

# MARSILII FICINI

FLORENTINI,  
INSIGNIS PHILOSOPHI  
PLATONICI, MEDICI, ATQVE  
THEOLOGI CLARISSIMI,


## OPERA,

Et quæ hætenus extitêre, & quæ in lucem nunc primùm prodîere omnia,  
omnium artium & scientiarum, maiorumque facultatum multifaria cogni-  
tione refertissima, in duos Tomos digesta, & ab innumeris mendis hæc  
postrema Editione castigata, quorum seriem versa pagella reperiēs.

VNA CVM GNOMOLOGIA,

*Hoc est, Sententiarum ex iisdem Operibus collectarum farragine copiosissima,  
in calce totius Voluminis adiecta.*

TOMVS PRIMVS.



PARISIIS,  
Apud GUILLELMVM PELE, viâ Iacobæa,  
sub signo Crucis Aureæ.

M. DC. XII

N O B I L I S S I M O , S I M V L A C

*Magnificentissimo in Christo Patri, ac Domino Reuerendissimo,  
Domino Guillelmo à Popet, Heteriarcho & Abbati in Burgundia  
superiori, Balma, Goyla & Balerna Monasteriorum, atque  
aliorum locorum Domino dignissimo, doctissimoque Patrono suo  
in primis colendo,*

ADAMVS HENRICVS PETRI S. P. D.



AT VR A sic omnes homines comparati sunt, vt memoriam sui nunquam abolitam velint: Hinc Monarchæ, Reges, & Principes sua palatia, & ædes sumptuosas, & pretiosissimis quibusq; rebus ornare, item templa & sepulchra magnifica extruere cõsueverunt: quale illud quoque quod in Halicarnasso oppido Artemisia Regina Mausolo marito suo ad eò magnificè extruxisse fertur, vt è septem mundi miraculis, ob ingentis operis admirationem habitum sit: quod sanè non ob aliud tentauit, quàm vt mariti sui memoriam, quem incomparabili amore prosequeretur, conseruaret. Idem fecisse Ægyptios quoque Reges legimus, qui ad sui memoriam in perpetuum posteris relinquendam, pyramides, labyrinthos & hortos pulcherrimos fabricauerunt, ac coluerunt: nec alia de causa veteres illi templa sua, vrbes item & arces, theatra quoque & amphitheatra ædificauere, quàm vt sempiternam sibi memoriam apud posteros compararent.

Horum tamen omnium conatus longè excedunt, Philosophorum & eruditorum hominum monumenta, quibus non tantum sibi nomen & famam, nunquam abolendam comparauere, sed simul etiam posteritatem plurimum adiuuerunt, quales apud Ethnicos quoq; non pauci fuere, inter quos primas merito tribuimus Principi illi Philosophorum Aristoteli, qui præter alias eius nunquam satis laudandas lucubrationes, primus etiam Ægypti Reges docuit libros in ordinem digerere, Alexandrinæq; Bibliothecæ author extitit, in qua allquot millia librorum collecta fuerunt: qui sanè tantus thesaurus regia opulentia dignissimum monumentum fuit. Cui equidem rei maiorum nostrorum quoque æuo Principes præsertim Ecclesiastici incubuere, ac etiam nunc hodie multo maximè incumbunt; id quod instructissimæ quædam eorum Bibliothecæ testantur, inter quas, præsertim in Germania, certe non postremo loco numeranda Fuldenfis illa Bibliotheca, qua vix vllam aliam vetustiore & locupletiore, maximè membraneis & manuscriptis codicibus, inuenire possis: quos digestos fuisse audio in quadraginta & octo classes, quæ omnis generis authores continent, quibus conscribendis & describendis annos plus minus Dcc. insumpsisse cœnobitas legimus. Non autem hæc tantum solertissimis quibusuis Typographis vartiorum exemplarium copiam facit, sed Italicarum etiam Bibliothecarum diuitiæ sunt longè maximæ, id quod tot præclari authores nostro tempore primum in lucem editi, ostendunt, quos sola nobis Italia communicauit: inter quos hic quoque noster Marsilius Ficinus, natione Italus, patria Florentinus, Ficini clarissimi Medici filius, Philosophus Platonius, Medicus, & Theologus, à tinearum & blattarum visceribus vindicatus. Cuius lucubrationes varias, quarum nunc quædam primum in hominum conspectum veniunt, felicissimè in duos Tomos distinctas, ac parentis mei sumptibus excusas, tuæ nunc cum omni promptitudine, Excellentiæ offero. Prior autem Tomus ea omnia continet, quæ vir ille non illustrando aliorum scripta, sed seorsim propria Thalia varij argumenti opuscula conscripsit. Quæ quidem hoc ordine non sine certo consilio digessimus, vt videlicet primum sibi locum vendicaret insigne illud volumen de Christiana Religione inscriptum, quo certe vix aliud pulchrius & vtilius, magisque homine Christiano dignum reperiri potest. Secundo loco posuimus Theologiam Platoniam de Immortalitate Animorum in qua quicquid iam antea ab antiquis Philosophis tractatum disputatumq; est, plenius completitur, veluti de essentia diuina, ideis, diuina prouidentia, anima mundi, intelligentiis, sphæ-



## Præfatio.

ris coelestibus, paradiso, quatuor elementis, purgatorio, limbo, inferno, materia, formæ, generibus causarum, casu & fortuna, fato, motu, infinito, loco, vacuo, tempore mundi æternitate, anima intellectiva, animabus brutorum & vegetalium, genii, dæmonibus, resurrectione, miraculis, in somniis, Prophetis, Religione, & aliis huius generis rebus: quarum sanè tractationem octodecim libris compediaria & succineta breuitate conclusit: ubi præter Platonica, maxima etiam mysteria, & quæque reconditissima explicantur, multa quoque arcana è sacris literis, & Christianorum tam veterum quàm recentiorum scriptis eruta elucidantur, eruditisque omnia familiaria redduntur. Tertium verò locum emeruit Comment. illud in Epistolam D. Pauli Apostoli ad Romanos nunquam hæcenus visum, in quo præcipua Christianæ totius religionis capita eruditissimè tractantur, veluti nominatim quidem de ascensu in tertium cælum, de Natiuitate Christi æterna & temporali, rationibus Trinitatis, qualiter diuinum Verbum assumpserit humanam naturam: præterea de mundo, de adoratione, cultu Dei spirituali, de variis sacrificiorum ritibus, virtute Evangelij, fide gemina, charitate, de differentia opinionis, scientia & fide. Item de cultu Gentilium, lege Mosaica, Gentilium impietate, & quomodo Deum diuinitus edocti cognouerint, quomodo inuisibilia Dei per visibilia cognoscantur: Amplius de trina penes Deum causa, de triplici cognitione diuina quasi cælo trino, quomodo impij de culpa in poenam, & ex poena in culpam prolabantur, de infidelium pertinacia, de diuino iudicio, de retributione operum, de poena æterna, de gradibus ad Patrem, de superba contentione contra Deum, & vindicta diuina, ac innumeris aliis quæ in singulis capitibus prænotantur. Quarto sequitur Sermonum liber elegantissimus simul & Christianissimus, quibus præter pia dogmata, etiam varia Euangelistarum loca explicantur: in iis etiam nihil à se promulgatum vult (quod & de omnibus aliis eius libris intelligendum) nisi quantum Christiana Religio, & Ecclesia Catholica ferre possit & consentiat. Quinto continentur in hoc primo Tomo, libri de Triplici Vita tres. Quorum primus de studiosorum sanitate pertractat, ex quo cognoscere est, quantum studiosos literarum amauerit, & commoda eorum quaesuerit, ob quod sanè beneficium, meritò magnas gratias agere ei studiosi simul iuuenes atque senes omnes debent, hinc enim edocti euadunt, quomodo possint vitam in literis versantes recte instituere. Secundus, de vita producenda, hoc est, quo remedio vitam extendere debeamus, vt longæua possimus frui prospera valetudine. Tertius, de vita coelitus comparanda: & hic liber plane experendus & legendus ab omnibus est, vnde instructi vitam coelestem in patria superna apud Sacrosanctam & indiuiduam Trinitatem, Patrem, Filium, & Spiritum sanctum aliquando acquiramus & illic, hac mole corporis deposita, vero gaudio fruamur. Hos sexto loco excipit Apologia, in qua agitur de re Medica, Astrologia, vita mundi de Magia, & Magis qui statim Christum Opt. Max salutarunt: in cuius fine etiam Epistola pulcherrima posita est, quod necessaria sit ad vitam, securitas atque tranquillitas animi: Subiicitur deinde huic Antidotus Epidimiarum, quam grauissimus anthor ille, sua vernacula lingua, hoc est Tuscana, adductus precibus & rogationibus amicorum quorundam conscripserat: tandem & Hieronymo Ricio Ticinensi. Latinitate donata: quam si T. E. cum animus à maioribus negotiis quietus fuerit, legere dignetur, erit vnà cum linguæ fecunditate, elegantia, & ornatu adiuncta voluptas, & commoditas quædam non vulgaris: Docet enim non solum mali *ἔνδιμνος* grassantis, præsentisque curationem, sed etiam quibus medelis seu medicamentis hæc lues à corporibus arceri possit, In septimum deinde locū reiecimus opus illud Epistolarum duodecim libris distinctum: quibus & alii de variis rebus differentes libelli & Dialogi, vt suo semper loco videre est, inseruntur. Octauum verò occupant locum libri illi duo, prior de Sole, alter de Lumine. Et priore de Sole quidem quamplurima scitu profectò dignissima & incunda, ostenduntur. Veluti, quæ eius natura, vis atque potentia, quomodo se ad alias omnes stellas & planetas habeat: quæ ei etiam cum Deo conditore omnium similitudo, & alia huius generis plurima: de Lumine verò ferè non pauciora, quemadmodum in capitum singulorum inscriptionibus legere licet.

Postremò, felicissimè clauditur prior ille Tomus libro de Voluptate, quem tamen primum omnium (vti fama est) in iuuentute sua, cum esset viginti quatuor annorum conscripsit: & hoc certè non vulgare ingeniosissimi doctissimique adolescentis specimen fuit, ex quo nobis planè intelligere est, quum iam multum in Philosophia versatum fuisse, plurimosque libros multorum Philosophorum omnium sectarum euoluissè & legisse: in eo enim Platoniorum, Pythagoricorum, Peripateticorum, Stoicorum, Scepticorum, Epicureorum, & aliarum ferè omnium sectarum sententiæ & opiniones iamdudum ab iisdem disputatæ referuntur. Verum hoc nostro sæculo paucissimos qui se Platonice Phi-

## Præfatio.

Philosophiæ dedant, & animum ad eam adiciant iuvenes, reperies, quod dolendum, cum nulla fermè sit Philosophia, quæ propius accedat ad diuinos Mosis libros, quam hæc, quorum nec ipse Plato ignarus fuit, quem in Aegyptum profectum ibidem eos cuoluiffe ferunt. Nantiens enim Pythagoricus, quem Origenes non solum Pythagoricis, verum etiam penè omnibus anteponit Philosophis, cum & Mosaicos & Platonicos legisset libros, aiebat se in Platone & Mosen agnouisse, nihilque aliud esse Platonem, quam Mosen, Arica lingua loquentem. In eius enim libris propè eadem, ac Mosis materia, veluti vnum rerum omnium principium esse Deum, mundum à Deo suæ bonitatis gratia procreatum: Deumque in principio coelum & terram, cum omni ornatu suo creauisse, & hæc omnia ad finem suæ voluntatis permanfura. Deum fecisse hominem sibi similem, terrenorum dominum, sui verò cultorem. Ex terra homines esse creatos, atque sub spirituum diuinorum custodia positos, legem à solo Dei quodam nuncio accepisse, ac demum post mundi cursum (Deo iubente) resurrecturos. In sola Dei fruitione nostram beatitudinem positam: Verbo Dei mundum esse dispositum, Deumque omnium rerum esse mensuram: denique omnibus prædici, siue descenderint in infernum, siue ascenderint in cælum, diuinum iudicem ubique reperiri. Deum rerum omnium ducem, causamque, Patrem & Filium esse, atque in eius amore summum bonum constitui, ipsius gratia omnia, eumque causam esse bonorum omnium; deinde beatos hoc ordine distingui Spiritus, ut alij potentiam Dei, velut efficientem causam, alij sapientiam ceu exemplar, alij bonitatem tanquam finem omnium, referant, & alia huius generis, quæ certè omnino consona sunt Mosaicæ doctrinæ. Hæc ergo sunt (Reuerende Pater) prioris huius Tomi volumina, in quibus profectò (quantum scire possum) nihil est penitus quod lectoribus displicere possit, omnia enim & cum sacra scriptura consentiunt, nec quicquam ab ea dissoni habent. Hos autem tanti Philosophi libros Tuæ Dignitati, cum ob multas & eximias illas tuas virtutes (Reuerendissime Antistes) inscribimus, tum etiam propter eruditionem tuam excellentem, linguarum sacrarumque scripturarum scientiam singularem, quæ valdè in te commendanda est, necnon ob summam illam tuam humanitatem, beneuolentiamque erga omnes, maxime autem eos qui eruditione, doctrina, morum probitate cæteris præstant, quos ad te vltro inuitas, venientes humaniter excipis, liberaliter tractas, honorificè à te dimittis, ad te frequentius redire cupis, & si quos animaduertas ad virtutem, & recta studia currentes, semper in oculis habes, eorumdemque studia pro virili foves, ornas, & tueris.

Porro hoc denique maximum est quod me commouit, & summum in te esse censeo, quod rectè iudicando perpendèdoque cognoueris, in quem maximè vsum Monasteria, Collegia, ædificata & instituta sint, nimirum ut essent sacrarum literarum, disciplinarumque, & artium aliarum Ecclesiæ Christi vtillum Scholæ, in quibus adolescentia & iuuentus à cæteris curis & cogitationibus vacantes, optimis tam moribus quam disciplinis instituantur. Hæc ego tam laudabilia in te non solum ex relatione præceptoris cum mei, tum nepotum tuorum nobilissimorum Peranorum, V. C. Gilberti Cognati Nozereni, vnde quaque doctissimi & tui studiosissimi percepi, sed ipse præsens Balmæ, Salinis & Lonsalinis in ædibus tuis diuersis temporibus perspexi & cognoui. At verò ne longiore oratione aures obtundam tuas, reliquum est, ut obnixè à T. E. petam, ut benignè humaniterque hoc munus suscipias, nec quod datur tanti æstimas, quanti exhibentis animum, id quoque ipsum quæso nunc, haud alio vultu suscipere digneris, quam qualia amicū exciperes, hocque sic fruaris, quo sit tibi mens sana in corpore sano: dignis enim es qui literatis quàm diutissimè viuas. Vale Abbatum Primarie. Basileæ Idibus Martij, anno à partu Virginis M. D. LXI.



# MARSILII FICINI

FLORENTINI, INSIGNIS PHILOSOPHI, MEDICI

atque Theologi clarissimi opera, quæ extant omnia: omnium artium

& scientiarum, maiorum quoq; facultatum cognitione

refertissima, in duos Tomos digesta.

*In Tomo primo hæc continentur*

1 De Religione Christiana, & fidei pietate liber	1.	23 Compendium Platonice Theologiæ	675
2 Theologia Platonica. De Immortalitate videlicet animorum, ac æterna felicitate Libri xviii.	75	24 Dialogus inter Paulum & Animam quod ad Deum non ascendatur sine Deo	677
3 In Epistolas Pauli Apostoli, Comment. & Accessus in tertium cœlum ad Paulum intelligendum	415	25 Exhortatio ad bellum contra barbaros	700
4 Prædicationes aut Conciones Marsilii	467	26 De officiis	721
5 De quinque panibus Luce	469	27 Oratio de laudibus Philosophiæ	733
6 De illo Pauli Apostoli ad Colossenses 3. Si confurrexistis cum Christo &c.	470	28 Oratio de laudibus Medicinæ	735
7 De duobus discipulis in Emaus	471	29 De Philosophia Platonica	737
8 De laboribus ac ærumnis dñi Pauli Apostoli	472	30 Vita Platonis diuini Philosophi	739
9 De passione Domini	476	31 Apologia de Moribus Platonis	745
10 De stella Magorum cuius ductu perueniunt ad regem Israelis iam natum	478	32 Disputatio contra iudicia Astrologorum	755
11 De Cantico Simeonis ac vera fidelium pace	480	33 De institutione Principis	770
12 De Creatione rerum	481	39 Oratio Christiani Gregis ad Pastorem Sixtum Pontificem	782
13 De Vita Libri tres, quorum primus de studiorum sanitate tuenda, secundus de vita producenda, tertius de vita cælitus comparanda tractat	482	35 Oraculum Alphonsi Regis ad Regem Ferdinandum, inter illos quidem primum Angelica lingua pronuntiatum, deinde verò in humanam à Marsilio translatum	789
14 Apologia, in qua de Medicina, Astrologia, vita mundi, atque præterea de Magis Christum saluantibus agitur	559	36 Orphica comparatio solis ad Deum atque declaratio idearum	797
15 Quod necessarium sit ad vitam securitas tranquillitasque animi	561	37 Philosophica principis institutio	802
16 Epidemiarum Antidotus, tutelam bonæ valetudinis continens	563	38 De Christianæ legis diuinitate	822
17 Epistolarum Lib. xxi.	592	39 De Platonicorum contemplationibus	823
18 Dialogus inter Deum & animam Theologicus	595	40 Oratio de Charitate habita in Collegio Canonorum Florentinorum ad populum	909
19 De diuino furore	598	41 De Adoratione diuinæ virtutis	942
20 De felicitate	644	42 Apologi de Voluptate	948
21 Oratio ad Deum Theologica	647	43 Excerpta ex Proclo in Rempub. Platonis	962
22 Quæstiones quinque de mente	656	44 Apologia in Librum suum de Sole & Lumine	973
		45 Oratio ad Carolum Magnum Gallorum Regem	984
		46 De Prouidentia, vaticiniis remediisque maiorum	985
		47 De Sole Lib. i.	989
		48 De Lumine Lib. i.	999
		49 De Voluptate Lib. i.	1011



# MARSILII FICINI FLORENTINI

LIBRI DE CHRISTIANA RELIGIONE, AD  
Laurentium Medicem patriæ seruatorem,

## P R O O E M I V M.

*Quod inter sapientiam religionemque maxima cognatio est.*



ET ERNA Dei sapientia statuit diuina mysteria, saltem in ipsis religionis exordiis, ab illis duntaxat tractari: qui veri essent veræ sapientiæ amatores. Quo fa-

ctum est, ut iidem apud priscos rerum causas indagarent, & sacrificia summæ ipsius rerum causæ diligenter administrarent, atque iidem apud omnes gentes Philosophi, & sacerdotes existerent. Neque id quidem iniuria. Nam cum animus (ut Platoni nostro placet) duabus tantum alis, id est intellectu, & voluntate possit ad cœlestem patrem, & patriam reuolare, ac Philosophus intellectu maximè, sacerdos voluntate nitatur, & intellectus voluntatem illuminet, voluntas intellectum accendat, consentaneum est qui primi diuina per intelligentiam vel ex se inuenerunt, vel diuinitus attigerunt, primos diuina per voluntatem rectissimè coluisse, rectumque eorum cultum rationemque colendi ad cæteros propagasse. Prophetæ igitur Hebræorum atque Essæi sapientiæ simul, & sacerdotio incumbabant. Philosophi à Persis, quia sacris præerant, magi, hoc est, sacerdotes, sunt appellati. Indi Brachmanas de rerum natura simul, atque animorum expiationibus consulebant. Apud Ægyptios Mathematici & Metaphysici sacerdotio funge-

bantur, & regno. Apud Æthiopas gymnosophistæ philosophiæ simul magistri erant ac Religionis antistites. Eadem in Græcia consuetudo fuit sub Lino, Orpheo, Musæo, Eumolpo, Melampo, Trophimo, Aglaophemo, atque Pythagora. Eadem in Gallia sub Druidum gubernaculis. Quantum apud Romanos Numæ Pompilio, Valerio Sorano, Marcō Varro multiisque aliis sapientiæ simul, sacrorumque studium fuerit, quis ignoret? Quanta denique & quam vera doctrina in priscis Christianorum episcopis, presbyterisque quis nesciat? O felicia secula, quæ diuinam hanc sapientiæ, religionisque copulam, præsertim apud Hebræos, Christianosque integram seruauistis. O secula tandem nimium infelicia, quando Palladis, Themidisque (id est, sapientiæ & honestatis) separatio & diuortium miserabile contigit. Proh nefas, sic datum est sanctum canibus lacerandum. Doctrina enim magna ex parte ad prophanos translata est, unde ut plurimum iniquitatis euasit & lasciuiæ instrumentum, ac malitia dicenda est potius quam scientia. Margaritæ autem religionis pretiosissimæ sæpe tractantur ab ignorantibus, atque ab his tanquam suis conculcantur. Sæpe enim iners ignorantum ignauorumque cura superstitio potius quam religio appellanda videtur. Ita neque illi sincerè veritatem intelligunt, quæ tanquam diuina solis piorum oculis illucescit, neque isti quantum in eis est, rectè vel Deum colunt, ut sacra gubernant, diuinarum



humanarumque rerum prorsus ignari. Quamdiu duram & miserabilem hanc ferrei sæculi sortem sustinebimus? O viri cœlestis patriæ ciues, incolæque terræ, libremus obsecro quâdoque philosophiam, sacrum Dei munus, ab impietate, si possumus, possumus autem, si volumus, religionem sanctam pro viribus ab execrabili inscitia redimamus. Hortor igitur omnes, atque precor, philosophos quidem, ut religionem vel capebant penitus, vel attingant: sacerdotes autem, ut legitime sapientiæ studiis diligenter incumbant. Ego quantum hac in re vel profecerim, vel profecturus sim, nescio, tentavi tamen, & tentare non desinam, non meo quidem ingeniolo, sed Dei clementiæ viribusque confisus. Auius tuus, magnanime Laurenti, magnus Cosmus, Petrus deinde pius genitor, me à teneris annis, quo philosophari possem, suis opibus aluerunt. Tu nuper volens philosophandi studium in me, quoad posses, sicut in aliis nonnullis consueuisti, cum pietatis officio copulare. Marfilium Ficinum tuum sacerdotio, & quidem honorificè, decorasti. Utinam nunquam mihi ipse defuerim aut desim, quandoquidem Dei ipsius, Medicumque fauor, & auxilium nunquam defuit. Ut autem diuinam mihi gratiam magis conciliarem, tibi que gratificarer, & mihi ipse non deessem, cum primum sacerdotij sacris initiatus sum, opus de Christiana religione composui, quod quidem tibi huius meæ professionis auctori, præcipuoque tum sapientiæ alumno, tum pietatis cultori censui dedicandum.

*Religio maximè homini propria est & veridica.*

## C A P V T I.

**S**ingulas generis humani dotes videmus in bestiis quibusdam saltem secundum quandam similitudinem excepta religione, aliquando apparere. Nullum bruta præ se ferunt religionis indicium, ut propria nobis sit mentis in Deum cœli regem erectio, sicut corporis in cœlum erectio propria, cultusque diuinus, ita fermè hominibus naturalis, quemadmodum equis hinnitus, canibusque larratus. At si quis curiosius affirmet, bestias insuper nonnullas interdum cœlestia venerari, quod ego minime credo, respondebunt Platonici: huiusmodi bestias, vel aliud quoduis tunc facere, cum cœlestia honorare videntur, vel si forte honorant, ta-

men nescire quid agant, vel si sciunt, illas quoque intelligentiæ, immortalitatisque participes esse. Sed re vera, ut ad propositum reuertamur, homo perfectissimū animal, ea proprietate maximè tum perfectione pollet, tum ab inferioribus discrepat, quia perfectissimus, id est, diuinis coniungitur. Rursus, si homo animalium mortaliū perfectissimus est, in quantū homo, ob eam præcipue dotē est omnium perfectissimus, quam inter hæc habet ipse propriam, cæteris animalibus non cōmunem, ea religio est, per religionē igitur est perfectissimus. Si religio esset inanis, per eam rursus homo omnium esset imperfectissimus, quoniam per eam dementissimus esset, atque miserrimus. Siquidem homines multi omnia, omnes certe multa vitæ cōmoda temporalis abiiciunt, & incommoda subeunt, Dei vel amore, vel metu. Nullum vero animalium reliquorum præsentibus abstinet bonis, propter Dei cultum, expectationemque futuri. Adde quod scientiæ stimulus nos solos pungit assidue, diuinæ vindictæ, inferorumque timor acerrimè vexat. Si ergo religio, (ut diximus) vana est, nullum est animal dementius & infelicius homine, esset igitur ob religionem homo imperfectissimus omnium, per eam tamen pauloante omnibus perfectior apparebat. Non potest autem per eandem sui partem ita contraria pati, ut secundum eam tum summè perfectus sit, tum summopere imperfectus. Est igitur religio vera, præsertim quia sicut non potest quicquam ignis propinquatione fieri frigidissimum, ita non potest homo, quia solus hæret Deo sapientissimo beatissimoque, stultissimus ex hoc, miserrimusque euadere. Neque etiam potest Deus, qui summa veritas & bonitas est, humanum genus prolem suam decipere. Naturalis autem communisque opinio de Deo inserta nobis est à Deo communi origine, ac principe naturarum. Præterea meminisse debemus vaticinium illud, quod à tota aliqua animalium specie fit, quia vniuersalis, particularisque naturæ fit instinctu, verum existere. Reptilia multa, oriente sole, è terræ sinu surrepunt, aëris caligo portenditur, cornicum plurima turba vespere à certa aëris plaga peruolat, venti prænunciantur, & alia eiusdem generis innumerabilia. Comuni quoque hominum vaticinio religio vera est, omnes namque semper vbique colunt Deum, vitæ futuræ gratia. Verum est igitur prouidere nobis Deum, & vitam aliam fore, si modo perfectissima species animalium

verissimum habet iudicium illud, quod sibi est maxime omnium naturale. Talem autem esse religionis assertionem apparet, non solum ex eo quod solius omnique hominis est, verum etiam ex eo quod omnes hominum opiniones, affectus, mores, leges, excepta communi quadam religione, mutantur. Siquis ergo reperiatur omnis religionis penitus expertus, quia præter humanæ speciei naturam est, vel monstrum quoddam est ab initio, vel contagione monstri alterius inquinatus.

*De diuinitate animi à religione.*

## CAPVT II.

**P**lato noster in Protagora, maximum esse vult nostræ diuinitatis iudicium, quod soli nos in terris tanquam fortis diuinæ participes ob cognationem quandam Deum recognoscimus, & cupimus, tanquam authorem inuocamus, & amamus vt patrem, vt regem veneramus, timemus vt Dominum. Sicut enim Sol sine Sole non cernitur, & sicut aer sine aëre non auditur, ac plenus lumine oculus videt lumen, plena aëre auris audit aërem resonantem, ita neque Deus sine Deo cognoscitur. Sed animus Deo plenus, tantum in Deum erigitur, quantum & diuino lumine illustratus agnoscit Deum, & diuino calore accensus sitit eundem. Non enim ad id quod supra est & infinitum, nisi virtute superioris, infinitique attollitur, hinc animus Dei templum efficitur, vt Xistus Pythagoricus arbitrat, Dei vero æterni templum nunquam existimat ruiturum. Deum agitât mens humana quotidie, Deo ardet cor, Deum suspirat pectus, eundem cantat lingua, eundem caput, manusque adorant, & genua, eundem referunt hominum artificia. Si non audit hæc Deus, est ignorans, si non exaudit, ingratus, crudelis omnino, si vociferari nos compellit quotidie, quos non exaudit. Deus autem, qui infinita sapientia, bonitas, claritas est, ignorans, vel ingratus, vel crudelis esse non potest. Omnino autem cum superior mens comprehendat inferiorem potius quàm e conuerso, si mens humana mentem diuinam attingit, necessarium est à diuina mente humanam comprehendere & gubernari.

*Caveant adolescentes, ne facile de religione sententiam ferant.*

## CAPVT III.

**E**t si homo natura in qualibet ætate, exceptis paucissimis, & illis quidem deprauatis, religiosus est, duæ tamen ætates, vt Plato scribit, religiosiores sunt, pueritia videlicet, & senectus. Nam pueri religiosi nascuntur, atque educantur, & in religione firmissimi permanent, quousque in adolescentia ratio excitetur, quæ sua natura singularum rerum causas rationesque requirit, si in hac ætate, aut ea studia capessant, aut in eos sermones incendant, quibus diligenter rerum causæ perquirantur, incipiunt quasi nihil velle asseuerare, nisi cuius ipsi rationem perspexerint. Tunc primum religionem magna ex parte post tergum abiiciunt, nisi forte legibus, seniorumque consilio se committant. Quia diuinorum occultissimæ rationes longo vix tandem tempore exquisitissima diligentia purgata mente perspiciuntur. Adolescentes illi rationes huiusmodi nondum attingunt, & quia nihil ferme asserunt, cuius non videant rationem, si proprio confidunt iudicio, religionem quodammodo negligunt. Nonnulli in hac opinione constituti propter superbiam incontinentiamque, Aristippicis voluptatibus sese dedunt, tandem nihil amplius de religione, nisi tanquam de anilibus fabulis cogitantes. Alij vero propter mansuetudinem & modestiam, Pythagoreo ritu mentem purgant à sensibus, per Morales, Physicas, Mathematicas, Methaphysicas disciplinas, ne tanquam superiores illi, lippos adhuc oculos in diuinum Solem subito dirigentes, caligari cogantur, sed gradatim progredientes. Primo lumen diuinum in moralibus tanquam solis lumen in terra prospiciant. Secundo physicis tanquam in aqua. Tercio in Mathematicis tanquam in Luna, Quarto in Methaphysicis tanquam in ipso Sole tam supercoelesti quam coelesti perspicue salubriterque perspiciant. Hos appellat Orpheus musarum legitimos sacerdotes, qui tandem in ætate maturiore de religione sentiunt multo melius, quemadmodum legimus apud Platonem in Epistola ad regem Dionysium in Phædro, in primo de republica in decimo legum. Monet autem iuuenes diuinus Plato, ne temerè de diuinis sententiam ferant, sed credant legibus, donec ætas ipsa doceat, vel per eos disciplinarum gradus, quos



narrauimus, vel per experientiam, vel per quandam animi à corpore separationem, quam moderata senectus adducit, vt anima in ea ætate res à corporibus separatas, quasi è proximo videns clarius discernat quàm consueuerit. Meminisse verò semper oportet, neque posse in iuuenibus secundum naturam sapientiam esse, neque quicquam vel in iudicando, vel in agendo periculosius esse, quam audacem ignorantiam, & audaciam ignorantem. Sapientia sine audacia prodest quidem, quamuis non satis magnificè, sed obest nunquam: audacia vero sine sapientia est fera quædam indomita, ac penitus effrenata. Quoniam vero de communi religionis veritate, prouidentia Dei, animorum diuinitate, in theologia nostra latissimè disputauimus, hæc de his ad præsens breuiter dicta sufficiant, nam ad Christianæ religionis mysterium properamus.

*Omnis religio boni habet nonnihil, modo ad Deum ipsum creatorem omnium dirigatur, Christiana sincera est.*

#### C A P V T I V.

**N**ihil Deo magis displicet quam contemni, nihil placet magis quàm adorari, homines diuinarum legumaliqua ex parte transgressores leuius punit, Rebellantes autem per ingratitudinem, malignitatemque & superbiam, ab eius imperio fulminat. Idcirco diuina prouidentia non permittit esse aliquo in tempore, vllam mundi regionem omnis prorsus religionis expertem, quamuis permittat variis locis atque temporibus, ritus adorationis varios obseruari. Forsitan vero varietas huiusmodi, ordinante Deo, decorem quendam parit in vniuerso mirabilem. Regi maximo magis curæ est re vera honorari, quam aut his aut illis gestibus honorari. Rex Alexander quot Gentibus imperabat, tot modis, cum vel ipse ad eas proficisceretur, vel legatos mitteret, honorabatur. Totumque id quod in eius agebatur gloriam, quodammodo commendabat, aliud tamen alio habebat acceptius. Idem quasi de mundi Rege est arbitrandum. Coli mauult quoquo modo, vel inepte, modo humane, quam per superbiam nullo modo coli. Incontinentes quidem homines, sed quodammodo subditos, vel corrigit tanquam pater, vel saltem minus affligit, impios autem ingratosque omnino, & sponte rebelles, tanquam hostis exterminat atque excruciat. Cum vero nullum humanum

cultum, eius gratia susceptum Deus sicut voluntariam impietatem penitus reprobet, quem tamen maximè omnium, imò solum approbat. Deus in se ipso summum est bonum, veritas rerum, lumen fauorque mentium. Illi igitur Deum præceteris, imò soli syncere colunt, qui cum actione, bonitate, veritate linguæ, mentis claritate, qua possunt, & charitate qua debent, sedulo venerantur. Tales vero sunt, vt ostendemus, quicunque ita Deum adorant, quemadmodum Christus vitæ magister, eiusque discipuli præceperunt.

*Discipuli Christi neminem deceperunt.*

#### C A P V T V.

**S**i discipuli Christi decipiendi humani generis gratia, figmentum introducere cogitauissent, rationem certe facilioris persuasionis aliquam habuissent. Contra vero fecerunt, aggressi enim sunt remtum ad credendum, tum ad obseruandum omnium rerum difficillimam. Adde quot modis etiam difficillimis, si tempora, loca, personasque consideres, in temporibus scilicet eruditis, in vrbibus amplissimis, plenisque omnium doctrinarum, aduersum potentes, principesque, & doctos & multos, cum ipsi debilissimi essent, omnium rerum egeni, rudes ab initio, & paucissimi. Vndecim enim Christus reliquit Apostolos, duo vero illi & septuaginta Christi discipuli ab Apostolis regebantur. Audire licet Paulum Corinthiis ita dicentem: Videte vocationem vestram fratres, quia non multi sapientes secundum carnem, non multi potentes, non multi nobiles, sed quæ stulta sunt mundi elegit Deus, vt confundat sapientes, & infirma mundi elegit Deus, vt confundat fortia, & ignobilia mundi, & contempnibilia elegit Deus, & ea quæ non sunt, vt ea quæ sunt, destrueret. Non igitur finxisse credendi sunt, præsertim quia summa inter se bonorum morum, opinionumque concordia, fortiter vsque ad finem in re maximè omnium ardua perseuerauerunt, alioquin nihil obtinuissent, neque præmium tanti laboris vllum in hac vita, vel ipsi præcipiebant, expectabantue, vel populis pollicebantur. Atque hoc est, quod inquit Paulus. Si in hac vita tantum speramus in Christo, miserabiliores sumus cunctis hominibus. Sæpe prædicebant se morituros pro fide, & postea vniuersos, qui eorum disciplinam securi essent, acerba, & nefanda passuros. Vt obmittam, quod abiiciebant quæcun-

que habetur à mortalibus bona, abiicique iubebant, neque in angulis susurrabant, sed palam vulgo suam doctrinam audacter disseminabant. Siquidem Paulus etiam catena collum vinctus publice prædicabat, vnde scribit ad Philipenses. Quæ circa me sunt, magis ad profectum venerant Euangelii, vt vincula mea manifesta fierent in Christo Iesu, in omni prætorio, & in cæteris omnibus. & alibi ait: Euangelium iam prædicatum fuisse omni creaturæ quæ sub cælo est. Rursus, in Act. Apost. Nihil horum in angulis gestum est. Sic enim Christus præcepit discipulis suis in Euangel. Matth. & Lucæ. Quod dico vobis in tenebris &c. Credebant igitur illi, se vera hominibus prædicare, imò certè quod prædicabant, intelligebant. Hinc illud Petri, Parati semper estote ad satisfactionem omni poscenti à vobis rationem, de ea, quæ in vobis est, spe & fide. Hinc illud Pauli ad Corinthios. Ego sic curro non quasi in incertum, sic pugno non quasi aërem verberans, sed castigo corpus meum, & in seruitutem redigo, ne forte cum aliis prædicauerim, ipse reprobus efficiar. Hinc Paulus & Apollo vtrique cum doctis de Christi mysteriis differentes, Prophetarum volumina in medium adducebant. Iubet sæpe Paulus discipulos suos, præcipuè sacerdotes, profundæ prophetarum intelligentiæ diligenter incumbere. Credebant igitur, intelligebantque, vt dixi, quod prædicabant. Alioquin pro disciplinæ illius assertionem nequaquam tam intrepidè, tam libenter se continuis laboribus, periculis, verberibus, & certæ morti supposuissent. Paulus pro Christi gloria annos septem atque triginta, supra quàm credi possit, vsque ad extremum Spiritum omni afflictionum genere continuò laborauit. Laborauit tempus idem & Petrus, laborauit Ioannes Euangelista annos octo & sexaginta, cæterique per omnem vitam similiter.

*Quo animo Christi discipuli laborabant.*

## C A P V T VI.

**Q**uo autem animo Christi discipuli laborarint, declarat Paulus in epistola ad Romanos. Quis, inquit, nos separabit à charitate Christi? tribulatio, an angustia, an persecutio, an fames, an nuditas, an periculum, an gladius? sicut scriptum est: Quia propter te mortificamur tota die, estimati sumus sicut oues occisionis. Certus sum enim quod neque

mors, neque vita, neque Angeli, neque principatus, neque potestates, neque virtutes, neque instantia, neque futura, neque fortitudo, neque altitudo, neque profundum, neque alia creatura poterit nos separare à charitate Dei, quæ est in Christo Iesu Domino nostro. Idem postquam Corinthiis enumerauit multa laborum, tormentorumque genera, quæ & tulerat, & ferebat, subiunxit, in his se lætari, gloriari, corroborari. Idem scribit dum Romæ vinctus esset ad Philipenses: In nullo confundar, sed cum omni fiducia, sicut semper, & nunc exaltabitur Christus in corpore meo, siue per vitam siue per mortem, mihi enim viuere Christus est, & mori lucrum. Quod si viuere in carne hic mihi fructus operis est, quid eligam ignoro, coarctor autè è duobus. Desidero enim dissolui, & esse cum Christo, atque hoc quidem mihi multo melius, permanere autem in carne propter vos, necessarium est. Subiungit diuinans in hunc modum. Et hoc confidens scio, quia manebo, & permanebo omnibus vobis ad profectum vestrum, & gaudium fidei, vt gratulatio vestra abundet in Christo Iesu in me, per meum aduentum iterum ad vos. Et paulo post: Vobis donatum est pro Christo, non solum vt in eum credatis, sed vt etiam pro illo patiamini, idem certamen habentes, quale & vidistis in me, & nunc audistis de me. Liberatus autem est, vt prædixit, à vinculis, rediitque ad illos. Idem ad Colossenses. Permanete in fide fundati, & stabiles, & immobiles à spe Euangelii, quod audistis, quod prædicatum est in vniuersa creatura, quæ sub cælo est, cuius factus sum ego Paulus minister, qui nunc gaudeo in passionibus pro vobis, & adimpleo ea quæ defunt passionum Christi in carne mea, pro corpore eius, quod est Ecclesia. Idem ad Thessalonicenses. Nemo moueatur in tribulationibus istis, ipsi scitis, quod in hoc positi sumus. Nam cum essemus apud vos, prædicebamus vobis passuros nostras tribulationes, sicut & factum est, & scitis. Idem ad Timotheum: Non dedit nobis Deus Spiritum timoris, sed virtutis, & dilectionis, & sobrietatis. Noli itaque erubescere testimonium Domini nostri, neque me vinctum eius, sed collabora in Euangelio secundum virtutem Dei. Et paulo post: Ob Euangelium hæc patior, sed non confundor. Scio enim cui credidi, & certus sum, quia potens est depositum meum seruare in illū diem. Itè post pauca: In Euangelij prædicatione laboro vsque



ad vincula, quasi male operans, sed verbum Dei non est alligatum, ideo omnia sustineo propter electos, ut ipsi salutem consequantur, quæ est in Christo Iesu, cum cœlesti gloria. Fidelis sermo. Nam si commortui sumus, & conuiuemus, si sustinebimus, & correpnabimus, si negauerimus, & ille negabit nos. Si verò non credimus, ille fidelis permanet, negare seipsum non potest. Item, Scis quales persecutiones & passiones sustinui Antiochiæ, Iconiæ, Lystris, & ex omnibus eripuit me Dominus. Et omnes qui pie volunt vivere in Christo Iesu, persecutionem patiuntur. Similiter Corinthiis: Semper mortificationem Iesu in corpore nostro circumferimus, ut & vita Iesu in corporibus manifestetur. Semper enim nos qui viuimus, in mortem tradimur propter Iesum, ut & vita Iesu manifestetur in carne nostra mortali. Vnde Galatis: Ego stigmata Domini Iesu in corpore meo porto Rursus Corinthiis: Puto quod nos Apostolos nouissimos Deus ostendit tanquam morti destinatos, quia spectaculum facti sumus huic mundo, & Angelis, & hominibus. Et post pauca. Usque in hanc horam esurimus, & sitimus, & nudifumus, & colaphis cœdimur, & instabiles sumus, & laboramus operantes manibus nostris, scilicet comparandi victus gratia, nunquam enim voluit alieno labore vivere. Et sequitur. Maledicimur, & benedicimus, persecutionem patimur, & sustinemus, blasphemamur, & obsecramus, tanquam purgamenta huius mundi facti sumus, omnium peripsēma, id est, rudera, atque sordes. Idem Romanis: Gloria-mur in tribulationibus, scientes quòd tribulatio patientiam gignit, patientia probationem, probatio vero spem, spes autē non confundit, quia charitas Dei diffusa est in cordibus nostris per Spiritum sanctum, qui datus est nobis. Similiter Galatis. Absit ut gloriemur in alio, nisi in cruce Domini nostri Iesu Christi per quem mihi mundus crucifixus est, & ego mundo. Item, Cum Christo affixus sum cruci, uiuio autem iam non ego, uiuit verò in me Christus. Sed audi rursus quid Romanis dicat. Non accepistis spiritum seruitutis iterum in timore, sed accepistis spiritum adoptionis filiorum, in quo clamamus abba pater. Ipse enim spiritus testimonium reddit spiritui nostro, quod sumus filij Dei. Si autē filij, & heredes heredes quidē Dei, cohæredes autem Christi, si tamen compartimur, ut & conglorificemur. Existimo enim quod non sunt condignæ pas-

siones huius temporis ad futuram gloriā, quæ in nobis reuelabitur. Nam expectatio creaturæ reuelationem filiorum Dei expectat. Idem Corinthiis. Si mortui non resurgunt, cur nos periclitamur omni hora? Quotidie morior, propter vestram gloriam, fratres, quam habeo in Christo Iesu Domino nostro. Quod secundum hominem ad bestias pugnaui Ephesi, quid mihi prodest, si mortui non resurgunt? Rursus: Tribulamur fratres pro vestra exhortatione, & salute, quæ operatur in nobis tolerantiam earundem passionum, quas & nos patimur, ut spes nostra firma sit pro vobis, scientes quod sicut socii passionum estis, sic eritis & consolationis. Non enim volumus ignorare vos fratres de tribulatione nostra, quæ facta est nobis in Asia, quoniam supra modum grauati sumus. Item: superabundo gaudio in omni tribulatione nostra. Nam & cum venissemus in Macedoniam, nullam requiem habuit caro nostra, sed omnem tribulationem passi sumus. Vnde Ephesi ait: Ego Paulus vinc-tus Christi Iesu pro vobis Gentibus, obsecro ne deficiatis in tribulationibus meis pro vobis, quæ gloria vestra, denique ait se pro Christo legatione fungi catena. Philippensibus ait, se omnia, quamuis maxima, nihili pendere, & ut stercore existimare, ut Christum lucretur, sociusque sit passionis eius, configuratus morti eius, ad eius resurrectionem promerendam. Item, conuersatio nostra in coelis est. Vnde etiam Saluatorem expectamus Dominum nostrum Iesum Christum, qui reformabit corpus humilitatis nostræ, configuratum corpori claritatis suæ, secundum operationem suam, qua possit etiam subicere sibi omnia. Itaque fratres mei charissimi, & desideratissimi, gaudium meum, & corona mea, sic stete in Domino charissimi. Thessalonicensibus autem: Vos quoque imitatores nostri facti estis & Domini, excipientes verbum in tribulatione multa cum gaudio Spiritus sancti. Scitis fratres introitum nostrum ad vos in anem non fuisse, sed ante passos, contumeliis que affectos, sicut nostis in Philippis, magna cum fiducia & sollicitudine in Domino vobis Euangelium prædicasse. Facti estis imitatores Ecclesiarum Dei, quæ sunt in Iudæa, in Christo Iesu, eadem enim passi estis & vos à contribulibus vestris, quæ & ipsi à Iudæis. Consolati sumus in vobis fratres in omni tribulatione, & necessitate nostra, per vestram fidem, quoniam nunc viuimus, si vos statis in Domino.

Hebræos præterea ita cohortatur. Rememoramini pristinos dies, in quibus illuminati magnum certamen sustinuisstis passionum, & in altero quidem opprobriis, & tribulationibus spectaculum facti, in altero autem socij taliter conuersantium effecti. Nam & vincti compassi estis, & rapinam bonorum vestrorum cum gaudio suscepistis, cognoscentes vos meliorem habere, & manentem substantiam in cœlis. Nolite itaque amittere fiduciam vestram, quæ magnam habet remunerationem. Item, habentes igitur Pontificem magnum qui penetrauit cœlos, Iesum filium Dei, teneamus spei nostræ confessionem. Item, & nos tantam habentes impositam nubem testium, deponentes omne pondus & circundans nos peccatum, per patientiam curramus propositum nobis certamen, aspicientes in authorem fidei, & consummatorem Iesum, qui proposito sibi gaudio sustinuit crucē, confusione contempta, atque in dextera sedis Dei sedet. Sed nescio quo spiritu ad illa quæ ad Corinthios scribit redire cōpellor. Ego in laboribus plurimis, in carceribus abundantius, in plagis supra modum, in mortibus frequenter, à Iudæis quinquies quadragenas vna minus accepi, ter virgis cæsus sum, semel lapidatus sum, ter naufragium feci, nocte & die in profundo maris fui, in itineribus sæpe periculis fluminum, periculis latronum, periculis ex genere, periculis in ciuitate, periculis in solitudine, periculis in mari, periculis in falsis fratribus, in labore & in ærumna, in vigiliis multis, in fame & siti, in ieiuniis multis, in frigore & nuditate, præter illa quæ extrinsecus sunt, instatia mea quotidiana, sollicitudo omnium Ecclesiarum. Quis infirmatur & ego non infirmor? quis scandalizatur & ego non vror? Si gloriari oportet, quæ infirmitatis meæ sunt, gloriabor, Deus & pater Domini nostri scit, qui est benedictus in secula, quod non mentior, Damasci Præpositus Gentis Arethæ regis custodiebat ciuitatē Damascenorum, vt me comprehenderet, & per fenestram in sporta demissus sum per murum, & sic effugi manus eius. Laudat quin etiā Corint. quod sustineant, si quis in seruitutē redigit, si quis deuorat, si quis extollitur, si quis in faciē cædit. Quod autem ipse non pro sua, sed pro sola Christi gloria contenderet, sic aperit. Inter vos alius dicit, ego quidem sum Pauli, alius ego ipsius Apollo, nonne homines estis quid enim est Apollo? quid vero Paulus? ministri eius, cui credidistis, & vnicuique

sicut Dominus dedit. Ego plantavi, Apollo rigauit, sed Deus incrementum dedit, itaque neque qui plantat est aliquid, neque qui rigat, sed qui incrementum dat Deus. Qui autem plantat & qui rigat vnum sunt. Nemo igitur in hominibus gloriatur. Omnia enim vestra sunt, siue Paulus, siue Apollo, siue Cephas, siue mundus, siue vita, siue mors, siue præsentia, siue futura, omnia vestra sunt, vos autem Christi, Christus autem Dei. Sed audi & illud Charitas non quærit quæ sua sunt, omnia suffert, omnia credit, omnia sperat, omnia sustinet, charitas nunquam excidit. Huic simile illud Canonice Ioannis: Timor non est in charitate, sed perfecta charitas foras timorem mittit. Concludamus iam verba Pauli cum Epistola ad Timotheum. In hoc laboramus & maledicimur, quia speramus in Deum viuū. Fidelis sermo, & omni acceptione dignus, quia Christus Iesus venit in hunc mundum, vt peccatores saluos faceret, quorum primus ego sum. Sed ideo misericordiam consecutus sum, vt in me primo ostenderet Christus Iesus omnem patientiam ad instructionem eorum qui credituri sunt illi in vitam æternam. Regi seculorum, immortalis, inuisibilis, soli Deo, honor & gloria in secula sæculorum. Hæc Paulus Apostolus. Ioannes quoque Apostolus in Apocalypsi se testem & participem passionum Christi appellat, & quosdam populos ad patientiam cohortatur. Multos de patientia valde commendat in Epistolis, similiter & alii Apostoli atque Euangelistæ. Scribit denique Lucas Euangelista, quod Apostoli à Iudæis cæsi, exultantes incedebant, qui digni habiti essent, qui pro Christi nomine iniurias paterentur. Insuper quod constituerunt nihil inter se suosque proprium possideri, & administrationem bonorum ab Apostolis alienam esse voluerunt. Addit, eum Cornelius quidam adorare Petrum voluisset, à Petro increpitum, prohibitumque fuisse. Præterea cum Lycaonienses propter miracula Paulo & Barnabæ tanquam diis immolare vellent, ab ipsis non fuisse permisos. Ioannes quoque in Apocalypsi se adorari prohibuit. Ex quo patet Apostolos non suum commodum, vel honorem, sed solam Christi gloriam quæsiuisse. Siquis igitur finxisse Apostolos suspicatur, is aut hæc, & similia nunquam legit, aut delirat.



*Discipuli Christi à nemine fuerunt decepti.*

## C A P V T VII.

**D**iscipuli Christi, eorumque sectatores longè manifestiora maioraque miracula viderunt quàm nos, qui quamuis in hac religione nati, educatique simus, tamen non tantum pro re nobis consueta laboraremus, quantum illi pro noua, & quasi, vt ita loquar, monstruosa laborauerunt, quæ quanto monstruosior appareret, tanto clarioribus signis, portentisque ab initio, vt crederetur, indiguit. Nam quis facile credat, adolescentem quendam illiteratum, fabri, (vt putabatur), filium, mendicum, infami supplicio publicè interemptum, esse diuinam ipsam mētem, quæ semper in Deo est, per quam cuncta fiunt semper atque reguntur. Quod de nullo vnquam alio creditum est, vnde vt Lucas Euangelista scribit, cum Paulus Apostolus hac de re coram Agrippa rege, ac Portio Festo Iudææ præfide disputaret, Festum exclamasse, insanis ô Paule, multæ literæ te insanire compellunt. Huic tendit etiam illud Tertulliani ad Romanos iudices. Hæc & nos risimus aliquando, de vestris sumus, fiunt, non nascuntur Christiani. Putandum est igitur illos qui hæc asserebant, & qui fidem assueuerantibus adhibebant, miracula palàm Deo digna vidisse. Hinc Paulus ad Corinthios: Iudæi signa petunt, Græci sapientiam quærunt, nos autem prædicamus Christum crucifixum, Iudæis quidem scandalum, Gentibus autem stultitiam, ipsis autem conuersis Iudæis atque Græcis Christum, Dei virtutem, & Dei sapientiam. Quia quod stultum est Dei, sapientius est hominibus, & quod infirmum est Dei, fortius est hominibus. Solis miraculis, & illis quidem manifestissimis adduci potuit Paulus, vir nobilis, potens, sapientissimus, atque fortissimus, vt ex acerrimo Christianorum hoste, repente acerrimus defensor euaderet totque incommodis se sponte subiiceret ob solum Christi amorem, quot nemo queat enumerare. Verè enim apud Lucam Deus prædixit, Vas electionis est mihi iste, vt portet nomen meum coram Gentibus, & regibus, & filiis Israël. Ego enim ostendam illi quanta oporteat pati pro nomine meo. Nullo igitur pacto credendum est, Christi præcones alicuius præstigiis fuisse deceptos. Scripta enim & gesta tam discipulorum Christi, quàm eorum qui eo tempore subito, & maximo cum pericu-

lo, disciplinam huiusmodi receperunt, testantur apud viros sanctæ mentis, primitias Christianorum fuisse tales, vt neque voluerint decipere, neque decipi villo modo potuerint. Quid causæ fuit, vt multi tam Iudæi quàm Gentiles, in quamlibet disciplinam eruditissimi, multique diuites, dimissis rebus oblectamentisque suis mallent cum rusticis illis mendicisque Christi discipulis crudeliter mori, quam cum mundi delitiis vinere? Audiamus diuinum illum virum Tertullianum Carthaginensem in Apologia ad Romanos iudices ita clamantem: Sed hoc agite boni præfides, cruciate, torquete, dampnate, atterite nos, probatio est enim innocentie nostræ iniquitas vestra. Ideo nos hæc pati Deus patitur. Nam & proximè ad leonem damnando Christianam, potius quam ad leonem, confessi estis, labem pudicitie apud nos atrocior omni morte reputari. Nec quicquam tamen proficit exquisita crudelitas vestra, illecebra est magis sectæ, plures efficimur quotiens metimur à vobis, semen est sanguis Christianorum, omnia impleuimus. Ac si non apud istam disciplinam magis occidi liceret, quam occidere, potuimus inermes, nec rebelles, sed tantummodo discordes, solius diuortij inuidia aduersus vos dimicasse. Si enim tanta vis hominum in aliquem orbis remotissimum locum abrupisset à vobis, suffudisset vtique dominationem vestram tota missio ciuium, imò etiam & ipsa destitutione punisset, proculdubio expauissetis ad solitudinem vestram, ad silentium rerum, & ob stuporem quendam quasi mortuæ vrbs quæfissetis, quibus imperaretis, nam penè omnes ciues Christianos habetis. Origenes quoque in quarto Periarcho libro inquit, innumerabiles in singulis mundi regionibus homines relictis patriis legibus, Christianam legem subito suscepisse, omniaque tormentorum genera, & mortem in eius gloriam libentissime & quotidie ferre. Iam verò si numerare vellem milia virorum in qualibet doctrina, Philosophia, præsertim excellentium, qui Christi discipulorum discipuli, successoresque fuerunt, & longo ordine vsque ad Iuliani Imperatoris tempora, inter gladios igneque Christum, sanctimoniam, voce, literis, diuturno labore, periculo, morte defenderunt. Opus cogeret haud breue componere, vt de mille millibus Oratorum Philosophorumque taceam, qui apud Græcos, Barbaros, & Latinos post Iulianum totam vitam sanctissimè in Christia-

no opere consumpserunt.

*Christiana religio in sola Dei virtute  
fundata est.*

## C A P V T VIII.

**S**I Christiana religio haudquaquam fundata fuit in potentia, vel sapientia humana, vel voluptate, imò vero inuitis & contra nitentibus passim multis potentibus, doctisque viris, & humanis oblectamentis, tam subito exorta est, tam repente per vniuersum obem propagata. Vnde ad Romanos scribit Paulus: fidem eorum in vniuerso mundo annunciari, & ad Coloss. Euangelium in vniuerso mundo esse. Ioannes quoque: Quod natum est ex Deo vincit mundum, hæc est victoria, quæ vincit mundum, fides nostra. Necessarium est hanc ipsam religionem in potestate, sapientia, speque diuina fuisse fundatam. Quid quod multis ante seculis longo ordine à plurimis Prophetis atque Sibyllis, singula hæc prædicta fuerunt? quod in sequentibus ostendemus. Quid quod Christus vitæ magister, mortem suam, persecutionem aduersum discipulos suos vbique futuram, propagationem, immutabilitatemque religionis suæ, miserabilem Iudæorum ruinam breui vëturam, Gentilium conuersionem, Iudæorum quorundam pertinaciam, vsque ad mundi finem duraturam, tum ipse prædixit, tum discipulos suos inspirauit vt dicerent? Atque id, quod mirabile est, Christus osbditionem in Sabbato futuram, & exitium fame, ferroque à Gentilibus inferendum, atque stragem inauditam, captiuitatem præterea Iudæorum in omnes Gentes, non aliter ante præscripsit, quàm Iosephus scripserit post ruinam. Præterea operæ precium est audire, qua concione vsus est & Iesus, & quisque discipulorum suorum ad auditores persuadendos. Date vestra omnia pauperibus, charissimos vestros respuite, porrigite genas percutienti, benefacite inimicis, vitam hanc omniaque eius oblectamenta pro nihilo habetote, abnegate vosmetipsos, crucem hanc nostram, crucem terribilem sustinete, sequamini nos quam primum precamur. Si enim nos sequemini, proculdubio quæcunque à mortalibus mala existimantur, per omnem vitam subibitis. Hæc illi. Osuationem dissuasionis omnis vndique plenam. An putamus Demosthenem, Ciceronemque hanc ratione quicquam persuadere cuiquam potuisse? Per-

suasit tamen concio illa, imo concionator subito multis, magnisque viris. At vnde: A Deo factum est illud omni miraculo mirabilius, siquidē, vt testantur qui audierunt, loquebatur Iesus non sicut Scribæ & Pharisei, sed tanquam potestatem habens. Persuasum autem illis vsque adeo fuit, vt Christi sectatores, ipsum plussquam humanæ naturæ secundum se possibile est, semper amauerint, quod quidem nullo modo negabit, qui vacua mente illorum opera, & scripta considerauit, totum verò illud est diuinum. Si quis est qui dubitat, legat, & relegat diligenter Prophetarum, Euangelistarum, Apostolorumque libros, legat & eorum, qui illos eo tempore securi sunt, commentaria. Veritas huius rei protinus elucebit, in illis enim noua vis est, singularis quoque simplicitas, sobrietasque & ardor, grauitas, profunditas, & maiestas. Quod quidem indicat neque diuinam ab illis vim, flammamque abesse, neque veritatem ipsam verborum fuco, neque vim diuinam humanis machinis indigere. Adde, quod in tot veteris, nouique testamenti voluminibus, nihil vsque nisi consonum reperitur, quod cæteris non est concessum, maximumque est diuinæ veritatis indicium. Habent scriptores illi nescio quid pium & augustum, atque id, quod mirabile est, inter se quidem commune, à cæteris omnibus penitus alienum, quod significat omnibus illis Deum præ cæteris aspirasse. Quid dicemus ad hoc? quod cum cæteri omnes scriptores ambigant, & vacillent, illi tamen nihil vsque dubitant, sed tanta, prohi Deus omnipotens! certitudine loquuntur, quanta fortitudine durissima quæque peregerunt. Audi piscatorem illum Ioannem Euangelistam. Quod fuit ab initio, quod audiuius, quod vidimus oculis nostris, quod inspeximus, & manus nostræ contrectauerunt de verbo vitæ, & vita ipsa innotuit, & vidimus, & testamur, & annunciamus vobis vitam æternam, quæ erat apud patrem, & apparuit nobis. Quod vidimus, & audiuius, annunciamus vobis, vt & vos societatem habeatis nobiscum, & societas nostra sit cum Patre & Filio eius Iesu Christo. Ecce hæc scribimus vobis, vt gaudeatis, & gaudium vestrum sit plenum, & hæc est annuntiatio quam audiuius ab eo, & annunciamus vobis, quod Deus lux est, & tenebræ in eo non sunt vllæ. Rursus in iis considera, quanta affirmatione loquatur: Deus testificatus est de filio suo, & hoc est testimonium, quod vitam æternam dedit



nobis Deus, & hæc vita in filio eius est, qui habet filium, habet vitam, qui non habet filium Dei, non habet vitam. Hæc scribo vobis, vt sciatis quod vitam habetis æternā, qui creditis in nomine Filij Dei, & hæc est fiducia quā habemus ad Deum, quoniam quodcunque petierimus secundum voluntatem eius, audit nos, & scimus quod audit nos, quicquid petierimus, scimus quod habemus petitiones quas postulamus ab eo, scimus quod qui natus est ex Deo, non peccat, sed generatio Dei conseruat eum, & malignus non tangit eum. Scimus quod ex Deo sumus, & mundus totus in maligno positus est, & scimus quod Filius Dei venit, & dedit nobis sensum vt cognoscamus verū Deum, & simus in vero filio eius. Hic est verus Deus & vita æterna. Item, Tres sunt qui testimonium dant in cœlo, Pater, Verbum & Spiritus, & ij tres vnum sunt, & tres sunt qui testimonium dant in terra, spiritus, aqua, & sanguis. Si testimonium hominum accipimus, testimonium Dei maius est. Nolite mirari fratres, si odit vos mundus, nos scimus quod translati sumus de morte ad vitam. Rursus, in hoc cognoscimus, quod in Deo manemus, & ipse in nobis, quoniam de spiritu suo dedit nobis, & nos videmus & testificamur, quod pater misit filium suum, saluatorem mundi, & nos cognouimus, & credidimus veritati, quam habet Deus in nobis. Item alibi, Qui vidit, testimonium perhibuit, & verum est testimonium eius, & ille scit, quia vera dicit. Item, Hic est discipulus qui testimonium perhibet de his, & scripsit hæc, & scimus testimonium eius verum esse. Sed vide insuper quanta asseueratione proclamet: In principio erat verbum, & verbum erat apud Deum, & Deus erat verbum, hoc erat in principio apud Deum, omnia per ipsum facta sunt, & sine ipso factum est nihil, quod factum est, in ipso vita erat, & vita erat lux hominum, lux in tenebris lucet, & tenebræ eam non comprehenderunt. Rursus alibi: Nunc clarificatus est filius hominis, & Deus clarificatus est in eo, si Deus clarificatus est in eo, & Deus clarificabit eum in semetipso, & continuo clarificabit eum. Nescio quis possit simplicius quicquam pronuntiare simul & efficacius affirmare. Concludemus verba Ioannis cum hac eius indubitata sententia: Ego vos in veritate diligo, & non ego solus, sed omnes qui cognouerūt veritatē propter veritatem, quæ permanet in nobis, & nobiscum erit in æternū. Iacobus duode-

cim tribubus dispersis ita loquitur: Omne gaudium existimate fratres mei, cum in tentationes varias incideritis, scientes quod probatio fidei vestræ patiētiā gignit, patientiæ autē opus perfectū habet, vt sitis perfecti & integri in nullo deficientes. Si quis autē vestrum indiget sapientia, postulet à Deo, qui dat omnibus affluenter, & non improperat, & dabitur ei, postulet autem in fide nihil hæsitās. Et paulo post. Omne datum optimū, & omne donum perfectum de sursum est, descendens à patre luminum, apud quem non est transmutatio, nec vicissitudinis obumbratio. Voluntariē enim genuit nos verbo veritatis, vt simus initium aliquod creaturæ eius. Audiamus & Petri fiduciam: Vos genus electum, regale sacerdotium, gens sancta, populus acquisitionis, vt virtutes annuncietis eius, qui de tenebris vos vocauit in admirabile lumen suum. Nolite trepidare, sed cōmunicantes Christi passionibus gaudete, vt in reuelatione eius gloriæ gaudeatis exultantes. Si exprobramini in nomine Iesu Christi, beati estis, quoniam quod est honoris, gloriæ, & virtutis Dei, & qui est eius Spiritus super vos requiescit. Seniores ergo qui in vobis sunt, obsecro consenior, & testis Christi passionum, qui & eius quæ est in futuro reuelanda, gloriæ communicator, pascite qui in vobis est gregem Dei, prouidentes non coacte, sed spontaneē, secundum Deum. Deus autem omnis gratiæ, qui vocauit nos in æternam suam gloriā, in Christo Iesu, modicum passos, ipse perficiet, confirmabit, consolidabitque, ipsi gloria & imperium in sæcula sæculorum Amen. Idem alibi: Non enim indoctas fabulas secuti, notam facimus vobis Dei nostri Iesu Christi virtutem, & præscientiam, sed magnitudinis illius speculatores effecti. Cōsiderare præterea decet spem, charitatem, firmitatemque Pauli, habentes talem spem multa fiducia vtimur. Dominus quidem spiritus est, vbi autem Spiritus Domini, ibi libertas. Nos verē omnes reuelata facie gloriam Domini speculantes, in eandem imaginem transformamur à claritate in claritatem, tanquam à Domini spiritu. Ideoque habentes hanc administrationem, iuxta quod misericordiam consecuti sumus, non deficimus, sed abdicamus occulta dedecoris, non ambulantes in astutia, neque adulterantes verbum Dei, sed in manifestatione veritatis cōmendantes nosmetipsos ad omnem conscientiam hominum coram Deo. Quod si etiam opertum est Euangelium nostrum

in iis qui pereunt est opertum, in quibus Deus huius seculi excæcavit mentes infidelium, ut non fulgeat eis illuminatio Euangelij gloriæ Christi, qui est imago Dei. Non enim nosmetipsos prædicauimus, sed Iesum Christum Dominum nostrum, nos autem seruos per Iesum. Quoniam Deus, qui dixit de tenebris lumen splendescere, illuxit in cordibus nostris, ad illuminationem scientiæ claritatis Dei, in faciem Christi Iesu Habemus autem Thesaurum istum in vasis fictilibus, ut sublimitas sit virtutis Dei, & non ex nobis. In omnibus tribulationem patimur, sed non angustiamur, attenuamur, sed non destituimur, persecutionem patimur, sed non derelinquimur, deicimur, sed non perimus. Et paulo post. Scimus enim, quod qui suscitauit Iesum, & nos suscitabit cum Iesu, propter quod non deficimus. Sed licet is qui foris est, noster homo corrumpatur, tamen is qui intus est, renouatur de die in diem. Id enim quod in præsentis est momentaneum & leue tribulationis nostræ, supra modum in sublimitate æternæ gloriæ pōdus operatur in nobis. Non contēplantibus nobis quæ videntur, sed quæ non videntur, quæ enim vidētur temporalia sunt, quæ autem non videntur, æterna sunt. Scimus enim quod si terrestris domus nostra huius habitationis, dissoluatur, ædificationē ex Deo habemus, domum non manu factam, sed æternam in coelis. Hæc ad Corinthios. Timotheum verò sic admonuit: Vigila, in omnibus, & labora, opus fac Euangelistæ, ministerium tuum imple, sobrius esto, ego enim iam immolor, & tempus meæ resolutionis instat. Bonum certamen certavi, cursum consummaui, fidem seruaui, in posterum reposita est mihi corona iustitiæ, quam reddet mihi Dominus in illa die iustus iudex, non solum autem mihi, sed omnibus qui diligunt eius aduentum. In his verbis vaticinatus est præsens sibi imminere martyrium, quod breui securum est. Non possum me continere quin his adiiciam, quam certa asseueratione, quantaque maiestate in epistola ad Hebræos æternam filij Dei generationem, vimque cecinerit. Multifariam multisque modis olim Deus loquens patribus in Prophetis, nouissimè diebus istis loquutus est nobis in filio, quem constituit hæredem vniuersorum, per quem fecit & sæcula. Qui cum sit splendor gloriæ, & figura substantiæ eius, portansque omnia verbo virtutis suæ, purgationem peccatorum faciens, sedet ad dexteram ma-

iestatis in excelsis, tanto melior Angelis effectus, quanto differentius præ illis nomen hæreditauit, & quæ sequuntur. De eodem filio Dei in sequentibus dicit. Viuum est enim verbum Dei, & efficax, & penetrabilius omni gladio ancipiti, pertingens vsque ad diuisionem animæ ac spiritus, compagum quoque, & medullarum, discretor cogitationum, & intentionum cordis. Non est vlla creatura inuisibilis in conspectu eius, omnia nuda & aperta sunt oculis eius, ad quæ vobis est sermo. Ad Colossenses: Filius est imago Dei inuisibilis, primogenitus omnis creaturæ, quia in ipso condita sunt vniuersa in cælis & in terra, visibilia & inuisibilia, siue throni, siue dominationes, siue principatus, siue potestates. Omnia per ipsum, & in ipso creata sunt, & ipse est ante omnes, & omnia in ipso constant, & ipse est caput corporis Ecclesiæ, qui est principium, primogenitus ex mortuis, ut sit in omnibus ipse primatum tenens, quia in ipso complacuit omnem plenitudinem diuinitatis inhabitare, & per eum. reconciliari, omnia per ipsum pacificans, per sanguinem crucis eius, siue quæ in cælis, siue quæ in terris sunt. Sed ne cogar longius progredi per ea quæ de filio Dei miranda in Epistola ad Ephesios, ad Colossenses, ad Philippenses, ac de Spiritu sancto ad Corinthios, deque cæteris Theologiæ mysteriis alibi tanquam oracula firmissima fundit, vno verbo comprehendam. Siquis diligenter sacras literas legerit, Christianam legem diuina virtute constare fateri cogetur. Siquidem nostri heroes stabiles hærent immobili fundamento, clari mente, voluntate feruentes, verbis simplices, atque certi, actione indefessi, inuicti proposito. Cæteri anxie nimium ratiunculas per ambages aucupantur, atque, (ut inquit Dauid,) tanquam impii, circuitu quodam oberant, & neque sui, neque aliorum duces sufficientes. Denique si religionis maximè propria est puritas, hæc certe diuinissima est, quæ neque viles posteriorum Iudæorum superstitiones, & spurcissima Talmut deliramenta, neque obscenas, & iniquas Gentilium fabulas, neque abominabilem Mahumetensium licentiam, & Alcorani ineptias admittit, quæ neque terrena præmia, ut leges aliæ, sed cœlestia pollicetur, neque aduersarios fidei legisque suæ interfici iubet, quemadmodum iussit Talmut, & Alcoranum, sed vel ratione doceri, vel oratione conuerti, vel patientia tolerari. Quæ ut in primitiis Christia-



norum re ipsa manifestissimè apparuit, non modo amputat vitia, sed extirpat, virtutesque persuadet operando priusquam suadendo. Talis enim illorum conditio forsque fuit, ut non aliter persuadere potuerint, quàm & virtutes & miracula exercendo. Virtutes præterea non ambitionis aut voluptatis, aut tranquillitatis humanæ, sed Dei solius gratia ardentè exercet, totumque hunc mundum pessundat, & pro nihilo habet, ut mundum alterum consequatur.

*Authoritas Christi non ab astris,  
sed à Deo est.*

### C A P V T IX.

**C**ommunem religionem neque à stellis, neque ab hominibus quibusdam, neque à morbo esse, sed à Deo, atque humana speciei communi natura, in Theologia nostra probauimus. In præsentia verò Christianam legem non esse, feruarique à fato quodam syderum, breuiter sic ostendimus. Aduentus Christi tanquam diuinus ab initio mundi prædictus à Prophetis, Sybillisque fuit, non in Astrologia peritis, sed diuinitus inspiratis. Adde quod solent sphaeræ cælestes, tanquam causæ vniuersales atque remotæ, particulares in terris effectus, non absque commodis quibusdam mediis ad finem perducere. Humana verò omnia, non modo non subministrarunt commodè Christianis, sed annos trecentos prorsus aduersata fuisse traduntur. Vnde cum Paulus apud Lucam Romæ disputans cum Iudæis dixisset, propter spem Israël catena hac circumdatus sum, subiunxerunt Iudæi, compertum habemus huic sectæ vbiq; contradici. Ob hoc ipsum sic exclamauit Tertullianus. Cum odio sui coepit veritas, simul ut apparuit inimica est, tot hostes eius, quot extranei, & quidem propriè ex æmulatione Iudæi, ex concussione milites, ex natura ipsi etiam domestici nostri, quotidie obsidemur, quotidie prodimur, in ipsis plurimum coetibus & congregationibus nostris deprimimur. Item, Veritas nihil de sua causa deprecatur, quia nec de conditione miratur, scit se peregrinam in terris agere, ita inter extraneos facilè inimicos inuenire. Cæterum, genus sedem, spem, gratiam, dignitatem in coelis habere, vnum gestit interdum, ne ignorata damnetur. Quid enim iniquius, quàm ut oderint homines quod ignorant, etiam si res meretur odiū?

Item vtrumque ex alterutro redarguimus, & ignorare illos dum oderunt, & iniuste odisse, dum ignorant, Hæcille. Præterea corporales causæ, leges vel voluptuosas, vel ambitiosas, vel certè non plusquàm ciuiles inducunt, Christiana lex omnia hæc damnat, vel superat. Item sphaeræ cælestes non altius infundere desiderium possunt, quam coelorum. Christiana pietas cælestes spernit sphaeras, atque transcendit, Deumque adorat solum super coelum, utpote quæ non nascatur à cælo, cælestibusue spiritibus, sed à solo supercælesti Deo, Innumerabiles homines apud omnes Gentes pro Christi nomine libenter se vulneribus, certæque morti solius diuinæ beatitudinis gratia obtulerunt. Quando alias talia cælestis motus effecit certamina? Quis sapiens vnquam potuit doctrinam suam sola pietate ad vniuersum orbem spargere? Ac Deus ob solam virtutem, vel aduersante prisca consuetudine, atque potentia, vbiq; credi. Si hæc à syderibus proficiscerentur, profecto alius quoque eandem aut similem stellarum necessitatem nascens habuisset. Quod nam fatum vniuersi creatorem ipsum esse confirmavit, qui nullam esse fatorum vim docuit, atque docet. Quomodo igitur ipsum fati sibi met repugnat, & non esse se ipsum prædicat? Hæc ita Eusebius confirmavit, qui prædicationis Euangelicæ gratia vel certarunt iam multis annis, vel etiam nunc certant, quomodo ad vnā voluntatem, & fidem, & eandem virtutem animi, viuendique rationem diuersis temporibus, & tam multi nostra memoria compulsi sunt. Quis mentis compos credere vnquam poterit, iuuenes simul ac senes, viros & feminas, seruos & liberos, doctos atque indoctos, non in vno climate orbis, neque in eadē hora natos, sed vbiq; terrarū, & diuersis temporibus syderibus coactos, vnā & eandem, nouam atque inauditam doctrinā, & quidem cum periculo mortis, patriis ritibus anteposuisse, & veræ philosophiæ dogmata, duritiemque viuendi, quam delicias maluisse. Hæc Eusebius. Non igitur audiendi sunt impij quidam, & fati fatui assertores, qui in ipso Christianæ religionis initio pronunciauerunt, ipsā cum primum annos trecentos sexaginta quinque impleuisset ruituram, idque etiā quodam oraculo firmauerunt. Neque audeat Astrologus aliquis aliquando eam defecturam pronunciare, quæ non à tēporali coelorum motu, sed ab æterna Dei stabilitate dependet, quæ ab initio mundi vique ad

que ad Octauiani Imperatoris tempora in Prophetarum præconiis populorumque expectatione, rerum similitudine constitit. Deinde usque ad nos annos iam mille & quadringentos septuagintaque & quatuor, inuitis cælis, terrisque perdurat. Cuius persecutores primos scilicet Iudæos, Deus ob hoc ipsum, ut aliàs ostendemus, exterminauit, quam à diuturna, immanique Gentilium, hæreticorumque persecutione defendit. Nunquam igitur poterit religio hæc aboleri, quæ Deum vindicem habet, atque custodem, etiam si male administratur à suis, & crudeliter impugnetur ab hostibus, stat enim regente Deo, qui non minus à suis male tractatur quam alienis. Denique si prosperè Christianis res humanæ succedent, ceremoniæ non cessabunt, si aduersa multa contingent, crescet tandem hæc religio, atque perficitur. Nam cum extrema quadam, & diuturna aduersitate quondam orta, adultaque fuerit, eadem necessario nutrietur, ac prorsus implebitur.

*Christi authoritas absque miraculis  
minimè fuit.*

## C A P V T X.

**S**Ed arguendi acriter illi mihi videntur, magnanime Laurenti, qui quotidie tam pertinaciter quam imprudenter noua ad fidem Christi confirmandâ miracula exigunt. Si enim rara sunt, prodigia sunt, si frequentissimè fierent, vel artificiosa, vel naturalia videntur. Sufficiat nobis scire, mundum olim non absque manifestis miraculis tam miraculosè, tam miraculosa instituta, & opera cœpisse, & pertulisse. Quid quod Christum fecisse miracula, Gentiles, Iudæi, Mahumethenses nobis concesserunt: Miracula de stella ab Oriente, Eclipsi Solis, ac terræ motu, tēplique scissione, & alia multa, multis hominū milib⁹ manifesta discipuli Christi tã in Iudæa quam alibi palā quotidie prædicabant, atq; scribebant. Atque eo quidem tēpore, quo innumerabiles adhuc supererant eorū, qui cū moriente Christo viui & iã aduki fuissent, redarguere discipulos illos omniū rerū egenos, nisi vera dixisset, facilimè poterant. Quonā pacto Herodes facinus tã abominabile, & periculosissimū perpetrasset, quādo videlicet tot infantes, filiumque suū interemit, nisi nouo quodā, & stupendo prodigio fuisset perterritus. Quod quidē cū primū perpetravit, ad O-

ctavianū scriptum fuit. Audi Macrobiū. Quū audisset Augustus inter pueros quos in Syria Herodes rex Iudæorum intra bi-matum iussit interfici, filium quoque eius occisum, ait, præstat Herodis porcū esse quam filium. Operæ precium est audire primum de terræ motu, inquit enim. Maximus terræ memoria mortalium exitit motus Tyberij Cæsaris principatu, duodecim vrbibus Asiæ prostratis. Forsitan ille terræ motus fuit, qui in Iesu Christi contigit passione, tum quia dicit eum fuisse talem, ut nunquam similis fuerit. Tum verò quia in Asia, & Tyberio imperante, vbi scilicet, & quando passus est Christus, scribit Eusebius, se legisse in commentariis Ethnicorum, quod anno Tyberij decimo octauo, Solis facta est defectio, Bithynia terræ motu concussa, & in vrbe Nicæ ædes plurimæ corruerunt, quæ omnia congruunt, quæ in passione saluatoris acciderunt. Scribit verò super his & Phlegro, qui Olympiadum egregius supputator est, in decimotertio libro, ita dicens: Quarto autem anno ducentesi-mæ secūde Olympiadis, magna excellens inter omnes, quæ ante eam acciderunt, defectio Solis facta, dies hora sexta ita in tenebrosam noctem versus, ut stellæ in cœlo visæ sint, terræque motus in Bithynia, Nicenæ vrbis multas ædes subuertit, hæc Phlegro. Argumentum huius rei, quod Saluator hoc anno passus sit, Euangelium præbet Ioannes in quo scribitur: post quintum decimum annum Tyberij Cæsaris tribus annis dominum prædicasse. Iosephus etiam vernaculus Iudæorum scriptor, circa hæc tempora, die Pentecostes, sacerdotes primum, locorum quosdam sonitus sensisse testatur, deinde ex adyto templi, repentinam subito erupisse vocem dicentium: Transmigremus ex his sedibus, huc usque Eusebius. Quod autem Christus passus fuerit anno Tyberij decimo octauo, declarat etiā Lucas Euangelista, qui anno Tyberij quintodecimo Christum baptizatum dicit, anno trigesimo iam propinquantem. Computat autem Eusebius, Christum anno quadragesimo secundo Imperii Augusti natum fuisse, cœpisse vero Euangelium prædicare anno Tyberij quintodecimo. Dionysius Areopagita philosophorum Atheniensium præstantissimus, & Apollophanes insignis sophista naturaliumq; rerum scientia pollens, eo die quo Ies⁹ occidebatur, vnā apud Helio-polim erant. Hic tunc viderunt Lunę globum extra coniunctionis tempus ab Oriente Soli mirabiliter incidere, atq; ipsum ab



hora nona usque ad vesperam supra Solis diametrum mirabiliter obfistentem, incidentiamque eiusmodi usque ad solaris corporis finem peruenisse, ac tum demum ex aduerso diametri resiliisse, considerauerunt. Cum verò hæc præter omnem naturæ ordinem contigisse manifestè cognoscerent, Dionysius prorsus obstupuit, & Apollophanes conuersus ad Dionysium exclamauit, præclare Dionysi, hæc quidem sunt rerum vicissitudines diuinarum. Hæc Dionysius Areopagita scribit ad sapientem Polycarpum, rogatque eum, ut Apollophanem ipsum ad huc viuentem, & nondum Christianum conueniat, qui neque sit negaturus, illa præter naturæ ordinem euenisse, neque Christianam veritatem aspernaturus vterius, sed eam humiliter suscepturus. Lactantius affirmat Christum cruci affixum fuisse Martij die X. X. Esculus autem quidam Astrologus, quamuis parum religiosus, asserit tamen Astrologica computatione certum esse, ea die qua Christus cruci affixus est, Solem in primo Arietis gradu, Lunam in principio Libræ fuisse, atque eclypsim secundum naturam non potuisse fieri, tum quia plenilunium erat, oportet autem Solis eclypsim in nouilunio fieri, tum quia ab Oriente incepit eclypsis illa, cum ab Occidente incipere soleat naturalis eclypsis. Alij Solem in Piscibus fuisse volunt, in Virgine Lunam, idem tamen ab his de eclypsi concluditur atque ab Esculo. Idem ostendunt Iudæi, qui lege sibi iubente, pascha semper quartadecima Luna celebrauerunt, & in pascha Iesum immolauerunt, Eclypsis autem fuit, non enim licebat tunc in re tam manifesta mentiri, nam in eodem seculo, & apud eosdem prædicata, scriptaque sunt, in quo, & apud quos miracula eiusmodi euenisse narrantur. Solius autem Christi gratia miraculum illud factum est in cælo. Quid enim aut tunc, aut aliàs miraculosius quam Christus factum est, vel sub cælo, vel supra cælum? De quo præco eius Paulus: Deus exaltauit illum, & donauit illi nomen quod est super omne nomen, ut in nomine Iesu omne genu flectatur, cœlestium, terrestrium, & infernorum, & omnis lingua confiteatur, quia Dominus Iesus Christus in gloria est Dei Patris. Atq; id, quod admirationem exauget, hoc confessum tunc est hominum lingua, postquam in forma serui exinaniuerat semetipsum humilis, & obediens factus usque ad mortem, mortem autem crucis. Si absque miraculis hominem in

eiusmodi habitu ac sorte constitutum mundus summum esse Deum confessus est, hoc vnum miraculorum omnium vincit admirationem. Ego adduci non possum, nisi miracula multa vidisset, Ioannem Euangelistam scriptorem maximè omnium simplicem, atque sobrium, tam miraculosa voce ausum fuisse clamare: Sunt & alia multa, quæ fecit Iesus, quæ si scribantur per singula, nec ipsum arbitror mundum capere posse eos, qui scribendi sunt libros. Mitto quod Euangelistæ sæpe aiunt, Iesum millia infirmorum simul mirificè curauisse. Docet nos magnus Paulus, qualis illa fuerit Apostolorum prædicatio, qua populi multi conuertebantur, nam Corinthiis inquit: Ego fratres cum venissem ad vos, veni non in sublimitate sermonis, aut sapientiæ, annuncians vobis testimonium Christi. Non enim iudicaui me scire aliquid inter vos, nisi Iesum Christum, & hunc crucifixum, & ego in infirmitate, & timore, & tremore multo fui apud vos, & sermo meus, & prædicatio mea non in persuasoriis humanæ sapientiæ verbis, sed in ostensione spiritus, & potestatis, ut fides vestra non sit in sapientia hominum, sed in potestate Dei. Sapientiam autem loquimur inter perfectos. In alia Epist. eisdem dicit: Signa Apostolatus mei facta sunt super vos in omni patientia, in signis & prodigiis & potestatibus. Sed audiamus eum ad Thessalonicenses scribentem: Scio quod Euangelium nostrum non fuit ad vos tantum in sermone, sed in potestate, & Spiritu sancto, & plenitudine multa. Adeone sui oblitus erat prudentissimus Paulus, aut usque adeò obliuiosos opinabatur populos, ad quos scribebat, ut commemoraret, se apud eos fecisse prodigia, nisi fecisset, in promptu erat redargutio, & infamia, si forte mentitus esset. De prodigiis à se factis scribit etiam ad Romanos, ex quibus & similibus miracula temporibus illis non defuisse concludimus, quorum virtute ad exemplar, lumenque, imò ad habitaculum nostrum ædificata tunc est domus Dei, quæ, ut ait Paulus, est ecclesia Dei viui, columna, firmamentumque veritatis, & manifestè magnum est pietatis sacramentum, quod manifestatum est in carne, iustificatum est in spiritu, apparuit Angelis, prædicatum est Gentibus, creditum est in mundo, assumptum est in gloria. Hæc ad Timotheum. Quid igitur garrimus increduli? quid vterius procaces efflagitamus? num quotidie (Deo magno nobis.

cum) sub iudice lis est? num quolibet temporis momento, tum singulis nobis, tum posteris, qui similiter quærent, Deus auctoritatem suam redimere miraculis cogitur? & tanquam præstigiator aliquis mercenarius in theatrum prodire ad nutum cuiusque compellitur? Atqui neque etiam hominem animal natura liberum, violentis quibusdam signis compellere naturale ac decens est, sed inspirationibus, doctrinisque allicere, volenti enim virtus, & beatitudo promittitur, non coacto, credendo præcipientis auctoritas confirmatur, non perquirendo. Quid? quod pauci sunt, qui miracula videre, paucissimi, qui accipere digni sint. Mirabilia inter homines congrue ut plurimum à Deo fiunt per animas hominum à corporibus valde sciunctas, Deoque coniunctas, tanquam per instrumenta. Immergite igitur vos in corporis lutum animæ miseræ, sic cœlestia cernetis miracula? O quam stulte optatis, inclinato in terram capite videre sublimia, rapi portentis in altum vultis, non virtutum gradibus scandere. Quid miraculosius, quid diuinius in terris, quam animus omnino sui corporis dominus? Imperium hoc experiamur, si possumus, possumus autem, si volumus, tunc non modo cernemus miracula, sed ipsi perficiemus. Ego certe arbitror, nobis etiam non merentibus, sæpe variis in locis mirabilia quædam signa diuinitus fieri, sed non patent omnibus omnia. Multa etiam non scribuntur, vel scripta quidem non creduntur; cuius quidem ambiguitatis occasionem dare videntur nonnulli homines admodum detestabiles, qui imitatione verorum, falsa prodigia introducunt, Imitatio & verisimilitudo necessariò rem veram sequuntur, quam quis imitetur, & representet, non esset introductus nummus adulterinus, nisi quandoque legitimus fuisset nummus, non essent falsa conficta miracula, nisi ex veris miraculis homines ad ipsorum imitationem fidemue inuitati fuissent. Miracula, quæ Aurelius Augustinus se vidisse, & Gregorius narrat, talia sunt, ut fide carere non debeant. Audiui equidem nonnulla nostris seculis, atque etiam in vrbe nostra Florentina, mirabilia simul & credibilia contigisse, sed quædam occultiora. Illud certè multis hominum millibus, qui & viderunt, & adhuc viuunt manifestissimum, quod Anconæ anno Domini. M. CCCC. LXX. factum à multis fide dignis accepimus. Puella quædam propter pessimam quandam

ætuorum contractionem à primis incubulis gradiendo natibus pro cruribus utebatur. Præterea Bindellus, Florentinus propter faucium pectorisque contusionem, multos annos loqui nihil potuit, ambo cum diuæ Mariæ eodem in loco se suppliciter commendassent, sani protinus euaserunt, omni populo multis annis notifuerant infirmi, & postea iam quatuor annos continue omni populo sani. Noli Laurenti mirari, quod Marsilius Ficinus philosophiæ studiosus miracula introducat, vera enim sunt quæ scribimus, ac Philosophi officium est rationibus propriis singula confirmare. Sunt autem propriæ rerum naturalium rationes, quæ secundum naturam sunt, diuinarum vero quæ super naturam huiusmodi sunt, tum metaphysicæ probationes, tum vel maxime miracula, Deus enim non tantum verbis, quantum miraculosis operibus mysteria sua probat, & præcepta confirmat, unde illud: Si verbis non vultis credere, operibus credite.

*Authoritas apud Gentiles.*

#### C A P V T XI.

**C**hristiana miracula nemo negauit vnquam, licet illa nonnulli ad dæmonum vim retulerint, nescientes dæmones vel sui cultum, vel vitia tandem pestiferasque dissensiones perfundere solere, hæc autem à Christianis illis heroibus alienissima. Atqui quonam pacto potest ea religio ortum à dæmonibus habuisse, quæ dæmonum cultum damnavit, eueritque, ipsosque dæmones & fugauit, & fugat? Vniuersus penè orbis Christum subito coluit, atque colit, exceptis paucis circumuagis foeneratoribus, qui avaritiæ penitus mancipati, de diuinis rectè sentire non possunt. Profecto Gentiles omnes consenserunt, Iesum aut Deum ipsum fuisse, aut certè diuinum. Milesius Apollo consultus, ita commendauit Christum: Mortalis erat corpore, sapiens prodigiorum effector, sed sub ducibus Chaldæis, armis comprehensus, clauis, fustibusque amaram mortem passus est. Porphyrius in libro de responsis inquit, Christum dij maxime pium pronunciauerunt, immortalemque euasisse asseruerunt, benignum admodum de illo testificantes. Adiungit Hecatem deam interrogantibus de Christi anima respondisse: Viri pietate præstantissimi est illa anima, hanc colunt à rigiditate alienam, & post multa subiunxit Hecate: Christus ipse



pius in cœlum sicut pij conscendit. Huic ergo ne derogaueris, concedit ipse Porphyrius, Christum & sapientem & pium fuisse, quamuis Christianos partim indoctos, partim magos nominet, tum veritati, tum sibi ipsi manifestè repugnans. Tertullianus in Apologetico scribit, quod cum Pilatus ad Tyberium imperatorem de Christianorum dogmate referret, Tyberius retulit ad senatum ut Christianorum sacra inter cætera sacra reciperentur. Verum cum ex consulto patrum, Christianos eliminari vrbe placuisset, ex eo quod non senatui, prius huius rei iudicium delatum fuisset. Vetus enim erat decretum, ne quis Deus absque senatus autoritate consecraretur. Tyberius per edictū accusatoribus Christianorum minatus est mortem; multi senatorum, & equitum Romanorum interfecti. Confirmat eadem Eusebius. Vespasianus, ac Titus, auditis Christi operibus eius potentiam timuerunt. Adrianus, sicut Iulius Capitolinus narrat, statuit Christo templum facere, eumque inter deos recipere, ideoque templa absque simulachris in omnibus ciuitatibus fieri iussit, quæ hodie idcirco, quia non habent numina, dicuntur Adriani, quæ ille ad hoc parasse dicebatur, sed prohibitus est ab ijs, qui cōsules sacra, repperant, omnes Christianos futuros, si id optatè euenisset, & templa reliqua deferenda. Alexander Seuerus templum fieri Christo statuit, sed non successit, orabat in matutinis in sacrario suo coram statua Christi. Hæc Capitolinus. Sed audi quod de Adriano referat Eusebius. Quadratus discipulus Apostolorum, & Aristides Atheniensis philosophi libros pro Christiana religione Adriano dedere compositos. Et Sereus Granius legatus, vir apprimè nobilis, literas ad imperatorem misit, iniquum esse dicens, clamoribus vulgi innocentium hominum sanguinem condemnari, & sine villo crimine, nominis tantum & sectæ reos fieri. Quibus commotus Adrianus Minutio Fundano proconsuli scribit, sine obiectu criminis Christianos non condemnandos, cuius epistolæ vsque ad nostram ætatem durat exemplum. Hæc Eusebius. Antonius Pius cum audisset Christianos hoc frequenter uti proverbio: Quod tibi fieri non vis, alteri ne feceris, perscrutatus est Christi vitam, eique statuam tanquam Deo sacrauit. Reor equidem ad hoc maximè inductum fuisse à Iustino Philosopho, qui ei librum pro nostra religione conscriptum dicauit.

Philippus ex imperatoribus primus Christianus fuisse ab Eusebia traditur, superiores enim Iesum non solum, sed cum cæteris diis colebant, sed si omnes populum suum magis quàm deum veriti fuisse videntur. Constantinus denique cum Christi miracula in rebus suis manifestius fuisset expertus, Deum magis quam populum timuit, solumque Christum & palam adorauit, idolorum templa subuertit, Christo templa passim preciosa ædificauit. Hæc de illo scribit Eusebius qui illius tempore floruit. Principes autem illos, qui atrocius in Christianos sæuebant, crudeli quadā naturā, & temeraria perturbatione potius quam ratione iustitiæ inductos fuisse constat, si quis insanos illos Neronem, Domitianumque, quibus illis temporibus abundauit Roma, consideret. Quibus damnatoribus Tertullianus inquit, sectam nostram gloriari debere, quia non nisi grande aliquod bonum ab illis damnari potuerit. Tales verò semper insecutores nostros fuisse iniustos, impios, turpes, ab omni populo damnatos. Modestiores vero principes erga Christianos honestius se gessisse. Sed quicumque principes præ cæteris immanissimè sæuierunt, ut Nero Domitianusque, miserabiles poenas dederunt. Ut obmittam, quod Christi proditor Iudas repente laqueo se suspendit, quod illis temporibus Christi discipuli publicè dixerunt atque scripserunt. Præterea quod Pontius Pilatus Christi condemnator, tandem in multas incidens calamitates se manu propria interfecit, quod apud Græcorum Romanorumque historicos legisse Eusebius asserit. Similis Herodis primi exitus fuit, qui se ipse peremit, similis & secundi, qui statim post Iacobi necem, carceremque Petri, percussus ab Angelo, ut Lucas testatur, periit, atque ut Iosephus inquit, vidit Angelum suo capiti insistentem, exitiique sui ministrum, deinde grauiter cruciatus vitam violenter abruptit. Adde quod Aurelianus Imperator cum primū aduersum Christianos persecutionem mouisset, fulmine primo territus est, mox occisus. Iulianus quoque apostata in Persas proficiscens, Christianum post victoriam diis sanguinem vouerat, sed in ipso itinere fame, sitique exercitum perdidit, ipse etiam ignominose est interfectus. Diocletianus seipsum peremit. Maximianus turpiter est occisus.

Neque silentio prætereundum arbitror, quod Celsus Epicureus, Porphyrius quoque & Iulianus Proculusque Plato-

nici, & nonnulli alij doctrina insignes, qui partim insana quadam arrogantia, partim vt suis populis, ac potentibus obsequerentur, contra Christianam pietatem, linguam suam, calamumque impiè armauerunt, dum contra illam potentium, mundique arma sœuirent, proculdubio reipsa declarauerunt, neque illos religionis nostræ patres vlllo pacto contemnendos fuisse. Quibus cum certamine congredi illustres philosophi dignabantur, & à quibus conuicti sunt, neque religionem ipsam vi humana fuisse exortam, quæ tam mirabiliter humanam sapientiam & potentiam superauit. Quod apud Esaiam Deus prædixit: Perdam sapientiam sapientum, & prudentiam prudentium reprobabo. Et Paulus Apostolus confirmauit dicens: Sapientia huius mundi, stultitia est apud Deum. Quod stultum est Dei, sapientius est hominibus, & quod infirmum est Dei, fortius est hominibus. Atque alibi strenuus hic Christi miles in hunc modum clamat: Arma militiæ nostræ non carnalia sunt, sed potentia Deo, ad destruendum munitiones & consilia, & omnem altitudinem extollentem se aduersus Dei scientiam, insuper ad redigendum in captiuitatem quemlibet intellectum in obsequium Christi, atque ad omnem inobedientiam promptius vliscendam. Merito igitur hæc arma timuit Gamaliel magnus Hebræorum doctor, quando consuluit, ne Iesu disciplinam persequerentur. Si enim ex Deo esset, impediri non posse, si non esset ex Deo, sicut cætera figmenta, quæ illis temporibus contigerant, breui tempore duraturam. Timuit quoque illa diuinus ille Plotinus Platonico- rum princeps interpretum, Numenius, Iamblicus & Amelius, qui Christianam theologiam non reprobare, sed emulari potius studuerunt. Timuit iisdem fermè temporibus, & multo magis illa Arnobius Aphricanus Rhetor clarissimus, qui cum adhuc idololatra ad credulitatē Christianam somniis compelleretur, neque ab episcopo fidem impetraret, quam semper impugnauerat, elucubrauit aduersus pristinam religionem, vt Hieronymus ait, luculentissimos libros, ac tandem veluti quibusdam pietatis obsidibus impe- trauit.

*Christi auctoritas apud Mahumethenses.*

## CAPVT XII.

**M**Ahumethenses Christiani quodammodo esse videntur, quamuis hæretici, Arrianorum, Manichæorumque sectatores, confitetur certe rex eorū Mahumethes, Iesum Christum Dei virtutem, sapientiam, animam, statum, spiritum, verbumque afflatu quodam diuino ex Maria virgine perpetua natum, suscitasse mortuos, aliaque miracula plurima præ cæteris diuinitus effecisse, fuisse cunctis Hebræorum prophetis sublimiorem, nullumque Hebræos post Iesum habituros prophetam, cunctis quidem viris cum anteposit, Mariam omnibus mulieribus. Addit corpus Iesu incorruptum in coelum ascendisse, Christianos longo interuallo Iudæis anteposit, Iudæos admodum detestatur. Hæc in libro eius Alcorano omnia. Vnde sectatores illius Iudæos suis sacris non prius initiant quam sacramenta Christianorum antiqua, vera, & bona esse confiteantur. Et qui Mahumethis sepulchrum visiunt, nisi etiam Christi sepulchrum viserint, nondum satis purificati existimantur. Qui Christi vel Mariæ nomen contumeliose commemorat, ab eis seuerè punitur. Religiosorum genus habent aliud Helix, aliud Ioanni Baptistæ, aliud & id quidem præcipuum Iesu Christo dicatum. Celebrant Prophetas, & Euangelia, didicerunt enim à Mahumethe in Alcorano, Alcoranum esse Hebraicorum Prophetarum, Euangelique affirmationem atque declarationem. Legitur ibidem, neminem fore perfectum, nisi testamento veteri, nouoque paruerit, & Alcorano insuper, quod sit congregatio & declaratio vtriusque. Quotiens Euangelium nominat, quod facit sæpe, totiens proprio cognomento librum appellat lucidum, aliquando etiam Euangelium addit esse lumen testamenti, castigationem rectamque viam timentibus Deum. Inducit præterea in Alcorano Deum ita loquentem: Cum Prophetas alios aliis præfecerimus, eosque allocuti fuerimus, Christo Mariæ filio animam nostram propriè conferentes, vim atque virtutem præ cæteris præbuimus. Duo autem præcipui Mahumethis errores esse videntur: Alter quod quamuis in Christo diuinitatem quandam ponat, longè maiorem quàm in cunctis hominibus, vel præsentibus, vel præteritis, vel futuris, videtur tamen alicubi velle diuinitatem

illam esse à Dei summi substantia distinctam atque minorem, quod quidem ab Arrianis accepit, sed in hoc secum ipse pugnat, epitheta enim, quæ Christo attribuit, diuinitatem eius eandem esse, atque summi Dei significant. Alter Mahumetis error, & quidem manifestior est, quod quando satellites illi sacerdotum, qui coniicere manus in Iesum conabantur, ceciderunt, Deus, ut Mahumetes putat, repente, & clam Iesum in cælum rapuit. Illi cum surrexissent, alium quendam Iesu similem comprehendentes verberauerunt, & cruci affixerunt, hoc à Manichæis accepisse videtur. Nihil opus est, ut errores huiusmodi confutem, quicunque enim Arrianam, & Manichæam hæresim confutauerunt, Mahumetem quoque confutasse videntur. Concludere possumus, Christianam legem apud omnes sectas Gentilium, Iudæorum, Mahumethensium, re vera omnium excellentissimam esse concedi. Quisque enim istorum, quamuis affectione quadam naturæ, consuetudinisque vel fictionis propriam hæresim cæteris proferat, Christianam tamen, excepta sua, reliquis anteponit. Itaque cum sincerè iudicaretur, cunctis absque controuersia præferretur.

*De generatione Filij Dei in æternitate.*

### C A P V T XIII.

**O**Mnis vita prolem suam penes se ipsa prius generat quàm seorsum, & quo præstantior vita est, eo interiorem sibi met generat prolem. Sic vita vegetatiuatam in arboribus quàm in animalibus semen quasi arborem, & quasi animal in corpore proprio prius generat, quàm aut iaciat extra, aut arborem inde, animalue externum producat. Sic sensitiua vita, quæ est vegetatiua præstantior, per phantasiam in se simulachrum, intentionemque rerum parit priusquam membra moueat, & in externa materia fabricet. Sed foetus ille phantasie primus, quia in ipsamet anima est, ideo propinquior est animæ quàm foetus vegetatiuæ vitæ, qui non fit in anima, sed in corpore. Sic vita rationalis, quæ est excellentior quàm sensitiua, parturit in se ipsa rationem tum rerum, tum sui ipsius, quasi foetum, priusquam vel loquendo, vel agendo promat in lucem. Primus ille rationis foetus propinquior est animæ quam phantasie foetus. Vis enim rationalis in se ipsum suum, perque illum in se ipsam

reflectitur, actum suum seque ipsam quærendo, cognoscendo, amando, quod non efficit phantasia. Sic Angelica vita excellentior quam rationalis, notiones sui ipsius, & rerum, diuino quodam instinctu promit in se, antequam depromat in mundi materiam, proles hæc interior est Angelo quàm rationi suæ, quia neque ab externis obiectis sigillatim incitata est, neque mutatur. Quamobrem diuina vita, quia eminentissima est, & fecundissima omnium, multo magis prolem sui simillimam quàm reliqua generat, ac eam in se generat, priusquam pariat, extra generat, inquam, intelligendo, prout perfecte Deus intelligendo seipsum & in seipso omnia, perfectam totius sui, & omnium notionem concipit in se ipse, quæ quidem æqualis, plenaque Dei imago est, & exemplar mundi superplenum. Hanc Palladem appellauit Orpheus, solo Iouis capite natam, hunc Dei Patris filium Plato in epistola ad Hermiam nominauit, in epinomide nuncupauit logon, id est rationem ac verbum dicens: Logos omnium diuinissimus mandum hunc visibilem exornauit. Mercurius Trismegistus de verbo, & filio Dei, ac etiam de spiritu sæpe mentionem facit. Zoroaster quoque intellectualem Deo prolem attribuit. Dixerunt isti quidem, quod potuerunt, & id quidem adiuuante Deo, Deus autem hoc solus intelligit, & cui Deus voluerit reuelare. Dei fecunditas, quod est bonum actu infinitum per immensi boni æternique naturam ab æuo se actu propagat infinite, quicquid autem est extra Deum, finitum est, se igitur Deus propagat in se ipso: ubi certè infiniti patris infinitus est filius. Oportet autem huiusmodi prolem multo magis intimam, ut ita dixerim, esse Deo, quam Angeli notionem illam Angelicæ mentis. In Angelo quippe cum sit esse aliud quam intelligere, notio, quæ generatur intelligendo, aliud est quam Angeli ipsius essentia. In Deo autem, quia esse & intelligere idem sunt, notio, quam Deus semper intelligendo seipsum gignit, semper tanquam exactissimam sui ipsius imaginem, idem essentia est, atque ipse qui generat, quamuis mira quadam relatione tanquam genita distinguatur à generante. Deus denique per æternam huiusmodi notionem cognoscens ab æuo se ipsum infinitum bonum, per eandem ab æuo infinitum in se ad seipsum spirat amorem. Pater ergo & Filius & Spiritus amatorius, tres à Theologis personæ vo-



cantur : natura quidem diuina inter se conuenientes omnino, ita vt vnicus, & simplex Deus sit, sed relatione quadam incogitabili differentes. Sic in ordine rerum duo habemus extrema, & media duo, in Angelo quidem quolibet vna, vt quidam volunt, persona Angelica est in vna specie suæ naturæ. Atque econuerso: In foemina vero præguante plures personæ in naturis pluribus, atque contra, in quolibet animali naturæ in vna persona sunt plures, in Deo autem plures in vna natura personæ. Sed de his satis ad præsens, imò vero nunquam satis, contemplationis autem huius sufficientia non à philosophis, sed ab heroicis illis Christianorum ducibus, & à Deo petenda. Rectè enim Esaias ait: Quod oculus non vidit, quod auris non audiuit, quod in cor hominis non ascendit, Deus iis quicum diligunt reuelauit.

*Ordo cælorum, Angelorum, animarum,  
circa trinitatem quasi sphaerarum  
circa centrum.*

#### C A P V T XIV.

**S**Vper quatuor elementa, quæ secundum substantiam & qualitatem mutabilia sunt, cœli septem sunt Planetarum, qui non substantia, sed quodammodo qualitate quadam vel dispositione quasi mutantur. Quoniam vero horum motus quasi erraticus est, cœlum illis octauum superponitur, cuius magis ordinatus est motus, sed cœlum illud duos habet motus, ab Oriente scilicet ad Occidentem, atque econuerso. Duas quoque saltem qualitates, candorem scilicet & splendorem, idcirco ab illo ad crystallinum ascenditur, cuius motus est simplex ab Oriente, qualitas quoque simplex, id est candor, sed quoniam motu superior status est, & candore superius lumen, ideo ab hoc ascenditur ad empireum omnino stabile, totumque lucens. Empireum stabilitati lucique trinitatis rectè accommodatur, nouem reliqui, nouem ordinibus Angelorum. Sunt enim quemadmodum Dionysio Arcopagitz placet, hierarchiæ tres spirituum diuinorum, quarum quælibet tres continet ordines. Quilibet ordo, vt Theologi quidam computant, multas continet legiones: legionem ex sex millibus sexcentis sexaginta sex vnitatibus constare putant, totque legiones in singulis ordinibus esse, quot vnitates legio ipsa complectitur. At ego Diony-

sio magis assentior dicenti: tanquam esse illorum spirituum multitudinem, vt facultatem humanæ computationis excedat. Vna Dei essentia in ternarium deducitur numerum personarum, ternarium hunc numerum ternarius hierarchiarum, & nonarius angelicorum ordinum, quasi spiritualium sphaerarum numerus circuit. Prima hierarchia patri, secunda filio, tertia spiritui attribuitur, in prima Seraphini patrem in seipso considerant. Cherubini patrem pro vt filium generat, Throni patrem cum filio spiritum producentem. In secunda, Dominationes filium in seipso, Virtutes filium à patre manantem, Potestates filium cum patre spiritum producentem. In tertia Principatus spiritum in se ipso, Archangeli spiritum venientem à patre atque filio, Angeli spiritum à filio patreque procedentem. Quamuis autem singuli (sicut diximus) alia & alia ratione præcipue Deum intueantur, singuli tamen Trinitatem totam, & in ea omnia vident. Habent (vt vult Dionysius) aliam insuper differentiam, quod prima hierarchia liquorem suum à sola haurit Trinitate, secunda per primam, tertia per secundam atque primam. Item Seraphini diuinæ prouidentiae ordinem in Dei bonitate speculantur tanquam sine. Cherubini in Dei essentia tanquam forma. Throni denique in se ipso, reliqui ad opera iam descendunt. Sed Dominationes velut architecti præcipiunt, quod reliqui exequantur. Virtutes iam exequentur, mouentque cœlos, & tanquam instrumenta Dei ad miracula facienda concurrunt. Potestates arcent ea quæ ordinem diuinæ gubernationis perturbare posse videntur, cæteri iam magis ad humana descendunt. Principatus publica curant, Gentes, Principes, Magistratus. Archangeli circa singulos diuinum dirigunt cultum, sacrisque interfunt. Angeli minora disponunt, singuli singulis custodes adstant. Quemadmodum vero nouem sunt Angelorum ordines, sic in nouem ordines distribuuntur animæ beatorum, quælibet enim ad eum ordinem, eumque spiritum tanquam suum (vt Plato inquit in Timæo) sydus ascendit, cui se in vita similem reddidit. Quamuis enim animæ nostræ dum sunt in corpore quartam sub Luna hierarchiam efficiant, possunt tamen propter liberum rationalis naturæ motum per omnes spiritus benignos ascendere, & descendere per malignos, præsertim cum medium rerum

omnium teneant, ideoque omnium in se quasdam contineant qualitates, quo fit vt latissima sit progressio animarum. Elysiorum finis est Luna, vitæ, mortisque (vt Pythagorici volunt) confinium, sub ea quicquid est morti & inferis deputatur, vbi quasi tot gradus pœnarum sunt secundum malignorum spirituum turbas, quot præmiorum sunt in coelis secundum ordines benignorum. Nouies enim miseros styx interfusa coercet, sicut beatos campi elysei nouies amplectuntur.

*Generatio filij in aternitate, & declaratio in tempore.*

## C A P V T X V.

**A**Nte mundi temporalis initium est mundus æternus, mundi quidem huius exemplar. Mundani vero architecti ratio & intelligibile verbum, gloriæ quoque ipsius splendor, & figura substantiæ. Verbum huiusmodi semper penes Deum est, atque est ipse Deus, per hoc diuina potestas ab æterno dicebat ipsa secum, tum seipsam, tum reliqua cuncta, ac dicendo imprimebat intrinsecus. Per hoc aliquando expressa sunt extrinsecus tam secula quam quæ in sæculis omnia. Diuina hæc oracula post mysteria Prophetarum cœlestes illi spiritus, Ioannes Euangelista, & Paulus Apostolus hominibus fudere de cœlo.

Defecit autem à Deo quandoque genus humanum, neque sine Deo poterat vnquam in Deum resurgere, quod ad ima ceciderat. Resurgere autem quandoque mentes humanæ debebant, ne frustra à Deo creatæ fuissent, quæ ab eo creatæ consequendi ipsius gratia fuerant. Per Dei verbum formati quondam homines fuerant, per verbum idem reformari debebant, & merito, per intellectualis enim verbi lucem depellenda erat caligo intellectus humani, per rationem Dei rationale animal emendandum. Ergo statutis à diuina voluntate temporibus, creauit Deus per verbum rationalem quandam hominis animam, quam eodem momento tenero foetui virginalis vteri per diuinum spiritum concipientis coniunxit. Momento quoque eodem verbum ipsum naturam assumpsit humanam, atque fermè sicut ex anima immortalis & mortali corpore homo factus est vnus, ita ex homine illo ac Dei verbo factus est Christus Deus & homo. Sic infinita bonitas, quæ se communi-

care vult omnibus, tunc modo quodam aptissimo se ipsam cunctis communicauit, quando sibi coniunxit hominem, in quo tanquam in media rerum specie cuncta comprehenduntur, neque mutauit tunc sedem suam diuina maiestas, cum sit semper vbique, neque se ad humana quasi per defectum deiecit diuina sublimitas, sed humana ad se potius eleuauit. Neque infinita diuini Solis lux, ex adiunctione hominis vlllo modo infici vnquam potuit, sed homo inde superillustrari, ac perfici, atque vt in homine augeri & minui, sic ad corpus pertinent, vt in animam nunquam penetrent. Ita in Christo humana pati propriè ad hominem pertinebat, in diuinitatem non penetrabat. Christus igitur vt homo patiebatur humanam, vt Deus diuina operabatur.

*Conueniens fuit Deum se homini iungere.*

## C A P V T .XVI.

**C**Vr olim Deus homo factus est, vt homo quandoque quodammodo Deus efficeretur. Deus enim quodammodo fieri potest, qui naturali instinctu cupit, studetque esse diuinus. Non potest autem in Deum surgere, nisi Deus aliquando ita trahat, vt surgat, quemadmodum ante traxerat, vt appeteret. Sed rem hanc ab alio principio repetamus. Summus opifex summum manifestumque debet opus efficere, tale vero illud est, quo maius effici nequit. Tale igitur manifeste Deus summus facere debet opus hoc, vel increatum solummodo est, vel creatum, vel ex vtrisque compositum. Primum quidem illud non manifestum opus est, sed opifex ipse, solus enim Deus est qui ab alio non dependet. Secundum vero cum omnino finitum sit, ab infinito Deo, spatio distat immenso & infinito. In hoc certè spatio, tam ratione interualli ipsius, quam etiam ratione infiniti Dei, opus adhuc aliud, rursusque aliud præstantius semper effici potest. Nulla igitur creatura simplex potest opus illud summum esse, quod nos quærimus, sed ita demum opus huiusmodi summopere reperire confidimus, si quid vnum reperiatur ex summo creatore simul & creatura compositum. Ratione quidem creaturæ illud dicitur esse opus, ratione autem creatoris immensum opus huiusmodi Deus facere potest, & scit, & vult, est enim Deus potentia, sapientia, bonitasque immensa, coniungi igitur quando-

que creatori debuit creatura. Quæ super rationalem animam sunt, solum æterna sunt, quæ infra illam, temporalia solum, ipsa verò partim quidem æterna, partim etiam temporalia. Deum imitatur unitate, Angelos intellectu, speciem propriam ratione, bruta sensu, nutritione plantas, essentia carentia, vita. Est igitur anima hominis quodammodo omnia, quod in Theologia nostra latius disputauimus, præsertim cum sit in corpore ex omnium viribus composito, cœlique instar temperatissimo. Decet autem Deo communi omnium duci vniuersam creaturam quodammodo iungi, non quidem sparsim, quia Deus summa vnitas est, imò vero summam, naturæ igitur humanæ Deus vnatur oportet, in qua sunt omnia. Si enim illis quæ supra eam sunt, tanquam creaturarum rerum extremis iungeretur, neque ad media rerum, neque ad alia extrema coniunctio eiusmodi pertineret. Similiter si illis quæ infra nos sunt iungeret semetipsum, profecto infinita vnitas opera sua vniuit summopere, & inuicem & ad ipsam, cum ab initio in homine cuncta concluderet, deinde sibi deuinxerit hominem. Forte ob ea quæ supra diximus, Propheta Abacuc inquit: Opus tuum Domine in medio annorum viuifica illud, in medio annorum notum facies, cum iratus fueris, misericordiæ recordaberis. Quia videlicet in media rerum specie, quæ ex vtrique seculis, æuo scilicet, temporeque componitur, opus illud impletur. Addunt aliqui, in medio quoque mundi cursu, volunt enim decem annorum millibus non mundum, sed mundi cursum prorsus expleri, siquidem motus quietis gratia sit institutus, atque in medio hoc mundi cursu, Deum se hominibus ostendisse, vt aduentus eius æquè ab vtrisque seculorum distaret extremis, ne vel expectatio futuri aduentus, nimium protraheretur, vel præteriti memoria prorsus aboleretur. Sed tempora Deus viderit, temporum temperator. Si bonitatis proprium est diffundere, & communicare seipsam, Deus cum sit infinitum bonum, omnes debet communicationis modos implere, ij verò quatuor esse videntur. Secundum præsentiam, virtutem, unitatem essentiae, unitatem personæ. Primus impletur in omnibus, vbique enim Deus adest. Secundus per omnes formas etiam minimas propagatur, nam omnis forma efficacem à Deo aliquam habet virtutem, materia vero ipsa non habet.

Tertius intra Deum fit solum, non potest enim essentia Dei, essentia alterius fieri, alioquin vel quod infinitum est, finitum fieret, vel quod est finitum, fieret infinitum. Quartus communicationis modus fieri nequit in rebus ratione carentibus, quibus enim natura deest omnino, cognitio, amorque Dei, vnio diuina, secundum personam non conuenit. Ex angelo quoque ac Deo vnā fieri personam non est necessarium, Angelis quippe miseris nullum superest remedium, cum poenitentia desit, cæteris Angelis satis est ad beatitudinem suam antiqua illa luminis diuini possessio. Quod quidem lumen in Seraphinis, Seraphinum quodammodo fit, in Cherubinis, etiam Cherubinum, similiterque in aliis, perinde atque Solis lumen, dum per vitra diuersorum colorum transit, in colores varios se transformat. Deus autem in homine, hominem reddit diuinum merito. Sicut enim in rebus naturalibus ex materia vltima formaque suprema fit compositū naturalium præstantissimū, vt animal rationale, sic ferme in rebus diuinis, ex supremo spiritu, atque vltimo scilicet Deo & hominis animo, efficitur diuinum assumptum omnium præstantissimum. Non satis erat homini ad hoc vt suscitaretur radius menti eius diuinitus infusus, nam propter sensus à mente digreditur. Oportuit igitur in homine quodam, scilicet Iesu, ita diuino ipsi soli animum iungi, vt in corpus ipsius, & ad sensus hominum, copia radiorum exuberaret.

*Qualis coniunctio sit Dei & hominis.*

## C A P V T XVII.

**Q**Voniam vnio Dei ad hominem secundum personam diuinam potius quam secundum diuinam naturam facta est, ideo cum vnitur homini verbum, non oportet patrem similiter, spiritumque vniri, qui licet natura conueniant, differunt tamen inter se proprietate personæ. Sicut ergo in Trinitate tres personæ in eadem natura existunt, sic in Christo persona vna in tribus existit naturis, Deo animoque, & corpore, atque ibi homo comparatur ad Deum, quemadmodum manus ad animam, imò lingua ad intellectum. Non enim fit Deus proprie naturalis hominis forma, sed homo fit proprium, coniunctumque instrumentum Dei, ad opera Dei propria excellen-



tiffimè peragenda. Non sunt autem duæ in Christo personæ, sed vna, scilicet persona verbi coniuncta, non personæ hominis, sed naturæ. Sicut enim rationalis anima in suo esse existit, per quæ eius esse existit & corpus, ita Dei Filius, & multo magis in esse personæ suæ existit, atque ad illud naturam extollit humanam.

Proinde quemadmodum verbum nostrum mente conceptum insensibile est, extra vero voce prolatum fit sensibile, ita mentis diuinæ verbum ab æuo in Deo inuisibile permanet, sed per assumptionem hominis factum est visibile. Est igitur Christus verbum, quod ab æuo diuina mens, se omniaque secum intelligendo intra se loquitur, iam spiritu diuino prolatum, & corpus humanum quasi vocem assumens, diuinamque audientibus significans voluntatem. Tantum vero diuinam cuique voluntatem significauit, quantum quisque capere poterat. Cunctis autem quantum si in breui hac vita exerceatur, beatitudinem largitur æternā. Multa quidem præcepta & præclarissima tradidit, sed paucis omnia comprehendit, quando iussit. Te toto Deum ama, homines ama sicut te ipsum, quod tibi fieri non vis, aliis facere noli.

*Quam decens Dei hominisque coniunctio.*

## C A P V T XVIII.

**N**on minus formè est deformia reformare, quam formare simpliciter ab initio, siquidem non minus est bene esse quam simpliciter esse. Decuit igitur Deum omnium effectorem perficere quæ defecerant, & quemadmodum per insensibile verbum cuncta creauerat. Quid enim aliud creaturæ sunt, quam cogitationum Dei quasi quædam voces extra prolata? Ita per verbum quodammodo iam sensibile factum sensibilia reformare. Quoniam vero Deus cuncta facit potenter, sapienter, beneuolè, decuit ita restituere illa, ut potentiam, sapientiam, beneuolentiamque ostenderet. Quid potentius, quàm extrema in vnam personam, & infinita ad summa redigere? Quid sapientius, quam vniuersi decorem miram primæ & vltimæ rationis copulam fieri? Quid beneuolentius, quam Deum vniuersi Dominum ob serui delinquentis salutem, serui formam assumere? Sic ergo & declarauit & fecit ut nihil esset in mundo deforme, nihil penitus contemnendum cum regi cælo-

rum terrena coniunxit, atque ea quodammodo cœlestibus adæquauit. Præterea quoniam à Deo ceciderat potentissimo, sapientissimo, benignissimo, idcirco in imbecillitatem, ignorantiam, malignitatemque corruebat, proptereaque ex pio profanus euadens, ineptus iam penitus erat ad diuinam virtutem imitandam, ad lucem cognoscendam, ad bonitatem denique diligendam. Ut ergo homo ex hac ruina rursus ascenderet ad sublimia, congruentissimum fuit, sublimem Deum ex alto huic manum porrigere, hac videlicet ratione, ut seipsum huic visibilem, amabilem, imitabilemque efficeret. Nullus ad hoc aptior modus, quam quod Deus fieret homo, ut homo, qui corporalis iam factus, corporalibus inhiabat, Deum iam quodammodo, & corporalem, & humanum clarius cognosceret, & amaret ardentius, facilius quoque & diligentius imitaretur, fieretque beatus. Postremo homo curari perfectè non poterat, nisi recuperaret mentis innocentiam, Dei amicitiam, suam excellentiam, quæ soli subiecta Deo fuerat ab initio secundum naturam. Neque excellentiam adipisci poterat, nisi curator esset Deus, cui soli homo secundum naturam subest, neque Dei amicitiam, nisi per congruū quendam conciliatorē, qui manū ad vtrunque posset extendere, & vtrisque extremis esset cognatus quodammodo & amicus, nullus est talis omnino, nisi sit Deus simul & homo, neque innocentiam, nisi culpa dimissa, quam dimitti sine satisfactione iustitia non permittit. Satisfacere pro vniuerso hominū genere solus poterat Deus, pati tamen neque decebat, nisi hominem, qui peccauerat, neque Deus ipse poterat. Consentaneum itaque fuit humanum genus per Deum factum iam hominem emendari, proinde neque excellentia comparari poterat, nisi per curatorem excellentissimum, neque amicitia reconciliari, nisi per amicissimum conciliatorem, neque recuperari innocentia, nisi per satisfactorem sufficientissimum. Excellentissimus autem curator solus Deus est, amicissimus conciliator est homo, sufficientissimus satisfactor ille propriè videtur esse, quia pariter est Deus & homo. Valde igitur humanæ curationi congruum fuit, quod Ioannes ait: diuinum verbum humanam induere carnem, ut genus humanum quemadmodum per æternum verbum creatum fuerat, deferendo autem inspiratum verbum, in culpam ceciderat, sic per visibile verbum à culpa redimeretur.

*Aduentus Christi dat beatitudinem,  
fide, spe, charitate.*

## CAPVT XIX.

**N**emo beatitudinem, quæ in diuina consistit contemplatione, consequi potest, nisi Deum ardentem amet, ardentem amare Deum nequimus, nisi speremus cum quandoque assequi posse, sperare non valemus, nisi prius credamus tum Deum esse, tum nos Deo posse quandoque frui. Deus igitur pater hominum & curator, aliquando miris modis indutus humanitatem, se nostris sensibus obtulit, ut per ipsos sensibus, quibus plurimum utimur & confidimus, corpus eius miraculaque cernentes esse Deum certiores essemus. Hinc fides exorta est scientiæ fundamentum. Qui verò crediderit, cum curandi humani generis gratia in molem corporis descendisse, omnia iam vel maxima se à Deo sperabit impetraturum.

Quisquis tanta beneficia partim videt, partim sperat, nisi penitus vecors, ingratusque sit, non amare non potest. Rursus cum Deum intelligas animo coniunctum fuisse quadam vnione personæ, sperare debes animum posse aliquando Deo coniungi, quadam operationis vnione, in qua summa beatitudo consistit. Desiderare quoque debes Deo præ cæteris inhærere, qui soli hominis animo, corporique se prorsus infudit. Proinde quia Deus homini absque medio se coniunxit, meminisse oportet, nostram felicitatem in eo versari, ut Deo absque medio hæreamus, & quia inter æquales amicitia est, dum consideras Deum quodammodo se homini adæquasse, neque amicitiam Dei erga te negare, neque tuam erga Deum deferere debes. Desinant igitur, iam desinant homines suæ diuinitati diffidere, ob quam diffidentiam mortalibus seipsum immergunt. Reuereantur seipsum tanquam diuinos, sperentque se posse ad Deum ascendere, quandoquidem ad eos dignata est quodammodo maiestas diuina descendere. Ament toto pectore Deum, in quem transformentur, qui ob ingentem amorem se mirabiliter in hominem transformauit.

*Aduentus Christi ad peccati grauitatem  
lenitiam utilis fuit.*

## CAPVT XX.

**V**ita corporis anima est, animæ vita Deus. Naturæ ordo exigit, ut corpus animæ, anima Deo pareat, iustitiæ ordo requirit, ut si à Deo dissentit animus, talionis poena dissentiat corpus ab anima, atque sensus à ratione. Rebellaui à Deo primi parentis animus, rebellaui corpus ac sensus ab eo, rebellio prima peccatum fuit, secunda; poena quædam peccati fuit, atque peccatum, quoniam rationi derogauit & Deo. Complexio affectioque rebellis à primo quasi sapor quidam profluxit in omnes, qui inde quasi riuuli à fonte manarunt. Hoc igitur originale vitium est cæterorum malorum animæ corporisque origo, hoc volumina illa Hebræorum testificantur, quorum diuinitatem testificatur summa illorum præ cæteris antiquitas, consensio penè omnium, propagatio per vniuersum, duratio indefessa, concordia, maiestas, sobrietas & miracula. Hinc illa Magorum à Zoroastre descendantium opinio, omnia scilicet corporis mala, à malis animæ proficisci, animæ curata cætera mala vitari, hoc Plato in Timeo quidem innuit, in Carmenide verò declarat.

Verum, ut ad propositum reuertamur, rebellio eiusmodi, quoniam infinitæ Dei derogauit maiestati, mortales ad infinitam beatitudinem ineptissimos reddidit, neque dirigi, nisi per infinitum Deum poterant. Dirigendi tamen aliquando erant, ne frustra à Deo fuissent ab initio ad beatitudinem ordinati. Per voluptatem commissum est peccatum, per contrarium voluptatis dolorem purgandum. Peccauit semel omnis quodammodo humana natura in homine illo, qui vicem gerebat omnium, pati similiter semel quodammodo debet omnis in aliquo, qui vicem quoque omnium gerat, qui longe magis cum Deo consentiat quam ille dissenserit. Omnium vero vicem post Adam solus ille gerere potuit, qui Deo penitus iunctus esset omnium conditori. Fuit igitur Deus simul & homo, Deus, ut omnes complecteretur, infinitamque culpam posset diluere; homo, ut pati pro culpa posset, atque ut pateretur homo, quemadmodum peccauerat homo. Sic & illius hominis poena meritumque vim aliquam habuit infinitam, in quantum re vera Deo iunctus fuerat infinito.

Infinito autem quedammodo supplicio meritoque opus fuerat, ad infinitam culpam penitus diluendam.

*Christus perfectum instructionis genus impleuit.*

## C A P V T XXI.

**D**Iuina prouidentia nullum erga filios suos institutionis genus prætermittere voluit. Est autem institutio duplex, per doctrinam videlicet, & exemplum. Doctrina perfecta est, de qua iure dubitari non debet, qualis in solo Deo esse conceditur, Misit igitur Pater Deus ad homines præceptorem aliquem, qui Deus esset, ne de doctrina eius dubitare deceret, adde & qui esset homo, vt ipse omnia humana officia verè exequi posset, omnesque pro honesto Deoque perferre labores, quo exemplo homines perfectè instrueret ad virtutem. Opera enim multo magis quam verba mouent, in disciplina præsertim morali, cuius finis proprius versatur in actione. Esse illum deum declarauerunt miracula, vt fidem apud dociles doctrina eius haberet, esse verò hominem passiones humanæ declarauerunt. Nullus igitur nobis, nisi pertinacissimum esse velimus, excusationi locus videtur esse relictus, si doctrinā eius quasi minus veram insolenter respucere nitimur, diuinitas miraculaque reclamant, si tanquam nobis supra modum duram, humanitas, laboresque magistri, & ducis illius ostendunt hominibus possibilia esse quæ pertulit homo. Denique quia delictorum summa in eo consistit, quod corporalibus nimium inhæremus, à spiritualibusue discedimus, Christus vitæ magister per doctrinam vitamque suam quasi gladiū & ignē immisit in mundum, hoc est virtutē purgatoriam, animique purgati, vt omnes corporalium vitiorum fomites resicaret ad viuum, atque consumeret. Ipse quoque singula vitro libenterque tulit, quæ cæteri fugiunt tanquam mala, peregrinationem, inedia, sitim, nuditatem, infamiam, contumelias, verbera, breuitatem vitæ, ignominiosam mortem & acerrimam. Fugit autem singula quæ tanquam bona cæteri prosequuntur, vt hac ratione nobis ostenderet, neque mala vera esse, quæ mala vocamus, neque bona, quæ vocamus bona, nihilque in rebus corporalibus esse, quod vilius precij censendum sit, sed quicquid præter Deum est, tenuis vmbre somnium extrinandum. Cum au-

tem omnibus, quæ à mortalibus optantur, tanquam bona careret, solis certè miraculis, solus ipse in orbe terrarum in hanc vsque diem meruit, & meruit subito, vt Deus summus existimaretur. Prophetas Hebræi sanctos homines vocant, Gentiles viros excellentes, cum deos nominant, diuinos iam factos & Dei ministros intelligunt. Mahumethenses regem suum Mahumethem filium Abdale, filii Abdal Muralibis Arabiæ regis, purum quidem hominem, sed Dei nuncium esse credunt, talem quoque ipse vocat in Alcorano. Addit se in vi armorum, Christum in virtute miraculorum missum à Deo fuisse, Deumque hominibus Iesum, & Mariam miraculum effecisse. Merito solus Christus stupendis operibus meruit, quod neque multi Principes hoc tum minis, tum beneficiis contendentes. Neque Zoroaster, Pythagoras, Empedocles, Apollonius Thianæus, aliique multi Philosophi, sapientia mirabili, & longa vita consequi potuerunt. Quamuis Pythagoram, Iamblicus Chalcideus longa disputatione, Apollonium vero Philostratus eloquentia, Porphyrius argutiis, multi Principes fauore pro viribus celebrauerint.

*Christus errores expulit, veritatem aperuit.*

## C A P V T XXII.

**A**Nte Christi aduentum per vniuersum penè orbem plures colebantur dii, imò dæmones, sacerdotesque & illi quidem mali, quod Enomaus Philosophus confitetur. Quis non videat illos fuisse malos, qui nihil de animorum purificatione curabant, de terrenis consulebant solum, ac terrena semper à cultoribus exigebant? Sacrificia iuebant obscenissima, & crudelissima fieri, responsisque suis discordias quam plurimas seminabant. Colebantur passim deorum, id est, beatorum loco, tyranni viuentes, colebantur animæ partim incontinentium, partim hominum iniquorum, his immanissimis monstris olim genus hominum premebatur. Non Hercules armatus ea, sed Christus inermis tunc extinxit, cum malignorum dæmonum vim retudit. Scribit Plutarchus, Barbarorum opinionem esse, aëreos dæmones, perturbationes, mortemque pati posse. Testimonia quoque multorum adducit, quod certis signis compertum fuerit, Tyberio imperante, Pana magnum dæmonem



dæmonem; multosque alios dæmones manifestè eiulasse, deinde etiā obiisse. Proculus etiā Platonius esse id posse probat. Nos autem scimus Christum eo ipso in tempore adiisse Ilybium, atque resurrexisse. Plutarchus præterea scribit, Oracula temporibus suis vno vel duobus exceptis, toto iam orbe extincta. Audi qua voce de hoc Porphyrius conqueratur. Postea, inquit, quàm Iesus colitur, nihil utilitatis à diis consequi possumus. Si dii sunt, ô Porphyri, quare viribus suis Iesu virtutem non deprimunt? Sed audiamus magnum illum Tertullianum apud Romanos iudices sic orantem: Agatur huc iudices aliquis sub tribunalibus vestris, quem dæmone agi constet. Iussus à quolibet Christiano loqui spiritus ille, tam se dæmonem confitebitur de vero, quam alibi Deum de falso. Æquè producat aliquis ex iis, qui de Deo pati existimantur, nisi omnes eiusmodi spiritus se dæmones confessi fuerint, Christiano mentiri non audentes, ibidem illius Christiani procacissimi sanguinem fundite. Quid isto opere manifestius? quid hac probatione fidelius? simplicitas veritatis in medio est, virtus illi sua adsistit, nihil suspicari licebit, magia, aut aliqua eiusmodi fallacia fieri. Atqui ut omnis hæc nostra in illo dominatio & potestas denominatione Christi valet, ita & de contactu, deque afflatu nostro, etiam de corporibus nostro Imperio excedunt inuiti, & dolentes, & nobis præsentibus erubescences, credite illis cum verum de se loquuntur, qui mentientibus creditis. Nemo ad suum dedecus mentitur, quin potius ad honorem Christianis ad probandam veritatem cogentibus, se deos palam esse negant, neque alium Deum respondent præter unum, cui nos mancipamur. huc vsque Tertullianus. Lactantius scribit suis temporibus hoc publicè quotidie compertum fuisse, cum Gentiles suis dæmonibus immolarent, si assistebat aliquis cruce signatam frontem gerens, neque poterant dæmones in visceribus bestiarum futura depingere, atque hanc fuisse causam, inquit, præcipuam, malis rebus Christianos persequendi. Non enim animaduvertebant signo crucis tanquam potentiore, dæmones tanquam debiliores inde fugari. Meritò Socrates, Plato, & Varro, quamuis latenter propter turbam, superstitiones Gentilium deriserunt. Iesus denique illas perdidit, ne homines perderentur. Græci atque Romani paulo ante Christi lumen cœperant Aristippi, Epicurique contagiosa impietate magis indies magisque corrumpi. Innumerabiles Chri-

sti exemplo Martyres vbique Gentium, partim literatissimi, cum præsentem vitam Dei vnus, futuræque vitæ gratia, prorsus contemnerent, contra Aristippicum Epicureumque venenum Medicinam hominibus saluberrimam porrexerunt. Præterea iniquissimæ apud multas Gentes leges extrabant. Persæ matres suas nephandis nuptiis cognoscebant. Humanis Scythæ dæmonibus sacrificabant. Massagetæ ac Derbices propinquos & affines suos cum consensissent immolabant, carnesque eorum epulabantur. Bactri canibus ad hoc ipsum nutritis senes obiciebant. Scythæ eos qui à defunctis amati fuerant, viuos infodiebant. Tybareni viuos seniores suos præcipitare. Hircani Caspiique rapaci auium generi, canibusque prolicere soliti, illi viuos, isti mortuos. Hæc & multa generis eiusdem prius religiosissimè faciebant. Sola deinde Christi discipulorumque illius prædicatione, vndique truculentissima hæc pestis expulsa, factum est etiam, ut pauciores, vel corripiantur à dæmonibus, vel à ipsis interimantur. Iudæi ante Christi aduentum (ut plurimum) legis Mosaicæ, Prophetarumque suorum superficiem attingebant, Christus autem eiusque discipuli, perfectissimè docuerunt profundos diuinæ mētis sensus linceis, imò diuinis oculis penetrare quòd etiam Iudæus Philo testatur, vbi de contemplatione disputans commendat acumen, & sanctimoniam Christianorum. Prisca Gentilium Theologia, in qua Zoroaster, Mercurius, Orpheus, Aglaophemus, Pythagoras consenserunt, tota in Platonis nostri voluminibus continetur. Mysteria huiusmodi Plato in Epistolis vaticinatur, tandem post multa sæcula hominibus manifesta fieri posse. Quod quidem ita contigit, nam Philonis, Numenique temporibus primùm cœpit mens priscorum Theologorum in Platonis chartis intelligi, videlicet statim post Apostolorum Apostolicorumque discipulorum conciones & scripta, Diuino enim Christianorum lumine vsi sunt Platonici ad diuinum Platonem interpretandum. Hinc est quòd magnus Basilus, & Augustinus probant, Platonicos Ioannis Euangelistæ mysteria sibi vsurpauisse. Ego certè reperi præcipua Numenij, Philonis, Plotini, Iamblici, Proculi mysteria, ab Ioanne, Paulo, Yerotheo, Dionysio Areopagita accepta fuisse. quicquid enim de mente diuina angelisque, & cæteris ad Theologiam spectantibus magnificum dixere, manifestè ab illis vsurpauerunt.

*Christus est idea & exemplar virtutum.*

C A P V T XXIII.

**Q**uid aliud Christus fuit, nisi liber quidam moralis, imò diuinę Philosophiæ viuens de cœlo missus, & diuina ipsa idea virtutum humanis oculis manifesta? Huc igitur omnes, huc inquam festinus oculos, atque mentem, hic veram sapientiam nos docebit, cui rudes olim non unclos subito reddidit sapientes. Hic rectam iustitiam, cui nihil possedit propriam, atque quod suum est, Deo & hominibus tribuit. Deo quidem paternam & plusquam paternam venerationem, hominibus verò fraternam beneuolentiam atque curam. Hic magnanimitatem, fortitudinemque præstantissimam, cui nihil in terris concupiuit tanquam magnum, nihil timuit tanquam durum. Hic temperantiam singularem, in quo vix primi animi motus (& illi quidem remissi, & decentes) apparuerunt. Hic mansuetudinem incredibilem, qua superbiam societatis humanę pestem penitus expellamus. Quis enim mansuetor illo, qui cum summus omnium esset, se infimis adæquauit? Hic ardentissimam in omnes homines charitatem, qui non sibi tantum, verum etiam toti hominum generi vixit, qui & mortuus est libenter, ut ceteros à morte redimeret. Hic & contenti plandi & agendi regulam perfectissimam cui sæpè curandis hominum erroribus atque morbis sapiissimè rebus diuinis contemplandis incubuit.

Huius vitę testes nobis sũt scriptores quidem ab initio plures, omniumque grauissimi. Imitatores verò quam plurimi, & mundus denique vniuersus. Oculis se Christus publicè hominibus breue tempus. Non enim quoad illum decebat, ultra & illud nobis sufficiebat, tot verò patrauit miracula, ut Ioannes dicat, si scriberentur singulatim, non undum quidem ipsum libros capere posse. Viram eius utpote celeberrimam, cunctis que mirabilem plures quam quatuordecim scripsisse traduntur. Soli tamen illi in vñ sunt aut aliquando fuerunt, qui non humana, sed diuina scripsere manu. Quales sunt Mathæus, Marcus, Lucas, Ioannes. Mathæus Hebræe scripsit, cuius textum Hebræicum Hieronymus (inquit) temporibus suis in Bibliotheca Pamphili extare sic etiam factam fuisse transcribendi illius facultatem a Nazareis, qui in Bersabe, & per Syriam hoc volumine utebantur. Panthenus etiam Stoicus Christi

martyr cum usque ad Indiam interiorem Christi verba prædicando penetrauisset, inuenit ibi tum Bartholomæi Apostoli emina, tum etiam Mathæi Hebræicum Euangelium, quod secundum Hebræos appellabatur, probatum satis ab Ignatio, ac Origene & ab Hieronymo ex Hebræica lingua in Græcam Latinamque conuersum. Hæc ab Hieronymo. Atque in hoc vel maxime Christiano elucet veritas, quæ Christianorum cœtus ab ipso exordio haud timere quoslibet scriptores admittit, sed sanctos, simplices, sobrios, & quam electissimos. Qui verò ex primis illis in præcio sunt, partim Christum ipsum, partim eius discipulos audierunt, qui & si diuersis linguis, temporibus locisque scripserunt, & alter alterius scripta non viderunt, nisi fortè Ioannes, eadem tamen ubique eundem veritate confirmarunt. Apparet interdum in illis quasi dissona quædam in rebus minimis dissimilitudo, nunquam reuera contrarietas. Vnde simpliciter videtur alter seorsum ab altero historiam conscripsisse, nullius tamen horum seorsum à veritate. Miracula verò tam multa quam magna, tam publica, tot annos in Iudæa, & Ierusalem ubi facta dicuntur, prædicauerunt, ut constet illos verissimè prædicauisse. Quonam pacto falsa asseuerando obtinere in re tam ardua, inter homines eruditissimos potuissent? Vnde nam admirationi essent, si pugnantia inter se dixissent? Nisi duces illi re vera inuicem conuenissent, Christianum regnum fuisset subito dissipatum. Euangelistæ, & Apostoli de Christi vita, doctrinaque communiter multa dixerunt, & quisque proprium aliquid in medium attulit. Sine enim quilibet vniuersa dixisset, superfluum videretur numerus cæterorum, siue singuli quædam solum atque non continua-tio, & authoritas historiæ tolleretur. Certè id, quod mirum est, talia sunt, Mathæi, Marci, Lucæ, Ioannis, Petri, Pauli, Iacobi, Iudæ scripta, ut in rebus principalibus plures testes adsint. Ac si testes omnes audiamus, nihil superfluum, & importunè repetitum videamur audisse.

*Authoritas Sybillarum.*

C A P V T XXIV.

**V**arro Philosophus in libris Diuinorum rerum, decem Sybillarum nomina, tempora, patrias diligenter commemorat, atque ad id scriptores multos testes adducit. Affirmat præterea, libros

Sybillinos fuisse apud Romanos in sacratio conditos, ubi à quindecim viris, & quibusdam sacerdotibus ad hoc destinatis custodiebantur. Addit Lilius Romanos sex libros illos Cumæ, regnante Tarquinio à quadam anicula concremaros, restituisse ex aliarum Sybillarum versibus, quos missis per orbem legatis diligentissime collegerunt.

Tres igitur libri apud eos erant Cumæ, reliqui aliarum, Hi verò libri nullo titulo, seu nomine, cuius harum essent, discerniebantur, præterquam Erethræ, quæ carmini nomen suum inseruit. Carmina hæc Romani de rebus maximis consulebant, neque cuilibet licebat aspicere. Maroni tamen Augusti, Lactantio Constantini familiaritate legere permissum existimo, aliisque nonnullis magnis, doctisque viris, Imperatore interdum, & custodibus concedentibus Lactantius ergo Constantini familiaris, testimonia Sybillarum quæ de Christo adducit, ex earum libris, qui tunc extabant, Roma nondum à quoquam expoliata, accipere potuit. Scripsit autem illa ad Constantinum, non igitur illi mentiri licebat, vel docto imperatori, vel cæteris eruditis, quibus tunc tam Italia quàm Græcia abundabat, ac nonnihil adhuc Christianos scriptores, vel in minimis grauer calumniabantur. Nonne Virgilius in eisdem Sybillarum libris legit, quæ Prophetæ & Euangelistæ de Christo loquuntur, & quod maximum est, cognouit Cumæ Sybillæ promissa ex textu, ut opinor, Sybillæ ipsius illis conuenire temporibus, in quibus natus est Iesus, quamuis ille, ut Pollioni adularetur, ad eius filium nuper natum nomine Saloninum, oracula Sybillæ torqueret, quorum nihil Salonino, qui puer obiit, neque egit quicquam, congruere potuit, congruit autem quicquid ibi legit de Iesu, qui temporibus illis est ortus. Sed quid illic Virgilius reperit (talividelicet quodam tempore) quale illud fuit, fore, ut in ipsa vltima expectationis ætate magnus quidam ordo nasceretur ab integro sæculorum æuo dependens, id est, æternus filius ab æterno patre dependens, aliquando etiam nasceretur in tempore. Quando scilicet Virgo floreret, aurea rediret ætas, id est, ex virgine filius pullularet, & ætas veræ beatæque doctrinæ vigeret, ac noua progenies cælo demitteretur ab alto. Hæc verba exponunt antecedentia, cognoscimus enim Sybillam ex Virgine puerum illum nasciturum prænunciassse, quoniam adiunxit, tam esse progeniem nouam, id est, nouo modo nascentem, neque ex terra sed ex

cælo, id est, Deo, in quo erat ab eo proficiscentem. Carmina ipsa Virgilij huiusmodi sunt.

*Vltima Cumæ venit iam carminis ætas,  
Magnus ab integro sæclorum nascitur ordo,  
Iam redit & Virgo, redeunt Saturnia regna.  
Iam noua progenies cælo demittitur alto.*

Arbitror equidem Virgilium huiusmodi carmina extalibus Sybillæ verbis, qualia paulo ante narraui, contexuisse. Subiungit Virg. quæ apud Sybillam legisse opinor, scilicet eo nascente, ferream ætatem in auream reducturam, atque eo tempore decus cui futurum. Totum hoc ad purgationem animorum, doctrinamque Christi pertinere videtur, & vestigia præcæ fraudis irrita fore. Legerat puto apud Sybillam, tunc originalem culpam quam ab initio diabolica fraude concepimus, deleri debere, ipse tamen cum mysteria huiusmodi nequaquam intelligeret, verba Sybillæ ita carmine componebat, ut alium quendam sensum præferre viderentur. Subiungit Maro: Quod huiusmodi progenies Deum vitam accipiet, diuisque videbit permixtos heroas, & ipse videbitur illis, Pacatumque reget patris virtutibus orbem. Videtur ibi legisse, prolem illam fore Deum Deo natum, Dei patris virtute vniuersum mundum gubernaturum, & iudicaturum, nihilque diuinorum sibi fore secretum, ipsumque Angelos omnes ministros habiturum. Addit Poeta, eodem tempore casurum serpentem, & fallacem veneni herbam, & post multa adiicit. Pauca tamen suberunt præcæ vestigia fraudis. Quo sensu hæc Virg. scripserit, nescio, satis est nobis, quod habuit à Sybilla, quam nequaquam intelligebat, opera prolis illius. Serpentem, id est, malum dæmonem ruinurum, domandamque fore herbam venenosam, atque fallacem, id est, dæmonum vim, quæ ante Christum homines falsa religione, quasi vera fallebat, & ab initio illos serpentis habitu, & plantæ cuiusdam occasione deceperat. Tentat dæmon adhuc animas post Christum, licet non ita consequatur ut ante, & ob hoc dictum fuit. Super fore pauca fraudis vestigia. Porphyrius etiam confitetur mortales à malignis dæmonibus in scelera, falsasque religiones induci consuevisse, idque diligenter in libro de abstinentia disputat. Præterea progeniem illam Virgilius sic alloquitur.

*Aggredere o magnos, aderit iam tempus,  
honores.*

*Chara Deum soboles, magnum Iouis incrementum.*



Credo Poëtam habuisse à Cumæa hominem illum expectatissimum, sobolem Deifore, non viri, & id quo nihil maius exprimi potest, Magnum Dei incrementum fore, id est, propaginem Dei æternam, propagationemque ipsius usque ad temporalia atque sensum, per quam Dei regnum, id est, beatorum numerus cresceret. Tantam fuisse scio in Marone prudentiam & modestiam, ut existimare nequeam, cum tam vasta hyperbole erga infantem filium prinati ciuis Pollionis vsum fuisse, nisi talia quedam supra modum ingentissima, ex Sybillinis carminibus hausisset. Sybilla etiam de simplici homine, qui non esset Deus, tam miranda nequaquam pronunciasset. Sed audi quam superbam Virgilius adiungat hyperbolem.

*Aspice connexo nutantem pondere mundum,  
Terraq; tractusque maris, cælumque profundum,  
Aspice venturo latentur ut omnia seculo.*

Fortè Sybilla scripserat Sobolem illam Dei ab elementis, cœlisque honorandam. Honorauit autem Iesum, cœlum eclypsi, aër, ignisque crinito fulgore, aqua cum dictis eius paruit, pedesque sustinuit, terra motu, cum Tyberio imperante cruci affixus fuit. Posti emo exclamat Poëta, quamuis quid petat ignoret. *O mihi tam longè maneat pars ultima vite.* Fortè Sybilla, quod & Prophetæ optauerunt, diem Christi videre optabat, ac tum primum vita decedere, quod cum Symeon optasset diu, fuissetque in senio consecutus, exclamauit. Nunc dimittis seruum tuum Domine, secundum verbum tuum in pace. Quia viderunt oculi mei salutare tuum & quæ sequuntur.

*Testimonia Sybillarum de Christo.*

## C A P V T XXV.

**L**ibros Sybillinos, sicut in superioribus diximus, Senatus Romanus habebat. In illa Lactantius Imperatoris Constantini familiaris, quædam legit manifestè ad Christum Dei filium pertinentia. Primum quidem illud Erithrææ, ubi Deum prædicat nutritorem omnium, creatoremque, qui dulcem spiritum omnibus tribuit, ac principem omnium deorum fecit. Rursusque ait: Ipsum dedit Deus fidelibus hominibus honorandum. Et alia Sybilla præcepit, hunc oportere cognosci, dicens. Ipsum tuum cognosce Deum, qui Dei filius est: Hoc est quod legitur apud Danidem: Dixit Dominus

Domino meo, sede à dextris meis. Item: Ex utero ante Luciferum genui te. Item: Dixit Dominus ad me, Filius meus es tu, ego hodie genui te. Et apud Salomonem. Deus condidit me in viarum suarum initio, in opera sua antefecula, fundauit me in principio antequam terram faceret. Et paulò post: Cum pararet cælos aderam illi, & reliqua. Collegit præterea Lactantius de Christi operibus & morte, ex Sybillinis libris talia: Mortuorum resurrectio erit, claudorum cursus velox, surdus audiet, cæci videbunt, loquentur non loquentes. Quod etiam ita cecinit Esaias. Confortamini manus resolutæ, genua debilia consolamini, qui estis pusilli animi, nolite timere, nolite metuere, Dominus noster iudicium retribuet, ipse veniet, & saluos faciet nos, tunc aperientur oculi cæcorum, & aures surdorum audient, tunc saliet claudus sicut ceruus, & plana erit lingua mutorum, quia rupta est in deserto aqua, & riuus in terra sitiendi, quod Baptismi tempus significat. Verum sequamur, quod collegit Lactantius ex Sybillis. Panibus simul quinque, & piscibus duobus, hominum quinque millia in heremo satiabit, & reliquias tollens, duodecim cophinos implebit in spem multorum, ventos compescet verbo, sternet insanum mare pedibus pacis, fideque calcans fluctus perambulabit, morbos hominum resoluet, viuificabit mortuos, arcebit dolores à multis, omnia verbo agens, omnem infirmitatem curans, miserabilis, ignominiosus, informis ut spem miserabilibus præbeat, in manus infidelium iniquas veniet, & dabunt Deo alapas manibus incestis, & in puro ore expuent venenata sputa. Dabit verò ad verbera simpliciter sanctum dorsum, & colaphos accipiens tacebit, ne quis agnoscat, quod verbum vel unde venit ut mortuis loquatur, & corona spinea coronabitur, Ad cibum autem fel, & ad sitim acetum dederunt, in hospitalitatis hanc monstrabunt mensam. Ipsa enim insipiens Gens, tuum Deum non intellexisti, ludentem mortalium mentibus, sed spinis coronasti, & horridum fel miscuisti. Templi verò velum scindetur, & medio die nox tenebrosa nimistribus horis, & mortis fatum finiet. Tribus diebus somno suscepto, & tunc è mortuis egressus, ad lucem veniet, primus resurrectionis principio vocatis ostenso. Quando hæc perfecta erunt, quæ dixi, in ipsum omnis lex soluetur. Item alibi dicitur à Sybilla, Iudæorum beatum futurum genus celestium, videli-

cet propter excellentiam Christi, cuius gratia multi Iudæi ipsi adhaerentes, diuini ante alios euaserunt. Adunxit Eritrea: Dicent Sybillam insanam, & mendacem, cum autem facta fuerint vniuersa, tum mei meminerint, neque me iam quisque mendacem dicet, sed Dei magni Prophetam. Adducit Aurelius Augustinus multa Eritreae Sybillæ carmina, in Latinam linguam translata, quæ vidit Græca apud Flaccianum Proconsulem virum doctrina clarissimam, in quorum capitibus talis erat ordo literarum, vt hæc in illis verba legerentur: Iesus Christus Dei filius saluator. In illis carminibus resurrectio corporum describitur, mutatio sæculorum, Dei aduentus ad iudicandum, præmia, & supplicia hominum sempiterna. Talia quædam legunt etiam apud Mercurium Trismegistum. Plato quoque interrogatus quatenus in præceptis eius quiescendum esset, Traditur respondisse, quatenus in terris appareat sacratior aliquis, qui fontem omnibus veritatis aperiat, quem denique sequantur omnes.

*De Authoritate Prophetarum, nobilitate veteris testamenti, excellentia noui.*

## C A P V T XXVI.

**D**ionysius Arcopagita ad sapientem Polycarpum scribit, Persas, Babylo-nios, Ægyptios in Annalibus suis adnotauisse tanquam miracula, & quasi diuina in sacris suis coluisse, ac colere prodigia illa, quæ Hebræi de statu regressioneque cælestium à Deo facta per suos narrarunt. Plato Solis retrogressionem & illuionem aquæ ignisue vastationem non tacuit. Ab Iosepho, Aristobolo, Tertulliano, Eusebio testes adhuc Gentilium multi citantur. Berosus scilicet Chaldæus, Manetus Ægyptius, Hieronymus Phœnicis Tyrij rex, Mendesium, Ptolemæus, Menander, Ephesus, Demetrius, Phalereus, Rex Iuba, Thallus, Appion, Nicolaus Molus, Damascenus, Hesiodus, Ecateus, Elanicus, Acusilaus, Ephorus, Theophilus, Manasses, Aristophanes, Hermogenes, Euemerus, Comon, Zephyrus, Abidenus, Estieus, Sybilla, Eupolemon, Alexander Artapanus, Melon, Theodorus, Philon Gentilis, Aristæus, Ezechielus, Timochares, Polyhistor, Numenius, Chorilus, Sachoniato Africanus, Alpheus, Megasthenes Hi singuli fermè singula, cuncti certè cuncta, quæ pertinent ad antiquitatem cæteris priorem, mirabilia gesta, doctrinam sum-

mam Hebræorum, & miracula Bibliorum confirmarunt. Ex quibus apparet, quod Clemens Alexandrinus & Atticus Platonius, & Eusebius, & Aristobolus probant. Gentiles videlicet, siqua habuerunt egregia dogmata & mysteria, à Iudæis vsurpauisse. Sed quæ apud illos historia simplici continentur, ab iis in Poëticas fabulas fuisse translata, quod Phæactontis ruina, Deucalionque declarat, cæteraque quam plurima. Plato vsque adeo Iudæos imitatus est, vt Numenius Pythagoricus dixerit, Platonem nihil aliud fuisse quam Mosen Attica lingua loquentem. Addit in libro de bono, Pythagoram quoque Iudaica dogmata sectatum fuisse. Plato in Epinomide, scientiarum causam inquit fuisse barbarum quendam qui primus hæc inuenit, post addit, ab Ægyptiis, Syriisque cuncta manasse, Iudæa verè ex quadam sui parte, quam Galilæam Plinius vocat, semper in Syria à scriporibus habita est, & ex parte quadam rhœnicia etiam apud priscos appellatur, vt Eusebius probat. Proculus quoque Platonius, Theologiam Syrianam rhœniciamque ante alias veneratur. Plinius ait, Phœnices literarum, & Astrologiæ inuentores fuisse, qui etiam Chaldæos laudant, Iudæos, qui & Chaldæi nominati sunt (vt probat Lactantius) videntur extolere. Ob hanc, vt arbitror rationem Orpheus inquit, Deum soli Chaldæo cuidam notum fuisse, Enoch vel Abraham, vel Mosen significans. Volunt Platonici, Zoroastrem ab Orpheo significari, hic autem, vt vult Didymus in Genesis commentariis, filius fuit Cham Noë filij, & ab Hebræis appellatus Chanaan, qui, vt Eusebius probat, tempore Abraham adhuc vivebat. Meminisse debemus Iudæorum dotes laudesque transire ad Ægyptios facile potuisse, vicini enim semperque permixti erant. Alexand. Eupolemonque scribunt: Abraham sanctitate sapientiaque fuisse omnium præstantissimum, hunc docuisse Astrologiam, Chaldæos primum, deinde Phœnices, demum Ægyptios sacerdotes, solitumque dicere, eam se habuisse à successoribus. Enoch, qui eius inuentor extiterit, & Atlas fuerit nominatus. Iulius Firmicus Astronomicus Abraham ob mirabilem sapientiam diuinum appellat. Artabanus quæcunque de Mercurio Trismegisto dicuntur, ostendit fuisse in Mose, & à Mose gesta, cumque Mercurium ipsum fuisse appellatum, insuper esse Musæum. Quod autem à Mose Gentilium doctrina habuerit incrementum, non diffidet, qui Porphyrium audiet dicentem,

Mosen antiqui Saconiatonis testimonio, ante primos Græcorum Philosophos annis mille quingentisque fuisse. Porphyriusque idem in lib. de Responsis, adducit Apollinis oraculum, in quo continetur quod inclita valdeque sancta gens Hebræa præ cæteris nouit, recepit, & tradidit veram sapientiam, optimum Dei cultum, vitamque beatam. Præterea in libro de abstinentia religiosos quosdam, Philosophosque Iudæorum, quos Essæos vocant, tantis prosequitur laudibus vt eos ante alios omnes & Prophetas, & sanctos, & diuinos ostendat. Ad idem vitur etiam testimonio Theophrasti Peripatetici dicentis: Eos ieiunio, orationique assidue operam dare, antiquosque Iudæos natura Philosophos esse. Nec immerito. Libri enim Sybillini Iudæorum genus cœleste beatumque appellauerunt. Clearchus Peripateticus scribit Aristotel. fuisse Iudæum. Calanos quoque Philosophos apud Indos Iudæos fuisse. Megasthenes insuper Brachmanas Indiæ Philosophos à Iudæis asserit descendisse. Ambrosius, si rectè memini, Pythagoram patre Iudæo natum ostendit. Mitto quod Iudæorum antiquitatem, sapientiamque Strabo, Iustinus, Plinius, Cornelius, Tacitus tacere non potuerunt. Non igitur paruifacienda est antiquitas Iudæorum, quorum scripta non esse à Gentilibus contempta, imo vsurpata fuisse ex eo coniicimus, quod Aristobolus probat volumina Mosis ante Alexandrum & ante Persarum Imperium in Græcam linguam fuisse traducta, tota verò Biblia, Ptolemæo Philadelpho regnante. Ad quam quidem traductionem (vt testatur Aristæus, qui interfuit) Regem induxit Demetrius Phaleræus Peripateticus, qui in Epistola ad Regem ipsum inquit, se legisse quædam Iudæorum volumina iam diu traducta tantæ certè admirationis, vt integra, & diuina sola legum sanctio Iudaica videatur. Idem de ea lege Ecateus Abderita confirmat. Cur innumerabilibus penè muneribus eam traductionem Ptolemæus emit? cur tanto honore transfatores, & Pontificem, postquam traduxerant, affecit? qui hoc ambigit, Aristæum legat & Iosephum. Nihil supra. Dic amabo, qualem putas fuisse Ierosolymam, in qua duos & septuaginta viros ex aliorum numero elegit Pontifex præstantissimos, Hebraicæ, Græcæque linguæ apprimè peritos. Merito Plinius Ierosolymam urbem præclarissimam Urbium omnium Orientis appellat, amplissimam quoque munitissimamque fuisse Aristæus, Ecateus Philo-

sophus copiosissimè narrauerunt. A deo verò capacem fuisse monstrat Iosephus atque Eusebius vt in obsidione à Romanis facta, supra vndecies centena millia Iudæorum in ea vrbe perierint: præterea ultra nonaginta millia venundata fuerint. Verum non erat propositum nostrum de terrenis vrbis illius, sed de cœlestibus dotibus disputare. Quod quidem si quis cognoscere vult, non modo quæ supra narrauimus, cogitet, verumetiam & multo magis eorum scripta legat, atque relegat. Reperiet tandem quam grauis sit autoritas Prophetarum, quorum legibus, oraculisque tot sæculis credunt, & parent Iudæi, Christiani, Mahumetenses, & vt summam dicam, omnes quas terra substat nationes. Tantum verò superat Christiana doctrina Mosaicam, quantum ciuilem virtutem superat purgatoria. Discurret in Euangelis Christus per omnes vitiorum spinas, & quas in ætate illa magis inculta Moses amputauerat (talem enim seruare ordinem docuit) eas ipse prorsus extirpat. Vbi enim qui adulterium, homicidiumque cogitat, adulterum iam homicidamque denunciat, neque dentem vnum pro vno dente extrahi gratia vindictæ permittit ulterius, sed percutienti genam alteram mansuetè iubet efferri, bonaque pro malis retribui. Si te turbat, inquit, oculus tuus, aut dextera, erue, atque abscinde, id est, primum ipsum ad lasciuiam vel vindictam, incitamentum prorsus extingue. Sunt & alia multa generis eiusdem, ex quibus apparet testamentum nouum esse absolutum finem veteris testamenti, tantoque præstantius illo, quantum ea, quæ sunt ad finem, finis excedit.

*Testimonia Prophetarum de Christo.*

## C A P V T XXVII.

**S**crutamini scripturas in quibus vitam æternam putatis habere, illæ sunt quæ testimonium perhibent de me. Hac voce apud Ioannem aduersum Iudæos maxima fiducia Iesus noster exclamat, vt pote qui sciat testimonia diuinitatis suæ quamplurima quærentibus non defutura. Sed admonet, vt non tam cortices diuinorum oraculorum attingant, quam medullas perscrutari conentur. Nam apud Prophetam Deus prædixerat. Aperā iū parabolis os meum. cructabo abscondita à constitutione mundi. Iudæi duplex habent ab antiquis sacrarum literarum volumen: alterum quidem Hebraicis literis, & oratione Hebraica,



alterum Chaldaea oratione, sed Hebraicis literis scriptum, & ut testatur Rabi Salomon, & Rabi Moses Aegyptius, Chaldaeo textui nullis unquam ausus est contradicere, utriusque igitur apud illos par auctoritas, sententia quoque eadem: sed quod in altero brevius, vel obscurius est, in altero saepe latius atque clarius. Eadem ratio est sacrarum literarum apud nos, quas à septuaginta duobus Iudaeis in Graecam linguam, & ab Hieronymo rursus ex Hebraea & Graeca in Latinam translatae habemus. Sed audiamus iam testimonia Prophetarum.

Jeremias. Ecce dies veniunt, dicit Dominus, & suscitabo David germen iustum, & regnabit Rex, & sapiens erit, & faciet iudicium, & iustitiam in terra, & paulò plus. Et hoc est nomen, quod vocabunt eum Dominus iustus noster, ubi Hebraicè dicitur (David) Chaldaicè habetur (Messiam) cum dicit ecce dies veniunt, ostendit absque diuturna mora, post Ieremiam, venturum fore Messiam, quod quidem falsum esset, si adhuc venturus esset. Aperit praeterea Messiam fore Deum, nam ubi translatio dicit Dominus, Hebraei habent nomen illud tetragrammaton, id est, quatuor literarum, quod praeter ceteris diuinis nominibus adeò apud deos est venerandum, ut nulli creaturae conveniat, de quo latè disputat Moses Aegyptius in libro de Directione. Vnde abba Iudaeus lib. Tren. ubi quaeritur, quod sit Messiae nomen, respondet, Adonay est nomen eius, ponens ibi nomen illud mirabile tetragrammaton, & adducens illud Ieremiae, hoc est nomen, quo vocabunt eum Dominus iustus noster. Non autem dicendum vocabit: sed vocabunt, sic enim Chaldaea translatio, & septuaginta Interpretes docuerunt.

Esaïas. Parvulus natus est nobis, & filius datus est nobis, & factus est principatus eius super humerum eius, & vocabitur nomen eius admirabilis consiliarius, Deus fortis, pater futuri saeculi, princeps pacis. Hæc Hebraicè Chaldaeus. Illorum textus habet: Infans datus est nobis: & recipiet super se legem ad scrutandum eam, & vocabitur nomen eius de ante, admirabilis consiliarius, Deus fortis, permanens in saecula saeculorum Messias, in cuius diebus pax multiplicabitur. Ostendit Messiam Deum fore, regnum eius spiritale, mundi-que alterius. Venturum illum Octaviano imperante, sub quo uniuersalis, & diuturna pax fuit. Monarchia mundi latissima, felicissimaque, & orbis uniuersi descriptio.

Quod autem hæc regi Ezechiae accommodari non possunt, patet, quia subdit: multiplicabitur eius imperium & pacis eius non erit finis. Item, super solum Dauid, & super regnum eius sedebit, ut confirmet illud, & corroboret usque in saeculum. Hæc solum ad diuinam animarum pacem & imperium spiritale pertinere possunt. Vnde Moses Aegyptius in Epistola ad Affricanos exponit de Messia puero nato sex illa nomina, scilicet admirabilis, consiliarius, Deus fortis, pater futuri saeculi, princeps pacis. Sed cur translatio septuaginta loco sex verborum ponit solum, magni consilij Angelus? Quia cum diuina eloquia Ptolemæo Gentili interpretarentur, saepe quæ ad Christi diuinitatem pertinent, vel prætermiserunt, vel mutauerunt, ne fortè ille putaret Iudæos existimare Messiam esse Deum in quantum homo, & Deum à summo Deo diuersum, duosque deos esse. Sed Christi diuinitatem Hebraicus textus, Chaldaeusque & translatio ex Hebraeo declarant. Deridendi verò sunt Iudæi quidam, qui in superioribus Esaïæ verbis dici volunt vocabiturque potius quam vocabitur. Nam Interpretes Ixx. vocabitur transtulerunt, & Chaldaea translatio monstrat, vocabitur esse dicendum.

Micheas. Et tu Bethleem Eufрата nequaquam minima es in millibus Iuda, ex te enim egredietur, qui sit dominator Israël, & egressus eius sicut ab initio ex diebus æternitatis. Chaldaeus textus post egredietur adiungit, Messias, ostendit Messiam tanquam Deum ab æterno fuisse, & tanquam hominem ex Bethleem egressurum. Quisquis ergo de rege Ezechia puro homine & temporali hoc exponit, manifestè delirat. Rabi autem Salomon Messiae regi accommodat.

Zacharias. Exulta satis filia Syon, iubilans filia Ierusalem, ecce rex tuus venit tibi sanctus. (Aliter, Iustus) & saluator, ipse pauper ascendens super asinam & pullum eius, & dispergam quadrigam, & Effrain, & equum de Ierusalem dissipabitur arcus belli, & loquetur pacem Gentibus, & potestas eius à mari usque ad mare, & à fluminibus usque ad fines terræ. Rabi Salomon Iudæus hunc locum exponens dicit, verba hæc non posse nisi de Messia rege intelligi, cui ceteri Iudæi consentiunt. Ex quo patet Messiam venturum fuisse Ierusalem, tanquam inopem, & super asinam, regnumque eius non fore terrenum, & salutem ab eo animarum potius quam corporum: & per solam sanctitatem, imo &

mortem : Adiungit enim Zacharias : Tu autem in sanguine testamenti tui misisti victos tuos de lacu , id est , antiquos ex limbo. Talia verò de solo Iesu leguntur, quem quidem hominem fore ac Deum Zacharias innuit quando dixit, cum pauperem super asinam imbellemque fore, nullis armis sed sola pacis doctrina vsurum, & tamen saluatorem regemque appellat, vbique regnantem. Dei autem hoc officium est.

Iacob in Genesi : Non auferetur sceptrũ de Iuda, nec dux de femore eius, donec veniat qui mittendus est, & ipse erit expectatio Gentium. Vbi Hebraicus textus habet ( dux ) Chaldaeus habet ( scriba ) de filiis filiorum eius. Vbi Hebraicè dicitur, qui, Chaldaicè habetur Messias. Vbi dicitur, & ipse erit, & cætera, Hebraica veritas habet Ei Gentes aggregabuntur. Constat autem Iacob de Messia aduentu loqui, sic enim Chaldaum declarat volumen, quod sequentes Moses Gerundensis & Chachadias & Chanihis Iudæi de Messia illic verba fieri consentunt. Iesum verò fuisse Messiam constat, quia Gentiles vocauit, saluauitque sicut Iudæos, & ab illis magis est cultus, ac etiam quia circa illius tempora Iudæorum sceptrum est ablatum. Cumque anni iam illinc vsque ad nos mille quadringenti septuaginta quatuor præterierint, nondum potestas Iudaica restituitur. Neque fingere licet aniculis Iudæorum in Babylonia, vel ultra montes Caspios adhuc eis superesse regnum. Nam contra omnis reclamatione historia, quinetiam Moses Aegyptius, cæterique doctores Hebræorum affirmant, nunquam licuisse vel licere posse cuiquam Iudæo extra promissionis terram, quicquam in causis criminalibus iudicare, qui ergo Iudæis extra Iudæam exultantibus regnum tribuit, manifestè delirat. Audiamus

Osee vaticinium. Dies multos sedebunt filij Israël sine rege, & sine principe, & sine sacrificio, & sine altari. Talem esse præsentem Iudæorum conditionem videmus, deque iis temporibus Prophetam fuisse loquutum Interpretes Prophetarum omnes tam Iudæi quam Christiani confirmant. Carere Iudæos hodie legitimo sacrificio, patet, quia lex eorum sola illa Iudæorum sacrificia probat quæ in regione promissionis efficiantur. Obiiciunt Iudæi nonnulli sceptrum de Iuda centum annis ante Iesum fuisse ablatum, quando scilicet in Machabæos sacerdotes potestas rerum translata est, qui non ex tribu Iudæ, sed Levi erant, quod & Iosephus narrat; Iesus

autem natus est Herodis tempore, qui Machabæis dicitur successisse. Ad hoc est responsio triplex. Prima quidem, quod cum Machabæi ex tribu Iudæ saltem secundum materiam lineam fuerint, regnantibus illis, non fuit omnino sublata Iudæ potestas. Secunda, quod Propheta Iacob non de tribu hac, vel illa, sed de vniuerso populo Iudaico intellexit. Tertia, quod quemadmodum omnes Iudæorum doctores consentiunt, semper fuit apud illos concilium quoddam septuaginta prudentum ad quorum iudicium rerum grauiorum sententiæ pertinebant. Concilium hoc Camedrim appellabant, eratque tanquam senatus, & adhærens viuenti principi, & defuncto principe, principis vicem gerens quod quidem ab ipso Mose fuerat constitutum, & in Babylonica captiuitate assidebat Iudæis ducibus Iudæorum in Babylonia, & post reditum assidebat ducibus illis in patria. Durauit autem concilij huius autoritas vsque ad Regem Herodem, qui ex patre Idumæo & matre Arabe, vt inquit Iosephus, natus erat, & regnum Iudæorum à Romanis accepit, sub quo natus est Iesus. Herodes enim omnes illius collegij viros interfecit, illudque concilium sustulit, quod & Iudæi confirmant in libro Camedrim Ierosolymitano, & in libro Abodazara. Tunc igitur ablatum fuit non solum sceptrum de Iuda, sed etiam scriba de filiis eius, quod Chaldaus prædixerat textus. Quamobrem quando Herodes, qui alienigena erat, regnum assumpsit, & omnes insuper quoruncumque reperire potuit ex regia Dauidis stirpe peremit, tunc propriè Iudæorum Regnum funditus est sublatum, denique quando concilium disperdidit, tunc scriba de filiis Iudæ sublati existimatur. Scribit Eusebius, Vespasianum, Domitianumque Imperatores iussisse omnes qui ex genere Dauidis essent interfici, vt nullus Iudæorum regni reliquus foret. Nam & ipsi de aduentu Christi formidabant, sicut ab initio Herodes. Hæc Eusebius accepit ab Egesippo.

Aggæus. Hæc dicit Dominus exercituum, adhuc modicum vnum, & ego mouebo cælum, & terram, mare, & aridam, & veniet desideratus cunctis Gentibus. Magna erit gloria domus istius nouissimæ magis quam primæ. Modicum vnum, significat nobis hodie iam pridem venisse Messiam; mouebo cælum, scilicet per eclipsum passionis, ac etiam per stellam illam à Magis visam, terram scilicet per terræ motum in passione. Et ante per terræ motum illum quem Iosephus scribit regnante

Herode in Iudæa, tam terribilem contigisse, ut finitimæ Gentes corruisse omnia Iudææ oppida existimauerint. Nonne tunc ubique terrarum motus facti sunt, quando Iesu nascente, vniuersus orbis descriptus est, edicto Cæsaris Augusti, cogebantur enim omnes vndique in patriam redire, ut singuliritè describerentur. Tunc enim ob factionem Iudæ Galilæi contra Romanos, multis cædibus turbatam Iudæam Iosephus asserit Mare; scilicet, quando Christus mari imperauit & ventis, quando subiungit, templum secundum primo felicius fore, intelligit, quia Messiam accipiet, nam in cæteris omnibus vilis miserabilisque fuit, singula hæc soli Iesu Nazareno conueniunt, præsertim quia venit Gentilibus desideratus, seruauit enim Gentiles magis, quàm Iudæos, quoniam ab illis magis est honoratus. Non expectent Iudæi tertij templi sub nouo Messia constructionem. Nam Aggeus templum secundum nouissimum appellauit.

Malachias: Ecce mitto Angelum meum, qui præparabit viam ante faciem meam, & statim veniet ad templum sanctum suum dominator, quem vos quæritis, & Angelus testamenti, quem vos vultis, ecce venit, dicit Dominus exercituum, & quis sustinebit diem introitus eius? Ecce mitto: Et rursus. Ecce venit. Declarat non tantam quantam Iudæi opinantur dilationem, sed citum Messie aduentum, non igitur adhuc est venturus. Angelum qui præparabit viam, Ioannem Baptistam præconem Christi significat. Ante faciem meam. Ostendit Ioannem Baptistam ante Christum prædicaturum, & Christum ipsum esse Deum, Deus enim ipse qui loquitur, faciem Christi, faciem suam appellat (Angelus testamenti) nuncium noui testamenti, Messiam demonstrat. Et quis sustinebit? Ambiguitatem designat in cognitione Messie, multorumque pertinaciam. Adde Iudæorum ruinam, idololatriæ casum.

Esaias: Vox clamantis in deserto, parate viam Domini, rectas facite semitas eius. Omnis vallis implebitur, & omnis mons & collis humiliabitur, & erunt praua in directa, & aspera in vias planas, & videbit omnis caro salutare Dei nostri. Hæc fermè superioribus similia sunt & manifesta.

Daniel: Septuaginta hebdomadæ abbreviatæ (aliter decisæ) sunt super populum tuum, & super urbem tuam sanctam, ut consummetur præuaricatio, & finem accipiat peccatum, & deleatur iniquitas,

& adducatur iustitia sempiterna, & impleatur visio & prophetia, & vngatur sanctus sanctorum, Moses Tyronensis, & Hyoces, & Dauid, Chalchadiasque, & Abraham Iudæi, sic Daniele exposuerunt, ut anni quadringenti ac nonaginta fluere ad destructionem primi tēpli, ad templi secundi destructionem, & circa huius temporis finem Messias nasceretur. Nicolaus quoque Lyrensis hebdomadas ita computat, ut in illis passus fuerit Christus. Talem quoque probat fuisse Danielis intentionem. Barachias Iudæus in libro de Ordine mundi exponit illud Esaiæ. Proxima est salus mea ad veniendum, & iustitia mea ad reuelandum. Vbi particulam illam, iustitia mea, dicit significare Messiam illum, de quo Daniel dixit, ut adducatur iustitia sempiterna. Similiter Moses Gerundenis verba superiora Danieli ab Angelo dicta exponens, ita dicit: Iustitia sempiterna, & sanctuarium sanctuariorum, vel sanctus sanctorum, non nisi ipse Messias est sanctificatus ex filiis Dauid, hæc ille: & meritò. Cecinit enim Dauid: Orietur in diebus eius Iustitia. Et Hieremias: Hoc est nomen quod vocabunt eum Dominus iustus noster. Nempe deleuit Iesus originalis præuaricationis perniciem, & gratiam, iustitiamque tribuit Euangelicam. Sed ne liceat cuiquam fingere, Danielis hebdomadas, vel mensium, vel centehariorum, millenariorum vel seculorum, septenarios numeros esse, meminisse oportet in libro quodam Iudæorum de Ordine mundi apertè omnes eorum scriptores in hoc conuenire, ut illæ annorum solum hebdomadæ sint. Idem testatur Salomon, & Moses Gerundenis in Commentariis Danielis, confitentes sacrificium Iudaicum in vltima illarum hebdomadarum, in excidio Ierusalem à Romanis fuisse sublatum, atque ipse Salomon hebdomadas Danielis finiri asserit in templi secundi destructione. Prædicatur certè à Daniele, vel in fine hebdomadarum illarum, vel saltem post sexaginta duas hebdomadas illud fore. Sic enim à Daniele prædicatur, & post hebdomadas septem, & sexaginta duas interibit Christus (aliter chrisma, id est vntio sacerdotum) & iudicium non erit in eo, templum & sanctuarium corrumpet populus duce veniente, & finis huius vastitas. Certè, ut testatur Iosephus, post Herodem sacerdotes nequaquam ex successione sacerdotalis generis, vel perpetuitate vitæ secundum legem Moysi constituebantur. Sed quilibet etiam ignobilis



simi singulis annis sacerdotium à principe, vel Romanis emebant. Quidam cum veras Christianorum rationes hoc in loco alter deuitare non possint, Daniele hic errasse aiunt, cætera ubique bene dixisse. Sed huiusmodi homunculi relinquendi sunt, tanquam qui sibi ipsi repugnent, atque hic & alibi semper errent. Sunt enim inter illos, qui Iesu tempora cunctis notissima audeant permutare, quos arguit Iosephus, ubi de Iesu temporibus scribit, & ubi inquit: Duodecimo Tyberij Cæsaris anno, Pontium Pilatum Iudææ procuratorem suscepisse, ibique decem annos continuos permanisse. Cornelius vero Tacitus Gentilis, ait Christum occisum fuisse per Pontium Pilatum procuratorem Iudææ, imperante Tyberio. Cæterum, ut rem omnem in ordinem redigamus, multæ fuerunt inter Talmuticos, id est, canonicos Iudæorum interpretes de aduentu Messiae opiniones. Prima Hyocis, qui in libro Cederlophan, id est, de ordine mundi, terminum lxx. hebdomadarum exposuit, quemadmodum supra diximus. Secunda Habaquibe, qui Danielis secutus computationem in destructione templi secundi venturum Messiam existimabat, ideoque sectatus est fatuum quendam, & bellicosum hominem nomine Ventozaram, tunc dicentem, se esse Messiam, quem maxima Iudæorum turba post annos ab excidio Ierusalem, ut ipsi aiunt, octo & quadraginta, secuta est. Igitur penè omnes congregati in oppido Bitera, Romanis rebellauerunt, utpote qui ducis illius fortunæ, armisque plurimum confidebant. Sed Adrianus Imperator vrbe obfesa, Ventozaram vna cum omnibus sectatoribus interfecit. Hæc omnia Iudæi in libro Demay habent. Tertiam Iudæi opinionem accipiunt à libro ludicum ordinariarum, qui non parvæ apud illos auctoritatis est, ibi tractatur sex annorum millia esse mundi ætate, duo quidē millia vanitati vel vacuo, tantundē legi, tantūdem Messiae attribui. Aiunt autē hæc dicta fuisse à discipulo quodam Heliae filio Sareptæ, quem Helias suscitauerat. At verò secundum Hebraicam computationem ab Adam ad Abraham duo millia annorum fluxerunt, qui anni vanitatis fuerunt. Ab hoc ad Iesum Nazarenum millia quoque duo, qui fuerunt legis anni. Anni igitur qui Iesum sequuntur, à Messia incepisse Iudaica computatione videntur, præsertim quia in eo libro assertur ab initio mundi ad Messiam quatuor annorum millia intercedere. Secundum vero Hebræorum omnium

computationem hodie mundus agit annorum quinque millia & ducentos insuper atque triginta quatuor, iam diu igitur Messias venit. Quarta opinio fuit magni cuiusdam viri, quem Rabi nominauerunt, qui in libro Camedrim ait: Omnes terminos de aduentu Messie assignatos iam perisse, redemptionemque in potentia sola consistere. Hic quamvis fortasse de Christiana potentia non loqueretur, veritatem tamen quodammodo reticere non potuit. Eodem tempore quidam huius auctoritate fretus, quia terminos omnes præterisse crederet, exclamavit: Væ animabus Messie terminos computantium. Quinta fuit Chahadie, qui in libro de credendis, diligenti dinumeratione conclusit quendam Messie terminum, qui supra trecentos quadraginta annos iam perit. Sexta Mosis Ægyptij, summæ apud Iudæos auctoritatis viri, qui quamvis in Deuteronomio Messie tempora inquiri prohibeat, tamen in quadam ad Africanos, Iudæos Epistola scribit, se ex certissima antiquorum traditione habere, Messiam nasciturum esse anno à mundi exordio quater millesimo & insuper quater centesimo septuagesimo quarto. Hoc autem tempus ex eorum computatione septingentis sexaginta annis nos antecessit. Septima Mosis Gerundensis, qui in commentariis Pentatheuci, Messiam oriturum affirmat, anno à mundi creatione quinquies millesimo centesimo quoque & decimo octavo, cui consensit Leui-Benguerfon in commentariis Danielis, sed hic terminus pluribus quàm centum annis nos præcessit. Frustra igitur expectant ulterius Iudæi Messiam, imo & quicumque post Iesum expectauerunt decepti sunt. Non enim considerauerunt quod alibi dixit Daniel: In diebus regum istorum suscitabit Deus cœli regnum, quod in æternum non corrumpetur, cœlestē scilicet Christi regnum. Dicite quæso Iudæi, cur Magi illi diuini Messiam visuri, statim nato Iesu Ierosolymam profecti sunt, & Herodes sciscitatus à legis peritis Messie tempus, & patriam, infantes illos filiumque suum occidit, quod testatur Macrobius & Philosophus & Gentilis, nisi quia sapientibus ad Messiam pertinere loca illa, & tempora videbantur. Unde multi periti Iesum viuentem tanquam numen venerati sunt Nathanaël & Nicodemus, alique quos Ioannes Euangelista principes nominat, qui propter Iudæorum metum clam illum venerabantur. Cur multi circa Iesu tempora Messiam se esse iactabant, licet, ut inquit Gamaliel, tanquam falsi, subito euanuerint. Iosephus narrat sub

Felice Procuratore Iudææ multos existisse, cui populum sua persuasione deciperent, inter alios Aegyptium quendam Pseudopphetam, qui plurimis sibi adiunctis in ipso magnarum rerum conata per exercitum Felicis oppressus fuerit. Hæc Actibus Apostolorum consentanea sunt, in quibus Paulo dicitur à Tribuno. Nonne nunc Aegyptius, qui per hos dies excitasti, & eduxisti in desertum quatuor millia virorum? Tribunus cum non cognosceret Paulum, suspicabatur, ne fortè esset Aegyptius ille. Surrexit etiam, ut Lucas Evangelista inquit, Iosephusque confirmat, sub Cyrino Syriæ Præsides, Iudas quidem Galilæus, tempore conscriptionis census, populumque decepit, sed ille paulò post, & omnes qui sequebantur cum dispersi sunt. Talis etiam Theodas fuit quidam, de quo similia omnino scribunt Lucas & Iosephus, talis Simon Magus, præterea Barchosibas, de quo Moses Aegyptius Iudæorum doctissimus in libro Indicum inquit Achilayl præ cæteris Iudæis sapiens, omnesque eius temporibus Legisperiti, asseriebant, Barchosibam ducem bellicosissimum, esse Messiam, quousque ob eius scelera ab Adriano est interfectus. Hæc Moses De hoc etiam Eusebius mentionem facit Ariscopellei sequens historiam dicentis: quod ex illo tempore omnis Iudaica natio Adriani decretis etiam ab aspectu Iudææ penitus arcebatur, quodve Ierosolymorum regio, mutato nomine, Aelia, ab Aelio Adriano, cognominata est. Legitur autem in Talmut, id est, peculiari Iudæorum doctrina, libro Camedrin, ipsum Barchosibam annos triginta & dimidium regnauisse, solitumque dicere, se esse Messiam, atque sapientem Achylaiem Barchosibe consensisse. Hæc ibi. Necessè est autem Barchosibam Iesu temporibus quàm proximum existisse. Quid ulterius expectatis homines pertinacissimi, cum olim omnes vestri generis sapientes Iesu seculum, ad Christum spectare censuerint? Cur paulò post Iesum à Romanis totiens miseri rebellastis, nisi quia tunc finem Prophetarum promissa iam habitura nobis omnibus videbantur? Testatur hoc Suetonius Gentilis. Percrebuerat, inquit, Oriente toto vetus & constans opinio, esse in satis, ut eo tempore Iudæa profecti, rerum summa potirentur, atque ob hoc Iudæos rebellasse, & periisse, ait. Nempè tunc expectabatis repenrè Christum quendam armatum, perpetuam mundi Monarchiam in Iudæa stabiliturum. Quanto sapientior vobis Virgilius, qui vaticinia Sybillæ de

mundi rege temporibus Iesu congruere posse, & consummari existimauit, sed de hoc alias disputauimus. Scribit Iosephus ante obsidionem Ierusalem, Oraculum quoddam in sacris literis repertum, quod per idem tempus virum designaret ex eorum regione processurum, qui totius orbis potiretur imperio. Cuius Oraculi præsagium quidam Vespasianum declarare suspicatur. Sed Vespasianus non aliis quàm illis solis Gentibus, quæ Romano Imperio videbantur subditæ, dominatus est, unde ad Christum hæc oracula referantur, ad quem dixerat Pater: Pete à me, & dabo tibi Gentes hæreditatem tuam, & possessionem tuam terminos terræ. Et cuius per idem tempus per Apostolos suos in omnem terram sonus exiuerat.

Esaïas: Dominus exercituum est, ipsum sanctificate, ipse est pauor vester, ipse est terror vester, & ipse erit vobis in sanctificationem, & in lapidem offensionis, & petram scandali duabus domibus Israël, & in laqueum & ruinam habitantibus Ierusalem, & offendentur ex eis plurimi. Idem: Ponam in Sion lapidem offensionis, & petram scandali, & omnis qui crediderit in eum, non confundetur. Ex his patet, quod Christus expectatus est Deus, atque idem sanctas effecit credentium animas, & illius causa duæ domus Israël casuræ erant, scilicet domus regia, & domus sacerdotalis, & quod non omnes, sed plurimi pertinaces erant futuri, & qui credituri erant confundi non poterant. Neque licet exponere, ut quidem peruertunt, duas domus, id est, duos reges. Consuetudo enim Hebraicorum scriptorum est, totam seriem sacerdotum domum, vnam sacerdotalem cognominare, totam quoque seriem regum, domum vnam regiam, id est, Davidis domum.

Ieremias. Cumque multiplicati fuerint, & creuerint in terra, in diebus illis ait Dominus: Non dicent ultra Arca testamenti Domini, neque ascendet super cor, neque illius recordabuntur, nec visitabitur, neque fiet ultra, scilicet quia post Messiam (quod & Mahumethes æquum putat) ram dignitates, quàm ceremoniæ testamenti veteris cessauerunt, neque id quidem iniuria. Imagines enim erant illæ futurorum sacramentorum, præsentem verò substantiam, quid est opus imagine?

Esaïas: Antequam parturirer, peperit, antequam veniret partus eius, peperit masculum. Commentaria Hebræorum antiquissima exponunt, id est, antequam natus fuisset ille, qui Iudæos in seruitutem vlti-

nam redegit, id est, Titus, iam natus Redemptor eorum fuerat. Vnde Chaldaus textus habet: Adhuc non erit ei veniens angustia, & adhuc non veniet ei tremor cum doloribus propter partum, reuelabitur Messias. In hoc ipso Chaldaeo textu Hebraeus Ionathas inquit: Antequam veniret ei angustia salua facta est, & artequam venirent ei dolores partus, Messias reuelatus est. Similiter affirmat ibidem sapiens Samuel. Ex iis omnibus apparet Messiam ante destructionem Ierusalem ortum fuisse. Concedunt autem plurimi Hebraeorum illum eo die natum, quo ciuitas diuebatur. Deinde ad ineptias suo more refugiant, dicentes illum latere quousque Deus praecipiat, ut se palam cunctis ostendat. Alij in monte Synai cum Angelis eum collocant, alij ultra Caspios montes segregant, alij mendicantem passim, & circumuagum agunt, sua insania & discordia se inuicem confundentes.

Esaïas: Dabit vobis Deus ipse signum. Ecce Virgo concipiet in vtero, & pariet filium, & vocabitur nomen eius Emanuel. In Hebraeo est Hahalma, quod puellam absconditam, conseruatamque significat. Emanuel verò significat nobiscum Deus, scilicet quia ille qui nasciturus erat ex illa puella, futurus erat non homo tantum, sed etiam Deus Ex puella inquam semper Virgine, promittitur enim partus huiusmodi tanquam signum quoddam prodigiosum, de quo David: Veritas de terra orta est. Et Esaïas alibi ait: Exultent cœli desuper, & nubes induant iustitiam, aperiatur terra, & pullulet saluator, Ego enim Dominus Deus creavi eum. Videmus in humana specie duo extrema, ac media duo, quisque nostrum ex viro & muliere nascitur, Adam ex neutro, Eva ex solo viro diuina virtute, Iesus ex muliere sola diuino spiritu. Mysteriorum hoc etiam rex Arabum Mahumetes in Dialogo suo admiratur multum, & veneratur, in Alcorano quoque veritate coactus ait: Iesus Mariæ filius, Deique nuntius, suusque spiritus, ac verbum Mariæ Virgini cœlitus missum fuit.

Daniel: Videbam in visu noctis, & ecce in nubibus cœli, ut filius hominis veniens, & vsque ad vetustum dierum peruenit, & qui assistebant obtulcrunt eum, & datum est ei regnum & honor, & imperium, & omnis populus, tribus, & linguarum seruient ei, & potestas eius æterna, quæ nunquam transibit, & regnum eius quod non corrumpetur. Omnes enim Iudæi Interpretes hanc parabolam de rege Messia exponunt, quamuis hic de ultimo Christo aduentu tra-

ctetur. Et iis verbis significat Daniel, Deum venturum sub hominis habitu, Christianique regnum non temporale, sed æternum, & spirituale futurum In quo & Esaïas venit, apud quem Christo ita Deus loquitur: Dabo tibi thesauros absconditos, & inuisibiles.

Osce: Vocabo non plebem meam, plebem meam, & non dilectam meam, dilectam meam, & non misericordiam consequutam, misericordiam consequutam, & erit in loco vbi dictum est, non plebs mea vos, ibi vocabuntur filij Dei viui. In eis prædicitur conuersio Gentilium, ac pertinacia Iudæorum, qualis fuit circa Iesum.

Esaïas: Inuentus sum à non quærentibus me, palam apparui iis, qui me non interrogabant. Tota autem die expandi manus meas ad populum non credentem, sed contradicentem mihi In iis idem, quod & paulo superius est vaticinium.

David: Lapis quem reprobauerunt ædificantes, hic factus est in caput anguli, à Domino factum est istud, id est, mirabile in oculis nostris, hæc est dies quam fecit Dominus, exultemus, & lætemur in ea. O Domine saluum me fac, ó Domine bene prospere, benedictus qui venturus est in nomine Domini. Iesus tanquam inutilis reprobatus à prauis, factus est diuina virtute in caput anguli, cui duo annectuntur, parietes, id est, Gentiles, & qui ex Iudæis sunt conuersi.

Malachias: Non est mihi voluntas circa vos, dicit Dominus, & sacrificium acceptum non habeo ex manibus vestris, quoniam à Solis ortu vsque ad occasum clarificabitur nomen meum apud Gentes. Ex iis ostenditur reprobatio infidelium Iudæorum, Iudaicarumque ceremoniarum, & approbatio fidelium Gentilium adueniente Christo.

Esaïas Posui te in lucem Gentibus, ut sis in salutem vsque ad extremum terræ.

Esaïas. Venio colligere omnes Gentes & linguas, & venient, & videbunt claritatem meam, & dimittam super eos signum, & mittam ex iis conseruatos in Gentes, quæ longè sunt, quæ non audierunt gloriam meam, & nunciabunt claritatem meam in Gentes, & assumam ex eis Sacerdotes & Leuitas, dicit Dominus. Et alibi apud eundem Deus Messiam sic alloquitur. Parum est, ut sis mihi seruus ad sustinendas tribus Iacob, & feces Israel conuertendas, dedi te in lucem Gentium. Item Primus ad Sion dicet Ecce adsum, & Ierusalem Euangelistam dabo, vidi, & non erat vir, nec ex istis cuiquam, ut iniret consilium, & interrogans videret Verbum,

Verbum ecce omnes iniusti, & vana opera eorum. Et in sequenti capitulo subdit: Ecce seruus meus, suscipiam eum, electus meus, complacuit mihi in illo anima mea, dedi spiritum meum super eum, & iudicium Gentibus proferet, non clamabit, nec accipiet personam, calamum quassatum non conteret, donec ponat in terra iudiciū, & legem eius Insulæ expectabunt. Rursus alibi: Educam de Iacob semen & de Iuda possidentem montes meos, & hæreditabunt eam electi mei, & serui mei habitabunt ibi. Ecce serui mei comedent, & vos esurietis, serui mei lætabuntur, & vos erubescetis, & dimittetis nomen vestrum in iuramentum electis meis, & interficiet te Dominus, & seruos suos vocabit nomine alio. Idem alibi Deum sic loquentem facit: Israël me non cognouit, & populus meus me non intellexit. Rursus, Auditū audietis, & non intelligetis, & videntes videbitis, & non videbitis. Incrassatum est enim cor populi huius, & auribus grauius audierunt, & oculos suos clauferunt, ne quando oculis videant, & auribus audiant, & corde intelligant, & conuertantur & sanem eos. Mittam ex iis conseruatos in Gentes, id est, discipulos Messiae, qui manus Iudæorum euaserint, ad Gentes conuertendas, mittam & assumam, id est, ex numero Gentilium, qui conuertentur, constituam legitimos Sacerdotes. Ex quo patet, quod etiam Gentiles ad dignitatem Israëliticam assumi poterant. Vnde Rauanais Iudæus in commentariis Exodi ait: Tempore Messiae Gentiles conuersi sacerdotes erunt, Domino ministrantes. Parum est vrsis. Per hæc patet, quod Messias ad salutem non Hebræorum solum, sed etiam Gentilium mittendus erat, sicut Iesus primus ad Sion dicet. Salomon Iudæus Interpretes hunc locum exponens, omnia hæc ait de rege Messia, atque vltima redemptione esse intelligenda. Idem aperit Chaldaea translatio Ionathæ. In iis autem Esaiæ verbis apparet, quod Christus primo, & propriè apud Iudæos prædicaturus erat, & ibi Euangelia, & Euangelistas fundaturus, sed quia prauis, & pertinaces futuri erant, adiungit, Non erat vir, atque ideo iudicium Gentibus proferet, scilicet apud Gentiles per discipulos suos, doctrinam Euangelicam diuulgabit. Atque ut ostenderet, quod iudicia Euangelica in humilitate summa, non magnificentia, in tumultu, sonituque tubarum, sicuti lex Moysi, promulganda erant, adiunxit, non clamabit: In reliquis verbis aperit Esaias, Messiam ex Iacob descensu-

rum, sectatoresque suos, ut plurimum alienigenas fore, qui electi apud Deum futuri erant, nec Israëlitici isti quidem amplius, sed alio nomine, scilicet Christiani nominandi. Aperit etiam Iudæos Messiae aduersaturos, pœnasque duros, sicut olim Iesus temporibus contigit, pertinaciam etiam Iudæorum sempiternam, qualem hodie experimur.

Ieremias. Cognouit tempus suum turtur & hirundo, & passeret custodierunt tempora introitus sui, populus autem meus non cognouit iudicium Domini. Quomodo dicitis sapientes sumus, & lex Domini nobiscum est incassum, facta est metatura falsa? Scribæ confusi sunt, sapientes trepidauerunt, & capti sunt, quoniam verbum Domini reprobauerunt. Cur Prophetæ quæ futura sunt, sæpè tanquam præterita narrant? quia in diuina mente, cui sunt præsentia omnia illa, tanquam præsentia vident, & postquam viderunt tanquam præterita, id est, manifesta, & iam consummata loquuntur. Sed redeamus ad Ieremiam. Hic in verbis superioribus declarat. Scribas non perfectè cognituros tempus aduentus Christi, tempusque metendi, neque id quidem mirum, difficillima enim est iniustis diuini sensus interpretatio. Huic congruit illud quod in Deuteronomio legitur. Percutiat te Dominus amentia, & cæcitate, ac stupore mentis, & palpes in meridie, sicut palpare solet cæcus. Meridies, est lux operum Christi, in qua Iudæi plurimi caligati sunt. Idem Ieremias alibi: Domine Deus meus ad te Gentes venient ab extremis terræ, ac dicent, quæ falsa nostri parentes idola possederint, & non erat in ipsis vtilitas, si faciet homo sibi ipsi deos, non erunt isti dii. In his prædicitur casura idola per Messiam, quod factum est per Iesum. Cui quadrat illud Esaiæ, ubi loquens de Christo inquit: Docebit vos vias suas, & post multa: In die illa proiciet homo idola argenti sui, & simulachra auri sui, quæ fecerat sibi, ne ea adoret. Idem significat Daniel quando loquens de Christo inquit, quod lapis abscissus sine manibus conteret statuam ex ferro textam, auro argentoque compositam. Lapis abscissus est Iesus, vi Sacerdotum afflicus, hic sine manibus, id est, sine humana violentia contriuit statuam, id est, idololatriam, quæ statuas colebat, statuam, inquam, quadripartitam, nam in quatuor præcipua mundi regna sparsa erat, scilicet Chaldæorum, Medorum, Græcorum & Romanorum. Idem Ieremias alibi: Horribilis Dominus super eos, & exterminabit omnes



deos terre, & adorabit eum vir de loco suo, omnes insulæ Gentium.

Esaïas. Quoniam miscuit vobis Dominus spiritum soporis, & claudet oculos vestros, & principes vestros, qui vident visiones operiet, & erit vobis visio omnium sicuti verba libri signati, quem cum dederint scienti literas, dicent, lege istum, & respondebit, non possum, signatus est enim, & dabitur liber nescienti literas, diceturque ei lege, & respondebit, nescio literas. Et dixit Dominus: Pro eo quod appropinquat populus iste ore suo, & me glorificat labiis suis, cor autem eius longè est à me, & timuerunt me mandato hominum, & doctrinis, ideo ecce addam, ut admirationem faciam populo huic miraculo grandi & stupendo, peribit enim sapientia à sapientibus, & intellectus prudentium eius absconderetur. Rursus alibi, Dedit eis Deus spiritum compunctionis, oculos ut non videant, & aures ut non audiant usque in hodiernum diem. Hæc omnia prædicunt, Iudæos quam plurimos, tam doctos quam indoctos, propter eorum scelera & impietatem, Christi expectati vaticinia, Christumque præsentem non cognituros, cuius erroris causa in miseria sunt hodie usque ad sæculi finem, quod, ut diximus, alias cecinit Osee: Dies multos sedebunt filij Israël sine rege, & sine principe, & sine sacrificio, & sine altari, & sine Ephod, & sine Theraphim.

Quoniam verò circa sæculi finem credituri sunt Christo nostro, subiungit: Et post hæc reuertentur filij Israël, & quærent Dominum Deum suum, & Dauidem regem suum. Translatio Chaldæa continet: Et obedient Messias filio Dauidis regi suo, & pauebunt ad Dominum. In Hebræo habetur: Et fluent ad Dominum, & ad bonum eius in nouissimis diebus. Nemo intelligat hæc de Babylonica captiuitate, in qua reges, ducesque pro tempore honoratos habuerunt, quod quidem quartus Regum liber nos docet, ubi traditur, à rege Babyloniæ regem Iudæ Ioachim in sede regia vnà cum alijs regibus collocatum fuisse, cæterosque generis eius similiter honoratos, quibus honoribus hodie priuati sunt. Carent etiam sacrificio, & altari, cum careant templo Mosaica lege disposito. Carent Ephod, id est, Sacerdotia veste, & Theraphim, quod est instrumentum quoddam idololatriæ ritu ad futura præfagienda constructum. Quibus verbis significatur Iudæos, neque Deum verum legitimè, ne-

que idola hodie colere, in cæteris verò temporibus, vel Deum ritè coluere, vel idola. Post multos autem dies & in nouissimis diebus, id est, post multa sæcula, qualia hæc sunt post Iesum, & circa mundi finem, reuertentur, & quærent Deum suum, scilicet patrum suorum, & Dauidem regem suum, id est, Messiam Dauidis stirpe natum, quod Chaldæa translatio docet. Liberatio verò ex Babylone, non fuit post multa sæcula, & in nouissimis temporibus, nemo intelligat quod tunc primum venturus sit Messias: ad hunc enim errorem auferendum, Propheta non dixit: Veniet rex eorum, sed reuertentur, & quærent illum, quasi iam pridem venerit, sed illi discesserint, & neglexerint, & tandem quasi tunc sint illum. Quod Chaldæa verba declarant, cum dicunt: Obedient Messias, utpote qui antea fuerant pertinaces. De iis Esaïas ait: Hæc dicit Dominus ad domum Iacob, non modo confunderetur Iacob, nec modo vultus eius erubescet, quia cum viderit filios suos sanctificantes nomen meum, & sanctificabunt sanctum Iacob, & Deum Israël prædicabunt, & sicut errantes spiritu intellectum, & musitatores discent legem. In his tollitur confusio Iacob, quia ex eius stirpe, & quasi filij fuerunt Apostoli, qui Iesum exaltauerunt, quorum doctrina tandem Iudæi omnes credituri sunt Christo. Quod Paulus in Epistola ad Rom. acutissimè probat. Quamobrem loquens Esaïas de primo Christi aduentu ait: In die illa erit germen Domini in magnificentia, & erit omnis qui relictus fuerit in Sion, & residuus in Hierusalem, sanctus vocabitur in die, id est, in lucis tempore, germen Domini, id est, Christus Dei filius, in magnificentia scilicet operum ac prodigiorum. ( Omnis qui relictus ) significat Christi discipulos paucos penè ab omnibus destitutos, sanctas Christi reliquias. Istæ reliquiae in secundo Christi aduentu cum Christo exaltabuntur. De Iudæis autem interim quid est dicendum, raro & pauci electi erunt, de his enim illud Esaïæ intelligitur. Et relinquentur in eo sicut racemus, & sicut excussio oliuæ duarum aut trium oliuarum in summitate rami. Postquam enim propter illorum perfidiam à naturali arbore, ut Paulus Apostolus inquit, excussi sunt, & ab oliuæ radice separati, adhuc nonnulli vel ibi relictæ, vel potius interdum denuo videntur insiti, qualis fuit Euaristus Hebræus vir illustris, qui septimus à beato Petro Pontifex Christianorum fuit, annos plures quàm decem in ea dignitate dignissimè vixit, martyrque obiit.

Præterea, Gothorum tempore, Iulianus Iudæus primum Hispaniæ sanctissime rexit Episcopatum. Petrus quoque Alphonsus eisdem generis Dialogum conscripsit contra perfidiam Iudæorum. Alphonsus Burgenfis summus Metaphysicus in sexagesimo ætatis suæ anno fidem Christi suscepit, pluraque aduersus Iudæos egregia scripsit. Quid dicam de Nicolao Lyrensi, viro doctrinæ magnæ, viroque sanctissimo. Quid de Hieronymo Physico, qui tempore Pontificis Benedicti contra Iudæos subtiliter disputauit. Fuerunt & alij numero quidem multi, quamuis egregij tam longo seculo pauci, de quibus illud Ieremiæ dictum censeo. Assumam vos, vnum de ciuitate, & duos de cognatione (aliter, congregatione) & adducam vos in Sion, scilicet cœlestem. De his diligenter Paulus Burgenfis Episcopus Theologus insignis tractauit.

Dauid. Descender sicut pluuia in vellus, id est, multis ignotus, & addit: orietur in diebus eius iustitia, & abundantia pacis.

Esaïas. Orietur in diebus eius iustitia, & multitudo pacis. Iesus Octauiano imperante natus est, & aduersus originalem iustitiam Adæ radice contractam, Euangelicam gratiam, & iustitiam introduxit. Octauiani quoque imperium iustissimum fuit. Tanta etiam pax eo tempore per vniuersum orbem, vt nunquam vel amplior, vel diuturnior. Hinc Virgilius.

*Claudentur belli porte, &c.* Perseuerauit ea pax post Iesum, annos septem atque triginta.

Esaïas. Fatigata est Ægyptus, & negotiatio Æthiopum & Saba, viri alti ad te transgredientur, & tui erunt serui, & post te ambulabunt vincti compedibus, & adorabunt, & te precabuntur, quoniam in te Deus est, & non est alius Deus præter te. Tu enim Deus es, & nesciebamus, Deus Israël Saluator, confundentur & reuerbuntur omnes, qui aduersantur tibi, & cadent in confusionem. Hæc monstrant quemadmodum Gentilium Imperia, quandoque futura erant Christo subiecta. Item Christum esse Deum saluatorem aliquod tempus incognitum, adoratum postea, atque eius aduersarios, id est, Hierusalem pertinacē, & idololatram, æquē cadere oportere, sicuti contigit. Quod etiam Christus futurus sit homo, sic aperit Esaïas: Mitter eis Deus hominem, & saluabit eos, indicans sanabit eos. Merito Messiam saluatorem nominat, & saluaturum, Iesus enim appellatus est, id est, Saluator, osten-

dit autem, quod non violentia, & armis corpora, sed iudicio animos sanabit. Quod rursus Christus sit Deus, Dauid de Deo loquens sic aperit: Misit verbum suum, & sanabit eos de corruptis, propterea Abraham Deum sub forma hominis agnouit, & vt regem omnium adorauit. Similiter Iesu successori Mosi Deus apparuit, Iacob quoque similiter.

Ieremias. Hic Deus noster, & non reputabitur alius absque illo, qui inuenit omnem viam prudentiæ, & dedit eam Iacob puero suo, & Israël dilecto sibi, post hæc in terris visus est, & cum hominibus versatus est. Per hæc Messias Deus & homo monstratur. Idem alibi: Et homo est, & quis cognouit eum, quasi dicat, propter eius humilitatem hominumque superbiam, multi eum ignorauerunt. Nihil mirum est, Iudæos multos parum pios profundum Messias mysterium, & Iesu diuinitatem non cognouisse. Multi tamen Iudæi partim pii, partim etiam docti ab initio cognouerunt, multa enim Iudæorum millia ad legem suam Christus conuertit, multo plura discipuli. Eos autem Iudæos, qui Iesu crediderunt, etiam Mahumetes affirmat in Alcorano, à Deo cæteris Iudæis longè prælatos fuisse. Hi simul cum Gentibus Messiam (quod alibi Ieremias vaticinatus est) vocauerunt Dominus iustus noster, & verè vocauerunt, non enim permisisset se falso Deum vocari.

Moses. In numeris orietur stella ex Iacob, & exurget homo ex Israël. Per hæc & superiora Messias ostenditur deus & homo, propterea Ezechiel Deum depingens, collocat eum in hominis habitu super Zaphireum thronum, quia scilicet deus futurus erat homo. Vnde Rabi Ioanna in commentariis Psalterij dicit, quod cum Iudæi alias ab alijs ducibus ex captiuitate fuerint liberati, redemptio vltima à Deo sub propria persona est explenda, per hoc Messiam Deum esse concedit, ac de ipso exponit illud, Benedictus qui venit in nomine Domini, deus dominus & illuxit nobis.

Dauid. Loquens de Christo, qui inter cæteros vinctos à Deo (qui ob ipsam vinctiōnem Christi vocari possunt) excellentior est, dicit: Vnixit te Deus, deus tuus oleo lætitiæ præ consortibus tuis. Vbi declarat eum hominem, & paulo ante monstauerat Deum, dicens: Sedes tua Deus in sæculum sæculi, virga directionis, virga regni tui. Quod autem de Messia loquatur, declaratur ex eo, quod vbi Hebraicè dicitur, speciosus forma præ filiis hominum. Chaldæa

translatio Ionathæ, quæ apud Iudæos Hebraico textui est autoritate equalis, habet: Pulchritudo tua rex Messia maior, quam filiorum hominis. Merito translationis huius authoritati omnes cedunt, ordinata enim fuit ab Ionatha viro magno, ex consensu & ore Heliazar & Iosue, virorum excellentissimorum, longo tempore ante templi destructionem. Et antiqui omnes Talmutici Hebraei affirmant illam ab Aggeo, Zacharia, Malachia Prophetis descendisse. Ex superioribus Davidis verbis, atque similibus Rabi Abba commotus in commentariis Genesis interrogat, quid sibi velit Daniel, quando de Deo dicit: Ipse reuelat profunda & abscondita, & nouit in tenebris constituta, & lux cum eo est, ac respondet: Hæc certè lux, est lux regis Messiae, de quo in Psalmo, In lumine tuo videbimus lumen. Hæc ille. Hic fatetur diuinum illud lumen quod semper cum Deo est, & ipse Deus est, lucem esse Messie, ipsumque Messiam. Antiquus etiam ille & illustris Theologus Rabi Neuma in libro, qui Lucidus inscribitur, dictum illud Salomonis exponens in Proverbiis, Iustus est fundamentum sempiternum, interrogat, quid hoc sibi velit, & respondet de Messia in hunc modum. Quem nisi iustum habet, seu habebit Deus in sæculo suo, qui est sibi dilectus, quia sustinet mundum vniuersum, atque illius est fundamentum, gubernat mundum, atque ut gubernetur ipse efficit, ipse est animarum omnium fundamentum, atque hoc est, quod dicitur, iustus est fundamentum sempiternum. Hæc ille. Ex quibus aperit Messiam non solum hominem esse, sed etiam Deum. Ipse quoque David alibi idem aperit: Mater Sion dicet, Homo, & homo natus est in ea, & ipse fundauit eam Altissimus, id est, Deus, qui fundauit Sion ibidem tanquam homo natus est, & Sion appellat matrem.

Esaïas. Erit in die illa radix Iesse, & qui exurget principari in Gentes, in eum Gentes sperabunt, & erit requies eorum in honore. Et alibi. Exibit Virga de radice Iesse, & flos de radice eius ascendet, & requiescet super eum spiritus Dei; spiritus sapientiæ, & intellectus, spiritus consilij, & fortitudinis, spiritus pietatis, & implebit illum spiritus timoris Dei. Iesse pater fuit Davidis. Per hæc ergo prædixit Propheta Messiam ex Davidis stirpe pullaturum, Gentilibus magis quam Iudæis profuturum, spiritualibus potius quam corporalibus armis dominaturum, qualis Iesus fuit. Idem Esaïas alibi ex persona Christi sic inquit: Spiritus Domini super me,

propter quod vinxit me, Euangelizare pauperibus misit me, prædicare captiuis remissionem, & cæcis visum. Hic declaratur Messiam ex Sancto Spiritu nasciturum, Christum ex diuina solum vnctione nominandum. Item pauperibus Euangelium prædicaturum, remissurum peccata, ignorantiam expulsum.

David. Reges Tharsis, & Insulæ munera offerent, reges Arabum, & Saba dona adducent.

Esaïas. Omnes de Saba venient, aurum & thus deferentes, & laudem Domino annunciantes. Hæc partim Iesu statim nato facta fuerunt, partim post eius ascensionem, præsertim imperante Constantino ad hæc vsque tempora. Et alibi: Ex Ægypto vocaui filium meum. Rursus alibi: Nazarenus vocabitur. Iesus autem noster ex Ægypto reuersurus, Nazareth habitauit, ac Nazarenus fuit cognominatus.

Zacharias. Ostendit mihi Dominus Deus Iesum Sacerdotem magnum, stantem ante faciem Angeli Domini, & diabolus stabat ad dexteram ipsius, ut aduersaretur ei. Et dixit Dominus ad diabolum; Imperet Dominus in te, qui elegit Hierusalem, & ecce titio eiectus ab igne, & Iesus erat indutus vestimentis sordidis, & stabat ante faciem Angeli, & respondit, & dixit ad circumstantes ante faciem eius: Ferte vestimenta sordida ab eo, & induite eum tunicam talari, & imponite cidarim mundam super caput ipsius, & cooperuerunt vestimento, imposueruntq; cidarim mundam super caput ipsius. Angelus Domini stabat, & testificabatur ad eum, dicens: Hæc dicit Dominus Omnipotens; Si in viis meis ambulaueris, & præcepta mea seruaueris, tu iudicabis domum meam, & dabo tibi, qui conuertentur in medio horum circumstantium. Audi itaque Iesu, Sacerdos magne, Prophetæ verba, quia futurum portendunt, & hominem designant titionis extincti instar, contemptum primo, ac sordidum, deinde ornatum à Deo, diuinæq; domus Iudicem. Deo Iesu Nazareno congruunt, non Iesu Naue, vel Iesu Iosedech, qui & ante Zachariam fuerunt, & talia neque passi sunt, neque fecerunt.

Salomon in libro Sapientiæ. Circumueniamus iustum, quoniam insuauis est nobis, & exprobrat nobis peccata legis, promittit se scientiam Dei habere, & filium se nominat, factus est nobis in traditionem cogitationum nostrarum, gratus est nobis etiam ad videndum, quoniam

diffimilis est aliis vita illius, & immutatae sunt viae illius, tanquam mugaces existimari sumus ab eo, & conuenit se à viis nostris, & ab immunditiis, & praefert nouissima iustorum, & gloriatur se habere patrem Deum. Videamus ergo si sermones illius veri sunt, & tentemus quae ventura sunt illi, contumeliis & tormentis interrogemus eum, ut sciamus reuerentiam illius, morte turpissima condemnemus eum. Haec cogitauerunt, & errauerunt, excæcavit enim illos stultitia ipsorum, & nescierunt sacramenta Dei. Haec Salomon, quibus nihil clarius. Merito permisit Deus illos qui aduersus Prophetas Messiae praecones caeci, crudelesque fuerant, tales quoque aduersus Messiam fore.

Esaïas. Ecce intelliget puer meus, exaltabitur & glorificabitur, & sublimis erit valde, quemadmodum super te stupefcent multi, ita gloria priuabitur ab hominibus species tua, & gloria tua ab hominibus, ita mirabuntur Gentes multae super eum, & continebunt reges os suum, quoniam quibus non est annunciatum de illo, videbunt, & qui non audierunt, intelligent. Domine quis credidit auditui nostro, & brachium Domini cui reuelatum est? annunciauimus coram illo, ut infirmias, ut radix in terra fient. Non est species illi neque gloria, & vidimus eum, & non habebat speciem neque decorem, sed species eius sine honore, deficiens praeter omnibus hominibus, homo in plaga positus, & sciens ferre infirmitatem. Quoniau auersa est facies eius, inhonoratus est, neque magni aestimatus est. Hic peccata nostra portat, & pro nobis dolet, & nos existimauius illum esse quasi leprosum, percussum à Deo, & humiliatum (aliter in dolore, in plaga, & in afflictione) ipse autem vulneratus est propter iniquitates nostras, & infirmatus est propter peccata nostra. Eruditio pacis nostrae, in eo liuore eius sanati sumus, omnes ut oues errauimus, homo à via sua errauit, & Dominus tradidit illum pro peccatis nostris, & ipse propter quod afflictus est, non aperuit os, ut ouis ad immolandum ductus est, & ut agnus ante eum, qui setonderet sine voce, sic non aperuit os suum. In humilitate iudicium eius sublatum est, generationem eius quis enarrabit? quoniam tollitur de terra vita eius. Ab iniquitatibus populi mei ductus est ad mortem, & dabo malignos pro sepultura eius, & diuites pro morte eius, quoniam iniquitatem non fecit, nec dolus inuentus est in ore eius, & Dominus vult purgare eum de plaga. Si dederitis pro peccato animam vestram, videbitis semen longaeuum, &

Dominus vult auferre à dolore animam eius, ostendere illi lucem, & formare intellectum, iustificare iustum, bene pluribus seruientem, & eorum peccata ipse portauit, propterea ipse haereditabit plures, & fortium diuidet spolia. Propter quod tradita est ad mortem anima eius, & inter iniquos existimatus est & ipse multorum peccata portauit, & propter peccata eorum traditus est.

Quod autem Esaïas in verbis superioribus de redemptione vltima, quae per Messiam accipienda erat, locutus sit, pater per proemium quoddam ab eo iis verbis ita propositum. Quam pulchri super montes pedes annunciantis, & praedicantis pacem, annunciantis bonum, praedicantis salutem, dicentis: Syon regnabit Deus tuus. Et infra: Parauit Dominus brachium sanctum tuum in oculis omnium Gentium, & videbunt omnes fines terrae salutare Dei nostri. Et infra: Praecedet enim vos Dominus, congregabit vos Deus Israël. Haec & alia multa illic similia ad Messiam pertinere omnes tam Iudaei quam Christiani consentiunt. Deinde subdit, Ecce intelliget puer (aliter seruus meus) quod iste seruus sit Messias. Declarat etiam Chaldaea translatio hunc in modum. Ecce intelliget seruus meus Messias. Rursus quod Messias iste sit Deus, Iudaei Interpretes Talmutici Esaïam hic exponentes sic ostendunt. Exaltabitur plusquam Abraham, eleuabitur plusquam Moyses, sublimis erit valde plusquam Angeli. Quam verò preciosa sit redemptio huiusmodi per Messiam, patet per illud Esaïae: Israël saluatus est in Domino salute aeterna, non confundemini, & non erubescetis usque in saeculum saeculi. Non igitur corporalis, vel temporalis futura erat per Messiam salus, qualis Aegyptiaca, & Babylonica, & similes, sed spiritalis, & sempiterna. Quamuis autem prophetia illa Esaïae: Ecce intelliget, ad Iesum nostrum manifestè pertineat, tamen Rabi Salomon peruersae voluntatis homo, ausus est verba illa pervertere, extorquens ea ad Iudaicum populum in hodierna miseria viuentem. Cui quidem contradicit translatio Chaldaea, sicut diximus. Contradicunt etiam omnes antiqui Iudaei Interpretes Prophetarum, qui seruum illum esse Messiam volunt, Angelis valde subliorem, quae excellentia plebeculae huic Iudaicae vili, & vitiosae conuenire non potest.

Vnde Rabi Moses Gerundenſis, hoc Salomone contempto, secutus est priscos. Itaque in Genesis commentariis di-



cit, regem Messiam cor suum traditurum ad supplicandum pro Israel, ieiunia etiam pro illis, & humillima quaque passurum, adducens illud Esaiæ. Ipse autem vulneratus est propter iniquitates nostras, attritus est propter scelera nostra. Hæc ille. Et quamvis Iudaica sex hodie multum afflicta sit, & quasi vulnerata & attrita eodem penè modo, quo Esaias Dei seruum depingit afflictum, nullo tamen modo Esaiæ verba huic plebi congruere possunt, quòd quidem sex potissimum signa nobis ostendunt.

Primum, & si populus hic grauiter oppressus, non tamen hoc propter Gentium iniquitates, & scelera patitur, ita vt propter Iudæorum passiones & merita, Gentes quæ illos affligunt, à Deo veniam, & salutem consequantur, imò Iudæi omnes vindictam à Deo aduersus Gentes expectant. Cum ergo Esaias de seruo Dei asserit, quòd liuore eius alij sunt sanati, & quòd Deus in eo iniquitatem cæterorum omnium posuit, certè non loquitur de populo Iudæorum, ob cuius poenas alij non seruantur, sed vt ipsi asserunt, puniuntur. Secundum signum, Esaias ait, quòd seruus ille Dei iniquitatem non fecit, nec inuenus est dolus in ore eius. Iudæi autem auaritiæ, & foenori, mendacio, sceleribusque mancipati sunt. Ac etiam ipsimet concedunt, propter scelera sua in hac miseria viuere, & autoritate Deuteronomij, compulsi fatentur, quòd si deposita prauitate conuerterentur ad Deum, statim liberarentur. Vnde doctores eorum confidentes, ex peccatis suis hanc miseriam prouenire, inquirunt, quæ nam sint illa peccata. Rabi Salomon cultum vituli in deserto fabricati criminatur, quòd crimen tandem Deus puniuerat, & ignouerat ante Iesum. Alij varia singulorum delicta, alij occultum volunt esse peccatum, cuius culpa supplicia pendunt. Tertium signum. Esaias in fine capituli dicit, quòd seruus ille Dei pro transgressoribus exorauit. Iudæi contra ter saltem quolibet die in execrabilibus sacris suis, Romano Imperio, Ecclesiæ Christi, cunctis Gentibus, præterquam Iudæis, terribilissima imprecantur, atque in Talmuticis constitutionibus suis iubentur, Christianos vt cunque possint, vel vi, vel fraude, dolore lædere. Quartum, quonam pacto eruditio, & disciplina pacis, quam in seruo Dei esse Esaias ait, in hac indocta, & peruersa Iudæorum plebecula ponenda est. Quintum, quonam pacto sublimior est populus ille quam Angeli Dei, qualem esse illum

seruum Dei omnes antiqui Iudæi proculdubio consenserunt. Sextum, cum dicat Esaias: Iniquitatibus populi mei ductus ad mortem, quis non videat alium esse seruum Dei illum, qui ad mortem ducitur, alium Dei populum, ob cuius iniquitates occiditur, nisi fortè quis velit Esaiam scriptorem omnium elegantissimum, sic absurdè locutum fuisse, vt intelligi voluerit, ab iniquitatibus populi mei ductus est populus meus ad mortem. Proinde si populus Iudaicus peccatum non habet, falso hic de populo Iudaico loquitur Esaias, si habent, falso loquitur statim, quando subdit, iniquitatem non fecit, si modo tunc de populo loquitur, seruus igitur ille Dei nullo modo populus esse potest. Sed operaprecium est verba ipsa Esaiæ in duodecim Conclusiones redigere, quemadmodum Paulus Burgenfis Episcopus, Theologus insignis redegit. Prima, Seruus Dei apud Esaiam descriptus cunctis creaturis est excellentior, dicit enim, exaltabitur, & eleuabitur, &c. Secunda, Ipse ab initio fuit paruulus, humilemque habuit ortum, dicit enim, ascendit sicut virgultum, & sicut radix è terra sitienti. Tertia, In suo progressu contemptus est, & pro nihilo habitus, ait enim despectum, & nouissimum viro- rum vidimus, nec reputauimus eum. Quarta, Vulneratus fuit propter iniquitates nostras scilicet purgandas. Vnde illud: & liuore eius sanati sumus: Et infra, Iustificabit ipse iustos seruos meos multos, & iniquitates eorum ipse portabit: Quinta, Omnes iusti præter ipsum ex communi lege à via salutis aberrauerunt, ipse autem omnium portauit iniquitatem, id est, pro omnibus poenas dedit. Hinc illud: Omnes nos quasi oues errauimus, & Deus posuit in eum iniquitatem omnium nostrum. Sexta, Hæc supplicia, & post illa etiam mortem libenter sustinuit, de quo dicitur, oblat- us est, quia ipse voluit, & sicut ouis ad occisionem ducetur, & quasi agnus coram tondente. Iudæi autem non libenti, sed inuito, & agro animo passiones ferunt. Septima, Id contigit propter scelus, & iniquitates populi, erat autem ille innocens. De hoc ait: propter scelus populi percussi cum, & de eodem legitur infra, qui peccatum non fecit, nec est inuenus dolus in ore eius. Octaua, Quia seruus ille Dei, parta victoria, fortium spolia diuisurus erat, ex eo quòd vitam suam morti tradidisset. Huc illud tendit: Ideo disponam ei plurimos, & fortium diuidet spolia, quia morti tradidit animam suam. Nona, Existimandus erat iniquus, ob hoc ait: Et cum

sceleratis reputatus est. Decima, Seruus huiusmodi licet per illa, quæ tolerauit sufficienter peccata omnium sustinere, ac delere potuerit, non tamen effectu omnium mala diluit, sed multorum, quapropter adiunxit, & ipse peccata multorum tulit. Vndecima, Tanta in eo fuit charitas, ut etiam pro hostibus, homicidisque suis Deum orauerit, ad hoc subdit, pro transgressoribus orauit. Duodecima, Quæ in hac prophetia traduntur, naturalis ingenij vires excedunt, quæ circa exclamauit: quis credidit auditui nostro: hæc omnia soli Iesu Nazareno conueniunt.

Hieremias. Spiritus oris nostri Dominus Christus captus est in peccatis nostris, cui diximus, in umbra eius uiuemus in Gentibus. Item: In illo die non confunderis ex omnibus adinventionibus tuis, quas ipse egisti in me, quia tunc auferam abs te prauitates iniuriæ tuæ, & iam non adicies ut magnificeris super montem sanctum meum, & subrelinquam in te populum mansuetum & humilem, & verébuntur in nomine Domini, qui reliqui fuerint Israël. Item: Domine, significa mihi ut cognoscam, tunc vidi meditationes eorum, ego sicut agnus sine macula perductus sum ad victimam, in me cogitauerunt cogitationes dicentes: Venite, mittamus lignum in panem eius, & eradamus e terra vitam eius, & non erit memoria eius amplius. Item, exterrita est quæ parit, & tædedit animam, & subiuit soli ei, cum adhuc medius dies esset, confusa est & maledicta, reliquos eorum in gladium dabo in conspectu inimicorum eorum. Item: Dereliqui domum meam, dimisi hereditatem meam in manu inimicorum eius, facta est mihi hereditas mea sicut leo in sylua, dedit super me vocem suam, ideo odio habui eam. In iis docet Hieremias, quod Messias capiendus ob purganda nostra delicta erat, & intelligendus, quodque vel relicturus erat populum illum Christianorum primum humilem, persecutionibusque subiectum. Reliquias enim Israël Apostolos, Martyresque esse vult. Post hæc etiam ligni crucis mentionem facit, & eclipsis in meridie, patiente Christo. Martyria etiam Christianorum subiungit, vindictamque aduersus pertinacem populum Iudæorum: Denique addit, quod populus Dei tanquam leo surrexit in Christum tanquam agnum, atque ideo Deus populum illum exterminabit.

Salomon. Si auertimini à me, dicit Dominus, & non custodieritis veritatem

meam, reiciam Israël à terra, quam dedi illis, & domus hæc erit deserta, & omnis qui transibit per illam, admirabitur, & dicit: Propter quam rem fecit Dominus terræ huic, & domui huic hæc mala? & dicit, quia reliquerunt Dominum Deum suum, & persequuti sunt regem suum dilectissimum Deum, & cruciauerunt illum in humilitate magna, propter hoc importauit illis Deus hæc mala. Hæc ille. Quis ergo negabit Iesum Nazarenum fuisse Messiam, hominemque fuisse pariter atque Deum?

Eidras. Hoc Pascha saluator noster est, & refugium nostrum, cogitate quoniam habemus humiliare cum in ligno, & post hæc sperabimus in eum, ne deseratur hic locus in æternum tempus, dicit Dominus Deus virtutum. Si non credideritis in eum, neque audieritis annunciationem eius, eritis derisio in Gentibus. Hæc ille, Quibus nihil est clarius. Non minus autem eius illud Mosis congruit. Ego sum Deus, ad æmulationem vos adducam, mihi non Gentem in Gentem, insipientem in iram vos mittam. Præ cæteris verbis Esdræ, maxime illa consideranda sunt, quod Saluatorem, id est, Iesum, qui Saluatorem significat in ligno in Paschæ tempore, Iudæi humiliaturi erant. Meminisse rursus oportet, quod quartadecima Luna, lex Iudæis celebrare pascha, & agnum præcipit immolare. Vnde Apollonius Philosophus Alexandrinus, subtiliter probat, primò quidem rationibus, deinde lege, ac etiam authoritate Philonis, Iosephi, Agatobuli, Aristobuli, Iudæorum ritum celebrandæ Paschæ Mosaicum, rectum, & consuetum esse mense Martio, postquam & Sol & Luna æquinoctium vernale transferit, ac Luna Soli opposita sit. Hinc Policrates Apostolicorum discipulorum discipulus asserit, Apostolos etiam, eorumque successores solitos celebrare Pascha iuxta Iudæorum consuetudinem quartadecima Luna, quando populus Iudæorum Azima faciebat. Quorsum hæc? ut confirmemus quod aliàs diximus, scilicet eclipsim Solis, quæ Christo patiente contigit, naturalem non fuisse. Quod autem contigerit, Lucianus Antiochenus ante tribunal iudicis sui sic testatus est. Requirit in Annalibus vestris, inuenietis temporibus Pilati, Christo patiente, fugato Sole, interruptum tenebris diem. Tertullianus quoque clamauit ad Iudices: Hunc mundi casum in Annalibus vestris relatum habetis.

Esaias. Ego Dominus Deus vocauit ad

iustitiam, & tenebo manum tuam, & confirmabo te, & dedi te in Testamentum generis mei in lucem Gentium, aperire oculos cæcorum, producere ex vinculis alligatos, & de domo carceris sedentes in tenebris. Hæc ille, in quibus Deus Christum alloquitur. Mittit eum ad Testamentum novum introducendum, Gentiles conuertendos, non minus quàm Iudæos, ad eos qui in limbo alligati sunt, soluendos, & purganda peccata. Alibi apud Esaiam Christus ita loquitur. Non sum contrumax, neque contradico, dorsum meum posui ad flagella, & maxillas meas ad palmas, faciem autem meam non auerti à fœditate sputorum. Item, in die illa erit radix Iesse quæ erit in signum populorum, ipsum Gentes deprecabuntur & erit sepulchrum eius gloriosum, hæc omnia Iesu Nazareno contigerunt.

Amos. Et erit in die illa dicit Dominus, occidet Sol meridie, & tenebrabitur dies lucis, & conuertam dies festos vestros in luctum, & cantica vestra in lamentationem. In die scilicet, quo patietur Messias, occidet Sol, eclypsim Solis in meridie, patiente Iesu, significat, dies lucis, id est, Christus, qui lux lucis est. Post hæc in perpetuam vindictam statuit Deus, vt Iudæi quotidie vexentur, lamentationesque Hieremiæ, & similes querimonias repetant.

Ezechiel. Exaltaui lignum humile.

Iob. Quis det nobis de carnibus eius, vt saturemur?

Zacharias. His plagatus sum. Item alibi de Deo saluante Ierusalem sic ait: Effundam super domum Davidis & super habitatores Ierusalem spiritum gratiæ, & potestatis, & aspicient in me, quem confixerunt, & plangent super eum quasi planctum vni-geniti. Hæc ille. Ipse qui tanquam Deus spiritum gratiæ, & potestatis infundit, tanquam homo configitur, atque idcirco, vt intelligeremus, Christum ex diuersis naturis constitutum, alia ratione mirabilia operari, & ratione alia terribilia pati. Zacharias in prima persona dixit, scilicet effundam, in secunda, super eum effundam, scilicet ego tanquam Deus, aspicient in me quem confixerunt, scilicet tanquam hominem, & plangent super eum, scilicet hominem à me Deo assumptum. Nemini autem licet fingere textum, qui dicat, aspicient in eum, omnis enim Biblia tam Hebraica quam Chaldæa dicit, aspicient in me, plangent, id est, pœnas dabunt in hoc sæculo, & futuro. At quo pacto spiritum gratiæ infundit, si plangent super eum?

certe Spiritus sancti gratiam, & priscorum peccatorum, liberauit enim volentes ab inferis, infudit etiam spiritum potestatis ad incredulos puniendos, hi enim sunt qui plangunt.

Abacuc. In medio duorum animalium cognosceris, existi in salutem populi tui, vt saluos faceres Christos tuos, misisti in capita inimicorum mortem, duorum animalium, id est, duorum Testamentorum, rursus duorum Prophetarum in monte Thabor, Mosi & Helix. Iterum duorum latronum in cruce. Fortè etiam duorum brutorum, quando natus est in stabulis in salutem populi tui, vt saluas ab inferis faceres credentium animas. Inimicos vocat pertinaces Hebræos.

David loquitur sæpè sub nomine suo de Messia, quem sciebat è sua stirpe pul-laturum, sic autem inquit: Congregata sunt super me flagella, & ignorauì, dissoluti sunt, neque compuncti sunt, tentauerunt me, deriserunt me derisu, & striderunt dentibus suis super me. Deriderunt in escam meam fel, & in siti mea potauerunt me aceto, circumdederunt me canes multi, concilium malignantium obsedit me. Effoderunt manus meas, & pedes meos, dinumerauerunt omnia ossa mea. Ipsi autem contemplati sunt, & viderunt me, diuiserunt sibi vestimenta mea, & super vestem meam miserunt sortem. Captabunt in animam iusti, & sanguinem innocentem condemnabunt, & factus est mihi Dominus in refugium. Erues me de contradictionibus populi, constitues me in caput Gentium, populus quem non cognoui seruiuit mihi, in auditu auris obediuit mihi. Scribantur hæc in generatione altera, & populus qui creabitur, laudabit Dominum. Notum fecit Dominus salutare suum, ante conspectum Gentium reuelauit iustitiam suam. Dabo tibi Gêtes hæreditatem tuam, astiterunt reges terræ, & principes conuenerunt in vnum aduersus Dominum, & aduersus Christum eius. Fiat mensa eorum coram ipsis in laqueum, & in retributionem, & in scandalum. Obscurentur oculi eorum ne videant, & dorsum eorum semper incurua. Effunde super eos iram tuam, & furor iræ tuæ comprehendat eos. Fiat habitatio eorum deserta, & in habitaculis eorum non sit qui inhabitet. Quoniam quem tu misisti persequuti sunt, & super dolorem vulnerum meorum addiderunt. Appone iniquitatem eorum, & non intrent in iustitiam tuam. Deleantur de libro viuentium, & cum iustis non

scribantur. Ego sum pauper & dolens, salus tua Deus suscepit me. Non erat pauper David rex, sed Messias ex eo pauper nasciturus. De Iuda proditore sic prædixit David. Qui manducat mecum panem, leuabit contra me calcaneum suum. De Iudæis iterum: Sic odio habuerunt me gratis, de quibus Apostolus sic vaticinatus est Implebunt peccata sua semper, peruenit enim ira Dei super illos usque in finem. Sic ergo prædixit sempiternam Iudæorum, & pertinaciam, & miseriam. At cur prætermisissurus, quod Hieremias de Christi venditione à Iuda facta, & pretio, & agri emptione, quemadmodum in Euangelio traditur, aperte prædixit? Inquit enim: Et acceperunt triginta argenteos, pretium appetiati, quod appetiauerunt à filiis Israël, & dederunt eos in agrum figuli, sicut constituit mihi Dominus. Adiungit Matthæus agrum illum Christi pretio emptum etiam temporibus suis, sanguinis agrum cognominari. De resurrectione Christi David sic inquit: Caro mea requiescet in spe, quoniam non derelinques animam meam in inferno, nec dabis sanctum tuum videre corruptionem, quia scilicet Christus non putruit. Rursus: Domine eduxisti ab inferno animam meam, ego dormiui, & soporatus sum, & resurrexi, quia Dominus suscepit me. Resurrexi & adhuc tecum sum. Dauidi consentit.

Osce: Sanabit nos post biduum, die tertia resurgemus, vel sic: Venite reuertamur ad Deum, quia ipse cepit, & saluabit nos, percutiet & curabit nos, visitabit nos post duos dies. Die tertia suscitabit nos, & veniemus in conspectum eius. Rursus, Absorpta est mors in victoria, ubi est mors victoria tua? ubi est mors stimulus tuus? scilicet qua per resurrectionem Christi designatur etiam nostri corporis resurrectio. Sicut enim in vno Adam omnes deliquimus, & mortui sumus, sic in vno Christo omnes purgamur, atque resurgimus, sed de hoc Paulus Apostolus subtiliter atque diuine.

Ionas autem Propheta cur exceptus est vasti piscis ventre, & die tertio redditus luci viuens, nisi vt resurrectionem Christi significaret? Gesta siquidem veteris testamenti, non minus quam verba figuræ sunt noui. Nouum quippè non aliter veteris finis est quam adumbrationis cuiusdam coloratio absoluta, & perfecta pictura, ideoque nouum testamentum multo præstantius est quam vetus.

Dauid ascensionem Domini ita cecinit: Ascendet Deus in iubilatione, & Dominus

in voce tubæ. Psallite Domino, qui ascendit super cælum cœli ad Orientem. Ascendisti in altum, captiuam duxisti captiuitatem, dedisti dona hominibus. Sancti quoque spiritus missionem ita canit. Emittere spiritum tuum, & creabuntur, & renouabis faciem terræ.

Ioël: Et erit post hæc, Effundam de spiritu meo super omnem carnem, & prophetabunt filij vestri, & filia vestra. Seniores vestri somniabunt somnia, iuuenes vestri visa videbunt, & quidem in seruos meos, & ancillas meas, in diebus illis effundam de spiritu meo. Post ascensionem Christi, non solum Apostoli, sed & alij quamplurimi, tam scemina, quam mares, tam Gentiles, quam Iudæi, docti, indocti, senes, iuuenes, Spiritus Sancti dona gratiamque mirabilem acceperunt.

Esaïas: In aliis linguis, & in aliis labijs loquar populo huic, sed neque sic exaudiet me dicit Dominus. Atque ita quamuis Apostoli ante rudes, accepto Spiritus sancti munere, diuina mysteria subito variis linguis effunderent, non tamen Iudæi omnes crediderunt.

Ezechiel: Spiritum meum dabo in visceribus vestris. Et alibi de Baptismo sic, Effundam super vos aquam mundam, & mundabimini ab omnibus inquinamentis vestris, & ab vniuersis idolis vestris mundabo vos. Iudæorum Doctores vbi librum eorum de Ioua interpretantur, & vbi exponunt Talmut, nouas scilicet eorum constitutiones post Iesum factas, adducunt prophetiam huiusmodi, vt probent quod tempore Messia, non modo Iudæi, sed etiam Gentes quælibet aspiratione quadam aquæ sordes diluent peccatorum.

Esaïas in Cantico sic: Haurietis aquas in gaudio de fontibus Saluatoris, & dicitis in illa die: Confitemini Domino, & innocate nomen eius (Saluatoris) id est, Iesu Messia, Iesus enim significat saluatorem. Confitemini Domino, quia scilicet vnus Dei cultus adducitur per Christum, cessantibus idolis. Subiungit paulo post Apostolorum prædicationem apud Gentes hoc pacto: Cantate Domino, quoniam magnificè fecit, annunciate hoc in vniuersa terra. Quoniam verò Christus nascitur in Iudæa, subiunxit, Exulta, & lauda habitatio Sion, quia magnus in medio tui sanctus Israël.

Dauid Propheta multa & manifesta de Christo tractat in Psalmo secundo, tertio, decimo quinto, vigesimo primo, multisque aliis. Sed missio Apostolorum in longinquas nationes per illud ostenditur, in om-



nem terram exiuit foris eorum, & in fines orbis terræ verba eorum.

Esaïas de Messia, ac de missione Apostolorum sic: Quàm speciosi pedes Euangelizantium pacem, Euangelizantium bona. Afflictiones quoque Apostolorum ita præsensit, & prægustauit. Propter te mortificamur tota die, existimati sumus sicut cives occisionis. Origenes in tertio Commentariorum Genesios sic inquit: Thomas sicut nobis traditum est, sortitus est Parthos, Matthæus Æthiopiam, Bartholomæus Indiam citeriorem, Andreas Scythiam, Ioannes Asiam, Petrus Pontum, Galatiam, Bithiniam, Capadociam, cæterasque confines provincias, Iudæis duntaxat prædicans, circuisse deprenditur, & ad vltimum Romæ commoratus est, & vbi crucifixus est deorsum capite demerso, quod ipse ita fieri precatus est, ne exæquari Domino videretur. De Paulo autem quid dicam, qui ab Ierusalem vsque ad Illyricum repleuit Euangelio Christi, & ad vltimum sub Nerone martyrium duxit. Hæc Origenes. Thaddæus quoque vnus ex septuaginta Christi discipulis, vltra Eufratem profectus, & in Edissenæ vrbe prædicans Euangelium, totum regnum regis Abagari conuertit ad Christum, ipsumque Abagarum à morbo quodam incurabili mirabiliter liberauit. Sic enim fore Christus per Epistolam Abagaro ante promiserat, cum ab ipso per Epistolam rogatus fuisset, vt ad eum curandum proficisceretur. Eusebius hæc in publicis historiis Edissenæ ciuitatis, in qua regnauerat Abagarus, Syrorum lingua scripta legit, in Græcâque traduxit.

*Solutiones dubitationum circa Prophetas.*

## C A P V T XXVIII.

**E**Xponenda sunt ad præsens quædam Prophetarum verba, quæ non satis intellecta occasionem pertinacibus, hebetibusque Iudæis præbent, vt Iesum fuisse Messiam, id est Christum verum, nequaquam confiteantur.

Esaïas. Erit in nouissimis diebus, id est, vltimis Prophetarum temporibus, & in fine regni, sacerdotique Iudaici. Non enim in nouissimis diebus mundi, vt quidam somniant, Christum primò vult esse venturum, alioquin fermè inutilis, vel saltem ad breue vtilis foret eius instructio, sed in nouissimis diebus Prophetarum, sacerdotij, regnique Iudai-

ci. Tria hæc sub Iesu Nazarenò cessauerunt, & sequitur: Mons domus Domini in vertice montium. Ob hoc quidam Iudæi delirant, dicentes quod in aduentu Messiae, Deus transferet montem Thabor, montem Synai, montem Carmeli vsque Ierusalem. Ac super horum verticem montem Sion imponent. Hebetes homunculi incorporalis Dei, incorporaliaque opera semper ad corpora trahunt. At verò multò rectius Esaïam hic exponit Rabi Salomon Iudæus dicens: Montem Sion non altitudine loci, sed miraculorum magnitudine cæteros montes superaturum. Iesus autem noster in eo monte illuminauit cæcum natum, curauit Paralyticum, multaque alia illic miracula fecit, denique ibi spiritum Sanctum è cælo discipulis suis infudit. Post hæc sequuntur: Et fluent ad eum omnes Gentes, id est, ex omnibus Gentibus multi. Dicunt similiter, omne animal in Noë Arca fuisse, id est, ex omni animalium genere aliqua. Non leuabit Gens contra Gentem gladium, nec exercebuntur vltra ad prælium. Dictio hæc (Vltra) significat non sempiternam mundi pacem, sed vniuersalem, & diuturnam. Fuit autem tanta Iesu tempore pax, quemadmodum aliàs diximus, vt Maro tunc clausas esse portas belli cecinerit. Habent Hebræi in quarto Regum libro. Non venerunt vltra latrones Syriæ in terram Israël. Verumtamen post illud tempus, traditur Syrios frequenter terram Israël inuasisse. Vltra ergo significat vsque ad certum tempus. Eusebius autem tradit post Iesum vsque ad sua, id est, Constantini tempora, non contigisse tot regnorum euerfiones, cladesque populorum, quod ante contigerant. Item Esaïas idem alibi de tempore Messiae ait: Habitabit lupus cum agno, & pardus cum hœdo accubabit. Quamuis Eleazarus Pontifex Aristobulusque ante Christum, ac Philo post Christum Iudæorum interpretum sapientissimi sacras literas propter mysticum sensum per allegoriam exponendas esse censuerint, idque etiam ipsi tentauerint, tamen puerilia multorum Iudæorum ingenia, talem omnino regnante Messia, auream ætatem expectant, qualem Poëtarum verba coloresque depingunt. Satis autem viuente Iesu, fultit in animis hominum non pertinacium, aurea veritas, tranquillitas mentis, & fructus æternus, atque post illum ob eius opera, & doctrinam, quicumque vult aurea ætate potitur, æterna pax hominibus cum Deo per Iesum conciliata est. Quam-

quam etiam multos annos, lupus, id est, potentior princeps, vel populus, agnum, id est, debiliorem principem aut populum non deuorauit. Erant ante Iesum Gentiles & Iudæi, in omnibus omnino inter se discordes, post illum multi ex Iudæis, plurimi ex Gentilibus, sub illius doctrina concordēs moribus opinionibusque uiuebant, atque uiuant. Quotidie multis in locis animalium uenenosorum morsus, Apostolorum miraculis innoxij reddebantur, singula hæc ad seculum aurum pertinere videntur. Omnino autem aurum seculum in animi potius quam in corporis fructibus est ponendum. Nugæ uero Poetarum pueris relinquendæ, quod & Rabi Moses indicauit. hic enim in libro de Iudiciis ait: Caue ne putes Messias tempore mundi ordinem naturaliumque rerum progressionem aliter quam soleat se habere. Quod autem Esaias inquit, Habitabit lupus cum agno, & cætera, ænigmaticum est, significat enim Israël cum impiis seculi huius hominibus, qui figurantur lupi atque pardi, securum conuersaturum. Hæc ille.

Moses in Deuteronomio. Si ad cardines cœli fueris dissipatus, inde retrahet te Dominus Deus tuus, & assumet, atque introducet te in terram, quam possederunt patres tui. Iudæi ob hoc expectantes Christi auxilio congregari, cum propter Iesum dispersi fuerint, fuisse eum uerum Christum non confitentur. Quibus respondendum est: Oraculum hoc tunc impletum fuisse, quando ex Babylonica seruitute liberati fuerunt. Tunc enim, ut testatur Esdras, Cyrus rex, non solum permisit Iudæos omnes in patriam reuerti, uerumetiam munera proposuit reuertentibus. Quod si quis ad Messiam huiusmodi congregationem pertinere conuicerit, dicam satis per Iesum dissipatus propter peccatum animas, quæcunque uoluerit in cœlestem patriam congregari, vocatur enim illa à Dauide terra uiuentium. Credo, inquit, uidere bona Domini in terra uiuentium. Vnde Rabi Moses Ægyptius in Deuteronomio, diuinum ipsum bonum, quod intelligibile est, multis dicit nominibus in sacris literis nuncupari, dicitur enim mons Dei, & locus sanctus eius, locus sanctuarij, via sancta, atria Domini, templum Domini, domus Domini, porta Domini. Hæc ille. Rabi quoque Salomon, & Rabi Abba ædificationem templi ab Ezechiele descriptam ad cœlestem pertinere Hierusalem arbitrantur.

Vani sunt igitur qui visibile templum à Messia construui sperant, uani rursus qui populum Israël secundum lobum ab eo congregatum iri expectant, uani tertio, qui Iudæos omnes tempore Messias saluos fieri arbitrantur. Audiamus Hieremiam ita dicentem: Conuertimini filij reuertentes, ait Dominus, quia ego Vir uester, & assumam uos unum de ciuitate, & duos de congregatione, & introducam uos in Sion, & dabo uobis pastores iuxta cor meum, & pascent uos scientia, & doctrina. Hæc ille. Quæ quidem uerba de ultima redemptione, quæ per Messiam erat explenda, intelligenda sunt, non autem de redemptione à Babylonica seruitute, sicut aliqui opinantur. Nam in eodem contextu legitur. In illo tempore vocabunt Hierusalem solium Domini, & congregabuntur ad eam omnes Gentes in nomine Domini. Quocirca Rabi Salomon in libro Camedrin superiora Hieremias uerba, scilicet assumam uos unum de ciuitate, & duos de congregatione, exponit de ultima illa, quæ ab eis expectatur redemptione, sic enim ibi ait: Eligam iustos, & introducam eos in Sion. Ex quo patet in ultima per Messiam redemptione non omnes Israëliticos saluari, sed iustos. Hi autem pauciores admodum sunt iniustis, qui non saluantur, ideo dixit Propheta: unum de ciuitate, & duos de congregatione (aliter congregatione) quasi dicat, valde pauci eligentur ex multis. Hæc ille. Rursus ibidem aliquis ex antiquis Talmudicis inquit. Sicut ex sexcentis millibus hominum, qui Ægypto egressi sunt, soli duo, scilicet Caleph & Iosue terram promissionis intrasse traduntur, ita in Messias tempore fore. Sic enim apud Oseam scriptum esse, & canet ibi iuxta dies iuuentutis suæ, & iuxta dies ascensionis eius ex terra Ægypti. Hæc ille.

Zacharias loquens de Christo inquit: Aedificauit templum Domino. Expectant Iudæi Christum vastissimam in terris ex lapidibus mortuis machinam constructurum. Iesus autem sublime, & cœleste ex uiuentibus animorum lapidibus templum diuina nimiam arte construxit. Sed isti per superiora etiam confutantur.

Hieremias: In diebus eius scilicet Messias, saluabitur Iuda, & Israël habitabit confidenter. Dies illos quos nominat, ad Christum pertinere uolunt, cuius manibus in priscum illud, terrenumque regnum reduci sperant, terrenisque opibus ad uotum dirari. Nos autem dicimus,

per Christi gratiam & doctrinam, animas volentium tam reliquorum quam Iudæorum à pristina illa culpa mundari, per quam mundationem habitare corpus cum hac fiducia posset, ut post corporis solutionem ad cœlestia reuolent. Iuda, id est, Genus humanum, quod à Iuda, id est, ab Iudæa totam originem habet, saluabitur, scilicet si volet, sed ex quonam saluabitur? scilicet ex culpa per Adam concepta, & habitabit cœlum. Meminisse debemus Israël in sacris literis interdum significare homines cuiuscunque generis, modo verum cultum Dei Israël sequantur, etiam si ab Israël, seu Iacob secundum sanguinem non descenderint. Quapropter Esaias, ubi agit de propagatione populi Israël, per vocationem Gentium, sub doctrina Messiae inquit, Effundam spiritum meum super sementium, & cætera, & germinabunt inter herbas quasi salices iuxta fluentes aquas. Et in eodem contextu declarat hanc propagationem feminis Israël, seu Iacob non esse solum secundum progeniem corporalem intelligendam. Idcirco subdit: Ille dicit, Domini ego sum, & ille vocabitur in nomine Iacob, & hic scribet in manu sua Domino, & in nomine Israël assimilabitur, hæc ille. Qui dicit, Domini ego sum Israël, ita est secundum carnem, de quo etiam illud additur, & ille vocabitur in nomine Iacob. Quod præter hæc in textu sequitur, ad eos pertinet, qui opinione, moribusque sunt similes Israël, vnde Rabi Salomon ubi interpretatur verba huiusmodi, & in nomine Israël assimilabitur, sic dicit: Isti sunt, qui ex cultu Gentilium ad verum Dei cultum conuertuntur, digni enim sunt, qui Israël nomine nuncupentur, hæc Salomon. Quando igitur Prophetæ aiunt, Israël sub Messia saluum fore, non genus hominum hoc, aut intelligunt, sed omnes qui cultu, & vita Israël & Iacob se similes reddunt; quod si velis hoc nomine Iuda, & Israël, in textu illo Ieremiæ peculiarem duntaxat Dei populum significari, esto. At illi qui Dei filium negauerunt, degenerati sunt, à Romanis puniti sunt, qui verò illum ex Iudæis sectati fuerunt, & multi quidem & magni viri, verè erant Israël nomine nuncupandi, atque præcipui inter illos, signo quodam à Deo dato, ante Hierosolymæ urbis obsidionem in regnum Agrippæ regis, qui Romanis amicus erat, aufugerunt seruarique sunt. Vnde David; Dediti metuentibus te significationem, ut fugiant à facie arcus,

Consideratione dignum est illud non parua, quod verè Paulus Apostolus vaticinatus est: Iudæos videlicet aliquos pertinares fore, donec Gentiles omnes omnino vndique conuertantur ad Christum, postremo etiam illos in sæculorum fine penitus conuertendos. Adduxit quoque Propheticum illud; Veniet ex Sion, qui eripiat, & auertat captiuitatē ab Iacob, & hoc illis à me Testamentum, cum peccata eorum abstulero. Sic demum statutis temporibus Iuda saluabitur, erique tunc, quod diuinitus prædictum fuit, pastor vnus, & vnum ouile, tunc implebitur illud Zachariæ: In die illa erit Dominus vnus, & nomen eius vnum. Illud quoque Sophoniæ: Tunc reddam populis labium electum, ut vocent omnes in nomine Domini & seruiant humero vno. Adde rursus illud Ezechielis: Tuuc conuertam captiuitatem Iacob, & miserebor domui Israël Cui illud est simile: Reducam captiuitatem vestram de cunctis locis. Sed quando hæc erunt? quotidie ex captiuitate tum peccati, tum hominum liberantur per Messiam Iudæi, quicunque volunt. Apparebit autem hoc præcipue quando maximè volent, hoc est, in secundo Christi aduentu, propè mundani cursus finem. Tunc Messias armis quibusdam aduersus impios prælia illa mouebit, quæ Zacharias in bello Hierosolymitano futura prædicit, & post subiungit: In die illa erit Dominus vnus, tunc Messias potenter effundet iram super Gentes, & regna, quemadmodum Sophonias Prophetæ minatur, in quibus subiungit illud: Tunc reddam populis, tunc prælium illud Gog & Magog implebitur ab Ezechiele descriptum, quo finito, redemptionem Israël fore, prædicit Ezechiel, tunc conuertam captiuitatem. Christus ergo in primo aduentu doctrina, exemplo, & opere, suauiter volentium peccata remisit, In secundo rem fortius aggredietur, purgabit acrius, & pertinaces cum duce eorum Antichristo violentia expurgabit, sic enim Dei naturam disciplinæ ordo requirit.

Daniel. Aspiciebam in visu noctis, & ecce in nubibus cœli quasi filius hominis veniebat. Propter hæc, & similia expectant Iudæi Christum non humilem habitum, & fortuna sicuti Iesum accepimus, sed magnificum, & potentem, nescientes duplicem eius aduentum esse. Venit humilis olim iudicandus, veniet postremò magnificus iudicandus. Quod autem de ultimo mundi iudicio ibi loquatur Daniel, apparet, cum subiungit. Throni positi sunt, &

libri aperti sunt. Aduentum verò primum esse humilem multis Prophetarum oraculis, in superioribus demonstrauius, de quo illud Dauidis. Ego autem sum vermis, & non homo, opprobrium hominum, & abiectio plebis, omnes videntes me deriserunt me, locuti sunt labiis, & mouerunt caput. Sperauit in Domino eripiat eum, saluum faciat eum, quoniam vult eum, quoniam tu es qui extraxisti me de ventre. Spes mea ab vberibus matris meae, in te proiectus sum ex utero, de ventre matris meae, Deus meus es tu, ne disceseris à me. Subdit multa ibidem ad idem manifestissime pertinentia. Nonnulli Iudaeorum cum diuersa de diuerso aduentu oracula legerent, duos Messias introduxerunt, alterum filium Ioseph, id est, ex Ioseph patre Effraim longo ordine descendente, Passioni cædique subiectum. Alterum descendente ex Dauide, quem Dauidis filium appellare consueuerunt, qui Messiam alteram occisum suscitaret, regnumque Israel potenter instauret. Sed hi manifestè delirant.

Sacræ enim literæ ab vno, & per vnum, & ad vnum pendere volunt generis humani salutem, & quando de Messia loquuntur, ferè semper Dauidis, vel inde prolem vocant, Ioseph verò patris Effraim nunquam. Hinc Rabi Moyses libro ludicum adducens præcipuas omnes de Messia sententias, concludit Messiam ex Dauidis genere fore, nullamque alterius Messiae mentionem facit. Insaniunt igitur, qui frustra geminos inducunt, cum sufficiat vnus. Quanto rectius nos per vnum Iesum sufficientes implemus vaticinia omnia, quamuis diuersa, & sufficienter implemus. Ille siquidem Ioseph cuiusdam quasi adoptione, siue fama, & custodia filius, filius quoque Dauidis regis ex matre, quæ descendit ex Dauide, iudicatus est à mundanis semel humilis, semel quoque mundum potentissime iudicabit.

Esaïas. Erit lux Lunæ sicut lux Solis. Non de tempore primi aduentus hic loquitur, in quo non erat consuetus ordo mundi mutandus, vt alias diximus, sed de sæculo post aduentum Christi secundum. Non enim cessabunt post vltimum Iudicium cælestia corpora, vel elementa, sed motus, qui genera quietis est institutus, atque erit: deinde exuberante lumine pulchrius vniuersum, Adiungit: Tunc sanabitur vulnus populi & pressura plagæ eius, quia destruetur mortalitas propter peccatum primorum partum nobis inducta. Oēs enim homines ad immortalem vitam resurgent,

qui Prophetæ plures aperte prænunciant. Rationes autem resurrectionis in Theologia illa nostra, quam in agro Regniano apud Achatem nostrum Ioannem Chazalcatem composuimus adduximus, vbi etiam adiunximus Zoroastrem, & Mercurium, & Platonem, resurrectionem corporum prædixisse, Hebræorum verò Prophetas plures hanc prænunciassse nemini dubium est.

Esaïas. Videbit semen longæuum.

Dauid. Ponam in sæculum sæculi semen eius. In duobus his vaticiniis Christus promittitur spiritale semen, non corporale, similiter sacerdotium, & regnum spiritale, quando dicitur apud Dauidem. Tu es sacerdos in æternum secundum ordinem Melchisedech, & ponam thronum eius sicut dies cæli. Rursus, sedes tua Deus in sæculum sæculi, virga directionis, virga regni tui. Et paulo post subiungit etiam quod pertinet ad Messiae nomen dicens: Vniuit te Deus, Deus tuus oleo latitiæ præ confortibus tuis. Ipse enim excellentius omnibus regibus vnctus, sacratuque est, scilicet quia à Deo, & in æternum. Merito autem supra dixerat, eum esse sacerdotem secundum ordinem Melchisedech. Hic enim Melchisedech in sacris voluminibus sacerdos fuisse Dei summi refertur, sed qui non oleo communi perunctus sit, neque qui ex successionem generis suscepit sacerdotium, sicuti apud Hebræos fieri mos erat. Ideo secundum ordinem illius Christi sacerdos futurus prædicitur qui non olei liquore, sed virtute cælestis spiritus consecratur.

Nathan quoque iussus est à Deo prædicere Dauidi regi de ipso Messia ex eius stirpe nascituro, talia quidem verba cum impleti fuerint dies tui, dormies cum Patribus tuis, & suscitabo semen tuum post te, quod erit de ventre tuo. Hic ergo, qui post Dauidis mortem nascitur, Salomon esse non potest, imò est Messias rex æternus, non temporalis vt Salomon, & qui non temporale Salomon, sed æternum Deo templum ædificat. Loquitur enim sic Deus ad Nathan: Et reparabo regnum eius, hic ædificabit mihi domum nomini meo, & dirigam thronum eius vsque in æternum, ego ero illi in patrem, & ipse erit mihi in filium, scilicet quia Messias Dei filius magis est quam Dauidis, & paulo post addit: Et regnum eius erit vsque in æternum coram me, scilicet quia in spiritualibus bonis non corporalibus. Ideo subiungit. Et thronus eius erit erectus vsque in æternum. Hoc regnum Mahumetes intelligens melius, quam pertinaces Iudei, inquit in Alcorano. Verbum Dei Iesus-Christus Mariæ filius à creatore



mundi missus est, ut esset Gentium omnium facies in hoc sæculo, atque futuro. Tale fuit Iesu Nazareni regnum, quale à Prophetis Christo promittitur, ideo ipse ait: regnum meum non est huius mundi. Pontificibusque eius successoribus in spiritualibus rebus propriè reliquit imperium, nec usque ad mundi finem substantialis, & præcipua Pontificum in quantum Pontifices sunt, & Christi vicarij, iurisdictio ulterius se extendit. Rerum verò terrenarum dominatio & administratio pontificibus accessoria est, tanquam accidens, non in quantum vicarij Dei, sed in quantum Constantini Cæsaris sunt hæredes. Hæc autem dicta sunt, non ut auctoritatem rerum temporalium Pontifici adimamus, habet enim re vera, quamvis tanquam accidens quoddam, sine quo trecentos annos olim Pontifex verus fuit, atque esse potest, sed ut tela Iudæorum hac veritate facilius deuitemus. Nam ubi Daniel sub quatuor bestiarum figuris, quatuor regna significat, per quartam bestiam Iudæi omnes imperium Romanum intelligi volunt. Quoniam verò Daniel ait quartam bestiam destruendam fore per regnum à Deo cœli fuscitandum, exponunt Iudæi Romanum Imperium in aduentu Messiae destitui debere. Addunt regnum Ecclesiæ idem omnino esse, atque Romanum illud antiquum, licet angustius. Vnde concludunt, Imperium regnum esse, postquam per Messiam ab eis expectatum est dissoluendum. Quod quidem inde confirmant, quia Daniel ait. Ex quarta bestia cornu paruulum pullulare, quod sermones contra excelsum loquatur, qualem volunt fuisse Iesum eiusque vicarium. Huiusmodi verò machinatio falsa est, tum quia regni Romani ratio in rebus corporalibus consistit. Christiani regni ratio in rebus omnino incorporalibus. Diuersa igitur regna sunt. Vnde etiam hodie Imperatorem nostrum à Pontifice diuersum esse videmus, tum quia Daniel dicit, quod illud cornu faciebat bellum contra Sanctos, & præualebat eis. Quod de Iesu, eiusque vicario ei simili, dici nullo modo potest. Adde quod ibidem Daniel prædicit, quartam bestiam perinram, quando veniet ille quasi filius hominis in nubibus cœli. Totum hoc in secundo Christi aduentum est implendum, quando cum maiestate, & potentia summa accedet ad iudicandum. Nullo autem modo in aduentu primo, in quo non potens, magnificusque, sed tanquam lapis abscissus & abiectus venturus à Daniele prænunciatur. Cornu vero illud Antichristus erit, paruulum scilicet, quia ex viliori Iudæorum fece An-

tichristus trahit originem. Annectitur quarta bestia, id est, Tyrannicæ potestati. Bestia enim hæc tyrannidem vniuersam mundi significat, ab initio Romæ usque ad mundi finem, quæ casura est vna cum summo tyranno Antichristo in secundo Christi aduentu ad iudicium, circa finem mundi. Dicit enim Daniel: Iudicium sedit, dicit rursus, statim finis. Sunt qui velint cornu illo non modo Antichristum, verumetiam tyrannicam hæresim, hæreticamque tyrannidem Mahumetis regis Arabum significari, esse enim imaginem Antichristi, quemadmodum Ioannes Baptista fuit imago Christi. Quod autem quarta bestia tyrannidem vniuersam in qualibet mundi parte à Romanis primis exortam usque ad Antichristum, & mundi finem significet, ex eo patet, quod omnes etiam Iudæi consentiunt per bestiam primam significari vniuersam mundi tyrannidem ab initio mundi usque ad Nabuchodonosorem. Exitus enim rerum exordiis proportionem quadam congruere debent.

*Contra Iudæos quod miseri sunt in Christi vindictam.*

## C A P V T XXIX.

**S**I quis Hebræorum historias consideret, reperiens eos nunquam graui calamitate oppressos fuisse, nisi quotiens scelus aliquod turpissimum patrauerunt. Ante Babylonicam seruitutem in idololatriam inciderunt, viasque Hierosolymæ vrbis Prophetarum sanguine replevere (quemadmodum in Regum libro legitur) cæteraque similia facinora commiserunt, propterea passi fuerunt seruitutem annorum septuaginta in Baylonica regione. Deinde usque ad tempora Iesu Christi nostri satis iuste vixere, quem non aliter tractauerunt quam Prophetas ante illum eius gratia missos. Cum verò postquam Iesum interfecerunt, diutius acerbiusque quam vnquam antea puniantur, necessarium est tunc illos scelus idololatria, & Prophetarum cæde immanius patrauisse. Vnde Hieremias: Non audierunt me, nec inclinauerunt aurem suam, sed indurauerunt ceruicem, ac peius egerunt quam patres eorum. Quod quidem ostendit Iesum verum Messiam, & plusquam Prophetam, & plusquam diuinum hominem, imò Deum re vera fuisse. Dicite quæso Iudæi, cur in vestro illo legum nouarum volumine Talmur, quod ferè quadringentis post Iesum annis composuisse crudeliores aduersum Christianos leges, quam Ne-

ro & Domitianus excogitare poterunt, stantibus. Cum autem non à Christianis, sed à Romanis idololatriis dispersi fueritis. Cur tam venenosis execrationibus nobis præcipue ter saltem quolibet die in sacris vestris mala gravissima imprecamini, cum nos pro vobis oremus Deum, & mitiores etiam quàm Mahumetenses erga vos simus. Nūc putatis Christianam legem Mahumetensi ignobiliorem esse, imò præstatiorem? Verum instigat animos vestros clam, ut arbitror, ipsa natura ad odium Christianorum, quia videlicet, propter Iesum Christum diuina nos iustitia dissipauit. Videre licet quo pacto Christianæ vindictæ quamuis inscij aditum patefecistis. Profectò, quia inter vos multi propter impiam negligentiam, & ignorantiā scripturarum incernunt Iesum fuisse verum Messiam non crediderunt. Idcirco mox vel expectantes, ut Suetonius inquit, vel iam (ut multi inter vos opinabantur) habentes alium, qui armis potens esset à Romanis audacter rebellauistis, ob quam rebellionem funditus euersa vrbs, homines occisi, dispersique sunt. Hæc habemus à Suetonio. Perditi ergo estis, quia Iesu Christo non credidistis, quod quidem Iosephi vestri verbis possumus confirmare, qui multa diuinæ in Iudæos indignationis adducit signa, & miracula euidentissima, & horrenda, atque affirmat in summa celebritate vestram urbem Hierosolymam, in quam tunc azymorum gratia tota ferme Iudæa confluxerat, obsessam à Romanis fuisse. Certum est autem iisdem diebus vos Iesum superioribus annis interfecisse. Addit Titum, qui obsederat urbem, solitum dicere, propter multa portenta Deum ita esse Iudæis iratum, ut timeret, ne ei quoque irasceretur, si Iudæis ignosceret. Itaque, licet Titus non esset, similiterque Vespasianus, tamen impellente Deo, crudelius, imò iustius actum est, quam Romani vnquam aliàs consueuerint. Siquidem in ea vrbe perierunt fame, ferroque supra vndecies centena Iudæorum millia, venundata verò sunt plura quàm nonaginta millia captiuorum. Hæc Iosephus, qui & interfuit. Atque repetit Euseb. Addit Iosephus hæc: cum Titus circumiens peruidisset repletos mortuorum cadaueribus vallos, & humani corporis tabo patriam terram rigari, cum ingenti gemitu eleuatus ad cælum manibus, Deum inuocat testem, hoc suum opus non esse. Deinde ita subiungit: Arbitror equidem, quod etiam si aduersum impios Romanorum paulisper arma cessarent, aut hiant terræ, aut aquæ diluuiis, aut Sodomianis ignib. & fulminib. cœlitus missis, mor-

tis supplicium ciuitas pependisset, quæ multo infamtiorem illis, qui talia perpessi fuerant, & nequiores virorum præsentem hanc protulisset Deiratem, pro quibus & omnis Gens pariter mereretur extinguì. Idem confirmat Philostratus in vita Apollonij Theanei his verbis: Titus captis Hierosolymis omnia circum loca cadaueribus compleuerat. Finitimæ autem Gentes ob victoriam coronare eum voluerant, ille verò tali honore indignum se esse respondit. Non enim se fuisse talium operum auctorem, sed Deo iracundiam contra Iudæos demonstranti, suas manus præbuisse. Hæc Philostratus. Adfuit ea in obsidione Vespasianus, qui cum vrbe deleta, de Iudæis triumphasset, quemadmodum Suetonius narrat, statim coram populo duo fecit miracula. Nam cæcum & claudum tactu solo curauit. Is tamen neque postea tale aliquid fecisse narratur, quasi diuino auxilio miracula illa fecerit, statim cum diuino impulsu Christianum sanguinem vindicasset. Quamuis enim satis iustus esset, non tamen ea vel sanctimonia, vel doctrina, & arte, ut miracula posse facere videretur. Clemens & Egesippus Apostolorum discipuli scribunt: Iacobum fratrem Domini vsque adeò iustitia præstantem opinionem omnium extitisse, ut & Iudæorum prudentissimi quique crederent, hanc causam fuisse oppugnationis Hierosolymorum, sub Vespasiano statim post necem Iacobi consequutæ, quòd in illū sceleratas manus iniecissent, & Iosephus ira sibi videri per hæc euidenter indicat. Quæ omnia, inquit, acciderunt Iudæis pro vindicta Iacobi iusti, qui erat frater Iesu, qui dicitur Christus. quem iustissimum, & piissimum omnium confessione virum Iudæi interfecerunt. Hæc ille. Quod autem Christiani sanguinis vindicandi causa, Deus eos perdiderit, ex eo patet, quòd nullum aliud illis temporibus facinus patrauerunt, cuius causa Deus illis videretur tam acriter indignari debere, indignatus tamen erat omnino, quòd Iosephus ipse qui aderat, in septimo belli Iudaici libro sic aperit. Infelici, inquit, plebi deterrimi quidam homines, & deceptores falsa vaticinantes suadebant, ut euidentibus signis, & indiciis iracundiæ, & indignationis diuinæ non crederent, quibus apertè futurum & vrbs, & Gentis portendebatur excidium, sed velut amentes, qui neque oculos, neque animam haberent, spernebant omnia, quæ cœlitus nunciabantur. Etenim stella præfulgens gladio per omnia similes immi-

nere defuper ciuitati, & cometes, præterea exitiabilibus flammis ardere per totum visus est annus. Sed & ante excidij tempus, ac belli, cum populi ad diem festum Azymorum conuenirent, octaua die mensis Xandicis, qui est Aprilis, noctis tempore, hora nona, tantus luminis fulgor aram templumque circumdedit, vt putarent omnes diem clarissimum factum, & permansit spatio horæ dimidiæ, quod imperitis quidem, & ignaris prosperum videbatur. Sed legisperitos, & doctos, & probos quosque Doctores non latuit exitiale portentum. In eadem quoque festiuitate vitula sacrificiis admota, & aris assistens inter ipsas ministrorum manus enixa est agnam.

Sed & ianua interioris ædis, quæ respiciebat ad Orientem, cum esset ære solido induta, ac perinde immensi ponderis, quæ viginti viris summo conatu impellentibus clauderetur, ferreis immensis quoque vectibus, & seris munita, ac pæssulis in altum demissis teneretur obstricta, repente hora noctis sexta, apparuit sponte patefacta. Sed & transacto die festo, post aliquot dies, prima & vigesima die mensis Artemesi, id est Maii, prodigiosus apparuit visus, & fidem penè excedens, quod certè falsum putaretur, nisi oculorum fidem confirmasset malorum consequuta perniciēs, etenim propè solis occasum visi currus, & quadrigæ in omnem regionem per area ferri, & armatorum cohortes misceri nubibus, & vrbes circumdare agminibus improvīs. In alio autem die festo, qui Pentecosten appellatur, noctu sacerdotes ingressi templum ad mysteria ex more complenda. Primò quidem motus quosdam, strepitusque senserunt, tum deinde voces subitas audiunt, dicentes. Migremus hinc: Additur iis aliud terribilius, etenim quidam Ananiæ filius, Ioannes nomine, vir plebeius, & rusticus, ante quartum belli annum, cum ciuitas in pace & abundantia perduraret, in die festo Tabernaculorum repente clamare cepit: Væ ab Oriente, væ ab Occidente, væ à quatuor Ventis, væ super Hierosolymam, & super Templum, væ super Sponsos & Sponsas, væ super populum, & indefinenter die noctuque per omnes plateas circumiens hoc clamabat: Vsq̃uequo quidam primores ex populo viri, velut infasti præfagij indignatione commoti, correptum hominem verberibus multis afficiunt. At ille nequaquam pro se aliquid loquens, sed ne eos quidem, qui circumsteterant, deprecans, easdem vo-

ces pari obstinatione & clamore repetebat. Tum principes intelligentes (vt reserat) numinis esse motus in viro, perducunt cum ad Iudicem Romanum, apud quem flagris ad ossa vsque laniatus, neque preces, neque lachrymas fudit, sed eadem vocem miserabiliter, & cum quodam ululatu emittens per singula penè verbera proferebat. Addens etiam hoc: Væ, væ Hierosolymis. Hucusque Iosephus. Sed ante illum Iesus mala hæc ita prædixerat. Væ prægnantibus, & nutrientibus in illis diebus. Orate autem, vt non fiat fuga vestra hycne, neque Sabbato. Erit enim tunc tribulatio magna, qualis neque fuit ab initio sæculi hucusque neque erit. Videns igitur ciuitatem fleuit super eam dicens: Si agnouisses & tu in hac die, quæ ad pacem tibi sunt, nunc autem absconditum est ab oculistuis, quia venient dies super te, & circumdabunt te inimici tui vallo, & circuibunt te, & perurgebunt te vndique, & ad solum deducunt te & filios tuos, & necessitas magna super terram erit populo huic, & cadent in ore gladij, & captiui ducentur in omnes Gentes. Et Hierusalem erit conculcata à Gentibus quousq̃ compleantur tempora Gentium. Cum autem videritis circumdari ab exercitu Hierusalem, tunc scitote quia appropinquabit desolatio eius. Prædixit & his alia similia, quæ si quis cum Iosephi historia conferat de Christi diuinitate dubitare non poterit. Quid præterea dicetis ad hæc, o miseri, quod non semel tantum afflicti estis, aut ad breue tempus, quemadmodum solent, qui pro delictis humanis pœnas dant, sed tanquam sempiterno deo pœnas pro læsæ Maiestatis crimine dantes, & vbique, & semper miserrabiles oberratis, neque id quidem iniuria. Semper enim peccatis, tum quia pertinaces estis, tum quia mysterio Christi detrahitis. Quamuis autem multæ nationes Christianis obstiterint, rigidius tamen vos quàm alii iure puniri estis, & puniemini, quia olim super cæteros honorati à Deo nimium ingrati fuistis, Prophetas occidistis, & Christum. Primi omnium Christianis, tum in Iudæa rapinis & nece, tum vbique Gentium insidiis aduersati estis. Excitabatis vbique contra eos Gentium vires, vnde & exemplo, & instigatione multorum Iudæorum Christiani passim lacerabantur. Verum cœlestis dux exercitum suum vndique obtruncarum miris modis instaurabat, & mirificè augebat. Fuisse autem vos in Christi vindictam dissipatos, Mahumetes etiam confiteatur, qui ait in

**A**lcorano : Deum eripuisse Iesu animam ex manibus Iudæorum , reduxisse ad se atque exaltauisse , sectatoresque Christi persecutoribus præposuisse etiam usque ad mundi iudicium atque finem. Decreuisse insuper , incredulos Iudæos omni vindice tutoreque priuatos in hac vita , & altera cruciantibus summis affligere. Sed audite Mosen vestrum Ægyptium in libro Iudicum ordinario rum ita dicentem : Iesus Nazarenus visus est esse Messias , ac sententia Iudicum interfectus , causa fuit , vt destrueretur Israël gladio , hæc ille. Verum diuina iustitia quamuis statim post Iesum fermè singulis annis usque ad Titum diuersis , & grauibz calamitatibus , cædibusque vos oppræsserit , quòd Florus , Iosephus , Philo , Eusebius , ostendunt , tamen summum illud vestræ vrbs excidium anno post Iesum quadragesimo ideo distulit , vt & vos poenitentiae tempus haberetis , & Christianæ legis exordium ex tanta vrbe vestra , & semota rerum temporumque confusione , cunctis sæculis clarius innotesceret. Factum est etiam vt stante vrbe violentius à vobis torqueri Christiani potuerint , exactiusque probari. Puniuit autem vos Christus idololatrarum manibus , non Christianorum , vt ostenderet Christianos suos absque vlla violentia , & viuere debere , & posse regnare. Atque tam miraculosè puniuit vt nihil miserabilius vel vnquam fuisse , vel fore tam Christus prædixerit , quam Iosephus confirmauerit. Legite quintum de his rebus Iosephi librum , videbitis etiam matres fame filios deuorasse. Sed vt breuibz omnia comprehendam , nulla excogitari potest tragoedia luctuosior , atque hanc quidem miseram in Christi vindictam fore plebs olim vestra prædixit. Nam cum Pilatus ait , innocens ego sum à sanguine iusti huius , vos videritis , illi responderunt : sanguis eius super nos , & super filios nostros.

*Resumptio probationis de Christiana vindicta in tria capita.*

**Q**uoniam verò varias quotidie huius vestræ calamitatis causas diligenter excogitatis , quod cædis Christianæ culpam subterfugiatis , rem omnem ab initio repetentes in tria capita colligamus. Tria potissimum in eo scelere , cuius culpa dispersi estis , concurrere oportere necessarium arbitramur. Primum quidem illud , quod ab initio tetigimus , quòd videlicet multo grauius sit , quam ea culpa , ob quam olim in Babyloniam dispersi fuistis , & tan-

to saltem grauius quanto conditio vestra post Iesum deterior est quam in ea dispersione. Calamitas hæc à cede vestrorum inenarrabili , & vilissima venditione traditur incepisse , sæpè quidem alias , & grauius ante Titum , & post Iesum , maximè verò Hierusalem sub Tito , & in Mesopotamia sub Traiano , & Biter , sub Adriano , passimque sub Gallo , quod quidem in ea , quæ ante Christum fuit non contigit. Addite quòd Claudio ultra cæteras calamitates etiam fame extrema , vt inquit Lucas , vos Deus oppræssit , quam quidem Claudij tempore magnam fuisse in Iudæa etiam Iosephus asserit. Rursus in aliis dispersionibus duces vestri generis honoratos passim habebatis , legitimumque sacrorum vestrorum cultum integrum seruabatis , in hac verò nequaquam. Præterea vos Deus tunc Prophetarum missione consolabatur , qui vel citam liberationem pollicebantur , qualis Hieremias , atque Ezechiel , vel iam instantem monstrabant , qualis Daniel , Esdras , Aggeus , & Zachariæ. Ex quo apparet , Deum vos tunc tanquam filios habuisse , non vt hodie tanquam hostes. Nullum enim post Iesum Prophetam habetis , quod vobis minatus est Psalmus : Iam non est Propheta , & vos non cognoscet amplius. Cur Deus vos vita , maxima ex parte , atque Sacerdotio , regno , Prophetis iamdiu omnino priuauit ? Vt ostenderet vos omnis diuinæ spei , hæreditatisque expertes , tanquam rebelles iam pridem reprobauisse. Quomodo ergo Messiam ab eo expectare potestis ? à quo Messiae præcones , & similitudines minimè impetratis.

Postremo , aliàs ad breue quoddam tempus , & ad regiones quasdam , post Iesum ad longissimum , imò ad vniuersum , perque omnem orbem estis exterminati , vt pote qui in Deum ipsum , qui semper & vbique est , cum peremistis Iesum , propriè deliquistis , cum occidistis Prophetas , in Dei nuncios peccauistis , cum coluistis idola , regnum Deo quantum in vobis fuit , abstulistis , quid reliqui vobis supererat , nisi vt in personam Dei propriam sauiretis ? Si igitur occidentes Iesum , scelus commisistis , Prophetarum cæde , & idololatria maius , tunc certè sauiistis in Deum , atque è conuerso , si quando manus in Deum impias inieciistis , tunc solum id geri potuit , cum inieciistis in Iesum , qui solus in orbem terrarum solis virtutibus , prodigiisque esse se verum summi Dei filium , Deumque monstrauit. De primo hætenus dictum sit. Secundo verò



loco ad culpam hanc vestram, ob quam miseri exulatis pertinet, ut vobis omnibus, vbique, & semper communis sit, singuli enim continuè vbique Gentium miseram vitam ducitis. Nullum aliud verò scelus excogitari potest, quo singuli, assidueque infecti sitis, nisi quòd vitam Iesu suorumque discipulorum improbatis, eadem verò probatis, quam ob causam Christianæ cedis participes estis, quod quidem ita tetigit Hieremias: *quid vultis mecum iudicio contendere? omnes enim vos deliquistis in me.* Cum verò vitulum in orbe fabricatum, vel Prophetarum cædes, vel alia quævis maiorum vestrorum immania scelera vituperetis careatisque omni inclinatione, seu ad Prophetas occidendos, seu ad idola fabricanda, sequitur ut nullo modo scelerum illorum propriè participes sitis. Delirant igitur qui vos propter idola culta, vel Prophetas occisos hac calamitate pressos existimant. Tertium verò, quod ad culpam tantæ miseriæ causam attinet, esse videtur, ut occulta sit, vobisque ignota, siquidem in libro illo Talmutico, qui inscribitur Magnila, quæritur cur in Babylonia peregrinantibus, afflictionis terminus prædictus fuit, quod ita Hieremias testificatur. Postquam completi fuerint in Babylone septuaginta anni, visitabo vos: Peregrinantibus autem post Titum, nullus vnquam miserationum prædictus est finis. Ad hoc ibi sic breuiter respondetur. Tunc illis finis malorum ostensus est, quemadmodum & culpa, ob quam mala patiebantur aperta, his autem quibus ignota culpa est, ignotus & finis, hæc ibi. Nullum verò aliud commune scelus vestrum omnino est omnibus vobis ignotum, præter id, quòd in Iesum vestri commiserunt, ac vos approbatis. Non solum enim malum id esse nescitis, sed cum pessimum sit, optimum esse putatis.

*Confirmatio rerum nostrarum ex Iudaicis  
contra Iudeos de sacris libris.*

### C A P V T XXX.

**C**ircumfertis Iudæi passim, ac semper (Deo volente) Hebraicos Prophetarum libros, ex quibus intelligere licet cuique, Christianos Prophetarum vaticinia non finxisse, quod tetigit David: *Deus meus demonstravit mihi de inimicis meis, ne occideris eos, ne quando obliuiscantur legem tuam, disperge eos in virtute tua.* Sic igitur iuxta testes estis nostræ

veritatis vbique. Habemus & nos sacras Prophetarum literas à pluribus post Christum translatas in Græcum eloquium, & Latinum. Habemus insuper translationem illam apud Ptolomæum regem factam, annis pluribus quàm trecentis ante Christum, à duobus septuaginta Iudæis, ex omni populo ab Eleazaro Pontifice electis, tanquam omnium præstantissimis. Quod Græcus Aristæus, regis illius familiaris, qui & interfuit, ac Iosephus scribit. Addunt Regem translationis huius gratia, centum millia Iudæorum, qui in Aegypto seruiabant, à seruitute suis pecuniis redemisse, munera incredibilia templo, Pontificique donasse, traductores mirum in modum honorauisse. Qua ego translatione libentius vtor, ut perfidam hanc plebeculam Iudaicam cum egregiis illustrium Iudæorum illorum armis conuincam. Neque putandum est volumina illa à Christianis, quæ iam pridem per orbem sparsa erant, vitiata fuisse, primis præfertim, qui ea tanquam rem cœlitus missam venerantes, eorum mysteria sanguine defendebant.

#### *De miraculis.*

**V**enio ad miracula, quæ non negatis quidem, imò in pluribus historiis vestris tam Apostolos quàm Iesum fecisse miracula confirmatis. Sed quidam inter vos aiunt, Iesum mendicum apud Aegyptios in pueritia paucis annis ad summum magiam didicisse, rem supra modum arduam, quam tot, tantique Philosophi illuc vndique confluentes, ut in ætate etiam perfecta, multis annis, vel minima ex parte discere non potuerunt. Quisnam magus aliquis, cum publicè summa cum ignominia comprehensus, occisusque fuerit, assequi statim potuit, ut summus Deus passim haberetur? Quanam magia vti sunt rudes piscatores illi, Iesu mortuo, quos miracula fecisse necessarium est, alioquin Iesus interemptus auctoritatem breui omnem penitus amisisset. Si magi erant, cur non ut solent ambitiosi homines, se ipsos potius quàm Iesum prædicabant mendicum, publicè infami morte peremptum. Qua verò arte, an rustici piscatores illi, Paulum & Apollo Iudæos, hominum omnium doctissimos, multosque alios valdè eruditos, & claros ad sustinendam mortem irriterunt? aut Paulus Hierotheum, & Dionysium Arcopagitam Philosophos Platoniorum omnium ex-

cellentissimos, ceterosque similes, similiter illaqueavit: quæ incunctitas, quæ utilitas illis magis proposita erat, quotidie non fuit, sed Christi amore periclitantibus: Unde Iustinus Philosophus excellens in libro, quem ad Antonium Imperatorem pro nostra religione scripsit, inquit: Ego ipse sectis Platonice institutus, audiens vituperari Christianos, ac videns eos impavidos ad suscipiendam mortem, atque omne supplicium tolerandum, considerabam quod impossibile esset eos in malitia, & in libidine conuersari, Hæc ille. Sed audire libet Tertullianum temporibus Iustini propinquum ad Romanos iudices ita clamantem: Omne malum, aut timore aut pudore natura perfuderit, denique malefici gestiunt latere, deuitant apparere, trepidant deprehenso, negant accusati, nec torti quidem facile, aut semper confitentur, certe damnati moerent, dementant in semetipsum, mentis malæ impetus, vel fato, vel astris impurant. Nolunt enim suum esse, quia malum agnoscunt, Christianis verò quid simile, neminem pudet, neminem poenitet, nisi planè retro non fuisse. Si denotatur, gloriatur, si accusatur, non defendit, interrogatus, vel ultro confitetur, damnatus gratias agit. Quid hoc mali est, quod martyrialis mali non habet timorem, pudorem, tergiuersationem, poenitentiam, deprecationem. Quod hoc malum est, cuius reus gaudet, cuius accusatio votum est, & poena felicitas. Redarguit præterea Gentilium iudicum temeritatem, quod Christianos nullo vnquam crimine comperto, ob solum sectæ nomen crudeliter condemnarent. Quid autem huiusmodi secta sentiret, neque ipsi inquirerent, neque vellent à Christianis audire. Denique, ut aliàs dixi, finis huius disciplinæ sanctissimus manifestè declarat, non magia, sed diuinitate Christum, cuiusque discipulos miracula effecisse. Extat apud vos liber de Iesu Nazareni vita, in quo legitur Iesum inter alia miracula, quæ illic multa narrantur, etiam mortuum suscitasse, quia videlicet solus rectè pronuntiare sciebat nomen illud Dei proprium, quod est apud vos præ ceteris venerandum, & quia quatuor solum literis constat, & illis quidem vocabulis difficillimè omnium pronuntiat, sonat autem fermè in hunc modum: Hichouahi, id est, fuit, est, erit, atque hæc maior Hebræorum pars opinatur. Si ita est, cum nihil apud vos hoc nomine sanctius habeatur, ideoque nequeat propheta aliquid confirmare, absque dubio diuina est Christi nostri do-

ctrina, quæ sicuti vos dicitis, diuini illius nominis virtute, sicuti autem nos asserimus, Dei virtute, coaruit.

*Testimonium Ioannis Baptiste & Iosephi.*

**D**efinite iam delirare Iudæi tam insani, quàm miseri, creditis ne diuinò illo viro quem totus sine controuersia mundus honorat, Ioanni Baptiste, qui, ut ait Iosephus, erat re vera, atque publicè habebatur, omnium exemplar virtutum. Ad quem tanquam ad oraculum plurima Iudæorum, ceterorumque turba vndique consuebat Hæc Iosephus vester. Ioannes autem iste Iesum Nazarenum esse Messiam palam proculdubio affirmavit, iussitque omnes eum sequi, alioquin non omnes, qui tunc de Iesu locuti sunt, exordium à Ioannis testimonio, & confirmatione fecissent, cumque miris laudibus celebrassent. Patet autem cuique, vitam Iesu simul, atque Ioannis ab Euangelistis narrari. Horum amicitiam cum etiam Mahumetes non ignoraret, vtriusque scilicet Ioannis Baptiste, ac Iesu ortum, vitam, laudes in eodem Alcorani capitulo decantauit. Appellauit Iesum spiritum, verbumque Dei, Ioannem ibidem ait, magnum esse Prophetam, diuini verbi confirmatorem, & certè ita confirmavit, ut primos discipulos suos Iesus à Ioanne habuerit. Denique audite quid Iosephus vester in libris de Antiquitate Iudaica, quos Græcè scripsit, de Christo loquatur. Sicut etiam antè Constantinum in antiquis tam Græcis exemplaribus, quàm Latinis legebatur, & legitur, quod Hieronymus, Eusebiusque testantur, neque vitari tantum poterant libri, qui tam latè sparsi erant, & in summa autoritate ab omnibus habebantur, eo præsertim tempore, quo Christiani calumniatoribus vbique maxime omnium subiiciebantur, neque tamen à quoquam inimicorum noratos illos reperio, quod vel Iosephi, vel Prophetarum libros corruerint. Sed veniamus ad Iosephum.

Fuit, inquit iisdem temporibus Iesus sapiens vir, si tamen virum eum nominare fas est, erat enim mirabilium operum effector, & doctor hominum eorum, qui libenter quæ vera sunt audiunt, & multos quidem Iudæorum, multos etiam ex Gentilibus sibi adiunxit. Christus hic erat, (aliter credebatur) Hunc accusatione primorum nostræ Gentis virorum, cum Pilatus in crucem agendum esse decreuisset, non deseruerunt, ut qui ab initio eum dile-

xerunt. Apparuit enim eis die tertio iterum  
vixit, quemadmodum diuinitus inspirati  
Prophetae, vel hec, vel alia de eo innumera  
miracula futura esse prädixerant. Sed in  
hodiernū die Christianorū qui ab ipso nū-  
cupati sunt, & nomen perseuerat, & genus,  
alibi quoque sic ait: Ananias iunior, pro-  
teruus, & insolens moribus, fratrem Iesu,  
qui dicitur Christus, nomine Iacobum, &  
alios quā plurimos quasi contra legem a-  
gentes accusans, tradidit lapidandos. Qui  
autem videbantur esse moderatissimi ciui-  
tatis, & circa legis integritatem habere so-  
licitudinem, grauitur hoc tulere, miserunt-  
que latenter ad regem, rogantes eum, vt  
scriberet Ananiam, ne talia perpetraret, cum  
neque prius recte fecisset. Hæc Iosephus in  
vigesimo Antiquitatum libro.

*De resurrectione Christi.*

Cætera quidem miracula Iesu, quia  
sæpè, & multa, & coram populo  
facta sunt, & decantantur à multis, ne-  
gare non audetis. Resurrectionem au-  
tem, quamuis multi de illa scripserint, ta-  
men quia non omnibus nota fuit, om-  
nino negatis. Hanc tamen à Iosepho  
confirmatam videtis. An nescitis corpus  
illud Iesu, quod post resurrectionem im-  
mortale diuinūq; omnino fuerat effectum,  
non decuisse quorumlibet mortalium o-  
culis, sed ab illis duntaxat videri, qui sta-  
tuti testes aliis à Deo fuissent. Viderunt  
autem Iesum ex mortuis suscitatum qua-  
draginta diebus sæpè & pluries, neque  
solum Apostoli, vel Discipuli, verum-  
etiam plures quā quingenti fratres si-  
mul congregati, quod testatur Paulus A-  
postolus dicens: multos illorum adhuc,  
cum illa scriberet, viuere. Resurrexisse  
verè Iesum non illi solum testantur, ve-  
rum etiam mille hominum millia, tam  
Iudæorum quā Gentilium, qui sicuti &  
illi pro sola Iesu publicè, ignominiose-  
que interfecti gloria, certam acerbissi-  
mamque mortem libentissimè subie-  
runt.

Deridenda est igitur ficta illa à vobis  
historia, Discipulos corpus eius, sepul-  
chro surreptum, in hortis inter herbas oc-  
cultauisse, sed paulò post ab exploratori-  
bus ad hoc ipsum à Pontifice missis, fuisse  
reperitum. O imprudentes nimium &  
inepti! cur cadauer illud in foro non su-  
spendistis? si delere Iesu gloriam peni-  
tus studebatis, sic enim omnes subito Na-  
zarenam sectam deseruissent.

*Confirmatio trinitatis Dei, & diuinitatis  
Christi ex Iudæis.*

C A P V T XXXI.

Quid diuinam Trinitatem vituperatis,  
vestrorum mysteriorum prorsus igna-  
ri? Legite vestrorum Interpretum Com-  
mentaria super Psalmum, Deus Deorum,  
Dominus loquutus est, & vocauit terrā. In  
illis enim quæritur, quā ob causam Psal-  
mus ter vocat Deum, atque respondetur, vt  
videlicet ostenderet, Deum tribus his no-  
minibus seculum creauisse, secundum tres  
proprietas, quibus creatus est mundus.  
Hæ verò sunt, sapientia, scientia, & pruden-  
tia, sicut legitur in Prouerbiis Salomonis:  
Dominus in sapientia fundauit terram, or-  
dinauit cælos in prudentia, & in scientia  
sua abyssi erumpunt. Ter quoque nomi-  
natur Deus in Exodo. Ego sum Dominus  
Deus tuus, Deus zelator. Ecce tria diuina  
nomina, secundum tres Dei proprietates,  
quibus constituta sunt omnia. Legitur si-  
militer in libro Iosue: Deus Deus Domi-  
minus ipse scit: hæc ibi. Similem expositio-  
nem in Commentariis vestris in Genesim  
rapietis, in ea parte præcipuè. In principio  
creauit Deus cælum & terram, vbi Rabi  
Eliazar inquit. Non est creatus mundus  
nisi per Verbum, vel cum Verbo dei, sicut  
habetur in Psalmo: Verbo domini cæli fir-  
mati sunt. Et sequitur ibidem, Rabi Sy-  
meon inquit, Inspirauit, vel insufflauit  
deus spumum sanctum, & creatus est mun-  
dus, sicut in Psalmo legitur: Spiritu oris eius  
omnis virtus (aliter exercitus) eorum, hæc  
ibi. Negatis deum filium naturalem, id est,  
eiusdem naturæ, habere, Deus tamen in  
Psalmis ait: Filius meus es tu, ego hodie  
genui te. Neque hoc de Angelis, animisq;  
dici potest, qui non geniti, sed creati  
sunt.

Non enim de substantia Dei, sed de nihilo  
processerunt, ideo & si quando dicuntur  
in sacris literis filii Dei, nunquam tamen  
à Deo dicuntur geniti. Dixit autem ho-  
die, id est in æterno, hodie scilicet in præ-  
senti illo æternitatis statu, qui neque prin-  
cipium habet, neque finem. Quicquid  
enim ex substantia Dei est, & intra Deum,  
æternum est. Ideo in Psalmo, Deus iudi-  
cium tuum regi da, vbi manifestè de filio  
Dei tractatur, de ipso filio dicitur: Erit  
nomen eius in sæcula, & ante solem per-  
manet nomen eius. Quod autem de fi-  
lio Dei æterno sit sermo, illud declarat,  
quod vbi translatio nostra dicit, permanet,

Hebraicus textus habet *ynnon*, quæ quidem dictio à *nyn* derivatur, *nyn* filius est, *ynnon* ergo quid aliud significat quam filium, progenitum, natum, atque absolutum. Quod Deus filium habeat, Salomon in Proverbiis testimonio est. quis ascendit in cælum, atque descendit? quis continuit spiritum in manibus suis? quis colligavit aquas quasi in vestimento? quis suscitavit omnes terminos terræ? quod nomen est eius? & nomen filij eius? si nosti. Audite insuper Esaiam ad Deum ita clamantem: Sanctus, Sanctus, Sanctus, Dominus Deus sabaoth. Ter Sanctus trinitatem diinarum significat personarum, Dominus, in singulari vnicam Dei substantiam. Plena est omnis terra gloria eius, hoc assumptionem hominis è verbo Dei factam significat, nam ibidem Esaias Deum in throno sub figura hominis collocabat. Ut autem ostenderet, vos mysteria huiusmodi non satis intellecturos, adiungit de cæcitate, surditate, pertinacia vestra multa, quæ narravimus aliàs. Inducit & alibi Deum ita loquentem: Accedite ad me, audite hæc à principio, non in abscondito locutus sum, ex tempore quo facta sunt, ibi eram, & nunc Dominus Deus misit me, & spiritus eius. Ille ergo qui à principio, scilicet legis, non est locutus in abscondito, scilicet quia palam in monte Sinai omnibus audientibus, qui & illo tempore ibi erat, videlicet ipse Deus legis author, nunc à Deo mittitur, id est, filius Deus genitus à patre Deo naturam assumpsit humanam. Spiritus etiam Dei hunc mittit, quoniam per Spiritum sanctum facta est Dei, hominique coniunctio. Quilibet istorum qui mittunt, necessario Deus est, quando qui mittitur est Deus, & quamvis Deus unus sit, aliqua tamen licet incogitabilis distinctio est inter eos qui mittunt, atque illum qui hic mittitur. Quod autem qui hic inducitur, tanquam loquens sit ipse Deus, patet per antecedentia, dicit enim: Ego primus, & ego novissimus, manus mea fundavit terram. Patet etiam per sequentia, nam post omnia quæ adduximus, subditur. Hæc dicit Dominus redemptor tuus sanctus Israël. Sed audire licet Davidem ita clamantem: Quo ibo à spiritu tuo, & à facie tua quo fugiam? si ascendero in cælum ibi es, in quibus verbis Spiritum Dei ubique vult esse, Iudæi autem & Christiani solum Deum ubique esse volunt. Constat igitur Spiritum illum non spirationem quandam extra Deum, sed Spiritum sanctum, Deumque existere, de quo inquit Iob: Spiritus Dei fecit me, & spiraculum

omnipotentis vivificat me, Facere autem hominem, id est, animum, atque vivificare, solius Dei officium est. Præterea in vestris illis super Genesim commentariis quaeritur, quid sit spiritus ille Dei, qui ferebatur super aquas, ac respondetur ibidem, Messias hic spiritus est, de quo apud Esaiam legitur, & requiescet super eum spiritus Domini, spiritus sapientiae & intellectus. Hæc ibi. Ex quo patet, & spiritum illum Deum esse, & Messiam esse Deum. Item in eisdem commentariis Rabi Simeon dicit: quid est illud quod in Psalmo legitur, spiritu oris eius omnis virtus eorum, & respondet, hoc est, inspiravit Deus spiritum oris sui, & creatus est mundus. Accedit adhuc quod Rabi Moses Gerundensis exponens, In principio creavit Deus cælum & terram, inquit in principio, id est, in sapientia, quæ est principium principiorum. Atque ideò in translatione Hierosolymitana loco eius quod est in principio habetur, in sapientia. Quod autem in Deo sit sapientia quædam à Deo concepta ab ævo tanquam proles, Salomon Propheta sic aperit, sapientiam inducens ita loquentem: Audite quia de rebus magnis locutura sum, Deus possidet me in initio viarum suarum, antequam quicquam faceret à principio, ab æterno ordinata sum, & ex antiquis, antequam terra fieret. Non dum erant abyssi, & ego iam concepta eram, nec dum fontes aquarum eruperant, nec dum montes graui mole constiterant, ante omnes colles ego parturiebar. Adhuc terram non fecerat, & flumina, & cardines orbis terræ. Quando præparabat cælos, aderam, quando certa lege & gyro vallabat abyssos, usque ad eam partem cum illo eram cuncta componens. Lætabar autem coram ipso in omni tempore. In iis patet, quod sapientia huiusmodi ab ævo non modo concepta erat, sed & parturiebatur, imò tanquam absoluta iam aderat, & lætabatur, & tanquam suo quodam pacto à generante distincta, cum illo erat, & cuncta componens tanquam ipsa sit Deus. Quæ quidem licet à patre gignatur, semper tamen cum patre simul exitit, quæ enim sine motu fiunt, momento efficiuntur, talia verò dum fiunt iam sunt, quemadmodum aer dum illuminatur, iam illuminatus est, & veritas, ratioque rerum dum intelligitur, iam est intellecta. Verbum ergo ratioque ipsa Dei, quæ & sine motu & intelligibili modo gignitur, dum concipitur, iam paritur, dum



paritur, simul adest, simulque cuncta componit. Antiquissima apud patres vestros hæc sententia fuit, siquidem Moses ait: In principio creauit Heloym, & cætera, Heloym plurale est, singulare enim eius est Heluel creauit singulare. Nempè quia in vna & simplici Dei essentia est quidam numerus personarum, idèd Moses, & alij multi Hebræorum in solo Deo hoc modo loquendi vsi sunt nomine quidem plurali, & singulari verbo, atque è conuerso videntes. Significatur similis in Deo numerus etiam vltimo Iosue libro: Non poteris seruire Domino, quia Deus sanctus ipse, Hebraica veritas habet, quia Heloim sancti ipse. Rursus Hieremias Peruertistis verba Dei viuientis. Domini exercituum Dei nostri Hebraica veritas habet Heloym haym, id est, Deorum viuientium. Quod autem sequitur, habet singulare, sicut nos habemus iungitur nomen Dei plurale verbo plurali in Regum libro secundo. quæ est Gens vt populus Israel? propter quam iuit Deus, vt redimeret sibi in populum. Veritas Hebraica dicit, iuerunt Heloym, id est, Dij. Item in Ecclesiaste legitur: Quis est homo, vt possit sequi regem factorem suum. Hebraicus textus dicit: Quis est homo, vt intret post regem, qui iam fecerunt eum.

Dauid cum Deo ipsi dicit: Vnixte Deus Deus tuus oleo lætitiæ, nonne differentiam quandam ponit in Deo inter eum qui vngitur, & eum qui vngit, imo eos qui vngunt? Tetigit enim filium, qui vngitur, & patrem ac spiritum, quando de vngentibus dixit: Deus Deus. Quod autem Deo ipsi loquatur, patet ex præcedentibus, prædixit enim: sedes tua Deus. Sed & quando dicit de Domino Deo suo. Dixit Dominus Domino meo, sede à dextris meis, nonne inter eum qui sedet ad dexteram, & eum propè quem sedet differentiam significat personalem? Quod autem duo isti in natura conueniant, translatio Chaldæa demonstrat, dicit enim: Dixit Dominus verbo suo Apparet etiam per illa, quæ in eodem Psalmo sequuntur: Ex vtero ante luciferum genuite, id est, ante creaturas, ex intima mea substantia, & intrinsecus, quòd soli Deo Dei filio conuenit, duæ tamen personæ monstrantur etiam, cum dicitur, genui te, genitor namque, & genitus persona differunt. Quid ultra vagamur: Moses rem ipsam declarat, inquit enim: Dixit Deus, faciamus hominem ad imaginem & similitudinem nostram, & subdit, fecit Deus hominem. In hac oratione bis deo singularem proprie-

tatem attribuit, bis quoque pluralem, vt efficacius declararet in vnitæte essentiæ esse numerum personarum. Hinc deus loquens ad Mosem ait: Ego sum deus Patrum tuorum, deus Abraham, deus Isaac, deus Iacob.

Primò vnā dei substantiam esse designat, deinde trina repetitione ternarum personarum numerum manifestat. Meminisse verò oportet, quòd quamuis in humano artifice potentia, sapientia, voluntas, siue bonitas quodammodo differant, nemo tamen ob huiusmodi differentiam dicit, artifex ille fecerunt, vel artifices illi fecit, quia tria illa personas non constituunt differentes. In solo autem deo, & quasi semper sacræ literæ cum singulari plurale coniungunt, quia videlicet in illo solo vnica natura est, ac tres personæ, atque in eo non modo sunt tres vires, quemadmodum in artifice, sed tres etiam personæ mirabili quodam pacto distinctæ inuicem & vnitæ.

*Confirmatio passionis Messie contra Iudeos, ex Iudaicis.*

## C A P V T XXXII.

**D**Eridetis nos ridiculi, quòd Messiam vob originale culpam fuisse passurum existimemus, quòd autem passurus fuerit multa & grauiā, primò quidem rationibus, deinde ex mente tam Prophetarum, quàm Interpretum vestrorum in superioribus sæpè monstrauimus. Sed scio quid volebatis, Deum videlicet suā quādam liberalitate, vel clementia absque passione Messie delicta hominibus condonare. An oblitī estis antiquæ illius sententiæ, quæ apud Doctores vestros semper quamplurimum valuit, quòd omnia Deus, præcipuè humana, duplici mensura gubernat, misericordia scilicet & iustitia. Vniuersæ viæ Domini, inquit Dauid, misericordia & veritas, id est iustitia. Rursum: Sanctum, & terribile nomen eius. Mensuram quidem misericordiæ in sacris literis significari vestri interpretes volunt, vbi dicitur: Adonai Dominus, mensuram verò iustitiæ, vbi Eloyn, id est, Deus. Rabi ergo Iosue considerans nominis vtriusque simul iuncti virtutem apud Mosem dicenrem Emisit Adam Dominus Deus de horto voluptatis ad excolendam terram, inquit, Cum mensura quadam iustitiæ atque misericordiæ creauit Deus Adam, cum eadem dedit ei præceptum, cum eadem eiecit eum, hæc Iosue. Quia videlicet non in expulsiōe solum, verum etiam

in creatione, & præcepto Moſis ſimiliter germinat Dominus Deus. Uſus eſt autem Deus in creando Adam iuſtitia, quia non aliter formauit eum, quam ut congrueret tam eius Ideæ, quæ ſemper in Deo eſt, per quam format, quam diuinæ bonitati, cuius gratia format. Uſus eſt ruruſus miſericordia, quia nullis Adæ meritis præcedentibus ei largitus eſt vitam, & reliqua bona. Miſericors in præcipiendo fuit, qui fructuum penè innumerabilium uſum abundè conceſſit. Iuſtus inſuper, qui minis quibuſdam eſum ligni ſcientiæ boni malique prohibuit. Par enim erat ut homo lege aliqua, eſſe ſe Deo ſubiectum agnoſceret, atque declararet. Denique iuſtus fuit, quando poſt præuaricationem expulſione puniuit, ſed etiam valdè miſericors, quando quidem finita quadam poena eum affecit, qui delinquens in Deum infinitum, quodammodo infinite peccauerat. Nunquid ergo ſub Meſſia Adam, genusque humanum eius prole, creatori Deo, abſque illo miſericordiæ iuſtitiaque vinculo, ſola videlicet miſericordia vultis conciliari? abſit. Mementote eius, quod in Deuteronomio quotidie replicatis: Dei perfectæ ſunt opera, & omnes viæ eius iudicia. Deus fidelis abſque vlla iniquitate, rectus & iuſtus eſt. Congruum igitur Dei miſericordiæ fuit, ut quandoque ſibi genus humanum conciliaret, congruum eius iuſtitia, ut ſatisfactio aliqua intercederet, ac ſaltem Meſſias pro cæteris ſatisfaceret, de quo Eſaias: Omnes nos ſicut oues errauimus, & homo à via ſua errauit, id eſt, omnes homines errauerunt, quia pater omnium Adam à via ſua errauit. Subiungit de Meſſia, & Deus poſuit in eo iniquitatem omnium noſtrum. Scio autem vos obſistere hic ita ſolere. Abſurdum eſt ſcelere ſummo ( quod in occidendo Meſſia à multis committitur ) dilui ſcelera hominum arbitrari, neque vnus paſſio peccatis omnium ſatisfacit, neque iuſtum eſt Meſſiam innocentem pro aliis nocentibus ſatisfacere. Nos verò in hunc modum breuiter reſpondemus: Non homicidarum ſcelere, ſed Meſſiæ virtute in malis perferendis deleta ſunt mala, proinde in Chriſto patiente maior charitas, virtusque fuit, quàm odium vitiumque in omnibus delinquentibus, digniorque Chriſti vnus vita, quàm vita cunctorum. Quando ergo vitam ſuam pro omnibus tradidit, longè plus quam ſatis fuerat ſatisfecit. Satisfacere autem alter pro altero poteſt, quod fieri quotidie in rebus civilibus cernimus, in actibus enim exterioribus ſatisfactio conſiſtit, ad hos autem & inſtrumenta & amici accipi poſſunt.

Quoniam vero poenitentia in adiuuentis voluntariſque interiore verſatur, ad ipſum met poenitentia pertinet qui peccauit, poenitentia ergo delictorum afficiantur oportet quilibet peccatores. Ita Deum Meſſiam pro quolibet ſatisfeciſſe videtur. Tunc Eſaiæ illud impletur. Verè languores noſtros ipſe tulit, & dolores noſtros ipſe portauit, attritus eſt propter ſcelera noſtra, liuore eius ſanati ſumus. Neque tamen impunes hinc abimus, qui ab initio mundi ad finem ob peccatum illud originale, incommoda multa ſubimus. In Chriſto autem breuis paſſio fuit, virtus & perfectio mira, felicitas ſempiterna. Statuerat Deus ab æterno Meſſiam fore humani generis redemptorem, redemptorem dico, qui à mortiferæ culpæ ſeruitute redimeret, de quo Eſaias: Veniet de Sion redemptor. Atque hæc in Meſſia excellens dignitas eſt, qua quidem caruiſſet, niſi propriæ carnis ſacrificio maculas populi deleuiſſet. Compertum habemus in ſacris hitoriis ſanctos viros ſemper oblatione ſacrificiorum, præſertim ſanguinis aſperſione Deum placare, impetrare ab eo dona, ab imminentibus periculis populum liberare, leges diuinas ſancire, ſemel quotannis peccata populi purgare conſueuiſſe, quod quàmuis non legitimè, tamen Gentiles etiam ſunt imitati. Sed ad Hebræos in præſentia veniamus.

Primum illud in Geſeſi legimus, vbi Noë poſt illud commune diluuium, ædificauit altare Domino, in quo holocauſta obtulit, quam ob cauſam placatus Deus ſtatuit, ne vltèrius diluuium huiusmodi mundo contingeret. Sequitur enim ibidem, odoratus eſt Dominus odorem ſuauitatis, & ait Dominus ad eum: nequaquam vltèra maledicam terræ propter hominem. Secundum etiam in Geſeſi, vbi Abraham primum præcepto Dei ad ſacrificandum filium ſuum promptus, deinde à Deo per Angelum prohibitus, arietem denique obtulit, Deoque mactauit. Cuius voluntatis, & victimæ cauſa, iureiurando interpoſito, promiſit Abraham Deus ſingulare donum, id eſt, omnes Gentes in ſuo ſemine ( quæcunque voluerint ) ſaluas fore. Tertium in Exodo reperitur, ibi enim aſperſione ſanguinis Paſchalis agni per poſtes, liminaque domorum Dei, populus à calamitate Ægyptia liberatur. Videbo, inquit, ſanguinem & tranſibø, nec erit in vobis plaga diſperdens. Quantum quoque in Exodo, illic Moſes acceptam à Deo legem ſancire volens, ſuper populum ſpargit

sanguinem victimarum, ut fœdus hac ratione inter Deum & homines confirmetur. Sic enim ibi legitur Moses sumptum sanguinem resperfit in populum atque ait: Hic est sanguis fœderis, quod pepigit Dominus vobi cum super omnibus his sermonibus. Quintum in Leuitico expiationis die tractatur, de quo ibi sic legitur: In hac die expiatio erit, atque mundatio ab omnibus peccatis vestris coram Domino mundabimini. Summus quippe Sacerdos intrans sancta sanctorum semel quotannis, coram Propitiatorio, & super Propitiatorium sacrificiorum sanguinem diffundebat. Atque hoc sanguine ex institutione diuina populi sordes abstergebantur. Ratio constitutionis huius illic huiusmodi assignatur, quia anima carnis in sanguine est, & ego sanguis pro animæ piaculo sit. Quinque hæc à nobis narrata, ac etiam iis maiora complecti debuit purgatio liberati, cuius populi sub Messia. Merito igitur obiulit se pro omnibus Deo, proprii sanguinis sacrificium, cuius quidem sanguinis aspersio, tanquam perfectissimum sacrificium in omnibus superioribus sacrificiis, quasi signis portendebatur.

Præsertim in oblatione Isaac à patre facta, & in Pascha. Adde, & in puerorum omnium circumcisione. Noluit autem diuina misericordia, ut omnes homines pro peccatis suis vitam cum sanguine funderent, sed ut pro cunctis vnus sanguinem spargeret, quem ob hoc præ cæteris exaltauit, quæ quidem aspersio, quamvis ratione homicidarum impia cædes fuerit, ratione tamen promptæ voluntatis Christi seipsum libentissime offerentis, diuinum sacrificium fuisse censetur. Quod quidem quotannis immolatione Paschalis agni in signum vestræ expiationis, salutisque significabatis, ac denique in Paschalis agni immolatione, scilicet mansueti Iesu Saluatoris nostri, est impletum, quod etiam quotidie in Eucharistia quodammodo repetitur. Sic ergo Christus Iesus est Sacerdos in æternum, semel seipsum Deo Patri sacrificans, qui solus mundare alios perfecte potuit, quum neque immundus fuerit, neque sui ipsius mundandi gratia holocaustis indiguerit, quemadmodum cæteri ante illum Sacerdotes, qui non bestiarum sanguine, non impuro, non alieno, sed humano, puro, proprio humanas sordes, familiamque suam perfecte purgauit. De iis diuine Paulus Apostolus in Epistola ad Hebræos. Quamobrem solutio peccatorum decentior fuit passione Christi, quam si Deus absoluta potentia igno-

uisset. præter enim id, quod ita fieri ad Dei iustitiam & misericordiam, rursus ad ostendendam excellentissimam Christi virtutem, pertinebat, ad humanam quoque doctrinam mysterium huiusmodi præ cæteris summo opere contulit, exemplo videlicet obedientiæ, mansuetudinis, charitatis, magnanimitatis, fortitudinis, mortalium contemptus, desiderii æternorum. Sic Esaiæ illud impletur, disciplina pacis nostræ super eum, ille siquidem fecit, ut pacem cum Deo, atque docuit, ut inuicem haberemus. Liore eius fanati sumus, non solum videlicet quia pro nobis satisfecit, sed etiam quia doctrina nos, & exemplis instruxit.

*Confirmatio peccati originalis, & ob hoc passionis Messie, ex Iudaicis contra Iudaos.*

### C A P V T XXXIII.

**C**ulpatis sæpè nostram illam originalem culpam, utpote qui Prophetas vestros interpretari nescitis, ab illis enim nos hæc didicimus. Esaias ad populum ita clamat: Pater tuus primus peccauit, & Interpretes tui prauaricati sunt in me, & contaminaui (aliter prophanaui) Principes sanctos, & dedi ad interitum Iacob, & Israël in blasphemiam. Pater primus scilicet Adam peccauit, quando præceptum diuinum neglexit. Quapropter Principes sancti, id est, Patriarchæ, cæterique iusti ab eo descendentes, contaminati, id est, tanquam prophani à diuina visione separati sunt, quemadmodum contaminati à templo separabantur: Transiit autem primi illius peccati poena in omnes descendentes ab Adam, siquidem post delictum sic Adæ comminatus est Deus: Maledicta terra in opere tuo, in labore comedes &c. Ita etiam mulieri: In dolore paries filios &c. Cum igitur in omnes poena illa transferit, in omnes quoque culpa transiit. Non enim verisimile est, in cunctis hominibus tam diuturnam poenam esse procul à culpa. Audite rursus quid apud Eaiam populo Deus dicat. Seruire me fecisti in peccatis tuis, quia Dominus Deus pro sceleribus serui populi expiandis, serui formam accepit, non poterat seruire Deus in quantum Deus, seruauit igitur in quantum homo. Fuit ergo Messias Deus & homo, quod patet etiam per sequentia: Præbui mihi laborem in iniquitatibus tuis, id est, poenas propter iniquitatem tuam. Noli timere, serue mihi Iacob,

cob, ego sum qui delebo peccata tua, id est, quamuis delictum tuum usque adò graue sit, vt ab humana specie sola expiari nequeat, ego tamen Deus & homo penitus expiabo. De Baptismo quoque & Spiritu sancto ita subdit: Effundam aqua n super sitientem: effundam spiritum meum super semen tuum, & benedictionem meam super stirpem tuam. Fortè etiam in iis significatur aqua, quam percussus Christi latus effudit, & vitæ spiritus, quem in cruce pro nobis emisit. Legite Antiquorum vestrorum in Genesim Commentaria in ea parte, vbi dicit Moses: Hæ sunt generationes coeli & terræ, cum crearentur, reperietis ibi res omnes ab initio perfectas omnino à Deo creatas fuisse, sed post parentis primi peccatum statim omnes, humanas præfertim, à sua perfectione degenerasse, neque prius ad statum pristinum reuerfuras, quàm filius Phares venerit, id est Messias, qui à Phares descendit. Ex quibus conicere potestis vitia primorum in posteros fuisse translata, ac per Messiam curanda. Sed aliter in primo aduentu curauit, curabit aliter in secundo.

Multi quoque ex Doctoribus vestris, Prophetas, Sanctosque veteris testamenti Patres, ante Messiae aduentum ad inferos descendere arbitrantur, quod quidem ex hoc probant, quòd Abrahæ à Deo in Genesi dicitur: Tu ibis ad Patres tuos, ex quo Rabi Rhahamon argumentatur, quia Patres Abrahæ idola coluerunt, vt apud Iosua legitur, Abraham quando iuit ad illos, ad inferos descendisse. Idem de Isaac in Genesi traditur: Defunctus est Isaac, & mortuus, & additus est ad populos suos. Idem ibidem de Iacob, idem de Dauide in libro Regum tertio: Dormiuit Dauid cum Patribus suis. De his omnibus Rabi Rhahamon similiter argumentatur, cum ad eorum loca mittantur, qui fuerunt iniusti, & idola coluerunt, sed Christus morte sua sanctos Patres liberauit à morte, scilicet à tenebris animorum. Quod ita texit Zacharias: Tu autem in sanguine Testamenti tui emisisti vinctos tuos delacu, in quo non est aqua, id est, sanctos ex lyngo loco arido, scilicet luminis & gaudij vacuo. Non igitur Christianorum inuentum, hoc est, quòd magnus Messias laboribus suis, passionibusque animas Patrum, & succedentium ab inferis fuerit redempturus. Sed multi quoque ex antiquis Iudæis id censue-

runt, præcipuè Rhahamon, quem dixi, ac præterea Osiuas Hanna, Habba Iudæa, qui in Talmuticis disputationibus post multa ad id pertinentia, etiam ad hoc propositum Osee illud adducunt. De manu mortis liberabo eos, de morte reducam eos. Item, illud Isaia: Redempti à Domino conuertentur, ac venient in Sion cum laude & lætitia sempiterna super capita eorum. Sion exponunt patriam cœlestem, & meritò, non est enim in terris laus, & lætitia sempiterna. Cum his conuenit Rabi Moses Gerundensis, imò verò omnes Iudæi consentunt, quòd Patriarchæ, & Sancti ante Messiae aduentum in Paradisum non intrant, sed in eius suburbiis manent, donec veniat filius Phares, id est, Christus Dauidis filius, & hoc quidem propter peccatum Adæ.

Et cum hæc ita sint, nonnulli tamen inter vos, non satis docti, originalem culpam negant in succedentes fuisse translata, atque expiandam fuisse per Christum, quasi non esse deceat tam diuturnam poenam in omnibus sine culpa. Proinde cur Moses in Genesi scribit post transgressionem Adæ, Deum collocasse Cherubin atque gladium flammeum, & versatilem, ad viam ligni vitæ intercludendam, sinè vt significet, propter similitudinem quandam, & culpam à parentibus primis contractam, cunctis Paradisi aditum intercludi. Meminisse debemus ingressum cœlestis regni tam arduum esse, tam pretiosum, vt non solum propriis, quotidianisque singulorum peccatis, sed etiam communi totius naturæ humanæ vitio ab origine primorum nascendo contracto possit, ac debeat impediri. Et quamuis Sancti, ante Christum virtutis humanæ viribus seipfos à propriis peccatis liberarent, atque mundarent, vnde cruciari apud inferos non debebant, nullius tamen virtus usque adò sufficiens erat vt obstaculum illud, quod in communi culpa totius humanæ naturæ consistebat, auferre valeret, ac Paradisi aditum patefacere, sed culpa obligatioque huiusmodi passione Christi communiter dissoluta est. Deus enim, vt Isaia inquit, in eo posuit peccatum omnium nostrum, per illum igitur cœlestis patriæ portas aperuit. Hoc mysterium Ieremias ita significauit: Tibi peccauimus, expectatio Israel, Saluator in tempore tribulationis. Quare futurus es sicut colonus in terra, & quasi viator declinans ad manendum. Quare futurus es quasi vir vagus, & quasi qui non possit sal-



nare. Tu autem in nobis es Domine, & nomen sanctum tuum inuocatum est super nos, ne derelinquas nos Domine Deus noster. Nonnulli inter vos interrogant, cur Christus delendo culpam, non deleuit poenam illam: In sudore vultus tui, &c. & in dolore paries filios, & similia. Vt videlicet his stimulis quotidie agnoscamus quam pessimum fuit, atque est, Dei mandata contemnere, atque exercitatione moralium virtutum ad beatitudinem consequendam magis proficiamus. Accedit quod redemptio, victoria, libertas, affluentia, pax, quæ promissa fuerunt nobis Messiae tempore, fortè ad spiritalia pertinebant, quæ ad beatitudinem conferunt, non ad corporalia, quæ vel non conferunt, vel impediunt. Sic passione veraque Christi fide originale illud peccatum ablatum fuit, quantum videlicet ad culpam spectat, quæ beatitudinem vltimam impedit, laboriosa verò illa relictæ sunt, quæ non modo non impediunt sed conducunt. Sed obiicitis Ezechielis illud: Filius non portabit patris iniquitatem, Nos autem sic exponimus, filium videlicet propter peccatum patris non puniri, si penitus culpæ expers fuerit, omnes autem primæ illius culpæ participes nascebantur. Sicut enim quotidiana vitia à patre in filium imitatione, sic primum transit origine. Neque mirandum est, quòd primæ parentis vitium in posteros transuerit, quotidie namque in pueris tam aorum quàm genitorum gestus, affectus, mores agnoscimus. Sic natura comparatum est, ut corpus & anima proportionem quadam harmonica congruant, atque in vno esse conueniant, motusque corporis in animam quodammodo, animæ in corpus, facillè & vehementissimè penetrent. Non educitur anima filij vel à corpore patris, vel anima, sed corpus tale, & cum tali quadam procliuitate, à tali quodam corpore genitoris. Sic vvas acerbæ comederunt patres, ac dentes filiorum obstupuerunt, procliuitatis illius anima ob cognationem quandam affectumque erga corpus proprium participes quodammodo redduntur, præsertim secundum vim eius inferiorem, quæ corpori propinquat, multumque consentit. Deinde vis superior animæ naturali quodam amore inferiori sæpè obsequitur, ferè sicut illa corpori, obsequitur, inquam, quasi similiter, sed non æquè. Motus autem qui in anima actio est, fit in corpore passio, qui in corpore passio, fit in animo sensus, atque compassio, affectio quæ in corpore poena culpæ est, in anima culpa.

Obiicitis præterea hunc in modum. Peccatum adeò est voluntarium, quod si non esset voluntarium, non esset peccatum. Sed peccatum originale, dicitur macula per originem à genitore contracta. Cum autem in prole non sit voluntaria, non est peccatum. Imo peccatum est, quum sit obliquitas quædam à recto declinans, & ad finem consequendum inepta, quemadmodum defectus in claudio. Peccatum est, inquam, non tam propriæ naturæ, quàm communis. Voluntarium autem quodammodo fit in prole, in quantum libenter procliuitatem huiusmodi sequitur, voluntarium est insuper non tam voluntate prolis propria, quàm voluntate ipsius Adæ, qui generationis motione omnes, qui ex eius stirpe pullulant, quodammodo mouet, non aliter quàm animæ vnius voluntas membra corporis ad actum plurima mouet. Idcirco quemadmodum pedis motus non voluntate pedis propria, sed communi animæ voluntate, quæ primo membra mouet, dicitur voluntarius similiterque capitis, manusque motus: & reliquorum, sic obliquitas illa homini naturalis, propter voluntatem Adæ quodammodo omnes mouentis potius, quàm propter propriam voluntaria iudicatur. Sunt inter vos, qui contra nos hac ratione argumententur. Si peccatum à primis parentibus ideo in nos transfusum est, quoniam in eis fuimus, ab eisque naturam humanam accepimus, eodem pacto singula peccata singulorum progenitorum ab initio mundi vsque ad eos necessario nascentibus nobis insererentur.

Respondent ad hæc nostri Theologi, nullum vitium vel parentis primi, vel cæterorum in nascentes necessario traduci, præter primum. Homo namque idem secum non numero indiuiduoque, sed specie generat. Atque idcirco quæ ad propriam cuiusque personam propriè pertinent, filiis ab origine non traduntur, sed quæ ad speciem attinent. Non enim Musicus, Philosophusque Musicum generat, vel Philosophum. Homo tamen videns, audiens, bipes, nisi quid impediuerit, hominem bipedem generat, videndi audiendique compotem. Vitium verò primum speciei humanæ naturalis capus euasit, cætera aduentitia sunt, fiuntque propria singulorum. Scio vos hic obiicere solere, Adæ peccatum, quia ex actu proprio liberi arbitrij processerit, ad personam propriam potius quàm ad speciem pertinuisse. Ad hoc etiam ex Theologorum nostrorum mente ita respondeo: Ad

personam cuiusque duobus modis aliquid pertinet, vel secundum ipsam, vel quodam gratiæ munere. Similiter ad naturam dupliciter potest aliquid attinere, vel secundum ipsam, videlicet, quod ex naturæ principis, elementisque profuit, vel supernaturalis gratiæ dono. Originalem iustitiam humana natura non ex interioribus principis eius habuit ab initio, sed gratiæ diuinæ dono, quod ab origine totius naturæ humanæ in primo parente tradiiur fuisse collatum.

Donum huiusmodi ille ob primi delicti culpam amisit. Itaque sicut originalis illa iustitia, nisi ille deliquisset, una cum propagatione naturæ fuisset in posteris conseruata, ita opposita quædam peruersitas, & obliquitas in successione cum natura traducitur. Idcirco vitium huiusmodi, naturæ potius euasit quàm personæ. Cætera vitia, vel Adæ, vel aliorum naturam quidem, non quantum ad id quod naturæ est, sed quantum ad id quod est personæ deprauant, ideo in filios & nepotes non necessario diffunduntur. Quid ergo nobis Christi passio contulit? obstaculum culpæ originalis auferendo, Paradisi aditum patefecit, quem ante illum ingredi homines sancti non poterant. Nunquid si Adam non deliquisset, tam ipse quam cæteri iusti beati fuissent? Paradisum profecto possedissent, sed terrenum. Cœlestis autem Paradisi, aduentus Dei sub Christi persona nos compotes reddidit, vnde plus lucris in virtute Christi fuit, quàm in Adæ vitio damni.

Vitium Adæ, secundum se, cruciatum nobis quidem non attulit inferorum, sed abstulit Paradisum duntaxat terrenum, Christi virtus ab inferis tuetur, Paradisum cœlestem largitur. Hinc Paulus Apostolus: Vbi abundauit peccatum, superabundauit & gratia. Omitto minora illa, quod per Christum diabolus princeps olim mundi huius, id est, hominum mundanorum, eiectus est foras, non vltius per idololatriam nos deludit, non tot Gentium tam acriter, vt solebat, animos & corpora vexat, nisi interdum certi finis gratia permittatur à Deo, per fidem Messiae qui iam venit, diabolo resistimus, per fidem Messiae venturi, sancti ante Christum diabolo resisterunt. Nullus tamen tunc illius manus sic euadere poterat, vt cuiusdam inferni, id est, lympi deuitaret ingressum. Quod ita cecinit David: Quis est homo qui viuet, & non videbit mortem, & liberabit animam suam de manu inferni? Contra id venenum, atque simi-

lia, virtus, passio, mysteria, doctrina, exemplar, fides Christi abunde nobis remedia præbent. Præ cæteris Baptismus in virtute Spiritus sancti, fideique Christi, culpam illam, obligationemque in animo eius, qui Baptismo lauatur, dissoluit, procliuatatem vero naturæ corpori insitam non extirpat. Spiritus enim, & spirituale mysterium non corpus, sed spiritum, voluntatemque propriè respicit: hinc fit, vt qui ex baptizati corpore generantur, quia nascuntur immundi, Baptismo ipsi quoque egentes cogantur, singuli quotidie Christi mysterio donum purificationis agnoscere, perinde ac tritici granum, quod & si arret mundatum est, grana tamen immunda generat, ita vt arte rursus indigeant. Ars enim indiuidui proprietatem potius quàm speciei naturam, vimque generandi mundaauerat.

*Probatio, quod testamenti veteris ceremoniæ merito consumptæ, consummatæque sunt adueniente nouo, ex Iudaicis contra Iudeos.*

## CAPVT XXXIIII.

SI veteris Testamenti regnum, prophetia, sacerdotium, sacrificium tempore Messiae regis sacerdotisque æterni, finisque Prophetarum, nouo quodam Testamento introducto, auferri ex institutione diuina, sicut aliàs ostendimus, debuerunt, multo magis minutæ illæ ceremoniæ, in quibus parum momenti erat, iure euanuerunt, quod ex nonnullis Prophetarum vaticiniis aliàs declarauimus. Illæ siquidem non aliter, res Christianas ceremoniasque, quàm prophetiæ prænunciabant. Consummatis tandem oraculis Prophetarum, merito consumptæ sunt ceremoniæ. Vostamen adhuc ea mordicus tenetis Iudæi, præ cæteris pertinaces, illud Mosi in Deuteronomio contra nos adducentes: Et nunc Israël audi præcepta, & iudicia, quæ doceo te, vt faciens ea viuas, & ingrediens possideas terram, quam Dominus Deus patrum nostrorum daturus est nobis, non addetis ad verbum, quod vobis loquor, neque auferetis ex eo. Consideranda hæc verba sunt diligenter, Moses ad subiectam sibi gregem loquitur, dicit enim, Israël audi, non dixit, non addatur, vel minuanur ab illo, sed non addetis vos, neque auferetis.

Abstulit igitur subiecto gregi mutandi potestatem. Deo verò qui supra Moysen

est, vel egregio nuncio, qui à Deo mandandi habuerit potestatem, non absulit. Hieremias ita reclamationem: Ecce dies veniunt dicit Dominus, & feriam (aliter consummabo) domui Israël, & domui Iuda fœdus (aliter Testamentum) nouum, non secundum Testamentum (aliter pactum) quod disposui (aliter pepigi) Patribus eorum die, quâ apprehendi manum eorum, ut educerem eos de terra Aegypti, pactum quod irritum fecerunt (aliter, quoniam ipsi non permanserunt in Testamento meo) & ego neglexi eos (aliter, abominatus sum) dicit Dominus. Sed hoc erit Testamentum (aliter pactum) quod constituam cum domo Israël. Post dies illos, dicit Dominus, dabo legem meam in mentem (aliter in visceribus eorum) & in corde eorum scribam eam, & videbo eos, & ero eis in Deum, & ipsi erunt mihi in plebem. Et docebit unusquisque proximum suum, & unusquisque fratrem suum dicens: Cognosce Dominum, quoniam omnes scient, me scilicet vnicum esse Deum, & sequitur à maiore vsque ad minorem, quia propitius ero iniquitatibus eorum, & peccatorum illorum iam non recordabor. In iis promittit Deus aliquando, se nouum pactum Testamentumque dispositurum, nouam traditurum legem ab illa, quam dederat Mosi, postquam Iudæos ab Aegyptiis liberauerat, inscripturum eam non tabulis lapideis & chartis amplius, sed mentibus hominum, quasi prima illa deleri potuerit, non secunda. Ac ceremoniarum veteres, nouo Testamento introducto, secundum spiritalem intelligentiam seruari debuerint. Certè, ut Paulus Apostolus ait, quando Propheta dicit: Pactum Testamentumque nouum, significat alterum consensescere, atque deficere posse. Sed quando hæc fuerunt? quando impletum est illud, videbo eos, & ero illis in Deum? Videt semper Deus homines intellectu, sed oculis insuper vidit, cum assumpsit hominem, hominem, inquam, qui hominibus re vera Deus habitus est. De quo Dauid, videbitur Deus deorum in Sion, & Zacharias, Tu es Deus, & in te est Deus, nec est absque te Deus. Ex quibus ostenditur Messiae noui Testamenti, pactique conditoris diuinitas, significatur etiam diuinarum distinctio personarum.

Sed, ne quis turbetur, quod in variis translationibus varia vocabula sint, alibi pactum, alibi Testamentum. Sciendum est vocabulum hoc ab Hieremia introduci, scilicet berith, quod legem,

pactum, fœdus, Testamentumque significat. Nouam legem Messiae legem intelligi vestri Interpretes confitentur, unde Doctores Talmutici legem Messiae aiunt excellentiorem fore Mosaicam. Legite horum Commentariola in Salomonis Ecclesiastem. Hæc ibi reperietis, omnis lex præsentis seculi vanitas quædam est ad futuri seculi legem, id est, ad legem Messiae: nam in sequentibus sic res declaratur. Omnis lex, quam quis in hoc seculo discit, vanum quiddam est, si ad Messiae legem conferatur. Hæc ibi. Videtis ergo legem Messiae esse à lege Mosi differentem, ceremoniasque Mosaicam in Messiae conspectu penitus euanescere. Vana verò Mosi lex appellatur, non absolute, sed ad Christi legem, cæteris enim præstantior est. Sed cur vana? quia per ciuiles virtutes tantum humanum genus, non ad cœlestis beatitudinis finem, sed viam dumtaxat dirigere potest. Christiana per purgatorias purgatique animi virtutes ad exemplares virtutes, cœlestemque felicitatem perfectè perducit. Non enim datur perfecta felicitas, nisi animis perfectè purgatis, hoc non Mosaicam, sed Christiana lex efficit. Præparatio igitur quædam est Mosaicam legem ad Christi legem, quasi formam, habitumque perfectum, cum verò quis possidet habitum, præparatione non indiget. Quod autem sub Mosi lege, Sancti Paradisum non ingreditur, sed Messiae legem, gratiamque expectent, vos, ut in superioribus diximus, confitemini.

Ob hoc, ut arbitror, Moses legem suam seruantibus præmia solum temporalia pollicetur, non enim potest ea doctrina ad maius aliquid aspirare. Moses in Deuteronomio rem omnem sic aperit: Prophetam suscitabo eis de medio fratrum similem tui, ponam verba mea in ore eius, loqueturque ad eos omnia, quæ præcepero illi. Si quis autem verba eius, quæ loquetur in nomine meo audire noluerit, Ego ultor existam. Nonne videtis Deum Prophetam quendam præter Mosem in populo vestro creaturum fuisse? daturum ei condendarum ab initio legum auctoritatem? Huc mutare omnia pro arbitrio licet, mutare, inquam, imaginem in substantiam, ut imperfecta perficiatur. Vos ei credere omnia non minus quam Mosi diuino iussu debetis, & quia neque omnes, neque omnia credidistis, ut minatus est Deus, exterminati estis. Non fingant Arabes Mahumetem regem, imò tyrannum fuisse talem, cuius lex non

coartavit Mosaicam ex se valde liberam, sed nimium relaxavit, cui neque tempus, neque locus, neque vlla Prophetarum dicta conveniunt. Sed quonam pacto potuit Mahumetes esse Propheta ille supremus ex Iudæorum populo suscitandus, cum ipse in Alcorano confiteatur Iesum Nazarenum ultimum Hebræorum, summumque fuisse Prophetam. Iudæi quondam, præsertim Africani, his Mosi verbis admoniti, Messiam expectabant novarum legum conditorem. Sed Rabi Moses scripsit ad illos, non promitti à Deo Prophetam legum conditorem, sed solum præsagum futurorū. Volebat, inquit, Deus à Iudæis auguria, quibus utebantur Cananæi, fugare, hinc eis dicebat: Gentes istæ, quarum possidebis terram, Augures & Divinos audiunt, tu autem à Domino Deo tuo aliter institutus es, scilicet ut non per auguria, sed per Prophetas à Deo missos futura prænoscas, ideo subdit: Prophetam de Gente tua, & fratribus tuis, sicut me, suscitabit tibi Dominus Deus tuus, ipsum audies. Hinc Rabi Moses ad Africanos. Nos etiam affirmamus hæc Mosi verba non aliter exponenda esse, quàm Africanus Rabi Moses exposuerit. Sed consideremus magnum Mosem in eodem Deuteronomij capitulo, in sequentibus ita loquentem: Ut petisti à Domino tuo in Oreb, quādo concio congregata est, atque dixisti: ultra non audiam vocem Domini Dei mei, & ignem hunc maximum amplius non videbo, ne moriar. Et ait Dominus: Mihi bene omnia sunt loquuti, Prophetam suscitabo eis, de medio fratrum suorum similem tui, & ponam verba mea in ore eius, loqueturque ad eos omnia, quæ præcepero illi. Si quis autem verba quæ loquetur audire noluerit, ego ultor existam. Videtis ne populum, quando in monte Oreb tradita lex fuit, igni, cæterisque horribilibus signis fuisse perterritum, rogatum deinde Deum, ne ulterius eo pacto ad populum loqueretur. Vnde promisit Deus aliàs se absque ullo terrore per Prophetam quendam, qui verus homo foret, qualis Moses, legem populo traditurum. In superioribus ergo capituli verbis, Moses de Propheta futurorum præcone, quales multi fuerunt. In sequentibus autem de Propheta legum conditore (qualem Iesum Nazarenum fuisse volumus) loquitur. Sed turbat vos nimium scio, quòd iussit Moses semper eius mandata servari. Mementote à Grammaticis vestris tractari, dictiones ad sempiternum pertinentes duplices esse: aliàs ad sempiternum absolute, aliàs ad sempi-

ternum cum quadam conditione referri. In primo genere est Cæla, & vbi apud nos Psalmus dicit, in sæcula sæculorum laudabunt te, apud Hebræos est Cæla. Est etiam in eo genere Necali, atque vbi Psalmus Græcè & Latinè dicit: Vivet in æternum, Hebraicè sonat, Necali. In secundo genere Hebraicè est holam, Latinè sæculum. Hoc pacto in Deuteronomio de servo emptitio dicit: Erit tibi servus holam, id est, in sæculum, in sæculum, inquam vitæ tuæ, vel servi non ultra, unde sæculum ibi non totam rerum, sed huius, vel illius hominis durationem significat. Moses autem vbi ceremonias servari iubet circa Sabbatum, Pascha, Pentecosten, festumque Tabernaculorum, expiationis diem, atque similia, nunquam illis dictionibus, quæ absolutam æternitatem significant, utitur, sed holam duntaxat, quod certum significat sæculum, id est, totum sæculum veteris testamenti, donec Testamentum novum per Messiam confirmatur, & ceremoniæ veteres dum videbuntur arescere, reurescant, & in novis consumuntur potius quàm consumantur. Sic Iesus noster implevit legem, quando quæ fuerant imperfecta perfecit. Atque hæc ipsa legis Christianæ perfectio declarat ipsam Mosaicarum constitutionum finem terminumque durationis extremum existere, quod per Hieremiam prædixerat, ut diximus, Deus legem novam promittens à Mosaica differentem. Si quis autem qua in re perfectior nova sit quàm vetus, inquirat, consideret quinque præcipuas, quantum ad propositum spectat, novæ, id est, Christianæ legis excellentias esse.

Prima est, Lex Mosaica in tabulis lapideis corruptibilibusque tradita fuit, Lex nova erat, ut Hieremias ait, cordibus, & mentibus inurenda. Quod quidem significat, novam hanc disciplinam magis spiritalem esse, adde & æternam, quoniam naturalis legis instar æternis mentibus imprimitur in æternum. Vetus autem temporali subiecta data fuit ad tempus. Secunda, Vetus illa constitutio præter illa, quæ ad legem pertinent naturalem, solum Gentem Israëlitam, (cui data est) obligavit. Hinc Psalmista de Deo dicit: Annuncians verbum suum Iacob, iustitias & iudicia Israël, non fecit taliter omni nationi, & iudicia sua non manifestavit eis. Lex autem nova non aliter quam naturalis omnes astringit. Quapropter Esaias de Messia, eiusque doctrina sic inquit: Donec ponat in terra iudicium, & legem eius in-



fulæ expectabunt. Tertia, Prisca decreta, (his exceptis, quæ ad naturale ius pertinent) etiam subiectum populum, non vbiq; sed in sola promissionis regione alligasse dicuntur. Quod ita Deuteronomij verba declarant: Scitis, quod docuerim vos præcepta, atque iustitias, sicut mandauit mihi Dominus Deus meus, vt faciatis ea in terra, quam possessuri estis. Rursus, mihiq; mandauit eodem tempore, vt docerem vos ceremonias, & iudicia, quæ facere deberetis in terra, quam possessuri estis Iterum. Tu verò hic ista mecum, & loquar tibi omnia mandata, & ceremonias, atque iudicia, quæ docebis eos, vt faciant ea in terra, quam dabo eis in possessionem. Messia autem iura non minus quam naturalia vbiq; sunt obseruanda, igitur apud Malachiam, Deus quandoque vetera reprobabat sacrificia: Non est mihi voluntas in vobis, dicit Dominus exercituum, & munus non suscipiam de manu vestra. Deinde subdit: Ab ortu enim Solis vsque ad occasum magnū est nomen meum in Gentibus, & in omni loco sacrificatur, & offertur nomini meo oblatio munda. Sacra igitur, quæ in veteri lege in solis terræ promissionis templis, & tabernaculis celebrari licebat, quandoque scilicet sub Messia, vbiq; Deo grata futura erant. Quarta, Lex vetus sola corporalia, temporaliaque bona pollicetur, & mala minatur, vt in Leuitico, & alibi sæpè patet. Noua, spiritalia & æterna. Quinta, Vetus, ciuiles virtutes communelque duntaxat inducit, quibus perturbationes amputat. Noua, purgatorias animique purgati, quibus affectus extirpat, & obliuioni tanquam igni tradit fomites vitiorum. Sed cur istud? quia Deus rudem adhuc populum, sicuti par erat, leuioribus disciplinis erudiret, manifestioribusque tam bonis quàm malis mouere statuerat, quod etiam Rabi Moses Ægyptius in commentariis libri camedrim confitetur. At verò tempore Christi, populi iam eruditiores euaserunt. Tunc, (vt Esaias inquit) repleta est terra scientia Domini, sicut aqua maris cooperientis. Tunc igitur Deus verioribus præmijs exactoribusque institutis genus humanum prouocauit, atque formauit. Merito igitur, accedente lege noua tanquam forma, vetus veluti præparatio vel abit, vel transit in nouam. impleturque in noua. Quod quidem omnino tacere non potuit Rabi Moses in Deuteronomio, Vbi mundi ætatem in sæcula duo distribuit, sæculum videlicet præsens, seculumue Messia. Ac Talmutici Interpretes, sicut alijs di-

ximus, sæculum præsens, & futurum legis, & Messia sæcula esse volunt, vanamque sæculi huius legem, ad Messia legem esse fatentur, quasi in sæculo legem Christi, sæculum lexque vetus finiat, atque expleatur.

*Distinctio præceptorum Moſis.*

Mosis præcepta præcipua illa sunt, quæ in Decalogo continentur, data enim à Deo sunt absque medio in tabulis lapideis populo vniuerso, deinde tanquam perpetua in arca Testamenti in sancto sanctorum inclusa. Cætera verò minutiora sunt, ac data per Moſem, & ab eo chartis inscripta, atque extra sanctorum sancta posita. Inter hæc autem alia simpliciter moralia sunt, & quia naturæ legem imitantur, sempiterna sunt fermè, sicut præcipua. Alia ad iudicia pertinent, quæ neque in æquitatis arbitrio posita, prout rerum vsus exigit, variantur. Alia rursus ad ceremonias, quæ quidem parui momenti sunt, nam tanquam figuræ quædam Pythagoricorum symbolorum instar, ad aliud porrendendum, significandumque referuntur. Qui enim à porco abstinere iubetur, porci vitam vitare iubet, & qui sistere corpus in Sabbato, sistere mentem in contemplando. Hæc & similia ad significatum, effectumque suum per Christum redacta fuerunt. Sacrificare igitur Deo, & quod fur ablatum restituat, & similia ad ius naturale pertinent, atque morale, idè semper seruanda mandantur. Sacrificare autem hoc pacto, & die hoc aut illo, talia siue talia, rursus restituere quadruplum, aut duplum, & similia vel ceremonialia vel iudicialia sunt, mutarique potuerunt ac debuerunt, prout locis, temporibus, personisque congruit. In rebus huiusmodi non solum sub Christo mutatio contigit, & iure contigit, verum etiam apud præcos. In prima enim ætate ex institutione diuina, non licuit hominibus vesci, nisi plantis, sicuti nos Genesis docet. In secunda tamen ætate post illam mundi illuionem, concedente Deo, vesci animalibus licuit, quod etiam in Genesi declaratur, vnde apud vos in libro Beresith Rabba, videlicet in commentariis in Genesim, dum exponitur illud Psalmi: Dominus soluit compeditos, ita dicitur: Omnis bestia, quæ in hoc sæculo, videlicet sæculo legis, habetur immunda, à Deo in futuro sæculo, scilicet Messia fiet munda, quemadmodum munda fuerunt filiis Noë bestia, quæ prioribus munda non fuerant. Et sicut Deus concessit antiquioribus solimmodo plantas, tanquam munda, & si-

his Noë, deinde omne animal tanquam mundum. Sic in sæculo futuro Deus concedet quicquid ante prohibuit, hæc ibi. Ex iis patet in Messie sæculo minutiora illa sæculi veteris instituta tanquam inania iam & superuacua soluenda fuisse. Nunquid ad hoc, ô Iudæi, plures adhuc testes exigitis? quamvis non necessarij sint, quosdam tamen è multis, qui supersunt adducam.

Malachias. Testamentum meum erit cum eo vitæ & pacis, & dedi ei ut timore me timeret, & a facie nominis mei reuereretur, Lex veritatis erit in ore eius, in pace dirigens, ambulabit mecum, & multos ab iniquitate conuertet, quoniam labia sacerdotis custodient scientiam, & legem inquirent de ore eius, quoniam Angelus Domini omnipotentis est. In iis Deus Messie promittit denuo Testamentum suum, Testamentum inquam pacis inter Deum hominesque conciliandæ, ex quo vita hominum provenit. Vitam rursus illi promittit mitem, & quasi timidam. Sacerdotium quoque, & quod non vi & armis, sed pace, & scientia conuertet homines, non omnes, sed multos. Iterum, quod legem ab eo homines novam accipient. Cui autem hæc omnia, nisi Iesu Nazareno conveniunt?

Naum. Exterminabo sculptilia & conflabilia, ponam sepulturam tuam, quia ecce veloces super montes pedes Euangelizantis & annunciantis pacem. Celebra Iuda dies tuos festos, redde vota tua; quia iam non adiicient ultra, ut transeant in vetustatem, consummatum est, consumptum est, ablatum est. Ascendit qui insufflat in faciem tuam, eripiens te ex tribulatione. Hic aperte in aduentu Messie protendit idolorum casum, consummationem prophetiarum, ac veteris Testamenti, consumptionem priscarum ceremoniarum, ablationem regni Iudaici, prædicationem Euangelicæ pacis, ascensionem Christi, Spiritus sancti afflationem, liberationem denique à tribulatione, scilicet inferorum.

Micheas. Exibit lex de Sion, & sermo Domini de Hierusalem, & iudicabit inter populos plurimos, & reuincet, & dirigit validas nationes usque in longinquam. Per hæc significatum fuit Messiam novam doctrinam, legemque ultra Mosaicam adducturum, quæ non ex Synai, ut illa vetus, sed ex Sion procederet, neque solos Iudæos institueret, sicut illa, verum sermonem prædicantium Apostolorum passim propagaretur, ac validarum nationum instituta deleteret.

Esaias. Hæc dicit Dominus viris Iudæ

qui habitant in Hierusalem. Reuocate inter vos novitatem, & ne seminaueritis in spinis. Circumcidite vos Domino Deo vestro, & circumcidite præputium cordis vestri, ne exeat ira mea, sicut ignis, & non sit qui exstinguat.

Moses. In nouissimis diebus circumcidet Dominus cor vestrum ad Dominum Deum tuum amandum.

Iesus Naue qui Iesu Christi figuram præferebat, ait: Dixit Dominus ad Iesum, fac tibi cultellos petrinus nimis acutos, & sede, & circumcide secundo filios Israël, scilicet cordis circumcisione. His tribus oraculis ostensum fuit corporalem circumcisionem in spiritalem sub Christo fore mutandam, illi extremam pelliculam attingebant, hic vniuersum purgat, & lauat. Ergo quid oportet pueros post Iesum octaua die sanguinem fundere? parcite filiis vestris Iudæi tam crudeles, quàm superstitiosi, parcite filiis statim natis. Iesus olim circumcissus totus, pro omnibus sanguinem semel fudit. Quod si circumcisio ceremoniarum prima stabilis futura non erat, non enim ab initio, sed sub Abraham est instituta, & sine illa quandoque iustus esse quilibet potuit, multo minus reliqua. Ergo quid sabbata obseruatis vltius? Dies profecto vobis dominicus sub sabbato quondam figurabatur. Quid victimas adhuc temporales sacrificatis? illæ omnes in æterna victima Iesu finem habuisse videntur. Quid sacerdotes pristinos frustra quotidie restituitis? qui tanquam minimi Iesum sacerdotem præferebant æternum, ille ille est sacerdos in æternum verus secundum ordinem Melchisedech. Quid denique regem vltius expectatis, regnum illud vestrum olim temporale in æternum regem Christum est translatum. Et cum dixistis, vel legistis: O miseri, Iesus Nazarenus rex Iudæorum, tunc morientem hominem, viuentem Deum, regem vnicum, vltimum, perpetuum accepistis, quod quidem Moses vester nobis significauerat, quando ritum constituendi Pontificis tradens, per vnguenti cuiusdam mystici sacramentum, eum Christum nominauit. Rursum quando regem sibi successorem constituens, Iesum cognominauit eum, qui prius Aüses fuerat nominatus. Ita igitur per gemina hæc appellationis indicia, in altero Pontificij, in altero regni exprimuntur insignia, & Iesus-Christus tanquam qui rex & Pontifex esset, pariter nominatus.

*De auctoritate doctrinae Christianae.*

## CAPVT XXXV.

**D**Octrinam Christi multa confirmant. Primum quidem Sybillarum, Prophetarumque prædictiones. Deinde sanctitas, & miracula Christi, & Christianorum. Accedit illa supra modum mira profunditas, & maiestas, quæ in sobrio eorum stylo perspicitur, quia antea rudes piscatoresque fuerunt, Petri præsertim, Iacobi, & Ioannis, atque, ut de Paulo taceam, qui & si ante conversionem homo doctissimus erat, surgit tamen post in suis Epistolis admodum super hominem. Quid Petri Epistolis augustius, quid venerabilius Epistola Iacobi atque Iudæ? quid de Ioannis Apocalypsi dicemus? qui liber cœlestem præfert faciem, totque habet sacramenta, quot verba. Quid de huius Epistolis? quibus inest absque verborum fūco nectarea dulcedo, sensusque diuinus. Euangelium eius videtur Dei manibus scriptum esse, non hominis, quod cum legeret Amelius Platonius, per Iotiem iuravit, virum illum Barbarum, id est, Iudæum, breuiter comprehendisse, quæ de ratione diuina, principio, dispositioneque rerum Plato & Heraclius disputauerunt. Simplicianus ait, Platonium quendam audisse dicentem. Euangelij huius præcæm ubique in templorum apicibus literis aureis scribendum esse, denique omnestales oratione, quales vita fuerunt. Sicut enim in conuersatione fuerunt mitissimi, in periculis autem & laboribus fortissimi, & constantissimi, ita in loquendo humillimi pariter & excelsi. Coniunctiones huiusmodi Philosophi supra naturam esse censent. Sic ergo rusticos illos, & pisces Magister eorum Christus, quod promiserat, pisces hominum reddidit. Quodve mirabile est, eos post ascensionem suam in cœlum adhuc rudes è cœlo subito quodam afflatu mirificè docuit, usque adeo, ut statim coram omni populo, omnibus linguis, doctrinisque pollerent.

Cuius rei signum est, quod ipsi doctos plurimos docuerunt, multique sapientia excellentes, colla sua eorum liberrime subiecerunt. Hierotheus & Dionysius Areopagita, & Iustinus Platonici, quorum scripta omni sapientia plena sunt, crucem Christi vnâ cum Apostolus subire. Panteus præterea Stoicus, Quadrantus, Agrippa, Aristides, Lucas, Marcusque Philo-

sophus, Teras, & Apollo legis Iudaicæ peritissimi. Quid de sapiente Ignatio Christi discipulo Antiochiæ Episcopo dicam, qui dum Romam vincens deuorandus bestiis duceretur, in ipso itinere de martyrio, doctrinaque Christiana multas scripsit Epistolas ad Ephesios, ad Magnesios, ad Thracas, Smirneos, Philadelphos ad Policarpum, atque Romanos. Ex Syria Romam usque pugno bestiis deuorandus, interea nocte dieque ligatus pugno cum decem leopardis, id est, militibus, qui me custodiunt, quibus & cum bene fecerim, peiores fiunt. Iniquitas autem eorum mea doctrina, sed non idcirco iustificatus sum. Vtinam fruar bestiis, quæ mihi sunt præparatæ, quas & oro, promptas mihi esse ad interitum, & allici ad comedendum, ne sicut aliorum martyrum, non audeant corpus attingere. Quod si venire noluerint, ego vim faciam, ut deuorer. Ignoscite mihi filioli, quid mihi profit ego scio. Nunc incipio esse discipulus, nonne iis quæ videntur deficiam, ut Iesum Christum inueniam, ignis, crux, bestia, confractio ossium, membrorum diuisio, totius corporis contritio, omnia tormenta, diaboli arte quæsitæ, in me veniant, modo Iesu Christo fruar, hæc ille. Cumque iam damnatus esset ad bestias, rugientesque audiret leones, ardore patiendi ait, Dentibus leonum molar, ut panis mundus euadam. Polycarpus etiam Smyrneorum Episcopus, Ioannis Euangelistæ comes, magnus Asiæ doctor, sæpè rogatus à Iudice, ut Iesum negaret, respondit, non posse negare illum, cui octuaginta iam & sex annos feliciter seruierit. Itaque cum Christi amore totus arderet, ignis flammæ, mortemque facillimè pertulit. Hæc de illo Smyrnei ad Ponu Ecclesias scripserunt. Iustinus autem ille Platonius, audito Apostolorum libro, quem pro religionis nostræ defensione iudicibus obtulit, cum multos præclaros martyres numerasset, se quoque martyrio consumptum iri insidiis cuiusdam Crescentis Cynici (imò grassantis) vaticinatus est, dicens: Et ego quidem spero me ab aliquo horum, quibus pro veritate obisto, insidias esse passurum, spero baculo, aut claua feriendum, certè vel à Crescente hoc, non Philosopho, sed Philopompo. Quod & ita factum est, & Iustinus tam fortiter tulit quam manifestè præuiderat. Præuiderat autem Ioannes Euangelista, & in fine Euangelij sui prædixerat, se quamuis extrema pateretur, enecari non posse prædixerat. Et in Apocalypsi inter alias Christianorum calamitates, manifestissime illam, quæ sub Valerio principe contigit.

De qua Dionysius Alexandriae Episcopus, temporis illius Martyr inquit: Ioanni reuelatum est, ut diceret, & datum est ei os loquens magna, & blasphemias, & data est ei potestas per menses quadraginta & duos. Vtraque autem complentur in Valeriano, hæc Dionysius. At decebat ante martyres alios consobrinum illum Christi Simeonem, qui post diuturna tormenta etiam crucem sustinuit libens, cum annos ageret centum viginti. Sed ecce se mihi iam offert virorum in quavis doctrina excellentium turba quam plurima, Timotheus, Titus, Clemens Romanus Barnabas, Ioannes senior, Aristion, Sophistenes, Siluanus, Sosipater, Demophilus, Dorotheus, Philemon, Andronicus, Urbanus, Lucius, Iason, Tertius, Crescens, Linus, Cleus, Paulus, Sergius proconsul Cyprii, Syllas, Egclippus Iudæus, Crispus, Epaphras, Demas, Marcus, Aristarchus, Epaphroditus, Tichicus, Onesimus, Euodius, Papias, Hermas, Iustus, Gaius, atque Melitus Philosophus Asianus, qui librum pro Christo Marco Antonino Vero composuit, alique permulti viri admodum sapientes, Apostolorum discipuli, quorum alter alterius crucem aspiciebat intrepidus, suam mox expectabat in domitus, & ferebat inuictus. Imitati sunt istos & sapientes alij, Theophilus, Dionysius, Penitus Cretensis, Tacianus, Philippus, Musianus, Modestus Philosophus, Gardasenes, Syrus, Dialecticus & Mathematicus, Apollinaris Philosophus. Hi duo, Marco Antonino Vero, libros pro nostra religione dederunt, Victor, Hireneus, Rhodon, Clemens Alexandrinus, Milciades eruditissimus qui, Marco Antonino quoque librum pro religione tradidit Christianorum. Apollonius Philosophus Romanæ urbis senator, & Christi Martyr, qui Commodio Seuero, ut rationem suæ fidei redderet, insigni volumen composuit, Apollonius, Abel, Serapion, Bachilus, Policrates, Heraclitus, Maximus, Candidus, Appion, Sextus, Arauianus, Narcissus, Iudas, Tertullianus doctrinæ fons, qui sub Seuero Imperatore floruit, atque ita contra Iudices exclamauit: Dicimus, & palam dicimus, & vobis torquentibus lacerari, & cruenti vociferamur, Deum colimus per Christum, illum hominem putate per eum, & in eo se cognosci, & colit vult Deus, sententiis vestris gratias agimus, cum damnamur à vobis, à Deo absolui mur. Ammonius Alexandrinus Platonici nobilis, Leonides sapiens Origenis pater, Origenes vir doctrina, viraque apprimè mirabilis;

quem Porphyrius doctrina omnibus sui sæculi anteponebat, qui disputatione Celsi Epicuri contra Christianos octo voluminibus confutauit, torque de doctrina Christiana conscripsit, quot vix ætate longissima quis legere valeat. Hic ut Eusebius inquit, frequentia tormenta, & sæculis omnibus inaudita pro Christi gloria pertulit. Huius illustres discipuli, Phutarchus, Heraclides, Hero, Sereni duo pro Christo martyrio sunt coronati. Sequitur Triphon & Ambrosius, Origenis discipuli, Minutius, Gaius, Berillus, Hyppolitus, Alexander, Iulius Affricanus, Geminus, Theodorus, Cornelius, Cyprianus Afer, martyr, sapientia, & eloquentia præstantissimus, Pontius, Cypriani discipulus, Dionysius, Nouatianus, Marthio, Archelaus, Anatolius, Alexandrinus Philosophus clarus, Victorinus, Pamphilus martyr locupletissimus, eiusque discipulus, Eusebius Cæsariensis magistro similis, Phierius, Lucianus, Phileas, Annotius, Rethnicus, Methodius Philosophus insignis, qui disputationes Porphyrii contra nos egregio volumine confutauit. Iuuenius, Eustathius, Marcellus, Athanasius magnus, Antonius, Basilus, Theodorus Eusebius, Emisenus, Triphylus, Lucifer, Eusebius Sardus, Acatius, Serapion, Hylarius magnus, Victorinus, Titus, Damasus, Apollinaris, Gregorius Bedicus, Pacianus, Phebadius, Dydimus Alexandrinus vir diuinus, & Ambrosius Alexandrinus eius auditor, Opratus Afer, Achilius, Cyrillus, Cuzonis, Epiphanius, Effrem, Syrus, magnus Basilus, Gregoriusque eius frater, Gregorius Nazanzenus cognomine Theologus, Hic inuectiuis Iuliani Imperatoris in Christianos subtiliter, copioseque respondit. Didorus Ambrosius, Euagrius, maximus Philosophus, Ioannes Chrysostomus, Gelasius, Theothinus dexter, Amphilocheus, Sophronius, & alij penè innumerabiles viri doctrina præstantes, qui partim ante Iulianum Imperatorem, partim eo regnante inter gladios, igneque, calamo, lingua, vita, morte, Christi gloriâ defenderunt, inde martyres quasi testes Christianæ gloriæ sunt appellati. Adnumerat Hieronymus inter primos illos Christianos, Iosephum, & Senecam & Philonem, duæ quoque & septuaginta acutorum virorum hæreses, statim post religionis huius exordium, partim superbia hominum, partim astutia dæmonum scaturientes, Christum ipsum, quamuis non rectè, ut alij honorauerunt. Iam verò, si vellem Hieronymos, Ambrosios, Augustinos, Gregorios, aliosque innumerabiles numerare viros, scientia præstantissimos, Græ-



cos, Barbaros, & Latinos, qui post Iulianum apostatam, acutè, ornatèque scribendo, & sanctè agendo, diutissimè pro Christi gloria laborauerunt, arithmetica me computatio frustraretur. Tanto saltem Christiana lex cæteris excellentior est, quanto & plures docti, & doctis aliis semper doctiores, eloquentioresque, & sanctiores fuerunt, qui hanc secuti sunt, quam qui alias susceperunt. Si primùm religionis huius fundamentum Dialectici, vel Oratores, vel Poëtæ iecissèt, suspicaremur plebem astutia hominum fuisse deceptam, si docti omnes semper respuissent, iudicaremus eam forsitan contemnendam. Si principes, vel ab initio, vel paulo post huic legi omnino fauissent, opinaremur, quod de quibusdam religionibus arbitramur, debiliores à potentioribus fuisse coactos, successores deinde, ut sit, legem illam cum lacte suxisse. Diuina igitur prouidentia voluit simplicem religionis suæ veritatem ab hominibus primo rudibus, & simplicibus primam originem ducere, atque à simplicibus, & rudibus astutos, ac doctos feliciter irretiri. Permisit insuper religionem suam, annos plures quam trecentos à potentibus vbique Gentium crudeliter impugnari, quo maior esset doctorum testium, & fidelium numerus, rei que ipsius verior, certior, firmior autoritas, nam in prosperitate fidem præstare facile est, in aduersitate difficile. Exquisitissimis tormentis cruciatus fuisse Christianos, ut nostras historias prætermittam, testatur Cornelius Tacitus, vituperauit autem Christianos, credo ut sæculis suis adularetur, quem etiam in historia mentitum fuisse Tertullianus ostendit quia dixerit, Iudæos caput asini colere. Atque in eadem historia scripserit, Pompeium arcana Iudæorum speculatum, nullum in eis simulachrum reperisse. Igitur ab hoc vno mendacio disce reliqua. Accedit quod Hiereneus testatur, non ob aliud tunc de nostris suspicio exorta est, tanquam impiis & impuris, quam ob Hereticorum quorundam Gnosticorum, præsertim vitam incestam prorsus, & execrabilem, sed non in longum durauit infamia, ubi seipsa cœpit veritas aperire. Lucianus Gentilis, Peregrinum quendam sophistam, atque ut ipse describit, & Christianum non legitimum, tanquam ostentatorem iactatoremque deridens, inquit: Hic præterea mirabilem Christianorum sapientiam didicit à sacerdotibus eorum, atque doctoribus, qui magnum illum virum in Palestina crucifixum adorantes, cæteras religiones spernunt. Ex magistris autem sui lege sibi inuicem fraterna charitate deuinciuntur, sperant se æternos

fore, qua spe ducti miselli vitam hanc, eiusque bona contemnunt, & quotidie cadibus se sponte subiiciunt. Hæc Lucianus. Quem de Peregrino odij causa mentitum esse, testis est Aulus Gellius Peregrini familiaris, nam monstrat hunc Peregrinum virum grauem, constantemque fuisse verum Philosophum. Conquestus est Plinius secundus in Epistola ad Traianum, quod vrbes Christianorum trucidantur, qui nil præter Romanor. legem agant, nisi quod antelucanos hymnos canant Christo cuidam Deo. Ad conferendam verò disciplinam ventent homicidia, furta, adulteria, latrocinia, & his similia. Rescripsit autem Traianus, Christianos inquirendos eundem non esse, oblatos verò puniri oportere. Cuius sententiam ita Tertullianus confutat: O sententiam necessitate confusam, negat inquirendos innocentes, & mandat puniri ut nocentes, parcit, & sauit, dissimulat & animaduertit. Quid temetipsam censura circueuenis? Si damnas, cur non & inquiris? Si non inquiris, cur non & absoluis? Rumorem quoque vanum aduersum Christianorum mores exortum, subtilissimè confutat, monstratque, non de crimine vlllo, sed de nomine sectæ aduersum Christianos actum fuisse. Atque ut aliàs diximus, similiter conquestus est Serenus Granius in Epistola ad Adrianum. Vnde Adrianus scripsit ad Minutium Fundanum proconsulem Asiæ, ne permitteret Christianos innoxios homines perturbari, calumniatoribusque illorum occasionem latrocinandi concedi. Epistolam Adriani integram, Eusebius noster adducit. Mellitus Sardenfis Episc. ad Imper. Antoninū Verum, librū pro nostra religione scripsit, in quo refert edictū Antonini ad Asiaticos reprehēdentis eos, quod cultum immortalis Dei, quē Christiani colant, perturbent, usque ad mortem Christianos persequeutes. Addit in eodem edicto, plurimos ex prouinciis iudices super iis ad patrē suū scripsisse olim, atque nuper ad se quā plurimos, denique statuere se quod & Pater statuerat, hoc est, ne quis Christianos ob hoc dūtaxat quod Christiani sint, insequatur, nisi fortè arguatur aliquid aduersum Rom. regni statum moliri. Arbitror Antoninū ob hoc etiā timuisse Christum, quod frater eius M. Aurel. scripsit, cū exercitus eius apud Germanos sit periclitaretur, orationibus quorundam militum Christianorum à Deo impetrasse, subito contra omnium spes largissimos imbres, quibus & suorum sedata sitis, & hostes ob fulminum impetum effugati, atque ob insignis facti miraculum eam legionē mutato nomine fulmineā appellauit.

Hæc scribit Apollinaris atque Tertullianus. Addit Tertullianus Marci Imperatoris extare Epistolas, quibus apertius de iis indicetur, Eusebius adiungit, miraculum hoc ab historicis quoque Gentilium fuisse relaturn, sed quod Christianorum orationibus factum fuerit prætermissum. Calamitas igitur Christianorum vel ex imperito vulgo, vel ex impiis principibus maxime contingebat, quorum principes fuit Nero. Suetonius afflictos fuisse à Nerone Christianos narrat, ob hoc duntaxat quod nouam religionem introducerent, & ut ipse ait, maleficam, id est, magicam, miracula enim multi videntes, demonibus, quod Dei erat, attribuebant. Sed infinita veritas atque bonitas, veritatem suam ex mendaciis hostium declarauit, & mala hominum conuertit in bonum, permittit quoque vsque ad mundi finem sanctorum suorum cœtum, vel ab Hæreticis vel ab hostibus agitari. Non cogit ad salutem Deus homines, quos ab initio liberos procreauit, sed assiduus inspirationibus singulos allicit, quod si qui ad eum accesserint, hos durat laboribus, exercet aduersitatibus, & velut igne aurum, sic animum probat difficultate, qui si vsque ad finem persenerauerint, tanquam igne aurum, sic tandem diuino lumine feliciter coruscabit.

*Quod sacra Christianorum litera vitata non sint.*

#### C A P V T XXXVI.

**M**Ahumeres primos illos Christianos valdè probat, confiteturque doctrinam Christianam, id est, Euangelistarum, Apostolorumque libros ab ipso Deo auctoritatem mirabilem accepisse, ac Testamento veteri anteponit. Sed hos libros ait post Apostolos à Christianis fuisse corruptos, totumque id machinatus est homo tam callidus quàm bellicosus, quoniam asserit se Christo apertissimis verbis fuisse promissum, qui in Euangelio dixit. Prædicovobis post me venturum esse quendam Dei nuntium nomine Mahumetem, illum videlicet spiritus veritatis, qui docebit vos omnia. Principio machinatio huiusmodi, etsi apud brutos, imbellesque homines (tales enim Mahumetenses sunt) tam vi quam dolo locum habuit, tamen apud magnos, prudentesque viros, nimium ridicula est. Nam ante Mahumetis aduentum nulla causa erat, ob quam Mahumetis nomen potius, quàm Pilati, vel Iudæ, vel Antichristi, vel etiam Diaboli Euangelio subtrahe-

re debuissent. Post autem Mahumetis aduentum, ipse Mahumeres potius cultus fuisset ab iis qui Euangelium colebant, quàm nomen eius ablatum. Sed ipse falso nomen suum subiungi voluit, vbi apud Ioannem Christus Spiritum sanctum promittit, cuius infusio Apostolis ipsius non multo post Iesum ad resurrectionem promittebatur, non post autem annos sexcentos Arabibus. Promissus est autem non homo, sed incorporalis spiritus atque veritas. Et cunctis Christianorum ducibus consentientibus, præsertim illis qui de promissione verbis literisque testes erant, quinquagesimo post resurrectionem die aspirauit feliciter, & illuxit.

Deinde quonam pacto verisimile est Christianos omnes volumina illa, quæ tanquam cœlitis data summopere eo tempore venerabantur, ausos fuisse mutare. Si qui autem impij ausi sunt, tanquam pauci imprudentesque, à pluribus prudentibus conuicti statim sunt, neque obtinuerunt. Rursus si sacra volumina passim apud omnes Gentes deprauata fuerunt, multi subito animaduertunt, si alicubi solum cætera exemplaria reclamauerunt. Sed omnino impossibile est libros diuersis linguis, locis, temporibus, editos, tam latè subito sparsos, tam frequentatos, prorsus adulterare. Cur Hæreticorum sectæ diuersæ diuersas expositiones potius quàm textus varios adducebant. Audiuius à pluribus Æthiopibus, & illis quidem literatis, similia omnino apud illos sacra volumina nostra in Barbaris literis, atque apud Græcos, Latinosque existere. Scribit Richoldus Ebron Theologus, se in Asia omnino eosdem textus apud Iacobianos, Nestorianosque, Christianos hæreticos, atque apud nos legisse. Proinde ipsum testamentum vetus rectum à Christianis seruari patet. quia cum translationes multas habeamus & ante Christum, & post Christum editas, partim liberiores, vtpote quæ à Iudæis ipsis factæ fuerint, partim ad verbum obseruatas, maxime à Hieronymo, vbique tamen præcipua, imò omnia Iesu Christi mysteria ferme similiter reperiuntur. Et translatio Hieronymi ad verbum facta ab omnibus Iudæis tanquam vera admissa est, & ipsa quidem ad Iesum confirmandum sufficientissima.

Verissima etiam illa, quæ à duobus & septuaginta Iudæis ante Christum edita est, & apud Græcos, Latinosque, & Barbaros Christianos similis extat, cuius prima illa exemplaria, & Hebraica & Græca Tertullianus etiam temporibus suis apud

Serapion in Prolemæi bibliothecis asserit extitisse. Neque ab Apostolis eorumque successoribus translatio huiusmodi olim vitata fuit, tum quia difficile erat longè diuulgatos, & ita seruatos codices vitare, tum quia omnino stultum est credere, tot tantosque viros testimonia Iudæorum adulterasse ad Iesum occisum viuificandum, seipsos verò perdendos. Denique frequentes obiectiones & calumniæ, insidiæque vndique Christianis illatæ, alterationesque sæpius repetitæ admonuerunt Christianos, rectum scripturarum seruare tenorem. Quod si quis vnquam à Mahumetensibus audiuerit aliquid ad Mahumetem pertinens testamento veteri fuisse subtractum, respondeat nullo vnquam pacto Iudæos cum Christianis ad hoc agendum conuenire potuisse. Testamentum autem vetus neque apud Iudæos, neque apud Christianos Mahumetensibus quicquam fauet. Sed vt ad nouum redeam Testamentum, hoc ipsum esse syncerum, constat ex Apostolorum discipulis, discipulorumque successoribus, qui & operibus, & scriptis de textus synceritate testimonia perhibent. Constat etiam ex antiquissimis Conciliis sæpè constitutis, vbi ad decem doctissimorum virorum millibus, qui circumferebantur codices ex amussim examinabantur, vnde nihil vnquam admissum est ab Ecclesia absque examine seuerissimo. Garrit præterea Mahumetes successores Apostolorum parrem illâ Euangelii addidisse, puta, quod homo ille Iesus summus esset Deus, & verè mortuus. Primò quidē hoc in scriptis Apostolorum, Euangelistarumque tam sæpè, & eo ordine, eaque similitudine connexum est, vt nullo modo esse queat adiunctum. Deinde nihil aut difficilius persuadetur, quàm quod homo sit summus Deus, aut dissonantius proferri videtur, quàm quod verus Deus sit, & verè mortuus. Nunquid igitur hoc adiunxerunt, vt facilius quod prædicabatur, persuaderent? nihil fermè, hoc scilicet excepto, ab his dicebatur, quod aut perfidos Iudæos turbaret, qui Dei, hominisque coniunctionem illam non capiebant, aut Romanos offenderet rerum dominos, qui prohibuerant quenquam absque senatus autoritate Deum cognominari, multosque volebant deos, neque illos quidem summos, Iesum verò & summum & solum, Christiani absque senatus approbatione vocabant, atque sciebant ob hoc duntaxat se arduam omnino prouinciam ingressos, apud Iudæos Gentilesque valdè periclitari. Quamobrem

quod additum Mahumetes inquit, Minimè omnium videtur adiunctum, sed virtute nimium simpliciterque ab initio positum. At ipse videtur omnino profunda Christianorum mysteria, quamuis eæ legerit, nequaquam intellexisse. Vbi enim Iesum legit esse Dei filium atque Deum, putat Christianos, deos illic duos inducere, patrem videlicet atque filium. Atque hunc in Alcorano binarium deorum numerum detestatur, quod etiam à Christianis est alienum, Deum vnum Patrem, Filium, Spiritumque putantibus. Ipse autem licet nesciat quomodo, tamen miraculis Christi commotus, ipsum Dei filium Deumque fatetur, vbi cum nominat Dei statum, spiritumque, propriam Dei animam, virtutem Dei, verbum Dei, afflante Deo, ex Virgine perpetua natum. Præterea, quoties incidit in Trinitatis nomen, homo tantæ rei prorsus ignarus, Christianos falsò nimium, & ineptè calumniatur, quod tres deos adorent, nesciens proprietates diuinarum distinguere personarum, ac simul seruare diuinæ substantiæ vnitatem, ipse tamen veritate coactus, Deum vbique in plurali numero de se loquentem inducit, quod & Moses obseruauerat, qui in Genesi Deo, modo singulare nomen verbumque, modo plurale attribuit, certè vnitatem substantiæ in Deo seruans simul ac numerum personarum. Dixit Deus: faciamus hominem ad imaginem, & similitudinem nostram, atque alia multa etiam clariora. Sed audi quomodo loquentem Mahumetes Deum faciat Mariæ omnium mulierum optimæ, & à nullo vnquam tactæ. Nostram animam insufflauimus, & illam, filiumque suum manifestum miraculum posuimus. Item, Cum multos nuntios miserimus, misimus tandem Christum Mariæ filium, cuius sectatores fideles mansueto, & constanti corde fuerunt. Ei nos Euangelium dedimus, vt per ipsum homines Dei amorem gratiamque assequerentur. Rursus, Christo multam contulimus bonitatem, eumque doctorem filiis Israël præposuimus. Item, Christum ad diuinæ legis cōplementum misimus, Christum Mariamque miraculum fecimus, optimumque in paradiso locum dedimus habitandum, ac sæpè similiter. Quamobrem etsi arrogans fuisse negari non potest, non minus ignorantia quam arrogantia videtur esse culpandus. Multum enim suam arrogantiam temperauit, cum dixit in Alcorano, se miracula neque fecisse, neque facturum, plurima ignorare, esse purum hominem, quamuis nūcium à Deo inspiratū, neque se dare posse veniā peccatorū.

Vetuit se inuocari, & adorari, confessus est insuper, esse in libris suis nonnulla, de quorum veritate dubitari possit. Ex quo apparet ipsum veritatis spiritum non fuisse, multum quoque Alcorani auctoritati detraxit, cum inquit. Quicumq; Deum vnum adorans honestè vixerit, siue Iudæus, siue Christianus, siue Saracenus sit, misericordiam, salutemque à Deo consequitur. Auctoritatem verò Euangelij manifestissime confitetur, cum lumen, directionem, perfectionemque cognominat. Vnde & Mahumetis sectatores, eo concedente, fatentur nouo testamento accedente, veteris testamenti ritus magna ex parte merito cessauisse. Testamentum vetus nouumque eo pacto intelligunt, quo exposuit, mandauitque Mahumetes, quod se vtriusque verissimum interpretem esse asseuerauit, creationem mundi. Adde progeniem, historiamque Hebraicam probant, & Christi doctrinam. Expectant Anti-christum fore pessimum hominem, quem à Christo occisum iri putant. Item, corporum resurrectionem, vltimum iudicium, supplicia & præmia sempiterna, Christum proximum Deo sedentem collocant. Mahumetenses Christi oratione, qua & nos, quotidiana vtuntur ad Deum. Pater noster, & reliqua. Sed vbi nos dicimus, Et ne nos inducas, ipsi dicunt, Deus fuit, & Deus erit, Mahumetes missus à Deo.

*Causa erroris Iudeorum, Mahumetensium, Gentilium.*

## C A P V T XXXVII.

**Q**Varitur igitur, quænam causa sit, quæ Iudæos adhuc multos in perfidia detinet? Prophetarum, Christianorumq; mysteriorum diuina profunditas, & quia diuina, ideo humana intelligentia non penetrabilis atque è conuerso. Rursus ingenium mercenariorum, miserabiliumque Iudæorum incultum prorsus, &

perinax. Avaritia tum eius quod suum est seruandi, tum faciendi sceleris inextinguibilis, naturalis suorum amor, innatum odium Christianorum. Quid autem post beatum Gregorium Barbaros plurimos traxit in hæresim? Difficillima diuinarum literarum interpretatio, Barbarorum genus nimium imperitum, violenta Mahumetis regis Arabum manus, septemque regum ipsi ex eius familia per ordinem succedentium leges. Accessit & licentia largior. Verum quid Gentiles olim à vera Hebræorum religione detorsit? Mandata ambitiosorum principum, ætas parum erudita, profusa licentia, fallacia dæmonum malignorum. Auxerunt errorem deinde blandimenta, adulationesque Poëtarum. Detinet autem omnes facile, in quouis errore mos patrius, & diuturna consuetudo. Non potest consuetudo in errore Christianos legitimos detinere, qui à principio religionem susceperunt ab errore semotam.

Nihil autem opus est, vt longa disputatione confirmem, quæ Christus, eiusque discipuli credenda, speranda, agenda proposuerunt. Satis enim veritatis, authoritatisque habent, cum à diuina veritate procedere iam probauerimus. Maximam igitur Christianorum institutionum, promissionumq; rationem assignauerimus, cum Pythagoricorum ritu dixerimus. Ille dixit. Meminerimus autem turbari non oportere, si horum minus capaces possimus esse. maximum enim diuinitatis signum hoc esse censeo. Nempe si ea mens nostra penitus comprehendit, minora sunt mente, si talia sunt, diuina esse non possunt, si enim diuina sunt, capacitatem omnem humane mentis excedunt. Fides, vt vult Aristoteles, est scientiæ fundamentum, fide sola, vt Platonici probant, ad Deum accedimus. Credidi, inquit David, & propterea sum loquutus. Credentes igitur, propinquantescq; veritatis, bonitatisque fonti, sapientem beatamque vitam hauriemus.

F I N I S.



# MARSILII FICINI FLORENTINI.

IN PLATONICAM THEOLOGIAM

de Animorum immortalitate, ad Laurentium Medicem,

P R O O E M I V M.



**P**LATO, Philosophorum Pater (Magnanime Laurenti, cum intelligeret quemadmodum se habet visus ad Solis lumen, ita se habere mentes omnes

ad Deum, ideoque eas nihil vnquam sine Dei lumine posse cognoscere: merito iustum piūque censuit, vt mens humana sicut à Deo habet omnia, sic ad Deum omnia referat. Igitur siue circa mores philosophemur, animum esse purgandum, vt tandem factus serenior, diuinum percipiat lumen, Deumque colat. Siue rerum causas perscrutemur, causas esse quæ rentas, vt ipsam denique causarum causam inueniamus, inuentamque veneremur. Neque solum ad id pietatis officium Plato noster cæteros adhortatur, verum etiam ipse maxime præstat. Quo factum est, vt & ipse sine controuersia diuinus & doctrina eius apud omnes Gentes Theologia nuncuparetur, cum nihil vsquam siue morale, siue dialecticum, aut Mathematicum, aut Physicum tractet, quin mox ad contemplationem cultumque Dei summa cum pietate reducat. Quoniam verò animum esse tanquam speculum arbitrat, in quo facile diuini vultus imago reluceat: idcirco dum per vestigia singula Deum ipsum diligenter indagat, in animi speciem vbique diuertit, intelligens oraculum illud (nosce te ipsum) id potissimum admonere, vt quicunq; Deum oprat agnoscere, se ipsum ante cognoscat. Quamobrem quisquis Platonica (quæ iam diu omnia Latina feci) diligentissime legerit, consequetur quidem cuncta, sed duo hæc ex omnibus potissima, & piū cognitī Dei cultum, & animerum diuinitatem, in quibus vniuersa consistit rerum perce-

prio, & omnis institutio vitæ, totaque felicitas, præsertim cum Plato de his ita sentiat, vt Aurelius Augustinus cum tanquam Christianæ veritati omnium proximum, ex omni Philosophorum numero elegerit imitandum, asseritque Platonicos mutatis paucis Christianos fore. Ego verò cum iam pridem Aureliana autoritate fretus, summaque in genus humanum charitate adductus, Platonis ipsius simulachrum quoddam Christianæ veritati simillimum exprimere statuissem, ad illa quæ dixi, duo præcæteris diligenter incubui, ideoque vniuersum opus Platonice Theologiam de immortalitate animorum inscribendum esse censui. In quo quidem componendo id præcipue consilium fuit, vt in ipsa creatæ mentis diuinitate, ceu speculo rerum omnium medio, creatoris ipsius tum opera speculemur, tum mentem contemplemur atque colamus. Reor autem (nec vana fides) hoc providentia diuina decretum, vt & peruersa multorum ingenia, quæ soli diuinæ legis authoritati haud facile cedunt, Platonice saltem rationibus religioni admodum suffragantibus acquiescant: & quicunque Philosophiæ studium impiè nimium à sancta religione seiungunt, agnoscant aliquando se non aliter aberrare, quàm si quis vel amore sapientiæ à sapientiæ ipsius honore, vel in intelligentiam veram à recta voluntate disunxerit. Denique, vt qui ea solum cogitant, quæ circa corpora sentiuntur, rerumque ipsarum umbras rebus veris infelicitè præferunt, Platonice tandem ratione communiti, & præter sensum sublimia contemplentur, & res ipsas umbris feliciter anteponant. Hoc in primis omnipotens Deus iubet. Hoc omnino humana res postulat. Hoc cœlestis

Plato quondam suis facile, Deo aspirante, peregit. Hoc tandem & ipsi nostris Platonem quidem imitari, sed diuina duntaxat ope confisi, operoso hoc opere moliti sumus. Sed utinam tanta veritate id perfece-  
rimus, quanta veritatis diuinæ veneratione tractauimus, adeo ut non aliter quoduis apud nos probatum esse velimus, quam diuina lex comprobet. Opus autem ipsum tibi Magnanime Laurenti iudicaui præ cæteris dedicandum, non ut Philosophica tibi aperiam, de quibus iamdiu ita disputas,

ut non tam tibi, qui hæc iam videris miro quodam ingenio consequutus. quam cæteris prisorum arcana videar editurus, sed quod nos beneficio tuo id odium quo facilius philosophari possemus, consecuti sumus, & Plato noster hæc nostro erga te officio gratulaturus admodum videatur, quoniam quod ille in magnis quondam viris potissimum exoptat, ipse Philosophiam vnâ cum summa in rebus publicis autoritate coniunxeris.



# THEOLOGICÆ PLATONICÆ,

DE IMMORTALITATE ANIMORVM.

MARSILIO FICINO FLORENT. AVTHORE.

LIBER PRIMVS.

*Si Animus non esset immortalis, nullum animal esset infelicius homine.*

CAPVT PRIMVM.



QVOD genus humanum, propter inquietudinem animi imbecillitatemque corporis, & rerum omnium indigentiam, duriorem quàm bestię vitam agat in terris, si terminum viuendi natura illi eundem penitus, atque cæteris animantibus tribuisset, nullum animal esset infelicius homine.

Quoniam verò fieri nequit, ut homo, qui Dei cultu propius cunctis mortalibus accedit ad Deum, beatitudinis authorem, omnino sit omnium infelicissimus. Solum autem post mortem corporis, beator effici potest, necessarium esse videtur, animis nostris ab hoc carcere discedentibus lucem aliquam superesse. At, si lucem suam humanæ mentes nequaquam respiciunt, clausæ tenebris & carcere cæco, vnde sæpenumero cogimur propriæ diuinitati diffidere. Soluamus, obsecro, cœlestes animi cœle-

stis patriæ cupidi; soluamus quamprimum vincula compedum terrenarum, ut alis sublatis Platonicis, æt Deo duce, in sedem ætheream liberius peruolemus, vbi statim nostri generis excellentiam feliciter contemplabimur.

Cæterum, ut euidenter appareat quæ ratione potissimum mentes hominum mortalia claustra resolvere, immortalitatem suam cernere, beatitudinem attingere valeant, conabimur sequenti disputatione pro viribus demonstrare, præter pigram hanc molem corporum, quæ Democritiorum, Cyrenaicorum, Epicureorum consideratio finiebatur, esse efficacem qualitatem aliquam atque virtutem, ad quem Stoicorum Cynicorumque inuestigatio sese contulit.

Supra qualitatem verò quæ cum materiæ dimensione diuiditur, & mutatur omnino, formam quandam præstantiorem existere, quæ licet mutetur quodammodo, diuisionem tamen in corpore non admittit. In ea forma rationalis

animæ sedem veteres Theologi posuere. Hucusque Heraclius, Marcus Varro, Marcusque Manilius ascenderunt.

Super animam rationalem extare mentem angelicam, non indiuiduam modo, sed etiam immutabilem, in qua videntur Anaxagoras & Hermotimus quicuisque. Huius denique mentis oculo, qui cupit veritatis lumen, & capit, Solem ipsum præesse diuinum, in quem Plato noster purgatam mentis aciem dirigere iussit, docuit, & contendit. Proinde, cum ascenderimus, hos quinque rerum omnium gradus, corporis videlicet, molem, qualitatem, animam, Angelum, Deum, inuicem comparabimus. Quoniam autem ipsum rationalis animæ genus inter gradus huiusmodi medium obtinens, vinculum naturæ totius apparet, regit qualitates & corpora, Angelo se iungit & Deo, ostendemus id esse prorsus indissolubile, dum gradus naturæ connectit, præstantissimum, dum mundi machinæ præsidet, beatissimum, dum se diuinis insinuat. Ita verò nostrum animum se habere, atque esse talem, rationibus primò communibus, secundò argumentationibus propriis, tertio signis, quarto solutionibus quæstionum assue-  
rabimus.

C O R P V S N A T V R A S V A  
*nihil agit.*

## C A P V T II.

**Q**uoniam corpus apud Platonem ex materia quadam constat, & quantitate, atque ad materiam extendi & affici pertinet solum, & ipsa extensio affectioque passionis quædam sunt. Quantitas autem aut nihil est aliud quàm extensio ipsa materiæ, aut si quid aliud est, est tamen res quædam talis, vt & diuisioni subiecta sit semper, & materiam sequentibus omnibus subiiciat passionibus, & nihil effundat in materiam alienam, consequens est vt corpus ipsum quatenus corpus, agat quidem nihil, sed soli passioni subiiciatur. Idem quoque ex eo patet, quod ad actionis cuiusque naturalis perfectionem tria potissimum exiguntur.

Primum, vt agens in seipso potentissimum sit. Secundum, vt ad motum promptissimum. Tertium, vt facile penetret patiens, atque ipsum patiens agenti proximè vniantur. His omnibus moles corporis impedimento esse videtur. Primum,

quia cum in partes plurimas porrigatur, virtus agens in ea dispersa est, & à seipsa distans & distracta quamplurimum. Virtus verò, sicut vnione augetur, ita dispersione minuitur. Idcirco siccitas vim, tum caloris, tum frigoris auget, quia vnit, humiditas verò debilitat, quia dispergit. Deinde, quo maius corpus est, eo secundum seipsum pigrius est, ineptiusque ad motum. Igitur, quanto magis augetur corpus, tanto magis retardat motum, ac differt diutius actionem. Nempe vis leuitatis sursum tollit scintillam velocius, quàm flammam. Vis grauitatis celerius deorùm trahit lignum si acutum fuerit, quàm si larum. Postremò, cum corpus quodlibet suum impleat locum, ac locus vnus duobus corporibus nequaquam sufficiat, commigrare in vnum corpora nequeunt, ac etiam soliditate densitateque sua penetrationem mutuam prohibent. Itaque distantia partium virtutem agendi debilitat, molis amplitudo retardat motum, crassitudo penetrationem corporum impedit. Et quod deterius est, si distractas corporis alicuius partes natura coarctet ad augendam ex vnione virtutem, interim crassius corpus ipsum euadit, & ineptius ad ingressum. Ac firarè faciat ipsum ad acquirendam motus penetrationisque facilitatem, statim virtus agendi dispergitur. Quapropter cum tres esse debeant perfectæ actionis conditiones, corpus aut habet tres alias illis aduersas, aut vnā illarum accipiendo, non accipit aliam. Oporteret quippè breuitatem simul habere leuitatem, & raritatem. Quæ quidem tria ad incorporealem quendam habitum corpus ipsum reducunt, vt omnis agendi virtus sit ad naturam incorpoream referenda. Nonne ex ipsa quantitate multitudo partium est tum in agente, tum in patiente, tum in medio horum spatio? At propter primum illud remissior actio est, quæ aliter esset admodum vehementior. Propter secundum paulatim transigitur, quod subito impleretur. Propter tertium sero peragitur, quod cito consummaretur.

Quapropter ad vim quandam incorporealem pertinere videtur vehemens, citra, & subita operatio. Idem nobis ostendit ignis, qui sua tenuitate præ cæteris elementis naturæ spiritali appropinquat, est autem efficacissimus omnium, momento enim penè facit, quod alia corpora longo tempore, admixtione in se aliorum non patitur, qualem cætera corpora

patiuntur. Scintilla ignis, si datur materia, totum ferme occupabit orbem. Reliqua elementa non tantum, non tam cito, non tam vehementer seipsa diffundunt. Hic autem, quia tenuis est, fit potens. Quia potens fit, latus euadit potius quam conuerso. Fit etiam luminis quod incorporeale dicitur, capax, cuius actio fit momento, & modicus aer in vasis summo, vas in aquae summo sustinet, etiamsi multorum lapidum pondere oneretur. In fulgure quoque & bombarda planè perspicitur, quantum ignis aerque valeant. Denique cœlum, quantuminùs crassum est quàm cœtera, tanto luce, motu, effectu est mirabilius. Si igitur corpus, quanto propinquius fit incorporeis, tanto ad agendum fit efficacius, quis non videat agendi vim in natura incorporali consistere? Quod hinc etiam intueri licet, quod sicut primum in natura, qui Deus est, agit in omnia, nihil patitur, ita vltimum, quod est materia corporalis, pati oportet ab omnibus, agere verò per se in aliud minimè, cum nihil sit infra ipsam, quod ab ipsa patiaur.

Ac, si in summa infinitaque vnitatem infinita est agendi virtus, in multitudine infinita nulla est virtus agendi, sed infinita patiendi natura. Infinitam multitudinem corpus esse Pythagorici arbitrantur, quoniam absque fine diuiditur. Si quid igitur agere corpora videantur, non ex ipsa sui mole, vt Democriti, Cyrenaici, Epicuri putauerunt, sed ex aliqua vi & qualitate illis insita operantur. Nec iniuria. Vbi enim contrariorum oritur oppositio, ibi naturalium corporum editur actio. Oppositio illa nascitur in genere qualitatum. Adde, quod materia sub omnibus his corporibus vna est, vna quoque interminata dimensio. Si igitur actio à materia proueniret, aut dimensione, vna esset omnium operatio. Nunc verò cum diuersae appareant diuersorum corporum actiones, non per materiam dimensionemve vnā, sed per varias ipsorum qualitates quoniam operantur. Merito, quia ratione sunt, eadem agunt. Sunt autem non per molem in specie hac aut illa, sed per hanc formam aut illam, per formam igitur operantur. Præsertim, cum agens patienti propinquet per formæ qualitates, prius quàm per terminos quantitatis. Ac per formæ vim transeat in materiam alienam, potius quàm per quantitatis dimensionem, & singula materiæ puncta non dimensione attingat, sed qualitate. Sic per frigiditatem aqua frigefacit. Ignis per

caliditatem calefacit potius quàm per molem. Ignis enim non quia amplissimus, sed quia feruentissimus vrit. Ac si totius eius calor, quasi ad punctum sui redigatur, propter maximam vñionem potentissimus erit ad comburendum. Sic beneficio qualitatis, præsertim in angustum coactè prouenit actio. Hinc fit vt causæ naturales effectus producant suos qualitate similes causarum, potius quàm æquales quantitate. Ac si contingat interdum æquales prouenire, necesse est prius apparuisse per similes, quasi per qualitates actio peragatur, postquam necessariò in eis atque per eas effectus causas referunt. Ideo filij statim natpenè omnes complexione & figura parentum similes sunt, æquales autem magnitudine rarius & posterius. Sed quis hæc non viderit? Neque enim si corpori magno propinquas, magnus efficeris, at, si calido, certè calefcis, neque vllò sensu percipis quantitatem, nisi prius sensum qualitas mouerit. Quis enim quam magnus sit paties iudicabit, nisi hanc ipsam magnitudinem color lumenque ad oculum vsq; perduxerit? Ac, iudicium quantitatis magis priusq; propter distantiam perditur, quàm luminis & coloris, quasi sit efficacia motionis in qualitate. Quod hinc perspicuè confirmatur, quod res quælibet appetitum ratione boni (quæ qualitas est) semper mouet, non ratione magni aut multi. Alioquin semper quæ maiora plurave sunt eligeremus. Nunc verò in iis quæ mala putamus, minora pauciorave eligimus. Qualitas autem ideo corpus esse non potest, quia duo corpora eodem in loco sine mutua offensione omnino conflare non possunt, qualitates verò plures in eodè pariter confunduntur. Siquidem in mellis materia color flauus, dulcedo & odor, tres qualitates vbiq; simul reperiuntur. Quæque enim guttula mellis, flaua, dulcis, naribusque suavis est. Accedit ad hæc, quod omne corpus natura sua in longum, latum & profundum extenditur. Qualitas autem non sua natura videtur extendi. Nulla enim esset qualitas alicubi non-extensa. Insunt tamen puncto, vnitati, numero, harmoniæ, virtutibus, qualitates aliquæ non extensæ. Qualitas igitur non est corpus, præsertim quia si naturalis ipsi esset extensio, quanto latior fieret, tanto fieret & robustior. Fit autem dispersione debilior. Igitur qualitas per se quodammodo indiuidua, in corporis dimensione diuiditur. Siquidem, de ratione quantitatis solum fit diuisio, cum diuisio ex vno semper deducatur in plura. Seruat tamen qualitas, etiam in corpore quanti-



nam indiuisibilis naturæ proprietatem.

Nam, ut Platonici arbitrantur, albedo, quæ est in parte quavis corporis albi, non propriè dicenda est pars albedinis illius, quæ est in corpore toto, imò partis albedo dici debet, potius quàm pars albedinis. Nempè, si album corpus plures in partes diuiseris, in singulis partibus eadem restabit albedinis ratio. Vis quoque & actio similis, non tamen amplitudo eadem vel æqualis. Ideo non ad qualitatem propriè, sed ad corpus ratione quantitatis diuisio pertinet. Ad qualitatem præcipuè in exiguum radactam pertinet actio. Hæc utique corpus non est, ac maximè cum ad punctum colligitur, fit incorporea. Quo fit, ut incorporalis naturæ virtute, non ex materia corporum proueniat operatio.

*Supra formam diuisam in corpore, extat forma indiuidua, id est anima.*

### C A P V T III.

**I**Am igitur à corpore ad qualitatem ascendimus. qualitatem verò more Platonico omnem formam diuinam in corpore appellamus. Sed nunquid in ea Stoicorum Cynicorumque more sistendus est gradus? Minimè. qualitas forma quædam est. Formæ natura simplex, efficax, agilis ad agendum. Vnde forma à Physicis actus sæpè vocatur. Natura huiusmodi in materiæ inficitur gremio, ex simplici diuisibilis impuraque, ex actiua passioni obnoxia, ex agili fit inepta. Ideo neque mera forma hæc est, neque vera, neque perfecta. Non potest hæc prima forma esse, si mera non est. Vnumquodque enim prius sit saltem secundum genus oportet quam inquinetur. Item non potest esse forma prima, si non est vera. Vnde enim mens hanc formam arguit non omnino veram esse? nisi inde ubi ipsa cernit aliquam veriore, ad quam comparata hæc deficit, & falsa quodammodo esse conuincitur. Vbinam mens veram ipsam videt formam? profecto aut extra se aut intus eam conspicit. Si extra se prospicit: certè alicubi in natura est forma quædam vera, superior qualitate. Si in seipsa mens intuetur eam, non deest menti vera forma: non ergo deest mundo.

Præterea, validior quidem veritas est quàm falsum, cum veritas esse sine falso possit, falsum absque veritate consistere nequeat. Non enim falsum quic-

quam dicitur, nisi saltem verum sit illud esse falsum. Neque valet quicquam, nisi verum sit ipsum valere, neque verè intelligitur esse falsum, nisi per veritatem. Neque falsum dicitur, nisi quod fallit, neque fallit nisi per imaginem veritatis. Si igitur veritas est falso validior & forma minus, vera videlicet qualitas, in ordine rerum est aliquid, multo magis vera forma in rerum ordine reperitur. Præsertim cum quanto intellectus præstantior veriorque est quàm sensus, tanto intelligibilis forma præstantior veriorque quam forma sensibilis esse debeat. Per hæc patuit qualitatem non posse esse primam formam, tum quia mera non est, tum quia non vera. Constat idem quoque quoniam non perfecta. Primum enim in quolibet genere, totius generis est principium. Quod est aliorum principium, sequentia continet. Nihil igitur sui generis deest illi quod est in suo genere primum. Quemadmodum Sol si inter lucida primum est, nullo caret luminis gradu. Cætera sub eo lucida, ut sydera atque elementa, non totam capiunt luminis plenitudinem. Quoniam igitur prima forma omnes formarum perfectiones complectitur, atque idcirco imperfecta esse nequit; rectè concluditur, formam illam quæ dicitur imperfecta, primam esse non posse. Adde, quod qualitas quia ita inhæret materiæ, ut cum ea diuidatur, materialis (ut ita dixerim) prorsus euadit. Ac si à materia separetur, corrumpitur. Quocirca seipsam non sustinet, sed à materia tanquam subiecto sustinetur. Quod verò seipsum sustinere non potest, multo minus ex seipso subsistere. Itaque cum in alio iaceat, ab alio certè dependet. Oritur enim qualitas aliquando, cum mutetur & pereat. Nihil autem aliquando oritur à seipso.

Quod enim genito præstat initium, generatum præcedat oportet. Nihil autem seipsum præcedit. qualitas igitur cum ab alio oriatur, & nihil oriri nisi à superiori aliquo valeat, non potest esse naturæ principium. Verum vnde trahit originem? Nunquid à materia? Nequaquam: quoniam cum materia commune & informe subiectum sit, atque idcirco (quantum in se est) semper & vbique ad omnes formas æquè se habeat. Vndenam id prouenit, ut aliàs & alibi aliis formis ornetur, nisi ab aliquo superiore, quod eam & alibi & alias aliter afficit? Præterea si materia sibiipsi datura sit formam, quærimus vtrum ipsa virtute sua prius habeat eam

formam, quàm sibi sit præbitura, aut non habeat? Si non habet, neque concipere quidem potest, sin habet, non est utique materia prima, sed aliquid ex materia & formæ virtute compositum. Atque de hac ipsa virtute similiter inquiremus, nunquid eam habeat à seipsa, an ab alio? Quod si habet ab alio, ab alio quoque habet formam. Sin à se, nunquid hanc similiter habet per aliam virtutem sibi itidem propriam (atque ita in infinitum progrediemur) an potius virtutem illam non per aliam possidet virtutem, sed per essentiam? Si ita est, essentia materiæ idem erit ac virtus siue substantia effectiua formarum, & fons erit formarum potius quàm subiectum, imò erit forma potius quàm materia, & forma omnium præstantissima, forma omnis diuisionis impatiens, neque fluctuabit (ut nunc) labentium varietate formarum, sed per essentiam sempiternam formis erit prædita sempiternis. Ex his colligitur materiam non habere suapte natura vim ullam formarum procreatricem, quia formare seipsum non potest informe subiectum, cum nihil omnino agere queat, siquidem actio à forma provenit, à qua provenit esse. Ac si materia quæ subest arti, quamvis forma non careat, non tamen à seipsa, sed ab artis forma ad formam ducitur artificij, certè materia quæ naturæ subiicitur, cum sit informis, non à seipsa, sed à natura formæ ad formam ducitur naturalem.

Vnde igitur erit qualitas? forsitan ab alia qualitate, puta quod ignis alius alium generet? Neque id quidem. Nam qualitas quia esse nequit absque fomento materiæ, ideo materiæ suæ non dominatur, multo minus dominabitur alienæ. Non igitur potest corporis alicuius qualitas corpus aliud sola sua potestate formare. Corpus quidem naturale, per ipsam molem, quæ soli passioni subiicitur, agit nihil, per qualitatem verò non agit sufficienter. Hæc enim quandoquidem non habet, sufficientiam existendi, non præstat corpori sufficientiam existendi, non præstat corpori sufficientiam operandi. Profectò quia ignis prius genitus fuit ab aliquo, quàm ipse aliud generaret, prius sibi conuenit ut sit effectus quàm ut efficiens. Effectui conditio hæc innata est, ut pendeat aliunde. Quapropter quoties ignis aliquid operatur, agit tanquam superioris causæ instrumentum. Si enim ignis hic aut ille esset causa generandi, ignis prima, id est, summa, cum à causa alicuius generis prima, genus producat vniuersum, totum ubique ac semper

ignem efficeret. Itaque faceret cum seipsum, tum ignem quemlibet qui ante ipsum fuit, & qui post erit. Cum igitur ignis hic aut ille non sit prima generationis huiusmodi causa, quærimus cuius sit causæ instrumentum. Nunquid ignis alterius? Nequaquam.

Primò, quia æqua est illa causa, non superior. Deinde, quia vel extinctus est iam ignis ille vnde hic ante manauerat, vel remotissimus. An fortè instrumentum est aliorum elementorum? Neque id quidem. Non est enim in dissimilibus & contrariis elementis vlla ignis generandi ratio cui ignis hic alium generaturus tanquam instrumentum subiiciatur. Num igitur instrumentum fit cœli? Minimè. Non enim ignis hic remotissimi illius corporis, instrumentum fieri potest aliter quàm per medium. Media verò hæc corpora sunt inepta. Ac potius inter cœlum, siue ignis sphæram, atque dissimilia elementa, ad ignem hunc in terra gignendum, interponendus est ignis aliquid hunc ignem generaturus, quàm conuerso. Similiter in singulis rerum naturalium speciebus argumentabimur. Quamobrem præter omnes huiusmodi formas inesse oportet omnibus & præesse substantiam quandam incorporalem per corpora penetrantem, cuius instrumenta sint corporeæ qualitates. Quo enim pacto qualitates singulæ, quæ suapte natura instabiles inordinatæque sunt, aut stabilem ordinem in generationis successione seruarent, nisi per ordinem altioris causæ stabilem regerentur, aut ad eosdem effectus statutis temporum curriculis semper reuertentur, nisi vna eademque causa esset quæ illas quouis tempore ducens, statutis temporibus similiter duceret. Mens humana quotidie à particularibus formis ad vniuersales absolutasque se confert. Item super naturales formas certis adstrictis materiis per Mathematicas (quibus in certa materia sufficit) ad Metaphysicas (quæ neque certa neque reiecta materia indigent) ascendere solet. Præterea à dimensionibus, quæ tam situ quàm partibus egent, ad punctum sine partibus, sed quodammodo circumscriptum: rursus à punctis ad numeros, qui partibus quidem indigent, situ verò nequaquam, demum à numeris ad vnitatem, cui neque situ neque partibus ullis opus est, sese attollit. Atque ultra vnitatem indiuiduam, sed accidentalem, ad substantialem se vnitatem, id est formam transfert, indiuiduamque essentiam, accidentium fundamentum simul atque originem, tanquam ad fixum quendam & in seipso manentem ac-

identium per se mutabilium, alterique semper hærentium, cardinem. Si tantam ad ascensum rationalem mens humana potentiam habet, quæ & pars quædam est vniuersi, & corporeis vinculis impedita, multo certè maiorem ad idem in seipso possidet vniuersum, præsertim cum infimæ mentis ordo vniuersi ordine trahat originem. Vbi verò ad agendum potentia maior viget, ibidem naturaliter & magis & citius prodit in actum. Accedit ad hæc, quod si quælibet rerum genera ad vnum quiddam in suo genere quodammodo indiuisibile reducuntur, cuius simplicitate consistunt, vt puta. motus tempusque ad momentum, forma naturalis ad gradum minimum naturalem Geometricæ dimensiones ad signum, numeri ad vnitatem; cur non etiam substantiæ genus ad indiuisibilem substantiam redigatur? Vt quemadmodum figuræ omnes quæ inæqualitatis participes sunt, ad circularem omnium æqualissimam referuntur, circularis ad indiuisibile, centrum totius æqualitatis initium, ita formæ accidentales diuisibilesque, ad substantialem diuisibilemque formam, forma huiusmodi ad substantialem & indiuisibilem reducatur. Atque vt vltra qualitatem, quæ non decremento solum, sed etiam remissioni subiecta est, substantialis corporalisque forma est, quæ à remissione est libera, quamuis decreseat, ita super hanc esse debet substantialis forma, quæ neque remittatur, neque decreseat, vt ascensus qui in melius proficit, proficiatur in optime. Talis erit substantia incorporea, quæ in primis hoc habet, vt natura sua minui nequeat, quam oportet alicubi secundum propriam formam in natura subsistere. Indiuidua siquidem & simplicia diuiduis necessario priora sunt atque compositis. Vnumquodque enim antè sit oportet, quam protendatur & tumeat. Indigent quoque hæc illis, non conuerso. Ab illis enim hæc sumunt exordium, & terminantur ad illa. Quapropter si hæc secundum propriam formam, in rerum natura subsistunt, multo magis oportet illorum quoque genus alicubi secundum formam propriam reperiri. Nempe ex eo quod natura efficacius meliusque materiam suam mouet quàm ars suam, coniicimus principalem formam in natura materiæ suæ magis dominari, quàm principalem informam arte materiæ suæ. Si dominatur magis, duo concluduntur, tum quod propius quàm ars adest materiæ secundum situm, tum quod magis quàm ars secundum substantiam excellit materiam suam, magisque potest per se sine illa

existere. Mouet autem ad idem mentalis ratio plurimum; quod qualitates omnes, quia formæ in alio sunt quoties generant, formas in alio generant. Non enim possunt liberiorem prolem quam ipsæ sint gignere. Generat ergo formas in materiæ gremio, materiam verò ipsam, quæ in alio minimè iacet, sola illa facit seruatque forma, quæ non iacet in alia. Materia enim neque ex se est, cum imperfecta sit, & non agat ex se, neque ex qualitatibus, quas antecedit ipsa, sed ex forma quadam quæ materiam antecedit. Talis est penitus incorporea. In talis formæ virtute operationeque fundantur qualitatū virtutes operationesque, postquā in illius opere opera superfundantur illarū. Sed de hoc aliàs. Nunc autem meminisse oportet, materiam ipsam, vt Mercurius Trismegistus, Timæusque putant, esse informem, non nihil, nihilo proximam, quod primò infiniteque sit patiens. Vnde sequi Plotinus existimat vt propinqua ipsius materiæ dispositio, id est, dimensio, qualitasque, & vanissimum quiddam sit, & quantum cunque est, totum sit passio quædam. Dimensiones enim nihil esse aliud quàm materiæ ipsius extensiones, qualitates verò nihil aliud præter eiusdem, affectiones videlicet umbratiles & labentes, tanquam umbras quasdam eminentium arborum in torrente. Demum concludit, neque materiam, cum sit primum patiens, neque dimensiones, qualitatesque, cum sint primi patientis passionibus primæ, esse prima actionum principia posse. Ita Plotinus. Alij verò quidam aliter, quanuis ad eundem finem, ita distinguunt. Profecè aiunt materiam ipsam agere nihil posse, quantitatem quoque, si est extensio ipsa passiuam materiæ proficiens à causa quadam materiam extendente, agere nihil, cum sit primi patientis perpetua passio. Sin autem est quasi forma quædam per quam causa materiæ motrix extendit materiam, agere forte non nihil in illam materiā propriā, quia sit mediū quo causa la materiā videtur extēdere, sed in materiā alienā nihil penitus operari, qm̄ semper distare cogit agens à patiēte, quod impedit actionē. Qualitatē verò in materiā tam alienā quàm propriam secundum Peripatet. aliquid operari. Quod si à materia quæ in neutram agit materiam, ad qualitatem, quæ quodammodo mouet vtramque per mediam quantitatem, quæ solum in alteram scilicet propriam quodammodo operatur, nos ratio ducit, nunquid à quantitate, quæ nullo modo mouet materiam alienam, absque medio vilo ad rem illam transibimus, quæ omnino moueat alienam? nequaquam.

Qualitas autem est proxima quantitati. Itaque non est omnino sufficiens qualitas ad extrinsecam actionem. Si ergo claudicat ad agendum, à substantia superiore dirigitur, quæ omnino sit potens. Merito autem qualitas claudicat, quoniam eo ipso momento quo nascitur, spargitur per materiæ latitudinem profunditatemque, & quasi Letheo flumine mergitur. Quo fit, ut antequam ipsa agat quicquam à materia quasi inficiente quodammodo superetur. Nunquam ergo vis eius vincit per se materiam. Idcirco nunquam per se mouebit nisi à superiore causa roboretur. Roboratur profectò & ducitur à vita quadam, quæ etiam ex luto non viuente, quando ranæ generantur & muscæ, vitam gignit ac sensum, ex vna deformique materia fimi varios speciosissimosque procreat flores, per varia & speciosissima semina, quæ cum sæpè non inueuiantur in fimo, necessario in vita ipsa sunt. Sparsas quoque materias cogit in ordinem. Ordo ratione procedit. Ratio consistit in vita, Vita in virtute quadam indiuisibili. Siquidem mors diuisione & resolutione contingit. Rursus ex frigidorum corporum collisione generat ignem. Et quando reflexio radicum in speculo, aut calens ferrum per qualitatem ignis accidentalem calefacit lanam, vita illa per vitalia ignis semina substantialem ignis speciem producit in lana. Quia denique in nobis putamus esse quod nutrimentum haud violenter consumit, sed suauiter & ordinate concoquit & digerit? Quod tam mirabiliter ad viuam redigit formam alimenta non viuæ? Quod grauius sursum, leuius deorsum, absque manifesta violentia præter imo super illorum naturam, prout usus vitæ postulat, continuè transfert? Quod pugnantia inter se conciliat, vincitque inuicem (Certè non simplex calor igneus, non alia qualitas vlla pugnantium, non natura diuidua, non nuda naturæ proprietas, imò verò superior quædam & indiuidua & viuifica virtus. Sicut autem in nobis, ita & in vniuerso considerà. Atque ex his collige, formas corporales non habere ex se inuicem generationem sufficientem, sed causam postulare insuper aliquam altiore. Quæ quidem superior causa si rursus forma esset similiter iuncta materiæ, ab alia iterum substantia superiore descenderet. Tandem ne fiat in infinitum progressio, ad formam aliquam perueniendum est, quæ nullis sit mixta corporibus. Tanta verò est in genere formarum virtus ad id, ut à materia separari esse possint, ut etiam si quis illas esse quidem coniunctas ex se dixerit, ve-

rum ex ipsa mentium contemplatione se iungi, hinc saltem fateri cogatur, mentes ipsas esse seiunctas, quandoquidem ipsæ alia separant. Quod hinc rursus apparet, quia substantia per naturam & dignitatem prior est quantitate, ac reliquis accidentibus. Et quia quod prius est, potest esse à posteriore seorsum, potest esse substantia quædam sine quantitatibus diuisione, & si potest, utique est aliquando, ne desit naturæ ista perfectio, ne frustra sit ista potentia. Nam in his quæ ad præcipuum vniuersi ordinem pertinent, ita se res habet, ut quicquid potest esse, aut iam sit, ut Physici opinantur, ne contingat in æternis mutatio, aut saltem futurum sit aliquando, ne aliquid sit semper inane. Ac si vita, quæ sola origine naturali antecedit sensum, iam nunc per se existit alicubi sine sensu, multo magis substantia, quæ quantitatem tam dignitate quam origine præstat, consistit nunc in rerum ordine seorsum à quantitate, præsertim cum perfectius sit vniuersum, si substantiæ quædam sint solutæ à vinculis quantitatibus, quàm quod sint vitæ quædam sensus expertes. Auerrois ex Aristotelis sententia probat corpoream substantialemque cœli formam carere materia, quia videlicet ibi nulla sit ad diuersas formas potentia, quæ propria est natura materiæ. Ibi tamen dimensio est, & eiusmodi formam inter naturales formas atque diuinas esse mediam arbitratur, quia naturales formæ cum materia simul quantitateque sint, diuinæ ab vtriusque penitus absolutæ, cœli verò forma vtrarumque media sit, ne ab extremo ad extremum sine medio transeat. Quapropter eam cum quantitate quidem esse, sed sine materia, consentaneum esse censet. Hinc nos hunc in modum argumentamur. Cum substantialis forma soleat in materia potius quam in quantitate iacere, atque habeat secundum generis naturæque ordinem, maiorem cum materia quàm cum quantitate proportionem, si alicubi absque materia potest esse, multo magis alicubi seorsum à quantitate consistere potest. Præterea, ut Proculo placet, tria sunt genera corporum. Sunt enim quædam (ut eius verbis utar) materialia simul atque composita, qualia sunt quæ ex elementis quatuor componuntur. Sunt vltèrius elementorum sphæræ, materiales quidem, sed quodammodo simplices. Sunt denique coelestia corpora, & simplicia & immaterialia simul. Tria quoque formarum genera ponit, haud aliter quam Auerrois. Vult enim generalem formarum definitionem eiusmodi esse. Forma est id quo aliquid di-



finctè & actu est & agit. In hac autem definitione dimensiones omnino nullas includi, subiectum tamen quodammodo fortè significari, dum videlicet dicitur, quo aliquid, & cætera quæ sequuntur. Vnde concludit, si quæ formæ sine subiecta materia sint, sicut cœlestes, multo magis & multo plures absque dimensione esse posse simul atque debere. Item sic Proculus & Sirianus ad idem argumentantur. Quod ab alio semper extenditur, necessario dimensionibus est astrictum. Quod verò extendit, minimè. Materia igitur cum semper ab alio extendatur, necessario dimensionibus obnoxia est. Quia tamen vnumquodque prius in se est quodammodo quàm extendatur, materia potest indiuidua cogitari. Quapropter principium illud à quo extenditur, multo magis potest sine dimensionibus non modo cogitari, sed etiam esse.

Præterea omne diuiduum est quiddam totum vnum ex pluribus partibus constitutum, quæ partes nisi haberent in se vnum aliquid atque idem cunctis commune, nunquam totum illud conficerent. Non enim sit vnum nisi ab vno. Rursus, nisi essent participes vnitatis, nulla partium esset vnum, sed plura in infinitum, & quælibet pars innumerè infinita. Vnum autem in illud partibus insitum, non est diuisum singularim in singulis, egeret enim ipsum quoque alio copulante. Ergo est idem totumque in singulis. Tale quiddam incorporale esse necesse est. Item cum omne corporale sit vnum quiddam totum ex partibus, quidnam illius vnionis causa est? An totum ipsum vnit partes, vel partes totum vniunt? Vel superius aliquid, quod neque pars sit vllius, neque totum ex partibus partes vnit inuicem, & ad totum? Totum partes sequitur potius, quàm vniat. Ac si admittatur quod vnit partes, incorporeum erit? Si enim sit ipsum quoque diuiduum, eget alio similiter vniente. Si partes vniunt totum, absurdum id quidem, quod à multitudine vnitati opposita fiat vnio, quæ fieri debet ab vnitate. Reliquum est, vt præter partes singulas atque totum adsit aliquid vnum conspirationis illius causa, quod quidem sit incorporeum, ne cogatur ipsum quoque copula indigere, atque ita abeamus in infinitum. Quapropter non est putandum formam aliquam diuisam in corpore, apicem esse naturæ, rerumque principium, præsertim cum oporteat principium rerum vi sua sempiternum fuisse, & fore. Fuisse quidem semper, nam neque potuit ex se aliquando prodire, fuisset enim ipsum ante

seipsum) neque ex alio, nihil enim ante primum. Reliqua verò non essent vnquam, nisi prius fuisset primum. Fore quoque semper, quoniam extincto principio, corrumpunt vniuersa, neque ipsum amplius, neque aliud quicquam renasci potest. Habeat ergo necesse est vim infinitam, per quam ex se infinitè viuat, hanc non habebit, si fuerit corporale. Nam si dimensiones habuerit infinitas, nihil erit in rebus aliud præter ipsum. Si finitas, vim quoque finitam habebit. Mitto (quod aliàs ostendemus) neque corpus, neque corpoream formam, & indigam & mutabilem, sufficiens motionis principium esse posse, sed omne corporeum ab alio agitari, atque opificem, qui opificio miscetur inficiturque, non posse operi dominari, opificemque esse perfectum, primumue mundani operis architectum. Ergo formam corpoream transcendamus, & consideremus nunc primam quæ deinceps occurrit, vt sicut à corpore tanquam infimo. ascendimus ad formam corpoream quasi mediam, quia habet corporis aliquid, dum dilatatur in corpore. Aliquid verò non habet, siquidem ipsa non est aliquid ex materia & forma compositum. Ita nunc ab hoc medio ad formam sublimiorem incorpoream scilicet, prouehamur, quæ nihil habeat corporis, sed corporibus distribuat qualitates. Quæ quoniam per se subsistit, vera forma & essentia nominatur, tertia inquam essentia, quam etiam suo loco rationalem animam appellabimus. Quam ita irrationalis anima comitatur, vt corpus umbra. Essentia illa, & vera & immortalis à Platoniceis ideo iudicatur, quia neque partibus indiget, in quas aliquando dissolui possit, & per quas dispersa virtus debilitetur, neque subiecto adstringitur, à quo deserta aliquando euanescat, neque contrariæ formæ miscetur, qua infici possit, neque vel loco clauditur, vel tempori vel motui ob indiuiduam & in se manentem simplicitatem substantiæ subest.

*Anima rationalis per substantiam immobilis est, per operationem est mobilis, per virtutem partim immobilis, partim mobilis.*

### C A P V T IIII.

Tertiae huius essentiae naturam qualem esse dicemus? Immobilem ne prorsus, an potius mobilem? Certè non omnino immobilem, quia ipsa fons est qualitatum fluentium in materiam, quæ omni quiete carent. Omnis autem causa secun-

dum naturam propriam agit, ideoque oportet in opere vim aliquam & imaginem causæ referuari. Si essentia illa quæ est causa qualitatum esset prorsus immobilis, quia per naturam suam immobilem ageret, qualitas inde descendens immobilem in se naturam aliquam retineret. Contrà verò contingit. Nam tria in qualitate sunt, essentia, virtus, & actio, hæc omnia versantur in motu. Essentia eius generatur atque corrumpitur, generatio & corruptio per motum efficiuntur. Virtus quoque naturæ suæ intenditur atque remittitur, puta calor magis minusve feruet. Quod autem magis minusve diuersis temporibus calet, proculdubio permutatur. Actio quoque idem patitur. Ignis siquidem actio, calefactio est. Aquam non momento calefacit, sed tempore. Actio temporalis motus ab omnibus nominatur, ideo qualitas omni ex parte subiicitur motui. Quod hinc rursus apparet perspicuè, quod affectio corporis quæ per qualitates efficitur, non potest per aliquam temporis moram eadem penitus & similis permanere, ac semper tum in aliam atque aliam graduum proportionem, tum in melius vel deterius permutatur. Nempè si quis dixerit corporis affectionem permanisse per horam, Platonici ita interrogabunt illum, hora finita, nunquid par sit tunc in illa affectione virtus, ac in horæ principio? Si non sit par virtus, certè non stetit horam, cum in ea hora sit secundum potentiam permutata. Si par virtus dicatur inesse, affectio illa horam rursus aliam perdurabit. Æquales enim vires æqualia faciunt. Igitur si per tantam vim permansit horam, per æqualem rursus aliam permanebit. Hora secunda expleta, similiter de virtute illa interrogabunt, par ne sit, an impar. Si impar, non stetit. Sin par, stabit quoque tantundem. Deinceps in infinitum similiter procedent, monstrabuntque naturam illam corporis, si modo horam, in horæ dimidium steterit, perpetuo permanfuram. Perpetuo verò non viget corporis secundum se vllius complexio, cum breui omnes extinguantur & pereant, itaque vix momentum temporis eadem perscuerant. Et quia in eodem momento incipiunt atque desinunt, in incipiendo autem & desinendo integerrimus existendi habitus minimè possidetur, integro verò existendi actu opus est ad agendum, ideo confirmari videtur quod in superiori disputatione probauimus, non esse in qualitatibus sufficiens agendi principium. Sed ut ad quæstionem hic propositam reuertamur, si est in qualitatibus, quantum ad eas attinet, motio sta-

tus omnis quodammodo expertus, quoniam pacto ab ea causa gigni proximè possunt, quæ tanto ab ipsis intervallo distet, ut statum habeat omnis motionis expertem? Si ab extremo ad extremum omnia per media transeunt, ut ab hyeme per ver in æstatem, ab æstate in hyemem per autumnum, certè inter qualitatem penitus mobilem, atque essentiam prorsus immobilem, necessario ponendum est aliquid quod partim immobile sit, partim etiam mobile. Itaque substantia illa qualitatum proximè genitrix, omnino immobilis esse non potest. Quid ergo dicemus? An istam quoque substantiam omnino mobilem asseremus? Minimè. Nam vel esset in genere corporaliū qualitatum, in quo tamen genere sistere gradum non possumus. Vel causa quæ in genere superiore locatur, effectum suum sufficienti perfectione non excederet, si substantia quæ qualitatis est causa non minus quam qualitas vacillaret. Quocirca substantia illa partim stat, partim verò mouetur. Tria quidem in se habet & ipse, essentiam, virtutem, operationem. Quid horum stabit? quid mouebitur? operatio quidem stare non potest, si duo præcedentia permanentur. Neque moueri essentia, quin sequentia moueantur. Stabit ergo primam, scilicet ipsa essentia, mutabitur vltimum, videlicet operatio. Sed medium vtrorumque virtus quid? Stabit & ipsa partim, partim quoque mutabitur.

*Super animam mobilem est immobilis Angelus.*

## C A P V T V.

**H**Actenus formam quandam supra corporis complexionem inuenimus, quam rationalem animam appellabimus, cuius essentia semper eadem permanet, quod significat stabilitas voluntatis atque memoriæ. Operatio autem ex eo mutatur, quod non simul cogitat omnia, sed gradatim, neque momento alit, auget, & generat corpus, sed tempore. Naturalis virtus manet, quia naturalis eius vigor viget perennis, neque remittitur. Virtus acquisita mutatur, quia ex potentia in actum, ex actu transit in habitum, atque conuerso. Hucusque ascendit Heraclitus, Varro atque Manilius, Cæterum altius ascendendum, siquidem forma hæc non potest esse totius naturæ principium. Perfectior enim est operatio stabilis, quæ vno momento perfectissime suum opus absoluit, quam quæ indiget tempore. Integrior est vita, quæ tota simul est vnita secum, à seipsa non distans, quam quæ per diuersa temporum momenta porrecta, secundum actus affectusque intrinse-

cos quodammodo à semetipſa diſtrahitur. Igitur ſuper hanc formam, cuius operatio extrinſeca vagatur per tempora, cuius vita, id eſt, intrinſeca operatio quaſi quodam fluxu diſpergitur, ponenda eſt alia quædam forma ſublimior, cuius operatio ſtabilis ſit, cuius vita tota ſimul vnita. Siquidem perfectæ ſemper ſunt imperfectis antepo- nenda, propterea quod ſicut perfectæ in aliquo genere ſunt illa quæ per ſuam naturam ſunt taliaſic imperfectæ ſunt, quæ per ſe talia non ſunt, alioquin eſſent integerrimè talia. Si itaque imperfectæ non ſunt per ſeipſa, per ſuperiora coguntur eſſe. Item quod mouetur, ex potentia & ocio prorumpit in actum, & terminum aliquem ſui motus ad finem expetit, quaſi ſibi ipſi minus ſufficiet, ſed illo egeat ad quod motione ſua ſe confert. At verò ſuper id quod ex ocio migrat in actum, exiſtit aliquid ſemper quod actus plenus eſt atque perennis. Super id quod propter indigentiam tranſmutatur, exiſtit aliquid neceſſariò, quod quia vel nullius vnquam indigum eſt, vel iam pleniffimum, non mouetur, præſertim cum id quod mouetur, per appetitum proficendi mutetur, neque poſſit aliter quàm melioris præſtantiorisquæ naturæ adeptione proficere, neque habeat rem illam quam quærit, per motionem, ſed poſt motum adipiſcatur, non quidem à ſeipſo (quid enim mutari oportuiſſet?) ſed ab alio quodam vberiore. Quod enim ſui natura caret termino, ab alio perfectiore terminandum eſt, res mobilis ex ſe caret termino, quia non quieſcit in ſemetipſa. Ac ſi res quædam talis ſit rerum principium, quia per operationem ſuam mutabilem efficiet omnia, nullus erit ſtatus in rebus. Nunc verò uſque adeo neceſſarius eſt aliquis in rebus ſtatus, vt etiam motus ipſe ſtatu non careat. Niſi enim res quæ per motum aliter atque aliter affici dicitur, maneat in ſubſtantia per aliquod tempus, eadem nec mutabit affectiones, nec variabitur paulatim, ſed momento tota ceſſabit. Et ipſa ordinatiſſima cœlorum circa idem centrum eoſdemque polos reuolutio. Motionum æqualitas, ſyderum reſtitutio, alicuius ſtatus eſt particeps. Atqui quemadmodum quod ſtat, ſtat propter vnitatem, & vnitur in ſtatu (quod aliàs declarauimus) ita quod mouetur, mouetur propter ſtatum & ſtat in motu. Mouetur inquam propter ſtatum, id eſt, propter quandam morricis virtutis ſtabilitatem, quæ niſi in ſuo vigore maneret, non ſeruaretur ordo vllus in motu, imò neque motus vel parumper continuaretur. Rurſus ſtat in motu, id eſt, perſeuerat in

norma eadem vel æquali vel ſimili motionis. Multa etiam ſunt quæ & ſi ſecundum aliquam ſpeciem motus mouentur, tamen ſecundum ſpecies alias non mouentur, partim ergo mouentur, partim verò quieſcunt. Adde quod cum prima rerum materia ſit ſempiterna, quod per ſubſtantialem mutatur formam, interea tamen permanere cogitur per materiam. Itaque multo magis quod ſecundum quantitatem, qualitatem, locum mutatur, manere poteſt, imò & debet interim per ſubſtantiam. Quid plura? quod nullo pacto manet dum admittit ſtatum, totum ſimul & motum amittere cogitur. Si itaque eſt aliqua in rebus ſtabilitas, non poteſt rerum principium mobile eſſe. Quare quod mobile eſt, non eſt naturæ principium. Igitur eſt aliquid ſuper animam, vt anima quæ natura ſua ad intelligendum & non intelligendum eſt indifferens, cum viciffim ab altero permutetur in alterum, per eius influxum ad intelligendum determinetur, quod in tali genere ſemper eſt actum. Tale eſt, quod eſt ſemper intelligens, ſiue ſemper intelligibile actu quod eſt idem. Præterea quicquid ſecundum partem tale eſt, per illud cunctaxat tale eſt, quod tale ſecundum ſe totum exiſtit, ſicut lignum ex parte calidum, per ignem caleſcit, qui ex toto calet, quia quod tale eſt per naturam ſuam, quia calidum, ſicut totum à natura propria comprehenditur, ita totum ab huiusmodi qualitate. Atque contra, quod per partem eſt tale, non eſt tale per ſemetipſum. Tertia verò eſſentia illa, ſcilicet anima, non eſt ſecundum ſe totam intelligentia. Habet enim alias quaſdam naturas præter intelligentiam, expertes intelligentiæ. Ergo mens in anima, pars quidem eſt animæ. Pars quoque eſt mentis quodammodo, mentis inquam altioris, quæ tota ſolaque mens eſt. Quippè ſi anima mentem haberet à ſemetipſa in animæ ſubſtantia ratio propagandæ mentis ineſſet, vnde & tota anima eſſet mens, & mens quidem tota atque perfectæ, & omnis anima mentem haberet, quia in qualibet anima ratio animæ reperitur. Et ſicut mouere corpus, quia per naturam ſuam animæ conuenit, animabus ſingulis ineſt, ita intelligendi facultas animabus ineſſet omnibus, etiam beſtiarum, ſi per naturam ſuam competeret animæ. Ac ſi ſuper naturam minimè efficacem, eſſe efficaciorẽ aliquam neceſſe eſt, & mens quæ eſt in anima, neque ſolo ſui actu vllum extra ſe opus efficit, neque efficaci ſuæ animæ potentiæ imperat, oportet ſuper eam eſſe mentem ſuo actu alius operis effectricem, & efficaciſſimè potentiam

tentiz dominam. Merito ergo sicut animæ caput est mens hæc, pars eius excellentissima, sic mentis huius, quæ non sui ipsius est sed animæ, non absoluta, sed ad animæ huius tracta capacitatem, non clara, sed obscura, & quodammodo dubia, huius inquam mentis caput est mens quædam, quæ in seipsa est, liberaque & lucida. In quo sanè illud Magorum enodatur ænigma, Est res vndique lucida, est res vndique obscura, est media, lucida partim, partimque obscura. In ordine corporum res vndique lucida est stella quælibet super lunam, obscurus vndique est aër, media Luna. In ordine verò spirituum mens est lumine plena, anima irrationalis vacua, rationalis tenet medium, partem habet intellectualis luminis, parte caret. Ac partem quam habet à Deo, ceu Luna à Sole, alias aliter accipit, mutatque figuram. Ideo merito super eam est Angelus, qui tanquam stella quælibet super lunam, & totus semper & eodem pacto sui Solis luce refulget. Profecto ubi natura superior tangit inferiorem, ibi ex infimo sui gradu supremum inferioris attingit. Puta infimum ignis aërit attingit supremum. Natura verò intellectualis corporali est natura superior, tangitque illam ad eam, ut quod inter corpora præstantissimum est, intellectualis sit animæ particeps, inferiora vero quæ plurima sunt, nequaquam. Præstantissima vero corpora sunt apud Platonicos cœlicolarum, dæmonumque, & hominum. Sed nunquid mentes quæ corporibus huiusmodi tributæ sunt, mentium altissimæ sunt? Nequaquam, alioquin natura inferior, superioris absque medio summum consequeretur. Ergo quemadmodum sub corporibus mente præditi quam plurima corpora sunt expertia mentis, ita super mentes corporibus insitas quam plurimæ mentes sunt nullis attributæ corporibus, atque etiam multo plures sunt quam corporum species, quoniam (ut alias ostendimus) rationales animæ inter æternitatem tempusque sunt constitutæ. Æternitatis verò excellentia videtur exigere, ut plures in ea quodammodo species perfectionesque quam in tempore sint. Mitto (quod alias demonstrabimus) interval- lum inter animas primumque principium, infinitum esse sed spatium inter ipsas atque materiam, esse finitum, ut nemini minus videri debeat, super animas plures admodum angelorum gradus, quam gradus formarum infra animas esse posse. Præterea quando ex duobus fit vnum & alterum illorum quod minus perfectum

est, reperitur alicubi per se manere seorsum ab altero, multo magis alterum illud perfectius, & minus egenum, esse alicubi sine altero poterit. Fit autem animal vnum ex intellectuali substantia, id est anima rationali, & corpore. Corpora multa videmus sine huiusmodi intellectu esse ac vivere. Quid igitur prohibet esse mentes plurimas corporibus non unitas? Tales quidem erunt super animas quæ sunt unitæ corporibus. Proinde mentes coniunctæ corporibus, quatenus tales sunt, speciem animalis solæ non complent, sed compositæ speciei sunt partes, atque (ut plurimum) ut intelligant, in ea quæ sensibilia sunt, aspiciunt, quare & imperfectæ quodammodo sunt, & imperfectè agunt. Si igitur ab imperfectis in quolibet genere, ad perfectæ quæ priora natura sunt, est ascendendum, consequens est ut super coniunctas mentes ad separatas ratio nos perducatur, quæ & species ipsæ sufficienter suas compleant, & intelligendo ad illa quæ per se intelligibilia sunt, aspiciant. Mens ipsa, quia per intelligentiam & voluntatem, non necessario dependet à corpore, & naturaliter formas separat, atque circa separatas versatur, & quiete potius quam motu proficit, per naturam est à corpore motuque libera. Idcirco magis naturæ suæ conuenit ut viuat seorsum à corpore motuque, quam ut viuat in corpore atque motu. Multæ tamen mentes in corporibus mobilem vitam ducunt, quare multò magis, & multo plures immobilem vitam agunt absque corporibus. Quis neget incorporeæ substantiæ secundum generis sui naturam conuenire magis ut extra corpus sit, quam ut in corpore, ideoque plures illius species à corpore se iunctas quam coniunctas esse debere? Quod enim generi cuiuslibet naturalius est, id in eo existit ut plurimum. Tales quidem sunt Angeli, qui si corpora mundi mouent, ipsi, motis corporibus nullo modo mouentur.

Animæ tamen dum corpora transferunt, ipsæ quoque feruntur. Motor qui vna cum moto corpore peruagatur, perpetuum stabilemque tenorem & ordinem mouendi non seruat, nisi præsit illi motor immobilis. Ideo mundanæ reuolutionis perpetuus ordo testatur esse aliquos super animas motores immobiles. Elementa quoniam ex fluitante materia constant, seque mutuo semper inficiunt, nullum ex se ordinem obseruarent, nisi à lege cœlestis motus ordinatissima regerentur.



Cum vero & cœlum per se sit perpetuò immobile, ideoque indigum, ordo in suo motu stabilis non ex ipso prouenit, sed à superno motore prorsus immobili, atque indiuiduo. Non enim in rebus tam diuersis mobilibusque stabilis vnio perseverat nisi à stabilissimo & vnitissimo cardine, qui tandem ad vnitatem ipsam statumque refertur. Sanè sicut mobile se habet ad mobile, ita motor etiam ad motorem. Ergo sicut elementum quod mouetur mobiliter, ad cœlum quod mouetur stabiliter, sic motor cœli mobilis variusque ad motorem stabilem vnitumque, stabile denique & vnitum ad statum ipsum vnitatemque reducitur. Profecto motorem sequitur actio illa quæ mouere dicitur, actionēque hanc sequitur illa passio quæ moueri, neque fit contra. Non enim priora à posterioribus ducuntur, sed conuerso. Potest igitur multo magis esse alicubi actio illa quæ dicitur mouere, sine passione illa quæ est moueri, quam passio huiusmodi seorsum ab actione. Tamen passio talis in corporibus est seorsum ab actione. Igitur alicubi erit actio procul à passione, vt sicut corpora mouentur quidem, non mouent, sic Angeli moueant, non moueantur, de quibus inquit Zoroaster.

*ὁ πᾶς κόσμος ἔχει ποσὸν ἀνθρώπων ἀρχόντων,*

Id est, Mundus habet intellectuales rectores immobiles. Igitur sicut qualitates omnino mobiles antecedunt animæ, partim mobiles, partim immobiles, sic animas antecedunt omnino immobiles Angeli. Angelos esse, atque esse multos Aristoteles in libro 11. Diuinorum ita probat. Motum cœli continuum, ordinatum, & quantum in se est, indeficientem oportet à motore fieri, qui neque in se neque per accidens moueatur. Cum vero motus huiusmodi in cœlo sint multi, inter se discreti, specieque & virtute diuersi, oportet eos à pluribus eiusmodi motoribus fieri, qui videlicet neque corpora sint, ne cogantur dum mouentur, ab alio interim ipsi moueri, atque ita in infinitum necessariò procedatur. Neque rursus formæ in corpore, ne eas vnà cum moto corpore moueri contingat. Oportet enim ad motorem perfectissimum id est immobilem peruenire, ne in motibus vlla vnquam transgressio fiat. Motores eiusmodi, mentes sunt, siquidem in formis à materia omnino solutis intelligibile atque intellectus est idem. Hæc Aristoteles. Hebræi, posterioresque Philosophi mentes illas Angelos, nuntiosque nominant, quorum

præcipuos non esse pauciores quam decem, alicubi disputat Auicennâ, alibi vero multo plures significare videntur. Aristoteles autem haudquaquam pauciores esse quam cœlestes motus, cum quo numerum probabili se ratione computauisse fatetur, quod autem necessarium sit sapientioribus se dimittere. Quasi qui suspicabatur, ne forte mentes illæ secundum actionem suam propriam præcipuamque id est intelligentiam, potius quam secundum actionem communem atque posteriorem, id est motum essent dinumerandæ. Præterea cum illæ sint motionum fines, forte vaticinabatur non esse ad motionum numerum numerandas. Atque posse mentes esse quamplurimas, quæ non sint mouendis corporibus distributæ.

Quamobrem non iniuria Angelos esse penè innumeros & supra significauimus, & in præsentia sic ostendimus. Si species rerum naturalium in materia, quamuis in subiecto, angustæque sint, tamen inter se non per subiectum, sed per se distinguuntur, atque in numerum quamplurimum dilatantur, multo magis substantiæ ipsæ quæ super materiam in seipsis viuunt, per seipsas distinctæ sunt, atque mira quadam absoluti generis sui fecunditate in species quasi innumeras prorsus amplificatæ. Præterea intelligibile genus suapte natura magis multiplicabile quàm corporeū esse videtur. Siquidem numeri, dimensiones, figuræ, proportiones, raritas corporum, velocitas motionum, in ipsis corporibus semper terminata sunt, in mente autem absque termino pro arbitrio protenduntur. Rursus quæ in materia particularia sunt, in mente vniuersalia fiunt. Denique intellectus ultra corpora cuncta, alia pro arbitrio innumeratam incorporea quam corporea cogitat.

Cum ergo intelligibile genus magis admodum quam sensibile amplificari possit, potentiaque tam bona in vniuerso semper inanis esse non debeat, proculdubio iam actu sunt substantiarum species separatarum, multo plures, quàm species corporalium, præsertim cum potentia præstantior, & magis & prius in vniuerso actum sibi suum adsciscat, quam debilior. Denique vniuersi ordo cum sub infinito bono quam optime dispositus sit, exigere omnino videtur, vt quæ in ipso sunt meliora, quatenus fieri potest, super deteriorum quantitatem multiplicentur, præcipuè cum inferiora superiorum gratia sint constituta. Quod quidem in ipsis mundi sphaeris manifeste videmus. Quo

enim mobilior sphaera est, eo & amplior, adeo ut terra & aqua si ad superiora conferantur, quasi punctum ad circumferentiam sese habere putentur. Quod autem in corporibus est dimensio, id in rebus incorporeis numerus esse videtur. Quapropter consentaneum est, ut intellectuales substantiae, utpote quae optimae sunt, ac per se existunt, finesque sunt corporalium omnium quae illarum gratia sunt procreata, longè plures numero sint, quam & sphaerarum motus, & corpora omnia, quod Dionysius Arcopagita testatur, dicens plura esse intellectualium species separatas, quam corporalium. Merito potentissimus vniversi creator opus sibi suum quam simillimum reddere & potuit & sciuit, & voluit. Simillimum verò in huius imperio potissimum procreauit, quod absolutas mentes (quae ipsi omnium simillimae sunt) ultra coniunctas materiae formas, immenso (ut ita dixerim) spatio dilatauit. Hinc illud Danielis Prophetæ: Millia millium ministrabant ei, & decies centena millia assistebant ei. In distinguendis autem ordinibus angelorum Dionysius ternario nouenarioque numero in primis, necnon interdum septenario utitur. Quin etiam duodenarium in Christianorum mysteriis reperimus. Idem & Iamblichus Proculusque Platonici post Dionysium obseruarunt. Supremos enim & medios Angelos, ternario, & nouenaria diuidunt, sequentes autem septenario, postremos vndique duodenario ordinum numero partiuntur. Quoniam vero apud Platonicos gradus corporum sunt rationalium animarum umbræ, animarum vero gradus sunt imagines Angelorum, idcirco nonnulli angelorum ordines secundum ordines corporum simul animarumque distinguunt. Sed de his aliàs.

*Super Angelum est Deus, quoniam anima est mobilis multitudo, Angelus multitudo immobilis, Deus immobilis vnitas.*

## C A P V T VI.

**A**ngelum prorsus immobilem esse Platonici arbitrantur essentia, virtute, actione, quoniam semper sit idem, æquè possit, intelligat semper, omnia simul, & velit eadem, & quantum in se est, agat subito quicquid agit. Hæc Platonici. Quid vero dicant alij, alias dicam. Nondum tum quiescere hic cum Anaxagora & Hermotimoratio nos permittit, sed altius iubet ascendere. Porro anima, quia mobilis est, ab alio pertransit in aliud. Igi-

tur aliud in se habet, & aliud. Quod hæc habet, habet & multitudinem. Quapropter anima in seipsa multitudo quædam est, multitudo inquam mobilis. Angelus qui proximè hanc antecedit, esse nequit immobilis vnitas, quia duæ quædam huiusmodi res, quarum vna sit mobilis multitudo, & altera immobilis vnitas, longissimè inter se distare videntur. Vnitas siquidem multitudini opponitur, immobile mobili. Quoniam ergo res illæ ab omni parte inuicem opponuntur, proximè sibi non succedunt, sed medio quodam indigent copulante. Animam vero ipsam, quæ est mobilis multitudo, Angelus absque medio antecedit. Ideo non potest Angelus esse immobilis vnitas, ne duo extrema sine medio coniungantur. Immobilis certè est, ut supra probauimus, ergo non vnitas. Restat ut sit Angelus immobilis multitudo, vbi cum anima conuenit in eo, quod ipse multitudo est, sicut & illa. Discrepat autem, quia illa est mobilis, hic immobilis. Multitudinem certò aliquam ponere in Angelo cogimur. At qualem? Qualis conuenit intellectui, hoc est, ut essentiam habeant, atque esse, vim intelligendi, intellectionis actum, rerumque intellectarum species plurimas. Cum vero Angelus non sit simplex omnino, sed habeat numerum, super numerum autem vnitas esse debeat, quia vnitas est numeri totius origo, & vnione non indiget, multitudo autem natura sua indiget vnione, necessarium est super Angelum esse aliud quiddam, quod non modo immobile sit, sed vnum penitus atque simplex. Ille quidem est Deus, tanto rerum potentissimus omnium, quanto est omnium simplicissimus. Siquidem in simplicitate consistit vnio, in vnitate potestas. Deum nemo dicere audeat ex pluribus esse compositum, quia si modo rectè compositus fuerit, ex aliquo constabit quod erit tanquam subiectum, & aliquo quod erit tanquam forma. Itaque non erit Deus vndique perfectissimus, cum in eo sit pars altera imperfectior ipso toto. Non erit agens summum, quia non per se totum aget quicquid aget, sed per partem alteram, id est, formam. Non erit beatissimus, quia non fruetur vbique seipso. Non enim se totum in membro quodlibet complectetur. Videbit autem in se aliquid aliud præter Deum, quoniam non idem pars est, & totum. Beatior certè futurus est, si quicquid ipse videbit in se, sit ipse, nusquam sibi desit, sed sibimet totus occurrat vbique. Denique pars illa quæ ponebatur in Deo quasi subiectum,

quia secundum se cogitatur in formis, se ipsam formare non potest. Pars insuper altera quæ vicem formæ gerebat, quia non consistit in se, multo minus ex se potest existere, formabitur ergo Deus iste compositus à forma quadam superiore, atque illa potius erit Deus. Hæc autem est prima discursio per quam probamus super Angelum esse Deum. Præterea quemadmodum se habet tuus oculus ad corpus tuum, sic tua mens ad animam tuam. Est enim mens tua animæ tuæ oculus. Rursus, quemadmodum se habet lumen Solis ad oculum corporis, sic veritatis lumen ad animæ oculum. Itaque sicut oculus corporis non est lumen, sed virtus luminis capax, ita mens quæ est oculus animæ, non est veritas, licet capiat veritatem. Mens enim tua veritatem quærit. Non tamen quærit seipsam veritas, neque admittit veritas falsum, per quod sæpe tuus animus fallitur. Finge animo, oculum tuum usque adeo excrecere, ut totum occupet tuum corpus, & sublata varia membrorum specie, vniuersum corpus vnus sit oculus. Si amplius hic oculus videbit quicquam, non aliud. certè videbit, quàm lumen idem Solis, quod angustus dum erat, prospiciebat. Verum accipiet lumen idem vberius, & colores corporum in ipso lumine conspiciet vndique, vno prospectu simul omnes, neque vertetur huc aut illuc ut videat, sed quiescendo omnes pariter contuebitur.

Aliud tamen adhuc lumen erit, aliud oculus. Si enim visus ad lumen comprehendendum est institutus, aliud visus est, aliud lumen. Et lumini nihil est opus visu, cum ipsi lumini nihil sit luminis capiendum. Finge iterum mentem tuam usque adeo super animam inualescere ut deletis reliquis animæ partibus ad phantasiam, sensum, generationemque pertinentibus, tota anima mens vna sit atque sola, hæc mēs sola puraque relicta, Angelus erit. Hæc inquam mens ampla eandem veritatem intuebitur, quam angusta mens viderat, sed accipiat illam vberius, atque in ea res omnes veras vnico intuitu conspiciet, ut Platonice loquar, neque modò vnā aucupabitur, modò aliam. Aliud tamen adhuc mens erit, aliud veritas. Quod sic aperit Zoroaster.

Μακάρε τὸ νοῦλον, ἐπεὶ νόσ ἐξωπαίρεται,  
Id est, Scito intelligibile ipsum esse extra mentem. Quippe si ad veritatem percipiendam instituta mens est, aliud est mens indiga veritatis, aliud veritas. Neque ipsi veritati opus est mente, per quam capiat

veritatem. Atqui si ipsa mens idem esset atque ipsa veritas, mens quælibet veridica esset, & omne verum particeps foret mentis. Nunc autem & mentes humanae falluntur, & multæ res veræ sunt quodammodo, quæ mente carent. Veritas non modo aliud est quam mens, sed & superius aliquid. Eget quippe mens veritate, veritas mente non indiget. Ac latius se fundit veritatis quam mentis imperium. Arsenim intellectualis in formis singulis inuenitur, in materia verò informi nequaquam.

Verè tamen materia dicitur, & omnium naturalium reuera subiectum. At verò si veritas est supra mentem, & quod superius est, non caret bonis inferioribus, non deest mentis perspicacia veritati. Neque tamen duo quædam sunt in ipsa, perspicacia videlicet, atque veritas, sed simplicissima veritas seipsa minime latens, perinde ac si lumē quāuis non habeat oculum à se distinctum, tamen non lateat semetipsum. Est enim Deus perspicacissima veritas, & verissima perspicacia siue perspectio, lux seipsa videns, visus seipso lucens, intellectualis perspicaciæ luminis que fons, cuius lumine, & cuius lumen duntaxat mentis perspicacia perspicit. Et sicut lignū per participationem quandam calidum dicitur, ignis vero secundum formam calens, Sol denique excellentiori modo secundum eminentem virtutem, causamque caloris, sic anima mentis partem, Angelus mentis formam habet. Deus est efficacissima mentis origo, atque, ut more Plotini loquar, Deus ipsa intellectio est, non in aliquo intellectu tanquam potentia, non veritatis velut obiecti, sed in se ipsa, sui que ipsius existens, quemadmodum si visio neque esset in visu aliquo, neque luminis alieni visio esset, sed in se ipsa maneret, sui que ipsius visio foret. Vbicunque enim intellectus, quasi intelligendi potentia ponitur, etiam si intelligat semetipsum, tamen qua ratione intelligibilis est, prior quodammodo seipso dicitur, qua ratione intellectualis consideratur. Intelligibile enim tanquam prius atque præstantius, intellectualem virtutem quasi posteriorem inferioremque mouet, & format & perficit. Idcirco quidam Deum potius siue intelligibilis, siue intellectionis quam intellectus nomine nuncupant, quanquam hæc etiam nomina Deo haud propria omnino ratione conueniunt. Sed de his aliàs. Accedit ad hæc, quod animæ opus est vitalem motum præbere ( siquidem ipsa, vita quædam est)

mentis autem opus ordinare per formas. Ipsa enim species quædam est, & secundum species operatur, quod in nostra mente conspiciamus. Vitalis ille motus per omnia viuientia funditur, rebus carentibus vita non competit. Ordinatio vero per formas, conuenit rebus etiam non uiuentibus. Hæ siquidem ordine specieque non carent. Tanto autem intervallo mens animam superat, quanto latius funditur formarum ordo quam vita.

Quoniam vero ultra formarum ordinem est prima illa in formis rerum materia, in qua latent quædam (vt ita loquar) formarum pullulantium semina, mentis munus quod terminatur formis, hæc informia non complectitur. Ipsa tamen materia bona est quodammodo, quia boni id est formæ appetens, quia ad bonum suscipiendum exposita, quia bono necessaria mundo. Semina quoque sunt bona, quia sunt formarum bonarum inchoationes. Tanto saltem intervallo bonitas mentem superat, quanto longius boni quam speciei tendit largitio. Quo enim res quæque potentior est, eo longius operatur. Accedunt ad hæc huiusmodi rationes. Omnia bonum appetunt, mentem verò non omnia, non enim assequi mentem & sapientiam omnia possunt, ideoque multa sunt quæ eam, non appetunt, ne frustra appetant. Si omnia appetenda conuertuntur ad bonum non ad mentem omnia, & quò conuersio rerum est, illinc est & profectio, omnia à bono procedunt, non à mente, quare bonum potius quam mens est causa prima rerum.

Rursus, quæ mentem habent, nondum tamen cessant, sed adhuc bonum quærunt. Mentis enim proprium est nixus quidam ad intelligendum. Aut post hunc nixum deterius se mens habet, aut melius, aut æquè. Non deterius, quia operatio ipsa perfectio quædam est, & ad deterius nihil nisi aut vi, aut inscitia labitur, quorum neutrum in ipsam cadit mentem puram & liberam. Non æquè, frustra enim nititur, quod nihil proficit. & nihil ad id quod habet, adnititur. Ergo vt melius se

habeat, conatur, non igitur ipsum bonum est, nihil enim bono melius. Sic mens intelligendo haurit bonitatem, aliunde autem haurit. Si enim in se haberet, non esset nixus opus, vt operando proficeret, Illud vnde haurit bonitatem, ipsum bonum est, quod & super eam extat, cum in eam perfectionis suæ liquorem infundat. Quinetiam sapientiam mentemque solo petimus rationis impulsu, bonum vero etiam ante omne rationis incitamentum, omnisque noster appetitus semper est ad bonum, non omnes semper ad mentem, & intelligentiam ratione boni appetimus, non conuerso. Pluris ergo natura facit bonum, quam mentem, cum & prius & sapius & potius trahat ad bonum. Vnde nonnulli satis in Philosophia habere se putant, si sapientiam videantur habere, etiam si non habeant, non tamen satis in vita, nisi reuera id possideant quod sibi precipue iudicant esse bonum.

Si bonum naturali instinctu preciosius mente censetur, censetur & eminentius. Hinc fit, vt id quod intelligere est, non sufficiat nobis, nisi & bene & bonum intelligamus. Sæpe enim ad tempus cognitionem respuimus, si eam suspicamur nobis malam fore atque molestatam. Bonum verò ipsum respuere nunquam possumus. Sæpe etiam rerum speculationi anteponimus voluptatem, ipsi autem bono, qua ratione bonum est, nihil vnquam possumus anteponere. Nihil magis necessarium est, quam incitamentum boni, cum bonum ipsum nullus possit nolle. Nihil magis voluntarium est, quam boni incitamentum. Nam propter bonum omnia, imò bonum in omnibus vbique volumus, tam libenter, tanquam iucundè, vt velimus insuper non posse nolle. Cum ergo in bono summa necessitas cum summa libertate concurrat, bonique imperium summopere necessarium sit subiectis, & summopere voluntarium, constat hinc omnia tanquam à patre originem ducere, atque huc omnia tanquam ad patriam adspirare.





# THEOLOGIAE PLATONICÆ,

DE IMMORTALITATE ANIMORVM.

EODEM FICINO AVTHORE,

LIBER SECVNDVS,

*Vnitas, veritas, bonitas idem sunt, & super ea nihil est.*

CAPVT PRIMVM.



Ribus iam argumentis ostendimus esse aliquid super Angelum. Primò quidem esse monstrauimus super ipsum, simplicissimam vnitatem, secundò veritatem, tertio bonitatem. Tria hæc vnum sunt. Nihil enim aliud est summa vnitas quam summa simplicitas. Propter hanc vnitatis simplicitatem, res quælibet pura, veraque est. Verum quippe vinum est, quod purum est vinum. Sic veritas rerum in simplici illa vnitatem consistit. Atque propter eandem simplicem puramque vnitatem res quælibet sunt bonæ. Quodlibet enim tunc se habet bene, quando sibi ipsi atque principio suo vnitum est, purumque manet, neque rebus deterioribus commiscetur. Ac si in rebus circa idem consistit vnitas rerum, veritasque, & bonitas, meritò super ipsas idem est primum ipsum vnum, verumque & bonum. Quod in iis sit rerum principium, illud argumento est, quod horum vestigia in cunctis reperiuntur, quasi ab his cuncta manauerint, & omnia hæc capiunt, utpote quæ suum principium repetunt. Singula enim vnitatis, veritatis, bonitatis, & participia sunt, & auida. Super vnitatem nihil est aliud, quia nihil est vnitatem potentius, quando quidem vnio perfectionem cunctis præstat, atque potentiam. Verum super eam si vis ut sit aliquid, duo

statim sequentur absurda. Si enim vnitas sub aliquo est superiore principio, certe superioris illius particeps. Inferiora enim à superioribus causis semper aliquid capiunt. Sic non erit hæc vnitas ipsa, sed aliquid ex vnitatem quadam & vi supernè accepta compositum, eritque multitudo quædam, non vnitas. Ac etiam quod vnitati præponitur, nullius erit particeps vnitatis. Nam superius principium ab inferiori quo ad naturam suam suscipit nihil. Igitur erit aut nihil, aut multitudo omnium penitus vnione priuata, cuius nulla pars vnum aliquid erit. Neque tota multitudo erit vna, neque vlla in erit communio partibus vel ad se inuicem, vel ad totum. Rursus super veritatem est nihil. Nam simili ratione hæc non esset veritas ipsa, sed verum aliquid ex veritate quadam & superioris illius portione compositum. Et illud quod super eam locatur, cum neque sit veritas, nec particeps veritatis falsum est penitus, atque nihil. Neque esse potest veritate præstantius, nisi per veritatis vim verum proculdubio sit, illud esse præstantius. Similiter super bonitatem non est aliquid. Nam & hæc non pura esset bonitas, sed bonum aliquid, ac bonitas quædam commixtione alterius, inquinata. Et illud quod bonitati præponitur, penitus erit malum. Non enim bonum erit, cum sit ultra terminos bonitatis. Neque melius bonitate, cum nihil nisi per maiorem bonitatis portionem sit melius.

Quomodo autem malum excedat bonitatem, non video, cum excessus atque imperium ad bonitatem pertineant, sunt enim appetibilia tanquam bona. Ergo malum per naturam bonitatis superabit bonitatem, & bonitas malo vim præstabit imperii. Præterea si est aliud rerum principium super ipsam bonitatem, ipsum certè aliquod ex se munus rebus impertiet, sicut omnis causa superior solet. Porro bonitas ipsa munus suū impertit omnib<sup>9</sup>, id est, unicuique aliquam bonitatem. Quærimus autem de illo munere quod à superiore descendit principio, vtrum sit bonitate donata melius, necne. Melius quidem esse nequit. Quicquid enim melius dicitur, maiori bonitatis portione melius appellatur. Tamen absurdum est, superioris principii munus non esse melius inferioris causæ inungere. Accedit quod cum omnia bonum appetant, si sit aliud principium super ipsum bonum, interrogamus vtrum ipsum appetant, an non. Si appetere dicantur, sequitur quod aliquid expetunt ultra & plusquam bonum. Si negentur illud expetere, stultum id quidem dictum, quod effectus causam primam, qua seruantur, non appetant. Quinetiam ipsa bonitas superius principium cupere compelleretur, quod absurdum est. Nam omnis ratio appetendi ipsa clauditur bonitate. Nihil igitur super bonitatem extat, quod amari queat. Nullum ergo est principium super ipsam. Quamobrem ipsa vnitas, veritas, bonitas, quam inuenimus super Angelum, ex mente Platōnis, omnium est principium, Deus vnus, verusque, & bonus.

*Non sunt dii plures inter se æquales.*

## C A P V T II.

**P**Rofecto dii plures non sunt, quia nequeunt plura esse principia. Verūm sint (si placet) dii gemini, duo scilicet totius mundi principia, hoc & illud. Quærimus nunquid hoc sub illo sit, an sub hoc illud, an æqualia vtræque? Si alterutrum sub altero sit, quod præcrit, planè erit principium, alterum minime. Si æqualia sunt, interrogamus, vtrum omnino inter se differant, an omnino conueniant, an partim differant, partim vero conueniant. Primum non concedetur. Nam saltem in eo conueniunt, quod vtræque sunt, aguntque & rerum principia æquè dicuntur. Ac si nullo pacto congruerent, nulla esset in machina mundi concordia. Si secundum

illum admittimus, quod omnino conueniant, non duo sunt iam, sed (vt cupimus) vnum. Sin detur tertium, quod partim congruant in natura, partim discrepent, tunc sanè quia nequeunt per idem consentire & dissentire, vna quædam inest natura communis vtrisque, per quam conueniunt, duæ præterea in duobus illis naturæ propriæ ultra communem naturam, naturam, per quas discrepant. Ergo neutrum illorum erit simplex, sed vtrumque ex communi natura & proprietate compositum. Neutrum erit primum, quia pendet ex illo qui partes inter se diuersas conciliauit in vnum. Neutrum per se sufficiens, cum & totum egeat partibus, & alia pars egeat alia. Neutrum potentissimum, cum non sit prorsus vnitum. Atqui illa natura communis per quam vtriusque æqualem vtræque habent hoc, vt sint æquè principia, principium erit potius quam illa duo. Imò illud erit principium, quod illis inter se diuersis naturam dedit communem.

Nam vna hæc natura quæ in aliis iacet, & aliorum angustiis circumscribitur, ab ipsa profuit vnitæ, quæ in seipsa consistens nullo limite coarctatur. Sic ergo natura illa communis & vna vtrisque prouenit aliunde, & ab altiori principio. Quin etiam naturæ illæ duæ propriæ per quas differunt, extrinsecus illis adueniunt. Nam præter illas nihil reliquum est in vtrisque, nisi natura communis & vna, à qua si absolutè nascuntur naturæ illæ propriæ quæ duæ adiunguntur, non amplius erunt diuersæ, vt Metaphysici arbitrantur, sed vna eademque erit vtriusque proprietas, eadem vena scaturiens, scaturiet enim per absolutum meræ naturæ modum, & refluat intro. Si itaque duæ illis insunt absolutæ proprietates, necessariò accedunt extrinsecus. Quapropter vtrumque essentia suæ proprietatem accipit aliunde. Et quia propriam sui naturam aliunde sortitur vtrumque, neutrum per se existit, sed fit à principio altiore. In quolibet autem rerum genere illud quod est generis illius summum, vnum est duntaxat. Si enim sunt duæ summæ luces, vtræque in eo quod summa lux est, conuenit, atque est vnum, Quod si etiam duo quædam sunt, per aliam naturam potius quam per lucem differunt. Ergo alia insuper adest natura à luce diuersa, cuius contagione lux fiat opaca, neque sit summa. Sic & summus calor est, qui frigori aut aliis non miscetur, quia si miscetur, vtrique impeditur, & vehementior fieri potest, si modo purgetur. Itaque summum in quouis genere, & vnum est

solummodo, & vnus duntaxat illius naturæ. Puta summa lux, & vna est, non duæ lucēs, & sola lux est, non lux simul & aliud quiddam. Deus summum est rerum omnium, Vnus ergo est Deus, & simplex, nempe vna summa vnitas, vna summa veritas, atque bonitas, Deus vnus. Vnus inquam apud Platonicos tripliei ratione. Primò, quia summa est vnitas. Nam quodlibet summum est vnicum, quid magis vnicum est quàm summa vnitas? propria quælibet rerum innumerabilium multitudo ad propriam redigitur vnitatem, multitudo innumerabilium hominum ad vnā humanā speciem, Equorum ad vnā equinā, similiter aliorum. Accipe deinde omnes proprias vnitates, quæ certo sunt numero terminatæ, id est, rerum species, easque ad vnā communem collige vnitatem, scilicet Deum principem specierum, vt sicut multitudines singularium infinitæ ad finitas vnitates specierum, sic vnitates specierum finitæ ad vnicā super speciem vnitatem referantur. Par est vt sicut proprius quisque rerum ordo ad proprium sui principium vnum dirigitur, sic vniuersus ordo rerum ad vnum referatur vniuersale principium, & sicut singulæ materiæ ad materiā vnā, omnia membra mundi ad vnum corpus, sic omnes mundi naturæ ad naturā vnā, omnes mundi vitæ ad vnā vitam, omnes motus ad vnum motum, omnes motores ad vnum mundi motorem. Porro quando plura quædam, & inter se secundum naturā diuersa, ordine quodam vno mutuoque conspirant, necessarium est vt ordo huiusmodi in illis sit propter ordinem quem ad vnum aliquid habeant, qualis est ordo partium exercitus inuicem, quæ est propter ordinem totius exercitus ad ducem vnum. Nam quod alia quæ diuersa inter se sunt, nanciscantur hoc, vt communione mutua vniantur, non prouenit ex propriis eorum naturis, per quas sunt diuersa, nam ex iis potius disiunguntur. Neque etiam prouenit ex diuersis quibusdam ordinatōribus. Hi sane per naturas eorum discrepantes, prout discrepant, ad vnum ordinem non incumbunt. Atque ita ordo ille plurimū mutuu, vel casu contingit vel ab vno ac primo ordinatore est institutus ad vnum finem omnia dirigente. Omnes verò partes mundi, quamuis diuersæ, ordine mutuo conciliantur, quia vnum constituunt corpus, mutant inuicem naturas, & mutantur. Inferiora corpora per superiora mouentur, superiora per naturā incorporalem. Neque casu contingit hic ordo,

quia idem semper & similis est, quia similem semper retexit telam, atque similiter. Deus igitur mundi vnus ordinator est vnus. Vnus inquam prima Platoniorum ratione, quia est vnitas. Est etiam vnus secunda eorundem ratione, quia est veritas. Summa enim veritas vna est. Nam si duæ summæ veritates esse dicantur, aut vna earum habet quicquid habet altera, aut non. Si primum datur, vna est, non duæ. Si secundum, neutra est summa. Deest enim isti illud veritatis quod in illa est, & illi quod est in ista. Iterum est vnus Deus tertia ratione Platoniorum, quia summa est bonitas. Summa quippe bonitas, quicquid boni reperiri vsquam potest, complectitur. Ergo si duas induxeris bonitates summas, quicquid boni in vna est, est & in altera, alioquin neutra esset summa, & secundum boni ipsius naturā vnum sunt, non duo, neque est aliquid aliud illis admixtum præter bonitatis naturā, quia alioqui summæ non essent, sed inquinatæ. Vnum igitur sunt omnino. Denique si dii duo sunt, & vterque potest æquè mundum hunc totum efficere, aut neuter faciet mundum, ac frustra erit in vtroque potentia, neque vsquam mundus erit, aut alter creabit mundum, ac frustra erit in altero potentia generandi. Aut generabit vterque totum, atque ita duo erunt mundi æquales omnino inuicem & simillimi, quorum alter sufficiet, superfluu erit alter. Si alter totum valet conficere, alter verò solummodo partem, qui non valet totum conficere, non est Deus, & frustra generabit mundi partem, quam alter simul cum toto fabricat mundo. Si autem vterque ad dimidiam mundi partem creandam vim habet, neuter cunctorum erit principium. Et quia illæ partes in vno toto ad vnum finem concurrunt communione naturæ, oportebit binos illos Deos ad Deum vnum referri superiorem, vt motus ad vnum, qui fit per duos, ducatur ex communione duorum ab vno quodam superiore deducta. Quod si quis asserat, à diis geminis duos construi mundos omnino inter se diuersos atque dissimiles, cogatur fateri tum Deos illos tum mundos nullo modo inter se conuenire. Quo igitur pacto aut vterque illorum est, atque est Deus vnus? viuunt, intelligit, operatur? aut vterque istorum est mundus vnus, opus, & corporale? Itaque conuenient mundi gemini inuicem. At vna natura in qua conueniunt, ab vno tandem principio trahitur, non duobus. Rursus si dii ambo eundem semper finem appetant, aut alter

erit ab altero, aut vterque ab vno superiore, aut saltem in vna substantia ambo. Nisi enim ita congruerent, ad eundem finem minimè conspirarent. Vtunque sit, vnus solus est Deus. Sin opus idem semper alter vult, alter non vult, sequitur opus illud & fieri simul, & non fieri, esse, atque non esse, si modo æque valet huius Dei velle, atque illius nolle. Ille enim solus esset Deus, cuius semper prævaleret affectus. At si modo consentiant inuicem, modo dissentiant, & nunc huius, nunc illius conatus exuperet, est vterque mutabilis. Neque assentiendum est Manichæis Gnosticisque Philosophis duos esse deos asseuerantibus, quorum alter sit bonorum omnium author, alter verò malorum. Nam sicut Deus qui bonorum est author, suum bonum est, mali totius expers, ita contrarius, summū malum, omni bono priuatum. Hic igitur neque ager quicquam neque cognoscet, neque viuet, neque erit omnino. Siquidem esse, viuere, cognoscere, bona expetendaque sunt.

*Non sunt dii plures, alius super alium  
sine fine.*

### C A P V T III.

**C**Æterum concedet forsitan nobis aliquis esse quidem Deum super Angelum, & vnum esse Deum, ita vt non sint dii plures æquales inuicem, esse tamen Deum alium super alium sine fine. Hoc licet arbitremur ex superioribus confutatum, aliis tamen rationibus clarius refellemus. Si dii sic innumerabiles sint, erunt rerum causæ infinitæ, sed gradatim innumerè superantes, siquidem ipsi dii rerum causæ sunt, & innumerè alij aliis præponuntur. Si ita, erunt quoque effectus in mundo innumerabiles. Quælibet enim causa suum aliquem in rerum ordine producit effectum, atque sicut causæ se inter se superant, ita se superat & effectus. Igitur infiniti erunt effectus in descendendo, & innumerè deficient sub se deinceps, si causæ sint infinitæ innumerè se superantes. Et cum superior causa semper longius virtutem suam in producendis effectibus iaciat quam inferior, in infinitum erit iactus effectuum, si causarum fuerit infinitus ascensus. Hoc quam absurdum sit, quis non viderit? Primò quidem, si non sit in rebus primum aliquid, non erunt sequentia vlla. Cuncta enim trahuntur à primo, quod quidem si nusquam extet, non erit vnde effluxus rerum aliunde fluentium vnquam

exordiat. Deinde videmus in rebus alias esse aliis perfectiores, perfectionisque virtutem ascendendo crescere, decrescere descendendo, quo fit, vt vis naturalis rerum descendendo sensim debilitetur. Vnde cogitur alicubi omnino deficere, postquam minuitur paulatim. Ideoque non potest res alia esse sine fine sub alia. Itaque non erunt effectus innumeri. Non erunt igitur innumeræ causæ. Siquidem eo ipso quod ascendendo crescit perfectio, perspicuè constat, illam quandoque ad summum venturam fore. Cur iudicamus animam corpore meliorem, nisi quia sit summæ bonitati propinquior? Si nusquam esset bonitas summa, sed in infinitum de bono ascenderetur in bonum, per infinitum interuallum omnino distaret à summa bonitate corpus, per infinitum similiter anima. Infinitum alterum non est aut amplius aut angustius altero infinito. Neque erit vsque ratio mensuraque idealis, per quam alia aliis præferantur. Quare nihilo vel propinquior vel conuenientior esset anima ipsi bonitati quam corpus, igitur neque melior, neque Angelus melior anima. Proinde quicquid fuit ab alio, natura sua fluitat, quoniam & secundum se nihil est, & per fluxum quendam prodit in esse. Si non sit in rebus primum aliquid, res quælibet emanabit ab alia, omnes igitur fluitabunt, quapropter nusquam erit vnitas, æqualitas, similitudo, status, ordo, & restitutio. Nunc verò quia hæc rebus insunt, oportet rerum ab alio manantium fluxum duci & cohiberi statu cardinis alicuius ab alio non manantis, perinde vt interminatum fluxum corporum liquidorum terminari, necesse est, non alio corpore liquido similiter diffuente, sed corpore solido. Denique superior quilibet gradus in inferiorem aliquid operatur, & à superiore accipit aliquid. Si nullus sit gradus in rebus primus, nullusque sit vltimus, quilibet gradus medius à gradibus infinitis superioribus dependebit, ac rursus gradus infinitos producet inferiores. Quapropter accipiet à superioribus perfectiones innumeras, cū accipiat à qualibet sui causa boni non nihil. Et infinita munera inferioribus exhibebit, cuique enim aliquid largietur, quapropter erit immensæ virtutis, & perfectionum plenus infinitarum. Sic res omnes æque erunt infinitæ, non erit res alia præstantior alia, non erit causa suo opere melior. Vel fortè res quælibet innumerè finita erit, quia innumerè ab antecedentibus excedetur. Rursus erit quælibet infinita, quia sequentia innumerabilia supe-



abit. Nec erit vsque vlla vera scientia, cum nequeant infinitæ rerum causæ comprehendī. Neque erit vn̄uerso quod appetitum moueat, aut sistat, si non sit principium primum, vltimūque finis. Huius enim virtute mouetur appetitus omnis, atque firmatur. Vnum igitur omnino sit rerum principium, vocetur vnitas, quia per excellentissimam simplicitatem supereminet omnia. Veritas, quia producendo esse dat omnibus Bonitas, quia producta ad se reuocando præstat & bene esse. Atque vt tradit Ioannis Apostoli Theologia, Theologorum omnium diuinissimi, (quem Platonius Amelius libenter amplectitur) Vnitatem vocat principium, Veritatem principij rationem, Bonitatem denique, principij rationalis amorem. Atque hæc ipsa substantia, scilicet vnitas, vera bona, seu veritas vna bona, siue bonitas vna vera, sit vnus bonus verusque Deus. Sed quia vnitas est, idè sit veritas, quia vnitas vera, idè bonitas. In vnitate implicat cuncta, explicat in veritate, effundit per bonitatem. Cuncta vero postquam inde fluxerunt, refluunt per bonitatem, reformatur per veritatem, restituuntur in vnum per vnitatem.

*Dei virtus est infinita.*

#### C A P V T I V.

**S**icut in summa dispersione est imbecillitas infinita, sic in vnitate summa infinita potestas. Actus natura sua terminum non includit. Nam subiici termino, passio est, quæ actui est opposita. Actus ergo non patitur terminum, nisi quantum subiecto cuidam, vbi aliquid passiuæ potentie est, innititur. Actus vero diuinus in se ipso subsistit. Virtus ipsa efficax, quatenus virtus est, certum graduum numerum non includit. Quid enim prohibet in alio numero sicut in alio, virtutem ipsam vt virtus est, & cogitari & esse? Quapropter non aliunde graduum accipit terminum, quam vel à passiuæ potentia cui miscetur, vel à causa terminante. Diuina verò virtus pura est atque summa. Esse ipsum prout absolutò consideratur, est immensum, quia & infinitis rebus & innumerabilibus modis communicari potest & cogitari. Igitur si alicuius esse sit finitum, oportet illud esse finiri, vel per ipsius causam, vel per subiectum. Neutrum contingit Deo. In ipso autem infinito esse ita est infinita virtus, sicut in esse finito, finita. In ipso puro nihilo nullus essendi est ha-

bitus, siue verus, siue imaginarius. Quis enim sub essendi ratione definiat nihilum? Ergo in ipso esse puro nihil est vel priuationis essendi, vel potentie ad non essendum, aut vera aut imaginaria ratione. Igitur neque potest vel cogi, vel cogitari non esse, quod ad eius spectat æternitatem, neque potest deesse illi virtutis gradus vllus, qui mente queat effingi, Alioquin mens, quæ Dei effectus est, vltra Deum sese posset extendere, quæ quolibet finito graduum numero valet semper ampliorem aliquid cogitare. Imò etiam frustra ad infinitam progressionem esset mens ordinata, nisi inueniretur terminus aliquis infinitus. Et quia nihil veri bonique veritati ipsi deest, & bonitati omnes in ea gradus insunt quodcunque & intelligi tanquam veri possunt, & appeti tanquam boni. Tales sunt gradus innumerabiles. Omne autem agens tanto est validius, quanto remotiorem ab actu potentiam patiendi producit in actum, maiore si quidem virtute opus est ad aquam calefaciendā quam ad aërem. Sed illud quod omnino non est, infinite distat ab actu, nec vllam adesse ipsius actum suspiciendum habet potentiam, de quo planius in sequentibus differemus. Siue igitur Deus aliquid creat nuper ex nihilo, siue continuè materiam primam corporum, atque essentiam mentium animorumque ex nullo antiquiore subiecto edit & seruat, semper ab actu primo, id est, diuino pendentem, proculdubio immensam possidet agendi virtutem. Quid plura? Motus ordoque tam æqualis per tot secula huius tam ingentis tanquam multiplicis machine docet infatigabilem esse, ideoque infinitam in gubernatore potentiam. Finita namque potentia, tempore infinito, imò etiam longo quamuis finito, fatigatur & claudicat. Ab infinita igitur potentia Dei, intellectus omnes accipiant vt semper firmiterque intelligant, animæ vt sine fine discurrere valeant, materia vt interminatam habeat potentiam capiendi. Motus tempusque vt absque termino fluere possint, generatio quoque rerum (sicut placet Physicis) vt alterna & innumerabili successione queant continuari. Actionem enim motionemque infinitam ab infinita purant virtute originem ducere, & quæcunque vel potentia, vel quomodocūque aliter quodammodo infinita dicuntur esse, per summam actumque existentem infinitam talia esse atque iudicari. Hinc diuina natura ab Orpheo ἀπλῆστε πλευνῆ, id est, infinitus finis cognominatur.

*Deus est semper.*

## CAPVT V.

**S**I res quælibet tanto est diuturnior, quanto virtus, per quam permanet seruaturque, potentior est, Deus per infinitam virtutem suam in infinitum & ipse permanet, & cætera seruat. Item diuina veritas omne rerum antecedit initium, omnium rerum fini succedit, nam & ante cuiusque initium, verum erat initium illud fore, & post omnem cuiusque finem, verum erit finem illum fuisse, quicquid autem aliquando verum est, veritate verum est. Si autem veritas ipsa incepisse dicatur aliquando, longe antea per eandem veritatem verum fuerat, veritatem illam aliquando incepturam. Ac si desinere fingatur, adhuc postea per eandem veritatem verum erit, veritatem illam desuisse. Veritas igitur neque incipere vnquam, neque desinere cogitari potest. Rursum, si Deus super motum tempusque existit omnino, temporalem mutationem à priori in posterius secundum esse, atque non esse, non suscipit. Accedit, quod si Deus est summa essendi necessitas, quod in sequentibus ostendemus, nunquam potuit potest non esse. Denique si quicquid aliquando nascitur, ab aliquo sit priore, & quicquid resoluitur, in aliquid quod antiquius est resoluitur, non potest incepisse aut desinere, quod est primum. Cogitamus sæpenumero mente durationem quandam simplicem absque principio atque fine, appellamusque eam (vt ita loquar) sempiternitatem, quæ quidem ipse Deus est, etiam si minimè discernamus. Omnis enim simplex infinitas Deus ipse est. Discernere autem tunc prohibet phantasia, quæ mox sempiternitatem ipsam simplicem atque consistentem fluxu quodam multiplici induit & confundit, itaque fallit nos, nimirum dum ad accidentalem temporis fluxum trahit, quod est substantialis status æternitatis. Atque ita impellit, vt quod Deus est, tempus esse putemus. Deus ergo æternus tunc se nobis offert, sed tempore inuolutus. Nemo verò dubitare debet Deum semper esse, quando Deus est ipsum semper. imò sempiternitas ipsa, est ipse Deus. Et quæ sempiterna dicuntur, illa sunt propriè quæ Deus propagat per seipsum, & in seipsum.

*Deus est vbiq.*

## CAPVT VI.

**E**X superioribus probare possumus vbiq. esse Deum. Quemadmodum corpus tangit illud in quo est, per quantitatis dimensiones, ita incorporea substantia per virtutem. Quamobrem sicut si esset in natura dimensio corporis infinita, esset vbiq., ita postquam est aliqua immensa incorporealis substantiæ virtus, necessariò hæc est vbiq. Et quemadmodum particulari effectui adest, ceu ignis ignito ligno, ita vniuersalis vniuersali. Vbicunque igitur reperitur vel cogitatur esse, quod est vniuersalis effectus, ibidem est & Deus, qui vniuersalis est causa.

Vbicunque est opus aliquod, quod per certam causam solam, & sine medio fieri necessarium est, ibidem eius causa debet esse, est autem vbiq. aliquid, quod per solum Deum modo quodam creationis potest subsistere. Id vero est materia prima in corporibus, essentia in spiritibus. Appetibile est tanquam bonum vbiq. simul adesse, ferè non minus, quam semper esse, primo autem bono nihil deest boni. Non prohibetur Deus ab aliquo penetrare per omnia, infinitæ enim puritati virtutique resistit nihil. Non patitur natura Dei circa se loci terminum, sicut non patitur in se terminum dignitatis, quia si summa ipsa infinitas nihil finiti patitur, sit vt Deus ita non habeat finitam præsentiam spatii, sicuti non habet vim, actionem, durationemque finitam. Nec putandum est ipsum bonum, minus toti adesse mundo, quam toti corpori animam. Minus enim est mundus ad Deum, quam corpus ad animam, magisque eget Deo mundus, quam corpus anima. Bonum latius est quam vita, quia pluribus conuenit, magis quoque necessarium est mundo quam vita. Vita enim sublata, cessaret quidem mundus moueri, sublato bono, esse desineret. Si ergo in vno mundi corpore viuente, vna quædam vita vbiq. est, quod alias ostendemus, multo magis vnum ipsum bonum est vbiq., etià extra mundum. Si primum patiens, quod est materia, & essentia, per omnia propagatur, multò amplius per omnia, & ultra omnia sese propagat primum agens, quod est Deus. Non decet mentis machinationem vltèrius quam boni præsentiam progredi, illa vero progreditur per immensum. Ac decere Platonici putant, infinitum bonum per immensum exuberant-

do ita sese integrum fundere, vt nullam vel imaginariam immensi particulam, siue in mundo sit, siue cogitetur extra mundum, relinquat sua præsentia destitutam. Quippe si natura boni est seipsum amplificare, infinitum bonum amplificat infinitè seipsum. Difficile reperitur vbi sit Deus, quia nusquam est, quod nullius, vel subiecti, vel loci limite cohibetur. Difficilius reperitur vbi non sit, quia in omnibus est illud in quo sunt, per quod fiunt, per quod seruantur quælibet vbique. Deus ideo est in omnibus, quia omnia in eo sunt, quæ nisi essent in eo, essent nusquam, & omnino non essent. Per Deum hoc ipsum vbi est, diciturque vbique. Per Deum tanquam ducem, & tanquam lucem agit & quærit quodcumque agit quisque, & quærit alicubi. Non desideratur vsquam nisi bonum, non reperitur vsquam nisi verum. Deus est omne bonum, Deus est omne verum. Adde quod Deus amplitudo & plenitudo ipsa est. Non video igitur cur non amplifcet per cuncta seipsum, & singula impleat. Si visibile lumen, quod alicuius est, & in aliquo, atque finitum, per totum dilatare se mundum potest, certè lumen inuisibile, quod sui ipsius est, & in seipso infinitum, per mundum se amplificat, & extra mundum. Lux enim finita sicut ab infinita nanciscitur, vt luceat, & vt plurimum luceat, ita etiam vt latissimè luceat. Si ergo absente ad breuissimum tempus, siue per eclypsin, siue per noctem Solis lumine, tam malè se res habent, quàm pessimè se res, si Deus ab eis semper absit, habituras esse putamus. Cur non potius si absit per momentum, id quod ipsum esse est, repente in nihilum ruituras? Sapienter Orpheus in Saturni hymno inquit:

*ὁς ραίεις κατὰ πάντα μέρη κόσμου γενάρχα,*  
Id est, qui omnes mundi partes habitas generationis princeps. Cogitamus sæpe purissimam quandam capacitatem, quam nulli vsquam limites capiant, quæ capiat quæcumque possunt esse vel fingi. Quoniam verò pura ipsa infinitas nihil aliud est quam Deus, quando illam cogitamus capacitatem, tunc Deum ipsum excogitamus, & si minus animaduertimus.

Fallit enim mox suis nos præstigiis phantasia, subito pro diuinis radiis adducens tractum aliquem linearum in longum, latum, atque profundum, atque ita compellens dimensionem nobis aliquam vel inane videri, quod diuinum est lumen. Fallit nos iterum quando consideramus Deum omnia prorsus implere, tunc enim illa persuadet eum in rebus quodammodo collocari.

Sed reuera ille sic vbique est, vt in eo sit illud quod vbique appellatur, imo vt ipse sit ipsum vbique, quod capit seipsum, & reliqua, & quæ præter illud dicuntur vbique esse, ea sunt propriè quæ illud per seipsum amplificat in seipso. Ratio dicat id quod vbique nominatur, nihil esse aliud quam vniuersam naturam rerum, eamque esse Deum, ideoque quando dicimus Deum vbique esse, intelligi debere eum in seipso esse, atque conuerso. Nusquam præterea abesse Deum, si nusquam abest ipsum quod vbique vocatur. Phantasia verò cum putat naturam rerum esse solum hanc machinam corporalem, clamat id quod nominatur vbique, nihil aliud esse quam totam corporalium rerum extensionem, quam cum opinetur esse amplissimam, diffidit Deum hanc omnem posse replere. Ratio contra reclamationem, corporalem machinam vmbra quandam exilem & exiguum esse, quæ innumerabiliter in paruas partes, partiumque particulas diuidatur, habeatque paruitatem interminabilem, magnitudinem terminatam. Magnum autem reuera asserit esse illud, in quo nihil est paruum, in quo quicquid est, totum est, magnumque equè. Et sicut totum replicatur per omne quod est intus, sic explicatur totum per omne quod extra. Cōsistens itaque Deus in se, existit vbique. Nec per mundum Deus, sed mundus per Deum, quatenus potest, extenditur. Et sicut vim diuinam quæ infinita est, mundus assequitur modo finito, ita præsentiam eius quæ per immensum vndique fulget, finito quodam situ consequitur. Non progreditur per rectam lineam mundus vt attingat Deum, qui nusquam abest, sed conuoluitur pro viribus circa illum, imo reuoluitur in illo ibi duntaxat, vbi diuina lege situs ei motusque præscribitur. Anebon & Abamon Ægyptij sacerdotes, Plotinus quoque Ambliciusque & Iulianus Platonici, non Deum tantum, sed omnem quoque mentem, siue angelicam, siue animalem, per immensum se integram fundere voluerunt, ita vt huiusmodi spiritus absque mutua confusione sibi inuicem insint vbique quemadmodum diuersi habitus virtutum in anima, & diuersa simulachra colorum in aëre, quorum sententia his fundamentis innitur. Formæ spiritu rationali inferiores, quia ex certis terminatisque materiis oriuntur, iisdem necessario cohibentur. Spiritus autem rationales quoniam nullo pacto pullulant ex materia, ideo neque in se certam habent dimensionem, neque dimensionem alicui alligantur.

Quapropter

Quapropter cum æquè quamlibet spatij cuiuslibet partem respiciant, aut nusquam sunt, aut sunt in vniuerso, non est dicendum omnino nusquam adesse, quæ reuera existunt, nusquam igitur absunt. Mens omnis aliquo modo æterna est. quod æternum est, quamuis indiuisibile sit, secundum tempus, tamen per omnem cursum temporis seipsum porrigit. Sic rursus, quāuis indiuisibile sit secundum spatium, tamen per omne spatium dilaturatur. Et sicut se habet tempus ad æternitatem, ita temporale ad æternum. At momenta temporis momentum æternitatis reperiunt semper, puncta igitur corporis, temporalis punctum vbique spiritus æterni reperiunt. Æterna res quemadmodum extra tempus est semper, ita extra locum esse videtur vbique. Quocunque momenta temporis fluunt, in punctum æternitatis incurrunt. quacunque trahitur linea, punctum attingit. Quacunque tenditur spatium, reperit rem æternam. Quid est potissimum quod potest vbique esse? Id certè cui non repugnat quantitatis dimensio. Quid rursus quod potest esse semper? Id maximè quod qualitatis actio non expugnat. Quoniam verò qualitas quantitate admodum efficacior est, quicquid non prohibente qualitate semper esse potest, multo magis potest non prohibente dimensione vbique esse. Localis motus, qui extrinsecus motus est, tanto in re qualibet perfectior apparet, quanto intrinseca rei natura est efficacior. Ideo propagare se per omnia quod motum localem imitatur, exigit, vt in re ipsa prius sit virtus ipsius perpetua conseruatix, quæ quidem intrinseca perfectio dicitur, & cui hæc intrinseca perfectio competit, consequenter conuenit extrinseca per vniuersale spatium dilatio. Præstantius autem est semper esse, quod est tanquam intrinsecum, quam vbique esse, quod tanquam extrinsecum est. Idcirco quod potest esse semper, multo magis vbique esse potest. Facilius est enim pigras dimensiones excedere, quam motionem qualitatis & temporis efficacem. Mēs tam sibi quam aliis præ cæteris significat naturam, consilium, affectum Dei, prodit ergo ex Deo tanquam verbum, imo tanquam verbi significatio à loquēte Deo. Quoniam vero vbicumque est qui loquitur, illic & verbum, sequitur vt vbique sit mens, sicut vbique est Deus. Mens cogitatione effectumque immensa est, prout immensa machinatur & vult, perque immensum sua operatione discurrit. Non potest autem ibi lucere operarique vbi non est,

neque potest operatio talis latior esse quā essentia. Est igitur in immenso. Finis ignis est vltimi cœli concavum. Ideo flammula quælibet, si nihil prohiberet, illuc vsque euolaret, & quando concavum illud attingeret, si dimensionem haberet sufficientem, se per totum illud amplificaret, vt toto eo quod sibi naturale est, frueretur. Quod si esset indiuisibilis, conaretur esse in quolibet illius puncto tota, vt tota frueretur vbique. Scopus finisque mentis est ipsum verum bonumque, id est Deus. Huc essentiali quodam instinctu ignis instar currit prius quā vitali, & vitali prius quam intellectuali. Nihil est autem quod obstat quin essentia mentis vsque ad Deum penetret, corpus enim spiritui non resistit, multoque minus spiritus. Ac deus omnia penetrat. Attingit ergo mens per institutum essentialem semper deum, adde & vbique, nam & ad hoc ipsum nititur, & non habet vel assignatam dimensionem, vel situs alicuius indigentiam naturalem, per quas vbique esse prohibeatur. Et quia vbicumque est, aliquid agit, sequitur vt viuat intelligatque vbique semper in deo. Quamuis autem sint mentes quælibet per immensum, videntur tamen aliæ ad aliam immensi regionem manifestius actiones quasdam dirigere, mentes quidem Angelicæ gubernando, animales viuificando, perinde ac si multæ candelæ in eadem aula accendantur, quarum singula lumina totam impleant aulam, iuncta quidem inuicem, sed non permixta, potest enim lumen à lumine separari. Lumina hæc & si per totam aulam diffunduntur, singula tamen ad candelas singulas diriguntur. Fieri vero potest, vt mens aliqua putet in eo se tantum corpore esse quod regit, licet sit vltra corpus vbique, sicut mēs nostra quamuis in toto hoc corpore sit, tamen apud multos Philosophos in corde tantum esse se putat. Hæc illi de mente. Nos autem reuertamur ad deum.

*Deus omnia agit & seruat, & in omnibus omnia operatus.*

## C A P V T VIII.

**E** Sse deum, & esse vnum, primumque, & infinitum virtute, duratione, spatio, per superiora monstrauimus, ex quibus confirmatum est illud, quod in libro de veritate & opinione dixit de deo Parmenides Pythagoreus, ὃν ἐὰν τίς ποτε πείσῃ, id est ens vnum immobile infinitum. Hunc vero deum agere omnia & seruare, & in omnibus omnia operari, deinceps ita probabimus. Si deus est vnitas simplicis-



suma, atque hæc vna sola in natura est, quia est summa, quicquid est præter Deum, multiplex est & compositum. Multitudo autem omnis ab unitate, & omnis compositio à simplicium puritate descendit. Si Deus est summa veritas, & sine veritate esse potest nihil, quomodo enim erit quicquam, nisi & reuera sit id quod esse dicitur, & verum sit ipsum esse, à Deo cuncta proficiscuntur. Si Deus est summa bonitas, atque hæc per sui naturam summo-pere sese communicat, cunctis sese Deus impartit. Ideoque bonum appetunt omnia, quoniam cum à bono sint nata, suam originem reperunt, vt vnde effecta sunt, inde perficiantur. Res quælibet semper aliquid agunt, atque eo tempore magis, quo meliores in sua specie sunt, & illæ maximè, quæ in meliori sunt specie, & quælibet pro viribus sibi similia operantur, similia etiam, si possunt in specie. Et boni gratia operantur. Quapropter à bono per bonum ad bonum fit omnis in rebus quibuscumque actio. Igitur summa bonitas, quia bonitas est, agit, quia summa, agit semper, quia non est in specie aliqua terminata, sed æquè communis est omnibus speciebus, agit in omnes. Præterea quoniam Deus non miscetur alicui, nullius proprius dux, sed communis existit. Si est communis, commune sibi competit munus. Esse ipsum rebus omnibus est commune. Esse igitur ubicumque sit, pendet ex Deo. Quod mysticè tetigit Zoroaster.

*ἐστὶ πάντα πῦρ ἐκ πυρὸς ἐκ γενεῶν,*

Id est, omnia sunt ex vno igne genita. Insuper inferiora mundi corpora de non esse migrant in esse, & de esse transeunt in non esse. Superiora de alio esse mutantur in aliud, seu de alio essendi modo mutantur in alium. Propterea hæc omnia æquè se habent per naturam suam ad esse atque non esse. Si nihil aliud sit super huiusmodi corpora, vel non accepissent esse vnumquam, vel si quando accepissent, iam dudum esse omnia desuissent: non accepissent, quoniam si æquè se habent per naturam suam ad esse, atque non esse, seipsa adesse, nequaquam determinant. Iam pridem desuissent, quia cum fluant natura sua, si non ab alio stabiliore detinerentur, iam dudum in nihilum desuissent. Præest ergo mobilibus mundi corporibus substantia incorporalis & stabilis. Hæc si æquè se habet ad esse atque non esse, vt corpora, rursus indiget alio terminante. Tandem ergo vna quædam substantia sit oportet, quæ sit necessario per se ipsam, & hæc simplex erit omnino. Quippe si componerentur ex

partibus, non per se esset quidem, sed per partium conspirationem atque per illum qui diuersas inter se partes conciliauisset. Imò æquè dissolutioni partium subiecta foret, ac fuit subiecta connexioni, ideoque non esset ex necessitate, cum per dissolutionem posset etiam quandoque non esse. Talis est vtique Deus, substantia simplex, necessario per se subsistens. Quam ob causam Orpheus Deum appellauit necessitatem.

*θεὸν γὰρ ἀνάγκη πάντα κρατεῖ,*

Id est, fortis necessitas omnibus dominatur. Si summa essendi necessitas Deus est, & quod summum est in quolibet genere, vnum est duntaxat, nulla res præter Deum erit talis essendi necessitas. Nempe si talem quoque esse vis Angelum, ita vt duæ sint summæ necessitates, Deus, & Angelus, declarare cogeris qua in re Angelus differt à Deo. Non enim in ipsa essendi necessitate, nam in hac vnum abs te ponuntur esse. Igitur erit aliquid aliud præter ipsam necessitatem in Angelo, per quod à deo differre queat. Quapropter non erit Angelus summa necessitas, quādo est non necessitas pura & sola, sed mixta. Quicquid autem est in aliquo genere summum, purā debet habere generis illius naturam, rebus aliis non immixtam, ne minuat per mixturem. Cogeris etiam respondere, vnde habeat Angelus illam necessitati additam proprietatem, vtum à sui ipsius necessitate, an aliunde? Si primum detur, eandem proprietatem habebit deus à simili sui ipsius necessitate prouenientem. Ergo per illam à deo Angelus non distinguitur. Si concedatur alterum, sequitur vt aliunde propria Angeli ipsius natura nascatur, quam ab Angelo, quia proprietatem per quam distinguitur, extrinsecus adipiscitur. Quod autem aliunde pendet, non est necessario per se ipsum. Non est igitur Angelus, aut aliud quoduis essendi necessitas, sed solus deus. Si nihil aliud præter deum existit necessario per se ipsum, à deo cuncta accipiunt esse. Hinc Physicorum quorundam prophana sententia condemnatur, qui materiam, mundum, mentem, non solum semper fuisse opinantur, verū etiam nullo modo ex Deo secundum essentiam dependere, quāuis secundum actum inde pendeant, moueri enim operarique ad bonum omnia fatentur, tanquam ad finem. Considerare debent, quicquid sibi in operando non potest sufficere, sed ab extrinseco sine sufficientiam exigit, multò minus in essentia sibi posse sufficere, vtpote quod ab extrinseco principio habet essentia.

Quippe si eiusdem est perficere cuius efficere, atque conuerso, sicut omnia bono perficiuntur tanquam fine, sic ab eodem tanquam principio efficiuntur. Et cum essentia in fonte suo perfectissima sit, si quodlibet illorum trium essentiae suae fons esset, cuiuslibet illorum substantia æquè perfecta esset tum ad se inuicem, tum ad Deum, neque ad Deum, sed ad seipsa tanquam ad finem perfectionemque suam conuerterentur. Sicuti se habet ars ad naturam, sic & natura ad Deum.

Artium opera eatenus permanent incorrupta, quatenus vi naturæ seruantur. Ut statua constat diu per naturalem lapidis aut æris soliditatem, similiter naturalia quæque eatenus manent, quatenus Dei seruantur influxu. Et sicut natura operibus suis infert motum, sic Deus naturæ præstat esse. Tamdiu opera naturæ mouentur, quamdiu natura mouet. Tamdiu igitur existit natura, quamdiu Deus seruat eam in existendo. Præterea vniuersum hoc opus Dei, vel fuit semper, vel aliquando incepit esse. Si fuit semper, primum momentum assignari non potest in quo præcæteris esse à Deo acceperit. Ergo aut in nullo accepit, quod est falsum, aut quolibet momento accipit inde, hoc autem nihil aliud est, quam ab eo continuè conseruari. Si vero esse incepit aliquando, multò magis Deo eget tanquam conseruatore, quo quidem egeret etiam si poneretur æternum. Omnino autem quod alicui secundum naturam suam conuenit, prius conuenit, quam quod aduenit aliunde. Sed operi secundum se quidem conuenit non esse, postquam non accedente causa non fuisset, per causam verò conuenit esse, prius igitur illi ut non sit conuenit, quam ut sit. Quapropter prius illi competit ut à causa seruetur, quam ut à seipso. Et quia quod naturale est, nunquam amittitur, semper tale est, ut submotam causæ virtute non perseueret in esse, postquam tale fuit ab initio naturaliter, ut non prodiret in esse seorsum à causæ actione. Causam verò propriè Deum vocamus, qui solus rem quamlibet efficit totam, neque cogitur aut alterius auxilio indigere, aut aliunde materiam mutuari, sed cogitur res quælibet inde tota pendere semper, ut à corpore umbra. Quippe quando causa effectum efficit ipsa totum, atque effectus si ad substantiam causæ comparetur, imaginarium quiddam est & vanum potius quam substantiale, tunc sanè effectus tanquam per se vanus continuo causæ subsidio indiget, & causa quæ fecit totum,

conseruat totum. Mundus autem si cōparetur ad Deum, finitus videlicet ad infinitum, vanior est magisque umbratilis, quam si finiti corporis umbra finita comparetur ad corpus. Denique summa causa rerum sic rebus penitus dominatur, si res non semel modo ab illa manauerint, sed & assidue pendeant, sicut imagines à corporibus fiunt, ac seruantur in speculo. Quoniam ergo Deus agit seruatque omnia, ideo in omnibus operatur, id est, causæ rerum sequentes Deum nihil agunt, absque virtute actioneque diuina. Si Deus Angelo esse actumque largitur, & seruat, largitur etiam agendi virtutem, largitur & actionem, atque conseruat. Ita quicquid Angelus naturaliter operatur, Dei operatur virtute, sicuti instrumentum virtute agit opificis. Ergo Deus agit non Angelum solum, verum etiam ipsum Angeli opus, & multo magis quam Angelus opus efficit Angeli, cum ipse sit prima actionis origo. Si opus hoc quod est factum ab Angelo, agiter ipsum aliquid, per eandem agit Dei virtutem, per quam & ipsum factum fuit ab Angelo. Quæ obrem Dei virtute fit, quicquid ubique fit, à quocunque fiat, præsertim cum omnia quæ aliquid agunt, esse quodammodo suo operi præbeant. Esse inquam hoc, aut illud, tale, vel tale. Ita cuncta quæ sub Deo sunt agentia, ad vnum communem scilicet essendi concurrunt effectum. Agentia verò plurima & diuersa, in vnum opus quod est esse, non conspirant, nisi quia ipsa sunt vnum, neque vnum sunt nisi quia sub vno sunt, atque ad vnum. Vnius itaque Dei agentis primæ virtute agentia reliqua operantur. Nonne secundum ordinem effectuum, ordinem causarum disponimus? Primum omnium effectum est esse, reliqui siquidem effectus nihil aliud sunt, quam quædam ipsius esse determinationes & proprietates. Prius enim est vnumquodque secundum naturam, deinde est hoc aut illud, tale, vel tale. Adde quod & vltimum quod amittitur, est esse, prius enim amittitur esse tale, quam simpliciter esse. Quare esse ipsum proprius est illius agentis effectus, quod est principium finisque omnium. Atque ad id cætera agentia siquid conducunt, primæ agentis virtute conducunt. Et ipsa tanquam inferiora angustiorisque imperij, nihil agunt aliud, nisi quod vniuersalem illam Dei vim actionemque ubique ad esse vniuersale tendentem, distinguunt passim adiuuante Deo, & affectiones quasdam esse ipsius inducunt potius quàm essendi naturā. Imo diuina virtus per varia media seipsam ad varios distin-

guit effectus, sicuti Solis lumen, quod per se ad quemlibet colorem æquè se habet, si per duas fenestras vitreas penetraverit, quatum altera rubra sit, altera viridis, duos in pavimento splendores efficiet, rubrum scilicet atque viridem. Quod quidem vterque sit splendor, simpliciter habebit à lumine. quod vero alter rubeus sit, viridis alter, à lumine rursus habebit, sed quantum per tale vitrum penetrans aut tale, aliter aliterque se format. Concludamus primo, quod causa prima vehementius agit in quouis effectū quam reliquæ causæ, quia vestigium quod ab ea imprimitur, scilicet esse, & prius imprimitur, & posterius deletur, quam reliquarum vestigia causarum, quasi fortius imprimatur. Deinde quod cæteræ causæ super vestigium primæ causæ sua firmannt vestigia, quæ sicut omnia sua opera necessario in opere causæ primæ fundant, sic virtutes actionesque suas in illius virtute actioneque stabiliunt.

*Deus agit per suum esse quicquid ager.*

## C A P V T VIII.

**S**ed ne quis Epicureus Deum dicat, si multa egerit, solitari consilio, & opere onerari, meminisse oportet, Deum quia per suum esse solum opus suum potest efficere, consilio & electione non indigere. Nam si ipsum esse diuinum non tantum esset, ut valeret per se operari, sed consilio quodam quod ab ipso esse sit differens indigeret, nullius certe rei esse per se quicquam operaretur. Nunc autem corporum qualitates agunt in se inuicem absque consilio. Nunquid Sol illuminat mundum, & ignis calefacit, & anima alit corpus per electionem potius quam per esse? Proinde illa etiam, quæ per electionem agunt, aliquid etiam per esse suum faciunt naturale, id est, per virtutem ipsi esse insitam naturaliter. quippe hominis anima licet multa per electionem agat, corpori tamen sine electione ipso esse dat vitam. Nonne etiam electio ipsa quodammodo opus est animi? Atque huiusmodi opus ab ipso esse animæ est absque præcedente electione, ne similiter illa præcedens electio, electione alia indigeat præcedente, & alia rursus alia.

Sic opus quodlibet animæ requireret ante se electiones innumeras priusquam inciperet fieri, neque inciperet vnquam fieri, quoniam infinita transire non licet. Colligamus ita: Si actio quæ per esse ipsum naturale peragitur, inest omnibus,

non autem actio illa quæ fit eligendo, quia corpora nihil eligunt, atque etiam actionem ipsam electionis consiliique antecedit semper actio, quæ fit per esse ipsum atque naturam, constat planè actionem hanc quæ ipso esse fit, causæ vniuersali & primæ, qui Deus est, conuenire, ut prima communisque actio primi sit, & communis agentis. Actio quæ fit per esse, fit absque cura atque labore. Sic Sol vno actu facillimè illuminat quodammodo infinita, & gignit illuminando. Ignis plurima facillimè calefacit, anima nutrit corpus, digeritque in ipso multa simul absque solitudine atque labore. Sic Deus per esse suum, quod est simplicissimum quoddam rerum centrum, à quo reliqua tanquam lineæ deducuntur, facillimo nutu vibat quicquid inde dependet. Hoc autem interest inter agens primum, & agentia reliqua, quod primum agens ita per esse dicitur operari, ut per esse purum agat, reliqua verò per esse, id est, per virtutem aliquam naturalem, siue ut ita loquar, essentialem. Itaque operationem quæ à consilio proficiscitur, antecedit operatio quæ à virtute essentiali peragitur, hanc rursus illa quæ à puro fit esse. Et quanto quæ virtute fit, facilius est quam quæ fit consilio, tanto quæ puro esse expletur, facilius est quam quæ virtute.

*Deus intelligit seipsum primò, ac etiam singula.*

## C A P V T IX.

**I**n intellectus nunquam fieret rei intelligendæ capax, nisi esset aliqua sibi cum re ipsa cognatio. Quapropter cum sit intellectus & rem intelligendam cognatio, qua via aliquid proficit ad hoc ut intelligibile fiat, eadem proficit ut sit intellectus. Sed discessus à materia vnica via est, per quam res quæque cum adipiscitur terminum, ut intelligenda intelligibilisque sit, id est talis, ut propriè possit intelligi, quia tunc propriè res intelliguntur, quando seorsum à materia ac materiæ conditionibus cogitantur. Itaque per eundem discessum ad id peruenire quis potest, ut sit intellectus. Sanè si separari à materia, causa est ut forma quælibet vnum quiddam fiat cum intellectu, multo prius magisque semotum esse à materia, causa est ut res aliqua intellectus sit & intelligens. Quia vero nullus à materia remotior est quam Deus, exactius nullus intelligit. Rursus intelligentia appetibilis est tan-

quam bonum, per eam enim res quæque seipsa frui potest, ac cæteris omnibus, primo autem bono, id est, Deo nihil deest boni. Adde quod causa omnis per formam agit, & quanto amplior causa est, tanto per ampliorem agit formam. Amplissima causa Deus est, amplissima igitur forma est in Deo. Nusquam vero est forma amplior quam in mente. Deus igitur habet mentem. Quod inde etiam probatur, quia non decet mentes instrumenta esse eius motoris qui mente careat. Omnes autem mentes, Dei sunt instrumenta. Ad idem illud quoque confert, quod cum in Deo idem sit essentia & operatio, consequens est ut eius operatio ex earum genere sit, quæ in externam materiam non transeunt, sed in agente manent tanquam ipsius perfectiones potius quam materiæ. Talis est cognitio & appetitio. In Deo igitur saltem cognitio est, intelligentia scilicet, vel eminentior quam ipsa intelligentia. Et quoniam intelligentia Dei, prima intelligentia est, & quicquid est in aliquo genere primum, purum est & solum & in seipso, ideo idem est ibi penitus esse, & intelligere, ne si aliud esse sit, aliud intelligere, cogamur intelligentiam illam in alio, id est, in essentia collocare. Item si prima ibi intelligentia est, est utique perfectissima. Talis est planè, quæ illi obiecto quod est per ipsam comprehendendum, quam proxima est. Sic enim certa est prorsus, nullius indiga, atque plenissima. Illa vero intelligentia rei cognoscendæ est proxima, per quam res intelligens intelligit semetipsam. Propria igitur intelligentia Dei est, ut seipsum intelligat, præsertim quia si ab externo quodam obiecto intelligentia Dei perficeretur, ab eodem perficeretur essentia Dei, quæ eadem est cum illa, fieretque Deus ab alio. Quis dixerit diuinam mentem externa sequi, ut intelligat, cum externa diuinam mentem sequi cogantur ut sint? Quis proprium diuinæ mentis obiectum posuerit extra Deum, cum nulla virtus obiectum suum excedere valeat, Deus autem excedat omnia in immensum? Cum Deo intellectus & intelligentiæ nomen tribuimus, sic accipiendum est, ut huiusmodi appellationes secundum causam potius, quam per formam intelligantur. Propriè namque Angelum mentem esse putamus, Deum vero supra mentium genus, ita ut mens sit mentium, lumenque luminum. Intelligit verò Deus quicquid intelligit modo quodam super intelligentiam, atque, ut ad rem nostram veniamus, intelligit singula. Nam quicquid intel-

ctus agit, sua agit natura, atque ita agit intelligendo. Ergo quæcunque facit, intelligit, quod patet in artibus & consiliis. Cum ergo Deus per esse suum agat, idque esse non careat intellectu, imo verò esse & intelligere propter summam Dei simplicitatem idem sit, oportet ut operetur intelligendo. Eatenus vero cognitio eius extenditur, quatenus operatio, cum in Deo simplicissimo sit voluntaria cognitio & operatio idem. Operatio per omnia usque ad res extenditur minimas. Ergo minimas res omnes Deus intelligit, eò maxime, quod quisquis rerum minimarum causas omnes cognoscit, res intelligit minimas, Deus autem nullas ignorat, cognoscit quippe seipsum. Ipse est omnium causa, ergo primam & summam causarum, & rerum omnium causam noscens, noscit omnes. Noscit inquam distinctè atque clarissimè. Nam dum se videt, qui Angeli causa est, videt clarissimè Angelum. Dum Angelum intuetur, per eum, si opus sit, illius opera ut per causam propriam intuetur, per illa rursus opera illorum planissimè. Ita rerum infimarum causam summam, causas medias, atque proximas, ideoque illas clarè dinoscit. Quanquam non opus est ut extra se Deus in causis sequentibus ultimos intueatur effectus, cum ipse sit prima ipsius esse origo, & causa essendi sequentibus omnibus. Idcirco dum se inspicit, totum esse rerum quarumlibet inspicit. Totum inquam esse planè atque distinctè. Nam si seipsum perfectè cognoscit, totam suam potentiam comprehendit. Potentia autem sua per singula dilatur. Cognoscit itaque singula. Item dum videt essentiam suam, & bonitatem rebus communicandam, videt quot modis sua illa bonitas possit rebus communicari. Res autem tam variæ in natura fiunt, quam variis modis diuina essentia bonitasque communicatur. Igitur per distinctam bonitatis suæ cognitionem distinctas rerum singularum videt proprietates. Nullum enim deesse debet summæ intelligentiæ genus intelligendi. Quapropter non solum intelligentiam Deus habet generum specierumque, ut aliqui voluerunt, sed rerum etiam singularum. Cuiusque enim rei cognitio appetibilis est tanquam bonum aliquod, bonum vero nullum deest Deo. Adde quod virtus superior debet nosse quicquid inferior nouit, & aliquid ultra quod in animis nostris apparet. Quæ enim singuli quinque sensus accipiunt singulatim, phantasia summatim discernit, & aliquid excellentius quod phantasia videt in plu-

bus imaginibus, intellectus in vna videt, & clarius videt singula quam phantasia; videt insuper rerum rationes vniuersales; quas illa nescit. Ita Deus vnica virtute cognoscit; quicquid nostribus virtutibus, id est sensibus, phantasia, & intellectu cognoscimus. Ergo & vniuersalia intuetur, & singula. Intuetur inquam omnes essendi modos, qui originem videt essendi, & totam comprehendit ipsius esse naturam. Quod si ita est, inspicit vtique singula, quæ per varios essendi modos inuicem distinguuntur. Hinc Orpheus.

καὶ διὸς ὁμῶς τέλειον, ἐπεὶ γ' ὅσα γίνεται  
ἡμῖν  
μοῖρατε, καὶ διὸς οἷδε νόος ἀγπατὸς  
ἀπαρτα.

Id est, Iouis perfectus oculus; quoniam quæcunque apud nos fiunt, fatum Iouisque mens per vniuersum inspicit omnia. Nemo igitur Epicuro & Auerrois fidem adhibeat dicentibus rerum vilissimarum notitiam maiestate diuina indignam esse. Deus enim res non in seipsis, sed in seipso, non per earum imagines, sed per suam essentiam intuetur. Non distrahitur circa plurima, sed cuncta conspicit tanquam vnum. Non laborat vnquam quia non quærit, sed possidet. Non diuertitur à grauioribus, vt consideret leuiores, quoniam eodem intuitu hæc videt & illa, instar oculi, qui vno intuitu stellas in cælo plurimas contuetur. An ignoras Auerrois impie, bonum ipsum ordinis vniuersi esse cuiuslibet partis qualitate præstantius? Quippe cum & Aristoteles tuus in libro diuinorum ii. affirmet partes singulas referri ad bonum ordinis qui in toto est, tanquam ad finem. Si igitur Deus aliam vllam cognoscit rem mobilem, quod tu non negas, maxime ordinem vniuersi cognoscet. Ordo huiusmodi non aliter intelligi potest, quam si pretiosiora quælibet & viliora inter se discernantur, in quorum intervallis proportionibusque totus ordo consistit. Memento autem hæc ipsa quæ vulgo vilissima nuncupantur, singula exactissima quadam arte constructa fuisse, quemadmodum & illa quæ habentur pretiosissima, rursus quæ dum sola considerantur, minus formosa videri solent, in ordine tamen hoc toto, & in ipso totius ordinatore, tam tibi quam cæteris aptissimè consonare. Totum hoc ita in Apollinis hymno cecinit Orpheus.

ἔχεις διέ τε κείρα κόσμου  
παντός, σείδ' αὖ χεῖρ, πελευγί τε βῆ μέλουσά,  
παρτοβαλῆς, σὺ δὲ πάντα πόλοι καθάρη  
πολυκέρως αἰμώεις.

Id est, Tu habes mundi terminos vniuersi. Tibi curæ est principium, atque finis, per te virescunt omnia. Tu sphaeram totam citihara resonante contemperas.

*Deus intelligit infinita.*

## C A P V T X.

**V**Era nos ratio docet, Deum non solum singula & infima quæque, verum etiam infinita cognoscere. Si Deus potentiam suam perfecte cognoscit, nouit distincte omnia ad quæ potentiam habet. Nam potentia quantitas secundum eorum quæ potest quantitatem consideratur. Virtus autem Dei cum sit infinita, ad innumerabilia se extendit. Innumerabilia igitur Deus cognoscit. Dei cognitio per omnia illa se penitus porrigit, quæ esse dicuntur, quomodocunque sint aut esse dicantur. Itaque oportet vt planè intelligat non modo illa quæ actu existunt, verum etiam quæcunque potentia esse dicuntur. In rebus autem naturalibus sunt nonnulla, & si non actu, saltem potentia infinita. Capacitas videlicet materiae, progressio motus ac temporis, generationis successio, diuisio, continui multiplicatio numeri. Deus igitur plane intelligit infinita, quemadmodum vnitas quæ est principium numerorum, infinitos videret numeros actu, si eos numeros qui in ea secundum potentiam sunt, videre. Est enim vnitas secundum potentiam numerus omnis. Deus per essentiam suam quasi quoddam exemplar, omnia conspicit. Cum vero in hac essentia sit perfectio infinita, innumerabiles ad eius similitudinem res exprimi possunt, ita vt per innumerabiles perfectionis gradus in melius paulatim progrediantur, quia neque vna res quædam inde formata, neque quantalibet finita rerum huiusmodi multitudo, infiniti exemplaris integram usurpare potest perfectionem. Atque ita semper absque fine vllò nouus superest modus quo aliquid aliud ultra exemplar ipsum valeat imitari. Deus igitur per innumerabiles infiniti exemplaris gradus, innumerabiles intuetur imagines. Esse in Deo atque intelligere idem est omnino, ideoque sicut esse eius infinitum est, ita intelligere infinitum. Cum intellectus humanus vim habeat ad ea cognoscenda quæ sunt potentia infinita, potest in infinitum species numerorum multiplicare & in aliis multis absque fine pro arbitrio progredi. Quod si intellectus diuinus res actu infinitas non intelligit, sed certum duntaxat



numerus intuetur, quæro nunquid vltius intelligere queat, an nequeat? Si potest, Deus non intelligit illa actu omnia ad quæ intelligenda vim possidet. Si non potest, intellectus humanus plura cognoscere valet quam diuinus. Vtrumque absurdum est. Res igitur actu infinitas intelligit. Quapropter diuina mens cum sit infinita, merito nominatur ab Orphicis ἀπειρος ὕμνα, id est, oculus infinitus. Ex his eorum Philosophorum impius error arguitur, qui finita duntaxat videre Deum existimarunt, quia quæcunque videntur ab eo comprehenduntur, & quæ comprehenduntur, necessario finiantur. His in præsentia respondemus, idem esse Deum, & quæ in ipso Deo videntur ab ipso. Quisquis ergo dicit hæc à Deo comprehendì, nihil aliud quam hæc comprehendì à semetipsis. Absurdum quidem esset rem infinitam ab alio comprehendì. Comprehendì autem à seipsa non est absurdum. Hoc verò nihil est aliud, quam ipsa per se porrigi, & sibi met penitus adæquari. Non ergo finit se infinitus Deus, cum se modo infinito inspicit infinitum, imò suam confirmat infinitatem. Neque absurdum est Deum innumerabilia cernere. Non enim cernit ea gradatim enumerando, sed intuendo summam. Et sicut plura videt tanquam vnum, dum illa per vnam speciem actu vnico speculatur, sic infinitam multitudinem videt tanquam finitam; id est, tanquam rem quandam essentia omnino simplicem, sed quodammodo ratione multiplicem, quia formam suam re vera vnam, vigore & respectu quodam considerat omniformem, perinde ac si Solis lux, colorum fons omnium, quæ (vt ita loquar) vnicolor est, se tanquam omnicolorem percipiat.

*Deus voluntatem habet, perque illam  
extra se efficit omnia.*

## C A P V T XI.

**O**Mnis causa per aliquam agit formam, & agit effectum suum in forma quodammodo similem, ideoque oportet effectus formam à causa comprehendì. Cum verò Deus sit omnium causa, necessarium est in eo omnium formas esse. Est ergo Deus essentia omniformis. Vnde Orphicum illud Ζεὺς εἰδὸς πάντων, id est, Iupiter species omnium. Quemadmodum vero in potentia pura, id est, materia, sunt omnes naturales formæ secundum confusam quandam potentiam, sic oportet in

actu puro, id est, Deo, omnes secundum actum distinctum formas esse. Sed nunquid hæ formæ in Deo distinctæ sunt secundum quendam naturæ modum, quemadmodum in igne lux, calor, siccitas, leuitas, perque eas agit ductus quadam naturæ suæ necessitate? nequaquam.

Prima ratio, Deus cum omnia faciat, si per formas huiusmodi operatur, multo magis multiplex cōpositusque erit, quam quæuis alia causa, siue illæ formæ in eo essentiales sint, siue accidentales, oportet autem illum esse omnium simplicissimum, proinde neque essentiales esse possunt. Nulla enim essentia vsque minus vna in se esset, quam diuina, neque rursus accidentales. Nam quo pacto potest Deus capere qualitates? Non aliunde, cum pati aliquid ab aliquo nequeat. Non à seipso, quippe si à se illas accipit, quantum eas dat, vicem gerit efficientis, quantum capit, gerit subiecti vicem. Conditionem verò subiecti subire non potest agens primum purusque actus, cui subiecta sunt omnia. Item substantia non dependet ab accidente, quamuis accidens dependeat à substantia. Quod non pendet ex alio, seorsum ab alio quandoque existere valet. Igitur potest substantia quædam seorsum ab accidentiū conditionibus limitibusque existere. Quicquid libertatis bonique esse potest vsquam, id totum per summi principis bonique potentiam esse potest. Quamobrem Deus iam actu illa ipsa substantia est, quæ potest esse, imò quæ est ab accidentibus libera. Conducit ad idem quod effectus modo quodam præstantiore in superioribus causis quam in seipsis esse reperiuntur, atque idcirco in causa summa modo aliquo præstantissimo. Cum vero effectus Dei in seipsis substantiæ sint, nullo modo in Deo tanquam accidentia esse debent. Non tamen illic multæ substantiæ sunt itaque sunt illic vna quædā, id est, ipsamet Dei substantia, quandoquidem oportet in Deo cuncta modo quam perfectissimo inueniri, atque vniri illi, sibi que inuicem perfectissime. Nequeunt autem modo sublimiore in Deo esse, atque sublimius vniri tum Deo tum sibi ipsis, quam si in Deo sint ipse Deus. Non sunt igitur in Deo rerum formæ secundum modum naturæ distinctæ, per quas naturali quadam necessitate non aliter ducatur ad operandum quam ignis ad comburendum.

Secunda ratio. Natura cuiusque est vna quædam forma, virtusque ad vnum quoddam opus certo modo determinata, toto suo impetu aciens quicquid facit, & fa-

ciens necessario. Natura siquidem ignis calida vnum quoddam, caloris videlicet, opus facit præcipuè, atque eodem semper calefacit tenore, & quantum in se est, omnes caloris gradus exercet vbique. Igitur quod vno gradu ab ea calefiat materia hæc, & duobus gradibus illa, non ex agentis ordinatione procedit, sed ex ordine graduum qui in præparationibus materialium reperiuntur. Itaque ignis toti operi non dominatur. Non enim author est ordinis graduum qui sunt in opere. Ac si calores duos generaret extra subiecta, quia se toto ageret vtrosque, essent æquales vtrique, imò & nunc in subiectis omnino similibus similes omnino æqualesque generat. Potest vtique natura vel per diuersa media vel ex diuersis materiis diuersa facere, sublata vero mediorum materialiumque diuersitate, vel vnicum vel simillimum operatur, neque potest quando adest materia, non operari. Deus autem solus materiam primam corporum, & essentias mentium animorumque quam plurimas absque medio subiectoque procreat, quæ quidem inter se longè diuersæ sunt, multisque perfectionis gradibus inter se discretæ. Merito autem Deus quia primum agens est, vsque adeo vniuerso ipsius operi dominatur vt ipsemet & formas, & formarum ordinem, graduumque distinctionem efficere valeat. Nullum verò agens effectus & pauciores & minus varios faceret quam Deus, imò vnitum prorsus ageret Deus, si per solum meræ naturæ modum operaretur, cum diuina natura sit omnium simplicissima. Non ergo naturali instinctu impellitur ad agendum.

Tertia ratio. Si intelligentia in nobis est efficax, & in Angelis efficacior, oportet intelligentiam in Deo efficacissimam esse. Idem in Deo est natura eius atque intelligentia. Idem quoque operationis naturalis modus atque operationis intellectualis vbique esse solet. Siquidem tam natura quam intelligentia per formam agit, & simile aliquid operatur in forma. Non ergo dicendus est Deus aut per nudam naturam, aut per aduentitiam intelligentiam operari, imò per naturam intelligentiam naturalem Deo, quia causa prima communisque & felicissima est, operatio conuenit naturalis, quæ cæteris prior est, communior, & faciliior. Rursus, quia causa preciosissima est, conuenit operatio intellectualis, quæ prior est dignitate in nobis, quamuis non tempore, ideoque est in rerum ordine prima, & tanquam preciosa præstantioribus duntaxat

congruit speciebus. Propria igitur operatio Dei, est operatio vtraque. Est autem apud Platonicos vnica diuinæ essentiae prout Deus est, proprietas. Est igitur vtraque in Deo eadem operatio.

Quarta ratio. Natura nuda bonum hoc respicit aut illud, natura intellectualis vniuersale bonum. Causa igitur quæ per nudam agit naturam, ita comparatur ad causam quæ per naturam agit intellectualem, sicut particularis causa ad vniuersalem, & minister ad architectum. Mundi itaque architectus per naturam intellectualem, quantum intellectualis est, operatur. Quinta ratio. Illa præ cæteris operatio Deo congruit, per quem Deus neque ex suo statu neque ex sua simplicitate labatur. Talis in primis est operatio mentis. Operatio enim naturalis ab agente quidem incipit, sed desinit in id quod patitur, sicut calefactio ab igne in lignum. Intellectualis autem vtrumque terminum retinet in agente. Per hanc enim Deus dum se speculando versatur secum, vndique versat externa, atque vt Parmenides Pythagoreus inquit, rerum orbem mobilem rotat dum se seruat immobilem. Oportet præterea Deum esse penitus vniuniformem, quia super omnium formas existit. Imò & omniformem, quia formator est omnium. Quod vniiformis simul & omniformis esse queat, sola intellectualis natura facit, per hanc enim formam Dei seipsam intuendo, se concipit tanquam propriam formarum omnium rationem. Videt enim in se quicquid est cuique proprium, dum cernit quo gradu diuinam formam quodlibet imitari queat, quoue deficere, vt ecce dum intelligit formam suam per modum vitæ, non autem cognitionis, vt ita loquar, imitabilem concipit formam ideamque plantarum. Dum vero imitabilem per modum cognitionis quidem, sed non intelligentiæ propriam animalis ideam, atque cæteras eodem pacto. Et profectò in omnibus quæ non casu, sed vel natura vel proposito fiunt, necesse est effectus finem esse effecti operis formam. Causa verò agens actionem ad formam non per aliud quicquam dirigit, quam per formam in ipsa manentem. Neque ad certas dirigit formas aliter, quam vel per certas formas, vel per certas formarum rationes in seipsa conceptas. Cum igitur mirabilis ordo mundi casu ordinis expertè constare non possit, necesse est in opificis ipsius intelligentia formam esse, ad cuius similitudinem fit effectus. Et quoniam Dei proposito vniuersi ordo potissimus est, principalis

penes illum idea, est idea ordinis vniuersi. Ratio verò ordinis, atque totius haberi non potest, nisi rationes propriæ partium omnium ex quibustotum constituitur, habeantur. Quemadmodum architectus ædificij speciem non potest concipere, nisi proprias partium eius conceperit rationes. Propriè igitur in Deo sunt omnium rationes, neque aliunde rerum species habent vt distinctæ sint, quam vnde habent vt sint. Neque diuina simplicitas ob idearum multitudinem minus est simplex, cum per formam vnā vnoque intuitu omnes contutatur. Neque dicitur idea diuina essentia, prout simpliciter est essentia, sed quantum huius speciei vel illius est exemplar. Quocirca quatenus rationes ex vna essentia plures intelliguntur, catenus plures dicuntur ideæ. Respectusque huiusmodi quibus multiplicantur ideæ, non à rebus ipsis efficiuntur, imò ab intellectu diuino suam ad res essentiam comparante, neque sunt (vt ita dicam) reales respectus huiusmodi, quales illi quibus personæ distinguuntur dicuntur, sed potius intellecti. Sub vna autem idea multa & cognoscuntur, & fiunt. Nonnulla etiam per ideam aliorum perspiciuntur, vtpote per idem boni atque habitus, malum atque priuatio, & vt quidam putant, per ideam formæ materia. Proprietates quoque substantiæ per ideam substantiæ cognoscuntur, qualitates verò cōmunes propriis designantur ideis, quæ admodum Architectus per domus ipsius formam omnia efficit accidentia quæ domum à principio comitantur, sed quæ domui iam factæ contingunt, puta picturæ atque similia, per alias disponuntur ideas. Sed iam diffusius quam proposuimus, de ideis hic quasi casu quodam occasionem nacti tractauimus. Hæc autem est, & si canes quidam aliter latrant, certissima Platonis nostri Platoniorumque sententia. Quod & supra tetigimus, & aliàs latius declarabimus.

**P** Robauimus hætenus primam causam varios effectus suos per multiplicem sapientiæ ordinem operari, potiusquam per nudæ simplicisque naturæ necessitatem. Probabimus deinceps, volente Deo, non operari cum externos effectus per meram intelligentiam, nisi accedat voluntatis assensus, quod quidem disputationis huius erat propositum. Prima ratio. Causa prima omnia per se (vt in sequentibus ostendemus) ad finem optimum per vias rectissimas modo congruentissimo dirigit. Hoc facere nequit, nisi per intellectum anticipet finem, discernat vias, metiatur

proportionem, quæ inter vias est, ac finē, per voluntatem rursus finem approbet, ac viam talem præ cæteris eligat. Hinc Plato in Timæo, Phædone, Philebo, Politico, illos Philosophos derestatur, qui naturalium rerum causas vel ad fortunam, vel ad ipsam siue materiæ siue naturæ necessitatem referunt. Ipse verò naturalia quidem existimat instrumenta quædam intelligentiæ potius, quam agentia, singulosque effectus præcipuè ad finalem, efficientem, formalem causam vbique reducit. Quamobrem si quis quærat quam ob causam terra sit rotunda, respondet, quia videlicet rotunditatis idea participat, ad cuius similitudinem sapientia mundi artifex idcirco terram disponit, quoniam iudicauit voluitque boni ipsius gratia fore melius ita sese habere.

Secunda ratio. Quod comitatur quicquid est, id enī, quantum ens est, conuenit. Quod tale est, in eo quod primum ens est, reperiatur oportet. At quicquid est, hoc habet, vt & absens bonum appetat, & in præsentī bono libentissimè conquiescat. Profectò natura sensus expers per inclinationem quandam facit, sensus per appetitum, intellectus per voluntatem. Ergo cum Deus sit (vt Peripatetico more loquar) ens primum, quis diuinum intellectum negabit præses bonum suum, quod est omne bonum, per voluntatem libenter amplecti? Sicut enim in sua veritate videt omnia vera, quæ ipsa illuminante fiunt vera, ita in sua bonitate vult bona omnia, quæ & ipsius propagatione nascuntur, & ipsa perficiente fiunt bona. Mens autem quælibet volendo facit opera potius quam videndo. Videndo enim replicat formas intus, volendo eas explicat extra, videndo respicit verum, cui propria puritas est, volendo attingit bonum cui propria est diffusio.

Tertia ratio. Sensus, intellectusque ipsius cognitio, quia tanquam imaginarium quiddam in creaturis est, nullum substantialem effectum efficit, nisi per affectum, quod essenziale quiddam esse videtur, vnde quanto esse vehementius afficitur, tanto potentius operatur. Quod quidem indicat quodammodo Struthij oculus auidissimè intentus in ouem. Si intelligentia Dei in creando efficacior est quam Struthij intuitus in fouendo, imò si immensæ est efficaciz (quod patet ex eo, quod neque subiecto neque instrumento, neque tempore indiget in creando) coniectari possumus, voluntatis affectum esse in diuina intelligentia potentissimum. Adde &

iucundissimum, si modò intelligentia quæ perfectissima est, quæque integerrimo & perfectissimo obiecto semper & vndique, suauissima esse debet.

Quarta ratio. Vbi non est voluntas, quæ est inclinatio mentis ad bonum, ibi non est mentis voluptas, quæ est dilatatio voluntatis in bonum, & quies voluntatis in bono. Si non est ibi voluptas vbi est ipsum bonum, nusquam voluptas erit, quæ vbiunque est, sit ratione boni. In ipso igitur bono voluptas est, & voluntas. Affectus huiusmodi si in creaturis est generationis initium, certè in creatore ipso est creationis origo.

Quinta ratio. Si agentia omnia tam secundum naturam quam secundum artem, opera sua semper ad finem, id est, ad bonum ordinant, & bonitate sua id iaciunt, accipiunt autem operandi ordinem ab agente primo, atque illud est ipsum bonum, constat ipsum opera sua ad finem optimum ordinare. Si enim bona particularia quia bona sunt, & quia ordinantur à summo bono, ad bonum aliquod ordinant singula, quanto magis vniuersale bonum ordinabit ad bonum cuncta, videlicet ad vniuersale bonum? Deus igitur ad seipsum tanquam finem ducit omnia. Nullus enim actionis diuinæ finis est extra Deum, quoniam finis in eodem ordine locatur vnà cum eo quod agit ad finem, estque bonum quiddam, & causam mouet agentem. Nihil autem in eodem ordine cum Deo locatur, nisi ipse Deus. Deus alieno non seruit bono. Nunquam enim particulari bono seruit omne bonum, Deus insuper non mouetur ab aliquo. Si Dei finis est ipsa sua bonitas, Deus suo modo suam appetit & diligit bonitatem. Cum vero & Deus sit intellectualis & bonitas eius intelligibilis, intellectuali dilectione diligit eam. Dilectio huiusmodi in voluntate versatur. Deus igitur vult seipsum. Vult inquam se tanquam finem sui ipsius, & omnium. Ex voluntate autem finis prouenit operatio circa illa quæ diriguntur ad finem. Quapropter diuina voluntas (vt Plato in Timæo inquit) creaturarum omnium, est initium. Idem apud Mercurium Trimegistum sæpissimè legitur. Putant enim principium vniuersi perfectissimum actionis modum habere debere, id est, vt voluntate sua omnino sit effectiois Dominus, qui omnino est Dominus effectorum, Dominus inquam libera voluntate disponens. Nam si necessitate vel naturæ vel intelligentiæ ageret, ageret simul omnia atque infinita simul, singula quoque

cogeret, & momento raptaret.

*Voluntas Dei necessaria simul & libera est, & agit liberè.*

## C A P V T XII.

**S**atis probatum arbitror. Deum non necessitate naturæ aut intelligentiæ, sed voluntatis imperio singula procreare. quemadmodum verò voluntas eius necessaria simul & libera sit, in præsentia demonstrandum esse censeo.

Ratio prima. Caueat quisque diligentissime, ne in tam temerariam impietatem fortuito incidat, vt aliquando suspicetur Deum ita esse operarique, vt fortè contingerit. Si nulli vnquam rei forte contingit esse operarique, id quod naturaliter est operaturque, puta igni non contingit fortè, sed oportet quod calidus sit, & calefaciat, summo autem enti naturale est vt sit, & summo actui naturale est vt agat, sequitur, Deum qui summum ens, & plus quam ens, & summus actus existit, nullo modo secundum contingentiam esse vel agere. Si vbi plus est rationis, ibi fortis est minus, in Deo, qui summa ratio est, vel fons rationis, nihil potest cogitari fortuitum. Si fortuna non efficit rationem, cum ei contraria sit, imò si priuationis siue defectus, quoniam pacto producit aut Deum, aut diuinam aliquam actionem qualibet ratione superiorem? Si Deus est illa ipsa regula, ita rerum omnium ordinatrix, vt ab eis quæ proximè sequuntur, eam omnem contingentiam auferat, quomodo eum forte quadam contigit sic esse vel operari? Quamobrem Deus non vt contingit ita existit & agit, alioquin nullus vsquam ordo reperiretur vnquam, sed vt decuit, imò vt decet. Decet autem, quia decorum. Ipse verò decor est ipse Deus, à quo & per quem omnia decentia fiunt. Imo vero est agitque vt necesse est, inquã per ipsam necessitatem. Necessitas autem ipse est Deus, per quem & cætera necessaria sunt quæcunque sunt necessaria. Igitur ita est Deus, vt est. Ita agit, vt agit. Et quoniam necessitati nulla præest necessitas, ideo ibi est summa libertas. Libertas est appetibilis tanquam bonum. In summa vero bonitate est quicquid vsquam desiderari potest tanquam bonum. Liber est quicunque viuit vt vult. Viuit vt vult præ cæteris ipsa bonitas, cuius vitam vult voluntas omnis, præter quam nihil aliqua vult voluntas. Est Deus id quod est, ita vt aliud non potuerit esse, ( quia est, vt ita dicam omne

ens, omnisque potestas ) imò neque voluerit, quia est omne bonum. Possè autem aut velle aliter se habere, imbecillitas, esset insipientiaque, in deterius imò in nihilum ritura.

Ratio secunda. Si incitamentum boni in singulis maximè omnium necessarium est, & maximè omnium voluntarium spontaneumque, certe in ipso bono summa naturæ necessitas vna cum summa voluntatis libertate concurrir, ut alias probauimus. Atque ibi naturæ necessitas voluntatis confirmat libertatem, & libertas necessitati consentit, vsque adeo ut necessario liber voluntariusque Deus sit, & voluntariè necessarius. Ratio tertia. Quandiu res aliqua boni ipsius quasi est expers, tamdiu sibi displicet, & aliud quiddam præter se expetit. Quando verò sit boni particeps, iam sibi ipsi placet, seque vult, & talis est iam, qualis vult esse, & quo magis hoc affectitur, eo magis sibi placet, magisque talis est, qualem se esse vult ipsa. Quapropter ipsum bonum in primis hoc habet, ut se velit summopere, sibi que placeat, & tale sit omnino, quale vult ipsum.

Ratio quarta. Si quanto magis aliqua Deo propinquant, tanto minus seruilis sunt, magisque sui iuris euadunt, Deus sui iuris est maximè, ut non modo qualis ipse suapte natura est, talia velit, verum etiam qualiter vult, talis sit omnino, rursus qualia vult, talia quoque faciat, & cuius vult gratia, nullumque agens vsquam vel suæ actionis liberum principium erit, vel finem suæ actioni præscribet, nisi principium finisque vniuersi, & suæ actionis sit Dominus, & finem suæ statuerit actioni. Sed ad propositum redeamus. Ratio quinta. In quibus tria hæc, scilicet esse, intelligere, velle, re ipsa inter se discrepant, in iis non est absoluta libertas, quoniam in rebus huiusmodi modus volendi sequitur intelligendi normam, hæc essendi conditionem, esse denique sequitur eum qui dedit esse. At in Deo idem est re ipsa, esse, intelligere, velle. Quamobrem ita est per voluntatem suam intelligentiæ essentiæque suæ compos, ut non modo sicut est, & sicut intelligi suapte natura, ita quoque velit, verum etiam sicuti vult, ita intelligat, atque existat. Ob hanc forsitan rationem Zoroastris sectatores tradunt Deum quodammodo agere semetipsum. Quod in hunc fermè modum quem dicam, Plotinus exposuit. Deus est actus, non alterius, non circa alterum, sed suimet, & circa seipsum: Est enim actus intra se manens. Quoniam vero actus est propter naturam

infiniti boni infinitè fecundus, ideo non caret actō, id est, genito, actō scilicet infinito. At quoniam & per actum intimum, & solus Deus est infinitus, quod inde actū, id est, genitum est intra Deum, est ipsemet Deus. Deus est actus peruigil, atque perpetuus, ex se, in se, circa se penitus. Ergo ut agit & vigilat, ita prorsus existit. Totus nixus diuini actus circa se vertitur. At dum sibi innititur, quodammodo seipsum agit, id est, gignit, quia si respexerit alio, se perdet. Quapropter esse diuinum, actus est ad seipsum, quando non esse diuinum, foret actus ad aliud. Deus vult seipsum. Velle autem & agere, imò etiam esse, idem est omnino. Igitur se volendo, se agit, id est, producit, imò se iam ponit vel signat in esse. Ex his confici vult Plotinus, Deum non ita esse ut forte contigit, vel ut coëgit necessitas, sed ut vigilat, agit atque vult ipse. Sed hæc Deus ipse viderit. A nobis verò id tantum vbique affirmari optamus, quod Deo sit dignum, quale est quod antè proposuimus, in Deo videlicet cum summa necessitate summam congrredi libertatem.

Ratio sexta. Sola diuina bonitas est absolutum diuinæ mentis obiectum. Nā quælibet vis æquari obiecto potest, excedere minimè. Nihil autè extra Deum est, quod Deus excedere nequeat. Vult autem seipsum Deus absoluta quadam voluntatis necessitate. Vltimum namque finem suū necessario volūt omnia. Diuina bonitas Dei finis est vltimus, cuius gratia vult quicquid vult. Aut ergo fatendum est Deum nihil velle, atque esse gustus omnis expertem, quod est absurdum, aut affirmandum, siquid vult, necessario velle seipsum, præsertim cum in Deo esse ac velle sit idem. Volendo se, vult reliqua omnia, quæ prout in Deo sunt, sunt ipse Deus, prout ex Deo manant, sunt diuini vultus imagines, atque ad diuinam bonitatem referendam comprobendamque tanquam ad finem præcipuum ordinantur. At verò ille diuinæ voluntatis actus, qui prout diuinam respicit bonitatem, absolute necessarius est, ille inquam prout respicit creaturas, à quibusdam non absolute necessarius appellatur. Nam quamuis voluntas finem ipsum necessario velit omnino, ea tamen quæ diriguntur ad finem, conditionali quadam necessitate vult, imò etiam nunquam nulla necessitate vult, siquid ex illis est, sine quo finis possideri queat. Diuina autem bonitas non indiget creaturis.

Ratio septima. Conducit ad hæc, quod Deus volendo propriam bonitatem, non



ob aliud vult alia bona, nisi tanquam ipsius imagines. Cum autem diuina bonitas immensa sit, innumerabiles ad eius exemplar effingi imagines possunt, innumerabiles inquam, præter eas insuper quæ in his seculis effinguntur. Itaque si ex eo quod propriam vult bonitatem, necessario esse vellet singula quæ imitari eam possunt, certe vellet infinitas creaturas existere, infinitis modis diuinam bonitatem repræsentantes. Si autem vellet, utique essent. Sed in hac re meminisse oportet, ut placet diuino Thomæ Aquinati nostro, splendori Theologiæ. Quanquam diuinæ voluntatis actus secundum conditionem positionemue quando dici potest rem hanc aut illam necessario velle, videlicet postquam semel eam voluit, cum sit diuina voluntas non aliter immutabilis quam essentia, ipsum tamen suapte natura non habere eum necessitatis absolute respectum ad effectus suos, quem ad seipsum habet.

Ratio octaua, si Deus est perfecta entis causa, atque ens proprius est effectus Dei, eousque saltem Dei actus amplificare se potest, quousque entis potentia potest amplificari, præsertim cum passiuam potentiam ab actu superiore duci oporteat. At in huiusmodi potentia entis continetur quicquid rationi entis non aduersatur, quemadmodum in potentia corporalis naturæ sunt quæcunque naturam non auferunt corporalem. Nihil enim effingi potest quod entis rationi repugnet, nisi eius oppositum, hoc est, quod dicitur non ens. Contradictio sola rationem non entis includit. Quæcunque igitur contradictionem nullam includunt, ut Peripatetici putant, in entis potentia includuntur, atque ea omnia potest Deus efficere. Quod inde confirmatur, quod mens exclusa contradictione potest per omnem, imò per immensam entis latitudinem se porrigere. Non debet autem effectrix Dei potestas minus ampla esse, quam mentis potentia machinatrix. Adde quod si diuinus intellectus bona innumerabilia intuetur, voluntas autem eius ad omnia illa se potest conuertere quæ intellectus offert tanquam bona, consequens est ut voluntas Dei finitis obiectis non adstringatur, igitur & potestas eius ad infinita se porrigit. Quorsum hæc? Ut intelligas, quicquid contradictionem non includit, diuinæ potentie subici, atque cum multa non sint in natura rerum, quæ tamen si essent, contradictionem nullam inferrent, (quod patet præcipuè circa numerum, magnitu-

dinem, interuallaque stellarum) scias plurima sub diuina potentia contineri, quæ tamen in rerum ordine nunquam reperiuntur, & cum Deus eorum quæ potest quædam faciat, quædam non faciat, cum nulla vel naturæ, vel intelligentiæ, vel voluntatis necessitate, sed libera voluntatis electione talia operari.

Ratio nona. Non iniuria Deus electione (ut ita dixerim) quadam operari dicendus est. Siquidem agentia omnia quæcunque per aliud agunt, ducunturque ad operandum, reducenda sunt ad agens primum, quod ita per se agat, ut seipsum ad agendum ducat, ergo ut in actionem suam penitus se conuertat, ergo ut intelligat, velitque operari aut non operari, rursusque ita vel aliter operari. Quæ autem hoc modo proficiscuntur à Deo, nullus ignorat electione libera proficisci. Nullus tamen sapiens nescit electionem in Deo ab essentia non differre. Verum ne putet forte aliquis diuinam voluntatem si ad creatura respexerit, singulis vim inferre, meminisse oportet voluntatem Dei male vniuersi bonum quam apparens alicuius particulæ commodum. Nam in illo bono expressior fulget diuinæ bonitatis imago, bonumque illud in ordine quodam videtur consistere. Exactus autem ordo requirit ut omnes rerum gradus in vniuerso contineantur, ita ut quædam sint causæ stabiles, quædam mobiles, & illæ quæ mobiles sunt, effectus producant insuper magis vagos, & quodam variabili modo. Nam effectus proximarum causarum modum potius quam remotarum imitari videtur. Deus autem non modo res ipsas vult esse, verum etiam essendi modos qui ad eas per consequentiam requiruntur. Cum verò rebus quibusdam secundum naturæ suæ modum conueniat ut sint quodammodo contingentes, Deus eligit aliquid (ut Theologi quidam inquiunt) quodammodo secundum contingentiam euenire. Nihil tamen ita præuaricatur, vel ordinem vniuersi perturbet, vel ordinatoris effugiat præuidentiam.

*Deus amat, & providet.*

### C A P V T XIII.

**S**I Deus sibi ipse placet, si amat seipsum, S profecto imagines suas & sua diligit opera. Diligit faber opera sua, quæ ex materia fecit externa. Amat multo magis filii genitor, quem ex materia intrinseca generauit, quauis eam prius acceperit (dū comederet) aliunde. Amat deus ardentius

sua quælibet opera, cum non acceperit aliunde materiam, sed ipse idem materiam creauerit, qui & formauit, quo fit ut & solus, & totius operis causa fuerit. Si Deus usque adeo amat opera sua, bona illis vult, quod verò vult consequitur. Igitur bene illa disponit, & summa sua bonitate disponit quam optimè. Sicut enim fecunditas procliuitalisque ad agendum agentibus omnibus, ab agentis primi fecunditate ingenta est, sic diligentia in custodiendis operibus inserta est singulis à diligentia prima agentis primi omnium tanquam filiorum procuratoris. In quo, quanto maior fecunditas est quàm in cæteris, tanto & diligentior prouidentia. Rursus, Deus sui gratia facit cuncta, quia si ad alium finem præter seipsum ageret, ab illo fine penderet actio Dei, ergo & ab eodem agendi voluntas, ab eodem quoque Deus, cum idem sit Deus, Deique voluntas. Si ad sui finem facit omnia, atque ipse summum est bonum, ad bonum (ut Plato vult in Timæo) cuncta disponit, ita ut singula pro natura sua diuinam capiant bonitatem. Præterea, cum omnia bonum appetant, bonique appetitio bona sit, & ideo ab ipso sit primo bono, unde sunt bona omnia, sequitur ut à diuina bonitate intellecta, diuinam appetant bonitatem.

Quis igitur negauerit Deum res gubernare, cum eas ad bonum dirigant finem? Elementa membraque mundi, contraria sua inter se natura formæ virtutisve pugnantia, quo pacto coirent in vnum, ac manerent tamdiu inuicem copulata, mutarentque sibi vicissim naturas motusque, & mutarentur, nisi ab aliqua excellentiori virtute connecterentur? Porro, si mundi gubernatio his membris eius inter se contrariis relinquatur, hæc ponderibus librata suis, locisque disuncta, inuicem non miscebuntur. Ac si misceantur, nihil aliud agent quàm calida, frigida, sicca, humida, arida vel densa, & reliqua generis eiusdem. Ordinem verò formarum, figurarum, resolutionum nullum constituent. Siquidem & in artibus huiusmodi ordinem non materia facit, non instrumenta, sed sola artificis cogitatio. Et si cælum quodammodo elementa regit, non tamen ita regit quin ipsum aliunde regatur. Tanta enim in ipso diuersitas formarum, virtutum, motionum, non ab ipsis cæli corporibus suapte natura diuersis mobilibusque, sed à virtute quadam superiore per se vna prorsus & stabili, in ordinem vnum stabilemque dirigitur. Denique naturale agens, siue elementale, siue cœleste, tum quia mo-

bile est, ideoque egenum imperfectumque, semper aliunde dependet, tum qui necessitate naturæ seque toto agit quicquid agi, ideo mensuram modumque agendi per certos gradus certo finì conuenientem à rectore quodam superno fortitur. Calidum enim siue secundum formam siue secundum virtutem, simpliciter vbique & omnino dissoluit, frigidum verò condensat. Quod igitur tam illud vtiliter conuenienterque dissoluat, quàm hoc simili ratione condenset, idque continuè & ordinatissimè faciant, non à natura simplici, non à casu, sed à causa superna suscipiunt. Et quia sphaeræ continuo motu continuè à præsentis habitu digredientes, in seipsis non quiescunt: ideo & sunt & mouentur ab alio, penes quem sit finis, cuius gratia mouentur & agunt, siquidem finis, motiones ad finem, intentione quadam necessario antecedit. Hinc Aristoteles in libris diuinorum ait: Sicut ordo partium exercitus ad inuicem & ad totum, procedit ex ordine totius ad ducem vnum, ita ordo mundanarum partium ad inuicem, & ad totum, pender ex ordine totius ad Deum. Vnde concludit, sicut exercitus ordo est in duce, ita mundi totius ordinem esse in Deo, vno tantum principe mundi. Proinde partes mundi & corpuscula quælibet ad certum finem per viam ordinatissimam & commodissimos modos aut plurimum ita proficiscuntur, ut peragant sapientissimè opera sua quanto melius effici possunt, perinde ac si artem intus haberent, & artem quidem absolutissimam. Imò tam mirabili ratione progrediuntur, ut humanam artem rationemque expuerent. Et cum ipsa corpora sui motus ignara sint, ac propterea finem ad quem non casu sed necessario tendunt, sibi ipsa præscribere nesciant, habeant tamen præscriptum (alioqui non ad hunc magis finem quàm ad alium peragerent) constat eis ab alio quodam finem præscribi quem appetant, cuius sapientia ita ducantur ad finem, sicut sagittæ ad signum à prudentia (sagittarij) diriguntur. Vbinam hæc sapientia est? Si in summo Deo, prouidet rebus Deus, cum conciliet inuicem repugnantia, ne se vicissim interimant, atque ad fines optimos cuncta perducant. Sin in alia quavis infra Deum angelica mente vel anima, scito Deum omnia quæ infra se sunt, mouere. Quare si angelica mens aut anima quædam regit mundum, ducitque ad bonum, certè & ducta à Deo & Dei virtute id agit. quapropter Deus primus ac summus est rector, qui prouidere potest omnibus, si potest per intellectum omnia facere, cum

præstantias fit per intelligentiam facere, quam considerare & conseruare iam facta. Scit etiam regere cuncta, si facere non nesciuit. Vult denique gubernare & custodire quæ suæ sunt, quæ fecit ipse, quibus non inuidet bene essendi dona, postquam non inuidit munus essendi. Gubernat autem quælibet facilitate mirabili. Neque enim alienas tractat materias, quas acceperit aliunde, sed suas, quas facit ipse. Neque attingit extrinsecus, sed intrinsecus agit. Inest namque rerum omnium penetralibus. Neque laborat circa plurima, sed per ipsum esse suum, qui vniuersalis omnium cardo est, sequentes versat cardines, id est, essentiam, vitam, mentem, animam, naturam, materiam. Atque (vt Platonius aliquis diceret) per cardinem quoque cuiusque ordinis proprium, ipsum proprium versat ordinem, id est, per vnā essentiam, essentias omnes, per vitam vnā, omnes vitas, per vnā mentem, omnes mentes, per vnā similiter animam, singulas animas, per naturam naturas, per materiam verò materias. Neque eius decreto aliquid reluctatur quia immenso intervallo superat omnia. Diuinè de diuina natura ita cecinit Orpheus.

*Ἀενάω προφάλαγξι θοὸν ῥύμα δινεύουσα,*  
id est, perpetuo cardine velocem impetum voluntas. Compertum est esse in animali neruum quendam circa nucam, quem qui trahunt, cuncta simul animalis membra ita mouent, vt singula propriis motibus moueantur. Simili quodam tactu scribit Aristoteles in libro de mundo, à Deo mundi membra moueri. Vbi prouidentiam asserit apertissime. Quam in decimo quoque moralium significat, & in Physicis, vbi probat naturam certum vbiq; optimumque finem respicere, operaque ipsius opera esse intelligentiæ, non errantis. Vidimus Florentiæ Germani opificis tabernaculum, in quo diuersorum animalium statuæ ad pilam vnā connexæ atque libratae, pilæ ipsius motu simul diuersis motibus agebantur, aliæ ad dextram currebant, aliæ ad sinistram, sursum atque deorsum, aliæ sedentes assurgebant, aliæ stantes inclinabantur, hæc illas coronabant, illæ alias vulnerabant. Tubarum quoque & cornuum sonitus, & auium cantus audiebantur, aliaque illic simul fiebant, & similia succedebant quàm plurima vno tantum vnus pilæ momento. Sic Deus per ipsum esse suum (quod idem re ipsa est ac intelligere atque velle, quodque est simplicissimum quoddam omnium centrum, à quo, vt alias diximus, reliqua tanquam lineæ deducuntur) facillimo nutu vibrat quicquid inde dependet. Taceat

igitur Lucretius Epicureus, qui casu fieri ac ferri vult mundum, & constantem formosissimi ordinis habitum ex instabili deformique priuatione ordinis proficisci existimat, perinde ac si quis ex insipientia sapientiam, & ex tenebris nasci lucem arbitraretur. An tu Lucreti quoties casu absque consilio & proposito fine moueris, toties vno quodam recto tramite ad certum eundemque terminum proficisceris? nequaquam, sed hac & illac oberras. An quando absque arte & præscripto fine tractas lapides, tunc ordinatissimis & contextis inuicem parietibus ædificium construis, & aspectu pulcherrimum, & vsui commodissimum? nequaquam, sed deformem inutilemque congèiem. Considera plantas & animalia, quorum membra ita disposita sunt, vt alterum alterius gratia sit locatum, alterum seruiat alteri. Certè vno sublato, tota fermè compago dissoluitur. Cuncta denique membra, totius compositi gratia sunt digesta, & compositum ipsum, scilicet, planta & animal, conuenientibus instrumentis instructum ad opera naturæ propriæ nec essaria omnibus alimenta, loca, temporaque prouisa, terra & aqua his elementa parant, cælum temperat aquam ac terram. Tandem partes mundi cunctæ ad vnum quendam totius mundi decorem ita concurrunt, vt nihil subtrahi possit, nihil addi. An si tu omni consilio fuisses arboribus & animalibus prouisurus, aliter prouidisses? Non aliter, sed neque tam bene. Consilium igitur consilio tuo melius hæc disponit. Alioquin videres quotidie quam plurimis tam membra quædam sua, quàm instrumenta vbiq; deesse, item ex equi semine nasci canes, ficus ex malis, & membra hominis annexa leonibus, hominibus asinorum, cadere stellas, ascendere lapides. Nunc verò quia singulæ mundi partes certis seminibus ortæ, distinctis figuris præditæ, recta via, congruis temporibus & ordinibus pulcherrimè & commodissimè certos petunt terminos atque repetunt, consequens est vt eodem modo moueantur, quo & illa quæ arte & consilio mouentur humano. Si modo eodem, ergo eadem penè arte, eodemque consilio, & tanto præstantiore, quanto pulchrius & stabilius ordinantur. Consilio inquam non ambiguo & mobili, sed certo penitus atque subiro, & inuim potius quàm discursu. Si enim in opere non est mora, vel transgressio vsquam, vel retractio, non est ambiguitas in opifice. Intuim huiusmodi translationem quandam consilium appellamus, non quod ibi alia inuestigentur ex aliis, sed

quod alia aliorum gratia fiant. Solent incites homines de artificibus consultare. At verò qui artem perfectè callet, nihil consultat amplius, sed ita habitu facit, sicut natura formis. Quod si est ars alicubi perfectissima, ibi certè est, unde mirabile hoc opus mundi disponitur. Artem huiusmodi in natura fortasse locabis sensus omnis experte. Ego verò sensu carere te dicam, si tam fueris alienus à sensu, ut non sentias, si bestiolæ quæque terrenæ sentiunt, oportere multo magis totum mundum & artificem omnium naturam sensum habere, sensum, inquam, rationalem, si rationabilius sua opera ordinat, quam hominis ratio. Admirationem autem minuit diuturna consuetudo. At si parentes tui te clausa undique domo sic ab infantia educauissent, ut mirabile hunc mundi decorem ante annum ætatis trigessimum non vidisses, & tunc repentè tibi aperta domo monstratus fuisset, proculdubio nouum harum rerum spectaculum esses vsque adeo admiratus, ut quamuis ante ambiguus, postea tamen nunquam ambigere potuisses, quin cuncta vnus sapientissimi artificis prouidentia fiant atque regantur. Fateamur igitur necessarium est. Lucreti, quod cum partes effectusque mundi constanti ordine procedant, non potest totus ipse mundus præter constantiam ordinemque vel nunc procedere, vel ab initio prodiisse. Fateamur denique, quod neque sua sponte mouetur mundus sine vita, neque tam diu tam æqualiter voluitur sine potentissima vita, neque tanto ordine sine sapientissima mente, neque tam optimè & commodissimè absque summo bono, sed vita quædam vna, regina vnus mundani corporis, potentia, sapientia, bonitate præcellens, mundum prouidentissime & ab initio & continuè perducit ad optimum. Hæc vel summus est Deus, vel Dei summi pedisequa. Si summus est Deus, Deus prouidet certè. Si Dei pedisequa, Deus etiam prouidet, quoniam primum principium sui ipsius gratia agit, mouetque cuncta. Diuinè de Ioue dixit Orpheus.

πάντο γένεθλ' ἀρχὴ πάντων, πάντων τε  
λευτή.

id est, omnium genitor, principiumque & finis. Ideo si vita mundi prouidet, profectò ducta à Deo, ad Dei prouidet finem: igitur ad Dei bonitatem omnia denique diriguntur. Atqui hæc bonitas cum totius operis sui habeat curam, certè partes negligit nullas. Ex singulis enim constat optimus totius compositissimus & habitus. Totum hoc Orpheus sic expressit.

πάντ' ἐπορεύεσθαι, καὶ πάντ' ἐπαυγέειν, πάντα τε  
βελτένειν,

id est, omnia intus inspicis, omnia intus audis, omniaque distribuis. Quoniam verò tota mundi compago gratia diuinæ bonitatis referendæ instituta est, & partes mundi gratia ipsius compagis appositæ sunt, non est in toto hoc opere summa prorsus perfectio requirenda, sed quanta sufficit ad sublimiorem authoris perfectionem pro viribus iudicandam. Neque exigenda est in quauis mundi parte quælibet partis illius perfectio, sed quæ cæteris partibus concinat, totique conducatur. Sic licet nonnunquam aliqua particulæ alicuius mundanæ conditio videatur per se esse culpanda, si tamen ad totius statum comparatur, inuenimus non aliter mundum posse bene disponi, quam ita. Sanè vniversi conditor non totum ipsum ad partes vllas, sed partes potius ad totum refert. Merito igitur quæ alicubi circa partes vel mala videntur vel deformia, denique in totius ornamentum bonumque euadunt. Quapropter apud Orpheum Deus vocatur.

αἰδιος ζῶν, ἡδὲ ἀθανάτη τε ὁρῶνσα,

id est, sempiterna vita, immortalisque prouidentia. Hanc prouidentiam Mercurius esse dicit generis humani tutricem, & Plato in quarto legum libro inquit, Deum continere principia, media, finesque omnium, ambire cuncta, ac rectè disponere singula. Mitibus religiosisque viris esse propitium, superbos impiosque punire. Neque tolli putat per diuinam prouidentiam nostri arbitrij libertatem, imò seruari, quod aperit in decimo libro de Repub. in libro etiam de regno, & in Critia, quia Deus non tam sciendo facit quàm volendo. Alioqui simul cuncta fecisset & faceret, faceret quoque mala. Item sicut in præscientia Dei, futuri scripti sunt rerum euentus, ita & euentuum causæ, modique agendi. Et sicut opera nostra nota sunt Deo, ita & nostra voluntas, quæ nostrorum est operum causa & modus liber agendi. Sicut enim præuidet te id facturum, ita præuidet te ita, id est, voluntariè libereque facturum. Quare diuina præuisio si conditionis alicuius positione, reddit necessaria nostra opera, reddit necessarium, id est, confirmat similiter agendi modum, hoc est nostri iudicij libertatem, quoniam Deus naturarum omnium temperator cuique rei conseruat non subtrahit naturam quam dederat. Sic dum regit cuncta, singula pro singulorum regit natura, ascendentibus elementis ad ascensum conducit, descendentibus ad descensum. Si regit animalium motum, quia ille natura sua pro-

gressus est, confert ad gradiendū. Si cœ-  
los ducit, quia ob rotunditatem natura vo-  
lubiles sunt, confert ad circuitus ambitum.  
Si animos pulsat, quia illi sursum deorsum-  
que liberè volubiles sunt, pulsat, & liberè,  
ita vt alliciat, non trahat, non cogat, sed  
persuadeat. Quod Zoroaster ita testatur.

*πατήρ ὁ ὁρίων ὁρίσασκεν, πᾶσι δ' ἐπι-  
χέου,*

id est, Pater non incurrit metum, sed per-  
suasionem inducit. Quoniam verò motor  
primus præualere debet & dominari, ideo  
sic animos (vt Plato vult) quasi cogit ad bo-  
num, vt bonum ipsum nolle non possint. Bo-  
num enim necessariò volunt omnia, cuius  
ratione volunt quicquid volunt, sicut ne-  
cessario malum ipsum nolunt, cuius ratio-

ne nolunt quicquid nolunt. Nam si ad-  
quatum appetitus obiectum est ipsum bo-  
num, certè bonitas est ratio ipsa appetendi  
quicquid appetat, ita vt in omni re quam  
appetit non aliter bonum appetat, quam  
visus in omni colore videt lumen. Ac, si  
appetat vltèrius nihil appetere. hanc quo-  
que appetendi vacationem eligit tanquam  
bonam. Animus igitur necessario fertur ad  
bonum. At quia Deus debet naturam ani-  
mo propriam referuare, ideo iudicium ipsi  
relinquit liberum per quod de agendis suo  
more consultet, atque è multis sibi proposi-  
tis aliud alio melius iudicet, & quod a-  
ptius ad bonum consequendum censuerit,  
eligat.



# THEOLOGIÆ PLATONICÆ,

DE IMMORTALITATE ANIMORVM,

EODEM FICINO AVTHORE,

LIBER TERTIVS.

*Descensus per quinque gradus fit, per quos est factus ascensus, qui gradus  
inuicem congrue comparantur.*

CAPVT PRIMVM.



Scendimus hætenus à cor-  
pore in qualitatem, ab hac  
in animam, ab anima in  
Angelum, ab eo in Deum,  
vnum, verum & bonum,  
authorem omnium atque  
rectorem. Corpus appellant Pythagorici  
multa, qualitatem multa & vnum. Ani-  
mam vnum & multa. Angelum vnum mul-  
ta. Deum denique vnum, quia corpus ad  
quamlibet speciem indeterminatum est, &  
suapte natura sine fine diuiduum, cuius  
materiam in infinitum fluxuram inquirunt,  
nisi eam forma sistat & vniat. Qualitas ad  
materiam specie terminandam confert, &  
est per se quodammodo indiuidua, sed  
per admixtionem corporis fit diuisibilis.  
Anima materiam specie terminat, neque

per se, neque per iniquationem corporis  
est diuisibilis, sed mobilis multitudo. An-  
gelus receptaculum specierum est, & multi-  
tudo immobilis. Deus super species immo-  
bilis vnitas. Deū aiunt per se omnino indis-  
solubilem esse, quia ipsa vnitas statufque  
sit, corpora verò ex elementis composita,  
prorsus dissolubilia, quoniam in eis & mul-  
tudo vnitatem, & motus superat statum.  
Sed Angelos, animas, sphaeras, & stellas  
dissolubiles quidem videri quodammodo,  
quatenus partes habent, esse tamen indis-  
solubiles, propterea quod in ipsis vnitas sta-  
tusque multitudinem motumque exupe-  
rant. Hic autem est nodus ille diuinus, quo  
Deus (vt Timæus putat) hæc per se solubi-  
lia, semper indissolubilia conseruat.

Tam potens est vnitatis ipsius statufque



minus, ut in infimo solum vniversi gradu excedi ab oppositis videatur. Sed tamen interim ibi quoque quodammodo vincat, siquidem materiam ipsam infinitæ multitudini mutationique subiectam; semper custodit in vnitatem substantiæ; atque ordinis permanentem. Est vtiq; Deus vnitas, vt probauimus. Est & immobilis, quia neque ab alio mouetur, cum nihil sit illo validius, neque à seipso, quia ad melius se trāsferre nequit, cum sit ipsum bonum. Ad deterius autem nihil sua sponte se mouet. Ac si Deus fluere de alio dicatur in aliud, quæremus nunquid nouum aliquid assequatur, an nihil. Si nihil assequitur nouum, neque mutatus est quidem. Si noui aliquid, ante non omnia possidebat. Quod non possidet omnia, non est Deus, ex eo quod est vbique, non mutat locum, ex eo quod est omnium finis, circa aliud non mouetur, ex eo quod est simplicissimus, etiam in se est immobilis. Nam si moueatur in se, aut partem ipsius alteram ad alteram admouebit, aut saltem noua quædam in seipso cum veteribus congregabit. Erit enim per substantiam, quod erat ante, ac nouam insuper inducet formam, neque esse poterit simplicissimus. Denique Deus ipsa vnitas est. Vnitas autem status ipsius est fundamentum, quia sicut in multitudinem motus progreditur, sic vnitati status innititur. Illud enim in quauis natura stare dicitur, quod vnum in ea continuè habitum ita possidetur, vt ab eius naturæ vnitatem non discedat. Fundamentum verò status omnis quis dixerit esse mutabile. Possumus autem rationes huiusmodi per argumentationem illam numeri Pythagorici confirmare. Quicquid, inquit, secundum præteritum futurumque mutatur, priuationem quandam habet admixtam, futurum enim nondum est, præteritum non amplius est. In Deo autem, cum ipse sit primum ens, actusque summus, nulla est priuatio, est igitur immutabilis. Angelus quoque immobilis est, quoniam à Deo totius bonitatis fonte bonū per seipsum haurit absque medio, & vno æternitatis puncto impletur inde, ac permanet semper bonitate plenissimus. Quoniam verò omnis effectus extra causam suam productus, aliquid causæ seruat & inferior etiam euadit quàm causa, ideo Angelus proximè Deo creatus, aliquid Dei seruat, amittit & aliquid. Deus quidem vnitatem habet & statum, retinere vtrumque non potest Angelus. Esset enim Deus ipse, non Angelus. Neque etiam amittit vtrumque, ne proximum ac primum Dei opus euadat opifici dissimillimum.

Quid ergo? vnitatem ne solam retinebit? an statum? Solam vnitatem nequit sine statu. Vnitas enim ipsa est prorsus immobilis. Itaque retinebit statum, sed à simplici decideret vnitatem, vt Angelus sit immobilis multitudo. Neque iniuria multitudinem Angelo assignamus; quia si sit perfecta & absolutissima vnitas, erit summa & interminata potestas. Siquidem virtus in vnitatem consistit. Interminata potestas vnus ipse est Deus. Porro si corporis proprium est suscipere atque pati, naturæ autem incorporalis proprium dare & agere; in naturâ corporali dicitur esse potentia, potentia scilicet (vt aiunt Theologi) susceptiua atque passiuâ, in naturâ incorporali actus; id est, efficacia ad agendum. Ideo qualitas quia per se quodammodo incorporalis est, aliquam agendi vim habet, vnde & actus cognominatur. Quia verò in materia suscipitur & diuiditur, fitque inde quodammodo corporalis, hinc non merus est actus, sed passione corporis inquinatus. Constat igitur qualitas ex actu atque potentia. Anima autem licet sit à materia separabilis, atque ob id actus dicatur, & à passione corporis aliena, tamen nondum merus est actus, est enim mobilis. Si mouetur aliquid, per motum nanciscitur quo ante caruerat, vt carebat, potentiam illam habet, quam susceptiuam & quodammodo passiuam potentiam nuncupamus. Vt agit mouendo non nihil, est actus, & dum acquirit aliquid, etiam actus efficitur.

Est ergo anima ex potentia & actu composita. Sed nunquid Angelus actus est merus? Minimè. Deus planè, quia distat penitus à materia, in qua passiuâ potentia est sine vlla agendi virtute, ideo merus esse intelligitur vigor agendi seorsum à suscipiendi patiendique natura. Si Deus est purus actus, nequit Angelus esse talis, quia quod vnum in se est, nunquam fit plura, nisi per alienæ naturæ additamentum. Vnica est ipsius puri actus natura & definitio, quæ in Deo quidem est, vt patet. Quod si etiam in Angelo dicatur esse, interrogabimus, nunquid in Angelo sit aliquid aliud præter actum, necne. Si nihil, vnus solummodo restat actus purus. Siquidem nihil differt actus qui tribuitur Angelo, ab actu Dei, cum nihil insit vtrisque præter actum, & actus ipse sua ratione sit vnus. Sin additum est aliquid Angelo præter actum, non amplius est Angelus purus actus, sed infectus permixtione, & actus non absolutus, sed talis potius, aut talis. Sicut non est pura lux quæ viridis est, vel rubens, sed est & lux simul & qualitas elementorum aliqua, per

quam rubens sit vel viridis. Quapropter Angelus quoque ex actu componitur & potentia. Atque hoc est quod in Philebo vult Plato, vbi ait Deum esse rerum omnium terminum infiniti expertem, res autem alias præter ipsum omnes ex termino & infinito componi. Terminum vocat actum, infinitum verò potentiam quæ secundum se indeterminata terminatur & formatur ab actu. Sed vt ad rem veniamus, potentia quidem Angeli in essentia sua est, quæ prius quodammodo fit à Deo quam ab ipso formetur. In primo namque creationis suæ momento Angelus est solummodo, in alio ab autore illustratur vt sit intelligens atque formatur. Idcirco essentia illa principio informis est quodammodo, & tanquam passiuum subiectum quoddam exponitur ad actum intelligendi, & formarum idearumque ornatum suscipiendum, de quo Zoroaster ait.

πάντα γὰρ ἐξέτελειε πατήρ, καὶ ὡπαρέσχην  
κε δευτέρῳ,

id est, omnia perfecit pater, & menti præbuit secundæ. Est igitur Angelus multitudo cum constet ex pluribus. Multitudo inquam immobilis. In illo certè Deo inferior est, quod non est vera vnitas, sicut Deus. In hoc propinquat quod est fermè (vt ita loquar) sicut Deus immobilis. Rectè post Deum immobilem vnitatem ponitur Angelus immobilis multitudo. Post Angelum anima, quæ longius etiam distat à Deo, quia est mobilis multitudo. Multitudo quidem est, cum nihil post Deum esse queat vnitas simplicissima. Est quodammodo mobilis, quia longius recedens à Deo propinqua fit corporum qualitatibus quæ penitus agitantur. Si omnino immobilis esset vtique Angelus, si omnino mobilis esset qualitas. Medium tamen aliquod inter Angelum esse oportet & corporum qualitates, ne omnino immobilis Angelus mobili qualitati sit proximus, sit itaque partim etiam mobilis. Stabit eius substantia, neque in maius minusue, aut hoc aut illud mutabitur. Fluet autem operatio, & modo hæc, modo illa, atque aliter & aliter operabitur. Qualitas autem anima inferior est, quandoquidem per essentiam operationemque mutatur. Qualitate inferius corpus. Qualitas enim mouetur & mouet, mouet enim corpora. Corpus mouetur quidem, mouet nihil. Angelus quidem quod sit vnum quiddam, & quod sit actus, non à seipso habet, sed à Deo verè vno, actuque purissimo.

Sed quod sit multiplex per potentiam suscipiendi & patiendi, habet ex seipso, quan-

tum extra Deum productus, à productionis perfectione degenerat. Multitudo igitur naturalis est Angelo. Anima quoque quod vna quædam substantia sit, & quod sit actus stabilis per essentiam, non à seipsa, sed à Deo sortitur actu vno & stabilissimo. Quod verò multiplex sit & passiuæ, ex seipsa possidet, quia sub Deo locatur. Quod denique mobilis, ex seipsa rursus quia sub Angelo. Sicut igitur vnitas naturalis est Deo, & Angelo multitudo, ita motus naturalis est animæ. Lux Dei producit Angelum, sub Dei scilicet vmbra, lux Dei animam sub vmbra producit Angeli. Angelus à Dei vno actu vnitatem stabilem adipiscitur, sub Dei vmbra cadit in multitudinem; anima Dei licet statum nanciscitur, sub vmbra Dei multitudinem, sub Angeli vmbra mutationem. Fons vnitatis Deus, fons multitudinis Angelus, fons motionis est anima. Deus per seipsum vnitas, Angelus per Deum est vnus, per se multiplex. Anima per Deum vna, per Dei vmbra, id est, quia sub Deo est simul cum Angelo, multiplex per seipsam mobilis. Qualitas per superiora habet vt moueat aliquid, per se habet vt materie misceatur. Corpus per qualitatem habet vt agat, per se solum vt patiatur. Qualitas vno gradu excedit corpus, quod mouet ipsum, vno saltem cedit animæ, quod mouetur ab illa. Anima saltem vno excedit qualitatem, quod ex seipsa mouetur, vno cedit Angelo, quod mutatur, Angelus animam vno quod manet, Deo cedit vno, quod multiplex est. Deus tamen per hoc vnum abit super omnia in infinitum. Quod ita cecinit Zoroaster.

ἐαυτὸν δὲ πατὴρ ἥρπασεν  
ἐν δυνάμει μὲν νοεῖν, κλειστός ἦν οἱ  
πῦρ,

id est, Pater per seipsum rapuit, neque in mente quidem quæ illum sequitur, proprium inclusit ignem. Quasi dicat, nullam habet cum cæteris comparisonem. Corpus ab alio mouetur solum, nihil enim natura sua facit. Qualitas mouet aliud, & mouetur ab alio. Anima mouet quidem aliud, sed à seipsa mouetur. Angelus mouet alia, id est, agit in alia; ipse quidem stabilis, sed non stabilis per seipsum. Nam per diuinam stat vnitatem, quid enim aliud stare est (vt diximus) quam in naturæ suæ vnitatē perseuerare? Mouet quoque per Deum. Virtute enim primi actus agunt agentia omnia quicquid agunt, Deus per se mouet agiturque omnia, ipse quidem stabilis per seipsum. Sanè quia omnia quæ per aliud talia sunt, reducuntur ad primum aliquid quod est tale per semetipsum, idcirco quæcun-

que stabilia sunt, & mouentia per aliud, retinens ad Deum per se stabilem, & per se mouentem. Et quæcunque mobilia sunt ab alio, puta corpora & qualitates, retinens ad animam mobilem per seipsam, per se inquam mobilem, quia si à Deo descendas per Angelum, tam Deus quam Angelus stare tibi videbitur, & primum quod mobile tibi occurret, est anima. Quicquid autem primò tale est in aliquo genere, per se est tale, puta quod primò est lucidum aut calidum, per se licet & calet. Sic anima quoniam est primum mobile inter omnia quæ sunt mobilia, est vtrique per se mobilis. Cuius rei signum est, quia corpora quæ carent anima, impulsu solum agitantur externo, quæ animam habent, sua sponte mouentur, & in quamlibet loci partem. Et quoniam anima id præstat corporibus, vt per se quodammodo in partem quamlibet moueantur, sequitur vt ipsa sit verè & primo mobilis per seipsam, primumque mobile, postquam per eius præsentiam apparet in corpore, imago aliqua per se mobilis facultatis, sitque ibi motus in omnem partem, quod significat animam esse fontem motus, vnde libera & vniuersalis effluit agitatio. Per hæc solum arbitror Pythagoricum illud ænigma à Xenocrate usurpatum, scilicet animam esse numerum se mouentem, numerum, id est, naturam multiplicem, se mouentem, id est, sua proprietate mutabilem. Talem verò naturam esse alicubi oportere, multa nobis (vt significauimus iam) declarant.

Primum, quòd omne quod per aliud tale est, reducitur ad aliquid quod per se sit tale. Secundum, quia cum sint multa quæ mouentur ab alio, si omnia talia sunt, vel in infinitum vagabimur, vel circulo reuoluemur eodem, vt idem sit primus motor & vltimus, causa idem atque effectus, neque in rebus ordo sit vllus. Quocirca ad motorem aliquem peruenire compellimur, qui iam non moueatur ab alio. Sed motor ille qui proximè præcedit corpora quæ mouentur ab alio, non est prorsus immobilis, longius enim distant duo hæc, quod ab alio mobile, quod omnino est stabile, medium eorum est, quod ex seipso est mutabile. Tertium, quia si tanto melius res quælibet mouetur, quanto est motori propinquior, & ad optimum motum perueniendum est, oportet alicubi esse aliquid in quo eadem sit mobilis & motoris essentia. Quartum, quia si mouendum est aliquid, oportet vel motorem ad mobile ipsum conuerti, vel contrà, vel vtrunque

vicissim. Ponantur igitur in natura Angeli Deusque solum & corpora. Illi adhuc non accedent, quia sunt immutabiles, neque hæc ad illos, quia suapte natura torpent. Ergo nec vllus erit motus in rebus. Sit ergo necesse est natura quædam sua sponte mutabilis, quæ per se accedens ad corpora, torpentia ea suscitet, & ipsa per uigil vires suas in seipsa prius experiatur, quàm edat in corpore, vt sicut à spiritali substantia fit substantia corporalis, sic à spiritali motu corporalis motus efficiatur. Quod quidem intellexisse Platonem in Legibus arbitror, vbi inquit: Si nunc stent omnia, & paulo post moueri aliquid debeat, quid primò mouebitur? Ipsum videlicet quod per se ipsum agile est ad motum, tanquam mouendi virtuti propinquius, cuius motum cætera quoque motui subiecta sequentur. Id vocat in Phædro fontem & principium motionis. Fontem, quia ex se eam habet, principium, quia effundit in alia. Sed hic oritur dubitatio: Si Deus & Angelus mouent aliquid, atque anima illis subiicitur, ab illis vtrique agitur, quomodo igitur à se mouetur?

Respondemus in hunc modum. Cum inspiceret pratum Apelles, conatus est ipsum coloribus in tabula pingere. Pratum quidem totum subito se monstrauit, & subito appetitum Apellis accendit. Demonstratio huiusmodi & accensio, actus quidem dici potest, quoniam agit aliquid, motus verò nequaquam, quia non peragitur paulatim. Motus enim est actus per temporis momenta discurrens. Actus vero considerandi atque pingendi qui in Apelle fit, motus ideo dicitur, quoniam transigitur paulatim, modo enim alium florem inspicit, modo alium, pingitque similiter. Pratum profectò facit vt anima Apellis videat ipsum, & appetat pingere, sed vt subito. Quòd autem per diuersa temporis momenta nunc herba vna, nunc alia videatur, & similiter exprimatur, non ipsum efficit pratum, sed Apellis anima, cuius ea natura est, vt non simul inspicat varia, referatque, sed paulatim. Ergo motionis huius quæ in videndo est atque pingendo, initium & finis est pratum. Inde enim pictoris cœpit consideratio, eodem tendit & appetitio. Sed fons per quem talis actus paulatim fit & tempore, motusque dicitur, est pictoris ipsius anima. Similiter apud Platonicos anima rationalis perpetuo quodam lumine Deum quodammodo & Angelum cogitat siue auguratur, seque ipsam appetit ad eorum similitudinem pingere, tum speculationem, tum moribus atque actione

se paulatim formando, se mouet. Motio hæc ex animæ ipsius natura effluit propriè, tanquam fonte proprio motionis, id est, operationis, scilicet temporalis, incitatur autem à supernis tanquam ab extrinseco initio atque fine Infusio quæ à supernis manat in animam, vna stabilis subita fit & æterna, & quantum in se est, similia quoque in anima operatur, id est, subita, & stabilia, & æterna. Quod autem operationes animæ & opera paulatim tempore fiant atque mutantur, ex propria animæ natura supernis imbecilliore procedit. Sed rem totam hoc accipe exemplo. Sol ex seipso lumen habet, infundit ipsum momento in Mercurium, Mercurius quoque momento totum suum accipit lumen, manetque semper, deinde plenissimus. Sol idem lumen momento infundit in Lunam, Luna non suscipit ipsum momento, sed tempore. Nam prout aliàs aliter in Solem vertitur, ita aliàs aliter accipit lumen, & per naturam suam vicissitudine luminis variatur. Sol Deum, Mercurius Angelum, Luna significat animam. Quod autem de Mercurio dico, de omnibus similiter super Lunam stellis dictum intellige. Sicut enim illæ ad Solem, sic ad Deum Angeli referuntur. Anima verò sola sicut Luna ad Solem, ita se habet ad Deum. Quapropter nihil obstat quin anima à diuinis descendat, capiatque diuina, & tamen per naturam propriam moueatur, semperque moueri possit & viuere.

*Anima est medius rerum gradus, atque omnes gradus, tam superiores quàm inferiores connectit in vnum, dum ipsa & ad superos ascendit, & descendit ad inferos.*

## C A P V T II.

**C**Æterum, vt ad id quandoque veniamus, quod cupimus, in quinque gradus iterum omnia colligamus. Deum, scilicet & Angelum in arce naturæ ponentes, corpus & qualitatem in infimo, animam verò inter illa summa & hæc infima mediam, quam merito essentiam tertiam ac mediam more Platonico nominamus, quoniam & ad omnia media est, & vndique tertia. Si à Deo descenderis, tertio descensus gradu hanc reperis. Tertio quoque ascensus gradu, si suprà corpus ascenderis, huiusmodi essentiam in natura summopere necessariam arbitramur. Quoniam Angelus quidem, vt Platonici dicunt, verè est, id est, stat semper, quali-

tas fit, id est, mouetur aliquando, ideo qualitas omnino differt ab Angelo, tum quia hæc mouetur, ille manet, tum quia hæc fit aliquando, ille est semper, ergo opus est medio, quod partim cum Angelo, partim cum qualitate conueniat. Quid illud? nunquid quod est, id est, intrinsecus manet aliquando? Non. Tale enim aliquid non reperiunt, nam quod per tempus aliquod intrinsecus, id est, vel ex se vel ex statu proximè manet, manet & semper. Itaque medium erit illud quod semper fit, id est, mouetur. Quod quia semper est, cum Angelo congruit, quia mouetur cum qualitate. Vnde sequitur esse oportere essentiam tertiam horum mediam, quæ semper moueatur & viuatur, suoque motu vitam diffundat in corpora. Rectè dicitur à Platoniceis, super id quod est in parte temporis, esse quod est per omne tempus, super illud rursus esse quod est per æuum, denique super illud æuum existere. Sed inter illa quæ sunt æterna solum, atque illa quæ solum sunt temporalia, esse animam quasi quoddam vinculum vtrorumque. Cui quidem hac in re similes quodammodo sunt partes corporis mundani præcipuæ. Sunt & qui cælum Empyreum tanquam prorsus immobile in æternitate ponant, cæteras verò sphaeras in æternitate simul & tempore, composita denique in tempore tantum. Similiter quoque puros intellectus in gradu primo, sed intellectus animales in secundo, tandem animas corporales in tertio. Verum vt ad propositum reuertamur, omne opus quod constat ex pluribus, tunc est perfectissimum, quando ita ex suis membris conglutinatur, vt vnum fiat vndique, sibi constet & consonet, neque facile dissipetur. Quod liquido in quatuor elementorum temperamento corporalis natura demonstrat, vbi terra & ignis longè distantes, per aërem copulantur & aquam. Multo magis in vniuerso Dei opere connexio partium est ponenda, vt vnius Dei vnum quoque sit opus. Deus & corpus extrema sunt in natura, & inuicem diuersissima. Angelus hæc non ligat. Nempè in Deum totus erigitur, corpora negligit. Iure perfectissima & proxima creatura Dei, fit tota diuina, transiitque in Deum. Qualitas etiam non connectit extrema, nam declinat ad corpus, superiora relinquit, relictis incorporeis, fit corporalis. Hucusque extrema sunt omnia, seque inuicem superna & inferna fugiunt, cōpetentia carentia vinculo. Verum essentiali illa tertia interiecta, talis existit vt superiora teneat, inferiora non deserat, atque ita in ea supera cum inferis colligantur.

Est enim immobilis, est & mobilis. Illinc cum superioribus, hinc cum inferioribus conuenit. Si cum utrisque conuenit, appetit utraque. Quapropter naturali quodam instinctu ascendit ad supera, descendit ad infera. Et dum ascendit, inferiora non deserit, & dum descendit, sublimia non relinquit. Nam si alterutrum deserat, ad extremum alterum declinabit, neque vera erit ulterius mundi copula. Profecto idem facit, quod aer inter ignem & aquam medius, qui cum igne in calorem, cum aqua conuenit in humore. Illic cum igne calet semper, hic cum aqua humet. Illic tenuatur, & clarescit ut ignis, hic vicissim hebescit ut aqua. Imò vero idem facit quod Solis lumen. Id enim à Sole descendit in ignem, & ignem implet, neque deserit Solem. Semper Soli hæret, semper implet & ignem. Perficit quidem aërem, & infecto aëre non inficitur. Similiter oportet essentiam tertiam & diuinis simul hære, & implere mortalia. Dum diuinis hæret, quia spiritaliter illis vnitur, & spiritalis vnio gignit cognitionem, illa cognoscit. Dum implet corpora, intrinsecus illa mouens, illa viuificat, est igitur diuinorum speculum, vita mortalium, utrorumque connexio. Sed quomodo corporibus iungitur? Nam fortè cum corpus aliquod ingreditur, vnum quoddam illius corporis tangit punctum, atque ita dicitur vnita corporibus? nequaquam. Vniretur enim puncto, non corpori, neque totum corpus illud viuificaret, sed punctum viueret vnum, toto corpore vita carente. Imò verò si in vnum semper collecta punctum, ita sibi ipsi vnita perseueraret, idem esset quod Angelus, qui longè distat à corpore. Vel saltem diuinis eo modo hæreret quidem, corpora verò relinqueret. Igitur non vni duntaxat corporis puncto coniungitur, sed pluribus, atque ita partes corporis implet. Sed nunquid ita implet, ut albas carnes albedo? & omnino quæuis qualitas materiam propriam? Minimè. Sic enim esset idem quod qualitas, atque relictis diuinis ad corpus penitus declinaret. Albedo ita in tota est carne, ut cum ea æqualiter in partes plurimas extendatur & diuidatur, & pars albedinis secundum Physicos in parte sit carnis, & in maiori carnis parte, pars maior albedinis, in minore sit minor. Sic albedo facta est corporalis. Idem pateretur essentia illa quam tertiam esse putamus, si non aliter quàm qualitas ista funderetur in corpus, atque ita ad alterum naturæ extremum tracta esse desineret copula mundi. Quamobrem cum corpus ingreditur, sin-

gulis corporis particulis tota sit præsens, neque diuiditur distrahiturue in partes vllas ad hoc ut partibus corporis à se inuicem distantibus adstet. Nam per vim indiuiduam tangit corpus, non per latitudinem quantitatis. Igitur integra remanens atque simplex, singulis partibus tota & indiuisa sit præsens. Quemadmodum tota vox significatioque quodammodo simul in singulis domus est partibus, cum tota penè simul audiatur & intelligatur in singulis. Neque impossibile est hanc essentiam, cum sit indiuiduum quiddam in seipso existens, amplæ corporis moli sic totam esse præsentem, imò verò ex eo quod & indiuidua est, & non clauditur loco, potest tota totum quicquid in loco est penetrare & comprehendere. Extensio enim quantitatis ubique reperitur, talem vim & præsentiam prohibet, ita ut res extensa per quantitatem, nequeat tota esse simul in pluribus. Quin etiam res illa quæ licet indiuidua sit, est tamen alicubi affixa corporis quantitati (sicut punctum quod tanquam lineæ terminus signatur in linea) nequit tota esse simul per partes quaslibet corporis. Sic punctum quod est alicubi in linea aliqua circuli designatum, neque in omnibus lineis aliis inest, neque per totam diffunditur lineam aut circulum. Punctum vero quod circuli centrum est, nullius lineæ proprium, in omnibus quodammodo lineis reperitur, quæ inde ad circumferentiam deducuntur. Et cum nullum punctum quod in circumferentia designatur, totum circulum æquè respiciat, centrum tamen quod in nulla circumferentia propriè figitur, vniuersum circulum æquè circumspicit. Non potest igitur esse tota simul in pluribus res illa quæ diuidua est, neque etiam res illa quæ licet sit indiuidua, certum tamen in re alia diuidua habet situm. Tertia verò illa essentia neque extensa est, quia esset qualitas, neque in extensione sita alicubi, quia non per se ac liberè moueretur, si non subsisteret per seipsam.

Quapropter est instar puncti alicuius in seipso viuentis, & ab omni quantitate & situ penitus absoluti. Ideo ambit æquo omnem corporis situm, & quando corpus ingreditur, quia ipsa non est proprium quantitatis alicuius punctum, non adstringitur ad punctum aliquod corporeæ quantitatis. Quippè cum sit extra quantitatis genus, non determinatur ad tangendum punctum aliquod quantitatis, sed est ut centrum in lineis omnibus, & circulo toto. Hinc etiam illud sequitur, ut hæc essentia & diuidua sit simul, & indiuidua. Diuidua,




quia per diuisionem corporis vitalem sui vnam diffundit, dum diuersis partibus corporis se communicat. Indiuidua, quia integra simul adstat & simplex. Diuidua inquam, quia vmbra eius in toto corpore est diuiduo. Indiuidua, quia ipsa per modum indiuiduum est in qualibet corporis parte tota. Iediuidua rursus, quoniam stabilem habet vnitamque substantiam. Diuidua, quoniam per operationem in plura diuiditur, dum per motum operatur & tempus. Indiuidua tertio, quia suspicit superiora, quæ admodum sunt vnita. Diuidua, quia ad inferiora declinat, quæ plurimum diuiduntur. Talis quædam natura in ordine mundi videtur summopere necessaria, vt post Deum angelumque, qui neque secundum tempus neque secundum dimensionem diuidui sunt, ac supra corpus & qualitates quæ tempore dimensioneque dissipantur, sit medium competens, quod temporali quidem discursione quodammodo diuidatur, non tamen sit dimensione diuisum. Neque rursus in sua quidem natura collectum maneat semper vt illi, neque in partes discerpatur vt ista, sed indiuiduum sit pariter & diuiduum. Hæc illa ipsa essentia est quam Timæus, Locrus & Plato in libro de mundo constare dixerunt ex indiuidua diuiduaque natura. Hæc illa est quæ seipsam inserit mortalibus, neque sit ipsa mortalis. Sicut enim seipsam inserit integram, non discerpam, ita & integram retrahit, non dispersam. Et quia dum corpora regit, hæret quoque diuinis, corporum domina est, non comes. Hoc maximum est in natura miraculorum. Reliqua enim sub Deo vnum quiddam in se singula sunt, hæc omnia simul. Imagines in se possidet diuinorum, à quibus ipsa dependet. Inferiorum rationes & exemplaria, quæ quodammodo & ipsa producit. Et cum media omnium sit, vires possidet omnium. Quod si ita est, transit in omnia. Et quia ipsa vera est vniuersorum connectio, dum in alia migrat, non deserit alia, sed migrat in singula, ac semper cuncta conuersat, vt merito dici possit centrum naturæ, vniuersorum medium, mundi series, vultus omnium, nodusque & copula mundi.

Qualis sit tertiæ huius essentia natura, satis (vt arbitror) diximus. Quod autem hæc ipsa sit propria rationalis animæ sedes, facillimè inde conspicitur, quod huiusmodi est rationalis animæ definitio, Vita & intelligens discurrendo, & corpus viuificans tempore. Hæc eadem est essentia illius conditio. Nam viuit, intelligit, corpori præstat vitam. Quod viuatur, apparet, quoniam

ea in terris viuere dicimus, quæ sua quadam interiori virtute per omnem partem mouentur, sursum, deorsum, ante, retro, ad dextram & sinistram. Ita plantæ mouentur & animalia. Vbi igitur est motus intimus & communis, ibi vita. Vita, inquam, ibi est vis ipsa interna mouendi. Vis huiusmodi ibi est præcipuè, vbi totius agitationis fons est & origo, primusque motus. Maxime enim est motus intimus atque communis, vbi est primus. Primus autem motus inertia illa essentia ponitur. Ibi igitur vita est: vita, inquam, talis vt eius participatione corpora viuant & moueantur. Nam est vita corporibus per naturam quàm proxima. Illa igitur essentia tertia est vita viuificans corpora. Est etiam intelligens. Quippè si motus alicubi perfectus est, perfectissimus certe est, vbi primus. Nulla enim perfectio in posteriores motus nisi à primo descendit. Igitur motus est in tertia essentia motionum omnium perfectissimus. Is est autem qui à fonte suo discedit quàm minimum, qui suo fundamento maxime iungitur, qui vnus & æqualis est summopere, qui seipso sufficiens est, qui figuram perfectissimam imitatur. Talis autem est circuitus, vt cuique constat, qui etiam solus omnium motionum est sempiternus. Alij quippè motus aliquem attingunt terminum, ultra quem non liceat progredi, cum nullum sit vsquam spatium infinitum. Circuitus autem vt semel eadem repetit, ita bis ac ter & quater, simili peti ratione, idemque in eo finis est atque principium, ideo cum finiri videtur, tunc incipit. Circuitus igitur sempiternus est essentia, tertiæ proprius, ita vt per motum in seipsam circulo reflectatur. Merito autem si mouetur ex se, mouetur & in seipsam, vt finis aliquis motionis fiat, vbi aliquid est principium. Siquidem ipsa motionis causa quodammodo sui ipsius gratia edit motum. Igitur essentia illa à seipsa incipiens, perpetuo in seipsam reuoluitur, vires suas à summis per medias ad infimas explicando, ac rursus infimas per medias ad summas similiter replicando. Si ita est, seipsam, & quæ possidet intus, animaduertit. Si animaduertit, certe cognoscit. Cognoscit autem intelligendo, dum essentiam suam spiritalem & à materie limitibus absoluta agnoscit. Talium namque cognitio dicitur intellectio. In nobis profectò videmus cognitionem nihil esse aliud quàm spiritalem vnionem ad formam aliquam spiritalem. Visus per suum spiritum spiritali colorum imagini iunctus videt. Iunctus verò materie, nihil cernit quod patet, si quis super acie oculorum solidum aliquod corpus posuerit.

Mens quoque nostra spiritali virtute in corporalibus rerum speciebus rationibusque unita res ipsas intelligit. Similiter cum essentia tertia ( quæ quidem spiritalis est ) sibiipsi coniungitur , spiritali modo seipsam animaduertendo cognoscit atque intelligit. Intelligit etiam diuina, quibus spiritali modo hæret quàm proximè. Intelligit & corporalia , ad quæ declinat etiam per naturam. Cognoscit, inquam, temporaliter discurrendo , cum per ope-

rationem sit mobilis. Ex omnibus his colligitur talis quædam essentia tertiæ definitionis, scilicet vita quæ corpora per naturam viuificat. Cognoscit quoque seipsam & diuina & naturalia per discursum. Quicunque verò non viderit eandem esse animæ quoque rationalis diffinitionem, is anima caret rationali. Quapropter anima rationalis in essentia tertia habet sedem, obtinet naturæ mediam regionem, & omnia connectit in vnum.



# THEOLOGICÆ PLATONICÆ,

DE IMMORTALITATE ANIMORVM,

EODEM FICINO AVTHORE,

LIBER QVARTVS.

*Tres sunt animarum rationalium gradus: in primo, est anima mundi: in secundo, anima sphaerarum: in tertio, anima animalium, quæ sphaeris singulis continentur.*

## CAPVT PRIMVM.



Rincipio quinque gradus accepimus ascendendo, deinde eos descendendo inuicem comparauimus, tertio in eorum medio rationalem animam collocauimus. Deinceps animæ huius gradus, sicuti solent Mercuriales Theologi perscrutabimur. Generatio principium est nutritionis & augmenti. Nisi quam enim aut nutriri, aut augeri absque partium quarundam generatione quicquam potest. Exploratum autem habemus, vbi generationem nutritio & augmentum sequitur, ibi vitam animamque inesse. Terram verò videbimus seminibus propriis generare innumerabiles arbores, animantesque & nutricem augere. Augere etiam lapides, quasi dentes suos, & herbas quasi pilos, quamdiu radicibus hærent, quæ si euellantur & extirpentur à terra, non crescunt. Quis foeminae huius ventrem vita carere dixe-

rit, qui tam multos sponte sua parit foetus, & alit? qui sustinet seipsum? cuius dorsum dentes promit & pilos? Eadem est de aquæ corpore ratio. Habent igitur animam aqua & terra. Nisi forte quis dixerit, viuentia illa, quæ nos cum feminibus propriis carere videantur, ab anima terre fieri dicimus, aut aquæ, non ex tali animâ nasci, sed ex influxibus coelestium animorum.

At verò Platonici negabunt influxus illos, cum sic accidentia quædam à suis vitalibus substantiis longè seiuncta, possent vitalem hic substantiam generare, quia nequeat accedens generare substantiam, nisi tanquam instrumentum substantiæ subiiciatur, substantiæ, inquam, proximæ. Nam instrumentum seorsum ab artifice non mouetur ad artis formam. Sic influxus ille vitæ cœlestis ab ipsa vita remotus, vitalem formam non generabit. Merito cœlestis instinctus, quia communis est cuilibet elemento, in quolibet

determinatur ad vitam aliquam in ipso elemento gignendam à communitotius elementi vita, eique subditur vt instrumentum. Sed neque etiam vlllo pacto generabit ipse. Cum enim nihil vltra proprium agat gradum, nullo modo potest accidens generare substantiam, sed materiam duntaxat accidentali quadam præparatione disponere. Oportet autem elementis hanc vitam inesse, intus fabricatricem, ea ratio persuadet, quod & ad substantiam generandam substantia est opus agente, & ad perfectam actionem opus est perfecta agentis ipsius præsentia. Quando verò substantia corporalis corporali substantiæ admouetur ad aliquam actionem, quod in agente ipso substantiale est, remanet extra, quod penetrat intro, est prorsus accidentale. Opus est autem substantia penetrante, vt substantia fiat inde, fiatque perfecte. Substantia talis incorporea est, & viuens.

Præterea causæ naturales, quia per naturam suam agunt, ideo ad certum effectum non aliter quàm certa naturæ suæ ratione feruntur. Alioquin non magis ad hunc effectum vergerent, quàm ad illum. Quo fit, vt quatenus operi faciundo quadrant, eatenus operentur, atque contra. Quapropter herbæ animantesque quæ sola putrefactione nasci videntur in terra, non minus à propriis causis oriri debent, quàm quæ propagatione nascuntur. Sed vbinam sunt hæc propriæ causæ? Proculdubio in terrena vita sunt terrenarum vitarum causæ propriæ. Nam & si eas cœlestibus animis attribueris, oportebit tamen cœlestes communesque instinctus ad terrenas particularesque animas per vniuersalem terræ animam contrahi, vt à cœlesti communique ad oppositum, id est, terrenum particulareque, per medium competens, id est, terrenum communeque progrediatis. Rursus si causas illas quæ propriæ dictæ sunt, in multorum agentium concursu posueris, cogeris denique vnam quandam proprii ordinis determinatam causam assignare, quæ causas varias, & hinc atque illinc confluentes, ad effectum proprium ordinet atque determinet. Erunt igitur illæ causæ in anima terræ, quæ per naturalem ideam rationemque vitis, vitæ per muscarum rationem, mulcas efficiet. Faciet, inquam, talia in materia, sic prius, aut sic ab anima ipsa disposita, dum ad eam disponendam, sic aut sic contrahit mundanos instinctus. Proinde si ars humana nihil est aliud quàm naturæ imitatio quædam, atque hæc ars par certas operum rationes fabricat opera,

similiter efficit ipsa natura, & tanto viuacior sapientiorque arte, quanto efficit efficacius, & efficit pulchriora. Ac si ars viuas rationes habet, quæ opera facit non viuentia, neque principales formas inducit, neque integras, quanto magis putandum est viuas naturæ rationes inesse, quæ viuentia generat, formasque principales producit & integras. Quid est ars humana? Natura quædam materiam tractans extrinsecus. Quid natura? Ars intrinsecus materiam temperans, ac si faber lignarius esset in ligno. Quod si ars humana quamuis sit extra materiam, tamen vsque adeo congruit & propinquat operi faciundo, vt certa opera certis consummet ideis, quanto magis ars id naturalis implebit, quæ non ita materiæ superficiem per manus aliaue instrumenta exteriora tangit, vt Geometra anima puluerem quando figuras describit in terra, sed perinde vt Geometrica mens materiam intrinsecus phantasticam fabricat. Sicut enim Geometra mens dum figurarum rationes secum ipsa volutat, format imaginibus figurarum intrinsecus phantasiæ, perque hanc spiritum quoque phantasticum absque labore aliquo vel consilio, ita in naturali arte diuina quædam sapientia per rationes intellectuales vim ipsam viuificam & motricem ipsi coniunctam, naturalibus seminibus imbuunt, perque hanc materiam quoque facillimè format intrinsecus.

Quid artificium? mens artificis in materia separata. Quid naturæ opus? naturæ mens in coniuncta materia. Tanto igitur huius operis ordo similior est ordini qui in arte est naturali, quàm ordo artificij, hominis arti, quanto & materia propinquior est naturæ quàm homini, & natura magis quàm homo materiæ dominatur. Ergo dubitabis certorum operum certas in natura ponere rationes? Imò verò sicut ars humana quia superficiem tangit materiæ, & per contingentes fabricat rationes, formas similiter solum efficit contingentes, sic naturalem artem, quia formas gignit siue eruit substantialis ex materiæ fundo, constat funditus operari per rationes essentielles atque perpetuas. Plurimæ animantes, tum in terra, tum in aqua, sola putrefactione nascuntur absque vlllo semine corporali. Quamplurimæ ex seminibus procul iactis ab animali, diu postea, partim fomento quodam extraneo accedente, sine manifesto fomento pullulant. Herbæ omnes, arboresque, quanquam vel serendo, vel plantando

plantando plerumque propagantur, tamen quotidie multis in locis absque semine vel germine corporali sponte nascuntur, ut omittam quod multi Philosophi post aquarum miranda diluvia etiam animalia perfectiora ex terra existimant procreari. Oportet tamen certa quædam ex certis quibusdam seminibus exoriri, & quæ ex potentia in actum transeunt, per causam quandam in actum perducere talem, quæ ipsa iam in setalem vel æqualem, vel præstantiorem habet actum. Neque sufficere putandum est si vniuersalis remotaque causa tantum sit præstantior, alioquin imperfectissimæ quæque apud nos causæ possent in virtute cælestium perfectissima quæque producere. Hæc omnia significant adesse vbique per terram & aquam in natura quadam artificiosa vitalique spiritalia & viuifica semina omnium quæ ipsa per se gignant vbique semina corporalia desunt, semina rursus derelicta ab animalibus foueant, atque ex putrido vinaceo semine (cuius & vina & vilis natura est) variam, ordinatam, preciosamque generent vitem, viribus videlicet suis variis rationibus preciosis. Eadem natura vitalis substantialis elementorum formas ex fundo materiæ ipsius educit, quo non penetrant substantiæ corporales. Elementales insuper qualitates, quæ per se videntur solum, frigefacerentque, & similia, ad colorum figurarumque speciosissimam ducit varietatem, vitæque vigorem.

Præterea quando ex frigidorum corporum collisione fit ignis, ubi non præerat ignis nisi potentia quadam, & illa quidem remota ab actu, ipsa per rationem ignis efficacissimam generat ignem. Et vbique solæ apparent qualitates accidentales ad generationem conferre non nihil, quæ tamen per se absque substantia quadam effectui congrua nequaquam sufficiunt, ipsa vicem genitricis substantiæ gerit. Quinetiam corpora mixta, quæ propter terrenam vel aquaticam crassitudinem secundum se pigra sunt & vilia, admirabiles aliquas actiones extollit, imò etiam ad animos hominum & fascinandos & roborandos, quod absque virtute animi, & quidem potentioris, effici nequit. Virtute enim naturæ viuacis, & sapientis, quæ his ipsis est infusa corporibus, herba hierobotanon, ut magi inquirunt, confert diuinationibus Medicorum. Acharis fouet visum, obtundit venenum, præstat vires atque facundiam, præfens Adamas Magneti quod

rapit, aufert. Cornicula sanguinis sistit fluxum, & mitigat iras. Onyx accendit iras, terret in somniis. Corallus denique (ut testantur Metrodorus & Zoroaster) insanos terrores amouet, fulgura repellit & grandinem. Animis certe nostris tempestatibusque natura illa præstat, cuius virtute talia fiunt, quam esse oportet infusam corpusculis infimis, ut infima secum præter ipsorum naturas ad superiorum eleuet actiones. Esse vitam huiusmodi mundo infusam, Strato & Chrysippus confitebuntur, sed ipsam esse summum Deum asseuerabunt.

Platonici id negabunt, quia super eam vitam quæ alicuius est, & in aliquo, esse decet eam vitam, quæ sui ipsius est & in seipsa consistit. Vita verò mundanæ alicuius sphaeræ non minus familiaris est sphaeræ suæ quàm humano corpori animus sit humanus. Quapropter vita sphaeræ, siue alicuius, siue totius, neque prima est vita, neque Deus. Deus enim summus summa est vnitas. A summa vnitatem secundum Platonicos multitudo forsitan aliqua statim proficisci potest, non tamen tanta diuersitas discordiaque sese inuicem corrumpentium qualitarum. Rursus summæ bonitati pulchritudinique nihil mali & deformis est proximum, mala verò multa deformiaque contingunt circa materiam. Præterea si Deus est ipsum esse, non potest esse forma materiæ, talis enim forma non esset ipsum, sed essendi principium. Et quia Deus est esse, ut ita dixerim, adeò absolutum, ut non sit in essentia aliqua, multo minus est in materia. Item cum Deus sit prima efficiens causa, agit sua omnia primò, forma verò materiæ non agit primò omnia. Compositum enim primò agit potius quàm pars compositi.

Rursus compositi partes in potentia quadam sunt ad ipsum totius actum. In Deo autem nulla est ad vltiorem actum potentia. Non ergo ex ipso & materia fit animal vnum, ut stultè putant Almariani. Animal quippè rationale ex seipso mouetur, vnde moueri potest & non moueri, atque tum velocius moueri, tum tardius. Quod autem tale est, non perseuerat in motione perpetua & æquali, nisi lege alicuius superioris, quod nullo modo motetur. Deus igitur non est globi alicuius anima, ne ex ipso & globo animal vnum conficiatur, cogaturque habere supra se ducem. Sed nunquid sphaeræ vitam esse Angelum concedemus, naturalesque formas ab ideis mentis Angelicæ proficisci nequaquam. Corpus enim

sicut per talem aut talem essentiam ad vitam talem aut talem, ita per talem vitam ad mentem talem necessario præparatur. Ideo Plato in Timæo; Deū, inquit, mentem animæ, animam corpori coniunxisse. Quasi nō possit clara mens opaco corpori aliter quā per animam perspicuam copulari, sicut & lucidum corpus denso per diaphanum, id est, perspicuum iungitur, ut quod & lucem per se habet, & aliis exhibet, ei quod luce caret, & impedit lucem, per naturam mediam coniungatur, quæ licet per se careat luce, non tamen impediat lucis ingressum. Ac si mentis nostræ operatio per quandam à materia separationem perficitur, operatio mentis Angelicæ, quæ in genere intellectuali perfectæ est, longè semota est à materia. Cum verò Angelus ipse nihil aliud sit quā mens, & qua ratione mens est operando, materiam fugiat, quoniam pacto Angeli substantia materiæ proximè inhærebit? Decet, ut quemadmodum particulares hominum mentes, particularia ipsarum corpora per animas proprias, id est, per animales vires attingunt & mouent, ita communes sphaerarum mentes communia corpora per animas complectantur & ducant. Sic enim & Sphaera illæ vitam insitam possidebunt, & mentes diuinæ è sublimi statu nequaquam deiciuntur, & super vitas sphaerarum, quæ intellectuales sunt simul & animales, erunt Angelicæ vitæ, quæ solum intellectuales existunt. Super has autē erit Deus vita vitarum. Adde, quod si mens Angelica indiuisibilis immutabilisq; est, & super locum tempusque omnino, nulla ratione quadabit corpori diuisibili, mutabili, loco temporique subiecto, aut formas in eo tales efficiet, nisi anima intercesserit, quæ quia indiuisibilis est, superque locum, formatur ab Angelo siue ducitur: quia verò mutabilis est, & aliquid habet temporis, congruit cum materia, & formas acceptas desuper deducit in seipsa ad mutabilem temporalemque naturam, per quam facillimè transcutit in corpus quoque mutabile, atque in ipso diuisibiles iam euadunt.

Placet ergo Platoniciis, Deum per se ipsum formare Angelos, per Angelos animas, per has postremò materiam, formasque à summa vita & actu gradatim degenerare vsque ad eò, ut in materia iam neque efficaces appareant. Nempè à Deo in Angelum, ex vna essentia transcutit in multiplices qualitates, ab hoc in animam, ex statu in motum aliquem effi-

ciem. Ab hac in corpus ex vitali atque motu in mutationem mortalis naturæ passiuam. Quamobrem, si aqua terræque vita insita est, neque tamen, hæc est Deus, ne immensus actus vilissimæ potentiae sit addictus, neque Angelus, ne clarissima mens obscurissimæ naturæ sit proxima.

Consequens est ergo ut aqua & terra animas habeant, quarum artificio hæ sphaeræ rebus pretiosissimis exornentur, quemadmodum & animulæ quæque animalium aquaticorum & terrenorum, videlicet duce sphaeræ suæ anima, corpuscula sua per insita semina gratissimè pingunt atque figurant. Globo terreno vna anima sufficit, quoniam ipse vnus est omnino, partibus in molem vnā continuatis. Vna quoque anima orbi sufficit aquæ. Necessè est tamen geminas esse horum duorum animas, specie inuicem differentes, quod ostendunt ipsorum corporum naturæ diuersæ specie, qualitatibus & effectibus. Si globi tales propter crassitudinem à spiritus puritate remoti, atq; angusti, propriis animabus viuunt, viuunt & multo magis globi omnes superiores, qui & puriores sunt, & ampliores admodum, quorum fomento terra & aqua parturiunt. Animam suam habeat aer, suam ignis, eadem ratione qua terra suam, & aqua. Similiter octo coelorum globi animas octo, tot enim apud veteres erant coeli. Inter multa sunt animalia, quæ propriam habent animam à communi anima terræ distinctam, quia mouentur loco, quod terra non facit, quia separata cum sint à terra, viuunt, quod lapides & plantæ non faciunt, quæ per animam viuunt terræ, non suam, quia se à terra vel volatu, vel ædificiis & machinis tollunt in altum. In aqua rursus plurima sunt animalia viuentia propriis animabus. Si ergo à Deo fecunda & ornata facta est aqua & terra, cur non aer & ignis præter communes animas, suas etiam animas multas contineant, & animalia propria? Idem de coelorum sphaeris argumentare; ubi stellæ cum sint inter se quantitate, luce, virtute, motuque diuersæ, & singulæ proprios circuitus peragant, specie quoque diuersas animas habent. Quæ quidem stellæ ita coelos ornant, ut aquam aquaticam, & terrena animalia terram. Animalia illa coelestia ob maximam lucis copiam clarè perspicimus, terrena quoque & aquatica, quia & propinqua sunt nobis, & sua crassitudine oculis sese monstrant. Aërea verò & ignea non videmus, quia



neque etiam ignis & aëris cernimus elementa, cum neque lucis ingentissimæ beneficio, neque molis crassitudine appareant oculis terrenorum. Animam ipsam terræ rationalem esse, necessarium est, quandoquidem animalia quædam terræ ratione non carent, præsertim cum opera terræ pulchriora sint quàm hominum opera. Si anima huius infimi globi ratione capta non est, neque etiam superior globorum animæ sunt rationis expertes. In terra & aqua talis est distinctio partium, quod terrenorum corporum quædam sunt minus pura, quædam purissima. Illa animas irracionales habent, ista rationales. Idem in aqua, ubi sunt pisces irracionales in luteis partibus aquæ. Sunt etiam dæmones aquei quos Nereides vocat Orpheus, in quibusdam sublimioribus exhalationibus aquæ, quales sunt in hoc aëre nubiloso, quorum corpora videntur quandoque acutioribus oculis, præsertim in Perside & Affrica, ut existimat Zoroaster. Adiungit Porphyrius illos dæmones videri solum, in quorum corporibus præter aquæ exhalationem ignis abundat, idque in oriente contingere, atque meridie. Illos insuper tangi, in quibus præterea multum est terræ, quales fuisse temporibus suis apud Tuscos inquit. Sed in globis omnibus super aquam non sunt animantes nisi compotes rationis, quoniam non diuiduntur globi illi in partes crassas & tenues, & quicquid ibi est, aqueis exhalationibus longè est purius. Sed liceat hic vna cum Pythagoricis parumper confabulari. Quoniam verò omnis multitudo maximè ad paucum est numerum colligenda, paucus numerus ad paucas vnitates, vnitates paucæ ad vnitatem vnā, ideo innumerabilis animarum turba in qualibet sphaera mundi viuentium, ad paucas animas in ea ipsa sphaera præstantiores, puta principes duodecim est reducenda. Sed cur ad duodecim principes maximè, quia sicut vnum mundi corpus duodecim apud priscos continet artus, hi verò articulos plurimos, sic vna mundi anima, animas duodecim, hæc plurimas, sed hæc ita continent plurimas, ut duodecim primò contineant principales: Cur? Quia cum anima cuiusque sphaeræ ex primo duodenario animarum numero selecta sit, & accommodata sphaeræ, merito recurrit rursus in duodenarium, cuius numeri signum in sphaera prima habemus & vltima. In prima quidem per Zodiacum cernimus animalia sydereæ duodecim. In quolibet autem illorum stella quædam est principalis tanquam cor animalis illius in cælo picti. In

quo quidem corde vitam agit anima totius syderis principalis. Illic igitur animæ diuine, duodecim a Pythagoricis collocantur. In Arietis corde Pallas. In corde Tauri Venus. Geminorum Phœbus particularis. Cancrī Mercurius. Leonis Iupiter particularis. Virginis Ceres. Libræ Vulcanus. Scorpionis Mars. Diana sagittarij. Capricorni Vesta. Aquarij Iuno. Piscium verò Neptunus. In vltima quoque sphaera scilicet terra duodecim vitæ sunt hominum. Quippè vitam agunt homines per rationem cerebro assignatam, per iram cordi, per concupiscentiam iecori attributam. Si quis nulla harum virium vti dicatur, ne spirabit quidem. Si quis ratione sola, non amplius erit homo, imò impossibile est animam corpori coniunctam sola incedere ratione. Sola quoque irascendi vi vti nequit, quia hæc semper vel rationi seruit, vel cupiditati. Sola etiam cupiditate non potest, hæc enim roboratur semper vel a ratione deprauata, vel ab iracundia. Ergo necessarium est aut per omnes illas vires incedere, aut per duas. Prima igitur humana vita erit, quæ ratione vtitur magis ira minus, concupiscentia minimè. Secunda, quæ ratione magis, minus concupiscentia, iram quam minimum. Tertia, quæ magis ira, ratione minus, libidinè minimum. Quarta, quæ ira magis, cupiditate minus, ratione minimè. Quinta, quæ libidine multum, ratione parum, ira paululum. Sexta, quæ multum libidinè, ira parum, paulum ratione. Ita ex communi trium virium vsu sex vitæ conficiuntur. Nascuntur sex aliæ ex vsu duarum. In prima ratio superat iram, in secunda è conuerso, in tertia ratio superat concupiscentiam, in quarta contra, in quinta ira dominatur concupiscentiæ, in sexta è conuerso. Si in sphaeris mundi duabus extremis duodenarius numerus obseruatur, obseruatur in mediis. Quamobrem sicut incepimus paulo ante, plurimas animas in qualibet sphaera viuentes, ad duodecim principales in eadem viuentes sphaera per ordinem reducamus. Accipiamus iterum duodecim principes in vna quauis sphaerarū duodecim. Tot enim apud priscos sunt sphaeræ mundi, referamus illas ad duodecim animas illarum sphaerarum communes. Duodecim rursus sphaerarum animas ad vnā ipsius vnius materiæ animam. Quoniam verò anima est mentis particeps & super naturam participem oportet esse naturam per se plenam, ideo animarum genus ad mentes extollitur liberæ, mentesq; tandem ad vnā mentem. Et vna mens, quia & mens est & vnum, ad vnum simpli-

citer est erigenda, quod non sit vnum hoc, vñ illud, seu vel vna mens, vel vna anima, sed vnum ipsum, quod vocat Pythagoras vniuersalem Apollinē. Vult enim *ἡ ἀπλοῦς* dici, quasi *ἀπλῶς*, quod significat simplicē, & quasi *ἡ πολλῶς*, quod significat semotum à multitudine. Idem vocat *τ' ἀγαθόν*, id est ipsum bonum, quoniam bonitas & perfectio cuiusque in eius vnitatem consistit, vt si in rebus idem est bonitas atque vnio, supra res quoque idem sit ipsum primum vnum, primumque bonum. Quapropter primum vnum bonumque, proximè vni præest menti, vna mens multis mentibus primum, fortè duodecim ducibus mentibus, duodecimque sub illis duodenariis, plurimisque deinceps præest, denique & animæ mundi vni. Vna animā mundi duodecim animabus sphaerarum duodecim. Animæ duodecim, præsumt duodecim duodenariis animarum. Cuiusque scilicet sphaeræ anima præest animabus duodecim in sphaera sua præstantioribus. Duodecim denique duodenarij præsumt innumerabilibus animabus. Nam in qualibet sphaera duodecim illæ principes animæ, alias illius sphaeræ ducunt animas. Hæc autem Musarum chorea cantat saltatque perpetuo, vt ait Orpheus, Musicis modulis ad Apollinis ipsius imperium,

*οὕδε πάντα πόλον κιθάρη πολυκρέκτο ἀρμόζεις,*

id est. Tu totum cælum canora cithara temperas. Sed satis hæcenus cum Pythagoricis confabulati sumus. Ad institutum iam Platonicum ordinem redeamus. Sphaeras mundi viuere, vna ratione probauimus, pergamus ad aliam. Cum videamus sphaeras mundi moueri, & motores aliquos illarum excogitemus, sciamus præterea esse non posse sphaeram aliam super aliam aut motores alios super alios absque fine, fateri cogimur esse aliquā sphaeram quæ moueatur primo. Si primo mouetur, principio certè mouetur intrinseco. Nempe (vt supra tetigimus) quod primò calet, & friget, calore & frigore intrinseco calet & friget. Semper enim quod per aliud est tale, ad aliquid diximus reducendum quod sit tale per semetipsū. Ac si minima quæq; corpuscula mūdi habent quodammodo in seipsis suorum motuum operūque virtutes, quod in partibus elementorū & herbis apparet atq; animantibus, quanromagis sphaeræ mundi amplissimæ in seipsis possident cōuersionum suarum principia, principia, inquam, familiarissima, quibus sphaeræ coniunctiores sint, quàm nostris animabus corpora nostra. Si quidē motus tanto naturalior efficaciorq;

est, quanto mobile est motori coniunctius. Motus autem cæli cæteris à violentia alienior est naturalior, efficacior. Sed quæ nam illa principia sunt? num qualitates aliquæ? puta sicut grauitate & leuitate partes elementorum moueri videntur, atque calore operari & frigore, ira mūdi sphaeræ per qualitates huiusmodi reuoluuntur? nequaquam. Qualitas enim, quia situ & partibus terminata est, atq; vni cuidam est addicta materiæ, agit etiam terminatè, fatigaturque vt nequeat, aut semper aut eodem modo mouere, & quælibet qualitas vnicū opus agit, & ad vnicum mouetur terminum. Quid calor agit, nisi calorem, frigus frigiditatem? Leuitas sursum trahit solū, grauis verò deorsum. Nunquam igitur qualitas contrarium aliquem effectum principalis sui operis faciet natura sua, nunquam ad locū unde discessit, sponte redibit, nunquam inde discedet sponte, quò se naturaliter cōtulit. Cælum autem mouetur semper æqualiter, variosque & inter se contrarios producit effectus, atque ad hanc diuersitatem contrariis modis materiam disponit inferiorem. Figurationes varias inducit, nec vllum habet certum in suo circuitu terminum, sed quodcunq; signaueris punctū super cæli dorsū, ad illud innumerè quælibet cæli pars accedet, rursusq; recedet facillimè non per aliquā violentiam. Quod enim est violentū, neq; diuturnum est, neque super idem & ordinatum. Adde quod cū cælum contrariis simul motibus reuoluatur, si qualitate duceretur, certè contrariis qualitatibus moueretur. Non tamen illic esse possunt contrariæ qualitates atq; naturæ, vbi nulla est pugna, nullus interitus. Item, cū natura determinata sit, ideoq; nō queat indeterminatū diuersumq; finē, qualis est motus, appetere, quietis gratia tantum mouet, motus autem circularis secundum se, non dirigitur ad quietē: ergo neq; à natura agitur, neq; si quādo quiescat, sistitur à natura. Præterea, qualitas extensa in corpore, in seipsam reflecti nō valet cum sit corpori alligata. Quonā igitur pacto dabit qualitas cælo reuolutionem in semetipsum, quæ in se non habet sui ipsius reflectendæ virtutem? Itē, cū corpus nihil per naturā agat suam, sed per qualitatē, & qualitas nō suo ductu vim præstet corpori, sed quatenus ipsa aliunde mouetur, si qualitas aliqua mouet cælum, ipsa interim aliunde mouetur? Quid illud est quod ipsam mouet? Deus ne? Minimè, natura prima causa cum infinitè excedat omnia, nulli corpori familiaris est, sed æquè omnibus est communis, & ab omnibus absoluta.

Si enim Deus esset proprius alicuius corporis agitator, non esset amplius omnium. Ideo, ut sit omnium, non est rector proprius alicuius. Sphæræ tamen familiarissimos (ut diximus) motores requirunt. Ac etiam quia discretæ sunt inuicem, & diuersis motibus agitantur, alios atque alios motores proprios exigunt, quandoquidem esse debet inter motorem motumque proportio. Neque probanda est eorum sententia, qui motores sphæris ita distribuunt, ut Deus primæ accommodetur, reliquis reliqui intellectus. Nam cum secundum proportionem distributio fiat, sicut sphæræ in natura ordineque conueniunt inuicem ita inuicem congruent. Deus & intellectus, nec superabit Deus reliquos intellectus, nisi quantum prima sphæra superat reliquas, nec erit imensus. Erit quoque compositus ex natura communi, qua cum aliis congruet, atque ex propria, per quam, distinguitur. Præterea, si Deus ipsa bonitas est, hæc autem rem quamlibet mouet tanquam appetibile appetitum, Deus cælum mouet tanquam finis. Corpus autem ad finem extrinsecum non mouetur, nisi per interiorem aliquam formam, finis quidem ipsius cupidam, effectricemque motionis. Ergo inest cælo forma bonitatis primæ cupida, effectrixque motus. Quæ quidem auiditas neque cæca est, ut lapidum, neque irrationalis, ut bestiarum. Quomodo enim auiditas primæ veritati sapientiæque propinqua, cæca irrationalisq; erit? Præsertim cum maiori ordine moueat suum corpus quam nostra ratio nostrum. Non igitur Deus mouet cælum proximè, sed forma quædam cæli propria, vitæ rationisq; compos, & diuinæ cupida bonitatis. Ac si quis dixerit temperatione quadam moueri cælos, sicut æneæ quondam Archimedis volebantur sphæræ, compelleretur eam ipsam temperationem non minus substantialem, vitalem, rationalem esse fateri, quam sit temperatio qua terrenorum animalium membra mouentur, postquam illa primæ substantiæ, vitæ, rationi propinquior est, & apparet tum natura sua, tum moribus æquabilior. Sed nunquid illa est Angelus? Nequaquam, vita enim ipsa cælestis familiarissima est cælo, & vnà cum suo corpore quodammodo circumcurrit. Angelus neque familiaris motor est, neque mouetur. Nempè super motorem mobilem esse decet motorem alium qui sit immobilis. Rursus, Angelus est penitus stabilis. Ab eo verò quod stabile est omnino, tam repentinus tanquam varius motus non provenit. Si ergo Angelus stabilis est omnino,

cælum vero ab alio mobile, aliquo certè medic indigent quod sit mobile per seipsum. Nam rei omnino stabili succedit proximè res per seipsam mobilis, & huic succedit res per aliud mobilis. Siquidem res mobilis per seipsam ex eo quod mutatur, conuenit cum re illa quæ permutatur ab alio. Ex eo autem quod seipsam regit, quia sic in sua natura se sistit, neque è sua sede delabitur, conuenit cum re illa quæ penitus permanet. Quid tandem est istud per se mobile, quod proxime cælum voluit? Nihil est aliud præter animam. Hæc enim est quæ & per seipsam est mobilis, & talis motionis vestigium præstat corporibus. Nam & si dicatur semotus motor aliquis mouere cælum, non prius tamen cælo dabit motionis actum, quam vim motricem cælo coniunctam infuderit. Vis autem huiusmodi vnà cum cælo extensa esse non debet, alioquin à seipsa discederet, ideoque cælo facultatem ad seipsum redeundi perpetuo præstare non posset. Igitur erit indiuisibilis, non tamen adstricta dimensionibus, sicut punctum, quia non posset seipsam & dimensiones ab eodem in idem liberè voluere. Est autem in toto cælo vbique tota, ut moueat efficacissimè totum. Est itaque vis illa coniuncta indiuisibilis, libera vbique, æqualis est rationalis anima. Illius præsentia viuifc cælum, cuius motus viuificus est, cum viuificet omnia.

Denique, cum in animalibus instrumenta illa viuant, per quæ animæ viuientia generant, quis dubitabit viuere cælum? Siquidem vitæ alicuius instrumentum est ad viuientia generanda. Nonne motus (ut ita loquar) spontaneus, vbicunque est, vitæ interioris est signum? Talis autem maximè est, ubi naturalis est circuitus. Quid enim magis sponte mouetur, quam quod in seipsū naturaliter recurrit, & circa naturalem cardinem, atq; intra naturalem superficiem se volutat? Nulli ergo corpori vita magis intrinseca est, quam mundi sphæris. Neque diffidendum est animal vnum fieri ex sphæris animisque diuinis, quia cum proprium sit materiæ quidem adsciscere formam, formæ verò complecti materiam, atque ducere, idque totum ibi fiat magis, ubi tam materia quam forma præstantior est, quis neget ex animis illis qui nostris præstantiores sunt atque ex sphæris, quæ nostris corporibus simpliciores diuturnioresque sunt, continent quoque nostra trahuntque & generant, animal vnum & indissolubile confici? Nonne corpora illa propter mirabilem simplicitatem te-

uitatemque quasi spiritalia sunt. Ergo presentibus spiritibus facilius animantur, quam presente igne sulphur accenditur. Sic enim excellentissime, id est, intellectuali, coniungitur usque adeo, ut nunquam dissoluantur. Si ergo corpora mixta, quanto magis discedunt ab intemperantia elementalium qualitatium, acceduntque ad celestium corporum temperantiam, tanto magis vitæ cognitionisq; capacia fiunt, proculdubio celestia corpora vitæ cognitionisque capacissima sunt. Genus autem mentium sublimius est quam cælum, & cælo cognatius est quam terræ. Ergo cum multæ sint mentes terrenis coniunctæ corporibus tanquam formæ, necessarium est mentes & plures & prius & magis celestibus corporibus quam terrenis tanquam formas esse coniunctas.

Non solum autem cælos, verumetiam elementa viuere Platonici arbitrantur, ut diximus. Nam cum videant omnes sphaeras mundi, & multa insuper quæ his annectuntur composita, motu intrinseco moueri absque extrinseco impellente, animas iudicant illis inesse. Ac si quis quærat de ascensu & descensu elementorum atque compositorum, respondebunt Platonici, illum quoque, per animam inquam sphaeræ suæ, quæ sicut magnes ferrum, ita particulas sphaeræ suæ reuocat ad seipsam. Vnde fit etiam ut motus lapidis descendens ab alto, quo magis terræ propinquat, eo fiat velocior, & flammæ motus similiter ascendens, quo fit cælo propinquior, eo euadit rapidior. Quippè cum anima sphaeræ è propinquo rapiat vehementius, trahit quoque ad idem anima mundi. Et quemadmodum si homines ferri quidem ipsius motum videntes, magnetem non viderent, ferrum ex seipso moueri putarent dum trahitur à magnete, ita nunc qui sphaerarum animas non intelligunt, corpuscula quælibet credunt ex se moueri. At enim cum nulla mens artificis tam rectè aut membra sua aut instrumenta moueat, quam corpuscula illa mouentur in mundo, necessarium est illa corpuscula non ab inerti qualitate solummodo, verumetiam ab artificiosa natura moueri & duci. Porro naturalis motus elementorum est, qui cancellos naturæ naturalisque loci non transgreditur, id est, perpetuus circuitus in suo loco atque sphaera naturali, figuræ suæ persimilis. Circuit ignis & aer, ut Luna, quod crinitarum indicat reuolutio. Circuit aqua iugiter refuendo. Terra si (ut voluit Ægesias) moueretur, in circulum moueretur, quæ ut volunt plurimi manet per superficiem. Circuant partes eius mun-

di centrum quodammodo, prout se inticem circa ipsum vndique sempiterno coarant annixu. Ascensus autem aut descensus non propriè naturalis est motus, sed ad locum motumque naturalem subita per rectam lineam restitutio, quæ quoniam ab alio terminatur, perque vnicum semper dirigitur tramitem, liquido nobis ostendit elementorum partes ex seipsis minimè agitari. Nam alioqui & sponte quiescerent, neque agerent viam semper eandem, & aqua posset interdum aërem proximum non frigefacere, aut in præcipitium non defluere. Nam & si animæ sphaerarum eundem semper tenorem seruant, non tamen putandum est animulas, id est, vires proprias elementalium partium, si tanquam motrices illis insint, talem ordinem seruaturas, quandoquidem animæ nostræ non seruant. Augmentum verò Plantarum atque saxorum est ab anima terræ, ideo solum quamdiu hærent terræ, crescunt. Corpora brutorum & hominum seiunctè à sphaeris viuunt, quia proprias habent animas, quod indicat illorum figura variis instrumentis munita, figuræ sphaerarum penitus dissimilibus, indicat & complexio à sphaerarum complexione alienissima. Sicut se habet mobile ad mobile, ita motor ad motorem. Ergo ut corpus ad corpus, sic anima se habet ad animam. Itaque corpora seiuncta inter se per situm, naturam, figuram, quantitatem, motumque & speciem seiunctam habent & animam, coniuncta verò, coniunctam. Vna tamen est super singulas mundi anima. Vnius enim viuents opificis vnum debet esse opus viuens. Non est vnum viuens, nisi per vitam vnam. Non habet vnam vitam, nisi vnam habeat animam. Merito cum lateat (ut plerique disputant) in omnibus sphaeris vna prima & informis per se materia, vna illius est anima. Quidnam in causa est quod licet contraria inter se sint mundi membra, in vnum tamen conspirant, & alias aliis vires suas communicant, nisi quia vna anima huius ingentis animalis humores quamuis diuersos contemperat, ac membra per situm seiuncta & qualitatem, vitæ & motus conspirationis continuat? Vndenam fit ut inferiora nutus sequantur superiorum, & omnia mundi membra (ut ita loquar) compatiuntur inuicem, nisi ab vna communi natura, vna verò natura ab vna fit anima? Neque minus vnitum esse oportet diuinum hoc animal, quam sit quoduis aliud animal, siquidem est omnium potentissimum. Ergo si inter cætera animalia quodlibet corpus per vnam quandam suam animam gubernatur, multo ma-

gis mundani huius animalis membra per unam animam vincuntur. Quæ si ita se habent ad corpus suum, sicuti nostra ad nostrum, non aliter ipsa in qualibet mundi parte est tota quam anima nostra tota in qualibet nostri corporis parte, alioqui non posset vniuersum perfectè connectere, viuificare, mouere. Sicuti se habet natura ad corpus, sic anima ad naturam. Ergo quemadmodum in vniuerso corpore natura vniuersalis est vbique, ita in vniuersa natura vbique vniuersalis est anima. Quod autem sphaerarum animæ sint rationales, ostendit dispositio motuum mundanorum, semper ad id quod est melius & pulchrius proficiscens. Sicut enim motus tam velox, liber, & diuturnus, ab intima vita fit, sic tam mirabilis ordo mouendi, tamque artificiosa progressio, à sapientissima quadam arte ipsius vitæ procedit. Nam quod sphaeras ad idem semper per eadem dirigit, non necessitas quædam est vita carens, vt vulgo videtur, sed ars integra, & sapientia felix, quæ quoniam non errat in consultando, quemadmodum mortales solent, motu & opere non vagatur. Denique cælum ab intelligentia quadam moueri, id quoque nobis argumento est, quod cœli corpus motibus suis ita ordinat elementa, disponitque composita, vt animæ intellectuales compositis corporibus infundantur, hæc verò corpore cœlestibus valdè præstantiores sunt. Corporea igitur natura cœli cum per se supra speciem suam neque agat quicquam, neque disponat, certè in hac ipsa actione dispositioneque vbi ad speciem mentis perfectæ conducit à mente diuina tanquam instrumentum ab artifice ducitur, quæ quidem mens animæ suæ inest, quando quidem præstantissimi corporis anima, præstantissima est animarum.

Tres sunt præcipui (vt Magi putant) principes super mundum, Ormazis, Mitris, Arimanis, id est, Deus, Mens, Anima Dei proprium est vnitas, mentis ordo, animæ motus. A Deo solo prima ipsa fit in mundo vnitas partium & totius. A mente virtute Dei fit ordo partium vnitarum. Ab anima superiorum virtute fit motus operis ordinati. Mouet anima mundum mutabiliter per seipsam, mouet ordinatè per mentem, persequerat semper in vno hoc officio per vnitatem Dei ipsius æternam. Sic illorum trium principium tria hæc (vt dixi) in mundo videntur vestigia, quod Plato videtur in Epistola ad regem Dionysium tetigisse, quem locum in libro de amore latius declarauimus. Mitto quod quælibet species naturalis à Deo habet vt fit, vnaque fit, à

Deo per mentem ordinem, ab vtroque perpetuitatem, sed ab anima cœloque habet, vt multiplex per singula sit, atque mutabilis: Mens enim & anima quoniam à causa omnino immobili per ipsius substantiam proximè procreantur, substantia immutabiles prorsus euadunt. Naturales autem species quoniam à stabilibus causis, id est, Deo & mente per causas actione mobiles, id est, animas cœlosque manent, etiam substantia quodammodo sunt mutabiles, quamuis causarum stabilium munere per continuam singulorum successionem perpetuæ videantur. Vnde enim mobiles causæ motionis perpetuitatem habent, inde & harum effectus continuam generationis successionem. Cœlestes sphaeras habere animas, non modò Platonici, sed omnes etiam Peripatetici consentiunt, quod Aristoteles docet libro de cœlo secundo, rursus 7. & 8. naturalium 2. de anima vndecimo diuinorum. Theophrastus etiam discipulus Aristotelis libro de cœlo. Quod Auicenna & Algazales summopere confirmarunt. Augustinus Aurelius in Enchiridio, & Thomas Aquinas in libro contra Gentiles secundo, tradunt nihil quantum ad Christianam doctrinam spectat, interesse cœlestia corpora animas habere, vel non habere. Sphaeras autem elementorum viuere, & si planè constat apud Platonicos, de his tamen Peripatetici veteres nihil differuerunt, recentiores autem nonnulli ambigunt, quia elementa videantur compositorum gratia instituta fuisse, atque esse tanto compositis viliora, quanto sunt propinquiora materiæ. Sed adhuc Platonicis respondebunt, integras quidem elementorum sphaeras totius mundi gratia institutas fuisse, non gratia huius compositi, vel illius, particulas autem elementorum, quæ & segregantur ab elementi totius integritate, & miscentur in hoc aut illo composito corpore, corpusculi talis causa commisceri. Et quamuis harum particularum qualitates sint primæ materiæ proximæ, integra tamen elementa quia in ordine principalium mundi membrorum connumerantur, valdè propinqua sunt tum mundi totius formæ, tum summi opificis exemplari vniuerso atque proposito, tum diuinis cœlestium mentium sphaerarumque influxibus, qui in particulas & corpuscula mixta non aliter quàm per integra defluunt elementa. Atque hoc pacto elementorum globi digna receptacula sunt rationalium animarum. Sunt præterea in igne & aëre, propter situm perspicuitatemque ipsorum cœlis conuenientem, partes aliquæ quasi è regione syderi-



bus respondentēs, quæ directis quibusdam nobilitate influxibus, sufficienter præparantur ad mentes suscipiendas. Partes autem siue aquæ terræque crassiores, siue ignis ærisque in terris diffusi, à globis propriis segregare animos non merentur, quia & globorum amittunt dignitatem, & propter impetum corporum externorum simplicitatem suam puritatemque non seruant. Quod si diligentius miscentur inuicem, quousque diuturna qualitatum temperatione æqualitatem quandam recuperent similem sphaerarum æqualitati, primum quidem mirabiles operationes quasdam consequuntur in mixtis, deinde vitam in plantis, tum sensum, denique rationem. Si quis autem diuinorum animorum nomina nosse desideret, sciât Orphei Theologiam sphaerarum animas ita parti, ut quælibet vim geminam habeat, vnam in cognoscendo positam, alteram in sphaeræ corpore viuificando atque regendo. Ergo in elemento terræ illam vim Plutonium Orpheus nominat, hanc Proserpinam. In aqua Oceanum illam, hanc Thetis. In aëre fulminatorem Iouem, atque Iunonem. In igne Phœtē & Auroram. In anima sphaeræ lunaris illam Bacchum Licnium, hanc aliam Musam. In anima rursus Mercurij sphaeræ illam vim Bacchum Silenum, hanc Euterpen. Veneris Lysium & Erato. Solis Trietericum, & Melpomēnem, Martis Bassareum, atque Clio. Iouis Sabasium, & Terpsichoren. Saturni Amphietum, Polyymniamque, Octauæ sphaeræ Pericionium, & Vraniam. In anima verò mundi vim primam vocat Bacchum Eribromum. Secundam Musam Calliopen. Quapropter apud Orpheum singulis Musis præest Bacchus aliquis, quo vires illarum diuinæ cognitionis nectare ebriæ designantur. Ideo Musæ nouem cum Bacchis nouem circa vnum Apollinem, id est, circa splendorem Solis inuisibilis debacchantur. Sed hæc de nominibus diuinorum animorum dicta sufficiant. Verum hanc omnem disputationem hac ratione breuiter concludamus, ut antiquorum more dicamus eos esse penitus deridendos, qui partes elementorum impuras, ex quibus animalia constant, vitam & rationem habere fatentur, tota verò puraque elementa negant, quasi pars toto sit melior, & mundum vitæ carere volunt & sensu, qui tamen vitam dat plantis, quæ non fiunt ex semine, sensum dat animalibus quæ per coitum non gignuntur. Quamobrem tres rationalium animarum gradus colligimus. In primo, sit anima mundi vna. In secundo, duodecim sphaera-

rum animæ duodecim. In tertio animæ multæ, quæ in sphaeris singulis continentur. Hæc omnia quæ ad sphaerarum animas pertinent, ex Platoniorum opinione narrata, tunc demum affirmantur, cum Christianorum Theologorum concilio diligenter examinata placuerint. Nam & Plato in Epinomide, ubi sub propria persona ipse loquitur, de his sub diuisione sic inquit: Impossibile est, terram, cælum, stellasque omnes, & quæ ex his constant moles, nisi anima singulis aut insit, tam exquisita ratione annis, mensibus, diebusque circumuolui, nobisque omnibus bona omnia facere.

*Anima sphaerarum mouent sphaeras per legem fatalem, & mouent in circulum, quia ipsa sunt circuli.*

## C A P V T II.

**Q**uoniam pacto coelestes animæ sphaeras suas mouent? Profectò (quemadmodum placet Platoniciis) sicut corpus tuum, anima tua per appetitum, quia appetitus illic quoque à cogitatione excitatur, cogitatio ibidem à fatali illius animæ lege. Ideo Plato in libro de Regno inquit: Cælum mouet fatum, ex innata cupiditate. Quod accepisse videtur à Zoroastre, à quo omnis manauit Theologorum veterum sapientia. Ille enim ubi de cælo loquitur, inquit:

*Αἰδῶ βούλη φέρεται, δὲ τρέχει ἐργῶ ἀδύκως,*

id est, sempiterna voluntate fertur, semper necessitatis opera currit. Quod perspicuè intelligemus, si ita rerum ordinem considerabimus. Est aliquid quod dicitur super omne, est aliquid quod sub omni. Quod dicitur super omne, Deus est, qui non potest esse propriè omne, quoniam est simplicissima vnitas super numerum. Sub omni hæc corpora singula. Oportet igitur inter id quod est super omne, & id quod sub omni, esse aliquid mediū. Id autem est omne ipsum totumque, & rerum omnium cumulus. Erit autem triplex omne, siue totum triplex. Primum quidem omne proximè ab ipsa Dei vnitate dependet. Idcirco eatenus vnitam esse necessarium est, quatenus fieri potest, cum fiat ipsi vnitati simillimum. Esse verò potest aliquid tribus modis vnitum, essentia, puncto atque momento. Essentia scilicet, ut vna substantia sit, non ex substantiis pluribus composita. Puncto, ut non dispergatur in partes plures, per quas cogatur in plurima distrahi puncta locorum. Momento, ut quicquid habere potest vnquam, nunc oculi nanciscantur,

neque per varia temporum momenta fit varium. Ergo illud omne quod statim ex Deo est ipsi similis omnibus his modis est vnitum. Is est Angelus, qui quamuis prout pendet ex alio, mutabilis quodammodo dici possit, tamen quia infinito Dei statui præcipue proximus procreatur, in ipsumque conuertitur sine medio, stabilis prorsus euadit.

Sequitur secundum, omne, quod quia secunda quadam intentione pendet ab vno, vnum iam modum vnitatis amittit, retinet duos, vnum quidem restat essentia atque puncto, sed momentis fit varium. Talis est anima. Tertium omne est materia mundi, quæ vna substantia est, sed non solum momentis variatur, vt anima, sed etiam diffunditur per puncta locorum. Sed cur in hoc descensu tempus reperitur priusquam locus? Tum quia tempus spiritalis actionis alicuius comes est, locus comes est corporis, ideoque tempus ad spiritum efficaciamque propius quam locus accedit. Tum quia ab vnitatem in multitudinem gradatim est descendendum. Quoties verò rei essentia localem multitudinem subit, toties & operatio eius temporalem patitur numerum, non è conuerso. Essentia enim operationem vnione & perfectione superare potest, contra nequaquam. Membra denique mundi quælibet non omne, sed sub omni dicuntur esse. Quapropter Angelus continet in se omnes rerum omnium rationes, omnes, inquam, habitu simul & actu. Anima rursus omnes, sed habitu quidem, non actu. Materia omnes quidem potentia, non tamen habitu, necue actu, sed per successionem suscipit omnes. Oportet profecto animam ipsam esse quodammodo omnia, de qua Zoroaster ait:

ἡ ψυχὴ κόσμου πολλά πνεύματα ἰσχυρά,  
πᾶσι,

id est, mundanorum finum multas plenitudines comprehendit. Nam si inter sublimia & infima est media, necessario in se continet sublimium illorum munera & imagines, infimorum autem vires & exemplaria. Sed ea parte qua cum angelica mente communicat, euadit Angelo similis, alia parte dissimilis. Igitur sphaerarum animæ in mentibus suis ideas cunctas simul habent habitu atque actu. In suis potentiis infimis motricibus corporum, cuncta iterum habent generandorum semina, possessione & habitu simul, non actu. Media pars illarum, scilicet ratio, sequitur mentem, quia corpora illarum perfectissima, ac ferme nullius egena, sola animæ infima parte reguntur satis. Ideo media pars cœle-

stium animarum, quæ sua natura mobilis est, quia ocium agit ab opere corporali, absorpta à mente fit stabilis.

In nobis verò, propter nostri corporis indigentiam, media quoque pars mouetur vt infima, difficili & operosa nimium administratione corporis ita cogente. Apparet etiam quodammodo motus (vt vult Plotinus) aliquis in ipsa rationali cœlestium animarum parte. Cum enim à Deo omnium vnitatem, tum per vnitatem suam (quæ suæ mentis est caput) tum per mentem suam (quæ caput rationis est) effluat, refuitque quoque per mentem vnitatemque suam in Deum omnium vnitatem. Siquidem hæc Deum ipsum primò naturaliter appetit, secundò intelligit, tertio intellectualiter amat, quartò amatoria quadam vnione consequitur. Actionem verò quæ ad terminum quendam per media transit, motum Platonici nominant, ac si tempore transit, temporalem motum, si uerò momento motum appellant æternum, qualis est in animarum cœlestium ratione. Licet autem media hæc pars illarum in mentem conuersa, omnes simul videat rationes, tamen pars illarum infima, vt pote mutabilibus corporibus cognatissima, non tantæ virtutis est, vt valeat vno actu ferri in semina vniuersa, cupit tamen ferri actu omnia, ne frustra sint in eius potentia omnia. Ferrur enim in illa nixu multiplici, & modo hæc actu consequitur, modo illa, sed priora amittit actu, cum incurrit in alia. Non ergo complectitur simul cuncta, semper autem ad omnia nititur. Currit itaque semper, & huiusmodi cursus est motus primus. Huius autem cursus interuallum tempus primum est. Ad cursum illum currit mundus. Ad tempus illud fiunt tempora mundi. Hunc ego esse arbitror ipsum (vt est apud Orpheum) mutantem Prothea formas. Cum verò semina illa certo sint numero terminata, & anima currat semper, certo temporis spatio transit omnia, quibus peractis, vel quiescere cogitur, vt nobis videtur, vel recurrere paulatim per omnia denuo, atque eandem in mundo telam generationis retexere, vt placuit Zoroastri, qui iisdem aliquando causis omnino redeuntibus, eosdem similiter effectus reuerti putat. Qua quidè ratione tā ipse quàm alij multi successores eius humanorum corporum resurrectionem confirmauerunt. Circuitus autem vniuersi interuallum annis solaribus sex & triginta millibus expleri voluerit Platonici, quem magnum ac mundanum appellant annum. Huius finem Mercurius mundi senium vocat, Plato in lib. de Reg. mudi, restitutionem,

Sed vt mouendi cœli planius modum intelligas, exemplum accipe. Cogitat Euclides nocte Megaris abire Athenas Socratem auditurus, accipitque laternam. Totum illud iter in primis communis cogitatione præscribit. Ex hoc vniuersali proposito non fit proprius passus aliquis, nisi particularis cogitatio intercedat primum passum designans. Ergo laterna primum ostendit passum, hunc ipsum statim cogitat imaginatio, hunc eligit appetitus, hunc peragunt pedes. Quo peracto laterna passum secundum monstrat, mox illum cogitat Euclides, appetit, peragit. Similiter tertium atque alios. Eadem ratione in anima sphaeræ fieri arbitrantur, vbi mens ratioque ipsius communiter statuit totidem in cœlo figuras, & in materia formas per cœli motum effingere, quod videt ideas & conceptus in Angelo per Dei ipsius effingi virtutem, vt tale ipsa pro viribus mundanum opus efficiat, quale Deus facit Angelicum, atque ita primum imitetur artificem, non tamen incipit mouere cœlum, aut aliquid suorum seminum genus promat præ aliis, & quasi oculis offerat. Cum primum vis generis alicuius seminum cæteris feminibus præualeat, imaginatio ipsa, quæ infimæ huic potentiae annexa est, illud cogitat, idem & appetit, idem explicat in cœlo, format in elementis. Eodem modo fit per seriem successionis in feminibus aliis. In hac serie successionis fatalis consistit lex, in illa cogitatione cupiditas. Sic cœlum mouetur à fato & innata cupiditate, eodem quasi modo quo in nobis spiritus & humores à vehementi cogitatione affectuque vibrantur atque formantur. Neque putes tam novos in mundo effectus, tam varias in cœlo figuras mouentis singulis explicari nisi per nouas variasque animarum illarum affectiones. A causa enim quæ stabilis est omnino, stabile fit & opus. Neque arbitrandum est cœli animam fatigari mouendo, si nostra non fatigatur. Motores enim qui cum mobili extensi non sunt, fatigari non solent, videlicet si infinito statui motionum omnium fini sint proximi. Præterea quàm ineptum est infimum terrenumque corpus ad motum, tam est agile sublime corpus. Quod si & leuis aura puluerem agitat, & ventus inclusus terræ visceribus quassat montes, miraberis sublimes animas tenuissima corpora nutu leuissimo volucre? Præsertim cum ea circa naturalem cardinem & in ambitu proprio moueant, atque ipsa ad motum huiusmodi naturali instinctu magis conducant, quàm terrenum corpus ad descensum, quando anima nostra corpus suum per decliua du-

cit. Profecto cœli corpus ita æquè se habet, & facile ad quemlibet situm circa centrum, sicut elementalis materia ad quamlibet formam. imo vero multò magis. Proinde sicut animæ conuenit efficacia ad mouere, ita corpori procliuitas ad moueri. Corpus enim quoniam ab actu fit, in actu est, ad actum dirigitur, idcirco naturam habet, vt per formas suas semper exerceatur. Quoniam verò & substantiam & qualitatem diuisibilem habet, cogitur quicquid aut agit aut patitur, secundum modum diuisibilem, id est, secundum motum agere atque pati. Confert autem cœlestium motus eiusque varietas ad generationem, generandarumque rerum diuersitatem. Variis enim figuris cœlum exornat, cœlestesque vires vehementius in elementa transmittit. Mouet elementa, cogitque vt multis inuicem modis commisceantur, eorumque globum vndique vicissitudine quadam æquè illustrat & fouet. Præterea ipsa mundi materia, neque omnes simul in cœlo figuras, neque formas sub cœlo omnes simul potest habere (siquidem inter se multæ contrariæ sunt) vbique tamen appetit omnes, tanquam naturæ suæ perfectiones. Hinc ad sempiternum motum procliuus efficitur, vt quod non potest statu consequi, successionem saltem quodammodo consequatur. Verum cur in circulum maximè sphaeræ rotantur? quamuis id modo significauerim, altius tamen exordiamur. Deus circulus vnus est, quoniam à se est, circuli instar, & se ipsum, pro vt non habet extra se principium sui vel finem, sed in se incipiens, definit in se ipsum. Angelus duplex est circulus, tum quia illuc redit vnde manauit, dum suum intelligit & diligit authorem, tum quia considerat semetipsum. Anima est triplex circuitus, quia respicit Deum, quia seipsam considerat, quia à causis rerum ad effectus descendit, rursusque ab effectibus ascendit ad causas. Si circuant tres hi cœli motores, quid obstat quo minus cœlum quoque in circuitum rapiatur? Et postquam cœlum imitatur causas supernas in figura & substantia sua, cur non etiam in motu operationeque imitetur? Mobili animæ subiicitur cœlum, inde ipsam moueri incipit. Vt semel cœpit moueri cœli pars vna, propter continuationem trahit aliam secum, pellitque aliam, sequæ inuicem necessariò reflectunt in gyrum. Stare nequit cœlum, quandoquidem eius anima nescit quiescere, neque tamen locum sui naturalem relinquere vult. Ita fit vt circa idem reuoluatur, & in eodem cœlum semper mobile est, siquidem terra (quæ maximè ab eo distat) est semper im-

mobilis.) Quod mouetur semper, necessarium ad idem reuertitur. Nullus enim rerum corporalium spatium infinitum est. Præterea Plato in libro de Regno inquit: Solis rebus omnium diuinissimis conuenit status omnino mutationis expers. Mundus autem quia corpus est, iamque à diuinorum dignitate degenerat, immutabilis prorsus esse non potest. Quoniam verò diuinis proximum est, consentaneum fuit circulari ipsum motione moueri, quæ cum in eodem, circa idem, secundum eadem, simili iugique continuatione voluatur, quam minimè fieri potest à locali stabilitate discedit. Hæc ille. Adde quod sicut inter omnes species motionum solus localis motus, quia quasi extrinsecus est, subiecti sui substantiam qualitatemque naturalem mutare non cogitur, sic circuitus inter locales motus, quia solus non mutat locum, dici posse videtur quasi non motus. Si stare quis cælum velit, figat ipsum Saturni cælum in cardine quandocunque lubet. Tunc semicirculus ipsius sphaeræ alter super caput Antipodum. Cum verò partes omnes huius sphaeræ sine vlla naturæ discrepantia inter se simillimæ sint, nulla est ratio per quam alia pars hic sit magis, illic alia. Ergo inferior semicirculus, quia cum loco nostro æquè conuenit, ac cum regione Antipodum, ita nitetur hic esse, sicut ibi, & superior semicirculus propter eandem conuenientiam ad locum illum contendet esse illic, sicut & hic erat. Ex hoc nixu pars altera pellet alteram, dum quælibet pars propter æqualem conuenientiam volet vbique pariter esse. Est vtiq; octauæ sphaeræ concava superficies, locus naturalis sphaeræ Saturni. Ibi de uexum Saturni sphaeræ concuum

tangit octauæ. Quælibet particula huius sphaeræ quia æquè conuenit cum quolibet octauæ particula, omnes affectat particulas illius attingere. Si quiescat, singulæ tangent singulas, non quælibet cunctas. Currendo autem ferè assequitur, quod assequi quiescendo non poterat, tanta est huius sphaeræ ad illam auiditas. Præterea sphaeræ Saturni anima tota simul est in quibuscumque sphaeræ punctis. Sphaera hæc animæ fruendæ cupida, ideo currit, ut per omnes sui partes vbique tota anima perfruatur. Aduolat rapidissime, ut quod fieri potest, vbique sit tota simul, vbi cumque tota simul est anima. Et quia nusquam reperit stantem animam, quiescit & ipsa nusquam. Et sicut anima assidue circa Deum quasi centrum conuoluitur, ita corpus tractum ab illa semper circum animam reuoluitur quasi centrum. Stat autem in eodem cardine cælum, quia & anima propter mentis participationem quietis aliquis est particeps. Id agunt omnes rationales animæ in corporibus suis. Id omnia corpora agunt ad animas, siue de sphaerarum ac syderum animis loquamur, seu dæmonum atque hominum. Quod si minus in nostro hoc crasso corpore apparet, sit tamen in æthereo animæ indumento, (de quo disputabimus aliàs) quod voluit Zoroaster in nobis assidue volui. Denique hanc de motu cæli disputationem hac sententia concludamus. Neque corpus cæli mobile, neque motorem, qui ad motum cæli mouetur, esse præcipuum motionis huius principem atque finem, ne in huiusmodi motu labor transgressioque contingat. Motus enim ad stabile & circa stabile efficitur semper & regitur.

# THEOLOGICÆ PLATONICÆ,

DE IMMORTALITATE ANIMORVM,

EODEM FICINO AVTHORE,

LIBER QVINTVS.

*Omnis rationalis anima est immortalis. Prima ratio, quia  
per se mouetur, & in circulum.*

## CAPVT PRIMVM.



**H**As omnes animas in ordine essentia: tertia: collocamus, atque hac ratione communi esse volumus immortales, quod primò mouentur, & quia mouetur primò, mouetur in circulum. Quia igitur primò mouentur, mouentur & semper. Ibi enim perpetuus motus est, vbi primus. Nam si fons motus aruerit, nihil vltra mouebitur in natura. Item, quod primo mouetur, sibi ipsi præbet motum internum atque externum. Internus motus vita est, itaque sibi vitam suppeditat. Et quia nunquam deferit seipsum, cum in qualibet natura inest amor sui ipsius perpetuus, nunquam desinit viuere. Si enim quod mouetur ab alio, quamdiu adhæret motori, tamdiu mouetur, multo magis quod à seipso mouetur, quia idem est atque motor, nunquam à motore desertum, moueri desinit nunquam. Præterea, si fingatur interire quandoque, aut prius esse desinet quàm moueri, aut contra, aut simul. Non datur primum, quia motus non potest seorsum ab essentia remanere. Non secundum, quia spontaneus motus, non assiduus comes est eius quod motum sibi met exorditur. Non tertium, quoniam pernicio: a mutatio non potest ipsi ab intrinseco vnquam erumpere, ex quo motus vitalis viuificusque exoritur. Sed neque contingeret extrinsecus. Non enim fons morio-

tionis aliunde mouetur. Hæc est vtique essentia: tertia: proprietas, in qua cum sint animæ omnes rationales ex communi quadam definitione, illis quoque omnibus eadem conuenit proprietas. Sunt etiam ex eo immortales, quia per naturam essentia: tertia: primique motus circulo agitantur. Nam si mouentur in circulum; nunquam desinunt. Circuitus enim non effundit vires, sed sua quæque recolligit in seipsum, & cum deficere putatur, se renouat, vt rationem illam Pythagoræ ad præsens præteream, quæ ostendit nullum esse in sphaera principium aut finem. Ideoque illud qui mouetur in sphaeram, neque coepisse moueri vnquam, neque desinere. Esse autem rationales animas sphaeras quasdam spirituales, & circuitum in seipsis facere spiritalem, postquam corpora ipsa quæ illarum vmbra: sunt, figuram talem habent & motum. Itavt sphaeræ circuitusque visibiles sphaerarum & circuitum invisibilium vmbra: sint, ac si vmbra: sint perpetuæ, multo magis substantias illas fore perpetuas, quæ per virtutem termino carentem motionis actum peragunt sine termino. Nec est illis contrarium aliquid, à quo perimantur, sicut & motui illarum qui circuitus est, nullus est motus contrarius.



*Secunda ratio, quia stat per substantiam.*

## C A P V T II.

**A**Tque ita immortalem esse animam, per motum eius ratio superior demonstravit. Idem quoque per statum animæ demonstratur. Quando animam nominamus, rationalium animarum genus intelligi volumus. Nam irrationales vitas non animas propriè appellamus, sed idola & simulachra animarum. Si essentia illa tertia (de qua tam multa diximus) licet per operationem moueatur, manet nihilominus per substantiam, sequitur ut anima quæ eadem est quod essentia illa, per substantiam non mutetur. Quod autem tale est, esse definit nunquam.

*Tertia ratio, quia hæret diuinis.*

## C A P V T III.

**A**C si duo quædam in infimo naturæ gradu locata, materia, scilicet, & quantitas, sunt passiva, & duo alia in supremo sunt actiua, Deus & Angelus, anima & qualitas, quæ mediam inter passiva & actiua obtinent regionem, quomodo se habebunt? Sic profecto utraque particeps passionis euadit. Sed qualitas, quia patientibus inhæret, omnino per operationem; & essentiam suscipit passionem. Anima verò, quæ distat longius, etsi in operandi facultate corporalem aliquam percipit passionem, in essentia tamen passionis est expers. Et sicut corpus ex materia & quantitate passivum, inhærentem sibi qualitatem reddit subiectam corruptioni, ita Deus & Angelus actiui, animam sibi proximam & à corpore segregatam, diuinitate sua efficiunt immortalem.

*Quarta ratio, quia materia dominatur.*

## C A P V T IV.

**S**ed & in hoc maximè immortalitas eius apparet, quod oportet primam ipsam rerum materiam quæ mouetur & formatur ab anima, perpetuam esse. Naturam ars imitatur. Ars opera sua hoc facit ordine, videlicet in subiecta quadam materia, formas alias & alias imprimit, quarum nullam sibi propriam habet materiam. Nullam enim propriam vasis alicuius formam habet lutum, sed varias vicissim

capit à figulo, & fractis vasis superest lutum, ex quo alia reparentur. Ergo & ipsa natura rerum artifex subiectam quandam sibi materiam habet omnium expertem formarum, ad omnes suscipiendas pariter præparatam, quia sicut in gradu rerum summo est actus purus, nullius indigus, formarum omnium effector, ita in infimo esse aliquid debet, quod sit pura potentia, omnia egena, & ipsa per se informis sit formarum omnium susceptiua. Sic vniuersali artifici atque naturæ subest vniuersalis materia formarum, quantumlibet indifferens susceptaculum. Hæc prima vocatur materia, quæ elementorum aliorumque corporum formis æquè subiicitur. Et modo hanc à vi naturali accipit, modo illam, neque vllam natura sua habet propriam. Non enim esset infima, si quam haberet perfectionem, & agendi facultatem sibi ex forma propria naturalem, nec esset ad aliam formam formæ suæ repugnātem idonea. Nam si frigiditas materiæ propria naturalisque sit, quonam pacto calorem suscipiet? & si humiditas, quomodo siccitatem? Animaduerte mutuam elementorum commutationem, si cupis latentem hanc materiam inuenire. Nam quando cernimus vbi prius terræ species fuit, ibi aquæ postea speciem apparere, dicere non possumus aquæ formā quæ nuper aduenit, in terræ forma recipi, hæc namque oppositæ quodammodo sibi inuicem sunt, quippe cum terra siccitatem, humiditatem aqua contineat. Non igitur forma terræ formam suscipit aquæ, sed accedente aquea specie, abit in caos. Forma autem aquæ sine subiecto esse non potest, neque nouum subiectum in aquæ generatione accessit. Eadem ergo materia quæ terrenæ formæ subiecta fuerat, aquæ iam subit formam. Atque hæc est argumentatio qua Timæus Pythagoricus vtitur. Item, quando sol radiis suis mare percutiendo, aquam in fumos extenuat, & ex aqua generat aërem, aliquam certè aquei corporis portiunculā ex aquæ elemento detraxit. Querimus ergo vtrum portiunculam istā aquæ in nihilum primo redegerit, postea genuerit aërem, seruauerit aquæ nonnihil? Si aquam in nihil omnino deduceret, ad malum esset naturæ intentio (quæ tamen est semper ad bonum, cum à summa Dei bonitate regatur) Atque esse ipsum, quod æterni Dei peculiare donum est, quandoque ex rebus à sequentibus post Deum causis subtraheretur, quod fieri non potest, cum Deus semper, quod semel dedit, suo conseruet influxu, cui nullius agentis opponitur violentia.

ria. Nam res Deo inferiores, quia non habere esse absolutum omnino, sed esse aliquod, & tale esse vel tale, ideo non habent vim ad esse omnino auferendum, sed esse hoc modo potius aut illo. Sequeretur etiam ut Sol nouum illum aërem generaret ex nihilo, si totam aquæ prioris portionem in nihilum consumpsisset. Ex nihilo autem aliquid facere agentia naturalia nequeunt. Facilius enim est ex qualibet re existente aliquid facere, quæ ex nihilo. Non possunt autem ex quolibet semine rem quamlibet generare, nunquam ex tritico pyra, ex milio ficus, ex hominis semine aquilam. Multo minus poterunt ex nihilo aliquid generare. Hac ratione monstratur Solem non ponisse portionem illam aquæ mari detractam in nihilum vertere. Ergo in ea naturæ prioris aliquid restat. Quid illud? Aqua certè illa frigida erat & humida. Abscessit frigiditas, humiditas restat, ut placeat Platonis, quæ aëri & aquæ est communis. Si restat humiditas, restat & materia aliqua humiditati subiecta. Humiditas enim non est forma à corporibus separata. Itaque materia quæ prius sub aquæ frigore lauerat, iam sub aëris calore eadem delitescit.

Cum verò ex aëre sit ignis, humiditatem quoque amittit, & accipit siccitatem. Materia huiusmodi quæ tantum extenuata rarefactione in formam ignis ascendit, vicissim densitate descendit, turgescit in aërem, postea densatur in aquam, denique grauescit in terram. Vides materiam vnā omnes vicissim indui formas, dum & ascendit rarefactione, & densitate descendit. Quæ ideo vna est, tum quia vna vni sufficit mundo, tum quia cum sit informis, non habet quicquam per quod in se discerni possit in plura. Quod si vniuersum in vnum formabile definit, consentaneum est ab vnoquoque incipere formatore, totumque illi subesse. Sed de hoc aliàs & diximus, & dicemus. Materia verò hæc ideo nunquam corrumpitur, quia totius naturæ corporalis est fundamentum, quo diruto omnis mundi machina corruet. Neque in partes dissolvitur vnquam, quia non est per naturam suam ex partibus constituta. Partes enim per quantitatem fiunt, materia verò quantitatem præcedit. Est enim quantitatis qualitatique subiectum. Subiectum verò semper rem illam quæ in ipso iacet, antecedit oportet. Neque per accessum alicuius contrariæ qualitatæ interimitur. Nulla quippè ipsi est contraria qualitas, quia æquè omnes suscipit per naturam, at-

que nulla forma quæ indiget materiæ sustentaculo ipsi repugnat. Sibi namque met repugnaret, si suum destrueret fundamentum. Neque indiget materia alia quadam sede, qua fortè subtracta decidat in profundum. Ipsa enim est primum omnium sustentaculum, ac si qua violentia illam destruat, aut eam deducet in nihilum, aut in aliquid aliud transmutabit. Primum fieri nequit. Nam quicquid agit aliquid, ex naturali appetitu perfectionis propriæ propagandæ inducitur ad agendum, ut aliud quiddam sibi pro viribus simile generet, quod in elementis, plantis, animalibus est perspicuum, ubi apparet appetitum naturalem ad bonum, videlicet ad vitam, ad esse, atque similia, non ad contraria dirigi, quia à summo bono (ut diximus) omnibus sequentibus est insertus. Vnde enim sunt, inde mouentur, & illuc feruntur omnia. Igitur omnis omnium appetitio operatioque à bono exoritur, tendit reflectiturque in bonum. Quinetiam qui materiam funditus tollit è medio, nequit nouum opus suum alicubi stabilire, cessante formarum omnium generabilium fundamento. Ita & perderetur illa, & noui nihil generaretur, id enim quod denno faciendum est, si eget materia, iam fieri non poterit, illa sublata, si non eget materia, ab ea liberum est, quod est à materia liberum, eamque supereminet ab authore suo seorsum à materia procreatur. Itaque ipsius author dum ipsum agit, quoniam fabricat ipsum ab illa lōgè semotum, nullam ex hoc illi violentiam infert, neque in ipsius generatione illam vllō modo mouet, quia non indiget opus conficiendum. Igitur quod nouam rem gignit, qualiscunque ea sit, siue materiæ indiga, siue aliena ab illa, materiam non perducit in nihilum. An fortè in aliquid aliud commutabit, ita ut pars vna supersit materiæ, pars verò perierit? Minimè. Simplex enim illa est, quia neque ex materia & forma componitur, cum sit prima informisque potentia, neque certam quandam partium congeriem ad suam existentiam exigit, cum naturali origine præcedat quantitatis dimensiones. Præterea si illa ita mutetur, ut expleta mutatione supersit aliquid, quid istud erit? Materia ne? Si materia, nondum in aliud permutata videtur, cum supersit. Si quantitas, aut qualitas, absurdum id quidem, quia non possunt hæc absque illa manere. Si forma quædā supersit materiæ supereminens, quid opus erat materiam perdere ut forma hæc alienissima fieret, quæ nullo modo ex ea sit, & longè procul ab illa produciatur?

Imò verò, quia omnino aliud est materia, aliud forma ab ea semota, nihil per hoc materiae reliquum est quod illa commutata forma semota restat. Sic igitur colligamus. Materia nequit ex eo quod est, aliter permutari, quàm si vertatur in nihilum. In nihilum verti aliquid natura non patitur. Materia ergo nō interit. Multo minus interibit vis ipsa naturalis, quæ est materiae domina. Domina illius est vis ea efficiens, quæ format ipsam. Hæc format vis ea quæ primum mouet. Fons motionis est anima rationalis, cui qualitates ad mouendam materiam seruiunt vt instrumenta. Atque omnis anima rationalis per naturam essentiae tertiæ, vniuersæ materiae præsidet. Sed de hoc aliàs. Materiam quidem producit vnitque Deus, firmat (vt Platonici placet) & ordinat Angelus, mouet formatque anima immortalis. Vnitas Deus est, qui immortalis materiae dat unitates. Immortalis ordo est Angelus, qui immortalis materiae ordinem exhibet. Immortalis est anima, quæ mouendo immortalis materiae præbet vitam.

*Quinta ratio, quia est à materia libera.*

#### C A P V T V.

**Q**uatuor naturalium rerum causæ à Physicis numerantur, efficiens, finis, materia, & forma. Efficiens hominis causa est natura vniuersalis & homo: Finis humana felicitas: Materia, corpus: Forma est anima. Quoties aliquid per se esse dicitur, esse intelligitur sine causa. quoties esse per aliud, esse per causam. Solus Deus ita per se existit, vt per nullam sit causam, quocirca omnino per se est, quia quatuor excludit à se genera causarum. Corpus naturale omnino per aliud est, quia quatuor simul includit. Infrà Deum nihil esse potest quod efficiente careat atque fine. Quippè Deus vnus effector est omnium, atque finis, quare nihil præter Deum inuenitur, quod ita per se esse sit dicendum vt efficientem causam finemque non habeat. Non tamen omnia sub Deo esse decet per aliud, vt sint omnino per aliud. Nempe duo hæc omnino per se, & omnino per aliud, interuallo à se inuicem distant longissimo, quare inter hæc aliquo vtrisque similiore opus est medio. Cum enim omne agens ex sua agar natura, necesse est opus proximè ab ipso factum, quia statim ex agentis natura depromitur, illi quàm simillimum apparere. Ergo quod proximè, & principali (vt ita loquar) proposito sit à Deo, Deo dissimillimum non

debet euadere. Sunt ergo inter Deum & corpus aliqua, quæ non omnino per aliud esse dicantur. Talis apparet qualitas, quæ non per quatuor, vt corpus, causas fit, sed ex tribus solummodo pendet causis. Corpus materiam habet & formam, vt sui causas, efficientem etiam atque finem, qualitas formam non habet, vt formalem causam. Ipsa enim forma quædam est. Forma verò nulla, quantum est forma, formatur, efficitur tamen ab aliquo qualitas, & ad finem quendam ab agente dirigitur, atque etiam à materia pendet. Vt causa siquidem ex prægnante materiae alio talis foetus in lucem educitur, & cum ipsa extenditur atque diuiditur, quapropter qualitas gradu vno superat corpus, quod aliquo modo per se dicitur, cum non formetur ab alio. At, cur non etiam essentia tertia, quæ qualitate sublimior est, vno saltem gradu superet qualitatem, sicut qualitas vno superat certè. Sed quomodo? Non eo quod essentia efficiente careat aut fine, cum hoc Deo soli conueniat. Non hoc etiam, quod essentia hæc formam sui causam non habet, idem namque possidet qualitas. Solum ex eo restat vt superet, quod à materia non dependet, quod minimè conuenit qualitati. Ita oportet à quatuor oppositis in quatuor opposita per tria & duo gradatim procedere, vt sicut super quatuor corporis causas, in tres causas qualitatis ascendimus, ita super tres causas qualitatis in duas essentiae tertiæ causas ascendamus. Quapropter essentia hæc solum efficientem & finalem habebit causam, formam verò & materiam non habebit. Denique Angelus vno hanc essentiam superat, quoniam Angelus neque à materia dependet, neque ad materiam inclinatur, cum à Deo proximè occupetur. Essentia tertia, licet à materia non dependet, tamen à Deo facta longinquior, & propinqua materiae, ad eam quodammodo inclinatur, ob quam inclinationem anima nuncupatur. Et licet inclinetur, non tamen ab ipsa dependet, quod multis rationibus demonstraui-mus. Prima est, quam assignauimus. Secunda est, quia si hæc essentia esset immersa materiae, nunquam emergeret in diuina, quæ sunt à materia remotissima, atque ita non esset competens mundi nodus, quia non connecteret infima cum supremis. Tertia est, quia cum moueatur primò, necessario mouetur per se liberè in circuitum. Si per se mouetur, per se vique operatur. Si hoc est, etiam per se ipsam, nullis addicta corporibus. Si mouetur

liberè non est alligata materiæ. Si voluitur in circumm, in seipsam se recipit, relicta materiæ quarta est, quia si materiæ dominatur mouendo illam primum, atque formando, materiæ non miscetur. Per hæc apparet essentiam illam, quæ est animæ sedes, quam etiam animatum pateram Plato nominat in Timæo, nullam habere originem à corporibus, atque etiam neque ex partibus quantitatis constitui. Partes siquidem huiusmodi solis corporibus & qualitatibus insunt, non autem formis à corpore separat. Non igitur ob id anima dissipabitur, quod in partes aliquas dissoluatur. Sanè nullam habet distantiam partium, quoniam in corpore non diuiditur, neque ex eo deficiet vnquam, quod à suo aliquo sustentaculo deferatur, nullo quippè eget corporis fundamento essentia illa quæ per naturam suam est domina corporum, neque etiam per hoc interibit, quod contrariæ atque inter se pugnantibus elementorum vires aliquando eam turbent, hæc siquidem in materia pugnant. Anima vero est à Deo super materiam, vt eam non attingat elementorum procella, & iniquitas certantium qualitatū. Nunquam rursus ex eo inquinabitur, quod alienam aliquam & naturæ suæ aduersam quandoque suscipiat qualitatem, quæ noxiam ipsi inferat passionem. Primum namque subiectum passioni expositum, materia est, per quam & quantitas ipsi immersa, & qualitas quantitati coherens, exponitur passioni. Quocirca essentia illa quæ est à materia separata, id est, potentia separabilis nullam habet in seipsa potentiam, per quam alienum quicquam & hostile suscipiat, vnde passioni subiciatur.

*Sexta ratio, quia est indiuidua.*

## C A P V T VI.

**P**raterea cum indiuisibilis sit, diuisibiles & corporeas non suscipit qualitates. Non enim quod diuisibile est, tangit indiuisibile. Nam si indiuisibile tangi ab eo quod diuisibile est, dicatur, quæremus vtrum res hæc diuisibilis puncto quodam sui ipsius tangat rem illam indiuisibilem, an parte quadam sui diuidua. Si primum admiseris, tunc punctum est duntaxat quod rem illam tangit, atque ita non res hæc diuidua, sed indiuiduum aliquid tangit rem illam indiuisibilem. Sin autem dixeris quod parte quadam sui diuidua tangit, tunc ita ratiocinamur. Si res hæc diuidua tangit illam quam tu indiuiduam vocas, per partem sui aliquam diuisibilem, neces-

se est & illam per partem sui similiter diuisibilem tangi. Quomodo enim hæc illam tangit, nisi & illa tangatur? & quomodo per plures sui partes tangit hæc illam, nisi illa quoque per partes sui ipsius tangatur? Siquidem quatenus hæc tangit, eatenus illa tangitur. Quapropter res illa quam tu indiuisibilem affirmabas, tunc primum esse cogitur diuisibilis, quando à re aliqua diuisibili tangi conceditur. Itaque essentia illa animæ indiuidua nunquam tangitur ab aliqua diuidua qualitate. Non tangitur inquam per rectam lineam, neque etiam per reflexam. Non per rectam, quia ipsa anima qualitatem ex aduerso occurrentem non excipit. Non per reflexam, quia cum à corpore sit exempta, feruentibus in corpore qualitatibus illarum impetu & furore non rapitur, ideoque à nulla corrumpitur. An forte ab aliqua indiuisibili, quam facile suscepit, corrumpetur? Minimè. Susceptio namque indiuisibilium qualitatū perficit illud quod suscipit, non corrumpit. Quod patet per eas indiuisibiles rerum imagines, quæ ab aqua, speculis, anima, tum per sensum, tum per rationem suscipiuntur. Propriè verò non alia ratione hæc res agit in illam, nisi vt hæc illi suam formam exhibeat. Siquidem omnia propter suæ naturæ propagationem ducuntur ad operandum. Nulla verò res corporea potest aut nitiur formam sui corporalem in animæ essentia generare, quæ ita est à materia segregata, vt in ea nullum habeant formæ corporales ingressum. Sed nunquid Deus vel Angelus formam nouam inducunt in animam, per quam anima perturbetur? Nequaquam, quia si illi aliquam formam creant per se subsistentem, illam seorsum creant ab anima, non ergo per illius creationem anima perturbatur. Sin autem vim aliquam infundunt in animam, vis huiusmodi benefica est, cum ab optimis causis venerit animæ ipsius conseruatricibus, ergo per ipsam non interit anima, sed seruatur.

*Septima ratio, quia esse suum habet in sua essentia.*

## C A P V T VIII.

**A**liud essentiam vocamus, aliud esse. Essentiam quidem dicimus rationem rei, quæ definitione comprehenditur. Esse verò actum ipsius essentiae, & quandam eius in rerum natura præsentiam. Exemplum accipe de Crinita, essentia Crinitæ est ratio hæc ipsius & definitio, vt puta vapor siccus in aëre summo accensus ab igni, perque aërem ordine cir-

etiens. Quæ quidem definitio hodie vera est, etiam si nusquam hodie Crinita esset. Esse verò crinitæ huiusmodi quidam dicitur ut videlicet talis illa natura crinitæ, quæ per definitionem quotidie designatur, iam nunc alicubi luceat. Esse hoc absque certo loco & tempore non fit. Non aliter enim fit illa essentia præsens, quam hîc vel ibi, hac hora vel illa. Igitur esse naturalium rerum certo loco eget & tempore, essentia iis non indiget. Vera enim est crinitæ ratio illa, etiam si ad præsens crinita nusquam caleat. Imò si definitio illa certum includeret tempus & locum, puta hodie hîc, aut cras ibi, in eadem utique hora, eademque æris plaga, in qua vna crinita existit, cunctæ simul essent crinitæ. In singulis enim crinitis inest communis crinitæ essentia & ratio eadem. Quod si ratio hæc certo sit loco, temporique adstricta, ad eosdem terminos loci & temporis crinitæ omnes adstringerentur, quemadmodum rationalis potentia cum in definitione hominis includatur, singulis hominibus conuenit. Essentia itaq; & esse naturalium rerum hoc inter se differunt, quod esse certo loco temporique adstringitur, essentia verò quantum in se est, ad omne tempus fermè, omnemque locum æquè se habet. Siquidem humanitas ipsa non minus seculis aliis quàm nostris, aut in Oriente, minus quàm Occidente potest consistere. Plato verò & Socrates hoc aut illo, ut sint & viuant, loco egent & tempore. In ipsa humanitate essentia designatur, in singulis istis hominibus esse conspicitur. Igitur essentia à singulis temporis & loci limitibus est exclusa. Quapropter ad sui cōseruationem per sui naturam, nullo indiget loco, neque terminos habet temporis, quibus aliquando excedatur, quandoquidem ab huiusmodi terminis est exempta. Vbiq; ergo viget, & semper. Essentia igitur omnis secundum seipsam dicitur immortalis. Talis autem est per naturam suam formæ cuiusque essentia. Verum cum omnium author formarum gignit essentias, atque illas in esse producit, alias ad tale esse determinat ut existant in corpore, unde esse talis essentiæ siue formæ talis, ad corporales conditiones ab agente contrahitur. Quando esse ad corpus contrahitur, iisdem quoque essentia limitibus coarctatur. Conditiones naturalium corporum sunt, ut locum impleant, & tempore moueantur. Idcirco forma illa quæ per se super certum tempus locumque fuisse, tempus iam proprium subit & locum. Quia tempus subit, ideo incipit paulatim, muta-

tur, & desinit. Quia locum, ideo dum corpus ipsum in quo illa iaceret, contrarias quotidie suscipit qualitates, illa quoque qualitatum huiusmodi tempestate turbatur, fitque mortalis. Tales sunt formæ qualitatesque corporum. Alias autem formarum essentias author ille ita in esse producit, ut ipsum suum esse non in alia quadam re aut materia sortiantur, sed in seipsis contineant. Tales sunt formæ omnes à materiæ commercio alienæ. Esse namque suum in seipsis habent, non in materia. Quicquid autem ab aliquo capitur, pro capto eius quod capit, accipi solet, atque ad eius trahi proprietatem. Essentia verò quælibet per se immortalis est. Ergo esse quod ab ipsa essentia capitur, quoniam à re immortalis per modum capitur immortalem, efficitur immortale. Quapropter forma quæ est à materiæ societate seiuncta, vndique, id est, tam secundum esse suum quàm secundum suam essentiam est immortalis. Talis est essentia tertia rationalium fons animarum.

*Octaua ratio, quia esse proprium habet, & nunquam à sua forma discedit.*

## CAPUT VIII.

**G**eneratio & corruptio ita sibi inuicem opponuntur, ut ad contradictoria tendant, & generatio via quædam sit ad esse, corruptio via sit ad non esse. Vnumquodque autem ex eo tendit ad esse, quod certam quandam accipit formam. Ad non esse verò ex eo, quod formam suam amittere cogitur. In artibus nullum opus tale est propter materiam, sed propter formam. Æneus equus aut homo non propter æris materiam talis dicitur, quippe cum æs ad omnium animalium figuras suscipiendas æquè sit præparatum, sed propter equi aut hominis formam quandam similitudinemque ab artifice profectam. Hæc pars æris æquus dicitur, illa homo. In natura similiter materia quidem non illud est per quod Plato est homo, aut ficus est arbor. Eadem quippe mundi prima materia hominibus, brutis, arboribus est communis, ac multa ante Platonem sæcula, multa etiam post Platonem, materia illa eadem extat, Plato verò nequaquam. Igitur non propter materiam Plato humanam habet speciem, sed propter complexionem corporis talem, atque animam, quæ formæ dicuntur. Similiter de aliis iudicandum, ac summam concludendum, quodlibet à forma habere proprium suum esse, nam-



ram, & speciem ab aliis differentem. Quapropter quicquid esse definit, ipsum esse suum amittit, ex eo quod à forma propria separatur, sicut esse antea cœperat quando formam propriam fuerat cœquutū. Ideo res ex materia formaque composita, puta ignis ex mole sua & naturali caliditate compositus, interit quando à sua forma seiungitur. Potest autem frigus aquæ vel terræ se materiæ ignis insinuare, atque inde naturalem caliditatem ignis formam expellere, qua expulsa desinit esse ignis. Sic ignis ille ex materia & tali quadam caliditate compositus, esse amittit caliditatem suam, inquam, substantiali formam cum eius proprietatibus, quam nunc (quoniam manifestum nomen habet) caliditatem disputandi causa nominamus, caliditas autem ipsa quando esse suum amittit cum sit forma, & à forma sit esse. Quando videlicet ex materia depellitur. In rebus enim compositis naturaliter esse tribuitur toti, non partibus. Nempe esse ignis ipsius, compositi est propriè, non materiæ solius neque caloris. Nam cum calor in ignis generatione ab agente naturali ex materiæ semine eductus fuit, ea conditione fuit per omnem materiam ignis extensus, ut inde omnino penderet, neque esse proprium sibi calor haberet, sed per ipsum commune esse totius ignis, calor quoque esse diceretur. Esse autem illud commune tunc cessat, quando duæ illæ partes à se inuicem disiunguntur. Quando esse commune cessat perit & forma quæ per esse commune vigeat. Materia verò non perit, quoniam subito aliam suscipit formam, per quam existat, ita ut dum certum amittit calorem, esse igneum amittat. Dum certam quandam frigiditatem accipit, vel humiditatem, esse capiat terreum aut aqueum. Conclude, rem compositam, ut ignem & aquam, tunc interire, quando à sua forma seiungitur, formam verò illam perdi quando à formantis lege discedit. Sol, qui genuit ignem, ignis formator exiit. Is ea lege calorem ex fomite materiæ illius eduxit, ut in ea materia iacens sub esse compositi totius cōtineretur. Hanc legem transgreditur, quando ex illa abit materia. Abit, quando fugatur à frigore. Quod ergo neque à sua forma, neque à formantis lege discedit, quoniam pacto interit, cum esse cuiusque à forma procedat, & formantis lege seruetur? Anima vero propter tertiæ illius essentiæ proprietatem mera quædam forma est, non composita ex materia & forma, neque recubans in materia. Ideo in seipsa permanens, quicquid in se est, nihil est aliud præter formam.

Ipsa igitur sua essentia non formatur per aliud quicquid, sed sui ipsius est forma, id est, ipsamet forma est. Nihil est autem quod per se à sua essentia separetur, quia, nihil à seipso discedit. Omnia siquidem naturali instinctu nixue perpetuo seipsa seruant pro viribus, sibi que inhaerent. Igitur anima si nunquam à se disiungitur & ipsa sui forma est, nunquam à sua forma disiungitur. Itaque nunquam desinit esse, cum esse à forma semper hauriatur. Sua quidem sponte à se non separatur, ut diximus. Sed neque etiam ab extrinseca violentia cogitur, ut à se ipsa secedat, quoniam quicquid extrinsecus accipit suo quodam accipit modo. Ipsa planè spiritalis est, atque à loco & tempore absoluta, ergo spiritali modo & absolute accipit omnia. Spiritualia verò & absoluta quando ab aliquo capiuntur, nequaquam interimunt. Spiritalis namque susceptio cum sit in corporibus, corpora ipsa licet sibi dissimilia non corrumpit, ut simulachrorum susceptio in aqua & speculo. Multo ergo minus corrumpet rem spiritalem sibi persimilem.

Præterea cum absolutum illud quod ab animæ essentia suscipi fingeatur, æternum sit, cur susceptaculum suum interimat? An ut ex illius materia seipsum alat? Non, cum alimento non egeat illud quod est æternum. An ut seipsum propaget, generetque ex illius materia sibi simile aliquid? nequaquam. Non enim eget propagatione, quod semper idem manet, neque etiam potest ex re corruptibili perpetuam generare. Non ergo corrumpit quicquam, ut perpetuum aliquid sibi simile generet. Nullo itaque modo potest quicquam animæ essentia capere à quo perdatur. Merito non potest capere omnino noxium quicquam, cum materia careat, quæ primum & proprium passionum talium dicitur receptaculum. Imò verò si ista essentia sui ipsius est forma, inter eam & formam suam nihil unquam intercideret. Nam si quid medium aliquando inter ipsam & formam suam caderet, fieret profectò illud ipsius formæ propinquius, quàm ipsa eius essentia. Essentia verò ipsa est ipsamet eius forma. Ita fieret ipsi aliquid propinquius, quàm ipsa sibi, quod est omnium absurdissimum. Quapropter nihil se inter eam eiusque formam inserit medium. Si ita est, illa à sui forma nullo interueniente disiungitur. Sed neque etiam sponte seiungitur sua, quare nullo modo à seipsa sui que forma discedit. Neque etiam à formantis discedit lege. Ea siquidem lege creata est, ut in seipsa confisteret. Semper autem ita permanet. Ex eo enim statu à nul-

lo deicitur. Non à seipsa, nam res quæque speciem & dignitatem suam pro viribus sibi conseruat. Non à superioribus, causis, quia illæ qua lege eam produxerunt, in eadem & continent. Non ab inferioribus. Superius enim ab inferiori non vincitur. Quamobrem anima, quia mera forma est, ideoque neque à sui forma, neque à formantis lege discedit, permanet proculdubio immortalis.

*Nona ratio, quia sibi per se conuenit esse.*

## C A P V T IX.

**Q**Uod alicui per se conuenit, nunquam separatur ab ipso. Rotunditas suapte natura circulo inest, atque ideo nullus unquam sine rotunditate est circulus. Ligno autem quandoque rotunditas inest, non quia lignum est (omne enim lignum aliqui rotundum esset) sed quia ab artifice figuram accipit circularem, quam rotunditas comitatur, ideo tunc rotunditatem capere cogitur. Desinit aliquando lignum esse rotundum, cum primum esse desinit circulare, deinde restat lignum, sed non rotundum. Figura verò circularis ita necessario rotunda est, ut si defuerit esse rotunda, esse etiam desinat circularis. Similiter calor igni per se conuenit, humor aquæ, Soli lumen. Non aliter & formæ esse per se conuenit. Nam quicquid est in aliqua specie, id certè quod est à propria quadam forma fortitur ad talem speciem conducente. Quoniam igitur esse proprium, cuique per formam propriam competit, sequitur ut esse communiter & simpliciter per genus ipsum formæ conueniat. Vnde oportet ipsam formam fontem dici essendi, & per se esse. Quod si per aliud esse dicatur ab aliquo, interrogabimus utrum illud per quod forma dicitur esse, naturam formæ habeat, an materiæ, non materiæ, quia videmus in compositis singulis esse cuiusque proprium, non sequi materiam. Ergo neque in hac ipsa forma per quam res compositæ sunt, illud per quod ipsa est, vim habet materiæ, ergo formæ. Ita quæstio redit in idem. Vtrum forma illa alia per quam forma est, per seipsam sit, an per aliud quippiam? Si per se, tunc constat formam fontem essendi dici debere. Sin per aliud, tunc quæremus ut antè, atque in infinitum erit progressio. Quapropter formæ per se conuenit esse. At enim formarum conditor ad certum operis mundani finem integritatemque formas ea distinctione producit in esse, ut singulas naturaliter ad certum esse

determinet, & alias quidem ad esse in corpore, alias ad esse in seipsis absque materia. Forma impressa materiæ, non propriè est, neque proprium habet esse, sed dicitur id, quo compositum ipsum est, & ipsa per commune esse totius existit. Si esse formæ per se congruit, hæc certè forma quæ est in corpore, quia & ipsa forma est, id habet, ut & ipsi esse per se conueniat. At quomodo, cum à materia pendeat, & sub esse totius compositi contineatur? Attende, esse per se conuenit illi, id est, per se sequitur illam, sequitur inquam per se, id est, secundum naturam suam. Quid enim aliud per se significat quàm per sui naturam? Natura sua talis est, qualem sibi suus opifex assignauit. Opifex autem statuit ut materiæ inhereret. Hæc itaque natura, suæ est inherere materiæ. Per hanc naturam esse eam sequitur. Ergo esse eam sequitur per se eam inquam, materiæ inhaerentem, ita prius quodammodo illi competit materiæ infigi quàm existere. Quare tam diu existit, quandiu hæret materiæ. Non hæret autem semper, quia materia omnibus parata formis, locum sæpè dat formis contrariis priores formas inde pellentibus.

Non ergo existit semper. Forma verò illa quæ ita à conditore est ad esse determinata, ut in seipsa consistat seorsum à corpore, etiam quia forma est, habet illud, ut esse sibi per se conueniat, per se, inquam per naturam suam. Natura ipsi assignata est sibi in seipsa inherere. Igitur esse suum eam sequitur quantum sibi hæret, id est, existere suum eam sequitur ex subiecto minimè pullulantem. Et quoties dicis esse per se sequitur eam, toties dicis, esse eam sequitur sibi ipsi inhaerentem. Nihil autem à seipso discedit. Quid enim intercidit inter se, & ipsummet, quod separaret ipsum à semetipso? Si quatenus hæret sibi, catenus est, quia hæret semper, est & semper. Talis quidem forma est anima. Est igitur immortalis. Sed potest aliquis huic rationi sic obicere, quod quemadmodum ignis per se calet, calet semper dum est, non tamen est semper ex quo etiam non calet absolute semper, ita etiam animæ essentia quia propriè & verè forma est in seipsa subsistens, ideo per se est, & quia per se est, ideo est & semper, scilicet dum est. Non tamen semper est. Ergo non est semper. Hæc obiectio duabus de causis ridicula iudicatur. Primò sibi in seipso repugnat, quando ita contexitur. Forma illa per se est, ergo semper est, dum scilicet est, non autem est semper. Quatuor enim hic orationes sunt, quarum secunda illa quæ dicit. Ergo semper est, posteriori huic com-

tradit quæ infert. Non autem est semper. Deinde obiectio huiusmodi abundat superfluis, quando addit: dum scilicet est. Istud siquidem, dum est, non potest dici aliud est quàm primum illud ubi dicitur, semper est. Sic enim esset eadem in re geminum est, & geminum esse, neque existeret res una quædam, sed duæ. Hinc sequitur ut illud est quod ponitur quando additur: Dum scilicet est, sit illud idem quod iam erat positum quando prius dicebatur, Est semper. Quæ sunt eadem, eadem sunt ratione tractanda. Idcirco si primum est, absolute profertur, ita secundum est, absolute proferri debet absque illa dictione: Dum scilicet est. Ergo dici oportet. Est, semper est, est non tantum addendum, dum scilicet est. Veli si addis illi primo est, illud postea, Dum scilicet est, adde & huic secundo est, quod sequitur post, dum scilicet est. Rursus illud dum scilicet est, & huic tertio est, rursus dum scilicet est, atque ita in infinitum, neq; usquam reperies primam essendi radicem, per quam competat illi rei quod sit, sitque semper. Quod autem radicem essendi non habet, nihil est omnino. Age iam siste pedem. Forma illa separata, qualis est anima, per se est, ergo est semper. Quinetiam, si idem prorsus existeret esse atque calere, quando ita componis, Ignis quia per se calet, calet semper, adderes protinus: Calere & esse idem est, ergo est, & semper. Nunc autem non potes eo modo concludere, quia non idem est esse, atque calere, alioqui quodcunque sunt, calerent, & quicquid calere definit, defineret esse quod non accidit. Itaque ignis semper dum est, calet, quia prius quodammodo est, & postea calet. Et quia esse est ante calere, & aliud quàm calere, ideo per aliquod medium videtur calor essentia ignis inesse, ita ut primò ponatur ignis essentia, secundò eius esse, tertio loco calere. Imò verò essentia ignis sortitur esse per id quod hæret materia. Prius enim quodammodo latet in materia sinu, quàm edatur in lucem. Et sicut latuit antequam existeret, sic etiam hæret postea, ut non cesseret existere. Sortitur quoque calere per id quod possidet esse. Quapropter calere definit, quando definit esse, definit esse, quando definit inhærere. Sed animæ essentia, quoniam est forma soluta, esse sortitur per semetipsam, & in ea ipsum esse est primum & proprius actus essentia, nec ullum vinculum est per quod esse cum essentia connectatur, quo soluto accidat dissolutio. Ac licet tam calere quàm esse

per aliquam conditionem conveniat ignis essentia, animæ tamen essentia non convenit esse per conditionem ullam, sed absolute. Idcirco, licet ignis cum certa quadam conditione sit, & caleat semper, anima tamen semper est absolute.

*Decima ratio, quia per se, refertur ad Deum.*

## C A P V T X.

**S**I qua tamen videatur esse conditio citius virtute anima sit semper, ea non est per respectum aliquem ad corpora quorum adiumento non eget, sed respectum ad causam primam, unde descendit. Sed & respectus huiusmodi quoniam per ipsammet animæ naturam completur, nihil prohibet quin anima per se & absolute & absque conditione semper. Quod quidem hac ratione inuestigabimus, quoniam à prima rerum causa cuncta dependent, eatenus singula in suo esse permanent, quatenus ad primam causam referuntur. Respicunt autem illam ut aliquam ipsius similitudinem gerunt. Causa illa actus purissimus est, ab omni materia proprietate alienissimus. Huic actui res inferiores non ex sua materia, sed ex forma potius (quæ actus quidam existit) similes iudicantur. Quo fit, ut per formam suam omnia primam respiciant causam. Quare quæcunque ex materia & forma composita sunt, ut elementa, & mixta, non per se, neque per totam sui naturam, sed per partem illam sui duntaxat quæ forma dicitur, causam primam respiciunt. Argumentare hunc in modum. Ut ad primum principium referuntur, ita sunt, referuntur autem per aliud, ergo per aliud sunt. Quæ sunt per aliud, stabilia non sunt, in seipsis enim relictæ, in nihilum evanescent. In se ergo sunt nihil, quæ sunt per aliud quicquid existunt. Talia profecto sunt naturalia corpora. Corporales verò formæ quales? Certè similes. Forma enim corporibus insita, excellentiam quidem amittit suam, & corporalis prorsus evasit, siquidem omnes conditiones corporis iam subinit.

Conditiones corporis duæ sunt, secundum locum extensio, & secundum tempus mutatio. Forma verò immerfa corporibus, cum latitudine corporis dilatatur, & mutatur corpore permutato. Quoniam igitur facta est penitus corporalis pristina excellentia destituta, per se quidem minimè est, ut diximus aliàs, & esse nullum habet proprium, sed ita cum mate-

ria copulatur, ut unum sit esse totius. Si ergo per se non est, per se certe non agit. Ideo si refertur ad primam causam, per aliud aliquid referetur, per illud videlicet, per quod est. Est autem per formam aliam sublimiorem, à materia liberam, à qua etiā pendet in materiam continuè, quemadmodum à vultu hominis imago in speculum, per quam ad primam causam assidue quoque refertur. Si ergo omnino per aliud est forma corporea, cum etiam ad primum principium per aliud referatur, quidnam est illud per quod tam corpus naturale quam eius forma refertur ad primum? Sane est essentia illa tertia, quæ in supra corporum qualitates iam pridem locauimus. Essentia verò huiusmodi eodem modo ad Deum refert corporum qualitates, quo eas efficit in materia. Efficit autem operatione sua, operatio sua est mobilis. Per agitationem igitur generat, per agitationem & refert. Itaque refert mirabiliter. Hinc sequitur, ut naturalia corpora, eorumque formæ, quia per aliud perque motum referuntur in Deum, neque per se sint, neque stabilia sed vacillent prorsus, & pereant. Essentia verò tertia quia sui ipsius est forma, imò ipsamet forma est, & forma à materia libera, idcirco per se refertur in Deum. Ut refertur, ita est. Ergo est etiam per seipsam. Refertur autem per essentiam suam, illa stabilis est. Quapropter ad stabilem Deum, per stabilem sui ipsius essentiam relata, stabilis permanet. Nempè essentia hæc relationis suæ causa est, ratio perfectionis. Seipsam verò nunquam deserit, nunquam ergo desinit seipsam referre, nunquam seipsam perficere referendo. Deus quidem semper exuberat, illa semper haurit. Igitur tum ex parte hausti, tum haurientis, semper quidem esse ipsum bibit, ac permanet immortalis.

*Vndecima ratio, quia non componitur ex aliqua potentia in quam possit resolui.*

## C A P. V. T. II.

**S**icut generatio fit per coniunctionem formæ cum materia, ita per separationem formæ à materia fit corruptio. Vbi non est harum rerum coniunctio, non accidit separatio. Talis autem compositio non est in anima. Sed rationem hanc latius prosequamur. In corruptione cuiusque rei perditur ipse rei actus, sed post illum superest aliquid quod suberat illi actui, veluti potentia aliqua susceptiva, ne fiat

corruptio in nihilum, sicut non fit ex nihilo generatio. Res quidem ex forma materiaque composita, resolvitur in materiam. Forma quoque illa, quæ ex materiæ fomiteeducta fuerat, reducitur in materiæ fomitem. In anima verò actus ipsius est ipsum suum esse. Essentia verò & substantia eius est illa ipsa potentia quæ essendi actui subest. Non enim est in formis absolutis ferme alia compositio, quam ex essentia atque esse, aut similis. Essentia locum materiæ & potentiæ tenet, esse verò locum formæ & actus. Si corrumpitur anima, perditur eius esse omnino. Sed nunquid etiam essentia? nequaquam. Nulla enim res in nihil resolvitur, quia res quæ usque adeo est simplex, ut non aliter resolui possit, quam in nihilum, etiam talis est, ut sit à Deo facta per creationem ex nihilo. Quæ autem talis est, soli auctori suo subest Deo, Dei verò influxus vitalis atque beneficus nihil interimit. Itaque si anima destruitur, licet amittat esse eius, tamen essentia remanet. Quod etiam inde constat, quod quanto nobilior res est, tanto nobiliorem habet materiam, nobiliorem & formam. Animæ sunt admodum præstantiores corporibus. Igitur sub illarum esse tanquam sub forma & actui latet materia quædam & potentia, si qualaret, præstantior quam sub forma, & sub esse corporis cuiuscunque. Quod autem tenet in animabus primæ materiæ potentiæque locum, ipsa earum essentia est. Itaque essentia illarum eminentior est, quam materia corporum. Materia corporum incorruptibilis est, ergo quid mirum si esse potest incorruptibilis illa? Quo fit ut si quando anima esse suum fingatur amittere, supersit necessario adhuc essentia atque substantia. Hæc si superest, est certe. Si est adhuc, esse nondum est amissum. Ita anima si corrumpi dicatur, etiam post corruptionem necessario superest. Imò etiam vivit. Esse namque animæ nihil aliud est quam vivere.

Sed ne quis dicat ipsum animæ esse resolui in essentiam, atque essentiam ulterius non existere, quia sit absque actu, quamvis potentia forte supersit alicubi, meminisse oportet essentiam illam non posse in materiam potentiamve materiæ redigi, quia neque ex materia constat tanquam parte sui, neque ex materiæ potentia pullulat. Rursus non posse resolui in potentiam causæ alicuius agentis, nisi forte in Dei virtutem, qui solus animam procreavit. Non autem ob id moritur animus, quod in primam vitam resolvitur. Moretur autem, si reductus in Deum desino-

ret esse animus. Atqui sicut figura ceræ à sigillo impressa, quando sigillo penitus æquatur, non destruitur, sed in speciem suam redintegratur, sic essentia animi si quando ideæ per quam Deus eam in certa essendi specie disposuerat, admouetur, in esse pristino confirmatur. Maximè enim sequens actus roboratur à primo. Nam quomodo Deus esse potest terminus in quem corruptio tendat, cum sit efficiens terminus, unde & à quo omnis creatio generatioque deducitur? aut quo pacto Deus qui actus est purus, nascente anima ad animæ ipsius compositionem concurrat? Ita, ut quemadmodum ex materiæ potentia & actu potentie addito, forma fit corporalis, & in eam potentiam denique actus formæ resoluitur, sic ex Dei potentia quadam & adiecto quodam actu, fiat animus, qui tandem in Dei potentiam quasi materiam resoluitur. Non enim gerit vnquam materiæ vicem, qui primus est actus. Afferet aliquis essentiam animæ, neque in materiam, neque in Deum resolui, sed ipsam se statim in se recipere, esse priore sublato. Verum sicut materia corporalis absque actu corporali esse nequit, ita neque spiritalis seorsum à spiritali. Quapropter essentia quæ est materia spiritalium, & ad esse spiritale quasi actum aliquem comparatur, nunquam segregatur ab esse, ab esse inquam spiritali. Nisi fortè quis dicat essentiam animæ, dum esse aliud exiit, aliud indui, ac tales in esse spiritali vices hanc essentiam variare, quales in formis suis materia variat. Absurdum id quidem dictum, tum quia essentia spiritalium stabilior est quàm materia corporaliū, tum quia essentia animæ cum propria ipsius animæ ratio sit, non esse aliud omnino & aliud respicit pariter, sed esse solummodo animale, secundum certam videlicet animæ speciem. Materia quidem communis absque hoc actu vel illo esse potest, materia verò propria absque proprio actu nequaquam. Quapropter essentia animæ quæ in tali specie animarum est, nunquam actum speciei alterius animarum suscipiet, neque migrabit rursus essentia in eadem specie de animo hoc in illum, ne mobilis æquè sit ac materia corporaliū. Imò si materia coeli eadem forma contenta est semper, ut placet quamplurimis, quid mirum materiam animi spiritalē eodem essendi actu semper esse contentam? Ea essentia vita est, hoc esse vivere. Semper itaque vivit.

*Duodecima ratio, quia non habet in se potentiam ad non esse.*

## CAPVT XII.

**N**Vlla res corrumpitur vnquam nisi habeat in se potentiam ad non esse. Si enim nequiret non esse, nunquam esse desineret. Anima nullam habet talem potentiam, quoniam anima nihil aliud est apud Platonicos, nisi forma simplex per se subsistens, in essentia quidem sua perfecta & integra, ad peciem quoque animalis efficiendam conduens. Actus quidem existendi ibi est, in ipsa scilicet forma integra & perfecta. Siquidem per formæ integritatem est vnumquodque. Igitur proprium subiectum ipsius esse ibi, est sua forma atque essentia. Vbi autem erit potentia ad non esse? quod est ipsius esse oppositum? Nunquid in ipso esse? At quomodo vnum repugnans vim habet ad repugnans alterum capiendum? An in ipsa essentia? Neque hic quidem. Nam si essentia ex eo quod simplex & integra forma est, proprium est ipsius esse subiectum, quomodo habet potentiam ad non esse, quod dicitur esse ipsius oppositum? Quo enim pacto propria substantia ignis, quæ proprium caloris talis subiectum est, habet ad frigus suscipiendum potentiam aliquam? per quam & frigus accipiat & maneat ignis? Atqui in iis ipsis substantiis corporalibus mortalibusque non est potentia ad non esse, quantum sunt in specie sua completæ substantiæ, formæque præditæ (secundum hoc enim existunt) Sed quantum illis subest materia prima, quæ nunquam sub tali aliqua forma quiescit. Hæc verò abest ab anima. Nulquam igitur potentia ad non esse in anima reperitur. Est igitur immortalis. Sed hanc rationem planius exponamus. In rebus iis quæ ex forma & materia componuntur, id accidit, ut materia opus ipsum quodammodo antecedit. Quis enim dubitet quin materia prius quodammodo sit quàm formetur? Accipio materiam hanc operi faciundo quodammodo præcedentem, atque interrogo, vtrum opus illud ex natura huius materiæ fore necessarium sit? an impossibile? an forte possibile? Non necessarium, quia sic materiæ vis statim per seipsam operi necessitatem daret, neque præstantiore aliquo egeret formante, nunc verò indiget, quia quod est informe, formare se nequit. Igitur quantum ad materiam attinet, futurum opus non est necessarium. Nunquid impossibile? Neque hoc quidem. Sic enim esset materia adeo



ad opus illud inepta, ut nunquam ad illius formam atque effectum perduceretur. Si quantum ad materiam spectat, opus agendum neque necessarium est, neque etiam impossibile, restat ut sit possibile. Hoc enim inter duo illa est medium, possibile, inquam, esse, atque non esse. Nam si ex natura materiae foret possibile esse solum, foret absque dubio necessarium. Sin ex natura eiusdem foret solum possibile non esse, foret & impossibile. Quapropter cum ex natura materiae opus ipsum possibile sit esse pariter & non esse, constat quod in ipsa materia quantum ad faciendum opus est potentia ad esse pariter atque non esse. Cum verò simplex materia sit, ex naturis pluribus non composita, eadem natura materiae est potentia ad esse atque non esse, quoniam est indifferens ad utrumque, neque ex se ad alterutrum terminatur. Superiori ergo agente indiget, quod eam formando ad esse determinet. Accipit ab illo formam leonis, unde fit leo, & materia ista leonis, quae ante habebat in se potentiam ad esse leonem, atque non esse, tam nunc ad esse leonem determinatur. Sed nunquid adhuc restat in materia prima eadem illa indifferens ad utrumque potentia? Si non restaret, cessaret protinus natura materiae, neque quicquam ex materia fieret & constaret, si statim cum sit aliquid, materia prima natura priuatur sua peritque. Ergo cum restet leone iam genito, potentia eadem illa secundum speciem in materia non propinquae leoni, secundaque, sed prima potentia, inquam, ad esse pariter, atque non esse. Id accidit, ut quemadmodum per illam potentiam esse leo quandoque coepit, cum prius non fuisset, ita per eandem esse quandoque desinat, postquam fuit. Quoniam potentia ad extremum utrumque indifferens, vel ad neutrum vertitur, vel aequè atque vicissim vertitur ad utrumque, & sicut ad esse & non esse conuersa est, ita vicissim ab esse vertitur in non esse. Atque hinc sequitur rerum corruptio corporalium. Verum rationalis anima cum sit forma simplex, unde motus exoritur in compositis, non potest ex aliqua materia praecedente & subsequente forma facta fuisse, & cum sit forma in se subsistens, non innixa materiae, quia & supra & infra materiam progreditur indicando, non est composita ex aliqua potentia materiae, velut animae inchoatione, & actu potentiae addito, velut ipsius animae perfectione? Neque igitur ex materia constat, neque extat. Si talis est, ex nihilo processit in lucem. Eius ergo solus Deus est auctor, ut alias ostendimus. Atqui haec nisi ponis-

set fieri, nunquam profectò facta fuisset. Quapropter praecessit animam nostram nascendi potentia. Vbi nam erat illa potentia? Non in anima, quae nondum erat. Non in parte animae, quae est simplex, & tota simul efficitur, non per partes. Non in materia aliqua, quoniam anima à materia non dependet. Non in nihilo, non enim potentia ipsa essendi fundatur in nihilo. Nam quo pacto alterum oppositum sit oppositi & contradictorii alterius fundamentum? Esse verò & non esse contradictoria sunt. Restat, ut illa potentia in solo animae auctore fundetur Deo. Igitur potentia essendi per quam anima ad esse producitur, ipse solus immortalis stabilisque est Deus. Potentiae verò secundum congruentiam responderet actus. Actus ergo illi potentiae diuinae respondens est stabilis per essentiam. Talis actus est anima. Et quemadmodum in Deo eadem potentia est, per quam & Deus potest facere animam, & anima fieri, sic in anima idem actus est, id est, nexus idem, per quem & anima subsistit in natura sua, & Deus eam sistit in ipsa. Quo fit, ut non minori desiderio Deus animam in natura animae sistat, quam subsistat anima in eadem. Quae cum soli subiiciatur Deo, si perimenda est ab aliquo, ab illo est perimenda. Ab illo verò non potest. Quomodo enim causa alicuius effectrix & conseruatrix erit quoque corruptrix eiusdem? Aut quo pacto ipsum bonum cuiquam perniciosum est? Aut prima vita & infinita vita est alicuius mortis origo? Dicet aliquis: Non perimit Deus animam, vim nouam aliquam inferendo, sed vim ante illi tributam auferendo, id est, subtrahendo influxum suum, per quem anima vixerat, sicut qui intuitu imaginem suam creat in speculo, subtrahendo vultum, desinit imaginem procreare. Sed contingere hoc ibi non potest, ut paulo ante ostendimus. Rursus, si Deus nunc infundit animae vitam, postea non infundit, mutatio ibi prouenit ab infundendo in non infundendum. Quaero, utrum anima desinat haurire vitam, an Deus infundere? Non desinit anima haurire, quippe infusio vitae in essentiam animae fit, quoniam vita est primus actus essentiae cum primum acceperit esse. Animae essentia est immobilis, quoniam à stabili Deo sine medio pendet, quia stando & quiescendo perficitur: turbatur motu, attingit stabilia, regit caduca, sistit mobilia, colligit dissipata, conciliat repugnantia. Nec est in ea potentia illa ad esse pariter atque non esse, qualis est in corporibus, quae est totius mutationis initium. Non igitur cessat animae essentia vnuquam

vita ætæ accipere, non cessat Deus eundem infundere. Solis namque illis significauit Deus se vim suam aliquando infundere cessaturum, quibus ab origine inferuit procliuatatem illam ad non effendum. Præterea Deus naturæ institutor, nunquam rei quicquam subtrahit, quod rei illius est proprium. Propria animæ vita est, vita inquam perpetua, quia quantum rationalis est, etiam absque disciplina & vñ per solam eius naturæ virtutem quotidie in se parit species absolutas, per quas proximè ad æternas itur ideas. Si naturale est animo rationali ascendere ad ideas, naturale est ipsi quiescere in ideis, vt sicut naturaliter illis vixit, ita naturaliter viuat in illis, & qui operabatur secundum naturam assidue ad perpetua, operetur quandoque secundum naturam perpetuo in perpetuis. Et quia idea quæque æterna vita est, qui secundum naturam suam ideam per ideæ modum potest consequi, potest etiam per modum æternæ vitam consequi sempiternam.

*Decima ratio. Quia esse à Deo accipit  
sine medio.*

### C A P V T XIII.

**Q**uamquam Plotinus & Proculus alique nonnulli Platoniorum animam fieri arbitrantur ab Angelo, tamen Dionysium Arcopagitam, Origenem & Aurelium Augustinum Platonios excellentissimos sequor libentius, qui animam putant à Deo vnico procreari. Quod equidem hac ratione demonstrari posse confido. Anima est forma ita simplex, atque ita libera, vt neque ex pluribus partibus componatur, neque materiæ visceribus eruat. Quando igitur fit, non potest ex rebus vllis prius existentibus generari. Non enim ex rebus diuersis procul antè positis, deinde coactis in vnum conficitur, cum careat partibus. Neque ex materiæ fomite prius informi, deinde formato, cum sit supra materiam. Igitur fit ex nihilo. Ex nihilo autem aliquid facere, Dei solius est proprium. Nam ex ordine operum ordo causarum inuestigatur, causis enim effectus accommodatur. Quare oportet effectus proprios in proprias causas reducamus, atque id quod commune in omnibus effectibus propriis reperitur, in communem omnium causam referamus. Ita cum omnibus in rebus præter proprias singularum condiciones ipsum esse commune cunctis inueniatur, singularum conditionum & qualitatum cautas singulas asferre debemus, ipsius autem esse quod vñ

num omnibus est commune, vñam causam, omnibusque communem. Omnibus communis causa vnus ipse est Deus. Igitur essendi re vera Deus est causa, essendi vero hoc aut illud, hoc modo vel illo, aliæ quadam præter Deum sunt causæ. Ita, vt sis à Deo solo habes, vt sis homo, etiam ab homine, vt calidus sis, ab igne. Deus operibus esse dabit, aliæ causæ inter se diuersæ, diuersos essendi modos, & eos quidem virtute Dei. Esse quidem illud quod post nihilum sequitur, esse dicitur absolutum, statim enim post nihil sequitur esse simpliciter. Post esse simpliciter, sequitur esse hoc aut illud, aut tale esse vel tale, puta hominem esse vel equum, album esse vel nigrum: non enim potest quicquam fieri hoc & illud & tale, nisi sit prius quod hoc & illud & tale fiat. Quapropter esse tale & hoc & illud, haud euestigio post nihilum sequitur, sed post esse ipsum simplex & absolutum. Cum igitur Dei proprium sit, esse ipsum commune & absolutum cunctis tribuere, id verò esse ante omnes essendi modos sequatur post nihilum, solius Dei officium erit aliquid ex nihilo in esse producere. Vt primum quod datur omnibus, ipsum scilicet esse, à prima sit causa, à sequentibus causis munera secunda vel tertia. Profectò quod naturæ aliqui est particeps, non potest eam naturam producere absolutam, quia cum id quod est tale aliquid secundum participationem, necessariò sequatur id quod est absolute tale, imò etiam sit per illud, quicquid ipsum est, si hoc illud gigneret, certè quod est posterius, rem seipso priorem, atque etiam sui ipsius causam gigneret, vbi gigneret & seipsum. Igitur Ariston, quia non absolutus homo fuit, sed hic homo in tali materia constitutus, humanitatem ipsam non genuit absolutam, sed hominem hunc, Platonem scilicet, & in materia tali. Quoniam verò quantum pertinet ad essendi naturam, quicquid sub Deo est, esse ipsius est particeps, & esse non habet simpliciter, sed tale esse vel tale, in quadam essentia specieque determinatum, sequitur vt res nulla subiecta Deo, ipsum esse producat, sed talem quendam essendi modum tali cuidam materiæ tribuat. Quo fit, vt ad opus suum priori semper egeat fundamento. Præterea tam ars quam natura quicquid agit, ex potentia quadam producit in actum. Sculptor ex lapide ita præparato ad statuam, vt quodammodo habeat statuam in potentia, statuam actu fabricat, homo ex semine in cuius virtute homo est, generat hominem. Materia illa ex qua ars & natura aliquid faciunt, interdum obediens multum & apta

ad opus existit, interdū ineprior, ita ut materia potētia aliās minus, aliās magis distet ab actu operis fabricandi. Parū distat aëris potentia ab ignis effectu, lōgē verò ab hoc aquæ potentia. Facile itaq; est ex aëre, difficile ex aqua ignem accendere. Vnde apparet tanto potentiorē esse oportere eum qui agit, quanto longius intervallum est inter potētiā illā & actum à qua in quem opus suum est deducturus. Distantia verò inter nihil & esse est infinita, tū quia in nihilo nulla est proportio ad esse, tū quia nulla distantia mior hac esse aut excogitari potest.

Distantiam verò proportionē & sine carentem sola illa vis potest transcēdere: quæ nullam habet ad alias virēs proportionem, nec habet finem. Virtus huiusmodi solus est Deus: omnia enim alia à Dei potentia exceduntur. Solus itaque Deus aliquid ex nihilo in esse producit. Præterea res omnis præter ipsum Deum creatura dicitur à Theologia, & ex quatuor quibusdam componitur necessario.

Ideo Pythagorici non solum in corporibus, verum etiam in spiritibus quodammodo ponunt quatuor elementa, quia utraque constant ex essentia, esse, virtute, & actione. Nempe aliud in eis essentia est, aliud esse. Est enim esse, actus essentia. Quod si præter hunc actum non esset illic essentia cui talis actus hæreret, esset actus purus & infinitus, quia non circumscriptus ab ullo. Hic autem solus est Deus. Rursus esse ipsum ab omni esset participatione alterius absolutū.

Omne vero tale vnicum est in natura. Solum igitur Deo convenit. Merito autem creatura non est ipsum esse suum, quia ipse suus actus esse nequit, cum habeat in se potentia passiva non nihil immixtum, quia subest Deo, potentia verò opponitur actu. Quoniam verò operatio differt ab essentia magis quàm esse ipsum, prius enim est essentia quàm operetur, ideo ubi est essentia & ipse esse distinctio, multo magis est distincta operatio ab essentia. Operatio quidem ita est virtutis essentialis actus, sicut esse actus essentia. Quia verò creata essentia non est suus actus, ideo nec est operatio sua, alioquin operatio talis esset per se subsistens ab omni participantis limite penitus absoluta. Quod tale est, vnicum diximus, & infinitum existere. Sed nunquid operatio differt ab esse, sicut ab essentia differre monstratur? Proculdubio. Duplex enim est operatio, una fluuit extra operantem, ut calefactio, altera manet intus, ut cognitio & voluntas. Quæ effluit sine controuersia distat ab esse, quod à se ipsa non effluit, quæ manet, ob id etiam discrepat, quia esse creantur;

rae certa quadam rerum specie clauditur. Operatio talis per genera multa vagatur. Imò verò intelligentia ipsa atque voluntas per infinita. Illius enim obiectum est ipsum verum, huius ipsum bonum. Verum autem & bonum saltem tam latè patent, quàm ipsum quod ens vocatur. Operatio verò ab obiecto trahit speciem, ergo operatio talis omnibus rerum omnium speciebus induitur. Sed num differt operatio à virtute & virtus ab essentia atque esse? Certè. Primò enim, quia actus potentia semper opponitur, operatio quæ est actus, à virtute discrepat & essentia, quæ potentia quædam sunt, & virtus ab esse, quod est actus, & ab essentia, quia potentia per suos actus distinguuntur, cum propria potentia proprium respiciat actum. Essentia actus est esse, virtutis actus est operatio. Igitur tanto inter se distat essentia atque virtus, quanto esse distat & operatio. Quorsum hæc tam multa? ut intelligas operationem cuiuslibet creaturæ virtuti hære, virtutem & esse essentia, ac nullam creaturam per substantiam proximè operari, sed per virtutem operatricem, quæ est qualitas siue accidens, cum à substantia vndique distinguatur. Quoties ergo aliquid operatur, qualitates quasdam proximè generat, & esse dat quale habet ipsa, id est, inhærens alteri semper. Talia verò præcedente indigent fundamento. Quæ fundamento indigent, ex nihilo non creantur. Ergo nulla creatura creat aliquid, nec iniuria. Operatio enim eius & virtus quia hærent alteri, & quicquid hæret, non restat liberum atque integrum, sed pro facultate suscipientis accipitur, subiecti sui limitibus finiuntur. Creatio verò operatricem virtutem exigit infinitam. Itaque anima à solo creatur Deo. Sed forsitan putabit quispiam animam ita à Deo fieri, ut per Angelum tanquam medium efficiatur, atque Deus in ea creatione sit opifex, Angelus instrumentum. Quæ quidem opinio ideo videtur absurda, quoniam instrumentum hanc habet naturam, ut ipsum ab alio motum moueat aliud, afficiat subiectum aliquod, formamque principalis agentis traducat in subiectum per tēporis intervallum. Creatio autem neque subiectum exigit, neque fit motu vel tempore. Rursus, si creationis opus virtutem requirit immensam, quid absurdius, quàm ad id exequendum, virtutem ipsam quæ in Deo immensa est, prius in Angelo, cuius natura terminata est, terminari, deinde opus illud quod ad immensam virtutem spectat, peragere? Ex supra dictis concluditur, animam à Deo summo sine medio procreari.

Cum non perfectione pares inter se sunt Angelus atque anima, cum utraque à Deo absque medio pendeant? Quia sub alia idea & ratione Deus Angelum producit, sub alia animam. Illum sub altiori idea, istam sub inferiori, quemadmodum ab eodem pictore homo & equus picti non æquæ sunt pulchri. Pulchrior enim hominis figura, quam equi, quia pictor ad pulchrius suæ mentis exemplar, hominis picturam expressit, quàm equi. Sed finem iam sic rationi huic imponamus. Si animæ essentia proximè à Deo sit, nihil inter eam & Deum ipsius conservatorem intercidit medium, quod ipsam à conservante disjungat. Ac si solo Deo eget ut fiat, solo etiam eget ut maneat. Et quia Deus per eandem vim servat creatura, per quam creavit, ideo sicut ex infinita Dei bonitate anima ex nihilo ad esse processit, ita per eandem in esse permanet procul à nihilo, ut vita Deo proxima, divinæ vitæ simillima sit. Quod ita demum erit, si anima aut principio & fine caruerit, sicut Deus, aut si habuerit principium, finem saltem nullum sit habitura. Timæi Platonis sententia est, Deum mundi opificem per ideas, id est, exemplares absolutasque rationes sua opera procreare, proinde quicquid per talem, aut talem proximè creatur ideam, semper tale perseverare, quod verò deinceps, non necessariò semper, sed aliquando tale. Oportere enim effectum proximum causæ prodire simillimum, remotiorem verò minus similem, atque deinceps dissimiliorem semper evadere, adeo ut idea sit virtus & in se ipsa simul, & sempiterna, virtus verò quæ inde sit proximè, non in se, imò in aliquo sit, sed semper. Quæ autem sit deinceps, neque in se, neque semper per naturam suam, vel eadem vel similis perseveret. Cum igitur rationalis quidem anima per ideam vitæ absque medio fiat, tali quadam proximæ originis potestate forma est semper vivens. Irrationalis autem cum inde per rationalem proficiat, secundum se aliquando vivens. Quod enim ab idea sola creatur actione, actione sit penitus stabili, stabilemque inde habet essentiam. Quod autem ab idea per animam quasi mediam nascitur, quoniam actione mutabili gignitur, mobilem secundum se inde naturam ducere cogitur. Secundum se inquam, quia vitam ab anima æthereo impressam vehiculo tanquam speculo sempiterno, existimant semper imprimentem animam comitari. Impressam verò vitam composito corpori & caduco, non semper. Nempe arbitrantur ab animæ substantia semper vivente æthereum corpus sibi pro-

ximum perpetuo animari, elementale verò corpus ab ea per illud aliquando vitam accipere. Sed de his aliàs.

*Decima quarta ratio. Quia est per se vita.*

### C A P V T XIII.

**A**nima est essentia, est & vita. Superioribus rationibus ostendimus eam esse immortalem, quia sit essentia per se existens, in præsentia verò eiusdem immortalitatem ostendimus, quia sit vita per se vivens. Porro anima ex ipsa sui essentia vita est, quia totum quod est in ea, est vita. Si quid enim esset in ea quod vita non esset, illud quidem non pars esset animæ, & totum ipsum animarum quiddam potius quam anima diceretur. Fateamur igitur totam animæ essentiam esse vitam. Si tota est vita, per se certè secundum formam vita dicenda est. Nam quod per aliud vivit, ipsum per se non vivens, ex duabus componitur partibus, ex natura, inquam, sui propria secundum se non vivit, atque ex vita illa aliunde accepta. Ita conclude. Si res illa quæ per aliud vivit, non tota vita est, sequitur ut res quæ tota est vita, per se vivat. Ergo anima quæ tota est vita, per se vivit, præsertim cum per se moveatur. Si ita est, per se est vita. Est igitur animæ essentia vita. Cuius rei signum est, quod cuicumque advenit, ei præstat vitam, quasi per se sit hoc ipsum quod tribuit alteri. Vnde ab eunte illa definit corpus vivere, ac dum adest corpori, nullum momentum cessat vitæ operâ exercere, corpus vivificando. Quare perennis animæ actus, vivificatio est. Perennis actio, propria est rei actio. Propria igitur est animæ actio vivificare. Vivificare autem, vitæ ipsius est proprium, sicut caloris est calefacere. Igitur essentia animæ vita est. Accipe rursus aliam coniecturam, quod parato corpore, anima statim illud vivificat. Aut ergo suo esse dat vitam, aut appetitu, aut cognitione siue concilio. Si anima cognitione & consilio corpus vivificaret, scirent omnes quid quolibet momento gignat & alat in visceribus anima, qualisque sit interni operis dispositio, & nisi cognoscerent, ista non fierent. Sed nunquid appetitu? Neque hoc quidem, alioqui quandiu veller animus esse in corpore, tamdiu esset, & qui odit corporis consuetudinem, à corpore festim discederet. Restat ut ipso esse, id est, naturali virtute vivificet corpus. Si ipso esse vivificat, per suam essentiam est vita, aut vivens, sicut quod ipso esse calefacit, per essentiam suam virtu-

cenve est calor aut calens. Conclude animæ essentiam esse quandam vitam. Quòd si non libeat eam vocare vitam per se viventem, quemadmodum soles dicere calorem per se calentem, saltem per superiora cogeris confiteri animam esse substantiam propria vita vitalem, quemadmodum dicis ignem substantiam proprio calore calentem. Vtrum horum acceperis, minimè curo. Vtrinque enim sequitur id quod quaerimus. Sed ego superioribus rationibus adducor ut animam per se vitam appellem, vitam, inquam, naturalem, formamque vitalem. Vitæ autem formæque vitali contraria mors quodammodo dicitur, seu aliqua mortifera qualitas formæ, sicuti caliditati frigiditas, humiditati contraria est siccitas. Ea verò est contrariorum natura formarum, ut neque aliqua earum aliam capiat, ut calor non suscipit frigus, neque substantia cui vna illarum formarum est propria, etiam suscipiat aliam formam, suæ formæ contrariam, ut ignis cui calor est proprius, frigus non accipit, ut simul sit & ignis & frigidus, sed abit potius aut perditur tam calor quàm ignis frigore veniente, quàm aut calor aut ignis fiat frigidus. Est ergo vterque (ut ita loquar) infrigescibilis, cum frigoris particeps euadere nequeat. Similiter anima, quoniam aut vita ipsa naturalis est, aut vitam habet tanquam naturalem sui pedisequam, mortem (ut dixi) ipsius contrariam non admittit. Si non admittit mortem, ita fermè immortalis est, sicut ignis, quia non suscipit frigus infrigescibilis. Si idem foret infrigescibile, quod imperdibile, ignis sicut non frigescit, ita neque etiam perderetur. Nunc autem perditur potius quàm frigescat. Verum cum idem sit immortale, quod imperdibile, anima quæ non admittendo mortem dicitur immortalis, est etiam imperdibilis. Ideo abit veniente morte, non perditur. Tota superior disputatio his verbis Zoroaster comprehenditur.

*Αθανάτος τε ψυχή, καὶ ζῶνς δὲ ὁ νόμος ἐστίν,*  
id est, immortalis manet, ac vitæ domina est. Quasi dicat: ideo immortalis manet, quia vitam habet pedisequam, sicuti Sol lucem, Crinita comam. Hic pugnabit sic Strato, vel Epicureus aliquis. Sanè mortem non suscipit anima, quia veniente mortifera qualitate abit anima, & desinit esse. Si esse desinit, suscipit certè nihil. At nos, ô Epicure, non ita desipimus, ut ignoremus non posse mortem ab aliquo suscipi, tum quia nihil est (quod verò non est, non capitur) tum quia neque viuentes eam capiunt, neque defuncti. Illi, quia dum

viuunt, à morte absunt, isti, quia si non sunt, ut ipse putas, nihil suscipiunt, & si supersunt (ut nostri volunt) etiam absunt à morte.

Desistamus ludere verbis, audi quid velimus, quâdo dicimus animam non suscipere mortem, intelligimus eam non admittere in seipsa vllam mortiferam qualitatem, per quam desinat viuere. Profectò contrariæ qualitates se inuicem non suscipiunt, nam se vicissim & fugant & fugiunt. Ideo calor natura sua non modò non suscipit frigus, sed neq; loco etiam illi propinquat. Longissimè namq; sese fugant & fugiunt, quæ per naturam longissimo discrepant intervallo. Postquam natura sua hæ formæ tales sunt, si in mera sui & sola natura consistent, essentque ita ut modo sunt contrariæ inuicem, nunquam sibi inuicem propinquarent. Natura enim illas dissociaret, neque adesset medius aliquis illarum conciliator. Tales profectò forent, si calor ita in seipso subsisteret à materia separatus, ut nihil præter calorem haberet admixtum. Atque frigus similiter. Nunc iacet calor in materia, quæ suapte natura non minus ad frigus parata quàm ad calorem, aduenienti frigori sinum pandit suum, quem ingressa frigiditas calorem inde detrudit, qui inde depulsus extinguitur, cum ab auctore suo ea lege fuerit ad esse productus, ut tamdiu maneret, quamdiu à tali sinu materiæ foueretur. Quapropter formæ quæ à materia sustentur, licet formas sibi contrarias non suscipiant, illarum tamen impetu & propinquatione perduntur. Quæ verò in seipsis permanent, & si quando materiæ hæere videntur, illam sustentent potius quam ab illa sustineantur, contrariam sibi vim non possunt admittere, verum si qua vis aduenit materiæ gremio, qualitates & formas inquinat astrictas materiæ, formam verò illam quæ materiam supereminet, non attingit. Talis est anima, anima, inquam, rationalis, quæ cum fons motionis sit, corporumque motrix, non potest à corporibus è suo statu mutari. Cumque speciei suæ ingenitam habet vitam, utpote propriam, viuit semper absque labore viuendi, præcipuè quamdiu secum ipsa viuit. Propinquans verò corpori, irrationalem (ut Platonicè loquar) ex se fundit vitam, velut umbram. Ipsa quidem vera est anima, animalisque vitæ fons, talemque vitam non modo ad tempus suppeditat corpori, sed multo magis sibi ipsi semper, cum nunquam deserat semetipsam, neque ad se deferendam compellatur à corpore, cuius qualitas in formam non transit incorporat.



lem. Rurſus neque ad idem cogatur ab animabus, quarum officium eſt viuificare, nō perdere. Talis proculdubio rationalis anima iudicatur. Irrationalis autem non vera eſt anima, quia neque eſſentia vera eſt, neque vera vita. Non vera eſſentia eſt, quia non exiſtit per ſe ſeipſam ſiquidem per ſe non operatur, quandoquidem nihil agit abſque corporis instrumentis. Non vera vita eſt, quoniam motionis libertate priuatur. Non enim ducitur à ſeipſa, ſed vi trahitur ab iis rebus quæ ſenſibus offeruntur. Ideo Platonici multi aiunt animam rationalem eſſe & animam & vitam ſubſiſtentem, atque ex ſe corpus viuificantem. Sed irrationalem formam potius animationem viuificationemque corporis eſſe putant, quàm etiam eſſe immortalem Xenocrates, Speuſippus, Numenius, Plotinus exiſtimant, Porphyrius autem & Proculus & alij quamplurimi negant. Neque mirari debemus ſi animas alias veras, alias falſas eſſe multi Platonici arbitrantur. Rerum ſiquidem varietas decentibus neſcitur interual- lis. Deus verum bonum eſt, Angelus imago quidem eſt bonitatis, ſed intellectus eſt verus. Rationalis anima, imago intellectus, anima vera. Irrationalis anima, imago animæ, natura vera. Qualitas quæ diuiditur in materia naturæ imago eſt, verum naturalium agentium instrumentum. Sed meminſce oportet, eos qui animas noſtras inferiores, eſſe ſempiternas exiſtimant, etiam Plantarum animas, ſecutos eſſe Ægyptios Pythagoreosque, exiſtimantes animas humanas eſſe mentes delapſas in rationem atque ſenſum, animas verò brutorum eſſe noſtras in ſenſum generationemque omnino prolapſas, Plantarum denique animas eſſe eaſdem lapſas omnino in generandi potentiam, poſſeque omnes iterum ad ſuperiora conuerti. Quod quidem Empedocles, Timæus Locrus, Origenes, Plotinus ſignificaffe videntur. Sed hæc ipſi viderint, nos autem propoſitum proſequamur.

*Decimaquinta ratio. Quia vita præſtanti-  
or corpore.*

#### C A P V T X V.

**R**ationalis anima vera naturalis vita eſt. Vera vita per ſe corporis eſt formatrix & rectrix, ideoque corpore eſt longè præſtantiſſima. Corpus quamuis in varias vertatur qualitates, aut etiam milles diuidatur in partes, nunquam tamen deſinit eſſe corpus, ſemper enim reſtat natura corporis diuiſibilis cum diuidantur partes in

particulas ſine fine. Ergo multo magis anima rationalis (quæ vera eſt corporis vita) quantumcumque mutetur, nunquam deſinit eſſe vita. Huius argumentationis vim in eo potiffimum conſultare arbitramur, quod tertia eſſentia, quæ eſt ſedes rationalium animarum, tres habet dotes, ex eo quod omnium medium obtinet. Primam, quod in ea reſulgent veræ imagines diuinorum. Secundam, quod ipſa format continetque totam machinam corporalem. Tertiam, quod diuina & corporalia conciliat inuicem. Omnes hæc dotes eſſe ostendunt animam ſempiternam. Prima, quia ſi in genere corporum aliqua ſempiterna ſunt, in quibus vmbra ſunt diuinorum, multo magis animæ rationales animarum omnium præſtantiſſimæ ſunt, in quibus ſunt diuinorum imagines ſempiternæ. Prior enim in diuinis vita eſt quàm ſplendor, quoniam ſplendor eorum eſt tum reflexio, tum effuſio vitæ. Quapropter inde prius manat in animam vitæ immortalis vbertas, quàm diuinarum ſplendor imaginum. Secunda, quia ſi rationalis anima principium eſt formandi & continendi, neque formam ſuam neque conſtantiam naturalem poteſt amittere. Nempè cum totum animale genus ſit toto genere corporali præſtantiſſimum, & in omnibus mundi membris ſint aliqua corporalia ſempiterna, probabile eſt vt in omnibus hiis ſint animæ ſempiternæ. Quis enim negauerit animarum genus caput habere perpetuum, in quo rationales animæ ſunt, poſtquam corporalis mundus membra quædam habet vbique perpetua? Tertia, quia ſi anima conciliationis vniuerſalis & vinculi fons eſt, diſtrahi & diſſolui non poteſt. Si enim vniuerſorum vinculum reſoluatur, quid vltèrius vincietur? Platonica hæc myſteria ita deinceps Aurelij Auguſtini ſententia confirmabimus. Si anima rationalis interiret corpore pereunte, neceſſario mutaretur corpore permutato. Non mutatur autem à corpore. Ipſa enim motionis principium eſt. Ideo cum à corpore mutari videtur, tunc ipſa & corpus mutat, & ſeipſam ducit vt iubet. Si anima mouet ſapiffimè corpus, immobilis perſeuerans, longè magis ex eo quod ſiſtit continetque corpus, ſeipſam ſiſtit & continet. Quod enim ſtat plurimum in mouendo alio, ſtare poteſt ſemper in ſiſtendo ſe & continendo. Quis autem neſciat quando corpus vel proprium vel alienum mouetur ab animo, tam motionem ipſam quàm rem motam non habere ſua omnia ſimul, ſed labi prorſus à futuro in præſens atque præteritum, in animo autem tunc eſſe ſimul propoſi-

rum operis totius immobile, intentionem presentis operis, memoriam præteriti, expectationemque futuri? Illic intentio animi circa ea quæ non sunt, est ipsa, dum tam ea quæ nondum sunt, quæ ea quæ non sunt amplius, ipsa connectit in vnum. Circa temporalia est supra tempus, circa mobilia est immobilis. Cur ergo substantia eius circa mortalia non sit immortalis? Imò cur in perpetuis attingendis non fiat ipsa perpetua quandoquidem in tractandis mobilibus manet immobilis? Præterea, si non tam id quod in mole est corporis, quam id quod est in specie, facit esse corpus (corpus enim tanto magis est, quanto speciosius est atque pulchrius, tantoque minus est, quanto sordidius atque deformius, quæ defectio non præcisione molis, sed specie priuatione contingit) putandum est animum illum, à quo tanquam principio datur corpori forma, per quam est corpus, & connexio partium per quam consistit, nunquam vel forma propria vel vnione priuari per quam est & permanet animus, quandoquidem corpus nunquam omni forma, & vnione per quam est permanetque corpus, orbatur, neque tamen transire de specie in speciem animam sicut corpus. Mutatio enim ab anima descendit in corpus, & stabilior est illa quam istud. Ergo si hoc semper in genere corporali permanet, illa permanet semper in specie animali, neque in ipsa specie animali de alia in aliam animam commutabitur, non enim subest materia per quam fiat huiusmodi commutatio. Si non accidit mutatio talis, neque animus esse nisi viuat, potest, nunquam profecto animus moritur. Quod si quisquam non eum interitum dicat fornicandum animo, quo efficitur ut nihil sit, quod aliquid est, sed cum quo dicimus ea mortua, quæ vita carent, attendat quod nulla res seipsa caret. Est autem animus vita quædam. Vnde quod animatum est, viuere, omne autem inanime, quod animari potest, mortuum, id est, vita priuatum intelligitur. Non ergo potest animus mori. Nam si carere poterit vita, non animus verus, sed animatum, aut aliquod animi simulachrum est. Quod si absurdum est, multo minus hoc genus interitus timendum est animo, quod vitæ certè non est timendum. Nam prorsus si tunc moritur animus, cum eum deserit vita, illa ipsa vita quæ hunc deserit, multo melius verus intelligitur animus, ut iam non sit animus quicquid à vita deseritur, sed ea ipsa vita quæ deserit. Quicquid enim à vita desertum, mortuum dicitur, id ab anima desertum intelligitur. Hæc autem vita quæ deserit ea quæ mo-

riuntur, quia ipse est animus, & seipsam non deserit, non moritur animus, nisi forte veram vitam, temperationem aliquam corporis, aut aliquid eam sequens, ut Aristoxenus & Dicæarchus opinabantur, debemus credere. Quibus profecto nunquam hoc visum esset, si ea quæ verè sunt, & incommutabilia permanent, eodem animo à corporum consuetudine alienato atque purgato videre valuissent. Quis enim bene se inspiciens, non expertus est tanto se aliquid intellexisse sincerius, quanto longius remouere atque subducere intentionem mentis à corporis sensibus ponit? Quod si ad temperationem corporis animus pertineret, non utique id posset accidere. Non enim ea res quæ naturam propriam non haberet, neque per se subsisteret, sed in subiecto corpore tanquam corporalis forma inseparabiliter esset, vilo modo se ab eodem corpore ad intelligibilia percipienda conaretur auertere, & quantum id posset, tantum illa posset intueri, eaque visione melior & præstantior fieri. Nullo quippè modo forma talis, vel ipsa etiam corporis temperatio, quæ certa commixtione efficitur earum quatuor naturarum quibus idem corpus consistit, auertere se ab eo potest, in quo subiecto est inseparabiliter. Quinetiam cum humorum consonantia accidens quoddam compositum sit, si anima vel consonantia esset, vel ab ipsa dependens, nullo modo substantiarum rerumque simplicium rationes cognosceret, affectaret, & caperet. Ad hæc, ea quæ intelligit animus, cum se auerterit à corpore, non sunt profecto corporea, & tamen sunt maximè quæ sunt. Nam eodem modo sese semper habent, nihilque absurdius dici potest, quam ea esse quæ oculis videmus, ea non esse, quæ intelligentia cernimus, cum dubitare dementis sit, intelligentiam incomparabiliter oculis anteferri. Hæc autem quæ intelliguntur, eodem modo sese habentia, cum ea intuetur animus absque aliquo instrumento, satis ostendit se illis esse coniunctum miro quodam eoque incomparabili modo, scilicet non secundum locum. Nam aut in illo sunt, aut ipse in illis aut vtrumque per se subsistit. Si primum illud est, non est harmonia corporis animus, aut harmoniæ mancipatus. Quicquid enim tale est, à corpore tanquam subiecto separari non potest, propterea quæ quicquid in illo est, corpori æquè atque illud astringitur.

Mutabile autem est corpus humanum, mutabiles igitur erunt rationes illæ rerum quæ sunt in animo contemplante, si ani-

mus mutabili corpori alligatur. Mutabiles autem esse rationes illæ non possunt. Semper enim eodem modo verum est, quod duo & quattuor sex faciunt, quodque quæ comparatio est duorum ad quattuor, eadem quattuor est ad octo, cæteraque generis huius quamplurima. Rationes huiusmodi inseparabiliter insunt animo, qui semper & subito his utitur pro arbitrio. In quibus ars consistit ratiocinandi, quæ ab animo rationali minimè separatur. Nam si ab eo ratio illa artificiosa, vel ars rationalis, quæ rationum cœtus est, separabitur, aut nusquam erit, aut in re aliqua non viuent, aut in re viuent. Nusquam esse non est dicendum perpetuas & immutabiles rationes. Esse quoque in re non viuent rationes veras impossibile est, siquidem vita rationis est fundamentum. Si autem artificiosa ratio de vita transit in vitam, nunquam id facit commodius, quàm cum docet quis alios. Cum verò id non contingat (nemò enim docendo alios obliuiscitur) non fit transitus. Ars igitur inseparabiliter inest animo. Inest et quoque corpori, si animus esset corporis harmonia, quapropter mutabilis esset, sicut corpus, tam ratio ipsa quàm animus. Cum verò ratio talis sit immutabilis, ideoque & animi essentia immutabilis, cui illa tanquam subiecto inest, non est animus corporis temperatio. Atque ita disputasse sufficit ex primo illo diuisionis superioris membro, quo concessum sit animo rationes inesse. Præterea si quis secundum illud membrum admiserit, scilicet illis inesse animum, sequitur idem. Quo enim pacto animus est corporis temperatio, si in ratione rerum à corpore separata est tanquam subiecto? cum non possit esse alibi quàm in corpore corporis temperatio? Si tertium diuisionis illius membrum concesseris, scilicet vtrumque substantiam per se subsistentem esse, tam animum, quàm ipsam rationem rerum, per se subsister animus, neque temperationi corporis adstringetur.

Denique, quodcumque membrum diuisionis acceperis, vna hæc summo opere ratio persuadet animum in complexione corporis tanquam origine non iacere, quia non tam auidè, tam facilè, tam assiduè, dum philosophamur mutabili posthabito corpore, immutabilibus rationibus sese misceret, neque melius esset cum est in illis, quàm cum est in corpore. Est autem in illis tanto melius quàm in corpore, quanto præstantius viuit in illis, quàm in seipso. Tanto autem viuit præstantius, quanto perfectius operatur. Operatur verò in il-

lis perfectius, quia intelligit verius, desiderat pacatius, fruitur dulcius, plenius, atque securius. Et cum sæpè consonante secum corpore, animus ipse dissonet secum speculatione, tum moribus, atque contra consonet dissonante, cui non videri tantum non consistere in corporis consonantia, is dissonat veritati. Sed ut reuertamur ad Aurelium, hic fortè oboritur nonnulla quæstio. Vtrum sicut non interit animus, ita nec in deteriore commutetur essentiam. Videri enim cuiuspiam potest, neque iniuria, id effectum esse ratione hac, ut animus ad nihilum peruenire non possit, conuerti autem in corpus forsitan possit.

Si enim quod erat ante animus, corpus fuerit effectum, non utique omnino non erit. Sed hoc fieri non potest, nisi aut ipse id velit, aut ab alio cogatur. Neque continuo tamen animus, siue ipse appetierit, siue coactus fuerit, poterit corpus esse. Illud enim sequitur, ut, si sit, necessario velit, aut cogatur. At illud non sequitur, ut si velit aut cogatur sit. Nunquam autè volet. Nā omnis eius appetitus ad corpus aut ut id possideat est, aut ut viuificet, aut ut quodammodo fabricet, aut quolibet pacto ei consulat. Nihil autem horum fieri potest, si non sit corpore ipse melior. At si erit corpus, melior corpore profecto non erit. Non igitur esse corpus volet, neque ullum huius rei certius argumentum est quàm cum seipsum hoc interrogat animus. Ita enim facilè comperit appetitum se non habere nisi agendi aliquid, aut sciendi, aut sentiendi, aut vel tantummodo viuendi, quantum sua illi potestas est. Si autem cogitur corpus esse, à quo tandem cogitur? Num à quolibet? certè à potentiore. Non igitur à corpore potest. Nullo enim modo vllò animo vllum potentius corpus. Potentior autem animus non cogit in aliquid nisi quod suæ potestati subditum est. Nec vllò modo animus potestati alterius animi, nisi suis cupiditatibus subditur. Cogit ergo ille animus non magis quam quantum eius cupiditates sinunt, quem cogit. Dictum autem cupiditatem non posse animum habere ut corpus sit. Illud etiam manifestum est, ad nullam suæ cupiditatis expletionem peruenire, dum amittit omnem cupiditatem & amittit, dum corpus sit. Non ergo potest ab eo cogi ut fiat, qui potestatem cogendi nisi per subditas cupiditates non habent. Deinde quisquis animus alterum animum habet in potestate, magis cum necesse est velit in potestate habere quam corpus, & ei vel bonitate consulere,


vel malitia imperare. Non ergo volet ut corpus sit.

Postremo iste animus cogens, aut animal est aut caret corpore. Sed si caret corpore, in hoc mundo non est, sed si ita est, summè bonus est, nec potest velle aliter tam turpem commutationem. Si autem animal est, aut animal etiam est ille quem cogit, aut non est: sed si non est nihil cogi ab alio potest. Non enim habet potentiorē qui in summo est, id est, non cogitur qui est solutus. Si autem in corpore est, ab eo rursus qui in corpore est, per corpus cogitur, ad quodcunque cogitur. Quis autem dubitet nullo modo per corpus fieri tantam commutationem animo? Fieret enim si esset illo corpus potentius. Quamuis quicquid illud est ad quod per corpus cogitur, prorsus non per corpus, sed per cupiditates suas cogitur, de quibus satis est dictum. Quod autem rationali anima melius est, omnibus consentientibus diuinum est, quod profectò consulit animæ, & ideo non ab eo cogi anima potest, ut conuertatur in corpus. Si igitur nec propria voluntate, nec alio cogente id anima patitur, unde id pati potest? An quia inuitos nos plerunque opprimit somnus, metuendum est ne quo tali defectu à nimis conuertatur in corpus? Quasi verò quoniam somno membrā nostra marcescunt, idcirco animus fiat ex parte vlla debilior. Sensibilia tamen non sentit, quia quicquid illud est quod somnum facit, è corpore est, atque in corpore operatur. Corporeos enim sensus sopit & claudit quodammodo, ita tamen, ut tali commutationi corporis cedat anima cum voluntate, quia secundum naturam est talis commutatio, quæ reficit corpus à laboribus, non tamen hæc adimit animo vel sentiendi vim, vel intelligendi Nam & imagines sensibilibus præsto habet tanta expressione similitudinis, ut eo ipso tempore discerni nequeant ab iis rebus quarum imagines sunt. Et siquid intelligit, æquè dormienti ac vigilanti verum est. Nam verbi gratia si per somnum disputare sibi visus fuerit, verasque rationes secutus ita disputando didicerit aliquid, etiam expergefacto eadem incommutabilia manent, quamuis falsa reperiantur cætera, veluti locus ubi disputatio, & persona cum qua disputatio fuisse visa erat, & verba ipsa quæ ad somnum attinent quibus disputari videbatur, & alia huiusmodi quæ ipsis sensibus sentiuntur agunturque à vigilantibus, prætereunt tamen, nec vlla ex parte sempiternam præsentiam verarum rationum assequuntur. Ex quo colligitur, tali

commutatione corporis, quæ somnis est, non vim ipsius animæ, sed vitam corporis posse minui. Postremo si quamuis locum occupati corpori, anima tamen non localiter iungitur summis illis æternisque rationibus quæ incommutabiliter manent, nec utique continentur loco, prior afficitur anima quam corpus, nec prior tantum, sed etiam magis. Tanto enim prior, quanto propinquior, & eadem causa tanto etiam magis, quanto corpore est melior, nec ista propinquitas loco, sed naturæ ordine dicta sit. Hoc autem ordine intelligitur à summa essentia speciem corpori per animam tribui, quæ est quantumcunque est. Per animam ergo corpus subsistit, & eo ipso est, quo animatur, siue vniuersaliter ut mundus, siue particulariter ut vnumquodque animal intra mundum. Quapropter consequens erat ut anima per animam corpus fieret, nec omnino aliter posset. Quod quia non fit (manente quippè anima in eo quod anima est, corpus per illam subsistit, danrem speciem, non adimentem) commutati in corpus anima non potest. Si enim non tradit speciem quam sumit à summo bono, non per illam fit corpus, & si non per illam fit, aut non fit omnino, aut tam propinquè speciem sumit, quam anima. Nec etiam fit corpus, quia si tam propinquèsumeret speciem, idem esset quod anima. Nonne eo ipso est anima melior, quo sumit propinquius? Tam propinquè autem corpussumeret, si non per animamsumeret, etenim nullo interposito tam propinquè utiquesumeret. Nec inuenitur aliquid congruens medium inter summam vitam, quæ sapientia & veritas est incommutabilis, & id quod vltimum viuificatur, id est, corpus, nisi viuificans anima. Quod si tradit speciem anima corpori, ut fit corpus quantum est, non utique speciem tradendo, adimit autem speciem in corpus animam transmutando, non igitur anima siue per seipsam corpus fit, quod per eam fit (quia non nisi manente anima corpus per eam fit) siue per alia, quia non nisi traditione speciei fit corpus per animam & ademptione speciei anima in corpus conuerteretur, si conuerteretur. Hoc & de irrationali anima vel vita, quod nec in eam rationalis anima conuertitur, dici potest. Et ipsa enim nisi inferiori ordine, rationali subiiceretur, æquè speciemsumeret, & talis esset. Tradunt ergo speciem à summa pulchritudine acceptam potentiora infirmioribus naturali ordine. Et utique cum tradunt, non adimunt, eoque sunt quæ infirmiora sunt, quantum sunt, quod species quæ sunt, eis à potentioribus

traditur, quæ quidem potentiora etiam meliora sunt. Quod his naturis datum est, quæ non mole maiore plus possunt minoribus molibus, sed sine tumore vlllo localis magnitudinis eadem specie potentiora sunt, quæ meliora, in quo genere est anima corpore melior & potentior. Quapropter cum

per illam, vt dictum est, corpus subsistat, ipsa in corpus conuertere nullo modo potest. Corpus enim nullum fit nisi accipiendoper animam speciem. At anima vt corpus fieret, non accipiendo speciem sed amittendo fieri posset. Et ideo fieri nullo modo potest.



# THEOLOGIÆ PLATONICÆ,

DE IMMORTALITATE ANIMORVM,

EODEM FICINO AVTHORE,

(:)

LIBER VI.

(:)

REDVCTIO OPINIONVM

*de Anima, in quinque Capita.*

(:)

CAPVT PRIMVM.

(:)



**H**Æc olim in agro Regnano apud Ioannem Caualcantem vnicum amicum nostrum Calendis Martiis sub Lauro disputaueram. Quibus differendis interfuerunt præcipui familiares nostri tres. Christophorus Landinus, Bernardus Nuthius, Georgius Antonius Vespucius, viri probitate & doctrina clarissimi. His autem Ioannes summa cum attentione auditis, Marfilij Ficini, inquit, dici non posset quantū superiori disputatione fuerim delectatus. Sed hoc insuper cupio, vt postquam de communi animarum rationalium immortalitate dissenuisti, deinceps, si placet, diligentius de animæ nostræ immortalitate propriis rationibus differas. Assentior equidem quinque esse rerum gradus, quemadmodum superiori disputatione disposuisti, atque horum medium obtinere tertiam illam essentiam, quæ è materia, soluta sit, ac perpetua.

Præterea, coelestes animas in illius essentiae gradu collocari non dubito. Opinor etiam probabile esse, vt ibidem noster animus collocetur. Arbitror tamen non prius id posse penitus affirmari, quam omnes opiniones Philosophorum de hominis anima ad quinque capita reducantur, & quatuor confutatis, vltima teneatur. Aut enim anima corpusculum aliquod est tenuissimum corpori huic crassiori suffusum, siue igneum id sit, vt Democritus, Leucippus, & Hipparchus existimant, siue aëreum; vt Anaximenes, Diogenes Apolloniates, & Critias, siue aqueum, vt Hippias, siue terreum, vt Hesiodus & Pronopides, siue ex igne constet & aëre, vt Boëthus & Epicurus, siue ex aqua & terra, vt Xenophantes. Aut melius aliquid est anima, id est, non moles ipsa corpusculi propriè, sed qualitas illius aliqua per partes corpusculi sparsa, puta calor, vel cōplexio calida, quod voluisse videntur Zeno Citicius, Cleader, Antipater, Possidonius.



Aut purius aliquid, veluti punctum aliquod lucidum qualitatis illius in quadam ipsius qualitatis & corpusculi parte potiori, puta corde vel cerebro, assignatum, ibi residens, inde reliqua membra gubernans, ut est apud Chrysippum, Archelaum, & Heraclidem Ponticum. Aut liberius adhuc quiddam, ceu punctum aliquod nulli parti affixum, sed ab omni determinato situ seclusum, ac totum parti corporis cuique præsens, sed tale, ut sit ab ipsa corporis natura dependens. Dependens, inquam, duobus modis scilicet, vel quia licet complexio ipsum non genuerit, tamen genitor suus, quicumque sit ille, ipsum ex materiæ potentia eiusque visceribus eduxerit, id est, ex aliquo semine siue inchoatione seu proportionem materiæ ipsius in lucem eruerit, atque ipsi materiæ tanquam naturali gremio prorsus addixerit.

Quam sententiam Xenophanes Colophonius, Asclepiades, Aristoxenus, Critolausque sequuntur, apud quos anima est, vel vis quædam corporis agilis ad mouendum, vel partium corporalium harmonia.

Aut postremò diuinum quiddam est hominis anima, id est, aliquid indiuiduum, totum cuique parti corporis adstans, & ab incorporeo authore ita productum, ut ex agentis virtute solummodo, non ex materiæ inchoatione, aut capacitate, aut fomento dependeat, sicut nos docent prisca Theologi, Zoroaster, Mercurius, Orpheus, Aglaophemus, Pythagoras, Plato, quorum vestigia sequitur plurimum Physicus Aristoteles. Præter has quinque opiniones aliæ nullæ inueniuntur. Tu verò tunc demum immortalitatem ad nos pertinere monstraueris, quando reprobatis quatuor superioribus opinionibus, approbaueris vltimam. Sic enim constabit animam in tertie essentiae ordine collocari. Id verò non mihi solum videtur, sed etiam cum superioribus diebus apud Bernardum Bembum tuum, clarissimum equitem, atq; hoc tempore Veneti Senatus Oratorem, conuiuio discumbereimus, meministi (ut arbitror) idem Antonio Chronico Veneto, ac Demetrio Attico disputatoribus argutissimis visum fuisse, mox etiam à Richardo Anglerio Anglariensi, & ab Oliuerio Arduino Florentino insignibus Peripateticis similiter esse conclusum, ubi affuerunt tres amici, Naldus Naldius, Bartholomæus Fontius, Ioannes Baptista Boninsegnius, viri doctissimi. Eandem esse sententiam nostri Petri Leonis Spoletini, qui Platonica Peripate-

ticis præclarissimè iunxit. Hæc ille. His ergo ita respondi.

*Plebei Philosophi non ratione aliqua persuasi, sed praua decepti consuetudine corporalem animam posuerunt.*

## C A P V T II.

**P** Rincipio Plebeos Philosophos qui corporalem esse animam arbitantes opinionem ex illis quatuor aliquam sequuti sunt, non ratione aliqua persuasos, sed longa quadam & infelicissima consuetudine in hanc sententiam compulsos, existimo. Tria potissimum animæ nostræ officia esse videntur: Siquidem agit in corpore, agit per corpus, operantur etiam per seipsam. In corpore agit per eam potentiam, quam vegetatricem vocant Peripatetici; Platonici verò nostri naturam, quando generat corpus, nutritque & auget. Per corpus agit secundum sensum tum exteriorum, quando videt, audit, olfacit, gustat, & tangit, tum interiorum, quando eorum corporum quæ sensit extrinsecus, imagines quasi reliquias sensuum secum ipsa reuoluit. Per seipsam agit, quando neque corpora per sensus exteriores attingit, neque imagines corporum per interiorum sensum recolligit, sed ipsa mera vis animæ incorporea que incorporeum aliquid inuestigat & inuenit, quod neque corpus sit, neque corporis alicuius imago, quamquidem actionem, intelligētiam nominamus. Habes igitur actionem naturalem, sensum, intelligentiam. Actione naturali utitur anima in ipso fœtu statim corpus ingressa, sensu paulò post, homine videlicet statim nato, intelligentia pura vix tandem adulto iam corpore. Magna verò pars hominum ferè nunquam, illi præsertim qui etiam trigésimo ætatis anno sunt pueri. Si potentiam illam naturalem, quid anima sit interoges, corpus esse proculdubio respondebit. Ea si quidē vis nihil attingit aliud nisi corpus. Si sensum exteriorē rogaueris, corpus similiter respondebit. Oculi figuram quandam & colorem animæ ascribēt; aures vocem, olfactus odorem, saporem gustus, pōdus soliditatemq; & calorē, & similia tactus. Quod si sensum interiorē, qui reliquiis externorum sensuum pascitur, de anima fueris percontatus, ipse quoque animam corporum pinget simulachris, nihil enim habet aliud quod adhibeat. Infelix adolescentia nostra sub indoctis præceptoribus his nutrita, cogit nos per omnem ætatem stultè sentire de anima, dum eam opinamur esse corpoream, ab his doctis magistris qui sola sentiunt corporalia.

Maximè verò hic error inde videtur ex-  
 onus, imò verò potius confirmatus, quod si  
 quando tribus his præceptoribus tanquam  
 Sophistis omnino dimissis ad mentem il-  
 lam sapientiæ magistratam confugimus, &  
 ab ea quid sit anima, sciscitamus, illa talem  
 esse respondet, qualem & ipsa videt. Illa ve-  
 rò heu qualem videt, quàm fœdam, quàm  
 miserabilem? Profectò non talem qualis  
 olim coelo descenderat. Sed potentiam  
 illam animæ naturalem corporis, fabrica-  
 tricem cernit quatuor humorum (in quibus  
 ipsa mergitur) tabe pollutam, & membro-  
 rum pinguedine suffocatam. Sensus quo-  
 que externos inspicit vndique declinantes  
 ad corpora, agentes per corpus, à corpori-  
 bus quodammodo patientes. Sēsū etiam  
 interiorem, quem nominant phantasiā,  
 variis diuersorum corporum figuris & qua-  
 litatibus quasi per sensum hauris cernit om-  
 pertum. Dum igitur animam corporali ve-  
 ste aspicit inuolutam, & appetitum procli-  
 uem esse ad corpora animaduertit, certè  
 respondet eam esse corpoream, non aliter  
 ac si puer aliquis statim natus luto oblitus  
 ita fuisset, vt vndique per omnem pueri-  
 tiam lutea testa esset obductus, ac postea  
 rogaretur, quale tuum est ō puer corpus-  
 culum? Nonne esse luteum responderet?  
 Ab luteo puer, corpus, absterge carnes à gle-  
 bis, carneum te videbis, non luteum. Di-  
 mittite sensus, ō miseri, impios nimium  
 præceptores. Piam duntaxat mentem in-  
 terrogate, eo tamen pacto, vt animam il-  
 li puram, qualem accepistis, non corpori  
 mancipatam, non vitiorum maculis sordi-  
 dam ostendatis. Mens protinus responde-  
 bit, non incorporealem esse animam solum-  
 modo, sed diuinā. Magnum quiddam  
 es, ō anima, si te parua non implent. Opti-  
 mum quoque, si displicent tibi mala. Pul-  
 cherrimum, si horres turpia. Sempiter-  
 num, si temporalia paruipendis. Postquam  
 talis es, si inueni te cupis, quære obsecro,  
 ibi teipsam, vbi sunt talia. Magna verò ibi  
 sunt solum, vbi nullum locus imponit limi-  
 te finem. Optima, vbi nihil contingit ad-  
 uersi. Pulcherrima, vbi nihil est dissonum.  
 Sempiterna, vbi defectus est nullus. Quære  
 igitur extra mundū. Verum vt quæras te,  
 & inuenias, extra vola, imò extra respice.  
 Es enim extra, dum mundum ipsa com-  
 plecteris. Sed esse te putas in infimo loco  
 mundi, quia teipsam quidem non cernis  
 super æthera peruolantem, sed vmbra-  
 m tuam corpus vides in infimo, perinde ac  
 si puer aliquis super puteum constitutus,  
 esse se in fundo putei arbitretur, dum in  
 seipsum aciem non conuerit, sed suam

in fundo prospicit vmbra. Aut si quis in  
 aëre volans credat se in terra volare, dum  
 vmbra suam videt in terra. Ergo relictis  
 vmbrae huius angustis, reuertere in teip-  
 sam. Sic enim reuertaris in amplum. Im-  
 mensam esse scito in spiritu amplitudinem,  
 in corpore verò infinitam (vt ita loquar)  
 angustiam. Quod ex hoc licet perspicere,  
 quod numeri (qui spiritali naturæ pro-  
 pinquant, cum & situ careant, & metian-  
 tur, numerentque secundum formam, tam  
 incorporea quàm corporea, nihil aliud  
 sint, quàm quædam vnitatis ipsius replica-  
 tiones, vnitatis autem sit incorporea, quia  
 omne corporale sit multiplex. Numeri, in-  
 quam, qui spiritalis sunt, sine fine crescunt,  
 non tamen sine fine decrescunt, magni-  
 tudo contra terminum quidem habet aug-  
 menti, quamuis non habeat terminum  
 decrementi. Cur tanti facitis sensuum iu-  
 dicium, infelices, qui falsis imaginibus  
 ita decipiuntur, vt visus solem, qui terra  
 longè est amplior, vix bicubitum iudicet,  
 coelum quod rapidissimè currit, quiescere,  
 rectum in aqua remum fractum videat &  
 obliquum, currere littus, dum nauis ipsa  
 mouetur. Auditus vocem aliunde quam  
 mittatur, sæpè venire significet, gustus  
 sæpenumero quæ dulcia sunt, amara &  
 infinita generis eiusdem? Sensuum erra-  
 ta quis corrigit? Ratio. Nobilius autem  
 est quod emendat, & perficit, quàm quod  
 perficitur. Idcirco diligentior & vera-  
 cior ratio est quàm sensus. Ratio iudi-  
 cat inueniri posse aliquid incorporeum,  
 semperque circa huiusmodi quiddam ipse  
 versatur.

Est ergo verum per iudicium rationis,  
 esse alicubi aliquid incorporeum, sicut ve-  
 rum est per iudicium sensuum, esse mul-  
 ta in mundo corporea, horum tamen iu-  
 dicium in eo fallitur, quod nihil affirmat  
 aliud nisi corpus. Sic etiam falleretur iu-  
 dicium rationis, si fortè asseneraret non  
 esse in rebus aliquid corporale. Nunc  
 verò tantum abest à falso, vt etiam fal-  
 laciam sensus emendet. Sentiendi au-  
 tem vires vsque adeò fallaces sunt, vt  
 non modo emendentur à ratione, ve-  
 rum etiam à se inuicem ipsæ damnentur.  
 Si visui te soli committas, nihil in mun-  
 do esse aliud dices, quàm quæ videntur  
 in lumine: voces autem, & odores, &  
 reliqua quæ non videntur, omnino non  
 esse. Si auribus solis confidas, colores  
 esse negabis. Si olfactui, solos esse in  
 mundo putabis odores. Atque ita de aliis  
 purandum. Sicut autem quisque sen-  
 sum negat esse alicubi aliud quicquam

præter id quod est suum, & tamen per alium sensum damnamus alium, & esse aliquid aliud inuenimus præter id quod vnius sensus est proprium, & rectè inuenimus, ita cuncti sensus vnà conspirantes negant esse posse aliquid in natura, quod non sit corpus.

Nihilominus ratio cunctos redarguens, esse etiam aliquid incorporeale vaticinatur, & verè vaticinatur, & multo verius quàm sensus, qui & à se inuicem damnantur, & redarguuntur ab illa. Quid enim stultius est, quam concedere nos bestiis ratione præstare, atque ea quæ sensu percipimus, existere aliquid confiteri, quæ etiam nonnullæ bestię acutius sentiunt, id autem quod rationis oculo intuemur, nihil esse contendere? Nullum enim animal esset insipientius homine, si ea vis animi quæ hominis propria est magis quàm sensus, qui communis est bestiis, falleretur. Nefas est autem, animalium regem dicere omnium dementissimum. Dementissimus autem is erit solus, qui non fatebitur tanto præstantius esse mentis obiectum sensus obiecto, quanto mens est sensu præstantior, ac propterea incorporeas naturas in excellentiore substantiæ genere vera inueniri, quàm corporea, præsertim quia si obiecta mentis eam mouent, sicut obiecta sensus mouent sensum, oportet ea ipsa mentis obiecta aliquam per se habere substantiam, vt mentem mouere queant. Sin autem dicatur intellectum à suis obiectis minimè agitari, iam satis probatum erit, saltem intellectum ipsum esse naturam incorporealem, postquam dum fabricat sua, non mouetur ab alio, & ædificia fabricat incorporea. Meminisse verò oportet, quemadmodum puer qui natus est cæcus, difficile credit colorum varietatem, lucemque esse, cum tamen cæteris hominibus nihil sit luce clarius, sic animum nuper tenebris corporis circumfusus, vix adduci vt existimet lucem aliquam incorporealem existere, cum tamen nihil sit illa in rerum ordine Angelis manifestius. Hoc Plato in septimo de Republica longè conqueritur, hoc Aristoteles in secundo diuinorum confirmat, dicens humanum intellectum ad ea quæ sunt per se in ordine rerum manifestissima, non aliter se habere quàm ad Solis lucem notum oculum. Resipiscant igitur quandoque minuti Philosophi, qui sensuum indicio freti, incorporealem diuinamque esse animam cogitare non possunt. Animaduertant aliquando ex diurnis cum corpore consuetudine, se factos esse vs-

que ad eò corporales, vt merito nihil mouerint nisi corpus, aut rem corpore naturam. Purifient, & pura percipient. Experiantur aliquando in seipsis, possunt enim, modo velint, quod iam diu in vniuerso desiderant, percipiunt certè composita, percipiunt & formas plurimas in compositis. Formas insuper desiderant aliquas extra composita segregatas, ipsi ex anima & corpore compositi sunt. Habent vitam ab anima corpori traditam, habent & vitam animæ ipsius in seipsa vigentē. Illam ergo despiciant, hanc aspiciant. Vitam intellectualem agat à corpore separatam, separari statim separatas formas attingent, Socraticamque mox sententiam re ipsa probabunt super formas quæ in subiectis formati iacent, quoniam imperfectæ sunt, esse formas in seipsis, atque perfectas, vnde informia subiecta formentur, atque vnicam ad incorporea non attingenda solum, sed etiam possidenda, viam esse, seipsum videlicet incorporeum reddere, hoc est, mentem à motu, sensu, affectu, imaginatione corporali pro viribus seuocare. Sic enim experientia ipsa constabit, primò quidem qualis sit purus animus, id est, ratio secum ipsa viuens, seque circa ipsum veritatis lumen auersans. Secundò, qualis Angelus id est, intellectus purus, infuso iam veritatis lumine gaudens. Tertiò, quando animus ipse tanquam Angelus pleno veritatis gaudet lumine, Deum esse persentiet tum veritatem ipsam seipsa lucentem, atque gaudentem, tum ipsam lucem veritate gaudentem propria, tum ipsum gaudium veritate propria lucens. Esse verò plebeiorum errorem à corporea consuetudine natum, nosse incipiemus aliquantum, si saltem contrariam illius educationem aliquam cogitemus, qualem in sexto naturalium excogitat Auicenna. Creetur à Deo homo aliquis subito (inquit Auicenna) in ætate perfecta constitutus, sed ita dispositus, vt nihil per aliquem quinque sensuum apprehendat. Sic affecti hominis mens aliquid cogitabit, cum sit in ætate adulta, in qua corporis fabrica intelligentiam non perturbat, neque sit ad opera sensuum occupatus, quæ mentis operationem impediunt. Ac etiam adsit aliquid quod possit intelligi: Adest enim ipsa animæ substantia menti.

Mens igitur à nullo turbata præsentem sibi animæ substantiam cogitabit. At qualem cogitabit? Num coloratam, longam, aut amplam? Minimè, cæcus enim similia non apprehendit. Num sonantem;

vel bene olentem, atque similia? Neque ista quidem. Nondum enim talia quædam per sensus accepit, ut possit talem naturam animæ assignare. Igitur nihil poterit corporale anima illa sibi tribuere. Quid tandem de seipsa asseruabit? Profectò id saltem, quod sibi primo offeretur intuitu. Est autem hoc ipsius essentia, quæ propter affirmabit esse seipsam, neque tamen corporale quicquam in seipsa perspiciet. Itaque affirmabit esse se prorsus incorporalem. Neque fingere quidem poterit esse se corpus, sicut plebis animæ nunc aliter creatæ atque educatæ nequeunt seipsas incorporeales considerare. Quod si quis dixerit animam illam nihil de seipsa affirmare horum corporum quæ per quinque sensus accipimus, sed aliud quoddam corpus diuersæ naturæ, vanum hoc nimium. Nam, si ne nunc quidem, cum tot varia corpora perceperimus, possumus noui aliquid machinari, quod non vel in his insit, vel ex his saltem aut componatur aut eliciatur, quomodo in eo statu horum corporum ignarus posset animus noui corporis naturam effingere? Ac etiam si possibile esset eam aliquod sui corporis membrum excogitare, illud nullo modo putaret ad propriam substantiam pertinere. Affirmabit igitur animus ille de seipso esse, tamen corporeum aliquid non affirmabit. Diuersa verò inter se sunt duo hæc, id quod affirmatur, & id quod minimè affirmatur. Igitur essentia animi in ea consideratione erit aliquid præter corpus. Iudicium verò considerationis illius ideo verum fore putamus, quia meram prorsus naturam animæ sequeretur, non imagines acceptas extrinsecus. Esset ergo iudicium naturale admodum, ideoque verissimum. Itaque si deinde expurgiscatur, ut nos nunc, & sentiat, non erit, ut nos, ad inquisitionem spiritualium ineptissimus, sed viam aliquam habebit commodiorem, per quam ita quandoque ad sui ipsius considerationem se compareret, ut pronunciet se esse aliquid præter corpus. Quæ quidem via carent nunc animæ miseræ, quæ per naturam & sensus corpora tum propria tum aliena prius attigerunt, quàm seipsas considerarent. Vnde miserabilis ille profectus est error, ut nequeant seipsas seorsum à labe corporeis peruidere.

Hactenus educationem fictam ab Auicenna narrauisse sufficiat. Deinceps qualem Plato noster educationem in septimo de Republica libro describit, breuiter perstringamus.

Finge, inquit, quandam sub terra speluncam, in ea homines nutritos à pueritia, ita ceruicem & manus à tergo, pedesque columnis quibusdam alligatos, ut neque moueri vsquam, neque alia nisi quæ è conspectu imposita speluncæ parte apparent, aspicere possint. Post tergum verò supernè lampas accensa sit, atque inter lampadem & illos qui ligati sunt alij multi deambulent, loquanturque inuicem, ferentes manibus varia arborum animaliumque simulachra. Qui igitur ita vincti sunt, nunquam reuera vel seipsos, vel alia eorum quæ narrauimus, vlla videbunt, sed solas vel sui umbras, vel aliorum, quæ propter ignem à tergo accensum tantum ante suos oculos in aduersam partem speluncæ resultant. Quamobrem nihil aliud aut se esse quàm sui umbras, aut alia aliud esse quam umbras illorum existimabunt, aut lumen ipsum esse aliud quàm exiguum illud quod ibi reflexum apparet, opinabuntur. Siquis autem horum qui vincti sunt, fortè soluator, subitoque lampadem & alia sub illa quæ sequuntur à tergo, retro versus intueri cogatur, caligabit protinus, & dolebit, ac propter splendorem intueri non poterit illa quorum umbras paulò ante cernebat. Multoque magis id illi malum contingeret, si à spelunca sursum ad cœleste diurnumque lumen repente trahatur. Quare non subito, sed paulatim conuenientibus gradibus ab umbris rerum ad res ipsas, item à luminis imagine ad lumen ipsum est perducendus, ita ut quæ in spelunca sunt apud illos, prius illic in aqua videat, quàm ibidem in seipsis inspiciat.

Rursus quæ extra speluncam apud nos sunt, primò nocte hic ad Lunam in qua similiter, deinde in seipsis terrena hæc, similiterque in cœlo cœlestia nocte itidem solum intueatur. Postera verò diem Solem ipsum, quàm quæ sub Sole videntur, prius in aqua, post in seipsis illa, deum Solem in cœlo suspiciat. Hac potissimum ratione singula sincerè facileque discernet, atque existimabit se cæcum deceptum miserumque fuisse, quando sub specu vinctus exiguis rerum umbris fuerat occupatus. Proinde quæ comparatio est speluncæ illius ad hunc modum, quem visibilem nominamus, eadem fermè mundi huius ad illum quem inuisibilem diuinumque vocamus. Siquidem hic animæ miseræ moribundi corporis clausæ tenebris, & carcere cæco, neque seipsas vnquam, neque alia vlla reuera, neque verum Solem, imò sui aliorumque umbras, & exilem quandam veri

Veri Solis imaginem intuentur. Veræ enim mentes, veræ res quæque, verus Sol in mundo solum sunt inuisibili, quæ si absque congruis educationis disciplinarumque gradibus repente intueri conemur, caligamus protinus, & dolemus. Conuenientibus verò tum morum, tum doctrinarum, tum temporis perducti gradibus, sincerè discernimus, iudicamusque cæcos illos & miseros, qui falsis mundi huius umbris imaginibusque falluntur, occupantur atque premuntur. Verumtamen quando animus ab immenso inuisibilis mundi lumine in corpus obscurum regendum mouendumque descendit, nouis, suæque naturæ contrariis obrutus tenebris, cæcutire diu & titubare compellitur. Adde & propter repentinam maximamque in deterius mutationem, diu cogitur ægrotare, atque fermè sic affici, vt ij qui propter phrenesim, vel somnum, vel ebrietatem falsis imaginibus illuduntur atque vexantur. Aut certè non aliter se habere, quam si quis à Solis lumine in cauernam illam quam descripsimus, repente præcipitetur. A deo enim nouis tenebris offundetur, vt aut nullo modo, aut vix tandem sub exiguo illo cauernæ lumine umbras illas tantum quas narrauimus, discernere possit. Præterea, ob subitam illam & in peius mutationem, in morbos tam sensus quam corporis varios incidet.

Hæc à Platone in libro de Republica septimo.

Sed redeamus tandem ad ea quæ ab initio statueramus. Emergite obsecro, mortalium animæ nunc immerse corporibus, naturam vestram supra corporis fines statim reperietis. Corpus siquidem longum est, latum atque profundum. Quoniam verò nullum corpus est infinitum, ideoque finem habet profunditatis, finitur in superficiem non profundam. Habetis iam superficiem longam quidem & latam, sicut corpus, sed profunditate carentem, atque ex vna hac parte surgentem ad incorporea. Superficiæ quoque latitudo finita ad longam lineam terminatur, neque profundam neque latam. Habetis lineam duabus partibus ad spiritum accedentem. Sed hæc ipsa lineæ longitudo quia finita est, ad punctum ducitur, non profunditate solum & latitudine priuatum, sed etiam longitudine. Habetis punctum tribus partibus ad naturam vergens incorporalem. Sed hoc quoniam lineæ terminus est, ideo certum habet finem in corpore, neque implet totum, neque viuificat. Separare, si placet, ipsum à linea. Potest

autem cogitatione saltem à linea separari, quod est lineæ terminus, & prius in seipso est quodammodo, quam terminet lineam. Quod autem prius est, licet ab eo quod est posterius separare. Habetis punctum, quodammodo, id est, cogitatione solum à linea; quarto iam gradu discens à corpore. In hac ipsa solutione assequitur, vt omnes partes corporis æquè respiciat. Fundatur per omnes, & moueat, hic irrationalis anima sedem habet. Et quoniam rationalis cogitatio non fallitur ascendendo, ideo sicut inuenit punctum à corpore cogitatione liberum, sic re verà inueniet punctum, id est, indiuiduum aliquid re ipsa solum à corpore, quod non modo impleat corpus & moueat, sed ipsum liberè moueatur, & tollatur ad supera, quod iam vnitatis nomine appellatur: hic anima viget rationalis quinto gradu à mole corporis aliena. Si tanto quid impurius est, quanto eget, patiturque magis, corpus impurius est quam superficies. Pluribus enim ad hoc vt sit, dimensionibus eget, atque ex partibus diuiditur pluribus. Superficies simili ratione cedit lineæ, linea puncto, punctum denique vnitati, quæ neque dimensionibus indiget, neque situ. Si horum perfectissima substantialis vnitatis est, & quia perfectissima, ideo potentissima, & verissima, atque hæc sunt aliquid existuntque, quis negauerit verè existere vnitatem? Ergo quid prohibet animam esse aliquid, & id quidem virtute magnū, licet non sit magnū aliquid quantitate? Agite, igneam formam quæ in corpore vestro tricubito tricubita est, colligite totā in cordis centrum. Hinc tantum virtute crescat, quantum creuerit vniōe, non aliter ac solis radij in concaui æneique speculi collecti centro, qui vsque adeo roborantur, vt inde resiliētes durissima quæque accedant subito atque consumant. Subtrahite portiunculam illam cordis, qua forma ignis illa deprimatur, restet forma indiuidua, agilis, calens, lucens & aliter quam prius, & mirabilius. Quia indiuidua agilisque est secundum se totam, corpus totum æquè collustret. Quia feruet incredibiliter, vitalis sit atque viuifica. Quia mirificè fulget, sentiat. Intelligat insuper, si reflectitur in seipsam, sursumque attollitur. Hactenus per ea quæ tanguntur, pedetentim progredientes inuenistis animam, quando à solido corpore ad quiddam quasi punctum omnino liberum processistis. Rursus, per ea quæ cernuntur oculis, animam perscrutemini. Cur (quæso) diffiditis esse spiritale ali-



quid in natura, cum ipsis etiam oculis spiritum quodammodo videatis? Scitis lumen id solis oculo manifestum, ideo corpus non esse, quia momento se fundit in omnia infusum non frangit corpora, nec inficitur. Ecce videtis spiritum. Quid negatis? An forsitan illum negabitis esse quem non cernitis? Si ita est, sphaeras aëris ignisque & cœli, aqua & terra præstantiores, quia non videantur, nihil esse dicetis. Itaque pars maxima & præstantissima mundi, quia non sit visibilis, nihil erit. Sed redeamus ad lumen. Ita lumen esse negabitis in sphaera ignis, quoniam oculis non perspicitur. Sed & ipse solis fulgor etiam si non videretur, existeret, quandoquidem existit nunc, & non videtur à nocturnis, atque ipsius splendor aliquis mixtus vaporibus potius quam ipse videtur à nobis, sed ipsum esse alicubi ex hoc eius splendore coniicimus. Sic etiam inesse lumen cœlestibus animis spiritale, ex ipso syderum lumine, quod illius imago est, coniectamur. An nescitis lucis actum nihil esse aliud quam lucere, ac tanto clarius rutilare, quanto longius à crassis corporibus separatur? Secernite ipsam ab omni materia, mirabilius rutilabit, & viuet quidem tunc maximè, si quando victura sit. Vbi enim crescit actus, augetur & vita, præsertim cum per eius calorem hæc omnia viuunt. Sentiet quoque (ut ita dixerim) quando per eius radios hæc omnia sentiunt, ipsa tamen minimè sentietur; nam & tenuitate subterfugiet aciem oculorum, & vbertate fulgoris intelligibilis superabit terreni visus capacitatem. Scitis in sphaeris elementorum ignem infimum vsque ad eam ad naturam supremi aëris declinare, aërem verò contra supremum ita ad ignem illum atrolli, ut & ignis ille fermè aliud videatur esse quam tenuis aër, & aër ille crassior ignis, adeò ut quicumque aërem illum cernit, vidisse se ignem possit absque mendacio affirmare. Eadem comparatio est mentis infimæ, qualis est anima rationalis, ad sublime corpus, quod est cœlum. Ergo & anima quodammodo est tenue cœlum, & cœlum est crassior anima. Et qui cœlum suspicit, prospicit animam. Cogitate punctum aliquod Geometricum, quod quia æquè respicit quamlibet loci partem circumdantis ipsum, si quando mouetur in orbem, unde quod erat punctum, circumferentia videtur euadere, ubi sanè circumferentia, est punctum circumcurrens, cuolumque foras Punctum verò est circumferentia stabili quodam car-

dine conuoluta. Cogitate rursus scintillam quandam luminis inuisibilis, quæ quoniam super omnem existit locum, æquè in partem loci quamlibet sese fundat, ac dum mouetur in gyrum, flammæ orbis efficiatur Orbis, inquam, oculis manifestus, ubi scintilla est flamma compressa, flamma est scintilla profusa. Scintilla huiusmodi anima est, flamma corpus æthereum. Et quanta est in animabus rationalibus varietas luminis spiritalis, tanta est in propriis earum cœlestibusque corporibus visibilis luminis varietas. Atque id lumen ita lucem sequitur spiritalem, ut lunæ lucem pallidus orbis in nubibus.

Ea verò est inter rationales animas differentia, quod animæ fixarum stellarum planetarumque solum lucido corpore circumdantur, ceteræ corporibus geminis lucido & opaco, aut certè altero lucidissimo, altero minus lucido. Eadem quasi lux esse videtur, quæ dum scintilla manet, sentit quidem, sed non sentitur, cum verò explicatur in flammam, sentitur quidem iam, sed ipsa nil sentit amplius, & sicut sensu careret quicumque flammam videns, scintillam se videre negaret, ita carebit anima, qui dum globos æthereos suscipit quasi quosdam circuitus animarum, animas inesse illis quasi centra non senserit, neque concesserit animas esse globos luminum implicatos, globos autem esse animas explicatas. Quod ita significauit Heraclitus.

Ἄλγῃ ξηρὴ ψυχὴ σφαιρότης,

id est, lux sicca, anima sapientissima. Hinc efficitur, ut nihil animo aut gratius, aut mirabilius sit quam lumen, neque possit alibi quam in lumine spirituum habitare, dum colit terras. Iam igitur & hic inuenistis animam esse tanquam lucem inuisibilem, viuificam, sentientem, intelligibilem, intelligentem. Et paulò ante tanquam punctum à corpore liberum, agile per seipsum, calens, viuificum, sentiens, capax superiorum, quod substantialis quædam vnitas appellatur. Atque hæc prima quædam excursio sit, & quasi præludium, quo infelix diffidentia illa tollatur, quæ longissimè à spiritalium confessione ab-

ducit animos plebeiorum.

(.:)

(.:)

(.:)

*Anima non est corpus, aut forma diuisa in corpore, ut ostenditur per virtutem animæ naturalem.*

## CAPVT III.

**P**ropositæ quæstionis ordo requirit, vt in prima sequentis disputationis parte ostendamus, per virtutem animæ naturalem, hominis quidem animam potissimum quidem non esse corpus, partim etiam non esse formam diuisam in corpore. In secunda parte per virtutem sentiendi monstremus idem, scilicet, animam esse formam indiuisibilem, ac insuper illud adiiciamus, eam videlicet, non alicui corporis membro affigi, sed totam per singula fundi. In tertia verò parte, per virtutem intelligendi eadem confirmemus, scilicet, eam esse formam impartibilem vbique totam, & illud adiiciamus, quod nullam trahat originem à materia. Sic enim anima hominis ad tertiam illam essentiam, quæ est perpetua, pertinebit, & immortalis meritò iudicabitur. Iam verò primam disputationis partem diuino numine inuocato in hunc modum aggrediamur.

*Prima ratio, quia anima est principium nutriendi, & quomocumque aliter operandi.*

## CAPVT IIII.

**A**nimantes & plantæ virentes corpora sunt, corpora etiam sunt ligna & saxa, ex terra conuulsa: Corpora illa coalescunt, hæc verò nequaquam. Quid autem est in illis principium alimentum? Non materia corporalis, quoniam alia etiam corpora nutrentur, quibus talis materia est communis. Cum ergo vis illa per quam adulescunt, aliud quiddam sit præter materiam corporalem, & illa non sit aliud quàm anima nutritiua, sequitur vt talis anima non sit corpus. Si quis autem obiecerit ita: Imò vero est corpus, non corpus quodlibet, sed tale quiddam, & sic affectum, qualis natura plantis & animantis propria sit: Saxa vero & lignis aridis non communis, quæremus ab illo de huiusmodi tali certoque corpore, quod vocat animam, vtrum duo quædam in se contineat, corporalem, scilicet molem, atque insuper certam quandam affectionem, per quam tale vocatur, & certum sit propriumque corpus, an nihil habeat ultra materiam corporibus omnibus vbique communem.

Si nihil respondeatur habere præter communem hanc molem, vana fuerat nimium obiectio illa, per quam dicebatur, non quodlibet corpus esse animam, sed corpus tale, & certo modo dispositum. Non enim fit corpus tale, & certo modo dispositum, nisi per qualitatem ipsam, & propriam quandam affectionem ipsi corpori superadditam, per quam non modo fit corpus, sed & tale, per quam etiam à quolibet alio differat corpore. Itaque si nihil aliud est ibi præter molem solam communemque corporis, cum illa etiam aridis lignis insit & saxis, hæc quoque habebunt animam per quam alentur. Quod quia falsum esse constat, necessarium est, corpus illud tale quod aduersarius animam appellabat, non materiam corporis solam, sed qualitatem etiam siue formam aliquam continere. Atque illud non propter materiam ipsam corporis, anima nominatur, quia materia omnibus etiam vita carentibus corporibus competit. Restat vt propter formam, formam, inquam, viuificam. Id enim est animæ proprium, Formam itaque ipsam viuificam vocabimus animam, materiam vero illam cui adiuncta est, quia inde vitæ fit particeps, neque animæ partem, sed animarum quiddam esse dicemus. Præsens autem ratio maximè per eam sententiam confirmatur, quam induximus à principio quando diserebamus corpus ex se agere nihil posse, quippe cum videamus animam à corporibus accedente multis inde operationes proficisci quæ & ante animæ accessum, & post eius discessum minimè fiunt. Quapropter animam quæ huiusmodi operationum principium est, corpus non esse concludimus.

*Secunda ratio. Neque corpus animatum est anima, neque inanimatum.*

## CAPVT V.

**Q**uale corpus esse vis animam? animatum ne, an inanime? Inanime non dices, quod alteri vitam tribuit animalem, quomodo enim si anima inanime corpus sit, viuificat corpora? Neque animatum corpus eam potes dicere, quia si anima animatum corpus dicatur, certè illud corpus postquam animatum dicitur, per aliquam animam dicitur animatum. De illa anima rursus interrogo, corpusne sit, an non? Si corpus, vtrum animatum, vel inanime? Si inanime respondeatur, absurdum quidem. Si animatum, iterum de anima illa quæram per quam

dicitur animatum. Atque procedere cogere in infinitum, quamdiu corpus esse animam asseres, ac semper respondere compelleris absurdè. Vtraque enim responsio delira videtur, tum animam esse animatam, tum inanimem, quemadmodum de sapientia, tum esse illam sapientem, tum etiam insipientem. Aut de lumine, tum esse illud illuminatum, tum obscurum. Sicut enim neque obscurum est lumen, quod alia illustrat, neque ab alio illuminatum, quod ipsam est primum lumen, sic anima neque inanimis, quia dat vitam, neque etiam per aliud animata, cum ipsa illud propriè sit per quod revera quodlibet animatur. Ac si ad aliud illam retuleris per quod animeretur, ego similiter illud aliud rursus ad aliud referam, aliudque rursus ad aliud, neque cessabo unquam, aut si cessabo, in eo ipso cerrè quiescam, ut dicam, aut illud ipsum quod primo ponebatur, aut aliquid sequens, neque animatum, neque vivificatum esse ab aliquo, sed ipsum propriè per se esse, quod animat aliud atque vivificat. Tale quiddam animam & vitam propriè, non quodvis aliud appellabo. Tu forsitan ut infinitum illum progressum & responsiones deliras iam deuites, & tamen animam corpus esse asseras, inferes, eam esse corpus non quidem animatum, sed corpus animale, non vivificatum, sed vivens. Si ita est, revolueris eodem. Equidem percontabor, vtrum illud ea ratione qua corpus est, anima sit, an alia quadam ratione, nempe novæ alicuius additionis per quam animale dicatur & vivens? Certè non ea ratione qua corpus. Omnia siquidem corpora essent animæ, ac operationes præ se ferrent. Sequitur, ut alia quædam illic insit natura præter corporis rationem, per quam animale corpus illud vivensque dicatur. Illam ego vitam propriè & animam nuncupabo.

*Tertia ratio. Neque crassum corpus est, neque subtile.*

## C A P V T VI.

**N**Unquid crassum corpus est anima, puta vel aqua, vel terra, atque similia? An potius subtile, rarumque, ut ignis & aer? Primum dici non potest, quoniam animæ officium est, penetrare facillimè corpora, implere, movere. Huic autem operationi crassa corpora sunt ineptissima. Secundum vero, illud esse fortasse videbitur probabilius, ut ra-

rum sit corpus anima, ut ignis, ut aer. Verum, si ignis dicatur esse, vtrum ignis ille qua ratione ignis, anima est, an quadam alia ratione? Si qua ratione ignis est, esse dicatur anima, profecto quilibet ignis anima erit, & omnia ignita viventia. Igitur alia ratione. Ita de aere percontandum, concludendumque, animam semper esse ultra naturam corporis requirendam. Neque adducat quisquam quantum aliquod tenuissimum corpusculum, præter quatuor elementa, quod crassioribus infusum corporibus illorum sit anima. Eadem namque redibit quæstio, vtrum corpusculum illud per materiam suam sit anima, an per viam aliquam materiæ superadditam. Si primum dicitur, omnia corpora erunt animæ, quia omnibus subest materia. Si secundum, assequuti erimus, iam quod cupimus, ut anima sit ad aliquam vim quodammodo incorpoream referenda. Afferuntur hic à nonnullis breves quædam persuasiones huiusmodi: Si anima dicatur esse diuisibilis, quæritur nunquid partes eius vivant ut totum, necne? Si vivunt, tota anima in singulis est suis particulis, quo fit ut non egeat quantitate, quandoquidem per diuisionem non diminuitur. Si non vivunt, ex non viventibus vita consistet, quod est impossibile. Rursus, omne corpus alicui quinque sensuum innotescere potest, anima nulli. Omne corpus figura aliqua vel termino circumscribitur, anima minimè. Omne corpus operationem suam necessario peragit temporis interuallo (cum enim diuisibile sit in essentia, multo magis in actione) anima sæpe momento temporis operatur. Corpus per quantitatem, potius quam per essentiam est in loco, quia propter quantitatem implet locum, anima per essentiam adest corpori, ut enim adest illi, dat illi esse. Esse per essentiam datur, sicut per sapientiam sapere, adest igitur per essentiam. Corpus ita in alio est, ut contineatur ab eo in quo ponitur, atque excedatur, anima in corpore non est comprehensa, sed comprehendens. Ipsa enim corpus perficit, continet, atque ducit. Anima denique quolibet corpore, & toto corpore præstantior est, quare lineis punctisque quæ in corporibus sunt ut in subiecto, est præstantior. Indivisibile diuisibili excellentius est. Animus igitur magis indivisibilis est quam aut linea aut punctum.

*Quarta ratio. Corpus ex materia & forma  
componitur.*

## CAPUT VII.

**C**orpus naturale ex materia & forma componitur. Animal est naturale corpus. Materia itaque in eo est, & forma. Constat autem ex anima atque corpore. Corpus quidem non est forma naturalis, quia forma naturalis alicuius est forma, & in aliquo est tanquam subiecto quodam atque formato. Corpus autem nullius forma est, neque in aliquo est subiecto, sed loco. Restat ut anima forma sit, ob hoc potissimum, quod est proprium internumque operationum motionumque principium, imò etiam essendi principium est animali. Totum hoc ad formam spectat. Est igitur anima forma. Quod si ipsa quoque esset corpus, opus esset adhuc alia quadam forma tam animæ quàm corpori per quam ambo simul vnum animal vocarentur, quam quidem formam aliam proprius animam vocaremus. Nam per animam, quasi per formam corpus quod ante potentia quadam est viuens, actu fit viuens, & animal actu. Anima igitur solum est forma, præsertim, quia si duas haberet partes, materiam, scilicet atque formam, tria sequerentur absurda.

Primum, quod non secundum se totam formaret corpus, quia non formaret ipsum per partem eius, quæ est materia, oportet autem propriam formam secundum totam sui essentiam, totam perficere materiam propriam.

Secundum, quod pars illa animæ, quæ forma dicitur, duarum materiarum rationis eiusdem perfectio foret, quod natura non patitur, sicut neque patitur formas duas rationis eiusdem eandem informare materiam.

Tertium, quoniam anima in corpora hæc inferiora commutaretur, atque vicissim, si communem cum his materiam possideret. Quod ideo nefas est, quia si fiat corporum animarumque mutua commutatio, multo magis fiet quarumlibet animarum in quaslibet animas transmutatio, rursusque quorumlibet corporum in corpora quaslibet. Sit igitur anima solum forma. Forma, inquam, non accidentalis, sed substantialis. Nam, cum anima ipsa sit reatrix motrixque corporis, ita ut non contineat ipsum, sistat, & torqueat, corpore præstantior est. Corpus substantia est. Nullum verò accidens nobilius est substantia.

Rursus motor, quantum est principium motionis, non pendet secundum esse suum, ex eo quod mouetur. Igitur anima ipsa, quæ re vera est motrix corporis, à corpore non dependet, quasi pedisequa corporis, ita non est corporis accidens. Præterea, quicquid vicissim opposita suscipit, atque ipsum interim permanet idem substantia est, anima eadem permanens recipit tum opinionem hanc, tum illam, inter se contrarias, tum scientiam, tum ignorantiam, & repugnantes affectus, anima igitur est substantia. Substantia, inquam, ut forma quædam substantialis. Forma autem non est corpus, quia omne corpus forma aliqua designatur. Forma verò, quæ ratione est forma, formari non potest. Hinc fit, ut anima non sit corpus. Missas facio in præsentia rationes quibus ostenditur animam nostram accidens esse non posse, quia si necessitate quadam hæreret subiecto, non posset illi repugnare, neque in se vnquam reflecteretur, neque super accidentium genus ad substantiæ genus ascenderet, ipsumve propriè definiret, vel discernere posset ab accidentibus, vel quanto intervallo accidentia superat, ritè metiri.

*Quinta ratio. Corpus natura sua dispersum est.*

## CAPUT VIII.

**C**orpus natura sua dispersum est penitus. Primò, quia distantiam partium patitur, ita ut semper in alio loco sit alia. Secundò, quia continuè transmutatur. Nam si subiicitur tempori, sicut varia momenta succedunt in tempore, sic affectiones momentis singulis variantur in corpore. Quæ quidem varietas cum fiat in cælis, multo magis fit raptu cælorum in elementis. Tertiò, quia contrariis subiicitur qualitatibus, calori, & frigori, & similibus. Vnde fit ut contra naturam corporis sit coire in vnum, manere simile, & sibi ipsi constare. Extensio namque ipsa quantitatis partes corporis disinctas manere compellit. Motus perennis cogit mutari naturam, neque sua simul habere, sed aliud amittere, quærere aliud. Qualitatum contrarietas impellit ut alterea fagiat, alteram per quam fugam corpus ipsum compositum dissoluatur. Quamuis autem per hæc appareat corpus natura sua nullo modo posse firmiter in vnitatem consistere, tamen corpus quodlibet aliquo modo in suis partibus necitur, cunctis in vnam totius corporis copulam conspirantibus. Est igitur in corpore aliquid

ultra corporis naturam, quod ipsum vnit, sistit & continet. Vnit, inquam, distantiam partium, sistit fluxum perennem, continet inuicem per suam simplicem consonantiam dissonas corporis qualitates. Quid hoc est? corpusne? Si corpus est, eget similiter alio connectente. Quid aliud illud? Num corpus? Si corpus, eget & alio. quocirca fatendum est nullam esse posse in corporibus vnitatem, nullam constantiam, nullamve concordiam, nisi illis insit vis aliqua incorporea. Ergo si & anima corpus dicatur esse, eget etiam aliqua copula. Vim autem huiusmodi copulantem nos animam, vel virtutem animæ potius quam illud copulatum asseuerabimus, cum videamus esse animæ proprium, humores contrarios membraque diuersa in vnam animalis compagem deuincere, qua abeunte diffiunt omnia. Igitur anima neque est corpus, sed copula corporis intima, vel substantia copulatrix. Neque forma diuisa per corpus. Talis enim formatur (ut Platonici putant) simplicitatis & constantiæ naturam amittit in corpore, vnde ipsa æquè ut corpus eget alio continente, quod vnum in seipso consistat, ad diuisionem corporis minimè dissipatum. Si quis autem quærat vnde saxa & ligna sortiuntur suarum partium vnionem, respondebunt Platonici, illa quamdiu affiguntur terræ, ab anima terræ sortiri & vnionem & augmentum; postquam verò auulsa sunt, non augmentum amplius, sed vnionem.

*Sexta ratio. Duo corpora non sunt in eodem loco.*

## C A P V T V I.

**D**uo corpora in eodem loco penitus inuicem æquari non possunt. Nam si eodem in loco penitus esse debeant, oportet illa primum in partes diuidi, deinde partes illas inuicem iungi. Quæ quidem partes si indiuisibiles sunt, iam corpora illa in indiuidua resoluta sunt. Et quoniam ex iisdem composita fuerant, neque dissoluntur, sequitur ut ex indiuiduis quibusdam corporis magnitudo concreuerit. Quod ideo fieri non potuit, quia indiuidua congregata simul nunquam conficiunt magnitudinem. Sin autem partes illæ diuisibiles fuerint, quælibet per se erit corpus, ac situm proprium seorsum habebit ab alia, itaque non erunt corpora duo in loco vno. imò in multis loculis multa corpuscula. Si ergo corpora duo eodem in loco æquari inuicem nequeunt, anima quæ corpori vno se-

se vbique infundit, & per omnia se porrigit corporis puncta, non est corpus. Quod autem vbique in corpore sit, ex eo in præsentia patet, quod nihil magis intrinsecum essentia est quàm esse. Ideoque forma per quam esse substantiale tribuitur tum corpori toti, tum partibus, toti partibusque est intima. Et quia sicut res se habet ad esse, sic & ad vnum, anima quæ per se dat esse, per se quoque absque medio vnitur corpori vniuerso. Quod autem esse substantiale tribuat, inde patet, quod ea sublata omnia membra mutant speciem. Quoniam verò ab essentia fuit esse, à virtute operatio, anima quæ singulis membris esse operationemque largitur, singulis quoque essentiam suam virtutemque communicat. Ita enim, esse operationemque præstat, sicut vnitur. Quare si illa præstat singulis, vnitur & singulis. Nonne si corpus quodlibet naturale carens anima, vnum quiddam est per formam vnam in toto & partibus existentem, multo magis animatum corpus vnum erit per animam toti partibusque præsentem? Quod si anima in vno solum membro sit, illius solius erit forma, reliquorum aliæ erunt formæ, vnde non conficietur ex membris omnibus naturale corpus reuera vnum, sed congregatum quiddam, tanquam domus ex parietibus. Neque erit in qualibet animalis parte consensus & concordia ad quamlibet, qualis modo est, nisi per vnam animam varia membra conglutinentur, sicut neque ad tractum nerui omnes articuli contrahuntur, nisi idem sit neruus in omnibus. Adde quod in quauis quantumcunque minima corporis portiuncula inest vita, & in plurimis motus & sensus. Hæ animæ vires operationesque intimæ sunt. Vis actioque agentis alicui intima, sine agentis substantia non existit. In illis ergo est anima, si in illis viget & agit: quæ quando suo modo mouetur, corpus non dissipat, quia non fit dolor aliquis ex animæ motu per corpus. Fieret autem perpetuus in corpore dolor, si ad motum animæ partes eius dissiparentur & turbarentur. Dissiparentur autem proculdubio, si anima esset corpus, cum ipsa per corpus suo quodam motu perpetuo moueatur. Quoniam pacto anima corpus erit, quæ est vbique per corpus, & sine vlla corporis offensione totum vndique implet & penetrat? Porro si solidum corpus esset, vel totum corpus non impleret, neque viueret inde totum, vel si impleret, penetrando frangeret, frangereturque, & dolor in nobis perpetuus perueniret. Sin autem corpus esset fluxum & labile, anima corpus animantis neque deuinciret, neque firmiter



solidaretur, sed & ipsa alio quodam vinculo (vt supra diximus) indigeret, cuius stabilitate firmaretur & regereturque & moueretur. Illud verò vinculum libentius animam, imò virtutem animæ appellabimus. Siquidem animæ virtus in corpore idem fermè est quod vel coaguli virtus in lacte quod inde coagulatur, vel vis Magnetis in ferro, quod inde trahitur & suspenditur, vel temperatio artis in horologio; quod inde ordine mirabili regitur, mouetur, & sonat. Ipsa verò anima non est virtus temperatione humorum, sed forma quædam substantialis, simplex, indiuisibilis, quæ virtute & arte naturali spiritus, humores, membraque temperat.

*Septima ratio. Corpus non est simul totum in pluribus.*

## C A P V T X.

**N**Eque corpora, neque formæ diuisæ per corpora, possunt omnino esse simul in pluribus partibus aut locis. Vis seminaria tota est in qualibet particula seminis. In quot enim particulas semen diuiditur, totidem animalia oriuntur, quod maximè in piscium ouis apparet. Si ex quacunque guttula seminis totum pululat animal, tota illic delitescit seminaria virtus. Hæc verò est animæ instrumentum generationi subserviens. Quapropter multo magis tota est in qualibet seminis corporisque particula. Postquam ergo tota est in singulis animæ virtus, nonne virtus vegetatrix tota est in quolibet plantæ semine, cum plantam integram producat ex quolibet? Certe. Vegetatiua quoque anima exigua primum radice vel germine capitur, deinde crescente arbore per omnes se fundit ramos. Siccaris denique ramis vel amputatis rursus sese contrahit in radicem. Hanc animam quantitate carere Plotinus, Porphyriusque existimant, quæ æquè clauditur minimis, implet amplissima.

*Octaua ratio. Anima est vita, aut fons vita.*

## C A P V T XI.

**A**Nimam esse putamus naturam quandam quæ aut vita quædam sit, aut vitam cœu comitem habeat & pedisequam, postquam corpora vitam per animam sortiuntur. Corpus necessario in plures partes diuiditur. Nam corpus aliud est ex pluribus elementis compositum, aliud elementum, ex elementis aliis minimè congregatum,

sed ex forma & materia constitutum. Si animam dixeris esse corpus constructum ex pluribus elementis, sciscitabimur nunquid illa elementa quælibet per se seorsum ab aliis vitam habeant, aut nulla, sed congregata simul vitam pariant, aut vnum quiddam illorum possideat vitam. Si quodlibet illorum per se habet vitam, tot ibi sunt animæ, quot elementa. Neque ibi est anima vna ex multis conflata partibus, sed animæ multæ sedem eandem colentes. Si nullum illorum habet vitam, nunquam concursu mutuo vitam creabunt. Ac si in eorum concursu vita nascatur, non quidem ipsorum vi, cum ipsa vita careant, sed vi potius alicuius concursum illum ordinantis vita illa nascetur, præsertim cum sit fatendum, etiam si concursione multorum vita confietur, non tamen quomodocunque concurrant, verum si certa ratione viaque concurrant, vitam in illis gigni. Ita illius certæ concursione intimus ordinator, anima ipsa erit, vitam suo modo confluentibus exhibens. Sin dixeris vnum aliquod è multis elementis habere vitam, illud solum modo anima ipsa erit, neque opus erit præter istud aliis elementis vt anima generetur. Quamobrem anima nullo modo putanda est esse corpus ex elementis pluribus constitutum. Sed neque elementum vnum, quia elementum quodlibet ex materia & forma componitur. Si istud viueret, non per materiam viueret, cum informis materia nequeat vitam aut alicui aut sibi ipsi præbere. Igitur tale viueret per formam. Forma igitur esset anima. Quintiam si anima est corpus, siue elementum sit, siue simile quiddam, & seu simplex, seu compositum, certe ita vt dicam, vel similiter erit affectum, scilicet calidum vel frigidum, siccum vel humidum, leue vel graue, rarum vel densum, fluxum, solidum, album, nigrum, atque similia. Si calidum, calefaciet solum. Si leue, alta petet, & omnino quaecunque corpus sit, secundum naturam propriam operabitur, & affectum naturæ suæ oppositum nunquam aget. Non enim frigidum calefacit. Est autem cuiuslibet corporis certa & determinata natura ac forma, sicut locus terminatus est, & certum tempus, & finita potentia. Igitur cuiusque corporis determinata operatio est, & ad effectus contrarios non extenditur. Anima verò ad contraria quælibet vim habere videtur. Nam & in diuersis corporibus animalium & in eodem multa inter se efficit repugnantia. Sistit, mouet, contrahit, extendit, rarefacit, condensat, acuit, obtundit, aperit, claudit, fundit, & solidat. Contrarios odores, sapores, atque colores

oppositas vires & figuras humoribus membrisque tradit, leues spiritus deorsum mouet ad pedes, graues humores sursum ducit ad caput, quod fit contra corporum naturam. Agitat corpus in omnem partem sursum contra grauium elementorum pondera, deorsum contra leuium sublimitatem, in latus & in circuitum contra omnem corporis facultatem. Cum ergo omnes ferme effectus inter se contrarios faciat, & ad repugnantes motus ita sit compos, vt præter corporum ordinem moueat, quis adeo demens erit, vt aut corpus; aut eius qualitatem, siue qualitatis aliquid esse animam fateatur?

*Nona ratio. Corpus seipsum non mouet.*

## C A P V T XII.

**Q**Uod verè & primò est per seipsum mobile, ita vt ipsum omnino idem sit & fons & receptaculum motionis, secundum se totum per se mobile debet esse, sicut in cæteris omnibus apparet, quæcunque per se, & primò sic talia quædam dicuntur esse vel talia, sicut quod ita est clarum, secundum se totum est clarum. Quod ita bonum, totum bonum est. Quod ita intellectum, intellectuale est totum. Nam essentia quæ primò effundit qualitatem aliquam, & amplectitur suscipitque primo, quia perfectè agit vtrunque, efficit vtrunque per totum. Oportet autem in natura alicubi reperiri essentiam illo modo per se siue ex se mobilem atque animam esse talem, vt libris superioribus demonstrauius. Corpus autem etiam si fingatur per se primoque esse mobile, nondum tamen secundum se totum poterit esse tale, quoniam oporteret quamlibet eius partem à seipsa moueri, & partium partes atque particulas. Nam si vna particula sit in corpore quæ se non moueat, non erit corpus illud secundum se totum ex se mobile, atque ita non verè & primò erit tale, sed alterius cuiusdam primo talis participatione atque præsentia. Quare ad hoc vt perfectè per se mobile sit, concedendum esset quælibet eius particulas à seipsis moueri. Illæ diuiduntur in infinitum, vnde innumerabiles erunt illæ particule quæ se mouebunt. Quod mouet, agit, quod agit, existit actu. Erunt igitur infinitæ partes in actu sese agitantes, & infiniti in quouis corpore mundi motores. Imò verò non erunt partes illæ alterius corporis ex eo ipso quod actu erunt suo, sed quælibet per se tota consister, atque erit infinita quædam multitudo corpusculorum existens actu.

Impossibile autem est talem esse multitudinem in natura. Quoniam igitur nequeunt esse corporis partes actu infinitæ, imò verò neque actu quidem reuera esse omnino, quando nullum habent esse proprium, sed sub ipso esse totius compositi continentur, sequitur vt partes corporis sese non moueant, ne propter hoc actu cogantur esse, & actu penitus infinitæ. Concludamus igitur corpus non posse verè primoque per se mobile esse, cum ipsi secundum se totum id competere nequeat, quando partes eius assequi id non valent, vt se moueant. Ad idem rursus alia via progrediamur. Quando aliquis corpus asserit mouere seipsum, ex iis quatuor vnum aliquid potissimum compellitur confiteri, aut partem corporis alteram moueri ab altera, aut totum à parte, aut à toto partem, aut totum, à toto, id est, omnibus partibus partes omnes. Si primum affirmetur, cum aliud quiddam sit pars altera, aliud altera, non idem mouebit seipsum, sed aliud potius aliud. Neque ex hoc corpus illud compositum verè mouebit seipsum, cum sit ex aliquibus partibus constitutum quæ se non mouent, sed duo quædam habebit in se distincta inuicem, quorum alterum moueat alterum. Si secundum illud diuisionis membrum acceperis, scilicet, quod pars mouet totum, vel tertium scilicet quod totum mouet partem, nondum verè compositum illud sese agit. Aliud namque partem, aliud totum esse volumus. Atque illa pars quæ mouet totum, mouet vique omnes partes, ideoque in numero aliarum partium etiam seipsam mutat. Similiter si totum mouere partem dicatur, per omnes partes vnā commouet partem, ergo vnā quandam solummodo agit quodammodo per seipsam. Vides in his duobus diuisionis illius membris non posse aliter dici totum illud mouere seipsum, nisi per partem illam sui quæ sese agit, per alias minimè. Atque ita non totum illud reuera erit per se mobile, sed pars forsan illa totius, quæ etiam pars eius non erit, cum per se aliquid operetur. Quòd si quartum concesseris scilicet totum à toto moueri, cum totum fortasse non sit aliud quàm cunctæ simul partes, fateberis partes omnes ab omnibus permutari, vbi compositum illud non aliam ob causam affirmari debet mouere seipsum, nisi, quia pars quælibet eius agit semetipsam. Quapropter ad partem semper confugere cogeris per se mobile corpus affirmaturus. Quod in primis idcirco damnamus, quia corpus illud compositum non erit propriè per se mobile, postquam id ab alio, id est, à partibus mutatur. Nam ratio-

ne partium dicitur per se mobile. Licet enim corpus illud quodammodo cunctas simul partes esse constet, tamen motum huiusmodi mutari videtur à singulis, sicut & substantiam suam à singulis accipit. Responde quæso de illa parte vel partibus illis quarum ratione totum asseritur sese mouere ex eo quòd illæ se mouent, suntne indiuiduæ? Si sunt, profectò quòd sese mouet, non corpus est, sed indiuiduum quiddam in corpore, cuius impulsu etiam corpus sponte sua ferri videtur. Sin diuiduæ, illam similiter partiemur, vt & totum iam fecimus, atque eadem ratione comperiemus, nullo modo affirmari posse de illis partibus quòd per se moueantur, nisi ratione particularum quæ se moueant. De particulis similiter perscrutabimur, quæ quoniam in infinitam distribuuntur, nouos semper & plurimos motores inueniemus, neque vnquam perueniemus ad vnum, cum diuidendo semper plurimos habeamus. Neque vnquam ad primos aut primum, cum diuidamus similiter infinite. Nusquam igitur est in substantia corporis vnus ac primus ipsius motor, quamobrem nullam in se habet sui motus originem, per quam reuera asseri valeat ex seipso moueri, sed ad impartibile aliquid compellimur deuenire, vnde nascatur omnis corporalis agitationis origo. Internus autem corporis agitator est anima, qua præsentem corpora sua sponte quodammodo & in omnem partem feruntur, absente verò anima, externo indigent commouente. Si ista quoque sit corpus, eget ipsa quoque mouente, mouente, inquam, extrinseco, siquidem absque impulsu externo viuientia quæque mouentur. Ille quidem motor intus anima ipsa erit, quam per se oportet moueri, quandoquidem corpora per animam vim sese mouendi habere videntur.

Omne autem tale ad naturam aliquam verè suimet agitatricem est reducendum. Ita anima propriè per se mouetur, si eius participatione facultatem cætera nanciscuntur, vt per se quodammodo moueantur. Hæc igitur non est corpus, sed neque etiam forma in corpore dissipata. Nam hæc etiam per rationes superiores se mouere non valet, iisdem subiecta, quibus & corpus conditionibus, vt apparuit. Vbi cauillatio illa excluditur, qua nonnulli contendunt ostendere corpus aliquod per se moueri, dicentes, ipsum ex materia & forma vel ex quatuor elementis ita componi, vt alia quædam natura præter materiam & formam & quatuor elementa proueniat, quæ sit totius integritas quæ seipsam moueat, quia per for-

mam habet hoc vt moueat, per materiam vt moueatur. Talis obiectio aduersus Platonicos nihil valet, tum quia in alia essentia erit radix per quam mouere, in alia per quam moueri videbitur. Oportet tamen ad aliquam essentiam peruenire quæ sit & fons & receptaculum motionis & vitæ, quemadmodum ad aliquam peruenitur quæ lucis, & ad aliquam quæ caloris radix est simul & fundamentum. Tum quia natura illa quæ est totius integritas, si quantitate protenditur, non magis poterit ex seipsa moueri, quam moles ipsa corporea, vt supra monstrauimus. Sin autem indiuisibilis est, iam (vt cupiebamus) ad naturam peruenimus incorpoream, in qua sit sui ipsius agendi potestas. Non quod in seipsam agat, & patiatur. Morio enim in ea non transitum significat ab agente in patiens, sed naturalem essentiam illius vicissitudinem, qua suarum affectionum variat vices, atque ita per se discurrit, non agitante alio, vt per se calet ignis, neque alio calefaciente, neque parte sui alia in aliam fundente calorem. Motus igitur animalis cum non sit à corpore, quòd est sua natura pigrum, neque sit à solo composito, in quo non erit vis vlla mouendi, si ex partibus talibus sit conflatum, in quibus nulla vis sit ad motum, necessariò est ab anima, quæ si vim migrandi ex ocio in actum tribuit animali, multo magis priusque tribuit ipsa sibi. Quicquid enim boni actusque vitalis à causa traducitur in effectum, prius explicatur in causa. Sic enim calor calet feruetque secum ipse prius, quàm materiam aliam calefaciat, & animata corpora turgent feminibus, fetusque concipiunt in seipsas prius, quàm partus edant. Dum igitur anima vitalem à potentia in actum progressionem explicat in seipsa, dicitur à seipsa moueri. Motum quidem in anima, propriè actionem Platonici nominant, quoniam in fonte suo sit, formetque corpus & agitet. In corpore verò motum nominant passionem. Cumque molem corpoream etiam vniuersi oporteat moueri ab alio, concludunt vniuersi corporis motum passionem esse à motu animæ vniuersalis, tanquam ab actione quadam illarum. Et quemadmodum in quolibet genere imperfecta semper ad perfectà reducunt, ita motum corporis imperfectum ad animæ motum tanquam perfectum in ipso motionis genere referunt. Proinde cum quæritur quoniam motu præcipuè anima moueatur, respondent, non corporali, est enim incorporea, non imaginabili, caret enim figura non cognitiua, ignorat enim seipsam sed mouet secundum essentiam vi-

talem. Sicut enim essentia actus est esse, atque intellectus ipsius actus est intelligere, sic vita actus est viuere. Non enim aduentitiam, sed ex seipsa possidet vitam, atque ut illorum verbis utar, anima est vita se generans & producat. Vita verò omnis est motus. Quare si omne viuens mouetur, etiam quod per se uiuit, per se quoque mouetur, atque quod uiuit semper, mouetur & semper, non intellectualem uidelicet motum, sed uitali. Quapropter semper mouetur, & non semper. Nam mens quidem secundum potentiam est, vita uero secundum actum. Denique essentia semper uiuit, perpetuumque intrinsecus exercet motum, quoniam essentialis vita semper est mobilis, vires autem & actus quæ tam circa vitam quam circa intellectum contingunt, vel intermitti, vel aberrare quandoque possunt. Sed regrediamur iam unde digressi sumus. Idem nobis tertia hæc sequens ratio persuadet. Motus omnes hi sunt, alteratio, generatio, corruptio, augmentum, decrementum, condensatio, rarefactio, progressio. Nunquid secundum alterationem seipsum mouet corpus? nequaquam. Si enim se debent calefacere, calorem habeat oportet quam sibi met tribuat. Oportet etiam ut non habeat, si modò sit accepturum. Non enim accipit quisquam quod possidet. Ergo ut calefacit, calidum iam est, ut calefit, nondum est calidum. Dictum quidem ridiculum, istud habere aliquid simul & non habere, nisi fortè quis aquam dicat frigiditatem quædam secundum uirtutem habere, quam retineat etiam postquam igne fuerit calefacta, per quam remota ab igne ad frigiditatem secundum actum iterum reuertatur. Huic Platonici respondebunt, uel aquam illam ab elementis extrinsecus frigesieri, uel si qualitas eius secundum actum (quæ aliquantum ad naturam uergit incorporalem) pullulat ex intrinseca illa uirtute qualitatis productiue (quæ quidem uirtus etiam multo magis naturæ incorporali propinquat) sequi ut uirtus huiusmodi rursus à substantia quadam scaturiat, quæ penitus incorporalis existat. Substantia uero huiusmodi erit principium motus in corpore.

Nullum igitur corpus alteratione seipsum mouet. Sed neque etiam seipsum generat, quia quod generat aliud, generatio dat esse. Habet igitur genitor esse, quod tribuit genito. Quod generatur, aliunde accipit esse, quod ipsum non possidet. Nihil igitur sibi potest esse tribuere. Haberet enim ipsum simul & non haberet. Et cum genitor genitum antecedar, qui sui ipsius secundum finitam naturam genitor est, &

genitus, seipso simul prior est atque posterior, quod in natura finita nemo utique finxit. Atqui neque corrumpit etiam seipsum corpus. Quippè cum res quæque prolem suam ex natura propria generet, atque ideo sibi conuenientem proferat non contrariam, sequitur ut naturalis rei cuiusque instinctus, qui proles quædam est essentia atque ipsius esse, contra essentiam & esse non surgat.

Nulla ergo res instinctu suo ducitur ad non esse, nedum sui, sed neque alterius cuiusquam. Imò cum rei cuiusque nixus ad seipsam seruandam proficiscatur, in contrarium non flectetur. Sed neque auget se ipsum corpus aut minuit. Non enim fieri id sine alteratione contingit, ac etiam generatione quadam & corruptione. Nam per qualitatum alterationem crescimus & decrescimus. Et dum crescimus, nouæ in nobis partes corporis generantur, dum decrescimus, ueteres corrumpuntur. Si ergo incrementum & decrementum alteratione generationeque & corruptione indigent, corpus quod per alterationem, generationem, corruptionem se non mouet, neque augendo quidem mouet seipsum vel minuendo, neque etiam condensat seipsum vel rarefacit, quoniam sine alteratione ista quoque non sunt. Dixerit fortè quispiam, corpus saltem per se loco mutatur per transitum vel circuitum. Hoc quoque impossibile est dictum. Si enim ad superiores illos motus qui intenti sunt, est impotens, multo magis erit impotens ad externos. Motus quidem externos uoco circuitum atque transitum, qui ad terminos remotiores tendunt quam motus interni. Itaque si corpus non ualet per se moueri ad terminos proprios, quoniam pacto poterit ad terminos alienos? Quamobrem sic iam concludamus. Nulli apparent in corporibus alij motus præter illos octo iam numeratos. Per nullum illorum ex seipsis aguntur. Ergo nullo modo ex se corpora agitantur. Mouentur tamen (ut cuique constat) à natura quadam intrinsecus agente, etiam sine externis impulsibus. Hanc animam esse Platonici nemo negauerit, quam moueri per se possibile est, quia in ea alij quidam præter octo illos alterius naturæ motus reperiuntur. Quantum ad partem spectat quæ regitur corpus, reperitur in anima temporalis vicissitudo seminum aliàs aliter in ea emergentium ad corporalia generanda. Quantum uero ad partem animæ pertinet quæ in cognitione uersatur, inest in ipsa de cognitione affectioneque in alia in aliam discursio temporalis, ab effectibus naturæ

ultimis in superna principia per causas medias temporalis ascensio, ac vicissim à supernis principiis per medias causas ad ultimos effectus descensio. Hæ discurfiones, motiones quædam sunt, & naturæ animi propriæ, vt aliàs declarauimus. Non enim Deo vel Angelis congruunt, qui simul omnia possident atque vident. Non corporibus competunt, quæ per se nihil agunt. Non formis corporeis, quæ ad incorporea non mouentur. Huiusmodi verò discurfiones ad diuina nos ducentes, supra naturam corporis eleuant. Efferri verò supra naturam suam neque corpus, neque aliud quicquam per seipsum valet. Igitur reuolutiones tales quæ sunt à corporibus alienæ, animo tamén insunt, testantur animam vel corpus vel formam diuisam in corpore esse non posse, præsertim cum anima secundum illas per se, id est, per naturam ac vim propriam agitetur, ideoque per se moueatur, quod nequit corpus.

Præterea, apparent in anima motionum corporalium exemplaria, generationis, quando mortalibus, augmenti, quando reminiscitur, decrementi, quando obliuiscitur, alterationis quando variat vires affectionum, condensationis, provt subito aliquid intuetur, vel se colligit, rarefactionis, provt discurrit, vel circa multa distrahitur. progressionis in rectum, cum primum attingit externa. Circuitus autem, cum vel in rebus ipsis effectum resoluit in causam, & à causa deducit effectum, vel in seipsam considerandam reflectitur. Moueri rursus videtur in rectum, quando ad corpus sensumque declinat. In obliquum, quando in se angelumue reflectitur. In circulum, quando in Deum principium finemque suum, sursum ad vniuersalia, deorsum ad particularia, ad dexteram quoque atque sinistram in oppositas videlicet generis differentias. Denique ante & retro, quando ad causas naturales effectusue se vertit. Quis itaque neget animam motionum fontem esse, cum in ea proprii motus sint, & motionum corporalium exemplaria, in quibus contra corporis naturam ipsa sese generat quodammodo, vel (vt ita dixerim) quasi corrumpit, auget, minuitque, & transfert, & reliqua? Merito igitur per eius præsentiam corpora viuientia facultatem hanc adipiscuntur, vt sese alterent, nutrant, augeant, dum ex se aliquid generant in seipsis. Ac rursus vt ex se gradiantur, quocumque indicauerint gradiendum. Quorum nihil efficiunt quæ non viuunt, quasi spontaneus motus vitæ sit proprius.

*Decima ratio. Anima non crescit ad corporis habitus augmentum.*

## CAPVT XIII.

**S**I anima corpus est, implet certè corpus istud quod vides solidam, vt viuat totum, & ipsa tenue atque agile corpus est, quod animi celeritas indicat. Quare si corpus animalis partiaris in membra, sicut frustra omnia corporis corpora sunt, ita corpuscula illa quæ est in membris sectis supersunt, sunt animæ, præsertim cum anima vnius sit tota naturæ, vt diuersa coniungat. Viuent igitur, mouebuntur & sentient ad tempus brachia & crura à corpore separata, & anima quæ in reliquo restat corpore, quæ sæpè brachiis & cruribus amputatis viuit decennium, multo erit minor quam antea, ideo pusillanimis erit, hebes, obliuiosa. Imò etiam sic argumentemur. Si anima corpus est, manifesti huius corporis magnitudinem quantitatem penitus equans, crescente ipso crescet, decrescendo decrescet. In vasto corpore magnificentior erit & diuinior animus. Atque in eodem homine quando adolescente corpore adolescet & anima, oportebit vt per adiunctionem corporis sibi similis adolescat. Alimentum huiusmodi viuit ne in se antequam ab anima capiatur, an non? Si non viuit, quonam pacto vitam animæ præstat, & auget, quod & vita caret, & antequam vitam animæ mutuet, oportet ipsum vitam ab anima mutuari? Si viuit, iam habet animam. Nouæ igitur quotidie animæ à nobis hauriuntur ad nostræ huius animæ nutrimentum. Transiit autem semper alimonia in eius naturam quod alitur. Itaque multæ quotidie animæ à natura perdentur, vt vna seruetur anima, quod bonitas naturæ non patitur. Imò verò neque prior anima nostra seruiabitur, si substantia sua assidue subterfugiat, vnde nouas animas cogatur sibi semper addiscere, per quas anima iugiter innouetur. Verùm quonam pacto recens anima cum priore consentit? Quomodo si continuè effluit aliquid ab anima nostra, & influit in animam alimentum, sicut fieri in carne videmus, manet voluntas eadem in plerisque semper, idem mos, opinio eadem & scientia, perpetuaque eiusdem rei memoria? Quomodo post decennium agnoscimus illa statim visa quæ ante decennium videramus, nisi earundem rerum nobis acceptæ quondam incolumes adhuc seruentur imagines? Quis eas seruat nisi idem qui acceperat & indicauerat animus? Quo pacto seruat, si non seruetur? Qua ratione non stante ani-



mo stabunt imagines & scientiæ? Neque dicat quiquam stare diu animum, si corpus fuerit. Quod enim corpus sub cælo manere in eodem statu potest diu, cælo ipso tam celeriter percurrente? Proinde si corpus aliquod tale sit, ut maneat aliquantum, corpora tamen subtilia & agilia minimè omnium permanebunt. Anima verò si corpus sit, tenuissimum sit oportet, ut visceribus suffusa facillimè cuncta viuificet. Ideo & ossa & nervi diutius consistent quàm anima, imò etiam caro, quæ tamen breui tempore labitur, & renouatur indies. Erat autem anima status alicuius instar, instabilis prorsus, & momentis singulis euanescent, quapropter neque diem quidem vnum scientias rerum imaginesque seruabit. Idem quoque patietur si anima qualitas sit & complexio aliqua humorum atque membrorum. Pariter enim qualitas fluit & humor, atque in ipsa nutritione anima effluet refluatque sicut corpus, neque constabit animal secundum formam magis quàm secundum materiam propriam. Neque seruabitur innumerabilis vnitas animalis, neque continuatio motionis nutrimenti aut augmenti. Neque erit in animali vis aliqua horum motuum ordinatrix, quæ ita sibi ipsa constet, ut & ordinem ipsis progrediendi, & terminum imponat progressionem quousque nutriri oporteat vel augeri. Necesse est enim rectorem illum in se consistere, qui ordinat sistitque mobilia. Obiiciet fortè aliquis ita: Videmus in corpore nostro figuram eandem diutissimè permanere, licet caro labatur & refluat. Similiter ergo quid prohibet in anima easdem rerum cognitarum imagines permanere, licet animæ substantia ex vetere mutetur in nouam? Respondemus, neque eandem prorsus manere figu-

ram, neque penitus similem, sed priorem frequenter abeunte carne abire, & in carne recente nouam priori quodammodo similem reficit, idque fieri à quodam artifice stabilissimè interitus fabricante, qui cum maneat semper idem, habeatque in se membrorum familiaris corporis disponendorum rationes & semina, potest nouis humoribus quotidie influentibus complexionem similem ac prioribus tradere, & recenti carni similem ac veteri præbere figuram non aliter quàm vultus, qui flumen à supernè despiciens, fluentes vndas nouasque quolibet momento nouis imaginibus sui depingit, ita ut idem in variis vndis vultus persistere videatur. Intimus autem ille faber corporis atque stabilis, anima est, quæ si & ipsa fluat, certè neque similes corpus præ se diu feret effigies & figuras, neque anima scientias similes retinebit quia tunc neque ipsa visa eas tenebit, neque aderit illi aliquis qui aut stabiliat illas in animo, aut similes prioribus alias generet. Non enim dicendum est, quando anima imaginem rei possidens, effluit, eandem influenti animæ imaginem seipsam insinuare, quia nequit qualitas vlla in subiectum nouum de vetere subiecto transire, neque etiam euanescent illa prior anima imaginē aliam siue similem in animā veniente figurat. Figurare enim cum sit actio, perfectū requirit agentem. Illa verò anima dum interit, deficit quidem ipsa, neque potest tunc animam nouam perficere. Formare verò seipsam anima noua nequit, eo præsertim ipso momento quo nascitur, quia ipsa etiam tunc est imperfecta. Quocirca vilo modo potest animarum earum quas olim nouit imagines scientiasque tenere memoriter, si corporis & qualitatis instar effluat paulatim, & influat.

# THEOLOGICÆ PLATONICÆ,

DE IMMORTALITATE ANIMORVM,

EODEM FICINO AVTHORE,

(::)

LIBER VII.

(::)

*Anima non est corpus aut forma diuisa in corpore, aut talis forma punctum aliquod, sed est forma in qualibet parte corporis tota, vt ostenditur per potentiam sentiendi. Prima ratio. Corpus non capit imagines aptas ad sensum.*

(::)

CAPVT PRIMVM.

(::)

**N**Escio quo pacto in superiori argumentatione incidimus in secundam disputationis huius partem, in qua probaturi sumus propositum nostrum per potentiam sentiendi. Sic igitur hanc partem vltius prosequamur. Corpus si quando suscipit quicquam, modo suscipit corporali, partes videlicet rei in suis partibus, neque potest rem maiorem quam sit ipsum capere, quemadmodum cera à sigillo figuram suscipiens, nunquam ampliorem figuram quam ipsa sit accipit. Quod si haberet cera sensum, quo figuræ magnitudinem iudicaret, tantam planè iudicaret, quantam haberet. Neque potest aliam rursus figuram accipere nisi vel amittat priorem, vel vtrasque ita in se confundat, vt vix inuicem discernantur. Sic anima si corpus sit, per oculum corporum imagines modo suscipiet corporali, ita vt imago Platonis in oculo Socratis non maior sit quam Socratis oculus. Ita Socratis anima non maiorem putabit esse Platonem, quam suus sit oculus, vel certè non maiorem quam sit cerebrum in quod ab oculo transferetur imago. Tandem non maiorem quam sit Socratici corporis magnitudo. Anima enim Socratis si magna est, non est suo corpore maior. Ideo si in se to-

ta Platonis imaginem suscipit, non maiorem suscipit, quam sit ipsa, quapropter nihil vnquam maius existimabit esse Socratico corpore. Quin etiam quando Xenophontis & Alcibiadis & Phædri imagines accipit, tunc vel amittit Platonis imaginem, vel ita habet cunctas deinde confusas, vt alium illorum ab alio non discernat. Conclude etiam ita: Anima vel solidum corpus est, vel fluxum. Si solidum, vix à corporibus figuratur, peritque docilitas & acumen, atque vna vnus rei accepta figura, vel alias non capit, vel si alias post alias coeperit, cunctæ inuicem obfuscantur. Si labile corpus est, nullas tenet figuras, nullamque prorsus habet memoriam. Præterea nonne constat rem eandem in specillo paruo paruum videri; in maiori maiorem? ceu si vultum tuum in mea pupilla prospexeris, deinde in speculo, hic exiguum, illic ingentem pronuntiabis. Nam pro speculorum ipsorum magnitudine & paruitate maiora vel minora corpora iudicantur. In anima autem hominis corporum penè omnium lucet imagines, per quas anima corpora quanta sunt iudicat, nullumque est tam ingens, tam immensum corpus, quod ipsa vel intueri, vel excogitare non possit, semperque aliud corpus ultra excogitato corpore maius. Ex quo apparet nullum es-

se animæ præscriptum magnitudinis terminum, tum quod ad illa quæ comprehensura est, tum quod ad propriam spectat animæ ipsius substantiam. Si quam enim haberet in se propriam magnitudinem, tanta esset præcipuè, quanta est proprii corporis magnitudo. Vnde in tam pusillo animali speculo non possent res tam variae, tam perspicuae, tam immensæ lucere, cum pro diuersa speculorum quantitate maiores minoresue soleant apparere. Non tamen putare debemus spiritales colorum imagines vel à corporibus fieri, vel suscipi in speculis atque cerebro. Ipse enim nihil aliud sunt quam splendores luminis corpora verberantis. Id autem visibile lumen licet emicet in corporibus, fit tamen atque seruatur ab inuisibili lumine cœlestium animorum, quod ex ingenti copia exuberat foras, euaditque perspicuum. Corporibus quidem nullis affigitur, potest tamen luci nostri spiritus, quæ à nostra anima pendet, coniungi, eique suos splendores offerre. Significationes præterea vocum ad auditum peruenientes, quæ ipsæ quoque spiritales sunt, neque à corpore fiunt, neque figuntur in corpore, sed ab anima transmittuntur in animam, atque animarum virtute fiunt & conseruantur. Verum superiorem disputationem hac diuisione breuiter concludamus. Si anima sit aliquid corporale, vel simulachra corporum eius faciem attingent, sicut speculum, vel eorum qualitates in profundam animæ substantiam penetrabunt, sicut in aquam sapores atque odores. Si primum contingat, corpora forsitan præsentia sentiemus, sed non poterimus absentia cogitare, nam simulachra non seruabimus. Sin alterum fiet, sensus gradatim semper & cum corporis passione, similiterque memoria, & qualitates sine discretionis iudicio inuicem confundentur.

*Secunda ratio. Oportet quinque sensus ad vnum centrum conduci.*

## C A P V T II.

**V**isus colores attingit non voces, auditus voces duntaxat, olfactus odores. Animus colorem, vocem, odorem, ita inuicem comparat, aut aliud colorem esse quàm vocem, & alia similiter iudicat. Illa vis per quam ita iudicat animus, cognoscit tum colores, tum voces, & alia quæ inuicem comparat. Quomodo enim diceret colorem aliud esse quàm vocem, nisi simul vtrumque cognosceret? Quænam illa vis est? Visusne? Minimè. Non enim voces a-

gnoscit. Ita neque auditus, qui colorum ignarus est, neque vnus aliquis omnino quinque sensuum? Quisque enim illorum vnum quiddam nunciat solum, neque potest est plura inuicem comparare. Vis vna certè illa est interior animæ, ad quam velut centrum, à quinque sensuum instrumentis circumpositis vndique varia nunciantur, illa verò vna omnia illorum quinque sensuum obiecta & operationes diiudicat. Neque dicas duas aut plures esse animæ vires internas, per quas anima illa comparat. Sint enim si vis, geminæ vires. Responde igitur, quoties anima calorem ad vocem comparatura est, vtrum per vtramque vim apprehendat vtrumque, colorem scilicet atque vocem, an per alteram alterum? Si vtraque vis apprehendit vtrumque, quid opus est viribus geminis? cum vnà sufficiat ad comparationis opus, & tantumdem faciat vna, quantum ambæ. In necessariis rebus natura non deficit, superfluous non abundat. Sin per alteram vim alterum tantum noscit, per neutram inuicem comparabit vtrumque. Tamen per vim aliquam comparat. Est igitur alia quædam vis præter geminas illas antè confictas, per quam anima plura illa comparat inuicem. Vtrum vis illa vna indiuisibilis sit, an corporis instar in plures partes diuisa, puta vtrum sit vis illa tanquam punctum aliquod indiuiduum quod a, vocetur, an linea quædam ab a, in b, protracta? Si dixeris eam esse lineam ab a, in b, talem a, b, quæram abs te hunc in modum. Quoties anima colorem ad vocem per huiusmodi lineam comparatura est, certum est quod vtrumque istorum eam tangit lineam. Vtrum igitur color solum caput lineæ quod est a, attingit, ad b, non peruenit? Et vox solum b, lineæ finem tangit, ad a, non transit? An potius ambo tam color quàm vox ad ambo simul, tam scilicet ad a, quàm ad b, veniunt? Si primum concesseris, scilicet, quod alterum tantum venit ad terminum lineæ alterum, profectò duo illi termini, duæ à se inuicem erunt distinctæ vires, quarum vtraque quod suum est agnosceret, alterum ignorabit, ideo per neutram vim illa animus comparabit. Sin concesseris ambo illa ad terminos ambos concurrere, ita vt vis vtriusque termini ambo persentiat, vna illarum sufficit, vacat altera, quandoquidem nihil plus vires ambæ quàm alterutra faciunt, imò verò duæ vires erunt indiuisibiles ambæ. Ita cogimur confiteri vim illam animæ vnâ per quam plura diiudicat, non esse partibilem. Igitur vis illa magistra sensuum, neque corpus est, neque qualitas diffusa per corpus. Si talis est

animæ vis, quid prohibet animam esse talem? Nisi forte putes substantiæ alicuius vim substantia sua esse nobiliorem.

*Tertia ratio. Quo angustior sensus est, eo est perspicacior.*

### C A P V T III.

**P**rofecto, oportet imaginem visibilis corporis ad aliquid impartibile colligi: quod & in ipsis fit pupillis. Alioquin ingentia corpora, atque cælum ipsum per tam minimam pupillam non cerneremus. Quod si quantum ad oculum spectat, ut cernat acutius, ampliore quantitate opus non est, imò parvissimi oculi acutius inspiciunt quàm amplissimi, ut oculi aquilæ quàm bovis, quasi visum non modò non iuvet, sed impediatur magnitudo, si, inquam, exterior acies magnitudine ad percipiendum minimè indiget, quid de illo interiori visu & communi sensu dicimus? Qui quanto singulis sensibus est præstantior, & acutior, tanto etiam debet sufficientior esse, erit autem sufficientior, si nulla indigeat corporis quantitate. Denique & ipsa animæ substantia sensuum fundamentum, erit omni sensu sufficientior, si quantitate non egeat. Quis eam dixerit quantitatibus dimensionibus indigere, cum neque conducatur ad animi dotes corporis magnitudo, neque noceat? Si conduceret necessariò, non esset apis oue solentior, vulpes astutior sue, simia ingeniosior asino, leo boue audentior. Sin necessariò noceret, non esset elephas prudentior equo, canis agno sagacior. Quod si ad has animæ vires quæ versantur circa corporum quantitatem, nihil valet corporis quantitas, multo minus eam valere putandum est ad eam vim animi quæ transcendit corporum quantitatem, ad rationem scilicet, quam suo loco tractabimus.

*Quarta ratio. Si sensus diuiduus sit, in eo imago sensibilis diuidetur.*

### C A P V T III.

**E**sto, si vis, intimus ille visus corporeæ mole distentus, quid inde sequatur, attende. Cum coloris extremi capit concipere imaginem, suo modo accipit, atque corporeo: Imago huiusmodi per partes huius visus diuiditur, & alia pars visus aliam coloris aspicit partem, nec erit in nobis aliquid quod totum colorem

visibilem comprehendat. Oportet tamen vnâ rei vnus comprehensionem ab vno fieri comprehendente. Ac si dixeris vnum ipsum comprehendens esse formam quandam totius compositi, cunctis communem partibus, quæremus nunquid diuidua sit: vnde quæstio redibit eadem, an indiuidua, vnde comprehensionem in vi indiuidua collocabimus? Oportet igitur sensum esse magnitudinis corporalis expertem, præsertim quia si magnus sit, paruis non congruet, neque sentiet illa totus, sed pars eius ipsa quæ paruis æquatur. Si paruis, magna non capiet, si medius, non quadrabit extremis. At tu si vis sensibilem colorem, vnam eam sensu partiri, quonam pacto distribues? An æqualem æquali aptabis? Sed non potes. Non enim æqualis est sensus rei cui libet sentiendæ. In quot autem partes vtrumque distribues? Num in quasdam partes numero quidem terminatas, & naturali ordine minimas? Quod si feceris, non inuenies vnâ rei vnus comprehensionem. Sed more Mathematicorum in omnes quas habent, puto te partiturum. In particulas igitur infinitas tam visum quàm colorem secabis, & visus partes singulæ singulas coloris sentient portiones. Itaque innumerabiles ibi erunt visus, innumerabiles visi colores, innumerabiles visiones. Atque ita nunquam poterit color vnus visum incurtere, quin eodem illo momento infiniti visus infinitos colores videant infinitè. Quod ne fingi quidem potest. Foras, ut hæc monstra vitemus, subiciemus totum illum visum sentire, partes eius nequaquam. Sed hoc etiam rememoremur. Quo enim modo quæ sensu carent, sentientem substantiam generabunt? nullo. Igitur neque partes illæ sentiendi expertes sensum ipsum constituent. An dicemus singulas partes visus sentire, sed per eandem totius visus & integræ visionem, ac sentire speciem totam, partesque cum tota? Non Primò, quia species non videtur, sed color ipse per speciem. Deinde quia operatio quæ fit ex congregatione partium distinctarum, fit quoque per congregationem momentorum, ac transigitur paulatim, sensus autem fit subito, quod significat sentiendi vim esse indiuisibilem.

Denique si pars quæque visus per se sufficit ad videndum, quid opus est pluribus? Si non sufficit, ex non sentiente fit sentiens. Nisi forte partes illæ congregentur in vnâ superiore aliquo sentiente. At il-

Ind erit anima potius atque sensus. Quapropter nunquam deliras responsiones effugiemus, quamdiu sensum esse partibilem affirmabimus. Sit ergo impartibilis sensus, sit & anima talis, quæ fons est indiuisibilis virtutis atque subiectum.

## QVINTA RATIO.

*Anima sentit ubique tota.*

### CAPVT V.

**A**N ignoras partem corporis alicuius ipsi toti æqualem esse non posse, atque ideo formam, quæ talis est, ut per diuersas partes corporis protendatur, in qualibet corporis parte totam existeri non valere? alioquin toti pars foret æqualis. Admitto ista. Quid tum? Nempe anima cuiuslibet parti corporis adest tota, quia tota sentit cuiuslibet corporalis particulæ passionem. Nam si aliquo offensus casu pes doleat, statim illuc aduertitur oculus, admoventur è vestigio manus, os clamat, & reliqua membra ferè similiter. Quod certè nunquam fieret, nisi id quod ipsius animæ inest partibus corporis omnibus, etiam in pede sentiret. Atqui sentire quod ibi factum est, ab ens non posset. Neque enim nuncio a quo credendum est id fieri non sentire quod nunciat, quia quod non sentit, non nunciat. Neque passio quæ fit per continuationem molis, semper potest occurrere, ut cæteris animæ partes quæ alibi sunt, latere non sinat, quia non semper fit dolor ubique. Sed illud tota sentit anima, quod fit in pedis particula, & ibi tantum sentit, ubi fit. Tota igitur singulis partibus simul adest, quæ tota simul sentit in singulis. Formæ autem sparsæ per corpus, puta albedini, idem in hoc accidit quod & corpori, ut videlicet passio vnius partis non necessario reliquas partes omnes commutet. Quid enim prohibet vnâ corporis albedinisque partem infici & fœdari reliquis non pollutis? Cæterum nihil in vna quauis particula animalis accidit, quin id ad totam mox pertineat animam. Mystrium hoc Platonium Augustinus noster ita confirmat. Anima per totum corpus quod animat, non locali diffusionem, sed quadam vitali intentione porrigitur. Nam per omnes particulas tota simul adest, nec minor in minoribus, nec in maioribus maior, sed alicubi intensus, remissus, & in omnibus tota, & in singulis tota est. Neque enim aliter quicquid in corpore etiam non in toto sentit, tamen tota sentit. Nam cum exiguo puncto in carne vnâ aliquid tangi-

tur, quamuis locus ille non solum totius corporis non sit, sed vix in corpore videatur, animam tamen totam non lateret. Neque id quod sentitur, per corporis cuncta discurret, sed ibi tantum sentitur ubi fit. Vnde ergo ad totam mox peruenit, quod non in toto fit? Nec ut tota ibi sit, cætera deserit. Viunt etenim illa ea præsentem ubi nihil tale factum est. Quod si fieret vtrumque simul, vtrumque totam pariter non lateret. Hæc Aurelius. Verum dices fortasse animam quidem ita per vniuersum corpus portectam, ut pars eius in pede sit, pars in crure, alia in femore, pectore, collo, summa in cerebro, ubi fiat iudicium principale, ac dolore pedis non ideo iudicari à vi animæ quæ sedet in cerebro, quia illa vis adfit & pedi, sed quoniam successione quadam altera pars animæ alteri ad cerebrum vsque passionem pedis enunciat. Profecto non negabis partes istas animæ inferiores sentire, cum euidenter appareat in membris illis percipi passionem. Si enim pedis passio fit cerebro nuncianda, vel ex eo nunciatur, quod gradatim membra intermedia patiuntur, vel ex eo, quod licet non patiantur, sentiunt tamen dolorem pedis, eumque cerebro referunt. Certè non semper totum patitur æquè, nec idem in mediis membris, qui in pede est cruciatus, sed molestia quadam cruciatus illius perpensio. In omnibus igitur molestia quædã inest & sensus. Quid hinc sequatur, aduerte pars animæ quæ in pede est, cruciatum sentiet pedis, pars quæ in cruce non pedis, sed cruris molestiam sentiet (ibi enim sentit solum ubi est, & passionem sentit solummodo quæ in eam incurrit) Pars quæ in genu præsentem similiter tantum percipiet passionem, cæteraque similiter. Post omnes vis illa iudiciaria cerebri præsentem sibi solum molestiam animaduertet. Partes animæ à pede ad cerebrum, sicut & corporis, ferè innumerabiles sunt, si & ipsa sit corporalis. Ergo semel offenso ad lapillum pede, non fiet vnus sentiendi actus & subitus, sed multi gradatim & innumerabiles penè contingent dolores, sicut præceptiones innumerabiles, post omnes autem animæ partes (quod nefas est) sentiet illa in qua principalis est sensus. Sentiet autem non pedis passionem, sed suam solummodo, neque iudicabit vnquam ubi sit læsio, ubi sit succurrendum, neque per eius imperium membra corporis conuertentur ad pedem.

Ut hæc absurda vitentur, fatendum est totam vim illam iudiciariam animæ vnâ cum tota animæ ipsius substantia singulis membris esse præsentem, ut quicquid ubi-



que fit, statim sine intermuncio tota præsensiat, tota sibi met compariatur & consonet, cunctas animæ vires, cunctas etiam partes corporis imperio subito ad medellam læsæ partis adhibeat. Atque ita quicquid & quantumcunque animæ est in membris ullis, ab alio quouis membro non abest, quia in quouis ad quodlibet admouet quælibet. Corpus & forma per ipsum fusa, eiusve punctum talia non sunt, ut in multis sint tota simul, & secum ipsis in suis partibus absque mora prorsus compatiuntur, atque concurrant. Est igitur anima ab iis longè diuersa. Neque nos turbent animalia multa, quorum corpora cum iecantur, vtraque frustra mouentur & sentiunt, quasi anima ita longa fuerit sicut corpus, postquam dum corpus secatur in corpora, anima quoque secari videtur in animas. Non enim diuiditur anima primo, sed interit, cum primum illa ipsa corporis compago resoluitur, cui fuerat attributa. Fiunt autem subito nouæ animæ à vita mundi in frustis illis ad animam suscipiendam idoneis. Talis enim illorum natura est qualis fuerat & totius. Et quia animæ tales ita viles sunt, ut paucissimas vires operationesque habeant, ideoque paucissimis egeant instrumentis, factum est, ut corpus illis sufficiat, etiam si non sit variis instrumentis instructum, quod non sufficit perfectioribus animabus, quæ ob hoc in singulis membris viuunt. Si lignum aliquod secetur in puncto, punctum hoc, licet indiuisibile sit, perit tamen, ac in duobus frustis duo extrema videntur puncta renasci. Si speculum fregeris, in quo tui vultus apparebat imago, non conciditur imago primo, sed abit, ac duæ à te pro vna imagines in duobus speculis recreantur. Si nomen hoc Lucifer, in quo vox locum tenet corporis significatio animæ, in duo membra diuiseris quasi animal luci, & fer, cessat primum illa significatio per quam Venus designabatur, non tamen diuiditur (est enim indiuisibilis significatio nominis, ut aliàs ostendemus). Adhuc tamen duæ quædam sunt in duabus partibus significationes, per quas tanquam animas dictiones huiusmodi superuivunt, luci, per lucis significationem, fer, per significationem aliquam læsionis. Quid igitur prohibet quo minus reptilia animam habeant secundum Platonicos indiuiduam, quamuis membra diuisa viuant?

*Sexta ratio. Anima non necessario patitur sentiendo.*

## CAPUT VI.

**A**nima ipsa (ut vera Philosophia docet) cum sit purissima, crasso huic & terreno corpori ab ea longè distanti non aliter quàm per tenuissimum quoddam lucidissimumque corpusculum copulatur, quem spiritum appellamus, à cordis calore genitum ex parte sanguinis tenuissima, diffusum inde per vniuersum corpus. Huic anima sibi cognatissimo facillè se insinuans, primum quidem per hunc totum se fundit spiritum, deinde hoc medio per corpus penitus vniuersum, vitam primum huic præstat & motum, facitque vitalem, perque hunc regit mouetque corpus, & quicquid à corpore in hunc spiritum permanat, anima ipsi præsens continuò percipit, quam perceptionem sensum cognominamus. Deinde hanc perceptionem animaduertit & iudicat, quam animaduersionem phantasiam esse volumus. Quorsum hæc? Quando secat Medicus cutem corporis extimam, frangitur caro, dissoluitur & contrahitur spiritus, sentit hæc omnia tactus, qui per omnia membra vniuersalis est animæ sensus, iudicat hæc, & condolet phantasia. Quomodo potest discindi caro, quin spiritus illi suffusus, partim cum soluta carne soluatur, partim etiam in seipsum fugiens contrahatur? Quo etiam pacto solutio & contractio spiritus latere suam animam poterit? Ac si non latet, cur non molestè ferat anima operis sui perniciem? Spiritus quidem & corpus, opus est animæ, opus verò proprium omnia diligunt. In carne quidem est passio, cruciatus in spiritu, sensus in tactu, compassio & condolentia (ut ita loquar) in phantasia. Complectere paucis: tam in carne quàm in spiritu, perniciofa quædam sit substantiæque corruptrix solutio vel contractio, hanc vocemus noxiam læsionem. Nunquid etiam in animam læsio transit huiusmodi? Minimè. Hæc enim substantiam perdit, perdit igitur substantiæ ipsius virtutem, perdit deinceps virtutis operationem. In qualibet igitur carnis & spiritus vel leuissima læsione, animæ substantia illis præsens similiter læderetur, læderetur & virtus multo magis, læderetur & operatio. Sensus & phantasia, vires animæ sunt, sentire & iudicare per sensum, harum virium actiones. Ergo si discissio illa in animæ substantiam pertransiret, neque sentiremus eam, neque qualis sit & vnde, & quomodo succurrendum iudicaretur, sed vel lateret animam

penitus, vel minimum quid præciperetur, & falso iudicaretur ab anima. Et cum anima sit vbiq; tota, si ipsa in parte corporis lecta patitur, tota patitur. Eadem verò tota anima quæ ibi est, est & per totum corpus, per totum igitur corpus patitur. Si vbiq; patitur, non potest percipere & nunciare passionem illam in parte vna animalis magis quàm in alia esse. Quinetiam cum aliud sit passio, aliud iudicium passionis, & passio semper iudicetur ab alio, si in ipso iudicio insit passio, opus est vltèrius alio quodam iudicio, quo passium iudicium iudicetur. Si illud quoque sit passium, rursus opus est alio. Quapropter veniendum denique est ad iudicem quendam liberum passionis. Hic dum iudicat corporis passiones, si accipit inde qualitatem aliquam corporalem, proculdubio patitur. Si non accipit, non formatur à corpore. Sit ergo oportet talis iudex, vt neque passiones accipiat à corporibus, neque formas. Non posset autem anima talis esse, si ipsa vel corpus esset tenuissimum in hoc corporemersum, vel aliqua corporis huius affectio, siue punctum quoddam affectionis. Platonica hæc ita Augustinus Plotinusque comprobant. Videtur mihi anima cum sentit in corpore, non ab illo aliquid pati, sed in eius passionibus attentius agere. Et has actiones, siue faciles præpter conuenientiam, siue difficiles propter inconuenientiam, non eam latere. Et hoc totum est quod sentire dicitur. Sed iste sensus, qui etiam dum nihil sentitur, inest tamen, quasi per instrumentum est corporale, quod ea temperatione agitur ab anima, vt in eo sit ad passiones corporis cum attentione agendas paratior, similia similibus vt adiungat, repellatque quod noxium est. Agit porro ( vt opinor ) luminosum aliquid in oculis, æreum serenissimum & mobilissimum in auribus, caliginosum in naribus, in ore humidum, in tactu terreum & quasi lutulentum. Agit autem hæc omnia cum quiete. si illa quæ sunt in animali, in vnitare vilitudinis familiari quadam consensione cohæserint. Cum autem adhibentur ea quæ nonnulla ( vt ita dicam ) alteritate corpus afficiunt, agit attentiores actiones suis quibusdam locis aut instrumentis accommodatas, & tunc sentire dicitur. Quibus actionibus congrua libenter associat, & molestè obfistit incongruis. Has operationes passionibus corporis puto animam exhibere cum sentit, non easdem passiones recipere. Cum æreus auris spiritus verberatur sono, anima quæ ante percussionem huiusmodi in silentio corpus aurium vegetabat, vegetat tunc attentius, idque fa-

cere est non pati. Attentior operatio non latet animam operantem. Non latere, sentire est. Summatim, sensus est aut animaduersio operationis illius attentioris, aut iudicium corporeæ passionis & qualitatis, excitatum ab attentiore illa animæ actione.

*Septima ratio. Rationes propria per naturalem & sensitiuam anima, quod anima non sit forma diuidua, quia qualitatis opus vnum est.*

## C A P V T VII.

**E**T si superioribus rationibus non modo animam corpus non esse probauimus, verum etiam neque sparsam per corpora formam, tamen propriis argumentationibus secundam hanc partem ostendendam fore putamus. Atque vt commodius hæc de re loquamur, formam talem ( vt diximus aliàs ) tum qualitatem, tum affectionem corporis, Platoniorum more vocabimur. Si anima esset qualitas corporalis, vel esset simplex qualitas, vel complexio, vel forma istis astricta. Simplex esse non potest. Quælibet enim simplex qualitas, aut forma illam sequens, ( vt aliàs declarauimus ) vnum quiddam facit duntaxat, ad opposita non extenditur, anima plurima, & contraria. Neque etiam erit complexio, aut forma sequens complexionem, quoniam in hac semper vna quædam præ cæteris qualitas dominatur, cuius operatio ante alias viget in corpore. Anima nulli qualitati, nulli proprio motui est astricta.

*Octaua ratio. Complexio agit per vnam qualitatem.*

## C A P V T VIII.

**A**ctio complexionis eiusque formæ, semper per qualitates, ex quibus ipsa est conflata, peragitur, ideoque nunquam aliquid tam sublimè complexio operatur, quin ad illud qualitatatum se vires extēdant. Caloris opus est penetrare atque dissolvere, animæ autem nutritiua potentia per calorem instrumentum non dissoluit tantum cibos, ( quod ipsius caloris est proprium ) sed etiam concoquit digeritque, & ad formam vitæ carnis & figuram humanam perducit, quæ quidem actio caloris excedit potentiam. Augmentum quoque animalis à colore prouenire non potest tanquam causa principali, non enim fit nisi per nutrimentum, & cum ad certum terminum magnitudinis perducatur, certamque figuram,

calor autem, si detur materia, sine certo termino vel figura se fundat, cumve oporteat terminum figuramque operi à principali agente præscribi, constat principalem augmenti fabrum calorem esse non posse, imò neque aliam ullam accidentalem formam id posse facere, si non potest calor, qui est omnium præstantissimus. Fit tamen augmentum ab anima. Ex quo concluditur animam non esse formam accidentalem, quod sæpissimè nobis est probandum. Concluditur etiam non esse eam ex formis accidentalibus constitutam, quia non posset qualitates quæ absque certo termino, gradu, proportionem, figura vagantur, adhuc ipsa rationaliter ordinare. Concluditur postremò, animam non esse substantialem aliquam formam elementi vel mixti. Talis enim formæ motus ad unicum dirigitur terminum, sicut diximus, augmentum verò in quamlibet partem æquè porrigitur.

*Nona ratio. Complexio est accidentalis forma.*

## C A P V T IX.

**C**omplexio, natura quædam est ex contrariis quodammodo qualitibus constituta, quæ inter eas quasi medium obtinet. Ex quo fit, ut forma substantialis esse non possit, quia non in se subsistit, sed in eo corpore quod est contrarium illarum qualitatum subiectum, quæ quia inuicem pugnant, sese inuicem non suscipiunt, verum susceptæ, à materia, & inuicem mixtæ, complexionem generant. Hæc igitur complexio tum ex eo quod dixi, substantia non est, tum eo quod aliquid sibi habet contrarium, puta excessum alicuius extraneæ qualitatis, conflationem suam diffociantis. Præterea, suscipit magis ac minus. Intenditur enim ac remittitur natura, vis operatioque complexionis. Substantia verò neque habet proprium sibi contrarium, cum consistat in alio genere, quàm substantiæ ipsa rerum contrarietas, hoc est in genere qualitatis, neque in natura sua aut in magis intenditur, aut in minus remittitur, ut nunc magis nunc minus hæc aut illa substantia sit quod est semel substantia, hoc est magis minusve lapis iste quàm ille. Cum igitur complexio non sit substantia, anima si substantia sit, non est complexio. Quod autem anima sit substantia, hinc etiam patet, quia per eam animal certam aliquam & substantialem sortitur speciei generique naturam atque cognomen.

Per hanc animam hoc quidem canis est, per illam illud equus, per aliam illud homo. Illa quidem qualitas quæ accidens est, subiecto suo aduenit postquam illud in specie sua iam est perfectum. Anima verè suum ipsa sibi fabricat corpus, factum seruat, & dum deficit, reficit, pugnantia elementa connectit in vnum. Anima abeunte labitur corpus, neque prior complexio, aut species retinetur. Talis quidem necessario est anima nutritiva. Neque dicendum est animam illam quæ solum nutritiva est, corpus ita construere, cui postea iam perfectò anima sensitiva tanquam accidens quoddam adueniat. Nam corpus animæ sensitivæ congruum, instrumenta sentiendi & progrediendi oportet habere. Anima quidem nutritiva quantum talis est, sola instrumenta faciet nutriendi, alia verò instrumenta faciet anima, alia propter eas vires quarum usus instrumenta sunt seruitura. Neque sunt in eodem corpore duæ quædam animæ quarum una instrumenta fabricet alteri. Si quidem quæ nutrit, est eadem & quæ sentit. Quippe sensum perturbationes opus impediunt nutriendi vel augent. Tristitia enim phantasie illud debilitat, lætitia roborat. quasi una sit anima in homine, cuius utraque sint officia. Quæ ideo substantia est, quia est artifex corporis, non pedisequa. Igitur non est complexio.

*Decima ratio. Harmonia complexionis nihil agit in corpus.*

## C A P V T X.

**N**eque liceat Aristoxeno aut Musicis aliis somniare animam esse harmoniam quandam, ex ipsa complexione progenitam. Sic enim anima similiter esset non substantia quædam, sed accidens. Nonne harmonia totam vim suam trahit à fidibus? Neque quicquam ipsa per se existit, neque quicquam valet omnino in chordis efficere. Quippe non mouet ipsa chordas, sed iis aliunde motus nascitur harmonia. Anima ergo si sit harmonia humorum certo modo compositorum, tota pendebit ex illis, neque ipsa illos mouebit, sed illis ab alio agitatæ anima orietur, neque illos reget, sed ipsam illi regent & sustinebunt. Non erunt igitur motus in corpore aliqui præter humorum conditionem, non opera vlla super illorum imperium, sicuti modo sunt, ut in superioribus enarrauimus. Non figura artificiosa, non dispositio. Non repugnabit vnquam animus affectibus corporalibus, neque se vel in se reflectet, vel disiunctum

à corporeis incorporeis copulabit, neque per se aliquid operabitur, si nullo modo extiterint per seipsum. Sed de hoc aliàs diximus & dicemus.

*Vndecima ratio. In omni corpore composito est harmonia.*

## C A P V T X I.

**I**N omni corpore ex multis composito est aliqua suarum partium harmonia, per quam conspiratione mutua concinunt. Ita que si harmonia ipsa sit anima, corpora quaelibet composita ea viuent & coalescent. Dices forsitan animam esse quidem harmoniam, id est, concinnitatem & consonantiam, sed non quamlibet harmoniam, verum aliquam certo & proprio modo contemperatam. Vides non eandem esse rationem animæ atque consonantiæ, postquam non ex eo duntaxat quod res aliqua consonantia est, est etiam anima, sed ex eo quod certo modo disposita. Certum huiusmodi dispositionis modum concinnitas ipsa non ex sui natura haurit, quia esset in qualibet concinnitate. Igitur aliunde ab extrinseco ne principio? Imò verò. Cæterum extrinsecum istud non sufficit. Non enim mouet & temperat assidue & naturaliter harmoniam, quod extra ipsam est. Latet igitur in humorum consonantia vis quedam præstantior corporalis consonantiæ temperatrix, quæ in viuentium corporibus suo modo humores contemperans, ipsorum concinnitatem reddit certam, & ab aliis corporibus differentem, quæ propria consonantia vitalis harmonia est, à viuifico spiritu interius latente progenita.

*Duodecima ratio. Harmonia intelligitur aut compositio ipsa membrorum, aut aliqua compositionis ratio.*

## C A P V T X I I.

**Q**Vando animam esse consonantiam asserit aliquis, duo quædam posse illum arbitrari intelligere, aut compositionem ipsam humorum membrorumque, aut compositionis ipsius aliquam rationem. Anima profectò non est compositio, quia oportet et quamlibet animæ partem esse partem aliquarum corporis compositionem. Quod planè quomodo fiat, assignare non possumus. Compositio quidem corporis Phisicis manifesta est, anima verò ignota. Et quomodo ex suis viribus scilicet intellectu, sensu, appetitu, & reliquis componatur,

difficile est cognitu. Difficillimum rursus, quomodo vires singulæ componantur. Præterea compositio nihil est aliud quam vnio plurium, plura verò non vniuntur nisi ab vno. Ab vno, inquam, quod insit pluribus, ut ab intimo coagulo conglutinentur. Illa igitur vna vis insita membris, à qua vnio membrorum, anima ipsa est potius quam vnio inde profecta. Neque etiam compositionis ipsius est ratio. Cum enim diuersis corporis membris diuersæ insint compositionis rationes atque proportioniones, singula membra singulas animas possiderent, aliam quippè animam os, aliam neruum, caro aliam, similiterque de cæteris, siquidem membra ista sunt diuersa inter se proportionione composita. Vnius verò animantis vitam vniam assignare nequaquam poterimus, nisi vnicam illi formam, motorem vnum atque rectorem, id est, vniam animam tribuerimus. Cernimus etiam consonantiæ rationem qualitatibus corporis magis quàm animæ conuenire. Sanitas, humorum est consonantia, robur, consonantia ossium atque neruorum. Pulchritudo, quodammodo membrorum, atque colorum. Sensus autem & intellectus, qui actus simplices sunt, nescio quales, & cuius sint harmoniæ. Quando substantiam rei cognoscimus, facile inde possumus de accidentibus iudicare. Igitur quia cognita humorum membrorumue proportionione, facile de his iudicamus quæ ad sanitatem, robur, & pulchritudinem attinent, patet tria hæc in illorum proportionione consistere. At verò quia tali quadam proportionione inuenta, nondum tamen vires, affectus, actus, habitus animæ clarè discernimus, constat substantiam animæ in ea proportionione nequaquam consistere. Quis enim illa reperta statim sentiendi & intelligendi naturam reperisse inde se iactet? Cognoscit horum naturam Aristoteles melius quàm Hippocrates, illorum verò proportionem diligentius Hippocrates considerat.

*Decimatertia ratio. Harmonia humorum nihil capit absque materia.*

## C A P V T X I I I.

**Q**Uicquid aliquid efficit, eo quod ab ipso fit, esse debet præstantius. Quod quid à materia liberius est, eo est & sublimius. Quare semper debet causa esse à materia liberior quàm effectus. Nullus itaque effectus potest esse à materia quam causa sua liberior. Vis nutriendi à materia admodum libera est, quæ plurima &

super & præter ordinem elementorum operari demonstrata est aliàs. Vis sentiendi etiam magis est à materia libera, quia in ipso suo sentiendi actu formas rerum accipit absque rerum ipsarum materia. Non enim visus colorem parietis cum pariete simul accipit, sed coloris attingit imaginem spiritalem. Multo magis intelligentia idem facit, ut in sequentibus apparebit. Quoniam igitur hæ vires animi multum sunt à materia liberæ, nequeunt ab ea causa proficisci, quæ sit materia vel immersa materiæ. Humores omnino corporales sunt, quamobrem nullo modo humores possunt sua quadam mixtione, vel consonantia vires huiusmodi procreare, multo minus animam ipsam virium huiusmodi fontem. Quippe si anima in humorum qualitatibus substantiam habeat, quicquid capiet, per humorum affectiones suscipiet. Per eas verò formæ solum corporales suscipiuntur. Siquidem per caliditatem siccitatemque non ignis imaginem spiritalem accipiet, sed ignis substantiam corporalem. Rursus per frigus siccumque ipsam accipiet terram. Ipsa quoque terra, quoniam similiter accipiet atque anima, similiter sentiet. Idem faciet lapis, & reliqua.

*Decimaquarta ratio. Qua magis concinit, magis est harmonia.*

### C A P V T XIII.

**H**armonia ita in plurium concentu consistit, ut magis concinentibus fidibus magis sit harmonia, minus concinentibus verò minus. Anima nequissimi hominis minimè concinit se cum ipsa, dissentit enim à ratione sensus, pugnant quoque inuicem appetitus. Anima probi hominis concinit undique. Si anima sit harmonia, anima probi viri quæ concinit magis, magis est harmonia, igitur & anima magis.

Anima vita quædam est, ergo & magis vita. Viuacior itaque, audentior & robustior erit probi viri anima quàm latronis. Neque concoquet cibum latronis anima perinde ut iustiviri, neque generabit prolem, neque corporis membra sustinebit vibrabitque, neque acutè inueniet, firmiter reminiscetur, loquetur eleganter, aggredietur audacter, neque diu spirabit, & reliqua.

*Decimaquinta ratio. Harmonia nihil admittit dissonum.*

### C A P V T XV.

**H**armonia vera, ut rectius procedamus, nihil admittit dissonum, dum permanet harmonia. Si harmonia est, consonat, sin dissonat, non est harmonia. Animam vero nostram nonne videmus assidue dissonantibus opinionibus & affectibus distrahi, & nihilominus veram animam permanere, atque æquè vitalem? Neque obicias quod affectuum discordia licet non perimat animam, discordia tamen elementorum humorumque perimit. Porro si non potest animus propria intimaque dissonantia perire, alia nulla potest. Propria animi humani & intima dissonantia illa est, quæ soli & omni animo convenit, idest, opinionum affectuumque dissensio, quæ corpora vita carentia non attingit, & omnes mortalium pulsat animos. Dissensio talis eos vitæ sensusque statu non deiecit, multo igitur minus humorum discordia, quæ ab animo alienior est, animi ipsius naturalem habitum dissipabit, qui certè humoribus vel paulum dissonantibus dissiparetur, si in eorum concentu consisteret. Quamobrem nihil obstat quin partes animi corporisque longè dissonent, & anima nihilominus vera vitalisque anima perseveret, id harmonia non patitur. Igitur errabit qui dixerit animam harmoniam.



# THEOLOGICÆ PLATONICÆ,

DE IMMORTALITATE ANIMORVM,

EODEM FICINO AVTHORE,

(:.)

LIBER VIII.

(:.)

*Anima est forma individua ubique tota, & nullam trahit originem à materia, ideoque immortalis est, ut ostenditur per intelligendi virtutem. Animus per quatuor gradus ascendit ad spiritum. Prima ratio.*

(:.)

CAPVT PRIMVM.

(:.)



**T**ertiam nunc disputationis partem aggrediemur, quæ propositum nostrum ostendit per intelligendi virtutem, si prius exposuerimus quo pacto oanimus noster secundum Platoniorum sententiam per quatuor gradus cognoscendo, à corpore ascendit ad spiritum, quorum est postremus intelligentia. Ascendit enim per sensum, imaginationem, phantasiam, & intelligentiam. Per sensum quidem videt Socrates Platonem, ubi incorporale Platonis simulachrum, absque Platonis materia attingit per oculos, ea tamen conditione, ut oculus Platonem non videat aliter, quam corpore ipso Platonis præsentem. Deinde, etiam absente Platone, per internam imaginationem Platonis cogitat colorem figuramque quam viderat, item Platonis suauem illam quam audiuerat vocem, & reliqua quæ per quinque sensus acceperat. Surgitque huiusmodi imaginatio supra materiam magis quam sensus, tum quia ut cogitet corpora, præsentia illorum non indiget, tum quia ipsa vna facit quicquid quinque sensus omnes efficiunt.

At enim non omnino pura est, quia nihil aliud sapit, quam quod sensus acceperit, siue concepit. Sensus quidem

circa corpora, imaginatio circa imagines corporum per sensus acceptas, siue conceptas sese volutat, paulo post Socrates per phantasiam de hoc vniuerso Platonis simulachro, quod per quinque sensus imaginatio ipsa collegerat, sic incipit iudicare.

Quis hic tam procero corpore, ampla fronte, latis humeris, colore candido, glaucis oculis, elato supercilio, naso aquilino, ore paruo, voce suauis? Plato hic est, homo pulcher, bonus, discipulus dilectissimus. Cernis quantum excellat imaginationem Socratis phantasia. Imaginatio ipsa talem quidem collegit Platonis effigiem, sed quem designaret, & qualem effigies illa non nouit, phantasia iam discernit eam esse effigiem hominis huius, qui Plato vocatur, effigiem pulchram viri boni atque amici. Ergo in his sensum aliquem habet iam substantiæ, ut quidam putant, & pulchritudinis, bonitatisque & amicitiae. Platonici tamen substantiam à phantasia cognoscere vera negant, quoniam rationem substantiæ non agnoscant. Imaginatio neque substantiam rei suspicatur quidem, sed rei superficiem, exterioremque picturam. Phantasia substantiam saltem angurat, dum pronunciat, obuius ille homo aliquis est, & Plato.

Atque etiam res incorporeales quodammodo somnare videtur, dum Platonem iudicat pulchrum, bonum, amicum, discipulum. Pulchritudo enim, bonitas, amicitia, disciplina, incorporalia sunt, neque sensibus neque imaginationi patentia. Huiusmodi quidam conceptus phantasia, incorporales quodammodo corporum intentiones vocantur.

Verum nondum super materiam prorsus animus euolat, tum quia phantasia intentiones huiusmodi esse incorporeas non agnoscit, tum quia huiusmodi Socratis phantasia inspicit propriè hominem hunc, Platonem scilicet, hoc in loco & situ, in hoc tempore & hora diei, hanc pulchritudinem, hanc bonitatem, & reliqua eodem pacto. Vbi Platonem sub eisdem conditionibus in seipsa depingit, quibus extat & in materia. At enim dum phantasia circa singulares hominis huius conditiones vagatur, intellectus communes concipit rationes, & uterque simul suum opus exequitur. Sic enim intelligentia ratiocinatur. Qualis homo est Plato, talis ferè Antisthenes, talis est, & Xenophon, effigie similes, pulchri æquè & boni, amici, discipuli, eodem modo. Ergo in his tribus vna est communis humanitas, per quam æquè sunt homines, vna pulchritudinis natura, vna etiam bonitatis, per quas æquè pulchri sunt, & æquè boni. Humanitas ipsa quæ his communis est, innumerabilibus quoque aliis qui sunt, fuerunt, erunt, ue, quocunque in tempore & quocunque in loco nascantur, communis existit, similiter pulchritudo, & reliqua. Sed quod loquor de humanitate, de reliquis etiam dictum puta. Si ergo humanitas singulis personis, locis, temporibus se æquè communicat, nulli est restricta personæ, nulli loco, nulli etiam tempori. Natura huiusmodi singulas condiciones corporum videtur transcendere. Est ergo secundum se ipsam quodammodo incorporea, & quia corporibus singulis se infundit, ex quo & in alio est, & in multis, & super id quod in alio est, esse oportet id quod in seipso manet, & super illud vnum quod est in multis, esse oportet vnum ipsam quod in seipso consistat, idcirco super corpora omnia extat ratio quædam ideæque humanitatis ipsius, cuius participatione quædam vel similitudine homines fiunt quicumque sunt homines, siquidem in natura illa quæ personis singulis est communis, neque contingit casu, quia semper similiter ordinatur, neque per se subsistit, cum nequeat in se subsistere, eger enim materiæ fundamen-

to. Fit ergo à causa quadam, non tamen fit à materia, quæ seipsam non format, non à persona vna, quæ non potest operari in omnes, quæque quicquid agit, proprium agit, reliquis non commune. Non ab omnibus personis, quæ quatenus inter se differunt, non commune aliquid faciunt, sed diuersa, quatenus conueniunt, per hanc ipsam naturam conueniunt, imò per eam consistunt, tanto illis priorem, quanto est ipsa simplicior. Quippè ipsi tanquam prior proprietates variæ superueniunt ad personas constituendas. Fit tamen ipsa ab vna quadam forma, postquam vna est, quæ forma sit super multitudinem personarum, ne illa quoque fiat ab alia, atque illa rursus ab alia sine fine. Sic ad diuinam ideam ascendimus, quæ necessariò est super omnes, ut æquè agat in omnes, & communi natura conciliet. Si à parte quæ sub toto est ad totum, ab hoc ad id quod super totum surgendum est, merito à singulis personis quæ in partibus loci temporisque sunt, ad naturam illis secundum se communem surgimus, quæ quasi per omnem locum sit totumque tempus, ab hac ad rationem, quæ super locum totum tempusque existat, quam Plato vocat ideam. Ipsam deinceps diuinam ideam suscipit intellectus, siue apud seipsum, siue in diuino lumine existentem. Ratio enim dicat species naturales, quia sempiternæ sunt, à causa mobili esse non posse, alioqui per motionem factæ quandoque deficerent. Factæ tamen sunt, quia partes sunt vniuersi quod est aliunde compositum, & à causa vna omnes sunt. Siquidem ita ordinatæ sunt inuicem, ut in vna natura, in vnum opus finemque conducant. Hinc intellectus humanus concludit super mundum mobilem in mente immobili motrice mundi esse species specierum naturalium exemplaria, non in natura corporea vel animali (mobiles enim forent) sed intellectuali, imò intelligibili, intelligibilia enim in summo intelligibili sunt collocanda.

Non tamen talis argumentatio necessaria est, ut intellectus rationes rerum communes attingat, imò sicut phantasia suapte natura de rebus iudicat singularim, ita intellectus vi naturali statim absque vlla discussione simul ac depictæ est singularis imago illa Platonis in phantasia, subito, inquam, dimisso certo hoc homine, humanam illam communem omnibus tum naturam tum ideam excogitat. Picta illa pulchritudine & bonitate, illico vniuersalem pulchritudinis & bonitatis cogi-

tat naturam, rationemque in nulla certa materia, nullo proprio situ vel tempore positam, sed vel in omni materia, vel absolutam à materia in seipsa simpliciter subsistentem. Quapropter sensus circa corpora versatur, imaginatio circa simulachra corporum, phantasia circa singulas simulachrorum intentiones, intellectus circa singularum intentionum naturas communes, ac rationes penitus incorporeas. Meminisse verò oportet, intellectum non vniuersalem modo naturam, sed particularem quoque cognoscere, alioqui non posset utramque inuicem comparare, cognoscere insuper vires infra se omnes, actusque ipsarum, quando omnes comparat ad seipsum. Prius tamen vniuersalem quàm particularem naturam ab ipso cognosci penè omnes consentiunt. Siquidem pro natura formæ intelligibilis in primis agit. Ea vero cum abstractione quadam concipiatur, absoluta est, vnde naturam in primis refert vniuersalem. Quam quidem vim à virtute intellectus in quo & à quo est, adipiscitur, quasi intellectus ipse sit absolutus. A simulachro verò quod in phantasia est, particulare solum representatur, quod quidem particulare ab intellectu solum, secundo quodam actu atque reflexo prospici, tum Platonici tum Peripatetici plurimum arbitrantur, quatenus intellectus postquam subito rectaque via per speciem vniuersalem inuitus est, inde discursu quodam per actum speciemque in simulachrum, quo incitante species concepta fuerat, sese reflectens, particulare iam prospicit. Ideo motus ad incorporea absoluta que, maximè naturalis est menti, quando quidem primo subito, rectè ad ipsa se confert, vbi apparet intelligendi virtutem esse prorsus incorporealem. Si ergo per opera nutriendi, atque idem per opera sentiendi, quorum prima in corpore fiunt, secunda per corpus, & circa corpora, ostendimus animam non esse diuisam in corpore, quanto magis putandum est, idem quoque per opera intelligendi patere? Atque illud insuper animam scilicet neque ducere originem à materia, neque esse mortalem. Siquidem ipsa per se intelligendi opus exequitur, in quo materiam relinquit omnino, atque ad incorporeales ascendit & perpetuas rationes. Age itaque videamus qua viā possimus quod querimus, per opera & effectus intelligentiæ inuenire.

## S E C V N D A R A T I O.

*Anima alitur veritate.*

## C A P V T II.

**A**limentum ea ratione assumitur, ut in substantiam eius quod alendum est transeat, sicut comeditur panis, ut caro efficiatur. Ideo cibus cognatus admodum esse debet illi, quod est alendum, ut possit in eius naturam faciliè pertransire. Ita aquatica aqueis alimentis, terrestria terrenis, aërea pascuntur aëreis. Similiter corpora corporalibus, incorporea incorporeis nutriuntur. Non enim corpus transit in spiritum, neque spiritus migrat in corpus, quia non subest illis communis materia per quam & in qua inuicem se commutent. Constat animam corporibus non nutriri, constat incorporeis ali, constat igitur eam esse incorporealem. Si aliquibus anima vesceretur corporibus, illis maximè vesceretur quibus & corpus suum.

Nam cum istud maximè animæ congruat, alimenta etiam sua inter omnia corporalia congruent maximè, dummodo alimenta illa adeò tenuentur atque purgentur, ut corpusculo illi subtili quod vulgo anima esse putatur, conueniant. Erit igitur in corpore pingui, validior anima, quàm in tenui, acutior ad inueniendum, ad reminiscendum firmior, promptior ad agendum, ad peruincendas turpes corporis illecebras continentior. Magnanimitas in grandi corpore, in paruo pusillanimitas. Crescente corpore adolefcet animus, etiam si nihil discat, si nullo studio rerum exerceatur. Decrescente per ætatem corpore, & viribus eius debilitatis sapientia, iudicium, constantiaque perdentur. Post epulas & vina acutius erit ingenium & sublimius. Omnia hæc acciderent si animus cibis corporalibus coalesceret. Horum verò nunc contraria fiunt. Animus igitur corporalibus non pascitur alimentis. Quid ergo? nullis. Ita erit æternus, si nulla alimonia indigebit, quod nos maximè cupimus. An fortè spiritualibus vescitur epulis? Imò vero aliis nullis omnino, quod sapienti viro non est dubium qui talibus alimur sæpenumero. Neque asfentiendum est Epicureis opinantibus animam cum corpore coalescere, quia maiores vires sint in pueris grãdiusculis quàm infantibus, atque inde adolēscētes in dies viribus præstent, virique similiter, donec rursus senescente corpore minuantur.

Siquidem

Siquidem ea est animæ ad membra comparatio, quæ artis ad instrumenta. Ars autem sæpe eadem permanens atque similis, modò facilius instrumenta mouet, modò difficilior, quoniam hæc alias ad motum ineptiora. Sic quamuis eadem semper vis sit in anima, membra tamen propter nimiam aut molliem aut ariditatem neque constant æquè, neque flectuntur. Atque ipsa vis quæ videtur in corpore esse, non tam carnis sequitur pondus, quàm proportionem membrorum naturalem, conformationemque artificiosam, quæ duo ad spiritum potius pertinent quam ad molè. Vis etiam quæ inest animæ, non corporis acquireretur incremento, (quod patet in iis qui torpent ignauia, in quibus crescente corpore nihil proficit animus) sed ex ipsa animi industria comparatur ingenio, usu, affectu. Quis neget tempore vires corporis comparari? Animo autem sæpe momento fortitudo præstatur, quando vel ratio aliquid monstrat imperatque magnificum, vel furor arma ministrat, & sæpe pusillus homo superat grandior, & qui nõ crescit corpore, crescit tamen sæpe virtute animi. Imò dū decrescimus corpore, sæpe animo crescimus. Scientiã magnanimitatemque sapissimè acquirit subito animus, corpus autè neque dare quicquã potest neque accipere, nisi tempore. Deniq; virtus animi est æqualitas quædã, vt Magi tradunt, per quã animus & sibi met & ipsi vero bonoque consonat. Si quo pacto quadrangularis quædã linea circularis efficiatur, perfectior euadet, non tamen quod longior fiat, sed quod æqualior. Rursus si reperiatur lyra, perfectior erit, non quod grãdior fiat, sed consonantior. Ita cū adolescēs aliquis virtute adolescit, tunc anima non quantitate crescit, sed spiritali quadam æqualitate & consonantia proficit. Neque obiciat quisquam ita, quod quando corpus neque grauatur epularum nimio pondere, neque fame languescit, sed mediocriter alitur, tunc animus similiter enutritur, sitque in eo sit tu validior, aliter autem cõtra. Nam id quidem verum est, animum in eo hominis statu valere quamplurimum, non tamen hoc inde prouenit, quod similiter alatur vt corpus, sed quia animus natura regit corpus. Et quando ipsum ægrotat grauaturque, animus adeò in eo curando atque regendo occupatur, vt ad inquirendam veritatem non sit intentus. Quieto autem corpore, expeditè mens speculatur, & tunc maximè propriis vescitur alimentis. Escam vero animi quam esse dicemus aliam, præter illam quam esurit semper &

sit, qua parte gaudet summò opere, qua sumpta crescit & impletur? Omnis animus tum in omni ætate, tum continuè veritatem præ cæteris appetit, quam in omni arte quærunt artifices, & in qualibet, re, quid de re ipsa sit, verum etiam infantes interrogant curiosè, neque semel aut bis aut ter singulis diebus, vt corporis escam, sed momentis singulis verum in omnibus negociis inuestigant. Proinde veritatis acquirendæ studio alimoniam corporis prætermittimus sæpe numero, neque tempori neque pecuniæ parcimus, neque laboribus enervamus corpus, quo enervato animus sit neruiosior. Hanc veritatem animus ipse cupit, non corpus. Hæc enim corpus non auget, sed abest plerumque illius studium corpori. Quinetiam propter seipsum expetit illam animus, non propter corpus. Quid enim corpori conferat? Quod si quando videatur veritas conducere corpori, non propter ipsam veritatem id euenit, sed propter aliquod commodum corporale quod cognita veritate contingit. Imò vero animus, etiam si nihil inde sequatur vtilitatis, veritatem studiosè perquirat, & pleno cibus suis corpore, esurit sititque adhuc animus veritatem, qua inuenta exultat, non ad tempus, sicuti propter corporis vsus, sed perpetuo gaudet, illuminatur, adolescit, euadit magnificus, adeo vt illi præ magnitudine sua minima videantur illa quæ solent esurienti animulæ videri quam maxima. Hac etiam alimonia fit inuictus, temperans, iustus, hominum gubernator & Dominus, excelsior cælo, par Angelis, Deo similis. Quis igitur ambigat vltèrius quin veritas humanæ mentis naturalis sit esca? Eandem escam omnes appetunt mentes, eandem quæque mens semper. Quæ quidem consensus stabilis appetendi significat mentes inter se mirificè conuenire, & quamlibet mentem in natura sua stabilem permanere, quandoquidem appetitus earum non ita variatur mutaturue vt appetitio sensuum, quæ pro diuersitate corporum diuersa est, & ad mutationem corporis permutatur, quasi sensus corporum mutationem sequantur, mens diuinorum stabilitatem. Odit namque corporis alimenta, atque eodem cibo vescitur quo cœlestes & sempiternæ mentes. Hic cibus est veritas. Veritas autem non est corporea, alioqui rebus incorporeis non inesset. Nunc autem inest Deo, Angelisque, & numeris, quæ & incorporea sunt, & vera. Et quoniam incorporea tanto veriora sunt corporibus, quanto puriora fir-

amioraque sunt, fit ut veritas in illis sit potius quā corporibus. Atqui (quod maius est) nō est proprie veritas in corporibus. In his enim duo sunt, materia & forma, non est veritas in materia. Nā per eā nihil verē in specie aliqua rerum est, non homo verā per eā aliquid est, nō equus, & reliqua. Neque tamen in forma corporis iacet veritas, cū vera forma non sit, cuius virtus inficitur in materia. Testantur hoc & Mathematici, qui veras figuras in corporib. nō reperiūt. Verus quippē circulus locatus in vero plano, assidue voluitur, hoc fieri ratio cogit, cū circulus ille planū tangat in puncto; in pūcto autē corpus quiescere nequeat. Nemo hęc in corporibus vidit vnquam. Non insunt igitur veræ figuræ corporibus, quia forte neq; vera principia figurarū, saltem quantū spectat ad sensū, qualia sunt pūcta, lineæ, superficies. Ratio quidē ostendit verū punctū longitudine carere debere, verā lineam latitudine, superficiē verā profunditate. Talia verō in materia nusquā sensu reperiuntur. Cū ergo alicubi sit veritas, & a corporibus sensuq; absit, est proculdubio in spiritibus, est igitur incorporea. Idem ex eo patet, quia ibi maximē consistit veritas, vbi scientiā. Hęc vero in rationibus rerum vniuersalibus reuera versatur, ceu cū quis cognoscit quid bonitas ipsa sit, quid iustitia, singulis bonis & iustis actionib. officiūque cōmunis, atque similia. Rationes verō huiusmodi incorporeales sunt, quoniam in nullo particulari corpore cōcluduntur, sed sunt ad multa cōmunes. Ratio corporis vel circuli tota in minimo corpore vel circulo sicut in maximo reperitur, ratio longitudinis vel latitudinis, vel profunditatis tota in minima linea, superficie, altitudine, sicut in maxima. Deniq; ratio quantitatis ipsius tota adæquatur toti rei cuiuslibet quantitati. Quapropter rationes corporis, figuræ dimensionis, atq; ipsius etiam quantitatis, corporales & extēse nō sunt, multo minus rationes alię corporales & extēse esse possunt. Præterea rationes rerū immutabiles sunt, nā aliter se habere nō possunt, omnia vero corporalia mutabilia sunt. Quapropter scientiā cū in his versetur, est incorporea, igitur & veritas incorporea. Quo fit ut de ipsa veritate rerū quid sit, qua ratione cōstet inueniaturq;, quid ipsi sit propinquius, quidue remotius, nō sensus vllus, imō sola ratio iudicet, & tunc potissimū quādo sese à sensu corporūq; fallacia se vocat. Est ergo veritas incorporea. Talis est autē maximē veritas & scientia diuinorū, qua præcipuē animus oblectatur & alitur. quo igitur modo animus potest corporalis esse, qui

corporalib<sup>9</sup> cibis offenditur, spiritualib<sup>9</sup> alitur? Quandoquidē veritate omni, præsertim diuinarū rerū veritate delectatur, alitur, augetur. Aut quo pacto mortalis erit, si veritate pascitur immortalī, cū neque corruptibilis venter cibum incorruptibile cupiat aut capiat, neq; cib<sup>9</sup> incorruptibilis in corpus trāseat corruptibile? Sanē immortalis est veritas, atq; est cōtinuus animi cibus, ut certē est, siue ipse cōuertatur in animū, siue animū seipsā cōuertat, eū efficit immortalē. Quoniā verō dū familiari hoc vescitur cibo, ea voluptate perfunditur, quæ neq; molestiā habet admixtā, neq; in fastidū vertitur vel dolorē, constat mentē neq; fatigari vnquā, neq; turbari cōtrarij alicuius occursu, neq; in contrariū posse aliquid corrūpi. Rursus quia mēti nihil natura optabilius est, quā veritas, veritas autē per separationē quandā à rebus mortalibus cōparatur, nihil menti qua ratione mens est, magis est naturale familiareq;, quā à mortalibus segregari. Ex eo verō quod maximē naturale est, non remissio vitæ sequitur, sed intensio. quapropter tunc viuet mens præcipuē, cū hinc abierit. Hanc vero argumentationē nostrā argumentatione quadā Olympiodori Platonici cōfirmare possumus, quam partim Pythagoricis, partim Platoniciis mysteriis à Phedone. Gorgiāq; acceptis, sic ille cōtexiit. Mens naturali veritatis aviditate continuē tū se à corpore, tū formas à materia separat, cupitq; ita atque conatur separata viuere, quāuis quotidie in contrariū corpus sensusque detorqueat. Separatam verō illā à caduco corpore vitam naturaliter appetit, tanquam naturaliter, id est, reuera bonā, præsertim cum vita sit omnino dedita veritati atque bonitati. Vita citismodi bona est, ergo & possibilis est. Quod enim impossibile est, idem quoque inutile. Bonum verō inutile non est dicendum. Item si impotentia ad malum pertinet, ad bonum potentia pertinet. Ergo bonum omne natura sua possibile est. Hinc efficitur ut naturalis appetitio boni sit possessionis possibilis appetitio. Ac si etiam quod apparet bonum, est possibile, certē & ipsum reuera bonum potentissimum est, & vera bona verē beneque quærentibusabilia sunt.

*Tertia ratio. Virtus anima quia indiuisibilis est, corporis qualitas esse nequit.*

### C A P V T III.

**Q**uod indiuisibile est, corporis qualitas esse nequit. Nam si qualitas eius



esse ponatur, ita interrogabimus, nunquid tangat partem aliquam diuisibile corporis, an punctum aliquod corporis indiuisibile? Si conceditur primum, profecto qualitas huiusmodi diuisibilis erit, cum modo diuisibili tangat. Atque ita non indiuisibile diuisibilis ipsius erit qualitas, sed alicuius diuisibilis diuisibile. Si secundum conceditur, certè illa qualitas puncti illius quod attingit solum, qualitas est, inon corporis. Quamobrem quod indiuiduum est, corporis qualitas nunquam erit. Indiuidua vero virtus animæ humanæ est qualitas. Igitur anima non est corpus. Sufficiens quidem putabitur huiusmodi demonstratio, si duo illa planius ostenderimus, videlicet & virtutē esse animæ qualitatem, & hanc ipsam virtutē indiuiduam esse. Primum cuique est euidentissimum, quandoquidem per virtutis præsentiam talis actalis anima fit, & dicitur sapiens, prudens, iusta, fortis, & temperans. Atque abesse virtus ab anima potest anima remanente. Huiusmodi vero est conditio qualitatum. Secundum præterea illud, videlicet virtutem esse indiuisibilem, sic ostendimus: Virtutum duo sunt genera, aliæ intellectu, in appetitu vero siue rationali siue irrationali aliæ. Illæ speculatiuæ vocantur, istæ morales. Illæ speculatiuæ, quia speculando comparantur, & cōparatæ versantur in speculando. Istæ Morales, quia more & consuetudine acquiruntur, atque acquisitæ in moribus & operum usu consistunt. In eo genere sunt diuinorum sapientia, scientia naturalium, ciuiliū prudentia, ars operū humanorū. In hoc sunt iustitia, quæ suū cuiq; tribuit. Fortitudo, quæ ad opera honesta promptior abiicit à nobis timoris impedimentū. Temperantia, quæ libidinis mollitiem (quod alterū honestorum impedimentum est) repellit. Hæ quidem sunt apud Platonē virtutum descriptiones. Si qua esset in iis virtutibus corporea magnitudo, quo quisque grandior est, eo sapientior iustiorque fieri posset, neq; possent exigui homines grādes virtutibus superare aut æquare. Rursus scientia quæ maximorum corporū notitia est, amplior & clarior esset, quam scientia quæ minorum. Cognoscimus autē multa quorum non valemus magnitudinem adæquare, totusque animus & æquē & ita rem magnam percipit sicut parua. Summatim verò quid aliud speculatiua virtus est nisi claritas intellectus? Quid aliud moralis, nisi feruor stabilis appetitus ab intellectu claritate succensus? Claritas illa non paulatim fit, licet ad eam pedetentim proueniamus.

Sicut post longam per vestigia multa inuestigationem subito lepus aspicitur, ita quisque in seipso animaduertit post diuturnam indaginem se momento quid verum sit ea de re quam quæsiuerit, intueri. Subito veritatis lumen (ut Plato inquit) effulget in animo, non subito excessum à rebus, sed longa quadam discussione, ut ex lapide sapius colliso scintilla. Similiter diuturna consuetudine iuuentus ad mores disponitur, donec paululum quid ad accendendum stabilem illum rationalemque appetitus ardorem deficit, nondum sufficienter accenditur, nondum virtus moralis habetur, sapius inspirando, subito tandem flagrat æstus appetitus sufficiens ad virtutem. Quid plura? Verso ad Solem speculo, in speculo lumen momento refulget, supposita illi speculo lana, statim ut parata est, in ipsa ignis accenditur. Quare & repentinus splendor in speculo fit, & repentinus ignis in lana. Non aliter subita in intellectu claritas veritatis, subita inde in appetitu flagrantia. Resume iterum hoc pacto: Virtus speculatiua est quædam cognitio veritatis. Si gradatim confletur, pars nunc quidem habebitur, pars deficiet, & quæretur. Quatenus pars veritatis habebitur, sciemus quidem. Quatenus pars deerit, etiam nescimus. Ita eandem rem & sciemus simul, & nescimus. Quod ne ebrius quidem aliquis somniaret. Quapropter speculatiua virtus non gradatim à parte sui in aliam sui partem progreditur, sed tota simul è vestigio lucet. Virtus quoque moralis est voluntas quædam constans quodcunque ratio dictauerit eligenti. Si partes habeat multas, fiatque sensim, pars huius voluntatis inerit, pars adhuc aberit. Quantum pars inest, volumus. Quantum pars abest, etiam nolumus. Sic eandem rem simul per eandem vim animæ volumus pariter, atque nolemus.

Quod est monstro per simile. Quoniam igitur virtus fit momento indiuisibili, est ipsa quoque indiuisibilis, si modò natura cuiusque propriam originem sequitur, præsertim cum finem habeat indiuisibilem. Cuius autem ortus & finis indiuiduus est, cur non sit ipsum etiam indiuiduum? Quis virtutis finis? Moralisis quidem finis, animam à corpore diuisibili purgare atque se iungere, speculatiuæ autem incorporeas vniuersalesque rerum rationes à diuiduis corporibus procul positas comprehendere. Cernis finem vtriusque virtutis, sicut & ortum, esse indiuiduum aliquid, ideoque virtutes ipsas oportere indiuiduas iu-

dicari ostendunt utræque virtutes huiusmodi quandam sui naturam, in eo quam maxime, quod multæ scientiæ simul in intellectu sunt, multæ virtutes Morales simul in appetitu, neque sese sua numerositate confundunt, sed augent potius & lucidant. Atque vnius scientiæ conceptionem in nobis seorsum ab alia peruidemus, ita vt sine consideratione alterius possimus alteram cogitare. Proinde tales habemus artificiorum ideas in mente, vnitas inquam pariter & distinctas vsque adco, vt possimus ad vnius ideæ exemplar loqui, & fabricare aliquid ipsi proprium, etiam si nihil ad vterius conceptionis exemplar agamus. Corpora esse nequeunt tales intelligentiæ, quæ ita in eodem manent animæ gremio, vt neque sese detrudant pellantque, neque se mutua mixtione confundant. Eadem est de Moralibus virtutibus ratio. Quinetiam cum multæ sint in anima sapientis intelligentiæ, vnaquæque illarum tota in singulis inuenitur. Profectò qui in Geometria siue Theologia peritus est, propositionem aliquam habet facultatis illius primam, habet secundam, tertiamque, & reliquas, atque ex cognitione vnius in alterius cognitionem progreditur. Si prima docet secundam, secunda tertiam, & quisquis docet aliquid, possidet in seipso quod docetur, sequitur vt in qualibet præcedente propositione sequentes omnes contineantur. Quinimo & in qualibet sequente insunt similiter præcedentes. quippe solemus sequentium indicium præcedentia sæpe rimari. Neque id iniuria. Siquidem in effectibus lucent imagines causarum. Hac rerum serie fit, vt sapiens vna quavis propositione excogitata, velocissimè percurrat in multas, atque ita multas, imò omnes in vna conspiciat. Est ergo quælibet intelligentia in qualibet, & vna quæque tota cnotinetur in singulis. Idè in virtutibus Moralibus accidit, nam acquisita illarum vna, statim omnes habentur. Quis enim iuste distribuit, si aut timeat minas, aut libidini seruiat? quisnam metus fortiter superabit, si emolliatur libidine? Quis domabit cupiditates, si formidini succubuerit? Denique quis honestè vitam aget, nisi per prudentiam optimum vitæ finem statuerit, & vias ad finem elegerit rectiores? Aut quis prudenter inspiciet, si mentis acies caligine vitiorum obnubiletur? Sunt ergo virtutes istæ ita connexæ inuicem, vt in vna sint omnes, & quælibet virtus tota comprehendatur in singulis, sicut & tota Geometriæ facultas in præcipua eius propo-

sitione, imò in qualibet delitescit, cum persolertis ingenij sagacitatem ex qualibet propositione omnes eliciantur. Non potest autem diuisibilis qualitas tota simul rebus multis inesse. Profectò in vna sola est, id est, corpore vno, & alias sui partes per alias corporis partes extendit, neque tota eius quantitas singulis corporis partibus inest, ideo. intelligentiæ illæ moresque omnino indiuisibiles sunt. Quamobrem anima neque corpus, neque forma diuisa per corpus esse potest, siquidem ipsa est subiectum indiuisibilem qualitarum. Ergo sicut delirat qui aut quærit quanta sit scientia vel iustitia, aut putat Geometriam corpore geometræ esse minorem, ita despiciat qui aut interrogat quanta sit anima, aut eam opinatur corpore minorem esse, quandoquidem nullo modo corporalis est. Non solum enim incorporalia suscipit, verum etiam multa in seipsa facit incorporalia, dum species rerum rationesque & habitus concipit, præsertim cum definitiones incorporalium fabricat. Quis autem eam quæ incorporalium causa est, esse dixerit corporalem, aut eam mortalem quæ subiectum est virtutum? cum virtutū officium sit repugnare mortalibus, siquidem speculatiua virtus illa fugit, moralis fugat. Non potest autè qualitas subiecto proprio repugnare, imò immortale est illud necessariò, quod naturale receptaculum est qualitarum earum quarum proprium est aduersari & imperare mortalibus. Vis autem rationis huius in eo consistit maxime, quod anima non modo subiectum est talium qualitarum, sed & principium, ideoque naturam illam mortalibus repugnantem fortiuntur ab anima.

*Quarta ratio. Species conceptioque intelligibilis suscipi non potest à corpore.* CAP. IV.

**I**D sentiunt Græci omnes Platonici. Idè possumus ita Platoniorum Arabum sententia confirmare. Intellectus rem aliquam, puta hominem, non intelligit, nisi formam quandam vniuersalem hominum significatricem adipiscatur, quam intelligibilem formam & speciem nominant. Hanc adeptus, quid sit hominis natura ita iudicat, homo est animal rationale. Iudicium hoc, tum conceptus & conceptio mentis vocatur, tum rei cognoscendæ ratio & definitio, quam etiam solemus scientiam appellare. Si intellectus à corporis latitudine protendatur, tam forma intelligibilis quam conceptio latitudini corporis adhærebit. In hac ipsa latitudine duo considerantur, punctum scilicet, & extensio latitudinis. Igitur formæ illius con-

reptionis que sedes erit, vel solum punctum aliquod corporis, vel extensio. At verò si neutrum cōcedi debet, ut demonstrabimus, sequitur ut intellectus in corpore minimè protendatur. Ostēdamus prius punctū sedē tale esse nō posse. Primū quidem animaduertēdū est pūctū nō existere per seipsum, sed esse mensuræ corporis sic affixū, ut sēper eius sit terminus. Si pro natura sua rem capit, certè nunquā accipit nisi terminū aliquē magnitudinis alicuius, quæ in illa corporis mēsurā suscipiatur, cuius terminus est punctū, ita ut sicut corporalis mēsurā suscipit rei aduenientis magnitudinē, sic talis mensuræ terminus terminū suscipiat magnitudinis: quare quicquid pūcto corporis suscipi dicitur, non est a magnitudine liberum, ideo si formæ intelligibilis receptaculū sit punctū, fieri non poterit quin ea species diuisibilis sit, & terminū suū in pūcto corporis habeat, reliquas verò partes in corporis latitudine. Eam tamen indiuisibilem esse probabimus in sequentibus. Præterea si dicatur punctum ita formam illam capere, ut solum ipsum sit eius sedes & fundamentum, atque illa per hoc maneat à corporis latitudine segregata, oportet punctū quoque esse disunctū à latitudine, præsertim cū nihil sit propriū accidentis alicuius subiectū, nisi quod propriè existit actu. Punctum huiusmodi erit à linea separatum, neque erit lineæ aliquid, neque terminus latitudinis, & linea per aliud quoddam punctum huic proximum terminabitur. Rursus aliud illud punctum similiter proprio existet actu, quo possit & ipsum accidentis formæ sedes fieri, eritque ipsum quoque seiunctum à linea, præcipuè cum sit eadem punctorum omnium ratio. Quo efficitur ut aut nullum sit punctum in linea, quo nihil est dictū stultius (terminis namque careret, aut lineæ longitudo conficiatur ex punctis, quod etiam dictū ridiculum, quia punctum puncto additum non augeat longitudinem. Quod ea ratione conspicitur, quoniam si tria puncta cogitentur sibi inuicem succedentia, interrogabimus nunquid punctum illorum medium cogat duo extrema puncta inter se ita distare, ut se inuicem non contingant, aut non impediatur extremorum concursione. Si distare cogat, certè non eadem sui parte tangit eorum vnum, quæ tangit alterum, alioquin non disiungeret inuicem. Quod si altera parte sui vnum extremorum respicit, altera alterum ipsum duabus partibus constituitur, nec est punctum, siquidem est diuisibile. Quare cogimur confiteri punctum medium non im-

pedire aliorum concursione. Itaque erunt in omnibus omnia, neque vllam suo concursu efficient longitudinem, quando per punctum medium nullum inter alia puncta nascitur interuallum. Si non constat ex punctis aliqua corporis longitudo, nullum reperitur in ea punctum quod per se quandoque ita possit actu fieri, ut fiat intelligibilis formæ subiectum. Dixerit forte quispiam punctum non actu, sed potentia esse in corpore, & per eam ipsam potentiam fieri intelligibilis formæ subiectū. Quamuis id iam fuerit confutatum, sic tamen iterum confutatur. Puncta huiusmodi tum quia potentia sunt, non actu, tum quia sunt infinita, nulla ratione ita inuicem distinguuntur, ut aliud illorum potius quam aliud formam illam capiat. Omnia itaque illam capiunt. Quocirca intellectus aut infinitas simul rei cuiusque intelligendæ formas accipiet actu, aut infinite simul per infinita puncta rem eadem intelliget. Vtrumque impossibile est, tum esse formas infinitas actu, tum esse simul intelligentias infinitas. Per hæc manifestum est punctū corporis intelligibilis speciei sedem esse non posse. Sed nunquid ipsa punctorum continuatio corporisue extēsiō sedes erit? Nequaquam. Omnis enim forma quæ diuisibili subiecto recipitur, sit diuidua, quemadmodum niuis albedo niuis diuisione diuiditur. Itaque si a corporis latitudine species illa suscipitur, lata sit & diuidua. Talem vero illam fieri impossibile est, quod sic ostendam. Si species secatur in partes, aut partes illæ dicuntur omnino similes esse, aut dissimiles. Sed horum neutrum est admittendum. Non est admittendum quod similes sint omnino, quia si ita similes sunt, ut in quauis parte ratio integra sit speciei totius, sicut in singulis aquæ guttis integra ratio totius aquæ seruatur, certè intellectus in qualibet parte inspiciet totum, atque vna speciei pars ad totius rei intelligentiam satisfaciet, superflue erunt ceteræ. Præterea per talem speciem quæ vndique sibi ipsi persimilis est, & tali similitudine decipit intellectum inde ductum ad cognoscendum, confundetur prorsus iudicium intellectus in partibus discernendis à toto, tum in qualibet re ex partibus constituta, tum vel maximè in re illa quæ ex naturis variis est composita, neque poterit partes vel à partibus vel à toto discernere. Alia tamen reuera ratio partis est ut pars est, totius alia ut est totum, & hoc semper per mentis iudicium affirmatur, cum neque ipsum totum pars esse valeat, neque pars totum.

Negandum igitur arbitramur speciei partes omnino similes esse, ob eam maximè rationem, quia cum mens rei partes intelligat, ut partes sunt, & intelligat totum ut est totum, & totum verè distinguat à partibus, neque possit verè distinguere, nisi aliqua sit in ipsis distinctio naturalis, sequitur ut partes intelligibilis speciei, si modo partes habet, tam vicem quam à toto naturali aliqua discerpent varietate. Accedit & alia ratio. Nempe partes quæ inter se & ad totum similes sunt omnino, quando totum aliquod mutuo congressu conficiunt, non aliter perficiunt totum, quam per numeri vel magnitudinis augmentum, quod in tritici granis, & aquæ guttis aspicimus. Vbi enim forma non variatur, & tamen aliqua intrinsecus fit mutatio, incrementum ibi quodam modo fit vel decrementum. Itaque illa mentis species si talibus concrevit partibus, numerus aliquis erit, vel aliquid numerosum, aut cumulus, vel continuum aliquid. Ergo per illam numerosum & numerosa aut magnitudines quasdam intelligemus, siue figuras, eritque species ad imaginationem & phantasiam pertinens potius quam ad mentem. Ex his concluditur, formam intelligibilem in partes inter se similes minimè diuidi. Num fortè secatur in partes dissimiles, sicut animalis corpus in ossa, carnes & neruos? Nullo modo. Nam per hanc formam, mens quid rei substantia sit cognoscit, ut diximus. Substantia rei definitione maximè comprehenditur. Definitio genere constat & differentia, ut hominis definitio animali constat & rationali. Animal genus est, per quod homo cum cæteris animalibus communiter conuenit. Rationale differentia, per quam differt ab animalibus carentibus ratione.

Quare si qua sit in ea forma diuersitas partium, hæc erit potissimum per genus & differentiam. Sint hæc duæ, si vis, intelligibilis formæ partes, sint extensæ per latitudinem corporalem.

Quid hinc sequatur, audi. Quia partes corporis diuidi possunt in infinitum, idcirco vnà cum illis tam genus quam differentia absque fine secabitur, eruntque in definitione vna innumerabilia genera, & innumerabiles differentiarum, nec erit reuera definitio, quia non comprehendetur ab intellectu si infinita fuerit, neque suis finibus terminabitur, & (quod absurdius est) vel infinitè eadem genera easdè que differentias replicabimus, vel à genere resoluen-do ascendemus in genus in infinitum, à differentia similiter diuidendo descen-

demus in differentiam. Ascensus talis atque descensus impossibilis est, quia ratio vera tandem ad prima rerum genera & ultimas differentias peruenit, ultra quæ non liceat progredi. Siquidem substantia supremum genus est in homine, quod in genus aliud non resoluitur. Certa verò discurrendi potentia est vltima differentia, quam non licet in aliam differentiam coarctare. Auget errorem illum hoc præcæteris, quod si genus & differentia in realia sunt, infinita talia erunt effectu. Quæ enim ad rei essentiam concedunt, & ad ordinem pertinent naturalem, effectu ac reuera existunt in natura, non cogitatione finguntur humana. Esse autem multitudinem aliquam talem reipsa siue effectu innumerabilem, natura non patitur, præsertim in corpore, in quo tamen esset innumerabilis multitudo, si genera innumerabilia & innumerabiles differentiarum per partes corporis pariter secarentur, totidem namque essent etiam ipsius corporis portiones. Rursus percontamur Epicureos, qui speciem diuidunt in intellectu velut formam in corpore, & partem eius vnā in vna mentis parte locant, verbi causa: Genus in parte dextera mentis, differentiam verò in sinistra, cur dextera pars potius congruat generi, differentiarum verò sinistra? Nonne quælibet pars mentis æque mens est? Ne ex partibus amentibus fiat mens. Quælibet igitur particula mentis æque vtrunque tam genus quam differentiam respicit, ideo quælibet capit vtrunque. quod si quælibet ambo suscipit, & in vtraque sunt ambo, fit ut illa non sint inuicem separata. Verum, ut Epicurei volunt, casus efficit ut duorum illorum alterum in dexteram cadat, alterum in sinistram. Sed respondeant nobis illi, vtrum sic deinde distincta permancant, an inuicem misceantur? Si dent primum, sequitur ut inde scientia non nascatur. Nulla enim fit definitio ex genere & differentia inuicem separatis. In neutro illorum seorsum posito perfecta habetur de re ipsa scientia. Misceantur oportet in vnum, ut vna scientia de re vna ab vna mente per definitionem vnā in vno tempore possit haberi. Oportet profectò vtrumque in toto mentis esse, ut vero intelligatur. Nā quod in parte mentis est, nondum integrè intelligitur. Actio enim rei totius est, non partis. Fateantur ergo oportet illa misceri. Sed vnde miscentur? nunquid casu vel mente? Casu inquiunt. Nimum hoc dictu nefas. Nam rarissima fieret mixtio talis, & quando fieret, tunc demum con-

cederent illa sic vnita incorporalia esse, quod ipsi volumus. Concedent denique illa à mente misceri. Ex hac concessione duo statim nos inferemus. Primum, mentem esse incorporalem, si acceptas formas ducit ad habitum incorporeum, quæ sententia Epicureis aduersatur. Secundum, mixtionem illam à mente factam non aliter fore veram, nisi in rebus ipsis talis quædam sit vnio. quod enim à mente præter naturam rerum fabricatur, figmentum est potius quam scientia. Omnino autem oportet genera & differentias natura coniungi inuicem vel disiungi, non mentis figmento, vel situ. Si enim figmento mentis id fiat, erramus, non discimus. Si autem situ, ita vt genus in parte mentis dextra sit, differentia in sinistra, sanè quia licet menti communia hæc resolvere, illa mens diuidet. Per hanc ipsam diuisionem modo corporeo secabuntur, & dimidium generis vnum in parte dimidia dextræ partis relinquetur, dimidium alterum relinquetur in altera. Idem accidet differentia. Licebit partiri iterum. Hinc dilaniatio sequetur, non resolutio, & dum communia discerpemus, scientiâ disperdemus. Quod si per diuisionem non lacerentur communia illa, sed genus in quauis sui parte supersit integrum, & similiter differentia, iam non erunt amplius corporalia, quia certa quantitate non indigent, ac etiam innumerabilia genera totidemque differentias, qui ita secabit, inueniet. Atque horum multitudo non natura constabit, sed mentis machinatione nascetur. Forsitan Epicurei vt has obiectiones deuitent, non dabunt amplius speciem illam intelligibilem ex genere differentiaque componi, sed partibus aliis. Nos autem quæremus, nunquid speciei pars, qualiscunque illa sit, à tota specie differat nec ne. Si non differat, sane neque pars erit illa quæ à toto non differt, sed erit totum, neque species illa erit composita, si nihilo differt à partibus, quia sic partium caret diuersitate. Ergo differre speciei partem à specie fatebuntur. Nos autem ab illis, quomodo differat, sciscitabimur, si non tanquam genus differentiaue à specie vt ostendimus, num saltem tanquam à specie species, ceu à colore figura : Sed hoc admiti non potest. Non est enim species talis intra speciem. Non continetur sub colore figura. Pars tamen intra totum est, & continetur ab illo. Forsitan vt speciem illam conceptionemque mentis habere partes conuincant, quæ sub illa contineantur, ad numeros conuigient, atque inferent spe-

ciem à suis partibus distrepere, sicut quatuor à duobus, ab vno duo, nos autem licet id supra confutauerimus, rursus tamen ita refellimus. An volunt partes illas speciei conceptionisque, quam scientiam vocant, esse scientias ? Si nolunt, creabunt scientiam ex inscitiis, ac si albedinem constituerent ex figuris. Si volunt, sic eo arguimus : Constat apud Philosophos, quilibet scientiam habere obiectum suum in quo versatur, quod scitum vocant. Declarent nobis isti, siquidem scientiæ illæ quæ sunt vnius scientiæ partes, obiecto carere non debent, nunquid idem sit scitum proprium cuiusque illarum atque totius, an aliud ? Si idem esse respondeant, tunc nulla illarum pars erit, sed vnaquæque totum, postquam æquatur toti. Vbi enim æquantur obiecta, scientiæ quoque æquantur. Sin aliud fateantur, rursus id sequetur absurdum, quod scientia ipsa totius sciti præter partium scientiam erit, neque ex partium cognitione cognoscetur totum, vbi non concurrunt scientiæ singulæ in scientiam vniuersam. Verum sic iterum procedamus. Mens vt plurimum intelligit rationem ipsam rerum & vnā, & vniuersalem, vt puta bonitatem ipsam, multis bonis æquè communem. Ratio huiusmodi quantum vna & vniuersalis est, est & simplex. Ratio quoque Dei siue Angeli quoties verè cognoscitur, tanquam indiuisibilis iudicatur. Hæ rationes essentiæ intelligibiles appellantur, eas nostra mens nunquam cognosceret, nisi formas earum haberet in se velut imagines. Nam si cognoscendo agit aliquid, nec agit nisi sit, actu, nec agit aliter quam actu sit, actu verò fit per formam, nunquam essentias contemplatur, nisi earundem formis ornetur. Formæ tales licet quandoque intelligibiles appellantur, proprius tamen intellectuales dici debent, essentiæ vero intelligibiles. Hæc enim est veterum Platoniorum consuetudo. Si forma quædam talis, essentiæ talis, imago in nostra mente spargatur in partes, tunc partes illæ aut ita se habent vt nulla illarum essentiam ipsam respiciat, aut alia respiciat quidem, sed non alia, aut omnes. Si primum detur, tunc forma illa tota essentiam nullo modo respiciet, cum nullus sit respectus in partibus. Sicut enim tota forma constat ex partibus, si totius respectus ex partium respectibus congregatur. Quod si nullo pacto essentiam aspicit, non erit eius imago, neque ad eius intelligentiam conferet. Si detur secundum, pars quæ non respicit essentiam, nihil attinet ad intellectualem formam, post-



quam ad essentiam non spectat intelligibilem. Si autem tertium concedatur, ita-  
tim interrogabimus, vtrum quæquæ pars  
eundem habeat aspectum, an aliæ potius  
aliud? Si eundem habere respondeatur,  
& habere eundem non possunt aliter quā  
si quæque referat essentiam totam, profe-  
cto nulla earum pars formæ intellectualis  
erit, sed quælibet erit tota, vna ad cognos-  
cendum sufficiet, supererunt aliæ, quæ e-  
tiam innumerabiles erunt actu, si corporis  
diuisione secantur, & conducunt ad actio-  
nem. Si autem aspectum habeant alium at-  
que alium, nec aliter hoc fieri potest quam  
si partes singulæ formæ totidem aspiciant,  
essentiæ partes, quandoquidem intelle-  
ctuale intelligibili oportet æquari. Sequi-  
tur vt essentia illa sit diuisibilis, quam ta-  
men ratio vera esse simplicem conclude-  
bat. Neque posset simplicem iudicare,  
nisi aspectu simplici eam intueretur. Mul-  
tiplici autem aspectu partium diuersarum,  
multiplicem iudicaret. Opinamur autem  
eos in hunc errorem propterea incidisse,  
quod scientias nonnullas in rebus compo-  
sitis versari considerabant. qualis est scien-  
tia de homine, qui ex animali rationali-  
que componitur, tanquam genere suo &  
differentia. Qualis est scientia de septe-  
nario & denario, numerisque aliis qui ex  
numeris vel vnitatibus congregantur.  
Nos autem putamus hominem, quatenus  
homo est, vnum quid esse & simplex, quia  
vna eius est forma. Huius signum est, quod  
in plures homines non diuiditur. Siue e-  
nim secundum speciem diuidas ipsum in  
genus & differentiam, neutrum illorum  
homo est. Siue secundum singula in caput,  
pectus & femur, illorum nihil est homo.  
Corpus quidem secas quia discerpis in  
membra, quæ corpora sunt, non secas ho-  
minem, quia non secas in homines. quod  
autem tale quiddam est in seipso, & in plu-  
ra talia non diuiditur, illud certè quan-  
tum est tale, indiuiduum est & simplex.

Denarius quoque, quantum denarius,  
non diuiditur, nam vna species est dun-  
taxat, & vna forma, quam in plures dena-  
rios partiri non possumus. Quod si partia-  
mur, numerum quidem partimur, quia  
partimur in numeros, denarium non par-  
timur, quia non distribuimus in denarios.  
Neque obstat quod in specie genus & dif-  
ferentia videatur includi, non enim in ea  
sunt duæ formæ, sed vna. Nam licet aliud  
sit in rerum ordine animal esse, aliud esse  
rationale, in homine tamen est idem, &  
(vt Platonicè loquar) ipsa hominis natu-  
ra rationalitas quædam est. Rationalitas

autem nihil est in homine aliud, quam ani-  
malitas ipsa in actum rationiseducta.  
Talis autem forma simplex esse simplici  
fundamentum species est, quæ non dis-  
pertit seipsam in singulos homines, sed  
totam singulis se communicat, & per hanc  
singuli vnum sunt.

Differunt autem per alia quæ extrinse-  
cus adiacent, ad speciem minime perti-  
nentia. Quod quidem speciei simplicita-  
tem significat, quæ ex eo quoque non pa-  
rum significatur, quod species magis mi-  
nusue non suscipit, & in quodam certo  
consistit gradu naturæ, cui nihil addi po-  
test, nihil demi, quin species ipsa mutetur.  
Testantur hoc species numerorum, septe-  
narius species quædam est numeri, adiun-  
ge huic vnum, nouam creabis speciem,  
scilicet octonarium. Subtrahe vnum, sena-  
rium habes, nouam rursus numeri spe-  
ciem. Quoniam verò scientia non de sin-  
gulis vel generibus propriè, sed de specie-  
bus habetur. Singula enim quia innume-  
rabilia sunt, mutanturque, neque com-  
prehenduntur, neque firma tenentur, ge-  
nera verò propter confusionem in se per-  
fectè non discernuntur, quoniam, inquā,  
de speciebus scientia est, species vero sunt  
simplices, scientia quoque illarum est sim-  
plex, si modo scientia veritatis adeptio est.  
Veritas autem est rerum cum mentibus a-  
dæquatio. Neque nos turbet aut multitu-  
do vocabulorum, aut cogitationum mul-  
tiplicium varietas, ex quibus conflare scien-  
tia forte videtur. Præparationes quidem  
hæ sunt ad scientiam siue pedisequæ. Scien-  
tia actus est vnicus, siue habitus, tactus, in-  
quam, simplex simplicis formæ, indiui-  
duus indiuiduæ veritatis intuitus. Subitum  
intelligentiæ lumen. Sed ex hoc eorum  
error euidentius redarguitur, quod multæ  
sunt scientiæ de rebus proculdubio indiui-  
duis. Quis enim diuidat vnitatem? Quis  
item simplicitatem & puritatem? Quis di-  
uidat esse ipsum simpliciter? Porro quic-  
quid diuidimus, in partes diuidimus toto  
prioris. Hæc verò ex nullis partibus præ-  
cedentibus componuntur. Homine quip-  
pe in animal & rationale resolvimus, ani-  
mal in corpus & sentiendi naturam, cor-  
pus in substantiam & quantitatem, sub-  
stantiam in esse & sufficientiam subsisten-  
di. Esse vero ipsum in quas partes resolu-  
mus, ignoro, nisi forte in vnitatem & mul-  
titudinem Plotinus Proclusque resol-  
uant: at vero vnitatem ipsam vltius non  
resoluent. Nemo vnitatem resoluet in nu-  
meros, nemo punctum in magnitudines,  
nemo formam rei vltimam in aliam for-

mam, aut primam materiam in materiam, nullus denique simplices illos mentis nostræ conceptus, qui de scientiarum principiis semper intra nos lucent, in conceptus aut notiores referet aut priores. Vbi resolutio cessat, cessat diuissio, vbi diuissio desinit, perfecta simplicitas possidetur. quam obrem concludendum est, primos conceptus mentis simplices esse, & illa quæ inde noscuntur, partim talia esse, vt quamuis diuidi videantur, ea tamen ratione noscantur, qua minimè diuiduntur, ideoque notionem eorum esse indiuisibilem. Partim esse talia, vt penitus simplicia sint, & propterea simplicem esse eorum perceptionem, si modò intelligentia rebus intellectis æquatur. Si conceptus, notio, perceptio, simplices sunt, formæ quoque intelligibiles vnde nascuntur ista, sunt simplices. Si ita est, mens quoque est simplex, quæ simplicium est subiectum. Et quoniam quo quid simplicius est, eo est magis indissolubile, mensque summum simplicitatis attingit gradum, vt diximus, in cognoscendo summum quoque gradum naturæ indissolubilis assequitur in viuendo. Intelligentia enim est vitæ reflexio in seipsam. Ideo si per intelligentiam quæ vitam sequitur, simplicitatem summam attingit, quæ naturam antecedit indissolubilem, multo magis per vitam intelligentia priorem assequitur indissolubilem gradum simplicitate ipsa posteriorem.

*Quinta ratio. Si mens est corpus, tangendo intelligit & currendo.*

## C A P V T V.

**S**I mens est corpus, aut forma diffusa per corporis magnitudinem, duo quædam in se habet, vt aliàs indicauimus, punctum videlicet, & latitudinem. Atque eisdem conditionibus mancipatur, quibus & corpus. Ideo non aliter res intelligendas comprehendet, quam tangendo illas, seque per illas amplificando, & instar corporis transcurrendo. Aut igitur tangere diceretur, puncto solum vt intelligat, aut sola latitudine, aut vtrisque. Si solo utitur puncto, & ad cognoscendum indiget tactu, rerum magnitudines non cognosceret, quippe per punctum puncta attingit, non magnitudines: atqui etiam si attingeret, nunquam tamen totum aut totas eas agnosceret. Nam puncta in eo sunt infinita. Infinita quoque in magnitudine. Illorum omnium cumulus est intellectus, horum quodammodo cumulus est magni-

tudo. Infinita pertransire non licet. Ergo neque mens ipsa tota intelliget vnquam, neque totam intelliget magnitudinem. Igitur non solo utitur puncto. Num sola utitur latitudine ad tangendum? nequaquam. Sola namque illa cognosceret, quæ latitudine ipsa tanguntur. Hæc verò ea sunt tantum, quæ & ipsa latitudine distenduntur. Nunc autem præter hæc alia multa cognoscimus. Confugient ad hoc nonnulli, vt mentem confiteantur ambobus vti ad cognoscendum, puncto quidem ad simplicia, ad alia latitudine. Verisimile istud apparet, non tamen est verum. Primò quidem per punctum simplicia illa attinget solum quæ corpori applicantur vt punctum, formas verò solutas aut numeros non attinget. Deinde per latitudinem suam percurreret totam cognoscendi corporis magnitudinem, vt intelligat totum. Non potest autem latitudo aliqua totum aliquod transcurrere spacium magnitudinis, nisi qualibet sui parte in longum quamlibet spatij illius percurrat partem. Ergo mens singulas ipsius partes cuique parti corporis cognoscendi discurrendo per ordinem admouebit, admo- uendo cognosceret. Admouebit autem partes quodammodo infinitas. Tot enim partes mens habebit, si latitudo corporalis extiterit. Itaque breui tempore quasi innumerabiliter quamlibet illius corporis portionem intelliget, & ipsum corpus secundum particulas penè infinitas innumerabiliter cognitæ, infinitis (vt ita loquar) vicibus innumerè apprehendet. Sed hanc argumentationem nobili quadam Plotini nostri sententia breuiter concludamus. Quæcunque intelliguntur, aut sua natura simplicia sunt, aut saltem dum per resolutionem simplicia fiunt, intelliguntur. Quia verò indiuidua solis indiuiduis capiuntur, vis illa in nobis quæ capit talia, est indiuidua. Si ergo mens esse dicitur corporalis, non tamen latitudine sua capiet illa, sed aliquo potius impartibili. Si solo hoc capit, solo intelligit. Solum igitur hoc eius impartibile re vera mens erit. Quid reliquis opus est partibus, vt sit intellectus? quando non opus est aliis ad intelligendū, postquam vnum illud impartibile sufficit. Vnum igitur hoc mens est, hoc retine, se- grega cætera, mentem simplicem es adeptus. Cuius simplicitas etiam hinc apparet, quod accipit sine longitudine punctum, sine latitudine lineam, superficiem sine profunditate, numeros absque situ, pulchritudinē sine turpitudinis mixtione. Sic enim seorsum ista discernit considerando,

neque considerat aliter quam accipiat. Forma verò corporalis non omnino sic accipit ista seorsum. Si animum esse simplicem indiuiduumque illud liquidò ostendit, quod simplicia & indiuidua comprehendit, multo liquidius hoc declarat, quod quæcunque secundum se simplicia vel indiuidua forent, & tamen quia cum aliis iunguntur, composita diuiduaque euadunt, animus segregat ab oppositis redditque simplicia prorsus & indiuidua. Non posset autem illis restituere simplicem indiuiduamque naturam, nisi ipse esset simplex & indiuiduus. Denique si infectis restituit puritatem, ipse est extra & super infectionem.

*Sexta ratio. Intellectus accipit secundum se totum quicquid capit, quod non faciet, si fuerit corporalis.*

## C A P V T VI.

**N** Vllum corpus aliquid in se continet, nisi per eam quantitatis adæquationem per quam se toto totam rem comprehendat, partem verò parte, atque maiore sui parte, maiorem rei contentæ partem, minore minorem. Intellectus non hoc pacto res ipsas capit, nam se toto capit quicquid accipit. Eodem quippe modo capit, quo intelligit. intelligit autem se toto quicquid intelligit. Nempe si quis dixerit intellectum duas partes corporales habere, quarum vna quidem capiat rem & intelligat, alia minime, redarguemus eum, asseuerantes intellectum re vera esse partem illam quæ rem capit atque intelligit, siquidem ab intelligendo dicitur intellectus, illam verò quæ non intelligit, intellectum non esse. Quapropter natura illa quæ re vera intellectus est se tota rem quamlibet intelligendam capit atque cognoscit. Quando ergo intelligit hominis corpus, intelligit & corporis illius membra, se toto cognoscit totum corpus humanum, se toto cognoscit quodlibet eius membrum. Nam qui membrum quodlibet ad quodlibet comparat, & membra quælibet ad totum refert; necesse est ut idem tam singula membra cognoscat, quam corpus totum. Neque duas ponere debes partes in intellectu, quarum vna vnum cognoscat membrum, altera alterum. Per neutram enim illarum posset illa comparatio fieri. Si ut cognoscit, ita & capit, se certe toto capit tam totum corpus, quam membra corporis singula. Nul- lum verò corpus, nulla que forma corpo-

rea hoc pacto potest aliquid capere, neque potest corpus vnum omnibus pariter æquari corporibus. Quomodo enim corpus canis corpori formicæ, equi elephantis, solis æquabitur? Mens autem corporibus omnibustam maximis quam minimis pariter adæquatur, cum omnia intelligendo similiter comprehendat. Neque iis solum, verù etià quodāmodo sūmæ se equat æqualitati, dum res omnes minus magisue æquales per accessum ad æqualitatem summam rectè metitur. Vbi mens inter res quaslibet æqualitat. ipsius participes & ipsam æqualitatem se inserit mediam. Quod si summæ æqualitati proximè adæquatur, nulla inæqualium qualitatum iniquitate pulsatur.

*Septima ratio. Intellectus accipiendo rerum formas, non amittit suam, corpora contra.*

## C A P V T VII.

**S** Olent corpora quando corporum aliorum formas accipiunt, suas amittere. Quomodo enim aqua igneam caliditatem induet, nisi frigiditatem suam exuerit? Quod si quando aliena accepta, remanet etiam propria, sit imperfectior, ut quando remanet dulcedo in vino, etiam aqua illi infusa sit dulcis, sapor inde debilior. Mens autem rerum omnium accipit formas, dum omnes agnoscit, & cognitas in seipsa volutat, neque illas accipiendo, formam propriam amittit aut debilitat, quippe cum ex operatione semper cuiusque formæ habitus designeretur, atque operatio intellectus intelligentia fit, sequitur ut forma intellectus sit ipsa (ut ita dixerim) intellectualitas naturalis, quæ tunc perfecta maximè iudicatur, quando operatio eius intelligentia perfectissima est. Hæc autem tanto est perfectior, quanto plures rerum formas attingit. Sublimior enim fit, velocior & lucidior. Quamobrem intellectus corporum omnium formas accipiendo, non modò non amittit aut non remittit suam, sed (quod est contra naturam corporis) summopere perficit. Penetrat eorum substantias, & cuncta in singulis conspicit, dum in simplicibus per compositionem videt mixta, in mixtis per resolutionem simplicia intuetur. Ergo mens ita esse videtur in omnibus, ut in singulis ipsa sit cuncta. Rursus est extra & supra omnia corporalia. Alioqui non posset hæc ab incorporeis secernere, & illa ab iis discernere. Si est in omnibus corporali-

bus, omnia, atque etiam extra omnia, omnibus imperat per naturam. Quapropter nullius corporis violentia è suo statu deicitur.

*Octaua ratio. Forma est in mente vniuersalis: Talis in corpore esse non potest.*

## CAPVT VIII.

**C**Orpus & forma per corpus extensa, adeo (vt ita loquat) materialia sunt, ac particulari situi temporique astricta, vt vniuersalem vim nullam habeant. Quo enim quid corporali materiæ propinquat magis, eo angustius est, quo discedit longius, eo fit amplius. Quamobrem intellectus esset corpus, vel forma diffusa per ipsum, formæ omnes ab eo susceptæ, etiâ si in seipsis essent vniuersales, in eo saltem particulares omnino materialesque eaderent. Nam formæ in subiecto quod est astrictum materiæ passionibus, nullam vim retinent ad vniuersale quicquam representandum. Ita intellectus quicquid cogitaret, per formam materialem, singularibusque conditionibus astrictam excogitaret. Cum vera operatio rei cuiusque formam rei operantis sequatur, intellectus per talem formam operans, id est, excogitans, singulariter solum operaretur. qualis autem operatio est, tale semper est opus. Ideo intellectus singulariter cogitans, sola singularia cogitaret, neque commune quicquam & vniuersale cognosceret. Vnum quidem hominem, puta Socratem vel Platonem in se reuolueret, humanam vero naturam illis æquè communem minimè. Neque regulam in moribus & artibus ad plurâ vniuersalem statueret, neque legem conderet vnquam multos hominum actus respicientem. Si mens etiam sine electione & vsu quotidie in se ipsa formas parit vniuersales, fit vt ipsa fons earum naturalis sit, & receptaculum naturale. Formæ huiusmodi propriæ alicui materiæ minime astringuntur, neque mens igitur materiæ alligatur, neque corrumpetur vnquam. Corruptio enim ex materiæ insidiis protienit.

*Nonaratio. Mentis se inuicem complectuntur, corpora nequaquam.*

## CAPVT IX.

**D**Vo corpora se inuicem mutuis amplexibus continere non possunt. Quod enim per quantitatem aliud conti-

net, maius est illo quod continetur. Non potest autem vnum corpus alio quodam vno corpore amplius esse simul atque angustius. Sic Saturni sphaera Iouis sphaeram ambit & continet, non e conuerso.

Alia vero mens aliam continet, & ab eadem pariter continetur. Mens quidem mea tuam considerat, tua meam. Itaque nostræ mentes se inuicem considerando, vicissim se capiunt, capiendo intelligunt, complectuntur intelligendo. Et (quod maius est) vna mens amplectitur omnes, quando mentium omnium naturam considerat. Quare si quæque mens mentem quamlibet intuetur, quod potest quidem, si animaduertat, quauis mente mens quælibet clauditur. Non potest autem quodlibet corpus quolibet corpore claudi. Si quælibet rerum species est immortalis, consequens est vt singularis substantia, quæ speciei suæ seipsam æquat, sit immortalis. Mens autem quælibet quælibet (si contingat) introspicit, & in singulis cunctarum conspiciit speciem, vbi suæ speciei per actum reflexum, qui cognitio est, se æquat. Ergo & per actum rectum, qui est vita, prius se æquauit eidem. Si ita est, sequitur vt vel quælibet mens semper fuerit, futuraue sit, sicut ipsa mentium species, vel saltem futura sit semper vt illa.

*Decima ratio. Mens Per omnia corpora operatur, & supra corpora.*

## CAPVT X.

**Q**Voniam forma operadi principium est, res quæque secundum genus agit, ex quo omnia prolem sibi similem, modo possint, in specie generant, vltra verò genus suum nihil agit. Sed neque etiam hæc inferiora vltra speciem operantur, (nunquam enim canis generat oue) & multo minus aliquid supra suam speciem operantur. Nam quo pacto canis hominem procreabit? quo fit, vt corpus agendi vim suam nec vltra proprium genus, & multo minus supra naturam suam possit extendere. Nunquam igitur attinget, assequetur, producet, aut quodlibet corpus aut incorporalia. Intellectus si corpus esset, certum quoddam corpus esset in specie aliqua corporum. Ex hoc duo sequerentur absurda. Primum, quod multorum corporum formas neque susciperet, neque conciperet. Corporum quidè ipsius similium mas non caperet, quoniam iam haberet. Quomodo enim ignis formam alterius ignis accipiar? Dissimilium verò corpo-

rum formas nequaquam conciperet aut pareret, quælibet enim natura sibi simile parit. Ad hoc autem quod intelligat, oportet ut rei intelligendæ formam accipiat primum, deinde ex illa definitionem rei rationemue concipiat, tunc demum perficitur intellectio. Per pauca igitur corpora intellectus cognoscet, si corpus fuerit, cum nullius corporis similis accipiat formam, nullius dissimilis corporis formam concipiat, & intelligere nequeat, nisi & accipiat pariter & concipiat. Quod si quomodo geri possit, ut corporalem aliquam formam accipiat vel concipiat, profecto non aliter quam secundum naturam propriam hoc efficit. Si accipiet aliunde formam, in naturam trahet suam. Si concipiet ex seipso, secundum naturam suam parturiet. Ergo per formam quamlibet ab ipso susceptam vel etiam conceptam, semper certam quandam speciem corporis sibi conuenientem & congruam apprehendet, neque corporalium generum diuersitatem considerabit. Nunc autem videmus mentem non modo quæcunque corpora sunt animaduertere, sed alia infinite plura & varia prout libet effingere.

Secundum vero sequeretur absurdum, si intellectus esset corpus, quod videlicet ordinem corporum non transcenderet, cum corpora fermè nunquam ultra suam speciem, certe nunquam supra suum genus aliquid operentur. Mens igitur nunquam cognoscet incorporea. Vtrum horum præstantius arbitraris? Substantiam ne an actionem? Substantiam certè, quæ ipsius actionis est causa. Cauendum itaque ne operationem aliquando substantia sublimiorem confiteamur. Esset autem mentis operatio sublimior quam substantia, si substantia quidem eius certum corpus esset solummodo, intelligentia verò eius & corpora quæque & incorporea comprehenderet. Quapropter non est corpus, quandoquidem ultra corpora quælibet apprehendit etiam incorporea. Atqui neque etiam est forma aliqua mixta corpori, nam forma mixta sicut per corporis diuisionem fit diuidua, sic fit, qualis per corporis qualitatem. Ideoque certam quandam mens sibi contraheret qualitatem à corpore, per quam ipsa ad certam speciem corporalium rerum determinata, certam speciem corporalium cognosceret solum, sicut visus per oculum ad colores contrahitur. Et formas simillimas non caperet, ut diximus, neque etiam dissimillimas. Atque hæc Aristotelis sententia est Platoniciis compro-

bata. Sed addunt Platonici, quod mens si mixta esset, neque caperet incorporea, quia quod mixtum est, sincera non comprehendit, neque affectaret attingere aliquid à corpore separatum, alioquin affectaret à corpore separari atque dissolui. Neque aliter cognosceret quam mouetur, sicut materialis potentia solet. Nunc autem non ut mouetur, sed ut ipsa sibi met efficit species, sic abstrahit, discurrit, seque in se quasi absque fine reflectit. Neque obstrepat hic nostris auribus Epicureus aliquis, negans intellectum incorporea capere. Sanè & cupit illa semper, & capit sola summa cum voluptate tanquam ipsi simillima. Neque solum illa cupit & capit, sed etiam procreat. Quid enim nos aliud modò in his disputationibus nitimur, nisi rem aliquam mentis nostræ (ut ita loquar) manibus fingere à corpore alienissimam? Quam finximus iam & fingimus, atque ijs ipsis mentis manibus atrectamus, & antequam effingeremus, prospeximus effingendam. Nempe cum primum statimus animam monstrare incorporealem esse, videbamus iam aliquem alicubi incorporealis naturæ gradum, ad quem perducere animam volebamus. Quid quotidie facimus disputando? quoties essemus aliquam asseueramus, quæ existat quidem, nullam verò habeat longitudinem, latitudinem, profunditatem, vel qualitatem aliquam, vel figuram, tunc certè spiritum quendam mente creamus supra corpus, & corporis passiones. Ibi profectò nostra mens est, ubi parit, parit inquam prolem sibi persimilem, nullo modo substantia sua sublimiorem. Igitur mens nostra corpora & conditiones corporum supereminet. Quamobrem neque loco clauditur, neque temporum limitibus circumscribitur. Vbiq; igitur esse potest, & semper. Idcirco nihil prohibet illam fore perpetuam.

*Vndecima ratio. Mens statu proficit, corpus motu.*

## C A P V T X I.

**N**Vnquam corpus formam nouam accipit, nisi per motum. Nam per alterationem (ut aiunt Physici) forma inducitur in materiam. Mens autem neque per motum accipit formas, neque accipiendo mouetur. Quæ quanto magis ab omni perturbationum & negotiorum motu quietem agit, tanto magis proficit speculando. Vbi etiam apparet eius æternitas, quia suapte natura solam speculationem



nem veritatis affectat, atque ideo statum, sine quo non perficitur speculatio. Proficat autem corpus motu, quod per motum natum est. Quod ergo stando proficit, ex statu dependet, ideoque stabilem habet substantiam, atque perpetuam.

*Duodecima ratio. Quæ in materia sunt contraria, non sunt in mente contraria.*

## CAPUT XII.

**F**ormæ contrariorum elementorum dum sunt in materia, contrariæ inter se sunt, quia pellunt se inuicem, & interimunt. In mente non sunt contrariæ, quia ibi non modo non pellunt se inuicem, sed & iuuant. Simul quidem nostra mens habet contrariorum elementorum formas, quando simul elementa considerat. Simul quoque comprehendit bona & mala, vtilia & inutilia, pulchra atque deformia, lucem & tenebras, vocem atque silentium, dulce & amarum, & reliqua, atque ex cognitione alterius contrarij sincerius iudicat alterum. Non igitur est corporea, neque etiam propriè corruptibilis. Quippe quod corrumpitur, ut plurimum corrumpitur à contrario. Quod autem esse potest menti contrarium, quæ tantam habet super contraria potestatem, ut ab ipsis auferat contrarietatem, & sua pace conciliet inimica? Neque rursus corruptibilis est, quod à suis conseruatoribus disiungatur. Nam si aliena & contraria alienis contrariisque conciliat, multo magis se suis tum causis tum seruatoribus admoet.

*Duodecima ratio. Mens accipiendo format non mutatur.*

## CAPUT XIII.

**C**orporis cuiusque forma quando verè ab alio corpore capitur, tale reddit omnino illud quod suscipit ipsam, quale est corpus illud à quo forma tribuitur, veluti quando flamma ignis à ligno suscipitur, lignum facit calidum atque igneum. Flamma verò illa in speculo longè distante resplendens, speculum non reddit calidum aut igneum, quia non verè ab illo suscipitur, cum propter distantiam ad veram ignis flammam non sit paratum. Imò verò nullo modo flammula illa, id est imago illa flammæ, cum spiritalis sit, in speculi corpore figitur, sed in spiritali So-

lis lumine, quod ambit speculi superficiè. Fiunt autem huiusmodi rerum imagines non à corporibus his, quorum imagines sunt ( corpus enim non procreat aliquid incorporeum ) sed à lumine spiritali corporibus circumfuso.

Lumen quoque ipsum à Solis globo non nascitur, sed à Solis anima, cuius lux cum intra se sit inuisibilis, effusa longius sit inuisibilis, in qua ipsa quoque anima fit conspicua. Nam ut placet Orphicis, & Heraclito, lumen nihil aliud est nisi visibilis anima, unde per hoc omnia reuiuiscunt, anima verò lux inuisibilis. Sed ne longius digrediamur, formæ vel imagines corporum non sunt in speculis. Mens autem corporum accipit omnium formas, quando de corporibus iudicat. Num accipit verè? Vere profecto. Nèpe ut accipit, ita iudicat, vere iudicat, vere igitur accipit, accipit à seipsa (ut Platonici opinantur) quando corporum simulachris excitata, formas quæ in mentis abditis latent, promit in lucem. Accedit, quod ubi perfectior forma est, ibi est & verior, quanto verò perfectior sit forma corporum in mente quam in ipsis corporibus, & aliàs declarauimus, declarabimusque. Et hinc patet quod humana natura in Platone vel Socrate solius Platonis est, & solius Socratis propria. Humana autem natura illa, quæ mente concipitur, quando sub vna hominis definitione hominum condiciones considerat, ad singulos homines habet vim, siquidem omnes complectitur. Præterea si veritas rei cuiusque in pura integritate consistit, vel integra puritate, atque forma in materia vim suam integram non retinet propter passionis admixtionem, & extraneis accidentibus circumfunditur, verior res quæque inuenitur in mente, ubi rei ipsius idea naturaliter insita notionem rei parit; necessaria quidem includentem omnia, superuacua verò penitus excludentem. Mens igitur vsque adeo verè corporum capit formas, ut verius etiam eas habeat quam materia corporum. Igitur si ipsa sit aliquid corporale, talis reddetur omnino, qualia corpora. Fiet ergo aqua cum aquam intelliget, cum ignem intelliget, ignis. Et quia simul intelligit calorem atque frigus, fiet contraria simul. Nunc autem formas accipit omnium, neque è suo statu deiicitur, imò perficitur capiando. Hinc apparet intellectum non esse corporeum. Apparet etiam non esse mortalem. Ille siquidem eo modo quo est, accipit quicquid accipit. Esse suum intellectuale est duntaxat. Non ergo acci-

pit quicquam aliter quam intelligendo. Per huiusmodi susceptionem non modo non deficit, sed & proficit. Nihil ergo suscipit aliunde, quod ipsum mutet & perdat, & quod maius est, tantum in omnibus formis suscipiendis lucratur, ut lucrari etiam videatur in malis. Si tanto perfectior euadit, quanto cognoscit plura, certè perfectior est si rerum priuationes, defectus & mala discernit, quam si ignoret. Quæ ergo in seipsis mala sunt & noxia, in mente fiunt bona atque salubria, multum abest ut ea natura à malis noxiisque rebus interimatur, quæ ita mala conuertit in bona, ut ipsi bona sint omnia.

*Decima quarta ratio. Operatio corporis tendit ad rem compositam, mentis ad simplicia.*

#### C A P V T XIV.

**O**peratio cuiusque rei esse ipsum rei semper sequitur, ita ut illius sit operatio, cuius & esse, & modus operandi idem sit, qui & essendi, & opus ad quod terminatur operatio, sit simile operanti. In rebus ex materia & forma corporali compositis, esse non est materiæ proprium aut formæ, sed totius compositi ex utrorumque coniunctione confecti. Igitur & compositi ipsius propriè operatio est, quare & modo composito operatur, & opus producit compositum, hoc in elementis, plantis, animalibus intuemur, quæ quidem opera composita sicut ipsa sunt, generat. Si intellectus corpus aliquod esset ex materia & forma compositum, cum eius operatio intelligentia sit, hæc ipsa intelligentia semper ad aliquid compositum terminaretur, unde nunquam aliud præter res compositas intelligeret.

Nunc verò nostra mens usque adeo naturalem excellit compositionem, ut corpora composita in materiam resoluat & formam, & cogitet utrumque seorsum. Utrumque vero per se est simplex. Atque in hoc maxime excellentia eius aspicitur, quod illa quæ in materia quodammodo falsa sunt, tanquam vera comprehendit, sicut figuras, & principia figurarum, quæ in materia sunt impura, discernit ut pura. Qualitates enim quæ sunt in materia mixtæ inuicem, & infectæ contrariis, ipsa secundum proprias diiudicat rationes. quæ in se multa sunt, conspiciuntur tanquam vnum, cœu sub vna specie homines infinitos. quæ in se mobilia sunt, tanquam stabilia speculari, quando temporis partes quæ in se

ipsis fluunt, simul colligit, & præsentia annectit præteritum & futurum. Quæ in se distantia sunt, tanquam vnita sæpissime conuertitur, quando totum orbem videt in puncto. Neque temporum intervalla, neque locorum spacia mentis intuitum cohibent. Quæ ( ut ita loquar ) mortua tanquam viuientia. Siquidem lapides qui vita carent, mens viuos intra se possidet, quando ad primam à qua facti sunt, comparat vitam. Quæ corruptibilia tanquam perpetua, quando singula corpora quæ loco subiiciuntur & tempori, mens intuitu suo à locis & temporibus eximit. Ex omnibus his colligitur, intellectum neque esse corporeum aliquid, cum longè aliter quam corpora operetur, neque esse impurum, infectum, dispersum, mutabilem, corruptibilem, quippe cum illa etiam quæ talia sunt, sua quadam vi ab huiusmodi liberet passionibus.

*Decima quinta ratio. Actio mentis finitur in actione, actio corporis in corpore.*

#### C A P V T XV.

**N**ullius corporis actio in ipsam actionem propriè desinit, sed in exteriorem transit materiam. Nam si in actionem desineret, actio illa in operante restaret, vbi in seipsum operaretur, puta ignis seipsum calefaceret. Quod non potest à corpore fieri, quia si corpus non agit ex se, etiam non agit in se. Rursus si quicquid corpus agit, mouendo agit, certè cum mouere se nequeant, in seipsum agere nequit. Videmus autem mentis operationem, ipsam scilicet intelligentiam, in seipsam desinere, neque quicquam per se extrinsecus facere, nisi forte quandoque moueat voluntatem, quæ motis brachiis opus aliquod extra producat, quale fuerat cogitatum. Sensem autem dicimus quodammodo extra se fluere. quia aliunde mouetur, prospicit aliena, externi finis gratia operatur, neque sui ipsius est conscius. Mens contra, mouetur liberè, se suæque inspicit, sui gratia operatur. Ideo essentia apud Platonem status dicitur, quia si sine vita sit, torpet. Vita motus, quia iam exit in actum. Mens reflexio, quia sine hac vita in externum opus efflueret. Sed mens sistit vitalem essentiam motum in semetipso, reflectit ipsum in essentiam quædam sui ipsius animaduersione. Trahit quoque cætera omnia ad seipsam, prout res potius ut ipsa mens est, quam ut res

extra existunt, considerat. Vocatur etiam reflexio infinita, quia in operationem suam non modo semel mens hominis terminatur, verum etiam innumerabiliter, cum se aliquid intelligere animaduertit, & quod animaduertat agnoscit, & cum aliquid velle se vult, & vult quod velit se velle, atque eadem ratione deinceps, ubi vel operatio alia in infinitum terminatur ad aliam, vel eadem in se replicatur innumerè. Hinc patet intellectum non solum esse incorporeum, sed etiam immortalem. Siquidem per seipsum operatione sua se format semper & perficit, semper intelligendo atque volendo. Hoc autem nihil est aliud quam seipsum vel facere, vel seruare, vel renouare continuè, quod quidem quotidianæ renouationis nomine Paulus Apostolus appellauit. Quo fit ut nunquam à suo perfectore vel seruatore deficiat & absit, cum nequeat abesse vnquam à semetipso, atque ideo formetur semper atque perficiatur. Quinctiam si naturalis generationis finis immortalitas quædam est, multo magis intellectualis generationis finis est immortalitas. Sed quia natura prolem extra se gignit, immortalitas eius expletur in successionem nascentium. quia verò mens generat in se ipsa tum se, tum alia, quantum & sui & aliorum omnium concipit rationes, quando, aut se intelligit, aut alia, sequitur ut immortalitatis huius virtus in mente ipsa genitrice seruetur. Hic etiam latet argumentatio quædam huiusmodi. Præstantius est bene esse, quam simpliciter esse. Quisquis igitur bene esse sibi præbet, multo magis potest sibi esse se præbere. Intellectus sibi dare bene videtur, quando format perficitque seipsum tum speculatione, tum moribus. Quapropter esse quoque sibi potest secundum formam ita præstare, ut nunquam desinat esse. Mitto quod Proculus ait, animam, cum sit generationis principium, ita seipsam gignere atque viuificare, ut essentiam habeat à seipsa. Atque summam de omni indiuisibili substantia in sua essentia existente, affirmat tum producere tum continere seipsam. De omni autem substantia diuisibili, etiam de ipso cælo, dicit necessario aliunde produci atque contineri. Sed hoc ipse viderit. Latet præterea alia quædam talis argumentatio. Quando intellectus operationem suam primò, atque inde vim suam & substantiam comprehendit & amat, tunc proculdubio in seipsum agit. Igitur & per seipsum. Nihil enim inter intellectum, atque ipsummet medium interponitur. Adde quod quemadmodum

corpus quia ex se non agit, ideo non operatur in se, sic intellectus quia in se operatur, idcirco ex se operari censetur. Si ex se in se agit, igitur & per seipsum. Si enim vtrique in eo actionis termini sunt, igitur & medium. Quid ergo prohibet intellectum à corpore separatum operari & viuere? præsertim cum operatio ipsius quæ ex se in seipsum per se expletur, necessariò fiat, & resideat in seipso? Sed hoc ita planius explicabitur. Si mentis operatio propriè in seipsam mentem finitur, mens ipsa quodammodo suæ operationis est finis. Idem vero est rei cuiusque finis, ac principium, cum omnia originem suam appetant, & tanquam sui motus finem sibi illam proponant. Igitur substantia mentis est operationis suæ principium, per se igitur operatur, quod Plato noster appellat per se moueri.

Ut operatur, ita viuit, vita enim est interior operatio, viuit itaque per seipsam, ut viuit, ita etiam est, nam vita est primus existentiae actus. Est ergo similiter per seipsam. Quid impedit eam esse semper, quandoquidem sui ipsius est causa? Causa inquam non efficiens, sed formalis, cuius virtute esse tribuitur & seruatur. Qualitas & vita, cuius operatio omnis in alia effluit, necessariò secundum naturam suam quatuor ex partibus deficit. Primò, quia effluendo vacillat, alieno indiget sustentaculo. Secundo, diffluendo debilitatur. Tertio, dum insluit aliis, ab extraneis inquinatur. Quarto, propter indigentiam, debilitatem, inquisitionemque à natura sua quandoque defluere cogitur. Si ita est, sequitur ut rationalis vita quæ relabatur in seipsam sustineat, non debilitetur, non inquinetur, non defluat. Meritò sicut vita quæ omnino profluere cogitur extra seipsam, dum discedit à vita, tendit consumiturque in mortem, sic vita quæ redundat in semetipsam, adolescit & consummatur in vitam. Denique si vberior motus, vitæ vberioris indicium est, vita rationalis quæ vniuersum motionum genus exercet, implet & terminat, vniuersum quoque genus implet viuendi, ideoque ipsi neque priuatio vitæ miscetur, neque conditio vlla obnoxia morti. Exercere autem ipsam omnes species motionum in corpore, implere motionum omnium exemplaria in se ipsa, terminare motum omnem in seipsam, suumque principium per mentis ipsius reflexiones, aliàs declarauimus.

*Decima sexta ratio. Forma corporalis non habet vim infinitam, mens habet.*

## CAPVT XVI.

**C**onstat apud Physicos, formam corporalem, præsertim elementalem, esse usque adeo terminatam, ut nullo modo vim aliquam infinitam indefessamque possit habere, mens autem absque termino peruagatur, neque fatigatur vnquam. Principio in seipsa quasi est sine termino, intelligit enim seipsam. Ideo intellectio eius profecta ab ipsa mentis substantia, in eandem reuoluitur. Reuolutio infinitus est motus. Ad nullum enim terminum proficiscitur extrinsecus acquirendum, quo pacto quiescat, sed propriam ambit substantiam, sui ipsius auida. Sui verò ipsius auiditas nunquam extinguitur. Substantia igitur quæ suimet cupiditate caput semel sibi vndique fieri obuia, & circumcundo seipsam vndique contueri, eadem cupiditate perpetuo instigante, semetipsam perpetuo similiter pro arbitrio amplectetur. Motus igitur intellectus, quoniam orbicularis est, in seipsum circumuolutus, quatenus intellectualis est, est vtique sempiternus. Caret etiam fine, vt diximus, ob eam causam, quod infinite intelligentia replicatur. Potest enim qui aut se aut aliud quoduis intelligit, sicut rem ipsam intelligit, sic suam intelligentiam intelligere, itemque aliam & aliam sine fine, dum & rem cognoscit, & quod cognoscat illam, animaduertit. Rursus, quod sic animaduertat, ipsum non latet, & similiter absque termino. Talem intelligentiæ cursum comitatur rationalis appetitio illa quæ nuncupant voluntatem. Hæc sanè seipsam vult, aut quoduis aliud, & vult se vellet, & rursus vult quod velit, similiterque deinceps. Quinetiam corpora diuidit in partes plurimas, partiumque particulas, numeros augeat supra numeros absque fine. Figurarum modos, mutuasque illarum proportionem, atque etiam numerorum comparationes innumerabiles inuenit, lineam supra cælum ultra terminum vndique protendit. Tempus in præteritum absque principio, in futurum absque fine producit. Neque solum ultra omne tempus aliud antiquius cogitat & prolixius, verum etiam ultra omnem locum alium semper cogitat ampliorem. Innumeros quoque effingit gradus in singulis qualitatibus. Accedit, quod non vno quodam rerum genere mens, sicuti sensus, contenta est. Non solis coloribus, vt visus, non so-

lis vocibus, vt auditus, sed currit per omnia, Per omnia inquam, non modo quæ sunt, sed quæ fuerunt, erunt. Neque id solum, sed per illa etiam quæ neque sunt, neque fuerunt vnquam aut erunt. Multa enim excogitat quæ forte esse possent, non tamen fient vnquam, & multa quæ esse forsitan nunquam possunt, ipsa fingit. Quanquam non minus in rerum natura esse videntur, quæ mens per se pingit in seipsa, quam per linguam in aëre, vel per manum pingit in pariete. Nouas quoque semper rerum facies vi propria & quodam ordine fabricat, & rursus innouat alias. Nonne etiam postquā gradatim per mundi sphaeras ascēdit, gradatim quoque Angelos ita considerat, vt alium videat semper alio altiore, neque tam sublimem reperit vnquam, quin possit aliū vno saltem gradu, & alium rursus alio gradu inuenire maiorem? atq; id tamdiu facit, quandiu facit, quandiu finitum esse Angelum quæque pronunciat, ex quolibet finito spiritu, inuenit alium altiore. Atque ita sine termino progrediretur, nisi ipsamet sibi modum imponeret, concluderetque esse spiritum aliquem infinitum, qui omnem angelum, & qui esse, & qui cogitari potest, innumeris gradibus superet. Quis infinite progreditur? Quis infinitum progressum quodammodo terminat? Quis terminum illum progrediendi infinitum assequitur? Mens certè hæc facit. Mentis igitur quodammodo infinita virtus est, quæ in eo quoque apparet, quod non modo reperit infinitum actum, qui Deus est, verum etiam potentiam infinitam, quæ est materia subdita Deo, atque ad innumerabiles formas inde capiendas idonea. Hinc etiam infinitam inuenimus generationis vicissitudinem, quæ potest per infinitum tempus ab actu infinito fundi in potentiam infinitam. Apparet rursus ex eo, quod vniuersales rerum rationes capit. Sub quolibet autem vniuersali seu specie siue genere innumerabilia continentur. Innumerabiles sub humana specie homines successione perpetua, itemque sub aliis infinitis indiuidua colligit in vnam speciem, species multas in genus vnum, multa genera in vnam essentiam, essentiam vnam in diuinam vnitatem, veritatem, & bonitatem.

Vicissim ab hac vna gradatim descendit in multitudinem infinitam. Mira profecto virtus, quæ infinita reddit vnum, vnum reddit infinita. Huic fermè non proprius in natura gradus est ullus, quatenus summum deorsumue penetrat omnes;

Non fitus est proprius quatenus nusquam sistitur. Non certa ( vt ita dicam ) & terminata potestas, quatenus ad omnia æqualiter operatur. Illud quoque mihi videtur vim mentis ( vt ita loquar ) interminatam præ cæteris demonstrare, quod ipsam infinitatē esse inuenit, quidue sit & qualis, definit. Cum verò cognitio per quamdam mentis cum rebus æquationem perficiatur, mens cognitæ infinitati, æquatur quodammodo. Infinitum verò oportet esse, quod æquatur infinitati. Ac si tempus quod successione quadam metitur motum, infinitum esse oportet, si modo motus fuerit infinitus, quanto magis infinitam esse oportet mentem, quæ non modo motum tempusque stabili notione, sed infinitatem ipsam quoque metitur? Cum necesse sit mensuram ad id quod ipsa metitur, habere proportionem, finito verò ad infinitum sit nulla proportio. Idem quoque euidenter ex eo monstratur, quod à non esse considerando transit in esse, atque econuerso. Esse autem & non esse, immenso inter se discrepant interuallo. Immensam verò oportet esse virtutem, quæ spacium percurrit immensum. Currere autem illud quis negat? quando creationem quæ ex non esse fit ad esse, & interitum qui fit contrà, certissimis rationibus comprehendimus, atque vtriusque extremi naturam describimus, & ipsius esse communis vim intellectu consequimur, quæ rebus eius progressionem nascentibus per innumerabiles essendi modos communicat. Denique vt summatim dicam, infinitam quodammodo esse in mente virtutem illud nobis testimonio esse poterit, quod fames corporis, sitisque, & somnus, citò & re paucula satiantur, mentis ardor nunquam extinguitur, siue humana respiciat, siue diuina. Si auct humana, quis diuitiarum cumulus, quæ imperij amplitudo hunc terminat? Si diuina, nulla rerum creatarum finitarumque scientia impletur. Merito quiescit nunquam, nisi infinitum Deum capiat, qui capacitatem eius ab ipso ma-

nantem impleat infinitam. Quæ si finita esset, aliqua re finita vel impleteretur, vel saltem fitis eius vtrumque leuaretur. Nunc verò per quorumlibet finitorum adeptionem non modo non extinguitur, sed flagrat ardentius, quoniam quo magis plura capiendo, Deo infinito quadam præparatione propinquat, eo ardet magis igni suo facta propinquior, atque eo currit rapacius infinito sui motus fini iam proxima. Quod & ignis elementum facit, quando in propriam sphaeram se recipit.

Facit idem lapis euià manifestius, quando descendit ab alto, qui quo terræ fit propinquior, eo vehementius defertur in terram. Quis dixerit mentem elementale corpus esse, vel corporale quicquam, si vim possidet infinitam? Vim, inquam, tum perseverandi & capiendi, tum ambiendi, percurrendique, siue seipsa hanc habeat, siue ( vt verius loquar ) quadam amplificatione diuina. Quatenus videlicet absoluta infinitas Dei mentibus animabusque proximè ab ipsa pendentibus, intellectualem vitamque infinitatem inserit, seruatque continuè, atque in infinito principio ad finem reuocat infinitum. Si enim solet vbique ab absoluta qualitate manare similis aliqua communicata qualitas, quid mirum ab absoluta infinitate talem quandam alicubi aut talem infinitatem effluere? Imprimis autem in mentes & animas, per quas Platonici putant in mundo quoque temporis generationisque successionem procedere infinitam. quis igitur adeò demens erit, vt velit mentem habituram esse aliquem in perduratione sua terminum, cum in virtute saltem adeo amplificata & operatione non habeat? quasi possit habere extra se terminum, quem in seipsa non habet. Si vita origine antecedit intelligentiam, & intelligentia precio vitam excedit, atque humanus animus tanta est dignitate donatus, vt concessa sibi fuerit infinita quodammodo virtus intelligendi ac volendi, multo prius magisque concessa eidem fuisse debet virtus infinita viuendi.



# THEOLOGICÆ PLATONICÆ.

DE IMMORTALITATE ANIMORVM,

EODEM FICINO AVTHORE,

LIBER IX.

*Probat per rationalem virtutem, animam non modo esse formam indiuiduam, verum etiam à corpore non pendere, ut euidentius immortalitas demonstratur.*

*Prima ratio, quia mens reflectitur in seipsam.*

## CAPVT PRIMVM.



**A**CTENVS probauimus per virtutem rationalem animam esse formam indiuiduam, immortalemque. Deinceps probandum est eam à corpore non pē-

dere, vnde propriè concluditur immortalitas. Res diuinales in seipsas minimè reflectuntur. At si quis dixerit rem aliquam diuisibilem in se reuolui, sic statim interrogabimus. Vtrum pars huius rei alia vertatur in aliam, an pars in totam, an tota in partem, an tota potius in ipsam totam? Si datur primū, non aliquid idem vertitur in seipsum, cum inter se diuersæ sint partes. Si secundum conceditur, aut tertium, sequitur idem. Alii denique pars est aliud totum. Solus restare videtur modus quartus, quod totum vertatur in totum hoc non aliter fit quam si omnes partes vertantur in omnes. Esto. Tandem nos conuersione huiusmodi facta quæremus, vtrum pars aliqua in re remaneat extra aliam, vel ab alia discrepans, an nulla. Si remaneat, alia pars in hoc erit situ vel modo, in illo alia, atque ita in se inuicem conuersæ nouidum erunt. Sin nulla certè nulla in ea re pars distabit discrepabitue apertè. Quod tale est, indiuiduum est omnino, ita vt neque ex partibus quantitatis, neque ex materia & forma constituatur. Itaque aut non reflectitur res aliqua in seipsam, aut si refle-

ctitur, est indiuidua. Animam in se reuolui modis quatuor aliàs diximus; scilicet per intellectum in naturam suam, quando quærit, inuenit, consideratque seipsam. Per voluntatem in naturam eandem quādo se affectat & amat. Per intellectum in actum ipsum intelligendi, quando & rem intelligit & se intelligit intelligere. Per voluntatem in voluntatis actum, quando & vult aliquid, & vult se velle. Atque has rotas quatuor Plato animæ curru tribuit, & hunc esse fontem illum quadruplicem arbitror naturæ perpetuæ, quem Pythagoras inquit animæ hominum ab Ioue tributum. Si nulla res diuidua remeat in seipsam, profectò nostra hæc quadriga rationalis quæ per rotas quatuor in se recurrit, atque ipse fons intimus qui per quatuor gurgites refuit in seipsum, simplex est, & prorsus indiuisibilis. Huiusmodi verò conuersio non est à corpore ad corpus, sed ab anima ad animam quæ ex multis aliis supra, & hic ex eo probata est indiuisibilis esse, quod in se redeat. Quapropter conuersio talis à corpore libera est, cum neque exordietur ab ipso, neque in ipsum regrediatur. Multo magis animæ substantia libera est à corpore, si conuersio quæ eius est motus est à corpore libera. Itaque rationalis anima nullo modo pendet ex corpore in essendo, sicut neque in mouendo & operando. Itē si per operationē in se reflectitur, reflectitur etiam per effectum. Ita est

sentia animæ in se conuertitur. Quo autem cuiusque rei conuersio fit, illinc est & profectio, atque contra. Igitur ex se anima, quæ in se vertitur. Ex se inquam, tribus præcipue modis. Primo secundum formam, quia per formam aliam non formatur, alioquin non ad se, sed ad illam recurreret. Deinde secundum fundamentum, quia non sustinetur ab alio. Non enim innititur alteri forma hæc, quæ sibi met innititur, quâdo adnititur ad seipsam. Tertio secundum simplicitatem, quia non constat ex partibus. Nam quo pacto explicatur ea forma per partium superficiem, quæ in suum centrum penitus replicatur? quod ita est ex se, est semper quoniam quod definit esse, id aut quia à causa formatrice derelinquitur, aut quia à fundamento deseritur, aut quia dissoluitur in partes, esse definit. Quod verò ad seipsum conuertitur, quia indiuiduum est, non dissoluitur, quia sui ipsius est forma, à formatrice causa non relinquitur, quia in seipso manet, nunquam à fundamento deseritur.

*Secunda ratio. Mens quo magis separatur à corpore, eo melius se habet.*

## C A P V T II.

**S**I anima originem ullam à corpore traheret, quanto coniunctius haberet corpori, tanto melius se haberet. quælibet enim res ab origine sua seruat atque perficitur. Nunc vero contra contingit. Præstantissimæ animæ partes sunt intellectus atque voluntas, quando circa corporalia occupamur, intellectus aut nihil cernit omnino, aut non sincerè discernit, sensibus & phantasia deceptus, voluntas affligitur, dum multis inde vexatur curis. Contra, quando corporalia despiciunt, & sopitis sensibus expulsisque phantasmatum nubibus animus per se aliquid speculatur, tunc intellectus sincere discernit, claretque maximè, quod etiam in his apparet, qui per somni quietem aut aliam quamuis alienationem à corpore, vaticinantur. Ideo nonnulli (vt in Critone & Apologia inquit Plato) prope mortem cum sunt, futura prædicunt, quasi tunc illa videant in supernis numinibus præscripta, quibus suapte natura iungitur animus, modo non impediatur à corpore. Vnde Socrates tractus à falsis accusatoribus in iudicium, primo prædixit iudicibus futuram pœnitentiam, accusatoribus ruinam, ciuitati seditionem, deinde in carcere mortis suæ diē

præsignauit, monstratum sibi à numine per quietem. Item Theramenes cum esset coniectus in carcerem, biberetque venenum, Critiæ aduersario suo proximam mortem est auguratus, quæ breui consecuta est. Rhodius quidam moriens (vt scribit Possidonius Stoicus) sex æquales nominauit, dixitque qui primus eorum, qui secundus, qui deinceps moriturus esset. Scribit & Aristoteles, Eudemum Cyprum familiarem suum cum venisset Phæras Thessaliæ oppidum, grauiter ægrotasse, eique visum in quiete egregia facie iuuenem, qui diceret fore vt breui conualesceret, paucisque diebus Alexander oppidi illius tyrannus interiret, ipseque Eudemus quinquennio post domum rediret, paulo post conualuisse illum, tyrannum fuisse interemptum, Eudemum peracto quinquennio obiisse, atque ita eius animam in patriam remeasse. Nonne Calanus Indus iam moriturus etiam Alexandro regi mortem prænuñciauit? Et Phercides Syrus moriens Ephesis victoriam contra Magnesios vaticinatus est. Leguntur alia multa generis eiusdem.

Non solum vero intellectus, dum seorsum à corporis contagione viuimus, cernit multa perspicue, sed & voluntas impletur, neque perturbationibus ullis affligitur, sed diuinis gaudet summopere tanquam sibi simillimis. Hinc sequitur non esse corpus originem animi, si quo longius animus discedit ab illo, eo se perfectius habet. Sequitur & hoc, si quanto magis mens in hoc corpus immergitur, tanto deficit magis, & quo discedit longius, eo magis & proficit, tunc fore perfectissimam mentem, quando penitus ab hoc corpore euolauerit. Non est autem inde interitus, vnde summa perfectio, sed integra vita, vsque adeo vt sit perpetua. qua enim mutatione animus vnquam deficit, quando non perit exeundo è corpore, qua nulla ipsi maior potest esse mutatio?

*Tertia ratio. Mens repugnat corpori.*

## C A P V T III.

**N**ulla res sponte sua potest suæ originis repugnare, alioqui sponte ad sui ipsius ferretur interitum, qui necessatio sequitur origine perditâ. Quinetiam quicquid effectus aliquis operatur, suæ originis vi & auxilio facit. Si ergo aduersus causam pugnaret, in ea colluctatione causa illa sibi ipsi aduersaretur. Anima repugnat aduersaturque corpori nostro, imo cor-

poribus omnibus. Igitur à nullo corpore ducit originem. Duo præcipua sunt illius officia, speculari, & consultare. In utroque repugnat corporibus, Primum videamus quomodo repugnat in specularando. Multis quotidie modis externa corpora variè disposita, nostri corporis instrumenta sensibus assignata ita mouent, vt ad tempus fallant, quam fallaciam emendat & corrigit ratio, vt alias diffusius enarrauimus, vbi ratio aliter iudicat quam aut externum corpus annuat, aut corpus proprium nunciet, ac sæpe iudicat modo contrario, qua in re tam sui corporis quam aliorum damnat affectionem. Mittamus in præsentia cæterarum rerum speculationes, accipiamus summam summi contemplationem, vt cognoscamus quantum in ea mens naturam redarguat corporalem. Phantasia sensus externos sequitur, sensus, corporis sui aliorumque corporum dispositionem. Quapropter sensuum & phantasie iudicium, corporum dispositioni tribuimus, dicimusque ipsum secundum affectionem fieri corporalem. Quando animus noster, quid Deus sit, cupiens inuenire, à magistris huiusmodi sciscitatur, phantasia præceptor & faber nimium temerarius statuam aliquam machinatur ex quinque materiis quas aliarum omnium pulcherrimas externi sensus ipsi obtulerint, acceptas à mundo, eo tamen pacto, vt materias illas excellentiores reddat quodammodo, quam à mundo per sensus acceperit. Offert igitur phantasia nobis lumen adeo clarum, vt nullum aliud videri possit fulgentius. Adeo ingens, vt nullum amplius, ac ferme per immensum inane diffusum, quod innumerabilibus sit coloribus exornatum, & in circulum reuoluatur, ob quam reuolutionem dulcissimis resonet modulis tam implentibus quam demulcentibus aures. Lucundissimis redeat odoribus. Saporibus quoque omnibus abundet, qui possint effingi omnium suauissimi. Tactu molle mirum in modum, delicatum, lene, & temperatum. Hunc esse Deum prædicat phantasia. Nihil dat nobis pulchrius mundi corpus. Nihil corporeus sensus aut attingit melius, aut nunciat excellentius. Nihil amica sensuum phantasia effingit sublimius. Sed ratio interim è summa mentis specula despiciens phantasie ludos, ita proclamat. Caue anima, caue inanis istius sophistæ præstigias. Deum quæris? Accipe lumen tanto clarius lumine Solis, quanto lumen Solis est lucidius tenebris, ad quod si Solis lumen comparetur, etiam si millies milliesque

clarius sit, esse videatur umbra. Atque etiam tanto subtilius accipe, vt aciem visus effugiat. Neque ipsum per inane diffundas, ne partibus constet, atque ita sustentatione indigeat partium, ac loco. Collige totum (si potes, in punctum, vt ex hac infinita vnione infinite sit potens. Sit deinde (si lubet) vbique præsens, non sparsum loco, sed integrum loco, cui libet adstans, neque colorum multiplici varietate inficiatur. Splendidius enim est lumen purum, quam coloratum lumen, neque voluatur aut sonet, & olo enim moueri illud vel collidi vel frangi. Et statum esse arbitror motu perfectiorem. Auferas quoque odores, sapores, mollitiemque intractabilem, ne crassiori sit natura compositum. Hic fulget quod non capit locus. Hic sonat quod non rapit tempus. Hic olet quod non spargit flatus. Hic sapit quod non minuit edacitas. Hic hæret quod facieras non diuellit. Dei faciem rursus intueri desideras? Mundum conspice vniuersum Solis lumine plenum. Lumen conspice in materia mundi plenum omnibus rerum omnium formis, atque volubile. Subtrahe quæso materiam lumini, relinque cætera, subito habes animam, incorporeum videlicet lumen, cunctiforme, mutabile. Deme rursus lumini huic animali mutationem, es iam intellectum Angelicum consecuta, incorporeum scilicet lumen, cunctiforme, inuariabile.

Detrahe huic eam diuersitatē per quam forma quælibet diuersa est à lumine, & aliunde infusa est lumini, ita vt eadem luminis & formæ cuiuslibet essentia sit, atque ipsum lumen sese formet, perque formas suas formet omnia.

Lumen hoc infinite lucet, quia natura lucet sua, neque alterius mixtione inficitur vel contrahitur, per omnia est, quia in nullo, in nullo est, vt abunde per omnia fulgeat, viuit ex se, & vitam præstat cunctis, quando quidem umbra eius, qualis est lux ista Solis, sola in corporibus est viuifica, sentit quælibet, sensumque largitur, si umbra eius sensus omnibus excitat. Amat denique singula, si maxime sua sunt singula. Ergo quid Solis est lumen? umbra Dei. Ergo quid Deus est? Sol. Solis lumen est Deus in corpore mundi. Deus est Sol super Angelicos intellectus. Hic tuus est, o anima, hic tuus est Deus. Huius umbram tibi ostenderat phantasia, talis umbra Dei est. vt sensibilibus pulcherrima sit. qualem esse Dei lucem existimas? Si tantum Dei lucet umbra, quantum lux Dei fulget? Amas lucem Solis vbique præ cæteris, imò

solam. Ama Deum solum, solam ô anima lucem. Infinitam benefici Dei lucem infinite ama. Fulgebis iam, & oblectaberis infinite. Quare igitur obsecro faciem eius, & gaudebis in ævum. Sed ne mouearis precor ut eam tangas, quia stabilitas ipsa est, ne distraharis per varia ut apprehendas, quia vnitas ipsa est. Siste motum, collige multitudinem, Deum protinus assequeris, iam diute penitus assecutum. In hac indagatione, proh Deus immortalis, quantum repugnat mens cunctis corporibus, quantum disperdit eorum imagines & fallacias? quantum damnat phantasiam, sensusque comites corporum? Profecto ipsa sicut per se est substantia, nullam à corpore vllò ducens originem, ita per se agit quandoque proprium opus, absque vllò corporum adminiculo, imò verò (quod est mirabilius) contra quælibet corporum machinamenta. Hæc certè nunquam operando se ab omni secerneret labe corporea, nisi multo magis in essentia ab omni corporea stirpe esset alienissima. Et quia non potest per vim aliquam corporis vniuersæ naturæ corporum repugnare (non enim surgit particula supra totum) sequitur ut per vim propriam in presenti agat absque subsidio corporalium, ideoque multo magis in posterum id possit efficere. Quomodo repugnat mens corpori speculando, satis iam diximus. Dicamus deinceps quantum in consultando. Sæpe esuriens stomacho, vel sitiens pulmone, siue per somnum cerebro grauescente, siue genitalibus membris semine tumescentibus, sensus corporis comes, ad cibum, potum, somnum inuitat, & coitum. Incitat, inquam, vel potius corporis incitamenta nunciat animo. Ratio vero contemplationis honestatisque gratia ab iis iudicat abstinendum, & ut lubet, sæpe numero abstinemus. Quando infertur contumelia vel iniuria, circa præcordia sanguis ad vindictam accenditur. Tunc vis animæ motrix, comes, hospesque corporis, pedes & manus mouet ad vlciscendum, ratio nonnunquam pacis & ocij causa sistere iubet & cohibet. Obiectis sæpe periculis cor trepidat, sed occurrere prælio ratio præcipit tutandæ patriæ causa, vnde inuito etiam corde itur in hostes. Fines autem ad quos ratio ita deliberat, incorporei sunt, veritas scilicet & honestas. Cum Plato noster vir cœlestis domandi corporis gratia academiam insalubrem Atticæ locum habitandam elegit, nonne animus eius corporis naturæ aduersabatur? Cum Xenocrates dilectus Platonis discipulus,

& Origenes eorum sectator, exusserunt sibi virilia, quo libidinis incendia prorsus extinguerent, nonne inuictus animus bellum membris corporis indicebat? Ante hos Magi Persarum, Ægyptij sacerdotes, Pythagorici Philosophi, ut Venerem eneruarent, mero & carnibus abstinebant. Mitto Priscos illos sacerdotes magnæ Matri consecratos aut Saturno. Illi castrabant se, isti se excarnificabant. Mitto primitias Christianorum, quibus nihil fortius, nihil mirabilius vnquam vidit mundus. Quapropter nemo nobis obiiciat vel paucos olim fuisse, vel esse hodie paucissimos, qui corporis resistent affectibus, imò vero resistimus omnes quotidie, alij sanitatis, alij honoris, alij pacis, alij iustitiæ, contemplationis Dei, beatitudinis gratia. Ac etiam si nunquam corporis impetus frangeremus, satis tamen esset pugna ipsa quæ est in nobis continua, ad ostendendum animam corpori repugnare. Si nulla in nobis alia esset natura quam corporea, statim cum corporis affectio ad aliquid traheret, proueremus ut bruta, neque pensi quicquam haberemus, consultaremus, nunquid esset illud ad quod allicire corpus efficiendum. Nihil enim secum pugnat. Semper tamen ferme in nobis expugna illata nobis à corpore toto. Est igitur in nobis aliquid præter ipsum, ab eius stirpe semotum. Semotum, inquam, tum ab omni humorum elementorumque natura, quo cunctis horum inclinationibus possit obistere, easque cogitatione & affectu transcendere, tum etiam ab omni natura cœlesti ab ipso cœlo humoribus his infusa, ad eorumque perducta proprietatem. Quo etiam cœlestibus inclinationibus quandoque valeat aduersari, quod Astrologi nobis ipsi concedunt, atque substantiam quandam cœlo longè præstantiorem excogitare semper & colere. Mitto quod quicquid per corpoream mobilemque cœli virtutem efficitur, & corporeum est, & penitus mobile, neque potest corpoream mobilemque naturam exuperare. Quapropter animus tum ab elementalitum à cœlesti natura elementis infusa seorsum viuere potest. Quod si quis Platoniorum dicat eum in cœlesti vehiculo semper esse, respondebimus, non animum à vehiculo, sed vehiculum ab animo dependere, sempiternumque animum apud Platonios sempiternum vehiculum semper viuificare. Sed ad institutum ordinem redeamus. Neque nos turbet quod anima sæpe obsequitur corpori, quia non vi obsequitur, sed amore quo corpori per ip-

ſam viuenti tanquam filio & ſuo operi afficitur. Mater filium tanquam ſuum opus amat, filius paruulus cibum præter modum cupit, abſtinere iubet mater, tacet inde quieſcitque puer, ſi bene fuerit educatus, ſin male, clamat, domumque perturbat, miſeretur plagentis filij mater, quem amat nimium, nondum tamen vt cibum capiat aſſentitur, niſi ſecum ipſa prius conſultando iudicet, poſſe illum guſtare aliquid abſque corporis detrimento, aut ſi quid damni illatum fuerit, per medicinam facile poſſe ſuccurri. Tunc demum cibum accipit natus. Non cogitur mater à filio paruulo, ſed operis ſui dilectio matrem allicit vt filio obſequatur. Obtemperat tandem prout cenſet obtemperandum. Iudicat autem ſæpe verè, quandoque fallitur, quia obtemperandi nimium cupida non ſatis diligenter euentus examinat. Eadem eſt animæ ad corpus ſimilitudo. Proinde ſi naturale eſſet animam ſuccumbere corpori, omnis anima ac ſemper ſenſibus cederet. Quoniam verò reſiſtit ſæpe numero conſultando, ſi quando conſentit, non natura vel violentia obſequitur, ſed amore, quo ſumma vis animæ afficitur mediæ, media infimæ, infima vitali complexioni, vitalis complexio corpori. Siquidem Platonici putant ab animæ rationalis ſubſtantia tanquam à Sole effundi vitam corporis irrationalem tanquam lumen illamque erga hanc affici quaſi erga prolem. Ad quam prolem ſuſcipiendam corpus ( vt Timæus docet ) per cœleſtes animas diſponatur. Quid vero dicemus ad illud, quando animus aliquis ſuum corpus interimit, ſue conſilio, ſue indignatione, ſeu metu id faciat, vel dolore? Quomodo id vnquā aggredietur, ſi corpus animi eſſet origo, cum non poſſit appetitus aliquis in natura contra ipſammet inſurgere? Nullum brutum ſponte ſeipſum interimit, quia non poſſet in eorum animam à corpore pullantem ſtimulus aliquis contra corpus oriri. Homo autem licet ſit prudentius animal, tamen id ſæpe facit, vaticinans ( vt arbitror ) ſe ſuper fore poſt corpus, ac ſe potius corporis ſarcina exonerare, quam perdere.

*Quarta ratio. Anima liberè operatur.*

#### C A P V T IV.

**M**aximè verò non oriri vlllo modo ex corpore hominis animam cognoſcemus, ſi quam liberum ſit in ea arbitrium, ratione propria comprehendere-

mus. Nam quod corpori cuius natura determinata eſt, alligatur, operationem habere non poſſet liberam & ſolutam. Proſecto à communi aliqua cōſideratione nulla prouenit actio, niſi intercedat aliqua particularis exiſtimatio, quia motus actioneſque circa particularia ſiunt, cœcum quis communiter conſiderat exercitationem corporis vtilem eſſe, licet ita conſideret, nondum tamen exercetur, niſi conſultet prius quot ſint exercitationis modi, & qui magis conducant. At quando vnā quandam particularem exercitationem præ multis elegerit, tunc opus aggreditur.

Si deãbulationē, deãbulat, ſi equitationē, equitat. Intellectus natura ſua in vniuerſalium rationum conceptione verſatur. quapropter vt ex eius apprehenſione aliqui proueniat actio, oportet vniuerſalē eius conceptionem ad particularia quædam deduci. Vniuerſalis autem notio vi ſua multa, imò infinita ſingularia continet, vt excendi commune genus modos exercitationis innumerabiles. Igitur poſſet vniuerſaliſ illa notio ad diuerſa pariter ſingularia deriuari. Derivationem huiusmodi ſequitur iudicium de agendis. Diuerſum igitur ſequi poſſet iudicium. Itaque iudicium intellectus de rebus agendis non eſt natura ſua ad aliquid vnum determinatū. Eſt igitur liberum. Iudicij ſiquidem libertate ideo carent aliqua, quia nullum habent iudicium, vt plantæ. Aliqua quia licet habeant, habent tamen à natura ad vnum aliquid determinatum, vt bruta. Naturali enim exiſtimatione iudicat ouis lupum ſibi pernicioſum, ac fugit, neque poſſet non fugere, impellente natura. Naturali inſtinctu feruntur hirundines ad nidū conſiciendum, apes ad aluearia, ad telas araneæ. Ideo omnes eiſdem ſpeciei animantes, eodem modo ſua fabricant ſemper, neque diſcunt aliquando, neque variant vnquam, quia ſpecies naturalis qua ducuntur, ab initio ineſt, atque eadem permanet. Homines autem & diſcunt, & opera ſua variant ſemper, vnā tamen ab initio naturam habent. Non igitur natura trahuntur ad agendum, ſed ipſi ſuo conſilio alias aliter ſeipſos agunt. Vnde enim contingere id putamus, quod arbores beſtiæque in ſuis quibuſdam motibus, artibus, electionibuſque nunquam aberrant, homo verò ſapiffime? Non quidem ex eo quod intellectus inſit illis perfectior, quibus nec intellectus quidem ineſt vllus, ſed quia ab intellectu diuino nunquam errante trahuntur, homo verò à ſuo, qui errare



potest, ducitur. Qui etiam si quando ab actionibus propriis ocium agit ad tempus, tunc ipse quoque à Deo ducitur, neque errat, quod ex vaticiniis & miraculis declaratur. Ac si semper duceretur, sicut alia, tanto minus erraret quam illa, quanto perfectius est instrumentum. Rursus si alia se ipsa ducerent sicut homo, tanto magis errarent quanto minus perfectam sortita sunt speciem. Cum igitur homo iudicium de rebus agendis non habeat, à natura ad vnum determinatum, est necessariò liber. quod autem iudicet liberè ex eo cõiicimus, quod se ipsum ducit ad iudicandum. Quod se ipsum ducat, ex eo quod in iudicium suum se reflectit. Quod se reflectat, ex eo quod se iudicare cognoscit, iudiciumque definit. Quam quidem libertatem intellectus ipsius virtute sortitur. Intellectus enim non modò hoc aut illud apprehendit bonum, sed ipsum commune bonum. quoniam verò intellectus per apprehensam à se formam mouet voluntatem, atque in omnibus motor & mobile proportionem inuicem congruunt, voluntas rationalis non est à natura determinata nisi ad ipsum commune bonum. Sub ipso autem communi bono bona singula continentur. quicquid igitur voluntati officitur vt bonum, potest in illud inclinari voluntas, nulla inclinatione naturali in contrarium prohibente. quod quidem significatur per ea quæ supra diximus, quod multa eligit contra naturæ corporalis vsum & voluptatem. Præscribit sibi vitæ ordinem sapissimè corpori noxium, odit corpus, extenuat, enecat, quod nunquam bestia facit, quarum omnis impetus actioque seruit corporis vsui. Operæ precium est considerare, quædam à Philosophis necessaria, quædam impossibilia, quædam media scilicet possibilia nuncupari. Et possibilia quædam vt plurimum euenire, quædam rarius, quædam verò equaliter ferè contingere. Hunc ordinem vniuerso congruere potissimum arbitrantur. Affirmant rursus alia quidem naturalia, alia verè voluntaria esse. Addunt insuper, nusquam fore potentiam vllam ad vtrumque contingentium æqualiter se habentem, nisi voluntariis agentibus insit. Naturalia enim agentia potius esse determinata quam voluntaria. Denique naturalia speciei cuiuscunque officia probant vana esse non posse, officium autem hominis esse consiliũ. Frustratamen illic ad opposita consultari, vbi nequeat alterutrum prout coniectura designat, eligi atque tractari.

Pacipue verò ex hoc inuenietur animi

nostri libertas, si planius quomodo mouentur bestiarũ animæ, videamus. Quãdo animal brutum esurit, si cibus suus oculis eius offertur, eius anima iudicat pabulum tale sibi fore conueniens, appetitus cupit, mouetque, ad ipsum membra. Quærimus vnde sit motus ille membrorum. Proculdubio est ab appetitu. Appetitionis motus vnde? A iudicio. Ex eo enim quod cibum conuenire sibi iudicauit, illico concupiuit. Vnde iudicium? A forma tali vel tali cibi ipsius oculis apparente, & ab internatalis corporis egestate. Quoties enim tale corpus esurit, & pomum tale monstratur aspectui, totiens anima illa conuenire sibi illud iudicat, atque appetit.

Cernis motus illius principium non esse in anima, sed in corpore. In corpore, inquam, pabuli sic dispositi, & corpore bruti sic affecto. Itaque non proprie anima illa ducit corpus, neque propriè ex se ipsa mouetur, sed tam cibi quam sui corporis natura trahit illam, ad cuius tractum membra etiam rapiuntur. Cuius rei signa, quatuor afferemus. Primum, quod tali quodam cibo monstrato, & sic affecto corpore, statim ita iudicat & appetit anima, neque postquam pabuli figuram aspexit, tempus aliquod vel breuissimum differt iudicium & cupidinem; quasi anima illa penè nihil ex sua virtute in medium afferat, sed posita illa iudicij causa, statim iudicandi sequatur effectus. Nec iniuria. Forma enim agendi principium est, vt ignis calor calefaciendi principium. Formarum verò aliqua est à natura impressa, vt igni calor & leuitas, aliqua est apprehensa, vt species cibi per visum. Appetitio ignis ac motus formam impressam sequitur. Iudicium & appetitio bestia sic affectæ formam illam cibi sequitur apprehensam. Huius ergo motus principium est cibus, eiusque forma. Et sicut ignis non per se mouetur, quia non potest non ascendere cum nihil obstat, non potest non verè cum aliquid adest vrendum, sic bestia non per se mouetur, quia non potest non ferri in ea quæ sic aut sic offeruntur.

Secundum signum est, quod irrationalis anima nunquam aliter iudicat, cupit, prosequitur, quam ad corporis pertineat vsum. In omni enim eius actione finis est corporis commodum. Finis autem in rebus vltimus idem est ferè quod & principium. Principium ignis est Lunæ concavum, concavum Lunæ ignei motus est finis, quia causa quæque ad sui finem agit & mouet. Ergo in bruto principium actio-

num est corporis natura siue anima. Non anima mera, sed corporalis, & vt seruit toti naturæ vitæque artifici naturalium, postquam in natura vitæque corporea conseruanda est finis agendi.

Tertium, quod bestiam nunquam poenitet sic aut sic egisse, neque retractat quicquam, neque emendat, quod significat vnicum ibi esse agendi principium, postquam nulla est repugnantia. Corporea certè vita mouet tanquam finis proprius. Ergo nihil aliud proprium inest ibi præter corpoream vitam quod moueat.

Quartum, quod ( vt supra diximus ) in operibus brutorum eiusdem speciei non est diuersitas. Non aliter aranea alia telam texit quam alia. Omnes quoque hirundines nidum similiter faciunt, & singulis annis eodem pacto, quemadmodum omnis ignis similiter calefacit, omnis lapis descendit similiter, omnis planta pro sua specie similiter pullulat. Natura siquidem rei cuiusque vna quædam est affixa sibi forma, & certa vis ab initio insita, per quam vnā similemque semper, vnum opus sit semper & simile. Idcirco bestiarum anima instinctum secuta naturæ, tenorem seruat speciei suæ familiarem. Idem & nobis accidit quoties torpet ratio, & ad nutum sensuum phantasieque viuimus. Verum expergefacta & intenta ratione, consultamus in rebus agendis diu, & nutum phantasie damnamus, & aliter facimus quam vel externorum corporum vel membrorum nostrorum poscat natura. Ac si quando iis indulgemus, poenitet nos, atque emendare conamur, domamusque sæpe naturam corporis, & subiiciamus. Agimus enim non modo per imagines illas obiectu corporum acceptas siue conceptas, sed etiam per vniuersales rerum species & rationes, quæ partim insunt animo, partim eius peculiari vi pariuntur, vbi agendi principium nostra forma est non corporis, à nobis parta non accepta à corpore, ad animi modum potius quam ad modum corporum procreata, communis ad infinitos agendi modos. Ideo non vni agendi modo adstringimur, sed per omnes liberè peruagamur. Habemus enim in mentē commune quoddam bonorum exemplar, ad quod singula comparantes, siue reiiicimus, siue magis minusue probamus, non ipsi quidem tracti à rebus ipsis vel corpore, sed trahentes res ipsas potius ad exemplar, & corpus ad mentem. Ideo etiam dum similis permanet rerum corporisque affectio, sæpe eligimus dissimiliter, aliàs scilicet aliter. Et

dum sit dissimilis, eligimus sæpe similiter, imò in eodem penè momento propter varias coniecturas à ratione propositas, etiam dum corporalia manent similia, variaz contrariæque quodammodo sunt electiones. Consultatione namque fit, vt non animam rebus, sed res animæ nostræ subiiciamus: profecto vt sæpe Plotinus ait, Proculusque confirmat, huius indicium habemus in scientiis & moribus. In scientiis hoc pacto. Quando sola veritatis speculatione contenti sumus, nihil prorsum communicantes cum corpore, neque agere aliquid, extra nos affectantes, quis non videat, contemplationem illam nostram esse penitus nullo modo à corpore dependentem? In moribus iterum hoc modo: Cum omnia vitæ studia ad animum nostrum dirigimus moribus exornandum, quis non intelligat, tunc officiorum nostrorum finem esse animam, atque ideo eorundem animam esse principium? Harum actionum non humores principia sunt, quoniam humores non inuitant ad aliquid contra corpus eorum, & supra corpora, non cælum, quod per humores mouet, corpus quippe cœli longè remotum, neque prius mouet quatuor humores nostros quam moueat quatuor elementa, neque mouebit animam nisi humoribus agitata. Humorū verò agitationi animus aduersatur, dum illorum impetus speculationis intentione contemnit, morum studio cohibet, artium industria frangit. Nemo aut Socrate ad amorem, aut Alciphone Megarico ad libidinem ebrietatemque natura procliuior fuit, nemo iis euasit studio continentior. Nonne Xenocrates, Demosthenes, & Cleanthes naturæ impedimenta diligentia repulerunt? Si humoribus resistimus, obstitimus & elementis, & cœlo, imò etiam si non subiicimur cœlo, multo minus cæteris corporibus subdimur.

Cœlo verò non subiici hominis animum, hinc apparet, quod futuros casus primò scientia præuidet, deinde aut prædētia vitat, aut magnanimitate nihili pendit, quasi non ad ipsum hominem, qui ipse est animus, pertineant quicquam, sed ad animi carcerem. Accedit, quod prospera fortuna propter temperantiam feliciter vititur, aduersa propter tolerantiam optime, ita vt vtræque sibi æquè ad virtutem proficiat & salutem. Quo autem pacto aut sequitur casus, qui præcedit, aut suscipit necessario, qui diligentia vitat? Aut horret natura, qui sæpe despicit? Aut bonis vincitur, qui ad felicitatem propriam

priam illa dirigit? Aut superaretur malis, qui mala conuertit in bona? Aut necessitate aliqua cogitur, qui dum propter pietatem libenter cum diuina voluntate consentit, illa etiam quæ necessaria sunt, terribiliaque videntur, voluntaria efficit atque leuia: Idem rursus ita per intellectum monstramus & voluntatem. Primum sic per intellectum: Cœlestis corpus formam habet corporalem, singularem, localem, & temporalem. Forma per quam mens omnis intelligit, est incorporealis, vniuersalis, & absoluta. Hæc ergo à cœlo non nascitur. Forma enim quæ alicubi clauditur, formam non generat absolutam. Ideoque cœlum formam aliquam in intellectu non generat. Num forte in eo gignit intelligentiam? Nequaquam. Hæc enim formam sequitur intellectus. Quod ergo dare formam nequit, non dabit intelligentiam. Omnino vero nullum corpus per suam formam quicquam intelligit. Talis enim forma singularis est omnino. Multo minus in alio intelligentiam generabit. Quoniam igitur intellectus neque actionem propriam, neque actionis principium habet à cœlo, corpori cœlesti non subditur, præsertim quia noster animus secundum eam vim qua iungitur his quæ supra cœlum esse dicuntur, non modo non subest cœlo, sed etiam præest. Hic autem quatenus intelligit veritatem, Angelis qui præsunt cœlo, coniungitur. Eatenus enim intelligit, quatenus intellectuale lumen inde fortitur. Sic ergo constat intellectum cœlo non subiici. Sic rursus constabit non subiici voluntatem. Ea profecto quæ natura sunt, determinatis mediis perducuntur ad finem, vnde semper eodem penè modo proueniunt. Natura enim ad aliquid vnum determinatur, electiones autem hominis diuersis viis tendunt ad finem tam in moribus quam in artificijs. Præterea quæ in eadem specie sunt in naturalibus actionibus, quæ sequuntur speciem ipsam, inter se minimè discrepant. Sicut enim omnis hirundo (vt diximus) similiter construit nidum, sic omnis intellectus similiter intelligit prima illa artium morumque principia, quæ nota sunt cuique per naturam. Et omnis voluntas similiter appetit ipsum bonum, quia bonum secundum naturam voluntas desiderat. Ea siquidem hominis natura est, vt sicut se intellectus habet ad speculandi principium, quale est id quod vbiue est manifestè verum, ita voluntas ad agendi principium, quale est ipsum bonum, ac necessario vtrisque omnes assentiamur. Electio verò est actio quædam sequens humanam spe-

ciem, sicut discursio rationis. Hæc enim duo sunt hominis propria.

Sic ergo si homines naturæ instinctu ratiocinarentur, eadem omnium hominum in singulis rebus esset opinio, ita si ducente natura eligerent, vna omnium esset electio. Nunc autem alij modis alijs eligunt alia, sicut & ratiocinando iudicant variè. quamobrem cœli voluntatem nostram instinctu naturæ non mouent, mouent tamen corpus. Corporis motum sequitur siue nunciat sensus. Hinc sæpe voluntas allicitur. Non est autem incitamentum hoc electionis causa necessaria, quia illi alijs assentitur, alijs minimè. Neque tamen à cœlestibus duntaxat corporibus humanum corpus sensusue mouetur. Nam & Ptolomæus ipse concedit particulares effectus circa materiam, haudquamquam absolutè sequi cœlestia, quæ vniuersales remotæque causæ sunt, sed quatenus causæ mediæ tribuunt, & mobilis dispositio materiæ contrariis subditæ causis alijs & alibi aliter accipit.

Quod quidem quotidie experientia ipsa probamus, in his præsertim, quæ cum simul nascantur, naturam potius speciei & indiuidui, loci quoque & nutrimenti, consuetudinisque sequuntur, vt diuerso modo se habeant, quam idem nascendi momentum, vt se omnino similiter habeant. Merito igitur præcipit Ptolomæus Astrologis, vt communem potius atque possibilem, quam distinctam necessariamque sententiam ferant. Addit sapientiam astris vel minantibus repugnare, vel pollicentibus posse fauere. Non igitur credendum est assertoribus fati, dicentibus singula à determinatis causis proficisci, causaque posita effectum necessariò sequi. Primum quidem à causa remota, quamuis necessaria, effectus non necessariò prouenit, nisi causa insuper media sit necessaria.

Quemadmodum in argumentationibus ex maiori propositione necessaria, atque minori contingenti, necessaria conclusio sequi non solet. Sed inter cœlestes causas atque terrenos effectus mediæ causæ sunt virtutes elementales, siue simplices, siue mixtæ, siue actiue, siue passiuæ, quæ quidem contingentes mutabilesque sunt, & impediri inuicem sapissimè possunt. Deinde non est necessarium, posita hac vel illa effectus causa determinata atque etiam sufficienti, statim effectum sequi, cum possit ex concursu causæ alterius impediri. Sepe enim sufficiens hinc causa est ad bilem, sed inde causa quædam suffi-

ciens ad piruitam, atque inuicem impedire se possunt.

Postremò non omnium determinatas causas possumus designare. Quod enim sis albus, causam habes propriam, item propriam alteram quod sis grammaticus. Quod autem albedo grammaticaque concurrant, propriam non habes causam. Si enim duorum quæ dixi concursus, ex communi quadam determinataque causa prouenirent, aliquem certè ordinem inter se haberent. De quolibet ergo effectu dicemus non necessario apud nos ex sua causa proficisci, quoniam impediri poterat ex alia quadam causa per accidens concurrente.

Et quamuis causam concurrentem aliquis in causam reducerit altiore, ipsum tamen concursum qui impedit, in causam quandam reducere nemo potest, ut inde conuincat impedimentum huiusmodi ex aliquo cœlesti principio proficisci. Quapropter si quæ ad corpus pertinent, non necessario sequuntur astra, multo minus animi eorumque actiones stellis subiiciuntur. Neque audeat quisquam dicere, mentes hominum à supernis mentibus moueri per cœlum tanquam per instrumentum aliquod, atque medium. Magis enim conueniunt mentes cum mentibus quam cum corporibus, ideo inter illas mentes ac nostras cœlum non interponitur, sed potius inter mentes illas, ac cœlum nostræ mentes medium obtinent. Proptereaque cœli à numinibus per mentes hominum mouendi essent potius, quam nostræ inde per cœlos. Dixerit forte quispiam, mentes nostras à mentibus illis absque medio agitari. Agitent ergo, si placet nos, imò ducant. Sic enim diuinæ erunt hominum mentes, si mouentur proximè à diuinis. Erunt namque illis proximæ per naturam. Alioqui per naturam aliam illis propinquiorem quasi per medium mouerentur. Erunt certè illis propinquiores quam cœli globus, postquam inde mouentur sine cœlo. Quod si cœlum putant fore perpetuum, cur non etiam hominis animum sempiternum esse, cum sit diuinis propinquior? Proinde infusio quæ in mētes inferiores à superioribus angelicisque transit, illuminatio potius est dicenda quam motus. Illæ siquidem suo modo tradunt, hæ quoque suscipiunt suo modo, utriusque vero sunt intellectus. Ergo intellectuale lumen est, & quod datur, & quod accipitur. Minus huiusmodi non prohibet animum nostrum ad lumen illud suo modo conuerti, pro natura sua uti, ac per il-

lud liberè ratiocinari atque eligere, præsertim quia noster animus interdum ad deteriore partem in consiliis sese confert, instinctus autem mentium diuinarum traheret semper ad optimum. Quapropter humanus animus inspirationem numinum in naturam suam trahit. Illic quippe descendit stabilis. Ipse mobilem reddit, cum ipse sit mobilis, ac deinde mobiliter agit. Itaque nihil obstat quo minus libera sit animi actio, cum nulli proprio mouenti subiiciatur. Plotinus, Proculusque, & Auicenna disputant, cœlestes motus non esse inferiorum causas, sed instrumenta potius diuinis motoribus velut artificibus obsequentia, quorum varias cogitationes cœlestibus corporibus figurisque & motibus tanquam oculis nutibusque suis indicari nobis, & futura portendere. Addunt diuinorum notiones cœlestibus dispositionibus quasi literis explicari, & sicut aues volatu atque garritu auspicibus auguribusque, non quæ agant ipsæ, sed quæ significant, creduntur ostendere, ita cœlos figuris & motibus, quæ aliunde fiant, quotidie nobis significare. Quod quidem ostendunt Astrologi, quando in alicuius genesi iudicanda plurima proferunt quæ ad patres auosque & fratres, uxores, amicos, inimicosque pertinent, quorum fortuna ab alterius genesi non dependet, sed tantum significatu. Si ergo corporea (quod etiam supra probauimus) neque propriè, neque omnino cœlestibus superiorum motorum instrumentis subiiciuntur, multo minus mens ipsa subiicitur, cuius mores & artes si quando ab Astrologis prædicuntur, tamq; per signa potius quam per causas proferuntur. Siquidem superni motores non solum illa quorum ipsi sunt causæ, sed etiam quorū mentes nostræ futuræ causæ sunt, & excogitant ipsi secū, & cœlestibus nutibus sæpe demonstrant. Non subiici autem tunc declarat maximè mens nostra voluntasq; quando usq; adeo effertur, ut penè se velit solam. Tunc enim se quodammodo à cæteris liberat creaturis, seque ipsa ferme contenta est. Rursus quando in suū actum circulo se reflectit. Circuitus enim spiritalis termino non seruit extraneo. Præterea quando non modo propter aliam coniecturam vult, propter aliam non vult, sed etiam vult quod possit velle pariter atque nolle. Qua in re videtur indifferens ad volendum pariter & nolendum, ac nulli prorsus astricta. Item quando eligit summā desiderii cuiusq; vacationē. Nam tunc tractū proprii obiecti cuiusque dissoluit. Potentia hæc quæ actū

omnem interimit, proprio nulli seruit obiecto. Sed totum hoc ita planius explicemus. Quoties aliquod nobis bonum proponitur, toties potest animus ita ratiocinari. quia maximum bonum est libertas, volo eam in me experiri quandoque. Itaque malo nunc eligendi ætum retinendo mei iuris esse, quam huic vel illi seruire volendo. Eligit tamen libertatem tanquam bonam, quam sæpe alias propter alia bona postponit. Nullum igitur bonorum eligimus necessario, quamuis necessario velimus ipsum bonum. Denique aut nusquam motus est liber, aut liber est ubi primus, Primus in anima. Oportet autem primum esse liberum, si modo quicquid primo tale est, per se est tale. Quis enim dubitet actionis motum inde incipere descendendo, quo quæstionis motus desinit ascendendo? Desinit verò in animi ipsius imperium, ceu cum dico me agere hoc propter istud, istud propter illud, illud quia volo, velle, quia placet. Placere autem mihi, & insuper velle, quod placeat. Addo quinetiam quod si forte nollem, nolle vellem. Id sæpe appellat Plato per se moueri, id est per se ac liberè agere. Hinc effici vult ut liber viuatur qui agit & libere, ut nullius particularis siue boni siue mali subiiciatur impulsui, qui viuunt liberi, ut non perdatur vnquam, qui violentia non pulsatur.

*Quinta ratio. Mens absque corpore operatur.*

#### C A P V T V.

**O**perandi modus modum sequitur existendi. Quare si anima modo aliquo per corpus existit, nihil sine corpore vnquam vel auxilio corporis agit. Nunc autem contrà contingit, non igitur est per corpus. Audiamus primum Platonis mentem de modo cognoscendo quo hominis anima operatur.

Quoniam anima multo est præstantior corpore, & quod assidue format aliquid, est formato præstantius, ideo nulla corpora, siue extra nos sint, siue intra, formas vel imagines suas pingunt in anima, sed suis quibusdam qualitatibus siue viribus siue imaginibus vaporem illum pulsanant calentem atque vitalem, qui quodammodo corporis est nodus & animæ, & spiritus à Phisicis appellatur. Si enim corpora illa cum spiritu hoc conueniunt in materia, cum anima verò non conueniunt, rationabilius est spiritum & ab illis

formari quam animam, quæ tantum abest ut formetur à corpore, ut ipsa potius reuera sit & forma corporis, & formatrix. Formatrix quidem sui corporis per naturam, aliorum vero partem. Anima igitur rationalis, quæ fons est corporalium motionum, mouet quidem ipsa corpora, à corporibus vero non mouetur. Moueretur autem ab illis, si formaretur inde. Sed spiritus qui est animæ currus, à corporibus quibusque pulsatur. Pulsatio huiusmodi non latet animam. Ut talis quædam passio siue agitatio spiritus animam non latet, sentire dicimur. Statim vero ex hoc subito sentiendi actu vis interior animi ad opus aliud huic perfimile excitatur. Nam ubi per oculi spiritum colores, per aurium spiritus sonos, perque alios alia attigit, ipsa sua quadam vi, per quam præest corporibus, eorumque semina possidet, non minus in cognoscendi quam in alendi virtute, mox colorum sonorumque & reliquorum simulachra penitus spiritalia vel denuo concipit in seipsa, vel olim concepta parturit, colligitque in vnum. Hanc imaginationem in superioribus nuncupauimus. Posuimus postea phantasiam paulo hac superiorem, per corporum imagines fermè similiter peruagantem. Intellectum denique longo interuallo eminentiorem, quemadmodum declarauimus. Quando anima sentit quippiam, apud Platonicos dicitur operari per corpus, non quia ipsa simul & corpus sentiat. Sicut enim anima fons est viuendi (ut Plato ait) ita & sentiendi. Præterea oculis auribusque sæpe obiecta sua præsentia sunt, si tamen animus attentius quicquam intra se secum agit, non prius sentiuntur, quam animus ad talia reuertatur, quasi non membra hæc, sed interior ipsa animi nostri natura vim habeat sentiendi. Quæ tamen vis sentiendi non sentit nisi dum corporalis spiritus à corporibus agitur. quando ergo per imaginationem vel phantasiam agi dicitur per corporis auxilium operari, quia reuoluitur per imagines singulas, quæ singula referunt corpora, & per impulsu corporalis spiritus à corporibus factum conceptæ fuerunt. Ac etiam quia tanta est inter has internas imagines spiritumque cognatio, ut reuolutionem imaginum factam intrinsecus sequatur semper spiritus ipsius vibratio, atque vicissim spiritus huius vibrationem comitetur ut plurimum imaginum reuolutio. Quando per intelligentiam aliquid speculatur & eligit, dicitur & sine corpore & sine auxilio corporis operari.



Quoniam etiam absque impulsu illo spiritus, & absque imaginibus inde collectis aliquid videt eligitque ab illis prorsus alienissimum. Mitto in presentia quod Peripatetici vires sentiendi omnes in anima quidem secundum originem, in composito verò secundum formam ponunt, intelligendi autem in sola anima collocant, atque hoc pacto illas per corpus agere, hanc verò etiam sine corpore arbitrantur. Veruntamen naturaliter se ad imagines corporalis sensus tamdiu conuertere, quamdiu animus corpus naturaliter habitat. Quod autem postrema hæc operatio quandoque sine corporali subsidio fiat, & priores illæ semper per corporis auxilium, hæc quæ subiiciam signa nobis ostendent. Primum vis ipsa animæ quæ corpore utitur, quæcunque illa sit, instrumentum suum non percipit. Quis enim gustu linguam suam gustat? quis per imaginationem vel phantasiam cognouit spirituum imaginumque naturam, quæ vix post diuturnas mentis discussiones agnoscitur? Pateret autem cuique, & facillimè, si per imaginationem & phantasiam cognosceretur. Secundum signum. Vis talis quam vti diximus corpore, neque seipsam nescit, neque propriam actionem. Si visus propriè ex eo quod videt, perciperet se videre, semper dum videmus aliquid, videre aduerteremus, quod minime fit. Sæpè namque præsentem hominem patientibus oculis videmus, quoniam verò tunc vis interior animæ ad illud intenta est, videre nos nequaquam animaduertimus, quasi actus huiusmodi non à visu, sed à vi quadam interiori quando expedita est, percipiatur. Præterea actus videndi ac similes quodammodo incorporeales sunt, sensus autem illi sola corporalia nesciunt.

Si actiones suas hæ vires ignorant, ignorant quoque seipsas. quid enim aliud, certa quædam vis est, nisi principium certo modo quodam & proprio operandi? Ergo qui operationem nescit, nescit & operandi modum, nescit quoque proprium sic operandi principium. Itaque sensus quinque seipsos ignorant. Sed neque etiam imaginatio & phantasia se nesciunt. Nam cum omnes duabus his animæ viribus semper utantur, omnes facillimè quam naturam hæ vires habent cognoscerent. Nunc vero vix illa ista nouerunt, qui diuturno mentis examine quæsiuere.

Tertium signum, quando vehemens aliquid viribus iis obicitur, quod nos violentius agitet, ita eas occupat, ut res debi-

liores non bene percipiantur, neque ipso eodem tempore, neque postea ad tempus. Oculus noster aduersis quandoque Solis radiis obrutus, colores alios neque tunc neque postea per aliquod temporis spacium dispicit. Idem accidit auribus ex strepitu & tonitru vehementi. Idem quoque sensibus cæteris. Idem imaginationi & phantasie, quotiens horrendis quibusdam imaginibus occupantur. Quod ostendit huiusmodi virium actum, cum spiritus vibratione concurrere, atque econuerso. Quemadmodum sensus motusque araneæ, in media tela manentis tensis vndique filis, & aduolantibus muscis, tremorem telæ vndique sequitur, atque contra telæ tremor araneæ motum. Profecto hoc monstrat eas vires materiæ esse propinquas, cum sæpe ab obiecto quasi vincantur, & corporalium passionum reliquiæ in spiritu remanentes ad tempus eas confundant.

Quartum signum ab obiecto potentiori non modo actus discernendi confunditur, sed læsio fit in nobis atque molestia, quasi læso spiritu corporali, his quoque à viribus ex mutuo quodam usu nonnulla contingat offensio.

Quintum, qualitatem sensus imaginemque sibi familiarem non apprehendunt. Candorem suum vel imaginem per quam intuetur, non videt oculus. Calorem suum tactus non iudicat. Ac etiam si calor aliquis alienus euadat ipsi familiaris, non sentit, quod fieri solet in iis qui hæctica febre laborant, quorum tactus nequaquam persentit febrem. Vim suam & habitum & conceptas imagines imaginatio quoque & phantasia prorsus ignorant. Vix enim ratio talia reperit.

Sextum, post ætatis septimum vel octauum septenarium, quando complexio corporis ad terrestrem qualitatem paulatim incipit declinare, resolutis aut nimium densatis tepesactisque spiritibus, hebescit visus, auditus obtunditur, olfactus obstruitur, riget gustus, tactus arescit, imaginationis phantasieque solita velocitas retardatur.

Septimum, quanto diutius laborant sensus, tanto magis debilitati sentiunt peius atque confusius. Si enim per horam aliquid fixius inspexeris, caligabis, quia resolutis spiritibus vel obscuratis, non clarent in eis rerum sensibilibus qualitates imaginesque quas sentias.

Octauum, Certum quoddam rerum genus attingunt, non omnia genera, quinque sensus sua quisque (ut patet) genera quali-

tatum, imaginatio phantasiaque proprias harum qualitarum conditiones. Hæc & huiusmodi alia viribus animæ utentibus corpore solent accidere, contraria verò accidunt intellectui. Ergo intellectus non utitur corpore. Quod autem contraria menti contingant, animaduerte. Vires illæ seipsas ignorant, mens autem se nouit. Inuenit enim se esse, & in qua rerum specie sit, & quam vim habeat. Vires illæ instrumenta quædam habent, atque illa ignorant. Intellectus instrumentum habet nullum, & si quod haberet, cognosceret, postquam & seipsum cognoscit, & alia. Ac inter se & alia instrumentum illud collocaretur. quod si quis mentem habere dixerit instrumentum, percontabimur nunquid illud corporale sit, an se aliter habeat. Si corporale responderit, ita per argumentationem Peripateticam refelletur. Omne instrumentum corporale in aliqua specie corporum continetur per formam aliquam sibi propriam. Si tali quodam instrumento intellectus utatur, non sincerè de rebus corporalibus feret sententiam. Nam quicquid per tale instrumentum percipietur, qualitate illius infectum, non tale penitus apparebit quale re vera ipsum fuerit, sed quale fuerit instrumentum, ut per rubentes oculos apparet aer rubens, per croceos verò croceus. Quo factum est, ut pupilla omni careat colore, quo possit omnes colores pure suscipere. Sic omni corporea qualitate carere oporteret mentis instrumentum, ut sincere per ipsum discerneret omnes. Non tamen careret omni, si corpus esset, haberet igitur aliquam. Quam verò haberet, non acciperet. Itaque illius similes qualitates per illud mens non cognosceret, quemadmodum tactus, cuius instrumentum certam habet caliditatem, similem omnino caliditatem non sentit. Sed neque etiam qualitates illius dissimiles purè discerneret, quia illæ per illius qualitatem prius inficerentur, quam mens aduerteret. Denique per instrumentum quod esset corpus, quod esset in certo aliquo genere corporum, quod esset aliquid singulare loco ac tempore circumscriptum, non cognosceret mens præstantius aliquid quam corpora, neque illa quidem omnia, sed certum quoddam genus rerum corporearum, quemadmodum singuli quinque sensus per singula instrumenta sentiunt genera corporalium. Postremò vniuersale aliquid per singulare instrumentum non comprehenderet.

Experimur tamen nos per mentem vniuersalia nosse, quando quæ diuersa viden-

tur, conuenire simul in natura aliqua reperimus, quando singula quæque in vnam reducimus speciem, quando rem singularem ac propriam cum communi comparantes, differre vniuersale à particulari censemus. Comparare autem inuicem duo hæc non possumus aliter quam per virtutem vnam quæ vtrique comprehendat. quoties recta ratione genus quoddam rerum verissimarum ab omni corporum genere ita secernimus, ut in illo nihil corporale cernamus, toties quicquid dici potest corporale, reiicimus. Non tamen possumus per corporeum instrumentum cuncta reiicere corporalia, quia ipsum saltem instrumentum per ipsummet instrumentum repelli non potest. Et quando abstractam conspiciamus speciem, perque illam vniuersum tum nos formis rationibusque abstractis, tum nobis easdem, tunc corporeum instrumentum iis interpositum impedimento esset potius quam adiumento.

Nam & diuersissimum est ab illis, & inferius admodum, & distantiam affert multo magis quam vniionem. Cum hæc ita se habeant, mens uti non potest instrumento aliquo corporali. Sed nunquid alio? Prorsus nullo. Nam si quis illi aliud quoduis instrumentum adiunxerit, sciscitabimur vtrum possit absque ipso intelligere aliquid, an nihil? Si potest, instrumento non eget. Sed dicet aliquis non posse. Nos contra posse asseuerabimus. Iam enim quisque fatebitur intellectum nosse seipsum, in qua cognitione nullo utitur instrumento. Nam si aliquo vteretur ad se capiendum, illud certè caderet medium inter mentem & mentis ipsius essentiam, quæ ab ipsa per illud comprehenderetur, ubi extraneum aliquid esset menti propinquius quam mentis essentia. Et quando potentia mentis reflectitur in potentiam, siue actus in actum, nullum ibi interponitur instrumentum. Medium enim assumi solet propter conuenientiam cum extremis. Nullum verò instrumentum cum potentia & actu magis quam potentia actusque conuenit. Quisque etiam confitebitur intellectum si habeat instrumentum, ipsum non ignorare. Nam ob id in primis videmur ipsum non ignorare, quod esse ipsum asseueramus, & tale esse audimus, ut intellectui seruiat. Quinetiam si intellectus noscit seipsum, ac etiam externa obiecta, necesse est ut instrumentum quoque nunquam nouerit per quod à se transit in obiecta intelligendo. Præterea quando per obiecta iam nota in

actum suum se vertit, perque actum in virtutem atque substantiam, nonne cogitur in hac ipsa regressione etiam in instrumentum suum si quod habet incurrere, cum illud inter actum mentis & virtutem sit medium? Vbi instrumentum suum agnoscere cogitur. Sed vtrum mens agnoscit instrumentum suum per instrumentum aliquod, necne? Si per aliquod, quæro de alio atque alio rursus in infinitum. Si per nullum, ergo non eget instrumento ad cognoscendum, postquam ipsum sine instrumento cognoscit. Ibi sanè quod instrumentum dicitur, obiectum quiddam potius est quam medium. Ac si ab hoc in aliud transeat cognoscendo, non de medio in obiectum, sed de obiecto priori in posterius currit obiectum. Sed dixerit forte quispiam, instrumentum à mente cognosci non per instrumentum aliquod, sed per ipsummet instrumentum. Ego autem quæram, vtrum per ipsam essentiam instrumenti, an per ipsius imaginem? Non primum, quia mens semper illud cognosceret, cum semper ad illud similiter compareretur. Quod si per imaginem fiat, iam illud quod instrumentum appellabatur, obiectum est potius quod cognoscitur, quam instrumentum, per quod aliquid cognoscatur. Atque imago ipsa cognosci potest nullo instrumento intercedente, cum ipsum necessario antecedit, prout inter ipsum animamque est media. Iam igitur intellectus tam seipsum quam quod extra ipsum est, absque aliquo instrumento cognoscit. Proinde eo ipso quod verè simplicia veramque simplicitatem excogitamus, concludunt Platonici, id quod ita in nobis excogitat, neque ex intellectu & instrumento constitui, neque ex anima corporeque componi, sed mentem simplicem solamque existere. Per se igitur mens operatur, & hoc etiam pacto nuncupat Plato per se moueri, Ergo per se viuunt, viuuntque semper.

Pergamus ad signum tertium. Vires illæ à vehementi obiecto confunduntur, vt non discernant debiliora. Mens contrà quando magnifica & ardua videt, tum in illis, tum post illa clarius & facilius minora & leuiora discernit, vtpote quæ magna sit, magnisque pascatur & crescat. Pergamus ad quartum, & reliqua. Vires aliæ potenti offenduntur obiecto, mens nullius rei vel immensæ consideratione offenditur, quasi certæ cuidam humorum commensurationi non sit obnoxia. Tardius quidem maxima reperit, quoniam alienis explicata non indagar. Expedita in-

uenit ocyus, & inuentis tum clarescit mirificè tanquam parata prorsus ad illa, tum incomparabili voluptate completur, tanquam illis quam proxima. Quis hic non videat infinitam quodammodo esse vim mentis, quæ nullo finito superetur obiecto? Aliæ præterea vires, qualitates imaginesque sibi familiares ignorant, mens autem quidnam familiare nesciat? Quæ & familiaritatem ipsam definit, & semetipsam videt, actum suum intelligendo, ac speciem per quam intelligit, & habitum & virtutem. Secum igitur habitat mens, sui ergo ipsius est domicilium. Res quolibet loco naturali seruatur, ideo seruatur à seipsa mens manetque inde semper incolumis. Accedit, quod robustiores, quantum spectat ad operationes naturales, semper sensualesque sæpe aliis se melius habent, quantum verò ad intelligentiam neque semper, neque sæpe, quasi intelligentia corporis non sit comes. Adde quod sensuum naturæ per senectutem in operatione deficiunt, mentis verò oculus tunc cernit clarius, fugatis nebulis iuuenilium vitiorum: Diuinè enim Plato, non florescit, inquit, virtus animi, nisi virtus corporis deflorescat.

Non acuitur mentis acies, nisi corporis acies hebetetur. Tunc diuinarum rerum sapientia viget, humanarum prudentia consumitur, æquitas pollet atque constantia. Et quod maius est, neque vis etiam ipsa propriè sentiendi quæ est in anima, senio vel morbo deperditur, quamuis oculo læso actus eius intermittatur, ex eo quod non satis sincerè repræsentantur obiecta. Nam & calamo fracto cessat actus scribendi, ars vero scribendi in animo remanet integra. Quod ars detrimentum inde nullum susceperit, hinc patet, quod interim in seipso scribit, & calamo restituto arbitratur scribit suo. Idem fieret si elingui curaretur lingua, & si pes claudet. Idem si cæco vel lippo oculus curaretur, quasi in corpore damnum fuerit, non in anima. Sæpe enim purgato oculo mox videmus. Quod aut non fieret, aut iam etiam sanato corpore fieret serò, si ipsa videndi vis defecisset, quæ certum restitutionis suæ tempus exigeret, postquam corpus exegit suum. Scite Aristoteles, si præstes, inquit, seni iuuenis oculum, videbit penitus sicut iuuenis.

Si sensus qui certis partibus corporis adscribuntur, neque læsis partibus ipsis, neque senio vim amittunt, mens quæ adscribitur nullis, neque læso toto corpore, neque vnquam deficiet. Hic succurrit vobis

ratio illa quam affert in decimo de Republica Socrates apud Platonem, quod per nullum corporis morbum rationalis animus moritur. Quo enim pacto, inquit, corporis morbo peribit, qui proprio morbo non deficit? Corpus siquidem nostrum non alieno perit morbo, sed suo. Quod si cibi vitio & aëris putredine interit, non prius per hoc perit, quam ex hoc in proprium incidat morbum, quo propriè morbo dissolvitur. Ac si morbo proprio non periret, nunquam etiam alieno. Nam si non lædatur febre, insalubri cibo vel aëre non lædetur. Animus autem propria labe, id est, iniquitate non perit. Iniquus enim animus non minus est animus & vitalis, quam sit æquus. Ergo non perit corporis morbo. Accedit, quod corporis morbus animo non infert vitium ipsius animi proprium, quoniam animus corpore ægrotante non fit iniquior, sed emendatur sæpe, & morum studio proficit. Quapropter morbus corporis non modo non perdit, sed neque vitiat animum. Ac si quandoque ægrotante corpore lædi mens videatur, non tamen est ita. Ociatur mens ibi forte etiam, vel in seipsa agit, vel circa humana negociatur, non læditur. Socrates quando vel ludebat cum liberis, vel eos curabat languentes, Philosophiæ sublimioris habitum quidem non amittebat, licet vel non philosopharetur tunc ullo modo, vel non philosopharetur egregiè, dum scientiæ actum ad viliora considerata distraheret. Animus noster in corporis oblectamenti ludit cum ipso sæpe. In eius languoribus regit & curat. In utroque statu intermittitur vel remittitur sublimis illa rationis consideratio, quia vel ociatur ad tempus, vel anxie nimirum circa viliora negociatur, re pacata vero resurgit. Ita natura comparatum est, ut ad diuersa simul opera quantum ad humanas vires attinet, non satis sufficiamus.

Conuiuæ epulis intenti non bene lyræ modulos audiunt. Dum anima multum concoquit cibum in stomacho, humanæ contemplationis munus remittit, ideo tunc hebetari videmur. Dum attentius speculatur, ægrè cibum concoquitur. Hinc sæpe corpore languent philosophantes. non languent animo, sed intelligentia tantum excellunt, quantum deficiunt corpore. Ergo quid mirum si corpore febriente, anima sustinendo curandoque ægroto intentissima cessat à contemplando, & in pueri corpore fabricando, in decrepiti quoque corpore sustinendo occupatissima minus utitur intellectu? Et cum

vapores attri cerebri spiritum occupauerint, atque eo vibrato mouerint horribiles in phantasia species, vnde tetri spectaculi nouitate. tota ferè vis animæ phantasiam intenditur, mirabere si interim opus intermiserit contemplandi, quod tandem vaporibus resolutis instaurat. Sæpe etiam vaporibus feruescentibus ratio ipsa peruigil imaginum illusiones redarguit, quod in his accidit qui cerebri vertiginem patiuntur, quorum ratio negat cœlum aut terram ruere, licet sensus id asserat. Rursus qui propter morsum canis concitantur rabie, aut furore dæmonis instigantur, nonnunquam etiam in ipsa furoris incursione imminenti insaniam animaduertunt.

Et qui insomniis terrentur horrendis, reclamant aduersus phantasiam, sæpe se somniare dicentes. Ergo mens non semper indiget inferioribus viribus, quæ sæpe illis vigentibus ociatur, ociantibus autem viget, garritum earum damnat, iubetque filere? Si quis autem dixerit mentem illis egere ut excitetur, ideoque sine ipsis nihil penitus operari, ita respondeo, quoniam anima dum corpus habitat, eius sustentationi semper est occupata, atque circa plurima à diuinis remota distrahitur, ideo ad diuinorum intuitum non conuertitur, nisi quantum expressiores aliquas eorum similitudines per vires eius pedisequas, quibus plurimum utitur comprehendens, excitatur ad ipsa. Postquam verò satis conuersa est, & per crebram conuersionem apte parata diuinorum infusioni, non amplius ad eam contemplationem illarum obsequio indiget, imò eas sopit pro viribus, ne ab ipsis impediatur. Ac semper libens in eo statu perseueraret, nisi curandi corporis vrgeret necessitas. Quod significat mentem posse per se speculationem continuare, & quando ab hac non amplius propter curam corporis retrahitur, libere speculaturam per se sine aliarum virium ministerio, cui satis fuerit ante ab illis minime impediri. Sed quamdiu corpore clauditur, propter illud sensuum ministerium quo paratur conuersioni, accidit ut læso corpore, spirituque obnubilato, quia neque perspicuè obiecta repræsentantur, neque fit clara in sensibus & phantasia perceptio, mens inde ad veram speculationem non facile excitetur. Fit etiam ut alij aliis ingeniosiores appareant propter spirituum diuersitatem. Quanquam differentiam hominum in artibus addiscendis non tam ingenij quam voluntatis diuersitati censeo tribuendam.

Quilibet enim maxima quæque, si studiose contendit, assequitur. Fit insuper, ut quidam dicantur amentes, quia vel non vtantur mente, vel abutantur. quippe cum omnis intentio animi in his sit circa vehementiores phantasiæ illusiones nimium occupata. Sed vacuata bile vel atra vel crocea, quæ causam præbet illusionis resipiscunt subitò, utpote qui mentem non amiserunt. Mitto quod Origenes Plotinusque disputant, animas humanas esse quodammodo mentes ex sua puritate delapsas, quando videlicet ab intentione mentis circa ideas ad intentionem potentia viuificæ corporum prolapsæ in corpora deciderunt. Et quanto aliæ magis aliis intentius profundiusque ad materiam conuersæ sunt, tanto minus (ut aiunt) intellectualis retinent luminis. Vnde magna in ingeniis moribusque inter animas diuersitas prouenit. Ad quam etiam conducunt ætherea corpora animarum diuersis cœli figuris syderibusque accommodata. Denique varietas geniorum varietatem adducit ingeniorum. Si quis autem animas extitisse per tempus ante corpora non concesserit, voluerit tamen ex parte quadam Platonicos imitari, poterit forsitan dicere animas saltem eo ipso momento quo creantur, corporique iunguntur, ita ut Origenes Plotinusque disputant, ferme affici atque disponi. Profectò mentes Angelicas, alias ad inferiora prolapsas, alias minimè, & earum quæ ceciderunt, alias quidem magis, alias verò minus. Sed mentes hominum tanquam infimas omnes naturali instinctu cum primum creantur, ad naturalem partem & corpora vergere, aliasque aliis profundius sese in Lethæum flumen, id est, materiam mergere. Atque hoc quidem pacto Pamphilus Origenem, quoad potuit, emendauisse videtur. Sed de his aliàs. Iam igitur ad propositum reuertamur. Si quis parte capitæ quadam læsa memoriam videatur amittere, respondebunt Peripatetici, confundi rerum imagines quæ in cerebri spiritu retinentur, sed species quæ in mente sunt, non lædi propriè, imò (ut ita dixerim) ociari. Oportere enim mentem quamdiu corpus habitat, in corporalium species non sine corporalium imaginibus contueri. Addent Platonici quatenus animæ intentio circa læsi curationem membri vehementius occupatur, eatenus cognitionem memoriæ remitti atque intermitteri. Auicenna & Alganteles dicent mentem ad inferiora conuersam, à diuina quadam mente diuertere, vnde omnem in-

telligentiæ actum putant continètere dependere. Quoniam verò Lucretius immortalitati ob eam causam diffidit maximè, quod imminente mortè vires animi deficere videantur, animaduertendum est, vitam corporis in humoris & caloris temperatione consistere, ideoque mori corpus quando vel calor resoluit humorem, vel calorem humor extinguit.

Quoniam autem humor caloris pabulum est, calor vehiculum spiritus, spiritus est animæ ad corpus conciliator, fit ut quando resoluitur humor in membris corporis paulatim, anima quoque membra deserat paulatim. Et quia tunc regendo corpore minus quam soleat occupatur, in mentem suam se colligit, cernit arcana, præfagitque futura. Absit à nobis Lucretiana suspicio, animam scilicet cum corpore morituram, quæ debilitato corpore roboratur. Et cum vnio dissolutioni opposita sit, longissimè tunc abesse à dissolutione putandus est animus, quando se maximè colligit in seipsum, ac deposita animali natura surgit in mentem. Atque id in morte, quæ propter resolutionem fit, manifestè contingit. In morte vero quæ fit propter extinctionem vitalis animæ, vis humoribus tumoribusque curandis intenta est, sensus doloribus iudicandis, phantasia spectandis simulachris quæ ab humorum vaporibus concitantur. Quapropter ratio ad tempus remittit officium, sicut solet in somno nonnunquam, quod resumatur post mortis strepitum, sicuti consuevit post insomnia vigilare. Quod autem in eo ipso tempore vires dotesque suas nequaquam amittat, illud nobis argumento est, quod multi qui diligentia medicorum ab imminente morte reuocantur ad vitam, corporis quidem vires vel nunquam vel sero recipiunt, animi verò mox humore purgato, quasi corporis vires extinctæ fuerint, animi autem lumen latuerit potius tanquam sub cineribus ignis, quam euanuerit. Quis dixerit eundem fore à vita exitum corporis atque animæ, cum non sit idem reditus? Redit enim corpus vix seroque, redit animus facile atque subito. Neque quicquam eo tempore amisit sui, cum & naturales & acquisitas dotes subitò rursus edat in lucem, non minus quam antea consueverit, utpote qui sua tunc collegerat suppellectilia, non disperferat, paratusque fuerat tanquam serpens ad exuias exuendas, non aliter iis claustris egressurus in lucem viuens & integer, quam olim materno utero cum est emissus in lucem.

Putat autem sapiens quando relinquit



corpus, se non parte priuari sua, sed molestissimo onere liberari. Ac de sexto signo iam satis. Accipe septimum illud signum. Sensus diuturno opere fatigantur, mens verò nunquam. Quanto diutius inflexeris, eo cernes obtusius. Quanto diutius indagaueris intellectu, eo intelliges clarius, omne corporis sensusque opus usu defatigatur, mentis verò corroboratur. Solet tamen diuturna cogitatione grauari caput, & oculus caligare, quia mentis exercitium omitantur sæpe numero phantasiæ motus, hos autem vibratio spiritus, hanc læsio cerebri aut oculi. Ipsa verò mentis acies fit leuior & acutior.

Quæ certè sine intermissione vlla sursum directâ maneret, nisi miserata corpus hoc ipsi commendatum, eius recreandi gratia opus proprium intermitteret. Quod in iis planè conspicitur, qui dum speculantur attentius aliquid, fatigati corpus ægrè ferunt, in quibus mens inuita quodammodo cessat ab opere, corpus autem sensusque cessant quam libentissimè, quasi non mens fatigetur operando, sed illa. quod verò indefessum est etiam immortale.

Octauum signum est, quod vires aliæ alicui rerum generi sunt adscriptæ, mens nulli. Quid est enim in eorum numero quæ esse dicuntur, ad quod mentis acies dirigi nequeant? Quæ ipsius quod dicitur ens, essentia, esse naturam & vim descriptione comprehendit, sub iis verò ea quæ sunt omnia continentur. Reperit quoque differentiam inter esse atque non esse, itaque nouit vtrunque, & esse diuidit quodammodo in partes suas atque particulas, dum quælibet rerum generis speciesque sub esse disponit. Et, quod maius est, super esse ipsum ascendit, & sub esse descendit, quando ipsum vnum, ipsum quoque bonum statuit super esse, & materiam siue priuationes rerum sub esse locat. Nulli rerum generi mens astringitur, si ambit omnia. Nihil extra se habet, à quo perimatur, quod intra se quodammodo claudit omnia. Concludamus disputationem hoc pacto. Animus hominis si per corpus esset aliquo modo, nihil ageret vnquam sine corporis instrumento vel auxilio. Agit autem sine corporis usu intelligendo atque volendo, vt per octo signa exposuimus. Non igitur est per corpus. Ergo est aut per se, aut per diuina. Si per se, nunquam se deserit, si per diuina, ergo per æternas causas est æternus.

*Sexta ratio. Anima conuenit partim cum diuinis, partim verò cum brutis.*

## CAPVT VI.

SI anima hominis ex materia (quam fluuium vocant Lethæum) scaturiret, nunquam cum diuinis, quæ ex eo fluuiio non scaturiunt, in operatione coniungeretur. Congruere verò cum illis in operatione, imò etiam in essentia & vita, sic ostendemus. Quoniam videmus omnia tunc maximè aliquid operari, quando in sua specie adulta sunt atque perfectæ, cogimur asserere Deum, quia est omnium perfectissimus, non ociosum esse, sed aliquid agere, postquam operatio perfectionis est signum. Imo verò neque nos aliquid ageremus, nisi ageret ille, quo mouente, mouemur, sicut quo faciente, sumus, & quo afflante viuimus & spiramus. Sed quænam est operatio Dei? non quæ aliunde incipiat, aut alio quopiam tendat, ne cogatur Deus aliunde pendere. Est igitur operatio Dei perpetua quædam in seipsum conuersio, per quam seipso fruatur & gaudeat. Itaque contemplatur seipsum, se contemplando, suam videt potentiam, hanc intuens, quæcunque potest discernit. Ergo & seipsum simul & vniuersum opus suum actu vnico speculatur, speculando in se concipit cuncta, concipiendo extra se quæcunque vult, parit. Similis ferme est in sanctis ministris eius coelestibusque spiritibus operatio, se namque ipsos illi quoque & sua opera speculantur, speculantur & Deum, operaque diuina. Speculatio certè illis sola conueniens est, quia operationum omnium perfectissima. Quod etiam in nobis apparet. Hæc non externa eget materia, vt fabricatio, neque corporalibus instrumentis, vt sensus, neque aliunde mouetur, aut alio tendit, vt operationes aliæ, neque figurat materiam alienam, sed colit ornatque mentem, quando non alio terminatur, sed desinit in seipsam, neque fatigatur citò, vt aliæ, sed permanet indefessa, neque molesta est vel indiga, vt sunt illæ, sed facilis, plenaque, & gaudio perfusa incomparabili. Si qua igitur ex iis operationibus quæ nobis insunt, supernis est numinibus tribuenda, contemplatio certè tribuenda est, operationum omnium felicissima. Ex iis patet hominis animam in contemplatione cum diuinis congruere. Congruere quoque eum bestiis in nutritione, sensuque, & corporis affectu, non dubitamus. Certæ autem operationes ad conuenientia sibi

directè obiecta, certas conuenientesque requirunt virtutes atque substantias, & quæ proportio est obiecti vnius ad alterum, eadem operationis vnius ad alteram. Eadem quoque virtutis est & essentia ad virtutem & essentiam comparatio. Itaque sicut in nobis quod ad corporis vsum pertinet, est operatio cum brutis communis ad commune cum illis obiectum, ita natura cum illis communis apparet. Hæc est nutriendi sentiendique operatio, & potentia atque complexio corporis, quæ in nobis fermè sicut in bestiis sunt caduca. Oportet quinetiam reperiri in nobis potentiam & substantiam cum cœlestibus illis communem, ex qua nascatur operatio illa quam habemus cum illis communem ad commune nobis illisque obiectum. Quamobrem sicut in nobis quodammodo caducæ sunt nutriendi, sentiendique natura & complexio corporalis, quæ circa caduca versantur, & cum caducis animalibus sunt communes, ita immortalis erit contemplandi potestas quæ circa immortalia versatur, & cum immortalibus est communis, quia non potest operatio eadem nisi ab eadem natura & potentia proficisci.

Quis autem dubitet contemplationem nostram supernis esse persimilem? cum per eam animus, vt cœlestes illi, seipsum & opera sua consideret, inuestiget quoque supernas causas, earumque effectus, item ab effectibus inferioribus per medias causas vsque ad causam supremam ascendat, atque vicissim à suprema causa vsque ad infimos euentus circulo remeet. Vbi videtur vniuersam diuini operis seriem non alia virtute quàm diuina complecti, & tanquam Deus aliquis circumlustrare. Non solum verò intelligentiam cum numinibus communem habet, sed etiam voluntatem, cum illorum affectet beatitudinem. Habet præterea similem actionem, quatenus agit liberè, & suo imperat corpori fermè sicut illa. Ex omnibus iis colligitur animum nostrum cum cœlestibus essentia conuenire. Si essentiam habet cum illis communem & proximam & illa nullam habent originem è materia, sequitur vt nullam quoque animus noster talem originem habeat. Præterea si numina illa sempiterna sunt, quia mundi sphaeras eodem semper mouent ordine, neque fatigantur vnquam, sequitur vt sit mentis essentia sempiterna, quoniam terminata mobilisque vita nullo modo interminatæ immobilisque vitæ res proxima. Tanto autem magis conuenit cum illis immortalitate vitæ, quam intel-

ligentia veritatis & beatitudinis desiderio, quanto vita ipsa prior est quam intelligentia vel voluntas. Ac si voluntas est nixus intelligentia vero summum adolescentis vitæ fastigium, animus non aliter dirigitur ad voluntatem rectam, quam per veram intelligentiam, ad hanc quoque non aliter quam per veram adultamque vitam. Voluntatem habet rectam, quia ad primum totumque bonum sese confert. Intelligentiam veram, tum quia quatenus intelligentia est, non fallitur, tum quia veras omnium intus possidet rationes, quod alias ostendemus. Habeat ergo necesse est veram adultamque vitam. Talis est quæ non est obnoxia morti. Huic nostræ argumentationi illa Origenis fauet summopere, vbi inquit: Omnes naturæ quæ eiusdem principij participes sunt, inter se sunt similes, ceu oculi, quia omnes lucis participes sunt, cum ad lucem natura sua similiter conuertantur, omnes sunt similes, sed tamen pro diuersa lucis participatione alius alio est acutior. Omnes rationales substantiæ Dei participes sunt, cum omnes conuertantur ad Deum, ergo similes sunt tum inter se, tum illi. Itaque sicut supremæ sunt immortales, vt Angeli, sic & inferiores, vt animæ. Immortales verò sunt omnes, quia Deo per similes immortalis. Quam similitudinem ostendit illa ipsa in Deum conuersio, in quem quidem velut in Solem, tanquam stelle, superiores conuertuntur Angeli, anima verò in eundem, ceu Luna, quæ quamuis vicissitudine quadam diuini luminis permuetur, ideoque modo quodam mirabili capiat, inextinguibili tamen percipit ratione. Siquidem & inextinguibile ipsum esse, & qua ratione sit inextinguibile, certis rationibus comprehendit.

*Obiectio Epicureorum & responsio de rerum temperatione.*

## C A P V T VII.

**R**eluctabitur iis Dicæarchus, aut Epicureus aliquis, quasi monstro id simile sit, rem scilicet aliquam partim incorruptibilem esse, partim corruptioni obnoxiam. At nos affirmabimus naturæ ordinem sine hoc seruari non posse. Sunt aliqua corpora ab omni penitus corruptione semota, vt cœli, quorum neque sphaera ipsa, neque particula vlla corrumpitur. Sunt & corpora iis prorsus opposita, scilicet omnino caduca, puta ligna, lapides, metalla, cæteraque ex quatuor elementis

aliquam sustinere. Sed ut capitulum composita. Ligni siquidem particulæ nonnullæ quandoque putrescunt, deinde etiam totum lignum ipsum definit esse lignum, quamvis quicquid ita compositum est, ob id saltem ex incorruptibili constet & corruptibili, quod primam in se materiam habet perpetuam, formam verò mortalem. Quapropter coniunctio mortalium cum immortalibus neque impossibilis est, neque rata.

Sed redeamus ad ordinem institutū. Sūt tiam corpora media, elementorum videlicet quatuor sphaeræ, partim incorruptibilia, partim corruptibilia. Ipsa quidem tota elementi sphaera suam speciem, suum situm, suum seruat tenorem, particulæ vero eius nonnullæ quandoque hinc perduntur, inde instaurantur. Cum vero corpora vel à spiritibus vel spirituum gratia fuerint constituta, ordinem corporum oportet ab ordine spirituum proficisci, aut saltem spirituum ordinem imitari. Sunt ergo spiritus aliqui penitus immortales, ut Angeli, quorum neque tota ipsa substantia commutatur, neque vlla vis, neque etiam operatio. Sunt alij mortales omnino, ut communis fert opinio, brutorum scilicet animæ, quarum permutatur vis operatioque, permutatur & tota substantia. Sint insuper oportet spiritus utrorumque medij, ut vnus sit absque intermissione totius naturæ contextus. Hi per totam substantiam permanebunt, per particulas aliquas mutabuntur. Tales erunt animæ nostræ præcipue, quarum substantias cogit esse perpetuas communis illa cum cœlestibus contemplatio voluntasque & actio. Potentias verò aliquas siue operationes quandoque cessaturas indicat nobis illa communis cum brutis mortalibus operatio, cultui mortalis corporis penitus mancipata, quippe cum naturales affectus in naturis propriis fundentur, diuersique affectus in diuersis naturis, videamus autem nostras animas affectum ad æterna habere, affectum quoque ad temporalia, meritò dicimus eas ex naturis duabus æterna videlicet, & temporali compositas esse, quemadmodum si videremus corpus aliquod natura sua quasi æqualiter sursum deorsumue moueri, diceremus ipsum ferme æqualiter ex grauitate & leuitate componi.

Tria vidimus corpora, tres quoque spiritus, tres nunc accipiamus species animalium. Animalia vtrunque tam ex anima quam ex corpore sempiterna, seu mundi sphaeras, stellæque (ita ut Plato existimat)


animatas, ut tam corpus earum, quam anima sit procul à morte. Item animalia vtrunque mortalia, seu bruta. Interponamus homines ex anima immortales, mortales ex corpore. Multi verò etiam multos dæmones herosque similes interponunt, neque seruialiter ordo naturæ potest, nisi cœlesti animæ ferme penitus immutabili, corpus omnino incorruptibile tribuatur, atque bruti animæ penitus corruptibili, corpus omnino mortale, animæ autem hominis, & immortalis simul, & quadam ex parte mutabili, corpus detur vtrunque, æthereum vnum secundum Platonem, elementale alterum, ut hominis anima æthereo immortalique corpore, qua parte immortalis est, cœlitus induta descendat. In terris verò, qua parte mutabilis est mutabili elementorum corpore vestiatur. Ac meritò hominis animæ, licet immortalis, corpus corruptibile congruit, propter eam sui partem, qua esse mutabilis demonstratur. Nihil igitur obstat quin possit animal vnum in naturæ ordine reperiri ex anima immortale, ex corpore corruptibile. Idque manifestius homo sit, ut & superior ratio demonstrauit, & Anaxagoræ sententia comprobatur, quatuor rerum gradus inducens, immortalem æternitatem, immortale tempus, mortalem æternitatem, mortale tempus. Primum esse arbitror mentem, secundum cœlum, tertium rationalem animam, quartum irrationalem. Ideo de homine dixit diuinum illud.

θνητὸς αἰὼν μέρος ἔχει θεοῦ πνός,

Id est, mortalis æternitas, Dei partem habet: hominem æternitatem quidem vocat, tum propter animæ substantiam, tum propter intelligentiam. Mortalem verò tum propter mutabilem animæ partem vel actionem, tum propter corpus ex elementis compositum. Neque absurdum esse Platonici putant, ut in anima actionis motio vnà cum substantiæ immutabilitate concurrat, quandoquidem & in cœlo (quod animæ fert imaginem) hæc duo manifestè concurrunt, nihil enim inter corporea cœlo mutabilius, nihil contra stabilius inuenitur. Talem quoque putant esse primam mundi materiam, quæ sic naturalibus subest formis, quemadmodum mens nostra diuinis. Putant autem mutationem rebus ex ipsarum multiplici- tate contingere ita ut quæ essentiam habent multiplicem, motionem in essentia sortiantur, quæ verò virtutem actionemque solam, in iis duntaxat mutationem cludamus, nihil prohibet quo minus ani-

mæ quamuis indissolubili corpus dissolubile congruat, præsertim cum etiam cœli corpus ex eo dissolubile nominent, quod partibus constet extensis, propterea- que seipsum continere non possit, sed vir-

ture animæ connectatur. Idem contigit & nobis, si animæ nostræ similiter atque cœlestes à diuina vnitatem non recesserint.



# THEOLOGIÆ PLATONICÆ,

DE IMMORTALITATE ANIMORVM,

EODEM FICINO AVTHORE,

LIBER X.

*Prima ratio. Sicut vltimum in ordine corporum est incorruptibile,  
sic & vltimum in ordine mentium.*

(:.)

CAPVT PRIMVM.

(:.)



Quoniam ordo corporum sub ordine intellectû collocatur, pendetque inde, ideo corporum ordo non aliter ordinem sequitur intellectuum, quam

pedis vestigium ipsum pedem, & umbra corpus. Itaque qualem videmus ordinem in corporibus, talem penè debemus in mentibus coniectari. Videmus in corporum ordine sublime corpus, videlicet supremum cœlum in natura sua cunctas vires formarum omnium efficiendarum continere, per quas vtique vires tanquam actiuas & efficaces inferiora corpora ad varias formas suscipendas disponit.

Quapropter variis naturæ suæ viribus, & variis motionis suæ configurationibus corpora inferiora variè mouet & format, vt meritò dici possit, sublime cœlum formas corporum reliquorum vel actu vel actiua virtute complecti. Corpora verò sequentia affirmare possumus illi ad eò subiecti, vt ipsa quidem in potentia quadam susceptiua (vt dicitur) & passiuæ easdem habeant formas, atque actu ab illo suscipiant. Verum talis ordo seruetur, vt quo

sublimius sub illo corpus est, eo magis actiuam potentiam habeat, minusque passiuam. Quod enim primo est proximum, ab vnico primo suscipit, atque patitur, agit in multa.

Quod sequenti ponitur gradu, patitur etiam magis, agit minus, quoniam à duobus iam, primo videlicet & secundo, patitur, in sequentia quæ accepit effundit, quousque ad infimam quandam materiam veniatur, quæ cum à superioribus omnibus capiat, ipsa tribuit nulli. Itaque in potentia passiuæ habet quidem formas omnes, quas per successionem à superioribus suscipit patiando. In virtute autem effectiua habet nullam. Idem in mentibus cogita, quarum principium Deus, omnes intelligibiles species vno & proprio habet actu, distribuit omnibus, capit à nullo. Sequentes illum mentes inde omnes accipiunt, & inuicem ita se habent, vt superior inferiori ideas illas lumenque quasi distribuat. Ergo quo altior mens est, eo paucioribus subiecta, pluribus præsidet. A paucioribus igitur patitur capiando, agit in plures distribuendo. Infima denique mens talis debet esse, vt primo illarum principio sit opposita, capiat ab

piat ab omnibus, tribuat nulli. Secundum naturam suam ideas illas in potentia quidem habeat passiva, nullas activa, postquam ideas non transfundit in aliquem ipsi subditum intellectum. Quippe in primo potentia sola activa est idearum in sequentibus activa per ordinem & passiva, in infima mente passiva. Ordinem igitur primi coeli continet Deus, vicem sequentium corporum media tenent mentes, locum materiae infimae infimus intellectus, qui per naturam suam successione quadam omnes intelligibiles rationes accipiat actu, tunc videat, neque omnes actu simul intueatur, quemadmodum corporum formas suscipit ab alia in aliam succedendo. Materia haec quia ex nulla antecedente materia fit, unde creatore indiget infinito, idcirco à solo creatur siue manat Deo. Par est enim ut potentia simplex à simplici fiat actu, qui quoniam actionem suam vitra agentium reliquorum actiones pretendit, solus facit materiam, quae gradum tenet ultimum in natura. Si solus Deus creat materiam quae est infimum corporaliū, solus creat eam mentem quae est infimum intellectuū. Si materia opus est omnium divinorum operum à Deo remotissimum, intellectuale verò genus est proximum, & illa fit seorsum à mente, multo magis potest mens seorsum fieri à materia. Si talem ordinem habet intellectus ultimus in rerum intellectualium genere, qualem materia in genere naturalium, & materia à nulla re naturali potest fieri, sequitur ut postremus intellectus à nulla specie intellectus, quae in eo sit genere, possit fieri. Quod si intellectus huiusmodi à nullo generis eiusdem intellectu vel multo praestantior dependet, multo minus putandus est à genere naturalium, multo insuper minus à materia dependere. Hinc sequitur postremam mentem è materia non educi, sequitur etiam esse incorruptibilem. Nam cum mentium ordo sit ordine corporali praestantior, atque ordo rerum corporaliū tandem descendat in materiam sempiternam, siquidem materia illa nunquam corrumpitur, quis usque adeo demens erit, ut concedat mentium ordinem qui stabilior est diviniore corporibus, in mentem postremò desinere corruptibilem? Sit ergo perpetuus oportet ultimus intellectus, qui ita comparatur ad intelligibiles formas, quemadmodum ad sensibiles prima materia. Materia verò neque per aliquam sensibilem formam corporali corruptione corrumpitur, per has enim formatur, ne-

que per aliquam intelligibilem speciem, ab his enim perficitur. Ergo mens ultima neque per aliquam intelligibilem speciem spiritali corruptione destruitur, his namque perficitur) neque per aliquam sensibilem formam corporali perit corruptione. Praest enim mens, non subest corporali- bus speciebus. Neque transit in mentem corruptio corporalis, sicut non transit in materiam corruptio spiritalis. Imo verò si non transit in mentem violentia spiritalis, multo minus propter corporum crassitudinem transibit in eam violentia corporalis. Imo etiam si corruptio corporaliū subiectam illis materiam non attingit, multo minus altiore illis mentem conquinabit. Esto perpetuus intellectus ultimus. Sed quis iste? Iste inquam est intellectus humanus, quod intellectus in nobis sit, quis dubitat? cum non possumus nisi per vim intellectus de intellectibus disputare. Et sicut oculus Solis lumen non capit nisi per proprium quoddam sui lumen internum, ita anima nostra divinos intellectus nec investigat nec intuetur, nisi per proprium intellectuū. Sed qualis hic noster est intellectus? Hoc ego non curo amplius, qualiscunque enim sit, sempiternus erit. Intellectus namque superiores proculdubio perpetui sunt, si infimus est perpetuus. Ego verò arbitror nostram mentem idcirco esse postremam, sicut & pluribus placuit antiquorum, quoniam non simul agit sua, sed versat in se vicissim tanquam Proteus formas, atque intelligit succedendo, quemadmodum Luna quae ultima stellarum est, vicissim mutat lumen, ceteris non mutantibus. Sit ergo nostra mens ultima. Sit etiam sempiterna. Quia sempiterna est semper inhiat sempiternis, & illa quoties à corpore non turbatur, attingit illico, solisque gaudet ut suis atque domesticis. Motus autem cuiusque rei ille est naturalis, qui fit statim impedimento subtracto. Fit autem simillimum terminum, quia verò est ultima, amat corporum naturam ad quam quasi propinquam accedit, vivificat & gubernat.

*Obiectio Epicuri & responsio de rerum serie.*

## C A P V T V.

**T**Emere hic rursus Epicurus exclamat, portentum esse hoc, ut divina mortalibus haerant, utpote qui non videat absque divinorum stabiliumque consortio non posse consistere mortalia. Latuisse illum puto oportere rerum seriem ita in suis



partibus digeri, ut cum multi varique sint rerum ordines in natura, semper superioris cuiusque ordinis infimæ partes supremis partibus ordinis inferioris proximè subsequenter quodammodo copulentur. Hoc nos docet ætheris cum elementorum natura cognatio. Siquidem Luna pars ætheris infima proxima elementis, elementale nonnihil habere videtur, tum crebra illa mutatione figure, tum ipsa lucidi fuscique corporis sui varietate. Rursus ignis altissimum elementum cælum proximum imitatur, quoniam cœli instar mouetur & fulget. Idem ostendit & ipsa inter se naturalis elementorum quatuor dispositio, ubi pars infima ignis tumidior est, & quasi tepescit ut aër. Suprema regio aëris tenuatur & quasi feruet ut ignis. Ibi ignis aëreus est, igneus aër, atque ita in vnam compagem copulantur. Idem infima plaga aëris & aquæ suprema faciunt, ubi aër obnubilatus liquefcit ut aqua, aqua item extenuata vaporibus exhalat ut aër. Terra rursus altior, pinguis & lubrica fit instar aquæ. Aquæ imum turgescit in terram, & sæpe glaciatur, ut terra. Ultra elementa vapores ipsi crassi, fumique, corpora iam composita sunt, sed proxima elementis. Postea paulo solidius glutinantur, fiuntque lapides aliqui spongiosi & rari, propinqui vaporibus, postmodum lapides reperiuntur duri fermè speciosique sicut metalla. Ex metallis ferrum plumbumque sunt propinqua lapidibus, argentum & aurum propinquiora sunt plantis, quoniam horum nitor & splendor flores referunt candidos & purpureos. In plantis tuber excedit metalla, quia manifestius nutritur & augetur, paulum tamen, quia non habet varium partium ordinem. Nobilissimæ arbores propinquæ sunt brutis, radices oris loco habent, ramos ut crura, brachia, & similia. Sextum habent vtrumque nonnullæ arbores, masculinum & foemininum, unde propè sitæ vberius pullulant. In brutis ostrea vno tantum superant plantas, quod sensum habent tactus, sed fixa terræ penè nutriuntur ut arbores. Multæ quoque bestiolæ sine coitu sponte nascuntur, ut herbæ. Sunt & simiæ, canes, equi, & elephantes, & aliæ bestię hominibus in quibusdam figuris, gestibus, artificis que persimiles. Sunt stolidi homines & ignavi ( ut apparet ) his quoque quam proximi, sunt heroici homines aliorum duces, supernis numinibus cognatissimi. Esse rursus oportet spiritus hominibus familiaritate coniunctos, quorum instructione magicæ artis, Plato vult reperta

fuisse miracula, quemadmodum & instructione hominum bestię nonnullæ nobis propinquiores, mira sæpe supra suam speciem operantur. Atque hos dæmones herodesue ita esse nobis affectu proximos, sicut natura atque situ, adeo ut quibusdam perturbationibus afficiantur humanis, atque alij, aliis faueant personis & locis, alij insuper aliis aduersentur. Siquidem Ægyptij, quos sequuntur Origenes & Numenius & Porphyrius, multos autem esse dæmones qui ad superiora animos erigunt, multos etiam qui ad inferiora detorquent, pessimos autem in occidente dæmones esse, in septentrionali etiam plaga malos, bonos in meridionali, optimos orientalem colere regionem. Dæmonibus autem apud illos inferioribus superiores præfunt, his quoque alij, quos Angelos nominant. Item Angelis archangelos, archangelis principatus Platonici præferunt, principatibus autem intellectus quosdam qui dii iam participatione quadam deponentur, summo semper Deo pleni, diuinoque nectare ebrij. Si in omnibus rerum generibus confitemur infima quæque antecedentis ordinis cum supremis ordinis succedentis esse coniuncta, & inuicem quomodo confundi, cur non fateamur infimum intellectum cum suprema animarum sensitiuarum ita esse coniunctum, ut cum hæc, quamuis mortalis, imaginem aliquam habeat intellectus, quod est in bestiis sagacissimis manifestum, intellectus quoque postremus licet diuinus sit, sensitiuam tamen quandam habeat brutamque naturam, per quam conuenienter ad corpora terrena declinet. Præsertim cum deceat non humanam modo mentem, sed alias quoque omnes quæcunque impure quodammodo sunt, cum purioribus corporibus conspirare. Impuræ vero mentes animæ omnes rationales sunt, quæ licet puræ animæ sint, idè tamen sunt mentes impuræ, quia mentes sunt animales. Mentis inquam ita mouendis corporibus dedit, ut vestigia sua vitalia animaliaque corporibus imprimant. Puræ verò mentes sunt quæ mentes sunt solum, neque animalia ex se fundunt simulachra regendis immersa corporibus. Puræ verò corpora sunt apud Platonem duodecim ipsæ mundi sphaeræ, cœli octo & elementa sub cœlo quatuor. Quinetiam partes quædam in iis sphaeris singulis preciosissimæ. Animæ itaque rationales sphaeris omnibus insunt, gradatim pro sua dignitate dispositæ.

Sed ipsam unam unius machinæ animam Iouem nuncupat Plato, animas autem duodecim sphaerarum duodecim vocat deos Iouis pedisequos. Sphaerarum partibus purioribus similiter attribuit animas mentis participes, stellis scilicet & planetis, quos etiam vocat deos. Ignis partibus dæmones, heroesque igneos. Aëris clari aëreos. Aëris caliginosi aquaticos dæmones, atque heroes. Purioribus postremo terræ partibus mentes copulat, quæ humi habitantes hominēs appellantur. Interdum etiam dæmones heroesque in terra ponuntur.

Neque sub luna tantum, sed etiam in cœlis ultra stellas dæmonum heroumque turbas quamplurimas collocat. Sed in omnibus sphaëris ultra dæmones heroesque principes animas ponit particulares, siue dæmonicas heroicasque, siue humanas, quæ non semper æterna sequantur, ut principes illi, sed æterna temporaliaque vicissim, & corpora vitamque mutant, tum ascendendo in melius, tum in deterius descendendo. Proinde quot stellæ sunt, totidem subesse dæmonum, heroum animarumque turbas. Sub Saturno Saturnias, sub Ioue Iouias, Martias verò sub Marte, similiterque deinceps. Mitto quod omnia putat in omnibus esse, sed in terra modo terreno, in aqua aquatico, similiterque in aëre atque igne. In cœlo quoque pro cœlesti natura. Omnia in luna pro natura lunari, in sphaërisque aliis eodem pacto, adeo ut sphaera quælibet suo modo & propria qualitate totus sit mundus.

Sed ut iam propositum concludamus. Sic erunt aliqui spiritus extra corpus atque perpetui, item aliqui iis oppositi in corpore, atque mortales. Sint ergo oportet medij, qui vel extra corpus sint, & mortales, quod fieri nequit, vel in corpore quidem, sed immortales. Primi illi sunt supernæ mentes, quos vocant purissimos Angelos, qui & gradibus inter se quamplurimis distinguuntur. Illis oppositæ sunt animæ bestiarum. Medium obtinebunt rationales animæ, quæ sunt quasi Angeli quidam inferiores. Neque absurdum est esse spiritum in corpore aliquo immortalem, cum etiam reperitur corpus aliquod immortale, quod est cœlum, & tota ipsa quælibet vniuersi sphaera. Imò decet omnibus præcipuis mundi corporibus spiritus adesse perpetuos, quasi formas. Siquidem omnibus (ut plerique putant) perpetua inest materia. Oportet autem à formis quibusdam ubique materiam superari. Condu-

cit ad idem Ægyptiorum opinio illa à Platonis quidem omnibus, præsertim à Proculo confirmata, videlicet ad consonantiam mundi perfectam esse oportere, non solum animalia quædam rationalia, immortaliaque, atque contra animalia irrationalia & mortalia simul, verum etiam multa inter hæc media rationalia quidem, sed mortalia, non in terra solum, sed etiam in cæteris elementis. Non tantum igitur homines in corpore mortali habere animos sempiternos, verum etiam multos dæmones partim propinquos nobis, partim longè sublimiores, quorum corpora gignantur atque intereant, quamuis diutius quam nostra gradatim diutiusque viuant. Non enim decere putant, ut à cœlestibus animalibus, rationalibus, sempiternis, felicissimis, ad animalia terrena rationalia quidem, sed infelicissima, vitæque breuissima, subito descendatur, imò per gradus quosdam animalium rationalium quæ feliciora quidem sint, & diuturniora quam homines, non tamen sempiterna, corpore vel animo beatissima. Idem quoque Plutarchus, & familiares eius Demetrius Philosophus, Æmilianusque rhetor affirmant. Testantur enim ex multis prodigiis quæ suis temporibus contigerunt, Pana magnum dæmonem, aliosque multos dæmones ciuulasse primum, deinde etiam obiisse. Itaque sempiternæ mentis cum corpore humano quamuis caduco consortium haud ita absurdum est, ut Epicurus Lucretiusque existimant, præsertim cum nostra mens ita sit vltima mentium, sicut stellarum est vltima Luna, atque ut Luna ad Solem, sic nostra mens referatur ad Deum. Luna circa Solem ita reuoluitur, ut aliàs luceat, aliter & varie figuretur, nunquam tota luminis recipiendi facultate priuetur. Habet insuper nitidum in se quiddam, habet & fuscum. Habet denique opacum quiddam, quod impedit ne tota resulgeat. Mens humana similiter diuini Solis radio fulget quidem semper, sed aliàs aliter, mutatque figuram, nunquam tota resplendet. Neque quod in ea splendet, splendet æqualiter. Præter diuinam eius rationalemque virtutem subest pars quædam opaca, & vacua ratione, quæ tanquam lunaris illa opacitas ad elementa, sic ipsa ad materiam corpusque declinans, relinquitur luminis expers.

Ergo naturali rerum ordini consentaneum esse videtur, mentem vltimam, quamuis sempiterna sit, cum corpore quodam licet caduco posse coniungi. Mitto quod

Xenocrates & Speusippus, Iamblicus & Plutarchus putant ab ipsa sempiternitate vim procedere sempiternam, non solum usque ad mentes ultimas quæ reflectuntur in ipsam, sed etiam usque ad animas bestiarum. Numenius insuper ad plantas usque producit. Plotinus denique etiam ad naturam. Nos autem Porphyrium Proculumque sequamur, eatenus putantes vitam cognitionemque procedere sempiternam, quatenus propria in eandem conuersio reperitur. Illa enim quandam in se æternitatis retinent rationem, quæ in ipsam ipsius tum ratione tum gratia, nec solum motu alieno atque communi, sed etiam suo & proprio reflectuntur. Sed nunquid humanum corpus eâ est dignitate donatum, ut mentem perpetuam excipere hospitem mereatur? Proculdubio, neque turbari ex hoc debemus, quod natura variis propugnaculis instruxit corpora bestiarum, & adiumenta suppeditauit ad victum, nobis nihil tribuit tale. Non enim voluit delicatam æqualitatem nostri corporis deformare, neque potuit infinitis actionibus hominis, quæ infinitam sequuntur cogitationem, innumerabilia vel propugnacula vel instrumenta suppeditare, sed, ut inquit Aristoteles, dum mentem manûque dedit, artes omnes atque omnia instrumenta concessit. Bestias autem facile finitis munimentis instruxit, quibus determinatas actiones phantasiæ ad certum quiddam natura directæ exquerentur. Arbitramur verò corpora nostra esse idonea mentis hospitia, tum propter figuram erectam, non humi sed supernè spectantem, & cælum quasi patriam suam proprius agnoscentem, tum propter membrorum variorum decorem omnino mirabilem, tum quia ignis & ær elementa purissima in nobis valent quam plurimum, quod etiam indicat agilitas corporis, procerus habitus, & erectus aspectus. Maximè vero propter complexionem temperatissimam, quæ significatur ex delicata, leni, firma & nitida carnis mollitie, quæ non fit nisi exactissima elementorum temperatione. Aliqua visu hominem superat, multæ aues auditu, canis olfactu, nullum vero animalium gustu vel tactu.

Quod planè perspicitur ex eo, quod homines in epulis, poculis & venereis immoderatus profunduntur quam bruta, licet ratione nonnunquam cohibeantur. Par est enim ut auidius quam bestię eas voluptates adsciscant, quas sentiunt & acutius. Tres illi sensus superiores tunc ex-

peditissimi sunt, quando siccum est cerebrum. quam siccitatem non tradide Deus homini, cuius cerebrum quiescit nunquam, ne fortè si esset natura siccum, etiam continua agitatione arefscens, citius quam decet exsiccaretur. Gustus nihil aliud est quam tactus aliquis linguæ. Tactus cum vniuersalis sit sensus, tum omnis animalis, tum corporis vniuersi, vbi acutissimus est, declarat optimam ineffe corporis complexionem, ob id potissimum, quod cum fiat in neruis, qui quando aridiores sunt, sentiunt male, vbi acutus est tactus, significatur ineffe mollitiem, quæ temperet neruorum ariditatem. Præterea sensuum instrumenta nunquam actu eas qualitates habere debent, quas sensus est percepturus. Pupilla enim coloribus, auditus sonis, olfactus odoribus, cæca lingua saporibus. Cum verò tactus versetur circa quatuor qualitates, & elementorum, oportet ut vel careat illis omnino, quod fieri nequit in composito corpore, vel ab earum excessu procul absit, ita ut in eius instrumento nulla videatur qualitas dominari, sed quasi quædam expulsiis qualitatibus harmonia. Opus fuit tamen multum terræ & aquæ secundum molem nobis ineffe, ut vim ignis aërisque longe vehementiorem aqua & terra molis abundantia temperaret.

Datum quoque nobis est maius cerebrum, & cor calidius quam cæteris animalibus. Illud quidem, ut per varia instrumenta speculationi suppeditet, hoc autem ut & multi & clari spiritus adsit cerebro. Suspensum etiam caput est, ne grauium humorum sordes descendant ad cerebrum, & inquinent spirituum puritatem. Vehemens quoque tum cerebri frigiditas humiditasque, tum cordis caliditas atque siccitas, tam se inuicem quam membra omnia temperant. Ideo in homine videtur esse complexio omnium temperatissima. Quæ si terrea esset, ut bestiarum ferè omnium, cornibus, dentibus, vnguibus, rostrisque durioribus, aspera & hirsuta pelle, squamis effemus obducti.

Nunc verò contra, ita affectum est corpus humanum, ut neque caloris & siccitatis excessu sit asperum, neque frigore nimio rigidum aut pigrum, neque humore superfluo fluxum & lubricum, sed delicatum pariter atque solidum. Quod etiam intelligitur ex alimentis quibus assidue vescimur, aëreis, dulcibus, attritis, tenuatis, liquefactis, concoctis, temperatissimis. Bestię verò contrariis.

Qualis autem complexio est, talia alimenta cupit, & qualibus utitur alimentis, talis euadit. Concludamus igitur hominem ad contemplandum esse natum, ut Anaxagoras inquit, postquam ita in eo tam cerebrum quam reliquum corpus constitutum est, ut continuo contemplationis officio seruiat, quod & cerebri requirit molliorem, & complexionem corporis temperatam, illam ne speculando nimium exsicceetur, hanc ne humorum tumultu à contemplando detorqueatur. Cum verò tanta sit & tam sublimis nostri corporis moderatio, ut coeli temperantiam imitetur, nihil mirum est si coelestis animus hanc ad tempus ædem habitat coelo similimam. Neque tamen carni infunditur primum, sed mediis ducitur competentibus, ut Magi Persarum docent. Primo quidem in ipso descensu coelesti aëreoque inuoluitur corpore, deinde spiritu ex corde genito, qui in nobis coeli instar temperatissimus est, & lucidissimus. His mediis corpore clauditur crassiore. Atque iis omnibus æquè fit proximus, licet per aliud in aliud se transfuderit, sicut calor ignis aëri & aquæ hæret proximè, quamuis per aërem trahatur ad aquam. Ac meritò immortalis anima per immortale corpus illud æthereum mortalibus corporibus iungitur. Perpetuum quidem illud colit semper, hæc ad breue tempus mortalia, ut merito appellari animus debeat Deus quidam, siue stella circumfusa nube, siue dæmon, non incola terræ, sed hospes. Hospes nosce te ipsum, scito te esse coelestis patriæ ciuem, ciuem natum ad coelestia contemplanda. Memento si finis tuus est contemplatio, vitam tuam augeri ac perfici contemplando. Cum verò ex hoc ipso vita corporis quodammodo remittatur, sequi ut in ipso vitæ corporeæ detrimento atque interitu, non decrescat tua vita, sed crescat.

*Secunda ratio. Sicut in rebus naturalibus fit resolutio ad primam materiam immortalem, sic ad formam ultimam immortalem.*

### C A P V T III.

**O**Rdo naturalium corporum ita est institutus, ut in primam descendat materiam & in ultimam ascēdat formam. Et quo magis materia quæuis ad materiam primam accedit, eo potior materia sit, id est verior puriorque materia. Quo magis aliqua forma ad ultimam formam, eo fit

forma perfectior. Materia enim prima: materialium materia est. Forma ultima est: forma formarum. Accipe hoc exemplo: quod volumus: Corpus animalis in membra quasi materiam suam diuidimus, membrum quodlibet in humores quatuor, qui sunt quædam membri materia. Similiter humorem quemlibet in quatuor elementa. Elementum vero in materiam simplicem, ad quam deuenire tandem oportet, ne descendamus in infinitum, neue compellamur econuerso ascendere sine fine. Nusquam enim erit actus mixtus, si nusquam mixta potentia fuerit, nusquam rursus actus purus inuenietur, si nusquam potentia pura valeat reperiri. Et cum actio ab actu puro exordium habeat, passio à pura potentia, actiones passionisque nusquam erunt. Sit ergo oportet materia simplex. Hæc utique materia simplex quæ subiecta est elementi formæ, prima materia nominatur. Quoniam ipsa naturæ artifex in corporibus fabricandis principio hanc materiam accipit nudam, mox elementorum vestit qualitatibus atque formis, tum elementa in speciem producit humorum, deinde humores in formas membrorum digerit, membris addit speciem nutriendi, huic sentiendi formam, huic tandem intelligendi. Intellectiua vero natura est duplex. Vna quæ adeo est à corporibus aliena, ut nullam illis vitam præstet, hæc ideo materiæ vel corporis forma non dicitur, & ordo ille corporum in hanc mentis naturam ceu propriam formam non desinit. Hunc gradum apud Platonem sublimes obtinent Angeli. Sed est altera natura mentis, quæ corpori iuncta, quodam quasi foedere cum ipso conspirat, in quam velut ultimam materiæ formam ascendit progressio corporum. Progressionis huius duo sunt termini, materia infimus, mens ista supremus. Si longissimè inter se distant, conditiones inter se oppositas habent. Ergo sicut materia prima, mera materia est, natura sua expers omnino formæ, omnibus subiecta formis atque materiis, ita ultima illa forma, scilicet mens, mera forma est, scilicet expers omnino materiæ, formis omnibus earumque materiis præsidens. Item sicut materia prima à primo esse distat longissimè, atque est proxima nihilo, unde inter esse & nihil ponitur à Platone, ita ultima forma longissime distat à nihilo, atque est primo esse quam proxima. Hinc tria sequuntur. Primum, quod ultima forma nulla ex parte pullulat à materia, secundum, quod à solo fit Deo, tertium, quod per-

manere poterit immortalis. Primum horum concluditur ex prima comparatione quam induximus, secundum ex secunda, tertium ex prima sequitur & secunda. Ex prima sic: Si est expers omnino materiae corporalis, quæ perniciosæ mutationis initium est, procul est à pernicië. Ac si mirabile rerum caput est, neque mirabilibus rebus succumbit, neque mutationem suscipit aliquam nisi vitalem.

Ex secunda vero sic: Si terminus nihilo proximus non tendit in nihilum, quid mirum terminum à nihilo remotissimum, & primo esse proximum, neque ab esse extrudi vnquam, neque trudi in nihilum? Rursus perfectior est formæ quam materie natura, cum materia à forma perficiatur atque ornetur. Ergo quemadmodum de materia in materiam descendentes gradatim, ad materiam primam corporum devenimus sempiternam, ita etiam de forma ascendentes in formam, paulatim in ultimam corporum formam sempiternam prouehimur, ne ascensus sit imperfectior quam descensus; ac supremus terminus imperfectior sit quam infimus. Decet eam intellectualem formam ad quam tanquam finem totus vniuersæ naturæ tendit conatus, usque ad eò absolutam consummatamque esse, ut sit procul à morte. Medias vero formas immortales esse non est necessarium, eas enim parui facere natura videtur; cum illas non tam propter ipsas quam propter ultimam eligat. In quo sane videntur præparationes quædam materiae ad formam ultimam capiendam potius quam formæ principales existere. Per illas quasi vias transit ipse motus impetusque naturæ, in illa sistit natura motum. Merito igitur illæ ab esse in non esse transibunt, illa quiescet in esse, ut naturæ finis maneat sine fine. Dicimus autem totum vniuersæ naturæ conatum ad id potissimum dirigi, ut animal intellectuale sit ex eo quod intellectus adsit corpori, ut autem intellectus ipse in se sit, actionem duntaxat diuinam posse conferre. Et cum ab ipsa duntaxat æternitate dependeat, æternum fore. De intellectu autem animali quidnam dicemus? Magi non dubitant id quoque in sua temperantia permansurum fuisse, ut Plato in Charmide scribit, si modo animus in sua id est diuina temperantia permansisset. Ab ipso enim omnem tum consonantiam, tum dissonantiam corporis proficisci. Idem prorsus lex Mosaica Christianaque docet. Verum quod vniuersus ordo ob inordinatum animi motum olim amisit, ipso tandem ordine præ-

ualente rursus in ordinem esse redigendum, non Moses solum, sed Zoroaster, Mercurius, Plato consentiunt. Sed de his alias. Nunc iam quod erat propositum concludamus. Sint igitur termini corporalis ordinis vtrique perpetui, & infimus, & supremus. Supremum verò terminum, ultimamque formam esse rationalem animam prisci Theologi putauerunt, quibus cum Aristoteles consensit in libro de diuinis duodecimo, ubi de causis efficientibus & formalibus disputans inquit: causas quidem mouentes materiam præcedere, formas minime. Si autem post materiam forma aliqua maneat, esse perscrutandum. Nam in quibusdam nihil prohibere, ut si est anima tale, non omnis, sed intellectus. Idem in libro de Naturalibus secundo inquit: Philosophi naturalis inuestigationem usque ad illam formam protendi, quæ separata quidem sit simul & in materia, quam esse hominis animam ipse tibi significat, & ita Peripatetici omnes exponunt. Nos autem putamus tum priscos Theologos, tum Aristotelem tali quadam ratione in hanc sententiam concurrisse. Quod si cut complexio temperata est finis ad quem diriguntur omnes motiones complexionesque naturales, ita rationalis anima, cui subest temperata complexio, finis est formarum omnium naturalium. Rursus illa est ultimæ formæ conditio, ut neque omnino sit absoluta, neque omnino immersa corporibus. Si omnino esset libera, neque quicquam per corpus operaretur, corporis forma non esset. Si obrueretur omnino, neque ageret aliquid absque corpore, non esset vltima forma, Esset enim hac vltior illa quæcunque talis esse reperiretur, ut partim quidem iungeretur corpori, partim non iungeretur. Qualem profectò esse aliquam oportet, ut inter substantiam illam angelicam à corpore omnino seiunctam, perque illud nihil agentem, atque formam aliam omnino coniunctam corpori, perque corpus agentem omnia, qualis est anima bestiarum, forma quædam sit media, partim iuncta corpori, partim etiã separata, ut aliquid per corpus efficiat, aliquid per seipsam. Talis est autem rationalis anima omnis, quia & regit corpus, & speculatur. Humana quoque talis est proculdubio, quæ nutriendi & sentiendi opera per corporis exequitur instrumenta, intelligendi autem & eligendi actum perficit per seipsam. Sic Angelus tam per substantiam quam per operationem est à materia separatus, & in æternitate totus, quia totus in statu. Brutorum animæ per



utrumque coniunctæ, & totæ in tempore, quia per utrumque mutantur. Rationales animæ quia partim coniunctæ esse debent, partim etiam separatæ, neque esse possent per aliquid separatæ, si coniunctæ per substantiam essent, necessario sunt per substantiam separatæ, siue separabiles, quia scilicet nullam habent originem à materia vel ab agentibus instrumentisque corporeis. Sunt autem coniunctæ per operationes, non quidem per omnes operationes, sed infimas, & id quidem non violentia, sed amore. Vnde secundum Chaldaeos in confinio sunt æternitatis & temporis. Per substantiam quidem in æternitate sunt, per operationes in tempore. Siquidem illa manet, istæ mutantur. Decet enim inter quod omnino est æternum, atque id quod penitus temporale, esse aliquid partim æternum, partim etiam temporale. Et inter id quod semper est, atque id quod fit aliquando, esse aliquid quod fiat semper. Tale quidem est cælum, & permanens substantia semper, & mobile. Rursus talis ipsa mundi materia, atque ipsa etiam (ut ita dixerim) corporeitas. Præterea ferè talis est anima, quæ fuit semper effectû & actû, quamvis substantia maneat. Vnde declinat ad corpora quæ fluunt insuper per substantiam. Talis profecto anima ideò forma est corporis vltima, quia format quidem regitque corpus. Verum ita pene excedit naturam corporis, ut in ipso sit limine, ac paulum quid prætergressa, limites corporis sit penitus relictura. Nempe multo magis separata est, quam coniuncta. Communicat namque illi partem sui, siue potentiam inferiorem quam habet cum brutis plantisue communem. Partem verò præcipuam, diuinis persimilem, in qua tota consistit rationalis animæ ratio, semotam habet à corpore in essentia, qui etiam in actione. Et quoties operatur per intellectum, primo naturalique instinctu ad separatas rationes sese confert, quod quidem omnes Peripaterici consentiunt. Ad singulas verò coniunctasque formas non primo aut recto, sed secundo & obliquo quodam actû se torquet, quatenus ad simulachra vnde species intelligibiles procreauit, se reflectit. Quis ergo non viderit vim rationalem magis separatam esse quam coniunctam? Siquidem ad separata rectè & primò, ad coniuncta oblique actû sequenti se vertit. Quæ tunc maximè quod vult assequitur, quando longissimè discedit à corpore. Contra, quando per sensus descendit ad corpora, tunc fallitur, & in-

numeris passionibus perturbatur. Non potest autem rerum mortalium esse similis, si illarum præsentia fallitur & turbatur. Imò verò similis est diuinarum ut in Phædone docet Plato, quia quo illis hæret propinquius, eo clarescit magis, gaudet. Quiescit autem in loco sibi naturali, res quælibet angitur in alieno. Vnde apud Platonicos apparet non esse in corporibus mortalibus, quatenus mortalia sunt, naturalis intelligentiæ, sedem. Ergo paululum quid abest ut rationalis anima sit prorsus à corpore separata. Est igitur forma vltima, cum super eam non sit forma alia corporis, infra verò sint multæ ita dispositæ, ut gradatim huic animæ propinquantes quasi super materiam eleuentur.

*Obiectio Epicuri & responsio, de formis Deo simillimis.*

#### C A P V T IV.

**S**Omniare nos Epicurus inquit quando formas excedere vllò modo materiam qua sustentur, asserimus. Absorberi eas usque adeo à materia putant, ut impossibile sit aliquam licet excellentissimam formam aliquid vltra materiam operari. Nos autem omnia naturæ opera (sicut Plato in Philebo scribit, Aristotelesque confirmat) à diuina quadam perfici arbitramur intelligentia, quæ quidem cælos velut instrumenta sua reuoluens, & cirans, ut Plato inquit, coelestem currum, inde inferiorem hanc elementorum format materiam. Atque ut in arte operis forma triplicem habet gradum. Est enim primum in artificis animo, secundo in instrumentis ab eo agitat, tertio in materia inde formata, ita formæ rerum quas Deus per cæli motus vel traduentes vel præparantes hic generat aut creat, primum in ipso sunt Deo, deinde in cælis tanquam riuulis aut sedibus, postremo in hac inferiori materia. Oportet autem materiam hanc, quandoquidem à diuina intelligentia sic agitur, suscipere ac præ se ferre exactissimam aliquam diuinæ intelligentiæ formam, quod etiam in natura & artibus fieri cernimus. Vitalis siquidem natura animæ per calorem naturalem tanquam aliquod instrumentum materiam agit alimentum à nobis sumpti, redditque vitale. Vita hæc alimentum tributa, non caloris illius imitatur formam, sed animæ. Calor enim ex se vitam non generat. Pictor etiam per instrumentum suum penicillum formam aliquam signat in pariete, non penicilli fi-

milem, sed animi sui potius, qui eam in se prius conceperat, & postea parit. Igitur tam secundum naturam quam secundum artem operis forma formam refert agentis. At enim in hoc gradum triplicem reperimus. Aliam formam videmus propinquiorem materiæ quam agentis, aliam agentis propinquiorem quam materiæ, mediam verò nonnullam. Accipe primum exemplum aliquod in natura. Anima quippe per instrumentum illud suum calorem scilicet naturalem, cibo digesto triplicem tribuit formam. Nam crassioribus cibi partibus formam tribuit ossium, ossa namque ex illis generat atque nutrit. Tenuissimis verò partibus ut plurimum spiritus ipsius adhibet formam, quia ex illis spiritum creat. Mediis denique formam præstat carnis atque neruorum. Hæc omnia exequitur naturalis ille calor, non sua virtute, sed animæ. Ipse enim vrit tantum natura sua, atque dissolvit, sed ad huiusmodi opera per virtutem animæ temperatur. Forma ossium remotissima est ab anima, & materiæ proxima. Nullus enim fit sensus in ossibus. Forma carnis atque neruorum propinquior est animæ quam ossium. Sensus enim per hæc fiunt. Sensus, inquam, hi quinque, qui nondum tamen longissime discedunt à corpore, cum nihil unquam nisi præsentibus externis corporibus agant. Forma denique spirituum est animæ proxima, quippe cum hi imaginationi & phantasiæ excellentioribus animæ viribus modo quodam subseruiant. Exemplum habes in natura. Accipe insuper exemplum in artibus. Instrumenta profectò quibus utuntur artifices, suam quandam duntaxat habent naturam atque figuram, non tamen habent ipsam artificis intelligentiæ pulchritudinem. Verum per hæc artificis animustria quædam exequitur, nonnulla sibi quam proxima, remotissima, alia media. Omnia sanè artificis opera quæ ad aspectum pertinent, aut auditum, totum penè artificis declarant ingenium. Quæ ad sensus tres reliquos, minime. Nam in odoribus saporibusque conficiendis, aut stratis lauacrisque temperandis, paulum aut vix artificis apparet intentio. In picturis autem ædificiisque consilium & prudentia fulget artificis. dispositio præterea & quasi figura quædam animi ipsius inspicitur. Ita enim seipsum animus in operibus istis exprimit & figurat, ut vultus hominis intuentis in speculum, seipsum figurat in speculo. Maxime verò in sermonibus, cantibus, atque sonis artificiosus animus se depromit in lucem.

In his enim tota mentis dispositio & voluntas planissime designatur, & qualis est affectus artificis, talem nobis affectum opera eius solent excitare, flebilis vox flere, furiosa furere, lasciuia lasciuire sæpe compellit. Hæc igitur opera cum ad visum tum ad auditum spectantia, artificis menti sunt proxima, illa verò quæ ad tres reliquos pertinent sensus, ut diximus, remotissima. Mediæ autem illæ operationes sunt, quæ ad corporis exercitationes, ludicras aut bellicas pertinent. Vndenam ars & natura ita ad dispositionem suorum operum temperantur, nisi à Deo naturæ artiumque institutore? Deus itaque opera sua in corporibus similiter temperat, ita ut etiam ipse in materia sibi subiecta triplicem formarum generet gradum, videlicet sibi proximas formas, remotissimas, atque medias. Et quoniam quicquid mouet materiam, non alia ratione mouet, quam ut eam extollat ad sui vultus imaginem, nec falli Dei sententia potest, necesse est alicubi in materia diutius agitata faciem artificis Dei expressius relucere, ac ferme tanto expressius quam in aliis materiis, aliorum mouentium facies, quanto in mouendo atque trahendo Deus est potentior aliis. Ideo Dei vultum tam similem denique in materia effulgere oportet, ut nequeat similior emicare. Quamdiu resulat mortalis, consummatam non implet imaginem. Sane similior foret, si semper esset similis, id est si surgeret immortalis. Fit ergo aliqua forma in materia immortalis. Si qua talis erit, illa erit quæ est vltima, quæ sicut remotissima est à materia ex eo quod vltima est, ita est proxima Deo, ideoque simillima. Talem esse rationalem animam non est dubium. Sed planius rem ipsam aperiamus.

*Responsio planior de formarum gradibus.*

## C A P V T V.

**P** Rincipio Deus materiam primam certo modo ad rerum naturalium species producendas afficit per qualitates primas, atque disponit, per raritatem, densitatem, leuitatem, grauitatem, caliditatem, frigiditatem, humiditatem, siccitatem. Quæ quidem vocantur qualitates præparationesque materiæ potius quam formæ principales & species, propterea quod harum quælibet pluribus comperit speciebus, & sæpe intenduntur & remittuntur. Rerum tamen species (ut placet Physicis) non ita mutantur. Sæpe accedunt atque rece-

duntatq; ecedunt, dum species permanent. Quis neget multis arborum & animalium speciebus communem esse caliditatem & frigiditatem, atque has qualitates in animantibus secundum magis minusque variari, dum eadem permanet species animantibus. Sunt igitur materiae quam simillimae, cum instar materiae pluribus speciebus subiciantur, neque ipsae suaduntur a praesentia species rerum inter se distinguant. Affectiones igitur praeparationesque materiae ad suscipiendas species nuncupentur. Ergo materia per extensionem quantitatis sibi familiarem, & ad multa communem, qualitibus huiusmodi pandit sinum. Per has vero ad suscipiendas species praeparata, statim à mente diuina mundi totius opifice formas speciesque accipit elementorum. Speciem ignis, quando parata fuerit per caliditatem, siccitatem, raritatem, & leuitatem. Speciem terrae, quando per frigiditatem, siccitatem, spissitudinem, grauitatem & reliquas sua singulas ratione. Hae formae elementorum eo suas illas praeparationes superant, quod illarum sunt fines. quodue proprias distinguunt species, & permanent quodammodo firmiores. Citius enim aquae frigiditas permutari videtur, quam species aquae, similiterque in aliis. Sunt tamè materiae prorsus immerse, quia non resoluntur in species alias formasue principales, sed mox per qualitates affecta materia inducuntur de formi materiae gremio proximae. Vnde propter naturam passiuam materiae vix vnus sunt participes actionis. Quid agit aliud ignis nisi quod urit? Neque aliud operantur, nisi quatenus praeparationes illae materiae adiuvant, quia nihil agunt ultra quam possit calor, frigus, siccum, & reliqua. Vnicum praeterea motum habent, & vnum situm. Est ramen ordo aliquis inter formas elementorum. Nam forma ignis quia à materia liberior est quam aliae propter mirabilem raritatem, efficacior est in agendo, & à passionis infectione remotior. Congregat deinde mens quatuor elementa haec in vnum, eorumque temperationibus variis varias conficit lapidum species & metallorum, atque similia quae mixta dicuntur. Quorum formae in hoc excellunt formas elementorum, quod in formas alias quodammodo precipuas resoluntur, neque in materia nisi diligentius elaborata fiunt, & aliquid operantur, ad quod elementorum formae & dispositiones illae materiae non sufficiunt. Non enim per elementorum qualitates ipsis prouocat partum, phan-

tas mata noxia pellit Saphirus, cohibet sudorem, confert ad gratiam, Smaragdus extinguit libidinem, Amethystus sedat ebrietatem. Nam & alia multa quae similes habent qualitates, idem efficerent. Faciunt autem haec ex quadam virtute speciebus talibus ab animis sphaerarum tributa. Sed à materia non longè absunt, quoniam virtus huiusmodi corporalis est, atque per corpora sphaerarum traducitur. Ac licet operationem aliquam qualem diximus, agant, nullum tamen opus ab illis tali virtute perfectum restat. Atque vnum haec motum habent, locumque vnum, quantum elementum hoc aut illud in eorum praeualet mixtione. Omnino autem inter has formas illae efficaciores sunt, in quarum mixtione elementa puriora crassioribus dominantur. Sequuntur formae plantarum, his idcirco praestantiores, quia per elementorum qualitates vt instrumenta opus viuum efficiunt quod illae non possunt. Propagant similes sibi plantas in specie, quod mixtorum illorum formis non datur. Nutriendo motus peragunt in omnes locorum partes contra naturam grauium elementorum, quae in earum mixtione excellunt, corpus nactae sunt secundum membra inter se diuersa distinctum, ramos, furculos, stipitem, & radices, quasi sint multae in his formis virtutes, ad quarum officia explenda multis & variis opus sit instrumentis. Similitudinem quoque praeseferunt aliquarum tum virtutum coelestium, tum motionum. Virtutum, quatenus aliqua operantur ad quae elementorum non sufficiunt qualitates. Motionum, quia motus edunt vndique quasi in circulum, atque ab intrinseco principio coelorum instar sua mouent corpora, ordinant praeterea membra sua omnia ad principale aliquid sui, sicut mundi agitator sphaeras omnes in vnum. Verum nimis adhuc vergunt in elementorum materiam, quia opus nullum peragunt nisi elementorum formis vtantur calefaciendo, frigefaciendo, & in reliquis eodem pacto. Accedunt brutorum animae, plantarum animabus praestantiores, quoniam similes sunt coelesti naturae non in mouendo solum, sed quodammodo etiam in cognoscendo. Cognoscunt omnia coelestes illae virtutes, cognoscunt aliquid & animae bestiarum, operationem habent spiritalem. Sensus enim imaginationisque actus spiritalis est per ipsas obiectorum imagines spiritales. Neque peragunt sentiendi actum per aliquam qualitatem elementorum, quia cum sentiunt aliquid, neque

frigefaciendo sentiunt. Versantur autem & istæ formæ adhuc circa materiam, quia per corporalia instrumenta sensuum actus exercent, neque quicquam nisi corporale & particulare percipiunt, semperque obtemperant corporis vsui. Has omnes denique supereminet hominis anima, quæ non in cognitione duntaxat, sed in genere etiam cognitionis cœlestibus fit mentibus similis. Intelligit namque hæc, sicut & illæ. Ad quam operationem neque elementorum qualitates, neque instrumentum aliquod corporale ex illis compositum concurrat. Quod quidem significat præ cæteris mentis huius naturam à materiæ vinculis exclusam esse, cum operationem sortita sit à materiæ commercio liberam. Materia siquidem vim impedit cognoscendi, quod ex hoc apparet, quia formæ elementorum, mixtorum, plantarum quæ materiæ vicinæ sunt nihil noscunt. Et in animalibus illæ partes sensibus pluribus seruiunt, ad quas materia crassior minus ascendit, quale est caput, & ibi fit sensus acutior, ubi purius instrumentum est, & spiritus plurimus. Vnde visus quia est purior reliquis, sentit celerius & acutius, altiusque nobis infigit rerum notas. Ideoque per ea quæ ad visum spectant, clarius post longum tempus agnoscimus quælibet, quam per sensuum aliorum indicia. Arqui & in somnis sæpius nobis visa sese offerunt quam audita. Neque solum cognoscendi vim materia impedit, sed rem etiam cognoscendam. Idcirco quando moles ipsa rerum premit sensum, aut nullo modo aut egrè sentimus. Formæ quoque rerum in primis sese nobis offerunt, perque illas materiam quasi subintelligimus. Priuationes præterea per habitus, materiamque per relationem quandam ad formam necessario coniectamur. Non omnes tamen formas per relationem ad materiam cogitamus, quod significat materiam à formarum genere dependere, atque esse formas aliquas à materia liberas. Rursus tunc res clarissimè firmissimeque cognoscimus, quando rationes ipsas rerum absque materiæ conditionibus cogitamus. Si materia tam virtuti quam obiecto cognitionis impedimento est, sequitur animam quæ sentit quippiam imaginaturque, non esse compositam ex materia, imò neque esse formam quantitate diuisam, si modo in ipsa cognitione mutua mirabilisque vnio, & penetratio fit inter formam apprehensam, & potentiam apprehendentem. Id verò totum quantitatis dimensio prohiberet. Ac si per co-

gnitiones inferiores concludimus animam ex materia non esse, per cognitionem supremam, scilicet per intelligentiam, animam non esse à materia concludere possumus ut quemadmodum quod sine materia noscit, est sine ipsa, ita quod absque materiæ conditionibus comprehendit ab ipsius passionibus procul existat. Nam si anima hominis talis forma esset, ut ad materiam quasi suam originem referretur, non cognosceret formas vllas, nisi per relationem aliquam ad materiam. Nunc autem tanquam materiæ domina eam subiicit formis, dum ipsam refert ad formas, ac tanquam Deo similis, formas sequentes ad primam refert formam, ipsumque Deum. At qui in hoc ipso surgit supra materiam maximè, quod eam tollit supra seipsam, Deo quoque fit proxima, quod formas omnes reducit in Deum. Ex quibus liquido constat quod iam dudum quærimus, rationalem scilicet animam ex omnibus formis corporis Deo simillimam euadere, vsque adeo ut nequeat alia similior fieri, postquam non potest fieri vltius alia in materia, cum hæc in ipso extremo emineat corporis limite. Exprimi verò oportuit aliquam in natura formam Deo simillimam, si modo diuinus artifex materiam sit superaturus, ut Plato tradit in Timæo. Talem verò esse vult mentem quæ est in corpore, à mente quæ est extra corpora, delibatam, quasi quendam mentis illius vultum insublimioris materiæ speculo relucens. Considera ad quantam sui similitudinem ignis materiam extollat, & quibus gradibus. Sphæra ignis qualitatem triplicem possidet, calorem, lumen, & leuitatem ad superiora vergentem. Mouet sphæra illa corpora infima, & crassissimis ineptissimisque corporibus calorem infundit solum, ut plerumque fit in lapidibus. Purioribus calorem atque lumen, quod facile facit in lignis. Tenuissimis denique vltra calorem ac lumen etiam leuitatem illam ad superna trahentem. Quod efficit in chartis & lino, ita ut statim in se horum assumat substantiam quasi sibi simillimam. Ideo forma ignis in lapide fusca fit & inepta quidem, sed clara, in lino clara simul & agilis. Eodem quasi modo diuina mens corporibus inferioribus vitam præbet solam tanquam calorem, præstantioribus etiam sensum tanquam lumen, præstantissimis insuper intellectum tanquam leuitatem per quam anima surgit in Deum. Ita diuinus Alexander omnia penetrans in lapidibus est quidem, sed non viuit in plantis, viuit qui-

dem, sed non fulget, in brutis fulget, sed non replicatur in seipsum, neque redit in fontem. In hominibus est, viuit, fulget, replicatur in seipsum. Primò per quandam sui ipsius animaduersionem, deinde in Deum fontem suum reflectitur, originem suam feliciter cognoscendo. Vt autem ascensus ignis certum aliquem habet finem, quem consequi possit, atque hic est in sphaera sua quies, ita nostræ mentis ascensus perpetuo directus in Deum statutum finem habet, cuius quandoque fiat compos, neque aliud quicquam is finis erit, nisi quies in Deo, quam non prius animus assequetur, quam hinc abierit.

*Obiectio Lucretii & responsio, quod mens potest absque corpore operari.*

## C A P V T VI.

**I**Nterturbabunt disputationem nostram impij duo, Lucretius & Epicurus, vt solent non ratione aliqua, sed clamore. Nos quidem duo potissimum hic asserimus, quod Deus creat animam sibi similem, quod in materia. Contra primum Lucretius obiiciet: Si tam diuinus est animus, primum contra naturam eius est coniungi cum corpore ad conficiendam speciem animalis, deinde & si iungitur, cur nunquam mens aliquid speculatur, phantasia non cogitante? Contra secundum sic obiiciet Epicurus: Si Deus creat animam in materia, ergo etiam ex materia ideoque mortalem. Nos ad primam obiectionem respondemus, & respondebimus diffusius alias, nunc breuiter hunc in modum. Quoniam vltima in vniuerso virtus intelligendi per operationes sensuum & phantasie ad speculationem propriam expergiscitur, sensus verò & phantasia per spiritus agunt corporeos, sequitur non esse contra mentis naturam, vt corpori huic vniatur ad humanam speciem in terra complendam, præsertim cum mens nostra non simplex sed animalis mens esse dicatur, vltimam entium corporumque viuifica, & si in generica ratione mentis non sit vlla ad corpora inclinatio, tamen in specifica mentis vltimæ ratione inclinatio eiusmodi quodammodo tanquam ipsi naturalis includitur, quatenus videlicet in confinio mentium animarumque creata mens animalis euasit, atque inde ad proxima corpora viuificanda proclit. Et quia res quæque secundum modum suæ substantiæ operatur, substantia vero mentis humanæ incorporealis quidem est omnino, sed vni-

ta materiæ, hinc fit vt incorporalia intelligat quidem, sed ea dum corpus habitat, sæpe vnà cum aliquo quodammodo corporali conspiciat, hoc est simulachro phantasie, ideo huiusmodi plerunque eget simulachris. Verum quando hoc deposito corpore redacta fuerit in seipsam, intelliget in seipsa. Sed nunc alio modo se habet mens hæc ad phantasie simulachra, antequam ipsa in se vniuersalem concipiat speciem, alio modo posteaquam concepit, ante eget illis, vt eorum instigatione exciteretur ad vniuersalem speciem parientdam. Postea verò si illis eget, eget quidem ( vt arbitrantur Peripatetici ) tanquam fundamento, vel comite aliquo speciei. Atque etiam secundum intellectus imperium formatur sæpe nouum in phantasia simulachrum vniuersali illi speciei conueniens, in quo resplendet species illa mentis vniuersalis, sicut in imagine splendet exemplar. Quanquam non eget forte mēs phantasie simulachro, vt Platonici opinantur, postquam semel inuitate illo speciem peperit, & retinet propriam. Sed ea est oculorum geminorum natura in eadem radice fixorum, siue à cardine vno pendentium, vt aperiantur simul, atque claudantur, eodemque inspiciant. Ita mēs & phantasia, qui gemini oculi sunt eiusdem animæ, atque admodum proximi, simul aperiantur, atque eodem pro modo suo conspiciunt. Et dum phantasia hunc cogitat hominem, mens vniuersalem hominem cogitat, & conuexo. Atque hæc est concursio naturalis. Potest tamen adhibita manus opera oculus alter absque altero intueri, sic & studio quodam ardentiore non minus mens ad vniuersales species flecti cessante phantasia, quum sæpe per aliquam turbationem accadat phantasia intentius per corporalia peruagari mente cessante. Potest insuper anima, quando seipsam considerat, tunc actum suum vimque & essentiam sine phantasie simulachro intueri. Maxime vero quando & animaduertit se intelligere, & rursus quod animaduertat intelligit, replicaturque similiter absque fine, præsertim si, vt quidam putant, speciem suam intelligibilem, suumque actum per ipsammet speciem, ipsumue actum animaduertat, vbi certè neque simulachro neque instrumento egeret. Potest etiam simulachri ipsius naturam sine alio simulachro iudicare. Quod si quis conuicerit, intelligentiam dum rerum naturalium rationes considerat, earundem simulachris indigere hoc forsitan disputationis gratia concedemus,



propterea quod sicut humanitatem ipsam communio ad singulos homines comitatur, sic humanitatis intelligentiam huius vel illius hominis cogitatio.

Non tamen in rebus diuinis id facile concedemus, ut quoties angelicas essentias speculamur, toties cogamur corporalia simulachra intueri. Quia sicut essentiae tales ad materiam hanc aut illam non declinant, ita speculationes nostrae quibus illis æquamur quodammodo cognoscendo, non necessariò corporalibus imaginibus astringuntur. Earum enim cognitionem non à corporibus propriè animus mutuatur, sed ab ideis vel ingenitis, quando reuertitur in seipsum, vel infusus, quando supra se surgit. Sed quisnam dixerit mentem in ipsa diuinorum exacta contemplatione, simulachrorum adminiculo indigere? cum illorum siue occursum siue interuentu ab eiusmodi speculatione vehementer impediatur, sæpeque fallatur, ac si falli non vult, illa tanquam nubes discutere compellatur. Forte verò quando per sensus animus à se digreditur, attingit solum sensibiles qualitates. Quando per phantasiam ad se regreditur, insensibiles intentiones imaginum sensibilibus. Quando per rationem in se reuertitur, insensibiles rationes ad intentiones insensibiles declinantes. Quando per mentem supra se surgit, instar Angeli insensibiles rationes iam ab imaginariis intentionibus segregatas. Quid? quod philosophica mens intueretur in vniuerso & in seipsa cognitionem quandam angelicam & diuinam à simulachris liberam? Primo quidem probat eiusmodi cognitionem esse debere, & cuius sit, & qualis, & quare, & quomodo fiat, in seipsa describit. Ac etiam assequitur tam secundum formam, experiturque describendo. Profecto descriptio eiusmodi conceptio quædam animæ est ab omni simulachro libera. Nequit enim per simulachrum cognitionem à simulachro liberam intueri atque definire. Deinde in conceptionem eiusmodi se conuertit, dum se agnoscit ita iam concepisse. Quæ quidem conuersio multo magis est à simulachris absoluta. Denique in conuersionem hanc iterum atque iterum se conuertit, semperque longius gradatim à simulachris peruiolat. Mitto notiora illa, videlicet quando mens dimissis indiuiduis non modo specialissimas species, sed subalternas & genera subalterna generalissimaque, ac denique transcendentiâ perspicit, diuidit, componit, definit, argumentatur. In iis certè simulachra prætermittere non so-

lum nititur, sed compellitur. Operæ præcium est hoc insuper animaduertere, infimam animæ vim magis corpori quam mediam, mediam quam supremam coniungi. quando suprema ratiocinandi vis per humanæ intelligentiæ voluntatisque actum obnixè se colligit in seipsam, tunc infima vis magna ex parte seiungitur ab opere corporali, quia tunc officium regendi, mouendi, concoquendi, digerendi, expurgandi, dimidiam sui partem, imò etiam maiorem solet amittere. Si ita sit, necesse est potentiam mediam ex parte multo maiori tunc à materia semoueri, quod patet in abstractis inter contemplandum hominibus nihil penitus sentientibus. Ex hoc sequitur, ut suprema potentia quandoque in hoc ipso actu corporalia relinquit omnino, cuius virtute reliquæ vires magis magisque relinquunt. Quippe quod adolescit, potest aliquando penitus consummari, eo videlicet consummato quo ipsum crescente crescebat. Ipsa igitur animi à corpore abstractio, quæ inualecente speculationis intentione vehementius inualescit, illa quoque intentione impleta prorsus impletur. Impletur illa, quando cæteris omnino posthabitis, solum primum verum bonumque summa mentis flagrantia amatur & cogitatur. Tunc ergo consummatur abstractio, finisque abstractionis huius quæ nos segregat à mortalibus, tandem non separatio erit à vita, sed primæ consequutio vitæ. Quæ enim se vicissim comitantur, itinere comitantur & termino. Quapropter idem portus animam à corpore fugientem excipit, qui accipit speculantem, hic portus est ipsa veritas. Veritas æterna est, imò est æternitas ipsa. Hæc ad Lucretium dicta sint, pergamus ad Epicurum.

*Obiectio Epicuri & responsio, quod Deus nec  
facit mentem nisi ex seipso,  
& per seipsum.*

#### C A P V T VII.

Q Vonam pacto, inquit Epicurus, producit Deus hanc animam in materia, nisi etiam ex materia. Nos autem interrogamus eum, quonam pacto producit Sol lumen in aëre, non tamen ex aëre. Vultus in speculo imaginem, non ex speculo. Mens loquentis significationem vocis in aëre, non tamen ex aëre. Proinde sicut Sol calorem quidem in aëre gignit ex aëre, lumen tamen non ex ipso aëre, licet in ipso, & mens loquentis ex aëre gignit sonum, significationem vero soni

non ex ipso aere, sed in ipso, ita Deus alias formas ex materiae visceribus eruit, intellectum verò, qui forma vltima est, super materiae faciem pandit, non trahit è sinu. Considerare debuit Epicurus, materiam ipsam nullam habere virtutem propriam formatricem sui (nihil enim informis se format) habere tamen virtutem preparationemque formabilem, quam formarum vocamus inchoationem, & prisca Theologi chaos antiquum. Cui Deus, ut Timæus docet, formatricem virtutem applicat, non tanquam materiae propriae, sed tanquam Dei ipsius instrumentum aliquod ad formandum huic virtuti influxum coelestem elementalemque accommodat. Fortè verò diuinus influxus ex Deo manans, per coelos penetrans, descendens per elementa, in inferiorem materiam desinens, illa ipsa est formatrix virtus, quam Plato vocat diuinæ intelligentiæ rationem, per cuius infusionem machina mundi ex necessitate constat, & mente, id est materia corporibus necessaria, & ex formis pulcherrimo quodam ordine diuinam mentem bonitatemque referentibus. Hanc virtutem Peripatetici tum instrumentum Dei vocant, tum naturam, tum potentiam seminariam. Huic formatrici virtuti subest formabilis illa natura materiae. Deus igitur per vim huiusmodi formatricem, per machinam mundi diffusam formabili ipsius materiae virtuti formas illa accommodat, quas materiae proximas, & quas medias collocauimus. Hic autem Platonici quisque ordinem quādam in quatuor tam formarum quam subiecti gradibus obseruabit. Animæ rationales per solum purumque Dei radium super puram indiuisibilis materiae faciem accenduntur. Animæ irrationales per coelestem quoque animaleque influxum radio illi diuino adhibitum è sinu materiae nondum extenso exprimuntur in lucem. Formæ elementorum mixtorumque familiares, per familiares etiam elementorum qualitates educuntur ex materiae gremio iam extenso, extenso inquam, per dimensiones non terminatas. Formæ eorundem peregrinæ, per qualitates insuper peregrinas elementorum eruuntur ex alio materiae extenso iam per terminatas quasdam dimensiones. Has autem formas præter rationales animas esse materiae astrictas idè arbitramur, quia nullam prorsus operationem habent ad quam non aliquo modo concurrat corporis vel natura vel instrumentum, & finem semper sibi proponunt corporis vsum, utpote quæ

ex corpore pendeant, dum per instrumentum coeleste siue elementale formatum formabili virtuti materiae accommodantur. Cuius rei signum est, quia nulla illarum in Deum conuertitur, quasi Deus non sit illarum proxima causa, sed potius aliena. Anima verò rationalem fieri à Deo sine instrumentis vllis ex eo potissimum coniectamur, quod in Deum proximè vertitur, quod in sequentibus declarabimus. Concurrent igitur instrumenta non ad animæ humanæ productionem, sed ad materiam præparandam, quam sit anima hominis habitatura. Deus vero per se illam materia præparata producit. quod Plato in libro de natura docet, ubi vult animam rationalem à solo mundi opifice tribui, irrationales verò etiam à ministris eius operi huic fauentibus. Aristoteles quoque in hoc secutus magistrum in libro de animalibus secundo inquit: Quando generatur homo, intellectum infundi forinsecus, ac solum esse diuinum, cuius operatio non expleatur per aliquid corporale. Quasi non expromatur ex intimo materiae gremio, sicut alias formas putat expromi. Ergo hanc sine instrumento ipse Deus infundit. Exemplum habes in Solis lumine, & in anima. Lumen Solis per calorem tanquam medium dissipatis nubibus serenat aërem, serenum aerem illuminat per se ipsum. Anima per calorem naturalem coquendo cibum præparat ipsum ad vitæ formam. Cocto & præparato cibo non per calorem, sed ipsa per se vitæ tribuit formam. Anima rursus per linguam tanquam instrumentum frangit aerem, fractus aer sonat, sonando significat. Sonus ille est quasi quoddam animal constitutum ex aere fracto tanquam corpore atque ex ipsa significatione tanquam anima, quæ quidem significatio instar animæ latet in vocibus, & quasi vita quædam est non audita vocis audita. Vndenam datur sono talis significatio? Ab ipsa loquentis hominis anima. Sed nunquid anima significationem dat voci per linguam? Minime. Lingua enim corpus est, & corporale dat munus solum atque sensibile, neque significationem dat per se vllam, quoties animo ad rem non attendente casu quis loquitur. Significatio vero res est incorporalis & insensibilis. Alioquin quicumque vocem audiret, statim quid significatur voce, cognosceret. Quapropter significatio quæ insensibile quiddam est, fit tanquam anima quædam in voce, id est, aere fracto ceu corpore. Fit inquam ab animam ipsius cogitatione sola, non per

linguæ obsequium. Atque idè dum Platonem pronuncias, àër ille fractus plures in partes diuiditur. Platonem. Quæ per tria temporis momenta percurrunt. Significatio verò non per partes diuiditur, quia in loquentis mente indiuisibili, antequam pronuncietur, momento concipitur, & significat sæpe res ingentissimas, quarum molem non potest ipsa per magnitudinem adæquare. Significat etiam motum tempusque sæpe sine motu vel tempore. Et quando pronuntiatur sono, soni ipsius parte pronunciata, plurimum nondum ab audiente comprehenditur, neque percipitur paulatim, sed omnibus syllabis pronunciatis, quid ex illis cunctis significatur, cuestigio intelligitur. Quæ quidem significatio in audientis intellectu perpetua sæpe remanet syllabis pereuntibus, sicut in loquentis mente fuerat antequam loqueretur. Significatio igitur ab anima loquente sine medio producta incorporealis est. Est & vocis anima simplex, & quodammodo immortalis, sonus autem per linguam mediam fabricatus in partes dissipatur, & interit. Si Sol & anima sine instrumentis aliquid efficiunt in materia, multo magis Deus poterit formam aliquam nullo intercedente instrumento materiæ tradere. Atque ea maxime erit rationalis anima, quæ non nihil sine instrumento cogitat atque eligit. quod nunquam valeret si esset per instrumenti operam fabricata. Si per nullum medium à Deo fit, non fit ab eo nisi per Deum. Deus ipsa æternitas est. Fit ergo per seipsam æternitatem. Quod per æternitatem fit, est æternum. Et quod summo statui proximum est, ita est stabile, vt à mutatione mortali sit remotissimum. Hæc enim est summa mutatio. Meritò sicut in cæteris rerum generibus præter id quod per se tale est, sunt & alia quæ per aliud talia sunt, ita in æternitatis ordine vltra Deum, qui per se est æternus, multa sunt quæ per illum æterna fiunt. Talia verò esse ille Timæus docet, quæ à Deo absque medio procreantur. Erit igitur hominis anima & immortalis, & huic corpori tanquam significatio aëri à loquente Deo inserta. Quam significationem si quis animaduertit, Dei loquentis intelligit mentem.

*Obiectio Panætij & responsio, quæ animæ sine medio est ex Deo.*

## CAPVT VIII.

**D**abit forsitan Panætius nobis, posse aliquid à Deo in materia sine materia & instrumento creari, sed animam nostram ita fieri non concedet, nisi manifestiori aliquo signo hoc iterum ostendamus. Arbitratur enim tam animam nascentis ab anima parentum, quam corpus à corpore generari, quia & corpore & ingenio similes genitoribus filij sæpe nascuntur. Sed coniectura Panætij parum momenti habere videtur, quia sæpe dissimiles corpore nascuntur, sapissime animo. Et qui mores sequuntur paternos, consuetudine eos imbibunt potius quam genitura. Et si qui eos vsu non acquirunt, imitantur tamen, non idè imitantur, quia animus nascatur ab animo, sed quia animus à tenera ætate blanditur proprio corpori, in quo propter genitorum complexionem similia quædam fiunt incitamenta, sed procedente ætate arbitrato suo & in peius & in melius mutant mores. Itaque abiicienda est coniectura Panætij. Quoniam verò signum à nobis exposceret, per quod anima à Deo venire clarius ostendatur, signum nobis erit huiusmodi. Anima rationalis quoties aliqua sibi res occurrit, perscrutatur non modo quid res illa sit, & qualis, sed etiam quæ sit eius origo. Neque cessat vnquam nisi causam eius inuenit. Neque tamen in quauis causa sistit gradum, sed indagat semper causæ causam, ita vt non prius quiescat quam supremam causam fuerit consecuta. Vnaquæque res in proprio sui fine quiescit. Proprius finis rei est eius causa propria. Ibi enim perficitur, perfectionem vero naturalem appetunt omnia tanquam finem. Quod si communem finem expetere videantur, non tamen ipsum adsciscunt nisi quantum ipsis congruit & accommodatur, propriusque euadit, talis euadit, quando suscipitur in causa proxima sufficiente superius ordinata. Non petit aër Venerem aut Iouem, licet etiam inde ducat originem, sed appetit ignis concavum, vbi principium eius proprium est, locusque domesticus. Cætera quoque similiter non quamlibet sui causam expetunt. Nullæ enim res prius cessarent quam in Deum transformentur, qui primum omnium est principium. Aut si nunquam transformarentur in Deum, frustra & temere mouerentur. Non igitur quælibet quærent

causam, sed propinquam. Sufficit enim cuique speciem suam incorruptam integramque seruare. Hæc autem seruatur à causa propria, quæ efficiens sit & superius ordinata. Causa verò altissima speciem rei à se remotioris mutaret in naturam sublimiorem, ubi cessaret res illa esse quod erat, atque periret, non autem res id appetunt, sed incolumes in suo statu manere. In quo quatenus permanet, eatenus primæ quoque causæ similitudinem assequuntur. Quorsum hæc? ut intelligas rem quamlibet solum cum proximam attigerit causam, quiescere protinus, neque ultra perquirere. Atque ideo mentem quæ in re nulla quiescit, nisi in prima, nullam habere propriam causam nisi primam. Cuius rei signum est, quod hominis mens in Deum conuertitur sine medio. Si enim cōres uertuntur in causam, ut procedunt. Quæ per medium processere, per medium conuertuntur. Quæ sine medio processerunt, conuertuntur etiam sine medio. Anima sine medio in Deum reflectitur, quando Deum neque in aliqua creatura, neque imagine sensus & phantasie, sed super omnia creata absolutum nudumque suspicit. Suspicit vero talem, quando argumentatur Deum esse adeo infinitum, ut omnia quæ cadere in cogitationem possunt, infinito superemineat interuallo, ubi nihil creatum inter Deum & animam interponitur. Quo autem modo intuitus animæ in Deum absque medio figeretur, nisi etiam intuendi virtus ab illo absque medio processisset? Quod si videatur anima quibusdam ad id mediis indigere, ex eo quod per mundi dispositionem & ordines angelorum ascendit ad Deum, scito non uti his mediis animam ut Deum in his aut per hæc quasi Solem in aqua aut per vitrum intueatur, sed quasi quibusdam gradibus, ut ipsa quæ infra se olim delapsa est, per hos gradus in arcem suam redeat, quo regressa, Deum absque medio videt. Porro per mundi dispositionem inuitatur, ut dimisso corporis cultu, in suam redeat rationem, per angelorum indagationem siue inspirationem admonetur, ut dimisso consueto rationis discursu, ad lumen sibi quodam diuinitus infusum sese recipiat, quo reflecta, per ipsum iam Dei lumen suspicit Deum, ut ille qui per Solis radium non colōres amplius corporum, sed ipsum suspicit Solem, de quo inquit Zoroaster,

ἤτοι ἐπὶ τοῦ αἵματος τοῦ σώματος καὶ τοῦ πνεύματος  
αἵματος.

ἢ ἐπὶ τοῦ σώματος καὶ τοῦ πνεύματος  
αἵματος.

Id est, ascendendum tibi est ad lumen ipsum & patris radios. Vnde infusa est tibi anima multo mentis lumine circumfusa. Quod autem animus ad hunc quandoque statum perueniat, inde conicimus, quod usque adeo se ab omni rei creatæ cognitione secernit, ut super omnem rei cuiusque creandæ conceptum quantumcunque sublimem extare diuinum verticem per infinitum asserat spatium. Dum verò Deum ita describit, pro viribus capit Deum. Habet ergo vim aliquam absque medio Dei capacem. Hæc autem à solo tributa est Deo. Qui enim format solus, ipse solus disponit. qui implet, ipse amplificat, sicut & visus radium illum intimum & intemum ab origine, quo Solis lumen proximè videt, quotidie ab ipso eodem lumine Solis accipit. Atque ita vis illa Dei capax medio indiget nullo ultra Deum ad Deum suscipiendum, sicut neque visuius radius ad radium solarem accipiendum ullo indiget medio, quia & radius à radio, & vis Dei capax à Deo nullo medio interposito. Probauimus hætenus propositum nostrum præcipuè per intellectum. Rursus ita probamus idem præcipuè per voluntatem. Omnis appetitus causæ suæ impletur possessione. Sitim enim appetitionis extinguit perficiendo res eadem quæ accendit efficiendo. Voluntas solius infiniti boni possessione potest impleri. Eousque enim affectat bonum, quousque ipsi bonum porrigit intellectus. Intellectus communem boni ipsius rationem inuenit ab omnibus rei participantis angustis segregatam, quæ propter hoc ipsum infinita permanet in seipsa. Diffunditur quoque in infinitum, cum possit bonitas rebus innumerabilibus per infinitos modos communicari. Si voluntas eousque affectat bonum, quousque intellectus offert, hic autem offert infinitum bonum, & infinita bona, sequitur ut totidem voluntas affectet. Ergo solius infiniti boni impletur possessione. Ad hæc, sicut obiectum intellectus est ens ipsum sub ratione veri, ita voluntatis obiectum ens ipsum sub ratione boni. Quia verò vis quæque eo solo contenta esse potest, in quo integra obiecti sui ratio reperitur, sequitur ut intellectus & voluntas solo Deo satiari possint, in quo solo est integra veritatis bonitatisque ratio. Et quia ille ab aliis veris semper discurret ad alia, hæc ab aliis bonis fertur in alia. satis constat quietem his ex eo solo obtingere posse, quod talis cuncta complectitur. Habitus enim sistit motum, & motum quodammodo interminatum

habitus infinitus. Postremo legitimus intellectus est ille, qui res intelligit sicuti sunt, legitima voluntas illa, quæ res appetit sicuti sunt appetibiles. Sunt autem res, ut ordinantur à Deo: Appetibiles vero sunt, ut ordinantur ad Deum. Ergo neque intellectus neque voluntas in rebus ipsis quiescere potest. Sed ille resoluit in Deum, hæc refert ad Deum. Illi solus Deus conspiciendus naturali instinctu proponitur, huic solus Deus amandus. Si sola infinita bonitas implere voluntatis capacitatem valet, nimirum sola infinita bonitas naturam procreat voluntatis, præsertim cum ipsa quoque voluntas in bonitatem infinitam quandoque se conferat sine medio, quod tunc facit evidentissimè, quando intellectus voluntati non amplius bonum hoc proponit, aut illud, sed aut cunctorum simul bonorum ostendit cumulum, aut bonitatis ipsius fomitem, unde talis cumuli segetes pullularunt. Denique nullus effectus ultra suam causam se extendit. Humanus animus rem quamlibet finitam transgreditur, quia quodcumque finitum verum bonumue obtuleris, intellectus magis intelligere potest, voluntas ulterius affectare. Nulla ergo finita res est animi causa. Quod hinc potissimum confirmari videtur, quia causa motorque particularis virtutem inclinationemque ad vniuersalem tendentem non potest efficere. Et quia in intellectu virtus est ad vniuersale verum, in voluntate inclinatio ad vniuersale bonum, constat planè intellectum & voluntatem à nulla re creata fieri vel moueri. Quicquid enim creatum est, verum bonumque est duntaxat particulare. Nonne animus quolibet particulare bonum respuere potest, licet bonum vniuersale non possit? Quidnam hoc significat, nisi ipsum solius vniuersali boni actioni & imperio subiici? Concludamus igitur per intellectus & voluntatis actus conuersionesque, hominis animam à Deo nullo medio interiecto in lucem ex nihilo prodiisse, atque eam Dei vim infinitam, quæ ita producta est ipsi animæ ita quodammodo inferi, ut ipsi quasi propria & naturalis euadat, per quam ipsa, quoties vult, in Deum se vertit. Non minus fermè infinita virtute opus esse putant Platonici ut quis ad Deum se conferat infinitum atque infinitum esse sub certa ratione infinitatis agnoscat, & amet, quæ ad hoc ut aliquid fiat ex nihilo. Infinita virtute sua Deus animam creauit ex nihilo, infinita Dei virtute anima Dei virtutem eandem infinitam attingit, quæ ipsam ex nihilo procreauit. Quæ quidem in-

finita virtus, siue semel animæ sit infusa, siue potius iugiter infundatur, serueturque à Deo, demonstrat eam virtutis infinitæ participem, & (ut ita loquar) capacem ita esse, ut per hanc ipsam Dei attingat infinitatem. Infinitatem Dei esse scimus totam simul & integram, infinitatem temporis, qua euanesceat continuè, continuè quoque instaurari, fluxisse partim, partim quoque fluxuram, neque habere vnquam in præsentia nisi momentum. Momentum ab integra infinitate innumerè superatur, quo fit ut infinitas Dei infinitatem temporis innumerabiliter per distantiam superet infinitam. Anima illam attingit. Hanc ergo longissimè supereminet. Quamobrem omnes excedit terminos temporis, viuitque perpetua. Quod hinc maximè confirmatur, quod si Deus eam non facit per Angelicas coelestesque virtutes, multo minus per materialia semina. Ideoque pestiferam non subit mutationem. Si ergo tuum colere parentem desideras, ipsum solummodo cole bonum. Parentem quæris? Non corporis natura parens est tibi, o anima. Tanto enim melior res, quanto parenti magis obtemperas. Es autem tanto præstantior, quanto magis corpori aduersaris. Bonum tibi omnino est esse cum patre, malum tibi quodammodo est esse cum corpore. Non animus aliquis te genuit anima. Animi operatio mobilis est. Si ergo per eam facta fuisses, substantiam omnino haberes mutabilem, ideoque in ipsa animi mutabilitate sisteres gradum, neque stabilem prorsus naturam exigeres, neque quicquam super animum cogitares. Non intellectus aliquis multiplex te creauit, non enim simplicitatem summam attingeres, atque intellectus ipsius tibi sufficeret consecutio. Nunc autem ad ipsam vitam, ad ipsam essentiam, ad ipsum esse absolutum, intelligendo amandoque ascendis super quemlibet intellectum, neque satis tibi intelligentia est, nisi & bene & bonum intelligas. Bonum verò ipsum tibi satis est absque dubio, non enim alia ratione requiris quodlibet, nisi qua bonum. Bonum igitur ipsum procreator tuus est, anima, non bonum corpus, non bonus animus, non bonus intellectus, sed bonum, ipsum bonum inquam, quod in seipso consistit, extra obiecti cuiusque limites infinitum, infinitamque tibi tribuit vitam, vel ab æuo in æuum, vel saltem ab initio quodam in sempiternum.



*Tertia ratio. Quale est obiectum, talis est potentia.*

# CAPVT IX.

**Q**uatuor hæc, essentia, virtus, operatio, obiectum, hunc habent ordinem, vt ab essentia profuat virtus, ab hac operatio, operatio obiectum petat, & talis quædam essentia per talem quandam virtutem, id est, virtutem propriam certo modo circa obiectum sibi conueniens operetur. Non est putandum ab essentia aliam virtutem fluere, quam sibi familiarem, neque à virtute aliam ed operationem, quam naturalem, neque operationem versari circa obiectum aliquod nisi simile, commodum, & conueniens. Nam cur naturalis illa essentia virtus operando appetit obiectum aliquod tale potius quam tale, nisi quia tale aliquid ipsi familiarius est, aptius & commodius? Nisi enim conueniret magis cum tali quodam quam cum aliis, vel appeteret nullum, vel æquè omnia peteret. Sic intimus virtutis visuæ radius per radium Solis coloratos radios aspicit. Intimus aurium ær per externum aerem, aerem haurit fractum, id est, sonos. Olfactus in vapore aëris caliginoso genitus, per vaporem talem in aëre crasso à pomo diffusum vaporem in pomo odoriferum percipit. Gustus in saluæ humore submersus per liquefactionem cibi in ore saporis vel natura liquidos, vel ibi iam liquefactos attingit. Tactus terrenis neruis accommodatus terrena & solida sentit facile, & corporales admodum qualitates. Vides obiecta semper cum operationibus & virtutibus naturalibus conuenire. Idem in mente cogitis confiteri, vt mens libera sit à materia, cuius obiectum est à materia liberum. Talis est autem rei cuiusque vni-

uersalis ratio & idea. Obiectum eiusmodi primum Platonici vocant, atque Peripatetici, quia primo rectoque aspectu se obicit. Obiectum vero adæquatum esse totam entis ipsius latitudinem arbitrantur, quia per vniuersum ens intellectus abstrahendo, diuidendo, componendo, definiendo percurrit. Ens autem tam incorporeis omnibus quam corporeis est commune, atque infinitum. Ac ne quis ita fallatur, vt dicat intellectum forte in alia quâdam re cum vniuersali ratione potius quàm in ipsa separatione congruere, considerare debemus in eo congruere maximè, quod necessario ipse facit ad hoc vt intelligat. Quid autem facit potissimum? Certè & seipsum, & ipsam à materia passionibus segregat. Neque quicquam magis impedit vel hunc intelligere, vel hanc intelligi, quàm materia passiue coniunctio. Proinde si nō modo talis potentia tale petit obiectum, sed etiam obiectum tale potentiam suo accessu multo magis efficit talem, quemadmodum visus natura lucidus & lucem petit, & accendente luce fit lucidior. Sequitur vt mens non solum ex eo remota sit à materia, atque ampla, quia naturaliter assidueque ad remota & ampla se confert, verum etiam vt multo inde fiat remotior, ampliorque, quod quæ remota amplaque sunt, illam pulsan, rapiunt, occupant. Sed quantum potest à materia segregari? tandem videlicet, vt effugiat materiae passionis. Rationem namque ideamque rei cuiusque tum entis ab his absolutam naturaliter auet. Potest autem per eandem naturam ipsam consequi, per quā mouetur ad ipsam. Et ipsa denique idealis ratio quæ in æternitate est omnino, cum sit in Deo, mentem sese ad eam pro viribus eleuantem potest omnino supra limites loci temporisque extollere.

# THEOLOGIAE PLATONICÆ,

DE IMMORTALITATE ANIMORVM,

EODEM FICINO AVTHORE,

(.·.)

LIBER XI.

(.·.)

*Prima ratio. Mens vnitur obiecto perpetuo, & species suscipit absolutas, rationesque sempiternas.*

(.·.)

CAPVT PRIMVM.

(.·.)



Ratio ipsa rei penitus absoluta illud ipsum est, quod actu à nobis primo rectoque & proprie intelligitur. Quod intelligitur actu, magis sit vnum per intellectualem speciem cum intellectu, quam quod videtur actu per visibilem speciem cum visu, & tanto magis, quanto ex purioribus & rectior prouenit copula. Copula hæc augetur rursus ex eo quod visibile quidem est extra visum, ratio verò ipsa intelligibilis quæ adest & omni mundi materiæ ab ipsa formabili, & omni loco, cum situm proprium non respiciat, proculdubio inest mentium penetralibus ipsi per naturam quam proximis, vnde & ab illa & ad illam semper afficiuntur. Si ex intellectu intelligente, & specie illa intellectuali siue ratione per speciem significata sit vnum, ac species illa, & ratio vt talis est, est à loco & tempore & cæteris materiæ passionibus separata, intellectus in hoc ipso actu ab ipso idem semotus erit. Actus huiusmodi intellectus ipsius est proprius. Proprius actus essentiam propriam comitatur, atque econuerso. Itaque intellectus non per actum modo proprium, verum etiam per essentiam propriam erit ab omni materiæ contagione seiunctus. Et sicut ratio illa communis, quantum in se est, vniuersum locum tempusque ambit, quantum vt materiam respicit, ad locum tem-

pusque declinet, ita mens illi per naturam accommodata, quanquam vt respicit corpus, sese ad partes loci ac temporis cohibet, tamen quantum in se est, quodammodo totum ambit, vtrumque, præsertim quia non potest species secundum significandi virtutem esse absoluta, si mens quæ eius tum subiectum tum fons est, absoluta non sit, cum omne subiectum pro natura sua suscipiat qualitates, & fons saporem suum infundat, riuulis inde manantibus. Hinc duo sequuntur. Vnum, quod substantia mentis non editur ex materiæ latebris. Alterum, quod est immortalis ex eo quod sit vnum cum specie illa rationeque vniuersali, quæ prout vniuersalis est, locum fugit & tempus. Ad idem verò sic rursus argumentemur. Ipsum intelligibile propria est intellectus perfectio, vnde intellectus in actu & intelligibile in actu sunt vnum. Intellectus siquidem quandiu potentia est intellecturus, nondum cum re potentia intelligenda coniungitur, sed quando actu intelligens est cum re actu iam intellecta. Coniungitur autem cum ea (vt volunt Peripatetici) quoniam rei illius forma inhaeret menti. Quorum verò vna forma est, ipsa sunt vnum. Vnum ergo sit ex mente intelligente, ac re intellecta, quandoquidem rei huius forma, vt talis est, format mentem. Quod ergo conuenit intelligibili, quantum intelligibile est, conue-

nit intellectui quantum intellectus, quia perfectio, & quod perficitur, vnius sunt generis, & semper inuicem proportionem mutua vincuntur. Intelligibile verò quantum tale est necessarium & perpetuum. Quippe in speculando nullius existimamus corruptibilia, quia nos scire non arbitramur quicquam, nisi certam rei rationem & necessariam teneamus, & quæ necessaria sunt, ea perfecte intellectu comprehenduntur, contingentia verò, quantum huiusmodi, imperfectè. Quando enim contingentia intellectus affirmat, sæpe fallitur. Si falli non vult, ambigit, vterque actus imperfectus est, & falli, & ambigere. Merito ergo quando contingentia cogitat, dubitare solet, ne interim permutentur, & aliter de illis atque aliter momentis aliis sit iudicandum. Momentis namque singulis permutantur. Putandum dicimus Platonem sedere, potest enim interim surrexisse. Definitiones autem rerum vniuersales perpetuæ sunt, vt homo est animal rationale. Proprietates quoque specierum quæ propriè definiuntur, sunt sempiternæ, vt omne rationale potest ratiocinari. Semper enim definitiones proprietatesque tales æquè sunt veræ etiam si nullus in terris homo spiret. Has intellectus perspicuè cernit, tenetque firmiter, & asserit sine errore vel dubio. Et si qua contingentia intelligit, maximè sub his rationibus vniuersalibus comprehendit, vbi corruptibilia cogitat, non vt talia, sed vt æterna. Intellectus ergo perpetuus est, qui rationibus sempiternis vnitur, solisque perficitur. Si intellectus eas capit, & quod capit, proportionem aliquam habet cum eo quod capitur, congruentiam certè cum his rationibus intellectus habebit, hæ neque principium habent, neque finem. At si mens habet vtrunque, nullam cum his habebit proportionem, quoniam ab eis omnino per conditiones oppositas distinguitur. Quapropter mens aut fuit semper & erit vt ipsæ, aut si esse cæpit quandoque, non tamen desinet vnquam.

*Obiectio Epicureorum & responsio de vniōne mentis cum speciebus absolutis è rationibus sempiternis.*

## C A P V T II.

**N**Eque nos hic obtundat Epicureus aliquis, obiciens, lumen eundem Solis ab oculo suscipi, oculum interire, lumen verò Solis incolume superesse. Similiter speciem illam vniuersaliter signi-

ficantem, rationemque sempiternam capiam intellectu, intellectum perire quandoque, speciem vel rationem remanere. Respondemus, Solis lumen ab oculo minime suscipi, quoniam ab eo ne momentum quidem tenetur, & occidente Sole visus momento lumen amittit. Quis quid luminis suscepisset, retineret vtiq; illius aliquid vel parumper, sicut aqua calorem retinet aliquantis per igne subtracto. Itaque adesse oculis lumen possumus affirmare, inesse vero & suscipi minime. Mens verò speciem illam rationemque vniuersalem hominis & aliorum ideo suscipere dicitur, quoniam absente etiam homine memoriter retinet. Adde quod lumen hoc ipsum quod lumen est, & quod visibile, ab oculis non sortitur. Est enim suapte natura tale, & oculi inde vt clarescant & videant assequuntur. Species autem illa hominis vniuersalis, hoc ipsum quod vniuersalis est, non ab ipsis singulis hominum habet personis, in quibus quicquid est, particulare est. In mente tamen est illa vniuersalis. Igitur vt vniuersalis sit, habet à mente. Sed quonam pacto hoc maximè, vt Aristoteli placet, duas nostras habet vires, agentem vnā, alteram vero capacem. Agens est, quæ species agit vniuersales, capax, quæ eas capit ab agente conceptas. Quando igitur phantasia in se hominis huius, vt Socratis, hoc tale simulachrum contuetur, mox lumen virtutis illius agentis simulachrum istud pulsatur, non aliter quam Solis radius aquā. Atque vt radius hic Solis ab aqua percussus in oppositum parietem, ibi circulum procreat splendidum, atque tremulum. Ita lumen ipsum virtutis agentis pulsans particulare simulachrum hominis phantasia conceptum, atque ex eo simulachro in vim intellectus capacem reflexum, in hac ipsa inde speciem quandam parit, quæ non amplius Socratem hunc in hoc loco & tempore positum refert, sed hominis naturam singulis personis æquè communem, à certis loci & temporis limitibus absolutam, vbi & species ipsa vniuersalis est, & natura quæ per eam refertur vniuersalis. In hoc mirabilis vis intellectus apparet.

Nempe qui speciem creat à materia, loco & tempore absolutam, atque ideo quodammodo sempiternam & creatam recipit in seipso, per quam etiam naturam similem apprehendit, cur non & ipse ab iisdem absolutus sit, atque perpetuus. Denique ea quæ intellectus attingit ita separata si natura sua sunt talia, talis quoque est intel-

lectus, nam cum attingit separata, ibi tunc est vbi sunt ipsa, igitur & ipse est separatus. Sin autem natura illis passionibus mancipata sunt, sed intellectus sua vi illa liberat, multo prius ac magis est liber, vt cætera liberet. Dic age, cur forma rei cuiusque non potest vnum quiddam fieri cum intellectu, antequam omnino materia separetur, nisi quia intellectus ipse multo prius magisque est à materia separatus? Quo autem modo fiat vnum ex illa specie & intellectu, docet comparatio illa quam de radio induximus atque aqua. Quippe circulus ille inde natus splendidus ac tremulus parieti non satis vnitur, quia splendoris illius & parietis est nimium diuersa natura. At si in speculum inciderit, arctius vnietur. Tandem si in lumen Solis idem redierit, vnde radius ille demissus fuerat, qui splendidum circulum procreauerat, coibit prorsus in vnum. Quid autem illa species est apud Peripateticos, quam peperit intellectus, nisi scintilla quædam tum simulachri illius quod à rebus collegerat phantasia, tum virtutis illius agentis per quam mens illam peperit? Quid autem nostra mens est, nisi scintilla quædam mentis superioris? Ergo species illa ita nostræ menti infunditur, vt scintilla rerum scintillæ mentis superioris, & vt circulus ille splendidus Solis lumini cuius radio fuerat procreatus. quapropter ex mente atque specie ita fit vnum, vt ex duabus scintillis vnâ coniunctis flamma vna, siue duarum candelarum radiis vnum lumen, siue ex circulo illo splendido & lumine Solis, fulgor vnus. Quod autem per speciem ita sempiternis vnitur, fit sine controuersia sempiternum, ea præsertim ratione, quod intellectus forsitan intelligendo non modo cum re æterna intellecta coniungitur, sed ille quoque res ipsa est æterna quæ intelligitur. Idem enim radius est quodammodo qui ab alto verberat aquam, qui fulget in aqua, qui in ærem repercutitur, vbi in seipsum refusus, si videndi vim nanciscatur, videbit statim fulgorem illum suum qui redundauit ab aqua. Idem faciet si ab auro resultauerit vel argento. Semper enim fulgorem suum videbit, licet variis modis affectum, pro obiectorum varietate à quibus fuerit percussus.

Si exemplum conuenientius de duabus illis viribus intellectus & hac vnione desideramus, consideremus muscipulæ (selem intelligit, quem vulgus catum vocat) oculum, in quo penè sicut in mente nostra duæ sunt vires, est in eo vitrea perspi-

cuitas, est & scintilla. Illa vis capax, hæc agens. Scintilla nocte emicat foras, trahit coloris huius aut illius imaginem à corporibus ipsi oppositis, imprimit eam virtuti perspicuè, quæ per eam corpus obiectum perspicit. Lino fortasse non tam corpus oppositum perspicit, quam sui ipsius radium qui explicatus fuit & replicatus, & quando replicabatur, resiliuit in oculum iam pictus imagine corporis. Ideo licet cernere videatur modo hunc colorem, modo illum, semper tamen seipsum cernit quodammodo, sed vario modo à variis coloribus refulgentem.

Quid prohibet virtutem illam agentem, quæ nostræ mentis est radius, in aliis & aliis phantasiæ simulachris aliter & aliter emicantem, inde reflecti in semetipsam, seque videre diuerso modo affectam pro diuersitate simulachrorum? Vbi species illa siue ratio quam intelligimus absolutam atque perpetuam, nihil est forte aliud quam radius intellectus reflexus in semetipsum, qui tunc facile seipsum animaduertit, quando in simulachra sese dirigit, sicut vultus se non videt, nisi intueatur in speculum, vnde etiam varius repercutitur pro speculorum ipsorum varietate, quemadmodum & mentis radius à simulachris pro diuersitate simulachrorum diuersus reuerberatur in mentem. Sed de his absolutius in sequentibus.

*Obiecto Epicuri & responsio, quod species innata sunt menti.*

### C A P V T III.

**N**Egabit forsitan Epicurus species illas quas quotidie concipit intellectus, esse perpetuas, quia & esse incipiant quando patiuntur, & desinant quando mandantur obliuioni. Nos autem ex Platonis nostri sententia satis in hoc habere putamus, quod species illæ si nascuntur, à rationibus animi perpetuis patiuntur, & ideas super animum referunt sempiternas. Ratio prima. Profecto sentire & intelligere quia vitales operationes sunt, à principio vitali intrinsecoque proficiscuntur, principio inquam actiuo. Sunt enim operationes quædam viuentibus & carentibus vita communes, vt generatio, alteratio, mutatio loci. Ea quæ vita carent, operationes huiusmodi patiuntur potius quam agant. Non enim se villo modo generant, aut alterant, aut mutant loco. Viuentia verò eas in seipsis agunt, quia sese nutriendo augendoque alterant &

generant aliquid in seipsis, & iudicando appetendoque locum mutant. Si natura viuētia ad proprias actiones melius instruere debet quam ad communes, melius autem instructum est quod est agens, quam quod patiens, atque ad communes operationes eis actuum principium tradidit, multo magis ad proprias actiones, sensum videlicet intelligentiamque, sic illa disposuit, ut agerent per eas magis quam paterentur. Quapropter neque mens, neque etiam sensus ( ut pluribus placet Platoniorum ) ut percipiat quicquam, ab extrinsecis formatur corporibus. Sed quemadmodum pars viuifica per insita semina alterat, generat, nutrit & auget, ita interior sensus & mens per formulas innatas quidem, & ab extrinsecis excitatas omnia iudicant. Neque aliud quicquam est hoc iudicium quam transitus formulæ à potentia quadam in actum. Non enim debet operatio vlla agentis transcendere limites. Vitalis igitur & intus permanens operatio non est ab extrinseco principio vita carente, sed ab intrinseco & vitali. Signum vero quod sensus interior est admodum efficax, inde capitur, quod componit, diuidit, discurrit, suoque affectu vertit corpus in contrarias qualitates. Signum quod mens sit maximè efficax, à Boetio contra Stoicos hinc accipitur, quod ultra illa quæ facit sensus, ipsa præter obiectorum naturam vniuersales excogitat regulas, descendit componendo, ascendit & resoluendo, ac sese referens sibi, veris falsa redarguit. Denique cum rem eandem aliæ vires animæ aliter iudicent ( aliter enim imaginatio siue phantasia, aliter ratio iudicat ) consentaneum est ut iudicium ipsum iudicantis formam naturamque sequatur, non iudicati. Et quia iudicium iudicantis actus existit, probabile est ut quisque iudex operam suam non ex aliena, sed ex propria potestate perficiat.

Ratio secunda. Sed reuertamur ad mentem. Sicut simulachra singularium à corporibus phantasiæ non inuruntur, ut etiam probauimus alias, ita vniuersalium species à simulachris non signantur in mente, sed ita mens illas per vim suam efficit, sicut phantasia fingit simulachra per seipsam. Quo enim pacto simulachrum ( quod etiam phantasma vocatur ) rem aliquam procreabit seipso liberiores & ampliores? Ipsum quidem singulare est, & materię conditionibus adstrictum, species verò quia vniuersalis est, ideo liberior est & amplior. Si non sit species hæc quæ etiā vniuersale nuncupatur, à simulachris, mul-

to minus sit à rebus externis, quæ non possunt per aliud medium formare mentem, quam per simulachra. Rursus vnius spiritusque speciei vnā esse oportet causā spiritalem, vel saltem vnitā, & spiritali modo ordinatā. Singula vero quæ extrinsecus sunt, plurima sunt & corporea. Atqui nullum illorum per se acceptum, cum propriè solum, corporalisque naturæ sit, speciem procreabit incorpoream, & naturæ communis significatricem. Sed neque etiam omnia singularia simul iuncta istud efficient. Sparsa enim sunt, neque ordinem aliquem talem habent, ut talia subnexa aliis, vnā seriem digerant causarum. Idcirco sicut lapidum coniunctione vnum quiddam simplex non fit, sed cumulus, ita per singulare turbam fiet forte quædam simulachrorum confusio potius, quam vnā species atque simplex. Præterea in quolibet singulari tria reperiuntur, natura speciei, accidentia quæ non sunt necessaria speciei, & ipsum ex vtrisque compositum, ut in Socrate est humanitas, quæ natura speciei vocatur, est albedo, talis talisque figura, quæ forte accidunt speciei, & aduentitia nominantur. Ex vtrisque Socratis persona componitur. Nunquid ab his personis imprimitur in mente species illa communis, quæ est omnium hominum æqualis similitudo? Certe ex accidentibus personarum non imprimetur ( referret enim hominis accidentia, non substantiam ) neque etiam ex ipsa natura quæ subiicitur accidentibus. Illa enim non tota persona alicuius est hominis, sed pars eius. Ideo natura talis de nullo homine enunciat. Quis dixerit, Socrates est humanitas? Dicimus autem Socratem esse hominem. Homo igitur enunciat de Socrate, de Socrate inquam toto, non de humanitate solum vel accidentibus. De Platone toto similiter, atque aliis omnibus, ubi apparet hominem ipsum quem mens nostra communiter enunciat, de integris quibusque personis in seipsa conceptum, multo ampliorem esse hac vel illa personæ cuiusque natura. Quod verò comprehendit, aliud & amplius est, non fit ab eo quod & comprehenditur, & est angustius, præsertim cum natura illa fiat in singulis hominibus singularis quod autē singulare factum est, non creat vniuersale. Sed nunquid ab integris cunctisque personis species illa nobis infertur? Nequaquā, quippe innumerabiles personas æquæ illa species respicit. Innumerabiles verò nusquā inspeximus; neque ex quibusdā personis accipimus eam quæ infinitas insuper alias



comprehendit. Neque potest ullus satis tuto à quibusdam singularibus regulam communem perscribere, falleretur enim quisquis id tentaret, perinde ac si quis cum sola terræ animalia consideraret, atque illa videret spirare, animal omne spirare concluderet.

Cum igitur species neque à singularibus personis, neque ab earum simulachris generetur, reliquum est ut fiat ab intellectu. Intellectus eam non generat ex phantasmate, vel in phantasmate. Phantasma enim quia & in essendo & in significando singulare est, si fieret materia, locusue speciei, eam redderet similiter singularem. Cæterum dubium est, num ipsam generet per phantasma tanquam per causam mediam inter intellectum & speciem generandam. Quod quidem fieri non posse ex hoc opinamur, quod causa media & effectui proxima, cum effectui magis quam remotior causa conuenit, ut in hominis generatione, quia Sol per hominem medium generat hominem, magis homo generans cum homine genito quam ipse Sol congruit. Si igitur phantasma esset proxima causa speciei, species phantasmati similior quam intellectui nasceretur, hinc duo sequerentur absurda. Vnum, quod species huiusmodi statim nata, phantasma ipsum & phantasia, utpote sibi propinquiora, adscisceret tanquam naturalem sedem potius quam intellectum. Alterum, quod & si eam intellectus acciperet per talem speciem, intelligeret singulare aliquid, & magis & prius quam vniuersale. Illa siquidem singulare nunciaret in primis, quia esset phantasmati singulari cognator. Neque audiendi sunt illi qui phantasma inter intellectum & speciem quasi instrumentum aliquod interponunt. Nonne virtus mentis agens cum capace magis congruit quam phantasma? Quo igitur pacto agens capacem per extraneum phantasma formabit, cum oporteat instrumentum formationis inter formatorem atque formabile interponi, phantasma verò extraneum inter duas illas vires inuicem germanas nequeat interponi? Quamobrem intellectus quando formam illam creat, neque ex simulachro, neque in simulachro, neque per simulachrum procreat. Forte vero radium aliquem, seu vim inserit simulachro phantasiae, per quam ipsum simulachrum tanquam formator mentis formam huiusmodi generat quam speciem vocamus intelligibilem. Sed neque hoc fieri posse puramus. Nempe vis illa suscepta simulachro

ipsæ materie conditionibus adstringetur quibus simulachrum. Itaque formam intelligibilem quæ ab illis conditionibus est absoluta non generabit. Ac si quis dixerit formam illam modo absoluto capi ab intellectu, quamuis phantasma ipsam non creauerit absolutam, ex eo ipso nos concludemus (quod exoptamus in primis) intellectum non subiici phantasiae tanquam formabile formatori, postquam præstantiore modo formas habet quam ipsa tribuere valeat. Quo fit, ut forma intellectualis si nascitur, à solo intellectu nascatur, & sine medio. Si enim mens formam illam generat, & generando eam in se absque medio suscipit, certe per se gignit illam, & gignit alio nullo intercedente. Ex omnibus his concluditur, intellectum formare seipsum. Et quoniam si esset prorsus informis, seipsum formare non posset, necesse est ante eas formas vel notiones, quas per omnem ætatem penè momentis singulis in se parit, latere in animi penetralibus formas alias animo naturales, totidem numero, quot sunt in mundo rerum species creaturarum, quibus possit formas illarum specierum intelligibiles parere.

Ratio tertia. Certæ namque res certis egent seminibus. Non facit naturæ ex quolibet quælibet, non facit ex nihilo aliquid. Idcirco non potest essentia animæ, quæ & vna est, ac fermè omnia respicit æquè, multas & varias specie formas producere, & alias aliis temporibus, nisi per plures formulas infinitas specie differentes, quibus aliis temporibus alias potius quam alias procreet aut promat.

Ratio quarta. Has enim sæpe numero etiam nulla consultatione vel voluntate antecedente, solo quodam naturali instinctu repente promit in lucem. Effectus verò qui naturali fiunt ordine, formam præferunt talem, qualem causæ possident. Calida enim ab igne fiunt calente, quia causa quæ ex suo esse aliquid efficit naturaliter, talem licet inferiori modo effectum facit, qualis est ipsa. Mens igitur quæ per suum esse naturaliter generat vniuersales rerum omnium species, in ipsa quoque sua essentia ab origine nata videtur vniuersales species omnium, ut similia similibus generentur. Nam si illarum specierum vna est efficiens, causa scilicet intellectus & subiectum vnum, intellectus scilicet idem, nulla ratio assignari potest cur multæ & differentes fiant secundum speciem, nisi quia intellectus per diuersas rationes sibi naturales eas promit diuersas.

Non enim sufficit ad hanc varietatem efficiendam, simulachrorum diuersitas, quæ nihil ad hanc fabricam aliud afferunt, quam occasionem aliquam operandi, dum per illorum præsentiam mens ad promendas species excitatur. Hoc autem nihil aliud est quam rationes illas ociosas reddere promptiores.

Ratio quinta. Proinde si diuina mens idearum omnium plena per essentiam suam adeò plenam absque medio animam procreat, oportet animam inde idearum plenam effluere. Nempe Deus cum in efficienda anima à nullo prorsus impediatur, tam perfectam efficit, quam perfecta in tali genere illa effici potest. Perfectior certè prodit, si in prouinciam tam difficilem notionum plena descendat, quam si vacua. Est autem notionum capax ab initio ex ea parte qua cum Angelis conuenit. Sicut enim ex parte sua temporali habet ut continue quærendo discurrat, sic ex æterna ut possederit ab initio, præsertim cum ipsa propinquior Deo sit quam prima materia. Ideoque si materia omnes inde species accipit, & cum primum parata est capit, necesse est animam quoque omnes suscipere. Parata verò est anima ad omnes suscipiendas cum primum à Deo accipit esse. Siquidem eius essentia simplex est, stabilis supra tempus, ideoque non potest augeri, aut per tempora paratior fieri. Quod ita cecinit Zoroaster:

σύμβολα πατρὸς νόος ἐνέσπειρεν ταῖς ψυχαῖς,

Id est, paterna mens inseruit animabus coniecturalia signa. Et Orpheus ita:

πάντα γὰρ πρῶθ' ἑὴν πρώτη φύσις ἐγκατέθηκεν,

Id est, omnia enim Protheo prima natura indidit. Theologia Orphica Prothèum appellat essentiam tertiam animarum rationalium sedem. Architas quoque Tarentinus in libro de sapientia, hominem, inquit, sapientissimum cunctorum animantium esse natum, quippe cui Deus rerum omnium ideas infuderit, per quas mente valeat notiones rerum non aliter procreare, quam ore per linguam rerum nomina fingere. Hæc ille.

Ratio sexta. Profectò (ut Platonicè loquar) in materia formarum omnium suscipiendarum latent inchoationes. In natura quoque per quam ad formas mouetur materia, formarum semina delitescunt. Vnde in complexione arboris naturali clauditur semen ad arborem similem propagandam. In semine arbor generanda tota concluditur. Idem accidit in com-

plexione naturali, & semine animalis. Igitur in ea parte animæ quæ alit corpus, & natura vitur velut instrumento ad mouendam formandamque materiam, insunt, & multo quidem præstantius, formarum omnium rationes, ut ex ratione capitis quæ in anima est, exoriatur semen illud capitis quod est in natura, ex hoc autem semine pullulet forma hæc capitis quæ conspicitur in materia. Atque idem fiat in pectore, brachiis, membrisque cæteris. Si pars hæc infima animæ fecunda est, formatque ipsa corpora, & à corporibus non formatur, & formarum generandarum continet rationes, nunquid mens quæ pars est animæ summa, sterilis erit? Aut solum formabitur à corporibus? Aut carebit rationibus ad species producendas? Nullo pacto. Imò verò sicut pars infima quæ singulis corporibus proxima est, per insitas sibi ab origine rationes singula gignit & corporalia, ita mens quæ in corporalibus ac penitus absolutis mentibus proxima est, rationes inde insertas habet, per quas producat species illas à corporum passionibus absolutas.

Septima ratio. Sic enim anima inter diuina & corporalia medium obtinebit, si vtrorumque particeps apparebit, habebitque intus vtrarumque formarum & intelligibilium & sensibilibus rationes.

Octaua ratio. Neque decet eam corporibus esse deteriore. Ergo si corpora ante aduentitias qualitates, qualitates possident naturales, multo magis animus formulas habet in mente proprias antequam excipiat peregrinas. Duplex materiæ communitas conuenit, naturalis, & aduentitia. Naturalis est natura illa in qua singula, sub eadem specie inuicem congruunt, sicut humanitas in qua singuli congruunt homines, quæ communitas (ut plerique putant) perpetua est, & singulis quibusque præstantior. Aduentitia est notio illa vniuersalis, quam de naturali communitate mens cogitat, singulis quibuscumque seclusis. Quæ non modo, quod ad materiam spectat, aduentitia est, sed quod ad mentem. Si ante hanc aduentitiam communitatem materia possidet alteram naturalem, mens quoque materia melior ante hanc alteram similiter possidet. Oportet enim communem formam in mente aliquam præstantiorem esse quam in materia. Est autem naturalis perfectior quam contingens. Igitur oportet inesse menti communes formas ante illas quas corporalium rerum fingit occursum.

Sæpe verò dum ingenitas formas inspic-

mus, putamus propter infcitiam nos aduētias vel externas prospicere, non aliter atque illi qui vel somno vel morbo quodam cerebri oculorumue affecti, arbitrantur se videre quædam extra suos oculos huc & illuc sæpe volantia, quæ tamen & versantur & videntur intrinsecus.

**Nona ratio.** Cur bruta rebus singulis inspectis communem non excogitant notionem, homo autem ex natura sua rationali, qua differt à brutis, id agit? Nisi quia ipsa sua natura sigillum perficit talium figuratum? Si enim formas procreat per naturam speciemque propriam, eas profecto per naturam procreat formatricem. Naturam verò talem carere quis dixerit characteribus?

**Decima ratio.** Præterea quando in scientiis perfectas demonstrationes conteximus, ex principiis quibusdam præstantioribus & latioribus solemus de speciebus proprietates aliquas demonstrare. In illis autem notionibus quæ denuo finguntur ab animo, quæ latior est, ea est remotior à substantia, proptereaque speciei notio ad substantiam accedit propinquius quam noti generis. Quos fit, ut quæ in illis minus communis est, ea præstantior iudicetur. Aliæ igitur notiones sunt in animo præter istas, quæ latiores sunt simul atque præstantiores, ex quibus demonstratio vera conficitur. quoniam vero demonstratio non ab vniuersalibus tantum, sed ab vniuersalibus causis proficiscitur, notiones autem quæ menti innatæ sunt, non sunt demonstrati effectus causæ, rursusque formæ in corporibus vniuersales esse non possunt, sequitur ut super formas & quæ in corporibus, & quæ in nostris mentibus sunt, quærendæ sint formæ aliæ in mente diuina omnium conditricæ, quæ vniuersales omnium causæ sint, quarum formulas humana mens habet, ut per has tanquam causarum similitudines ad illas tanquam effectuum causas conclusiones referat demonstrando. Sed alias de ideis.

**Vndecima ratio.** Atque hæc ipsa demonstratio semper aliqua nobis ignotiora ex propositionibus notioribus infert, illas rursus ex aliis, quousque ad principia quædam menti per se nota perueniat, ne aut irritus fiat in infinitum progressus, aut ab eisdem ad eadem retexatur circulus temerarius. Quæ verò per se nota sunt menti, per naturam mentis effulgent mentis aspectui. De singulis autem speciebus rerum ex propriis earum principiis propriæ sunt demonstrationes, & in variis faculta-

tibus variæ. Igitur secundum varias species & varias facultates adsunt menti diuersa doctrinæ principia ex naturali mentis lumine cognita. In ipsis verò principiis cuncta sequentia continentur. Hinc efficitur, ut animus per naturam omnibus doctrinis abundet.

**Duodecima ratio.** Ut quemadmodum & arbores, & animantes, earumque membra ex propriis seminibus pullulant, ita scientiæ ex intimis initiis oriantur, ne mens sit sterilior quam natura quæ ex seminibus infitis suos foetus educit, non casus effundit impulsibus.

**Decima tertia ratio.** Quando inter nos verum quærimus interrogando & respondendo, quomodo posiet ad summam peruenire quæ concluditur ratio? nisi aliquid prius concederetur? Concedi autem rectè quid posset, quod nesciretur? Ita ista ratio (ut Augustinus Aurelius inquit) nisi inueniret in nobis aliquid cognitum, quo innitens, ad id cognitum duceret, nihil omnino per illam discernereamus. Inde est ergo nobis ante ratiocinationem intelligentia quædam, unde ratiocinatio sumat exordium.

**Decimaquarta ratio.** Nonne ratiocinatio nostra mobilis est, & dum varietatem inquirat, ab alio descendit in aliud, & quando aliquid inuentum examinat, in aliud ascendit ab alio? Motus verò omnis à quiete, siue stabili aliquo exorditur, ac tendit ad stabile. Motus autem huiusmodi notionum complexio est. Res verò quælibet principium habet proprium, suumque finem. Quapropter ratiocinatio quia notionum progressio est, in notiones reducit, quia mobilis in aliquas stables notiones, quam impulsu quærat quod cupit, indiciis inueniat quod quæsiuit, luce examinet quod inuenit, firmitate quiescat inuentis. Inde ergo capit quærendo, in idem redit examinando. Sunt ergo in mente stabiles quædam & perpetuæ notiones, quæ & principia sunt & fines ratiocinandi.

**Decimaquinta ratio.** Neque ratiocinandi solum, verum etiam quomodocunque intelligendi. Nam sicut sensus qui per aduētias formas, quæ dicuntur accidentales, cognoscit semper, accidentia quoque semper attingit, ut Platonici putant, ita è conuerso mens quæ essentias rerum definit, per essentielles formas intelligit. Et quia sensus qui fallacibus confidit rerum imaginibus, & subito evanescentibus sæpe fallitur, neque imaginē à re vera discernit, sed opus est ad hoc iudicio rationis,

rationis, idcirco mentem oportet essentialibus (vt ita dixerim) rationibus inniti, ne ipsa quoque fallatur, & iudicio virtutis alicuius superioris indigeat.

Decimasexta ratio. Præterea si cognoscimus Angelos, neque eos nosse valemus per species à sensibus haustas, quæ cum pendeant à corporibus, non referunt angelicas formas, quæ ad corpora non declinant, sequitur vt eos per infitas species cognoscamus. Quo enim pacto iudicamus Angelos esse naturas non vergentes ad corpora, nisi per species à corporibus minimè dependentes?

Decimaseptima ratio. Denique inter cognitionem diuinam & sensitiuam cognitio intellectualis est media, ergo & medias habet conditiones. Deus cognoscit per essentiam suam immobilem, sensus per mobiles qualitates, id est, species peregrinas. Quapropter mens cognoscet per qualitates immobiles, quæ species innatæ vocantur. Ordo denique vniuersi requirit, vt quemadmodum puræ mentes in se respiciunt, sensus autem in alia solum, sic anima mentis sensusque particeps, non modò extra se formas, sed in se quoque respiciat. Vbi autem Aristotelis more mentem dicere solemus nouas species procreare, possumus etiam proprius more Platonico dicere, innatas species ex mentis penetralibus erui. Germanarum virium ea est natura, vt se mutuo comitentur in operando, sicut in existendo, & se vicissim fuscitent ad agendum. Germanæ vires sunt olfactus & gustus, vnde sæpe animus per odoratum inuitatur ad gustum. Germanæ, concupiscendi virtus & irascendi natura. Facile igitur ex libidine irritamur ad iram. Germanitas etiam oculorum facit vt ambo simul vertantur ad idem. Germanitas sensus & phantasie efficit, vt operante sensu ad aliquid ad idem operetur & phantasia. Propter similem Germanitatem, quando phantasia species suas profert in actum, mens quoque suas educit in lucem. Non generantur propriè tunc mentis species, sed quæ angustius coarctabantur, patent latius, & florescunt, quæ tepebant, feruent, quæ in solo mentis vertice per se lucebant, rutilant eminus, & in ratione quæ mentem sequitur, iam facta sereniore refulgent. Itaque quam Aristoteles creationem vocaret in speciebus, Plato conuscationem cognominabit, per quam expergefactus oculus rationis, speciebus mentis irradiatur. Prima illa in mente conuscatio, intelligentia ipsa est, sequens irradiatio est ipsa rationis discursio. Per in-

telligentiam essentia rerum definiuntur. Per rationem componuntur essentia definitæ, & argumentationes conficiuntur. Veras autem definitiones essentialium non potest mens per accidentalium rerum simulachra fabricare, sed eas construit per infusas ab origine rerum omnium rationes.

Decimaoctaua ratio. Infusas, inquam, à rationibus rerum quas habet Deus. Quæ quidem in Deo sunt ipsa Dei essentia, ab ipso Deo sub variis rationibus intellecta. Formæ igitur omnium in Deo sunt, ibique nihil aliud sunt, quàm essentia ipsa Dei, atque omnes habitu simul & actu. Omnes quoque formæ sunt in Angelo. Non quidem essentia ipsa sunt angeli, sed rationes quædam essentielles, id est, quæ semper essentiam comitantur. Vbi vigent habitu simul omnes & actu, quia secundum omnes actu omnia simul intelligit. Præterea sunt omnes in hominis intellectu. In quo etiam essentielles rationes cognominantur, habitu cunctæ simul, sicut in angelo, non simul actu, quia non simul vtitur vniuersis. Propterea intellectus infimis appellatur, & materiae quodammodo similis, quia tamen est præstantior quàm materia, ideo effectiuo habitu formas habet, quod materiae non conceditur, qui habitus appellatur vis mentis agens, quia sese confert ad actum. Vis quoque capax, quia suscipit actus perfectionem. Postremò omnes formæ sunt in materia. Vbi etiam rationes essentielles ideo nominantur, quia sunt fomites siue habitudines quædam, siue respectus ad formas essentiam materiae perpetuò comitantes. Quæ quidem formarum potentia sunt, potentia, inquam, capaces formarum, non efficaces, & formæ quodammodo ipsæ, sed imperfectæ. Vnde omnes quoque sunt in materia modo perpetuo, secundum quidem potentiam, non tamen secundum efficacem habitum aut actum.

Decimanona ratio. Quis neget animum statim à tenera ætate vera, bonæ, honestæ, vtilia exoptare? Optat autem intellectus nullus incognita. Ergo insunt istorum aliqua etiam antequam appetat in animo notiones, per quas ceu formas rationesque ipsorum ea iudicat appetenda. Idem ab inquisitione & inuentione probatur. Si in turba hominum quærat Socrates Alcibiadem, sitque illum aliquando inuenturus, necesse est Socratis menti aliquam Alcibiadis figuram inesse, vt sciat quem hominum quærat præ cæteris, atque inuentum in cœtu multorum Alcibiadem ab aliis discernere valeat. Ita neque inda-

garet ea quatuor animus, neque aliquando inueniret, nisi haberet illorum, id est veritatis, bonitatis, honestatis, utilitatis aliquam notionem, per quam illa quæret inuenturus, ut quoties inuenit quæ inuestigauerat, agnoscat, atque ab eorum discernat contrariis. Neque solum ab appetitu, indagatione, inuentione, sed etiam à iudicio id probamus. Quicumque enim aliquem sibi amicum iudicat vel inimicum, quid amicitia quidve maliuolentia sit, non ignorat. Quonam igitur pacto multa vera vel falsa, bona vel mala, ut solemus, quotidie iudicaremus, & rectè iudicaremus nisi esset nobis veritas quodammodo bonitasque ab initio cognita? Quomodo rursus structuræ, musicæ, picturæ, & artium cæterarum opera, necnon inuenta Philosophorum, multi etiam in iis artibus non versati probarent sæpe numero rectè, & reprobarent, nisi illarum rerum forma quædam esset & ratio illis à natura tributa? Comparatio quoque idem nobis ostendit. Quicumque enim mel vino comparans, alterum altero pronuntiat dulcius, quis dulcis sit sapor agnoscit, & qui Speusippum & Zenocratem conferens ad Platonem, Zenocratem censeret Platonis similiorem quàm Speusippum, Platonis figuram præculdubio nouit. Eodem modo cum è multis bonis aliud alio melius rectè existimemus, & maiori minorive bonitatis ipsius participatione aliud alio melius deteriusve appareat, necesse est bonitatem non ignorare.

Præterea cum è multis & diuersis Philosophorum aut etiam aliorum opinionibus, quæ veri sit similior & probabilior, sæpe optimè iudicemus, oportet non deesse nobis aliquem veritatis intuitum, ut quæ sint illius similia, non nesciamus. Quapropter nonnulli in adolescentia, aliqui etiam sine præceptore, plerique ex paucissimis doctrinæ rudimentis à præceptoribus demonstratis doctissimi euasisse traduntur. Quod nunquam nisi multum, ut diximus, iuuante natura fieri potuisset. Hoc abundè Socrates Phædoni, Menoni, Theæteto adolescentibus demonstrauit, docuitque posse pueros rectè in singulis artibus respondere, si quis prudenter eos interroget, cum à natura sint artium disciplinarumque omnium rationibus præditi.

*Confirmatio superiorū, atque insuper de ideis.*

#### C A P V T I V.

**P**ossimus autem ex tribus illis Platonis libris, Phædone, Menone, Theæteto, atque insuper ex Parmenide, Timæo, & Conuiuiō sic rursus argumentari. Si capite propriè atque præcipuè alter quidem maior, alter verò minor denominetur, absurdum id quidem. Primo, quoniam per idem & maior erit & minor. Deinde per aliam speciem in alia specie aliquid collocabitur, puta per capitis speciem in maioris minorisve specie. Præstat autem capite capitatum quàm maius, aut minus denominare. Denique absurdum est, per aliquid paruum maius aliquid dicere. Igitur si formalis afferenda causa est, maiore minus cognominabitur. Similiter denarium numerum nouenatio plurem, non vnitatem propriè appellabimus, siquidem ab vnione propriè vnum denominamus, imo pluralitate plurem, & alium paucitate pauciores esse dicemus. Item dualem numerum fieri afferemus non diuisione vnus in duo, quia etiam conjunctione interdum huius rei atque illius fieri contendetur. Et omnino idem propriè oppositis effici causis non est dicendum. Ergo dualem numerum dualitatis ipsius participatione fieri secundum formam potius afferemus. Sed hæc tanquàm leuiora mittamus, pergamus ad grauiora. Si color vel figura est ipsum pulchrum, quonam pacto erit color aliquis vel figura deformis? Item quam ratione multa subiecta pulchritudinis vnus tanquàm communis participarent, nisi vna quædam pulchritudinis natura communis & inesset singulis, & præesset, ut ab ea quæ præest, dependeat & quæ inest? Proinde aliud est ipsa bonitas quam res quæ bonitatis participatione fiunt bonæ. Aliud pulchritudo quam res pulchræ, similiterque de cæteris speciebus, quas Plato vocat ideas. Corpora enim pulchra multa sunt, ipsa verò pulchritudo vna est. Nam omne primum summumque in aliquo rerum genere, vnum est solummodo.

Rursus hæc pulchra duas habent naturas, tum materiam corporalem, quæ fit particeps pulchritudinis, tum pulchritudinis qualitatem, ipsa verò pulchritudo nihil est aliud quàm pulchritudo, quoniam quicquid est in genere aliquo primum tale, nihil aliud est quam tale. Item corpora hæc partim pulchra sunt, partim etiam



turpia. Nam ex ipsa sua materia, quæ aliud aliquid est quàm pulchritudo, deformia iudicantur, ipsa verò pulchritudo turpitudinem non admittit. Si modò opposita vicissim se fugiunt, corpora quoque pulchra mutantur, & modo pulchra sunt, modo contra. Pulchritudo verò ideo immutabilis est, quia & nihil est aliud quàm pulchritudo, & quantum pulchritudo est, non mutatur, quia sic neque vertitur in contrarium, neque priuatur quandoque fundamento & sustentaculo, cum seipsa sustineat. Adde quòd corporalia quæque aliis pulchra videri possunt, aliis verò non pulchra, ipsa verò pulchritudo carere pulchritudine cogitari non potest.

Præterea corpora formosa diuisibilia sunt, pulchritudo autem indiuisibilis. Non parua est, quia magna corpora non formaret, non magna, quia paruis corporibus non congrueret. Denique non est corporea, quoniam rebus spiritalibus non competeret. Non est etiam temporalis, quia rebus non inesset æternis. Inest autem multo magis animabus & mentibus quàm corporibus. Sed neque in illis est prima, tum quia illæ secundum se deformes sunt nisi formentur à bono, cuius splendor est pulchritudo, tum quia illæ veritatem appetunt tanquam pulchram. Pulchritudo verò non expetit semetipsam. Tunc denique quia simpliciter & communiter amabile est non esse quidem animale vel intellectuale, sed bene bonumque esse. Cum verò bonum summè allicit, summa est pulchritudo. Itaque idea ipsa pulchrorum est super corpora, animas, mentes. Est vna, simplex, pura, immutabilis, indiuisibilis, incorporea, & æterna, atque eadem idearum omnium est natura, quod hinc quoque alio exemplo probamus. Hinc homo quando illum generat hominem, non propriè specificam humanitatem ipsam, quæ communiter in utroque consideratur, gignit. Gigneret enim & seipsum qui per humanitatem extat. Præterea terminata natura naturam interminatam generare non potest. Non ergo causa est hic homo ut simpliciter humanitas sit, sed ut in illa materia propagetur. Oportet autem naturæ humanæ communis esse communem causam, atque etiam per se agentem, quod ostendit ordinatissima eius & stabilis compositio. Quamobrem super agentia in speciebus particularia extare oportet vniuersale agens, speciem respiciens atque dirigens. Quod etiam apparet in iis quæ absque manifestis seminibus generantur, ut alias demonstrauimus.

Argumentantur rursus multi Platonici à mentis obiectis hunc in modum. Cum intellectus noster naturaliter formas capiat, rationesque intelligat vel separatas, vel separando, sequitur ut communes ipsæ rerum separatæque à materia, rationes, naturalia sint eius obiecta. Quoniam verò obiecta eiusmodi mouent, formant, perficiunt intellectum, ideo in præstantiori veriorique vniuersi gradu sunt constitutæ, longissimeque à figmentis absunt, ne mens & veritatis iudex, & sensuum emendatrix, à veritate remotior sit quàm sensus. Quamobrem rationes illæ merito sublimiores, veriores, efficaciores naturæ existimantur, quàm intellectus qui inde formantur. Sed nunquid illæ rursus intellectuales sunt appellandæ? Non quidem proprie. Siquidem rationales animæ secundum participationem intellectuales sunt, angeli verò intellectuales secundum formam. Rationes denique illæ atque ideæ intellectuales quidem secundum causam, intelligibiles verò secundum formam. Intellectuale enim ad intelligibile ita ferme se habet, ut appetens & mobile atque formabile ad appetibilem motorem atque formatorem. Sed vbinam sunt? Sane ideas minus communes in ideis communioribus generatim Platonicæ collocant. Ac demum omnia idearum genera in ipso ente primo communissimo entium atque perfectissimo, quod summum intelligibile vocant, intelligibile quidem secundum formam, intellectuale verò secundum causam, cui proximè subdunt mentes quàm plurimas intellectuales secundum formam, intelligibiles verò secundum participationem. His autem rationales subiiciunt animas, intellectuales tam participatione quadam, intelligibiles verò nequaquam.

Proinde censent ens ipsum, ipsumque intelligibile, idem esse, quoniam ens sit naturale & adæquatum intellectus ipsius qua ratione est intellectus obiectum. Præterea intelligibile ipsum sub primo rerum principio collocant. Illud enim tale est, ut comprehendi quodammodo possit, hoc verò nequaquam. Principium primum appellant propriè vnitatem ipsam atque bonitatem. Et quia vnitatem eminentiam lucemque præcul ab omnibus segregatam refert, intelligibile verò refert lumē quoddam iam intellectibus proportionem quadam accommodatum, ideo vnitatem & aliud & superius quàm intelligibile esse putant. Rursus quia mentes tam intelligere quàm intelligibile appetunt, non sim-

pliciter, sed & bene & bonum, bonum verò simpliciter appetunt, idcirco hac etiam ratione, id est Deum summum, ipsi enti, quod & intelligibile est, præponunt. Mitto quòd intelligibile respicit intellectum, bonum verò respicit voluntatem. Itaque non solum hoc ab illo est differens, sed & præstantius, quippe cum præstantius sit quòd voluntatem rapit, quàm quod ab intellectu comprehenditur. Quapropter ens ipsum ab intellectu pro viribus percipi opinantur, bonum verò per voluntatem potius ad seipsum animam trahere, atque tractam in se quoque transfundere, & si quo pacto ab anima iam occupata suo modo tangitur, tangi propriè per vnitatem mentis caput, quam ab initio nobis Deus, qui est vnitatis vniuersi princeps, inseruit. Cæterum vt ad propositum reuertamur, in ipso quidem bono ideas per causæ modum esse solum relatiuis quibusdam rationibus tantum inter se distinctas, in ipso verò intelligibili per formam propriè atque absolutis insuper formis inuicem differentes, in sequentibus mentibus siue à corpore separatis siue coniunctis participatione iam quadam & gradatim magis magisque distinctas, in natura verò semina quædam infima formarum ab ideis infusa, in materia denique vmbas. Ipsum quidem bonum Plato in Epistolis Deum patrem nominat, ipsum verò intelligibile Deum filium. Plotinus quoque & Deum de Deo, & de luce lumen, & rationem, verbumque Dei.

Rursus Plato in Epinomide per rationem huiusmodi diuinam, siue verbum (quem mundum vocat intelligibilem) affirmat mundum fuisse sensibilem exornatum. Quoniam verò ideæ in primo quidem vna forma sunt, in secundo verò multæ formæ (non enim putant in prima forma absolutam diuersitatem esse formarum) ideo Plato contemplatus & colores in lumine circa lucem, & lineas in circulo circa centrum, inquit in Epistolis, multiformes ideas absolute distinctas circa primum rerum principium esse potius quam in primo. Similiter in libro de Republica septimo, ideam inquit boni, id est, ipsum bonum, in cuius forma omnes ideæ vna forma sunt, pulchrarum esse causam idearum, videlicet illarum quæ in sequentibus multæ formæ sunt absolute inuicem differentes.

Superioribus rationibus Plotinus & Proculus ideas confirmant, & aliter in Deo (vt aiunt) primo ponunt, aliter in secundo. Alij verò nonnulli ad idem ita proce-

dunt. In materia quidem postrema idearum vmbra resultat, super materiam verò idearum omnium lucet facies, quarum fons est Deus rerum auctor, vt Platonis Timæus planissimè docet, ac liber de Republica decimus, & Parmenides. Si enim mens & natura plenè formarum sunt, perque illas agunt quod in naturalibus artificisque apparet, merito & Deus, qui naturæ mentisque formator est, infermis esse non debet. Per formas igitur agit, quas appellamus ideas. Has Plotinus & Proculus non solum exemplares, sed etiam essentielles formas appellant. Putant enim opificem mundi nulla in fabricando mundo consultatione vti. Talem enim imperfectam operationem esse, atque eum qui de opere perficiendo consultat, prius in se imperfectum opus quodammodo concepisse, deinde de illius absolute perquirere. Quod à mente perfecta est alienum. Item si vniuersum mutabili solum prouidentia discursu disponderetur, non esset vnquam stabile quicquam, neque perpetuus esset mundi motus & stabilis. Igitur Deus vniuersum per esse suum facit atque disponit, præsertim cum eiusmodi actio & prima & communissima & facilissima sit omnium actionum, ideoque à causa quadam prima communissima, felicissima sit vbicunque sit, eique in primis conueniat. Omnis autem causa quæ ipso esse facit, talem sequenti gradu facit effectum, qualis est ipsa primo. Cum igitur mundus sit cunctarum complexio specierum, sequitur vt mundi opifex modo quodam supra quàm cogitari possit præstantiore specierum omnium complexio sit, & omnium formas habeat exemplares, sibi quæmet, vt illorum more loquar, essentielles. Quod iterum ita confirmant. Si ars naturam imitatur, perque operum rationes efficit opera, ergo & natura suorum operum possidet rationes. Rursus natura cum ex seipsa careat ratione, & moueatur perficiturque à Deo, rationes accipit ab ipsis diuinæ mentis. Et quanto naturæ rationes interiores ipsi naturæ sunt, quam rationes artis arti, tanto saltem rationes diuinas interiores oportet esse Deo, quam naturæ rationes ipsi naturæ.

Addunt, quòd formæ sensibiles haud omnino vereque sunt tales quales cognominantur. Sanè æqualitas & similitudo passim inæqualitatis dissimilitudinisque sit particeps. Formositas autem vera in subiecto per se deformi informique esse non potest. Bonum quoque verum, vbi defectus & procliuitas est ad malum esse ne-

quit. Quinetiam in cœlestibus nolunt esse veram lineam, superficiemque; verum centri polorumque punctum. Siquidem quorum ratio est impartibilis, ipsa in re partibili esse non possint. Sed animus noster veras habet gignitque formas, per quas alias falsi redarguit quantum à veris distent, animaduertens. Quamobrem multo magis anima vniuersi veras formarum possidet rationes & gignit. Vbi enim virtus intelligentiæque præstantior, ibi expressiorum formarum conceptio atque partus. Denique mundi opifex certiores etiam perfectioresque formas in seipso gignit, atque (vt Proculi verbis utar) dum se animaduertendo seipsum gignit, in se simul generat omnia. Accedit ad hæc, quod cum vniuersi membra perpetuo quodam ordine inter se conspirent, non casu, sed ratione conciliantur atque reguntur. Ratio illa quæ ordinat omnia, seipsam ignorare non potest. Alioquin ratio summa foret irrationalis, si nullam rationem sui ipsius haberet. Rationalior enim ratio est quæ seipsam cognoscendo complectitur, quam quæ ignorando se deserit. Illa igitur se tanquam ratione omnium ordinatricem intelligit, quo efficitur vt quibus rationibus modisque singula disponantur, semper intelligat. Quamobrem in summa omnium ratione sunt omnium rationes. Vtrum igitur quia Deus facturum erat omnia, cuncta cognouit? Non certe. Alioquin essentialem operationem, ipsamque ad seipsum conuersionem, ad externa referret; atque aliunde penderet. Igitur quemadmodum Sol in se lucendo illuminat omnia, sic Deus intelligendo atque volendo seipsum, & scit & efficit omnia. Quis non viderit, si videndo se, videt facitque cuncta, sequi vt in substantia sua substantiales formæ sint, quæ exemplaria causæque sint omnium? Semper enim in ipso naturæ ordine ita se res habet, vt ab interiori actione procedat exterior, atque idem opus actioni persimile, quemadmodum à lucere illuminare, ab illuminatione illuminatum, illuminationi lucique simile. Proinde plantæ & animalia ex seminibus generantur. Oportet autem in semine rationes esse quodammodo animantis inde rationaliter procreati. Non tamen sunt in semine corporeo nisi potentia. Vniiforme enim semen est, ac penè informe, quod autem inde gignitur, multiforme atque formosum. Item si semen diuidatur, plura inde rota quæ nascuntur, quasi in partibus tota lateant quæ gignuntur. Hinc patet vim seminariam in semine

ipso latentem, esse quodammodo incorporationem, in qua sit huius motus generationisq; principium. Oportet autem multiplicis animantis rationes multiplices seminarie inesse virtuti, quam vocamus naturam. Idem enim provt idem est, diuersitatem tantam proximè generare non posset. Insuper inesse actu necessarium est. Quod enim est potentia tale; tanquam imperfectum, in aliquid actu tale, non aliter quam per aliquid quod actu tale sit, perfectiusque produci potest. Insunt ergo singularum animantis partium specie differentium singulæ rationes, quibus suo singula tempore locoque & ordine procreentur, atque excisa, si fieri potest sapissime recreentur. Sed nunquid seminariæ vires in seminibus animantium summae causæ sunt? Nequaquam. Non enim ab vlla illarum fit species ipsa, sed quiddam potius particulare sub specie, & quælibet illarum ab alio sub eadem specie ducit originem. Ideo ad vniuersalem naturam cōfugiendum est, in qua vniuersales sint suarum specierum omnium rationes. Ad naturam, inquam, terræ terrenorum procreatricem, præsertim cum sæpe plantis & animalibus passim sponte nascentibus semina corporalia desint, quo fit vt ad eorum productionem seminibus incorporeis opus sit. Atque vt conuenienti ordine procedamus, singulas terrenorum species ad vniuersalem referamus terræ naturam, similiterque in cæteris elementis, deinde quatuor elementorum naturas proximè ad Lunæ naturam; in qua sint elementalium omnium rationes, naturam verò Lunæ; ad naturam sphaeræ superioris, similiterque deinceps. Cunctas denique naturas ad ipsam vniuersi naturam, in qua necessario sint tam naturalium quam naturarum omnium rationes, rationes, inquam, & exemplares, & effectrices, vt naturas omnes certis regulis ad certa dirigat & perducatur. Non potest autem natura esse ratio causaque rerum summa, tum quia per se irrationalis est (quod in nostra natura patet), nam neque alia nouit, tum quia est causa effectui mixta, perinde ac si faber lignis infusus tractet ligna. Tali enim causa opus erat, vt quæ ab alio extrinsecoque & communi mouentur, familiarem quandam intrinsecamque virtutem à separata causa possiderent, quippe cum & hæc non aliter propriè, distinctè, accommodatè dicantur, quam per virtutem ipsis propriam, distinctam, accommodatam; & causa tandem excellentissima, quæ purè & ab-

solutè operi dominatur est, ab ipso opere per essentiam & esse & virtutem oportet esse secretam, sicut in aëre videmus calorem quidem à Sole superno misceri, lumen verò nequaquam. Oportet autem naturam etsi per se irrationalis est, tamen corporalium rationes habere, quibus possit intrinsecus singula congruis modis ad finem conuenientem rationaliter ordinare, mouere, formare, cumque per se irrationalis sit, ab eo quod per se rationale est, duci debet, rationibusque formari. Nempe irrationale est, naturæ per se irrationali ordinem vniuersi committere. Igitur in causa superiore necesse est rationes rerum adeo rationaliter esse, vt causa ipsa se suamque animaduertens, & sui & rationum suarum certam habeat rationem. Absurdum certè foret, cum nos, tum nostri, tum nostrorum operum, tum vniuersi rationes habeamus, causam vniuersi, neque sui neque suorum rationes habere. Quamobrem si mundi conditor omnia nouit, certè non respexit in alia vt illa perciperet, siquidem cognitio eius, alia ipsamet cognitione producta proculdubio antecedit.

Quis enim ignoret externum opus sequi intrinsecam actionem? Itaque Deus in seipsum respiciens nouit omnia. Quo fit vt in ipso sint omnium species, per quas cuncta cognoscat & faciat. Atque (vt summam dicam) quemadmodum in hoc materiali mundo materiæ omnes in vnam tandem intimamque materiam, sic & multo magis in mundo formali formæ omnes in vnam intimamque formam necessario reducuntur. Quod hinc rursus argumentari licet. Quòd omnis vita prolem suam penes seipsam prius generat quàm seorsum, & quo præstantior vita est, eo interiorem sibimet generat prolem. Sic vita vegetatiua tam in arboribus quàm in animalibus semen quasi arborem & quasi animal in corpore proprio prius generat, quàm aut iaciat extra, aut arborem inde animalie externum producat. Sic sensitiua vita, quæ est vegetatiua præstantior, per phantasiam in se simulachrum intentionemque rerum parit prius quàm in externa materia fabricet. Sed foetus ille phantasie primus quia in ipsa anima est, ideo propinquior est animæ quàm foetus vegetatiuæ vitæ, qui non fit in anima, sed in corpore. Sic vita rationalis, quæ est excellentior sensitiua, parit in seipsa rationem tum rerum, tum sui ipsius, quasi foetum prius quàm vel loquendo vel agendo promat in lucem.

Primus ille foetus propinquior est ani-

mæ quàm phantasie foetus. Vis enim rationalis in foetum suum, perque illum in seipsam reflectitur, quod efficit phantasia. Sic angelica vita notiones sui ipsius & rerum promit in se antequàm depromat in mundi materiam. Proles hæc interior est angelo quàm rationi suæ, quia neque ab externis incitata est, neque mutatur. Quamobrem diuina vita eminentissima & foecundissima omnium, vniuersam hanc mundi Machinam tanquam prolem suam in se generat prius quàm pariat extra. Oportet autem huiusmodi prolem, quam Orpheus Palladem vocat, Iouis capite natam, magis intimam (vt ita dixerim) esse Deo, quàm angeli notionem angelicæ menti. In angelo quippe cum sit esse aliud quàm intelligere, notio quæ generatur intelligendo, aliud est quàm angeli ipsius essentia. In Deo autem quia esse & intelligere idem sunt, notio qua Deus intelligendo seipsum gignit tanquam exactissimam sui ipsius imaginem, idem est atque ipse Deus. Quoniam verò generationem voluptas comitatur, Timæus Platonis inquit, Deum opere suo mirifice delectari. In prole autem illa Dei intima, quæ vniuersale semen est mundi, insunt propria semina membrorum omnium quæ in mundo hoc prole eius externa gignuntur. Semina illa essentia inter se conueniunt, ne Deus sit substantia multiplex. Differunt ratione, ne quicquid in mundo sit, sine vlla varietate sit vnicum. Age sic vltra procede.

Cum Deus vim habeat infinitam, & res quæ sequuntur eum cunctæ finitam, ideoque diuina virtus non sit determinata ad ea solum agenda quibus finitæ res possunt subministrare, sed queat absque illis insuper innumerabilia opera etiam incorporea facere, an non necessarium tibi videtur in Deo horum operum formas, quæ absque instrumentis certisque subiectis facere potest, ita relatione saltem distinctas esse, vt propriam illic habeant rationem? Nam cum ab vno, quantum vnum omnino est, absque medio subiecto vno certo non fiant multa, nulla est ratio ob quam formæ tales possint ex Deo multiplices emanare, nisi multiplex (vt ita dicam) & quodammodo multiformis sapientia Dei. Quinetiam quicquid reliquæ causæ agunt, id omne operantur tanquam primæ causæ instrumenta, atque ita agunt, vt temperentur ab illa. Temperantur autem ducunturque à Deo certis modis ad certas formas in materia generandas, non per aliud quàm per certas formarum ra-

tiones quæ sunt in Deo, quemadmodum instrumenta artis atque naturæ per formas agentis diriguntur ad formas. Atque ut formæ tum artificiosæ, tum naturales perspicuæ magis sunt in agente, quàm in opere vel instrumentis, ita mundi totius formæ expressiores modo suo in Deo sunt, quàm in sequentibus causis & materia. Quamobrem Mercurius putat, mundum esse omniformis Dei imaginem omniformem. Et Plato in Timæo inquit, diuinam virtutem cum bonitatis suæ gratia, vellet mundum quàm pulcherrimum facere, decreuisse cum ad exemplar illud quod est omnium excellentissimum, figurare. Ideoque mundum ita ad sui similitudinem effecisse, ut mundi partes ad sui ipsius formarit ideas. Ex iis quorundam canum rabies condemnatur latrantium Platonem ideas extra diuinam intelligentiam posuisse.

Coelum vnum syderum plenum torrentem noctu figurat suorum syderum imaginibus, quæ quidem imagines neque sunt sydera, licet esse infantibus videantur, neque manent, sed iugiter innouantur aqua fluente, quamuis manere vulgo putentur. Similiter Deus vnus idearum, quæ sanè simulachra neque veræ species sunt apud Platonicos, quanquam veras esse quidam Physici arbitrantur, neque quiescunt vnquam, ut Heraclitus ait, labente materia, etsi quiescere eas ignorantes existimant.

Atque hic est modus per quem res temporales, ut vult Parmenides Pythagoreus, æternarum fiunt participes idearum. Profectò sicut æternitas (quæ vnum duntaxat momentum est manens idem semper & eodem modo) tempus omne quod per innumerabilia diffluit momenta, quiescendo metitur, & sicut centrum stabile puncta superficie circumcurrentis, ita idea quælibet in æternum vna eademque consistens, res eas temporales metitur omnes, quæ in eadem inter se specie sunt ideæ vnus eiusdemque participes. Quod de vna dicam, de omnibus est ideis intelligendum. Pulchritudo ipsa pulchrorum omnium est mensura, quia per accessum ad pulchritudinem primam, & recessum ab ipsa, res sequentes magis minusve pulchræ existimantur, & quod cadit ab omni pulchritudine, ab omni cadit essentia, & quod totam possidet pulchritudinem, totam habet essentiam, quia prima essentia & prima pulchritudo sunt idem. Quæcunque homo in specie aliqua iudicat, iudicat ad speciem referendo, puta quando

iudicat Solem aut ignem esse pulchrum, tunc duo pulchra refert ad vnā pulchritudinis speciem absolutè. Et quando Solem esse igne pulchriorem pronunciat, ad eandem refert ideam, non absolutè, sed comparando.

In vtraque relatione, pulchrum Solem & ignem pulchrum per eandem metitur ideam, sed in prima vtrumque per totam ideam mensurat, in secunda per alteram ideæ gradum illorum metitur alterum. Neque audiendi sunt Barbari quidam, qui res pulchras mensurari non posse putant per accessum ad purum pulchritudinis actum, quia ille sit infinitus, ideoque non possint res aliæ aliis propius ad ipsum accedere. Volunt autem per recessum à pura pulchritudinis priuatione mensuram talem excogitari.

Hi enim ob id errare videntur, quod si purus actus est infinitus affirmatione, similiter pura priuatio est infinita negatione. Neque fit pulchrorum comparatio ad diuinam essentiam penitus infinitam, sed ad pulchritudinis ipsius ideam, quæ quodammodo finita est quantum respicit creaturam, quia est determinatio quædam diuinæ perfectionis, facta quidem à mente diuina, confirmata verò à voluntate. Accedunt autem ad eam propius, quæ similitudinem eius suscipiunt purius. Recedunt verò, quæ contrà. Merito autem inde mensura accipitur pulchritudinis in rebus pulchris, vnde ipsa suscipitur pulchritudo. Hæc autem ab ideâ capitur, non à pura pulchritudinis priuatione. Denique quid stultius, quàm pulchritudinis habitum per priuationem velle discernere, cum fieri è conuerso tam natura quàm ratio cogat? Quapropter absque dubio fateamur humanam mentem pulchra referre ad ipsam pulchritudinis rationem.

Quoniam verò quod mensurat, præstantius est quàm quod mensuratur, mens humana quantum per relationes ad ideas res omnes temporales metitur, quæ sub ipsis continentur ideis, rebus illis est excellentior. Atque ideo ideis est proxima, quia metitur quæcunque illas sequuntur, utpote quæ cadit media inter idearum fontem, & riuulos inde manantes. Verum licet mensuret ad ideas, non tamen per ideas ipsas mensurat tanquam per propria quædam & proxima media. Non enim sunt vniuersales ideæ proprium instrumentum huius aut illius mentis humanæ, neque inter mentem singularem & res alias



singulares vltio modo vniuersales ideæ cadunt mediæ. Quia verò non potest animus singularia vniuersalium idearum simulachra aliter metiri, quàm per formulas idearum animo proprias, & quasi declinantes ad singularia, necesse est menti idearum formulas inhærere, per quas ideis simulachra cõferat, & quæ congruunt formulis probet, reprobet quæ non congruunt. Sed vnde adueniunt hæ formulæ menti? nunquid à simulachris? an ab animi fictione? an forsitan ab ideis? Non à simulachris, nam per eas formulas animus mensurat simulachra, vnde formulæ simulachra antecedunt, & tanto præstantiores sunt quanto ideis propinquiores. At si fierent à simulachris, non verè mensurarent illa, sed ab eis potius mensurarentur. Mensura enim adæquatio est. Causa adæquat effectum, effectus causam non adæquat. Nusquam in corporibus perfectas vnitatis, bonitatis, pulchritudinisque rationes inuenimus. Oportet enim eas suis contrariis non esse permixtas. In corporibus autè vnitatis miscetur partium multitudini, bonitas vitio, pulchritudo deformitati. Nusquam rectas figurarum rationes inspeximus in materia corporum, eas tamen ipsi tenemus. Alioquin neque de ipsis loqui possemus, neque per ipsas quasi examen defectum formarum corporalium redarguere. Non igitur eas à corporibus accepisse videmur, essent enim illis deteriores. Neque dicendum est eas esse nusquam, quia nequit mens intelligere per seipsum quod nihil est omnino. Nam & priuationes per habitus cogitat, & falsæ opiniones non ex eo fiunt in nobis, quod ipsum quod omnino nihil est cogitemus, sed quod vel coniungamus res inuicem vel disiungamus præter ordinem naturalem. Imò verò si existunt alibi obiecta sensuum, sunt & rationes obiecta mentis, si modò & mens sensibus est nobilior, & quod omnino nihil est, neque mouet animi aciem, neque contrahit, neque terminat. Non igitur finguntur ab animo. Sanè figmenta metiuntur, res veras non metiuntur. Figmenta animi res ipsas sequuntur confusus etiam quàm vmbræ corpora. Corpora per vmbras non discernuntur. Quis ergo per fictitium extraneumque simulachrum pulchritudinis, odoris, saporis, caloris, horum ipsorum essentialia definitiones proprietatesque latentes inspiciet? Præterea figmentum animi est animo ipso deterius. Formulæ verò illæ ideo præstantiores sunt animo, quia per ipsas animus etiam iudicat corri-

gitque seipsum. Nempe per rationes vnitatis, bonitatis, & pulchritudinis, animus de seipso iudicat sæpe quàm sit ipse aut partibus multiplex, aut affectibus diffidens. Item quantum vel natura deficiat, vel vitio deprauetur.

Rursus quantum vel natus sit deformis, vel turpis euaserit. Nonne per pulchritudinis sigillum pronunciat esse se corporibus pulchriorem & hanc partem sui illa, & hunc habitum illo pulchriorem esse? Imò verò & angelis sublimiores esse videntur, quia per sigillum idem angelum mens nostra designat, quando angelum animo pulchriorem esse affirmat, & alio angelo alium, angelisque Deum. Non tamen metitur Deum, sed ipsum tanquam mensuram relinquit immensurabilem. Sicut enim sapientia non fit sapiens, & motus non mouetur, ita prima mensura non mensuratur. In eo igitur quod illæ formulæ angelos metiuntur tanquam regulæ expressæ ab ideis super angelos existentibus, certè sublimiores sunt angelis. Et animus in hoc ipso actu quo metitur angelos, excellentior est quam ea ipsa natura angeli quam apud seipsum metiendo designat. Quamuis & angelus animam metiatur per regulas quodammodo rectiores, & eo ipso actu magis excedit animum, quàm per actum animi excedatur ab animo. quo autem pacto sigilla huiusmodi; quas & formulas appellamus, si sunt animo & angelis altiora, finguntur ab animo? Quinimo sunt in animo ante omnem commentum animi. Animus enim sua inuenta omnia ad sigilla talia confert. Siquidem veritatis sigillo discernit; quæ vera inuenta sint; quæ veriora, quæ falsa. Item quod per novos temporalesque actus animi fabricatur, mobile est omnino. Quod enim motu fit, nimirum fit & mobile. Sigilla verò talia sunt immobilia. Hærent enim animo immobiliter, quoniam quicquid singulis momentis occurrit animo, vel fit ab animo arbitrato nostro, ad illa referimus tanquam firmiter inhærentia. Porro si illa quoque nutarent, essent ad alia referenda, & alia rursus ad alia, neque esset in nobis principium aliquod iudicandi. Sigillum per quod de statu huius rei, aut statu illius, aut etiam de æternitate sententiam ferimus, mobile esse nequit. Siquidem in sigillo ratio illius exprimitur, quod eo significatur. Ratio verò status ipsius æternitatisque est à ratione motus alienissima.

Quin etiam stabile & æternum non aliter quàm sub rationibus status æternitatisque definimus. Rationes huiusmodi

omnis sunt mutationis expertes, siquidem status antecedit motum. Quod verò in natura prius est, est à posteriore solum. Atqui has rationes per quastalia definimus, intus habemus. Non enim per aliena mens loquitur. At si extra nos essent, egeremus adhuc aliis rationibus rationum, quibus quasi mediis rationes illas hauriremus per quas essemus de statu æternitateque locuturi. Aliæ illæ rationes ideo immobiles essent, quia essent rationes immobilium rationum. Itaque quacunque gradiamur, ad immobiles rationes nobis innatas perueniemus. Scite Plotinus quando de ævo disputat, inquit, Hecne de æternitate loquimur quasi de extraneis rebus testificantes, ac de alienis agentes? Nequaquam. Non enim intelligimus, nisi tangamus, neque extranea tangimus. Itaque oportet nos æternitatis esse participes, hæc ille. Talia ergo sigilla sunt immobilia. Imò etiam sigillum motionum est immobile. Quando enim de rerum motibus iudicamus, illos ad æternam motus ideam per motionum sigillum nobis insitum comparamus. Si hoc quoque foret motus aut mobile, esset per sigillum aliud comparandum. Non enim motus ad æternitatem nisi per medium competens religatur, quod neque motus sit, neque mobile. Item si foret mobile, non recte per illud motiones iudicaretur. Motio namque tunc iudicatur rectè, quando refertur ad terminos & spatia quæ permanerint. Nam iis non manentibus neque sit motus, neque motus progressio cernitur. Ipsum quoque tempus, quod est proprietas quædam & perduratio motionis, non aliter mensuratur quàm si per stabilem seruetur memoriam, & stabili æternitatis momento circumscribatur. Si motionis sigillum stabile est, multo magis stabilia sunt sigilla omnia reliquorum. Ex iis omnibus duo pariter concluduntur, quòd scilicet sigilla talia & ab ideis animo inferantur, & ipsi hæreant immobiliter.

*Confirmatio superiorum per signa.*

## C A P V T V.

**H**uius autem rei signa multa comperimus. Primum, quòd rustici homines, qui nunquam de ideis aliquid cogitauerunt, & adolescentuli qui nihil de iis audierunt, cum primum eorum sensibus occurrunt corpora pulchra, modo ratione ventantur, ea referunt ad ideas, duobus

(vt diximus) modis. Vno, quando affirmant hoc esse pulchrum, quod non faciunt nisi ex eo quòd talis corporis figura quadrat sigillo pulchritudinis intus ingento. Altero, quando affirmant hoc isto, & istud illo esse pulchrius, quantum aliud alio accedit propius ad sigillum. Tale sigillum neque per doctrinam, neque per inuentionem prius acquisiuere, quia neque cogitauerunt de illo quicquam, neque audierunt, neque etiam tunc ex singulis pulchris corporibus ipsum colligunt. Siquidem per ipsum minime fallax, singulorum fallaciam defectumque redarguunt. Neque ex natura quadam communi quæ est in singulis. Nam quod in rebus iacet fallacibus, ipsum quoque fallax euadit, fallacemque ex se procreat notionem. Præterea quando de illo diligentius cogitant, inueniunt ipsum vel esse, vel referre aliquid vnum supra multa in seipso consistens. Nam super naturam illam quæ vna quodammodo est in multis, oportet esse naturam talem quæ vna sit ante multa, vt communis sit æquè multorum. Tale sigillum quia nullo modo clauditur rerum singularium multitudine, ab ea multitudine nullo modo colligitur, neque etiam cogitationis machinatione concipitur. Nam per ipsum inuenimus super mobilem multiplicemque cuiusque animi pulchritudinem, vnâ esse pulchritudinem in seipsa manentem. Ergo sigillum vim suam tollit altius super animos, machinamenta verò animi nihil animis eminentius fabricant. Si ergo cum primum vtimur ratione, res plurimas ad huiusmodi sigilla referimus quæ neque didicimus ante, neque tunc colligimus aut fingimus, præsertim cum comparationis signum præcedere semper res illas oporteat quæ comparantur, sequitur vt ante omnem rationis usum ea possideamus.

Secundum signum est, quòd subito fiunt relationes utræque, sæpe etiam nulla præcedente aut intentione voluntatis, aut rationis discurfione. Quod significat non esse animo regulam relationum huiusmodi nuper aut extrinsecus acquirendam, sed iam diu intrinsecus possideri, quæ toties vti pro arbitrio potest, quoties se ad eam intenderit.

Tertium signum est, quod omnes in se ipsis experiuntur, quoties volunt aliquius rei definitionem & causam inuenire, nihil aliud conantur, quàm vt omnibus sensibus & phantasiæ sub motis obstaculis, profundæ mentis intima penetrèt, quibus tunc primum clarissime fulget quod venantur,

cum primum in arcanæ mentis adytis penetraverint, quasi intus scientiarum The-  
sauri delitescant. Quod ita Pythagoras ce-  
cinit.

*Ἄλλ' οὐ θάρσει ἐπεὶ θεῶν γένος ἐστὶ βροτοῖσιν*  
*οἷς ἰερεῖς ἀεθέρουσα φύσις δέκνυσιν ἔργα,*  
id est, tu autem confide, quoniam diu-  
inum genus est hominibus, quibus sacra  
natura proferendo in lucem omnia mon-  
strat. Ergo mirabimur Homerum & Di-  
dymum aliosque permultos, vel natura vel  
ab infantia cæcos ita scripsisse, vt perspi-  
cueridisse omnia videantur? Mirabimur  
Zoroastrem, aliosque sapientiæ inuento-  
res, diuturna duntaxat solitudine, sola-  
que animi totius in mentem solam con-  
uersione, rerum omnium scientiam pe-  
perisse?

Quartum signum ab approbatione su-  
mitur. Complexio corporis quæ abundat  
sanguine, suos quosdam postulat tum sa-  
pores, tum cæteros rerum usus, quæ bili  
alios, alios quæ pituita. Quando cuique  
complexioni quod suum est offertur, non  
aliter oblatam rem natura talis adsciscit,  
quàm ipse ignis escam sulphuream. Hinc  
sanguineus commendat dulcia, acuta a-  
criave cholericus, acida melancholicus,  
mollia phlegmaticus & insipida. Quod de  
sanguineo dicemus, similiter est ad alios  
transferendum. Nescit sanguineus quam  
ob causam dulcia probet, quia non com-  
mendat consilio, sed naturali complexio-  
nis instinctu. Sane per naturalem instin-  
ctum quoque appetit genera qualitarum,  
rubra, & virida visu, auditu læta, dulcia  
gustui, temperata tactu atque olfactu. Si  
has quinque qualitates per complexio-  
nem affectat & probat, necesse est in ipsa  
complexionis conflatione quinque inesse  
fomites harum quinque probationum. Si-  
cut enim illarum quinque qualitarum alia  
inter se est & alia ratio, ita à tali comple-  
xione sub alia & alia ratione probantur.  
Igitur in vnoquoque homine quinque  
sunt fomites naturales ad quinque quali-  
tates congruas quinque sensibus compro-  
bandas. Et quia in aliis hominibus aliæ  
sunt complexionibus humorum, ideo rerum  
concupiscentiæ corporalium inter homi-  
nes sunt diuersæ. Quoniam verò vna hu-  
mana species est in omnibus, cum sit men-  
tis species vna, idcirco communis est eo-  
rum quæ ad mentem pertinent approba-  
tio. Omnis mens figuram laudat rotun-  
dam in rebus statim consideratam, & cur  
laudat, ignorat. In ædificiis quoque simi-  
liter talem, vel quadraturam ædium, vel  
parietum æqualitatem, lapidumve dispo-

sitionem, angulorum oppositionem, fe-  
nestrarum figuram atque occursum. Lau-  
dat insuper eodem pacto certam quan-  
dam siue membrorum humanorum pro-  
portionem, siue numerorum vocumque  
concordiam. Commendat mortales ge-  
stus, & habitus tanquam decoros. Com-  
mendat sapientiæ lucem, & veritatis in-  
tuitum. Si quælibet mens hæc omnia sem-  
per & vbique adsciscit illico, & quam ob  
causam adsciscat ignorat, neque potest  
non adsciscere, instinctu adsciscit neces-  
sario prorsus & naturali. At quia eorum  
quæ hic affectantur, diuersa inter se ratio  
est, oportet vt à mente ex diuersis naturæ  
suarum rationibus tum quasi fomitibus appe-  
tantur, tum quasi formulis & regulis ap-  
probentur, itavt ex eisdem regulis illorum  
contraria reprobentur. Siquidem contra-  
ria illorum cum primum nobis obiciuntur,  
offendunt naturam suam, etiam si causam  
nesciamus. Sunt ergo rationes illorum si-  
miliumque ingentis menti.

Quintum signum à definitione artis ac-  
cipitur. Omnis ars quia certa ratione ad  
certum finem ordinat opus, rationalis fa-  
cultas est. Facultas rationalis si omni na-  
turæ irrationali est ingenta, multo ma-  
gis ingenta est omni rationali. Elementa  
quàm artificiosè situm repetunt suum?  
Quanta geometriæ arte rectam lineam in  
ascensu seruant atque descensu? Quanta  
architecturæ industria pluuiæ se in orbicu-  
lares guttulas cohibet? Quanta aër saga-  
citate rerum naturæ succurrit, ne quid in  
ea vacuum relinquatur? Complexio quo-  
que plantarum & animalium quàm mira-  
bili medicinæ artis solertia vitur in con-  
seruando habitu naturali aut recuperan-  
do? Ipsæ quoque brutorum animæ singu-  
lis in speciebus singulas artes exercent.  
Laneam telam infecta sericia, lineam a-  
raneæ, hirundines figulinam, muscanti  
olores, apes architecturam, ciuilem ci-  
coniz, bellicam verò leones, vulpes de-  
nique venatoriam. Quis autem dixerit  
(modò ista consideret) solam naturam  
rationalem inertem fuisse, atque ex iner-  
tia irrationalem ab initio constitutam? Imò  
verò si debet rationalis sedes multo prius  
& magis artem capere rationalem, quàm  
sedes irrationalis, oportet omnes ratio-  
nali hominum speciei artes innasci, post-  
quam singulæ innatæ sunt singulis irra-  
tionalium speciebus. Omnes enim ferme  
in genere brutorum vniuerso congregan-  
tur, sed aliæ species artium per alias ani-  
malium species disperguntur. Omnes er-  
go in vnica rationali hominum specie

colliguntur, licet per singulos diuidantur. Omnes iterum vno speciei Angelicæ singulari, in quo tamen diuiduntur secundum formas, quoniam multiformis est angelus. Cunctæ denique in vno singulari Deo, atque vna duntaxat Dei forma. Quapropter artes diuiduntur inuicem in brutorum genere secundum habitum atque actum, quoniam nulla mutorum species aut artes omnes exercet actu, aut omnes infusas habet, sed quælibet eorum species vnica vitur arte, & possidet vnicam. Artes igitur diuidantur oportet in hominum specie secundum actum, quia alij alias meditentur, non tamen secundum habitum, quia singuli cunctas possideant. Siquidem in Angelo quolibet vniuntur cunctæ habitu atque actu. Quilibet enim illorum quælibet meditatur, sed diuiduntur executione, quoniam alij aliter gubernant mundum. Cunctæ in Deo modis omnibus vniuntur, quia & habet & videt & exequitur vniuersas. Nam in omnibus operantibus, ut inquit Theologus Paulus, omnia operatur.

Sextum signum ab assecutione artium ducitur, quas non illi solum qui præceptore carent, per se assequuntur, sed illi etiam qui magistros vel libros vel homines habuisse traduntur. Nam & qui eligendo discunt, non à literis corporalibus vitæque carentibus spiritalem vitamque scientiam hauriunt, sed ipsi per literas prouocati, pariunt in seipsis, & qui discunt audiendo, non prius discunt, quam ipsi, audita apud se recolant, examinent, approbent. Non fit autem examinatio approbatioque verorum, nisi intus præfulserit regula veritatis, & qui docere dicuntur, neque scientiam eandem quam ipsi habent, omnino transfundunt in alium. Nam docendo alios, ipsi euaderent ignorantes, & scientiæ qualitas de alia mente in aliam quasi de subiecto in subiectum transiret, quod non conuenit qualitatibus. Neque aliam quandam specie similem scientiam in discipulo ipsi per propriam generant. Talis enim generatio ad qualitates pertinet corporales, non ad humanam scientiam, cuius actio clauditur intus, & operantem perficit potius quam externa. Cæterum quoniam pacto magister discipulum edocet? Duo sunt artium genera. Aliæ sunt quarum materia circa quam versantur, nullum habet in se principium operis effectuum, sicut lutum aut saxum, ita subesse videntur figulo & sculptori, ut manum duntaxat expectent artificis, ipsa verò suapte natura nihil mo-

menti habeant ad opus efficiendum. Aliæ verò artes sunt quarum materia per formam quandam motum agit ad opus, quod quidem naturale est potius quam artificiale dicendum. Sic terra subest agricolæ, sic medico corpus humanum. Quippe fecunditas solis ad segetes producendas agricolæ, & corporis humani complexio ad sanitatem recuperandam medico confert quamplurimum, vsque adeo ut sæpe ager absque cultura producat segetes, & complexio corporis nostri sine medentis opera pellat morbos. Quod significat & agro inesse semina segetum per naturam, & complexionem semina sanitatis. Ergo in primo artium genere artifex ille Dominus materiæ vocatur atque magister, in secundo verò excitator naturæ atque minister. Artem docendi ad secundum id genus spectare, hoc nobis testimonio esse potest, quod animus qui tanquam materia videtur subesse docenti, nonnunquam antequam audiat, præfagit audienda, & postquam audiuit, audita reddit vberiora & meliora, & sæpe licet non audiat, ex se parit, quippe qui semina scientiarum non minus quam ager segetum possidet.

Vnde qui docet, minister est potius quam magister. Quapropter Socrates apud Platonem in libro de scientia Thætheto, inquit, se filium obstetricis esse, & obstetrici per similem, utpote qui in erudiendis hominibus non inducat scientiam, sed educat, sicut obstetrices conceptos iam foetus educunt. Ideo quando doctor aliquis contendit ex pluribus argumentis audienti aliquid demonstrare, qui audit, non paulatim formatur, ut lutum à figulo, aut saxum aliquod à sculptore, sed post multa indicia, veritatem subito intuetur, etiam absente magistro, quando sufficienter fuerit prouocatus, sicut ager cultus à rustico, post diuturnos illius labores suo ipse tempore edit foetus agricolæ nihil agente. Quis oculos videre docuit? Aures quis audire? Oculis non præstat visum Medicus, sed vel super infusas caligines discit, vel dirigit in obiectum, ita menti præceptor scientiam non infundit, sed purgat aciem aut dirigit. Nemo canibus sagacitatem præstat venatoriam, nemo equis currendi virtutem, nemo robur bellicum elephantibus, sæpe tamen homines eas ipsas virtutes latentes & dormitantes in membris usu expergisci compellunt. Idem facit in mente præceptor, ut Plato in septimo libro de republ. docet. Mens enim virtutem suam (quæ est

veritatis intuitus) non minus habet fir-  
mum & naturale, quàm sensus & anima-  
lia suam. Eam sciscitando prouocat So-  
crates docendi dux, ipsa rectè interroga-  
ta, vera respondet, respondere non po-  
test vera, nisi cognouerit. Quoniam verò  
res ipsæ inuicem connexæ sunt, similiter-  
que rationes rerum coniunctæ sunt inui-  
cem, vnde facilè de vna transitur in mul-  
tas, sæpe fit vt ex vno quodam vestigio à  
præceptore monstrato, sagax discipuli a-  
nimus propriis naribus venetur longo or-  
dine plurima. Adde quòd non imbecillio-  
rem habet mens videndæ veritatis aspe-  
ctum, quàm pedes progrediendi poten-  
tiam. Socrates infantem porrecta ducit  
manu quo gradiatur, adolescentem quo  
discat interrogat. Infanti non præstat  
eundi virtutem, sed & prouocat, & tutius  
perducit ad terminum. Adolescenti non  
largitur intelligentiam, sed efficit ad effe-  
ctum sui operis promptiorem. Ipse autem  
Socrates scientiam suam si quando adeptus  
dicitur tanquam nouam, aut per in-  
uentionem aut per disciplinam est adeptus.  
Si ipse per se res inuenit, nunquam  
rebus inuentis fuisset vsus, nisi vtendi mo-  
dum antea cognouisset, vtendi modum  
non tenet, qui rei ipsius non tenet natu-  
ram. Sin ab alio audiuit, non prius ex au-  
ditu concepit scientiam, quàm sciret nun-  
quid docentis rationes veritati congrue-  
rent. Non intelligit hoc, nisi qui ipsam in-  
spicit veritatem. Igitur antequam inueniat  
quicquam aut audiat, veritatis est compos.  
Et qui docuit Socratem Archelaus, vel per  
se inuenit, vel accepit ab Anaxagora.  
Quicquid fuerit, sciuit & ante. Atque licet  
& Anaxagoras ab Anaximene, & ille ab  
Anaximandro, & Anaximander accepe-  
rit à Thalete. Thales denique vel alius qui-  
nis sacerdos Ægyptius, aut saltem Persicus  
magus caruit præceptore. Qui hominis  
caret doctrina, discit docente natura, imò  
verò scit, iam diu docente Deo. Quapro-  
pter Socrates apud Platonem in libro de  
sapientia inquit. Theagi, nemo vnquam  
didicit à me quicquam, quamuis mea con-  
suetudine multi euaserint doctiores, & me  
exhortante. & bono dæmone inspirante.  
Tu quoque breui multum proficies, si Deus  
fauerit.

Præterea narrat Socrates ibidem, quem-  
admodum nonnulli dum eius consuetudi-  
nē vterentur, illique propinquarent, ipso  
etiam tacente acutiores euaderent, rece-  
dentes verò hebetiores subito redderen-  
tur, quasi ad diuinum quendam influxum  
à Deo per genium mentemque Socratis

in familiarium animos penetrantem, vis  
illa ingenij pertineret. Et Orpheus Musas  
esse dicit Iouis & Memorix filias, quia vi-  
delicet scientiæ in profunda memoria la-  
teant, nobis olim à Deo tributæ. Quin e-  
tiam hæc de memoria tradidit.

*πάντα ῥόν συνέχουσα βροτῶν ψυχῶσι σύνκοιτο.  
ἐπιμνήσκουσα δὲ πάντα ὥς αἱ ἐχάστος αὖτε πα-  
ροῖο γινώμην καὶ τήνται, ἐπεγείρουσα φρένα  
πάντι.*

id est, Totam mentem continens humano-  
rum animorum familiaris. Commemoras  
omnia quorum notionem quisque semper  
animi sinibus oculit, mentem fuscitas om-  
nibus. Concludemus iam præsentem dis-  
putationem, si prius nos ipsos admonueri-  
mus, vt quando audimus artes nobis inef-  
se natura, non intelligamus vel à natura  
cœlesti corporalique impressas, vel à me-  
ra animæ essentia fluere ( siquidem à tali  
natura impressas habent bestix, ab essen-  
tia autem mera manantes solus possidet  
Deus ) sed intelligamus nostris mentibus  
statim ex Deo natis infusas fuisse species  
rerum, & regulas artium, vt in Timæo tra-  
dit Plato, non aliter quàm angelicis men-  
tibus infundantur. Est autem differentia  
triplex inter nos & bestias, quo ad artes  
pertinet. Prima, quòd à Deo sine medio  
nos eas accipimus. Ille, natura cœlesti in-  
tercedente. Secunda, quòd quisque no-  
strum accipit cunctas bestiarum species,  
singulæ singulas. Tertia, quòd bestix ne-  
cessario quodam impulsu naturæ ad suæ  
artis vsum certo tempore compelluntur,  
nos autem libero rationis iudicio tum ar-  
tis vnus, tum plurimarum vsum eligimus.  
Conuenimus autem quantum ad species  
rerum & regulas artium attinet, cum ange-  
lis atque Deo, cum in aliis nonnullis, tum  
in hoc vel maxime, quod nobis insunt per  
absolutum perspicuumque modum ferme  
sicut & illis. Itaque diuinæ ideæ absolutas  
atque distinctas ipsarum imagines nobis  
tanquam speculis impressere, naturæ au-  
tem corporali vmbas quasdam confusio-  
res, quemadmodum nos ad lumen ima-  
ginem quidem nostri corporis claram in  
speculo pingimus, vmbam verò reddimus  
parieti. Vbi autem idea per modum lucet  
absolutum perspicuumque, non modò lu-  
cet clara, sed ferè tota. Omnes enim ideæ  
proprietas, quas in disputationis huius  
principio ex Platonis mente narrauimus,  
in eo consistunt potissimum, quòd vniuer-  
salis sit atque soluta. Quòd autem non vm-  
bræ idearum, sed imagines perspicuæ no-  
bis insint, ex eo patet potissimum, quòd  
vmbas illarum ab imaginibus earundem



recta ratione distinguimus, quodve formulæ illarum nobis insitæ ipsas nobis perspicue repræsentant, nosque ad eas conueniunt, & umbræ idearum in corporibus haud prius eas nobis referunt, quam per nostræ mentis formulas purgentur atque reformatur. Denique si per distinctas imagines, atque per modum integrum splendent in nostris mentibus, atque solum, per modum quoque fulgent penitus immortalem. Quod si immortalis rei naturale subiectum est immortale (subiecto namque soluto, quicquid subiecto hærebat disperditur) proculdubio mens hominis est immortalis, quæ naturaliter firmiterque immortalium idearum species per modum suscipit immortalem.

*Ratio secunda. Mens est subiectum veritatis æternæ.*

## C A P V T VI.

**A**Vrelius Augustinus, diuino vir ingenio, (quo Latinorum nullus Platoniam maiestatem tum sapientia, tum eloquentia expressit exactius, iactis à Platone superioribus fundamentis, argumentationes huiusmodi construit. Aliud est verum, aliud veritas, quemadmodum aliud castus, aliud castitas, præstantiorque est vero veritas, siquidem omne verum veritate est verum. Cum verò aliquid quod verum dicitur, interit, non tamen interit veritas. Sicut si quis castus intereat, castitas tamen non interit, si manebit semper hic mundus, verum est semper esse mansurum, quod si non manebit, verum est non semper esse mansurum. Quid cum interierit si interiturus est, nonne tunc id verum erit mundum interiisse? Nam quamdiu verum non est occidisse mundum, non occidit. Repugnat igitur ut mundus occiderit, & verum non sit mundum occidisse.

Non potest autem aliquid esse verum ubi veritas non sit. Erit igitur veritas, etiam si mundus intereat. Quid si ipsa veritas occidat? nonne verum erit veritatem occidisse? Verum autem non puto esse, si veritas non sit, nullo modo igitur occidet veritas. Hæc Augustinus. Sed ubi nam est veritas? non in corporibus, mutaretur enim corporibus permutatis, cum tamen æterna sit veritas. Hinc sequitur paradoxon illud Platicum, corpora non verè esse, quia scilicet in illis non maneat veritas. Ergo quod aurum dicimus, si non verè est aurum, falsum aurum est.

Si hoc, neque aurum quidem est. Atque ita de cæteris rerum corporalium speciebus. Præterea affectio corporis per duo temporis puncta non permanet penitus eadem, ut ostendimus aliàs & in præsentia in hunc modum ostendimus. Sicut stabilis & simplex æternitas, rerum stabilium simpliciumque mensura est; ita fluens & varium tempus, mobilium & multiplicium est mensura.

Temporis puncta nunquam permanent eadem, sed sibi inuicem surrepunt semper aliis alia succedentia. Corpus mundi mobile tanquam mensuram sibi propriam tempus habet. Si ita est, quadrat utique cœli dispositio & mutatio temporis fluxui. Itaque non potest in duobus temporis momentis esse cœli dispositio penitus eadem. Nam si eadem per duo momenta maneret, in ea ipsa morula tempus quidem de alio momento fluxisset in aliud, cœlum verò quicuisset in vno. Fluxus verò quieti minime congruit. Quod non congruit non metitur. Quomodo enim motus mensurat quietem, aut res fluens per duo rem stantem in vno? Quapropter in ea morula tempus cœlum non mensurasset. Metitur autem reuera tempus semper cœlum, non aliter quàm æternitas ea quæ sunt supra cœlum. Ergo sicut illa in æternitate continuè sine vlla mutatione manent, ita cœlum sub tempore continuè absque vlla quiete transcurrit. Si cœlorum configuratio nullo modo permanet, multo minus corpuscula quæ sub cœlo sunt, & cœli rapacitate raptantur. Necesse est enim hæc per influxum & effluxum, condensationem rarefactionemque, intensionem, remissionemque qualitatam, consonantiam & dissonantiam complexionis, cæterosque motus continuè variari. Quod quidem abundè Plutarchus & Proculus demonstraerunt, & ante illos Heraclitus inquit. Quemadmodum non possumus eandem torrentis aquam bis intrare, aut eandem rotæ currentis particulam bis similiter tangere, ita similem omnino dispositionem complexionemque corporis per duo puncta perseverantem assequi non valeamus. Si nullius corporis affectio per duo momenta præterit eadem & similis perseverat, in eodem momento incipit qualitas talis, & definit. Quod in natura incipit, nondum absolutum existendi vel operandi actum possidet, quod definit, talem iam actum non retinet. Igitur in eo puncto in quo esse qualitas illa dicitur, dici etiam potest non esse, cum nondum à non esse omnino discesserit, & iam non esse labatur. Et quia

celeritas temporis linguæ celeritatem superat, dum esse illam pronuncias, te pronunciante, subterfugit prius quam hoc ipsum verbum est, ore protuleris. Et ut Timæus inquit, fallit pronunciantem, nec unquam verè quicquam de hac pronunciat aut percipitur. Nec esse magis quam non esse dici potest, cum & sit & non sit pariter, dum profertur. Quoniam verò quæ continuè permutantur, quatenus mutantur, eatenus fiunt, quæ verò fiunt, dum fiunt, reuera non sunt, ideo quæcunque ita mutantur & fiunt, non tam dicuntur esse, quam esse videri. Quid verò dicemus de tempore? quod semper falso dicitur esse, cum eius, ut ita loquar, sit non esse. Sanè de quolibet præsentis momento verè dicitur, hoc non est tempus, sed temporis terminus. De præterito autem aut futuro duntaxat affirmantur esse tempus. Siquidem continuam successionem quandam tempore significari putamus. Præteritum verò futurumque non est: Igitur esse temporis quodammodo in non esse locamus. Momentum verò, quod est terminus temporis, dum esse pronunciamus, vertitur in non esse atque pronunciantes mentiri compellit. Quòd autem de tempore demonstramus, de temporalibus quoque est iudicandum, esse scilicet in non esse, ut ita loquar, habere. His consonat Pythagoricum illud. Qui homo dicitur, magis non homo est quam homo, quia si innumerabiles eius partes consideraueris, innumerè poteris iudicare, hæc pars non est homo, & illa similiter. Semel duntaxat de toto dices, hoc est homo. Vnde & de elementis Timæus differens, duas esse elementi partes existimat, materiam atque formam, propter materiam non dici ignem aut aquam, sed propter formam, ergo secundum partem. Hoc igitur solum secundum partem ignis dicitur, & illud aqua. Ac reuera non ignis hoc est, sed igneum. Illud non aqua, sed aqueum. Adde quòd illud est verum tale, quod merum tale est, puta merum vinum, quod merum est vinum. Natura verò cuiusque speciei quando in materia est, primo quidem admixtam habet potentiam ad non esse, ut in libro quinto probauimus.

Deinde multa patitur additamenta, ac sæpè contraria. Siquidem in aère sæpè aliquid igneum est, semper sinus aliquis præter aeris rationem. In homine hoc vel illo sæpè complexio aliqua contra naturam eius, semper habitus aliquis, vel affectus, figura vel sinus ultra humanæ speciei necessitatem. Similiter se habent & reliquæ re-

rum naturalium species. Quoniam verò super omnia quæ per partem & impurè talia sunt, esse oportet ea quæ secundum se tota & purè sunt talia, putat Timæus super inquinatas & mancas materiæ formas esse alias meras, integras, separatas. Atque eius rationis viribus confidit maximè, quæ sic argumentatur. Formæ quæ sunt in alio, scilicet in materia, sunt & ab alio, non tamen ab informi natura materiæ, & formam esse oportet à forma, & à forma tandem per se subsistente, atque una formabilis materia ad vnum tandem reducitur formatorem. Nam & si quis multos induxerit formatores, nunquam multi, quatenus diuersi sunt, mutuum inter se habebunt ordinem, atque ad vnum opus finemque conducent. sed quatenus ab vno omnium formatore ducuntur. Igitur necesse est formas dari materiæ à mente quadam plena formarum, ubi formæ fiat ipsa mentis essentia, atque ideo veræ sint species. At quia mens illa est esse primum. materia verò est proxima nihilo, & illa purus actus, hæc pura potentia, sequitur ut materia innumerabiliter penè sit mente deterior. Quicquid autem ab aliquo capitar, in suscipientis transit naturam. Quare formæ immerse materiæ usque adeo sunt speciebus mentis deteriores, ut umbræ quædam sint illarum potius quam imagines, & illarum denominationem & hanc quidem falsam retineant potius quam naturam. Sicut artificia sunt simulachra naturalium, ita naturalia sunt simulachra diuinorum.

Propius autem accedunt artificia ad naturalium veritatem, quia cum illis conueniunt in materia, quam naturalia ad veritatem diuinorum. Si ergo pictus equus usque adeò à naturali equo deficit, ut non sit verus equus, multo magis naturalis equus adeò à diuino equo, id est, ab idea, veraque equitatione deficit, ut dici debeat umbram equi ipsius potius quam formam repræsentare. Ac si vera hominis & equi ratio naturaque, idea ipsa est hominis aut equi, & hanc non seruat materia longissimè inde distans, concluditur illud Socratis in Phædone, & in Republica, videlicet veros homines verosque equos in materia non reperiri, quæ idearum umbris ita ignorantium fallit animulas, ut somniantium instar, dum rerum verarum simulachra vident, putent se res ipsas inspicere. His consonat illud Proculi nostri paradoxon. Composita ex elementis, neque sempiternitatem habent, neque statum. Puræ mentes utrunque possident, suar-

que simul omnia comprehendunt, horum media sunt, quæ suam in motu quodam sempiternitatem habent. Animæ quidem mentibus proximæ motum in operatione duntaxat admittunt, animæ verò sequentes quodammodo in super in virtute. Vniuersa denique corporei mundi machina, tanquam per essentiam operatione virtutis animarum inferior, essentiam quoque ita mutabilem nacta est, ut tota vndique sit temporalis. Atque sicut res omnino æterna in vno semper tota manet, ita mundi huius machina penitus temporalis, in quolibet temporis infiniti momento tota à mundo diuino efflat semper, statimque diffuat simul & resuat, non aliter quàm quidam putant à Sole lumen per momenta semper effundi simul totum ac diffundi, repente euanescere atque resundi. Profecto quod indiuidua æternitas ipsa metitur, indiuiduum esse necesse est. Quod ergo diuisibilem habet essentiam tum ex partibus, tum ex naturis pluribus constitutam, qualis est mundi machina, cum indiuidua æternitate non congruit, sed cum tempore potius diuisibili, quo mensuratur, quo cum perpetuo labitur. Præterea diuisibilem motu virtutem actionemque fortitur, quapropter mundi moles momentis singulis tota simul ex non esse incipit esse, atque desinit, iterumque renascitur, quemadmodum in motu & tempore (quibus omnino subiecta est, momenta profluunt tota singulatim simul & resuunt. Quod quidem ita insuper confirmatur, quod perpetuo cœlestium motui virtute opus est infinita. quam cum terminatum mundi corpus neque ex se habere, neque totam simul ab alio possit accipere, oportet ab opifice suo atque motore paulatim momentis singulis haurire. Haurire inquam momentaneum, & subito euanescentem.

Siquidem & temporalis essentia omnino temporaliter accipit, & terminata natura capax æternitatis, cuius infinite totaque simul potentia est, esse non potest. Sanè & natura mundi infinitatem simul non potest accipere. Et æternalis infinitas cum indiuidua totaque simul constet, à nullo potest accipi paulatim.

Hic Proculus ista distinguit. Essentias immobiles esse quidem à Deo quodammodo semel, sed à seipsis suamet virtute seruari. Nam cum sine motu totæ simul inde sint, ideo stabiles per se deinde perseuerare posse quodammodo, suæque virtutis iam à quibusdam potentiis suis in suos actus posse procedere. Quamobrem tales essentias per se subsistentes nominat, sequæ

quodammodo producentes affirmat; machinam verò corpoream, & post animæ motum, tempusque, & vna cum motu temporeque corporeo profluentem, nihil habere stabile, nullamque habere virtutem suimet seruatricem. Itaque non substantialem aut veram, sed vmbrailem omnino falsamque, qua Manichæorum more cognominat, perpetuò dilabentem, perpetuoque influxum desuper instaurante prorsus egentem, quasi corporis vmbra in aqua velocissimè perfluente. Hinc illud Timæi. Mundum intelligibilem semper quidem esse, nunquam verò fieri dicimus, sensibilem verò fieri certè semper, esse nunquam.

Hic Proculus addit mundum illum numero eundem semper existere, hunc verò non propriè vnum eundemque numero esse vnquam, sed potius vnum, eundemque numero continuè recreari. Et quantum corpus est, fieri semper, atque incipere, quantum verò à mente diuina dependet, factum esse semper, finemque subito consequi. Sed huius paradoxon finem iam habeat. Quoniam igitur tota sensibilis machina vanitas quædam est, vanitatisque quotidie sensibus causa, ideo exclamauit Salomon. Vanitas vanitatum, & omnia uanitas. Non est igitur in rebus sensibilibus veritas. Sed nunquid in anima? Forsitan est in anima, non tamen (ut opinatus est Protagoras atque Epicurus) in ea parte animæ quæ sensus est, quia extra se respicit, & cum passione quadam sentire compellitur, frequentibusque nugis deluditur sensibilibus. Propterea Xenophanes, Parmenides, Zeno Melissus, Stilpo, dixerunt nihil veri sensibus comprehendendi. Idem fermè Anaxagoræ Empedoclique placuit & Platoni. Nam etiam si quis dixerit esse aliqua sensibilia eodem modo semper manentia, & quæstionem nobis de Sole atque stellis afferat, in quibus facile conuinci non possit, quod cita mutabilitate nos fallant, illud certè nemo est qui non cogatur fateri, nihil esse sensibile quod non habeat simile falsum, ita ut internosci non possit. Nam ut alia prætermittam, ut Augustinus inquit, omnia quæ per corpus sentimus, etiam cum ea non adsunt sensibus, imagines tamen eorum patimur tanquam prorsus adsint, vel in somno, vel in furore. Quod cum patimur omnino, vtrum ea ipsis sensibus sentiamus, an imagines sensibilibus sint, discernere non valeamus. Si igitur sunt imagines sensibilibus falsæ, quæ discerni ipsis sensibus nequeunt, & nihil percipi potest nisi quod à falso discernitur, non est consti-

totum iudicium veritatis in sensibus. Atque fieri fortè potest, ut sensus aliqua verè percipiat, ut Aristoteli placuit, nunquam tamen discernit verè ne an contra percipiat, & cum veritas rerum naturalium in eo consistat, ut diuinæ mentis congruant rationibus, quemadmodum veritas artificiorum, ut congruant artificiosæ mentis ideis, sensus congruitatem eiusmodi non agnoscit, ideoque non habet veritatis examen. Rursus, cum cognoscentis potentiæ veritas, nunc oritur, quando potentia rebus congruit cognoscendis, perficiatur autem, quando rerum adæquatur ideis sensus, qui neque illam congruentiam, neque adæquationem animaduertit, caret iudicio veritatis.

Adde quòd sensus non comprehendit intimam meramque rei substantiam, aut quo ordine in natura res quælibet disponatur, quod totum ad rei ipsius pertinet veritatem, sed subito impulsu allicitur qualitarum ad prosequendum vel fugiendum, in quo corporis sui commoditati indulget potius quàm veritati rerum comprehendendæ. Ergo non est in sensu veritatis iudicium constitutum. Constitutum est autem in ratione. Nam priuationes rerum per habitus cognoscuntur, per lumen tenebræ, per voces verò silentium. Priuatio veritatis est falsum. Ratio nostra sensibilia & sensus redarguit falsi, quod facere non potest, nisi præsentis veritatis examine. Rursus ratio veritatem ipsam ita describit: Veritas est naturæ cuiusque pura integritas, & integra puritas. Non definitur autem veritas nisi sub naturali veritatis & propria ratione. In ipsa ratione veritatis est veritas. Est igitur veritas in animo veritatem definiente, sicut in animo falsum redarguente. Quinetiam est in animo rem quamlibet describente. Speciei siquidem definitio ipsam rei essentiam complectitur tum integram, tum ab extraneis contingentibus segregatam. Si ergo in ipsis speciebus est veritas rerum, species autem definitione comprehenditur, & definitio mente, quis non videat esse in mente hominis veritatem? Quæ si est immortalis, satis declarat mentem cui inhæret inseparabiliter, incorruptibilem esse. Nam qualitas, quæ alicui subiecto inhæret inseparabilis, subiecto sublato perditur.

Inhæreret autem veritatem nobis inseparabiliter, illud testimonio esse potest, quòd vel assidue, vel saltem arbitrari nostro, subito & sola mentis in seipsam collectione tum falsa multa damnamus, tum

communes naturas aliquas definimus, siue naturalium rerum, siue moralium, siue artificiorum. Quinetiam ex eo idem concluditur, quòd in superioribus ostendimus, idearum perspicuas rationes menti stabiles inhære. In ipsis verò rerum omnium veritates comprehenduntur. Præceteris autem declarat hoc summopere vis ipsa rationalis, quæ non minus homini naturalis est, quàm auibus sit volatus, canibusve latratus. Per hanc Socrates homo est, per hanc homo ab aliis animalium distinguitur speciebus. Rationalem vim vocamus in præsentia ipsam rationcinandi virtutem, quæ consequentia cernit, id est, quid ex quoque sequatur animaduertit gradatim, & à præcedentibus ordine percurrit ad consequentia. Hæc est naturalis quædam Dialectica, id est ars differendi, ab origine hominibus insita. Per hanc pueri & imperitissimi quique partes suas quibuscunque possunt coniecturisq; assertionibus tutantur Atq; omnis hominis sermo, totaque vitæ actio & consultatio nihil est aliud quàm argumentatio quædam. Ac nemo est tam insanus quin ex aliis alia inferat argumentando, & ita fermè ab imaginibus ad imagines argumentetur, sicut sana mens ad res ipsas percurrit ex rebus. Vis ergo rationalis nunquam ab homine separatur. Quod si ab hac non separaretur veritas, ab anima nunquam veritas separabitur. In hac differendi virtute duæ insunt necessitates, altera secundum subiectum eius; altera secundum eius usum. Prima quidem necessitas est, quia ipsa differendi facultas toti hominum speciei sic insita est, ut nequeat separari. Secunda vero necessitas, quæ in eius usu conspicitur, duplex est, absoluta & relatiua. Absoluta quidem necessitas in tribus apparer, scilicet in disciplinæ principiis, definitionibus, proprietatibus. Principia sunt huiusmodi. Quicquid est, aut per se est, aut per aliud. Contraria sua se natura repellant. Omne totum est maius sua parte. Suum cuique tribuendum est. Hæc & talia plurima necessariò ita se habent, ut necessariò cognoscantur, quia neque possunt vnquam aliter se habere, neque ab aliquo quamuis imperitissimo ignorari. Est quoque necessitas in definitionibus, ut quando sic circulus definitur. Circulus est figura à cuius centro ad circumferentiam omnes lineæ in rectum ductæ sunt æquales. Quamuis enim vel talis verborum coniunctio in ore, vel figuratio talis in puluere sit contingens, veritas ta-

men illa est necessaria & sempiterna, quod illa ipsa circuli est natura. Similis in proprietatibus necessitas est, id est, quod circulus est capacissimus omnium figurarum.

Atque, ut cætera omittam, nonne in numeris à necessaria veritate, in necessariam veritatem absque fine transcurrimus? Bis duo quatuor. Ter tria nouem. Bis quatuor octo, & quæ sequuntur. Idem facimus in compositionibus comparationibusq; figurarum. Quod si definitiones proprietatesque in principiis confluunt quia effluunt ex principiis, principia verò necessariò insunt semper virtuti rationali, unde assidue aliqua de re ratiocinetur, sit ut hæ tres necessariæ veritates, quæ omnes absolutæ vocantur, in naturali hominum dialectica comprehendantur.

Restat necessitas relatiua, quæ etiam tres habet partes. Alia quidem est in positione, in conditione alia, alia in demonstratione. Prima est talis. Res nulla potest non esse, dum est. Animal dum viuit, necessariò viuit, & similia quæ de præsentis tempore affirmantur. Ex quibus necessitas habetur præteriti atque futuri. Quod factum est, infectum esse nō potest. Quod futurum est, non potest non fore. Secunda talis est. Si corpus viuit, est necessariò. Si animal currit, mouetur. Tertia est huiusmodi. Omnis pars minor est quàm totum. Caput humani corporis pars est. Ergo caput illud est humano corpore minus. Hæc conclusio ideo omnino necessaria est, quia duæ præcedentes propositiones necessariæ sunt simul iunctæ. Necesse est enim caput esse minus corpore, tum quia pars est minor toto, tum quia ipsum est pars corporis. Quapropter in his quoque tribus, positione, conditione, demonstratione, tres sunt necessariæ veritates. Ac si tria ipsa in humana ratione sunt cum disputat, tres quoque hæc veritates necessariæ sunt in ipsa. Et quia disputat semper, etiam dum tacemus, & dum dormimus (tota enim hominis vita perpetua quædam ratiocinatio est) idcirco semper sunt illæ veritates in ratione. Quæ semper, ut ita loquar, & veridica est, & verificata. Veridica in primis tribus veritatibus, quæ necessariæ per se sunt, etiam si ratio nihil egerit. Verifica in tribus aliis, quia ratio necessitatem quandam illis imponit per positiones, conditiones, demonstrationes, siue per quoslibet alios argumentandi modos. Contingit enim hoc animal viuere, non tamen dum viuit, contingit viuere, sed est necessarium. Contingit hunc hominem moueri, non tamen si currat, imò sequitur ne-

cessariò. Contingit hoc caput esse hoc corpore minus, sed positum ab animo prioribus illis duabus propositionibus, est necesse, quamuis in ipsa specie capitis & specie corporis nunquam id sit contingens. Si ratio in aliis necessariam veritatem capit, in aliis ipsa facit, & capit semper & facit, quis negabit in ea esse perpetuam veritatem? Imò quis negabit eam esse necessariam, postquam quæ per se necessaria sunt, ita ut sunt accipit, nequemutat, quæ verò non sunt per se talia, ipsa virtute sua efficit necessaria? Et multo magis necessaria est quàm omnia quæ positionibus, conditionibus, argumentationibus necessaria efficiuntur ab ipsa. Ipsa igitur absolute est necessaria ferme ut principia illa disciplinarum, definitiones proprietatesque perpetuæ. Quapropter humana ratio vel necessario fuit semper & erit ut illa, vel saltem necessario semper erit. Nam quid prohibet fore perpetuam rationem? cuius perennis actio nihil est aliud quam ex absoluta æternitate firmiter intra manente, relatiuam æternitatem temporalibus quibuslibet contingentibusque præstare, atque ex necessariis & contingentibus seriem vnam digerere necessariam & perpetuam? Si erit semper, viuet & semper. Non enim est ratio nisi viuens, & in viuente.

*Obiectio Scepticorum & responsio, quod aliquid certum sciatur.*

## C A P V T VII.

**N**Eque audiendi sunt Sceptici, si negauerint in animis nostris esse veritatem, quia videantur de singulis dubitare. Non enim de omnibus dubitat animus, ut apparuit in omnibus necessariis veritatibus quas narrauimus, & similibus. Hoc mihi candidum videri scio. Hoc mihi iucundè olere scio. Hoc dulciter gustum attingere scio. Quis nesciat summum bonum esse, quo nihil præstantius? Et esse vel in homine, vel extra hominem, & si in homine, vel in animo, vel in corpore, vel in utroque. Quis non certò sciat Deum esse, vel non esse? si sit, oportere vnum esse, vel plures, & si plures, aut finitos numero, aut infinitos? Oportere Deum esse corporeum, vel incorporeum. Ac si non sit corporeus, esse necessario incorporeum. Item regulas multas astrologiæ & Medicinæ certas esse declarat effectus, ut arithmeticas & geometricas prætermittam, quibus nihil est certius. Et quod maius est, si quando animus de re aliqua dubitat,



tunc etiam de multis est certus. Nam se tunc dubitare non dubitat. Ac si certum habet se esse dubitantem, à veritate certa id habet certum. Quippe qui se dubitantem intelligit, verum intelligit, & de hac re quam intelligit, certus est, de vero igitur est certus. Atque omnis qui verum sit veritas dubitat, in seipso habet verum, unde non dubitet. Nec ullum verum nisi veritate verum est. Non igitur oportet cum de veritate dubitare, qui potuit undecunque dubitare, ut Augustinus inquit, præsertim cum non modo se dubitare intelligat, sed quòd hoc intelligit animaduertat, & quòd animaduertit agnoscat, ac deinceps in infinitum. Discernit præterea dubium animum ab indubio. Nec cum latet quando satius foret non dubitare, & quam ardentem cupiat veritatem. Certitudinem cum dubio comparat, quo fit ut de utrisque sit certus. Est insuper certus se inuestigare, sentire, vivere, esse. Siquidem nihil dubitat qui non est, vivit, sentit, & inuestigat. Certus quoque est se non esse primam veritatem, quippe cum ipsa per se non dubitet. Scit eam dubitatione & errore non implicare. Scit oportere se in iudicando falli aut non falli. Scit siue fallatur, siue non fallatur, dum iudicat, se proculdubio vivere. Postremo non ignorat esse extra animum suam aliquid aliud in natura quod ipsi inferat dubium. Tales quædam certæ veritates in ipsa etiam dubitatione perspiciuntur. Quo admonemur ut Aristonem, Pyrrhonem atque Herillum non metuamus, qui dum opinantur nihil à nobis verum sciri, ipsi proculdubio sciunt opinionem hanc suam oportere aut veram esse, aut falsam. Sciunt si vera est, non nihil ab homine verum intelligi. Sciunt si falsa est, opinionem eis oppositam esse veram scilicet aliquid ab homine verum sciri.

*Obiectio Peripateticorum & responsio, quod veritas animum familiariter habitat.*

### C A P V T VIII.

**S**Ed nunquid metuendi Peripatetici sunt, qui negant familiariter habitare in animo veritatem, ex eo quòd tam pauci eius periti esse videantur, & quisquis eam nouerit, tanto ab infantie tempore fuerit indoctus? Certè non esse timendos, Augustinus ubi mentem Platonis exponit, ita testatur. Aut est aliquid in animo quod in præfenti cogitatione non est, aut non est in Musico ars Musica, cum de sola geome-

tria cogitat. Hoc autem falsum est, illud igitur verum. Non autem quicquam se habere animus sentit, nisi quod in cogitationem venerit. Potest igitur aliquid esse in animo, quod esse in se animus ipse non sentiat. Id autem quamdiu sit, nihil interest. Nam si diutius fuerit in aliis animus occupatus, quamvis intentionem suam in ante cogitata facile possit reflectere, obliuio vel imperitia nominatur. Sed cum vel nos ipsi nobiscum ratiocinantes, vel ab alio bene interrogati, de quibusdam liberalibus artibus vera percipimus, ea quæ inuenimus, non alibi quàm in animo nostro, inuenimus. Nam ob id ipsum oportet animum adhuc inuenienda relictis externis secedere in seipsum. Neque idem est inuenire, quod facere aut gignere. Alioquin æterna gigneret animus inuentione temporali, nam æterna sæpè inuenit. Quid enim tam æternum, quam circuli ratio, vel si quid aliud in huiusmodi artibus neque non fuisse aliquando, neque non fore comprehenditur? Hinc manifestum est immortalem esse animum humanum, & omnes veras rationes in secretis eius esse, quamvis eas siue ignorantia siue obliuione aut non habere aut amisisse videatur. Fac te aliquid esse oblitum, aliosque te velle quasi in memoriam reuocare. Dicunt ergo illi, nunquidnam hoc est, aut illud? diuersa velut similia proferentes. Tu verò nec illud vides quod recordari cupis, & tamen vides non hoc esse quod dicitur. Nunquidnam tibi cum hoc euenit, integra videtur obliuio? Nequaquam. Nam ipsa discretio qua non admittitur quod falsò amoueris, pars quædam recordationis est. Tales ergo nondum verum vident, falli tamen decipique non possunt, & quid querunt, satis norunt. At si tibi quispiam dicat te post paucos dies risisse quam natus es, non audes dicere falsum esse, & si auctor sit cui fides habenda est, non recordaturus, sed crediturus es. Totum enim tempus illud validissima tibi obliuione occultum est. Hæc igitur ab illa obliuione plurimum differt, sed illa media est. Nam est alia recordationi reuiscendæ quæ veritati propior atque vicinior. Cui simile est quando videmus aliquid, certoque agnoscimus nos id vidisse aliquando, atque nosse affirmamus, sed ubi, aut quando, aut quomodo aut apud quem nobis in notitiam venerit, satagimus repetere atque recolere. Ut si de homine nobis contigerit, etiam queramus ubi eum nouerimus. Quod cum ille commemorauerit, repente tota res memoriæ quasi lumen infunditur, nihilque amplius ut remi-

niscamur laboramus. Tales sunt qui bene disciplinis liberalibus eruditi sunt. Siquidem illas sine dubio in se obliuione obrutas erunt dicendo, & quodammodo effodiunt, non tamen contenti sunt, neque se continent, donec totam faciem veritatis cuius quidam in illis artibus iam splendor subrutilat, latissimè, arque planissimè intueantur. Sed in iis quidam falsi colores atque formæ velut in speculum cogitationes effundunt, falluntque inquirentes sæpè ac decipiunt, putantes illud totum esse quod norunt, vel quod inquirunt, ipsæ sunt illæ imagines magna cautione vitandæque deprehenduntur fallaces, cum cogitationis variato quasi speculo variantur, cum illa facies veritatis vna & immutabilis maneat. Quamuis enim alterius atque alterius magnitudinis quadratum sibi cogitatio depingat & quasi ante oculos præferat, tamen mens interior quæ vult verum videre, ad illud se potius conuertit secundum quod iudicat omnia illa esse quadrata. Quid si quispiam nobis dicat secundum idem iudicare, quo videre oculis solet? Quare ergo dicit, si tamen verè erudita est, pilam veram

vera planitie puncto tangi? Quid tale vquam oculis vidit, aut videre potest? cum ipsa imaginatione cogitationis fingi quicquam huiusmodi non possit? An non hoc probamus, cum etiam minimum circulum imaginando animo describimus, & ab eo lineas ad centrum ducimus? Nam cum duas duxerimus, inter quas quasi acu vixungi possit, alias iam in medio non possumus ipsa cogitatione imaginaria ducere, ut ad centrum sine vlla commixtione perueniant, cum clamet ratio innumerabiles posse duci, ita ut in omni earum interuallo scribi etiam circulus possit. Hoc cum illa phantasia implere non possit, magisque ipsi oculi deficiant, siquidem per ipsos est animo infusa, manifestum est, & multum eam differre à veritate, & illam, dum hoc videtur, non videri. Idem contingit quando ratio lineam diuidit in infinitum, quod neque cernit sensus, neque assequitur phantasia. Ex omnibus his Augustinus confici arbitrat, quod & Plato in Epistola ad Syracusanos docet, ut veritates ipsæ rerum mentem nostram familiariter habitent, ostendantque sua illam familiaritate perpetuam.



# THEOLOGICÆ PLATONICÆ,

DE IMMORTALITATE ANIMORVM,

EODEM FICINO AVTHORE,

(::) LIBER XII. (::)

*Rationes multa & signa, quòd mens humana intelligendo  
mente diuina formatur.*

(::) CAPVT PRIMVM. (::)



Lato, Philosophorum pater, in Epistola ad Syracusanos, de comparanda sapientia disputans: Quinque, inquit, potissimum ad rei cuiusque scientiam concurrere oportere; nomen, descriptionem, idolum, formulam & ideam. Exemplum

de circulo, sicut ipse, ponamus, ut idem de cæteris omnibus arbitremur. Animus noster ad scientiam circuli commonetur sæpenumero per auditum, quando auditum hoc nomen circulus, tum circuli descriptionem huiusmodi: Circulus est figura reflexa, quæ æquis interuallis vndique distat à medio. Admonetur quoque per

visum, quando circulum vel torno factum ex ligno videt, vel in pariete signatum, qui non verus est circulus, quoniam non perfectus, sed veri idolum & simulacrum. Per hæc tria commonitus animus avidus veritatis, eruit in actum ingenitam sibi circuli formulam, per quam velut characterem ad ipsam circuli ideam in mente diuina vigentem aciem dirigit, quæ quidem directio est scientia circuli. Ostendit autem in ea Epistola Plato, animum corpore clausum non posse ad ideam absque quatuor illis gradibus surgere, quia oportet illum iam diu infra se lapsum, primum per illa tria in se reuerti: deinde per formulam quam in se habet, supra se ipsum ascendere ad ideam. Sicut enim formæ rerum à mente diuina in materiam per infimam animæ virtutem traiciuntur, id est, per semina formarum virtuti huic infusa, ita è formarum corporalium perceptione non fit transitus in diuinæ mentis ideas, nisi per summam animæ partem, id est, per innatas formulas idearum, vt à formis corporis, quæ omnino temporales sunt, quia tam essentia quàm affectione mutantur, transcendatur in formas diuinæ mentis æternas omnino, quia nulla ex parte mutantur, per mentis humanæ formas, partim æternas, partim etiam temporales, quia per essentiam manent, per affectionem verò ex habitu vertuntur in actum, atque contra. Merito enim faber qui materiam formaturus est, ipse disponit. Idcirco mens illa sublimis mentem nostram per ideas quotidie formatura, ad hanc formationem olim disposuit eam per characteres idearum, signauitque, quemadmodum Propheta canit, Super nos vultus sui lumen, vt lumen in suo lumine videremus. Videlicet vt per formulam opportunè excitatam, idea non aliter accenderetur in mente, quàm aut ignis per sulphur in ligno, aut per naturam perspicuam serenamque in aëre lumen. Et quia, sicut natura ad suam se habet materiam, ita penè Deus ad suam, natura verò coelestem (vt quidam putant) materiam semel cunctis formis ornaui, elementalem singulis momentis exornat, ideo probabile est Deum quoque materiam (vt ita loquar) angelicam semel ideis omnibus impleuisse, animalem implere quotidie. Huic autem Platoniorum mysterio similis ex quadam parte videtur esse Aui-cennæ Aigantelisque opinio. Opinantur enim materiam tum elementalem, tum intellectualem sub luna diuinæ cuidam menti tanquam formatrici subesse, cuius in-

strumenta sint ad elementalem materiam disponendam formæ corporeæ, sed ipsa tandem præparatæ materiæ substantiales imprimat formas. Similiter humanam mentem per imagines corporum, per sensus phantasiamque acceptas ita sæpè disponi, vt in diuinam illam intelligentiam se conuertat, atque ab illa quatenus conuertitur, eatenus formari quotidie. Neque aliud quicquam esse quod intelligere dicimus, quàm ab intelligentia diuina formari. Quod autem dicimus meminisse, id esse videlicet, habitum iam contraxisse quo facile ad diuinam mentem pro arbitrio conuertamur. Sed mittamus Arabes in præsentia, quamuis Platoni satis amicos. Ad Platonica redeamus.

Quod autem res verè cognoscere nequeamus, nisi formemur ideis, his rationibus Plato sibi persuasisse videtur.

Prima. Nomen circuli mutabile est. Potest enim vsu linguæ variato aliter appellari. Si est ita, descriptio quoque mutabilis est, quæ componitur ex nominibus. Idolum quoque mutabile est. Potest enim ligneus circulus destrui, & qui pictus est, aboleri. Formula quoque ex eo mutabilis est, quòd ex potentia siue habitu migrat in actum, deque actu rursus in habitum. Illud autem quod per scientiam circuli comprehenditur, est penitus immutabile, quoniam & vniuersale est, & non potest aliter se habere. Quapropter idea immutabili opus est ad rationem circuli immutabilem comprehendendam.

Secunda. Circulus qui vel torno fit, vel pingitur, non est purus, quia non nihil rectæ figuræ habet admixtum. Similiter phantasia, quæ sequitur illius aspectum, puram rationem circuli non assequitur, quæ est figura eius opposita penitus segregata. Ratio quoque si phantasie auscultauerit, fallitur, oportet ergo vt ad puram ideam recurrat, qua cernat purum.

Tertia. Scientia vera circuli in eo consistit, vt quid sit circulus, cognoscatur. Quatuor verò illa qualitatem potius significant quàm substantiã, quia & ipsa sunt qualitates.

Quarta. Verus perfectusque cognoscendi modus, modum sequitur essendi. Itaque sicut tam circulus quàm reliquæ rerum species à mente diuina per idearum ideas concipiuntur & pariuntur, sic à sequentibus mentibus per easdem cognoscendæ videntur, vt omnes scientiæ primam pro viribus scientiam imitentur. Veritas rei creatæ in hoc versatur, vt ideæ suæ respondeat vndique. Scientia verò in hoc præcipuè vt mens congruat veritati.

Non potest autem rei ipsius veritati quadrare, nisi ideæ quoque quadret, in cuius congruitate sita est veritas, ut ita per ideam, quæ rei causa est, rem cognoscatur, siquidem vera scientia est per causam. Ideo Ioannis Euangelistæ Theologia, quæ ideam appellat rationem diuinam, eam ipsam rationem vocat veritatem, cuius per eam res & verè subsistant, & cognoscantur verè.

Quinta. Intellectus quælibet creata in ipsorum rationibus absolutis intelligit & diiudicat. Et sicut plerumque eadem sensibilis a natura sua omnibus sentientibus præsto adsunt, neque mutatis istis illa inde mutantur, ita eadem intelligibiles rationes ubique & semper cunctis ratiocinantibus sese monstrant, manentque stabiles in seipsis, dum ratiocinantium animi magis minusve ad illas accedunt. Rationes huiusmodi creatis omnibus præstantiores sunt, non ob id solum quòd per ipsas tanquam regulas creata quæque probantur, reprobanturque, sed ob hoc insuper, quod tum propter amplitudinem, tum propter simplicitatem sunt priores. Quapropter in ipso sunt Deo, per quas ipse & discernit singula & disponit. Quando igitur intellectus apprehendit rationes huiusmodi, tunc apprehendit quodammodo tam Deum in quo sunt, quam res quarum illæ sunt exemplaria, prius tamen secundum naturalem originem quandam quodammodo apprehendit Deum quo illæ sunt, quam res quibus non insunt, quamvis adsint. Neque incredibile videri cuiquam debet per incorporalia exemplaria corporalia quælibet cognosci, potius quàm è conuerso. Nam per imagines sensibilium spirituales, siue in sensibus siue in speculis illæ sint, sensibilia corpora, non contrà sentimus. Quod autem ita hac in re decipiamur, ut dum spiritalia rerum exemplaria intuemur, sæpè intueri solum naturas rerum corporeas arbitremur, quid mirum, cum & infantes quando in speculis vident simulachra corporum incorporea, & somniantes quando cogitant imagines spirituales, corpora videre se credant? Sed de hoc planius in sequentibus. Adde his rationibus signa duo, alterum per intellectum, alterum per voluntatem. Per intellectum hoc pacto. In speciei naturalis seu pulchritudinis cognitione, primò quidem descriptionem pulchritudinis aliquam singulis rebus pulchris communem excogitamus.

Addimus statim proprietates aliquas pulchritudinis à descriptione deductas. Has

notiones forsitan concedemus, posse per formulam pulchritudinis menti innatam excogitari. Sed quando in hac ipsa consideratione diutius immeramur, inuenimus eam naturam pulchritudinis quam definimus, quia mera sit, esse infinitam, & quia infinita sit, esse Deum. Nullus autem sanæ mentis concesserit per formulam terminatam, & infra Deum intervallo longissimo imò incomparabili existentem, apprehendi naturam infinitam, ipsumque Deum. Igitur mens per formulam suam ex habitu eductam in actum ideæ diuinæ quædam præparatione subnectitur, cui subnecta, supra se surgit. Nulla enim res supra se vnquam attollitur, nisi à superiore trahatur. Quo enim pacto aqua volat in aërem, nisi calore aëris eleuetur? Facile autem & naturali quodam instinctu ipsa formula, cum sit ideæ radius, resilit in ideam, secumque attollit mentem cui est infusus hic radius, qui cum reducitur in ideam, refluit in eam sicut fontem, seu radius repercussus in Solem, perque nondum huiusmodi vntum aliquid ex mente & Deo conficitur. Hinc Paulus diuinus Theologus inquit: Qui adhæret Deo, vnus fit spiritus.

Signum per voluntatem, hoc est Mens in clara veritatis cognitione tam mirabili voluptate perfunditur, ut omnem humanæ voluptatis excedat modum. Talem quoque vitæ statum voluntas propter seipsum appetit solum, alia propter illum, quasi status eiusmodi in summa sit arce naturæ, ultra quem nihil super sit optandum.

His rationibus & aliis penè similibus Plato sibi persuasisse videtur nihil reuera dici posse, nisi docente Deo. Ideo in eadem Epistola inquit: Diuina mysteria verbis doceri non possunt. At si quis diutissime cum diuinis versetur, similemque illis agat vitam, subito tandem tanquam ab igne scintillante lumen veritatis effulget in animo, seque ipsum iam alit. Quod sibi scribit accidisse. Merito, quia etiam in Epistola ad Dionysium regem scripserat, omnem suæ mentis curam in diuinorum inuestigatione versari. Quam quidem inuestigationem Socrates tandem purgatione mentis affecturam quicquid cupit existimare. Ideo prætermissa quandoque solita inquisitionis sollicitudine, ad mortalem confugit Philosophiam, ut mens eius beneficio è corporeis discussis nubibus facta serenior, diuini Solis lumen semper & ubique lucis ubito caperet. Quod quidem & Socrates ipse prius, deinde Plato imitatione Socratis affecturus fuisse videtur. Sed ad institutum ordinem redeamus.

Plato in septimo libro de Republica. Cum Deum bonitatem ipsam appellauisset, adiunxit, vix quidem eam percipi posse, sed hac ignorata nihil aut verè cognosci, aut rectè agi vel publicè vel priuatim. Quod quidem ab Indis Philosophis Socratem & Platonem didicisse Aristoxenus affirmat. Idque Socrates Theâgi apertissimè declarauit, videlicet à solo Deo tam hæc quàm alia disci, quemadmodum in libro superiore narrauimus. In sexto autem de Republica, Plato Deum comparat Soli, vt in libro de amore exposuimus, vt quemadmodum summum in genere sensibilem se habet ad sensus & sensibilia, ita summum in genere intelligibilem se ad intellectus & intelligibilia habeat. Sol oculos visuros, & colores visibiles procreat. Tribuit oculis generationem, vim videndi, & videndi actum, quia sine lumine nihil actu videmus. Dat rursus coloribus generationem, ac vim qua oculos possint mouere, & actum per quem moueant. Sic Deus (vt scribit Plato) mentibus essentiam tribuit, deinde intelligendi virtutem, postremò ipsam infundit intelligentiam. Rebus quoque intelligibilibus præstat essentiam, vim qua mentem mouere queant, & actum per quem moueant. Itaque mentis actum Deus cū intelligibilem actū coniungit, sicut solis lumen oculi actū cum actū colorū. Et sicut in videndo triplex est actus, motus scilicet coloris, aspectus oculi, fulgor lumini cōnectens actus reliquos inuicem, sic in intelligendo, vbi actus intelligibilem veritas à Platone vocatur, actus mentis scientia. Actus vtrorumque nodus apud Platonem est Deus, quin efficit vt & mens scienter intelligat, & res verè intelligantur, imò facit vt ipse intelligatur. Idcirco Ioannes Euangelista inquit, Dei mentem esse viam, veritatemque, & vitam, ac neminem ad Deum proficisci, nisi per ipsam. Est enim veritas rerum intelligendarum, vita mentis intelligentis, via per quam res ipsæ menti influunt, & in qua mens rebus sit obuia. Quare & alibi dixit, eos solos veritatis spiritum videre posse, apud quos & in quibus est Deus. Nam si res bonæ sub bonitatis ratione voluntatem mouent, atque idè bonitas ipsa voluntatem mouet per bonitatem ad bonitatem, neque aliud quicquam nisi bonitatem ipsam in singulis exoptamus, sequitur vt quia res veræ sub ratione veritatis intellectum mouent, idcirco veritas ipsa per veritatem ad ipsam veritatem moueat intellectum, neque aliud quicquam quàm veritatem ipsam intellectus intelligat. Ipsam verò bonitatem & veritatem esse

Deum ambigit nemo. Lucentes oculi lucè communi lucentia vident, aures aëre communi aëre aërea audiunt. Veridicæ mentes veritate communi vera intelligunt & pronuntiant. Voluntates quoque bonæ ipsa bonitate communi afficiuntur ad bona. Et sicut oculus Solis lumine illustratus in eo corporum colores intuetur atque figuras, neque aliud quicquam re vera nisi lumen ipsum videt, licet videatur varia intueri, quia lumen ipsi infusum variis fulget splendoribus, prout à variis corporibus in visum reflectitur, atque hoc quidem lumen in corporibus reflexum oculus percipit, ipsam verò in fonte suo lucem minimè sustinet, ita mens nostra Dei radio illustrata, in eo ipso intelligit rerum omnium rationes, quarum fons est Deus, & quæ Deus ipsæ sunt, ideo & per Dei lumen intelligit, & ipsum diuinum duntaxat lumen cognoscit. Diuersa tamen videtur cognoscere, quia sub diuersis rerum inde manantium ideis & rationibus seipsum intelligit. Quamuis autem per Dei lumen quotidie omnia cognoscamus, & ipsum quoque lumen sub tali aut tali rerum figura refulgens gradatim percipiamus, puram tamen Dei lucem ab ideis omnibus absolutam, & in suo fonte penitus infinitam, non prius videbimus, quàm cum mentis purissimæ statum adipiscamur, in quo lumen ipsum vnico intuitu cunctarum simul idearum splendore refulgens contuemur. Tunc (vt inquit præco ille veritatis insignis Ioannes Euangelista) videbimus Deum sicuti est, quia Deum cognoscemus vt Deum. Nunc enim formati hac idea vel illa, videmus eum vt speciem hanc rerum aut illam. Quamuis & in hac vita secundum Ioannem Theologi filij Dei sint, quia per diuinas ideas quotidie reformantur, quarum idearum series ab eo vocatur ratio Dei, vita rerum omnium lumen mentium, non angelicarum modo, sed etiam humanarum. Humanarum inquam, omnium, quia ita illuminat omnem hominem venientem in hunc mundum, vt quicquid intelligit quisque, in ipso intelligat, & per ipsum, licet tenebræ mentes ipsum non comprehendant, quia non agnoscunt se omnia videre per ipsum. Istæ quidem vocem diuini spiritus vbicunque vult spirantes audiunt, nesciunt autem vnde vox illa veniat, quoniam tendat. Cum hæc Theologi prisca cognoscerent, Philosophiæ studium semper cum religiosa pietate iunxerunt. Principio Zoroastris Philosophia (vt testatur Plato) nihil erit aliud quam sapiens pietas cultusque diuinus. Mercurij quoque Trismegisti disputationes omnes à votis in-



cipiant, & in sacrificia desinunt. Orphei etiam Aglaophenuque Philosophia in diuinis latibus tota versatur. Pythagoras à matutino hymnorum sacrorum captu Philosophia studia inchoabat Plato non indicendo solum, sed etiam in cogitando exordiri à Deo præcipiebat in singulis, atque ipse semper exordiebatur à Deo. Sed redeo parumper ad Pythagoram Hic cum inuenisset latus longius trianguli illius quem rectangulum nominat, tantum posse quantum duo reliqua simul iuncta. hecatomben Deo simpliciter immolauit, utpote qui intelligebat nihil usquam veri sine summæ veritatis lumine posse videri. Hinc denique fingitur Minerva sapientiæ dea sola Iouis capite nata. Hinc & illud: *A* b Ioue principium Musæ, Iouis omnia plena.

*Quæstio prima de ascensu ad Deum, quomodo mens in diuinam eleuatur ideam.*

## C A P V T II.

**T**Res hic quæstiones suboriuntur. Prima, quo pacto mens in diuinam eleuetur ideam. Secunda, quam ob causam in eo statu Deum non videre nequaquam animaduertamus.

Tertia, quo pacto hanc ipsam intelligentiam Deus nobis infundat assidue, quod Plato in superioribus affirmavit. Ad primam ita in præsentia respondemus. Quando phantasia excitata per hominis alicuius figuram visu haustam, simulachro formatur humano, tunc humanæ speciei formula quæ latebat in mentis arcanis, instigata coruscet, & mentis siue rationis aciem actu format, quam formauerat habitu, formatio talis, vel intelligentia quædam ambigua est, vel ortus intelligentiæ. Postquam, ita satis formata est, hominis idea formatur, id est, ratio illa per quam Deus hominem generat. Ita verò mens per formulam hominis ideæ quadrat humanæ, sicut cera quæ ab annulo figurata est, quando diligenter annulo admouetur, suo congruit exemplari. Illa ipsa quadratio, vera & distincta hominis intelligentia est. Ideo Plato in conuiuio inquit animum diuinæ pulchritudinis amatorem, quando diuinæ rationes attingit, tunc non amplius simulachra rerum, sed res veras parere in seipso, partæque nutrire, familiarem Deo fieri, ac præ cæteris immortalem. Sed nullus hoc arcanum lucidius quam Ioannes Euangelista reuelasse videtur, qui mentem hominis, quando verum aliquid attingit, non dicit (ut solent alij) videre rem aliquam veram, sed facere

veritatem, quia scilicet re ipsa assequitur, ut Deus qui ipsa veritas est, quasi forma eius efficiatur. Tunc enim mens ideam induta fit ipsa veritas rei illius quæ per talem est ideam creata. Quod omnes faciunt contemplantes, quos, inquit Ioannes, de plenitudine diuinæ rationis accipere, quia scilicet quisquis verè contemplatur speciem aliquam rerum, accipit iam in se aliquam ex numero idearum, quarum plenitudo est ipsa diuina ratio. Consummati verò Theologi mentem aurum appellat ignitum, quia sicut aurum formam induitur ignis, per quam calefit, rarefcit & fulget, sic illa mens induta diuinæ mentis ideas, per illas tum veritatis lumine claret, tum bonitatis fomite flagrat. Paulus quoque Apostolus mentem diuinorum contemplatricem affirmat tum quotidie renouari, tum in eandem cum Deo imaginem transformari, tum vnum cum ipso spiritum fieri. Trismegistus similiter ait ex mente pura & diuinitate quodammodo vnum spiritum coalescere. Et Platonici omnes probant in rationibus contemplandis diuinam rationem tactu quodam mentis substantiali potius quam imaginato tangi, vnitatemque mentis propriam, Deo rerum omnium vnitati modo quodam inextimabili copulari. Quod Plato in Phædro & in Epinomide & alibi sæpè confirmat, præsertim quando in Phædro diuinorum ait contemplatorem à reliquis segregari, purgari prorsus, hæreere Deo, impleri Deo & in Epinomide, animum contemplatione perfectum penes diuinam vnitatem vnum prorsus euadere. Idem in libris de Republica censet.

*Quæstio secunda. Quam ob causam in eo statu Deum nos videre nequaquam animaduertimus?*

## C A P V T III.

**A**D quæstionem secundam ita possumus respondere. Sicut oculus per speciem coloris formatus videt colorem, speciem verò per quam videt, non cernit, sic forsitan intellectus quodammodo formatus idea, per hanc statim speciem ipsam naturalem intelligit, quæ per talem facta fuit ideam, ideam tamen ipsam nondum perspicue intuetur, imò non agnoscit, licet intueatur. Fortè verò sic accidit in contemplationis quadrationisue initio, sed quando pergit in contemplando, congruitque magis, ipsam quoque ideam suspicit clarius, agnoscitque, sed ubi eam suspiciat, nondum discernit.

Sicut enim pueri, dum figuras suas in eo solis fulgore, qui ambit superficiem aquæ, prospiciunt, eas non in extrinseco lumine, sed in aquæ fundo se putant videre, ita mens adhuc rudis, dum rationes rerum in sublimi videt Deo, in se aut in rebus aliis videre se putat, præsertim cum ratio rei naturalis in Deo, verbi causa ratio æris, non Deum referat prorsus ut Deum, & ut principium vniuersi solum ac liberum, sed ut exemplar æris, quo fit ut mens quando ratione ipsa diuini æris circumfunditur, Deum intelligat, non tanquam Deum, sed tanquam ærem, Deum namque videt æreum, id est, ad naturam æris circumscriptionem. Angeli verò qui cunctis simul formantur ideis, per ipsam idearum omnium congregationem, vniuersæ naturæ conspiciunt. Sic enim diuinæ substantiæ, non ex quadam ipsius parte, ut nos, sed toti ferme seipsum insinuant. Idcirco ubi illas videant, animaduertunt. Idem continget & nobis quando in Deum penitus reformabitur. Nunc verò non aliter in hac penè omnes decipimur, quàm plebei, qui cum multa nocte ad Lunam videant, aiunt se in lumine Lunæ videre, cum tamen illud sit Solis lumen, quo etiam nocte vident. Sic ingrati homines lumine proprio & naturali vera se affirmant inspicere, quæ in lumine communi diuinoque inspiciunt. Quod si globus ipse Solis aut non exoriretur atque occideret, aut à nobis in sua illa figura nequaquam suspiceretur, ita nemo sciret unde lumen hoc mittatur in ærem, quo cuncta videmus, sicut modo scit nemo unde lux demittatur in mentem qua cuncta discernimus, quia occultus est Deus, unde illa descendit. Descendit autem ita, ut sit intelligentiæ nostræ principium, medium atque finis. Principium, quia sicut ipsius oculi visio à lumine externo fit tanquam vniuersali causa, ac etiam à scintilla quadam interiore inde accensa, tanquam causa particulari, ita in nobis actus intelligendi ab ampla Dei mente pendet, & nostra. Medium verò, quia in ipsa æternas discernimus rationes quæ in æternitate sunt solum. Finis denique, quia ipsum dumtaxat cognoscimus. Nam æterna cuiusque rei ratio, in ipsa æternitate nihil est aliud secundum essentiam, quàm æternitas. Hic reuelatur diuinum illud Platonis nostri mysterium, quod in septimo de Republica legitur. Inquit enim Theologum idoneis demonstrationis fundamentis & gradibus ascendere usque ad principium vniuersi, tangere ip-

sum atque tenere adhaerentem semper his quæ adhaerent principio, quippe qui nullis sensibilibus rerum corporeis gradibus ad id contendat, sed ipsis speciebus per ipsas, ad ipsas potius innitatur, quousque ad speciem finem vniuersi perueniat. Brevis horum verborum explanatio erit huiusmodi. Theologum tum agendo, tum disputando, purgat à corporeis affectibus animam, segregat rationem à fallacibus rerum sensibilibus coniecturis, inuitat mentem, ut se ad veritatem huiusmodi se gradibus conferat, speciebus, id est, insitis ab origine formulis, per species, id est, per formationem, quæ nobis provenit ab ideis. Ad species, id est, ad ipsas ideas & rerum naturalium species considerandas. Quas species adhaerere, inquit, Deo vniuersi principio, ipse enim fons est idearum, Theologi verò mentem illis adhaerere, id est, illis se formandam insinuare, per quam insinuationem, inquit, Deum tangere, id est, diuina mente formari. Adiunxit & tenere Deum, duabus (ut puto) de causis. Tum quia mens ubi semel ita coepit, fortè nunquam talis vitæ statum penitus intermittit, tum quia postquam mente diuina multis ex partibus iam mens nostra formata est diutius contemplando, incipit usque adeo supra hominem sapere, ut se & per Deum, & Deum, & in Deo contemplari non nesciat. Vocat autem hic Deum nominibus pluribus, principium, finem, speciem. Principium, quia ab ipso omnia, & quia ab ipso exordium sumit intelligentia. Finem, quia ad ipsum & intelligentia, & omnia terminatur. Speciem, tum quia ipse est actus qui res omnes dum ab ipso tanquam principio procedunt, format & facit, atque easdem dum ad eundem tanquam finem, conuertuntur, reformat & perficit. Tum quia ipso mens quæque formatur dum intelligit veritatem. Addidit Deo nomen quartum, scilicet ipsum bonum, vel bonitatem ipsam. Proprium boni est, quod se diffundat, quod res alliciat, quod perficiat. Deus se diffundit res producendo, allicit conuertendo, perficit formando procedentia, reformando conuersa. Ponit autem ipsum bonum supra mentem, & super essentiam. Super mentem, scilicet, eam quæ est inuisibilis oculus veritatis capax, avidus bonitatis. Nam Deus non capax veritatis dicitur, non cupidus bonitatis, sed est ipsa veritas atque bonitas. Potest autem secundum excellentiorem sensum vocari mens, tum quia diuina veritas sui ipsius non est ignara, tum quia exuberantia quædam diuinæ bonitatis mentes inde effluunt plurimæ. Super essentiam quoque

quoque eam locatur Deus, quæ est ipsius esse subiectum. Quinetiam locatur super esse illud quod est actus essentiae. Talis enim actus quia potentiae passivæ miscetur, impurus est, & infinitus. Vocatur tamen à Peripateticis esse quantum ipse est purus & absolutus actus, per quem omnes essentiae actum essendi suscipiunt. Plotinus autem & Proclus ipsum vnum bonumque super ens his rationibus collocant. Vnius bonique ipsius influxus latius sese propagat quam entis influxus. Materia siquidem informisque potentia magis vnius bonique particeps est dicenda, quam entis. Siquidem esse fit per formam, materia verò est informis, vna tamen materia dicitur, & auida boni. Atque hanc argumentationem à Dionysio Arcopagita accepisse videntur.

Præterea quemadmodum non idem est multitudo atque nihilum, ita non est idem ens ipsum atque vnum. Neque tamen pariter disposita sunt ens quidem hinc, & inde vnum, ne duo rerum principia stultè ponantur. Neque rursus ens super vnum, siquidem vnum particeps fieret entis, neque amplius vnum, sed duo, id est, vnum simul ensque foret. Sequitur igitur, ut super ens sit vnum. Denique quanto simplicius quiddam significat unitas quam ens, in quo essentia & esse clauduntur, tanto magis primo rerum principio congruit. Neque segregari permittunt esse alicubi ab essentia, ne proprius actus usque à propria potentia segregetur. Neque mirum cuiquam videri volunt quòd principium rerum nominent unitatem. Sic enim distinguunt. Aut nominandum est unitas, aut multitudo, aut ex utrisque compositum. Sed non compositum, ne ab illo dependere cogatur, qui diuersa in vnum conciliauit. Non multitudo unitatis expers, quia & ipsum omni virtute, & vniuersum omni vnione carere. Rursus in principio omnium omnis esse debet potentia. Ergo si ipsum multitudo ipsa sit, quatenus in multitudinem quælibet laberentur, eatenus potentiora euaderent. Quoniam verò quatenus ad unitatem accedunt, eatenus valentiora sunt, atque contrà, sequitur ut principium rerum propriè sit unitas appellandum. Denique cum vnione quadam propriè singula fiant seruenturque, quis non viderit, unitatem ipsam esse causam, omnia facientem atque seruantem? Item bonum omnia simpliciter appetunt, esse verè non simpliciter, sed bene esse duntaxat. Fortè etiam si bene esse omnino nequeant, esse non appetent, ut probat Olympiodorus,

utpote quæ esse appetant gratia boni. Bonum igitur cum finis sit vltimus, nimirum primum omnium est principium. Si super ens existit, multo magis super vitam atque mentem. Quando verò vnum bonumque dicunt, idem semper intelligunt. Sicut enim in ordine rerum bene esse in vnione consistit, quoniam malum dissensione & diuisione contingit, sic & super ordinem vniuersi idem est vnum ipsum atque bonum, cuius splendor est pulchritudo, quæ nihil est aliud quam multarum rationalis ordo formarum in mente, anima, natura, materia, inde refulgens, supra quam pulchritudinem esse vnum probant, quia illa composita sit. Rursus super eam esse bonum, quia omnia, & semper bonum appetunt, pulchritudinem verò sola quæ cognoscunt eam, & postquam eam nouerint. Item pulchritudinem gratia boni desideramus, sperantes videlicet profuturam. Postremo bonum reuera habere volumus, sæpè tamen nobis est factum, si palam pulchritudinem vdeamur habere. Beati nimirum, quos vniuersi pulchritudo boni ipsius splendor, in ipsum bonum amore transformat, præsertim quia dum transformatur in bonum, pariter reformat in vnum, ideoque ipsi bono coniungit in vnum. Siquidem ipsum vnum bonumque, tanquam idem, & per omnia, & super & ista pariter dilatantur, pariterque ab omnibus etiam sine cognitione naturali desiderio appetuntur. Neque differre inter se tanquam duo quædam equaliter disposita possunt, ne duo rerum principia sint. Neque vnum super bonum esse potest, ne quid melius optabiliusque bono esse dicatur. Neque rursus bonum super vnum, ne quod bonum dicitur, desinat esse bonum. Vnum ergo bonumque sunt penitus idem, quando equaliter appetuntur, quemadmodum diuisio atque malum tanquam idem equaliter fugiuntur. Beatus qui bono prorsus vnitur. Vnitur autem non intellectuâ virtute propriè. Hæc enim cum sit multiplex, atque infra intelligibile collocetur, neque congruit unitati, neque quod intelligibile, id est ens vniuersum supereminet, attingere potest.

Adde quod cum vnum bonumque instinctu quodam antecedente intelligentiam, appetatur, consequens est ut tactu quodam super intelligentiam attingant, tactu (ut ita loquar) vnifico, per unitatem videlicet nostram, quæ intelligentiam superat, animamque ipsam ipsi rerum omnium unitati bonitati que non imaginaria intelligentiæ copula, sed vera substantiæ ipsius

vnione coniungit, vnde non leuis quædam & extrinseca particularisque lætitia, sequitur quasi videntis bonum vel audientis, sed vehemens intrinseca vniuersalis voluptas efficitur, quasi gustus tactusque intellectu superioris suauitatem ipsam intelligibili superiore gustantis iam penitus atque tangentis. Profectò naturalis sitis liquorem appetit priusquam sensu sitire nos agnoscamus, ac postquam agnouimus, rursus appetimus. Appetitus qui sensum sequitur, imaginarius est, & à substantia nostra remotior, antecedens verò, substantiæ intimus. Quamobrem cum liquorem gustu consequimur, non sequentis propriè, sed antecedentis appetitus virtute complectimur, & in substantiam nostram perfectè transferimus. Similiter non tam appetitio quæ mentis actionem sequitur, quam quæ præcedit tanquam principium motus, motionis fine perfruitur, dum substantialem conficit copulam, ideoque votum sola penitus implet.

*Quæstio tertia. Quo pacto Deus nobis intelligentiam infundit assidue.*

### C A P V T III.

**S**ed hinc iam ad quæstionem tertiam descendamus. Hunc esse Platonis nostri sensum arbitror, quando scribit & intellectui scientiam, & intelligibilibus veritatem ab ipso bono infundi, quòd videlicet beneficis ille, & viuificis actus omnium, qui Deus est, ambit opera sua semper, ac se inferit vniuersis. Potissimum verò lucens in mentis arcanis, tum eius aciem purgat, acuit, illustrat, accendit assidue, tum formulas infinitas menti viuificat, ita vt quoties curis vacui animum ad veritatis indaginem applicamus, formulæ illæ Deo viuificante viuaciores effectæ, promptius palam erumpant, ac mentis acies Deo irradiante succensa, lucidius ardentiusque inspiciat. Vbi ad ipsum intelligendi actum Deus se habet tanquam agens primum atque commune, formula tanquam agens proprium atque secundum, simulachrum tanquam incitamentum, mens tenet materiæ locum.

Sed hanc rem exemplo consideremus, vt planius videamus, qua ratione actus intelligendi in nos descendit ex Deo. Si Deus ad creandæ mentis ideam in se vigentem, mentem nostram temperat procreando, & secum maximè configurat, atque ex lyra in lyram similiter temperatam motus sonus-

que transit, quid mirum est sonante diuina mente intelligendo mentem hominis consonare? Efficit faber aliquis specula mille, his factis dispositisque in ordinem sese obicit. In mille speculis mille fabri resultant imagines. Mouet quandoque faber seipsum hunc in modum, vt oculum suum ad reliqua membra sua circumspectenda conuertat, & membra pro viribus conuertat ad oculum. Hos motus imagines in speculis imitantur. Ad motum viuientis oculi imaginarij cuncti mouentur, ad motum membrorum viuientium, imaginaria membra. Similiter Deus animas procreat, deinde his sese obicit tanquam speculis, per quam obiectionem in singulis imagines fiunt Dei. Quæ quidem imagines mentes ipsæ sunt animarum, ita vt mentes tum multæ sint, quia multæ sunt animæ in quibus sunt, tum vna cunctæ, quia vnus est Deus quem referunt. Mens autem quæque per vim intelligendi vim Dei refert ideas concipientem, per formulas autem refert ideas. Hinc etiam propheticum illud quod supra tetigimus, aperitur. Signatum est super nos lumen vultus tui Domine, & in lumine tuo videbimus lumen. Nempè Deus per vim suam foecundam qua ideas concipit discernendo, vim præstat seruatque menti per quam ideas attingat intelligendo. Iterum Deus per ideas ipsas iam conceptas, & ratione discretas, imprimit & seruat menti formulas idearum. Ad Dei motum, id est, ad actum Dei, continuus fit motus in mentibus. Quonam pacto? Vis quæ in Deo est, ideas concipiens, ad ipsas quodammodo se flectit ideas, ideæ ad eam vim mutuo se reflectunt. Interea concordia quadam temperatione contingit, vt vis intelligendi in hominis mente, si expedita sit, in Deumque erecta, se vertat ad formulas, & formulæ ad vim conuertantur intelligendi. Atque ita mentis actus mirabili consonantia Dei actus perpetuo imitatur. Quoniam verò vultus in speculo quando videtur aspicere vultum vnde manat, reuera potius aspicitur quàm aspiciat. Ideo Paulus Apostolus ait: Cum Deum cognoueritis, imò cogniti sitis à Deo. Sic igitur superior animæ nostræ vultus, diuini vultus imitatio à Platonice nominatur, vsque adeò vt Plotinus Theodorusque Asinius & Iamblichus censuerint illam hominis mentem quæ non humana est, sed diuina, in mundo intelligibili viuere & operari continuè per continuum intuitum idearum. Mouerunt autem Plotinum Theodorumque & Iamblichum ad hoc duc potissimum rationes.

Prima, Animæ suprema mens, quia secundum se intellectualis essentia est, ideo intelligit per essentiam, sicut per essentiam ignis calet, & aqua friget, licet potentia animæ mente inferior per essentiam non intelligat. itaque sicut ignis semper calet, ita mens semper intelligit. Obiecta verò intelligentiæ sunt species ipsæ rerum æternæ. At intellectus intelligendo non obiectum simulachris fallacibus hæret, sed ut verè intelligat, ipsis vnitur obiectis. Ergo mens semper est æternis speciebus vnita, quo fit ut sedulo ad eam colat æternitatis. Huc illud Iamblichi tendit. Intellectus nostri esse non est aliud quàm intelligere numina. Putat enim sicut idem actus est quo & sol lunam illuminat, & luna inde illuminatur, respicitque luminis similitudine solem, ita eundem esse actum quo & diuina mens creat, illuminatque mentem nostram, & nostra creatur, illuminaturque inde, & intuitu illuc quodam naturali conuertitur. Similiter imago in speculo eodem actu vultum respicit, quo à vultu aspicitur. Et sicut aspiciendo fit, ita respiciendo seruat. Eadem est animæ ad Deum similitudo. Secunda ratio talis. Rationalis anima à mente diuina fit, & iungitur corpori, atque inter mentem & corpus obtinet medium. Si solum hæret menti, vitam corpori non tribueret. Si solum hæreret corpori, intelligeret utique nihil. Ergo hæret menti simul & corpori, sicut linea quæ centrum tangit simul atque circumferentiam, sicut solis lumen soli coniunctum est simul, diffusumque per aërem. Atqui ut anima rationalis se habet ad corpus, sic mens ad animam se habet rationalem. Sed vita ipsa corporalis nihil aliud est quàm actus continuus animæ transfusus in corporis huius complexionem, ab anima non recedens. Igitur intellectualis animæ vita nihil est aliud quàm intellectus diuini perennis actus, annexus animæ, non solutus à Deo. Et sicut anima vitæ corporali semina inserit rerum generandarum, ita Deus animæ cognoscendarum accendit igniculos. Vita corporalis est animæ rationalis simulachrum. Intellectualis animæ vita simulachrum est vitæ mentisque diuinæ. Corporali vitæ præsidet infima pars animæ, quæ est potentia nutriendi. Si hæc infima pars quæ corpori iungitur, agit semper, & ipso suo esse quodammodo operatur, multo magis suprema potentia, quæ validior est, quia suo fonti hæret propinquior, operatur semper, & per esse suum quodammodo operatur. Agit autem circa mentem, unde effluit proximè. A mente enim solum mens effluit.

Mens autem quæ supra nos est, quia purus intellectus est, puro intelligibili pascitur, id est, pura fruitur veritate. Eadem nostra mens assidue vescitur, si epulis superioris mentis accumbit. Nec iniuria intelligentiam in anima essentialem perpetuamque locamus, quia ex eo est in anima, quod conuenit cum perpetuis eius essentialis causis. Et sicut animæ ingenuus est appetitus boni perpetuus atque essentialis, ita & ipsius veri naturalis essentialisque intuitus, siue tactus aliquis potius, ut Iamblichi verbis utar. Tactus, inquam, omni cognitione discursuque prior atque præstantior. Eiusmodi sententiam hac inuper ratione diuinus Iamblichus confirmavit, quod quemadmodum temporalia contingentiaque per temporalem contingentemque cognitionem attingimus, ita oportet necessaria & æterna per essentialem & perpetuam attingere notionem, quæ non aliter inquisitionem nostram antecedit, quàm status motum. Temporalis verò cognitio ita inquisitionem sequitur, ut contingens effectus motum sequatur ac tempus. Putant autem diuinum ipsum mentis actum qui quodam intuitu & quasi tactu diuinorum fit, propter actiones inferiores non intermittere quidem in seipso, quamuis quod ad animaduersionem pertinet, in viribus inferioribus intermittatur, atque actus intellectus rationalis, vel rationis intellectualis, qui discursione fiunt, propter operationes inferiores soleant intermittere, atque è conuerso. Verum cur non animaduertimus tam mirabile nostræ illius diuinæ mentis spectaculum? Forsitan quia propter continuam spectandi consuetudinem admirari & animaduerrere desueuimus. Aut quia mediæ vires animæ, ratio videlicet & phantasia, cum sint ut plurimum ad negotia vitæ procliuiiores, mentis illius opera non clare persentiant, sicut quando oculus præsens aliquid aspicit, phantasia tamen in aliis occupata, quod oculus videat non agnoscit. Sed quando mediæ vires agunt oculum, defluunt in eas intellectualis speculationis illius scintillæ velut in speculum. Vnde & vera ratiocinatio nascitur ex intelligentia vera, & humana intelligentia ex diuina. Neque mirum est aliquid in mente illa fieri quod nequaquàm persentiamus. Nihil enim animaduertimus nisi quod in medias transit vires. Ideo licet sæpè vis concupiscendi esuriat atque sitiât, non prius tamen hoc animaduertimus quæ in phantasiam transeat talis passionis intentio. Nonne nutriendi virtus assidue agit? Assiduam tamen actionem eius haudquaquam perpendimus, itaque neque perpetuam mentis intelligentiam,



Neque ex hoc est intelligentia illa debili-  
 or, quod intelligere nequaquam nos a-  
 gnoscamus, imò est potius vehementior.  
 Sapè enim dum canimus aut currimus, ca-  
 nere nos aut currere nequaquam excogita-  
 mus, atque ex hoc attentius operamur. A-  
 nimaduersio enim actionis intentionem  
 distrahit animæ, ac minuit actionem. Tyro-  
 nes in qualibet arte opera eius artis sine at-  
 tentione non agunt, veterani autem etiam  
 si non attendant, habitu quodam & quasi  
 natura operantur. Quid prohibet talem es-  
 se continuam mentis intelligentiam? Quo-  
 niam verò lumen lumini iunctum, sine con-  
 fusione conspirat in vnum (nam & ubique  
 sunt ambo, & alterum scerni potest ab al-  
 tero) efficitur ut mentes hominum menti  
 diuinæ coniunctæ; vnum quodammodo  
 fiant cum mente diuina, & vnum inuicem,  
 neque tamen inter se confundantur, non  
 aliter ac multæ lineæ à circumferentia in  
 centrum reflexæ, per puncta sua medium  
 circuli tangunt punctum, ibique vnum  
 quodammodo fit lineæ cuiusque punctum  
 cum puncto circuli medio. Vnum quoque  
 quodammodo fiunt puncta inuicem singu-  
 la, & quæ non discernit situs aut tempus, ra-  
 tio tamen ipsa discernit, quemadmodum  
 plurimæ notiones in mente tum inuicem,  
 tum menti absque vlla confusione coniun-  
 ctæ. Profectò sicut sphaeræ minores intra  
 maiorem sphaeram, centri sui centrum ma-  
 ioris attingunt, ita mentes quasi minores  
 intelligibilis mundi sphaeræ sub bonitate di-  
 uina comprehensæ tanquam sphaera maio-  
 ri, sub ipsaque reuolutæ propriè per centra  
 sua, id est, per vnitates suas intellectibus suis  
 præstantiores, vnitati diuinæ tanquam vni-  
 uersi centro se copulant. Ac si fortè disun-  
 guntur circuli, disiunguntur & centra, ut-  
 pote quæ vnita fuerant potius quam confu-  
 sa. Disiungi verò nunquam vult Plotinus,  
 ne æternæ mentium sphaeræ minus vnitæ  
 permaneant cum sphaera ipsarum summa,  
 quàm temporales visibilis mundi sphaeræ  
 cum sphaera maiori. Sed hoc ipse viderit.  
 Nos autem ad institutum ordinem reuertamur.  
 Ex iis omnibus quæ ex Platonis & Plo-  
 tini fontibus hausimus, concluditur, homi-  
 nis mentem ad mentem diuinam in ipsa sua  
 intelligentia fermè comparari, quemad-  
 modum materia comparatur ad formam.  
 Sanè si mens nostra quotidie formatur di-  
 uinæ mentis ideis, perque illas opus pro-  
 prium agit, quis non videat mentem no-  
 stram subire diuinam, ceu materia subit  
 formam, nec aliter se habere ad diuinas  
 formas, quàm materiam primam ad natu-  
 rales? Vnde non minus immortalis debeat  
 esse quàm illa, præsertim quia quanto mens

purior est & simplicior corporibus atque a-  
 nimis, & ob hoc magis est vna, tanto ex  
 duabus illis mentibus vnà congreganti-  
 bus arctior prouenit copula quàm proueni-  
 re soleat, aut ex quibullibet rebus corpora-  
 libus vnà mixtis, aut ex animis inuicem  
 concurrentibus, aut ex anima cum corpo-  
 re coeunte. Auget huius copulæ nodum,  
 quòd Deus ipsa vnitas est, & ipse a bonitas.  
 Et cum per vnitatis vim, rerum omnium co-  
 pula vnatur, per vim quoque bonitatis ubi-  
 que attractio fiat & propinquatio, nusquam  
 vnio verior prouenit, quàm ubi mens cum  
 diuinitate conspirat. Item si Deus menti ab  
 ipso proximæ, perpetuoque emananti, infi-  
 nita tum puritatis tenuitate intus illabitur,  
 tum virtutis amplitudine eam penitus im-  
 plet, partesque mentis quasi iuncturas, ipse  
 tanquam neruus connectit intrinsecus in-  
 uicem, & ad totam, totamque essentiam ip-  
 se velut nodus intimus cum esse deuincit,  
 ideoque interior menti est quàm ipsa sibi,  
 quid mirum est Deum ipsi in ipsius intelli-  
 gentia vniri tanquam formam? postquam  
 in essentia & vita iam vnitus est plusquam  
 forma? Signum illius vnionis hoc est præci-  
 puum, quòd per veram intelligentiam intima  
 substantia rei semper inspicitur, utpote  
 quæ in rei ideam profundius penetrauerit,  
 quàm aut visus in coloris speciem, aut in  
 coloris simulachrum phantasia, cum sensus  
 & phantasia rerum superficies duntaxat at-  
 tingant. Ideo Mercurius inquit ex diuini-  
 tatis & mentis conspiratione vnum spiri-  
 tum coalescere. Et Ioannis Theologia do-  
 cet contemplatores diuinæ rationis in v-  
 num cum ipsa ita consummari, sicut ipsa  
 vnita est Deo. Nempè si in genere corpora-  
 lium tanta est vnio, ut materia (quæ vltimus  
 eorum est terminus) vnum quiddam effi-  
 ciatur non solum cum mediis omnibus, ve-  
 rum etiam cum supremo generis corpora-  
 lis, quis negabit æqualem saltem esse in ge-  
 nere intellectualium vnionem, ut mens hu-  
 mana, quamuis vltimus illorum terminus  
 sit, cum omnibus tamen intellectualibus  
 formis, ac etiam cum suprema vnum ali-  
 quid fiat? Non fit autem ex animo ac Deo  
 tertia quædam natura à tertio aliquo com-  
 ponente vtrumque inuicem, & ad tertium  
 actum dirigente vtrūque, sicuti fit in natu-  
 ralium rerum compositione, sed quia in a-  
 nimo contemplante Deus & primus motor  
 est, & formator vltimus, ideo totus actus est  
 Deus, quo quidem actu & ipse semper est  
 Deus, & animus fit saltem quandoque di-  
 uinus. Et sicut natura per naturalem mo-  
 tum tradit materiæ formarum ordinem, sic  
 Deus per diuinam mortalemque vitam tra-  
 dit menti perspicuam formarum possessio-

nem, ut eidem diuina immortalisque competat vita, cui diuina immortaliumque intelligentia conuenit. Atque ut in aëria, licet sub inferioribus fluat formis, tamen sublimibus (ut quidam putant) quiescit semper, ita mens hominis, quamuis per sensibiles imaginariasque perfluat formas, potest tamen sub diuinis quandoque in æternum quiescere, quod etiam modo facit, ut vult Plotinus, & Iamblichus, & Theodorus, ut quemadmodum materiam perficit semper quantitatis interminata dimensio, sic mentem diuinæ amplitudinis virtus immensa per huius vim in huius luce, ad huius finem mens continuè æternis formatur ideis. Et quia per congruentiam formatio omnis efficitur, non potest subiectum hoc esse mortale, quod formis continuè formatur æternis. Si incorruptibilis est materia prima, in quam formæ quædam penetrant sempiternæ, quamuis ipsa non penetret in illas, nonne immortalis quoque mens erit, quæ non modo penetratur ab illis, sed & penetrat cognoscendo, & reflectitur in eas agnoscendo? Præterea ubi prima mens est, ibi vita prima, quoniam mens est reflexio vitæ in esse suum. Vbi vita prima, ibi & esse primum, quoniam vita est primus, & intimus ipsius esse motus. Profectò Deus propterea se existit, & verè id quod existit perpetuo permanet, primum apud multos esse vocatur. Propterea non torpet ocio, sed operatur assidue secum, vita dicitur. Propterea actus est talis, qui non effluit extra, sed refluit in seipsum, mens appellatur. Nam ea reflexione seipsum animaduertit. Quoniam verò quod est in genere aliquo summum, nihil contrarij generis aut immixtum habet, aut proximum, fit ut neque prima mens vel in se vel iuxta seipsam demens aliquid patiatur, neque prima vita mortale quicquam, neque primum esse aliquid in nihilum ruiturum, neque prima vnitas aliquid dissolubile, neque prima bonitas aliquid morbo subiectum. Quare mens quæ menti iungitur primæ, sicut in ea coniunctione nihil reseruat dementiæ, sic mortale nihil admittit aut perdibile, aut dissolubile, morboque subiectum, quia per mentem primam primæ quoque vitæ copulatur, & esse primo, similique vnitati & bonitati. Quid mirum si intellectualis vita propter congressum cum prima vita, immortalis permaneat, cum cœlestia corpora (ut volunt Platonici) per se quidem dissolubilia sint, quia & mobilia & composita sine ex naturis pluribus siue partibus, ex eo tamen indissoluta perdurent, quòd nullo alio corpore interiecto. immortalis animæ copulantur, quæ verò per

aliud medium dissoluuntur, qualia sunt corpora ex pluribus elementis composita, quæ immortalem animam (ut Magi tradunt) per corpus cœleste suscipiunt.

*Confirmatio superioris rationis prima per visum.*

## C A P V T V.

**A**Nimas hominum de corporibus in corpora transmigrare, & præcedentis vitæ artes in sequentibus recordari, Plato non suo sensu tractauit, sed ex quorundam Ægyptiorum opinione recēssit, quorum opinionem Augustinus Aurelius reprobauit. Quod autem anima hominis ab ipso suo formatore formis rerum insignita descendat, atque his formis non sufficienter rerum substantias comprehendat, sed per eas tanquam præparationes ideis reformata comprehendere valeat, hoc, inquam, & Plato ex mente propria sæpè affirmasse videtur, & Augustinus summopere comprobasse. Ergo per Augustini vestigia gradientes, ad superioris sententiæ confirmationem iterum contendamus. Procedamus autem triplici calle, visu, auditu & ratione. Visu primo, hunc in modum. Anima qua viuunt corpora, omnibus corporibus potior est, quia vitam dat corporibus. Hac profectò, quæ sensum habet, excellentior est. At verò in animo humano quiddam præstantius est, non dico quod sentit sensibilia, sed quod de sensibilibus iudicat. Iam verò illud videre facile est, præstantiorem esse rem iudicantem illa de qua iudicatur, neque iudicat. Non solum autem rationalis vita de sensibilibus, sed de ipsis quoque sensibus iudicat, ut cur in aqua rem fractum oporteat apparere, cum reclusus sit, & cur ita per oculos sentiri necesse sit. Nam ipse aspectus oculorum renuciare id potest, iudicare autem nullo modo. Igitur rationalis vita sensuali præstat. Itaque si ratio secundum seipsam iudicat, iam nulla est natura præstantior. Sed quia clarum est eam esse mutabilem, quando nunc imperita, nunc perita inuenitur, tanto autem melius iudicat, quanto est peritior, & tanto peritior, quanto alicuius artis, vel disciplinæ, vel sapientiæ est particeps, ipsius artis natura quærenda est. Neque nunc artem intelligi volo, quæ notatur experiendo, sed quæ ratiocinando indagatur. Sed certè quærendum est, cur nos offendat, si duabus fenestris non supra inuicem, sed iuxta inuicem locatis, vna earum maior, altera minor sit, cum æquales esse

potuerint, si verò super inuicem fuerint, ambæque dimidio quamuis impares, non ita offendant illa inæqualitas, & cur non multum curemus quanto sit vna earum aut maior aut minor, quia duæ sunt, in tribus autem sensus ipse videtur expetere vt impares non sint, aut inter maximam & minimam ita sit media, vt tanto præcedat minorem, quanto à maiore præceditur. Ita enim primò quasi natura ipsa consulitur quid probet. Vbi potissimum notandum est, quemadmodum quod solum inspectum minus displicuit, in melioris comparatione respuatur. Ita reperitur nihil esse aliud artem vulgarem, nisi rerum expertarum placitarumque memoriam, vsu quodam corporis atque operationis adiuncto, quo si cæreas, iudicare quidem de operibus possis, quod multo est excellentius, quamuis operari artificiosa non possis. Sed cum in omnibus artibus conuenientia placeat, qua vna seruata pulchra sunt omnia, ipsa verò conuenientia æqualitatem vnitatemque appetat, vel similitudine parium partium, vel gradatione disparium, quis est qui summam æqualitatem vel similitudinem in corporibus inueniat, audeatque dicere; cum diligenter considerauerit, quodlibet corpus verè ac simpliciter vnum esse, cum omnia vel de specie in speciem, vel de loco in locum transiendo mutantur, & partibus consent sua loca obtinentibus, per quæ in spatia diuersa diuiduntur. Porro ipsa vera æqualitas ac similitudo, atque ipsa vera & prima vnitatis, nullo sensu sed mente intellecta conspicitur. Vnde enim qualiscunque appeteretur in corporibus æqualitas, aut vnde conuinceretur longè plurimum differre à perfectà, nisi ea quæ perfectà est mente videretur? Et cum omnia quæ sensibilibus pulchra sunt, siue natura edita, siue artibus elaborata, locis & temporibus pulchra sint, vt corpus, & corporis motus, illa æqualitas & vnitatis menti tantummodo cognita, secundum quam de corporea pulchritudine sensu internuncio iudicatur, nec loto tumida est, nec instabilis tempore. Non enim rectè dici potest secundum eam iudicari rotundum templum, & non secundum eam rotundum vasculum, aut rotundum denarium. Similiter in temporibus atque in motibus corporum ridiculè dicitur secundum eam iudicari æquales annos, & non secundum eam æquales menses. Sed siue per hæc spatia, siue per horas, siue per breuiora momenta conuenienter moueatur aliquid, eadem vna & incommutabili æqualitate iudicatur. Quòd si minora & maiora spatia figurarum atque motio-

rum per eandem legem parilitatis vel similitudinis vel congruentiæ iudicantur, ipsa lex maior est iis omnibus, sed potentia, cæterum spatio aut loci aut temporis, nec maior, nec minor. Quòd si maior esset, non secundum totam iudicarem minora, si autem minor esset, non secundum eam iudicarem maiora. Nunc verò cum per totam quadraturæ legem iudicetur & forum quadratum, & lapis quadratus rursus si per totam æqualitatis legem iudicentur conuenire sibi motus pedum currentis formicæ, & per eam gradientis elephantis, quis eam dubitet locorum interuallis ac temporum nec maiorem esse nec minorem? cum potentia superet omnia. Hæc autem lex omnium artium cum sit omnino incommutabilis, mens verò humana cui talem legem videre concessum est, mutabilitatem pati possit erroris, satis apparet supra mentem nostram esse legem, quæ veritas dicitur. Nec iam illud ambigendum est, incommutabilem naturam quæ supra rationalem animam sit, Deum esse, & ibi esse primam vitam & primam essentiam, vbi est prima sapientia. Nam hæc est illa incommutabilis veritas, quæ lex omnium artium rectè dicitur, & ars omnipotentis artificis. Itaque cum se anima sentiat nec corporum speciem motumque iudicare secundum seipsam, simul oportet agnoscat præstare suam naturam ei naturæ de qua iudicat, præstare autem sibi eam naturam secundum quam iudicat, & de qua iudicare nullo modo potest. Possum enim dicere quare similia sibi ex viraque parte respondere membra cuiusque corporis debeant, quia summa æqualitate delector, quam non oculis sed mente contueor. Quapropter tanto meliora esse iudico quæ oculis cerno, quanto propria natura viciniora sunt iis quæ animo intelligo. Quare autem illa ita sint, nullus potest dicere, nec ita esse debere quisquam sobriè dixerit, quasi possint esse non ita. Quare autem nobis placeant, & cur ea quando melius sapimus, vehementissimè diligamus, nec id quisquam quidem, si ea ritè intelligit, dicere audebit. Vt enim nos & omnes animæ rationales secundum veritatem de inferioribus rectè iudicamus, sic de nobis quando eidem cohæremus, sola ipsa veritas iudicat, de ipsa verò nec iudicat pater. Nec enim minus est quàm ipse. Et ideo quæ pater iudicat, per ipsam iudicat. Omnia enim quæ appetunt vnitatem, hanc habent regulam, vel formam, vel exemplum, quoniam eius similitudinem sola, à quo esse accepit, impleuit. Mens omnia iudicat, quia super omnia est, quando cum Deo est. Cum

illo est autem, quando purissimè intelligit, & tota charitate quod intelligit diligit. Ita etiam quantum potest lex ipsa, & ipsa sit per quam iudicat omnia, & de qua iudicare nullus potest. Sicut in istis temporalibus legibus, quanquam de his homines iudicant quando eas instituunt, tamen cum fuerint institutæ atque firmatæ, non licebit iudici de ipsis iudicare, sed per ipsas. Conditor autem legum temporalium, si vir bonus est, & sapiens, illam ipsam consulit æternam, de qua nulli animæ iudicare datum est, ut per eius incommutabiles regulas, quid sit pro tempore iubendum vetandumque, discernat. Æternam igitur legem mundis animis fas est agnoscere, iudicare fas non est. Sanè secundum ipsam de animo & corpore iudicare possumus, hic minus actus, aut minus vehemens est quàm debuit, hoc minus candidum est quàm debuit. De ipsa verò lege nullo modo quis iudicat. Cum enim quis dixerit æterna temporalibus esse potiora, aut septem & tria esse decem, nemo dicit ita esse debuisse, sed tantum ita est, agnoscens, non ut examinator corrigit, sed tanquam inueniens delectatur. Sed multis finis est humana delectatio, nec volunt tendere ad superiora, ut iudicent cur ista sensibilia placeant. Itaque si quæram ab artifice, vno arcu constructo, cur alterum parem contra in alteram partem moliat? respondebit, credo. Vt paria paribus ædificij membra respondeant. Porro, si pergam quærere, id ipsum cur eligat, dicet hoc decere, hoc esse pulchrū, hoc delectare cernentes, nihil audebit amplius. Inclinator enim recumbit oculis, & vnde pendeat, non intelligit. At ego virum intrinsecus oculatum, & indiuisibiliter videntem non desinam commonere cur ista placeant, ut iudex esse audeat ipsius delectationis humanæ. Ita enim superfertur illi, nec ab ea tenetur, dum non secundum ipsam, sed ipsam iudicat. Et prius quæram, vtrum ideo pulchra sint, quia delectant, an ideo delectant, quia pulchra sint. Hic mihi sine dubitatione respondebitur, ideo delectare, quia pulchra sint. Quæram ergo deinceps, quare sint pulchra, & si titubabit, subiiciam: Vtrum ideo, quia similes sibi partes sunt, & aliqua copulatione ad vnam conuenientiam rediguntur? Quod cum ita esse compererit, interrogabo, & vtrum hanc ipsam vnitatem quam conuincuntur appetere, summè impleant, aut longè infra iaceant, & eam quodammodo mentiantur. Quod si ita est, nam quis non admonitus videat, neque vllam speciem, neque vllum omnino esse corpus, quod non habeat

vnitatis qualecunque vestigium? Neque quantumvis pulcherrimum corpus, cum interuallis locorum necessariò aliud alibi habeat, posse assequi eam quam sequitur vnitatem, & flagitabo ut respondeat ipse vbi videat vnitatem hanc, aut vnde videat. Quam si non videret, vnde cognoceret, & quid imitaretur corporum species? & quid implere non posset? Nunc verò cum dicitur corporibus, vos quidem nisi aliqua vnitatis contineret, nihi essetis. Sed rursus si vos essetis ipsa vnitatis, corpora non essetis, rectè dicitur. Vnde igitur nostri istam vnitatem, secundum quam iudicas corpora? Quam nisi videres, iudicare non posses quod eam non impleant. Si autem iis corporeis oculis eam videres, non verè diceret, quanquam eius vestigio teneantur, longè tamen ab ea distare. Nam iis oculis non nisi corporalia vides. mente igitur videmus eam. Sed vbi videmus? Si hoc loco esset vbi corpus nostrum est, non eam videret qui hoc modo in Oriente de corporibus iudicat. Non ergo isto continetur loco. Et cum adest vbique, iudicanti nusquam est per spatia locorum, & per potentiam nusquam non est. Cum anima multis illusionibus phantasmarum hinc inde perturbantium concitatur, & tamen falsa hæc esse agnoscit, vbi est verum quod mente conspicitur? Illa lux vera est, qua hæc omnia non esse vera cognoscis, per hanc illud vnum vides, quo iudicas vnum esse quicquid aliud vides, nec tamen hoc esse quod illud est quicquid vides mutabile? Præterea quære in corporis voluptate quid te delectat, nihil aliud inuenies quàm conuenientiam. Nam si resistentia vel discrepantia pariunt dolorem, conuenientia pariunt voluptatem. Agnosce igitur quæ sit summa conuenientia. Noli foras ire. In teipsum redi. In interiore homine habitat veritas. Et si tuam naturam mutabilem inueneris, transcede teipsum. Sed memento cum te transcenderis, ratiocinantem animam te transcendere. Iluc ergo tende, vnde ipsum lumen rationis accenditur. Quo enim peruenit omnis bonus ratiocinator, nisi ad veritatem, cum ad seipsa veritas non vtiq; ratiocinando perueniat, sed quod ratiocinantes appetunt, ipsa sit? Et cum disputando ambo videmus verum esse quod dicis, & ambo videmus verum esse quod dico, vbi quæso hoc videmus? Hoc vtiq; nec ego in te, nec tu in me, sed ambo in ipsa quæ super mentes nostras est incommutabili veritate videmus. Ibi sanè formam ipsam secundum quam hæc temporalia facta sunt, visu mentis aspicimus, atque inde conceptam rerum veritatem &

notitiam tanquam verbum apud nos habemus. Vide ibi conuenientiam qua superior esse non possit, & ipse conueni cum ea. Confiterete non esse quod ipsa est. Siquidem seipsa non querit. Tu autem querendo ad eam venisti, non locorum patio, sed mentis affectu, vt interior homo cum suo inhabitatore spiritali voluptate conueniat. Aut si non cernis quæ dico, & an vera sint dubitas, cerne saltem vtrum de iiste dubitare non dubites. Et si certum est, te esse dubitautem, quare vnde sit certum. A lumine quod illuminat omnem hominem venientem in hunc mundum, quod iis oculis videri non potest, nec illis quibus phantasmata cogitantur, sed illis quibus ipsis phantasmatibus dicitur, non eitis vos quod ego quero, neque illud estis, vnde ego vos ordino. Et quod mihi inter vos fœdum occurrat improbo, quod pulchrum approbo, cum pulchrius sit illud vnde improbo & approbo quare hoc ipsum magis approbo, & non solum vobis, sed illis omnibus corporibus vnde vos hausi, antepono. Vbi videntur hæc, ibi est lumen sine spatio locorum & temporum, & sine vlllo spatorum talium phantasmate. Nunquid ista ex aliqua parte corrumpi possunt, etiam si omnis ratiocinator intereat? Non enim ratiocinatio talia facit, sed inuenit ergo antequam inueniantur, in se manent, & cum inueniuntur, nos innouant. Ita renascitur interior homo, & exterior corrumpitur de die in diem. Inter mentem nostram, qua illum intelligimus patrem & veritatem, id est, lucem interioram per quam illum intelligimus, nulla interposita creatura est. Quare ipsam quoque veritatem nulla ex parte dissimilem in ipso & cum ipso veneremur, quæ forma est omnium quæ ab vno facta sunt, & ad vnum nituntur. Vnde apparet per hanc formam facta esse omnia, quæ sola implet quod appetunt omnia.

*Secunda confirmatio per auditum, secundum Augustinum.*

## C A P V T VI.

**H**Atenus per ea quæ aspectu percipiuntur, duce Augustino eò peruenimus, vt inueniremus mentem nostram diuina mente formari. Deinceps, duce eodem per ea quæ audiuntur, ad idem proficiscamur. In sonis concinnis est aliquis numerus, hinc & in actu sentiendi certus fit numerus, quia numerosus sonus numerosè sentitur. Est & numerus aliquis in ipsa sensus natura. Non enim aliter aut mulcetur sonorum concinnitate, aut absurdi-

tate offenderetur. Idipsum ergo quicquid est, quo aut annuimus, aut abhorremus, non ratione sed natura, cum aliquid sonet, ipsius sensus numerum voco. Non enim tunc fit in auribus meis cum sonum audio, hæc vis approbandi & improbandi. Aures quippe non aliter bonis sonis quàm malis patent. Vide potius ne ista duo sint minimè confundenda. Nam si versus quilibet modo correptius, modo productius pronuncietur, spatium temporis non idem teneat necesse est, quamuis eadem pedum ratione seruata. Vt ergo ipso suo genere aures mulceat, illa vis facit qua concinna adsciscimus, & absurda respuimus. Vt autem breuiore tempore sentiatur, cum celerius quàm cum tardius promitur, non interest aliquid nisi quamdiu aures tangantur sono. Affectio ergo hæc aurium, cum tanguntur sono, nullo modo talis est ac si non tangantur. Vt autem differt audire ab eo quod est non audire, ita differt hanc vocem audire, ab eo quod est alteram audire. Hæc igitur affectio nec ultra porrigitur, nec infra cohibetur, quam est mensura eius soni qui eam facit. Altera est ergo in Iambo, altera in Tribrachto, productior in productiore Iambo, correptior in correptiore, nulla in silentio. Quod si in numerosa voce fit, etiam ipsa numerosa sit necesse est, neque esse possit cum abest effector eius sonus. Similis est enim vestigio in aqua impresso, quod neque antè formatur quàm corpus impresseris, neque remanet cum detraxeris. Naturalis autem illa vis & iudiciaria quæ auribus adest, non desinit esse in silentio, nec nobis eam sonus inserit, sed ab ea potius sonus probandus siue improbandus excipitur. Quis negauerit in anima esse vim numerorum, cum anima hos numeros agat quos in venarum pulsu inuenimus & reciproco spiritu? Cum aliquando correptius siue productius, dum seruiam temporum legi, qua simplo ad duplum pedes conueniunt, versum pronuncio, nulla fraude iudicium tui sensus offendo. Atqui sonus ille qui correptioribus, & quasi fugacioribus syllabis æduntur, non potest plus temporis occupare quàm sonat. Iudiciales autem illi numeri si vinculo temporis in tanto spatio tenerentur, quanto isti sonantes digesti sunt, non possent ad eorum sonantium, qui paulo productius eam Iambica lege funduntur, aspirare iudicium. Hos igitur mora temporum qui iudicando præsidet, illa non tenet. Sed si nulla tenerentur, quanto libet productius competentibus intervallis, & inuicem respondentibus Iambicos proferrem sonos, nihilominus ad iudicandum



adhiberentur. Nunc verò si ederem vnam syllabam quāta mora peraguntur (nemultum dicam) tres passus incedentis, & aliam duplo, atque ita deinceps tam longos iam-bos ordinarem simpli & dupli, lex illa nihilominus seruaretur, nec tamen naturale illud iudicium iis dimensionibus approbandis adhibere possemus.

Tenentur ergo & ij iudiciales nonnullis finibus temporalium spatiorum, quos iudicando excedere nequeunt, & quicquid excedit hæc spacia, non assequuntur vt iudicent. Temperant tamen isti singulas actiones. Quod enim nos vel ambulantes ab imparibus passibus, vel percutientes ab imparibus interuallis plagarum, vel edentes ab imparibus molarum motibus, scalpentes denique ab imparibus vnguium ductibus, & quod nos in qualibet attentione agendi aliquid per corporis membra ab imparibus motibus refrinat & cohibet, & quandam parilitatem tacite imperat, id ipsum est iudiciale nescio quid, quod facit vt homines sensum ac delectum habeant pulchritudinis & decoris magis quam bestiae quæ ad quælibet sua incitamenta sedandæ passionis corporalis causa præcipitantur, non pulchritudinis gratia aueritateque alliciuntur. Vnde equi non formosiores deligunt equam quam ament, sed ad quamlibet æquali furore trahuntur. Iudiciale autem illud conditorem animalis insinuat. Cum, quem certè decet credere authorē omnis conuenientiae atque concordiae. Præterea numeri, & qui in sono sunt, & qui fiunt in sentiendo, in quantum eorum interualla potest memoria custodire, in tantum iis iudicialibus iudicandi offeruntur atque iudicantur. Numerus namque iste qui interuallis temporum constat, nisi adiuuemur, in eo memoria iudicari à nobis nullo modo potest. Cuiuslibet enim brevis syllabæ, cum & incipiat & definat, alio tempore initium est, & alio finis sonat. In audienda itaque, vel breuissima syllaba, nisi memoria nos adiuuet, vt eo momento quo iam non initium, sed finis syllabæ sonat, maneat ille motus in animo qui factus est cum initium ipsum sonuit, nihil nos audisse possumus dicere. Hinc est illud, quod plerumque alia cogitatione occupati loquentes, nihil nobis videmur audisse. Quapropter iudiciales illi numeri, qui numeros interuallis temporum fitos iudicare non possunt, nisi quos eis tanquam ministra memoria obmulerit, nonne ipsi existimandi sunt per certum spatium temporis tendi? Licet enim in iis spacia temporum minimè videamus, non tamen adhibentur nisi ad ea iudicanda, quæ

in spatiis temporum sunt; nec ipsa quidem omnia, sed quæ possunt articulari memoriter. Cum versus ille canitur: Deus creator omnium, numeros ipsius versus per numeros sentiendi audimus, & per iudiciales numeros delectamur, & nescio quibus aliis existimamus de ista delectatione, quæ quasi sententia est iudicialium istorum, cum per alios super his latentiorem, sed certè veriorē ferre possimus sententiā. Aliud est enim delectari sēsu, aliud existimare ratione. Aliud quippè est annuere vel renuere motibus numerosis, quod fit in delectatione conuenientiae, & offensione ab surditatis talium motionum, & aliud est existimare vtrum rectè an secus ista delectent, quod fit ratiocinando. Ac si rectè nobis visum est, nisi quibusdam numeris esset ipse delectationis sensus imbutus, nullo modo eum potuisse annuere paribus interuallis, & perturbata respuere rectè etiam videri potest ratio quæ huic delectationi superimponitur, nullo modo sine quibusdam numeris viuacioribus de numeris quos infra se habet, posse iudicare. Iam nunc, si placet, illi qui nobis surrexerant ad principatum obtinendum, sensuales nominentur, & iudicialium nomen, quoniam est honoratius, ij accipiant, qui excellentiores comperti sunt. Age nunc accipe vim potentiamque rationis quantum ex operibus eius aspicere possumus. Ipsa enim (vt id potissimum dicam, quod ad huius operis susceptionem attinet) primò quid sit ipsa bona modulatio considerauit, & eam in quodam motu libero, & ad suæ pulchritudinis finem conuerso esse perspexit. Deinde vidit in motibus corporum aliud esse quod breuitate & productione temporis variaretur, in quantum magis esset minusue diuturnum, aliud localium spatiorum percussione in quibusdam gradibus celeritatis & tarditatis. Qua diuisione facta, id quod in temporis mora esset, modesto interuallo, & humano sensui accommodato articulatam, varios efficere numeros, eorumque genera & ordinem vsque ad modulos versusum persecuta est. Postremò attendit quid in his moderandis, operandis, sentiendis, retinendis ageret anima, cuius caput ipsa esset, hosque omnes animales numeros à corporalibus separauit, seque ipsam hæc omnia, neque animaduertere, neque distinguere neque certè numerare sine quibusdam suis numeris potuisse cognouit, eosque cæteris inferioris ordinis iudicaria quadam estimatione præposuit, & nunc cum ipsa sua delectatione qua temporum momenta perpendit, & talibus numeris modificandis nutus suos

exhibet, sic agit. Quid est quod in sensibili numerositate diligimus? Num aliquid præter parilitatem quandam, & æqualiter dimensa intervalla? An ille pyrrichius pes, siue spondeus, siue anapæstus, siue dactylus, siue proceleusmaticus siue dispondeus nos aliter delectaret, nisi partem suam parti alteri æquali diuisione conferret? Quid verò iambus, tribrachus, trochæus, pulchritudinis habent, nisi quod minore sua parte maiorem suam in tantas duas æqualiter diuidant? Nam porro sex temporum pedes, num aliunde blandius sonant atque festiuus? nisi quod vtræque lege partiuntur, scilicet aut in duas æquales partes ternæ tempora possidentes, aut in vnam simplam ex qualibet parte, & alteram duplam, id est, vt maior habeat bis minorem, & eo modo ab illa diuidatur æqualiter duobus temporibus quatuor tempora in bina dimetiente atque secante? Et in reliquis omnibus simili ratione. Atque vsque adeo delectamur æqualitate, vt eam non modo in vocum intervallis, sed etiam in silentiorum spatiis exigamus. Quærit ergo ratio & carnalem animæ delectationem quæ iudiciales partes sibi vendicabat, interrogat, cum eam in spatiis temporalium numeris æqualitas mulceat, vtum dux syllabæ breues quascunque audierit, verè sint æquales, an fieri possit, vt vna earum ædatur productius, non vsque ad longæ syllabæ modum, sed infra quantumlibet, quo tamen excedat sociam suam. Num negari potest fieri posse vt hæc delectatio ista non sentiat, & inæqualibus velut æqualibus gaudeat? Quo errore & inæqualitate quid turpius? Ex quo admonemur ab his auertere gaudium quæ imitantur æqualitatem, & vtum impleant, comprehendere non possumus, imò quod non impleant, fortasse comprehendimus, & tamen in quantum imitantur, pulchra esse in suo genere & ordine suo, negare non possumus. Æqualitatem illam quam in sensibilibus numeris non reperiēbamus certam & manentem, sed tamen adumbratam & prætereuntem agnoscebamus, nusquam profecto appeteret animas, nisi alicubi nota esset. Hæc autem alicubi, non in spatiis locorum & temporum, nam illa tument, & illa prætereunt, non in corporis formis, quas æquales nunquam dicere possumus, aut in temporum intervallis, in quibus similiter vtum aliquid aliquanto quàm oporteat productius vel correptius transeat, quod sensum fugiat, ignoramus. Illam quippè æqualitatem quæro vbi esse arbitreris, quam inuentes, cupimus æqualia esse quædam corpora,

vel corporum motus, & diligentius considerantes, eis fidere non audimus? Ibi puto, vbi regnat quod est corporibus excellentius. Sed vtum in ipsa anima, an etiam supra animam, quæramus. Artem istam rhythmam vel metricam quam vultur qui versus faciunt, putamus habere aliquos numeros, secundum quos fabricant versus. Quicunque isti sunt numeri, non prætereunt cum versibus, sed manent. Conueniendum est ergo ab aliquibus manentibus numeris prætereunte aliquos fabricari & hanc artem non aliud putamus quàm affectionem quandam animi artificis. Quid si omnia quæ ad numeros pertinent, ille interrogetur qui nunquam didicit, nonne censet hanc artem posse cognoscere? Non transibunt i numeri ab eo qui docebit, in eum qui discet, sed discens intrinsecus apud mentem suam mouebit se ad aliquid vnde menti eius imprimantur hi numeri, & illam faciant affectionem, quæ ars dicitur, & ea quæ interrogabitur, vera esse intelliget atque respondebit. Quoniam verò hi numeri de quibus ita quæritur, incommutabiles sunt, ideo sunt æterni, neque vlla in eis est inæqualitas. Vnde verò credendum est animæ tribui quod æternum est & incommutabile, nisi ab vno æterno & incommutabili Deo. Ergo qui dicit alio interrogante, sese intus ad Deum mouet, vt incommutabile verum intelligat.

*Tertia confirmatio per mentem secundum Augustinum.*

## C A P V T VII.

**S**atis per visus iudicia primum, deinde per auditus admonitiones, propositum nostrum inuestigauimus. Nunc indagemus per iudicia rationis. Aliter vnusquisque homo loquendo enunciat mentem suam, quid in seipso agatur attendens: Aliter autem humanam mentem speciali aut generali cognitione definit. Itaque cum mihi de sua propria loquitur, an intelligat hoc aut illud, an non intelligat, & vtum velit an nolit hoc aut illud, credo. Cum verò de humana specialiter aut generaliter verum dicit, agnosco & approbo. Vnde manifestum est aliud vnumquemque videre in se, quod sibi alius dicenti credit, non tamen videri, aliud autem in ipsa veritate, quod alius quoque possit intueri, quorum alterum mutatur per tempora, alterum incommutabili subsistit æternitate. Neque enim oculis corporeis multas mentes videndo per similitudinem colligimus gene-

ralem vel specialem mentis humanæ notitiam, sed inueniatur inuiolabilem veritatem, ex qua perfectè (quantum possumus) definiamus non qualis sit vnus cuiusq; hominis mens, sed qualis esset æternis rationibus debeat. Præterea, cū impij cogitant æternitatem, & multa rectè reprehendunt, recteq; laudant in hominum moribus, quibus ea tandem regulis iudicant, nisi in quibus vident, quemadmodum quisq; viuere debeat, etiam si nec ipsi eodem modo viuant. Vbi eas vident? Neq; enim in sua natura, cū proculdubio mente ista videantur, eorumq; mentes cōstet esse mutabiles, has verò regulas immutabiles videat quisquis in eis, & hoc videre potuerit, neque in habitu suæ mentis, cū illæ regulæ sint iustitiæ, mentes verò eorum esse cōstet iniustas. Vbi nam sunt istæ regulæ scriptæ? Vbi quid sit iustum, etiam iniustus agnoscit, vbi cernit habendum esse quod ipse non habet. Vbi ergo scriptæ sūt nisi in libro lucis illius, quæ veritas dicitur, vnde omnis lux iusta describitur, & in cor hominis qui operatur iustitiam, non migrando, sed tanquam imprimendo transfertur, sicut imago ex annulo & in ceram transit, & annulum non relinquit. Qui verò nō operatur, & tamen videt quid operandum sit, ipse est, qui ab illa luce auertitur, à qua tamen tangitur. Qui autem nec videt quemadmodū sit viuendum, excusabilius quidem peccat, quia non est transgressor legis incognitæ. Sed etiam ipse splendore aliquoties vbique præsentis veritatis attingitur, quando admonitus confitetur. Deniq; superior hæc Aureliana discursio quatuor finibus terminatur, quod videlicet mens ad summa non surgit, nisi eius quod est summum trahatur instinctu, quod æternis rationibus non vteretur pro arbitrio iudicando, nisi æternitati se posset æquare, quod immutabilia ratione immutabili non apprehenderet, nisi regulam ipsam immutabilitatis attingeret, quod animi multi eandem non caperent veritatem, nisi aut vnus esset in multis intellectus humanus, quod fieri nequit, aut saltem multi intellectus humani in eundem se fontem veritatis immergerent, quasi tunc optime aliqui ordinem artificij sint cognituri, quādo rationem ipsam vnā per quam artifex opus cōstruxerat, penetrauerint. Hæc autem Augustini sententia duobus modis potissimum confirmatur: primò, per communem virtutem argumentandi, deinde per communes notiones veritatis, bonitatis, & esse. Omnis intellectus apprehendit necessariam consequentiam in rebus, & contingentibus, & non existentibus. Hæc enim

consequentia est necessaria: si Plato currit, Plato mouetur, licet Plato, & cursus, & motus eius, contingentia sint. Quinciam hæc est necessaria; Plato olim dum discebat, loquebatur, licet neque Plato, neque disputatio sua, neque sermo sint in præsentia. Talium itaque consequentiarum necessitas immutabilis in rebus illis temporalibus non fundatur, quæ vel non sunt vilo modo, vel sunt contingentes, neque in solis cogitationibus animæ, alioqui non esset vera necessitas, sed figmentum, imò neque immutabilis esset, cū cogitatio nostra sit mobilis. Fundatur igitur in æterna & necessaria rerum serie, quā diuina mens omnium ordinatrix intra se continet, vbi mutuam rebus habitudinem tribuit. Quapropter omne veræ rationationis lumen à prima veritate accenditur, & in eandem reflectitur, postquam omnis consequentiæ necessitas in summa totius naturæ necessitate fundatur. Docet hoc communes quoque veritatis bonitatisque ipsius intelligentiæ, quas in superioribus probauimus inesse mentibus omnium, ex eo verò quod vera & bona assidue comparant. Quod si veritas ipsa & bonitas Deus est, sequitur vt Deus toties mentibus hominum illucescat, quoties per Deum tanquam normam vera & bona diiudicamus. Docet idem etiam ipsius notio omnibus insita. Nam omnes homines iudicant illud quidem nullo modo esse, istud verò esse, sed imperfecto modo, hoc esse modo perfectiori, talis autem in essendo gradatio, neque fit, neque cognoscitur, nisi per accessum ad esse summum (qui Deus est) atque inde recessum. Accessum verò ad ipsum, & recessum ab ipso, videre non potest nisi qui ipsum videt. Vident autem ipsum viri peritiores aliò insuper pacto, quando videlicet omnia rerum genera subalterna ad generalissima, & illa vsque ad ipsum quod dicitur ens simplex absolutumque resoluunt. Tale ens aut figmentum falsum est, aut est Deus. Non potest autem ens ipsum falso esse, si modo aliquid in rebus est verè. Si comparatio illa de rerum gradibus, atque hæc resolutio non fit nisi per ipsam summi & absoluti esse virtutem, vti que fit per Deum, quo formatus intellectus & comparat & resoluit. Accedit ad hæc, quod ipsum esse vsque adeò perspicue fulget, vt nequeat cogitari non esse. Sicut enim ipsum quod dicitur nihil, occurrit nobis vt expers omnino essendi, ita esse occurrit vt expers penitus non essendi. Itaque inesse neque potentia vlla prorsus apparet ad non essendum, neque aliquis de-

fectas effendi Ex prima parte æternum est, ex secunda est tota effendi perfectione plenissimum, id est Deus. Hac ratione esse occurrit nobis euidētissimè, & rectè animadvertentibus occurrit, ut Deus. Quod duabus præterea rationibus confirmatur. Prima, quia esse usque adeò manifestum est, ut singulis quæ cognoscuntur, semper cognoscatur & ipsum. Qui cum vocat hominem aut album, esse in hominis specie ait, & albi. Denique in singulis effendi modis per quos res cōstant singulæ, ita esse ipsum ubi intelligitur, quemadmodum in omnibus animalium speciebus subintelligitur animal. Secunda ratio, quia per ipsum esse cætera cognoscuntur, ipsum verò per semetipsum. Si quidem in cognitione quæ fit per intuitum illud quod dicitur non ens, per ens cognoscitur. Ens in potentia, per ens actu. Ens actu, per actum cognoscitur existendi. Talis actus, esse ipsum existit. Si per esse quod cuiuslibet entis actus est, quodlibet ens agnoscitur, sequitur ut per esse cunctorum existentium actus origoq; est, existentia cuncta noscantur. Ac si ponatur superesse in potentia, & esse in actu, ens ipsum simpliciter, quod neque sit potentia, neque actu, ens ipsum aut figmentum erit, aut erit Deus, aut quædam significatio Dei, ut placet Platoniciis. Deus autem actus est omnium author existentium, perque actionis excessum prius, vehementius, diutius mouet mouentem, quam reliqua quæ offeruntur, imò eius virtute reliqua mentem mouent. Ipsum ergo esse absolutum, ipse scilicet purus actus effector omnium existentium, qui Deus est, primum est quod mentibus miro quodam pacto sese offert, quod illabitur, quod effulget, quod cætera omnia patefacit. Cuius formam & notionem quamuis perpetuam quodammodo in nobis possideamus, perque illam & in illa reliqua cognoscamus, non tamen illud animaduertimus, sicut neque oculus considerat se videre Solis lumen continuè, cæteraque per ipsum, atque in ipso, neque ratio animaduertit se continuè ratiocinari, cum semper fermè ratiocinetur. Nam diutius consueta animaduerrere nō solemus. Quis enim se spirare considerat? Vbi Platonici Deum summum vocant ipsum esse, intelligi volunt non esse quod essentia est, sed huius esse principium, esse videlicet super esse, quodcunque propria quadam effendi ratione concipitur, & aliqua notione comprehenditur. Summum enim Deum propriè vnitatis bonitatisque, sequentem verò Deum de Deo, lumenque de luce, entis nomine nuncupant, à prima vnitatem in tria de-

ductum, scilicet in essentiam, vitamque & mentem. Et quia in quolibet trium modo suo sunt, & reliqua tria in nouem usque producunt, vnde fiat, ut in Angelis nouenarius sit numerus obseruandus, simili que in animabus felicibus gradus. Mentem verò contemplantem formari quidem Deo à summo per vnitatem mentis caput, à Deo verò sequente per intellectum. Sed hæc ipsi viderint, nobis autem sufficit animam diuinitate formari. Ex omnibus superioribus concluditur, rationem humanam in ordine rerum considerando versari semper circa rationem diuinam rerum omnium ordinatricem, non minus quam mundi pharæ circa medium mundi punctum. Quod si reuolutio quæ naturaliter & assidue ex se ipsa perpetuum ambit centrum, perpetua est, oportet rationem nostram fore perpetuam. Quæ quoniam intelligendo per Deum atque in Deo sine medio in Deum reflectitur, planè testatur se à Deo sine medio processisse. Quis autem neget, quod proximè ab æternitate sit, æternum fore? Atque etiam videt in Deo speciem sempiternam prout sempiterna est, dum certa illam ratione sempiternam esse concludit. Ita verò videt, ut suscipit inde, sequitur igitur ut per modum suscipiat sempiternum. Et quia suscipit ut est ipsa, siquidem pro natura capit sua, fit ut ipsa perpetua sit, postquam modo perpetuo suscipit. Ratio autem hæc nostra nihil est aliud quam vita intellectualis. Semper ergo viuet, imò & intelliget semper, si semper erit. Sed iuuat hic cum Augustino, ut sæpè solemus, paulo latius peruagari. Quando ratiocinamur, animus id agit. Non enim id agit, nisi qui intelligit. Nec corpus intelligit, nec animus auxiliante corpore, quia cum intelligere vult, à corpore auertitur. Quod enim intelligitur, eiusdem modi est semper nihilq; corporis eiusdem modi est semper. Non igitur potest adiuuare animum ad intellectum nientem, cui non impedire satis est. Si per se ratiocinatur animus, ac ratiocinando veritatem attingit, attingit utiq; per se veritatem, quapropter ipsi veritati per quam vera sūt quæcunq; intelligendo attinguntur, propius heret quam aut rebus sensibilibus, aut earum imaginibus, quas non per se attingit, sed per instrumenta & reliqua media. Nō enim eam posset cōtemplari animus per se ipsum sine maxima cōiunctione cum ipsa. Ea quæ sensu capiuntur, extra etiam nos esse sentiuntur, & locis continentur, vnde nec percipi quidem posse affirmantur. Ea verò quæ intelliguntur, non quasi alibi posita intelliguntur, quàm ipse qui intelligit animus.

Simul enim etiam intelliguntur non contineri loco. Quare ista coniunctio intuentis animi, & eius veri quod intuetur, aut ita est, ut subiectum sit animus, verum autem illud in subiecto, aut contra subiectum verum, & in subiecto animus, aut est utrumque substantia. Horum autem trium si primum est, tam est immortalis animus, quā veritas illa, & summa ratio rerum, quæ inseparabiliter inhæret animo, & ineffensivi viuo non potest. Eadem necessitas est in secundo. Nam si verum illud quod ratio dicitur, nihil habet commutabile, sicut apparet, nihil commutari potest, quod in eo tanquā in subiecto est. Remanet igitur omnis pugna de tertio. Nam si animus substantia est, & substantia ratio cui coniungitur, non absurde quis putauerit fieri posse, ut manente illa hic esse desinat. Sed manifestum est, quod quādiu animus à ratione non separatur, sed ei cohæret, necessarium est eum manere atque vivere. Separari autem qua tandem vi potest? Num corporea, cuius & potentia infirmior, & origo inferior, & ordo separatio? Nullo modo. Animal ergo? Sed etiam id quomodo est? An alter potentior animus quisquis est, contemplari rationem non potest, nisi alterum inde separauerit? At neque ratio cuiquam contemplanti defuerit, si omnes contemplantur. Et cum nihil sit ipsa ratione potentius, quia nihil est incommutabilius, nullo pacto erit animus qui nondum est rationi coniunctus, eo qui est coniunctus, potentior. Restat ut aut ipsa ratio à se ipsum separet, aut ipse animus ab ea voluntate separetur. Sed nihil est in illa natura inuidentiæ quo minus fruendam se animis præbeat. Deinde quo magis est eo quicquid sibi coniungitur, magis facit ut sit, cui rei contrarius est interitus. Voluntate autem animum separari à veritate quis dixerit, qui nihil vnquam avidius studet quā veritati coniungi? Quid ergo? Iamne concludendum est animum esse immortalem? An ne etiam si separari non potest extinguí potest? At verò si illa vis veritatis ipsa sua coniunctione afficit animum (neque enim non afficere potest) ita profecto afficit, ut ei esse tribuat. Est enim maximè ipsa veritas ubi summa etiam incommutabilitas intelligitur. Itaque quemcunque ex se afficit, cogit esse quodammodo. Non ergo extinguí animus potest nisi à ratione separatus, separari verò non potest, non potest igitur interire. Quod verò infert dubitationem, illud est, quod animus stultus separari ab ipsa ratione videtur, & in quodam defectu esse & in essentia cer-

tiore atque pleniores sapiens. Sed si (quod nemini est dubium) tunc est animus sapientissimus, cum veritatem quæ semper eodem modo est, intuetur, eique immobilis inhæret diuino amore coniunctus, & ex illa essentia omnia sunt, quæ quoquomodo sunt, quæ summè maximeque est, aut ab illa est animus in quantum est, aut per seipsum est. Sed si per seipsum est, quoniā ipse sibi causa existendi est, & nunquā se deserit, nunquā interit. Si verò ex illa diligenter opus est quærere quæ res ei possit esse contraria, quæ animo auferat animū, esse quod illa præbet. Quid est igitur? An fortè falsitas, quia illa veritas? Sed manifestum est, atque in promptu situm, quantum nocere animo falsitas possit. Non enim amplius potest quam fallere. At nisi qui viuitalitur nemo. Non igitur falsitas interime, re animum potest, quod si hæc non potest, quæ contraria veritati est, auferre animo animū esse, quod ei veritas dedit (ita enim est inuictissima veritas) quid aliud inuenitur quod auferat animo id quod est animus? Nihil profecto. Nam nihil est contrario valentius ad id auferendum, quod fit ab eius contrario. At si veritati contrarium ira quæramus, non in quantum veritas est, sed in quantum summè maximeque est, quanquam in tantum est id ipsum, in quantum est veritas, (si quidem veritatem eam dicimus, qua vera sunt omnia, quantumcunque sunt, in tantum autem sunt, in quantum vera sunt, tamen nullo modo id defugerim, quod mihi euidentius suffragatur. Nam si nulla essentia in quantum essentia est, habet contrarium aliquid, multo minus habet contrarium prima illa essentia quæ dicitur veritas, in quantum essentia. Primum autē verū est. Omnis enim essentia non ob aliud essentia est, nisi quia est. Esse autē non habet contrariū, nisi non esse. Vnde nihil essentiæ est contrariū. Nullo igitur modo res vlla esse potest contraria illi substantiæ quæ maximè ac primitus est, ex qua si habet animus id ipsum quod est, non enim aliunde hoc habere potest qui ex se non habet, nisi ab ea re quæ illo ipso est animo præstantior, nec habet esse animus ab alio quā à veritate. Siquidē ab ea sola sortitur & bene esse, sequitur ut nulla res sit qua id amittat, quia nulla res ei contraria est qua id habet, & propterea esse non desinit. Sapientiam verò quis per conuersionem habet ad id ex quo est, auersione potest amittere. Conuersioni namque auersio contraria est. Illud verò quod ex eo habet, cui nulla res est contraria, non est vnde possit amittere. Non potest igitur interire.



# THEOLOGIÆ PLATONICÆ,

DE IMMORTALITATE ANIMORVM,

EODEM FICINO AVTHORE,

(:.) LIBER XIII. (:.)

*Quantum anima corpori dominetur, à multis ostenditur signis,  
ac primum ab affectibus phantasia.*

(:.) CAPVT PRIMVM. (:.)



**H**IC TENVS diuinitatem animæ rationibus demonstrauius, deinceps verò signis idē penē similiter confirmabimus. Phantasiam quatuor sequuntur affectus, appetitus, voluptas, metus ac dolor. Hi omnes quando vehementissimi sunt, subito corpus proprium omnino, nonnunquam etiam alienum afficiunt. Quantos ardores vel cupiditas vindictæ ciet in corde, vel libido voluptatis in iecore, imò & in pulsu? Ex cuius mutatione cognouit medicus Erasistratus, Antiochū esse amore Stratonicæ captum. Rursus cupido nocendi frequenti intuitu quam perniciosè pueros aliosque quoslibet molliores fascinat? Quam manifestè prægnantis mulieris auiditas tenerum foetum inficit rei cogitatæ nota? Quæ varios filiis suis gestus figurasque parentes, & quantum sibi dissimiles imprimunt propter vehementem rerum diuersarum imaginationem qua dum coeunt casu aliquo afficiuntur? quo fit vt dissimiliores sint admodum inter se homines figura gestibusque & moribus, quam quæuis inter se in quauis specie bruta. Quam sæpe malefica voluntas execrationibus suis & veneficiis vulgo fertur nocuisse hominibus, & brutis, & plantis, Adde quod glutones nonnulli epulas quasdam auidius cogitan-

tes, saluam suam simili quodam sapore inficiunt.

Pueri quoque & grauidæ mulieres propter nimiam vetiti cibi vel potus auiditatem liquecunt, diffiunt, dilabuntur. Hæc & similia per multa efficit appetitus. Lætitia quoque vehemens non minora. Hæc perimere subitò potest corpus, & sæpe morboleuare.

Nonne Sophocles & Dionysius Sicilia Tyrannus obiēre repente vterque accepto tragicæ victoriæ nuncio: Mater vilo filio è Cannensi pugna redeunte, subito expirauit. Quid contra dolor possit, nullus ignorat. Molestia quinetiam tetri cuiusdam spectaculi, gustum inficit, & prouocat nauseam solo aspectu. Pueri nonnunquam & grandiores cum amarā potionem offerri vident alicui, statim sentiunt amaram in ore saluam, quam vehemens mouet imaginatio. His nonnunquam tali quadam cogitatione alius quoque laxatur.

Et quod mirabile est, nonnullis stupefiunt dentes & aspectu aliquo, & auditu. Quid? misericordia quæ dolor quidam est, nonne miserantis corpus ita nonnunquam afficit male, vt corpus alterius videt affectum: Quod declarant ii qui sanguinis humani aspectu statim spiritu deficiente labuntur, & ii quibus dolet cubitus dum vident aut audiunt alterius cubitum vulneratum.

Quid metus? an non sæpe altis è fenestris in terram despicientes præ formidine caligamus, & contremiscimus? quandoque etiam ruimus? Pallent repente timentes, sicut & verecundi rubent. Timore subito trepidat cor, arrectæ stant comæ, vox faucibus hæret, deficit quoque vita, vel morbi diurni sequuntur. Nonnunquam verò morbos quosdam curat metus, ut singultum & quartanam febrim. Quando autem metus vehementissimus cum vehementissima auiditate concurrat, nonnunquam effectus mirabilis prouenit. Hinc (ut est apud Herodotum) cum Cræsum regem quidam ex Cræsis interficere vellet, filius Cræsi antea mutus, propter ingentem tum mortis paternæ timorem, tum clamandi cupiditatem, subito soluit linguam, ac magna voce clamauit. O uir, ne interficias Cræsum. Inde vocalis est factus.

Quamobrem affectus illi quatuor corpori penitus dominantur, cum illud vndique mutant. Sunt autem hi motus ipsius animi. Nam quantum animus bonum quippiam iudicat, aut malum tantum cupit, gaudet, timet, & dolet. Vnde sequitur naturam corporis animæ motibus penitus subiici. Hinc fit ut vultus humanus tum inclinationum animi perspicua signa, tum affectuum singulorum indicia certissima præ se ferat. Illa quidem soli Physiognomi, hæc etiam vulgares intelligunt. quis non faciliè agnoscat cupientem, timentem, iratum, gaudentem animum, & moerentem? Hinc accidit rursus, ut solus homorideat, solus & lachrimetur, ex eo quod animi motus plurimum in corpus habent imperium. Ex hoc autem quod rationalis animæ motus omnino corpus subiicitur, duo quædam coniicimus. Vnum, quod anima hæc forma excellentissima est, ac per se subsistens, quia non dominatur corporiforma illa quæ per corpus existit. Alterum, quod corpus humanum animæ suæ succedit facillimè. Non cedit faciliè, quod propter abundantiam terræ solidum est & durum. Ideo corpus nostrum si ad cætera animalia comparetur, quam minimum terræ, & illud quidem subtile possidet, sublimiorum elementorum quamplurimum, quocirca celestis est animæ receptaculum. Cui quidem rei documento esse potest, quod viri ingeniosiores sæpe numero molles carne sunt, graciles, valetudinarii, corpusque illorum quam minimis ipsorum motibus plurimum variatur, quod de Aristotele, de Pyrrhone, Speusippo, Carneade, Chry-

sippo, Plotino legimus. Quod in Timæo sensit Plato cum diceret Deum potuisse tam solidum hominis corpus facere, ut ab externis minimè læderetur, sed voluisse mollius facere, quo esset speculationi paratius, quasi non ad hanc habitationem, sed ad coelestem speculationem simus progeniti. Addit etiam, animi potentissimi motiones proprium corpus & resolvere & dissolvere. quod non in affectu solum, verum etiam in speculationis intentione contingat. Scribit & in Charmide, Magos illos animæ corporisque Medicos, Zalmoxidis Zoroastrisque sectatores, arbitrati omnia corporis tum bona tum mala ab anima fluere in ipsum corpus, quemadmodum oculorum qualitas fluit à cerebro, cerebri qualitas à toto corpore. Atque ut impossibile est oculos curari nisi curetur cerebrum, & cerebrum curari nisi corpus totum, ita corpus totum, nisi anima bene valeat, non posse bene valere. Valetudinem verò animæ curari Apollineis incantationibus quibusdam, id est, philosophicis rationibus. Socrates præterea narravit, vulgatum esse apud Thraces eos Medicos tali quadam curatione nonnullos homines seruare immortales consueuisse. Tantum est animæ in corpus imperium, tanta potestas. Magica hæc opinio videtur cum illa Hebræorum Christianorumque sententia consentire. Adæ primi parentis animo prius quidem sano, sana fuisse omnia. Deinde verò infirmo, infirma omnia euasisse. Cæterum de nostris motibus, hoc est diligenter animaduertendum, quod aliqui incipientes à corpore, non penetrant ad animam, alij penetrant, aliqui incipientes ab anima, non redundant in corpus, alij vero redundant. Primi huiusmodi sunt, quando temperatissimus aër corpori circumfusus licet aliquo modo corpus moueat, & tamen neque caloris præbet nobis sensum neque frigoris. Secundi sunt, quando ita mouet, ut aliquid sentiamus. Tertiij sunt, quando mens tranquille aliquid speculatur, aut phantasia leue aliquid modicè intuetur, ex iis namque cogitationibus corpus non agitur.

Quarti denique, quoties seu mens siue phantasia vehementius sese confert ad aliquid aut noxium valde, aut utile multum iucundumque existimat. Tunc enim corpus aliquid patitur. Profectò quando per animi affectum motus aliqui in corpus redundant, non per vim corporis, sed per animi imperium in corpus videntur descendere. Corpus enim vim non habet a-

gendi, atq; accipit subito motus illatos ab animo, nulla intercedente mora. Nam subito pallefcit vultus animo metuente, & per animi agitationem duntaxat expallet. Quando verò calefacto nimium corpore, anima id ægre fert, perturbatio huiusmodi non prius accidit animo, quam & passionem corporis senserit & noxiam iudicauerit. Sentire & iudicare actus est animi. Itaque per suum actum propriè, non per corporis violentiam animus perturbatur, ideoque seipsum mouet, non mouetur à corpore.

Quod ex hoc plane conspicitur, quia ex vehementiore cogitatione animi & affectu semper agitur & corpus, neque potest illi corpus oblistere, ex passione verò & cruciatu corporis, non necessario animus de suo statu deiicitur. Diogenes Cynicus nudus glaciem, niuemque hyeme, æstate arduas calcabat arenas, atque interim ridebat & iocabatur, Polemon Academicus rabidissimos canum morsus dum sentiret, ne expalluit quidem. Anaxarchus Abderites Philosophus à Nicocreante Cypri tyranno iussus est in saxum concuuium coniici, terreisque malleis cædi.

At Philosophus pœnam corpori negligens inquit, tunde, Tunde Anaxarchi vasculum, Anaxarchum ipsum nihil teres. Iussit tyrannus illi præcidi linguam. Tunc ille præcisam mordicus in tyranni faciem conspuuit. Alique innumeri, maximè omnium Christi martyres, talia fecisse commemorantur. Ex quibus apparet, non per corporalem naturam, semper animæ ipsius iudicium, passiones corporis posse in animam penetrare. Iudicium vero non semper naturam sequitur corporis.

Variatur quippe iudicium ad coniecturarum varietatem, etiam simili corporis complexione manente, sæpe etiam manet idem complexione mutata. Constat igitur animum corpori per se obesse, ipsum verò nisi à seipso lædi non posse. Læsiō verò quæ à seipso infertur, controuersia quædam est potius quam pernicies. Nihil enim à seipso perimitur.

*Signum secundum ab effectibus rationis.*

## C A P V T II.

*De Philosophis.*

**A** Nimam nostram corporis esse dominam, ab effectibus phantasiæ satis narrauimus, coepimus quoque idem partim à rationis affectibus indicare. hanc ergo partem diffusius prosequamur. In hac parte ponimus Philosophantes, Poetas, Sacerdotes, Præfagos, & Prophetas. Epimenidem Cretensem annos quinquaginta dormisse aiunt, id est, (vt opinor) à sensibus vixisse semotum, similiter decem latuisse Pythagoram, Zoroastrem verò viginti. Socrates (vt Plato) a Solis ortu vsque ad Solem alterum orientem inconniuens, immobilis, iisdem vestigiis & ore atque oculis in eundem locum directis, cogitabundus, & abstractus à corpore stabat.

Plato cum frequenter contemplationis intentione longe secessisset à corpore, tandem in ea ipsa abstractione à corporis vinclis decessit omnino. Eius discipulus Xenocrates singulis diebus integram horam abstrahebatur à corpore. Archimedes Syracusanus Geometricis figuris intentus, tumultuosum excidium pereuntis patriæ, & imminentem supra caput hostem non sentiebat. Porphyrius Plotini discipulus scribit, Plotinum sæpe solitum solui à corpore, mutare vultus, tunc miræ quædam inuenire, quæ postea scriberet. Quater autem affuisse se asserit iis Plotini miraculis. Seipsum vero cum ageret octauum & sexagesimum ætatis annum, à numine correptum semel inter contemplan- dum affirmat. Multis annis ante istosidem fecisse Heractum & Democritum legimus. Vtrique in solitudinem secesserunt. Alter intentione studij subtristis videbatur aspectu, alter cum mentem à sensibus auocare cœpisset, & impediretur ab oculis, sese excæcauit. Quid multa? quicumque magnum aliquid in quauis arte nobiliori adinuenerunt, id fecere præcipuè quando digressi à corpore in arcem animi confugerunt. Hinc plato scribit in phædro philo'sophorum mētes præcipuè alas quibus ad diuina volatur, recuperare, quia videlicet sæpe diuinis incūbant. Et alibi quidē diuinos, alibi verò Dei filios nominat, quia quodammodo renascantur ex Deo. Ob id scribit Aristoteles, omnes in qualibet arte viros excellentes, melancholicos extitisse, siue tales nati fuerint, siue assidua

meditatione tales euaserint. Quod ego ob eam causam arbitror euenire, quoniam humoris melancholici natura terræ sequitur qualitatem, quæ nunquam late sicut cætera elementa diffunditur, sed arctius contrahitur seipsam. Ita melancholicus humor animam & inuitat & iuuat, ut in seipsam se colligat. Rursus anima si frequenter ita ipsos in se spiritus colligit, propter continuam agitationem partibus humorum subtilibus resolutis, complexionem corporis multo magis terream efficit quam acceperit, præsertim cum habitudinem corporis se colligendo reddat compressiorem. Talis autem est terræ natura. Mitto quod talis quoque est natura Mercurij atque Saturni, per quam dum spiritus in centrum colligunt, animi aciem quodammodo ab alienis ad propria reuocant, sistuntque in contemplando, & ad centra rerum conferunt penetranda. Neque tamen planetæ vel humores eiusmodi tanquam efficientes causæ id operantur, sed vel præbent occasionem, vel impedimenta repellunt, animus autem ipse & inuitatus & expeditus talia perficit. Magnum certè est mentis imperium, quæ virtute sua à compedibus corporis soluitur. Ingens opulentia mentis, quæ quoties preciosos Dei & naturæ cupit thesauros, non ex terræ visceribus, sed ex proprio eruit sinu. Maxime verò in illis apparet quantum corpori ratio dominatur, qui cum flagitiosam adolescentiam egerint, ante ipsam senectutem subito vel inspirante Deo, vel homine exhortante ita mores mutant ut ex intemperatis temperari vel continentes euadant. Quod statim fecisse Polemon traditur eodem die quo audiuit Xenocratem de pudicitia disputantem. Idem Diogenes cum audiret Antisthenem differentem de libertate. Solet natura quicquid longo tempore inoleuit, non aliter quam longo tempore abolere. Habitum igitur diuturna consuetudine roboratum momento labefactare, non naturæ corporalis est, sed excelsioris atque diuinæ.

#### *De Poëtis.*

**P**Ræterea Poëtæ considera, quos Democritus & Plato diuino quodam furore correptos affirmant, hoc ostendunt præ cæteris duo Platonis dialogi, Phe-drus, & ion. Cuius quidem rei tria affert signa. Primum, quod artes singulas singuli homines sine Deo longo vix tempore assequuntur, legitimi verò poëtæ, qua-

les fuisse vult Orpheum, Homerum, Hesiodum, Pindarum, omnium artium suis operibus certa quædam indicia & argumenta inseruerunt. Secundum, quod multa furentes canunt, & illa quidem mirabilia, quæ paulo post deferuescente furore ipsimet non satis intelligunt, quasi non ipsi pronunciauerint, sed Deus per eos ceu tubas clamauerit. Tertium, quod non prudentissimi quique, & ab ineunte ætate eruditissimi, optimi euasere Poëtæ, verum insani potius aliqui, qualem fuisse constat Homerum, atque Lucretium, aut rudiores, qualem se fuisse testatur Hesiodus & quales extitisse Ionem & Tynnium Chalcidæum scribit Plato, qui præter artem subito in rebus Poëticis mirandi prodierint. Addit ineptissimos quosdam homines à Musis ideo corripì, qui diuina prouidentia declarare vult hominum generi, non hominum inuenta esse præclara poëmata, sed cœlestia munera. Cuius illud affert signum in Phædro, quod nullus vnquam licet diligentissimus, & omnibus artibus eruditus, excelluit in poësi, nisi ad hæc accesserit feruentior illa animi concitatio, quam sentimus quando est Deus in nobis, agitante calescimus illo. Impetus ille sacræ semina mentis habet. Veniamus ad sacerdotes.

#### *De Sacerdotibus.*

**D**Iuum Paulum Theologum tres cœlestium Hierarchiarum cœlos in diuina abstractione animi cōscendisse scripta eius, gesta discipuli monstrant. Galilæi quoque nonnulli olim subito inspirante Deo ex piscatoribus summi euasere Theologi, sacerdotes multos ante horum tempora instinctu dæmonum solidos debacchari mirabilia quædam effari omnis testatur antiquitas. Cornelium sacerdotem castissimum scribit Aulus Gellius Patavi mente motum fuisse, eo tempore quo Cæsar & Pompeius in Theffalia confgebant, adeò ut tempus & ordinem & exitum pugnæ videret. Plinius quoque tradit Hermotimi Clazomenij animam relicto corpore vagari solitam, & multa ac vera è longinquo nunciare, donec cremato eo inimici eius, qui Cantaridæ vocabantur, remeanti animæ velut vaginam ademerūt. Idē facere consueuissē scribit Maximus Pyrius Platonius & Herodotus animā Aristei Proconnesij Aurelius Augustinus refert sacerdotem quem Calamensem solitum se suo arbitratu à corpore auocare, præ-

fertim cum querula harmonia demulceretur. Iacebat, inquit, simillimus mortuo, sine anhelitu, & cum vreretur & secaretur, non sentiebat. Experrectus autem dicebat se nihil præter ipsam melodiam & voces loquentium in ipsa abstractione sensisse. Quod significat animam illam nihil tunc operari solitam in corpore, cum nullus esset motus aut sensus tangendi, aut anhelitus, aliquid tamen in seipsa agere cum harmoniam ante auditam excogitaret, vocesque perciperet. Atque & Cornelius ille, & Hermotanus & Aristeus, quos supra narraui, cum se à corpore abstulissent, nihil vidissent remotius quam antea, nisi anima cum à corpusculo isto eximitur, viueret liberior, & latius vagaretur, nec Calamensis anima se sua sponte abstulisset à corpore, & semota egisset aliquid, si corporis sui pedissequa fuisset omnino. Hæc his Platonis verbis in Phædro consumari videntur. Diuinis, inquit, meditationibus qui recte vititur, perfectisque mysteriis semper imbuitur, perfectus re vera solus euadit. Ab humanis autem studiis segregatus, diuinoque numini semper inhærens, vulgo capitur quasi extra se positus, sed ipse Deo plenus vulgus latet.

*De Fatidicis, & Prophetis.*

**D**iximus de Philosophis, Poëtis, Sacerdotibus, iam de Fatidicis Prophetisque loquamur. Longior esse cogar, si Augures, Aruspices, Auspices, Mathematicos, Magos commemorauero. Horum quidem opera peritissimas indicant mentes. Mentis vero diuinas illa præ cæteris præfagia indicant, vt in Phædro vult Plato, quæ sine arte & consilio fiunt, qualia sunt quæ de Diotima vate & Socrate & Epimenede Plato refert, quæ de Sibyllis Varro vnâ cum Platone, quæ de Pythiis oraculis historici narrant, & Philosophi penè omnes confirmant, præsertim Platonici, quæ de somniis experiuntur omnes, quæ de diuinis Prophetis tradunt Hebræi. Horum omnium mentes tunc maxime loca plurima circumhæstrabant, & tria in vnum tempora complectebantur, quando se à corpore secernebant.

Ergo quando animus hominis omnino erit seiunctus à corpore, omnem (vt est apud Ægyptios) comprehendet locum, & omne tempus. Imò verò iam penè est talis animus suapte natura vbique & semper, qui vt multa loca & remotissima circumspiciat, atque vt totum recolat præte-

ritum tempus, & futurum anticipet, non cogitur extra se progredi, sed relicto corpore in se reuersus, id prorsus assequitur, aut quia natura sua vbique est & semper, vt arbitrantur Ægyptii, aut quia cum in naturam suam se recipit, statim numini coniungitur omnes & locorum & temporum terminos comprehendenti. Cæterum qua via præfagium cadat in animum, si placet, altius reperam. Tres rerum ordines ad humanam animam pertinere videntur, prouidentia, fatum, natura. Prouidentia est series mentium, fatum series animarum, natura series corporum. Principio sub Deo mentes illas omnino solutas à corpore ponimus secundum Platonem, quos vocat Dionysius Angelos, purissimos scilicet intellectus. Addimus inferiorem mentium gradum, earum scilicet quæ iam corporibus vniuntur, & quasi quidam Angeli videntur esse, obtinentes quodammodo gradum infimum angelorum, quorum in numero sunt animæ omnes rationales, siue mundi, seu mundanarum sphaerarum, syderum, demonum, atque hominum. Tertio loco sunt globi cælorum, elementorum, humorum. Proinde angelorum caput Deus est, quia radium suum rerum omnium creandarum rationibus præditum, per Angelos omnes demittens, gradatim format omnes, ita vt in singulis vniuersalem describat mundi figuram. Neque solum sublimes illos intellectus, angelosque purissimos sic exornat, verum etiam per illos tanquam medios in mentes quoque rationalium animarum quasi quosdam infimos Angelos radium eundem traducit, iisdem præditum rationibus, huiusmodi rerum dispositio, lexque diuina inscripta mentibus, prouidentia nuncupatur. Sequitur fatum. Animæ quippe rationales non modo vim illam habent intelligendi, per quam angelicæ sunt, & in ordine prouidentie numerantur, verum etiam vim illam viuificam, reatricemque corporis, quæ alit corpus in corpore, sentit corporalia per corpus, mouet corpus per locum, regitque in loco, quam vim idolum, id est simulachrum rationalis animæ Platonici nuncupant. In hoc idolo insunt semina motionum & qualitatum omnium quæ in corpore explicantur ab anima. Omnes animæ rationales tum nostræ, tum quæ supra nos sunt vires illas habent intelligendi. Habent & has viuificas reatricesque corporum facultates. Sequitur natura. Nam in quolibet corpore animato est



certa quædam eius affectio siue complexio efficax atque vitalis, quam virtus animæ suæ viuifica corpori tribuit. Hanc volunt esse Platonici naturam corporum, quasi quoddam vestigium animæ in corpore, siue vmbra, quam I'roculus esse vult vnâ cum diuisione corporis diuisibilem seminibusque plenam, vitamque corporis ab animæ vita manantem. Resumamus in hunc modum. Omnes mentes, siue sublimes & super animas sint siue inferiores & inditæ animabus, ita inuicem connexæ sunt, vt ab earum capite Deo incipientes, longa & continua serie procedant, ac superiores quælibet inferioribus radios suos disperant. Videamus quid hinc oriatur. Quando quis caput summum recti ligni humi iacentis digito pulsat ad alterum ligni extremum pulsatio vel leuissima resonat. Idem in chorda fit tensa, cuius si apex tangatur, tota tremit & sonat. Si tendas æquo interuallo duas in lyra fides, altera pulsata, tremit & altera. Si duas lyras ad eandem intentionem fidiū tēperes, sonante altera, altera reboat. quorsum hæc? vt intelligamus hinc, ex omnium mentium mutua & inuicem temperata connexione idem fieri, vt scintillæ primarum in medias, mediarum in infimas vsque refulgeant, & à postremis per medias in sublimes iterum reflectantur. Harum connexionem, hanc mutuam, scintillarumque infusionem à superioribus ad inferiores continuè demnantem, prouidentiam appellamus. Mittamus mentes in præsentia, accipiamus idola, id est simulachra animarum. Caput omnium sit idolum animæ mundi, huic connectantur idola duodecim, animarum duodecim, sphaeras duodecim agitantium. Quoniam verò in quælibet sphaera plures sunt animæ, harum idola ad vnum idolum vnius communifque animæ, quæ totam illam regit sphaeram, relegendur.

Atque ita omnia animarum rationaliū idola mutua quadam conspiratione ex vno pendent idolo summo, ita vt nutus quilibet idoli primi in media, & mediorum in infima transeant, & semina rerum omnium corporalium à primis idolis, idolis sequentibus inferantur. Conspirationem huiusmodi, seminumque traductionem, fatum esse arbitrabamur. Eadem ratione per corpora procedamus. Complexiones siue affectiones siue naturæ duodecim, sphaerarum duodecim, vni & summæ naturæ ipsius mundanæ materiæ copulentur. Singulæ vero naturæ singulorum corpusculorum sphaeræ cuiuslibet adhe-

rentium, ad naturam sphaeræ suæ vniuersalem similiter referantur. Atque hæc dependentia, series naturalis cognominatur, in qua naturarum superiorum instinctus in naturas inferiores transfunditur. Ita omnes mentes tãquàm lumina ad vnâ mentem tanquam lumen, omnia animarum idola & simulachra ad vnum vniuersalis animæ idolum, omnes naturæ corporum, quasi animarum vmbre, propriè ad communem naturam vnius corporis quasi vmbra vnius animæ reducantur. Anima nostra per caput suum id est mentem, superioribus mentibus nequitur, per vim infimâ id est idolum quo regitur corpus, cum idolis animarum superiorum conspirat, per naturam corporis sui, cui idolum se insinuat, conciliatur naturis corporum mundanorum, quas natura huius corporis sequitur. Ergo iis quasi tribus rudentibus toti machinæ colligamur, mente mentibus, idolo idolis, natura naturis, non aliter ac factus in aluo toti corpori materno per continuata ligamenta connectitur, vnde & animæ maternæ, & corporis & spiritus materni ipse quoque per animam suam corpus & spiritum percipit passionem. Anima igitur per mentem est supra fatum, in solo prouidentia ordine tanquam superna imitans, & inferiora vnâ cum illis gubernans. Ipsa enim tanquam prouidentia particeps, ad diuinæ gubernationis exemplar regit se, domum, ciuitatem, artes, & animalia. Per idolum est in ordine fati similiter, non sub fato. Siquidem animæ nostræ idolum, natura sua cum supernis idolis concurrat ad formandum corpus atque mouendum. Per naturam quidem corpus est sub fato, anima in fato naturam mouet. Itaque mens super fatum in prouidentia est, idolum in fato super naturam, natura sub fato, supra corpus. Sic anima in prouidentia fati, naturæ, legibus, non vt patiens modo ponitur, sed & vt agens. Ideo Plato in libro de republica decimo, virtutem animi, inquit, non esse seruilem dæmonem vitæ ducem, ac rursus vitæ fortunam eligit à nobis, non nos à dæmone vel fortuna. Culpam eligit à nobis, non nos à dæmone vel fortuna. Culpam eligentis esse, non Dei, Zoroaster quoque ita præcipit:

Μὴ σὺ γ' αὐτὰρ ἐλπίδι μαρτυρήνῃ.

Id est, ne tu angeas fatum. quasi in tuo arbitrio sit cedere fato, atque non cedere. Cum verò ex tribus illis partibus adstringamur partim rerum ordini, partim non adstringamur, ex quarta præcipue solvimur, nostri que sumus omnino. Hæc ratio

est quam inter mentem animæ caput, & idolum animæ pedem, mediâ collocamus. Mens enim animæ inest non quantum anima propriè est, sed quantû angelica, & à supernis mentibus occupata. Idolû quoque illud animæ, id est rectrix potètia corporis, non est animæ puræ officium, sed animæ iam vergentis ad corpus. Verû ratio interponitur, vis quædam verarum propria animarum, per quam in vniuersali conceptu à principiis rerum ad conclusiones temporali successione discurrunt, effectus resoluunt in causas, causas iterum in effectus deducunt, discurrunt etiam conceptu particulari ad discursiōis vniuersalis exemplar. Sed in prima ipsa & vniuersa in discursiōe, ratio intellectualis vocanda est, in discursiōe particulari, ratio cogitatrix & opinatrix. Mens autem illa quæ est animæ caput, & auriga, suapte natura Angelos imitata, non successione, sed momento quod cupit assequitur, imò habitu quodam, & (vt vult Plotinus) actu simul continet omnia. Ac merito post mentem hanc animæ stabilem Angelos imitantē, sequitur ratio mobilis animæ propria. Huius pedissequæ sunt vires illæ sentiendi brutæ, quæ sunt in idolo phantasia scilicet confusa, quæ instinctum sequitur naturalem, imaginatioque quinque sensuū congregatrix. Idoli pedissequa est natura. Mentem nostram soli cuidam nostro, ratonem Solis huius lumini, idolum luminis huius radio, naturam radij reflexioni, id est splendori, & vt rectius loquar, vmbre, Platonici comparant, atque vt ad vim reuertar rationalem, sæpe eam aiunt ita se ad mentem habere, vt sermonem ad animam se habere videmus, & in motu perpetuo liberoquē versari. Denique facultas illa rationalis quæ propriè est animæ veræ natura, non est ad aliquid vnum determinata. Nam libero motu sursum deorsumque vagatur. Primus enim motus est qui in propria animæ natura locatur, cum ipsa sit essentia tertia, cuius virtus est per se mobilis. Primus autem motus, nō hic motus est aut ille, non huc solum fertur aut illuc, sed communis motus est, & tanquam fons motionis perfluit liber, partibusque in omnem partem momentis prolabitur. Quamobrem licet per mentem, idolum, naturam, quodammodo communi rerū ordini subiectamur, per mentem prouidentie, per idolum fato, per naturam singularem vniuersæ naturæ, tamen per rationem nostri iuris sumus omnino, & tanquam soluti, modo has partes modo illas sectamur. Quandoque ratio menti cohæ-

ret, vbi surgit in prouidentiam. Quandoque idolo obsequitur, & naturæ, vbi fatum suo quodam subit amore, dum sensibus confusa, huc & illuc rerum sensibilibus occursum distrahitur. quandoque omissis aliis in seipsam se recipit, vbi aut res alias perquirat argumentando, aut indagat semetipsam. Usque adeò vis hæc media propriaque animæ, & libera est, & inquieta. Et quando aliquid in nostra incurrit extremâ, puta in mentem, idolum, vel naturam, fieri quidem potest vt anima statim illud quoquo modo percipiat, non tamen prius animaduertit se illud percipere, quam in potentiam transeat mediam.

Cum enim potentia media sit, per quam nos homines sumus, imò & quod ipsi sumus, quod pertinet ad eam, euidentissimè ad homines pertinet. Mouent sæpe colores aut voces oculos siue aures, confestim visus & auditus suum explent officium, hic videt, ille audit, nondum tamen animus & videre se & audire animaduertit, nisi media nostri potentia sese ad hæc intendat. Quod patet in his qui obuios sibi non comprehendunt, dum aliud quippiam attentius cogitant. Sic mentes superiores mouent semper nostram mentem illis annexam, impulsam tamen huiusmodi ideo non aduertimus, quoniam vis media per inferiora circûuaga à superioribus se diuertit. Eadem ratione idola animarum superiorum pulsant semper idolum nostrum, hunc tamen nos influxum haud agnoscimus, quando pars illa media aliud quicquam firmiter speculatur. Similiter corporum ampliorum naturæ continuè laceffunt corporis nostri naturam, & hunc instinctum sæpissime ratione eadem nequaquam aduertimus. Huius rei exemplum habemus in corpore. Sæpe enim nullare laceffiti, nobiscum subiacimur, nullis malis turbati, nunciis aut potentis territi torpescimus, mœremus, & trepidamus, nullis bonis permulciti gestimus ipsi nobiscum & canimus. Hæc vnde? Causam certe nouam habent tam noui effectus. Hæc utique est varia pro variis temporibus affectio corporis, siue in felle vel iecore crocea bilis exæstuet, seu bilis ferueat atra in splene, seu claro sanguine cor abundet. Huiusmodi corporis affectiones atque naturæ quia proximæ sunt viuificæ potentie quæ idolo continetur, & continet ipsas, eam variis incitant pulsibus, dum occasionem præbent vt illa & aliter & obnoxius operetur in complexione corporis viuificanda, quam solear. Huiusmodi operatio reddita concitior,

vim sentiendi quæ eodem idolo continetur, tactum præsertim titillat sensum, pungitue latenter eiusdem idoli phantasiam, ceu per naturæ indigentiam pungitur stomachus. Punctio illa & titillatio latens, ad mediam animæ partem non transit quando illa in aliud inhiat, transit autem quando vacat. Tunc per rationem cogitatricem repente subirasimur quodammodo, vel moeremus, vel gaudemus. Ratio intellectualis hæc aduertit, vnde assentitur quandoque, quandoque etiam consiliis & remediis hæc fugit & fugat. Summatim his sæpe pulsamur affectibus longo ordine à naturis vniuersalibus per propriam in nos descendantibus, & vnde nobis ingerantur, penitus ignoramus. Si ita est, cur non etiam mentes superiores menti nostræ coniunctæ semper eam pulsent? Quem impulsus nos minime aduertimus quando pars media nostri ita est suis actibus occupata, vt vsque ad eam non transeat mentis influxus. Ea verò vacante, quid prohibet Angelicam aliquam rationalibus viribus cogitationem irrepere, licet vnde surrepat, non videamus? Quod indicant illi, qui absque præceptore ex sola vacuæ rationis intentione, aut etiam tranquillitate, sæpe multa & præclarissima etiam dum non inquirerent, pepererunt, quasi sua sponte Solis lumen in serenum aërem subito se transfundat. Ac licet dispositio mundi, quæ tota simul est in mentibus rationibusque supernarum animarum inscripta, perenni quadam continuatione tota simul nostræ menti se offerat, temporalis tamen mundanorum seminum vicissitudo sicut paulatim in idolis naturisque illarum animarum sibi ipsi succedit, ita simili quadam successionis continuatione per omnium animarum idola omniumque corporum naturas descendit vsque ad idolum animæ nostræ, & corporis nostri naturam. Vt ecce ratio pluuiæ, cras futuræ hodie regnat in animarum cœlestium idolis, cœlorumque naturis. Eadem per elementalium animarum idola, elementorumque naturas demanat, quousque idolum animæ nostræ simulque naturam pulset humorum. Pulsatio idoli nostri fit ab idolis, naturæ nostræ pulsatio ab illis naturis & idolo nostro. Quando mentium ille influxus rationem nostram sortitur ociosam, siue menti vacantem, ipsi aliquid ostendit eorum, quæ ad vniuersalem æternarum rerum cognitionem seu mundi gubernationem pertinent, vt vel Dei legem, & ordines angelorum, vel seculorum restitutiones, & regnorum muta-

tiones præuideat. Quando idolorum naturarumque instinctus rationem omnino & phantasiam offendit vacuam, aliquid sibi portendit eorum quæ ad temporum vicissitudines, elementorumque perturbationes attinent, vt futuram præuideat pluuiam, terræ motus, atque similia.

Qua via istud? Vis illa supernorum idolorum pluuias inductura, ad pluuias præfigurat cœlorum rotas, hæc aërem humefaciunt, aër vduis pituitam mouet nostram, humorem scilicet aqueum, pituita spiritum, ex ea præsertim parte qua & ipse est aqueus. Siquidem spiritus cum sit vapor sanguinis, & in sanguine quatuor insint humores, in spiritu sunt quatuor humorum elementorumque virtutes. Igitur virtus illa spiritus aquea à pituita irritata, viuificam animæ nostræ instigat potentiam ex ea parte qua aquaticorum semina-vis viuifica possidet. Vis hæc suscitatur eas imagines quæ in vacante phantasia rationesque sunt ad pituitam pertinentes, vt subito cogitemus flumina, imbres, angues, anguillas, pisces, atque similia. Eodem pacto vis supernorum calores & æstus procreatura, congruis mediis choleram, id est, bilem in nobis & cholicum spiritum mouet, hic virtutem viuificam, hæc igneas imagines in phantasia rationeque latentes, vt incendia imaginemur, rubeosque colores, & flauos.

*Septem vacationis genera.*

**V**erum quando ita vacamus, vt huiusmodi aduertamus influxus, septem sunt vacandi genera. Somno, syncope, humore melancholico, temperata complexione, solitudine, admiratione, castitate, vacamus. Quoniam anima operationes suas mouendi & sentiendi in hoc corpore crassiore per spiritum sibi proximum explet, ideo quando vel propter defatigationem spiritus in mentibus exterioribus resoluuntur, vel propter vapores humoresque meatus illi cerebri opplentur, per quos huiusmodi spiritus ad sensum motumque idonei solent ad membra transmitti, tunc animus sese quodammodo colligit, neque in sentiendis corporalibus qualitatibus, neque in regendis mouendisque membris sui corporis, neque in tractandis externis negociis occupatur, quod facile fit in somno. Quanto autem magis exterior actus remittitur, tanto intenditur magis interior. Interiores actus sunt phantasie visa, rationisque discursiones. Sed plurimum ita intenditur

phantasia ( cuius nutu plurimum agimus vitam ) vt imagines suas acerrimo intuitu in seipsa volutet. Reuolutæ acrius imagines illæ vsque ad communem illum sensum, quem more Platonico vocamus imaginationem, relucet, inde in sensus inferiores, & spiritum. Imago verò in sensibus iis spirituque lucens, solet pro reuera asseuerari.

Nam vigilantes hominem se videre aiunt, quando ad hominis imaginem in iis micantem sese vertunt. Similiter dormientes affirmant hominem se videre, quando eius imago à phantasia ipsius conseruatrice per imaginationem in sensum resplendet & spiritum. Resplendent autem imagines illæ præ cæteris, ad quas phantasia magis afficitur, siue cogitatio siue perturbatio præterita, siue tumultus præsens dominantium humorum id faciat. Atque hæc insomnia vana sunt, & nihil præferunt vaticinij, nam aut ex vigiliarum reliquiis, aut ex corporis turbatione nascuntur. Talibus insomniis homines illi solent illudi, qui voluptuosæ vitæ dediti, ad ea quæ mouent sensus, vehementer afficiunt, & phantasiam ad hæc vel tanquam bona adsciscenda, vel tanquam mala reiicienda affigunt acerrimè, quo fit vt eorum reliquæ phantasiam turbent in somnis. Accedit, quod nimio grauati cibo vel potu, phantasiam in somno expeditam habent nunquam. Nam propter immoderatam humorum vaporumque redundantiam, imagines illæ in phantasia sæpe mouentur, quæ terræ spectacula præferant. In iis quoque propter vini calorem incitata virtute genitalis seminis expultrice, mouentur imagines amatae personæ quas seruat phantasia, vnde cogitatur amplexus. Ex iis rationibus Plato in nono libro de Republica, concludit rationem sæpe in somno vsque aded occupari, vt non liberè influxus superiores persentiat. Percepturam autem veritatem inquit, quoties non turbabitur. Sunt & multi voluptuosæ vitæ contemptores, rerum tamen ciuiliū studiosi vel imperij & gloriæ cupidi. In his dormientibus consopitur interdum etiam phantasia, at ratio tunc priuata & publica tractat negotia, & iis plurimum occupatur. Sunt nonnulli tam voluptatum quam humanæ gloriæ contemptores, sed indagationi rerum diuinarum & naturalium dediti. Horum in somno cessat aliquando non phantasia solum, sed rationis etiam actiue anxia consultatio. Resurgit autem consueta illa rationis speculatricis inuestigatio, vt vel

metiri coelū, videamur, vel elemēta parti-ri, vel animalium species numerare. Nullis eorum quos numerauimus, communiter conuenit vaticinium, licet postremi ij philosophantes verè ratiocinentur etiam dormientes, imò & inueniant quandoque quæ diu quæsitæ non inuenerant vigilantes, quia ratio est tranquillior. Tale quiddam contigit Galeno, qui scribit cum circa diaphragma ægrotaret se somniauisse liberatum iri, si sanguinem mitteret ex vena quæ est inter pollicem & indicem, minuisse sanguinem, conualuisse. Neque sunt aliqui, licet perpauci tales reperiantur, qui domitis voluptatibus, ciuilibusque rebus neglectis, ita suam vitam instituant, vt veritatis quidem assequendæ flagrent cupiditate, eam tamen humanis vestigiis, quibus ambigua mens naturalium Philosophorum plerumque solet confidere, inuestigari posse diffidant, itaque Deo se dedunt, ipsi moluntur nihil. Apertis & purgatis oculis quid maxime diuinitus ostendatur, expectat, quod & præcepisse dicitur Socrates, & fecisse, Hi piij homines & religiosi vocantur, horum animus in vigilia vacat præ cæteris, vacat in somnis omnino, quapropter supernus impulsus ab eo facile animaduertitur. Sed horum hominum duo sunt genera. Alii templum hoc Dei, mundi scilicet machinam admirantur frequentius, alii templi huius numen impensius venerantur. Illorum animo per somnum quieto passionēs mundi monstrantur, & illæ præ cæteris ad quas magis afficitur, vt pluuiam videat futuram, bellum, pestem, atque similia. Demonstrationis modum & ordinem supra diximus. Cæterum sæpe difficilis somnii interpretatio est, sæpe etiam facilis. Difficilis, quando postquam pluuia futura expressa est in phantasia, vis phantasie imaginem pluuiæ non satis attente commendat memoriæ, sed tanquam velox nimium & versatilis, vt semel impulsæ est, currit lubrica per similes & consequentes imagines, vt ex pluuiā excitetur ad ventos cogitandos, ex ventis ad altissimos montes, ex montibus ad niues, ita prætergressa expergiscitur, atque expectata niuis postremò visæ magis memor est quam pluuiæ, vnde futuram prædicit niuem, non pluuiam. Quapropter oportet interpretem somniorum esse sagacissimum venatorem, vt sciat ex proximo vestigio recurrere ad remotum, ab illo rursus ad remotius aliud, ac videat quid apprimè ex quoque sequatur, quousque ad primum perueniat.

Quod solemus in quotidianis sermoni-

bus observare, quando ex vno sermone in alium rursusque in alium transgressi, tandem sermonem primo propositum in promptu non satis habemus. Tunc novissima verba consideramus, è quibus potissimum verbis sequi poterint, & iterum ex quibus illa, donec prima planissime recolamus. Solertia venatoria velox & versatilis requirit ingenium, præfaga facultas, si modo perspicue debeat prævidere, pacatum atque quietum. Hæc tanquam repugnantia in eodem non facile concurrunt. Ideo plurimum non iidem præfagi sunt perspicui, & interpretes, & sæpe qui præfagiunt, nesciunt quid præfagiant maxime, & qui interpretantur, velociter errant magis in prævidendo. Quod in Timæo significat Plato, cum dixit alios esse vates, alios vatum interpretes. Sed ut ad rem redeamus, eorum somnia interprete indigent, qui propter cholericos & igneos spiritus curriculo phantasie currunt velocius. In quibus vero propter complexionem spirituum temperatam vel melancholicam phantasia incedit maturius, prævisæ res firmiter inhaerent memoriæ, neque novis & variis imaginibus confunduntur, propterea horum præfagia interpretatione non indigent. Atque hæc sunt præfagia somniorum quæ religiosi illis conveniunt, qui divinam hanc ædem admirantur & stupent, qualia sibi obtigisse tradit Hippocrates, qui cum Democritum, qui insanire vulgò ferebatur, curaturus adiret, per quietem accepit à Deo, non Democritum insanire, sed vulgus. Eadem ratione Socrates futuram Platonis excellentiam prædixit ex somnio. De his satis. Illis verò religiosi, qui templi huius potius numen adorant cum per somnum quiescunt, id accidit, ut mens eorum divinæ cupida maiestatis pulsètur numine vehementer, & talis quædam menti illorum succurrat de Deo cogitatio, qualem maximè solet vigilans affectare, puta sedem operationemque Dei nosse desiderabat. Quiescenti rationi lux infinita inuisibilisque occurrit, quæ ubique tota & in seipsa sit, seque ipsam, per se sine oculo videat. Hic si phantasia ad motum est tardior, plana manet & perspicua notio, quam expectatus animus immaculatam, ut acceperat, hominibus aperit. Sin velocior sit statim ipsa post rationem, ut solet, suum opus aggreditur. Volutat consuetas imagines, atque imitata pro viri ut s rationem, lucem fingit Solis immensam, tetram oculis omnium ubique micantem. & in seipso perpetuo se circuitu revolventem. Hic ergo est opus

interprete, qualis Ioseph fuit, & Daniel, qui regia somnia interpretabantur. Hac divinatione polluit Mercurius Trismegistus, quod eius liber de Dei potentia & sapientia, è Græca lingua in Latinam a nobis translatus ostendit. Hæc vaticinii species religiosi quidem (ut diximus) maxime convenit. Aliis quoque nonnunquam, si quando vel providentia aliqua, vel casus prosperitate iaceant sobrii, curisque vacui. Unde Alexandro regi dormienti draco herbam monstravit, qua Ptolemæum curaret graviter vulneratum. Præcipue verò propè ortum Solis sedata paulum vaporum externarumque curarum turba, id accidit.

Quamquam, quod vulgo effertur, maturina somnia esse veriora, non ob id solum provenit, quòd magis sobrii sumus (sæpè enim sobrii dormitum accedimus, neque tamen tunc fiunt perspicuæ visiones) verum etiam ex eo, quod & Solis Phœbique vatis accessu vaticinium roboratur, & sanguinei ignei que spiritus ea hora dominantes, claritate sua ad claram conferunt visionem, & (quod videmus) quia statim expergiscimur, turbam imaginum consequentium non confundimus. quæ de somno dicta sunt, his Orpheï versibus confirmantur.

Ἀγγέλοι μέλλοντων, θνητοῖς χρησμάδε μέγιστα,  
ἡσι χαρὰ ὑπὸ πτερύγεσσιν ἔσσι γέλλος ἐπέλθων  
προσφώνων ψυχῆς θνητῶν, νόον αὐτὸς ἐγείρει.

καὶ γνώμας μακρῶν αὐτὸς καὶ ὕπνῳ  
ἔσσι πτερύγεσσιν.

σιγῇ σιγῶσαι ψυχῆς, μέλλοντα πρόφω-  
νών,

οἷσιν ἐπ' εὐσεβέσιν ἑσὼν νέος ἰσθλὸς ὀδύνη.

Id est, Nuntie futurorum mortalibus vaticinator maxime, Accedis ad animas somni quiete demulctas, easque compellans suscitās mentem. Sententias numinum beatorum eis per somnum subinferis. Silens silentibus animis ventura prænuncias, his, inquam, animis, quorum mens divino cultu rectissime utitur.

Satis de ea vacatione animi quæ per somnum fit, diximus. Sequitur vacatio quæ fit per syncopam, id est, per casum corporis semiivi quando cordis defectu spiritus ad membra non mittuntur, & qui in membris sunt, retrahuntur ad cordis debilitati præsidium, quo in statu perinde ut in somno provenit vaticinium.

Quo excelluisse Hercules dicitur, Arabesque permulti, cui comitiali morbo corripiebantur. Hinc Plutarchus in libro primo de anima, Enarchus, inquit, nuper æ-



grotas, tanquam iam mortuus à medicis fuit relictus, & breui tempore in seipsum postea reductus, dicebat se mortuum fuisse, & in corpus iterum restitutum, nec eo morbo moriturum, reprehensosque aiebat vehementer à domino suo eos spiritus, qui animam eius duxerunt. Ad Nichandam enim missos, non ad ipsum fuisse. Nichandas autem corarius erat, & in palæstris non ignobilis, qui eo tempore quo Enarchus reuixit, in maximas incidit febres, ac repente mortuus est. Hic autem uiuit, superstesque est, felicissimè nobiscum manens.

Tertius vacationis modus fit ex melancholici humoris contractione, animam ab externis negotiis seuocantis, ut anima tam vacet homine vigilante, quam solet dormiente, quandoque vacare. Certè quemadmodum commodissimum instrumentum carere oportet motu proprio, ne forte quando faber mouere ipsum ad dextram statuit fabricando, ipsum interim feratur motu proprio ad sinistram, sic animum illum quo diuina providentia uti ad vaticinium statuit quasi aliquo instrumento, quietum esse necessarium est quales sunt melancholici sæpe.

Sed & hi quando numine rapiuntur, tanto cæteris concitiores fiunt, quanto corpora densa si accendantur, feruentius vrunt, quam corpora rara. Hac ratione Socrates, quem Aristoteles melancholicum iudicauit, dæmonis familiaris inspiratione multa præsentiebat, cuius rei testes sunt Plato, Xenophon, Antipater maximus, Apuleius.

Siquidem Timarchus cum ab eo conuiuium discessisset ubi Socrates discumbebat, Socratis dæmone prohibente, inde ea perpetravit, quorum causa est occisus. Charmides in Nemea certauit vetante Socrate, ac certasse poenituit.

Critoni contra Socraticum consilium rusticati ramulus aliquis percussit oculum.

Idem etiam Socrates dum fugeret vnà cum aliis nonnullis impetum hostium, ut ventum est in triuiū, eadem qua cæteri via fugere noluit, quia deterrebat à dæmone. Tum quidem ij qui alia via fugerant, in equitatum hostium inciderunt. Aristides & Thucydides alique permulti quamdiu Socrati propinquabant, etiam Socrate ipso tacente in philosophiæ studiis proficiebant quamplurimum dæmonis illius instinctu, & quanto longius recedebant à Socrate, tanto reddebantur ad philosophiam ineptiores. Idem cum morti propinquaret, ut scribit Xenophon, prædixit

Anyto filium eius, qui tunc modestus videbatur, fore flagitiosissimum, atque ita euenit.

Est & quartus à temperata complexionem vacandi modus, siquidem talis complexio nullum infert tumultum alicuius superantis humoris, qui ad vllam imaginem commoueat phantasiam. Sunt enim huiusmodi viri in affectibus suis & actibus moderati, ideo animo ad eò tranquillo viuunt, ut etiam vigilantes supernis subiiciantur influxibus, quod Pherecydi, Syro, Pythagoræ, Plotino dicitur contigisse. Plotinum præ cæteris admior qui (ut narrat discipulus eius Porphyrius) mores hominum, errata, euentus præsentiebat, & cum ipse Porphyrius seipsum interficere cogitaret, id ille perspexit diuinitus, atque prohibuit. Ob hanc rationem, ut scribit iunior Plinius, Curtio Ruffo dum Affricam obtineret & inclinato die spatialetur in porticu, oblata est mulieris figura humana grandior, pulchriorque. Hæc prædixit eum venturum Romam, honoresque gesturum, atque etiam cum summo imperio in eandem prouinciam reuersurum, ibique moriturum. Factaque sunt omnia.

Quinta vacatio fieri videtur à solitudine, ubi animus nullis humanorum negotiorum curis distractus, paulo vel numinum vel cœlorum momento eadem quotidie cogitat, quæ cœlestia numina cogitant facere, quod quidem Zoroaster Magorum princeps solitudine viginti annorum dicitur affecutus, ubi de omni diuinandi arte multa conscripsit & fecit. Similia operatum fuisse Orpheum in Thraciæ desertis, eius scripta Musæo declarant.

Sexta fit ab admiratione vacatio, Sibyllæ & Pythiæ sacerdotes cum secederent in Iouis aut Apollinis antrum, ubi numen ipsum adesse credebant, tanto admirationis venerationisque stupore de maiestate numinis cogitabant, ut sensus, phantasia, ratioque actus suos illico prætermitterent. Tunc mens soli exposita nuniini, siue Deus ille fuerit, siue dæmon, supernos persentiebat nutus, eos præsertim qui ad ea negotia pertinebant, de quibus nuper deliberauerant. Similiter affectum fuisse Cornelium sacerdotem Patanij tradit Aulus Gellius. Et tales quosdam inducit Orpheus Corybantes. Hac vaticinii specie præcellebat Albigerius Carthagenensis. Hic penè quicquid egisset quisque aut cogitauisset, affatu dæmonum respondebat. Huius diuinationibus sæpe se affuisse Aurelius Augustinus affirmat.

Septima & omnium præstantissima et 2-nimi alienatio est, quæ fit castitate mentis

Deo deuotæ, quemadmodum Orpheus in hymno Deorum omnium Musæum docet. Talis quippe mens non ad tempus, vt aliæ, sed ferme semper pacatum est Dei templum, cuius ostium (vt Ioannes inquit Theologus) Deus pulsat primum, quod statim apertum ingreditur, quod inhabitat sedulo, in quo hominem pascit ambrosia. Per hanc (vt refert Aurelius Augustinus) rusticus quidam suis temporibus secedebat à corpore, & vigilare se sciebat, dum tamen videret mira quædam oculis non corporeis. Per hanc Ioannes Theologus omnium diuinissimus in Pathmo vniuersum vidit ordinem seculorum. Per hanc Ezechiel campum ossibus mortuorum inspexit refertum, & ossa postmodum resurgentia. Per hanc Esaias Deum sedentem à Seraphim circumdatum. Sed ij omnes, quemadmodum & somniantes, quicquid mente cernebant, phantasie veiaminibus statim operiebant, ita vt visa mentis, phantasie vmbraculis obscurata, interpretare indigerent. Concludamus iam per septem vaticinij species, tantam esse humanæ animæ aduersus materiam excellentiam, vt & domito & sopito & semiuuio corpore, multo clarius videat, multo que præstantius operetur, quàm corpore operante, quasi ad magnifica quæuis efficienda subsidio corporis non indigeat. Vbi apparet quanta sit animæ cum cœlestibus concordia, quanta cum Deo cognatio, quæ quotiens in se redit, cœlestium arcanorum & diuinæ sit prouidentie particeps.

*Tertium signum, ab artium & gubernationis industria.*

### C A P V T III.

Cætera animalia vel absq; arte viuunt, vel singula vna qua iam arte, ad cuius usum non ipsa se conferunt, sed fatali lege trahuntur. Cuius signum est, quod ad operis fabricandi induttriam nihil proficiunt tempore. Contrà homines artium innumerabilium inuentores sunt, quas suo exequuntur arbitrio. Quod significatur ex eo, quod singuli multas exercent artes, mutant, & diurno vsu fiunt solertiores. Et quod mirabile est, humanæ artes fabricant per seipsas quæcumque fabricat ipsa natura, quasi non serui simus naturæ, sed æmuli. Vuas ita pinxit Zeuxis, vt aues ad eas aduolarent. Apelles equam ita pinxit & canem, vt prætereuntes equi hinnirent, latrarent canes. Pra-

xiteles in quodam Indorum templo Venerem marmore adeò venustam expressit, vt vix à libidinosis transeuntium conspectibus tuta & pudica seruaretur. Archytas Tarentinus columbam e ligno mathematica disciplina fecit, librauit, inflauit spiritu adeò vt volaret. Ægyptij, vt tradit Mercurius, Deorum statuas construebant tales, vt loquerentur & irent. Archimedes Syracusanus æneum cœlum fecit, in quo omnes septem Planetarum motus verissimè conficiebantur vt in cœlo, & ipsum volebatur vt cœlum. Mitto Ægyptiorum pyramides, Romanorum Græcorumque ædificia, metallorum officinas & vitri. Denique homo omnia diuinæ naturæ opera imitatur, & naturæ inferioris opera perficit, corrigit & emendat. Similis ergo fermè vis hominis est naturæ diuinæ, quandoquidem homo per seipsum id est per suum consilium atque artem regit seipsum à corporalis naturæ limitibus minime circumscriptum, & singula naturæ altioris opera æmulatur. Et tanto minus quàm bruta naturæ inferioris eget subsidio, quanto pauciora corporis munimenta sortitus est à natura quàm bruta, sed ipsemet illa sua copia construit alimenta, vestes, stramenta, habitacula, supellectilia, arma. Ideo cum ipse sua facultate se fulciat, fulcit vberius quàm bestias ipsa natura. Hinc profiscitur inenarrabilis varietas voluptatû, hos quinque sensus corporis oblectantium, quas ipsimet nobis proprio ingenio machinamur. Bruta breuissimis naturæ claustris concluduntur. Non solum ad corporis necessitatem noster animus respicit, sicut bestie naturæ imperio mancipatæ, sed ad oblectamenta sensuum varia, quasi quædam pabula phantasie. Neque solum per varia blandimenta ipsi phantasie animus adulatur, dum quasi per iocum diuersis ludis deleuit quotidie phantasiam, verum etiam agit interdum cogitatrix ratio serius, & suæ proles propagandæ cupida emicat foras, & quanto polleat in genio, euidenter ostendat per variam lanificiorum sericique texturam, picturas, sculpturas, & ædificia. In quibus componendis sæpe nullum corporis respicit commodum, nullum sensuum blandimentum, cum aliquando sponte ex iis incommodum & molestiam patiatur sed facundie suæ amplificationem, approbationemque virtutis. In iis artificiis animaduertere licet, quemadmodum homo & omnes & vndique tractat mundi materias, quasi homini omnes subiiciantur. Tractat, inquam, elementa, lapides, metalla, & plantas, &

animalia, & in multas traducit formas atque figuras, quod nunquam bestię faciunt. Neque vno est elemento contentus, aut quibusdam, vt bruta, sed vtitur omnibus, quasi sit omnium Dominus. Terram calcit, sulcat aquam, altissimis turribus conscendit in aërem, vt pennas Dædali vel Icarı prætermittam. Accendit ignem, & foco familiariter vtitur & delectatur præcipue ipse solus. Merito coelesti elemento solum coeleste animal delectatur. Coelesti virtute ascendit cælum, atq; metitur. Supercoelesti mente transcendit cælum. Nec vtitur tantum elementis homo, sed ornat, quod nullum facit brutorum. Quàm mirabilis per omnem orbem terræ cultura? Quàm stupenda ædificiorum structura & vrbium? Irrigatio aquarum quam artificiosa? Vicem gerit Dei, qui omnia elementa habitat, colitque omnia, & terræ præsens, non abest ab æthere. Atqui non modo elementis, verum etiam elementorum animalibus vtitur omnibus, terrenis, aquatilibus, volatilibus, ad escam, commoditatem, & voluptatem. Super his coelestibusque ad doctrinam, magicæque miracula. Nec vtitur brutis solum, sed & imperat. Fieri quidem potest, vt armis quibusdam à natura acceptis bruta nonnulla quandoque vel imperium in hominem faciant, vel hominis effugiant imperium, homoq; autem acceptis à seipso armis, & vitat ferarum imperus, & fugat & domat. Quis vidit vnquam homines vltimos sub bestiarum imperio detineri, quemadmodum vbique videmus tam immanissimarum ferarum quàm mitium armenta per omnem vitam parere hominibus? Nō imperat bestiis homo crudeliter tantum, sed gubernat etiam illas, fouet & docet. Vniuersalis prouidentia Dei, qui est vniuersalis causa, propria est. Homo igitur qui vniuersaliter cunctis & viuentibus & non viuentibus prouidet, est quidam Deus. Deus est proculdubio animalium, qui vtitur omnibus, imperat cunctis, instruit plurima. Deum quoque esse constitit elementorum, qui habitat colitque omnia. Deum denique omnium materialium, qui tractat omnes, vertit, & format. Qui tot tantisque in rebus corpori dominatur, & immortalis Dei gerit vicem, est proculdubio immortalis. Sed artes huiusmodi licet materiam mundi figurent, & animalibus imperent, atque ita Deum naturæ artificem imitentur, sunt tamen artibus illis inferiores, quæ regnum imitatæ diuinum, humanæ gubernationis suscipiunt curam. Singula bruta vix ad sui ipsius vel breuem

natorum curam sufficiunt, homo autem vnus tanta abundat perfectione, vt sibi ipsi imperet primum, quod bestię nullæ faciunt, gubernet deinde familiam, administret rempub. regat Gentes, & toti imperat orbi. Et quasi qui ad regnandum sit natus, est omnino seruitutis impatiens. Adde quod boni publici gratia subit mortem, quod bruta non agunt, vtpote qui singula hæc mortalia despiciat bona, communis æternique boni firmitati confusus. Cæterum ad præsentem vitam artes huiusmodi pertinere alicui forsitan videbuntur, quamuis non sit tanta cura ob vitam præsentem necessaria, sed spectet potius ad diuinitatis prouidentiam imitandam. Consideremus igitur artes illas quæ non modo corporali victui necessariæ non sunt, sed plurimum noxiæ, quales sunt omnes sciëntiæ liberales, quarum studia corpus enervuant, & vitæ impediunt commoda. Subtilis computatio numerorum; figurarum curiosa descriptio, linearum obscurissimi motus, supersticiosa musicæ consonantia, astrorum obseruatio diuturna, naturalium inquisitio causarum, diuturnorum inuestigatio, Oratorum facundia, Poëtarumque furores. In iis omnibus animus hominis corporis despiciat ministerium, vtpote qui quandoque possit, & iam nunc incipiat sine corporis auxilio viuere. Vnum illud est in primis animaduertendum, quod artificis solertis opus artificiosè constructum, non potest quilibet, qua ratione quoque modo sit constructum discernere, sed solum qui eodem pollet artis ingenio. Nemo enim discerneret qua via Archimedes sphæras constituit æneas, eisque motus motibus coelestibus similes tradidit, nisi simili esset ingenio præditus. Et qui propter ingenij similitudinem discernit, is certe posset easdem constituere, postquam agnouit, modo non deesset materia. Cum igitur homo cælorum ordinem vnde moueantur, quod progrediantur, & quibus mensuris, quidve pariant, viderit, quis neget eum esse ingenio (vt ita loquar) penè eodem quo & author ille cælorum? ac posse quodammodo cælos facere, si instrumenta nactus fuerit, materiamque coelestem? postquam facit eos nunc, licet ex alia materia, tamen persimiles ordine.

*Quatuor hominis dotes in artibus.*

**I**N humanis artibus quatuor animi nostri emicant dotes excellentissimæ, facilitas ad percipiendum velocissima, memoria amplissima ac penitus indelebilis, saga-

cissima prædictio futurorum, verborum v-  
sus innumerabilium. Quam diuinum pu-  
tas in Homero viguisse acumen, qui & cæ-  
cus & inops tot & tanta percepit, tam e-  
gregie cecinit, vt cunctas in eum huma-  
nas, tum diuinas artes Plato asserat con-  
currisse. Quam diuinum in Didymo Ale-  
xandrino, quem scribit Hieronymus à  
pueritia excæcatum, postea tamen diale-  
cticen, physicen, theologiam præ cæteris  
ebuisse, & quod mirum est, geometram  
cualisse mirabilem, & geometricas figuras  
describere solitum & docere, egregia quo-  
que Theologiæ opera condidisse. Diuinum  
certe iis lumen ea nascentibus infudit, &  
quærentibus reuelauit, quæ impossibile  
fuisset humanis studiis inuenire. Et si Pla-  
to Aristotelesque in libris ciuiliū institu-  
tionum scribunt, regiones alias aliis esse  
exercendo ingenio aptiores, compertum  
tamen habemus non in oriente solum at-  
que meridie, sed etiam in occidente sep-  
tentrioneque & complurimos homines,  
& frequenter in qualibet arte mirifice cla-  
ruisse. Si regionum seculorumque diuer-  
sitas, diuerſitatem maximam necessariò  
efficit in corporum habitu, in ingeniis ve-  
rò minimam, & hanc ipsam consilio stu-  
dioque corrigimus. Quis non videat in-  
genium hominis natura suis locis & tem-  
poribus non esse subiectum? Sequitur in-  
delebilis illa memoria, qua excelluerunt  
quamplurimi, Mithridates duarum ac vi-  
ginti Gentium rex, singulis absque inter-  
prete ius dicebat. Cyrus & Lucius Scipio  
omnium suorum ciuium sciebant nomina.  
Fabius Maximus & Lucullus, omnes nomi-  
num Gentium historias memoria tene-  
bant. Seneca inquit, se duo millia om-  
nium recitata eodem ordine reddidisse,  
ducentos quoque versus à discipulis pro-  
nunciatos se ordine retrogrado recitasse.  
Scribit Augustinus fuisse quendam suis  
temporibus qui multa legerat, neque ali-  
quid vnquam eorum quæ legerat, oblitus  
fuerat. Fuisse Romæ alium qui comœdiami  
totam, dum recitaretur, mandauit memo-  
riæ, tot tantarumque rerum capacitas,  
tanta in iis quæ sunt accepta, stabilitas, an-  
gusto cerebri angulo comprehendendi, & flu-  
xa eius labilique materia seruari non po-  
test, sed amplissimo eget stabilissimoque  
diuini animi receptaculo.

Est & futurorum prædictio illa, qua pol-  
lebant Chaldæi & Ægyptij mathematici.  
Certe illa substantia in futuro non efficit,  
cuius præſaga virtus ita totum futurum an-  
ticipat, sicut memor potentia totum præ-  
teritum recolit. Est autem substantia hæc

æterna quæ in æternum monumentum  
colligit labilia temporum interualla. Po-  
stremò loquendi vsus atque scribendi ho-  
mini proprius, diuinam quandam indi-  
cat nobis inesse mentem, qua careant be-  
stiæ. Absque sermone ita nos possemus  
vivere, sicut & bestię & homines muti.  
Ideo ad excellentius aliquod opus est no-  
bis sermo tributus, videlicet tanquam  
mentis interpres, infinitorum inuentor-  
um præco, & nuncius infinitus. Neque  
somnia Epicurus, bestias sicut & nos ra-  
tione pollere, verum deesse illis sermonis  
& manuum vsum, per quem intus laten-  
tem extra significant rationem, quoniam  
natura in rebus necessariis non deficit, su-  
perfluis non abundat. Arboribus non de-  
dit pedes, non brachia. Terrenum enim  
illarum corpus solo fixum, vbique terrea  
alitur alimonia. Brutorum corporibus tan-  
quam minusterrenis, non omnis terreus  
cibus est vbique sufficiens, ideo ad quæ-  
rendum commodius alimentum pedibus  
sunt instructa. Phantasia illorum paucos  
aliquos & confusos conceptus habet, & ad  
vsum duntaxat corporis necessarios, qui  
mugitu, latratu, hinnitu, garritu, ganni-  
tu, fremitu, seu nutibus sufficienter expri-  
mi possunt. Verum mens hominis infini-  
tarum distinctarumque inuentrix rerum,  
vfu sermonis innumerabilis suffulta est,  
quasi quodam digno eius interprete, ma-  
nibus quoque munita tanquam aptissimis  
instrumentis ad inuenta mentis innume-  
rabilia fabricanda; quæ quidem instru-  
menta natura eadem dedisset & bestiis, si  
illis inesset artifex idem interior, talibus  
instrumentis vsurus. Ergo tot concipit  
mens in seipsa intelligendo, quot Deûs  
intelligendo facit in mundo. Totidem  
loquendo exprimit & in aère. Totidem  
calamo scribit in chartis. Totidem fabri-  
cando in materiâ mundi figurat. Quapro-  
pter demientem esse illum constat, qui ne-  
gauerit animam quæ in artibus & guber-  
nationibus est æmula Dei, esse diuinam:

*Quartum signum ab effectu miraculorum.*

#### C A P V T IV.

**N**ON solum verò in formanda & fi-  
guranda per rationem artis mate-  
ria, sicut diximus; mens humana iis sibi  
diuinum vendicat, verum etiam in spe-  
ciebus rerum per imperium transmutan-  
dis, quod quidem opus miraculum ap-  
pellatur, non quia præter naturam sit no-  
stræ animæ, quando Dei sit instrumentum;

Sed quia cum magnum quiddam sit, & fiat raro, parit admirationem. Hinc admiramur, quod animæ hominum Deo deditæ imperent elementis, citent ventos, nubes cogant in pluuias, nebulas pellant, humanorum corporum curent morbos, & reliquæ quæ palam facta fuisse quibusdam sæculis apud varias nationes Poetæ canunt, narrant Historici, non negant excellentissimi quique Philosophi nostri, præsertim Platonici, testantur Theologi veteres, Mercurius in primis & Orpheus, posteriores quoque Theologi verbo & opere comprobant. Miraberis forsitan si miraculorum rationes exquiram. Sed audi. In primo libro disputatum est, essentiam tertiam esse sub Angelo, & super totam mundi materiam, à numine formari, formare materiam, accipere quidem formas spirituales à numine, dare verò materiæ corporales. In tertio quoque libro constitit essentiam tertiam nihil esse aliud quam rationales animas tam nostras quam nostris superiores. Hinc efficitur apud Platonicos sectatoresque Auicennæ, ut omnis rationalis anima per essentiam suam atque potentiam super totam sit mundi materiam, totam mouere possit atque formare, videlicet quando ad hæc Dei sit instrumentum.

Veruntamen talis est ordo rerum: Habent omnes animæ rationales ( ut diximus ) intellectuale caput rationale medium, infimum verò viuificum. Media hæc vis est animæ proprietas. Vis autem intellectualis est radius quidam superioris intellectus demissus in animam, & in superiorem intellectum iterum se reflectens. Vis quoque viuifica actus est animæ redundans in corpus, & inde resultans in animam, sicut lumen Solis in nube secundum proprietatem suam splendor est, ut Solem respicit radius, ut nubem implet est pallor. Intellectus intelligibile suspicit, & circa ipsum intelligibile permanet in seipso. Ratio currit, sed in seipsam. Viuifica vis infra se currit usque ad aliud, dum implet, corpus.

Quoniam verò per hanc infimam sui partem siue umbram, animæ longissime à sua dignitate discedunt, corporibus propinquantes, factum est ut vires huiusmodi rectrices corporum remissa quodammodo vel intermissa amplitudine illa dominationis, quam anima super vniuersitatem corporum possidet, singulæ sunt singulis distributæ corporibus, quibus astrictæ dum sunt, propriam suorum corporum agunt curam, ac ferme negligunt a-

lienæ. Quid eas corporibus alligat? Ut Plato vult, amor, id est, vitæ exuberantis affectus ad proxima sibi viuificanda procliuior. Diuersis autem animarum rationalium speciebus proximæ sunt diuersæ corporum species. Hinc fieri vult, ut aliæ rationales animæ cum aliis corporibus conspirauerint, aliæ cum sphaeris, aliæ cum syderibus, cum aliis aliæ. Denique aliæ cum corporibus hominum. Atque ex certis quibusdam seminum intimorum dispositionibus à prouidentia constitutis, aliæ humanæ animæ aliis humanis corporibus regendis magis conueniunt. Et, ut summatim dicam, cuiusque animæ rationalis vis illa viuifica, quoniam ad tertiam essentiam pertinet, æquam vim habet ad corpora quælibet, sed per amatorium quendam instinctum corporibus aliis aliæ sese mouendis accommodant, conferente ad hoc videlicet temperatione diuina, & vno quodam instinctu cessante, vis illa viuifica euadit libera, ut nouo affecta instinctu, corpus aliud quodammodo regat & moueat. Si pars hæc infimæ naturas omnes corporum superat, multo magis media atque summa. Suprema, id est mens, usque adeò supereminet, ut nihil vnquam sapiat corporale, diuinorum duntaxat auida, stabilis à natura, intelligentia subita. Media, id est, ratiocinandi facultas, eminet quidem & ipsa magis quam infima, & nunc quidem ( ut diximus alias ) ascendit in mentem, quando susceptis à mente principiis demonstrandi, vniuersales rerum naturalium rationes inquirat argumentando. Nunc autem ad viuificam declinat potentiam, quando credit phantasie, auscultat sensibus, blanditur & corpori. Ascendit autem in mentem supernorum capiendorum amore, descendit in potentiam infimam amore inferiorum gubernandorum. Merito cum sit vtrorumque media, diligit vtraque, & tanquam eminentior quam infima, dum infima corpus vnum regit solum, ipsa plura mouet atque gubernat. Nam dum rectrix facultas corporis tuum solum alit corpus, perque sensum & concupiscentiam seruit tui corporis alimonie, ratio tua & tui corporis agit curam, & aliorum, atque in externa materia fabricat artificia. Hæc quoque cum æque valeat quælibet tractare materias, aliis tamen temporibus alias, quocumque rapit amor, tractandas aggreditur. Cessante amore per quem sculpsit lapidem, statuam dimittit subito. Trahente amore ad vasa fictilia, aggreditur figulinam. Quando de tractandis cor-



poribus loquimur, mentem illam corporum penitus contemptricem parumper intermittimus, de ratione magis & rectrice potentia loquimur. Hæ utique ambæ, licet ad quælibet mundi corpora, propter communem naturam essentiaæ tertiaæ paræ vim habeant, in illud tamen agunt potissimum, in quod magis afficiuntur, diuina illa seminum temperatione non prohibente. Affectus animorum illarum qui supra nos sunt, stabiliore sunt nostris, atque eundem semper retexunt ordinem, consueto semper tenore progredientes, quoniam in illis tam suprema vis quàm media sursum vergit, contemplationi incumbens æternæ. Sola vis infima operari variat, sed vicissitudines agit, & illas quidem ordinatissimas, ita ut in ipsa etiam mutatione videatur esse stabilitas, dum idem obseruatur tenor, eademque similiter retexuntur. Sed utcumque sit, formæ rerum tribus animorum illorum viribus insitæ causæ sunt formarum, quæ in mundanis corporibus exprimuntur. Atque ut ita dicam, fatales imaginationes quæ gradatim idola animorum illorum suboriuntur, quasi prægnantium mulierum affectus vehementissimi, quicquid sibi fingunt in sphaëris suis sequentibusque tati-quam foetibus exprimunt. Nostra quoque anima erga corpus hoc affecta, secundum suorum seminum ordinem, corpus hoc ex ipsa vi corporis rectrice figurat. Quid huic corpori præstat certam quatuor humorum complexionem, quid faciei colores & lineamenta, nisi anima? Anima quoque contra naturam corporis ponderosi ipsum agit sursum, & quatuor inuicem vincit contraria, neque miraculum hoc miratur quisquam. Quantum verò vis tandem per phantasiam valeat in formando vehementioribus affectibus corpore, in superioribus diximus. Siquidem pro affectuum diuersitate diuersas qualitates producit in membris. Ira, calorem, rubedinem, amarumque saporem, & alui fluxum. Timore frigus atque pallorem. Mœrore, sudoris humorem, albedinemque ceruleam. Anxietate, siccitatem atque nigredinem. Harum profecto qualitatum ipsi animi affectus auctores sunt, quia sæpè ad tales aliquas qualitates mouent priori nostræ complexionis contrarias. Atque, ut Hippocrates docet & Galenus, inueteratis affectus priorem mutat corporis complexionem, & in suam trahit naturam. Hoc agit phantasia. Quid autem ratio in artibus & gubernationibus operetur, alias declarauimus.

Proinde quid à rectrice corporis potentia in proprio corpore fiat per virtutem viuificam, & affectus illi seruientes, hic explanauimus. Fit insuper ab ea nonnihil in corporibus alienis quæ sibi propinquant, quandoque per naturalem calorem concoquit cibos, calefacitque tangentes. Anima quoque materna in corpus alienum agit, quando nutrit foetus in aluo, quod quidem explet ex continuatis vinculis quibus foetus materno corpori alligatur. Neque propinquum duntaxat corpus format, sed quandoque & remotum. Iactò siquidem à viro semine in matricem, & diu postea viro absente, virtus formatrix relicta in semine viget ibi, & vicem paternæ animæ gerit in semine, corpusque effingit humanum, ceu cum quis lapidem iacet procul, virtus expultrix lapidi immissa à iacente, quandiu regnat in lapidem, tam diu lapidem pellit, ea scilicet aëris plagà, & ad illud signum, quia & ad quod iactor ille direxerat. Si pars animæ regendo corpori accommodata, per viuificam vim aliquid operatur in corpus alienum atque remotum, cur non etiam per vim sensitiuam hac eminentiorem, per affectus scilicet phantasie? Ergo phantasia instar virtutis viuificæ format & ipsa proprium corpus, ut diximus, quoties actionibus affectibus agitatur. Format etiam fascinationibus & maleficiis alienum. Neque mirum est animam facere talia affectibus suis, si herbæ quædam faciunt aut lapides suis vaporibus, cœlestibus tamen animis aspirantibus. Neque deest animæ continuatio mediorum, per quæ in alienum corpus transigat actionem. Quippe venefici hominis phantasia insensa infantis teneriori corpusculo, febrem affectat puero. Imaginatio febris spiritus febriles vibrat, id est, cholericos, sicut imaginatio coitus seminales spiritus ad genitalia mēbra. Cholericus & febrifer spiritus ille percussus, vapores foetidos atque febriferos, siqui in venefici hominis corpore sunt, excuscat. Hi cum primum incitati sunt, una cum spiritu proripiunt illuc tanquam sagittæ, quò malefica phantasia quasi ad signum intenderat. Maxime verò ex oculis emicant senioris; per quæ oculos pueri transeunt tanquam ex vitreis materiis, perque materias vitreas radij, spiritusque inficiunt pueri & humores. Ad hæc autem maleficia illi sunt omnium potentissimi, quibus nascentibus Saturni malignus aspectus, semenque parentum terrestre, ac victus persimilis complexionem conflant foetidis vaporibus abundantem, &

melancholicam. Præterea sæua Martis potentia bilis igniculos subdit. Hi quando in senio sunt, ætate terrestri & melancholica, morosi sunt valde, & cuicumque contigerit, acerrimè irascuntur, animoque infensissimo execrantur. Phantasiam certè propter humorem terreum stabilius efficaciusque suis votis affigunt. Hic humor accensus & vrit vehementissimè, & extinguitur sero, tanquam ignis in crassioribus lignis & duriori materia. Vapores quoque non desunt maligni, per quos quasi sagittas venenum in aduersarium iaculentur. Miraris corpus vnus ab animo alterius inquinari? At non miraris animum lædi ab animo, dum per consuetudinem vitia aliena combibimus. Non miraris corpus tuum à vapore alterius corporis morbo facillè infici, quod phthisis, epidimia, lepra, pruritus, dysenteria, pleuresis, oculorumque rubor indicant. Apud Hesperios Æthiopas fuisse traditur bestias, nomine Catophlephas, quæ solo aspectu homines interimerent, quod & apud Cyrenem faciunt Basilisci. Tanta est vis in vaporibus oculorum. Cur minus subijciatur corpus tuum alterius animo, quàm alterius corpori? Cur non magis potius, cum sit potentior animus, neque desint media per quæ agat? Quod facere consueuisse homines quosdam in Illyriis & Triballis legimus, qui cum essent irati, si diutius attentiusque intuebantur hominem, perimebant, qui & geminas habebant pupillas in oculis. Idem quoque fecisse foeminas nonnullas in Scythia.

Tanta est imaginationis potentia, præsertim quando affectibus animi vapores oculorum subseruiunt. Auget enim vim attentio illa mirabilis phantasie non minus quàm Struthij oculus defixus ad ouum. Vno siquidem affectu feruescente tepescit alter. Ideo in maleficæ phantasie intentione remittitur paulisper affectus animæ naturalis, per quem suo corpori deuincitur, vnde à suo corpore facta liberior, materiam nouam in quam nuper afficitur, quasi recens aliquod suum corpus incipit transmutare. Si tantam habet vim malefica phantasia, quantam putas habituram beneficam rationem? saltem duplo maiorem. Et quia ratio superat phantasiam, & bonitas malum, igitur ratio quando ad beneficium aliquod tota animi erga Deum intentione defigitur, nonnunquam corpus illud erga quod est affecta, afficit beneficio tam proprium quam alienum. Hoc munere excellunt illi (ut est apud Platonicos) qui diuino quo-

dam beneficio præ cæteris complexione temperata coelestique sunt præditi, necnon puris & modicis nutriti cibis, honestis præterea diuinisque moribus educati. Hi medici sæpe sunt generis humani, & corpori cui cupiunt bona, si directi prorsus in Deum piis votis ardentè exoptant, illico præstant, præsertim si hominis beneficium accepturi animus sit paratus. Hinc Zoroaster inquit:

*ἐκτίνας πυρινὸν γὰρ ἔρρον,  
ἐπ' εὐσεβείης, ῥεύσῃ καὶ σῶμα σωσείης.*

id est, Si mentem ardentem ad opus pietatis intenderis, labile corpus seruabis. Talia quædam miracula facta ab Apollonio Tyaneo Philosopho narrat Philostratus. Rursus à Pythagora, Empedocle & Philolao similia quædam gesta Pythagorei multi affirmant. Scribit insuper Iamblichus, Pythagoricos, quoties narrarentur miracula, facillè solitos credere illa à Deo per diuinas animas fieri. Atque in rebus huiusmodi hæc Lini carmina semper habuisse in ore.

*ἐλπείσθαι γὰρ παντ', ἐπεὶ ἔν ἐστι ὃ δὲν ἀέλπει.  
ῥάδια πάντα θεῷ τελέσαι, καὶ ἀδύτατον ὃ δὲν.*

id est, Credenda sunt omnia, nihil enim est incredibile. Facilia Deo omnia sunt, nihil est impossibile. Sed redeamus ad illos iam animos, per quos Deus quasi per instrumenta miracula perficit. Quid confert illis ad hanc excellentiam habitudo corporis temperata? vt ratio illorum sit expeditior, nullo excedentium humorum turbata tumultu. Quid modicus purusque victus? vt non sit anima corporis sui sarcina prægrauata. Quid educatio illa honesta atque pia? Vt & optet hominibus bona, & tanquam Deo quodammodo similis adiuuetur à Deo, imò tanquam instrumentum à Deo ducatur.

Denique cum ratio sit eminentior phantasia, quando ipsa dedita Deo tota ad vnum hoc opus beneficij conferendi dirigatur, remittitur admodum naturalis ille prior affectus animi quo proprio corpori copulatur, & ab eo soluta agit in alienum. Potest enim facillè ad hæc tanquam instrumentum à Deo duci, cum natura sit super corpora omnia, quamuis affectus olim aliquis ad vnus gubernationem rapuerit, non aliter ac si sapientissimus rex potentissimusque cuius prouidentia & ditioni subsint omnes pariter amplissimi regni partes, reliquas negligat ad tempus, partes alicuius amœnitare pellectus, sed amore aliquando partis illius defervescente, se ad alias conferat gubernandas. Mysteria hæc Plato noster omnia tetigisse videtur,

tyrannidem quidem illam phantasiæ, & hoc rursus piæ rationis imperium in Timæo, ubi de vi animæ in corpus disseruit, in Phædro autem mirabilius quiddam innuit, cum inquit, omnem animam vniuersi corporis curam habere, atque animam nostram quando libera est, totum pererrare cælum, mundumque vna cum celestibus animis gubernare, aliàs in aliis figuris circumeuntem. Quando verò sit talis, aperuit in Epinomide, ubi affirmavit necessitatem mentis atq; animæ menti coniunctæ necessitatem omnem exuberare, ac tale omne decretum esse fatale. Quintiam in decimo de iusto, intellectualem animam appellauit necessitatem, inter cuius genua sit fusus aliquis circa quæ sphaeræ mundi voluantur. Quorsum hæc? Vt intelligamus fieri posse quandoque, vt hominis anima, tota rationis intentione in mentem caputque suum vertatur, sicut quandoque vertitur in phantasiam, vt diximus iam, & rationem. Quisnam animus hæc agit? Qui phantasiam iubet silere, ac etiam superni numinis desiderio flagrans, consuetis rationis naturalis discursibus nõ confidit, sola viuit mente, euadit angelus, & toto capit pectore Deum. Hæc significat Zoroaster, vbi sic inquit:

ψυχή ἡ μερόπων, θεὸν ἀγχεί πως ἐξ ἑαυτῆς,  
ἐδὲν ἐν τῷ ἔχουσιν, ὅλην θεόθεν μεμέτρουται

ἀρμονία αὐχέι γάρ, ὅφ' ἡ πελε σῶμα βρόττον.

id est, Anima hominum Deum quodammodo contrahit in seipsam, quando nihil retinens mortale, tota diuinis haustibus ebriatur. Tunc quoque exultat in corporis harmoniam. Huiusmodi animū D. Ioannis Theologia nasci iterum dicit ex Deo. Siquidem Dei summi influxus per mentes angelicas vsque ad animam hominis defluens, instigat quotidie animam corpori immerfam, vt exuta carneam testam, ponat potentias operationesque animales, & pro anima fiat angelus; quemadmodum radius Solis vapores tenuat, trahitque sursum, & in igneam conuertit naturam. Qui huic inspirationi totum se committit, cessat esse anima, fitq; Deo regenerante Dei filius, angelus. Idcirco Plato Theologos appellauit Dei filios in Timæo. Si anima natura sua excedit mundi machinam, perque vires inferiores mira operatur in corporibus etiam alienis, quid illam putamus acturam, quando in caput surrexerit suum, euaseritque angelica? Quod oportet fieri posse quandoque, postquam blandimentis sensuum fit sæpe brutalis, & inspiratio Dei esse non debet vanior, quam sensuum blandimēta. Tunc igitur non vnum quen-

dam amplius aut tenerum fascinabit, aut sanabit hominem ægrotantem; sed sphaeris imperabit elementorum. Quandiu corpori huic addicta est, parui huius mundi elementa, id est, humores quatuor agitat, eisque calorem, frigus, humorem, siccitatem, colores omnes saporesque inducit, vt supra patuit tum in actu vitali, tum in affectibus phantasiæ. Ideo quando soluta ab hoc emergit in amplum, Deo iam plena animalis huius grandioris humores, id est, quatuor elementa maioris mundi mouet vt sua. Siquidem iam quasi euasit animam mundi, eius videlicet mundi partis, erga quam afficitur maxime. Ac sicut eadem hominis anima quæ cubitale infantis corpusculum rexerat, regit bicubitum æquæ & tricubitum, ac deinde quatuor cubitorum, & decem rursus, vt dicitur de gigantibus, ita si vsq; ad centum creuerit & ducentos, æquæ reget. Quod enim naturæ ordine & dignitate omnem molem corporis antecedit, non minus totam ipsam molē quam molis partem implere potest, atque mouere. Si vim ac ipso Deo videlicet habet viuifica vis rationalis animæ in mundi sphaeras, vim quoque habet in eas rationis ac mentis affectus. Solo igitur affectu citabit ventos Deo duce, ac cælo nubes inducet sereno, easq; coget in pluuias. Rursus sedabit ventos, & aërem serenabit. Quod quidem posse fieri factumve fuisse, Hippocrates Cous, Theologi Mauri & Arabes confitentur, Maurorum princeps Auicebron, Arabum Auicenna. Mitto quot elementorum turbationes procellasq; tum ex demonum conflictationibus, tum ex casibus animarum in corpora sæpe contingere Ægyptij Platoniciq; arbitrentur, qua quidem de re Plutarchus & Porphyrius & Proculus diligentissime disputāt. Platonis certè, Platoniorumque sententia est, à cælo ad terram vsque in sphaeris omnibus alias plagas numinibus aliis ab initio distributis ita fuisse, vt quando in regione terræ certis dicata numinibus, dispositio ad ipsa numina vel per supernos influxus, vel per animorum affectiones præcipuè augetur, miracula sæpe talibus numinibus congrua, vel per se, vel per animas ibidem ab eisdem numinibus occupatas efficiantur, Sed de iis aliàs, Magicam quandam in præsentia sententiam referamus. Putant Chaldæi posse insuper aliud quiddam ab anima mirabile fieri, vt scilicet radiis effusis in corpus suum, ipsum lumine circundat, & radiorum leuitate tollat in altum.

Quod in seipso fecisse patrem eorum Zoroastrem nonnulli referunt. Ego verò,

si qua huius miraculi ratio assignari potest, talem forsitan esse opinor. Prima lux in Deo est, atque ibi est talis, vt supereminet intellectum, ideoque non potest lux intelligibilis appellari. Sed lux illa Deum infunditur angelo, fit euestigio lux intellectualis, atque intelligi potest. Quando infunditur animæ, fit rationalis, ac potest non intelligi solum, sed etiam cogitari. Inde migrat in animæ idolum, vbi fit sensitua, nondum tamen corporea. Inde æthereum vehiculum idoli, vbi fit corporalis, nondum tamen manifestè insensibilis. Denique in corpus elementale, siue simplex aëreumque, siue compositum, quod est ætherei vasculum, in quo euadit manifestè visibilis. Atque ego hanc esse puto catenam illam auream quam vidit Homerus à coelo pendentem, & in terras vsque demissam, qua apprehensa homines sese possint in coelos attollere. Profectò tanta luce diuinitus abundant coelestes animæ, vt ingens inde in corpus earum redundet copia luminis, quo videmus in stellis, si quando anima hominis ita figat aciem suam in Deum, diuinoque lumine impleatur, rapiaturque, vt ille tunc æque toruscat, & in vehiculum suum radios effundit vberimos, perque vehiculum & corpus aëreum, in corpus hoc oculis manifestum. Quod tunc plenissima illa copia radiorum effulget, rarefcit, attollitur, æthereo ad hoc conferente vehiculo, corporeque aëreo, quasi stупpa eleuata per flammam. Tali quodam igneo curru Magi atque Platonici, Heliam Paulumque raptos in cælum fuisse dicerent, ac demum post mundi iudicium corpus, quod nostri glorificatum nominant, similiter raptum iri. Ideo sic præcipit Zoroaster.

οπ ψυχῇ πῦρ δυνάμει πατρὸς ὅσα φανεινὸν  
 ἡγεσθῶ ψυχῆς βαθὺς ἀμβροτον, ὅμματι  
 δ' ἄρδην  
 παντ' ἐκπέπασον ἄνω  
 μη δὲ τὸ τῆς ὕλης σκύβαλον κρημνῶ κατὰ  
 λήψης.

id est. Quoniam anima per potentiam patris fit ignis splendidus, dominetur in te immortalis profunditas animæ, & oculos omnes vnà tolle in altum. Tunc neque etiam materiale ipsum corpus præcipitio derelinquens. Ignem appellat lucem ipsam qua & exuberat Deus per se, & anima per vim patris conuersa in patrem abundat. Et quia Deus est ipsa vnitas super mentem, & centrum essentiarum super essentiam, ideoque non vnitur illi per mentem propriè, sed per vnitatem animæ, quæ est mentis caput, centrumque

totius animæ, idcirco dicit Zoroaster: Decat te animæ profunditas immortalis, id est, vnitas ipsa, quam impressit quondam Deus animæ tanquam vnitatis diuinæ characterem, à qua & ad quam omnes aliarum vires animæ, quasi à centro & ad centrum omnes circuli lineæ pendent. Sequantur oculi tui omnes, id est, omnes vires animæ quæ in cognoscendo versantur. Huc tendit illud. Attollite portas principes vestras, & eleuamini portæ æternales, &c. Vnà, id est, in vnā collectæ mentem, siue in vnitatem mentis caput. Tunc eas sequetur corpus tum cœleste, tum terrenum. Propterea dixit corpus materiale, id est terrenum, tunc non derelinqui præcipitio, quia tunc ipsum quoque tolletur in altum, neque relinquetur in infimo loco mundi, quem locum Magi sæpe nominant præcipitium. Miraculi huius vim effectumque describit etiam Mercurius Trismegistus, vbi de regeneratione cum filio suo Tatio disputat. De hoc quidem miraculo quod in proprio corpore mens ostendit, ex Platoniorum opinione, satis sit dictum. De illis verò quæ in sphaeris mundi demonstrat, tales quædam apud Platonicos mouentur quæstiones, quales dicam, & soluuntur vt dicam.

*Quæstiones sex, & Solutiones de miraculis.*

## C A P V T V.

**M**ENS hominis quando corporeas exuit curas, cur passiones elementorum affectat? Quia publicum bonum non despicit diuinus animus summi communisque boni filius, ergo tanquam Deus aliquis ad animalium hominumque commoditatem prouidenter elementa mouebit. An potest adeò supra suum corpus attolli, vt mundi sphaeras attingat? Potest vtique, si vbique est, vt quidam putant. Sed nonne etiam lumen crassa laterna inclusum paulo momento laterna reclusa emicat eminus, & remotissima quæque illuminat, neque tamen à laterna discedit, clausa iterum laterna, in angulum absque sui offensione colligitur, quod dum locum prius impleteret amplissimum, absque sui dissipatione profunde batur. Mira luminis virtus. In angustissimo quiescit loco, implet amplissimum. Id quippe facit, quoniam lumen quodammodo est incorporeum. Idem facit animus, quia diuinum est lumen. Nunquid diuinus hic animus in iis conficiendis miraculis per omnes sui partes secedit à corpore?

Nihil opus est ut officium omnino dimittat contrariorum conciliandorum. Anima utique in corpore per idolum suum quasi crinitæ comam in vapore, primum contraria in vnum elementa conciliat, deinde si dissolvitur quicquam, instaurat nutriendo, auget etiam, regit corpus transfert, & reliqua. Videmus apertissime opus transferendi regendique corporis remitti & intermitteri quandoque. Cum anima vehementiori corripitur phantasia, officium augendi nutriendique minuitur propter intentissimam rationis indaginem. Ideo non concoquunt cibos philosophantes, & anima adulto corpore acutius speculatur quàm adolecente, minus in augendo corpora occupata, & sobrium corpus speculationem impedit minus, dum anima ad speculandum est duntaxat intentæ. Quamobrem cum per mentem tanta animi contingit abstractio, ut & phantasia & ratio naturalis intermittantur, quæ solent ipsæ nutritionem regimenque membrorum debilitare, quid obstat quo minus cadat corpus, & nutriatur in corpore nihil? Restabit forsitan solum conciliationis officium, quo anima nondum sinat dissolui humores atque diffugere. Sed non fiet tunc talis conciliatio, ut fieri solet per idolum, quod omnino destituit terrenum corpus, quando anima nihil sapit terrenum. Tunc enim idolum ita relinquit terræ naturam, sicut ratio terrenorum corporum relinquit imagines. Opinor igitur viri omnino abstracti corpus eo ipso in tempore brevissimo quo est angelicus animus, per virtutem idoli antea consuetam neque moveri, neque sustineri, neque etiam contineri. Quod si moueatur, vel sustineatur, vel contineatur, id fieri arbitror per illud animæ centrum quam paulò antè unitatem vocauimus animæ à Deo tributam, per quam Deo omnium centro & puræ unitati concilietur, per quam non modo elementa corporis huius, sed etiam mundi conciliet, per quam vniuersi possent Deum attingi sic aperuit Zoroaster.

ἐστὶ δὲ πὶ νότον, ὃ γὰρ αὖ τοῦν τὸν ἀνθρώπου.


id est, Est intelligibile aliquid, quod intelligere te oportet mentis flore. Florem mentis appellat Zoroaster ipsum animæ centrum, quod Plato nominat mentis caput. Sententiam hanc nostram illud Pauli diuini Theologi confirmare videtur, quod inquit, animum Deo raptum nec esse euidenter in corpore, nec extra corpus, videlicet quia non insit corpori per idolum, sed adsit per centrum.

Quandiu mirabilia hæc animus operatur? Quandiu ita manet abstractus? Manet verò parumper, naturali quodam potentia inferioris affectu ad curam corporis retrahente, sicut & paulisper manere in aëre lapis dicitur sursum iactus, inter ascensum atque descensum. Sed nunquid ordinem mundi animus confundit humanus miracula operando? Nequaquam. Nam ut Platonice loquar, in vniuersali rerum lege & perpetua quadam serie causarum ad idem conferentium sunt huiusmodi præscripta miracula. Ad hoc ipsum conducit prouidentia mentium sub Deo usque ad mentem nostram continuè conspirantium. Ad idem diuinum fatum animalium idolorum à primæ animæ ad nostræ animæ idolum confluentium. Ad idem diuina quædam naturarum omnium dispositio à primæ naturæ affectione concurrentium usque ad naturæ nostræ complexionem. Idem sæpe nobis coelestia signa prænuntiant, per quæ quasi per oculos nutusque numinum cogitationes significantur. Cæli enarrant gloriam Dei, & opera manuum eius annunciat firmiter. Non igitur quando animus ille angelicus optat mirabile aliquod opus conficere, puta citare ventos, statim superiores causæ huic fauent voto, & noua cupiunt, quoniam noua animus affectauit, sed contra quoniam coelestes id ipsum decreuerunt, iste cupit. Quoniam patet? Futurorum ventorum stat in supernis luminibus præuidencia. Dispositio huiusmodi (ut aliis diximus) per tres illas series statim ad animas nostras usque decurrit, præcipue per prouidentiam in mentem, quodammodo etiam per fatum in idolum, per naturam quoque in corporis nostri complexionem. Sed perturbati hominum animi hos impulsus non capiunt, pacatus autem animus vndique supernos capit impulsus, vnde latenter incipit cogitare eadem quæ cogitant superi, eademque velle ac nolle, cum naturali, id est, diuino & intimo inclinetur instinctu. Huic cogitationes omnes affectusque succedunt ad votum, & quicquid à superis postulat, accipit. Nempe quæ illi iam daturi fuerant, postulat, & quia daturi erant, ad postulandum prouocauerunt, sicut mater quæ pomum manu præfert oculis filij, ut hinc inuitatus filius petat pomum. Filius videt, petit, accipit: accipit, inquam, non solum quia petit, sed petit etiam, quia sit accepturus. Neque vult dare mater postquam filius velit accipere, sed econuerso. Nos



quidem plurimum non naturalibus diuinisve incedimus desideriis, sed illis quæ accendit quotidie casus. Provt enim alia atque alia sensibus nostris occurrunt, aliter aliterve afficimur. Atque ita rebus contingentibus occupati, raro vt cupimus, assequimur, quia raro & fortè quadam cum supernorum voluntate concurrimus. Angelicus autem animus & consentit cum illis, quia tranquillitas viuit, & imperat mundo, quia sua sponte ab hoc corpulculo quod est mundi particula, soluitur, in sui naturam regressus amplissimam. Talem verò formæ animum præuidit Deus, talem, inquam, non superno auxilio tantum, sed etiam propria voluntate, quæ quidem tunc præcipue agit libere, quando dimissis actionibus, in seipsam, originemque suam contemplandam amandamque se flectit. Talem quoque elegit Deus ad mirabilia perpetranda. Cuius orationes etiam circa publicas mundi mutationes non esse vanas, Auicenna in Metaphysicis, & Proculus Iamblichusque disputant in Timæo. Probant enim vota viri sanctissimi, præsertim si cum illo po-

puli quoque vota concurrant, animos mirabiliter ita coniungere Deo, vt vna quodammodo Dei animique operatio fiat, sed Dei quidem velut artificis, animi autem tanquam instrumenti diuini. De illis verò miraculis quæ Deus per se absque instrumento facit, quæ longè maiora sunt, in præsentia non tractamus. Miracula huiusmodi nunquid naturalia sunt animo? Sunt naturalia quodammodo, vt opinantur Platonici, atque iterum non naturalia. Naturalia quidem quantum recurrit in mentem, fitque summi Dei pedisequus atque instrumentum. Non naturalia, quantum vnius tantum seruit corporis vsui, cuius amore captus ad tempus, neque virtutis suæ explicat amplitudinem, neque diuinæ fit particeps. Qui quoties & explicat, & fit particeps, ostendit se nullo ictu corporum dissolutum iri, quandoquidem quodammodo præstat omnibus, & torquet omnia pro arbitrio. Singula verò quæ de miraculis ex Platoniorum mente disseruimus, ita à nobis affirmata sint, vt à Christianis Theologis approbantur.



# THEOLOGIE PLATONICÆ,

DE IMMORTALITATE ANIMORVM,

EODEM FICINO AVTHORE,

(:)

LIBER XIV.

(:)

*Quòd anima nitatur Deus fieri, ostendimus signis duodecim secundum  
duodecim Dei dotes.*

(:)

CAPVT PRIMVM.

(:)



**I**N principio disputationis duo iecimus fundamenta signorum ad immortalitatem animæ pertinentium. In vno tractatur quantum anima corporibus dominatur, quod per quatuor signa transegitur. In altero agitur, quod ani-

ma Deus fieri nititur. De quo per duodecim signa tractabimus secundum duodecim Dei dotes. In quo apparebit miræ animi magnitudo, cui non satis fuerit æmulari Deum iis miris quos diximus modis, nisi etiam fiat Deus. Hinc ita exclamauit Zoroaster:

Ὁ τολμωροῦντις φύστος ἀνθρώπῳ τὴν γὰρ φύσιν

id est, O homo naturæ audentissimæ artificium. Constat apud omnes Theologos, Deum esse primum ipsum verum ac bonum. Esse authorem vniuersorum. Super omnia. In omnibus. Semper. Prouidere cunctis. Iuste administrare. Fortiter, dum administrat, in habitu suo perseverare. Temperatè suauiterque tractare. Opulentissime viuere, atq; iucundissime. Seipsum adeò beatum intueri, mirari, & colere.

Has duodecim Dei dotes, omnis apud omnes Gentes tribuit Theologia. Quicquid vbique homines agunt, ad harum possessionem referunt, neque aliud quicquam expetunt & conantur, quàm dotes huiusmodi sibi plenissimè comparare. Plenissimus harum possessor solus est Deus. Totus igitur animæ nostræ conatus est, ut Deus efficiatur. Conatus talis naturalis est hominibus non minus quàm conatus auium ad volandum. Inest enim hominibus omnibus semper vbique, ideo non contingentem alicuius hominis qualitatem, sed naturam ipsam sequitur speciei. Naturalis autem motus ad finem aliquem directus, non aliam ob causam ad hunc finem potius quàm ad alium determinatur, nisi propter quandam naturæ suæ affectionem, per quam cum tali fine congruit potius quàm cum tali, & propter congruitatem amat, ac propter eandem assequi potest quod amat, quemadmodum aer qui leuitate cum ignis concavo congruit, per eandem annititur moueturque ad illud. Per eandem rursus attingere potest ipsum, & in eo, postquam attigerit conuiescere. Potest igitur quandoque nixus humanus in Deum intentus expleri. Nam quis hunc inseruit animis nostris, nisi idem ipse Deus, quem petimus? Qui cum solus sit author specierum, proprium speciebus inserit appetitum. A primo namque rerum principio, tanquam à primo bono appetibilique, omnis naturalis ducitur appetitus. Idem primus est motor. Idem & finis est vltimus. Siquidem ad agentium ordinem ordo sequitur & in finibus, quia sicut supremum agens sequentia mouet agentia, ita ad finem supremi agentis referri oportet fines agentium reliquorum. Quicquid enim agit primum ipsum agens, propter finem suum agit. Ducit autem agitque primum omnes omnium causarum sequentium actiones, mouendo ad suam actionem omnes, ideoque ad suos fines. Vnde sequitur agentium omnium inferiorum fines ab ipso primo ad finem proprium ordinari.

Primum agens Deus est. Diuinæ volun-

tatis finis est sua bonitas. Quapropter sequentia omnia in Deum tanquam finem necessariò ordinantur, præsertim quia nihil tendit in aliquid tanquam finem, nisi quatenus ipsum est bonum. Quo fit vt bonum sit finis, quia ratione bonum. Quod ergo summum est bonum, est maxime omnium finis. Adde quòd primum bonum est causa omnibus vt sint bona, ergo est causa vt appetantur. Si autem ipsum est propter quod omnia sunt appetenda, sequitur vt ipsum sit & maxime omnium & ab omnibus appetendum. Est igitur finis omnium, eo tamen pacto, vt mentium finis sit secundum formam, reliquorum verò secundum vnam. Ergo & hominum secundum formam finis existit, quando nihil aliud satis ipsis facit. Ita igitur homines Dei formam appetunt, vt à Deo tributus sit huiusmodi appetitus. Neque minus à Deo accenditur appetitus quo Deum desideramus, quam à re quauis obiecta sensibus appetitio corporalis alliciat. Imò & tanto magis, quanto bonum summum potentius ad trahendum est quam minima bona. Profecto quemadmodum in libro de Amore disserui, ipse summi boni splendor fulget in singulis, & vbi fulget accommodatius, ibi præcipue allicit inuenientem, concitat considerantem, rapit & occupat propinquantem, cogitque eum venerari splendorem huiusmodi præ cæteris tanquam numen, nihilque aliud anniti quam vt deposita priore natura, ipse splendor efficiatur. Quod hinc patet, quoniam aspectu tactuue amari hominis non est contentus, & clamat sæpe: Homo hic nescio quid habet quod me vrit, atque ego quid cupiam, non intelligo. Vbi constat animum diuino vti fulgore, qui in formoso homine micat quasi speculo, atque ab eo clam raptum quasi hamo trahi sursum vt Deus enadat. Effet autem Deus (vt ita loquar) tyrannus iniquus, si ea nobis mandaret aggredienda, quæ nunquam possemus implere. Mandat autem vt se queramus, dum suis igniculis desiderium in se inflamat humanum. Effet quoque sagittarius imperitus, ac nimium temerarius, si desideria nostra velut sagittas ad se ceu signum dirigeret, neq; addidisset spiculis pennulas, quibus quandoq; signum attingerent. Effet denique infortunatus, si conatus suus quoniam nos ad se rapit, nunquam finem suum consequeretur. Quam ob rem potest animus noster aliquando fieri Deus, postquàm ad id naturaliter contendit sollicitante Deo. Non fit autem Deus, nisi quod Dei induitur formam, sicut neque fit ignis quicquam, nisi

formam ignis accipiat. Ergo sicut materia aëris quæ prius erat sub aëris humiditate atque calore, per ignis vim humorem exiit, seruat calorem, & accepta siccitate forma ignis induitur, sic animi humani essentia, quæ nunc mentem habet, viresque inferiores, Deo expoliante inferiores quodam modo exiit vires, ac mente, imò verò capite mentis vnitate seruata, substantiam diuinam induitur, quasi recentem formam, per quam penè fit Deus, per quam omnes deinde operationes agit vt Deus aliquis potius, quam vt anima. Hoc impleri posse quandoq; necessarium est, ne frustra ab humana specie quærente, imò ne temerè à Deo trahente tentetur. Anima tenebroso huius corporis habitaculo circumsepta, vires omnes inferiores aut nunquam aut vix & momento remittit. Quocirca mirabile opus illud in hoc corpore non impletur, & vix vnquam gustatur ab vno. Naturalia verò desideria & in multis oportet expleri, & non per momentaneam qualitatem, sed per habitum stabilem qualem appetunt. Quod si mens quanto altius ad contemplanda spiritalia eleuatur, tanto longius discedit à corporalibus, supremus autem terminus, quem attingere potest intelligentia, est ipsa Dei substantia. sequitur vt tunc demum mens diuinam subire substantiam valeat. quando fuerit à mortalibus sensibus penitus aliena. Igitur anima ab huius corporis vinclis exempta puraque decedens, certa quadam ratione fit Deus. Deus autem ac Dei æternitas, idem. Igitur ratione simili fit æternitas, multoque magis fit æterna. Quem quidem statum Ioannes Theologus appellat Deo similem fieri. Paulus autem, in Dei imaginem transformari.

*Quintum immortalitatis signum ab eo quod anima petit primū verum, & primū bonū.*

## C A P V T I I.

**I**Ta demum ratio superior nos de immortalitate certiores efficiet, si duodecim illas Dei dotes sigillatim percurrentes ostenderimus, animam in his quærendis naturaliter Deo se quodammodo æquare conari.

Animus itaque noster communem veritatis bonitatisque concipit rationem, per quam commune verum quærit, & commune appetit bonum. In communi veritate omnia vera, in communi bono bona omnia continentur. Hinc fit vt cuncta ve-

ra naturaliter quærat, cuncta naturaliter appetat bona. Quod ex eo patet, quod cognita vna quadam alicuius rei veritate, non quiescimus, sed aliam inquirimus, rursusque aliam, quamdiu putamus veritatem aliquam superesse noscendam. Idem in bonis comparandis inspicitur. Omne autem verum, & omne bonum, Deus ipse est, qui primum verum est, primumque bonum. Ergo Deum ipsum appetimus. Sed quid in eo potissimum affectamus? Illi similes fieri. Omnia enim pro capacitate naturæ in ipsum tendunt tanquam finem, & ipsi suo modo cupiunt similia fieri, corpora vita carentia, secundum esse tantum, viuientia secundum vitam, sensitiua, secundum sensum, secundum intellectum rationalia. Non possumus autem Deo per intellectum similes effici, nisi Deum intelligendo, quippe cum quibuscumque aliis rebus intellectus tunc fiat similis, quando eas intelligendo se in earum imagines transfiguratur. Finis ergo noster est, per intellectum Deum videre, per voluntatem viso Deo frui, quia summum bonum nostrum est, summæ potentie nostræ obiectum summum, siue actus perfectissimus circa ipsum. Summæ autem potentie nostræ sunt mens, mentisque caput, atque voluntas. Summū harum obiectum est commune verum, bonumque commune & integrum, id est autem Deus. Neque obiciat nobis Arabum aliquis sufficere nobis angelo aliquo frui. Naturale quippe desiderium nobis inest ad causam semper cuiusque effectus inueniendam, neque cessat inquisitio quousque ad causam primam perueniatur. Quoniam igitur cuiusque effectus cogniti, optamus causam videre, intellectusque noster esse ipsum vniuersale cognoscit, efficitur vt naturaliter affectemus esse ipsius causam noscere, quæ quidem ipse est Deus, neque dicimur finem vltimum affecturi, nisi quiescat totum desiderium naturale. Quare in sola Dei siue cognitione siue possessione vltimus finis consistit humanus, quæ naturalem sola terminat appetitum. Quod liquiddò hinc apparet, quia proprii finis adeptio delectat quemque summopere. Animus autem rei nullius possessione tam vehementer, tam purè, tam firmiter gaudet, quantum vel exigua qualibet speculationis diuinæ gustatione, pro qua, si quando verè persentiat, & possessio omnis & mundus totus & vita contemnitur. Quisquis enim pie nonnunquam cum Deo viuit, is clamat se tunc solum in vita & à malis vixisse semotum, & boni

aliquid

aliquid gustauisse, quasi duntaxat in suum se portum receperit. Huc tendit illud Platonis in libro de scientia: Mala omnino denitari non possunt. Necesse est enim semper aliquid bono contrarium esse. Apud superos autem mala esse impossibile est, sed circa mortalem naturam locumque inferiorem necessariò reuoluuntur, quamobrem hinc illud quamprimum est fugiendum. Fugere verò hinc illuc, nihil est aliud quam Deo, quatenus fieri potest, se similem reddere. Similem verò faciunt iustitia & sanctitas cum prudentia. Hæc ille. Merito ita præcipit. Vbi enim bonorum omnium viget bonum, ibi solum inuenitur omnium Medicina malorum. Neque credendum est Panætio dicenti, optare quidem nos diuina, sed nunquam ad summum consecuturos, quia plena diuinorum possessio & vita quieta non ad animos hominum pertineat, sed ad Angelos. Natura ipsa rerum contrà nos nocet. Nempè elementa quæ naturali cupiditate sua petunt loca, tanto feruntur rapacius, quanto magis locis suis finibusque propinquant. Ideo Aristoteles in libro de cælo ostendit motum naturalem rectum non posse ad infinitum vagari, alioquin in suo progressu non esset modo tardior, modo verò velocior. Quapropter quod tale est, ut vehementius postea quàm prius tendat in aliquid, non oberrat in infinitum, sed ad certum aliquid sese confert. Hoc autem in ipso sciendi desiderio experimur. Quo enim quis magis intelligit, eo ardentius flagrat ad reliquum. Igitur naturale desiderium cognoscendi, ad finem aliquem determinatum dirigitur. Quis hic finis?

Causa causarum omnium, quæ comperta naturalem omnem inquisitionem terminat causarum. Dedit natura corporibus crassis appetitionem inclinationemque qua loca cuperent inferiora, adhibuit illis præterea grauitatem, frigusque, quasi medium per quod ad locum optatum descenderent. Dedit subtilioribus appetitum altioris loci, adiunxit & leuitatem, caliditatemque, perque media optatum finem consequerentur. Dedit brutis cibi & coitus appetitum, addidit membra ad æsum & coitum præparata. Dedit naturæ dux animo vniuersalis & totius veri bonique votum, quod quidem eo naturalius est quàm cibi & coitus appetitus, quo illud est magis continuum. Comedere enim raro corpus exigit, rarius verò coire. Verum autem bonumque singulis optamus momentis. Semper enim nouarum rerum imaginatio-

numque & rationum cupidi sumus. Semper oculos patefacimus ad quælibet occurrentia, & longissimo amplissimoque prospectu nimium delectamur, imò solo contenti sumus immenso. Semper attrigimus aures ad quælibet audienda, quod infantes faciunt & adulti, gnari pariter & ignari, atque omnes in arte qualibet artifices, duce natura. Adde quod domari potest coitus libido, edendi voracitas minui, veri autem bonique cupiditas minime, imò verò decrescunt illa ætate, hæc augetur. Adde insuper, quod illa corporalia propter aliud appetuntur, hæc autem gratia sui.

Quanto igitur naturalior est veri bonique quàm cibi coitusque cupiditas, tanto magis à naturæ duce prouisum est ut finem suum prorsus adipiscatur. Imò verò ob eam maximè causam naturalior est, quia ad finem acquirendum paratior. Profecto si speciei cuiusque proprietates necessaria est, prudenterque ab authore disposita, sequitur ut rationalis speciei conatus qui ad totius boni possessionem dirigitur, quasi finem, assequi valeat quod contendit. Nempè si impossibilis sit finis vltimi consecutio, vniuersa tum species tum actio speciei contingens est, fortuita, & inanis. Quiescit quandoque oculus speciei gratiosæ conspectu, quiescit auris melodia, & quisque sensus quandoque suis satiatur & impletur obiectis. Tanta felicitate sensus natura donauit. Ratio verò istorum regina, quæ licet Angelis inferior sit, brutis tamen est superior, tam infelix erit, tam ab artifice naturæ neglecta, ut oberret semper, quiescat nunquam. Certè in hac vita nunquam Neque audiendus hic est Arabum aliquis, fingens intellectum humanum, quod hac in vita nequit in singulis, saltem in cunctis hominibus assequi.

Primò quidem non est intellectus vnus in omnibus inter se penitus repugnantibus (quod alias ostendemus) deinde neque in cunctis quidem simul hominibus vnquam animus habitum exoptatum consequitur. Ac dum in singulis hominibus ad diuina cæcus est, ad eadem fermè similiter in cunctis est cæcus. Denique non licet fingere nos ipsas diuinarum formarum substantias ex substantiis naturalibus ad votum comprehendere posse. Hæ namque substantiæ ad materiam declinant, illæ verò nequaquam. Intellectus autem humanus quatenus hoc habitat corpus, eatenus cognoscendo quodammodo ad corporalia vergit. Præterea naturales effectus, diuinarum causarum vires substantiasque

æquare & demonstrare non possunt. Adde, quòd diuinæ formæ à naturalibus multo magis distant, quàm à naturalibus naturales. Ergo si per voces non cognoscuntur colores, quod apparet in cæcis, multo minus per naturalia vnquam diuina comprehenduntur, vt Plato ad Dionysium scribit Syracusanum. Mitto quòd substantia virtusque diuina tanquam infinita non potest à nobis prius ad votum percipi, quàm per ipsammet absolutè formemur. Quòd quidem in anima huic coniuncta corpori sic affecto perfici nequit. Verùm vt ad propositam huius argumentationem regrediamur, rationis capacitas appetitioque, non quædam vera, aut bona quædam, sed omnia integraque requirit. Quæ hic ideo nunquam assequi videtur, vt Plato inquit in Epinomide, quia semper est ambiguus intellectus, semper voluntas est anxia.

Hæc igitur animus exutus corpore consequetur. Si bonum vniuersum adipiscetur, immortalitate nullo modo carebit; quæ tantum bonum est, quantum mors est malum, quæ cunctis prius bonis. At mens quæ vera videbit omnia, nullis gaudebit bonis si se suspicabatur morituram. Vt ergo secura sit finis adeptio & tranquilla, necesse est mentem de æterna finis possessione certam esse. Quòd quidem ita confirmat Aurelius Augustinus in libro de Trinitate tertio decimo. Omnes beati esse volunt, atque ideo nolunt perire & consumi, quod beati sunt. Nec nisi viuentes beati esse possunt. Nolunt igitur perire quòd viuunt. Immortales itaque esse volunt, quicunque verè beati vel sunt, vel esse cupiunt. Non autem viuit beatè, cui non adest quod vult. Nullo modo igitur esse poterit vita verè beata, nisi fuerit sempiterna. Hæc ille. Sed ne Pannætiani diffidant vltèrius vitam verè beatam homini conuenire, ita concludemus. Cum naturæ intellectualis proprium sit, cognitione gustare omne bonum, certè eiusdem proprium est, affectu etiam vesci omni bono, id est, integro. Beatitudo igitur naturæ intellectualis est propria. Qualem verò quisque intellectum habet, talem potest beatitudinem consequi. Si verum formalemque intellectum, veram quoque formalemque felicitatem. Sin vmbatilem intellectum, vmbatilem quoque felicitatem. Hominis anima licet imago quædam sit intellectus diuinioris, veram tamen in se mentis formam habet, quod tribus probatur signis.

Primum est, quòd multa vera secundum veram eorum rationem intelligit. Secun-

dum, quòd veram veritatis ipsius intelligit rationem. Tertium, quòd si anima nostra solam intellectus vmbam haberet, non intelligeret, definiretve vnquam formam & substantiam intellectus, sed accidentia tantum confusè prospiceret. Quoniam igitur anima vim intelligendi possidet non vmbatilem tantum, sicut bestiarum quædam sagaciores, sed verè etiam expressam atque formalem, idcirco potest quandoque vitam consequi verè beatam. Neque mirum alicui videri debet, me intellectum alium vmbatilem, alium formalem ponere. Siquidem Platonici, vt Proculus disputat, omnia rerum genera ita distinguunt, atque in primis vnitarè & mentem, animam & naturam. Sed missa hæc in præsentia faciamus, videamusque qua ratione Origenes in libris de Principiis superiora confirmat. Cum consideraret Origenes Deum rerum artificem in singulis non necessitati solum, vtilitati tum propriæ, tum communi consulere, sed etiam (neque id quidem minus) pulchritudini rerum, admirationique spectantium ybique studere conclusit.

Quemadmodum humanus artifex artificia construit quàm pulcherrima, vt inuentes alliciantur ad ingenium quo ille construxit, considerandum atque admirandum, ita Deum artificisissimum mundi opificium construxisse. Vnde efficit vult, vt rationum quibus omnia constant, inquisitio, ab ipsamet ratione Dei artificis omnium mentibus sit inserta, & inde quotidie moueatur, ita vt minus eas nostra mens desideret per naturam, quàm oculus colores, & gustus escas. Addit ea nos conditione à Deo eiusmodi desiderium accepisse, qua aliquando posset expleri, ne frustra à Deo sit insitum. Præterea quisquis amoris huic studio voluntatis indulserit, etiam si parum veritatis consequatur in vita, tamen ex hoc affectu præparari ad veritatis plenitudinem in futuro comprehendendam. Et quoniam præparatio talis fit per Deum, per Deum fore quandoque formationem. Siquidem agentes causæ non ob aliam rationem disponunt materiam, nisi vt eam forment quandoque dispositam. Hanc Origenis sententiam ita breuiter confirmamus. Quòd videlicet quatenus consideramus quales effectui vniuersi formæ sint, atque vtrum prosint nobis aut obsint, eatenus à natura creata duci videmur, & vitæ corporis obsequi, ac velle formas externas in formam nostram, prout vsus postulat, transformare.



At, quando perscrutamur quibus rationibus singula ita creata ordinataque sint, quod sanè inquirimus naturaliter, tunc ab ipsa rerum artifice ratione ad ipsammet allicimur, vitæque studemus æternæ, & in formam artificis omniformem, animum reformare conamur. Hinc Paulus Apostolus inquit, interierit hominem quotidie renouari, inuisibilia nobis æternaque contemplantibus. Item: Nos autem, inquit, reuelata facie gloriam Domini speculantes, in eandem imaginem transformamur à claritate in claritatem, tanquam à Domini spiritu.

*Sextum signum, quia anima conatur omnia fieri.*

### C A P V T III.

**O**stensum est animum nostrum in omnibus suis actibus primam illam Dei dotem pro viribus comparare, id est, totius veri totiusque boni possessionem. Secundam verò illam querit ne? An conatur omnia fieri, sicut Deus est omnia? Conatur mirum in modum. Vitam siquidem agit Plantæ, quatenus sagingando indulget corpori. Vitam bruti, quatenus sensibus adulat. Vitam hominis; prout de humanis negotiis ratione consultat. Vitam heroum, quantum naturalia inuestigat. Vitam dæmonum, prout Mathematica speculatur. Vitam Angelorum, prout diuina inquirat mysteria. Vitam Dei, quantum Dei gratia omnia operatur. Omnis hominis anima hæc in se cuncta quodammodo experitur, licet aliter aliæ. Atque ita genus humanum contendit omnia fieri, cum omnium agat vitas. Quod admiratus Mercurius Trismegistus inquit: Magnum miraculum esse hominem, animal venerandum & adorandum, qui genus dæmonum nouerit, quasi natura cognatum, quiue in Deum transeat, quasi ipse sit Deus.

Præterea quæcunque sunt, quantum sunt, sunt vera. Quantum verò vim aliquam ordinemque & vsum sortita sunt, sunt & bona. Animum supra monstrauimus omnia vera & bona omnia querere. Res igitur omnes querit. Quid autem querit aliud, nisi ut per intellectum sciat omnes, per voluntatem omnibus perfruatur? Utroque autem modo fieri cuncta conatur. Sicut sensus, puta visus, colores non cernit, nisi colorum induat formas, fiatque vnum ex videndi potentia & formæ visibilis actu, ceu ex aëre lumineque fit vnum. Itaque intellectus res ipsas cognoscit, nisi vestiatur

formis rerum cognoscendarum, fiatque ex intelligendi potentia & formæ intelligibilis actu vnum, quorum vnionem vna actio comitatur. Vna enim intelligendi operatio est vtriusque. Quis item neget ex materia corporali & forma illi tributa rem vnā fieri, cum ex illo composito vnus proueniat actus, vnusque motus: Multo autem magis (ut placet Platonis & Auerō) vnum quiddam fieri oportet ex potentia, formaque rei intelligendæ, tum quia sæpè stabilior ex iis prouenit compositio (sæpè enim diutius manent vnā quam materia corporalis, eiusque forma) tum etiam quia intellectus ipse forma quædam est, forma, inquam, inhians materia iuxta ad formam vltiorem. Ideo magis conuenit cum forma suscipienda quàm conueniat cum forma propria materia corporalis. Omnes enim formæ in mundi materias à superna mente descendunt, quocirca cum mente nostrā multo magis conueniunt, quàm cum materia. Denique mens, quanto est præstantior quàm materia, tanto efficacius formam quam exoptat sibi adsciscit & vnit. Neque credendum est animum sibi minus vnire quæ capit, quàm corpus. Corpus enim cibos vel diuersissimos in suam vertit substantiam, anima cōcoquente. Ita & animus quæ accipit, in se vertit, & multo magis. Siquidem dimensiones corporum mutua in corporibus impediunt vnionem, spiritalia verò sunt vnioni admodum aptiora. Itaque rationes rerum intellectarum magis in substantiam transeunt intellectus, ut vult Plotinus, quàm in substantiam corporis alimentata. Per hæc patet, ex mente nostrā & forma rei intelligendæ vnum aliquid fieri. Quod autem ita subit alicuius formam, ut ex ea seipso reddat vnum, illud ipsum fermè euadit, cuius subiuit formam. Quis ueliat materiam aeris quando ignis formam suscipit, effici ignem, aut igneam? Ideo intellectus penè res illa fit, quam intelligit. Fir, inquam, actu res illa. Nam & potentia, & quodammodo habitu res eadē erat, etiam priusquam intelligeret, ut Plotinus existimat. Tunc sanè intellectus intelligit circulum quando ipse actu quasi fit ratio circuli. Imò hoc ipsum actu fieri, ipsum intelligere est. Erat autem intellectus eadem ipsa circuli ratio etiam prius, tum secundum potentiam, quo ad substantialem pertinet circuli ipsius ideam, tum secundum habitum, quo ad ideæ formulam nobis familiarē. Veritas autem singularum rerum in ipsa firma illarum ratione consistit. Atque ita mens res quælibet vera fit, quando res

ipsas intelligit, se in earum rationes perpetuas cōuertendo. Sed de hoc aliās. Sufficit autem nobis in præsentia, quòd cum intellectus quærat res omnes intelligere, & intelligendo formis earum penitus vestiamur, consequens est, vt quærat res omnes effici, vnde nititur Deus fieri, in quo sunt omnia, dum nititur omnia fieri. De intellectu satis. Cupit idem & nostra voluntas, quia semper affectat bonis omnibus perfrui. Fruendo autem rebus, seipsam rebus quibus fruatur vnit. Sed in interest inter intellectum & volūtatem. Vtraq; enim sunt quidem omnia, intellectus omnia vera, voluntas omnia bona, sed intellectus res in seipsum transferendo illis vnitur, voluntas contra in res transferendo seipsam. Quoniam pacto? Sanè noster intellectus modo suo potius res intelligit, quàm pro natura rerum. Formas vtiq; corporum, quæ sunt particulares, materiæ immerse, diuise, confusæ, infectæ ac mobiles, intelligit modo quodā yniuersali absoluto, simplici, distincto, puro & stabili. Deū verò & Angelos, qui stabiles sunt & simplices, mobili vt plurimum & multiplici comprehendit discursione. Ita intellectus noster tā illa quæ infra se, quàm quæ supra existunt, modo quodam percipit suo. Quam ob causam dicitur omnia in suam transferre naturam. Ex quo etiam Platonis illud confirmari videtur, quòd mens per innatas formas intelligat, postquam per naturæ suæ modū intelligit. Voluntas autē primo quidem non sicut intellectus in se permanet, sed animam & corpus mouet ad operandū, vt ad res desideratas accedant, deinde nō eo proprio modo quo res in anima insunt affectat, sed quo potius in seipsis. Intellectui aurū cognituro, species auri illa yniuersalis & incorporea sufficit, voluntati verò non sufficit. Nā quantum ad humanā vitam spectat, aurū vult particulare istud & corporale, quale est in seipso. Concludamus, animā nostram per intellectum & voluntatē, tanquam geminas illas Platonicas alas idcirco volare ad Deum, quoniā per eas volat ad omnia. Per primam omnia sibi applicat, per secundam se applicat omnibus. Itaq; anima cupit, conatur, incipit Deus fieri, proficitq; quotidie. Motus autē omnis qui ad terminū aliquem directus, incipit quidē primo, pergit deinde, intenditur paulatim & proficit, profecto quandoq; perficitur. Eadē namq; facultate intenditur, qua coepit. Eadē postea proficit, qua & intendebatur. Eadem tandem perficitur, qua proficit. Quamobrem animus noster quandoque fieri poterit quodammodo omnia, ac Deus quidam euadere.

*Septimum signum & octauum, quoniam animus conatur facere omnia, atque item omnia superare.*

### C A P V T IIII.

**S**equuntur aliæ Dei dotes, tertia, quòd auctor vniuersorum est: quarta, quòd super omnia. Has quoque animus noster aucupatur. Diximus aliās, quemadmodum per varias artes omnia Dei opera æmulantur, atque ita instar Dei efficit omnia. Diximus etiam hominem semper contendere, vt sibi ipsi & cæteris cunctis, tum hominibus, tum bestiis dominetur. Esse seruitutis omnis impatientem. Qui etiam si seruire cogatur, odit Dominum, vt pote qui seruiat contra naturam. Superare autem obnixè qualibet in re contendit, pudetque, vel in rebus minimis ludisque leuissimis superari tanquam id sit contra naturalem hominis dignitatem, & omnino pudoris verecundiæque affectus humano generi proprius, nescio qui angustum latere in nobis significat, quod nefas sit temerari, quodve sit veneratione dignissimum. De hoc alibi. Sed quantum pertinet ad victoriæ cupiditatem, immensam animi nostri magnificentiam ex hoc manifestè licet perspicere, quòd non satis illi futurum sit mundi huius imperium, si hoc subactō, aliū rescuerit superesse mundum, quem nondum subegerit. Hinc Alexander cum audiret Anaxarchum Democritum mundos esse innumerabiles disputantem, heu me miserum, exclamauit, qui ne vno quidem adhuc potitus sum. Ita nec superiorem vult homo, neque parem, neque patitur superesse aliquid ab imperio eius exclusum. Solius Dei quod multus hic status est. Statum igitur quærit diuinum. Quod inde planè possumus coniectari, tum Philosophi tum principes diuinos sibi quæsiuerunt honores. Neque satis illis fuit quòd boni homines haberentur, nisi haberentur etiam diuini. Imò tanquam dii voluerunt coli, quod cum innumerabiles viri tentauerunt, tum inter Philosophos Empedocles præcipue, inter principes Alexander Macedo dicitur concupisse. Denique omnes, idem affectant, & si successurum sperarent, aggrederentur, quasi iure suo vendicent sibi diuinitatem.

*Novum signum & decimum, quod homo affectat ubique esse, atque item esse semper.*

## CAPUT V.

**D**Eus præterea ubique est, & semper. Cupit autem homo ubiq; esse. Quatuor enim elementis utitur, sicut diximus. Terram metitur & cælum, ac profundas Tartari latebras perscrutatur. Non illi cælum videtur altissimum, ut Mercurij verbis utar, non centrum terræ profundum. Non temporum locorumque intervalla impediunt quin per omnia percurrat quæcunque sunt in quibuscunque temporibus aut locis. Nullus paries eius aut obtrudit aut retundit intuitum. Nulli fines sibi sunt satis. Ubique studet imperare, ubique laudari. Atque ita conatur esse, ut Deus, ubique. Conatur quoque esse & semper, ut Deus. Duobus autem id quærit modis. Primò quòd per omne futurum tempus in ore hominum restare contendit, doletque neque potuisse etiam in omnibus præteritis sæculis celebrari, neque posse in futuris ab omnibus tum hominum nationibus tum brutorum generibus honorari. Id omnes tam adolescentes quàm adulti, tam rudes quàm eruditi, omni ope studioque nutriuntur, & tanto affectant ardentius, quanto magis excellunt ingenio. Quod autem omnes appetunt homines, maximè verò præstantiores, hoc ab illis naturali lege tanquam bonum desideratur. Non igitur frustra quæritur, siquidem in lege naturæ non est temeritas. Temere autem quæreretur & frustra tanquam bonum, si nihil esset quærentibus profuturum. Non prodest laus quæ non sentitur. Quapropter species humana vaticinatur se in sæculis futuris sensu non carituram, cum sæpè etiam præsentem contemnat vitam ut à posteris celebretur. Posterorum quoque suorum cum in omni vita, tum in vitæ calce summam habet curam, existimans ad se futura sæcula pertinere. Hæc fieri à bestiis non videmus, quasi earum natura vaticinetur nihil in se esse quod aut veneratione sit dignum, aut sensu prædium sempiterno. Vaticinium vero naturale excellentissimorum præsertim ingeniorum, aberrare non potest, quemadmodum Plato in Epistola scribit ad Dionysium. Ex quo effici vult, ut animis hominum sensus humanarum rerum supersit, quod etiam in legibus ex ordine diuinæ providentiæ confirmatur.

Alex modus quo noster animus optat es-

se semper, imò & vivere, ( siquidem animæ idem est esse quod vivere ) talis apparet. Humanus animus, & is quidem omnis, vitam aliquam cogitat sempiternam, quam statim cogitatam affectat, semperque cupit esse. Omnino appetitus essendi, naturalis est, quoniam rebus statim natis inest cunctis, atque continuus. Neque consilio advenit, quia inest euestigio natis. Neque casu contingit, quia cunctis, & quia continuus. Profectò elementa per virtutem naturalium qualitaum resistunt rebus corruptionem tentantibus, ne esse illis auferatur.

Rursus, loca sibi convenientia petunt avidissimè, repelluntque obstantia motui, ut esse conseruent. Hic appetitus essendi ideo dicitur naturalis, quia naturales rerum sequitur qualitates. Plantæ quoque vitalis complexionis instinctu humorem sugunt salubriorem, radices ad hunc longissimè dilatantes, quo esse conseruent, item umbras retractis declinant ramusculis, atque viminibus quibusdam aduncis implicant sustentacula, ne esse amittant. Quem appetitum dicimus naturalem, quia naturalem sequitur vitæ complexionem. Bruta per concupiscentiam naturalem ea adfiscunt, quæ esse conseruant, repellunt per naturalem iracundiam interimenta.

Itaque in iis similiter essendi appetitus est naturalis, quia non consilium aut casum, sed vires sequitur naturales & insitas. Quoniam verò horum naturæ vim non habent ullam per quam esse sempiternum subiecto suo propriè corporique exhibeant, ideo horum nulla semper esse in sua propriè substantia cupiunt, frustra namque contenderent, cupiunt tamen secundum naturam esse sempiternam in sua specie, ad quod sufficienter naturales eorum vires subseruiunt. Hinc similia sibi in specie generant, per quam propagationem species talis rerum perpetua manet in mundo. Quæ quidem appetitio non solum in elementis & plantis, sed brutis etiam, caret cognitione. Nempe vis generandi quæ ad id servit, nullam prorsus habet cognitionem. Si quæ verò sunt corpora quorum principia sufficiant ad esse in propria substantia, sempiternum illa secundum naturam esse appetunt, sempiternum non in specie solum, verum etiam in substantia propria, qualia fortè sunt syderum corpora. Redeamus ad nostra. Appetit noster animus esse. Sed nunquid naturalis est huiusmodi appetitus? Est absque dubio non minus naturalis animo nostro, quam care-

ris rebus appetitus effendi. At enim appetit esse semper. Num hæc semper effendi cupiditas ita naturalis est, sicut effendi? Est plane. Neque nobis Epicureus quisquam obiciat, quod licet animus esse quidem ipsum appetat naturaliter, quia etiam si non nosset, appeteret, tamen esse sempiternum præter naturam exoptat, ob id fortasse, quod æternitatem illam cognouit quidem prius, postea verò concupiuit. Non enim obstat cognitio illa quo minus æternitatis auditas sit naturalis. Nam & nostri sensus cibos cognoscunt, quos tamen secundum naturam appetunt. Lupus agnum, canis leporem postquam viderunt, cupiunt, tamen cupiunt naturaliter, quoniam ex naturali complexione statim ita compelluntur ad appetendum, ut non cupere nequeant. Atque ut oculis naturale est talia sibi obiecta perspicere, ita naturale est concupiscendi potentia talia inspecta prorinus affectare. Eadem ratione intellectui naturale est perspicua obiecta cognoscere, voluntati quæ bona iudicata sunt velle.

Quicquid perspicue offertur, naturaliter intellectus agnoscit. Quicquid sub boni ratione offertur, voluntas appetit naturaliter. Quare naturale est intellectui esse sempiternum cognoscere, cognitum verò tanquam bonum voluntati naturalem exoptare. Et sicut appetitus irrationalis sequitur sensum, sic voluntas, quæ est rationalis auditas, sequitur intellectum. Ergo si appetitio cibi est naturalis, quia subita est, non nata consilio, sic voluntas immortalitatis est naturalis, quia est actus subitus sequens meram intellectus voluntatisque naturam.

Nam, cum primum menti esse sempiternum offertur, iudicatur appetendum absque discurfione, & appetitur nullo consilio præcedente. Quod si vel casu, vel consilio affectaretur, neque omnes, neque semper iidem, neque æquè semper exoptarent, sed variatur istud secundum casuum consultantiumque varietatem. Nunc autem omnes & necessariò & subito id sibi adfiscunt impellente natura, quemadmodum & bonum ipsum necessariò volumus, hoc autem illud non necessariò, neque natura. Ita esse tale aut tale, hic vel ibi, non naturaliter affectamus, esse autem ipsum absolutum, cui nulla priuatio miscetur effendi, trahente natura desideramus. Atque sicut sempiternam vitæ priuationem impellente natura semper horremus, ita sempiternam vitam natura trahente diligimus. Temperauit autem naturæ artifex cum essentia cognitionem, cum co-

gnitione appetitum, cum appetitu finis adaptionem. Ergo sicut brutum esse tantum temporale cognoscit pro naturæ suæ capacitate, ac secundum naturam esse appetit temporale, ita noster animus naturæ suæ magnificentia sempiternum esse cognoscit, & naturaliter appetit. Nam & esse ipsum est secundum naturam appetibile, & eo quidem modo secundum naturam appetibile, quo & cognoscibile naturaliter. Itaque, sicut à natura bruti esse cognoscitur tantum ut temporale ac præsens, ita ab illa desideratur similiter secundum naturam. Ab humana verò natura sicut cognoscitur esse ipsum tanquam perpetuum, ita tanquam perpetuum ab ea naturaliter affectatur, ut quod secundum propriam intellectualem naturam dumtaxat notum est, secundum eandem naturaliter appetatur. Quinimò, secundum eandem quod cupimus consequemur. Rationabile enim est, ut per eandem facultatem attingamus in consequendo, per quam in cognoscendo attingimus & volendo, ut eidem naturalis sit terminus motionis, cui naturalis est motio. Ergo qui per cognitionem & voluntatem sempiternam vitam attingit, non video cur per vitam non attingat, cuius quidem vitæ virtute temporalia superante, tam intelligentia quàm voluntas quæ inde dependent, ultra temporanea sese conferunt ad æterna. Præterea, cum non sit frustra desiderium naturale, consequens est ut hominis animus esse perpetuum consequatur naturaliter exoptatum. Esse, inquam, perpetuum non in specie tantum, sed in substantia propria, id enim cupit. Merito corporalia, quia propagatione nascuntur, esse perpetuum secundum propagationem affectant, mens autem esse perpetuum substantiæ propriæ, quia mens quoque in se ipsa subsistit, sitque à Deo, non iacet in aliquo generationis subiecto, neque successionem producit. Quis autem secundum naturam cupit impossibilia? Nam quis aut volare, aut siccis pedibus flumina pertransire? Potest quidem quandoque puer aliquis vanus, casu quodam per sensum commotus, talium sibi miraculorum optare facultatem, sed neque pueri ipsi sæpè talia, neque viri vnquam cogitant aut cupiunt. Vix tam verò sempiternam omnem cupimus, atque semper, etiam dum non aduertimus cupere. Itaque non est huius affectus impossibilis. Hoc autem arbitror summo opere aduertendum, quod vita est naturalior quàm scientia, quoniam vita est prior interiorque, & magis continua substantialis.

que, quàm scientia. Verè igitur vitæ appetitus magis naturalis est quàm scientiæ veræ. Vera scientia est, quæ est oppositi sui, id est, ignorantia, vsque adeò expert, vt neque iam habeat illam actu admixtam per fallaciam, neque in illam per obliuionem vnquam cadere possit. Vera quoque vita est, quæ neque secundum actum mixta est mortiferæ qualitati, neque secundum vllā procliuatatem obnoxia morti. Cum igitur veræ, id est, sempiternæ vitæ cupiditas multo naturalior sit quàm scientiæ veræ, sequitur vt longè magis naturalis possibilisque sit sempiternæ vitæ quàm veræ scientiæ consecutio. Imò verò cum vita multo magis quam intelligentia & voluntas cum sempiterna vita conueniat, si intelligendo atque volendo, certè longè magis viuendo vitam consequimur sempiternam. Que quidem si posterioribus actibus animæ, intelligentiæ scilicet voluntatiue se communicat, nimirum vitæ iam ipsi, quæ prior actus est, seipsam prius communicauit. Alioquin naturæ author non tam vehementer nos ad huius rei audiratem quotidie raperet, sicut neque ad alia quæuis rapit impossibilia. Diuinè enim Zoroaster: —

Οὐ γὰρ ἀπὸ πατρὸς ἀρχῆς ἄλλῃς π τρω-  
χέλει,

id est, Nihil a paterno principio progreditur aut voluitur imperfectum.

*Signum xi. xij. xiiij. xiiij. quod cupimus quatuor Dei virtutes affequi.*

## C A P V T VI.

**S**VNT quatuor quædam aliæ Dei dotes ad virtutes quatuor pertinentes. Vocauimus namque illum prouidum, iustum, fortem, & temperatum. Quis negauerit Deum singula circumspicere? Debitis naturalibusque ordinibus gubernare. In suo statu permanere immobilem, dum hæc agit, neque defatigari? Tranquillum esse, suauiterque singula & moderatè tractare? Hominis animam inspicere diuinæ prudentiæ æmulam. Quàm curiosè recolit præterita, non prinata solum vel sua, sed publica omnia & mundana? Quàm impensè præsentia sciscitatur, aliena etiam & externa? Quàm annexè futuris inhiat? Quàm diligenter futura anticipat sæcula? Quod grauis audire potest homo conuiuium, quàm si inscius & improuidus appelletur? Vnde fit, vt nemo velit vltro rei aut artis vllius ignorantiam confiteri, vt pote qui monstrante natura indicet nullius rei igno-

rantiam ad hominem pertinere, sed esse illi rerum omnium fermè perinde ac Deo peritiam.

Iustitiam quoque diuinam mens nostrā venatur. Quot legibus suum subiicit corpus? Familiam gubernat? Temperat ciuitatem? Moderatur & regna? Quot pœnis sæuit in peccatores? Quot bonos afficit premiis. Quàm grauiter scelestissimis indignatur? Quam ardentè vel à malis viri probatissimi diliguntur? Quanto denique ordine ac penè cœlesti societas humana disponitur, & in omni gubernatione ad vnum senioreni prudentioreniue tanquam totus mundus ad Deum vnum dirigitur? Quin etiam latrones iuste inter te prædam dispartiant. Et iniqui homines si quam inferunt iniuriam, iuste illam inferre putant, vel acceptas iniurias vindicantes, vel tollentes è medio homines nocituros, vel furantes ea quibus indigent ipsi, abundant alij, ac videri volunt iustissimè singula perpetrare. In quibus omnibus apparet humanum genus non minorem sibi velle iustitiā vendicare, quàm Deus ipse possideat. Damus quoque operam vt Dei fortitudinem adipiscamur. Dei profecto fortitudo est status immobilis. Prudentissimi viri hunc sibi statum ex eo pro viribus comparant, quod statuunt animi bonis contenti viuere, neque vllius facere corporis & fortunæ commoda vel incommoda, quasi ad se, qui animi ipsi sunt, nihil pertineant. Qui hæc mobilia negligunt immobiles animo perseverant. Imprudentiores autem eundem optant vitæ statum, sed alia aggrediuntur viā, putantes ea sibi rem facilius successuram. Quid ergo? Expugnant & subigant pro viribus omnes qui eos posse quandoque ex sua sede & dignitate depellere videantur.

Diuinam præterea temperantiam qui non cupiat? Prudentes ita moderari motus animi student, vt nulla ex parte diffideant, imprudentes & corpus & res suas ita componere, vt animum non perturbent. Vtrique integram expetunt animi sui concordiam, & prudenti quidem res succedit quandoque, imprudenti nequaquam. Denique sicut cæterarum rerum omnium, ita quatuor harum virtutum summæ in Deo sunt rationes, adeò vt summa prudentia Deus sit, summa iustitia, & reliqua summa. Viri autem harum virtutum studiosi summam earum expetunt rationem, dum nihil quod ad ipsarum consummationem pertineat, sibi volunt deesse. Id omnes optant homines, licet alij alia proficiantur via. Omnes igitur Deum



quarunt. Quarunt autem illi Deum rectissimo calle, qui primo per civiles virtutes affectus animi secundos amputant, deinde per virtutes purgatorias eos extirpant, tertio loco per virtutes animi iam purgati affectus primos insuper moderantur, quibus temperatis, denique virtutibus exemplaribus quæ sunt in Deo formentur. Formari verò quandoque virtutibus exemplaribus proculdubio possumus. Nam præparatio siue affectio formam habitumque respicit, atque certa quædam affectio certum habitum. Quapropter causa quæ subiectum aliquod gradatim magis magisque præparat, ob id præparat, ut formam inducat substantialem atque præcipuam, & subiectum illud secundum communem naturæ ordinem, quemadmodum præparationis illius fit particeps, ita & principalis formæ capax effici potest. Deus qui virtus ipsa exemplaris est, animæ humanæ speciem afficit ab initio feminibus quibusdam incitamentis virtutum, per quæ humanis virtutibus, id est, civilibus purgatoriis, purgati animi ad exemplares diuinasque virtutes commodè præparantur. Quod tres eiusmodi virtutes humanæ præparationes sint ad diuinas, ex eo conuicimus, quod ex diuinis inseruntur nobis & excitantur, quod illarum imagines sunt ita perspicuæ, ut per ipsas agnoscantur illæ, quod ad illas gradatim magis magisque accedunt, quod ita nos afficiunt, ut in his non quiescamus, sed afficiamur ad illas. Ergo & Deus immortalis diuinæ virtutis habitu animæ speciem formare quandoque debet, & animæ species formari potest.

*Decimum quintum signum, quod animus summam expetit opulentiam & voluptatem.*

## C A P V T VII.

**A**ccedit quod vitam Dei opulentissimam & iucundissimam posuimus. Nam solus ille summa est opulentia summaque voluptas, qui fons est bonorum omnium, nullius egenus. Si ergo summam opulentiam & voluptatem summam omnes expetunt homines, dii expetunt fieri. Noua certa quædam aliquarum possessio, aut species aliqua voluptatis sufficit homini, quemadmodum cæteris animantibus, sed paulum quid in iis adeptum se putat, donec restat aliquid, vel minimum acquirendum. Quamobrem prudentes viri existimantes opulentiam Dei, gaudiumque in solis intelligentiæ honestatisque thesauris re vera consistere, sola hæc cupiunt, sed

ad summum. Imprudentes autem homines opinantes maiestatem diuinam bonis insuper corporalibus perfrui, appetunt insuper corporalia, & ad summum. Constat autem eos neque necessitatis, neque commoditatis corporalis gratia, dumtaxat talia quærere. Nempè etià si arbitrentur habere se quantum sufficiat ad viuendū, & quantum ad viuendū iucundè & copiosè, nondum tamē cessāt accumulare thesauros, & oblectamēta exquisitissima diligenter inquirere, quod Midas, Sardanapalus & Xerxes demonstrauerunt. Ille thesauros in immensum accumulabat, hi summa præmia proponebant illis qui noua quotidie inuenerent oblectamenta. Non corpori seruiunt isti, sed obsunt, neque damni corporalis ignari. Non corpori obsequuntur, sed diuinæ felicitatis inuidi, immensam sibi illius copiam tam rerum, quam voluptatum usurpare contendunt, atque ut hanc assquantur, corpus suum perdunt, afficiunt animum, vitamque perturbant. Tandem neque prudentes, licet accedant propius, neque imprudentes hac in vita, ingentes illos quos cupiunt thesauros consequuntur, ideo hic quiescunt nunquam. Res autem quælibet in loco suo ac naturali habitu conquiescit. Quam obnixè loca sua repetunt elementa? Quam firmiter illis inhaerent? Plantæ conueniens sibi solum finisque congruum quàm auidè adsciscunt? Quam stabiliter in eo pro viribus permanent bruta similiter. Talpæ enim sinus terræ, armenta gregesque terræ faciem, pisces aquam, & auidissimè petunt, & in his locis trahunt moras quam libentissimè. Tandem hæc omnia (ut breuī complectar) quando locum habitumque naturalem nacta sunt, quiescunt. Quod indicat & corpus nostrum quando bene valet, pastū est belle, molliterque recumbit ad vorū, tunc neq; cōplexio eius, neque sensus eius comes, qui in nobis ipsa est bestia, poscit aliquid ultra. At interim vel ratio intellectualis rerum inquirat causas studiosè, & anxie de rebus consultat agendis, vel ratio cogitatrix nouas fingit & postulat voluptates. Stimulatur pœnitentia, suspicione sollicitatur. Anxietas huiusmodi hominis ipsius est propria. Siquidem à viribus animi homini propriis oritur, non elementorum corporalium, non bestiarum viribus, quæ in nobis sat habent, ut diximus.

Quamobrem homo solus in præsentī hoc viuendi habitū quiescit nunquam, solus hoc loco non est contentus. Solus igitur homo in regionibus his peregrinatur, & in ipso inire non potest quiescere, dum

ad patriam aspirat cœlestem, quam petimus omnes, quamvis propter varietatem opinionis atque consilij diuerso calle proficiscamur. Si ergo quæ nobis inferiora sunt, quandoque naturalem habitum patriamque sedem adepta quiescunt, nos quoque necesse est (ut diximus alias) hæc assequi posse quandoque, atque quiescere. In vita præsentī non datur? Merito, appetimus enim tanquam naturalem habitum, finemque nostrum, bonum illud quod tres præcipuè conditiones habeat, videlicet purum sit, integrum, stabile. In hac autem vita boni possessio neque pura est, quoniam naturalis quidam affectus animæ erga corpus, primique ipsi sensuum motus, mentes virorum vel excellentissimorum distrahunt & perturbant. Neque integra, oportet siquidem omne illud cui naturaliter inest ad actus aliquos potentia nixusque, ad eos ipsos peruenire omnino, si quando sit quieturum. Cum ergo insit intellectui humano capacitas naturalis atque conatus ad formas rerum omnium percipiendas & possidendas, tunc demum finem suum naturalem consecutus erit, cum adeptus fuerit omnes. At quia in hac vita talem nunquam habitum adipiscitur, bonum hic integrum nunquam possidet, neque stabilis. Quippè bonum nostrum in actione quadam consistit expedita, secunda, continua.

Omnis autem hominum in terra viuentium actio, impedimentum aliquod & periculum interpellationemque patitur. Quid, quòd quæcunque longiore ad incrementum indigent tempore, solent diutius cum sunt adulta perseverare? Homo verò vsque ad extremam senectutem contendit obnixè ad felicitatis habitum acquirendum, quem tandem ex parte quadam percipit, cumque in hac vita ad tempus quam breuissimum possidet.

Quapropter ut habitus qui ex parte est acquisitus, impleatur quandoque, & qui diutissimè creuit, permaneat diutissimè, necesse est animam corpori superesse. quæ quoniam hic Italiam sequitur fugientem, neque patrium portum attingit, sollicitatur moeretque assiduè. Porro, quod mirabile est, quotiens oriosi sumus, totièns tanquam exules incidimus in mœrorem, quamvis mœroris nostri causam aut nesciamus, aut certè non cogitemus. Ex quo factum est, ut homo nequeat solus vivere. Nam cæterorum hominum societate, ac insuper multiplici oblectamentorum varietate, latentem perpetuamque mœritiam expellere posse putamus. Sed falli-

mur heu nimium. Sanè in medijs voluptatum ludis suspiramus nonnunquam, ac ludis peractis discedimus tristiores. Idem accidit nobis quod illis, qui esuriēte stomacho dormientes insomnia comedunt, nec implentur, quia non imaginem cibi, sed ipsum cibum stomachus appetebat.

Nos quoque menti nectar, id est, visionis paternæ gaudium sitienti, offerimus lethales Lethæi fluminis aquas; dum umbratiles adhibemus ludos corporalium voluptatum, quæ falsæ voluptates sunt, non solum quia breuissimæ, ac plenæ sollicitudinis, sed quia mixtæ dolori. Siquidem appetitio indiga, dolor quidam est. Voluptates autem corporis tamdiu percipiuntur, quamdiu egestas & appetitio permanet. Merito igitur oblectamenta terrena non implent animum, sed titillant. Ille siquidem res veras affectat, & gaudia vera, res autem corporales umbræ sunt rerum, earumque illecebræ, umbræ sunt gaudij. Quamobrem si neque alicuius rei temporalis, neque cunctarum temporalium rerum potus sitim mentis extinguit, non temporalem sitit liquorem, sed æternum. Ac si sitim superno Sole accensam impleri oportet quandoque, atque nunquam Lethæo flumine satiatur, aliquando æterno nectaris haustu satiabitur.

Sed iuuat rursus, quæ dicta sunt, his quæ referam priscorum Theologorum mysteriis confirmare. Affirmant enim animas in corporibus dormire, & quæcunque hic agere pative videmur, nihil aliud esse quàm somnia, cogitationesque animarum separatarum à cogitationibus coniunctarum multo magis differre, quam vigilantium ab insomniis dormientium, similiterque à voluptatibus voluptates. Quod quidem ita probatur. Experimur in nobis non solum quotidie, verumetiam fermè qualibet hora, quoties pauculus quidam vapor aliquantro crassior & humidior ab inferioribus corporis partibus exhalans, caput ipsum petit, cerebrique meatus opplet, statim nos somno grauari, mox etiam in somniis imaginibusque deludi. Experimur quoque nonnunquam si vapor aliquis bilis atræ, quam melancholiam Græci vocant, arcem corporis obsecerit expugnaueritque, statim reginam inde nostram, ipsam videlicet rationem, ut ita dicam, præcipitari, ac manifesta homines insania corripī. Si fumus quidam exiguis tantam in nobis vim habet, sitam levis motus nos tantum mutat, quanto magis censendum est cœlestem immorta-

lemque animum, quando ab ea puritate qua ab initio creatur, delabitur, id est, quando obscuro terreni, moribundique corporis carcere clauditur, tunc (ut est apud Platonicos) è suo illo statu mutari? quippè qui tunc non vno & consueto tantum humoris alicuius fumo, sed omnibus pariter nouisque humorum omnium vaporibus, atque ipsa insuper humorum membrorumque insueta mole grauatur, præterea informi illa materia, quæ à formosissima mentis forma diuersissima est, tanquam flumine Lethæo submergitur. Quamobrem toto illo tempore quo sublimis animus in infimo agit corpore, mentem nostram velut ægram perpetua quadam inquietudine hac & illac, sursum deorsumue iactari, nec non dormire semper & delirare Pythagorici & Platonici arbitrantur, singulasque mortalium motiones, actiones, passionnes nihil esse aliud quàm vernigines ægrotantium, dormientium somnia, insanorum deliramenta, ut non iniuria Euripides hanc vitam vmbre somnium appellauerit. Proinde cum fallantur omnes, ij tamen minus falli solent, qui interea quandoque ita ut interdum fit in somno, suspicantur, secumque ipsi dicunt; Forsitan non sunt vera quæ nunc nobis apparent, forsitan in præsentia somniamus. Quicumque inter somniantes sic est affectus, talis certè est ad alios qualis apud inferos ab Homero dicitur esse Tiresias. Solus, inquit, iste sapit, cæteri verò omnes velut vmbre volitant, imò vmbre volitant.

*Decimum sextum signum, quòd colimus nos ipsos ac Deum.*

#### C A P V T -VIII.

**S**Vpere est ut de duodecima illa Dei dote loquamur, per quam seipsum amat & colit, quam homines duobus sibi modis vendicant. Primò, quòd omnes non modo ut cætera faciunt cuncta, se diligunt & tuentur, verum etiam colunt seipsos magnopere, & quasi quædam numina venerantur. Id agunt prudentes quatenus externa & corporalia animo tanquam principi subigunt. Toti ex mente pendunt tanquam ex Deo. Augustam quoque suæ mentis maiestatem velut diuinam statuant vilibus cogitationibus terrenisque sordibus temerare nefas existimant. Quæ quidem notio naturalis humano generi pudorem verecundiamque ingenuit, ut non modò aliorum hominum conspectum quasi diuinorum, verum etiam propriæ men-

tis conscientiam (quòd præcepit Pythagoras) tanquam Dei faciem vereamur, quæ nos assidue malefactorum poenitentia stimulat, etiam si poenam non metueamus. Bene autem factorum oblectat memoria. Quasi cœlestis animus à terrenis vitiorum maculis semper abhorreat. Idem imprudentes quodammodo faciunt, sed à prudentioribus in consummando hoc opere superantur. Idem rursus, sed aliter agunt homines dementissimi, prout nimium placent ipsi sibi, pertinacissime in sua persistunt opinione, sententiam suam tanquam diuinum decretum mordicus tenent. Cuncti denique homines, excellentissimos animos, atque optimè de humano genere meritos in hac vita, ut diuinos honorant, solutos à corporibus adorant, ut deos quodam Deo summo clarissimos, quos præci Heroes nominauerunt. Tanta verò ad se & ad suos reuerentia non apparet in bestiis, nedum vilioribus, sed neque etiam in maioribus. Atque hic primus est modus quo homines diuinum imitantur cultum, videlicet quia seipsos ut deos colunt. Est & alter quia scilicet soli nos animantium omnium colimus Deum, soli nos Deum affectu, gestibus, verbis, delubris, sacrificiis honoramus.

Quod Plato in Protagora maximum esse vult nostræ diuinitatis indicium, quòd soli nos tanquam sortis diuinæ participes, ob cognationem quandam Deum agnoscimus & cupimus tanquam auctorem, inuocamus & amamus ut patrem, ut regem veneramus, timemus ut Dominum. Sicut enim Sol sine Sole non cernitur, sicut aer sine aëre non auditur, ac plenius lumine oculus videt lumen, plena aëre auris audit aërem resonantem, ita neque Deus sine Deo cognoscitur. Sed animus Deo plenus tantum in Deum dirigitur, quantum & diuino lumine illustratus agnoscit Deum, & diuino calore accensus sitit eundem. Hinc animus Dei templum efficitur, ut Xystus Pythagoricus arbitratur. Dei verò æterni templum nunquam existimat ruiturum. Deum agitat mens humana quotidie. Deo ardet cor. Deum suspirat pectus. Eundem cantat lingua. Eundem caput manusque adorant & genua. Eundem referunt hominum artificia. Si non audit hæc Deus, fortè videtur ignorans. Si non exaudit, forsitan apparebit ingratus. Crudelis quodammodo, si vociferari nos cogit quotidie, quos non exaudiat. Neque audeat quisquam dicere Deum humana despiciere tanquam minima. Sanè commoda habitatio tanquam finis fabrum mouet quasi agentem

causam, ut certam quandam domus formam cogitet, ob quam formam rursus certam quærat materiam. Vbi finis mouet agentem, agens si in eam, forma materiam. Idem accidit in cunctis bellicisque consiliis. Quo fit, ut finis sit causa causarum, ideoque omnes causas antecedit. Sunt autem naturalia quæque certi alicuius finis gratia instituta, cum singula ad singulos potissimum usus conducere videantur. Iura vimen palmitis (quem capreolum vocant) ad hoc natum est, ut vitem proximæ arbutulæ vinciat. Hic vincendi actus, causa est ut ortum sit vimen. Quia verò quod nullo modo est, id neque esse potest efficiendi causa effectui cuiquam, neque causas omnes mouere, necessarium est actum huiusmodi & ante reliquas omnes vitis causas extitisse. Non autem extitit in corporibus, nisi nouissime. Ergo in natura quadam incorporea rectrice corporum extitit longè prius quàm in palmitis. Quæ quidem natura vitis artifex gratia talis actus per formam suam, viminis formam in tali quadam materia figurauit. Sed utrum actus huiusmodi in natura illa præfuit secundum naturæ modum, an secundum propositum voluntatis? Certè secundum utrumque. At ex illo idem erat quod agentis forma quædam, & affectus ipsius exemplar. Ex hoc erat finis. Vbi autem artificiosæ voluntatis propositum est, ibi mens. Quapropter præest omnibus corporibus diuina mens, quæ corporalium omnium formas intellectualem modo completitur, & tanquam sagittarius singula ad suos dirigit fines, ad vnum denique cuncta. Diuinus hic agricola colit pampinos, capreolos, & radices. Vnde enim aut pampini vertuntur ad Solem umbra vitata? Aut capreoli tanquam manus ad eam partem præcipuè protenduntur, ubi est propinquius sustentaculum? Aut radices fugientes ariditatem, ad humorem maximè propagantur? Electio quæ non erat, artificiosi consilij, imò verissimi intellectus est opus. Non tamen inest vera mens vitibus. Ergo adest. Adest insuper abiectissimis quibusque bestiolis, quæ in suis artificijs temper eligunt potiora. Colit Deus arbores, ducitque & pascit beluas, quod & prisci Theologi voluerunt. Nunquid solos despiciunt homines? qui soli in terris diuinam non despiciunt maiestatem? Absit, imò verò si Deus nullas omnino vel minimas mundi negligit partes, profectò non despiciunt genus humanum, quod est mundi pars adeò pretiosa, ut media sit temporalium rerum & æternarum, quantum æterna capit, ordinat temporalia. Ad eò Deo proxima, ut sese

diuinæ mentis arcanis insinuans, opus hoc Lei, ordinem scilicet mundi cognoscat. Mundani ordinis intelligentia eo ipso ordine est excellentior. Siquidem ordo huiusmodi per intelligentiam est factus, & regitur. Si per cognitionem animus noster est mundo præstantior, per vitam quoque præstantior erit. Cuius virtute a corpore separari, ipsumque mundum vitæ (ut ita dixerim) supermundanæ virtute transcendere. Quantum verò mundi ordinem intelligentia superet, hinc apparet, quod ordo talis dispergitur tempore, intelligentia totum simul ac stabilem possidet. Ordo rursus causam suam sequitur, non assequitur, intelligentia causam assequitur ordinis, quando Deum eius artificem inuenit, ubi tam ampla capit de Deo, ut mundum deinde velut umbram posthabeat. Rem verò tantam non spernit, nisi qui concipit ampliora. Si tam amplius est animus hominis, cur negligatur à Deo rerum vel minimarum procuratore? Si Deum sentit animus, cur & Deus sentiat animum, præsertim cum Deus hanc ipsam vim actionemque sentiendi animo dederit, & seruet, & ducat? Hinc David interrogat: An qui plantauit aurem, non audit? Et qui finxit oculos, non considerat?

Præterea si animus ad Deum ascendit, cur non descendat quodammodo Deus ad animum? Si quæ iusta sunt, à Deo mens postulat, dum paternam poscit hæreditatem, cur non exaudiat Deus? Quid postulat à parente indulgentissimo hic natus offitiosissimus? Æternitatem. Impetrabit certè. Potest enim Deus æternus eam tribuere, potest capere vita mentis æternitatem, quam capit eius cognitio & voluntas. Non enim vult nisi cognoscat, neque cognoscit etiam, nisi viuat. Quin etiam dari debet æternitas menti, quæ & transcendit tempus, ac pro Deo æterno despiciit temporalia. Quod non modo religiosiores, verum etiam impij quodammodo faciunt. Nam quos non allicit amor Dei, saltem terret timor. Quos non terret metus, suspicio saltem sollicitat. Itaque homines multi omnia omnes certè quam plurima vitæ commoda temporalis abiiciunt Dei amore, vel suspicione vel metu. Deus igitur debet pro temporalibus æterna tribuere. Nullum verò animalium reliquorum præsentibus abstinet bonis propter futurorum desiderium. Quo fit ut homo stultissimus sit animalium omnis, atque miserrimus si neque præsentia frui vitæ, neque futura. Atque hæc eius stultitia misera ac futura miseria ex eo proueniet, quia se Deo fa-

pietissimo felicissimoque crediderit. At enim sicut non potest quicquam ignis propinquatione fieri frigidissimum, ita non potest homo, quia solus hæret Deo sapientissimo beatissimoque, stultissimus ex hoc miserrimusque euadere, imò verò ob hoc ipsum fit beatissimus, quòd beatissimo se coniungit. Iungit se illi, temporalia contemnendo, æterna desiderando. Si contemnendis temporalibus fit beatus, non aliter talis efficitur, nisi æternarum rerum adeptione.

Præterea si Deus prima & summa est vita, animal quod ipsi proprius hæret, viuit diutius. Non autem viuimus diutius corpore. Si Deus summa sapientia est, homo tanto est sapientior cæteris animalibus, quanto Deo hæret propinquius. In hac autem appropinquatione se iudicat immortalē. Quia verò iudicium huiusmodi verum est, quod fit ab animo, tunc quando est aliis animalibus & hominibus sapientior, verum est esse animum sempiternum. Si prima veritas non potest fallere, non fallitur spes immortalitatis à prima immortalitate vsque adeo nobis inserta, vt inuitis reclamantibusque omnibus inter quæ versamur, spem eiusmodi semper retineamus. Si prima bonitas non est malefica, auiditas primi boni nobis ab illa infusa non priuat nos temporalibus bonis nisi vt tribuat sempiterna. Si opinio quæque eo verior est, quo melior, atque eo melior, quo meliores efficit opinantes, opinio immortalitatis omnium verissima est, quia præ cæteris optimos, excellentissimos homines, ideoque felicissimos efficit. Quis ignorat id in natura hominis verissimum esse, quod maximè ad perfectionem conducit humanam? Si intellectus natura amat Deum tanquam ipsum verum bonumque, ac Deus & amat intellectum, præsertim primum, tanquam ipsi cognatissimum, & redamat tanquam amantem, fit vt naturalis quædam inter eos sit amicitia. Amicitia finis est vitæ communio. Potest ergo Dei vita intellectui communicari, ea videlicet ratione qua amatur ab illo. Siquidem talis est amicitia finis, qualis est amicitia, atque contra. Amatur verò desideraturque perpetua. Quod inde confirmari videtur, quia cum boni proprium sit allicere ad se cuncta, seque cunctis communicare, necesse est infinitum bonum, qui Deus est, trahere communicareque infinitè. Ideo communicat cuique se ad votum, quia idem ipse Deus communicat, qui & traxit. Intellectus autem non minus secundum naturam exoptat perpetuam Dei vi-

tam, quàm certam illius intelligentiam. Denique si Deus beneficus, imò ipsa beneficentia est, officio gratitudinis carere non potest. Non potest autem gratus esse erga eum qui diuini cultus amore vitam amittit præsentem, nisi post hanc vitam.

*Religionem esse humano generi maximè omnium propriam & veridicam.*

## C A P V T IX.

**H**ominem esse brutis præstantiorem, opera eius euidētissimo testimonio sunt, quod ostendit xij. libro animalium Aristoteles. Quæramus igitur qua præcipuè dotes sit præstantissimus. Videtur sanè præstare artium & gubernationis ingenio, præsertim quia (vt aliàs declarauimus) homines variant artificia, vt pote qui ipsi artifices sint, non alterius artificis instrumenta. Bestiæ verò non variant, quia artificiosæ naturæ instrumenta sint potius quàm artem ipsæ possideant. Vtrum licet artis & gubernationis ingenio cæteris animalibus præcellamus, communis tamen hæc nobis est cum brutis industria. Oportet autem humanam speciem, postquam à brutis distincta est, distinctam aliquam propriamque habere perfectionem, cuius non sint bestiæ vllæ vllō modo participes. Num sermo hic erit? At nutu, clamore & cantu sermonem bestiæ imitantur. Num ratio?

Ratio certè, non omni tamen operatione rationis. Nam ratio quidem actiua habet & in bestiis vestigia quædam, per artium & gubernationis indicia. Ratio quoque rerum naturalium speculatrix habere videtur non nihil in bestiis imaginarium. Nam & ipsæ morbis suis ciborum remediumque quorundam electione medentur, & quasi futurarum tempestatum providæ, argumenta præferunt futurorum, mutantque loca, vt ventura temporum vitent discrimina, quamuis ad hoc ducantur potius natura quàm ducant. Quid ergo reliquum est, quod omnino solius sit hominis? Contemplatio diuinorum. Nullum enim bruta præ se ferunt religionis indicium, vt propria nobis sit mentis in Deum cæli regem erectio, sicut corporis cælum erectio propria. Cultusque diuinus ita fermè hominibus est naturalis, sicut equis hinnitus, canibusque latratus. At si quis curiosus affirmet bestias insuper nonnullas cælestia venerari, (quod ego minimè credo) respondebunt Platonici, huiusmodi bestias,



vel aliud quoduis tunc facere, cum cœlestia honorare videntur. Vel si forè honorant, tamē nescire quid agant. Vel si sciunt, eas quoque intelligentiæ immortalitatisque participes esse. Sed reuera, vt ad propositum reuertamur, perfectissimum animal ea proprietate maximè tum perfectione pollet, tum ab inferioribus discrepat, qua perfectissimis, id est, diuinis coniungitur. Rursus si homo animalium mortalium perfectissimus est, qua ratione est homo, ex ea præcipuè dote est omnium perfectissimus, quam inter hæc habet ipse propriam, animalibus non communem. Ea religio est. Per religionem igitur est perfectissimus. Si religio esset inanis, per eam rursus omnium foret imperfectissimus, quoniam per eam, vt paulò antè exponebamus, dementissimus foret atque miserrimus. Non potest autem per eandem sui partem ita contraria perpeti, vt per eam tum summè perfectus sit, tum summopere imperfectus. Est igitur religio vera. An ignoramus vaticinium illud quod à tota aliqua animalium specie fit, verum esse? Reptilia multa oriente Sole è terræ sinu erumpunt, aëris caligo protenditur. Cornicum plurima turba vesperè à certa aëris plaga peruolat, venti prænuntiantur. Communi quoque hominum vaticinio religio vera est.

Omnes namque semper vbique colunt Deum vitæ futuræ gratia. Verum est igitur vitam aliam fore, si modo perfectissima species animalium verissimum habet iudicium illud, quod sibi est maximè omnium naturale. Talem autem esse religionis assertionem appareret non solum ex eo quod solius hominis est, verum etiam ex eo quod omnes hominum opiniones, affectus, mores, excepta religione, mutantur. Cum religionem dico, instinctum ipsum omnibus Gentibus communem naturalemque intelligo, quo vbique & semper prouidentia quædam regina mundi cogitatur & colitur. Ad quam certè pietatem causis præcipuè tribus inducimur. Primò quidem naturali quadam (vt ita loquar) sagacitate, ab ipsamet prouidentia nobis infusa, deinde philosophicis rationibus ex ipso ædificij ordine architecti prouidentiam comprobantibus, postremò propheticis verbis, atque miraculis. Quod verò modo de Prophetâ dixi, operæpretium est deinceps argumentis quæ & Plato in Protagora & Auicenna adducit in Metaphysicis, confirmare. Homo (vt aiunt) est animal naturaliter sociabile, eget enim necessariò multis, quæ singuli comparare non possunt, cuncti verò in vnum congregati, munus

sibi vicissim operas subministrant. Præterea quod sociabile sit, indicat sermo quasi quidam alterius ad alterum humanæ mentis Interpres, quem natura homini non dedisset, nisi fuisset in cœtu victurus. Quamobrem naturalis est homini congregatio. Verum si absque lege concurrant, paulo post mutuis disgregabuntur iniuriis, disgregati verò, tum multorum defectu peribunt, tum velut inermes laniabuntur à feris. Vt ergo viuant, & bene viuant, congregari eos necesse est. Sed rursus vt in cœtu permaneant, omnino opus est lege. Ea inquam lege, cuius tanta sit authoritas, vt nemo vel violentia vel dolo præuaricari se posse aut debere confidat. Talis autem esse non potest, nisi legislator sit, existimeturque diuinus. Denique vt talis sit habeaturque, oportet eum manifestis quibusdam miraculis ad homines diuina prouidentia mitti. Quem sanè Prophetam, humani generis diuinum ducem Plato & Auicenna cognominant. Huc tendit Platonicum illud in libro de regno. Quemadmodum bestię nequeunt à bestia feliciter sine homine duci, ita neque homines ab homine sine Deo. Rursus in Protagora inquit, non potuisse homines simul viuere absque lege, neque legem ad hoc sufficientem accipere à Prometheo, id est, creata quadam prouidentia potuisse, sed Iouem ipsum omnium creatorem ad homines vnà cum lege misisse Mercurium, id est, Prophetam aliquem, & diuinæ voluntatis interpretem, & legis tam diuinæ quam humanæ latorem. Quod autem Deus Prophetas certis sæculis ad officium eiusmodi mittat, sic vnà cum Auicenna ostendere possumus. Si Deus humano corpori non solum in rebus omnino necessariis, sed etiam commodis, accuratissimè prouidet, velut in superciliis palpebrisque, & Plantarum concauitate, multo magis animo, totique hominum generi in rebus præcipuis, maximeque ad bonum nostrum necessariis prouidet, præsertim cum bonâ minora maiorum gratia sint. Ideoque si minora bona ab initio statim nobis adsunt, absque dubio adsunt etiam maiora, quæ adesse possunt, & causæ sunt vt minora non desint.

Quamobrem Deus circa legem diuinam, Prophetamque conditorem eius, ita prospicit, vt de cuius bonitate singula membra corporis iure conqueri nequeunt, multo minus animus ipse horum dominus, vniuersumue genus humanum vlla vnquam ratione conqueri possit. Probat insuper Auicenna animam quidem Prophetica lege virtuteque imbutam, à diuina fo-

lum providentiā mitti. Corpus autem ad animam Prophetæ suscipiendam idoneum disponi à Deo non tamen proximè, sed per animas cœlorum motrices, tanquam per ministros, ac etiam per cœlos quasi per instrumenta Dei, ita ut diuina lex, utpote incorporea, quamvis per cœlestia corpora effici nequeant, quodammodo possit indicari quibusdam à cœlo acceptis significari, quod etiam ex multis Plotini disputationibus comprobatur, in quibus ille demonstrat, quæ ad mentem nostram pertinent, à cœli corpore fieri nunquam posse, sed tamen significari. Siquidem mentes cœlorum motrices nostra hæc prævident, cogitationesque suas sapè cœlestibus quasi oculis nutibusque suis indicare videntur.

*Tres objectiones Lucretianorum, & solutiones. Prima.*

## C A P V T X.

**N**ON est credendum Lucretianis dicentibus, religionem non à iudicio naturali, sed à complexionis corruptione, consilij legibus, cœli impetu provenire. Profecto à complexionis corruptione idcirco eam proficisci non arbitror, quia non est in hominibus complexio deterior quam in bestiis, præsertim ad veritatis iudicium, bonique delectum. Homines autem soli ac sedulo religionibus occupantur. Sed neque etiam inter homines qui depravatam habent complexionem, hi sunt propriè qui colant Deum. Omnes enim corruptam non habent. Omnes tamen quodammodo Deum colunt, & coluere semper, neque tamen semper fuit hominum depravata natura, neque rudes tantum homines adorant, sed etiam ingeniosi & sapientes, quod ostenderunt Persarum Magi, Ægyptij Sacerdotes, Prophetæ Hebræi, Orphici, Pythagorici, Platonicique Philosophi, ac prisci Theologi Christianorum. Hi omnes sine controuersia mirabili sapientia pollebant, & incorporabili sanctitate. Porphyrius de voto disputans, inquit, præstantissimos quosque apud omnes Gentes sapientiæ studio votis incubuisse, quales apud Indos Brachmanæ, apud Persas Magi, similesque apud Græcos Chaldæosque fuerint. Hæc ille. Neque eos simulasse putandum, qui tum perpetuis operibus, tum vitæ periculo linguæ sanctimonia confirmant. Fuerunt & alij complurimi doctissimi Philosophi, Barbari, Græci atque Latini, qui & si non tanta excellere castimonia vitæ, quam illi quos antè comme-

morati, honestis tamen moribus duxerunt vitam, religionibusque favere non dubitauerunt. Fieri quidem potest, ut aliqua ex parte horum aliqui simulauerint, non tamen omnes credo simulavisse, neque eos qui simulauerunt, omnis fuisse religionis expertes. Difficile enim est naturam prorsus exuere. Impios quidem præ ceteris fuisse traditur Diagoram, Dicæarchum, Epicurum, Lucretium, qui etiam natura cogebantur interdum non nihil religionibus assentiri, quod eorum libri testantur. At sicut isti nonnulla impunè contra religiones in medium protulerunt, ita & alij multi Philosophi palam impietatis virus euomiscent, si plurimi fuissent impij. Aliud autem est hunc aut illum religionis cultum non admittère, quod faciunt multi, aliud omnem religionem funditus tollere, quod tentauerunt quàm paucissimi, & illi quidem suspicantes potius quàm prorsus asseverantes. Porro si qui ingeniosi viri ac docti in religione reperiantur ambigui, non est mirandum. Duas enim ætates Plato scribit esse valdè religiosas, pueritiam, & senectutem. Nam pueri cum lacte religionem sugunt, & in iis permanent quæ imbibuerunt quousque in adolescentia ratio excitetur, quæ sua natura singularum rerum causas rationesque requirit. Si in hac ætate aut ea studia capestant, aut in eos sermones incidunt, quibus diligenter rerum causa perquirantur, incipiunt quasi nihil velle asseverare, nisi cuius ipsi rationem perspexerint. Tunc primum religionem magna ex parte post tergum abiiciunt, nisi fortè legibus, seniorumque consilio se committant, quia diuinorum occultissimæ rationes longo vix tandem tempore, exquisitissima diligentia, purgata mente perspiciuntur. Adolescentes illi rationes huiusmodi nondum attingunt, & quia nihil fermè asserunt cuius non videant rationem, si proprio confidant iudicio, religionem quodammodo negligunt. Nonnulli in hac opinione constituti. Aristippicis voluptatibus sese dedunt, tandem nihil amplius de religione nisi tanquam de anilibus fabulis cogitantes. Alij verò Pythagoreo ritu purgant mentem à sensibus per Morales, Physicas, Mathematicas, Metaphysicas disciplinas, ne tãquam superiores illi lippos adhuc oculos in diuinum Solem subito dirigentes, caligare cogamur, sed grãdatim progredientes, lumen diuinum in Moralibus primò tanquam in terra, secundo in Physicis, tanquam in aqua, tertio in Mathematicis, tanquam in Luna, quartò Metaphysicis, tanquam in Sole perspicuè salubriterque perspiciant.

Hos appellat Orpheus Musarum legitimos Sacerdotes, qui tandem in ætate maturiori de religione sentiunt multò melius, quemadmodum legimus apud Platonem in Epistola ad regem Dionysium in Phædro, in primo de Republica, in decimo Legum. Monet autem iuvenes Plato ne temerè de Diuinis sententiam ferant, sed credant legibus, donec ætas ipsa doceat, vel per eos disciplinarum gradus quos narrauimus, vel per experientiam, vel per quandam animæ à corpore separationem, quàm moderata senectus adducit, vt anima in ea ætate res à corporibus separatas, quasi è proximo videns clarius discernat quàm consueuerit. Quapropter cum Plato Dionysio adhuc inueni diuina quædam mysteria sub quodam velamine tradidisset, adiunxit primùm, vt ea diligenter examinaret, nullum enim hoc studium beatius esse posse. Deinde caueret ne in hominum imperitorum aures hæc exciderent, quia nulla sint apud vulgus quidem magis ridicula, apud viros autem bono ingenio præditos magis mirabilia & diuina.

Addit insuper, diuina mysteria, postquam frequentius, imò semper examinata sunt, vix tandem multo labore tanquam aurum purgari atque lucere, vt etiam multi, & illi quidem acutissimi, eruditissimique, cum talia in iuuentute, atque etiam in trigésimo ætatis anno audientes tanquam incredibilia reprobauerint, postea tamen siue maturioris ætatis, siue diligentioris examinis beneficio, siue potius diuina ( vt alibi dicit ) reuelatione, talis tanquam omnium probabilissima manifestissimaque concesserint, contraria verò tanquam falsa damnauerint. Hæc Plato. Accedit ad hæc, quòd multi in quauis arte excellentes viri, vel Melancholici sunt, quales Heraclitus, Aristoteles, Chrysippus fuerunt, vel fiunt, quales Democritus, Zeno Citricus, Auempaces Arabs, Auerrois euaserunt. Hic humor frigidus est, siccus & ater, quæ quidem tres qualitates tribus illis contrariæ sunt in quibus vitæ consistit vigor, calori videlicet, & humori, spirituique perlucido. Talis itaque humor, tanquam vitæ contrarius aufert spem vitalem, & animo suspicionem iniicit contravitam, quo fit vt de immortalitate animi nonnunquam ambigant & diffidant. Quod sibi contigisse scribit Auempaces. Non ideo diffidunt, quia sunt excellentes ingenio vel doctrina, sed quia ob humorem terreum suspiciosi & timidi. Nam rudes hebetesque homunculi nonnunquam

ipsi quoque diffidunt, si eodem illo præmantur humore. Et viri egregij sæpenumero sperant quàm optimè, si humore eiusmodi non vexentur, quanquam qui vexantur ab incunte ætate, si tamen non peruersè omnino fuerint educati, inanes suspensiones abiciunt facillè, & naturalem sequuntur religionis instinctum. Tanta est ipsius naturæ vis, tanta stabilitas. Quod Pythagoras, Socrates, Plato & Varro, Apolloniusque Tyaneus sunt præ cæteris assecuti. Quapropter suspensiones illæ nihil habent momenti ad animorum mortem significandam, cum neque ab ingenio, neque à sapientia, sed à morbo proficiscantur. Quinetiam illi sæpè sunt acutiores, in quorum ortu Saturnus & Mercurius possunt quàm plurimum. Nam hæ stellæ inuitant ad contemplandum, quoniam ad interiora spiritus cōtrahunt. Hi Planetæ si directi sunt, optimeque dispositi, ingenium augent, religionem non minuunt. Sin retrogradi, neque optimè dispositi, vndique hominem reddunt formidolosum admodum atque suspiciosum ob terream ipsorum qualitatem non sufficienter aspectu aliorum syderum temperatam. quo fit vt non in religione solum, sed in rebus etiam aliis ambigat & diffidat. Cæterum meminisse oportet, eam opinionem siue affectionem non satis habere fidei, quæ sequitur aut ingenium melancholicum, ægrum, & quodammodo vitæ contrarium, aut indecentem & noxiam positionem syderum, quæ etiam complexionem peruertit humanam, ac defectum affert secum non modo quantum spectat ad vitæ fiduciam, sed etiam quantum ad humanarum rerum gubernationem. Vnde impij homines plurimum vel ignauissimi sunt, qualis fuisse dicitur Epicurus, vel flagitiosi, qualis Aristippus, vel insani, qualis sectator eorum Lucretius, qui dum insania propter atram bilem concitaretur, animam suam primò conatus est verbis perdere in libro de natura rerum tertio, deinde corpus suum gladio perdidit. Ergo sicut de vini sapore non est ægotanti credendum, sed bene valenti, ita de fine humanæ vitæ credendum est humano sanoque ingenio potius quàm insano. Sanam verò & naturalem hominis complexionem appello sāguineam, ac maximè temperatam. Sanguinea aërea est, in calore & humore vitali consistens. Temperata coelo est similis, neque veritatis iudicium inturbat.

Tales sunt plurimum humanæ complexionem ad sanum ingenium prudentiamque accommodatæ, quæ religionem no-

his non afferunt quidem ( est enim hæc menti infusa diuinitus cum diuinorum gratia negligi cætera iubeat ) sed eam nequam impediunt, neque vanas animo suspiciones iniiciunt. Quod autem in pluribus perfectioribusque est, naturale censetur. Quod in paucissimis & ægrotantibus, monstrum. At verò naturale quidem veridicum, monstrum verò fallax esse solet. Iudicium autem religioni fauens reperitur in pluribus grauioribusque hominibus, in paucissimis verò leuissimisque contrarium, quorum exemplo alij quoque nonnunquam inficiuntur. Atque in illis paucissimis non est hoc iudicium rationis, sed morbus animi, formidolosaque suspicio à deprauata complexione corporis proficiscens. Quod ex eo patet, quòd sæpè homines huiusmodi rationes quidem habent animi æternitati fauentes, suspicantur tamen tanquam ij, quorum ratio aut iudicat vinum non esse bibendum, pulmones nihilominus sitiunt, aut iudicat nihil esse in via quod noceat, horret tamen sensus in tenebris. Neque solum contractu vel à parentibus vel à syderibus iniqua complexio, sed ysu inducta qualitas, vt significauimus ab initio, à religione humanum genus abducit. Solent enim homines in quauis disciplina nimium curiosi, propter nimiam cerebri agitationem siccato cerebro quodammodo insanire, quod in Theæteto scribit Plato contra illos qui nihil in rebus stare vnquam dicebant, quos, inquit, vertigine affectos ob frequentem reuolutionem, putasse omnia verti, cum verterentur ipsi. Itaque non mirum est, si curiosi artium viri nonnunquam & in religione & in rebus aliis manifestè delirant, quorum insaniam declarant tum mores leuissimi, tum ridiculæ nimium in rebus multis opiniones, opinionumque ipsarum contrarietates. Non igitur à corruptione complexionis religio, sed impietas nascitur. Neque solum à deprauata complexione, sed & à deprauatis moribus impietatem nasci Plato in Epistolis ad Syracusanos asserit dicens, credendum semper esse priscis sacrisque oraculis asserentibus animam hominis esse immortalem, iudicesque habere, ac poenas pati maximas cum à corpore fuerit separata.

Quapropter minus malum existimandum esse, perpeti grauissimas iniurias, quàm inferre. Quæ quidem auarus homo mentisque inops, aut non audiat, aut deridere soleat, voluptatibusque deditus, quasi cæcus non cernat quàm maximum semper malum videntem se impiè necessariò

sequatur, & post mortem quàm misera demigratio ipsum maneat. Hæc ibi omnia. Similia quoque in Gorgia, & in decime de Republica & in Legibus, vbi addit hanc de anima sententiam necessariis adamantinisque rationibus esse probatam. Quod vique adeò Cleombroto persuasum fuit, vt se hac vita alterius amore priuauerit. Demosthenes quoque ait, malle honestè mori, quam turpiter viuere, postquam Platonem Zenocratemque de animorum immortalitate differentes audisset. Neque silentio prætereundum puto maximam impietatis causam à Platonicis in genus infirmorum dæmonum referri solere, qui tacita quadam persuasione, vel propter ambitionem in falsam, vel propter inuidiam in nullam religionem pro viribus nos impellunt.

#### *Secunda obiectio & solutio.*

**C**onfutauius obiectionem primam Lucretianorum, qua dicebatur Dei cultum humanæ naturæ deprauatione contingere. Vbi apparuit Lucretianos esse potius deprauatos, qui naturam hominum ex eo pessimam iudicant, quod Deo optimo iungitur. Sed nunquid quod secundo afferunt loco, diuinorum veneratio à consiliis hominum nascitur, & ciuilibus institutis? Nequaquam. Dici enim non potest quàm citò hominum inuenta mutantur, etiam vera, ne dum falsa & simulata. Omnia hominum instituta breui tempore in contraria instituta mutantur. Contrariæ quoque eodem in tempore leges diuersis sunt Gentibus, & quæ aliis turpia, aliis honesta censentur. Quid autem religione antiquius? Quidue amplius? Neque hanc inuenerunt conditores legum ad populos coercendos. Nam ante ciuitates & domos vixit in orbe religio, & homines sparsi atque syluestres Deum coluerunt, & iidem ipsi latrores legum numina timuerunt. quod quidem in Protagora Plato confirmat dicens: homines etiam antequam congregarentur, velloquerentur, vel artes aliquas exercerent, statim ab initio ob naturalem cognationem Deum adorauisse, arasque & sacra fecisse. Proinde tam durum religionis iugum, tot bonis vitæ contrarium, quandoque homines alicubi reiecessent, si ficta esset, neque veritatis stabilitate constaret. At inquit fortè Protagoras non esse naturalem religionem, sed videri, quoniam à teneris vnguiculis eam combibimus. Nos ita Protagoræ respondebimus, cum ab infantia loqui & bibere didicisse, nihilominus tamen naturalem esse sermo-

nem atque potum. Vbiq̃ue & semper loquantur homines, atque bibunt, quoniam est naturale Sed aliis temporibus atque locis alio ordine loquantur, & bibunt, quoniam operationis ordo opinione constat potius quàm natura. Similiter apud omnes Gentes omnibus sæculis adoratur Deus, quia naturale est, quamvis non iisdem sacris ac modis Sermo quia naturalis est, suum attingit finem, id est, voluntatem alterius alteri declarare. Potus quoque suum, id est, corporis humorem intaurare. Religio cur suum non nanciscatur, non vi deo. Suus finis est frui Deo, suum votum, perpetuò frui.

*Tertia obiectio & solutio.*

**A**N feruntur homines ad religionem syderi us quod tertio obiciunt impij Minime Nempè humoribus corporum sydera suffragantur Religio est inimica corporibus. Neque altius desiderium infundere cœlum potest, quàm sphærarum cœlestium, quas etiam spernit homo religiosus. Adde quòd religio fatum damnat, & asserit libertatem. Quoniam igitur pacto id ipsum vt fato repugnet, habebit à fatis? Præterea coniunctio quædam Planetarum fertilitatem præstat, opposita verò penuriam Hæc pestem, illa salubritatem, bellum similiter, atque pacem. Videmus dona cœlorum quā cito in contraria permutentur. Itaque si Deum colere cogit certa quædam positio syderum, breui positio contraria è memoria hominum diuinos delebit honores. Nusquam tamen & nunquam religionis facta est intermissio, licet aliàs, & alibi aliter Deus sit honoratus. Quæ etiam varietas humanarum mentium est secunda consilia, quæ astris nequaquam subiiciuntur. Humana quippè mens natura sua tanquam diuina ad Deum sentiendum colendumque ducitur & timendum, sicut natura sua ad amandum bonum, malumque vitandum. Verumtamen per liberam suæ consultationis electionem, Dei colendi variatur, sicut etiam ad bonum variis graditur callibus pro arbitrio. Superiori disputatione colligitur, communem ipsam omnium Gentium ad Deum vnum religionem, esse humanæ speciei admodum naturalem, virtutemque hominis propriam, ideoque excellentissimam. Duo quidem excellentissimi sunt actus hominum, illi scilicet qui in excellentissima parte animæ sunt, & circa obiectum versantur excellentissimum. Tales sunt in mente nostra Dei cognitio, atque amor. In hac vita humanus

amor in Deum humanæ præstat cognitioni, quia Deum nemo verè cognoscit. Verè autem amant illi Deum quoquo modo cognitum, qui spernunt omnia propter ipsum. Rursus sicut deterius est odisse Deum quàm ignorare, sic melius amare quàm nosse. Adde quòd perscrutando Deum, longissimo tempore minimum quid proficimus, amando breuissimo plurimum. Ob id enim citius propinquiusque & firmitus amor quam cognitio mentem cum diuinitate coniungit, quia vis cognitionis in discretionem consistit magis, amoris autem magis in vnione. Quinetiam gratius ipsi Deo est amari quàm prospici. Nihil enim Deo tribuimus intuendo, amando verò tribuimus quicquid & sumus & possidemus. Amantibus ergo Deus seipsum retribuit potius quam scrutantibus. Deinde cognitione Dei malè possumus vtī, scilicet ad superbiam, amore Dei malè vtī non possumus. Et amando Deum longè maiorem quàm perscrutando percipimus voluptatem, & meliores amando efficimur quàm inquirendo. Imò sicut non qui videt bonum, sed qui vult, fit bonus, ita animus non ex eo quòd Deum considerat sed ex eo quòd amat, fit diuinus, quemadmodum materia, non quia lucem ab igne capiat, sed quia calorem ignis euadit. Hinc illud Porphyrii, animus Deum inquirendo purus efficitur, Deum imitando fit Deus. Quod quidem ab ipso Platone acceptum est, dicente diuinum lumen non inquisitione paulatim à nobis acquiri, sed perfecta vitæ coniunctione subito tandem diuinitus in nobis accendi.

Præterea cognoscendo Deum, eius amplitudinem contrahimus ad mentis nostræ conceptum, amando verò mentem amplificamus ad latitudinem diuinæ bonitatis immensam. Illic nos in Deum deiicimus, hic attollimus nos in Deum. Noscimus enim quantum ipsi capimus, amamus autem & quantum intuemur, & quantum ultra nostrum intuitum vaticinamur bonitatis diuinæ reliquum superesse. Neque est amor humana cognitione contentus Ea siquidem creata est, atque finita. Voluntas in solo primo & immenso quiescit bono. Quoniam verò in hoc ipso amore tota consistit religio, nihil habent homines (vt Plato in Epinomide testatur) religione diuinius. Quæ tanto est à falso alienior quàm cætera hominum studia, quanto propinquius Deo summæ veritati nos copulat. Quare præfugium eius verius est quàm facultatum aliarum sententiæ. Eius verò præfugium bonis digna præmia pollicetur, malis minatur




supplicia. Hominis sanctissimi probitati primum dignum debetur. Probitas per summum habitum confirmata, indelebile bonum est, ac si mille annorum millia vixerit, semper similiter aget. Præmium igitur ea dignum nullum est nisi indelebile & æternum, præsertim cum illud sit conuenientissimum præmium sanctitatis, cuius gratia sanctitas agit singula, quodve eius appetitum potest implere. Tale est illud in quo est tota ratio boni. Est igitur eius præmium, immensi boni sempiterna possessio. Viuet igitur semper religiosus animus, vt dignum suscipiat præmium. Viuet semper & impius, vt luat supplicia impietatis, qui infinite peccat, quoties pro finitis commodis Dei obliuiscitur infiniti, & malignum habitum contrahit indelebilem, per quem mille annorum millia sit peccaturus si vixerit, postquam statuit semel tamdiu peccare, quamdiu viuet. Qui tamdiu iam deliquit diuinæ iustitiæ, cui futura sæcula præsentia sunt, quamdiu est, si vixerit, peccaturus, infinitum huic debetur supplicium iam infinite peccanti. Adde quod si veræ virtutis præmium est æternum (Deum enim à quo tanquam principio pender, respicit tanquam finem) sequitur vt vitij quod deficit ab æterno tam virtutis præmio quàm vitæ principio, supplicium sit sempiternum. Nullum tale est in hoc tempore vitæ breuissimo, erit igitur in futuro. Hoc pacto aduersa quæ in hac vita bonis, & prospera quæ malis contingunt, compensanda videntur, ne & pietas boni damno sit, & vt in Phedone legitur, impietas malis sit lucro. Bonum quidem prodesse oportet, obesse malum. Obest in hac vita pietas, quæ non solum præsentia bona contemnere, verumetiam Dei honestique gratia labores & mortem subire compellit. Contrà prodest impietas quamplurimum. Igitur ne desit iustitiæ locus, alibi est ferenda sententia. Neque putandum est hanc iustitiæ partem quæ humana respicit, ad Deum non pertinere, ad quem pertinet mundi totius administratio, in quo si singula intelligendo amandoque facit, vt Plato vult, sequitur vt faciendo intelligat ametque singulas, atque in toto curando, partes (quibus non curatis, non curatur totum) non negligat. Hæc in legibus Plato. Mundi verò pars non mediocris est hominum species, administratrix & ipsa iustitiæ. Si ergo diuina iustitia, vt Orphici canunt hymni, elementa suis quæque distribuit locis, si rebus quibusque vel minimis pro sua cuiusque natura dispertit munuscula, cur non hominibus etiam pro meritis loca, præmia, suppliciaque dispertiat? Deus

frequenter vel bonos immunes, vel malos relinquit impunes, vt his iudiciis nobis ostendat vitam alteram superesse, in qua iustitia quæ falli non potest, pro meritis impleatur. Nonnunquam verò scelera, præcipue grauissima, in hac etiam vita puniunt, vt ob hoc eius prouidentiam cognoscamus. Mitto in præsentia multa prouidentia diuinæ exempla. Philo Iudæus Platoniceus, in libro de Prouidentia scribit, legem apud veteres extitisse, sacrilegos vel cremari, vel præcipitari, vel suffocari. Cumque Philomelus & Onomarchus & Phaylus templum spoliauissent, paucis post diebus absque iudicum opera diuina quadam forte eos in tria hæc supplicia incidisse. Præcipit autem in legibus Plato, ne ob id vnquam de diuina prouidentia dubitemus, quod iniusti sæpe homines hinc impunes videantur abire, quippè cum nesciamus qua ratione, & vbi, prout ordini vniuersi conducit, singula singulis tependantur. Rursus in vltimo de Repub. probat animum per virtutem Deo similem, ideoque amicum euadere, atque idcirco ita à Deo curari, vt quæcunque contingunt, in bonum denique perducantur, & siue in paupertate, siue in morbis, siue in alia quadam calamitate sit constitutus, singula vel in hac vita vel in futura aliquando conducant ad bonum. Neque ob hoc dicenda est bonitas diuina malefica, quod committi peccata permittit. punitq; commissa. Profectò in regno Dei gradum suum obtinet natura rationalis. Huic motus conuenit liber. Motui tali datum est vt progredi possit in melius, & naturæ bono, bonum insuper voluntatis actionis adeptionisque adiungere, ita vt natura huiusmodi non modò ab alio facta sit bona tanquam patiens, verumetiam seipsam efficiat bonam tanquam agens. Datum insuper est tali motui, vt possit transgredi in deterius non quod naturam propriam exuat, sed quod induat alienam, & illam quidem inferiorem, hanc infectionem supplicium sequitur vel noxium, vel purgatorium. Sequitur, inquam, necessaria quadam diuinaque lege, peccantem intrinsecus ad similia perducende. Et vt in decimo legum inquit Plato, motionis principium in anima est, quo se pro arbitrio talem efficit aut talem. Postquam verò talis euaserit, mox non tam arbitrio quàm fatali quadam Dei lege in talem conditionem locumque transfertur. Addit quasi diuino Davidis ore siue ad mundi centrum penetraveris, siue ad superficiem peruolaueris, diuinam legem euitare non poteris. Huc illud in decimo de Republica tendit, cum neque latere neque effugere diuinos

oculos manusque possis, caue omnino ne pecces, id est, ne Deo dissimilior vnquam euadas. Odit enim animas ab ipsius similitudine longè degenerantes. Quinimò si & Gygis anulum, & galeam nactus fueris infernalem, iniustitiam procul effugito. Sed redeamus ad leges. Inquit ibidem, mundum partim bonorum, partim malorum esse plenum, Deumque nobis deos dæmonesque quosdam quasi Pastores custodiendis ouibus præfecisse, quorum prouidentia & deuitemus mala, consequamur & bona. Addit, eos qui cum multa iniuste rapuerint, muneribus se deos placare confidunt, perinde errare, ac si qui dilaniantes oues, putent se membris quibusdam ouis pastori redditis, pastorem sibi conciliare. Tandem ubique Plato reperit, & arbitrio nos peccare, & post peccatum necessario pati. Sed iam ad institutum ordinem redeamus. Quid ergo? Si Deus & permittit & punit, in permittendo mirabilis humani generis excellentia lucet, in puniendo Dei potestas, bonitasque immensa. Si peccare permittitur animus, quis non videat hominem sui iuris

esse, ac dominum, suoque arbitrio alias aliter agere? Si delicta punit Deus, in ipso delictorum malo iustitiæ peragit bonum, quæ hunc non haberet locum, nisi delinquere-tur, ac deesse videretur quodammodo pars aliqua virtutis, vt ita dixerim, & iustitiæ, & regno Dei, cuius hic præfulget potestas & bonitas infinita, dum contra mali naturam facit ex malis bona, vt tota natura sit mirabiliter ordinata, in qua tanto est amplitudo boni, vt in bonis splendeat atque malis, & quantum valeat, in ambobus experia-tur. Tanta quoque ordinis obseruantia, vt animus qui peccando digredi videtur ab ordine, & in ipso liberi motus ordine gradiatur, etiam dum digreditur, & in ipsum iustitiæ ordinem statim patiando regredia-tur, dum propter delinquendi habitum talia patitur qualia habitui congruunt. Hæc habui quæ de immortalitate quantum ad signorum testimonia pertinet dicerem, oportet autem dubitationes deinceps quæ cogunt immortalitati diffidere, diligentissimè soluere,



# THEOLOGIÆ PLATONICÆ,

DE IMMORTALITATE ANIMORVM,  
EODEM FICINO AVTHORE,

(:.) LIBER XV. (:.)

*Sequuntur quæstiones quinque de Anima. Prima, verum sit vnus cunctorum hominum intellectus. Quod non.*

(:.) CAPVT PRIMVM. (:.)



Ultæ iam quæ æfferri solent aduersus animam, superioribus disputationibus confutauimus. Quinque restant (vt arbitror) dubia declaranda. Primum est, de quo Peripateticus Auerrois dubitauit, ne fortè vna sit mens hominum omnium & æterna. Multæ autem animæ atque mortales, itavt

nihil profit mentis ipsius æternitas humanis animis perinuris. Secundum, de quo dubitant nonnulli, cur animi, sic diuini sunt, terrenis corporibus tam infimis sint coniuncti. Tertium, quam ob causam in his adeò perturbentur. Quartum, cur inuiti discedant. Quintum, qualis animæ status sit antequam ad corpus accedat, qualis etiam post discessum. Auerrois His-

panus patria, lingua Arabs, Aristotelis doctrinæ deditus, Græcæ linguæ ignarus, Aristotelicos libros in linguam barbaram è Græca peruersos potius quàm conuersos legisse traditur, vt non mirum sit si in quibusdam rebus reconditis, breuissimi scriptoris mens cum latuerit, quod illi contigisse Platonius Plæthontestatur, & peritissimi quique Græcorum. Et quod maximum est, aduersus Auerroëm Græca Aristotelis verba reclamant. Ait ipse Plæthon Aristotelem sine controuersia censuisse hominum animos esse multos & sempiternos. Subiungit, nolle se Aristotelis verba peruertere, & si Aristoteles Platonis cæterorumque Philosophorum verba peruertit. Hæc ille. Videtur tamen Alexander Aphrodiseus Aristotelis sensum de anima peruertisse, vbi ait, Aristotelem mortalem animum censuisse. Themistius æquius Aristotelem declarauit, dicens ab eo mentem quidem agentem vnicam, capacem verò multiplicem existimari, & vtramque perpetuam. Quid verò ipse sentiat Alexander, in quæstionibus naturalibus declarat, vbi inquit, Medicina etsi scientia est, tamen in opere suo ars apparet, quemadmodum anima, etsi est immortalis, tamen in corpus mortale demersa videtur esse mortalis. Atque iterum ait: Noluisse mundi opificem diuinos cœlestesque hominum animos corporibus terrenis absque congruo quodam medio colligare. Medium verò eiusmodi, spiritum vehiculumque Platoniorum more cognominat. Proculus verò non modo Platonicos, sed etiam Aristotelem affirmat immortalem animam posuisse. Et eadem ratione posuisse Themistius asserit, qua & Plato posuerat. Atque postquam in libro de Anima iij. probauit vtrumque intellectum, scilicet agentem atque capacem, esse perpetuum, addidisse solum hunc, scilicet ex vtroque mixtum, esse talem, passiuam verò rationem, id est phantasiam, minimè. Quam ob causam conclusisse, nos post obitum humanarum rerum non reminisci, quoniam harum recordatio per conuersionem ad phantasmata, ac propter affectum ad corporea fieri solet. Quod ergo, inquit, non reminiscimur, ideo Themistius vult esse additum, vt indicaret animos post obitum vivere, pluresque animos, sed nihil esse mirum si corporaliū non reminiscantur, quod si perire animos putauisset, nulla fuisset ratio assignanda, ob quam minimè recordentur. Sed ad Auerroem redeamus.

*Narratio opinionis Auerrois.*

**A**uerrois cum apud Aristotelem sepe legeret intellectum proculdubio nihil habere naturæ corporalis mortalisque admixtum, sic accepit, vt inde tria concluderet. Primum, intellectum non esse corpus, id est, non componi ex materia atque forma. Secundum, non esse qualitatem aliquam cum corpore diuisibilem, aut villo modo à corpore dependentem. Tertium, non esse formam talem, vt queat corpus perficere, viuificare, & regere, atque ita hæere corpori, vt ex materia & intellectus substantia vnum fiat compositum, cuius esse sit vnum. Primum & secundum damus Auerrois, tertium, si Peripateticos veteres sequimur, nullo modo concedimus. Negat substantiam intellectus esse posse formam perfectricem corporis, atque viuificum. Prima illius argumentatio huiusmodi est. Si intellectus esset talis corporis actus, ex eo & corpore vnum nasceretur compositum, & vnum esse compositi. Non potest autem ex eius congressu cum corpore vnum fieri, quin ipse eundem corporis particeps. Hanc participationem non admittit mens, quam esse ostendit ratio à corporibus absolutam. Secunda ratio. Si mens forma corporis esset, eodem pacto quæque susciperet, quo & materia suscipit corporalis. Quod enim est corporis forma, nihil absque sua materia suscipit. Materia verò quicquid suscipit, diuiduo suscipit modo, vnde formæ rerum in ea diuise temporales, particulares eadunt. Tales quoque caperet intellectus, nunquam igitur per suas formas vniuersalem naturam aliquam comprehenderet. Tertia ratio. Materia formas quas possidet, non agnoscit. Ita mens, si iuncta materiæ per eius consortium eodem pacto caperet, quo materia, nihil prorsus agnosceret. Quarta ratio. Impossibile est in corpore infinitam vlla ratione esse virtutem. Mentis autem virtus est quodammodo infinita. Hinc effici vult, vt mens nullum habeat commercium cum materia. Cum verò multæ sint in natura species mentis, vnam quandam eius speciem vult esse humanam mentem, illam scilicet, quæ rerum ordinem speculatur in nobis, quandoquidem in cunctis hominibus idem est secundum speciem modus intelligendi, eademque anima specie, per quam vna secundum speciem est in cunctis hominibus vita, eademque figura. Quoniam verò vna est humana mens specie, vna quoque sit numero

oportet, id est, vnica & singularis, non diuisa per singulos. Nam forma quæ in se vna est specie, non secatur in multas nisi adiectione materiæ. At quomodo mens humana vna in se existens diuidetur in plures, cum nullius sit materiæ particeps. Præterea si alius esset in me intellectus, in te alius, oporteret speciem illam quæ est intelligendæ rei similitudo, aliam secundum numerum in me esse, in te aliam, secundum speciem verò eandem. Cum enim rerum intelligendarum species in mente sint quasi subiecto, oportet in aliis mentibus alias esse species & distinctas. Distinctas, inquam, numero, sicut mentes distinctæ sunt numero. Species autem aut formæ quæ multæ sunt numero, vnum specie, formæ sunt particulares, quæ ad intelligentiam conferre non possunt, quoniam vniuersale oportet esse quod sit verè intelligendum. Accedit, quòd quando alius docet alium, præceptor scientiam suam in discipulum videtur transfundere. Aut igitur eandem omnino quam habebat ipse, tradit discipulo, aut aliam numero, specie verò eandem. Si eandem specie tradit, sed numero aliam, eodem pacto scientiam generabit quo suum opus generare natura solet. Nempè quod per naturam agit, formam suam gignit in alio conuenientem plurimum specie, numero differentem. Hoc autem pertinet ad ea quæ congruunt inuicem in materia. Mens verò tum docentis, tum discantis est supra materiam, atque ipsa scientia non est qualitas efficax, sicut calor atque similia. Restat itaque vt eandem prorsus scientiam numero quam possidet ipse docendo, communicet & discipulo, quod fieri nequit vnquam, nisi sit in vtrisque vnicus intellectus, ne eadem scientiæ qualitas de subiecto alio in aliud transeat, neve magister docendo, scientiam cogatur amittere. Adde, quod in nostris mentibus, si diuersæ numero, & conuenientes specie fuerint, notiones cognitarum rerum specie conuenirent, differrent numero. Quæ verò præter diuersitatem suam in specie aliqua congruunt, profecto in communi quadam congruunt notione. Communem huiusmodi notionem tam meus intellectus, quàm tuus videbit, ad quam diuersas illas colliget notiones. Sic vtrique huiusmodi notionem concipiemus, ego vnā, tu alterā, numero quoque differentes, specie congruas. Ideo rursus ad communem aliam redigemus. Atque ita in infinitum. Est autem absurdum in rebus ordinatis infinitum progressum inducere. In speciebus verò rerum ordinem esse necessarium est. His ra-

tionibus concludit Auerrois, humanam mentem, quia sine materia est, vnica esse ac fuisse semper, & fore, esse verò hanc omnium mentium infimam. Et sicut superioribus orbibus singulis singulas mentes attribuit, ita orbi huic inferiori mentem vnā, quæ non huius hominis propriè, vel illius, vel humanæ speciei mens appelletur, vt speciei vnice sit vnicus intellectus, in hoc orbe inferiori (vt nonnulli ipsum interpretantur) totus vbique. Cōstare quippe hunc hominem quem videmus, existimat ex corpore hoc, & anima sensitua, vt nominat ipse, intellectiua verò nequaquā. Sed hanc animam sensitiuam esse omnium talium animarum perfectissimā, à brutis specie differentem. Tot esse animas, quot hominum corpora oriri & occidere cum corporibus. Supremam huius animæ vim appellat virtutem cogitatricem, quam Græci nominant phantasiā. Addit animas bestiarum habere estimatricem vim aliquam, per quam naturali instinctu, quod bonum sibi vel malum sit, iudicent subito, ac prosequantur aut fugiant. Nostram verò animam habere vim illam cogitatricem, quæ non naturæ ductu feratur, sed ratione perquirat, consilio quodam deliberet, eligat, vt consuluit, nihil tamen sentiat vniuersale, sed discurrat solum per singula. Hanc ideo vocat rationem particularem, intellectum verò rationem vniuersalem, rationem hanc particularem locat in media cerebri particula inter imaginationem atque memoriam. Opinatur enim in prima particula sensum esse communem, qui operationes quinque sensuum in se colligat. In secunda imaginationem earum imaginum conseruatricem, quas communis sensus collegerat. In tertia cogitatricem virtutem iudicem eorum quæ seruauit imaginatio. In quarta memoriam, custodem iudiciorum quæ cogitatrix potentia protulit. Igitur cogitatrix virtus mediæ partis regina quæ cæteris rebus inferioribus est proxima menti, ad eò vt mens illi adsit vbique, & intelligentiam suam per eius expleat adminiculum, dum simulachra rerum in cogitatrice virtute lucentia, mentem ad intelligendum mouent. Atque hæc sola est hominis cum mente communio, non quia intellectus sit pars aut forma viuifica hominis huius qui ex corpore & anima cogitatrice componitur.

Separatur enim intellectus ab homine & in essentia, & in essendo. Sed quia præsens est vbique intellectus hominis huius cogitationi, atque ex hac particulari cogitatione ille vniuersalem haurit speciem, occa-

scienem prabet homo intellectui ad speculandum, quæadmodum coloratum lumen oculo ad videndum Neque ex homine hoc & mente conficitur vnum esse, sed operatio vna contingit, vna scilicet intellectio, quæ tamen non in homine est vllò modo, sed in mente sola, in mente, inquam, ab hominis cogitatione pulsata. Neque quicquam ex illa transit in hominem, sed tota completur in mente. Non intelligit homo per mentem aliquid, sed in homine mens intelligit. Atque in ipsa mente artium scientiarumque sunt habitus. Cogitatrix anima vnitur puero à prima eius origine, mens verò diu postea, cum simulachra in cogitatione sunt adeò pura, vt moueant intellectum. Affirmant Auerroici duas esse non vires solummodo, sed substantias ex quibus cõponitur intellectus. Sanè vim agentem esse substantiam vnã, capacem, vim substantiam alteram. Et illa natura tua lucidam formatricemque esse Hanc obscuram penitus atque formabilem, harum æterna copula vnã constare animam secundum esse, quemadmodum ex materia & forma vnum secundum esse fit in natura compositum. Illam intellectum vocant agentem, hanc intellectum formabilem & capacem. Censent intellectum agentem, quia fit actus per se existens, per se intelligere seipsum semper, ita vt respiciens essentiam suam se videat, ac per se mentes quoque supernas. Intellectione huiusmodi esse ipsam eius essentiam Quoniam verò essentia eius semper est intellectui capaci coniuncta, sequi putant vt per hanc eandem intellectualem essentiam intellectus capax intelligat semper agentem intellectum, cuius illa et tam intellectio est, quàm essentia. Intelligat quinetiam mentes superiores. Hanc intellectionem esse in intellectu vniuerso, siue anima actum vnum stabilem & æternum. Esse quoque in ipsa parte eius formabili intelligentiam alteram, sempiternam quidem, sed variam, temporalem, atque multiplicem, quam mutatur à nobis. Et quia hæret propius agenti intellectui quàm phantasie, ac propter cõiunctionem cum temporali phantasia temporalem sortitur cognitionem, patere putant id quod diximus paulò ante, vt scilicet propter coniunctionem cum æterno illo intellectu, æternam intelligentiam habeat, tanto altera clariorem, quanto intellectu agenti familiarior est quàm phantasie. In nobis verò dubiam mutabilemque scientiam singularem aucupari existimant, ita vt viuentem Pythagoræ per simulachra rerum in Pythagoræ cogitatione lucentia, scientiam illam

collegerit Pythagoricam, decedente verò Pythagoræ, & cessantibus illis simulachris, intellectus species inde acceptas scientiamque amiserit. Nam species illas à simulachris fieri atque seruari. Quinetiam viuentem Pythagoræ toties actum suum prætermiserit intellectus apud Pythagoram, quoties suum Pythagoræ cogitatio. Vnã acceperit, vnã obliuio fuerit, inceptum vnã. Fecisse similiter in Platone, & in singulis quotidie eodem pacto. Imbui vbi que ac semper variis modis per varias hominum animas, & quodammodo pasci, tot accipere species, quot in nobis simulachra fuerint, tanquam speculum imagines à corporibus, totidem actus ædere intelligendi, habitus quoque diuersos disciplinarum pro humanorum studiorum diuersitate. Et quia quotidie innumerabilis hominum multitudo cognitioni omnium studet, quotidie hinc illum omnia discere. Atque per ipsas species hausas à simulachris nostris intellectum capacem non modo inferiora, sed denique tum in cunctis hominibus, tum in hominibus sapientissimis seipsum cognoscere. Hinc agentem intellectum, inde & mentes superiores, opinantur in hoc mirabilem rerum connexionem consistere. Esse namque formas à materia penitus absolutas, ipsos scilicet Angelos, inter quos non sint plures in vnã Angelica specie Angeli, sed quot sunt Angeli, totidem sint species Angelorum. Esse insuper formas penitus corporales in eadem specie plurimas, puta animalium animas, & formas illis inferiores. Interponi compositum hoc ex homine atque ex mente, ex hominum animabus multis, mente vnã, quasi monstrum quoddam ingens multis cruribus & capite vno compositum, vbi & absoluta forma cum corporeis coit, & corporea cum ipsa vicissim. Atque vt par est, quod est absolutum, vnicum permanet in seipso. Quod est corporale, fit multiplex, dum vnã mens innumerabilis sufficit animabus. Et illud quidem compositum ex mente & vno quoque nostrum, hominem intellectualem appellant, sed vnum quemque nostrum seorsum à mente, hominem cogitatum. Et primùm quidem hominem affirmant aliquid intelligere, quia pars eius, id est, mens intelligit, sicut hominem solemus simum appellare, quia nasus est simus, alterum verò hominem nihil penitus intelligere.



*Confutatio Auerrois. Quod mens sit forma corporis, patet primum ex ordine naturæ.*

## CAPUT II.

**M**agna fuit olim inter Peripateticos de mente hominis controuersia, atque adhuc sub iudice lis est. Dicæarchus eam esse formam aiebat tum corporis, tum corporalem. Corporis, quia corpus humanum viuificat. Corporalem, quia è corporis sinu depromitur. Auerrois contra neque formam corpoream esse neque etiam corporis. Auicenna Theologorum Arabum princeps, & Alganteles mediam viam secuti, mentem asseruerunt formam quidem corporis esse, non corporalem, ut inter formas quæ corporis corporalesque sunt, atque formas quæ neque corporales sunt neque corporis, tanquam maximè differentes, mediæ quædam formæ sint partim cum illis, partim cum his quodammodo congruentes. Merito inter formas omnino diuinas, quæ ita separatæ à materia sunt, ut coniungi non possint, atque naturales omnino, quæ ita coniunctæ sunt, ut nequeant separari, formæ interponuntur mediæ, partim quidem naturales, partim quoque diuinæ, ita separatæ sunt, ut coniungi possint, ita coniunctæ, ut valeant separari. Quod quidem earum viribus actionibusque ostenditur, quæ tali quadam tum coniunctionis tum separationis inter se differentia distinguuntur. Denique non abs re inter sensum qui & in forma corporis est, & indiget instrumento, atque intellectum Angelicum, qui est vtrinque liber, intellectus est humanus, qui forma quidem corporis est, sed nullo indiget corporis instrumento. Quæ quidem sententia & communi hominum iudicio probabilior est, & libris Platonis, Aristotelis, Theophrasti atque Themistij maximè consona. Dicæarchum vnâ cum Epicureis satis iam libris superioribus confutauimus, Auerroem deinceps pro viribus reprobantes, Auicennæ & Algantelis interpretationem, imò Platonis Aristotelisque sententiam comprobauimus. Siquidem ex fundamentis quæ alias iecimus, ostendimus probabile esse, ut inter formas quæ solum viuificando corpori adstringuntur, sit forma mediæ, quæ & corpus viuificet, & intelligat, ut diuini vultus imago non succumbat vbique materiæ, sed vincat alicubi. Sunt autem formæ in corporibus nihil aliud quàm idearum imagines diuinarum,

sicut figuræ quæ imprimuntur in cera, sigilli aurei sunt imagines.

Si in omnibus ceris confusa fiat impressio, inertem dices illum qui impresserit tam ineptè. Ita mens diuina quæ in mouenda materia est suæ similitudinis anida, iners fortè videbitur si nunquam sui yori compos efficiatur. Fiet autem nunquam, nisi formæ huiusmodi appareant in corporibus, quæ ita fermè corporibus imperent suis, sicut mundo Deus, atque ita in se ac Deum per intelligentiam reflectantur, perinde ut Deus se vertit in Deum. Quippè diuina mens per cælorum motum agitando materiam dicitur aliquid, imò oinnia generare siue producere, quamuis non quamlibet formam vel per mutationem producat, vel ex materia ipsa educat. Quoniam verò primus ipse terminus, vnde generatio hæc vel productio vniuersalis sumit exordium, diuina ipsa mens est, vltimus quoque terminus quo talis generatio clauditur, mens quædam debet esse diuina. Terminus verò generationis vltimus in eo est quod gignitur, cuiusque est forma. Quocirca aliquam esse oportet diuinam mentem, quæ sit materiæ forma. Nam si generatio ab igne facta finitur in ignis formam, facta ab homine in hominis figuram, cur non generatio vel productio quæ à diuina mente disponitur, finiatur in mentem? Non finitur generatio nisi in formam, quæ est propria & intima generati perfectio. Si ars per instrumenta tribuit tandem materiæ formam, formæ illi simillimam, quam mens artificis continet. Si corporis humani natura in generatione semen mouet, primò ad formam lactis, deinde sanguinis, tertio carnis, denique hominis. Si ignis lignum primo ad tepidum mouet, ad calidum deinde, tertio ad ignitum, quid obstat quo minus diuina mens moueat mundi materiæ ad formas elementorum primùm; mixtorum secundò, Plantarum tertio, quartò brutorum, quintò ad formam sui, id est, mentem, quæ sit corporis geniti forma, ut in nobilissimis natis parentis vultus eluceat.

Mouet autem materiam ad inferiores formas per mutationem ex ipsa materia educendas, ad mentem verò per diuinum actum potius inducendam. Si enim educeretur, mens esse non posset. Hoc autem ad diuinum ordinem pertinet, ut postquam formæ superiores animo rationali neque educuntur, neque inducuntur, formæ verò inferiores & inducuntur & educuntur, ipse animus inducatur, non educatur. Ac si tanti pretij est forma mi-

sti, ut vim actionemque habeat elementorum, forma rursus Plantarum tam valida, ut agat quicquid agunt inferiores, itemque forma brutorum, cuius neget mentem habere vim actum, ue formarum inferiorum, ita ut ipsamet eius essentia dum intelligit, sentiat quoque per corpus, & alat corpus?

Profectò cum natura superior totam vim naturæ inferioris & includat & superet, idemque opus effectura sit quod sit ab inferiori, dum modo instrumenta eadem ipsi suppeditentur, necesse est mentem illam quæ intra nos videt, opus alendi & sentiendi posse peragere non minus quam animam cogitatricem. Quippè si complexionis nostræ spiritus sufficiens instrumentum menti est ad intelligentiæ ministerium, quod sentiunt Auerroici, multo magis ministrabit substantiæ mentis ad sensum & alimoniam. Et quia natura superfluis non abundat, non inest nobis nisi in anima formaque una præcipua, sicuti nec corporibus aliis. cum superiores formæ inferiores contineant. Mentem humanam esse mentium omnium infimam, tum ex eo coniicimus, quod ex otio mitigat in actum atque è conuersione, tum ex eo quod intelligendi occasionem accipit à corporibus. Sic enim corporibus proxima est, quæ ex potentia educuntur in actum propter materiam, atque mouentur extrinsecus, & occasionem sumunt extrinsecus operandi. Si mentium vltima est, ideoque supremo coniungitur corpori, atque ob hanc vicinitatem ipsa à corporibus haurit ocium, motumque externum, necesse est corpus humanum compositorum corporum nobilissimum, menti coniunctum, duo rursus à mente suscipere, actum scilicet motumque interiorem. Actus à forma suscipitur, ab anima motus interior. Ergo mens infima corporis supremi forma efficitur atque anima. Quippè sicut materia quæ vltimus terminus est corporalium, non est corpus aliquod, ita mens humana quæ mentium vltimus terminus est, non est mens aliqua separata, sed per naturam coniungitur corpori. Et quia sensibus eget ad intellectus exordium, ut per sensus percipiat corpora, eorumque quasi hauriat formas, ideo natura instituit ut tanta esset inter sensum intellectumque cognatio, quanta esse potest, quo huiusmodi huiusmodi facillimè & exquisitissimè fieret. Non potest autem aut maior esse cognatio, aut facilius exquisitiusque ea fieri, quam si in eadem substantia animæ tam mens quam sensus. Et sicut ostrea, quæ omnium sensualium vltima sunt,

ita propinquant arboribus, quæ omnium sensu carentium sunt suprema, ut partim terræ affigantur, ut arbores, partim sensu tactus utantur, ut sensu alia, sic intellectus humanus infimus inter alios ita coniungitur naturæ earum formarum quæ inter corporeas supremae sunt, ut partim formet corpus ut illæ, partim intelligat ut mentes superiores. Merito, sicut inter ignem & aquam maximè inter se distantes, est aer, inde calens ut ignis, inde humens ut aqua, sic inter Angelos animasque brutas longissimè differentes rationalis anima interponitur, quæ & intelligat ut illi, & corpus formet ut illæ. Ac si forma quæ materiæ propinquior est, umbra eius est quæ à materia est remotior, ut vegetatiua sensitiua, hæc autem intellectiua, sequitur intellectiua animam per umbram suam, ideoque per suum actum vniuersum, materiæ iungi. Principale agens sequentia mouet à entia. Principalis finis reliquos cogit fines. Materia principalis cæteras materias sustinet. Principalis itaque forma, reliquas, quoad fieri potest, formas format. Cum igitur in rebus naturalibus mens forma sit principalis, oportet ut ipsa formet quodammodo cæteras formas, omniumque gerat vicem. Quod nunquam efficiet, nisi formet materiam antea per formas inferiores congruè præparatam, atque illis quasi cessantibus, illa in seipsa vires sequentium formarum experiatur. Quinetiam si ea naturalis motus finem suum assequitur, atque talis est in formarum genere ascensus, ut gradatim magis magisque materiam nitantur transcendere, neque transcendant alia, necesse est saltem formam naturalium vltimam id assequi, ac non modo formare materiam, sed etiam per aliquid sui materiam prorsus excedere. Qua parte excedit corpus ac tempus, spiritibus & æternitati intelligendo coniungitur. Talem formam Platonici tum naturalem, tum diuinam appellant, quia est naturalium formarum diuinarumque confinium. Mentis cælestium corporum gubernatrices ita sunt distributæ, ut vna quæque vnum primò moueat corpus, & illud quidem intrinsecus, & sine medio. Multo magis mens humana vnicum in primis corpus mouere debet, & intrinsecus sine medio agitare, cum sit vicinior corpori. Vnde videtur contra naturæ ordinem esse, ut mens illa sublimis corpori sine medio coniungatur, infima verò per animam cogitatricem. Requirit insuper ordo naturæ, ut sit bonum, purum, & bonum intellectuale. Intellectus purus, & intellectus animalis, anima pura, & anima corporalis.

Primum Deus est, secundum angelus, tertium anima rationalis. Anima verò irrationalis est quartum. Igitur nisi alicubi sit forma partim intellectualis, partim viuifica, ordo naturæ confunditur, qui in eo consistit, ut Deus purum bonum sit, angelus bonum quidem intellectuale sit, sed intellectus purus, anima rationalis sit intellectus quidem animalis, sed anima pura, quia ipsa se sustinet. Anima irrationalis sit anima ideo impura, quia eget corporis sustentaculo. Sic ergo quia esse in se, antecedit esse in alio, & quod in se est, perfectione sua exuberat quoque in aliud, factum est ut sit bonum in se, bonum in mente, mens in se, mens in anima, anima in se, anima in corpore, sicut corpus summi coeli in se, reliqua verò in ipso. Quod si totum animæ genus toto genere corporeo præstantius est, debet amplius esse animæ genus quàm corporis. Itaque infimum animalis generis summum generis corporalis exuperat, proptereaque mirum in modum summum generis animalis summum excedit generis corporalis. Quo fit, ut rationalis anima non modo corporis profunda ingrediatur alendo, sed etiam sublimia corporis supergrèdiatur intelligendo. Merito, quia quod excellentius est, minus oportet ab eo quod deterius est pendere, quàm econuerso. Sicut ergo animæ infimæ quasi continentur à corporibus, & mediæ quodammodo continentur & continent, ita sublimes omnino corpora continent. Non continent corpus omnino, nisi & intrinsecus penetrent, & extrinsecus ambiant. Et sicut ambiendo corporis superficiem anima vitam intellectualem sumit ab alto, sic intima corporis penetrando, animalem vitam tribuit infimo. Dum ambit pro ut à Deo est, intellectum sortitur agentem, pro ut residet in seipsa, capacem possidet intellectum. Dum penetrat, pro ut spiritibus sese insinuat, sentit & mouet, pro ut se immergit humoribus alit & sustinet.

Sed ad vniuersalem rerum ordinem reuertamur. Deum dicere possumus esse formam, quæ neque hæret, neque format, neque formatur, animam verò irrationalem contrà formari, formare, hære. Sed angelum formari quidem à Deo neque tamen hære materiæ, neque formare materiam. Merito ergo inter angelum animamq; irrationalem, animam ponemus rationalem, tali quadam natura præditam, ut materiæ non inhæreat, formetur tamen, & formet. Præterea multum probanda videtur distinctio illa Pla-

tonica in metaphysicis Auicennæ; videlicet in mundo intelligibili procedendum esse ab intelligibili summo ad intellectus multos, tanquam à formatore ad vires inde formabiles, ac primum ab absoluto illo ad absolutos, qui nullo modo inde declinent, deinde ad intellectus qui paulum quid ad sensibilia vergant, id est, solum extrinsecus gubernanda, ita ut illis quoque, quasi extrinsecus accidere eiusmodi videatur officium. Tertio ad intellectus, qui quantum in natura intellectuali fieri potest, naturaliter ad sensibilia iam declinent, id est, intrinsecus per vitam motumque regenda. Non enim aliter & sensibilis mundus cum intelligibili perfectè connectitur, & inferiora ad superiorum exemplar pulcherrimè atque optimè disponuntur. Hinc autem quartus quidam, licet umbratilis, sequitur gradus, ut quidam putant, quasi nodus mentium cum corporibus, vitarum videlicet irrationalium species, quæ, ut putant Platonici, tanquam umbræ quædam mentes sequuntur per corpora procedentes.

Sed ad diuinam iterum reuertamur. Deum quidem esse negat nemo, esse verò ipsum Dei, non certa quadam specie determinatur essendi, per quam fiat esse tale vel tale, ne compositus sit Deus ex communi natura essendi, & ex aliqua addita differentia, id est, essendi proprietate. Igitur esse ipsum absolutum est, nullis limitibus circumscriptum, quod existit penitus infinitum, radix immensa omnium eorum contentrix & procreatrix, quæ tale habent esse, vel tale. A simplici enim fonte omnis compositio manat. Igitur angeli esse habent, sed quisque illorum tale esse vel tale, id est, cum hac aut illa proprietate in alia atque alia specie angelorum. Quapropter esse angeli non est infinitum, sicut esse diuinum. Non enim continet amplius totius essendi integram plenitudinem, neque omne esse existit, sed vna quadam rerum specie clauditur, per quam ad vnicum essendi modum determinatur.

Par enim est, ut esse diuinum quod ideas, id est, species antecedit, perque species rebus ab ipso manantibus esse dispertit, hoc ipsum esse tradat in speciebus, ideoque diuersis speciebus modos essendi diuersos. Itaque esse angelicum in angelica specie terminatur. Species autem angelica, quam eandem vocamus essentiam, quæ esse talis est fundamentum, quodammodo est infinita, non quidem ut Deus, sed quia secum ipsa permanet, totamque suæ speciei seruat integritatem, neque

quicquam in se accipit ultra speciem & speciei proprietates cum nulli inferiori naturæ propinquet cuius contagione inficiatur. At si essentia hæc angelica non differret ab eius esse, infinitum quoque diceretur & esse, quandoquidem in seipso & per seipsum subsisteret, esse verò utrinque infinitum, ac per se existere, Dei solius est proprium. Item si esse eius ab essentia non differret, cum esse sit actus, certe angelus solus esset actus. Cum verò per potentiam solam participatio fiat, nullius alterius participaret angelus, essetque vndique simplicissimus, quod soli Deo congruere potest. Sic Deus infinitus est omnino, quia solum esse existit, atque esse totum, & omne.

Angelus finitus est secundum esse, secundum essentiam infinitus, adde & secundum virtutem quodammodo, operationemque. Nullius enim deterius ob-  
staculo cura sollicitudine impeditur, quominus totam semper suam virtutem quantacumque illa sit, exerceat operando. Forma corporis, qualis est anima rationalis, quia incerta quadam existit specie, sicut angelus, esse habet ipsa quoque finitum, essentiam autem partim infinitam, partim verò finitam. Infinitam quidem, quoniam nihil vnquam amittit quod ad speciem suam pertineat. Eius siquidem natura est actus vitalis, rationalisque, quem actum nec dimittit vnquam, nec intermittit. Finitam verò, quoniam admittit aliquid ultra speciem, siue principia speciei, id est, affectionem hanc aut illam, ad talem vel talem humani corporis habitudinem, per quam fit forma viuifica corporis, & ad numerum corporum numeratur. Essentia huius animæ quantum infinita est, corporis capacitatem exuperat, vitamque agit intellectualem. Quantum verò finita est, proportionem habet cum corpore, cumque ipso corpoream agit vitam. Ibi vis operatioque infinita viget, hinc contra finita. Forma denique corporea vndique est finita secundum esse, essentiam, virtutem, & actionem. Secundum esse, quia esse eius certæ speciei limitibus circumscribitur. Secundum essentiam, tum quia in se accipit accidentia plurima præter speciem, tum quia proprium vigorem omnino non seruat. Nempe eius natura est actus efficax vel vitalis, subit autem in corpore passionem atque interitum. Secundum virtutem, & actionem, quoniam virtus eius augetur atque minuitur, & operatio quælibet consue-  
so extendit, quousque instrumentorum

subiectorumque conducunt affectiones. Tales sunt omnes formæ animæ rationali inferiores. Oportet hos quatuor rerum gradus in natura existere, ut paulatim ab eo quod omnino infinitum est, per media mixta ad ea quæ omnino finita sunt, descendamus. Quæ quidem gradatio continuari non poterit, nisi quemadmodum in mundo intelligibili infinitum est ac finitum, ut Deus & angelus, ita in mundo sensibili duæ sint illorum imagines, aliquid scilicet quodammodo infinitum, & aliquid omnino finitum, ut rationalis anima, & forma quævis inferior. Illa quidem forma corporis est, non corporea, hæc & corporis, & corporea.

Rursus iis gradibus descendamus. Deus esse possidet à se, in se, atque pro se. Angelus non à se, quoniam à Deo, sed in se, atque pro se. Forma corporis, qualis rationalis est anima, neque à se habet esse, quoniam fit ab alio, neque pro seipsa tantum esse suum seruat, quia ipsum communicat corpori, esse tamen habet in se, quia suum esse in eiusdem fundatur essentia, suæque essentia actus est proprius, sicuti Solis anima secundum Platonicos in se lucet, & illuminat Solem, ita lumen, ut lumen proprium non amittat. Forma verò corporalis esse neque à se, neque pro se habet, ut etiam anima. Neque rursus in semetipsa. Ita enim est materiae dedicata, ut ex ea & materia tale fiat compositum, in quo propriè esse ipsum fundetur, & cuius esse sit actus, forma autem eius non sit ipsius esse proprium fundamentum. Hoc ordine carere natura non debet. Careret autem, nisi esset forma quædam corporis, non corporea. Huic similis videtur esse illa Proculi nostri distinctio. Diuinum, inquit, intelligibile ipsummet est appellandum, intellectus autem purus sui ipsius, atque in seipso. Intellectus deinde animalis tum sui ipsius, quia esse suum in sua essentia possidet, tum alterius, quoniam ex ipsa sua rationali vita, vitam aliam ratione carentem quasi imaginem diffundit in corpus. Natura post hæc, id est, vitalis complexio, quasi umbra propter vitam ab anima infusam in corpore iam ipso resultans, duntaxat alterius est iudicanda, id est, corporis, cum quo extenditur atque diuiditur. Corpus denique ob conditionem eius ex se diuersam ac penitus dissipabilem propriè alterum appellatur. Vbi apparet in ipso rerum ordine intellectum animalem siue animam intellectualem medium obtinere. Similem quodammodo ordinem Porphyrius ex mente Platonis

in commentariis in Timæum afferre videtur, in sex vniuersum gradus ita distinguens, aliqua solum esse, aliqua solum fieri, alia esse simul & fieri, alia fieri simul & esse probat. Præter ea præponit omnibus aliquid super esse, & fieri, supponit quoque omnibus aliquid sub esse atque fieri collocatum.

Esse quidem dicit omnem mentium latitudinem, siue mentes in seipsis sint, siue mentes in animabus. Contrà verò fieri vult latitudinem sensibilem, siue elementalia, siue coelestia sint. Esse autem simul & fieri animarum genus. Ac vicissim fieri atque esse ipsam vniuersi naturam vniuersum viuificantem, quæ quidem eorum quæ fiunt, summitas est. Atque quatenus per corpora distribuitur, fieri dicitur. Quatenus verò per se minimè corporea est, dicitur esse.

Denique omnibus præponit quidem bonum, subiicit verò materiam. Quorsum hæc? vt intelligamus non posse ordinem vniuersi continuari nisi sint formæ intellectuales simul, corporumque viuificæ, solis enim his conuenire id potest vt æmper esse simul fierique dicantur. Esse quidem per substantiam prorsus indiuisibilem, subitumque intelligentiæ ipsius intuitum, fieri verò per temporalem reliquarum actionum discursionem. Talem quandam formam esse oportere ratio hæc Pythagorica persuadet. Incubat, vt Timæo Locrensi placet, Deus pater materiæ matri formas tanquam proles generaturus. Est in patre fecunditas efficax formarum omnium, est in matre fecunditas capax formarum, præcipuè corporalium. Est in patre actus formarum efficax, est in matre potentia formarum capax. Nascuntur proles matri similes, multæ formæ videlicet, quæ ex materiæ fundo emergunt, & in idem denique immerguntur, sicut vasis aurei figura ex auro, atque in aurum. Nascantur rursus oportet proles nonnullæ patri persimiles, si modò plus aliquid pater quam mater in hoc valet congressu. Huiusmodi erunt formæ ex patris actu exilientes in materiæ faciem, & inde in patris actum resilientes, quemadmodum splendor à Sole in aurum & in Solem. Illæ quidem formæ matri similiores prius in materiæ visceribus latent quodammodo, sicut figura vasis in auro. Latent & in animorum corporumque mundanorum virtutibus, quæ sunt diuini artificis instrumenta. Deus eas per mundi motus ex materiæ erant gremio, & pro capacitare materiæ producit in esse. Huius-

modi autem esse cuius est propriè? Compositi illius corporis quod ex hac generatione conficitur. Quare? Quia instrumentum per quod generatur à Deo, compositum est. Si ergo proxima causa est composita, & effectus solet proximæ causæ simillimus prouenire, sequitur, vt quod propriè gignitur, sit id quod est compositum. Ei verò quod gignitur, propriè conuenit esse. Proprium est igitur illud esse compositi. Non enim fit à forma vel materia, sed composito. Accedit, quòd tales formæ materiæ secundum potentiam quodammodo prius hærent, quam assequantur esse. Atque in materiæ gremio producuntur in esse, eo ipso momento quo completur esse compositi. Quoniam verò inhærendo secundum virtutem ipsi materiæ fiunt, accipiuntque esse, ideo adhærendo secundum actum, eidem materiæ retinent esse, ac tamdiu sunt, quandiu hærent. Non ergo per suum esse sunt, postquam & fiunt & sunt, & permanent inhærendo, sed per esse illius compositi cuius ipsæ partes sunt, quodve generationis est terminus. Ac merito esse non habeant proprium, neque vim quidem ullam aut operationem propriam possident. Tales sunt formæ, quæ matri similiores videntur esse quàm patri. Quæ verò sunt patri similiores, quales sunt rationales animæ, ex actu mero promuntur Dei, ideo subito ad actum perducuntur essendi. Quapropter esse quasi in se habent prius, postea iunguntur materiæ. Esse se habent antequam hæreant corpori, & ante corpus ordine ipso naturæ esse retinent, & post corpus esse habent proprium in seipsis. Optionem aliquam habent propriam in se ipsis, corpori non cōmunem. Esse suum quadam ex parte impertiunt corpori, operationes aliquas in corpore edunt, atque per corpus.

*Quomodo mens propinquat corpori.*

### C A P V T I I I.

**S**ed quonam modo esse suum impertiunt corpori? Miscent ne ipsum? Minimè. Perit enim & confunditur quod miscetur. An tangunt corpus? Nequaquam. Tactus enim duorum est corporum proprius. Nunquid clauditur in eo. Neque istud. Non enim loco clauditur nisi corpus. Quid igitur agunt hæ formæ in corpus quando ipsi suum esse communicant? Penetrant ipsum vndique essentia sua, virtutem essentia suæ dedicant illi. Cum ve-



rò ab essentia ducatur esse, & à virtute profluat operatio, coniūgendo essentiam impertiunt esse, dedicando virtutem, operationes communicant, vt ex animæ corporisque congressu vnum euadat animalis esse, operatio vna. Esse quidem hoc animæ ipsius est per essentiam, per participationem fit corporis. Non immergit anima esse proprium corpori, sed corpus extollit ad ipsum. Neque capit corpus totam illius essentia amplitudinem, sed attingit aliquid pro natura sua, neque sustinet eam, sed sustinetur. Quo autem pacto forma non extensa molem corporis impleat, planè intelliget quisquis considerabit etiam extensam formam plurimum ita se ad corpus habere, vt quælibet eius pars æquè se ad quamlibet partem materiae habeat, atque vicissim. Itaque cogitare possumus quamlibet huius formæ partem in singulis materiae portionibus esse, easque ita formare, vt tota puncto cuiuslibet adsit. Verùm huic formæ auferamus extensionem, atque interim formandi corporis officium relinquamus. Possumus enim. Nam formare, & aliud & præstantius est quàm extendi. Itaque si materia extenditur quidem, sed non format, potest aliqua materiae forma formare, ac non extendi. Sic videbimus indiuiduam formam totaque simul formare simul materiam totam, & quamlibet pariter eius partem. Ac si verum sit Pythagoricum illud, videlicet punctum motu suo lineam facere, lineam verò superficiem, superficiem denique simili motu profundum, faciliè cogitare poterimus punctum idem motu suo seipsum totum indiuiduumque per longitudinem & latitudinem, profunditatemque diffundere. Hinc fit vt vbicunque diuidas, tangasve, reperiās punctum. Quod quidem si sit accidens, à mole necessario sustinebitur. At si substantia fuerit, sicut anima in se subsistens, moli quidem aderit, atque à mole seiunctum in se perpetuo permanebit.

*Quomodo adsit mens corpori.*

#### C A P V T IV.

**A**NIMA hæc tam excellens nunquid materiae informi sine medio iungitur? Semper forma perfectior imperfectiores formas intra se continet, quemadmodum quadrangulus triangulum comprehendit. Rationalis anima si intelligendi vim habet omnium præstantissimam, habet etiam sentiendi, alendi, atque re-

gendi. Ideo in animæ rationalis virtute clauditur anima sensitiva & nutritiva, forma quoque mixtorum vita carentium. Accedit materiae rationalis anima iis omnibus prædita formis, perque formam suam seu virtutem quæ mixtorum corporum vita carentium gerit vicem, hæret materiae informi quàm proximè, atque in ea quatuor elementorum constat complexione, dum partes materiae deuincit in vnum, ac temperat elementa. Per formam suam quæ plantarum habet vim, hæret corpori ex materia & complexione composito, illique elementorum complexioni tribuit motum in quamlibet loci partem, qui vita vocatur. Per formam animalium propriam, iis se accommodat, spiritumque procreat sensuum instrumentum. Per formam rationalem, reliquis imperat.

Itaque per infimam vim suam est forma materiae, per secundam forma est corporis mixti, per tertiam plantæ, per quartam forma est animalis, imò forma formarum. Ex quo fit vt rationalis anima & corpora formet magis quàm reliquæ formæ, quia per plures virtutes format & formet purius, quia informem materiam per pedem suum tangit cominus, per caput autem eminus prospicit.

Quemadmodum ignis ex quatuor caloribus proprii gradibus, primum gelido ligno infundit, secundum ligno iam tepido, tertium ligno per duos iam calido, quartum tribus illis gradibus insuper addit, per quem fulget supernè. Sic animæ rationalis essentia quatuor quibusdam referta gradibus, mixto, vitali, sensuali, intellectiuo. Primum materiae applicat, secundum adhibet primo, secundo tertium adiicit, tertio addit quartum, vbi tam secundum totam essentiam quàm secundum gradus omnes materiam formare videtur, licet secundum essentiam quidem totam formet eodem modo, secundum verò omnes gradus alio atque alio. Primus siquidem forma est materiae, secundus est forma mixti corporis, tertius forma est formæ vitalis, quartus est corporalium omnium forma formarum, per tres gradus anima particularis euadit, per quartum remanet absoluta, formarumque capax absolutarum. Quid mirum si in hoc eius excellentissimo gradu aliqua apparet vis operatioque diuinis persimilis, quibus ex eo hic gradus sit proximus, quòd sit à materia remotissimus, cum in nonnullis mixtorum corporum formis propter temperationem aliquam cœlestibus corporibus

congruam, vis aliqua actioque resulter aliena quidem ab elementis, ex quibus illius formæ subiectum componitur, consentanea verò cœlestibus quibus temperatione fit similis? Neque mirum videri debet, animam, licet sit forma corporis, habere tamen virtutem aliquam corpori non communem, quoniam angeli neque secundum essentiam, neque secundum præparationem ad essentiam, ex materia eruuntur, animæ verò irracionales per vtrumque. Animarum ergo rationalium, quia mediæ sunt, media debet esse conditio. Nequeunt autem ex materia per essentiam pullulare, quin secundum præparationem ex materia pullulent. Quocirca secundum præparationem scaturient quidem, secundum verò essentiam minimè. Quod si virtus essentiâ sequitur, nulla virtus angeli corpori est cōmunis. Omnis autē bestiarum virtus est animæ simul & corporis, quia simul cum essentia trahitur ex materia, virtus autem animæ rationalis in sola eius essentia est, cum ea descendens ex alto. Et quoniam huiusmodi anima proportionem corporis superat, neque est in corpore, sed corpus in ipsa, corpus omnem ipsius virtutem non comprehendit, attingit autem virtutis alicuius non nihil, propterea quòd anima quæ secundum præparationem pendet quodammodo ex materia, vsque ad eò afficitur corpori, vt interiores vires suas illi accommodet proportionem quadam, perque illud libenter operetur, atque in illo. Neque absurdam putari debet rationalem substantiam coniungi materiæ, quia non potest aliter ordo naturæ seruari. Est enim spiritus aliquis à materia separatus, rationalis, incorruptibilis, qualis est angelus. Est & spiritus coniunctus, irrationalis, corruptibilis, qualis est anima bestiarum. Distant duo hæc nimium. Nempe in genere ipsius spiritus sunt, atque inter se per tres differentias differunt. Quid ergo inter hæc medium est? Non spiritus aliquis qui solum sit separatus, talis enim esse nequit, quia oportet si separatus est, rationalem quoque immortalemque esse. Non spiritus aliquis qui rationalis sit tantum, oportet enim spiritum talem coniunctum insuper esse, vel separatum. Non spiritus solum incorruptibilis, quoniam necesse est ipsum rationalem præterea esse. Non spiritus separatus rationalisquetantum, nempe oportet ipsum etiam incorruptibilem ponere. Non spiritus separatus & incorruptibilis solum, nam si duo hæc habet, habet & rationem, quia cum neque sen-

sum exerceat, neque alimentum, frustra erit, nisi operationem habeat rationis. Non spiritus coniunctus, irrationalisque solum, talis namque etiam est mortalis. Non spiritus coniunctus, immortalisque duntaxat, qui enim cum angelis communem habet immortalem vitam, communem habet intelligentiam. Non spiritus coniunctus rationalis, atque caducus, quia si communem habet cum angelis intelligentiam, quæ vitæ ipsius in seipsam reflexio quædam est, communem habet & vitam. Sit ergo oportet in corpore spiritus aliquis medius extremorum, qui & rationalis & incorruptibilis sit. Conueniat cum vtrisque, quia spiritus est. Differt ab angelo, quia est coniunctus. Differt à bestia, quia rationalis. Conueniat cum angelo propriè, quia immortalis. Conueniat propriè cum bestia, quia coniunctus. Imo cum oporteat inter illa extrema esse medium ab vtrisque; quodammodo æquè distans, & æquè particeps vtrorumque, necesse est esse spiritum aliquem qui partim separatus, rationalis, sempiternus sit, partim cōiunctus, irrationalis, atque caducus. Talis maximè humanus est animus, in cuius summo tres primæ illæ conditiones sunt, in infimo tres sequentes, in medio sex omnes mixtæ inuicem, & musicis, (vt Plato inquit) modulistemperatæ.

*Quomodo mens insit corpori.*

## C A P V T V.

**A**T quonam pacto rationalis animæ coniungitur corpori? Non vt solidum corpus solido. Nam corpora hæc solida quæ solo tactu iunguntur, neque simul sunt omnino, neque simul agunt, vt anima atq; corpus simul omnino sunt, simul & operantur. Proinde omnium absurdissimum esse videtur, animam efficacissimam vitalis motionis originem, densis crassisque corporibus comparare, quæ quanto magis corporeæ proprietatis dicuntur habere, tanto minus naturalis actionis vitalisque motionis possidere videntur. Nempe si diuidantur, remanent dissipata, neque, sicuti puriora solent, mox in suam redeunt vnionem. Contrà verò, quæ quàm minimum corporeæ crassitudinis habent, dum videntur à solidioribus percuti, ictum facillimè vitant, dum penetrari, efficacissimè penetrant, dum diuidi, ad eò in unitatem suam velociter reuertuntur, vt discessisse ab ea minimè videantur. Igitur, vt

dicebamus, anima non ut solidum corpus solido iungitur. Rursus non ut aqua vino. Corpora enim hæc mollia mixtura mixtione vim priorem amittunt, ac desinunt esse quod erant. Anima cum sit incorporea, neque materiam cum hoc corpore communem habeat, non potest cum corporis huius qualitate misceri atque confundi. An forte sicut calor ignis aqua? Hoc potius modo. Calor siquidem non est corpus, ideo est similior animæ. Sed neque id satisfacit nobis. Nam pars caloris in aquæ parte est, non totus in tota. Forfitan ut vox aëri. Vox enim forfitan una eademque tota est in qualibet aula parte, cum tota audiatur in qualibet. Mouet aures, nunciat aliquid intellectui. Quemadmodum anima tota est in qualibet particula corporis. Corpus regit simul atque intelligit. Sed nescio quid fragile vox habet, & passioni subiectum. In fractione aëris nascitur, leuique retruditur aura. Sed habeo interim similis aliquid, videlicet imaginem coloris in aëre ad oculos venientem. Spiritualis hæc est, currit momento, attingit procul, tota occurrit ubique, venti non patitur impetum, pingit aërem, format visum. Simile admodum est id quidem, sed hoc differt, quod aërem non regit neque gubernat, sicut anima corpus. Sed ecce gubernat nauem aliquam gubernator, & est in naui. Num ita & anima se habet ad corpus? Non, quia gubernator nauem non implet, non adest toti, non per se mouet solum, sed per gubernaculum. At nunc in gubernaculo hoc inueni animam, quoniam cum per ipsum nauta regat nauem, ars gubernatoria non modo in nauta est, sed & transit in gubernaculum. Tota in eo fit toto, regitque ipsum, hæc ipsa est anima gubernaculi. Sed hæc nihil naturæ suæ tribuit substantiæ gubernaculi, sed agitatur solum ipsa quidem extrinsecus agitata, anima verò aliquid tribuit corpori, & suapte natura mouet. Tolle quæso oculos in cælum Philosophæ, Cœlestem quæris animam in terra vel mari. Suscipe Solis lumen. Vnum hoc & indiuiduum est, ut ita dixerim, in qualibet aëris parte totum. Aërem illuminat, calefacitque, ipsum verò nihil sumit ab aëre, neque vim alicubi patitur, neque ullis sordibus maculatur. Fluitat aër ventis, manet lumen, ut vult Plotinus. A Sole est, momento transit in aërem. A Sole iterum non separatur, reflectitur & in Solem. Sine ipso aër mortuus est, cum sit frigidus & obscurus, forma qualibet destitutus. Duas habet lumen qualitates, fulgorem atque

calorem. Fulgorem quidem exercet in aëre, non tamen tribuit aëri, calorem tribuit. Vnde occidente Sole non extinguatur, ut Plotinus putat, sed vna cum Sole subito totum recedit lumen, caloris ad multam noctem reliquæ relinquuntur, quasi aër factus fuerit caloris particeps, non fulgoris. Sed præstet, si placet, fulgorem non largiatur. Esse quidem lucis illius quid est aliud quam lucere? Sine illa non lucet aër, sine aëre illa lucet. Siquidem vera est Plotini sententia, lumen non à perspicuo vlllo pacto, sed à solo Sole continuè dependere, ipsumque semper, utpote quod sit actus quidam ipsius perpetuus, comitari. Sed pergamus ad reliqua. Accedit lux aëri, lucet ibi lux, sicut & ante in seipsa, lucet aër, qui non ante, per se lux illa lucet, per lucem aër. Nunquid aliud est lucere lucis & lucere aëris? Nequaquam, alioquin remaneret fulgidus aër abeunte luce. Vnum igitur est lucere, quo lucet vtrumque, sed luci per essentiam conuenit, per participationem conuenit aëri. Vnum igitur esse quodammodo vtrisque competit, nec est lumen in aëre, quamuis ita vulgo dicatur, sed est aër in lumine, si modò quod angustius est, passionique obnoxium, ampliori & impatibili continetur. Similiter hominis anima à Deo dimittitur in materiam, transit in eam subito, neque discedit à Deo, sed vtrumque simul agit, regit corpus, atque etiam veritatem ipsam rerum omnium (quæ est ipse Deus) miro quodam (ut disputat Plotinus) modo attingit per intellectum. Rursus sicut lumen in Solem reflectitur, sic ipsa in Deum per voluntatem, prout semper bonitatem rerum omnium appetit, quæ ipse est Deus. Implet corpus sine offensione, ut aërem lumen, totaque similiter toti adest, patiente corpore non patitur, sed sentit & iudicat passionem. Non fluit corpore labente, sed constat. Duas habet vires præcipuas, iudiciariam, & vitalem. Iudicium non tradit corpori, sed ipsa peragit. Vitam corpori mutuat vel largitur, quatenus vim quandam suæ vitæ imaginariam ipsi communicat. Vnde indicat anima sola, non corpus. Viuit autem corpus & anima. Quapropter anima decedente sensus abit protinus, vestigia verò vitæ manere videntur ad tempus, calor scilicet atque motus. Animæ esse, viuere est, quandoquidem animæ essentia est vita, per quam formaliter viuit corpus. Esse quoque animantis nihil aliud est quam viuere. Non tamen aliud est viuere ipsum animæ corpori copulatur,

aliud ipsius compositi vivere, imò sicut per vnam eandemque vitam, id est, animæ essentiam viuit vtrumque, sed anima per suam, corpus per alienam, ita vt plerique iudicant per vnum duntaxat vivere, vtraque sunt dicunturque viuientia, per suum anima, corpus per alienum. Atque vt supra tetigimus, anima non est in corpore, quamuis ita appareat illis qui corpus videntes quidem, animam verò non videntes, latere animam in corpore tanquam vasculo arbitrantur. Qui verò inspicunt animam ingredientem corpus intrinsicè, extrinsicè supergredientem, complectentemque & sustententem, atque mouentem puluerem hunc exiguum, vndique proculdubio corpus esse in anima consentunt. Quis dubitet eam esse corpore ampliorem, cum parte sui æquetur illi quodammodo, scilicet vitali potentia parte excedat, scilicet iudiciaria facultate?

Itaque corpus tanquam angustius atque labile in anima est ampliori prorsus & stabili, perinde vt id quod continetur in continente. Quamuis ergo tota anima adsit corpori, non tamen corpus toti adest animæ, sed parti infimæ solum, id est vitali. Quod hinc confirmari videtur, quia cum anima sit virtute longè maior corpore, & à virtute motus amplificatioque proueniat, oportet animam non modo toti adesse corpori, verum etiam secundum præsentiam (vt placet Iamblichò) corpus excedere. Et quia est indiuisibilis, vbicumque est, illic est tota. Corpus autem sicut non toti æquatur virtuti animæ, sic non æquatur toti eius præsentia. Id sensit Plato in Timæo, quando dixit, mundi opificem corpus in anima statuissè. Iterum in libro decimo de repub. vbi inquit, mundi corpus inter necessitatis gēua volui, id est, infima coelestis animæ parte regi atque moueri. In Phædro etiam animas affirmavit supra cœlum caput extollere. Verum quamuis anima ita corpus excedat, non tamen impossibile cuiquam videri debet eam vsque ad eò ad se materiam trahere, vt vnum reddat compositum. Cum enim proprium sit formarum perficere, & sibi deuincire materiam, & materiæ partes inuicem copulare, quo præstantior forma est, & quo magis materiæ dominatur, eo perfectius hoc efficere potest. Faciunt autem id formæ quælibet infimæ, quid obstat quo minus faciant & sublimes, modò id naturaliter cupiant? Quod si angelicæ minime faciunt, id ex eo prouenit, quod nullam prorsus inclinationem habent ad speciem aliquam animalis sua

coniunctione complendam. Fieri verò hoc à mentibus Platonici omnes & Peripatetici veteres voluerunt. Nullus enim illorum repertus est qui non affirmauerit sphaeras coelestes esse animis rationalibus animatas. Testantur id inter Platonicos præ cæteris Plotinus, Porphyrius, Iamblichus, Proculus, inter Peripateticos autem Theophrastus, Auicenna, & Alganteles. Quia in re Ptolemæus quoque & Albumasar, & Zaelles, & Manilius cæterique præcipui authores Astronomiæ nobiscum sentire videntur, quando videlicet affirmant coelestia corpora esse diuinis animabus mentibusque prædita, ac tanquam animalis quædam diuina ipsi Deo omnium rectori parere. Neque id quidem iniuria. Nempe cum viderent nonnulla quæ ad animos pertinent, ex stellis prænunciari, non aliter id fieri posse putabant, quàm qui stellæ animatæ sint, videntque futuras hominum actiones, suisque quodammodo nutibus indicent, præterea sicut corporum illarum radij in corpora nostra, sic animorum earundem radij in nostros animos influant. Omnia verò à causis illis ordinatissimis ordinata bonaque mitti, posse tamen ex diuersa multarum circa nos causarum commixtionē, materiæque defectu perueri, adeò vt Mercurialis prudentia in malitiam, Martia magnanimitas in ferocitatem, Venereā charitas in libidinem conuertatur, similiterque de cæteris, quemadmodum & radij Solis inde quidem blandi mittuntur, sed hic sæpe recipiuntur edaces. Verum hæc iam tanquam in præsentia superuacua dimittamus.

*Quod mens sit forma corporis, patet ex opinionibus actionibusque humanis. Ratio prima, quia homo est animal rationale.*

## CAPVT VI.

**N**on solum verò rerum naturalium ordo demonstrat eandem esse animam quæ in homine speculatur & sentit, vt in superioribus declarauimus, verum etiam sapientum sententiæ, atque operationes humanæ. Omnes philosophantes in hac sententia consenserunt, hominem esse speciem quandam rerum, cuius differentia propria, per quam à brutis differat, sit ipsum rationale. Oportet autem differentiam propriam ab intrinseca rei forma semper accipere. Nihil enim ab alio differt secundum speciem, nisi per naturam interiorem. Non sumitur autem rationale ab anima solum cogitante, quia in ea est

ratio duntaxat particularis, homo autem ad commune bonum decusque dictis factisque rationaliter operatur. Eius igitur differentia ab vniuersali sumitur ratione, hæc autem in mente est. Mens igitur forma illa est per quam quisque nostrum in humana specie collocatur. Si autem fuerit secundum esse ab homine separata, ex ipsa & homine hoc species vna non fieret, atque homo propter interiorem carnem carneus proprius diceretur, quàm propter rationem exteriorem rationalis. Neque dicat Auerrois hominem esse aliquid congregatum ex animali cogitatio ac mente, totumque ipsum propter alteram eius partem rationale cognominari, sicut corpus simum quia simus est nasus. Primo enim nasus corpori continuus est, mens autem cogitationi nequaquam.

Deinde mens huiusmodi species quædam est seorsum ab animali cogitatio, & hoc animal est species per se à mente seorsum. Non transit autem de specie in speciem separatam differentie cognomen tum. Et sicut non dicitur apud Auerroem mens cogitativa & sensualis propter cogitatricem animam cui propinquat, sic neque cogitatrix anima dicitur rationalis siue intellectualis propter mentem. Neque rursus transibit cognomen tum differentie in tertium aliquod quod ex illis efficiatur. Vna enim differentia vnam quandam exigit speciem, atque contra. Illa verò vnam speciem non conficiunt, quia neque in vnam essentiam neque in vnum esse congregiuntur. Omnino autem ridiculum est, hominem accipere differentiam per quam est homo, à mente vnica & separata. Sic enim singulæ personæ vnus homo erunt, animalia multa, & natura speciei remanebit vniuersalis, natura generis iam facta particulari. Neque minus ridiculum est humanam speciem in eo cumulo collocare, quia sicut non erit simpliciter vnum, sic non erit (vt ita loquar) ens simpliciter, neque substantialis aliqua rerum species, sed contingens acerruus, eo maximè, quia ex duabus rebus quæ per se secundum perfectam speciem actu existunt, non fit vnum per se verum, sed falsum vnum, & id quidem alio vineiente. Non enim in alterius se gremium iacit quod per se omnino existere potest, neque admittit naturaliter intra se alterum, quod sibi ipsum sufficit. Imò verò cum res quæque per actus suos inuicem distinguantur, ideoque actus sit separationis principium, quæ actu existunt, aduersantur coniunctioni. Mens

verò & animal actu subsistunt vtraque, neque possunt ab alio copulari, vt in sequentibus ostendemus. Esse autem rationem vniuersalem in anima, qua sentimus & viuimus, propterque illam nos rationalem, cognominari, docet in libro de moribus Aristoteles. In primo libro inquit, mentem esse in anima sicut est in oculo visus. Partes item animæ duas esse, ratione carentem, & rationalem. Primam distinguit in duas, in nutritiuam partem, quæ nunquam obtemperat rationi, & sensitiuam, quæ quandoque obtemperat. Alteram pariter diuidit in actiuam rationem, & speculatricem. Virtutes morales ponit in voluntate, & appetitu rationi obediens, principia virtutum moralium in actiuam rationem, virtutes speculatiuas in ratione speculatrice. Idem facit in sexto, vbi etiam asserit rationalem vim esse humanæ animæ partem, atque hanc duo agere, scilicet cognoscere & gubernare humana per prudentiam atque artem, & naturalia diuinaque per sapientiam contemplari, quæ intelligentia & scientia continetur. In Problematum libro inquit: Natura parens & author omnium, instrumenta nobis duo inseruit, quorum opera pro instrumentis extraneis vti valemus. Manum inquam corpori dedit, animo mentem. Est enim mens quoque rebus à natura nobis impertitis annumeranda, vicem sanè gerens instrumenti. Hæc ibi.

*Ratio secunda, quia homo intelligit.*

## C A P V T V I I.

**A**ristoteles hominem esse vult animal ex corpore ac mente compositum. Siquidem in libro primo de moribus, statuit de felicitate hominis propria disputare, quæ in propria hominis operatione consistat. In decimo operationem hominis propriam esse inquit, intelligentiam, quia sit secundum mentem, quæ magis propria nobis est quàm sensus, quæ suprema pars animæ sit. Addit nos vel mentem esse, vel maximè mentem, cum tamen velit nos esse compositos. Quasi mens sit forma hominis maximè naturalis. In primo libro de anima inquit, potius dicendum esse hominem per intellectualem animam intelligere, quàm ipsam animam intelligere. Vbi fatetur Auerrois intelligentiam propriè sicut & sensum esse totius compositi. Vnusquisque etiam experitur in seipso se aliquid intelligere, neque id facit nisi per intellectum. Nos quoque in



præsentia quonam pacto intellectus naturam inuestigaremus, nisi ipsi nos intelligeremus? Et quoniam intellectu magis pro arbitrio nostro utimur quàm phantasia, quæ sæpe cogitur aliunde, familiarior naturaliorque nobis intellectus est quam phantasia. Si Auerroici interrogentur quidnam illud sit quod intelligit propriè, cum dicit Aristoteles & Auerrois, hominem propriè intelligere, responderunt neque mentem esse illud, non enim apud eos mens est homo, neque animal cogitatum, quia non habet intelligendi virtutem, sed aceruum quendam ex mente & huiusmodi animali, & actionem mentis, quæ intelligentia est, ipsi toti ideo attributi, quia soleat actio partis sæpe ascribi toti. Stultum id quidem. Primo, quia aceruus talis non est in aliqua vna specie, aut genere vno, neque eam habet vniorem, per quam in vna operatione, qualis intelligentia est conueniat.

Deinde, quia partis actio tunc toti ascribitur quando pars illa vel continuatur cum altera in vnam essentiam, sicut hominem videre dicimus, quia videat oculus. Vel inesse vnum, ceu cum dicimus ignem calefacere per calefactionem quæ prouenit à calore & forma, quæ talis pars ignis est, ut materiam alteram ignis partem formando ad vnum esse perducatur. Vel in vnum agitationis effectum, veluti cum dicimus animam vnà cum brachio enssem vibrare, quia motio talis ab anima in enssem per brachium transeat. Mens autem apud illos neque continuatur cum animali in essentiam vnam, neque in vnum esse, ut constat, neque etiam in vnum agitationis effectum, quia intelligentia nunquam mente egreditur quòd possit alteri præter mentem communicari, neque expletur per aliquod instrumentum. Ex quo fateri coguntur contra ducem eorum Aristotelem propriè dici mentem intelligere, hominem verò intelligere dici non posse, nisi impropriè admodum & absurdè. Neque adducant consuetum illud exemplum de cælo, quòd cælum nonnunquam dicatur mouere seipsum, quia pars eius altera moueat alteram, atque ita homo intelligere, quia pars eius intelligat. Exemplum non consonat. Nam motus à mente cæli transit in cælum, intelligentia verò neque ab humana mente transit in animal, neque econuerso, sed afferent rursus aliud æquè ridiculum, quòd cælum à nonnullis intelligere affirmetur, cum tamen pars eius intelligat sola. Quamuis rarò id audiatur de cælo, quod intelligat, de homine ve-

rò semper, tamen quicumque illud dixerit, falsò ac stultè loquetur, nisi forsitan existimet mentem illam cum cælo in vnam speciem conuenire.

Proinde quicumque aiunt omnes homines per vnam mentem, & illam quidem ab hominibus separatam, intelligere, non minus delirant, quàm qui dixerint omnes per eundem oculum ab omnibus semotum singula cernere. Denique quando interrogantur quare nos operari dicimur ex eo quod separata mens operatur, respondent, quia licet illa non sit forma à qua habeamus ut simus, ab ea tamen habemus ut operemur. Quæ quidem responsio ideo ridicula est, quia idem probat per idem. Afferunt Auerroici arctiorem quandam (ut putant) copulam inter mentem & animalis huius phantasia, per quam fiat homo vnus, atque intelligens, quia scilicet mens speciem per quam intelligit, haurit à simulachro quod sibi per sensus formauerit phantasia. Si enim species sit forma mentis, simulachrum verò forma sit phantasiæ, sequi opinantur ut quoties species cum simulachro copulatur, toties & mens conspiret cum phantasia. Copulari verò toties, quoties dependet species à simulachro. Id verò fieri quoties homo aliquid speculatur. Nos huiusmodi copulam sufficere non putamus.

Quo enim pacto potest species intelligibilis esse nodus quo phantasia menti deuinciatur, quæ talis est, ut quamdiu inhæret simulachris phantasiæ tanquam in particularibus fundamentis, particularis sit, & à mente seiuncta permaneat, & cum primum in mente sit facta vniuersalis, iam procul absit à phantasiæ simulachris. Nunquam ergo phantasia nostram menti species alligabit, quæ non potest in ambobus simul existere. Actus quidem intelligendi in sola mente est, quod nemo negat, mens autem id intelligere solet, cuius habet speciem & similitudinem in se ipsa. Quare ex hoc ipso quòd mens speciem per quam intellectura est aliquid, à phantasiæ simulachris accipit, nullo modo id sequitur ut phantasia intelligat quicquam, sed potius ut ipsa aut eius simulachra aut obiecta intelligantur. Quisquis igitur mentem cum phantasia coniungens profitetur se ex iis duobus vnum aliquid intelligens constituere, nihil plus agit quàm ut ex intelligente ac re extra mentem intellecta intelligens vnum conficiat, perinde ac si ex visu & re visa vnum quiddam efficiat videns. Nisi forte quis velit sicut ex igne calefaciente & aëre

inde calefacto, vnum quiddam fit calefaciens, quando ignitus aer calefacit manum, ita ex mente intelligente ac phantasia vel intellecta, vel quomodocunque per intelligentiam agitata, vnum ædi rursus actum intelligendi, quo ambo rem extra phantasiam positam intelligant. Quod si contingeret, iam mens illa sublimis, & separata vim intellectualem phantasiæ communicauisset, quemadmodum ignis aëri calorem prius quàm actum extrinsecus calefaciendi communicat. Imò etiam magis, quoniam actus intelligendi semper clauditur intellectu, neque transmigra- foras, quo fit vt nequeat tradi cuiquam intelligentia sine mente. Atque ita mens humano corpori inesset tanquam forma, quod in præsentia quærimus. Quanquam coniunctio illa fieri nequit, quoniam intelligentia non expletur per instrumentum.

Denique vt conuincant intelligentiam vniuerso illi acervo esse communem, connexionem talem in medium rursus adducunt, vt quando phantasia imaginem rerum aliquam concipit, eadem statim suscipiatur in mente, atq; in phantasia phantasma vocetur, & particularis appareat atque multiplex, in mente verò vocetur intelligibilis species, & absoluta penitus videatur & vna, cum tamen vna eademque forma sit, quæ quoniam mentem simul format & phantasiam, vnum conflat ex utrisque compositum, quod appellatur homo. Quoniam verò intelligentia speciem intelligibilem sequitur, species autem est forma compositi, intelligentia propriè composito assignatur. Cuius quidem connexionis exemplum ostendunt in oculo, in quo spiritus est visiuus, lumen autem per coloris imaginem coloratum visu spiritui se insinuat, ac spiritus vicissim penetrat lumen, vbi coloris imago quæ in lumine est, eadem penitus fulget in spiritu, ideoq; ex lumine & spiritu facit vnum. Nos autem negabimus fieri posse vt eadem omnino forma in subiecto æterno proximoque suscipiatur simul & corruptibili. Tàm enim diuersos habent modos essendi formæ omnes, quàm diuersa subiecta sunt à quibus suscipiuntur. Forma igitur esse longè diuersum habebit in mente & phantasia. Vbi autem esse duo sunt, multumque diuersa, duæ quoque & diuersæ admodum formæ sunt, quæ sunt essendi principia. Quin etiam si concesserimus eandem in ambobus esse formam, neque sic quidem intelligentia communis erit. Siquidem ibi solum intelligentia est, vbi

propria & intrinseca intelligendi principia sunt. Hæc verò sunt duo, virtus intellectiua, & intelligibilis species per modum penitus absolutum. In phantasia verò neque vis intellectiua est, neque modus speciei intelligibilis absolutus. Nihil igitur nodus ille conducet ad hoc vt homo intelligat, sicut neque imago coloris, licet eadem sit in lumine atque in spiritu, efficiet, aut lumen aut congregatum ex lumine ac spiritu videat. Solus enim videt spiritus ille visiuus, in quo solo est & videndi virtus, & imago coloris secundum visuum modum. Neque vltèrius nobis obiciant congregatum illud ideo intelligere, quia phantasia offerat intellectui quæcunque sit intellecturus. Sic enim animal quoddam similiter constituetur ex lumine atque spiritu, quod vocabitur visuum animal, totumque videre affirmabitur, quia lumen spiritui offert quod videat. Resipiscant igitur quandoque Auerroici, & cum Aristotele suo consentiant, illud quo quid actionem propriam exercet, formam esse eius propriam, speciei que effectricem, propriam verò hominis actionem esse intelligentiam, per quam specie differat operando à brutorum actionibus, ideoque per intellectum tanquam intimam formam specie differre in essendo ab irrationalium animabus. Nonne ex hoc Aristoteles ostendit animam esse formam, quod per eam animal viuit & sentit, homo autem intelligit, ac duntaxat per intellectum, itaque in ea quæstione qua principium quo intelligimus indagabat, naturam mentis denique tradidit, dicens intellectiuam animæ partem esse illam qua intelligimus. Quod autem plurali vitur numero, ostendit non separatum quiddam, sed nos propriè intelligere. Atque in ipsa hominis anima intellectum tum agentem collocat, tum capacem. In secundo libro de anima definitionem omni animæ communem esse hanc inquit: Anima est actus corporis Phisici organici potentia vitam habentis. Siue, anima est principium viuendi, sentiendi, secundum locum mouendi, intelligendi. Rursus. Anima est id quo viuimus, & quo sentimus, ac intelligimus primo. Ex his autem duabus descriptionibus concludit primam quasi per syllogismum. Cum verò non debeat syllogismus ex terminis æquiuocis fieri, consequens est vt illa dictio actus, idem vbi que significet, id est, actum corporis naturalem, quod ipse statim aperit, quando subdit diuisionem substantiæ in materiam, eiusque formam, & quod ex aliis com-

ponitur. Dicitque animam omnem esse eam formam quæ pars altera sit compositi. Iterum, ubi est intelligendi potentia, sunt etiam sentiendi & nutriendi potentia. Ac sicut triangulus est in quadrangulo, sic anima vegetatiua in sensitiua. Atque hæc in anima intellectiua. Et quamuis intelligendi vim dicat separari, id est, distingui, & separabilem esse ab aliis tanquam perpetuum à caduco, tamen dicit insuper intellectum distingui ab aliis, vel subiecto, ut prisci putabant, qui rationem capiti, iracundiam pectori, libidinem iecori tribuere videbantur, vel distingui potius ratione quadam, sicut in eadem superficie concavum à conuexo. Præterea laudat eos præ cæteris, qui hominis animam esse quidem incorpoream, sed tamen corporis aliquid, id est, actum talem in tali quodam subiecto, arbitrarentur. Hinc in tertio libro de anima dicit: Cum intellectus non sit à corpore separatus, perscrutandum erit aliàs, utrum formas à corpore separatas intelligere possit. Evidentissime autem in libro naturalium secundo id aperit, ubi vult animam hominis esse formam naturalem, & separatam à materia, atque coniuncta. Coniunctam quidem esse dicit, quia terminus sit generationis humanæ, separatam verò eam arbitror dicere propter intelligentiam. Hæc verò neque de anima cogitatiua, neque de vnica mente rectè intelligi possunt. In libro etiam duodecimo de diuinis, ubi negat formas materias suas præcedere, sequi verò post materiam, eam duntaxat formam concedit, quæ sit anima intellectiua, manifestè declarans animam nostram esse formam corporis, incipere cum corpore, neque tamen desinere. Neque intelligi verba illa possunt de Auerroica mente, quæ inter mouentes causas numerabitur potius quàm formales, & corpus antecedit humanum, neque corpori nostro ab ipsa genitura coniungitur, quod est contra ordinem illum quo Aristoteles in secundo libro animalium utitur, ubi ab ipsa origine nobis adhibet intellectum, licet extrinsecus desinentem. Theophrastus quoque & Themistius intellectum ab initio coniungi nobis, atque esse animæ nostræ insitum consentientur. Quod si legitur apud Aristotelem, quod genitum est, fore corruptioni obnoxium, nihil ad animam, quæ non per motum genita est, sed creata momento. Verum sit omne quod coepit, apud Aristotelem corruptibile. dummodo natura sua sit tale. seruetur tamen semper Dei virtute, quod à Deo processit

rit sine medio, quod totum à Pythagorâ inuentum est, à Platone probatum. Si fuisse semper hominum generatio, extet nunc multitudo animarum innumerabilis, dummodo in eadem specie sint. Species verò infinitæ esse non possunt. Res autem eas quæ & spiritales sunt, & eiusdem speciei, esse posse innumerabiles ex eo indicant quidam Peripatetici, quod à colore & lumine innumerabiles imagines in aëre procreantur. Sunt tamen Philosophi nonnulli, qui non semper fuisse generationem hominum arbitrentur. Mitto nunc Pythagoricum illud, generationem scilicet sempiternam, sempiternum quoque certumque numerum animarum corpora commutantium.

*Ratio tertia, quia homo libere seipsum mouet.*

### C A P V T VIII.

**P**latonici & Peripatetici omnes consentiunt hominem mouere seipsum, actionesque humanas ita disponi, ut homo ipse qui operatur, suarum operationum sit dominus. Agere autem rationaliter certo modo ratiocinando antequam exequatur. Accipere primum vniuersalem regulam, deinde subiungere opinionem particularem, tertio inferre conclusionem, hoc pacto: Omne bonum eligendum, cibus ille bonus est, igitur ille cibus est eligendus. Prima argumentationis huiusmodi pars solius est mentis, secunda potest esse etiam phantasie, tertiaque similiter. Et sicut in sola mente est vniuersalis regula iudicandi boni, ita in ea sola vniuersalis appetendi boni voluntas, in phantasia non potest esse nisi particularis opinio, appetitioque particularis. Quando affirmant hominem libere mouere seipsum, non solam mentem accipiunt in qua mouere est ad opera potius quàm moueri, non solum animal, in quo moueri est & cogi ad opus potius quàm libere ducere, sed ambo simul accipiunt. Quod si ambo simul speciem quandam & personam vnam humanam efficiunt, mens erit forma viuifica corporis. Sin minus, nusquam reperietur aliquid quod libere moueat semetipsum, sed mens quædam animali propinqua animal coget ad motum, sicut violentia lapidi immissa à iacente lapidem pellit in altum. Atque ita confictum erit libertatis nomen, sicut persona hominis est conficta. Omnino autem posita vna (ut vult Auerrois) mente, quicquid ad quæsitum responderis, aut absurdum eris,

aut nobis quidem conueniens, Auerroi autem minimè. Siue enim mens illa mouet nos, natura certè continuè similiterque mouebit, sicut intelligentia cœlum, nam sic illam nobis sicut cœlo intelligentiam adhibent. Siue voluntate, aut per illam coget nos, atque ita liberi nunquam erimus, nihilque erit in ordine rerum quod liberè moueatur aut persuadebit, quo admissio, quæram quonam pacto ego scilicet animal cogitatum, persuasionem illam percipio, ad quam non aliter possum quàm per intelligentiam peruenire. Atque sic apparebit intelligentiam mihi propriam esse, præsertim cum oporteat, si liberè moueor, eandem substantiam esse quæ persuadeat moueatque, & quæ persuadeatur atque moueatur, alioquin libertatis nomen erit inane. Sed rursus ad idem diuerso quodam tramite procedamus. Cum compertum habeamus viuum hoc corpus à mente moueri sæpissimè in illis præsertim operationibus, quæ præcedente consilio ordinatissimis modis ad finem rationalem conducunt potius quàm corporeum, quærimus vtrum mens per naturalem coniunctionem substantiæ suæ ad substantiam corporis ipsum moueat, an solummodo per imperium? Non videtur per imperium solum id facere, quia non aliter hoc faciet quàm persuadendo aut præcipiendo phantasiæ vt ipsa membra corporis moueat. Atque ipsa mouebit, si modo consenserit. Nunc autem sæpenumero intellectus agitat corpus contra phantasiæ sensusque affectum, appetitu sensuum reluctante. Mouet itaque membra per naturalem quandam substantiæ suæ coniunctionem, ac per esse potius quàm per imperium.

Proinde si plerumque contra phantasiæ inclinationem, ipsa phantasia minimè persuasa, mens tum sistit membra, tum mouet, idque facit intrinsecus, & eodem ordine quo solet phantasia mouere, quis non videat tunc quasi cessare ab opere animam illam cogitatuam, atque esse superfluam, cum mens opera illius vsurpet? Mentem verò per modum naturalis formæ mouere. Siquidem natura est intrinsecum motus statusque principium. Et cum pariat motum in membris externum, multò magis parere poterit motum intrinsecum in humoribus, qui facilius agitantur. Humores autem agitando qualitates eorum ad nutritionis opera temperabit. Rursus quanto magis vibrare poterit spiritus qui aura vel leuissima commouentur. Dum intrinsecus spiritum temperabit,

sensum exercebit in spiritu. Quid igitur opus est nobis geminis animabus, intellectuali, & cogitatrice, cum vna sufficiat, nec minus possit mens & intelligere & sentire, quam cogitativa sentire & alere? Imò & alere potest mens, postquam vegetatrix non alere solum potest, sed elementorum quoque motus actionesque peragere. Est profecto in nobis vis aliqua quæ esse ipsum siue ens & rationem ipsam considerat communiori quodam conceptu quàm sit sensibile vel insensibile, ac potest pro arbitrio aliquod intelligibile ad sensibile aliquod, imò singula & cuncta intelligibilia, ad singula & cuncta sensibilia comparare, quo fit vt eadem vis hæc omnia noscat.

Cum verò sensus insensibilia non attingat, neque percipiat quicquam communius vniuerso sensibilibus genere, & phantasia ignoret vniuersalia, vis illa sola mens erit. Igitur in substantia mentis, vis erit omnium sensibilibus discretiua sicut in phantasia, quæ certè poterit phantasia quædam excellens, sensusque intellectualis cognominari. Vbi sentiendi vis est, sit & sentiendi actus, modo non desit spiritus, in quo siue passionibus corporis exprimentur, siue imagines qualitatibus effulgeant. Spiritus autem lucidus subest menti efficiens ad officium sentiendi, ideoque excellens illa phantasia quæ in mentis substantia est, infusa spiritui cerebri cogitat, infusa oculorum spiritui, videt, dum ex vno fonte multas effundit vires. Nempe si apud Auerroem phantasia corporea substantiæ intellectuali ministerium præbet ad actum intelligendi, cur non etià apud nos spiritus qui phantasiam corpoream comitatur, eidem mentis substantiæ seruiat ad exequendum phantasiæ illius actum quæ comitatur intelligentiam? Ac si membra terrestria corporis motum à mente suscipiunt, atque ad exteriora transmittunt, quid obstat quo minus ignei spiritus per mentis præsentiam illustrati, imagines corporum occurrentes mentis offerant phantasiæ? Quamobrem in eadem mentis substantia vis intelligendi, sentiendi, nutriendique locatur, in qua etiam tota vis consistit liberè operandi atque mouendi. Quando enim aliquid per rationem acturi sumus, necessariò antecedit in nobis ratiocinatio illa quam suprâ descripsimus. Quæ si sparsa per multas substantias quasi personas fuerit, non exhibit in actum. Oportet enim omnem effectum ad vnâ causam principalem reducere, in qua tota agendi facultas & ratio colligatur.

Actiōnis autem humanæ ratio in illa ratiocinatione confisit. Tota ergo in mentis natura concluditur, quæ quidem natura sufficiens erit humanæ actiōnis principium, tum quia in ea tota ratiocinatio est, tum quia illi etiam soli corporis obediunt membra, oculus, lingua, manus, pedes, tam facillè, tam citò, tam assiduè singulos penè mentis nutus percipiunt & sequuntur, ut incredibile sit, mentem non esse propriam horum formam, familiarēque reatricem.

*Ratio quarta, quia vires animæ se vicissim  
tum impediunt, tum movent.*

### C A P V T IX.

Quoties natura una duashabens dissimiles vires agendi, in actum unius nimis intenditur, ab alterius actu fermè desistit. Ideo conuiuæ acutè audire lyram simul & epulas gustare vix possunt. Quod si intentissima degustatio non impediret auditum, has vires duas non unius substantiæ, sed duarum esse affirmaremus substantiarum. Actus autem alendi & sentiendi intentissimi humanam intelligentiam impediunt, atque hæc illos. Quod significat intellectum esse ipsius eiusdem nostræ animæ vim, cuius est nutriendi virtus & sentiendi.

Respondebunt ad hæc Auerrois sectatores, sensum & phantasiam duas esse animæ nostræ vires, atque ideo se inuicem impedire. Actum verò phantasie propter nimiam sensuum intentionem remisso, debilitari insuper mentis actum, non quia mens in eadem sit anima qua phantasia vel sensus, sed quia ad creandas & videndas species mens phantasie indiget ministerio. Quamquam non pertinet ad Auerroicos dicere phantasiam propter intentionem sensuum remitti, qui putant phantasiam esse motum factum à sensibus. Neque etiam verisimile est phantasiam studio nutriendi multum debilitari, tamen dimitamus nunc alimoniā atque sensum, phantasiam verò accipiamus & mentem. Ego certè hoc experior in meipso, inuenta nimium phantasia remitti humanam intelligentiam vel rationem, atque contra, adeò ut vacet mens siue ratio plurimum, quando nimis imperat phantasia, etiam si sana & sobria phantasia sit, atque è conuerso. Quemadmodum & sensus, etiam si sanus fuerit, quando attentius circa externa versatur, distrahit phantasiam atque contra.

Rursus, quando in somniantibus, ebriis, iratis, amantibus, amentibus & phreneticis phantasia tota animi attentione suas in se volutat imagines, nonne omne mentis humanæ, vel rationis iudicium consopitur? Quando autem in contemplantibus ratio diuinis considerandis ardentem figit intuitum, an non silet maximè phantasia, & si quid interpellat, tacere statim à ratione iubetur, neque permittitur, aut affectibus efferrī nimium, aut per consuetas ambages latius euagari? Quis ergo negabit mentem & phantasiam eiusdem animæ vires esse, cum sua se vicissim intentione debilitent? Cæterum, concedamus Auerroicis tantam esse motionis vicissitudinem inter mentem & phantasiam, quanta est inter communem sensum atque particularem, & sicut imago rei in oculo lucens, inde in sensum relucet communem, similiterque & actus videndi ab oculo in communem redundat sensum, ita à phantasia tum simulachra, tum actus in mentem continuè refulgere. Quamquam mihi videtur etiam maior esse vicissitudo inter mentem & phantasiam, quàm inter interiorē sensum atque exteriorē, quia à mente in phantasiam tam simulachra quàm actus reuerberantur, ab interiorē autem communique sensu in oculum, quomodo id fiat, non planè video, neque ipsi declarant. Quòd si & hoc quandoque fieri in somniantibus asserant, esto. Inueniam rursus aliud in quo illarum vicissitudo horum vicissitudinem superet. Quippè inter mentem & phantasiam non speciei actusque tantum, verumetiam affectus habitusque mutua fit commutatio, quæ inter hunc & illum fit nunquam. Cum igitur menti ad phantasiam multo maior cognatio sit, copulaque insolubiliior quàm sensui communi ad alium, & tamen sensus hic & ille in eadem anima sint, cur non mens quoque & phantasia in anima sint eadem? Cur mens æterna usque adeò erga temporalem phantasiam fermè semper afficitur ut obsequatur ipsi & blandiatur, ac dolente illa siue gaudente condoleat (ut ita dixerim) & congaudeat, nisi eiusdem naturæ & substantiæ fundamentum utrisque subiiciatur. Quoniam pacto vis phantasie finita vim mentis quodammodo infinitam sapè comitatur agendo, ut quousque illa speculatur, eo usque hæc illa cogitet, nisi substantia eadem æquet utraque? Nunquam fit inter aliqua duo subita, facilis, integra commutatio qualitarum, nisi communis illis materia sublit. Quapropter neque intellectus tam facile fieret unquam phantasticus, aut phan-



ratia intellectualis euaderet, neq; ille irrationalis efficeretur aliquando, aut illa rationalis, nisi commune subesset vtrifq; subiectum. Sicut enim rota altera mouet alteram, quia eidem machinæ innituntur, sic duo illi appetitus, rationalis scilicet & irrationalis, sese mouēt vicissim facillimè tam impetu quàm iudicio, quia in eadē animæ substantia sunt. Hinc Aristotelicum illud in libro de Anima 3. Quemadmodum sphaera mouet sphæram, sic concupiscentia voluntatem; non autem concupiscentia mouere, nisi sit aut quasi sphaera superior trahens inferiorē, quod nemo vnquā dixerit, aut sphaera eidē artificio cui & mēs cōnexa.

*Quinta ratio, quia separata mens non indiget phantasia.*

## C A P V T X.

**M**Entis natura apud Auerroem non habet esse commune cum corpore, non esse proprium illi communicat. Non habet inde originem, neq; secundū essentiam, neq; secundum præparationem ad existendum. Non cōficit cum ipso speciem aliquam, neque secundum numerum corporum numeratur. Itaq; sicut habet essendi modum ab hoc animali penitus separatum, sic cognitionis modum habebit prorsus à corpore segregatum. Quapropter nulla ratio est quæ eam cogat species à phantasie simulachris haurire, atque tēporali mobiliq; discursu ad ipsam rerū præsertim æternarum sciētiam indigere. Profectò erit supernis mentibus quam simillima, & in illis multo propinquior, quàm corporum qualitatibus. Igitur illas, earumque more intelliget magis quàm istas. Quod est cōtra duce Auerrois Aristotelem, qui hanc mentem scribit, nihil absque simulachris intelligere. Simulachra verò corporum sunt, non mentium. Omnino autem cū prima familiariaque humani intellectus obiecta sint communes ipsæ naturalium naturæ, rationesque coniunctæ quidem corporibus, sed à corporibus separabiles, licet nobis ex proportionē quadā potentiæ ad obiectū, argumentari talem esse hominis intellectum, vt & cōiunctus sit, & possit à corpore separari, & quia coniunctus est, idcirco penè semper ad simulachra se conuertat. Profectò, quia coniunctus est, ideo se ad cōiuncta conuertit. Et quia modo separabili est coniunctus, ideo modo separabili se conuertit, id est, abstrahendo, atque separando. Mentes verò quæ non solum separabiles, verum etiam separatae sunt, & separabili modo & se-

parata pariter intuentur. Proinde, vt summatim dicam, nihil mihi magis videtur humanæ mētis naturam esse mediā demonstrare, quàm naturalis eius inclinatio ad vtrunq;e. Sine enim per intellectum vel incipiat à corporibus, mox inde se ad incorporea transfert, vel si ab incorporeis interdum exordiat, vicissim ad corporum simulachra labitur. Siue per voluntatem vel optet æterna, interim inde temporalium affectu deflectitur, vel contrā cupiat temporalia, vicissim inde sæpè æternitatem reuerentia cohibetur. Sed ad quæstiorē iam Auerroicam reuertamur. Respondebunt Auerroici, hunc intellectū mentes quidem supernas intelligere absq; simulachris phantasie, naturas corporum minimè. Nos ad hæc inferemus. In mētibus illis esse species corporū incorporeas, per quas de corporibus iudicat. Propterea si intellectus hic eas intelligit, ab eis accipit corporū cognitione. Nihil ergo opus est vt à corporibus eam accipiat. Tū illi intellectum hunc asserent infimū esse, in seipso subsistere, ac nobis hærere. Quantum in se subsistit comparari, ad mētes superiores vt perspicuum vitreūq; corpus ad lucē, easq; perspicere: quantum nobis adhæret, haurire species à simulachris, & corporalia intelligere. Nos ad hæc primum quidem dicemus superuacuum id esse, vt intellectus qui semper inspicit corpora in corporum causis, eadem quoque semper videat in simulachris, & qui habet in æternitate, quotidie mutuatur à tempore. Deinde, non quia nobis adhæret, à simulachris accipit species, sed quia illas hinc capit, adhæret. Vt enim arbitrat Auerrois, ex eo solum coniungitur intellectus, quòd speciebus formatur à nobis acceptis. Ergo considerandus est intellectus prius quasi præparatus per quandam potentiam ad huiusmodi species capiendas, quàm nobis adhæreat. Non igitur per hoc quòd hæret nobis, est ad huiusmodi species præparatus, nisi forsitan opinetur ipsum hærere nobis quantum ad naturæ spectat propinquitatem, id est, intellectus illius naturam esse gradu quodam nostræ animæ proximam. Si ita sit, nihil amplius consequetur, quàm vt mens huiusmodi nostram animam moueat atque formet. Dignior enim gradus quando propinquat inferiori, non accipit ab eo, sed tribuit. Sphaera lunæ sphæram mouet ignis, non mouetur ab illa.

Cur ergo mens hæc scientiam mutuatur ab anima, potius quàm mutetur? Nempe si superior est, & tanto præstantior quanto arbitrat Auerrois, debet ipsa

quidem per se sapere solum, anima verò per ipsam, præsertim cum eodem modo mens hæc coniuncta sit corpori, quo & mens cælestis est cælo, ut vult Auerrois. Quapropter, sicut illa nihil capit à cælo, ita nihil à corpore. Neque nobis obiciant Auerroici, sicut cæleste corpus suis fermis plenum est, sic eius mentem suis esse plenam, nostram verò nouas semper formas accipere, sicut corpus nostrum formas suas continuè variat. Obiectio hæc nihil efficit. Ea siquidem artificis actio modum sumit ab instrumentis, quæ per instrumenta transigitur, sicut sectio, & similia. Ea verò quæ in sola mente artificis permanet, ut disponendi operis consultatio modum ab instrumentis non accipit. Quare non decet dare modum intelligentiæ ex ipso corpore, per quod intelligentia non expletur.

Interrogabimus deinceps Auerroem, nunquid mens dum in nobis intelligit, perfectior fiat, an imperfectior, an neutrum. Si neutrum, inanis erit perpetua hæc agitatio, nihil operando proficiens. Imò nec operabitur quidem, nam ad indifferenter terminum non fit motus. Si perfectior, æternæ mentis perfectio semper à simulachris temporalibus depēdebit. Semper id quod est imperfectum, id quod perfectius est perficiet, præsertim cum non aliter velint moueri ac formari eam à phantasia nostra, quàm à corpore speculum. Sin imperfectior, quomodo semper mouetur ad imperfectum? Quo appetitu assidue nititur ad defectum? Et quod imbecillius est, qua vi semper inficit quod est præstantius? Nonne Auerrois ipse, ubi de mentibus disputat separatis, inquit eas cum per suam essentiam æterna cognoscant, temporalia nulla cognoscere, alioquin, ut inquit ipse, & suo vtar verbo, vilescerent. Si ita est, sequitur ut ex Auerrois sententia temporalis cognitio ibi defectum afferat, ubi cognitio est æterna. Cum igitur intellectus humanus (quod ipse asserit) semper æterna cognoscat, non modo frustra dicitur intelligere temporalia, quoniam hinc perfectior non euadat, sed etiam quia fiat hinc imperfectior. Ego certè imperfectiorem fore mentem illam æternorum speculatricem in nobis ob eam causam arbitror, quòd semper hic falsis illuditur imaginibus, curi que turbatur. Atque hanc eius intelligentiam in rerum natura superuacuam esse, quia conferat nihil, nec ullius finis gratia sit instituta. Animis quidem nostris quid tribuit sui? Nonne particularem ratiocinationem hu-

manus animus natura habet sua, perque illam, ut putat Auerrois, instruit mentem, imò sæpè illudit & turbat? Vniuersalem verò discursum neque ex se habet, neque capit à mente. Non enim est capax vniuersalium æternarumque rationum particularis animus & mortalis. Si enim eas caperet, intelligeret sanè, atque intellectus esset, & sempiternus. Nihil igitur confert nostris animis huiusmodi copula, nisi fortè conducere putas nobis ex eo mentis præsentiam, quòd nos contra naturam trahit inuitos, & falsis implicat fabulis, dum fallaci spe diuinorum, priuāt nos præsentium bonorum iucunditate. Sed neque menti prodest, ut diximus, quæ cum diuina sit, non est ad hunc hominem, tanquam ad finem referenda, hominem, inquam, ab illius esse seiunctum.

Rursus, cum per suam essentiam supernas rerum videat causas, in quibus causæ omnes mediæ & effectus quilibet continentur, ideoque in illis perque illas perspiciat corporalia omnia, nihil nostris eget phantasiis & sensibus ad corporalia discernenda, præsertim, quia inest illi secundum Auerroem agens ille intellectus, qui cum in æterno sit actu, per quem naturam intelligibilem singulis potest sensibilibus commodare, potest & magis & prius capacem intellectum eodem intellectuali splendore replere, atque in eum species supernarum rerum sibi ingentitas capaci offerre, tum per efficacissimam virtutem sui vniuersales species illas in conceptus particulares deducere. Nam, si potest ex particularibus contingentibus vniuersalia fingere, potest etiam ex vniuersalibus, vel innatis, vel inspectis diuinitus particularia quæque concipere, præsertim cum essentia sit capace superior, atque munitus hoc iam ab æuo semper expleuerit. Neque rursus dicendum est, tum mentem, tum animal propter compositum ex vtrisque coniungi. Non enim ita iunguntur ut verè vnum ex vtrisque conficiatur. Neque decet partes veras ad falsum totum referre quasi finem. Fortasse dicent conferre copulam illam ad mundi decus & ornamentum. Ego verò non puto mundum superfluo hoc ornari figmento, imò portento, quod vnicum habet caput, & illud quidem, licet diuinum sit, tamen chamæleontis instar colores variat pro obiectorum varietate. Crura insuper habet innumerabilia, caput manet, crura semper amputantur, rursusque repullulant. Neque ro-

terabimus eos, si dixerint monstrum hoc ad rerum, tum superiorum, tum inferiorum connexionem conducere. Quo enim pacto connectet cetera, quod ipsum in se non modò non est vnum quiddam, sed neque connexionem suscipit aliquam aliunde? Vnam quandam formam esse oportet in mundo, quæ superiores formas nectat inferioribus. Nam formæ unitatisque officium est connectere. Atque in ea congruere oportet formarum omnium proprietates, itavt formæ superiores remittantur quodammodo, atque ad inferiores deiiciantur, inferiores autem intenduntur, extollanturque ad superas. In illo autem Auerroico monstro nec forma inuenitur vna communis, nec extrema inuicem in se commigrant, sed dum singula quod suum est seruant, remanent dissipata.

Denique, si intellectum esse dicant ubique sub Luna, frustra ibi ponent ubi nulli vnquam sunt homines, vt puta in summo aëre, in nauigabili æquore, terraque inhabitabili. Ibi enim nihil intellectus vnquam proficit, neque mouet quicquam. Peripatetici verò diuinas mentes nusquam designant, nisi ubi accommodatè regunt aliquid atque mouent. Quod si dixerint illic illum esse duntaxat ubi sunt homines, duo statim sequentur absurda. Primum quòd totus erit in duobus hominibus longissimo inter se intervallo distantibus, neque tamen erit in medio, quod natura non patitur. Alterum, quod motus hominibus, ipse quoque mouebitur. Moueri tamen vel per se, vel per accidens substantiam illam quæ neque corpus sit, neque forma propria corporis. Peripatetica secta non solet admittere. Proinde quæ ratione tam diuina mens homunculum oberrantem, rarissimeque mente vtenrem, quasi pedissequa passim comitetur, quis explicabit? Nunquid naturali necessitate? At verò superior est, & hoc neque ad esse, neque ad bene esse suum indigere videtur. Sed neque violentia, neque consilio licet fingere. Neque licet afferre quòd ideo mouetur moto homine, quia naturaliter humanæ speciei accommodatur. Non enim aliter illum huic accommodant, quàm cælo mentem, quam tamen vnà cum cælo moueri non putant.

Postremò, si dixerint mentem moto homine non moueri, fateri compellitur, tum mentem quandoque procul à mentis præsentia viuere.

*Ratio sexta, quia intellectus vterque est virtus in anima.*

## C A P V T X I.

**Q**Uod autem intellectum agentem, atque capacem, duas esse affirmant essentias ex quibus vnum esse intellectualis animæ constituitur, id quidem superfluum & absurdum. Superfluum, quia vna essentia sufficit viribus duabus instructa, itavt per vnā efficiat species, per alteram capiat, sicut & phantasia intentiones quasdam ex imaginibus haurit, & hausas ipsamet recipit. Et oculi animalium quæ noctè vident, in eadem essentia vires geminas possident, per vnā imagines colorum eliciunt, per alteram capiunt. Ipsum quoque lumen colores quosdam in nubibus aut aqua & facit, & suscipit. Quo autem pacto in eadem essentia duplex fundatur potentia, effectrix & susceptiua? Ex diuersis videlicet principiis siue relationibus. Sanè lumen prout à Sole est, colores facit, profit quasi in seipso est extra Solem, suscipit. Ita & anima quantum ex Deo est actu purissimo, vim sortitur ad species fabricandas. Quantum verò in seipsa est infra Deum, euadit quasi passiuæ, ac species suscipiendo formatur. Quo fit vt figmentum illud Auerroicum sit superfluum. Est & absurdum, quoniam ex duabus essentiis quæ actu vterque existunt, esse vnum substantiale non constituitur. Duo namque existendi actus, duo sunt esse, non vnum. Intellectum agentem apud illos esse actu substantiam quædam postquam agit aliquid, non est dubium, neque nos contra pugnamus. Quod autem adiungunt capacem quoque intellectum esse substantiam alteram actalem, vt mera potentia sit, non aliter quàm materia prima, non probauimus. Nam si mens capax pura potentia sit, à materia prima non distinguetur. Et ubicunque materia erit, erit intelligentia, itavt & lapides ipsi intelligant. Certum quidem est materiam primam esse meram potentiam. Non potest autem mera potentia in natura esse nisi vna, sicut neque merus actus nisi vnus, atque è conuerso. Si enim quæcunque in potentia esse dicuntur, per vnā rationem communem talia sunt, & quæcunque actu similiter necessarium est ad vnicum potentiarum fontem, & vnicum actuum peruenire.

Iterum, si prima & communis in rebus distinctio compositiove illa est, quæ per potentiam fit & actum, atque ex vno non sunt multa nisi per ordinem quæ-

dam aliorum ad alia, & ex multis similiter non fit vnum nisi per huiusmodi ordinem, in quo aliud ad aliud tanquam potentia refertur ad actum, sequitur vt multitudo in rebus ab ipsa potentia actusque commixtione sumat exordium. Quo fit vt neque merus actus neque mera potentia multiplex esse valeat, postquam neque potentia nisi per actus mixtionem, neque actus nisi per mixtionem potentia subit numerum. Ex quibus conficitur vt mens pura potentia esse non possit. Ac si dicatur mentem quoque simplicem potentiam esse non minus quam materia sit, & ab ea nihilominus discrepare, sciscitabimur qua ratione à materia differat.

Planè non quantum potentia est, tum quia in hoc ipso conueniunt, tum quia per potentiam confusio regnat & chaos, distinctio fit per actum. Adicietur igitur menti aliquid vltra potentiam, per quod differat à potentia materiae, & id quidem aliquis actus erit. Atque hic actus si mentis gremio sit infusus, efficiet vt mens non sit mera potentia, postquam actum habet admixtum. Sin incumbat extrinsecus, non prius efficiet vt mens à potentia materiae differat quantum illa potentia est, quam per actum proprium agendo in mentem, actum aliquem menti intimum tribuat, per quem à potentia pura in quantum potentia discrepet. Talis enim discrepantia non fit nisi per actum aliquem, in quantum est actus, atque ita rursus mens non erit potentia pura. Fingent Auerroici mentem ideo differre à materia, quoniam mens alium actum respicit scilicet absolutum & vniuersalem, alium verò materia scilicet concretum atque particularem. Quasi verò ipsi respectus non actus aliqui sint. Nempè si respectus mentis non sit aliud quam ipsa mentis potentia, differentiam non adhibebit. Sin aliud fuerit, erit actus. Præterea si mens ac materia prius sunt quam respiciant formas suscipiendas, & vt sunt in seipsis, ita respiciunt, certè ex eo quòd diuersæ inter se sunt, diuersos actus respiciunt, non è conuerso. Neque putandum est mentem respicere actum perfectiorem quam materia illa respiciat, nisi ex eo quòd mens est illa perfectior. Si ita est, longius discedit à nihilo, & propinquius ad actum accedit summum, vnde est omnis perfectio, non igitur sola potentia est. Proinde si materia inter actum atque nihilum tenet medium, & quod infra eam consideratur, non est vltimum quod super eam actus existit, aut actum, quærimus vbi locemus mentis essentiam. Perfecto si ipsa est aliquid, infra ma-

teriam non locabitur. An fortè in eodem perfectionis gradu quo & materia constituitur? Nequaquam. Nihil enim præstantius susciperet quam materia. Accedit, quòd sicut ea quæ per quantitatem sunt æqualia, per eam sunt & vnum, ita quæ inter se secundum perfectionem æqualia sunt, perfectione sunt vnum. Perfectio in forma est, per formam species. Quæ ergo perfectione vnum sunt, sunt vnum forma, & vnum specie. Hinc accidit vt duæ quædam rerum species æquè perfectæ inter se esse non possint. Quare mens est quæ est alia species quam materia, in eodem perfectionis gradu dum materia non locabitur, ergo in gradu præstantiore. Si super materiam ponitur, erit actus, aut saltem actus. Et tanto magis actus quam formæ reliquæ naturales, quanto longius quam omnes multis gradibus remota est à materia, & actui diuino propinquior. Si actus est, neque in genere sensibilibum collocatur, certè super rerum sensibilibum actum in genere & in specie intelligibilibum intellectualem secundum certam speciem habebit actum, siue intelligibilem. Quinetiam in genere rerum actum habebit vitalem, quo viuificet sensibilia. Quod si dicatur sic se habere ad formas intelligibiles, sicut materia se ad sensibiles habet, exemplum quidem hoc erit vtcunque poterit verum, non tamen coget mentis essentiam esse totius actus expertem. Opinabitur forsan Auerroicus aliquis rationes superiores ita demum se subterfugere, si concesserit ipsam potentia meræ naturam non esse ad extremum punctum coarctatam, sed habere in se aliquam latitudinem qua intendatur & remittatur, ita vt eius perfectio naturalis in mente sit intensior, in materia verò remissior. Sed neque sic quidem subterfugere poterit. Sicut enim merus actus est actus summus, sic potentia mera summa potentia. Quod verò in aliquo genere tenet summum, id certum (vt ita dixerim) habet limitem, vltra quem genus non porrigitur, citra quem quod est, nondum est summum, neque etiam merum. Quippè qualitas non aliter cadit à sui generis summitate, quam per quandam oppositi generis mixtionem.

Præterea si natura potentia in mente est perfectior quam in materia, per aliquam superadditam sibi perfectionem mens non est potentia pura, quòd si per seipsam, tunc potentia ipsa intensior est in mente, remissior in materia. Aut ergo secundum magis, aut secundum minus est intensior. Si datur primum, materia non

amplius erit extrema potentia, cum sit 2-lia quæ magis potentia est, si secundum, mens non erit potentia mera, quia quod est melius, summæ bonitatis magis est particeps. Ea verò summus est actus. Cum igitur mens non sit potentia mera, non est in ea substantialis sed accidentalis potentia, & quia potentia actusque congruere debent, accidentali quidem actui subiecta erit, substantiali nequaquam. Quapropter ex ipsa & substantiali actu intellectus agentis non potest tertia quædam substantia fieri.

Potentia enim secundum quid, ut inquiunt Metaphysici, aliquem simpliciter actum non suscipit. Putant Aristotelici intellectum capacem vniuersales rationes rerum naturalium tunc intelligere, quando earum formas absolutas intelligibilesque acceperit. Quoniam verò in seipsis tales non sunt & fieri actu intelligibiles non aliter possunt quam per naturam intellectualem atque agentem, intellectum aliquem efficacem introduxerunt absolutarum formarum procreatorem. Si natura hæc intellectus agentis sit virtus quædam eidem essentia inrita, cui & capax virtus innata est, quid opus est Auerroica illa geminarum substantiarum congerie? Sin autem alia quædam substantia sit hac excellentior, quæ vim intellectualem transfundat per substantiam mentis capacis usque ad simulachra phantasie, atque iis simulachris præstet vim formarum intelligibilium efficacem, quod Auerroici arbitrantur, multo & prius & magis vim eandem ipsi mentis capacis substantiæ largietur. Illa substantia modo largietur stabili, hæc substantia modo stabili capiet, cum vtraque sit æterna. Ipsa igitur substantia eadem quæ capacem vim habet, habebit & efficacem, neque opus erit ad duò illa mentis officia substantiarum coitu geminarum. Hinc etiam error Alexandri conuincitur, qui ut ex violenta Aristotelis expositione omnem diuinitatem humano generi auferret, mentes quidem capaces esse in nobis, numcroque distinctas asseruit, agètem verò mentem extra homines, atque vnicam, in qua sola sit tota mentis diuinitas, quæ sit vniuersalis causa intelligibilium specierum.

Verùm cum in omnibus rebus naturalibus sint virtutes quædam suorum morum effectrices, nefas est substantiam mentis humanæ naturalium omnium præstantissimam efficace virtute priuari. Et quia à virtute operatio proficiscitur, mens vniuersalis menti nostræ non prius tribuit actum

intelligendi, quam virtutem intelligentiæ effectricem. Quinetiam si causa vniuersalis particulari effectui prorsus opponitur, videlicet tum ut causa effectui, tum ut vniuersalis particulari, necesse est inter duò hæc particularem causam tanquam mediam interponere. Virtus quidem Solis vniuersalis hunc hominem, qui est particularis effectus, non produci nisi per hominem alium tanquam particularem causam atque propriam. Eadem ratione mens illa agens vniuersalis non producat effectum hunc, aut illum speciei intelligentiæque in mente capace sine mente quadam agente particulari quæ intra nos habitet. Sicut enim pro arbitrio nostro utimur ad intelligendum mente capace quasi forma quadam familiari, ita prout lubet per efficacem mentem species fabricamus quasi per artem propriam nobis & insitam. Scite Aristoteles mentem agentem atque capacem nunquam duas essentias appellauit, neque posuit super animam, sed vocauit animæ partes, dixitque eas duas esse differentes vires in anima. Si quis autem Auerroicam mentem appellauerit animam, is animæ vocabulo abutetur.

*Solutio rationum Auerroicarum de mente separata.*

## C. A P V T XII.

**E**X omnibus quæ contra Auerroem adducta sunt, duo concludimus. Vnum eandem esse in homine animam, quæ corporalia format, & formatur ab incorporeis. Hoc enim medio solum diuinorum radij usque ad infima transmittuntur, si idem quod ab illis illustratur, hæc illustrat. Imò & hoc medio infima ad sublimia reflectuntur, si idem regit infima, regitur à supremis. Concludimus & alterum, quod humanæ mentes ad numerum hominum numerantur, ita ut vel specie inuicem distinguantur, ut opinantur Magi, aut certè numero, ut posteriores Theologi asseuerant. Quot enim corpora hominum sunt, totidem, & vitales complexionones, totidem viuificæ animæ, totidem animarum mentes. Fæmè enim sicut ad corporum distributionem distribuuntur complexionones, atque ad has vitæ, sic ad viuificarum animarum numerum mentes distribuuntur, quæ vires sunt animarum. Non tamen ex distinctione corporis, tanquam ex causa substantiæ, virtutisque incorporeæ distinctio, sed ab ipso formatore incorporeo prouenit. Ra-



tiones verò illæ Auctrois, quibus ab initio quæstionis negabat intellectum esse corporis formam, nihil contra nos valent. Id enim efficiunt, ut non sit forma corporalis esse proprio carens, ac dependens à corpore per essentiam. Nos autem cum esse volumus non talem formam, sed inesse proprio subsistentem, & materiæ dominam.

Cæterum, ut referantur nonnullæ insuper captiunculæ, quibus Auerroici Platonicos captare obnixè student, meminisse oportet non esse præter naturam animæ humanæ ut corpori coniungatur, sed animæ huic sempiternæ, naturale esse ut semper cum sempiterno sit corpore atque cælesti, & cum temporali corpore atque terreno sit ad tempus, sicut & Planetæ cuique naturale est ut semper in sphaera sua sit, ad tempus autem sub tali signo vel tali. Postquam verò discesserit à corpore, naturale est rursus conciliari, ita ut seorsum à corpore maneat cum affectione quadam ad idem corpus iterum reuertendi, sicut & lapis etiam sursum positus manet integer, sed interim pro viribus ad inferiora declinat. Et Planeta discedens à signo, naturali ordine ad idem quandoque reuertitur. Redituram verò quandoque animam in eiusdem corporis habitaculum, ne in sempiternum frustra sit ille naturalis affectus, Magi & Ægyptij cum Platonici consenserunt. Alioqui violentum aliquid esset æternum. Quoniam verò per actum Dei anima in se est, per qualitates verò complexionis est in corpore, & actus Dei permanet sempiternus, complexio soluitur, definit esse quandoque in corpore, non tamen esse definit in seipsa. Subsistit in suo esse, postquam seiuncta est à corpore. Subsistebat similiter dum aderat corpori, sed non communicat esse, sicut communicabat. Neque mirabile videri debet, animam quæ ad tempus habitat corpus, posse manere seorsum à corpore incorruptam, si modo magis dependet mobile à motore quàm è conuerso. Animus autem verus motor est corporis. Ergo si corpora quædam separata ab anima manent quodammodo incorrupta, ut ossa, vngues, nerui, capilli, quæ videntur tempus longissimum perdurare, idemque faciunt ligna, saxaque, maximè verò balsamum, mel & oleum, quæ nunquam penè putrescunt, nonne animus rector corporis naturali ordine poterit manere semper absque corruptibili corpore incorruptus? Qui planè ostendit se in huius vitæ progressionem propter corruptionem talis aut talis corporis non corrupti, cum ipse per omnem æ-

tatem permaneat idem, exuatque materiam veterem, induat nouam, dum corpus propter effluxum reflexumque materiæ continuè innouatur. Sed pergamus ad reliqua. Quando anima accedit ad corpus, gignitur animal per generationem corporeæ complexionis, spiritusque vitalis. Quando discedit, soluta complexione ac spiritu resoluta dissoluitur animal. Neque ex aliquo contingenti hoc animal gignitur, sed ex ordinato concursu omnium naturalium causarum, similiterque dissoluitur. Hoc tamen dissolutionis malum Plotinus probat ad animam idcirco non pertinere, quia ipsa se corpori non miscuerit, sed permanens in seipsa, non ex se & corpore, sed ex corpore & suo quodam vitali simulachro vnum sub se irrationale animal composuerit. Sed hoc ipse viderit. Siue propinquat anima materiæ quantitate intercedente, non necessario extenditur, sicut neque superficies in corpore profundo fit profunda, neque linea in latitudine lata, neque punctum in longitudine longum, neque significatio vocis colorisque imago in amplo aëre fiunt amplæ. Materia enim ipsa potius quàm anima indiget quantitate. Siue antecedit quantitatem, aduenienti quantitati nequaquam subiicitur. Quippè cum per potentiam fiat susceptio, non per actum, in materiâ suscipitur quantitas, non in anima. Quantitas, inquam, indeterminata primum propter materiæ ipsius infinitatem, deinde ad certam figuram determinata propter præsentiam animæ, quæ certè speciei tradit initia. Nemo dubitat materiam naturali quodam ordine antecedere quantitatem. Causæ quidem naturales quia loco temporique subiectæ sunt, ideo localiter & temporaliter agunt, vnde & paulatim opus transigunt, partem que tum tempore cum loco post partem. Quapropter opus eiusmodi non possunt alibi quàm in materia iam extensa perficere. Deus autem quia omnem tum localem tum temporalem diuisionem exuperat, modo agit prorsus indiuisibili, indiuiduamque potest formam ipsi materiæ in eo ipso gradu quo ipsa antecedit quantitatem, tribuere, quam sicut & cæteras formas determinata quantitas comitetur, non in anima sed in materia iacens.

Sit vnica in homine communis forma totius, atque præcipua, id est, rationalis anima. Sint quoque, ut placet multis, multæ partium specie distinctarum formæ particulares obediens animæ, formæ carnis & ossis, & nerui, & reliquorum, ex quibus compositum quoddam fiat, quod figuræ

corporeæ, diuisionisque & passionis sit subiectum. Adsit anima corpori figurato, non figuretur. Animam verò ipsam non esse talis figuræ subiectum inde patet, quòd talis figura corporis & antecedit animam, & succedit. Cum interrogatur de ipso totius esse, nonnulli respondent per ipsum substantiale animæ ipsius esse, fieri esse substantiale totius, quod partium coniunctione resultat. Esse enim animæ dicunt, quo esse totius existit, quo & ipsa existit in semet ipsa.

Atque hæc anima in pede quiescere non sistitur, sed sistit in manu mota, mouet, & forsitan non mouetur. Sicut enim in corpore locali non subit locum, sed super locum adest, & inest loco, ita in moto corpore alienum non subit motum, sed quodammodo immobiliter est in motu. Ac si currit, cum mentibus currentibus currit transferens, non translata. Ergo quando eodem tempore mouetur manus, pes quiescit, non cogitur anima quæ tota est in vtrisque, tota moueri simul atque quiescere. Sed moueatur, si placet, anima in manu, respondet Scotus, quid cogit eam interim in pede quiescere? Nonne potest in pede immoto mente ipsa moueri? Quanquam sicut non est impossibile eundem hominem simul totum motibus moueri contrariis, dum naui defertur versus orientem Solem, at interim versus occidentem vel pellitur ab alio, vel ipse currit in naui, ita non esset absurdum apud Aquinatem Thomam, animam ad statum motumque alterius in diuersis quiescere simul atque moueri. Totà anima est in brachio, tota est in manu. Amputata manu, anima non truncatur, neque restat in aëre, neque se condensat in brachium, neque refugit tempore, (omnes enim hæc passionibus sunt corporum) sed tota viuificat brachium solum, quæ ante illud & manum viuificabat. Desinit autem esse ubi erat, non per motum, sed momento operari desinit ubi operabatur, quemadmodum si frangatur portio aëris exigua in Occidente, & euanescat lumen quod totum est in Oriente, ut vult Plotinus, totumque in Occidente, cum ea portione in qua etiam erat totum, non frangitur, sed illuminare desinit portionem quam prius illuminabat, neque temporali fluxu in seipsam se condensat, sicut neque ab Oriente in Occidentem temporali fluxu sese rarefaciendo protenderat, momento enim se fecerat presens, momento se facit & absens. Si anima ubique tota est per corpus, atque ipsa intelligit sola, intelligit & ubique. In nullo tamen membro intelligit, quia ipsa non est in membris, sed

in membra potius sunt in anima. Videtur tamen vulgo apud cerebrum intelligere, quoniam intelligentiam phantasia plurimum comitatur, hanc verò agitatio eorum spirituum qui sunt in cerebro, sicut affectus phantasie comitatur agitatio spirituum eorum qui sunt in corde vel iecore, affectum quidem iracundie spiritus sequuntur cordis, affectum libidinis iecoris spiritus. Si quis interroget quidnam sentit quidue intelligit Homo? Peripatetici respondebunt, sed aliter atque aliter. Sentire enim compositi actum esse dicent, primo quia vis sentiendi in ipso composito est ex materia formaque mixti, & anima, deinde & actum animæ, quoniam ipsius virtute fit sensus. Intelligentiam quoque esse totius compositi actionem. Quamuis enim in anima sola intelligentia sit, ideoque possit in separata anima remanere, tamen dum anima est ita forma compositi, ut in vnum esse commune concurrat, id totum cuius est id esse, ita per formam operari dicitur, sicut & esse. Huc illud Aristotelicum tendit. Intellectus nullius actus est organi. Et merito. Non enim in corpore est sicut sensus, sed in anima. Neque sicut putauit Auerrois, existimandus est esse ab homine, sed ab organo separatus. Neque rursus Alexandri more sic est exponendum, ut sensus quidem singuli singula sortiti sint instrumenta, intellectus autem ipsius corpus totum sit instrumentum.

Videmus enim nobilissimas vires non quouis sed nobilissimo solum instrumento uti, unde tactus quasi quolibet, phantasia vnico atque distincto vitur. Non ergo vniuersum corpus satisfaciet menti. Neque dicendum est ex omnium instrumentorum conspuratione vnā consonantiam confici, qua velut instrumento intellectus utatur. Nam si ita se res habeat, intellectus instrumentis omnibus indigebit, eritque maximè virium omnium organicus atque mixtus, neque Aristotelicum illud stabit vterius. Sensus quidem non est absque corpore, intellectus autem est separatus atque immixtus, nullo prorsus organo utens. Si enim organis vteretur, talis aut talis euaderet, neque omnia vterius cognoscere posset. Non tamen ita separatus est, quin animæ substantia in qua est corpus viuificet. Alioquin non dicerent hominem intelligere. Separatus est enim quia non est in composito sicut sensus, sed in ipsa animæ substantia, quæ est à composito separabilis. Neque intelligendo vitur instrumento. Quod quidem in libro de animalium & somno & yigilia, animalium con-

firmavit dicens, quorum sunt actiones, eorundem esse agendi virtutes. Quoniam verò sentire quidem per instrumentum contingit, intelligere autem minimè, idcirco sentiendi vim esse compositi, intelligendi animæ propriam esse posse.

*Solutio rationum Auerroicarum de mente unica.*

### C A P V T XIII.

**S**oluimus iam Auerrois Auerroicorumque rationes, quibus demonstrari putabant mentis substantiam formam corporis vitalem esse non posse. Soluamus eas deinceps, quibus unicam esse mentem, Auerrois conatur ostendere. Ex materia inquit, provenit formarum sub eadem specie numerus. At mens caret materia. Quanquam hæc quorundam Peripateticorum sententia est, Pythagoreorum tamen Platoniorumque plurimi speciei naturam vnam in plura individua fundi non propter externam materiam arbitrantur, sed propter insitos quosdam ipsi formæ modos, in quos actu perducta forma, individuum hoc aut illud exadet. Esse enim in quolibet Angelo Angelicam speciem ad Angelicum individuum absque materiæ mixtione deductam. Verum ut sequamur in præsentia partim Peripateticos, partim nonnullos Platoniorum, fortè concedemus vel ex materia, vel propter materiam, imò propter compositum ex materia & forma, formarum numerum provenire. Formæ siquidem corporales sicut ex materia quodammodo trahunt essentiam, sic & numerum sub eadem specie positum. Formæ autem non corporales quidem, sed corporis, quales sunt animæ rationales, quia non habent originem à materia, neque ab ea numerum habent. Quia verò non modo ad diuinitatis intuitum, verum etiam ad gubernacula corporum diuina providentia illas instituit, sicut voluit certum esse variorum corporum, id est, hominum compositorum numerum ad sui operis ornamentum, ita certum ordinat numerum animarum. Sed ut cum Plotino loquamur, quidnam Platonis animam distinguit à Socratis anima? Diuinus ille conceptus, qui vivificam animæ Platonice vim primò ad talis cuiusdam temperavit cœlestis corporis indumentum, perque hoc ad talem quandam præcipuè elementis corporis complexione gignendam regendamque accommodavit. Ita & ad sua quædam Socratis animam. Sic ergo vivificas ani-

marum vires discrevit propter materiam, imò propter compositum ex materia, mundani ornamenti gratia, vires autem animarum earundem intellectuales discrevit ad animarum distinctionem. Sed quam ob causam?

Propter alium atque alium diuinitatis intuitum. Sub variis ideis frui possumus mente diuina, per varia vestigia illam inuestigare, variis ad hunc finem callibus proficisci. Voluit sanè infinita bonitas non solum corporeis, sed etiam spiritalibus oculis seipsam infinitis (ut ita loquar) modis communicare, atque innumerabilibus penè oculis innumerabiles sui ipsius vultus ostendere. Itaque variorum animorum intellectuales oculos & affectus diuersis temperavit modis, ut diuerso tramite ad diuersas multiplicium diuinorum bonorum possessiones proficiscamur. Proculus ex mente Platonis in Timæo dicentis Deum animas hominum alias aliis ducibus stellisque accommodasse, probat differentias animarum non ex corporibus vel inclinationibus ad corpora provenire, sed ex ipsa essentiali accommodatione à Deo facta ad differentes duces atque stellas, unde & differentia inclinationum actionumque proveniat tum ad æterna videnda, tum ad temporalia gubernanda. Proinde quemadmodum Scotus eiusque sectatores disputant, omnis natura præter primam, quæ sola purus est actus, potentiam quandam quodammodo ex se informem & aliunde formabilem habet admixtam, quæ non aliter ad plures singularesque existendi modos, quam materia ad plures formas æquè se habet, ideoque sicut humana species & equina, sic & intellectualis pecies quælibet tam Angelorum quam animarum in plura potest individua derivari. Confert autem mentium in eadem specie numerus ad vniuersi ordinem omnino complendum. Siquidem ordo plenus ille est, in quodum superiora ad inferiora, tum hæc ad illa vicissim, tum æqualia inter se pariter ordinantur. Ordinem verò eiusmodi in rebus corporeis planè perspicimus. At si incorporea pleniorum habent ordinem, in ipsis quoque similem ordinem, id est, triplicem cogitare compellimur. Non autem potest esse ullus inter æqualia ordo, nisi plura sub eadem specie comprehendantur.

Conducit rursus numerus plurimarum in eadem specie mentium ad perfectiorem ipsarum felicitatem. Nam illæ seipsas quodammodo in se inuicem conuentes, æquali muneraque (ut naturaliter fieri solet)

tum agnitione rum familiaritate congratulantur. Denique longè pulchrius est vniuersum, si vbiq̃ue infra species quemadmodum supra species sit multitudo. Supra quidem, generali specialique, infra verò numerosa quadā varietate decora. Neque putant singulorum numerum ad id duntaxat conducere, vt species ipsa seruetur, quia etiam in corporibus longè plura indiuidua vbiq̃ue sunt quā opus sit ad speciem conseruandam. Præterea videmus naturam in singulis speciebus multa non salutis omnino, sed etiam ornamenti gratia facere, quod in coloribus & figuris lineamentisque & dispositione quadam ordinatissima manifestè videmus. Denique finis præcipuus cuius gratia Deus omnia esse vult, haud propriè est vt sint, imò potius vt bene sint, ac bene se habeant. Ac si huius gratia sunt præcipuè, qualiacunque sunt, certè eiusdem gratia sunt, quocunque sunt. Quapropter Dens plures in eadem specie mentes non ideo esse voluit, vt species ipsa sit, solumque seruetur, imò vt bene sit, optimeque se habeat. Eiusmodi verò habitus in ornatu quodam vndique vario, & actione variis vbiq̃ue modis beata consistit. Si quis autem humanarum multitudinem animarum ad speciei salutem conferre conuicerit, id nos ita concedemus, videlicet non ad ipsius animæ speciem propriè, sed ad hominis compositi speciem seruandam talem numerum necessarium esse. Vult enim Deus plures homines esse ob id forsitan, quia humana species non seruatur in vno. Nequeunt autem plures homines fieri, nisi plures quoque animæ sint. Neque tam corporum quā compositorum numero, speciei que toti, imò vniuersi ordini, numerus animarum seruire videtur. Neque putet quispiam animas inter se idcirco differre, quia differentia respiciunt corpora. Prius enim in seipsis differentes sunt, quā differenti ratione respiciant. Hæc illi.

Nos iam ad propositum redeamus. Quod autem subiungit Auerrois, si meus intellectus ac tuus differunt numero, species rerum cognoscendarum similiter different, eruntque particulares, oportet tamen quæ intelligenda sunt, vniuersalia esse, ita soluitur. Non tam singularitas est quæ aduersatur intelligentiæ, quam corporalium accidentiū congregatio. Siquidē singuli intellectus & singulæ illorū conceptiones cōmodissimè intelligi possunt. Adde quòd sicut imago coloris in oculo, nō est id quod videtur propriè, sed per quod color ipse videtur, ita species & similitudo rerum in mente, non est id quod propriè intelligitur, sed per

quod intelliguntur rationes rerum vniuersales. Neque est illa species in mente ita singularis, vt impediatur vniuersalium rationum intelligentiam. Nam si statua quidem quæ singularis est & corporea communem quodammodo figuram hominum nobis refert, quanto magis species illa naturam communem, cum si in mente, quæ est ab omnibus corporum passionibus absoluta, ideoque ipsa ab iis libera sit, vnde & refert nobis rem neque certo loco clausam neque tempore? Meminisse verò oportet hunc in speciebus ordinem à plerisque poni, vt in Angelis vniuersales sint, tum quo ad referendum, tum quodammodo quo ad efficiendum spectat, in brutis vtroque modo particulares. In animis hominum singulares quidem sint in essendo, quia sunt in essentiis penitus singularibus, vniuersales autem in referendo, quia sunt in essentiis à materiæ limite absolutis. Sed hæc ipsi viderint. Afferebat præterea nescio quid de scientia quam tradit magister discipulo, quod ex his quæ aliàs tractauimus de speciebus ingentis, facillè soluitur. At enim illa Auerrois argumentatio in ipsum facillè retorquetur. quippe si docentis scientia non transit in discipulum, neque in eo scientiam aliam generat, è duobus alterum sequitur, videlicet quòd ipse idem intellectus qui est in vtroque, vel eundem in vtroque possideat habitum, vel ex habitu quem apud vnum possidet, alterum habitum generet apud alterum in seipso. Neutrum fieri potest apud Auerroem. Non primum, quia cum sua illa mens quotidie in cunctis hominibus cunctas calleat artes, easque omnes alij alios doceant, perpetua quadam successione docentium & discipulorum, sequitur vt habitus omnium scientiarum iidem omnino sint semper in mente, quod apertè Auerrois respuit. Non secundum, quia scientia erit qualitas efficax, quod ille negat, arque innumerabiles qualitates speciei inter se similes in subiecto eodem simul erunt, quod etiam ille nequaquam admitteret. Quantum enim præter naturæ propositum sit fortuita illa superfluarum qualitarum congeries, in substantia præsertim æterna atque diuina, quisquis non viderit, is erit præter naturæ propositum.

Postremò ratiocinabatur Auerrois. Si in duabus mètibz singularibus duæ sint species singulares, licebit eas ad vniuersalem reducere, & vtraque mens ad suam quandam reducet, & in vtraque rursus mente, vtraque species euadit particularis. Quapropter licebit iterum ad aliam absque fine vtrasque colligere. Vanum id quidem.

Primò quia mentis aspectus excitatur plane à specie, non tamen terminatur in speciem, ut illam necessario tanquam obiectum inspiciat, sed per eam inspicit rationem rei vniuersalem, quam profecto vnā atque eandem, & tanquam vnā, duæ mentes per duas species intuentur, quemadmodum duorum hominum oculi rem eandem vident per duas illius imagines.

Non ergo ad hoc intendunt mentes, ut species suas ad alias reducant species, sed ut per eas rerum videant rationes. Quòd si quando ad hoc intendat non tamen in infinitum progredientur, quoniam vim significationemque hæ species habent. Iraque non licet eas semper tanquam singulares in alias re ipsa communiore resolueret, sed progrediantur absque fine, si placet. Quid enim prohibet mentem, quæ infinitam quodammodo habet virtutem, sine fine vagari, dummodo infinitum hunc actu cursum peragat nunquam? Similis argumentatio fieri potest de notionibus & conceptibus, responsio quoque persimilis.

*Signa quòd non sit mens una tantum.*

### CAPVT XIII.

**P**ostquam respondimus Auerrois rationibus, reliquum est ut afferamus in medium quæ sint ea signa potissimum vel argumenta, quæ dissuadeant vnū esse in cunctis hominibus intellectum. Signum primum. Si mēs ad eò diuina est, ut nullum habeat cōmercium, materia, vna sit initio carens & fine cum tota vbique sub Luna, nō est verisimile eam ita esse sui ipsius ignorantem, ut in omnibus penè hominibus, præterquam vno Auerrois se numero multiplicem esse putauerit semper & putet. Ego certè non solum intelligo, sed etiam intelligo me intelligere, atque similiter me sentire. Vnus ergo idemque sum qui intelligo, & qui sentio. Vnus inquam, per esse vnū. Alioquin non tam diu & à me & ab omnibus affirmaretur eundem esse prorsus intelligentem atque sentientem, sed manifestè discerneret intelligens à sentiente. Quo enim pacto verisimile est separatam, æternam, diuinam mentem, in æternitate omnia cognoscentem, ad eò ignorare se ipsam, ut semper & vbique putet se non intelligere solum, sed etiam sentire & mouere atque nutrire, cum talia, sicut opinatur Auerrois, non efficiat.

Signum secundum. Mens, veritatis locus est. Veritas, mentis est cibus, quo fit

ut se vicissim libenter adsciscant. Cum verò aut nunquam aut vix humana mens Auerroicæ opinionis capax efficiatur, conicere possumus eam opinionem non esse veram. Quinetiam ipse Auerrois non libero suæ mentis iudicio in opinionem huiusmodi incidit, sed quia nesciebat aliter Aristotelis libros in Arabicam linguam peruersos interpretari. Neque sententiam profert, sed vires tentat ingenij. Solum hoc affirmat, immortalem esse mentem. Esse verò vnā non affirmat, sed opinatur & dubitat. Inquit autem se conari & fingere, ac posteris occasionem disputandi relinquere. Et si qui eius dubitationi astipulantur, non tamen ex animi sententia hoc agunt, quoniam quodam ambitionis studio, ut videantur paradoxa posse defendere. Merito Scotus inquit, hoc paradoxon tantum abesse ut cuiquam probabile fieri vnquam possit, ut neque etiam Auerrois ipse sibi met persuadere potuerit.

Multo verò probabilius, imò verius dixisset Auerrois, si vel cum Themistio vnicum intellectum introduxisset illuminatorem, multos verò partim illuminatos, partim illuminantes, vel cum Plotino Deum posuisset tanquam Solem, huic subdidisset intellectum vnicum vbique totum, quasi Soli lumen, huic insuper intellectus quamplurimos, quasi lumini radios, his denique animas quoque quamplurimas, quasi radiis oculos. Aut saltem si cum Auicenna multas mentes vni menti quasi formabiles formatori. Hæc enim facile quicuis capere potest, & exemplo mox aliquo confirmare. Inuentum verò Auerroicum ab omni mentis capacitate est penitus alienum. Quòd autem mentes humanæ inuentum aliquod capere nequeant, vel inde prouenit, quòd super eas illud est, atque diuinum, vel inde, quòd contra eas & falsum. Inuentum Auerroicum quia de mente est, non super mentem, est ergo falsum.

Signum tertium. Quoties vnitatem mentis excogitamus, toties eam odisse solemus, ac mentis numerum cupere, si modo cupimus superari. Neque arbitranda est nos per phantasiam numerum mentis odisse. Nam siquid est in nobis odij aduersus mentem, eadem mens vnitatem suam odisse potest, quæ & nosse. Non est autem verisimile, rem diuinam & beatissimam semper sui ipsius naturam aspernari, respuere, & odisse.



*Rationes quod non sit mens una. Prima,  
quia septem inde contingunt  
superflua.*

## CAPUT XV.

**A**rgumentationes autem erunt huiusmodi. Si intellectus agens perfecte seipsum intelligit, quod Auerroici consentiunt, vim suam & operationem naturalem continuamque non nescit. Idcirco animaduertit se ceu lucem formare continuè intellectus capacis perspicuitatem. Nam si capax aduertit sæpè se illuminari, cur agens non aduertat illuminare, non video, ubi quomodo intellectus capax moueatur à simulachris, non ignorat. Inde & homines singulos se regere, illuminare in super simulachra hominum. Hinc & simulachra, & quicquid per illa significatur, intelligit, præsertim quia dum descendit ad sensibilia per vim intellectualem, transit quoque in illa per vim ipsam intellectuam. Itaque intelligit illa, non quia formetur ab ipsis, sed quia ipsa se format in ipsa, dum formam suam naturalem, seu formas innatas, per lumen suum discretium discernit in singula. Si capax modo quodam reflexo per speciem accipit & attingit simulachra vnde quasi accepit, cur non agens qui speciem facit, attingat simulachra vnde facit? Attingant autem oportet vtrique intellectuali modo, siquidem natura sua nihil sunt aliud quam intellectus. Qui verò sic attingit, simulachra sensibilia prospicit. Cum igitur substantia mentis in parte hac agente vim habeat ad æterna & temporalia cognoscenda, quid opus est partem illam capacem illi subiungere? An videlicet ad præparandum & exequendum operis huius effectum? Minimè. Agens enim præparat capacem ac phantasiæ simulachra, non è conuerso. Neque externa eget materia ad agendum, cum & interius & ab interioribus valeat operari. Postquam ergo in agente est virtus efficax & præparatrix ad intelligendum sufficienter, superflua est virtutis capacis adiunctio ad mentem vnā ex substantiis duabus conficiendam. Sed esto, iungatur vis capax agenti, hæc rursus agenti subnexa in ea, tam æterna cognoscet, quam temporalia. Hæc quoque cognitio in vniuersa mente ex hac parte capace superuacua est, quandoquidem deest ex altera. Iterum, vis ista capax ab humanis formata simulachris, in nobis temporalia nescit, quæ iam non erat in agente. Quo fit vt tertia hæc cognitio similiter sit superflua.

Si potentia videndi per sensum quendam agentem sibi coniunctum, singula semper videret, frustra diceretur oculum indigere potentia, per quam ab exterioribus moueatur atque formetur. Sicut ex verbis Auerrois in his tribus cognitionibus superfluitas nascitur, sic & in tribus formationibus oritur. Si formatus est intellectus capax agente semel per essentiam, vt ipse putat, superfluum est iterum formari semper eodem per hominum cunctorum simulachra, superfluum quoque eodem formari quotidie per simulachra virorum sapientum atque felicum. Hæc omnia superflua sequuntur ex dictis Auerrois, quæ nos ab initio recensuimus.

Quod liquido nobis ostendit opinionem eius, tanquam superuacua esse reiiciendam. Iacet ergo se diuinam mentem adinuenisse, quæ cum in seipsa sit sapiens, semper delirat in nobis. Et quoniam quotidie innumerabiles homines rem eandem considerant, ac sæpè falluntur, mens illa singulis momentis eandem rem simul millies milliesque considerat, & sæpè decipitur. Si superfluitatem hanc fallaciamque sibi à phantasiis iniectam mens ipsa secum animaduertit nunquam semper sui ipsius est inscia. Cuius contrarium experimur in nobis, quando fallacias proprias redarguimus. Si animaduertit quidem, non tamen intentionem suam ab iis ambagibus in se diuertit, cum possit, semper est mollis, semper incontinens. Potest autem æterna mens in æternum aciem suam à temporalium phantasiarum nugis auertere.

Siquidem temporalis anima sæpè ad tempus à sensuum nugis seuocat semetipsam, neque potest affectus ad singula quæ sunt infra homines, mentem illam in iis erroribus & turbinibus remorari, quæ neque erga humanam quidem naturam sic afficitur, vt cum ipsa conspiret ad speciem fabricandam. Quo igitur pacto cum hoc animali ad intimas, operationes concurret, nisi prius ad esse congregiatur? Nam & forma ignis externæ materiæ calefactionem quidem ipsam, quæ externa operatio est, communicat, etiam si esse suum nequaquam communicauerit, calere autem per se, quæ est intima operatio, solum post esse communicat.

(:-)

(:-)

(:-)

*Secunda. Quia mens species seruat, ac iam diu  
plena omnium debet esse.*

## CAPVT XVI.

Quamquam in libro superiore ex Platonis sententia, nonas menti formas non aduenire probauimus, declinemus tamen ad Peripateticos in præsentia, ac notias fieri formas in mente capace per vim mentis agentis præsentibus simulachris, concedamus, eo videlicet pacto, vt simulachrum efficacem vim ad speciem creandam non adhibeat, sed occasionis impulsus, quod aliàs declarauimus. Si tota vis speciei vniuersalis efficiendæ in agente est, ac tota vis sustinendæ eiusdem est in capace virtute, profecto ab iis duobus absque simulachrorum præsentia species conseruabitur. Verùm habeat, si videtur, simulachrum efficacem vim ad speciem procreandam, dummodo ipsum instrumenti gerat vicem, agens verò intellectus, artificis. Propterea intellectus agens tanquam causa principalis, in qua tota vis sequentium causarum concluditur, postquam semel speciem impressit menti capaci, solus ipse conseruat. Siquidem species in mente vigent etiam dum in ocio torpent simulachra, quæ cum apud Auerroem tanquam mouētia extrinseca se ad speciem habeant, nequeunt aliter illam seruare quàm agendo in ipsam, atque mouendo. Mouent autem solum vt actu sunt, non habitu. Quod si species in sensu interiore manent diu, producuntque in actum, etiam si non seruentur, excitenturque ab exterioribus sensibus, quanto magis species in mente absque simulachris? Neque comparanda mens est exterioribus sensibus, qui formas absentibus obiectis amittunt. Non enim formas veras, sed imagines habent, neque ipsi vi sua conducunt ad imagines fabricandas. Mens autem veras possidet rationes, per quas veras rerum substantias comprehendit, atque ipsam et sibi eas effingit. Ideoque potest eadem virtute seruare qua finxit. Atqui si species mentis non aliter à simulachris, quàm vmbra à corporibus dependere, nihil haberent in se præstantius quàm simulachra. Ac si quid haberent sublimius, id esset munus virtutis agētis, quo etiā semotis simulachris seruabuntur. Quod autem non sicut vmbra pendeant à simulachris, documento nobis esse potest quod vscue adeò radicitus infiguntur, vt imprimant habitum penitus indelebilem. Neque dicendum est species ideo exiguum essentiam habere, quia vniuersalia referant, propter-

eaque egere semper simulachrorum fundamento, tanquam conseruatore. Primum quidem, quia & plura & meliora & magis ad essentiam rerum pertinentia continent referunturque, quàm simulachra, ideoque nobiliorem amplioremque essentiam possident. Quod si quis conceptus generis propter confusionem dispersionemque, & conceptus singularium propter vmbra-tillem illorum naturam paruifaciat, facile concedemus. Species autem honorari iubet Plato. In iis enim consistit mundi perfectio, & scientiæ veritas. Ad has ita singula referuntur, vt partes ad totum, atque etiam vt ad finem. Deinde etiam si propter vniuersalem conditionem indigent conseruante, seruabit eas potissimum intellectus agens, à quo naturam huiusmodi nasciscuntur. Neque etiam ob hoc egere simulachris hanc speciem, arbitramur, quia naturam significet in singulis existentem, quoniam si naturam tanquam absolutam significat, rem potius respicit seorsum à singulis quàm in singulis, rationem scilicet æternam rerum quæ secundum essentiam in mente diuina est, secundum verò participationes medias in sequentibus Deum mentibus, secundum postremam quandam similitudinem in corporibus, quorum imaginibus commonitus intellectus diuinitatis absolutè particeps, statim aut concipit speciem, aut in se & supra agnoscit ideam. Sic per ipsam speciei conditionem constat non esse eam quasi vmbra simulachri prorsus instabilem, sed excellentem quandam stabilemque naturam. Idem quoque ex natura mentis possumus coniectari. Profecto cera & puluis seruat ad tempus rerum figuras, rebus ipsis etiam abeuntibus. Cerebrum quoque, vt opinatur Auerrois, custodit absentibus corporibus simulachra corporum. Mens autem ipsa, quæ propter æternitatem stabilis est, & super motum, non suscipiet pro natura sua species stabiliter, & super motam. Non seruabit æternè, quæ gremio suscepit æterno? Nonne intellectus est virtus sensu superior, atque ideo magis vnita? Ac propterea solus ipse facere potest omnia, quæ plures sensuum vires efficiunt. Quocirca sicut phantasia sola cognoscit quæcunque sensus quinque percipiunt, quia ipsa est illis superior, sic intellectus solus & iudicabit species, & seruabit. Licet fortè iudicare simulachra & seruare, non sit solius phantasiæ officium, vt putat Auerrois, sed iudicare phantasiæ, seruare memoriæ. Distinguntur duo hæc officia in iis inferioribus viribus, coniungantur oportet in mente, quan-

quam apud Platonicos phantasia quoque memoriam propriam possidet, quod testatur & habitus confirmatio, & in libera discursio ab imaginibus in imagines, quæ sæpe fit reminiscentiæ studio. Mentem verò esse memorem, illud significat, quod cum primum aliqua discimus, difficillimè nos & vix ad illa conferimus, post verò diuturnum cogitationis vsum promptissimè pro arbitrio nostro quæ olim accepimus meditatur, quasi nostra iam facta fuerint, atque alta mente reposita. Postquam semel in se ipsa mens nostra formauit diffinitiones quasdam figurarum, seu numerorum, seu virtutum siue Angelorum sibi inuicem ordinem succedentes, vix primam recollere potest quin secundam resumatur & tertiam, & sicut à principio cum eas inueniret, vix eas contexuit, ita quando rursus incidit in inuentas, vix dissoluit quæ antea contexuerat, ac multo facilius cuiusque ab aliis speciebus recurrit in alias, quàm soleant sensus interior, quando & ipse ad priora simulachra gradatim reminiscendo reuertitur. Quod apertè declarat inesse menti memoriam multo magis quàm sensui. Quod si quis dixerit mentem non tam formatas species definitionesque seruasse, quàm habitum reformandi, respondebimus, vim mentis eandem quæ & contrahit & seruat habitum, in eius naturam iam penè conuersum contrahere in intima sua speciem, atque seruare. Siquidem habitus fundatur in speciebus, species in habitu concluduntur. Proinde si habitus fit à mente, specie atque actu, ab aliquo istorum stabilitatem suam nanscitur. Non à mente solum, alioqui mens posset actui quoque stabilitatem tribuere. Non ab actu, quia nullam habet stabilitatem. A specie igitur? Ergo species stabilis permanet. Neque opus est, quotiens eandem rem speculamur, toties nouas ab agente formas recipere, prioribus subito vanescentibus. Si modò tam agens virtus illa pro natura sua tradidit formas, quam virtus capax pro natura suscepit easdem, atque vtriusque natura mobilitatem corporum antecedit, meritò imagines nouæ semper recreantur in visu, quæ à lumine creantur externo. In mente autem species permanent, eodem ipso interno lumine vnde primo effluerant, firmiter illustrante, præsertim quia si ex eo creatæ sunt, quòd rei cognoscendæ natura secreta est à mutabilis materiæ passionibus, iure permanent immobiliter, vt à substantia mentis omnino stabili fiat transitus in accidens prorsus instabile, in ipsam scilicet intelligentiam per accidens aliquod stabile scilicet speciem. Vbi

substantia semper est actu, species ex actu migrat in habitum, atque contra, intelligentia ab esse in non esse, atque è conuerso. Neque simulachris indigent species vt feruentur, quippè cum ipsi etiam phantasmatum assertores confiteantur, quamuis ad intelligendas communes corporum naturas simulachris propriis egeamus, tamen ad formarum intuitum diuinarum, non simulachris vnquam propriis nos vti solere, sed naturis potius ipsis, quas simulachra comitantur. Hinc apparet ipsas diuinarum notiones in mente non à simulachris, quæ per accidens confluunt, sed ab ipsa mente per antecedentem speculationem iam præparata seruari.

Præterea, quando Platoniam illam seriem connectimus idearum, in qua speciebus vltimis medias quasdam species anteponimus, atque illis iterum genera subalina, donec multis gradibus ad latissima genera conscendamus, transcendamus quoque genera, ad eam naturam peruenientes quæ cuncta genera extrinsecus ambit, tunc sanè simulachra dimittere cogimur citra species vltimas peruagantia, quæ ascensum illum nequeunt comitari, nisi forsitan vniuersalem ordinem in singulis quoque simulachris disponamus. Quod quidem fieri reuera nequit, ac fingatur, non à phantasia fingitur, sed à mente, quæ interdum notiones innouat vltra notiones, etiam si libuerit immensum, simulachra verò non innouat. Neque prohibet quicquam, quod ad mentis naturam pertinent, in æuum ita nudam simulachris peruolare. Interdum verò quousque angustiora quæque resoluit in ampliora, eousque simulachra pingit in phantasia speciebus quodammodo respondentia, vbi species ipsæ quia præcedunt, faciunt & conseruant simulachra, non è conuerso. Phantasiam verò formari à mente, ex eo perspicimus, quòd subito in ipsa lucent quamplurima, qualia nunquam aut acceperat à sensibus, aut excogitauerat. Diuidit quoque imagines & componit non sine aliqua ratione, & infinitum fingendo progreditur. Imò à mente fingitur absque fine. Habitus quoque ac mores accipit rationales. Ac multo magis ipsa formatur à mente quam format, quoniam si ipsa mentem format quandoque, id non aliter efficit, quàm à sensibus & à mentis virtute pulsata. Neque potest formas innumerabiles tradere. Mens autem ex se phantasiam format, & absque fine. Et potest nonnunquam siue affectu suo, siue diuino quodam afflatu ad intelligendum absque simulachris pronocari. Quod

significat ( quod sæpè iam quæsiuimus ) mentem etiam dum adest corpori , sine corporis auxilio operari nonnunquam , ideoque cum ab eo discesserit , per seipsam multo magis operaturam . Si adduxerint hic Auerroici , eos solere magis intelligentia memoriaque valere , qui corpoream complexionem talem habeant aut talem , propterea quòd notiones intellectuales à sensibus continuè pendeant . Peripateticè respondere poterimus . certam corporis affectionem sensui per se seruire , menti verò per accidens , quia mens dum coniuncta est corpori , per imagines sensuum quodammodo species fabricat suas , & quoties in suas species quas fecit seruauitque , ipsa se voluit , toties penè in imagines se reuoluit . Reuoluit , inquam , tum ob quandam inter illas germanitatem , tum ob consuetudinem ex conditione animæ corpori copulatæ cōceptam . Et quamuis in qualibet complexione quotidie acumen & memoriam videamus , vnde fateri cogimur hæc ab altiori principio proficisci , sit tamen ( si placet ) sicca natura magis memor , dummodo siccitas causa per se memoriæ sit in sensu , in mente verò per accidens , non sum quia sensus ipsius memoria menti quodammodo seruit , vt diximus , sed etiam quia spirituum siccitas ad intima se contrahendo non impedit animam quin se colligat , quo fit vt propter vehementem assiduamque cogitationem & acuatur intellectus , & memoria confirmetur . Humiditas verò contrà . Ad hæc autem Platonici dicerent , quot stellæ sunt , totidem esse exercitus animarum . talemque naturam inde denominationemque habere . Hinc ergo dici Saturnias animas , Iouiasque , & Martias , & Solares , aliasque similiter , variasque dotes circa acumen , memoriam , voluntatem , mores , artes , fortunas , ab illis habere , omnes tamen prout inde sunt , bonas , quamuis hic ex multiplici causarum concursu sæpè degenerent . Præterea à suorum syderum animabus numinibusque eas tam ducentibus quàm sequentibus spirituales dotes accipere , à stellarum vero corporibus corporeas atque sensuales . Quamobrem si Saturniæ Mercurialesue hominum animæ inde ad acumen atque memoriam adminicula nanciscuntur , simul etiam ab earundem stellarum corporibus certam sortiantur affectionem in corpore , quæ intellectualis muneris non causa sit , sed omnes . Denique ex voluntatis vehemètia attentioneque assidua magnam acuminis memoriæque excellentiam plurimum prouenire . Sed non licet hic vltius digredi . Quorsum hæc ? Vt

Auerroicam illam opinionem reiiciamus , quæ absolutas diuinæ mentis species à corporeis temporalis phantasie simulachris tanquam à corporibus vmbras asserit dependere . Platoni verò fidem adhibeamus dicenti , quod semel reuera fuerit intellectum , obliuioni omnino mandari nunquam posse , sed rei comprehensæ speciem in aterna mente verti in habitum sempiternum . Neque enim contrarium quicquam habet , cuius accessu interimatur , neque vnquam a subiecto deseritur . Quamobrem si mens Auerroica singulis momentis per cunctorum hominum phantasias haurire omnium species affirmetur , vnderes omnes intelligat , atque si hæc mens initio caret , semper quoque fuit hominum generatio , certè ante nos mille annorum millibus species omnes habitusque non semel sed innumerabiliter habuit , imò nunquam primas species accepit ab aliquo , si nunquam fuit homo primus intelligens . Vnde per nullius simulachra species finxit , sed species eius sunt ipsamet , vel ex ipsa eius essentia . Quod Aristoteles non concesserit , sed acceperit species , ac iam diu omnes . Seruat autem quæcunque accipit immobiliter , si modò intellectualiter accipit id secundum rationem intellectualem . Si olim adepta est singula infinitè , plenaque est omnium & exuberat . quid quærit vltra ? Quid sibi vult superflua hæc formarum acceptio sine fine ? Quapropter nihil mens nunc in nobis intelligit , cum nihil à nobis accipiat . Forsitan respondebit Auerrois , mentem si rei alicuius olim , puta auri , speciem possidet , non aliam rursus auri speciem nuper à phantasia mea de auro cogitante recipere , sed ipsam auri speciem , quæ quantum ad me attinet , quodammodo dormiebat in mente , propter auri simulachrum expèrgisci , atque ita mentem nuper phantasiam meam respicere , & in me intelligere aurum , sicut ante intelligebat in alio . Si ita sit , nullas amplius species agens intellectus procreat , nullas excipit capax , quandoquidem iam diu omnes species possidemur . Quod quidem repugnat Auerroi atque suis volentibus nouas quotidie species procreari & suscipi . Repugnat Peripateticæ sectæ asseueranti intellectum esse velut tabellam cui nihil sit inscriptum , quod quidem Auerrois , dum opinionem suam tuebitur , non poterit vnquam nisi ineptè ridiculeque exponere . Nobis autem non dissonat , qui duce Platone existimamus intellectum non cogi toties nouam hominis speciem generare , quoties variavariarum hominum simulachra nobis obicit phantasia , sed con-

ceptam antea speciem potius expergisci. Quemadmodum neque Socratis phantasia toties nouum Alcibiadis simulachrum in se fingit, quoties eodem die obuium prospicit Alcibiadem, sed latens intrinsecus producit in actum Atque idem oculi facerent, si imagines custodirent.

*Tertia, quia quoties duo rem eandem intelligunt, toties omnino sequuntur absurda.*

## C A P V T X V I I.

**P**hantasia mea nunc aurum cogitat, tua quoque aurum, mens Auerroica nostris simulachris excitata parturit in se auri speciem, & intelligit aurum, percunctamur, vtrum nunc in vtriusque nostrum vnam capiat speciem, vnamque intelligentiam auri, an species geminas, geminasque intelligentias, an potius speciem vnam intelligentiasque geminas, vel è conuerso. Nonnulli Auerrois sectatores primam diuisionis huius partem sequuntur, qui ratione huiusmodi confutantur, quia si nostrorum simulachrorum diuersitas nullam facit in mente diuersitatem, temerè nimium garriunt quoties asseuerant mentem illam in me & in te, imò me & te aurum intelligere. Sola enim mens ipsa intelliget, & in seipsa, cogitantibus nobis, quemadmodum & ipse Xenocrates in seipso communem vnam & vtriusque conionem inspicit veritatem, dum Spensippum audit & Polemonem in disputando per inscitiam verbis dissentientes. Præterea si mens eodem actu intelligendi apud me nunc & apud te intelligit aurum, cum primum apud te definit ipsum considerare, apud me considerare pariter definit, cuius contrarium experimur. Negabunt autem id sequi, & sicut apud nos eadem anima brachium manumque viuificat, atque amputata manu definit hanc viuificare, non illud, ita inquit mentem cessantem in tuo simulachro, in meo solum considerare quæ ante & in tuo simul considerabat. Exemplum non conuenit, quoniam actus viuificandi transit in corpus, actus intelligendi in simulachra non descendit. Ideoque in duobus membris diuersi recipiuntur actus viuificandi, actus intelligendi in mente vna permanet vnus. Sed exemplum hoc conuenit potius, vt sicut anima per vnam vitam in membris vivebat ambobus, postea per eandem viuit in vno, ita mens per eandem intelligentiam apud vtrumque considerabat, per quam postea solum in altero speculatur. Sed neque exemplum hoc satis congruit,

quoniam hic & illic viuere rectè possumus dicere, intelligere autem hic aut illic minime. Siquidem per segregationem loci intelligentia consummatur. Verum: nunquid si oculus eodem aspectu partem exigua superficiei dextram simul videt atque sinistram, ac interim subtracta sinistra idem ipse aspectus omnino qui perspiciebat vtramque, remanet integer, sed solum terminatur in alteram, qui prius in vtramque terminabatur, ita idem actus intelligendi respicit simulachrum vnum, qui duo respexerat: Hoc quoque dissonat. Primum, quia non propriè oculus videre definit dum visio manet integra, sed videre definit potius pars illa superficiei quæ frangitur. Sed desinat videre, quid tum? Nonne aspectus ad locales partes superficiei dirigitur? Vt non ab re dici possit tam hic videre quàm ibi, ideoque fortè hic definit quandoque videre, non ibi. Intelligentia verò non ad localia simulachra se protendit, sed ad rationem locis exclusam. Quocirca non rectè dicitur, hic perire, non ibi, sed aut nusquam, aut tota vbique definere. Quid ergo sibi vult temeraria illa responsio, intelligentia modo duo simulachra respicit, modo vnum? Non quod simulachra ipsa contineatur, aliud enim suspicit. Non quòd ipsa moueat, quia non ex hoc propriè mens intelligit, sed afficit ita simulachra, vt ipsa vel intelligant, vel ad intelligendum aliud moueant. An fortè quòd mens à simulachris mouetur? Si ita est, cur non dicebant mentem à simulachris respici potius quàm respicere? Sed dixerint: Quid significat ab iis illam respici? Num mētis species à simulachris velut umbras à corporibus dependere? Sanè hoc ipsum est magnificum Auerrois ipsius inuentum. Neque magis ex hoc sequitur mentem in simulachris intelligere, quàm aut auditum in voce audire, aut olfactum olfacere in odore. Imò quia dimissis simulachris auri, ipsa per se in absoluta atque vna auri specie vni & absolutæ se insinuat auri rationi, sit vt seorsum à nobis in ipsa ideâ per actum vnicum intelligat, ac si quando definit intelligere, semel ibi tota simul desinat & momento. Qui autem species esse simulachrorum umbras affirmant, atque deinde speciem vnam à duobus simulachris emanare, ac rursus speciem eandem quæ à tuo simulachro prius solo manabat, postea etiam à meo tam tecum quàm te desinente manare, similiter delirant atque illi qui affirmarint, aut vnam à duobus corporibus umbram effluere, aut vnus corporis umbram eo sublato ab altero corpore conseruari. Accedit ad hæc, quòd in eodem mo-



ergo una illa mens per unam speciem unamque intelligentiam de uno auro ita secum ipsa dissentit, quod in me iudicat aurum spernendum esse, aspernaturque, in te vero preciosum iudicat, & affectat. Tanta iudicii & affectibus repugnantia nequit ab uno principio, quatenus unum est provenire. In intelligentia specieque nulla esse diversitas dicitur, nunquid ergo à simulachrorum diversitate? Minimè. Nempè simulachrorum diversitas prius in speciebus intelligentiisque, quam in iudiciis & affectibus differentiam parceret. Quis ergo confenserit actum unum intelligendi ad contraria iudicia terminari, & repugnantes affectus quasi idem motus possit ad contrarios terminos proficisci. Confugiunt ad hoc eorum nonnulli, ut duo illa simulachra unam quidem in mente speciem faciant. Quæ species prout à duobus simulachris proficiscitur, duas parit intelligentias, quæ ad discrepantes terminos diriguntur. Sed quis dixerit simulachrorum veritatem, quæ speciebus propinquior est quam intelligentiis, species quidem differentes non facere, intelligentias verò diversas? Præterea si species illa datur menti cum diversis respectibus ad diversa, non datur penitus absoluta, neque sufficiens est intelligendi principium. Sin non datur ut differens, differentiam intelligentiis non parturiet. Adde quod nullus sanæ mentis unquam concesserit, unam agendi siue cognoscendi virtutem per unam formam in tempore uno circa obiectum idem operationes plures ædere numero differentes, sicut oculus unus circa rem eandem per unicam imaginem non ædit duas eodem in tempore visiones, una enim sufficit, & differentes esse nequeunt, nisi à principiis differentibus. Vnde si omnes homines eodem ad videndum oculo vterentur per unam Solis imaginem, eodem tempore unam tantum visionem Solis haberent. Similiter intellectus unus per unam auri speciem momento uno unam auri habet intelligentiam. Neque differentiam huc afferunt duo illa simulachra, quæ tanquam præparationes quædam, imò incramenta ad actum præcurrunt intelligendi, non incurrunt unquam, neque concurrunt etiam necessario. Similis quoque sensuum actibus ad phantasiam est comparatio. Neque de futuros arbitror inter illos, qui asserere audeant à geminis simulachris auri geminas menti tribui species, unum tamen inde intelligendi actum circa ipsam aurum provenire. Quod ideo reprobabimus, quia si simulachrorum diversitas vim tantam habet, ut in speciebus diversitatem pariat, cum

tamen simulachrum atque species diversis substantiis insint, quanto magis differentia specierum differentiam intelligentiarum pariet, præsertim cum in eadem sint mentis essentia? Nonne etiam apud istos motus unus ad contrarios terminos agit, quando per unam intelligentiam contraria iudicia fiunt, affectusque contrarij? Quid etiam responduri sunt nobis interrogantibus, nunquid alterutra species seorsum ab altera sumpta possit intelligentiam procreare necne? Si nequit, non poterit mens rem aliquam cernere nisi eius rei in mente imagines gementur, quarum semper una superflua erit. Si autem potest, vtraque suum actum exequitur, fiuntque geminæ à geminis speciebus actus intelligendi. Recentiores autem Auerroici confitentur à duobus simulachris auri duas in mente eadem formas simul intelligibiles fieri, quas duæ sequantur intelligentiæ. Principio liceret in eos cauillari eadem illa ratione qua in nos cauillabatur Auerrois, ut alias declaravimus. Certum est eas formas inter se secundum speciem non differre, quandoquidem conducunt ad unam auri speciem cognoscendam, suntque ambæ intellectuales auri similitudines. Quod si in specie eadem solo differunt numero, in formam aliam communiorē resolvi possunt, imò & debent, si modò per eas intelligentia sit implenda. Resolvantur ergo. Quærimus utrum communior illa forma una sit omnino in mente apud me & apud te, an differens. Si eadem, per hanc ipsam solam explebitur intellectio, poteramusque ab initio unam ponere. Sin differens, similiter resolvemus. Et quia infinitum digrederemur, præstat unam in principio ponere. Sed cauillationes huiusmodi dimittamus. Si formæ intelligibiles usque adeò sequantur simulachra, ut fiant serventurque ab eis, ac per eadem numerentur, fieri non potest quin eodem modo singulares sint ad simulachrorum singularitatem, quo & colorum imagines ad singularitatem colorum singulares existunt. Quod enim sic adstringitur singularibus necessario conditionibus eorum subiicitur. Neque conferet illis mens, ut absolutæ fiant. Sicut enim non sufficienter illis præstat initium temporale, ac perseverantiam temporalem, ita non sufficienter præstabit illis absolutam æternæ naturæ communitatem. Et cum communitas absolutioque in unitate consistat, mens quæ unitatem formis largiri non potest cum ipsa sit una, sed in hoc vincitur à simulachris, communitatem quoque non largietur, sed à simulachris singularitatem præstantibus superabi-

tur. Proinde ab Auerrois sectatoribus suscitabimur de duabus hisce formis intelligibilibus auri, nunquid per seipsas differant, an per subiectum in quo sunt, an per aliquod aduentitium. Non per seipsas, alioquin secundum eorum doctrinam specie discrepant. Non per subiectum, quod vnicum esse dicunt. Non per aliquem peregrinum.

Nihil enim aliud hoc esse posset quam respectus aliquis vel ad auri simulachra, vel ad ipsam auri rationem. Profectò per aspectum pertinentem ad auri rationem non discrepabunt, cum ipsa sit vna. Sed neque etiam per aspectum ad auri ipsius simulachra.

Eatenus enim forma intelligentiæ confert, quatenus ab aspectu simulachrorum absoluitur, respicitque naturam oppositam omnino simulachris, à loco videlicet ac tempore liberam. Ergo cum primum forma intellectualis affecta est, simulachra respicere definit. Sed esto, respiciant formæ illæ simulachra, ac differant per aspectum, certe non per aspectum simplicem discrepant, sed per duplicem. Duo igitur erunt in formis duabus aspectus, non quidem specie differentes, quandoquidem ad vnam specie naturam auri referuntur. Differentes itaque numero. Caterum per quid differunt? non per seipsos, alioqui specie discrepabunt. Non per subiectum, in vna enim mente locantur. Neque dici debent ideo geminari, quia in formis geminis collocentur. Nam concessum est ipsas formas per aspectus potius geminari, non per aduentitium aliquid, quoniam rursus aspectibus aspectus adiungeremus, ac de posterioribus sicut de prioribus ligaremus.

Iterum percontamur, vtrum respectus illi in formis fundentur, aut in simulachris. Si in simulachris, formæ à simulachris respicientur, potiusquam respiciant. Si in formis, neque ad formarum ipsarum essentiam pertinent, quia differentiam formis secundum speciem adhiberent, essentis formarum adiiciuntur extrinsecus à simulachris formarum ipsarum fabricatoribus. Vnde sequitur formas huiusmodi esse particulares propter ipsam corporalium singularitatem simulachrorum. Quod quantum intelligentiæ puritatem impediat, nemo sanæ mentis ignorat. Profectò cum simulachra ad formas, tanquam agentia extrinseca comparentur, nunquam efficient vt forma altera distinguatur ab altera, nisi singula simulachra formis singulis inde manantibus certas quasdam conditiones adhibeant, quibus inter se non aliter discrepabunt, quam simulachra

in vicem. Itaque absolutæ formæ non erunt, dum ad simulachrorum angustias contrahentur. Omnino autem incredibile est duas absolutas formas in eodem subiecto reperiri solo numero differentes. Eo enim ipso quod neque ratione essentiaque differant, neque subiecto cogentur per qualitates peregrinas in vicem discrepare, vnde absolutæ non erunt. In duobus autem subiectis esse illas non esse impossibile. Simul enim in vicem distinguuntur, quia distincta subiecta formabunt, & absolute manebunt, quoniam à subiectis non formabuntur, quando subiecta simplicia fuerint, & ab infectionibus aliena.

*Quarta, quia vel eadem esset multorum hominum scientia, vel superflua qualitates in eodem.*

## C A P V T XVIII.

**Q**ualitates omnes, tam à termino, quam à conseruante externo absolutæ, quæ sunt vnum specie, si in idem concurrant subiectum, fiunt etiam numero vnum. Nam quæ specie conueniunt, conueniunt & forma: quod si materia insuper conueniant propter subiectum, omnino sunt vnum. Quapropter in vna vini gutta dulcedo est simul atque rubedo, quæ duæ qualitates diuersæ sunt specie, non tamen duæ dulcedines ibidem sunt, duæve rubedines. Et si imagines splendoresque qualitatum possunt in eodem esse secundum numerum solummodo differentes, ceu duorum ouorum imagines in oculo & phantasia, ac etiam duarum candelarum lumina duo in eodem aëre, quoniam ab externis dependent assidue, & idcirco sequuntur eorum numerum quorum vel imagines sunt vel lumina, potiusquam subiecti, illæ tamen qualitates quæ & veræ sunt, & sequuntur subacti naturam potiusquam obiecti, vnum fiunt numero per subiectum, si vnum specie fuerint. Absoluta autem mentis forma ideo vera stabilisque eius qualitas est, quia non est peregrinorum accidentium imago, vel umbra, vel splendor, sed intellectualis substantiæ partus substantiarum exemplar, regula veritatis ab intellectu dependens non ab externis. Quapropter non sunt in mente formæ quædam absolutæ solo inter se numero differentes. Vbi contemnere licet Auerroicam illam obiectionem. Simulachrum, inquit, formæ intelligibilis principium est, quot igitur occurrunt simulachra simul, totidem formæ fiunt, quia simulachrorum quodlibet

seorsum ab alio formam potest sufficienter efficere.

Nos autem dicimus simulachrum, neque esse formæ principium, si modo forma vniuersalis sit, neque mentis capax præparationem ad formam suscipiendam, ne prius sit in mente quàm forma, aut certe mente similis, sed esse occasionem quandam ad virtutis agentis incitamentum. Quod etiam efficiet nunquam, si in alia substantia ipsum sit in alia forma. Si verò in eadem sint anima, vt certè sunt, quodammodo occasionem præbeat, aliàs declarauimus. Quàdo igitur simulachrum auri sese offert, si mens formam auri antea nunquam acceperat, ipsa producit, nata occasionem ad producendum. Si autem produxerit alias, eamque possidet, non producit aliam, sed quam possidet, educit in actum. Vnam verò dumtaxat producit atque educit, etiam si mille simulachra speciei eiusdem occurrerint. An non animaduertis quando mille homines oculis conspicias in theatro, & horum mille postea mille simulachra recelis simul in phantasia, interim mentem ita considerare. Pulchrum animal homo est, societate gaudēs, solers, religiosum? Hic mens de nullo illorum mille ita pronunciat, sed de vna cunctorum communi natura, de communi animalis rationalis substantia, de communi definitione societatis ipsius solertiae atque religionis. Vnum hoc iudicium de vna cunctorum hominum, seu virtutum natura non potest mens commodius quàm per vnā speciem & similitudinem facere. Vbi apparet eam à mille hominum simulachris vnā dumtaxat hominis speciem hausisse, idemque facere semper in omnibus speciei eiusdem simulachris quantumcunque diuersis, ab omnibus equorum simulachris vnā collectis equinam speciem vnā, non autem à simulachris equi & hominis speciem vnā, sed duas. Hoc in seipso quisquis vnquam aliquid intelligit, experitur. Quapropter quando centum homines equum vident, centum colligunt in phantasiis equi simulachra. Mens verò si est vna cunctorum, à centum simulachris prouocata, vnā equi concipit speciem, quam vnā sequitur intellectio. Vnus igitur erit apud centum homines actus intelligendi. Quoniam igitur pacto cessant vna intelligere, alius quoque non cessat? Possunt certè innumerabiles homines sibi deinceps succedentes per ipsam eandem intellectionem in se manentem intelligere. Hinc sequitur, vt ipsa temporalium speculatio sit

æterna. Quod Auerrois non concedet. Non considerat mens equum prout hic equus est, sed simpliciter secundum speciei equinæ rationem vniuersalem. Huiusmodi ratio vna est, etiam si mille sint equorum simulachra in anima hominis vna vel pluribus. Vna igitur erit equi consideratio in multis hominibus. Ex tali consideratione scientiæ habitus in mente contrahitur. In mente, inquam, non in phantasia, si modo actus intelligendi dispositio est ad habitum, & vbi sit dispositio, ibi sit forma, id est, habitus, habitus vniuersalis ex vniuersalibus actibus atque formis. In phantasia verò, cum secundum Auerroem sit alligata materiæ, neque actus neque habitus secundum modum vniuersalem esse potest. Vnus ergo erit & idem scientiæ habitus, quantum ad speciei equinæ spectat considerationem, in centum hominibus. Imò verò cum intellectus species habitusque conseruet, quilibet nostrum qui per hunc intellectum intelligit, & cuius intelligentia est ea ipsa mentis intelligentia, iam nunc intelligit omnia quæcunque præsentis homines & præteriti cognouerunt. Respondebit Auerrois, nos eatenus per intellectum intelligere, quatenus per simulachra nostra nobis coniungitur. Et quoniam non sunt eadem apud omnes simulachra, neque affecta similiter, ideo non quicquid vnus cognoscit, agnoscit & alius. Responsio talis non satisfacit. Quando enim mens iam actu speciebus est prædita, potest per seipsam meditari, quod Aristoteles confitetur. Vnde videmus nos illud cuius iam scientiam accepi-mus, posse quoties volumus meditari, neque simulachrorum absentia impediri. Si enim simulachra viæ sunt ad species, quid opus est via postquam ad terminum peruenerimus? Quid præparatione, postquam sumus habitum consecuti? Qui tantum abest vt simulachris tanquam cōseruatoribus egeat, vt neque etiam propriis actibus, à quibus proximè proprieque creatus est, indigere ulterius quando confirmatus iam est, videatur.

Profectò, quando iam adultus est, tanquam natura seipso viget in intellectu, neque dependet ulterius à simulachris, neque ipsa respicit. Si ita est, habitus qui in Auerroico sunt intellectu, iam consummati æquè sunt omnium, quandoquidem iam absoluti sunt, neque huc magis quam illuc extra prospiciunt. Igitur æquè doctus erat & æquè bonus Aristippus & Socrates. Et quando discit Grammaticam Plato, simul & Xenophon, habitum Grammaticæ similitimum sibi comparant ambo.

Grammaticæ simillimæ vna est ratio, itaque habitus eius vbicunque sint, eiusdem sunt speciei. Habitus talis in Platone, atque habitus similis in Xenophonte, specie vnum sunt. Quod si intellectus in quo velut subiecto sunt, est vnus, vnum quoque sunt numero. Nam si qua formarum ex vnitatem subiecti sit vna, maximè talis est habitus, qui transit in subiecti naturam, imò subiecti naturam usurpat ipse sibi, certam præstat procliuatatem & subiectum mouet immobilis. Si ergo mens vna sit, aut eadem omnino erit duorum scientia, duo cogitant, vnà, vnà desinent cogitare, aut qualitates innumerabiles speciei eiusdem in subiecto eodem erunt, & quotidie intellectus qualitates accipiet plurimas specie eadem cum iis quas habet, ac si mel singulis momentis aliam dulcedinem acciperet suæ simillimam. Atque in hoc Auerrois opinio sibi plurimum aduersabitur; qui in libris de anima ter replicauit (iuxta sententiam Aristotelis) omne subiectum nudum esse oportere specie qualitatis illius quam sit suscepturum. Proinde cum in nobis experiamur mentem non solum intelligere, sed etiam quòd intelligat animaduertere, atque ex alia intelligentia in aliam sæpè similem, sæpè etiam oppositam facillimè se momento transferre, plurimaque in vnum connectere. Quinetiam multas eius qui cum disputat notiones per vnius expressionem aucupari, & quod maius est, sæpè quod alius habet in phantasia, quæ remotior est à mente percipere, proculdubio mirum est Auerroicam mentem vnicam, æternam, indiuisibilem, vniformem, cunctis æquè præsentem, quod apud te intelligit, nunquam apud me quod in te intelligat, illud animaduertere, nunquam quod in alio intuetur, cum his quæ contuetur in alio copulare, nunquam quod apud alium cogitat, apud alium per seipsam augurari. Neque ad simulachrorum diuersitatem licet confugere, quæ & extra & infra mentem sunt, ac multa certo intelliguntur tempore, simulachro tunc neque intercedente, neque per se & propriè comitante.

*Quinta, quia contradictoria in eodem essent.*

## C A P V T XIX.

**C**ontradictoria tanto magis sibi inuicem aduersantur quàm contraria, quanto maior repugnantia est inter esse atque non esse, quàm inter esse tale atque tale. Quapropter si contraria in idem sub-

iectum congrèdi nequeunt, multo minus possunt contradictoria: quo fit vt quisque nostrum in seipso experiatur mentem suam nunquam rem aliquam affirmare omnino simul atque negare, velle prorsus ac nolle, etiam si plura rei ipsius simulachra in eius sint phantasia. Neque nunc afferant in medium Auerroici, quòd imago albedinis simul atque nigredinis in oculo sunt & phantasia, ac rursus earum species simul in mente, in qua etiam sunt cognitiones simul contrariorum, quoniam huiusmodi formæ quæ extra animam contrariæ sunt, ideo in anima non sunt contrariæ, quia naturam suam amittunt. In qualitatem enim quandam animæ transferuntur, & illam quidem quodammodo imaginariam. Sed assentiri & non assentiri, velle ac nolle, vim contradictoriam retinent, quia & essentialia potius quàm imaginaria sunt, & circa eundem animæ actum siue affectum esse significant, atque non esse. Igitur quamuis albedinis nigredinisque species in visu non sint contrariæ, tamen visio alicuius obiecti tanquam albi, ac visio simul eiusdem tanquam nigri, sic aduersantur inuicem, vt concurrere nequeant, quamuis visiones ipsæ à diuersis speciebus obiectisque continuè pendeant, sic in mente affirmatio diuinæ Trinitatis simul atque negatio conuenire non possunt, etiam si à diuersis simulachris speciebusque pendere dicantur. Sanè agentium diuersitas nihil prohibet quo minus affectus contrarij inter se sibi inuicem aduersentur, seque expellant. Quid ergo facit vt Auerroicus intellectus in Platone asserat vnum ipsum esse superessentiam, & ipsum bonum super mentem, in Aristotele reprobet? Cerrè non efficit istud varietas vlla simulachrorum. Talis enim contemplatio non aliter quam posthabitis simulachris rectè peragitur. Aut quid efficit vt intellectus ille apud Platonem affirmet cælum esse ignem, apud Aristotelem simul neget? An duorum simulachrorum diuersitas faceret quidem fortasse istud, si mens in simulachris aut per simulachra, aut de simulachris iudicaret, nunc verò occasione ab illis accepta, statim se in se recipit, ac per communem speciem iudicat in seipsa de natura communi cœli atq; ignis, ipsi verò phantasiæ relinquit simulachrorum intuitum; atque etiam perexiguum, qui tanto magis debilitatur, quanto magis mentis speculatio roboratur, atque contraria. Quod euidentissimum argumentum est ad id quod in superioribus tractabamus, speciem videlicet neque fieri à simulachro, neque seruari. Nunquid diuersæ species per


occasionem diuersorum simulachrorum in mente conceptæ diuersas illas sententias pariunt? Nequaquam. Vnam enim mens accipit speciem à duobus eiusdem cœli simulachris. Sed gratia disputationis accipiat duas. Licet istæ duæ sint viæ per quas sententiæ repugnantes in mentem proficisci posse videntur, non tamen duæ quædam sunt in mente partes aut vires, aut propriæ formæ, in quibus possunt discordes sententiæ suscipi, sed ad vnum & indiuiduum centrum intelligentiæ colliguntur. Vnicus ibi & simplicissimus index profert sententiam. Vnus autem sibi met non potest ad eodè manifestè in eodem tempore contradicere. Specierum duplicitas nihil vltius potest quàm variè animum instigare, si modò ipse sint variæ. Sententiam verò fert intellectus debiliore specie neglecta per aliam, perque speciei vnius prævalentis imperium vnam duntaxat sententiam profert, sicut & phantasia, quamuis per varios sensus coniecturis variis agitur, vnum tamen iudicium parit atque affectum. Mentem verò idem facere in variis coniecturis apud seipsum quilibet experitur. Quod si vna illa mens per duas species in duobus hominibus ambigat, atque huc feratur & illuc, quia tamen sui ipsius conscia est in seipsa, quid illic ambigat non ignorat, coniecturisque libris, ad partem alteram paulo momento declinat. Ac si absurdum est dicere, in eodem subiecto calorem simul frigusque suscipi, etiam si à diuersis causis duo hæc inferantur, igne videlicet atque aqua, nonne etiam ridiculum erit contrarias in mentem opiniones incidere, quamuis à diuersis causis immittantur? Quod enim suscipitur, pro dispositione subiecti suscipitur. Nequit autem subiectum idem modis simul contrariis esse dispositum ad contrarias simpliciter formas accipiendas. Fortior insuper erit argumentatio, si de contrariis habitibus argumentemur. Cum enim habitus confirmati à simulachris vltius non dependeant, iamque absoluti sint etiam (quod maius est) à propriis actionibus, non possunt Auerroici dicere contrarios habitus propter contraria quædam agentia, id est, simulachra posse concurrere. Quod autem dicunt mentem duabus speciebus indutam, vicem duorum gerere subiectorum, quibus repugnantia capiuntur, ideo non admittimus, quia non pertinet ad eos tantum speciebus confidere, qui eas velut umbras putant superficiem mentis ambire. Deinde quia species apud illos peregrini & contingentis actus obtinent locum, mens verò substantiæ atque subiecti. Non sunt autem propter duas ad-

uentitias formas subiecta duo, neque suscipitur aliquid formarum ratione, sed ratione subiecti. Vna igitur mens vnum est subiectum, licet duas excipiat species, atque ratione ipsius (non specierum) suscipitur quicquid aduenit. Quomodo igitur contradictoriis pateat aditus, ne fingi quidem potest, nisi fortè addiderint ita se mentem habere ad speciem, sicut materiam ipsam ad quantitatem. Igitur sicut materia per quantitatem extensa contrarias suscipit qualitates, ita mens vestita speciebus sententias repugnantes. Exemplum minimè conuenit, quia quantitatem esse à materia inseparabilem arbitrantur, speciem verò menti penitus peregrinam. Præterea materia non prius per quantitatem formas contrarias excipit, quàm in diuersas partes extensione secetur. Quod si Auerrois mentem per ipsas species in alias atque alias mentes secari concesserit, forsitan admitemus. Ergo si materia licet per quantitatem præparata sit, non tamen in eodem suis ipsius puncto qualitates contrarias accipit, ita mens non admittit contradictoria, etiam si variis affecta fuerit speciebus. Natura quippè contradictoriorum est, ut simul habitare non possint. Nequeunt autem esse simul, etiam si per medium aliquod quis illa conciliare tentauerit. Adde quod repugnantia si præparationibus quibusdam suscipienda sunt, præparationes exigunt repugnantes. Si modo præparationes quantum ad certos habitus conferunt, atque cum illis proportionem aliqua congruunt, tantum habitus diuersos impediunt, & ab eorum præparationibus dissonant. Ac si præparationes ad repugnantia per alias iterum discordes affectiones ab eodem subiecto suscipiuntur, in infinitum errabimus. Sin autem affectione nulla intercedente, absurdum id quidem est, & poterunt habitus repugnantes æquè sicut affectiones sine medio suscipi. Quamobrem si mens nostra sit ad repugnantes contradictoriorum actus & habitus disponenda, opus erit prius aduersantibus inuicem speciebus, atque etiam discursionibus dissonis, quæ à speciebus discordibus excitatæ, principia ratiocinandi pugnantia sumant, perque dissona media ad conclusiones perueniant contradictorias. Vniuersa hæc repugnantia quæ ad contradictoria distrahunt, ita nequit à mente suscipi sine medio, sicut contradictoria nequeunt. Si quæretur medium, absque fine quæretur. Quemadmodum de contradictoriis assensionibus disputauimus, ita de contradictoriis affectibus licet differere, ut ecce quando mens illa apud Plato-



nem obiectum aliquod vniuersale vult quidem, atque eodem tempore apud Aristotelem non vult, qualis effectus ad phantasias non pertinet, quæ non magis attingunt vniuersale aliquid appetendo, quam cogitando. Contrarios quoque in mente videmus affectus, quando homines duo obiecta duo vniuersalia simul nolunt, inuicem dissidentia, & quando in rebus incorporeis alij gaudent, alij simul dolent. Denique eadem mens proba erit & improba simul, sapiens & ignorans, certa & ambigua, felix & misera. Quid dicent ad hoc? Quod ex repugnantibus actibus affectibusque repugnantes, habitus in eadem mente coalescent, videlicet & contrarij. Hoc autem ideo est omnium absurdissimum, quoniam habitus non imaginarium quiddam est, sed naturalis formæ gerit vicem, naturalis autem forma procliuiusque per aduentum oppositæ formæ procliuitatisque disperditur. Diutius fortasse quam decuit, de mente cum his disputauimus qui mente se priuant, quando eam ab humana specie segregant, quæ vsque adeo speciei humanæ familiaris est, vt neque nos mentem adsciscere sine mente possimus, neque illi mentem respuere sine mente. Arbitramur autem nos in superioribus non Auerroem solum confutauisse, verum etiam Mauros illos qui vnam esse omnium animam opinantur. Si enim in mentibus distinctio est, multo maior est in animalibus diuersitas, tum quia mentes humanæ magis vnitæ sunt inuicem, eo quod præstantiores sunt quam animæ inuicem, tum quia si sufficeret anima vna nostris corporibus gubernandis, multo magis mens vna sufficeret veritati comprehendendæ. Vnde neque credendum est nonnullis adulterinis Platonice asserentibus viuientia omnia per vnam mundi animam viuere, quia non duceremur motu libero, & varietate consilij, sed impetu subi-

to velut sagittæ ferremur. Et si vna quadam anima spirarem omnes, etiam vna quadam super mundum mente solum speculareremur. Satis autem diuersitas ipsa & distinctio corporum mundanorum, distinctionem significat naturarum, naturarum distinctio, distinctionem sequitur animarum, animarum distinctio distinctionem mentium comitatur, & mentes insitæ animabus, animarum retinent numerum. Ridere quoque licet barbarum quendam Dinantem & Manichæos, qui Dei portiones quasdam esse nostras animas voluerunt, siue Deum. Nam hoc esse non posse satis ex quinque illis rerum gradibus in primo libro dispositis declaratur. Neque potest Deus aut in animas multas discerpi, cum summa vnitas diuidi nequeat, aut materia fieri plurium animarum, ne sit vilior animabus, nec summus actus gerat subiecti vicem. Aut ipse in sua forma consistens, mutari tam frequenter in nobis, cum sit stabile mobilium centrum à vero in falsum, bono in malum, gaudio in dolorem, atque contra. Denique si Deus cunctorum esset anima, vt mens esset in cunctis, quod est in superioribus confutatum. Quoniam verò Themistius asserit vnam fuisse Platonis, Aristotelis, Theophrasti de mente sententiam, si cupimus Peripateticam hanc disputationem felici fine concludere, veritatem ipsam Platonice Peripateticamque per plures dispersam interpretes, ita colligamus in vnum. Accipiamus ab Auerroee capacem intellectum esse immortalem. Accipiamus ab Alexandro capaces intellectus esse vires quasdam animabus nostris naturaliter insitas, totidem numero quot sunt animæ. Concludamus hominum animas immortales esse. Atque hæc est conclusio Platonice, Christianorumque, & Arabum Theologorum, priscis Peripateticis maxime consona.



# THEOLOGICÆ PLATONICÆ,

DE IMMORTALITATE ANIMORVM,

EODEM FICINO AVTHORE,

(:)

LIBER XVI.

(:)

*Sequitur secunda quaestio, cur animi terrenis corporibus  
sint inclusi.*

(:)

CAPVT PRIMVM.

(:)



Ostquam primæ quaestio-  
ni respondebimus, osten-  
musque mentis diuinita-  
tem nostris animis con-  
uenire. Secundæ respon-  
deamus, ostendamusque  
cur animi, si diuini sunt, terrenis corpori-  
bus tam infimis sint inclusi.

*Ratio prima. Vt cognoscant singula.*

**E**ssentia Dei, si modo essentia nomi-  
nanda est, nō vnum quoddam rerum  
genus est, alioqui res tantum sui generis  
ageret, sicut aqua, ea quæ humida sunt,  
non sicca facit, ignis contra sicca non hu-  
mida generat. Cū verò cuncta rerum  
generat per suam essentiam. Deus effi-  
ciat, & quod efficit, super omnia quæ  
sunt maneat, in nullo rerum genere Deus  
est, sed super omnia genera. Igitur quan-  
do suam intuetur essentiam, cunctorum  
originem & exemplar, cuncta rerum ge-  
nera contuetur, cunctas quoque species,  
atque singula. Nā essentia Dei, principium  
mediumq; & finis est. non specialium tan-  
tū principiorum, sed etiam singularium  
sub qualibet specie peruagantium. Profe-  
ctō diuina essentia cū nihil in se habeat  
materiæ simile, quæ obumbrare solet co-  
gnitionem, lux est perspicacia summa. Id-  
circo Deus per suam essentiam propriè,  
tanquā per lucem efficacem discrettricem  
que singulorum singula perspicit, atq; cum

essentia Dei penitus absoluta sit, non tan-  
tū ab omni materia, materiæque pro-  
prietate, sed etiam ab omni certa conditio-  
ne, respectuque ad hanc rem creatam aut  
illam, atque sit infinita, idcirco indifferen-  
ter (vt ita dixerim) se habet ad omnia. Igi-  
tur aut nihil præter se cognoscit, aut om-  
nia. Nihil autem cognoscere dictu nefas  
est, cū & cognoscētium, & cognitorum,  
& cognitionis sit ratio summa. Neque ob-  
iiciat nobis Auerrois, vilescere Deum, si  
inferiora consideret. Sanè quis cognoscit  
se esse omnia quæ infra se sunt, principium  
ideo nouit quid sit inferius esse, igitur quæ  
ratione deficiant, comprehendit. At verò  
dum rationem ipsam defectus ipsius agno-  
scit, defectum ipse non patitur. Quod si  
Deus in ipso imperfectionis fundamento  
considerando quod ab ipso alienissimum  
est, ipse non sit imperfectior, certè multo  
minus quàm in aliis vel imperfectissimis co-  
gitandis imperfectus euadet. Quid plura?  
cognitio sui aliorumque, tanquam bona o-  
ptabilis est, est enim quædam sui ipsius ani-  
morumque possessio. Potest autem aliquis  
cogno'cendi modus minus quàm alius  
optabilis esse. Siquidem modus quo sensus  
cognoscit externus, est imperfectus. Minus  
autem imperfectus ille, quo sensus inter-  
nus, minus quoque quo ratio, minimè tan-  
dem quo mens Angelica. Itaque cognitio-  
nis ille modus quo Deus discernit singula,  
cū sit gradibus infinitis Angelico modo  
perfectior, imperfectionem certè nullam;

imò perfectionem omnem penitus comprehendit. Talis certè est cognitionis diuinæ modus, qui per ipsam perfectionem omnem fit infinitam.

Denique, sicut nobis finitis præstat finita quædam scire quàm ignorare, sic infinito Deo conuenit potius infinita, quàm vel nulla vel finita videre. Cognoscit verò distinctè ubique singula, si modò qui causam causarum perfectè tenet, & cunctas & singulas causas perfectissimè possidet. Atque distincta perspectio tanquam perfectior admodum, quàm confusa magis admodum est exoptanda. Sed ne longius digrediamur, pergamus ad reliqua. Angelus quoque cuncta Dei & opera & singula conspiciat. Nempè, si nostræ mentis obiectum est esse ipsum verumque commune, atque ideo ad existètia omnia veraq; mens humana (licet paulatim) se dirigit, par est ut mens Angeli, quæ nostræ præstantior est, omnia capiat. & ut volunt Platonici, simul omnia. Sed quonam respicit Angelus ut omnia videat? Nunquid in corpora aciem dirigit? Nequaquam. Quia stabilis est Angeli mens; cernitque cuncta simul, propterea non potest ea discere à corporibus, quæ cursu suo sæpius permutata aliàs aliter & alia monstrant. Ac si modus agendi sequitur essendi modum, Angelus qui in essendo omnino est à corpore liber, erit quoque liber intelligendo. Neq; formabitur à corporibus, qui corporibus est excellentior, & cum ipsis commercium habet nullum. An fortè in angelicam essentiam flectet intuitum? Flectet quidem, sed in Angelo solum perspiciet Angelum. Nam tantum in angelica natura videbit, quātum ipsa se porrigit. Ipsa in genere solū est angelico. Angelum igitur videbit in ipsa, reliqua rerum generaculare discernet. Nempè si materia cognitionem impedit, essentia verò creata non nihil habet materiæ simile in formeque & fuscum: sequitur ut nulla creata mens, quatenus in nudam quasi caliginem aspicit, visionis claritatem adipiscatur, perinde ac si Luna in se respiceret nondum lumine Solis illustris. Ergo sicut oculus colores non cernit, nisi per formas ipsas colorum, ita neque mens perspicuè rerum videt genera, nisi per ipsorum formas, siquidem forma est agendi principium. Essentia Angeli, solius est Angeli forma, atque illa quidem quodammodo fusca. Dei verò essentia, imò veritas bonitasque, omnium est forma, luxque purissima, radix, ratio, & exemplar. Per hanc itaque solam, tanquam per Solem conspici omnia possunt. Nunquid ergo per ipsam Dei essentiam Angelus cuncta

discernet? Non quidem per absolutam Dei essentiam absque medio. Quo enim pacto essentia infinita potest tanquam forma finitæ menti nulla præparatione intercedente congruere? Oportet tamen mentem ipsam aliquam in se formam habere, per quam agat intelligendo. Quapropter Angelus formas & exemplaria rerum Dei essentia suscipit, atque ut oculus per Solis lumen colorum omnium effectiuū, colorum eorundem suscipit formas, videtq; colores, ita mens Angeli per Dei lumen rerum omnium effectiuum, earundem rerum accipit species & intelligit. Meritò Deus prius pleniusque format spiritalem materiam ipsi proximam, id est, mētes angelicas, quàm remotissimam ab eo mundi materiam. Sed multi sunt gradus mētium, & multiplex quàm corporum, ut Dionysius tradit Areopagita. Voluit enim optimus artifex plures in præstantibus operibus suis gradus statuere, quàm in operibus vilioribus. Sic Dei ciuitas erit præclarior, si plures sint in ea nobilium & liberorum gradus, mercenariorum atque seruorum. Talis est utique mentium ad corpora comparatio. Quot autem præcipui sint in Angelicis gradibus ordines, satis ex Dionysij mente tum in libro de religione, tum in Pauli raptu disseruimus. Quo etiam pacto Platonici in nouem ordines diuidāt, significauimus aliàs, quoniam videlicet Angeli intellectus quidam sunt summum ipsum intelligibile conuentes, in quo essentiam, vitam, intelligentiam conuentur. Sed illic in essentia tum vita, tum intelligentia est per essentiæ modum. Rursus, in vita sunt reliqua duo, similiter per modum vitæ.

Item, intelligentia duo similiter reliqua, id est, vita & essentia per quendam intelligentiæ modum. Illic igitur summum vnumque intelligibile in tria diuiditur, perque tria deinde multiplicatur in nouem. Eodem quoque ordine intellectus ipsum considerantes in ordines nouem distribuuntur. Atque hoc pacto Angelos soli deditos contemplationi, Platonici diuidunt. Eos autem qui mundum quoque gubernant, quidam duodenario, septenarioque partiuntur in primis secundum duodecim Zodiaci signa, septemque Planetas. Deinde, his alios quosdam Angelorum exercitus addunt, pro stellarum numero in quauis sphaera mundi certis officiis incumbentes, totidem quoque dæmonum heroumque turbas Angelis obsequentes, ac denique totidem particularium ordines animarum sese numinibus supernis accommodantes.

Sed mittamus nunc dæmonicos heroicosque exercitus, satis est intellexisse Platonicos mentes supra nos innumeras posuisse, in quibus nominandis non solum angelorum, sed etiam archangelorum & principum nomina nostris Iamblichus accipit, lumenque diuinum per omnes quasi per vitra putat ad nos usque descendere. Quamobrem per innumerabiles penè spirituum mediorum gradus radius ille diuinus formator mentium ad infimas usque deuenit mentes, quales sunt hominum animæ. Quatuor verò hic consideranda videntur. Primò quidem radius ille diuinus, deinde species rerum in ipso, quas & rationes creandarum rerum, ideæque vocamus, tertio mentes, quarto mentium vires. Radius prout in simplicissima Dei unitate consistit, vnus est prorsus & simplicissimus, atque vnicam ideam diuino offert oculo, vnam scilicet Dei essentiam, sed illam quidem per multos essendi modos creandis rebus communicabilē. Qui modi apud Platonem illæ ipsæ ideæ sunt rerum quæ per tales modos sunt producendæ. Vna igitur essentia Dei, vna est idea, idearum omnium vicem gerens, perque hanc vnicam Deus cuncta circumspicit. Radius ille dum manat ex Deo: quo longius à diuina unitate procedit, eo magis fit multiplex, & qui vnicam Dei oculo ideam in primis obtulerat, multas iam ac plures deinceps, & plurimas oculis offert angelicis: quemadmodum linea à centro producta, quæ in eo indiuidua erat, quo discedit longius, eo in plures partes extenditur. Imò quemadmodum Solis radius in Sole ipso vnicam præfert lucis formam, multas in igne, plures in aere atque aqua, in terra quamplurimas, sicut se habet radius ille diuinus, ita & mentes in quas infunditur. Quo enim propinquior mens est unitati diuinæ, eo est unita magis & simplex. Quo remotior, contrà. Caput autem quæque mens pro natura sua radium venientem, quapropter simplicius supræmæ mentes illum capiunt, reliquæ multiplicius. Vnde pauca ideæ à radio in sublimi mente pinguntur, in sequente plures, plurimæque deinceps. quoniam verò quo quid simplicius magisque unitum est, eo est & potentius, ideo in altioribus mentibus vis intelligendi perspicacior viget, hebetior in sequentibus. Quo fit vt per illas ipsas pauciores ideas non pauciora videantur mentes superiores, quam per plures ideas reliquæ: sicut medicus peritissimus futuros in ægrotante casus vnico præuidet signo, pluribus signis eget ad iudicandum

imperitus, plurimis quoque imperitissimus. Et vnico nutu intelligit sagax minister quid iubeat Dominus, tardiores multis indigent verbis. Ergo tum propter recentis radij simplicitatem, tum propter sublimium mentium unitatem, earumque ipsarum mirabilem perspicaciam, paucissimæ communissimæque in arce angelica sunt ideæ, plures magisque speciales per ordinem in sequentibus. Exemplum accipe veritati (vt arbitror) simile. Communissimum omnium Peripateticis esse ipsum videtur. Hoc in duo diuiditur. Alterum est per se: alterum hæret alteri Substantia illud est, hoc accidens. Substantia rursus altera corporalis, incorporalis est altera. Similiter accidens vnum est qualitas, alterum quantitas. Corpus item duplex: animatum, inanimatum. Spiritus quoque alij à corporibus separati, alij verò coniuncti. Diuiditur deinceps vnumquodque horum generum usque ad species ultimas: denique species quælibet singula infinita. Deus per vnam ipsius esse vel boni ideam, quæ ipsa Dei natura est, intelligit omnia. Primus angelus exempli causa duas forte habeat ideas, alteram substantiæ, alteram accidentis per quas omnia substantiarum & accidentium intelligat genera, prout radius ille diuinus qui in Deo per vnam ipsius esse vel boni ideam formatus erat, iam in primo Angelo in geminas sese diuidit formulas, dum discedit ab vno, atque ideis substantiæ accidentisque vestitur. Secundus angelus duplicata rursus radij varietate quatuor inde ideas accipiat: duas ad genus substantiæ pertinentes, duas ad accidentis genus, vnam scilicet ideam substantiæ corporalis, incorporalis substantiæ alteram. Rursus vnam accidentis eius quod est qualitas, alteram accidentis eius quod est quantitas. Per has quatuor ideas, omnia rerum genera quæ sub communi substantia & accidente communi comprehenduntur, intelligat. Tertius angelus per duplicatum rursus radium multipliciterque diuisum octo ideas suscipiat, per quas totidem intelligat, quorū primus atque secundus. Vbi apparet sublimioribus mentibus vniuersaliores ideas inesse, sequentibus paulatim minus vniuersales. Siquidem vna idea in illis tantum sub se continet, tantumque significat, quantum duæ in his ideæ. Semper enim descendendo vna geminatur in duas. Atque ita geminatur gradatim, quousque ordo mentium infimus qualis est anima rationalis, tam multiplicem radium diuinum accipiat, quantum ille in

spiritibus potest fieri multiplex. Potest autem in illis usque ad ideas rerum ultimas diuidi, ita ut totidem præ se ferat formulas, quot rerum à Deo creatarum sunt species, ut speciei humanæ ideam habeat unam, alteram equinæ, similiterque de aliis. Singulorum vero hominum & equorum figuras singulas radius ille non facile aut cuilibet ostendit expressas. Nam cum sit penitus absolutus, formulas præ se fert modo præcipue absoluto. Sanè Platonici mentes supernas existimant, sicut ideas rerum materialium in materiales, generabiliumque ingenerabiliter continent, ita & particularium rerum ideas duntaxat vniuersales habere. Cogitemus hominis animam nunc primum ex Deo manantem, neque dum corpus indutam, ut ab occupatione corporis libera intentionem prorsus omnem in mentem propriam dirigat, ubi pro natura sua duntaxat accipiat radij illius perpetuo sibi adstantis & inspirantis influxum. Quid per huiusmodi radium naturaliter capiet anima? Tot ideas quot sunt rerum species creatarum, unam speciei cuiusque ideam. Per ideam hominis quid intelliget? Naturam tantum cunctis communem hominibus, singulos sub ea homines non videbit. Idem per ideam equi faciet, & reliquorum. Itaque confusa relinquetur animæ huius cognitio, cum ipsam lateat distincta progressio specierum in singula, eritque naturalis appetitus eius inanis, & inquietus semper affectus, qui nullo vult vero, nullo bono carere. Verum cur nequit hominis anima in ultimis ideis sicut species, ita singula speciebus subiecta plane conspiciere, quemadmodum Angeli in suis ideis genera vident, speciesque, & singula? Quia, ut alias differuimus, in quolibet rerum ordine ita natura comparatum est, ut actio in summo illius ordinis sit passionis expers, passio in infimo actione priuata, in mediis compositio media Animas quoque nostras esse mentes infimas constituit.

Quapropter quantum ad intelligentiam spectat, Deus aget solum: Angelus aget & capiet: anima capiet per naturam suæ mentis solum, non aget. Deus siquidem ideas effundit aliò, non haurit aliunde. Primus angelus duas (ut ita dixerim) capit ideas, id est, duo illa rerum latissima genera, quibus suscipiendis quodammodo paritur. His susceptis ob efficaciam propriam illorum generum viscera penetrat, speciesque omnes sequentes in eis perspicue inspicit, fabricatque sibi ipsi conceptus proprios quarumlibet specierum, quos

etiam deriuat in singula. Atque hæc non passio iam, sed actio. Idem angelus secundus agit, & alij, ac semper posterior angelus plures ideas superne accipit patiundo, paucioresque conceptus specierum sibi est fabricaturus agendo. Propterea crecit passio sensim, actio verò decrescit, quousque ad mentem infimam veniatur, quæ nihil agat, sed acceptis ideis alatur, nihil molietur noui. Cuius intelligentia nihil est aliud, quam susceptio idearum seipsam minime latens. Et quoniam ideæ vniuersales sunt natura, non potest mens aliqua illas absque propria actione ad distinctos singularum rerum conceptus deducere. Ideo hominis anima quæ ex ea parte qua mens est, inter mentes est vltima, intelligitque solummodo patiundo, vniuersalia in singula non distribuit. Verumtamen qua parte est diuina, per centrum suum, quasi Dei characterem, habet aliquam actionem qua producit species vel educit, diuidit verò nequaquam. Quinetiâ qua parte est anima, quia non est vltima animarum, animalis corporeæque operationis est compos. Cæterum per diuinam providentiam in eo gradu locata est hominis anima, ut sicut succedit proximè mentibus, ita proximè terrena præcedat corpora, qua cognatione erga inferiora hæc afficitur, eiusque amatorio quodam affectu se inserit. Vnde corporibus copulata terrenis, terrenorum omnium præstantissimis, regit quidem illa, perque virtutem vitalem vitales illis affert passiones intrinsecus, per sensum autem iudicat alienas passiones illatas illis extrinsecus. Corpus humanum quoniam constat quatuor elementis, & in medio mundi locatur, omnium elementorum omniumque rerum circumfluentium impulsus per quinque instrumenta sensuum patitur. Impulsus huiusmodi vndique à singulis rebus illatos sigillatim anima discernit per sensus, eorumque imagines ipsa animali virtute in seipsa fingit per phantasiam, seruatque memoriter, quo fit, ut breui tempore phantasia singularum ferme rerum singulis plena sit formis. Hinc ratio prouocata, primò quidem species vniuersales parit, perque illas intuitu simplici communes concipit notiones. Mox verò ex hoc intuitu recta iam ab actu intelligendi in speciem intelligibilem, perque hanc in simulachrum se reflectit, & per simulachrum prospicit indiuiduum, prius quidem vagum indeterminatūque, puta aliquod mel: deinde determinatum, scilicet mel hoc aut illud. Sed post huiusmodi breuiore act<sup>o</sup> latius in huc



modum percurrere consuevit, quodnam est corpus hoc dulce & flauum, quod offert nunc phantasia mihi: Cur dulce? Dulcius ne hoc, an vinum. Tria hic ratio quaerit, quæ ut Platonici videtur, phantasiam latuerant. Primum, rei illius substantiam, quando quid hoc est interrogat. Secundum, qualitatis illius causam, quando cur dulce sit perquirat. Tertium, ordinem eius ad alia, quando sciscitatur num vino sit dulcius. Post hæc respondet sibi ipsi tria. Primum, mel hoc est. Secundum hoc ideo dulce, quoniam humor eius pinguis est, & moderate coctus. Tertium, dulcius vino est, quia dulcedo eius linguam magis diutiusque delinit. Hæ rationis humanæ diffusiones quoniam phantasie sequuntur impulsu, particulares sunt, & per singula peruagantur. Quinetiam aggreditur alias quaestiones. Quid mel? Quid dulcedo? Nunc non magis de melle hoc quam de quouis alio rogat, similiter de dulcedine qualibet. Ac neglecto proprio illo mellis simulachro quod attulit phantasia, de communi perscrutatur vniuersi mellis & dulcedinis ratione. Vniuersalis hæc quaestio est. Vniuersalis sit & responsio, ita Mel est apum succus, gradu secundo calidus, virtute abstergens, sapore dulcissimus, tactu pinguis. Rursus dulcedo est sapor ex moderata humoris aërei concoctione proueniens. Has communes definitiones mellis atque dulcedinis quaesivit ratio diuina, & inuenit tandem. Si quaesivit diuina, non habebat ipsa. Accepit enim aliunde illud ad quod discurrendo peruenit. Vnde ergo accepit? Non à phantasia. Ea enim si illas habuisset, obtulisset plane statim, ut simulachra obtulit, præsertim cum lux illa communis definitionis quanto est illustrior diuiniorque simulachris, tanto clarius oculis rationis ad ipsam accommodatis resurgere debuerit. Quapropter à mente ratio illas accipit, quæ quoniam menti quam proxima est, eam ipsam vim adipiscitur, per quam neglectis quandoque singularibus quaestionibus ad vniuersales se conferat quaestiones. Et quia quaerit communiter definitiones, reportat à mente communes. Quærebatur quid lucris à corpore proueniret. Plurimum proculdubio. Nempe si remanet extra corpus anima cum primum nata est, vniuersalia cognoscet quidem, singula vel virtute propria vel radio diuino per ipsam comprehenso non cernet, quia mens eius ultra ideas ultimas non descendet, ratio verò in mentis quiescet intuitu. In hoc autem corpore propter sensus ratio consuevit per singula curre-

re, singula applicare communibus, communia in singula derivare. Per singula currit hunc in modum. Hoc est dulce, & flauum, ergo est mel. Singula communibus applicat ita, hoc est dulce. Omne dulce est humidum moderate coctum. Ergo hoc est humidum ita coctum. Communia verò sic adhibet singulis. Omne dulce & flauum est mel. Hoc igitur quia tale est, est mel. Sic assuefacta ratio, quando animus fuerit separatus, communes mentis ideas facile in singulas distribuet notiones, quia ratio sicut hic sua quadam temporali diffusionem diuinum illud & efficax animæ centrum caputque mentis prouocat, ut formulas in mente latentes paulatim educat in lucem, & in rationem usque traducat, ita illic subito continuoque affectu per diuturnam consuetudinem generatio formulas inflammabit, ut per quasdam rerum singularum scintillas excussæ, quandoque ex mente coruscent in rationem. Quapropter Plato in Epistolis atque legibus, Plotinus quoque in libro de animorum immortalitate concedunt, animis separatim inesse nostrarum rerum sensum aliquem atque curam.

Quod quidem Plotinus sic accipi vult, ut eatenus animaduertant humana, quatenus superest ipsis habitus aliquis vel affectus ad corporea vergens, quo tandem sublato, tanta attentione diuinis incumbat, ut singula quæ inter nos contingunt, aut non videant, aut (sicuti solent qui aliquid intentissime cogitant) se videre talia non aduertant. Eadem ferme de rerum humanarum reminiscencia ratio est. Nam Plato alibi recordari concedit, alibi lethæum inquit, obliuionis flumen inter vitæ huius atque alterius fluere regionem. Recordari enim quamdiu erga illa quæ hic senserant, afficiuntur, deinde minime. Animas verò quæ labuntur in corpus, eatenus diuinorum obliuisci, quatenus sese in corpus immergunt. Cum primum emergunt & quantum emergunt, tunc primum atque tantum reminisci. Sunt autem animæ multæ, (ut & priscis & nostris placet Theologis) quæ hæc aut illa, hic aut ibi, non affectu sed prouidentia quadam à Deo distributa gubernant. Adde quod in Republica scribit Plato animas quæ hic aliquo affectu se nouerant, sese illic agnoscere, atque ferme ad se inuicem similiter affici. Auctenna quoque in Metaphysicis ait, animarum beatas tum miseras in altera vita perseverante ad tempus habitu quodam à sensibilibus contracto, posse imaginari, quæ hic prius vehementiore affectu ima-

ginabantur. Sed hæc nunc tanquam minus necessaria dimittamus.

*Ratio secunda, ut forma singulares cum vniuersalibus formis concilientur.*

## C A P V T II.

**M**irabilis profectò virtus est hæc humana ratio, animæ rationalis propria, per quam sumus homines. Accipit à phantasia singula, à mente communia, & in vnum congregat vtraque, & sicut in homine mortalia cum immortalibus copulantur, sic in huiusmodi ratione temporalia simulachra speciebus iunguntur æternis. Quod nisi in mundo efficeretur alicubi, restaret formarum series interrupta. Fieri autem nequit, nisi rationalis animus terreno corpori coniungatur.

*Ratio tertia, tam radius diuinus, quam eius formula reflectantur in Deum.*

## C A P V T III.

**F**acit in hoc iterum aliud mirabilius, quoniam diuinus ille radius idearum plenissimus, postquam ad animam vsque descendit, transit per vitalem animæ vim, perque naturam in mundi materiam, in qua fingit extremas quasdam atque vmbrales similitudines idearum, quemadmodum lumen fingit imagines colorum in speculo, imò quemadmodum per lumen vmbra corporum designantur in terra. Tales autem similitudines siue vmbrae discedunt ab ipsa diuinitate quamplurimum. Nam ex puris impurae fiunt, dum à contrariis inquinantur, ex vnitis dissipatae, ex communibus singulae, ex stabilibus prorsus instabiles. Si res quæque suam originem repetunt, vnde percutiens terram Solis radius, in Solem inde reflectitur quid mirum has quoque vmbrales similitudines idearum occulto quodam instinctu pristinam puritatem requirere, atque radium ipsum earum fictorem postquam descendit, vicissim ad ascendendum ardentem anniti? Frustrane tantus conatus erit? Minime. Quis succurret? Non animæ bestiarum, quæ solis singularibus simulachris inhiant. Non mentes illæ nostris præstantiores, quæ cum non habeant corpora omnibus omnium corporum subiecta procellis, particulares quaslibet passionum formasque quorumlibet corporum non suscipiunt. Sola restat hominis anima, quæ propter terrenum corpus singu-

lorum corporum singulis quodammodo pulsata tumultibus, assumit quidem ipsa per sensum has à mundi materia infectas similitudines idearum, colligit autem eas per phantasiam, purgat excollitque per rationem, ligat deinde cum vniuersalibus mentis ideis. Ita radius ille cœlestis qui ad ima defluerat, refluit ad sublimia, dum similitudines idearum quæ fuerant in materia dissipatae, colliguntur in phantasia, & impurae purgantur in ratione, & singulares tandem in mente euadunt vniuersales. Sic hominis anima iam labefactatum restituit mundum, quoniam eius munere spiritalis olim mundus, qui iam corporalis est factus, purgatur assidue, atque euadit quotidie ipiritalis. Radij ab amplo Solis orbe demissi in angustum foramen altissimi parietis, conum faciunt per pyramidem, & in ipso foramine obliquantur vsque adeò, ut transuersi traducantur ab ipso, & in suppositum pavementum cum decidunt, orbem fulgidum configurent, tanto ampliorem, quanto remotius à foramine fuerit pavementum, vbi Solaris globi latitudinem adæquatari videntur, si aquali spatio deciderint à foramine, atque à Solē defluerant. Hoc autem in nostris oculis assequuntur. Nam qui in pupilla coacti sunt in angustum, & ab ipsa traducti in animum, in ipso animo Solis magnitudinem implent, vbi verè de Solis magnitudine iudicatur. Ex quo apparet tanto animum distare ab oculis, quanto solaris orbis supereminet oculos. Idcirco & in cœlo secundum Ægyptios & cœlestis animus, qui terrenos oculos æquè supereminet, atque cælum. Influxus quoque idearum à supernis mentibus demissi in corpora, ex amplissimis angustissimi fiunt, & dum ex vniuersalibus omnino particulares euadunt, à corporibus tandem reflexi in hominis animum pristinam recipiunt amplitudinem. Vnde euidenter ostendunt, humanam mentem ita fermè à corporibus esse remotam, sicut & mentes superiores. Ideoque cum æquè à mortalibus seiuncta sit, ac diuinæ mentes, æquè immortalem existere, præsertim cum formas ab æternitate ad tempus partemque temporis vsque prolapsas æternitati restituat.

*Quarta ratio, ut anima fiat beator.*

## CAPVT IV.

**C**onfert præterea descensus animæ in corpus ad animæ ipsius beatitudinem. Si quis enim hebetior ingenio sit, ac semper corpore validus, quanti facienda sit bona valetudo corporis, ignorabit. Ægrotet oportet quandoque, ut ea comparatione saltem precium sanitatis agnoscat, & recuperata iterum sanitate suavius perfruatur. Anima hominis mentibus omnibus obtusior comparatione indiget ad plenissimum rerum maximarum iudicium. Ergo mundanis agitata procellis, quam quietus dulcisque sit in Deo portus, & hic rectius vaticinabitur, & illic discernet acutius, intentius adhærebit, fructur & dulcius. quam quidem rationem Plotinus non mediocriter probare videtur, maximè verò Porphyrius, qui animam inquit sæpius mala hæc expertam, tandem omnino hæreere parenti, nunquam ad hæc ulterius redituram. Forsitan & ipse Deus instituit diuina gaudia superioribus quidem mentium gradibus natura obtingere, ordini verò inferiori laboribus comparari, ut essent & qui nascendo beatifierent, & qui se viuendo beatos efficerent, ne aut sublimes spiritus plures quàm sint æstimentur, cum aliunde beatitudinem nansiscantur, aut inferiores spiritus contemnantur, cum ipsimet sibi sint beatitudinis authores. Quid si Angeli, utpote qui sunt remotiores à tempore, statim ut orti sunt, per subitam quandam in Deum conuersionem, momento beatitudinem promerentur, nos autem longiori circuitu felicitatem similem adipiscimur? Et quod naturæ deest, industriæ nostræ reppenditur. Ac dum honesti piique laboris tollerantia cum imbecillitate nostræ originis compensatur, quodammodo excellentiam æquantur angelicam, æquamus & præmia. Ita quatuor in bono gradus reperiuntur. Deus à se tantum bonum habet suum, corporea ab alio tantum, angelus & animus non modo ab alio, quia à Deo, verum etiam à se, quia sibi met bonum præstant, sed angelus actu æterno, animus temporali. Neque mirari debemus animum posse non modo ad extremum digredi malum, sicut miseri, sed etiam ad summum progredi bonum, sicut Angeli. Primus enim liberque motus nusquam nisi in infinito habet terminum.

*Quinta ratio, ut vires animæ inferiores ad effectum progrediantur.*

## CAPVT V.

**C**onducit insuper hæc habitatio non ad rationem mentemque solum, sicut exposuimus, verum etiam ad tres illas inferiores, animæ vires, phantasiam, sensum & nutriendi virtutem, quas animæ inesse oportet non minus quam mentem & rationem, si modò inter angelos ac bestias obtinet medium. Inanis quidem & inquietata est vis illa quæ nunquam prodit in actum. Harum trium virium absque corpore non est actus, aut certe non incipit sine corpore, sine corpore inquam terreno, operationes suas tum singulas tum integras non exequuntur. Adde quod Plotinus ait animam per actiones perspicue vires suas naturamque perspicere, ac nisi omnes ædantur, se suaque perfecte non cognituram.

Quoniam verò omnino mobiles temporalesque sunt earum actus atque effectus, par est ut ad aliquod tempus agant, ut ad tempus operetur, quod agit temporaliter, temporalia, idcirco datur eiusmodi corpus ad tempus. Sed quoniam operatio mentis atque eius pedissequæ rationis continua esse potest ad obiecta perpetua, merito in perpetuum operantur tribus aliis viribus quandoque vacantibus. At quam ob causam adeò brevis hic est animæ habitatio? Respondet Plotinus, ut citius deposita sarcina proficiatur ad meliora. Brevis ætas sufficit ad munera hæc explenda, quorum huc gratia venit. quo autem modo conueniens est animo sempiterno, ut modo descendat in terras, modo ascendat, & quasi ludens modo in corpore sit, modo sit extra corpus? Forsitan, ut Plotinus existimat, non opus est ut ad hæc officia moueatur loco ac tempore animus per descensum atque ascensum. Ut enim super locum tempusque (quæ sunt corporis passionem) natus ex Deo est, ita extra loci temporisque limites permanet, non aliter ex Deo pendens, quam ex Sole lumen totum ubique per ætherem. Hoc Plotinum arbitror ab Ægyptiis didicisse, qui animam opinantur immensæ præsentiae Dei secundum essentiã suã participare esse, quandoquidẽ secundum virtutẽ operationemque sit particeps immensæ intelligentiæ voluntatisque diuinæ per interminabile interminabilis veritatis intuitum, & bonitatis affectum. Quare secundum eos non esset dicendum ut modo hic sedeat, modo transeat illuc, sed potius ut

nunc det vitam terræ, postea non det, sicut lumen non mutatum loco nunc oculum apertum illuminat, post clausum minime. Sed hoc ipsi viderint. Quorsum hic ludus in tribuenda corpori vita & auferenda? Satis, vt arbitror, diximus. Dat enim vitam, vt illa expleat munera quæ narrauimus. Aufert, ne diutius à melioribus vacet muneribus propter viliorum operum ministeria. Atque vt stellæ ad explendum officium sibi à Deo iniunctum oriuntur oculis nostris & occidunt, spiritus quoque permulti fabricatis sæpe nouis corporibus, modo oculis se nostris obiciunt, modo subtrahunt, sic hominum animæ aliàs in corporibus apparent, aliàs delitescunt. Hic triplex ostensionis apparet gradus. Animæ stellarum oculis hominum sese monstrant semper atque continuè, licet aliàs aliis. Animæ sequentium spirituum semper, non ramen continuè. Semper, quoniam omnibus seculis id agunt. Non continuè, quoniam intermittunt. Animæ nostræ neque semper, neque continuè. Quod si non est contra naturam, vt à sublimibus corporibus aliquid descendat momentis singulis ad inferiora, rursusque ascendat, vt radij syderum, atque flammæ, non est etiam contra naturam aliquid è sublimibus spiritibus huc quasi descendere quotidie atque ascendere. Item consentaneum videtur Platoniceis, vt quemadmodum Angelicæ vitæ semper à corporibus separatæ sunt, brutæ verò nunquam separatæ, sic mediæ duæ sint, tum animæ feliciores, quæ semper partim separatæ, partim coniunctæ sint absque actionis vllius impedimento, tum etiam minus felices, quæ aliquando segregatæ sint, aliquando verò coniunctæ, coniunctæ inquam elementali corpori, quod intellectualem quodammodo impedit actionem. Nam æthereum corpus apud Platonicos semper habent, apud Christianos autem tale quoddam corpus tandem semper habebunt. Mitto quod Platonici non nostras solum, sed multorum quoque dæmonum animas propria quandoque mutare corpora putant. Profecto diuinam bonitatem tum effundere se in alia, tum alia ad se conuerrere arbitrantur. Inde animas habere, vt corpora regant, inde vt se ad incorporea conferant, & quæ perfectè vtrumque simul facere possunt, corpora non mutare, quæ verò aliter sese habent, merito permutare. Oritur hinc illa vulgarium diffidentia. Quid hoc? Defuncti non redeunt, non agunt quicquam, redire quidem sub aliis figuris Platonici putant. Sed rourera quid

opus est vt redeat ad pugnam veterans & emeritus miles? Si secundum naturam esset reditus ad pugnam, redirent vtiq; omnes. Si est contra naturam, noli alicuius reditum quærere. Contra naturam certe est reditus superuacuus, si fuit secundum prouidentia leges abire hinc illos qui munus suum impleuerant. Accendit sphaera ignis sæpe flammam in aëre, flamma paulo post redit in sphaeram. Noli quærere crebriorem illius flammæ descensum. Naturalis sibi est perpetuus ille cum sphaera circuitus, contra naturam est descendere rursus. Ac licet animus per naturam essentia tertiæ Iani bisfrontis instar vtrumque respiciat, corporeum scilicet & incorporeum, tamen quia sublimioribus mentibus amplior prouidentia, inferioribus angustior conuenit, & animus noster illarum omnium infimus est, angustissima sibi conuenit prouidentia, vnde & ad breue tempus regit cœleste corpus, & ad breue tempus terrenum. Et quando corporeum simul incorporeumque mediocriter respicit, æquè exercet vtrumque essentia tertiæ munus. Quod in hac vita contingit. Quando verò post hanc vitam vel propter puritatem incorporeis incumbit attentior, tunc prospicit corporea negligentius, vel propter impuritatem corporibus mergitur infimis, tunc humana gubernationis autoritate priuatur. Quippe cum humana vita inter diuinam feruamque sit media, animus dum agit mediam, extremam quoque attingit vtramque. Dum declinat ad alteram extremam, (quod quidem & nunc incipit facere, & explet postea cum decesserit) mediam attingit paulum, extremarum alteram minimè. At cur non videntur animæ defunctorum? Deum, Angelos, aërem non vides, ob hoc tamen esse non negas. Cur non agunt quicquam: Agit omnia Deus, agunt Angeli, actiones illorum ita non animaduertis, sicut non vides illos. Quid prohibet animas à terrenorum corporum vinculis iam solutas mouere corpus æthereum, vel aëreum nestrus oculis inuisibile? quid prohibet eas rationem phantasiamque nostram cogitationibus, visionibus, signis, quotidie commonere? Nos autem hæc nonnunquam vnde veniant ignorare: Sæpe enim inuisibilium motiones inuisibiles sunt. Auenzoar Albumaron medicus arabs scribit, se à medico nuper defuncto per somnum accepisse optimum oculo suo ægrotanti remedium. Multa generis eiusdem quotidie nobis eueniunt. Plato in libro Legum nono tradit, eorum

qui occisi sunt animas sæpe interfectores hostiliter insequi. Vnde fortè contingit, vt occisi hominis vulnus, etiam iacente cadauere, in eum qui vulnerauerat, si modo ille communius instet, vulnus ipsum inspiciens, sanguinem rursus eiciat, quod quidem euenire nonnunquam Lucretius affirmavit, & iudices obseruauerunt. Confirmat Platonis sententiam Possidonius Stoicus ex eo quod duo quidam Arcades familiares cum Megaram venissent, alter ad Cauponem diuertit, alter ad hospitem. Qui vt cœnati quieuerunt, nocte visus est in somnis ei qui erat in hospitio, ille alter orare vt subueniret, quod sibi à Caupone interitus pararetur.

Hic primò perterritus somno surrexit, deinde cum se collegisset, idque visum pro nihilo habendum esse duxisset, recubuit. Tum ei dormienti ille idem visus est rogare, vt quoniam sibi viuo non subuenisset, mortem suam saltem ne inultam esse pateretur, se interfectum à Caupone, in plaustrum esse coniectum, & supra stercus iniectum, petere vt mane ad portam adesset prius quam plaustrum ex oppido exiret. Hoc ergo in somnio is commotus, manebubulco præsto ad portam affuit. Quæsiuit ex eo quid esset in plastro. Ille perterritus fugit, mortuus erutus est. Caupo repatefacta poenas dedit. Beneficij quoque memores esse animas defunctorum, ex hoc coniciunt Stoicorum nonnulli, quod Simonides cum ignotum quendam proiectum mortuum vidisset, eumque humauisset, haberetque in animo nauem conscendere, moneri visus est ne id faceret, ab eo quem sepultura affecerat. Si nauigasset, cum naufragio periturum. Rediit Simonides, cæteri naufragium fecerunt. Hæc omnia docent aliquid in nos agere animas defunctorum.

*Ratio sexta, vt mundus ornatur,  
colatur Deus.*

## C A P V T VI.

**S**ed vt disputationem superiorem fine congruo concludamus, voluit diuinus artifex mundi opus sibi quam simillimum facere. Tale est autem, si vbique sit ratione plenissimum. Profectò vt in ipso ratio est & vniformis simul & omniformis, sic in opificio suo animam vnā rationalem esse voluit, atque multas, vnus scilicet sphaera vnā, multasque multarum. Et quia sphaera quælibet suum imitatur totū, ideo multas etiam in sphaera quælibet col-

locauit, ita vt sicut sphaera sphaeram, sic anima animas contineret. Tot verò saltem esse animas statuit in supremo, quot sunt stellæ, quæ cum sphaeram imitentur suam, singulæ quoque circa centrum proprium reuoluuntur, propriorumque motu proprios sunt fortitè motores. Probabile enim est illas vltra sphaeræ vitam proprias quoque vitas habere, si modo præstantiora corpora sunt quam animalium terrenorum, quæ proprias nactæ sunt vitas. Mirro quod singulæ coelestium animæ, & proprium circa intelligibilia intellectualem habent motum, & communem circa corporea animalem vnā cum vniuersali sphaeræ anima, geminosque hos animarum motus sequuntur gemini motus in stellis, proprius simul, atque communis. Sic verò sphaeræ minores perfectè imitantur maiores, quod rationales similiter multas continent animas, quæ & communem in facto, & propriam in seipsis habent conditionem. In omni igitur mundi sphaera vltra communem sphaeræ cuiusque animam viuientia multa instituit rationalia, vt aliàs disputauimus. Quare oportuit in media quoque mundi sedetalia quædam esse, vt esset in membris omnibus rationalium turba quam plurima, quæ hoc ornet colatque Dei templum, atque Deum artificem canat & laudet. Id agunt in altioribus sphaeris mentes aliæ, id agunt humane mentes in terra. Neque peccus hoc mortale futurum est, quod assiduè æternum Dei resonat nomen. Nemo vero ob hoc diffidat esse multos in planetarum sphaeris habitatores, quod vnus in qualibet earū planeta suspiciatur. Imo vero quia descendendo à summo semper, vt Platonici putant, numeralis habitantium crescit turba, ideo in summo cœlo ipsi stellarum numero dux vnus, id est, ipsa sphaeræ anima sufficit. Sed quoniam in singulis Planetarum circulis habitant plures quam in summo, atque inferiores, idcirco pluribus opus est ducibus. Quocirca duos in singulis duces, id est animam sphaeræ & planetæ animam illic Deus instituit. Habitatores autem eiusmodi animalia vocant angelica, dæmonica, heroica deinceps atque humana ex anima rationali & corpore sphaeræ suæ congruè constituta, quæ tamen non videantur, quia vel minus lucis vel minus solidi habent quam stellæ atq; planetæ. Neque id quidē mirū, cum nec sphaeræ etiam in quibus sunt, videantur. Sequi verò eos & natura & motu & denominatione planetæ suum, sicut planeta sphaeræ animam, & sicut sphaera animam vniuersi. Denique



concludunt, si in extremis vtrinque mundi sphaeris rationales sunt multi, meritò & in mediis esse multos. Nos autem quasi vicissim concludimus, si Deus diuinis mentibus circumfusus ornauit sphaeras, iure & mediam diuinis mentibus exornauit. Neque spernenda est habitatio terræ, quæ medius choris est templi diuini, & tantarum sphaerarum stabile fundamentum. Neque paruifaciendum est, quod circa eam cæteræ voluuntur sphaeræ tanquam cardinem. Quid? quod cœlestium omnium radij in eam confluentes miscentur hic, virtutemque mira vnione mirabilem consequuntur. Quid? quod facies terræ viridis, instar cœli varia, perspicuis corporibus tribus inuoluitur, aqua, aëreque & igne, ac repercussa syderum radiis eos congregat in splendorem. Ideo si in Luna constitutus, globum hunc inde prospiceret, talis tibi forsitan videretur, qualis tibi nunc à terra Luna videtur, putaresque eos qui hic habitant esse cœlestes stellamque aliquam habitare. Idcirco Pythagorici terræ globum aqua & aëre suoque igni quasi velaminibus suis circunvolutum, sphaeram mundi vnā ac stellam quandam nominauerunt. Et Plato terram vocat Deam antiquissimam Deorum omnium qui sint intra cœlum. Addit ingentes terræ regiones habitari nostris admodum altiores, vbi lapides, metalla, plantæ, animalia sint nostris mirum in modum præstantiora atque pulchriora, vbi homines diutissimè viuunt, modicisque alimentis, cum preciosissima sint, odoribusque feliciter nutriantur. Mitto quod Diodorus Pliniusque narrant alicubi homines solo etiam odore nutriri. Illud certè mirabile, quod Olympiodorus Platonius scribit, Aristotelem vidisse hominem qui dormiret nunquam, soloque aëre radiis Solis exposito viueret. Hæc illis fermè similia, quod in diuinis hortis quasi campis Elysiis homines sola arboris vitæ gustatione immortales viuere potuissent. Sed vt ad institutum ordinem reuertamur, Timæus Moysen imitans inquit, Deum in principio igneum cœlum terramque creasse quasi præcipua mundi membra, atque vt hæc duo hæc aptius inter se vinciret, aerem mox aquamque interieciisse, quasi non sui, sed illorum gratia sint inuenta. Quod si liceret paulo latius (vt sæpe solemus) cum antiquis nostris confabulari, referrem e quidem præcipuam propriamque naturam ignis lucem esse potius quam calorem, Primò, quia illa diuinior est. Secundò, quia illa citius agit. Tertiò, latius se

diffundit. Quarto, non sicut calor abente igne, quasi cæteris quoque communis, quodammodo in calefacto relinquitur, sed tanquam igni maximè propria, nullique permixta, suum vbique sequitur ignem. Quinto, quia ignis quo magis alienæ soliditati miscetur, eo feruet magis lucetue minus. Contrà verò quatenus in puritatem propriam restituitur, eatenus vrit minus, lucetue magis. Quorsum hæc? vt intelligamus cœlum esse ignem, cuius proprium sit actu quidem lucere, virtute verò calere, vt non immeritò dici possit cœlestem ignem esse lumen cuius calefactoria virtus nulli per se noxia sit, sed blanda omnibus atque salutaris. Vnde & æthereus sub Luna ignis quodammodo cœlestem secutus, aërem proximum non consumit. Quod autem virtus quæ in supremo igni tantum salutaris est & blanda, penes ignem inferiorem à superiori specie differentem mordax (vt ita loquar) euadat, hinc efficitur, vel quod asperitati terrenæ miscetur, (vnde in solidiori sicciorique materia vehementius vrit) vel quod reflexione quadam cogitur, & quasi vim patiens, vim etiam infert. Ideo in liberiore aëre tangenti vbique blanditur, sed inter concaua percussa percutit, atque speculo concauo violentius repercussa, violentius & ipsa repercutit.

Quamuis autem totum cœlum per ignem potissimum describatur, tamen cætera quoque elementa, sed modo cœlesti subiungunt. Igitur in cœlo vbique præualet ignis, sed alibi vnā cum quadam cœlestis terræ soliditate, quod patet in manifestioribus stellis, quæ quoniam soliditate quadam obsistunt radiis oculorum, ideo licet remotissimæ sint, tamen perspicue discernuntur. Alibi vero ignis subiuncta quadam cœlestis aquæ proprietate viget in orbe præcipue lacteo, ideoque ibi stellæ, quantum fert aquæ natura, videntur. Denique passim ignis addita aërea quadam perspicuitate regnat. Quo efficitur, vt in sphaeris plurimum, dum pro sui aërisque natura non obsistit oculis, non videatur. Quod autem quædam elementorum naturæ in cœlo sint, omnes Astrologi consentunt. Hinc campi apud poetas Elysi. Hinc & illud, Beati mites, quia ipsi possidebunt terram. Hinc & Dauid & Moyses aquas per cœlestia fundunt. Iterum quorsum hæc? Vt concludamus, si elementa quodam cœlesti modo in cœlo reperiuntur, posse vicissim in elementis quoque elementali quadam conditione cœlestia similiter reperiri. Maximè in terræ globo,

quod alterum præter coelum mundi est fundamentum, in quo licet terra præualeat, sicut in coelo ignis, tamen perinde atque in coelo aer ignisque adiungitur. Denique super Lunam ignis, infra verò terra ubique regnat. Atque etiam propè ipsum mundi centrum per terrenos hiatus flumina, ignis & aëris & aquæ vndique fluunt. quamobrem nemini mirum videri debet & coelestes animas ad terrena demitti, & vicissim peregrinos habitatores terræ ad coelestia quandoque remitti. Denique qualiscunque terra sit, huius homo est Dominus. Est utique Deus in terris. Neque eo minus diuinus putandus est hominis animus, quia corpore fragili circumdetur, sed ideo diuinissimus, quoniam etiam in fecce terrena, si modò terra sit vilis, contra tum loci naturam, tum corporis farcinam, tam diuina opera peragit, ut dum inferiora gubernat, à superioribus non discedat. Platonici omnes, quibus consentit Dionysius Arcopagita, naturale diuinarum mentium officium esse censent, ut mancant in natura sua, ut prouidendo agendoque procedant, ut se suamque originem agnoscendo conuertantur ipsæ, sequentiaque conuertant. Igitur anima tanquam diuina tria hæc pro viribus explet, atque ad hanc inferiorum gubernationem non tam amatorio affectu allicitur propter affinitatem, quam ingenito quodam prouidentia studio propter naturæ præstantiam. Nam præstantissima quæque intimæ perfectionis exuberantia sese latissimè propagant. Atque ut Plotinus ait, ipsum bonum effuso splendore procreat intellectum. Intellectus quoque dum explicatur, animam exprimit rationalem. Anima ipsa se propagans, vitam efficit formamque corpoream. Hinc Dionysius Arcopagita. Certè diuina vnitas cunctis vnita, inuicem vnit cuncta, dum ea quæ inter se sunt æqualia, propter qualitatæ similitudinem in vnum congregat mutua quadam consensione, inferiora verò propter indigentiam ad superiora conuertit fruenti cupiditate, superiora propter abundantiam ad inferiora deflectit studio prouidendi, quo diuinam prouidentiam imitentur. Animas autem rationales diuinam prouidentiam modis quatuor imitari Platonici disputant. In primo quidem gradu animam mundi collocant, in qua vniuersalis circa mundum sub Deo sit prouidentia, per quam omnibus omnia largiatur. In secundo verò duodecim sphaerarum animas, in quibus vniuersalis particularis prouidentia sit, per quam videlicet mundanis

omnibus nonnulla distribuatur. In tertio animas tum stellarum tum numinum quorumlibet in quauis sphaera mundi regnantium. Apud quos esse censent prouidentiam particularem vniuersalem, quæ scilicet nonnullis mundi membris, quæ ipsis congruunt singula tribuant. In quarto denique particulares animas, illas videlicet quæ ab intelligibili ad sensibile, vicissimque recurrunt. Quarum esse prouidentiam particularem adeò putant, ut aliqua iam tantum aliquibus impartiant, præterea multis vitarum cursibus impleant, quæ & superiores paucioribus periodis agunt, & prima vnico circuitu complent. Sanè Plotinus Proculusque disputant, quemadmodum vnus mundi circuitus multos complectitur, Saturnios, Iouios, Martios, Solares, aliosque deinceps, sic vnum animæ mundanæ per species suas circuitum intimum, multos animarum particularium continere, quippe cum sublimior anima longiorem circa intelligibilia orbem peragat, inferior breuiorem. In his equidem recitandis prolixior esse volui, quoniam Platonici per hæc potissimum tam ea quæ in hoc capitulo sunt, quam quæ in capitulo præcedente tanguntur, explanari confirmarique existimant. Sed talia quædam ipsi viderint. Mihi verò narrauisse sufficiat.

*Tertia questio, quam ob causam animi si diuini sunt, perturbationibus afficiuntur.*

## C A P V T VII.

Quærebatur tertio, quam ob causam animi si diuini sunt, perturbationibus sunt subiecti. Sed nemo id vnquam admiraretur, si quandoque consideraremus nulli menti corpus fuisse tributum onerosius quam humanæ. Profecto mentes sphaerarum, syderum; atque dæmonum sublimiorum, simplicibus præsent corporibus, quæ sua quadam similibus partium vnitate vsque adeò constant, ut non effluat sui quicquam, ideoque nec influat noui quicquam oportet. Naturali rursus agilitate ita vergunt ad motum, ut leuissimo illarum mentium nutu viuant & moueantur. Contra corpus humanum elementis quatuor pugnantibus est compositum, & aquæ terræque pondere retardatur. Quapropter partium suarum tum dissensione penè quolibet momento dissoluitur, tum pondere decedit, fitque ad vitam ineptius, pigriusque ad motum. Propter ipsam quoque interiorem dissensionem in qua humores inuicem se expel-

sunt, effluit aliquid semper è corpore, ac rursus oportet vt influat.

Quare ad corpus huiusmodi conciliandum, mouendum, instaurandum, impensissima opus est animæ nostræ attentione. Huc tendit Platicum illud. Sublimia corpora ad sublimes accedunt animas, inferiores animæ accedunt ad corpora, quia videlicet illa illis facillimè cedunt, hæ verò his difficillimè. Quod si sublimiorum illarum mentium aliqua corporis nostri claustris ad decennium clauderetur, forsitan non multo minus quam noster animus fatigaretur onere, & cura sollicitaretur, ac illius diuinitati diffideremus, vt modo nostræ diffidimus. At dicet aliquis mundi animam corpus, habere ex quatuor compositum elementis aduersantibus inuicem, neque tamen ea cura fatigari, vt nostro corpore nostram. Sic est plane, sed ipsa elementa quæ corporis mundani sunt membra, non elementorum aliorum partes sunt, sed tota integra elementa non sunt extra loca naturalia, sed in suis quæque disposita regionibus. Non sunt confusa inuicem vndique, sed propriis sedibus sunt discreta. Non sunt externis subiecta corporibus. Nullum enim corpus extra mundum est. Contra vero corporis nostri ignis nõ totus est ignis, sed pars aliqua amplioris. Sic reliqua tria. Idcirco imperfecta sunt huius corporis elementa. Sunt etiã extra loca ipsorum propria, propterea ignis & aër qui sunt in nobis, semper hinc fugiunt ad sublimia, aqua terraque ad infima decidunt. Difficillimũ verò est imperfecta perficere, conciliare pugnantia, extra locum naturalem corpora detinere. Sunt etiam in nobis quatuor illa permixta in qualibet particula corporis, quo fit vt pugna passim ferueat vehementior, in mundo autem alicubi discernuntur quodammodo, pacatiusque quiescunt. Multa quoque & ingentia extra nos sunt quæ nobis vndique imminetia corpus affligunt, quibus oneribus & laboribus neque anima mundi premitur, neque etiam elementorum animæ, quarum corporibus quicquid accedit aut decedit, vix atomi vnus momentum habet. Temperata quoque est vndique restitutio, neque vsquam naturalis dissonat harmonia, harmonia, inquam, sphærarum salutis conducentis. Sed neque illæ, quamuis diuinissimæ possunt vsque adeo sphærarum impetum cohibere, quin & elementorum partes & composita corpora se inuicem deuorent atque perdant, & illuiones ignis & aquæ mundum sæpe perturbent.

Atqui qualitates eiusmodi repugnantes, non possent à cœlo aliquo pacto produci atque duci, nisi in eo earum virtutes essent, neque in cœlo essent, nisi in motoribus conditoreque cœlorum. Sed in Deo vna forma sunt, ratione duntaxat distinctæ, in Angelis verò formis insuper distinguuntur, in animabus motu insuper ac tempore, in cœlo etiam loco simulque virtute, sub cœlo denique effectū atque repugnantia. Quorsum hæc? vt intelligamus sphærarum elementarium animas haud tantam habere potentiam, vt qualitates quæ in cœlo inter se non pugnant, ita moderentur atque concilient, vt sub cœlo non pugnent inuicem, & se interimant. Sunt qui dicant coelestem substantiam præstantia sua illas conciliare, materiam verò quæ sub elementis est, deformis, instabilis, inefficax, neque illas simul capere posse, neque conciliare. Vtunque sit, apparet elementorum animas, si animas habent, illas omnino simul pacare non posse, quod neque etiam mundi anima potest, vt non mirum sit animas nostras in contemperandis humoribus adeo laborare, & in regione dissonantiæ dissonare. Omnino autem assignata superioribus animabus est tam facilior quam felicitior gubernatio. quod si noster animus mundani corporis gubernaculis præflet vt illæ, eadem fortasse qua illæ felicitate disponderet. Sed erant etiam in particulas terræ mentes aliquæ mittendæ diuinæ, ne mundi rex minus in terræ partibus quàm in coelis elementis que totis celebraretur, hoc nostris obtigit animis. Scribit Hippocrates, mutationes quæ & repentinae sunt, & maximè ad oppositum, maximos diurnosque morbos inferre. Plato verò in libro de Republica septimo, animam in corpus labentem repente à summa luce in extremas tenebras ruere arbitratur, vt non mirum sit eam diutissimè excutire atque turbare. Auget turbationem eius (vt disputat Proculus in Timæo) quod ab vnitate in multitudinem dissonantem, à statu mutationem omnis ferme quietis expertem delabitur, vnde distrahitur semper, & quasi affecta vertigine titubat & vacillat. Neque eam permittit facilè à tot fluctibus tantisque procellis emergere, sua illa vitalis vmbra naturaliter corpori tradita, erga quam ceu prolem amore vehementer afficitur, atque illa quotidie patiente, ipsa quoque suo modo compatitur. Fortè verò quamdiu anima seipsam nequaquam animaduertit, nihil aliud se putat esse quam vmbra, palam in flumine cor-

poris apparentem, quemadmodum Plato in septimo de Republica docet. Neque aliter turbata hac umbra, ipsa quoque se turbat, quam si pueri rudes, cum videant umbras suas in aqua confundi, grauiter lamententur. Talem verò in animabus ordinem Platonici ponunt, alias videlicet in generationem, id est, generabile corpus nunquam descendere, quales sint animæ vel diuinæ, vel proximæ, alias descendere quidem in generationem, & à meliori vita in minus bonam, ita tamen, ut inde nequaquam inficiantur, malumue aliquod subeant, quales inter dæmones herocique connumerent, alias descendere tam simul, atque quodammodo vitari, sed purgari posse iterum, seque rursus ad meliora transferre. Addunt in summis animabus neque secundum essentiam, neque secundum actionem vitium reperiri, sed in infimis animarum umbris secundum utrumque. In nostris autem vitari quidem actionem posse, essentiam verò nequaquam. Plerique putant humanæ vitæ difficultatem hinc insuper augeri, quod motus & habitus animæ quatenus intellectualis rationalisque est, circuitus esse debeat. Similis quoque ætherei vehiculi motus atque figura. In corpore verò composito anima vegetando, sentiendo, progrediendo, rectum quodammodo subit motum, dimisso circuitu. Vehiculum quoque motum figuramque suam mutare compellitur. Quod etsi secundum substantiam non destruitur, quia ut quidam putant, materia caret, tamen secundum figuram motumque turbatur. Quæ tunc demum recipiet, cum primum animus in caput suum, id est, mentem erectus in habitum suum prorsus restituetur. Quem tam diu amisisse videtur omnino, quamdiu per intemperantiam caput, id est, mentem figit humi, pedes autem, id est, inferiores animæ vires extollit in altum, quo quidem habitu nihil aut deformius aut laboriosius potest excogitari. Sed cur non est datum nobis æthereum corpus aliquod in quo terram coleremus, & liberius speculareretur cœlestia? Quoniam aëri sui adsunt spiritus, defuissent hoc modo terræ. Ac si corpora simplicia ratione non carent, debent aliqua rursus composita terrenaque corpora ratione pollere, ut mundus hic corporeus ita totus sit rationalis. sicut spiritalis ille mundus, ad cuius exemplar hic est factus. totus est ratio. Voluit autem pater ille optimus sacerdotes suos qui in sphaeris superioribus cum cantant. manere ibi semper eodem, quoniam propter loci felicitatem

sine labore illic agunt vitam. In terris verò sacerdotes suos diuturnas moras trahere noluit, quoniam non debetur labor perpetuus aut longius iis qui sedulo Deum laudant. Ideo cemitit huc eos quotidie, atque reuocat, ut per successionem in terris fiat semper, quod fit per eandem vitam semper in coelis. Mitto quod multi etiam in aëre animas dæmonum heroumque putant corpora quamuis tardius, tamen aliquando in melius permutare. Verum habeat, dicet quispiam, noster animus corpus onerosius quam mentes aliæ, atque idè sollicitetur quandoque, & magis quam aliæ à speculando prohibeatur, cur autem fragilius corpus habet quam bestie? Non quia fragilius habet corpus, idè putandus est minus esse diuinus, imò quia est diuinius, corpus habere fragilius. Disputauimus aliàs, corpus nostrum esse terriorum omnium temperatissimum, cœloque simillimum ut cœlestis animi muneribus pacatius ministerium præbeat. Hanc verò temperantiam necessario sequitur imbecillitas. Complexio in qua nimis excedit calor, vix à calore & frigore læditur. Nam calor ingens remissiores calores exuperat, ut eius comparatione vix appareant, & frigoris impetum frangit. Ac si in aliqua complexione frigus excelsat non quælibet frigiditas extrinsecus injecta percipitur, & æstus facile toleratur, Similiter ubi humiditas aut siccitas præuālet. Vbi verò hæ quatuor qualitates mediocres sunt & consona temperatione miscentur, quæcunque noua qualitas aduenit, excedere cogit aliquam ipsarum quatuor qualitatum, qua excedente, prioris complexionis consonantia perit, & naturalis habitus dissipatur. Ergo quia necessaria fuit homini complexio terrenorum omnium temperatissima, hæc vero quibuslibet offensusculis læditur, consequens fuit ut imbecilla esset corporis humani natura. Huic tamen imbecillitati subuenit diligens artium nostrarum industria. qua fit ut temperantia nostra contra mundi procellas diutius perseueret. Sic enim adæquauit omnia diuinus artifex, ut in bestiis cum imbecillitate animæ vires dotæque corporis in nobis autem cum corporis imbecillitate vires animi compensaret, atque ita significaret bestiarum animas morti corporis deputatas esse, nostras autem vitæ mentis perpetuæ dedicatas, quas tamen oporteat semper extra patriam laborare. Nam temperata complexio quæ speciei humanæ maximè naturalis est, ut diximus, ob innumerabiles causas tum ab

initio in multis, tum quotidie in singulis undique diffonare compellitur. Ideoque continuat & impensissima attentione animæ opus est, etiam si minime aduertamus, ad temperationem ipsam naturæ restituendam. Durissimus hic perpetuusque vegetatricis potentia labor, non solum & remittit admodum & in termitit mentis intentionem, unde quasi mente non utimur, sed etiam multis nos clam perturbationibus afficit, & quasi somniantes exagitat. Nempe dum in qualitatibus his aut illis contemperandis obnixius operatur, ipsa interim ad hæc congruis suis seminalibus rationibus utens, suscitatur sensim in superiore sensui imagines affectusque ad qualitates illas maximè pertinentes. Igitur in tractandabile latenter insurgit ira, vel ad irascendum procliuas. In agitando sanguine, læticia vana. In pituita tædiū & pigritia. In atrabile timor & mœror. Sæpe verò adeo imagines affectusque huiusmodi inualescunt, ut vacante omnino circa talia ratione sequatur insania. Præterea in multis dum crassiores spiritus tenuare molitur, hebetissimos arguit. Dum in aliis laxiores spiritus congregare studet, contemplationis assiduitati memoriæque, ineptos ostendit. Quod si quando spirituum siccitatem colligere animum dicimus, sic accipi volumus, non ut agat in animuni, sed ut animus in congregandis spiritibus non labore, unde cogatur à contemplatione diuertere. Denique sicut sensus exterior dum circa molesta versatur offenditur, sic & interior plurimum intrinsecas spirituum offensiones percipiens à variis illatas humoribus atque causis, molestas imagines affectionesque suscitatur.

De causis onerosæ gubernationis iam satis. De vitis autem animi etsi non nihil diximus, aliquid insuper est dicendum. Anima quoniam in medio mentium corporumque confinio creata est, non solum diuinis inhiat, verum etiam naturali providentia & amore materiæ iungitur, atque in ea per umbratilem quandam vitæ suæ communionem animatum corpus disponit, deinde ipsum tanquam opus suum & prolem propriam diligit. Amor animæ naturalis corpori iunxit, amor eam naturalis in corpore detinet. Amor idem quotidie ipsam ad cultum corporis prouocat. Mitto quod Plato in legibus probat, Plotinusque comprobat, animam cum antecedar corpus, eique dominetur, non tam à corpore corporeum affectum habere, quam per affectum eiusmodi suum sese in corpus imbergere. Quæ quidem senten-

tia Zoroastri & quodammodo Mosi conuenit, dicentibus, mala corporis à culpis animæ proficisci. Sed utcumque sit, anima quidem corpus amat, onerosi autem & fragilis natura corporis postulat ut vitalis animæ virtus summo nixu sustentet ipsum & moueat, atque ut sensus & phantasia, quæ prodesse corpori possunt, quæ obesse, assidue circumspiciant, ac pro corpore quasi animæ filio cupiant, timeant, latentur, & doleant, A prima origine tres eiusmodi vires huiusmodi opus aggrediuntur, tanta quidem intentione, propter recentis corporis fabricam, ut nulla penè sit animæ attentio ad rationem, priusquam a ducto corpore & purgatis sensibus remittat operis huius intentio. Verum cum primum ratio expergiscitur, summa cum difficultate imperium phantasiæ diuturno usu in anima confirmatum debilitat, quippe cum arduum sit vel naturæ vel habitui repugnare. Hic autem tam contra confirmatum ultra naturam habitum, quam contra naturalem affectum est pugnandum. Id tamen diligentiori disciplina tandem assequitur. Sed interim ipsa etiam ratio propter naturalem cognitionem prouidentiamque tres illas inferiores diligit vires quasi germanas aut filias. Ideo sæpe illis obsequitur. Illæ corporis naturaliter agunt curam. Igitur & ratio per illas amore declinat ad corpus. Ex diuturna declinatione habitum sibi ipsi contrahit procliuas inclinandi. Habitum huiusmodi, vitium, imò etiam quendam (ut ita dixerim) interitum appellamus, quoniam sicut in multis fieri solet animalium speciebus, postquam vis inferior in corpore fabricandæ naturalibus se circum filis inuoluerit, sæpe vis superior cœptum opus solidiori paulatim contexit tela, atque sub durissima tandem textura se clam includens, ipsa se perdit, non prius in lucem resurrexura, quam textura concreta frangatur. Quamobrem non vitatur animus diuinus à corpore, neque cogitur, sed ipse amore animati corporis (quod & opus suum, & instrumentum est) ad ipsum è suo statu sponte se deiicit, ut ad se illud extollat. Neque desunt inter Platonicos qui dicant, præsertim Hermias, quosdam esse demones generationis fautores, qui inclinationem animæ ad corpus naturaliter augeant. Certè Plato in libro de pulchro, quasi sicut Moses, inquit dæmonem quendam ab initio voluptatem plurimis malis immiscuisse. Mitto quod in Epistolis ait dæmonem bona publica turbauisse. Sed de his in sequentibus. Redeamus interim ad animæ providentiam.



providentiam. Cum omnium diuinarum mentium proprium sit quod superiora intueantur, quodque inferioribus prouideant, idem quoque animæ nostræ est proprium, quæ non modo corpus suum, sed etiam terrenorum omnium, & ipsius terræ corpus curat & colit. Sed hæc providentia quanto grauior est, quia res curat fragiliores, ineptioresque ad ordinem obseruandum, tanto magis distrahit à superioribus speculandis, neque tamen omnino. In omni enim ætate per intellectum omne verum inquirimus, per voluntatem omne bonum amamus, per operationes Deum qui omne reuera bonum est, colimus. Tria hæc honestatis officia significant, animam etiam in tanta maris huius tempestate cœlestia semper suscipere, quibus suscipiendis vehementiore illorum amore quotidie capitur. Amore huiusmodi feruescens, deseruet paulatim corporis amor per quem vitiatus fuerat animus, & vitij maculæ abolentur. quapropter animus nunquam cogitur aliunde, sed amore se mergit in corpus, amore emergit e corpore. Huc tendit diuinum illud, qui amat animam suam in hoc mundo, perdit eam. Qui hic odit, in vita æterna recipit eam. Qualis autem in hoc pelago fiat videaturque, sic in decimo de Republica Socrates primit. Quemadmodum si quis marinum Glaucum longo iam tempore vndis attritum atque distortum, præterea petris, alga, ostreis obsitum viderit, non marinum, sed siluestre potius animal opinabitur, sic nos cum animam terrenis affectibus & habitibus distractam circumfusamque videmus, terrenum quiddam potius quam cœleste nos videre putamus. Verum si nudauerimus eam, considerauerimusque puram, atque diuinorum amere iam ex hoc pelago emergentem, proculdubio cognoscemus animam propterea quod diuinis externisque cognata sit, talia quædam appetere, & cum primum pura euaserit, tangere, cumque iis in serena luce versari, eaque consuetudine diuinam prorsus euadere. Hactenus Socrates. Quando igitur viciari animam dicimus, non tam amittere suam quam aliena id est, inferiora in se admittere intelligi volumus. Huiusmodi autem virium naturam non perdit, sed occupat. Sed ne quis nostrum animum ob id esse corporeum opinetur, quod corporeis quotidie causis infici videatur, operæ precium est audire diuinum Paulum Apostolum clamantem, non esse nobis colluctationem aduersus carnem & sanguinem, sed aduersus multas dæmonum turbas,

quæ in hoc caliginoso aëre inter nos versantur. Hos autem prisci Theologi, quod Origenes Augustinusque confirmant, aëreo corpore indutos, motu agiles, perspicaces sensu, mirabili rerum scientia præditos arbitrantur, aëreisque corporibus suis, aëreo spiritui nostro penitus illabi, atque sicut quilibet homines per indicia externa quodammodo ac peritissima quique præcipue intrinsecos augurantur affectus, ita sagacissimos dæmones non per externa solum indicia, sed etiam per ipsos nostrorum spirituum motus, qui à phantasia sæpius incitantur, attentiores quotidie notiones acrioresque affectus, vnde proprie spiritus ipsi mouentur, aucupari. Hinc ergo fieri, ut qua via quemque perturbare facilius valeant, rectissime calleant, atque ipsi perturbatione quadam affecti nos quotidie turbent. Perturbationis huius motum ita potissimum fieri arbitramur. Mouens sane aëreum in nobis spiritum aërei dæmones, quo quidem quasi vibrato & humores mouentur in corpore, & in phantasia imagines excitantur. Sed quonam pacto? Nempe in sanguineo corpore sanguinem, imaginesque quodammodo similes sæpius commouentes, ad inanes animum voluptates alliciunt. In cholericovero bile conuenientibusque bili imaginibus irritatis, iras & prælia suscitant. Sed in phlegmatico dum pituitam augent, congruaque simulachra ignauia & torpore nos occupant. Denique cum in melancholicis atram incitant bilem, timorem, moeroremque incutiunt, phantasiam falsis territant vmbis, animum opinionibus sæpe falsis illudunt. Id totum posse à dæmonibus fieri, præsertim atrabilis incitamento, Serapion & Auicenna ex antiquorum Philosophorum sententia narrant, atque ipsi non negant. Non enim consentaneum est, diuinam mentem à sensibus aliter quam ad idem dæmonibus cõtendentibus, adeo falli atque impugnari. Sed eiusmodi inuidorum ambitiosorumque dæmonum violentiam expurgari Platoniciper philosophiam & sacrificia posse putant, quod Orphici nobis hymni demonstrant. Christus autem verus medicus animorum ieiunio atque cratione hoc fieri præcipit. Si Dei ipsius oraculum philosophice liceret exponere, ieiunium interpretare abstinentiam ab his rebus quæ talem aut talem vel augment humorem, vel imaginem affectumque mouent. Orationem verò exponerem tam vehementem in Deum conuersionem, ut & animus stimulos dæmonum non aduertat, & dæmones expu-

gnare mentem deo deditam se posse diffidant. Sed disputationem iam concludamus. Nemo igitur dicat animam hominis ob hoc minus esse diuinam, quod in curando corpore sollicitetur, quod vitietur. Multo enim durior menti nostræ provincia quam reliquis mentibus assignatur. Neque vitiat a corpore anima, sed ipsa nimium corpus amando se vitiat, ipsa se purgat. Neque putandum est ex eo deesse nobis diuinitatem, quod anxij multo magis quam bestię viuimus. Imò ex hoc maxime diuini sumus, quod priuari ad tempus habitatione patriæque cœlesti, scilicet quamdiu Dei vicarij sumus in terra, sollicitamur continuè, etiam si hoc minime aduertamus, cœlestis patriæ desiderio, neque vlla terrena oblectamenta consolari in hoc exilio mentem humanam possunt rerum cupidam meliorum.

*Quarta questio, quare animi à corporibus inuiti discedunt.*

#### C A P V T VIII.

**P**roposita nobis fuit quarta questio, quare si cœlestes animi sunt, à terris tam inuiti discedunt? Primum quidem non omnes inuiti discedunt. Nam Theamenes, Theodorus Cyrenæus, Cleombrotus, & omnino omnes Hegesie Cyrenaici auditores sponte ac libentissime decedebant. Gymnosophistæ quoque Indorum Philosophi, & Gethæ Thraciæ populi, apud quos lugebantur puerperia, nati que descebantur, funera autem festa erant & veluti sacra lusu cantuque celebrabantur. Mitto innumerabiles alios milites, ciues, Philosophos, Religiosos: mitto primitias Christianorum. Mitto quod non omnes morientes lugent, lugent autem nascentes omnes, & quasi inuiti à lachrymis terrenum hoc iter auspicantur tanquam exilium. Deinde in his etiam qui mortem horrent, non tota (vt ita loquar) anima expauescit. Siquidem ea pars nostri quæ discedendo pergit in melius, non modo semel non decedit inuita, sed etiam quotidie sponte discedit. Quid per Philosophiam moralem aliud agimus, quam vt animam ab affectu corporis seiungamus? Quid per Philosophiam speculatricem aliud, quam vt rationem à sensibus seuocemus? Totum hoc Philosophiæ studium, vt inquit Plato, est meditatio mortis. Siquidem mors est animæ à corpore liberatio. Nec terribilis mors est Philosophis, atque similibus, quoniam familiaris illis & dome-

stica est, nec latet eos qualis futurus sit post obitū puri animi habitus. Talis enim erit, qualem ferme experiuntur quotidie in summo contemplationis fastigio. Tranquillus videlicet atque serenus, & idearum formulis quasi stellarum radiis circumfusus, & diuini solis splendore coruscans. Hinc Propheta Daniel, fulgebunt docti tanquam splendor firmamenti, & qui multos ad iustitiam erudierint, tanquam stel læ in perpetuas æternitates. At ea pars animæ abijt inuita, quæ corpori duntaxat alendo atque tuendo tributa est, quoniam abeundo naturali quodam officio vacat, & amicum deserit suum. Quinetiam ratio in plerisque amat nimium inferiorem hanc animæ partem, quo fit vt quodammodo eius doleat detrimento. Plotinus autem non partem animæ vocat propriè, sed simulachrum quoddam animæ substantialis vmbatile. Probat enim hominem esse ipsam rationalem animam, quæ quidem permanens in seipsa, sub se generat animal, neque ex se & corpore propriè animal componit vnum, sed potius ex corpore tali, atque vitali quodam sui simulachro membris infuso. In quo quidem animali sensus illi sint qui externa corpora cum quadam passione percipiunt, phantasia quoque & confusa prorsus & perturbata. In ipsa vero animæ rationalis substantia sit impartibilis vniuersalisque sensus, non ad sensibilia sed ad imagines passionisque, quæ in sensibus animalis illius sunt, aspiciens. Sit & ratio quæ suscipit mentem. Et quatenus ipsa tum in se regitur, tum in mentem erigitur, separatione proficere atque gaudere. Quatenus autem quodam prouidentię munere & format animal, & respicit iam formatum, commercio quodam cum corpore delectari. Sed pergamus ad reliqua. Nonnulli etiam cruciatum qui in discessu sentitur, magis metuunt quàm discessum, quem vel suauem fore quasi soporis oppressionem Timæus docet, si resolutione quadam fiat propter naturæ maturitatem, non autem suffocatione propter incontinentiam. Plurimi autem hoc discessu, quoniam non putant se suis operibus visionem meruisse diuinā, vnde efficitur vt diuturnas aut perpetuas mētis tenebras expauescant. Adde quod plurimi vitæ huius blandimenta quibus ab initio irretiuntur, ægrè relinquunt. Sunt & qui propriæ diuinitati diffidant, quia diuinū puræ mentis splendorem inspexere nunquam, sed mortalem corporaliū simulachrorum caliginem animæ per sensus infusam. Et qui splendorem mētis rationis oculis non

dum Philosophia purgatis acriter intuentur, radiis eius reuerberantur, hebescuntque & ambigunt. Nam cum nihil sit oculis rationis magis præsens quam ipsa mentis substantia, non est verisimile eam propter minimam sui lucem esse nobis ignotam, sed propter maximam. Qui ergo & puram mentem & purgatis oculis rationis inspiciet, is non modo non diffidet, sed ipsam reueretur tanquam numen. Sed licet diffidant nonnulli, plurimi tamen confidunt. Et illi ipsi qui videntur diffidere, sperant simul se fore perpetuos. Neque potest vnquam spes huiusmodi ex animo nostro penitus extirpari, utpote quæ sit nobis naturaliter insita. Solent illæ species esse fallaces, quæ aut casu quodam aut usu à sensibus habent originem, qualem profecto non habet æternitatis opinio, cum sensus nihil percipiat nisi caducum, & cogat nos suspicari quandoque, ne fortè qui decesserunt è vita, nihil sint amplius postquam videntur nunquam. Itaque immortalitatis spes naturalem sequitur rationis instinctum, cum eam speret animus non modo non conferentibus sensibus, sed inuitis. Ergo certè nihil magis soleo admirari quam quod nostrum id quisque speret, quandoquidem semper inter caduca verlamur, neque tamen sperare desinimus. Quod quidem significat hanc spem naturæ firmitate constare. Illud quoque considerandum arbitror, quod videlicet non esset mirum, homines etiam si euidentiores de immortalitate rationes haberent, quam de reliquis omnibus, adhuc tamen magis hac in re rationibus ipsis diffidere quam in cæteris. Quod enim amamus multum, ei multum metuemus. Nihil autem magis quam vitam diligimus sempiternam, ob eam maximè rationem, quia maximè naturalis est nobis. Omnino autem ipso mortis metu coniectari possumus aliquem nobis sensum superfore post mortem. Nam si animus ideo timet mortem, quia perpetuas odit tenebras, atque à diuersitate naturæ odium proficiscitur, perpetua lux est animus.

Aut talem tenebras sempiternas non aliter discernit quam per lucem aliquam sempiternam, hanc absque immensa luce contueri non valet. Si lux animæ quæ mens eius est, ita se habet ad ipsam lucem, sicut animæ vita ad ipsam vitam, & lux animæ super immensam lucem reflectitur, necessario animæ vita vitam complectitur infinitam.


Quinetiam qui vita magis cum vita congruit quam lux cum vita, si lux animæ suo

modo, id est, intelligendo vitam attingit immensam, multo magis animæ vita modo suo, id est viuendo vitam assequitur infinitam.

Porro qui tenebras horret, secum ipse consultat, nunquid semper victurus sit absque corpore, an defuturus. Quæ quidem consultatio significat animum relicto corpore iam tunc sese recipere in seipsum. Non enim reflectitur in seipsum corpus, neque eleuatur in vitam à corpore separatam. In ea ipsa consultatione diiudicat quanto præstantior sit vita sempiterna à mortali corpore libera, quam aut vita præsens, aut vitæ priuatio, exoptatque liberam & æternam. Iudicare autem ita & exoptare non posset, nisi talem vitam in seipso prius experiretur. Si vita libera longè diuersa est à seruili, & tamen animus corpore clausus experitur ipsam, exercetque, quanto magis solutus à corpore eam potest implere. Præterea in eadē deliberatione disceptat mens, num queat aliquid per se deposito corpore agere, nec ne. Ac si queat, non diffidit seorsum à corpore se victuram. Vbi iam nunc quamuis cum corpore ducat vitam, agit tamen sine ipso nonnihil, quando iudicat quid sit & quale id ipsum quod dicitur sine corpore operari. Quis enim per corpus aliquod omne corpus abiiciat? Quis cum corpore hoc secernat corpora omnia? Quis operando cum corpore agat operationem illam quæ fit sine corpore? Agit autem quodammodo operationem aliquam quæ est sine corpore, qui eam ipsam excogitat & effingit. Excogitatio enim actus est animæ. Quod si dum est in corpore, agit aliquid sine corpore, longè magis poterit sine ipso agere extra ipsum. Atqui quod mirum est, usque adeo inuictus est animus, ut quicumque eius æternitati bellum inducunt, superentur ab ipso. Nam siue Lucretiani ignauè certent, non expugnatur, siue alij strenuè pugnent, quia eiusdem animi armis aculeisque pugnant fortiter, imò animus ipse pugnat. Ideo animus ipse quando videtur succumbere, tunc maximè superat. Excellit enim quam maximè. Ac si se perimere videatur, videt denique se peremptum. Qui videt quicquam adhuc spirare. Ex iis patet qua ratione si mortis metus à tenebrarum horrore proficiscatur, in eo ipso ostendatur immortalitas. Forsitan qui formidat mortem, non tam horret tenebras quam vel poenam vel moestitiam vaticinatur & timet. Quod equidem potius arbitror. Ex quo etiam immortalitas declaratur.

Sicut enim nemo cupit illa quæ profutura non sperat, neque prodesse putat nisi percipiantur, ita nemo metuit, quæ nocitura non iudicat, neque arbitratur obesse nisi percipi possint. Cupido enim voluptatem in boni adeptione respicit, aut vitiatione mali, merus dolorem in mali præsentia,

aut absentia boni. Voluptas autem & dolor absque cognitione non fiunt. Ergo qui vitæ statum cupit propter voluptatem quæ in tempore vitæ perfunditur, idem quoque statum post mortem metuit propter dolorem quem fit in eo tempore percipiturus.



# THEOLOGIÆ PLATONICÆ,

DE IMMORTALITATE ANIMORVM,

EODEM FICINO AVTHORE,

(:.)

LIBER XVII.


(:.)

*Quinta quæstio, qualis sit anima status antequam ad corpus accedat, qualis etiam post discessum.*

(:.)

CAPVT PRIMVM.

(:.)



**S**E d iam disputationem quintam aggrediamur, per quam quæstio illa solvatur, quæ interrogabat, qualis sit animæ status priusquam accedat ad corpus, qualis etiam cum discesserit. In rebus his quæ ad Theologiam pertinent, sex olim summi Theologi consenserunt, quorum primus fuisse traditur Zoroaster Magorum caput, secundus Mercurius Trismegistus, princeps sacerdotum Ægyptiorum. Mercurio successit Orpheus. Orphei facris initiatus fuit Aglaophemus. Aglaophemo successit in Theologia Pythagoras, Pythagoræ Plato, qui vniuersam eorum sapientiam suis literis comprehendit, auxit, illustravit. Quoniam vero ij omnes sacra diuinorum mysteria, ne prophanis communia fierent, Poeticis umbraculis obtegebant, factum est vt successores eorū alij aliter Theologiam interpretarentur. Hinc turba Platoniorum interpretum in sex Academias se diuisit, quarum tres Atticæ fuerunt, reliquæ peregrinæ. Atticarum vetus sub Xenocrate floruit, media sub

Archefila, sub Carneade noua, peregrinarum Ægyptia sub Ammonio, Romana sub Plotino, sub Proculo Lycia. Verum cum sex fuerint scholæ Platoniorum, tres illæ Atticæ simul atque Ægyptia, quæcunque de animarum circuitu scripta sunt à Platone, aliter quam verba sonarent accipiebant, duæ vero sequentes ipsam verborum faciem curiosius obseruarunt. Quo autem modo hæ duæ, Platonica exponant mysteria, diligenter recenscamus.

*Expositio Platonis de anima secundum duas Academia ultimass.*

*De compositione anima.*

CAPVT II.

**P**lato in Parmenide quidem Deum vocat infinitum, in Philebo vero nominat terminum. Infinitum scilicet, quia nullum aliunde accipit terminum. Terminum autem quia formis quasi mensuris passim distributis omnia terminat. Hinc Platonici disputant, quatenus Deus tanquā infinitus omnē à se excludit terminū, carens fermè ex eo quasi umbram pendere potentiam quandam quasi materialem,

termini cuiuslibet indigam, informemque natura sua, & ut ita loquar, indefinitam. At verò quatenus Deus tanquam terminus umbram suam respicit tanquam speculum, eatenus in umbra iam velut imaginem resultare, infinitatemque ipsam, id est, materiam communissimam formis ordinatissimè terminari. Idem rursus ita confirmant. Si in Deo semper est vnuerſi faciendi potestas, merito semper extra Deum vnuerſi (ut ita loquar) fiendi est potentia. Non enim facere ille semper omnia posset, ut opinantur, nisi semper fieri omnia possent. Potentia eiusmodi, materiam communissimam, id est, vim formarū omnium æqualiter receptricem nominant, quæ natura sua neque ad ipsum esse vergat, alioqui superno formatore non indigeret, neque ad non esse, alioquin formatori non obediret, sed ad esse pariter atque non esse, item ad formas tales aut tales quasi medium quoddam æque se habeat, atque à formatore determinetur. Sit quoque in omnibus vna non numero, non specie, non genere, sed analogia & proportionem quadam potius, scilicet quoniā ab vno dependet, atque vnus Dei infinitatem vtrunque potest modo quodam umbratili repræsentat, quemadmodum & actus quodammodo vnus in omnibus nominatur, quoniam ab vno terminatore, & vnus terminationē imaginariè refert. Atque actus huiusmodi potentiam superat, proptereaque à Deo manat non fugiente ulterius, sed iam respiciente materiam. Huiusmodi potentia in spiritibus non nihil corporis habere videtur, siquidem in mentibus, habet corporū rationes, in animabus insuper motiones, in vtrisque formabilem facultatem. Rursus in corporibus corporei non nihil videtur habere, quia & dum antecedit quantitatem, indiuisibilis apparet, & semper vires quasdam quodammodo incorporeas sustinet. Ex hac infinitate, ex hoc termino, id est, potentia receptrice formabilique, atque actu formali, constare sub Deo omnia putant. Quod Maurus Auicebron in libro fontis vitæ fortè significat, atque Theologi nostri breuiter ita cōfirmant: Si creatura & quælibet & vnuerſa esse sortitur à Deo, certè ex se non est, atque ab illo destituta iam vltra non esset. Quapropter esse potest atque non esse. Igitur non est ipsum esse suum, imò ad ipsum potentia est. Nihil vero ad seipsum est potentia, vel suscipit semetipsum. Semper enim agens dum agit, quod potentia tale est, efficit actum tale. Quamobrem creatura producitur

non ex eo quod potentia potentia imprimatur, alioqui nondum quicquam ederetur in actum. Neque ex eo quod actus actui infundatur, vel idem sibi ipsi concilietur, alioqui quod producitur, esset antequam esset. Sed in ipsa productione propriè actus potentia adhibetur. Atque hæc ipsa duo in creatura necessariò distinguuntur. Alioquin esse ipsum creaturæ quia in seipso subsisteret, esset penitus infinitum. Cum igitur esse ab essentia differat, nunquid fit ab essentia? Minime. Nihil enim tanquā efficiens potest sibi met esse tribuere, itaque aliunde accipit esse. Hinc ergo prout capit, potentia est, quod verò capitur, actus cognominatur. Quare quicquid producitur, ex potentia & actu, id est, essentia & esse componitur. Essentiam quidem potentiamque ad infinitatem, esse vero & actum ad terminum Platonici referunt. Proinde in Sophista & Parmenide & Timæo quinque rerum numerantur genera, ex quibus præter primum omnia componunt, scilicet essentia, idem, alterum, status, & motus. Essentia quidem manifestè significat rationem rei cuiusque formalem, innuit quoque esse tanquam actu essentia proprium. Idem vero dicitur, quoniam quodlibet & secum in primis, & cum aliis congruit. Rursus additur alterum, quia quandam tum intra se, tum ad alia differentiam habet. Præterea status, quippe cum aliquandiu suam retineat vnitatem. Denique motus hoc in loco exitum quandam ex potentia in actum siue essendo siue quomodolibet intrinsecus extrinsecusue agendo significat. Quamobrem diuinæ infinitati ac diuino termino hinc rerum infinitas, inde rerum terminus subditur. Deinde ad rerum infinitatem tria potissimum, scilicet essentiam, & alterum, motumque referimus. Ad ipsum verò rerum terminum tria similiter, scilicet esse, idem ac statum pariter distribuendo reducimus. Quod autem in Parmenide quidem vnum & multa, in Timæo verò impartibile & partibile dicitur, sic accipiendum est, ut vnum & impartibile secundum terminum, rursus multitudo & partibile secundum infinitatem per sua passim genera propagentur. Quamuis autem singula præter primum ex iis quasi seminibus elementisque componantur, incorporea tamen consonantiori seminum mixtione quam corpora conſari dicuntur. Quam ob causam illa magis indissoluta permanere putantur. Missam in præsentia faciam cæterarum rerum commixtionem, & qua ratione his generibus animæ Pythagorici &



Platonici misceant, mox exponā, si prius admonuero, ne forte putemus & si animā sēper fuisse horū plerique dicunt, eam atmen illos omnino ex se esse putare. Cum enim non totam operationem suam anima, per quam semper operatur, simul explicet, sed paulatim, constat eam hanc infinitam semper operandi virtutem haud totam simul habere. Si enim totam simul haberet, ederet quoque totam simul & vnicam. Omnis enim (vt aiunt) potentiae operatio, vna vnius est. Igitur semper accipit virtutem semper agendi. Propterea non similiter, sed alias aliter agit, vt summatim dici possit, quicquid temporaliter agit, siue corpus siue anima, accipere quidem continuē paulatim operandi virtutem, nunquam verò simul totam penitus possidere. Quamobrem anima non solum semper esse, sed etiam gigni semper à Platoniciis indicatur, scilicet quatenus vim suam haurit paulatim, & formas intrinsecus alias aliter explicat, atque affectus actionesque continuē variat. Igitur quatenus vitalis ipsa sui motus causa est, quodammodo sibi met essentialē interminatamque suppeditat vitam, atque ita esse censetur, quatenus vero infinito id explicat tempore, vimque eiusmodi paulatim à superioribus accipit, nimirum gigni perpetuo ab alio iudicatur. Accedit ad hæc, quod principium summum rerum omnibus adest, adeo vt singula principij pro natura sua vbique participant, alioqui subito euanescerent. Anima vero non adest omnibus, non enim omnia viuunt. Item primum omnino ipsum vnum esse oportet, nam si multitudo quædam esset, proculdubio super se causam suæ vnionis haberet, quippe cum vnire non multitudinis sit, imò vnitatis officium, esse vero primum multitudinem sparsam, dictu nefas. Anima tamen omnis est multitudo. Rursus primum super omnem essentiam cogitatur, cum omnis essentia in se multitudinem patitur, saltem qualem in superioribus numerauimus. Anima vero essentia quædam est, vitalis scilicet atque viuifica. Denique primum neque vsquam, neque vnquam, neque vllō pacto contaminari potest, animæ tamen permultæ quandoque & alicubi, & certo quodammodo inficiuntur. Quamobrem anima necessariò à superiore principio suo quodam pacto composita habet essentiam. Cæterum in rebus super animam à Deo compositis, munera quæ ad terminum spectant, longissimo intervallo opposita genera superant, in rebus vero sequenti-

bus animam contra contingit. At verò in anima componenda genera generibus æqualius concinunt. Cum enim anima verissimum omnium quæ à Deo componuntur medium sit, consentaneum est eam media quædam æqualissimaque (quoad fieri potest) ratione esse compositam. Igitur in ea, vt cætera prætermittam, partibile impartibili, alterum eodem motus statu quasi acutum graui harmonicè temperatur. Profecto in his quæ super animam sunt, tria potissimum cogitantur, essentia, vita, intelligentia. In his quoque quæ sunt infra animam, tria vicissim, qualitas, natura, sensus, vt sensus intelligentiæ, natura vitæ similitudo sit, qualitas denique essentiae vltima sit imago. In superioribus quidem secundum essentiam & vitam & intelligentiam impartibile superat, idem quoque excedit alterum, statusque motum, in inferioribus autem omnino contra contigit. In anima verò, vtpote omnium media, modus per omnia quasi medius obseruatur. Proinde siue eam ad extrema mundi conferas, inter mentes tanquam admodum impartibiles, & qualitates tanquam omnino, id est tempore locoque partibiles, media iudicatur. Siue ad sui ipsius extrema scilicet ad mentem hinc suam, atque inde ad vitam corpori immerfam, similiter inter indiuiduum & diuiduū media pariter esse censetur. Siue ad ipsum sui ipsius medium scilicet rationem denique conferas, etiam hæc ipsa ratio quando ad intellectum & vniuersalia surgit, dicitur impartibilis, quando vero ad sensus singulaque declinat, partibilis nuncupatur, atque illic identitatem (vt ita loquar) statumque consequitur, hic verò vicissim alteritatem subit & motum. Ac dum in æternis considerandis quodammodo ipsa discurrit, in diuiduo statu diuisibilem permiscet motum. Contra vero dum in temporalibus attingendis quodammodo in se ipsa consistit, motum vicissim diuisibilem in diuiduo quodam statui contemperat. Præterea sicut anima mundi in mouendo quidem cœlo quod ἀπλᾶν, id est, meraticum dicitur, in eodem ostendit alterum, in planetis verò quodammodo erraticis moderandis, per ipsum motionis ordinem altero vicissim idem seruare videtur. Sed hætenus idem superat alterum. Denique in inferioribus gubernandis idē iam ab altero superari permittit. Similiter hominis anima circa tria quasi vehicula, scilicet æthereum, æreum, compositum corpus se habere videtur. Iam igitur quid ibi Timæus velit vbi in anima componen-

da Musicis proportionibus utitur, satis intelligi potest. Nihil enim aliud sibi vult, quam animam tum ex ipsis rerum generibus tum ex viribus suis ita componi, ut ideæ suæ in primis, deinde sibi ipsi, tertio rebus aliis aptissime congruat. Solent Pythagorici in anima figuranda Mathematicis tam figuris quam numeris uti, quoniam sicut Mathematica, sic & animæ inter naturales diuinasque formas medium obtinent. Constituunt ergo triangulum, in cuius apice locata sit unitas, à qua terni utrinque numeri profluant, hinc pares, inde similiter impares, hac videlicet ratione, ut à parte altera primum duo, deinde quatuor, demum octo, altera ex parte primum tria, deinde nouem, postremò septem atque viginti. His verò censent omnes animæ partes, vires, officia designari. Quæ enim super animam sunt, unita potius quam numero à putantur. Quæ vero sub anima, numerosa quidem, sed per se maxime dissona. Verum anima primò numerosa ideo dicitur, quoniam cum proxima sit multiplici corporæ, iam intelligitur tam motionibus quam viribus multiplex esse. Deinde verò cum ordinatæ motionis generationisque proximum sit principium, probabili ratione concluditur, numerositatem eius esse maximè consonantem, à cuius consonantia, corporis continuè tum cœlestis tum elementalis cōsonantia non aliter pēdeat, quam ab ipsa quæ in Musici mente harmonia est, illa deinceps quæ in vocibus & quæ in sonis harmonia sentitur, & fluere solet. Proinde Philolaus cū Deū unitatem more Pythagorico nominasset, mox extensam materiam dualitatem cognominauit, propterea quod quemadmodum dualitas ipsa prima inter numeros diuisio est, sic materiæ dimensio causa est in primis ut formæ distractæ inter se repugnantesque euadant. Itaque animam ab unitate diuinā pendentem sese in materiam quasi in dualitatem insūdere putant, non aliter quam triangulus ab angulo summo in duos similiter desinat angulos. Itaque in corpore composito distrahi semper & perturbari. Merito igitur anima triângulo figuratur. Septem verò deinde huic triângulo numerorum terminos adhibent. Nempe cum videamus rerum generationem septenario Planetarum numero gubernari, summumque Planetarum Saturnum septimo quolibet anno mutationes in vita hominum facere. Lunam quoque Planetarum infimam septimo quouis die, tum in seipsa, tum in humoribus mutationem inducere, merito ani-

mam motionis generationisque originem septenario numero describere iudicantur. Sunt etiam qui foetum in aluo perfici septenariis, & natum extra aluum per ætates duci similiter arbitrentur. Afferunt insuper utrinque numeros & pares & impares, ut per pares animam ex natura diuidua, per impares ex indiuidua commixtam esse declarent. Rursum numeros lineares superficialesque & solidos addunt, ut appareat animam per longitudinem, latitudinem, profunditatem corporis sese facillimè fundere. Eligunt autem illos duntaxat numeros, quorum proportionibus mutuis Musica consonantia constat, ut ostendant animam concinne compositam, concinne cuncta disponere atque mouere. Sanè inter quatuor ac tria sesquitercia proportio est, ex qua nascitur harmonia quam Græci nominant diatessaron. Sed inter tria & duo est proportio sesquialtera. Hæc procreat harmoniam quam nuncupant diapente. Præterea inter quatuor atque duo, siue quatuor & octo, proportio dupla, quæ diapason conficit consonantiam. Inter vnum verò & tria siue tria inter & nouem, siue inter nouem atque vigintiseptem, proportio tripla, à qua melodia diapason diapente componitur. Proinde inter quatuor & vnum, siue duo inter & octo, quadrupla proportio nascitur, quæ disdiapason generat harmoniam. Denique inter octo ac nouem fit epogdous, quo constat tonus. Sonum vero tono remissiorem hemitonum nominant. Quam ob rem omnes quas narrauimus proportionibus, arti Musicæ potissimum necessariæ, ab illis fiunt numeris, qui in figura animæ describuntur, per quos animæ tum naturalis compositio tum motio actioque naturalis maximè omnium esse tam consonans quam numerosa significetur. Neque desunt qui sphaerarum quoque cœlestium magnitudines inter se, interuallaque & motus, Planetarumque habitus & aspectus proportionibus penè similibus metiantur, spiritum quoque vitalem simili qualitatibus suarum temperatione disponant. Missa non absque ratione facio multa, quæ multi hac in parte de fictis numerorum figurarumque virtutibus tam leuiter quam curiose pertrahant. Hæc est mysterij Pythagorei & Platonici summa. Mitto, quod solent intelligentiam, quoniam per simplicem fit intuitum, sæpe unitatem cognominare, scientiam vero dualitatem, quoniam ex principio probat conclusionem, sed opinionem trinitatem, quia insuper conclu-

sionis oppositum ambiguitate quadam affert in medium. Sensum postremo quaternitatem, propterea quod circa composita ex quatuor elementis plurimum versari videtur. Mitto rursus quod animam ideo currum vocant, quia motus efficit circularis. quodue in ea lineam ponunt quodammodo rectam, quantum corpora mouet & respicit. Deinde circulum quandam inferiorem, quasi Planetarum orbem, quando redit in semetipsam. Circulum quoque superiorem quasi stellarum orbem fixarum, quatenus ad superiora conuertitur, alas duas, scilicet instinctum intellectus ad ipsum verum, atque voluntatis ad ipsum bonum, aurigam mentem, caput aurigæ, diuinam vnitatem mente superiorem, equos superiores, scilicet idem, & statum, equos inferiores, scilicet alterum atque motum. Item æquum, bonum, atque malum, scilicet irascendi & concupiscendi naturam. Ita enim propinquior rationi quam libido esse videtur. Denique (vt summam dicam) hac ratione Pythagorici & Platonici omnes, rationales animas tum nostras, tum nostra superiores, penè similiter esse compositas arbitrantur. Vnde sequi existimant, vt & coelestes animæ in voluendis sphaeris inæstimabilem pariant melodiam, & nostræ huiusmodi concentibus mirificè delectentur. Verum inter coelestes atque nostras quasi longè distantes tres gradus medios interponunt medio modo compositos, qui nostras cum diuinis quodammodo vinciant, atque hos gradus secundum essentiam, vitam, intelligentiam proportionem procedere opinantur. Angelicas enim animas ab intelligibili mundo proximè emicantes, intelligibile lumen sequentibus infundere per modum essentiam permanentes. Deinde dæmonicas animas per modum interminabilis vitam atque processus. Postremò heroicis secundum mentis conuersionisque modum. Mitto quod angelicas secundum intellectualem virtutem à Deo procedere arbitrantur, dæmonicas secundum opificiam atque prouidentem, ideoque fabricare mundana. Heroicas secundum conuersiuam præcipuè facultatem, idcirco purgandarum animarum officio fungi. Has omnes harmonice temperatas & harmonica facere, & harmonicis mirabiliter oblectari. Sed de his animarum generibus conuenientius in sequentibus pertractabimus.

*Species & circuitus animarum secundum eas similiter academias ultimas.*

### C A P V T III.

**Q**uatuor sunt animarum genera, sunt animæ diuinæ, id est, animæ sphaerarum mundi atque syderum, quæ ideo diuinæ dicuntur, quoniam & Deo proximæ sunt, & communem mundi prouidentiam agunt in regione perpetua. Sunt animæ profanæ, id est, animæ bestiarum propriæ, omnis diuinitatis expertes. Sed has in præsentia dimittamus. Sunt inter hæc extrema media duo, animæ scilicet semper Deum sequentes, quales sunt animæ dæmonum, heroumque sublimium, quæ licet propriè diuinæ non appellentur, nunquam tamen à Deo discedunt. In primo & hoc animarum genere sic principia disposita sunt, vt illic quidem essentia, hic verò (vt ita loquar) identitas cætera principia quodammodo superet, sub iis sunt animæ quæ quandoque sequuntur Deum, quandoque relinquunt. In his principium, quod ipsum alterum appellatur, alia quodammodo superare videtur. Tales sunt inferiorum dæmonum heroumque animæ, sed manifestius hominum animæ, quæ cum sint mentium omnium infimæ, non eam vim habent, per quam possint duo admodum diuersa perfectè simul implere, id est, per humanam rationem intueri diuina, ac terrena corpora gubernare. Vtrumque tamen agere eas oportet, postquam natæ sunt vtrumque. Quare vicissim faciunt, quod eodem tempore nequeunt. Vtuntur autem vicissitudine tribus præcipuè modis. Primò quidem ab intelligibili mundo ad sensibilem, atque conuerso se transferunt. præterea in ipso intelligibili varias vicissim contemplationis species peragunt. Rursus in sensibili regione diuersas viuendi species mutant. Quas quidem vicissitudines Plato tum sæpe alibi, tum in Phædro præcipuè describit, atque ibi manifestius, vbi animas, inquit, alias aliorum Deorum in coelo comites esse, atque in contemplandis ideis similem pro viribus cum Deo suo discursionem mentem peragere, tamen super cælum circa diuina, tum in coelo circa coelestia, tum sub coelo circa naturalia gradatim considerata. Et quatenus Deos imitari possunt, eatenus apud superiores permanere. Item cum multiplices à causis ad effectus, atque vicissim circuitus repetant, ait animum qui intuitus est ideam quæ caput circuitus est, in circuitu illo qui per ipsam propriè ideam continuatur, non

cadere, sed tunc labi cum malus equus, id est, concupiscendi vis incitata per vim generandi, iam suo quodam tempore inualescentem, à contemplando diuertit ad generandum. Deinde vitas dinumerat nouem, non quod tot solum sint, sed quia per septem Planetas ignemque & aërem delabuntur, demum transmigrationes multas per inferiora, reditumque ad superiora describit, vbi multa proculdubio Poëtica sunt potius quam Philosophica. Igitur iam ad ordinem magis Philosophicum nos conferamus. Profectò Platonici multi putant aliquid esse quod infinitam ex se vitam habet, aliquid quod ex alio, aliquid quod ex neutro. Rursus quod habet ex alio, aut ad summum, aut ad imum potius declinare, aut omnino medium possidere. Nempe Deum infinitatem vitæ manentem ex seipso penitus possidere, angelum quoque manentem, sed ex Deo susceptam, animas deinde diuitas nostris superiores infinitam quidem aliunde habere vitam, sed currentem tamen certo quodam ordine à speciebus in species discurrendo, defectus omnis & obliuionis expertam. Animas denique nostras vitam habere similiter infinitam, sed non modo currentem, verum etiam inordinate, atque à meliori habitu in peiorem, vicissimque tum reminiscendo tum obliuiscendo mutabilem. Animas vero infra nostras nullo modo esse vitæ infinitæ participes. Vbi sectatores Proculi suum illud confirmant, scilicet cœlestes animas etiam intelligendo discurrere, quia inter Deos qui intelligibilia & semper & manendo suscipiunt, atque particulares animas, quæ illa & aliquando suscipiunt, & currendo, congruè medium obtineant cœlestes sublimesque animæ, quæ semper intuentur quidem, sed de speciebus in species transendo. Nos autem alibi sententiam hac in re Plotini narrauimus. Proinde sic esse volunt infinitum vnum tam virtute quam perseuerantia, deinde infinita multa perseuerantia potius quam virtute (perseuerantia, inquam vel sua omnia simul possidente, vel de aliis ad alia succedente, siue id maiori siue minori ordine fiat) denique multa quæ neque virtute sua neque perseuerantia aliunde accepta sint infinita. Talem in spiritibus ponunt ordinem. In mundo verò sensibili polus utcumque potest, primum ordinis illius gradum refert, axis verò secundum, sphaera cœlestis tertium, elementalis sphaera quartum, quintum denique quæ ex elementis quatuor componuntur. Sed digressionem hac omis-

sa, ad nostras animas redeamus. Semper quidem erit hominis anima, quoniam inhabitat sempiternis. Semper & fuit, ut aiunt, quoniam haberet quandoque finem, nisi initio careat. Pythagoræ anima ante ortum Pythagoræ fuit quandoque à terreno corpore libera, post inclusa est nascente Pythagora. Duæ hic vitæ sunt, vna libera, altera corporalis. Vita illa quæ fuit libera, finem accepit in vitæ corporalis initio, ergo & initium aliquando prius habuerat. Quod enim cessat, incipit, itaque non fuit ante Pythagoram semper extra corpus, licet quandoque. Et postquam coepit esse in corpore, non erit in iis corporibus semper, quia quod incipit, desinit. Vnde sequitur ut innumerabiliter ante Pythagoram animam eius in corpore terreno fuerit, atque extra, rursusque post Pythagoram extra corpus futura sit vicissim atque in corpore. Et sicut omnes mundi sphaeræ per animas suas variant formas, ac tandem recursus proprios repetunt (quod in quatuor anni temporibus, & quatuor Lunæ alternis vicibus intuemur) sic animæ nostræ animarum cœlestium similes varias formas corporum induuntur, certisque curriculum temporum, iisdem quibus antea corporib. inuoluuntur. Quas *παλιγγενεσίαν*, id est, regenerationem Zoroaster appellat, de qua multa Mercurius cum filio suo Tatio disputat. Et Plato in libro de regno, resurrectionem hanc describit futuram in fine mundanæ reuolutionis iubente Deo, ac dæmonibus ministrantibus. Quod autem per vitam vnam explet mundus, anima nostra per multas exequitur. Timæus enim Platonis tradit, Deum mundi opificem iecisse in pateram quandam cuncta semina rerum, eaque innicem Musicis (ut supra diximus) modulis temperauisse, ex qua temperatione rationales animas tribus creauerit gradibus distributas, ita ut in qualibet anima cuncta inserta sint semina, ut cum sit ex ipsis omnium mixta generibus, omnia per cognationem quandam facile posset agnoscere, mouere omnia atque viuificare, omniformemque vitam facilius experiri. Quid aliud Dei pateram, quam essentiam tertiam intelligimus inter diuinam & corporalia mediam, scintillis diuinorum micantem, corporalium seminibus gravidam? Ex hoc fonte tres præcipuæ animarum species manauerunt: Diuinæ, Deum sequentes semper, aliquando sequentes Deum Primis assignant Pythagorei sapientiam, secundis opinionem rectam, tertiis opinionem ancipitem. Vnde colligitur quod sæpe iam diximus, ani-

man nostram esse quodammodo omnia, ideoque omnium viuentium progressus in suis visceribus continere. Non tamen omnes explicat sigillatim. Plura enim operantur animæ primæ quam secundæ, hæ quoque plura quam tertiæ. Quamobrem licet ad omnes, ad multos tamen vitarum progressus anima hominis instituta videtur. Neque violentia quadam illata extrinsecus, neque discursu consilij de vita transfertur in vitam, sed tali quodam naturali instinctu, quali in hac vita suo quæque tempore prodeunt, dentes, pili, semen, & reliqua. Sicut enim in ipsa vniuersi natura, sic in particularium animarum naturis æterna quadam lege ordinata sunt singula, prodeuntque ita in actum, vt & sibi & vniuersæ naturæ est consentaneum. Certè vna quædam ex cunctis mundani animalis membris sit harmonia, per quam singula singulis & vniuerso vndique consonant. Ergo sicut ipsa mundi anima certis temporibus certa producit, sic & particulares animæ seminibus insitis tempore certo ad certas viuendi species naturaliter inclinantur, atque disponuntur. Ac dum paulatim præteritæ vitæ affectus actusque remittitur, vicissim vitæ sequentis intenditur, conferente singulis passim vniuersi natura. Meminisse vero oportet, quod quemadmodum docet liber de republica decimus, animæ fato descendunt, id est, quod generationem appetant, & tali quodam appetant tempore, ex naturali instinctu provenit ordini vniuersi coniuncto, sed arbitrio talem vitam eligunt aut talem. quamvis enim vitam corpoream prius naturaliter concupiuerint quam cogitauerint, tamen talem aut talem vitæ speciem prius cogitant quam adiscant. Plurimum vero inquit eligere, secundum prioris vitæ consuetudinem & affectus qui habitus, affectusque ex liberis quondam actibus fuerint procreati. Ideo, inquit, culpa eligentis est, non Dei. Non vos dæmon sortitur, sed vos dæmonem. Virtus enim libera est. Postquam vero quis vitam dæmonemque elegerit, virtus electam vitam disponere & componere potest potius quam deponere. Oportet enim curricula certa sortis impleri. Quod enim ibidem scribitur, mundum inter necessitatis ideæ genua volui, aliàs exposuimus. Necessitas enim anima mundi ideo dicitur, quoniam fatali eius virtute ducitur vniuersum. Inter genua inquam, id est, per virtutem eius inferiorem voluendis sphaëris accommodatam. Siquidem menterationeque diuinis incumbit, & si inferior virtus vniuersalis est vna, ta-

men quasi triplex cognominatur. Lachesis id est sortitrix, quia sortes singulas inserit.

Clotho, id est reuolutrix, quia inuolutas à principio sortes vnicuique suas certis ordinibus temporibusque euoluit. Atropos, id est inconuertibilis, quia in sortibus euoluendis immutabili ratione procedit. Ad has omnes deas Plato asserit ire animam ad inferiora vergentem, eo videlicet ordine, vt postquam & sortibus in eam Lachesis incidentibus naturaliter elementalem concupiuerit vitam, & propositis multiplicibus vitarum exemplis, pro arbitrio certam vitam eiusque ducem elegerit dæmonem, tunc Lachesis electionem confirmet. Inde ab eodem dæmone ad Clotho & Atropom necessitatemque ducatur. Quis hic non viderit, animam ob solam corporis huius affectionem in omnem mox factorum incidere potestatem, postremo ad Lethæum obliuionis flumen, in hoc videlicet corpus, vnde diuinorum statim obliuiscatur? Proinde significat animam quæ prius ex eo flumine biberit, id est, quæ affectu vehementiore sibi corpus adsciuerit, obliuisci magis superiorum, atque tardius reminisci, contra veroque contra. Sed ad diuersas iam viuendi species veniamus. Agit quandoque Angelicam vitam in æthere apud eam stellam cui est vel natura vel vsu facta propinquior, cumque illa simul incerta vniuersi gubernatione consentiatque concurrat. At potest per omnes sphaëras gradatim sursum deorsumue discurrens tempus in qualibet vitam, gubernationem, contemplationemque agere illi sphaëræ stellæque congruam. Agit quandoque dæmonicam vitam in igne similiter, tum heroicam in aëre, humanam in terra, atque ferinam. Ac sæpe dum hominis vitam ducit, sensim ex eius seminibus in naturalem instinctum & phantasiam vita scaturit equina, vel leonina, vel similes. Quod significat affectus & mores qui talium bestiarum proprii, nobis suboriuntur.

Deposita denique figura hominis, eius bestiae subit corpus, cuius se moribus similimam præstitit, seu inserat se ferino foetui, fiatque propria ferini corporis anima, vt Plotinus, Numenius, Harpocratius Boetius existimant, seu animæ ferinæ seipsam iungat, atque feræ sit comes, vt placuit Hermiæ, Syrianoque & Proculo. Ac postquam de alia bestia migravit in aliam, explicuitque omnes progressus illos vitæ ferinæ, quibus explicandis pronior fuerat, promittit iterum progressus humanos, post heroicos, deinde dæmonicos, postre-



mo diuinos. Aliæ verò alibi plus minusue viuunt, quatenus fato vel fortuna vel electione habituque variè disponuntur. Has transmigrationes restitutionesque plato annis mille, tribus millibus, decem millibus designauit, disputationis exemplique gratia potius, vt inquit Hermias, quam quod certe dinumerari posse putaret. Horum enim numerorum quilibet non modo plurimus est, sed etiam certa quadam ratione perfectus, vt ostendatur animas ad perfectam purgationem longo quodam sed certo tempore indigere, & quæ vel leuius peccauerunt, vel potius philosophatæ sunt, eas citius in patriam redituras. Neque tamen intelligendum est animam communiter in eundem omnino hominem numero redituram, nisi fuerit tandem totus mundi cursus impletus, vt scribitur in libro de regno, quem cursum (vt diximus aliàs) triginta sex annorum millibus impleri astronomi computant.

Interea tamen sæpe in idem reuerti anima dicitur, in eandem scilicet speciem, similemque viuendi modum, à diuino videlicet ad diuinum, ab humano ad humanum, à bruto similiter ab brutalem, quemadmodum & ipse mundi circuitus sæpe interim ad similia redit, donec ad eadem prorsus denique reuertatur. Ne quis autem absurdum putet esse animam in tam diuersas species se transferre, considerare iubent, quam diuersos affectus & habitus in hoc etiam corpore sæpe animus induat, non in aliis solum, sed in eodem etiam homine, plantæ videlicet & bruti, hominis & Angeli. Rursus ne quis miretur, nos eorum quæ in superiori gessimus vita, in hac minime recordari, animaduertere iubent non solum quam multum in senectute infantia, sed etiam quam facile hodie hesternarum rerum obliuiscamur. Hæc illi quibus propheticum illud obicitur: In circuitu impij ambulant. Quasi dicat illos esse impios iudicandos, qui eiusmodi animarum circuitus introducunt.

*Quod Plato rectius exponatur more Academicarum quatuor precedentium, præsertim prima & quarta.*

#### C A P V T IV.

**A**cademiæ vero quatuor iis antiquiores in hoc ab iis discrepabant, inter se congruentes, quod scripta Platonis omnino poetica esse arbitrabantur. Sed inter se differabant quod Carneades Pla-

tonem & putauisse & tractauisse omnia opinabatur Scepticorum more velut ambigua, neque vllum in rebus vllis habuisse delectum. Archesilas autem certum quidem nihil habuisse Platonem, verisimile tamen aliquid & probabile. Xenocrates simul atque Ammonius illum aliqua non modo tanquam verisimilia tenuisse & probabilia, verum etiam tanquam vera certa que affirmauisse, eaque esse paucula quædam de prouidentia Dei animorumque immortalitate. Nos ergo Xenocratis & Ammonij vestigia sequentes, Platonem affirmauisse quædam de anima non negamus, sed multa quæ de circuitu eius ab ipso tractantur, tanquam poetica aliter intelligimus quam verba videantur significare, præsertim cum circuitus huiusmodi haud ipse inuenerit, sed narrauerit alienos, Primum quidem ab Ægyptiis sacerdotibus sub purgandarum animarum figura confictos, deinde ab Orpheo, Empedocle, Heraclito poetis duntaxat carminibus decantatos.

Mirto quod Pythagoras animorum transmigrationes consuetis illis semper confabulationibus suis symbolis inseruit. Quamobrem ita ad academias ultimas respondebimus. Nituntur autem duobus præcipue fundamentis ratione propria, & auctoritate Platonica. Quæ de rerum generibus, Musicaque animæ compositione exponunt, ac rursus quod in argumentatione assumunt, quatuor esse species animarum, admittimus. Rursus, quod anima nostra vix efficere queat vtrūque simul, diuina scilicet videre, & corpora regere, præsertim ineptiora.

Id quoque damus, sed non putamus ob hoc necessarium esse, eam sursum atque deorsum vices innumerabiles agere, cum satis vtrumque officium peragat, si dum viuit in terris, modo corporalia curet, modo seipsam Deumque colat, & cum hinc abierit, facilius vehiculum suum regat, intentiusque diuinis incumbat. Concedimus insuper animam esse vitarum omnium seminibus grauidam, ideoque posse earum omnium progressionem peragere, eo tamen pacto, vt ea semina secundum humanæ animæ speciei que modum in hac ipsa sint anima, pullulentque ex illis affectus habitusque cæteris speciebus congrui, nunquam tamen fiat vera de specie in speciem transmigrationis. Siue enim anima ita comparatur ad corpus, sicut forma propria ad propriam materiam comparatur, siue vt ars propria ad proprium instrumentum, non poterit anima quælibet cor-

pus quodlibet ingredi. Nam quis audeat dicere Lunæ formam lapidis formare materiam, aut Musicam artem figuli instrumenta subire? Merito diuinus Iamblichus transmigrationem animæ ab homine in bestias reprobaui. Reprobaui Porphyrius etiam circuitum infinitum, atque in specie humana solum certis seculis pererrare concessit, ac tandem purgatam hominis animam patri semper hætere cœlesti asseuerauit, nunquam ad huius vitæ miseriam redituram, quoniam non posset vnquam esse beata, si aut ignoraret se huc redituram esse, cum esset huc aliquando reuersura, aut futura mala præuideret atque metueret. Quod quidem inde confirmatur, quia instabile bonum appetitum implere naturalem nequit, qui æternum infinitumque propriè & agnoscit & appetit. Rursus animam infinita potentia veritate fruente, neque violentia inde diuellit, neque fallacia dimouet, neque voluntas vlla diuertit.

Non voluntas Dei, cuius proprium est conuertere. Non animæ, quæ cum nihil eligat vnquam nisi ratione boni, non habet quod extra ipsum eligat, in quo totam boni rationem prorsus agnoscit. Neque mutatio vlla vitæ cadit in animam super tempus in æternitate viuente. Denique dicere animam sine fruente, inde quandoque seiungi, perinde se habet ac si quis dixerit vel terram ipso centro, vel ignem ipsa Luna proximè perfruente, vel ferum immensæ Magnetis moli hærente inde diuertere. His atque similibus (ut arbitror) rationibus commotus Porphyrius erubuit animam centro suo semel infixam temerè inde diuellere, Proculum quoque Syrianumque & Hermiam puduit cœlestem animam in corpora bestiarum precipitare. Atque ut debita supplicia immanibus rependerent vitiis, obseruari putarunt sacrilegas animas inter animas bestiarum, non tamè brutorum corpora regere, quoniam si bruta euaserit anima, non purgabitur inde, sed prorsus inficietur. Non enim purgatio fit, nisi ubi regnat quædam conscientie reclamatio. Quod præterea negant animam nisi fuerit semper, non semper esse futuram, quo pacto damnetur, aliàs diximus, & dicemus. Quocirca rationes eorum nobis non persuadent ut infinitis animarum erroribus ambagibusque, & absurdis specierum confusionibus fidem adhibeamus. Sed repositionem suam auctoritate Platonica tueantur, meminisse debemus, Platonem Pythagoricam sapientiam, quæ à Zoroastre manauerat, ab

Archyta, Euryto, Philolalo didicisse, & cū peragrasset orbem, aliàsque omnes Philosophorum opiniones examinauisset, Pythagoricam denique sectam tanquam verisimiliorem præ cæteris elegisse, quam suis literis illustraret. Propterea Pythagoricos inducit in dialogis suis præcipuis disputantes. Timæum Locrum, Parmenidem Eleatem, atque Zenonem, à quibus Socrates apud Platonem discit quæ in cæteris Platonis dialogis ipse aliis referat. Tria vero præ cæteris signa videntur evidentissima, quibus iudicare possimus cum Pythagorica illa nequaquam affirmasse. Primum, quod eosdem disputantes inducit, qui quondam talia dixerant. Secundum, quod fingit Socratem ambiguum quæ audiuerat referentem, qui nihil aliud scire se prædicabat, quam hoc ipsum, quod nihil sciret. Tertium, quod quæ de rebus huiusmodi scripserat, non confirmavit in senectute. Siquidem in libris de legibus, quos scripsit in senio, in quibus solis ipsa Platonis persona loquitur, nihil asseruit tale. Et in epistola ad regem Dionysium, cum esset admodum senex, inquit, nihil se de rebus diuinis vnquam composuisse neque esse Platonis opus de iis vllum, neque vnquam fore, quasi non suam mentem aperuerit, sed narrauerit alienam. In epistola quoque ad Syracusanos, quam postea scripsit senior, eadem repetiuit, ubi adiunxit neminem extare tunc aut fore in posterum, qui mentem Platonis de huiusmodi rebus intelligat. Merito, quia non scripsit. Num ergo nihil de diuinis affirmat Plato? Quædam proculdubio: Deum scilicet humana curare, atque animæ immortalis operum præmia reddere vel supplicia. Aliud verò affirmat nihil. Paucula enim hæc non in aliis modo dialogis asserit, in quibus aliæ personæ loquuntur, verum etiam in legibus & epistolis, ubi loquitur ipse. Mundum semper fuisse non asserit, sed ipsum generat in Timæo, generat, inquam, ab initio temporis ordinati, eadem ferme ratione qua primum Moses, deinde Mercurius, ut exposuerunt Seuerus, Aricus, Plutarchus & alij multi Platonici. Hinc Numenius Pythagoricus exclamauit, nihil aliud esse Platonem quam Moysen Attica voce loquentem, quamuis Plotinus, Porphyrius, Iamblichus, Proculus, perpetuam mundi generationem ibi à Platone accipi velint. Quod si forte illud ita exponendum est, Timæi Pythagorici sententia erit potius quam Platonis. Siquidem Plato ipse in Epinomide inquit, astra aut immortalia fore, aut adeo lōgæva, ut vitæ sua illis

illis sufficiat, atque longiore non egeant. Id illi consonat in Timæo, videlicet astra per se dissolubilia fore, quia videlicet ab initio composita sunt, nisi componentis voluntate seruentur. Rursus in libro Legum sexto, inquit humanum genus aut fuisse semper, aut multis ante seculis ortum. Vbi videtur initium quàm æternitatem eligere maluisse. Aristoteles quoque vbi de quæstionum natura disputat, inquit quæstionem de æternitate mundi esse neutram, quasi dicat non tam sententiam demonstrabilem, quàm opinionem quodammodo ad vtrumque probabilem. Animas autem Plato in legibus esse ante corpora ita fortasse vult, vt naturæ dignitati id potius quam temporis tribuatur. Quamquam per aliquam temporis morulam animas antecedere corpora etiam Christianorum aliqui opinantur. Animas hominum transire in bestias in legibus non confirmat. In nono autem libro inquit, secundum fabulas sacerdotum ire eas in alios homines. Et in septimo declarat, quomodo exponendum sit, si quando dicantur corporibus aliis se inserere. Vbi tradit eum qui necessarias doctrinas ignoret, nunquam fore inter alios homines Deum, aut dæmonem, aut heroem. Quasi per comparisonem ad alios homines & hæc dicantur & illa quæ nonnunquam de ferinis corporibus fabulatur, quamquam in Phædro non dicit animam hominis in bestię corpus transire, sed in ferinam vitam, & in Timæo in naturam ferinam, non in corpus feræ. In ultimo de republ. Theristę animam non in simię corpus, sed in simiam. In quibus intelligitur habitus vitęque potius quam speciei vel corporis permutatio.

Præterea in Phædone postquam narravit poetarum more transitum animarum in beluas propter supplicia peccatorum, subiunxit non esse prudentis viri talia confirmare, sed id solum asseuerari posse prudenter, quod poenas aliquas pendunt flagitiorum. Addit purgatas per legitimam Philosophiam animas apud Deum in æternum sine corporibus esse victuras, quod quidem in Epinomide confirmat, dicens primum animum à corpore separatum reliquum tempus in rerum omnium pulcherrimarum contemplatione versari. In Gorgia quoque & Theæteto, & decimo libro de Iusto perpetua describit supplicia impiorum ob multa peccata quæ expiari non possint, taliaque supplicia iustitię exemplique potius quam curationis gratia fuisse asserit instituta, vbi reprobat errores il-

los inexplicabiles animarum. Per hæc patet Platonem Christianorum more semipiternum bonum malumve significauisse. Quod verò purgatorium appellant Christiani, ibi Platonem intellexisse, vbi purgaturus animam sapius per inferiora reuoluit, videlicet non tam per corpora, quàm per vitas & commercia bestiarum. Denique purgatam cœlo restituit. In libro nono de Iusto figurat hominis animam hunc in modum. Est aliqua congeries capitum plurium beluarum quasi in globum coacta ferinum, ex hac multiplici capitum ferinorum congerie pullulat quasi stipes aliquis ex radicibus, qui stipes hinc leo est, inde draco. Huic stipiti homo aliquis superponitur clauam manu tenens, qua bestias verberat sæuientes. Demum corporis humani pellis omnia illa circumdat, per quam animal vnum videatur esse quod est simplex animal. Congeriem plurium bestiarum esse vult insatiabilem concupiscentię partem. Stipitem leone & dracone compositum, iracundię vim. Quæ leo dicitur, cum suffragatur rationi, draco cum refragatur. Homo est ratio. Post hæc iubet Plato vt interiorem illum hominem nutriamus potius quàm bestias illas, ne propter famem deficiente homine, solæ in nobis supersint bestię. Per hæc admonemur vt ad transitum animarum accipiamus non in varias species, sed in habitus. Erit itaque arbor apud Platonem, qui nutritioni deditus, die nocteque torpebit. Miluus, qui raptu viuet per concupiscentiam. Leo, qui egregie militabit. Draco, qui crudeliter in genus hominum sæuiet. Homo, qui ratione ciuili viuet. Heros, qui naturalia perscrutabitur. Dæmon, qui mathematica. Angelus, qui diuina. Talis enim fit animus, qualem induitur habitum, talis inquam in corpore, talis & extra corpus. Eadem in Phædro Socrates comprobatur, dicens. Ego itaque considero vtrum ipse sim Typhone multiplicior, siue diuinius animal. Et postea in libro eodem, in anima aurigam ponit, & geminos equos, bonum, atque malum, rationem scilicet, irascendique & concupiscendi potentiam. Vbi apparet in ipsis animæ viribus & hominem & beluas esse. Eodem modo Parmenides Pythagoræus in libro de natura animam figurauerat. Timæus quoque Pythagoræus nobilissimus, migrationem in bestias inquit, induci falsò ad terrorem hominum impiorum. Sed rem omnem ita Pythagoras ipse significauit.

ἢν δ' ἀπλευράς σῶμα, ἐς αἰθέρ ἐλεύθερον  
ἔλθῃς.

ἔσσεαι ἀθάνατος, θεὸς ἄμβροτος, οὐκέτι θνητός.

Id est, si deposito corpore liberum ascenderis ætherem, eris immortalis Deus. Immortalis, non ultra mortalis. Quasi dicat, ita Deus immortalis efficieris, ut omnino futurus sis procul à morte, nunquam amplius ad mortalia reuersurus. Orpheus quoque in ipso Mercurij terrestris hymno de Mercurio inquit:


κωλυτὶ γαίῳ ἀνυπόστροφον οἶκον ἀναγκῆς.

id est, Cocyti habitans irremeabilem viam necessitatis. In iis verbis poenas apud inferos ponit æternas, regressumque illum multiplicem à vita in vitam penitus aufert. Sed neque etiam omnes Ægyptij sacerdotes transitus animarum de specie in speciem fieri reuera existimant, imò verò de ferino vel heroico animæ habitu intelligi volunt, quando hominem fieri bestiam aut heroem asserunt, quoniam apud eos homo solus est animus. Quod aperuit Mercurius Ægyptiorum Pontifex maximus, qui cum talem quandam migrationem ritu poetico descripsisset, adiunxit legem diuinam non permittere migrationem animorum nostrorum in corpora beluarum. Poenas quoque sempiternas tribuit impijs animis in mundi huius infimis elementis, atque manifeste asserit impiorum animas æterno supplicio per immortalem sententiam subiugari. Agit quoque, Deo gratias, quòd bonos viros æternitati consecrauerit. Item dicit mentem vsque ad eò coniungi Deo, ut nunquam vltius implicetur erroribus. Denique Zoroaster priscae illius inuentor Theologiae, sic inquit:

σὸν γὰρ ἀγέῃον θῆρες χθονὸς ὀγκήσουσιν.

id est, tuum vas bestiae terrae habitant. Quòd si intra nos bestiae sunt, intra quo-

que, non extra de homine in bestiam, ac de bestia transimus in bestiam. Neque desunt qui transmigrationem in bestias sic exponant, ut animarum quæ brutis similem duxerunt vitam, aliæ inter alias bestiarum turbas versentur. Quod quidem Platoni admodum consentaneum Olympiodorus iudicat, propterea quòd Plato animas purgatissimas inter Deos versari censuerit, impuras autem sæpe inter sepulchra reuolui, quarum umbris perterre-ri aliquando soleamus, quippe cum corporei non nihil circa se sicut & in se traxerint. Quo fieri Plato vult, ut videri quandoque possint. Simile huic est quod scribit iunior Plinius infamem Athenis fuisse domum, in qua & strepitus audiebatur, & simulachrum horridi senis aspiciebatur. Atque Athenodorum Tarsensem Philosophum còducta domo vidisse simulachrum illud, eoque duce comperisse in area domus sub terra ossa inserta catenis. Ea sicut mos erat sepelisse. Domum deinde illam eo strepitu liberatam. Subdit se pluribus hæc affirmantibus credere. Nihil igitur mirum est, impuras animas si inter hæc, similiter quoque inter bruta versari. Ex omnibus iis concludimus, Platonem ea solum de rebus diuinis affirmauisse, quæ in Epistolis ac legibus comprobauit (in iis autem circuitus animarum infiniti non approbantur) atque ea quæ solum in cæteris tanquam priscorum inuenta recensuit, probabilia potius habuisse quam certa. Ac si quis ea etiam Platonem affirmauisse contenderit, nos quoque affirmare forsitan disputationis gratia concedemus, verum longè aliter quàm verba designent, exponenda esse censebimus, quem admodum declaratum est paulò antèrùm Platonis verbis, tùm Theologorum veterum testimonijs.



# THEOLOGICÆ PLATONICÆ,

DE IMMORTALITATE ANIMORVM,

EODEM FICINO AVTHORE,

(:.)

LIBER XVIII.


(:.)

*Quod Plato non prohibet fidem adhibere Theologiæ Hebræorum, Christianorum, Arabumque communi, scilicet mundum fuisse creatum.*

(:.)

CAPVT PRIMVM.

(:.)



Lato igitur nihil prohibere videtur fidem adhibere Theologiæ Hebræorum, Christianorum, Arabumque communi, coepisse mundum quandoq; Angelos ab initio creatos, animos hominum immortales creari quotidie. Ad hæc cogimur autoritate diuina, ad hæc rationibus huiusmodi ducimur. Mundi moles per se esse non potest, ita vt non pendeat aliunde, sed in esse suo stabilitur, alioquin seipsam quodammodo faceret. Facere autem aliquid, nõ ad corpus pertinet, quod quicquid agere videtur, per virtutem quandam exequitur incorpoream in subiecto iacentem, imò ad essentiam ipsam spectat penitus incorpoream in seipsa manentem, virtutisq; illius originem. Præterea corporea moles seipsam continere non potest. Siquidem continere, nisi aliquid agendo nequit, præfertim cum continere sine vnione non valeat. Vnire autem non ad naturam diuisibilem, quæ & ipsa indiget vnione, sed ad vim tandem penitus indiuiduam spectare videtur. Rursus moles eadem per se operari moueriq; non potest, quia si nequit sibi esse dare, multò minus præstare poterit actionem. Ac vicissim si posset seipsam agere, posset etiam per seipsam. Quod autem per se operari non valeat, hinc etiam patet, quod se mouere non potest, vt in libro sexto probauimus. Ostendimus insuper alibi, perpetuo ordinatissimoq; mundi motui virtute infinita opus esse, quam finita

determinataque natura corporis ex se habere non potest. Ideoq; mundus tanquam ex se erraticus dissolubilisque, aliunde indissolubilem ordinem mutatur. Sed vnde nam mutuatur? Profectò si mundus neque per se subsistere, neque se continere, neque per se agere moueriue potest, necessariò à causa per se existente seq; continente dependet, causa, inquam prorsus indiuisibili, ne illa similiter vel sit per aliud scilicet per partes, partiumve congregatorem, vel contineatur ab alio, scilicet ab vnitate partes inuicem connectente, vel sit insufficiens, cum partibus egeat, vel admixtum habeat non esse, cum compositum ex partibus nulla sit partium. Proinde cum mundus ex dissimilibus sit compositus, oportet compositionis huiusmodi causam perscrutari. Non enim seipsam componit corpus, quod neque actionis, neque principium est. Neque dicendum est partes mundi suo quodam motu in compositionem huiusmodi confluisse, non enim corpora per se mouentur. Neque tanquam ad id & aliunde compulsa, & inuicem compellentes. Quid enim est quod impellit? & quid impellit primo? Rursus nefas est impulsionebus carentibus ordine, ordinem committere tam mirandum, quoniam pacto ex ordinatis inordinatisque ordo tantus & ornatus efficitur, quippè cum soleat semper agens causam effectum esse præstantior. Præterea, si mundi partes esse compositionis huius materiales dixeris causas, de causa efficiente quaeremus. Sin autem efficientes, iterum perqui-



remus, quoniam pacto ex rebus ratione carentibus rationale opus efficiatur. Quapropter si mundus neque ex se, neque casu compositus est, certe compositionis causam habet certam. Neque afferat quispiam solam habere finalem causam. Habet enim eam, cum ad bonum tamquam ad finem recte feratur. Cum verò ad id frustra non moueatur, aliquid certe boni ab illo consequitur. Accipit autem secundum essentiam, quandoquidem secundum essentiam appetit atque mouetur. Igitur ab eodem accipit esse, à quo essentiali accipit bonitatem. Itaque causa illa tam efficiens est, quam finis. Est & exemplar, si enim mundus certa ratione fertur ad bonum, certe Deus illum certa ratione tamquam exemplari ad bonum illud continuè dirigit. At verò cum ad finem ducere, bonumque petere, sit voluntatis officium, nimirum Deus voluntate mouet mundum, quem similiter & voluntate composuit. Idem ita insuper confirmatur. Quod fortuitum & contingens dicitur, solet eo quod ordinatum est, determinatiue constare causis, posterius esse. Igitur non potest ordo mundi priore casu aliquo contigisse. Ac si multas mundanorum effectuum causas aliquis afferat, nisi omnes sub vna conciliet, non poterit, quam ob causam mundus licet ex diuersis constet, sit & vnus & vnitus, afferre. Et qua ratione vnum totum sit melius partibus multis, nisi vnā inueniet causam & cōmunem, & præstatiorem causis multis, cuius virtute omnes in vnum congregiantur. Quamobrem vna est vniuersi vniōisque ipsius causa, ad quam coordinata sunt omnia. Si hæc esset rationis expers, qui ratione vtuntur, seque ipsos cognoscunt, prima causa præstatiore essent, atque opus humanum opere diuino perfectius redderetur. Igitur Deus infinitam bonitatem suam rationaliter nouit per omnia propagabilem, vnde placuit sua sibi bonitas per singula propaganda, quippe cum boni proprium sit vt placeat, ac summi boni, vt summopere placeat. Quo quidem rationalis voluntatis affectu rationaliter atque optimè omnia tum procreata sunt, tum continuè disponuntur. Ratione voluntateque diuina disponi mundum, in Oraculis Chaldaeorum quæ recitat Proculus, iis verbis significatur. Intellectus Patris emanans perfecto consilio, ideas omniformes intelligit, quæ quidem ab vno fonte omnes prodierunt. A Patre enim erat voluntasque finisque. Distributæ verò sunt intellectuāli quodam igne, atque in alias quasdam intellectuāles deinde diuise. Rex enim multifor-  
mi mundo intellectuālem figuram indefi-

cientem preposuit, cuius secundus mundus est vestigium, properans vnā cum forma, & mundus apparens omniformibus dotatus ideis. Fōs vnus, ex quo erumpunt diuise aliæ innumerabiles circa mundi corpora producentes. Quæ circuitu quodamritè assimilata ferantur vndique conuersæ, sed alibi aliæ intelligentiæ à fonte paterno tamquam ab igne scintillæ peruiigili circa primordiales ideas. Prima enim à Patre idea effluxit, atque fons voluntarius. Hactenus Oraculum, in quo de Patre, Filio, Spiritu, Ideis, Angelis, dispositione voluntaria mundi mentio fit. Sed nos iam ad institutum ordinem reuertamur. Elementa & plantæ quicquid agunt, necessaria quadam naturæ suæ operantur affectione. Ea vna est dumtaxat. Vnum igitur quiddam quælibet operantur. Bruta præterea operantur, per appetitum, qui prout modis per sensum variis lacessitur, aggreditur varia. Et sicut elementa & plantæ innata necessitate agunt, ita bruta necessitate operantur illata. Rationalis anima per voluntatem agit, quæ quidem ad opus mouetur, non à rerum formis vt appetitus, sed à notionibus & consiliis intellectus. Hæc libera operatio est meritò perfectiori conueniens animali. Talis quædam præ cæteris esse debet operatio Dei. Quapropter Plato in Timæo voluntatem Dei beneficam, originem rerum certissimam extitisse. Mercurius quoque mundum diuina voluntate constare, quam cuncti comitentur effectus. Orpheus vbi de summo Ioue loquitur, sic inquit:

Πάντα γὰρ κρύψας, αὐτὸς φάος ἐς πολυμήτες,

Ἐξ ἱερῆς κραδίης ἀνένεχτο μέμμεγα πέζον.

id est, Cum abscondisset omnia deinceps in lumen gratum, emisit ex sacro corde operans cogitata, & mirabilia. In iis verbis Orpheus apertè declarat mundum à voluntate diuina initium temporis habuisse.

Natura & appetitio nunquam opus aliquod nouum aggrediantur, nisi quando natura variè afficitur, & appetitio variè lacessitur, intellectus autem atque voluntas etiam in homine nouum opus inchoant sæpè absque propriis, nonitate. Mane statuit Plato vespere accersire Xenocratem. Stat futuræ vocationis firma sententia, donec ea hora Xenocratem vocet. Mutatio quidem fit non in mente & voluntate, sed ore Platonis membrisque Xenocratis. Erat semper in mundi architecto machina mundana præscripta, ac momentum inchoationis eius in architecti voluntate signatum. Eo ipso momento quod præsignauerat, inchoata est machina, nulla intercedente Dei mutatione. Compleuerat

ab æuo Deus substantialem mundum intra se totum. Permisset umbratilem mundum inde tunc emanare, quando fuit melius. Melius fuit, quando statuit bonitatis diuinæ voluntas, per quam bona sunt omnia. Nos siquidem res quia bonæ sunt volumus. Hæ verò ideo bonæ sunt, quia vult eas Deus. Et quo pacto esse, & quando vult fieri, eo solum pacto & momento sunt bonæ. Similiter ideo res intelligimus verè, quoniam ita ut reuera sunt intelligimus. Contrà verò ita reuera sunt ideo, quoniam eas ita Deus intelligit. Sic ergo à diuina intelligentia rerum veritas, à diuina voluntate rerum bonitas proficiscitur. Vbi causa prima rerum, ibi ratio rerum summa. Quapropter ita rationaliter debebant fieri, ut intelligebat Deus, atque videbat. Temporaliter, id est, ab initio temporis emanare ab ipso debere Deus intelligebat atque dolebat hanc umbram, cuius natura in motu temporeque versatur. Et umbræ mundanæ motus ab initio temporali ad finem produci debebat & debet, cuius tempus momentis singulis in principio simul est atque fine. Neque perquirendum est cur illo momento potius quam priori inceperit inde hic mundus effluere. Nam si mille annis ante inceperat, etiam quæremus cur non prius. Initium tamen aliquando habere debebat. Adde, quòd phantasie est ista fallacia. Non sunt ante primum mundi momentum vlla temporis momenta quibus antè creari debuerit.

Quicquid cogitatur ante mundum, vnicum & stabile est æternitatis punctum. Omnis momentorum temporalium discursio cum mundo cœpit, mundo currente. Similiter neque inuestigandum est, quomobrem hic potius quam illic situs sit mundus. Phantasie est ista fallacia. Non est corporalis locus extra mundum. Tempus totum cursum, totum mundi metitur. Totus corporalis locus, mundi amplitudine prorsus impletur. Atque ut Timæus Platonis ostendit, par tempus est cursui, locus æqualis est amplitudini. Fallitur qui corporeum locum cogitat extra mundum. Fallitur qui ante mundum tempora fingit. Fallitur & qui crediderit diuinæ perfectioni accedere aliquid vel decedere, manante illuc mundo vel non manante, qui multo minus ad Deum, quam ad corpus sit corporis umbra. Corpori autem ex umbra neque accedit aliquid vnquam, neque decedit.

Profectò spiritualis ille mundus, mundi huius exemplar, primum que Dei opus, vi-

ra æqualis est architecto. Fuit semper cum illo, eritque semper. Mundus autem corporalis, quod secundum est opus Dei, discedit iam ab opifice ex parte vna, quia non fuit semper. Retinet alteram, quia sit semper futurus. Composita verò corpora, quæ tertia Dei opera sunt, omnem partem æternitatis amittunt. Rationabile est mundum Deo non æquari secundum vitam, postquam secundum substantiam non æquatur. Neque esse vndique infinitum, ut diuinæ cedat infinitati.

Decet etiam sicut res omnes duos habent actus, internum scilicet atque externum, & ille est vita æqualis agenti, hic verò posterior, ita ipsum quoque rerum opificem fœtum vitam æqualem intra se continere, partem verò extra se posteriorem producere, ut non minus æternitas quam perfectiones aliæ deficiat in effectu. Atque hic mundus sicut à Deo infinito finitus virtute magnitudineque producit, sic verisimile videtur ut ab æterno Deo fiat nouus, & initio circumscriptus. Et sicut mundo assignatur certus situs, quia ita hic est, ut non per immensum sit spacium, ita illi quasi certum assignetur tempus, quia ita in hoc est tempore, ut non antè fuerit per immensum, ac si Deus vniuersi substantiam infinitis perfectionis excedit gradibus, multo magis vniuersi durationem infinitis gradibus durationis excedat.

Præstantior enim in re qualibet est substantia quam duratio. Quisquis autem considerat partes mundi quæ sunt infra Lunam, de hoc esse in illud mutari, atque è conuerso, ac partes eiusdem quæ supra Lunam sunt, de esse tali in esse tale transire vicissim, & quia mutatur vbique, ideo indigas imperfectasque esse, rursusque vniuersum ipsum ex subiecto aliquo formaque constare, & subiectum qui naturaliter antecedit formam, posse & subire formam talem & non subire, item constare mundum non modo ex partibus quantitatis, sed ex partibus etiam inter se pugnantibus, denique vniuersum corpus nullo modo per se esse, sed omnino per aliud, quia per omnem causam, scilicet efficientem, finem, formam, materiem, ideoque secundum se penitus vacillare, quisquis, inquam, quantum hæc considerat, is planè conicere potest vniuersam mundi molem natura sua fore de esse in non esse mutabilem. Talis non foret, nisi de non esse quandoque transisset in esse. Hinc fermè Democritij, Cyrenai, Stoici, Cynici fateri coacti sunt mundum initium temporis habuisse. Ægyptij

primum mundi diem ita illoxisse aiunt, ut Aries in medio esset cælo, Cancer exoriretur, Luna in Cancro, Sol in Leone, Mercurius in Virgine, Venus in Libra, in Scorpio Mars, Iupiter in Sagittario, Saturnus in Capricorno, singulosque Planetas eorum signorum dominos esse aiunt, in quibus dum nasceretur mundus, fuisse creduntur. Chaldæi nascentem mundo Solem in Ariete fuisse putant. Vtrique mundum natum existimant fuisse aliquando, & Arietem, siue quod in eo Sol esset, siue quod ipse medium percurreret cælum, signorum caput appellant. Ideo ab ingressu Solis in Arietem præcipuè totius anni fortunam Astronomi iudicant, quasi inde penè omnia pendeant. Mitto quòd Ægyptij solum Leonem Soli, solum Lunæ Cancrum assignauerunt, reliquis verò Planetis præter illa signa quibus tunc inhærebant, reliqua quinque sic adiunxerunt, ut à fine prioris ordinis ordo secundus inciperet. Sic enim Aquarius qui Capricorno succedit, Saturno qui vltimus fuerat, traditur, Pisces deinde Ioui, quia Saturno proximus fuerat, Marti Aries Veneri Taurus, Gemini verò Mercurio, Sed his omiſſis ad propositum reuertamur.

Proculus demonstrat mundum quoniam extensam & compositam habet essentiam, ideoque ex se distractam atque dissipabilem, idcirco solum per indiuiduam quandam virtutem & diuina vnitate infusam connecti. Rursus quia naturali appetitu semper ad bonum ordinatè mouetur, ideo naturam talis appetitus motusque, originem à diuina mente bonitateque accepisse. Hanc verò virtutem per quam connectitur atque mouetur, oportere infinitam esse per quam absque fine connecti mouerique possit, quam ex se, cum sit finitus, habere non valeat, sed ab infinitate diuina semper accipiat, haud simul totam, ( non enim capit ) sed pro sua potius temporali natura, scilicet quasi guttatim momentis singulis hauriat. Hanc ostendit non aliter quàm momenta defluere subito, rursusque cum momentis momentaneum similiter hauriri, semperque hoc pacto, ut narrauimus aliàs, mundum corporalem fluere fierique, sed esse re vera nunquam, quasi vmbram eminentis arboris in torrente, quæ & cum videatur arbor, non est arbor, & cum diu eadem appareat permanere, tamen continuè renouatis vndis continuè renouatur. Cuinam igitur mirum videri debeat, mundum ab initio ex non esse processisse semel in esse? cum apud quosdam adeò vmbranilis instabilisque sit, ut mo-

mentis singulis ab esse in non esse vicissimque pertranseat? Sed hæc Proculus ipse viderit.

Plato in libro de mundi generatione ostendit mundum diuinæ bonitatis gratia fuisse creatum. Non autem ad hoc est opus huiusmodi constitutum, ut Deum qui ipsa bonitas est, faciat meliorem, sed ut diuinam referat bonitatem. Sicut neque pariteres ob aliam causam filios generant, quàm ut eorum imago videatur in filiis. Præcipuè verò mundus refert Dei opificis bonitatem, si non modo quàm munifica sit, sed etiam quàm excellens, ostendat. Quam munifica sit, ostendit prout semper à Deo seruatur incolumis, qui sibi ipsi relictus dissoluere, ut in Timæo inquit Plato. Quam excellens, testatur prout esse cœpit aliquando, per quam inchoationem clarè perspicitur quòd mundus non à seipso sed à Deo est. Quod infinito interuallo Deus excedit mundum, qui in infinitum erat ( ut ita dixerim ) ante mundum, quòd infinita virtute mundum produxit ex nihilo, quòd libertate voluntatis agit, non necessitate naturæ. Tolem mundanæ generationis originem planius Trismegistus Mercurius docuit. Neque mirum videri debet hunc talia cognouisse, si homo idem Mercurius fuit atque Moses, quod Artapanus historicus coniecturis multis ostendit.

*Angelos & animos non semper fuisse.*

## C A P V T II.

**O**Rdinem in corporibus posuimus, ponamus ordinem in spiritibus. Est spiritus ille supremus, qui fuit semper & erit, Is est Deus. Sunt & spiritus infimi bestiarum, qui nec semper fuere, nec erunt. Medijs sint oportet duo quidam spiritus inter extrema adeò discrepantia, qui partem primi illius spiritus habeant, & partem spirituum infimorum. Quo igitur pacto hos medios componemus? Nunquid dicemus eos fuisse semper, sed quandoque desinere? Minimè. Quod enim fuit semper, id per infinitam virtutem vixit in infinitum. Infinita virtus nunquam minuitur. Quare si fuerunt semper, semper & erunt, atque pares in duratione sunt Deo, non medijs spiritus. Ergo ut in persecrantia medijs sint, oportet eos cœpisse quandoque, desinere nunquam, Qui & si ex nihilo facti sunt, non tamen vertentur in nihilum. Ipsum enim quod dicimus nihilum, in eorum creatione neque materia neque effectior iporum est ex quibus fiant, sed terminus forsitan vnde

fiant, neque etiam terminus est reuera, sed dicitur.

Non ergo coguntur ipsius nihili sequi naturam, per quam in nihilum reuertantur, quam quidem naturam ante reiecerant cum primum in esse prodirent. Imò naturam illam suæ causæ seruant, unde essentiam acceperunt, ut per eandem infinitam virtutem in ipso esse seruentur procul à nihilo, per quam ex nihilo emerferunt in esse, posthabito nihilo. Haud absurdum est, quod ab infinito principio atque infinito fine, id est, Deo proximè procreatur, cogitare finem non habiturum, cum multa etiam quæ ab initio ac termino quodam finito procedunt, ritè considerentur absque fine procedere. Sic enim ab unitate numerus, sic à puncto Mathematica linea, sic à præsentī momento futurum tempus absque fine, nihilo prohibente progredi cogitur. Aliquid verò creatum fore semper, præsertim animam, non religio solum, sed etiam Auicenna & Alganteles tanquam Philosophi probant. Itaque Angeli vnum quidem medium obtinent inter Deum & beluas, alterum medium statim post Angelos sortitæ sunt hominum animæ, quæ cum Angelo conueniunt, quòd semper erunt, differunt, quòd non fuerunt saltem per omne tempus ut Angeli, qui ab initio rerum orti naturali ordine ante cœli cursum, cuius comes est tempus, licet non fuerint per omnem æternitatem, tamen per omne fuere tempus. Animæ nostræ post temporis ortum natæ cedunt Angelis, neque tamen sunt temporales. Nam Deus per id ipsum æternitatis suæ punctum, quod semper est idem, & vniuersum supereminet, complectiturque temporis ambitum, quo Angelos procreauit, animas quoque hominum procreat. Igitur supra temporis passionibus fiunt hominum animæ, quamuis fiant post temporis ortum. Animæ verò brutorum & post ortum temporis, & sub temporis passionibus generantur, quia non fiunt à Deo per æternitatem Dei proximè, sed per cœlorum conuersiones, animarumque virtutes, quo fit ut non viuant semper. Nam & mutationi temporis sunt obnoxie, quæ per cœli motum sunt factæ sub tempore. Et siquid habent præclari, id totum defluit ingiter ab ipso tertiæ essentiae fonte, cuius ipsæ non riui sunt, sed vmbre. Idcirco Platonici eas esse putant idola quædam animæ mundi, vel animæ sphaeræ illius quam habitant, mediaeque inter essentiam tertiam disponunt & corporum qualitates, ad hanc tamen essentiam reducunt eas ut vmbas.

Hinc Plotinus inquit, quemadmodum ab vno vultu multæ per specula multa diffunduntur imagines, sic ab anima sphaeræ in corpora brutorum multa animæ vnius simulachra multa, corpora inquam brutorum, quibus humanæ non insunt animæ. Vbi enim hæ sunt, ibi potentia irrationalis, rationalem animæ nostræ substantiam sequitur velut vmbra.

*Anima creantur quotidie.*

### C A P V T III.

**V**erum cur nouæ quotidie animæ creantur à Deo? An non poterat Deus mundo constructo creare simul animas cunctas, quemadmodum cunctos in mundi exordio Angelos procreauit? Non decuit. Nam si diu à vinculis corporum solutæ vixissent, sincerè iudicauissent quanto pretiosior sit vita soluta quàm alia, nec ingredi vnquam corpora voluissent, videlicet quatenus intellectuales sunt. Neque Deus vel Angelus volunt liberam voluntatem animæ cogere. Non enim aliter mens quam persuasionem mouetur. Imò neque etiam singula quæque corpora anima cognouisset quæ posset eligere, cum desit illi ante sensus cognitio singulorum. Itaque careret diuinis sacerdotibus sacrisque hymnis pars hæc media templi diuini. Oporteret tamen in singulis huius templi circulis proprios duci choros sacerdotum Deo canentium. Consonat præterea rationi, ut sicut sphaerarum animi siue Angeli non fuerant per moras aliquas temporum ante sphaeras proprias procreati, sic neque animæ nostræ ante corpora propria. Item anima est forma actusque corporis. Actus autem quamuis in vniuerso secundum naturæ ordinem prior quam potentia sit, in eodem tamen subiecto secundum tempus est posterior, quoniam à potentia in actum motus efficitur. Quapropter prius fuit semen quod est potentia viuum, quam anima quæ vitalis est actus. Ad hæc cuique formæ naturale, hoc est, ut materiæ propriæ vniatur. Alioquin quod ex materia formaque componitur, esset congeries aliqua præter naturam.

Prius autem rei cuique tribuitur quod ipsi conuenit secundum naturam, quàm quod præter naturam. Quod enim secundum naturam conuenit, per se inest cuique, quod præter naturam aduenit, ex aliquo contingente. Animæ igitur quæ ratione anima est, prius conuenit ut coniuncta corpori sit, quàm separata. Quomodo

igitur vixit ante corpus? Adde quòd si superior mens quælibet (vt quidam putant) & vna est in specie vna, & immortalis, forma verò quælibet corporalis & multiplex fit in eadem specie, & mortalis hominis anima quæ illis mentibus succedit, præcedit has formas, sic vtrarumque particeps erit, vt fit vel vnica anima in vna hominum specie, atque mortalis vel immortalis & multiplex. Primum fieri nequit. Si enim anima vnica totius speciei animarum gerat vicem, innumerabiles animas quæ fieri sub illa specie possunt, suis virtutibus complectetur. Sic immensæ quodammodo virtutis erit, & immortalis, præsertim quia rerum species sempiternæ sunt, & quod totam capit speciem, est sempiternum. Rursus, quia nullam haberet cum his corporeis rebus communionem, esset procul admodum ab interitu. Imò si talis esset, meram speciei suæ seruaret simplicitatem. Ea species est à caduco corpore segregata. Igitur in puritate propria remaneret à corporibus aliena, neque præstaret his vitam. Ex iis constat hominis animam non posse esse vnica in cunctis hominibus, rursus non posse esse vnica simul atque mortalem. Itaque erit immortalis & multiplex. Immortalitate imitabitur mentes, multitudine formas penitus corporales.

Erit fortè id rerum ordini consentaneum, vt primum gradum teneant ideales ipsæ rerum species, secundum verò quæ species capiunt. Atque ex iis quæ capiunt, primum quæ totam pro facultate creaturæ suæ capiunt speciem atque semper. Secundum verò, quæ non totam, sed tamen semper. Tertium, quæ neque totam, neque semper, quemadmodum in summo ponimus exemplar luminum, id est solem, in secundo stellas, quarum quælibet totum inde suum semperque accipit lumen: in tertio lunam, quæ semper quidem accipit, sed non totum, & si pati videtur eclipsim, tamen subito recipit, similiter aërem & aquam. In quarto illa ex elementis composita quæ perspicua quodammodo & nitida sunt, talia cupiunt quidem, sed neque semper, neque totum, vt opposita prætermittam, quæ nullo modo in se lumen admittunt. At vna hæc animæ species vnde multiplicem accipit numerum? Fortè non ex eo quòd imitatur mentes. Ex eo igitur quòd formas imitatur corporeas. Quales hæc sunt? Incipiunt cum corpore, & cum corpore desinunt. Anima nostra si talis sit omnino, vt incipiat simul & desinat, non imitatur eas, sed generis est eiusdem. Atque illa si neu-

trum horum habet, non imitatur, non congruit, non hæret illis, non viuificat. Ergo habebit alterutrum, vel incipiet cum corpore tantum, vel tantum cum corpore desinet. Desinere non potest cum corpore mens, quæ ad immortalem veritatem bonitatemque dirigitur tanquam finem. Agit enim omnia huius gratia. Sicut autem de rerum initio habemus ab efficiente causa coniecturam, sic de rerum perseverantia coniecturam sumere solemus à fine. Si igitur mens ad sempiternum finem propriè naturali quadam cognatione dirigitur, sempiternæ perseverantiæ est capax. Proprius enim finis proprio respondet agenti, perseverantia rei ad finem directæ inter vtrunque tenet medium.

Mens igitur cum proprium finem habeat sempiternum, habet quoque agens proprium sempiternum, atque idcirco vtrunque vitam perseverantiamque perpetuam. Si non desinit cum corpore, incipit saltem cum corpore, multiplex profecto fit anima hominis in multis corporibus. Quod quidem significatur ex opinionibus hominum, affectibusque contrariis. Talis verò non fit ex specie sua per quam est vna, sed (vt quidam putant) quodammodo ex corporibus, imò ex Deo animarum corporumque conciliatore. Non quia in corpore sit diuisa. Non quia ex materia sit vt corpus. Non quia nascatur ex corpore. Vnde igitur, nisi quia diuina voluntate comes fit corporis? Quando Deus simul initium præbet vtrisque, non tamen præbet principium idem. Igitur neque naturam eandem, neque exitum similem, sed initium, vt diximus, idem. Vnde & numerum tradit eundem. Hinc affectus animæ ad naturam corporis augetur, quia corporis initium comitatur. Atque in huius creatione mutatio quæ vna videtur, est triplex. Mutatio quidem animæ ex nihilo ad esse per Deum solum facta, creatio est, mutatio verò corporis non viuentis ad vitam ipsam ab anima capiendam, formatio quidem corporis, animalis autem generatio nuncupatur.

Creationis terminus ad quem dirigitur anima in seipsa est, diuinæ solum æternitati respondens, quæ terminus est à quo creatio prouenit. Formationis autem terminus ad quem fit, est anima non tam in se ipsa permanens, quam in corpore. Terminus verò à quo fit, videtur esse natura. Denique generationis terminus ad quem est animal ex anima corporeque compositum. Terminus autem à quo, ferè similiter est natura.



Natura, inquam, non particularis tantum, sed etiam vniuersalis, in cuius virtute particularis corpus ad animam præparat Vniuersalis verò natura, virtus quædam dicitur siue instrumentum animæ mundi. Ideo Plato in Philebo dixit. Si mundus anima careret, vndenam nos haberemus? Non quia ab anima mundi sit anima in se ipsa, sed quia per eius operam sit in corpore. Animas enim nostras ab eodem Deo & ex eodem fonte quo & superiores omnes fieri Timæus ostendit. Hinc illud quoque ostenditur quod Timæus inquit, rationalem videlicet animam à solo Deo esse: irrationalem verò vitam sub ea corpori mancipatam à diis cœlestibus Deo iubente pendere, quia scilicet & corpus ad ipsam præparant, & animam nostram ad eam corpori infundendam corroborant.

Sed hæc tanquam hic superuacua dimittamus. Sint igitur, dicet aliquis, animæ multæ, incipiant etiam cum corporibus, hoc aures non offendit, hic tamen vnus restat scrupulus, quonam pacto conueniat Deo singulis momentis ad libidinem concumbentium animas singulas procreare. Non malum est concubitus, quoniam ad bonum est naturaliter institutus, sed defectus moderationis in animis concumbentium. Non fit ex priuatione moderationis, sed ex concubitu corporis generatio. Huic generationi Deus distribuit animas non ad libidinem concuntium, sed ad præscriptam prouidentię legem, quæ & numerum & tempora concumbentium ab initio rerum videt in æuo. In æuo iam dudum concipit animas. Cur ergo Deus animas parit quotidie? Quia non simul, sed per successionem erant corpora generanda.

Adde quòd continuè illuminat Angelos, & sicut nunquam desistit mentes superiores formare, ita nunquam cessat mentes infimas procreare. Perpetua illic formatio fit, hic perpetua procreatio. Procreatio inquam tamdiu assidua, quamdiu sol Dei vicarius continuè superiora illuminat corpora: & continuè generat infima. Decet immensam Dei potentiam, ita semper sese potentem ostendere mentium oculis, vt videant Deum in infimo gradu mentium propter vltimum mundi locum continuè aliquid ex nihilo procreantem, vt hoc effectum continuo infinitam omnino Dei potentiam clarius agnoscant in infinitum creationis actum infinitè si placuerit peragentem. Venerentur eam illuminantem in cælis. Admirentur

(vt ita loquar) in terra creantem. Excel-  
lentior sanè operatio est creatio quam illustratio. Illa igitur magis quàm hæc conuenit Deo: hæc continua fit à Deo. Illa igitur pro Dei arbitrio fit continua. Cœlos mouent ministri Dei. Hoc motu sequentia generantur, dum species quælibet rerum in terris aliquid agit, & in agendo ministra fit cœli. An Deus ipse solus agit nihil quamdiu cætera omnia aliquid operantur? Absit vt primus actus agat nihil, agentibus aliis. At inquires eum agere satis, dum agentia non deserit reliqua, sed vim illis operandi suppeditat. Non satis est istud. Nempè hinc propria causarum aliarum sequuntur opera, atque imagines illarum fiunt in mundo, non Dei. cur nolit & Deus assidue opera propria, propriasque imagines facere, plurima semper sine medio procreando? Igitur cum creatio, propria Dei operatio sit; generatio autem externa, operatio propria aliorum, non cessabit Deus creare aliquid quamdiu alia non cessabunt aliquid generare.

Centrum mundi verum Deus est, vt in libro de amore differuimus: quia vnus, simplex, stabilis est, & in omnibus, atque alia quælibet omnino plura, composita, mobilia, circa ipsum per naturalem ipsius appetitum perpetuò reuoluuntur. Ita centrum Deus est omnium, quia sic est in omnibus, vt cuique rei interior sit quam ipsa met sibi. Est etiam circumferentia mundi, quia extra cuncta existens ita supereminet vniuersa, vt cuiusque rei summum apicem dignitate excellat immensa. Item quanto est omnium (si dictu fas est) minimus quantitate, tanto virtute est maximus omnium. Vt centrum quidem, est in omnibus, vt circumferentia vero, est extra omnia. In omnibus inquam non inclusus, quia est & circumferentia. Extra omnia quoque non exclusus, quia est & centrum.

Quid ergo Deus est? Vt ita dixerim, circulus spiritalis, cuius centrum est vbique, circumferentia nusquam. At enim si centrum id diuinum in aliqua mundi parte imaginariam aliquam aut perspicuam operationis sedem habeat, potissimum in rerum medio dominatur, tanquam rex in medio ciuitatis, cor fermè in medio corporis, sol in medio Planetarum. In sole igitur, id est, in tertia mediaque rerum essentia Deus posuit tabernaculum suum. Tabernaculum inquam virtutis suæ frequentius demonstrandę. Quæ sedes familiaris est Deo, non tam quòd species animæ est, quàm quòd diuinæ ciuitatis est medium, ærarum

publicum, & consona vrbanaſum partium moderatio. Animam hominis eſſe rerum medium ſæpè iam declarauimus. In hac igitur regione præcipua Dei operatio frequentius præualebit. Talis creatio eſt. Creat igitur aſſiduè animas hominum. Profecto quia ſtabile centrum eſt, creat continuè. Quia circumferentia eſt, quæ mundi ambit circumferentiam, creat eas (vt Platonici dicerent) quodammodo in circumferentia mundi. Rurſus quia centrum, ideo eſt ſumma rerum. Quia ſumma, ideo ſingula fundit, tum ſigillatim ſingula ſemel ab initio rerum, tum cuncta ſummatim quotidie, prout creando animam, quæ rerum medium eſt, effundit è ſinu proprio vniuerſa, quæ ſummatim confunduntur in medio.

*Vnde anima deſcendit in corpus.*

### C A P V T IIII.

**V**Ndenam deſcendit in corpus anima? Reuera cum Deus extra locum adſit omni loco, & anima non claudatur loco, momentoque & creetur & adſit, neque dicendum propriè eſt eam deſcendere, neque vnde deſcendat eſt quærendum. Sic enim ab ipſo Deo manans adeſt corpori (vt ita dixerim) ſicut à Solis lumine radius oculo. Sed delectat interdum vna cum priſcis conſabulari. Igitur ſi Zoroaſtri & Mercurio credimus, ex amplo demittitur ambitu mundi. Atque vt illorum ſententiam ordine inferam, infima mens ſupremo corpori primum adhæret, neque hæret ſolummodo, ſed infunditur, quo tanquam medio craſſioribus corporibus copulatur. Spiritus ſimplex immortalis que non aliter composito mortali que corpori, quam per corpus ſimplex & immortale coniungitur. Neque id quidem iniuria, quoniam anima per ſuam eſſentiam corpori præſtat vitam. Eſſentia eius vita eſt ſempiterna. Sempiterna vita cui primum hæret, hæret in ſempiternum, præſertim quoniam eſſentia animæ immutabilis eſt, quo fit vt immutabiliter proximum ſibi corpus viuificet. Siquidem perpetuæ vitæ proprius actus eſt viuificatio ſempiterna. Tale quiddam opinari poterit aliquis Ariſtotelem cogitauiſſe in ſecundo de generatione animalium libro, vbi cum probauiſſet intellectualem animam eſſe à corpore ſeparabilem, propterea quod cum operatione ſua non communicat operatio corporalis, paulo poſt ſubdidit, huic animæ cōuenire corpus aliquod quod fit à genituræ corpore ſeparabile. Ex quo etiam apparet quod contra Auerroem

in ſuperioribus quæreſſamus, ſcilicet intellectualem animam eſſe formam corpus viuificantem, præſertim quia cum Ariſtoteles ibidem probauiſſet ex tribus animabus, ſcilicet vegetali, ſenſuali, intellectuali, hanc ſolam eſſe, & ab extrinſeco & à corpore ſeparabilem, quia huius tantum operatio per ſe abſque instrumento poſſit expleri, ſubiunxit has omnes ſcilicet tres animas pariter eſſe in ſemine ſecundum potentiam. At verò ſiquis hæc conſideret diligenter, inueniet non poſſe potentiam vllam his eſſe communem, per quam corpus pari ad tres animas modo in potentia ſit, niſi facultatem quandam qua ab intellectuali anima ſimiliter atque ab aliis vitam motumque accipiat. Sed iam ad corpus animæ proximum redeamus. Hoc vocant Magi vehiculum animæ, æthereum ſcilicet corpusculum acceptum ab æthere, immortale animæ indumentum, naturali quidem figura rotundum propter ætheris regionem, ſed in humanam effigiem ſe transferens, quando corpus humanum ingreditur, atque in priorem ſe reſtituens cum egreditur. Quod ob eam cauſam Magi neceſſarium arbitrantur, quoniam Angelitales ſunt, & virtute ſeparabiles, & actu ſeparati ſint à corporibus, irrationales animæ, neque virtute ſeparabiles, neque actu. Ex quo ſequitur, rationales animas tanquam medias tales eſſe debere, vt virtute quidem ſemper ſeparabiles ſint, quia illis ſubtrahantur corpora, non peribunt, actu autem ſint ſemper coniunctæ, qui familiare corpus nanciſcuntur ex æthere, quod ſeruant per immortalitatem propriam immortale, quod Plato currum tum Deorum tum animarum vocat in Phædro, vehiculum in Timæo, quo vtantur animæ ſphærarum celeſtesque puriſſimo, dæmonum animæ minus puro, noſtræ quoque minus propter terreni corporis mixtionem. Quam ob cauſam ita præcipit Zoroaſter.

*μη πνεῦμα μολύνῃς, μη δὲ βαδύνῃς τὸ ὅπι-  
πεδον.*

id eſt, ne ſordet ſpiritum, neque in profundum exaugeas quod eſt planum. Spiritum planumque appellat ipſum vehiculum, non quia corpus non ſit, atque profundum, ſed quia propter tenuiſſimam & ſplendidam puritatem ſit quaſi non corpus. Præcipit ergo ne propter nimium corporis elementalſis affectum, cogas ipſum etiam poſt hanc vitam ſordidum atque graue ſuperfore caliginis elementalſis adiunctione, quam animæ vmbra priſci Theologi nuncuparunt. Neque tamen volunt rationalem animæ partem proximo hæ-

tere vehiculo, sed rationalem ipsam animam quantum & rationalis est, & comes coelestium animarum, addere actum viuificum in vehiculum, quod animæ idolum sæpe iam appellauimus, quam speciem animæ mortalem in libro de mundi Generatione Plato nuncupat non quia moriatur aliquando, sed quia subtracto vehiculo rueret, ut quidam putant. Sicut enim Lunæ splendor in nubē promit ex seipso pallorem, sic anima in corpore coelesti emitit idolum, quasi stella crinita comam. Quod euanesceret, si euanesceret corpus illud, sicut pallor extinguitur nubibus dissipatis. Quia tamen nunquam vehiculum subtrahetur Zoroaster inquit.

*ἐν τῇ εἰδωλῷ μερὶς ἐς τόπον ἀμφοτέρωτα,*  
id est. Est idolo quoque locus in regione perspicua. Quia scilicet cum vehiculo simul & anima rationali recurret in cœlum. Plotinus autem ipsum esse putat simpliciter mortalem, etiam si ipsi vehiculum subtrahatur. Similiterque ait Solis lumen in aëre, imò præsens aëri, haud extinctum iri, etiam si aër tollatur è medio. Ex solo enim Sole pendere tanquam perennem ipsius actum, neque esse passionem aëris, qualitatemque aëri propriam. Siquidem momento adest atque abest, neque ipsius quicquam sublato Sole in aëre. Neque solum adest aëri, sed similiter omni perspicuo, etiam si contrariæ inter se naturæ perspicua sint, quasi non à certa natura subiecti dependeat. Neque aliquo modo à perspicuo, qua ratione perspicuum est, dependet, sed tantum illi adest, quia non impeditur illi adesse, sicut adesse opaco impediri videtur. Sol enim hunc actum emittit semper, non dimittit, non immitit. Sorte verò contingit subesse quod capiat, imò quod capere videatur. Actus hic Solem vicissim perpetuò comitatur. Similiter se habet & vultus ad speculum, & ad corpus anima. Hæc Plotinus. In esse autem idolo huic opinantur phantasiam quandam irrationalem atque confusam, sensus præterea tales, ut per totum vehiculum videatur pariter atque audiatur, quibus sensibus propriè homines quàm paucissimi vtantur & raro. Sentiri verò per illos sæpe concentus cœlorum mirabiles, vocesque & corpora dæmonum, quoties aliquis ad tempus terreno corpore derelicto sese in corpus suum coeleste receperit. Ideo Tatijs Mercurij filius cum esset paternis sacris expiationibusque purgatus, illico exclamauit esse se tunc in corpus immortale translatum, ac intueri mirabilia, & audire. Quod & ipse Mercurius

narrat, sibi quoque Paulo ante in abstractione animi contigisse. Olympiodorus quoque Platonici tradit Apollonium Tyaneum hac ratione solitum ex vrbe Roma, quæ fiebant in Ægypto, prospicere. Mitto quòd Platonici multi putant animam tribus vti vehiculis, primo quidem immateriali & simplici, id est, coelesti, secundo materiali & simplici, id est, aëreo, tertio materiali atque composito, id est, elementis quatuor constituto. Et primo quidem dare vitam irrationalem, sed immortalem, secundo verò vitam irrationalem, sed longæuam, quæ videlicet composito corpore aliquando dissoluto ad certum tempus supersit in simplici corpore, tertio, denique vitam & irrationalem, & vnà cum dissoluto corpore dissoluentem. Præterea in prima vita communicata vehiculò sensum esse communem atque impatibilem, in secunda patibilem & communem, id est, per vehiculum, vniuersum sensum pariter vniuersum, denique in tertia sensum diuisum pariter atque patibilem.

*Qua parte cœli anima creantur, quare descendunt.*

#### C A P V T V.

**Q**ua parte cœli animæ procreantur, quâquam stultum est quærere situm in his quæ situ aliquo non clauduntur, & sicut vbicumque Sol fulget, ibi mittitur radius, sit vbicumque Deus adest, mittitur animus, delectat tamen cum antiquis interdum poëtice ludere. Igitur alias, inquit Timæus, apud alias stellas à mundi opifice seminari, quarum fiant in vita comites animæ. Quod ita Platonici intelligi volunt, ut non singulæ animæ, sed animarum legiones singulis stellis ac fatales edocommodentur. Addit Deum animas suis imposuisse vehiculis, ac vniuersi naturam legesque cuius. Qua parte cœli descendunt? Cancro præcipue, ut aiunt Platonici, vicissimque per Capricornum Cancro oppositum ascendere putant. Atque hinc illam hominum, hanc Deorū portam appellant. Nemo verò adeò falli debet, ut descensum ascensumve hic accipiat secundū situm, sed quia Luna Cancrī Domina, generationi proxima est. Saturnus verò Dominus Capricorni remotissimis, ideo per Cancrū, id est, lunare vegetalemque instinctum descendere animas dicunt, per Capricornum verò, id est, per Saturniū intellectualēque instinctū ascendere. Saturnū enim præsci mentem vocant, qua Sola superiora

petuntur. Accedit ad hæc, quò Capricorni Saturnique sicca virtus dum spiritus ad intima contrahit atque colligit, ad contemplandam assidue prouocat, lunaris autem humor spargit atque dilatat, & animum circa sensibilia distrahit. In ipso autem descensu animus accipit & à Saturni numine per se, & à Saturni lumine per corpus æthereum atque idolum, adminicula quædam siue incitamenta ad contemplationem aptius exequendam: ab Iouis numine atque lumine similiter ad vitæ ciuilis gubernationem: à Marte similiter ad magnanimitatē propter iniurias propulsandas: à Sole ad phantasiæ & sensuum claritatem: à Venere ad charitatem: à Mercurio ad interpretationem atque eloquentiam: à Luna ad generandum. Et quamuis inde singula dentur bona, possunt tamen in mixtione terrena ad malum degenerare. Descensus huiusmodi ita ferme subito potest fieri, vt radij descensus à Sole, qui quamuis subito demittatur in terram, variis tamen in ipso casu nubium vestitur coloribus. Nonnulli verò putant animas in qualibet sphaera ad certum tempus vitam agere sphaeræ illi conuenientem. Sortiri enim à sphaeris singulis vehicula propria, ac tandem post multa secula ad elementa descendere, atque in igne & aëre dæmonicam, in terra humanam brutalemve vitam agere. Item similibus gradibus tandem ad superna redire. Hæc illi. Nos autem in omnibus quæ scribimus, eatenus affirmari à nobis aliisque volumus, quatenus Christianorum Theologorum concilio videatur.

*Quando infunditur anima corpori, & quò dum in corpore viuit, ducitur.*

## C A P V T VI.

**Q**Vando infunditur anima corpori? Postquam in aluo mulieris ipsum semen quod à toto viri corpore antè defluerat, traxeratque secum formatricem vim ab anima viri, per hanc ipsam vim diebus circiter quinque & quadraginta sic esse affectum, vt sex primis diebus lac euaserit, nouem sequentibus sanguis, duodecim aliis caro, decem & octo reliquis fuerit figuratum, tunc anima creatur atque infunditur. Qui animas ante ingressum vixisse putant, eas dæmonem vitæ ducem naturaliter elegisse dicunt in ipso descensus initio prius quàm corpus ingrederetur. Alij verò postquam electione vti cœperint, eligendo mores interim dæ-

monem vitæ ducem latenter eligere. Sæpe etiam eundem dæmonem à pluribus eligi. Possè enim animas multas genio vno, id est vno ingenij duce dæmone vt. Qui antè eligere opinantur, ex illa potissimum turba dæmonum accipere volunt, quæ eidem accommodetur stellæ, cui & anima ab ipso mundi opifice fuerit assignata.

Tot enim esse dæmonum heroumque legiones, quot stellæ sunt numero. Atque ex tali quadam turba illum sortiri præceteris, qui cum illa electa vita maxime conuenit & figura coeli, quæ eo ipso electionis descensus momento componitur, maximamque his de causis in hominum ingeniis fortunisque differentiam prouenire: qui verò post ortum pro diuersitate morum diuersos animas adipisci genios aiunt, permutari quoque duces eiusmodi concedunt moribus permutatis, plusque consilio tribuere, quàm vel fato vel fortunæ videntur. Verùm vtcunque sit, perpetua indigemus custodia numinum. Quod quidem Plato cum in Symposio, Protagora, Politico, Critia dicat, sic probat in Legibus, videlicet quoniam inter falsa bona, & innumerabilia mala versamur, vnde perpetua fallacia & perturbatio nascitur. Ideoque tanquam oues mira diuinorum pastorum custodia semper egemus. Addit, cum nos proprium quidem vitium perdat, propria verò virtus velut exigua seruare non possit, ideo sola superorum virtute custodum (quorum virtutis imago quædam exigua sit nostra virtus) nos possè seruari, præsertim cum, sicut alibi dicit Hermia exponente, malefici dæmones assidue nos pro viribus ad inferiora detorqueant. Sed alij sunt custodes illi qui nos eligunt, alij dæmones quos nos eligimus.

*Qua parte corporis anima ingreditur, quæ egreditur, & quò duce progreditur.*

## C A P V T VII.

**A**Nima qua parte corporis ingreditur? qua egreditur? Anima quæ est medium rerum, iussu Dei (qui est mundi centrum) in punctum cordis medium (quod est centrum corporis) primum infunditur. Inde per vniuersa sui corporis membra se fundit, quâdo curram suum naturali iungit calori, & per calorem spiritui corporis. Per hunc spiritum immergit humoribus, mēbris inserit per humores. Denique per morbum solutis iis medijs statim cum suo illo

fu illo curru se (vita dixerim) colligit, refuitque in cor, vnde primum effluerat. Cordis extincto calore, quod proprium erat illius vehiculi susceptaculum, cor deserit, tandem suo illam vehiculo comitante. Sicut oculo clauso lumen Solis quod illi influxerat, effluit integrum, suo ipsum comitante calore. Atque ut probat Plotinus, non extinguitur, sed Solem suum perpetuò sequitur. Mitto in præsentia, quòd egredientes animas genij dæmonesque sui ad communem iudicem omnes ducunt, sed lata sententia priores abeunt dæmones, malasque violentus & malus dæmon trahit, bonas autem Deus tranquillè perducit. Hæc in Phædone.

*De statu animæ puræ, præcipuè secundum  
Platonicos.*

### C A P V T VIII.

**V**Binam est anima pura decedens corpore mortuo? Vbi est lumen Solis purum oculo clauso. At lumen in Solem reflectitur. In ætherem quoque reflectitur animæ currus æthereus, onere terreno deposito. Ad ætherem aspirat anima nata quondam in æthere, ut inquit Pythagoras, præcipuè si viuendi & cogitandi habitum æthereis mentibus similem mente conceperit. Ita enim animus habitu mouetur & agit, sicut natura formis. Quod quidem patet in his, postquam artis habitum contraxerunt, sine consilio & attentione (ut natura solet) quasi naturaliter operantur. Remanere verò in anima separata habitus tum morum tum disciplinarum tam bonos quàm malos, Plato in Phædone Gorgiaque asserit, & ratio illa probat, qua dicitur habitum ita in naturam conuerti, ut talis ab illo, qualis a natura proueniat inclinatio, quod maximè impletur in animis ab hac mutabilitate seiunctis.

Sed cur animæ quoque elementorum, earumque currus, ad cœlestem habitationem non annuntantur? Quoniam, ut Platoniorum potius quàm mea opinione respondeam, officium illis à Deo assignatum est, ut ibi sint semper. Animæ cedunt voluntati diuinæ. Currus quoque cedunt desiderio animarum. Animæ illæ ex hoc officio præstantius officium non amittunt. Currus orbicularem motum circa suas animas seruant non impeditum. Et sicut cœlis naturale est illic circa suas animas verti, ita hic his vehiculis circa suas. At anima nostra ritè functa hic munere sibi ad tempus immo, ætheris eam plagam sibi præ cæteris eligit, cui nascendo fuerat assi-

gnata. Ad illud confugit astrum atque nomen, ut Plato inquit, cui viuendo se similem reddidit. Sed hæc illi viderint. Proinde sicut in terris considerando à singulis ad communes naturalium species, à speciebus ad rationes diuinas tanquam naturalium causas procedebat, sic in cœlo vicissim à rationibus diuinis id est, ideis, ad species naturales perfectè, ab his ad singula quodammodo se conuertit. Ac quam diligenter hic inspiciebat singula, tam ibi eadem prospicit negligenter.

Rursus quam obscure diuina prospiciebat, tam perspicuè ibi perspicit eadem. Et quæ hic singulatim per instrumenta in externo videbat lumine, illic secundum speciem per se in lumine videt intrinseco. Profecto quantum olim conuertebatur ad sensum, tantum conuertitur tunc ad mentem, cuius oculo diuinum fulget lumen. Quod quidem etsi intrinsecum mentibus dici potest, tamen multo magis ab ipso Deo, quam infusus oculo radius à Sole pender semper atque seruetur, plenusque formarum adest, sicut colorum Solis lumen. Formasque ipsas, & cuncta per formas eatenus ostendit mentibus, quatenus in ipsum puræ ardentisque conuertuntur. Tot verò saltem iis omnino conuersis patefacit, quot rerum species facit in mundo. Non enim decet minus formare mentem, quam mundi materiam. Neque minus tribuere menti, quam naturaliter appetat, optat autem ordinem vniuersi comprehendere, quo & ipsa comprehensa est, quem diuturna iam admiratione quæsiuit. In quo & ipsa prouidentia cuiusdam sortitur officium. Singula verò & infima tantum in lumine prospicit, siue præterita illa fuerint, siue præsentia, siue futura, quantum ad illa vel prouidentia quadam vel affectu dirigitur. Sanè quemadmodum senes puerorum ludos, Philosophi studia plebeiorum, vigilantes somnia dormientium aut negligunt aut rident, nisi aliter nonnunquam necessitas postulauerit, ita & multo magis segregatæ mentes nostra hæc singula & contingentia negligunt, nisi quantum ab ipso omnium patre (cuius natura prouidentia ipsa est, cuius agere est prouidere, cuius officium est omnibus prouidere) prouidentia illis quædam fuerit demãdata. Tales Plotinus animas tum ex antiquorum sententia, tum ex propria ratione probat curare suos, & sæpè publicè vaticiniis cæterisque beneficiis generi humano prodesse. Sed cum harum prouidentia voluntati diuinæ consentiat, non perturbatione ex rebus nostris vlla tanguntur, sed facilè hæc & tranquillè gubernant. Sed ne



quis diffidat animam separatam ad tantam posse lumen attolli, propterea quod eam in corpore videamus tanta caligine circumfusam, comparare Platonici iubent intellectum quidem visui, intelligibile verò visibili. Visus nunquam lucem ipsam in ipso Sole plenissimam comprehendit. Illa enim huius semper excedit proportionem. Interdum etiam neque lumen in coloribus impeditus cataracta videt. Aliquando vapore quodam offusus vel rubro vel croceo, & obscure & aliter quam sit iudicat. Alias autem vel propter contractionem ad interiorum imaginationem, externa non videtur aspicere, vel propter distractionem simul ad obiecta inter se longè distantia, vix cernit alterutrum. Ac si paulo attentius ad alterum vergit, interim remissius vel nullo modo vergit ad alterum. Similiter intellectus humanus immensam ipsam diuini luminis plenitudinem in absoluta Dei natura exuberantem nunquam penitus comprehendit, quippè cum illa nimium capacitatem mentis exuperet. Præterea idem Dei lumen vel in rerum creaturarum ideis quasi determinatum, vel in Angelis iam contractum clarè perspicere quidem potest aliquando, videlicet cum fermè ita fuerit à corporis contagione semotus ut illa. Elementaliter verò, ut nunc coniunctus corpori, quasi cataracta quadam adeò eius ad illa proportio impeditur, ut ideales rationes angelicasque substantias longè admodum à materia segregatas omnino comprehendere nequeat. Proinde quoties pro viribus quasdam earum proprietates excogitat, toties, quia phantasie coniunctus est, nimirum phantasie simulachris, quasi vaporibus nebulisque eas adeò prospicit inuolutas, ut vel obscure admodum, vel aliter quam sint, videre cogatur. Postremò etiam si parumper quoad potest phantasie discutiat nubes, interea tamen quia & ad difficile regendi corporis ministerium est contractus, & ad sensibilibus imaginum occursum continuè impendentem, simul atque ad intelligibilium intuitum est distractus, idcirco supernos influxus vix quidem suspicit & quasi nec prospicit, atque (ut Platonici opinantur) tanquam per repentinam quandam coruscationem subito vanescentem. Quamobrem nemini mirum videri debet quod hic neque claritatem diuinorum percipiamus, neque suauitatem ipsam quæ illic gustatur ex illis, ipsi vnquam vel paulum degustemus. Nempe mens ob informem materiam & à mente & à diuinis alienissimam, non aliter quàm lingua propter punitam paralytica, diuinorum sapo-

rum veritatem voluptatemque gustare non potest. Sed tunc demum salutarem nectarei liquoris recipiet gustum, cum Lethæi fluminis lethales humores penitus expurgauerit, atque insuper diuinum fontem non naturali tantum siti, quæ ex seipsa molesta est, appetierit, sed etiam quodam moralis piæque sitis habitu ipsum præ cæteris, imò solum elegerit appetendum. Quo autem gustu saporibus his vescatur, alibi disputauimus. Huc tendit Platonicum illud in Phædro, animas quæ ex Lethæa emerferint aqua, altius exolare, ibique primò cœlestem vnà cum diis cœlestibus, deinde supercœlestem cum supercœlestibus circuitum agere, eo scilicet ordine, ut aliæ cum aliis ibi numinibus circumuagentur, circuitusque huiusmodi alternis vicibus repetant. Hoc autem nihil aliud sibi vult, quàm solutas ab elementalibus corporibus animas in cœlestibus in vehiculis in figuram propriam, circularem scilicet restitutis, cœlestem colere regionem, atque alias vnà cum stellis, cœlicolisque aliis, quibus vel natura vel habitu magis familiares sunt, tam in certa quadam mundi gubernatione congruere, tum per rerum species similiter ratione discurrere. Rursus cum diis supercœlestibus, id est, Angelis in ipso idearum intuitu & quasi quodam circuitu subito consentire, & vnà cum vtrisque feliciter vtrunque peragere. Addit eisdem vnà cum superis illic alimentis scilicet Ambrosia & nectare vesci. Ambrosiam quidem esse censet perspicuum suauemque veritatis intuitum, nectar verò excellentem facillimamque prouidentiam. Hic panditur & vetus illud arcanum à Platone in libro de regno præ cæteris celebratum, præsentem mundi circuitum ab Oriente ad Occidentem esse Iouium atque fatalem, verum fore quandoque alterum huic oppositum sub Saturno ab Occidente vicissim ad Orientem, in quo sponte nascuntur homines, atque à senio procedent in iuuentutem, alimenta que illis vltro æterno sub verè ad votum suppeditabuntur. Iouem (ut arbitror) animam mundi vocant, cuius lege sarali manifestus hic manifesti mundi ordo disponitur. Præterea vitam animorum in corporibus elementalibus Iouiam esse vult, sensibus actionique deditam. Saturnum verò supremum inter Angelos intellectum, cuius radiis illustrentur vltra Angelos anime, accendanturque, & ad intellectualem vitam continuè pro viribus erigantur. Quæ quoties ad vitam eiusmodi conuertuntur, catenus sub regno Saturnio dicuntur vivere, quatenus intelligentia viuunt.

Proinde in ea vitæ ideo sponte dicuntur regenerari, quia electione propria in melius reformantur. Rursus, in dies reiuuenscere, id est, in dies, si modò ibi dies dinumerantur, magis magisque florescere. Hinc illud Apostoli Pauli. Homo interior renouatur in dies. Denique illis alimenta sponte affatim sub perpetuo vere suppeditari, quia non per sensus, operosamque disciplinam, sed lumen intimum summaque cum vitæ tranquillitate atque voluptate miris veritatis ipsius spectaculis perfruiuntur. Eiusmodi vitæ odor quidem mente pro viribus separata sentitur, sapor verò mente penitus separata gustatur. Addit his in Symposio, purgatas animas quæ diuinam præ cæteris pulchritudinem amauerunt, tandem in ipsum diuinæ pulchritudinis pelagus sese prorsus immergere, diuinumque ibi liquores non tantum bibere, sed etiam in alios iam ex seipsis effundere. Summum verò beatitudinis, concludit in Epinomide, ubi ait, animum purgatissimum omni tum mutabilitate firmata, tum multiplicitate collecta, sese in propriam vnitatem intellectu superiorem omnino conferre, perque hanc in vnitatem diuinam intelligibili mundo superiorem iam transferre, Deoque potius viuere, quàm seipso, cui certè mira quadam super intelligentiam ratione sit coniunctus. Hunc verò nondum effici Plato vult diuina quadam luce, quæ quidem non aliter in mente resulgeat, quam si amore Dei prorsus accensa transformetur in Deum. Quo fit ut diuinum amorem in Phædro omnibus diuini furoris gradibus animisque bonis longissimè præposuerit.

Hic verò potissimum Platonica latent mysteria, paucis quæ subdam, à nobis breuiter comprehensa. Nempe, segregatæ mentes cum primum in se conuertuntur per radium naturalem sibi que proprium, tanquam animalia quæ nocte vident, pauca quadam, & illa quidem quasi sub nube vident, quatenus scilicet earum natura ea subterminata specie rerumque formulis quasi informibus repræsentat. Deinde verò radium proprium in lumen commune cunctis mentium sublimium speciebus sese conuertentes, iam per ipsum quasi per diurnum lumen perspicuè cuncta ab ipso luminis huius auctore creata conspiciunt. Lucem verò ipsam luminis huius originem, quam naturaliter appetunt, ideoque nec frustra desiderant, assequi suspiciendo non possunt, quoniam & per externum à Deo lumen, quatenus externum est, lucem Deo intimam

omnino penetrare, & amplissimum Dei angustissimo suo cōprehendere nequeunt. Siquidem lumen ipsum, quamuis in Leō amplum, tamen in mentibus euadit angustum. Verum lucem, licet obscurè perspectam, tamen ardentè amando, ipsius interim calore penitus accenduntur, atque accensæ, quod amoris est proprium, transformantur in lucem. Qua denique roboratæ, ob amorem iam consequuntur, quod per aspectum vix emimus sequi potuerant, ut lux iam ipsa amore facillimè fiant, quam prosequi oculis ante moliebantur. Tanta vis est amoris, tanta facilitas, tanta felicitas, imò verò (ut rectius loquar) tanta vis est lucis amatæ. Mens enim amando lucem non tam sese accendit & transfert, quàm à luce blandè alliciente, vehementer percutiente penitus penetrante & accenditur, & transfertur, & lucet. Cum verò tota perceptionis fruitionisque efficacia quæ in sensibus est externis, sit & multo magis in phantasia, rursusque longè potentior sit in mente, expedita præsertim, ac præterea sensibilium rerum oblectamentorumque rationes exactissimæ sint in Deo, sequitur ut mens dum expedita ponitur Deo, summa quæque & sincerissima omnium oblectamenta sensuum suo quodam miroque modo plenissimè sentiat, neque solum imaginaria circa Deum delectatione quasi videndo, audiendoque & odorando (hæc enim implere non potest) sed etiam substantiali quadam gustui tactuique per simili voluptate permulceatur. Gustum verò tactumve, inquam, non contigui cuiusdam, ut fit in sensibus, sed penetrantis penitus, atque penetrati, penetrati, inquam, à toto immensoque bono, totum secum immensumque gaudium inferente.

*Nouem gradus in patria.*

Proinde nouem beatorum gradus, non solum apud Christianos, sed etiam apud Platonicos, tum in Angelis, tum in animis disponuntur, ob eam, ut arbitror, rationem, quod nouem præcipuè modis diuina illic perficit contemplatio. Sanè, quemadmodum nos ex rerum potentia, ordine, commoditate, potentiam, sapientiam; bonitatem Dei qua possumus sagacitate venamur, sic illi vicissim ex diuina bonitate, potètia, sapientia, tanquam ex finali efficiente exemplari causa vniuersi, hæc tria similiter in rebus agnoscunt, ea videlicet ratione, ut ali, diuinam bonitatem potissimum in seipsa considerent, alij

ad res ipsas præcipuè referant, alij præcipuè res ad ipsam, velut ad finem, singuli tamen cuncta contueantur. Sic ergo triplex diuinæ bonitatis impletur intuitus, per quem tres primi beatorum ordines distinguuntur. Tribus quoque modis similiter potentia, totidemque sapientia cogitatur. Hinc sex insuper ordines beatorum connumerantur. His nouem feliciū gradibus apud Platonicos octo cœlorum plagæ, ac noua super cœlum excogitata regio congruè accommodari videntur. Apud Orphicos autem octo cœli, atque sub Luna æthereus ignis. Apud Christianos circuli sub empyreo nouem. Quilibet enim ad illam potissimum regionem habitu quodam simili quasi naturali leuitate feruntur, cuius habitatoribus Angelis sese in vita præcipuè similes reddiderunt. Similiter quoque Christiani reprobos animos in nouem reproborum dæmonum gradus quibus se videndo fecere similes, ipsa similitudine quasi pondere naturali putant præcipitari. Sed de his aliàs. Quod verò nouem sint in beatitudine gradus, hæc quoque, vt arbitror, ratio comprobatur. Nempe diuinam potetiam timemus, sapientiam quærimus, diligimus bonitatem. Solus quidem bonitatis amor animam transformatur in Deum. Idcirco amor absque inquisitione atque timore animam patriæ reddit, contra verò nequaquam. Sed iam gradus ipsos quibus in cœlum ascenditur, ordine disponamus. In primo sint qui bonitatem amant, deinde potentiam timent, postremò sapientiam quærent. In secundo, qui in primis diligunt bonitatem, circa verò reliqua duo separiter habent. In tertio, qui similiter erga bonum in primis afficiuntur, deinde sapientiam perscrutantur, postremò timent potentiam. In quarto, qui circa tria æquè se habent. In quinto, qui bonum primò amant, deinde potentiam extimescunt. In sexto, qui similiter bonum diligunt, sequenti verò gradu appetunt sapientiam. In septimo, qui absolutè bonum & simpliciter amant. In octauo, quos potentia primum, secundo bonitas, tertia sapientia mouet. In nono, apud quos sapientia primo, secundo bonitas, tertio potentia potest. Mysterium eiusmodi in Euangelio ibi significatum arbitror, vbi diuinum oraculum sectatores suos nouies beatos appellat, propterea quod nouem gradibus meritum, duce Deo, cœli nouem ad nouem contemplationis ordines beatè petuntur. Sed ecce iam beata Euangelij sancti commemoratio nos admonere videtur, vt Philosophicis dimissis ambagibus, breuiori tramite beatitudinem ea quæ-

ramus via, qua Christiani ducunt Theologi, ac Thomas Aquinas in primis, Christianæ splendor Theologiæ.

*De flatu animæ puræ, præcipuè secundum Christianos Theologos.*

**C**Reata mens quælibet respiciendo vel in suam essentiam, quæ ibi differt ab esse, & in certa specie est à Deo infinite distante, vel in lumen sibi met proprium, vel in quoduis lumen in ea determinatum, substantiam diuinam intelligere nequit, quæ cum infinita sit, certè quid ipsa sit, per finitum aliquid repræsentari non potest. Solum verò per ea quæ diximus, mentes & Deum esse cognoscunt, & quid non sit potius quàm quid sit, & qua ratione vel ipse ad alia, vel alia referantur ad ipsum. Id Plato in Parmenide probat. Idem Dionysius Areopagita in mystica Theologia comprobatur, concludens mentes in summo naturalis cognitionis gradu coniungi Deo velut ignoto, quasi oculum sub Solis lumine caligantem. In eiusmodi verò cognitione naturale desiderium non impletur. Quicquid enim in specie quadam est imperfectum, speciei ipsius optat perfectionem. Talis autem cognitio in ipsa cognitionis specie imperfecta censetur. Solemus enim in nullo cognitionis modo quiescere prius quàm quid sit res ipsa secundum substantiam cognouerimus. Præterea rationis naturalis est continua per rationes discursio, quousque ad summam perueniat rationem, quæ quoniam infinita sit, ideo sola rationis discursum ex se absque fine frustra peruagaturum sistere possit. Siquidem ultra finitum quodlibet mens semper aliquid vterius machinatur. Quod quidem in numeris & lineis & figuris proportionibusque apparet. Quo fit, vt in sola Dei substantia, quæ sola infinita est, conquiescere valeat. Idque inde prouenire censendum, quod naturalis tum intelligentiæ perspicacia, tum voluntatis ardor, radius quidam est ab ipsa diuina luce proximè per ipsius lumen infusus, in eandemque resilit naturaliter, neque moueri cessat prius quàm in suum se Solem denique restituerit.

Proinde quo quid naturali est fini propinquius, eo vehementius adueniat ad finem. Quod in elementorum motibus est manifestum. Segregatæ verò mentes per naturalem cognitionem propinquiores Deo euadunt quàm coniunctæ. Igitur cum nostræ naturalis cognitionis suæ terminis contentæ non sint, certè multo minus illæ.

Quoniam verò naturalis speciei cuiuslibet appetitus ab vniuersali natura directus omnino inanis esse non debet, oportet mentes posse diuinam videre substantiam, sine qua nihil perfectè vident. At cum videre illam in specie aliqua creata non possint, opus tamen sit forma per quam videant, forma, inquam, diuinæ substantiæ propria, quia illam non imaginariè sed propriè cernant, necesse est eas diuinæ substantiæ adeò copulari, vt ipsam iam inspiciant per seipsam. Simile quiddam apparet in visu, qui colores quidem per ipsorum imagines sub lumine cernit, lumen verò per aliud præcipuè quam per lumen videre non potest. Sed ne quis absurdum putet Deum intellectui coniungere, velut formam, meminisse oportet perfectionem mentis consistere circa verum. Verum autem & ens & intelligibile, idem. Quicquid aut in hoc ipso genere ex essentia atque esse componitur, tanquam ens verumque potius quam tanquam esse veritas se habet, neque potest aliorum in eodem genere esse forma, cum iam forma in se sua ad suam quasi materiam sit contracta. Itaque nulla creata mens mentium reliquarum forma fieri potest, imò solus Deus ad genus mentium vbique se habet vt forma, qui solus est ipsum esse, & simplicissima veritas, vt forma, inquam, non tanquam pars compositi, sed operandi principium, quo mens potius vt Deus iam, quam vt mens, operetur, sicut ignitum aurum vt ignis agit potius quam vt aurum, quale Apocalypsis Ioannis iubet emendum.

*Quo pacto mens Deo coniungitur.*

**A**D hoc autem vt mens diuinam induat substantiam quasi formam, non propria virtute ducitur, sed diuina trahitur actione. Siquidem natura inferior proprietatem formamque superioris ipsius actionis consequi nequit. Quod in elementis est manifestum, in quibus aer non aliter quam agente igne ignis euadit. Præterea nihil potest ad excellentiorem actionem aliquando perducere, nisi prius in eo virtus corroboretur. Quod si ad consuetam actionis speciem, sed tamen aliquanto vehementiorem est perducendum, satis vtique erit, si modo solita virtus augeatur, vt pote si aer qui naturaliter vno calefacit gradu, duobus aliquando sit gradibus calefacturus, sufficiet naturalis sui caloris aliquantum intendere qualitatem. Verum tamen si aer actionem specie genereque superiorem sit sibi vendicamus, videlicet si illuminaturus fuerit, quod corporis est ætherei proprium, no-

nam ab ipso æthere formam iam fortitur oportet. Quorsum hæc? Vt intelligamus mentem non posse ad diuinam substantiam per ipsammet perspiciendam attolli per solum naturalis virtutis & luminis augmentum, cum eiusmodi operatio ab ipsa naturali mentis operatione plus quam genere differat, sed opus esse noua quadam virtute, nouoque lumine ab altiori principio descendente. Quod quidem & gratiæ & gloriæ lumen appellant, quo illuminata mens, & multo magis accensa, diuinam iam substantiam, cuius calore iam feruet, induitur velut flammam, flammam, inquam, non qualem in crinita stella siccus vapor à terra sublatus subit propè ignis spheram, quamuis id admodum simile videatur. imò flammam supercœlestem, lucentem salubriter, non vrentem. Negabit forte aliquis mentem per quoduis lumen ad perspicendum Deum posse perducere, quia si nulla est visus ipsius ad sonum proportio, nimirum neque mentis, neque luminis à mente suscepti, ideoque finiti, vlla ad immensum Deum proportio, est. Nos autem respondemus Deum quamuis facultatem intellectus excedat, non tamen sic alienum esse ab intellectu, sicut sonus est alienus à visu, vel insensibile quiddam à sensu cum Deus sit, vt Christianis placet Theologis, intelligibile primum, totiusque intellectualis virtutis & actionis principium, mediumque & finis. Est igitur quædam inter intellectum Deumque proportio, non quia sit vlla commensuratio, sed habitudo quædam potius quasi materiæ intellectualis ad intelligibilem formam, & effectus ad causam. Præterea lumen illud infusum & si terminatum euadit in mente, ea tamen virtute præditum à Deo infunditur, qua eam diuinæ substantiæ copulet, non naturali quidem, sed intellectuali potius copula. Id verò efficere nequit radius naturalis, quia iam ab initio totus in suscipientis transiit naturam per se prius informem, vnde & ipse caliginosus euasit & debilis. Neque mens cum longè à diuina simplicitate degeneret, totam potest suam per idem fortiri perfectionem, ideoque aliud in ea radius est naturalis, per quem quatenus suæ conuenit speciei, non nihil intelligit, aliud verò lumen infusum diuinitus, quo subleuante ad gradum super se ultra quam cogitari possit eminentissimum mirabiliter eleuatur. Denique infinitas ipsa Dei haud priuationem formæ significat, qualis infinitas materiæ conuenit, (cumque sit inefficax & informis, merito cognitioni inepta censetur) sed absolutam significat excellentiam nullo prorsus subiecto

contractam. Hæc autem cœu Sol natura sua id habet, vt mirum in modum lucendo atque illuminando maximè omnium mouere intellectualem visum possit, atque videri, & qua virtute excedit mentem, eadem possit eandem supra vires proprias eleuare. Neque tamen putandum est mentem essentia diuina formatam, quamuis quid ipsa sit intelligat, ipsam tamen penitus comprehendere. Nam & virtus ipsius terminata est, & lumen in ea determinatum, & diuinam cum subit essentiam, non per omnem diuinitatis virtutem inde formatur. Quid ergo? Nunquid partem diuinæ substantiæ cernit quidem, partem verò non cernit? Non ita sanè dicendum, si quidem Deus diuidi nequit. Imò verò putandum est eam aspicere Deum, haud tamen penitus comprehendere, id est, sub rationibus, & tanta certitudine, tantaque perfectione perspicere Deum, sub quot, & quanta sibi met perspectus est Deus. Accedit ad hæc, quòd non cuncta quæ Deus & videt & potest, videndo Deum potest ipsa videre. Videt autem potestque Deus infinita præter illa quæ in natura consistunt, quod probauimus alias. Si enim Dei substantiam non comprehendit, certè neque intelligentiam eius atque virtutem. Neque igitur cuncta quæ & intelligit Deus & potest. Alioquin cum virtus per ea quæ potest soleat æstimari, sic quæcunque videt potestque, penitus comprehenderet, comprehenderet pariter viuendi faciendique virtutem atque substantiam. Quid plura? Quo altior intellectus, eo & plura vel numero vel ratione intelligere debet. Ex quo consentaneum est, diuinam mentem seipsam vndique conuentem, tum plura, tum pluribus rationibus videre, quàm videat quilibet intellectus.

*Omnes mentium species possunt coniungi Deo.*

**N**emo verò diffidere debet mentes humanas propterea quòd in seipso mentium genere infimæ sint, ad ipsam diuinæ substantiæ contemplationem posse perducì. Quandoquidem neque ipsæ Angelicæ mentes illuc virtute quadam perueniunt naturali, sed diuina potius, & (vt ita dicam) supernaturali trahuntur. Opus autem quod supernaturali virtute peragitur, propter naturarum diuersitatem, impediri non potest, quippè cum immensæ potentie Dei nihil alicubi relictetur. Tam facile diuina potestas totam mouet machinam, quam facile minimam mundi partem. Tam facile curat ægotantem grauiter, quàm facile leuiter ægotantem. Quamobrem qua

facultate infusa diuinitus mentes altissimæ, eadem & infimæ ad sublimia rapiuntur. Præterea suprema mentium creaturarum immenso quodam à Deo spacio distat, infima verò ab hac, cum vtraque finita sit, finito discrepat intervallo. Intervalli verò huius ad illud nulla esse proportio iudicatur. Quod si finitum additum infinito nullam (vt apparet) affert varietatem, quidam prohibet ipsam Dei virtutem, quæ spacium ad Angelum vsque subito percurrit immensum, mox inde pusillum inter Angelum animamque complecti, vt simul tam anima quàm Angelus rapiatur. Denique si mentium generi, qua ratione mentes sunt, naturalis est instinctus ad summum intelligibile peruidendum, quod in omni intelligibili quærendo quærunt, & appetunt appetendo, sequitur vt tam naturalis sit instinctus eiusmodi mentibus infimis quàm supremis, atque tam hæc quandoque quàm illæ terminum consequi possint naturaliter exoptatum. Id autem nobis appetitio ipsa naturalis ostendit, quæ cum trahat ad infinitum, non potest aliunde quàm ab ipsomet infinito inseri ac moueri, atque denique terminari. Quòd si quæ à natura mouentur inferiora, non frustra mouentur, multo minus quæ à suprema ducuntur. Huius quidem radius per omnes sese ordines mentium transferens, singulas & illustrat vt videantur, & accendit vt ament. Cum verò ignis atque Sol lumen latius propagare soleant quàm calorem, consentaneum est, quousque diuini Solis radius calefaciendo protenditur, eousque multo magis posse illuminando protendi. Ergo mentes humanæ sicut inde accensæ diuinum quotidie appetunt bonum, ita & illi diuinum quandoque verum illuminatæ conspiciunt, atque conspiciendo vero bono feliciter perfruuntur.

*Diuerſi in patria gradus, & quòd omnes omnia creata vident.*

**P**ossunt autem aliæ mentes aliis clarius pleniusque diuinam substantiam contueri, quatenus lumen ipsum quoad id quasi materiæ perspicuè præparantur, sub diuersis perfectionis gradibus inde suscipiunt, siue pro naturæ, siue pro dispositionis acquiræ diuersitatē aliter atque aliter præparentur. Maxima verò nostris mentibus varietas ex diuersis amoris gradibus proficiscitur. Quibus quidem gradibus diuersi & visionis & multo magis gaudij gradus non iniuria congruunt. Fortè verò licet singulæ cuncta creata videant, vt probabi-



mus, alię tamen plura quàm alię ex his quę non creantur attingunt, & quę vident, pluribus rationibus assequuntur, omnes tamen vera ratione perspiciunt. Et cum gaudium velut terminus amoris respondeat, quę amauerunt ardentius, hæc coniunctius (ut solet amor) hærentes interius transferuntur in bonum, sic ipso amoris habitu conferente, suauiusque fruuntur. Proinde si mentium finis est ad diuinam substantiam peruenire, necessariò illic tanquam in fine omnem mentium desiderium prorsus impletur. Non impleretur autem, nisi ordinem illic vniuersi creatum vndique comprehenderent. Si quidem eiusmodi est consuetum studium intellectus, ut particularia in vniuersalia ad communissimum usque resoluat, atque ipsum ens sub absoluta ratione describat, perque omnes eius gradus distinctissimè diuidat, quasi ad id præcipuè natus sit, ut vniuersi forma quandoque formetur. Quidnam prohibet intellectum dum fontem, conspiciat vniuersi, vniuersum effluens inde perspicere? Præsertim cum non sicuti sensus ex summo sensibili ad sentienda minora impeditur ad tempus, sic intellectus ex intelligibili summo impediatur ad reliqua, sed potius mirificè roboretur. Præterea intelligibile genus amplius est genere naturali. Multa enim ultra illa quæ natura facit, intelligi possunt. Igitur quæcunque ad esse naturale complendum necessariò requiruntur, insuper & multa plura ad complendum intelligibile exiguntur. At verò esse intelligibile tunc demum absolutum est, cum intellectus summum attigerit finem, quemadmodum ipsa naturalis esse perfectio in ipsa rerum cunctarum constitutione consistit.

Quamobrem Deus quæcunque ad perfectionem vniuersi produxit, in intellectu sibi iuncto producit. Rursus, quamuis alius perfectius alio Deum videat, singuli tamen ita vident, ut capacitas naturalis impleatur ad votum. Hæc autem in qualibet mente ad omnia vniuersi genera speciesque extenditur, adde insuper & ad singula passim subdita speciebus. Nec enim insuper exoptamus. Itaque mentes in Deo etiam singula distinctè discernunt.

Profectò, cum virtus superior possit quicquid inferior, atque etiam eminentius, animæ verò coniunctæ corporibus & vniuersalia cognoscant singula, consentaneum est mentes ipsi veritati coniunctas, vna virtute vnoque inniti vtraque comprehendere, præsertim cum & ipsæ rerum species amplissimæ sint in illis, & illæ

virtutem ibi efficacissimam consequantur, per quam genera speciesque ad singula usque deriuent. Sanè opposita quodam ordine rerum species ad intellectum perueniunt atque separatim. Hic enim resolutione quadam in singulis materiæ conditionibus separando, ibi verò ex coniunctione quadam mentis cum forma diuina omnium effectrice, & iudice etiam singulorum. Quæ quidem forma non à singulis abstracta est, sed singulorum ubique creatrix: non formæ tantum, sed & materiæ in qua singularitatis rerum consistit origo. Quamobrem formæ in mentem inde fluentes, ultra communia etiam singula coniunctis mentibus repræsentant. Quod quidem hinc etiam confirmatur, quòd si mentes angelicæ cœlestia corpora per intellectum mouent, necesse est eas hoc ipsum quod mouent, situsque qui motu mutantur, non ignorare. Nostræ verò mentes ad angelicam, præsertim quantum ad motum spectat, notitiam perducere possunt, præcipuè si quod illic gubernationis officium consequantur.

*Status anima apud Deum immobilis.*

Cum mentes illic vnica Dei forma rerum creaturarum videant formas, consentaneum est ut omnes vna videant visione: quæ quidem si perfectissima est, statim possidetur, potiusquàm successione quærat. Probabile enim est mentes quietis, potiusquàm motionis auidas, ubi finem consequutæ fuerint, firmiter conquiescere, præsertim quia si omnes vniuersi species ibi cognoscunt, sub quibusdam verò generibus species procedunt innumeræ, ceu sub numero figuraque & proportionem consequens esse videtur, ut species quodammodo videant infinitas. At verò cum infinita pertransire non liceat, non prætereundo dinumerant, sed manendo conspiciunt. Rursus, si perpetua intelligentia ipsius intelligentis vita quædam est, atque ibi intelligentia ob stabilitatem suam particeps euadit æternitatis: sequitur ut beata mens in æternam vitam iure translata dicatur. Meritò quidem. Nempè mens humana inter æterna & temporalia media collocatur. Sicut igitur operatio eius qua iungitur temporaneis, temporanea euadere consuevit: sic & illa qua æternis æterna.

Denique, quoniam pacto visio ipsa illic mobilis sit, non video, ubi & videndi virtus tempus tum ab initio, tum vel maximè iam supereminet, & obiectum quod

videtur, ac forma qua videtur, status ipse est, ipsaque æternitas. Hinc sequitur animas Deo semel hærentes, inde discessuras esse nunquam, si modò motum iam transcenderunt, atque naturale desiderium impleuerunt. Quod quidem cum & in substantia stabili sit fundatum, & ad stabile obiectum naturaliter dirigatur, nimirum non aliam quàm stabilem denique possessionem appetit tanquam finem. Quid mirum si sempiterna mens, quod non propter aliud, sed propter se desiderat, desiderat ut semper habendum? Præterea ubi naturalia sub se nulla ignorat, certè qualis sua illa possessio sit, non nescit. Quocirca si defutura est, defuturam prævidet, ac viuit infelix, cum possessione tam chara aliquando, imò breui se existimet carituram. Adde quòd quicquid naturaliter cuidam adhæret fini, non aliter quàm vi quadam illata inde diuellitur. Cum igitur Deo mens tanquam fini coniungatur naturaliter præ ceteris exoptato, coniunctionisque huiusmodi efficiens causa ipsa sit Deus, nullaue vis maior ex aduerso queat accedere, quæ violenter quandoque sciungat quod Deus sponte coniunxit, proculdubio mens à nullo vnquam inde recedere compelletur. Quo autem pacto vel à certa veritate per fallaciam, vel à puro totoque bono per voluntatem sese auertat, cogitari non potest. Perfecto neque mentis substantia permutatur, neque intelligendi perspicacia sub lumine deficit continuè confirmante: neque lumen subtrahitur vnquam quod ab æternitate infunditur in æternum: neque voluntas vel ob alterius stimulum à totius possessione recedit, vel ob tedium satietatemue ab eo vnquam obiecto se segregat, quod cum penitus comprehendi non possit, nimirum & semper occurrit ut nouum, & cum admiratione summa, ideoque cum desiderio continuè possidetur. Denique si quanto quid summo Dei statui propinquius est, tanto sit immobilius, mentes substantia iam diuina formatas, necesse est immobiles prorsus euadere.

*Singuli in Deo contenti.*

**H**ic verò singuli quæcunque appetunt consequuntur. Philosophi veritatis admodum studiosi, hic in ipsa veritate veritatum procreatrice, vera cuncta perspiciunt. Hic viri ciuiles gubernationi ac potentie dediti, cum omnipotente gubernatore mundi potentissimi gubernatores euadunt. Hic victoriæ gloriæque cupidi, omnia iam aduersa vicerunt. Nouerunt

omnes, beatis noti sunt omnibus. Hic voluptatum sectatores, si modò peruenierint, in ipsa voluptatum causa, tota voluptate fruuntur. Nempe quemadmodum corpora umbræ sunt diuinorum, ita & sensus oblectamenta diuini umbræ sunt gaudij. Nam mens efficacior admodum est quàm sensus, ac verum totumque bonum falso quodam bono & potentius supra quàm cogitari queat & suauius est. Præterea, intellectus obiectum suum vndique penetrare solet, cum & intrinseca ab extrinsecis, & propria secernat ab alienis, quod nunquam efficit sensus. Item, intelligibile ob mirabilem puritatem atque virtutem intellectus, ipsius penetralibus prorsus illabitur, quod quidem sensibile sensui non potest efficere. Quamobrem puri intellectus voluptas circa intelligibile summum, non modo continua puraque est, qualis non est in sensibus, verumetiam inima & integra, simulque tota comprehenditur, multoque magis sensus superat voluptatem, quàm saporum suauitas illecebras inanes odorum. Solemus cum in habitum proprium restituimur, quocunque id modo fiat, voluptate perfundi. Nulla verò cogitari potest restitutio maior, quàm ubi animus qui ab idea, imò à seipso degenerauerat, in ideam suam, imò seipsum vndique restituitur. Ibi rursus ipsa gaudij gaudet idea, vnoque in bono bonis fruitur vniuersis. Et cum nos ea delectent quæ cupimus, cupimus autem omnia, quia bona, ibi summa voluptate perfundimur, ubi cum sit omne bonum, perfectè quicquid appeti potest consequimur. Variæ verò mentes omni quidem bono secundum essentiam boni præcipuè, boni autem gradibus secundum varias propriè fruuntur ideas, quatenus varios in primis totius boni gradus amantes, variis quoque callibus ad bonum ipsum proficiscuntur.

Denique, ut summatim dicam, vnum est omnino quo beati fruuntur omnes, etsi aliis aliis præcipuè modis rationibusque fruuntur, prout variè vel ex affectu vel ex obiecto aliterque; alliciēte, trahit sua quemque voluptas. Sic ergo, ut Plato inquit, liuor omnis abest à choro diuino. Communis enim in eo choro charitas efficit, ut singuli singulorum felicitati tanquam suæ congratulentur. Præterea ubi quisque & quod amauit, & ea qua potissimum eligit ratione, & quousque desiderat, ad votum iam consequitur, ibi quilibet absque inuidia & procul à stimulo contentus omnino plenusque viuit. Illic enim tam naturalis quam acquisita capacitas prorsus impletur, neque ca-

pacitas ab illo maior desideratur. Sua enim cuique naturaliter charissima sunt. Accedit, quod nihil gratius est beatis diuino prorsus amore flagrantibus, quam id ipsum velle, quod Deum velle cognoscunt, atque ea tum mensura qua capiunt, tum ratione qua capiunt, tum modo quo Deus ipse se exhibet potiundum, Deo amato potiri. Quod verò bonum ibi suum omnino comprehendere non posse cognoscunt, & hoc ipso mirifice delectantur, suum videlicet thesaurum eligentes infinitum esse potius quam finitum.

*De corporibus beatorum.*

## C A P V T IX.

**A** Nimæ puræ duplex felicitas conuenit, altera ex seipsa de qua tractauimus, ex corpore altera, quæ apud Platonicos est eiusmodi. Præstat enim exemplo quodam hanc cogitare. Oculus quidem tuus rotundus est, perspicuus, splendidus, motu celerrimus, mirabilis perspicacia oculum meum videt, seque ipsumque cernit in meo. Affectus animi tui singulos in seipso figurat, ac traducit in meum, meosque affectus per meum mutuo recipit. Tales sunt illi animorum currus & in seipsis, & inuicem. Quisque enim illorum est totus oculus, atque in omnibus ferme ita se habet, ut oculos ipsos se habere videmus. Igitur quasi oculi quidam rotundi sunt, perspicui, splendidi, motu celerrimi, cuncta undique facillime circumspectant. Animorum suorum affectus cogitationesque præ se ferunt, cæterisque animis quodam quasi nutu facillime indicant. Accipiunt quoque ab illis similiter alienorum affectuum cogitationumque indicia. Neque solum undique procul & acutissime vident, sed etiam audiunt. Similiter quoque stellæ omnes & demones, vocesque faciles facile formant, & sicut absque passione vlla sunt ibi sensus, sic & voces, alterius certe speciei generisque quam nostræ. Hæc Plotinus & Hermias. Platonice eiusmodi sententiam confirmat in Metaphysicis Auicenna, probans animam à contagione corporis separatam in cælo cælesti quodam instrumento uti quasi suo à corpore cæli accepto, perque ipsum imaginationis officium exercere. Vult enim intellectualem animam (ex Platonis sententia) vniuersæ mole corporum naturali dignitate imperioque præesse. Denique currus illi exuberante suarum mentium splendore repleti mirifice fulgent, eisque tanquam radius quibusdam tonum cæ-

lum est peruium. Atque ut multis Platoniorum placet, potissimum in orbe lacteo non aliter quam stellæ coruscant. Hinc antiqui Poetæ dicebant, quando felices animæ ad superos reuolabant, stellæ in cælo novas lucere. Sed hæc illi viderint. Accedit ad hæc, quod Zoroastri & Pythagoræ Platonisque sectatores Plotinus Proculusque præcipue disputant, iisdem quandoque omnino redeuntibus causis, eisdem numero prorsus homines redituros. Et Plato in libro de regno scribit, post præsentem fatalemque mundi cursum, hominum animas imperante Deo, atque succitante, corpora sua quæ in hoc cursu amiserunt, ideo recepturas, ut quemadmodum sub fato quondam corpora humana in terram deciderant, ita sub prouidentia diuinæ imperio ex terra resurgant, atque reuiuiscant. Hæc priscomum mysteria Philosophorum haud multum discrepant ab Hebræorum Christianorumque mysteriis, quæ etiam à Mahumetensibus confirmantur. Communis enim tribus his legibus sententia est, motum ipsum ideo finem reuera esse non posse, quoniam semper ab alio fuit in aliud. Hoc ipsum verò scilicet in aliud tendere, ab ipsa ratione finis præsertim ultimi alienissimum est.

Itaque, summum vltimumque vniuersi finem, quem mundus quandoque consequi debet cum & singula mundo minora quandoque finem proprium consequantur, motum non fore, sed statum. Statum enim motu perfectiorem esse, quietisque gratia moueri singula. Præterea mundi corpus in eo statu, utpote consummatissimo, fore pulcherrimum. Expleto tandem cæli cursu, quo gignuntur omnia, nihil ulterius generari, sed singula hominum corpora, quorum gratia prius generabantur omnia, è terra iubente Deo resurrectionem primum autoritate diuina confirmant. Sic enim Deum sæpè per Prophetas & Apostolos prædixisse, multosque variis sæculis mortuos suscitasse. Præterea sanctos homines etiam vita functos fecisse miracula, atque quotidie facere. Mitto reliqua, innumerabilia enim sunt. Certè nostra ætate, anno M. CCCC. lxxvij. Decembri atque Ianuario reliquæ quædam Petri Apostoli in vrbe Volaterrana repertæ, miracula duodecim ostenderunt, & ingentia illa quidem, & omni populo manifesta. Hæc & similia potissima sunt resurrectionis indicia, adeo ut Auicenna in Metaphysicis asserat, autoritati diuinæ resurrectionem asseueranti esse credendum. Etsi Auicenna nullam tantæ rei rationem afferre tentat, Christiani ta-

men Theologirationibus eiusmodi persuadent.

Prima ratio, quoniam ex anima & corpore humano fit vnum quiddam naturale compositum, naturalique instinctu anima ad corpus afficitur. Ideo patet animam non ex ipso solum vniuersi ordine, verum etiam secundum suæ naturæ ordinem corpori copulari, quo efficiatur, vt contra ordinem tam vniuersæ quam propriæ naturæ sit animam seorsum à corpore permanere. Permanent autem post corporis interitum sempiternæ. Cumque id quod est contra naturam, sempiternum esse non possit, consequens est animas quandoque sua corpora recepturas.

Ratio secunda. Singulæ animæ ad corpora singula viuificanda regendaque naturaliter inclinantur. Sic enim fert & natura & prouidentia vitæ inter æternitatem temporisque locatæ, inclinationemque partim ad æterna habentis, partim ad temporanea naturalem. Inclinatio verò naturalis manet semper manente natura. Quapropter animæ à corporibus separatæ, ad illa naturaliter semper inclinabuntur. Naturalis autem inclinatio procliuiasque inanis semper esse non debet. Id enim ab ordine vniuersi alienissimum est. Igitur animæ sua ipsa corpora, ad quæ secundum naturam semper afficiuntur, quandoque recipient.

Ratio tertia. Anima speciei humanæ pars altera est, altera verò corpus. Ergo seiuncta à corpore, ita prout est anima, est imperfecta, quemadmodum pars ipsa solet extratorum, ad quod constituendum est instituta. Idcirco nunquam eius appetitio naturalis quiescit. Nunquam anima vlla beata erit, nisi ad totum suum resumpto corpore reducat, speretve reduci.

Ratio quarta. Virtutibus præmia, vitiis supplicia digna debentur. Hæc cum in hac vita non tribuantur, tribuuntur in altera. Corpus autem & virtutum & vitiorum est vnà cum anima particeps. Vt igitur præmiorum quoque suppliciorumve simul sit particeps, tandem animæ redditur. Neque absurdum videri debet animas postquam à naturali habitu suo discesserint, in eundem iterum redituras esse. Siquidem Planetæ domicilia sua naturalia & relinquunt & repetunt. Elementorum quoque particulæ sæpè extra situm proprium expulsæ diuque seiunctæ, interim continuè ad ipsum vergunt, ac denique reuertuntur. Neque difficile est infinitæ Dei virtuti vique præsentī, quæ totum creauit ex nihilo, quandoque corpora dissoluta in elementa,

ex elementis vicissim restantibus reuincere. Idem verò corpus ideo retegetur, quoniam eadem erit forma quæ quondam, id est, anima, eadem quoque prima illa materia sempiterna, quæ vna cunctis subest. Eadem denique indeterminata dimensio materiæ comes. Quinetiam in hac vita idem corpus à pueritia ad senectutem habere quilibet dicitur, quamuis effluat iugiter atque refuat. Resurget autem corpus penitus immortale. Nam Deus ab initio sic rerum ordinem temperauit, vt rationali animæ, quæ est sempiterna vita, naturalisque forma corporis, materia sua, id est, corpus in hoc ipso congrueret, vt per ipsam semper viuentem, semperque viuificare naturaliter appetentem, ipsum similiter semper viuere posset. Potentia eiusmodi, bonum quoddam est ordini vniuersi maximè consentaneum. Igitur quando Deus qui creauit ab initio, ac tale creauit, vt posset semper viuere, quando, inquam, recreabit, proculdubio id quod conuenientissimum est, implebit, ne potentia tam bona, tanquam vniuerso congrua sit semper inanis. Præterea creatio illa per Deum facta, cessante mundi motu, qui quietis alicuius perfectioris gratia tandem est institutus, ad aliquid duntaxat stabile dirigetur. Itaque corpus semper coniunctum animæ permanebit. Rursus. Intentio naturæ in generando ad perpetuitatem saltem speciei dirigitur, idque ab ipso Deo sortita est, in quo prima perpetuitatis viget radix. Quapropter intentio Dei in regenerando ad perpetuum quiddam multo magis quam natura dirigitur. Hominem ergo incorruptibilem recreabit, non specie tantum (id enim per consuetam generationem expleri satis poterat) verum etiam numero sempiternum. Non secundum animam solum (nam hoc & prius habebat) sed etiam secundum corpus. Accedit ad hæc, quod in generatione quotidiana corpori iam facto accedit anima, in regeneratione illa contrà animæ corpus accedit. Quare sicut vita hominis compositi præsens caduci corporis conditionem sequitur, ita futura illa vita compositi vicissim conditionem immortalis animæ consequetur, vt priuatio tandem secundum perfectissimam saltem naturalium speciem cesserit in habitu. Atque mors tanquam debilissima, vt Prophetæ aiunt, absorbeatur à vita. Item corpora idcirco resurgunt, vt præmia & supplicia etiam corporibus ita merentibus sempiterna in perpetuum persoluantur. Ergo sempiterna resurgent. Adde quòd etiam ideo suscitantur, ne animæ semper maneat imperfectæ.

Cum igitur hac in re animæ ipsius perfectioni potissimum consulatur, tale reddetur corpus, quale conuenit animæ. Sempiternæ verò animæ corpus conuenit sempiternum, quale etiam ab ipso rerum initio tributum fuisse literę sacrę testantur. Quod quidem munus inordinato quodam motu ad tempus intermissum, Deo tandem ita vniuersum vt melius est ordinante, restituitur. Quod autem naturalis hominis habitus ab initio talis fuerit, hinc ostenditur quòd quanto perfectior homo est quàm bruta, tanto facilius, perfectius, sæpius finem suum posse consequi debet quam illa suum. In præsentī verò habitu contrā contingit. Ex quo patet homines ob id propriè, quòd à prima sua temperatione discesserint, ad felicitatem suam maxima cum difficultate contendere, facillimeque eam tunc demum assecuturos, cum in habitum priorem restituti iam fuerint. Quæ quidem sententia, Zoroastris, Mercurij, Platonis mysteriis, atque Poëtis aurea canentibus sæcula, maximè omnium consentanea esse videtur. Sed ad resurrectionem iam reuertamur. Denique Dei virtus immensa, efficiens resurrectionis causa est. Ergo quæ vitæ infinitate suscitatur mortua, eadem in æternum à morte libera conuenientissimè seruat. Tantum enim reuiuiscendi miraculum vita solum sempiterna in posterum decere videtur. Qua in re Deus omnipotens reddit corpora vsquè adeò animarum suarum imperio subdita, vt vita animæ sempiterna sempiternè quoque exundet in corpus. Quod quidem & præstantissimæ formæ aduersus materiam sibi subiectam naturaliter conuenit, & ordini naturæ maximè consentaneum est. Ordini verò, vt tradunt Theologi, meritum, id quoque magnopere congruit, vt corpora non tantum secundum vitam omnibus hominum animabus, quæ vitæ quædam sunt, sed puris etiam secundum qualitates actionesque penitus coniungantur, quemadmodum animæ illæ sunt coniunctæ Deo. Itaque intellectus diuino lumine plenus, ac voluntas lætitiæ efficaciamque incomparabili inde repleta, splendorem, efficaciamque ad motum in corpus mirabilem omnino transfundunt. Vt quemadmodum animæ illæ ad cœlestium mentium, ita corpora ad corporum cœlestium claritatem virtutemque attollantur.

Neque mirum videri debet corpus humanum natura cœlo, propter temperantiam non parum simile, quando rursus dono quodam cœlestem formam quandam induitur, subito ad cœlestem regio-

nem penitus eleuari, trahente videlicet anima, infinita Dei virtute suffulta, quæ & in terra nunc à Deo disiecta corpus contra elementorum suorum naturam conuectit, sustinet, eleuat, & tunc supercœlesti coniuncta Deo, potest etiam ad sublimem attollere secum ætheris regionem. Neque penetratione tunc vel offendit ætherem, vel offenditur purissimum corpus illud, iam iam virtute factum qualitateque æthereum.

*Status animæ impuræ.*

## C A P V T X.

**V**T autem intelligamus qualis sit status animæ impuræ post mortem, animaduertendum est quales sint viuentium mores & habitus. Quales enim sunt adolescentiæ mores, tales plurimum sunt habitus senectutis, tales quoque affectiones sunt defunctorum. In vita præsentī virtus nascitur ac vitium. Cum virtute oritur præmium, cum vitio verò supplicium. In futura vita virtus consummatur & vitium. Illic præmiū impletur atque supplicium. Virtus est exorients præmium. Præmium est virtus adulta. Vitium est supplicium nascens. Supplicium est vitium consummatum. Idem enim est quod erat semen, & quod fit seges. Idem quoque quod erat seges, & quod fit pabulum. Qualia igitur in hoc autumno serimus, talia in illa æstate metemus. Talibus aut fusca nocte in Stygia palude pascemur, aut die serena in campis vascemur Elysiis. Quemadmodum natura prouidentię diuinæ ministra corpora intrinsecus leuitate sursum mouet, grauitate deorsum, ira & prouidentia intrinseca lege, & quasi naturali cuidam inclinationi persimili omnia ducit. Hac lege supernæ mentes & animæ ipsis insita vniuersum sub primo gubernatore gubernant. Hac similiter insita lege mentes humanæ sese ad loca suæ vitæ conuenientia ducunt. Et sicut humores in animali duo motus habent principia, naturæ videlicet, atque animale, naturali quidem leues sursum, graues deorsum sæpius, sese transferunt, animal verò ad ea potissimum, membra quæ his maximè indigent, prout vita exigit animantis, sic animæ duo intus motuum principia possident, alterum quidem vel impetum proprium vel iudicium, alterum verò diuinæ prouidentię legem omnino penetralibus insitam. Illo quidem in hos aut illos se transferunt mores, hac autem post mores contractos ipsæmet in loca, supplicia, munera congrua moribus, intrinseca quadam & occulta inclinatione



perducunt. Hanc Plato sententiam à priscis acceptam sapissimè probat. Hanc & Platonici omnes vbique confirmant. Eam legem semper bonam in se atque diuinam, quidam tamen ita distinguunt vt & gratiam & bonum dæmonem vocent, quando bonis meritis reddit bona. Contrà verò aliquando & nemescin, & furiam, & malum dæmonem appellant, quando peccatores ad supplicia ducit. Ea lex intrinsecus more naturæ, adeoque leuiter ducit, vt nullus donec ad terminum perueniat, à prouidentia sentiat violentiam. Atque interea vniuersum quod ex primo animorum motus principio sapissimè dissonaret, per secundum hoc principium motionis in suam vndique consonantiam restituitur, dum sua singuli, motu proprio gradatim merita sortiuntur. Præterea, non desunt dæmones boni nobis, qui genij nominantur, ingenij duces assidui, qui non vi, sed persuadendo ducant. Sunt & mali, non tanquam duces naturaliter ordinati, sed aduersarij (vt ita dixerim) peregrini, quos in hac vita per Philosophiam sacrificiaque propulsari Platonici putant.

Sed improbas animas post vitam, & Plato & Mercurius aiunt, mutato ingenio incidere in mali dæmonis potestatem, scilicet postquam suo genio ductæ fuerint ad iudicem, qui falli non possit, præferim, cum omnia appareant in animis separatis, & quæ ex natura, & quæ ex affectibus inerant. Hinc Socrates in Gorgia: Cæteris, inquit omissis id confidero, quemadmodum iudici sanissimum ostendere animum possim. Summum enim malorum est animo peccatis referto ad inferos descendere. Addit tum ibi, tum in Theæteto, & Republica, hæc non esse tanquam fabulas deridenda. Siquidem, quicumque talia negant, ridicula ipsi in medium semper ducunt. Igitur præcipit hoc maximè contendendum, vt mores optimi comparentur. Mores enim esse inquit vias, vel ad inferos, vel ad superiores. Operæpretium fore arbitror repetere latius quæ de his in Republica, & in libro de Scientia scribit. Profectò eos inquit, esse penitus deridendos, cui vel iniustitiam sectandam, vel iustitiam fugiendam humanorum, vel præmiorum, vel suppliciorum gratia putant. Illam verò sententiam esse veram, quæ asserit illa non esse vera, vel præmia, vel supplicia, quæ aliquando atque forte, sed illa quæ semper necessarioque ordine virtutes vitiaque sequuntur. Addit in libro

de Scientia: Deum ipsam iustitiam esse, nihilque illi iusto similis, nihil contra iniusto dissimilis esse. Veram præterea sapientiam, potentiamque existimandam, quæ id cognoscat, & consequatur ad votum, contrarium verò habitum extremam inscitiam, imbecillitatemque esse censendam.

Proinde, duo in vniuerso extrema inter se exemplaria ponit, in summo quidem beatissimam diuinitatem, in infimo verò oppositum diuinitatis expers atque miserrimum. Affirmatque iniustos ob extremam inscitiam nunquam animaduertere se propter iniustitiam, beatissimo quidem in dies dissimiliores, miserrimo verò similiores euadere. Eiusmodi verò dissimilitudinem similitudinemve esse propriam iniustitiæ pœnam, sed iustitiæ præmium propriè ipsam beatissimi similitudinem, miserrimive dissimilitudinem iudicari. His addit iniustos, neque in hac, neque in altera vita, ab ipsa beatitudinis patria (vtpote qui sint dissimiles) recipi, imò peruerso quodam habitu ad infimum miseriæ situm (cuius facti sunt similes) congruè retrahi, semperque in regione maligna sibi persimili inter malos sibi similes pererrare. Subdit denique hæc à quibusdam ambitiosis irrideri solere, verum si cogantur in his rationes reddere, atque accipere diligenter, eos tandem (vt supra significauimus) re vera conuictos, tanquam pueros deridendos abire.

Sed iam redeamus ad mores, quibus ordine distributis, qua ratione præmia, suppliciaue distribuuntur, intelligemus. Antequam verò distinguamus, meminisse oportet mores bonos ita demum ad felicitatem conducere, si præcipuo erga Deum felicitatis authorem amore quærantur. Malos autem eas potissimum animas in miseriam præcipitare solere, in quibus amor Dei omnis extinguatur. Hinc Platonicum illud: Sapienti viro lex Deus est, insipienti verò libido. Item illud: Beatus ille futurus est, qui humiliter diuinæ legi se subiicit, miser verò, qui eam superbè contemnit. Sunt autem mores viuientium quatuor. Est homo temperans, continens, incontinens, intemperans. Temperans est, cuius ratio verè indicat, sensualis affectus libenter obtemperat rationi. Continens, cuius ratio indicat quoque verè, affectus obtemperat ægrè. Incontinens, in quo etsi non malè indicat ratio præualet tamen corporea perturbatio. Intemperans, in quo ratio vel

confopita

confopita est, vel deprauata affectu nimium dominante, ubi ad imperium phantasiæ omnia fiunt, neque affectui ratio aduersatur. Cum hic temperantiam continentiamve dicimus, intelligimus ritu Platonico componere vel disponere animum aduersus omnes perturbationum species, adeo ut omnium virtutum moralium in his officia comprehendantur. Præterea cum in anima separata phantasiam ponimus, intelligimus vel ritu Platonico sensum intimum quem in vehiculo & æthereo & æreo collocant, sed cum passione propriè in æreo, vel more Peripateticorum, maximè Auicennæ, affectum habitumque partis, etiam rationalis, quam obsequendo sensibus in seipsa concepit ad passionem corporeas declinantem, ad materiamque trahentem, quo Auicenna didicit animam quasi natura quadam, etiam sine electione, meditationeque, & hic in altera vita intelligibili modo ad sensibilem detorqueri.

Vt igitur ad institutum iam reuertamur, in animo temperato sola vis nutriendi curat corpus. Phantasia non amat ipsum, ratio odit. Quapropter impleto curandi huius corporis ministerio, vis illa vivifica, quasi contenta est vehiculo, reliquæ vires animæ quæcumque supersunt, sicut in hoc ipso homine temperato solitæ fuerant, veritati rerum omnium considerandæ sese dedunt, & tanto feruentius quàm antea, quanto sunt factæ liberiores Omnes igitur repente communi nixu, curiueque æthereo recurrunt in ætherem.

Animus continentis fertur quidem in cælum, ut ille paulò post, non subito. In hoc enim appetitio phantasiæ solita erat vix rationi parère, propter corporis blandimenta, vel terramenta. Ideo corporea in morte ægrè relinquit, qua ægritudine occupat parumper aciem rationis. Verùm ratio quæ illam vincere consueuerat, silere iubet. Vnde sedata phantasiæ quærimonia, atque expulsa caligine, cælestis scintilla subrutilat, omnibusque animæ viribus consentientibus patria superna reuifitur. Incontinens autem serò ex his carceribus liberatur, intemperans verò nunquam. Siquidem horum animæ passionibus infectæ corporeis, in tantam hac in vita insaniam prolapsæ sunt, ut ipsis bonis bonorum umbras temerè præposuerint, umbras amauerint, umbrasque timuerint. Atque post hanc vitam insanire similiter compelluntur, illa quidem diu, hæc semper. Quippè in-

continentis insania aliquam reperit medicinam, quia licet dominari solita fuerit perturbatio phantasiæ, ratio tamen aduersari quandoque consuevit in vita. Similiter & post mortem reclamatur aduersus phantasiæ cuiusdam furentis insaniam, doletque se rerum sublimium possessione priuari.

Hæc reclamatio poenitentiaque paulatim vim actumque illius phantasiæ debilitat, præsertim, cum non adsint incitamenta corporea, quæ eiusmodi nutrant phantasiam. Et quisque libenter auscultet Medico curaturo, tædio diurni languoris affectus, sitque perinde ac in illo qui cum horrendis vexatur insomniis, interim quia somno non premitur profundissimo, secum ipse inquit forte tunc dormire se, & curis inanibus cruciari. Vnde paupor laborque minuitur. Idem forsitan apud inferos contingit incontinenti, & quantum delirantis phantasiæ minuitur strepitus, tantum augetur absolutæ rationis imperium. Sic tandem animus expeditus beatitudinem adipiscitur. In animo autem intemperato, & dum hominis vitam agebat, dormiebat ratio penitus, vel affectui prorsus obsequebatur, vnde indelebilem habitum ad corporea declinantem secum transfert quasi naturam. Talis est animi huius habitus, qualem cecinit Orpheus.

*Ἀρρήντοι τ' αἰδῶο πόλιν, καὶ δῖος ὀνείραν.*

Referari nequeunt portæ Plutonis, intus est populus somniorum. Hunc animum in septimo de Republica. Plato inquit, in hac vita profundè dormire, & antequam expergiscatur decedere, ac post mortem somno profundiore grauari, somniisq; acrioribus perturbari, quod propriè Tartari nomine designatur Fertur, ut Plato vult, nimio corporis elementalis amore. Terreno igitur corpore dissoluto, alterum sibi quamprimùm ex elementorum retexit vaporibus. Solo quasi quodam nutu retexit ex materia facili. Solo haustu reficit quotidie, quasi respirando corpus illud iugiter euanescens. Addit eiusmodi animum circa corpus elementalemque regionem, erga quæ affectus fuerat, affectu perseverante reuolui. Neque mirum videri volunt, quod anima vaporeum corpus quasi suum formet, perque ipsum sentiat, cum id facilius sit, animæque propinquius. Atque in hoc corpore per talem spiritum vitam corpori præstet & sensum.

Si quærantur qualis sit corporis illius figura, respondebimus secundum Magos,

varia simulachra diuersorum animalium ex huiusmodi vaporibus fieri. Qualis enim quælibet animalis vitam moribus imitata est, talem in primis sese facit, talisque omnino eius affectio & dispositio apparet, si sensu aliquo cerneretur, talem quoque figuram quodammodo in umbrato ipsius corpore fingit, si modò ex affectu & habitu animæ vehementi colorari possit leue corpus & figurari. Et sicut carnis in vita senserat passiones, ita corporis illius passiones sentit, & tanto acutius, quanto corpus est purius. Sed in alio genere sensus illius sunt, in alio carnis. Atque ita fortè intelligenda est apud veteres hominum in bestias transformatio. Quidam verò dicunt animam non propriè tale corpus formare, perque ipsum sentire, imò sicut arte magica per certam statuariam dispositionem dæmonibus certis accommodatam, dæmonis statuis quasi deuinciuntur (quod Mercurius confitetur atque Plotinus) sic lege diuina animas quæ se corporibus dederunt, aquæ mancipari vel igni, atque id quidem adeò seruiliter, ut ob hoc vehementer indignentur, & doleant.

Sed utcumque sit hæc passio Tisiphone furia adhibet alias duas animæ furias, quæ eam crucient ab effectu. Megæra quidem propter odium, imaginariique malitiam. Alecto autem propter imaginarij boni cupiditatem. Quas quidem furias incitari à dæmonibus ultoribus, Plato inquit, Plotinusque probat, & Orpheus ipse magnum dæmonem ultorem proprio hymno describit. Tales sunt enim primæ animæ huius perturbationes, quales sunt eorum qui delirant phrenesi propter febrem, aut eorum qui melancholico terrentur humore. Quod quidem fieri & Auicenna fatetur, & Proculus, cum dicat esse dæmones quosdam irracionales, significat nihil mirum esse, si animæ miserrorum irracionales euadant. Quando enim quinque sensuum actiones cessant, actiones interiores maximè augentur. Ac si ratione uti plurimum consueueris, tunc diligentissimè specularis, si phantasia, tunc imaginarij vehementissime. Id usque adeò fit in somno, ut quæ rerum imagines sunt, res veras esse putemus, atque horribilibus visis perterriti trepidemus, sudemus, vociferemur, atque surgamus. Multo magis impiis in morte, atque post mortem, fallacia terribilium contingit imaginum.

Tunc enim cessant varia nutriendi officia, sensuum externorum multiplices a-

ctiones, humanarum actionum occupationes, rerumque solatia, solius restat, ut Platonici putant, phantasie furentis, vel phantasticæ rationis imperium in homine impio, quæ odio quo dixi & timore commota versat secum longo ordine tristes imagines. Nunc cælum ruere in caput suspicit. Nunc se terræ profundis hiatus absorberi. Tum impetu absumi flammarum. Tum vasto aquarum gurgite mergi, aut umbris dæmonum comprehendere. Itaque corpus suum per infima passim exagitat, quamcunque furentis phantasie depulerit impetus, malusque dæmon, ut Mercurius ait & Plato, quos quidem duos esse vult hac in re, etiam si non aduertant, legis diuinæ ministros. Atque id ex odio metuque patitur impius per Megaram. Cæterum per Alecto, ex amoris habitu quem ad corporea contraxerat indelebilem, tales quædam rursus cogitationes sursum & affectus, videlicet quemadmodum senes qui vixerunt in iuuentute lasciuia, duplici pœna vruntur in senio, scilicet quod ardent voluptatum cupiditate, quodque omni spe potiundi priuantur, nisi fortè delirent, sic miseri apud inferos ob pristinum habitum cupiditatibus humanarum rerum alij aliis sollicitantur, atque plurimum non sperant, se consequi posse, quamuis nonnumquam velut insani sibi ipsis videantur propemodum suas delicias adipisci, sed ad pœnas acerbiores se statim ab illis arceri. Sardanapalus arcetur longius ab amplexu, Midas ab auro, à conuiuio Tantalus, à fastigio Sisyphus.

Tanta vis phantasie est, tantus impetus, quando vel ipsa imperat sola, vel solus phantasticus quidam habitus & affectus ex diuturno ipsius commercio in ratione contractus. Ordinem à nobis in superioribus positum confirmat Olympiodorus in Commentariis in Phædonem, tria ex Platonis sententia vitia ponens.

Prima quidem, quæ facillè sanabilia sunt, quæ scilicet habitu careant.

Secunda verò difficillè curari posse inquit, utpote quæ habitu comitantur, sed repugnantiam quandam, pœnitentiamque comitem habeant.

Tertia denique sanari non posse, quæ videlicet & habitu perpetrentur, & repugnantia pœnitentiaque penitus careant. Prima igitur Acheronti, secunda Pyriphlegethonti, atque Coccyto, tertia Tartaro apud Platonicos deputantur, unde dicit Plato nullum vnquam egredi posse. Totidem gradus bonis in Phædone distribuantur, ubi asseritur animas innocentes &

pias, sed expertes Philosophiæ, in aëre una cum aëreis corporibus facile vivere, animas autem Philosophia citili insuper præditas, in cœlo cum cœlestibus lucidissimè vehiculis, denique purgatissimas super cœlum absque corporibus beatissimè vivere. Orpheus autem nouem præcipuas animabus distribuit regiones. Probris quidem vel octauam sphæram vel planetas, vel ætherem sub planetis. Quæ quidem sphære nouem sunt, si diligentius partiatis nouem contemplationis gradus quos aliàs diximus congruè.

Mediis autem aërem, aquamue, & terram. Reprobis denique Acherontem, Cocytum, Pyriphlegethontem, vbi nouies insuper Stryx interfusa coercet. Nouenarius autem numerus inde sumitur, quod vel affectione quadam, vel habitu mobili, vel habitu immobili peccauerunt atque quocunque horum modo deliquerint, vel cogitatione, vel etiam sermone, vel insuper actione peccarunt, vnde nouem gradibus culparum, nouemque poenarum merito computantur. Oraculum verò illud Maronis in sexto, nullo pacto contemnendum est quasi poëticum, in quo partim Mercurium, partim Platonem secutus, affectus describit quatuor, qui quatuor sequantur humores. Siquidem ex ignea bile appetitum, ex aëreo sanguine voluptatem, ex atra bile terream timorem, ex aquea pituitam dolorem mollitiemque nasci consentaneum esse videtur.

Deinde subdit ex quatuor his affectibus quatuor tales habitus in animo concipi ad corporea declinantes, quos miseri post obitum secum ferant circa quatuor elementa purgandos. In qua quidem purgatione quatuor præcipuas inferis plagas disponit more Platonico, vbi licet Acherontis, Cocytii, Phlegethontis, Tartari strepitum mugitumque audire. His admodum consentaneum esse videtur, quatuor vicissim in campis Elysiis disponere regiones, quatuor videlicet in Zodiaco signorum triplicitates, quæ quatuor congruant virtutum generibus, quibus quatuor expugnantur affectus, vnde serena mens lumine cœleste recipitur. Meminisse verò oportet eos non esse inter Platonicos admittendos, qui animas in Planetarum sphaeris igneque & aëre puro viuentes esse inter inferos opinantur. Quo enim pacto inferis deputantur, si & apud beatos sunt, & in corporibus ad eò leuibus obedientibusque imperio animorum, vt inde à diuinorum contemplatione non diuertantur? Quamobrem solam eam mundi plagam v-

bi tumultuaria elementorum confusio dissonat, inferorum nomine Platonice nuncupare debemus.

Denique vt priscorum Theologorum sententiam de statu animæ post mortem paucis comprehendam: Sola diuina (vt aliàs diximus) arbitrantur res veras existere, reliqua esse rerum verarum imagines atque vmbas. Ideo prudentes homines, qui diuinis incumbunt, præ cæteris vigilare. Imprudentes autem qui sectantur alia, in somniis omnino quasi dormientes illudi, ac si in hoc somno priusquam expergefacti fuerint moriantur, similibus post discessum & acrioribus visionibus angere. Et sicut cum qui in vita veris incubuit, post mortem summa veritate potiri, sic eum qui falsa sectatus est, fallacia extrema torqueri, vt ille rebus veris oblectetur, hic falsis vexetur simulachris. Propterea Christus vitæ magister sæpè ita præcipit. Vigilate inquam, vigilate, ne dormientes vos Dominus deprehendat. Rursus, Surgite iam, atque hinc abeamus.

Quidnam aliud est expergisci, quam agnoscere se in sensibus somnare? Quid verò surgere aliud & abire, quàm ad Deum seipsa mente conferre? Neque silentio prætereundam censeo causam quandam supplicij occultam quidem dolentibus, sed potissimam, quam Plato significauit in Timæo, Gorgia, Republica & interpretatus est Origenes. Deus animam certa quædam spiritalium partium, virium, motuum harmonia ab eius initio temperauit. Temperatio huiusmodi in hominibus intemperatis iniustisque soluitur paulatim, ac dissoluitur plurimum in damnatis. Necessarium est autem ex solutione & dissolutione hac non mediocrem oriri molestiam doloremque in animo, etiam si nesciat vnde & cuius gratia doleat, quemadmodum soluta naturali corporalium, spirituum, humorum, membrorum temperie, dolor necessariò sequitur, etiam si ægrotans doloris sui nesciat rationem.

Non negabunt hæc omnino Christianorum Theologi, sed addent (vt arbitror) poenam aliquam ex vero quodam animæ damnatæ iudicio, quoniam cogitabit esse se in æternum diuina visione priuatam. Quæ ideo maxima poena est, quoniam Deus finis est cuius gratia nati sumus, cuius gratia omnia omnes appetimus atque agimus. Ideoque multo acrior est naturalis sitis quæ ad ipsam, quam quæ ad potum concitat sitibundum. Sed quemadmodum si quis opio soporifero fuerit stupefactus, quamuis siti pereat, tamen sitis stimulum

detrimētumque nō sentiet. Opio verò resolutō persentiet, vehementiusque vexabitur, sic animus qui Lethæum merē frīgē ingurgitauit, à Deo omnium diuērsissimū, stupore circa diuinorum sensum penitus occupatus, naturalis erga Deum sitis tormenta nō sentit, sed stupore tandem expulso, & acutissimē sentit, & vehementissimē cruciatur. Ac si quodammodo in vita cogitare possumus esse nos procul à Deo, occupati tamen vitæ solatiis rariū hoc animaduertimus. & quando animaduertimus, speramus breui nos redituros ad patrem, ibi neque solatium miseros, neque spes vlla delectat, quod & Acheron dici potest. Auget pœnam, quod sua se culpa tanto priuatos existimant, propterea sibiipsis perpetuo indignantur, quod Stygis nomine significari potest. Accedit Tartarea locorum aut vilium aut teterrimorum habitatio, ac tandem humani huius corporis cruciatus, qui in sensu Phlegethon, in animo Cocytus esse videtur.

*De medio animorum statu, præcipuè secundum Philosophos.*

**S**Olet de animabus illorum sæpè quæri, qui ante electionis ætatem è corporibus decesserunt. Plato scribit, Herum Pamphilium qui à morte surrexit, de aliorum statu animorum multa & stupenda narrasse, de his autem alia quædam non multum memoria digna. Auicenna verò in Metaphysicis, eos animos qui nondum vel bonum vel malum habitum contraxerunt, ex diuinæ clementiæ largitate boni aliquid reportare.

Nos igitur, si Philosophicis hac in re coniecturis liceret incidere, forsitan diceremus, ordine rerum ita currente, eiusmodi sortem illis quodammodo præter apparentem ordinem contigisse, sed à diuina sapientia, quæ nihil vsquam esse permittit ordinis totius expert, in ordinem quendam nobis quidem occultum, superis autem manifestissimum redigi. Quid si Deus quemadmodum inter omnia extrema quæ inter se longissimè distat, plura semper media interponit, ita inter ipsas beatissimorum miserrimorumque sortes tanquam maximè omnium inter se distantes gradus, quam plurimos interiecit? vt non pauciores in occultis animorum ordinibus, quam in manifestis, corporum gradus existerent, essentque hinc beatissimi multi, multi inde miserrimi, rursus hinc alij minus beati, inde alij miseri minus, omnium verò medijs pariter, qui neque miseri sunt pro-

prie, neque beati? Siquidem beatus est, qui diuinis in Deo saporibus fruitur, miser verò, qui nusquam diuinum aliquem sentit odorem, semperque esurit. Minus autem inde beatus, qui in illo paucioribus fruitur. Vicissim minus hinc miser, qui esurit doletque minus. Medius tandem, qui in creatura quosdam creatoris sentit odores, viuitque odore contentus. Quamobrem dicent fortè Philosophi infantum animas non debere de diuina iustitia conqueri, quia si fortè facultate summi boni priuati sunt, etiam sunt extremi mali discrimine liberati.

Rursus probabile est non conqueri, si modo in perspicuitatem animæ nullis corporalium affectionum nubibus obfuscatam, lumen diuini Solis naturalia creans, naturalium formarum influat plenum, cuique vt Timæus inquit, ordinem vniuersi demonstraret, atque simul ordinatorem in ordine, quantum ordo ipse capit ordinatoris, & hoc bono iubeat faciatque esse contentam. Itaque sicut in homine inter crassum corpus & animam spiritus est, atque in affectu dolorem inter & voluptatem est indolentia, item in ratione inter scientiam & ignorantiam opinio recta: rursus in vniuerso perspicua inter lucidum & opacum, sic in spiritibus segregatis esse videntur, qui in celis tam luce quam lumine Dei beatè formantur, atque contra quibus circa terram miserabiliter vtrunque desit. Inter hos autem in puriore aëre medijs, quibus etsi non lux ipsa propriè, tamen lumen aspiret. Meminisse verò oportet, quod significamus alias, quemadmodum aliud est lux in Sole permanens, aliud lumen inde manans, perque cuncta diffusum, aliud radius quidam oculis inde naturaliter insitus, sic aliud esse infinitam in Deo lucem, per quam solam & Deus seipso fruitur, & beatæ mentes diuina bonitate fruuntur.

Aliud commune lumen inde per omnes perspicuas mentes se abundè diffundens, per quod quasi creatum externumque mentes singulæ (modo inde non diuertantur) creata cuncta conspiciunt, creatorem verò ipsum propriè in seipso nequaquam, nisi per lumen accensæ transferantur in lucem. Aliud radium quendam iam singulis proprium, factumque ab initio mentibus naturalem, in eisque restantem quodammodo etiam inde diuersis atque discedentibus. In gradu quidem primo beati sunt, in secundo verò neque beati propriè, neque miseri, modò hoc in ipso contenti viuunt. In tertio denique animæ sunt humanæ, siue corporibus siue corpo-



reis affectibus alligatae, atque ex hoc ipso pene iam miserae, sola verò spe quasi felices. Miserrimi verò sub hoc ipso gradu sunt, quibus solus restat radius, atque ille quidem iam & caliginosus & yrens, lucisque purae fiducia destitutus. Fortè verò Platonici aliquis ita coniiciet. Si Deus mentes primae lucis gratia procreauit, atque ipsae ad eam consequendam tum diuinæ bonitatis agnitione, tum vel maximè amore parantur, quippè cum agnito lumine inde formet, & amor hinc illuc luce reformat, verisimile fore diuinam iustitiam velle nulli omnino mentium agnoscendi amandique Dei semper facultatem omnem occasionemque deesse.

Quoniam verò multis ante rationis usum morientibus, rursusque quibusdam ab initio stolidis, vtrumque maligna fati necessitate subtrahitur, ideo consentaneum fore, facultatem eiusmodi per diuinam prouidentiam vel in hac quandoque miro quodam pacto, vel in altera saltem vita rependi, nequis absque propria culpa sine speciei præcipuo careat. Quamobrem horum animas etsi hic nunquam, tamen à corporibus segregatas, in illo quod diximus lumine, dum creatorem in creaturis agnoscunt, tanto gradatim accendi creatoris amore, ut ad consequendam lucem certo quodam tempore disponantur, tempore inquam, quoniam solae Angelicae mentes tanquam in aeternitate totae, momento siue proficiant, siue deficiant. Animae verò quasi iam naturaliter quodammodo ad temporalia declinantes, suam tempore operam peragant, sed longiori quidem in corpore, extra verò corpus admodum breuiori, momenta verò tum duntaxat, cum primum fuerint in Angelicam fermè translatae naturam.

Ac si animae in purgatoriis constitutae suppliciiis, quamuis in deteriori habitu locoque sint, tamen ad beatitudinem usque resurgunt, nihil mirum videri debere, illorum animas in regione indolentiae media, beatitudinique propinquiore positas, ad beatitudinem usque posse proficere. Haec de infantibus maximè Philosophi opinarentur. Verum de his qui ab ipsa natura omnino stolidi sunt, difficilior admodum quàm de infantibus quaestio esse videtur. Hi enim si diuixerint, aliquem circa materiam (quae est infimum vniuersi) habitum contrahunt, qui à Deo, quod est vniuersi summum, diuertere solet. Hic habemus animam comitans etiam separatam, adhuc fortè ad materiam vertit, atque interim auertit à Deo. Beatitudo autem nullis nisi in Deum conuersis

conuenire censetur. At verò si hi miseri sunt, cum conuerti nullo modo ad summum fato prohibente potuerint, nulla sua culpa sunt miseri, ac Deus frustra conuerti iussisset eos, qui non possent. Respondebit hic fortè Peripateticus aliquis, in stultis ob nimiam phantasiae ipsius intensionem, rationem adeò vacanisse, ut non agendo habitum non creauerit. Habitu verò proprium phantasiae (qui non tam in anima est, quàm in corpore animato) cessare statim composito dissoluto, quo efficiatur ut mens statim, nullo prohibente naturali radio, conuertatur in Deum, & diuinum lumen quod ubique adest, accipiens accendatur; deinde amet accensa, & amando vehementius se conuertat, breuique tempore non nihil promerendo beatitudinem consequatur. Platonici vero, qui habitum & in phantasia quodammodo remanente restare putant, & in rationem illi consentientem, si modo quicquam & tunc quidem coacta consenserit, inde transfundi, responderunt, oportere prius habitum ad opposita diuerterentem omnino deleri, quàm superius erigatur. Sed in hoc delendo tum genij tum Dei virtutem mirabiliter operari. Non enim sub diuina prouidentia minus consultum prouisumque esse mentibus quàm corporibus. Igitur sicut corporibus aegrotantibus, ubi natura morbum non potest expellere, propriaque in sanitatem virtute redire, arte Medicorum confirmata expellere consuevit, similiter & in mentibus quibus naturalis facultas corporei habitus expurgandi, renouendique Dei deest, omnipotentem Medicum vel propria duntaxat virtute, vel ministrorum felicitum ministerio feliciter vtrumque peragere. Neque id quidem ordine carere putabunt, ut diuina clementia, quae maximè probatur in principe, hic apertissimè luceat, dum & nullus absque culpa propria condemnatur, & qui extra culpam ad tempus meriti facultate priuatur, in facultatem quandoque diuinitus restituitur, facultatem, inquam, tutam, quae & aberrare non possit, & breui multum Deo adiuvante promereatur. Haec illi. Verùm ne de pueris stultisque pueriliter stulteque sentiamus, ita iam concludendum esse videtur. Huc nos fermè coniecturalis Philosophorum ducit via. Sed quoniam humana coniectio circa diuina saepe multumque fallitur, multo satius tutiusque censemus, nos sanctionibus apud Christianos ducibus obedienti humilitate committere.

## C O N C L U S I O.

**P**ostquam terminus vitæ non idem nobis, atque cæteris animantibus, est à Deo tributus, quemadmodum primò communibus rationibus, secundò argumentationibus propriis; tertio tum signis, tum solutionibus quæ stionum ostendimus, summa diligentia cauendum arbitror, ne incertum hoc fugacis vitæ momentum seculis infinitis anteponamus. Meminerimus autem, si sapimus, non posse nos in æternum aut bene esse, aut perfectè viuere, aut feliciter intelligere, nisi eius forme-

mur essentia, quo creante, vt essemus accepimus, eius vita viuamus, quo affante spiramus atque mouemur. Eius intelligentia intelligamus ipsum perque ipsum omnia, quo illustrante quotidie & creatâ consideramus, & quærimus creatorem. Perueniemus autem, Deo duce, ad hunc gradum naturæ supremum, si modo ab ipsa materia, quæ naturæ gradus est infimus, affectum animi pro viribus segregabimus, vt quantum ab ea discedimus, tantum accedamus ad Deum, & cui nunc posthabito fallacis huius vitæ momento quoad possumus viuimus, tandem eius vita viuamus in æuum. Amen.

## AUTHORIS PROTESTATIO DE SCRIPTIS SVIS.

In omnibus quæ aut hîc, aut alibi à me tractantur,  
tantum assertum esse volo, quantum  
ab Ecclesia comprobatur.

F I N I S.





# MARSILII FICINI FLORENTINI

IN EPISTOLAS DIVI PAULI

*Ascensus ad tertium Cælum.*

AD PAVLVM INTELLIGENDVM,

P R O O E M I V M.



**S**CIO hominem in Christo, ante annos quatuordecim, siue in corpore nescio, siue extra corpus nescio, Deus scit, raptum huiusmodi usque ad tertium cælum. Et scio huiusmodi hominem siue in corpore, siue extra corpus nescio, Deus scit, quia raptus est in Paradisum, & audiuit arcana verba quæ non licet homini loqui.

Venerandi in Christo Patres, & dilectissimi in Cathedrali collegio fratres, Paulus Apostolus Gentium, Sol mundi, Vas electionis. Spiritus sancti tuba, mysteria hæc quæ modo narrabam in 2. ad Corinthios Epistola tanquam oracula cecinit, quæ quidem cum ad eam Epistolam peruenerimus, aspirante Deo, pro viribus explicare conabimur. Interca verò cum singula verba eius qui raptus est ad cælum intelligere ab initio cupiamus, neque nobis liceat, cum in terra tanquam homines vitam agimus, hæc audire, studendum nobis est, humanos quoad possumus supergredi limites, & in primis excelsus Paulus obsecrandus, ut ipse sua clementia secum ad coelestem quendam angelicumque gradum nos attollat. Est enim in nobis terra, est & quodammodo cælum, idque trinum. Terra quidem corpus & sensus, affectusque corporis. Cælum verò recta veraque ratio. Ratio autem triplex, quasi cælum triplex esse videtur. Infima quidem practica rerum humanarum, priuatarumque & publicarum gubernationi & prouidentiae dedita. Superior autem ratio mundanum or-

dinem Physica facultate considerans. Suprema denique ratio, siue mens, res diuinas altiores mundo Theologica ratione contemplanis. Quamobrem arcana sublimis Pauli mysteria percepturi, debemus corporeo sensu affectuque dimisso quasi terra, itemque ratione practica prætermissa velut primo quodam cælo, ac rursus Physica ratione posthabita cælo quasi secundo, ad mentem diuinorum contemplatricem velut cælum in nobis tertium angelicumque statum, duce Paulo, totis viribus nos ipsos attollere. Quoniam verò nec ipsa mentis contemplatio propriis viribus intelligentiæ ad diuina peruenire potest; in hac nobis iterum tres quidam gradus, quasi cæli tres constituendi, seu potius à Deo per Paulum petendi, videntur, Fides, Spes, Charitas, Spiritus sancti dona, præcipuè verò charitas, omnem scientiam superminens, & cum ordine Seraphico nos coniungens. Hic denique trinum quoque nobis occurret cælum. Nam in charitate Seraphica ineffabilis ille accendetur in nobis Spiritus sancti feruor. In hoc autem almo feruore, lumen & sapientia Verbi diuini protinus effulgebit, quibus sanè muneribus diuinis graua præditi incomparabili potentiæ donum consequemur à Patre, quo quidem mysteria D. Paulo diuinitus reuelata percipere valeamus. Quod autem modo significabamus in calore lumen accendi, diligentius mihi videatur considerandum. Philosophorum sententia est, calorem in corporibus naturaliter à lumine proficisci. Quemadmodum in spiritibus

ab intelligentia voluntatem. Sol igitur velut quidam cœli Dominus perspicuis ubique corporibus, quasi similibus lumen in primis infundit atque inde calorem. Terre-  
nis autem calorem priustabuit; materiam  
crassam extenuantem. Postea verò exhalationibus inde surgentibus lumen protinus inserit. Deus similiter mentibus à corpore separatis per intelligentiam infundit amorem. Animis verò tenebroso corpore circumseptis, necessarius in primis est amor, ex fide, speque in Deum erecta creatus. Quo quidem amore purgati in Deumque conuersi, lumen intelligentiæ consequuntur. Quamobrem & nos, venerandi, patres fratresque dilectissimi, fide, speque diuina freti, & amore flagrantés ad diuinorum intelligentiam Paulo reuelante proficisci debemus.

**P**AULUS ex tribu Benjamin natus in oppido Gestali Iudææ, quo à Romanis capto in urbem Ciliciæ Tarsum sese contulit. Inde à patre Hierusalem ad Gamalilem missus disciplinæ gratia, Christianæ legis primordia crudeliter infecutus. Propè finem anni quo passus est Christus, ab Hierusalem Damascum pergens gratia persequendi, repentina conuersione in terram prostratus est & conuersus ad Christum. Postquam ab Anania Damasci baptismum suscepit, Hierusalem profectus est. Ibi persequentibus Iudæis apud Felicem præsidem, tanquam Romanus ciuis Cæsarem appellauit. Hinc victus Romam missus est ad Neronem, secundo Neronis anno, Romæ in libera custodia Christum biennio prædicauit. Deinde annos decem in Occidente. Denique Romam reuersus quarto decimo Neronis anno martyrio coronatur. Annos post conuersionem sex atque triginta pro Christi gloria laborauit.

*Summa in Epistolam ad Romanos.*

**R**OMÆ fideles erant multi Iudæi simul atque Gentiles, non ab Apostolis, sed ab Iudæis iam conuersis instructi, ij super-

ba contentione alterutrum dignitate eandem vel gratia superare volebant. Iudæi quidem iactabant se populum esse diuinitus electum, ab Ægypto miraculis liberatum, Manna in deserto nutritum, per Mo-  
sem instructum, lege & Prophetis refertum, Christi promissione dignum. Gentilibus obiecebant idolorum cultum, quo quidem sacrilegio indignos fore dicebant, vt cum Dei populo comparentur. Gentiles autem contra respondebant, quanto maiora erga vos Dei beneficia narraueritis, tanto maioris vos criminis reos esse monstrabitis. Semper enim his omnibus extitistis ingrati, nam ab Ægyptiis diuinitus liberati, iterum coluistis Idola, Manna fastidio vobis fuit semper in deserto, contra Dominum murmurastis, perdidistis Prophetas. Christum promissum vobis interemistis, quem vt nos cognouimus statim credidimus, cum nobis de eo antea non fuerit prædicatum. Has altercationes Apostolus ita dirimit, vt neutrum eorum sua iustitia salutem meruisse confirmet. Iudæos enim legem præuaricatos, Gentes autem Deum cognitum non coluisse sed idola, vtrosque similiter veniam consecutos, æquales esse demonstrat. Et in lege prædictum Iudæos & Gentes ad Christi fidem vocandos. Quamobrem vicissim eos humilians ad modestiam & concordiam cohortatur. Scribit autem, vt inquit Haimon, Athenis, vt autem Origenes atque Hieronymus, Corinthi. Fortè verò Athenis Epistolam inchoauit, Corinthi verò perfecit. Prima verò posita est ad Romanos Epistola propter ipsam urbem (vt arbitror) excellentiam, non quia prima scripta fuerit ab Apostolo. Athanasius enim inquit, quatuor saltem scripsisse priores, duas quidem ad Corinthios, vnam insuper ad Galatas, & ad Thessalonicenses vnam. Cum hoc consentit Hieronymus. Siquidem Paulus se hanc scripsisse testatur proficiscentem Hierosolymam, cum Corinthios & alios iam ante, vt ministerium quod secum portaturus erat, colligerent, literis hortatus esset.



I N

## P R O O E M I V M

P A V L I.

Quomodo Paulus vocatus &amp; segregatus.

*De Nativitate Christi, aeterna & temporali.*

(··)

C A P V T P R I M V M.

(··)



PAVLVS, seruus Christi Iesu, vocatus Apostolus, segregatus in Euangelium Dei, quod ante promiserat per Prophetas suos in scripturis sanctis.]

Prooemium Oratorum more narrationi praeposit, in quo quidem tria potissimum efficit. Primo quidem officium suum describit, multisque breuiter rationibus comprobatur, atque interim attentos auditores facit & dociles. Secundo verò conditiones eorum exponit, ad quos scribit Epistolam. Tertio denique felicitatem illis exoptat, atque interea captat beneuolentiam. Post hæc autem narrare incipiet, ubi dicit primum quidem, & quæ sequuntur. Saulus quidem apud Hebræos dictus est, Paulus autem apud Gentes appellatione, videlicet vnâ cum professione mutata. Præterea Pauli nomen cum Gentilium nominibus magis conuenit, ad quos præcipuè missus est Paulus, denique nomen hoc Pauli Sergij proconsulis ab Apostolo conuersi, victori merito competit, sicut & cognomentum ab Africa conuenit Scipioni. Seruum verò se dicit Christi, cum non propriæ, sed Christi gloriæ seruiat, & à seruitute velut à conditione quadam humili ad Apostolicam mox peruenit dignitatem. Neapè qui se humiliat exaltabitur. Apostolus missus

intelligitur, cum diuina scilicet potestate. Huc tendit illud, Dabit Deus verbum Euangelizantibus in virtute multa Missus, inquam, non ab hominibus, sed à Spiritu sancto, ut patet in Actis Apostolorum, ubi Paulum & Barnabam à Spiritu sancto missos asseritur, vocatus autem procedente quidem tempore ab hominibus. Qua sanè ratione Corinthiis inquit: Non sum dignus vocari Apostolus, sed ab initio vocatus à Deo, quando ad Apostolicum munus diuinitus est electus. Vbi Ananiæ dicit Dominus: Vas electionis est mihi iste, ut portet nomen meum coram Gentibus & regibus & populis Israël. Primo quidem vocatus fuit ad fidem, quando cœlesti coruscatione prostratus est ad terram. Sed in verbis modo narratis vocatus ad Apostolicam dignitatem, qua quidem Christum omnibus prædicaret, non Gentilibus tantum, sed Iudæis. Quod & præcedentia Lucæ verba significant. Sed Iudæis inquam, non tam in Iudæa quàm inter Gentes propriè conuersantibus. Quapropter addit Segregatus. Partim quidem ab aliis Apostolis atque Iudæa. Hinc illud in Actis Apostolorum à sancto Spiritu dictum: Segregate mihi Paulum & Barnabam ad opus ad quod elegi eos. Partim etiam segregatus à professione Iudaica. Hinc illud ad Galatas: Cum autem placuit illi qui me segregauit ab utro-



ro matris meæ, id est, à Iudaica Synagoga, vel etiam, me ab ipso natiuitatis initio ad hoc officium destinauit. Sed curram ab Apostolis & Iudæa Paulum separauit? Et præcipuè misit ad Gentes. Quoniam videlicet & Iudæis admodum infestus futurus erat, qui repente ex eorum potissimo propugnatore, acerrimus expugnator euasit, & Gentibus propter ingenium & eloquium acceptissimus. Siquidem Paulus ipsa etiam natura, acumine, animo, eloquio omnium præstantissimus. Hinc apud Gentiles Mercurij nomen est adeptus. Tantum profectò virum elegit Deus, vt non solum mirabiliter erudisse rudes iudicaretur, sed etiam ingeniosissimos eruditissimosq; mirificè conuertisse. Fortè verò & ab alijs secreuit Apostolis, ne quis suspicari posset, vel piscatores illos à Paulo instructos, animatosque fuisse. vel Paulum ab illis disciplinam Euangelicam accepisse. Quamobrem segregatus, inquit, in Euangelium, id est, in bonum nuntium & promissum, non ab homine, sed à Deo. Ideo in Euangelium Dei dixit, quod non solum Dauid, vt supra diximus, sed etiam Esaias ita prædixit, quàm speciosi pedes Euangelizantium pacem, Euangelizantium bona. Quod sanè non leue nouumque fuit inuentum, sed diuinitus longè ante promissum, non per vnum testem, sed per plures, non quoslibet, sed Prophetas, non qui humano ingenio vel instinctu dæmonico, sed afflatu diuino prædicerent. Prædictiones apud Platonicos quinque modis fiunt, aut enim fortuna, aut arte, vel natura, vel dæmone, vel toto moti prædicimus. Sola prædictio facta diuinitus certa est, semperque veridica. Idcirco dictum est per Prophetas, non in verbis tantum, ne memoria eorum periret cum sonitu, sed in scripturis, non quibuslibet, sed à Spiritu sancto profectis. Ideo in scripturis sanctis est dictum, quale illud est Hieremiæ: Ecce dies veniunt, dicit Dominus, & feriam domui Israël, & domui Iuda foedus nouum, non secundum pactum quod pepigi in die illa cum patribus vestris, qua apprehendi manum eorum, vt educerem eos de terra Ægypti. Sed hoc erit pactum quod feriam cum domo Israël: Dabo legem meam in visceribus eorum, & in corde eorum scribam eam. Moses quidem scriptis legem, Christus autem mentibus commendauit. Vbi verò Propheta significat legem Moysis quidem in tabulis, nouam verò in mentibus imprimi, etiam innuit nouam vetere tanto præstantiorem fore, quanto mentes tabulis excellentiores existunt, vt meritò, sicut Lunæ lumen adueniente Solis lumi-

ne cedit occupaturque ab illo, ita cedat rebus & occupetur à noua. In scriptis inquam, non de quauis materia, sed de filio suo. Hinc enim Prophetæ prædicebant cum lege Euangelica profecturum. Quod verò dicitur de filio suo, habet emphasin, ne fortè intelligeremus cum Plotino Christum Dei filium adoptiuum, sed naturalem. Christus profecto naturas habet geminas, diuinam scilicet & humanam. Personam verò vnicam, id est, diuinam, hæc quidem persona Dei filius est semper apud patrem, inde genitus ab æterno. Qua quidem ratione dixit de filio suo, vt generationem significaret æternam. Vt autem natiuitatem exprimeret temporalem, addidit: Qui factus est ex semine Dauid secundum carnem. Non simpliciter quidem factus, vt existimat Arius, sed quodammodo factus homo. Ideo secundum carnem factus asseritur. Perinde ac si dicatur, diuinitus factum est, vt Dei filius carnem assumeret, humanam videlicet naturam. Per hæc interea duo verba, factum secundum carnem, refellitur Manichæus dicens: Deum corpus phantasticum ostendisse. Ex semine Dauid, ex semine Mariæ virginis descendens à Dauide. Ac ne existimares affectionem huiusmodi nouum aliquid afferre Deo, subiunxit: Qui prædestinatus est filius Dei, id est, decretus & ordinatus ab æuo filius Dei. Non propterea quod persona diuina per voluntariam destinationem à patre processerit, quæ est inde genita per naturam, sed quia diuinitus decretum fuit, vt ipse Dei filius incerto quodam tempore per assumptionem humanæ naturæ se hominem demonstraret. Iure autem non prius dixit destinatus quam factus, vt ostenderet, duntaxat affectionem coniunctionemque humanæ naturæ sub prædestinatione comprehendi. Deus nullum simpliciter ad malum prædestinauit aliquando, sed ad bonum, nā infinita bonitas non decernit aliquem simpliciter, malum fore vel miserum, sed cum conditione quadam statuit, hunc si malus fuerit, fore damnatum. Simpliciter autem prædestinauit quosdam Prophetas fore vel Apostolos vel Doctores. Similiter prædestinauit humanam naturam, quandoque cum diuina iungendam. Sed ne fortè putares vnā cum Nestorio, diuinum verbum sola quadam habitationis communionem hominem suscepisse, subdidit.

[In virtute secundum Spiritum sanctificationis ex resurrectione mortuorum Iesu Christi Domini nostri.] In virtute, id est, in eadē potestate diuina, quasi dicat in vniōne personæ. Quod autem diuina virtus tradita

Christo fuerit, inde probat Apostolus quod & Iesus natus fuerit per virtutem sancti Spiritus, factum in Maria formantem, &, ut ita loquar, sanctificantem, & quia Christus Spiritus sancti gratiam suis infuderit ad vaticinium atque miracula præcipuè postquam surrexit ex mortuis. Per quam ipse prius & mortuos plures & seipsum suscitauit à morte.

Possumus autem ita simplicius accommodatiusque verbis exponere. Iesus destinatus est penes Deum, & à Deo hominibus declaratus filius Dei. Sed in quo? in virtute profecto. In virtute, inquam, miraculorum palam efficiendorum. Deinde per Spiritum sanctificationis, quem Iesus abundantius effudit in suos, postquam surrexit ex mortuis. Quæ quidem resurrectionis maximum diuinæ virtutis pignus extitit, & id quidem declarato ex manifesto Spiritus sancti dono, in suos deinde diffuso. Appellauit autem resurrectionem Christi, resurrectionem mortuorum. Quia hæc generalem, ut inquit Ambrosius, resurrectionem facit [Per quem, sancte, Christum accepimus gratiam & Apostolatū ad obediendum fidei in omnibus Gentibus pro nomine eius.] Paulus se accepisse ait à Patre per Filium ipsam Spiritus sancti gratiam ad plenum Apostolatus effectū. Et hanc quidem apud omnes Gentes, ut Christianæ fidei tandem omnes obediant. Propterea Esaias ait: Patrum est ut sis mihi seruus ad suscitandas tribus Iacob, & feces Israël conuertendas. Dedi te in lucem Gentium. Dum verò dicit: [In quibus estis & vos vocati Iesu Christi] Iudæos etiam connumerat Gentibus mixtos. Nam & in sequentibus Iudæos etiam suscipit conuertendos. Vocati Iesu Christi, id est, ab Iesu Christo. Vbi verò in superioribus ait, pro nomine eius, gloriam propriam prorsus exclusit. Hic interea proficitur ad Gentes se præcipuè missum, ostenditque in ipso Iesu duntaxat impleri, quod per Prophetas Christo Deus ipse promiserat. Fore scilicet, ut Dei vnus cultum apud Iudæos tantum hætenus angustum, Christus Gentibus omnibus promulgaret, idololatriamque destrueret. [Omnes qui sunt Romæ dilectis Dei vocatis sanctis.] Scribit autem non Romanis tantum, sed omnibus etiam qui sunt Romæ, siue Romani, siue Græci, siue Iudæi, siue quomodocūque Barbari. His autem non quibuslibet, sed conuersis, Sed qua virtute conuersis: Vocatione diuina per quam sancti fiant, qua Deus ex dilectione sua eos vocat. Interea bis vocatis inquit. Ut intelligerent se sola diuinæ vocationis gratia profecisse, vel in-

super profecturos. [Gratia vobis & pax à Deo patre nostro & Domino Iesu Christo.] Denique sic affectis optat promittitque præcipua Spiritus sancti dona, gratiam atque pacem. Per gratiam quidem dilectionem efficaciamque diuinam. Per pacem verò reconciliationem apud Deum ob indulgentiam peccatorum. Atque ut totam exprimat Trinitatem, optat nobis hæc Spiritus sancti dona à patre per filium provenire. Et cum nominauit patrem, non solum naturalem eius filium nuncupauit, sed nos etiam patris illius filios adoptiuos, vbi magna charitatis & obedientiæ emphasi dixit; nostro. Huc tendit illud Apostoli in sequentibus, ut sit ipse primogenitus in multis fratribus. Item, hæredes quidem Dei, cohæredes autem Christi.

*De rationibus Trinitatis.*

## C A P V T II.

**H**ætenus Epistolæ procemium exposuimus, sed antequam ad narrationem perueniamus, operæpretium fuerit de Trinitate diuina & humanitatis assumptione per verbum diuinum facta, non nihil afferre. Nam hæc mysteria Paulus & hic & alibi frequenter attingit. Perstringam verò paucis in præsentia. In libro enim de Religione de his latius pertractauimus. Si natura boni est propagare seipsum bonique maioris, se diffundere magis; consequens est, ut Dei bonitas infinita, sui ipsius propaginem proferat infinitam. Cum autem extra Deum nihil esse valeat infinitum, necesse est infinitam Dei propaginem in ipso Deo prorsus expleri. Æternam videlicet in æterno. Illic igitur & Genitor est, & Genitus. Et cum vterque sit infinitus, filius patri semper est æqualis. Atque cum infinita natura propter exactam capacitatem duplex esse non possit, sequitur ut vna tum sit patris filique natura. Quamuis propter relatiuam generantis genitique oppositionem persona sit gemina. Vbi profectò pater alterum se ad votum generare videtur, alterum quidem duntaxat persona, idem verò natura prorsus, natura videlicet singulari. Hinc igitur omne quod vsquā generat, habet ut aliquid pro viribus sibi simile & æquale, & idem saltem speciali natura quasi alterum se generare conetur, efficere verò reuera se alterum solus potest Genitor infinitus. Præterea quoniam bonus vbique comitatur amor, necessarium est penes bonitatem ipsam eiusque propaginem infinitam, amorem ad se inuicem vigere similiter infini-

am. Cum vero spirans amorem & inspiratus amore per relationem inuicem opponantur, quamuis eadem eorum sit natura, persona tamen alia indicatur. Quamobrem sateri compellimur, in vna simplici infinita Dei naturae tres esse personas æquales inuicem atque simillimas. Verum si fortè quaesieris quomodo generatio hæc & inspiratio fiat, respondebimus, per quendam intelligentiæ voluntatisque modum hæc impleri. Profectò paterna fecunditas perfectè intelligendo seipsam, & in se cuncta, perfectam totius sui & omnium notionem concipit in seipsa, qui sanè conceptus æqualis plenaeque Dei, vt ita dixerim, imago est & exemplar mundi superplenum. Conceptus ipse diuinus non quasi imaginarius est, vt noster, sed proles naturalis existens. Quoniam natura Dei ipsa intelligentia est, & intelligentia idem est atque esse. Quod ergo per intelligentiam generatur intrinsecus, per modum naturæ genitum, proles naturalis existit. Fortè verò Orpheus nesciens, quomodo hanc Palladem Orpheus appellauit solo Iouis capite natam. Hunc Dei patris filium Plato in Epistola ad Hermiam nominauit. In Epinomide verò Logon, id est, rationem ac verbum dicens, logos omnium diuinissimus mundum hunc visibilem exornauit. In septimo de Republica, penes Deum filium significat inuisibilem, dum apertè dicit, Solem quoque esse Dei filium, sed visibilem. Zoroaster quoque vnà cum Mercurio intellectualem Deo prolem attribuit. Dixerint isti quidem quod potuerunt, & id quidem adiuuante Deo. Deus autem hoc solus intelligit, & cui Deus reuelare voluerit. Deus denique per æternam, quam diximus, notionem cognoscens ab æuo seipsum infinitum bonum, per eandem ab æuo infinitum in se ad seipsum spirat amorem. Quamobrem pater & filius & spiritus amatorius, tres à Theologis personæ vocantur, natura quidem diuina conuenientes omnino, ita vt vnicus simplexque sit Deus, sed relatione quadam incogitabili differentes. Nempe non alio pater à filio differt, quam hoc ipso quod generat, nec filius à patre per aliud, nisi quod genitus, vtrique rursus in hoc ipso conueniunt, quod vna virtute rationeque Spiritum tanquam amorem mutuum æquè spirant, à patre per filium procedentem, tanquam à personis quidem duabus, ab vno tamen principio venientem. Qui nec à patre filioque simul differt alio, nisi quod spiratur ab illis, illi spirant, nec a filio per aliud quam quod filius quidem generatur, hic autem spiratione procedit. Siqua mens humana

intelligeret perfectè, seipsam intellectuam vehementer amaret, expressiorem Trinitatis imaginem penes se haberet. Nunc verò cogimur eam in Sole suspicere. In quo Deus suum posuit tabernaculum. In vna enim natura Solis tres vires inter se æquales existunt. Prima quidem naturalis ipsa fecunditas, à qua Lux intima semper emicat, à quibus prodit intrinsecus calefactoria virtus. Fecunditas illa patrem, Lux intima filium, virtus calorifica spiritum representat.

*Rationes quibus diuinum Verbum assumptum humanitatem, atque de mundo.*

### C A P V T III.

**H**umanæ mentis finem esse frui Deo, hinc præcipuè conicere possumus, quod hoc naturaliter omnes optant, nec a libi conuiescunt. Ad id autem peruenire absque certiore quadam fide, firmiore spe, ardentiore charitate non possunt. Tria verò hæc erga Deum consequi nostræ mentes distractæ sensibus & sensibilibus occupatæ non valent. Nam huiusmodi tenebris semper obscuræ diuinam lucem quamuis præsentem, comprehendere nequeunt, quæ quidem nuda sufficit Angelis ad conuersionis affectum, nobis verò nequaquam. Quorum animus oculos quasi duos habere videtur. Alterum quidem sursum spectaturum, alterum verò deorsum. Sed alterutro nimium patefacto, alter interea clauditur. Superior igitur in nobis est clausus, quàm diu inferior per sensus omnino se distrahit, quæ offeruntur sensibus attentius circumspectans, & ardentius amans. Itaque diuina bonitas nobis clementissimè providens, lucem suam a reia inuisibilem nostris oculis offerre decreuit, quando eam humanitate vestiuit, vt sensum saltem ipsius, cui dediti sumus, testimonio esse Deum certius crederemus, speraremusque posse consequi, & ardentius amare eum, qui pro homine factus est homo, vt homo quandoque diuinus euaderet. Huius sanè magistri præcepta quem Deum pariter atque hominem esse credimus, spernere facile non valemus. Esse quidem hominem, passionibus humanæ demonstrant. Esse quoque Deum, opera miranda declarant. Negare vtrique non debemus, nos tolerare posse quæ per tulit homo. Præcepta Dei negligere non est tutum. Nullum igitur ad salutem nostram remedium fuerat opportunius, quàm hoc ipsum quod diuina clementia factum est, vt diuinum lumen sub humana specie ad nostros

ad nostros oculos perueniret. Hæc igitur Ioannes Euangelista, & similia contemplatus, postquam dixerat, Lux in tenebris lucet, & tenebræ eam non comprehenderunt, adhibuit testimonium Ioannis Baptistæ de lumine sensibus manifestū. Deinde diuinum lumen verbumque carnem indutum, inquit, suam nostris oculis gloriam ostendisse, dedisseque potestatem, ut Dei filij fieremus Spiritu sancto renati. Siquidem Deus factus iam esset homo, filiusque hominis ex homine natus. In epistola quoque magna, verbum lumenque diuinum & ipsam Dei vitam ad sensus humanos, aures, oculos, manus, descendisse testatur, ut homines per filium cum patre cœlesti feliciter iungerentur. Simile quiddam antiqui vates augurati videntur, ubi Deorum aliquem introducunt sub humana figura homines salutantem atque iuuantem. Cur autem Deus filium factum iam hominem pro hominibus sacrificari voluerit, in sequentibus cum Paulo declarabimus. Videtur etiam Plato noster nonnihil ad humanitatem à Deo assumptam pertinens, in legibus attigisse, ubi ait: Mensura rerum omnium non homo, sed Deus est, maxime vero si Deus fiat homo. Præterea interrogatus quamdiu suis legibus acquiescendum esset, respondisse fertur: Donec aliquis sacratior homine in terris appareat, qui fontem omnibus veritatis aperiat, quem denique sequantur omnes. Denique si quærat, quomodo humanitas in Christo diuinitati coniuncta sit, respondet Athanasius, quasi quo pacto in homine quouis corpus animæ. Aquinas verò Thomas, quomodo inest lingua. Non enim Deus sit naturalis quædam humanitatis forma propriè, sicut anima corporis. Sed humanitas sit proprium coniunctumque instrumentum ad Dei miracula, id est, ad opera Dei propria mirabiliter peragenda. Quamquam sicut in virtute in Trinitate, ita in eiusmodi copula nulla comparatio penitus satisfacit. Omnino vero sicut neque corporis, neque linguæ augmentum vel decrementum ad animam pertinet, aut mentem, quamuis anima corpori vitales motus, & mens linguæ motus expressionis quoquomodo communicet, ita nec in Christo passionēs humanitatis diuinitatem tangunt, & si mirabiles diuinitatis actus per humanitatem celantur mirificè diuinitati coniunctam.

*De summa Epistola. De adoratione. De culta Dei spiritali. De variis sacrificiorum ritibus.*

## CAPVT IV.

**P**rimum quidem gratias ago &c.) Summæ Epistolæ est, ostendere omnes Roma fideles, siue Iudæos, siue Gentiles gratia Dei vocatos ad fidem esse, gratiaque seruandos neque prærogatiuam scientiæ Gentibus, neque priuilegium legis obseruantiaque ipsius Iudæis, quibus vtrique gloriabantur, ad diuinam vocationem salutemue sufficere, sed ambos ad vtrumque gratia Dei pariter indigere. quod potissimum inde patet, quia vtrique cum ipsis suis prærogatiuis in vitia horrenda ceciderant.

Quæ quidem grauiter increpaturus, lenit eos inprimis, dilectionemque suam erga eos multis modis ostendit, beneuolentiamque capiat, ut cum postea castigantem libentius audiant. Principio igitur narrationem quidem ab oratione, orationem vero exorditur à gratiis, ac dum orat ipse, interim orare nos docet. Monet enim ut primo quidem gratias agamus, Deinde verò petamus. Sed quidnam & quomodo postulemus? Spiritualia videlicet bona, Spirituque in Deum prorsus erecto, non pro nobis tantum, sed pro cæteris, & id quidem sedulo. Atque cum hac duntaxat conditione, si votum nostrum diuinæ volūtatī placuerit. Incipere autem à Deo, Plato etiam in Epistolis ita præcipit. Principium in omnibus à Deo faciendum est, agendi atque cogitandi. Sed verba eius iterum disponamus.

Primum quidem gratias ago Deo meo. quod enim creditis, ex ipsa Dei gratia prouenit. Deo meo, in quo omne meum posui bonum, per Iesum Christum.) Nam per quem preces, per eundem aguntur & gratiæ. Ipse enim est ad vtrumque inter Deum hominesque conciliator & medius. Pro omnibus vobis. Summæ charitatis est, alieno bono publiceque gaudere, quasi proprio. quia fides vestra annuntiatur in vniuerso mundo. Paulus strenuus Christi miles illius gloriæ in primis congratulatur. Romanæ ecclesiæ fides, quoniam caput orbis, per vniuersū prædicebatur, omnibus exēplo futura, Aduerte Christi fidē passim iam diuulgatā. Nā in omnē terram exiuit son⁹ eorū. (Testis enim est mihi de⁹, cui seruo in spiritu meo in Euāgelio filij eius. Hic vero testem adducit Deū, secretæ orationis sue pro Romanorū fide firmāda.

Cui quidem Deo seruit Apostolus, non in ceremoniali Iudaicæ legis obseruatione, sed in spiritu, non quidem affectu solo, sed etiam Euangelicæ prædicationis effectû, appellant autem Euangelium filij Dei, quoniam à Dei filio reuelatum, & de vtraque illius natiuitate æterna scilicet, temporalique tractat.

(Quod memoriam vestri facio sine intermissione semper in orationibus meis.) Quotiescunque oro, pro vobis etiam oro, Et quomodo? Quo videlicet modo pro me atque charissimis, scilicet sine intermissione, id est, continua prorsus attentione pro eo ipso tempore, quod orationibus destinaui. Similiter Thessalonicensibus præcipit. Sine intermissione orare. Id est summa in Deum attentione orare. Cauentes interea ne distrahamini.

(Obsecrans & si quo modo tandem aliquando prosperum iter habeam in voluntate Dei venire ad vos.) Atque in hac memoria præ cæteris obsecro, vt si modo diuinæ voluntati placuerit, ad vos veniam, saltem post longum tempus, & quomodo-cunque etiam cum labore, modo sit iter prosperum, id est, vt tandem perueniā, atque profim. Sed in primis si Deus velit. Quum enim caput adiuuat, omnia membra iuuat. Fortè vero ob vehementius visendæ huius ecclesiæ desiderium, captus Hierosolymis Cæsarem appellauit.

(Desidero enim videre vos, vt aliquid impertiar vobis gratiæ spiritualis ad confirmandos vos.) Id est, simul consolari in vobis per eam quæ inuicem sit in fidem vestram atque meam. Quid vero postremo desiderat? vt mirificam Spiritus sancti gratiam pro eorum facultate illis impertiat, ne in materiis, sed in spiritu Deum colant. Modeste vero loquens inquit, ad confirmandos, quasi sine illo non parum iam profecissent. Ad confirmandos inquam in fide. Per quam mutua spes augeatur, & charitas, mutux videlicet consolationi futura. Per fidem, inquam, quæ inuicem est, id est, communem.

(Nolo autem vos ignorare fratres, quod sæpe proposui venire ad vos & prohibitus sum vsque adhuc, vt aliquem fructum habeam in vobis, sicut & in cæteris Gentibus.) Postquam dixerat se desiderare atque insuper obsecrare Deum, vt Romam accederet, nunc addit, ob maximum desiderium se iter sæpius tentauisse. Itaque grauissima quædam causa iam assignanda est, ob quam non venerit. Nulla vero est granior quam diuina. Inquit ergo: Prohibitus sum. Iam vero cum supra dixerit, se

optare voluntatis diuinæ consensum, & nunc grauissima causa significet se esse prohibitum nec aperiatur, Deo prohibitum intelligitur, volente videlicet oportunas aliquid Paulum interea facere. Non enim dixit impeditus, ne fortè tempestate, negotiisue detentum existimares. Socratem scribit Plato, diuersa tentantem, sæpe à genio fuisse prohibitum, prouocatum verò nunquam. Diuinior certè causa ducit Apostolum, aliàs quidem vetans, aliàs vero prouocans. assignat autem rursus vehementis desiderij causam, scilicet vt aliquem fructum habeam in vobis, scilicet, vt vos spiritalem fructum feratis, atque ego referam. Sicut & in cæteris Gentibus, quasi dicat, si membra iuuui, multo magis inuare debeo caput orbis, & vos à me sperare fructum, quem & alibi protuli, nec ego beneficii mei gratiam à vobis expeto, quia vobis & omnibus debitor sum, iubente Deo.

(Græcis atque Barbaris, sapientibus & insipientibus debitor sum. Itaque in me promptum est, & vobis qui Romæ estis euangelizare.) Beneuolentiam multipliciter demonstrauit atque captauit. Sed cum Græce scribat, hic Græcorum more, præter Græcos, omnes Barbaros appellauit. Iusserat enim Deus, vt portaret nomen suum coram omnibus Gentibus & regibus & populis Israël. Itaque Corinthiis inquit. Væ mihi si non euangelizauero sapientibus & insipientibus. Etiam doctos docere audet, & rudes erudire dignatur. Si autem quod omnibus debeo vobis reddidero, gratiam à vobis nullam posco. Quod in me est, quantum ad voluntatem meam pertinet, quandocunque Deus voluerit, ad eiusmodi officium sum propensus. Inquit autem in superioribus in spiritu seruire se Deo, quia Christus ait, veri adoratores in spiritu & veritate adorant. Quia Deus tanquam spiritus & veritas, sit in spiritu & veritate colendus. Quibus in verbis Christus & Paulus materiale cultum vel improbant, vel minimè probant. Apollonius Thianeus Pythagoricus, item Iamblichus Porphyriusque Platonici, species quinque cultus esse disputant, pro quinque speciebus spirituum qui coluntur. Spiritus enim infimos crassum aërem habitantes, sacrificiis ex frugibus animalibusque coli solitos. Spiritus autem purum aërem incolentes, vaporibus sonisq; & cantibus atque luminibus. Ætherea vero numina orationibus luminibusq; simul. Sed intellectus à corporibus separatos intelligentiæ viribus atque moribus.



Horum denique patrem excessu quodam mentis, & ineffabili voluntatis affectu. Iamblichus inter hæc damnat Ægyptios, quod materiali cultu præ cæteris viceretur, æriorumque dæmonum cultores essent. Anteponebat autem iis Chaldaeos, qui spiritalem cultum potius sequerentur, utpote qui separatas à materia mentes patremque earum præcipuè colerent. Hæc quidem illi viderint. Nos autem ne longè digrediamur; Reuertentes ad Paulum, præcipuum esse cultum orationisque modum dicimus, qui spiritu, id est, intelligentia & voluntate per charitatem in Deum erecta perficitur. quod autem communiter traductum est, ut aliquid impertiar vobis gratiæ spiritualis, ita etiam interpretari licet, ut aliquid vobis gratiæ donum impertiar. Nam charisma in Epistola ad Corinthios donum Spiritus sancti significat. Ostendit autem hic Apostolus Romanos ultra fidem, quæ & ipsa Spiritus sancti donum est, indigere duobus præterea donis, scilicet, intelligentia atque charitate, quibus tanquam lumine simul atque odore fides eorum confirmetur, id est, stabiliatur atque roboretur, viuæque & operetur, ut viuæ quæ hæcenus tanquam obscurior atque frigidior & vacillabat, & tanquam exanimis non satis agebat. Arguit enim eos quasi ceremoniis materiisque deditos, nec dum charitate flagrantes. Hinc ergo desiderat profundiores quosdam scripturarum sensus diuiniorumque cultum illis tradere & charitatem ardentior in eis accendere, per quæ quidem Spiritus sancti dona, quæ & ipse gratis acceperat, proueniat spiritualium donorum effectus ille mirificus paraclesis cum paraceto congruens, scilicet consolatio animi recreans atque fouens lumine, scilicet & calore, & nullis aduersitatibus perturbetur. Idque futurum promittit per fidem ipsis communem, hæcenus quidem Romanis inchoatam, tunc vero perfectam, fidem inquam, in ambobus ad Deum quidem utrinque directam per charitatem bona inuicem operantem. Proinde nisi proximitatem verere, de luminis & caloris virtute differerem. Quemadmodum illud quidem sensibus monstrat omnia omniumque imagines efficit. Hic autem recreat, atque generat omnia, tantoque charitatem quasi calorem intelligentia quasi luce meliorem esse, quanto melius est efficere quam ostendere, & res ipsas generare, melius quam rerum similitudines ostentare. Denique quanto nobis optabilius est foueri calore, quam lumine de-

lectari. Quapropter in symposio Plato noster inquit, mentem nostram denique per amorem cum diuina mente coniunctam ipsas rerum ideas virtutesque non modo spectare, sed in seipsa iam generare. Siquidem vis amoris vnifica genitrixque existit, sed de his ubi de charitate in Epistola ad Corinthios prima differetur, opportunius disputandum.

*De virtute Euangelij, fide gemina, charitate  
Quomodo differant, dubium, opinio,  
scientia, fides, de cultu Gemini-  
lium, de lege Moisaica.*

## CAPUT V.

**N**on enim erubesco Euangelium Christi, virtus enim Dei est in salutem omni credenti, Iudæo primum & Græco. ) Audiuerat præceptum illud Seruatoris apud Lucam: qui erubuerit me & meos sermones, hunc filius hominis erubescet. Euangelij prædicationem tria impedire posse videntur, pericula, labores, ignominia. Cum non Paulus pro Christi gloria nec pericula timuerit, nec labores recusauerit, nimirum nec ob suspicionem ignominiae vilius erubuit. Quippe cum sciret Euangelium non esse rem debilem vel humanam, sed diuinam virtute refertam, scilicet, sancto Spiritu Euangelij præcones vaticiniis & miraculis muniente. Similia Paulus Corinthiis inquit. Prædicamus Christum crucifixum Iudæis quidem scandalum, Græcis vero stultitiam. Ipsi autem conuersis Iudæis atque Græcis Christum Dei virtutem & sapientiam. Item verbum crucis, quamuis per euentibus stultitia sit, nobis tamen virtus Dei est, quoniam non videbatur erubescere Christum debere aut ut vile quiddam aut stultum. Ideo dixit: Dei virtutem atque sapientiam. Iam vero filius Dei nominatur sapientia, lux & veritas, quia per modum intelligentiæ nascitur. Nominatur & virtus, quia in hoc conceptu potentia tota patris exprimitur. Vniuersum verò comprehendit Paulus ad Hebræos dicens: Portans omnia verbo virtutis suæ. Virtus autem Dei, quæ in Euangelico verbo tanquam viuente & efficaci spirat, quidnam in credentibus operatur? Diuinam gratiam & salutem. Iudæo primum & Græco, id est, omnibus, Græcorum enim nomine omnes idolorum cultores complectitur. Huius enim cultus præcipui auctores Græci fuerunt. Dixit autem Iudæo primū, non quia Iudæorum tantū vel præcipuè

gratia salutis futura sit, non enim est apud Deum acceptio personarum, quantum videlicet ad finem spectat, vel ad ea quæ omnino necessaria sunt ad finem, sed dixit Iudæo primum, quia Iudæi propter privilegium Prophetarum atque Christi, priores ad salutem properare debent, cæteris exemplo futuri. (Iustitia enim Dei in eo reuelatur ex fide in fidem, sicut scriptum est, iustus ex fide viuit.) Diuina virtus in Euangelio per tres potissimum gradus ad salutem felicitatemque perducit, per fidem quasi geminam atque iustitiam. Credendum enim est, non solum Prophetis Christum prædicentibus venturum, sed etiam Apostolis affirmantibus iam venisse. Credendum verbis, credendum similiter & operibus, nec sola fides habenda est, & simpliciter, sed fides ipsa quam charitas comitans facit vitam & efficit operantem. Auditor igitur Euangelij, hac quasi gemina fide præditus, ipsam Dei iustitiam assequi iudicatur beatitudinis effectricem, non humanam duntaxat decretis mortalium institutam, nec illam, inquam, apud Iudæos ceremonialium legum obseruatione cõtentam, sed Euangelicam spiritali veritate constantem. Lex Mosaica data diuinitus, per obseruationem sui ad iustitiam perducebat, non tamen ad ipsam potissimam Dei iustitiam. Data enim erat mancipiis, rudibus, atque pertinacibus potius, pro eorum modo ad tempus quoque videlicet ita disposito, quam pro voluntate præcipua Dei. Iustitia vero Dei per legem Euangelicam reuelatur. Propheta Abacuc eiusmodi iustum, inquit, hac fide iustitiaque iustum factum, iam diuina quadam vita viuere. Iustitiam sacræ literæ virtutem significant vniuersam, quam Aristoteles legalem iustitiam nominauit, & Plato in legibus præcipuam legum intentionem. Iustitia enim eiusmodi est obseruatio legum, leges autem vniuersam virtutem spectant atque præcipiunt. In Republica confirmat idem dicens: Iustitiam esse harmoniam totius animæ ex omnibus simul virtutibus resultantem. Hanc iustitiam neque Gentiles neque Mosaica lex penitus consummauit. Nam & Gentilis pro hominum opinionibus, & Mosaica pro natura & consuetudine populi promulgata videtur. Euangelica vero lex ad iustitiam, id est, vniuersam virtutem perducit, non civilem duntaxat, sed purgatoriam atque potius animi iam purgari. Secundos quidem animi motus eradicans, primos quoque pro viribus amputans, idque totum Dei gratia faciens. Qua-

tuor hæc inter se differunt, dubium, opinio, scientia, fides. Qui dubitat in, alteram partem æquè versatur. Qui autem opinatur, ad alterum quidem oppositorum potius inclinatur, sed interea quodammodo vergit ad alterum. Scientia vero vni extra controuersiam cum ratione consentit, sed fides ad vnum proculdubio auctoritate dirigitur. Fides autem, quasi duplex, vt dixi, consideratur, aut enim in formis, aut charitatis feruore formata, & si in formis atque formata fides eadem forsitan esse potest, tamen ita demum virtus est, si charitate formetur. Quod in superioribus diximus idololatriam à Græcis esse profectam, Plato noster in Cratylo confirmat. Exponens enim deorum nomen Theous Græcè, id est, currentes, ideo appellatos ait, quoniam veteres ab initio stellas, quæ semper mouentur, adorauerint tanquam Deos. quoniam vero pro stellarum ordine appellationeque in aëre quoque dæmones coluerunt, homines præterea nonnullos stellarum dæmonumque certo quodam, vt opinabantur, influxu progenitos, his consequenter simulachra & sacrificia quædam propria dicaerunt, ex quibus vniuersa idololatria cõstat. Item legem Mosaicam quasi non penitus absolutam, sed pro capacitate suscipientium datam, non solum Dominus in Euangelio emendauit, sed Socrates etiam atque Plato. Quod enim illa vindictam permittit æqualem iniuriæ propter sauitiam iudæorum, hi Philosophi in Critone, Gorgia, Republica, Epistolisque emendant, omnem videlicet priuatam vltionem penitus comprobantes. Iam vero Socrates percutienti genam alteram obtulit. Non dixit Euangelium esse ex diuina virtute, sed Dei virtutem esse. Quod & Corinthiis confirmauit, dicens: Verbum crucis Euangelium Dei virtus est. Virtutem verò Dei sæpe Christum nominat, vt Christum prædicamus Dei virtutem & Dei sapientiam. Cum igitur Euangelium nominat Dei virtutem, dicere videtur Euangelium esse Christum, nempe Christus est Dei verbum, humanitate vestigium, sanctificante spiritu. Euangelium quoque siue in meditatione, siue in voce, siue in scriptis, Dei verbum est, prolatum quidem afflante spiritu, sed humana meditatione, vel voce, vel scriptura vestitum, videtur autem eiusmodi copula diuini verbi cum eiusmodi corpore non solum in Apostolis, sed etiam in Prophetis ab initio extitisse, vt tota diuina scriptura per sanctum spiritum de Christo lo-

loquens, quasi ipse sit Christus, vbiq; vi-  
uens & spirans in omnes, qui vehemen-  
tiore quodam affectu legunt, audiunt, me-  
ditantur. Quapropter Paulus clam hic ad-  
monere videtur, vt ad Euangelium cum  
summa reuerentia, feruè sicut ad Eucha-  
ristiam, accedamus.

*Contra Gentiles, quomodo Deo ingrati, & de  
impietate, & quomodo diuino lu-  
mine Deum cognouerint.*

## CAPVT VI.

**R**euelatum &c.) Romanis hæcenus  
salutem dixit, optauit bona, præci-  
puè gratiam atque pacem, demonstrauit  
ingentis erga illos charitatis affectum, vi-  
fendi desiderium diuturnum, dilationis  
longæ causam, firmum in Euangelio in-  
stitutum, Euangelij denique salutare pro-  
missum. Cum igitur beneuolentiam ab  
his captauerit, salutaribusque promissis pa-  
rituros mirificè fuerit consolatus, iam mi-  
nis ac terroribus pertinaces aggreditur, &  
primo quidem Gentiles corrigit, deinde  
Iudæos. (Reuelatur enim ira Dei de cælo  
super omnem impietatem, & iniustitiam  
eorum hominum, qui veritatem Dei in in-  
iustitia detinent.) Impietatem, id est, di-  
uini cultus præuocationem. Iniustitiam,  
id est, vniuersam præuitatem inde profe-  
ctam. Veritatem Dei, id est, Dei notitiam  
diuino lumine habitam. Iniustitia, id est,  
ingratitude detinent, vt in luto thesau-  
rum. Vide quam consequenter singula  
singulis opposita reddat, nempe in supe-  
rioribus dixerat, in Euangelio virtutem  
vigere diuinam, salutem credentibus af-  
ferentem, dum in ea reuelatur iustitia Dei  
per geminam fidem, scilicet, per pietatem  
proculdubio comparanda. Hic verò con-  
sequenter infert, diuinam iram in Euan-  
gelio reuelari de cælo venturam vlticem,  
scilicet, impiorum iniustorumque, vide-  
licet in fide, & charitate opera delinquen-  
tium. Potissimum vero contra illos, qui  
veritatē in Dei iniustitia, id est, ingrati-  
tude detinent. Qui, scilicet, ingenio &  
doctrina, & philosophica facultate cæte-  
ris excelluerint, nihilo vero minus ingrati  
Deo fuerint. Quippe cum naturale lumen  
eorumque philosophicum à Deo tribu-  
tum, tanquam iniusti Deo, vt par fuerat,  
non reddiderint. Propterea quod Deum  
hoc lumine cognitum, non rite colue-  
rint. Tales autem Gentiles Græcique  
potissimum extiterunt. Appellauit autem  
iram Dei graue supplicium, si Deus irasci

posset, ira grauissima inferendum, Deus  
peccatores quidem curabiles affligit, tan-  
quam medicus gratia sanitatis, incurabi-  
les autem irati more cruciat, vt disperdat.  
De cælo inquit, duplici forsitan ratione,  
& quia Christus promittitur ad iudicium  
de cælo venturus, & quia sicut ordo coele-  
stium Deum illis ostendit rectius veneran-  
dum, sic & cælum postremò Deum vindi-  
cem patefacit. Omnino vero quotidia-  
num iudicium sub figura iudicij postremi  
significat, vt magis terreat impios. In-  
quit autem omnem impietatem, quia  
multæ sunt species impietatis, quas Plato  
in decimo legum enumerat latius, & ef-  
fulminat. Impios sane vocat eos, & qui  
Deum esse negant, & qui affirmato Deo  
auferunt prouidentiam, & qui Deum pro-  
uidere quidem fatentur, sed delictis ira-  
tum non tam poenitentia purgationeque  
mentis humanæ, quam sacrificiis mune-  
ribus, placari putant. Has autem opinio-  
nes impias Plato dignas venia minimè  
censet, nam & quamuis per ignorantiam  
quadam tam male de Deo sentiant, ipsi  
tamen vel per negligentiam, vel per ebrie-  
ratē quandā ex animi perturbatione pro-  
fectam, ignorantiz suæ causam præbue-  
runt. Quod enim deceat in diuinis, præter  
lumen intimum, & leges tam ciuiles quam  
sacræ, & insignes Philosophorum scholæ  
palam vbiq; docent. Proinde quemad-  
modum nihil acceptius Deo, quam diuina  
rectè colere, ita nihil detestabilius, quam  
in ipso diuinorum cultu præuocari, in  
quo Gentiles maximè deliquerunt. Inquit  
autem, detinent, quia lumen naturæ di-  
uinitus insitum in ingratis superbisque re-  
manet, vt quod fuerat index, postea sit  
& iudex, quodue puris oculis fuerat salu-  
tare, noxium sit impuris. At vero ne for-  
te præuocationem suam ita defendant,  
quonam modo potuimus celebrare, quæ  
ne cognoscere quidem possumus? Apo-  
stolus obiectionem ita dirimit, quia quod  
notum est Dei, manifestum est in illis, deus  
enim illis manifestauit. Quod enim supra  
dixerat veritatem Dei, hic appellat, no-  
tum Dei, scilicet, quod verè de rebus di-  
uinis hominibus naturaliter notum esse  
potest, quod & ad rectum cultum sufficit  
diuinorum, id ipsum profecto fuit Genti-  
libus manifestum, atque vt ad eiusmodi  
cultum arctius eos obstringeret, mox ad-  
iunxit, non tam industria operaque mor-  
talis quā ipsemet Deus ipsis manifestauit.  
ait autem non tam illis quam in illis, vt de-  
claret, sufficiens ad diuinorum notitiam lu-  
men mentibus ab initio diuinitus insitum.

Quis ostendit nobis bona? signatum est super nos lumen vultus tui Domine. Omnem diuinorum veritatem diuino quodam lumine intrinsecus patefieri, in Theologia nostra rationibus Platonice demonstrauimus, præsertim à septimo de Republica sumptis, vbi traditur à Platone, sicut oculus solis beneficio solaris, id est, luminosa, videt, sic animus diuina ipso Dei lumine percipit. Hinc & in Epistolis Platonice illud: Ex diuturna diuinorum meditatione, subito tandem, velut ab igne scintillante, lumen effulget in mente, seque ipsum iam alit. Hinc Iacobus, omne veritatis lumen desuper, inquit, à patre luminum prouenire, à patre qui illuminat, vt Ioannes inquit, omnem hominem venientem in hunc mundum. Dicitur autem: Deus manifestauit, quoniam communem notitiam diuinorum Deus ipse sicut Iudæis reuelauerat per Prophetas, ita Gentibus manifestam effecerat per Philosophos. Hinc quidem effectum est, vt & Iudæi Prophetis, & Gentiles philosophis frequenter gloriarentur, & inanem vtrorumque iactantiam, in hac Epistola Paulus castigauerit. Iamblichus quoque Platonice artium liberalium inuenta Diis attribuit, platonem in Timæo sequutus, dicentem, philosophiam donum esse Deorum, notitiamque Deorum atque demonum ad nos per antiquos Theologos descendisse, quibus quidem ob familiaritatem, quasi Dei filiis, suorum notitiam Deus ipse concesserit, multi philosophos spernunt omnes, quasi opinione sola scientia veronulla nitantur, paulus autem, scientiam illis multam concedit, etiam diuinorum, sed superbiam & ingratitude accusat.

*Quomodo inuisibilia Dei per visibilia cognoscantur. Quomodo trina penes Deum causa, & de triplici cognitione diuina quasi cælo trino.*

## C A P V T VII.

**I**nuisibilia enim Dei à creatura mundi per ea quæ facta sunt, intellecta conspiciuntur. Si forte quæras quomodo Deus philosophis, perque philosophos Gentibus suam aperuerit veritatem, respondet paulus duobus præcipue modis, per intelligibile lumen atque sensibile, per intelligibile, inquam, mentibus naturaliter infusum, & vt in Republica inquit plato, quotidie etiam superfusum. per sensibile quoque lumen, in quo pulcherrimum mundi ordinem artificiumque mirabile mentibus

per oculos offert, euidentissimum diuinorum diuinitatisque testimonium, præsertim in stupendo cœlestium splendore & ordine constitutum, quo quidem cœli enarrant gloriam Dei. Mitto nunc quomodo lumen etiam hoc oculis manifestum incorporeum quiddam sit atque diuinum, & quomodo per hoc, quasi vestigium quoddam, ad inuenienda diuina Deumque vnum, progredi liceat, hoc enim in libro de Sole lumineque tractauimus. Perfecto Paulus vbi dixit, manifestum in illis, & vbi dicit, intellecta, lumen primum videtur attingere; sed vbi ait, per ea quæ facta item conspiciuntur, secundum lumen significare putatur. Sed quænam inuisibilia Dei significat? Intellectuales forte substantias quæ & nullo sensu vel interno percipiuntur, & sunt Dei solius effectus. Eiusmodi sanè substantias non solum Platonice, sed etiam Peripatetice, per mundanarum sphaerarum motum atque ordinem cognouerunt. Hæc autem corporea facta dicuntur, quia ex materia composita sunt, intellectuales verò substantiæ, non tam factæ quam ex nihilo creatæ putantur, huc forsitan tendit illud, opera manuum eius annuntiat firmamentum. Præterea inuisibilia Dei dicuntur exemplaria rerum omnium in ipso Deo, quæ & sensum & imaginationem prorsus exuperant. quod quidem ad Hebræos paulus ita significare videtur. Intelligimus aptata esse secula verbo Dei, vt ex inuisibilibus visibilia fierent. Nempe in ipso intelligentiæ diuinæ conceptu ideales omnium eorum rationes extendunt, fecit enim cœlos in intellectu. Ex his ideis, velut exemplaribus visibilia omnia sunt effecta, vt ipsæ merito philosophicæ tanquam per imagines cognoscantur. Duo quidem sæcula sunt æternitas atque tempus. Verbum igitur, id est, diuina ratio, rerum artifex, ita hæc sæcula coaptauit, vt ab æternis temporalia dependere, item vt imagines idearum in æternitate micantium in temporali seculo refulgerent. Dicit autem, intellecta conspiciantur, nam animus cum primum per sensum iam monitus contemplatus est ideas, mox ad sensibilia ista reuertitur diligentius, & maiori cum admiratione quàm ante, conspicienda à creatura mundi, nisi addidisset, mundi, forsitan interpretari licet ab homine, quoniam in eo sit omnis creatura, neque id quidem satis aptè. Cum vero dicat, à creatura mundi, aptius exponemus, ab ipso mundi exordio ingenia philosophica per artificium mundanum, vbi que mirandum capisse diuinam

artem ( quæ hæc omnia pulcherrimè disposita sunt ) prorsus inuestigare, vt diuinorum notitia non noua sit hominibus, sed antiqua. Plato noster in Prothagora disputat, ante omnes artes ab initio rerum homines propter quandam cum diuinitate cognationem, notionemque intimam incepisse augurari Deum, atque venerari diuina. Præterea in Timæo à creatura, id est, effectiōe mundi, ita fermè Deum inuestigauit. Mundus profectò cum sub sensu cadat, ideo essentiam non omnino profectam habeat. Merito à causa quadam superiore dependet, & hoc vnum opus à causa tandem vna, & pulcherrimum à sapientissima, & pro viribus optimum ab ipso bono, & quoniam artificiosissimè compositum est ab arte summa, exemplarique exacto, penes causam existente. Nos igitur in Commentariis in Timæum ex hoc opificio tres apud Deum causas operis indagamus. Ex magnitudine quidem machinæ, motu celerrimo perpetuoque, mirabilibus rerum quasi innumerabilium viribus admirandam in causa virtutem atque potentiam. Ex ordine miro artificiosaque pulchritudine sapientiam prouidentiamque prorsus incomparabilem. Ex cōmuni rerum commoditate omniumque ad bonum velut ad finem directione prouidam & mirificam bonitatem. Tria hæc igitur, potentia, Sapientia, Bonitas, vt placet Theologis, attributa patrem & filium sanctumque Spiritum repræsentare videntur. Diuinam quidem potentiam præcipuè dicimus mundi causam effectricem, sapientiam consequenter operis huius exemplar, bonitatem denique finem. Triplicem hunc ordinem causæ penes Deum Plato noster regi Dionysio declarauit, exemplar quidem dum inquit, ex ipso & per ipsum, & in ipsum omnia. Ex ipso efficientem, per ipsum exemplarem, in ipsum finalem causam nobis exprimens. Quamobrem in præsentia tria hæc attingens, causam prius affert exemplarem, dicens: Inuisibila Dei, id est, intelligibiles rerum ideas per visibilia earum in mundo simulachra coniectari. Deinde efficientem penes Deum causam, vbi ait sempiterna quoque virtus. Postremò finalem dum addit atque diuinitas. Sempiterna virtus, id est, infinita potestas, quam Philosophi etiam Peripathetici ex perpetuo omniformique ingentium machinarum motu perscrutari videntur. Platonici quoque rationibus multis, quas in Theologia & in Platonem Commentariis explicamus. Diuinam Paulus bonitatem, quate-

nus rerum omnium finis est, omnibusque prouidet, diuinitatem appellare videtur, quia summa rerum causa finis est, vt Plato probat, præcipuumque nomen Dei bonum, vnde diuinitas dicitur, id est, bonitas, & bonum, vt inquit Aristoteles, commune diuinum. Non utique dicimus philosophos Deitatem ipsam ex operibus inuenisse. Hæc enim est ipsa Dei substantia, illis adhuc ignota, sed diuinitatem, id est, beneficam prouidamque per cuncta diffusionem, & segregatam interim excellentiam. Proinde triplicem de Deo cognitionem, quasi cælum trinum, vt in libro de raptu pauli scribimus, esse putamus. Nam aut Deus in rebus agnoscitur, aut cognoscuntur res in Deo, aut Deus in se ipso cognoscitur. Modos itaq; duos, cælos quasi duos, philosophi possedisse videntur. Nam & quantum diuinitatis sit in mundo, & quæ ratione mūdi exēplar exprimat in Deo, hætenus comprehenderunt. Quid autem ipse Deus in se ipso sit, & plato in parmenide confitetur ignotum. Idemque Dionysius Areopagita confirmat, & solus paulus raptus ad tertium cælum est assequutus. Inuestigandum nobis diligentius erit, cur dixerit, intellecta conspiciuntur, videbatur enim potius dicendum, conspectu intelliguntur, nam per aspectum ad intelligentiam peruenitur, videtur autem paulus hic attingere, quod & Corinthiis inquit, videmus nunc per speculum in ænigmate, tunc vero facie ad faciem. Hic igitur exponendus ita videtur, intellecta perspiciuntur, id est, quando intelliguntur hic à nobis per modum visionis in speculo cognoscuntur, nam καὶ ὁραται ita significat. Plato plotinusque res veras esse duntaxat ideas existimant, formas autem naturales rerum verarum, id est, idearum imagines esse, ex influxibus inuisibilium idearum in ipsa mundi materia quasi speculo resultant ad sensum. Quarum aspectu vides homines ita falli vt res veras existiment, perinde ac si infantes imagines apparentes in speculo pro rebus omnino veris accipiant. Hinc forte Salomon materiam vnitatem vocat, vnitatem ostentatricem, & omnia vnitatis, id est, omnia fallunt, iudiciumque vanum reddunt atque falsum. philosophi verò, præsertim platonici, formas in materia mundi considerantes, agnoscunt eas esse similitudines idearum, vt viri per imagines in speculo, si modo sint in speculo, animaduertunt totidem à tergo res esse. Ad quas quidem ideas in alia vita conuertentes vultum, perspicaciter, vt inquit paulus, facie ad faciem con-



templantur, itafermè cum propheta clau-  
trantes, Domine Deus virtutum conuerte  
nos. Illumina vultum tuum super nos, &  
salui erimus.

*Inexcusabiles qui Deum cognitum non leu-  
runt. Quomodo vani stultique eua-  
serint. Cur alia & quomodo  
præter Deum coluerint.*

## C A P V T VIII.

**I**Ta vt sint inexcusabiles.) Præter tres il-  
las impietatis species, quas narrauimus  
in superioribus, Platonica lege damnatas,  
Paulus quartam prosequitur contra Gen-  
tiles apud eos crebram & nulla venia di-  
gnam. Siquidem hanc ignorantia de-  
fendere minime liceat. Apud hos enim  
non Leges solum, sed etiam Philosophi  
Deum vnum omnium conditorem singu-  
lis prouidentem, principium rerum atque  
finem aptissimè celebrant, vt hoc ignora-  
re nemo debuerit, nisi vel ultro negligenti-  
ssimus, vel sponte animi perturbationi-  
bus ebrius, quibus plane quasi voluntariis  
ignorantiæ nostræ culpis iustus Iudex nul-  
lus ignouerit, propterea dixit, istos inexcusabiles. Quia cum Deum cognouissent  
&c. Cognouerunt sanè non solum ipsi  
philosophantes, sed populi etiam à legi-  
bus philosophisque instructi. Cognoue-  
runt inquam, si omnia sunt ex primo,  
summo iure, primo cuncta reddenda. Si  
etiam tendunt ad primum velut ad finem,  
illi merito dedicanda. Illud in cunctis, &  
præ cæteris venerandum. Illius gratia om-  
nia cogitanda, petendaque similiter &  
agenda, si ab illo omne veritatis lumen,  
eidem omnis inuentionis veræ gratia re-  
ferenda, si ab eodem omnia bona, merito  
huic soli vel potissimum nos obnoxios esse  
fatendum. Quamobrem Paulus quartam  
impietatis speciem acerrimè detestatur,  
quando quispiam gloriam primo debitam  
ad aliud quiddam transfert, vel quasi  
Deum vel quasi diuinum. Hanc enim im-  
pietatem esse summam asserit iniustitiam.  
Siquidem quod primo omnino debemus,  
eidem hoc auferimus & aliis immeritò in-  
digneq; tradimus. Ideo subiunxit: Non fi-  
cut Deū glorificauerunt, aut gratias ege-  
runt id est, non præcipuo quodam, vt par  
erat, obsequio coluerunt. Neque luminis  
diuini, quo inuentum est, vel vilius accep-  
ti boni gratias, aut soli, aut primas egerunt,  
& quoniam de lumine modo mentionem  
fecimus, meminisse debemus, Platonem

in septimo Republica probare geminum  
mentes humanas, vel in hac vita lumina a  
Deo suscipere. Primum quidem proprium  
quidem proprium vnicuique naturaliter  
insitum. Alterum verò commune cunctis  
in qualibet mentis contemplatione por-  
rectum, quo & vera omnia, & ipsum vero-  
rum fontem intelligere valeant, sicut &  
oculi geminum habent à Sole lumen in-  
genitum atque diurnum, quo cætera vi-  
deant, atque Solem. De iis quidem in  
septimo de Republica, libroque de Sole &  
in Theologia latissimè disputamus. Apo-  
stolus igitur Gentiles increpat, quod nec  
inuentum Deum honore affectuque debi-  
to prosequuti fuerint, neque luminis quo  
inuenerant gratias vllas egerint. Denique  
verus Dei cultus est, Deum cogitare fre-  
quenter, propter seipsum ardentem amare.  
In omnibus agere gratias & orare, totam  
vitam ad illius voluntatem imitationemq;  
componere, quod quidem Gentiles mini-  
mè perfecerunt. Exteriores vero ceremo-  
niæ non ipsæ cultus sunt, sed indicia cul-  
tus, sed euauerunt in cogitationibus suis.  
Quod Latine scribitur cogitationibus,  
Græce habetur *λογισμῶν* id est, exco-  
gitationibus vel argumentationibus & dis-  
cursionibus atque syllogismis. Euanesce-  
re autem hic, vt ita dixerim, superbire & ina-  
niter gloriari & delectari significat. Id ve-  
rò totum summam duobus modo propo-  
sitis aduersatur, est enim contra illud quod  
dicitur, glorificare, rursusque gratias age-  
re. Philosophi namque communiter post-  
quam vniuersi ordinem mente complexi,  
ex hoc vnum ordinatorem omnium asse-  
quuti sunt, consueuerunt vniuersa hac in-  
uentione quasi suo quodam foetu pulcher-  
rimo nimium blandiente, mirificè dele-  
ctari, hunc ardentem amare, in hoc velut  
fine penitus conquiescere, quod quidem  
superbum illud Luciferi facinus repræsen-  
tare videtur. Nam ob nimium sui concep-  
tus amorem atque gaudium, quasi obli-  
ti sunt venerari Deum, inuentionisque tan-  
tæ authori gratias agere. Interea suis con-  
fisi viribus, quasi industria sua quæsiuerint  
& inuenerint, potius quam luce & ope  
concessa diuinitus, perinde ac si quis quod  
sub Luna plena videt, non agnoscat se So-  
lis lumine perspexisse. Huc forsitan tendit  
illud: Dies diei eructat verbum, id est, di-  
uinum lumen piæ menti dictat inuentionem,  
nox nocti indicat scientiam, id est,  
pro confidentia sui, ingratitude suadet,  
suis viribus scientiam, adipisci forte etiam  
nocturna diaboli confidentia, ingrati-  
tudinem obscuramque opinionem nostri

nobis adanger. Et obscuratum est insipiens cor eorum sicut oculus à Sole se auertens euadit obscurus, Solis videlicet splendore priuatus, sic intellectus sui ipsius amore gaudioque distractus à Deo, promissum illud beatum gratiæ lumen non reportans, obscurus euadit, ob humanæ sapientiæ opinionem sapientia diuina priuatus. Omnino vero qui amorem gaudiumque suum non tam in Deo iam inuento, quam in inuentione propria collocat, nunquam ineffabile lumen gaudiumque penes Deū vigens percipere potest, neque gustat vnuquam, neque videt, quam suavis sit Dominus, neque thesauros illos apprehendit, quos abscondit Deus diligentibus se. quapropter inanis, vacuus, obscurus, insipiens iudicatur. Et si Philosophi nonnunquam opinati sunt, intelligentiæ lumen, quo Deum cernunt, se habere diuinitus, plurimum tamen gaudio, & amore inuentionis propriæ nimio, tanquam ebrii, diuinitatis verique cultus obliti videntur. Nam & si interdum leui quadam imaginatione vel verbis, nunquam tamen toto prorsus affectu Deum ipsum gratiarum actione, vel laude prosequuti videntur. Dicentes esse sapientes stulti facti sunt. Ex hoc enim ipso quod contemplatione sua, tanquam sapienti suo quodam inuento, gloriabantur, stulti facti sunt, diuinam videlicet lucem, sapientiam non adepti, vide interim decentem in verbis Pauli consequentiam. Ad id enim quod dixerat, euauerunt, consequenter pertinet, quod subiungit, dicentes esse sapientes, ad illud iterum ubi ait: obscuratum est insipiens cor eorum, oportune spectat quod modo subiicit, stulti facti sunt. Radius ab ipso Deo ad perpendiculum descendens in animum, si obliquum inæqualem reperit, per eum profilit è transuerso, neque demonstrat Deum, scilicet, inane quoddam in animo coruscamen. Vanum inquam, quia hic deest obiectum vnde venit, & finis cuius gratia venit. Sin autem nactus est animum planum penitus & æqualem, resilit in Deum protinus, capitque secum animum ad obiectum finemque suum feliciter apprehendendum, ubi mens denique Deo fruens, fruitur quoque seipsa, seipsam videlicet consequens in idea. Animus autē qui primum in seipso quiesceretentat, ob hanc iniustitiam, nec assequitur Deum, neque seipso fruitur, quia caret idea quæ verus animus est, in qua & animus reformatur. Hinc obscurus, inanis, insipiens nominatur. quod autem impius hic euestigio etiam stultus euase-

rit, euentu demonstrat Apostolus, per id quod sequitur, & mutauerunt &c. Gentilium Religionis antistites, qui & frueri Philosophi, simulque Poëtæ, non solum hoc quasi superbia ingratitudineque in Deum peccauisse videntur, sed etiam mundanorum vel bonorum amore, vel malorum timore nimio deliquisse. Cum enim sub Deo summo non solum separatos à corporibus, intellectus, quos ultra mundanos Deos nominant, inuenissent, verum etiam coniunctos coelestibus, quos mundanos Deos nuncupant, sphaeras videlicet atque stellas, dæmones quoque in aëre vel puro crasso, adorationes & sacrificia Diis mundanis potius quam superioribus, & inter mundanos potissimum dæmonibus, instituerunt atque seruauerunt, spirantes videlicet numinum mundanorum cultu, mundana quidem bona consequi, mala verò vitare. Atque ita vulgus horum etiam studiosius assuefecerunt vovere & sacrificare dæmonibus. Quippe cum etiā speraret à propinquis numinibus magisque à superioribus exaudiri, quod quidem sacrilegium ex nimia diuitiarum auaritia, quæ vitæ vitiis & libidinibus subministrant, quas & dæmones suppeditare creduntur, admodum inualuisse videtur, ut merito Paulus auaritiam Idolorum seruitutem nominare voluerit. Denique quod non solum impium, sed etiam ridiculum iudicatur, animalia multa certis, ut putabant, subiecta dæmonibus vulgo colenda dederunt. Iam vero Iamblichus & Porphyrius sacros Ægyptiorum, Græcorumque, & Romanorum ritus improbauerunt, quod corporeorum vel bonorum vel malorum gratia, corporea numina potius quam incorporea colerent, sed iam ad ipsum verborum contextum regrediamur.

(Et mutauerunt gloriam incorruptibilis Dei in similitudinem imaginis corruptibilis hominis, & volucrum & quadrupedum & serpentum.) Deum hic quidem incorruptibilem dicit comparatione hominis. Alibi verò, inquit, qui solus habet immortalitatem, quia solus per se est immortalis. Simile quiddam in Timæo Plato noster inducit, sed aduerte precor qua arte & quanta simul indignatione potentissimus Paulus Gentiles à summo ad infimum tanquam fulmen repente præcipitet. Tacuit enim quod summi Dei venerationem ad stellas dæmonesque deduxerunt, quod quidem minus mirabile fuerat, intulit autem subito gloriam primo debitam, homini corruptibili deditam.

Conquestus est etiam, quod non hominem saltem viuum adorauerint, sed simulachrum, nec solum hominis, sed brutorum, nec solum honestiorum saltem, sed serpentum. Inter hæc considera dictum circa hominem, in similitudinem imaginis corruptibilis hominis. Platonici enim & Homerus atque Maro, corpus nostrum imaginem animæ vocauerunt. Apostolus ad hoc alludens Gentiles vituperat, quod nec animam ipsam hominis adorauerint, nec saltem corpus hominis animatum, quod imago animæ nuncupatur, sed corporis similitudinem, id est, statuam picturamque honorauerint. Sed nunquid existimandum est, doctissimos illius Religionis Antistites pro nominibus talia coluisse? Nequaquam. Imò tam absurdè adorationis anas vulgo dedisse. Profecto quemadmodum in Commentariis in Platonem atque Plotinum, & in tertio de vita tractamus, sapientes antiqui mundanorum, ut aiunt, Deorum dæmonumque & numinum gradatim inde sequentium, series quasdam longas disposuerunt. Sub qualibet stella certos ibi cœlicolas, sub iis in aëre alios deinceps, aliosque dæmones, eadem scilicet proprietate cum superioribus cognomentoque præditos. Saturnios, sub Saturno, sub Ioue Iouios, & Martios atque Phœbeos, cæterosque similiter. Præterea sub Saturniis, Iouiisue dæmonibus Saturnios homines atque Iouios. Animalia rursus præter hominem ad hunc, vel alium cœlestem, vel cœlicolam, vel dæmonem pertinentia, nec animalia tantum, sed plantas etiam & metalla, & lapides quosdam superiorum proprietates saltem imaginarias habere putarunt. Et ut in præsentia mittam, quomodo Magi per inferiorum electionem compositionemque docuerint homines ad se superiora quædam cum inferioribus cōgruentia opportune deducere. Certè religionis illius Antistites, qui iidem atque Magi fuerunt, ubi templa cœlestibus & cœlicolis dæmonibusque dicauerunt, serie certa dispositas ibidem, & statuas hominum locauerunt, quos præ cæteris existimabant præcipuo quodam eiusmodi numinum influxu genitos, & munere præditos. Saturnumque hominem appellabant, aut Iouem, sub Saturno, vel Ioue cœlesti, vel ærio constitutum. Adhibebant & animalia & ligna & metalla & saxa characteresque simulachra eisdem numinibus congruentia. Fortevero animalia in primis quorum similitudines aliquis in cœlo notauerant vel effinxerant. De his autem in tertio libro

de vita latius disputamus. Præterea voluerunt, ut arbitror, nimis indulgere vulgo, & inferiorum bonorum cupido, & superstitionibus eiusmodi dedito. Qua quidem indulgentia cæcum miserumque vulgus adorandis infimis subiecerunt. Mercurius ter maximus testis est religionis Ægyptiæ patres statuas in templis arte magica fabricatas collocare consueuisse, & in eas dæmones defunctorumque animas excitare. Iam vero Orpheus, magnus religionis illius author, hymnos quamplurimos non solum cœlestibus, sed etiam dæmonibus dæmonicisque hominibus consecrauit, certasque certis subfumigationes adhibuit. Superstitiones autem multo etiam magis aniles & iniquas, & turpes introduxerunt Pontifices multi, ciuiles & Poëtæ, simul atque fortuna malis ubique dæmonibus incitantibus. Quod Porphyrius, & Iamblichus, confitentur. Iure itaque Varro, ubi tres Theologias enarrat, philosophicam & ciuilem atque poëticam, duas hic sequentes prima longè inferiores esse censet. Quamobrem cum Roma tanquam caput orbis, quo omnia confluxebant, omnes omnium superstitiones admiserit, & in templis à Græcis aquilam, ab Ægyptiis bouem & crocodilum, à Babylonis draconem, similiaque vndecunque susceperit, meritò Paulus Gentiles apud Romanos superstitiones in primis effulminat.

*Quomodo impij de culpa in pœnam & ex pœna in culpam iterum prolabantur, & quomodo Deus tradat illos in perturbationes concedatque dæmonibus.*

## C A P V T IX.

**P**ropter quod tradidit &c.) Nemo grauius miserabiliusque peccat, quam qui cum Angelo rebelli per ingratitude nem superbiamque à Deo deficit, creatore bonorumque omnium largitore. Hic enim sicut infelix angelus perpetuo peccat atque punitur. Quatenus circulo quodam à peccato in pœnam, & à pœna vicissim relabitur in peccatum. Propterea quod in hac circulari successione & pœna peccati, sæpe similiter peccatum est, produciens subinde peccatum atque pœnam. Hinc illud: Impij autem in circuitu ambulant. Hanc itaque mirabilem consequentiam Paulus serie quadam longa prosequitur, sæpe vicissim culpam repetens & vindictam. Vidisti primo ingratitude nem atque superbiam. Quicum Deum cognouissent non sicut Deum glorificauerunt aut gra-

nias egerunt. Huius subinde poenam similiter atque culpam. Sed euauerunt in cogitationibus suis. Huius iterum uitium pariter atque culpam. Obscuratum est insipiens cor eorum. Huius deinde vindictam similiter atque peccatum. Dicentes esse sapientes. Huius quoque supplicium iterumque delictum. Stulti facti sunt. Ob quam stultitiam mutauerunt gloriam incorruptibilis Dei & quæ sequuntur. Quæ quidem commutatio tanquam peccatum, iterum detestabile subsequentes meretur poenas pariter atque culpas. Propter quod tradidit illos deus in desideria cordis eorum in immunditiam. Non autem legendum est, tradidit in desideria, sed in desiderijs, id est, quando desiderant, tradit eos in immunditiam. Sic enim græcus textus habet. Tradidit, inquam, non inferendo malitiam, sed gratiam subtrahendo. Merito qui Deum pro inferioris amore reliquit, à Deo desertus est, & sub inferioris conditione relictus. Hic illud Augustini nostri præterire non possum: Manifestum est, Deum operari in cordibus hominum ad inclinandas eorum voluntates quocumque voluerit, siue ad bona pro misericordia sua. siue ad mala pro meritis eorum, iudicio utique suo aliquando aperto, aliquando occulto, semper autem iusto. Sed siue inclinationes eiusmodi Deus tantum permittit, ut supra tetigimus, siue nonnunquam quodammodo moueat, Aurelio teste, omnino diabolicis & superbis, peccatum in poenam & poena relabitur in peccatum. Quod autem Augustinus dicit, Deum aliquando mouere inclinatione ad malum, intellige equidem non ad malum culpæ, sed poenæ, & si utrumque sit coniunctum, ad malum quia ratione est supplicium, non quia peccatum. Tradidit ergo Deus ingratos superbosque eiusmodi, in desideria cordis eorum, id est, permisit saltem, atque concessit, ut animi ab ipso rebelles rebellionem sensuum ipsi quoque sentirent, & perturbationibus sæpe intolerabilibus supplicio iusto succumberent. Et qui Dei gloriam ad bestias transfulerunt, ipsi præcipitarentur in bestias. Inquit igitur non in desiderium sed in desideria. Quoniam turba perturbationum in sensu est quasi multiplex animal, ut in Phædro, imò omnigenum animal, & ut in nono de Republica traditur. Omnem vero hanc turbam desiderij, amoris nomine nuncupauit. quia sicut ex amore diuinorum vniuersa tranquillitas virtutisque nascitur, sic ex amore mortalium vniuersa perturbatio prauitasque contingit. Libidi-

nes idololatrarum abusu naturali prolapsas, quas & Philosophi immanes appellant, appetitis admodum verbis insequitur, ut Satyrorum more deformem ignominiosam libidinum eiusmodi faciem oculis nostris obuiens, stomachumque mouens palam abominandas efficiat, & interea ritu tragico patefaciat, in quam infimam miserabilemque sortem corruant, qui à summo per ingratitudinem & superbiam defecerunt. Socrates quoque apud Platonem in Phædro libidines contra naturam verbis longioribus & apertioribus imprecatur. Sed ne pudore interim impediatur obuoluto capite loquitur, ut audientes admoneamur, quam turpe sit ea facere, cum etiam nominare sit turpe. Paulus autem non erubescit neque verecundia prohibetur. Sicut enim erubescencia puerum quidem decet, adultum verò dedecet, sic & verecundia qualibet conuenire quidem potest homini ingenio videlicet humano loquenti. Sed in animum diuinitus afflatum nec verecundia, neque similis perturbatio cadit. Videtur autem Paulus tres Gentilium Theologias rangere. Ciuilem quidem qua Pontifices in templis statuas & sacrificia ceremoniasque disponebant, ubi ait: & commutauerunt gloriam Dei. Poëticam vero quam Poëtæ in Theatris introduxerunt, ubi inquit, & commutauerunt veritatem Dei in mendacium, siue, ut græcus textus habet, in mendacio. Quod tendit ad idem. Postremo philosophicam, qua Philosophi sphaeras mundi, stellasque & demones colere docuerunt. Cum dicit, & coluerunt scilicet creaturam, & seruierunt creaturæ potius quam creatori, in quo etiam cultu dici potest commutari diuina veritas in mendacium. Siquidem responsa dæmonum à stellis accepta, sæpe mendacia sunt, quod & Porphyrius confitetur. Præterea veridicum à Deo lumen infusum, quo & nonnulla vera circa Deum cognouerunt, non sincero studio loque affectu prosequuti, in mendacium conuertisse dicuntur. Quoniam subinde coniecturis affectibusque humanis inducti, in mendacia quædam circa Deum prolapsi sunt, vel quod non minima quæque curet, vel quod sine mediorum Numinum intercessione, minus hominibus beneficiat. Licet etiam simulachra culta Gentilibus mendacia dicere. Quæ quidem à Philosophis concessa & confirmata videntur. Duo vero peritissima in cultu Gentilium detestatur, Vnum quod multi obliti creatoris, adorauerint creaturas. Alterum quod plurimi supremum cultum affectum-

que mentis summo Deo debitum propter auaritiam libidinemque ad numina quædam mundana præsertim propinquiora traduxerint. Atque vt declararet sibi primo summum cultum attribuendum, dixit: (Qui est benedictus in secula amen.) Ter vero repetit.) Tradidit illos Deus & quæ sequuntur: ) Forsitan vt nos admoneat, Deum pro tribus impietatis gradibus, ter impios destituere, nam incipienti quidem impietati, ipse quoque incipit spiraculum suum influxumque remittere. Crescente vero magis gradatim magisque remittit.

Consummatæ denique impietati retrahit penitus atque deserit, summamque contra impios licentiam & potestatem perturbationibus omnibus quomodolibet incidentibus dæmonibusque concedit, tradere enim id significare videtur. Præterea tradit, quasi tribus furiis agitandos, primo quidem perturbationibus sensuum, vt ita loquar, inertibus, secundo autem astutioribus, tertio rationi iam malignitate peruersæ. Tradit autem vbique exterminatoribus Angelis, quos impij omnes imitantur & colunt. Si quæris exemplum quo planius cognoscas impios ob culpas suas à Deo destituti, non mutato Deo, considera Solem suum apertis oculis communiter lumen infundere, sed conuiuentibus oculis magis paulatim atq; magis, minus gradatim lucis minusque tribuere. Penitus vero clausis nihil penitus impertiri, sed eiusmodi oculos tenebris quodammodo tradere, vt qui dedignatus Solem hallucinari cæcutireque cœperat paulatim, iam vt par est, tenebris obrutus offendat passim promeritis atque cadat. Trinum Platonici lumen animis putant infundi diuinitus, sicut & oculis à Sole trinum. Primum quidem naturaliter vnicuique proprium. Secundum vero commune contemplantibus superinfusum. Tertium denique cœlicolis animisque vel ad cœlum iam reuersis vel hic nonnunquam abstractis exhibitum vel ostensum. De duobus quidem primis Platonis exemplo Solis loquitur in Republica. Detertio autem in conuiuio atque Phædro, quod quidem ad beatos vel abstractos animos ita se habet, sicut lux pura Solis ad cœlestes cœlicolarum oculos se habere putatur. Primum itaque lumen Deus non aufert peccatoribus, sed relinquit ad pœnam, secundum verò magis minusue negat, & perditis omnino negat. Tertium postremo in patria quidem largitur æternum, extra patriam vero mentibus humanos aliquando limites excedentibus sub

quadam coruscatione reuelat, humanasque fallacias arguit. Ego dixi in excessu meo, omnis homo mendax.

*Quomodo qui non probauerunt Deum habere in notitia, in mala omnia dilabantur.*

## C A P V T X.

**E**T sicut non probauerunt Deum habere in notitia, tradidit eos Deus in reprobum sensum, vt faciant ea, quæ non conueniunt.) Vbi latinè dicitur sensum, græcè habetur intellectum. Sensum igitur intelligi intellectum merito, quia nondum resipiscunt, in alia flagitia cadunt pro eadem culpa. Paulus peccato pœnam assimulat, vt sicut peccauerunt in sensu Dei, sic in sensu proprio puniantur, & sicut non agunt officia conuenientia consentaneaue notitiæ Dei, sic in flagitia dignitati hominis non conuenientia corruant. Iam vero à libidinibus non humanis tantum, sed immanibus cum stomacho supra narratis, ad iniquitatem multiplicem dilabuntur, diabolica spiritus malignitate productam. Quid vero significat, non probauerunt Deum habere in notitia? Certe opera nulla declarauerunt Dei notitiam se habere. Quam tamen habuisse Paulus confitetur. Nullum enim officium præstiterunt huic notitiæ consentaneum. Inter hæc aduerte Paulum magno significationis pondere protulisse, Deum habere in notitia. Siquidem notiam Dei habent quicunque de illo rationibus veris pro arbitrio disputant. Sed in hac Dei notitia, hi soli ipsum quoque Deum habent, qui amore diuino flagrant, quasi per hunc coniuncti Deo cætera parui pendunt, & pro Dei gloria fortes euadunt.

Pius quidem animus ad Deum se conuertens, tribus quibusdam gratiis diuinitus munitus incedit, fide certa, spe firma, charitate feruenti. Certitudinem quidem fidei filio potissimum offerre videtur, amoris ardorem spiritui, spei firmitatem præcipuè patri.

Deus igitur tribus quoque gratiis comitantibus conuenit in animum, nouo quodam lumine, incomparabili gaudio, inuictō vigore. Lumen quidem filius præcipuè videtur afferre. Gaudium autem spiritus, Pater verò vigorem. Lumen fidei præcipuè distribuitur, spei gaudium, amoris denique vigor. Tria hæc ipsius præsentia Dei certissima sunt argumenta. Qui autem hæc non habes dicit habere se Deum, sibi ipsi



sibi ipsi profecto mentitur. Quapropter iure dictum: Numero Deus impare gaudet, id est, ternario, tum in recipiendo tum in dando. Hinc illud: spes autem non confundat, quia charitas Dei diffusa est in cordibus vestris per Spiritum sanctum qui datus est nobis. Similiter & vini notitiam habent aliquam, qui visu olfactuque percipiunt. Sed vinum in notitia ipsum habent, qui re vera iam gustant. Hi soli vini vim fructumque perferunt. Hac igitur ratione, qui per affectum amatorum cum Deo iam noto arctius copulantur, habere Deum in notitia dici possunt. Quoniam Deus charitas est, qui manet in charitate in Deo manet & Deus in eo. Possunt & cum Propheta clamare. De torrente voluptatis tuæ potabis nos, inebriabimur ab ubertate Domus tuæ. Deus igitur cognoscentes quidem ipsum, sed cognitum non habentes: id est, amore minimè complectentes, tradit in reprobum sensum, iure enim si non probauerunt, labuntur in reprobum. Sed in quem reprobum?

Primo quidem in reprobum sensum, id est, intellectum, quo nihil cogitent, nisi à probitate remotum, ideoque sint à Deo, & piis hominibus reprobandi. More quidem vel lippi, qui refugit lumen, vel gustus infecti, qui salubria respuit, noxia concupiscit. Hinc illud Apostoli: sanam doctrinam non sustinebunt. Deinde in sauiam incidunt reprobi dæmonis quasi Cerberi potestatem. Cuius quidem morsu quodam rabido impij homines sauci & prorsus infecti, passim mordeant alios & inficiant, & contra naturæ ipsius ordinem maleficiis, ut ita dixerim, delectentur & in hac interim delectatione falsa verissimè crucientur.

Ideo in eos inuectus Apostolus, inquit: [Repletos omni iniquitate.] Etiam qui solet esse brevis, prolixior nunc apparet indignatione concitus longiore quadam inuectiua, more etiam inculcantium, complurima impiorum veneficia, & facinora congerit, ut veneficam pariterque miseram impietatem tot tantisque facinoribus, suppliciis simul oppressam procul aufugere totis viribus omnes admoneantur [Cum dicit repletos omni iniquitate & quæ sequuntur.] Duobus modis miseram impietatis culpam exaggerat. Tum quia in ea atque ex ipsa existunt omnia vitia, tum etiam quia singula sunt ad summum. Quod sapientiæ liber affirmat, infandorum idolorum cultura omnis mali causa est. Iniquitate, id est, iniustitia. Sic enim propriè textus habet Græcus, & ipsa iniustitia significat omne vitium. Hinc illud Ioannis, omne pec-

catum est iniquitas. Sicut & iustitia legalis virtutes omnes, Aristotele etiam teste, comprehendit. Iniustum enim est, quod contra legem. Omne verò peccatum contra legem est diuinam & naturalem atque civilem. Iniustitia auersio quædam est à Deo. Auersio hæc in omni peccato prorsus includitur. Diuidit Paulus iniustitiam deinceps in multa peccata, propter varias omnesque iniquas ad creata conuersiones. Sed primo repetit pertinentia quædam ad libidines supra narratas, sed hic perpetratas potius per legis vel personæ contemptum. Nequitia enim apud veteres licentiosa quædam lasciuia est, quæ continere se nequit.

[Fornicatione.] Fornicatio est concubitus omnis lege prohibitus. Vbi enim Latini codices post iniquitatem habent malitiam ex *πονηρία* Græca traductam, ego libentius pono nequitiam, & verbo Græco magis aptam, & cum fornicatione proxima congruentem. Deinde ad noua crimina peruenitur ad auaritiam, scilicet & malitiam vel prauitatem. Vbi enim post auaritiam *κακία* Græca traducitur nequitia, malo equidem malitiam vel prauitatem interpretari. Id enim Etymologiæ magis consonat. Auaritia siquidem libidinum explendarum gratia pecunias affectamus. Nam astutia prauitateque ad libidines & pecunias vtimur consequendas. [Plenos inuidia, homicidio.] Accumulat deinceps iniustitiæ crimina. Non satis huic erat bona sibi opinabilia comparare, nisi eadem impedire aliis cogitaret, itaque inuidet habentibus vel habituris, & ob inuidiam, homicidia machinatur. (Plenos id quoque magis adauget contentione, dolo.) Inuidus vix nec proximum perdere nequit, contentione saltem aperta vel clam dolis aggreditur, malignitate. Si minus obiurgare fraudareque potest, saltem venefica voluntatis malignitate imprecationibusque semper infequitur. [Susurriones, detractores.] Malignus enim dum virus intimum aliter euomere nequit, verbis vel palam vel clam euomit. [Deo odibiles.] Quid enim magis contra beneficium Dei bonum quam maleficiis addè delectari. Sunt autem odio Deo, quia dum mala volunt, bona nolunt. Si hæc nolunt, Deum consequenter bonorum principium minimè volunt. Ob hoc igitur & propter superbiam inuectionemque malorum sunt odio Deo tanquam oscores Dei. Hinc iam non humani, sed diaboli sunt. [Contumeliosos, superbos, elatos.] Non solum maledicunt absentes, sed etiam ad contumeliam veniunt in præsentia. Neque

verbis contenti sunt, sed opera contrà ius separare conatur. Ac se quidem extollere, cæteros vero deprimere. [ Inuentores malorum. ] Leuia fortasse putant consuetudina. Ad noua quædam excogitanda maleficiorum genera omnes ingenij nervos intendunt. [ Parentibus non obediētes. ] Hactenus insequutus est iustitiæ culpas affirmatiuas, quæ plurimum in committendo versantur, deinceps autem negatiuas, quæ potissimum consistunt in obmittendo, persequitur, & sicut in illis enarrandis incæpit à Deo, sic in istis incipit à parentibus, qui nobis in terra quasi sunt pro Deo. Parum istis fuerat proximis malefacere, nisi etiam à parentibus rebellarent. [ Insipientes. ] Merito tam dementes iudicari possunt tanquam paternæ, & cuiuslibet disciplinæ prorsus expertes. [ Incompositos. ] Id est, procul à compositione, quasi conuentis pactionibusque non stantes. Neque id quidem mirum. Siquidem paternæ iura iam fregerint sine affectione. [ Absque fœdere. ] Si Deum non diligunt, nec parentes quidem. Item si non parentes, quomodo cæteros? Si neminem diligunt, quonam sociatis fœdere, id est, iure vel promisso cuiquam deuinciri poterunt? [ Sine misericordia. ] Merito, cum caritas omnis iam refrigerit, humanitatemque omnem prorsus exuerint, homini vel miserabili, nec adminiculum subministrant vllum, nec saltem animi misericordia mouentur. Ideo nec homines sunt habendi. Qui cum iustitiam Dei cognouissent, non intellexerunt. Quoniam qui talia agunt, digni sunt morte. (Non solum qui faciunt, sed & qui consentiunt facientibus.) Per hæc verba constat eos sibi met aduersari, dum Deum quidem iustum dicunt, sed non punire concedunt, dum se confidunt impunitos fore. Hæc iam superioris disputationis summa est & quasi quidam Epilogus. Redit enim Paulus ad iustitiam cognitionemque Dei in exordio positam & inexcusabile crimen illic adductum. Cum igitur quid apud Deum iustum sit cognouerint, quid Deo, quid sibi, quid proximo debeatur, & tamen propter impiam superbiam contrà hæc omnia iura fecerint, nulla iam venia digni sunt. Nam sua quadam culpa ad eò obcæcati sunt, ut non intellexerint, id est, cogitare noluerint, Deum peccata punire, atque alios qui talia perpetrarant morte dignos esse censendos. Nam animi qui Deum deserunt, digni sunt, ut ipsi deserantur à corpore, morte scilicet temporali atque insuper deserantur à Deo æterna quadam morte damnari. Deus enim est animi vita, sicut anima corporis.

Neque scilicet dum ipsi qui patrauerint, sed etiam qui charitatis defectu minimè prohibuerint, digni hoc supplicio iudicantur. Fortè Paulus Philosophos in pœnitentiâ quosdam tangit, qui & si ipsi dæmones vel idola non colebant, nec erant propria iniquitate polluti, his tamen Gentium erroribus minimè succurrebant.

*Contra Iudeos, simul atque Gentiles. De iniustitia eorum iudicio, & quemodo iudicandi sint à Deo, atque de illorum pertinacia.*

## C A P V T XI.

**P**ROPTER quod inexcusabilis es, ô homo, omnis qui iudicas. Postquam probauit Gentiles non esse iustitiam consequutos per ipsam duntaxat veritatis cognitionem, quia in primis gloriabantur, neque venia dignos esse ostendit, neque Iudeos assequutos esse iustitiam ex privilegiis multis gratia diuina susceptis, quibus insolenter extollere se solebant. Quo quidem efficitur, ut vtrisque necessaria sit ad salutem gratiæ Euangelicæ virtus. Primo igitur disputat, Iudeos perfectionem iustitiæ non adeptos ex lege, deinde nec ex genere, tertio neque ex ipsa circuncisione. Principio nobis considerandum, quemadmodum Iudæi pariter atque Gentiles Christiani iam facti, adhuc de prioribus insolenter se inuicem iudicabant. Iudæi enim Gentilibus frequenter obiiciebant, eos absque Dei lege vixisse quasi prophanos, atque idolis immolasse. Gentiles contrà Iudæis quotidie obieciabant, illos acceptam à Deo legem minimè seruasse, ingratosque diuinis privilegiis extitisse. Primo itaque Paulus de iudicio minus recto utrosque condemnat, humanum quidem iudicium vniuersaliter improbans, probans vero diuinum. [ Propter quod inexcusabilis es &c. ] Quasi dicat, propterea quod vos Gentiles veritatem Dei in iustitia vestra detinuistis, & cognito Deo fuistis ingrati, excusatione caretis, neque meremini veniam, simulque tu Iudæe propter acceptam legem, non es excusatione & venia dignus. Ideo in quo alteruter iudicat damnatque alterum, ipse quoque clam suo iudicio condemnatur. Quippè cum in simili quodam crimine deprehendatur. Dicit autem, ô homo, ut uterque meminerit se non diuinum esse, sed humanum. Ideoque in iudicando facile falli posse, atque esse similiter culpis iudicioque obnoxium. Inquit præterea, omnis. Ut quamuis inciperit à Gentilibus, tamen

max comprehenderet & Iudæos. Quos & in principio complexus est, ubi dixit: In Evangelio divinam vigere virtutem, in salutem omni credenti, Iudæo primum & Græco. Et in disputationis huius progressu Iudæum simul repetit atq; Græcum. (In quo enim iudicas alterum, teipsum condemnas. Eadem enim agis, quæ iudicas.) Sed quomodo eadem? In effectu saltem aut genere, si minus in modo atque proprietate. Si Iudæus ingratitude in Deum damnat Gentilem, quod Philosophico ingenio & scientiæ munere gratus Deo non fuerit, similiter & Gentilis Iudæum accusabit ingratum, quod prærogatiuis multis à Deo tributis gratus minimè fuerit. Rursus si Iudæus Gentilem tanquam naturalis legis præuaricatorem proculdubio nuncupabit. Gentilium leges idololatriam quidem præcipiebant, fornicationem verò animaduertere negligentius videbantur, utrumq; Iudæorum lex censura seu iure, notabat. Iudæus ergo manifestam in Gentili idololatriam fornicationemque damnabat. Gentilis in Iudæo taxabat occultam. Simili ratione deinceps de culpis quoquomodo comminibus alter alterum mutuo condemnabat, & uterque dum accusabat alterum, damnabat quoque seipsum. (Scimus autem quod iudicium Dei est secundum veritatem in eos qui talia agunt.) Apostolus hos altercantes ita monet: Iudicium istud vestrum in opinione versatur, & perturbatione peragitur. Nos autem Apostoli scimus & certi sumus, vos interim à superiore Iudice iudicari, introspicente veritatem, quamvis occultam & animaduertente in eos qui subiecti criminibus, non sua quidem purgant, sed obiurgant potius aliena non emendationis quidem gratia, sed superbiæ causa. Quod autem de opinione dicebam, Plato in Timæo confirmat his verbis: Veritatis quidem intelligentia certa Dei propria est, opinio verò hominum. Cum verò dicit talia agunt, non solum significat reliqua crimina, sed hoc potissimum, quod tu alios iudices atque damnes, præferim cum sis ipse damnandus, iudicandique officium, quod solius Dei est, tibi insolenter usurpes. (Existimas autem hoc, ô homo, qui iudicas eos qui talia agunt, & facis ea, quod tu effugies iudicium Dei.) Si Deus, ut modo dicebam, secundum veritatem iudicat, id est, penitissimam inspicit veritatem, neque perturbatione mouetur, existimare non debes tu, ô homo, scilicet terrenum animal, te diuinam ultionem effugere posse. Hinc ten-

dit Propheticum illud, Quo ibo à spiritu tuo, aut quo à facie tua fugiam; Si ascendero in cælum tu illic es, si descendero infernum ades. Item, Nec est quo se abscondat à calore eius. Atque illud Hieremiæ: Ego sum iudex atque testis. Idem à Platone in Legibus confirmatur, dicens, singula à diuino iudicio introspecti animaduertique. Itaque peccatoribus, nec apud cœlestes, nec apud inferos esse refugium.

Sed cur prætermisimus, quod Apostolus ad Hebræos inquit, Diuinum Verbum penitissima quæque efficacissimè penetrare; omniaque nuda & aperta esse oculis tuis. Inquit autem Paulus bis, ô homo, ut tu quando iudicare conaris, bis quoque dicas, Homo sum, semel quidem inter te & proximum recordatus, videlicet te esse peccatorem fallique posse, & illum tanquam fratrem, non esse lædendum. Semel iterum erga Deum, cogitans, te animal terrenum non debere officium tibi usurpare diuinum, solius enim illius est iudicare, qui solus est mentium perscrutator, & Dominus vniuersi, cuius aduentum ad iudicium expectare iubet Apostolus. Nolite iudicare, & non iudicabimini, scilicet de hoc ipso grauissimo crimine, quod quidem est diuinum iudicandi munus sibi arrogare, quæ & diabolica superbia est. Nihil silentio facilius esse debet, nihil iudicatori sit difficilius, qui sapere non iuo commodo, sed sola malignitate mouetur, quasi moueatur à diabolo. Fortè verò qui ab iudicio abstinebit, se continebit à gratiis, neque iudicandus erit. [Admittas bonitatis eius & patientiæ, longanimitatisque contemnis.] Fortè non tam confidis in ignorance Dei, quam temerè in misericordia speras. Quatenus & diuinam grauissimè peccas, & vindictam nullam ab hac experiris.

Erras quidem grauiter, dum sub Iudice adeò iusto sapienteque, immeritam tibi promittis impunitatem, grauius dum diuinam contemnis benignitatem, grauissimè dum tam longa Dei patientia tolerantiæque abuteris. Copiosa quidem bonitas Dei est, quæ vel grauiter peccanti naturalia bona non aufert, imò insuper bona suppeditat quotidie quasi blandiens, ut ad gratiarum actionem & ad poenitentiam reuertaris. Copiosa nimium patientia, quæ tot & tanta peccantes, vel ad tempus sustinet. Copiosa denique longanimitas longam ad poenitentiam tempus expectans, ignoras quod

benignitas Dei ad poenitentiam te adducit. Deus adedò bonus atque clemens non tuis quidem malis commotus, sed bonitate propria fretus te tamdiu malum non solum non punit, sed accumulat quoque bonis ut poenitentiae tempus occasionemque gratitudinis habeas, sed tu interea nequam, quid ad poenitentiam tibi conceditur, ad temerariam impunitatis confidentiam insipienter adducis, neque auscultas quod admonet Esaias: Expectat inquit vos Deus ut misereatur vestri.

Si primum principium quod à nullo finitur, virtutem possidet infinitam. Hæc autem imaginabile quantumlibet tempus spatiumque comprehendit, ubique proculdubio semperque existit. Si virtute infinita, quæ & ipsa intelligentia est, singula facit atque disponit, intelligit certè regitque singula. Nullæ igitur hominum actiones cogitationesue iudicium eius effugiunt. Clamavit ergo David: Domine ô pater quoniam à facie tua, id est, à filio fugiam? Quo nam à spiritu abibo scilicet sancto. Quasi dicat, si tibi amicus ero, paterna me potentia sustinebit. Hinc illud: Tenebit me dextera tua. Si autem inimicus eadem me potentia premet. Durum est incidere in manus Dei viuentis. Item, si amicus vultus mihi tuus sanctus ac lætus occurret. Si inimicus, terribilis atque atrox. Rursum si amicus, Spiritus sancti calor fouebit atque recreabit. Si inimicus, extenuabit atque comburet. Non est qui se abscondat à calore eius. Sed calor eius in animam veniens apertam & liberam atque amplam suauissimè calefacit. In animam verò angustam distortamque conclusus adurit. Profectò mysterio quodam dum ad Solem alluderet, non dixit, non est qui se abscondat à lumine eius, sed inquit, non est qui se abscondat à calore eius. Quoniam lumen quidem Solis non apprehendit omnia, calorem verò quoquomodo res omnes accipiunt. Sic & diuinum lumen tenebræ non comprehendunt, incendium verò præsentunt.

*De diuino iudicio, de retributione secundum opera, de pœna æterna, de gradibus ad parum.*

## C A P V T XII.

**S**ECUNDUM duritiam autem tuam, & cor impoenitens thesaurizas tibi iram in die iræ & reuelationis iusti iudicii Dei. Deus quidem sicut patientibus atque poenitentibus mala conuertit in bonum, sic diuina patientia aburentibus statuit, ut bona

conuerterentur in malum. Quoniam igitur longanimitate diuina ad poenitentiam non flectuntur, acerbiores sibi vindictam exaggerant in die diuini iudicii peccatoribus inferendam. Est autem iudicium ætænum duplex, vnum quidem in fine sæculi cunctis vniuersale futurum. Alium verò particulare singulis post præsentis vitæ finem aperiendum. Vtrumque iudicium hic videtur attingere, & vtrumque in die, & cum reuelatione dicitur exhiberi. In die quidem, quoniam diuino iudici, qui & ipse Sol iustitiæ nominatur, singula perspicue patent. Cum reuelatione verò, quoniam & in animam notæ peccatorum omnium tanquam iuste se præferunt. De Sole diuino, inquit Orpheus, omnia introspicit, omnia intus audit, omnia iuste distribuit. Et Socrates in Gorgia: Diem reuelationemque eiusmodi tetigisse videtur, ubi ait: omnes animæ ad diuinum Iudicem absque aduocato nudæ venient, vitiorum cicatrices notasque intimas proferentes. Quas quidem seuerus Iudex prorsus inspiciens discernet atque iudicabit, nec personarum, conditionumque aliarum rationem ullam delectumque habebit. Et in ultimo de Republica probat animas ad iudicium accedentes, palam opera sua singulas secum gerere, bona quidem à fronte, mala verò à tergo pendetia. Hæc ille. [Sic igitur reddet Deus vnicuique iusto iudicio secundum opera sua.] Sed quomodo reddit vnicuique secundum opera sua? Si tempore peccantem perpetuo punit? Hac vique ratione: Siquidem ille peccauerit in diuinam maiestatem, cuius est dignitas infinita. Ideoque culpa sequitur infinito quodam supplicio digna. Item si peccator statuerit in eodem crimine perpetuo se victurum, hoc verò peccatum non futurum Deo quidem est, sed præsens. Itaque tanquam semper peccauerit punietur.

Denique si peccator ob insignem culpam diuinam gratiam prorsus amiserit, sine qua nemo resurgit à culpa. Sed perseuerans in peccato, perseueraturus est in pœna. Temporalibus verò virtutum officiis largitate diuina præmium datur æternum. Quod ergo dicitur reddere secundum opera, non debes intelligere secundum æqualitatem operum, quasi opera sint æqualia præmiis. Nam præmium excedit meritum. Sed secundum proportionem quandam est intelligendum, scilicet quia bonis quidem bona tribuet, malis verò mala. Meliora rursus melioribus, peioribus verò peiora. Duritiam non poenitentis animi superius improbatum, doctores nostri cul-

pam in Spiritum sanctum nuncupant nulla venia dignam. Quod quidem, ut planius intelligatur, attende parumper. Patri quidem potentiam attribuere solent, Filio sapientiam, Spiritui vero benignitatem, quæ quidem bona & si tribus æquè communia sunt, tamen certa quadam modi vel muneris ratione singula præcipuè tribuere singulis consueverunt. Qui igitur perturbationibus superatus, quasi ob impotentiam infirmitatemque delinquit contra potentiam attributam patri, & ideo contra patrem peccauisse videtur. Qui autem per ignorantiam, contra filij sapientiam deliquisse. Sed qui per malitiam malignitatemque transgressus est legem, benignitatem sancti Spiritus offendisse putatur. Idque apparet præcipuè in odio inueterato, in effectui inuidiæ in diuinam gratiam, in superbia confirmata, in criminibus per malitiam voluntariam perpetratis, in contemptu diuinorum, in superbia veritatis impugnatione, in extrema in diuinam clementiam vel confidentiam vel diffidentiam, in duritia nullam poenitentiam admittente. Eiusmodi culpæ quasi diabolicæ, non sua quidem natura, sed miraculosa quadam Dei clementia operationeque in nos remitti possunt. Culpæ verò per ignorantiam vel infirmitatem disciplina castigationeque adhibita corrigi, ideo facilius remitti posse videntur. Attribuunt autem iudicandi munus præcipuè filio. Iuxta illud: Pater omne iudicium dedit filio, quem constituit iudicem viuorum & mortuorum. Congrua rerum vicissitudo seruatur, si filius ab hominibus iudicatus, homines ipse iudicet, competens quoque generis humani Iudex, qui super homines est, & homo in se expertus humana. Iudicium quinetiam luce rationeque agendum. Lux autem & ratio patris est filius. Denique si attributa consideremus horribile forsitan videatur iudicium potentia paternæ concedere, ne fortè sententia rigidior expectetur. Tribuere verò clementia spiritus nimiam præstaret indulgentia confidentiam. Ad sapientiam verò iuste iudicare, simul cum æquitate, spectare videtur. Vniuersale quidem iudicium filius ipse per se prorsus explebit. Particulare verò per Angelum vniuscuiusque custodem exploratoremque ab initio constitutum. Hinc Plato in Gorgia iudicium hoc per propria quædam Numina existimat expediri.

*De retributione premiorum, atque suppliciorum, de superba contentione contra Deum, & vindicta diuina.*

## CAPVT III.

**H**is quidem qui secundum patientiam boni operis, gloriam & honorem & incorruptionem quærentibus vitam æternam. His autem qui ex contentione, & qui non acquiescunt veritati, credunt autem iniquitati, ira & indignatio, tribulatio & angustia. Sicut modo disposui, communiter legitur apud Latinos, eiusmodi verborum textus sensum habet obscuriorem. Quod commentantium mentes fatigauit atque fatigat. Planius autem Græcæque aptius interpretabimur, si cum Athanasio scriptore Græco, doctissimoque ita dicamus. His quidem secundum patientem perseuerantiam boni operis gloriam & honorem &c. His autem ex contentione non acquiescentibus veritati, obsequentiibus autem iniquitati &c. *ὑπομονὴν* Græcum, patientiam perseuerantiamque significat. Patientiam quidem quatenus aliquis ab honesto quodam officio non separatur terrore malorum. Perseuerantiam verò, quatenus nullo tædio vel mollicie reuocante ad finem vsque perdurat. Quoniam igitur ut placet Athanasio, Paulus hic utrumque intelligi seruarique vult, ideo patientem perseuerantiam ego traduxi. Sic etiam quid Paulus velit, facilius intelligitur, scilicet Deum perseuerantibus in bono opere gloriam polliceri. Ex communi verò translationis forma factum est, ut quidam exposuerunt. quicumque Dei patientia bene vitur ad bonum opus &c. Sic autem exponere, est quasi verbis Pauli vim inferre.

Sed quamnam gloriam in bono opere perseuerantibus dabit Deus? claritatem, splendoremque mentis in hac vita quodammodo, in alia verò plenissime, adeo ut in corpus vsque redundet. Quod & gloriosum corpus appellant. Hinc illud Esaiæ: Implebit splendoribus animam tuam. Et Davidis: Exultabunt sancti in gloria. Et Euangelij secundum Mattheum, Fulgebunt iusti sicuti Sol in regno patris eorum. At quem honorem? certum quidam officij & prudentia munus in cælo, occultum aliquem apud homines. Ideo David: Nimis honorati sunt amici tui Deus. Incorruptionem vocum etiam impiorum corporibus Deus postremo fir con-



cessant. Cur præcipuè piis in præstantia pollicetur? Quoniam immortalitas in corporibus piorum cum honore erit & gloria, impiorum verò contrà, & quoniam beati æterno firmoque bonorum statu fruuntur. Miseri verò habitum reuera immortalem experiri non potuerunt. Sed fortè variarum perturbationum poenarumque semper mutabili quadam vicissitudine vexantur, adiunxit verò Paulus, quærentibus vitam æternam, ut finem pietatis exprimeret. Perseuerantia enim in bonis operibus vel ad finem usque perdurans, beatitudinem non reportat æternam, nisi æternæ vitæ, scilicet Dei diuinæque fruitionis gratia suscepta consummataque fuerit. [ His autem ex contentione. ] In superioribus primo posuit merita, deinde præmia. Merita quidem ubi ait: His quis secundum patientem perseuerantiam boni operis. Præmia verò ubi subiunxit, gloria, & quæ sequuntur. Hic quoque primo culpas enarrat, deinde poenas adiungit, culpas quidem tres præcipuè.

Prima quidem est superbia pertinaciter cum Deo contendens. Secunda verò diffidentia diuinæ veritatis authoritati non acquiescens. Tertia est confidentia sui, indulgens iniquitati. Poenæ verò quatuor describuntur, scilicet indignatio, ira, tribulatio, angustia. In primis animaduerte, quanta ratione Paulus præmia illa ab ipso Deo tribui dicat. Hæc verò supplicia minimè, nam ubi dicitur indignatio &c. Intelligitur sint vel erunt, hæc peccatoribus potius quam tribuantur à Deo. Sed ut redeamus hic ad primum institutum. Nonne senex aliquis venerandus iure indignatur seruo, puero nolenti mandatum eius vllum exequi, nisi prius efflagitauerit omnes in singulis rationes, quas nec exquirere debeat, nec intelligere valeat, præsertim si Domino ad honestiorem vitam verbis & officiis exhortanti seruus contumax semper reluctari contendat, sceleribus se prorsus immergens. In homines ergo huic seruo similes Paulus hic inuehitur, qui erga Deum contra se habeant, atque superiores illi, qui tanquam humiles & sponte subiecti Deo in opere bono scilicet in præceptis Dei opera ipsa seruandis patientia summa perseuerabant. Hi verò inferiores contrà propter superbiam Deo quodammodo se æquant, quasi Deum ipsum in similitudinem, id est, statum picturamque honorauerint. Sed nunquid existimandum est doctissimos illius regionis antistites pro numinibus talia coluisse? Nequaquam. Imò tam absurda adorationis anfas vulgo de-

disse. Sed quemadmodum in Commentariis in Platonem atque Plotinum, & in tertio de vita tractauimus. Item de his quomodo Magi per inferiorem electionem compositionemque docuerint homines ad se superiora quædam cum inferioribus congruentia oportunè deducere, alio loco oportunius disputandum.

*Deus pensat opera, non personas, Iudeos atque Gentiles aequè damnat, quamuis illi sine lege, hi cum lege delinquant.*

## C A P V T XIII.

**G**Loria autem, & honor, & pax, omni operantibus bonum, Iudæo primum & Græco. (Non enim est acceptio personarum apud Deum.) Superioris disputationis huius discursum, quo Gentiles Iudæosque redarguit in minis malisque conclusit. Iam verò similem discursionem repetens reprehensionis, utrosque, & ab utrisque in primis benevolentiam capraturus, à pollicitationibus felicibusque auspiciis facit exordium, & quia Iudæos est alicubi maiori crimine grauaturus. Iudæo primum suo more repetit, & meritò primum, Iudæis enim primis diuinitus promissa sunt optima. Cæteri verò in eorum promissiones intrauisse dicuntur. Gloriam & honorem in superioribus exposuimus. Quod autem ibi dixit, in corruptionem, hic pacem nominare videtur. Quoniam pax concordiaque in viribus animæ partibusque, corporibus præsertim, concordia mentis humanæ cum Deo totum hominem quoddam promiserat immortalem iterumque promittit. Huc tendit Platicum in Charmide: Consummata animi temperantia temperatum corpus immortaleque efficere potest. Et si primo promissa sunt Iudæis bona, nihil tamen prohibet, quin Gentiles pariter assequi valeant, si bona pariter operentur. Iudæi quinetiam non aliter consequuntur, quàm si bona similiter operentur. Qua quidem ratione dixit: Non enim est acceptio personarum apud Deum. Hac interim ratione, Paulus sæpè repetit opera, ut Iudæorum insolentiam reprimat communiter confidentium priuilegiis suis legibusque, ceremoniis etiam absque opera sua, vel alia gratia se & scelerum impunitatem reportant, & salutem præ cæteris habituros. Vbi verò culpatur acceptio personarum, eiusmodi acceptio est rationem duntaxat habere personæ, & solius personæ alicu-

is propriæ gratia absque alia dignitate, vel ratione prorsus vlla plus alteri tribuere quam alteri, vel bonorum, vel malorum, quæ utrique alioquin æquè merentur præcedentibus operibus, vel nullo modo merentur. Delectum huiusmodi nullum in retributionibus malorum vel bonorum pro meritis Deus habet. Forſitan vero habet inuocationibus quorundam ſola gratia factis. De quibus ſanè ubi de prædeſtinatione agitur eſt tractandum. In præſenti vero de iuſta pro meritis præcedentibus retributione diſſeritur, ubi Deus actiones voluntateſque conſiderat, penſatque merita. Perſonam vero Græcam Iudæamque nequaquam. [Quicumque enim ſine lege peccauerunt, etiam ſine lege peribunt, & quicumque in lege peccauerunt, per legem indicabuntur.]

Quòd Deus in puniendo rationem non habet perſonarum, ſed culpæ momentum penſitet, ita declarat. Quia tam Iudæi, quàm Gentiliſ peccata & culpas aſpicit, non perſonas. Culpa quidem Iudæi grauior, quia lex Moſaica data diuinitus, neque permittit Iudæum ſe per ignorantiam excuſare, & arctiori vinculo reddit obnoxium. Itaque peccantes apud Gentiles, qui lege Moſaica nec inſtructi fuerant, nec adſtricti leuius puniuntur. Hi namque ſola legis naturalis transgreſſione peribunt. Sine lege, ſcilicet Moſaica, id eſt, lege Moſaica non grauante. Iudæi vero vltra idipſum quod lege naturali contempta peribunt ſimiliter, vt Gentiles etiam Moſaica legis iudicio grauante plecterentur.

Præterea, ne Iudæi fortè conſidant ſola legum ſuarum lectione, ceremoniarumque obſervatione perfectos fore, nec opera, nec gratia alterius indigere, ſubiunxit: non enim auditores legis iuſti ſunt apud Deum, ſed factores legis iuſtificabuntur, ſcilicet, quicumque legis præcepta ſeruauerint, ſiue Gentiles legis ſuæ, ſcilicet naturalis, ſiue Iudæi legis præterea datæ per Moſen, & id quidem vſque ad Euangelicam legem vtriſque neceſſariam ad ſalutem. Ac ne fortè quod hic Paulus ait, factores legis iuſtificari, intelligas vniuerſaliter dictum, quodcumque iuſtiæ per legem quamlibet comparetur, id proſectò non per legis audium lectionemque, ſed per obſeruantiam præceptorum denique reportari. Tameſi perfecta iuſtitia, ſcilicet perpetua ſalute digna per ſolam legem gratiamque Euangelicam comparatur.

*De Lege naturali atque ſcripta, de Iudicio iudicioque nobis intimo, atque etiam de communi.*

## CAPVT XV.

**C**Um enim Gentes quæ legem non habent, naturaliter ea quæ legis ſunt faciunt, hi legem non habentes, ipſi ſibi ſunt lex. ] Per hæc confirmat, factores legis etiam ſi non audiuerint, iuſtitiam aliquam reportare. Gentes diuinam legem tabulis ſcriptam, qualem Iudæi, non acceperunt, vt enim inquit Dauid: Non fecit taliter omni nationi. Inſculptam verò mentibus naturaliter, id eſt, ab ipſis vitæ primordiis, diuinitus habuerunt. Meminiſſe verò debemus, Iudæos à Deo per Moſem legem geminam accepiſſe. Vnam quidem moralem præcipuè decalogo comprehenſam, perpetuo duraturam, nec ſolum Iudæis, ſed etiam Gentibus neceſſariam. Gentes autem eiſmodi legem non ſcriptis, ſed mentibus acceperunt. Alteram verò ceremonialem, Iudæis duntaxat vſque ad Euangelium obſeruandam. Poſt hæc autem noxiam. Gentibus verò nullotempore neceſſariam. Circa obſervationem vel præuaricationem legis & iudicium damnationemque & iuſtificationem tempora tria commemorat, præteritum & præſens, atque futurum. Ante Euangelium. In Euangelij tempore. In termino ſæculorum, & vbiq; vult legem moralem, ſiue Gentibus inſuſam duntaxat, ſiue Iudæis præterea ſcriptam, quicquid ad iuſtitiam ſalutemque conducere poteſt, id ipſum non auditu, ſed opera, & vtriſq; pariter quouis tempore conducere poſſe. Et in vltimo iudicio ſola opera fore liberanda.

Item Euangelio diuulgato, opera legis ad iuſtitiam ſalutemque valentia, hæc intelligi vult, quæ in Euangelica lege gratiaque fundantur. Denique nullam legem, vel naturalem, vel ſcriptam habere efficaciam ad iuſtitiam & ſalutem, niſi diuina gratia præter intellectum moueat & affectum, atque ita moueat, vt ipſius Dei gratia legis præcepta ſeruentur. Ipſi ſibi ſunt lex, id eſt, pro lege, quoties videlicet legem mentibus ſuis diuinitus ab initio ſcriptam, quodammodo legentes obſeruant. Proſectò, lux illa vera illuminans omnem hominem venientem in hunc mundum, inſudit lumen menti veridicum. Vt quemadmodum ipſa lux vera exiſtit Iudex in vniuerſo, ita

veridicum inde lumen emicans , tanquam iudex sederet in animo, vicemque Dei teneret in homine. Hoc itaque ex lucerna lumen in mente veridicum legem inde moralem naturaliter secum attulit. Hinc Dauid per lumen in nobis inde signatum ostendi nobis existimat bona. Hinc in Epistolis inquit : Sapienti viro lex Deus est , insipienti verò libido. Quoniam hi sapientes habentur , qui pro viribus intentionem animi auertunt à sensibus , ad intellectum verò conuertunt , ubi diuinam legem auscultant , officia iusta dictantem. Nempè Deus , quemadmodum in ipso lumine intellectus principia posuit speculationibus conducentia , sic & regulas actionibus , & officiis præfidentes , per quas quilibet mentis compos intelligere possit , modo diligenter examinauerit , quid in agendo , vel non agendo bonum , honestum , decorum , iustum. Quod ve contra. Item , Deum mundi Dominum , naturali quadam ad illum cognatione cognitum , consensuque omnium confirmatum , verendum esse præcæteris & colendum , suum cuique tribuendum , honorem superioribus exhibendum. Quod tibi fieri nolis , alteri minime faciendum , cæteraque generis eiusdem.

Eiusmodi regulæ , quasi leges , sunt inscriptæ intellectui nostro iudici , per lumen veridicum infusum à luce vera , iudice mundi. Rationes quidem Platonicas , quibus hæc in Theologia nostra probauimus , in præsentia prætermittam. Quas autem Apostolus breuiter hic attingit , breuiter ego quoque perstringam. Qui ostendunt opus legis scriptum in cordibus suis , id est , re ipsa declarant naturaliter sibi notum certumque esse quæ sint opera officiaque legi naturali moralique consentanea , dum ipsi naturali quodam iudicio ista discernunt , & alia quidem probant tanquam iusta , alia vero reprobant , vt iniusta , quod quidem facere nullo modo possent , nisi notam intus haberent ipsius iustitiæ formam , ad cuius normam singula referentes discernere iudicareque valeant , quæ iusta sint , quæ iustiora , & contra quæ iniusta , & quæ iniustiora censenda. [ Testimonium reddente illis conscientia ipsorum , & intra se inuicem cogitationibus accusantibus , aut etiam defendentibus in die , quando iudicauerit Deus occulta hominum , secundum Euangelium in eum per Iesum Christum. ] Vbi Latini Codices hîc genitinos casus habent ,

ideo ablatiuos posui , quia & vsui Græco , & sententiæ Pauli magis consonant , & ita doctissimus Athanasius accipit. Legem moralem diuinitus esse mentibus nostris impressam.

Præter argumentum quod modo posuimus , testis est etiam conscientia virtus quædam animi verax animaduersoriaque , ex illo lumine veridico profluens. Quæ quidem , vt vult Diuus Thomas Aquinas , est applicatio quædam cognitionis habitæ ad aliquid iudicandum , vtrum benè vel malè sit factum. Ex hoc igitur quod conscientia de bono vel malo testificatur , coniectamus in penetrabilibus animi leges extare. Quarum observatione vel præuaricatione aliquid iuste vel iniuste factum diiudicetur. Iam vero conscientia virtus causam pro anima , vel contra animam agitans , coram intimo lumine , tanquam Iudice leges habente , testes producit in medium cogitationes , recordationesque frequentes , quæ nonnunquam nos accusant , ratione quadam oblicientes aliquid malè factum. Quandoque etiam cogitationes aliæ surgunt contra defendentes illud , alia quadam ratione non esse dammandum. Atque ita sæpè mutua quadam alteratione vicissim , donec lis ista sub Iudice recognoscente interim conscientia dirimatur. Accusatio verò , defensioque & iudicium absque notitia quadam legis agi non possunt. Per hæc igitur confirmatur , moralium legem esse mentibus nostris impressam. Per quam prudentior & temperantior aliquis sine scriptis legibus vitam quodammodo iustam agat. Scripturæ verò leges imprudentibus improbisque videntur armatæ insuper ad compellendos qui leges intimas neglexerunt. Ideo scribit ad Timotheum legem iusto positam non fuisse.

Proinde , meminisse debemus trinum esse iudicii diem. Vnum quidem vniuersalis iudicii in vltimo sæculorum. Aliud autem subito post finem vitæ cuiusque , aliud quoque quotidianum. Vltimum quidem vniuersale in particulari post vitam repræsentatur , & vtrumque in quotidiano refertur. Paulus igitur à 'quotidiano incipiens , etiam ad duo reliqua peruenit.

Profectò , quoties aliquis se reuocans ab externis ad intima , vt præcipit Proverbium , se ipsum quandoque recogniturus , toties in controuersiam eiusmodi trahitur , sub intimo Iudice dirimendam Iudicis vniuersi Vicario.

Atque hoc ipso tempore, quo se quodammodo à corpore separat, in iudicium peruenit simile iudicio animarum à corpore seiunctarum. Sed quotidianum hoc iudicium planè differt ab aliis, quòd in hoc alteratio paulatim vicissimque, sicut diximus, agitur. In cæteris autem non agitur controuersia dubia, sed tota huiusmodi controuersia in subitam ab iudice recordationem sententiamque producit. Quemadmodum Augustinus in ipsa Dei Ciuitate declarat. Diem verò tempus illud appellat, exprimens diuini iudicis certitudinem, qui illuminabit abscondita tenebrarum. Et, ut improbi merito terreantur, hominum occulta non minus quàm manifesta discernet atque iudicabit. Euangelium verò apud Matthæum tempus illud appellat noctem, tanquam nobis incertum. Media nocte clamor factus est. Fiet autem iudicium per Iesum Christum, quem Deus omnipotens iudicem uiuorum mortuorumque constituit. Inter hæc Apostolus prædicationes Epistolæque suas suum nominat Euangelium. Quia doctrinam hanc non accepit ab homine, nec alios Euangelistas legere vel audire compulsus est. Quoniam hic sicut & Ioannes atque Matthæus Christum habuit præceptorem, sed illi quidem in terra loquentem, hic autem cœlitus reuelantem. Ex superioribus Pauli verbis intelligere licet, quandoquidem animæ nunc se quodammodo iudicant atque damnant, multo magis in alia vita, ubi se ipsas magis animaduertent, illas suo se iudicio damnaturas. Hinc confirmatur & illud quod Dionysius Pauli discipulus scribens ad Ioannem Euangelistam, inquit; Animas impiorum in ipso iudicii tempore, etiam nullo fugante, procul à diuini iudicis cultu pro viribus figuraras. Id equidem arbitror terrificam quadam diuinæ indignationis existimatione facturas. Quamobrem suo quodam impetu longius diuercentes à bono, in miseriam labuntur extremam. Firmè sicut oculi ophthalmia laborantes lumen diurnum fugiunt salutare quidem sanis, ægrotantibus verò noxium, qua quidem fuga in malum ipsi suum, scilicet in tenebras sese mergunt. Huc tendit Platonis illud in libro de Scientia & Legibus: Iniqui sua quadam inclinatione loca suis meritis conuenientiâ petunt, sicut ignis quidem leuitate sursum feruit, terra verò deorsum.

*De prerogatiua Iudæorum, & quomodo abutuntur ea.*

## CAPVT XVI.

**S**I autem tu Iudæus cognominaris ] Hæc scætenus ostendit obseruatores legis iustitiam assequi, etiam si non sint auditores. Quod ad Gentiles præcipuè pertinebat. Deinceps verò demonstrat, auditores non effici iustos nisi sint præterea seruatores. Quod quidem pertinet ad Iudæos. Principio quidem narrabit Iudæorum prerogatiuam, quòd legem soli susceperunt. Deinde vitium increpabit, quòd legem transgressi fuerint. Prærogatiuam autem eorum circa tria disponet. Primò quidem, quantum spectat ad Gentem legi subiectam. Secundò, quantum ad legem ipsam attinet. Tertiò, quantum spectat ad legis effectum. Quantum igitur ad Gentem attinet, cuius nomen est venerabile, inquit [ Si autem tu Iudæus cognominaris. ] Hinc Dauid: Facta est Iudæa sanctificatio eius. Et Ioannes Euangelista: Salus ex Iudæis est. Iudæi verò nominantur ab Iuda Patriarcha. Quemadmodum in Genesi declaratur: Iuda te laudabunt fratres tui. Cum enim regnante Roboam decem tribus ab eo deficerent, vitulumque aureum adorarent, captiuæ ab Assyriis ductæ traduntur, ut in libro Regum quarto narratur. Quod autem reuersæ quandoque fuerint, nullam Eloquia sacra faciunt mentionem, imò verò regiones earum ab extraneis occupatæ sunt, qui deinde Samaritani nominati dicuntur. Reliquæ verò tribus dux ab Iuda & Benjamin, trahentes originem in ipsa Roboam dictione, & in cultu Dei vnius perseuerauerunt. Quæ quidem et si deinde captiuitatem in Babylone subierint, tamen per Cyrum regem Persarum in patriam denique restitutæ feruntur, quemadmodum Esdræ historia narrat. Sed quoniam tribus Iudæ maior erat, omnis illa Gens ab ea nomen accepit. Nec solum Gentes ab ipso Benjamin profectæ, sed multi etiam ex tribubus aliis reuerterentes, qui profectò tribui Iudæ se vinxerunt. [ Et requiescis in lege. ] Prærogatiuam Iudæorum quæ pertinet ad legem iam profectur. Sed quoniam modo requiescis in lege? quia per legem existimas te certum effici, quid agendum, quidve credendum. [ Et gloriaris in Deo. ] Legis videlicet auctore, & in ipso solius Dei cultu. [ Et nosti voluntatem eius. ] Scilicet, declaratam lege, quæ quidem notitia susceptæ legis est fru-

Æus. Magnum verò priuilegium in hoc Iudæi sibi vindicare videntur, quod cognouerint per legem quid Deus ipse velit eos agere, quidve nolit, propter quam sanè notitiam, subdit: [Probas vtiliora instructus per legem.] Id est, discernis quæ diuinæ voluntati magis consentanea sint. Quod quidem ad perfectionem tuam præcipuè pertinet. Præterea, & quantum ad instruendos alios attinet. [Confidis teipsum esse ducem cæcorum, lumen eorum qui in tenebris sunt, eruditorem insipientium, magistrum infantium, habentem formam scientiæ & veritatis in lege.] Ex his verbis apparet Iudæos existimauisse Gentiles esse cæcos, id est, omnino mente captos, vt nihil vnquam veri consequi possent, vel etsi non prorsus oculis mentis orbatos, tamen propter absentiam luminis tanquam in tenebris cæcutire, aut saltem sapientiæ minimum eos attingere. Aut denique virilem maturamque prudentiam non habere. Ad primum ergo se iactabant, duces esse cæcorum. Ad secundum verò lumen eorum qui in tenebris hæsitant & offendunt. Ad tertium autem, eruditores insipientium. Ad quartum denique, magistros infantium. Perinde ac si solus Iudæus scientiæ formam haberet virtute legis diuinitus reuelatam, per quam non modo seipsum, sed etiam Gentes omnes erudire valeret. Quippè cum non solum veritatem legis in agendis, sed etiam scientiam mysteriorum profiterentur. [Qui ergo alium doces, teipsum non doces.] Hactenus narrauit priuilegia Iudæorum, quibus partim quidem iure gloriari poterant, partim verò insolentius se iactabant. Nunc verò planius legis abusum præuaricationemque persequitur, & passim Gentilibus quodammodo deteriores esse significat. Atque, vt mihi videtur, eos indignatione quadam interrogat, & quasi quadam inuectiua refellit. Primò quidem quantum pertinet ad doctrinam. Dicitum est enim quantum in legis notitia confidebant, seq; duces lumenque Gentium, quasi cæcorum, profitebatur. Itaq; consequenter doctrinæ ac legis abusus illis dicitur, ad eorum videlicet superbiam cohibendam. Perinde ac si dicat, frustra sapitur qui sibi nō sapit. Cū igitur teipsum nec doces, nec emendas? Siquidem docere alios castigareque possis. Quòd autem Iudæus doctrinam legis ad vsum ipse suum, disciplinamque perfectam minimè referat, deinceps ita conuincit [Qui prædicas non furandum, furaris: qui doces non mœchadum, mœcharis.] Quæ quidem cōtra proximum delicta

putantur. Imò verò & contra Deum peccas. (Quid abominaris idola, sacrilegium facis.) Abuteris enim his quæ ad diuinum cultum pertinere censentur. Id quidem primò legeregnante perpetraverunt, Malachia teste, dicitis, mensa Domini contaminata est. Deinde, Christum execrantes Prophetis hac lege promissum, vbi in Beelzebub dæmoniorum principe miracula facere prædicabant. Mox autem obicit eis Paulus, quod diuinam gloriam vehementer offendant. (Qui in lege gloriaris, per præuaricationem legis Deum inhonoras.) Dum enim legem, abste verbis adeo celebratam, flagitiosis operibus præuaricaris, ansas Gentilibus exhibes, vt diuinum apud te cultum, quasi moribus adionibusque inutilem, spernant atque vituperant. Quod quidem nihil aliud est quam Deum inhonorare, id est, debito honore fraudare. (Nomen enim Dei per vos blasphematur inter Gentes.) Deum propter flagitia vestra, per legis vestræ defectum contingere putant, Deumque propterea à vobis prædicantium recipere dèdignantur, sicut scriptum est. Esaias enim inquit: Dominatores eius iniquè agunt, & igitur tota die nomen meum blasphematur. Et Ezechiel: Non propter vos ego faciam Domus Israël, sed propter nomen sanctum meum, quod polluistis in Gentibus.

*Circuncisio duplex - corporalis & spiritalis.  
Prima non sufficit ad salutem.*

## C A P V T X V I I

**C**ircuncisio quidem prodest si legem obserues. (Si autem præuaricator legis sis, circuncisio tua præputium facta est.) Hactenus legem ad salutem non sufficere disputauit. In præsentī verò neque circuncisionem satisfacere probat. Quoniam videlicet obseruantia legis sine circuncisione vim habeat. At sine legis obseruatione circuncisio iudicatur inualida, sed quonam modo circuncisio prodest? ad originalem culpam videlicet diluendam. Id confirmatur in Genesi: Masculus cuius præputij caro circuncisa est, & quæ sequuntur. Sed tibi adulto, tunc denique prodest, cum mādara legis obserues, quemadmodum & religiosi duntaxat, si legem suam impleant professio profutura putatur. Circuncisio enim erat quasi professio quædam, circuncisos ad obseruationem legis obstringens, propterea scripsit ad Galatas: Testificor omni circuncidenti se, quoniam debitor est. Quod autem dixit Apostolus: si circun-



cidimini, Christus nihil vobis proderit, de tempore duntaxat loquitur post Evangelium divulgatum. Hic autem tempus ante passionem Christi significat, in quo circumcisio vim habebat. Si autem prauaricator legis sis &c.] Hic iam quomodo circumcisio non profit ostendit. Perinde ac si dicat: si tu Iudæe adulte prauaricator es legis, circumcisio tua incircuncisio facta est, non plusquam incircuncisio tibi valet, quia quid per circumcisionem profiteris, minimè seruas. Id quidem Hieremias ita confirmat: Omnes Gentes præputium habent, domus autem Israël incircuncisi sunt corde. Imò verò ex hoc obnoxii magis reique censentur, quoniam promissa non præstant. [ Si ergo Gentilis iustitias legis custodiat, incircuncisio eius quasi circumcisio reputabitur.]

Hic iam circumcisionem comparat ad Gentiles, quantum videlicet ad hoc attinet quod fructum eius Gentiles legem obseruando reportant. Nempè si circumcisionem legis obseruatione prodest, sine hac autem minimè, sequitur vt si Gentilis incircuncisus custodiat iustitias legis, id est, iusta præcepta legis, incircuncisio eius quasi circumcisio reputetur, nam veræ circumcisionis fructum refert, huius enim gratia exterior homo in corpore circumciditur, vt circumcidere se admoneatur in animo. Hinc Hieremias inquit: Circumcidimini Domino, & auferte præputia cordium vestrorum. [ Et iudicabit quod est circumcisum ex natura legem consumans te qui per literam, & circumcisionem prauaricator legis es. Iterum circumcisionem comparat ad Gentilem, ostendens hunc propter obseruantiam legis, ideo proferri. Ait igitur Gentilis incircuncisus consumans legem, id est, implens mandata legis ex natura per rationem, scilicet, naturalem. Nempè supra dictum est naturaliter, quæ sunt legis faciunt, hic per comparisonem sui iudicabit te Iudæum, ostendens te iudicandum atque damnandum. Qui es prauaricator legis dum eius præcepta transgredieris. Per literam & circumcisionem, scilicet, confidentem in ipso scriptæ legis auditu & circumcisione corporea, quæ quidem non tam vera circumcisio est, quam circumcisionis intimæ signum. [ Non enim qui in manifesto Iudæus est, nec quæ in manifesto in carne circumcisio. ] (Rationes superiorum hic assignat.) Primo quidem rationem adducit, quare circumcisio vel Iudaismus sine legis obseruatione non profit, obseruantia verò legis absque circumcisione, vel Iudaismo proficiat. Profectò circumcisus in corpore

legis prauaricator, velut incircuncisus habetur, & ab ipso incircunciso legem colente damnatur. Non enim est verus Iudæus, qui in manifesto est Iudæus, scilicet nomine tantum atque stirpe. Quæ d & in sequentibus declarabitur, vbi dicitur: Non enim omnes qui ex circumcisione sunt Israël, hi sunt Israëlitzæ, sed qui filij sunt promissionis, eadem ratione non est vera circumcisio illa, quæ in carne manifesta est. Illa enim signaculum quoddam esse putatur. Quod quidem sic in Genesi declaratur: Circumcidetis carnem præputij vestri, vt sit in signum fœderis. Signum autem non iudicatur verum, nisi & quod significatum est congruè consequatur. Propterea si quis Iudæus fœderis sit transgressor, non erit eius circumcisio vera. Quapropter tanquam incircuncisus habebitur. [ Sed qui in abscondito Iudæus est, & cordis circumcisio in spiritu non litera. ] Rationem hic assignat, quare incircuncisus legem seruans tanquam circumcisus existimetur, atque sui comparatione iudicet atque damnet circumcisionem duntaxat corpoream, scilicet quia verè est Iudæus, qui Iudæus est in abscondito, id est, qui in affectu cordis habet mandata legis, quæ Iudæi plerumque solo nomine profitentur. Simili ratione circumcisio vera est, quæ est cordis in spiritu id est, per spiritum facta, per quem superflue cogitationes ab animo præciduntur. Item per spiritum, id est, spiritalem legis intelligentiam non literalem. Inquit ad Philippenses: Nos sumus circumcisio, qui spiritu Deo seruimus. [ Cuius laus non ex hominibus, sed ex Deo est. ] Superiorem hic rationem confirmare videtur. Siquidem diuinum iudicium in omnibus humano iudicio præferendum, ea verò quæ extrinsecus nobis apparent, siue Iudaismus, siue circumcisio sit, ab hominibus laudari solent, quæ verò in penetralibus mentis nostræ latent diuino iudicio duntaxat probari possunt. Hinc ergo conducitur Iudaismum circumcisionemque interiorem, exteriori præferri, idque ipsum est quod inquit, cuius scilicet interioris circumcisionis laus non ex hominibus, sed ex Deo dependet. Huc tendit & illud, quod Corinthiis inquit: Non enim qui seipsum commendat, & quæ sequuntur.

*De prerogatiua, & quomodo illorum infidelitas non mutauit promissiones Dei.*

#### C A P V T XVIII.

**Q**uid ergo amplius est Iudæo? aut quæ utilitas circumcisionis? multum

per omnem modum.] Postquam Apostolus demonstrauit Iudaismum, ad quem legis susceptio & circumcisio pertinet, ad salutem non satis efficere procul ab obseruantia legis, per quam quidem obseruationem Gentilis sine exteriori Iudaismo, id est, sine lege scripta atque circumcissione fructum vtriusque consequitur, obicit ad ista nunc atque respondet, nempe si, ut dictum est, nec verus Iudæus, nec vera circumcisio in ceremoniis, sed in affectu consistit, quidnam amplius Iudæo quam cæteris est tributum? Nil sanè videtur, plus tamen apparet esse concessum, ubi Dominus in Deut. dixit: Te elegit Dominus Deus tuus, ut sis ei populus peculiaris. [Aut quæ utilitas circumcissionis.] Scilicet exterioris? utilis tamen esse debet, cum Deus ipse mādauerit. Esaias autem inquit: ego Dominus docens te utilia. Itaque cum subdit, multum quidem quæstionis dirimens. Primo quidem prærogatiuam Iudaismi defendit, deinde circumcissionis utilitatem propria ratione tuebitur. Profecto Iudæo amplius est tributum, itaque ut magnitudinem ostendat, respondet, multum, ut numerum quoque comprehendat, adhibet, per omnem modum, scilicet non tam in diuinorum contemplatione quam in rerum humanarum dispensatione. Primum confirmat Dauid, notus in Iudæa Deus. Idem quoque secundum, non fecit taliter omni nationi. Amplius quoque habet quantum spectat ad patres, ad promissiones, ad prolem. Quæ Paulus in sequentibus enarrabit, quorum est adoptio filiorum Dei & gloria & testamentum. Ac ne in tot tantorumque vel significatione, vel enumeratione bonorum, superbiam augeat Iudæorum, nihil à Iudæis gestum narrat, sed duntaxat diuinitus attributa, existimatque cætera munera ad hunc finem his à Deo concessa, quia filium suum destinauerat corpusque ex stirpe Iudaica suscepturum. Id autem & illa non pro meritis Iudæorum, sed propria voluntate decreuerat. Extollit autem per hæc eos Apostolus, non tam pro tempore post aduentum Christi, quam pro statu ante temporalem Christi natiuitatem. [Primum quidem quia credita sunt illis eloquia Dei.] Hæc dictio, primum, hoc in loco non propriè significat initium numerandi, non enim postea subdit, secundum atque tertium, sed significat principalem ante Christum prærogatiuam. Quia scilicet, Deus credidit illis atque concessit, quasi iam amicis eloquia sua, id est, mysteria in Patriarchis & Lege, Prophetisque contenta. Quid enim si quidam illorum non crediderunt? (Nunquid incredulitas

illorum Dei fidem euacuabit: absit, Prærogatiuæ Iudæorum forsitan aliquis derogabit, quasi propter ingratitudinem suam diuinorum eloquiorum amiserint dignitatem. Huic obiectioni respondet, incredulitatem illorum, Dei fidem euacuare non potuisse. Obiectio quidem est eiusmodi. Quid autem si quidam illorum non crediderunt, nunquid inde conuincitur nihil amplius esse Iudæo? Non crediderunt autem primo quidem legislatori, ut inquit Dauid, non crediderunt verbis eius. Deinde nec Prophetis fidem adhibuerunt. Quod Ezechiel ita confirmat: Increduli & subuersores sunt tecum. Denique nec assensum filii præstiterunt. Itaque ubi dicit. (Nunquid incredulitas &c.) Obiectionem eiusmodi soluit argumento quodam ad inconueniens deducente. Quia si propter quorundam incredulitatem, prærogatiua Iudæorum è medio tolleretur, hinc utique sequeretur, infidelitate hominis, Dei fidem euacuari atque disperdi. Quod quidem dictum nefas. Perinde ac si dicat: Nunquid incredulitas eorum, qui non crediderunt, Dei fidem euacuauit? Quod quidem duplicem habet sensum, nam aut fidem significat, qua in Deum creditur, aut Dei fidem, qua quidem Deus fidelis in promissis implendis existimatur. Ex hoc autem quod aliqui minimè crediderunt, reliquorum fides credentium non euauit. Neque rursus ex hoc ipso Dei fidelitas in promissis implendis diminuta esse potest. Quæ tamen sublata iam esset, si propter quorundam incredulitatem accideret, nihil amplius esse Iudæo. Premisit enim Deus populum illum multum, magnumque efficere. Quod quidem patet in Genesi: Multiplicabo semen tuum. (Est autem Deus verax, omnis autem homo mendax.) Latini codicis est, habent. Græci esto, atque ita legit Athanasius. Esto igitur, id est, palàm ab omnibus affirmetur. Iam verò Paulus, hoc quidem absurdum esse declarat, propter humanam incredulitatem fidem disperdi diuinam. Nam Deus quidem verax est, & tamen omnis homo mendax. Ego dixi in excessu meo, omnis homo mendax. Hinc patet mendaciam infidelitatemque hominis diuinæ veritati non adhaerentis, veritatem fidemque non auferre diuinam. Promisit verò Deus Iudæis aliquid absolute, aliquid autem cum conditione quadam, absolute quidem legem atque Christum. Hæc igitur firmiter, ut promiserat, sic impleuit, nec ob illorum perfidiam retractauit. Hæc enim nec pro dignitate suscipientium dantur, sed decreto diuino, nec ullis meritis compensantur. Cum conditione

ditione verò mundanam nonnunquam promissit prosperitatem, si videlicet in fide pietateque firmiter permanerent. Eiusmodi verò bona, nonnunquam homines promerentur.

Vbi autem isti conditionem eiusmodi minimè seruauerunt, ne talia Deus promissa seruauit. Et interea nihilominus fidelis & verax extitisse dicendus. Hoc autem quod dicitur, omnis homo mendax, ad hoc præcipuè videtur adductum, vt appareat diuinam promissionem esse factam atque completam, non propter aliquam mendacis hominis dignitatem, sed propter misericordiam singularem, vt gratia etiam impartiat in indignis, appareatque mera gratia hæc existeret. Deus quidem dicitur verax propter essentiam immutabilem, certam intelligentiam, firma promissa. Contrariis autem rationibus, homo mendax. Sicut scriptum est: Vt iustificeris in sermonibus tuis, & vincas cum iudicaris. Propheta postquam dixit: Tibi soli peccaui, & malum coram te feci, euestigio subdidit, vt iustificeris in sermonibus tuis &c. Continuanti quidem verba Dauidis, sensum verò minus consideranti, videri poterit ita dicere, se videlicet ad hunc finem peccauisse, vt Deus iustificetur in sermonibus suis, quod quidem foret absurdum. Hæc itaque pars vt iustificeris &c. continuanda est, cum obsecrationibus illis, miserere, dele, laua, munda me, non solum quia iniquitatem meam ego cognosco, sed etiam multoque magis ad gloriam tuam. Quæ quidem ex hoc etiam apparebit, si me purgato atque iustificato, tu in venia concedenda, promissisque implendis iustificeris &c. Itaque Deus iustus existimabitur, cum quia promissa seruauerit, tum quia et si non digno, tamen non prorsus alieno tribuerit. Alienus autem à gratia Dauid non erit omnino, si Deus propter misericordiam suam ignouerit, se verò ad veniam comparat. Peccatum meum ego cognosco, delicti me assidue poenitet, quia coram me est semper. Quod graue sit pensito, Cum tibi soli peccaauerim, id est, tibi soli sit notum, quam sit graue, & peccauerim coram te, cuius nasciturus filius & afflatio spiritus est in me. Denique subiungit: Causam veniæ validissimam, scilicet, Dei gloriam in hoc etiam consistentem, vt iustificetur in sermonibus suis. Promiserat enim Deus per Nathã Prophetam Dauidi, regnum eius in suo semine in æternum confirmaturum. Quod secundo Legum libro legitur. Post hæc autem Dauid adulterij homicidijque crimine se prorsus contaminauit. Propterea multis oriri

suspicio poterat. Deum huic velut indigno promissa minimè seruaturum. Ad hæc Dauid ita responderet, propter peccatum meum diuina iustitia non mutabitur, cuius est præcipua implere promissa. [Vt iustificeris in sermonibus tuis.] Videlicet vt ex hoc in tuis sermonibus iustus appareas. Quippè cum propter crimina mea non sis hæc aliquando frustraturus. Atque vincas cum iudicaris. Id est, quando ab hominibus iudicaris promissum decretumque mutaturus tanquam ipse meis sceleribus permuratus, in hoc ipso humanam vincas opinionem implendo videlicet, quod terminum expleturum mortalis suspicabatur opinio. Promissio quidem diuinitus facta Dauidi de Christo, ex stirpe Dauidis profecturo, erat prorsus implenda. Pertinebat enim ad propheticum prædestinationis oraculum. Promissiones autem minaces per Prophetas illatas, non est necesse prorsus impleri. Preiudicantur enim implendæ pro meritis, quibus interea permutatis, minarum non procedit euentus. Quamobrem nisi fuisset impletum promissum Dauidis, diuina forsitan iustitia culparetur, si quando verò minarum, potentia minus eueniunt, diuina quidem iustitia non arguitur, sed mutati mortales existimantur.

*Soluit questiones circa Dei veritatem & iustitiam & gratiam contingentes.*

### C A P V T XIX.

**S**I autem iniquitas nostra iustitiam Dei commendat, quid dicemus? nunquid iniquus est Deus, qui infert iram? Si Deus clementia sua vel indignis bona tribuit (in quo quidem munere commendabilior gratia eius apparet) inferre quispiam poterit Deum vt malignitate nostra, velut instrumento quodam, ad suam gloriam celebrandam. Eoque rem deducet, vt dicat iniquum Deum vbi peccata punit, quæ ad suam gloriam conferunt. Inquit ergo Paulus, quidnam dicemus, si quis arguat Deum iniquum, vbi peccata punit ad suam gloriam conducentia? Perinde ac si dicat, quomodo deuitabimus absurda, quæ inde sequentur? exprimit autem quod sequitur inconueniens, ita dicens: nunquid Deus qui infert iram, id est, vindictam, pro peccato, est iniquus? Hoc enim sequi videtur ex dictis. Iam verò peccatum nequaquam Deo necessarium est ad ipsam eius iustitiæ gloriam commendandam. Si enim peccatum propria quadam via tenderet ad diuinam iustitiam celebrandam, non esset supplicio, sed præmio dignum. Arque ita Deus dum

punit homines, pro delictis videretur iniquis, quod quidem dictum nefas. Ideo per verba sequentia prophana hoc excludit. Dicens absit, scilicet ut Deum indicemus iniquum. [Secundum hominem dico.] Id est, suspiciosam consequentiam circa iniquitatem in Deo fortè futuram, non mea quidem sententia, sed quorundam ita dubitantium lingua protuli. Aduerte quantum Paulus vertatur verba etiam aliorum proferre, Deum quomodolibet offensura. Similiter Socrates in Phædro, Philebo se dicit summa omnium formidine perterriti, ne fortè contra nomina diuina delinquat. Hoc autem non esse dicendum ostendit ita subdens. [Alioquin quomodo iudicabit Deus hunc mundum.] Scilicet, si Deus est iniquus, nempe sicut ad creatorem vniuersi pertinet esse potentissimum, sic ad vniuersi iudicem attinet esse iustissimum. Hinc illud Davidis: Iudicabit orbem terræ in æquitate. Atqui & ubi Paulus dicit, quomodo iudicabit hunc mundum? non solum de iudicandis hominibus, sed de vniuerso iudicio vult intelligi, quo quidem Deus omnia potenter attingit, suauiterque disponit, & quæ in coelis & quæ sub coelo sunt, mirabili quodam ordine digere atque dispensat. Non igitur putandus est in solis hominum rebus iniquus esse, qui est in communi totius mundi distributione iustissimus. Si enim veritas Dei in mendacio abundauit in gloriam ipsius, quid adhuc & ego tanquam peccator iudicor? Si in meo mendacio, id est, propter meum mendacium, quod in omni peccato comprehenditur, veritas Dei, id est, æqua fidelitas abundauit, scilicet, palam in gloriam ipsius, adeo ut humanum mendacium propriè ad gloriam Dei conferat, duo sequuntur absurda, primum quidem hominem non debere peccatorem existimari propter mendacium, si quidem propriè ad Dei gloriam conferat, propterea dicit peccatoris personam sumit, quid adhuc, id est, cur etiam nunc & ego iudicor ab hominibus pro mendacio tanquam peccator, & omnino peccator? Secundum autem absurdum est. Quod anfas falsis Apostoli cōcedemus ad criminandum, ut solent Apostolos Christi veros. Cum enim Apostoli veri prædicarent, per abundantiam gratiæ Christi peccatorum abundantiam salui. Quale illud Apostoli, ubi abundauit delictum, superabundauit & gratia, carpebant Apostolos, quasi diuulgarent, debere homines perpetrare mala, ut contingant inde bona. Quod quidem sequeretur, si mendacium hominis reuera Dei gratiam commendaret, & propriè gloriam il-

lustraret, propterea dixit. Et sicut blasphemamur. Id est: non si ipsi dicimus & sentimus, sicut quidam nos quasi per blasphemiam criminantur, & sicut fingunt, nos dicere, faciamus mala ut veniant bona. Scilicet ut Dei veritas & gratia & æquitas commendetur, abundemus peccatis, ut superabundet & gratia. Non enim nos ita loquimur vel sentimus. Quorum condemnatio iusta est. Scilicet, eorum qui mala faciunt, ut bona contingant. Sicut enim non debemus proponere falsa, ut concludamus vera, ita nec eligere mala, ut per ea velut ad finem perueniamus ad bonum. Eorum quin etiam iusta est damnatio qui tam iniquas Apostolis notas inurunt. Nec iniuria, qui Deum vel Dei ministros iniuste damnant ipsi iuste damnantur. Et qui diuinam iustitiam trahere in dubium non verentur, eam ipsi damnantem experiuntur, & sentiunt cruciantem.

*Inuectiua contra Iudeos atque Gentiles. Quod observatio legis non sufficit ad salutem.*

#### C A P V T XX.

**Q**uid igitur? Præcellimus eos? nequaquam. [Paulus se Iudæis adnumerans sic interrogat: Quid ergo dicendum? Nunquid nos excellentiores esse Gentilibus. Aliter quidem hic interrogat, in superioribus aliter. Illic enim quæsiuit nunquid amplius est Iudæo, scilicet à Deo tributum? statimque eloquia, mysteria, oracula Dei præ cæteris Iudæo credita confirmauit. Nunc sub Iudæorum persona quærit, num Gentilibus eminentiores sumus? Quantum scilicet ad personas & actiones humanas. Itaque respondet, minimè, atque sicut in superioribus multa & magna Gentilium vitia numerauit, ita deinceps totidem Iudæorum simul atque Gentilium, ut saltem pares vtrique moribus existimentur, & interea Iudæi tanto peiores quanto maiori munere, donato diuinitus, sunt abusi. Altercatio enim erat inter Iudæos Gentilesque conuersos ad fidem an veri excellentiores essent. Vbi Iudæi præcipuè se diuinis muneribus extollebant, & Gentiles quasi minimè idoneos ad salutem paruipendebant. Vtrique igitur, sed Iudæi maximè, cohibendi Apostolo videbantur. Causati enim sumus Iudæos & Græcos omnes sub peccato esse.] Proinde ac si dicat, rationibus accusauimus & criminati sumus utrosque, ita peccati esse subiectos, ut sola diuina gratia iustitiam salutemque consequi possint. Nec Græci Philosophia vel lege naturali, neque Iudæi prærogativa vel lege scripta confidant, sed ad gratiam Evangelicam vtrique confugiant.

Causatus quidem est Gentiles Apostolus, ubi obiecit eis veritatem Dei in iniustitia impietateque detinere. Causatus quoque Iudæos ubi dissenuit eos acceptam diuinis legem præuaticatos suo Deum honore fraudasse. [Sicut scriptum est.] Scilicet à Davide scriptum multas grauesque Iudæorum Gentiliumque culpas accumulante. Esaiam quoque citabit testem contra eosdem. In peccatis autem enumerandis, primo quidem obmissis, deinde commissionis culpas adducit in medium. [Non est iustus quisque, non est intelligens, non est requirens Deum.] Non est iustus quisque iustitia perfecta, quæ quidem referri debet ad Deum, atque ad hunc finem gratia diuina contendere. [Non est intelligens.] Exactam scilicet rationem, qua iustæ actiones sunt in Deum præcipue dirigendæ. [Non est requirens Deum.] Quia scilicet non inuestigant quid Deo placeat, quid non placeat. Et quomodo ipse potissimum sit finis actionibus proponendus. [Omnes declinauerunt.] Scilicet via recta. Merito in delectu viarum itinereque semper erant qui terminum non prospexerunt. [Similiter inutiles facti sunt.] Consequentem finem vltimum, in quo requiescant, non assequuntur, postquam in ipsa finis constitutione viarumque delectu ab initio, errauerunt. Hinc conatus omnis inutilis [Non est qui faciat bonum, non est vsque ad vnum.] Nimirum cum in actionum principiis iam errauerint, opus nullum peragunt absolute bonum, & quia omnes similiter errauerunt, nullus peruenire putatur ad bonum, videlicet facultate sua. Hinc omnes gratia pariter indigere censentur. [Sepulchrum parens est guttur eorum, linguis suis dolose agebant.] Iam peccata commissionis aggreditur, & à sermonis falsitate detractiōneque & maledicentia facit exordium. In hac enim & quæuis horribilia peccata labuntur, mortales omnes qui ab initio semel errantes diuina gratia passim orbatī pererrant. [Dolose agebant.] Quia non solum crimina vera vel palam, sed etiam falsa & clam inferunt, atque confingunt. [Venenum aspidum sub labiis eorum.] Maleficia siquidem lingua virus effundunt ad longum tempus quam plurimos infecturum. [Quorum os maledictione & amaritudine plenum est.] Auger admodum ubi dicit, plenum. Maledictione etiam in Deum & amaritudine, dum etiam alios ad hoc prouocant & inficiunt. [Veloces pedes eorum ad effundendum sanguinem.] Testimonium Esaiæ nunc adducit, & post linguæ

culpas, peccata operis iā inuadit. Exprimit igitur, quam propensi ad quæuis facinora putandi sint, quandoquidē ad homicidium etiam Prophetarum præcipientes efferuntur. [Contritio & infelicitas in viis eorum.] Post pedes consequenter vias attingit, id est, motus actusque, scelestos. In his autem contritionem collocat & miseriam, supplicia videlicet verborum & operum pessimorum. Si quidem ipsi etiam in hac vita suis flagitiis, obiter velut offendiculis tribulisque cōteruntur atque cruciantur. In vita verò futura miseria premuntur æterna. [Viam pacis non cognouerunt.] Quoniam rectam compendariamque viam ad beatitudinē, in qua sola pax & quies esse potest, non cognouerunt, id est, non elegerunt. Cōsequenter hac via relicta, quæ vnica est, per vias distrahi multas, in viasque pererrant ad pessimos habitus infelicitatemque deducentes. (Nō est timor Dei ante oculos eorum.) Quod hic postremum posuit, omnium principium est malorum. Sicut enim sapientiæ quidem principium est timor Domini. Sapientia verò principium recte feliciterque agendi, quod & Plato in Euthydemo demonstrat, sic non timere Deum origo est ignorantie, quasi cæcitatē in eligēdo plurimum aberrantis. Atque hinc obliqui infelicisq; itineris est origo. Dixit autem ante oculos, ut admonet non leuiter, sed assidue valdeque verendum esse Deum, & eiusmodi redolentiā pro indice simul atque duce actionum omnium semper habendam. (Scimus autem quod quæcumque lex loquitur, his qui in lege sunt loquitur.) Nonnulli apud Iudæos superiora Davidis verba aduersus Nabuchodonosor Babyloniæ regem, exercitumque eius dicta interpretantur. Est igitur, & Esaias, si placet, loquatur & de Gentilibus. Omnino verò quoniam utriusque in lege Mosaiica fundati loquuntur, pro lege sunt habendi, ad instructionem populi Iudaici missi diuinitus. Quamobrem & si verba eorū vel Gentiles tangunt, vel complectuntur omnes, tamen ad castigandum populum cui præpositi sunt ubique cōtendunt, & ideo præcipue ad eos scilicet formandos, qui in lege sunt loquuntur. Atque idcirco si quādo Gentiles tangunt, illorum interim cognomento exemploque Iudæos quoque comprehendunt. [Ut omne os obstruatur.] Quæ nam est intentio Prophetarum, ubi omnes pariter detestantur? Ut nullus audeat vltius se iactare quasi prudentem aut iustum. (Et omnis mundus subditus fiat Deo.) Omnes errata sua pariter recognoscant, & quam minimè sufficientes sibi sint perpendant, ideoque Dei gratiam semper expectent.



(Quoniam ex operibus legis nō iustificabitur omnis caro coram illo.) Nec Gentilis ex operibus legis naturalis atque Mosaicæ iustitiam æterna salute dignam consequi potest. Vtrique igitur ad gratiam Evangelicam confugere compelluntur. Dixit autem coram illo. Quoniam observatio legis apud homines quidē existimatur sufficiens ad salutem, apud Deum verò nequaquam. [Per legē enim cognitio est peccati.] Lex enim non ei leuat culpas & peccata, sed grauat. Duobus videlicet modis, quia per legem naturalem atq; scriptam docemur quid agendum, quid vitandum, ut ignorantia nos excusare nō possit. Item, lex ad observantiam nos astringit. Hinc ergo cū nitimur in vetitum, reuerentia legis posthabita, grauiore quadam damnatione peccamus. Opus est igitur indulgentiore quadam authoris legum clementia, ope, gratia, ut nos vel per auxilium, vel veniam gratiamque à crimine culpisque redimat.

*Quæ sit iustitia Dei, & quomodo non dependeat ab operibus legis, sed à gratia Dei per fidem in Christum, atque de redemptione.*

## C A P V T XXI.

**N**Vnc autē seorsum à lege iustitia Dei manifestata est, testificata à lege & Prophetis. Iamdiu molitur Apostolus affirmare, salutē absq; fide Christi haberi non posse. Hactenus quidem hoc per legis defectum ostendere voluit. Deinceps autem potissimum per Christianæ fidei gratiæque perfectionem idem nobis aperiet. Præterea in superioribus enarrauit Iudæos Gentilesque ante Christi aduentum fermē æquales in culpa fuisse, deinceps autem æquales ad statum gratiæ demonstrabit. Principio iustitiam Dei dicit à lege minimē dependere. Iustitiam verò Dei vocat eam præcipuē, quæ Deus ipse requirit tanquam saluti sufficientem, & qua credentes in filium pater ipse iustificat. Hæc igitur Dei iustitia nunc, id est, in tempore gratiæ manifestata est, cum per Christi doctrinam, tum per eius miracula, tum etiam per operis euidentiā. Siquidem compertum sit, multos esse diuinitus ut ita loquar, iustificatos. Atque hoc quidem seorsum à lege, id est, dum lex eiusmodi iustitiam non efficeret, quemadmodum inquit ad Galatas: Qui in lege iustificamini à gratia excidistis. Hinc & Esaias inquit, propē est salus mea, ut veniat, & iustitia mea, ut reueletur. Et ne quis putet hanc iustitiam esse legi contrariam, ait,

testificata est per vaticinium atque figuram. Hinc Christus apud Ioannem. Si crederetis Mosi, forsitan & mihi crederetis De me enim ille scripsit. Quinetiam per effectum. Quia cum ipsa iustificare non posset, satis arguebat aliunde quærendam fore iustitiam. Prophetæ autem testificati sunt eam prænuntiādo. Propterea in Actis Apostolorū dicitur. Huic omnes Prophetæ testimonium perhibent. [Iustitia autem Dei per fidem Iesu Christi in omnes, & super omnes qui credunt in eum.] Iustitia quidem quæ satisfacit Deo, quæ iustificatur apud Deum anima, comparatur per ipsam fidem, Christo & Evangelio præstitam. Per fidem, inquam viuam, id est, charitatem formatam & operantem: quæ quidem fides præparat nos ad gratiā. Gratia verò iustificamur. In omnes, inquit: quoniā iustificatio eiusmodi quæ competere potest omnibus. Inquit, & super omnes: quoniam omnium merita & vires excedit: qui credunt in eū, scilicet esse Dei Filium. Antea quidem venturum, postea verò venisse. (Non enim est distinctio, omnes enim peccauerunt, & privatur gloria Dei.) Hoc per Esaiam confirmari videtur, omnes sicut oues errauimus. Inquit non esse distinctionem inter Iudæum atque Gētilem: quoniam neuter per suam legem dumtaxat ducitur ad salutem, & vtrique adeo peccauerunt, ut privati sint facultate ad Dei gloriā. Vtrique igitur æquē indigent gratia Dei. Atq; ad hanc gratiam per fidē sunt pariter præparandi. Per quam sanē gratiam æquē iustificandi putantur. Ideo sequitur. [Iustificati gratis, gratia ipsius pro redemptione quæ in Christo Iesu.] Quoniam nec suis legibus, nec meritis, sed sola fide gratiaq; Dei iustitiam sunt adepti. Sed antequā vltius prosequamur admonendi estis, non esse legendum, ut Latini Codices habent, egent gloria Dei. Id enim neq; cum Græcis convenit verbis, nec modum dicendi seruat vsui consentaneū. Non enim propriē loquimur, egent gloria, sed egent gratia, & privantur gloria siue carent. Sic Athanasius quoq; legit: Nā ob hoc ipsū quod omnes peccauerunt, similiter gloria carent, & gratia pariter egent ad gloriam consequendam, sed ad institutum proximum redeamus. Neque rursus legendum est, per gratiam ipsius, quemadmodum Latini Codices habent, sed veritate Græca, ut suprā dicebam, gratia ipsius. Alioquin ridiculus est cōtextus. Ipsius Dei gratia nos iustos efficit per redemptionem quæ est in Christo Iesu, id est, per hoc mediū, quia misit Iesum qui nos à culpis quasi reos sua pro nobis satisfactione redimeret.

Satisfactione, inquam, sustinendo pro nobis mortem. Cui quidem propter originale peccatum obnoxii omnes eramus. Eiusmodi vero satisfactio non aliter ad nos pertinere potest quam per fidem. Qua quidem credamus Redemptorem nostrum esse Iesum, ideo subditur [Quem proposuit Deus Propitiatorem per fidem in sanguine ipsius] Proposuit, id est, prædestinauit, & palam pro omnibus posuit humani generis cum Deo conciliatorem, in sanguine suo, id est, mirabili sui ipsius sacrificio per fidem dumtaxat ad nos pertinente. Vbi vero Propitiatorem dicit, Mosaicum tangit Propitiatorium. Quod quidem, ut inquit Philon, Arcæ erit operculum Cherubinisin geminis insignitum, ut nostri exponunt, Christi Symbolum Qui & Ecclesiam & Arcam protegit, & sicut figuratur Cherubin humanus est pariter & diuinus. [Ad ostensionem iustitiæ suæ propter remissionem præcedentium delictorum.] Finalis assignat redemptionis propitiationisque causam, id est, ut Dei iustitia declaretur pluribus sanè modis, ut diuina ad nos iustificatio veniat. Ut quod diuinitus promissum est, iuste & fideliter impleatur, ut vniuersale generis humani delictum non sit penitus impunitum. Quod quidem sola Christi & innocentis atque diuini pro nobis satisfactione expiari potest. Ideo dixit, ostensionem diuinæ iustitiæ in remissione delictorum præcedentium effici posse In sustentatione Dei ad ostensionem iustitiæ eius in hoc tempore. Quæ quidem delicta Deus hæcenus sustinuerat, ut nec puniret nec absolueret, præsertim circa patres expectantes in lymbo, sustinuerat autem ut denique declararet dumtaxat in hoc tempore Christianæ gratiæ absolui posse delicta. Ut sit ipse iustus & iustificans cum qui ex fide est Iesu Christi ad hunc videlicet finem ipse Deus omnino iustus appareat, & iustum insuper reddat in Christo credentem.

Operæpretium fore videtur antequam consequentem disputationem aggrediamur, non nihil de redemptione per Christum facta differere. Rationibus videlicet ex libro de Religione nostro breuiter huc adductis. Ibi enim de hoc latius disputamus. Vita corporis anima est, animæ vita Deus, naturæ ordo exigit, ut corpus animæ, anima Deo pareat. Iustitiæ ordo requirit, ut si à Deo dissentit animus, talionis poena dissentiat corpus ab anima, atque sensus à ratione. Rebellauit à Deo primi parentis animus, rebellauit corpus ac sensus ab eo. Rebellio prima peccatum fuit. Secunda

poena quædam peccati fuit atque peccatum, quoniam rationi derogauit à Deo. Complexio affectioque rebellis à primo quasi sapor quidam profuxit in omnes, proinde quasi ut riuuli à fonte manarunt. Hoc originale vitium est cæterorum malorum animæ corporisque origo. Hoc volumina illa Hebræorum testificantur, quorum diuinitatem testificatur summa illorum præ cæteris antiquitas, consensio penè omnium, propagatio per vniuersum, duratio indefessa, concordia, maiestas, sobrietas & miracula. Hinc illa Magorum à Zoroastre descendentium opinio, omnia scilicet corporis mala à malis animæ proficisci, animæque curata cætera mala vitari. Hoc Plato in Timæo quidem innuit, in Carmide verò declarat. Vtrum, ut ad propositum reuertamur, rebellio eiusmodi, quoniam infiniti Dei derogauit maiestati, mortales ad infinitam beatitudinem ineptissimos reddidit, neque dirigi, nisi per infinitum Deum poterant. Dirigendi tamen aliquando erant, ne frustra à Deo fuissent ab initio ad beatitudinem ordinati. Per voluptatem commissum est peccatum, per contrarium voluptatis dolorem est purgandum. Peccauit semel omnis quodammodo humana natura in homine illo, qui vicem gerebat omnium, pati similiter semel quodammodo debet omnis in aliquo, qui vicem quoque omnium gerat, qui longè magis cum Deo consentiat quam ille dissenserit. Omnium verò vicem post Adam solus ille gerere potuit, qui Deo penitus victus esset omnium conditori. Fuit igitur ille Deus simul & homo. Deus, ut omnes complecteretur, infinitamque possit culpam diluere: Homo ut pati pro culpa posset, atque ut pateretur homo, quemadmodum peccauerat homo. Sic & illius hominis poena meritumque vim aliquam habuit infinitam, in quantum reuera Deo iunctus fuerat infinito. Infinito autem quodammodo supplicio meritoque opus fuerat ad infinitam culpam penitus diluendam.

Proinde Doctores Iudæorum consentiunt diuinam prouidentiam, mala imminuentia populo scelerato conuenienter, ac sæpè purgare per supplicium vnius iusti, pro omnibus libenter satisfacturi, sicut per incisionem vnius venæ sæpè curantur omnia membra. Item conueniunt per culpam Adæ humanam speciem infectam fuisse. Atque hanc contagionem nondum fuisse purgatam, sed tempore Messæ purgandam, quomodocunque purgetur. Nos autem ex eorum principio concludimus purgationem eiusmodi fieri per passionem

Messias. Sicut enim pro pluribus satisfactorius gradatim debet esse iustior, ita pro omnibus iustissimus. Talis verò solus est Messias. Quomodo autem oportuit ad animos expiandos Messiam esse sacerdotem, atque hostiam probat Paulus ad Hebræos.

*Non per merita legalium operum, sed per Christianam fidem iustus saluusque efficitur Gentilis pariter ut Iudæus.*

## CAPUT XXII.

**V**bi est igitur gloriatio tua? Exclusa est. Per quam legem? operum? non, sed per legem fidei. ] Iamdiu Apostolus incipit iactantiam reprimere Iudæorum, quatenus sola lege vel maximè gloriabantur, confidebantque se Gentilibus ad consequendam salutem esse admodum potiores. Cum ergo Paulus iam pridem probauerit Iudæos in culpa Gentilibus æquales existere, innueritque Gentiles in suscipienda gratia æquales esse Iudæis. Hic itaque prosequitur inanem Iudæorum gloriam repressurus. Ausculta Iudæe, si æquè peccaris es obnoxius ut Gentilis rursus, quando iustificatur pariter atque tu per Euangelicam fidem atque gratiam. Vbi est igitur gloriatio tua? qua scilicet in lege adeò gloriaris, ut existimes operum eiusmodi meritis te solum vel potissimum ad iustitiam peruenisse? Exclusa est videlicet & explosa. Quoniam verò altera quidem lex per alteram excludenda, vel declaranda, vel emendanda videtur, interrogat, per quam præcipuè legem eius iactantia cohibita sit. Vna quidem lex esse dicitur regula operum scilicet Mosaica: Quæ quidem non tam in extirpandis perturbationibus animique in actionibus exterioribus disponendis versari videtur. Altera verò lex fidei nominatur, id est, Euangelica, quæ non solum actiones externas castigat atque disponit, sed etiam omnes animi motus moderatur ad vnguè, & perturbationes extirpat. Per hanc sanè legem sublata est gloriatio Iudæorum. Quippè cum huius munere Gentilis quilibet non minus quàm Iudæi diuinam iustitiam & gratiā consequantur. ] Arbitramur enim iustificari hominem per fidem sine operibus legis. ] Fides profecto viua & per charitatem operans, exhibita Christo, iustitiam præstat perfectam cuiuslibet ita credenti, etiamsi in legis operibus non fuerit conuersatus. Necessarium tamen est ita credentem deinde legitima operari, nec fides sine operibus mortua iudicetur. ] An Iudæorum tantum Deus est? Nonne & Gentium? Imò & Gentium. ]

Deus conditor vniuersi non solum Iudæis, sed etiam Gentibus vbique prouidet. Itaque non Iudæis tantum, sed Gentibus quoque modum adhibuit ad salutem, ut sicut Iudæus sub præceptis Mosaicis educatus aditum habet ad gratiam, ita Gentilis sub lege naturali nutritus & doctus viam habeat ad salutem & vterque per fidem Euangelicam iustitiam prorsus adeptus apud Deum gloriam consequatur æternam. Quoniam vnus est Deus, qui iustificat circumcisionem ex fide, Gentilitatemque per fidem. ] Ipsemet Deus pariter vtrisque prouidens eiusdem fidei, scilicet Christianæ munere, vtrisque tanquam iustos comprobabat & gratia gloriaque dignatur. Inquit autem ex fide iustificare Iudæos, & per fidem iustificare Gentiles. Ex fide scilicet apud Iudæos omnium antiquissima. Siquidem cœpit in Abraham, processitque per Patriarchas alios atque Prophetas: Christum expectans quandoque futurum. In hac itaque Iudæus natus, hac quoque munitus ex hac nimirum iustificari dicitur apud Deum. Apud verò Gentiles nulla de Christo fides antiqua fuit, sed Apostolis prædicantibus per hanc nouam subitamque fidem iustificati censentur. ] Legem ergo destruimus per fidem? Absit, sed legem statuimus. ] Nequis per suprà dicta putet Euangelicam fidem Mosaicæ legi contrariam, subdit: Euangelica lege Mosaicam non disperdi. Sed, ut inquit Dominus, adimpleri. Quæ enim in Testamento veteri ceremonialia erant, tanquam signacula futurorum, in Euangelica substantia veritatem suam reportauerunt. Quæ verò moralia quondam fuerant, optatum finem votumque præceperunt. Disponebant enim animorum motus & pro viribus amputabant, ut denique penitus purgarentur. Quam sanè purgationem puritatemque perfectam lex Euangelica præstitit.

*Non Abraham nec alius quisquam propter circumcisionem vel simile aliud legis opus apud Deum iustus habetur, sed propter fidem.*

## CAPUT XXIII.

**I**udæi Gentilibus propter legis circumcisionisque priuilegia seipsum in salute recipienda nimium præferbant. Apostolus igitur cum eiusmodi iactantiam circa legem iam sapè represserit, deinceps etiam circa circumcisionem cohibere prosequitur, repetens videlicet quæstionem quandam superiorem ita dicentem: Quæ igitur

utilitas circumcisionis? Et quoniam Abraham primus mandatum circumcisionis accipit, merito circa personam eius questionem de circumcisione resumit, ita dicens: [Quid ergo dicemus Abraham patrem nostrum inuenisse secundum carnem?] Perinde ac si dicat: Postquam diximus Gentilitatem pariter atque circumcisionem apud Deum iustificari, quidnam igitur facultatis eximie ad diuinam iustitiam consequendam inuenit reportauitque Abraham secundum carnem, scilicet circumcisam, id est, ex eo quod iussu diuino carnem suam suorumque circumcidit operaque similia est exequutus? Quasi dicat, per huiusmodi opera perfectam non reportauit iustitiam, sed per fidem. Si quis enim mortalis cum diuino mandato spectet circumcidentem, aliaque legitima extrinsecus opera peragentem, comprobabit ipsum iam dignum iustitiae gloria iudicandum, atque hoc quidem iudicium est humanum externa videlicet circumspiciens. Quandoquidem inspicere non valeat intima. Atque ita Abraham gloriam apud homines promerebitur. Non tamen eadem hac ratione gloriam apud Deum insipientem videlicet intima, ac propter fidem finisque intentionem potius quam propter externos motus iustificantem. Qui sanè & mentiuntur falluntque plerumque Iudicem his intentum, & si quando legitimi sunt, ut in Abraham, non tamen propter eos sed per fidem intentionemque intimam Deus iustitiae gloria dignum censet Abraham & quemlibet similiter operantem. Iustitia quidem humana bonum humanum spectans externorum operum consuetudine communiter comparatur. Iustitia verò diuina scilicet in primis accepta Deo, diuinum extremumque bonum optans, non tantam habet cum actionibus externis proportionem, ut ex illis comparari queat, sed fide per charitatem in Deum erecta diuinaque gratia prouenit, ut merito dictum sit, externa quidem opera apud homines, iudem verò intentionemque intimam apud Deum gloriam reportare. Quamobrem subdit Apostolus: Si enim Abraham ex operibus legis iustificatus est, habet gloriam; sed non apud Deum. Quasi dicat, si iudices iustum propter opera legis exteriora, hæc quidem humana comprobatio fuerit potius quam diuina. Opera verò legis intelligit, quod circumcidit, quodque sacrificia obtulit, ceteraque id genus, qualia lex Mosaitica præcipit obseruanda.

Præterea ex operibus externis acquiritur civilis & humana iustitia, gloriam inter

homines quidem habens, sed non simile apud Deum. Quoniam non efficit hominem æterna gloria dignum, nisi accesserit & præcesserit ingens fidei & charitatis affectus gratia diuina munitus. Considerandum verò quod Latine traductum est, habet gloriam, Græcè haberi propriè gloriationem. Vbi sensus hic est proprius, scilicet habet in se quo gloriatur, id est, si per opera liberi arbitrij, tanquam sua, iustitiam promeretur, merito gloriari potest non solum apud Deum, sed etiam apud se, id est, non solum diuina gratia, sed propriis etiam actionibus atque meritis. Si autem non per opera externa, sed per ipsam solius fidei oblationem iustus euadit, sola Dei gratia largitateque gloriabitur. Quod autem Apostolus de Abraham loquitur, similiter de ceteris hominibus vult intelligi. Quid enim scriptura dicit? [Credidit Abraham Deo & reputatum est illi ad iustitiam.] Nempè in Genesi scribitur Abraham credidisse Deo multiplicationem feminis promittenti. Ac propter eiusmodi fidem, non propter exteriora, à Deo iudicatum esse iustum. Credidit autem Deo præcipuè promittenti Christum, vnde confirmatur per fidem in Christum perfectam iustitiam comparari. Perfectam sanè iustitiam Deus non in vili quidem subiecto, scilicet in scriptis motibusque externis, sed in intimo mentis affectu nobis imprimere voluit, in quo quidem affectu fides habet exordium. Inquit autem, credidit Deo. Est enim fidei trinus actus. Credere Deum, credere Deo, credere in Deum. Ille quidem credit Deum qui auctoritate nitens, Deum esse prouidereque prorsus affirmat. Credit autem præterea Deo qui diuinis reuelationibus præceptisque fidem adhibet atque parat. Credit denique & in Deum qui fidei charitatem adhibens ad Deum omnia refert ut ad finem. Primus quidem actus materiam fidei continere videtur, secundus autem fidei formam, tertius denique finem. Vt igitur ipsam fidei formam exprimeret, credidit Deo, inquit. Ei autem qui operatur, merces non imputatur secundum gratiam, sed secundum debitum. Ei verò qui non operatur, credenti autem in eum qui iustificat impium, reputatur fides eius ad iustitiam, secundum propositum gratiæ Dei. Exponit & confirmat Apostolus illud, credidit Abraham Deo, & reputatum est illi ad iustitiam. Cum enim Abraham nihil adhuc exterius operans, perfectè Deo crediderit, atque ob hanc ipsam fidem iustus à Deo sit iudicatus, gratus à Deo iustitiam accepisse videtur. Similiter & alij multi cum

operandi tempus occasionemque vel facultatem nondum habuerint, ob solam fidem affectumque in Deum, iustitia donati sunt, perinde ac si iustitiæ opera peregerissent. Quod enim reputatum dicitur, intelligitur gratis datum alicui, nondum reuera merenti. Hæc in sequentibus confirmantur, vbi dicitur, corde creditur ad iustitiam. qui autem opera multa denique iustitiæ consentanea & ad libitum iustitiæ conducentia iam exercuit, si vero iustus habetur à Deo, non solo quidem munere, sed etiam suo quodam officio mercedem huiusmodi, id est, iustitiā est adeptus. Hæc autem huiusmodi ratione nituntur. Quod alicui tanquam merces operanti traditur, non propriè ratione gratiæ datur, sed debiti alicuius conditione rependitur. Iustitia verò perfecta, de qua hic est sermo, gratiæ largitate concedetur. Itaque non per opera legis acquiritur.

Proinde quod inquit, qui iustificat impium, auget argumentum. Nam si Deus aliquando hominem nondum credentem ad fidem vocat, perque fidem gratiamque ad iustitiam salutemque perducit, multo magis animum iam quodammodo pium etque credentem iustum efficit & beatum. Præterea quod inquit, secundum debitum, non ita debes accipere, ut opera temporalia digna sint vel æterna beatitudine vel perfecta comprobatione iustitiæ. Hoc damnat Paulus vbi dicit ad Romanos: Passiones huius temporis non sunt condignæ ad futuram gloriam. Atque ad Titum, non secundum opera iustitiæ, quæ fecimus nos. Opera enim nostra per formam naturamque suam, neque iustitiam perfectam, neque beatitudinem promerentur. Secundum verò diuinum influxum, quo mirabiliter incitantur atque ducuntur promereri videntur. Ipsa profecto fides manifestè non ista meretur, diuina gratia fulciatur. Quod denique subdidit: Secundum propositum gratiæ Dei. Significat Deum largitate sua prædestinasse iustitiam & salutem reuera credentibus impartiri. [Sicut & David dicit, beatitudinem hominis cui Deus acceptam fert iustitiam sine operibus.]

Latini Codices accepto habent, mendosum est, nec vllum habet sensum. Quod verò dicitur, cum Deus acceptam fert iustitiam, Latinus loquendi modus est, atque eiusmodi significationem habet, Deus habet iustitiam pro accepta ab illo, videlicet homine qui nondum opera legis exercuit. Sed quomodo habet acceptam? Quoniam ille & si non fert ad Deum opera legis, fidem tamen iam habet. Quam

scilicet fidem, vel ipse homo Deo in primis obtulit, postmodum augenti, vel Deus largitate sua fidem fidem principio præstitit, dum ad hanc hominem miraculosa quadam opera compulit. Propterea iustum eum fecit, & reputauit quasi gratis, qui nondum ad opera foris ad iustitiam conducentia perpetravit. Imò & nonnunquam opera contraria fecit. Quod quidem Propheta declarat vbi sequitur. [Beati quorum remissæ sunt iniquitates, & quorum testæ sunt peccata. Beatus vir cui non imputabit Dominus peccatum.] Ex his planè conspicitur, hominem sæpè peccatis onustum ad fidem à Deo mirabiliter prouocari, atque ita pro iusto haberi, gratisque fide iustitiæque donatum ad beatitudinem præparari. Enimvero felix, ac supra modum dilectus Deo, beneque fortunatus iudicatur à Dauide, qui sine operibus, id est, officiis præcedentibus, sine labore, gratis munus perpetuum reportauit. Vbi dicit iniquitates, delicta significat per malitiam perpetrata. Vbi verò peccata, per infirmitatem commissa declarat. Vbi denique peccatum commune cunctis & originale vult intelligi. Peccata rursus testæ dicuntur diuino conspectui. Quæ Deus non aspicit ad hoc ut puniat. Similiter non imputat peccatum, scilicet ad vindictam. Eiusmodi verò gratia prædestinatione quadam paucis concessa traditur. Quemadmodum Paulo similibusque diuinitus compulsis ad bonum. Remissio verò peccatorum iam credenti concessa, vel nondum operanti pluribus contigisse videtur. [Beatitudo ergo hæc in circumcisionem tantum peruenit, an etiam in Gentilitatem. Dicimus enim quod reputata est fides Abrahæ ad iustitiam. Quomodo ergo reputata est? In circumcisione, an ante circumcisionem? Non in circumcisione, sed ante.] Quæritur de eiusmodi gratia, quæ vocatur iustitia fidei, per quam gratis remittuntur peccata, quæ nonnunquam per solam fidem nullis meritis operum præcedentibus credentem, reputat redditque iustum, & nonnunquam etiam male habitum operatum vocat atque iustificat: Quæritur, inquam, num circumcisis dumtaxat conueniat, an etiam non circumcisis æqualiter concedatur? Respondetur, & æqualiter. Siquidem nondum circumcisis fuerat Abraham, quando fides ipsa sine operibus præcedentibus reputata illi est ad iustitiam, ante Ismaëlis natiuitatem, circumcisio verò facta est, Ismaële propè iam adulto.



*Circuncisio non est iustitiæ causa, sed signum  
iustitiæ, quæ est per fidem. Item,  
premissio facta fuit Abraha  
non propter legis opera,  
sed propter fidem.*

## CAP V T XXIIII.

**E**T signum accepit circuncisionis, signaculum iustitiæ fidei, quæ est in non circunciso, ut sit pater omnium credentium sine circuncisione, ut reputetur & illis credulitas ad iustitiam, atque sit pater circuncisionis, non his tantum qui sunt ex circuncisione, sed his etiam, qui sectantur vestigia fidei, quæ est in patre nostro Abraham ante circuncisionem. ] Postquam disputatum est beatitudinem illam quæ in peccatorum remissione consistit non solum circuncisis, sed etiam non circuncisis æquè congruere, idque exemplo Abraham probatum, qui ante circuncisionem per fidem ipsam ab ipso Deo iustitiam & eiusmodi beatitudinem est consequutus, reliquum erat, quid sibi velit circuncisionis officium patefacere, ne fortè frustra videatur inducta, quandoquidem ipsa non iustitiæ causa. Inquit ergo Paulus, eam tanquam signum atque signaculum esse diuinitus institutum. Signum quidem futuri, id est, spiritualis circuncisionis efficiendæ per Christum. Signaculum verò siue sigillum ipsius iustitiæ quam Abraham per fidem est adeptus. Est autem signaculum eiusmodi affectionis Abraham duobus præcipuè modis. Quantum scilicet ad hoc ipsum quod credidit & quantum ad crudelitatis effectum. Credidit enim promissioni de progenie propaganda. Ut conuenienter sigillum in membro propagationis acceperit. Et ipsa fides culpam amouet, quemadmodum circuncisio superfluum pelliculam in membro libidinis aufert. Quod autem circuncisio non tanquam substantia quædam, sed quasi signum vel signaculum introducta fuerit, declarat in Genesi Moses. Circuncidetis carnem præputij vestri, ut sit in signum fœderis inter me & vos. Per hanc enim Dei populus ab alieno discernitur, significaturque libidinum amputatio, quæ animos à Deo separant. Qui tandem per circuncisionem spiritalem corporeis affectibus extirpatis, atque ita fœdere apud Deum instaurato, cum Deo reconciliari dicuntur. Mysterium eiusmodi tetigit Hieremias: Circuncidimini Domino, & auferte præputia cordium vestrorum. Deinde ubi ait, ut sit pa-

ter &c. Id profecto vult intelligi. Cum Abraham ante circuncisionem per ipsam fidem iam iustus à Deo sit iudicatus. Dñi verò postea circuncisus, sequitur ut sit pater non solum circuncisorum, sed etiam omnium, sine circuncisione, credentium. Quod autem in textu dicitur, sine circuncisione, duo pariter significare potest. Tum quod Abraham per id quod habuit ante circuncisionem, scilicet per fidem sit pater omnium æquè credentium, ut reputetur & illis ad iustitiam scilicet quod credunt, sicut & Abraham fuerat reputatum. Tum etiam quod sit pater eorum, qui sine circuncisione credunt.

Quemadmodum & ille absque circuncisione crediderat, & sit pater circuncisionis, id est, circuncisorum, qui ex eo originem ducunt, circuncisionemque acceperunt. Hinc illud apud Ioannem, pater noster Abraham est. Hactenus communiter expositio est. Propria verò magis est eiusmodi, scilicet ut sit pater authorque fidei atque circuncisionis, fidei, inquam, credentibus omnibus, etiam non circuncisis. Quoniam fides ante circuncisionem & deinceps absque circuncisione ad iustitiam sufficit & salutem. Circuncisionis iterum acceptæ communiter, siue corporea siue spiritualis, corporeæ quidem palam Iudæis. Spiritualis autem non Iudæis tantum, sed etiam Gentibus, per imitationem videlicet quatenus congruè sectantur vestigia fidei, quæ fuit in patre Abraham antequam diuino iussu circuncideretur. Id est, ea certitudine, charitate, opera credunt, qua & ille crediderat. Quæ quidem fides ita his sicut & illi est ad iustitiam & salutem absque circuncisione sufficiens. Quærun nonnulli, utrum circuncisio ad diluendam originalis peccati culpam conferat. Qui sequuntur Bedam, sic per circuncisionem in veteri testamento remissam fuisse originalem culpam putant, sicut per baptismum in nouo remittitur. Id tamen Thomas noster Aquinas ita moderari videtur, ut circuncisio ex ipso simpliciter opere neque gratiam conferat, nec vim habeat vel ad auferendam culpam, vel ad iustitiam afferendam. Ac nisi iustitiam afferat, auferre nequit culpam. Quoniam sine aduentu luminis tenebræ non expellantur. Non esse autem eiusmodi in circuncisione virtutem, quia in ea non sit ipsa gratia, sine qua non potest esse iustitia. Hinc Augustinus ex mente Pauli sic argumentatur ad Galatas. Si iustitia est per legem, ergo Christus mortuus est gratis, id est, sine causa. Similiter & nobis argumentari licet. Si ex circuncisione iusti-

cans gratia proficiscitur, Christus gratis mortuus est. Quod quidem dictum nefas. Nempè remissio peccati nunquam sine gratia provenit. [Quod quidem ita Paulus in sequentibus aperit: Iustificati igitur gratia ipsius &c.] Merito itaque Paulus in circumcissione fermè nihil posuit nisi signum atque signaculum. Non ergo per ipsam circumcidendi operam, sed per fidem Christi, cuius circumcisio signum erat, auferebatur originale peccatum, auxiliumque gratiæ ad rectè agendum afferēbatur. Quatenus igitur circumcisio futuri signum erat, meritò mutata censetur. Non enim signum idem præsentī conuenit & præterito atque futuro. Ideoque baptisumus est præsentis gratiæ signum. Quapropter ampliorem effectum gratiæ continet. Quanto enim agens propinquius præsentiusque est, tanto efficacius operatur. Proinde circa promissionem Abrahæ factam, fides quidem promissione prior extitit, circumcisio verò longè posterior. Item circumcisio fidei signum dicitur & imago fides autem exemplar & substantia viuens. Ex quo planè concluditur, ipsam promissionis causam extitisse, non circumcisionem quidem vel aliquod huiusmodi legis opus, sed ipsam fidem gratia fultam & charitate viuentem. Quapropter ita subdit Apostolus. [Non enim per legem promissio Abrahæ aut semini eius, ut hæres esset mundi, sed per iustitiam fidei. Si enim qui ex lege hæredes sunt, exinanita est fides, abolita est promissio. Lex enim iram operatur. Vbi enim non est lex, nec præuaricatio.] Deinceps ex ipsa promissionis forma, confirmat inceptam circumcisionem, videlicet & quodlibet externum opus legalis obseruantia simile, perfectam iustitiam non afferre. In Genesi quidem scribitur, promissum fuisse diuinitus Abrahæ, quod in semine suo benedicentur omnes Gentes terræ. In semine autem suo intelligendum est excellenter in Christo. Hinc ad Galatas inquit Apostolus: Abrahæ dictæ sunt promissiones & semini eius, non dicit in feminibus quasi in multis, sed in vno, scilicet Christo, quem & hæredem mundi vocat Paulus, id est, omnium Gentium, quod quidem in promissione patet. Et Dauid ita præfagit: Postula à me, & dabo tibi Gentes hæreditatem tuam. quodammodo etiam promissio implenda fuit in semine Abrahæ per imitationem ita cognominato. In his videlicet qui per gratiam Christi semen Abrahæ spiritualiter appellantur. Propterea Paulus in sequentibus inquit: qui filij sunt promissionis, existimantur in semine, qui etiam per Christum sunt

hæredes mundi. Proinde in hac promissione vnum quidem negat, alterum verò asserit. Negat, inquam, promissionem factam fuisse per legem, asserit autem per iustitiam fidei fuisse factam. Merito non per ipsam legem, quia nondum data lex erat, neque per ipsam legis obseruantiam quandoque futuram, quia non eà conditione promissum est, ut obseruetur lex futura, vel externum aliquid legi simile, sed simpliciter propter ipsam fidem. Quod & promissionis verba declarant. Itaque non talis est facta promissio, ut duntaxat sit implenda per legem. Hinc Paulus ad Hebræos: Nihil ad perfectum lex adducit. Affirmat autem promissionem per iustitiam fidei fuisse factam, & per eandem implendam denique fore, ut videlicet finis cum principio congruat. Quoniam, ut dicitur ad Hebræos, Sancti per fidem vicerunt regna. Atque rursus idem ita confirmat. Primo quidem non implendam fuisse promissionem per legem, postea verò per iustitiam fidei perficiendam esse monstrabit. Conficitur autem ratio deducens ad impossibile fermè hunc in modum: Si promissio Abrahæ facta per legem implenda foret, sequeretur è vestigio ut fides Abrahæ promissioni credentis foret inanis, quia promissio hæc aboleretur. Cum autem eiusmodi consequens futurum sit absurdum, nimirum & antecedens falsum esse conuincitur. Quis enim dixerit, Deum vel non manere promissis, vel aliquem ei credentem fallere. In disponenda verò consequentia quod dicitur; Si enim qui ex lege hæredes sunt &c. sic accipiendum est, si ad hoc ipsum ut aliqui promissam reportent hæreditatem, necessarium est hanc ex ipsa duntaxat legis obseruantia consequi, exinanita est fides, atque promissio. Primo quidem, quoniam non modo Iudæis, sed manifestè Gentibus omnibus legem eiusmodi non habentibus est promissum. Nunc autem ad Iudæos solum attinere concederetur. Deinde quia si per legem, ergo fides illa in qua fundata promissio fuit, tãquam insufficiens vacillare videtur, simulque cum illa promissio. Nempè si promissa hæreditas reddenda sit, non ratione quidem promissionis, sed legis obseruantiaque futuræ. Promissio eiusmodi fit inanis, quatenus non propter ipsam, sed propter aliud procul futurum redditur quod est promissum. Postremo quemadmodum diuus Thomas noster enarrat, si promissio per legem implenda dicatur, atque lex impediat quodammodo aut differat promissionis effectum, impeditur quidem dum impleri videbitur.

Quod autem lex saltem contingenter impediatur hereditatis promissæ consequutionem, inde probat Apostolus. Quod lex iram operatur, id est, indignationem diuinam vindictamque in peccatores exaggerat. Quoniam ubi non est lex, nec prauaricatio accedit. Leuius ergo peccant, qui sola lege naturali viuunt, quam qui præterea legi scriptæ subiiciuntur. Cum igitur lex eiusmodi culpam quidem prauaricantibus augeat, adminiculum verò adiuuantis gratiæ non secum afferat, munus videlicet Christi proprium, consequenter accedit, ut impediatur vel differatur promissæ hereditatis effectum. Præsertim quia per notitiam lege datam excusatio minuitur in peccatis, & propter libertatis licentiæque auiditatem nitimur in veritatem. Atque hoc quidem incommodi per legem, in moralibus accidit. In ceremoniis quoque quamplurimum, quibus quidem innumeris obseruatuque difficillimis populum suum saltem vsque ad Messiam Mosaica lex astrinxit. Inde frequens admodum prauaricatio contingebat. Grauior quoque futura, si post Euangelium diuulgatum eiusmodi curiositas prosequatur. Hinc illud Pauli ad Corinthios: *Litera quidem occidit, spiritus autem viuificat*. Quia, ut in sequentibus affirmabit, spiritus interius adiuuat infirmitatem nostram. Ex omnibus his concluditur, promissionem hereditatis tanquam optimam, atque de optimo factam, non fundari in eo quod aliquo pacto sit causa mali impedimenti ad consequendum quod est promissum. Ideoque nec in lege fundari. Alioquin firmitatem non habituram.

*Promissio Abrahæ quæ non est implenda per legem, est implenda per fidem atque gratiam.*

## C A P V T XXV.

**I**udæo ex fide, ut secundum gratiam, ad hoc ipsum ut firma sit promissio omni semini. Non ei quod ex lege est solum, sed etiam ei quod ex fide existit Abrahæ, qui pater est omnium nostrum, sicut scriptum est: quia patrem multarum Gentium posui te coram Deo, cui credidisti, qui viuificat mortuos, & vocat ea quæ non sunt tanquam ea quæ sunt. Qui contra spem in spem credidit, ut fieret pater multarum Gentium, sicut dictum est ei: sic erit semen tuum, sicut stellæ cœli & arena maris.]

Postquam ostendit promissionem Abrahæ seminique eius à Deo propositam, non

esse per legem implendam, consequenter ostendit implendam esse per fidem. Id verò ex supposita quadam disunctione concluditur hunc in modum: Promissio hæc vel per legem, vel per fidem perficienda videtur, non per legem quidem, alioquin vacillaret atque euanesceret. Ergo per fidem, scilicet, promissionem consequimur, ut ita mundi simus hæredes. Id Ioannes in Epistola ita confirmat: Hæc est victoria quæ vincit mundum, fides nostra. Contrarium verò ad superius fundamentum probationis in præsentia iacet. Nempe ut in superioribus dixerat, superius quidem fundamentum extitit. Si iustitia promissæque hereditas legis virtute foret, fides promissioque euanesceret. Nunc verò fundamentum est eiusmodi, si existit ex fide, id est, si fundatur in fide, per eamque procedit, perstat firma promissio, videlicet propter gratiæ diuinæ virtutem nobis iustitiam afferentem, ut autem gradibus suis probatio ista procedat, ut Græci codices habent, verba Pauli disponenda constitui, ut sit sensus eiusmodi. ex fide existit promissio, ut secundum gratiam præcipue ad nos accedat. Atque ut propterea perstat firma promissio. Firma, inquam, & ipsa quidem in se semper, & omni semini Abrahæ æquè præstanda.

Profectò si quod promissum fuit, denique legalibus nostris officiis tribuatur, videri nimirum poterit meritis humanis potius quam diuina gratia & largitate tributum. Hoc autem & opinionem diuinæ clementiæ & beneficiæ minuit, humanam autem augeat arrogantiam. Sin autem per ipsam fidem affectionemque mentis intimam ad nos procedat, id proculdubio totum diuinæ gratiæ tribuetur. Quod quidem ad mirificam diuinæ bonitatis, & potentæ gloriam summopere conferre videtur. Quod autem est eiusmodi potius admittendum. Proinde si promissa hereditas consistat in obseruantia legis, & futuro & ab actionibus nostris admodum instabilibus dependebit, ideoque penitus vacillabit. Sin autem in gratia diuina stabili fecerit fundamentum, stabiliter & ipsa consistet. Accedit ad hæc quòd eiusmodi legis obseruatio tantum attinuit ad Iudæos. Promissio verò manifestè cunctis Gentibus est effecta. Ut igitur & in cunctis habeat firmitatem, non ex lege paucis obseruata, sed ex fide potius vniuersis æquè communi processura videtur. Quod ergo dixit, omni semini, semen tetigit Abrahæ geminum, & corporeum, inquam, id est, & iudaicum, & spiritale pariter, id est, genus hominum

univerſum, ſicut credidit Abraham, crediturum. Semen cuiſmodi tangit Euangelium illud: Potens eſt Deus de his lapidibus ſuſcitare ſemen Abraham, id eſt, de Gentibus imitatores Abraham & quaſi filios adoptiuos efficere. Poſthæc vbricit, qui pater eſt omnium noſtrum, confirmat quod modo poſuerat, ſcilicet, quod ſemen Abraham ſit non ſolum Iudaicus populus ſectator legis, ſed & Gens quælibet ritu Abraham ſimpliciter credens. Pater enim omnium noſtrum, id eſt, credentium quorumlibet, ſive Iudæorum ſive Gentilium. Idem hac Genetiſ authoritate confirmat: Patrem multarum Gentium poſuite. Hinc illud in Eccleſiaſtico ſimile: Abraham magnus pater multitudinis Gentium coram Deo cui credidiſti. Additum eſt ad exprimendum quod nobis futurum eſt extare diuinæ prouidentię præſens, & in conſpectu quaſi iam poſitum. Abraham quoque tam perfectè credidit Deo ut futura prænuntiata, quaſi præſentia & iam facta perſpiceret. Qui viuificat mortuos, ſcilicet Iudæos præuariationis ingrati tudinisque criminibus quaſi mortuos. Et vocat ea quæ non ſunt. Id eſt, prouocat ad gratiam & ſalutem etiam Gentes, quæ hætenus in conſpectu Dei quaſi non erant, ſi conferantur ad priuilegia Iudæorum. Tanquam ea quæ ſunt, id eſt, pariter ut Iudæos, qui adoptiui & electi iam erant. Hinc illud in ſequentibus: Vocabo non plebem meam, plebem meam &c. Itaque per vocationem cuiſmodi promiſſio Abraham pertinet & ad Gentiles. Aptiſſimè verò cum litera congruit, ut dicatur Deus viuificare mortuos, id eſt, Abraham atque Saram ſteriles ſenioque conſectos ad propaginem ſuſcitare. Atque etiam futuram inde progeniem nondum exiſtentem eligere & prædeſtinare quaſi iam exiſtentem. Quo quidem ſenſu loquitur Apoſtolus ad Epheliſios, Elegit nos in ipſo ante mundi conſtitutionem. Item in ſequentibus, Non ex operibus, ſed ex voluntate dictum quod maior ſeruiet minori. Commendaturus autem Abraham fidem addidit: Qui contra ſpem in ſpem credidit, ſcilicet, contra ſpem virtutemque naturalem, quia ſteriles ſenioque conſecti erant Abraham atque Sara, ille enim nonageſimum nonumque, illa verò nonageſimū iam annū impleuerat atq; ſterilis, ut narratur in Genetiſ. Credidit tamen promittenti Deo progeniem. Ideo in ſpem à Deo porrectam credidit, in vita natura. Spes autem diuina eſt cuiſmodi. [ Patrem multarum Gentium poſui te. Item, ſic erit ſemen tuum, ſicut ſtellæ cœli & arena maris. ] Quibus in verbis ſucceſſionem A-

brahæ, ſive per naturam, ſive per imitationem ad omne genus hominum pertinere decernit. Per comparationem ad ſtellas excellentiam diuinitatemque multorum futuram in hac ſucceſſione declarat, per arenam maris multitudinem proſus innumerabilem. Quoniam verò ſpes non ſolum vehemens atque velox, ſed etiam firma fuit, didit: Et nō infirmatus eſt in fide, nec conſiderauit corpus ſuum emortuum, cum ferè centum eſſet annorum, & emortuam matricem Saræ. In promiſſione etiam Dei non hæſitauit diffidentia, ſed corroboratus eſt fide, dans gloriam Deo, pleniffimè ſciens, quod quæcunque promiſit Deus, potens eſt & facere. Ideo reputatum eſt illi ad iuſtitiam. ]

Firma proſectò fides fuit, quæ propter impedimenta naturalia, minimè diffidebat. In anno quidem centeſimo natus ei Iſaac in Genetiſ traditur, ante verò ferè anno promiſſus. Quod autem poſt obitum Saræ genuit filios ex Cetura, ad eandem quoque virtutem Abraham diuinitus reſtitutam attinere cenſetur. Cetura quidem iuuenis erat, Sara vero ſterilis & decrepita, & Abraham iam naturaliter impotens. Cuiſmodi facilitatem firmitatemque in diuinis recipiendis Pythagoras valdè probabat, ſententiamque leni frequenter habebat in ore, Credere oportet omnia, quoniam nihil eſt incredibile, omnia Deo facilia ſunt, nihil impoſſibile Deo. Plato quinetiam in Phædro legibus hominem in diuinis incredulum deteſtatur. Sed cum Paulus dixiſſet, non infirmatus eſt vel non vacillauit in fide, cur nam addidit: In promiſſione etiam Dei non hæſitauit diffidentia? Quia videlicet, ſicut credidit Deo progeniem promittenti, ita fidem adhibuit facilem excellentiam exaltationemque futuri generis portendenti. Poſtquam enim prædixit Deus: Patrem multarum Gentium poſui te &c. Subdidit: Poſſidebit ſemen tuum portas inimicorum tuorum, & benedicentur in ſemine tuo omnes Gentes terræ.

Comparatio quoque ad ſtellas, ut dixi, ſignificat excellentiam. Præterea dicens, non hæſitauit diffidentia, carpit diffidentiam Zachariæ, qui in promiſſione diuina timbuiſſe narratur, atq; ob hanc diffidentiam viſu ad tempus orbatus. Quod autem Abraham ſic exclamauit, Putas ne cœtenario naſcetur puer? Non dubitantis vox cuiſmodi fuit, ſed admirantis rem inſolitam, ac pariter exultantis. Affectu fortè ſimili ad Gabriëlis vocē Maria virgo clamanit: quomodo fiet iſtud? quia virum non cognosco.

Quaſi

Quasi dicat, istud quidem futurum certo scio, sed modū ipse planius exprime, quandoquidem non est modus humanus, sed protectio diuinus. Cum igitur Abraham motu quasi proprio non vacillauerit, quod quidem exprimitur vbi dicitur: Contra spem in spem credidit. Item, & non infirmatus est fide. Rursus, non hæsitaui diffidentia, merito subiunctum est, sed corroboratus est fide, id est, diuinitus insuper ad hoc adiutus. Quod Abraham animaduertens dedit gloriam Deo, scilicet, & fidei firmitatem, & promissum munus non suis meritis, sed diuinæ bonitati prorsus attribuit, atque existimans quod promissum est, proculdubio fore, quoniam Deus verax, imo veritas ipsa sit, pariter & omnipotens. Qui autem inspiratus à Deo vel quomodolibet instructus adhuc in fide vacillat, de prouidentia diuina, vel veritate vel potentia diffusus diuinæ gloriæ derogat. Proinde cum ab initio dixerit fidem Abraham pro iustitia fuisse apud Deum acceptam, atque deinceps qualis eius fides fuerit, enarrauerit, concludit, non quālibet fidem, sed facilem, certam, stabilem, & cum charitate gratias agentem, & ad gloriam Dei vbique tendentem, qualis Abraham fides extitit, apud Deū pro iustitia reputari. (Non est autem scriptum tantum propter ipsum, quod reputatum est illi ad iustitiam, sed & propter nos, quibus reputabitur credentibus in eū, qui suscitauit Iesum Christum Dominum nostrum à mortuis, qui traditus est propter delicta nostra, & resurrexit propter iustificationem nostram.) Paulus in sequentibus. Quæcunque scripta sunt, ad nostram doctrinam scripta sunt. Similiter in præsentī docet, Deum in Abraham summo credentium Patriarcha disciplinæ totius exemplar constituisse. Et magna forte significatione in superioribus illud adduxit: Patrem multarum Gentium posui te coram Deo, cui credidisti. Id est autē Patriarcham, & exemplar, & ducē omnibus Gentibus te constitui præcipuè credituris, quemadmodum & tu credidisti, & id quidem in conspectu Dei, videlicet non solum in prouidentia Dei, sed etiam, vt Athanasius inquit, velut instar Dei, vt quasi numen aliquod sit omnibus author piè credendi atque bene viuendi. Atque ad ipsius similitudinem nobis quoque, quia pia fides ad iustitiam reputetur. Qualis inquam fides? qualis & illius extitit, vt in superioribus enarrauimus. Atque insuper, vt quemadmodum ille corpus suum emortuum similiterque sacrè credidit quandoque diuinitus suscitandum, sic & nos credamus Christum &

mortuum quidem esse, & diuinitus suscitatum. Atque eiusmodi fides ita nobis sicut & illi ad iustitiam reputetur, credentibus videlicet ita venisse Christum, quemadmodum & credidit ille venturum. Quoniam vero eadem virtus est, & operatio manifesta Patris & Filij, sicut dictum est, pater suscitauit Iesum, ita sæpe dicitur, Iesus resurrexit à mortuis. Rursus sicut in sequentibus dicit, proprio filio suo non pepercit Deus, sed pro omnibus nobis tradidit illum. Sic ad Ephesios, tradidit semetipsum pro nobis. Quod autem hic dicitur, traditus est, intelligi potest à patre, & à seipso, & à Iudæis traditus. Dicitur autem resurrexit propter iustificationem nostram, vt nos resurgendo iustificaret, id est, ea iustitia dignos efficeret, qua & ipsi resurgeremus. Quod autem propter nostra delicta traditus sit in mortem, significat eum morte sua, velut sacrificio quodam pro nobis facto, culpas quodammodo nostras expiauisse.

*Gratia diuina quomodo acquiratur. Item qua mala vitet, qua bona conferat, (scilicet, iustitiam per fidem. Item spem, charitatem diuinam hereditatem. Item quare sit constans spes diuina.*

## C A P V T XXVI.

**I**ustificati igitur ex fide, pacem habeamus ad Deum per Dominum Iesum, per quem accessum habemus in fide in gratiam istam, in qua stamus & gloriamur in spe gloriæ filiorum Dei. ) Apostolus hactenus quam necessaria sit ad salutem Christiana gratia, hinc potissimum comprobauit, quod neque Gentilibus cognitio veritatis atque philosophia, neque Iudæis circumcisio, vel observatio legis sine gratia Christi suffecerit ad salutem, satisque profuerit. Deinceps autem de virtute gratiæ disputabit, ostensurus videlicet quæ bona per gratiam adipiscamur, ac propter eandem, quæ mala vitemus. In primis autem viam modumque præscribet, quibus perueniatur ad gratiam. Cum igitur dictum fuerit, quemadmodum fides reputabitur omnibus ad iustitiam, videlicet resurrectionem Christi credentibus, tanquam nostræ iustitiæ fundamentum, meritò subdit.

( Iustificati igitur ex fide. ) Quatenus per ipsam resurrectionis fidem, effectum eius, quæ iustificatio est, consequimur. Habeamus pacē ad Deū. ) Particula hæc dupliciter quidē legi potest, & habem⁹, scilicet, atque habeam⁹ sed deniq; sēsus est idē. non enim possumus aliter reconciliari Deo quā



per iustitiam, fide gratiaque Christiana fundatam. Hac quidem ratione nos sic affecti pacem iam habeamus ad Deū. Quod autem exprimitur habeamus, id forte sibi velle videtur, vt pacem eiusmodi quam sic habemus, firmiter teneamus, neque suspicemur vnquam haberi posse aliter vel teneri. Habemus, inquam, vel habeamus per Dominum nostrum Iesum Christum. Ipse enim est pax nostra, sicut scribitur ad Ephesios. Quoniam ad eiusmodi pacem ipse perduxit, quam quidem pacem, gratiam quandam in præsentia nominat, quia non pro meritis tributa nobis est, sed gratis, non nostra quidem facultate, sed ope diuina, ideo subiicit: (Per quem accessum habemus in gratiam istam.) Cuius enim virtute ad hanc accedimus, eiusdem præsidio & tenens, & tenere posse duntaxat, sperare debemus. Merito igitur ad Timotheum, mediator Dei & hominum nominatur. Atque ad Ephesios. Per ipsum accessum habemus ambo in vno spiritu ad patrem. Inquit autem in fide, id est, in ipsa Christianæ fidei firmitate. Græcè non legitur per fidem, vt communiter Latine dicitur, sed in fide, idque rectius. Alioquin si per fidem dicatur, videbitur forte fides causa quædam gratiæ. Thomas verò noster contrarium asserit, scilicet, gratiam esse fidei causam. Gratia enim diuina sortimur, quod recte firmiterque credamus, vt legitur ad Ephesios: Gratia salui facti estis per fidem, vult autem fidem esse primum gratiæ aduenientis effectum, ideo recte dictum est, nos per Iesum ad gratiam peruenire. Ad quam habemus accessum, id est, aditum & introitum in fide, quasi in ipso gratiæ lumine primo, quam sane fidem sequuntur deinceps & reliqua gratiæ dona, species, charitas, constantia, lætitia, gloria. Vbi vero dicit, in qua stamus; Intelligendum est in virtute gratiæ nos id habere, vt non solum suscitati à culpa, velut à morte fuerimus, sed etiam firmiter in habitu probabili consistamus in Deum prorsus erecti, tanta spe futuræ gloriæ freti, vt hac præ cæteris gloriari possimus. Quæ quidē omnia sunt gratiæ munera. Gloriæ, inquam, filiorum Dei, id est, habebimur, quasi filij Dei, sic per adoptionem facti, vt Christus extitit per naturam, sic iterum in seculorum fine, sicut Angeli in principio sæculorum. Quam vero sit excellens spes eiusmodi gratiæ comes, apparet inde potissimum, quod non breue quiddam aut leue, sed æternum speramus diuinumque bonum. Rursus nō solum per hanc gloriamur, & exultamus summorum expectatione bonorum, sed

etiam aduersis omnibus delectamur, quæ & pro hac professione speique approbatione perpetuimus, & existimamus quoquomodo ad futuram gloriam conductura. Quamobrem subiungit Apostolus: (Non solum autem, sed & gloriamur in tribulationibus, scientes quod tribulatio patientiam operatur, patientia vero probationem, probatio vero spem, spes autem non confundit, quia charitas Dei effusa est in cordibus nostris per Spiritum sanctum, qui datus est nobis.) Sic ergo textus continuatur, non solum autem gloriamur in hoc, quod speramus consequi gloriam felicitatemque Dei filiis congruentem, sed etiam ipsius tribulationibus huius gratia susceptis gloriamur atque gaudemus. (Non opiātes quidem vel aliorum more mortalium suspicantes, sed certo scientes, quod tribulatio patientiam operatur &c.) Id est in tribulationibus ad inuictum patientiæ habitum exercemur, adiuuante videlicet Deo, cuius gratia in aduersitate duramus.) Patientia vero probationem.) Sicut igne aurum, ita constans animus aduersitate probatur. Ille enim approbari potest, tanquam diuinorum credulus, & amator, qui horum gratia libenter durissima quæque sustinet. (Probatio vero spem.) Nempe qui in præsentia aduersitate durauit, futuram felicitatem sperare proculdubio posse.) Spes autem non confundit.) Non fallitur vnquā aut labitur, vt inde contingat sperantem aliquando ruborem & ignominiam reportare, aut affici poenitentia, quod sperauerit. Hinc Psalmus: In te Domine speraui, non confundar in æternum. Spes autem eiusmodi cur nam fortiter perseverat, feliciterue consequitur? Quia videlicet vegetatur amore, amore, inquam, mentis in Deum erecto, qui sanè amor amore Dei ipsius in mentem est accensus. Hinc Dionysius Arcopagita, authore Hierotheo, amorem diuinum circularem quondā motum nominat, ab ipsa bonitate diuina exordiētem, progredientēque in animum, atque hinc in diuinum bonum regredientem. Motus enim animi ad infinitum bonum tendens, cum nequeat à finita virtute animi proficisci, nimirum ab ipso eodem infinito bono sortitur instinctum, vt finis tandem cum principio congruat. Quod si charitas in Deum nostra ab ipsa Dei erga nos charitate principium habet, merito & quæ charitati necessaria sunt, fides scilicet atque spes, ab eadem diuinitate procedunt. Cum vero nec Deus frustra moueat, nec communis, & assidus mentis ipsius instinctus esse debeat, prorsus inanis

efficitur profectò, ut fides, spes, charitas & fortiter perdurent, & quandoque consequantur euentum. Quod autem instinctus ad diuina in nobis, ab ipsa diuinitate procedat, hinc etiam confirmatur, quod omnia circa animum in terris mortalia, contrarium generant in nobis instinctum, ut non valeat animus mortalibus obrutus, nisi per diuinitatem ad diuina prorsus emergere. Dicitur autem Græcè ἡ ἀγάπη πῦρ ἐκὼν ἐκέρχεται, charitas effusa, quod quidem emphaticam proprietatem habet. Perinde ac si dicit, ex charitate diuina velut ex igne, charitas in nobis quasi flamma per modum scintillantis ignis penitus accenditur. Atque id quidem abunde. Quod sanè Plato in Epistola ad Syracusanos ita tetigisse videtur, ex diuturno animæ nostræ cum diuinitate commercio, subito tandem illinc velut ab igne scintillante, lumen effulget in anima, seque ipsum iam alit. Propriè vero loqui videtur Apostolus ubi dicit, per Spiritum sanctum, quasi afflante Deo ignis in nobis amatorius accendatur. Omnino vero firmitatem spei argumento duplici comprobatur. In præsentia quidem ex ipso Spiritu sancti dono In sequentibus autem ex morte Christi. Charitatem interea tangit vtramque, & qua nos Deus amat, & qua nos amamus Deum, vtramque vero charitatem per Sanctum spiritum voluntatibus nostris iniustam esse censet. Nos autem, ut cum Thoma nostro loquamur, sic exponimus. Spiritum sanctum, qui est amor Patris & Filij, dari nobis, est nos ad participationem amoris illius adduci, qui sanè ipse Spiritus sanctus existit, qua quidem participatione ipsi Dei amatores efficimur. Iam vero ex hoc quod ipsum amamus argumentum habemus, quod ipse nos amet. Non quasi nos primo dilexerimus Deum, sed quoniam ipse prior nos dilexit. Quod maior Ioannis declarat Epistola. Dicitur autem charitas, qua Deus nos amat, in cordibus nostris effusa, quoniam in nobis late diffundit. Ex vtraque autem horum verborum intelligentia concluditur idem spem videlicet eiusmodi nunquam falli. Nam & quia Deus nos diligit, seipsum non negabit, & quia nos Deum diligimus, sperare possumus cum nobis æterna bona daturum.

(Cur nam Christus cum adhuc infirmi essemus, tempore opportuno pro impiis mortuus est? vix profectò pro iusto quis moriatur. Iam vero bono forsitan quis audeat mori.) Quod Latine legitur secundum tempus, intelligiturque à plerisque

triduum illud, quod Christi corpus latuit in sepulchro, mihi quidem non admodum placet, sicuti nec Athanasio linguæ Græcæ doctissimo. Quod enim Paulus ponit *ἔσχατον*, non significat simpliciter ipsum tempus (id enim *χρόνος* Græcè dicitur) sed tempus duntaxat significat opportunum & occasionem propriè tempestiuam opportunitatemque designat. Præterea cum velit Paulus ingentem Christi in nos exprimere charitatem, non id quidem exprimit, si dixerit ad breue tempus pro nobis expertus est mortem. Sed potius, si adduxerit Christum obseruauisse tempus non solum sibi decens, sed nobis etiam opportunum præscitum diuinitus omnino, quodammodo etiam destinatum, ut Athanasius inquit. Id sæpe significat Euangelium, nondum venit hora mea. Item, venit hora. Rursus, venit hora vestra, & potestas tenebrarum. Mors quidem Christi, si diuinam respexeris voluntatem, sacrificium prædestinatum esse censetur. Sin autem impetum occidentium, homicidium est præscitum. Eiusmodi vero sacrificium salutare simul, & homicidium prorsus iniquum in eodem tempore mira quadam occasione concurrat, ut non alio tempore diabolica instigatio apud iniquos homines præualuerit ad hunc euentum quam quod diuina voluntas & homicidium præsciuerit, & sacrificium ipsum prædestinauit. Sacrificium eiusmodi operante Deo opportuno quodam tempore celebrandum. Propheeta Abacuc ita prænuntiasse videtur: Opus tuum Domine in medio annorum, viuifica illud. In medio annorum notum facies. Cum iratus fueris misericordiæ recordaberis. In medio annorum forte significat in medio mundi cursu. Volunt enim aliqui, decem annorum millibus non mundum, sed mundi cursum prorsus expleri, siquidem motus quietis gratia sit institutus, atque in medio hoc mundi cursu, Deum se hominibus ostendisse, ut aduentus eius æquè ab vtrisque seculorum distaret extremis, ne vel expectatio futuri aduentus nimium protraheretur, vel præteriti memoria prorsus aboleretur. Sed tempora Deus viderit, æternitatis fons temporisque productor. Forte vero Pythagorici bonum ipsum opportunitatem ipsam vocant. Quoniam omnibus prouidet opportune, & vna quæque natura tunc optimè sese habet, quando eligit vel sortitur vel aggreditur, quod optauerit opportunè. In hoc enim prosperitas, felixque fortuna consistit, ab influxu superiore, & denique à prouidentia superna proueniens. Sed

verborum Apostoli feriem repetamus Per interrogationem ergo significat Christum pro nobis voluisse mori propter incomparabilem in nos charitatem, ut hinc & firmiter ab eo bona omnia sperare possimus, & pati pro eodem mala omnia debeamus. Auget vero debitum quod infirmi, id est, contra eum peccatores eramus, atque rei, non leui quodam crimine, sed impietate grauati. Non inuenitur alius, qui pro iniusto suoque inimico velit mori, vel laborare quam minimum. Vix etiam inuenitur qui pro iusti alicuius salute, salutem suam spernat. Forte vero aliquanto facilius reperiatur, raro tamen qui mortem obire velit pro bono, id est, pro viro liberali in omnes præ ceterisque benefico, & cui propter beneficentiam quis summo pere debeat. Iustum hic nominare videtur eum, qui nocet nemini, aliena non usurpat, suum cuique reddit, etiam si nihil de propriis bonis eroget. Bonum vero, ut dixi, largum bonorum suorum communicatorem. Id enim bonitatis proprium esse censetur. Nos autem nec erga homines, nec erga Deum iusti eramus, nec erga Deum boni, id est, benefici esse vnquam possumus. Bonorum enim nostrorum non eget. Hinc mirabilis in nos Christi charitas elucet, spem nostram nobis confirmans, mutuamque charitatem in nobis accendens.

Commendat autem charitatem suam erga nos Deus, quoniam cum adhuc peccatores essemus, Christus pro nobis mortuus est.) quod paulo ante per interrogationem significabat, idem in præsentia per affirmationem sine interrogatione declarat. Perinde, ac si dixerit, ex hoc potissimum ingens erga nos Dei charitas demonstratur, quod Filius eius Christus pro nobis contra eum peccantibus mortem subire voluit, quasi eadem sit patris filiique voluntas.

**I**am vero sicut in superioribus Apostolus charitatem Dei patris erga nos ostendit per hoc potissimum, quod spiritum nobis suum infudit, sic in præsentia tandem ex hoc ipso demonstrat, quod pro nobis suum filium tradidit, & ad reciprocam erga Deum charitatem vtrique nos provocat. Suam vero charitatem Deus duobus modis exaggerat, cum videlicet, quia dedit filium pro nostra salute passurum, tum etiam quia pro inimicis, id est, peccatoribus atque rebellibus. Id vero totum in secunda ad Ephesios Epistola similiter confirmatur: Deus qui diues est in misericordia per nimiam charitatem qua dile-

xit nos, cum essemus mortui peccatis conuiuificauit nos Christo &c. Itaque multo magis iustificati nunc in sanguine ipsius salui efficiemur ab ira propter ipsum.) Hactenus asseruit, quomodo Deus ob incomparabilem erga nos charitatem, sui filij sacrificio pro nobis satisfaciens, nos ex iniustis iustos effecit, videlicet in ipso credentes. Deinceps quomodo iustificationem tribuit & salutem. Salutem primo qua ab ira, id est, à miseria liberemur. Deinde etiam ad felicem cum Deo vitam recipiamur. Si enim recepimus ab eo quod difficilius erat, id autem est, ex iniustis fieri iustos, nimirum & quod facilius est, atque inde consequitur, reportare poterimus, id est, ut iam iustificati liberemur ab ira, id est, à vindicta, quam iniustitia merebatur. Et quoniam dum ex iniustis iustos effecit, etiam ex inimicis fecit amicos, merito nobis quasi iam amicis sua bona communia facit, dum mirabili quadam largitate comunioneque beatæ vitæ suæ nos participes efficit. Ideo subdit:

(Si enim cum inimici essemus reconciliati sumus Deo per mortem filij eius, multo magis reconciliati, salui in vita ipsius efficiemur.) Hic interim nonnulla notanda sunt antitheta ordine quodam posita. Iniustos iustificando Deus ipse facit iustos. Inimicos, videlicet propter iniustitiam, reconciliando reddit amicos. Obnoxios iræ liberat ab ira, scilicet per mortem filij sui ad vitam suam nos admittens. Non solum autem, sed & gloriamur in Deo, per Dominum nostrum Iesum Christum, per quem nunc reconciliationem accepimus.) Non solum gloriamur in spe atque expectatione gloriæ apud Deum quandoque futuræ per iustificationem reconciliationemque nobis exhibitam, sed gloriamur etiam nunc in ipso Deo, id est, in mira quadam coniunctione cum Deo per fidem charitatemque iam conflatam, conciliante videlicet hanc Iesu Christo per doctrinam & virtutem sacrificiumque suum. Ad superiora vero consequitur: Maius esse iniustum iustificare, quam iustificatum salute donare, quia in illo homine non est proportionale principium ad diuinam iustitiam consequendam, sed totum gratia sola perficitur. In ipso autem iam diuinitus iustificato, inhabitat iam Spiritus sancti donum, quod arbitrium mouens ad actum, efficit ut ira salutem promereatur.

**P**ropter hoc quemadmodum per vnum hominem peccatum in hunc mundum intrauit, ira & per peccatum mors,

atque ita in omnes homines mors pertransiit, in quo omnes peccauerunt.) Queret forte aliquis, curnam oportuit per Christum iustificari atque reconciliari mortales? Respondet ita. Propter hoc, inquam, scilicet, oportuit. Deinde causam explicaturus, altius exorditur hunc in modum, quem occulta quadam comparatione præiens hic textus exponit. Congruit autem cum prima ad Corinthios Epistola, ubi dicitur: Sicut in Adam omnes moriuntur, ita & in Christo omnes uiuificabuntur. Sic casus in peccatum atque mortem, quod quidem mali conditionem habet ab ordine longius alienam, ordinem tamen quondam subit, multo magis ordinem seruat reditus ad iustitiam atque vitam. Sed casus ille tantum saltem ordinis videtur admittere, quod in eo turba quam plurima ad unitatem principij sui reducit, unde mira quadam traductione deducitur. Ab vno enim patre primo, quasi principio speciei, tota hominum species, quasi communis quædam natura vna producta vnius originalis inclinationis culpæque particeps hinc euasit, proptereaque obnoxia morti, quid ergo mirum humanam speciem ordine quodam ab vno similiter inchoato in originalem iustitiam vitamque restitui? scilicet ab vno principio salutis atque gratiæ. Atque sicut ab vno generationis initio culpa morsque defluxit in omnes, sic in omnes ab vno regenerationis exordio iustificationem uiuificationemque profluere. Verum, ut supra monui, comparationem eiusmodi Paulus hic minuit, clamque significat, vult enim subintelligi, quæm deinceps attingit apertius. Si autem præsentia Pauli verba disponantur, aliter quam disposui, in longissimum orationis hyperbaton incidemus, nec facile verbum quod à grammaticis principale dicitur offendemus. Quæri potest, curnam dixit, peccatum & mortem per peccatum intrasse in mundum potius quam in genus duntaxat humanum? quia forte cum anima primum corpusque subinde nostrum superiorem amisit ordinem, externa quoque quodammodo nobiscum, præsertim nobis, exorbitauerunt. Sequitur vero mors ad peccatum, non solum mors animæ, scilicet, felicitatis diuinæ priuatio, sed mors præterea corporis. Quod quidem Mosaicum mysterium, ut alibi enarraui, Plato noster in Charmide tetigit, opinione Magorum, significans ex intemperantia quadam animæ intemperiem mortemque corporis proficisci. Quippe cum afferat si animam temperan-

tiam suam recuperauerit, immortalitatem suam in corpus etiam exundaturam, bona enim malaque animæ in corpus ita profluere, sicut à toto corpore in cerebrum, & ab hoc in oculum fit effluxus. Recuperari vero temperantiam philosophicis quibusdam arcanisque rationibus, quasi quibusdam præcantationibus, asserit. Proinde de originali peccato, quod ab Adam profluxit in omnes, esset in præsentia longius disputandum, nisi multa de hoc in libro de Religione differuissem, satis erit igitur breuiter hoc attingere. Pelagiani quidem istud negant, dicentes non originali successionem, sed imitationem quadam potius voluntaria peccatum primi parentis ad posteros attinere, scilicet quatenus isti parentum iniustitiam imitantur. Aurelius Augustinus sic eos arguit: Si peccatum Adæ progressum in omnes dicendum esset imitationem potius quam per Adam. Diabolus enim præuaricatore primum præuaricatores omnes potissimum imitantur, hoc autem per illud in libro Sapientiæ confirmatur. Invidia diaboli mors intrauit in orbem terrarum. Præterea sicut à Christo iustitiam salutemque suscipimus, non principaliter, quia imitemur eum, sed quoniam inde virtutem accipimus per gratiam satisfactionemque ab eo nobis exhibitam, sic ab Adam originalis quædam iniustitia mortis origo, non tam imitatione nostra quam propagatione quadam nobis influit. Si enim imitatione sola contingeret, comparatio inducta hic ab Apostolo non congrueret. Quod autem quasi naturaliter influat Ephesiis declarat Apostolus. Eramus natura filij iræ. Item Dauid: Ecce enim in iniquitatibus conceptus sum, & in peccatis concepit me mater mea. Dicit autem originale vitium peccatum naturæ. Quemadmodum quotidianum delictum, quod & actuale vocant, dici solet peccatum personæ, & illud sicut hoc quodammodo voluntarium, quia sicut hoc per voluntatem personæ peccantis committitur. Sic & illud per voluntatem principij humanæ naturæ creditur perpetratum. Profecto quemadmodum varia membra corporis vnius humanæ personæ partes sunt, ita personæ singulæ membra sunt humanæ naturæ. Itaque sicut manus pedisque motus per voluntatem principij personalis rationem voluntarij habet atque culpæ, sic per voluntatem culpamque principij humanæ speciei singulorum hominum inclinationes similes voluntariæ obnoxieque censentur. Plura inueniri non potuerunt.



# MARSILII FICINI FLORENTINI.

*I N O M N E S P R E D I C A*

*tiones suas*

**P R O O E M I V M.**

Adspira nobis precor Alme Deus, via, veritas, vita, Trinitas, vnus Deus. In mediõ  
Ecclesiæ laudabo te. In conspectu angelorum psallam tibi.

**V**N A hæc homilia nostra, dilectissimi fratres, præcipuas tres partes habebit. Vtinam vnicæ Trinitati sit accepta. Vnæquæque pars simili ratione tres partes, per nouenarium numerum inde confectum, imitaturascœlestem numerum angelorum, nos videlicet excelsio Deo benigne conciliantium. Prima quidem Hierarchia vero. Secunda via monstrabit ad veram vitam. Tertia denique & vitæ veritatem summam ante oculos ponet. Videte precor fratres mei quam opportunè ad illam Iacob Patriarchæ scalam Deo duce, perueniemus. In hac sane cœlestes Angeli, & ascendunt pariter & descendunt. Ascendunt quidem contemplantes Deum Deorum in Sion. Descendunt interim hominibus prouisuri. Descendunt, inquam, manus hominum apprehensuri. Ascendunt iterum nos iam apprehensos ad excelsa ducturi. O scalam inestimabilem! ô gradus prorsus incomparabiles! ô ascensum ineffabilem, mirabilemque descensum! Non alio quidem tempore ascendunt Angeli cœlestes, alio vero descendunt, hominum animaliumque more, sed eodem momento mirabiliter vtrumque conficiunt. quemadmodum à Sole radij terram verberantes, momento reuertantur in Solem. Neque solum eodem momento ascendunt Angeli, quo descendunt, verum etiam qua ra-

tione cleuantur contemplatione diuina, perfecti roboratique illinc, ad beneficia nobis conferenda se construunt, diuina videlicet plenitudine prorsus exuberantes.

Sed vt regrediamur illuc vnde iam paulo latius progressi sumus. Primam sermonis nostri partem Hierarchiæ vltimæ commendabimus, qua quidem in parte tres erunt gradus, Angelis, Archangelis, principatibus commendati. Secundam vero sermonis partem Hierarchiæ mediæ dedicabimus, tres quoque gradus habentem, Potestatibus, Virtutibus, Dominationibus commendatos. Tertiam denique destinabimus Hierarchiæ tertiæ, tres gradus similiter continentem, per quos vtinam Throni, Cherubini, Seraphini, nos ad alta perducant. Verum vt manifestius iam quod volumus vobis fiat in omni prædicatione nostra. Primo quidem de animæ Immortalitate tractabimus. Quod quidem pertinebit ad vitam. Idque tribus vel rationibus vel persuasionibus vel modis quibuslibet confirmabimus. Secundo vero de fidei Christianæ firmitate loquentur. quod sane spectabit ad viam, ad veram vitam nos denique perducturam. Atque id iterum tribus modis similiter asseremus. Tertio denique declarabimus verum Euangelii sensum, pertinentem ad veritatem, sensum, inquam, triplicem, historicum, moralem, & allegoricum.



*Prima pars prædicationis de Immortalitate anime.*

*Prædicationis prima.*

Adspira nobis precor Alme Deus, via, veritas, vita, Trinitas, vnus Deus. In medio Ecclesie laudabo te. In conspectu angelorum psallam tibi.

**P**rimam prædicationis partem auxilio primæ Hierarchiæ angelorum aggrediamur. In omni re naturali, per continuam naturalemque eius inclinationem solemus naturæ proprietatem inuestigare, exempli causa. Per inclinationem ad descensum, coniicimus in quouis corpore grauitatem esse. Per inclinationem similiter ad ascensum, inesse inuenimus leuitatem. Si quoddam itaque corpus inclinationem ad vtrumque comperiamus habere, vtramque proprietatem possidere putabimus. Quorsum hæc? Nempe bruta videmus ad caduca tantum præcipitari. Intellectus autem Angelicos ad æterna solum se erigere cogitamus. quamobrem illinc quidem solam in brutis naturam caducam; hinc vero solam in angelis æternam esse concludimus. Cum igitur anima nostra communiter & assidue inclinetur ad vtraque tum temporalia tum æterna, vtramque quasi naturam habere coniicimus, per intellectum quidem æternam, per temporalem vero sensum.

Præterea, si homo, vt multis rationibus confirmatur, est animalium perfectissimus, per eam præcipuè partem facultatemque perfectissimus est, quam habet ipse propriam, cæteris animantibus nullo modo communem. Hæc vero sola religio est. Nam & rationis cuiusdam vestigia quædam sagaciores bestię videntur habere, nullum religionis indicium. Non foret autem per religionem perfectus, si per hanc & falleretur, & spe futurorum præsentibus fraudaretur. Item religio, vt in Prothagora probat Plato, primo omnium homini contigit, non solum ante omnes artes ad victum necessarias, sed etiam ante sermonem, atque commercia. Cum vero etiam maximè omnium sit communis, & firma, sequitur vt maximè omnium sit naturalis. Et quia instigante Deo, rudibus statim hominibus est inserta, non solum maximè naturalis est, sed etiam diuina quam maximè. Naturale vero speciei iudicium falli non potest. Neque fallit naturalis instinctus, multoque minus fallit Deus summa veritas atque bonitas, æternitatem religionemque promittens, speque

eiusmodi præsentibus tum bonis expoliatis, tum malis affligens. Post hæc partem secundam aggrediemur beneficio Hierarchiæ secundæ intrantes viam per probationem fidei ad æternam vitam.

*De probatione fidei. Secunda pars prædicationis.*

Adspira nobis precor Alme Deus, via, veritas, vita, Trinitas, vnus Deus. In medio Ecclesie laudabo te. In conspectu Angelorum psallam tibi.

**S**i discipuli Christi decipiendi gratia signum introducere cogitauissent, rationem certè facilioris persuasionis aliquam habuissent. Contra vero fecerunt. Aggressi sunt enim rem & ad credendum & ad obseruandum omnium difficillimam. Adde quot modis etiam difficilimis, si tempora, loca, personæque consideres. In temporibus videlicet eruditis, in vrbibus amplissimis, plenisque omnium doctrinarum, aduersum potentes, plurimosque & doctos, ipsi debilissimi, omnium rerum egeni, ab initio rudes, & paucissimi. Neque accipere voluerunt vel Cerimonias à Iudeis, vel Deos plurimos à Gentilibus. Quod quidem si admisissent, compertum haberemus, omnes subito Christianos fuisse futuros. audi Paulum Corinthiis ita dicentem: Videte vocationem vestram fratres. quia non multum sapientes secundum carnem, non multipotentes, non multi nobiles, sed quæ stulta sunt mundi elegit Deus, vt confundat sapiētes, & quæ infirma sunt mundi elegit Deus, vt confundat fortia. Et quæ ignobilia mundi & contemptibilia elegit Deus, & ea quæ non sunt, vt ea quæ sunt destrueret. Item si fuissent simulatores, non potuissent summā inter se concordia in tot tantisque difficultatibus perseuerare. Perseuerarunt tamen, alioquin nihil obtinuissent. Paulus pro Christi gloria annos septem atque triginta innumerabili tormentorum gratia tulit. Petrus quoque tantundem. Ioannes annos octo atque sexaginta, cæterique similiter per omnem vitam. Neque præmium tanti laboris vllum in hac vita sperabant, optabant. Imo omnia vitæ dona, vitamque ipsam penitus contemnebant. Hinc Paulus, Si in hac vita tantum speramus in Christo, miserabiliores sumus cunctis hominibus. Præterea neque in angulis susurrabant, sed palam vulgo suam doctrinam audacter diffeminabant. Siquidem paulus etiam cathena collum victus, publicè prædicabat. Hinc ait ad Philippenses, quæ circa me sunt, magis ad profe-

Quā venerunt Euāgelii, ut vintula mea manifesta fierent in Christo, in omni Prætorio, & in cæteris omnibus. Et ad Colossenses ait: Euangelium iam prædicatum fuisse omni creaturæ quæ sub cælo est. Item nihil horum in Angelis gestum est. Et Corinthiis, non adulterantes verbum Dei, sed in manifestatione veritatis commendantes nosmetipsos, ad omnem conscientiam hominum coram Deo. Quod si cui etiam opertum est Euangelium nostrum, his qui pereunt est opertum. In quibus Deus huius seculi excæcavit mentes infidelium, ut non fulgeat in eis illuminatio Euangelij gloriæ Christi, quod est imago Dei.

*Pars prædicationis tertia de Euangelio.*

Adspira nobis precor Alme Deus, via, veritas, vita, Trinitas, vnus Deus. In medio Ecclesiæ laudabo te. In conspectu angelorum psallam tibi.

**S**ed per viam comprobata fidei felicitate huc vsque progressi, pergamus iam ad Euangelicam veritatem, hierarchiam angelorum tertiam inuocantes. Principio, Throni historicum nobis aperient Euangelij sensum. Secundo, Cherubini moralem. Tertio Seraphini allegoricum patefacient. Quemadmodum vnusquisque nostrum ab Angelo quodam regitur persuadeturque ad bonum, à quibusdam vero spiritibus malis passim incitantur ad malum, ita Iesus regebatur à Spiritu sancto. Qui postquam in baptismis oculis eius auribusque apparuit, mox eius intellectui persuasit, ut in desertum iret, noxia videlicet hominum commercia deferens, ieiunio, orationi contemplationique vacaturus, ut non ibi iam aduersus carnem sanguinemque certaret, sed aduersus principes caliginosi aeris dæmones quos ieiunio, oratione, contemplatione superans, nobis præberet exemplum, tum in statu perfecto nobis à dæmonibus periculum imminere, tum etiam expugnari posse, & quibus repugnaculis expugnare. Platonici quoque confirmant tentamenta dæmonum, & quomodo eisdem remediis expellantur.

*Prædicationis secunda.*

Adspira nobis precor Alme Deus, via, veritas, vita, Trinitas, vnus Deus. In medio Ecclesiæ laudabo te. In conspectu angelorum psallam tibi.

**I**nstitutum à principio ordinem proficientes ternarium nouenariumque

numerus in orationis nostræ partibus tanquam angelicum & nunc & in posterum obseruabimus, neque id quidem ab re, cum in sacra angelorum æde loquamur. Vbi semper illius oraculi memores, Ego sum via, veritas & vita, primam sermonis partem ipsi vitæ, secundam vitæ, tertiam veritati, distribuemus, ut ex prima fidem ad credendum æternam vitam, ex secunda spem ad eius bona apud Deum percipienda, & ex tertia charitatem consequamur erga Deum bonorum immortalium largitorem. Atque ita ex fide per ipsam spem ad charitatem, quasi tertium cælum, ascendemus, duce Paulo, ut vel audiamus arcana Dei quantum libet homini, vel saltem gustemus mirificum charitatis fructum qui superat omnem sensum, quoddam videlicet ineffabile gaudium.

*De vita anime immortalis, Prædicationis pars prima.*

Adspira nobis precor Alme Deus, via, veritas, vita, Trinitas, vnus Deus. In medio Ecclesiæ laudabo te. In conspectu Angelorum psallam tibi.

**N**vlla res sponte sua potest suæ originis repugnare. Alioquin sponte ad sui ipsius naturaliter ferretur interitum, qui necessario sequitur origine perdita. Quinetiam quicquid effectus aliquis agit, suæ originis vi & auxilio facit. Si ergo aduersus causam pugnaret, in ea colluctatione causa illa sibi ipsi prorsus aduersatur corpori nostro, imò corporibus omnibus. Igitur à nullo corpore ducit originem. Sæpe enim ab incitamenti corpore abstinere, honestatis, vel veritatis, vel religionis gratia. Cum Plato noster domandi corporis gratia salubrem Atticæ locum Academiam habitandam elegit, nonne animus eius corpori aduersabatur? Cum Xenocrates dilectus Platonis discipulus, & Origenes eorum sectator exusserunt sibi virilia, quo libidinis incendia prorsus extinguere, nonne iniussus animus bellum membris corporis indicabat? Antehos Magi Persarum, Ægyptii Sacerdotes, Pythagorici Philosophi, ut viderem eneruarent & sobrii forent ad contemplandum, mero & carnibus abstinebant. Sed sanctimonia, martyriaque Christianorum, multo magis victoriam mentis erga corpus testificantur. Omnes profecto quotidie à corporis incitamentis certa de causa pro viribus abstinemus. Ac etiam si nunquam corporis impetus

frangeremus, satis tamen foret pugna ipsa, quæ sit in nobis continua ad ostendendum aliam in nobis substantiam esse, præter corpoream, corporeis aduersantem, tum humoribus, tum etiam cœlestibus influxibus sensum mouentibus per humores. Quod si anima corpori frequenter obsequitur, non violentia ad hoc inducitur, sed amore quoad corpoream vitam, quasi mater ad prolem suam prorsus afficitur. Quo quidem vehementius blandiente vel nullo modo vel leuiter consultatur.

Ratio hætenus assignata est, ex eo quod anima in moribus repugnat corpori. Secunda mox assignanda est. Quoniam supra assurgit, quo patet eam non ex corpore dependere. Multis quotidie modis sensibilibus imagines fallunt continuò sensum. Quam sane fallaciam ratione corrigit intellectus. Qui quatenus excogitat vel affectat aliquid incorporeum absque controuersia seipsum supra corpus attollit. Res vero nulla causæ suæ vires & ordinem transcendere potest. Sensus quidem interior exterioribus nuntiantibus, nihil præstantius confingere potest, quam lumen ingens variis affectum coloribus & odoribus atque sonis saporibusque mirabiliter oblectantibus. Nihil profecto sublimius interrogata de Deo imaginatio porrigit rationi. Ratio vero è summa mentis specula phantasiæ fallacias prospicit & emendat. Deumque ratione admodum diuersa describit. quemadmodum in Theologia nostra latissimè declaramus.

Tertia ratio adducitur hunc in modum. Si rationalis animus originem vllam à corpore traheret, quanto coniunctius hæreret corpori, tanto melius se haberet. Quælibet enim res ab origine sua seruetur atque perficitur. Nunc vero contra contingit. Præcipuè quidem rationalis animæ partes duæ sunt, intellectus atque voluntas. Quando circa corporalia occupamur, intellectus aut nihil cernit omnino, aut non sincere discernit, sensibus & phantasia deceptus. Quod planè comprobatur Socrates in Phædone. Voluntas affligitur, dum curis multis inde vexatur. Contra, quando corporalia despicit, & sopitis sensibus, expulsisque phantasmatum nubi- bus, nec aliter animum corpore distrahente animus per se aliquid speculatur, tunc intellectus sincere discernit fulgetque maximè. Quod etiam in his apparet, qui aut per somni quietem aut aliam quamuis alienationem à corpore, vaticinantur. Ideo nonnulli, ut in Critone & Apologia inquit

Plato, propè mortem cum sunt, futura prædicunt. Quasi tunc illa videant in supernis spiritibus præscripta. Quibus suapte natura iungitur animus, modo seiungatur à corpore. Non solum vero intellectus se à corpore seuocans, quod aptat clarius inmetur, diuinusque euadit, ideoque se melius habet, sed & voluntas nec perturbationibus tunc affligitur, imò diuinis tanquam sibi similibus summopere gaudet. Hinc sequitur, non esse corpus animi rationalis originem. Siquidem quo longius discedit ab illo, eo se perfectius habet. Sequitur & hoc, si quanto magis mens in hoc corpus immergitur, tanto deficit magis, & quo discedit longius, eo magis & proficit, tunc fore perfectissimam mentem cum ab hoc corpore penitus euolauerit. Non est autem inde interitus, unde summa perfectio. Sed integra vita, vsque adeo ut sit perpetua. Nulla enim mutatione animus vnquam deficiet, quando non perit exeundo è corpore. Qua quidem nulla circa ipsum maior potest esse mutatio.

*De probatione fidei. Prædicationis pars  
secunda.*

Adspira nobis precor Alme Deus, via, veritas, vita, Trinitas, vnus Deus In medio Ecclesiæ laudabo te. In conspectu angelorum psallam tibi.

**A** Postolos nulla simulatione vel ambitione fuisse adductos ad prædicandum patet, quoniam non propriam, sed Christi gloriam affectabant. Hinc illud Pauli ad Corinthios: Non enim nosmet ipsos prædicamus, sed Iesum Christum Dominum nostrum. Nos autem seruos vestros per Iesum. Item, inter vos alius dicit, ego quidem sum Pauli. Alius, ego ipse Apollo. Nonne carnales estis? Quid enim Apollo? Quid vero Paulus? nisi ministri eius cui credidistis. Et vnicuique sicut Dominus dedit. Ego plantavi, Apollo rigauit, sed Deus incrementum dedit. Ita neque qui plantat est aliquid, neque qui rigat sed qui incrementum dat Deus. Qui autem plantat & qui rigat vnum sunt. Nemo igitur in hominibus gloriatur, omnia enim vestra sunt, siue Paulus, siue Apollo, siue Cephas, siue mundus, siue vita, siue mors, siue præsentia, siue futura, omnia vestra sunt, vos autem Christi, Christus, autem Dei. Ideo in actis apost. cū quidam Cornelius adorare Petrum voluisset, prohibitus est à Petro. Præterea cum Lycaonienses propter miracula Paulo & Barnabæ

tanquam Diis immolare vellent, ab eis permitti non sunt. Ioannes quoque in Apocalypsi adorari se vetuit. Sed quidnam hoc Pauli manifestius? Absit ut gloriemur in alio quam in cruce Domini nostri Iesu Christi, per quam mihi mundus crucifixus est, & ego mundo. Accedit ad hæc, quod non inuiti, sed sponte libenterque cruciatus pro Christo ferebant. Hinc Paulus ad Romanos: Gloriamur in tribulationibus, scientes quod tribulatio patientiam operatur, patientia vero probationem, probatio verò spēs, spes autem non confunditur, Quia charitas Dei diffusa est in cordibus nostris per Spiritum sanctū, qui datus est nobis. Item ad Corinthios, Superabundo gaudio in omni tribulatione nostra. Rursum ad Timotheum: In hoc laboramus, & maledicimur, quia speramus in Deum viuum. Fidelis sermo & omni acceptione dignus, quia Christus Iesus venit in hunc mundum, ut peccatores saluos faceret, quorum primus ego sum. Sed ideo misericordiam consequutus sum, ut in me primo ostenderet Iesus Christus omnem patientiam, ad instructionem eorum qui credituri sunt illi in vitam æternam. Regi sæculorum immortalis, inuisibili, soli Deo honor & gloria in sæcula sæculorum. Rursum ad Colossenses. Nunc gaudeo in passionibus pro vobis & adimpleo ea quæ defunt passionum Christi in carne mea, pro corde eius quod est Ecclesia. Item Lucas in Actis: Apostoli ab Iudæis cæsi exultantes incedebant, quia digni habiti essent, qui pro Christi nomine iniurias paterentur. Denique testimonium Apostolorum summopere validum est, ex eo quod in fide minime titubabant. Hinc illud ad Romanos: quis nos separabit à charitate Christi? Tribulatio? angustia? an persecutio? an fames? an nuditas? an periculum? an gladius? sicut scriptum est: Quia propter te mortificamur tota die, æstimati sumus sicut oues occisionis. Sed in his omnibus superamus propter eum qui dilexit nos. Certus sum enim quod neque mors, neque vita, neque angeli, neque principatus, neque potestates, neque virtutes, neque instantia, neque futura, neque fortitudo, neque altitudo, neque profundum, neque alia creatura poterit nos separare à charitate Dei, quæ est in Christo Iesu Domino nostro. Huc tendit & quod scribit ad Philippenses Romæ vinc-tus. In nullo confundar, sed cum omni fiducia sicut semper & nunc exaltabitur Christus in corpore meo, siue per vitam, siue per mortem. Mihi enim viuere

Christus est, & mori lucrum. quod si vivere in carne hic mihi fructus operis est quid eligam ignoro. Coarctor autem à duobus. Cupio enim dissolui & esse cū Christo, atque hoc quidem mihi multo melius. Permanere autem in carne propter vos necessarium est. Et hoc cōfidens scio, quia manebo & permanebo omnibus vobis ad profectum vestrum & gaudium fidei, ut gratulatio vestra abundet in Christo Iesu, in me per meum aduentum iterum ad vos. quibus in verbis liberationem suam vaticinatus est. Item ad Timotheum: Non dedit nobis Deus spiritū timoris, sed virtutis & dilectionis & sobrietatis. Noli itaque erubescere testimonium Domini nostri. Neque me vinc-tum eius, sed collabora in Euangelio secundum virtutem Dei. Ob Euangelium hæc patior, sed non confundor. Scio enim cui credidi, & certus sum, quia potens est depositum meum seruare in illum diem. In Euangelij prædicatione laboro vsque ad vincula, sed verbum Dei non est alligatum. Ideo omnia sustineo propter electos, ut & ipsi salutem consequantur, quæ est in Christo Iesu cum cœlesti gloria. Fidelis sermo, quia si commortui sumus, & conuiuemus, si consustinebimus, & corregnabimus. Si negauerimus eum, & ille negabit nos. Si vero non credimus, ille fidelis permanet. Negare seipsum non potest. Idem ad Corinthios: Deus qui dixit de tenebris lumen splendere, illuxit in cordibus nostris ad illuminationem scientiæ claritatis Dei in faciem Christi Iesu. Habemus autem Thesaurum istum in uasis fictilibus, ut sublimitas sit virtutis Dei & non ex nobis. In omnibus tribulatione patimur, sed non angustiamur. Attenuamur, sed non destituimur. Persecutionem patimur, sed non derelinquimur. Deici-mur, sed non perimus. Scimus enim quod qui suscitauit Iesum, & nos suscitabit cum Iesu, propter quod non deficimus. Sed licet is qui fortis est noster homo corumpatur, tamen is qui intus est, renouatur de die in diem. Quod enim in præsentis est momentaneum, & leuæ tribulationis nostræ supra modum in sublimitate æternum gloriæ pondus operatur in nobis, non contemplantibus nobis quæ videntur, sed quæ non videntur. Quæ enim videntur, temporalia sunt, quæ vero non videntur, æterna sunt. Scimus enim quod si terrestri domus nostra huius habitationis dissoluatur, ædificationem ex Deo habemus domum non manu factam, sed æternam in cœlis. Idem ad Timotheum, Vigila in omnibus, & labora.

Opus fac Evangelistæ. Ministerium tuum imple, sobrius esto. Ego enim iam immoror & tempus meæ resolutionis instat. Bonum certamen certavi, cursum consummaui, fidem seruavi. In posterum reposita est mihi corona iustitiæ, quam reddet mihi Dominus in illum diem iustus Iudex. Non solum autem mihi, sed omnibus qui diligunt aduentum eius. Denique certam Ioannis asseuerationem audire fas est.

Quod fuit ab initio, quod audiuius, quod vidimus oculis nostris, quod inspeximus, & manus nostræ contrectauerunt de verbo vitæ, & vita ipsa innotuit. Et vidimus, & testamur, & nuntiamus vobis vitam æternam, quæ erat apud patrem & apparuit nobis.

*Sequentes superiorem ordinem incipimus, ut inde per viam veniamus ad veritatem.*

Adspira nobis precor Alme Deus, via, veritas, vita, Trinitas vnus Deus. In medio Ecclesiæ laudabo te. In conspectu angelorum psallam tibi.

**Q**UOD corpori, cuius natura determinata est, naturaliter alligatur operi, operationē habere non potest liberā & solutam. Animus vero noster hāc habet. Igitur cum à corpore viuere. Bruta videmus iudicium habere natura determinatum. Naturali enim extimatione iudicat ouis lupum sibi perniciosum atque fugit. Neque potest non fugere impellente natura. Naturali instinctu feruntur hirundines ad nidum conficiendum, apes ad aluearia, ad telas araneæ. Ideo omnes eiusdem speciei animantes, eodem modo sua fabricant semper. Neque discunt aliquando neque variant vnquā. quia species naturalis qua ducuntur, ab initio inest, atque eadem permanet. Homines autem & discunt & sua opera variant semper. Vnam tamen ab initio naturam habent. Non igitur natura trahuntur ad agendum, sed ipsi consilio suo aliās aliter se ipsos agunt. Vndenam contingere id putamus? quia elementa, arbores, bestię, in suis quibusdam motibus, electionibus, artibus nunquam aberrant. Homo verò sepiissime. Non quidem ex eo quod intellectus inest illis perfectior. quibus nec intellectus quidem inest vllus, sed quoniam ab intellectu diuino instrumentoque eius natura nunquam errante trahuntur, homo vero ab intellectu proprio, qui errare potest, ducitur. Qui etiā si quando ab actionibus propriis ocium agit ad tempus, tunc ipse quoque à Deo ducitur, neque errat. Quod ex

vaiciniis & miraculis declarat. Ac si semper duceretur, sicut alia, tanto minus erraret quam illa, quanto esset perfectius instrumentum. Rursus si alia seipsa ducerent, sicut homo, tanto magis errarent, quanto minus perfectam sortita sunt speciem. Denique si electio nostra illata quadam necessitate ferretur, nunquam aliter ageremus quam affectio corporis simul atque imaginatio præsens à sensibus mora nos allicit.

Quemadmodum & bestię faciunt omnes, & bestia nostra. Contra verò sæpè ita primum commoti, mox consultamus, eligimusque contra quam incitatio eiusmodi prouocauerat. Quoniam libertatem animi & virtutem eius æternamque felicitatem rebus mortalibus anteponimus. Quod quidem maximè apparet in Philosophis atque religiosis, qui vel veritatis inueniendæ, vel diuinæ gratiæ incundæ gratia, institutionem vitæ eligunt, non solum sensibus repugnantem, sed etiam corpori procudubio noxiam. Qua quidem in re mens humana liberam actionem imperijumque in corpus corporeaque declarat.

**T**ESTIMONIUM Apostolorum pro Christo vnde potissimum confirmatur? quod neque decipere quemque instituerunt, neque etiam decepti fuerunt. Huc tendit illud Petri: Parati semper estote ad satisfactionem omni poscenti à vobis notionem de ea quæ in vobis est spe & fide. Item, non enim indoctas fabulas sequuti notam facimus vobis Dei nostri Iesu Christi virtutem & præscientiā, sed magnitudinis illius speculatores effecti. Item Paulus ad Corinthios: Ego sic curro non quasi in incertum, sic pugno non quasi aërem verberans. Sed castigo corpus meum, & in seruitutem redigo, ne fortè, cum aliis prædicauerim, ipse reprobus efficiar. Hinc Paulus & Apollo vbique cum doctis de Christi mysteriis differentes Prophetarum volumina in medium adducebant. Iubet sæpè Paulus discipulos suos, præcipuè sacerdotes, profundæ Prophetarum intelligentiæ diligenter incumbere Origenes contra Celsum inquit, Paulus criminatur eos, qui temerè credunt. Profecto Christianis consuetudo est, pro eorum indubitata sententia trahere audientes, hæc ille. Præterea quidem hanc nobis sanguine suo testificati sunt, viri fuerunt iudicio prudentissimo. Ac si non omnes ab initio, tamen paulo post doctissimi, quod quidē eorum gesta scriptaque confirmant. Et hi quidē deinceps quam plurimi, Ioannes,



Paulus, Hierotheusque & Dionysius Philosophi summi, Iustinus, Patenus, Quadratus, Agrippa, Aristides, Lucasque, Marcusque Philosophi. Item Thomas & Apollo legis Iudaicæ peritissimi. Timotheus, Titus, Clemens Romanus, Barnabas, Ioannes senior, Egesippus, Papias, Mellitus Philosophus Asianus, Ignatius sapiens Polycarpus insignis doctor Asiæ, Dionysius Alexandrinus, alique permul- ti sapientia excellentes. Quos in libro de Religione longo ordine numeramus. Inter innumerabiles Origenem tacere non possum Philosophum, Martyremque præclarum. Denique si primum Religionis huius fundamentum Dialectici, vel Oratores; vel Poëtæ iecissent, suspicaremur plebem astutia & eloquentia fuisse deceptam. Si docti omnes semper respuissent, iudicarem eam forsitan contemnendam. Si principes vel ab initio vel paulo post huic legi omnino fauissent, opinaremur debiliores à potentioribus fuisse coactos. Successores deinde, ut sit, legem illam cum late suxisse. Diuina igitur prouidentia voluit religionis suæ simplicem veritatem ab hominibus prima rudibus, simplicibus, paucis, primam originem ducere, atque ab eis astutos, doctos, plurimos quasi pisces à piscatoribus feliciter & mirabiliter ir- retiri. Permisit insuper Religionem suam annos plures quam tercentos à potentibus ubique gentium crudeliter impugnari. Quo maior foret doctorum testium & fidelium numerus, rei que ipsius, verior, certior, firmior, authoritas. Nam in prosperitate quidem seruare fidem facile est, in aduersitate vero difficile.

**I**ntellectus rem vera ratione intel- lectam attingit intelligendo. Cum igitur rationibus certis substantiam indiuiduam comprehendit, suo quodam indiuisibili tangit rem indiuisibilem & intelligit. Alioquin diuiduum tangeret non indiuiduum. Hoc ipsum intellectu indiuisibili ad intelligendum sufficiens solum quidem ipsum, ipse intellectus existit. Cum igitur intellectualis substantia sit penitus indiuidua, dissolui nunquam potest. Præsertim quia substantia hæc intellectualis non solum impartibilis est, sed etiam in se ipsa subsistens, videlicet à corpore non dependens. Alioquin in se ipsam reflecti non posset quemadmodum in Theologia nostra Proculratio ne probamus. Conuer- titur autem in se ipsam, dum actionem suam, virtutemque & essentiam animaduertit & causam. quod si actio eius tanquam libera remeat intro, multo magis essentia est à

corporibus expedita. Oportet præterea inter naturam cognoscentem, atque cognitam esse proportionem, ut inter visum atque lumen, inter auditum atque sonum. Multo magis inter intellectum & intelligibile proprium. Intellectus enim intelligibile penetrat definiendo atque distinguendo. Quod sensus circa sensibile nunquam efficit. Intelligibile vero proprium est, vniuersalis ipsa specialisque rei cognita ratio. Cum igitur hæc à loco tempore- que sit absoluta, merito intellectus ab eisdem solutus est atque sempiternus.

**L**eges humanæ non aliter aut admit- tuntur ab initio, aut postquam admis- sæ sunt propagantur, quam vel consuetis communibusque humanarum & natura- lium rationum suasionibus vel autoritate quadam imperatoria, impetue armorum vel facilitate & commoditate viuendi, at- que illecebris voluptatum. Præterea fide- rum dispositio, non aliis vnquam instru- mentis quam eiusmodi leges inter homi- nes potest inducere. Quamobrem cum Christianam legem cognouerim apud ho- mines sanæ mentis & ortam aliquando & cito latissimè propagatam, dum probabi- les illi multorum argumentationes aduer- sarentur, dum arma potentum contra il- lam ubique sæuissent, dum palam omnis humanæ voluptatis usus spesque ab ea prorsus auferretur. Legem eiusmodi neq; humanam esse neque à coelesti fato pen- dere, sed diuinam omnino & à supercoe- lesti quadam potentia proficisci necessa- rio concludemus. Quid? quod multis ante seculis longo ordine à plurimis Prophetis atque Sybillis singula hæc prædicta fue- runt, quod in sequentibus ostendemus. Quid? quod Christus, vitæ magister, mor- tem suam, persecutionem aduersum discipulos suos ubique futuram, propagatio- nem, immutabilitatem religionis suæ, mi- serabilem Iudæorum ruinam breui ventu- ram, Gentilium conuersionem, Iudæorum quorundam pertinaciam vsque ad mundi finem duraturam, tum ipse prædixit, tum discipulos suos inspirauit, ut dicerent. At- qui id quod mirabile est, Christus obsidio- nem in sabbato futuram, & exitium fame ferroque à Gentilibus inferendum, atque stragem inauditam & captiuitatem. Præ- terea Iudæorum in omnes Gentes, non aliter ante præscripsit, quam Iosephus scripserit post ruinam. Denique si religio- nis maximè propria puritas est, hæc certè diuinissima est, quæ neque viles postero- rum Iudæorum superstitiones, & spurcissi- ma Talmut deliramenta, neque obscæ- nas &

has & iniquas Gentilium fabulas, neque abominabilem Mahumethensium licentiam & Alchorani ineptias admittit. Quæ neque terrena præmia, vt leges aliæ, sed cœlestia pollicetur. Neque aduersarios legis suæ interfici iubet, quemadmodum iussit Talmut & Alchoranum, sed vel ratione doceri, vel oratione conuerti, vel patientia tolerari, neque virtutes ambitionis aut voluptatis aut tranquillitatis humanæ, sed Dei solius gratia ardentem exercet, totumque hunc mundum pefiundat & pro nihilo habet, vt mundum alterum consequatur. Ad idem pertinet sermonis puritas simplicitasque & maiestas insolita concordiaque & occulta quædam verbis insita virtus.

*De quinque panibus.*

#### C A P V T IV.

Adspira nobis precor Alme Deus, via, veritas, vita, Trinitas, vnus Deus. In medio Ecclesiæ laudabo te. In conspectu Angelorum psallam tibi.

**E**X quinque panibus & duobus piscibus satiauit quinque virorum millia. Quæritur quomodo panis ille acceperit incrementum. quatuor id modis effici potuit. Creatione, Rarefactione, Generatione, Magnitudinis attractione, alienæ materiæ non creauit nouam ibi materiã. Creatione namque tanquam actionum omnium nobilissima in operibus vitur nobilissimis, in productione mundi, angelorum, animarum. Si solum præsentem materiam rarefecisset, nihil amplius nutriuisset. quemadmodum si quis melidem extendat in amplius. Potuit autem probabiliter præsentem materiæ quantitatem adhibere maiorem, non quidem rarefaciendo quæ aderat, sed aliam generando consimili præditam densitate. Nam & ab initio mundi primo, materiam procreauit nondum quantam. Mox adhibuit quantitatem, non quidem rarefactæ materiæ, quæ nondum quantæ erat. Rarefacta vero passio quædam est pertinens ad rem iam quantam. Potuit etiam probabiliter virtutem inferere pani mirabiliter attractiuam, quæ efficacissimè sugeret aërem vndique & aquæ terræque vapores. Quæ in pane protinus condensata coactaque subito facerent augmentum. Similiter sanguine granam attractiua & digestiua virtute, sugit aërem & humorem, vnde tumet, ex pusillo fit magnum atque procerum, ex vno fit multa. ex deformi formosum. Natura id longo perficit tempore, breui Dæ-

mon efficit idem. Solus momento Deus Facit quoque pro arbitrio Deus multa, producendo formas etiam sine motu. Dæmon autem mouendo quæ sunt loco coniungit vnde formæ resultant. Disposuit Iesus in prato mensas ordine xij. & in qualibet mensa centum discumbere iussit vtrinque, videlicet quinquaginta. post hunc mensarum duodenarium, adhibuit alium duodenarium in longum, aliumque deinceps vsque ad duodenaria quinque. Sunt igitur ibi sexaginta mensæ & hominum sex millia, virorum scilicet quinque millia, & quingenti pueri & toridem mulieres. Benedixit autem panem dicens: Crescite panes, replete populum fidelem. Similiter pisces subtractis primo spinis. Erant autem libræ quinque panum, & similiter piscis, ac dum benediceret sub Sole, resultabat umbradigitorum quinque super pisces & similiter aliorum quinque digitorum super panes. Vnde augmentum est vtriusque sexorsum ad libras vsque viginti quinque. Deinde fregit panem quemlibet tractu apertæ palmæ digitorumque super panem. Cessit digitis panis. Vnde sex resultauere bucellæ. Duxit rursus etransuerso manum, & factæ sunt triginta sex bucellæ. Ex quinque panibus ita multiplicatis facta sunt centi & octuaginta frusta. Dedit Iesus unicuique duodecim Apostolorum frusta in gremio quindecim, id est, unicuique confinium. Pisces vero integros ipse portauit. Paulatimque distribuit, mensis procedens in latitudinem per semitas laterales. Dum Apostoli duodecim procedebant per semitas duodecim in longum. Denique cum repleti essent & collecta fragmenta, benedixit fonti, vt tutius suauiusque combiberent. Dicens: Feratur Spiritus Domini super aquas. Ponimus corpus corpulentum, corpus spiritale, & Spiritum. In primo genere sunt, e Terra, Aqua, Aër mixtus. In secundo autem sunt, Aër purus, Ignis, Cœlum. In tertio anima, Angelus, Deus. deus quidem & Angelus simpliciter spiritales sunt. Anima vero spiritalis quid est, quatenus intellectu agit. Dicitur etiam animalis, exercet opera vitæ, sensusque in corpore. Dicitur & corporalis, quando intellectu nihil agente agit, quod est animæ reliquum. Sic enim affectum & habitum induitur corporalem. Vbi anima ad conditiones corporis traditur, id est, vt fiat passibilis, obscura, tarda, hebes. Potest itaque corpus quandoque ad naturam animæ retrahi, vt fiat impassibile, clarum, agile, spiritale. Tunc inquam, cum animus totus intellectu euadit diuino absorptus intellectu

Neque id mirum, vidimus enim terram refractione fieri aquam hanc, similiter aëre effici, hunc fieri similiter ignem. Ignis, si materiam dempseris, erit coelum. Si coelo dimensionem subtraxeris, erit spiritus, id est, lumen à materia & dimensionibus absolutum. Sic vides corporale ad naturam ascendere spiritalem. Sicut cogitare potes Spiritum effici corporalem. Addita luminis dimensione primum, deinde materia. Addito animæ affectu & habitu corporali adhibita condensationi igni, aërique & aquæ.

*In illud Pauli, Colossen. 3.*

**F**Ratres si confurrexistis cum Christo &c.) Congregatio fidelium secundum Paulum vnum corpus est. Cuius caput est Christus. Caput secundum Platonem est totus homo. Rotundum enim est instar cœli. Septem meatus habet quasi plantas septem, oculos duos, quasi Solem & Lunam. Omnes sensus, qui non sunt in reliquo. Habet septem potentias cognoscendi, quinque sensus, imaginationem & rationem, & secundum Galenum principatum tenet in corpore, & ab eo derivatur in corpus animalis vita, sensus & motus. Huic reliqua famulantur, ut hominis instrumenta. Itaque fratres, si Christus caput nostrum est in cœlo, nos membra, quatenus in terra sumus, tanquam membra seiuncta, motum, sensum, vitam amittimus, nisi quatenus fide, spe, charitate ad ipsum, quasi tribus nervis, alligati manemus. Quæramus igitur superius ascendendo arctius alligari Christo qui sursum est, ne penitus pereamus. Sapiamus & gustemus, quæ sursum sunt. Terrenas escas passim paratas à Diabolo fugiamus, harum enim sapere velut hamo nos illaqueat, & sapore detinet diuturno, ne euolemus ad Christum. Igitur quæ sursum sunt sapite. Animalis quidem & diabolicus homo, qui in nobis erat, iam per passionem & resurrectionem mortuus est. Interea spiritali homine viuimus, donec vita gloriæ manifestetur in nobis, quæ nunc nobis est abscondita & reservatur in Christo apud patrem. Hinc illud Ioannis: Filij Dei sumus, quasi iam generati, sed nondum apparuit quod erimus. Cum autem Christus, in quo seruatur nobis vita gloriæ, apparuerit in iudicio, tunc & nos apparebimus & fulgebimus vnâ cum ipso per gloriæ splendorem in sempiternum. Nam & intellectus nostri ex lumine intellectus eius, illuminabuntur, & corpora nostra tanquam per radios sui corporis resplen-

debunt. Vnde & imagines nostræ in nobis inuicem perspicientur, & imago Christi inspicietur in cunctis, & imagines cunctorum conspicientur in Christo, & beatus erit oculus in nobis vterque, mentis scilicet atque corporis. Hinc illud Ioannis: Hæc est vita æterna, ut videant te solum Deum, & quem misisti Iesum Christum, ad eiusmodi vitam ut Deus tua clementia nos perducatur. Tradunt Platonici animam esse corporis seminarium. Ideoque formam corporis esse quasi animam quandam degenerantem in naturam materialem. Ideo probabile est vicissim naturam corporalem redigi quandoque ad animæ ipsius naturam. Similiter semen tritici tumescit in herbam, herba redit in semen. Ignis densatur in terram, ad ignem terra reuertitur. In quem materia hæc reuerfa ex immobili, inepta, obscura, fit mobilis, agilis, clara, & sine dissipatione penetrans.

Quando igitur natura corporis in naturam animæ redigetur, præter id quod in passibilitatem, claritatem, agilitatem ab anima fortietur, habebit ab anima quod penetret solida, nec dissipans, nec dissipatum, sicut anima solidum hoc penetrat vndique corpus, non dissipata. Quoniam ipsa interim id viuificat, nec solum non dissipans, sed etiam repugnantia ligans. Plotinus probat corpus solidum non posse absque fractione solidum aliud penetrare, non quidem culpa materiarum quæ cum prima sui natura indiuisibiles sint, facile possunt simul congregi, nec culpa dimensionum. Hæc namque cum sint efficaces neque frangunt, neque resistunt, sed culpa duritiæ solidæ.

Duritia vero soliditasque qualitas quædam est, Ideo eiusmodi qualitate subblata, statim corpora procul à fractione corporibus se prorsus insinuant. Liquidæ liquidis, sicut ignis aëri, aër aquæ. Item liquidis solidis, ut oleum chartæ vel ligno, ignis ferro. Quid ergo? Nunquid glorificatum corpus quod ad ipsam animæ iam factæ diuinæ naturam redactum est, omni soliditate caret? Nequaquam, ait enim, palpare & videte &c. Quomodo igitur lignum vtrinque stante soliditate sine tua penetrat fractione? Quia qualitas hæc admodum vilis velut propria terræ, quo soliditas vel duritia nominatur, non tantam vim habet ad faciendam fractionem, & penetrationem prohibendam, quantam habet facultas corporis animalis iam atque diuini, tum ad motum efficacem & penetrantem. Talis enim est animæ diuinitatisque potestas.

Tum ad connexionem partium corporali-  
um & faciendam & conseruandam. Pro-  
fecto si animæ officium est repugnantia  
in corpore deuincire, & simul conseruare  
deuincta, perfecte id efficit: quando &  
ipsa in diuinitatem absorpta est & corpus  
in ipsam. Claritas corporis gloriosi magis  
natura distat ab oculo quam Solis clari-  
tas. Sol enim & si summum tenet in toto  
corporali genere, genus attamen non  
transcendit. Gloriosum vero corpus qua-  
tenus ad animæ diuinæ conditionem iam  
ascendit, eatenus transcendit & Solis ter-  
minos & oculi facultatem, qui quamdiu  
simpliciter terrenus est, minus potest glo-  
riosum lumen, quam Solis lumen aspice-  
re. Sed quemadmodum in voluntate ar-  
bitrioque animæ positum est demonstra-  
re seipsam, tum ad aures verbis, tum ad  
oculos nutibus, ita glorificatus homo ha-  
bet in suæ voluntatis arbitrio ostendere  
suum corpus iam spiritale, vel occultare.  
Sed quomodo? Non quidem se alteran-  
do. Non enim decet, neque afficiendo  
intuentis imaginationem, falleret enim,  
sed vel suos radios continendo, ne verius  
effluent vel intuentis oculi radios robo-  
rando. Potest & circumfusus aërem in  
superficie sua prout libuerit figurare. In  
qua figura se accomodat intuentibus.  
Sic Christus in gloria visus est in monte  
Tabor. Sic post resurrectionem visus est  
matri temperatione videlicet radiorum.  
Figuratione vero aëris circumfusi, appa-  
ruit mulieribus, & discipulis. In hortis qui-  
dem velut agricola, peregrinantibus pe-  
regrinus, piscantibus vero piscator. Fre-  
git panem, leuissimo tactu, facultas nam-  
que diuinæ manus vicem gladii supplet.  
Nam & homo simplex quatenus habet  
manum, instrumenta omnia videtur ha-  
bere. Inflammat cor audientium ver-  
borum suorum flatu quodam flagran-  
tior. Cum enim adhuc, velut terreni  
inepti essent ad lucem, incepit sub simplici  
fide atque sæpè animam calefacere chari-  
tatem, quo calore purgaretur & transfer-  
retur ad intelligentiæ lumen. Angelus au-  
tem qui descendit ad monumentum fuit è  
numero virtutum, quæ mortis sphæram  
regunt. Venit itaque ad custodes perter-  
rendos, & forma fulguris & miro terre-  
motus effectû, quæ pertinere videntur ad  
Marrem, alij duo Angeli grandiores fue-  
runt ex ordine Dominationum, quæ Io-  
nem, & Potestatum, quæ Solem ducunt.  
Quamquam & ille prior vestem habuit  
argenteam, ad consolandas mulieres, si-  
cut per fulgur milites antè terruerat.

*De duobus discipulis in Emaus.*

*Luce XXIV.*

Adspira nobis precor Alme Deus, via, veritas,  
vita, Trinitas, vnus Deus. In medio Eccle-  
siæ laudabor te. In conspectu ange-  
lorum psallam tibi.

**I**Bant discipuli duo in Emaus, & quia ca-  
rebant firmitate fidei, Dæmon detine-  
bat oculos eorum, ne parentem agnos-  
cerent Iesum. Citans videlicet vaporem  
quendam ad oculos tum disgregantem  
pupillas, tum rubore afficientem. Quo ef-  
figies Iesus, tum grandior tum rubicun-  
dior appareret. Et has rationes elicimus  
ex quodam Augustini fundamento. Iesus  
igitur quo eis vilis perspicaciam restitue-  
ret, explanatione vititur scripturarum, qua  
fidem assereret, vt hac adhibita accende-  
retur & charitas. Incepit paulatim resur-  
gere fides. Flagrare cæpit & charitas.  
Hinc illud: cor nostrum erat ardens, dum  
nobis loqueretur in via. Verum sicut ne-  
que sufficiebat fides nisi charitas addere-  
tur. Ita neque charitas in affectu satis erat,  
nisi accederet charitas in effectum. Igitur  
tunc demum se patefecit Iesus, cum eum  
hospitio, & conuiuio receperunt. Vbi non  
solum præbuit se clare videndum, sed e-  
tiam sacramento Eucharistiæ degustan-  
dum. quin panem benedixit & fregit. Vbi  
communione Christi expulsus est Dæ-  
mon, qui intulerat cæcitatem. Charita-  
te igitur & affectus simul & operis accede-  
re debemus ad Iesum, si modo dicturus sit  
nobis: gustate me, ac videte quam suauis  
sit Dominus. Nam & ille charitatis amore  
accessit ad creandum mundum, descendit  
ad hominem redimendum. Hinc factum  
est, vt amore omnia ad generandum ope-  
randumque moueantur, quod patet non  
solum in animantibus, sed etiam in ele-  
mentis & coelis, atque, vt alibi diximus,  
optimum in quolibet ordine proprium a-  
matoriæ charitatis obtinet signum. Sera-  
phini quidem inter Angelos Empyreum  
inter coelos, & reliqua. Seraphini sub Tri-  
nitate, cui attribuitur cælum Empyreum;  
regunt Christallinum, & merito cum ar-  
deant charitate, empyreum, igneum capi-  
te tangunt. Cherubini, in quibus est scien-  
tiæ plenitudo, Firmamentum regunt, quod  
est plenitudo stellarum. Vnde Daniel: Ful-  
gebunt docti tanquam splendor firma-  
menti. Throni qui sedes sunt, regunt  
sphæram Saturni stabilitatem significan-  
tis. Dominationes Ioui præsunt Domino-  
rū signicatori, Virtutes Marrem ducunt,  
significant enim & ille & hic virilitatem.

Potestates Soli dominantur qui significat Magistratus. Principatus Veneri, cuius est amor affectuum motuumque principium, Archangeli, Mercurio. Merito principales nuntij, nuntiorum principio præfunt, Angeli, id est, nuntij præfunt Lunæ, quæ inferioribus nuntiant influxus superiorum. Throni Patrem referunt. Cherubini Filium, Seraphini Spiritum. Item Principatus patrem, Archangeli Filium, nuntium primum, Angeli Spiritum, qui nuntiauit secundo. Rursum firmamentum Patrem, Christallinum filium, Empyreum Spiritum. Saturnus patrem, Iupiter Filium, Mars Spiritum. Sol Patrem, Mercurius Filium, Venus Spiritum, Luna Christum. Luce sua diuinitatem eius, fusco suo humanitatem. Rursum sicut tres in Deo personæ in vna conueniunt Deitate, sic Sol, Mercurius, Venus, semper proximi in communi quodam splendore conueniunt. Denique vna in Sole substantia est sub figura, luce, calore, sicut vna in tribus personis est diuina natura.

*De laboribus ac ærumnis D. Pauli  
Apostoli.*

Exiui seminare semē tuum Domine. Semen quidem tuum bonum est, adiuua nos propter magnam misericordiam tuam, vt & ego bene seminem, & populus tuus hic semen tuum bene suscipiat, fructumque centuplum inde deducat.

**M**agnus ab alto Iesus per Ananiam Tharsensi Saulo has voces intonuit: Elegite hodie Saule tanquam vas meum omnium electissimum, vt portes ad omnes Gentes verbi mei semina, quibus Euangelicos fructus vbiq; propages. Multa quidem inter seminandum patieris pro nomine meo, sed fient lachrymæ tuæ panes, panes dico cœlestes. Seminabis enim in terris lugens, colliges centum pro vno in cœlis exultans. Surge igitur, vade alacer, memor quod per Dauidem seminantibus sum pollicitus: Qui seminant in lachrymis, in exultatione metent. Euntes ibunt & flebunt, mittentes semina sua, venientes autem venient cum exultatione, portantes manipulos suos.) Quot subinde & quanta pertulit apud omnes Gentes, xliij. iam annis die & nocte. terraque marique, ab hominibus, à bestiis & corpore & animo, dum seminat Euangelium, narrat in Epistola ad Corinthios breuissimè Paulus. Quot insuper annis triginta & quinque labores passus fuerit, non posset vnquam absque magno labore narrari,

vnus duntaxat, quod obscurius est, exponam. Narrat præter id quod ter virgis cæsus est, semel lapidatus est, scà Iudæis quinquies verberatum, id est, quinque seorsum temporibus, & qualibet vice nouem & triginta plagas se accepisse. Erat enim Mosaica lex, si quis contra legem deliquisset, neque tamen esset capitali supplicio dignus, verberibus affligeretur, non pluribus quam quadraginta. Interpretes vero legis, æquitate ducti, statuerunt plagis multo paucioribus verberari. Sed Paulum rigidius quam ceteros, id est, vna tantum subtracta cruciandum iudicauerunt.

Narrat autem Paulus labores suos, ærumnas, vigiliaeque multas, famem, sitim, ieiunia multa, frigus, & nuditatem, & assiduas Ecclesiarum omnium curas, reuelationesque subinde, vt authoritatem Apostolatus sui confirmet. Qua firmata stabilietur Euangelica veritas ab eo Gentibus prædicata. Stabiliatur, inquam, contra falsorum Apostolorum insidias qui ex Iudæis ad baptismum profecti contendebant legales cerimonias cum Euangelica lege commiscere. Et quando Paulus Euangelium introducebat, ab externis cerimoniis absolutum, odio erat illis. Vnde calumniabantur, quasi ipse non esset verus Apostolus. At ipse ex passionibus reuelationibusque sui Apostolatus veritatem firmat, contra illos, qui & in voluptatibus versabantur & reuelationibus digni non erant. Edixerat enim Iesus, si quis vult meus esse discipulus, abneget semetipsum, & tollat crucem suam & sequatur me. Finis tandem est, vt integra firmaque sit Euangelica veritas. Reuelatione narrata, confirmat, quantam de ipso tanquam de legitimo seruo Deus habeat curam, vt velit eum Iliaca sæpius passione torqueri, ne forte ex diuinis muneribus efferatur, putetque se esse aliquid plusquam hominem, sed ex dolore ventris hominem se prorsus agnoscat. Christumque prædicet non se ipsum. quod autem stimulus carnis eius non libidinis seruior extiterit, testatur vita eius innumeris continuisque plena laboribus, victusque parcissimus, inedia, nuditas, labor assiduus. quodue prouidentia Dei commodius tutiusque virtutis dolore corporis quàm libidine probat. Neque vos turbet quod stimulum carnis appeller, confuevit enim quicquid ad corpus, & materiā pertinet, carnis nomine nuncupare. Item quod de Diabolo stimulante dicit, memento dæmones humores sæpe mouere ad morbos efficiendos. Quod Serapion &



Avicenna confirmant. Revelationibus igitur instructus & inter labores atque pericula toto terrarum orbe diffeminat Dei verbum. Quod in Euangelio hodierno seminat ipse Deus, atque dum seminat, aliud cadit secus viam &c. Quoniam dicit semen suum, per suum, declarat Deum ipsum esse qui seminat, seminat autem in animabus humanis tum ab initio intellectualis conscientiae regulas, tum quotidie veritates suas sanctorum ministerio. Tum maximè in Iesu tempore suo. Exire dicitur, quatenus filius venit ex patre, & ex occulto prodit in manifestum. Audientes vero multi quidem, nullo modo suscipiunt hoc semen, hoc Dei verbum. Qui videlicet nullam rebus diuinis fidem adhibent. qui sunt via quædam à diabolo trita. Vbi nota incitamenta ad vitia ex humoribus facile prouenire, ex cholera ad iram atque superbiam. Ex sanguine ad vanitatem atque libidinem, ex phlegmate ad pigritiam. Ex melancholia ad timiditatem, inuidiam, avaritiam. Incredulitatem verò non facile ex humoribus prouenire, sed ex dæmonibus dissuadentibus aliquid, & aliud suadentibus. Nam & credulitatem augent nobis Angeli. Alij vero suscipiunt semen aliqua fide, sed quia non veram charitatem habent, non perseuerant, ideo non perducunt ad fructum, atque hi quidem duobus modis, aliqui enim fortitudinis defectu, id est, laborem & dolorem non tolerant, recedunt à fructu verbi diuini, & hi dicuntur timore cadere. Alij defectu temperantiæ. Hi enim corporis voluptatibus obsequuti, sementem intellectualis verbi non proferunt, talesque sunt quamplurimi, plures enim muscarum vino dulci suffocantur quam austero. Sicut autem tribus gradibus fit defectus, sic tribus gradibus fit profectus. qui enim fide suscipiunt verbum, & propter veram charitatem perseuerant, fortitudinis & temperantiæ beneficio: hi, vt tradit Matthæus, si fide excelluerint, producant triginta pro vno, si spe præualuerint, sexaginta, si charitate, centum. Fortè per tres gradus in fructu designat tres in beatitudine gradus, vt alij ad primum cælum, alij ad secundum, alij ad tertium eleuentur. Tangitur hic insuper Platonica quædam opinio, ponens tres in qualibet morali virtute gradus. Alii enim ex diuino semine ciuilem producant virtutem, quæ secundos amputat motus. Alii purgatoriam, quæ motus secundos extirpat, alij purgari animi, quæ primos amputat motus. Sic castitas alia coniugalis est, alia vidualis, alia

virginalis, sic fortitudo, alia spernit detrimenta externorum, alia detrimentum corporis, alia totam hanc vitam, virtus purgati animi tanquam perfectissima centenario numero designat, qui resultat ex denario in se ipsum ducto, qui plenus est numerus, vltra enim hunc est quædam repetitio numeri. Memento parabolam hanc afferri proprie de prædicatione Christi ad Iudæos. quorum quarta pars profecit in semine, tres enim partes in vanum proiectæ dicuntur. quamobrem Iesus Apostolos, præcipue Paulum, extra Iudæam per tres mundi partes, Asiam, Africam, Europam misit, diuinum verbum seminaturus. Vt autem Paulus ante persecutor sui clarius & ardentius prædicaret, reuelauit ei arcana sua quando rapuit eum. Post annum à passione completum, ante biennium expletum. A die vero conuersionis suæ raptusque sui post annos quatuordecim à Troade secundam Corinthiis scribit Epistolam.

Raptus est autem Damasci in eo tri-duo, quo non vidit, non bibit, non comedit, sed orabat assidue. Narrat vero se raptum in tertia persona. Quoniam quasi alter nunc est, & alter quando fuit in raptu, vel alter ante raptum, alter vero post raptum. Dicit item se nescire vtrum animus suus in raptu esset in corpore nec ne, id est, nesciri à se in quantum homo, nesciri ab aliquo simpliciter homine. Nos igitur si scientia id comprehendere non possumus, opinione saltem, ac fide pro viribus tentemus attingere. Et radius visualis in oculo per quem eminus proiectum oculis remotissima quæque tangit, videtque tangendo, quod in animalibus appareret nocte videntibus, multo magis est intellectualis in mente radius, emicans in remota, præsertim quoniam homo præstantissimus quantum deficit inter animalia radio visuali, tantum intellectuali radio re-compensat. Potuit igitur eiusmodi radius in Paulo ad remotissima quæque petendi, diuino videlicet fauente lumine. Sicut radius oculi nostri, vsque ad remotissima foueatur lumine Solis. Hoc itaque pacto anima Pauli virtute duntaxat ascendisset in cælum. Hoc equidem concedo fecisse, sed efficacius aliquid est vltius requirendum.

Siquidem & raptum assueueranter repetit. Et vtrum cum corpore fuerit, ponit ambiguum. Neque tamen cum corpore terreno vult intelligi. Neque sursum intelligi vult, animam per mortem ab hoc corporis reparatam.

Deus namque beneficus non facit per mortem quod potest sine morte facere. Quid ergo : est inter animam corpusque solidum spiritus, tenue corpus, vapor subtili sanguine procreatus. Vigore talis, qualis odor aquæ vitis aspectu, talis qualis reuerberatio quædam splendoris æstate super arenas, hoc in spiritu propriè habitat anima. Per hanc regit & tractabile corpus. Nam & quando spiritus retractus ad intima describit extima, anima quoque deferit eadem, quando iterum dilatatur, adest illis simul & anima. Potuit igitur Deus eiusmodi spiritum usque ad cælum tertium dilatare. Quo illuc usque porrecto, ipsa quoque substantia animæ cælo præsens extitit, & interea terreno simul corpori præsens. Eatenus enim præsentem se facit anima ubique toram, quatenus & spiritus dilatatur. Nam & Gigantem præsentia regit, quæ pusillum rexit infantem. Sed quoniam pacto potuit ipse spiritus eatenus dilatari? Potuit quidem, siquidem eatenus dilatatur & radius. Spiritus quidem vapor quidam est radiosus, & in conum sicut radius à base protenditur. Adde quod sanctus Dei Spiritus, quatenus Pauli spiritum cælum versus protraherebat in longum, eatenus in corpus Pauli circumfusus aërem undique contraherebat, subitoque coctum calore suo in corpore Pauli supplebat in Spiritum. Nam & in nobis Spiritus aëre iugiter attracto reficitur. Igitur interim anima Pauli mortæ plantæ vegetabat in corpore solido, dum spiritale corpus etiam animabat, tangensque cum eo cælum tertium, expedita à variis corporis ministeriis, Dei perspiciebat arcana. Sic animus quatenus suprema tangebatur, nec erat propriè in corpore solido, nec extra corpus omnino. Quoniam habitabat in corpore spiritali, & hoc qua ratione fiat, nesciri fatetur ab homine. Nos autem & si nescimus, attamen opinamur. Raptus est non sua virtute profectus, sed diuina perductus in tertium cælum, scilicet corporale, id est, empyreum. Primum namque cælum est tota sydereæ regio, stellas videlicet planetas continens atque fixas. Quam & nonnulli Philosophi præsertim Iudæi, non solum contiguitate, sed etiam continuitate molis vnam esse dixerunt, & geminos habere motus, eosque oppositos. Proprium quidem ab Occidente, alienum ab Oriente, Nequit enim natura vna oppositos habere motus æquè proprios. Hac igitur causa ab hac regione sydereæ ascenditur ad christallinam, cuius sit motus vnus abstractè, quem sydereæ imitetur. Præterea cum mo-

tus in sydereæ sit multiplex, atque diuersus, qualitas quoque multiplex, scilicet perspicua simul & lucida, varietque lucens, merito procedimus ad Christallinum cælum, cuius vnus sit motus & qualitas vna. Rursum quia super mobile debet esse stabile tanquam perfecti, & super perspicuam qualitatem, quæ quodammodo passiva est, debet esse lumen velut actiuum, nimirum super candorem motumque Christallini lumen, & stabilitas est empyrei. Primum itaque cælum sit stelliferum, Secundum, Tertium sit empyreum, vbi Paulus videns lumen, quod sequentia per se non lucida semper illuminet, & mobilia illuminet non mobilitè. Ex hoc excogitauit ipsam Dei bonitatem prorsus æternam, & virtute præditam infinita. In bonitate rursum infinita, ideoque infinita propagabili propaginem reperit infinitam, ac penitus intimam. Nequeunt enim duo esse pariter infinita. Inuenit & in bonitate infinita amorem ad se pariter infinitum. Vbi Paulus post tertium cælum corporeum, triplex quoque reperit diuinum cælum, patrem & filium atque spiritum. Post hoc per trinum quoque descendit angelicum cælum, vidit enim quemadmodum natura diuina intelligentiæ fons non solum cælos corporeos, sed intellectuales effecit, dum Angelos procreauit, qui tanquam sphæræ circa polum, ita circa Deum perpetuè reuoluuntur. Naturam hanc angelicam in trinum vidit cælum similiter distributam. Sicut enim vna Dei natura in tres personas mirabiliter deriuatur: sic vnam generalem angelorum naturam cognouit in tres hierarchias, id est, sacros principatus esse diuisam. Prima quidem hierarchia patri, Secunda filio, Tertia spiritui potissimum est attributa. In prima Seraphini patrem præcipue in se ipso considerant. Cherubini patrem gubernantem præcipue filium. Throni patrem cum filio Spiritum producentem. In secunda Dominationes filium in se præcipue speculantur, Virtutes filium à patre genitum. Potestates filium producentem vna cum patre spiritum. In tertia Principatus præcipue in se ipso Spiritum contemplantur: Archangeli spiritum à patre, simul & filio procedentem. Angeli spiritum à filio simul & patre manantem. Singuli vero & si alij præcipue aliter omnia contemplantur. Animæ vero beatæ per eosdem nouenarij numeri angelorum gradus distribuuntur. Est & alia quædam apud Dionysium distributio angelorum. Nam hierarchia prima contemplationi prorsus incumbit & contem-

plando sequentes illuminat. Seraphini, ut exponit beatus Thomas, ipsum diuinæ prouidentiae ordinem in diuina potissimum bonitate considerant velut sine. Cherubini eundem in essentia diuina potissimum velut forma quadam & exemplari. Throni eundem potissimum in se ipso. Forſan vero Seraphini quam potenter prouideat, potius speculantur. Cherubini quam sapienter. Throni denique quam beneficè. Secunda hierarchia contemplanſo peruenit ad agendum. Sed Dominationes velut architecti ſequentibus imponunt communes prouidentiae regulas. Cæteri iam exequentur. Virtutes quidem cœlos mouendo gubernant, & cum Deo tanquam instrumenta ad miracula faciendâ concurrunt. Potestates interim quæ prouidentiae ordinem videantur impeditum, propellunt. Tertia hierarchia iam ad inferiora magis gubernanda descendit. Principatus publica curant, principes videlicet atque ciuitates. Archangeli vnumquemque ad diuinum cultum dirigunt, ſacrisque interſunt. Angeli minora diſponunt, & ſinguli ſingulis cuſtodes aſſiſtunt. Paulus hætenus inſpexit diuinorum cœlorum faciem in tribus cœlis corporeis, & tribus cœlis angelicis apparentem. Quos quidem cœlos angelicos præcipuè Paradifum cognominauit, hætenus eſt quaſi videre, dum Dei potius exteriora videt per cœlos vtrinque fulgentia. Audiuiſſe præterea dicit, auditu enim interiora cognoscimus. Dum Dei cognouit arcana, quatenus ipſi Deus reuelauit ultra ideas angelorum atque cœlorum, ideas inſuper aliorum quæ creare poteſt, modo velit. Quorum ſanè arcanorum cognitio non poteſt ab homine percipi, niſi beato. Ideo Paulo non licuit hæc hominibus eloqui; nam minimè percepſſent. Nihil prodeſt nobis, ô fratres, ſcire duntaxat, Paulum altiffima conſcendiſſe & illuc ſubinde ſecum diſcipulos adduxiſſe, niſi & ipſi tales nos Paulo præbeamus, poſſit nos quoque ad excelsa prouehere. Ponderoſa non poſſunt ad altiffima prouehi. Deponamus itaque fratres omnia terrenorum pondera vitiorum, purgati & leues accedamus ad Paulum, oremus Deum ut manum ſupplicibus piâ porrigat. Porriget ille ſtatim benignitate ſua, facileque eleuabit leues in altum. Illic nos diſcubemus dapibus Angelorum. Deſpiciemus itaque terras, ubi mortales tanquam ſues inuoluuntur aſſiduè, luto & ſordibus nutriuntur. Interea nos inter Angelos infinitis veſcemur ſuauiſſimæ Mannæ ſaporibus, & ex ligno

vitæ vinum cum Chriſto bibemus æternum. Eloquutus autem eſt quæ vidit, id eſt, facies corporum angelicorumque cœlorum diſcipulis, Luca, Barnabæ, Clementi, Timotheo, Tito, Dionyſio, Hierotheo, quos perduxit in tertium cœlum tribus præcipuè gradibus, ſicut & ipſe tribus aſcenderat, atque aſcenderat, eos igitur ſic eſt alloquutus. Accipite, ô filij, fidem, qua credatis primum bonum eſſe à vobis in primis amandum, à quo, & res omnes habent ut amari debeant, & vos habetis ut amare poſſitis. Sperate, filij ſi amaueritis ipſum, vos à Deo proculdubio redamari. Quandoquidem niſi prius amati vos ab illo, ipſum non poſſetis amare, amate, filij, tota mente totum bonum & amando illud vnum apprehendite, in quo vno ſunt omnia bona. Quo quidem apprehenſo comprehenditis omnia, quod in ipſo, nec vos, nec alia poſſidetis. Per cœlum itaque fidei primum, ad cœlum ſpei ſecundum, per hoc ad cœlum charitatis tertium proceſſiſtis, qua accenſi ardetis Deo, lucetis ex Deo, gaudetis in Deo, ſicut & quo ad cœlum Veneris, tertium & amatorium peruenerunt, Solem quaſi Deum proſus attingunt. Rurſus, ô filij, amore Dei proſus accenſi mortalium amorem procul expellite, habetis in animo circa mortalia motus animi primos atque ſecundos. Primi ſunt quædam incitamenta ſenſus ante iudicium rationis exorta. Secundi ſunt, qui poſt iudicium rationis etiam perſeuerant & ipſi rationis aſſenſus. Hos itaque conſenſus amputate primum moderationeſque reddite, vnde ciuiliſ in vobis virtus exorietur. Poſthæc conſenſiones eiſmodi penitus extirpate, eritque in vobis purgatoria virtus. Denique primos quoque motus pro viribus amputate. Itaque hac purgati iam animi probitate, tanquam tertio cœlo exemplarem in Deo virtutem percipietis. Sicut quæ per Martem ferro amputantem ad Iouem æquitatis ſignum & ad Saturnum mentis ſegregatæ ſignificatore tanquã tertium inde cœlum venerit, peruenit ad Lacteam circulum occultis diſſimum ſyderibus quaſi Deum, quem Saturnus ipſe per capricornum ſui domicilium videtur attingere. Poſtremo, filij viſibilem hunc mundum dimittite, ad imaginabilem quaſi ſecundum procedite cœlum, ab hoc ad intelligibilem quaſi tertium, id eſt, ad rationes ordinis vniuerſi, quas ſi abſque materia mundi cogitaueritis, mentem architecti mundani prætinus poſſidebitis. Ordo namque mundani artificij, ſubtracta materia, ipſa diuini mens eſt artificis. Ita-

que per cœlum tertium tertio iam peruenietis ad Deum, sicut & qui Zodiacum quasi mundum visibilem recte perspexerit, perueniet ad Christallinum quasi mundum imaginabilem, in quo imaginabilia signa ponuntur ab hoc ad empyreum tanquam ad intellectuale cœlum & intelligibile lumen, vnde ascendet ad Deum, vt à lumine, quod & dispersum est, & in materia, ad lumen tandem vnitum & vbiq̃ue totum & à materia liberum postremo perueniat.

*De passione Domini.*

**C**æci sumus omnes, ô Domine, miserere nostri propter merita passionis tuæ. Aspice nos clementissime Domine, vt te respiciamus, vt te feliciter videamus. Hodie fratres mei Christianus populus vanis passim bacchanalibus occupatur, Christus interea seruator populi, in Euangelio Lucæ prænuntiat discipulis futuræ passionis suæ dolores. Quos bacchanalium nostrorum culpa sustinuit. Quos & libentissimè perpeffus est, vt nos à perpetuis cruciatibus liberaret. Prænuntiat autem passionem suam, vt eos animet ad patientiam atque martyria. Prædicat & resurrectionem, ne malis vllis perterreantur. Præmonet omnia vt diuinitatem suam cognoscant quodue non vi humana victus, sed electione sua passurus erat. Ne ab eo in passione discedant, etiam singula confirmat oraculis Prophetarum. Quod apparet per Isaiam atque Daniele & alios. Isaias ita dicit: Obtuli scapulas meas ad verbera, genas meas ad alapas, & faciem meam non diueri à sputorum dedecore. Hinc & illud de cruce: tradidit in mortem animam suam & cum sceleratis reputatus est, & de resurrectione Dauid, non derelinq̃ues animam meam in inferno, neque dabis sanctum tuum videre corruptionem. Prædixit autem se passurum sub Gentibus, & Iudæis propter Pilatum eiusque satellites. Discipuli vero non intelligebant scilicet mysteria Prophetarum. Item credebant eum sæpè allegoricè loquutum, sub passionis mortisque suæ nomine aliud quiddam significare. Iam enim conceperant hūc esse adeo diuinum, vt occidi non possit. Mox cæcum illuminat, miraculo diuinitatem confirmans, ne diuinitati futura passio detrahat. Illuminat cæcum, sed petentem iterumque petentem, & superantem impedimenta turbæ mundanæ retrahentis à Deo. Et forte prius illuminatur mente quam corpore. Cæcus enim mendicusque, Prophetarum

forfan ignarus, filium Dauid eum vocat. Iesus perseuerantiam illius, diligens suo statu, à se mouet illum. Interrogat quid velit, vt votum coram omnibus fateatur, & cæcum se esse palam ostendat præsentibus. Neque pecuniam postulare sed lumen, cum dicit, Domine, iam illuminatus est mente per ipsum Christi statum. Cum dicit, vt videam, desiderat oculi lumen. Iesus motu linguæ vel oculorum, illuminauit eum, sicut Sol radiorum aspectu reddit nos videntes, quando dixit, respice, scilicet me, quia fides tua erga me te reddidit salute dignum. Agnosce me salutis datorem. Cum dixit respice, prouocauit eum, vt oculos in se verteret. Mox intuitu illuminat eum, dum dicit quinque verba, scilicet, fides tua te saluum fecit. Ille tanquam gratus, sequitur eum, laudans in Iesu Deum & alios prouocat ad laudandum. In cæco mendicante in via, nota humanam cecitatem in hac vita saluis egenam. In hoc cæco illuminato statim post narrationem dominicæ passionis. Nota passionem Christi humanæ salutis necessariam extitisse. Christi peruiam Hiericho transeuntis, qui significat Lixnam, id est, descendentis à cœlo, & momento ad salutem consequendam esse opus, instantia superante impedita. Denique petendum esse à Deo intelligentiæ lumen. Hinc illud Dauidis, Intellectum da mihi & viam. In hoc autem, vt Ioannes clamat, Apparuit charitas Dei in nobis, quando filium suum vnigenitum misit Deus in mundum, vt viuamus per eum. Sic Deus dilexit mundum, vt filium suum traderet pro peccatis nostris. Charitas est amare Deum propter se & cætera propter Deum. Cum enim omnis multitudo rerum sit ab vno & ideo referatur ad vnum, nimirum omnia bona referenda sunt ad vnum primumque bonum, ex quo sunt velut ab efficiente, in quo sunt, vt exemplari. Ad quod sunt velut ad finem. Primus enim effector rerum atque motor sui gratia facit, mouetque omnia. Cum igitur per primum bonum omnia sint bona, & quatenus bona sint amanda, meritò propter ipsum, duo quædam videmur dicere. Primum, quoniam aliquam hæc illius habent imaginem. Secundum, vt hæc amando amemus in omnibus ipsum. Sed cuius gratia? duntaxat vt placeamus ipsi. Placeamus autem cur? Nunquid, vt mala vitemus, vel vt commoda consequemur? Nequaquam. Nam primum illud non propter se, sed propter alia, & gratia tui diligeres, & contra prudentiæ ordi-

nem, principium primum vltimumque finem subiceret sequentibus aliorumque referret, hucusque igitur. Denique fit resolutio, vt Deo placeas, & si quid addendum est, cur placere velis, adde ad gloriam Dei, vt sit eius imperium gloriosius. Hæc ipsa charitas est, propter quam ad gloriam Dei tu non solum contendis illi placere, sed etiam vt cæteri placeant, videlicet amplificandæ diuinæ gloriæ gratia. Nam & ipse Deus charitate sui, id est, amplificandæ siue communicandæ suæ bonitatis amore, vt Dionysius ait, omnia procreauit. Amor autem in voluntate consistit. Ideo Mercurius atque Plato vna cum nostris Theologis, voluntatem diuinam ex amore bonitatis suæ cuncta procreauisse confirmant. Vniuersum igitur, quod tantum & tale & tunc effectum fuerit, propriè ex diuina voluntate & charitate fortitur. Tantum enim & tale & tunc factum est, quantum & quale & quando Deus voluit. Nam prout ad potentiam & sapientiam pertinet, & aliàs, & aliter fieri potuisset. Cum igitur ex amore diuino facta sint omnia, eodem omnia conseruantur, atque mouentur. Singula igitur inde ducta amore quodam propagationis suæ, qua diuinam imitentur propagationem, mouentur & agunt. Amorem item conseruationis suæ qua diuinam imitentur æternitatem prosequuntur & fugiunt. Quæ sine amore, nec aliquid agerent, nec agendo consequerentur. amore item partium mutuo seruator totum, conseruantur & partes. Amore tandem omnium inter se communi vniuersum perpetuo conseruatur, omnisque huiusmodi amor charitas nominatur. Quando à Deo insitus ad diuinam imitationem, & legem omnia prouocat. Sola forsan quæ intellectum habent ex libero arbitrij motu ab hoc fine aberrare possunt. quæ tamen ex hoc liberi motus munere plus admodum quam cætera Deo debent. Ideoque multo magis ab eis charitatem Deus exigit, qua Deum propter Deum ament, & se vnà cum cæteris diligant propter ipsum. Quanti vero Deus faciat charitatem, non solum ex eo pater quod ille omnia charitate fecit & seruat, & mouet, quoduè regnum eius in subditorum charitate seruator, verum etiã ex eo quod symbolum, id est, indicium & imaginem charitatis in summis vbique constituit. Inter Angelos ordo Seraphinorum primus est. Prima, sancti Spiritus & diuinæ charitatis imago. Inter cælorum sphaeras prima est empyreum symbolum charitatis. Dominus inter planetas, Sol calore suo

proprietas charitatis. Ignis inter elementa summus charitatis indicium. In calore tandem, charitati persimili, generatio rerum vitæque consistit. quid denique profunt alimenta corpori, nisi calor concoquat, digeratque & non viuientia in formam vitæ traducat? Similiter mortuæ nobis sunt res actionesque omnes, nec animam nutriunt nisi charitatis calore tangantur, referanturque ad ipsam animæ vitam, ad ipsum videlicet Deum. Omnia sub terris semina rerum quasi mortua iacent, nisi verno Solis feruore viuificentur, & germinent. Nata rursum mortuos habent colores atque figuras, nisi luce Solis illuminentur. Similiter vita carente, quæcunque virtutes ab hominibus nuncupantur, nisi formentur. In qua & calor est & lumen. Calor quidem quatenus Deum appetit. Lumen autem quatenus delectatur Deo & vtrumque summam vno amoris diuini & charitatis nomine comprehenditur: quo tanquam solaris virtus nostra omnia fecit viuia, sic & salis more conseruat. Sed cum charitas sola facit, vt virtutes cæteræ sint virtutes? Quando & foelicitatem, id est, ad finem vltimum dirigit. Quod & primum omnium est principium, facit vt & cætera sint nobis bona, quatenus ad primum refert bonum. Cuius tamen participatione sunt bona. Ideo seorsum ab illo quæsitæ sunt mala. Sola tandem charitate Deum consequi possumus. Cum enim ille sit immensus, non possumus illum apprehendere, nisi nobis ille se dederit. Non dat ille se ipsum, nisi animo charitatē danti. Ideo per viam intelligendi nimium tempore longo proficimus. Per viam amandi breuissimo plurimum. Paucissimi quoque ingenio ad Deum adniti possunt, charitate omnes accedere, ideo nequis conqueri possit, statuit Deus charitatem quasi felicitatis viam omnibus æquè communem, quæ reducit in patriam. Ibi pro diuersis amandi gradibus gradus digerit gaudiorum, efficitque ipso amoris condimento, vt æterna saturitas fastidio careat. Animus enim per amorem non solum plenitudine delectatur, sed & interim appetit eam. Ideoque perpetuo delectatur. Appetit, inquam, non consequi, sed tenere. Eodem igitur amore desiderat retinere bonum, quo & affectauerat consequi. Sicut & leuia eadem leuitate in sublimi manere contendunt, qua contendunt proficisci. Animus denique non scientia, sed charitate fit Deus. Sicut lignum non quia lumen externum ab igne capiat, sed quia calorem, ignis euadit. Sic & ani-



mus non per externam notitiæ lucem, sed per amorem in Deum, fit Deus & intrinsecus inde lucet ut Deus.

*De stella Magorum, cuius ducta perueniunt ad Christum regem Israelis iam natum.*

Adspira precor Alme Deus, monstra nobis tuam hodie stellam, quam olim ostendisti Magis, ut quæ quondam Magos duxit ad Christum, eadem ad Christi mysteria nos perducatur.

**O** Rietur stella ex Iacob, & consurget virgo ex Israël. Per hæc verba Balaam in libro Numerorum prædicit Messiam nasciturum. Quando stella quædam miris modis oriatur circa Iudæam. Habebat autem Balaam in orientali plaga versus Hierusalem, in qua erant Magi, inter quos peritissimi Astronomiæ sacerdotes erant, qui & regebant populum. Hi ergo coelestium signorum curiosissimi notauerant, quæ prædixerat Balaam prodigio stellæ significandum. Demum nascente Christo, miranda quædam in altis Cometa refulsit. Quod autem fuerit à doctis iudicatus Cometa, testatur Origenes contra Celsum dicens, se legisse in libro Chereemonis Stoici de Cometis, quandoque ex ipsis prospera & salutaria significari, qualis fuerit qui hoc ipso Octauiani tempore fulserit. De qua historiam exponi ab ipso Cheremone asserit, subditque Chaldæos, cum & hunc considerauissent & suos dæmones nuper debilitatos animaduertent, adiisse Iudæam, præstantiorem quandam dæmonibus suis adoraturos. Testatur idem Platonius noster Calcidius, qui varias adducit historias de stellis. Quæ cum raro videantur, ingentes portendunt calamitates. Deinde subdit. Extrat quoque alia sanctior & venerabilior Historia, quæ perhibet ortu stellæ cuiusdam non morbos mortisque denuntiatus, sed descensum Dei venerabilem ad humanæ seruationis rerumque mortalium gratiam, quam à Chaldæis obseruatam fuisse testatur. Qui Deum nuper natum muneribus venerati sunt. Hæc Calcidius. Testis est etiam Suetonius his verbis: Percrebuerat Oriente toto vetus & constans opinio, esse in fatis, ut eo tempore Iudæa profecti, rerum summa potirentur, atque ob hoc Iudæos rebellasse à Romanis atque periisse. Ex his colligitur orientales Astronomos quodammodo per Astrologiæ regulas & per prodigia quodammodo suis regulis consentanea iudicauisse natum eo tempore Regem, qui authoritate mirabili

mundum reformet in melius. Vbi enim iudicant Cometam esse prosperum & salutarem, agnoscunt eum esse ex natura Solis, Iouisque & Veneris. Tradunt enim ubi color apparet plumbeus, esse Cometam Saturnium, & significare pestem atque penuriam. Vbi vero color est igneus, esse Martium & prælia incendiaque portendere, plurimum vero tales existere. Vim enim Martis igneam & motiuam attrahere, sursum vapores à terra quamplurimos ad sublimem aëris regionem igni contiguam, ibique protinus inflammari. Iudicant quoque varios ex Cometis euentus, ex signis atque planetis, quibus cum crinitæ exoriuntur & occidunt à meridie, vergunt ad septentrionem atque vicissim. Forte igitur cum viderent orientales Astronomi mense Decembri exoriri Cometam in principio Sagittarij, iudicauerunt esse salutare portentum, quia radios ostendebat tum aureos ex natura Solis, tum argenteos ex natura Iouis, tum mistos ex natura Veneris. Fortè etiam erat tunc in principio Sagittarij Iupiter. Sol enim si rite metimur, tunc medium obtinebat Sagittarij signum. Facile vero Venus semper vicina Soli occupabat Sagittarij finem, probabile est, talem quoque fuisse postea cœli figuram Christo nascente, Mense Decembri, si natus sit post noctis dimidium. Nam & in Euangelio legitur natum, dum Pastores alternas custodirent noctis vigilias, & ab Angelo dicitur; hodie natus. Ingens vero ex hac cœli positione, tum admiratio, tum controuersia Astrologis incidit, hinc enim ex Ioue, Sole, Venere iudicabant, Regem vero iustissimum, clarissimum, clementissimum. Inde vero ex Sole admodum diuitem esse non posse. Quomodo igitur magnus Rex erit & pauper? Præterea ex Ioue in angulo ascendente existimabant genituram eius valde fecundam, sed ex Luna prima faciem virginis obtinente genituram fore sterilem, & Virginem quandam potius quam grauidam exaltari. Ex his Astrologorum iudiciis, atque etiam ex prædictionibus Balaam cæterorumque Prophetarum percrebuerat opinio frequens Oriente toto, Regem iustitiæ, propter Iouem, veritatis propter Solem, gratiæ propter Venerem tunc exortum, vel designatum. sed ab orientalibus nati locus ignorabatur. Cometa quidem ad duos forte menses duxit, secundum duas ascendentes horas, & si vergeret ad Meridiem versus Iudæam, locum tamen certum non designabat. Hactenus insuper ob eiusmodi controuer-

nam nesciebatur utrum natus vel nasciturus ille, coelitus potius, an diuinitus mitteretur. Quod Cometa rursus post duos annos, referens videlicet menses duos, non in summo, sed in infimo iam aëre se monstrauit, tunc agnoscentes priorem Magi Cometam, motum eius prosequuti sunt, eoque duce Hierusalem quadraginta & vno peruenere diebus, non humanum iam amplius Regem quærentes, sed diuinum. Videbant enim Cometæ modum motumque naturalem esse non posse. quod autem Magi uenerint, ortumque tanti Regis & tempus Herodi narrauerint, non Euangelium tantum, sed etiam Macrobius testis esse potest, qui ait: cum audisset Augustus inter pueros, quos in Syria Herodes Iudæorum rex iussit interfici, filium quoque eius occisum, ait: Præstat Herodis porcum esse quam filium. Nos igitur Cometam non naturalem, sed diuinum ab Angelo Gabriele motum existimamus & insuper illustratum. qui enim præcursores Christi Ioannem nuntiauerat Zachariæ, qui Christum nuntiauit Mariæ, idem ortum Christi locumque portendit & Gentibus, & per Gentes conuicit quoque Iudæos. Et sub forma stellæ stellarum docuit studiosos, per stellæ lumen à Sole susceptum duxit ad Solem. Gestabant Astronomi ad Regem natum aurum, quoniam solarem existimabant, per Thus odoriferum gratiam Veneris designabant, per Mirram putrefactionis nesciam vitam Iouiam portendebant. Sed interim in aliud hæc sunt conuersa mysterium. Nam auro pauperem adiuuerunt, Mirra tenerum corpus confirmare. Thure stabulum condierunt. Aurum obtulere Regi, Sacerdoti Thus, Mirram denique Deo. Probabile vero est Cometam illum fuisse angelum, ut sicut Tobie iter angelus sub humana figura direxit, sic iter Astrologorum angelus sub forma stellæ ad Christum quandoque direxerit. Nam, ut testatur Moses Ægyptius doctorum doctissimus Hebræorum, summa stellarum notitia eo perduxit Abraham, ut solus & primus sæculo suo vnam esse primamque cœlorum causam comprehenderet, eamque suppliciter adoraret, unde effectum sit, uti deinde natus à Deo fuerit gratiæ lumen & prophetiam. Sed redeamus ad Cometam. In hoc ipso apud Lucam Euangelistam, quo Christus noster nascitur, Angelus Domini pastores lumine circumfulsit, nuntiauitque eis gaudium magnum. dicens: Hodie natus seruator mundi. Et merito dixit hodie, quasi

hodie, quamuis forte nox esset media. quoniam diem tunc præferebat ipsum Cometæ lumen, hinc illud Davidis: & nox sicut dies illuminabitur. Post hac Angelus hanc Orientem versus subito traduxit ad Persas, Magos inde ducturus ad Christum. Hinc illud Esaie: Surge, illuminare Hierusalem, quia venit lumen tuum, & gloria Domini super eo orta est, &c. Et ambulabunt Gentes in lumine tuo. Nam quando ortus est Dominus, hoc lumen apparuit circa Hierusalem. Deinde in hoc lumine Magi Gentiles ambulauerunt quia sicut ab Iudæa primum processit in Orientem, ita vicissim ab Oriente rediit in Iudæam, illuc Magos adducens. Quod autem hic Cometa fuerit idem Angelus, qui Pastoribus dixerat gaudium magnum, ex eo conuicimus, quia Magi cum viderunt iterum eiusmodi stellam, gauisi sunt gaudio magno, & dixit valde, quia cum primum ab initio viderant, grauissi fuerant gaudio magno, sicut & pastores. Nunc vero & valde, quia gratissimum tibi bonum solet accidere, quod gustaueris aliàs, & intermissum quandoque recipias. Idem vero Angelus, qui sub radiis visibilibus duxerat Magos ad Christum mox sub occultis radiis mentes dormientium Magorum admonet, ne Hierosolymam aduertantur, & Iosephum monet, ut cum puero fugiat in Ægyptum. Angelus moriente Christo in ipsa Lunæ forma plenam lumine Lunam super naturæ vires momento subiecit Soli, diemque meridie conuertit in noctem, qui & nascente Iesu sub forma Cometæ mediam noctem conuertit in diem. Hinc illud Davidis, sicut tenebræ eius, ita & lumen eius, quoniam utrumque eiusdem Angeli ministerio est impletum. Et utrumque in spatio similiter medio, siue noctis, siue diei. Quo autem modo Angelus Cometam accumulauit? Stans protinus in aere medio, mille aëris stadia circumfusa sibi in spatium aliquanto angustius congregauit, idque totum velut anima corpus sibi mira potestate deuinxit, & à reliquo elemento secreuit. Proinde ac virtute coaguli, lac plurimum cogitur in angustius, & ab aqua secernitur. Et cur Angelus aërem condensauit? Ut lumen quod huic aëri exhibiturus erat, hominum oculis appareret. Quæ enim rarissima sunt, subterfugiunt acies oculorum. At unde lumen corpori huic adhibuit Angelus? Ab ipso videlicet suæ intelligentiæ lumine. Quod enim in ea est intellectuale & inuisibile lumen, si quomodo traducatur in aërem fit visibile, in aerem quidem subtiliorem conspicuum sit beatis. In aërem

denique densiorem ab aliis quoque videtur. Diximus in superioribus Magos Hierosolymam die post natiuitatem vigesimo primo venisse. Quando eo purificationis tempore iam absoluto obtulit Maria Filium templo. quo igitur die Simeon & Anna Christum iam agnoscunt, eodem & Magi adhuc ignotum in Hierosolyma predicant. Postridiè vero Bethlehem accedunt. Proinde cum Ioseph in accessu Magorum iubeatur cum puero fugam arripere, ideoque non sit probabile eum post diuina mandata in templum puerum aduexisse, verisimile videtur Magos post purificationem puerum salutasse. Præterea quod de Sagittario ex aliquorum computatione diximus, probabilius diceretur mea sententia de Virgine atque de media nocte. Neesse quidem fuit oriente Christo signum ex duodecim aliquod pariter exoriri. Ego autem nescio quod signum accommodem ex virgine nato, potius virginem. Et huius quidem significiem præcipuè primam. Tres enim signum quodlibet facies habet. In primaque vero virginis facie, ut testatur Albumasar, Indipariter & Ægyptij imaginem quandam contemplati sunt, quæ referat puellam virginem & pulcherrimam sedentem puerumque lactantem. Maximè vero faciei huius exortus exorienti puero, ex virgine congruit, & rectè computanti in mense Decembri nocte media facies eiusmodi nascitur. Fuit autem facies hæc in qua & Cometa creditur effulsisse, non causa Christi, sed signum. Si enim vim aliquam ad efficiendum partum virginis habuisset, nimirum in tot seculis sæpius effecisset. Omnino vero cœlestia corpora legem creare non possunt, quæ posthabito cœlo adoret & speret aliquid super cœlum. Summatim vero cœlestis fatum non potest faue re legi, quæ neget fatum. Lumen quod ab ipso bono per omnes Spiritus dilatur est beneficium. Ideoque motum & quietem circa bonum præstat, id est, efficit ut ames bonum & delesteris in bono.

Qualecunque sit bonum quatenus boni ipsius habet imaginem. qui inter homines non habet charitatem, qualis est præcipuè qui laborat inuidia, iam incipit in tenebras exteriores ruere paulatim, id est, extra luminis benefici munera. Odit namque bonum, doletque bono.

*De Cantico Simeonis ac vera fidelium paci.*

Adipira nobis precor Alme Deus, via, veritas, vita, Trinitas, vnus Deus. In medio Ecclesie laudabore. In conspectu angelorum psallam tibi.

**C**onsole nos Domine semper in infirmitate nostra. Quemadmodum consolatus es aliquando Simeonem in senectute sua. Simeon sacerdos sapiens cum ex scripturarum obseruatione cognouisset eo sæculo Christum esse venturum, obsecrauit Deum, ut tamdiu viueret, ut videre posset Christum natum. Accepit igitur à Spiritu sancto, eum se in sua vita visurum. Cum vero & differretur aduentus & ille viribus in senectute deficeret aiebat in orationibus suis. Defecerunt oculi mei in eloquium tuum dicentes: quando consolaberis me? Memor esto verbi tui Domine seruo tuo, in quo mihi spem dedisti. Respondet interim illi Dominus, Multitudine dierum replebo te, & ostendam tibi salutare meum. Hac ergo fiducia Simeon pius Spiritus sancti charitate plenus expectat diu aduentum Christi eumque tota mente considerat, non solum ad consolationem suam, sed ad consolationem populo Israeli communem. Et quoniam cum charitate sperat, ideo consequitur hodie quod expectat, & eodem quo sperabat amore, Iesum ipsis amoris vlnis amplectitur. O fortunatum senem, qui tam facile amplecteris eum, qui mundum pugno complectitur. O Senem reuera beatum, qui regis & sustines eum, qui & te regit & sustinet omnia. Simeon ergo ex diuturno desiderio mirabiliter translatus in gaudium exclamat, ó Domine; ubi Iesum faretur esse Deum. Nunc primum tu dimittis me, & vnā quæque seruum tuum in pace. Non dimittis quia vsquam à nobis fugias, qui semper es vbique, sed dimittis ex hac vita descendere. Nolebas enim sicut promissisti me prius hinc abire quam æternum Filium tuum hætenus mente mihi visum, quandoque oculis viderem in tempore genitum. Recedo equidem nunc in pace facta, scilicet per Filium tuum inter homines atque Deum, sublati culpis hominum. quibus pax inter homines & te esse non poterat. Paratam intelligo pacem cum primum vidi salutare tuum, hic natum in communem toti mundo salutem. Id salutare verbum tuum prius quidem erat in mundo, sed nobis occultum. Nunc vero assumpto corpore patebit coram facie omnium communiter populorum. Proinde vero erit lumen Gentibus, & gloria plebis tuæ Israel.

Iudæi

tuz Israël. Iudæi quidem etiam ante hac lumen aliquod possidebant in Prophetis & Lege atque Figuris. Gentiles verò eiusmodi carebant lumine. Sed lumen accipiunt ab Apostolis. Quod quidem lumen est ad gloriam Israël, non dico totius populi, sed maximè tui, id est, Patriarcharum, Prophetarum, Apostolorum, & præcipue Christi patrisque Dei. Hanc lucem, hanc gloriam, hanc pacem, nascente Christo, multitudo pronuntiat Angelorum. Nam & splendor in altis apparet, & Angeli clamant, gloria in excelsis Deo, & in terra pax hominibus bonæ voluntatis. Tota gloria, totus effectus nostræ salutis est à Deo per Christum eo tempore natum. Vnde & pax facta est hominibus, inter illos & Deum Christum conciliante, hominibus, inquam, bonæ voluntatis, id est, qui voluntatem suam ita cum diuina copulant voluntate, quemadmodum Angeli voluntatem suam cum diuina coniungunt, atque ita facta erit voluntas tua sicut in cælo, sic in terra. Ideo sic exclamat, pacem meam do vobis, pacem meam relinquo vobis, non eam quam mundus dat, sed quam dat pater meus qui est in cælis. Dicite rogo fratres mei, quam pacem, quam concordiam inuenire possitis in mundo, qui totus est ex discordibus constitutus. In corpore nostro aduersus humores continuè humores pugnat. Rationi repugnat sensus, & in ratione opinionibus. opiniones contradicunt. Nunquid inueniemus extra nos pacem in rebus infra Lunam insuper inter se continuè discordantibus. Repugnant frigida calidis, sicca humidis, graua leuibus, rara densis, mollia duris, albis nigra, amara denique dulcibus. Quæramus saltem in cælo pacem atque concordiam, quam infra cælum reperire non possumus. Verum nec in cælesti quidem corpore, pro dolor, concordiam & pacem possumus inuenire. Nam & illuc Astronomi repugnantiam multiplicem inuenerunt. Contraria enim illic esse tradunt signa signis, & Planetas repugnare Planetis, & oppositos inter se cælorum peragi motus. Merito igitur pacis author ait, pacem nobis dari, non à cælis quidem, sed à patre omnium qui imperat cælis, à patre, inquam, per filium, exhortante spiritu, qui appellatur spiritus pacis & charitatis, etiam Apostolus ait: Spes non confundit, quia charitas Dei accensa est in cordibus nostris, per spiritum sanctum qui datus est nobis. Quamobrem, dilectissimi fratres, Spiritus sancti charitate

feruentes, ingrediamur hodie templum, v-nigenitum ibi Dei filium statim inueniemus, videbimus eum cum admiratione & gaudebunt oculi nostri. Tangemus eum cum timore vna cum Simeone, & gaudebit inde cor nostrum. Amplectemur eum cum reuerentia, sicut & sanctus ille senex, & gaudium nostrum erit plenum, cantabimus: Viderunt oculi nostri salutare tuum, & inueniemus plenam in eo pacem, & gaudium nostrum nemo tollet à nobis. Deus enim qui possidet & conseruat omnibus omnia, erit nobiscum in sæcula sæculorum.

*De creatione rerum.*


**F**igulus principio præparat sibi lutum, quasi materiam, in qua formas vasculorum fingat, quas habet in mente. In vna, inquam, mente multas habet, & similiter in luto vno multas effingit, dum informe lutum prius à se formabile factum extendit, atque extendendo figurat. Similiter Deus ab initio vnā creauit materiam prorsus informem, de qua Moyses ait: tenebræ erant super faciem Abyssi. Materia hæc in primo suæ creationis momento, nec formam habebat, vt dixi, nec etiam magnitudinem. Ordine namque naturæ materia prius est id quod est in seipsa, quam sit formosa vel magna. Neque formosa fieri potuit, nisi prius habuerit aliquam magnitudinem. In primo igitur creationis momento materiam fecit, vt simpliciter esset, necdum corpus erat. In secundo protendit eam in dimensionem trinam, id est, longitudinem, latitudinem, profunditatem. Materia igitur sic extensa statim est facta corpus, necdum ipsa quicquam facere poterat. In tertio corpus hoc, id est, materiam, sic extensam Deus multis formauit formis, scilicet elementorum atque cælorum, & in cælo confirmavit eam stellarum formis. Sub cælo præter elementorum formas, formauit eam formis vaporum, Lapidum, Metallorum, & Plantarum & animalium. Materia quidem vnica est vbique his omnibus induta formis. Omnes autem motiones actionesque rerum per ipsas rerum formas efficiuntur. Graua enim per grauitatem descendunt, non per materiam. Nam & in leuibus eadem est materia. Leuia similiter ascendunt per leuitatem. Calida non per molem calefaciunt, sed per calorem. Frigidaque per frigida. Grauitas autem leuitasque & calor & frigus formæ sunt.



# MARSILII FICINI FLORENTINI IN LIBRUM DE VITA.

*Ad magnanimum Laurentium Medicem, Patris servatorem,*

## EPISTOLA DEDICATORIA.



*B*acchum Poëta, summum  
Antistitem, sacerdotem, bis  
natum canunt. Fortè signifi-  
cantes, vel futurum sacerdo-  
tem statim initiatum, oportere  
renasci, vel perfecti tan-


dem sacerdotis mentem Deo penitus ebriam,  
iam videri renatam. Aut forsan humilioris sen-  
su, vinum Bacchi germen generari semel in vi-  
te quasi Semele, maturis sub Phæbo racemis, re-  
generari rursus post ipsum vindemiæ fulmen  
in suo vase vinum, velut in Iovis femore me-  
rum. Sed de sacris in præsentia mysteriis non est  
loquendum; ubi mox Physica potius ope lan-  
guentibus opitulaturi sumus. Nec agendum sty-  
lo gravitatis seruo, sed libero potius & iocoso,  
postquam à Libero patre nescio quomodo statim  
exorsi sumus. Et rectè inquam, nescio quomodo,  
nam fortè pudentior aliquis à Phæbo Medico-  
rum primo; potius quam à Bacche Medicinam  
auspicatus esset. Quid verò? Si quod non vanum  
omen sit, in ore nunc sorte quadam proferente  
Bacchum. Hic enim almo quodam vino securi-  
tateque latissima salubrius fortè medetur, quàm  
herbis ille suis carminibusque Phæbus. Quo-  
cunque verò sensu vel illa, vel hac acceperis, dux  
ille sacerdotum Bacchus, geminas quasi matres  
habuisse fertur. Melchisedech autem summus  
ille sacerdos, unam vix matrem, unum vix pa-  
trem habuit. Ego sacerdos minimus, patres ha-  
bui duos; Ficinum Medicum, Cosmum Medi-  
cem. Ex illo natus sum, ex isto renatus. Ille qui-  
dem me Galeno, tum Medico, tum Platónico  
commendavit, hic autem diuino consecravit me  
Platoni. Et hic similiter atque ille Marsilium  
Medico destinavit. Galenus quidem corporum,  
Plato vero Medicus animorum. Iamdiu igitur  
sub Platone salutarem animorum exercui medi-  
cinam, quando post librorum omnium eius in-

terpretationem, mox decem atque octo de ani-  
morum immortalitate libros, & æterna felici-  
tate composui, ita pro viribus patri meo Medici  
satisfaciens. Medico verò patri satis deinceps fa-  
ciendum putans, librum de Literatorum vale-  
tudine curanda composui. Desiderabant præter-  
ea posthac homines literati, non tantum bene  
quandoque valere, sed etiam bene valentes, diu  
vivere. His ergo deinde librum de Vita longa  
dedi. Diffidebant autem Medicinis atque reme-  
diis in re tanta terrenis. Adiunxi librum de Vi-  
ta, tum valida, tum longa cælitus comparanda,  
ut ex ipso mundi corpore vino, vita quadam  
vegetior in corpus nostrum quasi quoddam  
mundi membrum, velut ex vite propagaretur.  
His verò tu Medicina libris ignosce præ-  
cor indulgentissime Laurenti, si dum Medicus  
esse volo, nescio quomodo etiam nolens sum, & si  
non bonus sapienter Poëta. Nam & Phæbus idem  
est Medicina rector, poësisque magister, vi-  
tamque ille suam nobis tam per herbas, quàm  
per cytharam cantumque largitur. Ipsa quin-  
etiam Venus apud Astrologos Musicum aequè  
parit & Medicum. Sed hæcenus dum literato-  
rum civiumque similium vite curiosus con-  
sulo librorum meorum salutem negligo, quam-  
diu inter se patior esse seiunctos. Quamobrem in  
eos nunc primum pius, in corpus unum copulo.  
Cuius artubus in unam formam iam compactis,  
vita protinus adsit. Non potest autem hoc opus  
Physicum, id quasi corpus meum, vitam accipere  
nisi meam. Eiusmodi verò vita, ex mea dumtaxat  
pendet anima. Hæc autem iamdiu penes te (ma-  
gnanime Laurenti) mi patrone, vivit, in ea præ-  
sertim amplissimarum adium tuarum parte,  
ubi unà cum Platone, nostrum illud de Animo-  
rum Immortalitate servatur opus, tuo iampridem  
nomine dedicatum. At animus iste meus,  
& si in beata quadam quasi patria penes te



vitam agit, verumtamen quod & Theologi  
volunt, inquisitus est interea, donec opus id  
Physicum tanquam suum corpus accipiat. Ac-  
cipe igitur, optime Laurenti, post illos de Ani-  
ma, hos etiam de Corpore libros, eodemque a fla-

tu, quo & illis dudum, feliciter his aspira. Ita  
Ita enim & corpus hoc sub tuo spiritu, per suam  
viuet animam, & anima vicissim nostra  
cum iam suo corpore in tuis laribus  
conquiescet.



# MARSILII FICINI

## FLORENTINI,

### MEDICI ATQ; PHILOSOPHI

#### CELEBERRIMI,

*De Studiosorum sanitate tuenda, siue eorum qui literis operam  
nauant, bona valetudine conseruanda.*

LIBER PRIMVS.

*De nouem Studiosorum ducibus.*

(:.)

CAPVT PRIMVM.

(:.)



Vicunque iter illud aspe-  
rum, arduumque & long-  
gum ingrediuntur, quod  
quidem vix tandem ad ex-  
celsum nouem Musarum  
templum assiduo labore

perducit, nouem omnino itineris huius du-  
cibus indigere videntur. Quorum primi  
quidem tres in cœlo, tres sequentes in ani-  
mo, postremi tres in terra, nos ducunt.  
Principio, in cœlo Mercurius vt inuesti-  
gando Musarum iter aggrediamur, vel  
impellit, vel adhortatur, siquidem Mercu-  
rio tributum est inuestigationis omnis offi-  
cium. Deinde Phœbus ipse, & quærentes  
animos, & res quæsitæ splendore vberri-  
mo sic illustrat, vt perspicue quod quære-  
batur, à nobis inueniatur. Accedit gratio-  
sissima Venus, Gratiarum mater atque al-  
mis omnino lætisque radiis suis, rem om-  
nem adeò condit & ornat, vt quicquid &  
instigante Mercurio quæsitum fuit, &  
monitante Phœbo iam erat inuentum,  
mirifica quadam & saluari venustate Ve-  
neris circumfusum, delectet semper &  
prosit. Sequuntur tres itineris huius duces  
in animo, videlicet voluntas ardens &

stabilis, acumen ingenii, memoria te-  
nax. Tres in terra postremi sunt, pruden-  
tissimus paterfamilias, probatissimus præ-  
ceptor, Medicus peritissimus. Abique  
his nouem ducibus nemo ad ipsum nouem  
Musarum templum peruenire vel potuit,  
vel poterit vnquam. Cæteros quidem du-  
ces ab initio nobis præcipue Deus om-  
nipotens naturaque tribuerunt, tres verò  
postremos nostra adhibet diligentia. Sed  
præcepta officiaque quæ ad patremfami-  
lias, & quæ ad præceptorem circa litera-  
rum studia pertinent, antiqui plures sa-  
pientesque tractauerunt, præcipue Plato  
noster, & sæpè aliàs, & in libris de Repu-  
blica ac de Legibus diligentissimè. Dein-  
de Aristoteles in Politicis, Plutarchus  
quoque & Quintilianus egregie. Solis au-  
tem literarum studiosis hæcenus deest  
Medicus aliquis, qui manum euntibus  
porrigat, salutaribusque consiliis atque  
medicinis adiuet eos, quos neque cœ-  
lum, neque animus, neque paterfami-  
lias præceptorve destituit. Ego igitur sor-  
tem eorum laboriosissimam misertus, qui  
difficile Minervæ minuētis nervos, iter  
agunt, primus, tãquam Medicus debilibus

& valerudinariis adsum, sed vti nam facultate tam integra, quàm propitia voluntate. Surgite iam adolefcentes, Deo duce alacres. Surgite iuvenes, atque viri, quos ardentius Mineruæ studium nimium enervat. Accedite libenter ad Medicum, qui vobis ad instituti vestri perfectionem, monstrante Deo atque fauente, consilia remediaque salutaria largitur.

*Quàm diligens habenda cura sit cerebri, cordis, stomachi, & spiritus.*

### C A P V T I I.

**P**Rincipio, quantam cursores crurium, athletæ brachiorum, Musici vocis curam habere solent, tantam saltem literarum studiosos cerebri, & cordis, iecinorisque & stomachi oportet habere rationem, imò verò tanto maiorem, quanto & membra hæc præstantiora quàm illa sunt, & ij frequentius, atque ad potiora his membris, quàm illi illis vtuntur. Præterea, solers quilibet artifex instrumenta sua diligentissimè curat, pernicillos pictor, maleos incudesque faber ærarius, miles, equos & arma; venator, canes & aues; citharam citharædus, & sua quisque similiter. Soli verò Musarum sacerdotes, soli summi boni veritatisque venatores, tam negligentès (proh nefas) tamque infortunati sunt vt instrumentum illud, quo mundum vniuersum metiri quodammodo & capere possunt, negligere penitus videntur. Instrumentum eiusmodi spiritus ipse est, qui apud Medicos vapor quidam sanguinis, purus, subtilis, calidus & lucidus definitur. Atque ab ipso cordis calore, ex subtiliori sanguine procreatus volat ad cerebrum, ibique animus ipso ad sensus tam interiores quàm exteriores exercendos assidue vtitur. Quamobrem sanguis spiritui seruit, spiritus sensibus, sensus denique rationi. Sanguis autem à virtute naturali, quæ in iecinore stomachoque viget, efficitur. Tenuissima sanguinis pars fluit in cordis fontem, vbi vitalis viget virtus. Inde creati spiritus cerebri, & (vt ita dixerim) Palladis arces ascendunt. In quibus animalis, id est, sentiendi mouendique vis dominatur. Itaque talis plurimum fermè contemplatio est, quale sensus ipsius obsecrum. Talis autem sensus, qualis & spiritus, spiritus verò talis, qualis & sanguis, & tres illæ vires quas diximus, naturalis scilicet, vitalis, & animalis, tales, vt sunt, à quibus, per quas, in quibus spiritus ipsi concipiuntur, nascuntur, atque fouentur.

*Literatos pituita & atra bili obnoxios esse.*

### C A P V T I I I.

**N**ON solum verò membra illa, virescunt & spiritus, homines literarum cupidi curare diligentissimè debent, verumetiam pituitam semper & atram bilem, non aliter quàm nauigantes Scyllam atque Charibdim, cautissimè euitare iubentur. Quantum enim reliquo corpore ociosi sunt, tantum cerebro ac mente negotiosi. Inde pituitam, quod Græci phlegma, hinc atram bilem, quàm iidem melancholiam vocant, gignere compelluntur. Illa quidem ingenium sæpè obtundit & suffocat, hæc vero si nimium abundauerit flagraueritque, assidua cura crebrisque deliramentis vexat, animum iudiciumque perturbat, vt non immeritò dici possit, literatos fore præcipuè sanos, nisi pituita molesta esset, & lætissimos sapientissimosque omnium, nisi bilis atræ vitio vel moerore sæpè, vel interdum desipere cogerentur.

*Quot sint causa, quibus literati melancholici sint, vel fiant.*

### C A P V T I I I I.

**V**T autem literati sint melancholici, tres potissimum causarum species faciunt. Prima cœlestis, secunda naturalis, tertia est humana. Cœlestis, quoniam Mercurius, qui vt doctrinas inuestigamus inuitat, & Saturnus, qui efficit vt in doctrinis inuestigandis perseueremus, inuentaque seruemus, frigidi quodammodo sicci que ab Astronomis esse dicuntur, vel si fortè Mercurius non sit frigidus, sit tamen sæpè Solis propinquitate siccissimus, qualis est natura apud Medicos melancholica, eandemque naturam Mercurius ipse & Saturnus literarum studiosis, eorumque sectatoribus impertiunt ab initio, ac seruant augentque quotidie. Naturalis autem causa esse videtur, quod ad scientias præsertim difficiles consequendas, necesse est animum ab externis ad interna tanquam à circumferentia quadam ad centrum sese recipere, atque dum speculatur in ipso (vt ita dixerim) hominis centro stabilissimè permanere. Ad centrum verò à circumferentia se colligere, figique in centro, maximè terræ ipsius est proprium, cui quidem atra bilis persimilis est. Igitur atra bilis animum, vt se & colligat in vnum & sistat in vno contempleturque,

affidue provocat. Atque ipsa mundi centro similis, ad centrum rerum singularum cogit inuestigandum, euehitque ad altissima quæque comprehendenda, quandoquidem cum Saturno maximè congruit altissimo Planetarum. Contemplatio quoque ipsa vicissim assidua quadam collectione & quasi compressione, naturâ atrabili per similem contrahit. Humana verò eâ ex nobis causa est. Quoniam frequens sagittatio mentis cerebrum vehementer exsiccat, igitur humore magna ex parte consumpto (quod caloris naturalis pabulum est) calor quoque plurimum solet extinguî, vnde natura cerebri sicca frigidaque euadit, quæquidem terrestris & melancholica qualitas nominatur. Præterea, ob frequentissimum inquisitionis motum, spiritus quoque moti continuè resoluuntur. Resolutos autem spiritus, ex subtiliore sanguine instaurari necessarium est. Quapropter subtilibus clarioribusque sanguinis partibus sæpè consumptis, reliquus sanguis necessariò densus redditur & siccus & ater. Accedit ad hæc, quod naturâ in contemplatione cerebro prorsus cordique intenta, stomachum heparque destituit. Quare alimentis præsertim, vel vberioribus, vel durioribus malè concoctis, sanguis inde frigidus, crassusque & niger efficitur. Demum nimio membrorum ocio, neque superflua excernuntur, neque glutinosi, tenaces, fuscique vapores exhalant. Hæc omnia melancholicum spiritum, moestumque & pauidum animum efficere solent. Siquidem interiores tenebræ multo magis quàm exteriores, moerore occupant animum atque terrêt. Maximè verò literatorum omnium hi atra bile premuntur, qui sedulo Philosophiæ studio dediti, mentem à corpore, rebusque corporeis seuocant, incorporeisque coniungunt, tum quia difficilius admodum opus maiori quoque indiget mentis intèntione, tum quia quatenus mentem incorporeæ veritati coniungunt, eateenus à corpore disiungere compelluntur. Hinc corpus eorum nonnunquam, quasi semianimum redditur atque melancholicum. Quod quidem Plato noster in Timæo significat, dicens: animum diuina sapiensimè & intentissimè contemplantem, alimentis eiusmodi adèò adollescere, potentemque euadere, vt corpus suum supra quàm natura corporis pariat exuperet, ipsumque vehementioribus agitationibus suis aliquando vel effugiat quodammodo, vel nonnunquam quasi dissoluere videatur.

*Cur melancholici ingeniosi sint, & qui horum sint eiusmodi, an secus.*

## CAPVT V.

**H**Actenus quam ob causam Musarum sacerdotes melancholici, vel sint ab initio, vel studio fiant, rationibus primè coelestibus, secundò naturalibus, tertio humanis ostendisse sit satis. Quod quidem confirmat in libro Problematum Aristoteles. Omnes enim, inquit, viros in quauis facultate præstantes, melancholicos extitisse. Qua in re Platonium illud quod in libro de Scientia scribitur, confirmauit, ingeniosos videlicet, plurimum concitados furiososque esse solere. Democritus quoque nullos, inquit, viros ingenio magnos, præter illos qui furore quodâ perciti sunt, esse vnquam posse. Quod quidem Plato noster in Phædro probare videtur, dicens Poëticas fores frustra absque furore pulsari. Etsi diuinum furorem hic fortè intelligi vult, tamen neque furor eiusmodi apud Physicos, aliis vnquam vllis, præterquam melancholicis incitatur. Deinceps verò assignandæ à nobis rationes sunt, quare Democritus, & Plato, & Aristoteles asserant, melancholicos nonnullos interdum adèò ingenio cunctos excellere, vt non humani, sed diuini potius videantur. Asserant id Democritus, Plato & Aristoteles absque dubio, rationem verò tantæ rei haud satis explicare videntur. Audendum tamen (monstrante Deo) causas indagare: Melancholia, id est, atra bilis est duplex: Altera quidem naturalis à Medicis appellatur, altera verò adustione contingit. Naturalis illa nihil est aliud, quàm densior quædam sicciorque pars sanguinis. Adusta verò in species quatuor distribuitur. Aut enim naturalis melancholiæ, aut sanguinis purioris, aut bilis, aut salsæ pituitæ combustionem concipitur. Quæcunque adustione nascitur, iudicio & sapientiæ nocet, nempe dum humor ille accenditur atque ardet, concitados furentesque facere solet, quam Græci Maniam nuncupant, nos verò furorem. At, quando iam extinguitur, subtilioribus clarioribusque partibus resolutis, solaque restante fuligine tetra, stolidos reddit & stupidos. Quem habitum melancholiam propriè & amentiam, vecordiamque appellant. Sola igitur atra bilis illa, quam diximus naturalem, ad iudicium nobis sapientiamque conducit. Neque tamen semper. Sanè si sola sit, atra nimium densaque mole obfuscat spiritus, tæret animum,

abundit ingenium. Si verò pituitæ simplici misceatur, cum frigidus obstiterit circum præcordia sanguis, crassa quadam frigiditate segnitiam adducit, atque torporem, atque ut densissimæ cuiusque materiæ natura est, quando eiusmodi melancholia frigescit, ad summum frigiditatis intenditur. Quo in statu nihil speratur, timentur omnia, tædet cœli conuexa tueri. Si bilis atra, vel simplex, vel mixta putrescit, quartanam gignit febrem, lienis tumores, & multa generis eiusdem. Vbi nimis exuberat, siue sola sit, siue coniuncta pituitæ, spiritus crassiores facit atque frigidiores, continuò animum afficit tædio, aciem hebetat, nec salit arcadico circum præcordia sanguis. Oportet autem atram bilem neque tam paucam esse, ut sanguis, bilis, & spiritus, quasi fræno careant, unde instabile ingenium labilemque memoriam esse contingat. Neque tam multam, ut nimio pondere prægrauati dormire atque egere calcaribus videamur. Proinde necessarium est, omnino eam esse quoad eius natura patitur, subtilissimam. Si enim tenuata pro natura sua maximè fuerit, poterit forsitan absque noxa etiam esse multa, atque etiam tanta ut æquare bilem saltem pondere videatur. Abundet igitur atra bilis, sed tenuissima, non careat humore subtilioris pituitæ circumfuso, ne arescat prorsus durissimaque euadat. Non tamen misceatur omnino pituitæ, præsertim vel frigidiori, vel multæ, ne frigescat. Sed bili sanguinique ad eò misceatur, ut corpus vnum conficiatur ex tribus, dupla sanguinis ad reliqua duo proportionem compositum. Vbi octo sanguinis partes, duæ bilis, duæ iterum atræ bilis portiones existant. Accendatur aliquantulum à duobus illis atra bilis, accensaque fulgeat, non vratur, ne, quemadmodum solet materia durior, dum feruet nimium, vehementius vratur & concitet, dum verò refrigerat, similiter frigescat ad summum. Bilis enim atra ferri instar, quando multum ad frigus intenditur, friget ad summum, quando contra ad calidum valdè declinat, calet ad summum. Neque mirum videri debet atram bilem accendi posse facile, atque accensam vehementius vrere. Siquidem videmus calcem illi similem, aqua perusam feruere statim atque exurere. Tantam ad utrumque extremum melancholia vim habet, vnitatem quadam stabilis fixæque naturæ. Quæ quidem extremitas cæteris humoribus non contingit. Summè quidem calens summam præstat audaciam, imò ferocitatem, extreme verò

frigens, timorem ignauiamque extremam. Mediis verò inter frigus caloremque gradibus infecta varie, affectus producit varios, non aliter quam merum, præcipuè potens, bibentibus ad ebrietatem, vel eam paulò liberius, affectus inferre varios solet. Igitur opportunè temperata sit atra bilis oportet. Quæ cum ita moderata est, ut diximus, & bili sanguinique permixta, quia & natura sicca est, & conditione quantum ipsius natura patitur tenuissima, facile ab illis accenditur, quia solida est atque tenacissima, accensa semel diutissime flagrat, quia tenacissimæ siccitatis vnitatem potentissima est, vehementius incalescit. Quemadmodum lignum in paleis si utraque accendantur, magis diutiusque calent & lucent. Atqui à diurno vehementique calore, fulgor ingens, motusque vehemens & diurnus proficiunt. Huc tendit illud Heracliti, lux sicca, anima sapientissima.

*Quo pacto atra bilis ingeniosos efficiat.*

## C A P V T VI.

Quæret fortè quispiam, quale sit corpus illud humoris eiusmodi ex tribus illis humoribus ea quæ diximus proportionem conflatum? Tale est ferme colore, quale aurum esse videmus, sed aliquantulum vergit ad purpuram. Et quando tam naturali calore quam vel corporis vel animi motu accenditur? ferme non aliter quam ignitum rubensque aurum, purpureo mixtum calet & lucet, atque velut iris trahit varios flagrante corde colores. Quæret aliquis iterum, quonam pacto humor eiusmodi conducat ingenio. Nempe spiritus ex hoc humore creati, primo quidem subtiles sunt, non aliter quam aqua illa quam & Vitis, seu Vitis aquam nominant & ardentem, quoties ex crassiori mero, quadam ad ignem destillatione, ut fieri solet, exprimitur. Spiritus enim sub angustioribus atræ bilis eiusmodi compressi meatibus, vehementiore ob vnitatem calore, maximè tenuantur, perque arctiores meatus expressi, subtiliores erumpunt, deinde calidiores similiter atque eadem ratione lucidiores, tertio, motu agiles actione vehementissimæ, quarto, solido stabilique humore ingiter emanantes, actioni diutissime seruiunt. Tali autè animus noster obsequio fretus indagat vehementer, perseverat inuestigando diutius. Facile quæcūq; inuestigauerit, inuenit, clare perspicit, syncere diiudicat, ac diu retinet indicata. Adde quod quem-

admodum in superioribus significauimus, animus instrumento siue incitamento eiusmodi, quod centro mundi quodammodo congruit, atque (vt ita dixerim) in suum centrum animum colligit, semper rerum omnium & centra petit, & penetralia penetrat. Congruit insuper cum Mercurio atque Saturno, quorum alter omnium Planetarum altissimus, inuestigantem euehit ad altissima. Hinc Philosophi singulares euadunt, præsertim quum animus sic ab externis motibus atque corpore proprio seuocatus, & quàm proximus diuinis, diuinorum instrumentum efficiatur. Vnde diuinis influxibus oraculisque ex alto repletus, noua quædam inuitataque semper excogitat, & futura prædicat. Quod non solum Democritus atque Plato affirmant, sed etiam Aristoteles in Problematum libro, & Auicenna in libro Diuinorum, & in libro de anima confitentur. Quorsum hæc de atræ bilis humore tam multa? Vt meminerimus, quantum atræ bilis, imò candida bilis eiusmodi quærenda & nutrienda est tanquam optima, tantum illam quæ contrā se habet, vt diximus, tanquam pessimam esse vitandam. Ad eò enim dira res est, vt à malo dæmone eius impetus instigari Serapio dixerit, & Auicenna sapiens non negauerit.

*Quinque præcipue studiosorum hostes, Pituita, Atræ bilis, Coitus, Satietas, Matutinus somnus.*

## C A P V T VII.

**V**T autem redeamus illuc vnde iam longius digressi sumus, longissima via est quæ ad veritatem sapientiamque perducit, grauibus terræque marisque plena laboribus. Quicunque igitur hoc iter aggrediuntur, vt Poëta quispiam diceret, sæpè terra marique periclitantur. Siue enim mare nauigent, continuè inter fluctus, id est, humores duos, pituitam scilicet & noxiam illam melancholiam, quasi inter Scyllam Charibdimque iactantur. Siue terra (vt ita dixerim) iter agant, tria monstra protinus sese illis obiciunt. Primum terrena Venus, secundum Bacchus & Ceres, tertium nocturna Heccate frequenter opponit. Ergo & Apollo ab æthere, & Neptunus ab æquore, & à terra Hercules sæpè vocandi, vt monstra eiusmodi Palladi inimica, iaculis Apollo transfigat, Neptunus tridente domet, claua Hercules conuincat & laceret. Primum quidem monstrum est Veneris coitus, præ-

sertim si vel paulum vires excefferit, fit bitò namque exhaurit spiritus, præsertim subtiliores, cerebrumque debilitat, labefactat stomachum atque præcordia, quo malo nihil ingenio aduersus esse potest. Curnam Hippocrates coitum comitiali morbo similem iudicauit? nisi quia mentem, quæ sacra est, percellit, tantumque obest, vt Auicenna in libro de Animalibus dixerit: Si quid spermatis supra quàm natura tolleret, coitu profluat, obesse magis, quàm si quadrages tantundem sanguinis emanarit, vt non iniuria prisci, Musas atque Minervam virgines esse voluerint, Huc Platonium illud spectat, quum Venus Musis minitaretur, nisi sacra Veneræ colerèt, se contra illas suum filiū armaturā. Responderunt Musæ, Marti, o Venus, Marti talia minitare. Tuus enim inter nos Cupido non volat. Denique natura nullum sensum longius quàm tactum ab intelligentia segregauit. Secundum monstrum, est vini cibique satietas. Quippè si vinum vel nimium vel nimis calidum vehemensque fuerit, caput ipsum humoribus pessimisque fumis implebit. Mitto quod insanos facit ebrietas. Cibus verò nimius, primum quidem ad stomachum, in ipso coquendo omnem naturæ vim reuocat. Quo fit, vt capiti simul speculationique intendere nequeat. Deinde ineptè coctus, multis & crassis vaporibus humoribusque, acciem mentis obtundit. Quinetiam si satis coquatur, tamen vt Galenus ait, animus adipe & sanguine suffocatus, cœlestè aliquid peruidere non potest. Tertium denique monstrum est, ad multam noctem, præsertim post coenam frequentius vigilare, vnde etiam post ortum Solis dormire cogaris. Quoniam verò in hoc errant fallunturque studiosi permulti, idcirco quantum ingenio noceat, latius explicabo, atque rationes septem præcipuas afferam. Primam ab ipso cœlo. Secundā ab elementis. Tertiā ab humoribus. Quartam ob ordine rerum. Quintam à natura stomachi. Sextam à spiritibus. Septimam à phantasia deductas. Principio, tres Planetæ, quemadmodum in superioribus dicebamus, contemplationi & eloquentiæ maxime fauent, Sol, Venus atque Mercurius. Hi verò paribus ferme passibus concurrentes, aduentante nocte nos fugiunt, die verò vel propinquante, vel iam surgente resurgunt, nosque reuiscunt. Post verò Solis ortum in plagam cœli duodecimam, quæ carceri tenebrisque ab Astronomis assignatur, repente traduntur. Ergo non qui vel nocte quando nos fugiunt, vel die post Solis or-



tum, quando carceris tenebrarumque domum intrant, sed qui vel propemodum petentibus ortum, vel iam surgentibus ad contemplandum scribendumque, ipsi quoque consurgunt, ij soli acutissime speculantur, & eloquentissime inuenta sua scribunt atque componunt. Ratio secunda, scilicet ab elementis est talis. Oriente Sole mouetur aer, tenuaturque & claret, occidente verò contrà. Sanguis autem & spiritus, motum qualitateque aeris circumfusi, naturaque similis sequi necessario compelluntur. Tertia ratio, quæ ab humoribus ducitur, est eiusmodi. In aurora mouetur sanguis, & regnat, motuque tenuatur & calefcit & claret, spiritus verò sanguinem sequi imitarique solent. Verum accedente nocte vel melancholia illa crassior & frigidior, atque pituita dominantur, quæ spiritus ad speculandum ineptissimos proculdubio reddunt. Quarta ratio, quæ trahitur ab ordine rerum, hæc erit: Dies vigilæ, nox somno tributa est. Quoniam quum Sol vel ad hemisphærium nostrum accedit, vel super ipsum incedit, radiis suis meatus corporis aperit, atque à centro ad circumferentiam humores spiritusque dilatat, quod quidem ad vigiliam actionesque excitat atque conducit. Contrà verò quando recedit, omnia coarctantur, quod naturali quodam ordine inuitat ad somnum, maximè post tertiam aut quartam noctis partem. Quisquis igitur manè quidem dormitat, quando Sol mundusque excitat, ad multam verò noctem vigilat, quando natura dormire iam & à laboribus quiescere iubet, hic absque dubio quum ordini vniuersi, tum sibi ipsi repugnat, dum contrariis simul motibus perturbatur atque distrahitur. Sanè dum ab vniuerso mouetur ad extima, ipse sese mouet ad intima. Atque contrà, dum ab vniuerso ad intima trahitur, ipse se interim retrahit ad externa. Ergo peruerso ordine motibusque contrariis, tum corpus totum, tum spiritus ingeniumque prorsus labefactatur. Quinto loco à natura stomachi in hunc modum arguamur. Stomachus diuturna diurni aeris actione, apertis poris admodum dilaturatur, euolantibusque spiritibus tandem valdè debilitatur. Igitur subeunte nocte, nouam spirituum copiam exigit, qua foueatur. Quapropter quicumque eo tempore contemplationes longas & difficiles inchoat, ipsos ad caput spiritus retrahere nititur. Hi verò distracti neque stomacho satis, neque capiti faciunt. Maximè verò nocet, si post cœnam lucubantes, diu eiusmodi studiis attentius incumbamus. Pluribus enim nunc ad concoquendum ci-

bum spiritibus, multoque calore stomachus indiget. Hæc verò duo, lucubratione studioque tali diuertuntur ad caput. Quo fit, vt neque cerebro, neque stomacho suppetant. Adde quod caput ob eiusmodi motum, crassioribus cibi repletur vaporibus, atque cibus in stomacho à calore & spiritu destitutus, crudescit & putret, vnde rursus caput opplet atque lædit. Denique matutinis horis quando surgendum est, vt excrementis omnibus somno retentis singula membra purgentur, tunc id quod pessimum est, qui nocte lucubrando concoctionem penitus interruperat, idem dormiendo manè, excrementorum expulsionem diutius impedire compellitur. Quod quidem tam ingenio quàm corpori, Medici omnes obesse quamplurimum arbitrantur. Merito ergo qui nocte contrà naturam pro die, atque conuerso, die rursus pro nocte vtuntur, tanquam noctuæ, ij etiam in hoc vel inuiti noctuas imitantur, vt quemadmodum illis sub Solis lumine caligant oculi, ita & iis mentis acies sub veritatis splendore caliget. Sexto loco à spiritibus idem ita pr. batur. Spiritus fatigatione diurna præsertim subtilissimi quique denique resoluuntur. Noctè igitur pauci crassique supersunt, literarum studiis ineptissimi, vt non aliter mancis horum fretum alis ingenium volare possit, quàm vespertilioes atque bubones. Contrà verò post somnum manè spiritibus recreatis, membrisque adeò corroboratis, vt minimo spirituum adminiculo egeant, multi subtilesque spiritus adfunt qui cerebro seruiant, atque expeditius obsequi possunt, in membris fouendis regendisque parum admodum occupari. Postremo septima ratio, sic à phantasie natura deducitur. Phantasia, siue imaginatio, siue cogitatio, seu quouis alio nomine nuncupanda videtur, multis, longis, contrariis in vigilando imaginibus, cogitationibus, curisque distrahitur atque turbatur. Quæ quidē distractio perturbatioque sequenti contemplationi, tranquillam serenamque mentem penitus postulant, nimium contraria est. Sola verò nocturna quiete, agitatio illa sedatur tandem atque pacatur. Igitur accedente quidem nocte semper turbata mente, recedente verò, vt plurimum mente tràquilla ad studia nos conferimus. Quicumque verò mente nimium agitata res ipsas iudicare conantur, ij non aliter quàm illi qui vertiginem patiuntur, omnia verti putant (vt Plato inquit) quum ipsi vertantur. Quamobrem scite Aristot. in Oeconomicis iubet ante lucem surgere, asseritque id & ad corporis sanitatem & ad Philosophiæ studia prædesse quamplurimum.

Sed hoc ira accipiendum est, ut cita & modica coena matutinam cruditatem diligentissime deitemus. Denique sacer ille vates David, omnipotentis tuba Dei, nunquam dicit vespere, sed inane semper atque diluculo in Deum suum canendum se cithara psalmisque surgere. Surgere quidem mente, ea hora omnino debemus, mox etiam corpore, si modo id commodè fieri possit.

*Quæ sit hora inchoandis studiis opportunior, quisque continuandi modus.*

## CAPUT VIII.

EX iis quæ in superioribus disputata sunt, fermè iam satis constat, opportunè nostra nos studia exordiri, vel statim oriente Sole, vel hora una saltem, vel duabus ad summum ante Solis exortum. Sed antequam è lecto surgas, perfrice parumper suauiterque palmis corpus totum primo, deinde caput vnguibus, sed id paulò leuius. Hac in re Hippocrates admoneat. Nam frictione, inquit, si vehemens sit, durari corpus; si levis, molliri; si multa, minui; si modica, impleri. Quum è lecto surrexeris, noli subitæ lectioni meditationique prorsus incumbere, sed saltem horæ dimidium cuiuslibet expurgationi concedito, mox meditationi accingere diligenter, quam ad horam circiter unam pro viribus prorogabis. Deinde remittes parumper mentis intentionem, atque interim eburneo pectine diligenter & moderatè pectes caput, à fronte cervicem versus quadragies pectine ducto. Tum cervicem panno asperiori perfrice, demùm reuersus ad meditandum, duas insuper horas, aut saltem horam unam studio dedicato. Produci verò nonnunquam studia possunt, sed aliquanta interdum intermissione facta, ad horam usque meridianam. Quinetiam interdum quamuis raro, nisi cibum interim cogamur assumere post meridiem circiter horas duas. Sol enim circa ortum potens est, potens & in medio cœlo. In plaga quoque illa cœli, quæ medium proximè sequitur, quam nonam Astronomi vocant & sapientiæ domum, Sol maximè gaudet. Quoniam verò Poëtæ omnes Phœbum Musarum scientiarumque ducem esse volunt: merito si quid aliud excogitandum est, his horis potissimum cogitur. Si Musæ querendæ, horis iisdem Phœbo duce quærantur. Reliquæ enim horæ veteribus alienisque legendis potius quam nouis propriisque excogitandis, accommodatæ videntur. Semper autem memini-

se debemus, qualibet hora semel saltem paulisper remittendam esse mentis intentionem. Quum enim ob intentionem huiusmodi spiritus resoluantur, merito si nunquam cesses tendere, lentus eris. Dum laboras animo, interim corpore conquesce. Mala est defatigatio corporis, peior animi. Vtriusque simul pessima, oppositis hominem motibus simul distrahens, vitamque disperdens. Denique haud vltius meditatio procedat quam voluptas, potius verò citra.

*Vitanda pituita præcepta.*

## CAPUT IX.

OPERæ precium fore videtur, quæ noxia literatis esse diximus repetere breuiter, atque remedia singulis adhibere. Ergo ne pituita nimis augeatur, exercitatione quotidie stomacho fermè vacuo bis utendum, nunquam tamen laboriosa, ne acuti spiritus dissoluantur, excrementa diligentissime ab omnibus meatibus expurganda. Sordes à corporis totius cute, capitis præcipuè, tum lotione, tum frictione penitus abstergendæ. Vitanda alimenta frigida nimium, atque nisi obstiterit atra bilis, etiam humida, & omnino quæ pingua, virulenta, viscosa, vincta, glutinosaque sint, vel quæ faciliè putrescere soleant. Si stomachus, vel natura, vel ætate sit frigidus, aut dimittendus omnino, aut certè minuendus aquæ potus. Moderatus cibus sit oportet, sed potio moderatior. Habitatio alta à graui nubiloque aëre remotissima, tum ignis, tum calidi odoris vsu, humiditas expellenda. Prohibendum frigus à capite, maximè verò ceruice atque pedibus, multum enim obest ingenio. Prodest moderatus vsus aromatum in frigidioribus epulis, nucis muscatæ præsertim, & cinnamomi, & croci, zinziberis quoque conditi manè stomacho vacuo, quod sensibus etiam & memoriæ maximè prodest.

*Qua ratione vitanda sit atra bilis.*

## CAPUT X.

Pessimam verò illam quam in superioribus detestabamur atram bilem, hæc augent. Crassum turbidumque vinum, præcipuè nigrum, cibi duri, sicci, salsi, acres, acuti, veteres, vsti, assi, fricti, carnes bouis & leporis, caseus vetus, salsamenta, legumina, præcipuè faba, lenniculæ, melangia, cruca, brassica, sinapis, radícula, allium, cæpa, porrum, mora, carioræ, & quæcunq;

calefaciunt vel frigefaciunt, simulatque desiccant, & omnia nigra. Ira, timor, misericordia, dolor, ocium, solitudo, & quæcunque visum & olfactum auditumque offendunt, omnium verò maximè tenebræ. Præterea exsiccatio corporis nimia, siue longis nata vigiliis, siue multa mentis agitatione vel cura, seu frequenti coitu, vsuque rerum calidarum multum, atque siccicarum, seu immoderata quadam deiectione atque purgatione, vel exercitatione laboriosa, vel inedia, siti, calore, vel sicciore vento, vel frigore. Quum verò bilis atra semper siccissima sit, frigida quoque, licet non æquè, huic certè resistendum est, rebus quidem modicè calidis, humidis verò quàm maximè, cibus elixis assiduè, qui coquantur facilè, & subtilem gignat sanguinem atque clarissimum. Sed interim vt stomachi & pituitæ ratio habeatur, perinde atque bilis atræ, epulæ cinnamomo, & croco, & sandalis condiantur. Conferunt femina peponis, atque cucumeris, & pinei nuclei abluti. Conueniunt carnes anium & pullorum gallinaceorum, quadrupedumue lactentium, oua sorbilia maximè, & ex membris animalium, cerebellum, dulcia mala, pyra, persica, pepones, pruna damascena, atque similia, cucurbita ritè cocta, herbæ humidæ, non viscosæ. Cerasa verò, ficus, vuas, minimè laudo. Nauseam verò & satietatem valdè detestor. Nihil autem aduersus hanc pestem valentius est, quàm vinum leue, clarum, suauè, odorum, ad spiritus præ cæteris perspicuos generandos aptissimum. Nam vt Platoni & Aristoteli placet, hic humor, hoc vino non aliter molitur atque dulcescit & claret, quàm vel lupini aqua perfusi, vel ferrum flammis accensum. Verùm quantum eius vsus spiritibus & ingenio prodest, tantum nocet abusus.

Præterea infundere aurum vel argentum maximè ignitum, eorumque folia in poculis vel in ipso iure prodesse consentaneum est, atque aureo vel argenteo vasculo bibere cibosque sumere. Item perutile est, si sæpè stomacho vacuo glychyrrisæ succus deglutatur, succus quoque punici pomi dulcis atque dulcis arancei. Conducunt non mediocriter suauès odores, temperati maximè, at si regnat frigus ad calidum declinantes, sin dominetur calor, vergentes ad frigidum. Temperandi sunt igitur ex rosæ, violis, myrto, camphora, sandalis, aqua rosacea, quæ frigida sunt. Rursus ex cinnamomo, citro, aranceo, gariophyllis mentha, melissa, croco, ligno aloë, ambra, musco, quæ calida. Verni flores profunt in pri-

mis & folia citri siue arancei, odoraque poma, si maximè vinum. Odores eiusmodi prout cuique continet, & naribus hauriendi sunt, & pectori atque stomacho ad mouendi Odores verò calidos multum siccosque, si soli fuerint & continui non probamus. Tenendus ore hyacinthus, qui animum vehementer exhilarat. Hierobotana quoque, id est, sclarea syluestris, tum cibo tum odore confert. Buglossa rursus, borago, melissa, horumque trium aqua. Rursus lactuca, endiuia, vua passula, lac amygdalinum, mensæ familiarissima esse debent. Fugiendus aer, vt feruens, aut glacialis nimium, aut nubilus, sed aer temperatus serenique liberrimè admittendus. Mercurius, Pythagoras, Plato iubent dissidentem animum vel moerentem cithara cantuque tam constanti quam concinno componere, simulatque erigere. David autem Poëta sacer psalterio psalmisque Saulem ab insania liberabat. Ego etiam, si modo infima licet componere summis) quartum aduersus atræ bilis amaritudinem dulcedo lyræ cantusque valeat, domi frequenter experior. Laudamus frequentem aspectum aquæ nitidæ, viridis iubeiue coloris, hortorum nemorumque vsus, deambulationem secus flumina, perque amœna prata suauem, equitationem quoque, gestationem, nauigationemque lenem valdè probamus, & varietatem in primis facilesque occupationes diuersaque negotia non molesta, assiduam hominum gratiosorum consuetudinem.

*De curatione stomachi.*

## C A P V T XI.

**S**Equitur vt curam stomachi quàm diligenter habeamus, ne nauseam cruditateque adducat vnquam satietas, caputque offendant. Bis cibus quotidie sumendus est, & modicus atque leuis, cinnamomo, mace, nuce muscata moderatè conditus. Semper tamen siccus cibus pondere alimentia mollita potumque exuperet, nisi fortè atræ bilis siccitatem admodum vereamur. Famem (si commodè fieri potest) cibus, sitim potus expectet. Auiditas vtriusque, supersit mensæ. Fastidium & saturitas procul absint. Abstinentum ab iis quæ ob nimiam humiditatem vel virulentam & vntam viscosamque materiam stomachum relaxando debilitant, vel etiam frigida aut calidissima sunt, aut propter duritiam ægrè coquuntur. Et quæ talia sunt, vt diu post mensam palato saporem reddant molestio-

rem . siue infient, siue caput multis vaporibus impleant, ab omnibus in primis quæ facile vel extra aluum, vel in alio putrescant. Dulces saporés aut acres si soli sint, nullo pacto probamus, sed dulces acri quodam vel acuto vel sicco volumus temperari. *Malix* & *mentha* sicca, *salvia* recens, *uiz* *passulæ*, *cidonia* poma cocta, condita *saccharo*, *cichorea*, *rosa*, *corallus*, *lotus capparis* & aceto conditus, stomacho amicissima sunt. Mala præterea *punica* sapore inter acidum dulcemque medio, & omnino quæcunque moderatè acida sunt & aliquantulum austera, quæ Medici *styptica* vocant, siue quæ aliquantum acuta sint vel salsa vel aromatica. *Mirobalani* autem omnia superant. Vinum quoque rubeum potius quàm album, sapore quasi paululum subamaro, ac nisi caliditas vel destillatio aliter postulauerit, optimum erit merum bibitum paulatim. Omnino autem liquidiores epulæ prius sumendæ quàm duriores. Sumpto verò cibo conuenit, *coriandrum*, *pomumque cydonium* conditum *saccharo*, mala *punica*, & *pyra* austera, *mespila* quoque & *persica*, sicca, atque similia. Mandere verò oportet antequam deglutiantur singula exactissime. Fouendus stomachus si oportet extrinsecus, *mastice*, *rosa*, *mentha*, *corallo*. Cauendum ne post cibum, duabus aut tribus proximis horis vel cogitationi difficili, vel lectioni sedulò incumbamus. Necessariæ forsitan erunt horæ vacationis quatuor, si cibus potusue vberior fuerit, aut cibus durior. Malum est cibo potusue ventrem extendere, pessimum stomacho sic extento, difficilia cogitare. Aut igitur nutrimentum sume leuissimum, aut sumpto, vaca donec quasi concoxeris. Neque dormiendum post cibum meridie, nisi maxima cogat necessitas, atque id quidem non prius quàm horas duas vigilauerimus. Nocte tamen sumpta coena, hora (vt videtur) vna vigiliæ satis est. Coitus stomacho pestilens, præsertim si vel saturo statim vel esuriēte concumbas. Ocio moreretur stomachus, exercitatione gaudet, nisi dum cibo sit plenus. Sumpto cibo statim modicè deambulandum, mox verò sedendum.

*De iis quæ fouent membra præcipua & vires spiritus.*

## C A P V T XII.

**S**ED iam opere præcium facturus, vt nulla ex Medicorum officina in medium producamus, quæ stomachi, cordis, cerebri, spirituum ingenij, vires vel seruent

integras vel restituant, ac si vel pituita vel atra bilis excrescat, vel imminuat nausea, longè propellant. Omnes sine controuersia Medici consenserunt, nihil esse salutarius theriaca, fouendis confirmandisque tum singulis membris & viribus, tum spiritibus atque ingenio Huius igitur in primis vt emur drach. dimidia, aut saltem drach. tertia parte, bis qualibet hebdomada hyeme & autumnō, sed æstate atque verè semel vel sola, vel si placet frigidis humidisque temporibus cum pauculo mero claro, suauī, temporibus verò calidis siccisque, præsertim si natura vel ætas sit calidior, cum aquæ rosacæ duabus vinciis aut tribus, stomacho scilicet vacuo sex aut septem horis antè cibum. Si theriaca desit, dabimus mithridatum. Sed vbi theriacam mithridatumue sumimus, eo die ab omni re calida penitus abstinendum, & si ætas aut ver fuerit, frigidis est vtendum. Secundo verò loco eadem in causa probatur ab omnibus aloë ritè electa atque lota. Sume myrobalanorum chebularum drachmas duas, rosarum purpurearum, sandali rubei, emblicorum, cinnamomi, croci corticis, pomi citri, been, melissæ, id est, citrariæ, singulorum drachmam vnam, aloës electæ riteque ablutæ drachmas duodecim. Ex iis confice pilulas optimo mero, quibus hebdomada qualibet semel vtaris disicculo, eo scilicet pondere, quod naturæ tuæ conueniat, æstate quidem cum aqua rosacea, aliàs verò cum vino. Quibus autem diebus neque theriacam, neque pilulas assumes, vt ere confectioe eiusmodi manè atque vespere duabus aut tribus ante cibum horis. Sume cinnami electissimi drachmas quatuor, chebularum myrobalanorum duas, & totidem emblicarum, croci, rosarum drachmam dimidiam, sandalorum rubrorum drachmas duas, corallorumque similium drachmam vnam, sacchari albissimi quantum satis est. Funde saccharum aqua rosacea atque succo citri vel limonum, æqualibus videlicet portionibus, coquas suauiter. Deinde adde musci tertiā drachmæ partem, atque ambre tantundem. Demum confice bolos solidos, quos morsulos vulgo nomināt, auroque inuolue. Tria hæc, ipsi eo vsu quo præscripsimus, experti sumus, Theriacam & aloen, ita (vt diximus) temperatam, confectioemque illam singulis conferre membris, viribus & spiritibus, acuiere sensus atque ingenium, memoriam confirmare. Pituitam quoque & bilem atque atram bilem illis pilulis facile vel educi vel emendari. Præterea ætati cuiuslibet & naturæ, tria quæ diximus familiarissima iudicantur.

*Pharmaca pituita repressiva atque educitiva.**Visus caligantis medela.*

## CAPVT XIII.

**S**I aduersus exundantem pituitam acrius pugnandum fuerit, pilulas aureas ex Hierapicra Galeni, vel quas Mesues Elephanginas nominat, dabimus, scilicet quot & quoties oportuerit, vel etiam in robustiore natura pilulas ex hiera atque trochiscis agarici pari portione compositas, semper verò cum mellerosaceo liquido atque oxymelle aquaque maratri, id est, fœniculi. Qui certè syrupus in pituita digerenda etiam antepilulas atque post eas maxime prodest. Si vnà cum pituita cæteri quoque humores turbent, pilulis ex rhabarbaro Mesues, vel pilulis quæ Sine quibus à posterioribus nuncupantur, opportunè purgabimus. Omnem verò vehementem repentinaque deiectionem purgationemque penitus detestamur. Nam stomachum corque debilitat, spiritus multos exhaurit, confundit humores, spiritus fumis humorem fuscis obtenebrat.

*Catarri & destillationis, communis studioforum pestis remedia.*

## CAPVT XIII.

**V**bi caput propter pituitam destillationibus fluctuat, quandoque hora somni aliquot ex pilulis, quas modo descripsimus, dabimus. Iubebimus præterea ea hora & aliis thus sæpè mandere, nam mirificè destillationibus & sensibus omnibus memoriæque succurrit. Rursus muscata nux & theriaca ore retenta probatur. Maiorana quoque, quam amaracum nominant, vel eius aqua admota naribus vel infusa. Post cibum verò alimentorum fumos coriandro, cydoniisque coërcebumus.

*De dolore capitis.*

## CAPVT XV.

**S**I caput sæpè doleat humore grauium frigido, præter illa quæ narrauimus, confectionem illam quam diambram nominant, vel diacori, vel plirisarconicon tenere ore iubebimus. Quinetiam massicem sæpè mandere. Præterea linire frontem, tempora, cervicem, maioranæ, fœniculi, rutæ foliis vnà cum oleo, aquaque rosaceis perfecte diluta.

## CAPVT XVI.

**V**bi oculi caligant, neque rubent tamen, neque aliud præbent vllum caloris indicium, tunc sanè collyrium ex aqua fœniculi, maioranæ, chelidonis, rutæ, adhibito croco & antimonio, confert. Sed aqua eiusmodi prius densiori panno est exprimenda. Nihil tamen admoueas oculis, nisi antea pilulis Lucis sæpè purgaueris. At si caligantes oculi rubeant, subito pilulis ex fumo terræ compositis purga. Mox collyrium ex aqua rosacea & saccharo prodest. Nonnunquam verò albumine oui, rutæ, lacte adiectis quam primum capitulatur. Omnino autem quotidianus vsus marathri visum seruat & acuit. Semen quidem eius frequenter ore tenere oportet, folia verò comedere. Triphera minor à Mesue descripta, optima est. Optimum quotidie vacuo stomacho myrobalanum, chebulam conditam sumere, atque cum ea nonnihil panis ex saccharo, marathroque in puluerem ducto compositi, quod insuper ingenio mirum in modum, ac producendæ vitæ prodest. Eufrasie quinetiam vsus, oculis est singulare præsidium. In omni vel dolore capitis, vel caligine oculorum, diuertendi sunt retro vapores frictionibus cucurbitulisque. At si calor in causa sit, sanguisque abundet, hirundines cervici & humeris adhibebimus.

*De sensorio iustus instaurando.*

## CAPVT XVII.

**S**tomachus sæpè literarum studiofis gustum ferè omnem amittit. Si id pituitæ vitio incidit, quod acidus oris sapor, vel salina multa & glutinosior indicat, postquam aluum subduxeris Medicinis, quas supra narrauimus, aromatico rosaceo vttere, scilicet saccharo rosaceo mixto, melle quoque rosaceo cū cinnamomo, solo etià vel zingibere condito, vel menthæ syrupo, sed in primis theriaca. Sin autem bilis copia fortè contingit, quod quidem es amarum ostendere solet, similiter post purgationem ex aloe, sicut diximus, præparata, vel rhabarbaro adsume, vel triasandalum, vel oxyfaccharum, saccharo, aceto albo, & vino acrioris punici mali, compositum, vel persica, pyraue siue condita siue syrupo confecta, sicut Mesues docet, vel nostram eiusmodi confectionem gustui saluberrimam. Sume sacchari rosacei uncias quatuor, diamarenati uncias duas, diacytonites



ronites tantundem, scilicet uncias duas, myrobalanorum chebularum semunciam, emblicarum tantundem, sandali rubri, coralli rubri, utrorumque æqua drachmam dimidiam. Funde insuper iulep ex succo citri vel limonis uncias tres aut duas. Quod si stomachus debilis est & frigidus, adiuce duas cinnami drachmas. His ante cibum duabus horis utendum. Nauseam semper ab utroque natam humore tollit diacytonites, & usus capparum cum aceto. Item potus modicus ieiuno stomacho albi acetosi rosacei, si duplo sacchari pondere miscetur. Rursus menthæ syrupus atque absinthij. Item mentha vel aceto condita, vel acido mali punici succo diluta atque rigata.

*Exquisitissima atra bilis remedia.*

### C A P V T XVIII.

**V**erum missa hæc tanquam leuiores iam faciamus, atque ad id quod periculosissimum est reuertamur, ad atram bilem scilicet, quæ quoties abundat & furit, cum corpus totum, tum vel maxime spiritum quasi quoddam instrumentum ingenij, ipsumque ingenium & iudicium labefactat. Primum in ea curanda præceptum sit, ut docuit Galenus, ne repente illam educere contendamus, ne forte eius parte liquidiore subtilioreque subducta, densius admodum, sicciusque resideat, sed paulatim molliatur digeraturque pariter atque educatur. Secundum, ut interim tam cibis humidioribus quam lauacris dulcibus & modicis, vnguentisque similibus caput & corpus totum ad summum pro viribus humectetur, ea tamen cautione, ne vel destillatio irritetur, vel destruat stomachus aut iecur, vel meatus corporis obstruatur. Tertium verò, & id quidem maxime necessarium, ut continuè cor foueatur, roboreturque rebus congruis partim intus acceptis, partim extra pectori naribusve adhibitis. Aspiciantur quoque & audiantur, odorentur, & cogitentur assidue quæ oblectent, contraria verò longius arceantur.

*Syrupi melancholicis maximo futuri commodo.*

### C A P V T XIX.

**M**ulta quidem à multis, aduersus hunc humorem composita sunt. Ego autem in præsentia tria quædam remediorum genera à plurimis adferam electissima omnium atque iustissima, accepta primum à

præcis, deinde à recentioribus confirmata, interdum etiam à nobis ad usum nostrum accommodata. In primo est syrupi optimi compositio. In secundo pilulæ probatissimæ. In tertio electaria saluberrima. His tribus opportunè adhibitis, melancholicus humor mollietur, & digeritur, atque soluitur, spiritus acuantur & illustrantur, fouetur ingenium, memoria confirmatur. Syrupus est huiusmodi. Sume boraginis, buglossæ, florumque utriusque, melissæ, capillorum Veneris, endiuiz, violarum, cuscuz, polipodij, fenæ, epithymi, singulorum quantum manu capitur, pruna damascena numero viginti, odora poma numero decem, passularum unciam vnam, liquiritiæ unciam dimidiam, cinnami, sandali rubri, corticum citri, singulorum drachmas tres, croci drachmam dimidiam. Coquantur in aqua omnia præter epithymum & aromata, donec pars tertia consumatur. Decoctio expressa post, cum saccharo iterum & epithymo moderatè coquatur. Postremo infundantur aromata scilicet cinnamum atque crocus. Huius syrupi aurora calefacti unciaz tres bibantur, simulque unciaz duæ aut tres aquæ buglossæ, atque vnâ cum iis ex sequentibus pilulis accipi debent duæ saltem, aut plures, prout cuique conuenit, eo scilicet pacto ut alius quotidie paulum moueatur.

*Pilula ad humores vitiosos molliendos & expurgandos.*

### C A P V T XX.

**P**ilularum verò quantum ad propositum spectat, duo sunt genera, aliæ delicatis congruunt, robustioribus aliæ. Primæ, lætæ siue magicæ nominari possunt, partim Magorum imitatione, partim nostra inuentione, sub ipso Iouis Venerisque fluxu compositæ, quæ pituitam, bilem, atram bilem educunt absque molestia, singula membra corroborant, spiritus acuant & illuminant. Ita eos dilatant, ne constricti molestiam pariant, sed dilatatione & lumine gaudeant. Ita rursus stabiliunt, ne extensione nimia euanescant. Sume igitur auri granæ duodecim, maxime foliorum eius si puræ sint, thuris, myrrhæ, croci, ligni aloës, cinnami, corticis citri, melissæ, serici crudi coccinei, menthæ, been albi, been rubri, singulorum drachmam dimidiam, rosarum purpurearum, sandali rubri, coralli rubri, myrobalanorum trium, scilicet emblicarum, chebularum, Indarum, singulorum drach. vnam, aloës ritè ablutæ tantundem quantum cunctorum pondus. Confice pi-

lulas mero quàm electissimo. Sequuntur pilulæ ad soluendam melancholiam aliquanto validiores, verumtamen minimè violentæ. Sume pæoniæ, myrrhæ, stachados Arabici, melissæ, thuris, croci, myrobalanorum trium, scilicet emblicarum, chebularum, Indarum rosarum singulorum drachmam vnam, trochiscorum agarici, polipodij, epithymi, senæ, lapidis lazuli ritè loti & præparati, lapidis armeni effecti similiter, drachmas treis singulorum, aloës lotæ vncias duas, vino perfecto pilulas confila. Si cum melancholia manifesta caliditas dominetur, quæ in hac compositione sunt frigida, ad tertiam insuper ponderis sui partem augenda erunt. Has pilulas vt literarum studiosis conuenit, Græcorum, Latinorum, Arabumque imitatione composui, nolui verò fortiora miscere, quale veratrum quo Carneades fanaticus utebatur. Viris enim literatis tantum vel paulò firmioribus consulo, quibus nihil pestilentius est quàm violentia, ideo prætermisi pilulas Indas, lapidisque lazuli vel armeni notas, & quam compositionem Ieralogodion appellant. Si denique decet simpliciore compositionem inferere, qua ego familiarius vtor. Sume aloës lotæ vnciam vnam, mirobalanorum emblicarum atque chebularum, vtriusque pariter drachmas duas, masticis drachmas duas, duas quoque rosarum, præsertim purpurearum, confice pilulas vino. Proinde pilulis aut iis, aut illis, ex iis scilicet quas probauimus, nemo vnquam solis vti debet, ne fortè nimium exsicceatur, quod quidè in melancholia pessimum est, imò vnà cum syrupo, quem sequuti partim Mesuen, partim Gentilem Fulgiantem, suprà descripsimus, vel cum vini odori, lenisque vncia vna, siue duabus, siue tribus, vt cuique conuenit. Aut cum aqua mellis & passularum atque liquiritiæ. Aut si cubi caliditas dominatur, cum Iulep violaceo aquaque violacea. Omnino autem consulo literatis, quicunque ad atram bilem sunt proniores, vt hac purgatione bis quolibet anno, Vere scilicet Autumnoque vtantur, diebus quindecim continuis vel viginti, pilulis scilicet cum syrupo atque similibus. Quicunque verò paulò minus huic morbo obnoxii sunt, sat habebunt si pilulas primas aut vltimas toto anno sumant, semel hebdomada qualibet, Æstare quidem cum Iulep, vt diximus, aliàs verò cum vino.

*A liquidarum Medicinarum vsu medele.*

## C A P V T XXI.

**M**eminisse verò oportet, vbi maximum in exiccatione periculum imminet, purgare tamen nec effitas cogit, operæ precium esse pilulas intermittere, atque in ipso syrupo vel simili quadam decoctione, facta in aqua buglossæ, quando purgandum est, interdum infundere diasenæ, vel diacatholiconis, vel Tripheræ persicæ vnciam vnam, aut saltem dimidiam. Quod si vel corpus robustius sit, vel astrictior & durior alius, addere electuarij Hamech drachmam vnam aut duas. Vtilis quoque hic est confecta Casia, vtilior Manna. Nec omni melancholiæ speciei conueniunt, sed illi maximè quæ adustione creatur. Sin autem melancholia naturalis sit, conueniunt quidem, verum præcipuè si in syrupo addatur polipodij portio dupla vel tripla, similiter liquiritiæ croci que & passularum. Item Medicinæ addantur mellis rosacei liquidi vnciæ duæ. Quoties verò syropus sumendus sit, in superioribus diximus. Sed Medicina cum ipso ter viginti diebus sumenda erit. Verum si melancholicus nullus humor appareat, tantum verò complexio melancholica, scilicet frigida membrorum qualitas atque sicca, memento ducere alium vel mittere sanguinem minimè expedire, sed reliqua duntaxat facere, quæ vel diximus, vel dicemus, præsertim quæ cunque ad corpus pertinent, mediocriter calefaciendum, atque magnopere humectandum, spiritusque quoad fieri potest illuminandos, fouendaque membra. Vbi verò ipse atræ bilis humor exundat, non madefacimus tantum corpus atque humorem, sed etiam solvimus alium ea cautione qua diximus, nunquam verò vehementer. Siquidem Plato in Timæo nos monet, diuturnum morbum, qualis est Melancholicus, non esse nimis valentibus medicamentis atque molestis pharmacis irritandum.

*Sanguinis mittendi Canones.*

## C A P V T XXII.

**N**onnulli sunt in sanguine mittendo audaciores, quos Medici sapientes admodum detestantur. Nam sanguis est atræ bilis temperamentum, spiritus fomes, vitæ thesaurus. Solum verò vbi abundantiam sanguinis indicat vel profusior risus, audaciaque & confidentia multa, vel color rubens, venarumque tumor, mittere san-

guinem literatis quando res postulat, debemus à vena lienis sinistri brachij, lata quidem incisione, quatuor uncias manè, vespere totidem. Deinde paucos dies, saltem septem, ad summum quatuordecim, tum frictione quadam asperiore, tum admotis hirundinibus, quas sanguifugas nominant, mariscas irritare, vt sanguinis uncia tres aut quatuor inde destillent. Hæc ambo robustioribus tantum facienda videntur. Debilioribus verò, si necesse sit postulat, mariscas solum, sicut docuimus, irritare. Sed neque ventrem medicinis solvere, neque sanguinem licet, nisi prius clysteribus pinguibus, mollibusque lenieris. Atque hoc sit in melancholica natura commune præceptum, dandam esse operam, vt si oportuerit eiusmodi clysteribus frequentatis venter inferior lubricus semper sit atque purgatus.

*De electuariis & confectis.*

## C A P V T XXIIII.

**S**equuntur electuaria, ex quibus laudo Sequidem quod Rasis exhilarans appellauit. Præterea, quæ in libro de Viribus cordis Auicenna componit, sed multo magis quod Mesues ita conscribit. Sume crudum sericum colore coccineo nuper tinctum, pondere libram vnam, id merge succo pomorum dulcium & suauiter redolentium, atque succo buglossæ, aqua que rosacea, singulorum libra vna, post quatuor & viginti horas, totum id coque suauiter, donec aqua rubeat. Deinde extrahe sericum, atque insuper exprime diligenter. Infunde mox sacchari candidissimi centum & quinquaginta drachmas, coque rursus donec quasi mel spissetur. Amoue tunc ab igne, atque infunde dum calet, ambra crude diligenter conscissæ drachmas sex, & vt liquecat ambra permitte. Postremò adde his puluerem eiusmodi. Sume ligni aloes crudi, cinnami, vtriusque æquè sex drachmas, lapidis lazuli ritè abluti drachmas tredecim, ynionum, id est, albarum margaritarum drachmas duas, auri veri drachmam vnam, musci electi partem drachmæ dimidiam. Dantur ex eo cum vino drachmæ duæ vel vna, manè ac vespere ante cibum tribus aut quatuor horis. Id mihi præ cæteris valde placet. Verumtamen probo etiam diamuscum Mesues dulcem compositionemque gemmarum, modo cum aqua rosacea adsumuntur. Laudarem quoque mirificè quod est Petro Ebanensi Philosopho summo, constatum, nisi ipsemet ex eius immo-

dico vsu dilatationem exhalationemque spirituum nimiam formidaret. Quamobrem duo quædam insuper excogitavi tutissima, atque ob temperationem suam cuiuslibet tempori, ætati, naturæ conuenientissima, in quibus miscetur vile dulci. Quæ tantum nutriunt quantum fouent & roborant. Præterea spiritui & ingenio tantum stabiliendo, quantum acuendo & illustrando conueniunt. Sume sacchari vnâ cum floribus buglossæ concocti uncias duas, corticis pomi citri saccharo conditi vnciam, chebulæ conditæ uncias duas, cinnami electi drachmam vnam, sandali, coralli scilicet vtriusque rubri, item serici coccinei crudi & conscissi, croci, margaritarum, singulorum drachmam dimidiam, auri, argenti, singulorum tertiam drachmæ partem, ambra, musci, vtriusque grana duo. Funde omnia simul succo citri vel limonis, saccharo cocti. Sequitur confectio altera aliquanto salubrior, certè multo suauior. Sume amygdalarum dulcium quatuor uncias, nucleorum pineorum scilicet ablutorum diei vnus spacio, seminum cucumeris, vtrorumque pariter uncias, sacchari duri quod Candum, id est, candidum vocant, quatuor uncias, sacchari alterius & albissimi libram vnam atque dimidiam. Funde cuncta hæc aqua rosacea, atque limonis & citri, in qua extinctum fuerit ignitum aurum & argentum, simul coque suauiter. Demum adde cinnami, been rubri, coandali rubri, coralli similis singulorum drachmam vnam, margaritarum nitidissimarum, croci, serici crudi, coccinei minutissimè attriti, singulorum drach. dimidiam, auri, argenti vtriusque grana duodecim, hyacinthi, smaragdi, saphiri, carbunculi, singulorum tertiam drachmæ partem. Si cui verò defunt aurum, argentum, ambra, muscus, pretiosi lapilli, confectioes illæ etiam prodesse multum sine his poterunt. Quarum treis potissimum eligo, vnam scilicet Mesues, quam recensui, duas verò nostras, quas modo descripsimus. Quo verò pacto iis vtendum sit, superius satis exposuimus. Si quis autem simplicius aliquid appetat, omnibus tamen accommodatum, hic citri pomum perfectè maturum, integrum perfectè contundat, multoq; saccharo & multo rosarum succo adhibito coquat, coctum verò modico cinnamo crocoque condiat, aut aromatico rosaceo, vtatur sic temperato. Sume aromatici rosacei unciam vnam, sacchari rosacei sacchari diabuglossati, vtriusque uncias duas, aut similiter, miscet diamuscum. Quanquam enim duo hæc non sint simplicia, tamen faciliè satis habentur.

mr. At si caliditas timeatur, diaprunis & saccharum violaceum adiungantur.

*Emaciantis vigilia remedia.*

### C A P V T XXIII.

**S**Æpè melancholicis, præsertim literatis accidere solet, vt nimium exiccato cerebro vigiliis longis extenuentur. Quoniam verò nihil attræ bilis mala magis augeat, quam longa vigilia, tanto malo omni studio succurrendum. Idèò lactucas post cibos alios edant vnà cum pane modico, pauculo croco, vinumque purum sorbeant post lactucam, neque vltra horam lucubrent. Quumque se dormitum conferunt, confectionem eiusmodi sumant, in qua seminis papaueris albi vnciæ duæ sint, seminis lactucæ vncia vna, amomi, croci scilicet vtriusque pars drach. dimidia, sacchari vnciæ sex. Dilue & coque omnia simul syrupo papaueris. Edant huius drach. duas, simulque nonnihil syrupi papaueris gustent aut vini. Illinias eis frontem temporaque oleo ex violis, & ex nenufare adiecta camphora. Item lacte oleoque amygdalino atque violaceo Odorem croci & camphoræ, putaminumque dulcis mali naribus admouebis. Aceti insuper modici, sed aquæ rosaceæ plurimæ. Sternes quoque lectum plantarum foliis frigidarum. Aures suauibus cantibus sonisque delinies. Humectabis sæpè caput eiusmodi lauacris, scilicet aqua in qua cocta sint frusta papaueris, lactucæ, portulacæ, maluæ, rosarum, vitis, salicis, arundinumque folia, addita camomilla. Balneis quoque dulcibus ex rebus eiusmodi sæpè tibia brachiaque, sæpè totum corpus est humectandum. Lac insuper bibere mixtum saccharo, scilicet stomacho vacuo, si modo stomachus optimè tolerauit, maximè prodest. Humida hæc melancholicis, etiam si satis dormiant mirificè conferunt. Memento lac amygdalinum mensæ familiarissimum esse debere.

*Memoria hebetis atque obliuionis remedia.*

### C A P V T XXV.

**A**ccidit verò nonnunquam vt studiosis, vel quia sedulò inclinato capite legant scribantque, vel quia ocio nimio torpeant, pituita quædam viscosior vnà cum frigida nimis melancholia caput occupans granet, atque hebetes obliuiososque efficiat. His ergo caput exonerandum est iis remediis, quæ alias diximus pituitæ conue-

nire. Sin minus illa suffecerint, ad pilulas Indas & cocchias hieralogo diuimque confugito. Præterea ad iaram diacoloquintidos vel Archigenis, vel Andromachi, vel Theodotionis, aut ad pilulas Iudæi, quas Mesues in capitulo De capitis dolore describit. Quod si natura ætate frigidior sit, nec æstas obstitit, post purgationem vt re confectione illa anacardina, quam Mesues Sapientum confectionem nominat in Antidotario. Rursus anacardina illa, quam in capitulo de Obluione ex sententia filij Zachariæ recenset. Da summæ manè drachmam vnā, sed qui eam tumet, ab ira, coitu, ebrietate, labore, rebusque calidis eo diè prorsus abstineat. Hæc quidem aduersus hebetudinem obliuionemque valentissima sunt. At verò si familiaria magis optet, da gingiber conditum, sed modico thure mixtum quod sensibus & memoriæ magnopere prodest, præsertim his adiectis, scilicet melle anacardi, melle chebularum, acoris, ciperis, ambra musco. Prodest etiam diambra, pliris sarcoticon, & diacori. Sed hæc ore diutius retinenda naribus etiam & auribus infundenda. Odor quoque thuris, amaraci, marathri, nucis muscatæ, rutæ, gariophylorum, prodest non mediocriter. Memento tamen theriacam, in his atque similibus, quemadmodum ab initio diximus, nulli vnquam remedio postponendam. Præterea hebetibus obliuiosisque tempora & ceruicem vntione eiusmodi unge. Sume olei sambucini vnciam vnā, olei de been vncias duas, euphorbij vnciam dimidiam, castorei quoque tantundem, perfricabis brachia, crura, ceruicemque vehementer. Ac si opus fuerit, ceruici cucurbitulas admouebis. Verticem præterea capitis amaraco, thure, nuce muscata unxis, operies atque fouebis.

*Spirituum custodia nos esse intentos debere.*

### C A P V T XXVI.

**S**I homines veritatis cupidi, tanta Medicorum diligentia corporum spiritum curare debent, ne fortè omnino neglectus, vel impedimento sit, vel ineptè seruiat querentibus veritatem, multo proculdubio diligentius incorporeum spiritum, id est, intellectum ipsum disciplinæ moralis institutis colere decet, quo solo veritas ipsa quum sit incorporea, capitur. Neque enim fas est solum animi seruam, id est, corpus colere, animum verò corporis dominum regemque negligere, præsertim quum Magorum Platonisque sententia sit, corpus to-


rum ab animo ita pendere, ut nisi animus bene valuerit, corpus bene valere non possit. Quapropter Medicinæ auctor Apollo, non Hippocratem, quamvis ex sua stirpe gentium, sed Socratem sapientissimum indicavit. Quippè quum quantum Hippocrates corpori, tantum Socrates animo sanando studuerit, quanquam quod tentauerant illi, solus Christus effecit. Proinde mentem nostram optimis colere motibus à Socrate idcirco iubemur, ut lucem veritatemque à nobis naturæ instinctu quæsitam serena mente facilius assequamur, quanto magis veritatem ipsam diuinam in primis religionis sancta fas est venerari. Ad quam quærendam capiendamque non aliter creata mens est, quam oculus ad lumen Solis perspicendum. Atque, ut Plato noster inquit, quemadmodum visus nihil visquam visibile perspicit, nisi in ipso summi visibilis, id est, Solis ipsius splendore, ita neque intellectus

humanus intelligibile quicquam apprehendit, nisi in ipso intelligibilis summi, hoc est, Dei lumine nobis semper & ubique præsentem. In lumine inquam, quod illuminat omnem hominem venientem in hunc mundum. In lumine de quo canit David. In lumine tuo videbimus lumen. Profectò quemadmodum purgatis oculis, inque lumen ipsum aspicientibus, subito splendor eius infunditur, coloribus figurisque rerum abundè refulgens, ita quum primum ab omnibus corporis perturbationibus per moralem disciplinam purgata mens est, atque in diuinam veritatem, id est, Deum ipsum religioso quodam flagrantissimoque amore directæ, subito, ut diuinus inquit Plato, diuina menti veritas influit, rationesque veras, quæ in ipsa continentur, quibus omnia constant, feliciter explicat, quantoque mentem circumfundit lumine, tanto simul & voluntatem gaudio beatè perfundit.

(.:)

LIBRI I. FINIS.

(.:)




# MARSILII FICINI FLORENTINI.

IN LIBRVM II. DE VITA PRODVCENDA,

*Ad Philippum Valorem Epistolare.*

P R O O E M I V M.



Vanquam Plato noster Genius suo viuit, & victurus est, ut arbitror, dum mundus ipse viuet, meus me tamen Genius huc semper impellit, ut post diuinum cultum ante omnia Platonis vitæ prospiciam. Ad hoc ipsum iam diu nobis aspirat præ cæteris Medica domus. Ad idem conspiras & tu mi Valor, Medicum amicissimus, & Platonica gloriæ atque disciplina

admodum studiosus. Quam ergo vitam Platoni semper exopto, eandem opto Medicibus, similemque Valori. Quamobrem hortor & obsecro te, mi Valor, ut quantæ semper operæ gloriæ Platonica faues, tanta aliquando diligentia præcepta hæc nostra de Vita producenda legas atque serues, quibus diu viuens resurgenti nuper disciplinæ Platonis diutius unâ cum magnanimo Laurentio Medice patrocinari possis. Vale.



MARSILII FICINI  
FLORENTINI,  
MEDICI ATQ; PHILOSOPHI  
INSIGNIS,  
DE VITA PRODUCENDA,  
SIVE LONGA.

(::)

LIBER II.

(::)

*Ad perfectionem scientia necessaria est vita longa,  
quam diligentia praestat.*

(::)

CAPVT PRIMVM.

(::)



D artem scientiamque perfectam non tam vel docilitas ingenij, vel memoriae firmitas, quam prudentis iudicii perspicacia nos perducit. Iudicium verò propter ambiguitatem ex coniecturarum diuersitate conceptam, adeò difficile est, ut experimento sit necessario confirmandum. Experimentum quoque fallax, tum propter iudicii ipsius difficultatem, tum propter fugacem opportuni in experimento capiando temporis breuitatem. Quibus sanè de causis, artem esse longam vñ cum Hippocrate rectè concludimus, nec posse nos eam nisi vitæ longitudine consequi. Vitam verò longam non solum ab initio semel fata promittunt, sed nostra etiam diligentia praestat. Quod & Astrologi confitentur, ubi de Electionibus & Imaginibus agunt, & Medicorum cura diligens, experientiaque confirmat. Qua quidem providentia non solum homines natura validi saepissimè, sed etiam valetudinarij vitam longam aliquando consequuntur, ut non mirum sit Herodicum quendam literarum studiosum omnium sui temporis infirmissimum, ut Pla-

to & Aristoteles testantur, eiusmodi providentia annum ferè centesimum impleuisse. Plutarchus præterea narrat, multos corpore alioquin parum firmo, vitam sola diligentia longam consequutos. Mitto in praesentia, quod imbecilles ipse nouerim prudentiae munere robustissimorum annos superauisse. Neque igitur inuile fuerit neque vanum, post librum de Curanda valetudine literatorum, à nobis compositum, præcepta quædam insuper ingenij scientiae cupidis ad vitam longam conducentia, tradere. Instituta verò hæc nec in itineribus ignauisque communicari volumus. Quid enim cupiamus istos diu viuere, qui nec viuunt quidem, quasi fucos nutriamus, non apes? Nec hominibus diuulgari, perditam voluptatum libidine dissolutis, qui breuem quotidie voluptatem longæ vitæ, stulti præponunt. Nec improbis iniquisque patefieri, quorum vita mors est bonorum. Sed viris dumtaxat prudentibus atque temperatis, solertis ingenij viribus humano generi, vel priuatim, vel publicè profuturis.

(::)

(::)

(::)

*Vitalem calorem nutriti humore, cuius ultra ci-  
traque excessu fieri corruptionem  
dissolutionemque.*

## CAPVT II.

**V**Ita quidem, tanquam lumen in naturali calore consistit. Caloris verò pabulum est humor aërius, atque pinguis quasi oleum. Siue igitur humor eiusmodi fortè deficiat, siue prorsus excedat, vel inquinetur, calor naturalis statim debilitatus, exstinguitur. Si humoris defectu calor debilitatur & perditur, mors resolutione contingit. Si potius obruitur humoris excessu vel vitio, vita suffocatione perit. Suffocatio verò humoris cuiuslibet exundantia vel putrefactione contingit, præsertim pituita, vex excrecente, vel quomodolibet putrefacta, vt non immeritò pituita petēs vitam fuerit nominata. Præcepta igitur ad producendam vitam maximè necessaria, hinc quidem resolutionem, inde verò suffocationem putrefactionemque æquè deuitat. Æquè, inquā, ratione cōmuni Nam si calidiorem siccioremve hominem fortè curant, & cui meatūs quidem aperti sunt, humores autem spiritusque subtiles resolutioni magis occurrunt. Sin autem contraria ratione corpus affectum tractant, potius suffocationi subueniunt. Maximè verò in alterutro student, si ad alterutrum locus tempusve declinet. At vbi ingeniosis studiosisque consultiur, vtrumque præceptum fermè est pariter necessarium, in vtroque similiter laboratur. His enim acutum quidem calidumque ingenium, & imaginationis motus assiduus, resolutionem, ocium verò corporis atque cruditas, suffocationem minitari videtur. Nusquam igitur Medici vehementius quàm eiusmodi curatione laborant. Etsi tota libri superioris disputatio ad propagandam vitam maximè confert, propriam tamen quandam res tanta curam, qualem deinceps quoad potero paucis comprehendam, postulare videtur.

*Quomodo sint temperandi calor & humor, quodam Minervæ consilio.*

## CAPVT III.

**C**æterum, dum oleum istud pingue, Cigneo huic vigori nostro necessarium, pingui Minervæ tractamus. Minervæ inter omniū olei vitalis origo, almi videlicet Iouis capite nata ridet, quod sui muneris quantitatē planè cernentes, interea

non satis vidimus qualitatem. Ridens ergo; Vobis, inquit, oleum non modo quantum sat flammæ nutriendæ foret, abundè dedi, sed etiam sine amurca syncerum infudi lucernæ. Hæc illa. Nos autem inter loquendum errantes offendimus, quoniam lucerna pedibus nostris verbum suum nondum nobis auditum. Ex hac ergo lucerna discamus, oleum iugiter flammæ subministrandum, ea scilicet diligentia, vt nec repentina quadam lumen obruamus illu-  
tione, nec rursus differamus sibiundo potum. Sed hæc quidem duo, satis in superioribus tractata putamus. Reliqua nobis duo sunt, quorum alterum leuiter tetigisse, alterum vix attigisse videmur. Tangentes interim ita Palladem vt ridere nunquam solita, nos rideret. Quid ergo? Primo quidem considerabimus flammam vel pauculam esse prorsus edacem, ideoque lucernam illam lucere diutius, in qua sic flammula est ad ellychnium, id ad lucinijū temperata, vt non eibat oleum, sed pitisset. Itaque & nos in omni dicta cauebimus, ne quando præsertim in iuuentute, nimium inualescat insitus ignis suapte natura vorax. Sat verò fuerit tum humorem inundantem, tum penetrabile frigus hinc arcere. Deinde lucernam cogitabimus frequenter exstingui, quando non syncerum oleum instillauerit, sed (vt ita dixerim) amurcosum. Vnde paulò post concresecunt ex amurca fungi, lumenque exstingunt. Iam verò nos alumnum à Pallade suscepimus oleum, scilicet aërium quamplurimum purumque, & nativo quodam lentore tenaxque atque firmum. Quod ergo huic paulatim absumpto suggeritur, non solum huic æquale debet esse, sed simile. Vt verò sit simile, non tantum aërium esse debet & pingue, sed penitus ab amurca secretum, id est, à facie quadam ex terra & aqua crassiore congesta. Hanc ergo con-  
gestionem faciemque vitaturi, alimenta eiusmodi fugiamus, & ocium & cruditatem atque sordes. Interea verò Mineruam ea moderatione colamus, vt caput quidem de quo nata est ipsa, nobis augeat, nervos autem stomachumque non minuat.

*Arescentis humidi naturalis & alieni exuberantis causa, Et quàm necessaria sit ad vitam perfecta digestio.*

## CAPVT IV.

**N**aturalem humorem velociter hæc exsiccat, sanguinis fluxus vberior, Violenta solutio ventris, Diu lubrica aluus;

Profusus sudor, Latius patefacti meatus, Coitus ad debilitatem factus, Sitis anhelata, Fames crucians, Vigilia longa, Vfus præcalidarum rerum simulatque siccatum, Laboriosus animi corporisque motus, Anxietas, Ira, Dolor, Siccior simulatque feruentior aer, præsertim igne calefcens, Ventus aridior & violentus atque diurnus. Humorem supra modum augent iis contraria. Ebrietas frequens vtrumque facit. Nimio enim tum calore, siccat, tum humore suffocat ebriosum. Nihil autem magis quam cruditas ad vtrumque nocet. Vbi enim non concoquitur alimentum, hinc quidem deest quo naturalem irriget humorem, inde verò putrefactum superest, quod exundans, calorem obuiat naturalem. Quamobrem Auicenna corrumpi sanguinem inquit, vbi digestio ipsa corrumpitur, secutusque Galenum appellat digestionem, vitæ radicem. Optima igitur est & quasi vnica hæc regula Galeni, concoctionem cibi præ cæteris vbique curare. Nam quod maximum videtur esse præceptum, salubribus videlicet vti, nihil proderit nisi coquas. Siquidem ex his ferme sicut ex contrariis noxius humor profluit, si cruda membris influxerint. Ex cibis autem etiam minus arte laudatis, sæpè minus malum accipitur nutrimentum, si vehementius concoquantur. Cruditatem igitur tanquam grauem, resolutionis simul & suffocationis causam, diligentissime deuitemus, quantitate videlicet cibi potusque nobis accommodata. Qualitate, simplicitate, præparatione, contritione, ieiunio, reuocante famem ac si opus fuerit, stomachi etiam exteriore fomento, rebusque quibusdam stypticis post epulas intus assumptis. Caueamusque diligenter, ne cibum potus exuperet, neue cibus sit liquidior, aut durior, aut hic vel ille valdè sit actu frigidus, aut alimenta sint longè diuersa, aut crudum addamus crudo. Hæc enim concoctionem magnopere prohibent. Caueamus insuper diligentissime, ne vel coitu statim post cibum, vel somno meridiano sæpius non necessario, vel nocturna vigilia, vel labore animi villo, siue corporis importuno, vel alio quopiam pacto digestionem impediamus. Digestionem dico equidem non primam tantum, quæ fit in stomacho, sed secundam etiam quæ fit in iecinore: tertiam insuper quæ in venis: quartam denique quæ in membris efficitur. Quæ longo quodam indigent intervallo, & quauis impedita, pabulum non suppeditatur humori.

Proinde sicut digestionem, sic excre-

mentorum purgationem adimare in primis necessarium est ad vitam. Necessarium sordes etiam acutè detergere. Necessarius est motus corporis tam continuus, tam temperatus, tam varius, quam celestium aerisque motus & ignis & aquæ, seruata dumtaxat concoctionis & somni necessitate, defatigatione verò & resolutione vitata. Præterea sub vmbra situm cariemque obducimus. Sub dño, sub lumine viuimus. Quod patet meus Ficinus insignis Medicus, frequenter habebat in ore. Sed ad hæc feliciter peragenda operæ precium foret, non tam vrbani negotiis quam rusticis quibusdam exercitationibus à tenera statim ætate corpus assuefecisse, & quodammodo similibus. Interdum etiam nutrimentis, & vitæ genus quodammodo varium tenuisse. Quod me sæpius ille prudens monebat. Qui enim in omni ætate lautissima quadam curiositate viuunt, sæpè minus tuti viuunt. Qui verò adolescentes se minus assuefecerint, adulti saltem assuefaciant, cautioribus tamen & paulatim id tentantes.

*Sanguis & humor accommodatus vitæ, ærius esse debet, qualitate temperatus, substantia medius atque tenax.*

## C A P V T V.

**G**Ræci omnes inter præcepta ad diuturnam vitam maximè necessaria, mandant vt euchymis alantur. Euchyma vocamus alimenta salubria, quæ bonum afferunt nutrimentum, id est, sanguinem bonum Bonum verò sanguinem appellamus, non frigidum, non siccum, non turbulentum, sed calidum & humidum atque clarum. Calidum quidem calore non acrimo. Humidum verò humore non aqueo. Clarum quoque, nec tamen interea tenuissimum. Iam verò feruentior sanguis, naturalem tum calorem exacuit, tum exiccat humorem, & quem ipse humorem infert vel calorem, resolubilem præstat atque fugacem. Sanguis præterea humidior proniorque ad aquam, naturalem obtundit calorem, humorem quoque naturalem vel heberat, vel impellit sub calore liquefcere, vel suffocat humiditatem calorem. Et omnino, si qua portio naturalis humoris ex aqueo sanguine trahitur, tum putrescit facile, tum citò diffuit, atque dissoluitur. Hinc efficitur, vt qui molliores fructus herbasque comedunt, nisi raro forsitan & pro Medicina tunc ventrem leniente sumant, breui venas succo crudo putrefactionique obnoxio peni-

tus impleant. Ac ne id accadat, tutius pro alimento vel coquantur, vel saltem cum pane misceantur. Sanguis ergo nec igneus esto, nec aqueus, sed aerius. Non aëri crassiori similis, ne proclivior sit ad aquam. Non aëri subtilissimo, ne facile incalescat in ignem, sed substantiam teneat mediotrem, in qua medius aer dominatum habeat plurimum. Cætera elementa insint, quatenus aeris accommodantur imperio. Non sit eius substantia subtilissima, ne humorem instabilem generet, spiritumque volatilem & dissolutioni subiectum. Non sit crassissima, alioquin & ingenio minimè ministrabit & vix in naturalem humorem ac spiritum permutabitur, meatus obstruet, suffocationi dabit occasionem. Et spiritus qui vix tandem crassius inde creatur, densitate sua, & ipse parum idoneus est ad vitam, & calorem naturalem ita suffocat, sicut fumus densior flammam comprimit protinus & extinguit. Mitto quod saltem adeò tenebrosus est, ut vitam efficiat moestam, morte deteriore. In primis autem, ut mihi videtur, ad vitam expedit diuturnam, sanguinem unà cum substantia quidem aëria valde, nec admodum crassa, habere glutinosum aliquem in se humorem atque tenacem, qualem ferè cum subtilitate habet oleum oliuarum, & humor anguillæ pinguis simulatque tenuis, & oleum ex terebinthina quadam sublimatione tractum. Tu igitur alimenta, cæteraque omnia quæ sanguinem pro viribus, humoremque talem efficiant, diligenter eligito. Sanguis enim humorque talis sicut oleum flammæ, ita vitali calori pabulum est, & una cum subtilitate habet etiam firmitatem. Præceptum enim Rasis est pro iuventute servanda, rebus uti sanguinem ad præcordia traducentibus, ibique condensantibus, corque fouentibus. Quod Avicenna probat, a quo sam labilemque sanguinem præcipiens evitandum. Differens autem in hoc, pro differentia corporum ratio est habenda. Nam ubi densius corpus est, ad subtilitatem sanguinis, ubi rarius ad crassitudinem eiusdem, omnibus est remediis declinandum. Vbi media corporis habitudo, via similiter media tutius imus. Nunquam tamen naturalem corporis habitudinem extirpare conabimur, alioquin vitam ipsam extirparemus. Expedit insuper meminisse, ubi subtilitatem sanguinis valde veremur, & stomachus interea non sit admodum natura validus, minorioribus ad crassitudinem gradibus accedendum esse, dum gracilem hominem crassioribus alimentis nutrire contendimus, & fouendum interim stoma-

chum & producendum somnium Exercitationem corporis pro viribus augendam, animi minuendam, quæ plurimis sæpissimè nocet. At si minus ferat alimenta viscosa nimium duraque vel admodum frigida, vix saltem corallorum, sandalorum, rosarum, coriandrorum, myrobalanorum, cydoniorum & diacydonion, saccharique rosacei, stypticarumque rerum eam sanguinis humorisque firmitatem denique consequemur, quam rebus nimium glutinosis hic tuto consequi non valemus. Commodissimè verò ex nucleis pineis pistaceisque & glycyrrhizæ succo, & amido additis amygdalis dulcibus, earumque oleo & cydoniorum semine, atque oleo sesamino una cum saccharo candidissimo aquaque rosacea nutriuntur, qui viscosa grandiorum animalium membra concoquere nequeant. Concedemus his præterea extrema gallinarum vel hædorum, & testudines & limaces atque testiculos. Vina dabimus non alba, sed rubra stypticaque & quodammodo subamara, aqua vinum ferrea vel masticea temperantes. Oleo quoque masticeis cydoniorumque cutem leuiter leniemus, & vitabimus interim quæ sanguinem subtilem faciunt vel feruentem, nisi forsan nonnihil croci vel cinnamomi tenacioribus epulis infundamus, ut & facilius concoquatur, & cocta per meatus angustos transferantur ad membra. Difficile namque est viscosa vel alimenta paulò firmiora ex stomacho non admodum valido usque ad digestionem tertiam quartamque perducere, nisi eiusmodi vehiculis perferantur, atque insuper frictionibus lenibus prouocentur. Quas quidem quum facies, manibus eas mollioribus facito, ac memento madefacere manus odorifero quodam vino, in quo camomillam myrtumque coxeris atque rosas.

*De communi edendi bibendique regula; & qualitate epularum.*

## CAPUT VI.

**S**ed missa in præsentia faciamus obtusissima hominum corpora vel tenuissima, ad communem viuendi rationem perueniamus, communi mediæque corporis habitudini prorsus accommodatam. Caue ne vlla ratione meatus corporis vel supra modum pateant, vel nimium obstruantur. Ibi enim in resolutione & iniuria extrinsecus inferenda discrimen, hic autem in putrefactione & suffocatione periculum. Et si non arctissimo regulæ frano, quod Hip-

pocrates damnat, re cohibeo, non tamen habenas tibi ad licentiam vsque relaxo. Herbas & fructus humidiores accipe parce. Parcius lac & pisces, & vtrumque cum melle. Parcissime fungos, atque cum aromaticis ac semine pyri. Similiter purum aqua potum, atque vna cum paritate. Quae humidiora sunt vel pingua, aromaticis acrisbusq; condito, alioquin & humorem alienum membris plurimum inferunt atque putridum, & si quem necessarium naturae humorem suggerunt, hunc praestant citae admodum corruptioni subiectum. Quod non aliter quam aquosum vinum conturbatur celeriter & corrumpitur. Hinc citae canicies, & pallor rugositasque senilis. Carnes quoque si quotidie comedantur, ac etiam si pondere pani propinquent, citam putrefactionem inferunt. Vnde Porphyrius Pythagoraeorum antiquorumque auctoritate fretus, esum animalium detestatur. Nonne homines accepimus ante diluuium longaeuos, animalibus pepercisse? Quamquam Medici non tam carniū vsum vident quam abusum.

Denique, humida tanquam putrefactioni obnoxia fuge, memoria tenens humidos & pingues senescere citius atque mori. Quod & Hippocrates ait, & res ipsa declarat. Siccissima rursus accipe moderate, vel saltem liberiore tempera potu. Media tutus eligito. Tamen si Auicenna formam cibi paulo sicciorē molli praepōnit, ad caniciem euitandam. Ad frigida nimium aut calida cautissimus esto. Calida simul & humida sequere. Si feruet aer, epularum humor calorem superet, si friget, calor humorem. Vtrobique verò modicus sit excessus. Vbique calor & humor non nihil glutinosum habeat atque stypticum, ut illinc membris irrigatus humor inhæreat firmius, ac diu sub calore perduret. Electum triticum & panis electus hoc in primis habet. Deinde rubrum stypticumque vinum parumque dulce. Tertio pinei nuclei resque iis temperie & lentore perfimiles. Quarto carnes non humidae simulatque laxae, ut suillae & agninae lactentes. Medici tamen veteres, maximè Galenus, suis carnes & sanguinem, propter quandam cum corpore nostro similitudinem valde commendant. Optimae sunt igitur similibus corporibus, ut rusticis & robustis, corpusque multum exercitantibus, praesertim si quatri-duum gariophyllis, coriandris praeparatis, sale conditae seruentur. Et sanguis forsitan vilis si cum saccharo coquantur, defecatusque ad summum fuerit atque liquens. Sed ut ad numerum reuertamur, non proban-

tur carnes humidiores, quales diximus, non durae simulatque siccae, quales vetustioris leporis atque bouis, sed mediae quaedam, ut gallinaceorum, pullorum, caponum, pavorum, phasianarum, perdicum, fortè etiam pullorum columbinorum, praesertim domesticorum. Tales quoque sunt capreoli vitulique iuuenes & anniculi verueces, pariter atque apti. Hoedos non sperno lactentes, caesumque recentem. Auiculas equidem praetermissi. Frequens enim subtiliorum alimentorum usus, stomacho solum conuenit crassiora minimè toleranti. Qui verò validior est, fugacem ex iis fumum reportat vel humorem. Oua tamen gallinarum non praetermitto, si vitellus vna cum albo comedatur. Vitellus namque solus delicatorum est nutrimentum, nam Auicenna probat nutrimentum nullum expedire magis in diminutione sanguinis & dissolutione spiritus cardiaci quam vitellum oui gallinae, vel perdicis, vel phasianae. Neque fortè ab re fuerit anseres nutrire spelta aqua uenitida, ac post necem carnes sale & coriandris aceto praeparatis conditas, dies septem seruare prius quam edas. Ceruumque similiter, si stomachus fuerit validissimus.

Probabile namque est longaeua quaedam animalia ad vitam conferre longaeuam, si tamen huiusmodi carnes iuuenes comedant: Similiter aliae carnes vicissim sint tum assae, tum elixae. Cibus esto duplex ad potum. Panis duplex & sesquialter ad oua, triplus ad carnes, quadruplus ad pisces, herbas, fructus humidiores. Ne incipiat a potu mensa, neque potus sit semel vberior. Semper stypticum aliquid absque potu vel modico, sequatur mensam. Vbi complexio, aetas, locus, tempus, ad calidum sic curae labitur, tu quoque paulisper ad opposita declinato. Vbi ad frigidum aut humidum, similiter ad opposita vergito. Vbi temperies, seruato temperiem. Eat enas autem exercitationi quidem corporis est addendum, & animi detrahendum, quatenus epulis vescimur durioribus ad diuturnitatem vitae aliquando forsitan necessariis. Mensae tibi sint in nouem diei horis duae, & utrobique parcae. Parcior verò cena. Exercitationes corporis duae ferme post digestionem primam ad sudorem quasi productae. Somnus quidem nocturnus, quia semper est necessarius, semper bonus, diurnus autem nisi admodum necessarius, nunquam bonus.



*Non esse vitandum alimentis quæ citò putrescant, vinum & triticum præ cæteris eligenda, putrefactio & resolutio fugienda.*

## CAPVT VII.

**A**Nimalia verò quæcunque in nostram custodiam veniunt, mundis electisque alimentis nutrienda sunt anrequam vescamur. Atque hæc & alia omnia ex pascuis altioribus & odoriferis eligenda sunt. Inter hæc regulam ante omnes ab Arnol'do Philosopho comprobata, memori semper mente teneto. Animantes, herbas, poma, fruges, vina ex altis oporiferisque, ut diximus, regionibus eligere oportere, quas venti temperati serenant, suaves Solis radij fouent, vbi aquæ nullæ stagnant, culta sterquilinio non pinguescunt, sed humore natio, vbi etiam quæcunque nascuntur, diu permanent incorrupta. Hic dumtaxat habitandum est, hic quoque nascentibus vescendum est, ex alimentis quæ breui putrescunt, humorem nos comparaturos diuturnum, & à putrefactione remotum. Neque sperandum facile nos diu victuros, vbi terræ fructus incorrupti diu non conseruantur, vbi raro admodum homines sunt longæui. Quantum verò sit in loco victusque discrimen, pomum declarat persicum. In Persica quidem venenum, in Ægypto, cordis amicum. Et hellebortus in Anticyra impunè sumptus, alibi verò venenum. Aristoteles habitationem eligit altam ad meridiem orientemque spectantem, sub aëre subtili, nec humido, nec frigido. Et Plato longæuos in æditissimis atque temperatis reperit regionibus. Deterrimum verò est stercoreare agros, vel aquas stagnantes ex agris minimè deriuare. Omnia enim illic citæ corruptioni subiecta nascuntur. Quamobrem eos non vituperare non possum, qui sapientem Hesiodum idcirco vituperant, quod in re rustica sterquilinum prætermiserit. Sed ille prudens salubritati potius quam fertilitati consuluit. Satis autem ex lupinorum fabarumque foliis tempestiue subuersis, agrum pinguescere posse putauit. At verò si regiones humidiores immundasque colere, & alimenta minimè duratura sumere compellamur, cum quasi seruemus victum, quem sub aëre pestilenti Medici mandauerunt. Qua de re in libro contra Pestilentiam satis egimus. Summatim verò suauibus & quodammodo calidis vtemur odoribus. Aloë ritè præparata sæpè, leuiterque purgabimur. Ritè vero præparatam dicimus, si lota fuerit aqua rosa-

cea vel succo rosarum, aut si cum rosis recentibus contritisque fuerit perfectè commixta.

Deinde addatur ei myrobalanus atque mastix, & fortè rosa. Medicina hæc extra controuerfiam mirabilis est ad conseruandam diu mentem sanam in corpore sano. Præterea corpus exercitabimus, oppositino vtemur foco. Hoc puluere epulas condiciemus. Myrobalanorum emblicarum sit pars vnciæ quarta, sandalorum vero dimidia, cinnamomi integra, octaua croci. Hoc itaque puluere rebusque simul acribus imminentem & putridis alimentis & locis corruptionem forsitan inhibere poterimus. Meminerimus autem, vbi multo plures putrefactione suffocationeque quam resolutione pereunt, ibi putrefactioni, & suffocationi maximè resistendum. Vbi vero contrà, vicissim uti condimentis aromaticis, & quodammodo austeris, ut diximus, odoribusque similibus quouis tempore putrefactionem prohibet vngi oleo, frigoris iniuriam, uti lauacris ex aqua & oleo, resolutionem ex labore vel calidis temporibus imminentem. Similiter os aqua sæpè colluere, succum glycyrrizæ vel saccharum crystallinum ore tenere. Aqua rosacea multa, paucoque aceto rosaceo manus faciemque perfundere, similibusque odoribus uti. Septima, quaque hora alimentis modicis recreari, corpore simul & animo conuiescere, calore vitato. Plurimum vero interest, quale sit vinum & triticum, quibus assidue vescimur. Hæc ergo sint talia, ut ultra annum & potius ad triennium integra perseuerent, si modo incorruptibilem ex iis alimoniam sperare debemus. Vinum, siue album siue rubrum sit, esto clarum, suauis, stypticum, odoriferum, & quod indigeat aqua. Nisi fortè vinum repereris, leue simul atque durabile, quod rarissimum esse solet. Quod verò validius est, Philosophus Isaac vinum dicit esse vinosum, coctum Sole, ventisque purgatum, quod aqua fontis puri temperari iubet, aliquamdiu antea quam bibamus, ut perfectius misceatur. Aquosum verò vinum atque debile vel acerbum, fugiendum monet, utpote quod intra venas & membra acidum cito fiat, aut aliter putrescat. Vinum quidem aquosum putrefactioni subiectum, si conseruata eius substantia coctum fuerit, hoc saltem erit vtile, alioquin non laudatum, quod humorem corruptibilem non creabit, sed acumen eius aqua electa temperandum erit. Vinum verò quale probauimus, Isaac ex antiquorum sententia theriacis magnis inquit esse persimile. Quod, ut diximus, temperatum;

habitudinem corporis frigidam calefacit, refrigerat calefactam, humefacit siccam, humidiorē verò desiccāt, atque (vt Gale- nus ait) naturalem humorem recreat, calorem fouet, vtrūque contemperat. Miscere verò vinum eiusmodi magis necessarium est iuuenibus, minus senibus, frigidis verò senibus minimè. Frigida namque duraque senectus (vt inquit Plato) ita mero feruet atque molliuit, sicut vel igne ferrum, vel aqua lupini. Quod diximus per vinum opposita fieri, atque dissidentia temperari, scito etiam per glycyrrhizam fieri, sed debilius. Fieri etiam per oleum rosaceum, sed extrinsecus. Hæc ergo tibi familiaria sunt. Neque diffidas quicquid & qualitate temperatum est, & virtute potens, posse reliqua temperare, sicut frigus alia frigefacere, id in primis habere temperamento Iouis quo etiam saluberrima sunt. Sed de his alibi disputandum.

*Dieta, victus & Medicina senum.*

## C A P V T VIII.

**Q**ui septimum iam septenarium impleuerunt, quinquagesimum attingentes annum, cogitent Venerem quidem significare iuuenes, Saturnum verò senes, atque has apud Astronomos stellas inter se maximè omnium inimicas existere. Rem ergo veneream Saturno fugiant, quæ iuuenibus etiam vitæ plurimum detrahit. Non enim natis consulit, sed nascituris, ipsasque etiam herbas statim producto semine ficat. Præterea frigus aeremque nocturnum lethiferum sibi putent, atque eum omnino vitæ seruent, ex quo sanguinem plurimum sperent, spiritumque quàm plurimum, ex vitellis videlicet ouorum recentibus, vino aliquantum quidem dulci, odorifero vero quàm plurimum. Nam hic vitellus propriè cordis sanguinem, vinum præcipuè spiritum recreat. Carnibus electissimis coctisque facillimis omni summatim vtantur diæta, calidum pariter atque humidum augente. Spiritum odoribus præsertim vini assiduè recreent. Vigiliam & inediam sitimque deuitent, laborem rursus corporis atque animi, & solitudinem & mœrorem. Musicam repetant si fortè intermiserint, nunquam intermittendam. Ludos quosdam & mores quoad decet olim antea pueritiæ reuocent. Difficillimum namque est (vt ita dixerim) reiuuenescere corpore, nisi ingenio prius repuerasceas. Itaque in omni etiam ætate magnopere conducit ad vitam nonnihil pueritiæ retinere, & oble-

amenta varia semper aucupari. Longum verò profusumque ritum minimè, spiritum namque nimis ad exteriora dilatat. Sed redeamus ad senes. Hi præterea si frigeant, fomenta petant aromatica & calida simulatque humida. Meminerint puerile non esse puerile illud Auicennæ fomentum, factum quidem à Dauide, sed tardius fortè factum. Fomentum seni mirificum. Medulla recentis adhuc calentis panis infuso maluatico vino cum puluere menthæ, appositæ stomacho & sæpè ad olfactum adhibita. Nam & medullas eiuſmodi etiam sola semocrito iamjam expiraturo retinuit spiritum, quoad placuit fugitiuum. Præterea frictionibus vtantur leuibus, seu quandoque lauacris nutrimentum prouocantibus ad extrema. Nucleos ante omnia pincos videlicet ablutos, familiares habeant. Hoc enim nutrimentum Medici veteres senibus aptissimum probauerunt. Calidum enim & humidum est & pingue, & omnem lenit asperitatem, atque simul, quod mirum est, dum naturalem humorem auget, interea superfluum desiccāt, putridumque expurgat humorem. Sunt qui nucleorum eiusmodi drachmam vnam quotidie post cibos exhibent senibus comedendam. Ego drach. quoque alteram ieiuno stomacho senibus exhiberem, vel recens, calens, auratum, pinucleatum. Componerem quoque electuarium hoc pacto. Sume amygdalarum dulcium mūdatarum vncias quatuor, tantundem eiusmodi nucleorum, pistaciorum duas, vnam feminum cucumeris, vnam cucum aulanarum mūdatarum, contunde, coque vnā cum candidissimo saccharo, cui tamen addideris vnam zinziberis recentis conditi drachmam, croci dimidiam, musci tertiam, ambra tantundem, saccharum, aqua melissæ, id est, citrariæ rosarumque fundito, multa aurifolia his adhibeto. Huius enim vsu quotidiano, vitam senes validiorem longioremque consequentur. Possunt & in mensa hoc accipere & pluribus horis ante mensam. Vtilius autem tunc erit, si quid albi odorique vini vnā cum confectio- ne eiusmodi biberint. Temporibus verò calidioribus saccharum rosaceum vnā cum aurifoliis, & conditæ myrobalani vitam senibus prorogabunt. Theriacam nemo dubitat ad idem humidis conuenire personis atque temporibus. De cuius vsu satis in libro superiore dictum. Nemo etiam negabit his prodesse admodum radices emulzæ, beeniaque radices, albas similiter atque rubeas, maximè verò recentes illam quidem pro nutrimento, has etiam pro aroma- te, & omnia simpliciter calida, humida- que, &

que & aromatica simul & styptica, simulque pinguis. Certum est senes electo glycyrrhizæ succo familiares uti debere. Tradunt enim glycyrrhizam esse humani corporis calori pariter & humori persimilem, præterea variis senum morbis opitulari. Lac quoque amygdalinum, & amidus cibus familiaris esto, & saccharum atque pafula Rasis tripheram ex myrobalanis Indis, emblicis belliricis confectam. Item myrobalanos Indas conditas saccharo, non solum ad retinendam, sed etiam ad retardandam senectutem valde probat. Auicenna laudat tripheram myrobalanorum maiorem atque minorem. Rursus confectionem de squama ferri, maximè verò auri. Iubet quotidie mandere myrobalanos, præcipuè chebular ritè conditas, ad differenda senectutis incommoda.

*De naturis aromatum & cordialium necessariis, & rursus qualis senum victus.*

## CAPVT IX.

**S**Cito myrobalanis varias inesse virtutes. Vnam quæ mirabiliter superfluum exsiccat humorem, unde caniciem prohibet. Secundam quæ humorem colligit naturalem, & à corruptione simul & inflammatione tuetur, unde vitam producit in longum. Tertiam quæ styptica aromaticaque potentia, virtutem & spiritum naturalem & animalium congregat & fouet, & roborat. Hinc aliquis vitæ lignum in paradiso myrobalanum fortè fuisse putabit. Simile quiddam feruè faciunt aurum & argentum, corallus, spodiumque, & preciosi lapilli, quantum pro aromatica virtute facultatem afferant illulirandi Tu verò memento aromatica tunc maximè prodesse nobis ad vitam (ut supra significauimus) quando cum vigore quodam aromatico humida sunt pariter atque calida, lentoremque pinguem habent, commodum augmento, quales sunt in primis radices beeniæ albæ, similiter atque rubentes præsertim recentes. Aut saltem quando cum virtute quadam subtili odorifera, & acuta, substantiam densam habeant, & stypticam valde proprietatem, qualis utique compositio inter cordialia frigida primum myrobalanis inesse videtur & succino. Deinde rosæ & succo, & semini citri. Tertio sandalis & coriandris, atque myrto, cæterisque similibus. Inter calida verò cordialia zedoariæ, ligno aloës, citri cortici, & chariophyllis, nuci muscaræ, maci, olibanæ, mastici atque doronico. qualem etiam saluæ experimur inesse. Tradunt ambra & muscum stypticam habere virtu-

tem. Zinziber autem ob quandam eius humiditatem, præsertim recens & conditum, senibus sæpè prodest. Sed hoc & chariophyllus propter caloris vehementiam, caute videtur accipiendum. Zedoaria quoque caute, tametsi theriacæ similis iudicatur, & stypticam simulatque pinguem naturam habet, senibus commodissimam. Ambra propter calorem quasi temperatum tuto feruè sumitur, ac propter lentorem cum styptica subtilitate mixtum, prærogatiuam habet ad vitam in membris & spiritibus confirmandam, tum verò si ex ea fiat aqua, cutisque lauatur, digestionem quartam restituit, ac morbos eius defectu contingentes expellit. Aromatica verò, quæ subtilem admodum substantiam habent, qualem cinnamomum atque crocus, cordialibus frigidis & durioribus sunt miscenda. Nam aromatica si tantum calida subtiliaque sint, & sola sumantur, naturalem calorem nimis excitant, humoremque dissoluunt. Necessaria tamen sunt, tum frigidioribus & humidioribus epulis concoquendis, tum cordialibus duris ad præcordia transferendis. Tenamque latere non debet, humorem ipsum vitæ necessarium primas in corde sedes habere & arteriis venisque eiusdem, quod Isaac perspicuè docet, atque, ut Auicenna probat, hic humor naturali cæterorum membrorum humore frequenter irrigatur atque fouetur. Quapropter cauendum est, ne membri vilius humor casu quopiam arefiat, multoque magis, ne præcordiorum humor comminuatur. Atque ut nutrimenta vel fomenta, & cordialia omnia per angustos meatus ad præcordia latissimè perferantur, his inferre crocum. Ut verò sistantur ibi, myrobalanos adhibe. Ut autem consequaris vtrunque, accipe inter calida muscum atque ambram, inter frigida rosas atque myrtum. Memento dulce marathrum senibus profuturum. Nam & nutrimentum per membra diffundit, & qua facultate lac, eadem humorem auget naturalem. Vnde Dioscorides marathro serpentes ait annuam exuere senectutem. Probamus & saluiam. Hæc enim naturæ virtutem temperatè calefacit & firmat, paralyfim propulsat. Probamus & moderatū conditi zingiberis vsum, habet enim cum calore pinguedinem.

*De auro, & aureis alimentis, & refocillatione senum.*

## CAPVT X.

**A**Vrum omnes ante omnia probant, tanquam omnium rerum tempera-

tiſſimum, & à corruptione tutiſſimum. Si quidem propter ſplendorem, Ioui autem propter temperaturam conſecratum, ideoque poſſe calorem naturalem cum humore mirificè temperare, humores à corruptione ſeruare, Solarem & Iouialem ſpiritibus & membris inferre virtutem. Verumtamen oportet duriſſimam auri ſubſtantiam, ſubtiliorem facere, penetratuque faciliſſimam. Nouerunt enim cordialia tunc maximè latentem cordis recreare virtutem, quando in eis attrahendis minimè natura laborat. Vt autem minimè fatigetur, vel ſubtiliſſima iam effecta, vel cum ſubtiliſſimis ſunt exhibenda. Optimum fore putant, ſi abſque aliena permixtione aurum potabile fiat. Sin minus poſſit, contuſum, & in folia redactum accipi volunt. Aurum fermè potabile habebis (vt dicam) Collige flores boraginis, bugloſſæ, meliſſæ, quam citrariam nominamus, & quando Luna Leonem ſubit vel Arietem, vel Sagittarium, aſpicitque Solem aut Iouem, còque cum candido ſaccharo, aqua roſacea liquefacto, & pro qualibet vncia inferre diligèter aurifolia tria. Ieiunus cum vino quodam aureo ſume. Item aquam ex capone deſtillantem foco vel aliter conſumpto, vnà cum Iulep ſumerofaceo in quo auri folia quædam antè contuderis. Præterea in nitidiſſimam fontis aquam aurum extingues ignitum, cum eodem auri contundito folia. Eadem vinum aureum temperato, & vnà cum eiufmodi potu comedito recentem oui vitellum. Facile verò in tota corporis arbore ſeruabis humorem, ſi in radicibus conſeruaueris. Accipe igitur gallinarum & pullorum eiufmodi atque caponum, cor, iecur, ſtomachum, teſticulos, atque cerebellum, coque aqua modica, minimo ſole. Cocta contunde extota carne & toto iure & ſaccharo, addito recentis oui vitello, ſacplacentam modico cinnamomo crocoque conditam & auratam. Hac veſcere eſuriens ſemel ſaltē, quarto quoque die, & tunc quidem ſola, claro tamen ad potum addito vino.

*De uſu lactis ſanguiniſque humani pro vitæ ſenium.*

## C A P V T X I.

**S**Æpè poſt decimum ſtatim & nonnunquam poſt nonum ſeptenarium, arbor humana arefacto paulatim humore tabeſcit. Tunc primum humano iuuenilique liquore irriganda eſt hæc arbor humana, quo renireſcat. Eliges ergo puellam ſanam, formoſam, hilarem, temperatam, & fameli-

cus lac eius ſugito creſcente Luna, ſtatimque comedito marathri dulcis modicum puluerem ſaccharo ritè conſectum. Saccharum quidem lac in ventre cogi vel putreſceri non permittit, marathrum verò quum & ſubtile ſit & lactis amicum, dilatabit ad membra. Quos hectica ſenilis exedit, Medici diligentes liquore humani ſanguinis, qui arte ſublīmi deſtillauit ad ignem reſicere moliantur. Quid ergo prohibet, quo minus ſenio iam quaſi conſectos interdum hoc etiam potu reſiciamus? Communis quædam eſt & vetus opinio, aniculas quaſdam ſagas (quæ & ſtriges vulgari nomine nuncupantur) infantium ſugere ſanguinem, quo prouiribus iuueſcant. Cur non & noſtri ſenes omni videlicet auxilio deſtituti, ſanguinem adoleſcentis ſugant? volentis inquam adoleſcentis, ſani, lati, temperati, cui ſanguis quidem ſit optimus, ſed fortè nimius. Sugant igitur more hiru-dinum ex brachij ſiniſtri vena vix aperta, vnciam vnā aut duas. Mox verò ſacchari vini que tantundem ſument, idque eſurientes & ſitibundi facient creſcente Luna. Si crudas ægrè concoquitur, coquatur prius vnà cum ſaccharo, vel ad aquam calidam moderatè deſtillet ſaccharo mixtus, deinde bibatur. Fouere quoque ſtomachum tunc ſanguine ſuillo præſens auxilium eſt, quem vtique ſanguinem è vena ſuilla fluentem, ſpongia calente vino madefacta còbibat, & ſtomacho ſtatim calens admoueat. Galenus atque Serapio morſum rabidi canis ſanguinis canini potu curari dicunt. Rationem verò illis aſſignare non placuit. Ego igitur biduum eam quæritans, opinor denique ſaliuam carnis rabidi venenoſam, impreſſam hominis pedi læſo, per venas paulatim ad cor aſcendere, more veneni, niſi quid interea diſtrahat. Si igitur interim canis alterius ſanguinem ille biberit, ſanguis ille crudus ad multas horas natat in ſtomacho, cum denique velut peregrinum deiecturo per aluum. Interea caninus ſanguis iſte ſaliuam caninam ſuperiora membra preſentem prius quam ad præcordia veniat, deriuat ad ſtomachum, nam & in canino ſanguine virtus eſt ad ſaliuam canis attrahendam, & in ſaliua viciffim virtus ad ſimilem ſanguinem proſequendum. Venenum igitur à corde ſemotum, ſanguinique imbibitum in aluo natanti, vnà cum ſanguine per inferiora deducitur, hominemque ita relinquit incolumē. Quorſum hæc? Primo quidem vt rei tam occultæ, ſuccurrentem inter differendum cauſam aperuerim. Deinde vt moneam, ſanguinem potari poſſe & quidem ſalubriter, atque in ſanguine

humanò virtutem esse, qua humanum sanguinem attrahat, & mutuo prosequatur. Ne fortè diffidas iuuenilem sanguinem à senè bibulum trahi ad venas membraque possit, ibique prodesse quamplurimum.

*De diæta, habitatione, & consuetudine senum.*

## CAPVT XII.

**M**eminisse decrepitos expedit, naturam debilem non esse nutrimentorum pondere fatigandam, vel etiam epularum diuersitate nimia distrahendam. Nam & iuuenilis ætas hoc vitio fit citò senilis. Diuidant ergo mensas, nec tam multa naturam alimonia quam frequenti reficiant, interuallo tamen interim ad digestionem dato. Nam sæpè etiam postquam stomachus ipse concoxerit, nisi & iecur quasi digesserit, sumere nutrimentum, naturam distrahit atque fatigat, quæ quidem lassitudine sæpius frequentata, aduolat intempestiua senectus. Senes hyeme velut oues aprica petant, æstate velut aues amœna riuosque reuisant. Frequenter inter virentes versentur plantas, & suauiter redolentes, hæ namque viuentes, spirantesque conspirant ad spiritum hominis augendum. Ad loca verò communiter apibus amica confugiant, mellaque hyeme degustent. Mel enim cibus est senibus in primis amicus, nisi vbi bilis timetur incendium. Amicus caseus recentissimus, amici dactyli, ficus, passulæ, cappares, dulcia punica, zizipha, hyssopus, scabiosa, betonica, sed pistacia multo magis. Pinei verò nuclei maximè omnium, sicut diximus. Ex quibus plurimum referent adiumentum, si eos horas duodecim in aqua paulum calida teneant priusquam edant. Sic enim stomacho non nocebunt. Ac præterea, si dum his vtuntur, etiam interpineta & oliueta vitæque versentur, aut saltem pini vaporem accipiant & odorem. Item gummi lachrymaque pini cum oleo vel vino corpus sæpè deliniant. Probabile enim est arbores longa naturaliter vita doratas, præsertim sic etiam hyeme virecant, ad longam tibi vitam vmbra, vapore, nouo fructu, ligno & tempestiuo quolibet vsu prodesse. De animalibus autem longæuis supra diximus. Iam verò ad idem tibi fortè conducet, si viuas plurimum penes eos qui sani, tibi sano natura sint similes & amici, ac magis forsan si paulò iuniores. Vtrum verò & quomodo frequens adolescentum consuetudo parumper senium retardare valeat, pudicus Socrates consulendus.

*Quæ adminicula senes à Planetis accipiant ad omnia membra fouenda.*

## CAPVT XIII.

**V**erum consulite potius solliciti senes Apollinem, qui Socratem Græcorum sapientissimum iudicauit. Consulite Iouem insuper atque Venerem. Phœbus ipse artis Medicinæ repertor, nucem muscatam vobis fouendo stomacho dabit. Iupiter cum Phœbo mastichen atque mentham. Venus verò corallū. Fouendo rursus capiti Phœbus pæoniam, thus, amaracum, & cum Saturno myrrham. Spicam nardi macemque Iupiter. Venus denique dulce marathrum atque myrtum. Ad cor verò fouendum accipietis à Phœbo quidem citrariam, crocum, lignum aloës, thus, ambra, muscū, doricum, modicum chariophylorum, citri corticem, cinnamomum. Ab Ioue liliū, buglossam, ozimum & mentham, becniasque radices, & candidas pariter & rubentes. A Venere sola quidem myrtum & sandalum atque rosam, vnà cum Saturno coriandrum. Hæc vos condite diligenter. Et quæ stomachi sint, cydonicum oleo in formam ceroti cōficite. Quæ verò capitis, oleo spicæ perfundite ac illinite ceruicem, tempora, frontem. Quæ denique cordis, aureo vino spargite, aquaque rosacea, eaque foris præcordiis admoвете. At iecur in primis creando sanguini necessarium, nescio quomodo prætermisimus. Huic ergo semper Eupatorio & opobalsamo Phœbus opitulabitur. Pistaceis Iupiter atque passulis, Venus autem hepatica, endiuiā, spodio, cicorea. Lien tandem fouendo Saturnus ille vester vnà cum Ioue capparim dabit vobis, scolopendriam, tamariscum. Sicut vesicam Iupiter cum Venere, pina, glycyrrhiza, amido, cucumeris seminibus, malua, althæa, manna, casia curat. Saturnum verò verendum pluribus, ne ad eò vos fugite senes. Hic enim quàm peregrinus est iuuenibus, tam vobis domesticus erit. Vt igitur totum ipsi quoque vobis corpus vegetet pro viribus, atque confirmet, accipietis nonnunquam ab eo regnante pariterque à Phœbo muniam simul, & anseris assi pulpam, hæc anseris adipe modico delinite, contundite diligenter, Myrobalanorum chebularum atque Indarum melle concoquite, ambra, musco, croco condite, credentes Medicinarum ad vitam conferentium veram esse fidem. Quæ speretis & Deum supplicanti bus vobis adspiraturum, & res ab eo creatas, præsertim cœlestes mirificam proculdubio ad augendam vel conseruandam vitam habere potentiam.



*De confabulatione serum sub Venere per  
virentia prata.*

### CAPVT XIII.

**S**ed à grauioribus his numinibus ad Venerem parumper vos per hortos & prata senes virentia reuoco. Ad almam Venerem vos omnes aduoco, non ludentem quidem vobiscum, sed jocantem. Hæc & vobis, inquam, & mihi iam seni, primo quidem iocosum hoc fundit oraculum. Ego filij (si nescitis) voluptate motuque vobis vitam dedi. Ego igitur voluptate quadam motuque & si non simili, vobis seruabo vitam. Eandem quoque seruabit libertatem Liber vitisator, propagator vitæ. Liber ipse semper odit seruos, & quam vino promittit vitam, solis liberis implet longam. Mæ quidem vitæ simul atque menti quondam profuit regnante Saturno diminuta mentha, placetq; quotidie. Vobis autem maior mentha mente vitæque prodest, diminuta nocet. Risum ex meis hortis legite, negligite ficum. Has verò violas quando carpitis, carpere vos existimate lilia, prehendentes lilium, comprehendere crocum. Crocum à Phœbo Iupiter ipse natus propagauit in lilium. Lilium à Ioue suscipiens, in has quas hic videtis, violas transformauit. Denique rosa quidem vobis esto Lucifer, Hesperus verò myrtus. Post oraculum nobis cogitandum, mandat rerum viridium naturam, quatenus virent, non solum esse viuam, sed etiam iuuenilem, humoreque prorsus salubri, & viuido quodam spiritu redundantem. Quapropter odore, visu, vsu, habitatione frequenti iuuenilem inde spiritum nobis influere. Inter virentia verò deambulantibus interim causam perquiremus, ob quam color viridis visum præ cæteris foueat, salubriterque delectet. Inueniemus tandem naturam visus esse lucidam, ac lucis amicam, volatilem tamen ac facile dissipabilem. Idcirco dum per lucem se dilatat amicam, inrer dum nimio lucis excessu rapit prorsus, & vehementi dilatatione dissolui, tenebras autem naturaliter velut inimicas fugere, ideoque radios in angustum inde retrahere. Optat verò visus ita perfrui lumine, vt per amicum hoc suum amplificetur quidem, nec tamen interim dissipetur. Iam verò in quocunque colore plus admodum tenebrarum sine nigredinis quàm lucis, non dilatur, nec ideo delectatur radius visus ad votum. Vbi vicissim plus admodum splendidi coloris est quàm nigri, spargitur latius, noxia quadam voluptate distractus. Quam-

obrem color viridis, maximè omnium, nigrum cum candido temperans, præstat vtrumque, delectans pariter atque conseruans, & molli insuper & adhuc tenera qualitate, sicut & aqua radiis oculorū absque offensione resistit, ne abeuntes longius disperdantur. Quæ enim dura sunt simul & aspera, frangunt quodammodo radios. Quæ verò rarissima sunt, dissolutioni aditum patefaciunt. Sed quæ soliditatem aliquam habent, lenemque simul æqualitatem, sicut specularia corpora, nec ipsa quidem frangunt, neque longius disperdi permittunt. Quæ denique præter hæc beneficia, tenera quoque sunt & mollia, sicut aqua resque virides, liquidis oculorum radiis mollitia blandiuntur. Denique visus radius quidam est in quadam oculorum aqua naturaliter nobis accensus, ac temperatum lumen in aqua quodammodo resistente requirit. Itaque gaudet aqua, delectatur speculis similibus, viridibus oblectatur. In quibus sanè viridibus solis lumen insitum adhuc vernum secum habet humorem, aquamque subtilem occulto quodam lumine plenam. Ex quo fit etiam, vt color viridis cum tenuatur, in croceum resoluitur. Quorsum hæc? Vt intelligamus frequentem viridium vsu, siquidem visus spiritum recreat, qui in animali spiritu quodammodo præcipuus est, animale quoque reficere. Atque etiam meminerimus, si color viridis, quia inter colorum gradus medius atque temperatissimus est, tantum animali spiritui prodest, multo magis quæ per qualitates temperatissima sunt, naturalem & vitalem spiritum in natura, atque admodum profutura nobis ad vitam. Nihil in mundo temperatius est quàm cælum, nihil sub cælo fermè temperatius est quàm corpus humanum, nihil in hoc corpore temperatius est quàm spiritus. Per res igitur temperatas vita permanens in spiritu recreatur. Spiritus per temperata cælestibus conformatur. Denique discamus extemperie viridis, quæ illuminando æquè congregat animale spiritum atque dilatat, ideoque maximè inuat, nos quoque in cordialibus eligendis, componendis, vtendis, aromatica, subtilia & acuta, quæ spiritum extendere vel etiam illuminare solent, quod facit crocus atque cinnamomum, cum aromaticis semper stypticis congregantibusque, cum myrobalanis, & similibus commiscere, atque vicissim.

Neque præmittere quæ absque acumine etiam aromatico simul vtrumque conficiunt, aliquanto videlicet dilatan-

atque admodum congregant, multumque illuminant, quæ & alias narravimus, quod efficit aurum, argentum, spondium, corallus, electrum, sericum, pretiosi lapilli, inter quos hyacinthus vel ore detentus ob Iovialem temperiem plurimum comprobatur. Cum enim sub terra nequeant speciosissima, & quasi cœlestia procreari absque summo quoddam beneficio cœli, probabile est rebus eiusmodi mirificas cœlitus inesse virtutes. Compositio verò eiusmodi quæ dilatando & illuminando spiritum æquè congregat, ita delectat eum intrinsecus atque recreat, sicut foris viriditas oculos; atque ipsum etiam apud senes in naturali quadam viriditate diutissimè servat, quasi laurum, oliuam, pinum, etiam hyeme virentem. Tantoque magis id efficit, quod efficit, & interius, atque maximè si compositio ralis aromatico flagret odore alliciatque sapore. Profectò sicut corpus ex crassioribus humorum partibus compositum in quintam redigitur formam, ita spiritus ex subtilissimis eorundem portionibus constitutus, formam habet quintam naturaliter temperatissimam atque lucidam, ideoque cœlestem. Atque in hac ipsa forma conservandus est, ut subtilis quidem sit, & interea firmus, sicut diximus. Sit omnino lucidus, sed etiam quodammodo solidus. Ac præterea rebus odoriferis, firmis, lucidis, assiduè foueatur, si vitam cupimus conservare quæ viget in spiritu, & vendicare nobis cœlestia dona. Hæc hætenus iussu Veneris contemplati, Venerem ipsam audivisse putemus.

*Prosopopœia Mercurij senibus consulentis circa voluptatem, odores, cantus, & Medicinas.*

## C A P V T XV.

**I**Nterea dum inter senes ipsa quasi Venus confabularetur, fortè quidem hætenus satis belle, deinceps verò prolixius forsitan fabulatura foret. Sermonem hunc his Mercurius vocibus, sermonum autor interpellat. Quidnam vobis est cum Venere istac semper puella senes? Quid rursus Veneri cum sermonibus? Nonne mei simul atque vestri sunt sermones? Mea ratio pariter atque vestra? Audite me igitur eadem nunc attentione, qua illam, & multo maiore insuper attentione quam Venerem. Quinque scitis esse sensus, visum, auditum, olfactum, gustum, tactum. Esse rursus quinque (ut ita dixerim) discite rationes. Dum enim per

quinque sensus quotidie imbuimur vobis animus rationesque inde rerum ipse concipit, interea notiones habimisque ad res iudicandas quinque, tanquam rationes quinque resultant. Præterea sicut quinque hinc quidem sunt sensus, inde verò quodammodo rationes, ita vitæ tenor quinque gradibus circa sensum rationemque disponitur. Vnde quinque numerantur ætates. Primæ quidem sensu tantum trahitur. Secundæ, sensu magis admodum allicitur, quam ratione ducatur. Tertia post hæc alternis pariter rationis & sensus persuasionibus agitur. Quarta, ratione potius quam sensu ducitur. Quinta tandem ratione tantum regi debet. Prima igitur ætas atque secunda tanquam subiecta Veneri, Venerem si placet loquentem, audiat, reliquæ verò Mercurium. Ego igitur reliquos vos omnes alloquor, non pro me quidem tantum, sed pro Diana etiam hac, quam ad sinistram meam cernitis, nempe quum hæc elinguis sit, ego verò bilinguis, iure pro hac ipsa, cuius ego linguam habeo, loquor. Vnam profectò noxiamque Venus vobis indidit voluptatem, qua noceret quidem vobis, prodesset verò futuris, exhauriens paulatim vos per latentem quandam quasi fistulam, aliudque vestris liquoribus implens atque procreans, vos tandem quasi vetustum quoddam spoliū cicadarum iam exhaustum humi relinquens, cicadæ interim teneriori prospiciens. Nonne videtis quod Venus de materia vestra generat esse recens quiddam & viuum, sensuque præditum? Surripit ergo vobis iuventutem & vitam atque sensum, ex toto, inquam, corpore per totius voluptatem, ut efficiat inde totum. Ego interim materiæ illius quæ quartæ digestionis superest qualitate monitus, vos commoneo, alimenta similiter quarta digestionis cocta pluitimum vitæ vestræ succurrere. Ouum recens videlicet integrum & forbile una cum saccharo exiguoque crocò, lac humanum, vel suillum, vel caprinum cum pauculo melle sumptum. Atque hæc duo tunc salubriora sunt, quando natio adhuc calore flagrant. Etsi ouum aliam mox cocturam desiderare videtur, præsertim in stomacho minus valido sed leuiter est coquendum. Venerum ut parumper ad Venerem redeamus. Si quando vidistis Venerem, iuvenilem admodum vidistis, & quasi meretriciis fucis & ornatibus expolitam. Hæc ergo quæ nova semper est, nova semper affectat, odit vetera, facta destruit, unde construat faciendâ. Hæc rursus (si dictu fas est) quasi meretrix non vno quouis est contenta viro, vulgus amat, & ut dialecticè loquar, speciei passim

potius quàm indiuiduo suffragatur. Iam verò neque tactu tantum vos præcipitat, sed etiam gustu fallit quotidie perditque deceptos. Quos enim vos in rebus saporibus percipitis mediocri quadam temperie gratos, hos Diana hæc Apollinis Iouisque munere tradidit. Illecebras verò saporum miras, quibus quotidie velut homo capti clamiferi vitam perditis, Venus insidiosa fabricat. Quid igitur Martem incusatis? Quid Saturnum? Mars quidem raro admodum vobis palamque nocet. Saturnus quoque sæpius vultu se proficitur hostem, nec et tardius, tempusque remediis nulli negat. Solâ Venus palam ut amica venit, clam inimica venit. Hanc igitur incusate potius, si quem inter superos incusare licet. Ad multiplices huius insidias, tum oculis Argi vos ipsos instruite, tum Palladis clypeo vos munite. Aures autem ad blandas pollicitationes eius tanquam ad lethales Syrenum cantus obstruite. Hunc denique prouidentia florere à me accipite, quo Circes huius veneficia deuitetis. Hæc vobis duas vix tandem & hæc quidem lethiferas pollicetur voluptates potius quam largitur, ego verò beneficio patris atque fratris quique promitto vobis, quinque præsto, puras, perpetuas, salutare, quarum infima est in olfactu, superior in auditu, sublimior in aspectu, eminentior in imaginatione, in ratione excelsior atque diuinior. Quæ maior delectatio in tangendo percipitur atque gustando, eo vitæ grauius frequenter accidit detrimentum. Contra verò quanto maiorem in olfactu voluptatem & auditu atque visu, item imaginatione & sæpè ratione quotidie reportatis, tanto fila vitæ longiora producit. Verum sicut in blandimentis tangendi atque gustandi cauendam vobis subdolam admonui Venerem, sic in ipsa secretiore nimisque assidua contemplatione mentis delectatione cauete Saturnum, illic enim frequenter filios ipse suos deuorat. Nam quos sublimiorum contemplationum suarum rapit illecebris, & illic agnoscit ut suos interim ( si modo diutius gradum ibi sistant ) falce quadam à terris amputat, terrenamque incautis vitam sæpè surripit. Hoc saltem Venere interim indulgentior, quod Venus quidem vitam quam tibi detrahit, donat alteri, nihil tibi pro detrimento restituens. Saturnus autem pro vita terrena, à qua separatus ipse, te denique separat, coelestem vitam reddit atque sempiternam. Hoc ipso similes esse videntur inter se Venus atque Saturnus, qui sanè quam Aquario gaudet, tam regnat in Libra, quod homines & hic & illa generandi libi-

dine vexat nocetque vexatis, ut inde posteritati proficit. Sed hæc quidem fecundat corpus, stimulatque fecundum. Ille mentem suo semine gravidam urget ad partum. Vos igitur prouerbij memores, Nequid nimis, assiduus prudentia frans parturientis vtriusque libidinem cohibere. Tamen si multo citius grauiusque ille lædit, quos tardio, torpore, mœrore, curis, superstitione premit, quam quos supra vires corporis moresque mortalium eleuat ad excelsa. Omnino verò seruare moneo, quod æquus Iupiter Pythagoram docuit & Platonem, humanam vitam in quadam æquali animæ ipsius cum corpore proportionem seruari vtrumque suis quibusdam alimentis & exercitationibus ali, ac similiter augeri. Si quis alterum educatione præcipue sua multo robustius altero tandem efficit, non mediocrem facit vitæ iacturam. Propterea quicumque inter res Medicorum arte laudatas potissimum eas eligit, quæ corpori simul & ingenio profunt, maximum vitæ sibi vendicat adiumentum. In earum verò numero vinum, mentam, myrobalanum, muscum, ambram, zinziber recens, thus, aloë, hyacinthum, similesque lapillos, herbasue confimiles esse putate, & quæ ad vtriusque utilitatem à Medicis pariter componuntur. Sed longioribus his quandoque interceptis ambagibus ego quoque Medicus huc accessi. Si saporibus ex rebus acceptis non ultra viuentibus, item odores ex aromatibus iam ficcis vitæque vacuis, multum ad vitam conferre censentur, quidnam dubitatis odores ex plantis, radicibus adhuc suis hærentibus viuentibusque, mirum in modum vitæ vires accumulatuos? Denique si vapores exhalantes ex vita dumtaxat vegetali magnopere vitæ vestrae profunt, quantum profuturos existimatis cantus ærios, quidem spiritu prorsus ærio, harmonicos harmonico, calentes adhuc viuosque viuo sensu præditos sensuali ratione conceptos rationali? Hanc ergo vobis à me fabricatam trado lyram, cantumque cum ipsa Phœbeum, solamen laborum, diurnæ vitæ pignus. Sicut enim res qualitate temperatissimæ simulque aromaticæ, tum humores inter se, tum spiritum naturalem secum ipso contemperant, sic odores eiusmodi vitalem spiritum, sic rursus similes quoque concentus spiritum animale.

Dum igitur fides in lyra sonosque, dum tonos temperatis in voce, similiter spiritum vestrum inuis contemperari putate. Ac ne ipse Venere sim auarior, quæ sine Baccho friget, ab hoc ipso Libero patre per me nectar hoc accipite. Qui præcipue

inter vos frigent, temporibus similibus bis septimo quoque die vncias vernacei, vel maluatici dulcis meri duas sumant cum vna panis vncia, tribus ante mensam horis. Semel autem drachmam vnam sublimis aquæ destillantis ex vino cum iulep rosacei semuncia. Quo quidem liquore illinire etiam cutem, & ad olfactum vti commodissimè possunt. Atque vt post eiusmodi nectar ambrosiam quæque vobis afferam, hanc insuper acceptam ab Ioue largior medicinam. Quatuor myrobalanorum vncias accipite chebularum, tres rosacei sacchari, conditi zinziberis, hyeme quidem vnciam, æstate verò semunciam. Tria hæc cum emblicarum melle concoquite suauiter, septemque aurifoliis exornate. Ieiuni bolum ante prandium quatuor horis accipite. Anno saltem integro quotidie id assumite, vt inde velut Aquilæ renouetur vestra iuuentus. Hactenus quasi Mercurium loquutum existimemus.

*Confirmatio superiorum, & vitandi coitus assidueque cogitationis præcepta.*

## CAPVT XVI.

**A**strologi Venerem & Saturnum inimicos inuicem esse ferunt. Cum verò in cœlo, vbi omnia mouentur, vbi defectus est nullus, odium esse nequeat, inimicos, id est effectū diuersos interpretamur. Mittamus in præsentia reliqua. Ecce nunc Saturnus quidem nobis in centro, Venus autem in circumferentia posuit voluptatem. Voluptas verò spirituum esca quædam est. Igitur ex opposito Venus atque Saturnus spiritus nostri volatum occupantur. Illa per voluptatem suam allicit ad externa, hic interim per suam ad intima reuocat. Distrahunt itaque spiritum, si fermè eodem tempore moueant atque dissipent. Quamobrem nihil contemplatori vel curioso pestilentius, quàm in venereus actus, nihil vicissim hunc sectanti alienius quàm cura & contemplatio esse potest. Contemplatorem verò Physicum religiosumque eodem in gradu connumeramus Et gradu simili quemlibet in negotiis suis valdè cogitabundum grauiusque curis obnoxium. Hinc rursus efficitur, vt si quem Saturnia vel contemplatione nimium occupatum vel cura pressum, leuare interim & aliter consolari velimus, per venereos actus, ludos, iocos, tentantes tanquam per remedia longè distantia, frustra atque etiam cum iactura conemur. Atque vicissim si quem venereo vel opere per-

ditum, vel ludo iocoque solutū moderrari velimus, per Saturnum seueritatem emendare non facillè valeamus. Optima verò disciplina est, per quædam Phœbi louisque, qui inter Saturnum Veneremque sunt mediij, studia similiaque remedia homines ad alterutrum declinantes, ad medium reuocare. Sed vt tandem simus Medici. Sicut flamma duobus communiter modis violentis extinguitur, aut velut difflata ventis, aut contra quasi compressa cineribus, sic spiritum vel celeriter effectū venereo dissipamus, vel sensim Saturnio suffocamus, ac sæpè exprimimus comprimendo, pariterque resolvimus. Spiritus vti que frequenter ad extima volans, intima reddit vel vacua vel aliena vitæ. Sed ad intima sæpè coactus, cætera circum membra præstat vitæ minus idonea. Citam igitur senectutem, tum Venus interioribus nostris, tum Saturnus exterioribus infert. Venus quidem præcipuè, vbi ex quouis eius motu facillè corpus debilitatur atque labascit. Saturnus quoque potissimum, quando ex quocunque contemplationis officio vel cura, labore, ingenij corporisq; vires labefactantur, & si vel qui ad contemplationem, vel qui ad libidinem natus est, plerumq; ad suum vterque officium est natura fortissimus. Natura enim sæpè coniungit cum voluptate simul & facilitate potentiam. Vnusquisque igitur se cognoscat, sui que ipsius moderator ac Medicus esto. Coitum quidem frequentaturi cæteros consulant. Ego verò exercitaturis ingenium libro etiam superiore consului, denique omni diætâ omnibus remediis vti debent, quibus membra, spiritus sensus, ingenium, memoria confirmantur, cogitationes per intervalla repetere, nec expectare, vel minimum ex cogitatione laborem, maximè verò quam primum canescunt, quamuis nonnulli sint qui non tam debilitate naturæ videlicet adhuc iuuenes canos emittunt, quàm vel ægritudine, vel ægrotatione aliqua præcedente, aut etiam parentum similitudine, à quibus scilicet iam canescentibus fuerint generati.

*Medicina senum, & de habitatione iterum atque diætâ.*

## CAPVT XVII.

**C**haldæorum regula est fortè probanda ad iuuentutem recuperandam, peregrinos humores imbibitos corpori expurgare gradatim, tum interiores competenti-  
bus Medicinis, tum exteriores frictioni-

bus & lauacris prouocationibusque sudoribus, intereaque salubribus duraturisque alimentis paulatim corpus implere. Sunt autem qui trochiscis quibusdam ex vipera factis, vel helleboro præparato, promittunt humores omnes veteres putridosque prorsus educere. Quibus expurgatis & humore rursum saluberrimo alimentis salutaribus recreato, restituere iuuentutem. Et qui cautiores sunt, helleboro gallinas pascunt, hominem verò gallinis. Eiusmodi verò curationem tanquam periculosa in iuuentute arbitror, potius quàm in senectute tentandam, ne fortè iuuentutem illam a Medæa Pelæi seni promissam experiamur. Nam & iuuenes Medicinis exquisitè purgantibus citò senescere Hippocrâtes asserit. Sed vbi diæta non sufficit, clystere, vel manna, vel aloë præsertim lota securus vteris. Si tibi sit alius astrictior, manna cum iure caponis myrobalanisque vtere. Sin minus, hac te iuuenem etiam in senectute purgatione seruabis. Sume vnciam lotæ aloës vnam, myrobalanorum emblicarum drachmas duas, chebularum quoque tantundem, duas item rosarum purpurearum, masticis quoque tantundem, maluatico vino confice pilulas, quando Luna feliciter collocata, propitio fruitur Iouis aspectu, præsertim si domicilia fixa possederit vel ipsa, vel Iuppiter. Hæc enim ad diuturnitatem vitæ magnopere conferunt. Potes etiam vtiliter Rheubarbarum hic cum aloë componere, scilicet dimidiam aloës partem, dimidiam rheubarbari, & quoties opus fuerit, vnam manè sumere pilulam ad tres vsque vel quinque, modicumque insuper vinum bibere. Vbi verò pituitam magis times, potes commodè in his pilulis trochiscorum agarici tertiam partem accipere vna cum tertiis aloës duabus, omisso rheubarbaro. Sed primam illam ego iam multis annis pilularum compositionem omni ætati experior esse tutissimam. Eadem hora confectionem eiusmodi facito. Sume myrobalanorum emblicarum, belliricarum, Indarum, chebularum, vnciam vniuscuiusque vnam, cinnamomi verò duas, vnam quoque doronici rosarum purpurearum vnam, sandalorum rubeorum duas, vnam croci drachmam, tertiam drachmæ partem musci, ambre tantundem, candidum post hæc cum aqua rosacea succoque citri fundito saccharum, coque, ac bolos, auroque inuolue. Hoc ante prandium quatuor horis sumentes atque dantes, vtiliter experti sumus ad virtutem corroborandam, ad illustrandum spiritum atque firmandum. Maximè verò proderit si paulum quid insuper vini aurei

biberis. Proderit & sæpè calefactum panem aureo mero & rosacea aqua perfundere, & modico insuper cinnamomo saccharoque vberiore condire. Frequenter etiam duo hæc cum lacte amygdalino & modico pane misce, nam eiusmodi mixtiones naturam referunt Iouialem. Præter omnia quæ in superioribus explicauimus, vel saltem significauimus, ab iis omnes urbani diligenter cauere debent, æstu, gelu quolibet, vel post calorem frigore vel nocturno, nebulis, ventis, vel ex palude flantibus, vel irumpentibus ex angusto, locis item vbi aer vel mouetur violentius, vel nullo modo mouetur. Habitatione quauis humidior, foetore, mœrore, torpore. Diligentius autem Mercurij sectatores, diligentissimè senes. Qui præterea postquam manè corpus totum leniter perfricuerint, delinient ipsum aduersum aeris & laboris incommoda, calente oleo vel vino quopiam subamaro, cui prius infuderint myrrham & rosam atque myrtum. Saluiam frequenter ore ferant, neruis ac dentibus amicissimam. Et quando dentium vitio liquida, velut infantes, alimenta repetere cogantur, mollissima caneant. Lac quidem vino referant moderato. Utantur igne dumtaxat vt Medicina, quantum videlicet expellendi frigoris & fuscitandi caloris innati necessitas postulat, alioquin tanquam edace humorem naturalem exiccatur. Solem verò quoad delectat sequantur vt alimentum, distillatione vitata, & æstu similiter declinato. Faciles quidem motus diligant, excitando calori admodum necessarios. Labores autem corporis oderint, & multo magis animi, nec minus longam sitim, & incediam atque vigiliam.

*De nutrimento spiritus, & conseruatione vite per odores.*

## C A P V T XVIII.

**L**Egimus in calidis quibusdam regionibus, ac plurimo passim odore fragrantibus, multos gracili corpore & imbecillo stomacho, quasi solis odoribus ali. Fortè quoniam ipsa natura loci, tum herbarum & frugum, atque pomorum succos fermè totos redigit in odores, tum corporum humanorum humores illic resoluit in spiritum. Cum igitur vterque, videlicet odor & spiritus sit vapor quidam, & simile simili nutriatur, nimirum & spiritus & spiritalis homo, plurimum ab odoribus accipit alimentum. Nutrimentum verò qualecunque id sit, per odores



finē fomentum, apprime senibus & gracilibus necessarium est, quo defectum alimenti solidioris atque verioris utunque compensare possimus. Ambigere tamen nonnulli solent, utrum spiritus odoribus nutriatur. Ego autem opinor solis forsan ita nutriri, ut nisi alimenta quæ crassa sunt digestionē, in vapores extenuentur, spiritus ipse, quem diximus vaporem esse, nullum illinc suscipiat nutrimentum. Itaque vinum odore plenum, spiritum subito recreat, quem cætera vix tandem reficere possunt. Vaporem verò illum in quem cibi cocti denique transferuntur, ideo appellamus odorem, quoniam & odor ubique vapor quidam est, & hic tractus intus ex alimentis vapor, nisi spiritui quodam odore placeat, vix ullum spiritui exhibet alimentum. Quamobrem Auicennam nostrum valdè probamus dicentem, corpus quidem dulcedine, spiritum verò quadam (ut eius verbis utar) aromaticitate nutriri. Quoniam crassitudo corporis non nisi crassa natura, qualis est in dulcedine, coalescere valeat. Tenuitas verò spiritus non alio quàm fumo quodam atque vapore, in quo aromaticitas ipsa viget, refici possit. Aromaticam verò qualitatem dicimus odorem & acutam, & quodammodo stypticam. Proinde, quoniam iecur quidem corpori per sanguinem alimentum præstat, dulcedine plurimum augetur. Cor autem, quia & creat spiritum, & spiritui procreat alimentum, meritò desiderat aromatica. Expediit tamen & aromatica pro corde condiri dulcedine, & dulcia pro iecore aromaticis commisceri, dulcedinemque interea nimiam euitare. Quid plura? Galenus ipse sequutus Hippocratem, spiritum non solum odore putat nutriri, sed aëre. Aëre inquam non simplici, sed potius opportunè permixto. Quibus quidem si fidem habebimus, nec alimentorum, nec rei ullius delectum magis ad vitam necessarium, quàm aëris nobis accommodati, esse censebimus. Aër enim & inferiorum & cœlestium qualitatibus facillimè semperque affectus, & immensa (ut ita dixerim) amplitudine circumfusus, perpetuoque motu nos undique penetrans, ad suam nos mirabiliter redigit qualitatem, præsertim spiritum præcipuè vitalem in corde vigentem, in cuius penetralia, tum assidue influit, tum repente, sic protinus afficiens spiritum ut est affectus, perque spiritum vitalem, qui & materia & origo est spiritus animalis, pariter afficiens animalem. Cuius quidem qualitas maximi momenti est ingeniosis eiusmodi spiritum plurimum laboran-

tibus. Itaque ad nullos potius quam ad eos attinet puri luminosique aëris odorumque delectus, atque Musica. Hæc enim tria spiritus animalis fomenta præcipua iudicantur. Potissimus verò ad vitam est aër electus. Nam octavo mense nati in Ægypto plurimi viuunt. & nonnulli in plagis Græciæ temperatis saluberrimi aëris beneficio, quod Aristoteles narrat, & Auicenna confirmat. Sed profecto sicut corpus ex variis compositum, variis (quamvis non eadem immensa) nutriendum est alimentis, ita spiritus similiter compositus varietate quadam aëris semper electi oblectandus est atque fouendus. Simili quoque electorum varietate quotidie recreandus. Nam aër & odor quasi spiritus quidam esse videntur. Id verò Alexander, & Nicol. Peripatetici unà cum Galeno concludunt spiritum vitalem & animale idèò nutriri tum odore, tum aëre, quoniam uterque mixtus est atque conformis, & utrumque haustum in præcordia penetrare, ibi coqui temperarique ad vitam, perque arterias diffundi. Vbi uterque coctus iterum nutrit spiritum (ut aiunt) utrumque, præcipuè animale. Aiunt etiam spiratum aërem non solum refrigerando calori prodesse, sed etiam nutriendo. Nam & animalia etiam valdè frigida spirant. Addunt aërem crassiorē spiritui naturali tanquam magis corporeo conuenire, subtilem verò, purum, lucidum, spiritui potius vitali, potissimum animali. Neque mirum videri debet spiritum adèò tenuem rebus quoque tenuibus ali. Siquidem & pisciculi multi aqua nitidissima nutriuntur, & ozimum in aqua simili viuit, crescit, floret, redolet. Mitto quibus elementis chameleontem & salamandram nutriri ferant. Redeamus ad nostra. Interest certè quamplurimum qualem spirem aërem, quales hauriamus odores. Talis enim & spiritus in nobis euadit. Eatenus verò, nos anima per vitam vegetat, quatenus spiritus harmoniam seruat cum anima continentem. Spiritus quidem in nobis primus viuit & maximè, & quasi viuit solus. Nonne repente quodam sæpè casu vel affectu, vita, sensus, motus, subito membra deserunt, regresso videlicet ad cordis penetralia spiritu? & sæpè statim reuertuntur ad membra, per frictiones & odores illuc spiritu redeunte, quasi vita in ipso spiritu videlicet reuolati potius insit quàm humoribus aut membris. Alioquin propter horum crassam tenacitatem tardius admodum accederet vita membris atque recederet. Quicumque igitur vitam in corpore producere cupitis, spiritum in primis excolite, hunc augete nutrimentis sangui-

nem argentibus, temperatum videlicet atque clarum, hunc aëre semper electo fonte, hunc quotidie suauibus odoribus alite, hunc sonis & cantibus oblectate, sed inter ea odores cauete calidiores, frigidiores fugite, capeffite temperatos, frigidos calidis, liccos humidis temperate. Odorem verò omnem, quia pars corporis subtilissima est, scitote nonnihil habere caloris, atque ex rebus quæ ipsæ nutriunt, odores sperate potius nutritos, vt ex aromatico pyro pomoque persico, similique pōmo, magis autem recente pane, calente, maximè carnibus assis, quàm maximè vino, atque si vt sapor qui mirificè placet, plurimi velocisque nutrimenti causa est vel occasio corpori; sic odorem ad spiritum se habere putate. Commemorare vobis iterum placet Democritum iam iam expiraturum, vt obsequeretur amicis, spiritum ad quadriduum vsque olfactu calentium panum retinuisse, vltèrius etiam, si modo placuisset, spiritum seruaturum. Sunt & qui dicunt id mellis odore fecisse. Ego, si modo vsus est melle, existimo illum mel vino liquefactum albo, calentibus panibus infudisse. Neque enim spernendus est mellis odor. Flos namque florum mel existit, nec parum nutrit ipsa dulcedine, ac diu qualitate sua res integras à putrefactione tuetur. Itaque si quis nouerit hoc etiam ad cibum ita vesci, vt nec dulcedine nimia meatus oppleat; nec tali quodam calore bilem exaugeat, certum habebit longioris vitæ subsidium. Saltem igitur condimentum hoc frigidis & humidis adhibete. Verum vt vos reuocem ad odores. Vbicunque suffocationem, compressiōnemque spirituum nimiam extimescitis, quod moeror frequens torporque portendit, odores circumfusus amate. Vbi verò fugam exhalantium spirituum expauescitis, odores potius infusos nutrimenti accipite. Et si quid odorum præterea foris sumitis, velut clypeum costis dumtaxat ad mouete sinistris. Nonne videtis quam repente sursum vel deorsum ad odores se matrix ipsa præcipiret? quàm velociter ad os, ad nares spiritus aduolet, suauis odoris esca pellectus? Vbi igitur spiritus vel exiguus vel fugacissimus esse deprehenditur, quod pusillanimitas sæpè declarat corporisque debilitas, vel parua de causa multa contingens, odoribus non tam extrinsecus obiectis, quam intrinsecus iniectis allicite, imò potius pascite, retinete. Odorem verò vini ante omnes eligite. Multum namque nutrit spiritum odor exhalans ex natura tum plurimum & velociter nutriente corpus, tum voluptate sensum afficiente. Tale verò vi-

num est præ cæteris calidum, humidum, & odoratum atque clarum. Tale etiam saccharum esse dicitur, si sumat odorem. Cinnamon quoque simile & doronicum, anisumque & dulce marathrum, si acumini suo ad exiguam dulcedinem adderent amplior. Sed quam temperiē natura non fecit, vobis ipsi conficite. Et quoties distractionem spirituum formidatis, calidioribus acutioribusque & subtilissimis adhibete, quæ cohibere parumper volatum spiritus ac sistere valeant, ceu crocò, gariophyllis, cinnamomo, adustum panem, rosaceam aquam, acetumque rosaceum, rosam, myrtum, violam, sandalum, coriandrum, cydonium pomum atque citrum. Hordeo verò camphoram vbi contrà canitiem est agendum. Recentem verò semper mentham diligo, menti etiam salutem spirituique tutissimam.

Denique, mementote res omnes veneno contrarias, esse vitæ admodum salutare, non gustu tantum, sed etiam odoratu, maximè theriacam. Has verò in libro contra pestilentiam enarrauimus, narrabimus & in libro sequenti. Inter eas autem, ne quid vos lateat, numeramus & vinum. Nam sicut homini venenum est cicuta, ita cicutæ vinum, non simul quidem, sed paulò post ebibitum. Ac ne solis vos odoribus illic alliciam, componendum vobis mando electuarium quotidie mane gustandum, olfactu gustuque suaue, & vitæ admodum salutare. Accipite tres chebularum vncias; vnam emblicarum, & Indarum vnam, vnamque bellicarum, semiunciam verò doronici, cinnamomi vncias duas, croci drachmam vnam, ambraë partem drachmæ tertiam, musci quoque tantundem. Contundite diligenter, tantum rosacei sacchari adhibete, quantum gustui satis facit. Sandalorum rubentium, quantum sat est colori, mellis item emblicarum vel chebularum quantum molli expedit electuarij formæ. Auri folia totidem quot prædictæ sunt vnciæ. Vbi verò difficilior est compositio multiplex, experti sumus hanc simplicem hanc optimam esse, scilicet ex chebulis, marathro dulci, saccharo, aqua rosacea liquefacto, sumptam vero tum ieiuno stomacho, tum post cœnam. Memineritis autem myrobalanos conditas meliores esse, siccas vero saltem diem integrum oleo amygdalarum dulcium, vel butyro vaccino prius infundite quàm conficetis. Probat & Auicenna vobis confectionem ex emblicis atque Indis cum melle anachardorum coctoque butyro. Item che-

bulas cum zinzibere & squama ferri, & potius auri. Probat item Petrus Aponensis compositionem ex croco, mace, castoreo, per partes acceptis atque confusis, & vino commixtis. Vnde affirmat vitam etiam propemodum moribundis produci consuevisse. Denique Haly Astrologus, Medicusque excellens, asserit vsu triphera similiumque rerum vitam effici longiorem. In omni vero triphera myrobalanus fundamentum est, sed hanc temperant subtilius quibusdam atque mollibus, præsertim ubi sicciior est myrobalanus, ut & penetret, nec meatus obstruat, nec aluum exciccet nimium vel astringat. Cum vino præterea commodissime vitumur, sed modico, ne fortè diluat. Compositionem vero Petri, quam modò narrabam, si modò utilis est, arbitror olfactu potius quàm potu utilem fore.

*Magorum medicina pro senibus.*

### C A P V T XIX.

**M**agi stellarum obseruatores, ad Christum vitæ ducem stella duce venerunt pretiosum vitæ thesaurum offerentes, Aurum, Thus & Myrrham; tria dona pro tribus Planetarum dominis stellarum Domino dedicantes. Aurum quidem pro temperamento Iouis maximè omnium temperatum. Thus autem pro Sole, præcipuè Phœbeo, calore simul odoreque flagrans. Myrrham denique firmantem corpus atque confirmantem pro Saturno omnium firmissimo Planetarum. Huc igitur omnes ad sapientes Magos venite senes, munera vobis quoque vitam productura ferentes, quibus authorem vitæ quondam venerati traduntur. Venite senes, inquam, senectutem graniter tolerantés. Venite & vos præterea, quoscunque senectutis propemodum aduentantis formido sollicitat. Accipite, precor, alacres vitalia dona. Sumite uncias quidem thuris duas, vnam verò myrrhæ, auri rursum in folia ducti dimidiam drachmæ partem; contundite tria simul, constate, confundite in pilulas, aureo quodam mero, idque tunc opportunè conficite, quando Diana propitio Phœbi vel Iouis gaudet aspectu. Sumite posthac thesauri tanti aurora qualibet portiunculam, ac exiguo perfundite meri potu, nisi forsan incaluerit æstas. tunc enim aquam rosaceam bibere præstat. Siquis autem inter vos calorem quouis tempore magis metuat, is myrobalanum, chebulam aut emblicam

æqualem ad thuris, myrrhæque & auri simul pondus adiciat. Hoc humorem proculdubio naturalem putrefactione tuebitur. Hoc humoris resolutione longius propulsabit. Hoc res in vobis spiritus, naturalem, vitalem, animale[m] fouebit, confirmabit, corroborabit. Hoc rursum vegetabit sensum, acuet ingenium, memoriam conseruabit.

*De periculis vitandis ex quolibet vite septenario imminetibus.*

### C A P V T XX.

**Q**uam Astronomi singulas deinceps dici horas Planetis ordine singulis distribuerint, similiterque septem hebdomadæ dies, atque in ipso sortu menses digesserint officia Planetarum, cur non etiam per annos eadem disponamus? ut quemadmodum infantem in alio latentem rexit primo mense Saturnus, ultimo Luna, sic statim natum ordine iam conuerso, primo ipsius anno ducat Luna, secundo (si vis) Mercurius; tertio, Venus; quarto, Sol; quinto, Mars; sexto, Iupiter; septimo verò Saturnus; atque deinceps ordo per vitam similis repetatur. Itaque in septimo quolibet vitæ anno, fit in corpore mutatio maxima, ideoque periculosissima, quandoquidem & Saturnus nobis communiter est peregrinus, & ab eo tunc Planetarum summo ad Lunam euestigio Planetarum infimam gubernatio redit. Hos annos Astronomi Græci Climactericos nominant, nos Scalares, vel Gradarios, vel Decretorios appellamus. Fortè verò in morbis ipsum humoris vel naturæ motum Planetes per dies eodem ordine regunt, vnde & septimus quisque eadem ratione Iudiciarius appellatur. Quartus quoque, quoniam medium in septenario tenet. Tu igitur si vitam producere cupis ad senectutem, nullis eiusmodi gradibus interruptam, quoties septimo cuilibet propinquas anno, consule diligenter Astrologum. Vnde immineat tibi discrimen ediscito, deinde vel adito Medicum, vel prudentiam & temperantiam accersito. His namque remediis prohiberi minas Astrorum Ptolemæus etiam confitetur. Addit quinetiam astrorum promissa sic augeri posse, ut agrorum cultor augeat terræ virtutem. Probat Petrus Aponensis argumentationibus multis & testimonio Aristotelis, Galeni, Haly, naturalem vitæ finem non esse ab initio ad vnguem determinatum, sed ultra citraque moueri

posse. Idque asserit tum ex astris, tum etiam ex materia. Concludit his Authoribus rationibusque obitum etiam naturalem differri posse, cum Astrologiæ machinis, tum præsidis Medicorum. Igitur neque nos temere in his præceptis elaboramus. Neque te pigeat perquirere à Medicis quæ naturaliter tua sit dixta, & ab Astrologis, quæ stella vitæ faueat, & quando hæc bene se habet, & ad eam Luna, compone quæ prodesse didiceris. Neque pudeat sæpe illos auscultare, qui non tam fortuna, quam virtute senectutem prosperam consequuti videntur. Præterea Ptolemæus, & cæteri Professores Astronomiæ, imaginibus quibusdam ex certis lapidibus & metallis sub certo sydere fabricatis, vitam prosperam pollicentur atque longæviam. Verum de imaginibus quidem ex parte, ac plurimum de reliquo favore coelesti Commentarium componimus in Plotinum, quem librum huic operi deinceps subiiciendum existimamus, quemadmodum hoc post librum scribi volumus, quem de Curanda literatorum valetudine composuimus. Favorem verò coelestem, quem modò dicebam, pro iuventute longa, tunc quantum quasi Poëtæ cuidam licet loqui, quantum rursus Medico licet facere, à Phœbo Bacchoque petemus.

*Solis aterna est Phœbo Bacchoque inuentus,*

*Nam decet intonsus crinis utrumque Deum.*

Phœbus & Bacchus semper indiuidui fratres sunt, ambo ferè sunt idem. Phœbus quidem est ipsa spheræ illius anima, spheræ verò Bacchus, imò & Phœbus est totus ipse spheræ circus, Bacchus autem est flammeus ille in hoc circo circulus, imò verò Phœbus est alium in hoc flammeo glo-

bo lumen. Bacchus autem existit ibidem salutaris ex lumine calor. Semper ergo fratres comitesque sunt, ferè semper alter & idem. Quid verò? si Sol in Vere quidem Phœbus est, cantu suo tunc autum cantus excitans, cithara rursus tempora temperans, in autumno verò Sol idem autor vini Bacchus existit. Tria nobis ad seruandam iuventutem pater ille Liber, qui amat colles, Bacchus affert, hos quidem apricos primum celles, in his autem collibus suauissimum præcipuè vinum, perpetuam in vino securitatem. Tria quoque Phœbus Bacchi frater pari benignitate largitur, diurnum primo lumen, sub fomento luminis herbas suauiter redolentes, ad luminis huius umbram, citharam cantumque perennem. His ergo pensis potissimum, his staminibus Clotho nobis iam non Parca longa vitæ fila producet. Tres Parcas ferè omnes Poëtæ canunt. Tres quoque nos non Poëtæ canimus. Prudens quidem in omni victu parcitas, vitam nobis longam inchoat, constans quoque in curis subeundis parcitas producit vitam, parcitas verò in coelo fruendo negligens vitam occat. Tres Pythagoras temperantius ante omnia celebrat, tres etiam nos in præsentia celebramus. Temperantiam in affectibus conseruato, temperantiam in omni victu seruato, temperiem aëris obseruato. Hac enim providentia humorum intemperiem, quæ citæ senectutis & intempestivæ mortis causa est, aspirante Deo, procul admodum propulsabis. Aspirabit autem author ille vitæ, si ea tantum conditione vitam optaueris diuturnam, ut diutius cum genere humano viuas illi, quo mundus totus inspirante viuit.

*De vita producenda libri II. finis.*



# MARSILII FICINI FLORENTINI.

IN LIBRUM III. DE VITA  
*Cœlitus comparanda,*

*Ad Serenissimum Pannonia Regem Epistolare*

P R O O E M I V M.



*Philosophi veteres ( Rex omnium felicissime ) cœlestium vires inferiorumque naturas diligentissime perscrutati, cum existimarent hominem frustra sapere, qui*

*sibi non sapit, totam merito perscrutationem suam in primis ad vitam sibi cœlitus comparandam retulisse videantur, iudicantes ( ut arbitror ) tum elementa, & qua ex his componuntur frustra sibi cognita fore, tum motus cœlestium & influxus temerè nimium observatos, nisi hæc una cum illis cognita simulatque coniuncta, aliquando sibi ad vitam felicitatemque conducerent. Profuit autem illis, ut videtur, eiusmodi contemplatio ad vitam primo præsentem. Nam Pythagoras & Democritus, Apolloniusque Thecaneus, & quicumque ad id potissimum studuerunt, rerum sibi cognitarum usu prosperam valetudinem consequuti sunt, vitamque longævam. Constat insuper ad futuram vitam, tum per gloriam apud posteros propagandam, tum apud Deum in æternitate fruendam. Siquidem ex mirabili mundi totius ordine, eius tandem cognovere rectorem, & ante omnia cognatum amauerunt. Tibi verò gloriam per secula cuncta futuram, magnanimitas, magnificentia, victoria perpetua pollicentur. Vitam*

*quoque apud Deum in auro beatam d'ivina clementia, insigni pietati tua iustitiaque promittit, Vitam denique prosperam inter mortales satisque longam ( quantum ex indiciis quibusdam mihi licuit cōnectare ) felicia tibi sydera decreverunt. Ut autem quod pollicentur id & præstent firmissima fide, & cumulo insuper provogent pleniore, diligentia tua, & Medicorum Astrologorumque cura efficere proculdubio potest. Iam verò id posse scientia & prudentia fieri, doctissimique quique Astrologi ac Medici consentunt. Cum igitur inter Plotini libros magno Laurentio Medici destinatos, in librum Plotini de Faure cœlitus hauriendo tractantem, nuper Commentarium composuisssem, inter cetera in eum nostra Commentaria numeratum, id quidem seligere nunc, Laurentio quidem ipso probante, atque maiestati tue potissimum dedicare decreui. Spero equidem, dum vitæ tuæ prosperitatisque consulam, vitæ interim, & splendari seculi nostri, & humani generis consulturum. Atque ut valetudini prosperitatisque regie, validius hæc nostra prodesse, per Valorem ipsum mittenda putavi. Hunc tu igitur Valorem nostrum clementissime Rex, complectere precor. Tantum enim natura, virtus, authoritas tua valet, ut absque te nequeat vel Valor ipse valere. X. Iulij M. CCCC. LXXXIX. Florentia.*





# MARSILII FICINI FLORENTINI, AD LECTOREM EXHORTATIO.



Salve hospes ingeniose. Salve iterum quisquis es salutis avidus, qui nostra ad limina tendis. Vide precor, hospes cupide primum, quam hospitalis sim. Intransit erat certè, salutem statim hospitio dicere. Ego verò salute præueniens, mox prospectum saluere te iussi. Intransit & adhuc ignotum perlibenter excepi. Trahentem apud me moras, promissa (si Deus aspirauit) salute donabo. Hospitium ergo nactus es amicum quidem omnibus, & amoris erga te nunc plenum. Si quid fortè fers tecum amoris contrarium, siquid odij habes, prius ponito precor, quam medicinas hæc vitales attingas. Vitam enim tibi dedit amor, voluptasque parentum. Vitam vitissim demit odium atque dolor. Quem igitur odiosus vexat dolor, huic nullus vsquam Medicinæ vitali relictus est locus. Quamobrem deinceps te non ut hospitem tantum alloquor, sed amicum. Officina Marsilij tui aliquanto est amplior, quam his cancellis dumtaxat, quos hic vides, coercetur. Non enim solo hoc libro sequente, sed duobus etiam præcedentibus circumscribitur. Tota verò summam quædam est pro viribus opinatura vitæ, ut valida tibi vita sit, & longa. Idque ubique Medicorum ope cœlinus adiuta molitur. Varia sanè pro diuersis hominum ingeniis atque naturis nostra hæc

officina, antidota, pharmaca, fomenta, vnguenta remedia profert. Si qua tibi fortasse minus placeant, mittito quidem ista, cætera propterea ne respuito. Denique, si non probas imagines Astronomicas, alioquin pro valetudine mortalium adiuentas, quas & ego non tam probo, quam narro, has utique me concedente, ac etiam, si vis, consulente, dimitto. Medicinas saltem cœlesti quodam adminiculo confirmatas, nisi fortè vitam neglexeris, haud negligito. Ego enim frequentiam diu experientia compertum habeo, tantum interesse inter medicinas huiusmodi, atque alias absque delicto Astrogo factas, quantum inter merum & aquam, ut etiam infans octauo à cōceptione mense natus Florentiæ mense Martio, nocte ascendente, Saturno retrogrado seminiuus, cuiusmodi diligentia videatur à nobis, imò à Deo, quasi vitæ redditus potius, quam seruatus, trienniumq; validus ferme iam impleuerit. Iam verò si præter ea generis eiusdem plura narrauerò, vera loquar. Nec gloriabundus (quod est à Philosopho penitus alienum) sed exhortabundus potius afferam. Verum satis iam partim quidem conciliantes, partim etiam exhortantes alloquuti te sumus. Deinceps igitur cum Plotino loquamur, ita demum tibi diligentius con-

(..)

sulturi.

(..)

# MARSILII FICINI FLORENTINI.

## LIBER DE VITA COELITVS · COMPARANDA,

Compositus ab eodem inter Commentaria  
eiusdem in Plotinum.

*In quo consistat, secundum Plotinum, virtus fauorem coelitus attrahens;  
scilicet in eo quod animam mundi, & stellarum demonumq; animæ  
facile alliciuntur corporum informis accommodatis.*

(::)

C A P V T P R I M V M.

(::)



I tantum hæc duo sint in mundo, hinc quidem intellectus, inde verò corpus, sed absit anima, tunc neq; intellectus trahetur ad corp<sup>9</sup> (immobilis enim est omnino, caretq; affectu motionis principio, tanquã à corpore longissimè distans) neque corpus trahetur ad intellectum, velut ad motum per se inefficax & ineptum, longæque ab intellectu remotum. Verum si interponatur anima vtrique conformis, facile vtrunque & ad vtraq; fiet attractus. Primò quidem ipsa omnium facillime ducitur, quoniam primum mobile est, & ex se & sponte mobile. Præterea cum (sicut dixi) media rerum omnia suo in se modo continet, & vtrunque ratione propinqua. Ideoq; conciliatur & omnibus, etiam æqualiter illis quæ inter distant ab ea, videlicet non distantibus. Præter enim id quod hinc quidem conformis est diuinis, inde verò caducis, & ad vtraque vergit affectu, tota interim est simul vbique. Accedit ad hæc quod anima mundi totidem saltem rationes rerum seminales diuinitus habet, quot ideæ sunt in mente diuina, quibus ipsa rationibus totidem fabricat species in materia. Vnde vnaquæque species per propriam rationem seminalem propriæ respondet ideæ, facileque potest per hanc sæpè aliquid illinc accipere, quan-

do quidem per hanc illinc est effecta, ideoque si quando à propria forma degeneret, potest hoc medio sibi proximo formari rursus, perque id medium inde facile reformari, ac si certè cuidam rerum speciei vel indiuiduo eius ritè adhibeas multa, quæ sparsa sunt, sed etiã ideæ conformia. Mox in materiam hanc ita opportunè paratam, singulare munus ab idea trahes, per rationem videlicet animæ seminalem. Non enim intellectus ipse propriè, sed anima ducitur. Nemo itaque putet certis mundi materiis trahi numina quædam à materiis penitus segregata, sed daemones potius animatique mundi munera stellarumque viuentium. Nemo rursus miretur per materiales formas animam quasi allici posse. Siquidem escas eiusmodi sibi congruas ipsamet quibus alliceretur, effecit, & semper libenterque habitat in eisdem. Neque in mundo viiente toto quicquam reperitur tam deforme, cui non adsit anima, cui non insit & animæ munus. Congruitates igitur eiusmodi formarum, ad rationes animæ mundi, Zoroaster diuinas illices appellauit, quas & Synesius magicas esse illecebras confirmauit. Nempè denique credat ad propriam quandam materiæ speciem, & tempore certo hauriri omnia prorsus ex anima dona, sed pro opportunitate dona dumtaxat seminis quo talis species pullulauit, seminumque conformium.

Itaque hic homo humanis tantum adhibitis, non proprias piscium vel animi dores inde sibi vendicat, sed humanas atque con-  
similes. Adhibitis autem quæ ad stellam ta-  
lem pertinent atque dæmonem, stellæ dæ-  
monisque huius proprium subit influxum,  
velut lignum per sulphur paratum ad flam-  
mam ubique præsentem. Atque hunc non  
modo per ipsos stellæ dæmonisque radios,  
sed etiam per ipsam mundi animam ubi-  
que præsentem, in qua & cuiuslibet stellæ  
dæmonisque ratio viget, partim quidem se-  
minalis ad generandum, partim etiam ex-  
emplaris ad cognoscendum. Hæc enim  
secundum Platonicos antiquiores, ratio-  
nibus suis ædificauit ultra stellas in cœlo fi-  
guras, partesque ipsarum tales, ut ipsæ quo-  
que figuræ quædam sint, impressitque his  
omnibus proprietates. In stellis autem, fi-  
guris, partibus, proprietatibus, omnes re-  
rum inferiorum species continentur & pro-  
prietates earum. Vniuersale verò figuras oc-  
to posuit atque quadraginta, scilicet in zo-  
diaco duodecim, extra verò sex atque tri-  
ginta. Itē in zodiaco triginta sex ad nume-  
rum facierū. Rursus ibidem ter centū atq;  
sexaginta ad numerū graduum. In quouis  
enim gradu sunt stellæ plures, ex quibus ibi  
conficiuntur imagines. Similiter imagi-  
nes, extra zodiacum in plures diuisit figu-  
ras, pro facierum ibidem graduumque suo-  
rum numero. Constituit denique ab ima-  
ginibus his vniuersalibus ad vniuersales  
imagines habitudines & proportionem qua-  
dam, quæ ipsæ quoque imagines illic exi-  
stunt.

Eiusmodi verò figuræ continuitatem  
quæque suam habent ex radiis stellarum  
suarum in se inuicem, peculiari quadam  
proprietate coniectis. A quibus formis or-  
dinatissimis dependent inferiorum formæ,  
illinc videlicet ordinatæ. Sed & cœlestes  
illæ tanquam inter se disiunctæ, proce-  
dunt à rationibus animæ coniunctis inui-  
cem, & quodammodo mutabiles à stabili-  
bus. Sed hæc quatenus seipsas non compre-  
hendunt, referuntur ad formas in mente vel  
animali vel eminentiore sese comprehen-  
dentes, quæ tanquam multiplices ad sim-  
plicissimum rediguntur vnum atque bo-  
num, sicut figuræ cœlestes ad polum. Sed  
redeamus ad animam. Quando igitur ani-  
ma gignit speciales inferiorum formas vi-  
resque, eas per rationes efficit proprias, sub  
stellarum formarumque cœlestium admini-  
culo. Singulares verò indiuiduorum do-  
res, quæ sæpè nonnullis insunt tam mirabi-  
les quam in speciebus esse solent, exhibet  
per seminales similiter rationes, non tam

sub adminiculo formarum figurarumque  
cœlestium, quam situ stellarum & habitu  
motionum, aspectuumque Planetarum,  
tum inter se, tum ad stellas Planetis subli-  
miores. Anima quidem nostra ultra vires  
membrorum proprias, communem ubique  
promit in nobis vitæ virtutem, maximè ve-  
rò per cor, tanquam ignis animæ proximi  
fontem. Similiter anima mundi ubique vi-  
gens per Solem præcipuè suam passim ex-  
plicat communis vitæ virtutem. Vnde qui-  
dam animam & in nobis & in mundo, in  
quolibet membro totam, potissimum in  
corde collocant atque Sole. Semper verò  
memento sicut animæ nostræ virtus per spi-  
ritum adhibetur membris, sic virtutem ani-  
mæ mundi per quintam essentiam, quæ ubi-  
que viget, tanquam spiritus intra corpus  
mundanum, sub anima mundi dilatari per  
omnia, maximè verò illis virtutem hanc in-  
fundi, quæ eiusmodi spiritus plurimum hau-  
serunt.

Potest autem quinta hæc essentia à no-  
bis intus magis magisque assumi si quis sci-  
uerit eam aliis elementis immixtam pluri-  
mum segregare, vel saltem his rebus fre-  
quenter vti, quæ hac abundant, puriore  
præsertim, ceu electum vinum & saccha-  
rum, & balsamum atque aurum, preciosi-  
que lapilli, myrobalanique, & quæ suauis-  
simè redolent, & quæ lucent, maximè ve-  
rò quæ in subtili substantia qualitatem ha-  
bent calidam, humidamque & claram,  
quale præter vinum, est albissimum saccha-  
rum, præsertim si huic adhibueris aurum,  
odoremque cinnami atque rosarum. Præ-  
terea sicut alimenta ritè in nobis assum-  
pta, per se non viuæ, rediguntur per spi-  
ritum nostrum ad vitæ nostræ formam, sic &  
corpora nostra ritè accommodata corpo-  
ri spirituique mundano, videlicet per res  
mundanas, & per nostrum spiritum, hau-  
riunt ex vita mundana quamplurimum. Si  
volueris ut alimentum rapiat præ cæteris  
formam cerebri tui vel iecoris atque sto-  
machi, simile quantum potes accipe ali-  
mentum, id est, cerebrum, & iecur, & sto-  
machum animalium ab humana natura  
non lōgè distantium. Si optas corpus tuum  
atque spiritum ex aliquo mundi membro,  
videlicet ex Sole, virtutem accipere, quæ-  
re quæ ante alia sunt Solaria inter metalla  
lappillosque, magis autem inter plantas, sed  
inter animalia magis, maximè inter homi-  
nes. Similiora enim tibi magis proculdubio  
conferunt. Hæc & extra sunt exhibenda,  
& intus pro viribus assumenda, præsertim  
in die & hora Solis, & Sole in figura cœli  
regnante Solaria verò sunt omnia ex la-

pillis & floribus quæ heliotropia nominantur, quia vertuntur ad Solem. Item aurum & auripigmentum, aureique colores, chrysolithus, carbunculus, myrrha, thus, muscus, ambra, balsamum, mel flauum, calamus aromaticus, crocus, spica nardi, cinnamomum, lignum aloës, cæteraque aromata, aries, altur, gallus, olor, leo, cantharis, crocodillus, homines flauï, crispï, sæpè calui, magnanimi, superiora partim cibariis, partim vnguentis, suffumigationibus, partim vsui accommodari possunt. Hæc sentienda, & cogitanda frequenter, & in primis amanda. Et luminis plurimum est quærendum. Si dubites ventrem ab iecoris fomento destitui, trahe ad ventrem iecoris facultatem, tum frictionibus, tum fomentis per ea quæ iecori congruunt, per cicoream, endiuïam, spodium, eupatorium & hepaticam, atque hepata. Similiter ne destituatur tuum corpus ab Ioue, moue corpus in die, horaque in regno Iouis, & vttere interim Iouialibus, argento, hyacintho, topazio, corallo, crystallo, berillo, spodio, saphyro, viridibus aëriisque coloribus, vino, saccharo albo, melle, & cogitationibus affectionibusque plurimum Iouialibus, id est, constantibus, æquis, religiosis atque legiferis. Et inter homines eiusmodi, sanguineosque & pulchros, venerabilesque versantor. Sed memento primis illis rebus frigidis inferendum esse aurum & vinum, menthamque & crocum. Animalia verò Iouialia esse agnum pauonemque, & aquilam & iuuenicum. Quomodo verò virtus Veneris attrahatur turturibus, columbis & motacillis, & reliquis, non permittit pudor ostendere.

*De concordia mundi, & de natura hominis secundum stellas. Quomodo fiat attrahitus ab unaquaque stella.*

## C A P V T II.

**N**eq; verò diffidere debet quisquam, nos atque omnia quæ circa nos sunt, præparamentis quibusdam posse sibi vindicare coelestia. Nam cœlitus hæc facta sunt, assidueque reguntur, & illinc in primis præparata sunt ad illa. Et quod maximum est, mundus animal in se magis viuum est, quàm quoduis aliud animal perfectissimum. Ergo sicut in nobis membri cuiuslibet, præsertim principalis qualitas motusque ad alia pertinet, ita membrorum principalium actus in mundo commouent omnia, & membra inferiora facile capiunt à supremis vltro dare paratis. Quo enim potentior causa est, eò prom-

ptior est ad agendum, eò igitur propensior est ad dandum. Exigua igitur præparatio nobis insuper adhibita sufficit coelestium muneribus capiendis, si modo quisque ad id præcipuè se accommodet, cui est præcipuè subditus. Sed ante vniuscuiusque nostrum proprietatem, humanæ speciei proprietatem considerare debemus. Hanc igitur esse solarem Astrologi Arabes consenserunt. Quod ego è statura hominis erecta pulchraque, humoribusque subtilibus & spiritus claritate, imaginationisque perspicuitate, studioque veritatis & gloriæ, verum esse coniecto. Addo quinetiam proprietatem huic Mercurialem, ob strenuum versatilis ingenij motum. Et quoniam humanum genus natum, nudum, inermè, omnium egenum, hæc omnia propria industria sibi comparat, quod est Mercurij proprium. Addo etiam Iouialem, ob complexionem corporis temperatam atque leges. Et quoniam secundo mense, quo Iupiter dominatur, vitam accipimus, atque nascimur nonno, quo iterum recipit dominatum. Itaque humana species ab histribus potissimum dotes insuper ampliores ita demum sibi poterit vindicare, si per Solaria Mercurialiaque & Iouia, seipsam eis magis indies atque magis accommodabit. De reliquis autem quid? Saturnus non facile communem significat humani generis qualitatem atque sortem sed hominem ab aliis segregatum, diuinum aut bruta, beatum aut extrema miseria pressum. Mars, Luna, Venus, affectus & actus hominì cum cæteris animantibus æquè communes. Ad Solem igitur & Iouem atque Mercurium reuertamur. Solaria quidem nonnulla & Iouia diximus, Mercurialia verò nescio quomodo prætermisimus, sunt autem eiusmodi, Stannum, argentum, præsertim vitium, marcaffita argentea, lapis Achatès, vitrum Porphyriticum, & quæ croceum cum viridi misceant, smaragdum atque lacca. Animalia sagacia & ingeniosa simul & strenua, simiæ, canes. Homines eloquentes, acuti, versatiles, oblonga facie, manibusque non pingues. Sunt autem quærenda & exercenda quæ ad aliquem Planetam attinent, eo videlicet dominante (vt diximus) in die & hora eius, si fieri potest, etiam quando ipse sit in domicilio, vel exaltatione, vel saltem triplicitate sua & termino & angulo cœli, extra combustionem directus ac sæpius orientalis, si Sole sit superior, item in Auge, & aspiciatur à Luna. Si quis autem ab ipsa Luna beneficium, & à Venere poscat, tempora similia obseruare debet. A Venere quidem per

animalia sua quæ diximus, & per Corneolam & Saphyrum lapidemque lazuli, æs croceum atque rubeum & corallum, omnesque pulchros variosque vel virides colores & flores, atque concentus, suauesque odores atque sapor. A Luna per alba & humida & virida, per argentum atque crystallum & vniones, & argenteam Marcassitam. Quoniam verò Saturnus quidem statui & perseverantiæ dominatur. Mars autem efficaciz motus, cogimur nonnunquam horum quoque gratia ab eis patrocinia postulare, temporibus videlicet similiter obseruabis. Ab illo quidem, per materias quasdam quodammodo terreas & fuscas atque plumbeas, & fuscam jaspidem & Magnetem, & camoinum atque chalcidonium, & ex parte quadam per aurum & auream Marcassitam. A Marte verò per ignea rubea, æs rubeum, sulphurea omnia, ferrum lapidemque sanguineum. Neque diffusas Saturnum habere nonnihil in auro. Nam propter pondus id putatur habere. Quinetiam Soli aurum simile, sic omnibus metallis inest, sicut Sol in Planetis omnibus atque stellis. Iam verò si quis conuicerit Saturnum & Martem natura noxios esse, quod equidem nunquam crediderim, tamen his quoque vtendum, quemadmodum venenis nonnunquam vtuntur & Medici, quod Ptolemæus in Centiloquio probat. Proderit ergo quandoque vis Saturni cautè sumpta, sicut apud Medicos quæ adstringunt atque continent, imò & quæ stupefaciunt, sicut opium & mandragora. Martis quoque sicut Euphorbium & helleborus. Cautissimi verò hac in re fuisse videntur Magi Brachmanes Pythagorici, qui quum ob sedulum philosophandi studium Saturni tyrannidem formidarent, vestibus albis amiciebantur, Ionialibusque sine Phœbeis, quotidie sonis & cantibus utebantur, plurimumque sub duo viuebant. Vbique verò memento per affectum studiumque animi, & per ipsum spiritus qualitatem, nos facillimè subitoque exponi Planetis, eundem affectum atque eiusmodi studium & qualitatem significantibus. Persæpè rationem igitur à rebus humanis, per ocium, solitudinem, firmitatem, per Theologiam, secretioremque Philosophiam, superstitionem, Magiam, agriculturam, per incrorem Saturno subiicimur. Per ciuilia & ambiciosa negotia, per Philosophiam naturalem communemque, per religionem ciuilem, perque leges Ioui, Marti per iram atque certamina, Soli Mercurioque per studium eloquentiz, canusque & veritatis &

gloriz atque solertiam, Veneri per latitiam & Musicam & festiua, Luna per victum plantis similem. Sed hanc inter hoc differentiam mente teneto, exercitationem ingenij magis publicam atque amplam ad Solem spectare, priuatam verò & artificio mancipatam, potius ad Mercurium. Tum verò Musicam grauem quidem Iouis Solisque esse, leuem Veneris, mediam verò Mercurij. Similis quoque de stellis fixis ratio est.

Hæc quidem communis humanæ speciei regula. Propria verò vnicuique regula fuerit explorare quæ stella, quid boni cuique in genitura promiserit, atque ab ea potius quam ab alia reposcere gratiam. Et ab vnaquaque non quodlibet donum, & quod aliarum est, sed eius proprium expectare, nisi fortè tum à Sole communia multa reportes, tanquam communi quodam duce cœlestium, & ab Ioue fermè similiter, tum mundana pariter omnia ab anima spirituque mundi. Quem sicut & quoduis animal multoque efficacius animatum esse, non solum Platoniz rationes, sed etiam Astrologorum Arabum testimonia comprobant. Vbi etiam probant ex applicatione quadam spiritus nostri ad spiritum mundi per artem Physicam affectumque facta, traici ad animam corpusque nostrum bona cœlestia. Hinc quidem per spiritum nostrum in nobis medium, & tunc à mundi spiritu roboratum, inde vero per radios stellarum feliciter agentes in spiritum nostrum, & radiis natura similem, & tunc seipsum cœlestibus coaptantem.

*Quod inter animam mundi & corpus eius manifestum, sit spiritus eius, in cuius virtute sunt quatuor elementa. Et quod nos per spiritum nostrum hunc possumus haurire.*

### C A P V T III.

**P**rofectò mundanum corpus quantum ex motu generationeque apparet, est vbique viuum, quod Indorum Philosophi probant ex eo, quod passim ex se viuientia generet. Ergo per animam viuit vbique sibi præsentem, ac prorsus accommodatam. Igitur inter mundi corpus tractabile, & ex parte caducum, atque ipsam eius animam, cuius natura nimirum ab eiusmodi corpore distat, inest vbique spiritus, sicut inter animam & corpus in nobis, si modo vbique vita est communicata semper ab anima corpori crassiori. Talis namque spiritus necessariò requiritur tanquàm medium



quo anima diuina & adsit corpori crassiori, & vitam eidem penitus largiatur. Corpus autem omne facile tibi sensibile, tanquā sensibus tuis accommodatū, crassius est, & ab anima diuinissima lōgē degenerans. Opus est igitur excellentioris corporis adminiculo quasi non corporis. Proinde sci-  
mus viuentia omnia tam plantas quàm animalia, per quemdam spiritum huic simile viuere atque generare. Atque inter elementa, quod maximè spiritale, velocissimè generare perpetuoque moueri quasi viuens. Sed quæres interea, si elementa atque animantes generant aliquid simile suo quodā spiritui, cur lapides & metalla non generant, quæ inter elementa animantes media sunt? Quia videlicet spiritus in eis crassiori materia cohibetur. Quasi quando ritè secernatur; secretusque conseruetur, tanquam seminaria virtus poterit simile generare, si modo materię cuidam adhibeatur generis eiusdem, qualem spiritum Physici diligenter sublimatione quadam ad ignem ex auro secernentes, cuius metallorum adhibebunt, aurumque efficient. Talem utique spiritum ex auro, vel ex alio ritè tractum atque seruatum Elixir, Arabes Astrologi nominant.

Sed ad mundi spiritum redeamus, per quem mundus generat omnia, quandoquidem & per spiritum proprium omnia gnerant, quem, tum cœlum, tum quintam essentiam possumus appellare. Quia talis fermè est in corpore mundi, qualis in nostro noster. Hoc in primis excepto, quod anima mundi hunc non trahit ex quatuor elementis tanquam humoribus suis, sicut ex nostris nostra, imò proximè ut Platonice siue Plotinice loquar) ex virtute sua procreat genitali quasi tumens, & simul cum eo stellas, statimque per eum parit quatuor elementa, quasi in illius spiritus virtute sint omnia. Ipse verò est corpus tenuissimum, quasi non corpus, & quasi iam anima. Item quasi non anima, & quasi iam corpus. In eius virtute minimum est naturæ terrenæ, plus autem aqueæ, plus item aeriæ, rursus igneæ stellarisque quamplurimum. Ad horum graduum mensuras, ipsæ quantitates stellarum elementorumq; prodierunt. Ipse verò ubique viget in omnibus generationis omnis proximus author momis, de quo ille:

*Spiritus intus alit.*

Totus est suapte natura lucidus, calidusque & humidus, atque viuificus, ex dotibus animæ superioribus dotes eius-

modi nactus. Quem plurimum hausisse Appollonium Theanæum, testificatus est Indus Hiarchas dicens: Mirari nemo debet, ô Appolloni, te diuinandi scientiam consequutum, cum tantum ætheris in anima geras.

*Quod spiritus noster hauriat mundi spiritum  
per radios Solis & Iouis, & quatenus ipse fiat Solaris & Iouialis.*

### C A P V T IIII.

**H**Vnc tu igitur studebis tibi in primis insinuare. Hoc enim medio naturalia quædam beneficia reportabis, tum corporis mundani, tum animæ, tum etiam stellarum atque dæmonum. Nam ipse inter crassum mundi, & animam medius est, & in ipso stellæ sunt & dæmones, atque per ipsum. Siue enim mundi corpus atque mundana sint ab anima mundi proximè (sicut Plotino placet atque Porphyrio) siue mundanum corpus sicut & anima proximè sit à Deo, ut nostris placet, & fortè Timæo Pythagorico, omnino viuunt mundus atque spirat, spiritumque eius nobis haurire licet. Hauritur autem propriè ab homine per suum spiritum, illi suapte naturâ conformem, maximè si reddatur etiam arte cognator, id est, si maximè cœlestis euadat. Euadit verò cœlestis, si expurgetur à sordibus, & omnino ab eis quæ inhærent sibi dissimilia cœlo.

Quæ quidem fordes non solum intra viscera si fuerint, verumetiam si animo, si in cutè, si in vestibus, si in habitatione & aère, spiritum frequenter inficiunt. Efficietur tandem cœlestis, si ad orbicularem animi corporisque motum, ipse quoque orbes efficiat. Si ad aspectum cogitationemque lucis frequentiore etiam ipse subrutilet. Si adhibeantur ei similia cœlo, ea communiter diligentia qua Auicenna in libro de Viribus cordis, spiritum curat, & nos in libro de Curanda literatorum valetudine curare contendimus. Vbi primum segregantur ab eo vapores obnubilantes, Medicinis ita purgantibus. Secundo rebus lucentibus illustratur. Tertiò ita colitur, ut & tenuetur simul & confirmetur. Fiet denique cœlestis maximè quantum dicat ratio præsens, si applicentur ei potissimum radij influxusque Solis inter cœlestia dominantis. Atque ita ex hoc spiritum tanquam in nobis medio cœlestia bona in primis insita sibi in nostrum

tum corpus tum animum exundabunt: Bona inquam cœlestia cuncta, in sole enim omnia continentur. Conferet autem sol ad spiritum solarem efficiendum propriè, quando sub Ariete fuerit vel Leone, ipsum aspiciente Luna, maximè in Leone, vbi adedò spiritum nostrum vegetat, vt ipsum muniat contra venenum Epidemiæ repellendum, quod perspicuè apparet in Babylonia & Ægypto, & regionibus spectantibus ad Leonem, vbi Sol Leonem intrans, Epidemiam sedat, eademtaxat ratione, qua diximus. Tunc ergo & tu Solaria passim exquisita compone. Tunc incipe solaribus vt, ea tamen cautione, qua sub æstu exsiccationem diligenter euites. Non poterit autem faciliè spiritus solaris euadere, nisi sit quàm plurimus. Ad solem enim maximè pertinet amplitudo. Quàm plurimum verò faciet tum diligentia, cor rebus cordialibus intus & extra fouens, tum etiam victus ex alimentis quidem subtilibus multum tamen & faciliè & salubriter nutrientibus. Motus quoque frequens atque lenis, & opportuna quies, ærque tenuis atque serenus, & ab æstu geluque remotus, præcipuè lætus animus. Rursum, nec Solaris erit, nisi calidus fuerit, & subtilis, & clarus. Subtilem clarumque facies si tristitia & crassa deuitabis & fusca. Vtèris lucidis lætisque intus, & extra Luminis multum die nocteque excipies, Sordes expelles, & ocium, & torporem. In primis tenebras deuitabis. Perducturus autem spiritum ad calorem Soli naturalem; caue ne ad tertium caloris gradum siccitatemque deducas. Calor enim ipse Solis naturaliter non excitat, alioquin non esset Sol vitæ generationisque Dominus, & author augmenti. Siccare verò contingit radiis eius in concauis materiæ siccæ conclusis. Humorem itaque calori subtilem, qualis est solaris, & maximè Iouius, adhibebis & conseruabis in spiritu, rerum eiusmodi vsu, si solarem sis effecturum, ne alioquin ad Martium potiùs quàm ad solarem fortè deducas. Matrem quidem Soli esse similem in paucis, & his quidem manifestis, nec admodum excellentibus, & interim inimicum esse ferunt. Iouem verò Soli simillimum in plurimis excellentibusque muneribus, quamuis occultioribus, & amicissimum esse scimus Vnde & Ptolomæus vbi de consonantia disputat. Iouem ait cum Sole præcæteris perfectissimè consonare, Veneremque cum Luna, omnesque Astrologi vniuersalem beneficentiam Soli tri-

buunt similiter atque Ioui. Quamuis Sol eadem efficacius agat, & Iupiter sub virtute Solis efficiat. In vtroque calor viget, super atque humorem. Sed in Ioue superat modicè, in Sole superat excellenter, vtroque beneficè. Cum igitur adedò consonent, faciliè poteris spiritum solarem efficere pariter atque Iouium, ac res solares & Iouiales ritè poteris inuicem commiscere, præsertim si & has inuicem componas, & spiritui adhibeas, quando Iupiter Solem trino aspicit vel sextile, vel saltem quando Luna ab aspectu alterius ad alterum procedit aspiciendum. Maximè è quando ab aspectu Solis ad coitum cum Ioue progreditur. Seorsum verò Solarem propriè facies vel Iouialem, quando aspectum Lunæ ad Solem obseruaueris vel ad Iouem. Tamen si consequutus naturam huius, naturam mox illius faciliè consequèris. Sextilem verò aspectum intellige, quando Planetae duo inter se signorum duorum spatio distant. Trinum autem, quando quatuor signorum discrepant interuallo. Coniunctionem verò vel aspectum Lunæ ad alios, duodecim gradibus citra, totidemque ultra metiuntur.

*Quod tres Gratia sint, Iupiter, & Sol, & Venus,  
& quod Iupiter sit Gratia geminarum  
media, & maxime nobis  
accommodata.*

## C A P V T V.

**C**ompositiones quidem, & curationes Iouias, simul atque Solares inuenies in libro nostro de Vita longa, & in lib. de Literatorum cura. Vbi etiam miscuimus pleraque Venerea. Nam & nos in studiofis timemus exsiccationem, cui resistit Venus. Et hæc ipsa Venus est amicissima Ioui, sicut & Soli Iupiter, quasi Gratia tres inter se concordet, atque coniunctæ. Ab his quidem tribus cœli Gratiis, & à stellis eiusdem generis Astrologi gratias & sperant, & diligenter exquirunt, easque per Mercurium atque Lunam, quasi nuncios transmitti putant atque curant, faciliè verò communiterque per Lunam, Lunam quidem cum Ioue coniunctam, aut Venere feliciorum esse putant, quàm si per sextilem aspexerit, aut trinam. Verumtamen si per trinam aspiciens etiam suscipiatur ab illis quasi existimant esse coniunctam. Similiter si à Sole perspecta fuerit, simulque cepra. Nos autem si horum trium, stellarumque similium vires effectusque omnes percurrere singulatim velimus, longum opus aggredieremur, exquisitum difficile, difficillimum obseruari.

Si ad Venerem nos propriè conferamus, non facile Solem habebimus. Si ad Solem propriè, non facile Venerem. Vt igitur tres simul in vno gratias complectamur, ad Iouem tandem confugiemus, inter Solem Veneremque natura effectūque medium, qualitate admodum temperatum, & quæcunque sperantur à Venere, vel à Sole, suo quodam pacto tradentem, magnificentius quidem honestiusque, quàm Venus, temperatius quoque quàm Sol, & in omnibus cum humana natura maximè congruentem. Vtemur itaque Iouis, quando & ipse & Luna dignitatem tum naturalem, tum accidentalem habuerint, sintque simul, vel feliciter se aspiciant. Si quando id fieri omnino non possit, misce Solaria in vnum simulatque Venerea, faciesque sic Iouiale ex utrisque compositum, quando videlicet Luna à coitu Veneris eat ad sextilem Solis aspectum, vel è conuerso. Memento verò in rebus componendis quæ cor spiritumque foucant & corroborent, Lunam conferre potissimum, si vnà cum his muneribus hoc etiam habuerit, vt per aëria signa discurrat, maximè per aquarium, quod esse maximè putatur aërium. Velfi in suo domicilio sit, aut exaltatione sua, vel domo Iouis aut Solis. Erubique sit, si mansionem ex viginti illis & cæto teneat, tum sibi, tum etiam operi competentem.

*De virtutibus naturalibus, vitalibus & animalibus, & qui Planetarum singulis aut commodent incommodentur, idque maxime per aspectus.*

## C A P V T VI.

**P**Ræcipua verò disciplina est, rectè tenere quem spiritum, quam vim, quam rem potissimum hi Planetæ significant. Luna ergo Venusque vim & spiritum naturalem, atque genitalem, & quæ hunc augent. Iupiter eadem sed efficacius, heparque & stomachum, habetque non mediocrem partem in corde & spiritu, virtuteque vitali, quatenus suapte natura cum Sole consentit, imò & per seipsum, alioquin cor vitalem spiritum non propriè in mense Iouis acciperet. Vnde Iouem Græci appellant vitam, & per quem vitā. Habere quoque in animali spiritu potestatem testantur Astrologi, dicentes Iouem ad Philosophiam & veritatem inueniendam, religionemque conferre. Et Plato, vbi ait, ab Ioue Philosophos proficisci. Quod etiam significauit Homerus antiquorum opinione dicens: Talis est mens hominibus, qualem indies

adducit pater hominum atque Deorum. Nusquam verò numen aliquod cognominat præter Iouem. Sol spiritum vitalem præcipuè, corque significat, & habet nonnihil, imò non parum in capite. propter sensum atque motum, cuius est ipse Dominus, neque vim deserit naturalem. Mercurius cerebrum & instrumenta sensuum, ideoque spiritum animale. Proinde turissima via erit, nihil sine Lunæ beneficio facere. Quandoquidem cœlestia communiter & frequenter atque facile ad inferiora demittit, quam alterum Solem nominant, quolibet mense quatuor anni tempora facientem. In prima enim sui quarta Peripaterici putant esse calidam atque humidam. In secunda calidam & siccam. In tertia frigidam atque siccam. In quarta frigidam atque humidam. Lumenque eius proculdubio Solis esse lumen. Humores generationemque regere, omnesque mutationes fœtus ipsius in alio, conuersionibus suis metiri, & quoties Soli iungitur, viuificam ab eo virtutem accipere, quum infundat humori, atque ibidem à Mercurio vim humores commiscientem. Quam vim Mercurius & transformatione in omnes sua & gyris multiplicibus affert. Ibidem mox à Venere vim, quæ conducat ad formas geniturae conuenientes. Operæ precium verò fuerit meminisse, diurnum Lunæ cursum in quatuor distribui quartas. In prima quidem ab Oriente ad medium ascendit cœlum, atque interim humorem & spiritum auget naturalem. In secunda à cœli medio petit occasum, efficitque in nobis oppositum. Tertia ab occasu cœlum subtermedium addit, iterumque spiritum illum augeat & humorem. Quarta cadit inde versus ortum, minuitque vicissim, quod maximè in Oceanis ripis apparet, vbi ad hunc cursum mare manifestius accedit atque recedit, eodemque ordine vigor in ægrotantibus. Probabile etiam est, Solem per easdem sui quartas ad calorem naturalem, & spiritum vitalem augere, vel diminuerè. Animalem quoque, quatenus Mercurium habet comitem. His cognitis poterit Medicus pro humore & calore naturali, & quolibet spiritu recreando, tempora opportuniora seruare. Sed nunc de Luna satis. Neque dimittere docet Iouem, in cuius mense altero quidem vitam accepimus, altero autem communiter & feliciter nati sumus. Et qui inter Solem atque Venerem item inter Solem atque Lunam est qualitate effectūque medius, ideoque complectitur omnia. Solem verò ipsum prætermittere cœli Dominum nefas atque periculosum existima-

mus, nisi fortè quis dixerit, cum qui Iouem habet, in Ioue Solē iam habere, illic potissimum ad homines temperatum. In Sole certè omnes coelestium esse virtutes, non solum Iamblichus Iulianusque, sed omnes affirmat, & Proculus ait, ad Solis aspectum omnes omnium coelestium virtutes congregari in vnum atque colligi. Iouem verò esse Solem quendam ad nos temperatum nemo negabit. Lunam quoque temperatam ad Venerem haud neglexeris. Multum enim ad validam prosperamque vitam adiuvat. Siquidem Venus foecundat hominem, facitque laetum, hanc igitur obseruabis. Quanquam si Lunam Veneri similem, humore prorsus æqualem, & vix minus calidam, cum Ioue ritè misceas aut Sole, propemodum iam Venerem habes. Quid ergo? Ut tutissimum omnium & commodissima simul incedas via, Lunam obserua, quando Solem aspicit, coitque cum Ioue, vel saltem Iouem simul aspicit atque Solem, aut certè quando post aspectum Solis mox ad Iouis coitum progreditur vel aspectum. Atque eo ipso tempore compone inuicem, vel adhibe tibi Solaria. Iouiaque simulatque Venerea. Quod si te ad vnum ex magnis confugere necessitas vrgeat, vel negotium, ad Iouem ipsum, vel potius ad Lunam simul Iouemque confugito. Nulla enim stella naturales in nobis vires, imò & omnes magis quàm Iupiter fouet atque corroborat, nulla rursus pollicetur prosperiora simulatque plura. Et vbique hunc accipere faustum est, Solem verò accipere, forsitan non vbique tutum. Semper enim ille iuuat, hic sæpè nocere videtur. Venus autem quasi debilis. Ideo solus ille iuuans pater est appellatus. Id autem comprobatur Ptolemæus vbi ait: Pharmacum vix quicquam mouere naturam dumtaxat, quando Luna cum Ioue congregitur. Vtique adeo illinc propriè totam putat vniuersi corporis corroborari naturam. Expertus sum quinetiam, Luna coniuncta cum Veneri, Medicinam vix mouere. Quamuis autem vbi pituitam valdè timemus, Lunam præcipuè obseruemus ad Solem, vbi verò bilem exsiccationemque eiusmodi ad Venerem, tamen directio Lunæ ad Iouem, & adhæc omnia quodammodo confert, & præcipuè ad atram bilem expellendam, necnon ad communem hominum complexionem instaurandam atque firmandam. Sicur enim glycyrrhiza & oleum rosaceum frigidiora refrigerat, vinumque similiter, quod insuper humectat sicca, humidiora siccatur, ita Iupiter humano congruus calori, ut vinum, oleum rosaceum, camo-

milli, glycyrrhiza Vbi igitur audis Albulmasar, dicentem: Non est vita viuentibus, præter Deum, nisi per Solem & Lunam. Id intellige, quantum ad communem omnibus spectat influxum. Proprius autem homini accommodatissimusque influxus est ab Ioue. Sunt autem in natura corporis vires attrahendi, retinendi, coquendi, expellendi. Has igitur omnes Iupiter ipse iuuat, potissimum verò coquendi, siue digerendi virtutem, atque generandi & nutriendi simul & augendi, propter humorem eius ærium atque multum, & calorem eiusdem amplum, humori mediocriter dominantem. Profectò per radios Iouis semper vsquequaque diffusos, lumen Solis proprium ad salutem hominum maximè temperatur, radiis interim Veneris ad idem assiduè conferentibus, atque similiter transferente Luna. Radij quidem Veneris atque Lunæ tanquam humidiores quædam indigent temperante, sicut & Solis radij tanquam calidiores, humidioris cuiusdam temperiem exigunt. Radij autem Iouis temperamentum nullum desiderant. Quid enim aliud Iupiter est nisi Sol quidam ad salutem rerum præcipuè humanarum ab initio temperatus? Quid rursus aliud, nisi Luna Venusque facta tamen calidior atque potentior? Ideo Astrologi ab Ioue auspicantur annum fertilem, ferreum, salubrem & ab eo imminentium morborum remedia sperant. Atque Empedocles vbi propria vnicuique Planetarum munere tribuit Iouem solum generationis principem nominat, Orpheum imitatus. Præter Iouem præcipiunt Lunam diligenter in omnibus operibus obseruandam, tanquam medium inter coelestia competens, atque terrena. Sit ergo Luna in gradu situque & aspectu ad opus optatum, conueniente. Non sit in ecliptica, ne sub radiis Solis per gradus duodecim ultra citraque, nisi fortè sit in eodem minuto cum Sole. Plerique verò volunt omnes Planetas fore fortes quando in vnitatem Solis extiterint. Vnitatem vetò metiuntur minutis duobus atque triginta, ut xvi. quidem citra, xvi. verò ultra connumerentur. Non impediatur à Saturno vel Marte, non descendat. In latitudine meridionali, quando duodecim dictos gradus egreditur. Non sit opposita Soli, nec lumine minuatur, nec tarda cursu, quando scilicet die vno, duodecim non peragit gradus. Nō sit in via cōbusta à gradu Libræ vigesimo octauo ad tertium Scorpionis, nec in octaua, nec in Ascendente, nec in finibus Martis, vel Saturni. Quidam verò nec in sexta duodecima nona, quarta, Lunam vo-

hinc. In cæteris verò cœli plagis approbant. Vbi hæc omnia complecti non potes, Iouem saltem expecta vel Venerem in ascendente, vel decima, sic enim subueniunt detrimentis Lunæ. Nec abrefuerit recordari quatenus Luna lumine augetur, eatenus & nobis non solum humorem, sed spiritum etiam virtutemque augeri, atque hæc ad circumferentiam dilatarî, maximè in secunda eius quarta. Quando verò minuitur, contrà contingere, præsertim in vltima quarta. Primum eius ad Solem trinum præesse secundo. Hunc sextili primo. Hunc sextili secundo, Lunam quatenus lumine, eatenus repleti calore. Videntur ergo quidam non tam obseruare quomodo aspiciat Luna Solem (semper enim aspicit) quàm vt plurimum lumen habeat, præsertim dum augetur. Aspiciat verò interim trino vel sextili Iouem aut Venerem.

Proinde virtutem attractiuam ignea iuuant, retentiuam terrea, digestiuam aëria, expulsiuam aquea. Si tu has omnes in te adiuuare volueris, attractiuam quidem per ignea maximè roborabis, quando Luna in signis vel stationibus igneis constituta Iouem aspicit, scilicet Ariete, Leone, Sagittario. Retentiuam per terrea, potissimum quando intuetur eundem in signis vel stationibus terreis collocata, Tauro, Virgine, Capricorno. Digestiuam generatiuamque per aëria, scilicet Geminos, Libram, Aquarium, quoties sub aëreis Iouem suspicit, aut subit. Expulsiuam per aqueam. Cancrum, Pisces, Scorpionum. Quando sub aquis ipsa posita, Iouis radiis illustratur. Maximè verò in his omnibus consequeris oprata, si Iupiter eadem vel similia, vel saltem non dissimillima signa mansionesue possederit. Citaturus alium solidis Medicinis, accipe Pisces, Liquidis, Scorpionem. Mediis verò, Cancrum. Per inferiora purgaturus, Pisces & Scorpionum. Per superiora, Cancrum. Malum Saturni vel Martis ad Lunam deuitabis aspectum Ille enim vexat stomachum, hic intestina dissoluit. Capricornum euitabis & Taurum, nauis enim afferunt. Scis membrum irritandum non esse, quando Luna signum occupat membro præfectum humores namque mouet (sed potius esse fouendum Hæc verò de virtute & spiritu naturali in iecore præcipuè dominantibus, quæ in quatuor officia, vt narrauimus, diuiduntur, dicta sufficiant. De virtute spiritusq; vitali in corde vigente quidnam monemus? Satis id ferme significatum est. Nam per res in primis igneas & quodammodo simul aërias hæc

adiuantur, quando Luna in domiciliis mansionibusue consimilibus suspicit Iouem, præcipuè si Iouem complectatur & Solem. Virtutem quoque animalem per sensum & motum in capite dominantem confirmare potes per aëria in primis, subiunctis igneis, quando Luna in domiciliis vel sedibus consimilibus Iouem suspicit, præsertim si Iouem propemodum Mercuriumque complectitur.

Hic verò te moneo, ne Mercurium putes aqueum esse vel terreum (quod & ego aliquando suspicatus sum, alioquin motibus celeritatisque ingenij non conferret) sed quodammodo aërium esse scias. Nam & ob eandem causam tam mobilis est, tam facile conuertibilis, tantum ingenio confert, præsertim aquario plurimum aërio constitutus. Humor quidem in eo temperatus est, calor exiguus. Sub Sole positus dicitur exficcare. Longior autè à Sole factus, humectare putatur. Ibi quidem calefacere multum ex natura Solis, hic verò calefacere parum admodum, & humefacere magis suapte natura. Calore forsitan non cedit Veneri, Lunam superat, humore verò cedit vtrisque. Haly probat Mercurium qualitates cœlestium commiscere, quoniam facillimè permutetur, tum in qualitatem termini quem subit, tum in naturam stellæ quam aspicit. Ego igitur hunc tum facile permutari puto, quia nec excellentem potestatem, quam Iupiter habet, nec excellentem qualitatem, quam pleraque cœlestia, per quam alterationi resistat. Denique probabile est Mercurium assiduam Solis Achatem, multas illius vires habere, ideoque sperari solaris quædam à Mercurio posse. Aliquando verò & Martem tradunt, Solem in quibusdam muneribus imitari, ac Venerem quæ ad Lunam pertinent elargiri. Hæc igitur in agendo memineris. Neque negligas vnquam terminos. Aiunt enim Planetas in diuersis terminis ceu lucidis atque tenebrosis opposita facere. Denique vbi Martem times, oppone Venerem. Vbi Saturnum adhibe Iouem. Ac da operam vt in perpetuo quodam pro viribus motu verferis, tantum defatigatione vitata, vt & proprium motum externis motibus clam nocituris opponis, & cœlestem actum pro viribus imiteris. Quod si poteris spatia motibus ampliora peragere, sic & cœlum potius imitaberis, & plures cœlestium vires passim diffusis attinges.



*Quomodo membra foueantur in nobis per comparisonem Luna ad signa & ad stellas fixas.*

## CAPVT VII.

**T**otum quemadmodum diximus corpus fouere poteris, caput verò potissimum si Planetas obseruaueris in Ariete, vel in suo quemque domicilio primo. Præcordia si in Leone. Stomachum iecurque, si in Cancro atque Sagittario, aut saltem in Virgine. Et acceperis ea quæ propriè membrum petunt. Expedit quoque nosse, quæ quisque Planeta membra in signo quolibet habeat. Potes etiam propriè pro ætatis discrimine consulere vnicuique per quatuor ætates Lunæ. Hæc enim à Nouilunio vsque ad quadraturam primam iuuenis est. Deinde ad plenilunium est iuuenis atque virilis. Hinc ad quadraturam alteram, virilis simul atque senilis. Inde vsque ad conjunctionem est senilis. Ætatem itaque Lunæ feliciter ætati curandæ corporis adhibebis, si tunc aspectu eius ad aliquantum trium Gratiarum acceperis. Qui sanè aspectus Lunæ semper, & cito, gratiosa largitur. Neque tamen faciliè admodum diuturna vel maxima, nisi præter intuitum Lunæ, etiam ipsæ Gratiæ mutuo se conspiciant iam, vel propè modum conspecturæ sint, aut tres ipsæ aut duæ. In primis verò diuturna præbent signa fixa. Leo scilicet, Aquarius, Taurus, Scorpions Si fortè non possis in præsentia Lunam ad Planetas gratiosos opportunè dirigere, stellas elige fixas gratiarum naturam, id est, Iouis aut Veneris aut Solis, habentes, & eas directam Lunam elige. Tutius tamen est, Lunam interea Iouem propè modum adire vel Venerem. Stellæ namque fixæ si solæ spectent, proportionem humanam, id est, vnius hominis, nimis exuperant. Proportionem verò cum ciuitatibus moderatiorem habent.

*De virtutibus & vsu stellarum fixarum.*

## CAPVT XIII.

**T**radunt Astrologi maiores quasdam stellas à Mercurio compertas, auctoritatem habere quam plurimam. Qualis est in Arietis gradu xxij. vmbilicus Andromedæ, Mercurialis atque Veneris. Item in Tauri xviii. caput Algol, naturam Saturni possidens, atque Iouis. Cui subesse volunt adamantem & artemisiam, & audaciam victoriamque præstare. In eiusdem gradu xxii. Pleiades, Lunare fidus & Martiū. Cui subiiciunt crystallum, herbam diacedon,

femen fœniculi, conferre putat ad acuerdū visum. Quod autè nonnulli dicunt conducere ad dæmones cōuocandos, figmentum esse iudico. Aldeboran primo vel tertio geminorū gradu, Martium atq; Venerem. Hircus gradu eorūdem xiii. Iouius atq; Saturnius. Huic subiiciunt saphyrum, prassium, menthā, arthemisiā, mādragoram. Ad dignitatem & principum gratiam adiuuare cōfidunt, nisi forte eos opinio fallat. Illi subesse volunt rubinum, titimallum, matrisyluam, diuitias & gloriam augere. In Cæcri sexto vel septimo Canis maior Veneris, præest berillo, sauinæ, arthemisiæ, dracōtæ. Præstat gratiā, item in vxii. eiusdem Canis minor Mercurialis & Martius. Cui subesse volunt lapidē Achatē, herbam solsequiū, & pulegiū. Atq; gratiā largiri. In Leonis xxi. Cor Leonis, stella regia lo- uialis & Martia. Huic subiici putant lapidē Granatum, chelidoniam, masticē, melancholiam reprimere, temperatū gratiosumque efficere. In Virginis xix. Cauda Vrsæ maioris Venerea & Lunaris. Lapidem eius Magnetem putant herbā cicoreā à raptoribus veneficiisq; tueri. In Libræ vii. Ala Corui dextra. Item in eiusdem xii. & fortè xiii. Ala sinistra, Saturnia simul & Martia. Eius herbam lapathum & hyoscyamum esse, cum lingua ranæ audaciā augere. Fore noxiā, in eiusdem quindecimo vel sedecimo, spica Venerea Mercurialisque. Quam sequatur Smaragdus, saluia, trifolium, pro- rulla, arthemisia, mandragora. Diuitias augeat & victoriam, & ab angustia vindicet.

Denique in eiusdem xvii. vel xviii. Alchameth. Huic subdunt jaspidem & plantaginem. Firmare sanguinem sperant, febres omnes expellere. In Scorpionis quarto, Venerea Martiaq; Secundū verò computationem aliam in gradu eiusdem quinto est cornea, forsan eadem præsidens topazio, rorimarino, trifolio, hederæ, augere gratiam, castitatem, gloriam putant. In Sagittarij tertio, Cor Scorpionis Martium atque Iouium, præsidens Sardonio, Amethisto, Aristolochiæ longæ, Croco. Opinantur colorem bonum efficere, animum lætum, sapientemque reddere, dæmonia propulsare. In Capricorni gradu septimo Vultur cadens, hæc sequitur Chrysolithus, Satureia, Fumus terræ. Stella est Mercurialis atque Venerea, temperata. In ascendente medioque cœlo prodest. Quod autem excantandī auctoritatem afferre dicant, nihilipendo. In Aquarij xvi. cauda Capricorni Saturnia, Mercurialisque. Quam sequitur Calcidonius, maiorana, nepeta, artemisia, mandragora.

Præstare

Præstare in causis gratiam opinantur, diuitias augere, hominem ac domum incolumem reddere. In Piscium tertio humerus equi Iouialis & Martius. Thebit Philosophus docet ad captandam alicuius stellæ modo dictæ virtutem, lapidem eius accipere, herbamque eiusdem, annulumque aureum facere vel argenteum, in quo lapillum inseras herba subiecta gerasque tangentem. Id autem efficias quando Luna subit stellam, aut aspicit aspectu trino vel sextili. Et stella in medio percurrit cælo vel ascendente. Ego vero quæ ad eiusmodi stellas attinent, in formam potius medicinae quam annuli componerem, intrinsecus vel extrinsecus adhibendæ, opportunitate videlicet prædicti temporis obseruata. Tamen si prisci annulos magnificerint. Nam Damis & Philostratus narrant, Hiarcham sapientum Indorum principem simili quadam ratione septem annulos confecisse, stellarum septem nominibus appellatos eosque Apollonio Theano dedisse. Qui deinde singulos diebus singulis gestauerit, iuxta dierum nomina hos distinguens. Dixisse vero Hiarcham Apollonio, auium suum Philosophum annos centum atque triginta vixisse, eiusmodi forsan cælesti munere fretum. Quo & Apollonius deinde vsus, centesimo etiam anno, ut aiunt, iuuenem præferbat. Denique si quid eiusmodi annuli virtutis habeat ex alto, id quidem non tam ad animam vel ad crassum corpus pertinere arbitror, quam ad spiritum, calefacto paulatim annulo, sic inde vel sic affectum, ut firmior efficiatur, aut clarior, vehementior, aut mitior, seuerior, aut laxior. Quæ quidem affectiones in corpus quidem omnino, & in animam sensualem quodammodo, plerumque indulgentem corpori transeunt. quod autem aduersum dæmonas aut hostes, aut ad principum gratiam profuturos anulos pollicentur, vel fictum est, vel inde deductum, quod spiritum intentum, firmumque efficiant, vel etiam mansuetum, obsequioque amabilem, atque gratiosum. Iam vero si quid cælestia præter corpoream valetudinem, conferre ad ingenium, artem, fortunam dicerem, ab Aquinate Thoma nostro non diffiderem, qui in libro contra Gentiles tertio probat à corporibus cælestibus imprimi nonnihil in corpore nostro, cuius munere disponamur ad eligendum sæpè quod melius est, etiam si rationem finemque nesciamus. Qua quidem in re bene fortunatos appellat, atque ( consentiente Aristotele ) bene natos. Addit etiam

virtute cælesti fieri nonnullos in quibusdam artium effectibus efficaces ( ut eius verbis utar ) sicut miles in vincendo, agricola in plantando, medicus in sanando, felices. At enim sicut herbæ lapidesque mirabiles quasdam ultra naturam elementarem vires cœlitus habent, sic homines quoque in artibus nonnullos habere. mihi vero satis fuerit factum, si cælestia quomodocunque quasi medicinas, siue interiores, siue exteriores, ad prosperam conferant valetudinem, dummodo interea salutem corporis perquirentes, iacturam nullam salutis animæ faciamus. Nihil omnino tentemus à sancta religione prohibitum. Præterea in opere quouis conficiendo, fructum operis ab eo speremus atque petamus in primis, qui & cælestia, & quæ continentur cælo fecit, & virtute donauit, mouetque semper atque conseruat.

*De dignitatibus Planetarum in signis ad usum medicinarum obseruandis.*

## C A P V T IX.

**S**aturni domus Aquarius & Capricornus. Exaltatio Libra. Iouis domus Sagittarius atque Pisces. Exaltatio siue regnum, Cancer. martis domicilium, Scorpheus & Aries. Exaltatio Capricornus. Solis sedes quidem est Leo. Regnum Aries. Veneris habitaculum Taurus atque Libra. Exaltatio Pisces. mercurij ædes Virgo atque Gemini, Regnum virgo. Lunæ domus Cancer, Exaltatio Taurus. Saturnus & Iupiter triplicitatem habent in igneis aëriisque signis. Sol igneis tantum mercurius in aëriis solum. mars, Venus, Luna, in aqueis atque terreis. Planetæ quilibet præter Solem ac Lunam, in quolibet signo fines quosdam suos possident, quos & terminos appellamus. gigitur in Ariete Iupiter sex ibi primos terminos obtinet. Venus sex inde sequentes, mercurius posteriores octo, mars quinque deinceps, postremos quinque Saturnus. In Tauro ordine deinceps simili Venus fines habet octo, mercurius sex, Iupiter octo, Saturnus quinque, mars denique tres. In Geminis Mercurius sex, Iupiter sex, Venus quinque, mars septem, Saturnus sex. In Cancro Mars septem, Venus sex mercurius totidem, Iupiter septem, Saturnus quatuor. In Leone Iupiter sex, Venus quinque, Saturnus septem, Mercurius sex, mars totidem. In Virgine mercurius septem, Venus decem. Iupiter quatuor, mars septem, Saturnus duos.

In Libra Saturnus sex, Mercurius octo, Iupiter septem, Venus totidem, Mars duos. In Scorpione Mars septem, Venus quatuor, Mercurius octo, Iupiter quinque, Saturnus sex. In Sagittario Iupiter duodecim, Venus quinque, Mercurius quatuor, Saturnus quinque, Mars quatuor. In Capricorno Mercurius septem, Iupiter septem, Venus octo, Saturnus quatuor, Mars totidem. In Aquario Mercurius septem, Venus sex, Iupiter septem, Mars quinque, Saturnus totidem. In Piscibus Venus duodecim, Iupiter quatuor, Mercurius tres, Mars nouem, Saturnus denique duos. Sol autem & Luna alia ratione fines suos habent. Nam Sol quidem signa sex pro finibus habet, Leonem, Virginem, Libram, Scorpionem, Sagittarium, Capricornum, Luna vero reliquos, Aquarium, Pisces, Arietem, Taurum, Geminos, Cancrum. Solem igitur atque Lunam in his signis eum principatum effectumque, quem reliqui Planetæ in suis finibus habere putant. Præter fines habent in signis suas Planetæ facies, quas Græci Decanos nominant, decem occupantes signi gradus. In Ariete facies prima Martis. Secunda Solis, qui Martem in cœlo sequitur, ordine Chaldæorum. Tertia Veneris, quæ Soli succedit in cœlo. In Tauro prima facies Mercurij, sequentis Venerem. Secunda Lunæ, quæ Mercurio succedit, Tertia Saturni. Ad hunc enim redeundum est, impleto iam numero Planetarum. In Geminis prima Iouis, sequentis videlicet Saturnum, secunda Martis, Tertia Solis eodem ordine, similiter deinceps.

*Quomodo Planetis uti debeamus  
in Medicinis.*

## C A P V T X.

**C**ommemorauimus autem quas in signis Planetæ dignitates habent, ut quoties facturi composituri que sumus quæ ad Planetam aliquem attinent, sciamus eum in suis dignitatibus collocare, præsertim quando habuerit in nostra reuolutione & genesi principatum, ut etiam Saturnus atque Mars, alioquin deprimentes, nobis tamen sint erigendi, si genitura nostræ significatores extiterint. Maxime vero operæ precium ex hac commemoratione fecerimus, si quando vsuri in medicinis conficiendis beneficio Lunæ & Veneris atque Iouis, caueamus ne in finibus Saturni vel Martis existant, nisi forte

vbi cogimur, vel per Saturnum cohibere dissolutionem atque reprimere, vel per Martem frigidissima calefacere, torpenta suscitare, alioquin fines Iouis & Veneris eligemus, accipiemus quoque Mercurij fines, Mercurialibus in primis hominibus profuturi. Neque latere nos debet, homines valde Mercuriales, quales sunt qui ingenio, artificio, eloquio polleant, non mediocriter esse Solares. Mercurius enim semper est Apolline plenus. Ut autem quis intelligat quomodo figuras in cœlo describamus in oras signum quod ab Oriente surgit, primam appellamus vitæque domum. Quod succedit in ortum, secundam, tertiamque deinceps, aliasque similiter, ita ut septima domus sit signum, quo in Occidente iam descendens opponitur ascendenti. Huic octaua succedit. Nona vero è medio cadit cœlo, quod decimam domum efficit. Huic succedit undecima. Sed duodecima cadit ab ascendente. Ut igitur Planetæ sint potentes, habendi sunt in angulis vel Orientis, vel Occidentis, vel medij virinque cœli. Maxime vero in angulo ascendentis, aut decimæ mediū supra caput obtinentis cœlum, aut saltem in plagis quæ angulis mox succedunt. Tametsi Solem quidē nona, quæ à medio cadit cœlo, Lunam vero in tertia etiam cadente gaudere putant. Duas inter hæc regulas mente teneri Astrologi volunt. Vnam quidem ægrotantis ratione, alteram vero medici. Nempe vbi ægrotantis septima domus per Saturnum vel Martem infortunata est, vel Dominus eius infelix, separa medicum ab ægroto, si Ptolomæo credis. Præterea medicum electurus, Saturnium Martialemque declinare iubent, eumque perquirere in cuius genitura domus sexta per aspectum Solis, vel per Venerem aut Iouem, quomodocunque fuerit fortunatam. Infortunatum vero dicimus signum vel Planetam per Saturnum aut Martem, nisi propria domicilia sint vel regna, quando videlicet, vel ibi sunt, vel illuc aspiciunt opposito vel quadrato. Oppositum vero aspectum dicimus inter illa quæ intervallo discrepant quam longissimo. Quadratum vero, vbi hoc ab illo quarta parte cœli, id est, signorum trium spacio distant. Minus tamen per coniunctionem oppositum quadratum Saturnum & Mars Planetis aliis nocent, quando tanquam hospites eos domicilio vel regno suo terminoue suscipiunt. Quemadmodum Planetæ felices magis profunt, quando per sextilem trinumue aspectum atque coniunctionem etiam, ut diximus, sic excipiunt. Solis tamen coniu-

tionem Planeta verentur, aspectu gaudent, trino videlicet vel textili. Proinde necessarium est meminisse, Arietem præesse capiti atque faciei, Taurum collo, Geminos brachiis atque humeris, Cancrum pectori, pulmonibus, stomacho, lacertis, Leonem cordi & stomacho, atque iecori, & dorso, & costis posterioribus, Virginem intestinis & fundo stomachi, Libram renibus & femori atque natibus, Scorpionem genitalibus, vulvæ, matrici, Sagittarium femori atque subinguinibus, Capricornum genibus, Aquarium cruribus tibisque, Pisces pedibus. Huius enim ordinis memor cauebis membrum tangere ferro, vel cucurbitulis, quando Luna sub eius signo discurrit. Tunc enim auget Luna humores in membro, quorum affluentia, & consolidationem præhibet, & grauat membri virtutem. Obseruabis autem tunc membrum remediis quibusdam amicis, vel extra vel intus adhibitis, opportunè feliciterque fouere. Expedit vero nosse quod signum ascenderit tibi nascenti. Nam præter Arietem hoc etiam tibi caput significat, atque in hoc Luna tibi caput aspicit. Præterea quando Luna Arietem subit, opportune balnea tentas & lauacra. Quando Cancrum, feliciter minue sanguinem, medicinam accipe, præsertim electuarij formam. Quando est in Leone, prouoca vomitum. Cum in Libra, clysteribus apta est. In Scorpione, balnea nec tentas. Sunt qui medicinam soluturam dare nec prohibent, neque iubent. In Capricorno, medicinam sumere nocet. Similiter in Aquario. In Piscibus vero prodest. quæ vero membra in quouis signo vnusquisque habeat Planetarum, etsi scitum necessarium est, tamen narratu prolixum. Neque vero in purificatione alui laterè nos debet Ptolemæi præceptum. Medicinam accipere purgatoriam, quando Luna est in Cancro, Piscibus, Scorpione, probamus, præsertim si dominus signi tunc ascendens applicat se Planeta sub terra currenti. Sin autem ascendens Dominus coniungatur interea supra caput cum Planeta medium tenente cælum, nausea statim & vomitus incitabitur. Denique concludamus cum Galeno, Astrologiam esse medico necessariam, qui de criticis diebus disputans ait: certam esse Egyptiorum sententiam, id est, Lunam significare affectionem indies ægrotantis atque sani, adeo vt si misceantur cum Luna radij Iouis & Veneris, bene afficiatur vterque Sin autem Saturni vel Martis, contraria ratione se habeat.

Sed latius iam perueniati, ad spiritum tandem & vitam atque gratias reuertamur.

*Quibus modis spiritus noster haurire plurimum possit de spiritu vitæque mundi. Et quæ Planeta spiritum procreent atque recreent. Et qualia ad vnumquemque Planetam pertineant.*

## C A P V T IX.

**H**UIC vero tendunt hæc omnia vt spiritus noster ritè per naturalia præparatus atque purgatus accipiat ab ipso vitæ mundanæ spiritu plurimum per radios stellarum opportune susceptos. Vita quidem mundi omnibus insita, propagatur euidenter in herbas & arbores, quasi pilos sui corporis atque capillos. Tum & insuper in lapides & metalla, velut dentes & ossa. Pullulat quoque in viuentes conchas, terræ & lapidibus adhærentes. Hæc enim non tam propria quam ipsi communi totius vitæ viuunt. Quæ sane communis vitæ, multò etiam magis super terram in corporibus viget subtilioribus tanquam propinquiore animæ. Per cuius vigorem intimum, aqua, aer, ignis viuentia sua possident, atque mouentur. Vita hæc aërem ignemque etiam magis quam terram & aquam fouet agitatque perpetuo motu. Et denique coelestia corpora, quasi mundi caput vel cor, vel oculos quam inaximè vegetat. Vnde per stellas velut oculos, radios non visibiles solum, sed etiam visuales vsquequaque diffundit. Quibus more Struthij, vt diximus alibi, inferiora conspicit, fouetque videndo, imò etiam ita tangendo generat & format omnifariam atque mouet. Igitur ad motum nitentis aquæ, sereni quoque aëris, ignisque moderate distantis, atque cœli, motum mundanæ vitæ suscipies, si ipse quoque leniter & fermè similiter mouearis, quosdam prouiribus gyros agens, vertigine deuitata, coelestia lustrans oculis, mentè versans. Item frequenti quodam vsu planetarum, similiterque viuentium potes è mundi spiritu plurimum haurire. Præsertim si adhuc viuentibus recentibusque & matri terræ quasi adhuc hærentibus nutriaris, atque fouearis. Inter planetas suauiter redolentes, vel saltem non male olentes verseris quam frequentissimè. Omnes enim herbarum flores, arbor, poma redolet, quamuis sæpe minus animaduertas. Quo quidem odore quasi flatu spiritusque vitæ mundanæ te vndique recreant atque vegetant. Spiritum inquam tuum

odoribus eiusmodi natura simillimum, perque spiritum medium inter corpus & animam, facile corpus quoque reficiunt, & animæ mirificè profunt. Inter hæc diutissime diurno tempore sub dio versaberis, quatenus tuto vel commodè fieri potest, in regionibus altis & serenis atque temperatis. Sic enim Solis stellarumque radij expeditius puriusque vndique te contingunt, spiritumque tuum cōplent mundi spiritu per radios vberius emicante. Præterea naturalis ipse motus aëris, qui perpetuus est in orbem, quamuis ob lenitatem suam, consuetudinemque diurnam vix percipiatur ab ullo, te diē sub dio deambulantem, habitantemque in patentibus editisque locis liberè lambit, penetratque purè, ac motum vigoremque spiritui tuo mundanum mirificè præstat. Dixi equidem diē, compertum enim habemus nocturnum aërem esse spiritibus inimicum. Confert autem diurni vsus, præsertim si plurimum in aperto deambulans deuities primo quidem nimiam aëris intemperiem, deinde frequentius mouearis in eo, quando præter temperiem & serenitatem eius, stellarum positio magis est hominibus salutaris. Item si loca eligas præ cæteris odorifera per quæ situm quotidie mutēs, & ipse quasi continue, & leniter mouearis. Mutare locum quamuis semper cum delectu præcepi, quoniam bona coelestium & vniuersæ naturæ apud nos sunt rebus locisque aliis passim atque aliis distributa, quibus denique omnibus est fruendum. Mitto quod varietas tædium prohibet, spiritibus inimicum, propriumque Saturno. Voluptatem vero affert, per quam (vt ita dixerim) Venus ipsa voluptatis amica venit in spiritum, atque quod eius officium est, hunc statim ingressa propagat. Summatim vero si quis consideret Paradisum, & pomi vitæ vsum apud Moysen. Item similem victum à Platone positum ni Phædone, & quæ Plinius de populis ait odore viuentibus, intelliget esse vera quæ dicimus. Sed ad naturam spiritus descendamus. Spiritus qualitas est proculdubio Iouia, cuius tempore nobis infunditur. Est & Solaris. Iupiter enim hunc infundit, quatenus ingentem Solis in se temperat potestatem. Item alia quoque ratione Iouia est, quoniam calida est & humida, & calore abundat potius quam humore, nasciturque ex sanguine, & vapor quidem sanguineus appellatur. Rursus quoniam feruet, & subtilis est admodum atque lucens, oriturque à corde, Solaris proculdubio iudicatur. Habet quodam-

modo Veneream in se virtutem. Nam motu Venereo prorsus exundat, profuit, transfertur, prolemque propagat, ad voluptatem cuiuslibet sensus se dilatat refugitque dolorem. Summatim vero, spiritus quatenus corpori ad vitam & motum propagationemque conducit, Iouius, Venereus, Solaris existimatur. Quatenus animo ad sensum imaginationemque ministrat, Solaris Mercurialisque censetur, & vbiq; Mercurialis existit, quando quidem adeo mobilis est, & tam facile conuertibilis, atque formabilis. Saturni, Martis, Lunæ, sanus communiter Spiritus non multum habet, alioquin ex illo sæpè stupidus, ex hoc furiosus, ex hac obtusus quodammodo foret. Quamobrem Lunaria quidem velut crassiora simulque humidiora à subtili & volatili natura spiritus sunt admodum aliena. Quæ vero Saturnalia multum, atque nimium Martialia sunt, quasi venena sunt, spiritui naturaliter inimica. Illa quidem ob extremam frigiditatem atque siccitatem, hæc autem ob siccitatem, caloremque edacem. Iouia igitur & Solaris in primis, deinde Mercurialis & quodammodo Venerea, spiritus natura censetur. Distinctione verò præcipua, Spiritus quidem naturalis Ioui propriè dedicatur, vitalis autem Soli, animalis verò Mercurio. Quando igitur res postulat aliquem è tribus spiritum adiungere, patrono tunc suo infortunato, vel debili, non facile clientulo succurrere poteris. Difficillime vero spiritui animali, dum Mercurius infeliciter est affectus, qui tantam in animali spiritu auctoritatem habet, vt caduceo quodam suo animos tum consopire, tum suscitare dicatur, id est, suo quodam aspectu sic aut aliter se habente obrundere ingenium, vel acuerē, debilitare, siue corroborare, vexare vel sedare mirificè possit. Tu igitur quoties spiritum aliquem studes excolere, non modo patronum suum obseruabis fortunatum atque potentem, sed etiam Lunam eliges ad hunc opportune directam.

Non creatur autem neque recreatur aliquando propriè per influxum Saturni solum substantia spiritus, sed semper ab externis ad intima, & sæpè ab imis reuocatur ad summa. Vnde ad secretiora & altiora contemplanda conducit. Potest tamen, etsi raro, vis Martis atque Saturni, spiritui tanquam medicine prodesse, vel calefaciendo quum opus fuerit, & excitando atque dilatando, vel vicissim nimis volatilem coercendo. Per ea vero potissimū, quæ quatuor illis Planetis con-



ferreanea sunt, creatur natura Spiritus atque recreatur. Verum si ad Solaria quolibet valde & absque delectu declines, exacerues illum, & exiccabis tandem atque dissolues, si similiter ad Veneræ, liquefacies paulatim, vel obtundes. Si confidas tantum Mercurialibus, parum admodum inde proficies. Erit igitur operæ precium Iouialibus uti quam plurimum, eisque reliqua mediocriter admiscere, ac frequentius uti rebus, quæ vel his omnibus æquæ sint commutes, vel propriè Ioui. Nam hæc quoque omnibus quodammodo sunt communes. Communiter autem ad hos omnes attinent, quæ substantiam habent nec igneam nimis, nec prorsus terream, nec simpliciter aqueam, nec acutissimam, nec obtusissimam qualitatem, sed mediocrem & tactu leuem, & quodammodo mollem, vel saltem non duram, siue asperam, item gustu quodammodo dulcem olfactu suauem, visu gratam, auditu blandam atque iucundam, cogitatu lætam. Dulcedo igitur quædam saporis, & gratia his omnibus est communis, Si dulcedo quasi aquea est, & simul pinguis, ad Venerem magis attinet, si quasi insipida, vel aliquantum austera, potius ad Mercurium, atque hæc spiritui non multum profunt, necessaria tamen sunt interdum ad hebetandum nimium eius acumen. Si dulcedo manifesta sit atque subtilis, & paulum habeat styptici acurique saporis Iouialis propriè iudicatur. Cui congruit substantia dulcis amygdalæ, pinci nuclei, auellanae, pistacij, amidi, glycyrrhizæ, passularum, vitelli oui, carni gallinæ pulli, fasianorum, pauonum, perdicum, similitumque, item radicum been, atque enulæ. Rursum vini odoriferi clari, aliquantum dulcis, & styptici, sacchari candidissimi, tritici albi. Ad Iouem pertinet etiam manna, si modo myrobalani infusa virtute firmetur, alioquin non minus ad Venerem attinet quam ad Iouem. Hæc est utique substantia dulcedoque Iouis propria. quæ sanè spiritui creando & recreando ante omnia confert. Iouia vero plurimum sunt omnia, quæ in libro de longa vita diximus, & seruare iuuentutem, & senibus salubria fore. Sin autem dulcedo admodum pauca sit, multumque acuri stypticique habeat, vel etiam nonnihil amari, Solaris esse censetur. Similis quædam ratio est, & distinctio de ordinibus. Hi enim saporum germani sunt. Similis etiam de coloribus. Colores sanè æuei, albi, virides, aliquantum crocei, similes violarum, rosarum, liliorum coloribus, necnon odores eiusmodi Ve-

nerem referunt, & Lunam atque Mercurium. Colores vero saphyri, qui etiam dicuntur æerei, item purpurei pleniores, aureique argento mixti, & perpetuò virides, Iouem. Ardentes autem crocei, aurei puri, purpurei clariores, Solem. Quilibet vero colores si viui sint vel saltem sericii, magis stellares existunt. In metallis quoque & lapidibus atque vitris propter celestem similitudinem sunt potentes. Sed ut redeamus ad Iouem, sapor & odor eius quasi est, qualis in aureo pomo persico, similique pyro, vel aranceo, & vino maluatico leuiore, leuique vernaceo, qualis in viridi zinzibere, vel cinnamomo, vel dulci marathro, vel doronico, si hæc plurimo saccharo condita gustentur. Nam quatuor hæc, & nux muscata recens, sola si sunt, potius solaria sunt, Solaris & cariophilus & muscus, sed odoratu non gustu, aut aspectu. Ambra Solaris plurimum atque Iouia. Crocus in omnibus est Solaris, tametsi color eius & odor apud Astrologos omnibus gratis dedicatur, sapor autem ad Solem propriè pertinet. Denique omnia odorifera & aromatica, quatenus odorem gratum ferunt, ita ad Iouem Veneremque & Mercurium pertinent ut ad Solem, quauis inter hæc, acutiora magis ad Solem, obtusiora ad Venerem Mercuriumque potius, ad Iouemque propriè temperata, olfactu, gustu, auditu, visu, tactu. Soni quinetiam cantusque grati, blandique ad gratias omnes spectant atque Mercurium. Minaces autem admodum atque flebiles Martem præferunt & Saturnum. Neque vero mireris nos multum coloribus, odoribus, vocibus attribuere. Nam saporis quidem ad spiritum præcipuè pertinent naturalem, odores autem potius ad vitalem animaleque, colores, figuræ, voces ad animale. Motus quoque animi vel lætus, vel moestus, vel constans, spiritui ad similitudinem suam agitatur vehementer, animale primo, per hunc vitalem, per hunc insuper naturalem. Spiritus tandem omnis, quia ob naturam quodammodo igneam, æriamque omnino & lucidam atque morbilem, similis est luminibus, ideoque coloribus & vocibus æris, & odoribus motibusque animi, ideo per hæc subito in utramque partem mouetur atque formatur.

Et qualis euadit ipse, talem vicissim efficit quodammodo affectum animi, & omnino corporis qualitatem. Denique cum primum per illa quæ gratiarum propria sunt, opponitur gratis est expositus, utpote qui & naturaliter illis

consentaneus erat, statim per illarum radios tum vbiq̃ue vigentes, tum ipsi germanos, mirifica reportat munera gratiarum.

*Quod res naturales atque etiam artificiosæ habent virtutes à stellis occultas, per quas Spiritum nostrum stellis eiusdem exponunt.*

## C A P V T XII.

**Q**Uum vero dicimus, Spiritum exponi gratis per illa quæ sunt gratiarum, non solum per qualitates quæ videntur, audiuntur, odorantur, gustantur, sed etiam per illas quæ tanguntur commodari putamus. Memento igitur calidum in primo gradu Iouis esse, in secundo Solis cum Ioue, in tertio Martis cum Sole, in quarto Martis. Frigidum in primo Veneris, in secundo Lunæ, in tertio Lunæ cum Saturno. Humidum in primo Mercurij cum Ioue, in secundo Veneris cum Luna, in tertio Lunæ cum Venere, in quarto Lunæ, quando Veneri Mercurioque coniungitur. Siccum in primo Iouis, in secundo Mercurij cum Sole, in tertio Solis cum Marte, in quarto Martis cum Saturno. Summatim ex qualitatibus Planetarum, quas Ptolemæus scribit in quadripartito, colligimus harmoniam ex cunctis conflantem ad calorem humoremque declinare. Calor enim Martis ingens atque Solis & temperatus Iouis, ingentem superat Saturni frigiditatem, & Veneris Lunæque exiguam, ita ut calor ibi frigus excedat. Item humiditas Lunæ Venerisque plurima & propinqua nobis atque temperata, Iouis siccitatem Saturni Martisque multam superat, & temperatam Solis. Cum igitur humor frigori siccoque dominatur, atque similiter calor humori. Quæmadmodum in sani corporis homine ad cœlestem consonantiam temperato ex calore & siccitate cordis, item calore & humore iecoris, rursus frigore & humore cerebri, coalescit complexio quædam ad calorem humoremque vergens, mediocriter calore regnante. Calor enim cordis & iecoris, frigus cerebri superat. Item humor iecoris atque cerebri siccitatem cordis excedit. Neque vero prætermissum à nobis velim, talem existere ex stellis fixis harmoniam cunctis communem, qualem diximus ex Planetis, hos enim illis similes Astrologi putant. Quorsum hæc? Ut memineris spiritum corpusque nostrum per temperiem quandam ad calorem humo-

remque vergentem, vel natura cōstantem vel quasitam accommodari posse cœlestibus, sibi que cœlestia vendicare. Neque tamen dicimus Spiritum nostrum cœlestibus duntaxat, per qualitates rerum notas sensibus præparari, sed etiam multoque magis per proprietates quasdam rebus cœlitus insitas, & sensibus nostris occultas, rationi vix denique notas. Nam quum proprietates eiusmodi, earumque effectus elementari virtute constare non possint, consequens est à vita spirituque mundi per ipsos stellarum radios singulariter proficisci, ideoque per eas spiritum affici quamplurimum, atque quamprimum, cœlestibusque influxibus vehementer exponi. hæc utique smaragdus, hyacinthus, saphyrus, topazius, rubinus, vnicorni cornu, præcipue vero lapis bezaar apud Arabes appellatus, occultis gratiarum proprietatibus prædita sunt. Et idcirco non solum intus assumpta, sed etiam si carnem tangant, ibique calefactu virtutem suam promant, vim inde cœlestem spiritibus inferunt, quæ se contra pestem tuentur atque venena. Quod autem hæc similiaque tale aliquid agant virtute cœlesti, id argumento est, quia etiam exiguo pondere sumpta non exiguum habent in agendo momentum. Quod elementari qualitati vix unquam est concessum, igni videlicet valde cœlesti. Materialis enim virtus ut agat multum, materiam desiderat multam. Formalis autem, etiam quum minima materia valet plurimum. Simili virtute in primis phœbea Pæonia carnem tangens, contra caducum morbum spiritus armat vapore ad eos intus infuso. Simili corallus & chalcidonium aduersum atræ bilis illusiones, Iouis præcipue Venerisque virtute, cæteraque similiter eiusmodi quadam proprietate myrobalani iuuentutem seruant, acutæque senes, & ingenio prosunt atque memoriæ, propter Iouem in primis Saturni temperatorem, atque Mercurium sensus amicum. Quam quidem arborem forte aliquis in paradiso ad vitam prorogandam extitisse putabit. Mercurio lapidē Acharē consecrant. Vnde Physici conueniunt, ad facundiam visumque & contra venena valere. Serapio scribit eum qui hyacinthum vel ex eo sigillum gestat, esse à fulgure tutum, atque hanc virtutem eius esse latissime diuulgatam, quam si habet, ab Ioue putamus habere. Lapis ætites vel aquilinus habet à Lucina, id est Venere atque Luna, ut ad motus vuluæ, partum mox & facillimè citet. Quod Rasis confirmante Serapione frequenter se dixit expertum.

Forſan & à Phœbo qui tranſfixit Pytho-  
nem, Cretæ Dictamushabet, vt & vene-  
noſis obſiſtat, & ferrum è vulnere trahat.  
Solis virtute zinziber infuſum epulis arcet  
ſyncopem. Gentiana canis rabiem ſe-  
dat, fugatque ſerpentes. Verbena vatici-  
nium præſtare fertur, lætitiæque & ex-  
piationes & viſum. Ruta & zeduaria con-  
tra venena Theriacam agunt. Thus vita-  
lem & animale ſpiritum aduerſus hebe-  
tudinem, obliuionem, timorem, fulcit.  
Salvia vero menthaque virtute Iouis, illa  
quidem paralyſim fugat, hæc vero odore  
roborat animum. Eadem virtute Penta-  
phyllon reſiſtit venenis, cuiusque folium bis  
quotidie vnum vino bibitum curat Ephe-  
meram, tria, tertianam, quatuor vero quar-  
tanam. hæc herba ſacerdotes antiqui prop-  
ter puritatem ſuam in purificationibus v-  
tebantur. Agnus caſtus poteſtate Saturni  
Venerem ſiſtit motum, Iapis vero ſan-  
guinem. Mirabiles autem prouenire ſolent  
effectus, vbi occultæ proprietati proprietas  
ſeruit elementaris, velut in myrobálano  
ad ſpiritum corpusque firmandum, non  
ſolum virtus illa cœleſtis agit, ſed etiã ſty-  
ptica multum, nec parum aromatica virtus,  
quæ putrefactionem diſſolutionemque mi-  
rificè prohibet, ſpiritumque corroborat.  
Iam vero vt crocus petat cor, ſpiritum di-  
latet, prouocet riſum, non ſolum occulta  
Solis virtus mirabiliter efficit, ſed ad idem  
quoque conducit ipſa natura croci ſubtilis,  
amplificabilis, aromatica, lucida. Quod  
autem de ſimplicibus dico, de compositis  
ſimiliter dictum intelligi volo. Dic age  
theriaca quomodo contra venenum nobis  
opituletur? Non educit illa venenum,  
aſtringit enim aluum, non mutat omnino  
tam ſubito veneni naturam, non enim  
hæc adeo debilis eſt atque mutabilis, ſed  
ſpiritum vitalem potius valde tenuem &  
mutabilem, ſubito conformi quadam ad  
ipſum proportionem corroborat uſque adeo,  
vt ipſe iam validus tanquam agens, vna  
cum theriaca velut instrumento partim ſu-  
peret venenum, partim mutet, partim à  
præcordiis arceat. Sed quam proportionem  
ſine virtute id efficit theriaca? Iouia-  
li ſimul atque Phœbea, quam ex commix-  
tione multarum rerum ſecundum certam  
proportionem inuicem confuſarum ſibi  
vendicaſſe videtur. Eſt autem in eo virtus  
triplex. Hæc ipſa inquam cœleſtis, quam  
modo dicebam, item cœleſtis alia prius in  
herbis aromaticis proprietas, quibus e-  
leſtis ipſa rite componitur, quæ virtuti  
prius dictæ ſubminiſtrat ad idem. Eſt in-  
ſuper alia virtus in plerisque partibus eius,

elementaris potius quam cœleſtis, verum-  
tamen talis vt ſpiritui muniendo condu-  
cat, ſtypticam dico & aromaticam qualita-  
tem. Illa quidem ſpiritum firmat, iſta fo-  
net. Mirabilem ergo theriaca vim naſta  
eſt contra properantem ſenectutem atque  
venenum, tribus videlicet in ea virtutibus  
ad idem pariter conſpirantibus, quarum  
vna quidem eſt cœleſtis per artiſcioſam  
acquiſita commixtionem, alia cœleſtis  
iterum, ſed partibus eius naturaliter inſita,  
alia prorſus elementaris. Sed illa quæ prius  
dixi, cœlitus acquiſita, multo etiam foret  
admirabilior ſi non ſolum proportionem  
Iouia Solarique, & ex rebus eiufmodi con-  
flaretur, ſed etiam opportunum ad hoc,  
obſervatione cœleſtium, tempus eligeretur.  
Nam quemadmodum corpus ſe habet  
ad locum atque tempus, ita motus & actio  
ſe habet ad tempus. Sicut ergo certa paſſim  
corpora eorumque formæ certis & locis  
& temporibus coaleſcunt atque ſeruantur,  
ſic & propriæ quædam actiones ex propriis  
quibuſdam temporibus efficaciam nanciſ-  
cuntur. Idque in Alcibiade ſignificat So-  
crates, & Proclus explicat. quod ſane Py-  
thagoras animaduertens, ipſum bonum  
perfectionemque rerum, opportunitatem  
cognominauit. Primum namque princi-  
pium ſic apud Pythagoram & Platonem  
omnium eſt meſura, vt aliis corporibus  
actionibusque alia loca diſtribuerit atque  
tempora. Vnde ſicut res quædam non a-  
libi quam hic, nec aliàs quam tunc pro-  
priè naſcuntur feliciter & coaleſcunt, at-  
que ſeruantur, ſic & materialis actio, mo-  
tus, euentus talis, aut talis, non aliàs effi-  
caciæ ſortitur, effectumque perfectum,  
quam quando cœleſtium harmonia ad idẽ  
vndique conſonat, quæ ſane harmonia  
tantam habere poteſtatem exiſtimatur, vt  
non ſolum agricolarum laboribus, atque  
medicorum artiſciis per herbas aromata-  
que conſlatis, ſed etiam imaginibus, quæ  
apud Astrologos ex metallis lapidibusque  
ſiunt, virtutem ſæpe mirificam largiatur.  
Sed imagines caput iam proprium exigunt.  
Quantum vero ad horas pro actionibus &  
operibus eligendas pertinet, plurimum  
confirmatur à Ptolemæo vbi ait in Cen-  
tiloquio: Qui eligit quod melius eſt, nihi-  
lo diſferre videtur ab eo qui habet hoc ex  
natura. quibus in verbis tum cœleſtium,  
tum arbitrij electioniſque noſtræ poteſta-  
tem confirmare videtur. Albertus quoque  
Magnus inquit in Speculo: Non enim li-  
bertas arbitri ex electione horæ laudabi-  
lis coërcetur, ſed potius in magnarum re-  
rum inceptionibus electionem horæ con-

temnere, est arbitrij præcipitatio, non libertas.

*De virtute imaginum secundum antiquos, atque Medicinarum cœlitus acquisita.*

### C A P V T XIII.

**P**tolemæus ait in Centiloquio, rerum inferiorum effigies vultibus cœlestibus esse subiectas, antiquosque sapientes solitos certas tunc imagines fabricare quando Planetæ similes in cœlo facies, quasi exemplaria inferiorum ingrediebantur. Quod quidem Haly comprobat ibi dicens. Vtilem serpentis imaginem affici posse, quando Luna serpentem cœlestem subit, aut feliciter aspicit. Similiter Scorpionis effigiem efficacem quando Scorpij signum Luna ingreditur, ac signū hoc tenet angulum ex quatuor vnū. Quod in Ægypto suis temporibus factum ait, seque interfuisse, vbi ex sigillo Scorpionis in lapide Bezahar, ita facto, imprimebatur thuri figura, dabaturque in potum, ei quē Scorpius ipse pupugerat, ac subito curabatur. Quod quidem vtiliter effici Hahameth Physicus affirmat, confirmante Serapione. Præterea narrat Haly, notum illic sibi virum sapientem industria simili fecisse imagines quæ mouerentur, qualem effectam, nescio quomodo, legimus ab Archita. Quales & Trismegistus ait, Ægyptios ex certis mundi materiis facere consueuisse, & in eas opportune animas dæmonum inferere solitos, atque animam aui sui Mercurij. Item Phœbi cuiusdam, & Isidis Osyridisque sic in statuas descendisse, profuturas hominibus, vel etiam nocituras. Huic illud simile: Prometheus figmento quodam luteo vitam rapuisse, lucemque cœlestem. Magi quinetiam Zoroastri sectatores, ad euocandum ab Hecate spiritum, utebantur aurea quadam pila characteribus insignita cœlestium, cui & saphyrus erat insertus, & scutica quadam facta tauri corio inurebatur, atque interim excantabant. Sed cantiones equidem libenter omitto. Nam & Psellus Platonicus eas improbat atque deridet. Hebræi quoque in Ægypto nutriti, struere vitulum aureum didicerunt, vt eorundem Astrologi putant, ad aucupandum Veneris Lunæque fauorem, contra Scorpionis atque Martis influxum Iudæis insectum. Porphyrius quoque in Epistola ad Anconem, imagines efficaces esse testatur, additque certis quibusdam temporibus qui à propriis suffumigationibus exhalabant, acrios

dæmonas insinuari statim consueuisse. Iamblichus in materiis quæ naturaliter superis consentaneæ sint, & opportune ritæque collectæ vndique, constatæque fuerint, vires effectusque non solum cœlestes, sed etiam dæmonicos & diuinos suscipi posse confirmat. Idem omnino Proclus atque Synesius. Opera quidem ad salutem mira, quæ à medicis in Astrologia peritis, per res ex multis compositas, id est pulueres, liquores, vnguenta, electuaria fieri possunt, probabiliorē in se rationem & notiorē quam imagines habere videntur. Tum quia pulueres, liquores, vnguenta, electuaria, opportune confecta, cœlestes influxus facilius citiusque suscipiunt quam materiæ duriores, ex quibus imagines fieri consueuerunt, tum quia vel assumuntur intus affecta iam cœlitus, & in nos conuertuntur, vel saltem admota foris inhærent magis, & denique penetrant, tum etiam quoniam ex vno quodam duntaxat, aut per paucis imagines construuntur. Illa vero ex quamplurimis constari pro arbitrio possunt. Vt si centum Solis Iouisue dotes per centum plantas & animalia similiaque sparsæ fuerint, componere simul hæc centum tibi comperta possis, & in vnā conficere formam, in qua Solem fermē Iouemque totum iam videaris habere. Scis profectō naturam inferiorē non posse vno quodam capere cunctas superioris naturæ vires, ideoque illas per plures apud nos naturas esse dispersas. commodiusque per opera medicorum atque similia, quam per imagines colligi posse. Proinde imagines ex ligno confectæ vim forte paruam habent, nam lignum & forsā durius est ad cœlestem influxum facile capiendum, & minus tenax si acceperit, retinendum, & omnino postquam ex matris terræ visceribus est euulsum, paulo post ferme totum amittit mundanæ vitæ vigorem, & facile in qualitatem aliam transmutatur. Lapilli vero atque metalla, & si ad accipiendum cœleste munus duriora videntur, diutius tamen retinent, quod confirmat Iamblichus, si acceperit. Suanempe duritia, vestigia quoque donaque vitæ mundanæ post euulsionem diutissime continent, quæ quondam hærentia terræ possederant. Quamobrem ob hoc saltem aptæ materiæ ad capiendā tenendaque cœlestia iudicantur. Est & probabile quod libro superiore dixi, res adeo speciosas non posse sub terra constari, nisi maximo quodam conatu cœli, atque durare in eis impressam semel ex conatu virtutem. Nam in his coquendis cogendisque diu-

tiffimè cœlum elaborauit. Verum quum nequeas facillè eiusmodi plura componere, cogeris diligenter exquirere, quod metallum inter cœtera in ordine sit alicuius stellæ potissimum, quiscue lapis in ordine summus, vt saltem in vno quodam totius generis ordinisque supremo; reliqua pro viribus comprehendas, atque eiusmodi susceptaculo cœlestia huic consentanea mutueris, ceu si, exempli causa, in ordine Solari sub homine Phœbeo, summum inter animalia teneat Astur aut gallus, inter plantas balsamum aut laurus, inter metalla aurum, inter lapides carbunculus vel pantaura, inter elementa feruidus aër, nam ignis ipse Martius esse censetur. quod autem diximus influxum Solis vel Iouis aut Veneris augendum, intelligimus ratione communi, non tamen illi in cuius genesi aliquis horum intersector appareat.

*De ordinibus rerum à stellis pendentium, vt Solarium atque similitum. Et quomodo Spiritus fiat Solaris.*

## CAPVT XIV.

**D**Ixi equidem alibi, desuper ab vna quaque stella (vt Platonice loquar) seriem rerum illi propriam vsque ad extrema pendere. Sub ipso Scorpionis corde post eiusmodi dæmonas atque homines, scorpionumque animal, collocare possumus etiam herbam Asterion, id est stellarem, figura stellæ similem nocte fulgentem, quam medici tradunt qualitatem habere rosæ, vimque contra morbos genitalium mirabilem possidere. Sub serpente vel serpentario cœlesti Saturnum ponunt, & quodammodo Iouem. Postea dæmonas, qui sæpè serpentum formas induunt. Similes insuper homines, serpentes animantes, serpentariam herbam, lapidem Draconitem capite draconis natum. Item communi nomine Serpentinum. Et præterea quæ in sequentibus afferam. Sub stella Solari, id est Syrio, Solem primo, deinde dæmonas quoque Phœbeos, quos aliquando sub leonum vel gallorum forma hominibus occurrisse, testis est Proclus. Homines subinde per similes bestiasque Solares. Phœbeas inde plantas, metalla similiter & lapillos, & vaporem aëremque feruentem. Similiratione à qualibet firmamenti stella per aliquem Planetam existimant contextum rerum gradatim sub illius proprietate descendere. Si igitur (vt dicebam) Solaria omnia per gradum eius ordinis, quemlibet opportunè comprehen-

deris, homines videlicet tales, vel talis hominis aliquid, item bruta, plantas, metalla, lapillos, & quæ ad hæc attinent, virtutem Solis vsquequaque combibes, & quodammodo naturalem Solarium dæmonum facultatem. Similiterque de aliis dictum puta. Solares quidem homines sunt quales antea dixi, & qui ascendente Leone, Soleque hunc vel tenente vel aspiciente nascuntur, & qui sub Ariete similiter. Solaris est & sanguis è sinistro eorum bene ualentium brachio missus. Phœbeus, crocodillus, astur, leo, gallus, cygnus & coruus. Nec alia ratione leo veretur gallum, nisi quoniam in ordine Phœbeo gallus est leone superior. Eadem ratione inquit Proclus, Apollineum dæmonem, qui nonnunquam apparuit sub figura leonis, statim obiecto gallo disparuisse. Maximè vero in his animalibus cor est Solare. Arbitror etiam marinum vitulum cœlestis Leonis cordi subesse, & hac ipsa ratione corium eius quem cingit nudum fibula eiusdem osse confecta, à renum dolore redimere. Nam contra dolorem eiusmodi solent Astrologi sideris illius influxibus vti. Eadem forte ratione fertur hæc pellis à fulgure nos tueri. Inter plantas palma Phœbea est, & in primis laurus, qua virtute venenosa repellit & fulgur. Fraxinus quoque simili facultate venenosa longius arcet. Loton esse Phœbeam, rotunda tum folia tum poma testantur, & explicatio foliorum eius die, replicatio vero nocte. Pæoniam Phœbeam esse, non solum virtus indicat, sed & nomen. Ad idem attinent flores & herbæ quæ restringuntur abeunte Sole, redeunte protinus explicantur, & ad Solem continuè vergunt. Aurum præterea & lapis Elitis radiis aureis Solem imitans. Lapis item qui Solis oculus appellatur, figuram habens pupillæ, ex qua lumē emicat. Rursus carbunculus nocte rutilans, vel Pantaura omnes in se lapidum vires continens, vt aurum metallorum, & Sol stellarum. Multa denique in superioribus nobis significata, vnde si modo liceat, sub imperio Solis ex illo sanguine, & animalium illorum cordibus, & foliis fructibusque arborum prædictarum, item floribus atque herbis & auri foliis, nec non pulueribus pilulas, electuarium vel vnguentum conficere poteris, addito croco, balsamo, calamo aromatico, thure, musco, ambra, ligno aloes, zinzibere, mastice, spicanardi, cinnamomo, doronico citri corticè, zedoaria, nuce muscata, mace, cariophyllis cum melle flauo vel oleo balsamino, masticeo, laurino, nardino, ad cor,



& stomachum, & caput intus aut extra fouendum, vt spiritus inde Solaris euadat. Ex his omnibus, inquam, aut saltem ex pluribus componendum dominante Sole aliquid, quo etiam sub eiusdem dominatu incipias vt, dummodo & Solaria induas, habites, conspicias, audias, olfacias, imagineris, cogites, cupias. Item imiteris & vita dignitatem & munera Solis. Inter Solares homines plantasque verferis, laurumque assidue tangas. Tutius autem ad valetudinem fuerit, Solaribus admiscere Iouialia simulatque Venerea; Veneream maximè humiditatem Solaris caloris moderatricem, qualis est aqua succusque rosarum atque violarum. Sed medicinas eiusmodi in libro de curandis literatis primum, deinde in libro de Vita longa, partim equidem composui, partim ab aliis compositas enarraui, partim etiam temperaui. Item quales herbe à Sole Ioueque miras contra epidemiam & venenum vires habeant, diximus in libro Contra pestem, inter quas Perforata, fugadæmon appellata est, nec alia facultate quam cœlestium gratiarum noxios malorum dæmonum vapores à nobis arcere putatur, & si qua inter herbas alia vel lapillus vt corallus, idem videatur efficere. Herba profectò Lunarìs à Mercurio tradita foliis cæruleis atque rotundis, crescente Luna vnum quotidie producens folium, decrescente deponens, annos vtenti promittit Lunares. Sed iam ad imagines altero quodam exordio redeamus.

*De virtute imaginum secundum antiquos atque Medicinarum. Et quomodo Medicina sint longè validiores quam imagines.*

## C A P V T X V.

**S**I lapillos, quos paulo ante Phœbeos narrauimus, nactus fueris, nihil opus erit imagines eis imprimere. Suspendes itaque collo comprehensos auro, crocei serici filis, quando Sol sub Ariete vel Leone percurrit ascenditque, vel medium tenet cœlum, aspicitque Lunam. Multo vero potentiores in serie Lunæ lapillos narrat Proclus. Primum quidem Selinitim, qui non modo figura Lunam imitetur, sed & motu, circumeatque cum Luna. Hunc si forte repereris, & argento circumdatum argenteo filo collo suspenderis, Luna Cancrum vel Taurum subeunte, angulosque tenente sibi conuenientes, spiritum inde tuum reddet, postremo lunarem. Dum videlicet calefactus abs te lapil-

lus ipse Lunarìs virtutem suam tuis assidue spiritibus inserit. Alterum vero recenset lapillum, helioselinon cognomento, qui Solis Lunæque coniunctæ Soli, naturaliter habet imaginem. Hunc ergo quisquis argento inclusum de aurato similibus collo filis admouerit, quando Luna in domicilio suo vel Solis in eodem minuto cum Sole congregitur, suosque teneat angulos, solarem simulatque lunarem spiritum reportabit, aut saltem talem qualis euadit Luna per centrum copulata Soli. Hic vero tu vides dispersas Phœbi dotes, velut Ofyridis membra, sororem eius Phœbem velut Isidem congregare. Sed vtinam solarem alicubi lapidem facile reperiremus vel lunarem, adeo in eorum ordine præpotentem, quemadmodum sub serie septentrionalis poli magnetem habemus & ferrum. Solarem profectò ferunt inuenisse apud Indos Apollonium Theanum, lapidem scilicet nomine Pantauram, ignis instar micantem, sub terra passus quatuor nascentem, cui tantum spiritus insit vt tumeat, & plerumque scindatur terra, vbi eiusmodi lapis concipitur, ita cæteros ad se lapillos trahens, sicut magnes ferrum. Sed lapis hic Herculeus ad se contemplandum vehementius adhuc nos in præsentia rapit. Videmus in specula nautarum indice poli libratum acum affectum in extremitate Magnete moueri ad Vrsam, illuc videlicet trahente Magnete, quoniam & in lapide hoc præualet virtus Vrsæ, & hinc transfertur in ferrum, & ad Vrsam trahit vtrumque. Virtus autem eiusmodi tum ab initio infusa est, tum continuè Vrsæ radiis vegetatur. Forsitan ita se habet Succinum ad polum alterum & ad paleas. Sed dic interea, cur Magnes trahit vbique ferrum? non quia simile, alioquin & Magnetem Magnes traheret, multo magis ferrumque ferrum, non quia superior in ordine corporum, imo superius est lapillo metallum. Quid ergo? Ambo quidem ordine Vrsam sequente clauduntur, sed superiorem in ipsa Vrsæ proprietate gradum tenet Magnes, inferiorem vero ferrum. Superius autem in eodem rerum contextu trahit quidem quod est inferius, & ad se conuertit, vel aliter quomodolibet agitatur, aut efficit virtute prius infusa. Inferius vicissim eadem ad superius infusione conuertitur, vel aliter agitatur, vel prorsus afficitur. Sic in serie Solis inferior homo admiratur superiorem, in ordine Iouio veneratur, in Martio timet, in Venereo inferior ad superiorem rapitur amoris ardore, deseritque seipsum, in Mercuriali semper hic dis-

cit, vel persuadetur ab illo, in Lunari motum hic ab illo sapius exorditur, in Saturnali quietem. Ego autem quum hæc explorata hætenus habuiffem admodum gratulabar, cogitabamque iuuenis adhuc Magneti pro viribus insculpere cœlestis Vtriæ figuram, quando Luna melius illuc aspiciat, & ferreo tunc filo collo suspendere. Sperabam equidem ita demum virtutis me fideris illius compotem fore. Sed cum diutius exploraffem, inueni tandem fideris illius influxus Saturnales esse plurimum atque Martiales. Accepi à Platoniciis malos dæmonas plurimum septentrionales existere, quod etiam Hebræorum Astronomi consentunt, noxios Martiosque dæmonas in Septentrione ponentes. Propitios autem & Iouios, in meridie. Didici à Theologis, & Iamblichio, imaginū fictores à dæmonibus malis occupari sæpius atque falli. Vidi equidem lapillum Florentiam a ductum ex India, ibi è capite draconis erutum, rotundum, ad nummi figuram punctis ordine quamplurimis quasi stellis naturaliter insignitum, qui aceto perfusus mouebatur parumper in rectum, imo obliquum, mox ferebatur in gyrum, donec exhalaret vapor aceti. Existimaui equidem lapillum eiusmodi cœlestis draconis habere naturam atq; quasi figuram, motum quoque illius accipere quatenus per aceti seu vini valentioris spiritum, draconi illi siue firmamento familiarior redderetur. Hunc igitur qui gestaret, & aceto sæpe perfunderet, vim aliquā fortè draconis illius acciperet, qui geminis anfractibus hinc quidem Vtriā maiorem implicat, inde minorem. Extrat & prope Scorpionem serpentarius quasi homo serpente cinctus, manu dextra caput serpentis tenens, sinistra caudam, genibus quasi flexis, capite paulum resupino. Legi equidem Magos Persarum regi consuluisse vt imaginem hanc lapidi imprimeret Hamatiti, quem aureo clauderet annulo, ita tamen vt inter lapillum atque aurum serpentariæ radicem infereret. Hoc enim annulo gestantem contra venenum morbosque venenosos tutum fore, videlicet si Luna serpentarium aspiciente feceris. Hanc imaginem Petrus Aponensis confirmavit. Ego vero, si hanc annulus ille vim habet, arbitror non tam per figuram quam per materias eiusmodi, & hoc pacto temporeque compositas sibi cœlitus vendicare. Memento lapillos nascentes in animalibus, nec inde languentibus vt in dracone, gallo, hirtundine, ceterisque efficaces existere ferme, vt lapilli in terra nascent-

tes, atque easdem referri stellas, ad quas hæc animalia pertinent. Hinc Alektorius ex ventriculo galli veteris tractus pollet potestate Solari, per quem Dioscorides ait sæpe compertum esse, cum pugnare inuidum, qui lapillum hunc ore gestaret. Idem ait, Chelidonium erutum ex hirtundine rufum curare melancholicum, & amabilem idoneumque reddere. Quod quidem habet ex Ioue, per ea quæ diximus, scilicet res vbique infra Lunam stellares existere Confirmatur dictum illud valde Platonicum, hanc mundi machinam ita secum esse connexam, vt & in terris cœlestia sint conditione terræna, & in cœlo vicissim terrestria dignitate cœlesti, & in occulta mundi vita menteque regina mundi, cœlestia insint, vitali tamen intellectuali que proprietate simul & excellentia. Per hæc insuper confirmant nonnulli etiam illud magicum, per inferiora videlicet superioribus consentanea posse ad homines temporibus opportunis cœlestia quodammodo trahi, atque etiam per cœlestia supercœlestia nobis conciliari, vel forsan prorsus insinuari, sed postremum hoc illi viderint. Verum illud arte quadam rite, & opportunè in vnum plurima colligente, fieri posse probabile satis ( vt diximus ) esse videtur, tum rationibus quas in superioribus assignauimus, tum quia eiusmodi multa quando apud medicum & astrologum colliguntur, contunduntur, commiscuntur, concoquuntur subsidere certo, dum ipsa per se ratione concoctionis atque fermenti nouam paulatim formam subeunt hanc ipsam acquirunt certo quodam fomento cœlesti, radiis tunc intrus agentibus, idcoque cœlestem. Metallum vero vel lapillus quando momento sculpitur, non videtur nouam accipere qualitatem, sed figuram. Neque motio illa per debitos digestionis gradus, quos alteratio naturalis atque generatio solet obseruare, progreditur. Quum vero natura cœlestis, tanquam inferioris naturæ regula, soleat tenore quodam progredi naturali, & ita progredientibus aspirare, merito diffidunt plerique, imagines eiusmodi cœlestem aliquam virtutem habere. Ego quoque ambigo, sapius, ac nisi & omnis antiquitas, & omnes Astrologi vim mirabilem habere putarent, habere negarem, Negarem equidem non omnino, opinor enim ( nisi quis aliter persuaferit ) ad prosperam valetudinem saltem aliquam habere virtutem, electæ præsertim ratione materiæ, tametsi multo maiorem inesse pharmacis arbitror, & vnguentis sidereo fauore

conflatis. Quid vero voluerim vbi modo dicebam electæ ratione materiæ, in sequentibus declarabo. Quæ vero ex magorum vel Astrologorum opinione ad Plotinum interpretandum pro imaginibus allegari possunt, deinceps breuiter afferam, si te prius hic admonuero, ne putes probare me vsum imaginum sed narrare. Ego enim medicinis ad cœlum temperatis, non imaginibus vtor, atque ita cæteris quotidie consulto. Tu vero si concedis Deum rebus infra Lunam mirabiles inseruisse virtutes, mirabiliores concede cœlestibus. Præterea si licere iudicas homini ad prosperam valetudinem inferioribus vti, iudica, superioribus quoque licere atque inferiora ad superiorum normam, sic medicorum artificio temperare, sicut etiam à Deo sunt ab initio temperata.

*De potestate cœli, de viribus radiorum vnde vim sortiri putentur imagines.*

## C A P V T XVI.

**I**mmensa fermè cœlestium magnitudo, virtus, motio facit, vt omnes omnium siderum radij terræ molem quæ quasi punctum est ad cœlum, momento facillimeque vsque ad centrum recti penetrent, quod omnes Astronomi consentientur. Ibi vt placet Pythagoreis atque Platonicis fortissimi sint, tum quia recti vndique centrū tangunt, tum quia in angustum collecti sunt cuncti. Quorum vehementia, materia ibi terræ sicca procul ab humore remota prorsus accenditur, accensa que extenuatur, atque dispergitur per meatus vndique, & efflat incendia pariter atque sulphur. Sed ignem hunc putant valde caliginosum esse, & quasi incendium quoddam luminis expers, sicut in cœlo extat expers incendij lumen, ignis autem inter cœlestem atque infernum, lumen cum feruore coniungit. Putant autem ignem è centro flantem ignem esse Vestalem. Siquidem Vestam esse terræ vitam numenque putabant. Ideoque Vestæ templum veteres in medijs vrbibus construebant, ignemque in medio perpetuum collocabant. Sed ne vltius peruagemur concludamus iam, si stellarum radij totam mox terram penetrant, negari non facile posse metallum atque lapillum, quando cœlantur imaginibus subito penetrare, eis que miras vel saltem qualescunque imprimere potes. Quandoquidem & in alijs terræ preciosissima generant. Sed quis neget per hæc radios penetrare? Siquidem aer &

qualitas eius, & sonus minus efficax solida transit subito, & sua quadam afficit qualitate. Iam vero si duritia radiis obsisteret penetrantibus, lumen multo citius aërem quam aquam pertransiret, & hanc ocys multo quam vitrum, similiter quam crystallum. At quum eodem momento solida, quo liquida cuncta transuerberet, perspicue constat duritiam radiis nullo modo resistere. Atque idcirco dicent, non esse negandum metalla cœlestium radios influxusque suscipere, atque etiam conseruare ad tempus, tunc sibi cœlitus destinatū. Conseruare, inquam, virtutem quandam ex radiorum concurrentium contractu creatam. Quid vero, si materia durior hoc ipso quod videtur obsistere causæ præpotenti magis ictibus se exponit? Sic ensis lignum sub lana incidit, non incisa lana. Sic radius ille fulmineus corio quandoque nō læso dissoluit in eo metallum. Quum vero natura cœlestis nostro hoc igne incomparabiliter sit præstantior, non est putandum radij cœlestis officium esse duntaxat quale opus ignei radij manifestè videmus scilicet illuminare, calefacere, exiccare, penetrare, extenuare, dissolvere quæ nostris sensibus notissima sunt, sed multo plures mirabilioresque vires & effectus habere, alioquin & materia inferior, & cadueis sensus cum diuinitate cœli penitus æquaretur. Sed quis nesciat virtutes rerum occultas, quæ speciales à medicis nominantur, non ab elementalī natura fieri, sed cœlesti? Possunt itaque (vt aiunt) radij occultas & mirabiles vltra notas imaginibus imprimere, vires, sicut & cæteris inferunt. Non enim inanimati sunt, sicut lucernæ radij sed viui, sensualesque tanquā per oculos viuientium corporum emicantes, dotesque mirificas secum ferunt ab imaginationibus mentibusque cœlestium, vim quoque vehementissimam ex affectu illorum valido, motuque corporum rapidissimo. ac propriè maximeque in spiritum agunt cœlestibus radiis simillimum. Agunt insuper in corpora vel durissima, omnia enim hæc ad cœlum infirmissima sunt. Sunt autem in varijs stellis variæ quoque vires, & idcirco in radiis earum inter se variæ. Præterea in radiorum ictibus aliter atque aliter incidentibus virtutes diuersæ nascuntur. Denique in concursibus radiorum mutuis aliter atque aliter, & hic aut ibi, & tunc aut aliàs effectis diuersæ subitò vires suboriuntur, multo magis atque citius quam in alijs atque alijs elementorum qualitatūque elementalium mixtionibus multo etiam citius quam in tonis &

numeris apud Musicum aliter & aliter concinentibus. Si hæc diligenter consideraueris, forsitan non diffides, dicent, subito quodam radiorum iactu vires imaginibus imprimi atque ex diuerso iactu diuerſas. Nunquid ergo tam cito? Mitto fascinationes repentino quodam intuitu factas. Et amores acerrimos statim accensos radiis oculorum, qui & ipsi fascina-  
 menta quædam, quod in libro de amore probamus. Mitto quam citò rubens oculus inficiat intuentem, & speculum intuēs foemina menstruosa. Nonne & familiæ quædam apud Illyricos & Triballos iratæ, intuitu homines interemisse feruntur? Et foeminæ quædam in Scythia idem facere consueuisse? Et Catoblepæ regulique serpentes radiorum ex oculis iactu homines perimunt. Torpedo quoque marina tactu etiam procul per virgam manum subito stupe facit. Echinus quoq; pisciculus grandem solo præterea tactu nauem sistere fertur. Phalangia quinetiam in Apulia ictu quopiam vel occulto spiritum animumque repentino stupore permutant. Quid rabiosus canis facit, vel non apparente morſu? Quid scopa, deinde quid arbutus? Nonne leuissimo tactu venenum concitant atque rabiem? An ergo negabis cœlestia oculorum suorum radiis, quibus nostra contuentur, simulatque contingunt statim miranda perficere? Iam verò grauida mulier tactu statim signat membrum hominis nascituri, rei desideratæ nota. An vero dubitabit radios aliter aliterue tangentes diuersa conficere? Quum & tu helleborum herbam colligens, siue folium deorsum trahas, siue sursum, hoc subito tactu, causa sis helleboro, vt deorsum educat humores, aut sursum? Nonne ab initio rei cuiusque generandæ cœlestes influxus concoctione materiæ, digestionemque perfecta non tam tempore quam momento dotes mirificas largiuntur? Nonne suffragante coeli vultu innumerabiles sæpe ranæ, similesque animantes ex arenis momento profiliunt? Tanta est in materiis præparatis potentia coeli, tanta celeritas. Denique si ignis hoc habet, vt tempore quam breuissimo faciat quæ cætera longo, ob id præcipuè quod est coelo simillimus; quis nam dubitet, coelum magna quasi momento perficere, etiam in materia minus parata, sicut flamma solet ingentior? Quid ergo dubitas, inquirunt, in imagine construenda fermè similiter agere coelum? Dices opinor, sicut & ego dicebam, naturales hic alterationis gradus subesse. Qui sanè delectus minuit quidem coele-

ste donum, nec tamen penitus auferre videtur.

Nolunt enim Physici ex quolibet metallo vel lapide imaginem fabricari, sed certo. In quo quidem natura coelestis, virtutem olim ad hoc ipsum quod optatur naturaliter inchoauerit, & quasi iamjam perfecerit, vt in sulphure flammam. Quam sanè virtutem tunc demum perficiat, quando materia hæc per artem sub simili quodam influxu cœlesti vehementer agitur, & agitata calefacit. Itaque ars suscitatur inchoatam ibi virtutem, ac dum ad figuram redigit, similem suæ cuidam cœlesti figuræ, tunc suæ illic ideæ prorsus exponit, quam sic expositam, coelum ea perficit virtute qua coeperat exhibens quasi sulphuri flammam. Sic potentia quædam ad rapiendas paleas coelitus data succino, quodammodo debilis, sæpe per frictionem calefactionemque facta validior, subito rapit. Similem virtutem Serapio scribit datam lapidi Albugedi quasi hyacintho simili, sed non prius trahere paleas, quam capilli hoc lapide perfricentur.

Sic item lapis ille Iouius Bezaar, id est, à morte liberans, quem descripsimus in libro contra pestem, vim ab initio contra venenum accepit ab Ioue, sed non vsque adeo validam, vt eandem tradere possit materiis aliis exercendam. At vero quum primum sub Scorpionis cœlestis influxu figuram superni illius accepit, perfectam contra Scorpiones subito vim reportare putatur, quam mastici communicare valeat aut thuri. Eadem quoque de hyacintho, topazio, smaragdo, cæterisque ratio est habenda. Vt fabrica figurarum non alibi efficaciam habeat, quam vbi materia cum stella congruit & effectu, à qua hunc faber exoptat accipere. Ac præterea vbi hæc ipsa materia quasi iam talis ab initio, qualem affectas reddere per figuram.

Nullius ergo materiis ad imagines vti consulunt, nisi his ipsis quæ tibi notæ sunt; hanc ipsam fermè iam vim habere quam cupis. Lapillorum itaque vires atque metallorum diligentissimè perscrutari iubent, intereaque meminisse, inter lapillos quidem Carbunculum in tenebris coruscantem, atque Pantaurum præcipuè Soli subesse, Saphyrum Ioui, Smaragdum Veneri, Mercurio, Lunæ. Præterea metalla præter aurum & argentum vix vllam ad hæc habere virtutem. Tutior emque in his rationem fore, si aurum quidem purum ad Solem referas atq; Iouem, ad illū quidem

propter colorem, ad hunc autem propter temperatam commixtionem, nihil enim Ioue & auro temperatius. Purum vero argentum ad Lunam, sed ad Iouem similitudine. Venerem aurum argento permixtum. Præterea imaginem efficaciorē fore, si virtus in materia eius elementaris cōueniat cum speciali eiusdem virtute naturaliter insita, atque hæc insuper cum virtute altera speciali per figuram cœlitus capiēda. Denique figuras inferiores & formas cœlestibus conformari, inde perdisces, ut aiunt, quod Perseus truncato Medusæ capite, futuram nonnullis obtruncationem portendere consuevit, multaque similiter, & Lunam aliosque Planetas sub certis signis certa in nobis memoria mouere non dubitant.

*Quam vim habeant figura in cœlo atque sub cœlo.*

## C A P V T XVII.

**S**ed ne figuris nimium fortē diffidas, meminisse iubeunt, in regione hac sub Luna elementari, elementarem quoque qualitatem posse quam plurimum, in transmutatione videlicet ad aliquid elementare tendente, calorem scilicet & frigus, & humorem atque siccitatem. Qualitas autem quæ minus elementares materialesue sunt scilicet lumina, id est, colores, numeros quoque, similiter & figuras ad talia forsitan minus posse, sed ad cœlestia munera, ut putant, valere permultum.

Nam & in cœlo lumina, & numeri, & figuræ, sunt ferme omnium potentissima, præsertim si nulla sit ibi materia, quod peripatetici plerique putant. Sic enim figuræ, numeri, radij, quum non alia sustineantur ibi materia, quali substantiales esse videntur. Atque quum in ordine rerum Mathematicæ formæ physicas antecedant, tanquam simplices quidem magis, & minus egenæ, meritò in antecedentibus mundi gradibus, id est, cœlestibus, auctoritatem sibi maximam vendicant, ut non minus inde fiat numero, figura, luce, quam elementari quadam proprietate. Huius quidem auctoritatis habetur etiam sub Luna signum. Qualitates enim valde materiales plurimis rerum speciebus sunt communes, eisque quodammodo permixtis, non vsquequaque species commutantur. Figuræ autem numerique partium naturalium, proprietatem cum specie inseparabilem peculiaremque possident, ut

pote quæ cœlitus vnà cum speciebus cœstinata fuerunt. Imò & cum idæis maximam habent in mente mundi regina connexionem. Atque quum ipsæ numerique species quædam sint idæis ibi propriis designatæ, nimirum vires inde proprias sortiuntur. Ideoque tum species naturalium certis figuris, tum motus, & generationes, & mutationes certis numeris astringuntur. De lumine vero quid dicam? Est enim actus intelligentiæ vel imago. Colores autem sunt lumina quædam. Quamobrem ubi lumina, id est, colores, figuræque, & numeros Astrologi dicunt in materiis nostris ad cœlestia præparandis posse quamplurimum, non temere, ut aiunt, debes ista negare. Non ignoras concertus per numeros proportionalesque suas, vim habere mirabilem ad spiritum & animum & corpus sistendum, mouendum & afficiendum. Proportiones autem ex numeris constitutæ, quasi figuræ quædam sunt, vel ut ex punctis lineisque factæ, sed in motu. Similiter motu suo se habent ad agendum figuræ cœlestes, hæc namque harmonicis, tum radiis tum motibus suis omnia penetrantibus spiritum indies ita clam afficiunt, ut Musica præpotens palam afficere consuevit. Nosti præterea quam facile multis misericordiam moueat figura lugentis. Et quantum oculos imaginationemque, & spiritum & humores afficiat statim atque moueat amabilis personæ figura, nec minus viua est & efficax figura cœlestis. Nonne principis in vrbe vultus quidem clemens & hilaris exhilarat omnes? Ferox vel tristis repenti perterret? Quid ergo cœlestium vultus, dominos omnium terrenorum, aduersus hæc efficere posse putas? Quippe quum etiam cœnantes ad prolem plerumque vultus, non solum quales ipsi tunc agunt, sed etiam quales imaginantur, soleant filiis diu postea nascituris imprimere. Vultus eadem ratione cœlestes materias confestim suis notis inficiunt, in quibus si quando diu latitare videntur, temporibus deinde suis emergunt. Vultus autem cœli sunt figuræ cœlestes. Potes vero facies illic appellare figuras cæteris ibi stabiliores; vultus autē figuras quæ magis ibi mutantur. Aspectus quoque inter se stellarum motu quotidiano cōfectos, vultus appellare potes, similiter & figuras. Nā hexagoni, tetragoni nominantur. Esto, dicet quispiam, sint ut placeat, potentissimæ ad efficiendū figuræ cœlestes, verum quid hoc ad figuras imaginum artificio factas? Respondebunt, non id potissimum contendere ut potentissime



per se ad agendum sint nostræ figuræ, sed ut paratissimæ ad actiones & vires figurarum cœlestium capiendas, quatenus opportunè sunt dominantibus illis, atque ex amissis ad illas configurantur. Exigit enim figura illa figuram. Nonne sonante cithara quadam, altera reboat? ob id tantum, si & ipsa similem figuram habeat, atque e conspectu sit posita, & fides in ea positæ & intentæ similiter. Quidnam hic efficit, ut cithara subito patiatur à cithara, nisi situs aliquis & quædam forma conformis? Figura speculi lenis, concava, nitens, cœlo congrua, ob hoc ipsum propriè munus tantum cœlitus accipit, ut radios Phœbi in se cumulatissimè complectatur, & solidissimum quodque ad centrum suum è conspectu locatum repente comburat. Ergo ne dubites dicent, quin materia quædam imaginis faciendæ, alioquin valde congrua cœlo, per figuram cœlo similem arte datam, cœleste munus, tum in seipsa concipiat, tum reddat in proximum aliquem vel gestantem. Non solum verò figura, sed etiam dispositio peruia, quam Diaphanam vocant, inefficax quiddam est & passivum suapte natura. Veruntamen quoniam peruia dispositio est in cœlo proprium luminis susceptaculum, ideo ubicunque sub cœlo hæc est naturalis, vel modo aliquo comparatur, subito præfens cœleste lumen acquiritur, atque etiam conseruatur, ubi vnà cum hac vel calor est igneus, ut in flamma, vel est aliquid aëriū, aqueumue simul & glutinosum, ut in noctilucis & nocticernis, & carbunculis, atque forsan quodammodo in Camphora. Quid inde sequatur pro imaginibus ipse reputa.

*Quales cœlestium figuras antiqui imaginibus imprimebant, ac de usu imaginum.*

### CAPVT XVIII.

**A**Liquis autem quæret, quas potissimum cœli figuras imaginibus imprimere soleant. Sunt enim ibi formæ oculis valde conspicuæ, & à multis, quales sunt quasi depictæ, ut Aries, Taurus, similesque figuræ zodiaci, & quæ sunt extra zodiacum manifestæ. Sunt ibi præterea formæ quamplurimæ, non tam visibiles quam imaginabiles per signorum facies ab Indis, Ægyptiis, Chaldæisque perspectæ, vel saltem ex cogitatæ. velut in prima facie Virginis virgo pulchra sedens, geminas manu spicas habens, puerumque nutriens. Et reliquæ, quales describit

Albumasar, cæterique nonnulli. Sunt denique characteres quidam signorum & Planetarum ab Ægyptiis designati. Volunt igitur imaginibus omnia hæc insculpi. Ut si quis expectet proprium à Mercurio beneficium, collocare eum in Virgine debeat, vel saltem ibi Lunam cum aspectu Mercurij, & imaginem tunc ex stanno conficere, vel argento, in qua totum sit Virginis signum, & character eius characterque Mercurij. Ac si prima Virginis facie sis vsurus, addas etiam figuram, quam in prima facie diximus obseruatam. Similiterque de cæteris. Postremi quidem imaginum auctores, vniuersam earum formam ad cœli similitudinem accepere rotundam. Antiquiores autem, quemadmodum in quodam Arabum collegio legimus figuram crucis cunctis anteponebant, quia corpora per virtutem agunt ad superficiem iam diffusam. Prima vero superficies cruce describitur. Sic enim in primis habet longitudinem atque latitudinem.

Primaque hæc figura est, & omnium recta quam maximè, & quatuor rectos angulos continet. Effectus vero cœlestium maximè per rectitudinem radiorum angulorumque resultant. Tunc enim stellæ magnopere sunt potentes, quando quatuor cœli tenent angulos imò cardines, orientis videlicet occidentisque, & mediij vtrinque. Sic vero dispositæ, radios ita coniiciunt in se inuicem, ut crucem inde constituent. Crucem ergo veteres figuram esse dicebant, tum stellarum fortitudine factam, tum earundem fortitudinis susceptaculum, ideoque habere summam in imaginibus potestatem, ac vires & spiritus suscipere Planetarum. Hæc autem opinio ab Ægyptiis vel inducta est vel maximè confirmata. Inter quorum characteres crux vna erat insignis, vitam eorum more futuram significans, eamque figuram pectori Serapidis insculpebant. Ego vero quod de crucis excellentia fuit apud Ægyptios ante Christum, non tam muneris stellarum testimonium fuisse arbitror, quam virtutis præsagium, quam à Christo esset acceptura, Astrologos autem qui statim post Christum fuerunt, videntes à Christianis miranda per crucem fieri, nescientes autem vel nolentes in Iesum tanta referre, in cœlestia retulisse, quanquā considerare debebant per crucē ipsā absq; nomine Iesu miracula minime perpetrari. Cōuenire quidē imaginibus eam, quia referat fortitudinē Planetarum omniumque stellarum, forsitan est proba-

bile, non tamen ob hoc duntaxat ingen-  
tem habere potentiam, posse vero non ni-  
hil vnà cum cæteris, quæ necessaria sunt,  
coniunctam, ad prosperam forsan corpor-  
is valetudinem. Sed ad narrandas alio-  
rum opiniones, vt coepimus, reuertamur.  
Saturni veteres imaginem ad vitæ longi-  
tudinem faciebant in lapide Feyrizech, id  
est, Saphyro, hora Saturni, ipso ascenden-  
te atque feliciter constituto. Forma erat.  
Homo senex in altiore cathedra sedens  
vel dracone, caput tectus panno quodam  
lineo fusco, manus supra caput erigens,  
falcem manu tenens aut pisces, fusca in-  
dutus veste. Ad longam vitam atque feli-  
cem Iouis imaginem in lapide claro vel al-  
bo. Erat homo sedens super aquilam vel  
draconem coronatus, hora Iouis, ipso in  
exaltatione sua feliciter ascendente, cro-  
ceam induto vestem. Contra timiditatem  
hora Martis imagines fabricabant prima  
Scorpionis facie oriente, Martem arma-  
tum & coronatum. Ad morbos curandos  
fingebant Solis imaginem in auro, hora  
Solis, prima facie Leonis ascendente cum  
Sole, Regem in throno, crocea veste, &  
coruum Solisque formam. Ad latitiâ ro-  
burque corporis, Veneris imaginem puel-  
larem, poma floresque manu tenentem,  
croceis & albis indutam, hora Veneris,  
prima facie Libræ, vel Piscium, vel Tauri  
ascendentem cum Venere. Imaginem Mer-  
curij ad ingenium & memoriam, prima  
facie Geminorū. Item contra febres scul-  
pebant hanc in marmore, subinde mate-  
riæ cuiuspiam imprimebant languentibus  
assumendæ. Hinc omne genus febrium  
curari dicebant Imaginem Lunæ ascen-  
dente prima facie Cancri ad augmentum.  
Forma Mercurij. Homo sedens in throno  
galeratus cristatusque, pedibus aquilinis,  
sinistra gallum tenens aut ignem, alatus,  
aliquando super pauidem, dextra tenens  
calamum, veste varia. Luna puella cornu-  
to capite super draconem vel taurum, ser-  
pentes supra caput & sub pedibus habens.  
Ad curandum calculum, genitaliumque  
dolores, & ad sanguinem adstringendum,  
imaginem hora Saturni, surgente tertia  
facie aquarij cum Saturno. Item Leonem  
auro imprimebant, lapidem in formam  
Solis pedibus reuoluentem, hora Solis,  
primo gradu faciei secundæ Leonis orien-  
te. Hanc expellendis morbis profuturam  
existimabant. Ad renum morbos similem  
faciebant, quando Sol in corde Leonis  
coelum medium obtrineret, à Petro Apo-  
nensi comprobata, & experientia con-  
firmata, sed hac conditione, vt Iupiter

aut Venus medium aspiciat coelum. Pla-  
netæ vero noxij cadant, infortunatique  
sint. Accepi à Mengo physico præclaro  
eiusmodi imaginem factam Ioue ibidem  
coniuncto cum Sole, liberauisse Ioannem  
Marlianum, Mathematicum nostro secu-  
lo singularem, à pauore quo sub tonitru af-  
fici consueuerat. Præterea ad firmandam  
sanitatem & veneficia deuotanda, imagi-  
nem ex argento fingebant hora Veneris,  
Luna angulos obtinente, ac Venerem fe-  
liciter intuente, dummodo Dominus sex-  
tæ domus Venerem aspiciat aut Iouem tri-  
no quodam intuitu, vel opposito. Mercu-  
rius autem non sit infelix. Agebant hæc  
hora diei Solis vltima, ita vt dominus hora  
decima teneret coeli plagam. Petrus A-  
ponensis inquit, medicum per imaginem  
infirmum curare posse. Modo in ea fabri-  
canda obseruet, vt anguli ascendentis me-  
dij coeli occidentis sint fortunati, & ascen-  
dentis dominis, & eadem ratione secun-  
da, sed sexta & Dominus eius sit infelix.  
Ait etiam sanitatem fore firmiorem vitam-  
que longiorem, quam ab initio fuerit in-  
stituta, si nati vitare perspecta fiat imago,  
in qua hæc fortunata ponatur, scilicet il-  
lius significator vitæ. Item vitæ datores,  
tum signa, tum domini, præsertim ascen-  
dens eiusque Dominus. Item coeli me-  
dium, locus Solis, pars fortunæ, Dominus  
coniunctionis vel præuentionis ante na-  
tiuitatem factæ. Mali quinetiam infortu-  
nati cadant. Concludit Astrologorum  
nullum dubitare, quin ad producendam  
vitam talia conferant. Prolixum foret di-  
ctū, quas per quælibet signa facies antiquæ,  
& quas Lunæ stationes tanquam necessa-  
rias in exprimendis imaginibus obserua-  
bant. Nam in statione Lunæ à gradu Vir-  
ginis decimo septimo ad finem eius facie-  
bant imagines contra morbos & odia, &  
ad iter felix. In statione à principio Capri-  
corni ad gradum duodecimum, contra  
morbos & discordias atque captiuitatem.  
In statione à gradu duodecimo Capricor-  
ni ad gradum vigesimum quintum, aduer-  
sus languorem & carcerem. In statione à  
gradu quarto Piscium ad gradum eiusdem  
decimum septimum ad curandos morbos,  
ad lucrū, ad societatem, ad augendas mes-  
ses. Et in aliis similiter alias vana sapius  
curiositate machinabantur. Solas vero re-  
censui quæ non tam Magum quam Medi-  
cum redolerent. Nam & medicinam eius-  
modi vanam plurimum fore suspicor. Pro  
aliis autē magis legitimis medicinarū cō-  
fectionibus eiusmodi mansiones Lunæ ar-  
bitror eligēdas atq; etiam in ariete gradū

sextum, rursus decimum nouum, minuta xxvi. Item in Geminis gradum decimum, minuta xxxviii. In Cancro gradum decimum nouum, minuta xxvi. In Libra gradum sextum, minuta xxxiii. In Capricorno gradum decimum nouum, minuta xxvi. In Aquario gradum secundum, minuta xxvij. In eodem gradu decimum quintum, minuta vii. Præterea sententiam Haly mente tenendam. Quodlibet signum quamdiu Sol est in eo, viuum fieri, cæteris dominari, effectum eius præ cæteris euenire, vt illuc Lunam dirigas ad donum inde proprium pro medicinis suscipiendum. Illuc inquam, id est, ad signum & faciem, & maximè gradum, vt si bona Iouis affectas, ad hæc directam Lunam erigas vel vnitam, quamdiu locum eiusmodi Sol illustrat, vbi proprietates Iouia viget. Similiterque de cæteris. Curiosum vero narratu foret & fortè noxium, quas imagines, & quemadmodum associandos vel dissociandos inter se animos fabricabant, ad afferendam felicitatem vel inferendam calamitatem, vel vni cuidam, vel domui, vel ciuitati. Ego quidem fieri posse talia non affirmo. Astrologi autem fieri posse putant, & quomodo, docent, qualia ego narrare non audeo, Porphyrius vbi vitam Plotini magistri sui describit, talia fieri posse confirmat. Atque Olympium Magum & Astrologum Ægyptium narrat contra Plotinum Romæ talia tentauisse, dum conaretur per imagines vel res eiusmodi siderare Plotinum sed conatus in authorem suum ob excelsum Plotini animam fuisse retortos. Albertus quoque Magnus Astrologiæ pariter atque Theologiæ professor, ait in speculo, vbi à licitis discernere se inquit illicita, imagines rite ab Astrologis constitutas, virtutem effectumque acquirere à figura coelesti. Atque subinde narrat mirabiles earum effectus, quales Thebith, Benthorad, & Ptolemæus, cæterique Astrologi pollicentur. Describitque imagines ad calamitatem alicui, prosperitatemque afferendam, quas consulto prætermitto. Et interea confirmat effectum eas habere posse, quanquam & vt vir bonus artis damnat abusum, & vt legitimus Theologus orationes suffumigationesque detestatur, quas impii quidam dæmones imaginibus fabricandis adhibuerunt. Neque tamen reprobat figuras & literas dictionesque imaginibus impressas ad hoc ipsum duntaxat, vt donum aliquod accipiant à figura coelesti. Quod quidem posse per imagines comparari Petrus Aponensis confirmauit. Imo & affirmauit regionem nescio

quam fuisse destructam per imaginem illam, quam Thebith narrat à Phedice Astrologo fabricatam. Thomas autem Aquinas dux in Theologia noster, magis ista formidat, & minus tribuit imaginibus. Tantum namque virtutis duntaxat per figuras coelitus putat acquirere, quantum conducat ad illos effectus, quos solet communiter coelum per herbas resque alias naturales efficere. Non tam quia figuralis sit in ea materia, quam quoniam compositum tale iam positum est in certa quadam artificij specie, quæ cum coelo consentiat. Hæc ait in libro contra Gentiles tertio, vbi characteres & literas figuris additas ridet. Figuras vero non adeo, nisi pro signis quibusdam ad dæmonas adiungantur. In libro etiam de fato ait, constellationes dare ordinem effendi atque perdurandi, non solum rebus naturalibus sed etiam artificiosis, ideo imagines sub certis constellationibus fabricari. At si quid mirabile per eas ultra consuetos naturalium effectus nobis eueniat, in dæmonas reiecit hominum seductores, quod in libro contra Gentiles perspicue patet, maximè vero in libello de occultis naturæ operibus, vbi videtur etiam ipsas imagines paruipendere, quomodocunque factas, quas & ego quatenus ipse iusserit, nihili pendam. Referre autem mirabiles quosdam effectus imaginum in dæmonum falsitatem, nec est à Platonice alienum. Nam & Iamblichus ait, eos qui religione summa sanctimoniaque posthabita, imaginibus duntaxat consili, ab eis diuina sperant munera, hac in re à malis dæmonibus sæpissimè falli, sub prætextu bonorum numinum occurrentibus. Contingere tamen ex imaginibus legitima Astrologiæ ratione constructis naturalia quædam bona non negat. Denique tutius fore arbitror medicinis quam imaginibus se committere, rationesque à nobis potestate coelesti, pro imaginibus assignatas, in medicinis potius quam in figuris efficaciam habere posse. Probabile enim est, si quam vim imagines habent, hanc non tam per figuram nuper acquirere, quam per materiam possidere naturaliter sic affectam. Ac si quid denuo acquiritur dum insculpitur, non tam per figuram comparari quam per calefactionem contusione quadam prouenientem. Quæ quidem contusio calefactioque facta sub harmonia, coelesti simili harmoniæ, quæ quondam materiæ virtutem infuderat, excitat virtutem ipsam atque corroborat sicut flatus flammam, & manifestam efficit ante latentem, sicut calor ignis in aspe-

Etum producit literas scriptas succo cepæ prius delitescentes. Atque literæ hirci adipe inscriptæ lapidi prorsus occultæ, si lapis submergatur aceto, prodeunt, & sculptæ eminentes extant. Imò verò sicut tactus scopæ vel arbuti suscitatur rabiem consopitam, sic fortè contusio quædam & calefactio sola labentem in materia virtutem prodit, facta videlicet opportunè. Quæ quidem cœlesti opportunitate expedit in medicinis conficiendis vti. Aut si quis fortè tractare metalla lapidesque voluerit, præstat percutere solum atque calefacere, quam figurare. Præter enim id quod inanes esse figuras suspicor, haud temerè vel umbram idololatriæ debemus admittere. Item nec temere vti stellis vel salutaribus ad morbos his simillimos expellendos. Hos enim sæpe augent, sicut noxiæ stellæ dissimiles sibi morbos aliquando minuunt, quod sanè Ptolemæus & Haly perspicue docent.

*De fabricanda vniuersi figura.*

## C A P V T XIX.

**S**ed curnam vniuersalem ipsam, id est, vniuersi ipsius imaginem præmittimus? Ex qua tamen beneficium ab vniuerso sperare videntur. Sculptet ergo sectator illorum fortè, qui poterit formam quandam mundi totius archetypam si placebit in ære, quam deinde opportunè in argenti lamina imprimat aurata. Sed quando potissimum imprimet? Quando Sol minutum primum Arietis attigerit. Hinc enim Astrologi tanquam ex sui natalis reuolutione, fortunam mundi eo saltem anno imminuentem auspicantur. Ille igitur in hoc ipso mundi natali totius imprimet mundi figuram. At vide ne quam belle inter differendum mundi aliquando nati nobis succurrerit argumentum? si quidem quolibet anno renascitur. Nonne in ipsa hominis genesi metiuntur Astrologi, primum in quo signo, quo gradu, quo minuto Sol extiterit? Ibi quoque totius figuræ iaciunt fundamentum. Et quolibet deinceps anno, quum primum Sol minutum subierit idem, quasi renatum hominem arbitrantur, atque inde præfagiunt anni fortunam. Sicut igitur id in homine facere non valerent, nisi quasi renascereretur, atque hic non posset quasi renasci, nisi fuisset aliquando natus, sic & mundum conijcere licet aliquando genitum. Sole videlicet sub minuto Arietis primo tunc posito, quando quidem per eundem quolibet an-

no situm, fors quædam quasi renascentis mundi reuoluitur. Tunc igitur fabricauit mundi figuram. Cauebit autem ne sabbato Saturni die figuram sculptat aut exprimat. Hoc enim die Deus mundi fabricæ opere traditur quieuisse, quod ab ideali die Solis inceperat. Quantum enim Sol generationi accommodatus est, tantum Saturnus ineptus. Perfecerat autem opus in Venere, pulchritudinem operis absolutam significante. Sed de mundanæ fabricæ rationibus ultra. Ioannes enim Picus noster Mirandula diuina de genesi mundi mysteria Moseos diuinitus his diebus expressit. Quamobrem vt redeamus ad institutum, & ille mundum suum primum die vel hora Saturni non sculptet, sed potius vel hora Solis. Imprimet autem in anni natali, præsertim si tunc felices accedant Iupiter atque Diana. Optimum vero fore putabunt præter lineamenta opificio colores inferere. Sunt vero tres vniuersales simul & singulares mundi colores, viridis, aureus, sapphyrinus, tribus cœli gratiis dedicati. Viridis quidem Veneri simulatque Lunæ, humidus videlicet humidis atque nascentium proprius, accommodatus & matribus. Aureum Solis esse colorem nemo dubitat, & ab Ioue insuper atque Venere non alienum. Sapphyrinum denique Ioui maximè dedicamus, cui & Sapphyrus ipse dicitur consecraui. Vnde & lapis lazulus hoc colore dotatus ob virtutem Iouiam contra bilem atram à Saturno profectam, apud medicos prærogatiuam habet, nasciturque cum auro, aureis distinctus notis, ita comes auri sicut Solis est Iupiter. Similemque vim habet lapis Armenus, colorem similem cum viridi quodammodo possidens. Expedire igitur iudicabunt ad gratiarum cœlestium munera capeffenda, treis potissimum hos colores frequentissimè contueri, atque in formula mundi quam fabricas, sapphyrinum colorem mundi sphaeris inferere. Operæ precium fore putabunt aurea sphaeris ad ipsam cœli similitudinem addere, sidera, atque ipsam Vestem, siue Cererem, id est, terram, viridem induere vestem. Eiusmodi formulam sectator illorum vel gestabit, vel oppositâ intuebitur. Vtile vero fore spectare sphaerâ motibus suis prædit, qualem Archimedes quondam & nuper Florentius quidam noster, Laurentius nomine, fabricauit. Neque spectare solum, sed etiam animo reputare. Proinde in ipsis suæ domus penetralibus cubiculum construet in fornicem actum, figuris eiusmodi & coloribus insignitum, vbi plurimum vi-

gilet atque dormiat. Et egressus domo non tanta attentione singularum rerum spectacula, quanta vniuersi figuram coloresque perspiciet. Sed hæc imaginum fiores illi viderint. Tu vero præstantiorem in te finges imaginem, nempe quum noueris nec quicquam ordinatius esse quam cœlum, neque temperatius aliquid cogitari quam Iupiter, sperabis ita demum beneficia cœli Iouisque consequi, si cogitationibus, affectibus, actionibus, victu te ipsum ordinatissimum temperatissimumque præstiteris. At postquam in mentionem temperaturæ cœlestis incidimus, opportunum forte fuerit recordari nullum inesse cœlo elementaris qualitatis excessum, vt Peripateticè loquar, alioquin siue ita compositum sit, iam esset tot seculis dissolutum, siue etiam simplex, tanta saltem magnitudine, potentia, motione cætera perdidisset. Sed profectò tanquam moderatissimum omnia moderatur, ac diuersa commiscet in vnum. Præterea tum hac ipsa temperantia sua, tum excellentia formæ diuinitus vitam meruit. Nam & res compositas tunc demum vitam adipisci videmus, quando qualitatum perfecta commixtio priorem iam contrarietatem fregisse videtur, vt in plantis. Perfectiorem deinceps in animalibus vitam, quatenus inest in eis complexio à contrarietate remotior quam in plantis. In hominibus rursum eadem ratione perfectiorem, & quodammodo iam cœlestem. Siquidem humana complexio ad cœlestem temperantiam iam accessit, præsertim in spiritu, qui vltra substantiæ suæ subtilitatem qualitatumque temperantium quibus cum cœlo consentit, cœlestem quoque lucem est adeptus. Hic insuper vbi maximè talis potissimum est cœlestis, vitamque cœlestem diuinitus præ cæteris est adeptus. Et quatenus se talem in omni victu legeque vitæ efficit atque seruat, eatenus singularia cœlestium dona reportat. quando vero dicimus non esse in cœlo vllum elementaris qualitatis excessum, intelligimus vel nullam esse ibi eiusmodi qualitatem, sed virtutes potius effectrices qualitatum temperatas, vel si quæ sunt illic quodammodo similes qualitates, quasi æriam habere temperiem. Atque vbi quædam illic frigida siccaque nominamus, Platonica hæc accipimus ratione, id est, vt frigidum appelletur quod minimi caloris est causa. Sic cum vero quod humorem nobis exhibet minimum. Sic Astrologus Abraham; Saturnum inquit corpus nostrum quodammodo relinquere frigidum atque siccum,

quia calorem atque humorem affert nostro minorem. Eadem ratione carnes bouis & leporis in se quidem calidæ atque humidæ, nobis frigidæ sunt & siccæ. Ex hac autem inductione duo accipe corollaria. Primum quidem, si corpora magis deinceps temperata, magis viuunt, cœlū exactissimè temperatum absolutissimam in se vitam possidet, coniectari, vt quatenus reliqua ad temperiem vitamque illius accedunt, eatenus vitam fortiri præstantiorem. Alterum verò, vitam esse formam in se perfectam, perficientemque corpus, motionisque principium exhibentem. Principium, inquam, intimum, motionis quoque tum intrinsecus actæ, tum per omnem partem extrinsecus expeditæ. Si igitur id ipsum vita est, mente captum existimato qui eiusmodi formam non cognouerit inesse cœlo, corpore præstantissimo, circumcunte semper motione perfecta, cuncta viuificante, magisque illa gradatim, quæ vel ad ipsius similitudinem naturaliter propinquius accesserunt, vel quotidie huius influxibus aptius se exponunt.

*Quantam imagines vim habere putentur in spiritum, & spiritus in eas. Et de affectu uientis & operantis.*

## CAPVT XX.

**C**ompertum habemus, si quis rite utatur helleboro, feratque potenter, mutare quodammodo exquisita purgatione & occulta eius proprietate qualitatem spiritus corporisque naturam, & ex parte motus animi, & quasi reiuulescere, vt fermè videatur esse renatus. Vnde Medæa Magosque tradunt herbis quibusdam reddere iuuentutem consueuisse, quam non tam reddunt myrobalani quam conseruant. Similem Astrologi potestatem propitias habere imagines arbitrantur, per quam gestantis naturam & mores quodammodo mutant, in meliusque restituunt, vt quasi iam alter euaserit, aut saltem prosperam valetudinem diutissime seruent. Imagines vero noxias aduersus gestantem habere vim hellebori præter artem potentiamque assumpti, venenosam videlicet atque pestiferam. Aduersus autem alium quendam, ad cuius calamitatem fabricatæ intrinsecusque fuerint, vim ænei speculi concanque sic prorsus obiecti, vt collectis repercussisque in oppositum radiis, cominus quidem comburatur, eminus autem caligare compellatur. Hinc orta est historia vel opinio, putans Astrologorum machinis,



Magorumque beneficiis homines, bruta, plantas, siderari atque vabescere posse. Ego autem imagines in rem distantem, vim habere vllam non satis intelligo. Habere vero in gestantem nonnullam suspicor, non tamentalem opinor qualem plerique fingunt, & hanc ratione materiae potius quam figuræ, atque, vt dixi, longo interuallo medicinas imaginib. antepono. Quamquam Arabes & Ægyptii tantum statuis imaginibusque attribuunt arte Astronomica & magica fabricatis, vt spiritus stellarum in eis includi putent. Spiritus autem stellarum intelligunt alii quidem mirabiles coelestium vires, alii vero dæmonas etiam stellæ huius illiusue pedissequos. Spiritus igitur stellarum qualescunque sint, inferi statuis & imaginibus arbitrantur, non aliter ac dæmones soleant humana nonnunquam corpora occupare, perque illa loqui, moueri, mouere, mirabilia perpetrare. Similia quædam per imagines facere stellarum spiritus arbitrantur. Putant dæmonas mundani ignis habitatores per igneos humeros vel ignitos, similiterque per ignitos spiritus, & affectus eiusmodi nostris insinuari corporibus. Similiter stellarum spiritus per radios opportunè susceptos suffumigationesque & lumina, tonosque vehementes competentibus imaginum materiis inferi, mirabiliaque in gestantem vel propinquantem efficere posse. Quæ quidem nos per dæmonas fieri posse putamus, non tam materia certa cohibitos, quam cultu gaudentes. Sed hæc alibi diligentius. Tradunt Arabes spiritum nostrum quando ritè fabricamus imagines, si per imaginationem & effectum ad opus attentissimus fuerit, & ad stellas coniungi cum ipso mundi spiritu, atque cum stellarum radiis, per quos mundi spiritus agit, atque ita coniunctum esse ipsum quoque in causa, vt à spiritu mundi per radios quidam stellæ alicuius spiritus, id est, viuida quædam virtus infundatur imagini potissimum hominis tunc operantis spiritui consentanea. Adiuuari quoque suffumigationibus ad stellas accommodatis opus eiusmodi, quatenus suffumigationes tales aërem, radios, spiritum fabri, imaginis materiam sic prorsus afficiunt, Ego vero odores quidem tanquam spiritui aërique natura per similes, & quum accensi sunt, stellarum quoque radiis consentaneos arbitror, si Solares vel Iouii sunt, afficere ac erē aspiritum vehementer ad dotes Solis aut Iouis tunc dominantis opportunè sub radiis capiendas, atque spiritum sic affectum, ita

donatum, posse vehementiore quodam affectu, non solum in proprium corpus agere, sed propinquum præsertim natura conforme quidem, sed debilius, & consimili quadam afficere qualitate. Materiam vero imaginis duriorem ab odoribus & operantis imaginatione, vix minimum quiddam suscipere posse puto, spiritum tamen ipsum ab odore sic affici, vt ex ambo- bus vnum conficiatur. Quod quidem ex eo patet, quod odor non agit vterius in olfactum, postquam satis egit. Olfactus enim & quoduis aliud à seipso vel simillimo quopiam nihil patitur. Sed de his alibi. Proinde imaginationis intentionem, non tam in fabricandis imaginibus, vel medicinis vim habere, quam in applicandis & assumendis existimo, vt si quis imaginem (vt aiunt) gestans ritè factam, vel certè medicina similiter vtens, opem ab ea vehementer affectet, & proculdubio credat, speretque firmissimè, hinc certè quamplurimus sit adiuumento cumulus accessurus. Nam vbi vel virtus imaginis si qua est, tangentis carnem penetrat calefacta, saltem virtus in electa eius materia naturalis, vel certe medicine vigor intus assumptæ, venis ac medullis illabitur, Iouiam secum ferens proprietatem, spiritus hominis in spiritum eiusmodi Iouiū affectu, id est, amore transfertur. Vis enim amoris est transferre. Fides autem spesque non dubia, spiritum hominis iam ita percitum sistit in spiritu Iouiū penitus atque firmat. Quod si quemadmodum Hippocrates & Galenus docent, ægrotantis amor fidesque erga Medicum interiorē exteriorēque ad sanitatem plurimum conferunt (imò vero fiduciam hanc Auicenna plus inquit efficere quam medicinam) quantum ad coelestem opem conducere putandum est, affectum fidemque nobis erga coelestem influxum iam nobis insitum, agentem intus, viscera penetrantem? Iam vero amor ipse fidesque erga coelestionum, sepe coelestis adminiculi causa est, atque vicissim amor & fides hinc aliquando forsan proficiscitur, quod ad hoc ipsum iam nobis faueat clementia cœli.

*De virtute verborum atque cantus ad beneficium cœleste captandum, ac de septem gradibus perducentibus ad cœlestia.*

## C A P V T XXI.

**V**erba præterea quædam acriore quodam affectu pronunciata, vim circa imagines magnam habere censent ad ef-

fectum earum illuc propriè dirigendum, quorum affectus intenduntur & verba. Itaque ad duos ardentissimo quodam amore conciliandos, imaginem sub Luna coeunte cum Venere in Piscibus vel Tauro fabricabant, multis interim circa stellas verbaque curiosius obseruatis, quæ referre non est consilium. Non enim philtrea doceamus, sed medicinas. Probabilius autem est effectus eiusmodi per Venericos dæmonas confici, his operibus verbisque gaudentes, vel per dæmonas simpliciter seductores. Nam & Apollonium Theanæum sæpè Lamias deprehendisse & prodidisse ferunt, dæmonas scilicet quosdam salaces Venericosque, qui formosas puellas simulent, pelliciantque formosos, quos ut serpens elephantem ore, sic illi illos ore vulua pariter exugant, ac prorsus exhauriant. Sed hæc Apollonius ipse viderit. In verbis autem certis vim esse certam atque magnam Origenes asserit contra Celsum, & Synesius atque Alchindus de Magia disputantes. Item Zoroaster vetas barbara verba mutare, Iamblichus quoque similiter. Item Pythagorici verbis & cantibus atque sonis mirabilia quædam Phœbi & Orphei more facere consueti. Quod Hebræorum antiqui doctores præ cæteris obseruauerunt, omnesque Poætæ miranda canunt carminibus effici. Et grauissimus ille Cato in re rustica, in curandis bestiarum morbis, aliquando barbaris cantionibus utitur. Sed præstat dimittere cantiones. Concentum vero illum, quo adolescens David Saulem ab insania redimebat, nisi mysterium iusserit ad diuinitatem referri, referet fortè aliquis ad naturam. quum vero pro septem Planetarum numero, septem quoque sint gradus, per quos à superioribus ad inferiora sit attractus, voces medium gradum obtinent, & Apollini dedicantur. Infimum quidem tenent gradum materiæ duriores, lapides atque metalla, ac Lunam referre videntur. Secundum in ascensu locum habent, quæ ex herbis, arborum fructibus, gummis, membris animalium componuntur, respondentque Mercurio, si ordinem in coelo sequimur Chaldæorum. Tertium pulueres subtilissimi, eorumque vapores ex prædictis electi, odoresque simpliciter herbarum & florum & vnguentorum ad Venerem pertinentes. Quartum verba, cantus, soni, quæ omnium ritè dedicantur Apollini, Musicæ præ cæteris auctori. quintum vehementes imaginationis conceptus, formæ, motus, affectus vim Martiam referentes. Sextum rationis humanæ discursiones deliberationesque con-

sultæ pertinentes ad Iouem. Septimum secretiores simplicioresque intelligentiæ quasi iam à motu sciuntæ, coniuntæ diuinis, destinatæ Saturno. Quem merito Sabbath Hebræi nomine quietis appellant. Quorum hæc? ut intelligas, quemadmodum ex certa herbarum vaporumque compositione confecta, per artem tum Medicam, tum Astronomicam, resultat communis quædam forma velut harmonia quædam siderum dotata muneribus. Sic ex tonis primo quidem ad stellarum normam electis, deinde ad earundem congruitatem inter se compositis, communem quasi formam fieri, atque in ea coelestem aliquam suboriri virtutem. Difficillimum quidem est iudicatu, quales potissimum toni, qualibus conueniant stellis, quales item tonorum compositiones, qualibus præcipuè sideribus aspectibusque consentiant. Sed partim diligentia nostra, partim diuina quadam sorte non aliter id assequi possumus, quam Andromachus in theriaca componenda diutissime fatigatus, ac tandem post diligentiam, diuina sorte consequutus theriacæ virtutem. Quod quidem contigisse diuinitus Galenus & Auicenna confirmat. In id vero totam Medicinam exordium à vaticiniis habuisse, testis est Iamblichus atque Apollonius Theanæus. Ideoque Phœbum vatem Medicinæ præponunt. Tres verò potissimum regulas adhuc afferemus, si prius admonuerimus, ne putes nos in præsentia de stellis adorandis loqui, sed potius imitandis, & imitatione captandis. Neque rursus de donis agere credas, quæ stellæ sint electione daturæ, sed influxu potius naturali. Ad quem profectò multiplicem & occultum, ita nos exquisitis studemus modis accommodare sicut quotidie ad manifestum Solis lumen caloremque salubriter excipiendum nos ipsos accommodamus. Aptare vero se ipsum ad occultas dotes eius atque mirificas, solius sapientis est officium. Sed iam ad regulas tantum sideribus accommodaturas perueniamus.

Prima est, exquirere quas in se vires quosue ex se effectus stella quælibet & sidus & aspectus habeant, quæ auferant, quæ ferant. Atque verborum nostrorum significationibus hæc inferere, detestari quæ auferunt, probare quæ ferunt. Secunda, considerare quæ stella cui loco maximè vel homini dominetur. Deinde obseruare qualibus communiter hæ regiones, & personæ tonis utantur, & cantibus ut ipse similes quosdam vnà cum signi-

ificationibus modo dictis adhibeas verbis, quæ sideribus eisdem stupes exponere. Tertia, situs aspectusque stellarum quotidianos animaduertere, atque sub his explorare, ad quales potissimum sermones, cantus, motus, saltus, mores, actus incitari homines plerique soleant, ut Italia quædam tu pro viribus imiteris in cantibus, coelo cuidam simili placituri. similemque suscepturis influxum. Memento vero cantum esse imitorem omnium potentissimum. Hic enim intentiones affectionesque animi imitatur & verba, refert quoque gestus motusque corporis & actus hominum atque mores, tamque vehementer omnia imitatur & agit, ut ad eadem imitanda vel agenda, tum cantantem, tum audientes subito prouocet. Eadem quoque virtute quando coelestia imitatur, hinc quidem spiritum nostrum ad coelestem influxum, inde vero influxum ad spiritum mirificè prouocat. Iam vero materia ipsa concentus purior est admodum, cœloque similior, quam materia medicinae. Est enim aer etiam hic quidem calens siue tepens, spirans adhuc, & quodammodo viuens, suis quibusdam articulis artibusque compositus, sicut animal, nec solum motum ferens, affectumque præferens, verum etiam significatum afferens quasi mentem, ut animal quoddam ærium & rationale quodammodo dici possit. Concentus igitur spiritu sensuque plenus, si fortè tum secundum eius significata, tum secundum eius articulos atque formam ex articulis resultantem, tum etiam secundum imaginationis affectum huic sideri respondeat, aut illi, non minorem inde virtutem quam quælibet alia compositio traiecit in cantantem, atque ex hoc in proximum auditorem, quousque cantus vigorem seruat spiritumque canentis, præsertim si cantor ipse sit natura Phoebeus, vehementemque habeat vitalem cordis spiritum, atque insuper animalem. Sicut enim virtus ac spiritus naturalis, ubi potentissimus, est mollit statim, liquefacitque alimenta durissima, atque ex austeris mox dulcia reddit, generat quoque extra se feminalis spiritus productione propaginem, sic vitalis animalisque virtus ubi efficacissima fuerit, ibi intentissima quædam sui spiritus per cantum, tum conceptione agitationeque in corpus proprium potenter agit, tum effusione mouet subinde propinquum, afficitque cum suum, tum alienum siderea quadam proprietate, quam tum ex ipsa sui forma, tum ex electa temporis opportunitate concepit.

Hac utique ratione orientales meridionalesque multi, præcipuè Indi, admirandam feruntur in verbis habere potentiam, utpote qui magna ex parte solares sunt. Vimque non naturalem dico, sed vitalem & animalem habent fermè omnium potentissimam, & quicumque in regionibus aliis maximè sunt Phoebei. Cantus autem hac virtute, opportunitate, intentione conceptus, fermè nihil aliud est quam spiritus alter, nuper penes spiritum tuum in te conceptus, factusque Solaris, & agens tum in te, tum in proximum potestate Solaris. Si enim vapor & spiritus quidam aliquando per radios oculorum, vel aliter foras emissus fascinare, inficere, aliterque afficere proximum potest, multo magis id valet spiritus ab imaginatione cordeque simul vberior profluens & feruentior, motuque valentior, ut non omnino mirum sit, morbos quosdam animi atque corporis sic auferri posse aliquando, vel inferri præsertim, quoniam spiritus eiusmodi Musicus propriè tangit, agitque in spiritum inter corpus animamque medium, & utrumque affectione sua prorsus afficientem. Mirabilem vero in concitato canenteque spiritu vim esse concedes, si Pythagoricis Platonisque concesseris, cœlum esse spiritum, motibus tonisque suis omnia disponentem.

Memento vero totam procedere Musicam ab Apolline. Atque eatenus Iouem esse Musicum, quatenus est cum Apolline concors. Venerem insuper & Mercurium Musicam vicinitate Apollinis reportare. Item ad hos quatuor duntaxat attinere concentus, tres vero reliquos voces quidem habere, non cantus. Iam vero voces tardas, graues, raucas, querulas, Saturno tribuimus. Marti vero contrarias, veloces, acutasque & asperas & minaces. Medias vero Lunæ. Concentus autem Ioui quidem graues, & intentos dulcesque, & cum constantia lætos. Contra veneri cum lasciuia & mollitie voluptuosos cantus adscribimus. Inter hos vero medios Soli tribuimus & mercurio. Si vna cum gratia suauitateque sunt venerabiles & simplices & intenti, Apollinei iudicantur. Si vna cum iucunditate remissiores quodammodo sunt, strenui tamen atque multiplices, Mercuriales existunt. Tu igitur horum quatuor vnumquemque cantibus tibi suis conciliabis, præsertim si competentes cantibus sonos adhibeas, adeo ut quum eorum more opportunè canendo & sonando clamaueris, responsuri protinus videantur, vel instar Echo,

vel sicut chorda quædam in cithara tremens, quoties vibratur altera, temperata similiter. Atque ut vult Plotinus & Iamblichus, ita naturaliter id tibi coninget è cœlio, quemadmodum vel ex cithara reboatus siue tremor, vel ex opposito pariete fit Echo. Profectò quoties ex frequenti quodam usu, harmoniæ Iouiæ, vel Mercuriales, vel Veneræ, factæ videlicet his regnantibus, spiritus tuus ad hoc ipsum attentissimè canens, harmoniæque conformatus euadit Iouius, vel Mercurialis, vel Veneræ. Interea Phœbeus euadit, siquidem Phœbi ipsius Musicæ ducis virtus in omni consonantia viger. Atque vicissim ex cantu sonoque Phœbeo ipse Phœbeus euadens, virtutem Iouis interim tibi vendicas & Veneris atque Mercurij. Rursusque ex spiritu sic intus affecto, similiter afficis animam atque corpus. Memento vero orationem aptè & opportunè compositam, & affectu sensuque plenam atque vehementem, similem cantibus vim habere. Quantam in orando potentiam Damis & Philostratus habere sacerdotes quosdam Indos narrent, referre non expedit, nec etiam quibus verbis Apollonium euocasse manes Achillis affirmant. Non enim loquimur nunc de numinibus adorandis, sed de naturali quadam potestate sermonis & cantus atque verborum. Esse vero Phœbeam medicamque in sono, & eo quidem certo potentiam, ex eo patet quod quæ in Apulia tacti Phalangio sunt, stupent omnes, semianimesque iacent, donec certum quisque suumque sonum audiat. Tunc enim saltat ad sonum apte, sudat inde atque conualescit. Ac si post annos decem similem audiuerit sonum, subito concitatur ad saltum. Sonum verò illum ex indiciis esse Phœbeum Iouialemque coniicio.

*Quomodo septem modis nos cœlestibus accommodare possimus, & quibus Saturnus sit maleficus, quibus propitius. Quos Iupiter à Saturno defendat. Quomodo cœlum agat in spiritum & corpus & animam.*

## CAPVT XXII.

**Q**VONIAM vero cœlum est harmonica ratione compositum, moueturque harmonice, & harmonicis motibus atque sonis efficit omnia, meritò per harmoniam solam non solum homines sed inferiora hæc omnia pro viribus ad capienda cœlestia præparantur. Harmoniam vero capacem superiorum per sep-

tem rerum gradus in superioribus distribuimus. Per imagines videlicet (ut putant) harmonicè constitutas. Per medicinas sua quadam consonantia temperatas. Per vapores odoresque simili concinnitate confectos. Per cantus musicos atque sonos. Ad quorum ordinem vimque referri gestus corporis saltusque & tripudia volumus, per imaginationis conceptus, motusque concinnos, per congruas rationis discursiones, per tranquillas mentis contemplationes. Sicut enim corpus per harmoniam quotidie suam, id est, per situm & habitum & figuram opportunè lumini calorigue Solis exponimus, sic & spiritum occultis stellarum viribus comparandis, per suam quandam similem harmoniam, imaginibus ut opinantur, & certe medicinis, odoribus harmonicè compositis comparatam, & denique per spiritum superis ita paratum (ut sepe diximus) animam eisdem exponimus atque corpus. Animam, inquam, quatenus affectu ad spiritum inclinatur & corpus. In anima vero nunc imaginationem, rationem, mentem ponimus. Potest utique imaginatio nostra, vel propter qualitatem motumque spiritus, vel per electionem nostram, vel etiam vtrinque ita disponi, componi, confirmari Marti Soliue, ut sit euestigio proprium influxus Phœbei vel martij susceptaculum. Similiter ratio, vel per imaginationem spiritumque simul, vel per deliberationem, vel vtrinque, sic ad Iouem imitatione quadam comparare se potest, ut multo magis ob dignitatem propinquitatemque suam ipsa Iouem capiat & munera Iouis, quam imaginatio siue spiritus, quemadmodum imaginatio spiritusque eadem ratione multo magis cœlestia capiunt, quam res & materiæ quævis inferiores. Mens denique contemplatrix quatenus seipsam non solum ab his quæ sentimus, verum etiam ab eis quæ imaginamur communiter moribusque argumentamur humanis, seuocat, & affectu, intentione, vita, ad separata se reuocat, Saturno quodammodo se exponit. Huic soli proprius est Saturnus. Sicut enim Sol animalibus quidem nocturnis inimicus est, diurnis autem est amicus, ita Saturnus hominibus vel vulgarem palam vitam agentibus, vel fugientibus quidem vulgi consuetudinem. Vulgares tamen affectus non dimittentibus est aduersus. Vitam namque communem concessit Ioui, separaram verò sibi vendicauit atque diuinam. Mentibus autem hominum reuera hinc pro segregatis tanquam sibi cognatis quodammodo est amicus. Nam & spiriti-

bus sublimem habitantibus aërem ipse Saturnus ( vt Platonice loquar ) est pro Ioue, sicut Iupiter hominibus communem agentibus vitam est iuuans pater. Nullus vero Saturnus est infensior, quam hominibus contemplatiuam vitam simulantibus quidem, nec agentibus. Hos enim nec Saturnus agnoscit vt suos, nec Iupiter ipse Saturni temperies, adiuuet eos, qui communes hominum leges moresque & commercia fugiunt. Hæc enim sibi Iupiter vsurpauit ( vt aiunt ) ligato Saturno, segregata Saturnus. Quamobrem Lunares illi populi, quos Socrates in Phædone describit, eminentissimam terræ superficiem, & altiore nubibus habitantes, videntes sobrii admodum frugibusque contenti, & secretioris sapientiæ studio religionique dediti Saturni felicitatem gustant, vitamque agunt ita prosperam, tam longæuam, vt non tam mortales homines, quam immortales demones habeantur, quos heros multi nominant, aureumque genus Saturnio quodam seculo regnoque gaudens. Quod forsitan Astrologos Arabes voluisse puto, vbi aiunt vltra lineam æquinoctialem ad meridiem esse subtilissimos habitatores quosdam demones, qui nec oriri videantur, neque mori, ibique potestatem habere Saturnum, caudamque Draconis. Quod sanè confirmare videtur Albumasar in libro Sadâr, dicens quasdam Indiæ regiones Saturno subiectas esse, ibique homines esse valde longæuos, ac senio plurimum extremo decedere. Rationemque assignat, quoniam Saturnus non lædat domesticos, sed externos. Tu verò potestatem Saturni ne negligas. Hunc enim ferunt Arabes omnium potentissimum, Planetas sanè vires eorum subire ad quos accedunt, omnes verò ad eum accedere potius quam vicissim, Planetasque coniunctos illi, natura illius agere. Est enim ipse inter Planetas orbis amplissimi caput. Quilibet sanè Planeta sui orbis caput est & cor & oculus Saturnus, item stellis proximus est innumeris, primoque mobili quam similimus, longum agit circuitum. Est altissimus Planetarum, vnde felicem eum vocant, cui ille feliciter aspirauerit. Et quamuis eum tanquam à communi vita hominum alienum plerumque maxime vereantur, placari tamen etiam communi vitæ purant, si quando plurimam in ascendente potestatem dignitatemque habuerit, aut Iupiter eum suus feliciter aspexerit, vel in suis finibus excellenter acceperit, alioquin influxus illius opportunè susceptus, in ma-

teria præsertim crassa sit quasi venenum, sicut & ouum putrefactione vel aduersione fit venenosum, vnde nascuntur vel euadunt immundi quidam, ignaui, tristes, inuidi, dæmonibus immundis expositi, quorum commercium procul effugito. Nam Saturni venenum alibi quidem sopitum latet, ceu sulphur à flamma remotum. In uiuentibus vero corporibus sæpè flagrat, atque vt sulphur accensum non comburit solum, sed vapore etiam noxio omnia circum implet, atque inficit propinquantes. Contra influxum eius hominibus communiter peregrinum, & quodammodo dissonum nos armat Iupiter, tum naturali qualitate sua, tum alimentis medicinisque certe suis, atque ( vt putant ) etiam imaginibus, tum etiam moribus negociisque, & studiis atque rebus ad ipsum propriè pertinentibus. Noxium vero influxum Saturni effugiunt, subeuntque propitium non solum qui ad Iouem confugiunt, sed etiam qui ad diuinam contemplationem ab ipso Saturno significatam tota mente se conferunt. Hoc enim pacto malignitatem fati deuitari posse Chaldæi & Ægyptij, atque Platoniciputant. Quum enim cœlestia nolint esse corpora vana, sed diuinitus animata, atque insuper mentibus recta diuinis, nimirum illinc ad homines non solum quamplurima ad corpus & spiritum pertinentia, sed multa etiam bona quodammodo in animam redundantia proficisci volunt, non à corporibus in animam sed ab animis. Magis autem hæc pluraque eiusmodi à mentibus superioribus cœlo profluere. Inter hæc si rationes omnes assignare volueris, quibus adductus Moses ocium sabbati mandauit Hebræis, forsitan vltra sublimiorem secretioremque allegoriam inuenies Saturni diem actionibus ciuilibus bellicisque ineptum, contemplationibus aptum, eoque die diuinum contra discrimina patrocinium obsecrandum, quod quidem impetrari posse aduersum Martis & Saturni minas Abraham & Samuel, & plures Hebræorum Astrologi, eleuatione mentis in Deum votisque & sacrificiis consentunt, præceptum illud Chaldæum confirmantes scilicet: Si mentem ad pietatis opus ardentem erexeris, corpus quoque caducum seruabis. Consideratum dignum est illud Iamblichi, cœlestia mundana numina vires quasdam in se superiores, nonnullas inferiores habere. Per has quidem effectibus nos fatalibus deuincere, per illas autem vicissim soluere nos à fato, quasi clauas, vt inquit Orpheus, ad aperiendum habeant & claudendum. Multo



Multo igitur magis diuinitas mundo superior & fatali necessitate nos redimit. Exploranda quoque dignissimum est Hebraicum illud, in macandis animalibus rebusque nostris sacrificio dissipandis mala cœlitus imminetia, à nobis ad nostra deflecti. Sed hæc Pico nostro exploranda relinquimus. Denique vbicunque dicimus cœlestium ad nos dona descendere, intellige tum corporum cœlestium dotes in corpora nostra venire per spiritum nostrum ritè paratum, tum eadem prius etiam per radios suos influere in spiritum naturaliter, vel quomodocunque illis expositum. Tum etiam animarum cœlestium bona, partim in eundem spiritum per radios profluere, atque hinc in nostros animos redundare, partim ab animis eorum, vel ab Angelis in animos hominum illis expositos, peruenire. Expositos, inquam, non tam naturali quodam pacto, quam electione arbitrij liberi vel affectu. Summatim verò quicunque voto, studio, vita, moribus, beneficentiam, actionem, ordinem cœlestium imitantur, eos existimato tanquam supernis similiores, ampliores illinc dotes accipere. Homines autem artificiosè cœlestium dispositioni dissimiles atque discordes, & clam esse miseros, & denique palam infelices euadere.

*Vt prospere viuas agasque, in primis cognosce ingenium, sydus, Genium tuum, & locum eiusdem conuenientem, hic habita, professionem sequere naturalem.*

## CAPVT XXIII.

**Q**Uicunque sanæ mentis sui que compos nascitur, est à cœlo honestum aliquod opus & vitæ genus naturaliter institutus. Quisquis igitur cælum optat habere propitium, hoc opus, hoc genus in primis aggrediatur, hoc sedulo prosequatur. Cælum enim suis fauet incæpris. Ad hoc ipsum verò præ cæteris es natura factus, quod primum à teneris annis agis, loqueris, fingis, apras, somnias, imitaris, quod tentas frequentius, quod facilius peragis, quo summo opere proficis, quo præ cæteris delectaris, quod relinquis inuitus. Hoc est sanè ad quod te cælum rectorque cæli genuit. Eatenus igitur tuis fauebit incæpris & aspirabit vitæ, quatenus genitoris ipsius auspicia prosequeris, præsertim si verum sit Platonicum illud (in quo tota consentit antiquitas) unicuique nascenti esse dæmonem quendam vitæ custodem, ipso suo sydere destinatum. Qui & ad hoc ipsum officium adiunct, cui nascentem cælestia deputarunt. Quicunque igitur per argumenta, quæ mo-

do diximus, suum ingenium perscrutans, ita naturale suum opus inueniet, inueniet simul sydus & dæmonem, quorum exordia sequens ager prosperè, viuetque feliciter, alioquin & fortunam experietur aduersam, & cælum sentiet inimicum. Duo igitur sunt præ cæteris hominum infortunatorum genera. Alterum eorum qui nihil professi nihil agunt. Alterum eorum qui professionem ingenio alienam subeunt, Genioque contrariam. Illi quidem ignauia torpent, interim ad actiones incitante cælo semper agente. Hi dum aliena à patronis cælestibus agunt, frustra laborant supernis destituti patronis.

Primum quidem antiquo prouerbio confirmatur, Dij adiuuant facientes, ignauis autem infensi sunt. Secundum prouerbio simili, Nihil agas inuita Minerva. Ob hanc arbitror rationem Iouem in Pythagoricis carminibus obsecrari, vt vel ipse tot malis leuet genus humanum, vel saltem quo duce dæmone vtamur, ostendat. Proinde operæ precium fuerit indagare, ad quam potissimum regionem habitandam, & excolendam te tuum sydus dæmonque tuus ab initio designauerit, ibi enim magis aspirant. Ea verò est in quam primum profectus spiritus tuus quodammodo recreatur, vbi sensus vegetior permanet, vbi corporis habitudo validior, vbi magis plerique fauent, vbi vota succedunt. Hæc igitur experire, hanc regionem elige, hanc cole feliciter. Hinc videlicet discessurus infelix, nisi & rediturus & ad similia pergas. Sed interea frequentibus in hac regione motibus te exerce, gyrosque quosdam cælestium instar agito. Motu enim circuituque eiusmodi genitus similibus conseruabere. Quantum præterea ad habitationem pertinet, vtiliter recordabere. Sicut alimenta vitæ necessaria nus quidem vrbi suppeditat, vrbs verò consumit, sic & ipsam vitam rusticatione frequenti, vbi tædium te minimè cæperit plurimum augeri, sed vrano cum ocio tum negotio conterì. Quantum verò ad habitationem simul & professionem spectat, illud Orientalium Astrologorum minimè contemnendum videlicet mutatione nominis, professionis, habitus, victus, loci cælestem influxum nobis tum in melius, tum in deterius permutari. Dæmones quoque vel commutari, vel ad eosdem aliter hic & alibi nos habere Platonici iudicabunt. Dæmonem verò vnius cuiusque custodem Astrologi cum Platonice geminum esse posse consentiunt, alterum quidem genituræ proprium, alterum verò professionis. Et quoties professio cum natura con-

sentit, eundem vtrūque dæmonē vel certe  
simillimum nobis adesse, vitamque inde no-  
stram magis secum fore concordem atque  
tranquillam. Sin autem professio diffidet ab  
ingenio, dæmonem acquisitum arte, esse à  
genio naturali discordem, vitamque labo-  
riosam atque sollicitam. Qualis autem vni-  
cuique dæmon ab ipsa generatione præsit  
cupientibus inuenire, Porphyrius regulam  
inuestigat ex Planeta domino geniturę. Ju-  
lius Firmicus Planetam geniturę domi-  
num esse inquit, vel eum qui plures illic ha-  
beat dignitates, vel ex firmiori sententia po-  
tius eum cuius domicilium mox petitura sit  
Luna, post signum quod homine nascente  
iam tenet. Sed dæmonem non eadem re-  
gula putat inuestigandum, verum ex Chal-  
dæorum opinione à Sole potius aut Luna.  
A Sole quidem ad Lunam in natiuitate di-  
urna, à Luna vicissim ad Solem in natiuita-  
te nocturna, vt computato inter hæc inter-  
uallo, æquale spacium peragas ab ascen-  
dentis gradu descendens, & in quem termi-  
num definis animaduertas. Cuius enim  
stellæ est ille terminus, eiusdem esse dæmo-  
nem arbitrantur. Summatim verò à domi-  
no genituræ simul atque dæmone, tenorem  
vitæ fortunamque perpendere solent. For-  
tunam adiunxi quoniam nonnulli partem  
fortunæ, eadem fermè computant ratione.  
Optabant veteres suum ad se dæmonem  
ab aliquo cœli cardine descendisse, ab O-  
riente videlicet vel Occidente, vel medio  
vtrinque cœlo, aut saltem ab vndecima vel  
quinta plaga. Vndecima quidem medio su-  
pra caput nostrum cœlo succedit, ac bonus  
dæmon cognominatur, & ascendentem ab  
Oriente gradum aspicit ex sextili. Quinta  
verò cœlo antipodum medio succedit, ap-  
pellaturque bona fortuna, & ascendentem  
gradum contuetur ex trino. Optabant ter-  
tio loco dæmonem, si modò à cadenti pla-  
ga venerit saltem, vel à nona venisse, vel à  
tertia. Nona enim appellatur Deus, tertia  
verò dea. Et illa descendentem gradum ex  
trino, hæc aspicit ex sextili. Cadentes verò  
duodecimam atque sextam exhorrebant.  
Illam sanè malum dæmonem, hanc malam  
fortunam cognominantes. Nos autem o-  
ptare præterita superuacuum arbitrati, mo-  
nemus easdem plagas quas illi pro dæmo-  
nibus fortunisque optabant, obseruari pro  
Planetis & stellis ad opus efficiendum ac-  
commodandis, vt vel sint in angulis, aut in  
duabus quas diximus succedentibus, aut  
saltem in duabus dumtaxat cadentibus,  
quas antea nominauimus. Neque enim ab  
re Solem nona gaudere dicunt, Lunam ter-  
tia, Iouem vndecima, Venerem verò quin-

ta Hæ namque gradum conspiciunt ascen-  
dentem. Sed redeamus ad institutum. Sine  
igitur ab illa quam in superioribus narra-  
bam, experientia diligentiaque, siue ab hac  
arte quam modo recensui, primum inuesti-  
gemus naturæ dæmonisue instinctum, in-  
fortunatum esse censebimus, qui officium  
nullum profitetur honestum. Nam & du-  
cem professionis reuera non habet, qui o-  
pus honestum non aggreditur, & ducem  
naturalem vix vllum habet. Quoniam stel-  
larum dæmonumque siue Angelorum du-  
cum diuinitus ad custodiam dispositorum  
officium est agere semper, & excellenter &  
latissimè. Infortunatum insuper eum, vt su-  
prà diximus, qui professione naturæ con-  
traria diuersum à Genio subit dæmonem.  
Memento verò pro dignitate professionum  
digniores gradatim accipi dæmones, seu  
maius Angelos, atque in gubernatione pu-  
blica etiam digniores. Posse verò artem vi-  
tæque tenorem accipi Genio & ingenio  
non contrarium, neque longè diuersum, et-  
iam si ad excellentiora processeris. Me-  
mento rursus familiaritatem eorum inire,  
quibus Gratia cœlestes afflant. Quod ex  
bonis animi, corporis, fortunæ perpendes,  
sicut enim odor ex musco, sic ex bono boni  
non nihil exhalat in proximum, ac sæpè per-  
seuerat infusum. Mirificus autem foret cœ-  
tus trium felicitum vel duorum inter semi-  
rabiliter redundantium. Memento deni-  
que effrenatos & impudentes & malignos  
ac infelices procul fugere. Hi namque ma-  
lorum pleni dæmonum vel radiorum, ma-  
lefici sunt, & tanquam leprosi pestilentes-  
que non solum tactu nocent, sed propin-  
quitate etiam & aspectu. Sanè propinqui-  
tas ipsa corporum animatorum putatur ef-  
se contactus, propter efficacem vaporum  
exhalationem foras à calore, spiritu, affectu  
manantem. Maximè verò pestilens erit fla-  
gitiosorum familiaritas atque crudelium, si  
verum fuerit, post vegetalem vitam mense  
Iouis, id est, secundo nobis infusam deinceps  
mense Martis, id est, tertio sensualem  
animam infundi perturbationibus manci-  
patam. Sic enim qui perturbatione ferun-  
tur, Martis pleni Martiali contagione pro-  
pinquos inficiunt. Contraria verò ratione  
consuetudo frequens contiguumque com-  
mercium cum felicibus excellentibusque,  
vt diximus, prodesse mirificè consuevit. A-  
pollonium Theanæum ferunt Ephesi de-  
prehendisse senem, sub cuius figura lateret  
dæmon, qui sola præsentia totam ciuitatem  
peste contaminabat. Quantum verò So-  
crates multis præsentia sola profuerit, Xe-  
nophon & Plato testantur.

*Quæ ratione literati cognoscant ingenium  
suum sequanturque victum spiritui  
consentaneum.*

## CAPVT XXIII.

**Q**Voniam verò literarum studiosis lo-  
quor, recordari vnumquemque volo  
literarum amore captum in primis se esse  
Mercurialem, præterea Solarem, quatenus  
ipse Mercurius est Solaris. Atque hæc, com-  
munis his omnibus est conditio. Propriè ve-  
rò præter naturam Mercurialem quisquis  
eloquij gratia, lepore, dignitate, venustate  
pollet, Apollinem in se agnoscat & Vene-  
rem. Qui ad leges vel naturalem commu-  
nemque Philosophiam est propensior, non  
ignoret Iouem se habere patronum. Sed  
qui ad secretissima quæque curiosius per-  
scrutanda penitus instigatur, sciat se non  
Mercurialem solum esse, sed Saturnium.  
Sub cuius etiam principatu sunt omnes in  
quouis studio vsque ad finem seduli, præ-  
sertim in rebus diis negligentes. Denique si  
verum est quod nonnulli tam Physici quàm  
Astronomi tradunt, animam intellectu  
præditam in conceptum humanum, men-  
se Solis, id est, quarto descendere, qui pluri-  
mum intellectu viuunt, & ab initio sunt præ-  
cipuè & quotidie Solares euadunt. Horum  
itaque Planetarum fauor his hominibus au-  
spiciandus erit. Sub eorum spiraculo Medi-  
cinæ confluendæ. In eorum regionibus ha-  
bitandum. Verum ad Apollinem Musarum  
ducem in primis nos ô literati Musarum  
cultores aduoco. Quicumque igitur inter  
vos dilectissimi in Musarum amore fratres,  
ingenio multo magis longiusque quàm  
corpore valent, ij profecto sciant in geniti-  
ra quondam sua Phœbem quidem mate-  
riam suppeditasse perpaucam, Phœbeum  
verò spiritum infudisse quàm plurimum,  
imò & quotidie humores alimenta que in  
corpore in spiritum maxima quadam ex  
parte resolvere. Vnusquisque igitur ve-  
strum totus est fermè spiritus. Spiritualis, in-  
quam, homo quidam, terreno hoc corpus-  
culo personatus, spiritum ante alios perpe-  
tuo quodam labore fatigans, vt ipsi præ cæ-  
teris sit assidue spiritus recreandus, & in se-  
nectute præterea, in qua communiter eua-  
dit crassior, ad subtilitatem propriam re-  
uocandus. Scitis profecto crassum corpus  
crassis elementis quatuor ali. Scitote igitur  
spiritalis corpus suis quibusdam tenuibus  
elementis quatuor nutriri. Huic enim vi-  
num est pro terra, odor ipse vini vicem ge-  
nitiuæ, canus rursus & fortis agit æ-

rem, lumen autem præfert ignem elemen-  
tum. His ergo quatuor præcipuè spiritus ali-  
tur, vino inquam eiusque odore & cantu, si-  
militer atque lumine. Sed nescio quomodo  
ab Apolline primum exorsi, incidimus mox  
in Bacchum. Et meritò quidem à lumine  
peruenimus ad calorem, ab Ambrosia in  
nectar, à veritatis intuitu in ardentem  
veritatis amorem. Fratres certè sunt, indiui-  
duique comites Phœbus atque Bacchus Il-  
le quidem duo potentissimum vobis affert,  
lumen videlicet atque lyram. Hic item  
præcipuè duo, vinum, odoremque vini ad  
spiritum recreandum, quorum vsu quoti-  
diano spiritus ipse tandem Phœbeus eua-  
dit & liber. Quamobrem ita vos ad exci-  
piendum Solis lumen quotidie comparate,  
vt quatenus deuirtata destillatione quadam  
& exiccatione fieri potest, frequentissimè  
sub luce vinatis, saltè in conspectu lucis,  
tum eminus, tum cominus, tum recti, tum  
aperti, ad vsum vbique vestrum vitalem So-  
lis potentiam temperantes, atque igne re-  
ferentes in nocte Solem citharæ cantus-  
que interim non obliti. Spirare verò sem-  
per & vigilantes & dormientes aërem vi-  
uum, aërem huc viuentem. Similiter habe-  
re vos oportet ad merum Bacchi donum,  
Apollinis beneficio procreatum. Eadem  
igitur proportionem qua lumen, accipite vi-  
nū. Abunde quidè, quatenus nec destillatio  
nec exiccatio, qualem dixi, ebrietasue con-  
tingat. Atque præter substantiam vini quo-  
tidie bis acceptam, odorem verò frequen-  
tius haurire partim quidem os, vbi spiritus  
fuerit recreandus, colluentes mero, par-  
tim lauantes eodem manus, partim natibus  
& temporibus admouentes. Satis iam fra-  
tres colloquuti sumus, satisque combibi-  
mus. Ergo valere.

*De Astronomica diligentia in liberis procrean-  
dis, in preparandis epulis, in aedificiis &  
habitatione atque vestibus, & quan-  
tum curare talia liceat.*

## CAPVT XXV.

**S**Ed iuvat etiam parumper alloqui seu-  
rum religionis antistitem. Dic age  
quidnam in astrorum vsu damnas antistes?  
Quicquid inquires, arbitrio nostro detrahit;  
quicquid vnius diei cultui derogat. Eadem  
ego tecum non damno solum, sed etiam  
valdè detestor. Execraris quineriam scio,  
atque ego insuper perhorresco nonnullos,  
qui quum Deum exoratum volunt, ad Io-  
uem in medio cœlo vastum illud draconis  
caput subeuntem, tam miseri quàm stulti

confugiunt, ab ipso videlicet dracone, qui quondam è cœlo corruit, tertiam stellarum partem secum trahens denique deuorandi. Verùm concedes ne contractibus, matrimoniis, colloquiis, itineribus, similibusque operibus peragendis horas opportunas eligere? Non facile te his assensurum video, nescio quid arbitrio metuentem. Ego igitur, & si Theologus ille Magnus Albertus ista dabit, & ratio quædam fortè dictabit, per electionem ipsam arbitrium pernentem, cœlestia ita prudentiæ nostræ vsui subiici, quemadmodum herbæ Medico subministrant, tibi tamen potius in præsentia credam. Et quàm tu difficile nunc ea permittis, tam facile ipse dimittam. Observationes verò Lunæ ideoque aliarum stellarum ad morbos curandos, & idcirco ad remedia præparanda iamdiu (vt arbitror) permisisisti. Concessum quoque abs te, & insuper approbatum, crescente Lunâ, eademque aucta lumine, nec aliunde infortunata seminibus ægros spargere, vites oleasque ferere. Cur non igitur ad plantandum (vt cynice loquar) hominem, vtamur beneficio Lunæ Iouisque & Phœbi? Nam Veneris quidem adhæc officio semper vtimur. Sed rectius modo dixissem, semper vtuntur. Nam ipsa mihi Venus est Diana. Quid item de victu dicemus? Nonne licebit & prodierit sub felici sydere tum autumnum vinum, tum indies panem epulasque conficere? Ac si nequeamus in his præparandis aspectus syderum expectare, expediet saltem ascendentes accipere, vel aliter angulares, Solem, Iouem, Venerem, atque Lunam. Sic enim omnia quibus vtimur feliciter affecta cœlitus, feliciter nos afficient. Hactenus te video absque controuersia concessurum, nisi fortè dicas, ita vitam nostram nihil fore aliud quàm perpetuam seruitutem. Ad hæc ego subiiciam, frustra mortales cumulandis pecuniis & honoribus seruituros, quibus sunt perpetuo mancipati, nisi interim diligentia Physica dies vitæ sibi plures accumulent. Aut igitur soli Deo seruiant, quod quidem est potissimum, aut si cui præterea seruituri sunt vitæ, tum validæ, tum longæ potius, quàm pecuniis honoribusque vanis indulgeant. Concordes ergo sumus. Sed nunquid vel domos fundabunt temerè, vel insauistas habitabunt? Vbi contagiosa quædam calamitas ædificij fermè sic inficit habitantem, vt venenosus pestilentiæ vapor etiam ad biennium in pariete seruatus qualis etiam ex Epidemia latens in veste, diu postea vtentem inficit incautum atque perdit. At postquam hic in vestium incidimus mentionem, prohibebis ne, pie pa-

ter, in veste conficienda, vel primum intenda spiraculum Veneris diligenter occupari, quo quasi Venerca facta vestis, similiter prospera quadam corpus & spiritum afficiat qualitate? Nonne Medici vetant vulpium pelles, agninas probant? Non aliter fortè sydus indies quasi nascentes vestes afficit, quàm semel ab initio natas. Vestes quidam & cætera artis opera certam à sydere qualitatem accipere, Thomas Aquinas in libro de Fato confirmat. Tu igitur affirmabis. Infestas verò vestes vtentem inficere, etiam testis est scabies atque lepra. Denique si populi vitæ consulis (vt opinor) ista permittes. Atque ego permissione tua consulam obseruanda. Sin autem eiusmodi moribundæ vitæ curam non improbas quidem, sed negligendam mones, ego quidem negligo, melioris vitæ fiducia fretus, cæterisque similiter consulo faciendum. Vale.

*Quomodo per inferiora superioribus exposita deducantur superiora. Et per mundanas materias mundana potissimum dona.*

## CAPVT XXVI.

**S**ed ne longius digrediamur ab eo, quod interpretantes Plotinum instituiamus ab initio, breuiter ita collige. Mundus ab ipso bono (vt latè vnâ cum Timæo Pythagorico docet) quam optimus effici poterat, est effectus. Est igitur non solum corporeus, sed vitæ insuper & intelligentiæ particeps. Quamobrem præter corpus hoc mundi sensibus familiariter manifestum, latet in eo spiritus corpus quoddam, excedens caduci sensus capacitatem. In spiritu viget anima, in anima fulget intelligentia. Atque sicut sub Luna nec miscetur aër cum terra, nisi per aquam, nec ignis cum aqua, nisi per aërem, sic in vniuerso esca quædam, siue fomes ad animam corpori copulandam est ille ipse quem spiritum appellamus. Anima quoque fomes quidam est in spiritu corporeque mundi, ad intelligentiam diuinitus consequendam; quemadmodum summa quædam in ligno siccitas ad penetratum oleum est parata. Oleum huic imbibitum pabulum est ad ignem, ad calorem dico proximè. Calor ipse luminis est vehiculum, ac si lignum hoc eiusmodi sit, vt igne præsentente fulgeat, non vratur, qualia quandoque vidimus. Iam hoc exemplo videbimus, vtrum vel homo, vel aliud quiddam sub Luna certis quibusdam præparamentis, partim quidem naturalibus, partim arte quæsi-

tis, vitalia atque etiam forte intellectualia quardam bona opportune quodammodo desuper accipere possit. Verum quod hic ad religionem pectat discutiemus alibi, vt Plotinus in modum hæc adducet. Quod verò ad naturales spectat influxus, qualescunque sint desuper venientes, scitu eos in nobis materiisque nostris ita demum per artem comparari posse, quando fomenta nobis nostrisque ad illos natura suggesserit, cœlumque ad eosdem opportunius conspirauerit. Nonne in ipso factu natura foetus ipsius artifex, quum certo quodam pacto corpusculum affecerit figuraueritque, hoc ipso statim præparamento, velut esca quadam spiritum ab vniuerso deducit? Perque hunc velut fomitem, vitam haurit atque animam? Ac denique per certam animæ speciem dispositionemque corpus ita viuens dignum est præsentia mentis tandem iam donatæ diuinitus. Vbiq̃ue igitur natura maga est, vt inquit Plotinus atque Synesius, videlicet certa quædam pabulis vbiq̃ue certis inescans, non aliter quàm centro terræ grauiā trahens, Lunæ concauo leuia, calore folia, humore radices, cæteraque similiter. Quo quidem attractu secum ipso deuinciri mundum testantur sapientes Indi dicentes mundum esse animal passim masculum simul atque foeminam, mutuoque membrorum suorum amore vbiq̃ue coire secum, atque ita constare, vinculum verò membrorum inesse per insitam sibi mentem, quæ tota infusa per artus agit molem, & magno se corpore miscet. Hinc Orpheus naturam ipsam mundi Iouemque mundanum marem appellat & foeminam. Vsq̃ue adedò mutui partium suarum coniugii vbiq̃ue mundus est auidus. Esse verò masculinum sexum foeminino vbiq̃ue commixtum, declarat illinc quidem ordo signorum, vbi præcedens perpetuo deinceps ordine masculinum est, subsequens foemininum, hinc verò arbores atque herbæ, quæ etiam sicut animalia vtrunque sexum habent Mitto quod ignis ad aërem, aqua ad terram masculi vicem tenet ad foeminam, vt non mirum sit membra inter se mundana, & omnes eius articulos mutuum coniugium concupiscere. Quod & Planetæ conciliant, partim quidem mares, partim verò foeminæ, præcipue verò Mercurius masculus atque foemina, Hermaphroditus pater. Quod sanè animaduertens agricola, præparat agrum seminaque ad cœlestia dona, & insitionibus quibusdam vitam plantæ propagat & ad speciem alteram melioremque perducit. Similia quædam efficit & Medicus, Physicus, & Chi-

rurgus in corpore nostro, tum ad nostram fouendam, tum ad vniuersi naturam vberius comparandam Idem quoque Philosophus naturalium rerum astrorumque peritus, quem propriè Magum appellare solemus, certis quibusdam illecebris cœlestia terrenis opportunè quidem, nec aliter inferens quàm insitionis studiosus agricola veteri recentem stipiti furculum. Quod & Ptolemæus valdè probat, affirmans eiusmodi sapientem sic astrorum opus adiuvare posse, quemadmodum agricola terræ virtutem. Subiicit Magus terrena cœlestibus, imò inferiora passim superioribus, vt proprias vbiq̃ue foeminas suis maribus fecundandas, vt ferrum magneti trahendum, vt camphoram aëri feruenti sugendam, vt crystallum Soli illuminandum, vt sulphur & sublimem liquorem accendendum flammæ, vt oui testam vacuum & impletam rore Soli eleuandam, imò vt ouum ipsum gallinæ fouendum. Præterea sicut nonnulli fouentes oua, etiam sine animalibus vitam illis ex vniuerso conciliant, & sæpè materias quasdam opportunè parantes, absque ouis manifestisque seminibus animalia procreant, vt ex ocymo scorpionem, apes ex boue, ex salua autem merula similem, vitam videlicet à mundo materiis certis opportunisque temporibus adhibentes Sic & ille sapiens vbi cognouit quæ materiæ, siue quales partim inchoatæ natura, partim arte perfectæ, & si sparsæ fuerint congregatæ, qualem cœlitus influxum suscipere possint, has eo regnante potissimum colligit, præparat, adhibet, sibi que per eas cœlestia vendicat. Vbicunque enim materia quædam sic superis exposita est, sicut specularē vitrum vultui tuo parietque oppositus voci, subito supernè patitur ab agente videlicet potentissimo, à potestate vitaque mirabili vbiq̃ue præsentē, virtutemque passionē reportat, non aliter quàm & speculum imaginem repræsentat ex vultu & ex voce paries Echo. His fermè exemplis ipse Plotinus vtitur, vbi Mercurium imitatus ait veteres sacerdotes siue Magos in statuis sacrificiisque sensibilibus diuinum aliquid & mirandum suscipere solitos. Vult autem vnà cum Trismegisto per materialia hæc non propriè suscipi numina penitus à materia segregata, sed mundana tantum, vt ab initio dixi, & Synesius approbat. Mundana, inquam, id est, vitam quandam, vel vitale aliquid ex anima mundi & sphaerarum animis atque stellarum, vel etiam motum quandam & vitalem quasi præsentiam ex dæmonibus, imò interdum ipsos dæmonas eiusmodi adesse materiis. Mercurius ipse, quem



Plotinus sequitur, inquit, dæmonas æriæ non cœlestes, nedum sublimiores, statuasque Mercurius ipse componit ex herbis, arboribus, lapidibus, aromatis, naturalem vim diuinitatis (vt ipse ait) in se habentibus. Adiungit cœlestibus similes, quibus ait eos delectari, statuisque sic adesse diutius, & prodesse hominibus vel obesse. Addit sapientes quondam Ægyptios, qui & sacerdotes erant, quum non possent rationibus persuadere populo esse deos, id est, spiritus aliquos super homines, excogitasse Magicum hoc illicium, quo dæmonas allicientes in statuas esse numina declararent. Sed Iamblichus damnat Ægyptios, quod dæmonas non solum vt gradus quosdam ad superiores deos inuestigandos acceperint, sed plurimum adorauerint. Chaldæos verò dæmonibus non occupatos, Ægyptiis anteponit. Chaldæos, inquam, religionis antistites, nam Astrologos tam Chaldæorum quàm Ægyptiorum quodammodo tentauisse dæmonas per harmoniam cœlestem in statuas fictiles trahere suspicemur. Quod significare videtur Astrologus Samuel Hebræus, autoritate Davidis Bilastrologi fretus, antiquos videlicet fictores imaginum fecisse statuas futura prænunciantes. Harmoniam verò cœlestium his accommodatam esse tradit. Metallum fundere ad hominis pulchri formam, die Mercurij hora tertia scilicet Saturni, quando Mercurius Saturnum in Aquario subit, in nona cœli plaga vaticinium designante, ascenditque Geminorum sydus significans Prophetas vt aiunt, Mars à Sole comburitur nec Mercurium intuetur, Sol tamen aspicit coniunctionis illius locum, Venus interea aliquem obtinet angulum, occidentalis est & potens, Luna ex trigono gradum aspicit ascendentem, similiterque Saturnus. Hæc ille. Ego autem primo quidem ex beati Thomæ sententia puto, si modo statuas loquentes effecerint, non simplicem ipsum stellarum influxum ibi formauisse verba, sed dæmonas. Deinde si fortè contigerit eos in eiusmodi statuas ingredi, non arbitror hos ibi per cœlestē influxum fuisse deuinctos, sed sponte potius suis cultoribus

obsequutos denique decepturos. Nam & natura superior ab inferiore conciliantur quidem aliquando, sed cohiberi nequit. Et dispositio illa syderum paulo ante descripta, concurrere fortè non potest. Quamuis autem dæmones astronomica ratione statuis includantur, tamen vbi per cultum eis exhibitum præsentēs extiterint, Porphyrius ait eos regulis astronomicis oracula reddidisse, atque ideò frequentet ambigua, & merito, quoniam Iamblichus probat prophetiam veram atque certam, nec malis dæmonibus conuenire, nec humanis artibus vel natura, sed spiratione diuina purgatis mentibus prouenire. Sed ad Mercurium, imò ad Plotinum iam reuertamur. Mercurius sacerdotes ait accepisse virtutem à mundi natura conuenientem, eamque miscuisse. Sequutus hunc Plotinus, putat totum in anima mundi conciliante facile confici posse, quatenus illa naturalium rerum formas per seminales quasdam rationes sibi diuinitus insitas generat atque mouet. Quas quidem rationes appellat etiam Deos, quoniam ab ideis supremæ mentis nunquam destituuntur. Itaque per rationes eiusmodi animam mundi facile se applicare materiis, quas formauit ab initio per easdem, quando Magus vel Sacerdos, opportunis temporibus adhibuerit formas rerum ritè collectas, quæ rationem hanc aut illam propriè spectant, sicut Magnes ferrum, Rhenbarbarum choleram, Crocus cor, Eupatorium Spodiumque iecur; Spica Muscusque cerebrum. Fieri verò posse quandoque, vt rationibus ad formas sic adhibitis, sublimiora quoque donā descendant, quatenus rationes in anima mundi coniunctæ sunt intellectualibus eiusdem animæ formis, atque per illas diuinæ mentis ideis. Quod & Iamblichus approbat, vbi de sacrificiis agit. Qua de re alibi nos opportunius disputabimus. Vbi etiam apparebit, quàm impura supersticio populi Gentilis extiterit, contra verò quam pura pietas Euangelica fuerit, quod magna ex parte in libro de religione Christiana iam fecimus.

(::)

(::)

(::)



# MARSILII FICINI FLORENTINI

## APOLOGIA,

IN QVA

DE MEDICINA, ASTROLOGIA,

*Vita mundi. Item de Magis qui Christum statim  
natum salutauerunt, agitur.*



Marsilius Ficinus Florentinus, dilectissimis suis inuenerit studio fratribus, tribus Petris, Nero, Guiciardino, Soderino, ter quaterque salutem. Rectius modo Tripetro quam tribus Petris fortasse dixerim. Sicut enim ubi palma est una, non faciunt plures in ea digiti manus ibi plures, sic vestra amici corpora tria nihil prohibere videntur, quod minus vnum efficiat Petrum una voluntas. Faber ille coelestis patriæ Christus tam ingentem procreauit petram, ut immenso huic ædificio Ecclesiæ suæ una hæc petra fundando sufficeret. Ego quoque tam grandes nactus sum diuina quadam sorte petras, ut tres nunc meo vel arduo satis ædificio faciant. Nunc vobis amici, nunc si nescitis arx illa Palladis necessaria fore videtur, qua procul à nobis sæuim impiorum gygantum impetum arceamus. Quamobrem vestra primum arce tribus constructa petris, trium librorum meorum vitam, vitæ publicæ succurrentium munire decreui. Scitis (ut arbitror) me de Vita librum composuisse, in libellos tres diuisum. Quorū primus, de Vita sana: Secundus, de Vita longa: Tertius, de Vita coelitus cōparanda inscribatur. Igitur esca tituli tam suavis quam plurimos alliciet ad gustandum. Sed in numero tanto ignorantes plerique futuri sunt (ut

arbitror) maligni quoque non pauci. Alius ergo dicet: Nonne Marsilius est sacerdos? Est profecto. Quid igitur sacerdotibus cum medicina? Quid rursum cum Astrologia commercii? Alius item: Quid Christiano cum magia vel imaginibus? Alius autem, & quidem indignus vita, vitam inuidebit coelo. Cuncti denique sic affecti, beneficio in eos nostro ingrati nimis erunt, atque aduersus charitatem nostram, qua vitæ prosperitæque publicæ pro ingenij facultate consulimus, non pudebit esse crudeles. Communis igitur erit nobis iste labor, sed ut quodammodo leuior sit, tres enim estis aduersum tres hostes, distributum subite cōtra. Nec inuēctina (nouum enim ingenium vestrum) confurabit inuēctinam, sed alieni fellis amaritudinem (quæ vestra suauitas est mirifica) vestri mellis dulcedine superabitis.

Principio (candidissime Nere) respondeto primis, antiquissimos quondam sacerdotes fuisse Medicos, pariter & Astronomos. Quod sanè Chaldaeorum, Persarum, Ægyptiorum testificantur historiz. Ad nullum præterea, magis quam ad pium sacerdotem pertinere singularis charitatis officia; quæ quidem in maximo omnium beneficio quam maxime lucent.

Officium verè præstantissimum est pro-

cul dubio, quod & maximè necessarium, & in primis ab omnibus exoptatum, efficere videlicet, ut hominibus sit mens sana in corpore sano. Id autem ita demum præstare possumus, si coniungimus sacerdotio Medicinam. At quoniam Medicina sine fauore cœlesti, quod & Hippocrates Galenusque confitentur, & nos experti sumus, sapius est inanis, sæpè etiam noxia, nimirum ad eandem sacerdotis charitatem Astrologia pertinet, ad quam attinere diximus Medicinam. Eiusmodi (ut arditror) Medicum honorari sacræ literæ iubent, quoniam propter necessitatem hūc Altissimū procreauerit. Et Christus ipse vitæ largitor, qui discipulis mandauit languentes toto orbe curare, sacerdotibus quoque præcipit, si minus verbis ut illi quondam mederi possint, saltem herbis & lapidibus medeantur. Quæ si minus ipsa sufficiant, opportuno quodam afflatu cœli consilare hæc, & ægrotis adiuuere iubebit. Nam & ipse eodem afflatu cœli animalia passim ad suam quæque concitat Medicinam, usque adeo vitæ omnium abundantissimè prouidet. Sic instinctu cœlesti diuinitus instigante, serpentes quidem marathro, hirundines autem chelidonia oculis medicantur, aquilæ vexatæ partu, ætitem lapidem diuinitus inuenerunt, quo feliciter oua statim eniterentur. Itaque Deus ipse, qui per cœlum animalia quæuis ad Medicinas instigat, sacerdotes certè permittit non mercede, inquam, sed charitate Medicinis cœlitus confirmatis morbos expellere. His verò tu deinceps plura etiam si expedierit ingenij tui aculeis addes. Surge post hæc tu Guiciardine vehemens, atque curiosis ingeniis respondeto, magiam vel imagines non probari quidem à Marfilio sed narrari, Plotinum ipsum interpretante: Quod & scripta planè declarant, si æqua mente legantur. Neque de magia hæc prophana, quæ cultu dæmonum nitiur, verbum quidem vllum asseuerari, sed de magia naturali, quæ rebus naturalibus ad prosperam corporum valetudinem cœlestium beneficia captat, effici mentionem. Quæ sanè facultas tam concedenda videtur ingeniis legitimè vtentibus, quàm Medicina & agricultura iure conceditur, tantoque etiam magis, quanto perfectior est industria, terrenis cœlestia copulans. Ex hac officina Magi omnium primi, Christum statim natum adorauerunt. Quid igitur expauescis Magi nomen formidolose? nomen Euangelio gratiosum, quod non maleficum & veneficum, sed sapientem sonat & sacerdotem. Quidnam proficitur Magus ille venerator Chri-

sti primus? Si cupis audire, quasi quidam agricola est, certè quidam mundicola est. Nec propterea mundum hic adorat, quemadmodum nec agricola terram. Sed sicut agricola humani victus gratia ad aerem temperat agrum, sic ille sapiens, ille sacerdos gratia salutis humanæ inferiora mundi ad superiora contemperat, atque sicut cœta gallinæ, sic opportunè terrena subiicit fouenda cœlo. Quod efficit semper ipse Deus, & faciendo docet, suadetque facere, ut à superis infima generentur & moueantur atque regnatur. Denique duo sunt magiæ genera. Vnum quidem eorum, qui certo quodam cultu dæmonas sibi conciliant, quorum opera freti fabricant sæpè portenta. Hoc autem penitus explosum est, quando princeps huius mundi eiectus est foras. Alteram verò eorum qui naturales materias opportunè causis subiiciunt naturalibus, mira quadam ratione formandas. Huius quoque artificij species duæ sunt. Altera quidem curiosa, altera necessaria. Illa sanè ad ostentationem superuacua fingit prodigia, ceu quando Persarum Magi ex saluia sub fimo putrefacta, dum Sol & Luna secundam Leonis faciem occuparent, eundemque gradum ibi tenerent, generabant autem merulæ similem, serpentina cauda, eamque redactam in cinerem infundebant lampadi, unde domus statim plena serpentibus videbatur. Hoc autem tanquam vanum & saluti noxium procul effugiendum. Tenenda tamen species necessaria, cum Astrologia copulans Medicinam. Si quis autem pertinax vltius instet, morem huic ita gerito Guiciardine, ut ne legat hæc noxia, nec intelligat, nec meminerit, nec utatur homo, si homo est tanto beneficio prorsus indignus. Multa sunt præterea quæ tu aduersus ingratam ignorantiam in medium afferre tuo ingenio poteris. Quidnam agis & tu strenue Soderine noster? Tolerabis ne superstitiosos cæcosque nescio qui vitam in animalibus vel abiectissimis, herbisque vilissimis manifestam vident, in cœlo, in mundo non vident? Iam verò si homunciones isti vitam minimis concedunt mundi particulis, quæ tandem dementia est, quæ inuidia nec nosse, nec velle totum viuere in quo viuimus & mouemur, & sumus? Quod quidem canit Aratus, Iouem manifestè significans communem corporis mundani vitam. Per opportunè nunc in hæc Arati verba nescio quomodo videor incidisse. Memini Lucam Euangelistam, memini Paulum Apostolum his verbis libenter vti, in quibus mundi vitam sapientes illi non horrent. At verò superstitiosus quidam his

obſtinet, non facile conuinci ex verbis cuiusmodi Pſulum aſſentiri mundum, habere animam, ſed tantum ſubefſe Deo, ac nos in hoc ipſo Deo viuere. Eſto igitur, ne nomen in mundo quando non placet animam. Nomen anima ſit prophanum. Licebit ne ſaltem vitam qualemcumque dicere: quam Deus ipſe mundi faber huic operi ſuo tam feliciter abſoluto clementer inſpiret, quandoquidem erga viliffima quæque viuentia non eſt auarus, & quotidie per cælum quàm plurimis quæ ſunt in eo largiffimè præſtat vitam Dic amabo, nonne vides boues & aſinos, ô bos, ô aſine, qui tactu quodam ex ſe viuentia generant eſſe viuos? Si ergo hæc præterea ex ſe viuæ quædam aſpectu etiam generarent an non multo magis hæc viuere iudicares? ſi quod modo ipſe iudicium, ſi quam vitam habet. Cælum terræ maritus, non tangit (vt communis eſt opinio) terra cum vxore non coit, ſed ſolis ſyderum ſuorum quaſi oculorum radiis vndique luſtrat vxorem luſtrando fecundat, procreatque viuentia. Num ergo vitam vel intuendo largiens, ipſum in ſe propriam nullam habet vitam? Et quod dedit aui Struthio vitam aſpectumque viuificum, longè eſt hoc ipſo deterius. His tandem adductis in medium niſi perſuaſeris, ſuperſtitioſum iſtum mitto ſemiuiuum, imò verò non viuum. Proinde vt pluribus cauſam noſtram patronis agamus, addito Petre, mi

Nere, Amphionem illum noſtrum Landinum Chriſtophorum oratorem pariter & Poëtam. Ille noſter Amphion ſuauiſſimè mira celeriter lapidea hoſtium noſtrorum corda demoliet. Tu verò Guiciardine chariſſime compater ito nunc, ito alacer, Politianum Herculem accerſito. Hercules quondam vbi periculoſius certandum foret vocitabant Iolaum, tu nunc ſimiliter Herculem noſtri proſectò, quod barbara monſtra Latinum iam deuaſtantia Politianus Hercules inuaſerit, lacerarit, interemerit, quam acriter expugnet paſſim, quam tuto propugnez. Hic ergo vel centum hydræ capita noſtris liberis minitantiæ, ſtatim contundet claua flammisque comburet. Eia mi dulciſſime Soderine, ſurge age, Picum ſalutato Phœbum. Hunc ergo ſapè Phœbum appello meum, ille me Dionyſium viciffim atque Liberum. Fratres ergo ſumus. Nuncia Phœbo meo venenofum contra nos Pythonem, ex palude iamjam emergentem. Tendat arcum obſecra, precor. Conſeſtim ſpicula iaculetur. Intendet ille protinus, ſcio quid loquar, venenum totumque ſemel vna nece necabit. Valete iam feliciter amantiſſimi fratres mei, non valetudine tantum felici, ſed ipſa etiam felicitate digni, liberorumque meorum in lucem iam producentium valetudinem felicitatemque curate. Decimoquinto Septemb. M. cccc. lxxxix. in agro Caregio.

(:.)

APOLOGIÆ FINIS.

(:.)



QVOD NECESSARIA SIT

ad vitam ſecuritas & tranquillitas animi.

**M**arſilius Ficinus dilectiſſimis in veritatis venatione fratribus Bernardo Caniſiano, Ioanni Canacio, & Amerigo Cuſino ſalutem. Quum primis hic in verbis venationem quandam inſtituiſſemus, merito forſan canes ſtatim adhibuimus & curſores. Aptè quidem philoſophantes appellauimus venatores, anſela ſemper veritatis indagine laborantes. Num etiam aptè canes? Apertiſſimè inquit in Republica Socrates. Philoſophantes enim vel legitimi ſunt vel ſpurij. Ambo canes. Illi quidem veritatem ipſam ſagaciter inueſtigant, modicus inuentam tenent. Hi verò pro opinione latrant, mordent, lacerant. Tantum proſectò canes inter Philoſophos ſibi vendicant, vt

non ſolum ſeiſpos in ſectam aliquam inferuerint, ſed etiam ſectam ipſi ſuam nomine Cynicam quandoque confeſcerint. Habet quineriam ſuos Academia canes. Huc ergo vos ſagaces Academiae canes, huc vos velociſſimi curſores aduoco. Treis enim eſt. Treis ergo nunc meos precor defendite liberos adhuc teneriores, inter lupos (vt vereor) cuſtigio prodiruros. Currite inquam, alacres, negotia enim nunc vobis optata mando, non curas. Georgium Benignum Saluiatum, cognoſcitis meum, qui veritatem illam, per cuius nunc vos veſtigia paſſim venando diſcurritis, iamdiu eſt ſagaciter aſſequutus. Qui & fratres ſuos Solis inſtar, maior ipſe minores illuſtrat. Huic igitur ſi quem luporum vularum audieritis,

nunciate. Fortissimus ille Georgius omnes facile fugabit lupos, qui & vastum draconem quandoque transfixit. Ille me igitur, ille solitudine simul & vos cura leuabit. Solet enim inter vos aliquis, & quidem tam sapius dicere, nihil ad vitam salubrius experiri, quam magna cum securitate tempora deglutire. Ceteri verò dicenti protinus arridere. Sed dic age Canaci, quidnam hoc tuum est toties repetitum, Tempora deuorare? Quid denique tibi vis? Non esse inquires, sed bibere potius, non mandere vel conterere, sed faucibus plenis ingurgitare. Siquidem tempus ipsum natura quædam est liquens (ut ita dixerim) atque labilis. Lipientium verò hæc conditio, ut si cohibeas in angustum, subito perdas. Disfluunt enim coacta celeriterque diffugiunt. Si aquam spongiæ imbibitam fortè compresseris, exprimes eam, statimque disperges. Si latius hanc tenueris, retinebis, multo magis ærent, ignemque & ætherem. Hinc apud Poetas frustra contendunt, qui ampla diuorum maniumue simulachra vlnis capeffere moluntur. Latè admodum accipienda sunt latissima. Lipientia & amplissima sunt amplissime possidenda. Tunc certe grauius nos premit angustia, quando animum ipsum motumque eius naturaliter amplum, redigimus in angustum. Quicumque studia negotiaque pensitant examussim, & in minima quæque semper exactissime deterunt, vitam interea suam, heu suam vitam clam

miseri conterunt. Rectè igitur Pythagoræ præcepisse videtur. Cautè ne quando in angustum fortè cohibearis, nihil coelo amplius, nihil est vitalius. Angustissima vicissim terra vitam habet in mundo quam minimam. Denique si cælo temporeque viuimus, quanto hæc latius absorbemus, tanto viuimus & diutius. Viuite ergo læti ab angustia procul ô amici. Viuite læti. Læticia cælum vos creauit sua, quam suo quodam risu, id est, dilatazione, motu, splendore declarat quasi gestiens. Læticia cælum vos seruabit vestra. Ergo quotidie in præsens viuite læti. Nam sollicitudo præsentium rapit vobis præsens, præripitque futurum. Curiositas futurorum celeriter in præteritum traducit. Item igitur precor atque iterum, viuite læti. Nam fata sinunt, dum securi viuitis. Sed ut reuera sine cura viuatis, ne vnā quidem hanc curam sumite, qua solliciti curetis vnquam, qua potissimum diligentia curas effugiatis. Vnā enim cura hæc mortalibus heu miseris omni cura corvrit. Negligite igitur diligentiam, negligentiam verò diligit, atque hanc etiam negliger, quoad licet vobis inquam, atque decet. Hæc autem non tam ut sacerdos amici mando vobis, quam ut Medicus. Nam absque hac vnā tanquam Medicinarum omnium vita, Medicinæ omnes ad vitam producendam adhibita moriuntur. xvi. Sept. M.cccc.lxxxix. In agro Careio.



## ANDREAS LENNIVS, Medicinæ studiosis. S.



On abs re nobis visum est his de Vita libris, eiusdem Authoris Epidemiarum antidotum, veluti coronidem adsuere, quam ille quidem sua vernacula lingua, hoc est Tuscana, precibus amicorum conscripserat. Nunc verò hic vitæ thesaurus à Hieronymo Riccio Ticinensi in coloniam Romanam deriuatus est, ut si vñ cum voluptate & commodita-

tem metiaris, non sit aspernabilis. Traduntur in eo morbi, ne dum definitiones, causæ morbi effectrices, signa, verum etiam prophylacen, & præsentis mali curationem, variis diuersisque corporibus accommodatas, mira breuitate, simul atque facilitate perstringens medelas. His fretus prædidiis vitæ & sanitatis rationem in eas, tibi que persuade.

Ανδρῆς ὁ ὑγιαίνων ἀείρων ὅς μοι δοκεῖ.



# MARSILII FICINI FLORENTINI,

MEDICI ATQ; PHILOSOPHI

clarissimi Epidemiarum Antidotus,

EX IDIOMATE THVSCO

à Hieronymo Ricio latinitate donata.

P R A E F A T I O.



Peræpretium duxi (patriæ pietatis impulsu, aliqua consilia contra pestilentiae morbum conscribere. Ut verò quisque huius penetrare intelligentiam & curam exercere possit, institui subtiles omnes longasque disceptationes reiicere. Satis namque erit, quod quicquid in præsentia sum traditurus, etsi breui verborum contextu haud plura dici queant, sufficientibus tamen rationibus, multorumque tam prisconum quam

recentiorum Authoribus & experienciis, præsertim Patris nostri Marsilij Ficini, inter Medicos præcipui, qui haud paucos hac labe infectos pristinae sanitati restituit, & comprobatum est & traditum. Imploramus itaq; Deum Optimum Maximum humanæ vitæ largitorem, necnon verarum salutariumque medicinarum reuelatorem, ut contra pestis pericula efficacia nobis detegat remedia, utque suum vitale donum nobis ad laudem gloriæque suam conferuet.

*Quid qualisque sit pestis.*

(::)

C A P V T P R I M V M.

(::)



Estis, venenosus quidam vapor est in aëre con-creatus, vitali inimicus spiritui, non quod propter elementarem aliquam qualitatē sibi contrarietur, sed specifica quadam proprietate. Veluti Theriaca, amica quidem est, non quia calida sit vel frigida, sicca vel humida, sed quoniam eo vniuersa eius compositione forma resultat quædam, vitalis formæ spiritus accommodata. Sic & pestifer ille vapor non quia calidus, frigidus, humidus vel siccus, naturæ inimicus est, sed quia suæ proportio quasi ad amissim

proportioni contraria est, in qua spiritus consistit in corde vitalis. Et quemadmodum continuò in terra nascuntur venena, sic sæpenumero nascitur venenosus in aëre vapor, attamen non ita potens, quia magis spargitur. Nec puro stabili potest in aëre, quousque talis aër est spiritui conformis, & igni, qui ex suæ naturæ potentia alterius non recipit naturæ mixtionem, unde fit quod vllam capiat putrefactionem. Sic purus aër nullam recipiendo mixtionem, putrescere minimè potest.

Rursus, venenosus huiusmodi vapor, humano ei solùm applicatur corpori, in quo

apti ad febrem extant humores, utpote qui ad putredinem inflammationemque sunt dispositi.

Etenim, si vitalis potentior ipso fuerit spiritus, procul à se pellit, si verò debiliior, fugit eundem, suum veluti contrarium opus. Quapropter est ex usu, aërem, humores, & denique cor corripere, purgare, roborare. Notandum (ut rectè capias) cum dico venenosum hunc esse vaporem, tu ne credideris ipsum fore talem secundum formam, & totam sui naturam, quia omnes inde inficerentur. Sed huiusmodi est qualitatibus, ut quàm facillimè in veneni naturam transeat. Et propriè venenum efficitur, quando per ipsum in humano corpore, certo quodam gradu putrescunt humores, simul & ebulliunt. Quod communiter die tertia solet accidere, & interdum citius, maximè ubi quis superfluis abundat humoribus, præsertim sanguine & cholera. Et quando iam veneni suscipit naturam calcis vel arsenici, qualitatem recipit, cuius effectus est putrefacere, rodere, ardere intus & extra. Summe igitur necessum est, ut his trinis effectibus, potissimum interius, omni qua possumus industria resistamus.

*Epidemia ortus causa, & qua potissimum  
huius malo obnoxia sint  
corpora.*

## C A P V T II.

**C**oncreatur huiusmodi vapor in aëre, vniuersalioris tempore pestis ex malignis quibusdam constellationibus, præsertim ex Martis cum Saturno conjunctione, & ex luminarium eclipsibus. Qualis est præsens pestis, in anno, scilicet, millesimo quadringentesimo septuagesimonono; & qualis etiam fuit anno eiusdem millesimi, octauo, & hoc potissimum lædit homines. Hisque grassatur in locis, quæ horoscopus siue suum ascendentem ob prædictos syderum aspectus infortunatum habent. In magis verò particularibus pestilentibus, præfatum nescitur venenum ex ventis & malignis lacunarum cloacarumque vaporibus, atque pariter ex terræ motibus. At verò data istarum quacumque causa semper tamen grosso potissimum regnat in aëre, inque paludoso, nebuloso, foetido. Et quando subtilem ad aerem extenditur, penetrat, velociusque interimit, ac citius, frequentius, diutiusque in grosso, calido, humido, foetidoque aëre regnat. Asserunt Doctorem

nonnulli pestilentialem putrefactionem subtili prius, post verò grossiori aëri, sed multo putribiliorem in grosso. Haud scio quo mentis discursu, quo fundamento primæ sit mihi parti adhærendum, cum contrarium experientia monstret. Præterea nobis ratio dicat, quod cum non purum, sed tantummodo mixtum elementum putrefieri possit, quò minus est mixtum, quemadmodum esse constat subtiliorem aërem, eò minus aptum est ad putrefactionem. Et propterea eam non nisi per assiduam suscipit augmentum pestiferæ syderum influentiæ. At veluti grossior, mixta & stabilis aqua faciliior putrefieri solet, sic utique haud difficulter putrefactionem recipit grossus & nebulosus aër. Hoc dat præceptum Raimundus, quod peste inferius excitata altior subtiliorque petendus est aër, sed orta superne, duos menses primò fugiendum est deorsum ad grossiusculum frigidum, humidum, purumque aërem, ubi rara esse soleat infirmitas. Sequentes verò duos menses ad mediam aëris regionem, deinceps ad paulè altiore, videlicet siccum, frigidum & subtilem, semper fugiendo calidum, humidum & nebulosum. Quo in aëre tales sunt homines, quales turbidis pisces in aquis. Id insuper facit pestilentialis aër in hominibus, quod caliginosæ putresque in piscibus aquæ. Sed quod hominibus venenum est, non oportet ut semper tale cæteris sit animalibus, propter coelestium signorum, ac animalium specierum diuersitatem. Hinc oritur ut de illorum opinione quid dicam, ignorem penitus, asserentium quando pestilentiale incipit in aëre venenum, quod tunc quæ semper in alto degeresolent auiculæ, descendunt ad ima, & planitiem inhabitant. Sed quando in terra oritur, tunc lumbricos & serpentes exire dicunt de sinu terræ, & auiculas, quarum consuetudo est volare, habitareque ad imum, sublimia petere, & montes adire.

Addunt præterea, quod quando primum in aëre, post verò in terra venenum accenditur, interdum fugiunt animalia ex alto deorsum, & exinde rursus altiora repetunt. Hinc est quod vulgè dici solet; vultures seu miluos pestilentiali cedere aëri, & quæ loca huiusmodi tenent milui, pestifero non subesse aëri. Sæpius audiuius hanc contagionem ab hominibus transisse ad porcos. Fieri forsitan id potuit per aliquam non quidem spiritus, sed carnis similitudinem. His proximè elapsis diebus semel atque iterum

rum pestilentiae morbum ex vna in alteram domum tulere feles & canes, ipsi tamen nulla ex parte hac contagione laesi. Nec vlla te propterea admiratio capiat, quod interdum sine omni nocumento, homo vel bestia praedictum suscipiant vaporem, ac tamen alios inficiant. Ignitum namque ferrum stupam consumit & paleam, ipsum verò nullatenus consumitur. Hoc enim ex recipientis subiecti dispositione prouenit, in quo potissimum secundum Aristotelem, Galenum & Auicennam, rei consistit effectus, itavt his proximis diebus bimus nostro in rure puerulus integro stetit die, infecto cum puero, annorum plus minus septem, cibo saepius vescebatur infectiore pueri mactato, neque vllam ab ipso morbi labem suscepit, qua tamen correpti fuerunt alij longiusculè distantes. Nec nimiam habeas tua in dispositione fiduciam, cogitando te eius esse valetudinis vt minimè hæc tibi timenda sit contagio, sed hunc Physicum observa Canonem. Quod quando multum disposita est materia, agens tunc causa quantumcunque imbecillius, citò producit effectum, sic accendit stupam & sulphur fauilla ex suscipientis aptitudine. Et contra potentissima quæ fuerit causa, etiam in non dispositam operatur materiam. Et licet sulphur ignis suscipiat operationem citius quàm lignum, & siccum lignum minuteque incisum, facilius quàm cætera ligna, ardens nihilominus fornax ligna statim rapit in flammam, & grassiora & viridia, eo quod summa agentis potentia citò disponit atque informat. Et multoties pestifer huiusmodi vapor sit suarum vi causarum potentissimus, nec scire tu poteris quando scilicet hoc fiat. Et licet vno in tempore talis non adsit dispositio, est tamen futura in alio.

*Quo pacto & quales temperaturas pestis ex contagio feriat ocysimè.*

### C A P V T III.

**V**enenosus iste vapor adedò subtilis, saepenumero existit, vt visu diiudicari nequeat; interdumque dissoluitur, sed faciliè ex inde regenerantur, manente ad hoc ipsum disponente, influentia, iamque tamen pusillus à principio fuerit, tamen multo magis quàm sulphur, cum accenditur, velociorque cursu de loco in locum expanditur, & longè magis contrariatur vitali cordis spiritali, qui

est vapor ex subtili sanguine, quàm sulphur naso. Eiuscemodivapor solum in dispositis ad hoc corporibus infecto ab aere accenditur, sed postquam est accensus, corporibus mira velocitate facilitateque, accensum veluti sulphur, plus quàm antea circumquaque dilatatur, praesertim quando subtili in humore, & tenui æstatis aere accensus fuerit, & spargitur, salique ex vno in alterum corpus. Accenditurque potissimè vbi maior est naturæ similitudo, & in corpore excrementis pleno, cum foetidis intus & extra vaporibus, & in cibis humoribusque superfluis, & ad inflammationem putredinemque aptis, & vbi calida est materia, & humida, corveoitu debilitatum. Et pariter in corpore passionibus animæ defatigato, & ultra modum calido, quodve balneis est assuetum, cuiusve pori sunt nimis patentes, seu multum opitulati. Hæc quidem Galeni & Auicennæ fuit sententia. Pueri & foeminae multum ad pestem sunt apti, eo quod tenuis mollisque materia ad transmutationem est facilior, & pleni sunt humoribus ad putredinem aptis, estque præter modum & ordinem illorum vita. Quemadmodum enim perturbat confunditque vinum calidus ventus & grossus, sic pestifer iste vapor inficit cogitque circumquaque ad cor, primo spiritus, postmodum humores, qui iam putrefacti ebulliunt.

Est verò hæc ebullitio febris ipsa, quæ per vniuersum inde spargitur, plus quàm cæteræ bullit seu inflat, quia tanta est venenosa materia, vt natura quantum potest, principalibus à membris hanc statim conetur expellere. Iste quidem vapor omnem maculare potest humorem, sed potissimum sanguinem, secundo choleram, tertio phlegma, quartò verò melancholiam. Vnde fit quod magis huic subiiciuntur periculo sanguinei, paulò minus cholerici, postmodum phlegmatici, & minus reliquis melancholici, quia frigidus & siccus humor ad inflammationem & putredinem ineptus est; & maxime quia strictos habent meatus, per quos transire venenum oportet. Idcirco senes minus sunt pestifero morbo obnoxij, licet huius anni pestis nec seniores etiam reliquerit intactos. Cuius fortè ratio fuit, quod ultra cæteros aduersos syderum aspectus, Saturnus retrogradus Dominus fuerit anni. Est mirum dictu, quod licet ex vrbe nostra Florentina vniuersus fermè populus aufugerit, omni tamen die, vita sancti circiter centum & quinquaginta.

*De signis indicisq̃ue pestis.*

C A P V T IIII.

**Q**Uæ verò signa indicent, quibus febrem esse pestilentiam facilius & clareprehendatur, haud tam facile ostendere quisquam potest, propter tam multiplicem accidentium diuersitatem & fallaciam. Hoc enim testatur vniuersus Doctorum conuentus, præsertim Auenzoar & Rasis. Erit namque clara interdum vrina, eo quod non pertingent ad hepar humores, apparebit modica febris, eo quod non erit calido in humore venenum, seque propterea non diffundit ad extra, sic statim morietur patiens. Videbitur interdum reſtitutus, eo quod natura primo in aggressu venenum à corde depulerit, tamen paulò post destituetur spiritu, eo quod potens non erit secundum pellendi aggressum. Ex quo primò lassata fuerit conflictu, etiam quia venenum multiplicatum est, vel magis mutatum in malignum, vel propinquius factum cordi quàm prius. Omnes ferè in principio aliquantulum in melius tendere videntur, quia tunc robustior natura tantum contra hostem omnes colligit vires, verum in aliis minus malis ægritudinibus, ad tam repentinum tantumque non inducitur conatum. Videbitur præterea virtutis robur obtinere, quia dictum venenum non aliis vt cordi membris à principio contrarium est, & quando ipsum cor aggreditur statim interimit. Quare his in temporibus haudquaquam conuenit morbi signa examinando moram trahere, quia falleris, nec te natura expectabit, nisi administrando remedia festinaueris. Hac igitur de causa his cum temporibus febrem adesse conspexeris, præsuppone quod absit, vel citò futura esse possit pestis, ac ei pestilentialis curam febris administra, & eo maxime quod quamdiu venenosa durat aëris influenza, omnis superflui humor facile inficitur. Et omnis quæcumque fuerit infirmitas, in pestilentiam facile transire poterit, febres præsertim furiosæ & continuæ. Vnde communiter euenire solet, quod hoc morboſo tempore nulla præter pestem ægritudo appareat. Quod si aliæ & multiplices quidem apparuerint ægritudines, tunc pestilentia remittitur & cessat.

Sunt nonnulla pestilentialis febris signa, videlicet febris continua, absque ordinata & manifesta declinatione, cum anhelitus

& pectoris angustia, cum repentina pulsus debilitate, cum vniuersi corporis grauitamine, præcipue capitis, phrenesi, anxietatibus, ardore, siti, sanguineis maculis pluribus in locis, cum vrina grossa, turbida, qualis est iumentorum. Memineris tamen quod signa fallunt. Aduerte insuper, quod quicumque puer eo tempore vermium laborarit infirmitate, dici poterit pestilentia infectus, quia est materia ad pestem disposita, vt sulphur ad ignem. Hoc multi nescientes Medici, iuuandi studio post sunt fraudati. Et ex signis propinquæ pestis ultra aëris turbiditatem, & animalium ex putredine genitorum abundantiam, est principaliter vermium multitudo, variolarum & morbillorum, febrimque continuarum & conclusarum, vrinæ turbidæ, oculorum rubores, excoriationes palati, phrenesis, & vniuersaliter quacumque in febre, quæ se versus cor frequenter dirigit humor, humanam significat complexionem ad pestem esse dispositam. Scias iterum, quando multo tempore pestifer vapor in aëre durat, tunc aquam terræque fructus inficit, propterea tutius est aquam decoquere, vel ferratam, scilicet aquam conficere, cum eaque vinum lymphare, quia vinum fumosum est, & non conuenit, iuxta Auicennæ & Rhasis sententiam his in temporibus merum, vt pote purum. Opportunum præterea aliqua quæ sumuntur in cibum rebus boni odoris corrigere, & cum salis acetosive saporibus, præsertim quando pestis post terræ motum oritur. Præstiterit quoque non parum rebus vt aridis, in locis odoriferis, & æditis locis nascentibus, & inhabitare montes & colles.

*Prophylactica cura à diata & victus ratione in statu pestilentiali.*

C A P V T V.

**A**bstinendum est tempore pestifero à rebus inflammantibus, & nimis aperitiuis, quia ad venenum suscipiendum disponunt. Videlicet, cauendum est extra à Solari calore, pariter à calore ignis, vestimentorum, & intro, à sale, à speciebus & medicinis calidis, similiter ab herbis intensæ caliditatis, à multo vsu acrium, excepto cape & chicoria, vel raphano cum aceto, quia veneno aduersantur. Item, à vino nimium fumoso, ab exercitio post cibum, præsertim tempore calido, & à sudore, quia humores alterat, & in aëre infecto, non licet se multum

aëri exponere, nec excessiuo sub dio exercitio, quia calefaciendo, & poros aperiendo, statim multum de aëre suscipit infecto.

Idem, abstinendum ab facientibus oppilationem, & putrefactionem, quia pestilentialis dant febris materiam, qualia sunt viscosa, frigida & humida, præsertim quando aliquid accidentaliter seu extranei caloris suscipiunt. Etiam à viscosis, calidis & humidis, ubi humidum calido prædominatur & malè decoctum est, & ut summam dicam, humiditas putrefactionis est mater. Et quæ extra nos difficulter conseruantur, etiam in nobis haud facillè conseruari poterunt. Vitandi igitur pisces quantum fieri poterit, in quorum genere parui minus nocent pisciculi, & qui ex flumine sunt claro, petroso, & corrente, frigi in oleo cum sale, & immersi staphisagria seu aceto, aut succo aranciorum cum sale & modico piperis, vel cinnamomi. Etiam vitandum est lac & omnia recocta. Quod si eo uti volueris, sit primum inter alia cibaria & modica quantitate cum parum sacchari. Fructus vitandi sunt omnes, exceptis amygdalis, cerasis acetosis, pyris chrysomelis, persicis, pomis cydoniis, auellanis, prunis siccis, prunellis, mespilis & cornulis, malis apiis, malis granatis, malatestis. Cæteris verò fructibus nequaquam utere, vel raro, vel rarissimè. Poteris tamen diutius uti fructibus & herbis frigidis, siccis & acetosis, vel aliquantulum amaricantibus. Sed utendo fructibus calidis & humidis, ut sunt ficus, vua, mora, cerasa dulcia, fac sint modica, & immediate post comede pomum anarancie cum sale.

Præterea si uteris frigidis & humidis, ut sunt melones, pisces molles & teneri, pruna pinguis, sume post aliquid fœniculi, & pomi anarancie cum sale, suprabibendo parum vini boni & odoriferi. Vitare etiam debes fungos & herbas humidas, portulacas, cucurbitam, & omnem humiditatem, nec non & rem quæ facilis est putrefactionis. Cauebis quoque fructus & res nimium dulces & humidas herbas, permitto tibi lactucam permixtam mentæ vel cinnamomo. Eandem quoque corrigere poteris cum basilicone, cariophilato minutissimo & quasi ad rubedinem quandam tendente, odorem habente cariophilorum, est enim cordi gratissimum. Concedo etiam tibi cucurbitam, & herbam, quæ Tusca lingua Selbafrella appellatur. Rursus aduerte, ne te Rasis sententia fallat, quæ tempore multum calido admittit olera & fru-

ctus frigidos & humidos, quia Ægyptum inhabitabat ubi extrema est siccitas, ubi eiusmodi fructus & olera sunt exquisita à natura decocta. Cautus igitur esto, ne talem præsumas licentiam in regionibus non similibus Ægypto.

Notandum insuper quod res acetosæ, asperæ & acres in conseruatio æquè ac curatio administrandæ sunt regimine, quia periculum potissimum imminet in calido & humido, & in putrefactione illinc dependente, in spirituum resolutione, inque accessione veneni ad cor. Res itaque prædicti saporis omnibus iam dictis obfistunt malis, quia refrigerant, desiccant, conseruant, confortant, restringunt, & vniunt. Operæ precium hic est meminisse, quod res nimis acres, ubi timeretur pectoris strictura, aut stomachi debilitas, temperandæ sunt in saccharo, sale & lacte amygdalarum, cinnamomo, pipere, fœniculo, croco, ouis, & modico pinguedinis. Commendo plurimum panem speltæ, hordei, & fercula ex his condita. Item biscocta, risum, passulas tendentes ad acridinem, panem optimi grani sufficienter coctum cum modico salis. Utere sæpius caparibus cum aceto, & aliquando eo genere casei, quod Florentini Marzellinum vocant. Vitandus est caseus multum pinguis vel salus. Nec laudo tibi caules nec legumina, exceptis lenticulis. Prohibeo super omnia phaseolos, nec laudo multum rapas spinachias. Concedo tibi petroselinum & pastinacas. Prohibeo autem erucam, cariotas, sapam, sinapi, citrullus, melones, baccellos, cicer recens, cucumeres, cerasia dulcia & mollia, vuas, ficus dulces & mora. Nec te repleto nimio vino, carnibus, & ouis, ne nimium sanguinem, choleram, putrefactionem inflammationemque multiplices. Utere ouis cum agresta & aceto, & pomis arantibus. Carnes sint leues & siccæ, bene coctæ, pulli, auiculæ, hœdi castrati, pipiones, turtures, & syluestres auiculæ. Si visus fueris carnibus humidis sint assatæ, sed fac ut intus per totum bene impleantur cum acris condimentis & acetosis, cum modico piperis, cinnamomo, coriandro & sale. Vina turbida sunt omnino noxia, & præsertim multa. Esto in cibo & potu plus solito parcior, cibus sit aliquantum copiosior potu. Nec tamen volo, ut nimium feras sitim & inedia. Caue stomachum fastidire permittas, sed cum præserua cum cibi & potus mediocritate, cum exercitio & ieiunio, cum appropriatis euacuationibus. Abstine à coitu & passionibus animæ excessiuis, nisi forsitan per coitus abstinere



tiam te omnino grauatumpetceperis. Ad mentem reuoca dictum Auicennæ tertio naturalium, quod superflua per coitum feminis euacuatio plas nocet quàm si quadragesies tantum exiret sanguinis. Dixit Hippocrates, coitum speciem esse quandam morbi Epilepsie. Caue ab aëre multum nubilo, denso, recluso & humido, ac scias aërem qui non frequenter mouetur & innouatur, vbi nec ventus, nec Sol penetrat, nec purgat, facile mixtionem suscipere & putrefactionem venenosam, veluti immobilis aqua. Ab hominum turba semoueto, præsertim existens ieiunus, & quando calidum successerit humido, humidum calido. Declinato etiam aërem nimis calidum, quia aperit & nimis debilitat. Habitatio tua sit spaciola, sicca, aërem recipiens siccum continuo, & tempore æstatis subinde recentem. Caue quando multum incalueris, ne te protinus exponas frigido vel humido, nebuloso, & vento calido & humido, præsertim in locis infectis, & de infecto loco veniente, etiam ab omni vento de prædictis locis flante, nisi fuerit nimis longè distans, aut fractus pluuiis. Ventus autem qui aërem infrigidat & siccatur & serenatur, sua natura est salubris, si cum temperamento receperis, & est principalis Medicus contra huiusmodi venenum. Magnam adhibe curam vitando ventos à stagnis vel paludibus venientes, aquas fuge putridas, herbas continentes, immaceratumque linum, & quemcunque prauum odorem. Procul esto à caulium nucumue odoribus, & foetidis ab herbis. Abstinentum item à balneis, à somno meridiano, ab adhærenti arctoque hominum consortio. A turba fuga cito & procul ac tarde reuertaris, quoniam longo durare solet tempore venenum, ad offendendum perquam promptissimum. Vtere tibi siccis, optimi saporis, acribus, acetosis, vitando brodium, pinguedinem, dulcia, viscosa, vinis subtilibus, claris, odoriferis, aliquantulum fumosis, sed parum acetosis non dulcibus, dilutis aqua multum subtili & clara. Summa, omni tempore à rebus caue sanguinem generantibus aut nimium, aut aquosum, grossum & turbidum, & pariter quamcunque rem stomacho nocentem. Hæc est regula cibipotusque. Vtilis est, iudicio meo, omnibus superspersa cibariis talis specierum compositio. Accipe sandalorum rubeorum vnciam dimidiam, cinnamomi electi drachmas tres & dimidiam, croci drachmam dimidiam. Gentilis omni tempore his vtitur speciebus. Summe cinnamo-

mi semunciam, manna drachmam vnam & dimidiam, cariophilorum, been albi & rubei drachmam dimidiam, corallorum rubeorum drachmam vnam, cardamomi drachmas duas, croci drachmam dimidiam, sacchari ad pondus omnium. Item nonnulli alia habent descriptionem, & est talis. Cape margaritarum drachmas duas, corallorum alborum & rubeorum drachmam vnam, croci scrupulum vnum. Item, Summe cinnamomi vnciam dimidiam, cariophilorum drachmam dimidiam, corallorum rubeorum scrupulos duos, croci drachmam dimidiam, sacchari ad pondus omnium.

Pro primo cibo vtile est, nisi te calor offenderet, sumere ficus, rutam, & nuces cum sale, præsertim tempore frigido vel humido. Notandum quod speciebus multum calidis, ut est quarta compositio ex his quas narrauimus, vtendum est solum in ferculis multum humidis, frigidis & acetosis, aliis verò vt possumus in omnibus. Post cibum magno sunt adiumento semina coriandri præparata, & etiam secundum Auicennam ieiuno stomacho, qui hæc ipsa tali in causa plurimis effert laudibus. Vtere ieiuno stomacho frictionibus bene, pectina capillos, omnem expurga superfluitatem, vniuersum corpus mundum conserua. Matutino tempore ignem præpara temperatum, & interdum quandoque, præsertim humidis temporibus. Bonis sæpius odoribus domum suffumigato, similiter & vestimenta. Admoueas naso pariter & ore teneas vbi plus opportunum fuerit, aliquid theriacæ, aliis verò in locis siue temporibus corticem citri, zedoariam, vel modicum thuris, manu etiam supradictum gestare poteris cedrinum pomum. Cape ladani drachmam vnam, been albi & rubei, rosarum rubeorum ana drachmas duas, styracis liquidæ scrupulum vnum, myrrhæ, mentæ, cariophilorum drachmam vnam, sandalorum alborum & rubeorum, camphoræ ana drachmam dimidiam. Fac pomum cum aqua rosarum muscata, suspende collo cornu vnicornis, hyacinthum, topazium, smaragdum, vt pectus tangat, & etiam in ore. Dixit Auicenna, fore necessarium vt hyacinthus & similia, à naturali calore nostro calefiant, qui illorum ad actum producat virtutes, vt operentur in nobis. Fertecum etiam in manu ad odorandum poma odorifera, præsertim citri, limonum, aranciorum & cætera. Sæpius ablue os faucium, & manus aceto, & aliquando cum vino potenti. Nec omittas

odorem mentæ, melissæ, querculæ, rutæ, violarum rubicarum, & myrti. Vtere odoribus frigidis, quos tempora cum calidis, ita tamen ut frigidæ prædominentur præsertim calidis temporibus, quia calidus per se aperit odor & inflamat, quamuis ærem purget.

Super omnia cura, ut hoc facias, scilicet permisce æquali parte acetum rosatum album & aquam rosarum cum vino albo potenti, cum modico zedoariæ vel corticis citri, de qua sæpius modicum aliquid bibe, & sæpius cum ea manus ea lauro & faciem. Defer tecum in spongia cum ligno fraxini, & laua etiam cum eisdem manè & serò tepidis, vniuersum corpus. Vtere temperato exercitio sub tecto, quando es in locis infectis, ieiuno stomacho, sitque locus exercitij spaciosus, aliis autem in locis facies exercitium sub diuo & pariter ieiunus. Rustici bibant loco vini acetum permixtum aquæ. Admoneo omnes, ut non nisi summa cum cautela res tangerent ex infectis locis allatas, nec quicquam gustent ex illis nisi coquatur, mundetur, vel abluatur. Haud equidem scio an dicere in præsentia debeam, an silentio potius præterire. Quod Doctorum nonnulli sæpius ieiuno stomacho dare solent in potu, vrinam pueri recens emissam, vel lixiuium. Detur oro remedio rusticis accommodato.

*Præseruatricuratio Epidemia. De pilulis & pulueribus præseruatiuis.*

## CAPVT VI.

**N**Ecessaria nobis est bis in hebdomada, ipsa omnium compositionum regina, coelitusque tradita theriaca. Vera quidem theriaca, ut eam noscas saporem longa mora in ore conseruat, & stypticitatem ingerit ventri, ætatis esse debet annorum quatuor, & non ultra duodecim, de ea debet antea fieri experientia in venenatis animalibus. Theriaca electa iuxta Galeni, Auerroisque sententias, securum reddit hominem ab omni veneno, morboque venefico. Etiam in ipsa pestilentiali febre admittitur. Dicit Galenus se inuenire theriacam plusquam res omnes diuinam in conseruando & curando. Dixit Moyses Ægyptius, mirabilem factum esse cum ea experientiam in pestilentia Antiocheni. Nec silentio transeundum puto Galenitipum dicentis. Pestem esse draconem cum corpore aëreo, qui venenum contra ho-

minem spirat & theriacam purgatorium quoddam esse, purgans venenum & draconem domans. Accipiantur post cibum horis nouem, & ante cibum horis sex vel septem. Qui eam sumere non potest, saltem cordi apponat & stomacho nasoque & pulsibus, frequentius detur drachma vna prouectis aliis verò drachma dimidia, seu scrupulus vnus. Qui calidæ sunt temperaturæ, bibant æstiuo tempore sumpta theriaca tertiam partem cyphi aquæ rosarum cum modico aceti rosati, alij scilicet alterius complexionis, & alio tempore, sumant cum vino albo permixto cum aqua scabiosæ & melissæ. Quod si theriaca non affuerit, vel non competens fuerit tuæ naturæ, sume mithridatum. In aliis diebus hebdomadæ sume pilulas contra morbum saltem horas quatuor vel quinque ante cibum, vnā scilicet aut duas, vel plus, secundum complexionem, superbibendo parum de vino albo cum aqua scabiosæ & melissæ temporibus frigidis, vel cum aqua rosæ & cum aceto rosato temporibus æstiuis. Pilulæ antiquiores sunt istæ. Sume myrrhæ, croci, ana vncias vnā, aloës vncias duas, sed quia nimium aperiunt, calefaciunt, resoluuntque spiritus, idè nonnulli abluunt ipsum aloë, & addunt terram sigillatam, vel bolum armenum secundum dosim myrrhæ, sed eligibilis est bolus armenus. Nonnulli componunt sic. Accipe aloës drachmas sex myrrhæ drachmas tres, seminum citri scrupulos duos, tormentillæ drachmam dimidiam, croci drachmam vnā, reubarbari drachmas duas, cariophilorum scrupulum vnū, agarici, corticum citri, sandalorum rubeorum ana drachmam vnā, seminum citri scrupulos duos, seminis acetosæ drachmam vnā cum dimidia, corallorum rubeorum drachmam vnā cum dimidia, boli armeni drachmas tres, camphoræ grana duo, confice cum syrupo de citro. Aui-cenna & Auerrois dicunt, qui vtiuntur aloë, myrrha & croco nunquam periclitabitur peste. Prædictæ compositiones temperant illorum qualitatem, & virtutem augment. Sed multo meliores compositi Nicoli, secundum quam veræ pilulæ sunt istæ. Sume myrrhæ, croci, boli armeni, charabæ, corallorum rubeorum, ana drachmam vnā, emblicorum drachmas duas, aloës lati ad pondus omnium, fient pilulæ cum vino albo, odorifero. Credo quod essent nobiliores, & magis ad propositum, si loco emblicorum ponerentur terræ sigillatæ drachmæ duæ, & boli armeni drachmæ tres, fiant pilulæ cum acetositate citri, & accipiantur cum vino albo, aqua rosata, aceto rosato.

In aliis vero sequatur compositionem prædictam. Fac autem ut aloë sit splendidum, leue, aliquantulum rubescens, delicatum, odoriferum, frangibile, pinguescens, & immittendo super ipsum flatum, madescit. Sit & myrrha clara, & corallus delicatus, absque theriaca & dictis pilulis non bene fieri poterit præseruatio. Itaque præ omnibus aliis vtere duobus prædictis, scilicet theriaca, duobus diebus diuersis, & pilulis tribus saltem, quia desiccando humiditatem præseruant à putrefactione. Etiam fortificant cor, stringunt meatus, ne venenum transitum habeat ad cor & ipsum illinc depellunt. Videtur mihi quod aloë in prædictis pilulis, quando sunt tempora humida & frigida, similiter & complexio, non debet lauari, sed in aliis temporibus & complexionibus sumere pilularum compositionem in pulueribus, melius est solum quando opus est festinatione. Potest etiam sumi ante cœnam tribus horis, vel quatuor, sicut etiam ante prandium. Poteris etiam semel in hebdomada, vel duabus vicibus autem plus, quando pilulæ offenderent (licet nullius sint offensionis) in tempore hyemali & humido, loco pilularum sumere sicum siccam cum dimidio nucis, cum modico rutæ & parum salis, superbibendo parum aquæ rosarum, vel acetæ rosati. Quod si & istud te offenderet, vtere loco illius non accipiendo aliquid aliud parum panis tosti intincti in vino albo potêre, cu pomo aranciæ madefacto in aceto rosato, & intincto cinnamomo. Sunt nonnulli qui dant huiusmodi pilulas sero vel mane, vnam scilicet pro vice. Sume ligni aloës, drachmam dimidiam, tormentillæ scrupulos duos, dictami albi scrupulum vnum, zedoariæ drachmam dimidiam, croci drachmam vnam, berberis drachmam dimidiam, cornu cerui adusti scrupulos duos, sandalorum rubeorum scrupulum vnum, seminis acetosæ & corallorum rubeorum, boli armeni ana drachmam vnam, camphoræ scrupulos duos, gemmarum ex quibus fit electuarium de gemmis, drachmam dimidiam, margaritarum drachmam vnam, hyacinthorum drachmam dimidiam, confice cum syrupo de ribes, vel de limonibus. Ego autem in omni tempore etiam in calido, eiusmodi pilulas dare soleo. Sume zedoariæ, ligni aloës, agrimonie, croci, aristolochiæ rotundæ, dictami albi, gentianæ, corticum citri, seminis citri, ana scrupulum vnum, coriandri præparati, tormentillæ, sandalorum rubeorum, corallorum rubeorum, rosarum rubeorum, spodij, emblicorum ana drachmam vnam, terræ

figillatæ drachmas duas, boli armeni drachmas quatuor, fac pilulas cum acetositate citri, quas administra cum vino albo, aceto rosato albo, & aqua rosæ. Ego multum adhibeo fidei huic nostræ compositioni, eam accipiendo quando non sumitur aliquid de pilulis cum aloë compositis. Etiam post operationem prædictarum pilularum, additur ipsi compositioni, ambra, musci, hyacinthi, smaragdi, topazij, margaritarum, cornu vnicorni ana scrupulus vnus. Melius etiam erit & laudabile multum, bibere ista cum vino acetosæ, vel aceto albo, cum aqua rosæ, terra sigillata & bolo armeno, cum exigua portione smaragdi, & hyacinthi, & topazij, vel saltem cum margaritis & corallis. Ista multum commendantur à Galeno & Auenzoar. Alij dant cortices & semina citri, & limonum, cum vino vel aceto rosato, & aqua rosarum. Ego verò frequenter dare soleo hanc simplicem confectionem, & quidem efficacissimam atque securam, cum vino albo, vel aceto rosato & aqua rosarum. Accipe boli armeni drachmas duas, terræ sigillatæ, corallorum rubeorum ana drachmam vnam, corticum citri, zedoariæ, croci ana drachmam dimidiam, sacchari rosati ex rubeis rosis conditi vncias sex, acetositate citri vncias decem, fac electuarium. Raimundus & Arnoldus, theriacales quasdam pilulas tribus modis componunt. Primo, sume boli armeni drachmas tres, barbæ tormentillæ drachmas duas, barbæ herbæ tunici drachmam vnam, sacchari ad pondus omnium, fac pilulas. Item, sume ambra drachmam dimidiam, musci scrupulum vnum, camphoræ grana sex. Item, accipe smaragdi, hyacinthi, topazij ana partes æquales, triturentur & lauentur sicut abluit Mesue lapidem lazuli, fac pilulas cum succo aceto fellæ. Dicunt huiusmodi lapides ab antiquis appellari Bezoar, id est, liberatores mortis, & quod in hoc theriacam excellunt, quod ipsa venenum à se pellit, non trahit ad se, huiusmodi autem lapides vtrumque faciunt, idè debent per os administrari. Etiam possunt superponi plagæ, morsuræ, & bullæ venenosæ. Hac etiam vtuntur compositione, scilicet auri optimi, margaritarum, serici crudi triti. Laudant etiam electuarium diambra, de gemmis & chermes Mesue, laudant granata, rubinos, carbunculos, sapphiros, palladios, corallòs, grana tinctorum, & lapidem inuentum in capite aspidis, & pariter cornu vnicorni. Item electuarium latificans Almanforis cum re aliqua refrigeratiua. Vtere etiam rebus sanguinem clarificantibus, vt sunt lupuli, myrobalani, fumus

terre. Credo quod vti semine iuniperi cum semine myrti sit multum vtile contra huiusmodi venenum Item tale electuarium. Summe citrum vnum integrum, maceretur bene & coquatur cum saccharo & aqua rosarum. Et vbi non habetur citrus, fac cum limone seu pomo arancio integro, multi vtuntur verbenâ Summe dare solitus pauperibus parum panis bene tosti, intincti aceto cum modico rutæ, & aliquando cum cepæ portiuncula. Do etiam nonnunquam ad superbibendum parum vini puri. Item eiusdemodi panem tostum intinctum aceto rosato cum pauculo cinnamomi, quandoque superfumendo pomum arancium, & parum boni vini.

De his quidem rebus administrare poteris, modo vnam, modo alteram, his scilicet diebus quibus theriacam non fumis nec veraspilulas, vel etiam illis eiusdem diebus post vespervas. Vti etiam poteris ferro, ieiuno stomacho, parum istius nostræ confectionis. Cape sacchari rosati, diama renati ana vncias quatuor, coriandrorum præparatorum, corallorum rubeorum ana drachmam vnam, cinnamomi drachmas duas, sed æstiuo tempore drachmam vnam, sandalorum rubeorum, croci ana drachmam dimidiam, verum in æstate croci scrupulum vnum, confice cum acetositate citri vnciis quatuor, superbibe parum vini optimi, vel aceti rosati. Poteris etiam vti eo matutino tempore aliquando loco prædictarum. Dixit Raimundus, quod suo tempore iuncti fuerunt Saturnus, Iupiter & Mars in vnde vigesimo gradu Aquarii, anni millesimi trecentissimi quadragesimo octauo, in mense Martio, quæ quidem coniunctio horribilia significabat, præsertim graues pestilentias frequentius per spacium annorum quadraginta quinque, eo quod fuerit in signo humano fixo in domo Saturni. Inter quas erat pestilentia illa anni quadragesimi octauo, vbi Medici Parisienses & ex Auinione, & Pedimontani nouam composuerunt theriacam ab ipsis expertam, & cum felicitate eos conseruauit. Arnoldus Receptam conscripsit, quam Raimundus eiusdem discipulus his verbis recitauit. Summe seminis iuniperi drachmas duas cum dimidia, cariophilorum, macis, nucis muscatæ, zedoarii, zinziberis ana drachmas duas, aristolochiæ longæ & rotundæ, barbæ herbæ tunici, dictami, enulæ campanæ ana drachmam vnam cum dimidia, saluæ, rutæ, seminis balsamitæ, mentæ, pæoniæ, pulegij, ceruini ana drachmam vnam, doronici Romani, baccarum lauri, seminis acetosæ, seminis citri, basiliconis, masticis,

theriacis Liboli armeni, terræ sigillatæ, spodij, ossis de corde cerui, rasuræ eboris, & cornu vnicorni, margaritarum, sapphiri, smaragdi, corallorum rubeorum, ligni aloës, sandalorum rubeorum, hyacinthi, topazii ana drachmam dimidiam, sacchari rosati, diaboraginati, diabuglossati, dianenufarati, diacetosellati, pulparum tamarindi acetosi, theriacæ ana drachmam dimidiam, sacchari libras tres, fac electuarium aut morselles, cum aqua scabiosæ & rosata parum camphorata, & cum vino cydoniorum, addendo folia auri quadraginta. Qui sitim patitur extra cibum, vtatur acetosa simplici cum pauxillo aquæ frigidæ, vel vini mali granati acetosi cum iulep rosato, vel vino acetoso. Possis etiam exprimere acetositatem citri vel limonis, vel pomi arancii, & bibere cum aqua & saccharo. Item succi rosarum, sacchari rosati, diama renati, diaprunis, diacydonitis dissoluti cum aqua colata & expressa, bibendo cum aqua frigida. Item rosæ, myrobalani, tamarindi, cerasa acetosa, pruna, persica sicca, cydonia trita, dissoluta, colata & expressa, bibe cum aqua & saccharo ponendo plus de saccharo vbi minus est de calido, & minus de saccharo vbi plus fuerit de calido. Item succus rosarum cum vino granatorum, item oxyfacchara cum aqua frigida recentia. In pluribus etiam rebus proficuum est vinum cydoniorum. Vti herbis cor ipsum sua virtute respicientibus, vtile est, vt sunt borago, buglossa, melissa, endiuia ac mentæ parum. Item septem principales herbæ quas contra venenum plurimum valere fertur, quarum prima est herba hypericon, alio nomine Perforata, secunda est herba dicta vincetoxicon, tertia enula, quarta raphanus, quinta dictamus, sexta aristolochia, septima lactucella. His additur ab Arnoldo & Raimundo, herba tunici. Nec prætermittenda est agrimonia, acetosella, cichoria, marrubium, hyssopus, scabiosa, pentaphyllon, capparis, limones, citrullis, arancii scilicet quos poma aurea vocamus, & vniuersaliter cuncta acetosa, & quæ porticitatem quandam participant. Scias flosculos vitis multum conferre, si eis in cibo & potu atque electuariis vti consueveris, pariter & aqua scabiosæ, necnon melissæ, in his omnibus quæ sanis simul & infirmis administrantur mirabilis est, eo quod humiditates exiccet venenosas. Et vbi in desiccando refrigeratione multa opus sit, vtendum potius est aquis endiuia, rosarum, plantaginis, aceto rosato, vel aqua, vel succo acetosellæ, succo limonum, cedri, aranciorum, cichoriæ, pimpinellæ, fumi terre.

Cum verò temperatis ut oportet accipe aquam boraginis & buglossæ, singulis decoctionibus impone pruna damascena, myrobalanos, & tamarindos. Et hoc memori serua mente, quod cunctis in remediis quàm bene conueniunt hæc quatuor, videlicet vinum album, acetum album rosatum, aqua rosata, omnia æquali pondere, crocus pauxillula quantitate. Vbi absque mora accum facilitate quadam operari necesse fuerit, administrabis quæ opportuna sunt in forma subtili & liquida, vel ad suprabibendum dato quæ prædiximus.

Raimundus inquit, quod si tamdiu differri potest, ut præmemoratarum fiat compositio pilularum, melius esse ut exhibeantur pilulæ quàm pulueres, tum quia huiusmodi compositio melius fermentata est, qua quidem fermentatione ultra complexionalem, specificam quoque contrahit virtutem, tum quia permanendo in stomacho magis conseruat, roborat, confortat, ac melius discurrit per corporis remotiora, suprabibendo parum alicuius liquidæ substantiæ, & multum abstinendo. Nec tamen ideo volumus ut pilulæ sint valdè siccæ ac induratae, imò tales fuerint, decet ut reformentur. Congruit sanguineis plebotomia, videlicet extrahere sanguinem, ut conseruentur, si alias nullum ex fluxum sanguinis haberent. Sanguineos eos intelligo qui decenter carnosî, colore rubei sunt, pilosî, robusti, quibus venæ amplæ, & qui rebus vescuntur multi nutrimenti. His, inquam, extrahatur sanguis ex basilica dextra, inde post bimestre spacium fiat iterum minutio ex basilica sinistra. Nec vna pro vice excedas pondus libræ. Fiat etiam temporibus anni temperatis, ac Luna in bono & fortunato aspectu existente. Sanguis purus minuitur oriente Sole, cholericus in meridie, melancholicus in occasu, phlegmaticus in medio noctis.

Vult ideo Raimundus, ut iuxta ordinem Auicennæ secundum quatuor species sanguinis prænumeratas, obseruentur in extrahendo illæ quatuor horæ. Cognoscuntur autem hæ species: primò, per earumdem signa; deinde, iuxta quatuor ætates quibus dominantur, succedendo ordine prædicto. Et ubi non apparuerit multa sanguinis abundantia, vult ne penitus minutio fiat, nec causa conseruationis, nec curæ. Et cum extrahere volueris, cura ut die præcedenti fiat clystere, & exhibita sit aliqua Medicina non solutina. Nec prætermittendam duco, quod ubi sanguis ad

alios multum declinat humores, minimè se euacuandum. Memineris Galenum & Auicennam, quanto magis medendi artem exercuere, tanto semper timidiore erga phlebotomiam esse factos, eo quod plus trahit phlebotomia ex naturali & bono, & ex spiritibus quam ipsa Medicina, ac minus temporis concedit ad discernendum malum sanguinem à bono. Conferunt infantibus & pueris ea quæ contra vermes valent, quorum his potissimum temporibus imminet periculum, administrato illis in potu semel in hebdomada dictami drachmam vnam cum vino aliquo styptico, siue cum vino decoctionis absynthij & nigellæ, aut seminis sancti. Illiniatur item stomachus, vmbilicus, gula & pectus, oleis herbisque amaris & huiusmodi, quandoque etiam exhibebis pillulas de reubarbaro. Verum quia multum humida complexio, multumque calida periculosa est tempore pestis, opus est refrigeratione, desiccatione, & frequenti euacuatione, quæ quidem secundum opportunitatem cum moderamine fiant. Hunc defer sacculum cordi applicatum.

Sume rosarum rubearum drachmas duas, sandalorum rubeorum corallorum rubeorum spodij ana drachmam vnam, zedoariæ, lignialos, cinnamomi, cariophilorum, corticum citri, croci ana drachmam dimidiam. Esto diligens ut omnis expurgetur superfluitas ac cura, ne stypticus maneat venter, sitque tardus ad soliditas constringendum expurgationes vel fluxus siue superfluitates hæmorrhoides, scabies, naturales solitosque sudores plagas veteres apertas, quibus sine molestia profluit humor, lachrymæ, sanguinem è naribus fluentem, solitum & ordinarium vniuersales guttas & huiusmodi, quoniam hæc dicta expurgamenta securiorem reddunt à morbo. Admoneo rerum publicarum gubernatores, secundum Hippocratis experientiam, si fecerint ac ordinarint ignes & fumigia ex iunipero, myrto, terebinthina, & thure, manè & sero ante posticas quarumque ædium, domuum, & habitationum, statim expelleretur ab eo loco pestis. Valet loco iuniperi, laurus, salvia, rosmarinus, & herbarum quicquid est odoriferarum. At terebinthina mirabilis est. Multi Doctorum dicunt, ignem semper fore tempore pestis vtilem, eo quod omnem dissoluit vaporem. Inquit Raimundus utendum esse confortantibus solum, cum grossi apparent vapores & humidi. Calidis temporibus superare debent odores infrigiditate alios, è diuerso cum tempora frigida



sint & humida, rosæ, sandali, myrrhus, camphora, cortices pomorum, mala granata, calidos contemperant odores, similiter acetum, & vitides herbulæ frigidiusculæ. Cōsultare Magi Persarum regi pro sui defensione ab omni veneno morboque venenico, sculpi faceret in lapide Hamatite hominem flexis genibus stantem, cinctum serpente, dextra eius caput, læua caudam serpentis tenentem, & imprimi ligarique faceret hunc lapidem in annulo aureo, verum lapidi in loco capsulæ supponi barbam serpentariæ, quem quidem anulum gestaret in digito. Laudat Auerrois hircinæ odoramentum urinæ. Moneo ut continuis utaris remediis, quum fueris in loco infecto vel propè, eo quod contagio frequens est, infectusque aer continuè noxius offendit. Volo diligenter aduertas, quum fuerit coniunctio Solis & Lunæ, quumque oppositio, id est, quando est pelniliium. Item quando coniungitur Luna Saturno, & magis quando coniungitur Marti. Item quum fuerit in quadra cum dictis Planetis.

Et nota (ut refert Rhasis) fortiter moueri solet venenum huiusmodi pestilentie in Solis ortu, in occasu, in meridie, & medio noctis, quia Sol quatuor his vicibus mutationem causat in aere. Regnat in vere, in æstate magis, plus in autumnno. In vere est aer calidus & humidus, & accedit sanguinis dominium. In æstate cholera, calidus aer multum aperit & penetrat, debilitantur corpora, rebus replentur corruptilibus materiam humidam aeris caliditate in putredinem tribuentibus. Qui quidem calor si tam intus quam extra cum siccitate foret, parum abesset, quemadmodum etiam haud multum nocet humidum cum aeris tum complexionis frigiditati adiunctum. Sed valde periculosum est, ubi calidum humido permixtum fuerit, vel foris vel intus. Experimento compertum habuimus, quod longa siccitas calido minuit tempore pestem, at frigidus, excitat, affert. Denique in autumnno augmentatur fructuum repletio, ac corporum debilitas, aer tenuis est ob æstatem præcedentem vaporum facile susceptiuam, quas non resoluit propter caloris diminutionem, deinde nebulosus est ac variabilis. Sæpenumero ventus adest grossus & humidus, excedit caliditas humiditatem, & frequenter aduenit, augmentaturque pororum oppilatio propter aeris crebro post calidum præcedens, frigiditatem. Sciendum etiam quod cum pori valde oppilati sunt, comprimunt putrescibilem ad intra materiam. E contrario quum

plus æquo aperti, repente nimis venenosum capiunt aerem, ita ut nonnunquam (maximè post sudorem vel coitum) paucis (ut gladius) occidit horis.

*De modo curandi secundum rationem Physicam.*

## C A P V T VII.

**I**N pestilentiali febre non expurgato veneno, caue ne administres intus, ne extra res partium pectoris simpliciter aperitiuas, eo quod aditum præbent veneno ad cor, & spiritibus viam aperiunt exhalationis, sed ut inflammatio prohibeatur & putrefactio, vt ere subito aliquantulum infrigidantibus & multum desiccantibus. Roborant namque cor, & vias claudunt versus ipsum tendentes, ne venenum ad illud perueniat. Pro parte etiam bene purgandus est humor, & spiritus nutrimento sapius recreandi, & quæ contra venenum valent continuè administra, id quidem sua natura cor petit. Quod si differas donec venenum eò peruenierit, fortasse fieri poterit, ut partes cordis multum inde constringantur, quas quidem denuo aperire quam proficuum, plus fortè noxium periculo tunc esset. Igitur quum primum caput omniaque membra grauari simul adiuncta febre quispiam perceperit, vide ex signis ne mendacibus ambiguisque fidem habeas, nec differas quousque appareat inflatio vel bulla. Sed hæc quum emineant, eo citius quò poteris confestim inungas oleo de scorpionibus & theriaca, pulsus temporum manuum & pedum, nares, occiput, gulam, pectus & locum circa bullam & apostema si apparuerit. Vera olei compositio talis est.

Sume olei oliuæ annorum quinquaginta uncias octo, imponas scorpiones numero quinquaginta, simul cum oleo bulliant, ita ut fundum petant, quod faciās in æstate, & maximè mense Augusti, serua & vt ere, est enim mirabile contra venena. Quod si stomachus cibo grauatus fuerit, prouocandus est vomitus cum facilitate, cum aqua tepida, aceto, & oleo, etiam cum raphano, tenendo etiam prouocationem cum penna, & statim postea faciās clysterem. Et renouabis omni die malnarum decoctionem & matris violarum, bletæ, hordei, lactucæ, camomillæ, mellis violari, sacchari rubei, vitelli vnius oui, diasenæ vel cassiæ unciam vnā, succi rosarum solutū drachmas duas, salis communis & olei violari quod satis est. Hoc facto, applicabis Epi-

thema cordi ex rebus cordialibus frigidiusculis à prædominio.

Sume aquarum rosarum, buglossæ, acetosellæ, nenupari ana drachmas duas, aquarum melissæ, succi granatorum medij saporis, acetositis citri ana drachmam vnam, succi cydoniorum vnciam vnam, sandalorum alborum, rubeorum & citrinorum ana drachmas duas, spodij, rasuræ eboris, seminum citri, seminis acetosæ ana drachmam dimidiam, granorum tinctorum grana sex, camphoræ drachmam dimidiam, conterantur bene omnia, & calefiant in vase vitreato puro. Post cum panno de Grana temperatè calido superponas pectori, singulis tribus horis ipsum renouando. Item pro stomacho hanc habeto in sacculo compositionem, ad viuificandum & roborandum spiritus eius. Sume absynthii, mentæ ana manipulum vnum, melissæ, acetosæ ana manipulum dimidium, rosarum rubearum vnciam vnam, corticum citri, risi ana drachmas tres, coriandrorum præparatorum drachmas duas, corallorum rubeorum, masticis, sandalorum rubrorum ana drachmam vnam, macis, foliorum cariophilorum ana drachmam dimidiam, nucum cupressi numero quatuor, componas cum succo cydoniorum. Item sub brachiis hoc remedium administrabis. Sume rosarum, florum camomillæ, meliloti, florum myrti, nucum cupressi, sandalorum omnium in debita quantitate, bulliant in aqua cui intingatur sponsia vel stippa, quæ postmodum exprimat, & temperatè calida applicetur, sæpiusque renoua. Istud enim mirabile est.

*Cucurbitularum usus, & curandi ratio per sanguinis missionem.*

## C A P V T V I I I.

**H**is factis & debite, vt dictum est, administratis, si bulla vel signum in tibiis adhuc non apparuerit, duas confestim natibus ventosas applica, & duas pariter coxis à parte posteriori. Voluere veteres vt post huiusmodi ventosarum depositionem fieret phlebotomia. Et si bulla vel signum solitum non apparuerit, fiat ex vena comuni à parte dextra, ad prohibendum ne venenum partes cordis attingat: etsi etiam apparuerit huiusmodi signum vel bulla, eodem in latere extrahendus est sanguis, & hoc ne se extendat dilaterque venenum (vt semper solet) per omnes venas ac corporis partes. Quod si circa aures apparuerit, vel collum, minuatur ex cephalica in parte

qua signum, iuxta pollicem manus. Si sub axillis apparuerit, euacuetur hepatica in brachio eius partis in qua signum. Si in inguinibus, fiat phlebotomia ex saphena, hoc est sub talo pedis eiusdem lateris. Denique in vniuersali, quoties ab origine gulæ ad caput vsque huiusmodi signum appareat, fiat minutio ex cephalica in parte signi apparentis. Si ab ea parte vsque ad vmbilicum antè vel retro, fiat pariter phlebotomia ex hepatica. Si ab vmbilico infra, debet minui saphena modo quo supra. Et phlebotomandum est quàm citius fieri potest, saltem quum primo apparere incipit apostema. Intrepide autem bonam quantitatem extrahi facias, nisi patiens fortè modici fuerit sanguinis, extractis duabus vnciis vel circa, siste paululum, vt diiudicari possit an bonus sit sanguis vel ne. Si malus, extrahere poteris copiosius, si bonus, parcius. In debilibus & sanguine non multum abundantibus sufficit extractio duarum vnciarum. At febrilis tempore rigoris id minime feceris.

Patiens autem quum sit sanguinis minutio, degustet vel ore teneat pomum anarancie & acetosa quæque, naso, fronti, ac temporum pulsibus acetum applicando, hic namq; cõmunis phlebotomadi est modus. Fulgineus Gentilis plurimum laudat id quod iam dicemus, vt rem quampiam expertam. Si solitum apparens apostema venerit circa spatulas, applicandæ sunt ventosæ vbi iunguntur ipsæ spatulæ, minutio autem fiat ex mediana quæ dici solet communis & nigra. Si apparuerit in collo vel capite, minuatur cephalica iuxta pollices manuum. Si sub vel dextro in brachio, phlebotomandus est de vena pulmonis inter medium & anularem eiusdem lateris digitum. Si circa brachium vel latus sinistrum, ex vena Saluatella inter dextræ manus paruum & anularem. Si in inguinibus vel in sinistro latere, ex vena Paralytica minutio fienda est inter poplitem pedis & alium propinquum eodem in latere. Si appareat in tibia vel pede dextro, ex vena sic dicta Vena mulierum, solent Doctores Hispani & Carellani prima post factum clystere vel saltem secunda die, facere phlebotomiam duabus interpolatis vicibus. In sanguineis robustis, ac bonæ ætatis hominibus primo die sic faciunt. Primo extrahunt sanguinem in parte opposita, eo quod humor in motu adhuc existat, nec iam veneficus factus est. Si apostema sub brachio sinistro apparuerit, minuunt subito à manu dextra vncias sex vel quatuor, vel ex canilla pedis sinistri vncias tres.

Post verò horas sex vel octo recreato patiente atque quieto, extrahunt à sinistro brachio vncias sex vel quatuor aut tres iuxta compressionem & virtutem venæ grossioris, quoniam ea opportunius phlebotomiam exposcere se monstrat. Eiuerso faciunt vbi apostema in inguinibus appareat, primo quidem minuunt in brachio eiusdem lateris, secundo in pede illius etiam eiusdem partis ex saphena. Verum si patientis haud multum robustus fuerit, nec sanguine abundans, attamen naturalem habet decenter vigorem virtutisque constantiam, aut sit ut iam existat in fine secundi, vel in tertio die, quum iam verisimile sit materiam ipsam suum cursum motumque coepisse, iamque veneno infectam esse, euacuant vncias duas vel quatuor à latere apostematis, loco apostemati quàm sit possibile propinquiori. Si post aures extiterit, minuunt ex cephalica eiusdem lateris. Quod si hæc ipsa haud ita facile comprehendere possit, fiat in Mediana vniuerso corpori comparticipante. Quod si nec ista pateat, fiat in manu eadem ex vena quæ est inter pollicem & indicem. Similiter autem faciunt à medio secundæ diei ad sequentes, sed ab initio ad medium secundi facerent phlebotomiam ex parte opposita, similiter à primo ad medium secundi. Si apostema est sub brachio, euacuandum est ex vena eiusdem brachij, & ex venâ communi, vel saltem ex hepatica, aut eiusdem manus infra diginum medium & sibi adhaerentem. Si in eodem prædicto tempore signum ipsum in inguinibus fuerit, incidas venam sub eiusdem lateris genu, aut sub cauilla eiusdem pedis. Si signum vergit versus nates, mitte sanguinem de grossiori vena, & magis apparente in dorso pedis eiusdem lateris. Istorum quoque modus est, quod circa secundæ dimidium diei, incipiunt ut plurimum in contrarium.

Nos autem ad canones nostros vniuersales accedamus. Quia eiusmodi morbus vel est in ipso sanguine, vel in humoribus sanguine permixtis, idè mihi videtur extrahendum esse sanguinem omnibus, ab annis quatuordecim vsque ad sexaginta, ratus multo satius fore, ut venenum quod per venæ apertionem expiret, quàm sanguinis effluxu magnopere cruciari. Extrahe ipsum iterata vice cum sex horarum interstitio. Robustis autem corporibus & sanguine multum abundantibus, extrahe ad summum, libram vnam. Mediocriter verò robustis, & mediocriter sanguineis adusque vncias octo, debilioribus autem constante pulsu, vncias quatuor vel tres, siue duas aut.

saltem vnum. Vbi verò dominium cholera obtineat, non excedat vncias extractio duas. Multi extrahere præcipiunt, quousque non debilis, debilitetur. Hoc autem mihi minimè placet, quandoquidem spiritus dissoluit. Vbi pulsus vacillat, nil prorsus extrahendum. Maior verò mihi est cura prius appareat apostema, etiam postmodum prouocentur hæmorrhoides frictionibus factis cum rebus asperis, & succo coeparum, cum ventosis & scarificationibus, & sanguisugis. Vbi sanguis abundat, facias idem post alteram venæ sectionem. Vbi autem modicum fuerit sanguinis, saltem id feceris.

*De Medicinis venenum dissoluentibus & extrahentibus.*

## C A P V T IX.

**Q**uidam ut primo semel euacuatus est sanguis, applicant Epithema. Verum sapientiores id agunt à principio, sæpiusque renouant, videlicet à tertia in tertiam horam, apponunt temperatè calidum cum panno coccineo. Descripsimus vnum supra alterum, hoc est. Sume aquarum rosarum, endiuæ, buglossæ, melissæ ana libram dimidiam, aceti vncias duas, sandalorum, rosarum, corallorum, ana drachmas tres, spodij drachmas duas, margaritarum, sapphiri ana scrupulum vnum, beeri albi & rubei, ossis de corde cerui, seminum citri ana drachmam dimidiam, musci scrupulum dimidium, camphoræ, croci ana scrupulum vnum. Si insolitam in patiente noueris caliditatem, fac ut vngatur hepar & regio renum, vnguento sandalino, bis in die. Inde post horas quatuor (more consueto & ordine) exhibendæ sunt pulueris contra morbum drachmæ duæ vel vna cum albo vino & aquis endiuæ, necnon acetosellæ, pariter & theriacæ drachmæ duæ, vel saltem vna. Post hunc ipsum potum coadiuuat cum pannis & fumigiis calidis, naturam ad sudorem. Nec erraret qui theriacam solum administraret, verum tamen plus in usu est eam dare cum pulueribus. Addunt nonnulli acetum, & id mihi haud displicet, placet quoque eam sæpius administrari. Et utilis simul cum theriaca, aqua scabiosæ & melissæ, vbi non multa adsit caliditas. Antiqua contra morbum pulueris talis est descriptio. Cape dictami albi, corallorum alborum, tormentillæ, boli armeni, gentianæ ana vnciam vnam, terræ sigillatæ vnciam dimidiam. Modernior hæc est. Sume barbam tormentillæ, agrimoniam, ligni aloës, boli armeni, valerianæ, lapatii, sandalorum

rubeorum ana partes æquales, barbæ scabiosæ ad pondus omnium misce cum sanguine tauri desiccati ad Solem & destillati. Alia descriptio. Sume spodij, dictami albi, gentianæ, tormentillæ, granorum iuniperi, seminum citri, carlinæ ana drachmas quatuor, foliorum albatruncias duas. Tertia descriptio. Sume tormentillæ, dictami albi, cornu cerui vsti, zedoariæ ana drachmam vnam, margaritarum, corallorum rubeorum ana scrupulos duos. Quarta descriptio. Sume tormentillæ, dictami albi, boli armeni, camphoræ, margaritarum, sandalorum rubeorum cornu cerui vsti, aristolochiæ rotundæ, sacchari albi ana drachmas duas. Quinta descriptio. Sume tormentillæ, dictami ana drachmas duas, seminis acetosæ, seminum citri ana drachmas tres, zinziberis albi, cinnamomi, croci ana scrupulum vnum, boli armeni, terræ sigillatæ ana drachmas duas cum dimidia, sacchari vncias duas. Hic pulvis multum (vt fama est) valet cōtra venenum, tam antequam quam post administratus. Sexta descriptio. Sume radicem tormentillæ drachmas duas, sandalorum rubeorum, dictami albi recentis, cornu cerui vsti, margaritarum, boli armeni, aristolochiæ rotundæ ana drachmam vnam, camphoræ drachmam dimidiam, sacchari albi drachmas duas, pimpinellæ, myrrhæ, zedoariæ ana drachmam vnam, sandalorum, terræ sigillatæ ana drachmas duas, seminum citri, croci ana scrupulum vnum, hyacinthorum ana drachmā dimidiam. Hi pulueres vigorem præstant cordi, adiuuantque ipsum in expellendo à se venenum, putrescibiles humores desiccant, cohibent vias cordis ne venenum ipsum attingat, frequenter etiam venenum expellunt per viam sudoris. Experimento compertum habetur priorem, quam diximus antiquam, descriptionem, ac inter modernas vltimam, cæteris esse multo ac longè efficaciorē. Sunt quidam qui post vomitus prouocationem (si ea opus sit) facto etiam clystere & inunctione, primo exhibent pulueres atque Epithema, post cuius operationem, tunc primum euacuant sanguinem. Id autem faciunt vbi patiens sanguinis multum habuerit, nec fortè in hoc errant. At vbi fieri non possit sanguinis extractio, tum defectu sanguinis, loco phlebotomiæ exhibent Medicinam, prius tamen puluerem.

Postquam sudauerit infirmus, aut debitum sudoris tempus elapsum fuerit, non expectanda est humoris digestio, quoniam non adest temporis mora atque facultas pro celebranda digestionē. Equidem quum

necessitas imminet (siquidem ea ipsa non subest legi) minimè obseruanda est consuetudo temporum discretio atque dierum. Nec confidendum est spe aliqua in opere naturæ ad euacuationem enitentis, quoniam irregularis est propter indigestionem imperumque veneni, equidem oppressa natura vt potest, plus operatur quam debeat. Post idèò competens sudandi tempus, vel sanguinem si abundat minues, vel non abundante dabis purgationem, ex rebus tamen non commouentibus stomachum. Factus enim cum violentia vomitus, pectoris dilatando vias facit vt ad cor venenum percurrat, trahitque ipsum ad cerebrum. Hac de causa errant qui capraginem & res huiusmodi exhibent vomitiuas & venenosas. Vix enim vni resistere potest natura veneno. Posset fortè nobis quispiam opponere, cur venenatos ad vomitum producere physici soleant. Dico non parem esse venenorum conditionem, cætera enim plus habent materiæ, & ad educendum aptiora per vomitum, & sunt in stomacho, istud verò vapor est quidam venenosus, & in partibus pectoris. Nulla igitur adsit Medicina, quæ vomitum violenter producere possit, at cum qui nulla violentia, dānarem minimè, approbarem tamen magis, vt per inferiora diuerso fiat. Dissoluatur, quam dabis, Medicina in vino albo, & aquæ scabiosæ, endiuæ, rosarum, plantaginis, buglossæ, melissæ, aceto rosato, in quibus facta sit decoctio ex prunis damascenis, myrobalanis, tamarindis. Si autem morbus inuadit aliquem stomacho repleto, quidnam faciendum erit iuxta ordinē modernorum? Fac vt post inunctionem cum oleo scorpionum & theriaca faciliter vomat, cum aqua tepida, aceto, oleo, & succo raphani, tentando etiam prouocationem cum penna longa, deinde administrabis clystere, postmodum Epithema, & de ipsis pulueribus. Deinde tempore iquo iam quietior & restauratus agrotans fuerit, venam secet, si est sanguineus, sin minus, administra Medicinam. Et si in phlebotomia vltra quatuor sanguinis vncias extraxeris, abstine à Medicina quousque transactæ sint à phlebotomia horæ duodecim. Et licet phlebotomiam peregeris, spem tamen non ponas in sola ipsa, præsertim in plethorico, sanguineo, & robusto corpore. Quinimo & in aliis quibus parum sanguinis extraxisti, etiam propinanda est suo tempore Medicina iuxta complexionis qualitatem & virtutis. Similiter si prius Medicinam dederis, non eris ea contentus, si fuerit plethoricum corpus, virtute consentiente, phlebotomiam quoque tempore

tempore & modo iniunge. Et hanc distinctionem facies, scilicet in administrando vnum & alterum, vbi & possibile & conueniens. Sed vbi sanguis abundat, præcedat phlebotomia & sit copiosior, vbi vero sanguis non abundat, medicina præcedat, & phlebotomia sequatur, modica tamen, scilicet potius euentandi quam diminuendi causa. Post tertium diem nulla fieri debet sanguinis extractio, nisi te ad hoc sanguinis multitudo compellat. Quotiescunque medicinam vel phlebotomiam seu vomituum administras, ad hoc vt eiusmodi agitatione ipsum venenum à signo non reuertatur ad intus si signum fuerit apparens, fac vt in tali commotione ponas sub & supra signum, ventosas & sanguifugas, & super cor epithemata frigida. Et ante & post propinabis per eos ea quæ defendunt à veneno, videlicet theriacam, bolum armeni, smaragdos, hyacinthos, topazium, vel saltem alia gemmarum genera, aut corallo cum succo herbarum contra venenum. Quum facis purgationem, exhibe medicinam cum modico croci in decoctione suprascripta. Principalis & securior medicina secundum Persarum Medicos, & Mesuen, est triseræ persicæ vncia vna cum electuarij hamech drachmis duabus, vel ad minus triseræ vncia dimidia, & electuarij hamech bon, & Persiani eam administrant cum aqua frigida vel succo solatri vel endiuiz. De hoc sæpius audiui, & felix periculum feci iam præsentis anno. Vbi autem triseræ & electuarij hamech defuerint, propinabis diasenæ loco triseræ, & diamanna, vel succum rosarum loco electuarij hamech modo prædicto. Experientiam feci, & multæ utilitatis securitatisque hanc compositionem reperi. Sume triseræ persicæ, pulpæ casie ana vnciam dimidiam, reubarbari, diamannæ vel electuarij hamech drachmam vnam. Sed vbi natura valida est & venter stipticus, dabis diamannæ vel electuarij hamech drachmas duas, distempera cum aquis buglossæ, endiuiz, cum decoctionibus suprascriptis & aquis prædictis.

Ego vero reubarbarum in vino albo & aquis endiuiz cum modico spicæ teneo per horam, quod do in substantia commiscendo omnia simul, sæpius etiam addo postmodum mannæ vnciam vnam. Conueniunt & pilulæ de fumo terræ, aggregatiuæ pilulæ, partes æquales, robustis quidem in toto drachma vna, aliis vero in toto drachma dimidia, suprabibendo vinum album cum aquis endiuiz, vel rosa-

rum & scabiosæ. Etiam ipsæ solæ aggregatiuæ in omni tempore, præsertim minus æstiuo drachma vna vel dimidia. Notandum si febris inhæret humoribus subtilibus & calidis, apparebit sitis vehemens, gulæ ariditas, linguæ nigredo, acutus capitis dolor, phrenesis, vel similia horrenda accidentia. Si autem grossioribus inhæserit humoribus & minus furiosis, febris videbitur lenta, & prædicta accidentia remissiora. Considera eiusmodi signa, & scias quod in quocunque humore conuenit triseræ cum agarico, & pilulæ aggregatiuæ vel solæ, vel cum pilulis de fumo terræ. Syrupus etiam solutiuus quem dicemus inferius si fuerit in materia furiosa, etiam conuenit diasenæ cum electuario hamech vel succo rosarum. Item casia cum reubarbaro, item manna cum diamanna in decoctionibus frigidis. Si est in materia grossa frigida & humida, conueniunt robustioribus pilularum aggregatiuarum scrupuli duo, pilularum de agarico scrupulus vnus. Debilioribus vero diacatholiconis vncia vna cum diaseniconis drachmis duabus, vel cum agarici trochiscati drachma vna vel semis. Item de pilulis contra morbum dictis superius, drachma vna vel semis, & fortè eiusmodi pilulæ conueniunt in quocunque humore. Nota quod agaricus bene præparatus & trochiscatus, est singularis in hoc casu in quocunque humore & membro. Ideo quando certior essem de sua præparatione, vterer eo in omni medicina, dando drachmas duas, vel vnam, vel semis de eius trochiscis, iuxta potentiam medicinæ, & iuxta complexionem hominis. Et vbi dubitarem de eius præparatione, infunderem eum in oxymelle squillitico cum salgemma, & postea colando ponerem super medicinam absque expressione. Item notandum quod pilulæ aggregatiuæ sunt appropriatæ, & loca illarum debent administrari pilulæ sine quibus, minus robustis. Et scias melius esse dare medicinam quam pilulas in hoc casu. Et si haberi possit diamanna melior est succo rosarum & fortior. Et electuarij hamech melius est ambobus, scilicet & diamanna & succo rosarum.

Demum in omni humore mirabilis est iste syrupus solutiuus loco medicinæ ad minus vncia vna, & ad vltimum duæ, cum aqua rosarum & vino albo. Sume corticum citri, radicum capparis, berberis, sandalorum rubr. spodii ana drachmas duas, cariophilæ, melissæ, buglossæ, boraginis, cichoriæ ana manipulum vnum, acetosæ, prassii, hepaticæ ana manipulum



vnum cum dimidio, scariolæ syluestris drachmas duas, feminis cucurbitæ, scilicet peponum, citrulli, cucumeris, violarum ana manipulum vnam, thymi, epithymi, agarici, rhabarbari, senæ, polipodij ana drachmas duas, succi absynthij, fumiterre, ebuli & plâraginis ana drachmas sex, mirobalanorû chebulorû drachmâ vnâ, citrinorû drachmâ dimidiâ, diagridij drachmas duas, sacchari albi libras duas si syrupum cû aceto cydoniorum. Iste syrupus à Doctoribus vocatur diuinus in cõseruâdo & curando, quia statim abscindit humores putrescibiles, confortat membra principalia, pellit venenum ad extra, & de eo plures visæ sunt experientiæ. Inter cæteros Doctores Petrus de Tussigniana, & Gentilis Fulgineus, cum mirum in modum commendant, & mihi videtur eum factum esse ad intensionem triseræ perficæ, sed magis solutius, & mihi summo preplacet in personis non debilissimis, & non habentibus ventrem valde lubricum. Sumatur semel in hebdomada è sanis & ægris. Nota quod post operationem medicinæ, aut phlebotomiam, si medicinam non administraueris die sequenti, propinetur theriacæ drachma vna, cum aquæ rosarum vncia vna, cum modico aceti rosati. Nec timeas theriacæ caliditatem, quoniam tam modica portio parum calefacere potest, eo quod qualitas elementaris, qualis est caliditas, & similes, quum sint valde materiales, haud multum operatur, nisi multa cum materia.

Verum specifica virtus, vtpote quæ donum sit coeleste, & quasi spiritale, multum operatur secundum Galenum pauca etiam cum materia. Theriaca autem à proprietate sp̃etifica operatur contra venenum, ac præter hoc, caliditatis secundum vix perficit gradum, idèd longe potentior est ad venenum expellendum, quam ad calefaciendum. Febris item pestilentialis multo magis venenosa quam calida ad exhibenda est theriaca cum aqua rosarum, & etiam in cæteris curandum est, vt tendant ad quandam frigiditatem, quatenus hac ipsa vti valeas. Potest etiam dari Mithridatium loco theriacæ, sed multo potiores ex theriaca visæ sunt experientiæ. Idèd inquit Moyles Ægyptius, narratum sibi esse à sapiente quodam Medico, sedum tempore pestis in Antiochia artem exerceret, ipsa re verum reperisse, cætera remedia cuncta fore debilia, at solum qui monitu suo theriaca assumebant, tutos & superstites euasisse, cæteri nequaquam.

Et hi tantum qui ea post morbi inuaz-

sionem vsi sunt, liberati fuere, alij vitam morte commutarunt. Per hoc confirmatur quod inquit Galenus in lib. De theriaca ad Cæsarem, eam esse omnibus venenis per aduersam, foreque potentem, vbi cætera deficiunt ac sunt debilia. Hoc autem habet à virtute quadam miraculosa. Sunt etiam qui vrinam potu exhibeant, vel lixiuium, item succum cæparum albarum cum aceto, haud scio quid mihi dicendum. Hoc moneo, ne confidentiam habeas in purgatione postquam eam feceris, etiam si ex ipsa melius se habeat infirmus, sed quum æger melius habere videbitur, tertia die aut quarta post purgationem. Sed multa adhuc adfit sanguinis superfluitas, extrahe parum de sanguine, & reitera eandem medicinale purgationem. Quod si non admodum abundat, repere saltem pulueres & medicinam, ne recidat in peius. Quidam exhibent euphorbium cum mastice ac gumma elemi. Sume euphorbij drachmas quinque, & scrupulum vnum, gummi elemi vncias duas, mastice vnciam vnam cum dimidia, dabis robustis ad pondus drachmam vnam, debilibus scrupulum vnum, cum aquis endiuæ & scabiosæ. Est quidem periculosa medicina, nec nisi robustissimis appropriatur, ac nisi in principio. Afferunt nonnulli gummam elemi fore gummam arboris cedrini. Sciendum quod hoc in casu non debilis exhibenda est medicina, id est, quæ exilem faciat operationem, quoniam natura ipsa si prima medicina non bene sit operata, secundam non expectat. Nectamen decet nimio impetu soluere, nam ex hoc resolverentur spiritus, istudque malum magis consistit in qualitate quadam venenosa, quam in quantitate materiæ. Inquit Gentilis Fulgineus se multa expertum cum supradicto pulvere, ab initio sic ipsum administrabat. Sume euphorbij drachmam dimidiam, mastice drachmam vnam, dabat ex his scrupulos duos, & multum plethoricis drachmam vnam. At mihi multo magis placet agaricus, quia vt aiunt Democritus, Galenus & Auicenna, ab omnibus membris aliquè trahit humorem, similiterque habet virtutem quasi theriacæ, aduersus omne venenum corroborat, idque ab omni veneno expurgat, grossos principaliter purgat humores, nec relinquit tenues quoque intentatos. Sit albus, prorsus rotundus, nec non & fractu facilis, dulcis ac levis. Sit quoque modicè amaritudinis & stypticitatis, bene tritus, & mixtus cû salis gemæ parte tertia, & sic corrigatur cum sal gemma,

melle rosato colato, oximelle squillitico, & vino infusionis zinziberis, & sic præparetur in trochiscatum. Et debilibus tutus est vt detur permixtus aliis rebus, quam solus & melius in decoctionibus, quam in substantia, quoniam frequenter longos producit vomitus, ventrisque dolores, nisi bene electus & præparatus sit. Quod si debite fuerit electus & præparatus, est medicina sancta & familiaris secundum Democritum & Mesue. Felices namque fecimus (modo & ordine dicto) ipso cum agarico experientias. At circa euphorbium compertum habuimus, quod valde bonum nonnunquam fecerit opus, ac sæpiusculæ contrarium. Vniuersaliter & in summa, sis celer euacuando & frequens, obseruatis modo & ordine. Frequentius infirmum recrea, quoniam spiritus aliàs plurimum resoluntur, nec tantum ea dato, siue cibaria, siue medicinalia, quæ solum mollescant, sed his permisce refrigeratiua, desiccatiua, & cordis confortatiua, quæ etiam veneno resistent.

*De cibatione, & regimine egrotantis.*

## C A P V T X.

**C**ibus esse debet, secundum Rasim & Auicennam quarto Canonis, frequens, modicus, levis, elixus, ac multi & humidi nutrimenti, conditus cum rebus acetosis & frigidis, vt scilicet cum endiua, acetosella, aceto agresto, malis granatis, aranciis, limonibus, cerasis acetosis, prunis. Cibi substantia sint pulli, perdix, phasianus, cunctusque consummatum, destillatum, ova recentia. Hoc edinas quoque carnes non prohibeo. Summa, nutriatur rebus liquidis, humidis, & multi nutrimenti. Sic tamen nutrirî debet vt natura toleret, nec febres multiplicentur, plus enim multo quam cæteris hoc in casu vberiori opus est alimento. Inquit Auicenna quarto Canone, quod venarum repletio per nutrimentum prohibet vaporis venenosi aëris & humoris transitum, & quod hi frequentius liberentur qui intrepide nutrimento adiuantur. Nota, quod facto clystere solutiuo, de quo supra mentionem fecimus, si restauratione opus sit alia, sumat aliquid per os, facies solutionem vel cum enemate vel suppositorio, inde ad horas quatuor administrabis aliquid nutrimenti, de quo paulò suprâ differuimus. Vinum sit album, subtile, odoriferum, dilutum cum aqua ferrata, recenti saltem parte æquali. Melior vero esset aqua au-

rata in qua aurum ignitum extinctum sit vel etiam extingui potest aurum in vino. Non sinas cum pati sitim, nec os exsiccari, sed continue fac ipsum gargarizare cum vino albo bene diluto. Res teneat in ore humiditas frigidulas, frequenter bibat de acetositate citri, & iuleb rosato ana partes æquales cum vino granatorum & aqua siue succo acetosellæ. Vtilis est syrupus acetosæ simplicis cum aqua ferrata, & pariter succus citri vel limonum siue aranciorum expressorum, hæc dabis cum aqua & saccharo qui, vel forte melius cum aqua hordei vel ferrata. Item saccharum rosatum aut diamarenatum vel diaprunis & diacydonitem dissolutum in aqua, colatum & expressum, vel rosas, cerasa acetosa, myrobalanos, tamarindos, pruna, cydonia, persica sicca, trita & infusa in aqua, postcolata, expressa & cum saccharo & aqua recenti exhibita, vtilia sunt. Conuenit etiã acetum album cum aqua ferrata & saccharo ægris simulatque sanis. Confert etiam oxysacchara composita cum aceto albo, succo granatorum acetosorum, & saccharo. Prodest quoque succus granatorum medijs saporis vel succus siue vinum acetosorum cum modico sacchari, & aqua hordei cum vino granatorum. Bonum est annulos aureos in aquam tamdiu confricare, donec aliquantulum rodantur per aquam. Item bullire aquam cum auro, & ea vti in cibo & potu bonum est. Secundum Gentilem fieri fortasse potest, vt aurum ad formam reducatur liquidam aptam ad potandum, hoc modo. Sume auri vnciam vnâ, argenti viui vncias duas, misce, & simul mixta maneant quousque aurum dissoluatur, deinde imponas alembico cum igne lento, in tantum quod argentum viuum alembicum exeat. Postea excipias aurum ex fundo alembici, & adde aquarum buglossæ vncias quadraginta septem, ponas in alembicum vitreum bene obturatum. Continuabis sub eo ignem per tres dies & noctes, ignem dico bene proportionatum. In fine si callueris artem, inuenies aquam minimè consumptam, & aurum liquefactum, & hoc est aurum potabile, cordialissimum, & digeri potest. Aurum quidem alia forma parum est vtile, quia digeri nequaquam potest. Administrabis bis in die ieiuno stomacho ex his syrupis, scilicet de acetositate citri, de limonibus, de cichorio, de fumo terræ ana drachmam dimidiam, cum vncia vna aquarum melissæ & succi acetosellæ. Item syrupi de agresta, de ribes, rob berberis, de cydoniis, de granatis medijs saporis, de granatis

cum aquis endiuiz & buglossæ. Item syrupi de endiuia cum aquis endiuiz & acetositate citri, cum succo acetosellæ; & vino granatorum acetosorum, item succum limonum, vel citri, vel aranciorum expressorum exhibendum cum aqua & saccharo.

Non displiceret si loco aquæ administrares brodium pullorum, quod appellari vulgariter solet piperata, aut perdicem coctam cum agrestia & endiuia, exinde colata, cui mixtum sit aliquid ex memoratis succis cum dulcibus contemperando acetosa, veluti natura facit in granatis medijs saporis. Etiam mala granata acetosa cum vino & succo suo sola, vel etiam cum alijs succis, condiantur bene omnia. Item succum rosarum, myrobalanos, tamarindos, saccharum rosatum, & diamarenatum, diaprunis, diacydoniten dissoluta in aqua, & colata & expressa, bibenda sunt cum aqua recepti. Item oxysacchara cum iuleb rosato & aqua ferrata. Item succum rosarum & acetositatem citri cum vino granatorum. Nota, syrupus acetosæ scilicet in quocunque utilis est syrupo. Vbi non habeatur acetositas citri, exprime limones vel arancios, & cum saccharo tempera, & vbi maior adsit caliditas, maiori quantitate dabis acetosa, vbi minori. Et vbi non habeatur syrupus acetosus, dabis acetum, aquam, & saccharum simul permixta. Album acetum melius est rubro. Item syrupum hunc optimum. Sume succi melissæ, boraginis, buglossæ depurati ana vncias tres, aquæ rosarum, aceti albi ana vnciam vnā cum dimidia, acetositatis citri & limonum vnciam dimidiam, sacchari albi libram vnā, ex hoc propinabis vncias duas cum aquarum buglossæ & acetosellæ vncijs duabus & dimidia, ex his vttere quo placet. Et simul dato duos trochiscos de camphora. Quidnam sapientum loco syrupi hanc dant potionem. Sume aquæ rosarum libram vnā, vini albi odoriferi libram dimidiam, boli armeni optime pulverisati & cribrati vnciam dimidiam, pro vice vna exhibeto drachmas duas, est enim remedium & antiquum & potens. Experimentatores duobus potissimum vtuntur, videlicet succo florum aranciorum cum vino in casu & post casum, & semine cardui benedicti cum vino, quia hæc sunt experta aduersus venenum fungorum. Solent & hæc dare sapientes. Sume succi scabiosæ vncias tres, terræ sigillatæ drachmam vnā cum modico vini, semini citri drachmas duas cum vino bono. Item ambram & charabæ cum vi-

no, item specierum coagularū drachmā vnā cum vino. Coagula sunt mucilagine quædam in certis vesicis, appenæ in visceribus hoedorum & leporum. Item radicem palmæ Christi cum vino. Hæc quibus ( vt tradidimus ) sapientes vtuntur, remouent venenum à corde. Conueniunt ad conseruandum & curandum hæc confessiones. Multum confide in hac nostra compositione simplici, secura, efficacissima. Accipe boli armeni drachmas duas, terræ sigillatæ, corallorum rubeorum ana drachmam vnā, corticum citri, zedariæ, croci ana drachmam dimidiam, sacchari rosati, rosæ rubeis conditi vncias sex, acetositatis citri vncias decem, dabis semper cum vino albo & aqua rosarum, quandoque commiscendum est parum aceti rosati. Ex his etiam conficere possumus pilulas, si loco sacchari rosati accipiamus rosarum rubeorum vnciam dimidiam cum acetositate citri quantum sufficit.

Quidam dant istas consumptiones: Sume sacchari rosati, trium sandalorum, diadraganti ana vncias quatuor, folia auri numero decem, margaritarum, hiacynthorum, ossis de corde ceruici ana drachmam vnā. Item cape margaritarum scrupulum vnum, sapphiri, hiacynthorum, smaragdorū drachmas duas, terræ sigillatæ, trium granorum, serici-crudi trii ana drachmam dimidiam, smaragdorū drachmam vnā, manus Christi rosati quantumlibet, aquæ rosarum in qua confrientur anuli aurei vel vasa aurea humifmodi, quantum sufficit. Item aquæ rosarum, sacchari albi ana libram vnā, sandalorum rubeorum & alborum, corallorum rubeorum, spodij ana drachmam dimidiatā, margaritarum drachmam vnā, hiacynthorum, smaragdorū, sapphiri, ossis de corde cerui ana scrupulum vnum.

Omnia aromatica conueniunt ad conseruandum & curandum, maximè quæ attinent frigiditati & caliditati. Et si non conueniant ad febrilem calorem, valent tamen aduersus venenum ipsius, & maximè si contemperentur cum frigidis, ita vt ad frigiditatem aliquam declinent, & plus declinent stante vel temporum vel complexionum vel febrium acutarum caliditate. Item nota quod inter terram sigillatam, & bolum armenum hæc est distantia quod quamuis vtraque valeant contra venenum & morbum, nihilominus plus vtuntur sapientes terra quam bolo in ceteris venenis, at in morbo pestilentiali potius è conuerso faciunt.

In hoc conueniunt omnes, in cæteris venenis nil melius esse terra maximè exhibendo eam cum modico boli armeni, & granorum iuniperi, & aceto diluto secundum modum Galeni, quia statim confiringit, clauditque vias pectorales, ita ut venenum per eas transire non possit, eiicitque venenum per vomitum. Pariter & venenum quod per solutiuæ educibile, id facit administratam; tam postquam ante casum, sed securius ante.

Similiter consentiunt omnes, quod quum ad conseruandum se à peste tum etiam expellendum ipsam bolus armenus cætera simplicia superet omnia, maximè exhibitus cum vino albo & aqua rosarum, secundum ordinem Galeni, Scrapionis & Auicennæ, qui aiunt se esse expertos tempore magnæ pestilentie fuisse cum hoc facilliter & conseruatos & sanatos humores. Est enim bolus armenus rubeus parum croceus, delicatus, frangibilis. Terra vero sigillata aliquantulum sit rubens, gustui parum acetosa & arida, nonnihil viscosa, nec tamen adeò tenax ut digitis adhæreat. Aduerte quod nonnunquam initium capit morbus cum sputo sanguinis abundante, hoc in casu non datur bolus, neque aliud huiusce venenosi sanguinis stricini. Imò coadiuuatur iste fluxus cum rebus pectoralibus, extrahiturque sanguis ex ambabus venis saphenæ, in qualitatem complexionis.

Quod si ægrotans est multum sanguineus, sit etiam minutio postmodum ex mediana, Nec sunt prætermittendæ frictiones stomacho ieiuno. Fac ut admoveat naso spongiam intinctam in aqua rosarum & aceto rosarum, & cum vino odorifero, quibus etiam sæpe lauat omnes pulsus & faciem. Vbi adsit de futura phrenesi suspicio, admoveas quandoque fronti aquam rosarum cum aceto rosarum. Et nisi nimiam metuas somnolentiam, addas parum camphoræ. Cura ne infirmus in profundum nimis deueuiat somnum, sufficiunt enim horæ sex vel quinque per diem & noctem, siquidem dormitio multa retrahit venenum ad intra. Ventosæ à tergo positæ, frictiones & ligamenta circum extremitates, conferunt ad phrenesim pariter & somnolentiam. Item confert suppositorium ex sapone duro cum modico salgemmæ. Somnus modicus in principio morbi utilis est, nec ideo tantum vigilandum est ut inde spiritus resoluantur. Camera euentari debet sæpe aperiendo & referando, ex hoc enim variatur aer, sic tamen euentari debet, ne ob

id sentiat ægrotans & patiatur frigoris quicquam. Debent tendi per latera lecti lintea aceto madefacta. Asperge parietes ac solum camera aceto aqua permixto, spargantur hinc inde, & per angulos & parietes apponantur frondes, pampini, cannæ, salices, rosæ, plantuiz & folia citrullorum & alia quæque viridantia, flosculi & poma odorifera.

Facies suffitum ex sandalis & rosis, mirtillis & camphora, terebinthina, thure, corticibus citri, corticibus granatorum & pomorum communium, additis modicum cariophilorum & croci. Super omnia curæ sit, quod singulis horis sex oportet te mutare & renouare infirmo camisiam & omnes pannos, lintheamina, fumigia, vna cum vase pro fumigio. Si commodè fieri potest mutabis singulis viginti quatuor horis stratum & cameram.

Antea autem quam introducatur, sit camera bene emundata, ac bonis (ut conuenit) odoribus fumigata. Aliter enim amictus, lectus & habitatio veneno inficiunt. Nec volo cum silentio præteriri, quod ubi insolita, appareat caliditas, stomachi robur, dolorumque ab intestinis securitas, consueuerunt Rasis & Iohannitius semel tantum ad potandum dare aquam frigidam & recentem multa cum quantitate. Ego vero ut securius agerem, darem aquæ hordei recentis libras tres, cum vnciis tribus sacchari. Et forte darem etiam succi cucumeris libram dimidiam cum vncia vna sacchari bene simul permixta, postea succi aranciorum vel granatorum vnciam vnā, & drachmam vnā sacchari. Quidam compatriota noster vir robustus, quamprimum hic ipsum morbus inuasit, immerisit se aquis frigidis, perque duas horas sic stetit, exiens liberatus est, veruntamen fallacissimum hoc est experimentum. Forte securius esset sedere in aquis tepidis, quæ pectoralia non attingerent, quoniam hæ partes non sunt aperiendæ, nec ad ipsas prouocandi sunt humores.

Nonnulli hoc in casu assumpserunt venena, & maximè quæ frigidæ naturæ, & fortassis etiam ea quæ calidæ naturæ, prius vel post theriacam vel terram sigillatam cum bolo armeno & aceto aqua permixto, & similia quæ contra venenum sunt. Inter quos quidam phisicus liberatus fuerat. Videtur tamen mihi res admodum periculosa.

## CAPVT XI.

**H**Oc in casu non expectandum, quousque appareat inflatio aut bulla, sed facta purgatione vel phlebotomia sis celer & promptus ad venenum extrahendum, faciendo cum fermento & cantharidibus ruptorium, vel aliud ex his quæ inferius narrabimus. Applices musculo dextri brachij sub cubito interiori à parte vel vbi tangi solet pulsus, non tamen super proprio pulsu. Similiter facies super talo pedis dextri quatuor digitis ad intra, vt fiat vesica, quam aperi, apertamque teneas. Si solitum apparuerit signum, & incommoditas breuitasque temporis obseruandum ordinem impediunt, fiat phlebotomia atque purgatio. Quibus factis vel saltem phlebotomia, facies ruptorium, & applicabis eidem lateri sex digitorum sub signo distantia. Sunt qui temporis varietati non confidant, sed & præter ordinem primo & post, simulque quo melius possent remediis curæ student. Modernorum talis ordo quorundam est, vt vbi nil expediat, primo purgetur infirmus cum clysteribus, pulueribus, phlebotomia & medicina. Post vero applicanda vt diximus (etiam non apparente signo) ruptoria, ac tutius est confestim (appareat signum vel non) ponamus ruptoria & reliqua huic morbo appropriata. Si videatur apparens, sic facito. Si enim apparuerit circa aures subito ruptorium applica collo in posteriori parte, eiusdem tamen lateris in quo signum. Si sub brachio, musculo ruptorium apponatur eiusdem brachij, vel prope pulsum, non tamen supra. Si in inguinibus, pone iuxta cauilam, hoc est, super talo pedis eiusdem lateris. Quum alibi appareat, applica ruptoriū sub signo per distantiam sex digitorū, vel sextantis, ne tamen ponatur, vt cunque sit, supra pectus. Et si fuerit in gula, videlicet a parte anteriori, ponatur ruptorium à posteriori videlicet in collo, si vero in posteriori parte eodem in loco fuerit, non debet in anteriori applicari, sed potius sub loco signi, sicque tandiu permittes ibidem ruptorium donec vesicam fecerit, quam aperiās, & supraponas butyrum & folia caulis, item spongiam hac intinctam decoctione. Sume camomillæ britannicæ, meliloti, scabiosæ ana manipulum vnum, bulliant in libra dimidia aquæ ad consumptionem dimidij, hanc quia venenum trahit renouato, teneto sæpius in finem vsque curæ.

## CAPVT XII.

**R**uptoria hæc sunt, vincetoxicon, viatriolum, flos æris, nux rancida, corderium, arsenicum, calx viua, antipharicum, cuscuta, calx cum sapone fullo, aura, cynoglossa, fermentum cum lixiuio, galbanus cauda equina, euphorbium, sterces columbinum, sterces accipitris, anserum, anatum, nasturtium, limacia viua vel suo cum cortice trita, rana excoriata & affata, calamamentum, pulegiū ceruinum, aristolochia, raphanus, viscum, centinodia, costum, piper, lapis spongiæ marinæ, flammula trita, vrtica, sinapis vitalba, mentastrum, scabiosa, canapis, canapatium, cantharides & salgemma, grana masticata, pithrum, vitellum oui cum multo salis, consolida maior, & scabiosa, trita intra duas lapides mirabiles sunt. Dicta ruptoria debent cito, vt dixeram, applicari, & fortè pariter super signum apparens. In delicatis personis vtendum est lenioribus & in aliis, fortioribus. Et tutius est vt sub signo ponantur quam supra, vel suprapponantur minus fortia, sub vero, fortiora.

*Curandi apostematis rationes, modi, & conditiones.*

## CAPVT XIII.

**H**Oc signum vocatur apostema, quod quum venit ante febris accessum, indicat cor forte esse & potens ad expellendum venenum, & tunc est febris accedens apostematis. Ediuerso est quum venerit post febrim. Hoc enim apostema est duarum generationum, altera est bulla & nominatur anthrax & carbunculus, altera est inflatio, & vocatur bubo & glandula. Bulla communiter per emunctoria exit, & quanto plus à principalibus distat membris, tanto minus periculosa est. Nigra est omnium pessima, secundo viridis loco est paulo minus mala, tertio glauca, rubea quarto. Et quanto aridior, tanto peior est. Inflatio communiter in emunctoriis venire solet, hoc est principalium membrorum purgatoriis, quæ tres sunt, in locis scilicet post aures, sub brachiis, in inguinibus. Cerebrum per emunctoria post aures demittit venenum, nec non in colum. Cor sub brachia mittit. Ad vel circum inguina hepar. Hac de causa peior est inflatio quam bulla, quoniam veneni mul-



tam ad principalia decurrisse membra ostendit. Et quanto cordi propinquior inflammatio fuerit, tanto quidem periculosior. Vtrorumque scilicet bullæ pariter & inflammationis quasi similis est cura. Sunt qui accedente apostemate ante febrem & procul à corde, faciunt, subito ligaturas inter locum doloris & cor, supra ponuntque percussendi causa res frigidas, siccas. At supra doloris locum proprium, res ponunt calidas & humidas, resolutiuas. Alij quamprimum apparere incipit apostema, ponunt supra simul & à latere ventosas, ut diximus, & ruptoria, subito hanc exhibendo medicinam. Sume hellebori nigri præparati, senæ, cinnamomi ana drachmam dimidiam, diagridij scrupulum dimidium, infundantur in vini granatorum uncias quatuor, & sacchari unciam vnam. Si ad multas horas in infusione staret, melius esset, postea cola & exprime, propinanda quum apparet apostema antequam dormiat. Sic vero præparant helleborum. Scindunt per longum in frusta minuta, ponunt ipsum in pomum in stuppis prius aqua rosarum intinctis, sicque coquunt sub cineribus calidis, cocto semel proiciunt pomum, recoquunt helleborum alio in pomo, modo quo prius, separatim à pomo conseruatur. Dant robustissimis helleborum mixtis miscendis, modo & ordine dicto. Cæteris vero & minus robustis, dant solummodo pomum secundæ coctionis. Præparant scamoneam coquendo ipsam in malis cydoniis vel in pasta farinæ hordei facta cum vino cydoniorum. Non reprobo istorum regulas, sed ad nostras regrediamur.

*Regula & modi applicandorum ruptoriorum.*

#### C A P V T XIV.

**Q**Uum opportunum non est ut extrahi possit sanguis cum ventosis vel sanguitugis, nec incendi signum, poni debent sub vel supra, vel simul utrobique ruptoria ex dictis, & his etiam quæ in sequentibus dicam compositionibus. Exhibe autem prædicta, si videatur temporis adesse commoditas, postquam extractus est sanguis, ac parum quieuit ægrotans, vel saltem post assumptionem medicinæ, & eius perfectam operationem, & non præsto affuerit qui manu operetur, dato puluerem, quem si non habeas, exhibe medicinam. Si nec medicinam habueris, applica sine dilatione ruptoria supra & extra signum, cum moderatione, ut diximus,

& ordine, & si tempus insitet, nec quicquid adhuc factum sit, exhibe simul purgationem & ruptoria, nec cesses unquam à remedium administratione, nec differas ut speres te omnia cum temporis commoditate facturum. Aduert, ne super signo ponas res admodum frigidas & stipticas, ut venenum ad intra percutiant. Vtere his quæ aptæ ad trahendum & resoluendum, ut sunt res calidæ. Ac aliquantulum temperandæ sunt quandoque, si sis eas continuaturus cum rebus frigidis, ut nimia euitetur inflammatio, nec tamen ita frigidis ut inde restringant.

Nec multum metuas dolorem, quoniam venenum trahit ad postrema. Nolo tamen toleres excessum, quoniam vires adderet veneno, augmentaret pariter & febres, naturamque nimis lassaret. Locum ruptorii nolo per artem in totum consolidare, donec tres elapsi sint menses, hoc verò quum facis reiterna purgationem. Quidam Florentinus noster hoc verè incidit bullam, quod cum inde ab hoc morbo ita liber esset, ut non diuersus foret à sanis, haud ita multo post quam primum plagam consolidauit, transactis vero post diebus quadraginta iterum morbo infectus bidui spacio interiit, maximè hoc quia sine purgatione plagam restrinxerat. Hoc etenim scias, quod qui post septimum perit diem, mala potius cura id euenit quam huiusce natura morbi. Scito quod postquam venenum in tantum decurrit ad apostema, ut principalia membra per hoc si sit alleniata, nisi tu perbenè & continue id ipsum trahas, rectifies, & purges, intrinsecum apostematis venenum plus exasperatur, contractum vaporat ad intra & occidit. Idcirco continue cor ipsum fortifica constringendo vias eius intus & ab extra, humores sapius euacua, venenum plagæ rectifica, purga. Nil speres certi ex illorum præter rationem sanitatis spe, quinimo nec ad instans ob hoc à remediis cesses, maximè si adhuc septimus non elapsus fuerit dies.

*Composita ruptoria & emplastra quedam fortia.*

#### C A P V T XV.

**M**ULsariam sunt ruptoria composita, fortiaque in trahendo venenum ad extra. Enarrabimus multa, ut secundum opportunitatem cuiuslibet auxilio commodè uti possis. Sume ficus, ireos, & grana tritici contusa, parte æquali, maturat hoc citò ac rumpit. Item fermentum cum

oleo & sale. Item pix cum passulis & melle. Item stercus passerinum cum axungia porci. Item vitrum puluerisatum cum rebinthina. Item nisi abominosum foret stercus humanum, valet multum ante & post rupturam, supraponendo medullam panis feruenti oleo intinctam. Item oleum cum cineribus bullitum. Item cantharides numero decem, cum vnciis passularum vna, fermenti vna & semis, scabiosæ, cynoglossæ, consolidæ maioris, antiphar-macia vnciam vnam, incorporentur cum oleo liliorum. Et si fortius facere volueris adde sal & columbinam herbam, rutam ana drachmas duas. Item nasturtium cum oleo, & sale. Item auripigmentum, piper ana drachmas duas, caricæ numero decem, fac emplastrum cum melle quantum sufficit. Item baurach, salis amoniaci, scabiosæ, antiphar-maci, allij, piperis ana partes æquales, fac emplastrum cum succo scabiosæ. Item galbanum, radices liliorum alborum, stercus humanum, consolidam maiorem tritam inter duos lapides. Item fermenti vncias quatuor, sinapis, rutæ scabiosæ, absinthij ana manipulū vñū, radicum liliorum alborum partem tertiam, vitrioli drachmas duas, cantharides numero decem, galbani vnciam vnam, nucs rāncidas numero tres, olei liliorum quantum sufficit, coquantur herbæ & radices in oleo, & fiat emplastrum, addendo cætera ingredientia secundum artem. Item cantharides cum oleo saponis. Item cineris quercini, quo tinctores vtuntur, partes quatuor, calcis partes sex, misce, & quum vteris suprapone prædictum emplastrum. Aristud nunc dictum emplastrum facies cum oleo oliuarum nigrarum, & fortius est, si oleum cineribus bulliat. Item fermenti, vrticæ, pinguedinis carnis exicata, barbæ maluauiſci, maluæ, partes æquales. Quinque sunt herbæ hoc in casu tum omnibus emplastris tum etiam intus sumptæ valde conuenientes, quoniam tam intus quàm extra veneno resistunt, & sunt quasi temperatæ, scilicet consolidæ, scabiosa, agrimonia, britanica, aristolochia.

*De emplastris temperatis.*

#### C A P V T XVI.

**F**ortia sunt admodum supradicta ruptoria & emplastra, cum ad rumpendum, tum etiam ad extrahendum citò venenum. Sed non sunt continuanda, quoniam nimis inflammarent, arramen eis plus vti quis posset, vbi apostema non esset

coloris multum viridis aut rubei vel nigri. Ac etiam vbi non multa foret corrosio, temperatoria quædam adducam & magis conuenientia, vbi de magna metus esset inflammatione. Sume barbæ maluauiſci vncias duas, caput vnum liliorum alborū, farinæ seminis lini ana vnciam vnam cum dimidia, bulliant in aqua communi, & pistentur cum fermento & axungia veteri, applicetur calide. Item sume fursuris non penitus expurgati à farina manipulos duos, coquatur in aceto. Item columbina cum aceto & oleo rosato. Item farina hordei cum succo britanicæ vel consolidæ. Item cæpas cum butyro coctas, addendo post caricæ, & fermentum cum oleo camomillino dulcorari potest (si opus sit ob odoris vehementiam) addendo poma cocta, aut maluauiſcum, & maluam, ipsarumque mucilagines. Quod si maiori adhuc opus sit dulcoratione, accipe cæpas coctas & poma cocta, scilicet cum butyro & oleo camomillino. Item maluæ, barbæ maluauiſci, scabiosæ ana manipulum vnum, bulliant herbæ in aqua communi, cum qua incorporetur farina. Pistentur autem herbæ & condiantur simul omnia cum vncia vna pinguedinis gallinæ, & totidem olei camomillini, croci drachma dimidia, est enim delicatissimum emplastrum. Item scabiosa, pes columbinus, cichoria, consolidæ maior. Conuenit post hæc emplastrum ex apio, britanica, farina orobi cū prædictarum herbarum succis, secundum aliquos etiam cum theriaca. Item emplastrum ex opoponaco trito cum passulis. Item assa, ruta, & nitrum cum melle. Bonum quandoque fuerit vinctum esse cum theriaca, suprapositis cepis & malua coctis. Supraponunt etiam nonnulli flores aranciorum, & folia contusa cum axungia & maluis. Quantum vero ad ipsam theriacam, volunt aliqui non esse ei quicquam superponendum, quoniam remittit venenum ad intra.

*Emplastra temperatissima.*

#### C A P V T XVII.

**Q**uam bulla multum nigra est, & supra modum ardens, ac per quam cito accendit, corrodit, & dilatur, temperatoria debent esse ea quæ administras, desiccatiua cum aliquali frigiditate, temperataque caliditate resolutiua. Exempli gratia. Sume plantaginem & gallas cum aceto coctas, item lentes cum pane mixto, cum cribratura fursuris. Item granata ace-

cola & medij saporis in quatuor partes scissa & cocta in aceto vsque ad eorundem dissolutionem, conterantur & applicentur, conueniant ab initio morbi vsque ad declinationis statum. Conuenit alterum hoc emplastrum ante vlcerationem causatam à bulla. Sume acacij, draganti, opij, corticum granatorum ana drachmā vnā, viridis aris, hioscyamum album, fac emplastrum cum vino & serua ad vsum. Quando videas iam factam vlcerationem, suprapone id aliquantulum desiccatiuum. Sume esdram cum vino & rob grauato & similibus, aduerte ne partes signo circumstantes putrescant, defende ipsas cum bolo armeno, aquarofarum, oleo rosato, aceto rosato & cæteris. In recessu inflammationis, vlceratione remanente, pone emplastrum ex litargyrio, & ea quæ ad malignas & corrosiuas plagas conferunt, id est, quæ refrigerant, desiccant, reperiunt, ex quibus aliqua superius commemorauimus. At temperate facito cuncta, vt & repente expedit, purgationis ad intra.

*De modo mitigandi dolorem circa ipsum apostema.*

#### C A P V T XVIII.

**Q**Uæ superiori tractata sunt capite in bullis multum nigris & corrosiuis verificantur, at in cæteris non tantæ inflammationis temperatior esto maturiorque in reperiendo. Ardorem doloremque partim à morbo, partim ab ruptoriis siue ab inflammatione prouenientem, si mitigare studeas, circumpone signo medullampanis calidi recentis primum excepti è furno vino acetoso vel succo plantaginis intinctam. Item coque prædictam medullam, necnon & lentes in aceto, applica & sæpius muta, & ne desiccetemplastrū illico suprapone folia plantaginis. Quando emplastrum deponis lauetur plagæ superficies cum vino pontico siue aceto, suprapone farinam hordei cum melle. Intelligo autem poni debere ista non supra, sed circum plagam, quamuis secundum Petrum de Tussigniana aliosque & doctos & expertos, hæc quæ diximus non multum reperiunt, verum pellunt caliditatem, confortant doloris locum, & temperato quodam calore resoluunt. Remanentem postea plagam his rebus curato quæ ad venenosas corrosiuasque attinent plagas.

*De modo incidendi putrem ipsius apostematis carnem.*

#### C A P V T XIX.

**Q**Uando est mortificata plaga, cura subito vt tristis illa caro decidat. Sume brancæ vrsinæ, barbæ maluaufici, her-

bæ peruinæ, foliorum maluæ ana vaciam vnā, coquantur, pistentur & misceantur cum axungia porci non salita, & cum butyro veteri, sic simul ad tres dies permittantur, postea colentur, exprimantur, addendo colaturæ parum ceræ & masticis, serua ad vsum. Vtque competentem faciat plaga crustam, quam postea bene diuellas, quum dicto vsus es emplastro, vngatur cum butyro & oleo. Crustam autem nulla cum violentia depone (id quidem multum obesset) morare donec natura id per se facere incipiat, quam postmodum cum supradictis adiuua. Interea ne corrodat venenum, perque sanas corporis partes discurrat, hunc in modum succurrere opus est. Habeas ventosam amplam, ita vt totam (quum applicatur) plagam hoc modo ambiat, videlicet vt supraposita tangat circumcirca tantummodo carnem sanam, ita vt plaga nulla ex parte contingi queat à ventosa. Hanc igitur ventosam applicato sic trahendum venenosum ex profundo sanguinem prohibendumque ne intro reuertatur.

*De modo mundificandi plagam.*

#### C A P V T XX.

**R**VPto apostemate extractaque veneni materia, propinanda sunt constricuiua simulque mundificatiua. Sume farinam ordeï cum melle & modico salis, suprapone folia caulium. Item sarcocollam puluerizatam, & mel parte æquali, si fortius volueris, coque in primis ipsum mel, post vero adde sarcocollam. Est equidem secundum Gentilem de Fulgineo & Petrum de Tussigniana solennis compositio, quoniam omne vulnus mundificat, omnemque saniosam plagam. Commendo pariter ad hanc rem emplastrum diachilon.

*De modo regenerandi carnem bonam.*

#### C A P V T XXI.

**M**Vndificata quum fuerit plaga, ad bonam carnem regenerandam, accipe folia basiliconis optimè conuulsa. Item recipe xanthos, centaureæ maioris, herbæ pentaphyllon, consolidæ maioris ana partes æquales, destillentur in Vere per alembicum, vel facito his ex herbis succum sicque simul permitte donec bene permisceantur. Postea adde illis aquæ vitæ partem quintam, serua ad vsum, istud enim mirabile inuenies in regenerando carnē. Item confert ad hoc barba asphode-

li, hoc est lappa, cocta cum facibus vini. Item emplastrum ex coriandris viri dibus cum melle & passulis.

*De variis modis extrahendi sanguinem à signo.  
De modo cauterizandi per incendium.*

## CAPVT XXII.

**O**Mnis circa signum prædicta cura, quæ (vt antea narrauimus) fit cum ruptoriis simplicibus & compositis. Laudabilior fieret Italicorum omnium Doctorum sententia, modo quem iamiam dicemus, postponendo ipsa ruptoria, & sic faciendo. Pone cauteria distanter à signo quemadmodum iam diximus, & simul supra signum magnam pone ventosam, qua depolita, range ipsum variis in locis cum rasorio & lanceola, postea ventosam reponere, vt sanguinem attrahat, eamque cessante sanguinis attractione amoue. Deinde tres bene purgatas sanguisugas applica, hisque iam repletis & amoris, gallorum vel pipionum columbarumque pullos scinde per medium, & sic calide vnum post alterum appone. Post secundum quosdam debet inungi cum theriaca, dein vero permittas eum quiescere. Nonnulli istorum loco deplumant locum circa anum galli, & accipiunt saponis aliquantulum obscuri ac quasi viridis vnciam vnā, opij scrupulum dimidium, pistantque bene, & cum sale albo puluerisatissimo faciunt suppositorium gallo, & totum in simul superponunt. Quo peracto restaura agrotantem, postmodum cum leniter cauteriza. Non dico cum cera nec oleo feruenti, quia oppilant, sed cum auro ignito, aut argento vel ferro, ipsumque instrumentum in summitate rotundam habeat planitiem ad formam vnus fatis magni quadrantis, sitque in medio huiusmodi planitie acies siue acumen ad formam adamantis, non nimis acuti. Et post incendium inunge cum butyro, & cooperias locum folio caulis, & permittas eum quiescere. Hoc multo eligibilis est ruptoriis, eo quo citius operatur, magisque pellit venenum, meliorem insuper qualitatem in membro relinquit. Post hac vtuntur rebus plagæ superponendis, & circa quas superius commemorauimus post ruptorium administrandas & eodem modo. Nonnulli pestilenti morbo laborantes, non aliud ostendunt signum quam maculas, veluti morbilli, per corporis cutem disseminatas. Istiusmodi debent inuolui panno coccineo calido, & custodiri à frigore, apponanturque duæ magnæ

spongiæ dorso cum renibus, & pectoricallide, intinctæ decoctioni meliloti, camomillæ & lentis, & bene expresse, & ieiuno stomacho, sæpius mutantur. Dabis etiam in potu decoctionem caricarum, lentis granorum tinctorum, & croci.

*De cura secundum morem Hispanorum  
& Catelanorum.*

## CAPVT XXV.

**D**ictum à nobis in præcedentibus de istiusmodi morbi cura secundum Græcorum, Latinorum, necnon & Barbarorum intentionem, maxime vero secundum vsum Italicorum, at in præsentia iuxta Hispanorum morem pariter & Catelanorum, de hisce medicamentis considerabimus. Itaque secundum istos fit statim clystere, post vero, si sanguis abundat, phlebotomia. Sin minus exhibetur iuxta peccantis humoris qualitatem medicina. Ab initio applicant epithema, deinde facta aliquanti euacuatione, saltem cum clystere, ad curam procedunt apostematis. More etiam istorum, nihil ex inflammationibus ardentibusque superponi debet apostemati, quia spasmodum inducunt, febres accendunt, malignius reddunt venenum, maxime si in emunctoriis fuerit apostema. Aiunt item non esse in principio apponenda maturantia multum ac maceratiua, quoniam glutinant, oppilant, putrefaciunt, referuere faciunt, pelluntque venenum ad intra. Nec frigida quoque dicunt administranda, nec quicquam (quia desiccant) cum spongia, neque cum panno, quia intus claudunt vapores, stringitque. At vero cum lana munda, siue cum stupa (maxime ex cannabo) laudabile est. Præsens decoctio est maxime familiaris, his præcipue qui sunt natura delicati, ac etiam in emunctoriis. Accipe flores camomillæ, melilotum, capillos Veneris, bulliant in aqua, imbebe lanam siue stuppam, exceptam manibus exprime, applica tepidam vel parum calidam, singulis horis renoua, donec resoluat vel aperiat. Post vero aperturam transacto die quinto vtere maturatiuis & quæ mundificant, & regenerant. Bullis autem vt rumpantur secure superponitur scabiosa pista vel sola vel cum veteri axungia porci, & salita. Si viridis est bulla vel nigra, nec tamen est in emunctoriis, aperias eam subito variis in partibus cum lanceola, vel rasorio, vt inde citò exeat venenum. Deinde lana bullam cum aqua falsa, ne ibidem remaneat fan-

guis coagulatus, applica sanguifugas. Postquam fuerit rupta & veneno expurgata, transacto (vt supra) die quinto superpone maturatiua, mundificatiua, regeneratiua. Præter hæc (nisi admodum tenellæ sit ætatis ægrotans) debet non supra, sed sub bulla per sex digitorum distantiam poni ampla ventosa. Postea fieri debet apertura cum lanceola vel rasorio, & iterum apponi ventosa vt sanguinem attrahat, videlicet uncias duas vel tres, vel plus etiam iuxta tenorem consensumque virtutis. Aduerte signo in emunctoriis existente, proprio signo applices ventosas, nec incidas, nec nimis ipsum molestes frequentando ventosas, quoniam sic rugetur spasmus, multi trahuntur calidi humores, peius efficitur venenum, & multi sic faciendo pereunt. Verum si circa aures, vel in gula huiusmodi signum appareat, applica ventosam retro sub spondilibus colli, non supra vel in spatulis. Si vero appareat sub brachiis, applica ventosam sed eodem latere, declinando versus deorsum. Si in inguinibus, applica ventosam in coxa, vel retro sub clunibus. In quocunque horum casuum sic facito, pone per sex digitorum spacium procul à signo (vt diximus) ventosam & scarificando trahas sanguinem cum ventosis vel sanguifugis. Sed supra signum, supradictam pones decoctionem, vt temperatè leniat atque resoluat. Vna cum decoctione bonum esset, si posses apponere lapidem quempiam veneni tractuum puluerisatum, vel integrum, vt sunt smaragdus, hiacynthus, topazius. Tamen secundum aliquos istorum possumus superponere signo sanguifugas, & quandoque etiam ventosas, esto quod sit in emunctoriis, nulla tamen fieri debet cum violentia. post vero lauando cum aqua salsa. Hoc fit quando signum summè inflatū est, vel mali caloris, & quum est apertum signum, transacto die quinto vtuntur maturatiuis. Quod si hæc ipsa decoctio minimam facit operationem, reduces eam ad formam doccia vel gutta. Quando ipsum apostema plus solito est inflatum, quidam post diem tertium fortiter incidunt ipsum per longum eius membri in quo signum apparet, per interuenia scilicet, euitando venas & arterias. Et si nimis fluere sanguis, obuiant cum stuppa intincta vitello oui, & oleo rosato, non vero in albumine, quia frigidum est & viscosum. Eo tempore confortant ægrotum cum cordialibus intus & extra. Verum sapientiores inter istos non approbant hanc incisionem, iudicando ipsam maximi esse periculi,

præsertim in emunctoriis. Post vero quintum diem si febris non est ardua, ac signum non multum est venenosum, nigrum, vel viride, si etiam approximat rupturæ, corpore bene purgato, incipe cum maturatiuis, postquam feceris quæ diximus, ad maturandum apostema. Summe barbae maluaufci, barbae liliorum, enulae campanæ, cucumeris asinini, caprarum ana libram dimidiam, caricarum pinguium, seminis foenogræci, seminis lini ana unciam vnam, foliorum malua, maluaufci, brancae vrsinae, herbae violariæ ana manipulum vnum; coquantur, cum impetu in aqua bene pistentur. Si pro delicatis hoc maturatiuum fiat, colentur prædicta, coquantur, pistentur, & exprimentur. Postea addatur axungia porci recentis, liquefactæ, colatæ, libra vna vel quantum sufficit. Aliqui addunt limacias bene pistas, vnâ cum cortice, hoc enim conuenit vbi cutis multum densa est, veluti in inguinibus, & post aures. Alij addunt fermenti panis grossi ana uncias duas aut plus, vel minus, secundum opportunitatem trahendi & rumpendi, quæ res conuenientior est in bullis, quam in inflationibus emunctoriorum. Sunt & alia quædam leuiora maturatiua, vt est farina tritici cum oleo & aqua simul bullita, donec ad aliquantulam tenacitatem perueniant, vel cum medulla panis furfurei, & cum caricis pinguibus simul coctis & postea pistis. Possumus addere oleum oliuarum, vel oleum amygdalarum dulcium, & axungiam porci recentem. Si talis axungia vetus esset, & salita, foret hoc emplastrum vtile ad leniter rumpendum bullas. Etiam addere possumus pinguedinem gallinae recentem, si tali cum pinguedine, axungia, & butyro recenti, oleo violato, barbis liliorum coctis fiat emplastrum gratum delicatis. Huiusmodi maturatiua (vt ante diximus) fieri debent post purgationem cessante febre, & postquam signum est apertum, expurgatumque veneno, transacto etiam die quinto, deinde vtuntur mundificatiuis, postea regeneratiuis, ultimo consolidatiuis signi. Si bulla fuerit nigra vel viridis & corrosiua, nec est in emunctoriis, incide cum profundatione lanceola vel rasorio. Postmodum administrabis docciam cum aqua salsa aliquantulum calida, ne sanguis (vt diximus) coaguletur, deinde applica ventosam aut sanguifugas, vel anum galli deplumatum: quidam applicant limaciam viuam, nonnulli ranam viuam, hoc autem fieri potest quando signum non sit in emunctoriis, postea ap-



poni aliquod facile ruptorium quod supra tradidimus, vel etiam istud. Sume vitellum oui cum modico salis, nec fortius, quia bullam malignaret, mutetur autem istud sæpius. quod si & hoc bullam nimis conturbaret, vtire axungia porci salita, vel simul vtrisque.

Sunt quædam ruptoria admodum fortia, quæ non debent poni super emunctoria, nec vbi grauis adsit febris; quæ etiam si ponantur, vbi non minus sit fortis, minime conducunt. Sume caricas crudas, & fermentum. Item si hoc non valet, faciunt hoc fortius, obseruatis tamen modo & ordine narrato. Sume cantharides bene tritas, & tertiam partem axungie porci, hoc pone super bullam malignatam ter vel quater. Dicunt chirurgi hoc esse sæpius expertum. Quando adhuc fortius hoc ipsum habere volunt, addunt quartam partem saponis fullonum, quod quidem dicunt in malignata bulla, & in homine robusto mirabiliter operari. Item aliud forte pro bullis. Sume pulueris nitri bene puluerizati vnciam dimidiam, granorum tritici tritorum vel dentibus masticatorum vnciam vnam, vitella ouorum numero duo, croci drachmam vnam, terebinthinæ vnciam vnam, bene commisceantur & superponantur cum stuppis mundis. Reliqui apponunt calcem viuam cum sapone. At quoniam huiusmodi ardentia & violenta frequenter malignius faciunt apostema & febres, ideò securius est ante vlcerationem aduertere, ne materia intro reuertatur, etiam ne quasi rabida efficiatur his cum rebus acutis, in debilibus præsertim complexionibus, vel multum cholericis, ideo his intentionibus vtile est emplastrum Galeni toti membro superponere.

Sume plantaginis, lentis, panis fursurei ana partes æquales, coquantur in aqua donec ad quandam soliditatem perueniant, superpone loco doloris & circumcirca perlatum spacium. Auicenna addit galas, vbi plus de subtili sanguine apparet quam de compacto. Item ad istud vtile est emplastrum granatorum dulcium, & acetosorum coctorum in aceto & aqua, præsertim vbi apparet materia incensa. Post vero quam cessare incipit ardor, conuenit emplastrum Auicennæ, ex caricis pinguibus, passulis, nucibus, farina hordei, simul coctis ad maturandum & rumpendum. Post vero factam rupturam, mundificetur plaga cum succis apii, absynthii, plantaginis, melle rosato, farina, coctis cum modico terebinthinæ lotæ, deinde conso-

lidatur secundum ordinem aliarum plagarum, circumponitur vero vnguentum ex bolo armeno, & oleo rosato. Quidam ab initio causa fortis attractionis, ponunt inter musculos tibiæ, vel brachii, vel super spatulis herbam flammulam, id est, cuscute tritam, quæ quidem faciendo hulerationem emunctoriorum ad se trahit viores, & membrorum principalium. Istud remedium in robustis corporibus, & vbi nulla adest febris, vtile est, non alibi nec aliter. Nonnulli actuale faciunt cauterium super signo cum ferro ignito, quod quidem plus conuenit robustis, & vbi non est ardua febris.

Raimundus inquit, quod theriaca & bolus armenus non trahunt ad se venenum, sed procul depellunt; ideo dicit non esse assumenda per os post secundum vel tertium diem, quando materia iam venenosa est, & cor ipsum attingit, nisi bene euacuata sit & correctæ. Item prohibet ne vnquam super signo ponantur, nec etiam vult vt apponantur, nisi signum extra emunctoria fuerit, & quoque ante tertium diem, & in circuitu, non supra. Potest administrari bolus armenus etiam post septimum diem, plaga veneno expurgata, vngendo in circuitu. Sic igitur conuenit in tertio antequam plaga sit facta venenosa, & conuenit post septimum postquam plaga veneno expurgata est, in circuitu autem vngi debet cum oleo rosato, aceto rosato, & aqua rosarum ad defendendum membrum. Hactenus Hispanensium & Catelanorum narrauimus opiniones vnâ cum correctionibus Arnoldi & Raimundi medicorum singularium, vera res est, & Raimundus huius est sententiæ, scilicet quod non debeat purgari infirmus cum phlebotomia, medicina, aut vomitu, quando apostema repletum est admodum, & venenosum, hoc est, transacto die secundo, ne venenum tali motione intro reuertatur.

Hæc Quidem opinio videtur corrigenda secundum alios, & sic videlicet purgari debet si opus sit (cum dictis obseruantis) etiam post ipsum diem secundum, sic tamen quod dum purgatur applices ventosas & sanguifugas, sub & super signo, & quod cor defendatur intus & extrâ cum cordialibus frigidis, & hic quoque modus non prorsus est alienus ab intentione præfari Raimundi.

*De astantium conseruatione qui infirmum regunt.*

## CAPVT XXIIII.

**H** Vius astantes præterea quæ dicta sūt in principio pro conseruatione ( scilicet theriacam, pilulas & similia ) nisi vacui fuerint sanguinea superfluitate, debent aliquantulum sanguinis extrahere ex vena communi, facta bona purgatione cum dictarum pilularum drachma vna, vel saltem media. Vtile est sæpius sumant pulueres & medicinam contra morbum, vt in præcedentibus dictum est, & mane aut quò magis procul possunt ab infirmo, præsertim cum sunt ieiuni. Euentetur sæpè locus habitationis, & fiant fumigia, vt suprà dictum est, nunquam prætermittendo terebenthinam, gestent in manibus faces ardentes, & carbones bene succensos bonis odoribus fumigantes, lauent vniuersum corpus cum aceto tepido bis in die scilicet manè & serò. Sæpenumero mutet indumenta, & frequentius remoueat fumigia, maximè cum thure, terebinthina, iunipero, myrto, sandalis, rosis, & camphorà vel roremarino, lauro & similibus. Teneat in manibus arantium & facisculum rutæ vel querculæ maioris & mentæ ac melissæ cum myrto & flosculis recentibus, sit semper bene purgatus ab omni humore & cibo superfluo. Iterum repete salutariferum illum odorem cum aquà rosarum aceto rosato, vino maluatico, zedoaria vel corticibus citri, super omnia lauet sæpius cum his manus & vultum. Cuius etiam compositionis pauculum bibat, & teneat etiam ad motam naribus spongiam in eadem iam dicta mixturà intinctam, ligatam in ligno fraxini, quoniam tantam habet fraxinus contra venenum potentiam, vt nullum animal veneficum eius appropinquare audeat vmbre, suo neque odori, potius enim sese sponte ad concremandum igni concederet, quàm vt huic proximè adhæreret arbori. Faciant sæpiusculè ignes & focum per vniuersam domum, maximè cum lignis & rebus odoriferis. Nec putet qui semel ab hoc morbo liberatus est, sese deinceps non posse hoc in casu perire, quia præsentī anno ter vñum ex Florentinis nostris hīc morbus inuasit, qui secundo perfectè liberatus, tertio mortem euadere non potuit. Eodem iterum anno in mense Septembri mulierculam liberaui quadam à peste, sana equidem erat, vt cæteri qui semper sospites extiterant, ac cum inter morbosos versarentur, post dies xviii, iterum infecta perit. Nulli confidendum

est in hoc quod cæteris sit fortior & magis sanus, quoniam venenum ita fortes interimit vt debiles. Imò venenum istud plus quàm reliquos offendit sanguineos atque robustos, eò quod apertæ sunt illis pectoris viæ, habent & cor valdè validum, multumque sanguinem calidum & humidum, ideo cordis ipsa caliditas per meatus apertos multum trahit aërem perniciosum, & quidem subito trahit, antequam temperari transitu possit. Etenim sanguinis caliditas per quàm cito succenditur & inflammatur. Confestim putrefactioni subest humiditas, inque venenum conuertitur, quippè vt quanto plus in vase vini, & quanto potentius, tanto etiam in plus, tumque in mordacius vertitur acetum, sic potens venenum, tanto quidem abundantior, quanto calidior fuerit in pectore sanguis, quando equidem sanguis fit ipse venenum, per quàm faciliter paruoque ipsius contactu transmutatur ad idem. Conuertunt enim se alterutrum contactæ inuicem partes ad venenum. Nec te prætereat ô qui patientis curam geris, quod quanto illi es propinquior, tum cognatione, tum complexionis vel naturæ ac constellationis symboleitate, tanto quidem maiori contagionis subiaces periculo, quia lationis quædam inest qualitati promptitudo, vt similis ad simile adimpleri transmutatio possit veluti ignis ad aërem, ad aquam aëris huius ad terram. Et cum duæ citharæ, binæ vel fidiculæ versu modulantur eodem, tunc quidem resonat motus, voxque huius in illam. Si verò peris, quas intret per vias venenum? respondeo, quod omnes per corporis poros, maximè qui magis aperti. Citius autem offendit quando per nares, per os, perque pulsus ingreditur, & multo quidem fortius si vias adinuenerit in calidis, humidis subtilibusque apertas humoribus, & si quoque à similibus prouenit humoribus, sique influenza Martis cum diuerso euenit & modo contrario, cumque Saturnio influxu se quidem eo tardius demonstrat. Multoties immanet vestibibus diu & cute viis patentibus & venis cordi propinquis, nec inde quisquam grauari videtur, quia pauculus est leuisque vapor, nec eam habet cæteris vt cordi partibus contrarietatem, sed ipsi tantillum cum primum cordi contiguum efficitur, manifestè non occultè ledit. Similiter rabidicanis venenū, nec non & alia suam lōgo etiam post tempore detegunt offensionem. Hæc denique scias velim, quod scilicet per bimestre spacium remanet venenum in personis. Parietes, ferramenta, & quæ sunt ex lignis constructa, nisi corrigantur cum lotionibus,

fumigiis, ignibus, per annum vel plus fortè suam referuant venenositatem. Vestes quoque laneæ, & id genus nisi euententur, latentur, sæpiusque fumigentur, vel ponantur ad ignem, ad ventum, ad Solem, tribus annis & ultra remanent infectæ. Nosti quidem mucidi odorem aranci, in qua mucedferit capsula, multos seruari per annos. Similiter suo quo prius erat bombace musci diu permanet odor. Equidem ut ignis oleum, sic nutrimentum huius est lana veneni, & quidem ita enutrit hæc lana venenum, ut non modo conseruet ipsum, sed & augmentet simulque fortificet. Non est utendum pro cibi vel potus dispositione vasis illorum qui infecti sunt, nec tangi debet quicquid adhæserit illis. Incundè tibi viuendum est, eo quod lætitia vitalem confortat spiritum. Continenter & sobriè viuas, siquidem tanti est valoris sobrietas & continentia, ut ea sola mediante in multis & quidem grauib (Athenis quæ fuerant) pestilentis Socrates Philosophus sese seruauit incolumè. Inquiunt ideo Aristoteles atque Galenus talem esse in puris corporibus dispositionem, ut fermè nunquam sentiant pestem vel ea ipsa (& si infecti) saltem non pereunt. En tibi iam duo, ut conseruet singularia trado. Parato ut bibi possit smaragdum, ut tangi, ut ore teneri suspendique collo, cuius tanta est aduersus venena virtus, ut, teste Rasi, Auenzoar, Serapione, tyris & bubonibus eius conspectu ex sese statim lumina cadant. Pauperibus dare soleo raphanum syluestrem, parum pro yicene sanguinem incendat, tantam enim habet contra venenum efficaciam, ut scorpionem eius contactu crepari faciat, & dicit Dioscorides, quod trito cum aceto eius semine lotis manibus, tangendo serpentes, nocere minimè possunt. Lapis bezoar (si quis posset habere eum) super omnia valdè aduersus venena, quamuis enim Perfico idiomati id omne bezoar ab antiquis appellari solet, cuius est proprietas virtusque pellendi venena, secundum tamen Serapionem, & Rasi principaliter vocatur bezoar, lapis quidam omnibus venenis tum calidis tum frigidis moribus cunctisue vlceribus venenosis sua virtute resistens, & confert siue sumatur per os, tum etiam ore teneatur, vel è collo suspensus, tum denique quouis modo applicatus ad extrà. Oritur in Syria, in India, in partibus Orientis, estque diuersi, diuersus trini coloris. Nam quidem glaucus est & fuscus, quidam glaucus, fuscus & viridis, alter verò albus & aliquantulum glauculus videlicet similis colori vini, albi, clari, hic inter ceteros est optimus, leuis, delicatus,

mollis, absque sapore, splendens ut lumen. Dosis eius quando per os recipitur est grana duodecim. Testificatur Rasi & Serapio sæpius se suis compertum habuisse temporibus, quod preciosissimus iste lapis omnes tam simplices quàm compositas Medicinas, tum etiam compositas theriacas propria qualitate superauerit in resistendo venenis. Inquit Hahamed, ligetur in anulo, insculpaturque scilicet lapidi Scorpionis imago, cum Luna est in Scorpione, respiciendo ipsum ascendente. Quo facto sigillantur cum eo thura, quando fuerit in signo Scorpionis. Quod si postmodum huiusmodi thuris puluerisari ad debitam quantitatem yenenato in poru dederis, tantum valebit aduersus venena, quantum proprius ipse lapis. Inquit Abdallahamarac hunc se vidisse lapidem, quem comparasse ait filium Mamari, seque in solutionem lapidis Cordubæ palatium dedisse. Serapion ait eundem mirabilia operari non solum in hominibus, sed & in cæteris quibusdam animantibus, primum quod contingendo hoc lapide Scorpionis aculeum deperdit pungendi potentiam. Præterea tritum mixtumque cum aqua serpentisque ori impositum, occidere eum asserit.

*Fuge cito, procul, ac tarde reuertaris.*

## C A P V T XXV.

**R**eseruare visum est ad libri calcem principalium hac in materia regularum declarationem. Fuge quantum potes hominum conuersationem, & maxime quando es ieiunus. Sis semper remotus à socio ad minus per spacium bicubiti, & in loco aperto, & ab infecto (cum secum loqueris) remotior saltem per sex cubitorum interstitium, & sub dio vel loco aëreo, & caue ne ventorum status ab eo yersus te spiraret. Inter te & ipsum sit Sol, ignis odores, vel tendens ad ipsum ventus, loca enim angusta simulque turba hominum, valdè periculosa sunt. Hoc etiam commemoro, quod parietum procinctu ac domuum contingentia & continuatione multiplicatur morbosa contagio. Super omnia suadeo ut cito ac procul fugias ab his locis quibus imminet pestis, tardeque redeas. Dixi cito, hoc est, quam primum apparent signa proximæ pestis, quæ quidem signa sunt, quando eius loci aër extra naturalem suam dispositionem esse videtur, declinando ad calidum & humidum, quando nebulosus, nubesque densæ, puluerulentus apparet, venti grossi & tepidi, ac etiam quando aquæ &

aeri fumant & olēt, sic pariter & pisces mali sunt saporis atque odoris. Cum multa super terra ex putrefactione nata apparent animalia, fungorum & putridarum herbarum copia, terræ fructus & animalia insipida sunt, & parum conseruantur, turbida efficiuntur vina, multa & terrestria, & aëria animalia ab eo loci recedunt, insolite oriuntur febres latentes, furiosæ, continuæ, fallaces, cum pectoris anxietate, cum pulsus prostratione, phrenesis, vinarum turbulentia, palati, intestinorum excoriationes, oculorum rubedo, vermes, morbilli, multæ feminarum conturbationes, iræ rabidæ, rixæ, dira bella, monstra naturæ, mirandaque vel naturæ vel à Deo signa, inuisa multum & rara. Hæc enim quæ diximus præfagia sunt propinquæ pestis. Tunc igitur fuge antequam vnus efficiaris de duodecim mille signatis. Id verò dupliciter fieri potest, scilicet vel quia iam captus eris contagione infectorum, vel quia tristem infecti aeris qualitatem iam receperis, sic quod pedetētim fiat ille tibi familiaris aer, ita quoque nec aeri natura, nec aer illi resistet, verum si alienam subito quaesieris auram abibit primus aer, illique natura resistet, & hic naturæ, prouenit vnde pestis origo. Et etiam vt procul aufugias moneo, videlicet vt eare ad loca conferas quibus res, nec personæ, nec soni, strepitus, rumores quicunque infecti loci ad te peruenire valeant. Sicque remotus esto, vt alij intermedient montes, quibus vaporum prohibeatur accessus, ne ventorum flatu, vel aeris dilatatione te possint contingere. Considera loci ad quem curris dispositionem & situm, videlicet ne pestilēti quouis modo sit similis aeri, vtpotē in calido, frigido, humido, siccoque, nubibus, pluuiis, ventis; sit denique tali in loco firmatus, vt venti, nubes, pluuiæ, spirare, dilatari, ab inde ad te moueri nequaquam possint. Nec te hoc fugiat, quod Horoscopus, siue Ascendens alicuius vrbis vel castelli infectæ,

vel infecti, sapius ad ea loca omnia pestem extendit, quæ illi ab initio ciuitati vel castello subiacent, & quæ aliqualem eo cum Ascendente conformitatem habent. Tertiò dicimus, vt tardè reuertaris, quoniam pauxillula transacti morbi remanens infectio, potens est ad eos per quam subito maculandum omnes, qui etiam haud intempestiuo fugam tempore ceperunt, quia maiori subsunt periculo, qui locum frequentant infectum cum prius aufugerint, quàm hi qui semper ibidem, cum cautela tamen, permanserunt, quoniam subita nouaque malè toleret natura accidentia, & præter hoc diutissimè quidem remanent hæ (vt ante diximus) qualitates in parietibus, lignamentis, vestibus, pannis quibusque & cæteris. Quantum vero ad solius aeris dispositionem vna sufficit angaria, ita vt vbi ad tres menses immunes ab hoc morbo omnes quicunque sunt perstiterint, iudicare potest aerem iam fore purgatum. Sed esto cautissimus in appropinquatione & contactu eorum quæ plus aere venenum retinent. Procinctus fornacium in muris diutius seruant quàm ligna venenosam caliditatem, verum purificando (vt sapius diximus) videlicet cum ignibus, lotionibus, euentionibus, fumigiis, odoribus, & reliquis. Purificantur homines communiter spatium quatuordecim dierum, domus, lignamenta, & cætera in viginti vno. Panni, vestimenta, & huiusmodi spatium dierum viginti octo. His habeas temporibus separata ad bibendum pariter & manducandum vascula & lectisternia quæque, vel saltem si cætera non possis lintheamina reliqua lotionibus & fumigiis purificata. Equi, pecuniz, suppellectilia, sarcinulæ & huiusmodi, nisi admodum cautè egeris, venenum diu seruare solent, quare vigilans, & prudens esto, cunctisque ordinatim prouideas.

(. . .)

uideas.

(. . .)

## MARSILII FICINI EPIDEMIARVM

*Antidoti finis.*



MARSILII FICINI  
FLORENTINI  
EPISTOLARVM

(.) LIBER PRIMVS. (.)

PROOEMIUM  
IN  
EPISTOLAS

MARSILIUS FICINVS  
Florentinus cunctis semel  
Epistolis suis, S.



**Q**UOTIES Epistola mea amicis meis, (me iubente) salutem dicitis, toties amicissimo vestro Hieronymo Roscio immortales salutes dicite. Vos enim ego mortales genueram, ac nescio qua fortuna propediem moribundas. Hieronymus autem insignis pietate vir regeneravit vos nuper (ut spero) iam immortales. Latebatis enim iam diu lucis cupidae, nec quisquam adhuc è tenebris eruebat, Faso forsan vel Genio

nondum volente. Roscius autem noster, imò & vobis Roscius qua pietate semper erga parentem vestrum Marsilium se gessit, eadem nunc & vos charitate hereditario feliciter est prosequutus, diligentia simul & opera curans, ut vestra facies iam oppressa prorsus exprimerentur. Hunc ergo doctum piūque restitutorē vestrum, hactenus quidem tristes, nunc hilares salutate, atque pro ingenti immortalitatis munere, immortales gratias agite. xv. Decembris. M. cccc. xciii. Florentia.





# MARSILII FICINI FLORENTINI.

IN

## EPISTOLAS SVAS PRO O E M I V M

SCILICET IN I. LIBRVM.

AD IVLIANVM MEDICEM,

*Virum Magnanimum.*

# MARSILIVS FICINVS

IVLIANO MEDICI,

Viro Magnanimo, S. D.



**M**AGNVS Cosmus (Magnanime Iuliane) auus tuus patronus, saepe Platonium illud habebat in ore, nihil adegregias res agendas commodatius esse quam prudentium doctorumque virorum benevolentiam, nullumque certius argumentum esse vel iustitia prudentiaeque quam si amici huiusmodi adsint, iniustitia & imprudentia quam si desint. Aureum hoc Platonis nostri praeceptum. Cosmus re ipsa etiam multo magis quam verbis in omni eius vita probauit, vir certe, praeter ceteris diues pecuniarum, longe ditior hominum, prudentia iustitiaque ditissimus. Atque id quod ra-

riissimum & mirabile est, filium & nepotes huius omnis thesauri reliquit haeredes. Quo sit ut Iuliano meo senem illum ex quo unico post Deum salus mea pendebat agnoscam. Nemo est igitur quem magis saluere cupiam quam Iulianum, atque id quidem quotidie Deum precor & obsecro. Ut autem tibi animi mei votum affectumque certius declarem, volumen primam Epistolarum ad amicos mearum tibi amicorum regi dedicare decreui. Quo & amici omnes ad unum praecipuum referantur amicum, & tum in iis legendis, quoties salutem legis, toties Iulianum à Marsilio intellegas saluari.

*De felicitatis desiderio.*

COSMVS MEDICES,  
Marsilio Ficino Platoni-  
co, S. D.

**C**ontuli heri me in agrum Charegium, non agri, sed animi colendi gratia, veni ad nos Marsili quamprimum. Fer tecum Platonis nostri librum de Summo bono, quem te isthic arbitror iam è Græca lingua in Latinam, ut promiseras, transulisse. Nihil enim ardentius cupio, quàm quæ via commodius ad felicitatem ducat cognoscere. Vale & veni non absque Orphica lyra.

*Quæ sit ad felicitatem via.*

MARSILIVS FICINVS  
Magno Cosmo, S. D.

**V**eniam ad te cum primum potero quàm libentissimè. Quid enim gratius quam in Charegio, hoc est, gratiarum agro, vñà cum Cosmo gratiarum patre versari? Interim accipe paucis quæ apud Platonicos via sit ad felicitatem accommodatissima. Et quamuis existimem non oportere ei viam monstrari qui propè iam peruenit ad calcem, desiderio tamen tuo & in absentia, & in præsentia obsequendum esse censui. Omnes homines bene agere, hoc est, bene viuere volunt. Bene autem viuent, si bona illis adsint quamplurima. Bona verò hæc dicuntur, diuitiæ, sanitas, forma, robur, nobilitas generis, honores, potentia, prudentia, præterea iustitia, fortitudo, temperantia, & præ cæteris omnibus sapientia, quæ quidem vim omnem felicitatis complectitur. Felicitas quippè in prospera operati finis consecutione consistit, id autem in singulis facultatibus sapientia præbet. Si quidem periti tibicines quicquid tibiarum vsus requirit optimè consequuntur, & eruditi Grammatici quod ad literas tum legendas, tum scribendas pertinet, sapientes quoque gubernatores quoad prosperum navigationis portum, præ cæteris assequuntur, necnon belli dux sapiens quod ad militiam attinet tutius expedit, & sapiens Medicus melius ad optatam perducit corporis valetudinem. Quamobrem sapientia in singulis humanis operibus nos voti compotes pro viribus efficit, neque aberrat vnquam, neque fallitur, alioquin sapientia reuera non esset. Cum verò causa consequendi finis sapientia sit, necessarium est eam ad felicitatem totum valere. Præter-

ea ij dumtaxat quibus bona plurima adsint beati dicuntur. Hitamen non prius beati sunt, quam bona ipsis præsentia profint, neque profunt vnquam, nisi illis vtantur. Sola enim sine vsu possessio, nihil momenti ad felicitatem habet. Verumtamen nec vsus etiam sufficit, potest non quis malè vt, ex quo contingit vt lædatur potius quam adiuuetur. Vt igitur possessioni vsum adimus, sic & vsui rectitudinem addere decet, ne vtamur solum, verumetiam rectè vtamur, vt autem singulis rectè vtamur, sola nobis sapientia præstat. Quod quidem licet in artibus intueri. In quibus illi dumtaxat, qui artis periti sunt tam materia quàm instrumentis rectè vtuntur. Eadem quoque ratione vt diuitiis, sanitate, forma, robore, ac cæteris quæ bona vocantur, vtamur rectè, sapientia efficit. Quapropter in omni possessione, vsu, operatione, causa prosperè beneque agendi scientia est. Nam qui sine mente & possidet multa & vitur, tanto læditur magis possidet, plura pluribusue abutitur. Sanè qui insipiens, quo minus agit minus errat. Minus errans, minus etiam male agit. Multus autem male agens est miser. Agit certe minus, si pauper sit quam si diues, sit debilis quam si robustus, timidus quam audax, piger quam vigil, tardus quam velox, hebes quam sagax. Iraque nulla eorum, quæ in superioribus bona nuncupabantur, per se bona sunt. Nam si illis inscitia præsit, tanto deteriora sunt quam eorum contraria, quanto vberius improbo duci adminicula scelerum possunt suppeditare, sin autem prudentia sapientiaque illi præsideant, tum denique meliora. Ipsa tamen per se neque bona sunt neque mala, sapienti si, quidem viro tam aduersa quam prospera denique euadunt, vtilia rectè vtrisque vrenti, insipienti vero contra. Sola igitur ex omnibus rebus nostris sapientia per se bonum est, sola insipientia per se malum. Cum ergo omnes felices esse velimus, felicitasque absque recto rerum vsu haberi non possit, rectum verò rerum vsum scientia præbeat, cæteris omnibus prætermisiss omnium cum Philosophiæ plenitudine tum pietatis studio niti quisque debet, vt quam sapientissimus fiat, sic enim animus noster Deo, qui sapientia ipsa est, euadit simillimus, in qua quidem similitudine summum Plato consistere gradum beatitudinis arbitrat.

*Imitatio utilior est quàm lectio.*

MARSILIVS FICINVS

Amerigo Bencio, viro  
magnifico, S. D.

**A**Ccepi hodie tuo nomine Græcos Platonis nostri Dialogos, munus certè magnificum, animo tuo dignum, meo gratissimum. Gratias tibi ago magnas. & immortalem gratiam quandoque cœlestes tibi referant gratiæ. Imitari in hoc, sicut in plerisque aliis, magnum Cosmum, ut arbitror. voluisti, is enim superioribus diebus Bibliothecam meam Græco ornavit Platone. Donum Amerige tuum laudo equidem, imitationem probo. Accommodatior namque ad virtutem via est imitatio quàm lectio, sane quemadmodum harmonia, dum præsens aures nostras illabitur, vehementius afficit, quam dum præterita cogitatur, ac prælium cum spectatur acrius mouet, quam cum narratur, sic egregia viventium Heroum opera ardentius ad virtutem inflammant exactiusque formant, quam veterum Philosophorum de Moribus disputantium verba.

*Medicina corpus, Musica spiritum, Theologia  
animum curat.*

MARSILIVS FICINVS

Francisco Musano Ce-  
sensi, S. D.

**C**um primum tertiana notha medicinis nostris expulsa, vna cum Ioanne Aurelio Academiam nostram, tanquam Medicum tuum salutauisses, citharæ sonum, cantumque hymnorum postulasti à nobis & impetrasti. Deinde multa sparsim in nostra illa Theologia legisti. Noli Francisce mirari, quòd medicinam lyramque cum Theologiæ studiis misceamus. Meminisse debes, cum Philosophiæ sis deditus, naturam in nobis corpus & spiritum cum anima coniunxisse. Corpus quidem remediis medicinæ curatur. Spiritus autem qui aëreus sanguinis vaporem, & quasi quidam animæ corporisque nodus, aëreis quoque odoribus, sonisque & cantibus temperatur & alitur. Animus denique tanquam diuinus diuinis Theologiæ mysteriis expiatur. Apud naturam vnum quiddam est ex anima & corpore spiritumque compositum. Apud Ægyptios sacerdotes vna eademque facultas erat, pharmacis fidibus, mysteriis occupata. Vtinam hanc naturalem & Ægyptiam facultatem tam

feliciter assequamur quàm obnixè libenterque sectamur. Sed de his in præsentia satis. Iussisti heri ut prouerbum illud meum academiciæ parietibus vndique inscriptum, tibi transcriberem. Accipe, à bono in bonum omnia diriguntur. Lætus impræsens. Neque censum existimes, neque appetas dignitatem, fuge excessum, fuge negotia, lætus impræsens. Vale.

*Dialogus inter Deum & animam Theologicus.*

MARSILIVS FICINVS

Michaëli Mercato Miniateni dile-  
cto conphilosopho suo. S. D.

**S**æpè de moralibus naturalibusque vna philosophari sumus dilecte Michael, sæpius de diuinis, memini autem te sæpenu-mero solitum dicere, moralia vsu comparanda esse, naturalia ratione quærenda, diuina à Deo oratione petenda. Legi etiam apud Platonem nostrum, diuina ob vitæ puritatem reuelari, potiusquam doctrina verbisque doceri. Hæc igitur atque similia cum sedulo cogitarem, coepi quandoque lugere animo. Vtpote qui & rationi iam diffiderem, & nondum reuelationi confiderem. Ortus hinc est intimus quidam inter animam Deumque Dialogus. Hunc audi si placet, quamuis existimem te fortè propius iam quam nos alloqui Deum. DEVS. Misera quid tantum luges animam meam, pone iam finem ô filia lachrymis. En adsum tibi pater tuus, adsum Medicina salutis tue. ANIMA. O vtinam meus mihi pater aspires. Ah! si putarem posse tantum mihi munus obtingere, ah! quantum lætitia insanirem? Nunc verò quo pacto fieri valeat istud non video, neque enim qui mihi tantum extrinsecus adest summus est pater meus. Ille siquidem naturæ artifex, ut opinor, interius etiam me prolem suam genuit quàm naturam suam, neque qui tantum intrinsecus inest summus est pater meus, ille siquidem maior me est, qui verò intra me est, me est proculdubio minor. Quo autem modo & intra simul & extra me quicquam esse queat ignoro. Hoc me hospes quicumque sis, hoc me grauitè angit, quòd sine patre meo viuere nolim, & ipsum reperire posse diffido. DEVS. Pone finem, ô filia, lachrymis ne te afflictes ô filia, & non hospes est qui tecum loquitur, sed domesticus familiarior tibi quàm ipsa tibi. Adsum equidem tibi simul & insum. Adsum equidem tibi quia insum, insum tibi quia tu es in me, quæ nisi esses in me, non esses in te, imò omnino non esses.

Pone finem, ô filia, lachrymis, ecce parens. Parens tuus, quantum mole est, omnium minimus, tantum virtute est maximus omnium, & quoniam angustissimus est, est intra omnia, quoniam amplissimus, extra omnia, ecce tibi adsum, & intus & extra angustia maxima, minima amplitudo. Ecce, inquam, nonne vides? Cœlum & terram ego impleo, & penetro, & contineo. Impleo, non impleor, quia ipsa sum plenitudo. Penetro, non penetror, quia ipsa sum penetrandi potestas. Contineo, non contineor, quia ipsa sum continendi facultas. Non impleor, ne indignus fuerim, quia copia ipsa sum. Non penetror, ne esse desinam, qui ipsum esse sum. Non contineor, ne desinam esse Deus, qui infinitas ipsa sum. Ecce nonne vides, ingredior per omnia non permixtus, ut & supergredi valeam, qui excellentia ipsa sum. Supergredior omnia non disiunctus, ut simul & ingredi valeam, & ingredi penitus, & vnire qui vnio ipsa sum, per quam fiunt, per quam constant, quam appetunt omnia. Cur diffidis reperire parentem, ô demens, non difficile reperitur ubi sim, siquidem in me sunt, ex me fiunt, per me seruantur quælibet, semper vbique. Et infinita virtute, per infinitum amplificor interuallum. Quin potius nullo modo reperitur ubi non sim, per me quippe hoc ipsum ubi est, diciturque vbique, per me duces, per me lucem agit, & quærit quodcunque agit quisque & quærit alicubi, non desideratur vsquam nisi bonum, non reperitur vsquam nisi verum, ego sum omne bonum, ego sum omne verum, quære faciem meam & viues. Sed ne mouearis, ut me tangas, qui stabilitas ipsa sum, ne distraharis per varia, ut me apprehendas, qui vnitas ipsa sum. Siste motum, collige multitudinem, me protinus assequeris, iamdiu te penitus assequutum. ANIMA. Hui tam citò me deferis, ô mea salus! Cur tam repente filiam deferis sitibundam? Perge, age vterius, perge precor, venerabile Numen, dic obsecro, per maiestatem tuam, si placet, planius, ah! fac ut placeat, dic ergo, quia placuerit, planius, quid non es pater meus, ut reuiscam? Quid es iterum, mi pater, ut vinam? DEVS. Non corporis natura parens est tibi filia. Tâto enim melior est quanto parenti magis obtemperas, es autem tanto præstator, quanto magis corpori aduersaris. Bonum tibi est esse cum patre, malum tibi est esse cum corpore. Non animus aliquis te genuit, ô anima, alioqui nihil super animum cogitares, & in ipsa animi mutabilitate si-

steres gradum, neque stabilem profus naturam exigeres. Non intellectus aliquis multiplex te creauit, non enim simplicitatem summam attingeres, & intellectus ipse tibi sufficeret consequutio, nunc autem ad ipsam vitam, ad ipsam essentiam, ad ipsum esse absolutum intelligendo atque amando ascendis super quemlibet intellectum, neque satis tibi intelligentia est nisi & bene & bonum intelligas. Bonum verò ipsum tibi satis est absque dubio, non enim ob aliam rationem requiris quodlibet, nisi quia bonum. Bonum igitur ipsum procreator tuus est anima, non bonum corpus, non bonus animus, non bonus intellectus, sed bonum. Bonum quod quidem in seipso consistit, extra subiecti limites infinitum, infinitamque tibi tribuit vitam, vel ab æuo in æuum, vel saltem ab initio quodam in sempiternum. Boni faciem intueri desideras? mundum conspice vniuersum, Solis lumine plenum. Lumen conspice in materia mundi plenum omnibus rerum omnium formis, atque volubile, subtrahe materiam, relinque cætera. Habes animam in corporeum lumen, omniforme, mutabile. Demerulus huic mutationem, es iam intellectum Angelicum consequuta, incorporeum lumen, omniforme, immutabile. Detrahe huic eam diuersitatem per quam forma quælibet diuersa est lumine, & aliunde infusa est lumini, ita ut eadem luminis & formæ cuiusque essentia sit, lumenque ipsum sese formet, perque formas suas formet omnia. Lumen hoc infinitè lucet, quia natura lucet sua, neque alterius mixtione inficitur, vel contrahitur, per omnia est, quia in nullo, in nullo est propriè ut æquè per omnia fulgeat. Viuit ex se, & vitam præstat cunctis, quandoquidem vmbra eius qualis est lux ista Solis, sola incorporealis est viuifica. Sentit quælibet, sensumque largitur, si vmbra eius sensus omnes omnibus excitat. Amat denique singula, si maximè sua sunt singula. Ergo qui Solis est lumen? Vmbra Dei: Ergo quid Deus est? Sol Solis est Deus, Solis lumen est Deus in corpore mundi, Deus est Solis lumen super Angelicos intellectus. Talis vmbra mea est, ô anima, ut rerum omnium corporalium pulcherrima sit. Qualem esse meam lucem existimas? Si tantum mea lucet vmbra, quantum lux mea fulget? Amas lucem vbique præ cæteris, imò solam? Ama me solum, solam, ô anima, lucem infinitam, lucem me, inquam, infinitè ama, fulgebis iam, & oblectaberis infinitè. ANIMA. O rem miram, quæ admirationem ipsam exuperat!

Quis nunc me insolitus vit ignis? Quis mihi Sol nouus, & vnde subrutilat? Quis nam, & vnde tantus, & tam dulcis spiritus meas modo medullas pungit, & mulcet? mordet & lambit, stimulat, & titillat, quàm amara dulcedo hæc est? Cogitare quis possit, etiam amara dulcedo, quæ me liquefacit penitus & euiscerat. Cuius comparatione, quæue sublata, amara mihi vel quæ dulcissima sunt videntur. Quam dulcis amaritudo quæ me dilaniatam conglutinat & reintegrat, quæ cum mihi vel amarissima quæque dulcescunt. Quàm necessaria voluntas hæc est, cum bonum ipsum nolle non possim, & aliud quodlibet vitare potius valeam, vel differre, quam boni aueritatem. Nam & si hanc vitare voluero, non nisi quia deuitationem ipsam bonam existimauerim, deuicare tentabo, quam rursus voluntaria huiusmodi necessitas est. Cum nihil magis voluntarium sit quam bonum, propter quod omnia, imò quod in omnibus ubique volo, & ita volo, vt velim insuper non posse nolle, quam viua mors ista est, quis cogitet, per quam in me morior, in Deo viuo, per quam morti morior, vitæ viuo & viuo vita, & gaudeo gaudio. O voluptatem super sensum. O lætitia super animum. O gaudium super mentem. Sum equidem nunc extra mentem, neque amens tamen, quia super mentem. Furo rursus, furo nimium, neque præcipitor tamen, quia tollor in altum. Gestio nunc vndique totus, & diffuso, neque dispergor tamen, quia me colligit mecum, quia me viuit secum. Deus vnitas vnitatum. Exultate igitur nunc mecum omnes quorum Deus exultatio est. Deus meus obuius factus est mihi, Deus vniuersi amplexus est me. Deus Deorum meas modo medullas illabitur. Iam iam alit me Deus ipse totam, & qui genuit me regenerat. Genuerat animam, reformat in Angelum, conuertit in Deum, quam ego gratiam tibi referam, ô gratia gratiarum? Tu ipse doce me gratia gratiarum, doce precor & præsta. Gratia denique tibi met, Deus ipse tu, Deus esto.

*Lex & Iustitia.*

MARSILIUS FICINVS

Octoni Nicholino, Benedicto Arcetino, viris consultis, Petro Pactio & Bernardo Iunio Equitibus, S. D.

**P**ersuasistis mihi vt Græcas Platonis leges Latinas efficerem, ad idem cohortans est me etiam magnus Cosmus Itaque feci iam, atque eo libentius; quod arbitra-

bar ciuitati magis optis esse optimis viris consultis quam mercatoribus bonis aut Medicis. Ac tanto magis profuisse Græcis Minoen quàm Galenum, quanto animas præstantior est quàm corpus, aut spiritus, & æterna vita quàm temporalis. Mercatura quippè corpus, Medicina spiritus, lex anima ciuitatis esse videtur, & quamuis multæ videantur esse leges in ciuitate, non tamen multæ sunt ciuitatis animæ. Sicut enim multæ artes, varique ciuium gradus, non plures ciuitates, sed vnicam faciunt si ad finem eundem simili ratione proficiscantur, ita quamuis multæ sint magistratuum constitutiones in vrbe, vnica tamen est publica lex, communis, scilicet, rectè viuendi regula, ad publicam conducens felicitatem. Ad hanc legem Deus nos & natura præparant, constitutiones cohortantur, Deus vnicus denique format. A diuina enim lege, tum lex syderum, tum lex hominum proficiscitur. Quamobrem omnes legum conditores partim Moseri, tanquam sumæ, imitati diuinarum legum verissimum authorem, partim nescio quomodo veritate compulsi, à Deo leges se habuisse sub variis figmentis affirmauerunt, Ægyptiorum legumlator Oфирis à Mercurio, Zautraftes apud Arimaspas à bono numine, Xamolxis apud Scythas à Vesta, Minos Cretensis & Solon Atheniensis ab Ioue, Lycurgus Lacedæmonius ab Apolline, Numa rex Romanorum à Nympha Egeria, Mahumetes rex Arabum ab Angelo Gabriele, noster Plato legum libros exorditur à Deo, quem esse ait communem legum omnium conditorem, quod etiam in Dialogo qui Prothagoras inscribitur, confirmauit, dicens, artes illas quæ ad victum pertinent à Prometheo, hoc est, humana prouidentia nobis traditas esse, Legem verò bene feliciterque viuendi ab Ioue, id est, diuina prouidentia per Mercurium, hoc est, inspirationem Angelicam, fuisse concessam. Non possum amici optimi viri legis non admirari. Legis siquidem ordo & concentus aliquis necessarius est in elementis mundi animalisque humoribus, in brutorum victu, in conturbatio quoque latronum, hi enim absque iusto quodam ordine vna versari non possunt. Quid autem dicemus ad hoc quod cum apud inferos alia nulla sit virtus, non desunt illic tamen lex & iustitia, quam pro meritis improbos puniant, & cum inter beatos non sint virtutes illæ morales amplius necessariae, quæ ad sedatas corporis sensuumque perturbaciones mortalibus conferunt, à quibus liberati iam sunt qui beata vita fruuntur, lex tamen inter eos & iustitia vigent, quæ pro dignita-



te singulos æternis afficiunt præmiis seruantque beatos. Valere felices.

*De diuino furore.*

MARSILIVS FICINVS

Peregrino Alio, S. D.

**T**ertio calendæ decembres Ficinus Medicus pater meus duas Epistolas tuo nomine ad me Fighinium attulit, alteram quidem soluta oratione scriptam, verbis alteram, quibus profectò legendis effectum est ut nostris temporibus admodum gratuler, quòd cum adolescētem protulerint, cuius fama & gloria illustrari possint. Equidem Peregrine mi suauissime, cum ætatem tuam pariter, & ea quæ abs te quotidie proficiscuntur considero, non solum tantis amici bonis gaudeo, verum etiam vehementer admiror, atque haud scio, ut recentiores istos omittam, quis nam è priscis illis quorum memoriã veneramur, tantum in ea qua tu nunc es ætate profecerit, id verò non arti modo ac studio, sed & multo magis diuino illi furori, sine quo quẽquam magnum vnquam fuisse virum, Democritus ac Plato negant, adscribo. Quo te afflari, ut ita dixerim, ac penitus corripì, concitatiores quidam motus affectusque ardentissimi, quo scripta tua exprimunt, argumento esse possunt, atque hanc ipsam quæ externis motibus fit concitationem, potissimum Philosophi veteres argumentum esse voluerunt vim quandam in animis nostris esse diuinam. Sed quoniam à nobis de furore mentio facta est, ea de re Platonis nostri sententiam paucis, & ea breuitate quam Epistola exigit referam, ut quid furor sit, quot in partes deducatur, & quis cuique furori Deus præsit facillè intelligas, quod quidem tum voluptati, tum etiã vtilitati maximè tibi fore confido. Cēsset igitur ille animum nostrum priusquam in corpora laberetur, ut etiam Pythagoras, Empedocles, atque Heraclitus antea disputauerant, in coelestibus sedibus extitisse, vbi veritatis contemplatione, ut Socrates in Phædro inquit, nutriebatur atque gaudebat. Cumque ij quos paulo ante memorauì Philosophi, Deum summum fontem quandam ac lumen, in quo rerum omnium exemplaria, quas ideas nomināt, elucescant, esse à Mercurio Trismegisto Ægyptiorum omnium sapientissimo didicissent, necessarium fore putabant animum æternam Dei mentem assidue contemplantem, rerum quoque omnium naturas clarius intueri. Videbat igitur animus, inquit Plato, ipsam iustitiam, videbat sapientiam, videbat harmoniam, & quandam diuinæ naturæ mirabilem pulchritudinem, atque has omnes tum ideas, tum di-

uinās essentias, tum primas naturas quæ in æterna Dei mente sint, nominat, quarum perfecta quadam cognitione hominum mentes quamdiu illic degunt feliciter nutriantur. Cum verò ob terrenarum rerum cogitationem appetitionemque animi ad corpora deprimuntur, tunc qui prius ambrosia ac nectare, id est, Dei cognitione perfectoque gaudio nutriebantur, continuo in ipsa descensione flumen letheum, id est, obliuionem diuinorum haurire dicuntur, nec prius ad superos, vnde terrenæ cogitationes pondere deciderant, reuolare, quam diuinās illas, quarum obliuionem susceperant, naturas recogitare cœperint, id autem duabus virtutibus, ea videlicet quæ ad mores, ea insuper quæ ad contemplationem pertinent assequi nos Philosophus ille diuinus existimat, quarum alteram cōmunivocabulo iustitiam, alteram verò sapientiã nominat. Quapropter geminis, inquit, alis, has, mea quidem sententiã, virtutes intelligens animos ad superos euolare, easque duabus similiter Philosophiæ partibus, actiua, scilicet, & contemplatiua cōsequi nos in Phædone Socrates differit. Vnde ipse idem in Phædro sola, inquit, Philosophi mens recuperat alas. In hac autem ipsa alarum recuperatione abstrahi à corpore illarum vi animum Deoq; plenū ad superos trahi, ac vehementer anniti. Quam quidem abstractionem ac nixum, Plato diuinum furorē nuncupat, eumq; quatuor in partes distribuit, ueque enim diuinorum putat vnquam homines reminisci, nisi quibusdam eorū quasi vmbreis atq; imaginibus quæ corporis percipiuntur sensibus, excitentur. Itaq; Paulus ac Dionysius, Christianorū Theologorum sapientissimi, inuisibilia Dei asserunt per ea quæ facta sunt, quæque hic cernuntur intelligi, diuinæ verò sapientiæ imaginem esse Plato vult hominum sapientiam. Diuinæ harmoniæ imaginem hanc ipsam quam vocibus instrumentisque Musicis fingimus harmoniam, diuinæ autem pulchritudinis eam quæ ex partium membrorumque corporis aptissima compositione conficitur, conuenientiam venustatemque imaginem esse censet. Cum verò sapientia nullis, aut certe perpaucis hominibus adsit, nec ullis corporis sensibus comprehendatur, efficitur ut diuinæ sapientiæ similitudines apud nos perpaucae sint, & hæ quidem sensibus nostris occultæ ac prorsus ignotæ. Quapropter Socrates in Phædro simulachrum, inquit, sapientiæ oculis cerni nullo modo posse, quod si cernatur, mirabiles amores diuinæ illius cuius id simulachrum est, penitus excitaturum.

At verò pulchritudinis diuinæ similitudinem oculis cernimus, harmoniæ verò imaginem auribus annotamus, quos Plato sensus omnium qui per corpus fiant perspicacissimos arbitratur, quo sit ut iis quæ corporibus in sunt, quibusdam quasi simulachris in animum per sensus corporis haustis reminiscamur, quodammodo rerum earum quas extra corporis carcerem constituti antea noneramus. Qua quidem recordatione exardescit animus alasque commouens, iamjam à corporis cogitatione, sordibusque sese paulatim emaculat, diuinoque furore prorsus afficitur, atque iis duobus sensibus quos paulo ante commemoravi geminæ furoris species excitantur. Etenim pulchritudinis specie quam oculi porrigunt, veræ atque intelligibilis pulchritudinis quandam quasi recordationem recuperantes, eam ineffabili occultoque mentis ardore desideramus, hunc denique Plato diuinum amorem vocitat eum, diffiniens, profectum ex aspectu corporeæ similitudinis, desiderium ad contemplandam rursus diuinam pulchritudinem redeundi. Præterea necesse est eum qui sic afficitur non modo supernam illam pulchritudinem desiderare, verumetiam eius quæ oculis patet, aspectu admodum delectari. Sic enim natura institutum est, ut qui aliquid appetit, eius quoque similitudine delectetur, at illud crassioris ingenij corruptionisque naturæ proprium esse putat, si quis vñbras dumtaxat verè illius pulchritudinis concupiscat, nec aliud quicquam præter illam quæ oculis offertur speciem admiretur, hunc enim eo amore, cuius petulantia atque lasciuia comes est, affici vult, eum diffiniens irrationalem atque insolentem eius quæ sensu percipitur circa corporis formam voluptatis cupidinem, & aliter hunc amorem diffinit ardorem animi, proprio quodammodo in corpore mortui in alieno viventis. Vnde amantis animum, inquit, in alieno corpore vitam ducere. Quod imitantes Epicurei, amorem diffiniunt nexum quandam corpusculorum, quas atomos vocant, sese ei, à quo simulachra pulchritudinis hausta sunt, penitus infundendi.

Huiusmodi Plato noster amorem ab humanis morbis nasci dicit, & cura solitudineque plenum esse, cumque iis hominibus convenire, quorum mens adedò tenebris offusa sit, ut nihil altum, nihil omnino egregium, nihil præter fragilem ac fluxam corpusculi huius imaginem cogitet, nec auras respiciat, clausa tenebris &

carcere cæco. At quibus ingenium à corporis luto abstractum est atque absolutum, eiusmodi sunt, ut cum corporis cuiuspiam forma venustasque obicitur eius primo aspectu, utpote diuinæ pulchritudinis similitudine, delectentur. Verum ex hac imaginatione statim in memoriam diuinam illam reducant quam imprimis admirentur, ac verè desiderent, cuiusue ardentissimo desiderio ad supera raptantur. Atque hunc primum euolandi conatum diuinam Plato alienationem furoremque nuncupat. Hæc iam de eo furore quem per oculos fieri diximus satis esse videntur, per aures verò concentus quosdam numerosque suauissimos animus haurit, hisque imaginibus admonetur atque excitatur ad diuinam Musicam, acriori quodam mentis & intimo sensu considerandam.

Est autem apud Platonicos Interpretes diuina Musica duplex, alteram profectò in æterna Dei mente consistere arbitrantur, alteram verò in cœlorum ordine ac motibus, qua mirabilem quandam coelestes globi orbisque concentum efficiunt, utrisque verò animum nostrum, antequam corporibus clauderetur, participem extitisse, verum iis in tenebris auribus velut rimulis quibusdam ac cunctis utitur, hisque imagines, ut sæpè iam diximus, Musicæ illius incomparabilis accipit. Quibus in eius quæ antea fruebatur harmonia, intimam quandam ac tacitam recordationem reducit, totusque desiderio feruet, cupitque ut vera Musica rursus fruatur, ad sedes proprias reuolare, cumque id se quamdiu tenebroso corporis habitaculo circumscripta est, adipisci nullo modo posse intelligat, eam cuius hic possessione frui nequit, nititur saltem pro viribus imitari. Est autem hæc apud homines imitatio duplex. Alij namque vocum numeris variorumque sonis instrumentorum coelestem Musicem imitantur, quos certè leues ac penè vulgares Musicos appellamus, nonnulli verò grauiori quodam firmiterque iudicio diuinam ac coelestē harmoniam imitantes, intimæ rationis sensum notioneisque inuersum, pedes ac numeros digerunt, hi verò sunt qui diuino afflati spiritu grauissima quædam, ac præclarissima carmina ore, ut aiunt, rotundo prorsus effundunt. Hanc Plato grauiorem Musicam Poësimque nominat, efficacissimam harmoniæ coelestis imitatricem, nam leuior illa de qua paulo ante mentionem fecimus, vocum dumtaxat suauitate permulcet, Poësis autem, quod diuinæ quoque harmoniæ proprium est, vocum ac motuum numeris grauissimos quosdam,

& ut Poëta diceret, delphicos sensus ardentius exprimit, quo fit ut non solum auribus blandiatur, verum etiam suauissimum & ambrosia coelestis simillimum menti pabulum afferat, ideoque ad diuinitatem propius accedere videatur. Oriri verò Poëticum hunc furorem à Musis existimat, qui autem absque Musarum instinctu Poëticas adfores accedit, sperans quasi arte quadam Poëtam se bonum euasurum inanem illum quidem atque eius Poësim esse censet, eosque Poëtas qui coelesti inspiratione ac virapiuntur, ad eò diuinos sæpenumero Musis afflatos sensus expromere, ut ipsimet postmodum extra furorem positi quæ protulerint minus intelligant.

Atque ut arbitror, Musas diuinus ille vir coelestes cantus intelligi vult, ideoque canoras & canenas à cantu appellatas esse dicunt. Vnde Musis, id est, coelestibus numinibus atque cantibus diuini homines conciti, ad eorum imitationem Poëticos modos ac numeros meditantur. Itaque in Republica Plato cum de sphaerarum coelestium volubilitate tractaret, singulas ait Sirenas, singulis ordinibus insidere, significans sphaerarum motu, ut Platonici quidam inquit, cantum numinibus exhiberi. Nam Siren Deo canens Græcè rectè exprimitur, Theologi quoque veteres nouem Musas, octo sphaerarum Musicos cantus & vnā maximā quæ ex omnibus conficitur harmoniam esse voluerunt. Hac igitur ratione Poësis à diuino furore, furor à Musis, Musæ verò à Ioue proficiuntur. Nam mundi totius animum sæpenumero Iouem Platonici nuncupant, qui cælum ac terras, camposque liquentes, lucentemque globum Lunæ, Titaniaque astra intus alit, totamque infusus per artus agit molem, & magno se corpore miscet. Ex quo efficitur ut à Ioue totius mundi spiritum ac mentem, quomodo coelestes mouet sphaeras atque regit, earundem quoque cantus Musicis, quas Musas nuncupant, oriantur. Quapropter Platonici ille clarissimus, Ab Ioue principium Musæ, Iouis omnia plena, quoniam & vbique ille animus, qui Iupiter dicitur, viget, atque implet omnia, & cælum quasi citharam quandam, ut Alexander Milesius Pythagoricus inquit, exagitantem coelestem efficit harmoniam, itaque Orpheus vates ille diuinus, Iupiter, inquit, primus est, Iupiter nouissimus, Iupiter caput, Iupiter medium, vniuersa autem Ioue nata sunt, Iupiter fundamentum terræ ac cæli stelliferi, Iupiter prodiit masculus, Iupiter incorruptibilis sponsa, Iupiter spiritus spe-

ciisque omnium, Iupiter radix ponti, Iupiter indefessi ignis motus, Iupiter Sol & Luna, Iupiter rex & princeps omnium, abscondens lucem, rursus emisit ex alto corde operans cogitata. Ex quibus intelligitur Iouem omnibus infusum corporibus continere, atque alere cuncta, ut non immerito dictum sit, Iupiter est quodcunque vides, quodcunque moueris.

Sequuntur post hæc reliquæ furoris diuini species, quas ille bifariam diuidit, earumque alteram circa mysteria, alteram circa futurorum euentus, quod vaticinium vocat, versari putat. Primum quidem furorem definit, vehementiorem animi concitationem, in iis quæ ad Deorum cultum, religionem, expiationem, sacrasque ceremonias pertinent perficiendis. Affectum verò mentis, qui eiusmodi furorem falso imitatur, superstitionem nominat. Postremam verò furoris naturam, in qua vaticinium ponit, nihil aliud esse putat, nisi diuino afflatu inspiratam præfensionem, eamque proprii vocabulo, diuinationem ac vaticinium nominamus. Quod si animus in ea ipsa diuinatione acrius exarserit, furorem nuncupat; cum mens à corpore abstracta diuino instinctu concitatur. Si quis autem humana potius solertia, & sagacitate, quā diuina infusione futura præuiderit, huiusmodi præfensionem, prouidentiam coniectiōemque appellandam censet. Ex iis omnibus iam perspicuum est quatuor diuini furoris species esse. Amorem, poësim, mysteria, vaticinium. Amorem diuinum, amor ille alter vulgaris penitusque insanus, falso imitatur; poësim, leuior, ut diximus, musica, mysteria superstitio, diuinationem coniectio. Primum quidem furorem Veneri, alterum Musis, tertium Dionysio, postremum Apollini apud Platonem Socrates tribuit. Cæterum, in eo furore qui ad amorem diuinum poësimque pertinet, describendo duabus de causis longior esse malui, quod videlicet utroque te affici vehementer agnoui, & ut memineris quæ à te scribuntur ab Ioue Musisque, quarum spiritu ac diuinitate compleris, non abs te proficisci. Quapropter, o mi Peregrine, iuste pieque feceris, si tu ut hactenus, te egisse arbitror, maximarum optimarumque rerum, nec te, nec alium omnino quemquam hominum, sed immortalem potius Deum authorem ac principium esse cognoueris. Vale, ac tibi persuade nihil mihi te charius esse. Fighini Calend. Decembris, M. CCCC. LVII.

*Excusatio prolixitatis.*

MARSILIVS FICINVS  
Magno Cosmo, S. D.

**L** Laurentius Pisanus sacerdos exponit tui gratia Salomonis Canticum Cantorum, atque octo & decem iam libros, si rectè memini, pro vnus libelli expositione, composuit. Si miraris Cosme quòd tam prolixè loquatur Laurentius, cum Salomon tam breuiter sit loquutus, respondeo ob hoc ipsum cogi Laurentium fore prolixum, quia Salomon breuissimus fuit. quanto enim magis Salomonis nodus implicatus est, tanto pluribus ad explicandum opus est machinis. Laudat Laurentij scripta Nicolaus Fignosius Fulginas insignis Philosophus, probo & ego, licet à prolixitate soleam abhorrrere. At ideo non videtur mihi opus illud nimis magnum, quia nihil fermè in Theologia magnum reperio, quod non illuc ille congefferit, sed ne ego quoque dum prolixitatem excuso sim prolixior. Vale.

*De diuinatione & diuinitate animæ.*

MARSILIVS FICINVS  
Florentinus Matthæo Corsino con-  
philosopho suo, S. D.

**A**lexandra mater mea nata est ex patre Ioanne & matre Angela. Alexandra Fighini erat, Ioannes Iuarchij opido, Angela verò Florentiæ. Hæc ad Ioannem & Alexandram scripsit se bene valere, ac die sequenti redituram. Illi lectis literis, & nocte facta dormientes, Angelam viderunt eadem hora ambo. Alexandræ quidem in vestibulo domus apparuit, & cum filia matri tanquam reuertenti congratularetur, mater filiz amplexus effugiens, vale, ait, & da operam, vt pro me sacerdotes Deum orent. Ioanni autem, inquit, ô quantum fortunam tuam doleo mi Ioannes, vale, & iube pro me Deum orari. Repente ambo iis visis excitati exclamauerunt, eam mortuam iudicantes. Florentiam miserunt. Renuntiatum est illam ea nocte, ex hac vita migrasse. Miraris hæc Corsine, audi & aliud æquè mirandum, mater mea filium statim natum nutrici rusticæ tradidit, decima septima inde die dormiens meridie, videtur ipsa sibi maxima cordis anxietate premi, atque à matre sua iam pridem mortua subleuari, dicente, noli te afflictere filia, sequenti die rustici ad eam filium à nutrice suffocatum referent. Mitto quòd som-

nians præuidit futurum mariti eius Ficini Medici casum ex equo, & locum vbi casurus erat, & singula mitto, & alia multa, satis verò sit ad præsens duo illa superiora narrasse. Ex quibus duo præcipuè confirmari videntur, vnum videlicet animas hominum quæ propter temperatam complexionem, vitæ puritatem, sui abstractionem à corpore, quodammodo separantur, quamplurima diuinare, vt pote quæ natura sua diuinæ sunt, & quando in se reuertuntur, suam exercent diuinitatem, alterum verò animas defunctorum solutas à corporum vinculis nosse nonnihil & humana curare. Quod Hesiodus cecinit, & Plato noster in legibus confirmauit. Hos autem Heroas omnis antiquitas appellabat. Vale.

*Modus laudis absque adulatione.*

MARSILIVS FICINVS  
Francisco Castilionensi Theo-  
logo, S. D.

**L**Egi expositiones tuas circa Davidis Prophetæ mysteria. Cupio exclamare Franciscæ, sicut Deus Davidem reperit virum secundum cor suum, ita Davidem te virum secundum suum cor reperisse. Sed vbi adulationis suspicamur opinionem, innuere præstat quàm explicare. Saluta Georgium Antonium Vespucium virum humanitate doctrinaque insignem. Vale.

*Solitaria vita vtilitas.*

MARSILIVS FICINVS  
Gregorio Epiphanio sacerdo-  
ti, Conphilosopho  
suo, S. D.

**D**Eus vnitas stabilis est, & status vnicus. Hæc à Platoniciis nostris, vt te non latet, subtiliter disputantur. Quisquis igitur Deum assequi vult, multitudinem pro viribus motumque deuiter. Secedamus ergo mi Gregori in vnicam stabilemque mentis speculam, illucescet nobis illic protinus, vt Plato inquit, inuisibile lumen. Verum vt commodius hoc iis temporibus efficere continuareque valeamus, statui tempus aliquod montem Vechium illum mihi à magno Cosmo donatum colere, illic tu mecum eris. Audisti prouerbum illud, nullius boni possessionem absque socio iucundam esse. Ego autem nescio quem socium illic iis temporibus iucundiorum te possim habere. Vale & ad nos vola.

*De modestia componendi.*

## BESSARION CARDINALIS

Sabinus, Marfilio Ficino Platonico, S. D.

**S**pectate doctæque vir, amice noster, superioribus literis elucubratum opus nostrum & nuper æditum, in defensionem Platonis, nos ad te missuros promissimus, cum ob ingenium tuum & Platonica doctrinæ studium eximium, tum ut quid nos ex illo fonte hauserimus, facile perspicias, & legas, si quid enim in hac industria nostra, vel eloquentiæ, vel bonarum artium cognitionis eluxit, siquid fuimus, id omne vel nos ab illo accepisse, vel ipsum sibi se defendendo suppeditasse facile existimari patimur & volumus, quod nonnihil quoque ad illius laudem pertinere videtur, ut suis viribus, sua amplitudine, causam pro se dixerit, alieno auxilio non eguerit, voci tantum patroni locum reliquerit, ac studio, hunc librum ad te dedimus, iis qui curam gerunt rerum illarum ex Medicis, quo mittendo cum fidei & promisso nostro, omnino tum studiis tuis, atque animo erga Platonem nonnihil satisfactum esse putamus Bene vale, & an librum acceperis nos facies certiores. Ex vrbe Idibus Sept. M. cccc. lxiix.

*De laude Platoniorum Interpretum.*

## MARSILIVS FICINVS

Florentinus, Bessarioni Græco, Cardinali Sabinino, S. D.

**P**lato noster, venerande pater, cum in Phædro, ut te non laret, subtiliter & copiose de pulchritudine disputasset, Pulchritudinem animi à Deo, quam sapientiam, & aurum appellauit pretiosissimum, postulauit, aurum hoc Platoni à Deo tributum, Platonico in sinu utpote mundissimo fulgebat clarissimè. Verbis autem & literis licet luculentissimus, mente tamen obscurioribus inuolutum euasit obscurius, & quasi terreno quodam habitu obsitum, eos homines lauit, qui linces oculos non habeant.

Quamobrem nonnulli quondam miniores Philodoxi exteriori gleba decepti, cum non possent ad intima penetrare, latentem thesaurum contemnebant. Verum in Plotini primum, Porphyrij deinde, & Iamblici, ac denique Proculi, officinam aurum illud iniectum, exquisi-

tissimo ignis examine excussis arenis eruit, usque adeò ut omnem orbem miro splendore repleuerit. Tantis utique radiis noctuæ siue bubones quidam, ut videtur, offensi, sacrum illum Platonis nostri thesaurum non solum spernere, ut nonnulli quondam, sed prohi nefas! improbare ceperunt, quod multo erat priori errore deterius. Verum Bessarion Academiae lumen, medelam confestim hebetibus & caligatis oculis adhibuit saluberrimam, ut aurum illud non solum mundum sit & splendidum, verum etiam tractabile manu oculisque innoxium. Hoc vaticinatus Platon, fore tempus multa post sæcula, regi Dionysio inquit, quo Theologiæ mysteria exactissima discussione velut igne aurum purgarentur. Venerunt, iam venerunt sæcula illa Bessarion, quibus & Platonis gaudeat & numen & nos omnis eius familia summopere gratulamur. Vale.

*Exhortatio ad scientiam.*

## MARSILIVS FICINVS

Antonio Pacio. S. D.

**L**aurentius Medices, duo in te laudat præ cæteris, magnificentiam & acumen, laudo & ego. Sed Antonia magnificentia quidem usu comparare tibi cæteros potes, acuminis autem exercitatione comparare tibi teipsum, si tantum doctrinæ studueris quantum liberalitati iamdudum indulges, non dubito breui te ita omnium doctissimum fore, quemadmodum nunc es magnificentissimus omnium. Age precor Antonimi suauissime, commenda te ipsum tibi, sicuti cæteros commendatos habes. Laurentius noster ait te non modo erga doctos magnificum esse, verum etiam abundè doctum. Credo equidem atque gratulor. At non prius satis mihi feceris quam tantum scientia quantum magnanimitate excelleris, si tibi eruditissimi quique in primis placent, da operam, ut tibi ipse præ cæteris placeas. Quid ergo toto in omnibus plurimum, imò totum valet, stante oro tibi quotidie horas quatuor reliquas, ut cunq̃ placeat, amicis dona. Bene Vale, sed vis ne valere bene? Bene disce, & disce precor hodie, qui cras discit nunquam discit. viii. Nouemb. M. cccc. lxxiii.



*Consolatio in alienius obitu.*

MARSILIVS FICINVS

Sismundo Stufæ consolacionem dicit.

**S**I quisque nostrum id maximè est, quod sin nobis est maximum, quod permanet semper idem, qua nos ipsi capimus, certè animus homo ipse est, corpus autem est hominis umbra. Quisquis igitur usque adeò delirat, ut hominis umbram, hominem esse putet, hic miser in lachrymas instar Narcissi resolvitur. Tunc desines Sismunde flere, cum desueris Alberiam tuam Albitiam in nigra eius umbra querere, atque coeperis eam in alba sui luce sectari. Tunc enim illam tanto reperiēs pulchriorem quam consueueris, quanto ab umbra deformi remotiorem. Secede animum tuum precor, ibi animam illius speciosissimam tibi que charissimam possidebis. Imò ex animo tuo in Deum te recipe, illic ideam pulcherriam, per quam diuinus artifex Alberiam tuam creauerat, contemplabere. Et quanto formosior illa in opificis forma est quam in seipsa, tanto eam ibi beatius amplecteris. Vale, I. Augusti. M. CCC. LXXIII. Florentiæ.

LAUS BREUITATIS.

MARSILIVS FICINVS

Angelo Politiano, Poëtæ  
Homerico, S. D.

**C**ircunferuntur, ut ais, Epistolæ quædam meo nomine quasi Aristippicæ, & quadam ex parte Lucretianæ, potius quàm Platonici, si meæ sunt, Angele, non sunt tales, si tales, non sunt meæ illæ quidem, sed à detractoribus meis confictæ, ego enim à teneris annis diuinum Platonem, quod nullus ignorat, sectatus sum. Sed facile hoc signo scripta nostra discernes ab alienis; in Epistolis meis sententia quædam semper pro ingenij viribus aut Moralis, aut Naturalis est, aut Theologica. Quod si quid interdum quodammodo amatorium inest, Platonicum illud quidem & honestum, non Aristippicum, & lasciuum. Laudes autem veræ & tales, ut exhortentur atque admoneant, non adulentur, verba penè nulla superflua, statui enim ab initio studiorum meorum semper quam breuissimè possem scribere, nam in tanta temporis breuitate le-

qui superflua Philologi, potius quam Philosophi. Et cum paucissimi sint quibus multa sint nota, sæpè qui multa loquuntur, aut falsa, aut superflua loquuntur, aut utraque. Omnia hæc à viri dignitate aliena, à Philosophi professione alienissima. Vale.

*Quantum vile sit alere doctos.*

MARSILIVS FICINVS

Laurentio Medici, viro magnanimo, S. D.

**D**iuites alij, fermè omnes, Ministros nutriunt, tu sacerdotes Musarum nutris. Perge precor, mi Laurenti, nam illi voluptatum serui euadent, tu verò Musarum delitiæ, summus Musarum sacerdos Homerus in Italiam te duce venit, & qui hæcenus circumuagus & mendicus fuit, tandem apud te dulce hospitium apertum reperit. Nutris domi Homericum illum adolescentem Angelum, Politianum qui Græcam Homeri personam Latinis coloribus exprimat. Exprimit iam, atque id quod mihi est, in tam tenera ætate ita exprimit, ut nisi quis Græcum fuisse Homerum nouerit, dubitaturus sit, è duobus, vter naturalis sit, & vter pictus Homerus. Delectare iis pictoribus Medices, ut coepisti, nam cæteri pictores parietes ad tempus ornant, hi verò in æuum habitatores illustant.

*Laus opificis non à verbis, sed ab opere.*

MARSILIVS FICINVS

Laurentio &amp; Iuliano Medicis, S. D.

**A**ccipite lato animo Medices, Naldi Florentini Poëma, & Benedicti Coluccij Pistoriensis declamationes. Alter est Phœbi delitiæ, alter Mercurij comes. Non libet eos parè laudare, cum videantur supra modum esse laudandi. Non libet eos mihi laudare multum, ne laudatores laudando meos, meipsum extollere videar. Tacebo igitur ego horum pictorum virtutes, inspicite ipsi tabulas diligenter, pictura loquetur, cum loquitur pictor, loquitur malè, cum pictura loquitur, bene loquitur. Vanus est opifex qui ab alio magis quàm ab ipso opere expectat honorem, non pendet operis virtus ex iudice, sed opus iudici commendat artificem. Valere.

Ecc ij

*De virtutibus civilibus purgatoriis, purgati  
animi exemplaribus.*

MARSILIVS FICINVS

Francisco Lapaccino, & Megliori Crescio, S. D.

**I**lli Deum quærunt rectissimo calle, qui primo per civiles virtutes affectus animæ nimium luxuriantes aliquantum amputant. Demum per virtutes purgatorias eos penè ad viuum vsque rescant. Tertio loco per virtutes animi tam purgati proviribus radicibus illos extirpant. Quibus quantum homini possibilem esse eradicatis denique virtutibus exemplaribus quæ sunt in Deo formantur: nam tria illa vitutum genera gradus quidam sunt, quibus paulatim ad diuinas virtutes accedimus. Omnis autem naturalis motus finem suum aliquando potest attingere, & omnis præparatio quæ naturaliter ordinatur ad formam, & formam ipsam aliquando consequi potest.

*De sapiente & felice viro.*

MARSILIVS FICINVS

Antonio Seraphico Conphilosopho Miniatenfi, S. D.

**V**irum sapientem foelicemque cum puto, qui cum ex solo pendeat Deo, in mediis calamitatibus viuit lætus. Quem nec metus exanimat, nec dolor excruciat, neque voluptas corrumpit, neque libido inflamat. Qui inter densissimas spinas, molles speciososque flores legit, qui ex stercore margaritas eruit atque effodit, qui in profundis videt tenebris, qui compedibus grauatus & vinculis circumstrictus veluti liber solutusque percurrit, quem denique spiritus coelestis afflauerit. Imitare igitur, ut coepisti, Pythagoram, & Socratem, & Platonem, qui non minus agendo quam disputando, inuita etiam fortuna, philosophabantur. Philosophiam quam multi lingua, ipsi pectore toto colebant. Frustra sapit Seraphice qui non sibi ipse sapit. Vale & in tuis moribus persevera.

*Bona scribere re præstat quam multa.*

MARSILIVS FICINVS

Angelo Politiano Poëtæ Homericæ, S. D.

**Q**uid toties quæris librorum meorum titulos Angele? An fortè ut mis

me carminibus laudes? at non in numero sed in electione laus, non in quantitate, sed in qualitate bonum. An potius ut mea apud te habeas omnia. Quoniam amicorum omnia communia sunt, utcumque sit, accipe quod petieras. E Græca lingua in Latinam trāstuli Proculi Platonici Physica & Theologica elementa, Iamblici Chalcidei libros de secta Pythagorica quatuor, Theonis Smyrnei Mathematica, Platonicas Speusippi definitiones, Alcinoi Epitoma Platicum, Zenocratis librum de mortis consolatione, carmina symbolaque Pythagoræ, Mercurii Trismegisti librum de Potentia & Sapientia Dei, Platonis libros omnes. Composui autem commentarium in Euangelia, Summo bono, commentarium in Platonis conuiuium de amore, Composui Physiognomiam, Declarationes Platicæ disciplinæ ad Christophorum Landinum, quas postea emendaui, compendium de opinionibus Philosophorum circa Deum & animam, Oeconomica, de Voluptate, de quatuor Philosophorum sectis, de magnificentia, de felicitate, de iustitia, de furore diuino, de consolatione parentum in obitu filij, de appetitu, orationem ad Deum Theologicam, Dialogum inter Deum & animam Theologicum, Theologiam de Immortalitate animorum in libros octo decemque diuisam, opus de Christiana religione, disputationes contra Astrologorum iudicia, de raptu Pauli in tertium cælum, de lumine, argumentum in Platicam Theologiam, de vita & doctrina Platonis, de mente quæstiones quinque, Philosophicum Epistolarum volumen. Vtinam Angele, tam bene quam multum scripserimus, ut tantum ceteris nostra placeant, quantum ego tibi tuque mihi. Vale.

*Exhortatio ad scientiam.*

MARSILIVS FICINVS

Nicolao Albitio, S. D.

**A**vdisti prouerbum illud mi Nicolae, nihil lucro dulcius. At quis hominum lucratur? Qui quod suum futurum est adipiscitur, nostrum est quod scimus, cætera verò fortunæ. Inuideant homunculi diuitibus, quorum arca diues est non animus. Tu æmulare doctos bonosque viros, quorum mens Deo similis. Condiscipulos tuos admone ut Scyllam caueat & Caribdim, voluptatum videlicet illecebras pestiferamque mentis inflammationem opinantis potius quam scientis. Meminerint eam sibi.

quandoque summam voluptatem fore, quæ in summa animi parte, ex summo veritatis ipsius thesauro tunc demum percipiunt, cum inanum voluptatum umbras scientiæ gratia posthabuerint. Scientiæ arbor, & si radices aliquantulum amaras habere videntur, fructus tamen profert quam suauissimos. Meminerint præterea nunquam nimis fieri quod nunquam satis fit. Nondum satis didicit qui adhuc quicquam dubitat, dubitamus autem quamdiu viuimus. Tamdiu igitur discendum nobis est quamdiu viuendum. Imitandus sapiens ille Solon, qui etiam moriens discere aliquid nitebatur, utpote, qui veritatis pabulo alebatur, & cui mori nihil erat aliud quam reuiuiscere. Non potest mori vnquam, qui immortalis voscitur alimonia. Tunc primum appellatus fuit ab Apolline Socrates sapientissimus omnium, cum primum vulgò prædicare cœpit, se nihil scire. Mandauit discipulis suis Pythagoras, ut se in speculo, non ad lucernæ, sed ad solis lumen specularerentur. Quid est autem scintilla lucernæ, nisi parum adhuc eruditus animus? quid solis lumen, nisi mens quæque eruditissima? Cum ergo quis animi sui figuram appetit speculari, non cum indoctis seipsum, imò cum doctissimis conferat; sic enim clarius discernet quantum lucratus fuerit, quantumve supersit. In pascendo animo lures avarosque imitari debemus, qui semper ad id quod reliqui superest animum intendunt. Quid plura? vitæ magister ait: Non esse aratorem illum præmio dignum, qui retrò se vertit. Audisti & illam ob hoc ipsum ex viuente in statum fuisse conuersam. Audisti rursus Orpheum tunc Eurydicem, hoc est profunditatem iudicij, amisisse, cum retrò respexit. Iners & vanus est venator qui regreditur, non progreditur. Vale.

*Inuitatio ad scribendum.*

LAVRENTIVS MEDICES,  
Marfilio Ficino Platonicò, S. D.

**C**VM isthinc, huc iucundissime Marfilii, me reciperem; tecum verbis egi, atque impetraui, ne absentes diutius literas tuas desideraremus. Quod quidem facturum te recepisti, verum cum quatuor iam post discessum dies præterierint, neque adhuc tuæ literæ perferantur, cum aliorum tamen familiarium & necessariorum nostrorum pleræque perla-

tæ ad nos fuerint, tuam in scribendo tarditatem, & miror, & doleo: nam sanè existimabam, si par in ambobus benivolentia vigeret, par scribendi studium, quod amoris officium est, non defuturum. Cœpi egomet primum excusationem tuam mecum agere, mihiq; ipsi tuo nomine dicebam: Philosophiæ forsitan studia, quæ totum atque integrum hominem exigunt, in causa sunt, cur ad nos Marfilianæ literæ non perferantur. Faciebatque incredibilis propè noster amor, ut honestissimam omnium de te apud nos excusationem facerem. Quæquidem excusatio ita apud me valuit, ut paucarum horarum expectatio difficilis admodum non videretur. Cum verò quæ ego horis metienda ducebam, pluribus diebus metiri me oportere perspexerim, nullus iam patuit excusationi locus, atque ego qui defensionis tuæ curam susceperam, cœpi toto animo cogitare, quibus te modis cum plures in mentem venirent, accusarem. Totque offensionum in te genera inuenio, ut si Demosthenem & Ciceronem nostrum causæ tuæ patronos nactus sis, reum tamen futurum te pro certo habeam. Quod si te facti non poeniter, neque enim aliud poenitiæ signum, quam tuas literas, desidero, scito te communis amoris nostri iudicium subiturum, nam coram huiusmodi iudice agere lubet, quo aut æquiores, aut iustiores, aut qui verior animi nostri testis esse possit nullum inuenimus, is tibi trium tantum dierum spatium ad scribendum tribuit, quibus præteritis te, nisi scripseris, reum futurum pollicetur.

Sed dices tu, quid ad Laurentium scribam? Nihil habeo de Republica, nihil de rebus domesticis, neutrum abs te expecto, cum vtrumque in te ipso neglexeris, scio te non magis de alienis, quam de propriis curiosum esse, quid igitur scribendum tibi est? Quæcunque in mentem veniunt. Nihil ex te proficiscitur non bonum, nihil cogitas non rectum, nihil itaque scribi à te potest; non nobis utile, non iucundum. Quodque facit ut tuas supra modum literas desiderem, illud est quod in tuis literis ita lepos cum gravitate immixtus perspicitur, ut si lepide considerentur, omnia leporis plena graviter, ita gravia videantur ut nihil supra. Quapropter cum primum tibi scribendi facultas datur, diutius rogo ne differas, neque patiare tamdiu nos literas tuas desiderare. Vale Pisis.

*Gratiarum actio.*

## MARSILIVS FICINVS

Laurentio Medici viro magnanimo, S. D.

**M**ulta abs te quondam & magna accepi beneficia, Laurenti, nuper verò maximum atque gratissimum, videlicet diui Christophori templum, sed cur nondum tibi gratias egi? Quia noueram non mihi, sed tibi illud fuisse collocatum. Quicquid enim hac in re factum est, per te est, & tui gratia factum. Suspicebam igitur haec nescio quomodo, ne forte tu solus rei huius possessionem aditurus esses, tibi tota soli tradita fuerat. Postquam verò Pisas abiisti, cognoui statum, quo tibi vnico à Reneriis datum fuerat, mihi abs te nunc esse concessum. Ergo nunc primum tibi gratias ago. O quantas! Non quantas Marsilius capit pusillus homo, sed quantas vir grandior Laurentius. Imò quantas ingentissimus Gygas ille diuus Christophorus, tanto fermè Atlante grandior, quanto qui cœlum capit, amplior est quàm cœlum. Nempe Atlas cœlum, Christophorus cœli fabrum dicitur humeris sustinuisse. Diurnis præterea, nocturnisque precibus, cœlestem hunc oro Gygantem, vt patronum meum, inter varios ciuiliū negotiorum fluctus, iisdem sustineant humeris, quibus patronum suum permixta sustulit. Vale, XII. Ianuarij. M. cccc. lxxviii.

*Amatoria.*

## LAURENTIVS MEDICES,

Marsilio Ficino Platonicò, S. D.

**C**redo iam, doctissime Marsili, illam esse Plotini, si rectè memini, de anima sententiam, quæ à te in Theologiæ libro posita, est animas, scilicet, nostras eodem tempore vbiq; esse. Nam quòd compluribus in eo libro rationibus probatur, nunc re ipsa clarius constat, vix enim aliam ad te Epistolam obsignaueram, cum redditæ mihi sunt optatissimæ literæ tuæ eius suauitatis plenæ quam faciebat vt à me mirificè desiderarentur. Credo equidem absentem te & legisse nostras literas & accusationem tarditatis in scribendo tuæ isthinc perspexisse, qua monitus diutius ad nos dare literas non distuleris. Verum quicquid sit, iam non libet literarum causas inquirere, satis est eas me literas ac-

cepisse, quibus nihil mihi aut gratius aut iucundius est. Video, quod & ante mihi constabat, nihil à te temere agi. Nam durior expectatio suauiore ipsam quodammodo suauitatem fecit, vt etiam valde sitientibus euenire solet. Legens ego tuam Epistolam nihil reperio non Marsilianum, si gratiarum illæ actiones ex literis demantur. Non enim hoc gratiarum genus conuenire videretur aut amicitia nostræ, aut ei viro qui se ita mihi totum tradiderit, vt nihil sibi reliquerit suum. Non si tu ea magnitudine corporis esses, quæ diuus ille, quem ais, Christophorus pingitur, aliquid tibi superest non meum. Sic tu semel voluisti sic tibi quondam placuit. Ego verò tam nobile munus & accepi libenti animo & accepto gaudeo, mihiq; ipsi gratulor. Iam igitur non Marsili es, sed Laurentij tui, non minus tui quam tu ipsius.

Qua in re, si te ipsum tibi reddi vis, scito id ea conditione futurum vt nullam de te habere possis rationem, quin æquè de me ipso eodem tempore habiturus sis. Quos enim immortalis Deus coniunxit, homo non separet. Tu igitur vt ad gratias redeam nolim amplius hoc scribendi genere mecum vtare. Si enim gratia quas agis tuæ non sunt, nihil omnino nobis tribuis, si tuæ, scito superioribus rationibus, tecum iam pridem te mihi omnia tua tradidisse. Vale & te ipsum ama, quod si feceris, me quoque amabis. Ita enim non vulgaris noster amor exigit, quod te non latere existimo, cum in eo libro quem de Amore scripsisti, cunctos amoris affectus ad eò ex arte posueris, vt nihil in amore inueniatur, quod non eo libro legi possit, nihilque in tuo libro legatur, quod in amore non sit, iterum vale. Pis. XII. Kalendas Februarias. M. cccc. lxxiii.

*Mirabilium author Dens est non homo.*

## MARSILIVS FICINVS

Laurentio Medici Viro Magnanimo, S. D.

**Q**uid agam in præsentia nescio Laurenti, admirari me compellunt mirum in modum miræ literæ tuæ, exclamare Philosophicus prohibet pudor. Agere gratias innumerabiles hortatur singularis humanitas & magnificentia tua, sed uia rursus dehortatur Epistola. Permitte saltem mi Laurenti precor, vt summo Deo gratias agam, quod statueris temporibus nostris in cunctis fortunato affe-

etiam humillimum cum excelsa mente, in adolescente priuato prudentiam cum potentia, in potente abstinentiam cum licentia, in occupatissimo sapientiam cum eloquentia, copulare. Magna in te sunt Laurenti, proculdubio magna. Et nequis fortè adulationis vitium suspicetur, quod à viro & philosophante & amicissimo esse debet alienissimum in te non ex te, dixi magna. Deus enim omnipotens mirabilia facit solus. Instrumentum Dei es, ô bone vir, aptum: scio quid loquor, ad magnifica perpetranda. Tamdiu igitur mirabilia feliciter exequeris, quamdiu diuino parebis artifice. Parebis autem examussim crede mihi, si sæpè cum oraueris, ut ipse tibi qua ratione sis paritarius ostendat. Ostendet certè petenti, qui etiam priusquam petas stimulat ad petendum, & quid & quo pacto sis petiturus ostendit. Vale feliciter patriæ spes. Sed antequam finem faciam, obsecro te mi Laurenti cum per Academiam, quæ per te floret, tum vero per patriam hanc tuam, patriam quæ tibi præ cæteris chara est, ut bonæ valitudinis curam habeas, nisi enim tu beneualeas, non puto iis temporibus, bene vel Academiam vel patriam posse valere XXI. Ianuarij. M. cccc. lxxiii. Florentiæ.

*Laudes Laurentij Medicis mira.*

MARSILIVS FICINVS

Nicolao Michelostio vero  
Viro, S. D.

Quam difficile est mi Nicolaë, ô quam difficile nunc inuidia non pulsari? Ego forsitan Nicolaë, nisi quæ Laurentij sunt, mea quoque essent, non possem tor, tanta, tam senilia bona adolescenti non inuidere. Dic amice rogo, quis eloquitur elegantius? Quis probat acutius? Quis mulcet dulcius? Quis concitat vehementius? Cessistis iam pridem lauro Poëtæ, cessistis oratores modo, iam iam Philosophi cedamus. Proh Iupiter, ociosi veterani ab occupatissimo tyrone isto, tam cito, tam facile, tantopere superantur? si inuideant alij alienis & liuore rumpantur edaci. Ego meis mirificè gaudeo atque fruor, meus enim est Laurentius ob incredibilem humanitatem suam. Ego quoque Laurentij sum ob singulares animi sui dotes, magno me emit precio, hoc est, seipso. Ira me Deus amet loquor Nicolaë quod sentio, nemo magno Cosmo me familiarior fuit, nemo charior.

Cognoui in eo sene non humanam vir-

tutem, sed Heroicam. Agnosco nunc in isto adolescente penitus, agnosco totum illum senem, phœnicem video in phœnice, in radio lumen. Emicat iam ex Laurentio nostro foras Cosmianus splendor ille multis quotidie modis, lumen ad reuelationem Gentium Latinarum & Florentinæ Reipublicæ gloriam. De iis ha-tenus.

Interrogabat autem in Epistola Laurentius cuiusnam ille essent gratiæ quas ipsi egeram. Mei ne? an alterius? Responde illi meo nomine eas esse Dei. Tres enim illas opto. Gratiâs Medici nostro propitias fore, quæ ab Orpheo describuntur, scilicet splendorem, lætitiâ, viriditatem, splendorem, inquam, mentis, lætitiâ voluntatis, viriditatem corporis & fortunæ. Aspirant iam ex alto hæ Gratiæ Laurentio, ac tamdiu aspirabunt, quamdiu agnoscer gratis solum à Deo solo se gratias accepisse. Vale XXI. Ianuarij. M. cccc. lxxiii. Florentiæ.

*Amateria.*

LAVRENTIVS MEDICES

Marsilio Ficino Platónico Phi-  
losopho, S. D.

False meum de te iudicium, verumque illud vulgatum proverbium. Locorum, scilicet, interuallum ut ab oculis disiungit, ita nos ab amorum cogitationibus separare. Verum quis hoc credidisset? quod ego vix credo cum perspexerim. Ego binas ad te literas dedi, tu vnam vix Epistolam nobis, atque ita paucorum verborum, ut si ex ea primam salutationem atque vltimam loci & diei particulam demas, nihil ferè sit reliqui. An non decet Philosophum loquacem esse? An non decet mutum? Id enim nobis Terentius præcipit, quod ille à Græcis accepisse traditur, Ut ne quid nimis. Sed etiam ex his locis video quid in causa sit, cur ego à cogitationibus tuis absum. Cum enim semper ante oculos diuum Christophorum, cui ædes tua dicata est, habeas, ea ipsius est magnitudo corporis, ut cæterarum omnino rerum tibi prospectum auferat, atque inter te & nos quodammodo faciat Eclipsim quandam. Quod tamen tum miror, tum verò quibus verbis te accusem non inuenio. Nullum est enim tam asperum tamque contumeliosum verbum, quin deterius multo sit Marsiliana taciturnitas, qua & fidem tuam & nostram amicitiam fefellisti.



Doleo quidem non parum, quod si dem fregeris, atque amicitiae nostrae huiusmodi iniuria intuleris. At, quod magis mihi molestum accidit illud prorsus est, quod dum tu amorem nostrum frustratus es, ita nos a cæterorum hominum benivolentia alienasti, ut nemo super sit, cui fidem deinceps adhibere posse videar. Nihil enim tam perfectum, tam constans, tam verum videbatur, quam nostra amicitia, quæ quidem & tua virtute & temporis diuturnitate à Deo creuerat, ut si quodammodo decoxerit, nulla restet cui credere tuto possimus. Quapropter scito nos erga te mirum in modum iratos esse. Neque tamen ira iratos, ut si iucundissimæ literæ tuæ ad nos perferantur, sua illi incredibili suauitate cunctam animi asperitatem atque indignationem mulcere non possint. Nam cum Achillis telum in manibus habeas, scito tarditatem in scribendo, cuspidem esse qua vulneras, literas verò ita illato vulnere mederi posse, ut non modo vulnus ipsum, sed omnem penitus cicatricem auferre ac delere possint. Vale Pifis.

*Amatoria, quomodo amandus quisque sit, & quomodo laudandus.*

MARSILIVS FICINVS  
Laurentio Medici Viro Magnanimo, S. D.

QVod me diligas Laurenti multis clarissimisque argumentis iamdiu noui. Quod ames, nuper ex hoc vno precipue quod tanquam zelotypus leuissimis falsisque offensiueneulis subirasceris, irascere ut lubet, irascere zelotype, modo interim incalescas. Simile est iræ & amoris incendium, ego enim cum subirascor tibi, quod facio sæpè, tunc æstuo amoris incendio maxime. Tu quoque flagras non mediocriter, scio quid loquor. Quod si quando tepescere videamur, tum etiam nostra hæc tepiditas feruentius feruet quam cæterorum feruor. Odiumque nostrum, proh Iupiter, amantius amabiliusque est quam cæterorum amor. Ecce nunc mi Laurenti tua isthæc iramitior mihi videtur quam cæterorum mansuetudo, morsus iste tuus suauior suauio. O quam suauiter mordes! quam acriter obscularis! Acrimoniam miram misces dulcedinem, dulcedini acrimoniam, quod in suauissimis saporibus natura solet, & quoties acrimonia tua fortius accescit, toties aceti maluatici instar dulcius quam

dulceredoleat. Verum quid accusas in me accusator acer, amator acerrime? Breuitatem ne?

At tu in causa es, quod enim breuissimam, negotiorum tuorum, quod breuissimam videar, amoris erga me tui efficit magnitudo. Accusas taciturnitatem, suspicans eam ab obliuione, obliuionem ab absentia proficisci. Meminisse debes non abesse isthinc Marsilium, si non abest Laurentius, in quo est Marsilius, si ubique est eodem tempore animus, quod ipse superioribus diebus tua Epistola confirmasti. Quid igitur obstat Diuus Christophorus quin te cernam? Præsertim cum diaphanus sit atque perspicuus, & in ipso Christophoro inspiciam Laurentium, quandoquidem per Laurentium ipsum Christophorum video & amplector. Denique vis verum fatear? Non oppositio Christophori inducit Eclipsim per quam aut cæcutiam aut fileam. Imò tu coruscatione tonitruque tuo caligari, stupere, obmutescere, penitus me compellis. Improbe adolescens, ah nimium gaudes victoria, quamuis honesta. Quid amplius aut tibi aut reliquis est reliqui? Tibi quidem ut te ipsum vincas; reliquis autem ut vinci æquo animo patiantur. Ego certè, ut de me ipso prius loquar, superari ab te ferè tantum gaudeo, quantum ipse gaudes me ac cæteros superare. De cæteris verò quid dicam? Sol matutinus congregat nebulas. Meridianus Sol nebulas disgregat. Virtus adolescens inuidiam concitat, adulta sedat, liuorem domat tandem qui omnem prius vicit opinionem. Inuidiam quasi omnem in admirationem conuertisti. Laudant multi palam, qui hætenus inuidebant. Sed quamuis laudator pene nullus de Laurentio mentiatur, nulli tamen hunc, exceptis Platoniciis, legitime laudant. Peripatetici cum Laurentium videant tam feliciter singula profitentem, in omnibus eum laudant, Platonici contra in eo laudant omnia. Nempè cum considerent quam subito artis cuiusque prodeat magister, artes huic non labore quæsitæ, sed & natura subministratæ, & à Deo infusæ existimant. Ego igitur personam tuam in me diligo, meam in te amo, Laudo te in arte, artem in te probo. In natura te honoro, naturam in te miror. Te per Deum colo. Veneror per te Deum. Deo itaque soli gloria omnis ab omnibus ab æuo tribuatur in æuum. Vale.

*Ioſeſa ad Ioannem inuitatio ad reditum per diſſimulationem.*

MARSILIVS FICINVS  
Ioanni Caualcanti Amico  
vnico, S. D.

**D**Ecreueram hac nocte mane ad te ſcribere, redi Heros, propterea quaſo, aduola obſecro. Deinde verò maturius conſultandi, præſtare viſum eſt, vt mecum hoc deſiderium diſſimularem. Fore enim vt redeas ocuus, ſi me ſubiratum putes. Ecce ſubiratus ſum. Quid tandem? Nunquid mouebit indignatio, quem non mouebat amor? Non puto. Ergo quo me vertam neſcio, ad preces ne? an ad iurgia? imò quo refugiam nunc inueni. Cordi conſidam heroico, quod ſolet ſponte rectius currere quam calcaribus. Sed interim quonam pacto me continebo, quin parumper ſaltem ita ſuſurrem? ah nimium obliuiſe mei. At cohibebo conuitia, ac ne tædeat te eaſdem has cantilenas audire ſæpius, res maiores aggrediar, de rebus ſcribam publicis. Quaris quid agatur in vrbe. Tractantur grauiſa, audi, ſed aperias nemini. Magni plerique ciues ô Marſili aiant, cur tamdiu ſolus in vrbe? Quia ſolum incedere nunc me vult, qui nunquam finit eſſe me ſolum. Nondum rediit ergo? Nondum. Non habeo præſens aliud quod ad te ſcribam. Scripſi ad te vrbana negotia. Scribe ad metu ruſtica. Hei mihi errauit, ne ſcribas volo, ſed dicas. Si colloquemur, loquemur mi Heros eadem, dum ſcribimus, ſcribimus de diuerſis. Ego de memoria, de obliuione Ioannes. Sed nolim dixiſſe iſtud. Non oblitus eſt mei meus, quia neque ſui. Imò venit iam obſecutus mihi, ecce venit, occurrere mei huic fortunati pedes, excipite felices vlnæ.

*Epiftola genialis de Heroibus.*

MARSILIVS FICINVS  
Ioanni Caualcanti amico  
vnico, S. D.

**A**Ccepi à Carolo Marſupino Epistolam, cui cum primum reſpondere aggrederer, vellemque præſcribere, Marſilius Carolo ſalutem, genius mihi præter ſummam ita flexit calamum, vt Ioanni pro Carolo ſcriberem, accipe igitur Epistolam genialem. Neſas putauit Deus abſentem me cuiquam priuſquam Heroi ſcribere, arbitror Heroibus fauere ſuperos. Quoniam vt Platoniplacet Heroës ex a-

more Deorum ſunt geniti. Ego re ipſa expertus ſum Philoſophos ex Heroum amore renaſci. Vale I. Maij. M. CCCC. LXXII.

*Quod gratis, gratius eſt, quàm quod ex debito.*

MARSILIVS FICINVS  
Ioanni Caualcanti amico  
vnico, S. D.

**N**On poteſt manus calamum ducere, niſi ipſa moueatur ab animo. Non poterat his temporibus ſcribere Marſilius ad Heroem, niſi ante inuitatus ab Heroë. Sed vnum mihi moleſtum eſt præ cæteris, quod ideò ſcribis ad me, quia promiſeris, ergo pactiſſoni iſtud tribuo non amor. Amatorias poſco literas non mercatorias, aut es etiam pacto meus, ſcilicet quia ego ſum tuus, amore volo ſis meus. Vale. Ianuarij. M. CCCC. LXXII.

*Prouocatio ad ſcribendum.*

MARSILIVS FICINVS  
Ioanni Caualcanti amico  
vnico, S. D.

**A**Mice, quid tamdiu certatim ſileamus? Quid tandem victori lucri accedet, victo quid damni? Ego verò in hac ſilendi pertinacia vinci abſ te ſatius cenſui, vt in loquendi certamine vincerem. Ita poſt hac primæ tibi in tacendo partes, mihi primæ in loquendo dabuntur. Semper ne calcaribus indigebis in ſtadio? Nunquam tua ſponte curreſ? Cur mecum tam dure? Acrius forſitan iocari tecum videor mi Ioannes. Tu autem agis acerrimè, acerrimè quoque reſpondeſi placet, modo reſpondeas, ſi minus placet, dulciter ſile. Meæ certè huic verborum acrimoniæ cordis affectum mel- le dulciorem ſubeſſe putato. Vale, & tamdiu abeſto quàm tua reſpoſtulat. Satis enim mihi fit cum res agitur tua. Nonis Octobris Charegii.

*Quod neceſſaria Epiftola inter amicos.*

MARSILIVS FICINVS  
Ioanni Caualcanti amico  
vnico, S. D.

**Q**Voniam putabam breui te Florentiā rediturum, nullas ad te dedi literas, ſperans cito veras audire ac reddere voces. Nunc verò perpetua hæc, vt ita di-

xerim, cœli serenitas longiores mihi mas in Trebianis collibus minatur moras. Sed quis Trebiana suauitate non capiatur, hos certè Bacchus amat colles, iis meus caprus est Ioannes, hæc profectò cur non scripserim hætenus causa est. At tu cur scribis nihil? Nihil equidem habeo quod scribam, inquires. Idipsum saltem nihil habere te, scribe, quanquam nunquam deest amicis argumentum literarum. Quid enim amico charius quàm amicivita? Ergo vicissim qualis valetudo sit, sæpè significandum. Ego meam valetudinem declarare non possum nisi prius ipse tuam. Quippè valeo si tu vales, imo si te valere intelligo. Vale ex Charegio. XIII.

*Grauis est iactura temporis.*

MARSILIVS FICINVS

Ioanni Caualcanti amico  
vnico, S. D.

**O**nerosa mihi tam mei quàm paterni corporis cura, onerosa absentia tua. Vtraque sunt æquo animo tolleranda, ne fiant propter impatientiam grauiora. Tu si quid humanitatis habes, noli me duplici pressum sarcina, tertio insuper pondere onerare; oneras autem nimium nisi liberos ad me remittas. Temporis enim iactura me stimulat vt eos sæpius exigam. Nulla est grauior iactura quàm temporis. Heu confidentius flagito quæ forsitan accipere nollem, quem verò vellem accipere, postulare non audeo. Illa me decet habere, hoc me in præsentia necessarium est carere. Prudentis est tum carere, decens est implere, tum quid necessarium est pro viribus facere voluntarium. Tua interest illud implere, mea id conari. Vale, ac dum aliena collis, alienis cole tibi quoque te ipsum.

*Quod iocunda amicorum litere.*

MARSILIVS FICINVS

Ioanni Caualcanti amico  
vnico, S. D.

**Q**uid igitur faciam? Prior ne ego ad te scribam? an tuas literas expectabo? Equidem cum ad alios ferè nunquam nisi læcessius scribere soleam, tibi tamen venire obuiam cogor & prior inire certamen. Nec filere diutius te permittam. Non potes enim sine meo languore filere. Huc me, quod te non fugit, immoderatus impulit æstus, isthuc ventus intollerabilis retrahit, adeò, vt vix hodie me contineam, quin ad

urbem protinus adnolem. Potès verò hic me solus aliquot & illos quidem paucos dies tuis literis retinere, nam dum literis tuis legendis totus incumbam, nec ventorum procellas sentiam, nec fulmina & tonitrua audiam. Sic ergo fit, vt verba sedare ventos, & tempestates depellere valeant. Saluta Vgolinum Verinum tuum Musarum sacerdotem. Valexxx. Augusti M. cccc. lxxviii. Marciniani.

*Nemini detrahendum, quia Deus  
valescitur.*

MARSILIVS FICINVS

Ioanni Caualcanti amico  
vnico, S. D.

**H**omerus propter diuæ, vt aiunt, Helenæ vituperationem priuatus oculis, quia nunquam errasse cognouit, nunquam vidisse amplius dicitur. Eandem ob causam Stesicorus lumine captus, intellexit erratum, hinc palinodiam, id est, contrarium cantum cecinit, dicens, non verus sermo ille fuit, neque nauibus altis existi fugiens, neque adisti Pergama Troiæ, his dictis statim visum recuperauit amissum. Socrates præterea cum Deum Amorem vituperasset, in Illissi fluminis transitu à familiari dæmone correptus, antequam quicquam pateretur aduersi expiauit se laudauitque rursus. Amorem quem vituperauerat, vnde euasit incolumis. Ita Stesicorus Homero prudentior fuit, sed vtroque sapientior Socrates. Ego certè Socrate incautior fui, vt non sim Stesicoro infortunatior. Quorsum hæc? Nempè mensis huius nonis scripsi ad te mane Epistolam, diuturnum silentium tuum improbaturus, in qua indomitum te, & quasi durissimum omnium accusabam, vespere aduersa valetudine oppressus sum, nec dum conualeo. Quamobrem veritus, nequid mihi aduersi propter Herois vituperationem immincat, palinodiam licet breuem expiandis criminis gratia scribere statui.

Assero igitur non Heroem durum, sed me potius mollem esse, ac molli homini constantem virum sæpè ferocem videri. Hæc mea palinodia, sit contrarius superiori cantus, sit etiam contraria postulatio. Orabam quippè vt acerrimas, si placeret, potius quàm nullas literas mitteres. Nunc contra nullas potius quàm acerrimas postulo, non enim instigatione sed consolatione æger animus indiget. Vale Floren. Idibus Octobris, M. cccc. lxxviii.

*Homo est animas. Amantis animus  
est in amato.*

MARSILIUS FICINVS  
Ioanni Caluacanti amico  
vnico, S. D.

**E**GO Ioannes, sæpè quæsiui meipsum, primum pectora mea manibus attrectaui, deinde vultum hunc sæpè sum speculatus in speculo, sed neque ibi me tractasse, neque hic vidisse me vnquam asserere potui. Nam quando me ipse quæro, quæro vtique non alium, præter illum ipsum qui quærit vbi idem est omnino Marsilius quæsius & quærens. Quis igitur quærit? Qui reperire cupit. Quisnam cupit hoc? Qui iudicat esse quærendum. Quis iudicat? Solus iudicat animus. Solum igitur animum quæro, quando quæro meipsum, vrpote qui solus ipse sim animus. Hunc ego neque tangi, neque cerni posse confido. Non enim tamdiu de illius natura dubitarem, si sensibus his pateret. Ergo recepi quandoque mentis aciem in seipsam, si fortè hac via me cernerem, verum neque ita quod desiderabam omnino sum assequutus. Quippè interiore hoc meo intuitu, neque delector satis, neque quiesco. Qui autem quod inuestigat consequitur, gaudet protinus & quiescit, non igitur me apud meipsum reperio. Quod si in alio me quæsiturus sum, quonam pacto me apprehendam? Si me ipsum non habeo, per quem solū possum capere, quicquid capere possum. Redi igitur, & te imò me redde mihi. Quando ego id nequeo, redi hodie neque semper venturas differ in horas. Ne patiari obsecro, plures à nobis dies nigro numerari lapillo. Quor enim isthic tu serenos agis, totidem nos hic nubilos agimus atque nigros. Vale.

*Seria ad Ioannem. Anima post mortem intelligit, & multo charius quàm  
in corpore.*

MARSILIUS FICINVS  
Ioanni Caluacanti amico  
vnico, S. D.

**S**CRIPSI nonnullas ad te Epistolas (amice Soptimè) in quibus tentari amatorium quodammodo scribendi genus, quod quidem & nostræ familiaritati convenire videtur, & ab honesta illa Socratis Platonisq; libertate non est alienum. Nunc autem Platoniorum more post amatorios jocos (talìa enim Platonica Procemia sunt) ad

seria veniamus. Audi nunc, quæ cum Bernardo Iunio, & Bartholomæo Fortino ciuibus iustitia excellentibus, aliquando de mente differuimus. Duo sunt inter mortales dubia circa mentem præcipua. Primum est, vtum intellectus seiungi à corpore possit, ac deposito corpore viuere atque operari. Secundum, si quid tunc intelligit, vtum clarè intelligat, nec ne. Respondebimus ad hæc in præsentia quàm breuissimè poterimus: Nam hæc & similia in Theologia nostra de Animorum immortalitate latissimè disputantur. Concedimus intellectum multa incorporalia excogitare, Deum videlicet, Angelos, animas, virtutes, numerorum proportionem, ideas, rationesque rerum vniuersales. Quemadmodum verò non possumus per visum inuisibilia cernere, ita neque per corporale aliquod instrumentum incorporalia cogitare, neque per naturam aliquam districtam corpori, locoque & tempori, res à materia, loco, tempore, absolutas, petere, quærere, inuenire, seruare. Ac si mens interdum etiam dum regit corpus, ita se in se colligit, vt speculetur aliquam per seipsam; sequitur vt à corpore separata multo magis faciliusque per seipsam valeat speculari. Si poterit per se operari, per se quoque esse ac viuere poterit. Atque vt ad quæstionem alteram descendamus, clarius tunc discernet quæcunque intrinsecus offerentur intelligenda, quàm sensus nunc quæ offeruntur extrinsecus sentienda, & tanto saltem clarius, quanto visus acutior est, & velocior quàm auditus sensusque reliqui. Ac etiam quanto mens præstantior est quàm sensus, & obiectum mentis præstantius est quàm sensus obiectum. Mentem esse sensu excellentiorem non dubitat, quisquis illius viribus vtitur, videt enim eam sensuum iudicem esse, & tanquam pretiosiores, concedi paucioribus, tardiusque & rarius exerceri. Obiecta quoque mentis obiectis sensus esse sublimiora hoc ostendit, quod illa vniuersalia, ampla, æternaque sunt; ista particularia, angusta, mortalia. Accedit ad hæc, quod quanto magis exterior sensus intenditur, tanto magis interior sensus remittitur. Atque contra. Qui enim attentius inspicit auditque nonnulla, vix interim potest imaginari, & qui vehementer imaginatur, vix cernit vel audit, quæ tunc extrinsecus offeruntur. Eadem est inter imaginationem intellectumque proportio Anima in hoc corpore duo maxima omnium habet impedimenta; alterum, quod in plures operationes perturbatio-

tionesque distrahitur, operationes autem variae se inuicem impediunt atque debilitant, difficillimum est enim diuersis simul incumbere, alterum, quod tum propter infimae habitationis huius conditionem, tum propter ministerium corporale ad tempus adeo hominibus assignatum actiones inferiores longè prius, attentius, sapiusque quàm superiores exercet. Vnde fit vt quando contemplari incorporalia volumus, vt plurimum debiliter operemur, & illa obtuse & quasi in nebula quadam proficiamus. Verùm quando actiones alendi, augendi, sentiendi, imaginandi, vel obmittentur omnino, vel maximè remittentur, tunc vsque adeo mentis innuitus acutur, vt quicquid cernat clarius hac luce discernat, perspicit sanè anima per seipsam, tunc lucem illam intelligibilem perspicacius, quàm tunc sensibilem istam per vitreas corporis huius carcerisque fenestras, intuebitur enim tranquille per serenitatem suam perspicuam, perspicacissimamque, obiecta excellentissima in diuini Solis luce adeo clara, vt Solis huius lux ad eam sit umbra, & quia clarissima, ideo impuris oculis occultissima, puris autem manifestissima. Non intuebitur autem quasi pictas imagines, sed tanquam res veras, quarum res cæteræ sunt imagines. Quando per somnum operationes motus exteriorumque sensuum cessant, tunc imaginatio quæ reliquis pascitur sensuum vsque adeo roboratur, vt simulachra pingat intrinsecus tanquam res veras repræsentantia. Quid igitur faciet intellectus, imaginatione admodum efficacior, quando multo magis quàm imaginatio somniantis, liber ab impedimentis euaserit, atque in veritate rationeque summa veras omnium rationes inspiciet? pinget videlicet tunc in seipso vera omnia exactissime, imò veris omnibus aliunde pingetur. Sed à quo maximè? A mente, mente inquam, lumine luminum. Et quàm facile fiet? facillimè prorsus, subito namque ob naturalem quandam cognationem visibile lumen illuminat perspicuum corporale, cum primum serenum purumque fuerit, formatque ipsam forma sua, perque suam formam formis omnium visibilium. Similiter intelligibile & plusquam intelligibile lumen, id est, Deus, intellectualem format perspicuitatem, cum primum serena euaserit, format, inquam, forma sua, hoc est, diuina, perque ipsam formis intelligibilium omnium. Tantumque statim afficit virali calore & gaudio, quantum beneficio iam affecit fulgore, atque ita vitam tradit à morte liberam, sicuti lucem infundit à tenebris

alienam, & ultra quemlibet temporis terminum, infundit lumen in mentem, quod iam ex temporis mutatione ad statum æternitatis ascendit. Pascit autem bonitate ad votum semper, & implendo allicit pulchritudine appetitum, & implet alliciendo. Ibi saturitas est absque satietate, vbi bonum est absque malo, perque bonum infinitum fit etiam capacitas infinita. Infinitum ergo bonum & pulchrum, innumerabilem fons bonorum, atque pulchrorum allicit, & implet pariter in æternum.

*Contra Auerroem, scilicet, quod non sit vnicus hominum intellectus.*

MARSILIUS FICINVS

Ioanni Caualcanti amico vnicoco, S. D.

**A**uerrois vnicum esse opinatus est cunctorum hominum intellectum, eodemque omnes quicquid vsquam intelligunt intelligere. Hanc opinionem nonnulli rerum nouarum audiores quàm verarum, esse aiunt admodum naturalem. Atque ego confiteor, sed ob hoc tantum eam naturalem voco, quia sicuti res naturales solent, valde mutabilis est & contrario suo destruitur. Eo enim ipso quod aliquis affirmat contrarium subitò Auerrois opinio labefactatur. Cum enim non possint in eodem simul esse contraria, si intellectus in Auerroico quodam Philosopho atque in Platonico simul de seipso contraria sentit, dum illic ait se vnicum esse, hic autem plures esse, non vnicum, constat planè in illis non vnum intellectum esse sed plures. Nonne in iis quæ ad intelligentiam voluntatemque pertinent, maxima eodem tempore inter homines diuersitas est? Nam & idem & eodem tempore alij affirmant, alij negant, alij volunt, alij nolunt. Quid præterea de repugnantibus dicemus habitibus? Intellectus in alio doctissimus est, indoctus in alio, in illo iustus probusque, in illo iniustus & improbus, in illo felix, miser in illo. Non potest igitur idem esse in omnibus intellectus. Si diuersi sunt intellectus, multo magis diuersæ sunt animæ. Adde quod si vnus est intellectus, semperque fuit, vt ait Auerrois, non est verisimile eum ita esse sui ipsius ignarum, vt in omnibus penè hominibus, præterquam in solo Auerroë, se numero multiplicem esse putauerit semper & putet. Quid menti naturalius quàm sui ipsius cognitio? Cur igitur mens cum opinionem Auerrois cogitat, eam aut nunquam aut vix capere potest, nisi quia falsa opinio est?

Denique



Denique quoties unitatem mentis exco-  
gitamus, toties eam odisse solemus, ac  
mentis numerum cupere, si modo cupi-  
mus superuiuere. Eadem vero mens sola  
oerit, si modo odisse potest unitatem  
suam, quæ sola potest & nosse. Non est  
autem verisimile rem æternam, atque a-  
deo diuinam semper sui ipsius naturam as-  
pernari, respuere & odisse. Quid ultra ser-  
monem protraho? Satis superque hæc in  
agro tuo Regnano, ego ac tu inuicem dis-  
putauimus, quando marsilius hic hospes il-  
lic tuus grande illud componebant Theo-  
logie volumen. Vale. xvi. Aprilis Floren-  
tiz.

*Theologi vigilant, ceteri somniant.*

MARSILIUS FICINVS

Ioanni Caualcanti amico  
vnico, S. D.

**M**irantur nonnulli cur tanta obser-  
uantia Platonem sectemur, qui  
semper videtur inter paradoxa & porten-  
ta versari. Mirari autem, ut arbitror, desi-  
nent, si considerauerint sola quæ diuina  
sunt reuera existere, quia neque alienæ  
naturæ contagione inficiuntur, neque  
vnquam è suo statu mutantur. Corpora-  
lia vero haudquaquam esse reuera, sed es-  
se videri, cum inficiantur contrariis & iu-  
giter permulentur, ideoque non veræ res  
sint, sed rerum verarum imagines, aut um-  
bræ. Cum autem cæteri Philosophi penè  
omnes naturalium duntaxat rerum studio  
dediti, in his tanquam rerum verarum  
imaginibus somniant, Plato noster di-  
uinis incumbens, vel solus vel maximè  
omnium vigilabat. Itaque tanto satius ar-  
bitror Platonem Theologum sequi, quam  
Philosophos cæteros, quanto præstat vigi-  
lantibus gubernatoribus quam dormien-  
tibus se committere. Vale.

*Veritas Dei splendor, pulchritudo, amor.*

MARSILIUS FICINVS

Ioanni Caualcanti amico  
vnico, S. D.

**H**oc præcipuum diui Platonis, ut Par-  
menidis dialogus, & Epinomis in-  
dicant, studium fuit, ut vnum rerum mon-  
straret esse principium, quod & ipsum  
vnum proprio vocabulo nominauit.  
Vnam quoque omnium esse voluit verita-  
tem ipsius, scilicet, vnus, hoc est Dei, lu-  
men mentibus omnibus speciebusque in-

fusum, quod & species offerat mentibus,  
& mentes copulet speciebus. Vnicam igitur  
veritatem, vnus scilicet, Dei radius  
vnum colat oportet quicumque Platonem  
cum voluerit studium profiteri, hic radius  
per Angelos, animas, cælosque & reli-  
qua corpora transit. Atque ut in libro de  
Amore differimus, splendor eius pro na-  
tura cuiusque fulget in singulis, gratiaque  
& pulchritudo vocatur. Et ubi fulget ac-  
commodatius, ibi præcipue allicitur in-  
tuentem, concitat considerantem, rapit &  
occupat propinquantem, cogitque cum  
venerari splendorem huiusmodi præ ex-  
teris tanquam numen, nihilque aliud ad-  
niti quam ut deposita priore natura ipse  
splendor efficiatur. Quod hinc patet, quæ-  
do amator aspectu tactum amantis, homi-  
nis non est contentus, & clamat nonnun-  
quam, homo hic nescio quid habet quod  
me vrit, atque ego quid cupiam non intel-  
ligo. Vbi constat animum diuino vri ful-  
gore, qui in formoso homine micat quasi  
speculo, atque ab eo ciam raptum quasi  
hamo trahi sursum ut Deus euadat. Insa-  
nus igitur habendus est & miser, quisquis  
dum à Deo per visum ad sublimia prouo-  
catur, ipse per tactum seipsum demergit in-  
lutum, & cum ex homine potuerit Deus  
fieri diuinam ipsam per humanam pul-  
chritudinem contemplando, ipse se ex ho-  
mine bestiam reddit, spiritali veræque pul-  
chritudini corporalem, & umbratilem for-  
mam anteponendo.

*Quod Idea secundum Platonem in  
diuina mente sint.*

MARSILIUS FICINVS

Ioanni Caualcanti amico  
vnico, S. D.

**P**lato noster in Timæo, Timæum Py-  
thagoricum imitans atque compro-  
bans, mundum à Deo genitum asserit.  
Eiusque generationis causam triplicem  
introducitur, efficientem, finem, atque ex-  
emplar. Vult enim mundum à potentia  
Dei bonitatis suæ gratia ad diuinæ sapien-  
tiæ exemplar effectum fuisse. Et quemad-  
modum in architecto vniuersi ædificij  
eiusque partium exemplaria sunt, sic in di-  
uina quadam intelligentia supra mundum  
esse vniuersi mundi huius eiusque partium  
exemplaria, mundumque illum intelli-  
gibilem nominat & æternum, hunc vero tem-  
poralē atque sensibilem. Exemplaria huius  
in illo vocat ideas, similitudines illi in hoc

imagines atque umbras. Quamobrem inuidios quosdam ridere & licet & libet, qui Platonem vulgò tam ineptè prædicant quam inique, ideas rationesque rerum vniuersales posuisse, tum à corporibus, tum à diuina intelligentia, tum à se inuicem separatas, & tanquam nubeculas quasdam per aërem disperias à vento. Sed quoniam plurima contra illos adduximus in iis libris quos apud te in agro Regnano composuimus, sufficiat nunc testimonia solum ex Timæo Platonis adducere. Primum consideremus, inquit, quod in quaestione de vniuerso ante omnia solet inuestigari, vtrum semper fuerit vniuersum hoc sine vllò generationis principio, an genitum sit ab aliquo principio sumens exordium. Id profectò cernitur tangiturque & corpus est, omnia vero huiusmodi sen us mouent, quæ sensus mouent opinione per sensum percipiuntur, hæc vero talia esse constat, vt gignantur & genita sint, quicquid autem gignitur ab aliqua causa, necessario gigni asseruimus. Opificem quidem & patrem mundi inuenire difficile, & cum iam inueneris prædicare vulgò impossibile est. Rursum considerandum est, vtrum mundi faber sit imitatus exemplar, id ne quod vnum idem semper & simile est? An id quod genitum dicimus? Atqui si pulcher est mundus, & opifex mundi bonus, sempiternum exemplum maluit imitari, sin secus, quod ne dictu quidem fas est, generatum exemplar est pro æterno secutus. Cum vero & mundus omnium genitorum pulcherrimus sit, & eius author causarum omnium optimus, dubium non est quin sempiternum sit secutus exemplum. Sic igitur generatus ad id est effectus, quod ratione & sapientia sola comprehendi potest & immutabile permanet.

Ex quo efficitur vt necesse sit hunc mundum alterius simulachrum esse. Et paulo post. Dicamus quam ob causam ille rerum author generationem & hoc vniuersum constituit. Bonus erat, bonus autem nulla vnquam aliqua de re inuidia tangitur. Ergo cum liuor ab eo alienissimus esset, omnia sibi quantum fieri poterant simillima fieri voluit. Si quis hanc gignendi mundi causam præcipuam à prudentibus viris acceperit, rectissimè profectò accipiet. Et post pauca. Dicendum est hunc mundum animal esse, idque intelligens, reuera diuina providentia constitutum, hoc posito quod sequitur, videamus. Ad cuius animalis similitudinem Deus mundum constituit, vni cuidam propriæque

animalium speciei similem fecisse non arbitramur. Nam si imperfecto animali similis esset factus, pulcher certè non esset, imò verò illius animalis cum simillimum esse ducimus, cuius animalia cætera & singulatim & generatim partes sunt. Illud siquidem viuientia omnia quæ sola mente percipiuntur in seipso complectitur, quemadmodum mûdus hic nos & cætera quæ cernuntur animalia continet. Volens itaque Deus omnium quæ intelligi possunt pulcherrimo & vndique absoluto mundum hûc simillimum reddere animal, vnum ipsum effecit aspectui subiectum, animalia cuncta naturæ suæ conuenientia intra suum limitem continens. Rectè ne mundum vnum diximus? an rectius plures innumerabilesue dici oportuit? Vnum profectò, quandoquidem ad vnius similitudinem est formatus, quod enim viuientia omnia quæcunque intelliguntur continet, socium alterum habere non potest. Rursus enim aliud animal quod hæc duo contineret esse porteret, cuius duo hæc partes essent. Nec illorum sed tertij huius mundus iste simulachrum rectius diceretur. Vt igitur hic mundus esset animali absoluto simillimus, ex eo quod solus atque vnus esset, idcirco neque duo neque innumerabiles procreati sunt, sed vnus mûdus vnigeniusque factus est & erit. Sed audi Timæum Pythagoricum, qui Platonis magister extitit similibusque verbis ideas collocavit in Deo. Mundus, inquit, est eorum quæ genita sunt optimus, quoniam ab optimo authore est illo genitus, qui respicit non in manufacta exemplaria, sed in ideam intelligibilemque substantiam. Ad quæ quidem quod factum est examussum atque perfectè pulcherrimum & inemendabile sit. Perfectus vero est super secundum sensibilia, quoniam illud ipsius exemplar, quod omnia in se continet intelligibilia animalia, nihil exterius aliud reliquit, cum sit terminus intelligibilium absolutissimus, quemadmodum hic mundus est sensibilem. Hæc ille. Audiuius ideas omnium esse in quodam exemplari viuente æternoque quod sit intelligibilem omnium præstantissimum, & ita vndique absolutum, vt nihil intelligibilem sit extra ipsum. Hoc autem nihil aliud potest esse quam Deus. Sed quod illo clarius? Plato cum dixisset Deum omnia sensibilia ad similitudinem intelligibilem effecisse, subiunxit eum omnia sui ipsius fecisse similia. Quasi idem exemplar sit atque Deus. Quoniam verò quot sunt in hoc mundo rerum species creaturarum, tot saltem in Deo sunt ideæ, id est

tationes intelligibiles per quas cuncta creantur, atque creatæ species, quia sunt in materia per se non viuente, vel non viuunt, vel vix viuunt. Ideæ verò quia sunt in Deo per se viuente, viuunt in Deo. Plato in eodem libro inquit: quot & quales mēs ideas in ipso viuente inspicit, totidem & tales in hoc mundo species secum cogitauit effingere. Hoc Ioannes sensit, Plato, ut audis. Hoc senserunt antecessores successoresque Platonis. Crede Marsilio, qui sentit aliter à veritate dissentit.

*Causa peccandi, Spes, Remedium.*

MARSILIUS FICINVS

Ioanni Caualcanti amico  
vnico, S. D.

**C**Ur animi cum diuini sint tam prophane viuunt? Quia domum regionemque habitant prophanam. Alij propter negligentiam vel ignorantiam delinquant, neque mirum id quidem, quoad in caliginosa hac mundi face versamur, alij propter nimium corporis amorem, neque id quoque mirum, comes enim est & proles animæ, alij quia vel immortalitati, vel diuinæ clementiæ diffidunt, quid mirum? cum in loco mortis malignitatisque vitam ducant, alij quia vel diuinæ clementiæ, vel crastinæ emendationi plusquam par est confidunt, tum diffidentia, tum confidentia nimia periculosa est, illa vexat, ista fallit. Summa igitur prudentia est præsentis momento semper uti quam optime possumus. Vnicum refugium Deo se frequentissimè commendare. Optima spes, cum hæc egeris meminisse non latere Deum quam duram, quamue periculosam nobis prouinciam habitandam & administrandam tradiderit, infinita bonitas finitum longè superat malum. Varios instituit siue castigationis siue poenarum gradus atque eos quidem ad bonum vel proprium alicuius vel commune. Gradus autem præmiorum plurimos & vberimos.

*Quos Deus coniunxit moribus, coniunget felicitate.*

MARSILIUS FICINVS

Ioanni Caualcanti amico  
vnico, S. D.

**H**Erī in agro Nouolano sacra diui Christophori & Iacobi solennia instaurauimus, Sacra dixi, Ioannes, duntaxat, festa certe addidissem, si tu affuisses, sine quo nihil mihi festum. Vide igitur

quantum Marsilio tuo charus sis cui ne coelestia quidem, si dicere fas est, absque te chara sint, & merito, nam qui Iacobum Christophorumque coniunxit in sacris, idem Marsilium & Ioannem coniunxit in vita. Idem quoque aut certe quam similimus præest vtrisque genius. Statuit nos arbitror Deus in terra eadem voluntate moribusque similibus, in cælo sub eadem idea paribusque felicitatis gradibus viuere. Vale nostræ nauigationis Achates, ac portus denique condimentum.

*Præstantior est legum conditor  
quam sophista.*

MARSILIUS FICINVS

Ioanni Caualcanti amico  
vnico, S. D.

**M**Irabantur Græci quondam in Carneade, vim dicendi, memoriam & acumen laudant, ut ais, familiares tui eadem in Ioanne Guidio, eumque ob similitudinem quandam Carneadem sæpè cognominant. Tu autem hunc ob legum inuentionem Lycurgi vocas imitorem. Quæris præterea quænam præstantior laus sit, Carneadis ne an Lycurgi similem esse. Carneades disputando lites introduxit, Lycurgus verò dissoluit, Carneadis argutiæ sæpius inutiles quam vtilis. Vtilis autem paucis, raro alicubi. Lycurgi disciplina superutilis, vbique & omnibus necessaria. Denique quanto satius est bene viuere quam bene loqui, & felicem esse quam videri, tanto Lycurgi quam Carneadis facultas præstantior est. Sed accipe ab Herodoto quanta conditoris legum excellentia sit, is enim scribit, cum primum Lycurgus Apollinis templum ingredereur, hos versus Pythiam effudisse.

*Æthereo dilecte Ioni cunctisque Lycurge  
Cælicolis, qui nostra venis ad pingua templa,*

*Ambigo quem potius te nunc hominemne  
Deumue*

*Vaticiner, Diuum potius te spero Lycurge.*

Lege hanc Epistolam Priori Paldolino familiari nostro, noui hominis ingenium, scio hæc eum confirmaturum. Vale. Et in Ioannis Guidij beneuolentia perseuera.

*Legitimus amoris terminus est  
consuetudo.*

MARSILIVS FICINVS  
Ioanni Caualcanti amico  
vnico, S. D.

**I**nterrogas quæ me potissimum causa induxerit, ut amatorias Epistolas nonnullas excogitarem, sunt Ioannes quam plurimi qui de rebus amatoriis loquentes scribentesue ab amoris lege procul aberrant, error autem huiusmodi tam noxius est quam utilis est recta dilectio, tam etiam multiplex quam multi sunt qui amant.

Omnes vero homines amant, homines dixi, Ioannes, nam qui non diligit hominem, non est homo. Ergo non solum in libro quem de Amore composui, verum etiam in Epistolis meis præfixi amantibus terminum quem usque progrediantur, quem qui transgreditur cum sui ipsius verus hostis sit, verus aliorum amicus esse non potest. Legitimum vero in loquendo scribendoue terminum solus ille seruabit, qui prius in cogitando seruauerit, seruabit autem in cogitando, qui, quæ vera pulchritudo sit, quæ non vera quidem sed veræ similitudo, cognouerit, legitimus amandi terminus est consuetudo, hæc tribus constat, cogitatione, aspectu atque auditu. Nempe (ut Philosophi omnes definiunt) amor nihil aliud est quam pulchritudinis desiderium. Pulchritudo corporis non in umbra materiæ, sed in luce & gratia formæ, non in tenebrosa mole, sed in lucida quadam proportionem, non in pigro ineptoque pondere, sed in conuenienti numero & mensura, consistit. Lucem vero, ipsam gratiam, proportionem, numerum, & mensuram, cogitatione, aspectu, auditu, duntaxat attingimus. Hucusque igitur se extendit verus veri amantis affectus. Appetitus autem sensuum reliquorum, cum ad materiam, molem, pondus, deformitatemque formæ amoriuè contrariam rapiat, non amor est, sed pruritus quidam ineptus & onerosus nimiumque deformis. Sed quid ego tam diu Socratis & Platonis nostri more, vulgo potiusquam mihi consulo? Forte quanto magis conabor ne vulgus turpiter amet, tanto magis insanum, gratumque vulgus suspicabitur, me nimis amare, quod etiam diuinis illis Heroibus Socrati & Platoni nostris dicitur contrigisse. Ergo de iis hæcenus satis superque sit dictum. Vale.

*Neque amor sine religione neque religio  
sine amore laudatur.*

MARSILIVS FICINVS  
Philippo Contronio Lu-  
censi, S. D.

**M**itto ad te amorem quem promiscram. Mitto etiam religionem, ut agnoscas & amorem meum religiosum esse, & religionem amatoriam. Sane ita natura comparatum est, ut neque amor honestus sit nisi religiosus, neque religio vera nisi amore suscepta. Salutat te Angelus Mamettus Ioannoctij oratoris filius paternæ virtutis hæres.

*De tolleranda iniuria.*

MARSILIVS FICINVS  
Ioanni Caualcanti amico  
vnico, S. D.

**A**Is quendam familiarium tuorum à perulantibus quibusdam, contumelia & iniuria nuper affectum fuisse. Qui facit iniuriam Ioanes sibi ipsi facit. Animum enim perturbat & nota mali habitus inficit. Subit infamia odium, periculum & incommoda. Qui accipit iniuriam non ab inferente, sed à seipso accipit. Non enim offenditur animus ipse rationalis qui homo ipse est, nisi iniuriam illam esse sibi malam existimauerit. Existimatio huiusmodi in nostro arbitrio posita est. Cum igitur nemo nisi à seipso lædatur, nemo de alio quam de seipso debet conqueri; cogitet ergo qui queritur non quomodo alium, sed quomodo seipsum puniat, hoc est, castiget & corrigat. Vidisti ne vnquam catulos quosdam, qui lapidem mordent in eos coniectum etiam si ab eo percussi non fuerint? hi cum à lapide læsi non fuerint, morsu dentes suos lædunt, Idem faciunt homines imprudentes, illi enim sæpe ab asino calce percussi, asinum imò se pugno percutiunt. Sanè imprudentes iniurias multas opinione sua in se recipiunt, quæ sua natura quasi pilæ in iactorem resultare consueverunt. Dices forsitan vindictam non desiderare difficile est. Ne dubita, si homines ignouerint, tamen paulo post Deus iustissimus vlciscetur. Quid commodius, quid gloriosius, quam patrum & vltorem suum habere Deum? Et tantum boni saltem mereri ab illo expectando, quantum iniurius inferre voluit mali, malumque hoc pacto in bonum conuertere. O quam pretiosum bonum est tollerantia? Hanc solam exercuit Socrates Græcorum sapientissimus, hanc præ

cæteris virtutibus exercuit Christus vitæ magister. Nam ob hanc penè solam exercendam dicitur ad homines descendisse. Tam vituperanda impatientia est quam laudanda est patientia. Mittamus cætera, impatientia turbat animum, præterita bona delet, præsentia inficit, futura impedit. Neque rumorivilis plebeculæ præstandæ sunt aures, si inuitauerit ad vindictam. Quid plebs? polypus quidam, id est, animal multipes sine capite. Magnanimi est præ magnitudine sua parui facere quæ sunt parua. Parua sunt & breuissima temporalia omnia, quorum quod est præteritum, non est amplius; quod est futurum, nondum est; quod præsens, indiuisibile est & incipit simul ac desinit.

Non est fortis qui succumbit iniuriis, sed qui superat. Superat autem qui ita resistit, vt ob earum impetum è suo statu non moueatur. Hæc familiari tuo legito, dicto etiam vt à ratione medelam quærat, non expectet à tempore. Tempus enim noxius medicus est, quotidie enim expectatione futuri fallit ægrotum, & antequam veteres expellat dolores nouos adiungit veteribus, totque quotidie accumulât mala, vt fallaci spe vitæ deducat ad mortem. Viuendum est autem hodie, qui enim cras viuit nunquam viuit. Si vis hodie viuere, viuere Deo, in quo heri & cras nihil aliud sunt quam hodie. Vale xxx. Martij m. cccc. lxxiiii.

*De constantia aduersus fortunam  
comparanda.*

MARSILIVS FICINVS  
Ioanni Caualcanti amico  
vnico, S. D.

**S**Ocrates apud Platonem in eo libro qui de scientia Thætetus inscribitur, amicum suum Theodorum Geometram ad ictus fortunæ fortiter propulsandos, non ferreis vt plerique solent, armis, sed aureis, hoc pacto muniuit. Impossibile, inquit, est Theodore mala penitus extirpare. Necessarium est enim bono aliquid semper esse contrarium. Apud superos quidem mala esse non possunt, sed mortalem hanc naturam, regionem inferiorem necessario circueunt. Ideo conandum est hinc illuc quam celerrime fugere. Fugere autem dicimus, se Deo quam simillimum pro viribus reddere. Similem vero hominem Deo reddunt, prudentia, sanctitas atque iustitia. Quemadmodum vero diuinum hoc Platonis nostri præceptum

accipi debeat, breuibus audies, sicut animorum nostrorum qui creator est, idem & gubernator Deus, ita corporum genitor & gubernator est mundus. Quoniam vero filius animus mundi, membrum est corpus, animus noster à Deo tanquam à patre prouidentia legibus clementer & suauiter agitur, corpus autem nostrum à corpore mundi fati viribus tanquam particula quædam à tota sui mole violento quodam impetu trahitur, nec in mentem nostram fati vis penetrat, nisi ipsa se sua sponte prius in corpus fato subiectum immiserit. Nemo igitur adeo consilio suo viribusque confidat, vt morbos corporis, rerumque facturas, deuitare omnino possit se speret. Recipiat à corporis peste se ipsum animus quisque, & in mentem suam se colligat, tunc enim vim suam fortuna explebit in corpore, in animum non transibit. Non pugnabit incassum vir sapiens contra fatum, se fugiendo potius repugnabit. Fugari non possunt aduersa, sed fugi. Igitur hinc illuc, id est, ab amore corporis externarumque rerum cura, ad animi denique cultum aufugere à Platone iubemur, aliter enim mala declinari non possunt. Addit, quam celerrimè, ob eam arbitror rationem vt à tenera ætate segregare à commercio corporis animum incipiamus, antequam diuturna eius consuetudine submergatur. Per hanc utique fugam Deo similis non immerito redditur animus, quippe cum à corporis contagione liber tanquam Deus euadat. Huiusmodi libertatem virtutibus præcipuè tribus assequimur, Prudentia, iustitia, sanctitas. Prudentia quid Deo, quid mundo debeamus agnoscit, Iustitia quod suum est mundo, sanctitas Deo quod suum est, tribuit. Itaque vir prudens corpus quidem suum mundi membrum, mundi ipsius reuolutioni concedit, quocumque contigerit agendum. Animum autem Dei filium à corporis commercio segregat, & diuinæ committit prouidentia pro arbitrio gubernandum. Hoc aureum Platonis nostri præceptum si nos, suauissime mi Ioannes, sectabimur, peruastum hunc fortunæ gurgitem, cœlesti flamine adspirante, securi & incolumes ad portum feliciter nauigabimus.

*Amicitia illa stabilis quæ à Deo conflatur.*

MARSILIVS FICINVS  
Ioanni Caualcanti amico  
vnico, S. D.

**V**erâ Platonici Philosophi amicitiam, optime mi Ioannes, stabilè vitæ duorum  
FF f ii)



unionem definierunt. Vitam verò nos nam illis esse duntaxat hominibus arbitramur qui opere vno ad vnum finem tanquam eadem calle ad eundem itineris terminum gradiuntur, stabilem quoque corū ita demum fore societatem existimamus, cum non vnum solum, verum etiam stabile firmumque id fuerit quod sibi communi quodam inter se officio sectandum proposuerunt. Verum cum omne hominum studium atque commercium ad id quod bonum putatur semper contendere soleat, bona vero tria esse mortalibus videatur, bona inquam animi, corporis, & externa, aut virtus animi ab illis, aut voluptas corporis, aut diuitiarum copia quaeritur. Horum profectò primum illud certum est & perpetuum, duo reliqua caduca sunt atque mortalia. Quamobrem inter illos solum stabilis vitæ vnio, quæ vera est amicitia esse potest, qui neque ad diuitias cumulandas, neque ad explendas libidines corporis, quæ omnia fluxa & caduca sunt, sed ad vnā stabilemque virtutem animi capeffendam atque colendam communi quodam inter se studio & toto mentis ardore proficiscuntur. Animi virtutem Philosophorum ille omnium magister & dux Plato noster sapientiam voluit nuncupari, sapientiam verò esse rerum diuinarum cognitionem existimauit. Res autem diuinas, idem in libris de Republ. non aliter menti nostræ innotescere posse, quam Deo nos illustrante, demonstrat, quem admodum & corporum formas oculis, non aliter quam Sole oculos illuminante, videri. Idem igitur Deus est quem videre desideramus, qui aciem mentis vt intueri possimus illuminat, qui lucidæ menti se denique monstrat, monstrando delectat, idem via nobis est Deus, est veritas, est vita. Via quidem, quoniam suis nos radiis ad se conuertit & ducit & rapit. Veritas autem, quia verum se nobis ad ipsum conuersis ostendit. Vita denique, quoniam animum nostrum ipsius cōtemplatorem beata illa visione pascit perpetuò & oblectat. Hunc ergo sapientiæ omnis perennem fontem sitiant, oportet omnes quicunque sapientiæ gustare liquores suauissimos cupiunt. Sapientiam vero sectantur necesse est omnes, qui virtutem animi adipisci desiderant. Quo efficitur vt quicunque animum suum colere instituunt, Deum colere compellantur. Amicos autem inuicem eos in superioribus definiuimus, qui simili & pari studio ad virtutem contenderent, mutuoque fauore suos animos colerent. Cultus animi sola virtute constat, virtus

sapientia est, sapientia cognitio diuinorum. Cognitionem huiusmodi lux nobis diuina largitur. Cultus itaque animi, Dei ipsius est cultus. Amicitia igitur cum duorum consensu ad animum virtute colendum nitatur, nihil vtique aliud esse videtur quam duorum animorum summa in Deo colendo concordia. Amantur autem à Deo quicunque Deum pia mente colunt. Ideo non duo quidem soli, sed tres necessariò amici sunt semper, duo videlicet homines vnusque Deus. Deus, inquam, Iupiter hōspitalis, Iupiter amicabilis, Iupiter humanæ vitæ seruator. Quem coluit Plato semper, semper Socrates honorauit, hic vitæ dux hominum, hic nos in vnum conciliat, hic indissolubilis est amicitiae nodus, custosque perpetuus. Hoc Deo quondam conciliatore prisci illi Theologi, quorum memoriam veneramur sanctam, inter se amicitiae copulam inisse traduntur. Apud Persas Zoroastri in diuinis religiosæ philosophiæ mysteriis assiduum sibi comitem Arimaspem aspirante numine dicitur adsciuisse. Mercurius Trismegistus apud Ægyptios similiter Æsculapium. Musæum Thracia Orpheus. Illic etiam Aglaophemus Pythagoram. Atheniensis Plato Dionem primo Syracusanum. Dione deinde defuncto, Zenocratem. Vsq̃ue ad eò sapientes viri ad coeleste iter tuto & placide peragendum & ducem Deum & comitem necessarium fore arbitrabantur. Horum ego vestigia superne per coeli plagas impressa & si minime sequi posse cōfido, hoc tamen vnum mihi iam ab uideor consecutus, vt ad sacræ Philosophiæ studia, exercendam virtutem, veritatem inuestigandam, optimi viri commoda & iucunda societate non caream. Reor enim Ioannis Caualcantis & Marsilij Ficini familiaritatem in earum numero, quas paulo ante commemorauimus, ponendam esse, ac duce Deo qui nobis feliciter hanc copulam instituit & confluuit, utrique nostrum ad res agendas, ad vitæ tranquillitatem, ad diuinorum indagationem, plurimum conducturam.

*Poeticus furor à Deo est.*

MARSILIUS FICINVS  
Antonio Pellocto Baccio Vgolino, S. D.

Cum legeremus ego & Antonius Calderinus, vnà & Bindaccius Ricasolanus familiares mei, quæterque vestrum in Caroli Marsupini laudes Musarum alum-

ni composuit, consensimus verissimam esse illam Platonis nostri sententiam, Poësim non ab arte, sed à furore aliquo proficisci. Et si nihil opus est rationibus ubi res ipsa in promptu est, dicam tamen quod ratio Platonica persuadet. Plato de furore diuino in Phedro & Ione disputat, cuius tria potissimum affert signa. primum, quod artes singulas singuli homines sine Deo, longo vix tempore assequuntur. Legitimi vero Poëtæ, quales fuisse vult Orpheum, Homerum, Hesiodum, Pindarum, omnium artium suis operibus certa quædam indicia & argumenta inseruerunt. Secundum, quod multa furentes canunt & illa quidem mirabilia, quæ paulo post deferuescente furore ipsimet non satis intelligunt, quasi non ipsi pronunciauerint, sed Deus per eos ceu tubas clamauerit. Tertium, quod non prudentiores viri & ab ineunte ætate eruditiores optimi euasere poëtæ. Verum insani potius aliqui, qualem fuisse constat Homerum atque Lucretium aut rudiores, qualem se fuisse testatur Hesiodus & quales extitisse Ionem, & Tynnicum Chalcideum scribit Plato. Qui præter artem subito in rebus Poëticis mirandi prodierint. Addit ineptissimos quosdam homines à Musis ideo corripì, quia diuina prouidentia declarare vult, hominum generi non hominum inuenta esse præclara poemata sed coelestia munera, cuius illud affert signum in Phedro, quod nullus unquam, licet diligentissimus & in omnibus artibus eruditus, excelluit in poësi nisi ad hæc accesserit feruentior illa animi concitatio, quam sentimus quando Est Deus in nobis agitante calescimus illo, impetus ille sacræ semina mentis habet, Valete. IIII. Martij. M. cccc. lxxxiii.

*Cura patriæ, familia, amicorum.*

MARSILIVS FICINVS  
Francisco Tedaldo, S. D.

**B**Artolus Tedaldus patruus vester vir doctus & prudens, sæpè Socraticum illud habebat in ore: Duo præ ceteris rebus humanis esse curanda, patriam videlicet & familiam. Et merito, cuius enim patriæ membrum est familia, corpus patris. Quid igitur toties, Franciscus noster, quid tandiu peregrinaris? Sic neque patriam colis, neque familiam satis excolis. Non tantum cogitandum est, ut multa filiis relinquant bona, quantum ut multum bonos, alterum fortè extra patriam, alterum certè in patria consequi potes. Lacrantij ar-

bitror filij tui diligentie honestatique confidis. Neque ipse quidem diffido. Quid verò de amicis dicam? quibus aliquando obsequaris oportet, si vis tibi obsequi, obsequere amicis, imò tibi hodie. Obsequium crastinum inimicis, si quos habes, dona: sit precortibi saltem cura mei, cui quidem tam charus es, quam quod charissimum. Vale. v. Martij. M. cccc. lxxxiii.

*Quis sit verus vir appellandus.*

MARSILIVS FICINVS  
Bartholomeo Fontio & Alexandro  
Braccio Musarum alumnis, S. D.

**S**I miramini cur Nicolaum Michelsonium peculiari nomine verum virum nominem. Respondeo, quia nihil reperio in eo viro effæminatum, nihil mendax, nihil non virtutis vim præ se ferat, & intra se ferat. Vnde nam proficisci id putatis? Quod nemo reperiatur vsquam, qui Nicolao vel minimum quicquam detrahat. Cur sine exceptione laudatur? Quia sine simulatione diligitur, & vnde istud? Quia sine simulatione diligit & viuunt absque mendacio. Valete, sed caute ne legat hanc epistolam Nicolaus. Laudare eum absentem statui, ne fortè minus verè verum virum laudare viderer. Salutate Petrum Cenninum nostrum virum pietate literisque ornatum. vi. Aprilis. M. cccc. lxxxiii.

*De humanitate.*

MARSILIVS FICINVS  
Thomæ Minerbeo humano  
viro, S. D.

**C**Ur pueri crudeliores sunt quam senes? insani quam prudentes? hebetes quam ingeniosi? Quia minus homines, ut ita dicam, sunt quam cæteri. Vnde qui crudeles sunt, inhumani, efferatique nominantur. Qui enim à perfecta hominis natura, vel propter ætatis defectum vel propter animi vitium corporisue morbum, vel propter aduersam syderum dispositionem, procul distant, hi, ut plurimum humanam speciem, tanquam rem alienam extraneamque vel odere, vel negligunt. Non homo, ut ita loquat, fuit Nero, sed monstrum quoddam, pelle homini simile. Si enim reuera fuisset homo, cæteros homines tanquam membra quædam eiusdem corporis dilexisset. Singuli namque homines sub una idea & in eadem specie sunt vnus homo. Ob hanc ut arbitror rationem, sapien-

res solam illam ex omni virtutum numero hominis ipsius nomine, id est, humanitatem appellauerunt, quæ omnes homines quodammodo ceu fratres ex vno quodam patre longo ordine natos diligit atque curat. Ergo, vir humanissime, in officiis humanitatis perseuera. Nihil Deo gratius quam charitas. Nullum certius aut demeriti indicium aut miseriæ portentum quam crudelitas.

*Gratia, Amor, Fides, Amicitia.*

MARSILIVS FICINVS  
Naldo Naldio Poëtæ S. D.

**V**olebam Nalde te Phœbi nunc appellare delitias, poësimque tuam multis, ut par est, laudibus prosequi, sed venit in mentem, haudquaquam Musam decere nisi Musam, & carmina nisi carminibus celebrari. Tacere autem tua penitus nequeo, quid me prouocat ad loquendum, amor ac fides, amorem igitur fidemque laudabo, gratia mouet amorem, amor fidem procreat. Fides amorem patrem suum fouet, atque hoc fomento ex amore generat amicitiam, denique amicitiam iam natam alit fides, eadem & auget quotidie seruatque penitus indelebilem. Vndenam fieri hoc arbitramur? quod cum cætera quanto magis senescunt, tanto etiam magis debilitentur, amicitia tamen ipsa quanto vetustior est tanto robustior. Nunquid beneficia multa ultro citroque accepta id agunt? nequaquam. Voluntas enim cum libera sit, libera emitur, voluntate non pretio. Ergo diu probata fides, comprobata amicitiam, solaque fide fit ut beneuolentia & antiquissima simul & robustissima sit. Hanc mihi celebrare præ cæteris libet. Doctrina enim cuiusque propria vnus est duntaxat, fides vero saltem est duorum, qui enim sapis, tibi ipse sapis fidelis autem tibi es & mihi. Vale mi Nalde fide fidelior, & amice omnium antiquissime. Atque in familiaritate Bernardi Oricellarij docti probique viri perseuera. Memento quoties vnâ vel legitimum ciuem vel felicem virum excogitauimus, toties te centum virorum millibus Oricellarium, consentiente Marsilio, anteponere consueuisse. Iterum Vale. VIII. Aprilis. M. cccc. lxxviii.

*Stultitia & miseria hominum.*

MARSILIVS FICINVS  
Ricciardo Angelerio Anglariensi, Olierio Ardouino, Antonio Seraphico, Conphilosophis.  
suis, S. D.

**Q**uid tantum ridebat Democritus? Quid lugebat Heraclitus: Alter qui-

dem, ut opinor, stultitiam hominum, alter verò miseriam. Stultitia ridicula, miseria fiebilis esse videtur. Stultitia quid aliud est quam iudicij deprauatio? Miseria quid, nisi appetitus afflictio ex deprauatione iudicij proficiens? Quis negabit stultos esse homines, qui curant aliena, sua negligunt? Magnificiunt absentia & noua, præsentia consuetaque paruifaciunt. Ob assiduam futurorum cupiditatem, præsentibus non fruuntur. Et cum sistendus sit motus ut quiescas, ipsi, ut quandoque quiescant, nouos semper motus & varios inchoant. Sic diuitias accumulunt tanquam nunquam morituri, sic voluptatibus abutuntur, tanquam quotidie morituri. Missa faciamus alia in præsentia. Infinita enim materies nunc nobis occurrit. Illum in primis stultissimum non iudicare non possum, quod multi bestiam quidem suam imò feram noxiam & indomitam, hoc est corpus, pascunt diligentissime, seipsos autem, id est, animum ipsum quantum in eis est, fame perire permittunt. Et miramur quamdiu ita viuimus, imò quamdiu ita morimur, tamdiu nos miseros esse, quasi possumus alia metere quam quæ seuiamus. Stultitiæ fructus est miseria. At quomodo? Quoniam stulte nimium & corpus alimus & negligimus animum, illud pingue redditur & robustum, ille macer ac debilis. Hinc fit ut animo præ tenuitate imbecillitateque sua, corporalia tùm magna, tùm fortia videantur. quæ magna videntur, magnopere appetit, quæ fortia, timet summopere. Quocirca tanquam miser partim cupiditatis ardore, partim timoris horrore sollicitatur. Alamus obsecro angeamusque alimentis spiritualibus spiritum, ut magnus quandoque factus & corporalia tanquam minima paruifaciens, nullam in partem ob corporis impetum è sua sede declinet. Ascendamus in altam mentis speculam, infimo corporis puluere derelicto, tunc diuina propius, humana procul spectabimus. Illa maiora quam consueverint videbuntur, ista minora. Quapropter diligentes illa, & ista negligentes, neque stulti amplius erimus neque miseri, sed sapientes iam atque beati. Valete.

*Stultitia & miseria hominum.*

MARSILIVS FICINVS  
Petro Vannio, Cherubino Quarqualio, Dominico Gallero, S. D.

**V**idisti pisciâ in gymnasio meo mundi sphaeram, & hinc atque illinc Democritum & Heraclitum. Alterum quidem ridentem, alterum verò flentem. Quid

Quidnam ridet Democritus? quod luget Heraclitus, vulgus videlicet, animal mon-  
struosum, insanum & miserabile. Mortales  
bona quotidie à Deo petunt, sed vt bene  
illis vtantur, nunquam postulant. Optant  
vt cupiditates eorum fortuna sequatur, vt  
autem cupiditas rationem sequatur, nihil  
curant. Minima quæque suppellectilia stu-  
dēt quam pulcherrima fieri, animum fieri  
pulchrum ferè nunquam student. Corpo-  
ralium morborum medelas diligenter ex-  
quirunt, morbos animi negligunt. Pacem  
opinantur cum aliis habere se posse, ipsi  
tamen secum assiduè bellum gerunt. Est  
enim inter corpus & animam, sensum &  
rationem pugna perpetua. Amicum sibi  
ex aliorum numero fidum comparare pos-  
se confidunt, nullus autem eorum sibi ipse  
seruat fidem. Quæ probauere, reprobant,  
quæ voluere nolunt, atque contra, ædifi-  
ciorum partes ex amissis disponunt, fides  
in lyra ad vnguem temperant, vt autem  
animi partes motusque concinant, nun-  
quam tentant. Lapides viuētibz reddūt  
similes, viuētes vero lapidibus, sapientes  
ipsos contemnunt, sapientum statuas &  
nomina venerantur. Aliena profitentur  
nosse, cum propria nesciant. Quid præte-  
rea dicemus ad hæc amici? Magistratus  
homicidium prohibent, & vbique instru-  
menta permittunt ad necem hominum fa-  
bricari. Optimam virorum segetem op-  
tant, sementem verò virorum, id est, pue-  
ritiam non satis excolunt. Semper ma-  
le viuunt homines hodie, cras solum  
bene.

Ambitionis gratia maleficiis inter se cō-  
tendunt, commodior ad gloriam via esset  
mutuis beneficiis decertare. Cum semper  
loquantur male, bene sperant se audituros,  
eum male agant, accepturos bona. Bono-  
rum authores esse non prædicamus, ma-  
lorum vero Deum. Culpas nostras in astra  
reiciimus. Quot reperies qui tanti æsti-  
ment hominem, quanti pecuniam? Qui  
ita seipsum colant, vt agros & cætera co-  
lunt? qui tanta diligentia familiam edu-  
cent, quanta multi equos & canes & aues?  
Qui considerent quam grauis sit temporis  
iactura? In ære expendendo parcissimi  
sumus, in tempore erogando supramo-  
dum prodigi. Quot dabis qui animi sui pe-  
nuriam recognoscant? Quisque abun-  
dare sapientia se existimat, carere in  
pecuniis. Proh dolor, maxima quæri-  
mus in minimis, excelsa in infimis, in ma-  
lis bona, in rebus volantibus quietem, in  
diffidentibus pacem, copiam in penuria,  
in morte denique vitam. Quæramus, ami-

ci, obsecro, hæc eadem quæ iam quæri-  
mus. Sed non ibi quæramus vterius vbi  
quærimus. Insanus nimium & miser est qui  
se confidit contrarium in contrario reper-  
turum. Valere.

*Stultitia miseriaque hominum.*

MARSILIVS FICINVS

Christophoro Landino Viro boni-  
tate doctrinaque sin-  
gulari, S. D.

**A**Ristoteles problemata de natura re-  
rum introduxit. Ego nunc de na-  
tura hominum apud te problemata mo-  
ueo. Dic age, cur homines rationales esse  
se gloriantur, & tamen casu viuunt? Affe-  
ctant timentue multa, priusquam satis sciāt  
vtrum appetenda timendaue sint, an con-  
tra æternis & immensis breuissima & mi-  
nima anteponunt. Cur neque obedire ho-  
mini volunt, neque sapienti parere? Be-  
stias tamen vitis que libentissimè ser-  
uiunt.

Quare aliis contendimus dominari, cum  
nobis ipsi non dominemur? Quare studio  
dominandi quotidie in seruitutem incidi-  
mus? Et dignitates consequi conamur ma-  
gis quam vt dignitatibus digni simus?  
Præterea cum videamus bestias bestia à  
non posse recte absque hominis custodia  
regi, quonam pacto arbitramur homi-  
nes ab homine absque Dei consilio & au-  
xilium posse feliciter gubernari? Quidnam  
facit nos in tam superflua rerum copia  
querulos & egenes? Quid facit vt multis  
inuideamus, cum mortalium conditio mi-  
sericordia digna sit potius quam inuidia?  
Cur honorum tam facile obliuiscimur,  
nunquam verò malorum? Et cum contra-  
ria contrariis expellantur, quid mala malis  
curare tentamus? Quid sæpe speramus ad  
gloriam peruenire? Virtutem in alio ad-  
miramur, nos autem vt admirandi videamur  
nitimur potius quam vt simus. Displi-  
cet vitium alienum, vix autem cogitamus  
quo pacto nobis aliisque nequaquam dis-  
pliceamus. Claudimus aures veritati, men-  
dacio patefacimus. Quid de illis dicam qui  
alicuius vel homines vel rei amore capti, se  
ipsos odio habent, se deserunt vt aliud con-  
sequantur: ò demētes, ò miseri, cum alie-  
na per aliud quam per vos ipsos apprehen-  
dere nequeatis, quonam pacto si amiseritis  
interiora, exteriora vnquam apprehende-  
tis, quid bona procul quæritis peregrini?  
cum prope sint, imò intra vos sint? Admi-  
rari & hoc Landine sæpè soleo, quæ ratio-

ne mortem vnam duntaxat timeamus, eam videlicet quæ finis est moriendi, quotidianas verò mortes nequaquam? Nempe quolibet momento corporis temperatio variatur, & vita præterita definit. Denique, ut mihi videtur, quoniam falso virtutes, vitia vero reuera exercemus, idcirco quantum in nobis est, falso felices, reuera miseri euademus, hæc risit Democritus, hæc deplorauit Heraclitus, curare voluit Socrates, curare potest Deus. O quam miserum animal homo est, nisi aliquando exolet super hominem, commendet videlicet seipsum Deo, Deum amet propter Deum, & cætera propter ipsum. Hæc vnica problematum illorum solutio est, requiesque malorum. Vale.

*Exhortatio ad modestiam & studia  
literarum.*

MARSILIVS FICINVS

Juliano Medici viro magnanimo, S. D.

**E**T si is est amor erga te meus, ut index in rebus tuis imò meis perfectus esse non possim, dicam tamen Iuliane quod sentio postquam rogas. Primum quidem laudo prudentiam tuam, quod tuo ingenio non confidas, sed consultas seniores. Scis enim quam multum quisque ob naturalem amorem sibi ipse placeat. Deinde in Epistola laudo naturalem quandam suauitatem, videris mihi pictorum quorundam instar oculorum tuorum venustatem orisque leporem quemadmodum intuitu linguaque semper exprimis, ita modo calamo expressisse. Perge igitur Iuliane omnium suauissime. Perge quæso. Lustra diligenter hortos, ut cœpisti iam, Tusculanos. Nam si Tullianos flores exercitatione annua lambes iniectarium mel denique fundes. Si tua tibi commendare liceret, Andreæ Cambinum tibi plurimum commendarem. Vale.

*Quod amicus est in amico.*

MARSILIVS FICINVS

Juliano Medici viro Magnanimo, S. D.

**D**icage Iuliane precor, si quis te dormiente, diligenter in re tua vigilauerit, succensebis ne illi, quod te non excitauerit importunus? An debebis potius? debebis certè non parum. Debes & mihi qui te iacente, seriis interim negotiis tuis interfui, consuli, favi.

At cur non accerxisti, inquires, me, cum posses, etiam si putauissem te illuc abesse non accerxissem, ne tibi forte molestior essem. Sed re vera ingens in te amor meus iamdudum figuram animo impressit meo. Atque ut me extra me in speculo non nunquam, ita te sapientie intra me in meo corde speculor. Aderat insuper tunc Laurentius frater tuus, alter tu & natura & voluntate. Itaque cum Iulianum hunc meum perspicue & intus extra perspicerem, cum illuc abesse cogitare non poteram. Nulla igitur negligentia, sed amore nimio factum est, ne te aut tunc ad res agendas aduocarim, aut postea quid actum esset reddiderim certior. Aduocari vis alias dulcissime Iuliane? Des operam oportet, ut minus ameris. Arduum istud quidem & forsitan impossibile. Danda enim opera prius erit ne sis Iulianus. Tunc exues amorem cum te exues. Quid igitur in posterum faciam? vocabo ne te alias? nequaquam ut arbitror. Satis iampridem satis cupidè nos & inuicem & ad se conuocauit utrosque. Vale.

*Salus amici ab amico.*

Carolus Marsupinus Marsilio Ficino  
Platonico, S. D.

**S**alue solus mea salus. Tamdiu enim sanus saluusque sum quamdiu tecum sum. Actum denique viuere mihi videor cum tecum uiuo. Quoties absum, toties perij. Vide ergo, mi Marsili, ne me deferendo hominem perdas, imò amicum occidas. Hac semper atque illac circumsas. Nunc deorsum corpora curas, unce fursus animas custodis. Ego interim miles intereo. Si tantam charitatem habes quantam certè habes, cur amabo tuum charum Carolum hic manendo non curas? animus enim æger est tuo discessu, corpusque ægrotum, vna salus ut redeas, hic quartus iam dies est, ex quo me reliquisti, quatuor cum geminaueris, promissa seruato. Vale.

*Diuinatio de amico.*

MARSILIVS FICINVS

Carolo Marsupino suo Salutem.

**T**V quoque ter quaterque salue. Videbar mihi hac aurora dormiens breuissimam quandam orationem legere, in qua talis esset verborum sententiarumque contextus, qualem ego semper pro viribus



observare, itaque amorgebam mea ne an aliena legerem. Surgenti paulo post è lecto reddita mihi est Epistola tua, ex qua subito re ipsa cognovi, quod in libro de immortalitate animi disputaveram, matutina somnia sæpè nonnihil varicini continere. Vidi Marfupine Marsilium in tua pupilla hodie Marsilio pulchriorem. Sed hæc nunc missa faciamus. Talis denique Epistola est ut compellat me pedibus potius quam manibus, ac voce potius quam literis respondere. Saluta Thaddæum Vgolinum virum religiosum.

*Quantum possit desiderium amicorum.*

MARSILIVS FICINVS  
Laurentio Medici viro Magnanimo, S. D.

**T**heologi statim metiuntur æternitate, naturales Philosophi motum tempore, amantes tempus affectu. Quo enim maius est desiderium, eo tempus professio- nis quidem brevius, expectationis autem longius, opinantur. Quantum ergo tu me ames ex eo, præcipuè tuis literis declarasti, quod dici vnus silentium, diuturnum silentium, & literas meas, quæ velocissimè adularunt, expectatissimas appellasti. Quantum ego te vicissim amem, illud nunc declaret volo, quod Epistola tua mihi decies iam legenti ita brevis apparet, ut eodem penè momento & saluere iubeat & valere. Repugnantia hæc duo sunt in amore. Cæteri cum dicuntur valere, salui esse intelliguntur, amantes cum vale audiunt, male audiunt, imò malum. Efficis ergo ut gaudeam quando salve inquis, simul quoque ut doleam quando iubet vale. Iubes autem simul ut mihi videris vtrumque. Scriberem certè plura, forte etiam meliora. Verum repugnantibus iis affectibus tua causa distractus, neque amplius in præsentia scribere possum neque melius. Salve tu quoque simul & vale. xx. Martij. M. cccc. lxxiii. Florentiæ.

*Laudare præstat benevolentiam  
quam ingenium.*

MARSILIVS FICINVS  
Angelo Politiano poetæ Hometico, S. D.

**A**cceperam calamus Angele, ut tuam istam Homericam Musam miris in cælum laudibus quoad possem extollerem, repente autem sic interpellavit

me Cupido; Quid agis inepte Ficine, semper ne in laudibus Musæ versaberis, me lauda Philosophæ, si vis absque adulationis suspitione laudare, si Musam celebras Politianum, Angelum solum celebras, si Cupidinem Angelum vnà atque Marsilium. Ego enim communis vestrum amor sum, vtrumque colo, ab vtroque color. Hæc Angele Deus ille mihi, sed ego illi, inquam, verax est Musa Politiana, nunquam metiri me compulit, at tu periure amor, me cogis mentiri quotidie. Ita heri delitias Politianas amabam, ut iurarem eas in posterum vehementius amare non posse, si hodie rursus amo, ut iurem me heri eas non satis amasse, utque simul affirmem non posse cras ardentius amare quam hodie, cras istud quotidie me similiter deludit.

Semper adultus est meus amor, quis credat, semper & adolescens, adolescat tamen ut placet, modo non senescat. Sed audi Cupido; Non Venus Amoris mater est, sed Calliope, fouet hunc musa sedulo, crescit assidue, crescat hoc fomento iugiter & periurus sit. Non est hoc vitium in amore. Sic igitur, Angele, communem amorem nostrum Musamque tuam colere vnà & debeo & volo. Tu Musam ipsam adora amoris & gloriæ matrem xxi. Martij. M. cccc. lxxiii.

*Quos amor fallat, quos non fallat.*

MARSILIVS FICINVS  
Nicolao Michelotti viro S. D.

**S**cripsi Michelotti ad Laurentium Medicem & Angelum Politianum literas hodie, nescio quomodo, amatorias, ut nihil mirum sit si videantur ineptiores, nam ineptus amor. Vis me tertio ineptire? Et vis, & volo, sed paucis. Ego Nicolæ nihil habeo maius quam quod amo, nihil melius quam quod amor, & à viris amore dignissimis. Possum nonnunquam ob amorem forte loqui minus vere, sed de amore non possum nisi vera loqui.

Neque tamen me decipit amor ubi antea iudicaui quam amaui. Amor iudicium sequens excæcat non præcedens. Amor interdum nihil videt, interdum nimis videt. Quorsum hæc? Tu intelligis. Nam amatoria calles in primis vir omnium amantissimus. Commenda me & Ioannem Caualcantem meum Laurentio Medici. Et curate valetudinem eius diligentissime, est enim publica vita. Vale. xxi.

Martij. M. CCCC. LXXVIII. Florentiæ.

*Commendatio ab egestate & dignitate.*MARSILIVS FICINVS  
matthæo Palmerio Theologico.

**E**T si certo scio literatos viros apud Palmerium musarum palmam commendatione non indigere, vt tamen officio amicitie satisfaciam commendo tibi quam plurimum Lucam Geminianensem præceptorem quondam, vnà cum Comendo in grammatica meum, huic ego tantum debeo quantum loqui ex arte præstantius est, quam casu verba inania fundere. Huic & tu duabus de causis fauere debes, & quia indiget, & quia meretur. Indigenti benefacere misericordis officiū, merenti autem iusti, scio te misericordem & iustum esse solere. Vale.

*Cum bene omnia regantur à Deo, omnia in melius accipienda.*MARSILIVS FICINVS  
Episcopo Campanæ poëtæ.

**N**Vnquid & tu Campane rides vnquam mortalium arrogantiam? Quam ego sæpe rideo, & vt ita deuitem redarguo. Neque pueri senum consilia, neque rusticis sapientium cogitationes attingunt. Homo tamen animal audet diuinæ naturæ rationem sæpe superbius quam decet aucupari, & prouidentia illius finem auspicari. Et quod deterius est, mortales quilibet in quauis ætate inter epulas etiam atque scorta licentius diuina mysteria tractant. De quibus absque diuino lumine loqui Pythagoras iure prohibuit. Nemo Campane diuina percipit nisi diuinus. Recte enim Paulus Apostolus. Quæ Dei sunt nullus nisi spiritus Dei cognouit. Nemo rursus de diuinis amplius mentitur, quam qui metitur ad vnguem. Sic enim Deus apud Isaiam ait. Comprehendam sapientes in astutia eorum & alibi, Deus nouit sapientum cogitationes vanas esse. Satis igitur esse debet homini nosse pulcherrimam hanc mundi vnus machinam ab vno quodam sapientissimo architecto pendere & gubernari. Atque ab ipso bono non posse proficisci quicquam nisi bonum. & quæ ab eo proficiscuntur non posse ab ipso aliter gubernari quam bene. Itaque in melius accipienda sunt omnia. Qui ita diuina intelligit atque diligit, is est natura diuinus, arte bonus, spe lætus, præmio felix. Vale felix.

*De stultitia hominum, & quæ sit vera scientia.*MARSILIVS FICINVS  
Panetio Pandothio.

**A**ngelus Politianus noster Panetium suum marsilianæ, imò Platonice disciplinæ hodie condemnauit. Ego autem & si nouis amicis comoediam, veteribus Satyram canere soleo, Panetio tamen satyram canam. Volo enim amicitiam nostram exoriri simul & consummari. Considera mi Paneti quam peruerse iuuamus. Nam haud facillè exaudimus infames. Ipsi vero exaudiri speramus à Deo improbi, viuimus, ah demones nimium & iniusti. Deum non mores mutare conamur. Persuadere volumus aliis bona. Et non nobis persuademus. In ore bonum gestamus, in pectore malum. De virtute loquentes lyræ instar sonum proprium non audimus. malos medicos imitatur, qui sanitatem quam aliis pollicentur, sibi non præstant. Præsta amabo mihi aures amice parumper. Ego te & gratis paucis oratoriam & musicā Geometriamque docebo. Tibi ipse quod honestum est persuade, tempera motus animi, vim tuam actionesque metire. atqui difficile nimium istud inquires. Non erit difficile admodum Paneti, si tam auide cupias bene viuere quam cupis viuere.

*Liberalitatis & elemosynæ laus.*MARSILIVS FICINVS  
Laurentio medici viro magnanimo. S. D.

**D**icam mi Laurenti quod sentio, & si forte videtur execrabile dictum, sed reuera non est execrabile quod est verum, nihil enim sacratius veritate. Dicam ergo quod sentio libere. Deus, Laurenti, Deus ipse venalis est. At quo nummo potissimum Deus emitur? Quo ipse cæteros emit, hoc est charitate quadam in pauperes liberali. Deus enim amore immenso gratis largitur omnibus omnia, solisque dat pauperibus. Nam omnes, quamvis distissimi videantur, omnino inopes sunt ad Deum. merito hac sola virtute Deum emimus, quoniam hac sola eum verissimè imitatur: Nemo sapiens, aut fortis, aut temperans se iactat æmulari Deum. Vmbra sunt hæc virtutes diuinarum virtutum, solus homo in pauperes liberalis exactè hūc imitatur. Eadē enim in dādo nō est liberalitas

hominis

nominis atque Dei. O felicem nimium mercatorem, qui exiguo pretio se ab hostibus, id est, vitiis redemit, simulque emit homines atque Deum! Nunquam erit pauper qui hominum Deique diues est. Qui in summis diuitiis sæpè considerat, quid est pauperem esse, nunquam euadet infimus, qui constitutus in summo clementer prospicit infima. Nihil melius efficit vniquam pusillum homo quàm cum humiliter ascendit in altum. Nihil maius vir magnus agit, quàm cum magnificè descendit ad imum. Cæteræ virtutes vtenti solum vt plurimum profunt, liberalitas vtenti prodest ac cæteris. & quanto latius quàm reliquæ virtutes suum officium propagat, tanto præstantior iudicatur. Bonum enim quanto amplius, tanto diuinius. Ac si pessimum est maleficium, quia contra naturam boni generisque humani societatem est, necessariò beneficium esse optimum arbitramur. Cæteræ virtutes concitare inuidiam nonnunquam putant, sola hæc semper & amorem accendit, & odium inuidiamque prorsus extinguit. Quæ quidem tunc maximè officio suo vititur, quando homini subuenit, tum propter fortunam egeno, tum propter virtutem bene merenti. Sere igitur, mi Laurenti, sere, inquam, felix agricola, vt iam pridem coepisti, bono animo aridam hanc humanam terram, quæ tibi tandem non frugibus solum, verum etiam lacte affluet atque melle. Quamuis enim homo dicatur ab humo, diuersa tamen in serendo ratio est hominis atque humi. Qui in humum inopem semina proicit, iacturam facit seminum. At qui in hominem inopem, certè serit vtiliter. Atque, vt pollicitus est qui non mentitur, centum pro vno reportat, & id quod pretiosius est, pro centum seminibus vnum Deum. Quorsum hæc? Cum audissem te his sacris diebus multa, vt abundè soles, & plusquam soles, clementer in pauperes erogasse, nolui in charitate laudanda nimium parcus esse, in qua in exercenda liberalis, & vt ita dicam, prodigus extitisti XII. Aprilis, M. cccc. lxxiii. Florentiæ.

*Nulla virtus benignitate amabilior.*

MARSILIVS FICINVS

Nicolao Michelotto vero

viro, S. D.

**S**I lachrymari mulierum est, Michelotti, ego me esse fateor præ cæteris muliebrem. Ingenium nobis molle Thalia dedit. Laurus autem noster mollissimum red-

didit. Lachrymor equidem siue teneriore quodam gaudio, siue alio nescio quo mirò affectu, quoties considero, cōsidero autem sæpè, quantū Lauretius noster erga Deum pius, quantum misericors erga pauperes, quantum beneficus erga omnes. Verum quanto magis alius beneficus est, tanto magis quodammodo est marsilio suo maleficus, siquidem beneficiis, imò maleficiis istis suis me pene miserum miris modis quotidie fascinat & illaqueat. Ac dum cæteris lachrymas amouet, mihi mouet lachrymas. Et cum ardentius à me amatur, tunc discedit longius. Admone, vir amantissime Laurum vt quæ amauit amet. Et cum primum, licet tam propè accedat præsentia, quàm propè accessit amore.

*Verus amicus non eget absentia, vt magis desideretur.*

MARSILIVS FICINVS

Iuliano Medici viro magnanimo, S. D.

**C**Um superioribus diebus morali quadam oratione in nocturnis sacris amicos tuos ad peccatorum poenitentiam & lachrymas prouocasses, alij eiulabant, alij plangebant pectora palmis. Antonius autem Poëta Tuscus quasi ex æguis exanimisque dicitur cecidisse: Paulò post in Mugellanos montes te subito contulisti, vt quem admodum Antonium illum feruè præsentia tua perdideras, ita Marsiliū hunc tuum absentia perderes. Ah! parum officiose vir, hostibus olim crudelissimis pepercisti, nunc verò non parcis amicis. Forsitan statuisti dies aliquot rusticari, vt ad nos desideratior redeas, & post rusticationem vrbanius videaris. Quippè qui scias appetitum ab indigentia, & admirationem à nouitate proficisci solere. Sed nihil aut ibi, aut mihi, & astute Medices, isthac opus est medicina: Quid enim vrbānitate vrbanius videri potest? Quid, vt ita dicam, desideratius desidero? Mitte has medelas oro, & ægris valdè molestas, & modico necessarias. Illi amice, illi propter absentiam magis desiderentur qui propter diuturnam præsentiam minus in dies desiderentur. Nobis autem quotidie falso liquore tuo nostra hæc firis non tam extinguitur quàm accenditur. Saltem dum isthic cum angelo nostro moras trahis, Marsilium Iuliane tuum ore voluta tuo. Vellambe hunc Iulianè, vel mande. Morderi malo à Iuliano quàm expui. Vale.

*Quod diues iniustus sit, & quis iustus.*

MARSILIVS FICINVS

Angelo Politiano Poëtæ

Homerico, S. D.

**D**Eus aquam vniuersam aquaticis singulis, terrâ terrenis voluit esse cōmunem. Solus homo infelix animal quē Deus coniunxerat, separauit. Imperium suum quod natura fuerat amplum cohibuit in angustum. Meum in orbem introduxit, & tuum dissensionis totius malique initium. Quapropter non iniuria Pythagoras statuit inter amicos, Plato inter ciues omnia esse communia. Ergo diuites illi iniusti penitus habendi sunt, qui ob superbiam obliuiscuntur Dei diuitiarum omnium largitoris. Pauperum quoque se dominos faciunt, & pecuniarum se possessores appellant, cum à pecuniis ipsi possideantur. Contra verò iusti sunt & felices, qui in summis diuitiis constituti, se Dei ministros pauperum tutores, pecuniarum distributores, existimant. Fortunatè nimium adolescens, qui tales nuper nactus es patronos. Ego tales nactus sum iam diu. Et miraberis angelè, si propter abundantiam Iuliani mei mestissimum esse me dixerò. Profectò nisi me nunc discessu illius, quasi insipidum Martheus, Francus suis cōdiret salibus, aut fortè non satis benè mihi ipse olerem, aut certè ad suauissimos Medicis Iuliani flores odoresque subito aduentarem. Omnino autem vix me Politiane, hîc triduum continebo.

*Iurisconsulti bonitas & dignitas.*

MARSILIVS FICINVS

Angelo Nicolino Octonis insignis

Iurisconsulti filio, insigni

paternæ artis hæ-

redi, S. D.

**P**ictor, qui arte sua iniquè vitur, non necessario ob hoc malus pictor, sed malus homo. Idcirco neque bonus pictor idem atque homo bonus. Sanè, quia malum inter bonitatem interest atque picturam atque in cæteris artibus eodem pacto. Arverò Iurisconsultus qui lege vitur non legitimè, & malus Iureconsultus est, & malus homo, legitimus ergo Iurisconsultus, homo est cuiusque legitimus. Tanto est inter Iuris civilis peritiam, virique virtutem affinitas. Qui nummum rem re vera vilissimam è terræ visceribus effossam adulterat, humana lege inbente, vt scis, censura seuerissima plectitur. Qui ergo legem ipsam rem pretiosissimam, cœlitusque missam adulterat, quantà à diui-

na lege rigiditate punitur? Probo igitur te, mi angelo, quod vtaris lege legitimè. Perge, quaeso. Sperne alto animo minas & illecebras, non deseret te Deus omnipotens legis author & magister, finis & præmium. Perge amice, ne dubita, diuitias apud Deum incorruptibiles cumulabis. Magna quoque apud homines Iurisconsulti dignitas est. Hic publicus ciuium Patronus, hic commune ciuitatis Oraculum, hic diuinæ mentis & voluntatis Interpres. Vale.

*Dignitas sacerdotis.*

MARSILIVS FICINVS

Paci Sacerdoti, Iuris Canonici

Professori, S. D.

**S**Æpè ego & Ricciardus Angellerius, insignis Theologus, vnà de Sacerdotis dignitate differuimus. Conclufimus denique, quemadmodum bono angelo nihil post Deum melius, malo nihil peius. Ita nihil in terris honesto sacerdote pulchrius esse, turpi verò nihil turpius. Ille religionis hominumque salus, iste pestis. Quid est sacerdos legitimus, nisi Deo dicamus animus? Angelus vicem Dei gerens apud homines. Viuens Dei templum. Qui sacerdotij dignitatem rectè cōsiderauerit sacerdotio non abutetur. Cogitemus ergo, quid est legitimus sacerdotem esse. Hoc enim fermè est esse Deum. Sacerdos quidem est temporalis quidam Deus. Deus verò est Sacerdos æternus.

*Non cuilibet dandi sunt sacri Ordines.*

MARSILIVS FICINVS

Marrino Episcopo Corto-

nenli, S. D.

**V**Enit ad te Bastianus Saluinus, Amicitinus noster, tertium sacrorum ordinum mysterium postulaturus, atque, vt arbitror, accepturus. Tu verò qui hominem non nosti, ac scis sacramenta canibus dandum non esse, fortasse dices, oportet eum, ô Marfilij, qui tanto munere functurus sit, literatum esse, pium erga Deum, erga homines verò iustum. Adolescentem istum fore talem quis testabitur, vel fide iubet? Respondeo tibi, venerande pater Socratis illud. Sicut vas, ita hominem sono cognosci. Itaque ad obuium quendam & tacentem inquit, Loqueret hospes vt te videam, vt pote qui solum animum esse hominem iudicabat.

Præterea, si Zophyri artem haberes, adderem forsitan ut indolem eius considerares. At vetat vitæ Magister hominem secundum faciem iudicari. Fideiussorem quæris? Habes Marsilium. Vis locupletior? Volaterranus Episcopus fideiubet. Apud vtrumque adolescens est educatus.

*Nulla consonantia magis delectat, quam  
cordis & linguae.*

MARSILIVS FICINVS

Laurentio Medici, viro magnanimo, S. D.

**M**ittit ad te Bastianus Foresius Poëma suum, de Triumpho virtutum contra vitia, opus tanto hoc titulo dignum. Lege Laurenti Poëma, & elige Poëtam, nam in eius quoque animo virtutes de virtutibus triumphant. Nulla vel dissonantia magis offendit vel consonantia magis delectat quam cordis & linguae.

DE OFFICIO CIVIS.

MARSILIVS FICINVS

Petro Hero, S. D.

**D**ic Petre, cur febris, cum Bernardum patrum tuum inuasisset, subito me accedit? An fortè, quia tam proximi sumus ut non potuerit canicula in alterum flammam euomere, cum accenderet alterum? Utinam citò conualeat, ut Marsilius conualecat, imò ut & melius Florentia valeat. Quæ si Medicos semper tales haberet, qualem hunc habet & Medicem, nunquam grauius ægrotaret. Rectè enim isti officio ciuis vtuntur, sine quo bona valentudo patriæ non seruatur. Est autem ciuis officium considerare ciuitatem esse tanquam animal vnum ex ciuibus, tanquam partibus constitutum. Ac partem toti, non totum parti seruire debere. Quando enim partis tantum commodum quæritur, vtriusque, tam partis quam totius commodum prorsus amittitur. Quando verò totius quæritur bonum, bonum vtriusque seruatur. Igitur meminisse debet ciuis, nihil siue boni, siue mali, alicui ciuitatis membro posse contingere, quin propter connexionem quandam ad cætera membra pertineat atque totum, nihil rursus toti ciuitatis corpori conuenire posse, quin mox ad singula animalis huius membra pertineat. Nemo igitur in hac urbana familia dicat meum hoc & illud tuum, omnia enim in hoc ingenti animali quodammodo communia sunt. Sed dicat meum hoc & illud non possessio-

ne quidem propria, sed affectu potius atque cura; Patriam quisque tanquam parentum parentem amet & colat. Priuatius antiquis probatisque Legibus obediat tanquam Deo. Non enim absque Deo huiusmodi Leges constituuntur. Magistratus meminerit non aliter se Legibus, quam priuatum Magistratibus esse subiectum. Intelligat se à Deo cum iudicat iudicari. Platonis præceptum semper ante oculos habeat, ut non seipsum, sed ciuitatem, non partem ciuitatis aliquam dumtaxat, sed vniuersum respiciat. Scit denique optimum in cœlesti patria huic seruari locum qui terrenam patriam ad cœlestis exemplar pro viribus disposuerit. Communi enim mundi regi nihil gratius quam commune bonum. Hæc & similia ad ciuem legitimum pertinentia scire te arbitror, & seruaturum spero, cum doctrina prudentiaque non careas, ac præterea magistrum habeas hæc in re domi sufficientem, de cuius virtutibus aliàs. Vale. Ioannes Caualcantes noster se tibi commendat.

*Quid est bene viuere.*

MARSILIVS FICINVS

Hieronymo Pasqualino  
suo, S. D.

**Q**uæris quid sit bene viuere? Vtilius quæri nihil potest, est autem bene viuere, verum intelligere, consultare bene, velle bonum, agere bona. Primum sapientiæ est, secundum prudentiæ, tertium iustitiæ, quartum perseverantiæ. Primum à Deo est, secundum à primo, tertium à Deo simul atque homine, quartum est à tertio. Qui ita viuunt, viuunt homines. Qui viuunt aliter, animalia viuunt. Vale, ac viue homo.

*Vota non sunt spernenda.*

MARSILIVS FICINVS

Francisco Marescalcho Ferariensi,  
egregio Conphilosopho  
suo, S. D.

**L**ibrum de Christiana religione nondum absolui Franciscæ, quia dum emendarem hoc Augusto in febrem incidere atque diariam. Minabatur id fortè mihi Saturnus hoc anno, qui & in meæ natiuitatis ascendente Aquario ab initio fuerat, & iis temporibus est in Cancro domo meæ natiuitatis sexta. Missa nunc faciamus cœlestia, sunt enim qui talia parui faciant, ad supercœlestia veniamus. Quid ergo mihi in hoc morbo contrigit alicui. In



tantam Marescalchie debilitatem quandoque prolapsus sum, ut salutem pene iam desperarem. Meditabar igitur quaecunque annis triginta magna legissem, si quid forte mihi occurreret quid agrum animum consolaretur. Scriptores humani, exceptis Platonis, nihil penitus conferebant, Christi autem opera multo magis quam Philosophorum verba consolabantur. Feci insuper duæ Mariæ vota, signumque salutis aliquod postulavi. Respiravi subito aliquantum ac manifestum in somniis nuntium salutis accepi. Non igitur Æsculapio gratum, sed Christo Patrique; animum corpusque debeo. Omnia semper accipienda in melius marescalchie. Quid si Deus hoc inter morbum signo ad ponere me voluit ut acriori posthac ingenio studioque doctrinam Christi conformem. Præsertim cum paucos post dies etiam ab ardore urinae voto simili fuerim liberatus. Audi si placet & aliud mirabile atque verum. Pater meus Ficinus Chirurgus Florentiæ suo sæculo singularis, ductus olim fuit à rustico quodam, nomine Pasquino, ad curandum filium eius Thomam caput gravissimè vulneratum. Medicus inspecto incurabili vulneri, puerum paulo post proculdubio periturum existimans, recessit inde tanquam non rediturus. Parentes infirmi Medico destituti, diuam Mariam pro nati sanitate supplices obsecrarunt. Igitur eadem qua illi orabant hora, Ficino in itinere sub quercu vel oscitanti vel certè leuissimè dormienti, mulier quædam visa est aspectu admodum veneranda, ita eum compellans. Quid ingratus erga Deum es Ficine? Quæ ab eo gratis accepisti, non das gratis. Respondit ille, panem do quotidie mendicantibus. Subiunxit illa, Artis quoque tuæ munera egentibus abundè largire. Post triduum rediit ad Medicum rusticus ille orans, ut ad filium curandum reverteretur. Quod quidem valdè miratus est Ficinus, nam obiisse illum arbitrabatur. Accessit gratis, tum præterito omnino, tum voto parentum admonitus. Narrauit enim rusticus quæ vota & qua hora fecisset. Denique puer præter spem Medici artemque medendi sanus euasit, ex eo tempore Ficinus sæpè pro salute eorum qui curæ suæ commissi sunt, vota Mariæ fecit feliciterque successit. Quamobrem amicos tuos admone, ne spernant vota. Nam neque Aristoteles quidem in gravi morbo contempsit. xi. Sept. M. cccc. lxxiii.

*Nobilitas, utilitas & usus Medicinæ.*

## MARSILIUS FICINUS

Thomæ Valorio egregio Physico, S. D.

**L**Egi apud Homerum: Vir Medicus multis aliis æquabitur vnus, & merito. Nam medendi facultatem donum est Dei potiusquam hominum inuentum sacre Hebræorum literæ docent. Honora Medicum, nam propter necessitatem creauit eum altissimus. Gentiles præterea huius artis auctores deos fuisse volunt. Idem Apollinem, Æsculapium, singulares quoque Medicos diuinis honoribus prosecuti sunt, delubra enim Chironi, Machaoni, Podalirio, Hippocrati, Hermagoræ dicauerunt. Confirmavit hæc Hippocrates in Epistola ad Abderitas, Medicinam esse dicens Deorum munus. Atque esse liberam, neque se pro eius usu vnquam mercedem acceptauisse. In Epistola etiam ad Philemonem ait. medicina vaticinio propinqua est, harum enim duarum artium vnus est parens Apollo scilicet, qui progenitor noster est, hic & futuros morbos prædicit, & eos qui aduersa valetudine affecti sunt curat. Hinc Pythagoras, Empedocles, Apollonius, Theaneus non tam herbis quam carminibus morbos curasse traduntur. Et magi sacris rationibus orationibusque purgandum esse ægrotantis animum prius quam corpus existimabant. Quia videlicet huiusmodi ars & diuinitus accepta est, & diuinitus exercetur. Atque animus ex Deo, corpus pendet ex animo. Nonne Raphaelem Archangelum Hebræi volunt huius artis opus exercuisse? mittamus reliquos, Christus ipse tanquam generis humani medicus, ægros ægrotosque quotcunque offerebantur, curabat, Discipulisque medendi tradidit potestatem. Hanc igitur artem vipote nobilissimam reges meditari & exercere quondam nequaquam dedignabantur. Quales fuerunt Sabor & Ginges medorum reges, Sabid rex Arabum, Mithridates Persarum rex, Rex Ægyptiorum Hermes, mesues regis Damasci nepos. Volunt nonnulli & Auicennam fuisse Cordubæ Principem. Democritus, Timæus, Locrus, Plato, Aristoteles, Philosophi illustrissimi in hac arte scripserunt, innumerabilesque alij Philosophi non ignobiles. Quanta medicinæ nobilitas sit fermè quantum patitur Epistola dictum est. Quanta verò utilitas ex eo perspicimus, quod artes quæ ad bene viuendum diriguntur absque huius auxilio parum prodesse videntur.

Non enim bene vivere possumus, nisi vivamus, neque brevissimo hoc vitæ tempore in qua vis facultate multum proficere, nisi valeamus bene, neque facile multum apud homines Deum mereri, nisi diu sobriique vivamus. Omnem verò huiusmodi facultatem diligentia Medicinæ suppeditat. Vti autem hac arte oportet summa erga Deum pietate, tum erga homines charitate. Quemadmodum Lucas Evangelista, Cosmusque & Damianus divini Medici exemplo nos docuerunt. Est enim bonorum omnium author Deus, & legitimus Medicus quasi Deus aliquis inter homines. Eos namque in vitam à morte restituit. Et tanquam Deus colitur vel à regibus & sapientibus cum ægrotant. Quod acumine, doctrina, experientia opus sit Medico cuncti fatentur. Quod etiam gravitate, diligentiaque in deliberando, dubitat nemo. Sed postquam maturè consultum est, nulli arti, ut Hippocrates Abderitanis ait, magis quam huic mora obesse potest. Non tamen minus, imò magis periculosum est, ut Glauconi Galenus inquit, prævenire & præpedire naturam. Multos enim ait hoc errore, id est, in temeritate Medicorum, naturam vel impediendum vel præcipitantium quotidie perdi. Quem quidem errorem facilius deuitabit qui suo ingenio non confidet. Nam Hippocrates Democrito scribit, se in ipsa iam senectute constitutum, nondum Medicinæ finem attigisse. Galenus etiam ait, cum nonagenarius esset, tunc demum pulsus tenere naturam. In primis meminisse debet Medicus, authorem sanitatis Deum esse, instrumentum Dei esse naturam ad sanitatem efficiendam & seruandam, Medicum vtriusque ministrum, ut artificii non vires, sed materiam præparat, & impedimenta dimoueat. Qui si importunè mouere vel sistere materiam velit, sæpè malè vtrumque agit, & naturam impedit quæ bene exequeretur vtrumque. Sed audiamus hac de re diuinum Platonem nostrum in Timæo ex mente Pythagoricorum ita loquentem. Omnium verò motuum optimus ille est qui in semet ex seipso fit. Nam & mentis & totius ipsius motioni cognatissimus est. Qui verò ab alio fit deterior. Deterimus autem motus quando iacens & quietem agens corpus ab aliis secundum partes mouetur. Quapropter purgationum constitutionumque omnium corporis, quæ exercitatione gymnastica fit saluberrima est. Proximè ad hanc accedit vectio facilis sine nani seu quouis alio vehiculo peragatur. Tertia commotionis species tunc detum cum summa cogit necessitas utilis,

aliter verò nullo modo sanæ mentis homini suscipienda Medicorum illa purgatio est quæ Pharmacis, id est, solutivis medelis fieri solet. Morbi enim nisi periculosissimi sint, Pharmacis irritandi non sunt. Omnis namque morborum constitutio animalium naturæ quodammodo similis est. Quippè animalium compositio ab ipso generationis exordio certis temporum curriculis terminatur. Idque & genus vniuersum patitur, & animal vnumquodque ab ortu fatale viuendi spatium in seipso, exceptis necessariis passionibus, continet. Etenim trianguli, id est, qualitates proportionales ab ipso initio singulorum vim possidentes vsque ad certum tempus sufficienter ad vsum vitæ cohererent, ultra id vita nemini prorogatur. Idem quoque constitutionis modus languoribus conuenit. Quos si quis citra fatalem temporis cursum Pharmacis amputare contenderit ex paruis ingentes, ex paucis multi euadere consueverunt. Quapropter diligentia victus corrigendi & gubernandi sunt morbi, prout cuique datur officium, neque difficilè infestum malum Pharmacis instigandum. Hæc Plato. Galenum nostrum Florentinus populus quod hac regula vteretur sæpè commendat. Ego etiam Laurentium Martellinum verum Medicum hanc ob causam summopere laudo. Thomam quoque Valorium, nisi ad eum scriberem valdè laudarem. Vale & Antonium Beniuenum bonum Physicum bene saluta. Salutat verò te Hieronymus Amatijs comes noster in Medicinæ citharæque studio valdè iucundus.

*Tempus parce expendendum.*

MARSILIUS FICINVS

Laurentino Medici viro Magnanimo, S. D.

Salutem millies mea post Deum salus. Ne scias esse putabam cum primum manus calamum ducere posset ad alium prius quam ad Patronum meum vnicum scribere. Quid igitur potissimum scribam? Scriberem, certè nunc ad te si liceret seueriora quam soleam. Non semper arbuta iuuant humilesque myricæ. Sed quid obstat Marsili quo minus in præsentia liceat. Quandoquidem ad eum scripturus sis qui non modo perimit, verum etiam iam pridem literis suis id tibi præcepit. Laurenti in hac mea infirmitate nihil acrius animum affligebat quam inutiliter transacti temporis recordatio, nihil rursus restabat quod me aliquantum consolaretur præter eorum

memoriam quæ didiceram, quamvis non multa didicerim. Solo enim diuino veritatis pabulo re vera diuinus animus oblectatur, alitur, augetur. Cætera volantium nugarum deliramæra immortalem non implent mentem, naturali quodam instinctu æterna & immensa poscentem. Obsecro te igitur, charissime mi Patrone per æternum Deum, ut pretiosissimum temporis huius quam breuissimi minimum, parce prudenterque expendas, nequando frustra te prodigalitatæ irreparabilisque iacturæ poeniteat. Iactura temporis Theophrastum annos octuaginta natum frequenter deducebat ad lachrymas. Iactura temporis magni Cosmum natum annos plures quam septuaginta, sæpè, me præsentem, grauiter suspirare coëgit. Obiice, quæso, inanibus curis, superuacuis ludis, negotiis non necessariis Socraticum illud. Abite procul hinc hostes sacrilegi, abite quamprimum animi mei fures, ne à me ipse abire compellar. Furâtur hæc paulatim tibi te ipsum, & captiuum ducunt virum natum ad imperandum: redime te, quæso, ab hac misera captiuitate dum potes, solum autem potes hodie, hodie primum tui iuris esto. Non est, crede mihi, sapientis dicere, viuam, Sera nimis vita est crastina, viue hodie. Facile est Laurenti quod posco. Non est difficile horam vnā rectè vtiliterque transigere: vtare, precor, quotidie hora vna bene, hoc est ad mentem liberalibus disciplinis alendam, ac tantillum temporis foeliciter tibi ipse viue. Reliquum si libet viue aliis, nam & alij, ut scis, sæpè viuas oportet, si vis tibi viuere. Sed vtrumque Dei gratia facito. Nempè adeò Dei gratia primum, deinde tui aliorumque gratia es procreatus. Ludis autem iocisque raro parumque indulge nam & ad maiora, vel potius ad maxima scio, quod loquor, te Deus instituit. Et huiusmodi falsa oblectamenta conuersionis instar, tam celeriter euanescent, ut dum videntur oriri contrarium conuertantur. Sed noli mihi cras vlterius polliceri, polliceris quod neque habes, neque te scis habiturum. Si cras tantum comederis biberisque, nonne triduo peribis, amice? Pereat cras istud hodie, pereat quæprimum, ne tu pereas, nihil crastino isthoc fallacius, fefellit omnes quos terra protulit homines. Heu! quid agis inepte Ficine? Ecce vel contrahet supercilia Laurentius vel ridebit. Vtrumque malum. Imò vtrumque bonum. Noui enim Medicis ingenium. A bono non proficiscitur nisi bonum. Ego autem non tam Laurentium quam Marsilium, cæterosque mortales hac Epistola

monco. Omnes hoc morbo grauissimè laboramus. Cras istud fiet. Vix præsens tempus habemus. nam ita leuiter habemus, ut parumper retinere non valeamus. Futurum autem nihil est, futurum igitur nullus habet. O dementes! ô miseri! spes nostras in nihilum iacimus; atque thesauro semper quem possidemus abutimur. Vti autem illo rectè volumus, quem minimè possidemus. Sic omnes ferè ad interitum ægrotamus. Non igitur Galenus vel Hippocrates petendus est, sed Æsculapius & Apollo. Bene vale hodie, si cras valueris, valebis nunquam. Sed volo hoc sigillo hanc Epistolam obsignari, neque audias vnquam adulatores, neque obrectatores vllos exaudias, quibus maxima quæque domus abundat. Illi tibi oculos mentis eruere, isti manus tuas, id est amicos, amputare conantur. Mendacium tandem Deus ipse perdet, veritatem verò tuebitur. Soli Deo confide Laurenti, ego quoque confido Deo. Iterum hodie bene vale.

*Homo sine religione bestiis est infelicior.*

MARSILIVS FICINVS

Benedicto Coluccio Pistoriensis

Rhetori, S. D.

**H**ortaris ut in religionis defensione, quemadmodum cœpi, assidue pergam. Conabor id quidem pro viribus Benedicte. Non quia religio huiusmodi defensoribus egeat. Stat enim inuitis hostibus semper regente Deo, qui semper apud omnes Gentes vult honorari. Sed quia tunc solum feliciter viuere, imò tunc solum viuere mihi videor, cum de diuinis scribo aut loquor aut cogito. Reor equidem genus humanum cultu diuino sublato fore cunctis animalibus infelicius, mitto continuam multiplicemque inermis & imbecillis & semper ægrotantis corpusculi curam, inquisitio ipsa rationis, quæ videtur nos brutis præstantiores efficere, ipsa, inquam, propter præteritorum poenitentiam, futurorum metum, præsentium anxietatem, malorum cognitionem insatiabilem innumerabilium rerum cupiditatem, si diuina spes amoueatur, proculdubio reddit brutis miseres. Beati cœlestes, qui tanquam in luce cuncta cognoscunt. Securæ bestię quæ tanquam in tenebris nihil prorsus intelligunt. Anxii miserieque homines qui in media quadam nebula versantur, timbant & vexantur, sola nobis diuina lux ob pietatis meritum & clementię donum, veritatem potest beatitudinemque largiri.

*Responsio ad Epistolam de tempore parce  
expendendo.*

LAURENTIUS MEDICES,

Marsilio Ficino Philosopho Pla-  
tonico, S. D.

**P**eriuicunda mihi fuit Epistola tua, quæ ita præteriti temporis iacturam in nobis arguit, ut non omnino inutile ocium fuisse nostrum videatur. Factum est enim, priuata parui temporis iactura ut ea ex te præcepta emanarint, quæ non nobis modo, sed iis omnibus prodesse possint qui eodem morbo laborant. Declaraueras tu quidem sæpè mentem erga nos tuam. Verum mecum ipso sæpius hanc tuam Epistolam voluntati videris omnem aliud amicitiae officium superasse, siue quod primas in amore erga nos partes obtineas, ac longè cæteris in amicitia præstes, siue quod ea amicitiae munera abundè præstare valeas quæ cæteri nequeant. Cæteri nempe qui nos beneuolentia prosequuntur, aut diuitiis inuare possunt aut honoribus aut voluptatibus, quæ quidem omnia in fortunæ potestate constituta sunt, ut nihil firmitus habeamus, nihilque constantius quam eorum imbecillitatem ac mobilitatem, quod & tu sæpè docuisti, & nos sæpius experti sumus. Tu verò his abundas præceptis, atque eo amicitiae genere nobiscum agis, ut facile appareat, sicut nemini amicorum virtute cedis, ita reliquos in amore superare. Facis hoc tu quidem naturali quadam beneficentia tua. Facis insuper quod te non fugit, hac conditione datas esse ab immortalis Deo hominibus virtutes, ut quamplurimos inuent, neque adduci potes, ut diuina hac liberalitate abutaris. Lætatus sum mirum in modum quod pristinam recuperaueris valetudinem. Lætarer multo magis, si tuis literis assequer, ut pristina mihi animi valetudo redderetur, quod non equidem despero, tum tuis grauissimis præceptis, tum quod, ut nosti, ego non malignitate sed facilitate potius naturæ ac consuetudine quadam, deliro. Tuæ verò partes sunt, quæ & Apostoli, ut arguas, increpes, obsecres, & quod me huiusmodi rebus moueri intelligis, ne desistas iis omnibus nobiscum stimulis uti, quibus magis prostratam mentem nostram erigi posse existimas. Hoc vnum à te contendo atque expecto, quod nemo te aut libentius vult, aut sapientius monet. Gratulor iterum tibi mihiq; quod te incolumem sospitemque immortalis Deus nobis reddiderit, neq; ego minus quam tu admonitis sum discrimine vitæ tuæ. Idem enim fa-

tum & tuis oculis tenebras & nostris lucem eripuisset, nihil enim magis vitam nostram illustrare potest tuis grauissimis atque amantissimis admonitionibus, tuaque incunctissima consuetudine, quibus extinctis, extincta est prorsus vitæ pars altera nostræ, atque illa quidem pars, extra quam quicquid est ne hilum quidem est. Hoc ego periculo admonitus te & libentius utar & sæpius, & quando ea est humana conditio ut exemplis potius moueatur quam rationibus, ego & te & tempore hac lege utar, tempore, ut nullum cras habituro, te verò ut hominem, cui ne punctum quidem temporis superest metu mortis liberum. Vale & valetudinem cura. Floren. x. Octob. m. cccc. lxxiiii.

*Nemini rectè volenti omnino ad bonum interclusus est aditus.*

MARSILIUS FICINUS

Nicolao Michelocchio vero  
viro, S. D.

**S**olent Michelocchi qui quempiam confutant non aliter quam contradicendo refellere. Laurentius autem Medices cum mihi assentitur maximè, tunc maximè confutat. Nempe dum Epistolam meam qua iacturam in ea præteriti temporis arguo, artificiosissimè laudat, ne punctum quidem ætatis suæ videatur inutiliter expendisse. Quod si Patronus Nicolæ noster in negligentia talis est ut fuisse diligens videatur, qualem euasurum putas, si diligentior esse voluerit & potuerit? Ut hoc quidem velit eum precor, ut autem possit Deum obsecro. Quanquam non tam opus est obsecrare Deum ut possit quam ut velit. Tum quia nulli rectè volenti omnino ad bonum interclusus est aditus. Tum quia Deus honestam volutatem potius quam verborum obsecrationes exaudit. Vale, atque exhortare ad diligentiam Laurentium, ut breui tantum doctrina superet Latina, quantum autoritate ciues suos sine controuersia superat.

*Imitatio potior est quam lectio.*

MARSILIUS FICINUS

Laurentio Medici viro Magna-  
nimo, S. D.

**Q**uemadmodum Harmonia dum præsens auribus nostris illabitur vehementius afficit, quam dum præterita cogitatur, ac prælium cum spectatur nos acrius mouet quam cum narratur: sic egregia illu-

stirium virorum opera ardentius ad virtutem inflammant exactiusque formant, quam Oratorum Philosophorum de motibus disputantium verba. Ita enim natura comparatum est ut res ipsa multo maiorem quam earum nomina vim habeant. Atque ipsa rerum veritas efficacius animum moueat, quam quod verisimile est vel falsum. Quamobrem Socraticorum morum imitatio ad virtutem plures veriusque instruxit, quam Aristotelis de moribus disciplina. Et Christus solus exemplo ad honestam sanctamque vitam pluribus magisque profuit quam verbis Oratores omnes atque Philosophi. Laudo igitur te mi Laurenti quod lectionem quidem moralem non spernas. Lectioni tamen imitationem tanquam rem viuam longè præponas. Præsertim cum senem illum, senatusconsulto Patrem patriæ iudicatum, tibi iampridem proposueris imitandum, Magnum Cosmum dico auum tuum, Patronum meum virum ante alios prudentem, erga Deum pium, erga homines iustum atque magnificum, in seipso temperatum, in re familiari admodum diligentem, ac multo accuratius in Republica circumspectum, qui non sibi solum sed, Deo & Patriæ vixit, cuius animo nihil inter homines humilior, nihil rursus excelsius. Ego Laurenti vnâ cum illo annos plures quam duodecim feliciter philosophatus sum, tam acutus erat in disputando quam prudens & fortis in gubernando. Multum equidem Platoni nostro debeo, sed Cosmo non minus debere me fateor. Quam enim virtutum ideam Plato semel mihi monstrauerat, eam quotidie Cosmus agebat. Mitto nunc cætera huius viri bona, tam avarus parcusque temporis erat Cosmus quam munda pecuniæ. Et cum parcissimè suos dies expendere, horasque impense dinumeraret, homo momentorum avarissimus, frequenter iacturam deplorabat horarum. Denique Solonem Philosophum imitatus, cum per omnem vitam vel in summis negotiis egregiè philosophatus esset, illis tamen diebus quibus ex hac umbra migravit ad lucem, quam maximè philosophabatur. Itaque postquam Platonis librum de vno rerum principio ac de summo bono legimus, sicut tu nosti, qui aderas, paulo post decessit, tanquam eo ipso bono quod disputatione gustauerat re ipsa abundè iam potiturus. Vale, & sicut Deus Cosmum ad ideam mundi formauit, ita te ipse, quem admodum cœpisti, ad ideam Cosmi figura.

*Durate, & vosmet rebus seruate secunâs.*

MARSILIVS FICINVS

Francisco Saluiato, Archiepiscopo  
Pisano, S. D.

**D**edi ad te præterita estare Epistolam, qua exhortabar plurimum ut confideres. Affirmans te non esse ad parua vel mediocria natum. Parua quidem pro merito, præter animum, eo tempore possidebas. Ecce iam, fauente Deo, consequutus es mediocria. Quæ enim cæteris penè omnibus videntur maxima, Saluiato meo mediocria sunt. Magna igitur posthac, si qua Marsilio, imò Deo fides adhibenda est, te manent. Vaticinari similiter adhuc & licet. Nempè diuina prouidentia cum te Pisanum Archiepiscopum creauit, Vatem me declarauit. Vtri ergo nostrum magis congratulandum sit, ambigo. Tibi ne tanquam Archiepiscopo, an mihi tanquam Vati, fortè vtrique pariter. Nam cum amicorum omnia communia sint, siue ego vaticinor tibi, siue tu regnas, ego tecum regno. Vale felix, & cura precor valetudinem tuam diligentissime, sic enim video Sacerdotium Florétinum, iamdiu examine breui respiraturum. Quam vehementer & quam frequenter Ioannes Caualcantes noster hac de re mecum congratuletur capere non potest Epistola, cape animo. Iterum vale felix.

*Diuinitas animi ab inuentione.*

**H**actenus in tuo quodam Christianæ religionis templo religiosè admodum loquutus sum tecum, religiosissime Laurenti. Et ita per Deum loquutus ut esse opus Epistola non aduerterim. Hodie primum sacris peractis sermonibus templo egressus, agnoui iam Epistolæ auxilio indigere. Surge igitur mea, surge Epistola. Ad es dum, hodie Pisas salutem ad eum feras oportet, per quem Florentia salua est.

MARSILIVS FICINVS

Laurentio Medici suo salutem.

**O**Rem valdè miram. Imò & nimis incertam. Vnde nam hoc optimè Laurenti? Cœpi paulo ante ut mihi quidem videbar satis belle. Nunc repente post salutem omnis inuentio deficit. Marsili forte summa hæc salus est præter salutem nihil penitus reperire. At verò non est salus, ut arbitror, inuentione prinari. Nihilne igitur ulterius inops tecum Epistola feres? imò



ad hunc paucis te volo. Ecce enim inueni interim aliud nescio quid ferendum quamuis fortasse ridiculum hoc ipsum. Vnde quod nihil inueniam. Siste Epistola pedem, accipe rursus & istud. Inuenio tertium. Quod ex eo inuentionem modo agnouisti deficere, quia multa quondam soleam reperire. Sed ne propera. Accipe prius si placeat & quartum. Quod ex copia sæpè inopia tanquam ex habitu quodam priuatio recognoscitur. Vis ne & quintum? Verre Dialectica vices, quod ex inopia tanquam priuatione, copiarum quasi habitus ipsius oritur appetitus & augetur. Sed ecce pullulat nescio quomodo in præsentia sextum. Quod appetitus cum naturalem ab inopia trahat originem semper est pauper. Nunquam tamen, quod septimum dici potest, humanus animus inops, qui etiam ex inopia copiam generat, ex inuentionis priuatione texit inuentionem, ex tenebrosis terrarum finibus effodit argenti candorem aurique fulgorem. Hæc profecto est terra viuentium, in qua Dei bona videntur, terra inquam animi sempiterna cuius indeficiens fructus est motusque perpetuus. Hanc ergo terram excolamus nos millies rogat Epistola. Hæc nobis fruges vberrimas incorruptibilesque & suauissimas suggeret. Sed nolo grauiori sarcina dorsulum Epistolij premere. Vale iam Epistola præcax. Ac post salutem, Medicem & iube valere foeliciter, & roga redire.

*Novum opus nimium placet opifici.*

MARSILIVS FICINVS

Angelo Politiano, S. D.

Epistola hæc ad Laurentium & nascens & statim nata mihi, ut fieri solet, nimis blandiebatur. Sed paulo post considerata, minus placuit. At qualiscunque sit Medicis est. Ego autem tanquam iustus sua cuique reddo. Tu siquid ad manus tuas his annis ex Pædagogorum scriptis pessimum venerit, Laurentio legito, mox illi meam leges Epistolam, ut ad pessimum comparata minus offendant. Sed heus tu, lege obsecro eleganter, partim quidem voce suavi, partim ore rotundo, ita demum vel forte fuso deceptus, aliquantulum ille laudabit. Vel certe dicet, Misit saltem Marsilius aliquid, ineptos seruos malo quam pigros, pigros quoque quam nullos. Quod Ioannem Petrum Patavinum mihi commendas, libenter accipio. Hunc enim commendat etiam Philosophia mihi, siquidem tam natura quam studio Philosophus esse videtur. Vale.

*De perseverantia.*

MARSILIVS FICINVS

Ioanni Alouito, S. D.

Quia nos vel collo vel manibus apprehendunt, corpus trahunt, qui oculis, sensum, quam auribus & auditu, animum atque mentem. Tu modo auribus animum nostrum comprehendisti. Tot enim ac tanta de elegantia constantiaque tua Ioannis Caualcantis nostri verbis iam auribus meis insensuerunt, ut neque potuerim me neque voluerim continere quin te valde diligerem & amarem. Amoris nostri signum in præsentia sit hæc Epistola, quæ constantiam quidem tuam probet, & ad perseverantiam exhortetur. Altera enim absque altera esse nequit. Neque satis apud prudentes probandus esse videtur quem nondum satis fortuna probauerit. Neque probatus ab ea satis est, nisi qui ad finem usque perseverauit. Quantum bonum perseverantia sit hoc indicat, quod cæteræ virtutes bona pollicentur, perseverantia præstat. Quæ quidem quanto difficilior est, tanto cæteris laudabilior. Sed ne terrear difficultas, nam breuissimi sunt omnes virtutis humanæ labores; præmium sempiternum. Adde quod ardens clarè mentis propositum obscura illustrat, frigida calefacit, mollit dura, domat indomita. Vale.

*Prudentis est nihil præter salutem animi bonamque corporis valetudinem exceptare.*

MARSILIVS FICINVS

Andræ Cambino suo, S. D.

Sunt Andrea multi mortalium usque adeo cupidi, ut multa diuersaque quotidie, imò & innumerabilia tanquam insatiabiles cupiant. Cambinus meus utpote qui prudens moderatusque est nihil, ut arbitror, aliud optat præter salutem animi ac bonam corporis valetudinem. Salue igitur simul & Vale.

*De Musica.*

MARSILIVS FICINVS

Antonio Canisiano viro docto atque prudenti, S. D.

Quæris Canisiane cur tam frequenter Medicinæ simul & Musicæ studia miscam. Quidnam, inquis, commercij Pharmacia est cum cithara? Astronomi Cæ-

nisiante forsitan duo hæc ad concursum Iouis & Mercurij Venerisque referrent. Opinantes ab Ioue Medicinam, à Mercurio & Venere Musicam proficisci. Platonici autem nostri ad vnum Deum, scilicet, Apollinem referunt Quem prisci Theologi Medicinæ inuentorem, ac citharæ pulsandæ regem existimauerunt. Hunc in libro Hymnorum Orpheus vitalibus radiis sanitatem vitamque largiri cunctis arbitratur morbosque propellere. Præterea fidibus canoris, id est, inotibus viribusque suis omnia temperare, hypate, id est graui voce, hymen, neate, id est acuta, ætatem. Dorionibus, id est, vocibus mediis, ver autumnumque producere. Cùm ergo idem sit Musicæ dux Medici neque repertor, quid mirum vtramque artem sæpè ab isdem hominibus exerceri. Accedit quod anima corpusque naturali quadam proportionem inuicem consonant, rursus partes animæ inuicem, partes quoque corporis inuicem. Quam quidem consonantiam etiam harmonici febrium humorumque circuitus, motusque, pulsus ipsius imitari videntur. Partium animæ consonantiam, vt Plato & Aristoteles asserunt, & nos sæpè experti sumus, grauis Musica seruat atque restituit Concentum verò partium corporalium medicina. Cùm igitur corpus & anima inter se, vt diximus, congruant, eiusdem facile esse potest concentum partium animæ, ac partium corporis colere etiam. Hinc Chyron vtramque exercuit facultatem. Hinc Dauid Propheta animam corpusque Saulis delirantis Lyra traditur curauisse. Quod quidem & in cæteris tam corporis quam animæ morbis fieri posse Democritus & Theophrastus affirmauere. Pythagoras autem, & Empedocles, & Asclepiades Medicus, re ipsa etiam demonstrauerunt. Neque mirum id quidem. Nam cùm cantus sonusque ex cogitatione mentis & impetu Phantasie cordisque affectu proficiscatur, atque vna cum aëre fracto & temperato, aëreum audientis spiritum pulset, qui animæ corporisque nodus est, facile Phantasiam mouet, afficitque cor & intima mentis penetralia penetrat. Corporis quoque humores & membra sistit & mouet. Quod quidem ostendit Timotheus, quando Alexandrum regem sonis excitauit in furorem, deinde repressit. Mitto Pythagoræ Empedoclisque miracula, qui lasciuia, iram, furorem grauiore Musica subito cohibebant. Rursus aliis modulis torpentes animos excitabant. Mitto etiam quæ de Orpheo, Arione, Amphione narrant, Ve-

rùm vt ad propositum redeamus, prima Musica in ratione consistit, secunda in Phantasia, tertia in sermone, hanc sequitur cantus, cantum digitorum motus in sono, sonum totius motus corporis in gymnastica vel tripudio. Videmus igitur animæ Musicam gradatim ad omnia corporis membra deduci. Quam etiam Oratores, Poetæ, Pictores, Sculptores, Architecti in suis operibus imitantur. Cum ergo tanta inter animæ corporisque Musicam communio sit, quid mirum ab eodem homine tam corpus quam animam temperari? Denique qui à Pythagoricis, Platonicis Mercurio, Aristoxeno, tam animam quam corpus mundi & animalium singulorum Musicis rationibus constare didicerit, atque à sacris Hebræorum literis acceperit, Deum omnia in numero, pondere, mensura disposuisse: Is neque mirabitur harmonia animalia penè omnia rapi, neque Pythagoram, Empedoclem, Socratem etiam in senectute pulsantes Cithara accusabit. Sed parum eruditum Themistoclem illum qui sibi oblatam in conuiuio recusauit, fuisse fatebitur. Pertinere enim Musicam ad doctos qui Musarum cultores sunt in Dialogo Alcibiade Plato noster ostendit, dicens Musas esse Musicæ duces, atque ab eis Musicam appellari. Reiecit autem Plato vbique melodiam querulam aut leuem, quia vel fractum animum reddat vel lasciuum & iracundum, solam verò grauem eligit & constantem tanquam saluberrimam spiritus, animæ corporisque Medicinam. Ego autem, vt de Marfilio tuo aliquid dicam, eo consilio post Theologiæ vel Medicinæ studia grauioribus fidibus cantibusque frequenter incubo, vt cætera sensuum oblectamenta penitus negligam, molestias animæ corporisque expellam, mentem ad sublimia, Deumque pro viribus erigam, autoritate Mercurij Platonisque fretus, qui Musicam nobis à Deo concessam dicunt ad domandum corpus, temperandum animum Deumque laudandum. Quod præ cæteris Dauidem & Pythagoram præcepisse scio, & consecutos existimo. Vale.

*Verissima laus est quæ laude digna est.*

MARSILIVS FICINVS  
Ioanni Aurelio Arimnienti, S. D.

**L**Audas Lyram Aureli nostram carminibus laude dignis. Ego carmina tua vicissim Lyra laudabo. Sed vt laude digna. Vt tu vera loquaris. Ego verò canam, vterque nostram verissime laudet. Verissima enim laus est quæ laude digna est. Vale.

*Felicitèr amatur qui à viro amatur amore  
dignissimo.*

MARSILIVS FICINVS

Bernardo Bembo Venetorum  
oratori, S. D.

**O** Pinabar, Bernarde, me sic amare Marsilium ut magis cum aliquando amare non possem. Quoniam quisque sui gratia singula, in singulisque seipsum, seque ipsum summopere diligit. Sed heri mea hæc me feliciter nimium fefellit opinio. Tunc enim primum ardentius quam consueveram amare me coepi, cum primum certissimè agnoui abs te ardentèr amari viro præ cæteris amore dignissimo. Tantum equidem Bernardo tribuo, ut quanti ab illo fieri me intelligo, tanti me faciam. Quis igitur mihi magis vnquam placere potest quam ille per quem magis indices mihi ipse placeo. Utinam tibi placeam, Bernarde semper, ut prudentium nulli displiceam. Ergo amor huic in me tuo quid gratiæ referam? amorem. Cætera ut plurimum alieno pretio comparantur. Amorem autem cum in libera voluntate sponte nascatur, ideoque sit liber, nullo vnquam pretio aut emitur aut venditur, nisi seipso. Vale. Foelix. vii. Martij. M. cccc. lxxiiii. Florentiæ.

*De lege & Iustitia.*

MARSILIVS FICINVS

Laurentio Medici viro Magnanimo, S. D.

**P**romissi Nonis, si rectè memini, Martiis Laurentio Pisiflorentiam redeunti, cum in Pisanum agrum aliàs se conferret, ad eum aliquid me scripturum. Ego qui solco semper ad amicos scribere, quia velim, in præsentia scripturus sum quia debeam. Iustum est promissa seruare. Sic enim lege iubetur. Accipe igitur istam legitimamque Epistolam. Imò, ut rectius loquar, quoties volo torques & debeo, sed amoris lege rursus quando debeo tunc & volo sed legis amore. Vnde iustam accipies hodie voluntariamque Epistolam. Secernere vel à iusto voluntarium, vel à voluntario iustum neque licet cuique, neque liber amicis, ecce & debes & vis Marsili, nunc aliquid ad medicum scribere. Verum quid scribes potissimum & quo numine fretus. O salus hominum! ô regina mundi iustitia! tu causam mihi iam pridem scribendi dedisti, tu quæso nunc materiam

suggere ut quam libenter te fide iubente promiseram tam foeliciter te adiuuante persoluam. Diuina illa lex qua mundus constat & gubernatur nostris mentibus dum creantur inextinguibile lumen legis illius naturalis accendit, ad quam boni malique refertur examen. Ab hac naturali lege, quæ diuinæ scintilla quædam est, scripta lex proficiscitur scintillæ eiusmodi radius. Tres autem hæc leges, diuina, naturalis, scripta singulos homines quid sit iustitia docent, ut nullus peccantibus fermè relictus sit excusationi locus, quasi deliquisse omnino propter ignorantiam videantur.

Profectò mentis oculistria hæc lumina monstrant, iustitiam nihil aliud esse, quam voluntatis habitum sic à ratione directum & roboratum, ut minus illecebrisque contemptis, non aliter agere statuat quam diuinitas, natura, ciuitasque dictauerit. Quidnam diuinitas præcipit nisi ut in Deum à quo habemus omnia, omnem cogitationis aciem, voluntatis notum, operationis vim, opera merita, referamus. Natura quoque quid aliud docet, nisi ut pecuniam corpori, corpus animæ, animam rationi, rationem Deo subiiciamus? Denique ciuitas monere videtur, ut ciues singuli esse se quædam ciuitatis membra meminerint. Ideoque decere patriam quidem tanquam vniuersum corpus eorum, ciues autem tanquam corporis eiusdem membra diligere. Quamobrem ille sine controuersia vir iustus habebitur, qui Deum tanquam Patrem & Dominum pietatè incomparabili venerabitur. Affectus motusque suos diligentissimè moderabitur, homines fraterna diliger charitate, seipsum in Deo, homines diliger in seipso, Deo pro viribus inhærebit, secum alios quoad poterit diuinitati coniunger. Proinde iusti officium est cuique quidem suum tribuere, Maioribus honorem atque reuerentiam, æqualibus domesticam quandam consuetudinem, inferioribus opem atque consilium.

Præterea cum in magistratibus constitutus est, legem ipsam tanquam Deum ante oculos semper habere. Severò non legis Dominum sed fidum Interpretem diligentemque ministrum existimare. In qua quidem administranda delicta æquitate quadam & sine perturbatione puniat. Virtutibus absque inuidia pro dignitate præmia reddat. Neque proprium cogitet, sed commune. Neque proprio confidat ingenio, sed senes, pios prudentesque viros in omnibus consulat. Illud quoque apud eum

maneat alta mente repositum. Vos quibus rector maris atque terræ ius dedit magnū necis atque vitæ, ponite inflatos tumidosque vultus, quicquid à vobis timor extimescit, maior hoc vobis Dominus minatur, omne sub regno grauiore regnum est. Quid iustitia sit, quis iustus, quid iusti officium satis sit dictum. Quantus præterea iustæ actionis sit fructus hinc perspicuè declaratur, quod neque domus neque ciuitas, neque exercitus neque commercium prorsus vllum vel bonorum hominum vel malorum absque iusta distributione, quæ sit pro meritis, consistere potest. Qui quidem si vsque ad eò mundi machinæ necessaria est, vt hac sublata mundus sit protinus ruiturus, certè quantum sit vitæ hominum necessaria dici non potest. Nempè si desit hominibus siue congregentur in vnum à se inuicem cito perduntur, siue disiuncti vixerint à feris passim lacerabuntur, ô perpetuum humani generis vinculum! ô saluberrima nostrorum Medicina morborum! ô publica ciuitatis anima, iustitia vita beata, iustitia vita coelestis. Atrei sæculi mater atque regina. Astrea sublimis quæ thronos sydereos habitas. Terrenas sedes, Diua, ne deferas obsecramus, ne in ferreum sæculum miseri prolabamur. Habita precamur, habita semper coeleste numen humanas, coelestis patriæ ciues, vt coelestium vitam, & in præsentia quoad possumus imitemur, & in posterum penitus consequamur. Vale.

*De anima.*

## MARSILIVS FICINVS

Francisco Tedaldo suo, S. D.

**L**Astantius Tedaldus tam charus mihi familiaris quam tibi filius, opusculum nobis tuo nomine reddidit, in quo occidentalium Philosophorum disputationes de anima recensentur. At tandem ab illis quid hac de re Marsilius Ficinus sentiat, queritur, & si non nostrum inter hos tantas componere lites, tamen quid sentiam postquam rogant, latissimè explicabunt libri de Immortalitate Animorum à nobis compositi, qui breui, vt spero, ad vos mittentur. Interim ad eam disputationis partem quam potissimum expetunt, breuissimè respondebo.

Primum quidem scio animam meam substantiam esse. Alioquin substantiam perfectè comprehendere & definire non possem. Non possem vel esse aliquid præstantius accidente, vel quantum accidens à substantia deficiat indicare atque metiri.

Scio non esse corpoream & mortalem. Non enim incorporea & immortalia caperem, atque à corporalibus mortalibusque discernere, scio esse rationalem. Alioquin de illa cæterisque rebus rationes afferre nescirem. Scio quamuis rationis sit particeps, non tamen rationem ipsam, vt quidam existimant, esse. Nam & in rerum rationibus assignandis à veritate, & in rebus agendis à ratione, aberrare non possem. Potius igitur à ratione aberrat, qui animam esse rationem affirmat quam qui negat.

Proinde ratio aut substantia est aut qualitas. Si substantia ratio secundum essentiam est, summa absoluta ac penitus infinita est. Qualis non anima, sed solus est Deus. Si qualitas est accidens virtusque animæ potius quam anima esse videtur. Animam verò quæ substantiæ corporis formando, mouendoque in partes contrarias atque sistendo liberè dominatur, qualitatesque quodammodo contrarias vicissim induere potest, nemo qualitatem accidentis esse audeat affirmare. Quo enim pacto vel accidens vel occidens dici potest? Quæ per omnia tam substantiarum quam accidentium genera speciesque æquè diffunditur. Reflectitur quoque in seipsam tum affectu tum cognitione, atque idcirco etiam vita, vt pote quæ sibi met hæreat non subiecto, sine corporeo instrumento toties agit quoties attingit eligitque incorporalia, eaque à corporeis rectè discernit. Inclinationi corporali sæpè repugnat, neque quiescit in corpore. Denique quanto longius se à corpore seuocat, tanto efficacius intelligit, ac melius feliciusque se habet. Anima igitur est substantia incorporea, rationalis & immortalis, corpori regendo accommodata. Hanc antecedere corpus multi inter Platonicos arbitrantur, Peripatetici contra. Ego autem occidentales istos quos laudas Philosophos, & si non declares, reor tamen Peripateticos esse. Nam de anima, vt inquis, post epulas disputauerunt, vt pote qui corpus quidem prius creandum quam animum procreandum existimauerint. Ego & si ante epulas animulam huius Epistolij procreavi, tamen cum istis de creationis ordine sentio. Vale, ac da operam vt disputationibus istis frequenter intersis, sic enim corpus simul coles & animam. Ioannes Caualcantes noster se tibi commendat. Tu autem Philosophis istis me commenda.

*Consolatio in amici obitu.*

MARSILIVS FICINVS  
Florentinus Bernardo Bembo,  
Venetorum Oratori,  
S. D.

**D**ic age, Bernarde, si licet, quid in amici obitu luges? Mortem ne? An mortuum? Si mortem, luge Bernarde tuam. Nempè quàm certus es obiisse illam, tam certus es te moriturum. Imò te mori. Quolibet enim momento vita præterita interit. Si mortuum. Malum ne? An bonum? Si malus erat, bonum tibi est familiarem eiusmodi amississe. Bonis verò tuis dolere non debes. Si bonus fuit, quod ego potius arbitror, cum à bono prudenterque ametur, bonum certè illi est seorsum à continua morte corporis vivere. Tantis autem amici bonis invidere non decet, doles forsitan quod amicum tuum sicuti consueveras amplius nusquam cernas. Nonne amicus tuus is erat dumtaxat qui te amabat. Quis amabat nisi ipse qui te cognoscebat animus? Animum verò ipsum, neque aliter tunc quam nunc videbas, neque nunc minus quam tunc vides. Absentiam fortè culpabis. At animi cum locum non impleant, non tam situ fiunt quàm cogitatione præsentis. Quando illum non cogitas dolere non potes. Quando autem cogitas quod efficis, pro arbitrio statim in præsentia reuocas. Nunquam igitur quæri de absentia debes, nisi fortè illud nobis obiicias quod animo nunc tuo in corpore clauso soluti illius animi consuetudo non congruat. Segrega Bernarde, si potes, à corpore mentem. Crede mihi subito congruet. Sin minus potes, ne dubita, paulò post velis nolisque congruet. Quod enim vivimus si ad voluntatem nostram conferatur, quàm brevissimum est, si ad ætatem mundi, punctum, si ad ætatem Dei, etiam puncto minus. Vale atque vive Deo, qui cum solus infinita sit vita, mortem mortisque mœrorem solus à suis cultoribus longè propellit.

*Legitimi Iurisconsulti partes.*

MARSILIVS FICINVS  
Petro-philippo Perusino, illustri  
Iurisconsulto, S. D.

**L**egum facultatem Astronomi, Ioui, Solique attribuunt, quibus nihil in coelis est pulchrius. Quid igitur in terris pulchrius est æquo æquitatis legumque Interprete? Iniquo contra quid turpius? Desideras arbitror, legitimi Iurisconsulti

effigiem & indolem intueri, o quàm pulchrum spectaculum! quàm mirabile! Huius anima est Dei cultus. Spiritus patriæ legis cura. Cerebrum, iudicium perspicax. Oculi linguaque doctrina. Pectus memoria tenax. Cor recta voluntas. Manus rectæ voluntatis effectus. Pedes perfectæ gratia. Totum æquitas atque granitas. Sed quid ego verbis Iurisconsulti ideam effingo? Petrus-Philippus dum pictorum more seipsam in Francisco Soderino eius discipulo pinger, ideæ ipsius reipsa veram similitudinem assequetur. Nempè talem esse Petrum-philippum, & si adulationis suopicio asserere prohibet, cogitamen veritas confiteri. Talem quoque Soderinum fore Præceptor studet. Discipuli indoles & initia indicant. Pater eius Thomas Soderinus clarissimus Eques ardentè exoptat. Hieronymus Amatius noster, illius amatissimus proculdubio pollicetur. Marsilius Ficinus sperat, Deumque precatur.

*Velociter comparatur, quod ardentè desideratur.*

MARSILIVS FICINVS  
Ioanni Alouito, S. D.

**C**Vpit animus tuus ardentè, ut scribis, ad nos volare, si non habet alas, neque potest volare, neque cupere debet quod non potest. Si habet, quod ego potius arbitror, cum primum concupivit, advolavit, æternis siquidem & spiritalibus alis, neque tempus obstare potest neque locus: iam igitur habes nisi meratio fallit quod rota mente perebas. Sed ut tam magnum mihi sit quod habes quam tibi & comparanti facilè & possidenti charum, ut minus reipsa Marsilius quàm Ioannes æstimatione possideat. Vale. Ioannes Caualcantes noster se tibi commendat.

*Fontes potius quàm riuulos sectari debemus.*

MARSILIVS FICINVS  
Florentinus, Ioanni Petro  
Patauino, S. D.

**S**Vnt multi nostris sæculis non Philosophi, sed Philopompi, qui sensum Aristotelicum se tenere superbe nimium profitentur, cum tamen Aristotelem ipsum rarè admodum atque parumper loquentem, & tunc quidem non Græcè propria exprimentem, imò Barbarè aliena balbutientem, audierint, ideoque minimè intellexerint. Hi cum in foro



inter pueros garrunt, scire nonnihil vulgò videtur. Si domi eos prudenter interrogas, paucam in Physicis, pauciora in Mathematicis, paucissima in Metaphysicis scire deprehendes. Huiusmodi homines, etiam in septuagesimo ætatis anno pueri sunt expertes non eloquentiæ solum, sed Grammaticæ, neque res naturales aut diuinas, imò barbaras quasdam dictiones anxie nimis excogitant, quàm inuicem ineptè permisceant & confundant. Vnde Sophistæ leuiculi digna puerorum circulis in medium adducunt, potius quàm coronæ virorum. Ita loquuntur ut ex eorum sermone Philosophiam contemnas. Ita viuunt ut ex eorum vita Philosophiam vituperes. Quamobrem eos Plato noster meritò non maritos Philosophiæ, sed adulteros nuncupauit, ex quibus filij non legitimi, id est, opiniones absurdæ, inter Philosophos oriantur. Probo igitur te amice, quod pueriles horum ineptias & vana studia non æmuleris, qui neque fontes hauriunt, sed riuiolos lambunt, neque veritatis lucem, sed opinionis umbram stultè sectantur. Scito te ita demum ad veritatem proximè accessurum, si errantium vestigia diligentissimè deuitaueris. Commenda me Bernardo Bembo nostro, Venetorum Oratori clarissimo. Vale.

*Peripateticus non ut Philosophus est, pecuniam appetit, sed ut homo.*

MARSILIVS FICINVS  
Laurentio Medici viro magnanimo, S. D.

**O**liuerium Ardouinum, insignem Peripateticum commendarem tibi non mediocriter, nisi Aristoteles suus eum tibi plurimum commendaret, si Aristoteles qui pecuniam felicitàti necessariam iudicauit, libros suos absque nummis componere potuisset, etiam Peripateticus iste Aristotelica sine nummis posset interpretari. Intelligis ergo quid velit Oliuerius, Peripateticus est, non Cynicus. At non est, inquit, Philosophi hæc appetere, sit ita sanè. Verum non ut Philosophus est hæc postulat, sed ut homo. Vtrum verò Philosophi sit pecuniam perere, postquam concesseris disputabimus. Vale. Salutat te Laurentius Bonincontrus, Miniarensis Poëta, Astronomicus Astronomusque Poëticus.

*Commendatio à fortuna quondam felici, innocentia, scientia.*

MARSILIVS FICINVS  
Donato Carolo, S. D.

**C**ommando tibi Marsupinos quamplurimum, homines satis quidem fortunatos olim, nunc autem heu! nimis infortunatos, iniustos, ut arbitror, nunquam. Carolum præ cæteris tibi commendat ex alto pater eius Carolus Poëta. Audi, si placet, parumper, & si potes, exaudi, obsecrat ecce te cum per sapientiam humanitatemque tuam, tum verò per diuinam clementiam saltem, ne adolescentem doctum, ac penitus innocentem, vnicam patris spem, hodie deferas. Non decet Musam fieri mendicam, & Innocentiam miserabilem. Fer igitur opem, Patrone Musarum alumno, absque tuo auxilio perituro. IIII. Aprilis. M. cccc. lxxiiii. Florentiæ.

*Qua ratione sit quisque laudandus.*

MARSILIVS FICINVS  
Laurentio Medici viro magnanimo, S. D.

**S**cribis ut in te laudando posthac paucior esse velim. Et ita scribis ut dum fræno me cohibere videris, calcaribus accerrimè stimulas ad laudandum, sed me in præsentia continebo. Non licet ultra. In Epistolis Laurenti, quas ad te scripsi, hætenus semper te ita laudavi, ut admonerem similiter atque exhortarer. Admonui equidem semper ut à Deo te habere omnia recognosceres, ei gratias ageres, ei te sedulo commendares. Exhortatus sum ut pergeres. Nam principium vel voluntatis est vel fortis, perseverantia verò virtutis. Laudavi verò te nonnunquam, tanquam absentem in Epistolis ad Nicolaum liberius. Tu eas velim noli me legis, atque ita erga Nicolaum tuum es affectus, ut quæ ad eum scribuntur, scribi ad Laurentium arbitreris. Magis ergo amor erga Nicolaum tuus in me iudicando te decipit, quàm me in te iudicando amor erga te meus. Ego Laurentium magis adhuc amo quàm laudem, & iudicavi antea quam amarem. Vale. xv. Aprilis. M. cccc. lxxiiii. Florentiæ.

*Nemo sine amore, de amore bene loquitur.*

MARSILIVS FICINVS

Nicolao Micheloctio vero  
viro, S. D.

**A**D me scripsisti Epistolam amatoriam, Nicolae, & quasi plusquam amatoriam: nemo, Nicolae, nisi amator amatoriam tam bellè scribit Epistolæ tuæ, pro me respondeat totus ille liber, quem olim de Amore composui: scribo forsitan nimis pauca, quia in pœnitentia nimis multa cogito. Salutaui amicos tuos, ut iubes, salutationes huius non satis admittunt. Saluere malunt pœnitentia tua, quàm tuo nomine salutari. Vale. xvi. Aprilis. M. cccc. lxxiii. Florentiæ.

*Præcepta ad memoriam.*

MARSILIVS FICINVS

Banco arithmetræ, S. D.

**S**I reminiscencia valere cupis bonorum, da operam ut obliuiscare malorum, operæ precium est in Letheum fluuium demergere vilia, ut preciosa retineas. Fuge Branche perturbationum impetum, fuge multiplicium negotiorum cogitationumque tumultum. Vis ne vtiliter cogitare, cogita paucissima, & quæ cogitant paucissimi. Hoc illud Pythagoræ est, populares vias declinato, ito per diuerticula. Quid temerè circumuagantur. Sagacitate & electione opus est, in exiguo cespere latet lepus, patent vbique mala, in angustum redactum est quod bonum est. Vis ne rerum bonarum pollere memoria? diligenter curato, ut eius quod ediscendum est certam intelligas rationem. Responsio enim est in dissolutione veritatis & memoriæ vinculum. Ob hoc forsitan Plato noster inquit, quod bene intellectum est semel, obliuioni omnino tradi nunquam posse. Ea quoque memoriæ tradenda sunt quæ non solum vtilia sunt, sed & iucunda. Nam alimenta quæ suauissimum saporem afferunt, facilius in naturam nostram transcunt atque conuertuntur. Et quo auidius quid hantum est, eo diutius retinetur. Adde iis, quod obseruandum omnino, Aristoteles & Simonides arbitrantur, ut certus quidam in ediscendis ordo vel insit vel saltem excogitetur, ordo in proportionem quadam & connexionem consistit. In iis autem quæ ordinata serie digesta sunt, siquid vnum acceperis, reliqua continuo necessaria quædam vel naturæ vel artis continuatione sequuntur.

Ipsa quoque mentis intentio si vel in vnum quiddam dirigitur, vel in pauca tanquam vnum, vehementius agit quam si in plurima distrahatur, omnis aut partium continuatio atque ordo in vnum quiddam tam ipsum totum quod ex iis constituitur, quam ipsam animi intentionem inducit. Obseruandum insuper ut sapienter quæ didicimus meditemur, sic enim alimenta animi concoquuntur, & quasi conuertuntur in animum. Confert etiam quamplurimum, si quis eleganti oratione cantuque suauis quæ memoriæ mandauit sæpè recenscat. Voluptas enim rerum condimentum est, amoris esca, incitamentum ingenij, voluntatis pabulum, roburque memoriæ. Conducit multum & admiratio, nam ob hanc attentior factus animus altius penetratilibus suis rerum notas inurit. Quamobrem pueri cum propter nouitatem rerum admirentur magis, retinent quoque diutius. Fortè etiam cogitant pauciora quam viri, adde & multo tranquilliora. Sed de hoc alius. Si quæ in hac re fides Medicis adhibenda est, aloë sæpè purgandum est cerebrum, odoribusque cinnamomi & maioranæ, fouendum, Hoc equidem non virtutis, sed purgationem animæ multo magis probo. Purganda enim hæc primum à malis est ut impleatur bonis. Bene vale, hoc est animam bene ale. Ales autem bene, non si quam plurimis, imò si quàm electissimis hanc alueris.

*Virtutum definitio, officium, finis.*

MARSILIVS FICINVS

Antonio Calderino, S. D.

**P**Etis Antoni sæpè iam ut virtutes tibi definiam, expectas forsitan à me minutissimas illas Peripateticorum Stoicorumque petitiones. Calderine, non ita Platonici nostri solent. Nempè virtutis vis in vnione potius quàm in diuisione consistit. Ideo Pythagorici vnitatem ad bonum, multitudinem ad malum pertinere arbitrabantur. Definiam ergo breuissimè, præsertim cum virtutes exercere satius admodum sit quàm nosse. Virtus est habitus animi electione ad beatitudinem conferens. Virtutum duo sunt genera. Aliæ in intellectu. In appetitu verò siue rationali siue irrationali sunt aliæ. Illæ speculatiuæ vocantur, istæ morales. Illæ quidem speculatiuæ, quia speculando comparantur, & comparatæ versantur in speculando, Istæ verò morales, quia more & consuetudine acquiruntur, atque acquisitæ in moribus & operum vsu

consistunt. In eogenere sunt sapientia, contemplatio diuinorum, scientia quæ est cognitio naturalium, prudentia, hoc est, notitia rerum priuatim & publicè rectè administrandarum, ars denique quæ est recta efficiendorum operum regula. In alio genere sunt, iustitia quæ sponte suum unicuique tribuit, fortitudo præterea quæ ad opera honesta promptior, abiicit à nobis timoris impedimentum, temperantia denique quæ libidinum mollitiem, quod alterum honestorum impedimentum est, repellit, liberalitas autem & magnificentia iustitiæ comites sunt, atque virtutes aliæ similiter aliarum. Et vt summarim dicam, speculatiua virtus nihil aliud est nisi acquisita claritas, intellectus moralis autem nihil aliud nisi feruor stabilis appetitus ab intellectus claritate succensus. Meminisse verò oportet, nihil in humanis virtutibus electione preciosius esse, pro qua emenda, Plato in libris de Republica censet cætera omnia esse vendenda. Obsunt enim illi omnia, prod est nihil, qui nescit discernere à malis bona, & à bonis mala secernere. Volumus ne electionis consequi facultatem? consulemus in omnibus seniores probatioresque viros. Tempus igitur præ cæteris consulemus. Quid enim inter temporalia tempore antiquius & probatius? Consulemus autem tempus si præteritorum euentus sæpè & multum considerauerimus. Præteritum enim magister est præsentis atque futuri. Consideratio quoque futuri præsentia docet. Difficillimum est enim præsentia rectè administrare, nisi actionis cuiusque finem & exitum cogitaueris. Cogita quantum decet, reliquum relinque Deo. Quicquid sequitur, tanquam à Deo factum proba. Qui enim diuinam gubernationem improbat, reprobatur à Deo. quoniam verò Deus principium finisque omnium est, ideoque nos Deo non nobis nati sumus, quæ in superioribus narrabantur, eatenus virtutes sunt quatenus à nobis colendi, imitandi, consequendique, Dei gratia exercentur. Cultus itaque Dei virtutum virtus est. Consecutio autem Dei præmium est virtutum.

*Anima natura & officium, laus historia.*

MARSILIVS FICINVS

Iacobo Bracciolino Poggij oratoris  
filio, paternæ artishæredi,  
S. D.

**P**latonici veteres vrbana Platonis natalitia quotannis instaurabant. Notui autem Platonici, Braccioline, & yr-

ba & suburbana nostris temporibus celebrantur. Suburbana quidem apud magnanimum Laurentium Medicem in agro Caregio, culta in libro nostro de amore narrantur. Vrbana verò Florentiæ sumptu regio celebravit Franciscus Bardinus vir ingenio magnificentiaque excellens. Vbi tu & Bindaccius Ricafolanus & Ioannes Caualcantes noster aliique Academici multi discubuerunt. Ego quoque interfui. Atque ex multis & variis quæ in eo conuiuio disputauimus illud in primis mecum ipse sæpè meditor ac tibi libenter hodie recensebo, quod ante epulas de animæ natura concludimus. Nihil enim magis ad hominem pertinet quàm quæ de anima disputantur. Sic & Delphicum præceptum illud impletur, Noscete ipsum, & cætera omnia sagacius, quæ vel super animam vel infra animam sunt, intestigantur. Quo enim pacto capere alia abundè possumus, nisi animam ipsam, per quam capienda sunt alia, capiamus? An non abutitur anima qui intueri eam non studet, per quam & cuius gratia intueri cuncta desiderat? Anima rationalis quemadmodum omnes ibi conuenimus, in orizonte, id est, in confinio æternitatis & temporis posita est, quoniam inter æterna & temporalia naturam mediam possidet, & tanquam media rationales vires actionesque habet ad æterna surgentes, habet quoque vires operationesque declinantes ad temporalia.

Merito cum ex diuersis naturis inclinationes diuersæ nascantur eo ipso quòd animam videmus, tum ad æterna, tum ad temporalia vergere, eam ex vtrisque naturis constitutam esse cognoscimus. Partem quidem illam animæ superiorem Plato noster in regno Saturni, id est, in mentis & prouidentiae, inferiorem autem in regno Iouis, id est, vitæ fatique locauit. Quapropter anima iam bifrontis instar vultum geminum habere videtur, aureum, scilicet & argenteum, Illo Saturnia, hoc Ioualia respicit. Aspiciendo autem indicat atque appetit. Æterna amare præstat quàm iudicare, difficillimè iudicantur bene, malè amari nunquam possunt, dummodo ardentè amentur, quæ nunquam nimis, imò neque satis amantur. Temporalia indicare satius est admodum quàm diligere. Iudicantur vt plurimum satis belle, sed vt plurimum turpiter diliguntur. Profecto index rei iudicandæ formam in se transfert, amator verò se transfert in amari formam. Satius est inferiora ad nos attollere iudicando, quàm nos ad illa amando deicere. Satius

est ad superiora nos per amorem erigere, quam illa ad nos dimittere, per iudicium. Vale Sed antequam finem faciam rogo te, mi Braccioline, ut ab incæpto componendarum historiarum studio non desistas. Nam stylum orationis tuæ historici laudant, & res ipsa est ad vitam, non modo oblectandam, verumetiam moribus instituendam summopere necessaria. Siquidem quæ per se mortalia sunt immortalitatem ab historia consequuntur, quæ absentia sunt per eam præsentia fiunt, vetera iuvenescunt. Iuvenes cito maturitatem senis adæquat. Ac si senex septuaginta annorum ob ipsarum rerum experientiam prudens habetur, quanto prudentior, qui annorum mille, & trium millium implet ætatem. Tot verò annorum millia vixisse quisque videtur quot annorum acta didicit ab historia. Vale iterum.

*Tres vite duces, & una vite optima ratio.*

MARSILIVS FICINVS  
Laurentio Francisco, S. D.

**T**Res sunt humanæ vitæ duces. Prima est ratio diu diligenterque examinata, secunda experientia rerum diuturna consuetudine confirmata, tertia, autoritas antiquorum eorum, scilicet, qui tales sint, ut neque ab alio facile decipi poterint, neque ipsi voluisse alios decipere videantur. Magis enim attendendum est quid egerit quisque quam quid dixerit, bene loqui multorum est, bene agere paucorum. Optima verò viuendi ratio est, ut cogites conerisque quam maximè potes secundum mentem vivere, hoc est, non semper feliciter vivere, in mente siquidem status & tranquillitas reperitur, qui de mente cadit ad inferos labitur. Noli obnixè studere ut diu in corpore viuas, nihil est enim si ad æternitatem conferas in corporalibus rebus diu. Adde quod in ipsa, corporis vita à multis ac vilissimis superamur. Vitaque corporis poena est & mors animi nuncupanda. Hoc vnum conare præ cæteris quod in Gorgia Plato noster iubet, ut id temporis quod tibi hic à Deo est assignatum quam optimè viuas, sic sempiternæ miseriæ supplicia deuitantur, & æternæ felicitæque vitæ fundamenta diuino quodam auxilio iaciuntur.

*Ratio docendi, laudandi, vituperandi.*

MARSILIVS FICINVS  
Laurentio Lippio Rhetore, S. D.

**Q**uoniam legisti Græcos Rhetores & Latinos, arbitror te ita discipulos

tuos instruere, ut semper meminerint non quod libeat, sed quod liceat auditoribus persuaderi debere. Nam quicquid iustum est suadet, facilius & felicius persuadet, quippe cum in causa sua iustitiam habeat patronam. Meminerint se iustos esse oportere. Cuius enim vita non probatur oratio reprobat. Opera vehementius quam verba mouent, maximè mouet alios qui ipse mouetur maximè, omnino autem offendit aures qui aliter canit ore, aliter pulsat lyram. Diuina Musica est rectus cogitationum, verborum, actionumque concentus. Meminerint quando laudaturi quempiam vituperaturiue sunt, amplissimam esse rerum, locorum, temporumque naturam, itaque neminem posse ad eò sapientem bonumque esse, quin possit alter sapientior ac melior reperiri. Neminem rursus tam insipientem, tamque malum, quin locus pateat insipientiori atque peiori, parce ergo laudandum, sed & parcius vituperandum, laudando præterea exhortentur & moneant. Nemo pestilentior homicida quam adulator, qui quantum in se est interficit animum.

Laudent ergo virtutes Deumque virtutum largitorem potius quam personas. Illud quidem pij Philosophi est, hoc autem adulatoris. Vituperent vitia non personas, Illud amici est, hoc inimici, non hominem, sed vitia oderint. Ergo cogitent non quomodo lædant hominem, sed quomodo vitia diluant. Studeant magis ut boni sint quam ut docti, scientia inuidiâ gignit, bonitas occidit inuidiam, bonitas & hominibus vtilior & Deo gravior quam scientia, est etiam stabiliior, citius enim obliuiscimur rei alicuius quam breui didicimus, quam mores amittimus quos laboriosa & diuturna consuetudine comparauimus. Doctrina per se ad breue tempus parumue confert, bonitas in æternum & ad consequendum Deum. Consule igitur discipulisti ut more Socratico doctrinis humanis vtantur ad expellendas sensuum nebulas & animum serenandum. Tunc enim à diuino sole menti veritatis radius illucescet, aliter verò nunquam. Hoc vnicum vtile studium est. Qui aliter agit frustra misereque laborat. Sic te Lippi tui discipuli honorabunt. Pythagoram Socratemque præceptores diuinos non libri, sed discipuli illustrarunt. Imò verò libri sed viui, liber est discipulus carens anima, discipulus est liber viuens. Laurenti, quæ à veritatis omnis magistro gratis didicisti, gratis doce. Scientiam naturæ liberam nefarium est fieri mercenariam. Lando cum

qui absque verecundiæ rubore multa didicerit, atque illa sine inuidia doceat. Quicquid in discipulis exundat, redundat in præceptorem. Doce quæso libenter. Tot enim animæ filios habemus quot & discipulos, quod si genitores filios corporis cum voluptate generant, cur non & docti cum voluptate filios procreent? Præbe te ipsum morum bonorum exemplum. Sanctimonia vitæ doctrinam efficit venerandam, iuniores seniorum faciliè mores ebibunt. Sacrilegi habendi sunt qui iuniorum, imò & quorumlibet animos, verbis, moribusve inficiant. Denique Pythagoram & Alabandensem Apollonium imitari, qui Indorum Philosophorum ritu non adolēcentes quoslibet, sed fœliciter natos, & optimè educatos in disciplinam suam admittebant. Non enim decet Musas fieri, aut lasciviæ ministras, aut iniquitatis arma. Vale & saluta Albertinum Cremonensem Philosophum verum, id est, doctrinæ & honestatis exemplar.

*Cognitio & reuerentia sui ipsius omnium optima.*

## MARSILIVS FICINVS

Homini generi salutem, id est, cognitionem & reuerentiam sui ipsius, dicit.

**C**ognosce te ipsum, diuinum genus mortali veste indutum, nuda quæso te ipsum, segrega quantum potes, potes autem quantum conaris, segrega, inquam, à corpore animam, à sensuum affectibus rationem. Videbis protinus purum segregatisterræ sordibus aurum, videbis lucidum disiectis nubibus aërem, reuererebistunc, crede mihi, te ipsum tanquam diuini Solis radium sempiternum. Neque audebis coram te ulterius turpe quicquam aut vile vel aggredi vel cogitare. Nihil penitus latere potest Deum, per quem solum patent quæcunque vsquam patent. Nihil tuorum latet mentem vinam semper Dei vbique videntis statum, si venerandus antiqui regis aspectus verecundiam gignit, reuerere semper & vbique admirandam Dei regis omnium mentisque corporalium reginæ præsentiam. Merito igitur diuinus Pythagoras iussit, reuerere te ipsum. Qui coram seipso vilia cogitare non erubescit, & animam natura diuinam patitur seruo suo corpori seruire, diuinamque hanc margaritam submergit in lulum, is certè videtur quanti ipse pretii sit ignorare, neque considerauit diuinum illud oraculum: Minui-

sti cum paulò minus ab Angelis, & quæ sequuntur Rursus, Ego dixi, dii estis & filij Excellsi omnes. Heu vestri nimium ignorantes, heu pectora cæca. Surgite iam precor ex hoc profundiore somno, respiscite quandoque obsecro. Si enim respiscitis, feliciter respirabitis, quid huiusmodi tamdiu spectatis, diui cœlum suspicite cœlestis patriæ cines, incolæ terræ. Homo quidem terrena stella est circumfusa nube, stella verò cœlestis homo. Magnum quiddam es, ô anima, te parua non implent, optimum quoque, si displicent tibi mala, pulcherrimum, si horresturpia, sempiternum, si temporalia paruipendis. Postquam talis es, si reperire te cupis, quare obsecro ibi te ipsam vbi sunt talia. Magna verò ibi sunt solum, vbi nullum locus imponit limite finem, optima vbi nihil contingit aduersi, pulcherrima vbi nihil est dissonum, sempiterna, vbi defectus est nullus. Quare te igitur extra mundum, verum ut & quæras te & reperias extra, extra vola, imò extra respice. Es enim extra dum mundum ipsa complecteris. Sed effete putas in infimo loco mundi, quia te ipsam quidem non cernis super æthera peruolantem, sed vmbra tuam corpus vides in infimo. Perinde ac si puer aliquis super puteum constitutus esse se in fundo putei arbitretur, dum in seipsum aciem conuertit, sed suam quasi in fundo prospicit vmbra. Aut si auis in aëre volans, credat se in terra volare dum vmbra suam videt in terra. Ergo relictis vmbrae huius angustiis revertere in te ipsam, sic enim reuerteris in amplum. Immensam esse scito in spiritu amplitudinem, in corpore verò infinitam, ut ita loquar, angustiam, quod quidem ex hoc prospicere potes, quod numeri, qui spiritali naturæ propinquant, sine fine crescunt, non tamen sine fine decrescunt. Magnitudo autem corporalis contra, terminum quidem habet augmenti, quamuis terminum decrementi non habeat.

*De diuinitate animi ac religione.*

## MARSILIVS FICINVS Francisco Bandino, S. D.

**C**æteri cum ad Marsilium Ficinum & Ioannem Caualcantem vnicum eius Achatem scripturi sunt, geminas scribunt Epistolas, putantes vbi duo vident corpora, duas quoque voluntates inesse. Bandinus autem qui linceis oculis, ut ita dicam, introspicit vnicam ad vnicum scripsit Epistolam, in ea Marsilium appellat



immortalem atque diuinum, utpote qui non in carne hominis huius veste figat intuitum, sed interiorem hominem intueatur, animum scilicet ipsum, qui hominibus à Deo tributus est immortalis atque diuinus. O quam perspicax es Bandine, qui subito intuitu cernas, quod ego primum per longas ambages decem annos inuestigavi, deinde composui hac de re quinquennio octo decemque libros. Quorum initium diuinitatem animæ, quam ipse perspicere iam mihi videris, incipit iis verbis paulatim significare. Cum genus humanum propter inquietudinem animi imbecillitatemque corporis, & rerum omnium indigentiam, duriores quàm bestia vitam agat in terris, si terminum viuendi natura illi eundem penitus atque cæteris animantibus tribuisset, nullum animal esset infœlicius homine. Quoniam verò fieri nequit ut homo qui Dei cultu propius cunctis mortalibus accedit ad Deum beatitudinis authorem, omnino sit omnibus infœlicior, solum autem post mortem corporis beator effici potest, necessarium esse videtur animis nostris ab hoc carcere discedentibus lucem aliquam superesse. Sed de his satis. Tu verò perge Bandine res singulas ut facis, quantum potes introspicere, sic enim nunquam decipieris, qui superficiem aspicit umbras tantum videt & somnia. Cæterum est cardo rerum atque substantia, polliceris honorare nos cum primum potueris, iamdiu diuum Platonem eiusque cultores magnifice honorasti. Nunc quoque honoras dum polliceris, veridicus enim vir, qualis est Bandinus, cum pollicetur præstat officium. Vale.

*Consolatio in alicuius obitu.*

MARSILIVS FICINVS

Antonio Allio Theologo Episcopo  
Volaterrano, consolationem  
diuinam dicit.

**S**I liceret consolari eum qui cæteros consolari possit & soleat, scriberem ad te nunc Epistolam in fratrum tuorum migratione consolatoriam. Non contolabor igitur Antonium, sed precabor. Obsecro te venerande pater per Deum ipsum vitam viuendum, ut neque tam cogites terrenam tuorum mortem quàm cœlestem eorum vitam. Neque tam voluntatem tuam sequeris quam diuinam, cui quidem facile consentire vnica pietas est, vera sapientia & summa felicitas. Quæ cæteris necessaria aduersaque eueniunt, ei voluntaria & pro-

spera sunt qui cum gubernatoris omnium voluntate consentit. Sed quid ego ineptus Medicinas offero Hippocrati? Medice curate ipsum, imò te Deo committere curandum, nullum est enim, ut ipse optime nosti, remedium contra mortis terrenæ venenum, nisi & cœlestis & supercœlestis vitæ feruens amor & consideratio frequens. Vale xxviii. Aprilis, M. cccc. lxxiii. Florent.

*Contra mendaces & impios detractores.*

MARSILIVS FICINVS

Bernardo Oricellario viro  
præstanti. S. D.

**S**CIS fratrem tuum maximo tibi dedecori esse, quod mendax & instabilis ab omnibus habeatur, negare non possum cum esse mendacem, qui contra maiestatem diuinam, quæ infinita veritas est, venenosam linguam calamumque tam impie tanquam insolenter exercet. De illo igitur nihil verius quàm quod sit mendax homines prædicant. Sed cur instabilem hunc hominem non inuenio, qui tam pertinaciter in suo proposito stabilis est, ut in ipsa sua instabilitate, & malignitate iam consenuerit. Vel emenda vitia fraterna si potes (quanquam curare tam veterem morbum difficillimum est, & tam nefarium vitium forsitan impossibile, nunquam enim surrexit dæmon, qui cum rebellasset à Deo semel dicitur corruisse.) Vel saltem feras æquo animo, postquam & Deus eius conuitia tolerat, fortè quia scit Deus hunc nescire quid garriat. Non obscurant (amice) virtutes tuas fraterna vitia, sed illustant: albedo enim tua ob eius nigredinem candidius emicat. Noli igitur in bonis moribus minus ipse stabilis esse quàm frater in malis, ut tam bene agas bona, quàm bellè ille mala.

*Contra mendaces & impios detractores.*

MARSILIVS FICINVS

eodem Bernardo Oricellario viro  
præstanti, S. D.

**N**OLI nimium turbari, Bernarde, si ille aduersus omnes tam turpiter latrat; latrat enim canis ille pro natura & consuetudine sua, tunc latrare desinet eiusmodi rabula, cum desinet vivere, nisi fortè etiam post mortem latratu Cerberum comitetur. Sed dic oro, Bernarde, quid latratus eius cuiquam obesse potest? Imò homines vigilantiores cautioreque reddit. Et cum vulgatissimum

sit, cum semper probis, vel propter invidiam, vel propter dissimilitudinem solere detrahere, ille probatissimus vir habebitur, quem ille maximè improbauerit. Ego certè ab iniquo verbis malle, quàm re ipsa vituperari. Vituperat autem re ipsa iniquus quem verbis laudat; nam ei amicus ac similis iudicatur. Detractor quisque prius sibi ipsi quàm cæteris necessariò detrahit, subit enim invidi & maledici criminen. O quantum abutitur lingua qui ad malum vitur! Polluant maledictis os suum maledici, nos nostrum vicissim ne polluamus. Si foetores abominamur, scire debemus, nihil peius olere quàm in ore detergendæ sunt sordes, sermo foetens putidæ mentis est signum. Cauendum est igitur diligenter ne improborum contagione inficiamur. Non est curandum quid de nobis homunculi, sed quid viri, neque tantum quid viri, quantum quid veritas ipsa loquatur. Si quid obicitur falsi, contemne, veritate confusus, si quid veri, ad emendationem tuam aduersarij conuictis utere. Noli ad leuissimam fulgoris vulgaris auram, vel prosperam, vel aduersam vllam in partem verti. Diuinus animus nulla ex re alia pendere debet quàm ex Deo. At tu, frustra conaris istum perditum emendare, neque exaudit demens rationes, neque audit, nunquam parceret probis viris impius iste, qui nunquam pepercit Deo. Quonam pacto potest insanus qui Deum odit, homines vltos, qui Dei imagines sunt, diligere? Rogas me ut eum quibuscunque possum rationibus corrigam, litus arare me iubes. Nemo infestius, nemo rursus ineptius contra res diuinas inuehitur quàm iste homuncio quem emendare me rogas, puniendus est potius Therfites iste quam castigandus. Proh nefas! impunè inuestigas multas ore venenoso euomit contra Deum. At quo ore? Quod ab ipso Deo laudandi Dei gratia est creatum. Non habeo in quo sæculum hoc nostrum Bernarde accusarem, nisi quod portentulum istud impium produxit. Gloriosum bellum Ioui quondam à Gygantibus inditum fuisse narratur, ignominiosum summo Deo his temporibus à Pigmæis. Commendas meæ disciplinæ monstrulum miserabile, & certe si cerebrum haberet ac vires, valdè humano generi noxium. Hoc Hercules propter contemptum prætermisisset, Marsilius respuit propter foetorem. Vale felix, & iube alias leuiores.

*Quid est felicitas, quot habet gradus,  
quod est æterna.*

MARSILIVS FICINVS  
Laurentio Medici viro magnanimo, S. D.

**C**um ego ac tu nuper in agro Chæregio multa de felicitate vltro citroque disputauissemus, tandem in sententiam eandem duce ratione conuenimus. Vbi tu nouas quasdam rationes, quod felicitas in voluntatis potius quam intellectus actu consistat, subtiliter inuenisti. Placuit autem tibi ut tu disputationem illam carminibus, ego soluta oratione conscriberem. Tu iam eleganti Poëmatum officium impleuisti, ego igitur nunc, aspirante Deo, munus meum exequar quam breuissimè. Tria bonorum humanorum genera numerantur. Bona videlicet fortunæ corporisque & animi. Fortunæ bona sunt pecuniæ, honor, beneuolentia, dominatio. Atque ut à primis incipiamus, pecunia non est summum bonum, ut opinatus est Mida, non enim propter seipsam, sed propter corporis vel animi commoda comparatur. Neque honor & beneuolentia, ut Augustus solebat dicere, quia in alterius arbitrio sunt, & sæpè non sentiuntur à nobis, sæpissimè præter meritum & impenduntur, & amittuntur. Neque dominatio, ut voluit Cæsar, quoniam quanto pluribus dominamur, tanto acrioribus vexamur curis, plurà subimus pericula, pluribus seruimus hominibus atque negotiis, plures hostes habemus. Bona corporis sunt, robur, sanitas, pulchritudo. Robur sanitasque non est summum bonum, ut Milo Crotoniates existimasse videtur, minimis enim offensuiculis subiicimur. Neque pulchritudo, quam Scepticus gloriabatur Herillus, nemo enim quamuis pulcherrimus sit, hoc ipso contentus viuic, & alius potius bonum est pulchritudo quam pulchris. Animæ bona alia sunt irrationalis partis animæ, alia rationalis sunt. Irrationalis partis sunt, acumen sensuum, eorumque voluptates. Aristippus censuit in ambobus summum esse bonum. Nos in neutro felicitatem consistere arbitramur, non in acumine, tum quia in hoc à multis bestiis superamur, tum quia offendere nos solet acutus sensus non minus quam iuuare. Non in sensuum voluptatibus, nam ardor eas antecedit, comitatur suspicio, poenitentia sequitur, multis longisque doloribus vna emitur breuisque voluptas. Ac tandem voluptatis huiusmodi vehementia durat quamdiu durat corporis

indigentia, puta eousque potius suauitas  
 cuousque sitis, indigentia verò omnis mo-  
 lestia quædam est. Voluptas ergo sensus,  
 quia sæpè contrario suo id est dolori,  
 miscetur, neque pura veraque voluptas  
 est, neque sufficiens. Ac si quis dixerit  
 nonnullas esse sensuum voluptates quæ in-  
 digentiam non sequantur: Respondeo,  
 eas usque adeò debiles esse, vt nullus in eis  
 beatitudinem collocet. Neque audeat  
 quispiam in habitu quodam ex acumine  
 oblectamentisq; sensuum composito bea-  
 titudinem ponere, habitus enim huiusmo-  
 di fallax, volatilis, inquietus. Vilia oblecta-  
 menta non implent animū, naturali quodā  
 instinctu sublimiora petentem. Rationalis  
 partis animæ bona alia naturalia dicuntur,  
 vt acumen, memoria, & prompta volun-  
 tatis audacia. In iis foelicitas non consistit,  
 bene enim vtentibus bona sunt, malè verò  
 mala. Alia rationalis animæ bona sunt  
 acquisita, vt morales virtutes & specula-  
 tiuæ. Nunquid in moribus est foelicitas?  
 quod Stoici & Cynici arbitrantur. Ne-  
 quaquam, operationes enim moralium  
 virtutum, ceu temperantiæ, fortitudinisq;  
 negotiosæ atque laboriosæ sunt. In la-  
 bore autem non est finis ille quem quæri-  
 mus, sed inquirere, negociamur enim vt  
 oriemur, & bellum gerimus, vt in pace vi-  
 uamus. Præterea, mores non propter se  
 quæruntur vnquam, sed tanquam medi-  
 cinæ quædam ad purgationem tranquillita-  
 temque animi referuntur. Non est autem  
 in tranquillitate Epicurea finis vltimus.  
 Refertur enim animi tranquillitas ad spe-  
 culationem veritatis, ceu serenitas aëris  
 ad Solis lumen. Num ergo in speculati-  
 uis virtutibus, qualis est contemplatio ve-  
 ritatis, beatitudo versatur? Certè in iis ip-  
 sis. Sed alia est contemplatio, vt ita lo-  
 quar, subcoelestium, alia coelestium, a-  
 lia supercoelestium. Democritus in prima  
 speculatione finem statuit. Anaxagoras in  
 ea quiescere noluit, quia coelestia præstan-  
 tiora sunt quam sub coelestia, sed conten-  
 tus esse volebat speculatione coelestium.  
 Vnde, inquit, ad illorum contemplatio-  
 nem genitum se fuisse, coelumque esse  
 suam primam affirmavit. Quod quidem  
 Aristoteles reprobauit, quia supercoele-  
 stium consideratio dignior admodum vi-  
 deatur. Atque beatitudo sit summus actus  
 summæ potentiæ circa obiectum sum-  
 mum. Verum alia est horum consideratio  
 quam consequi potest animus corpe-  
 re clausus, alia quam solutus. Aristoteles  
 putauit hominem qui prima habeat esse  
 foelicem, nosse Plato negauit, quoniam

diuinorum consideratio in hac vita intel-  
 lectus ambiguitatem voluntariisque anxie-  
 tatem semper habet admixtam. Quam-  
 obrem apud Platonem beatitudo vera ad  
 animam pertinet à corpore separatam di-  
 uina considerantem. In diuinorum gene-  
 re Angeli ponuntur atque Deus. An-  
 tenna & Algazel affirmare videntur, in  
 Angelorum consideratione animam fo-  
 re beatam. Id duabus rationibus Platonici  
 confutant.

Ratio prima huiusmodi est: Intellectui  
 nostro conditio hæc innata est, vt rei cu-  
 iusque requirat causam, rursusque causæ  
 causam. Ideo non cessat vnquam inquisi-  
 tio intellectus nisi eam causam reperiatur  
 cuius nulla sit causa, sed ipsa sit causa cau-  
 sarum, id autem solus est Deus. Secunda  
 ratio talis. Voluntatis affectus nullo saria-  
 tur bono, quatenus putamus bonum præ-  
 terea aliud superesse, solo igitur eo bono sa-  
 tiatur ultra quod nihil est boni. Quid au-  
 tem hoc aliud nisi Deus? Quapropter in so-  
 lo Deo quiescere potest intellectus inquisi-  
 titio & voluntatis affectus. In Deo igitur so-  
 lo hominis beatitudo consistit. Quod qui-  
 dem inde prouenit, quod nulla res alibi  
 quam in propria causa potest quiescere. Et  
 quia Deus solus est propria animæ causa,  
 ideo anima in solo quiescit Deo. Sed hæc  
 latius in Theologia de Immortalitate Ani-  
 morum differuimus. Cæterum duo sunt a-  
 nimæ actus circa Deum. Videt enim  
 Deum per intellectum, ac Deo cognito  
 gaudet per voluntatem. Visionem Plato  
 vocat ambrosiam, gaudium nectar, intelle-  
 ctum verò & voluntatem geminas alas qui-  
 bus in Deum tanquam patrem & patriam  
 reuolemus. Idcirco puras, inquit, animas  
 cum in cælum euolauerint in diuina men-  
 sa ambrosia & nectare vesci. Gaudium in  
 ea felicitate est præstantius visione. Quia  
 quanto magis apud Deum in hac vita me-  
 remur amando quam inquirendo, tanto  
 maius in illa vita præmium amoris quam in-  
 quisiitioni tribuitur. Meremur autem aman-  
 do multo magis quam indagando, multis  
 de causis: Prima, quia nemo in hac vita ve-  
 rè cognoscit Deum. Vere autem amat  
 Deum quoquo modo cognitum qui sper-  
 nit cætera propter Deum. Secunda, quem-  
 admodum deterius est odisse Deum quam  
 ignorare, sic melius amare quam nosse.  
 Tertia, cognitione Dei possumus malè uti,  
 scilicet ad superbiam. A more eius malè uti  
 non possumus. Quarta, qui Deum prospicit,  
 nihil ob hoc tribuit Deo, qui autem eum  
 amat, & seipsum & quicquid possidet, Deo  
 tribuit. Amanti ergo se Deus retribuit po-

zias quam scrutanti. Quinta, perscrutando Deum paulum longo vix tandem tempore proficimus, amando breuissimo plurimum, ob id enim citius propinquiusque & firmitus amor quam cognitio mentem cum diuinitate coniungit, quia vis cognitionis in discretionem consistit magis, amoris autem vis magis in vnione, Sexta, amando Deum non solum maiorem percipimus voluptatem quam perscrutando, verum etiam meliores efficimur. His rationibus concludere possumus præmium quod amori debetur maius esse, quam quod humanæ inquisitioni accommodatur. Amanti conuenit ut re amata fruatur & gaudeat, is enim est finis amoris. Inquirenti autem ut videat. Gaudiū igitur in homine felice superat visionem. Præterea videre quærimus ut gaudeamus, non autem ut videamus gaudere. Causam assignare possumus, ob quam videre velimus, causam verò ob quam velimus gaudere, aliam præter ipsummet gaudium, assignare nequimus. Quasi propter seipsum desideretur. Non cupimus ipsum videre simpliciter, sed talia & tali quodam pacto videre ut gaudeamus. Nullum gaudium natura ipsa respuit vnquam, respuit tamen interdum cognitionem, imò etiam, si arbitramur multum fore molestatam, ut oblectatio non cognitionis tantum, verum etiam vitæ sit condimentum, quo sublato, omnia videntur insipida. Plenius est gaudium quam cognitio, non enim quisquis cognoscit, idem simul & gaudet, quisquis autem gaudet, necessariò & cognoscit. Natura sicut deterius existimat dolere quàm ignorare, ita melius gaudere quàm nosse. Et sicut dolorem semper & vbiq; propter se fugit & omnia propter ipsum tanquam summum malum, ita voluptatem sequitur propter se, & alia propter ipsam quasi summum bonum. Cum vis cognitionis, ut supra diximus, in quadam discretionem consistat, vis autem amoris in vnione, propius vnimur Deo per amatorium gaudium quod nos transformat in amatum Deum, quam per cognitionem. Et sicut non qui videt bonum, sed qui vult, fit bonus, sic animus non ex eo quod Deum considerat, sed ex eo quod amat fit diuinus, quemadmodum materia, non quia calorem ignis euadit. Ratio hæc ex eo confirmatur, quod cum anima non sit ipsum bonum, ideoque bonum ipsi extra sui naturam sit quærendum, sequitur ut conuersio voluntatis, quæ extra protenditur in obiectum, verius ipso bono statuatur, quam notio intellectus quæ manet intus. Intellectus enim modo quodam imaginario ob-

iectum capit. Voluntas essentiali instinctu transferre se nititur in obiectum. Appetitus in essentia fundatur latissimusque & perpetuus est, quæcunque enim sunt semper aliquid appetunt. Cognitio per acceptas imagines agit, paucorum est & intermissa. Possessio igitur boni per appetitus naturam magis substantialis est per cognitionis intuitum. Si Deus mentem à voluntate seiungeret seruaretque naturam vtramque seorsum, mens quidem priorem speciem retinere forsitan videretur. Eset enim adhuc forma quædam rationalis, voluntas speciem fortè mutaret. Eset enim appetitus aliquis carens rationis electione. Sed mens nullo prorsus bono ulterius frueretur, eset enim tanquam animal absque gustu, nihil sibi placeret, nihil probaret, neque alteri cuiquam, neque sibi assentiretur. Voluntas tamen adhuc suis quibusdam bonis pro viribus frueretur. Frui igitur summo bono ad voluntatem potius quam intellectum pertinere videntur. Merito voluntati conuenit finis motus, id est, felicitas, quoniam ad eam spectat motus initium. Intellectus enim cum notam pro natura rerum, qui pro natura sua res ipsas intelligat, res ad seipsum quodammodo videtur attrahere, ideoque non propriè mouere dicitur animam. Voluntas cum res appetat eo modo consequi, quo sunt in seipsis, trahit animam ad externa, Ideoque motus initium est voluntas. Finis autem motus vniuersalis extrinsecus est, qui denique tanquam forma quædam animæ sese iungit. Anima per voluntatem hoc fine maxime fruitur. Quia merces laboranti debetur. Cura verò stimulusque circa consequendum malum vitandum est in affectu. Voluntas non modo quia magis meretur quàm intellectus apud Deum, idcirco magis Deo fruitur, verum etiam quoniam ad eam beatitudinis distinctio pertinet. Quanto enim quis ardentius amat, tanto euadit beatior, ideo ad ipsam spectat felicitatis ipsius substantia. Quid dicemus ad hoc? quod cum multo plures amare Deum ardentius possint quam clarè cognoscere, amatorum via & hominibus tutior est ad infinitum bonum quod seipsum vult quàm plurimis impertire longè accommodatior. Ad voluntatem igitur pertinet consecutio. Quid rursus ad hoc? quod liber animarum rationalium motus, & quia liber, ideo progrediens præter finem quemlibet terminum vsque adeò meritis proficere potest, ut nonnullos etiam Angelorum beatitudine valeat superare, superare verò eos amando gaudendoque potius quam intelligendo.

do valemus. Proinde cognoscendo Deum, eius amplitudinem contrahimus ad mentis nostræ capacitatem atque conceptum: amando verò mentem amplificamus ad latitudinem diuinæ bonitatis immensam. Illic in nos Deum quasi deiicimus, hic verò attollimus nos ad Deum. Noscimus enim quantum ipsi capimus. Amamus autem & quantum intuemur & quantum ultra perspicuum intuitum nostrum varicinamur bonitatis diuinæ reliquum superesse. Vbi diuinæ infinitatis abyssum remisse quidem & obscure prospicimus, intense tamen ardentiusque amamus similiterque gaudemus. Non est, ut aliqui opinantur, visio mensura gaudij, potest enim qui parum videt, amare multum, atque contra. Denique illud est summum animæ bonum quo anima contenta est, non est autem contenta propriè ipsa visione Dei. Visio enim quæ in anima videte suscipitur, creata res est gradibusque perfectionis finita, sicut & anima. Non est autem anima contenta vnquam creato aliquo finitoque bono. Visio igitur non est summum. Contenta verò est anima Deo viso potius quam visione Dei. Fruitio boni in sensu, non in eo consistit propriè quod bonum moueat sensum, sed in eo quod sensus in bonum illud quod oblatum est sese reflectat, conuertatur & diffundatur. Quæ quidem spiritalis conuersio diffusioque nihil est aliud quam voluptas, ut in libro de Voluptate disseruimus. Sic in separata mente ipsa, ut ita loquar, fruitio Dei non in eo propriè quod Deus se monstrat menti consistit, hic enim Dei potius quam noster actus est, sed in eo quod mens se conuertit in Deum, quod est gaudium. Neque putandum est, animam in Dei visionem sese conuertere ut quiescat in ipsa, sed in Deum visum, vult enim visionem propter visum, quod etiam ipsi tanquam forma coniungitur. Sicuti neque gustus in gustationem saporis, sed in saporem gustatum se dilatat. Gustationem enim propter gustatum cupit. Appetitus nullus rem imaginariam quærit, sed substantialem, alioquin sufficeret appetenti absentis boni memoria atque imaginatio. Visio autem Dei in nobis imaginaria res est, & ut supra dixi finita. Quocirca voluntatis actus, qui est in Deum infinitum conuersio substantialisque diffusio, rationem infinitatis magis habet quàm actus intelligendi, qui est Dei notio quædam pro mentis capacitate. Summum igitur bonum Deus est. Beatitudo autem fruitio Dei, fruimur ideo per voluntatem. Quoniam per eam amando quidem mouemur ad Deum, gaudendo verò dila-

tamur conuertimurque in Deum. Fruuntur autem varij animi variis Dei virtutibus & ideis. Quisque enim ea virtute potitur in primis quam in hac vita dilexit præ cæteris, atque est pro viribus imitatus. Toto autem Deo fruuntur omnes. Totus enim in singulis est ideis. Sed totum Deum præstantius possident qui cum in præstantiore idea conspiciunt. Quoniam verò quisque & Deo toto pro sua capacitate potitur & eo modo quo amauerat fruitur, ideo, ut Plato inquit, liuor abest à diuino choro. Cum enim omnium iucundissimum sit re amara potiri, quilibet in eo potiundo quod amauerat contentus plenusque viuit, quippè si amatores duo suarum deliciarum compotes fiant, vterque in amari sui possessione quiescet, neque curam quidem vllam habebit num alter pulchriore potiatur amato. Adde, quod quamuis illic alij aliis capaciores sint, tamen quisque ad summum suæ capacitatis exuberat, quo fit ut nihil ultra requirat. Adde, quod amatorio quodam affectu voluntati distributionique diuinæ iustitiæ quilibet illic cedit quam libentissime.

Amoueri autem à Deo beatus animus nunquam potest. Neque enim vi id fieri posse dicendum est. Nam vnde violentia inferri potest in animam ab infinita Dei potentia comprehensam? Neque sponte, cum enim voluntas non moueatur ad aliquid nisi ratione boni, postquam semel hæserit ei in quo tota est boni ratio, idque cognoscit, nunquam inde mouetur ad aliud. Et quia natura boni est, sibi appetendi vim applicare, sequitur ut infinitum bonum applicet absque fine. Rursum, quia voluntas eatenus quiescit in aliquo, quatenus existimatur bonum, in bono infinito fine fine quiescit. At, si anima dum in corporis motu versatur, foelicitatem eligit omnis mutationis expertem, multo magis quando fuerit super motum. Neque inferiores animæ partes diuertere inde possunt superiores, cesserunt enim illis in æternum, quando in infinitum Dei statum anima sese vertit. Denique, si separandus illinc quandoque animus est, siue id nesciat, non est beatus, quia videlicet est ignorans, siue sciat, non est beatus, quoniam timidus atque æger. Semper ergo fruitur Deo, qui semel fruitur. Lege foeliciter, Laurenti foelix, quæ Marsilius Ficinus tuus hinc breuiter magna ex parte à te inuenta de foelicitate perstrinxit, sic enim requirit Epistola, latissime verò hæc ab eo in libris de Amore & in Theologia tractantur. Vale.



*Oratio ad Deum Theologica.*

MARSILIVS FICINVS

Bernardo Oricellario viro  
præstanti, & amico  
suavi, S. D.

**N**ihil mihi suavius super homines quam cum Deo loqui. Nihil mihi suavius inter homines quam loqui tecum, quæ tecum loquor, Deus audit semper vitæ dux & amicitiae nostræ conciliator. Quæ cum Deo sapè loquor ipse nunc audies. Vtor hac oratione, Oricellari, ad Deum quotidie, ut Deus meæ fulgeat menti, & faueat voluntati. Vtere, & aliquando nisi forte quid melius habes, nemo est enim cui magis optem Deum favere quàm tibi. Audiui quandoque Laurentium Medicem nostrum nonnulla horum similia ad lyram canentem, furore quodam diuino, ut arbitror, concitum. Sed orationem iam audi. O lumen immensum te ipsum videns, in te videns omnia! ô infinite visus te ipso lucens, illuminans vniuersa! ô spiritalis ocule, quo solo & quem solum spirituales vident oculi! ô immortalis videntium vita! ô videntium omne bonum! Bonum quod totum implet amantium desiderium, desiderium nobis totius boni tu Deus solus accendis, qui solus es totum bonum. Obsecro te, lux purissima, per teipsam purga, obsecro caliginosam aciem, qua te cernam, quæ gelidum cor inflammas, quo te sitio. Amplifica angustum oculum, quo te conspiciam, quæ humilem pupillam erigis ut suspiciam. Penetras enim penetrabilia mea, ô profunditas profundorum, subleuias quoque sublimia mea, ô sublimiū sublimitas omnium. Quid intima mea penetrat? Quid mea summa tollit? Mirabiles certè mirabilis bonitatis pulchritudinisque tuæ radij, per mentes, per animas, per corpora mirabiliter vsquequaque diffusi. His igitur afficis me vel inscium, his, inquam, allicis, me cogis, vris, quantum ô species singulares! ecce iam ecce ad te propero anhelans, vnica pulchritudo. Sed claudicat, ah nimium amator hic tuus, claudicat heu miser, porrigere precor claudicanti piam, spes mea, manum. Duc oro quem allicis, excipe quem cogis, refrigera quem vris, quem angis oblecta, oblectabis iam spero tuum hunc mirificè, ô mirum gaudium, ô fons omnium gaudiorum. Scio equidem in te vno, imò te vnum esse, quicquid vsquam desideramus, si placet bonum hoc nobis, si placet bonum illud, non quia hoc videlicet aut illud, sed quia bonum profecto bonitatis cupimus in

singulis qualitatem, si salutaris liquor per singula vbique diffusus ex vnico bonitatis fonte manat, qui in seipso viget, exuberans super singula proculdubio bonitatis ipse fontem bibere exoptamus, ô fons perennis bonorum omnium, te, te sitimus vbique. Ideoque non extinguit sitim bonum hoc nobis aut illud, neque rursus hoc simul atque illud, quatenus rectè vaticinamur esse bonum ipsum super bonum hoc & bonum illud. Tu ergo Deus noster, tu solus sitim hanc extinguas ardentem, tu inquam omnis boni bonum, ne frustra tuos omnes tam diu tantum sitire compuleris, ô mens prima procul ab omni dementia, ô sapientia prima sine vlla insipientia, quam nihil lateat eorum quæ efficis sapienter. Quæ nihil contemnis eorum quæ benefica efficis voluntate, efficis autem omnia Nunquid minima quæque terrenorum curas? omnino, quæ ipsa te non curant. Nunquid curas minima, hæc & pascis & implet? Nos verò despicias solos, qui soli in terris, tuam non despiciamus maiestatem. Nos inquam solos inquietos semper errare permittis, qui soli in te solo quiescere posse confidimus? Absit à summa beneficentia ingratitudo malefica. Absit à summa veritate deceptio. Decipis nos nimirum, decipis heu miseros, si tuis aculeis faucios compellis tibi anxie suspirare quotidie, neque sanas vnquam, si iubes temporalia pro te colendo relinquere, neque pro temporalibus æterna retribuis, si sedulos hos tui cultores miseriorem in terris quam bruta vitam agere statuisti, neque vitam eis in posterum seruas beatiorum. Seruas autem nobis eam ut affiduè speramus omnes, ô mundi seruator, ô salus humani generis vnica, vnicumque refugium, quo cum omne homini bonum, sine quo nihil bonum. Nempè quæ admodum clara intelligentia tua & charitas ardens intelligentiam & voluntatem nostram ad te inspiciendum amandumque illuminat accenditque, & format in ipsam, & vnit ipsi, sic æterna vita tua, vitam nostram perpetuo in ipsa viuificat. Et quibus tributa est intelligentia immortalium, capax voluntasque mortalibus imperans, multo prius magisque vita conuenit immortalis. Cuius quadam virtute æternitati coniuncta, seiuncta à temporis passionibus tam mens æterna capit quam eius affectus temporalibus dominatur. Sic enim & quisque animi actus modo suo attingit æternitatem voluntas volendo, intelligentia intelligendo, vita viuendo. Et æternitas ipsa quæ posterioribus actibus animæ se communicat, priori iam actui qualis vita est seipsam communicant.

Facies ergo nos quandoque pater optime, tum hæreditario iure tum munere, tuz beatitudinis compotes. Fac oramus participes insuper in præsentia, fac & istud, si placet, fac oramus. quod si nondum placet istud quia nondum meremur, præsta saltem ne aut fallacibus mundi huius irretiamur illecebris aut minis & icibus succumbamus. Miserere nostri pater indulgentissime, filiorum miserere tuorum, foue tuos, & recrea quos creasti, ex te enim solo nati sumus, quando tu solus intellectum affectumque nostrum integra veritate tua & bonitate potes implere. Ergo filiorum miserere tuorum procul à cœlesti patria in hac silua plena miseriis exulantium. Miserere tuorum quæsumus, tibi passim diebus & noctibus tanquam patri & patriæ suspirantiū, vbi patria, ibi quies, ibi verum bonum, vbi exilium ibi inquietudo, ibi falsum bonum, ibi verum malum. Nos vero tunc solum in vita parumper & à malis semoti viuere, & boni aliquid veri quietisque degustare nobis ipsi videmur, cum tibi parumper vel mentis intentione vel affectu pietatis hæremus. Abige igitur à nobis, pater alme, longè quicquid nos à te longe seiungit, diffidentiam, desperationem, tepiditatem. Da rursus quæ tibi nos iungant, alme pater, fidem veram, spem firmam, ardentissimam charitatem. Ne forte à te se gregati, vita vitarum, lumine luminum, atque nobis ipsi relictī, statim in exteriores tenebras tanquam mortui delabamur. Sed ut tibi pie viuamus quoad fieri potest, & qui sedulo tibi vixerimus, te quoque ipso viuamus semper & luceamus, fulgeamus simul atque flagremus, ardeamus simul & oblectemur, gaudeamus fœliciter absque fine desiderio nostrorum penitus infinito.

Infinitam pulchritudinem tuam infinite amemus sine anxietate. Infinito rursus bono in æternum sine vlla satietate fruamur.

*Quod soli virtuti Deoque confidendum  
& seruiendum.*

MARSILIVS FICINVS  
Francisco Saluiato, S. D.

**S**I quis diuturni silentij mei causam fuisse putat obliuionem, errat, ego enim tantum tibi debere fateor, ut non prius tuiquam mei obliuisci possim. Sciebam equidem non decere minima quæque scribere ad virum multis negotiis occupatum: optatam igitur aliquid in rebus tuis ma-

gnum, idque indies expectabam, cuius causa congratulatorias ad te literas scriberem.

Nondum quicquam voto meo & merito tuo dignum video contigisse. Confide Saluiate Deo, scio te non esse ad parua vel mediocritia natum. Bono igitur &, ut soles, magno animo esto. Iam enim magna consequutus eris, si magno animo fueris. Omnino autem piorum spem Deus clementissimus non frustratur. Obitum vero Petri Cardinalis nostri quid deplem? Nos quidem immortalis Deus non deseret, & si mortalis homo deseruit. Petrus autem iunior in prosperitate decessit, ut opinor, ne fortè obiret in senectute miserior. Prorogatio vitæ & si interdum morum emendatio est, sæpe tamen præteritæ prosperitatis abrogatio vel derogatio. Multum Saluiate vixit, quisquis id quod vixit multum apud homines, meritis est plurimum apud Deum. Qui nondum satis ingenio & virtute profecit, quamuis centum impleuerit annos, nondum satis vixit, denique, ut paucis absoluam, nemo diu fœliciterque viuit, nisi qui beatitudini viuit æternæ. Vale mi Francisce, semper illius memor, quod sæpe iam te Deus admonuit, neque esse fortunæ, vel homini confidendum, neque seruiendum esse nisi illi qui nulli seruit, qui neque fallere vult vnquam, neque falli potest, cui deest nihil, qui nihil deesse suis vnquam patitur, iterum vale. Ioannes Caualcantes noster se tibi commendat.

*Qualis debeat esse imitatio.*

MARSILIVS FICINVS  
Baccio Martello, S. D.

**L**Egi orationem illam Bernardi Nuthij rhetoris ad Laurentium Medicem virum doctum atque magnanimum. Tullium iam pridem noster Nuthius ebibisse & concoxisse videtur. In ea oratione mira quadam vicissitudo perspicitur, nam illic & Nuthius Tullianus est & Tullius Nuthianus apparet. Talis quædam inter Homerum atque Maronem, rursus inter Aristotelem & Theophrastum, fuisse videtur vicissitudo. Perseuera igitur in Bernardi nostri familiaritate, hic enim clarus est rhetor, adde & optimus, quæ enim persuadere docet, ipse sibi iam persuasit. Vale.

*Sæpe magna est laus qua brevis est.*

MARSILIVS FICINVS

Bartholomæo Scalæ Ora-  
tori, S. D.

**L**Egi quæstiones Christophori Londi-  
ni ad Camaluulêses. In iis libris Maro-  
nis adyta penetrat, Ciceronis Dialogos  
imitatur ad vnguem, felicem virum fabri-  
cat felicissime. Lege illos & tu, scio mecum  
senties. Vale Sed quare in laudando Chri-  
stophoro tam brevis es Marfili? Quia ha-  
bet nescio quid quod exprimere nequeam.  
Iterum Vale.

*Qui fauet bonis, sibi fauet.*

MARSILIVS FICINVS

Laurentio Medici viro magnani-  
mo, S. D.

**P**Agotibi, si Paci docto & bono sacer-  
doti fauebis, fauebis & mihi. Cum  
enim viri boni & amici agitur res, res agi-  
tur nostra. Vale.

*Qua sit petitio & commendatio iusta.*

MARSILIVS FICINVS

Laurentio Medici viro Magnani-  
mo, S. D.

**M**ulti à te digniora se petunt, Grego-  
rius Epiphanius longe dignior est  
his quæ postulat. Et si nobis amicissimus  
est, tamen propter eius virtutem magis  
quam propter amicitiam eum tibi com-  
mendo. Nam propter virtutem est ami-  
cus. Vale.

*Institutio brevis Episcopi.*

MARSILIVS FICINVS

Ioanni Nicholino Archiepiscopo  
Amalphienfi, S. D.

**M**Emini cum adhuc puer esses, atque  
vnà cum Cherubino Quarqualio-  
ne doctissimo præceptore tuo nostram A-  
cademiam salutare, consuluisse me tibi  
vt cum primum ætas pateretur, diuinas li-  
teras legesque capereres, deinde sacris  
initiareris. Idemque patrem tuum Octo-  
nem iuriconsultum equitemque præcla-  
rum sæpe numero rogauisse. Quoniam &  
astronomia te magnum in religione vi-  
rum, & physionomia legitimum tum lite-  
ris tum moribus sacerdotem mihi fore  
monstrabat. Ecce nunc, quod rarissi-

mum est, in vigesimo quinto ætatis tuæ an-  
no Archiepiscopus Amalphienfis regio  
fauore felicibusque auspiciis es constitu-  
tus. Quamobrem & tibi vero Archiepis-  
copo & mihi quasi vati cuidam, optime mi  
Ioannes, summopere gratulor, non tam  
quod Astronomiæ quam quod Physiono-  
miæ iudicium impleuisti, ex illo quidem  
ad Dei Vicarium, ex hoc autem ad Deum  
ipsum potes accedere. Reliquum est vt  
quod in tam tenera ætate, adiuuante Deo  
tam prospere es consecutus, feliciter exe-  
quaris. Quod quidem ita demum efficies, si  
semper meminêris te hominem esse, & quæ  
sine Deo adipisci non potuisti, non posse  
absque Deo vel recte gubernare vel felici-  
ter possidere, si te illi pia mente optimis-  
que operibus sedulo commendaueris, si  
in omnibus consulueris seniores viros at-  
que probatos, si non quod libet, sed quod  
licet, non quod irrationalis affectus blan-  
de mentitur, sed quod diligentissima ratio  
metitur, elegeris. Si memineris pastorem  
verum tam egregium virtute esse oportere,  
vt subiecto gregi virtutum omnium sit  
exemplar. Alioquin pastoris vitia gregem  
inficiunt, & vitia gregis in pastoris infamiam  
perniciemque redundant. Verum  
quid opus est, vt Marfilius instruat Ar-  
chiepiscopum? Satis hunc, vt literæ mo-  
resque declarant, Pauli Apostoli Epistolæ  
instruxerunt. Vale felix.

*Laus Philosophiæ oratoria, moralis, diallec-  
tica, Theologica.*

MARSILIVS FICINVS

Bernardo Bembo iuriconsulto equi-  
ti, doctrina & authoritate, præ-  
claro Venetorum ora-  
tori, S. D.

**Q**uæris quam ob causam cum res mul-  
tas passim artesque lauda uerim, Phi-  
losofiam tamen cuius studio semper in-  
cumbo, nusquam sim laudibus profecutus.  
Item forte superioribus diebus Ioannes  
Caualcantes meus Achates interrogauit.  
Ego autem respondeo, primum inuenta  
hominum ab hominibus posse quando-  
que pro dignitate laudari, Philosophiam  
verò inuentum Dei longè admodum hu-  
manam eloquentiam superare. Deinde in  
singulis rebus & artibus celebrâdis me Phi-  
losofiam rerum omnium inuentricem ar-  
tiumque magistratam celebrauiffe. Siquid  
nô nisi eius virib. orationibusq; singula di-  
gne laudamus, & quântū quæq; facultas Phi-  
losofiæ virtutis & dignitatis est particeps.

tantum laude dignam esse censemus. Sed quoniam nostra hæc mater & nutrix propriam à nobis aliquando declamationem iure optimo videtur exigere, hinc iam, si placet, exordiamur.

• *Laus Philosophiæ oratoriae.*

**O** Vitæ Philosophia dux! virtutis indagatrix expultrixque vitiorum! Quid non modo nos, sed omnino hominum vita sine te esse potuisset? Tu vrbes peperisti, tu dissipatos homines in societatem vitæ conuocasti, tu eos inter se primo domiciliis, deinde coniugiis, tum literarum & vocum communione iunxisti, tu inuentrix legum, tu magistra morum, & disciplinæ fuisti. At quonam insolens prætergressus sum? oratoriam modo Tullianamque cantilenam nescio quo modo incæptabam. Suavis nimirum huiusmodi melodia. Quoniam verò Philosophiam quæ tam cantus cuiusque quam rei canendæ regula est, non aliter quam Philosophicè cantare debemus, ludum hunc ab alio initio repetamus.

*Laus Philosophiæ moralis.*

**S**I Philosophia veritatis sapientiæque amor ac studium ab omnibus definitur. Veritas autem & sapientia ipsa solus est Deus, sequitur ut neque legitima Philosophia quicquam aliud quam vera religio, neque aliud legitima religio quam vera Philosophia verborum proprietas partim à rerum, partim à notionum proprietate deducitur, quod Plato, Aristoteles, Varro, Aurelius Augustinus subtilissimè disputant, certè Philosophia rerum indagatrix inuentrixque notionem, Grammaticam recte loquendi & scribendi regulam peperit. Si animorum naturam, operationum vim, operum formam, locorum dispositionem, temporum opportunitatem, Philosophia vel sola vel maximè omnium nouit, hæc nimirum Oratores docuit quid, quæ ratione, & cui, & quando persuaderent. Poëtas quoque quo pacto quæque describerent, mouerent affectus, animos delectarent, ex iis etiam sequitur ut neque Historici sine huius auxilio dignitatem suam seruare potuerint. Hæc animam ciuitatibus tradidit, quando ad cœlestium diuinarumque legum similitudinem terrenas humanasque leges excogitauit. Hæc corpus peperit ciuitatis & auxit, quando agriculturam, architecturam, medicinam, peritiam militarem, cæterasque omnino quæ vel ad victum, vel ornatum, vel defensionem

pertinent facultates exhibuit. Hæc denique miseriam à mortalibus præ cæteris amouet, felicitatē vero largitur. Quandoquidē bona discernit à malis. Et quo pacto mala vel caute deuitare ne obſint, vel fortiter ferre ut minus obſint valeamus, ostendit. Monſtrat præterea quomodo bona facilius conſequamur, atque etiam qua ratione bonis tum à natura fortunaue datis, tum per industriam acquiſitis, recte utamur ut proſint. Volebam hic optime mi Bernarde iam Epiſtolæ finem imponere, ne in præſentia ſim prolixior quam conſueuerim. Scis enim ipſe quantum nobis prolixitas, præterquam in Platone noſtro cœleſtis eloquentiæ fonte, diſpliceat. Sed reſclamat ecce nimium diua matrona quam præ cæteris veneramur. Ergo, ſi placet, quam adhuc orationem hæc à nobis poſtulet, imò vero nobis porrigat, audi.

*Laus Philosophiæ Dialecticæ & Theologicæ.*

**P**hilosophia Dialecticis instrumentis manu propria fabricatis utitur, ad verum in rerum speculatione, ad honestum in rerum vſu, ad bonum in vtriſque inueſtigandum. Vnde multa tradit ad ſpeculandum principia, multa ad agendum præcepta, inſtituta multa ad vtrumque communia, è communibus autem id mihi videt præcipuum quod adducam. Finis tanquam Dominus præſtantior eſt iis quæ tanquam miniſtra quædam referuntur ad finem. Ac ſemper quæ præſtantiora ſunt fines ſunt reliquorum. Seruiant igitur oportet ac decet externa & mortalia corpora, corp. animæ, ſeſus rationi, ratio actiua ſpeculatiue ſpeculatio Deo. Hinc efficitur ut artes omnes quæ ad externa, corp., ſenſum, actionem pertinent, ſpeculationi tanquam regi-næ cedere & obſequi debeant, & merito. Propria enim Dei eſt huiusmodi operatio. Non indiget certo vel inſtrumento vel loco, non ſeruit externis, maximè omnium continua eſt, imò perpetua. Obiectum ſuum ſempiternum & vbique præſens pro arbitrio vbique complectitur. Ac ſi vita actus quidam eſt & vbi magis actus ibi magis eſt vita, certè contemplationis actus tanquam cæterorum omnium ram dignitate quam perſeuerantia excellentiſſimus, maxima quædam eſt & eminentiſſima vita; adde omnium ſuauiſſima. Non enim, ſicuti ſenſus, impura, falſa, volantia oblectamenta ab intrinſecis rerum imaginibus mutuatur, ſed veras & ſempiternas rerum rationes naturaſque intus aſſatim poſſidens purè, verè, ſtabiliter puris, veris, ſtabilib⁹ paſcitur atq; gaudet, gaudet,

inquam, infinito penitus infinire, siquidem quod est maximum, huiusmodi vita Dei vitæ proxima in eius imaginem exactissimam transformatur. Deus igitur est humanæ contemplationis lux simul & oculus, contemplatio autem lux & oculus actionis. Et si oculus huiusmodi ociosus esse videtur, tamen absque illo male ociosa ac pessimè negotiosa & omnino obscura miseraque sunt omnia. Ad eius autem nutum singula feliciter operamur. Hanc vitam in summo rerum culmine collocatam & sine controuersia beatissimam, Philosophia sagax mortalibus tum proprio quodam oculo tum dialecticæ suæ digito monstrat. Ducit quoque ad eam, ut arbitrator gradibus præcipuè quatuor, moralibus, naturalibus Mathematicis, Metaphysicis.

Diuinus Plato coelestem & immortalem animam mori quodammodo putat, quando terrenum & mortale corpus ingreditur, reuiuiscere cum egreditur. Egredi autem quodam meditationis studio priusquam egrediatur lege naturæ, quando Philosophia humanorum medicina morborum animulam pestifero vitiorum coeno sepultam, moralibus pharmacis purgat & suscitatur. Deinde naturalibus quibusdam machinis ex infimo subleuans per omnia passim quæ ex elementis quatuor componuntur, perque ipsa quatuor elementa ad cælum usque perducit. Tum scilicet Mathematicis gradatim præstat sublimem ad summos cæli globos ascensum. Demum quod supra quam dici possit mirabile est, ultra cæli verticem ad ipsum cæli mundique totius fabrum metaphysicis alis attollit. Ibi anima, Philosophiæ munere, non modo felix euadit, verum & cū fiat, ut ita dicam, Deus, quodammodo fit ipsa felicitas. Ibi omnes mortalium res, artes, negotia cessant, sola ex omnium numero sancta restat Philosophia. Ibi nihil aliud vera beatitudo est quàm vera Philosophia, quippe cum hæc, quemadmodum à sapientibus definitur, amor sapientiæ sit. Summam verò illic beatitudinem in quodam voluntatis affectu, qui amor gaudiumque circa diuinam sapientiam est, consistere arbitramur. Quod autem Philosophiæ beneficio animus quandoque Deus quidam euadere possit, ex eo coniicimus, quod dum ea duce omnium paulatim naturas intelligentia comprehendit, & eorum formas penitus induit, voluntate insuper singulis partim fruitur, partim etiam dominatur, quodammodo efficitur omnia. Atque dum hac ratione fit cuncta, paulatim

Deus, qui fons & Dominus est cunctorum, efficitur. Profecto Deus & intra se & extra se perficit vniuersa. Mens quoque vni legitime Philosophantis, quasi Deus quidam, intra se vniuersorum veras sempiternasque concipit notiones. Sed nunquid humanam mentem extra se singula facere posse dicemus? Ut omittam quod ingenium philosophicum occulta Dei omnipotentis opera, cogitatione, verbis & litteris manifesta, instrumentis variisque materiis examissimè imitatur & exprimit. Vnum hoc animaduertendum in primis existimo, quod artificis solertis opus artificiosissime constructum non potest quilibet qua ratione quouè modo sit constructum discernere, sed solum qui penè eodem pollet artis ingenio. Nemo enim discerneret quo pacto Archimedes ille Philosophus sphaeras constituit æneas eisque motus motibus coelestibus similes tradidit, nisi simili etiam ingenio præditus. Et qui propter ingenij similitudinem discernit, is certe posset easdem constituere postquam agnouit, modo vel instrumentum vel materia non deesset. Cum Ergo Philosophus sphaerarum coelestium ordinem, vnde moueantur, quo progrediantur, & quibus mensuris, quidue pariant, viderit, quis neget, cum esse ingenio penè eodem quo author ille cælorum? Ac posse ipsum quodammodo cælos & quæ in eis sunt facere, si instrumenta nactus fuerit materiamque coelestem. Postquam facit eos nunc, licet ex alia materia, tamen persimiles ordine. O mirabilis nimium architecti coelestis intelligentia, o æterna sapientia solo summi Iouis capite nata, o infinita rerum veritas atque bonitas, sola totius mundi regina, o veridicum & benignum intelligentiæ lumen, o salutaris voluntatis ardor, o beneficium nostri cordis incendium, illumina nos, illumina usque adeo & accende precamur, ut lucis tuæ, hoc est veritatis sapientiæ que amore penitus ardeamus. Hoc enim solum est, proh Deus omnipotens, hoc solum est verissime sapere, solum beatissime cum Deo Deumque viuere. Quicumque procul radiis tuis aberrant cum nihil vnquam sincere discernant, fallacibus rerum umbris passim decepti atque perterriti tanquam horrendis quibusdam insomniis sub perpetua nocte miserabiliter vbique vexantur. Quicumque tecum sedulo viuunt, cum soli res veras, æternas, immensas, sub radiis tuis perspiciant, diligant, amplectantur, quicquid tempore locoue clauditur minimum quiddam umbræ somnium existimant.



Quo nō ut terrenarum rerum vel cupiditate vel metu ē summa cōlestis felicitatis arce deturbari non possint. Satis iam mihi er-  
narde, quantum Epistola patitur à Mar-  
silio tuo declamatum esse censeo. Vale er-  
go feliciter patrone Philosophorum. At-  
que ut hactenus fecisti in beatis sanctæ  
Philosophiæ vlnis continue viue. Viue e-  
tiam precor Ioannis Caualcantis Mar-  
siliiani cordis assidue memor.

*Gratia Iubilei.*

Franciscus Cardinalis Senensis Marsilio  
Ficino Florentino Platonico Phi-  
losopho, S. D.

**M**arsili charissime, salue. Tui memo-  
res & salutis perpetuæ tuæ tuorum-  
que cupidi, impetrauimus à summo Pon-  
tifice gratiam Iubilei pro te tuisque anno-  
sis parentibus. Da igitur laudem Deo, &  
cum tuis senibus incomparabilia diuinæ  
gratiæ munera tota mente capeffite. Et  
pro nobis orate. Vale optime nostri me-  
mor. Romæ die IV. Decembr. M. cccc.  
lxxv.

*Gratiarum actio.*

**MARSILIVS FICINVS**  
Florentinus Francisco Cardinali Se-  
nensi, pro immortal munere im-  
mortalem Salutem dicit.

**C**um felicem Epistolam tuam qua Iu-  
bilei gratiam nobis à Pontifice im-  
petratam significas, ego vnà parentesque  
mei legeremus, non minori gaudio affecti  
sumus, quam qui beatissimam vocem il-  
lam audituri sunt: Venite benedicti patris  
mei. Igitur pater repente præ cæteris ex-  
clamauit: Nunc dimittis seruam tuam Do-  
mine, secundum verbum tuum in pace.  
Tu autem quam magnificus donator es,  
tām iustus, tamque prudens videris ex-  
actor, æterna donas, non temporalia, non  
temporalia à nobis exigis, sed æterna.  
Nempe mandas ut pro tua salute Deum  
oremus, iubes certe iustissime, debemus  
enim etiam multo magis quam iubeas. Iu-  
bes & prudentissime, prius enim quam ut  
oremus mandares, operam dedisti ne inu-  
tiliter oraremus, efficiemus ergo quod im-  
peras, venerande pater, quamdiu viue-  
mus. Et proculdubio ita libenter singulare  
diuinumque donum & ipse largitus es, &  
nos accepimus. Tu vero scito nos existi-  
mare palamque fateri, cui vitam debemus  
æternam, multo magis temporalem vitam  
temporaliaque cuncta debere. Vale fe-

lix in authore felicitatis Deo.

*Ociofa vita utilitas.*

**MARSILIVS FICINVS**  
Andræ Cambino arcis  
custodi, S. D.

**C**um in foro vnà cum præclaro viro  
Francisco Casato nostro deambulā-  
rem, reddita mihi est elegans Epistola tua,  
qua significas te iam in arcis istius custodia  
ociofam vitam instituisse, atque in eo vi-  
tæ statu cætera quidem tibi adesse ad vō-  
tum, sola verò diuina deesse, idcirco rogas  
ut religionem nostram Francisco Berthig-  
herij filio literis moribusque ornato de-  
mus ad te mittendum. Primum quidem  
probo quod ais in arcis culmine te ocium  
reperisse, nempe in summa serenæ mentis  
specula solum Elisea illa felixque tranquil-  
litas reperitur. Infima sensuum vallis vñ-  
dique Cherontis, Stygis, Cocyti, Phlege-  
tontis, fluctibus agitur.

Quod autem subiungis tibi in eiusmodi  
ocio humana affatim suppeditari diuinā  
nequaquam, hoc equidem non mirari  
non possum. Nam cætera, ut scis, cum &  
extra nos & alicubi solum posita sint, mō-  
tu, negociis, labore quæruntur, diuina ve-  
rò cum & intra nos sint & vbique, quiete,  
ocio, tranquillitate comprehenduntur.  
quamobrem si re vera ociosus es, ut ais;  
nihil minus habes quam humana, quæ ni-  
mium negociosa sunt omnia, nihil rursus  
magis habes quam diuina, quorum im-  
mensa lux vbique lucens toties refulget  
in perspicuum perspicacemque mentis o-  
culum, quoties ad illam rite conuertit.  
Conuertitur autem ad illam suapte natu-  
ra tanquam diuinus cum primum ab ea  
humanorum negociorum perturbationib.  
non auertitur. Forte verò ad Solem con-  
uerti diuinum nihil aliud est quam non a-  
uerti. Quid ergo religionem nostram quæ-  
ris, charissime compater? Satis iam reli-  
giosus es, ut arbitror, si per ocium solutus  
ab infimorum curis summorum tranquil-  
litati per naturam es religatus.

Sed ecce mihi nunc inter scribendum  
succurrit quid meus compater cupiat.  
Quam ob causam formosi homines magis  
admodum quam deformes speculis dele-  
ctentur nullus ignorat. Igitur Cambinus  
noster, utpote qui iam abunde religiosus  
enaserit, librum nostrum diuina tractan-  
tem quasi speculum appetit in quo religio-  
nem suam tanquam speciem propriam  
speculetur. Mittam hoc meum cum pri-

num potero speculum. Imò verò, ut re-  
ctius nominem, pupillam hanc meam in te  
dirigam, in qua aspiciens te simul ac clare  
discernas. Qui enim corde viuunt vno, pu-  
pilla quoque vident vna, in vna etiam pu-  
pilla videntur. Sed ne multo longior in  
præsentia sim quam soleam, Vale. At vi-  
deo te utpote Marfilij amantissimum ut  
melius valeas nolle tam cito valere. An de-  
sideras Epistolam sicuti solent qui longè  
amant paulo insuper longiorem? Ergo ac-  
cipe vnde valeas melius à communi no-  
strum amico salutem. Paulus Saxia vir do-  
ctus saluere te iubet. Iam igitur bene Vale.

*De perseverantia.*

MARSILIVS FICINVS

Francisco Soderino, S. D.

**D**ic age, suauissime mi Soderine, quid  
scribam? An latissimè ingenium tuū  
& mores doctrinamque laudabo? Nequa-  
quam, nam in re omnibus manifesta nihil  
opus est testibus. Antè forte ad pretiosissi-  
ma ciuiliū legum studia vehementius ad-  
hortabor? Neque id quidem, qui enim  
vltro properantem stimulat, non præcipit,  
ut arbitror, sed præcipitat. Ergo non ut  
celerius curras vrgebo, sed potius preca-  
bor ut pergas. Sane non in carceribus cur-  
rentium præmium, sed in calce locatur.  
Cursum aggredi cuiuslibet est vel igna-  
uissimi, peruenire vero per paucorum. In  
sementis principio spinæ saxaque minan-  
tur, in medio blandissimi flores arident,  
in fine fructus suauissimi colliguntur. Non  
qui ferit, sed qui segetem colit & mētit, fœ-  
lix est agricola nuncupandus. Soderinum  
vero nostrum agricolam breui felicem fu-  
turum existimo. Durus huic sementis labor  
iam diu præterit & asperior hyems, ver iā-  
pridem floridum agitur, in diem fructifera  
aestas aduentat. Cura igitur tuam valetu-  
dinem diligenter, ut dulcibus agriculturæ  
tuz fructibus vesci suauissime valeas. Vale.  
At cur ad eum, quem tam multum amo, in  
præsentia scribo tam pauca? quia etiā dum  
videmur absentes pro mutuo inter nos a-  
more plurima inuicem die noctuque con-  
fabulamur. Præterea Hieronymus Ama-  
tius tuus, & quia tuus idcirco meus, com-  
munis nostræ beneuolentiæ nodus, qui ad  
Pisanum gymnasium proficiscitur, coram  
multa narrabit. Iterum Vale.

*Solus diuinus medicus curare morbos  
animi potest.*

MARSILIVS FICINVS

Francisco Cardinali Senensi, S. D.

**N**Vper Venerande pater ob egregij  
cuiusdam amici iacturam graui

moerore premebar, neque solari moerē-  
tem poterat cithara caliope sua, sæpe mi-  
hi aliàs lenimen dulce laborum. Minerva  
etiam me, nescio quomodo, destituerat.  
Nisi enim parumper indomitum clypeum  
amouisset, nunquam aut rigidi Saturniaut  
sæui Martis tela miserum vulnerassent.  
Solutus autem restabat Phoebus, id est, diui-  
nus medicus, qui curare posse morbum a-  
nimi videretur. Quorsum hæc? Nempe tu  
meam hanc iniquam sortem diuinans, ve-  
nerande pater, aliter enim scire non po-  
teras, opportunè admodum misisti ad mar-  
filium tuum Epistolam amoris gratiæque  
plenissimam, qua gratias tibi agi ob accep-  
ta summa abs te beneficia prohibebas. Et,  
ut verius loquar, non Epistolam, imò salu-  
berrimum diuinumque pharmacum por-  
rexisti, mannam, nectar, ambrosiam. Qua  
quidem siue medicina, siue potius alimo-  
nia recreatus animus reuixit, respirauit,  
resipuit & conualuit. Ergo posthac tu mihi  
Phoebus eris, mea te semper cithara can-  
net, singularem tranquillitatis animi au-  
thorem. Quam Democritij Philosophi tan-  
ti fecerunt, ut in ea sola tam diuinā quam  
humanā beatitudinem collocarent. At-  
que hæc quidem tranquillitas in his qui  
magna gerunt ideo minima esse solet, quia  
& illi minimi sunt in magnis, Phoebum ve-  
ro meum tranquillitatis portum & magna  
decent & maxima manent, quoniam in  
magnis est maximus.

*Vicissitudo amoris vnde nascitur.*

MARSILIVS FICINVS

Amerigo Corsino, S. D.

**P**rouerbum, Corsine, illud, (si vis ama-  
ri ama) vndenam maximè vim suam  
accepisse putamus? Si ab amore ipso ratio-  
nem huius prouerbij sciscitabimur, forsi-  
tam respondebit, se vsque adeò liberum  
pretiosumque esse, ut neque velit neque  
valeat alio vlllo emi vendiue pretio nisi se  
ipso. Si autem virum quendam reuera a-  
mantem amicumque interrogemus, ita  
respondebit, ut arbitror. Quisquis vehe-  
menter amat se ipse sibi aufert quodam-  
modo deditque amato. Hunc ergo ama-  
tus modo sanæ mentis sit, tanquam rem  
suam curat. Charissima enim sua cuique ef-  
se debent, scit etiam, ut par pari referatur,  
hominem deberi pro homine, pro volun-  
tate, scilicet voluntatem. Accedit quod  
qui amat, figuram eius quem amat suoscul-  
pit in animo, fit itaque amantis animus  
tanquam speculum quoddam in quo ama-

reducet imago. Idcirco cum in amante se amatus agnoscat, amare illum compellitur. Quod si à natura quæramus illius pro-  
uerbij veritatem, sic nos fortè docebit: A-  
morem semper procreat similitudo. Simi-  
litudinem autem naturam quædam est in pluri-  
bus eadem, nam si hic illi similis est, ille  
quoque huic est necessariò similis. Eadem  
ergo similitudo quæ hunc ut illum amet  
compellit, illum quoque ad hunc amandū  
adducit. Similis enim aut in geminis fidi-  
bus aut duabus citharis temperatio efficit,  
quemadmodum nos quotidie experimur,  
ut quotiens altera pulsatur, totiens mo-  
ueatur & altera. Si præceptores huiusmodi  
aut non satisfaciunt, aut minus forte de-  
clarant, conferamus iam nos ad Philoso-  
phos, mi Corine, & quam potissimum  
mutui huius affectus causam afferat audia-  
mus. Mutuam inter illòs benivolentiam  
esse Astrologi arbitrantur, in quorum ge-  
nesi luminum, id est, Solis & Lunæ com-  
mutatio fuerit, videlicet si me nascente Sol  
in Ariete, Luna in Sagittario: te nascente  
Sol in Sagittario, Luna in Ariete. Aut qui-  
bus signum idem vel saltem simile, idemq;  
planeta similisue ascenderit, aut benigni  
planetæ similiter angulum Orientis aspe-  
xerint, aut Venus in eadem natiuitatis  
domo eodemque gradu fuerit constituta.  
Addunt Platonici, quorum vitam dæmon  
idem aut certè similis ducat. Physici verò  
mortalesque, complexionis, nutritionis,  
eruditionis, consuetudinis, consilij simi-  
litudinem, similis affectus causam esse vo-  
lunt. Denique ubi causæ plures concurrunt,  
ibi mutua benevolentia vehementior re-  
peritur, ubi omnes, illic Pythiæ, Dæmo-  
nisque, Piladis & Orestis, resurgit affectus.  
Quid plura? Huiusmodi ratio, Amerige,  
Ioannem Caualcantem Marsiliumque Fi-  
cinum ià diu diuino quodam amore con-  
iunxit, ratio eadem Amerigum quoque fe-  
liciter iam nobis adiungit. Quid de Ber-  
nardo Bembo Veneto dicam? Hunc no-  
bis cum non ratio quædā eiusmodi solum,  
verū etiam providentia diuina coniunxit.

*Vera poësis à Deo ad Deum.*

MARSILIVS FICINVS

Alexandro Braccio Musarum

Sacerdoti, S. D.

PLato noster in Dialogo qui Ion inscri-  
bitur, carmina illa solum diuina, musi-  
ca musarumque furore infusa poëtis existi-  
mat, quæ quando Musica humana cantan-  
tur, & cantorem ipsum & audientes quo-  
dammodo concitant in furorem. Alexan-

dri verò carmina heri ad Marsilium scrip-  
ta esse talia mox cithara mea pluribus au-  
dientibus comprobauit, etiam paulò post  
Ioannes Baptista Boninsegenius familia-  
ris noster vir apprimè Latinis. Græcisque  
literis eruditus. Quamobrem non tam dili-  
gentiæ tuæ, quæ tamen est non mediocris,  
quam musarum aspirationi tuam hanc de-  
bes Bracci poësim. Ergo post hac mitte  
precor amice mortales, & quandoquidem  
adspirante Deo canis, cane Deum. Quod  
quidem non Moses solum & Dauid, cæte-  
rique Hebræorum Prophetæ, verū etiam  
Zoroaster, Linus, Orpheus, Musæus, Mo-  
sæus, Empedocles, Parmenides, Heracli-  
tus, Xenophanes, manifeste nos religiosi  
carminibus suis admonuerunt. Admonue-  
re insuper Pythagoras atque Plato. Qui  
Homerum Hesiodumque, quod partim  
tanquam ingrati diuina ad homines, par-  
tim tanquam impij huinana ad Deos tran-  
stulerint, ex hominum cœtu ad inferos ex-  
pulerunt. Proinde si, quod absit, fortè  
quasi Deo ingratus solos cantabis homi-  
nes, ingratos, ut plurimum, motusque can-  
tabis, quoties verò Deum canes, ( quod  
potius te spero facturum, ) toties tuum  
cantum suauiter & feliciter comitabitur  
Echo.

*Sua mittenda sunt ad nos.*

MARSILIVS FICINVS

Petro Soderino literis & moribus or-  
natissimo, S. D.

VOlui sæpe Soderine dulcissime ad il-  
los qui Epistolas meas à me peti-  
sent, nostrum ipsum archetypum mittere,  
sed hæc meus mihi liber summa cum que-  
rimonia statim obiciebat: Noli eo me  
mittere precor ubi ipse non es mi pater.  
Cum vero ad Petrum modo proficisci iu-  
berem, nihil prorsus obiecit, utpote qui, ut  
videtur, intelligebat quando, ad Soderi-  
num proficisceretur se à Marsilio non dis-  
cessurum. Ito ergo scilicet ad hunc, ito mi  
liber, sine quo ego nusquam eq. At postcis  
nunc non nihil viatici video, ego autem  
non reperio in præsentia viaticum precio-  
sius, quam Paulum Anthonium charissi-  
mum Petri meique fratrem. Huius igitur  
nomen dulce viaticum ferto tecum. Et  
quotiens hic te forte in laribus suis aspe-  
xerit, totiens Marsilij nomine saluere  
iubeto.

*Libri primi finis.*

## MARSILIVS FICINVS

FLORENTINVS,

FEDERICO VRBINATI SEMPER IN-

*uicto, & apprime duci sapienti atque clementi,*

P R O O E M I V M.



*U*m Epistolas meas undique collectas in libros distinguerem, placuit eas qua ad Theologiam praeter ceteris Platoniam pertinerent, quasi ob materiam ipsam diuinam, ab aliis Epistolis velut humanis secernere in unumque redigere. Cumque vellem corpori huic quasi ob

materiam diuino, caput reuera diuinum apponere, Federicum Vrbinatem Ducem praeter ceteris libenter adscripsi, cuius diuina virtus, ut Platonice loquar, ipsam non solum absoluti viri, sed etiam consummati principis adeo impleuit ideam, ut si hunc Diogenes ille perspexerit, qui ideas excogitari posse negauit, iam non modo eas intelligi posse animo, sed etiam cerni oculis, proculdubio sit concessurus.

## MARSILII FICINI

FLORENTINI

EPISTOLARVM

LIBER II.

*Quaestiones quinque de mente. Prima, Vtrum motus eius in finem aliquem certum dirigatur nec ne? Secunda, Vtrum motionis eius finis sit motus an status? Tertia, Vtrum sit particulare quiddam an vniuersum? Quarta, Vtrum optatum finem suum quandoque consequi valeat? Quinta, Vtrum postquam adeptus est finem, aliquando inde discedat?*

MARSILIVS FICINVS  
Conphilosophis suis, S. D.



*S*apientia summo Iouis omnium creatoris capite nata, Philosophis suis amatoribus praecipit, ut si modo re amata potiri quandoque desiderent, summa semper capita rerum potius quam

vestigia infima petant. Pallas enim Diuina progenies quae caelo demittitur alto, alias ipsa colit quas & condidit arces. Monstrat praeterea non posse nos ad summa rerum capita peruenire, nisi prius in caput animae mentem, posthabitis inferioribus animae partibus, ascendamus. Pollicetur denique si nos ipsos in forcundissimum caput animae collegerimus ibi proculdubio ipso capite, hoc est mente, men-

tem procreaturos. Mentem inquam, & Mineræ ipsius comitem, & summi Iouis alumnæ. Ego igitur optimi conphilosophi mei qualem nuper in monte Coelano vna quadam lucubratione mentem mente creauerim, nunc in medium vobis adducam, ut ipsi qui longè foccundiores estis quam Marsilius, æmulatione quadam, ut ita dixerim, prouocati prolem aliquando Iouis Palladisque conspectu digniorem parturiatis.

*Naturalis cuiusque speciei motus, quia certo a-  
gitur ordine, ideo à certo quodam princi-  
pio ad certum finem dirigi & pro-  
uenire cognoscitur.*

**O**Mnis naturalis speciei cuiusque motus certa quadam ratione procedit. Nam & aliter alia mouetur species, & species quælibet eundem seruat semper suo in motu tenorem, ut ab hoc in istud, & ab isto deinceps in illud, modo quodā congruentissimo progrediatur sēper atque regrediatur. Querimus vnde præcipue ordinē eiusmodi motus accipiat? Duo sunt apud Philosophos motus termini, à quo videlicet effluit, & in quem profluit. Ab his terminis suū ordinem adipiscitur. Quamobrem non ab incerto & inordinato in incertum & ordinis expers oberrat, sed à certa quadam & ordinata natura in certum quiddam ordinatumque dirigitur, quod cum natura illam conueniat vnde motus incepit. Vnū quodque enim ad suum recurrit potius quam alienum, alioquin & dissimiles rerum species nonnunquam similiter, & similes sæpe dissimiliter mouerentur, ac eadem species aliàs atque aliàs modo diuerso, & species diuersæ sæpe modo eodem agitarentur. Adde præterea quod auferretur motionis illa successio, qua gradatim deinceps per plures congruosque gradus formasque decentes certo tempore profluit, certis temporum curriculum refluat. Adde postremo, quod non in talem quandam vel regionem, vel qualitatem, vel substantiam potius quam in quamlibet aliam quifque modus dirigeretur.

*Ordinatissimus mundi motus ad certum finem  
providentia diuina dirigitur.*

**S**I motus singuli ordine quodam mirabili transiguntur, certè vniuersus mundi ipsius motus ordinis perfectione non caret. Sicut enim ab vniuerso atque ad vniuersum sunt singuli, sic ab vniuersi ordine accipiunt ordinem, & ad vniuersi ordinem

referuntur. In hoc ipso communi totius ordine omnia quamuis diuersissima vna quadam conuenientia & ratione reducuntur in vnum. Igitur ab vno quodam ordinatore ratione plenissimo cuncta ducuntur. Siquidem ordo apprime rationabilis à summa mentis ratione & sapientia manat, in qua necessariò præscripti sunt fines singuli, ad quos dirigat singula. Præscriptus est finis etiam vniuersi communis, ad quem fines singuli perducantur.

*Quos terminos habeat motus elementorum,  
plantarum atque brutorum.*

**Q**Vos terminos habeat motus elementorum, plantarum, animaliumque brutorum non dubitamus. Elementa quidem alia grauitate quadam ad centrum mundi descendunt. Alia leuitate ad concuum spheræ superioris ascendunt. Motus quoque plantarum ex virtute nutriendi generandique profectus, in plantæ ipsius sufficiente alimento & generatione plantæ similis terminatur. Idem accidit virtuti quæ nobis ac brutis cum arboribus est communis. Brutorum animalium motus, qui propriè ad sensum attinet, à forma sensibili atque indigentia naturæ procedit per ea quæ extrinsecus sentiuntur ad explendam corporis indigentiam. Idem naturæ illi contingit, quam habemus ipsi cum animalibus quibusque communem. Omnes hæ quas modo narrauimus motiones, quoniam ad particulare quiddam tendunt, à particulari etiam vi provenire noscuntur. Atque in his, quos diximus, terminis quietem agunt sufficientem, & quantum earum natura requirit perficiuntur.

*Quæstiones quinque de mentis motu.*

**S**Vperest ut de mentis humanæ motu quæramus. Primo, Vtrum ad aliquem tendat finem nec ne? Secundo, vtrum motionis eius finis sit motus an status? Tertio, vtrum particulare quiddam hoc bonum sit vel vniuersum? Quarto, Vtrum optatum finem suum, id est summum bonum, quandoque consequi valeat? Quinto, Vtrum postquam perfectum adepta est finem, aliquando inde discedat?

*Mentis motus certum respicit finem.*

**S**I cætera non sapienti casu passim oberrant, sed ordine quodam rationabili ad quiddam maximè proprium & conuenientissimum diriguntur, quo & prorsus perficiuntur, multo magis mens quæ



res suas quotidie ad finem quendam rationabiliter ordinat, quæ aliis omnibus quotcumque prædiximus est perfectior, multo, inquam, magis naturali instinctu ordinatum finem aliquem respicit, quo & ipsa ad votum perficiatur. Præsertim, quia quemadmodum singulæ vitæ partes, id est, consulationes & electiones & facultates ad fines singulos referuntur, quælibet enim harum proprium respicit finem tanquam bonum. Sic vniuersa vita ad finem bonumque similiter vniuersum. Cum enim partes quælibet seruiant toti, sequitur ut ordo qui partibus inest inuicem sit propter earum ordinem ad ipsum totum maximè pertinentem. Ordo rursus earundem qui ad fines spectat particulares à communi quodam dependeant totius ordine qui ad communem totius finem præcipue conferat. Profectò si motor quilibet sui ipsius gratia mouet, consentaneum est mentem non ob aliam causam sua quælibet ad fines proprios ducere, nisi ut ad communem mentis finem bonumque conducant. Denique quis adeo mentis inops, ut opinetur mentem anniti tam natura quam proposito singulis diuersisque ad vnum quiddam ordinem exhibere, nisi ipsa quoque ordinem quendam haberet ad vnum? Nempe cum vltimus communisque finis vbique reliquos moueat. Est enim primum quod appetitur cuius gratia cætera appetuntur. Nimium si vltimus ipse communisque absit omnino reliqui adesse non possunt. Nisi enim absoluta totius ædificij forma præscripta sit architecto; nunquam diuersi ministri eo ordine qui ad totum ipsum conducat ad diuersa opera mouebuntur. Imò verò nullo pacto ad ministeria præfinita mittentur ab illo qui non ipse prius communem totius operis terminum habuerit præfinitum.

*Finis motionis intellectualis non est motus sed status.*

**S**I motionis intellectualis finis est ipse motus, certe mouetur ut moueatur, rursusque ut moueatur deinceps sine fine mouetur, hinc efficitur ut in ipso motu iugiter perseverans moueri non desinat, ideoque nec viuere desinat vnquam neque cognoscere. Forsitan hic ille iugis est animi motus quo semper agi & viuere animus à Platoniciis nonnullis existimatur. Puto autem mentem quandoquidem statum noscit iudicatque ipsum mutatione præstantiorem, atque naturaliter appetit illum ultra motum, in habitu quodam sta-

bili potius quam mobili conditione bonumque suum optare, & denique consequi. Huius rei indicium est, quod mens in statu proficit magis quam in motu. Rursus, quod familiaria eius obiecta sunt rerum rationes æternæ, non mobiles materiæ passionēs. Accedit quod quemadmodum vitæ virtus scilicet intelligentia & voluntas ultra rerum mobilium fines ad stabiles progreditur & æternas, sic ipsa vita ultra mutationem quamlibet temporalem certè finem bonumque suum in æternitate consequitur. Alioquin non posset animus vnquam vel intelligendo vel appetendo, terminos mobilium transgredi, nisi eos supergrèdi viuendo valeret. Denique motus semper est imperfectus tenditque ad aliud, ipsius verò finis, præsertim summi, ratio est ut neque imperfectus sit, neque ad aliud quicquam progrediatur.

*Mentis obiectum & finis est vniuersum verum atque bonum.*

**S**Ed nunquid proprium quiddam verum bonumque finis intelligentiæ voluntatisque dicitur? An vniuersum? Vniuersum certe. Quoniam intellectus amplissimam quandam eius, quod Philosophi ens verumque & bonum nominant, concipit notionem. Sub qua quicquid vel esse potest penitus comprehenditur. Hoc ipsum quid ens verumque & bonum dicitur omnia continere. Peripatetici esse putant commune humani intellectus obiectum. Quia sicut obiectum sensus sensibile fit, intellectus ipsius obiectum intelligibile dicitur. Intelligibile autem amplitudine sua omnia comprehendit. Rursus intellectus natura afficitur ad totam entis amplitudinem comprehendendam, ac in eius notionem omnia conspicit, vicissimque in omnium notionem inspicit ipsum. Præterea sub ratione veri intelligit, sub ratione boni appetit omnia. Hæc autem vtrique ad rationem entis Peripatetici referunt. Vtrum verò bonum ente latius sit, quod Platonici putant, nec ne, ad propositam questionem nihil referre videtur. Vtatur igitur in præsentia tribus his, si placet, nominibus, scilicet ente, vero, & bono tanquam idem significantibus, nam in commentariis Philébi diligentius ista discussimus. Quærendum videtur in primis vtrum intellectus quicquid sub ente concluditur perspicue possit attingere? potest utique. Diuidere enim ipsum in genera decem generalissima, rursusque genera decem in genera subalterna gradatim sub ipsis quam pluri-

ma. Deinde species quasdam ultimas sub generibus collocat subalternis. Denique speciebus singula subiicit, ut ita dixerim, absque fine. Si intellectus potest ens ipsum tanquam totum quiddam describere, atque ipsum in cuncta eius quasi membra gradatim diuidere, ea quæ tam inuicem quam ad totum diligentissime comparare, quis non videat hunc natura entis ipsius vniuersi esse capacem? Qui enim totum ipsum in sua forma videt eiusque terminos atque gradus per quos propagatur vndique prospicit, absque dubio potest singula, quæ illis terminis comprehenduntur, media comprehendere. Mitto nunc quod cum apud Platonicos super ens atque sub ente queat ipsum vnum bonumque excogitare, multo magis totam eius latitudinem vndique percurrere poterit. Certe post notionem entis, quod vocabulum sæpius iam repetimus, etiã quod ab eo diuersissimam fingi potest, idest non ens pro arbitrio cogitat. Si potest ab illo ad hoc infinite inde distans percurrere, multo magis per quælibet quæ sub illo quasi media continentur. Hinc Aristoteles inquit: Sicut materia, quæ ultimum est naturalium, omnes potest corporeas induere formas, omniaque hoc pacto corporalia fieri, sic intellectum qui, ut ita loquar, supernaturalium ultimum est supremumque naturalium, spirituales omnes rerum omnium formas accipere posse, omnesque euadere. Quemadmodum vniuersum sub ratione entis atque veri obiectum est intellectus, ita sub ratione boni est voluntatis obiectum. Quidnam intellectus inquit? Nisi cuncta in se suo modo pingendo transformare omnia in seipsum? Quid rursus voluntas annitur? Nisi omnibus omnium modo fruendo seipsam in omnia transformare? Ille ergo conatur ut vniuersum fiat quodammodo intellectus, hæc autem ut voluntas sit vniuersum Vtrumque igitur naturalis ad hoc vergit animi nixus, quemadmodum inquit in Metaphysicis Auicenna, ut animus ipse modo suo totus mundus euadat. Videmus enim quemlibet animum naturali instinctu & continuo nixu conari, ut cuncta vera intellectu cognoscat, & cunctis bonis voluntate fruatur.

*Animi origo finisque est solum infinitum verum atque bonum.*

**M**eminisse verò oportet vniuersum ipsum, quod esse dicimus animi finem, esse penitus infinitum. Finem enim cuiusque præcipuum propriumque para-

mus quod propriè res quæque summopere appetit tanquam summum cuique bonum, cuius gratiam petit agitque reliqua, in quo tandem quiescit omnino, adeò ut finem naturæ appetitusque summo iam prorsus imponat. Intellectui verò nostro conditio hæc innata est, ut rei cuiusque requirat causam, rursusque causæ causam. Ideo non cessat vnquam inquisitio intellectus, nisi eam causam reperiat, cuius nulla sit causa, sed ipsa causa causarum. Id autem solus est Deus immensus. Voluntatis quoque affectus nullo satiatur bono, quatenus putamus bonum præterea aliud superesse. Solo igitur eo satiatur bono ultra quod nihil est boni. Quid autem hoc aliud est, nisi Deus immensus? Igitur quicquid aut veri aut boni offertur quod certos habeat gradus quamuis quamplurimos, adhuc plures intellectui requiris & ulterius appetis voluntate. Vnde nusquam nisi in vero bonoque immenso potes quiescere, neque finem nisi in infinito potes facere. Cui vero res quæque in propria eius quiescat origine vnde efficitur & vbi perficitur, animus verò noster in solo infinito quiescere valeat, sequitur ut solum quod infinitum, sit propria eius origo. Vocari autem id ipsum propriè debet ipsa infinitas & æternitas, potius quam vel æternum quiddam vel infinitum. Quoniam vero effectus causæ proximus euadit causæ ipsi simillimus, consequens est ut anima infinita quodammodo virtus sit & æterna, alioquin ad finem nunquam propriè vergeret infinitum. Hinc nimirum efficitur ut nonnulli sint inter homines qui contenti sub coelo viuant opibusque temporalibus impleantur.

*Animus optatum finem bonumque suum quandoque consequi potest.*

**P**otest autem perfectum finem suum aliquando rationalis animus assequi. Si enim quæ minus in natura perfecta sūt naturalem perfectionem suam in quæsitæ finis habitu consequuntur, multo magis animus qui & perfectissimus est, & finis omnium naturalium. Si quæ finem neque aliis neque sibi ipsa præscribunt, aliquando fine congruo potiuntur, multo magis & mens, quæ finem suum aucupatur & reperit, finem rursus multis instituit, multorum præfagit, videt & omnium. Si naturalis potentia in rebus vel minimis non est inanis, certe non est inanis in animo, qui vsque adeò magnus existit, ut quanto interuallo minima quæque à maximis excendantur examullum dimetiantur. Accedit quod animus haudquaquam finem cer-

tum naturaliter sequeretur nisi posset & assequi. Qua enim alia potentia mouetur ad illum, nisi qua potest etiam peruenire? Videmus præterea illum, quando impense contendit, multum in eiusmodi motu proficere. qua vero virtute proficit, eadem quandoque perficitur. Videmus denique vehementius paulatim vehementiusque moueri, quemadmodum elementum quilibet quo naturali termino propinquat magis, eo mouetur velocius. Ergo sicuti neque elementum, ita neque mens ab alio in aliud semper præter terminum frustra progreditur, sed terminum quandoque attingit sui ipsius gratia exoptatum. Sunt autem in rebus actionibusque naturalibus & humanis principia quædam, sunt & fines. Cōtra naturam ipsam rationemque principij est, ab alio semper principio ad aliud ascendere sine principio. Contra rationem finis est à fine deinceps in finem descendere sine fine. Omnis actio à summo agente, omnis appetitio à fine summo ducit originem. Quæcunque enim propter aliud talia sunt vel talia, ad ipsum quod propter se tale existit necessario reducuntur. Igitur si vtrinque summa desunt, neque actio prorsus incipiet vlla, neque appetitus aliquis incitabitur. Denique cum motor sui ipsius gratia moueat, vbi summus est motor, summus finis pariter reperitur. Idque & in ordine rerum quolibet, verum est, & in ordine similiter vniuersi. Sed iuuat rationem de mente superiorem aliquanto latius explicare. Si quis à nobis quærat, vtrum horum perfectius sit, intellectus ne an sensus, intelligibile ne an sensibile? promitemus ei nos quod desiderat protinus ostensuros, si modo nobis prius ad hoc vnum ipse responderit. Scis ô amice, qui me rogas, esse aliquid in te ipso quod aliquam habet vtrorumque notitiam, notitiam, inquam, intellectus ipsius & sensus, rursus intelligibilis atque sensibilis. Eadem enim vis quæ hæc inuicem comparat, iam vtraque quodammodo videt. Responde igitur, nunquid vis eiusmodi sit intellectus an sensus? Responde, quæso, libenter. Vt hac ego responsione tua, mox tuæ illi interrogationi respondeam. Iam igitur te sic audio respondentem. Virtus eiusmodi non est sensus. Omnes enim continue sensibus vtimur, ac maximè & intentissimè vtimur. Si igitur sensus videre se posset & illa, vel omnes vel quamplurimi facileque & clare vim ipsam sentiendi & intelligendi atque intelligibilia sensibiliaque cognoscerent. Cum vero paucissimi sint, qui ista cognoscant omnia,

atq; ij quidem vix & non nisi diuturnæ intelligentiæ argumentatione cognoscant, certum est sensum nequaquam nosse vel se ipsum vel intellectum & intellectus obiecta. Imò verò hæc omnia constat ab intellectu cognosci. Præterea vis illa quæ de vtrisque perquirat, eadem est ac illa quæ etiam ratiocinando hæc inuenit, & ratione concludit vtrum sit inter illa perfectius? Quod autem ratiocinando quærit rationemque assignat, ratio est, non sensus. Igitur solus intellectus est qui hæc omnia nouit. Igitur & ego priori tuæ illi quæstioni iam ita respondeo. Tanto saltem perfectior intellectus est sensus, quanto vis eius latius perfectiusque propagatur agendo, sensus, vt ipse monstrabas, neque se ipsum, neque intellectum intellectusque obiecta potest agnoscere, intellectus autē vtraque noscit. accedit alius quidem perfectionis gradus. Quippe intellectus quando se atque sensum cæteraque quantum ad perfectionis attinet gradus inuicem comparat, iam summam ipsam perfectionis formam quasi ante oculos habet, ad quam vtraque confert, quod ad ipsum accedit propinquius, idem iudicat esse perfectius. Si summam perfectionis attingit formam, proculdubio ex summa quadam ad eam proportionem hanc attingit. Non solum igitur perfectior est quam sensus, sed etiam penè post perfectionem ipsam summè perfectus. Video tertium insuper perfectionis intelligentiæ gradum, nam dum quærit iudicatque se ipsam, certe reflectitur in seipsam. Quod autem tale est etiam in seipso existit & permanet, est insuper incorporeum penitus atque simplex. Denique cum ex seipso ad se ipsum motu circulari progrediatur, potest vtrique sempiternè moueri, hoc est agere semper & viuere. Mitto quod intellectus tanquam perfectior paucioribus est communis, seriusque & rarius exercetur, ac tanquam finis potest vegetationis vsum sensumque conceditur. Dat sensui regulam atque leges finemque præscribit, seipsum ad agendum pro arbitrio ducit quando ratiocinatur atque consultat. Sensus autem, vbi ratio non resistit, instinctu semper naturæ propellitur. Mitto quod ratio sæpe aliter eligit quam sensus & vsum corporis exigit, quia videlicet electionis principium non pender à corpore, alioquin finis eius semper spectaret ad corpus. Rationem certe in motu suo nequaquam subdi corporibus ex eo perspicitur quod speculando transcendit corpora, consultando se ad diuersa oppositaque extēdit, eligēdo corporis inclinationi sæpe repugnat.

Quare multominus in essentia vitæque corporibus nullis subiicitur. Quid? quod sensus procedente ætate quodammodo hebetari videtur, intellectus verò nequaquam, potest tamen ab intentione speculationis auerui, quando in curando colendoque corpore nimium occupatur. Quid? quod sensus ipsius obiectum quoties vehementius est, lædit subito sensum, atque post illius occursum non potest è vestigio sensus debiliora discernere. Sic offendit oculum splendor exuberantior, sic offendit aures strepitus vehementior. Mens verò contra, ab excellentissimo sui obiecto neque læditur, neque confunditur. Imò eo cognito inferiora simul clarius veriusque discernit. Quod quidem mentis naturam esse significat summopere spiritalem & excellentem. Quid? quod sensus solis corporeis terminatur obiectis, intellectus autem secundum intimam actionem ab omnibus emergit corporibus, utpotè qui secundum essentiam atque vitam non sit submersus. Formas corporales separat à materiæ passionibus, formas quoque illas quæ per se penitus sunt incorporeæ discernit à corporalibus, quippe qui ipse à materiæ passionibus atque à corporalis formæ conditionibus sit separatus. Præterea sensus particularibus solum obiectis est contentus. Familiaria verò intellectus obiecta rationes ipsæ rerum sunt vniuersales & sempiternæ, quas non aliter quam per præcipuam quandam ad ipsas proportionem familiariter potest attingere, ex quo apparet ipse quoque absolutus & sempiternus. Præsertim quia rationes eiusmodi per species quasdam attingit, quas ipsemet & facit & suscipit. Quas esse necessarium est à materiæ passionibus absolutas, alioquin rationes ideæque illas referre non possent. Intellectus autem ipse nisi à materiæ passionibus liber existeret, species eiusmodi neque hoc pacto facere posset, neque suscipere.

*Mens magis quam sensus optatum finem consequi potest.*

**R**atio quidem nobis propria est, non enim bestiis eam Deus infudit, alioquin dedisset eisdem sermonem tanquam rationis interpretem, manum insuper tanquam rationis ministram & instrumentum, præterea videremus in bestiis aliqua consultationis varietatisque indicia. Nunc autem videmus eas nunquam aliter facere quàm quod impulsu naturæ, ad necessitatē dumtaxat corporis impelluntur. Omnes a-

discunt, neque tempore quamvis longo in melius texendo proficiunt. Postremo apparerent in brutis certa quædam religionis inditia atque opera omnibus manifesta. Vbi enim intellectus adest, qui tanquam oculus quidam est ad lumen intelligibile constitutus, ibi quoque intelligibile lumen, qui Deus est, lucet, suspiciur, amatur & colitur. Quanto intellectus perfectior est quam sensus, tanto saltem homo perfectior est quam brutum, atque ex hoc ipso est perfectior quod habet ipse proprium, bestiis non commune. Itaque propter intelligentiam tantum perfectior iudicatur. Præsertim tum intelligentiæ munere ad infinitam perfectionem, qui Deus est, affectu, speculatione, cultuque accedat. Perfectio autem cuiusque præcipua inconuenientis finis possessione consistit. Cuius quidem consecutio tanto facilius est & plenior, quanto innata perfectio vberior. Vbi enim perfectio illa formalis quæ innascitur ab initio præualet, ibidem naturæ ordine finalis ipsa perfectio abundantius & facilius feliciusque conceditur, siquidem illa huic obsequitur, nec illius obsequio prouenit. Vnde concluditur ut multo magis faciliusque ratio quam sensus, homo quam brutum, finem congruum optatumque consequi possit.

*Immortalis animus in corpore mortali  
semper est miser.*

**E**xperimur autem in nobis bestiam nostram, id est, sensum, finem suum bonumque sapissimè consequi, quando scilicet, sufficientis obiecti sui consequutione, quantum ad ipsum pertinet, prorsus impletur, homo verò noster, id est, ratio, quando finem consequatur optatum non experimur. Nam in summis esset corporis voluptatibus, quando sensus ipse, quantum in se est, impletur omnino, ratio adhuc vehementer sollicitatur, sensumque sollicitat. Siue enim sensibus obsequi velit, semper aliquid suspicatur, noua machinatur oblectamenta, continue, nescio quid ultra requirit. Siue sensibus repugnare contendat, vitam reddit laboriosam. Utrobique igitur non solum ipsa non est foelix, verum etiam sensus ipsius foelicitatem penitus interturbat. Siue iam dormuerit sensum seque in seipsa collegerit, tunc propria impellente natura rationes rerum causasque perquirat. Vbi aut inuenit sæpè quod nollit, aut non inuenit sæpè quod vellet, aut fortè non tantum comprehendit, quantum cupit & capit. Semper certè ambigit, & vacillat, & angitur.

Cum igitur nasquam quæta sit, certè nunquam dum sic afficitur, vel ipsa sine potitur optato, vel sensum præsentem iam sine suo potiri permittit. Nihil verò irrationabilius fingi potest quàm hominē, qui per rationem est animalium, imò omnium quæ sub cælo sunt, perfectissimus; perfectissimus, inquam, quantum ad formalem perfectionem illam quæ tributa nobis est ab initio, ob eandem rationem esse omnium imperfectissimum, quantum ad finalem illam perfectionem ad quam consequendam perfectio prima tribuitur. Hic esse videtur infelicissimus ille Prometheus, qui diuina sapientia Palladis instructus, ignemque coelestem in rationem adeptus ob hoc ipsum in summo vertice montis, hoc est, in ipsa contemplationis arce, ob continuum ausu rapacissimæ morsum in inquisitionis stimulum, miserrimus omnium meritò iudicatur, donec transferatur eodem, vnde olim acceperat ignem, ut quemadmodum vno illo luminis superni radiolo nunc assidue stimuletur ad totum, sic toto deinde lumine penitus impleatur.

*Homo quàm difficile extra habitum naturalem, positus felicitatem sequitur, tam facile hanc in naturalem habitum restitutus assequitur.*

**R**ationes de facilitate felicitatis humanæ in superioribus primo nobis adductæ, veritatem ipsam naturali quodam ordine monstrare perspicuè videbantur. Vndenam igitur, quemadmodum experientia docet, tanta nobis ad beatitudinem contendentibus opponitur difficultas? Ut græde illud Syssiphi saxum per montis ardua sursum voluere videamur. Quid mirum? Summa Olympi montis fastigia petimus. Infimæ vallis habitamus abyssum. Onerosissimi corporis sarcina præmimur. Dum anhelamus in arduum sæpè tam ipso pondere quàm præruptis vndique rupibus in præceps repente relabimur. Quid, quod illinc offendicula & obstacula quamplurima derinent? Illinc pratorum quorundam blandimenta noxia demorantur. Sic igitur, heu miseris! sic extra sublimem patriam religatis in infimo nihil vsquam obicitur non valde difficile, nihil occurrit non vndique miserum. Quidnam ad ambiguitatem eiusmodi respondebimus? Illinc argumentatio facilitatem summam pollicebatur, hinc experientia summam pariter monstrat difficultatem. Tanquam denique litem sola nobis lex Mosaica diri-

met. Extra naturæ primæ ordinem possumus, præter naturæ ordinem, prohi dolor! agimus atque patimur, primus homo quam facillè primum omnino conuersus ad Deum felicitatem accipere poterat, tam facillè deinde illinc aduersus ipsam amisit facilitatem. Cuncta igitur parentis primi propago tam difficillè extra naturæ prioris ordinem posita beatitudinem recipit, quàm facillè in ordinem ipsum restituta reciperet. Quid verò dicent ad ista Philosophi? Magi quidem Zoroastrii Hostanisque sectatores simile quiddam afferent, aiunt enim ob antiquam quandam humanæ mentis infirmitatem omnia nobis infirma difficiliaque contingere. Ac si quis temperationem animæ restituerit omnia iam fore disposita. Huic quoque non dissonat illud Pythagoræorum atque Platoniorum; Animam videlicet idcirco tot in mundo sensibili malis affligi quia sensibilibus bonorum auiditate nimis illecta bona intelligibilis mundi imprudenter amisit. Peripatetici fortè dicent hominem potius quàm brutum à fine proprio aberrare, quia libero mouetur arbitrio, vnde hinc atque illinc prout variis consultando vitur coniecturis, potest præuaricari. Animal autem irrationale non ducitur à seipso, sed ab ipsa naturæ prouidentia nunquam errante ad finem sibi conuenientem, tanquam ad signum sagitta dirigitur. Error autem ille noster atque præuaricatio cum non à naturæ defectu proueniat, sed à varietate rationis & obliquitate consilii, nequaquam disperdit potentiam naturalem, sed turbat potius voluntatem. Atque sicut in elemento etiam extra locum proprium posito, vnà cum natura seruetur vis atque inclinatio ad terminum proprium naturalis, qua potest aliquando suam reperere regionem, sic in homine etiam postquam à recto tramite aberrauit, restare putant naturalem tum tramitis, tum terminum repetendi potentiam. Denique exactissima Theologorum examinatio rem omnem breuiter ita concludit. Non potest vlla ad motum aliquem inclinatio amplior esse quam motor. Cum igitur animi inclinatio præcipuè vergat ad infinitum, nimirum dependet solum ab infinito. Si enim à determinata quadam causa post Deum animæ motrice quam proxime proueniret, ad finem quoque dumtaxat vergeret terminatum. Siquidem mouendi virtus quamuis in infinito principio sit infinita, tamen in sequente causa, quæ determinata est, terminatur. Ac motus mouentis proximi potius quam remoti sequitur qualitatem. Quam;



obrem motor ipse qui animum propriè vertit ad infinitum est ipsamet solum infinita potestas, quæ mentem pro libera voluntatis natura modo quodam mouet ad eligendas vias maximè libero. Rursus pro infinita mouentis potentia ad appetendum finem vsque adeò incitat vt non appetere nequeat. Si motus eiusmodi non potest quo dirigitur peruenire, nullus ytiq; poterit. Vbi infinita viget potentia, ibidem infinita sapientia atque bonitas dominatur. Hæc autem neque quicquam mouet incassum, neque bonum vllum prætermittit alicui quod accipi iam possit & debeat. Proinde cum homo tum ob rationis contemplationisq; vsum ad Angelos beatissimos, tum ob diuinum cultum ad Deum beatitudinis fontem multo propinquius accedat quam bestia, necesse est cum aliquando posse in optati finis possessione fore multo beatior. Vt qui supernis similior est tam voluntatis ardore quam intelligentiæ lumine, similiter sic vitæ felicitate similior. Si quidem à vitæ virtute intelligendi voluendiq; virtus & excellentia proficiscitur. Nunc verò in corpore hoc tum propter corporis ipsius imbecillitatem infirmitatemque, & rerum omnium indigentiam, propter continuam mentis anxietatem est longè miserior. Quapropter, quā difficile fœlicitatem suam in corpore terreno, intemperato, caduo, animus cœlestis & immortalis continuè sequitur, tam faciliè hanc vel à corpore liber, vel in corpore temperato, immortalis, cœlestis, consequitur. Non videtur

autem finis ipse naturalis existere, nisi in habitu naturali. Habitus autem sempiterni animi maximè naturalis esse videtur, vt suo in corpore viuat iam sempiterno. Hinc necessaria ratione concluditur, immortalitatem, claritatemque animi posse ac debere quandoque in corpus proprium effulgere. In quo quidem statu solum summa hominis beatitudo completur. Atque hæc quidem Prophetarum Theologorumque sententia, à Magis & Mercurialibus, Philosophis & Platonis confirmantur.

*Mens adepta beatitudinem nunquam amittit.*

**Q**Vando verò infinitum attingat anima finem, cum ea præcipuè ratione hunc attingat, qua hinc afficitur, & trahitur, & perducitur; attingit vtique sine fine. Si potuit ex finito quodam gradu qui infinite distat ad immensum quandoq; resurgere, potest etiam in ipso immenso infinite manere. Præsertim, quia eadem infinita potestas, quæ tam longè traxerat ad seipsum vehementius quàm explicari possit, in se proximè retinet. In bono autem infinito neque quicquam fingi mali potest & quicquid boni fingi optarique potest, plenissimè reperitur. Illic igitur æterna vita, charissimum intelligentiæ lumen, status mutatione carens, habitus priuationis expers, securæ utraque totius possessio boni, gaudium vndique plenum.

## FINIS QVINQUE QVÆSTIONVM de Mente.

\*\*\*\*\*

*Super sensum est intellectus. Super sensibile est intelligibile. Super mentes nostras, sunt alia mentes, super formas corporales, sunt forma incorporeales.*

MARSILIUS FICINVS FLORENTINVS

Conphilosophis suis.

S. D.

**V**id in rebus tam naturalibus, quàm humanis veris meliusve fit, quæcundie ratiocinando & consulando quærimus, atque inuenimus. In quo quidem discursu communibus incorporeisque quibusdam

veritatis bonitatisve regulis vtimur. Atque ea de quibus agitur, ad incorpoream communemque & summam veritatis bonitatisque formam comparando referimus. Vt quod ad ipsius gradum inter alia propius videtur accedere, id esse cæteris

verius ac melius iudicetur. Hoc autem totum non sensu facimus, sed ratione, sola enim in hominibus ratio est, quæ rerum rationes assignat, atque ratiocinando communibus regulis ad communem formam singula comparat. Hinc duo præcipue concluduntur. Primum, rationem sensu veriorum admodum melioremque existere, siquidem sola hæc nobis ad summam veritatem & bonitatem tam discursu quam affectu se confert. Et cum de ipsa veritate sensus & bonitate, qualiscunque illa sit, agitur, hoc ipsum non sensus villo pacto, sed ratio perficit. Secundum, quod quanto ratio verior & melior est quam sensus, tanto saltem quæ rationis obiecta dicuntur, veriora melioraque sunt quam obiecta. Præsertim, quia quoties de rerum sensibilibus veritate vel bonitate perquiritur, non aliter hoc ipsum vel indagari potest, vel inueniri quam virtute quadam, & luce intelligibilium rationum atque formarum. Quamobrem intelligibilia hæc, quæ intellectus obiecta dicuntur, id est, rationes ipsæ rerum incorporeales atque formæ à materiæ passionibus absolutæ verius meliusque sunt, ideoque magis in rerum natura videntur existere, quam formæ corporum quæ sensibus offeruntur. Accedit ad hæc, quod quemadmodum sensibile mouet sensum, sic quodammodo intelligibile intellectum. Si non possumus quæ infra nos sunt percipere, nisi ab illis per species quasdam quodammodo moueamur, multominus possumus quicquam super nos concipere, nisi moueamur ab ipso, vt mens eius semine prægnans, prolem inde parturiat præstantioris substantiæ similem. Mens enim virtute omnino propria nihil ederet vniquam, nisi vel inferius, vel inæquale. Ergo quando mens ad ipsum intelligibile surgit, tam sensibili verius, quam sæpe ipsa mente præstantius, necesse est eam ad ipsum supra seipsam illius virtute penitus eleuare. Hoc ipsum nisi esset quicquam nisi verius existeret quam sensibile, certè verius intellectum mouere non posset, quam sensibile sensum. Nunc autem longè verius mouet, quandoquidem magis perducit tam ad verum, quam ad veritatis cuiuslibet rationem. Quid enim verum sit propria ratione, & quid ipsa sit ratio veritatis, ac vicissim veritas rationis, haud sensu, sed ratione percipimus.

Si quis autem dixerit, mentem ab alienis vel extrinsecis ad intelligentiam non moueri, sed ipsamet propria & mirabili quadam virtute suas sibi species, sua ob-

iecta concipere, dicemus ex eo sequi, mentem esse incorpoream penitus & æternam, si nequaquam ab alio, sed à seipsa mouetur, suæque virtute species siue rationes concipit incorporeas & æternas. Vera enim cuiusque ratio cum aliter aliquando se habere non possit, est sempiterna. Caterum istis addemus: Si non deest menti simplicissima quædam forma & perfectissima, imò adest, per quam & ad quam de simplicitate perfectioneque rerum omnium dixerit, ac seipsam multis simpliciorum perfectionemque, multa quoque ipsa simpliciora & perfectiora esse concludit. Si, inquam, non deest mentalis quædam forma, sed adest, multominus vniuerso deest, imò verò multo magis inest. Ac mens ab illa vim accipit qua moueatur ad illam. Ad demus præterea, humanam mentem summam quidem esse in formarum genere naturalium, quoniam formas concipit siue suscipit puriores, & perfectiores, quarum comparatione naturales nihilipendat. Verum non esse in mentium ordine summam, quoniam non sit verissima, id est, summè veridica, cum noxiæ saltem vitio corporis sæpè ambigat & fallatur. Mens verò illa videtur esse verissima, quæ nihil vnquam admittit falsi, nihil prorsus ambigui. Quoniam verò quicquid verius est, id est, & magis potentiūque existit, sequitur supra mentem nostram mentes alias esse admodum veriores, quæ à falso remotiores sint, quam nostra, ac denique super omnes quandam esse summam atque verissimam, in qua non aliud sit mens quam veritas, non aliud intelligere sit quam velle. Quæ cum fecundissima sit, imò ipsa fecunditas, mentes deinceps quam plurimas tanquam filias procreet, seruet, illustret. Veriores autem mentes, veriores quoque rerum possident rationes, verissima verò verissimas. Vnde concluditur, rationes rerum incorporeales, quæ ab humana ratione pro arbitrio cogitantur, non esse figmenta quædam, sicut illis qui sensibus potius quam ratione viuunt, atque res indicant, forsitan videretur, imò verò super nos in diuina quadam mente, tanquam supercoelesti sole verissima rationum omnium lumina clarissime perlucere. Vnde in mentes alias quæ inter illam & nostram quasi mediæ esse videntur, ceu in stellas superiores, & quodammodo immutabiles, atque etiam in nostram, ceu in lunam iam quasi mutabilem, veri rationum radij dimittantur.

*Mens sempiterna est quia radio de super accepto  
uitur ad aethera.*

**Q**uoniam verò mentis acies non aliter per eiusmodi radios agit, hoc est, videt & appetit quam substantia ipsa mentis eos acceperit, idcirco clarissima veræ rationis luce concludimus, omnibus vel infimis mentium gradibus à prima mente, imò à summo mentium lumine æternitatem vitæ ipsius esse tributam, quandoquidem omnibus naturalis æternitatis agnitio quædam & appetitio veneratioque conceditur.

*Mens Dei radio reflexo intelligit creaturæ, recto  
creatorem.*

**L**una hæc nostra, id est, mens, prout in Solem suum magis minusve & aliter atque aliter conuertitur vel auertitur luminis & umbrarum quarundam diuersitate & vicissitudine variatur. Nunquam tota recipienda luminis facultate priuatur. Nunquam tamen tota vndique fulget, pars enim ratione carens, vtpote quæ sit quodammodo densior, id est, ineptior, non refulget. Luna, inquam, hæc nostra radios quibus stellas supercœlestes, id est, Angelos suscipit, eosque certa ratione cœlestibus longè præstantiores esse discernis, vehementiusque amat & colit, radios, inquam, eiusmodi ab ipsis cœli syderibus, quæ neque intellectum neque affectum altius quam ad ipsammet erigere possunt, habuisse non potest. Potest tamen eos à stellis Angelicis, imò verò à supercœlesti Sole per stellas Angelicas accepisse. Omne stellarum lumen, vt communis fert opinio, à Sole atque in Solem. Omne mentium lumen à Deo pariter & in Deum, Luna hæc nostra quando ita diuinum prospicit Solem vt esse illum infinitum, & qua ratione sit talis, prorsus, aspiciat, & quia sit infinitus, ideo infinito penitus interuallo Angelos asserat antecedere, ipsosque Angelos illius comparatione nihili pendat, radium eiusmodi quo & super Angelos & infinite progreditur & ipsos penè pro nihilo habet, certè ab Angelis non accepit. Neque rursus à Deo ipso per Angelos. Nam radius dum per Angelum transit determinatum, determinatur & ipse, ynde nequit ad proprium immensum in quantum immensum est vel prospectum erigere vel affectum. Virtute enim propriè infinita opus est ad motum illum qui ad infinitum propriè vergens terminum, sic absque fine progreditur, vt intermino infinito dumtaxat finem facere va-

leat. Igitur solius immensi Dei purus radius est, quo immensum esse Deum agnoscimus, quem nisi nouerimus, semper ultra perquirimus. Solius quoque immensi Dei flamma videtur, quæ sic ardemus immensum vt liquor vllus præter immensum situm posset extinguere, imò, (vt rectius loquar) implere. Forsitan operæpretium erit similitudinem illam de Sole Platoniam, quemadmodum in libro de Amore & in Theologia latissimè explicauimus, hic quoque aliquanto latius quam superius explicare. Inter omnia sensuum instrumenta purissimum oculus est. Inter omnes animarum vires purissimum intellectus. In mundo visibili summum visibile Sol. In mundo intelligibili summum intelligibile Deus. Igitur quemadmodum se ad visibile visus habet, sic penè ad intelligibile intellectus. Visus visibilia omnia, id est, colores, in summi visibilis, id est, Solis fulgore discernit. Intellectus intelligibilia omnia veraque cuncta in summi intelligibilis, veritatisque ipsius lumine conspicit. Ac tanto magis intellectus quilibet eiusmodi indiget lumine quàm visus illo, quanto magis omnis intellectus & quoduis intelligibile à supremo & infinito intelligibili dependet, quam visus & visibile quodlibet ab ipso Sole, qui finitus est & à causis superioribus producit & seruatur. Quicquid videtur vsquam siue ab oculis animalium quorundam, quæ innato quodam radiolo noctu vident, siue ab aliis ad ignis stellarumue lumen, totum hoc Solis ipsius splendore videtur. Sicut enim omne calidum à summe calido, sic omne lucidum à summe lucido efficitur & seruatur. Seruatur, inquam, quia & si causæ æquales, id est, quæ in eadem specie sunt qua & effectus in generatione effectus, non tamen in conseruatione necessariae sunt, tamen superiores causæ in effectum etiam conseruando sunt necessariae. Eadem ratione quicquid intelligitur vsquam, siue insito quodam & naturali lumine tanquam familiari oculi radio, siue infimorum radiis Angelorum tanquam igne, siue supernorum Angelorum luminibus, tanquam stellis, vniuersum hoc infiniti ipsius intelligibilisque Solis radiis intelligitur. Præsertim quia Sol eiusmodi vbique totus viget & implet intrinsecus vniuersa, magisque inde cuncta tam in conseruando quam in nascendo dependent, quàm imagines in speculis à corporibus. Ratio quidem Solis per alia passim reflexo cernere possumus alia. Solem verò ipsum nisi recto quodam ipsius radio rectoque in eum aspectum suscipere non valeamus. Atque hoc quidem radio qui pro-

fluit extra Solem, ideoque miscetur quodammodo & minuitur oculus, quam purus & quam magnus sit Sol discernere nequit. Quod si puritatem magnitudinemque illius agnoscimus, non oculis istud qui longè falluntur, sed ratione metimur. Oportet autem oculum sic à natura institutum fuisse, ut ipsi Solis globo quam proximè adhæreret, quo propriam eius puritatem magnitudinemque perspiceret. Sic radius qui ex Deo emanans rebus creatis infunditur, creata solum propriè nobis ostendit, Deum verò nobis ipsum ostendit magis qui in mentem ipsam dirigitur in Deum verè directam. Verumtamen quoniam à mente pro mentis qualitate & capacitate percipitur, puritatem infinitatemque Dei monstrare non potest. Ideoque per ipsum nunquam Deum esse actum purum omnino infinitumque cogitare possemus. Nihil autem supra mentem intus habemus quod queat mentis fallaciam redarguere. Certa tamen ratione consideramus diuinæ puritatis & infinitatis abyssum, rationemque infinitatis atque vicissim rationis infinitatem animaduertimus. Quando etiam super supremos Angelos per innumerabiles perfectiones gradus magis deinceps magisque gradatim progredientes qua ratione diuinus actus progressum eiusmodi penè infinitum infinitè superemineat cogitamus.

Quamobrem non solum diuini solis radius oculo mentis inest, sed etiam sol ipse diuinus adest sub ipsa infinitatis suæ (ut ita dixerim) ratione, per quam videat appetatque, tum infinitatis verissimam rationem, tum rationis ipsius infinitatem. Adest, inquam, vbique, & adest semper. Quandoquidem ubi mentes quoties expeditæ sunt, attentiusque ad hoc opus incumbunt, diuinum actum hac ratione considerant infinitum, quia neque subiecti alicuius limitibus ullis cohibeatur, neque permixtione qualitatis inficiatur, neque causæ superioris excellentia superetur, neque vel temporum interuallis, vel locorum spatiis excedatur, neque numeratis virtutis gradibus quamuis quamplurimis terminetur. Neque forsitan terminetur supereturque à mente, quæ ultra quemlibet numerum atque finem, tam fingendo quàm affectando sine fine progreditur. Videt mens infinito Dei actui infinitam subesse materiæ (ut ita dixerim) passionem. Tempus quodammodo interminatum, motum semper æqualem spatiumque immensum (ut ita loquor) atque quodammodo perpetuam generationis successionem, indefessam mētis discurfionem. Videt ipsum purum nihilum infinitè consi-

derari negando, & immensum ibi nihilum excogitari. Videt ipsum purum ens, (ut ita dicam), infinitè affirmari ratiocinando, bonumque esse prorsus immensum, quia sit virtus immensa. Aliud enim est virtus quælibet, aliud est numerus atque mensura. Ac prius est virtus quælibet ordine quodam quàm mensura. Numerus igitur vel mensura quoties virtuti accedit extrinsecus posteriusque contingit. Nihil tale Dei ipsius virtus admittit. Non igitur numerum vel mensuram habet, qui omnia numero perficit & mensura. Si non intra se admittit, neque etiam circa se patitur. Ergo sicut infinitè se replicat intus, sic infinitè se explicat extra. Vnde fit ut vbique sit & semper, cuncta facillimè faciat & perficiat, cunctis & facillimè adsit & insit. Sicut enim si qua esset infinita dimensio immensum spacium occuparet, sic si qua sit infinita potestas seipsam vndique sine fine diffundit, atque etiam absque principio & fine viuunt in ætuum. Platonici Philosophi opinantur, ubi est visibile summum existere visum. Idcirco Solis globo non modo vitam tribuunt, verum etiam videndi virtutem omnium perspicacissimam atque certissimam. Orpheum in hoc potissimum imitari videntur, qui Solem mundi oculum nominat, quo & quem omnium oculi videant. Opinantur Solem stellasque viuificas & viuentes iactis per omnia radius quicquid mundo continetur inspicere.

*Deus omnia videt & curat.*

**P**eripatetici putant summum intellectum summumque intelligibile idem penitus esse. Sanè summus intellectus summum possidet modum intelligendi, non igitur intelligendo respicit extra, sed intus, neque eius intelligentia ab alio quam à seipso dependet. Quod etiam summum intelligibile est, summus sit intellectus, ex eo patet, quod inter intellectum atque intelligibile maxima quædam proportio esse debet. Cum igitur id maximè fiat, intelligibile quod à materiæ passionibus longissimè separatur, maximè & verissimè intellectus est, quod maximè est abstractum. Præterea non esset intelligibile summum nisi tale sibi quoque esset, intelligereturque etiam à seipso. Denique si intelligibile excellentiam quandam super intellectus communes significat, mouet enim eos & illuminat, & format, & perficit, nihil in intellectu secundum participationem aut formam reperitur boni; quin in ipso summo intelligibili secundum causam virtutemque agentem reperianur. Igitur animæ rationa-

les intellectus quidam secundum participationem esse dicuntur, Angeli verò intellectus secundum formam existimantur. Intelligibile summum, id est, Deus, intellectus secundum causam est intellectus, inquam, super intelligentiam cogitabilem. Intellectus quolibet intellectu infiniter præstantior. Si Solis lumen quo Solem videt oculus haberet oculum, certè dum oculus non ipsum videt, ipsum quoque & multo clarius, quia omnis ab eo claritas emanat, oculum mutuo nostrum inspiceret. Et dubitamus adhuc, vtrum diuinus ille oculus quo etiam proximè & quem passim mentium nostrarum vident oculi, nostros ipse vicissim videat oculus? Nisi nos ipse videret qui nos continuè videndo, nos semper illuminat atque illuminando vim nobis videnti actumque largitur, certè nusquam aliquid videremus. Qui certè nihil aliud intelligimus præter intelligibilis summi lumen intelligibilis cuiuslibet rationibus vndique plenum. Sicuti neque videmus quicquam nisi Solis lumen, rerum omnium coloribus figurisque depictum. Et dubitamus adhuc, vtrum immensa bonitas nos amet nobisque prouideat? Quæ etiam absque medio nos fouet tanquam filios, & vbique ac semper amplectitur. Et dubitamus adhuc, vtrum infima quadam corporeaque scintilla, an potius incorporea luce atque superna, sublimes formarum radios ab infimis materiæ tenebris secernamus? Argumentemur superiora, inferiora passim redarguamus, quam parua sint terrena, quam magna cœlestia quam immensa supercœlestia, metiamur. Nemo magis videtur ubique mentiri quàm qui maxima quæque confidit pusillo corporalis sensus digitulo, potius quam maxima mentis mensura, metiri. Nemo profundius in tenebras vel clam ipse delabitur, vel præcipitatur inuitus, quam qui adeo & sibi superbus & soli superno euadit ingratus, vt absque illius lumine cuius est omne lumen, videre lumen profiteatur. Perinde ac si quis cœlestia lumina oculi dumtaxat sui radio, non cœlesti splendore videre se credat. Hinc Paulus Apostolas contra Philosophos nonnullos superbiores exclamat: Qui cum Deum cognouissent, non sicut Deum glorificauerunt, neque gratias egerunt, sed euanuerunt in cogitationibus suis, & obscuratum est insipiens cor eorum, & putantes esse se sapientes, stulti facti sunt. Horum mens passa videtur Eclipsim, quando superbè nimium defecit à Deo, imò verò miserabiliter admodum à seipsa. Tunc enim nos ipsi deserimus infelicitèr quando ipsum sine

quo esse nullo modo possumus, fuitè deserimus. Heu quisquis hunc misere relinquit tutorem, haudquaquam relinquit omnino, simul enim in eundem recidit sed vltorem. Heu quisquis patrem aspernatur benigne lucentem, interim eundem tanquam iudicem experitur vrentem. Vt in qua luce bonum suum infinitum venerari neglexit, in eadè nisi dilexerit aliquando quod neglexit, malum suum sentiat infinitum. Atque ob oculorum impuritatem sub lucis illius radio doleat semper, qui non purgauit oculos & erexit vt semper tota luce gauderet. Quando impiorum mens Philosophorum imprudenter defecit à Deo, tunc sensus in eis imprudenter defecit à mente. Corpus, & si libenter, impotenter tamen, secutum est sensum, illinc monstruosissimæ quædam opiniones, istinc mores orti sunt omnium immanissimi. Hinc vita vndique misera, contra verò nullorum vel sententiæ probabiliores vel mores probatiores, vel vita beatiore quam eorum qui legitime, id est, piè Philosophantur, hoc est, scientiæ veritatique studium cum religiosa semper veraque pietate coniungunt. Hoc autem nihil aliud esse videtur quam nolle ab inueniendæ veritatis amore seiungere honorandæ veritatis amorem.

*Elementa mouentur mobiliter. Cœlestes sphaerae mouentur stabiliter. Anima stant mobiliter Angeli stant stabiliter. Deus est ipse status.*

M A R S I L I V S F I C I N V S  
Florentinus Ioanni Francisco Hippolyto vtriusque iuris Doctori  
Gazolti Comiti clarissimo, S. D.

VIdemus elementa à terra vsque ad cœlum moueri mobiliter, mobiliter, inquam, quoniam à rectissima motionis norma nonnunquam vel ob impedimentum vel ob aliam quandam causam quodammodo dimoueri videntur. Cœlestia verò corpora mouentur quidem, sed stabiliter, nam in ipsorum naturali motu continuè perseverant. Proinde status motu longè perfectior iudicatur. Motus enim statui necessario indiget sed non contrà. Quamobrem si motus motu nobis ab inferioribus ad superiora nunc ascendentibus perfectior gradatim occurrit, atque ille est perfectior qui stabiliior est, multo magis status ipse statu gradatim perfectior debet occurrere. Itaque sicuti status elementis in cœlum vsque adeò creuit vt iam modus standi



quod stabiliter nominatur sit repertus, longè magis ad eò crescere debet supercœlum, ut status ipsius substantia quædam reperitur. Illicigitur erit aliquid quod stet quidem semper, licet mobiliter, hæc verò rationales animæ sunt, quarum substantia semper est eadem, neque motum patitur vllum, sed affectus & actio variatur. Quoniam verò mutatio quælibet indigentiam quandam significat, ob quam quod mouetur ad id quod non habet omnino solet percurrere, atque super id quod est indigum, necesse est esse aliquid quod sit plenum, quo sustineantur regenturque mobilia, quo recurrant alia ut impleantur, ideo sunt super animas Angeli, qui & stant quidem semper, & stant stabiliter, quia & substantia & actio in eis semper est eadem. Corpora spirituum umbræ sunt, spiritus contra sunt lumina corporum.

Tria verò sunt corpora, tres ergo sunt spiritus. Corpus ex elementis compositum, tam secundum totum, quam secundum partes è suo statu mutatur. Elementorum sphaeræ & si vicissim mutantur in partibus, totæ tamen ipsæ permanent incorruptæ. Cœlestes denique sphaeræ, tam secundum partes, quam secundum totum indissolubiles perseverant. Spiritus ratione vacui fortè mutantur omnino. Rationales autem in tota substantia & actione præcipua permanent, quamvis secundum particulas quasdam, id est, vires actionesque infimas quadam vicissitudine permutentur, Angelici spiritus iidem & similes in vtrisque consistunt. Imò verò, ut rectius exprimam, si corpora multa reperiuntur, quæ quamvis dispositione mutantur, semper tamen eadem substantia permanent, atque hæc quidem sunt, quorum proprius est circuitus, id est, multo magis multi sunt spiritus & si quadam dispositione mutabiles, substantia tamen penitus immutabiles. Tales verò sunt qui præditi ratione circuitum quandam rationalem à seipsis in seipso intrinsecus agunt, quando seipso animadvertunt & colunt. Agunt rursus extrinsecus, tum consultando à fine rerum agendarum ad principia, atque conuerso, tum differendo à propositionibus quibusdam ad conclusiones, atque contra tum speculando ab effectu ad causam, rursusque à causis ad effectum. Rursus quando particularia in vniuersalia ipsa resolvunt, ac vicissim vniuersalia in particularia diuidunt componendo. Omnis verò vis ad circuitum naturalis esse sempiterna censetur, tum quia à se per suum centrum non recedit, tum quia si opus fuerit per suam circumferentiam in se redit, & in

quouis puncto inchoat semper à fine principium. Maxime verò ubi fit circuitus spiritalis, ibi enim iungitur circumferentia centro. Atque huiusmodi substantia simplex vim suam replicat in seipsam & auget replicando. Sibi que innitens semetipsam conseruat. Meminisse verò oportet, ubi discursio rationis efficitur, innata esse principia quædam stabilia discurrendi, id est, communes quasdam manifestasque notiones, à quibus incipientes quasi radiis quaramus ignotiora, atque inuenta ad easdem comparando diiudicemus. Meminisse præterea decet, quoniam principia illa necessaria sempiternaque sunt, ideo vim animæque illarum subiectum est, esse similiter sempiternam. Discursionem quidem illam tanquam naturæ nostræ propriam possidemus. Fundamenta verò discursionis nobiscum Angelis sunt communia. Illa quidem parte cœlestes sumus, ex ista supercœlestes. Duo mundani corporis sunt extrema, terra scilicet cœlumque empyreum. Vtrumque videtur immobile, sed altera alterum ratione. Terra quoniam non adepta est virtutem aliquam ad circuitum. Empyreum verò cœlum quia iam omnem corporum virtutem est adeptum. Mediæ vero sphaeræ sempiterna quadam virtute sed mobili, requirunt vltius, nescio quid, permanens & æternum. Quod de tribus iis gradibus diximus, idem penitus de sensu, ratione, mente, rursus bestia, homine, Angelo, intellige dictum. Elementa quoniam non solum corpora sunt, verum etiam ex materia infima componuntur, ideo mobiliter agitantur. Cœlestia verò quia eiusmodi materia carent atque sunt quasi non corpora. Idcirco stabiliter æqualiterque discurrent, suoque ordine errores elementorum cohibere videntur. Quia tamen motibus oppositis contrariisque feruntur, si propriis ferantur naturis oportebit contrarias illis inesse naturas. Nulla tamen est contrariarum dissonantia qualitatum, unde omnis abest pernicies, omnisque transgressio. Mouentur igitur temperatione quadam, qua & ipsa superior causa regit potenter suauiterque perducit. Vniiformis natura est quæ tam multa conducit in vnum, est etiam omniiformis quæ illa ad terminos affectusque redigit omniiformes. Non est autem corporea forma, alioquin vniiformis simul & omniiformis esse non posset. Atque omne corporeum dum mouet, necessariò permutatur, ideoque perfectissimus motor esse non potest. Et quia in mouendo non permanet, idcirco solum virtute sua nequit permanentem in motu seruare tenorem. Quam-

obrem globi coelestes à substantia quadam spiritali rationalique mouentur, atque ista quidem sempiternam habente infatigabilemque virtutem, qua tam diu moles tantas tam æqualiter, tam celeriter voluere valeat, ordinemque mirificè rationalem pulcherrimumque conficere. Rationales animæ quia nullo modo sunt corpora, sed ad corpora iam affectu quodam naturali declinant, idcirco manent quidem essentia vitæque semper, sed quasi mobiliter. Innata verò virtute propriaque mouentur. Angeli verò, neque corpora sint, neque ad corpora viuificanda declinent, & stant quidem & stabiliter, vt in superioribus disputaui-  
mus. Quemadmodum omnia mobilia ad motum vnum tempusque primum, sic stabilia cuncta ad vnum primumque statum æternitatemque necessarie reducuntur, tanquam cardinem siue centrum. Cui quæcunque stant, pro viribus innitantur, quod & ambiant quæcunque mouentur, cuius vnione res tam multæ, tam diuersæ vnā quandam pariant harmoniam. Motus tempusque sunt penè idem, status & æternitas sunt penitus idem. Quæ enim in inferioribus disiuncta videntur, in superioribus mirificè coniunguntur. Quicquid stare dicitur, siue in se, siue in alio, primum quidem ipso statu stat. Deinde compositionem aliquam quodammodo suscipit. Verum super id quod aliquo pacto compositum est, extat aliquid necessario simplicissimum à quo cætera pendeant, vniantur & componantur. Præsertim quia quod primum est in natura, cum vltra primum esse suum nihil capiat, aliunde compositum aliquo pacto cogitari non potest. Sic igitur super pigrā naturam mobilis, super vagum motum motus sit constantior, super stabilem conditionem, substantia stabilis cum quadam conditione mutabili, super hanc naturam status ipse omnium simplicissimus. Vbi summa simplicitas, ibi summa vnitas, vnictus igitur Deus existit, qui re vera absoluta vnitas est, atque, vt Platonici placet, est etiam quodammodo mentis vnitas atque cardo, quemadmodum & mens cardo vnitasque animæ, & anima vnitas & cardo naturæ, natura denique corporum. Deus sicut est purus status mutatione carens, sic est pura vnitas imperfectæ multitudinis expers. Quoniam status est purus, ideo omni est motu celerior. Iam enim ab æterno ipse in se est id omne quod ex parte quadam minima vix & paulatim & vniuerso tempore vniuersus motus assequitur. Et quicquid diuiduus motus naturæ diuiduæ diuiduo facit temporis intervallo, id totum status

indivisibilis indiuiduo prout vult momento æternitatis indiuiduæ perficit. Vbi enim virtus constantissima dominatur, ibi actio editur omnium velocissima. Vbi verò instabilis natura vacillat, fit motio tardior. Rursus quoniam Deus est pura vnitas, multitudinis infinitæ principium, ideo infinita multitudine rerum est infinitè potentior, si innumerabilis inde potest numerus emanare, tempore sempiterno, ipse iam actus est innumerabilis numerus, imò vnitas infinita & immensa potestas. Et quæcunque infinitè, dispersa infinitè, vt ita dicam, debilitantur, ipse immensa vnitate sua potenter colligit in immensum. Quoniam verò nulla omnino difficultas actionis adest vnde mensura virtutis abest, cui resistere dimensa natura non potest, idcirco Deus infinitè facilius feliciusque quam cogitari possit omnia perficit, adeò vt si statuerit cuncta simul efficiat, qui est omnia simul, à quo & ad quem velut à centro & ad centrum singula tanquam lineæ punctaque dependent, vt vno stabilique nutu singula queat pro natura cuiusque vibrare.

*Forma corpora diuiditur & mouetur ab alio. Anima rationalis non diuiditur, sed ex se ipsa mouetur. Angelus neque diuiditur, neque mouetur, sed aliunde impletur. Deus est plenitudo vna, simplex, immensa.*

MARSILIUS FICINVS  
Nicolaus Episcopo Vacienti & Francisco Bandino, S. D.

**F**orma quæ ex se ipsa primoque talis quædam aut talis existit, in eo genere plenissimè talis esse debet. Quod enim ex se primoque calet & lucet, summopere calet & lucet. Quod igitur non est perfectissimè tale, ab alio quodam superiore dependet. Forma omnis quæ cum materia vel dimensionē diuiditur & mutatur ab alio, formarum omnium imperfectissima est. Nam subiecti dimensionis suæ ipsius indiget adminiculo, quippe quæ à se ipsa non sit, quandoquidem non est vel in se ipsa vel secum. Neque etiam à subiecto præcipue nascitur quod propria natura iudicatur informe, neque rursus à quantitate quæ non per se ipsam quicquam agit, sed per qualitatē: præterea propter extensionem dispersionemque forma illa fit debilis, denique propter motum apparet egena. Neque igitur propria virtute agit aliquid vel mouetur, postquam vim non possidet integram, atque propria virtute neque sustineatur, neque subsistit. Quapropter præstantiore quadam forma dependet, quæ in se sine

subiecto atque secum sine dimensione consistere possit, id est, ab anima, quæ quamvis ex seipsa quodammodo moueatur quia proximè qualitates omnino mutabiles antecedit, non tamen cum materia vel quantitate vlllo pacto diuiditur. Quod ex eo præcipuè patet, tum quia indiuiduas formas à diuiduis ipsa perspicuè diuidit, secumque coniungit, tum quia conuertitur in seipsam, quod forma diuisibilis facere nequit. Vbi enim pars altera distat ab altera, nondum totius in seipsum est facta conuersio. Quòd verò anima rationalis ex seipsa libere moueatur, tunc apparet potissimum, quando & res corporeas modo potius suo, quam rerum intelligit, & contra earum impetum, quod ipsa præstare censuerit pro arbitrio eligit sæpenumero. Motusque suos in plurimas oppositasque partes edit assidue, utpote quæ non determinata vel naturæ vel obiecti qualitate trahatur, sed consilij sui potius varietate ducatur. Quoniam autem mouetur quodammodo, atque idcirco quasi indiga iudicatur, cum nulla res motu quærere soleat quod iam possidet, idcirco super animam est immobilis Angelus, immobilis, inquam, quia iam vndique plenus. Quemadmodum verò ab eo quod haudquaquam omnino plenum est, ad illud quod plenissimum est ascenditur, sic ad plenitudinem ipsam ascenditur à plenissimo. Quia videlicet à plenitudine ad minus plenum ordine quodam per plenissimum fit descensus. Profecto causæ omnis in agendo intentio est aliquid sibi pro viribus simillimum generare, & quo potentior causa est, eo id magis faciliusque consequitur. Hinc efficitur ut causa illa qua nulla potest potentior cogitari aliquid generet sibi met vsque adeò simile, ut similius quicquam cogitari non possit, non reperitur alicubi talis quædam similitudo nisi vbi generantis genitique substantia est penitus eadem. Sed mittamus in præsentia quòd Deus generet in seipso, consideremus quæ procreat extra seipsum. Nam hic quoque consentaneum est, Deum simillima quædam gradatim minusculeque similia procreare, ut nullus in gradibus ordo rationalis possit à nobis considerari, qui non prius à ratione summa & consideratus fuerit & impletus. Nempè à tali quodam ordine Dei & naturales causæ eiusmodi seruant ordinem in effectibus producendis, & mentes ratiocinando similiter ordinem & artificiosum tenent & naturalem diuinumque inueniunt. Quorsum hæc ut super animas nondum plenissimas, plenissimos iam esse Angelos concludamus, super Angelos qui im-

plentur, esse fontem cuius liquoribus impleantur. Plenissimi quidem esse multi & possunt & debent, ut in Dei opere perfectissimo partes abundant vndique perfectissimæ. Plenitudo autem ipsa simplex, quæ plena sunt quæcunque plena, & quia plena ideo composita nuncupantur. Plenitudo, inquam, summa nisi vna esse non potest. Si quis duas summas induxerit plenitudines, quæremus vtrum in se penitus differant vel omni ex parte conueniant? An potius partim conueniant quidem, partim etiam discrepent. Si vtræque similiter est plenitudo omnino, differre non possunt. Si conuenire dicantur omnino, vnum sunt non duo, quod in præsentia volumus. Si parte congruerent altera, parte altera discrepant, primum quidem vtræque composita esset atque ex partibus & simplici quodam componente dependens. Deinde neutra esset ipsa quam quærimus plenitudo. Quippè quo altera differt ab altera, non reperiretur in altera. Adde quod in plenitudine summa, nihil debet esse (ut ita loquar) non plenum. Si autem partes diuersas haberet, nulla pars esset vel idem quod & alia vel idem quod & totum, nulla igitur pars plenissima foret. Quamobrem plenitudo, ut idem sæpius repetam, vnica esse debet ac penitus indiuidua, adde, & infinita. Profecto quemadmodum in eo quod purum, vacuum, vacuitatemque ipsam cognominamus, nihil quod adsit fingi potest, sic in plenitudine pura quam extare oportet vacuitati puræ prorsus oppositam nihil in infinitum fingi potest quod non adsit. Vnde nam prima mundi materia & vniuersus mundi cursus & mentis cuiusque discursus hoc habent, ut naturaliter vltra quemlibet terminum impleri conentur, nisi ab ipsa plenitudine, quæ & exuberat vltra terminum & mentes mundumque atque materiam allicit super terminum. Quoniam verò immensa plenitudo in vacuum non potest allicere, rectè vaticinamur, materiæ nixum & mundi cursum mentisque discursum ipsa quandoque plenitudine summa prorsus impleri. Tunc mundani stabilitas centri sphaerarum quoque circumferentiis se prorsus communicabit, & pura circumferentiæ claritas se ad centrum vsque diffundet. Tota prorsus machina mundi flammis empyrei coeli vestiatur innoxiiis. Corpora sensusque naturalia animarum rationalium instrumenta fulgebunt artimorum radius beatorum. Animi salubribus vitalibusque Seraphinorum radius feliciter accendentur. Tota spirituum multitudo felicitum infinita plenitudine infinite gaudebit in æternum.

*Compendium Platonice Theologiae Marsilij Ficini Florentini.*

Ascensus à substantia corporea ad incorpoream scilicet, animas Angelosque & Deum.

MARSILIVS FICINVS  
Conphilosophis suis, S. D.

**S**ubstantia quoniam accidentis omnis fundamentum est, naturæ ordine quodam prior est accidente, potestque cum sit prior ac formæ virtute non careat, alicubi sine accidente consistere, accidente, inquam præcipuè corporali, quod ad communem accedens substantiæ rationem, non tam profectum affert quam defectum. Profecto substantia si absque corporeo accidente consistat, tam ob puritatem verior erit, quàm ob ipsam indiuiduam naturæ simplicitatem vnitatemque potentior. Quamobrem iam est actu substantia quædam seorsum à quantitatis diuisione qualitatique corporalis permixtione, ne vana sit semper in vniuerso potentia illa tam rationabilis tamque bona vel falsa prorsus vel imbecillis omnino natura illa, quæ verior potentiorque quam substantia quælibet corporalis existimatur. Primitus incorporealis substantiæ gradus est vita quædam, id est, anima. Incorporealis autem illa substantia idem atque vita quædam esse videtur. Quandoquidem vitæ proprium est vis quædam ad penetrandum, vniendum, mouendum corpus, valdè mirabilis. Talem verò vim habet in primis substantia prorsus incorporealis. Vitæ quædam huiusmodi in rerum ordine iam existunt. Magis enim dependet corpus viuens à vita sibi coniuncta quam à corpore vita. Nam corpus inde formatur & sustinetur, regitur & mouetur. Quare quemadmodum infra coniunctionem istam corporis atque vitæ, corpora quædam reperiuntur, saxa scilicet & metalla, cæteraque generis eiusdem, quæ possunt absque vita manere, sic & multo magis, fortè etiam plures existunt vitæ, quæ sine aliquo corporis adminiculo sustinere se possunt, hæ verò partim sunt rationales animæ, partim Angeli. Super animas sunt Angeli. Verùm nunquid super corpora & animas necessarium est Angelos esse? Est utique necessarium Sanè intellectus ipsius, in quantum est intellectus, natura hæc esse videtur ut potius seorsum à corpore quam ut in corpore viuat. Intelligit enim abstractione quadam formarum à singulis corporum passionibus. Et quanto ab eisdem ipse

magis abstrahitur, tãto discernit clarius, & efficacius agit, viuítque beatus. Quasi ille sit mentis habitus potissimum naturalis, coniungere verò corpori mentem fortè nihil aliud sit quam eam ab ipsius origine longè seiungere. Quod autem naturalis est, in ipso rerum ordine existit ut plurimum. Igitur super intellectus eos qui corporibus adsunt, id est, animas rationales nimirum mentes quamplurimæ sunt à commercio corporum segregatæ. quemadmodum puri intellectus ipsius proprietas est seorsum à corpore viuere, sic & natura puri sensus esse cum corpore Spiritus igitur in quo solus cum vita est sensus, solum ut videtur viuít in corpore. Spiritus autem in quo intellectus solus, extra corpus tantum agit vitam. Sed ubi intellectus sensusque coniungitur, quod homini conuenit, eiusmodi spiritus ea præditus est natura, ut & in corpore viuere possit & extra. At quoniam intellectus in hoc est pars quædam in anima partes insuper alias continente, est & ambiguus & quodam spiritali motu ab alio in aliud intelligendo discurrit, idcirco super eum extare oportet mentem perfectiorem, quæ neque ad capacitatem animæ contrahatur neque inferioribus partibus misceatur, neque actionem suam tempore distrahat, sed in se ipsa absoluta meraque sit & vndique clara, actionemque suam non discurrendo peragat, sed manendo.

*Super mentem in anima est mens in seipsa, super illam est Deus.*

**C**onfert ad idem ratio illa Platonica. Si anima secundum formam rationemque suam esset intellectus, certè tota prorsus anima intellectus esset, intellectus, inquam absolutissimus. Et anima quælibet appareret intelligentiæ compos. Cum verò se res aliter habeat, perspicuum est animam non secundum formam propriè principalem sed secundum participationem quandam intelligentiam possidere. Quemadmodum verò super animarum mentes, quæ participatione tales esse dicuntur, sunt mentes multæ secundum formam, id est, Angeli, ita super mentes secundum formam est mens vna secundum causam efficacemque virtutem, id est, Deus.

*Multi sunt intellectus humani, multi Angelici, unus est diuinus.*

**Q**uod multi sint secundum participationem intellectus, patet ex eo quod animæ rationales sunt plurimæ. Atque in

mentibus hominum diuersorum momento eodem apparent opiniones, affectus, habitus inter se penitus repugnantes, quod sint multi etiam intellectus secundum formam in superioribus declarauimus, quando diximus ad mentis ipsius rationem spectare magis seorsum à sensibus corporeque viuere quam cum ipsis, quod super mentes omnes quæ forma ipsa sunt tales, sit vnicus secundum causam intellectus, inde probamus, quod cum spiritualis indiuiduarum mentium multitudo ordinata magis vnitate sit quam corporum multitudo, necessarium est vnionem eiusmodi ab vna quadam causa proficisci. Res enim diuersæ siue illæ quidem corporales, ea ipsa ratione qua diuersæ sunt, in vnam vel opus vel ordinem finemue conspirare non possunt. Sed in quantum vnum quiddam illis inest commune. Atque hoc ipsum quod commune dicitur vniuersis, à nullo illorum propriæque continentur in ordine, prouenit. Illi enim dumtaxat aut certè suis quibusdam proprium esset, non commune pariter vniuersis. Neque etiam à cunctis ex propria variaque ipsorum virtute communis illa qualitas proficiscitur. Quæ enim diuersa sunt, vt diximus, in quantum diuersa sunt non pariunt vnionem. Sed nunquid natura, quæ cunctis inest communis, ex seipsa prorsus existit? Nequaquam. Maius enim est existere ex seipso, quam in seipso consistere. Cum igitur natura eiusmodi non in se, sed in turba consistat, certè ex seipsa non potest existere. Igitur ab vnitate quadam quæ super omnium numerum in seipsa consistit, vnio illa omnium proficiscitur, & quia vnitas illa sublimis nulli propria est, ideo sicut vnitas numeralis vbique omnibus adest numeris, & punctū lineis, sic ipsa quoque indiuisibilis permanens omnibus vbique spiritibus corporibusque pariter adest ac æquè ligat inuicem vniuersa. Quæ ex hoc ipso mutua quadam conuenientia conducunt ad vnum, quoniam ducuntur ab vno. Sicut igitur omnia mundi corpora ad vnum summumque corpus continens mouensque omnia, rediguntur, sic spiritus omnes ad vnum summumque spiritum omnia complectentem, perque spiritus sibi subditos corpora viuificantem atque mouentem.

*Res neque circulo confunduntur, neque ad principia plura equalia reducuntur, neque sursum absque fine progrediuntur.*

**H**ic, vt videtur, triplex potissimum excluditur error. Primus eorum qui

aiunt cuncta sic circulo inimicem dependere, vt quemadmodum hoc ab illo, ita illud vicissim ab isto dependeat. Sic vtique idem ad idem comparatum esset & causa & effectus, prius quoque atque posterius, superius & inferius. Secundus, eorum qui plura in latus principia introducunt. Foret enim numerus quidam principiorum ex communi natura proprietatibusque compositus. Nullum igitur illorum esset reuera principium, quia nullum simplex existeret, & ab altiore vnitate cuncta ligante singula prouenirent. Tertius illorum qui sursum absque fine à principio alio ad aliud semper ascendunt. Sed illi dum innumerabilia principia curiosus affectare videntur, cum nusquam reperiant primum, nullum prorsus principium assequuntur. Cogitare profecto deberent, quicquid dependet ab alio suapte natura pendere, ac nisi ab alio quod non dependet, aliunde sustineatur, penitus vacillare.

Quapropter, si omnia ab aliis absque fine dependent, cuncta vndique vacillabunt. Perinde ac si liquida liquidis hæreant nec vsquam solida dentur quæ liquida sistant. Nullus erit in rebus status, ordo, circuitus, perseuerantia, & restitutio nulla. Non erit in rebus aliud præstantius alio, cum vbi non datur summum, ibi alia aliis ad summum propius non accedant. Manifestè verò videmus, alia in natura facere, alia fieri, illa quidem antecedere dignitate, ista succedere. Causarum præterea multitudinem latitudinemque in effectibus quoque numerum amplitudinemque producere. Itaque si absque termino à causis in causas ascendatur, similiter præter terminum ad effectus ab effectibus descendatur. Nulla erunt extrema, sed omnia media, omnia infinita. Siquidem res quælibet ab innumerabilibus antecedentibus vires accipiet, & succedentibus innumeris vires dare valebit. Innumerabilia erunt infinita. Quod est absurdum. Res quælibet cuilibet apparebit æqualis. Quod nihilominus indicatur absurdum. Nusquam reperietur corpus infimum quod est terra, nusquam materia infima, quæ est potentia vna puraque formarum capax. Nisi sit summus spiritus, nisi sit forma suprema, actus purus, fonsque formarum, nunquam incipient effectus aliqui fieri, quia nunquam mediæ incipient causæ facere, quæ non prius faciunt quàm ab omnibus superioribus moueantur: quod si ab innumeris, & per immensum intervallum expectetur motionis exordium, nunquam accipietur. Nulla erit effectus alicuius scientia, quia nequaquam erit innumerabilium



innumerabilium comprehensio canislarum. Quid plura? Singuli in rebus humanis naturalibusque motus ideo ad certos terminos diriguntur, quoniam à principio certo reguntur, nisi enim regerentur inde, illuc nunquam dirigerentur. Cum igitur vniuersi mundi motus ordinatior sit quam singuli qui ad illius ordinem referuntur, ideoque magis ad certum terminum se se conferat, id est, ad commune cunctis bonum atque pulchrum. Necessarium est ab vno quodam certoque principio, id est, bonitate ipsa summaque pulchritudine, proficisci.

*Veritas est super mentem.*

**V**erum ne fortè dum infinitum progressum amputare contendimus, ipsi quoque interuallo penè infinito ab ipso disputationis nostræ proposito dementer digrediamur, iam si placet regrediamur ad mentem. Quod est in corpore oculus, & in oculo visus, id fermè est intellectus in anima. Quod rursus, Solis lumen ad visum, hoc lumen veritatis ad mentem. Aliud Solis lumen est; quod oculus, similiter aliud ipsa veritas est, aliud intellectus. Alioquin & omnis mens omnino esset veridica, & res quælibet particeps veri, similiter esset intelligentiæ particeps. Oculus tuus quia pars est alterius, id est, corporis, neque clarè videt omnia prorsus, neque sua omnia simul. Si totum corpus tuum oculus vnus efficiatur, simul vndique cuncta videbit. Nondum tamen idem erit oculus atque lumen. Similiter mens tua quoniam pars est animæ, ideo neque clarè, neque momento eodem intelligit omnia. Si totus animus tuus intellectus vnus euadat, iam ex animo fiet Angelus, clarè cuncta perspiciet, neque temporali discursu amplius tum hoc, tum illud aucupabitur; sed cuncta simul perspicuè continebitur. Adhuc tamen aliud veritas ipsa, aliud ipsa mens erit, quæ nihil est aliud quam oculus spiritalis ad ipsum veritatis lumen bonitatisque calorem intelligentia & voluntate percipiendum.

*Veritas & bonitas idem sunt.*

**V**erum perscrutandam esse videtur, nunquid vnum idemque sit ipsa veritas atque bonitas? Mittamus quid relationes illæ dialecticæ machinentur. Si rerum ordine falsum atque malum, falsò esse atque malè esse inter se re ipsa non discrepant, sequitur vt eodem in ordine verum & bonum, verè esse & benè esse reuera non differant. Quapropter super rerum om-

nium ordinem idem in substantia est veritas atque bonitas. Præsertim quia quovisque se veritatis eoque & bonitatis, atque vicissim, se dilatat imperium. Quicquid enim veri, idem & boni particeps reperitur, atque è conuerso. Hoc ipsum tamen quod veritas & bonitas nominatur, mentem quamlibet supereminet. Quia mens non in sui ipsius natura, sed in veri & boni possessione quiescit. Ac latius se veritatis bonitatisque vestigia, quam intelligentiæ propagant. Vbi enim nullum apparet intelligentiæ munus, veri tamen bonique non nihil latere videtur. Quid ergo dicemus? Deus omnia ad suæ artis exemplar in specie quadam propria puraque collocat, deinde ad suæ largitatis exemplar omnibus ordinem vsumque aliquem ad aliquid benignè distribuit, in illo quidem actu vera, in hoc bona efficit omnia. Rursus Deus quando intelligentiæ lucet, veritas, quando voluntati calet, bonitas appellatur. Ibi intelligentia illustratur & adolescit, hic voluntas blandè allicitur & impletur.

*Deus mentem immenso supereminet interuallo..*

**M**eriamur præterea si mensurari potest, postquam Deus supereminet mentem, quam longo spatio eam superemineat. Ah quam immensæ dementiæ est, conari immensa metiri! Tanto enim dignitatis spatio saltem sursum distat à mente, quantum spatij mentis discursui patet super se gradatim à clariori in clarius percurrenti & voluntati à meliori melius affectanti. Id verò eoque patet quovisque nobis aliquid occurrat prorsus immensum. Quod infinitate sua imponat infinito quodam modo progressui terminum.

*Deus est ipsa certitudo & ipsum gaudium.*

**Q**uamuis autem extremæ dementiæ videatur, mente comprehendere vel le quod mentem insuperabiliter mentisque stimulum, id est, voluntatem exsuperat: Non tamen dementis est vllò pacto ab ipso saltem velle plenissimè comprehendendi. Fortè enim quod incomprehensibile est, comprehendere nihil est aliud quam ab ipso foeliciter comprehendendi. Quid ergo? Volumus ne à summa, increataque forma quæ nos hætenus clam complectitur manifestissimè comprehendendi, id est, ita comprehendendi, vt nos hoc ipsum minimè lateat? Apprehendamus quoad possumus quæ in

formarum genere creatatum summa nobis occurrunt. Summa verò in iis sunt, quæ absque medio ad summam increatamque formam sese conuertere possunt, ob id ipsum quod ab eadem sine medio processerunt, eiusmodi autem omnes mentium species esse videntur. Siquidem omnes diuinitatem summam non in rebus aliis tantum, sed etiam cæteris omnino posthabitis, in ipsa (vt ita dicam) eius excellentia quadam quærere, considerare, colere, quotidie possunt. Summa igitur in vniuerso post summum vniuersi principium sunt mentes tanquam specula summi. Capiamus quæ in mente sunt summa, id est, intellectum ipsum & voluntatem, rursus quod intellectus est voluntateque summum, in illo quidem supremum est intelligere, in hac autem velle. Verum quid est vltius in intelligendo supremum? Quid iterum in volendo? In illo quidem claritas summa, id est, exactissima verorum omnium certitudo. In hoc aut plenissimum gaudium, id est, integra bonorum omnium securaque fruitio. Nihil vltius possumus vel fingere vel optare. Quid ergo Deus est? Certè quantum in mente ipsius speculo refulget ex eo, Deus est clarissima & certissima veritas, omnium fons verorum. Verissima quoque claritas claritatum. Rursus bonitas infinita, quæ dum seipsa gaudet, bonis gaudet innumeris. Gaudium quoque immensum seipsa bonum, per quæ seipsum faciens vt alia bona sint, quibus gaudere quis possit.

*Ipsa certitudo vel claritas idem est atque ipsum gaudium.*

**Q**uando dicimus Deum claritatem esse vel gaudium, non claritatem, vel gaudium in voluntate ponimus, sed in seipsis. Neque volumus illic claritatem à gaudio discrepare, vbi veritas à bonitate non discrepat. Est itaque claritas gaudens, gaudiumque clarum. Claritas, inquam, gaudio non tanquam realia gaudens, sed seipsa. Gaudium non alia claritate clarum quam seipso.

*Sicut lumen non indiget oculo, sic veritas non indiget mente.*

**A**liud quidem oculus est, aliud radiolus. Quidam ingenitus oculo, aliud rursus amplissimum Solis lumen. Radiolus ille propria est oculi claritas & in oculo, lumen verò illud communis est omnium claritas, claritas non agens oculo qui ad ipsam percipiendam est institutus. Similiter aliud mens, aliud eius propria claritas, id est, ra-

dius ei insitus ab initio. Aliud Deus supereminens claritas claritatum, claritas propriè mente non indigens, quæ ad ipsam percipiendam procreatavidentur. Gaudium gaudiorum omnium, quæ à voluntate quolibet sentiunt, gaudium non indigens voluntate qua gaudeat. Siquidem ipso dumtaxat gaudet vnaquæque voluntas.

*Summa certitudini nihil est incertum.*

**S**i Solis lumen esset non solum in causa visus visibilisque ipsius, sed etiam omnium causa causarum, ac visus ipse foret præstantissimus Solis effectus & proximus, cum perfectio à defectu dari non possit, imò verò opus sit visu perfecto ad indigum generandum. Certè quicquid in visu bonum præcipuè optandumque apparet, id totum, ac multo excellentius esset in lumine. Optimum verò optabilissimumque est oculo, vt neque lumen lateat ipsum, neque cum patet offendat, imò vehementer oblectet. Lumen igitur & si non haberet oculum, tamen suo quodam pacto, id est, seipso tanquam sublimiore visu sese clarè videret, coloresque omnes in se fonte colorum intueretur. Videret quoque se id esse quod omnes vident oculi, omnesque per ipsum videntes, passim ipsam quoque videret. Mitto nunc, quod Platonici putant lumen cuncta videre. Deus autem tota mentis causa est & proxima, ac mens opus est Dei summum. Quicquid ergo summopere menti est optandum tanquam optimum, totum hoc iam habet Deus modo supra quàm dici possit præstantiore. Quid verò vel intellectui optabilius quam verorum omnium certitudo? Vel voluntati quàm gaudium omnibus gaudens bonis? Non satis esset menti, (eam interroga,) non satis esset ipsi veritatis tota possessio, si eam veritas ipsa quam possidet lateat. Non satis omne bonum, nisi incundum curet & gaudeat omni. Claritas ergo diuina quamuis intellectu propriè non vtatur, sed tamen ipsam minimè latet. Neque latet eam alicubi quicquam, quando per ipsam vbique omnia patent. Quid enim alicui posset esse certi, si certitudini ipsi, per quam sunt certa omnia, non esset certum?

*Vbi præcipuus mentium finis, ibidem est earum principium.*

**S**ed repete hunc in modum superiora, effectus quilibet impellente natura causam appetit, vt vnde efficitur, ibi quoque perficiatur. Causam quidè proximam, si talis sit vt in se remotarum omnium cau-

farum munera colligat, appetit propriè, atque sub huius forma remotam. Propriam enim distinctamque formam à proxima potius causa quàm à remota sortitur. Igitur in proxima illa, quam dixi, vnde proprium principium habuit, proprium quoque collocat finem. Sicut ignis in concauo Lunæ, potius quàm in Sole, vel Marte terminum assequitur naturalem. Et aer in ignis concauo, non in Venere vel in Ioue. Cum igitur mens quælibet, natura duce, siue in summa ipsa omnium certitudine summè gaudente, siue in summo omnium gaudio summopere certo, dumtaxat proprium præcipuumque finem statuerat tanquam in causa proxima, quis non videat Deum ipsum, qui proxima est mentium causa, esse summam ipsam, ut ita dixerim, certitudinem gaudiumque supremum? Certitudinem, inquam, non alicuius, vel in aliquo, vel ad aliquid, sed suiipsius, in semetipsa & ad seipsam. Alioquin neque pura simplexque esset, neque summopere summa. Cum igitur nulla ex parte terminum vllum, mensuramque accipiat, immensa relinquitur. Quapropter nihil prorsus admittit incerti. Nihil igitur siue in ea, siue extra, vel esse, vel fingi vnquam potest quod ipsi certitudini sit incertum. Quæ dum supereminet omnia, supereminenter est omnia. Neque aliunde in essendo agendoque dependet, sed inde alia in utroque dependent. In qua cum non aliud sit esse ipsum, atque certam esse imò certitudinem esse, nimirum dum suiipsius est, similiter suiipsius est certa, imò ut loquar rectius, certitudo. Ac dum suiipsius, quæ cuncta mirabili virtute complectitur, certa est, proculdubio est certa cunctorum, imò verò omnium certitudo. Proinde lumen quoscuncta videntur, nihil est aliud quàm puræ efficacisque formæ spiritualis quædam amplificatio. Vbi igitur formæ puritas efficaciaque minimè terminatur, vbi lux pullulat infinita, inde lumen emanat prorsus immensum. Profecto quod est in corporibus perspicuitas, hoc est in spiritibus perspicacia. Quod rursus in corporibus visibile lumen, hoc in spiritibus est perfectio. Vnde corpora quæ ad spiritum magis accedunt, facilius vberiusque refulgent. Atque contra, quæ fulgent, sola spiritalem ex se propagant qualitatem. Igitur in summo spiritu lux viget & perspectio summa. In eo idem est claritas atque perspectio. Non dico Deum esse quandam perspicendi virtutem, quæ perspicendi egeat actu, neque rursus ipsum appello id quod perspicere nominatur, ne vel nixus quidam ad aliud videatur vel compositum. Sed ip-

so actus vocabulo Deum perspicientiam nuncupo, per se existentem, nec claritate quam seipsa perspicentem. Verùm quid modo dixi perspicentem? Quis enim non impropiè dixerit visio videt vel sapientia sapit? Non tamen vel sapientia insipida est vel visio cæca. Similiter ipsa perspicentia neque propriè dicenda est perspicere quicquam, neque rursus aliquid alicubi esse, quod non perspicuum illi sit atque perspectum: sicut enim perspicentia huic vel illi perspecta sunt hæc & illa, sic ipsi illi summæ infinitæque perspicentia perspicua perspectaque sunt omnia. Ibidem quoque summa abundat lætitia vbi summa claritas emicat, quæ lætitia est spiritualis origo. Imò idem est ibi claritas atque lætitia. Nihil enim vel in oculo, qui in corpore maximè spiritualis apparet, vel in ipso spiritu, aliud quicquam exhilaratio est, quam vel claritas ipsa vel illuminatio congrua. Quisnam ambigit omne ibi gaudium dominari vbi est omne bonum? Siquidem gaudium tanquam optimum maximè omnium exoptatur, atque ipsum est tum boni ipsius circumfundentis splendor & gratia, tum circumfusæ virtutis amplificatio quædam circa bonum.

*Deus est claritas latissima & lætitia clarissima.*

**V**bi igitur volumus rectissimè loqui; Deum ipsum neque intellectum propriè nominamus, ne intelligendi egeat actu, neque etiam ipsam intelligentiam, ne in quodam intellectu maneat, & alio quodam lumine repleatur. Imò claritatem ipsam mirificè lætam lætitiamque clarissimam, quam ita omnes ambiunt intellectus, sicut astra omnia Solem. Claritatem, inquam, radiis certitudinis suæ cuncta videntem, & ut videant efficientem, flammis insuper gaudij sui tanquam voluptate omnium genitrice singula facientem, facta quoque fouentem, fouendo rursus viuificantem, viua sensu mouentem, mora ratione trahentem, rapta deinde mente sistentem, consistentia tandem suiipsius veritate bonitateque prorsus implentem.

*Deus volendo res facit & mouet; potius quam intelligendo.*

**S**ed delectat nescio quomodo; ab eo quod in corporibus est pulcherrimum; ad optimum spiritum similitudine quadam rursus ascendere. Ergo quemadmodum sol Dei similitudo eadem luce in seipso fulget, & suo pacto calet, eodem quoque radio

singula illustrat & calefacit, verumtamen calefaciendo, potius quam illustrando, res facit & mouet. Sic Deus ipse solis exemplar, eadem claritate, & claret ipse sibi suo modo intelligendo, & gaudet ipse secum suo modo volendo. Eiusdem præterea claritatis radiis, vt vocabulis aliquando loquamur humanis, intelligit atque vult omnia. Verum non tam intelligendo procreat quam volendo. Vnde omnibus & naturis videtur esse tributum, vt appetitu quodam pro natura cuiusque, ac etiam voluptate sibi similia generent. Meminisse verò debemus, Deum sicut intelligendo se, intelligit alia, quæ sunt quidam ipsius intelligentiæ radij, sic volendo se, id est, seipso gaudendo velle alia simul illisque gaudere, quæ sunt quidam affectus ipsius effectus. Genusque actionis eiusmodi scilicet voluntarium, quia perfectissimum est Deo agentium perfectissimo conuenire. Quod enim voluntate agit libera, præstantius agit, quam quod impulsu naturæ necessariò impellitur ad agendum. Felicissima certè est actio in qua author suæ actionis est Dominus, vt ipse finem, & modum, & mensuram præscribat agendi, finem quoque proprium certasque vias operibus suis instituat. Profectò, si Deus ita naturali qualitate faciat sicut ignis calefacit caliditate, maximè omnium compositus erit, quandoquidem à naturalibus formis eius inter se distinctis, res innumerabiles procreabit, præsertim illas quæ sola possunt creatione produci, scilicet materiam ipsam & formas, vel separatas à materia, vel separabiles. Præterea, non vicissitudine quadam distribuet singula, sed cuncta simul effundet, imò confundet. Adde quod cum sit actus immensus, repente omnia coget, agitabit sphaeras mundi momento. Nihil relinquet in vniuerso contingens, consultationis auferet libertatem. Nunc verò quoniam omnia efficit voluntate, idcirco ea potissimum mensura qua vult nimirum facit, & mouet, & sistit. Non difficile intelligit vniuersa in quo intelligere idem est atque esse. Non difficile singula facit & curat, in quo idem est facere quod & velle iam facere. Intelligit ille omnia vera dum seipsum intelligit omne verum. Vult etiam bona omnia, dum vult seipsum qui est omne bonum. Alia diuinæ intelligentiæ voluntatisque ratio est, alia est humanæ. Homo tunc verè ipsas rerum rationes intelligit, quando ita præcipuè vt sunt intelligit. Hæc autem idcirco sunt veræ, quoniam ita sunt vt Deus intelligit, qui ipsa veritas est, qua & vera

sunt omnia, & verè passim intelliguntur. Humana voluntas singula ideo vult, quia bona. Singula verò creata propterea bona sunt, quod hæc ipsa vult Deus, qui ipsa bonitas est, qua & bona sunt, & bene singula volumus.

*Deus omnibus prouidet, præcipuè mentibus, quia sunt ex eo proximè procreata.*

Vnde constat causam primam voluntatis suæ benignitate omnibus prouidere, quia maximè sua sunt omnia. Certè cum sit maximè causa, tam in conseruando, perficiendoque causa est, quàm efficiendo. Præcipuè ad summum bonum, summa pertinet prouidentia. Quæ nihil est aliud quàm diffusio & conseruatio boni. Constat præterea sequentes causas, dum à prima generandi fecunditatem procliuatatemque accipiunt, prouidendi que suis ab eadem diligentiam adipisci. Si quis verò neget, mundum tum artificiosissima ratione, tum voluntate benignissima gubernari, hic mihi videtur neque rationabilem pulcherrimumque rerum ordinem in seipsis & inuicem, & ad totum, neque mirabilem singulorum commoditatem vbique singulis aptissimè seruientem, mutuumque rerum vsum considerauisse. Sanè comoda habitatio tanquam finis fabrum mouet, quasi agentem causam, vt certam quandam domus formam excogitet, ob quam forma rursus certam quærat materiam. Vbi finis mouet agentem, agens formam, formam materiam. Idem accidit in ciuilibus bellicisque consiliis. Quo fit vt finis sit causa causarum, ideoque omnes causas antecedit. Sunt autem naturalia omnia certi alicuius finis gratia instituta, cum singula ad singulos potissimū vsus conducere videantur. Pura, clauiculus palmitis, quem capreolum vocant, ad hoc natus est, vt vitem proximæ arbusculæ vinciat. Hic vincienti actus causa est vt ortus sit capreolus. Quia verò quod nullo modo est, id neque esse potest efficiendi causa effectui cuiquam, neque causas omnes mouere necessarium est actum huiusmodi & anterequas omnes vitis causas extitisse. Non autem extitit in corporibus nisi nouissimè. Ergo in natura quadam corporali rectrice corporum extitit longè priusquam in palmitē. Quæ quidem natura vitis artifex gratia talis actus per formam suam capreoli formam in tali quadam materia figurauit. Sed vtrum actus huiusmodi in natura illa præfuit secundum naturæ modum, an secundum propositum voluntatis? Certè secundum

dum vtrumque. At ex illo idem erat quod agentis forma quædam & affectus ipsius exemplar, ex hoc erat finis. Vbi autem artificiosa voluntatis propositum est, ibi mens. Quapropter præest omnibus corporalibus diuina mens, quæ corporalium omnium formas intellectuali modo complectitur. Singula ad suos dirigit fines, ad vnum denique cuncta. Maximè verò omnium mentes non solum Angelicas, sed etiam humanas, Deus curat & diligit, tanquam filias ex eo proximè procreatas. Cum enim indiuiduæ & separabiles à materia separatæ sint, non possunt ex præcedente, vel parte, vel materia confici, ex nihilo verò quod infinitè ab ipso esse distare videtur agere aliquid solius infinitæ virtutis est opus.

*Omnes mentes sunt indiuiduæ, separabiles à materia, sempiternæ.*

**Q**Uod autem mentes indiuisibiles, separatæque, vel separabiles à materia sint, inde patet. Quoniam rationem ipsam indiuisibilem, ac penitus separatam, per quam res multæ indiuisibiles separatæque sunt & noscuntur, rationem, inquam ipsam propriè in quantum, indiuiduam separatamque est, attingunt. Quemadmodum verò lineæ indiuisibile centrum non aliter quàm per ipsarum indiuisibile punctum, sic nos indiuiduam secretamque naturam, non nisi per virtutem indiuiduam & secretam attingere possumus. Deus quibus esse producendo tribuit temporale, iisdem prouidendo bene esse temporale procurat. Quibus autem æternum esse sua incomparabili largitate concessit, iis bene esse nō tam ad tempus dirigit quàm in æternum. Vnde his res ita disponit in tempore, vt quamuis non videantur his bonæ, qui ipsam non vident æternitatem, tamen sint apud illum optimæ semper, qui quo pacto tempus æternitate seruiat, non ignorat. Quod autem mentibus vitam tribuerit sempiternam, nunc ab ipsa ratione & luce breuiter perspicua rationis luce monstrabimus. A ratione primum hunc in modum. Si rei cuiusque ratio quæ propria speciei definitione monstratur, aliter se habere non potest, quicumque dubitat vtrum summa ipsa rationum ratio non aliter habere se possit, is tunc vel ratione non utitur vel abutitur. Summa igitur ratio est æterna, siue potius est æternitas.

Hæc mentibus omnibus passim sese insinuat, qua vbicunque placuerit pro arbitrio possint ratiocinari. Atque eoque quandam æternitatis suæ largitur proprietatem, quousque sub rationis ipsius munere, hoc est ratiocinatione æternæ rerum rationes, in quantum æternæ sunt, capiuntur. At rationis æternitas, ratioque æternitatis sua quadam definitione comprehenditur. A luce deinde hunc in modum. Immensam diuini Solis lucem inextinguibilem esse non dubitant, quicumque vmbralem eius imaginem in cœlesti Sole lucentem extinguere nunquam animaduertunt. Si quidem in summo puroque actus cuiuslibet actu nulla potest passio vel priuatio fingi. Sicuti neque vel in potentia infima ullus actus, vel in mera priuatione habitus ullus. Lux illa supercœlestis per omnes mentes supercœlestia cogitantes, quasi stellas, pro natura cuiusque latè diffunditur. Eatenus verò suam illam inextinguibilem seruat proprietatem, quatenus per eam quod extinguere non potest, ab eo quod extinguere potest quadam rationis luce discernitur, & qua ratione vel hoc extinguiibile sit vel illud inextinguiibile demonstratur? Nempe sub ratione inextinguiibilis proprietatis lux illa tributa est, vbicunque ratio inextinguiibilis cuiusque naturæ perspicitur. Et summus ipse naturæ lucisque cuiusque fons fiti quadam naturali propriè quæritur, amatur & tollitur.

*Marfilij Ficini Florentini ad Ioannem Caualcantem amicum vnicum de raptu Pauli ad tertium cœlum, & animi immortalitate.*

**N**ON licet nobis mi Ioannes, his temporibus ob Epidemiæ suspicionem vna sicuti consueuimus familiariter in terra vitam agere. Verum quidnam prohibet interim nos in cœlo, vbi nulla pestis formido sollicitat, nos versari? Ergo amice age iam refugiamus in cœlum. At, inquires, forsitan in quodnam potissimum? In illud certè cuius radiis inflammati tam diu in terra cœlestem vna vitam agimus. Nunquid meministi Ioannes cum olim nobiscum in ædibus tuis cœnaret vir ille probatissimus Bernardus tenerius noster quàm de raptu Pauli in tertium cœlum differuimus? Instauremus conuiuium illud hodie, vt in eo inuita Epidemia conuiuiamus.



## DIALOGVS INTER PAVLVM

*Et Animam, quòd ad Deum non ascenditur sine Deo,*

*Et de Fide, Spe, Charitate.*

## MARSILIVS.

**D**ic oro, beatissime Paule, si modo licet homini loqui, quomodo in cœlum ascenderis, & cur in tertium? PAVLVS. Absit à nobis, absit Marsili, procul impietas tam superba, vt illuc ascendisse dixerimus. Nolo enim me ipso in huiusmodi reuelationibus gloriari, gloria mea omnis solus ille rex gloriæ Deus. Non ego ascendi, Marsili, sed raptus sum in cœlum. Grauius elementa mundi altâ non perunt, nisi eleuentur ab altis. Incolæ terræ cœlestes non scandunt gradus nisi cœlestis Pater traxerit illos. MARSIL. Doce obsecro & hoc Paule, per illum qui te rapuit, quosnam ille ex omnibus rapit potissimum. PAVLVS. An hoc ignoras, quod nemo potest, quisquis vel rapit aliquid, vel rapitur ignorare? Rapit ille præ cæteris quem amat ardentius. Ardens amat amantem. Non vult benignissimus ille raptor abs te aliud, quo sceleriter rapiaris ab ipso, nisi vt vel mediocriter velis rapi, sed hoc quoque nunquam velles, nisi ille antea voluisset. Quemadmodum Luna non refulget in Solem, nisi à Sole prius accensa, sic ipsum non amas amatorem, nisi amore ipso te amante atque afficiente fueris inflammatus. Hunc rursus non inuocas instar echo, nisi prius te vocantem, non apprehendis eum sicuti neq; locum nisi comprehendentem. Finita quidem, vt plurimum capere potes, etiam si ab illis non capiaris. Infinitum verò capere nihil aliud est quàm capi. Et quemadmodum imago in speculo non recipit vultum nisi ipsam vultus aspiciat, imò etiam quando hæc vultum videtur aspicere, nihil hoc aliud est quàm aspici hanc vultu. Rursus quemadmodum actio motusq; non metiuntur nobis tempus, nisi tempus hæc ipsa reuera dimetiatur, sic anima neque respicit Deum, nisi ipsam prius aspicientem, neque iudicat nisi diiudicantem. MARSILIVS. Sed age, ô nimium dilecte Deo, doce nosterisio, cur in tertium cœlum maximè fueris

eleuatus? vt inuisibile illud videres quod & vbique est sicut in tertio. Ac si vsquam est, præcipuè est potius in supremo. PAVLVS. Non sic, ah nimium terrestris homo, non sic supercœlestia capiuntur. Mitte secundi cœli argutias à Mercurio adinuentas. Mitte sexti leges conditas, vt vultis, ab Ioue. Mitte septimi Philosophiâ, vt aiunt, hominibus à Saturno donatam. Non attingunt ista veritatem ipsam, Mercurij, Iouis, Saturni procreatricem. Vis Solem attingere quarto currentem cœlo in quo rex ille mundi suum posuit tabernaculum? Eia scande cœli tertij dorsum quarto contingam. Venus illic tibi protinus quoad ipsa poterit largietur quod alij præstare non potuerunt. Dare dicitur Venus amorem vulgo vulgarem. Auget certè enim Angelus egregiam viris egregiis charitatem. Charitatem, inquam, à triplici supercœlesti cœlo tam in cœlum tertium eiusque Angelum, quàm in nostrum animum influentem. Hanc siquidem sanctus Dei spiritus primum Seraphinis inurit. Illi secundo principibus principale huius mysterium obsequiumque iniungunt. Hi tertiam regentes sphæram accendunt ibi Veneris Angelum, vnde charitas insita vobis à Deo continuè alitur, adolescit atque perficitur. Quid plura? Vis ne dimissis ambagibus breuiori tramite Solis attingere Solem? Primum sit tibi cœlum fides, qua firmiter credas hunc esse tibi in primis amandum, à quo & in hoc ipsum habes quod possis amare quicquid vsquam ames, & quæ diliguntur id ipsum quod diligenda sint habent. Secundum spes, per quam præculdubio expectes ardentem redamari ab illo, quem nisi ante amatus ab eo amare non posses. Tertium charitas, quæ te & sponte cogat & necessario alliciat, cæteris omnino dimissis, illum amplecti, quo solo dimisso nihil possides, quem si possides solum nihil est ex omnibus quod dimiseris, sine cuius vlnis neque amplecti te ipsum vales, neque alia, neque illum. Hic ego, ô anima nimium vagabunda,

hic solam pretiosissima Dei penetralia penetraui. Quæ nisi à patre familias aperiantur, non videntur. Non autem panditur dominus omnipotentis olympi nisi mentibus hoc ipsum fide quærentibus, spe petentibus, charitate pulsantibus. Charitas autem aliorum finis est omniumque perfectio, cuius igniculis quondam accensus, Helias igneo quodam curru raptus ad cælum fuit. Cuius & ego flammis raptus sum ad cælum. Denique hoc tibi maneat alta mente repostum. Frigus à tenebris, tenebræ à morte dependent. Calor autem à lumine, lumen dependet à vita. Quapropter frigus ad tenebras, tenebræ deducunt ad mortem. Calor autem ad lumen, lumen perducit ad vitam.

*Curru fidei, spei, charitatis septies in tertium ascenditur cælum. Primo quidem per virtutes ciuiles purgatorias animique purgati.*

**T**Rino autem hoc cælo quasi vehiculo quodam, id est, fide recta, spe firma, ardentissima charitate, septies percurrentriplex cælum, vbi dulcem patrem patriamque reuises, vnde terque quaterque, id est, septies fœlix euades. Primo quidem horum trium meritis tria quoque virtutum tibi genera diuinitus donabuntur. Ciuiles virtutes & purgatorie animi purgati. Quæ quidem faciunt vt nescias vtrum in corpore sis an extra corpus. Quibus formatus exemplares denique virtutes attinges, quæ nihil aliud sunt quàm Deus. Videbis enim tractus à Domini spiritu à claritate in claritatem in tribus hisce generibus rationem virtutis magis gradatim magisque proficere. Quod quidem fieri non posse cognoscas, nisi propinquiore quodam rursusque propinquiore accessu ad diuinam ipsam summamque virtutis ideam, vt in eandem imaginem transformeris.

*Secundo in cælum itur tertium per regionem Planetarum, per cælum stelliferum, per chrySTALLINUM.*

**S**ECUNDOPER Planetarum septem regiones, quod cælum quasi primum vagumque est, ad sphaeram transibis octauam, quod est ordinatissimum syderum firmamentum cælumque secundum. Ab hoc quia motu gemino agitur atque diuerso, ad chrySTALLINUM, id est, perspicuum nitidumque te conferes, quasi tertium quoddam cælum, cuius vnus est motus & simplex. Ibi aquæ, quæ super cælos sunt, lau-

dant nomen Domini Ex huius vertice statim in empyreo, quod totum ardor quidam est saluberrimus, agnosces vitale illud Dei lumen, cuius exuberante bonitate tantus tamque saluber illic ardor accenditur Planissimeq; perspices, & diuinum lumen veritatemque ipsam in ardore illo, id est, amore potissimum habitare tanquam in tabernaculo Solis, & ardorem illum lumine nasci atque vigere.

*Tertio tertium cælum scanditur per mundum visibilem, per mundum phantasticum, per mundum intelligibilem.*

**T**ERTIO totum mundi corpus tanquam cælum vnum transibis oculis manifestum. Atque ad eius imaginem phantasia depicta tanquam secundum cælum te conferes. Deinde & vniuersum corpus visibile & imaginem corporis phantasticam dimittens ad naturam ipsam, qua necessario constat, & rationem, qua definitur intelligentia, perges. Quod tertium tibi erit in mente cælum super sensum & phantasiam. Hic subito intelligentiæ tuæ intelligentia diuina subrutilat. Quid enim aliud est ratio vniuersi partiumque illius, quam ars illa æterna, qua eum suus disposuit architectus? Si enim à corporeo quodam artificio materiam relicto ordine subtrahas, quod reliquum est, mens est artificis tuæ iam menti conspicua.

*Quarto tertium cælum petitur per spiritus irracionales, rationales, intellectuales.*

**Q**VARTO esto primum tibi cælum spiritus omnis infra tuum. Secundum tuus spiritus sit ob rationis munus quo irrationalia iudicat quidem, sed ab eis non iudicatur illis longè præstantior. Tertium Angelus, qui oculus quidam est lucidissimus, cui quidem nota momento stabili sunt, quæ tu temporali quodam discursu aucuparis. In Angelo Deum continuo conspice, tanquam lumen in oculo lucido & in momento stabili æternitatem.

*Quinto ad tertium transitur cælum per tres Angelicas Hierarchias.*

**Q**VINTO scito quemadmodum in te, qui paruus es mundus, tres sunt spiritus, naturalis in iecore, vitalis in corde, animalis in cerebro, quo solo finitum percipis lumen, ita circa ampliorem hunc mundum tres esse spirituum exercitus diuinorum, quasi tres sphaeras intelligibiles, circa diuinum centrum iugiter se voluentes. Sed

alios regionem mundi Lunæ subiectam præcipuè gubernare, alios cœlestia regere, alios super cœli verticem volitare.

*Tenebra lucida, lux tenebrosa, lux mera.*

*Novem Angelorum*

*Chori.*

**V**olito & ego hac & illac ad votum alis sublatus Seraphinorum. Et si nihil usquam reperio extra immensum bonum quod vniuersum & omnino intrinsecus imbuat & infinitè extrinsecus ambit, tamen quicquid reperio quod non sit ipsum bonum, video ex lucidis quibusdam tenebris & tenebrosa quadam luce componi. Scio neque tenebras posse seipsas illuminare, neque lucem à tenebris comprehensam ex se ipsa lucere, alioquin in se vigeret ac purissime plenissimeque luceret. Lucere ergo eā animaduerto ex ipsa luce in qua tenebræ nō sunt ullæ. Ideoque quādo lucet in tenebris, tenebræ ipsam non comprehendunt. Hoc autem est absolutum ipsum in se bonum, neque subiecti, neque causæ, neque graduum, neque loci, neque temporis limitibus comprehensum. Quoniam verò omnia naturali instinctu bonum appetunt, tanquam finem, quo solo perficiantur, concludo bonum idem esse principium à quo cuncta efficiantur. Hoc cum ex se & sui gratia efficiat omnia & perficiat, certè ad sui ipsius exemplar tanquam medium cuncta disponit. Est ergo principium medium, finisq; cunctorum. Et quia omnino indiuisibile est, in quolibet trium continentur & reliqua.

Finis autem actionis mouet quodammodo principium ad agendum. Principium mouet exemplar operis atque formam. Huc omnes beati spiritus assidue oculos mentis intendunt. Singuli tria hæc intuentur, sed diuersa ratione diuersi. Atque in his inspiciunt veras rerum omnium quæ in vniuerso sunt rationes. Seraphini finem ipsum proprius attentiusque quam reliqua contemplantur, Cherubini in fine principium. Throni in fine medium speculantur. Dominationes autem ipsum principium. Virtutes in principio finem, Potestates medium in principio, Principatus & simulantur omnia, tamen medium proprius, & ut ita dicam, libentius, intuentur. Archangeli in medio finem, Angeli principium in medio contemplantur. Felices animæ pro diuersis piæ vitæ meritis morumque ad Angelos diuersos similitudine nouem gradibus in sphaeris patriæ nouem, sequuntur nouem ordines Angelorum. Mit-

to libenter animas infelices, quæ infra Lunam sub tetra caligine vbi eas nouies stix interfusa coercent, nouem turbas malignorum spirituum comitantur.

*Dei lumen in ardore empyrei cœli resulget.*

**C**um dimissi spiritus tenebrarum subiecto è summa lucentium spirituum specula lumen mihi coruscavit immensum. Vidi illic Seraphinos amore ardentis immenso. In ardore huiusmodi lumen infiniti boni infinitum mihi resulsit. Sæpenumero cogitaueram ante raptum, si bonum ipsum est voluntatis potius quam intellectus obiectum, sequi, ut animus voluntatis flagrantia ipso bono fruatur, magis quam intelligentiæ claritate. Agnouit illic statim raptus me vera cogitauisse, cum viderem non Cherubinatorum scientiam, imo charitatem Seraphinorum Deo esse quam proximam. Merito cum boni natura sit ut appetatur, & appetibilis ipsius ratio ut sit bonum infinitum, ipsum bonum proximè sequitur flagrantissimus amor subitoque consequitur.

*Sexto in tertium confugitur cælum per tres Trinitatis personas.*

**H**uc age, me sequere sexto quantum potes o mens, propriè infiniti boni ipsius auida mens, propriè infiniti filia boni. Ah propera, nec te pigeat, nam potes! o bona mens, tantum quantum velis! Vbi enim sola voluntate proceditur & proficitur, ibi sequi nihil aliud est quam velle sequi. Bono igitur animo esto. Nèpè finis ad quem quodammodo sine fine moueris propriè est infinitum bonum, necessario principium à quo propriè moueris, est infinitum bonum. Quod quidem cum ex seipso sui que ipsius gratia sit omnium origo, certè ex se & sui gratia mouet omnia. Præcipuè vero ac propriè spiritum, præcipuè hoc ipsum & propriè appetentem. Pater tuus usque adeò bonus, quando non malè, id est, non frustra, tibi dedit ut naturaliter huiusmodi bonum usque adeò sequi velles, dedit simul & ut assequi quandoque posses & consequi. In rerum ordine, sicut nosti, bona sunt omnia, præcipuè quia pulchrè vtiliterque ordinata sunt, & bonum naturaliter appetunt. Si cuncta bona in rerum ordine in vna quadam communi boni natura conueniunt, in qua cuncta bona sunt vnum bonum, necessariò penes rerum ordinatorum, vnum bonum est cuncta bona. Sane natura illa communis & vna quæ in multitudine omnium iacet & continet-

tur ab omnibus, ab una quadam emanat forma quæ in seipsa super omnem multitudinem est, & cōtinet omnia. Sed ultra progredere, si quod infra rerum ordinem cogitas, dicis infinitè malum, cur non etiam quod supra rerum ordinem extat fateris infinitè bonum? sed bonum propagatio pertinet, quo enim & quando quælibet perfectiora sunt eo, & tunc magis propagari videntur proculdubio penes infinitum bonum existit infinita propago. Propago, inquam intima. Nihil enim infinitum reuera existit extra ipsum. Ibi est igitur pater & filius. Penes patrem bonum infinitè filiumque infinitè bonum infinitus viget & amor. Si quilibet trium æquè infinitus est, etiam æquales inter se sunt atque simillimi. Si infinita natura atque plenitudo cum nihil relinquat extra se sui totumque penitus comprehendet, non nisi vnica esse potest. Vnica est substantia trium, adde, & simplicissima. Si modo potentissima esse debeat, ac tam potentia in vnione consistat quam in diuisione debilitas. Iam igitur, ô anima, tria & vna, spiritus vnus intellectu, volūtate, memoria, constans, ætherem vnà tecum vnicum conscendisti cælumque trinum. Intra cælum tria in vno Sole vidisti æqualia inter se & similia; Formam, figuram, atque lucem Solemque in tribus his non triplicem sed vnicum iudicasti. Supra cælum in vna bonitatis ipsius natura propagantem inuenisti ab æterno propaginem & amorem. Neque tres in his naturas sed vnicam agnouisti in seipsa se iugiter propagantem, plenissimè similiterque amantem, & quod hic diuinitus aspexisti haudquam licet aliter vnquam homini loqui quam tres personas vnumque Deum.

*Septem circa animam septenarij.*

**S**eptimo considera tecum, ô anima, septem capitalibus sceleribus expurgata à septem malignis spiritibus libera, quam septem Planetarum munera extrinsecus ornant, vt felix appareas, septem Spiritus sancti dona intrinsecus imbuunt, septem Angeli Dei thronum circundantes ducunt, vt reuera sis felix, considera tecum septima hac lucis die in qua reuera quiesces, hora scilicet diei septima, qua clarissimè perspicias vt septies in ea luce sis beata quæ indulgere tibi dum misera viuis septuagies

(..)

septies pollicetur.

(..)

*Septimo, mens tertium cælum attingit  
dum considerat Deum in creaturis,  
creaturas in Deo, Deus  
in seipso.*

**C**onsidera tecum vnum trinumque supercœleste cælum, videlicet primo Deum patrem tuum in rebus ab eo creatis. Res deinde creatas in Deo. Tertio Deum ipsum in semeipso. In quod quidem tertium cælum optimè raptus sum olim, vt & ipse haud vltèrius pessimè rapere, & quicumque in terris miserrimè rapiunt, illuc tecum beatissimè raperem.

*Trinitas Creatoris, in nouem creaturarum Trinitatibus reperitur.*

**D**iuinam Trinitatem in rebus cunctis agnosces dum in eis nouem Trinitates considerabis, quas imitantur nouem ordines Angelorum. In vna scilicet cœli machina, figuram lucemque & motum. In quolibet spiritu supra cælum, substantiam & vim & actionem. In omni spirituum numero tres Hierarchias, in qualibet Hierarchia tres ordines, in quouis composito sub cœlo materiam, formam, virtutem. In omnibus mensuram numerumque & pondus. Rursus potentiam, ordinem, vtilitatem. Præterea principium mediumque & finem. In te ipsa memoriam, intelligentiam, voluntatem. In scientiis naturalem, rationalem, moralemque facultatem. In qualibet Trinitate primum Dei potentiam patremque refert. Secundum sapientiam & filium. Tertium amorem spiritumque benignum. Sic inuisibilia Dei per ea quæ facta sunt intellecta conspiciuntur.

*Definitio & diuinitas animi.*

**H**ic dum in rebus tanquam diuina Deum reperis, reperis & teipsum. Quippè si in corporibus inuenis spiritum, in tenebris lucem, in malis bonum, in morte vitam, æternitatem in tempore, in rebus finitis infinitum, memento te esse spiritum incorporeum, lucidum natura bonumque, immortalem æternæ veritatis ac stabilitatis immensique boni capacem. Hucusque primum sit tibi cælum è cuius vertice tam Deum quam te in rebus cunctis agnoueris.

*Quod res creata in creatore reperitur  
per rationes ideasque  
diuinas.*

**A**ccede amabo ad secundum, ut inde in Deo res omnes inspicias: cuncta Dei opera cernit in Deo quisquis dispositionem formamque domus in patrefamilias, regni in rege, artificij in artifice, scientiarum in sapiente, considerat. Semper tamen huius memor, quod quaecunque hi cum tempore & labore meditantur & agunt, aeterna veritas infinitaque illa virtus momento prout vult & facillime peragit, praesertim cum & intelligere in Deo non aliud sit quam esse, & agere non aliud sit quam velle.

Sicut cunctae naturales formae in vna materia, sic cunctae earum rationes in vno artifice congregantur.

Sed ecce video communem quandam in mundi machina molem. Intueor formas in mole diuersas. Scio aliud esse formatam molem, aliud formas esse formantes, & quia molem hanc tanquam fundamentum intelligo ordine quodam antecedere formas, segrego mente hanc ab illis, eamque vel in abyssum dispergi vel colligi in punctum seorsum excogito. Seruo autem utcunque possum formas. Sed in quo eas seruo? In vna quadam communi cunctis essentia. Cunctae enim communiter in eo quod sunt conueniunt. In essentia, inquam, indiuisibili formas prorsus indiuisibiles. Iam enim dimensiones ab iis omnibus segregauimus. Volo insuper ex qualibet rerum specie vnam hic existere formam. Et quemadmodum omnes naturales formae quae participatione quadam tales sunt vel tales, in vno quodam subiecto per se infinite patiente, si est, in prima materia, congregantur, sic omnes quae per essentiam tales sunt, id est, formarum rationes volo & video in vno quodam fonte per se infinite agente.

*Deus est infinita vitarum vita lumenque  
luminum.*

**V**bi actus est infinitus, est & vita, atque illa quidem penitus infinita. Si quidem vita est intimus & absolutus actus essentiae. In vita infinita nihil est quod non perfectissime viuat. Quod ergo factum est ab eo in ipso vita erat. Vbi autem perennis actus & vita viget immensa, ibi absolutissimum est intelligentiae lumen. Si quidem intelligentia est absolutio vitae reflexioque eius in semetipsam. Ergo vita haec est lux hominum, quae & in tenebris

lucet, sed tenebrae eam non comprehenderunt. Diurnum lumen sanis quidem oculis est iucundum, aegrotantibus molestissimum. Radius Dei bonae menti benignus aduenit paterque & gratia nominatur. Mala autem rigidus iudex est & furia. Per hanc lucem veram quae illuminat omnem hominem venientem in hunc mundum, modo vidisti res omnes in Deo ipsumque Deum. Quicquid enim est in Deo simplicissimo, est ipse Deus. Illa igitur series idearum quam in Deo intellexisti, diuina ipsa sapientia est, quae verbum Dei est apud Deum, atque ipse Deus, perque ipsum facta sunt omnia. Ideo & ipse Deus reperitur in omnibus & omnia inueniuntur in ipso.

*Mens reperit aeternitatem suam in rationum  
idearumque aeternitate.*

**I**nuenisti & hoc tu modo immortalitatem tuam. Quo enim pacto potuisses à mundi formis mortales condiciones secernere, & rationes inde immortales concipere, in aeternam Dei vitam intelligentiamque huiusmodi rationes redigere, actum illum cogitatione quodammodo, ut ita dicam, efficere effectorem, nisi ipsa immortalis esses aeternaeque Dei vitae & intelligentiae capax. Diffidant de sua immortalitate homines flagitiosissimi, quorum animulae quærentes vitam solum in regione mortis, iamdiu mortuae sunt vitiorumque coeno sepultae.

*Immortalitatis fiducia accepta ex gradibus contemplationis quatuor.*

**T**V verò confide mecum coelestis anima, quae dum apud Deum contemplaris veras creaturarum rerum omnium aeternasque rationes, quodammodo comprehendis cuiusque rationis eternitatem, aeternitatis rationem, veritatem aeternitatis.

*Gradus quatuor.*

**P**rofecto rationis aeternitatem sentis quando iudicas cuiusque rationem, definitionemque ad eò certam consistere ut aliter vnquam se habere non possit. Puta quod homo sit animal rationale, & quod circulus sit figura in seipsam conuersa, à cuius centro ad circumferentiam omnes rectae lineae ductae sunt aequales, necessariò semper fuit semperque erit verum. Rationem aeternitatis intelligis, quando aeternitatis naturam ita definis: Aeternitas



est momentum sine punctum per se semper stabile, cui neque antecedit punctum, neque succedit, ita mensura quietis & motionis, mensura est tempus. Aeternitatis veritatem cognoscis, quando probas in eo solum esse veram aeternitatem, quod ex se, & in seipso, sine principio ac fine quiescit. Veritatis cernis aeternitatem, ubi argumentaris, neque incepisse unquam, neque desinere veritatem. Alioquin fuisset veritas ante seipsam, foretque post seipsam. Nempe si coepisse dicatur, quandoque ante ab aeterno verum fuit, & non nisi per veritatem fuit verum veritatem ipsam quandoque fore. Ac etiam desinere cogitur, deinde in aeternum verum erit, & non nisi per ipsammet veritatem erit verum, veritatem aliquando extitisse.

*Immortalitas animi ex proportionem ad immortalia.*

**A**tende, anima subunda liquoris aeterni. Memento te non potuisse aeternum omnino obiectum attingere, nisi tibi aliqua cum illo inesset proportio. Ergo si non ab ævo, saltem vivis in ævum. Neque solum attingis cum aliqua esse aeterna, & qualia sint, argumentaris, sed etiam pro natura tua penetras, quando intimam illorum naturam, quasi in suas quasdam partes viresque distinguis. Imò etiam quodammodo comprehendere videris, quando definis. Mitto quod videri posset alicui, si mens sempiternam comprehendit rationem, ratione illa esse maiorem, ideoque aeternam, satis esto si suo modo capit eam æqualem saltem quodammodo esse oportere. Siue autem iam æqualis sit natura, siue capiendo fiat æqualis, tanquam à Deo rationum fonte obmutuum quendam amorem iugiter dilatata, sufficienter ostenditur mentem esse sempiternam, Deumque animam ab initio quantum ad essentiam vitamque, ut ita dicam, parem aeternæ rationi fecisse, postquam quotidie quantum ad intelligentiam & amorem quoad fieri potest reddit æqualem. Denique, quæcunque vis capit aliquid, pro natura sua capit, & ad suam retrahit rationem. Si ergo mortalis esses nunquam aeterna in quantum aeterna sunt, & sub aeternitatis ratione, nunquam rationis aeternitatem, aeternitatisque conciperes rationem. Sed sicut rubris oculis, & amaræ linguæ, rubra & amara sunt singula, ita mortali animo, mortalia cuncta indicarentur. Nunc ve-

rò tantum abest quod quæ sempiternæ sunt ritè contemplando caduca putentur, ut mens contemplari etiam à mortalibus singulis conditiones mortalitatis discernat, atque sub uniuersali ratione percipiat. Hæc à materia corruptioneque separare nunquam posset, nisi & ipsa multo longius esset ab iis seiuncta. Capis ergo in cælo hoc secundo aeternitatē tuam, quando hic rationis cuiusque aeternitatem pro viribus capis in Deo fonte rationum immenso.

*Mens Deum in seipso videt, ob nimium splendorem omnino videri non posse.*

**C**æterum, nunquid Deum ipsum in seipso comprehendens, quod tertium tibi superest cælum, in quo illa ipse arcana vidi, quæ non licet homini loqui? lumen solis perspicis in elementis, suspicis & in stellis, in seipso non potes inspicere, & tamen homo, si sapias, contentus es tantum esse solem tuum, ut capacitatem superet oculorum. Diuinam lucem similiter in rebus ab ea creatis agnoscis, agnoscis & in rerum rationibus creatarum. Sed absolutam in seipsa non sustines. Gaudes autem thesaurum tuum tantum esse, ut sit prorsus innumerabilis, innumerabilis, inquam, non quod tibi desit ars numerandi, quæ tibi illic est plenissima, sed quod ille virtutis gradibus summum artis exuperet. Satis tamen numeravisse videris, quando cunctis, quæ vel esse, vel intelligi possunt, dinumeratis, recta computas ratione, Deum ipsum tale nihil esse, & quando & quomodo innumerabilis sit eius virtus, intelligis. Satis vides quando, & quomodo sit inuisibilis verè vides. Satis comprehendis, quàm sit incomprehensibilis. Nunquam enim clarius veritatem ipsam intelligis, quàm cum rectè quo pacto super intelligentiam sit intelligis. Vbi summa lux, ibi summæ tenebræ; ubi summæ quoque tenebræ, ibi lumen summum. Vnde hoc nihil notius, nihil rursus ignotius, hoc nihil præsentius, nihil absentius, nihil magis visibile, nihil inuisibile magis. Hinc exclamât David: Nox illuminatio mea in deliciis meis.

*Rectius de Deo loquimur, negando & referendo, quàm affirmando.*

**V**erum quid ita in hoc cælo vides, non potes loqui, hoc est, absolute pronuntiare, atque affirmare. Quoties

de Deo alia negas, ita discurrens, Deus neque est corpus vllum, neque corporis qualitas, neque anima, neque Angelus, neque si quid alius cogitetur, verè negas. Quoties ad Deum alia refers ita comparans, Deus principium est, quia ab illo profluunt omnia, Deus est finis, quia ad illum omnia refuunt, Deus vita & intelligentia est, quoniam per illum viuunt animæ ac mentes intelligunt, verè quoque refers. At si affirmaueris, Deus ipse in se absolute est hoc ipsum quod vel reperi, vel cogitauit, valdè deciperis. Quippè si maior te est summus ille omnium author, non potest id esse quod tua intelligentia circumscriptum cogitur te minus. Si principiorum principium, finiumque finis infinitus est, non est aliquid horum quæ abs te adinuenta & comprehensa iam infinita videntur.

*Anima beata contenta est hoc ipso, quod bonum suum incomprehensibile sit. Neque esset contenta si comprehensibile esset.*

**Q**uid ergo an contenta viuis anima, quod vitam tuam non penitus comprehendas finiasque, quia sit infinita? Imò scio te hoc ipso gaudere, quod absque fine sit vita tua, bonumque tuum. Sufficit tibi ab incomprehensibili foeliciter comprehendere, neque tibi aliquid nisi sit incomprehensibile sufficit. Quicquid enim aut veri, aut boni offertur quod certos habeat gradus, quamuis quam plurimos adhuc plures intellectu requiris, & ulterius appetis voluntate? Vnde nusquam nisi in vero bonoque immenso potes quiescere, neque finem, nisi in infinito potes facere. Quippè quæ à solo infinito dependeas, atque inde vim habeas ratione aliqua infinitam, qua ad infinitum vergas atque progrediaris.

*Voluntas Deo fruitur, magis quam intellectus.*

**E**cce video, vbi quodammodo deficit intellectus sufficere voluntatem. Penetrat ecce charitas, quæ non potest omnino scientia penetrare. Infinitatem quidem prospicis, quamuis non clarissimè, hanc ardentissimè amas, hac gaudes vehementissimè. Vides tu quidem, quantum est tibi visibile, amas & quantum vides ipsa, & quantum vides abs te, quia nimis exuberat, non posse planè videri, & hoc ipsum te inuat maximè, quod

sine vlla, vel sollicitudine, vel satietate fruaris bono, quod cum sit infinitum, & infinitè tibi suppetit, & infinitè delectat. Hic si non infinita omnino ratione discernit immensum intelligentia lumen, tamen immenso amore gaudioque afficitur dum fruitur bono infinito voluntas. Quæ quidem si plena est, ad quam pertinet esse contentam, totus omnino contentus est animus.

*Mens immortalitatem suam metitur in obiecto suo, quod est sine mensura.*

**A**Nimus, dum in tertio cælo exactius admodum quàm in aliis, quàm immensus sit Deus, vt ita loquar, metitur, simul quantum propria vita naturæ temporisque, cuiusque mensuram excedat, agnoscit. Neque enim infiniti, imò infinitatis ipsius rationem attingeret animus, si vita eius finem esset aliquem habitura. Neque obiecto immenso magis quàm terminatis contemplando delectaretur, si in numero esset naturalium temporaliumque formarum. Quarum vires obiectis non quidem maximis sed mediocribus solum eisq; proportionem quadam congruentibus oblectantur, si vitæ vis qualis est intelligentia & voluntas, ultra quemlibet loci, temporis, gradus, finem sibi oblatum sine fine intelligendo, amandoque progreditur: certè vita ipsa loci limitibus non constringitur, certè temporis terminis non exceditur, contrariæ qualitatis gradibus non obruitur, determinati veri bonique præsentia non impletur.

*Cælestè lumen lumine cælesti perspicitur, supercælestè supercælesti.*

**D**ic age, quò lumine suspicis cælestè lumen? profectò cælesti. Dic ergo quò lumine vidisti modo supercælesti. Lux ista mundi sensibus manifesta vna quadam qualitas est, ergo diuersa corpora non aliter eam capiunt, quàm per vnā naturam illis insitam, & luci conuenientem. Natura huiusmodi perspicuitas nominatur. Quoniam verò perspicuitas in oculo est sensibili luci cognatio, quàm in cæteris hisce corporibus, est enim in eo perspicuitas sensus: idcirco lux postquam illi infusa est, reflectitur quodammodo in seipsam, quando scilicet, oculus sentit illam. Vbi videtur oculus non solum à luce pati dum suscipit ipsam, verum etiam in eam quodammodo non nihil agere dum suo modo indicat eam.

*Anima immortalitatem suam videt quando  
videt radium intelligentie infundi sibi à  
Deo atque in Deum reflecti.*

*Mens est Dei speculum.*

**E**Adem ratione spiritale lumen vnum quiddam est, id est, veritas ipsa. Hoc spiritus diuersi non capiunt aliter quam spiritalem quandam perspicuitatem eis innatam.

Quoniam verò in spiritibus præditis ratione perspicuitas huiusmodi lumini huic similior & propinquior inest, fit ut ij spiritus non solum id capiant, sed etiam iudicent atque ita reflectantur in ipsum. Vbi videtur lumen hoc spiritale intelligibileque, primo quidem in intelligentiam influere se ipsum minime deserens. Deinde reflueri in seipsum intelligentiam non derelinquens. Atque sicut Solis lumen prout in Sole manet est inuisibile, ut autem è Sole, effluit in colores est visibile, prout influit oculo eique naturale euadit fit visuum, quando inde refluit in Solem, tunc videns efficitur: ita Dei lux quantum in ipso absolute se colligit est super intelligentiam, quantum inde in rerum se explicat rationes, intelligibilis est, quantum infusa intellectui, ipsi fit naturalis, euadit intellectiua. Quando vero in ipsum Deum reflit, est intelligens.

Quamobrem circulus quidam hic efficitur mirifice lucens, ab ipsa diuina veritate in intellectum, ab intellectu rursus in ipsam, circuli huius principium finisque est Deus, intellectus est medium. Si huius circuli primus vltimusque terminus est æternitas, in quantum æternitas, certe medium est æternum quod quidem est particeps terminorum.

Quo enim pacto splendor ab æternitate fluens in mentē, rursus in æternitatē inde reflueret, per intelligentiam scilicet quæ rapit obiectum, & per voluntatem quæ transit in obiectum rapiturque ab ipso, nisi in mente vim suam æternitatemque seruaret? Qua ratione hunc mens suscipit, eadem per ipsum agit. Non enim potest præstantius per illum agere quam susceperit. Agit verò per illum absoluto quodam æternoque modo, quandoquidem eius radiis supra locum & tempus erectis indiuisibiles æternasque rerum rationes attingit, atque in ipsam sese æternitatem miris modis insinuat.

**O**Sagacissimum venatorem, qui in profunda hac mundi filua occultissima Dei vestigia inuestigat & reperit. O argutissimum ratiocinatorem, qui rationes rerum inuenit in summa omnium ratione, ô perspicacissimum rimatorem, qui adyta Dei penetrat quodammodo in eius abyssu, & ut summatim dicam, in iis omnibus peragendis speculatur in se Deum velut in speculo, suspicit se in Deo, velut in Sole, ô speculum diuinissimum diuini Solis & radiis illustratum & flammis accensum. Nempe ipse veritatis radiis vera vbique discernit, ac in omnibus veris & super omnia ipsam. Ipsius boni flammis bona omnia passim ardet & fitit, ac in omnibus bonis & super omnia ipsum.

*Corpora sunt umbra Dei, anima verò Dei  
imagines immortales.*

**V**ides, ô mea mens, vides esete Dei speculum quando intelligentiæ tuæ radij in eum ab eo immissi resiliunt. Si eius speculum es ( ut es absque dubio ) quandoquidem cum in te specularis teque in eo, sequitur ut quid ex Deo infra te vestigium quoddam duntaxat est & umbra, id in te imago Dei similitudoque sit. expressior, ut merito dictum, sit, ad imaginem similitudinemque Dei te esse creatam. Umbra corpus intuenti distinctè non repræsentat, imago autem ad corporis similitudinem expressa refert expressius. Mundi machina tanquam umbra Dei Deum tibi ipsum non monstrat, nisi eius ad te redigas ordinem & examine tuo clarissimo discutias umbram. Tunc demum in te tanquam imagine Dei mundus ex umbra fit imago, & in te tanquam vera Dei similitudine verè agnoscis Deum, quando probas hunc ipsam esse veritatem æternam veramque æternitatem.

Tempus autem eius esse umbram & temporalia umbratilia omnia. Postquam vera es æternitatis imago super umbram & umbratilia, quandoquidem quasi media horum hæc secernis ab illa, certe æterna, es nullis aut loci limitibus aut certi temporis terminis circumscripta. Alioquin non posses vel per immensum spatium tempusue cogitatione discurrere, vel ultra hæc ad indiuisibilem æternamque transire naturam.

*Mens quia est diuini vultus imago, Deum  
semper suspicere debet.*

**O** Imago Dei in mentis speculo, quam diu es in ænigmate, id est, vmbra corporis, cognoscis per speculum, sed extra vmbra facie videbis ad faciem; ô diuini vultus imago in speculo vultum aspice tuum. Quem aspicere nihil ferme aliud est, quam aspicere. Quandoquidem oculi illius radius ipse est, qui inspicit ipse est, qui à se ipso respicitur, cognosce te ipsam mens aliarum rerum cognoscendarum vsque adeo cūpida, quid es? ô mens, cedo quid es? Imago vniuersi exemplaris exacta, legitima patris omnium filia, supercoelestis Solis radius sempiternus, iugiter natura reflexus in solem. Deus ergo te libentissime tanquam suam imaginem intuetur, amat omnino te tanquam filiam, fulget tibi tanquam radio suo, iungitque te sibi. Ergo iam moribus & pietate ad exemplar compone te tuum, quo integerrime reformaris. Ama ante omnia patrem illum quo feliciter generaris, felicius regeneraris. Gaude duntaxat lumine sine quo neque alius potes vnquam neque te ipsa gaudere. Terribiles ante omnia tenebræ, quia & vita consistit in luce & lux in vita, & quo interiores eo terribiliores adueniunt. Horribiles extra corpus tenebræ cunctis, horribiliores intra corpus sunt melancholicis, horribilissimæ in anima miseris. Iucundum ergo aëris lumen omnibus, quia vitali spiritui cognatissimum est, rerumque innumerabilium varietate delectat & docet, iucundius lumen in spiritibus corporis est sanguineis, suauissimū lumen intimum menti beatis.

*Deus est ipsum gaudium, Per ipsum duntaxat  
gaudemus, ipso solo beate gaudemus.*

**S**i omnia vitandi doloris & consequendi gaudij gratia omnes agunt & absque gaudio ipso vitam ipsam respuunt, manifeste gaudium est finis omnium, est igitur & principium, quo mouentur & fiunt. Quid ergo aliud est gaudium ipsum nisi Deus? Bonorum bonum, gaudium gaudiorum.

Cū tantū his bonis gaudeas atq; illis, dicito mihi, si modo dici potest, quātum illo bono quātum uē idea illa gaudij gaudeat, sine cuius illecebris, sine cuius forma, neq; his bonis gaudes neque illis? Bono hoc & hac idea gaudent continue quicumque re aliqua gaudent vel ingrati. Sed non bene beateque gaudent, nisi grati, quibus mul-

to gratius hoc aduenit quam ingratis. Ergo si vis ipso bono ipsoque gaudio optime beatissimeque gaudere, memento in omnibus quæ tibi placent nihil tibi aliud placere quam ipsum.

*Marfilij Ficini Florentini Argumentum in  
Platonicam Theologiam ad Laurentium  
Medicem patria seruatores.*

**D**Ecreeui, Magnanime Laurenti antiquā grande illud Platonicæ Theologiæ volumen ederem tuo nomini dedicatum, in quo adhuc superest nonnihil quod examinatione indigeat, edere, si tibi placuerit, argumentum. Non ut huiusmodi argumento quasi quodam theologiæ præludio exercitatus accedas promptior ad ludendum, cum mihi videaris ipsam ludæ palmam iam consecutus, sed ut hoc interim pignore admonitus memineris, & meminisse me tibi debere, quod iam diu iure promiseram, & soluere quandoque velle, quod debere cognosco. Præsertim cum non tam hoc ipsum debeam quia promisi, quam id promiserim quia cuncta debebam.

*Tres contemplationis Platonicæ gradus.*

**T**Res verò sunt præcipui contemplationis Platonicæ gradus. Primus quidem à corpore per animam ascendit ad Deum. Secundus autem consistit in Deo. Tertius denique ad animam corpusque descendit. Tres quoque gradus nostrum continet argumentum.

*Contemplationis Primus gradus est adscensus  
ad animam, angelum, Deum. Ac de diuina  
intelligentia & amore. Cælum est  
forma sine materia, ut nonnullis placet.*

**C**onsiderabam nuper diligenter Aristotelis illud paradoxon, cælum materia caret. Rationem quoque Auerrois meditabar qua paradoxon Aristotelicum comprobatur. Quod videlicet materia cum natura sua informis sit, ideoque ad quamlibet formam æquē se habeat, omnesque vicissim capere valeat, à formis iugiter fluit in formas, vnde fit ut quod ex materia constat, formam suam quandoque possit amittere. Cælū vero formam propriam amittere nequit, tum quia nulla vsquam est illi contraria qualitas, sicut neque motus circulari motui suo contrarius reperitur, tum quia motum habet sine vlla digressione semper æqualem indefessumque, qui & in idē redit, principiumque rursus inchoat ubi fatigari videtur. Ex his concludit Auerrois

cœlum esse formam quandam per se sine materia existentem, quæ quamvis subiecta materia non indigeat, ipsa tamen subiecta est quantitati motuique secundum locum. Eiusmodi forma inter Physicas formas & Methaphysicas esse vult mediam. Naturales enim formæ cum quantitate quadam & in materia sunt. Formæ verò omnino super naturam tam quantitate quam materia carent. Mediam quandam formam esse vult ne ab extremo ad extremo a absque medio transeat, quæ quamvis habeat quantitatem, materiam tamen non habeat quantitatem, substantiam cœlestem existimat. Proculus quoque Platonius cœleste vehiculum animæ corpus esse putat, nullam tamen habere materiam.

*Forma sine quantitate magis quam sine materia potest existere.*

**H**is ego Aristotelis Auerroisquæ & Proculi gradibus ad cœlum vsque directis, conatus sum pro viribus ascendere super cœlum. Profecto cum formarum genus queat alicubi se à materia liberare, sicut in cœlo modo nobis apparuit, potest etiam alicubi absolueret seipsum à quantitate, ac etiam multo magis, quippe si ab alterutro dependeret, penderet potius à materia qua substantialis forma sæpe sustinetur, quam à quantitate, quam substantialis forma forte non minus sustinet quam sustineatur ab illa. Quod maximè in cœlo conspicitur, ut placet Auerrois, ubi formata sustinet quantitatis dimensiones. Adde quod multo magis cum materia quam cum quantitate congruit in ordine quodam generis atque naturæ. Quare si absque materia potest esse, longe facilius absque quantitate consistere potest. Præsertim forma illa quæ substantia est. Substantia enim cum accidens accedat absque quantitate, quæ accidens est, alicubi potest existere.

*Forma sine quantitate magis quam sine mole esse potest.*

**I**ta formarum ordo quemadmodum ab elementis in cœlum proficit in melius, dum umbra materiæ liberatur, ita super cœli verticem in aliud longe melius proficit, dum in animis angelisque etiam à mole quantitatis absoluitur. Depositaque diuisionis debilitate ob indiuisibilis naturæ unitatem fortitudinem adipiscitur. Consummatur tandem super illos in optimo

cum in Deo etiam liberatur à qualitate accidentis defectu. Potest autem à qualitate serui facilius quam à mole. Substantialis enim forma vbique in natura ipsa sustinet qualitates, nusquam vero sustinetur ab illis. Alicubi tamen in quantitate iacere videtur. Quod in formis naturæ infimis plane conspicitur.

*Cœlum autem est vita quadam visibilis aut natura vita proxima.*

**C**œlum quidem cum sine materia sit, spiritale quiddam quodammodo esse videtur Platoniciis magis quam corporale. Quid ergo cœlum est? Lux circularis circulusque lucidus sine materia, quemadmodum oppositum eius, quod est terræ imum, est materia sine luce. Cœlum igitur, ut Platoniciis placet, aut vita quædam est non occulta, ut anima, sed ob dimensionem, si vis, oculis manifesta. Aut saltem cum sit natura quædam vitæ propinquior quam cetera corpora, vita quadam viuere sibi magis admodum familiari quam cætera.

*Differentia lucis in cœlo atque elementis apud Platonicos ac Peripateticos.*

**S**ed iuuat gradatim à luce ascendere rursus ad lucem. Videmus in elementis ubi minus crassæ naturæ inest, facilius lucem adesse. Accensamque materiā quo magis extenuatur rarefcitque, eo purius perlucere. Quamobrem cœlum quoniam fulget summopere, materia carere probatur, & ob hoc ipsum quia caret materia, maximè fulget. Quod si quis dixerit, partes cœli densiores magis lucere quam alias, respondebunt Platonici, rariores partes lucere quidem magis, sed ob nimiam tenuitatem lucem videri non posse. Respondebunt rursus Peripatetici, aliud esse ex se, aliud ex alio coruscare. Ideo elementa, quia fulgorem capiunt aliunde, quæ rariores sunt facilius capere, Cœlestia verò quæ ex se splendent quo, densiora sunt eo vberius refulgere. Verum mittamus his quæstiones huiusmodi. Mittamus cœlum parumper, ne splendore corporeo prorsus hallucinemur.

*Quando purgamus lucem cœlestem, primo reperimus animam, deinde angelum.*

**A**ge cœlesti naturæ relicto si vis lumine atque motu, subtrahe quantitatis dimensiones, licet enim cogitatione subtra-



here, nā aliud est lumen cœli motusque, aliud est dimensio formaque: superest spiritus quidam, qui est tanto lucidior velociorque cœlo, quanto cœlum est lucidius & velocius elementis, substantia hæc incorporea animus rationalis esse videtur. Deme rursus huic motū, relinque lucem & qualitatem, potes enim demere. Nam aliud lux & qualitas est, aliud motus. Forma quæ deinde restat, est angelus, clarior admodum & velocior animo. Quia neque disgregat lucem suam motu neque actionem propriam, sicuti anima distrahit tempore.

*Præstat ascendere ad substantiam, in qua virtus non sit aliud quam substantia.*

**C**Æterum nondum satis naturam rerum purgasse videmur. Restat nobis adhuc, nisi me ratio fallit, accidens à substantia secernendum. Angelus enim substantiam habet & qualitatem. Verum querendum est primo, nunquid fieri hoc præstet, deinde utrum possit? Præstat nimirum. Nam vbi substantia aliud est, aliud qualitas, substantia huiusmodi cum sua natura informis imperfectaque sit, aliunde formatur atque perficitur, & in capienda sustinendaque qualitate quodammodo patitur, atque qualitas illa, quia est forma quædam, in alio scilicet subiecto se sustinere non potest, multoque minus ex se potest existere. Eget ergo tam causa quam subiecto, nec est integra plenaque omnino cum pro capacitate subiecti suspiciatur. Vnde necessario fit ab altiore forma, quæ quidem, ne sine fine vagemur, in se ipsa sit per se sufficiens ipsa sibi atque plenissima, sitque virtus vndique infinita, cum neque excedatur ab altiore neque à suscipiente aliquo finiatur. Adde quod totum illud quod ex substantia qualitateque componitur, quia diuiditur in partes, in virtute debilitatur, & quia componitur pendet tum ex partibus, tum ex eo artifice qui partes illas in vnum conciliauit, quæ cum diuersæ sint, ex seipsis inuicem non coissent. Quamobrem cum huiusmodi compositum neque quantum ad partes, neque quantum ad totum spectat, sit optimum, meliusque aliquid futura sit & substantia quæ non distinguatur à qualitate sua, & qualitas quæ non sit aliud quam substantia propria, ut tandem actus quidam omnino purus immensusque reperiatur, quis dubitet melius esse ut super id quod ex substantia accidenteque componitur, ad id quod est melius ascendamus?

*Rationes multe quod necessarium sit esse actum purum & infinitum.*

**P**ræstat igitur huc ascendere, sed nunc quid possibile est? Quid si est possibile forte rogas? Quandoquidem iam esse ita est necessarium ut probauimus. Quod si aliam exigis rationem, conducit ad idem huiusmodi ratio, quod substantia, quia accidentis est fundamentum, prior est accidente, & quia quod prius est à posteriore non dependet, potest substantia alicubi absque accidente consistere. Atque hoc melius est sicut ostendimus. Quare ne ab æterno in æternum huiusmodi potentia in rerum principio tam bona sit frustra, operæ precium esse videtur ut iam sit actu. Præsertim cum vbi summus actus est, & summa perfectio, ibi potentia actusque posse & esse sint idem. Ac si in rebus inferioribus minusque bonis, scilicet elementis mixtis, plantis & animalibus, quantum ad partes eorum spectat & reliqua, quod præstat ut sit iam, est à natura prouisum, quanto magis in rebus admodum melioribus & in summo naturæ quicquid melius esse probatur iam iam est & verius. Præterea quod melius esse monstratur in vniuerso non ob aliam causam melius esse censetur, nisi quia veræ rationi consentaneum est, conducit maximè ad rerum ordinem, decet præcipue rerum ordinatorem. Tale vero nefas dictu est, impossibile esse vel falsum. Rursus potentia & veritas tanquam bona naturaliter appetuntur. Atque hoc ipsum quod sunt, aut sunt ipsa bonitas aut à bonitate. Ergo quod vniuersi natura possibilis veriusque est, hoc est & melius, atque è conuerso, quod vniuerso melius iudicatur, idem possibilis est & verius. Item quod est melius magis est boni particeps. Non est igitur impossibile. Nam impossibile nullius boni particeps iudicatur. Accedit quod si actus purus infinitusque, quem disputando excoGITamus, infinite melior est quam angelus, & quam vniuersum cuius pars est angelus, quod totum est terminatum, necessario est infinitè potentior ad existendum, cum potentia bonum sit bonumque potestas. Imò etiam cum verè actuque esse bonum sit & nihil boni immenso desit bono, immensus actus infinite verius iam actu est quam cuncta.

Si infinita potestas duratione infinita nondum venit in actum, nulla vnquam alia potentia venit. Imò si infinitus actus quidem est ac illa potestas, non fit semper in actu, alius certe nullus erit. Si est semper in actu potentia quædam sua natura

omni carens actu quæ est infinite passiva, id est, materia, proculdubio est semper in actu potestas illa quæ actus est totus atque est efficax infinite, à qua passiva potentia sit possitque pati & patiatur. Sed quid curiose ineptique quærimus, vtrum possibile verumue sit in vniuerso esse immensum bonum necne? Cum nihil sit possibilis veriusque eo quo nihil potest potentius cogitari. Non esset autem immensum bonum nisi esset in eo quicquid melius iudicatur ut sit. Atque excedere mens nostra cogitatione, affectu, quibus per boni gradus absque fine progreditur, principij summi naturam, siquid boni cogitari posset quod in eo non esset, ac nisi illud esset immensum. Quid plura? si in summo principio omnium atque fine, vbi summopere inuenitur quicquid est appetendum, summa bonitas est & summa ipsa bonitas idem est prorsus ac summa potentia veritasque, sequitur quicquid circa ipsum melius iudicatur possibilis fore, imò iam verius esse. Omnino autem meminisse oportet, potentiam alicuius boni capacem, esse reuera aliquid atque in re aliqua vera fundari, præterea dependere ab alio quodam quod iam actu id habeat bonum, rursus quod actu bonum possidet ab alio proficisci quod actu sit ipsum bonum actusque cuiuslibet actus.

*De luce Dei, ac de umbra materia.*

**C**Æterum alicui fortasse videbitur natura illa in qua qualitas non discernitur à substantia sine forma luceque esse. Sed meminerit ille probauisse nos ad formam in se existentem ascendendum esse, est ergo illa substantia forma. Profecto sicut in rerum infimo, id est materia prima idem est esse & informe tenebrosumque esse, sic in summo idem est esse & formosum lucidumque esse, imò formam lucemque esse. Materia enim apud Mosem, tenebrarum abyssus est formarumque informe subiectum. Deus lux abyssus luminum, formaque fons formarum. Materia infinita est patiendi potentia. Deus infinita virtus agendi, imò infinitus est actus. Illa ergo potentia est potentiarum omnium quæ in patiando versantur. Hic actus est actuum. Et sicut in numero de materia verè dicitur materia, neque forma hæc est, neque illa, ita de Deo innumerabiliter dicitur & verè dicitur, Deus hæc forma est & illa. Vna materia est umbra rerum umbratiliū infima. Vnus Deus lux summa luminum. Materia ob nimias tenebras ignota

est, Deus ob nimiam lucem est incognitus. Nam si lux quæ est purior est & lucidior, nimirum Deus cum solus sit purus actus, solus lux est reuera dicendus. Si lux in forma quadam consistit totius quam subiecto, & formositas consistit in luce. Ibi solum vera lux, vbi mera sine subiecti inquinamento forma. Ibi solum vera formositas, vbi solum lux vera, veraque forma. Quapropter omnis forma & lux, quæ vel videtur oculis, vel cogitatur, quia finita est, umbra quædam est ad Dei formam atque lucem. Merito Deus infinitus est actus, quoniam vel subiecti, vel causæ limite, sicut diximus, non contrahitur. Hinc fit planè ut sit lumen immensum.

*Quantum lux Dei supereminet superficiem intellectus, tantum Dei calor centrum penetrat voluntatis.*

**C**VM verò à lumine calor trahat originem, est etiam ardor immensus, ardor in bono infinito infinite beneficus. Hunc nos ardorem voluntatis ardore potius quam scintilla mentis attingimus. Nam Deus quantum intellectus sui luce nos supereminet, tantum fermè bonitatis ardore se nobis inurit, ut nihil Deo excelsius sit, nihil quoque profundius. Quò amplior eius lux, eo intellectui naturaliter est ignotior. Quo vehementior ardor eo, ut ita dicam, certior voluntati. Deus ergo in summa intellectus cognitione quodammodo nox quædam est intellectui. In summo voluntatis amore, certe dies est voluntati. Vnde Orpheus Deum appellat noctem atque diem. Veruntamen diuinus splendor in animo beatorum, quando nox appellatur, omni temporali die longè clarior aduenit. Atque ob diuinum munus tanto pene clarior, quanto & Deus est, ut ita dicam, lucidior Sole, & animus purior ac serenior aëre,

*Lux in elementis, cælo, anima, Angelo, Deo.*

**L**VX in elementis facile perspicitur oculis, quorum complexio constat ex elementis. Lux in cælo quamuis amplior, difficilius tamen aspicitur. Remotior enim oculorum qualitas est à cælo. Lux in anima nullo modo videtur sicuti neque lux Solis à noctua, quia nimia est, neque ad eam corporalis sensus ullam habet proportionem. Sed rationalis animæ discursu aliquo cogitatur. Lux in angelo neque videtur, neque etiam cogitatur, est enim super sensus proportionem, & super temporalem discursionem

capacitatem, verumtamen intelligitur, congruit in anima cum Angelo in sua quadam intelligentia stabili potius quam mobili cogitationis discurfione. Lux in Deo quia etiam limites intellectus excedit omnino naturali hominis intelligentia non intelligitur, sed creditur potius & amatur, atque amata gratis infusa videtur, nempe huius amore accensus animus quo flagrat ardentius eo refulget clarius, discernit quoque verius fruiturq; suauius. Hinc Plato asserit, diuinam lucem non rationis digito demonstrari, sed perspicua piæ vitæ serenitate capi.

*Quid cælum, anima, Angelus, Deus, atque de differentia visibilis lucis & inuisibilis.*

**V**T autem nostræ disputationis ambages aliquādo paucis colligamus, cœlum esse dicimus lucem quandam absque materia quodammodo corporali. Animam lucem quandam sine quantitate magnam. Angelum lucem sine motu celerrimam. Deum lucem absque qualitate optimam atque potentissimam, cuius calorem voluntate prius certiusque & vehementius experimur, quam intelligentiæ lumen. In hoc potissimum differt lux inuisibilis à visibili, quod visibilis quidem tam in igne quam in cœlo extrinsecus veniens illuminat prius quam calefaciat. Inuisibilis autē contra intrinsecus agens, quodammodo calefacit antea quam illuminet. Ideo in illa à visu ad tactū. In hac quasi à tactu quodam in ipsum iniustum progredimur. Humana pulchritudo videtur priusquam ametur. Diuina vero amatur vt videatur. Sed in illa qui videt spe miserabiliter possidetur. In hac videre nihil est aliud quam feliciter possidere. Igitur frustra nimium contraque ordinem naturæ laborat, quicumque Deum absque singulari eius amore cultuque credit se possessurum, vel reperturum sperat antequam amaturum.

*Secundus contemplationis Platonica gradus consistit in Deo. Artificium uniforme & omniforme pendet ab arte uniformi & omniformi.*

**C**ommunis omnium opinio credit, & diligens sapientum ratio probat, artificium hoc mundi quod circa naturam suam ac motum artificiose rationabiliterque disponitur atque agitur, esse regique ab arte quadam rationali artificiosaque ratione. Profecto quantum ex huiusmodi artificio conuicere licet, quod & vnum &

vniuersum est, atque circa totum partesque vndique imà mirabili ratione constat & agitur, vt vix vlla possit ratio assequi, nulla queat omnino ratio imitari absque dubio, vnà cum Timeo argumentamur, artem illam mundi effectricem esse rationē quandam & vnā & vniuersam, vniformem, vt ita loquar & omniformem. Rationem, inquam, mundi totius rationes omnes in se ipsa omnium mundi partium complectentem.

*Deus nominatur ars, ratio, substantia, natura, vita, sensus, intelligentia, certitudo.*

**S**I ratio hæc absolutissima est & fons omnium rationum à qua substantia omnis, natura, vita, sensus, intelligentia producit penitus atque ducitur, nemo vsque adeo irrationalis esse debet, vt neget huiusmodi rationem esse substantiam stabilissimam naturam fecundissimam, vitam æternam, sensum perspicacissimum, intelligentiam lucidissimam, lucidissimam inquam, idest certissimam. Quod enim in corpore mundi lux & luminum & videntium est, id in ratione mundi effectrice est certitudo, luce hac tanto lucidior quanto certior & præstantior certitudo scilicet cuiuslibet, certitudinis quæ ex se certa sit sui, in se certa cunctorum, per se serenis mentibus clara certa que faciat omnia.

*Deus est veritas, verorum omnium fons, causa veritatis rerum atque mentis.*

**V**Nde etiam summa cuiusque veritatis veritas nominantur, à qua vera omnia fiunt, per quam indagantur vera, in qua vera cernuntur. Quam rerum percrutatores pro arbitrio vbicumque volunt de veris consulunt, cuius scintilla naturaliter insita vera rimantur, cuius radiis per omnia fusis vera inuenta discernunt à falsis, cuius examine vera iam discreta comparant inuicem & diiudicant, & cum species à singulis abstractas, in quibus rei cuiusque veritas consistit, intelligunt non nisi veritatem ipsam, id est, Deum intelligunt qui complexio & fons est omnium abstractorum, id est, idearum, sicuti Solis lumen fons est colorum.

*Descriptiones Dei communes secundum Platonicos.*

**Q**Vid ergo Deus est? ratio rationum, fons, rerumque artifex omnium, forma vniformis & omniformis, substantia immobilis omnia mouens, in motu status,

in tempore eternitas, in loco continens, in summis profunditas, summitas in profundis, in multitudine vnitas, in debilitate potestas. Natura fecundissima naturarum, fecunditas fecunditatum naturalissima aeterna viuentium vitarumque vita. Sensus sensibilibum quidem lumen & sensuum perspicacia, Sensus medullas sensibilibum in corticibus sentiens cortices in medullis. Intelligentia quoque talis vt & ipsa rerum intelligendarum bonitas sit, & intellectus cuiuslibet veritas & gaudium voluntatis.

*Rationes multa quod gaudium contemplantis superat sensuum voluptates.*

**G**audium, inquam, ex verissima bonitate & optima veritate optimum & verissimum. Hinc Plato diuinus inquit, ab his quæ sensibus offeruntur, quia veniunt ab extrinseco, nec verè existunt, sed impura breuique sunt, externam quandam titillationem circa corporis & animæ cutem falsamque & dolori permixtam & breuem fieri voluptatem. Ab his autem quæ menti ab intrinseco penitus se insinuant, quia intima veraque & pura & stabilia summaque sunt, intimam, veram, meram, stabilem summam voluptatem animæ medullis infundi, Proinde sensus atque sensibile ita se inuicem habent, vt propter eorum crassitudinem debilitatemque sese prorsus penetrare non possint. Intelligibile verò sua tenuitate vique mirabili illabitur in intellectus interiora, atque intellectus subtilitate virtuteque sua yndique intelligibile penetrat. Alioquin non posset mens rei intelligendæ naturam ab alienis discernere, in partes suas distinguere, intima eius cum extimis comparare. Quo fit vt voluptas mentis si quando rite contemplando reuera percipitur, interior vehementiorque sit quam sensus oblectamenta. Si tunc vehementer delectari solemus cum circa calorem vel frigus siccumue & humidum aut euacuationem repletionemue habitum corporis naturalem contrariis quasi amissum, contrariis iam recepimus, ceu quando nimium calefacti refrigeramur, in cæterisque similiter, quanta illum voluptate perfundi putamus? qui naturalem mentis habitum tenebris & malignitate deperditum, iam iam luce & bonitate resumit, totusque ad suam reformatur ideam. Ac si ex rebus magis magisque conuenientibus maior gradatim maiorque nascitur delectatio, atque si nihil conuenientius homini quam ipsa hu-

manitatis idea, quæ verus est homo, quid suauius quam & eam intelligendo in se complecti & in eam amando restitui? Præterea in omnibus pulchris bonisque amandis reuera nihil aliud, quamuis forsitan inscij, quam pulchritudinem ipsam bonitatemque amamus, à qua & ex qua pulchra bonaque sunt singula. Perinde ac si quis dixerit, gustui dulcedinis auido pomum vinumque placere, non quia pomum vinumue sit, sed quia dulce, atque idcirco nihil aliud in his quam ipsam dulcedinem affectari & dulcedine bonitatem. Igitur si omnium iucundissimum est re amata potiri, quid potest iucundius cogitari, quam illo potiri qui ipsa bonitas? Nusquam enim alibi re amata sed eius vmbra potimur. Ibi ergo placet idea nostra, est enim sibi quisque charissimus. Ibi solum plenissime delectamur vbi solum verissime nos reperimus. In nostra idea ideæ placent omnes. Pulchritudo oblectat in omnibus omnes in bonitate nos implent. Atque secundum formam propriè ibi ipsa gaudij idea gaudemus. Quo fit vt tota gaudij illic solum plenitudine gaudeamus. Si vbi est bonum hoc & illud ibi gaudet hic & ille, certè vbi est ipsum bonum, ibi est ipsum gaudium. Si nullus verè viuit aut sapit nisi qui propriè vita ipsa viuit & sapientia ipsa sapit, proculdubio nullus verè pleneque gaudet nisi qui propriè gaudio ipso gaudet. Denique cum finito pulchro & bono finite lætemur, certè infinita pulchritudine bonitateque innumerabilium formarum bonorumque fonte infinitè gaudemus.

*Gustus animi amaro corporis humore infectus, diuinorum saporem aut nullo modo aut vix & rarissime gustat.*

**S**ed tanti huius gaudij vix & raro admodum, ah nimium miseri, in terris participes sumus. Et nunc quidem exilem quandam eius vmbra ac momento prætereuntem nostræ mentes ægrotæ percipiunt. Quarum naturalis gustus, prohi dolor, amaro corporis huius humore nimium est infectus. Vnde efficitur vt cœlestis ille saluberrimusque sapor vel non sentiatur vel offendat interdum vel leuiter breuiterue delectet. Acutius inter nos aliquando gustant vehementiusque & diutius oblectantur qui magis fordes labemque corporis, morum contemplationisque studio à natura mentis abstergunt, sed pauci quos æquus amauit Iupiter aut ardens euexit ad æthera virtus. Qui nam isti sunt, o amice? Hi certè sunt quibus à vitæ magistro dici-

tur. Iterum videbo vos & gaudebit cor vestrum. Gaudium vestrum erit plenum, nec à vobis vnquam auferetur. Tertius contemplationis Platonica gradus. Cur, anima in corpore difficile diuina cognoscat, & quod sit immortalis.

*Primum mentis obstaculum ad lucem intelligibilem intuendam, quia est coniuncta corpori.*

**I**Gneus est ollis vigor & cœlestis origo, Seminibus, quantum non noxia corpora tardant, terrenique hebetant artus moribundaque membra. Hinc metuunt cupiuntque, dolent, gaudentque Nec auras respiciunt, clausæ tenebris & carcere cæco. Quid in his carminibus Platonici Maro noster voluerit, videamus. Anima tenebroso corporis huius carcere circumsepata mirabile veritatis lumen & vera quæ mirifice in illo refulgent, minimè percipit, quia minimam ad illud habet proportionem. Defectus autem proportionis huiusmodi tribus ex causis prouenit. Prima est. Quoniam anima forma quædam est coniuncta corpori. Illud vero lumen est forma penitus à commercio corporum segregata. Huc tendit quod inquit in Methaphysicis Aristoteles: Intellectus noster se habet ad illa quæ in natura clarissima sunt, tanquam noctuæ oculos ad Solis lumen. Ad idem spectat quod scribit in Metaphysicis Auicenna: Quemadmodum paralytici lingua oppressa quodam humore, certum gustum saporis amittit, quo expurgato recipit gustum; ita intellectus humanus ob corporis mortalis coniunctionem quasi paralyticus, id est, naturali eius sensu orbatus est ad illa quæ incorporea penitus sunt & æterna. Atque sicut humor linguæ actum gustandi adimit, non virtutem, quod in eo apparet qui iam purgatus gustandi recipit actum, ita corpus actionem intellectus circa incorporalia interturbat, sed potentiam non disperdit. Sed ex eo coniicimus, quia quanto longius animus tam morum cultu quam speculationis frequentatione se à corpore seuocat, tanto clarius incorporalia cernit. Atque vnà cum his etiam semetipsum, qui etiam ipse est incorporeus quandoquidem actione sua & affectu quodam innato aliquando corporum transcendit ordinem atque virtutem.

*Secundum obstaculum ad intelligibile lumen, quoniam animus ad corpus afficitur.*

**A**ltera causa quæ proportionem quæ ab initio diximus impendit, est eius-

modi, quod anima coniuncta corpori cum eo pacto quo hic est naturaliter moueatur & agat, certè naturalem conuerit affectum in primis ad corporalia, qualis affectus eam ab incorporalibus longè diuertit.

*Tertium obstaculum ad intelligibile lumen: Quoniam animus vertit aciem ad corpora.*

**T**ertia quod aciem cognoscendi frequenter vertit ad sensum & sensibilia eorumque imagines in phantasia reconditas, hæ verò imagines tanquam nubes quædam vsque adeo aciem mentis obumbrant, vt lucem intelligibilem mirabilem non discernat, dum splendor eorū vt plurimum non in seipso, sed in his nubibus intuetur. Vbi iam à seipso degenerantem, & quasi corporalem iam factum aspicit, & ob hoc neque verum ipsum videt, neque clarum, sed imaginum caligine obfuscatur. Similis autem videtur hæc affectio mentis, oculis rubra ophthalmia laborantibus, quibus lux non clara sicuti est, sed rubra videtur, colores quoque in luce non quales sunt sed rubri. Sunt etiam nonnulli quorum animus aliquando ita & corporis contagione & corporalium nebulis obfuscatur, vt rerum spiritualium radios omnino nusquam videat, instar oculi qui opprimitur cataracta. Caterum quando corporales hæ sordes quodammodo abluuntur, ab animo incorporalia aliquantum prospiciuntur, quando vero penitus diluuntur, subito intelligibile lumen, intelligibile omnium radiis plenum intelligentiæ oculis sese prorsus infundit. Quod quidem vbique est, & natura sua intellectuali oculum, cum primum fuerit purgatus, illustrat, sicut lumen visibile visum. Atque sensibilia omnia multo clarius in luce intelligibili tanquam in primo fonte refulgent, quam in luce quæ, reuera illius est vmbra. Meminisse vero oportet, animam & occupatam in mole corporis fabricanda regendaque & in diuersas actiones distractam perturbatam ad spiritaliū radios, aut nullo modo, aut plurimum neglectæ & leuiter aciem vertere, adde, & oblique. Quippe etiam quando paulò attentius pro viribus aspicit, quia ipsa coniuncta est corpori, sapissimè ad coniuncta se flectit, id est, ad corporalium nubes in phantasia volantes.

Phantasia etiam radios spiritualium cum primum menti subrutilant corporalium simulachris induit, ideoque mens aut nullo pacto aut vix obscureque videt. Sed quan-



do & seiuncta est à corpore & à corporis labemundata, ad incorporalia solum tota intentione conueritur; quorum vberissima lucere fulget ad votum. Cuncta in ea clare discernit tanquam & clarissima in seipsis & intelligentiæ intima. Hoc autem assequitur quando perfecto temporis orbe increatam exemit labem, purumque relinquit æthereum sensum atque auræ simplicis ignem.

*Ratio immortalitatis animi, quoniam intelligit incorporea sine corporis instrumento, attingit formas separatas, separatque coniunctas.*

**Q**Uod autem animus noster queat secundum substantiam separari à corpore, atque deinde in seipso manere, ex hoc in præsentia intellexisse sufficiat, quod intellectus agit sine villo instrumento corporeo, quando scilicet per omnia corporalium genera Speciesque discurrens, ascendit inde superius ad ordinem spirituum, illaque in genera sua speciesque distinguit. Per instrumentum vero corporeum, quod etiam particulare est, non posset nisi corporea & particularia comprehendere. Si absque corpore potest & seorsum ab illo viuere atque intelligere. Adde quod secundum actionem quæ & à substantia eius est & in substantia permanet, ipse non modo attingit quæ separata æternæque sunt, quando inuitus etiam phantasiæ fallaciis probat talia quædam in rerum ordine esse debere, verum etiam vi sua separat à materia formas, quando in rebus naturalibus secernit à singulis speciei cuiusque naturam. Plotinus & Proculus aiunt, quoniam essentia actionis & principium est & fundamentum, ideo mentem quæ actione se à corpore seuocat abstrahendo posse multo magis secundum essentiam seorsum à corpore viuere. Themistius arbitratur, difficilius esse naturas separare coniunctas quam formas percipere separatas, vnde concludit, intellectum posse separatas formas attingere, quando quidem coniunctas naturas pro arbitrio separat.

*Ratio immortalitatis animi, ex proportionem ad formas separabiles atque ex accessu ad separatas.*

**N**ATURÆ huiusmodi naturalia familiarique obiecta sunt intellectus humani, quamdiu naturale hoc corpus inhabitat. Continuè nam & naturali quodam instinctu intelligit eas à singulis se-

parando. Vnde inter hunc & illas necesse est ut proportio sit non parua. Ex quo concluditur intellectum esse ea conditione corpori iunctum ut sit separabilis, imò etiam quodammodo separatus, quando quidem obiecta eius domestica sunt species coniunctæ quidem singulis, sed non ut coniunctæ, imò ut separabiles atque separatæ. Nempe communia intelligendi modus hic est, ut quando phantasia hominem hunc & illum imaginatur, tunc intellectus prætermittis mortalibus hominis accidentibus, prætermittit hoc situ temporeque & illo, ad humanitatem ipsam se confert singulis communem hominibus, ubique semper vigentem, similiterque in aliis speciebus. Maximè verò tunc separatus apparet, quando interdum ultra conditionem, qua hic habitat species illas rerum naturalium, resoluit prorsus in rationes ipsas ideasque super naturam ab omni materia penitus absolutas. Et sicut ab imagine in phantasia reperta antè naturali quodam intuitu processit ad speciem abstrahendo, sic deinde à specie argumentando ad speciei rationem prorsus æternam. Videlicet quia necessarium sit naturam in multis vnam à forma vna super multitudinem proficisci.

*Ratio immortalitatis animi, quia intelligit non nihil, ad cuius intuitum proprium phantasma aliquando non est necessarium.*

**P**ROfecto quoniam ab essentia prouenit actio, semper qualis essendi conditio est, talis agendi, atque è conuerso. Quamobrem animus noster quia nunc ita iunctus est corpori ut separabilis sit aliquando, & permaneat separatus, ideo cognoscendo quavis conditione loci incipiat à singulis rerum formis omnino materiæ iunctis, tamen deinde procedit ad species coniunctas quidem effectum, sed & sua quadam naturâ & virtute intelligentiæ separabiles. Tertiò vi sua discussis à se parumper phantasiæ simulachris ad rationes iam separatas, quas in rerum ordine omnino absolutas existere nunquam excogitare posset, nisi saltem ad breuissimum tempus ab acie phantasmatum nubes expelleret. Sed cito ob regionis huius naturam consuetudinemque congregatæ iterum nubes, coelestium impediunt claritatem. Ex illa autem subita abstractione coniciunt Metaphysici, posse intellectum aliquando absque phantasmatibus intelligere. Vnde etiam sequitur posse seorsum à corpore viuere & clarissimè intelligere.

Anima in corpore secundum Platonicos procedit cognoscendo à singulis ad species, à speciebus ad ideas. Extra corpus è conuerso progreditur scilicet ab ideis ad species, à speciebus ad singula.

**V**erum quando separatus animus est, progreditur aliter quam in corpore, Nam in corpore animus à singulis ad species, à speciebus transit ad rationes. Separatus autem contra. Nempe à familiaribus suis naturaliter tunc incipiens, in diuinis rationibus naturali intuitu naturales videt species, ac in speciebus quasi subita quadam argumentatione, & tamen momento inspicit singula. Hinc circulus ab eo fit à tempore ad æternitatem, ab æternitate rursus ad tempus. Ergo quemadmodum ita coniunctus materiæ fuit vt separabilis foret & aliquando separatus existeret, sic deinde ita separatus existit vt rursus iungibilis sit & aliquando vinctus. A naturis procedunt vires, naturæ à viribus indicantur. Nam ab infinita potentia, sapientia, bonitateque regitur. Non igitur frustra vires sunt naturales. Hac argumentatione ad animorum circuitum sempiternum vti verisimiliter fortasse possunt Platonici. Eadem verissimè ad corporum humanorum resurrectionem Hebraei, Christiani, Mahumetenenses vti posse videntur.

*Quod obscure animus in corpore tam clare extra corpus intelligit incorporea.*

**P**roinde anima dum in materia & quodammodo sub tempore vitam ducit, naturales formas in materiæ infimæ videt umbra. Supernaturales autem formas, vt plurimum, sub naturalium videt Eclipsi. Quando vero extra materiam & super tempus agit vitam; tunc supernaturales quidem formas in summæ formæ lumine conspicit. Naturales autem sub radiis supernaturalium intuetur. Tunc igitur omnia clare, omnia tunc obscure, siquidem temporalia non aliter percipit quam per eorum imagines sensibus haustas, in eisque quasi purgatas. Non enim aliter inter hæc & animam est proportio. Ad æterna verò quamdiu immortalis corpore occupata est, difficile parumque conuertitur, & conuersa occursum imaginum corporalium sæpissimè hallucinatur & fallitur. Hinc illud Platonis nostri mysterium in Phædone. Animus in alio viuens, scilicet, in corpore, perque aliud aspiciens, scilicet per sensuum fenestras atque phantasmata, aspiciens, inquam, quæ sunt in alio, id est, tam species in singulis quam formas singu-

las in materia, nihil vsquam clare discernit. Quando autem viuens in se per se aspicit, atque in se illa quæ sunt in se ipsis, id est, rationes rerum, quæ cum in summa omnium ratione sunt in seipsis existunt, tunc omnia clarissimè perspicit, quia & intima & clarissima, quæ tanto fulgentiora in se illa sunt quam ista quanto puriora, veriora, potentiora.

*Præstantior sensus est in phantasia, quam externis longe præstantior in mentem quam in phantasia.*

**S**ed nunquid illa sensibus comprehendit? Sensibus certè quibusdam. Sensuum videlicet sensu. Quoniam præter sensus illos quos in æthereo animæ vehiculo exerceri Platonici opinantur, sunt & sensus nonnulli admodum clariores, quibus vt mens potest etiam absque corpore. Sane quinque sensus qui in nervis & spiritibus exercentur, emanant ab iis qui vigent in phantasia. Sed in hac quinque illi sensus, vnus sunt amplior illis & perspicacior, adde & stabilior, seruat enim quæ illo non seruant. Vnus est rursus in mente latior, stabilior, perspicaciorque quam in phantasia, quanto mens præstantior est quam illa. Si latior est nimirum ultra illa rerum porrigitur genera quæ sensibus & phantasia comprehenduntur. Si stabilior est, etiam seruat diutius quam phantasia. Si perspicacior, certius, clarius, splendidius quam illi cernit & quam illa. Cernit, inquam, interdum per illos & per illam imagines atque singula quando eo sese vertit. Cernit per se excitatus ab illa species & clarius quia propinquius. Inspicit in se ipso se ipsum, quando ad se reflectitur, potest autem ad se reflecti si se amat, querit, intelligit. Vbi appareret prorsus indiuisibilis & in seipso consistens. Nam forma quæ vel diuisibilis est, vel necessariò iacet in alio, nunquam reflectitur in se ipsam. Clarissime tandem rationes discernit quando ex se ad summam omnium inspicit rationem. In qua mentis visus rationem vimque lucis videt atque colorum, tanto hac luce hisque coloribus fulgentiorem, quanto ibi, scilicet in idea sua, est integrior & præstantior, quam in corporibus inde formatis. In qua etiam mentis auditus rationem sonorum audit sonantior, consonantiorque sonis cunctis quos vel auris audire vel phantasia queat imaginari. Eadem ratio est de cæteris intelligentiæ sensibus, quibus quisquis suauissimè optat frui de operam imprimis oportet vt corporis

sensibus utatur quidem, sed non fruatur.

*Qualis est amor talis amicitia.*

MARSILIUS FICINVS

Alamanno Donato dilectissimo  
suo, S. D.

**C**um amicitia, quod nemo dubitat, ab amore vim nomenque accipiat, nihil enim aliud est amicitia quam mutuus amor, stabilis quidam, id est, honesta consuetudine confirmatus, consentaneum est ut qualis est ipse amor à quo amicitia ducitur & dicitur, talis quoque semper sit amicitia. Qualem igitur nostram fore potissimum Alamanne dicemus? Certe cum non aliunde quam ab amore Platonico coeperit, haud aliter vnquam quam Platoniam nominabimus. Siquidem in exponendis nuper commentariis nostris in ipsum Platonis conuiuium de amore compositis, sic interim amare inuicem nos incepimus, ut quam Plato illic veri amoris ideam fingit, ipsi iam in nobis effinxisse atque profecisse videri possumus. Ab hoc ipso deinceps amore Platonico, Platonica quaedam amicitia nascitur, quæ in almo musæ Vranix gremio concipitur, alitur, augetur. Ea quandoquidem à musis originem ducit, nihil redolet, nihil sapit vnquam, nisi Musicum & consonans & concinnum. Huic vnibeniulentix (ut est apud Platonem) plus fidei est habendum quam vlli necessitudini vel consanguinitati. Ergo quid dubitas vltius, Alamanne? Vtrum Plato noster plures vno in corpore animas esse voluerit? Tantum abest quod in vno sint plures, ut sæpe quodammodo vel contra contingere videatur, quando videlicet vnā ferme in pluribus amicorum corporibus animam Platonico amore constanter perspicimus. Sed de his hactenus. Venio iam ad ea de quibus interrogas.

*Secundum Platonem vna in homine anima est, vires in anima vna vires.*

**Q**uæris nunquid Peripatericis illis adhibenda sit fides, qui Platonem quod plures in homine anima, scilicet rationalem, irascibilem, concupiscibilem collocauerit, calumniari non dubitant. Respondeo, equidem vnā tantum esse animam, per quam pluribus eius viribus hæc omnia facimus. Quemadmodum corpus ignis vnum tribus qualitatibus sufficienter agit tria. Luce enim fulget atque illuminat, leuitate celer ascendit, calore calefacit &

urit, atque in qualibet ignis particula pariter tres hæc qualitates vigent, suntque locis simul, quadam tamen inuicem proprietate distinctæ, sic animæ substantia vna eademque sufficienter posse videtur tribus eius viribus officia exequi tria, videlicet ratione, tanquam luce quadam, verum bonumque à falso modoque discernere. Appetitu insuper, quasi leuitate, ad ea quæ sibi placent facillime se conferre. Animositatem rursus iracundiæque feruore, ceu calore quodam, in ea vel consumenda vel propellenda efferri, quæ aliquando ipsam ab eorum quæ petit consecutione impedire posse videntur. Quid prohibet quo minus vna sit anima viribus tribus munita? quæ quamuis proprietate inuicem discrepent, vbique tamen in eadem anima simul sint, vbicunque tota simul est anima.

Sed operæ prætium est Platonem ipsum audire in quarto de rebus libro ita hac de re disputantem, ut hoc ipsum habeat certum, animæ substantiam esse vnā, vires verò eiusmodi simul in anima plures, sic enim inquit, Res vna eademque contraria quædam aut agere aut pari eodem tempore secundum idem & ad idem nunquam potest, quod siquid moueri simul & quiescere videatur aut id per aliam quidem sui partem mouebitur, per aliam vero quiescet, ceu si quis alteram manum moueat altera quiescente. Aut certe ratione alia mouebitur alias verò nequaquam. Quemadmodum sphaera in rectum quidem non mutatur, sed interim rotatur in orbem, dum fixa permanet circa centrum, Ergo centro manet, circumferentia voluitur. Sed iam ad naturam animæ veniamus. Sitiens anima prout sitit, nihil aliud quam bibere cupit, atque ad id prout sitibunda est solum impellitur. Siquid igitur ipsam interim retrahat sitientem, aliud certe quiddam in anima ipsa erit præter vim illam quam diximus sitientem, quod illa à potu quasi bestiam retrahat. Res enim, ut supra diximus, vna eademque nunquam per eandem sui partem circa idem simul contraria peragit. Nam quo pacto manus vna Sagittarij vnus arcum vnum, vno momento intendit simul atque remittit; Videmus autem sitientes nonnullos aliquando bibere nolle, horum igitur anima habet in se aliquid quod impellit ut bibat, aliud rursus quod potum vetat & impedit. Illud concupiscentiam, hoc rationem appellare solemus.

Quamobrem concupiscentia, atque ratio diuersæ inter se esse videntur. Diuersæ quoque sunt inter se concupiscendi vires

& irascendi. Sæpe enim ratio iubet nonnulla à quibus appetitus abhorreat, vt in Medicinis, laboribus, periculisque subeundis apparet, sed iracundiæ vigor nonnunquam excitus, vtpote qui tunc proratione capiat arma, efficit tandem vt ignaue concupiscentiæ indignati quod ratio mandauerat, inuita concupiscentia, agamus atque patiamur. Præterea quando ratio pugnare nos pro patria iubet, appetitus in ipso prælio, somno, fame, siti prouocatus, nos à prælio ad molliem & conuiuia reuocat. Iracundia verò dum in hostes inuehitur, inuita concupiscentia rapit ad prælium. Quod autem aliud quoddam sit vis irascendi, ratio aliud, quisnam, modo rationis compos sit, ambigat? Nempe in bestiis cum sit ira, nulla est ratio. Rursus in pueris ferè statim natis feruescit ira, ratione autem serius vtimur. Præterea sæpe ira ad vlciscendum nos impellit, sed ratio prohibet. Cum verò tam ira quam libido à ratione differant, libido tamen magis quam ira videtur à rationis dignitate discedere, tum quia ad viliora detorquet, tum quia ira sæpe aduersus vilem libidinis impetum indignata rationi opitulatur. Libido vero nunquam aduersus iram rationi fauere videtur. Hęc Plato. Ex quibus apparet Platonem non tres animas, sed tres vires in vna hominis anima posuisse.

### MARSILII FICINI

Florentini, quid sit lumen in corpore mundi, in anima, in Angelo, in Deo. Ad Phœbum Verum clarissimum Oratorem.

**S**alue semper in vitæ lumine Phœbe noster. Salue Phœbe cœlestis non externa, sed intima luce clarissime. Cum superioribus diebus Marfilij tui mens Platonici Solis radiis quasi seminibus quibusdam pro viribus grauida parere inde Solem eniteretur, infœlix nimium nescio qua sterilis imbecillitate naturæ, pro Sole peperit Lunam alieni luminis indigam. Ergo Platonici Solis natum tenebris meis obscurum quam primum Platonico Phœbo dicabo, vt eius saltem radiis illustretur. Tu vero accipe libenter quæ tua sunt, clarissime Phœbe. Et quia iure sunt tua, ingenti splendore tuo redde obsecro clariora.

*Quisque sensus attingit obiectum solum sibi conueniens.*

**O**Di maximè omnium tenebras, quarum culpa displicent mihi quæcunque displicent, vel quodcum illis sint, vel quod ab illis labentia relabantur deprimantque ad illas. Amo ante omnia lumen, cuius gratia & cetera diligo, vel quod cum illo sint, vel quod ad illa fluentia refluant reducantque ad illud. Ergo nunciate mihi mei sensus qui cætera penè innumerabilia nūciatis, nunciate mihi obsecro, quid sit lumen. Respondet auditus: Aëreus sum, satis esto si sonos tibi aëreos nuntiem. Respondet & odoratus, equidem non sum adeò lucidus, vaporeus sum, à me disce vapores. Quid aliena quæris à me? gustus ait: Nato equidem in liquore, indico tibi liquores. Noli à me, dicit tactus, extorquere quod nequeo, corpulentus sum, corpulenta nuntio, altius quære lumen.

*Descriptio luminis visibilis.*

**H**Inc admonitus ab infimo quo cecideram, ad altissima mei corporis nūc ascendam, vt inde lumen leuius altiusque cunctis accipiam. Eya agite, ô oculi mei lucentes, per lumen illud obsecro quo præcæteris imò quo solo delectamini, tantum iudicate reginæ vestræ rationi quid sit lumen. Respondet subito visus splendidus. Ego spiritus sum & splendor sum spiritalis, quocirca cum à me iure propria officia postules, largior libentissimè, quantum habeo. Lumen est spiritalis quædam & subita & latissima à corporibus naturæ eorum sine detrimento proprio emanatio. Nitoris scilicet cuiusdam à diaphanis, id est, transpicuis. Coloris autem ab horum oppositis, quantitatis figuræ, motusque ab omnibus. Congrega in vnum genus omne colorum. Quid erit hoc vniuersum, nisi lux quædam omnicolor, siue lumen factum in solidiore obscurioreque materia terræ iam opacum? Segrega terram illi permixtam, quid erit reliquum, nisi qualitas quædam, imò claritas actusque perspicui, sicut calor est actus opaci? Color quidem lux est opaca, lux autem color clarus, imò perspicui corporis colorumque flos quidam vigorque quasi vnicolor, actu, virtuteque omnicolor.

*Nihil clarius quam lumen ac Deus, nihil obscurius.*

**A**Dumbratio hæc est, ô mei oculi, potius quam pictura. Nihil vnquam audiri.

audiri obscurius definiri. O rem valdè miram. Quonam pacto fieri potest, ut nihil sit obscurius lumine? Quo nihil est clarius quando per illud clarent declaranturque omnia. Ascendam igitur hinc ad sublimem mentis speculam, ut saltem hoc videam inde, præter quod aliud quicquam alibi videre non possum, ô mens, quæ rectè cuncta metiris, dicito mihi, nunquid fortè lumen est ipse Deus, quo etiam nihil clarius est, nihil obscurius. Nihil clarius quàm Deum esse, esseque ad summum potentem sapientemque & bonum, hoc enim auribus nostris quæcunque ab eo sunt facta proclamant, ut nemo sit surdior illo qui tantum rerum omnium sonitum strépitemque non audit. Nihil contra obscurius quàm quid sit Deus, ut nihil sit tenebrosius illo qui sibi opinatur hoc esse clarissimum.

*Lux intelligibilis est intelligibilium causâ, visibilis visibilium.*

**R**espondet mens, Deum esse patrem luminum. Apud quem non est transmutatio per quam extinguatur vel minuat. Neque vicissitudinis obumbratio per quam vel vicissim subeat noctem vel patiat. Eclipsim. Respondet rursus Deum esse lucem in qua tenebræ non sint ullæ. Idem forma in qua nihil est informe. Formositatem quoque in qua nihil est deforme. Deus certè sicut mens quæ radius eius est monstrat, lux est inuisibilis, infinita, veritas, veritatis cuiusque rerum omnium causa. Cuius splendor, imò potius umbra est, lux ista visibilis atque infinita causa visibilium. Quoniam verò lucis veritatisque natura est, ut cæteris alia verè declararet, Deo cuncta per se verè clareque conspicua sunt. Perinde ac si visibilis lux cum sit colorum visibiliumque fons seipsam intueatur tanquam omnicolore, atque in se colores omnes sensibiliaque omnia videt.

*Lumine visibile, rationabile, intelligibile, divinum.*

**V**erùm ad tam sublimem speculationem, haud tam repente prosiliendum, sed gradatim ascendendum mens admonet, ne caligari cogamur ac splendore nimio obcæcari. Noli ratio confidere sensibus. Visus tibi non satis nunciat, cæteri nullo modo. Visus quia sensualis lux est, tantùm sensibilem accipit datque splendorem. Arque conuerso, quia sensibilem accipit datque splendorem, hunc sensualem

quandam lucem esse cognoscis. Ultra verò in die non licet progredi. Sed hinc à me discito, primum quidem me scilicet intelligentiam esse lumen quoddam intellectuale, quando quidem obiectum meum est intelligibile lumen, quod in qualibet re & querenda quæro & reperta reperio. Siquidem lumen cuiusque rei & ipsius veritas idem. Veritas est lumen intimum, lumen veritas se ad extima fundens. Discito deinde, scilicet rationem esse lucem quandam rationalem rationemque lucentem, postquam rationem lucis tanquam originem tuam ratiocinando tanta aviditate perquiris. Sed vis rationem lucis commodius assequi? In duce cuiuslibet rationis eam quærito. Ibi est ratio lucis ubi & omnium, in veritate summa quæ & ipsa summa certitudo & claritas est reperies veritatem lucis & claritatem. Siquidem idem est huius lucis quam quæris claritas atque veritas. Quid lux in Deo? Immensa suæ bonitatis veritatisque exuberantia. Quid in Angelis? intelligentiæ certitudo à Deo manans profusumque gaudium voluntatis. Quid in cælestibus? Copia vitæ ab Angelis, virtutis explicatio à cælo. Risus cæli. Quid in igne? Vitalis quidam vigor à cælestibus in sentientibus exhilaratio ipsius spiritus sensusque vigor. In omnibus summam intimæ fecunditatis effusio. Ubique diuinæ veritatis bonitatisque imago.

*Ad numinum gaudium cælestes ipsorum oculi ridet, splendore motuque gestiunt.*

**P**ostquam videmus à cælestium radiis qui à supercælestibus per cælestia tanquam per vitra quædam ad nos descendunt, cunctis dari perfectionem suam, vitam, sensum, certitudinem, gratiam atque lætitiâ; Necessarium est lucem in spiritibus super cælum esse formæ ipsorum perfectionem. Fecunditatem vitæ. Perspicaciam sensus. Clarissimam verissimam intelligentiæ certitudinem, gratiæ copiam, gaudij vbertatem. Horum omnium imago est splendor cæli, imò ad horum claritatem tanquam umbra, quia minus potest corpus cæli exactè claritatem spiritus imitari quàm terra cæli fulgorem. Ad spirituum cælestium mirabile gaudium cælum quasi corpus eorum, imò quasi oculus eorum, oculum enim Orpheus Solem appellat, ridet splendore motuque exultat, sicuti terra tanquam ab illis remotissima lugeat tenebris sinique torpet & ocio. Neque enim putandum est cælum moveri vel vi aliqua vel defectu. Cuius motus natura perpetuus est



locumque naturalem non relinquit. Substantia quoque absolutissima à qua nihil discedit sui, sed quodam excessu lætitiæ ob quam gestiens quiescere nesciat. Ad gaudentium numinum cantum ut Pythagorici arbitrantur sphaeræ choreas ducunt. Vnde ordinatissimis variisque motibus mirabilem conficiunt harmoniam. Ad astrorum risum qui præcipue radiis indicatur rident omnia quæ sub cœlo sunt quæ super terram. Ad tenebrastanquam ad tristitiam omnia moerent. Solemus enim ridentibus congratulari, flentibus contristari.

*Risus cœli ex numinum gaudio proficiscens, id est, lumen omnia fouet atque delectat.*

**Q**uod lumen sit risus cœli ex spirituum cœlestium gaudio proficiscens indicant homines, qui quoties lætantur spiritu ridentque vultu, splendent certè intus dilatantque spiritu, vultu quoque splendere videntur, oculis maximè, quæ maximè sunt cœlestes, quique in risu motum cœli instar efficiunt circularem. In lugentibus autem contra, obtenebrantur, restinguuntur, torpent omnia. Radij verò ex stellis ridentibus tanquam diuinarum mentium oculis benignissimè lætissimeque directi semina rerum non aliter omnia fouent generantque quàm struthij aspectus in ouum. Illorum enim virtute calor naturalis cunctis inferitur. Vnde vita oritur, alitur, augeatur. Hinc fit ut omnia volūtatem appetant quia non modo voluprate terrena sed etiam cœlesti lætitia generantur. Quis dum neget numina læto quodam affectu omnia mouere ac gignere? Cum videamus & ab animalium natura & ab arte omnia voluprate procreari ac perfici.

*Aliud lumen est, aliud calor. Atque lumen antecedit calorem.*

**Q**uod aliud fulgor sit aliud calor perspicuum est. Nam fulgent siue nitent quæ non calent ac etiam frigida multa. Calida sunt etiam multa quæ fusca, calor ignis penetrat sæpè qua non transit splendor, propagatur & splendor longius citiusque multo quàm calor, quod sit calor à lumine inueniet quisquis cogitabit etiam in spiritibus intelligentiæ claritatem origine quadam antecedere voluntatis affectum & in mundi machina Solis radios sequentis caloris originem esse.

*Lumen est quasi spiritale quoddam. Et spiritus sunt lumina quadam.*

**Q**uod lumen spiritale quoddam sit potius quàm corporale ex eo constat, quia passim sine tempore propagatur. Sine offensione implet perspicua corpora. Sine sui inquinamento se sordibus circumfundit. Præterea corporibus his facilius se largitur quæ longius à corpulenta mole discedunt. Vnde purissima corpora cœli & ignis, ut Platonici putant, in se lucent. Aer & aqua ab illis. Interiora terræ neque ex se nitent, neque ex illis. In superficie terræ lumen mixtionibus diuersis elementorum quatuor maximè terrenis infusum, diuersorum colorum induit formas quasi corpuscula, quorum quasi quædam animulae sunt scintillæ luminis illis infusæ. Quas si ab illis mixtionibus segregaueris atque seruaueris, videbis fortè quales sint rationales animæ à corporibus separatæ. Sunt enim lumina quædam olim in corporibus confusiora, sed iam in naturam propriam restituta, ideoque clarissima. Sic enim corpus ab anima diuersissimum illi quasi Eclipsim obducit sicut Luna coniuncta Soli, imò verò sicut mixtio terrena à cœlo alienissima cœleste lumen reddit opacum, facitque colorem ex lumine, sic corpus circa animam reddit ex intelligentia sensum.

*Lumen in Deo, in Angelo, in ratione, in spiritu, in corpore.*

**V**erum ut redeamus illuc vnde digressi sumus, cœlum quamuis in se, non tamen ex se, sed ex superiorum claritate & gaudio resulget & gestit. Ceu oculus ex spiritus claritate animique lætitia. Spiritus autem lætatur maximè claritate sua Solisque. Animus claritate spiritus atque mentis. Videtur autem lumen hoc esse mens resurgens per corpus, perspicuum quasi vitrum & inde iam facta visibilis. Mens autem lux in se ob nimiam vbertatem tenuitatemque penitus inuisibilis. Deinde lux in mente est veritas gaudensque gaudium verum. Tercio lumen à mente in corporibus est quædam veritatis rerum sensibilibus declaratio, pulchritudinis flos, oblectatio sensus. Sed repete rectius lumen in diuina mente intelligentiam supereminet. Inde Angelicæ menti lumen idem infusum secundum intelligentiam redditur, sed super terminos rationis. Diuinum hoc angelicumque lumen in mentibus hominum secundum rationem iam euadit. Sed superat phantasiam. In spiritu secundum phantasiam, super

sensum. In corpore vero maximè oculis quasi cœlestibus animæ stellis sensui iam familiare fit, sed non materiæ. In omnibus mentibus lumen est vita exuberans, Veritas clara certa que, lætitia plena. Inde in corporibus est diuinæ explicatio & effusio vitæ. Declaratio veritatis rerum & authoris gratia formæ, voluptatis incitamentum. Empedocles & Zeno volunt quemadmodum se habet ad carbonem flamma, sic quodammodo se habere lumen ad flammam. Atque flammam esse quasi lumen densum. Lumen verò flammam rarissimam, vitamque cunctorum. Plotinus & Proclus arbitrantur lumen esse visum quendam aspectumque numinum per radios cœlestium oculorum procul emissum. Atque esse spiritum quendam diuinum, qui & omnia videat, & quantum in se est ab omnibus videatur. Addunt eiusmodi spiritum extinguī nusquam, sed sydera sequi.

*Lumen est umbra Dei, Deus est lumen luminis.*

**D**Enique lumen est quasi numen quoddam in mundano hoc templo Dei similitudinem referens. Adeò ut Plato noster in libris de Republica hoc ipsius boni filium nominauerit. Est enim instar Dei aspectu ante omnia venerandum, est & amplificatio quædam subita & latissima absque detrimento sui ob exuberantem bonitatem largitatemque suam cunctis sese li-

bentissimè & felicissimè largiens. Causa conseruatioque & excitatio omnium nascuntur. Proinde ad vitam, veritatem, lætitiā, vnde descendit cætera subleuat. Absque huius præsentia mori cuncta videntur, huius autem præsentia reuiuiscere. Atque id quod optimum est diuinum humano generi commemorat cultum, ut neque impij negare audeant esse Deum, cuius simulachro sensibus nihil est clarius. Neque flagitiosi vel latere oculum vel effugere manum eius se posse confidant, cuius simulachrum est ipsa claritas, ac velocius quam dici possit momento per omnia dilatatur. Vnus in omnibus & super omnia Deus. Vnum in omnibus & circa omnia lumen. Lumen rebus à Deo factis est quidam diuinæ claritatis splendor. Atque, ut ita loquar, est Deus quasi seipsum finiens & ad operum suorum capacitatem sese accommodans. Deus autem ipse est lumen immensum in seipso consistens ac per se in omnibus & extra omnia per immensum. Fons ille vitæ, in cuius lumine, ut ait David, videmus lumen. Oculus quoque quo omnes vident oculi, ut inquit Orpheus, oculus qui cuncta in singulis inspicit. Ac reuera omnia conspiciunt in seipso dum esse se perspiciunt omnia. Vale felix vna cum diuino senatu vestro clarissime Phoebe. Saluta Marfilij litteratorumque omnium nomine Bernardum Bembum Venetum, imò etiā Florentinum populi que nostri delicias.





# MARSILIVS FICINVS FLORENTINVS

MATTHIÆ FELICISSIMO

*Pannonia Regi, in pace securitatem, in bello*

*victoriam, in victoria gloriam sem-*

(:.)

*piternam vaticinatur.*

(:.)

PROOEMIUM

(:.)

LIBRI TERTII.

(:.)

EXHORTATIO AD BELLVM  
CONTRA BARBAROS.



LATO noster Philosophorum pater, rex felicissime, Xenocratem Dionemque dilectos discipulos suos viros quidem sanctos, sed paulo seueriores tristioresque, quam decere Philosophos videretur, saepe monere solebat, ut Gratiis sacra diligentissime facerent, quo gratiosiores incundioresque redderentur. Quod autem Platoni nostro quondam erga discipulos duos agendum fuit, idem mihi nunc erga geminos Epistolarum mearum libros, quasi liberos meos video faciendum. Videore quidem frigido quodam, ut ita dixerim, semine grauidus, hos aliquanto seueriores quam Epistolares liberos deceat peperisse. Quis enim in saculis regionibusque ferreis aurea unquam opera vel argentea condant? Quamobrem Platonico more iam iubeo eos non modo sacrificare Gratiis, verum etiam iis sese tota mente vouere, quo gratiosiores urbanioresque euadant. Ecce iam igitur nonne vides? Repente nescio quo numine, scio certe felici quodam spiritu rapti versus excelsum palatium tuum tanquam propriam Gratiarum adem iter arripiunt, sperantes, ut arbitror, penes te solum Gratiarum trium, id est, aequi Iouis, almi Phœbi, verusis Veneris, splendore gratissimo circum-

fundi, unde tristiori illo statim vultu matato, clariores posthac letioresque intuentibus admodum videantur. Tu vero precor, rex felicissime, Marsilianos filios dum sacram supplices adem istam ingrediuntur, letis vegetisque oculorum tuorum radiis, sicut cetera soles, inspicias. Sic enim & ipsi mihi quidem quod sint solum, regia vero maiestati quod pulchri sint omnino debebunt. Atque ego duci meo Platoni, qui solum principem illum venerari iubebat in quo excellens sapientia cum summa potentia iungeretur, satisfecisse videbor. Neque Platoni solum ob ipsam Matthiae regis inuicti venerationem; sed ceteris etiam Gracis Philosophis, imò etiam Poëtis, Oratoribus, Historicis scriptoribus, denique omnibus proculdubio satisfecero. Hi enim omnes cum olim summo studio nihil aliud quam veram gloriam lucemque quesierint, tandem post multa lucis sacula in tenebras sub sauis Turcis, prohi dolor! stella, inquam, sub truculentis feris in tenebras corruerunt. Iacent ben caelestia liberalium doctrinarum artiumque lumina iamdiu in lyngo, imò verò sub loco longe quam sit lyngus obscuriore. Et quemadmodum veteres illi sancti quondam in lyngo iacentes Messiam, sic & hi sapientes Matthiam quasi Messiam, Matthiam miseri perpetuo clamore vociferantur, qui eos à lyngo, vel potius ab inspe-

ris in lucem vitamque restituat. Matthiam non literati, quos dixi tantum, verum etiam nationes quam plurima in Asia atque Europa sub Tartis immanibus, quasi Iudei sub impio Pharaone, miserabiliter seruitutes, Matthiam, inquam, tanquam Moysen alterum assidue clamitant, cui Deus mare diuidat rubrum, & qualibet passim inuia mirabiliter patefaciat, electos Dei filios ab extrema seruitute atque miseria prorsus liberaturo. Matthiam rursus Italia pulchra, atque ipsa bonorum omnium mater sancta religio, assiduus vocat clamoribus eius tantum manibus immanes Barbarorum manus feliciter euasura. Quamobrem gemini quoque liberi isti mei almam penes te gratiarum ad eum ingressi, preces iam tibi supplices pro communi omnium salute verbis eiusmodi fundunt. Surge age Matthia iterum auspiciis felicissime. Quem admodum saepe alias feliciter surrexisti. Surge precamur, o victor Hercules, dum tempus adest aduersus dira hac & immania monstra. Quae

tam nefarie depopulantur agros, oppida diruunt, deuorant homines, Legum omnium liberaliumque artium disciplinas, atque id quod miserrimum est religionem sanctam, non solum sordidissimis pedibus impie calcant, verum etiam quantum in eis est ex omni hominum memoria delent. Vicisti Hercules monstrae eiusmodi mirabiliter sola virtute saepius atque domuisti. Sed noua iam iam victoria, scimus proculdubio quid loquamur, imo quid tibi vaticinemur, noua tibi victoria caelo demittitur alto. Tibi certe rursus pro vniuerso hominum virtutumque genere, pro ipso Deo fortiter pugnato, omnis fauebit orbis, totus militabit aether, & coniurati venient ad classica venti. Tibi soli Deus omnipotens imperium sine fine dedit. Summus ille Deus qui Solem in Deo constituit, stellarum caelique regem, Matthiam quoque solum sub Sole constituit, imperium Oceano, famam qui terminet astris. Calendis Octobribus. M. CCCC. LXXX.

*Quod fallax sit humana prosperitas.*

MARSILIVS FICINVS

Bernardo Bembo oratori Veneto  
equiti clarissimo, S. D.

**S**Vmpsi modo calamum, Bembe clarissime, ea conditione siue fortè potius, ut quodcunque primum ventret in mentem ad te scriberem. Sed fortè id in primis mihi succurrit, ut amico viroque omnium verissimo veram salutem dicerem & optarem. Veræ autem salutis initium arbitrari, nunquam sperare veram à mendace & falso salutem. Alioquin Bernarde charissime, si quem domesticorum decies in manifesto mendacio deprehenderimus, deinde tamen iterum illi facile iterumque credamus, nonne digni iam ob nostram imprudentiam iudicabimur, qui toties maximo cum discrimine atque damno fallamur ab eo, quoties fidem vltius eius verbis habebimus? Duo præcipue ab ipso rerum initio mendaces perpetui sunt. Malus videlicet Dæmon primus ille rebellis à veritate. Rursus humana prosperitas, falsa quidem felicitas ac veræ felicitatis impedimentum. Sed mendacia Dæmonis haud facile redarguere possumus. Terrena verò prosperitas toties humano generi apertissime mentita iam fuisse conuincimur, quot in vniuerso temporis cursu ab initio mundi ad nos usque momenta fluxerunt. Momenta verò eiusmodi apud Philosophos innumerabilia esse censentur. Adde quod in

quolibet puncto temporis simulato risu perfisteris illecebris, veneficis lenociniis, pollicitationibus falsis, innumeros passim homines decipit, ut merito dici possit, eiusmodi prosperitatis mendacia infinite iam plura videri quam puncta temporis infinita. Quod verò eiusmodi est, laudquaquam mendax vltius, sed ipsum potius mendacium, atque id quidem apertissimum est nuncupandum. Credamus ergo temerè, credamus adhuc facile, ut solemus ipsi, ut ita dixerim, falsitati. Ut verissime miserissimus, qui fidem adhuc felicitati falsissimæ tam imprudenter habemus, felicitati, inquam, miseros infinite iam pluries quam infinite fallenti. Quisquam adeò cæcus est, quin clarissime tandem perspicere debeat infelicem hanc mortalium felicitatem, tunc reuera infirmissimam esse, quando tanquam firmissimam sese nobis ostentat? Nempè haud prius à nobis felicitas nuncupatur, quam summum sui cursus attigerit. Verum in eo ipso momento, in quo summa videtur, & quoniam apparet summa, ideo & felicitas iudicatur, repente in contrarium absque mora relabitur. Adeò ut quod à nobis felicitas nominatur sit potius quoddam infelicitatis exordium. Atque reuera felintimo gustui nobis euadat, quod primo aspectu meli similitudine quadam coloris apparuit. Quæret fortasse quispiam quam ob causam potissimum ita vel natura comparatum sit, vel fortè datum. Quatuor huiusrei præcipue apud Philosophos causæ numerantur, diuina, cœlestis, natu-

ralis, humana. Principio diuina prouidentia statuit, terrenam prosperitatem idcirco volatilem & fugacissimam esse, ne tenere diutius nos procul à diuina beatitudine posset, cum ne momentum quidem à nobis vnum ipsa teneri possit. Atque etiam ut morbis frequentibus cogeremur, cœlestis Medici frequentius recordari. Meminisse præterea nos in regione, tam inquieta non esse tanquam in patria constitutos, sed quasi quodam exilio relegatos. Fatalis deinde lex syderum sic à diuina prouidentia temperatur, ut in perpetuo cœlestium cursu quietis omnis expers cum primum Planetæ ad summum vel altitudinis vel directionis peruenerint, retrocedant. Præterea à se sextili aspectu vel trino, qui salutare esse censentur, in quadratum vel oppositum, qui habentur noxij, velocissimè perlabantur.

Post hæc autem naturali quodam ordine ita quatuor elementa sub cœlestibus disponuntur, imò potius sphærarum volatu perpetuo ipsa quoque ita continuè rapiuntur, ut cum aut calor aut frigus vel siccitas vel humiditas ad summum vsque gradum naturæ suæ proprium intenduntur, tunc neque progredi permittat vltèrius finita natura, neque manere vel parumper sinat ibidem perpetuæ conditio motionis. Igitur quando qualitates huiusmodi maximè videntur intendi, tunc subitò remittuntur. Quam quidem celerem vicissitudinem quatuor nostrorum corporum humores & complexionemque sequuntur. Hinc, ut est apud Hippocratem, summa corporis valetudo fallacissima iudicatur. Nempè apud naturam ascensum ipsum, descensus fermè continuo sequitur. Et quæ velociter floruerunt, velociter & arescunt. Postremo vberior vanæ prosperitatis afflatus, vanos mortalium animos inflat, tumidosque reddit atque ægros. Hinc igitur velut ægroti delirantesque sui iam ipsorum obliuiscuntur, sortemque suam altiore quam humanam rati, omnia sibi licere, nihil imminere periculi putant. Quod fermè Alexandro regi dicitur contigisse. Ergo in seipsis solutio licentia incontinentes euadunt, circa res suas admodum negligentes, erga homines superbi, iniurij, contumeliosi, cæteri verò contra illos odio & inuidia perciti, & insidias machinantur & prælia parant. Quamobrem facillimè multis de causis, quas intelligere quilibet facile potest, prosperitas nostra turbatur. Atque perinde ut iactus in altum lapis quando altissimè ascendisse videtur, tunc subito sine vilo temporis intervallo descendit, ita fortu-

na quem ad summa euexit fastigia rerum, statim sine mora vel iubet cum velut è monte sponte descendere, vel ipsa præcipitat. Sanè & grandioribus casus grauior, & altioribus ruina profundior imminet. Sæpissimè post blandas auras zephyrosque suaues repente stridens aquilone procella velum aduersa ferit, fluctusque ad sydera tollit. Quapropter Philippus rex Macedonum qua die & in ludis Olympicis simul & in castris victoriam reportauit, atque primogenitum suscepit Alexandrum, in tam secundo vberioris prosperitatis afflatu contrarium ventum non iniuria timens, O dæmon ait, tantum bonum quàm minimo malo repende. Pauloque post sagitta quadam altero oculo est excæcatus. Nos quoque si sapimus, si valere volumus, similiter timeamus. Imò verò, ut rectius loquar, ne quando metuere similiter compellamur, ne credamus mendacio, ne speremus inuento, neque fugacia volantiaue sequamur, neque inimica nobis & noxia diligamus. Sed credamus veritati quandoque, qui mendacio tam facile tamdiu credidimus. Credamus inquam, veritati diuinæ, quæ non mentitur vnquam, quæ non fallit, quæ quotidie multis nos admonet modis, ne vnquam fortunæ infidæ confidamus, neque eam, quæ cæca est, tanquam nostræ ducem vitæ sequamur. Imò verò cunctis viribus nobis ab infinito bono tributis seruatisque, ipsum quoque infinitum sectemur bonum. Quod quidem non modo nusquam fugit, cum immensa potentia impleat vniuersum, sed etiam occurrit sequentibus obuium immensa benignitate naturæ, atque id quod maius est præcurrit etiam secuturis, dum & facit omnia & naturali quodam instinctu omnia semper allicit ut sequatur. Et qua virtute nos ipsum sequi iubet, quia sapientia nihil frustra iubet, eadem quoque ducit euntes, perseverantesque perducit. Principium, rector, dux, semita, terminus, idem.

*Oratio soluta Poëticiis modis & numeris exornanda est.*

MARSILIVS FICINVS  
Bartholomæo Fontio Rhetori,  
S. D.

**E**Legantissimè rogas Fonti, cuius potissimum vel imperio compulsus vel auctoritate fretus, solutæ orationi nonnunquam Poëticos modos numerosque inreferam. Ut autem summam acutissimo viro respondeam, id mihi imperat: cœlum-



idem cœlestis etiam Plato docet. Siue enim cœlum suspicis, vides illic Mercurium eloquij magistrum simul & citharæ fabrum. Hunc igitur si quando loquentem nobis audire liceret, audiremus frequenter verbis suis nonnullos citharæ suæ modulos permiscentem. Præsertim cum ipse semper tum Phœbo Musicæ grauioris, id est, Poësis patri, tum Veneri leuioris Musicæ matri, vel iungatur penitus, vel proximè saltem adhæreat. Siue cœlestem Platonem audis, agnoscis protinus eius stylum, vt Aristoteles inquit, inter solutam orationem & carmen medium fluere. Agnoscis orationem Platoniam, vt Quintilianus ait, multum supra prosam pedestremque orationem surgere, vt non humano ingenio Plato noster, sed Delphico quedam oraculo videatur instinctus. Mixtio verò eiusmodi vel temperatio ad eò in Platone placuit Ciceroni, vt dixerit si Iupiter humana lingua loqui velit, illum non alia lingua quam Platonica locuturum. Mitto quòd Moses, Iob, Salomon, Esaias, Hieremias, Daniel, Ezechiel, alique Prophetæ pene omnes apud Hebræos, Mercurius quoque Ægyptiorum sapientissimus, similiter in Græcia Gorgias, Isocrates, Herodotus, Aristoteles, alique permulti, denique inter Latinos interdum Tullius, frequenter Titus Liuius, Apuleius, diuus Hieronymus, Boëtius Philosophus summus, solutam orationem carminum numeris quibusdam exornauerunt. Eo scilicet consilio, vt oratio tum quia soluta sit, liberiore sæpius pede progrediens facilius quo cupit & citius perueniret, tum quia numerosa atque Poëtica Musicis interdum concentibus & figuris delectaret & blanderetur & raperet, quippè cum naturali quodam instinctu singula vt pote quæ Musica nata sunt, Musica quoque mirificè rapiantur. Hos ego non æquis sequi passibus malo quam nullo modo sequi. Quam obrem ignosces amice Platonico vel inepto, eique mixtum condonabis dicendi genus, cui hoc ipsa primum inseruit genesis, auxit deinde continua Platonis Poëtici lectio, præterea frequens vsus citharæ confirmavit. Neque tamen fortuito in Poëticos passim sonos erumpo, sed ibi præcipuè vbi materia vel forma quædam subest Poëtica. Talis enim tonus, tales quoque fides decere videtur. Miscere verò Poëtica Philosophicis docet nos omnis antiquitas, quæ ante Aristotelem potissimum semper id facitavit, ob hanc maximè rationem vt sacra Mineræ mysteria tum omnibus & veneranda & venusta, tum paucis & illis qui dem puris communia forent. Docet nos

idem ipsa diuinitas, quæ Poëtica quædam figura vbique gaudens innumeris cœlum luminibus quasi pratum floribus exornauit, atque ita diuersos sphaerarum circuitus modulata est, vt concentibus congruis harmoniam mirificam melodiamque conficerent. Præterea sub Luna Deus idem Poësi similiter delectatus, discordes rerum formas in pulcherrimam quandam digessit concinnitatem. Postremo terram, quæ fore omnium deformissima videbatur, miris metallorum, lapillorum, plantarum, animalium figuris picturisque variè decorauit, ipsosque terræ fructus foliis obtegi voluit, floribusque ornari. Quid plura? cum singulatum vniuersum Musicis numeris Poëticisque modulis temperauit.

*Solus nullum charum amittit vnquam, cui omnes in illo chari sunt, qui non amittitur.*

MARSILIUS FICINVS

Ioanni Caualcanti amico  
vnico, S. D.

**D** Ici non posset quanto afficiar tædio, suauius mi Ioannes, quòd ob hanc Epidemiæ suspicionem hos pauculos dies parentis mei iussu sine te esse cogar, & tamen interim supra quàm cogitari possit assiduè tecum sum. Et per Deum nisi ita tecum essem, certè sine te esse, non esset mihi molestum. Tu mihi solus cura Ioannes, tu solus mihi solamen, solare Marsilium tuum precor expectatissimis literis ruis. Quæ quidem quandocunque venerint nobis, venerint proculdubio felicissimæ. Ego autem hanc ad te Epistolam sub oppositione Lunæ ad Solem, quodammodo etiam ad Mercurium & Saturnum, ac etiam sub Martis ad Solem Lunamque quadratura scribo, quo tempore nihil fermè apud Astronomos infelicius. Nihilominus scio felicissimè me scripturum. Non enim conducentibus astris solum, verum & decernente Deo astrorum duce à primis annis conciliata nobis est amicitia. Iuuat me nunc parumper, vt & clam & palam soleo, sæpè vnà cum diuinissimo illo Aurelio Augustino nostro duce clamare. Solus nullum charum amittit vnquam, cui omnes in illo chari sunt, qui nunquam amittitur. Trigessimus, mi Ioannes, tibi iam annus agitur, si rectè numero, noli ergo in eo quod irreparabile est erogando prodigus esse, sed tanto indies parcius tuos dies expende, quanto deinceps pauciores tibi supersunt quos expendas.

*Maledici contemnendi.*

## MARSILIVS FICINVS

Laurentio Medici, viro magnanimo, S. D.

**L**Eges vique adeò horrent infamiam, & odere maledicos, vt in eos etiam rigide animaduertant, qui vel de turpi turpiter obloquantur: Quod quidem bis, imò & ter ætate nostra Florentiæ publicè obferuatum & vidimus, & probauimus. Ego autem à legibus tale hodie nihil postulo, nolo enim pro me contra pulices leges armari, quæ primo aduentu frigoris opprimuntur. Liceat ergo, liceat impiò illi Christos tuos impunè tangere, cui iamdiu licuit Christum Sit passim doctrinæ iudex vulgus, quæ vix nota est quàm paucissimis. Ferant vt libet homunculi, quibus nulla sententia est de mea vita sententiam, quæ soli nota est Deo. Hæc & similia, aut cum Socrate & Zenone nihil curo, aut certè cum Aristotele & Theophrasto perparum. Nempè didici ab Heraclito & Thalete cuncta mortalium, siue bona siue mala dum videntur occidere, didici à Pythagora & Platone dormire in corpore animum, & quæcunque hic agere pative videmur, nihil aliud esse quàm somnia. Didici à vitæ magistro, mundum totum esse positum in maligno, bono tamen viro in bonum cuncta reuerti. Omnes igitur eiusmodi nugæ sacræ Philosophiæ parietes, altissimi à nobis longius arcent, hoc tamen vnum ipsa me Philosophia hodie monet, vt rem ipsam tibi significem quo officio tuo fungaris, quemadmodum aliàs in re nostra diligentissimè es perfunctus, hoc est, vt vel leuissimo quodam nutu ostendas displicere tibi, quod Deo ante omnia displicet, dari videlicet sanctum, & id quidem tuum vel canibus lacerandum, vel canum pulicibus submordendum.

*Maledici contemnendi.*

## MARSILIVS FICINVS

Iuliano Medici viro magnanimo, S. D.

**Q**Uod canis ille continuè contra me latret, quemadmodum contra bonos, doctosque viros, animamq; & Deum, semper est solitus, neque miror equidem, sic enim & natura, & consuetudine affectus est, vt non latrare non possit, neque etiam curo, nam talis est, vt neque vimpere quemquam possit, nisi laudando, neq;

laudare nisi vituperando. Latret ille, & apud superos, & apud inferos, quantum placet, modo non placere Medicibus palam latratum eius intelligatur.

*Congratulatio de Magistratu.*

## MARSILIVS FICINVS

Petro Neto, S. D.

**P**Lurima scribere, mi Petre, iubet plurimus mentis, cordisque affectus, sed qualia in præsentia scripturus sim nescio, nam neque seridè nimium agere finit domestica hæc nostra, & plus quam familiaris consuetudo, neque iocari, quod sæpè inter nos solemus, promittit nunc summa Magistratus, in quo cõstitutus es, dignitas. Quid igitur faciam? Certè quod & Deus in primis admonuerit, & res ipsa potissimum postulauerit; ergo primum cœli rectorem oro, & obsecro, sine quo nihil in tērris foelicitè agitur, vt ad suam voluntatem dirigat tuam, & ad tuum votum perducat Magistratus ciuitatisque euentum. Deinde, ipsi magistratui summopere gratulor, quod ab homine pio doctoque rectè geretur. Gratulor & Petro meo, non tam quod hanc nuper dignitatem consequutus est, quàm quod iamdiu sic à Deo est institutus, vt qualibet mortalium dignitate sit dignior. Huic ergo sedulo gratias age, & suppliciter commenda. Vale.

*Non est suavis absque amico suauissimo melodia.*

## MARSILIVS FICINVS

Sebastiano Foresio, S. D.

**M**I Foresi, quid agas hodie? lyram pulsas? Caue ne hanc sine Marfilio tuo pulses. Alioquin si fidem fregeris, fides tibi penitus dissonabunt. Ergo quoties ad lyram cano, tecum concino, non est mihi suavis absque amico suauissimo melodia. Landino meo amico vero me commenda. De Petro autem Neto quid? Toties meo nomine salutato, quoties videris. vi. Augusti. M. cccc. lxxvi.

*Veritas sua potentia, potius quàm aliena defenditur.*

## MARSILIVS FICINVS

Petro Placentino, Commissario Apostolico, S. D.

**M**isit te, summus Pontifex, tanquam strenuum ducem, vt contra diuinæ

sapientia hostes arma parares. Cōducunt autem ad sapientiam defendendam, non tam Martis milites, quàm Palladis sacerdotes. Deus me sub Marte fallaci militare prohibuit, sequi insit inuictæ castra Mineræ. Quæ utinam quàm libenter iamdiu sequor tam foeliciter assequar. Mitto igitur hæc ad te arma, quibus aduersum veritatis hostes, pro viribus continuè pugno. Tu verò tanquam pius Palladis alumnus, musarumque patronus, operam dabis, ut aliàs insuper eiusmodi machinas struere valeam. Qui veritatis impugnatores telis inuadit, pugnat utcumque potest, qui autem veris aggreditur rationibus, re vera semper expugnat.

*Venus Martem, Iupiter Saturnum domat.*

MARSILIVS FICINVS

Rainaldo, Archiepiscopo  
Florentino, S. D.

**S**Vperioribus diebus, Petrus Placentinus, clarissimus Pontificis Commissarius, cum per Epistolam, tum vel maximè verbis tuo nomine rogatus, quicquid in publici oneris causa petieram, benignè admodum non promisit solum, sed & scripsit. Volentem deinde me tibi coram gratias agere ob beneficium tua causa designatum, plures iam dies aduersa valetudo detinuit: denique nudiustertius obnixius id tentantem, spiritus in medio itinere usque adeò defecit, ut vix domum pedibus redire potuerim. Mox mihi nunciatum est, munus id tuum interturbatum fuisse. Miratus sum mirum in modum, ac diligentissimèurbationis causam perscrutatus, cum eam in terra inuenire non possem, in cœlo denique reperi. Miraris hoc, venerande pater. Nonne Thales Milesius in terra lapsus, surrexit in cœlo, ut quæ non viderat hic, illic inspiceret? Obseruari igitur quid nuper meum ad te aduentum impediuerit, inueni quadratum malignumque Saturni ad Lunam aspectum id fecisse. Vnde conclusi, Saturnij cuiusdam hominis insidiis fuisse mihi beneficium interceptum. Primum quidem penè omnem remedij spem amisi, cum cogitarem Saturnum fortè ita Planetarum potentissimum esse, ut altissimum. Sed deinde in mentem rediit, quod antiqui sapientes non absque summa ratione de Saturno & Ioue, Marteque & Venere fabulantur. Martem videlicet à Venere, Saturnum ab Ioue ligari. Hoc autem nihil aliud significat, quàm quod Saturni Martique malignitatem, benignitas Iouis

Venerisque coercet. Opinor igitur vulnus quod forsitan à Saturnio aliquo illatum est, ab Iouio quodam maximè posse curari. In quo autem omnem Iouis effigiem, vim, doctes, agnoscam, præter te in præsentia Florentiæ inuenio neminem. Deridebit hic fortasse quispiam sacerdotem, Astronomica observantem. At ego Persarum, Ægyptiorum, Chædæorum autoritate fretus, putabam ad cæteros quidem terrena, ad sacerdotem verò cœlestia pertinere, ita tamen ut consilio humano suus relinquatur locus, & ad cœlirectorem summa imperij referatur. Sed vis nunc mittamus cœlestia? Mittamus. Quid igitur postulabo? Hoc vnum. Cum in cæteris Cæsare ipso superior sis, ne patiari ut in hoc vno, vel Pilato inferior videaris. Sed velis quod Commissarij manibus tuo nomine ab initio me præsentem, in causa mea scriptum est, sit scriptum. Hoc, venerande pater est, quod ocij Philosophici gratia posco, verum tamen fiat voluntas tua.

*Felix qui sua contentus est sorte.*

MARSILIVS FICINVS

Valerio Romanæ Scribæ  
Principis, &c. S. D.

**S**I haud faciliè emergunt, quorum virtutibus obstat res angusta domi, certè multo difficilius emergunt, quibus obstat res nulla domi. Solent quibus nulla res obstat nihilo indigere. Discipulus verò noster qui modò te salutauit, ob hoc ipsum omnibus indiget, quia obstat res nulla domi. Dere omni verò quid dicam? Tam maximè rerum omnium copia genus hominum impedit quàm inopia. Mediocris rerum possessio & temperatus fortunæ flatus, ut securior est, & iucundior, & stabilior, sic ad Mineruam & Musas accommodatior. Quemadmodum pauperes illos valde probamus, qui in ipsa tum paupertate sunt diuites, tum infima forte sublimes, sic eos diuites nimium admiramur qui & in summa rerum affluentia viuunt sobrii, & in excessa fortuna sunt humiles atque prudentes. Plerique cum possidere omnia videantur, existimant sibi cuncta licere, oblitis fortis humanæ se aliquid esse super homines arbitrantur, cum sæpè minus sint quàm homines. Discant in Alexandro Magno, in Cæsare, in Nerone, in Domitiano, discant minus vel tribuere genio, vel ingenio indulgere, vel fortunæ confidere, vel homines spernere. Verum, dum multa de his verba facio, videor eos for-

fitan multifacere, quos reuera paruifaciendos existimo. Fortunatus cui fors obligit mediocris, foelix qui sua contentus est forte. Calendis Nouembris. M. cccc. LXXIII.

*Virtus legitimi ciuis.*

MARSILIVS FICINVS

Ioanni Caualcanti amico

vnico, S. D.

**C**Um post lusciniæ ad nos misisti turtures, temerè nimium, & frustra pollicitus sum de iis quoque aliàs me scripturum. Nam nihil prorsus deinde hac in re menti suboritur. At si turtures longè salaciores sunt quàm lusciniæ, cur illæ nobis iam pridem peperere non nihil, hæ verò nihil pariunt? An fortè, quia Philomela Musis, turtur Veneri consecratur? Ædes autem nostra non Veneri dicata est, sed Musis. Sed age experiamur parumper, nūquid Thomas saltem Minerbæ, cui nuper vxor elegans scitum peperit filium, nobis aliquid pariat. Quando me Thomas nato elegit compatrem, nōne sibi me fecit comparem? magnum est, mi Ioannes, magnis viris æquari. Optimum quoque optimis comparari. Quanti faciam quod Minerbæ magni nos faciat, te non latet, qui nosti quanti eius iudicium semper fecerim. Quàm enim apud Platonem nostrum ideam optimi ciuis quotidie legimus, in hoc fermè iam agnominus. Cui tam curæ publica sunt quàm cæteris propria, in quo singularis magnanimitas, & incredibilis mansuetudo inter se de paritate contendunt. In quo & prudentia liberalissima, & liberalitas prudentissima, in quo tanta cum grauitate benignitas, vt tot diligant quot vident, tot ament, colantque quot & norunt. xvii. Septembris M. cccc. LXXVI.

*Quæ sit vera laudis laus.*

MARSILIVS FICINVS

Antonio Seraphico, Conphilosopho suo, S. D.

**S**olent opifices alij quantominus leuiusque opus est, quod fabricandum aggrediuntur, tanto & facilius & verius fabricare. Adde & tanto magis probari, quanto magis eorum opera materiam superat. Contra verò in iis tribus se habent periti declamatores illi qui in laudando versantur. Sanè facilius veriusque magna laudant quàm parua, & laus illa apud prudentes probari solet potissimum, quæ ita modum

tenet, vt laudato superari quodammodo videatur. At cur inter opificem & declamatorem tanta diuersitas? Nisi quia opera quidem non ab opere fabricando vim habent, sed ab opifice. Vehemens enim actio est non vbi ingentem quis aggreditur machinam, sed vbi virtus ingens est in artifice. Laus autem contra non tam à laudante sortitur reuera, quàm à laudato virtutē. Et quamuis sæpè veritatis opinionem quandam à dignitate laudantis adipiscatur, vera tamen erit laus si vera virtus in eo fuerit quem laudamus. Sed nescio qua infelici negligentia prætermiseram hic Seraphice quartum, & id quidem cunctorum maximum, quod vel parumper prætermisero mi Seraphice religio est. Artifices alij tunc solum examussim exprimunt quod proponunt, cum non aliud respiciunt quàm formam ipsam operis faciendi. Laudatores autem contra, tunc solum ritè laudant cum in aliud quiddam, scilicet, in Deum referunt laudati hominis excellentiam. Vnde nam hoc proficisci putamus? Nempè quia homines inde omnino vt bene sint habent, vnde prorsus habent vt sint. Atque sicut ars humana in naturali quadam materia declaratur, sic omnis & hominis & naturæ virtus lausque lucet probaturque in arte diuina. Vale feliciter declamator facilis, vere, probate, recte. Ac si vis semper, vt nunc à prudentibus ipse laudari, quemadmodum Bernardum Nerum nostrum paulo ante laudasti, ita posthac si modo vsquam nactus fueris laudato Bernardos Neros.

*Nihil postdetur in terris pretiosius homine.*

MARSILIVS FICINVS

Sebastiano Saluino amitino

suo, S. D.

**S**alue Saluine noster, impleuit desiderium Saluine nostrum Epistola tua. Non quia Marfilium laudat, sed quia ipsa mihi laude digna videtur. Desidero autem in Epistolis perspicuam breuitatem, acumen elegans, lepidam grauitatem. Scribis quod & antea mihi notum fuerat, me apud Thomam Minerbæ præstantem virtute virum plurimum authoritate valere. E quidem tanti facio apud virum non mediocris apud omnes authoritatis valere, quanti si ipse valuerim apud omnes, commendo ingenuos eius liberos tuæ diligentiae millies. Res agitur Saluine tua. Nullius rei lucrum maius, & possessio pretiosior in terris quàm virorum. Parentes adeò nobiles lucraris in filiis, lucraris tam generosos

filios in doctrina. Thomæ tibi liberi adolescunt, mi Salsine, si liberaliter adollescunt. Ex agro Cellano. xxvii. Septembris. M. cccc. lxxvi.

*Qualis sit terreni conuiuij ornatus, cœlestis conuiuij splendor, supercœlestis beatitudo.*

MARSILIUS FICINVS  
Laurentio Medici viro Magnanimo, S. D.

**R**Edeunt hodie, vnicte mi patrone, sacra illa diui Cosmi solemnia, quæ intergrum iam Saturni cursum, primo quidem sub magno Cosmo, deinde apud Pium Petrum, demum penes Magnanimum Laurentium quotannis colere consueuimus. Ibi suauiter pulcher Apollo Chelimi, dulcissimæ canebat Musæ, gratissimum ducebant Gratia chorum, petulantes Nymphæ ludebant, blande iocabatur improba Venus, iura dabat Iupiter, Mercurius differebat. Felix, Marsili, nimium felix cui Medicum benignitate tot annos datum fuerit epulis accumbere diuûm. Hoc nihil autumnano nihil in terris pestilentius agit, pestilentis suspicio Epidemiæ, quàm quod beatum illud conuiuium interturbat. At video quod apud mortales nunc intermittitur inter superos prorsus instaurari. Suspice age, cœlestis Laurenti, suspice cœlum. Magnus illic in orbe lacteo Cosmus familiares suos cœlicolas nectaris, & ambrosiæ conuiuium excipit. Ecce galaxie lac illis perpetuum ponit, & Iouios pisces cancrumque lunarem, his addit capreolum, iuuenicum, agnum, auesque cœlestes. Liberi quoque patris crateres aquario temperat, illis suas largitur libens Diana prædas, suos quoque distribuit fructus largissima Ceres. Præterea illos vndique mira varietate nouies circuit iris, Iris à Phoebi radiis ex mannæ rore resurgens in astra zodiaci suauesque miscens ex Elisii pratis odores. Illos nouus cœlestium Syrenarum permulcet cantus & consona ex sphaerarum syderumque motibus lyra oblectat in æuum. O terque quaterque beati, quibus Solis heroica virtus lætum reddidit lætum, & seuæ Parcæ iam parcunt. Qui procul ab iis Aeoli procellis & Neptuni fluctibus, nebulaeque Plutonis, ferena summi Ionis aura in campis vescuntur Elisii, quam felix Laurenti conuiuium, in quo cibus vnus omnis est cibus. Auiditæ satuta semper & saturitas auida. Nuptiæ quam mirabiles, in quibus amare idem est quod frui, videre non est aliud quam amplecti, amplecti nunc idem est quod & tem-

per amplecti. Commertium quam iustum quamue iucundum, vbi lex voluntatem instruit, voluntas construit legem. Non libet vnquam nisi quod licet, & licet semper quodcunque libuerit. Ibi felicitas supra quam cogitari possit facillima atque plenissima, vbi voluptas omnis infinitè facilius pleniusque voluntatem sequitur, quam hic voluptatem nostra voluntas. O fortunati quibus est fortuna peracta iam sua. Nos alia ex aliis in fata vocamur. Nos miseri frustra Italiam semper sequimur fugientem. At si frustra sequitur Italiam quisquis sequitur fugientem, necessarium esse videtur vt solus ille & rectè suam sequatur Italiam & feliciter assequatur qui non fugientem sequitur, sed manentem. Mane igitur felix, mi Laurenti, in amore semper manentis Dei. Ama etiam precor vt soles Marsilium tuum vnicte te amantem.

*Prudens neminem spernit tanquam inutilem.*

MARSILIUS FICINVS  
Nicolao Michelotto vero viro, S. D.

**V**Olui Nicolæ in hac mea rusticatione sæpè, vt par erat, ad Magnanimum Laurentium vnicum patronum nostrum aliquid scribere, sed nescio quis in hanc vsque diem pusillanimis timidusque affectus nobis obstabat. At hodie in diui Cosmi sacris magnus è cœlo Cosmus audaciam quandam & fiduciam præstat, qualem olim in terra solebat, hac videlicet ratione potissimum, quod non timendus sit vir bonus qui obesse cuiquam nesciat, & qui semper prodesse benignitate naturæ studeat vel ingratum. Ergo pulsa timiditate scripsi ad Medicum hodie. Verùm in ea Epistola, vt mihi quidem videtur, nescio quomodo deliravi. Forsitan quoniam temerè in alienam messem falcem immisi, & Poëticas insolens pulsaui fores. Tota verò Poësis poculis ad insaniam. Nam Philosophæres etiam quodammodo insanire scribit in libro Problematum Aristoteles. Verùm quicquid mi Nicolæ, tantum est à singulis exigendum quantum præstare singuli possint & sciant. Reliquum commodandum. Deus prudentibus ad gubernandum vitur, insanis ad diuinandum. Peritus artifex variis prout res postulat vitur instrumentis. Probus bellidux diligit equites, non negligit pedites. Prudens paterfamilias cui aurea, argentea, ænea vasa præsto sunt, nullum præterea vasculum spernit vel futile vel sordidum, scit enim nihil penè in amplis ædibus esse



profus inutile. Doctus Medicus herbas diuerfas colligit etiam spinosas & venenosas. Pictori ad lucis gratiam necessario seruit ater color & fuscus. Deus informi materia vitur ad quamlibet naturæ formam, rebus deformibus vitur ad certum graduum numerum & necessarios vsus, ad comparationis & varietatis ornatum, denique malo etiam dæmone ad examinis, probationis iustitiæ bonum.

*Peruersis animis aduersa sunt omnia.*

### MARSILIVS FICINVS

Anthonio Allio Episcopo Volaterrano, S. D.

**F**erunt multi rem onerariam contra sacerdotes, iterum iterumque feruere, eaque nihilysquam reperiri posse feruentius. Quippè cum æquè gelu ferueat atque æstu. Addunt nonnulli nihil opus esse ut ferueat ultra, iamdiu enim sacerdotium penitus decoxisse, hanc quoque calamitatem Ecclesiæ in Apocalypsi se vidisse depictam. Huius miseriæ causam alij Saturnum in Leone, Iouemque in Piscibus, retrogrados, esse asserunt. Alij non stellas sed hominum mentes retrogradas, esse in causa opinantur. Nos autem quid? Profecto putamus Anthoni & stellas & hominum mentes iis solis aduersas esse qui hæc peruersa mente interpretantur. Arbitramur à iustis principibus iustè subditos gubernari. Scimus ab infinito bono cuncta bonis viris in bonum denique verti. Didicimus à Christo vitæ magistro, libenter tributum soluere. Didicimus à Paulo præcipuo Christi præcone, principibus obedire. Verùm ut ad rem nostram iam veniamus, fortuna nobis, venerande pater, tenuis & humilis est vulgi quidem iudicio, qualis esse fermè semper Philosophantibus consuevit, sed tenui desiderio humilique animo meo satis pinguis atque sublimis. Si hanc patrono meo antiquo non commendauero, videbor fortè res meæ curæ & custodiæ commendatas negligere. Si commendauero, videbor parum & iustitiæ erga omnes & beniuolentiæ erga metuz confidere. Vnum ergo dumtaxat commemorasse sufficiet, diuturnum continuumque morbum, quamuis principio videatur levis, tamen in

leui corporis habitudine  
granissimum iu-  
(.) dicari. (.)

*Gratia & Musa à Deo sunt, atque ad Deum referenda.*

### MARSILIVS FICINVS

Bernardo Bembo Venetæ equiti  
& iuriconsulto præclaro, S. D.

**R**ogas quidnam agat Academia, mi Bernarde? Amat Bembum. Quid rursus? Veneratur Academia Bembum. Omnes apud nos in hoc consentiunt literati, hunc esse apprimè amandum & venerandum, cuius pectus Gratiarum templum est, ac mens est fons Musarum. Gaude igitur tuis Bernarde bonis. Tuis, inquam, quod in te sint, non quod abs te profisciscantur. Nempè, ut te non laet, ab ipso bonorum omnium bono singula hæc habes bona. Solus autem & his vitur prosperè, & illo beatè fruitur qui non fruitur his, sed vitur.

*Neque potest verè sibi ipse placere qui displicet veritati, neque vere gaudere bonis qui in iis diligendis negligit ipsum bonum unde sunt bona.*

### MARSILIVS FICINVS

Ioanni Caualcanti amico  
vnico, S. D.

**P**ati non possum tuos à Fihginensi foro nostris mercibus vacuos ad vos reuerti. Nefas enim esse arbitror, dum ad te aliena ferunt, non referre tua. Ferunt ergo tres à nobis Epistolas, vna emendat quæ veniente fratre, cursim puero nostro dictaueram, aliæ, exemplaria sunt eorum quæ iam pridem ad Anthonium Allium & iam diu ad Petrum Nerum scripseram. Hodierina in præsentia non habebam. Externa dedi. Rusticus es Choridon, ad acerrimum gustum pomula mittis insipida. Confide tamen momilla paululum gustet Alexis, sua enim sunt. Solent autem sui fructus agricolis etiam si minus boni sint, magis quam alienis placere. Ac fortasse nulla videtur ad humanam quandam felicitatem via commodior, quàm quod, ut plurimum, sua cuique placeant. Felicitatem, Ioannes, dixi quandam scilicet adumbratam. Nam & si hoc natura mortalibus quasi solatium quoddam, præsertim in rerum ingenique paupertate, voluit esse, non tamen vera in hoc felicitas esset, quando in his quæ nobis placent nos veritati displiceremus. Quoniam non potest verè placere sibi, qui veritati non placet.

Quippè

Quippè paulò post, re vera, sibi ipse displicet, qui iam displicet veritati. Sed cuiusnam hominum maximè amatur ab illa, nisi qui maximè omnium amat illam? Vbi nam, ô amice! ubi est amator huiusmodi? Pudeat autem quandoque mortales, pudeat, inquam, dum non alia ratione, nisi quia bona mortalia diligunt in iis diligendis æternum ipsum bonum negligere, unde hæc id prorsus habent ut sint bona. Bona quidem in seipsis omnia sunt, quoniam sunt ab ipso. Bona rursus & nobis quatenus referuntur ad ipsum. At mala & aspera non iniuria nobis eadunt, quia summa quadam iniuria hæc sectamur, illo dimisso, quæ necessariò in illo sunt & seruantur ab illo. Ah! quàm mirabile est, mi Ioannes, imò quàm miserabile, ut ea nos prorsus ab illo seiungant, quæ illi penitus sunt coniuncta. Quæ nisi ipsum quodammodo præ se ferrent, nos sibi ipsis adiungere non valerent, quæ nisi essent in eo, certè non essent in se, & omnino non essent. Vale. Sed nunquid, mi Canalcantes, aduertis? Quod & ego cui id modo contigit vix aduerti. Postquam dixeram me hodierni nihil habere quod mitterem, repente nescio quid subortum nobis est hodiernum. Serente, videlicet illo, cui nihil crastinum est, nihil æternum, cui quicquid est momentum idem est. Atque ideo solus serere eodem momento potest ac metere, & quoties vult ferendo metit seritque metendo.

*Nemo felix, nisi qui verè gaudet, nemo vere gaudet, nisi qui veritate gaudet.*

### MARSILIVS FICINVS

Ioanni Canalcanti amico vnico  
verum gaudium, S. D.

**C**VM hoc momento, frater meus, isthac se diceret transiturum, neque quod ad te darem huic inuenirem, cogitavi subito id ipsum dare, præter quod neque inueniendum est aliud, neque quærendum. Quod & si omnes mortales quærunt, nullus tamen qui quærat, mortaliter inuenit. Legebam modo hanc foelicitatis definitionem in Confessionibus Augustini nostri, cuius diuina vestigia, quoad possum, frequentissime sequor. Beate vivere, nihil est aliud quàm veritate gaudere. Atque hoc ipsum circa veritatem gaudium est ipsa foelicitas. Viue foelix, optime mi Ioannes, sed ut foelix viuas, verè gaude, ut autem verè gaudeas, veritate

gaude. Absoluta veritas, lux Dei est in se ipsa. Rerum veritas, est Dei splendor in ipsis. Ergo si vis veritate gaudere, ama, quære, considera Deum propter seipsum, & cætera propter Deum.

*Qui æternam amat formam, tam facile saltem tanquam secure fruitur, quàm difficile & solícite qui temporalem.*

MARSILIVS FICINVS,  
& Ioannes Canal. Georgio Antonio Vespuccio, viro doctissimo, S. D.

**B**REVIS Epistola, Vespucci dulcissime, affectu & doctrina referta non breui, longam nobis attulit voluptatem. Declarauit enim quàm bene iamdiu animo, quàm belle modo corpore valeas. Foelix igitur Vespuccius noster, cui est, quod in primis videtur optandum, mens sana in corpore sano. Cui sanitas animi, neque ex fallaci fortuna, neque ex insana pendet corporis sanitate, quæ quòtidie inuitis nobis amittatur, sed ex illius vitæ fonte manat, quæ solus & vix amittit, qui sponte dimittit. Quem quicumque re vera sitit, iamdidum & bibisse videtur. Nam & pretium quo liquor hic emitur, est ipsa sitis, & animus sitibundus hoc ipsum quod sitit ex libatione quadam illius habet, à quo plenius hauriens habet, ut aliud ultra non sitiat. Fortunatus nimium venator, qui solis solem passim sibi sectandum totis viribus proposuerit. Nempe prius etiam quærat, hunc facillime reperit, quem nonnisi eiusdem luce illustratus agnouit inuentum. Beatus qui satis aliquando pro viribus amat formam, quæ sola nunquam potest re vera satis amari, immensa enim hæc forma formæ cuiusque mensura, ingens semper, ubique lucens, pro amore infinitæ bonitatis, immenso verò amatori suo ad votum vniformem se monstrat, & omniformem. Atque amator statim amando, eiusmodi amatum, quatenus amplectuntur vlnæ, complectitur omnia còplectentem, suumque securus possidet possessorem. Prefectò votum hominis qui aliud affectat præter amorem, sæpè frustratur euentus, solus autem qui præter amorem ipsum nihil amat, subito desiderando consequitur, semper consequendo desiderat. Præterea, sicut nemo, vel sine potentia potest quicquam, vel sine sapientia sapit, sic absque amore amat nemo. Ipsam verò potentiam & sapientiam, ipsumque amorem, idem inter se penitus esse, atque esse

Deum, negare neque potentes audent, neque sapientes sciunt, neque amantes assestantur. Accedit ad hæc, quod quemadmodum absque pulchritudine nihil est pulchrum, ita sine amore, ut diximus, nullus amator. Sed aliud apud mortales est finita qualibet pulchritudo, aliud huius pulchritudinis desiderium. Alibi ergo inter nos amor flagrat humanus, splendet alibi pulchritudo. Pulchritudo autem infinita cum nihil vel alienum extra se patiatur, esse multo minus relinquit aliquid extra se suum. Suum igitur amorem intra se possidet. Hinc sequitur è conuerso, ut ubicunque illius ardet amor, illa quoque necessario luceat. Ut enim extrema tenebræ omnino cum extrema frigiditate conueniunt, ita lux summa cum summo ardore conspirat. Forte nimium, Vespucii vir optime, in iis alicui videbimur peruagari. Iuuat quidem nos cum homine pio eodemque amicissimo late de diuino amore differere. Quis enim immenso modus adsit amori? Rideat nos interim ridiculus aliquis talia sæpè multumque tractantes. Ipsi verò ridentem nos lugebimus. Vale.

*Deus omnia bonis conuertit in bonum.*

## MARSILIVS FICINVS

Ioanni Caualcanti Amico  
vnico, S. D.

**I**oannes scribe aliquando quid in rebus tibi mihiq̃ue communibus feceris, quidue à me fieri velis. Si modo in præsentia scis ipse quid velis optime mi Ioannes. Ego autem his temporibus quid velim quodammodo nescio. Forte & quod scio nolim, & quod nescio volo. Verumtamen opinor tibi nunc Iouis tui in piscibus directi benignitate constare, quæ mihi Saturni mei his diebus in Leone retrogradi malignitate non constant. Sed quod frequenter prædicare solemus, in omnibus agendæ illi gratiæ sunt qui infinita bonitate sua omnia conuertit in bonum.

*Mala non sunt ab astris proprie, sed ex defectu vel materia vel consilij.*

## IOANNES CAVALCANTES

Marfilio Ficino Philosopho Platonico, S. D.

**T**V quidem mea sententia interdum quædam magnificis, & quia magnificis ideo times, quæ licet penitus minimè

paruipendenda forent, verūtamen à te tanto viro tantum haudquaquam facienda censeo. Nunquam ergo mihi amplius mi Marfilij insimulabis malignitatem Saturni. Nullum hercle malum facere nobis possunt astra, nequeunt, neque volunt. Velle autem & posse est idem apud superos. Quæ ratione autem nos summi boni filios læderent? Cum aliis qui à summo bono solum originem suam trahunt, ducantur. Atque ea omnino secundum boni ipsius rationem felicissimæ illæ mentes circumagant. Si tantum quantum videmus & sciunt qui experti sunt, suos diligit filios secundus & terrestris pater qui comparatione cœlestis patris vix dicendus est pater, quantum nos primum & verum patrem putemus amare? Mirum inmodum certe. Nunquam igitur lædemur ab iis qui conuiuunt in prospera domo patris nostri. Caue igitur posthac transferas culpam tuam ad supremum illud astrum, quod te forte innumeris atque maximis beneficiis accumulatum reddidit. Sed ne singula frustra enumerare coner, nonne te missum ad florentem urbem orandam, iam per te florentissimam effectam, volui eodem aspicere aspectu quod diuum Platonem aspexit ad Athenas illustrandas euntem? Responde mihi quæso, vnde admirandum ingenium quo quid si Saturnus intelligis, quod triginta annis suum iter peragat cognoscis, quosue effectus in terris hoc in loco vel illo collocatus producat non ignoras. Age dic mihi, vnde robustum illud & validum corpus quo per deuios & indomitos saltus vniuersam Græciam peragraisti atque in Ægyptum vsque penetraisti, ad nos sapientissimos illos senes super tuos humeros allaturus. Audax certe facinus. Pro quo tantum tibi posteris debebunt, quantum soluere difficile erit. Haud te tuum fefellit inceptum. Tulisti certe eos quos attingere ausus est nemo, atque occidentalibus regionibus ostendisti, quorum tantum prius nomina acceperant, eaque tamen magnopere venerabantur, atque ab eis omnem obscuritatem, quæ circa eos erat, amouisti, nostrosque oculos ab omni caligine absterxisti, ita ut etiam cor eorum inspicere possit, nisi penitus lippi simus. Denique per te eos inspexit hæc ætas quo nunquam viderat Italia. Hæc omnia tibi ab eodem donata sunt. Ad hoc etiam te respondere velim vnde memoria illa tot rerum capacissima quæ adeò tenacissima est ut quolibet momento, sibi omnia adsint quæ vnquam vidisti aut audisti, nec tantum retinet, sed quibus ea gesta sunt meminit temporum atque locorum.

Tu ne ergo Saturnum inculabis, qui te tantum ceteros homines superare voluit, quantum ipse ceteros planetas superat. Itaque opus, mihi crede, est palinodia, quam si sapias, quam primum canes.

*Omnes omnium laudes referantur in Deum, principium atque finem.*

MARSILIUS FICINVS  
Ioanni Caualcanti Amico  
vnico, S. D.

**I**Vbes mi Ioannes, ut Saturno, de quo superioribus diebus valde querebar, palinodiam canam. Et iustissime quidem, nemo enim iubet iustius quam qui iusta iubens facit ipse quæ iubet. Et quamvis præcipias iuste, tamen superuacua mandas. Nempe si meo corde cantante necessariò mei pictoris concaua roboant, sequitur ut dum tu cor meum canis, ego concinam. Videris tu quidem mihi palinodiam Saturno ceterisque astris imò Deo astrorum duci in tuis literis cecinisse. Palinodia igitur Marsilio tuo fuerit Epistola tua, in qua laudes illas in eum tuas hac conditione libenter accipit, ut partim ardentissimo amoris in eum tuo attribuantur, partim verò Saturni muneribus. Amoris autem atque Saturni & denique omnium laudes omnes referantur in Deum, principium omnium atque finem.

Quem equidem in me ex hac laudo potissimum, quod eius solius æterno quodam munere, mortalium bonorum minimè cupidus sum, quod verò circa mala nimis formidolosus sum, quod interdum in me reprehendis, complexionem quandam accuso melancholicam, rem, ut mihi quidem videtur, amarissimam, nisi frequenti vñ citharæ nobis quodammodo delinita dulcesceret. Quam mihi ab initio videtur impressisse Saturnus in medio fermè Aquario ascendente meo constitutus, & in Aquario eodem recipiens Martem, & Lunam in Capricorno, atque aspiciens ex quadratura Solem Mercuriumque in Scorpione, nonam cœli plagam occupantes. Huic forte nonnihil ad naturam melancholicam restiterunt Venus in Libra, Iupiterque in Cancro. Sed quoniam temere prolapsus sum? Coges me video rursus non iniuria palinodiam alteram cantare Saturno. Quid igitur faciam? Equidem tergiversabor ac dicam, vel naturam eiusmodi, si vis, ab illo non proficisci, vel si ab illo proficisci necessarium fuerit, Aristoteli assentiar, hanc ipsam singulare diuinumque donum esse dicenti.

*Nemo ascendit ad Deum, nisi in quem quodammodo Deus ipse descenderit.*

MARSILIUS FICINVS  
Ioanni Caualcanti amico  
vnico, S. D.

**E**T si iam pridem veteres tres Epistolas tibi pollicitus sum, tamen quia opinor te his diebus mustum libentius gustare, quam vetus, mitto noua. Composui hoc triduo Theologica Opuscula tria, de triplici in Deum mentis ascensu, ad quem nullus ascendit, nisi in quem quodammodo prius ille descenderit, qui moueri potest nusquam, cum externum ei desit spatium, cuncta & intrinsecus prorsus implenti, & extrinsecus infinitè comprehendi. Mitto Opusculi tertii Procemium nondum emendatum. xxviii. Octobris. M. cccc. lxxvi.

*Nugis vulgus pascitur.*

MARSILIUS FICINVS  
Ioanni Caualcanti amico  
vnico, S. D.

**A**Beo hac hora ex agro nostro Cellano Florentiam petiturus. Fero mecum Theologica opuscula quinque hoc ultimo nostræ rusticationis tempore à nobis composita, de diuina providentia nominibusque Dei, & gaudio contemplantis; de ascensu à materia elementorum ad cœlum sine materia, ad animam sine quantitate, ad Angelum mutationis expertem, ad Deum sine accidente substantiam, de raptu Pauli ad tertium cœlum, & quomodo anima illic Dei æternitatem videat atque suam, de impedimento mentis à corpore eiusque immortalitate, de lumine, quod sit in diuinis numinibus claritas gaudens clarumque gaudium, in mundi verò machina sit risus quidam cœli ex numinum gaudio proficiscens. Hæc verbis quidem breuia sunt, quod planè ipse video, utrum verò etiam sententiis breuia sint ac longa, ceteri viderint, si tamen qui folia nostra quondam floresque legebant, nunc fructus qualescunque illi colligere non dedignentur, sed nescio quomodo Maius quotannis, & si penè fructibus caret, tamen mortalibus gratior aduenit quam September. Pergo iam ad urbem, veni & tu Ioannes, ut saltem Urbani familiares simus, & si hac æstate familiares rustici non fuimus. Vale decimo Nouembris. M. cccc. lxxvi.

Sed cur ego nunc de tertia Puella hac nuper tibi nata verbum nullum? Quia & tu ad me verbum nullum. Vis ne verum fatear? Non prius hac de re faciam verbum quam rescuiero congratulaturus ne sim an consolaturus. Gaude tamen utcumque sit regis magni muneribus. Nihil enim à magno paruum vel contemnendum.

*Amicitia vera est quam religio vera conciliauit.*

## MARSILIVS FICINVS

Antonio Sorliuensi, S. D.

**N**on est inter Religiosos amicitia vera, nisi quàm religio vera conciliauit. Cupio igitur nostram ab hac exordiri. Tua quidem religio clarissima est, mea verò qualis sit hic tibi quem mitto liber ostendet. Vereor ne parum formosa forsitan videatur, utinam saltem non mala. Tunc demum re vera probatam existimabo, cum ab Antonio viro omnium probatissimo probatam esse rescuiero.

*Non cortex nutrit, sed medulla.*

## MARSILIVS FICINVS

Philippo Sacramoro, insigni

Iuris Canonici Professori, S. D.

**M**itto ad te Religionem nostram, Religiosi pignus amoris. Si fortè videbitur pauperrima, memento Christianam Religionem in paupertate fuisse fundatam. Memento prætereà apud nos non expressores librorum esse, sed oppressores. Hæc si amabitur abs te, satis formosa diuesque videbitur.

*Miser qui ex futuris externisque pendet.*

## MARSILIVS FICINVS

Loetario Neronio, S. D.

**C**upio vehementer interrogari nunc abs te, cur legam scribamve? cur discam, doceamve? Atque summatim quam ob causam quodlibet aut cogitem, aut loquar, aut faciam? Esto igitur rogaueris me, amice. Respondeo subito, me non ob aliam rationem quidlibet agere, nisi quia delectat. Aduerte quid dicam, non dixi ut delectet; nam illud quidem futurum est. Nolo autem à futuro & in-

certo pendere, fallique, imò in præferti certoque consistere, sed ultra si modo id nunc te delectat progredere, si quid vis, ago, quia mihi in præsentia æternitateque placet, non ut mihi placeat in futurum tempus, & ad tempus. Multominus ago, ut mortalibus placeam. Quoniam hoc non solum futurum est, atque breuissimum, sed etiam externum, & in aliorum arbitrio propositum. Equidem sæpè animaduerti, qui à rebus externis pender, semper sollicitum maximumque vivere, & sæpissimè falli, solus autem tranquille certeque viuit, qui non extra se in rebus mortalibus, sed intra seipsum æternis vitam agit, solus nunquam pauper qui mercedem suam non in opere ponit, sed in opera, solus nunquam infortunatus qui non post & extra principium expectat finem, sed finem suum in principio collocat. Agimus igitur quoduis ob hoc ipsum, primò quia delectat & placet: scimus prætereà, neque posse nos per aliud delectari, quàm per ipsam delectationis ideam, id est, Deam. Neque alia ratione quicquam posse placere, nisi quia bonum. Vnde agnoscimus in singulis quæ nobis placent, nihil aliud re vera nobis placere quàm diuinum ipsum bonum, ex quo, & per quod cuncta sunt bona. Ergo cæteris omnino posthabitis, amice optime, totis viribus adnitamur, ut huic sùmo opere placeamus, sine quo impossibile est, aut alia nobis, aut nos aliis, aut nos nobis villo pacto placere. Vale vix dixeram, amice optime, Vale, volat, ecce repente ad nos Epistola tua melle mihi dulcior ac pretiosior auro. At, non licet mihi nunc in laude hac ulterius progredi, ne vanior fortè videar si eam Epistolam satis laudauero, quàm laudat me plus satis. x. Decembris, M. cccc. lxxvi.

*Qui sequitur omnia, nihil assequitur.*

## MARSILIVS FICINVS

Carolo Valgulio Briscienfi, S. D.

**Q**uæris quid agam hodie, mi Valguli? Quod heri. Quæris iterum, quid cras agere cogitem? Quod hodie. Persuasit mihi Plato noster, ita demum me quam plurima perfecturum, si semper idem fecero. Neq; id quidem in iuria. Nèpè qui sequitur omnia, nihil assequitur. Plurima quidem impediunt vnam, vnum autem ad plurima confert. E multorum numero est qui multa sequitur, singularis tantum est qui



uum. Puerilis & infirmi ingenij est quolibet momento diuersa tentare. Temeraria quoque ambitionis est quotidie plurima profiteri. Docet nos Pythagoras unitatem ad bonum spectare, ad malum verò diuersitatem. Quemadmodum vis naturalis in iecore, ac vis vitalis in corde quando distrahuntur in duo ad utrumque debilitantur, ita vis animalis in cerebro nobis ad diuersa non suppetit. Præterea, quisque id aptius peragit ad quod aptior à natura est institutus. Vni autem vnum est consentaneum. Vnum igitur est necessarium; nam plurima turbant. Vnum, inquam, quod ipsum in se honestum sit, & agenti præ cæteris aptum. Denique si Deus idem semper est, eademque agit, eo quis à Deo remotior, quo ad diuersa procliuior. x. Decembris. M. cccc. lxxiii.

*Quomodo inuidia puniatur, vel mitigetur, vel extirpetur.*

MARSILIVS FICINVS  
homini inuidiam timen-  
ti, S. D.

**V**is ne iniurias ab inuidis illatas vicisci? Da operam ut in dies magis, magisque inuideant. Nam si poena malum est, certè in ipso malo, est poena mali. Nunquid vis liuorem quodammodo mitigare, humanus ante alios esto. Sanè cætera bona liuorem irritare solent, sola humanitas mitigare. An fortè cupis inuidiam omnem penitus extirpare? Hoc opus, hic labor. Talem enim tantumque te oportet euadere, ut nullus aut superare, aut æquare te speret. x. Decemb. M. cccc. lxxvi.

*Dilige omnes, elige & ama unicum.  
Soli confide Deo.*

MARSILIVS FICINVS  
homini, S. D.

**D**oles ut audio ab amico te fuisse deceptum. Non potes, mihi crede, ab amico deceptus esse, sed ab amicis, vnus est alter ego qui non fallit. Multi autem videntur quasi ego qui sapissimè fallunt. Quamobrem si quando falleris, ne amicum accuses, sed amicos, imò neque amicos quidem, sed tuam temeritatem, qui vel prius amauisti quàm diligentissimè iudicares. Vel amauisti nimium, vel humanæ fortis nimium es confusus. Dilige omnes, elige & ama unicum. Soli confide Deo. x. Decembris. M. cccc. lxxvi.

*Benefacta malè locata malefacta  
arbitror.*

MARSILIVS FICINVS  
Marfilio Ficino, S. D.

**B**enefacta malè locata malefacta putas? Et quia malis ingratique benefeceris malè fecisse te doles? Non iubebone doleas. Siquidem ob maximum quendam errorem dolore & quidem maximo dignus es iudicandus. Atque cum malè bonum feceris dignus es malo. Ergo dole sicuti doles, & ut par est poenitentia cruciari. Sed noli vel aliorum ingratitudinem vel fortunam tuam, sed tuam potius prudentiam criminari. Iustè tibi ingrati sunt homines quibus ipse non iustè donaueris. Quinetiam tu nunquam erga alium ingratus fuisti vel hominem vel certè Deum, ingratitudo punitur. Nunquid tam diu sub magistra Philosophia tot alienà discere studuisti, ut tua dedisceres? O rem miram, solent Philosophi dum parum sapienter sectamini sapientiam sæpè desipere. Quid ergo? Debebas ne nihil cuiquam tradere? Absit, dum alienam ingratitudinem studes effugere ut tu Deo ingratus sis omnium largitori, à quo cuncta gratis acceperis. Absit dum displicent tibi mali, ut ipse vel malus euadas vel minus bonus bonisque displiceas. Fame perire coguntur qui ob hoc ipsum non serunt vltius, quia pars maxima præteritæ sementis exaruit. Igitur debebas aut antequam quicquam dares diuturno ac saltem trilucri examine ingenium vitæque hominis experiri. Aut si fortè ocus succurrere res urgebat, saltem Aristotelis more non huic homini dare, sed homini, imò Platonis more non homini dare, sed Deo. x. Decembris. M. cccc. lxxvi.

*Marsilij Ironia aduersus Philosophorum aduersarios.*

MARSILIVS FICINVS  
Laurentio Medici viro Magnanimo, S. D.

**P**ræterita nocte apud te amico cuiusdam nostro ioco quodam obiectum fuit, eius nonnunquam discipulos insanire. Et quia iucundè admodum est obiectum, accepit & iucundissimè. Sed vnum illi molestissimum fuit quod non interrogatus est abs te qua ratione desipere. Non enim vult eos absque ratione desipere. Omnia Laurenti apud Philosophantes ratione aliqua fulciunt, ut etiam cum ratione insa-

niant. Ac dum sapienter videntur desipere, certè insipide sapiant. At cur non vltro ille vobis tunc etiam non querentibus dementiæ causam attulit? Quoniam solet Pythagoricorum more coram heroibus nihil interrogatus, nihil loqui. Esto igitur cum rogaueris Laurenti, ego ita pro illo respondeo quàm libentissimè. Soles sæpè Medices dicere, Christum cruci affixum mira quadam operum varietate, ob quam tum homo vicissim, tum Deus intuitibus apparebat, delirare dæmones compulisse. Amicus quoque noster penè simili quadam diuersitate vertit homines in insaniam. Sed quomodo? Quatuor apud Pythagoram sunt sapientiæ fontes, quatuor apud hunc fontes insipientiæ. Hic & si nihil vnquam assequitur, sequitur tamen vt vides omnia. Attalo duplo deterior. Quia neque bene sua res agitur neque belle. Ergo familiares sui cum videant iugiter mutantem Prothea formas, alij chimæ hæc perterriti furore attoniti stolidiores euadunt, sunt etiam simiæ quædam quæ dum versatilem eius varietatem student penitus æmulari, vertigine occupantur & cadunt. Neque desunt auiculæ multæ, quæ dum noctuam hanc siue bubonem palam deludunt, clam aucupio capiantur & pereant. Habes Laurenti quadruplicem huius dementiæ fontem. Quid igitur Apollo facies aduersus publicam hanc, vt ita dicam, vrbis orbisque pestem? Nunquid sagittis hanc tuis quasi Pithonem confodies? Nequaquam vt arbitror. Iamdiu enim accepta lyra arcum & pharetram posuisti. Quid ergo? Lyra ne carminibusque mulcebis? Neque id quidem. Non enim tanta hic opus est opera. Proinde malus hic maleficusque tamdiu videtur ob hoc solum quia eum stellæ quædam aspiciunt malignæ. Age igitur benignissime Phœbe tuum hunc radiistantum aspice tuis. Bonus subitò cunctis beneficusque videbitur. Vale, atque Socraticam hanc Ironiam aduersus Philosophorum aduersarios considera diligenter Commendo tibi Angelum Politianum nostrum.

*Sua mittenda sunt ad suos.*

MARSILIUS FICINVS  
Petro Soderino S. D.

**V**Olui sæpè Soderine dulcissime ad illos qui Epistolas meas à me petissent nostrum ipsum Archetypum mittere. Sed hæc meus mihi liber summa cum querimonia statim obiciēbat: Nōlico me mittere

precor vbi ipse non es mi pater. Cum verò ad Petrum modo proficisci iuberem, nihil prorsus obiecit, vtpote qui, vt videtur, intelligebat quando ad Soderinum proficisceretur se à Marsilio non discessurum. Ito ergo feliciter ad hunc, ito mi liber, sine quo ego nusquam eo. At poscis nunc non nihil viatici video. Ego autem non reperio in presentia viaticum pretiosius quàm Paulum Antonium charissimum Petri meique fratrem. Huius igitur nomen dulce viaticum ferto tecum. Et quoties hic te fortè in laribus suis aspexerit, toties Marsilij nomine saluere iubeto.

*Bene faciendum est amico vel nolenti.*

MARSILIUS FICINVS  
Ioanni Caualcanti amico  
vnico, S. D.

**S**olent, optime mi Ioannes, qui nimio rei alicuius studio detinentur quicquid ad hoc ipsum spectat vehementius affectare. Tu verò, quod mirum est, ingenti literarum studio admodum occupatus non vis literas. Ego autem vsque adeò tibi bene volo vt velim vtrobique tibi bonum vbi velis vbi nolis. Ergo quamuis plerique alij tibi his temporibus nihil responsuro nihil scribant, accipe saltem à me, hoc est à teipso, literas ô laurco! ô helluo literarum! Si nihil mihi responderis, curabo equidem nihil. Scio enim te si minus his literis, saltem in literis responsurum. Qui autem longè amat, non tam breuem quàm longum fructum exigit ab amico. Medices vtrique paucis ante diebus in causa nostra aduersus aduersarios nostros non correptione tantum vsi sunt, sed etiam inuectiua. Verùm ne quid præter literas ad te literarum nunc solum auidum fortè mittam vel publicum vel priuatum. Vale, Primo Ianuarij. M. cccc. lxxvi.

*Tres sunt contemplationis Platonica gradus.*

MARSILIUS FICINVS  
Laurentio Medici viro magnanimo, S. D.

**D**Ecreui (magnanime Laurenti) antequam grande illud Platonice Theologiæ volumen ederem, tuo nomini dedicatum, in quo adhuc superest nonnihil, quod examinatione indigeat, edere si tibi placuerit argumentum, non vt huiusmodi argumento, quasi quodam Theologiæ præludio exercitatus accedas prom-

prior ad ludendum, cum mihi videaris ipsam ludi palmam penè iam consequutus. Sed ut hoc interim pignore admonitus memineris, & meminisse me tibi debere, quod iamdiu iure promiseram, & solvere quandoque velle quod debere cognosco. Præsertim cum non tam hoc ipsum debeam, quia promisi, quàm id promiserim, quia cuncta debebam.

Tres verò sunt præcipui contemplationis Platonice gradus. Primus quidem à corpore per animam ascendit ad Deum. Secundus autem consistit in Deo. Tertius denique ad animam corpusque descendit. Tres quoque gradus nostrum continet argumentum.

*Vbi ipsum vacillat fundamentum quicquid  
superstruxerit corruet.*

MARSILIUS FICINVS

Paulo Florentino, sacerdoti  
egregio, Conphilosopho suo, S. D.

**Q**Uæris, mi Paule, quam ob causam ad te nihil scribam. Quia ubi sermo perpetuus, nihil opus est literis. Tamdiu loquor, mi Paule, tecum, quamdiu tecum loquor, inquam, quia diligo. Non diligo, quia loquor. Quæ aut Epistolis, aut verbis solum stat amicitia silentio cadit. Quæ breui utilitate, vel voluptate contrahitur, breui tempore dissipatur. Vbi ipsum vacillat fundamentum quicquid superstruxeris corruet. Quamobrem indissolubilis est nostræ benevolentiae nodus. Quem non levis quædam, brevisve connectit causa, sed æternæ Philosophiæ vlnæ deuinciunt. Librum de Prouidentia Dei, quem petis, committam tempore quo prouidit Deus me fore missurum. Libere tamen mittam, quia & hoc ipsum prouidit missurum fore me libere.

*Vbi feruet charitas, ibi Deus lucet, ibi  
gratia emicat.*

MARSILIUS FICINVS

Alberto Parisio, doctrina  
moribusque præclaro, S. D.

**D**EUS ipse charitas est, qui manet in charitate, in Deo manet, & Deus in eo. Hæc Deus omnipotens diuino Ioannis Euangelistæ cecinit ore. Vbi igitur potissimum feruet charitas, cum Deus illic præcipuè luceat, nimirum splendor gratiæ, gratiaque splendoris efful-

get. Cum verò nihil vnquam mihi gratius fuerit, quàm illic esse ubi huiusmodi gratia fulget, certè in corde tuo iamdiu cor viuit meum. Ut autem ubi cor meum amando viuit, ibi viuat & mens disputando: accipe hodie in libro quem mitto, mentem amice meam, de fide speque diuina pro viribus disputantem. Meritò fidei speique vehiculum cum ad charitatem vehere soleat, quod tam Philosophi quàm Theologi arbitrantur, mentem nunc meam, ad mentem aduehit tuam, tum charitate flagrantem, tum gratia refulgentem.

*Omnia mundi bona illi mala sunt, qui immundus viuit in mundo.*

MARSILIUS FICINVS

Hominum generi, S. D.

**Q**Uid tamdiu vituperas homo mundum tanquam immundum penitus atque malum? mundus certè quamuis à ratione quadam pulcherrima optimaque, pulcherrimè & optimè disponatur atque ducatur, tibi tamen immundus est & malus, quia immundus viuus in mundo malusque in bono. Prima tibi mundanorum origo malorum est, mundanorum bonorum nimius appetitus. Paruum amas mundum vehementius quàm magnum. Magnum quoque hunc quem vides admiraris, magis quàm immensum quem intelligis, in quo ferè ita magnus continetur sicut paruus in magno. Amas, ô mens coelestis, terrenam umbram tuam, id est, corpus, magis quàm coelestem splendorem, tuum magis quàm supercoeleste lumen. Quoniam verò motionis omnis principium siue naturalis siue animalis est amor, idcirco dum ardens corpus amas, huic affectas timesque omnia, affectando autem sollicitaris, dolesque timendo.

Ah! cur tanto ardore mens amens hæc amas, quæque facillè impediri possunt antequam consequaris, tam facillè possunt postquam possederis auferri? Heu cur ipsa te fugiens, tam anxie sectaris quæ te tam celeriter fugiunt? Misera quid frustra tamdiu terrena hæc volandia tenere tanquam bona conaris? Quæ quidem tenere præcul à bono te possunt. Ipsa verò teneri abs te villo pacto non possunt. Quid tam temerè confidis in motu rapidissimo pedem figere? Quid vacuo impleri? Quid ventum stringere pugno? Vis ne ardentem hanc sitim quæ te tantopere vexat prorsus extin-

guere? Aquam vigilans bibe veram, non aquæ in somnis imaginem. Scito autem eas dumtaxat res veras existere, quæ ad veritatis iudicem intelligentiam pertinent. Quæ verò ad sensum attinent veritatis ipsius ignarum, verisimiles esse non veras. Vis breui diues esse? Tantum cupiditati iam stude demere, quantum addere cumulo hactenus studuisti. Viue precor ad naturæ legem, quæ paucis minimisque contenta est; non ad opinionem, quæ semper cogitet esse te pauperem. Necessitas quidem breuibus clauditur terminis, opinio nullis. Necessaria nobis passim exposita parataque sunt, ad superflua laboramus. Necessitas iter agenti vtile commodumque viaticum præstat, opinio inutile pondus atque laborem. Si quietem optas ne quæras mota quietem, sed siste motum, si imperium, ratione tibi impera. Si libertatem, rationi seruito. Si deuitare dolorem, fuge malorum escam voluptatem, nocet empta dolore voluptas. Voluptas illa corporis, dolorem gignit maximè, quæ videtur omnium maxima. Medicinæ ars & experientia docet fel nulla ex re magis fieri quàm ex melle. Quanto dulciora sunt alimenta, tanto bilem creant amariorem. Cur natura institutum est, vt profusè ridendo, sæpè lachrymaremur? Lachrymando autem minimè rideremus, nisi vt admoneremur veriorem in sensibus dolorem esse quam voluptatem. Siquidem dolor in voluptate potius quàm voluptas in dolore sentitur. Si tibi placere desideras, da operam vt non vulgo, sed vt sapienti imò, sapientiæ placeas, tibi ipse displiceas, necesse erit, si cuipiam præter rationem placere volueris. Si prudenter viuere, memento eam bonorum malorumque vicissitudinem esse, vt neque bona hæc absque timore suscipi, neque mala sine spe debeant sustineri. Bonis ergo moderatè gaudendum, malis autem moderatius est dolendum. Ex præteritis disce præsentia. In præsentibus quantum potes circumspecte singula. Ex singulis prospice finem. Neque præsentia siue dicenda siue agenda vnquam aggrediaris, nisi pro viribus futura prospexeris. Neque agas dicæ quicquam cuius nequeas rationem probabilem reddere. Denique cum in singulis Deo te suppliciter commendaueris, atque singula tam rationis examine quàm prudentum consilio feceris, & mente tranquilla vine, & quicquid sequitur in melius accipe.

*Quod gratis accepistis gratis date.*

MARSILIVS FICINVS  
Francisco Marescalco dilecto Con-  
philosopho suo, S. D.

**Q**uid nam ambigis Marescalce, vtum librum meum de diuina gratia disputantem gratis tibi dederim necne? Non sumus, mi Francisce, Samaritani, sicut accepimus sic & dedimus. Muneris huius pretium quidem sit, vt tibi sit gratum, fructus autem vt ego ac tu diuinæ gratiæ grati simus.

*De sufficientia, fine, forma, materia, modo, condimento, auctoritate conuiuij.*

MARSILIVS FICINVS  
Florentinus, Bernardo Bembo Veneto  
equitii, iurisconsulto clarissimo, S. D.

**C**ogitanti mihi non nihil Philosophicum de vera conuiuij magnificentia & elegantia scribere, primus ad quem hac de re scriberem Bernardus Bembo occurrit Philosophiæ charus alumnus ac magnificentia & elegantia singularis. Accipe igitur libenti animo mi Bernarde quæ de conuiuiio parum pingui pinguis Marsilio tuo Minerua dictauit.

*Nullum humanum oblectamentum sufficientius quàm conuiuium.*

**C**ommunis Peripateticorum Medicorumque sententia est, hominem ex corpore animaue constitui, atque corpus ex parte quidem altera crassiore, hoc est, membris humoribusque, altera verò subtiliore, id est, vaporibus quibusdam sanguinis spiritibusque constare. Animam autem ex sensu & ratione componi. Et quemadmodum humor se habet ad spiritum, ita se habere sensum ad rationem. Neque posse quenquam aliquando in rebus humanis contentum viuere, nisi quando vel parumper his omnibus hominis partibus fueris satisfactum. Cætera quæ apud homines habentur bona ad vnum, aut duo ex his quæ diximus pertinere videntur, solum verò conuiuium omnia comprehendit, conuiuium dico legitimum, quod quidem, vt singula numerem, efficit membra. Humores instaurat, spiritum recreat, oblectat sensus, fouet & excitat rationem. Conuiuium laborum re-

quies, remissio curarum, ingenij pabulum, amoris & magnificentiæ argumentum, escæ beneuolentiæ, amicitia condimentum, fomentum gratiæ, vitæ solarium.

*Finis conuiuij est dulcis vitæ communio.*

**C**Æterum, ut clarius pateat, quod legitimum sit conuiuium, videamus quis conuiuij finis, quæ forma, quæ materia. Huius autem finis esse videtur, quod eius indicat nomen non commessatio, non compositio, ut est apud Græcos, sed dulcis vitæ communio, ut quemadmodum in eo communi vescimur corporis alimento, ita eodem mentis vitæque bono & communi voluntate fruamur.

*Forma conuiuij est decens numerus, & qualitas conuiuiatum, confabulatio, atque lyra.*

**A**D huius formam pertinet maximè numerus & qualitas conuiuiarum. Qua in re Varronis illud valdè probamus, ut neque pauciores sint quam tres Gratia, neque plures quam Musæ nouem. Ex hoc autem Gratiarum Musarumque commercio, etiam quales esse debeant satis apparet, sint enim oportet gratiosi, musici, literati. Cauendum est igitur ne quis contentiosus, & qui propere excandescat, facile admittatur, nisi fortè talis sit, ut vel primo poculo vel vno verbulo mitigetur. Exulent etiam inde melancholici penitus & amari, nisi Xenoni Stoico & Zenocrati Platonico, similes sint, qui videlicet & tanquam lupini aqua, sic mero profusi dulcescant. Si quid de rebus diuinis tractandum fuerit, sobrij differant, si quid de rebus naturalibus disputent, mensa remota. Inter epulas autem sermo sit varius, iucundus, brevisque, historia breuissima, longiuscula verò fabella. Naturam rerum artificem imitentur, & vitæ magistrum, ut quod illa in saporibus suauissimis, isti efficiant in sermonibus, misceant videlicet dulcedinem acrimoniam, grauitati leporem, utile dulci, facit sint, acresque & falsi, non molesti, non amari. Acetum quidem conuiuium tollerat, non absinthium, scurræ minimè, si molestior sit, admittimus. Obscenos autem & spurcos nimium detestamur, sordes enim in animo oreque, & vultu, multo magis quam in vestibus & apparatu prudentes offendunt. Proinde ne lyra mihi dissonet mea, sed salua sit, ritè vocanti, adesto precor, ô decus Phœbi! & dapibus supremi grata testudo Iouis, ô laborum dulce leni-

men! Adsit omnino Gratiarum Musarumque mensæ cithara crinitus Iopas.

*Materia conuiuij necessaria est Bacchi Cererisque fructus.*

**Q**uantum verò ad conuiuij materiam spectat, primum quidem putamus vitæ venenum esse mœstitiā, mensæ quoque venenum esse tristitiā. Mœstitiæ verò tristitiæque teriacam, suaue clarumque vinum. Cuius vim numinum viribus Æsculapius æquat. Ingenium quoque ac vires temperato vini calore feueri mirificè Plato noster asseruit. Sed ne, sicut Homerus, vini laudibus arguar, Baccho dimisso ad Cererem iam confugio, hortorumque custodem. Pingues Sardanapali vinctasque nimium dapes nequaquam desideramus. Nolumus autem vilo pacto Pythagoricis frugibus & oleribus pomisque carere. Nulla enim facilior mensa, nulla felicior ea, quam natura vobis largissima præparat.

*Modus condimentumque conuiuij.*

**V**T parcum omnino conuiuium haud valdè laudamus, ita luxuriosum penitus detestamur, hoc enim commori est potius quam conuiuere. Lautum splendidumque ad summum non requirimus, ne seruilis difficultas insit, ubi facilem querimus libertatem. Mundum certè desideramus & purum, immundum horremus & sordidum. Denique nequid apud nos insipidum sit vel insulsum, nequid sordidum vel obscurum, omnia ingenij sale condiri debent ac mentis morumque radiis illustrari, ut quemadmodum de cœna Platonis Xenocratisque dictum est, conuiuium nostrum postriduum longius suauiusque redolet.

*Authoritas conuiuij à Philosophia, cælo, Deo.*

**S**I quis autem fortè miretur, quòd vsquè sàdè conuiuium celebremus, meminisse debet idem fecisse Platonem, Xenophontem, Varronem, Iulianum quoque & Apuleium, Macrobiūque Platonicum. Nonne Themistocles, Socrates, Empedocles, alique Philosophi permulti conuiuiis frequentabant? Nonne apud priscos Heroës & coelicolæ sæpè discumbunt? Æther quoque lacteum habet orbem. Liberique patris craterem, habet & amphoram, cancrumque & pisces & aues, agnum quoque & capreolum, & iuuenctum. Mirto qualia



Mahumetes conuiuia beatis polliceatur. At quis nesciat Christum vitæ magistrum conuiujs frequenter interfuisse? Primum illic ostendisse miraculum, quando aquam vinum dicitur reddidisse? Præterea in summa illa concione paucis panibus piscibusque plura hominum millia satiassse? quidnam aliud fauus mellis sibi vult? quid assis pisces? quid fractio panis? an noui in cœna discipulis præcipua diuinarum rerum mysteria cecinit? Huc tendit & mirabile illud Eucharistiæ sacramentum. Huc etiam quæcunque de cibis poculisque diuinis in saceris Hebræorum Christianorumque literis sæpè leguntur. Quorsum hæc de conuiuio tam multa? Vt videlicet qui seorsum ab alterutro non sine molestia viuimus, vnà iucundissime conuiuiamus, meminerimusque verum hominis alimentum, non tam plantam bestiamque esse quàm hominem. Alimentum quoque hominis integrum non tam hominem esse quàm Deum. Cuius necitare & ambrosia dumtaxat humana fitis & fames continuè excitatur & crescit, ac tandem tam mirabiliter feliciterque impletur, vt illic solum summa sit semper cum summa saturitate voluptas.

Vale feliciter vnà cum felicissimo senatu vestro, Bernarde clarissime, Academia omnis milles se tibi commendat. Tu verò obscuram Lunam nostram lucenti Phœbo iterum iterumque commenda.

*Quam gratus aspectus amici, quàm necessarius, quàm voluntarius amor.*

## MARSILIVS FICINVS

Ioanni Caualcanti amico  
vnico, S. D.

**C**VM longas hodie in lecto moras trahere cogerer, atque remedium aliquod contra longioris accubitus tedium cogitarem, primus, imò solus qui imminenti occurreret tædio, occurrit mihi Caualcantes meus, meus Medicus singularis. Salue igitur iterumque, ô mea salus, malorum expulfor meorum, bonorum mihi omnium condimentum. Tu mi Ioannes cætera quidem multa declaras quotidie, sed Aristotelicum illud imprimis, nihil videlicet in rebus humanis gratius esse præstantis amici præsentia. Huius ego Aristotelici sensus & veritatem accepi abs te iamdiu & didici rationem. Profectò qui tam desiderio sui olim quàm nuper absentia corporis me mihi penitus abstulit, idem vicissim mutuo quodam affectu mentisque præsentia red-

dit. Neminem latet quàm libenter imaginem suam speculis intueantur omnes vel homunculi. Amicus autem in amico non imaginem suam tantum inspicit, sed se ipsum. Ego certè & si quasi bellus in me homuncio sum tenuisque breuisque, in Heroico tamen speculò ex quo amari, lustrari iam quinque procerum me video procerem non homunculum. Accipies ergo Epistolam fortè necessariam magis quàm voluntariam, siquidem vitandi, vt dixi, tædij causa dictare hanc video fuisse compulsus. Heu mihi deliqui modo, nescio, quomodo, mi Ioannes, deliqui nimium aduersus Heroicum genium, numenque Platicum. Ecce iam Plato ex alto me acriter increpat, ita reclamans: Quid voluntarium in necessario, in amante, Marsili secernis? Tam voluntaria est, ô Marsili, quàm necessaria amantis Epistola. Nulla vel necessitas magis voluntaria, vel voluntas necessaria magis quàm amatoria. Quidnam magis voluntarium est quàm amor? Qui primus, summus, perpetuusque est voluntatis affectus, facitque omnino vt non amare nolimus? Quid rursus magis necessarium est, quàm amor? Qui clam numinum coelestium radiis flammisque incauto cordi prorsus inurit. Atque amator flammam iam experitur adultam priusquam radium senserit & scintillam. Non ardere non potest, si cœlesti ardet fato. Non ardere non potest, si quidem dum refrigerium querit, hoc ipso potu semper accendit ardorem, quo frustra quodammodo confidit extinguere. Vndenam huiusmodi mixtio necessitatiseque tam mirabilis? Nisi quia Deus & summa necessitas est, & summa libertas, omnesque summum bonum summo opere volumus, neque nolle possumus, neque volumus posse nolle. Idem fermè huic accidere solet, quicunque calidiore radij diuini splendore, qui in pulchritudine nobis mirabiliter emicat, blande allicitur, clam rapitur, vehementer accenditur. xxx. Ianuarij. m. cccc. lxxvi.

*Lupus est homo homini, non homo.*

## MARSILIVS FICINVS

Iacobo Bracciolino viro doctissimo,  
S. D.

**T**RISTE lupus stabulis. Triste gallinæis vulpecula pullis, sed triste magis hominibus homo. Nam & leo & lupus & vulpes est hominibus homo, sicut optimum animalium est, si visquam reperiatur, homo optimus, ita pessimum animal est homo

peffimus. Prudentiffimus eft, mi Braccioline, qui cautiffimus. Cautiffimus autem omnium, qui diligenter cauet ab homine, fed hic opus eft Lynce atq; Oedippo, hic opus eft Argo. Solus hominis ingenium confiliumque tenebit, qui femper meminerit aut nullo pacto, aut certè raro admodum diffillimeque poffe teneri.

*Nulli unquam Deus omnia dedit.*

MARSILIVS FICINVS  
homini faftidiofo cognitionem  
fuiipfius dicit.

**V**ideo neminem vndique tibi placere, hic acutus quidem eft, fed levis & iracundus, ille autem grauis, fed vel tardior vel inflatus, hic doctus eft incontinens, continens ille fed indoctus, alius quia deformis quodammodo vel ineptus vel fordidus videatur offendit, alius quia nimis comptus & vanus. Denique ne fingula enumerare coner, in fingulis eft aliquid quod non probes. Nulli unquam, vt eft apud Homerum atque Platonem, Deus omnia dedit. Meminiffe te volo inter homines effe te hominem, ac dum tibi displicent alii, te quoque aliis displicere. Solum primum bonum eft, in quo defectus eft nullus. In cœleftibus quidem defectus aliquis apparere poteft, fed non malum. In his autem quæ Lunæ fubiiciuntur, & defectus reperitur & malum. Omnia præter primum, quoniam à bono proficifcuntur, bona quodammodo funt, quoniam verò non funt ipfum bonum, vel non perfecta omnino videntur effe, vel mala. Cum igitur mixta fint omnia, qui malum ex fingulis colligit, tandem euadit peffimus, qui verò bonum eligit, optimus. Talis enim euadit quifque qualibus vefcitur alimentis. Bene vale. Atque vt alij te ferant, ferto alios.

*Discendi & loquendi ratio.*

MARSILIVS FICINVS  
Luæ Fabiano Scribæ  
fuo, S. D.

**N**atura nobis instrumenta quibus difcamus multa largitur, oculos, aures, nares, gultumque & tactum. Vnicum verò quo doceamus instrumentum dedit, loquendi fcilicet facultatem. Admonuit certè vt tanto fapius difcendi minifterioque docendi munere yteremur, quanto plura ad difcendum, quàm ad docendum tradidit instrumenta. Nullus igitur

verbofus & loquax poteft fapiens effe, docuit enim femper, didicit verò nunquam. Quifquis autem fapientia literisque caret, non modo pauper, verum etiam cæcus & mutus eft iudicandus. Efto precor velox quidem, & diligens ad audiendum atque videndum, tardus autem ad credendum, tardior ad iudicandum, tardiffimus ad loquendum. Vt poffis bona loqui, audi bona, vt etiam de te audias bene, tu quoque de cæteris bene loquere. Fieri enim non poteft, vt qui male loquitur, non audiat male. In loquendo autem caueto mendacium, non minus quàm fcopulum navigator. Immenfum eft enim veritatis lumen, immenfa potestas. Cito mendacium detegit perditque mendacem. Memento adulationem feruile vitium effe, imò etiam multo vilius quàm feruile. Nemo enim tam apte adulari poteft, quin à cellis longiffime superetur. Memento præterea increpationem temerariam aut rigidam effe, vel periculofam, vel prorfus inutilem. Iubet Plato nofter vt vel loquamur verum dumtaxat vbi profuturi fimus, vel taceamus. Si quis autem Pauli Apoftoli, prudentia, vita, propofito, difcipulus fuerit, folus inflare tam importunè poterit quàm opportunè. Omnino autem cauendum eft, ne dum verbis mores arguimus alienos, interim noftri mores noftra verba redarguant. Cœpifti ficur audio, bene, progredere igitur qua via cœpifti. Atque vt feliciter agas iter, equum tuum, id eft, fenfum habenis & freno cohibere ne definas.

*Vltionis ftudium nihil eft aliud quàm iniuriam  
rurfus accipere.*

MARSILIVS FICINVS  
homini iniuriarum impatien-  
ti, S. D.

**A**ccepiffe doles iniuriam, ô amice, concedo equidem, fed non tam læfus fuiiffe videris, quia male tibi fecerit quifpiam, quàm quòd malum exiftimafti, quod fecit. Malo quidem omnia vel bona vertuntur in malum. Bono autem cuncta vel quæ videntur peffima in bonum denique conuertuntur. Vlcifci cogitas? Caue monito diligenter, nam fi vlcifci tentaueris, fecundam ac tertiam patieris iniuriam, ac ftudio perdendi alterius, ipfe te perdes, apes minima iniuria læffitæ pungunt, vitamque pungendo relinquunt. Vt prorfus obliuifcaris non cogo equidem. fortè enim meminiffe operæ pretium eft, vt faltem aliàs tibi caueas à malignis. Solet enim nun-

quam qui semel læsit ignoscere. Ignosce, quæso, libenter, ne & ipse te afflictes, & illerum, iterumque te lædat. Mala illum necessario sua manent. Nihil enim relinquit, vel fortuna intactum, vel fortuna illæsum, vel Deus inaktum.

*Multum errat qui aggreditur multa.*

MARSILIVS FICINVS  
homini curioso & negotioso, S. D.

V Ideo te, ô amice, sollicitum plusquam vellem, neque tua negotia solùm, verumetiam aliena tractantem, quasi iam ritè propria composueris. Quoniam singulis penè momentis fallimur & erramus, nulla vel ad consequendam tranquillitatem, vel ad deuitandos errores via commodior, quàm pauca & egregia cogitare, pauciora electaq; loqui, agere paucissima, & illa quidem tampossibilia quàm honesta. Multum errant atque laborant, qui multa cogitando, vel loquendo, vel agendò aggrediuntur, plurimùm autem qui plura loquuntur, & agunt quàm cogitauerint.

*Nunquam satisfacit arti, is cui semper artificium satisfacit.*

MARSILIVS FICINVS  
artifici vano, S. D.

S Atisfacit tibi quamplurimum, ô iners nimium artifex! quicquid aut dixeris, aut feceris. Vis ne bona venia causam tibi dicam? Quia scilicet non plus aliquid forte mens capit tua, quàm lingua manusve expresserint. ô quam pusilla mens, cui lingua manusve æquantur! Profectò vbicunque mens, vt par est, instrumenta superat & materiam, nunquam opus satisfacit opifici, nunquam vero satisfacit arti is cui semper artificium satisfacit.

*Vnicus vite custos, amor; sed vt ameris, ama.*

MARSILIVS FICINVS  
homini imperium affectanti,  
S. D.

V Is ne tutus securusque viuere? Caute timeant te homines nimium, vel tibi prorsus inuideant. Tot nobis hostes sunt, quot timent, & quot inuident. Multos metuatur oportet quem metunt multi, quamplurimis quoque seruit, cui plurima seruiant, subditus quilibet seruit vni, Dominus omnibus. Vnus est vitæ custos, amor, sed vt ameris, ama.

*Gravis quidem videtur iactura pecuniarum, hominum verò grauissima.*

MARSILIVS FICINVS

Andree Cambino, compatri  
optimo, S. D.

Q Vidnam mirabile est in amore? non redamari. Quid impium? propter se amare, quod est alterius gratia diligendum, atque contra, ob aliud diligere, quod sui ipsius gratia est amandum. Quid turpissimum? Odisse quem amaueras. In hoc valdè delinquimus, quòd cum cætera quamuis leuia, nonnisi graui causa compulsi relinquimus, amicum tamen thesaurum pretiosissimum sæpè leuissima quaque causa inducti & deserimus, & insequimur. Iubet Pythagoras ne faciliè amicum quauis de causa amittamus, imò feramus quoad possumus, possumus autem donec relinquere omnino inuiti cogamur. Grauis quidem videtur iactura pecuniarum, hominum verò grauissima. Nihil in rebus humanis vel rarius acquiritur, vel pretiosius possidetur, vel infortius periculosiusque amittit, quàm amicus.

*Parum illi credendum est, qui nimis credit.*

MARSILIVS FICINVS

Francisco Saluiato, Archiepiscopo  
Pisano, S. D.

P Ater verande, quæris, quare nonnullis qui apud nos versantur parum credam? Quia hi, venerande pater, nimis credunt. Diuersa valdè in hoc est diligenditatio atque confidendi, quod faciliè quidem hunc amamus multum, qui faciliè multum amat. Vix autem fidem huic adhibemus, qui cuius vel homini, vel iudicio propere præstat fidem. Quemadmodum ocyus cadit, qui mouetur ocyus, sic faciliè fallitur, qui credit faciliè. Sed quàm temerarium & periculosum est, subito vel cuiuslibet authoritati atque verbis, vel tenni cuidam iudicio nimis credere, tam periculosum irrationabileque videtur probabilem rationem absque certiore alia ratione respuere. Tam denique impium, nefarium, miserabile, nolle absque rationis assertione credere Deo. Deus siquidem ipsa ratio est, nihil autem opus esse videtur ratione, alia, qua ipsi rationi prorsus assentiamur.

*De officiis.*

MARSILIUS FICINUS

Cherubino Quarqualio viro doctissimo, S. D.

**E**tsi nonnunquam minus fortasse officiosus sum quam deceat, quemadmodum solent qui Philosophiæ studiis occupantur, nequeo tamen in præsentia me continere, quin ad virum omnium officiosissimum aliquid de officio scribam. Si quantum ipse in agendo, tantum ego in disputando essem officiosus, neque Panetij subtilitas, hac in re, neque copia Ciceronis desideraretur. Agam igitur pingui Minerva, quandoquidem nunc aliter nequeo. Atque ut officio meo aliquando fungar, ad amicum omnium officiosissimum, omnium officia mittam. Officium est actio vnius cuiusque propria, decorum honestumque seruans, prout res, persona, locus, tempusque postulat. Sacerdotis virtus & officium, est sapientia quædam pietate feruens, & pietas sapientia lucens.

Principis, circumspecta prouidentia, iustitia clemens, sublimitas humilis, humilitasque sublimis. Magistratus, meminisse se non dominum esse legis, sed ministrum, tutoremque publicum ciuitatis, præterea se à Deo dum ipse homines iudicat iudicari. Priuati, tam libenter magistratum parere mandatis, ut non legis necessitate compulsus, sed propria voluntate videatur adductus, Ciuis, siue magistratus sit, siue priuatus, officium est, tam diligens publici cura, quam ingens amor proprii. Equitis, fortitudo quidem in bello, in pace verò magnificentia. Mercatoris, veridica fide atque diligentia externis alimentis alere ciuitatem atque seipsum. Opificis, alimentum à mercatore acceptum iuste singulis ciuitatis digerere membris. Mercatores & artifices atque alii, ita pecunias quærant, ut nemini noceant. Nam quicquid à malo surgit, in malum denique recidit. Ita seruent ut neque videantur frustra, neque seruandi solum gratia quæsiuisse. Sic expendant, ut diu possint expendere, atque honestè & utiliter expendisse probentur. Agricola, de agriculturæ opportunitate consulere aërem & agricolas seniores. Præterea tanta cum fide liberalitateque hospitibus suis agri fructus offerre, quanto illi cum scenore illos reddit ager.

Domini legi rationique seruire, quo possit seruis legitime & rationabiliter dominari. Considerare tam seruum, quam dominum hominem esse. Humanitatem sem-

per cum dignitate miscere. Serui, existimare vitam suam esse domini, atque rationem domini esse suam. Mariti, uxorem quasi corpus suum sensumque diligere, ac diligentissime ducere. Vxoris, prudentem maritum suum veluti suum animum rationemque honorare, atque libentissime sequi. Patris familiæ, filios colere, quasi propriæ vitæ propaggines, atque optimo suo exemplo regere tanquam membra. Filiorum genitorem sequi quasi radicem atque caput, & tanquam Deum alterum venerari. Fratris, erga fratrem ceu ferè alterum affici. Consanguineorum, se inuicem tanquam eiusdem corporis membra diligere. Affinium, ut meminerint se lege quasi natura quadam ita esse coniunctos, ut rem, operamque suam communicare sibi inuicem debeant. Amicorum, communi inter se consilio quærere verum, communi auxilio sequi bonum. Magistri, doctrina & bonitate sua discipulum doctum atque bonum quasi mentis suæ filium procreare. Cupio, si liceret, monere magistros ne obliuiscantur, Aristotelem in diuinum Platonem recalcitrasse. Discipuli, præceptorum honorare tanquam intelligentiæ patrem. Cauere tamen ne magistri vitia latenter imbibat. Iurisconsulti, ut omnium grauiissimus sit, atque sciat, qui sacram adulterat legem, ceu sacrilegum seueriori censura plectendum esse quam qui nummos. Medici, cogitare quando ægròtantes adit, agi de vita, ut nihil sine ratione tentare audeat, nihil sine consilio Oratoris, quæ aliis suasurus est, sibi iam ipsi persuasisse. Poëtæ, ut naturam moresque pingere valeat, utrumque vidisse. Musici, in sono gratiam cantus, in cantu sermonis elegantiam imitari. Meminisse etiam, motus animi, multo magis oportere consonantes esse quam voces. Inconcinus enim alienusque à musis est musicus, cui dum consonat vox lyraque, mens dissonat. Iubet Dauid Mercuriusque, quandoquidem Deo mouente canimus, canamus & Deum. Philosophus, diuina quærat diligentius, ut fruatur, perscrutetur & naturalia, ut utatur. Adsit humanis non intersit, Philosophus singularis ut pro patria non vera subeat vitæ discrimen à Platone & Aristippo non cogitur, quod quidem mihi quoque imò placet, quia Philosophus inuita & contra renitente ciuitate in qua nascitur sit Philosophus, cœlique filius est, non terræ. Adde quod omnino impium miserumque videtur, virum omnia videntem pro salute cæcorum, qui fortè salui esse nunquam possunt, amittere.

Vir, caueat ne vilo pacto muliebris sit. Mulier studeat vt quodammodo sit virilis, maximè verò pudica. Quantum enim virtutum magnanimitas decet, tantum pudicitia mulierem. Senex, videat ne puerilis sit recordetur iuuenem se fuisse. Adolefcens, curet vt sit similis, credat se posse fenefcere, feniores honoret. Indigenæ officium est, patriam vt patris patrem matrifque matrem colere, & quando cum peregrinis aliquid est agendum, se quandoque peregrinaturum existimare. Incolæ & peregrini, fcire se solum esse, honorare omnes, aliena vix attingere, non tractare. Fortunatus, fciat bona fortunæ, soli bono esse bona, ac sereno aëri succedere pluuias. Infortunatus, cogitet mala fortunæ, soli malo esse mala, ac post dies pluuios serenos expectet. Videmus enim ver arboribus folia reddere, quæ abstulit hyems. Homo, consideret, cum nunquam in terrenis contentus viuere possit, se cœli quidem ciuem esse, incolam verò terræ, vt anniratur, nihil cogitare, vel loqui, vel agere, quod minus decere videatur cœlestis patriæ ciuem.

*Nunquam ad infima cadit, qui constitutus in summo & acute & clementer profpicit infima.*

## MARSILIVS FICINVS

Iacobo Cardinali Papiensi.

**D**Vm Epistolam quandam de officiis philosophicam ad Cherubinum nostrum Quarqualium scriberem, Cherubinus ipse vir apprime officiosus mihi supra caput astitit improuisus. Ecce nuncius salutaris, venerande pater, Marsilium sacro nomine tuo iubet iterum iterumque saluere. Nuncius tuus hodie nos tam bonis auspiciis salutauit, vt non modo futuram nunciauerit salutem, & dederit. Salue igitur ô mea salus, saluè semper sub sempiterno authore salutis Deo. Videris tu quidem mihi & oculis Argum, & Lyncem visu, (vt ita dixerim) superare, qui tam sublimis ipse, tam procul Marsilium prospexeris, tam humilem tam pusillum. Vtinam, venerande pater, vt clare ipse cernis, ita me quoque clarum videres. Sic ego tam cunctis notus essem quam cuncta tibi nota. Sed vt clarum me & ipse & quiuis alius videat, respice precor propitius, vt coepisti. Siquidem tradunt Astrologi, benigno quodam astri salutaris aspectu fortunatos nasci homines & claros euadere. Quid autem beneficio tanto gratiæ referam? aliud in præsentia nihil habeo, nisi vt post officia

singulorum à me gradatim pro ingenij facilitate descripta hoc adiiciam. Marsilij quoque Ficini officium est, Papiensem Cardinalem tanquam gratiarum templum ardentè amare, tanquam Musarum fontem singulariter venerari. Atque ego hoc vno officio functus, ita demum officia me officiosissime tractauisse putabo. Proinde si quid ab excelsis de infimo hoc homunculo vnquam audire potueris, hoc vnum, vt arbitror, audisti maximè quod in hoc maximum, Marsilium scilicet Ficinum esse antiquissimum Medicæ domus alumnum. Ergo Medices vtrique Castor & Pollux patroni mei, suppliciter me tibi commendât. Atque existimant dum Papiensi commendatus sum, esse me magnis, probis, doctis omnibus commendatum. VIII. Februarij. M. CCCC. LXXVI.

Commendat se tibi Christophorus Landinus noster, vir doctrina bonitateque singularis.

*\*Facilitatem vitij vite sequitur difficultas, difficultatem virtutis vite facilitas.*

Marsilius Ficinus Petro Nero viro candidissimo.

**Q**Vanto difficilior certa ratione incedere quam casu vagari, ascendere quam descendere, aggredi noua, quam consueta tractare, attingere solum punctum circuli medium, quam in reliqua quælibet eius puncta, quæ innumerabilia sunt, incurrere; scopum ipsum, id est, signum, sagitta percutere, quam quæ circumstant, tramitem sulcumque seruare quam hinc atque inde præuaricari, rectum examum tenere quam dilabi in obliquum; tanto difficilior est recte agere quam delinquere, bonum esse quam malum. Cuius quidem rei inditium est, quod quotidie omnes erramus, raro autem & pauci honeste iusteque agimus. Vermen tamen tantæ huic virtutis difficultati duo rependit diuina lex beneficia. Primum, quod virtutes ita inuicem connectuntur, vt qui vnâ consequitur, assequatur & omnes. Vitia verò contrâ, ita inter se repugnantia sunt, vt nequeant cuncta eidem simul inesse. Quo enim pacto quis avarus simul esse potest & prodigus? aut audacior & timidior? Secundum, quod primum illam nascentis virtutis difficultatem, summa quædam sequitur vitæ facilitas atque voluptas; ac breue certamen præmium sempiternum. Vitij vero facilitatem, mox vitæ miserabilis difficultas sequitur, dolorque perpetuus. Hinc illud Pythagoræ symbolum. Animal cauda nigra ne tangas.



Hoc est, fugito vitium, cui mentis nigredo succedit & voluntatis afflictio. Vale candidissime Nere. Atque postquam & difficultate virtutem & virtute facilitatem vitæ iam es consecutus, ut inde felicitatem adipiscaris, memento tam arduum esse tanque laboriosum ex vasto vitiorum præcipitio reuocare gradus superasque euadere ad auras, ut nemo huc ascendere valeat, nisi quem æquus amavit Iupiter, atque inde ardens euexit ad æthera virtus.

*Sicut pulchritudo natura gignit amorem, sic amor opinione regenerat pulchritudinem.*

MARSILIVS FICINVS  
Iacobo Cardinali Papiensi suppliciter se commendat.

**Q**uo momento Cherubinus Quarqualius me superioribus diebus tuo nomine salutavit, eodem penè nostra illa ad te volavit Epistola. Ardentissimus enim cordis affectus repente nominis tui radiis flammisque accensus, manum prius meam impulit ad scribendum, quam quid potissimum scripturus essem mens mihi dictaret. Ut nihil mirum sit, si quæ celerrimè scripsimus, leuissima videantur. Alia quidem naturæ, alia orationis est ratio, nempe natura quo leuior, eo est & velocior, oratio vero contrà, quo velocior, eo leuior. Verum memineris, venerande pater, (scio quid loquar) te nuper à me Epistolam accepisse, non consilij filiam, sed amoris. Cum verò te non lateat, haud aliter accipienda esse quælibet quam mittantur, non tam consilio quam amore illam, ut arbitror, accepisti. Præsertim cum tu eam ab initio ingenti quodam erga me amore creaueris. Aqua genuit pisces, aqua capit. Planta eodem adolescit quo pullulavit humore. Amore nata est iam pridem nobis Epistola, amor eam tuus qui & creauit amplectitur, amplectendo mirifice fouet, fouendo sibi ipse regenerat pulchram. Sane sicut pulchritudo natura gignit amorem, sic amor opinione vicissim reuera pulchritudinem. At verò quonam pacto, Marsili, putas amore potius quam consilio ab eo viro qui ipsum, (ut ita dicam,) est consilium, tua legi? Quia videlicet si consilium ille ipsum est, rursus est ipse amor. Quantum ergo quæ sibi offeruntur, radiis mentis introspicit, tantum cordis vndique penetrat flammis, quam acriter acutèque sentit, tam suauiter & benigne semper interpretatur.

Quemadmodum frigus tenebras comitatur, ita calor sequitur vbique lumen. Rursus, ita calorem acri circumfusus sapore dulcedo. Apud naturam calore perfectum dulcedo superat acrimoniam, penes perfectum virtute virum, censuram indulgentia superat. Salue igitur Consilium meum. Salue iterum meus amor. Tu precor Marsilio tuo libenter, (vbi opus fuerit,) consule. Vbique tuum ama. Marsilius te tanquam oraculum in rebus grauioribus consulat. In singulis venerabitur, nono Februarij. M. CCCC LXXVI.

*Pios pia decent.*

MARSILIVS FICINVS  
Naldo Naldio Poëtæ, S. D.

**E**t si vetus nihil dare illi possum, cui iamdiu vnà mecum mea omnia dedi, nouum tamen nunc tibi dono munusculum, hoc autem est volumen à me nuper de pia fide compositum. Non quod existimem vel piis huic opus esse verbis, qui piis abundat operibus, vel huiusmodi mea fide, ei viro qui scientia pollet. Sed ne vbi de fide pietateque differo minus ipse fidus piusque videar, si minus interim pii ac fidi amici meminero. XII. Februarij. M. CCCC. LXXVI.

*Pios pia decent.*

MARSILIVS FICINVS  
& Ioannes Caualcantes Amerigo  
Corsino literis & moribus ornatissimo, S. D.

**M**ittimus ad te, amice noster, fide fidelior, nostrum de pia fide volumen. Non quod arbitremur eum virum qui fide ipsa charitateque excellit huiusmodi disputationibus indigere, sed ut in hoc libro tanquam speculo quodam pulcherrimum fidei tuæ charitatisque vultum iucundissime ipeculeris.

*Si perspicuè cerneremus quam turpis & quam ager sit prauus animus, non peccaremus.*

MARSILIVS FICINVS  
Iuliano Medici viro Magnanimo, S. D.

**M**eministi, Iuliane dulcissime, dum vnà præterita nocte vigilarem, casu quodam in hæc verba nos incidisse, quam

turpe sit sine coma caput, quam turpis sine barba vultus. Hinc paulo post orta mihi est declamatiuncula quædam, vt aiunt, quadragesimalis his forsitan diebus accommodata, quæ vtinam tantum tibi compta barbataque videatur, quantum ipse mihi videris & intus & in cute pulcher, quanto deformior est deformitas in vultu quam in manu, ac morbus in præcordiis pestilentior, quam in pedibus, tanto turpitudine ægritudoque in animis impiorum flagitiosorumque hominum abominabilior atque tetrior est, quam vniuersa cunctorum corporum deformitas atque pestis. Si vel oculis cernere vel animo prorsus excogitare possemus sordidam & horrendam improbæ mentis effigiem, certe raro admodum & leuiter peccaremus, nihilque longius fugeremus, quam malæ mentis aspectum. Eadem penè est pulchritudinis animi ad corporis pulchritudinem comparatio. Nam illa quidem si vel parumper oculis aut animo cerneretur, multo blandius alliceret, rapacius raperet, vehementius oblectaret felices amantes, quam singularis corporis species perditos & miseros amatores. Cur sapientes templo Apollinis inscripserunt, Nosce te ipsum, nisi vt puram suspicias mentem, tanquam veri Phœbi, id est, supercoelestis Solis radium sempiternum, nube corporis circumfusum, agnoscasque & fulgorem nubes à radio, & radij splendorem à Sole pendere. Vt corpus quidem laudes in animo, animum autem honores in corpore. Rursus animum diligas colasque in Deo. Deum ames quidem & venereris in animo, mireris autem & stupeas in seipso. Cum dux & magister noster Aurelius Augustinus nouisset se ipsum & in seipso Deum, sic protinus exclamauit: Sero te amaui pulchritudo tam antiqua, & tam noua, sero te amaui.

*Nihil turpius illo, apud quem præter animum pulchra sunt omnia.*

MARSILIVS FICINVS  
Hominum generi, S. D.

**S**I quis agricola non solum sine vlla mercede, verum etiam cum maximo sui damno alienos quidem agros colat, proprios autem negligat, absque dubio stultissimus & miserrimus ab omnibus iudicabitur. Ergo dementes nimium sunt illæ mentes & miseræ, quæ omnem in hoc operam suam semper impendunt, vt corpus atque externa quam optime ornatissimeque se habeant, vt autem bonæ ipsæ ornataeque sint, penitus negligunt. O quam malus est homo, cui canis & equus melior est quam animus, o quam deformis, cui calceus, quantum in se est, pulchrior est quam animus. Nihil huic reuera bonum est, vel pulchrum, apud quem cuncta præter ipsum, id est, præter animum, bona videntur & pulchra. Si huius ornatissimæ ædes Philosophus aliquis Cynicus ingrediatur ac necessitate quadam expuere compellatur, certè in eius faciem excreabit, quia videlicet singula ibi munda ornataque videat præter ipsum. Nihil pauperius & inanius illo cuius horrea quidem plena sunt, animus verò vacuus. Solum illos qui extra mentem positi sint, appellare dementes. Quo autem pacto in demente sit animus, qui iam dudum est in patinis, non intelligo. Dic precor, o mens infelix, quam alienorum curiosa, tam negligens propriorum, dic, inquam, cuiam hominum cuncta sana sunt, nisi sano? Cur igitur extra te demens tam anxie huc & illuc oberas, atque tantum & tam frustra laboras? Da operam vt bona pulchraque sis, subito tibi bona & pulchra sunt omnia. At verò ita demum quod iubeo perages, si tam cupis te bonam pulchramque euadere, quam affectas minima quæque suppellectilia esse optima, ornatissimaque videri. Si dum corpus pascimus & canes & aues, hominem ipsum interim, id est, animum, perire fame non fineremus, certe tam quisque contentus plenusque viueret quam nunc nemo contentus. Nunc verò cui mirum sit, si nunquam impletur animus, si semper affligitur? qui deserit semetipsum, cui solum id curæ est, vt bestiam suam impleat, quæ continuè sit in ipsa saturnitate voracior, atque contra Dominum suum negligentia eius esurientem penitus & exanguem, sæuior & robustior.

*Malis quidem bona fortuna mala est. Bonis autem mala fortuna bona.*

MARSILIVS FICINVS  
Florentinus Bernardo Bembo  
Veneto equiti clarissimo, S. D.

**D**IC mihi vir constans, quam ob causam fortuna odit quidem ac deprimat sæpè quem merito populus amat, contra verò amat atque extollit sæpius, quem iure quodam populus odit? An forte quia fortuna non solum rationi opposita est

sed etiam ab ipso mundi initio inimica est populo. Vnde populus semper infortunatus & miser. Forte etiam est ambitiosa. Atque ut non virtuti hominumue generi, sed ipsi soli maximum quoduis facinus adscribatur, quem homines quam plurimi iure depressum volunt, miris modis extollit, quem verò sublimem deprimit in profundum. Quid si cæca sit, ut aiunt, æmulaue naturæ? Natura siquidem instituit ut prius tanquam animal viuas quam tanquam homo, sentis enim antea quam intelligas. Fortuna siquidem magnum affectat hominem facere, ingentem prius facit bestiam venenoso fastidio turgidam. Vnde & ingenio & vultu tyrannus nascitur prius quam tyrannide potiatur. Hi præter dignitatem in dignitatibus constituti, faciunt ut dignitates ipsæ viterius probis hominibus non sint dignæ. Faciunt etiam ut interdum neque diuina providentia mundum, neque humana prudentia genus humanum agi, sed casu, credatur. Verùm diuina providentia nonnunquam alios contra omnem fortunæ fauorem, repente ad imum è summo fastigio deiicit. Alios contrà malignum fortunæ impetum euehit mirabiliter in excelsum. Si quos autem vel superbos stare diu, vel humanos ad tempus cadere finit, permittit etiam ut & illi tam deiecta miseraque mente sint, quam alta sorte, & isti tam excelsa mente quam humili & abiecta fortuna. Malis quidem bona fortuna fit mala, bonis autem mala fortuna bona. Equidem si mihi daretur optio, Hercules esse mallet quam Sardanapalus. Quot alter monstra præmebat, tot alter monstis opprimebatur, alter superatis feris Deus euasit, alter superatus à feris, factus est fera deterior atque miserior. Vbi sapientiæ plurimam, minima opus est sorte, vbi minimum sapientiæ, fors plurima dominatur. Et si interdum fortuna sapientiæ iungitur, non tamen simul vtraque regnat. Aut enim nullo pacto fors rationi coniungitur, aut seruit. Quamobrem fors probis inuida viris, totis obsistit viribus, ne proba vsquam ratio regnet, utpote quæ illa regnante sit & gloriam & imperium amissura. Sæpè fors dotat multum, quem parum natura virtusue dotauit. Neque dicit facile quem natura virtusue ditauit. Sunt certis seculis magni quidam potentisque viri, quasi humani quidam dii hominesque diuini, sed Phœnicibus rariores, quos nō fortuna facit, sed diuina providentia magnos. Hi certo indicio discernuntur. Tales enim sunt ut prosperitatis suæ sorti quidem tribuant nihil, hu-

manæ quoque virtuti minimum quiddam, virtuti autem diuinæ quam plurimum. Tantumque vultu erga omnes sint humani, quantum super omnes mente diuini. Si vbi est inflatio non est sanitas, certe nullus inflatus non insanus, nullus insanus profanusque non ferinus, nullus diuinus, non humanus, nemo humanissimus non diuinus. Vir certe diuinus non vult fortunam sibi ducem, cæca enim est sæpèque casu cadit. Non gaudet fortunæ promissis, infida enim est vel suis quos præter dignitatem ad summum dignitatis culmen euehit. Nempe inter summum atque imum reciproco gaudet ludo, ac vicibus delectatur alternis. Non timet etiam fortunæ minas, vana enim est. Neque magis potest in nobis quicquam, quam nos posse velimus, quando te facimus fortuna Deam cœloque locamus. Nemo inferior illo qui veram felicitatem collocat in fortuna. Nemo felicior quam qui fortuitam prosperitatem reuera felicem esse non iudicat. Qui vel ridiculum fortunæ fletum vnà cum Democrito ridet, vel flebilem eiusdem risum cum Heraclito deflet, prudens ab Hippocrate censetur. Qui puerilem fortunæ ludum cum Socrate calcatur, sapiens & diuinus ab Apolline iudicatur. Denique qui cum Ænea in rebus durat aduersis, solus cum Ænea rebus se seruat secundis, serenos post pluuiam suspicit dies, ac tandem optata potitur Italia. Igitur mi Ænea, ne cedè malis, sed contrà audentior ito. Quicquid igitur, superanda omnis fortuna ferendo. Vale lætior mi Ænea. Tot enim aliquando bonis gaudebis in portu securus, quot mari fortiter superasti procellas.

*Animus mortalibus non impletur, quoniam aterna requirit.*

MARSILIUS FICINVS  
Laurenrio Medici viro Magnanimo, S. D.

**S**I tibi nunc quadragesimalem declamatiunculam quandam recitauero, Laurenti, quam hac aurora mea mihi mens declamauit, en quid erit pretij? Forsitan ut tantum tibi meis ineptiis risum in præsentia moueam, quantum declamatores aptissimi vulgo lachrymas his diebus executiunt. Recitabo tamen, ut mihi quidē videor Laurenti. Scio enim insignem pietate virum, quāuis forte pietatis verba nonnunquam quodāmodo ridere possit, pietatē tamen ipsā reuera deridere non posse.

Qui sitit, Marsili, vinum, sitim, ut vides, extinguit vino. Atque magis si duas hauserit pateras quam si vnam. Huic imago vini vel videnti vel cogitanti incitat, non sedat sitim. Imaginis enim est allicere, substantiæ pascere. Tantum igitur imago vini alit sitim, quantum vinum ipsum alit hominem sitibundum. Quod quidem poena nobis indicat Tantalum, imò verò poena nostra nobis, Tantalum enim sumus omnes. Sitimus quidem bona omnes vera, omnes insomnia bibimus. Dum vero letales lethei fluminis undas faucibus plenis ingurgitamus, interea umbratilem quandam nectaris & Ambrosiæ gustulam summis labris ferè iam lambimus. Vnde miseros continuo Tantalos sitis exurit anghela. Si qualia mens capit, talibus potiremur? certè potiundo vel omnino vel maxima ex parte aliquando animus impleretur. Quoniam vero quanto magis mortalibus ubique potimur, tanto magis animi appetitus accenditur, satis constat mentem non mortalia, quæ æternorum imagines sunt, sed æterna requirere. Ideoque æternam esse non caducam, quandoquidem verum eius alimentum est æternum. Ergo in corpore caduco dormitat penitus & ægrotat, in hoc per sensus insomnia bibens sitim alit bibendo non seipsam. Ægra quoque propter affectus quiescit misera nusquam, sed frustra passim inquieta vagatur. Vbi moliter iacere confidit, alte cadit, vbi Medicinam sperat salubriorem, venenum haurit pestilentius. O miseram mortalium sortem miseria ipsa miseriorem. Quoniam miselli confugiemus? Certe nusquam nisi ab infimis refugiamus ad summa nisi ad illa quæ nusquam fugiunt fugiamus. Quid igitur est agendum? ut bene & vigilemus & valeamus? Vita nobis prorsus in contrarium conuertenda. Dediscenda quæ vulgo didicimus, quibus discendis nos ipsos hæcenus ignorauimus. Discenda quæ pretermisimus, quibus ignoratis, nos ipsos nosse non possumus. Diligenda quæ negligimus, quæ diligimus, negligenda, ferenda quæ fugimus, quæ sequimur fugienda. Flendus est nobis fortunæ risus, fletus quoque fortunæ ridendus. Sic enim nos neque vulgi sordes coinquinabunt, neque vel immortalium incuria lædet vel mortalium curiositas cruciabit. Neque prosterneat molities, voluptasue dissoluet. Neque fortuna vel prospera illaqueabit, vel aduersa necabit. Sed quam purgati erimus, tam sereni, quam sereni erimus, tam lucentes. Tunc primum verarum euadimus pleni formarum, cum primum vacui sumiorum.

*Non cortex nutrit, sed medulla.*

## MARSILIVS FICINVS

Dominico Francisco Gualconio viro  
clarissimo se commendat.

**D**ono tibi religionem nostram, religiosi pignus amoris. Non ut insignem pietate virum instruam ad pietatem, sed quia vno hoc munere puto magis quam cunctis disputationibus meis ipsi me pietati satisfacturum. Si fortè nostra hæc religio tibi videbitur pauperrima, memento Christianam religionem in paupertate fuisse fundatam. Memento præterea, apud nos non expressores librorum esse, sed oppressores. Verum qualiscunque sit, quandoquidem nihil est in re amata, quod amanti non placeat, amatorum suo Gualconio satis formosa diuesque videbitur. xx. Maij. m. cccc. lxxvi. Florentiæ.

*Quæ reuera sunt bona, quo maiora sunt eo etiam meliora.*

## MARSILIVS FICINVS

Laurentio Bonincontro Astronomo  
& Poëtæ, S. D.

**D**ici non posset quanta in legendis tuis literis voluptate affectus fuerim, clarissime Laurenti. In iis autem nihil equidem minus accuso, quam quod ipse magis excusas. Verum quid dixi modo, mi Laurenti? Imò vero accuso nihil, vbi mihi singula summo opere placent. Ergo rectius loquar, nihil in tuis literis mihi placet magis, quam quod tu maximè suspicaris mihi minus forte placere. Prolixitatem, inquam amice tuam, imò sobrietatem. quæ enim reuera sunt bona quo maiora sunt, eo etiam meliora. Defers ad nos iudicium inter numina tria grauissimum, inter prouidentiam videlicet, & farum & libertatem. Audisti ad Paridem quondam iudicium inter tres Deas fuisse delatum. Ego autem discrimine tanto offendere numina nolim. Manet alta mente repositum iudicium Paradisi preteritæque iniuria forme. Forte vero nihil amplius superest periculi. Videris ipse cautissimam de iis misisse sententiam. Non enim inepte, ut nonnulli consueverunt, seiunxisti numina, sed iniuicem aptissime coniunxisti. Sententiam verò tuam latius in libro de Astrologis confirmamus.

*Non possunt plures in ea re inuicem firmiter  
copulari, quæ ipsa in se mutabilis est  
atque diuersa.*

MARSILIVS FICINVS  
Locterio Neronio conphiloso-  
pho, S. D.

**A**mplector equidem summo quodam  
gaudio doctas, Locteri, piasque li-  
teras tuas, in parte præsertim ubi tu me in  
eo bono quod cuncta complectitur bene-  
gne complecteris. Legisti sæpenumero  
Peripateticum illud: Quæcunque cuidam  
tertio eadem sunt, inuicem quoque sunt  
eadem. Hoc autem tunc solum mihi vider-  
tur impleri, cum tertium illud sibi met est  
penitus idem, hoc est indiuiduum simplex-  
que & permanens. Alioquin non posset  
quæ ad ipsum recurrunt copulare inuicem  
prorsus atque firmare. Sed manifestò ex-  
plicemus exemplo quod volumus. Lineæ  
quam diu in centro indiuiduo & immobi-  
li permanent, singulæ tum in se ipsis indi-  
uiduæ immobilesque consistunt, tum in-  
ter se inuicem vel eadem penitus vel con-  
iunctæ. At cum à centro ad circumferen-  
tiam diuiduam & mobilem inexplantur,  
magis gradatim magisque tum singulæ in  
se ipsis diuixæ mutabilesque euadunt, tum  
inuicem disiectæ redduntur, quo si vicis-  
sim ab ipsa circumferentia in centrum de-  
nuò replicentur, continuò vnitatem stabi-  
litateque priorem recipere videbuntur.  
In centro quidem Deum, in circumferen-  
tia verò cælum & elementa, in lineis de-  
nique animas mentesque considerare de-  
bemus; ergo quid falsa quotidie vulgus be-  
nivolentia gloriatur? Hic quidem totus  
iamdiu sum tuus, inquit, iste vicissim sem-  
per, inquit, tuus ero, ille rursus audet di-  
cere, ego ac tu vnum prorsus idemque su-  
mus. O quam falsi sunt homines, quam fal-  
laces. Nempe dum ipsi à stabili Dei vnita-  
te cadentes in mundi machinam mutabi-  
lem multiplicemque, diuisibilem sese prorsus  
immergunt, ideoque stabilitatē vnitatēq;  
in seipsis non retinent naturalē, inter-  
rim tamen quod amiserunt dementes, quod  
miseri perdiderunt, tā impudenterquā im-  
prudenter aliis pollicentur. Desinant igitur  
profiteri, se inuicem mutua quadā beniuo-

lencia, idem prorsus & fieri & manere, quā  
diu & ipsi in se qui diligunt, non sunt tales  
quales aliis præstare se iactant, & in ea re  
diligunt quæ etiam non est talis, non coi-  
ligit vnquam, non sistit animos sibi ipsis &  
aliis, nisi vnitas ipsa simplex immobilisque  
æternitas, quæ maximè cuncta comple-  
ctitur, utpote quæ sua sunt maximè. In qua  
ego te libentissime complector, mi Lo-  
cteri, vicissim benignissime complecten-  
tem.

*Cupido magis persuadet vel tacendo, quam &  
orando Mercurius & Phæbus  
ipse canendo.*

MARSILIVS FICINVS  
Dominico Galleto, S. D.

**S**I quantū amor in te Dominice meus,  
me quotidie stimulat ad scribendum,  
tantum Musa materiæ mihi suppeditaret,  
certè totiens nostro nomine legeres, salue  
Gallete quoties ipse saluere desideras.  
Quam verò iamdiu materiam nobis negat  
inuida Musa, eam in præsentia Ioannes  
suggerit Caualcantes, Musarum dulcis a-  
lumnus. Hic tibi ob amicitiam nostram  
multa ideo debere fatetur, quoniam ego  
in te quondam, tanquam antiquiore, prius  
amando ipsum, ardentè stabiliterque a-  
mare didicerim. Quod si quam magnus est  
meus amor, tam magna quandoque præ-  
stare valeret, tu quoque vicissim plurimum  
Caualcanti debere cognosceres. Nempe  
cum hic vbique nobis tui simillimus aman-  
tissimusque occurrat, efficitur ut in hoc a-  
mando, amare Dominicum non dediscā.  
Ergo Caualcantis causam tibi Deus ille  
commendat, sine quo neque properè vn-  
quam, neque prosperè quicquam alicubi  
commendatur. Cœlestis Gallete, Cupi-  
do sæpè quod ipse ipse miles sapius expe-  
riris, persuadet antea quam suadeat. Per-  
suadet autem multo vehementius vel ta-  
cendo, quā & orando Mercurius & Phœ-  
bus ipse canendo. Quid mirum? Isti siqui-  
dem foris ad aures animi fores, verba vo-  
lantia fundunt. Ille vero intus indelebiles  
flagrantium cogitationum notas præcor-  
diis ipsis inurit. Sed mitto poëtæ vobis  
hec amatoria. Ad causam ipsam venio  
Ioanni nostro nobisque communem.

F I N I S.



# MARSILII FICINI FLORENTINI EPISTOLARVM

## LIBER IV.

*NEMO EST CUI POSSIT INVIDERE  
qui videre possit quot omnes intus & extra furiis agitatur.*

Marfilius Ficinus Florentinus Laurenti Francischio  
Dominici filio, S. D.

**M**Andauit discipulis suis Pythagoras, nec cerebrum corue comederent. Id est, neque cerebrum cogitationibus consumerent superuacuis, neque immoderatis curis vrent. Si omnia fortuna contingunt, frustra laborant qui confidunt, quæ præter rationem modis innumerabilibus accidunt, certa ratione definire penitus atque disponere. Si fato cuncta perueniunt, in ipsum fatum grauius incidunt, quicumque inuitabilem huius necessitatem euitare contendunt, addunt enim proprium fato laborem. Denique siue fortuna res nostræ, siue fato provenire dicantur, diuina providentia irrationalem fortunam in ordinem ratione disponit, immite etiam fatum ad bonum suauissimè temperat, ut cuncta his ordinata bonaque eueniant qui libenter cum diuina voluntate consentiunt. His solis interna consentiunt & externa, cæteris autē utraque ubiq; dissentiunt. Hi soli quam necessaria sunt faciunt voluntaria, quæ mala videntur bona. Quemadmodum pura mens vniuerso gaudet bono, sic impura malis cunctis affigitur. Sicut lumen maximum ad se lumina cuncta rapit, sic maximum in terris malum, id est homo malus omnia ad se vndique trahit mala. Multoque plura sibi ipse infert, quam accipiat aliunde. Sicut insatiabiles ad bonum sumus, sic ferè insatiabiles nescio quo-

modo sumus ad malum. Mala præsentia quidem non tam sentimus quam augemus, præterita verò repetimus, futura præripimus, fingimus non futura. Mitto quam peruersa mente res patiamur aduersas, nonne prosperitate sic abutimur, ut infelicissima nobis sit ipsa felicitas? Externarum rerum successus nihil aliud est quam rationis & legis excessus. Sanitas autem corporis quidnam est nobis nisi mentis infania? Forma quæque roburque corporis sæpè animi deformitas sit atque debilitas. O quam deformes sumus, quoties in ista quæ Deus formosa facit ipsi deformes irruimus. Heu quam ingrati Deo bonorum omnium largitori, quoties opera eius gubernationemque damnamus. Et quanto magis bonis illius frugibus horrea nobis abundant, tanto magis spinas loliumque & intra nos producimus & domi forisque serimus. Et cum mala producimus seramusque, miramur tamen si quando inde pessima metimus, neque agriculturam, sed astra Deumue culpamus. Nemo est igitur cui possit inuidere qui videre possit quot omnes intus & extra furiis agitatur. Difficile discernas in patria quisnam inter alios sit beator, difficilius extra patriam quis miserior, æqua ferè ratio est utrobique, illic ad summum singuli gaudent, hic singuli dolemus ad summum. Ut nisi cæci simus omnino, videre hinc perspicere debeamus, sementem nostram quando-

quidem tam male se habet in terris, non terrenam esse sed coelestem, coelestesque fructus, si recte culta fuerit, producturam.

*Cum rationi & consilio satisfeceris, cunctis satisfecisse putato.*

MARSILIUS FICINVS  
conphilosopho suo.

**T**Urbaris ut audio multum, quod quæ intelligis certa te ratione fecisse damnentur à multis. An ipse tanti te facis Amice, ut velis eos qui Deo non parcent, homini parcere? Quid pulchrius meliusque agi potest quam quæ à Deo, qui optima est ratio, fiunt? Operibus tamen diuinis ubique detrahitur. Horremus dæmonas, inculamus astra, damnamus tempora, Plantarum quoque & animalium formas & vires vituperamus, carpinus homines, de nostra sorte assidue querimur, quæ à Deo gratis accepimus displicent, quæ grati nos fecimus usque adeo placent, ut Deo displiceamus. Enitere precor ut quantum noua opera tua tibi tanquam foetus proprii subito blandiuntur, tantum ipse rationi obsequare pareasque consilio. Postquam vero diligenti rationi probatoque prudentum consilio satisfeceris, hominibus cunctis satisfecisse putato. Sic enim ipsi veritati, quæ cunctis est amplior, satisfecisti. Quod si adhuc quæ eiusmodi ratione cogitaueris dixerisque & feceris, alicubi improbentur, memento alimenti boni indicium esse malo gustui displicere, mali autem argumentum, gustui malo placere. Vale, atque postquam voluntas rectam sequuta fuerit rationem, ne turberis si quid præter voluntatem inde sequatur.

*Frustra sapit qui non sibi ipse sapit.*

MARSILIUS FICINVS  
Morali Philosopho non morato, S. D.

**Q**UAM absurdus est sutor veste vndique lacera, quam iners medicus semper egrotus, quam molestus Musicus cui dissonat lyra voci, tam turpis moralis Philosophus non moratus. Qui loquitur quidem bene, agit autem male, hic frustra vel hominibus bona loquitur non credentibus, vel à superis bona petit non concedentibus.

*Mundanorum medicina malorum est supermundani Dei cultus.*

MARSILIUS FICINVS  
Florentinus Bernardo Bembo  
Veneto equiti clarissimo, S. D.

**Q**UONIAM coelestis hominum pater statuit patriam nostram fore coelum, idcirco dum terram incolimus regionem à nostra patria remotissimam, contenti aliquando esse non possumus, fors autem huiusmodi non tantum hominibus, verum etiam cunctis omnino rebus creatis est communis, ut nusquam præterquam in propria origine quietem agant, atque quietis gratia contentur illic finem ponere, unde principium habuerunt: sic aqua terraque ad ima descendunt, alta petit ignis & aer, sic talpæ atque similia terræ alio se occultant. Cætera quam plurima calcant terræ dorsum. Pisces aqua nati, aqua nant. Hominum verò animi communi quodam naturalique instinctu continue coelum appetunt, atque ulterius cœli regem, unde creantur. Quoniam verò appetitio ad Deum naturalis à Deo nobis infusa inanis esse non debet, ne summa ratio quæ nihil frustra facit, frustra eam nobis infuderit, sequitur esse mentes hominum sempiternas, ut ad sempiternum diuinumque bonum natura desideratum quandoque valeant peruenire.

Ex his quæ diximus sequitur, ut animi quandoquidem neque terrenis vnquam alimentis implentur, neque dum terrena ingurgitant, coelestibus vesci dapibus possunt, hac in vita nitantur cœli regi quandoque pro viribus adherere. Tanto enim minus amaris inficiuntur terræ saporibus magisque dulcibus reficiuntur cœli liquoribus, quanto auidius ad supercoelestem dulcedinis fontem afficiuntur. Quanto propinquius accedimus ad mundi dominum, tanto longius à mundana seruitute discedimus. Cæterum sicut in patria habemus illi, videndo atque gaudento, sic extra patriam amando prorsus & adorando.

Quamobrem non reperitur usquam contra terrenos morbos medicina sufficiens, præter amorem cultumque diuinum. Neque id quidem iniuria. Nempe in quolibet morbo quando medicina mali humoris non superat qualitatem, convertitur in humorem, turbat corpus, minuit vires, pondus his auget. Cum igitur infirmitas omnis aduersitasque nostra sit corporalis atque

que mundana, proculdubio frustra laborat quisquis eiusmodi malo corporeis mundanisque medicinis succurrere tentat. Fortiore admodum mihi crede hic opus est medicina, medicina dico, quæ & spiritalis sit & super mundum, quo corporales mundanosque morbos expellere valeat. Si hoc solum languore laboraremus aut illo, forte hic nobis medicus sufficeret aut ille. Sed pestis nostra est omne malum. Ergo teriaca nobis est omne bonum. Morbus noster est inexplibilis appetitus, & continua perturbatio, medicus ergo nobis est immensum bonum & æterna tranquillitas. Si quis neget medicinam nostram esse verum Dei cultum, huic nullum malorum superest remedium, spesque omnis sanitatis adimitur. Qui autem reuera diuinis confidit remediis, conualescit protinus ut confidit.

*Non quid quisque, sed quo animo det considerare debemus.*

### MARSILIVS FICINVS

Georgio Antonio Vespuccio ciui optimo & doctissimo, S. D.

**D**ono tibi nostrum de vera pietate volumen, non ut insignem pietate virum instruam ad pietatem, sed quia vno hoc munere puto magis quam cunctis disputationibus meis ipsi me pietati satisfacturum, satisfaciam quoque pio amico meo, ut arbitror, qui cum pio semper affectu ferueat, affectum ipsum in cunctis meretur potiusquam affectum. Scit enim reuera in rebus externis nihil esse magnum, nihil rursus in affectu magno esse non magnum, scit etiam nihil vnquam ab eo magnum dari, qui nil vnquam dare maius voluit quam quod dedit. Nihil contra ab eo dari paruum, cui præ voluntate maioris quicquid largitur est paruum. Scit denique, non tam manum, quam cor largientis aspiciendum. Et quantum alter tribuere cupit, tantum alterum debere fatetur. Nam & si non manu statim, animo tamen acceptum à nobis est, cum primum nobis innotuit quicquid amicus tradere concupiuit. Qui noua potest donare quotidie, nihil vnquam largitur excellens, solus excellentissima dedit, cui nihil superest denuo tribuendum, cum semel seipsum secumque sua omnia dederit. Ut autem paucis comprehendam, aut nihil donamus aut omnia. Qui rem nobis aliquam dat, non animum, hic non donum offert, sed vel commendat

dépositum, vel emit nos, vel forsan autupatur. Subitò verò cuncta largitur qui mentem dat omnia possidentem. Vale.

*Quàm turpe est amare pecunias, tam honestum amare hominem, tam etiam necessarium & beatum amare Deum.*

### MARSILIVS FICINVS

Petro Guicciardino literis & moribus ornatissimo, S. D.

**Q**uàm turpe est amare pecunias, tam honestum est amare hominem amore dignissimum. Nemo dubitat, modo vnquam aliquid amari, quin amator seipsum sibi auferat, atque dedat amato. Pecuniæ hominem eam amantem accipere quidem possunt, reddere nequaquam. Hinc fit ut amator huiusmodi neque pecunias habeat neque seipsum. Qui autem amat hominem redamantem quantum dum amat sese alteri dedit, tantum se recepit dum redamatur. Imò verò, ut rectius loquar, duplo magis, nempe duos hac ratione recipit animos qui dederat vnum. Rursus quam honestum vtileque videtur diligere virum, benevolentia dignum, tam necessarium est atque beatum amare Deum, primam amoris pulchritudinisque originem, sine cuius calore nullus amare quicquam potest, sine cuius splendore nil potest amari. Vale felix, & commenda me patri tuo Iacobo ciui clarissimo. Calendis Martiis, M. cccc. lxxvi. Florentiæ.

*Qualis in se quisque est, talia cuique sunt quæ accipit.*

### MARSILIVS FICINVS

Ioanni Aurelio Ariminensi, & Iohanni Petro Cortusio Patavino conphilosophis suis, S. D.

**N**on est malum in hæc incidere, quæ vulgo dicuntur mala, nisi malis dignus fueris. Mala enim non patitur nisi malus. Non est bonum hæc habere, quæ dicuntur bona, nisi bonis dignus fueris. Bonis enim non fruitur nisi bonus. Non ab externis interna, sed ab internis externa dependent. Qualis in se quisque est, talia cuique sunt quæ accipit. Non tam de sorte quam de electione conqueri possumus. Mala continuè cogitamus, nos agitant vndique mala. Mala quotidie sequimur, merito nos mala sequuntur. Crudelitatem plurimum exercemus, crudelitas vicissim nos exercet. Clementiam fugimus, fugit & nos clementia. Quo magis

sponte humanam iustitiam fugimus, eo magis iustitia nos diuina inuitos assequitur. In ipso scelere sceleris est supplicium, boni præmium est in bono. Bona cras tantum agimus, bona cras accipimus, agimus mala hodie, hodie mala patimur. Dissonamus ipsi nobis omnes, dissonant vicissim nobis omnia. Si rite motus animi temperaueris, ut Magi Persarum docent, iam tibi omnia temperasti, humores corporis, anni tempora, plantas, animalia cuncta, coelum. Temperabis autem proculdubio, si animum tanta diligentia disposueris, quanta lapides architecti, colores, lineas, pictores, Musici voces, verba Poëtæ. Atque, ut summam dicam, nihil in te videtur incompositum, si tam cerebrum, quod capillis tegitur, composueris quam quisque capillos. Bene vale, ac ne frustra colas alia, in primis colè teipsum.

*Mundana omnia discordia componuntur, omnia discordia & ipsa sibi & aliis opponuntur.*

Marfilus Ficinus Paci suo pacem optat, metuit bellum, S. D.

**S**cripsisti nuper ad me mi Paces, sicuti soles, eleganter admodum & amice, ego autem nihil ad te scribebam, quia nusquam putabam esse pacem. Cum omnia cogitarem discordia penitus occupari. Sed ibi modo Pacem reperi meum, ubi iamdiu reperi pacem meam. Iupiter, ut aiunt, qui cœlestia norunt, humanæ pacis est author. Rainaldus Vrsinus Iouis alumnus meum alit Pacem atque meam. Ego te, ut iubes, alumno Phœbi suppliciter commendabo. Tu vero me vicissim commenda precor Iouis alumno. Sed antequam Epistolæ finem imponam, cupio tecum, nisi forte ridiculum videatur, ex pacis nomine de bello nonnihil philosophari. Opponuntur felicibus Angelis dæmones infelices, signa cœlestia signis, planetæ planetis, elementis etiam elementa, plantæ plantis, animalibus animalia. Opponuntur præterea quieti motus, habitui verò priuatio, lumen tenebris, nigro lucidum atque album, silentio sonus, acutumque graui, foetido suaue redolens, insipido falsum, ut Peripatetici putant, acre amarumque dulci, frigido calidum, humido ficcum, leue graui, raro densum, leni asperum, molli denique durum. Opponitur fortuna fatumque corpori, corporis humores humoribus, membraque membris, corpus ipsum animæ, rationi sensus,

affectus affectui, virtuti vitium, vitia vitiis, opinioni opinio, votum denique voto. Solæ omnium virtutes si vsquam reperiantur, reuera inuicem sunt concordēs, ita ut qui vnam consequitur assequatur & omnes. Res autem cæteræ nulla alia in re inuicem magis quam in ipsa discordia sunt concordēs. Ergo cui mirum sit continua inter se discordia genus hominum agitari? Omnia discordia componuntur, omnia discordia & ipsa sibi & aliis opponuntur, ibi solum extrinsecus omnia consonant, ubi intrinsecus nihil dissonat, nihil autem ibi dissonat intus, ubi vel sincera veritas dominatur, vel veritatis huiusmodi splendor exuberat, vel calor splendoris eiusmodi feruet. Primum quidem Deus est, secundum contemplatio Dei, tertium amor cultusque Dei. Nec nobis mi Paces eam dare pacem possunt, quam dare non potest mundus vndique discordia plenus. Verum ne forte dum de bello diutius disputo, bellum prolixiori disputatione oculis, auri-busue tuis indixisse videar. Vale Idibus Aprilibus: M. CCCC. LXXVIII. Florentiæ.

*Vt sortem in melius mutes, anima figuram in melius muta.*

Marfilus Ficinus hominum generi, S. D.

**P**racipuum mihi quærenti hodie rationem qua homines tam laboriosam in terris vitam continuè ducant, venit in mentem ludus quidam eiusmodi, in quo nonnulli cruribus extensis in altum interrim palmis & capitis vertice gradientur. Præterea conentur altero quidem oculo terrena vndique omnia, altero autem cœlestia circumspicere. Deinde quicquid humi occurrerit, naribus, labiis, digitis, prensare nitantur. Rursus si quid ab alto his imminet, pedibus attrectare conentur & cæpere, & quæcunque attingerit, portanda suscipiant. O turpissimum spectaculum! ô miserabile monstrum! Non homines isti sunt, non sunt animalia, arbores hæ Stygiæ mihi videntur, quarum folia quidem amarissima sunt, fructus autem inter folia nullus. Quid monstruosius? quid laboriosius potest & onerosius cogitari? Tales amici sumus quasi omnes, quasi omnes, heu miseri, caput animæ rationem, sensibus quisunt animæ pedes, stulte subiicimus. Proinde mente sic humi depressa, cœlestia nosse simul confidimus atque terrena. Infimis animæ plantis summa naturæ frustra tentamus attingere. Ac dum cuncta

nobis vſurpare molimur, onus omnium circumferimus. Heu interim quam infana miseria, quam miserabili infania laboramus! Quid sortem noſtram fortunamue deſlemus? quid mutare fortunam temere cogitamus? quid fleſtere fatum? Muta precor hunc anima ludum, tuam hanc figuram verte. Sic enim fortunam mutaueris fatumque flexeris, & mundi ipſius figuram in melius tibi ſubito verteris.

*Pura neque impure quaras, neque poſquam  
inueneris impuris commu-  
nia facias.*

### MARSILIVS FICINVS Laurentio Medici Viro Magna- nimo, S. D.

**C**VM Nouembris ſuperioris Calendis Epistolam alteram de raptu ad tertium coelum Pauli ad Ioannem Caualcātem, alteram de cœleſti & ſupercœleſti limine ad Phœbum Capellam compoſuiſſem, mox in eum oculorum morbum infe- liciter incidi, quem imaginum nomine phyſici nuncupant, proximamque aſſerūt portendere cæcitatem. Et ſi expertus ſum penè omnia quæ tractantur à medicis Apollinis ſucceſſoribus, nondum tamen medicorum pater Apollo lucens, priſtinā reſtituit mihi lucem. Heu quam diuerſa eſt mi Laurenti cæterarum rerum ratio, atque lucis! Nempe qui ſonos vel odores fugiūt vel ſapores, hi talia certe deuitant, quiverò res eiſmodi ſequuntur maximè, ii & maximè omnium conſequuntur. Lucem verò ipſam, proh dolor! tam qui obni- xè quæritat, quam qui procul fugit, ſolet amittere. Tarſenſis Paulus, dū & celeri paſſu verum fugit Solem, & Solis ipſius lumen impiis armis inſequitur, captus fuiſſe lumi- ne traditur. Marſilius viciffim dum ſequitur Solem lumenq; proſequitur, ferè cap- tus eſt lumine. Hinc heri dum iuncta eſſet Luna Soli, orta mihi eſt oratio quædam ad diuinum Solem fortaffis obſcurior, ſed tunc demum, vt ſpero, clarior euafura, cum humanus Sol meus meam hanc ſuamque Lunam ſemel ſaltem oculorum ſuorum ra- dios illuſtrauerit. Vale.

O Sol qui hominum flammis corda om- nia luſtras, nunquid mortalium nulli pa- tere vis nimium, cum tamen omnibus om- nium maximè pateas. O Sol iuſtitiz fons, Sol largitatis exemplar, quam me vehe- menter accendis vt quæram, tam clare, tamque ſalubriter reſulge quærenti. An forte ſubito nimium impuris oculis puriſ-

ſimum auſus ſum ſuſpicere lumen? Phæcō forſitā, hac in re, fateor quodammodo fui, fui tamen & ſum Phœbe tuus. Ergo calore me purga precor ſoueque tuo. Tantum ſa- lubri flamma potes omnibus Phœbe me- deri, quantum per omnia radios iaculari. Ego enim neque ſicut Iulianus ille & Pla- tonicus & Chriſtianus olim, ſed apoſtata, Solem ipſum ſine Sole cantavi. Neque charam, vt aiunt, ſororem tuam vnā cum Claudiano Proſerpinam raptam ad infe- ros impiè cecini, ſed filium tuum potius Æſculapium quendam Tarſenſem medicū animorum ad ſuperos raptum vnā cū Lu- ca Hierotheo, Dionyſio, celebraui. Ne- que ſicut Steſicorus & Homerus infelicem Helenæ, id eſt, terrenæ formæ, rapinam, ſed vt veri Platonici ſolent beatiffimum de- pinxi cœleſtis mentis aſcenſum. Neque vel inſtar numeri paſſim Eleuſina ſacra vulgaui. Vel tanquam Pherecides Syrus abdita cœleſtium animorum terreno cui- libet patefecit. Vel ſicut Hipparcus Pytha- goricus Delphica præceptoris ſancti my- ſteria iure communia pauciſſimis, cunctis vnquam feci communia Vel Dionyſij Sy- racuſani more Apollineos Platonis ſenſus impuris vulgi ſenſibus reſerare contendi. Non palām locutus ſum quæ non licet ho- mini loqui, non dedi ſanctum canibus por- ciſue dilaniandum, ſed Aœdipi arcana tantum, vt mihi quidem videor, quantum ipſe videram reuelauit. Danis autem omni- bus prorſus velata dedi.

Quid ergo poſt hac, quid potiſſimum Phœbe vis faciam? Mittes, vt arbitror, ad ananiam me Damafcum, quo & Saulum quondam miſiſti cæcum, vbi viſum protin- us recepit amiſſum. Ananias autem mi- hi fuerit opto alumnus ille Phœbe tuus Medices Laurus radiis olim tuis Orienti- bus ortus. Damafcum proſectus ſum nu- per itineris duce quodam Solis Platonici filio, Alumno quidem illic tuo Ananiæ ve- rò meo, portiunculam quandam, ceu pi- gnus grandioris holocauſti, reddidi, pro- pediem reſiduum redditurus. Ergo redde iam mihi Phœbe, ſi libet, opratum diu, red- de obſecro lumen xlv. Aprilis. m. cccc. lxxii.

*Honeſtum agendum eſt, quia placeat, piace-  
re debet vt Deo placeat.*

### MARSILIVS FICINVS Loſterio Neronio, S. D.

**Q**UANTUM ab initio ſtudiorum meorū mea mihi verba ſcriptaque placebant omnia, tantum fermè Loſteri dedie in dies mea



die mea mihi omnia displicent. Scribere tamen nonnihil quotidie nescio quo siue fato siue spiritu vel inuitus impellor. Ergo id mihi primum semper est in scribendo propositum, ut quam minime Marfilium ceterosque offendam, quam breuissime loqui. Sed dum nimia breuitate studeo prolixitatis deuitare fastidium, interim obscuritate quadam nonnunquam quodammodo confundo meipsum. Certe alios sæpè perturbo. Hoc autem iure iis solet accidere, qui modum in rebus tenere non didicerunt. Ecce nunc quam ridiculum videbitur, ô amice, quam absurdum, ut familiarem Epistolam illam familiari meo, qui interdum quasi alter quidam apparet virtute interpretandi Mercurius, cogar interpretari. At verò nequaquam cogar, ut arbitror, nempe dum petis à nobis clarius & facilius erudiri, abunde admodum nos erudis. Haud ita diffimulare tuam astutiam, ô ironice, potuisti, quin aduerterim, te ardentissimo quodam diutius loquendi mecum desiderio potius quam planioris eruditionis auaritate interpretationem Epistolæ meæ requirere clariorem. Igitur amatoriam quandam prolixitatem, callide vir, nunc exis non claritatem. Cæterum ut & tibi longiore quadam oratione & alteri cuipiam, qui interpretationem forte reuera requireret, verbis planioribus satisfaciam, summa antiquæ illius Epistolæ erit eiusmodi. Studeo pro viribus semper id agere, quod bonum esse tam prudentum consilium quam ratio diligens persuaferit. Neque hoc ipsum ad externum aliquem refero fructum, qui & futurus sit & brevis & in hominum vel fortunæ arbitrio positus, sed primum quidem ad verum illud gaudium, quod in ipsa boni actione percipitur. Quod quidem bonum gaudiumque & si temporale dici potest, quoniam non continuè similiter exercetur atque sentitur, initium tamen est & in nostro arbitrio situm. Eiusmodi verò bonum in præsentia æternitateque placet. Non istud dico, quia ego nunc prorsus ipsa fruar æternitate, sed quia intelligo id non ob aliam rationem nisi quia ideæ, id est, æternæ rationi Deique omnipotentis arti congruit, congruere menti, atque placere. Proinde quemadmodum bonum illud ad intimum gaudium retuli, ita refero gaudium ad ideam, ut videlicet ea ratione mihi placeat bonum, ut ipse Deo maximè placeam, omnis boni bono, sine quo nihil potest mihi placere. Non possideo præsentem felicitatem inquis, sed expecto futuram. Expecta, Lo-

cæri, felicitatem ipse videlicet futurus felix, præsentem, id est, æternam felicitatem potius quam futura. Si qua enim in te est futura felicitas, ideo felicitas est, quia in ea felicitate est, cui neque præteritum contingit neque futurum. Vale. xv. Aprilis. M. CCCC. LXXVII.

*Nihil vel mirabilius vel amabilius est quam doctrina probitati coniuncta.*

MARSILIUS FICINVS  
Florentinus Marco Aurelio Oratori  
clarissimo, S. D.

Quando singularis doctrina, Marce Aureli, vnà cum excellenti quadam probitate coniungitur, tantus ex hoc quasi Solis Iouisque congressu, & splendor à doctrina & ardor à probitate protinus emicat, ut radiis flammisque huiusmodi ab oriente in occidentem vsque porrectis mentes, vel remotissimarum Gentium incitatae atque accensæ & alliciantur blandissime & vehementissime rapiantur. Alliciebat igitur hac ratione Marcus Aurelius Marsilium Ficinum suum quondam adolescentem, rapit & nunc ætate maturiorem. Ecce nunc omnis hæc ad te properat præda, Marce, tua, Marsilius tuus adolescens pariter & maturior. Hic ergo tibi sex declamatiunculas offert, quarum primæ illæ duæ de philosophiæ medicinæque laudibus iamdiu à tenera ætate, quatuor verò sequentes de præcipuis humani generis institutis, verè hoc sunt illi natæ, ita demum natæ feliciter, si apud te continuè nutrantur.

MARSILII FICINI  
oratio de laudibus Philosophiæ.

Contrarias in partes animus in præsentia mihi distrahitur, viri clarissimi, quemadmodum sæpe his in rebus grauioribus oraturi sunt, contingere consuevit. Nam & antiqua sacri gymnasi, huius consuetudo & grauis autoritas patrum, quæ duo iure apud me possunt quam plurimum, cogunt ut hodie verba de Philosophiæ laudibus faciam.

Cum verò facultatis huius vim atque naturam mecum ipse confidero, tam præclara mihi videtur, tamque excellens, ut id quidem humana vel mente comprehendere vel lingua explicari posse diffidam. Neque solum hinc materiæ ipsius sublimitas, inde humilitas ingenij, verum etiam reuerendus cōspectus vester me nunc à dicēdo

deterret. Itaque modo vtrum tacerem, an potius loquerer, ambigebam. Dicam tamen, viri præstantes, vt potero, præstare arbitratu rem ipsam de qua dicturus sum minus parere Marfilio, quam Marfilium maiorum suorum præceptis nullo modo parere. Quare mihi veniam dabit, si eius aut egregias laudes haudquaquam exprimere pro illius dignitate potuero. Et id omne quodcunque à me dictum fuerit diuinæ luci, cuius lumine aduertimus, cuius radiis comprehendimus, cuius splendore explicamus, omnia prorsus attribuetis. Vetus Theologorum, præstantes viri, sententia est, multorum philosophorum rationibus confirmata, qua sane docemur atque instruimur, eo singula in rerum natura perfectiora dignioraque videri, quoad primi rerum omnium principij perfectionem dignitatemque accedunt, propinquius ac expressiorem in se eius imaginem complectuntur. Prisca verò Ægyptiorum & Arabum Theologia tradidit, Deum esse existendi, cognoscendi, agendique principium. Vnde Pythagoras, Heraclitus atque Plato, eam Theologiam in Græciâ transferentes ab eodem ipso Deo principium esse naturæ, veritatem doctrinæ, vitæ felicitatem, disputauerunt. Quod Platonis de Republica liber, Parmenides, Timæus, ac Iamblici & Proculi Theologia testatur. Secutus post eos veteres Dionysius Areopagita Platonius, primo, ac deinde Christianus, idem in libris suis latissime disputauit. Quod quidem diu postea Hilarius & Aurelius Augustinus inter Latinos Theologos principes obseruauere. Itaque & Augustinus ipse in libris de vera religione, deque ciuitate diuina, Deum ipsum rerum omnium effectorem, veritatis illustratorem, beatitudinis largitorem appellat. Idque multis antea seculis à Platonis philosophis, diuersis licet verbis pertractatum fuisse confirmat. In his præterea tribus appellationibus Dei quæ à veteribus philosophis primum inductæ fuerunt, Christianam quoque trinitatem quodammodo contineri, philosophiæ insuper tres species à Platone adinuentas atque distributas huic naturæ trinitati ex omnibus suis partibus respondere. Vt ea philosophandi facultas, quæ de rerum causis progressionibusque dixerit, Deo rerum principio congruat. Altera verò qua differendi origo modusque tractatur, Deo veritatis illustratori conueniat. Postrema philosophiæ pars cuius præceptis & institutis vitam agimus, nosque ipsos & familiam ac rempublicam ad felicitatem con-

sequendam dirigimus, Deo quoque beatitudinis largitori quodammodo comparatur. Ex quo iam satis perspicuum esse potest, philosophiam omni ex parte totamque perfectam (vt ita dixerim) diuinitati congruere, patrisque & Filij ac Spiritus potentia, sapientia & bonitatis plenam quandam & absolutam, (quantum nobis conceditur) imaginem continere. Quo fit vt nulla ex omnibus hominum facultatibus diuinitati propinquior similiorque appareat, & idcirco nihil apud nos, præter ipsum Deum, perfectius quam philosophia atque præstantius videatur. Quamobrem diuinè id explicuisse videtur Mercurius Ægyptiorum sapientissimus, cum homines dixit Philosophiæ lumine Deos fieri. Idemque Pythagoras in aureis carminibus cecinit, & Plato in libris de republica Philosophis vita sanctis, Deorum ceremonias mysteriaque instituit. Empedocles autem Agrigentinus, Philosophiam munus dixit esse Deorum, quod cui contigerit talem eum reddat, vt omnia quæ mouentur alta mente contemnat, intimæ mentis acie diuinis radiis illustretur, futuramque beatitudinem firma sententia speret. Sed quid eo præstantius, quod ab Aristotele dictum est? Cum ceteræ artes rerum magnitudine & difficultate perterritæ longe à veritatis inquisitione discederent, Philosophia sola nihillaboriosi operis refugit, nec se optimis indignam rebus, sed earum sibi cognitionem congruam & cognatam existimauit. Cumque impossibile foret, corporea mole cœlestes sedes adire, animus Philosophiæ munere intelligentiam ducem adeptus, rerum omnium naturam contemplatione transcendit. Hæc Aristoteles. Denique (vt summam dicam) Philosophia cum sit cœleste munus, terrena vitia procul fugat, fortunam fortissime domat, mitigat mirificè fatum, mortalibus donis certissime vitur, immortalia munera largitur ad votum. O thesaurum omnium pretiosissimum, haudquaquam terræ Plutonisque visceribus editum, sed summo cœli vertice Iouisque capite descendente, sine cuius possessione neque recte vti ceteris thesauris possumus, neque quicquid feliciter possidere. O ducem humanæ vitæ tutissimum, qui primum Herculeæ clauis vitiorum monstra prorsus expugnat. Deinde clypeo Palladis atque hasta deuitat vel superat fortunæ pericula. Postremo Atlanticis humeris humanos subleuans animos & terreno hoc exilio liberat & patriæ supernæ verissime felicissimeque restituit. Vt non immerito dictum sit à Platone,

quondam regnante sophia seculum aureum extitisse, ac rursus si quando Philosophia regnabit aureum seculum redditurum. Verum quid nam agimus, ó viri præstantes? quid momento, (vt ita dixerim) temporis æternitatem frustra metiri tentamus? Deficeret nos non modo dies, sed anni quoque quamplurimi, si omnes sanctæ Philosophiæ laudes prosequi prorsus aggredieremur. Quapropter nihil aliud dicendum superest, vel agendum, nisi vt tota mente ardentique animo, relictis omnibus mobilibus inanibusque rebus, in quibus nihil præter vmbras quasdam & phantasmata reperitur, huius diuini muneris studiis incumbamus.

Nam qui philosophiæ expertes sunt, hi humano genere inferiores, in bestias quodammodo præcipientes dilabuntur. Qui verò mediocrem illi operam impenderint viri proculdubio tales euadent vt & doctos docere queant & regere reges. At qui per vniuersam vitam, huic se totum soli deuouerit, corpore quasi deposito, & liber ad æthera perget, & humanam speciem superabit, factus Deus ætheris almi.

#### MARSILIUS FICINVS

Oratio de laudibus Medicinæ.

**P**hilosophi Pythagorici atque Platonici qui à Mercurio Trismegisto Philosophiæ fonte manarunt, nihil aut inquiri aut inueniri ab hominum mente vlllo modo posse arbitrantur, absque eo principio à quo & ipsa mens & ea insuper quæ sint discenda proficiscuntur. Ideoque lumen esse voluerunt ad inspicienda omnia eundem ipsum Deum à quo perfecta sunt omnia. Sicut enim oculorum scintilla colorum scintillas in ipso Solis lumine tam colorum quam oculorum authore discernit, ita veridica mens rei cuiuslibet veritatem in summa percipit veritatis mentisque cuiusque procreatrice. Quapropter cum hodie & antiqua consuetudine & iussu patrum inducti, de laudibus medicinæ, quæ ab Apolline descendisse dicitur, tractaturi simus, mentis aciem ad lucem à tenebris conuertentes, veri summiq; Apollinis radios suppliciter adoramus, vt salutari illius calore purgati, purgationis perfectionem laudesque vel pro ipsius dignitate vel saltem pro ingenii viribus prosequamur. Tria sunt, viri præstantes, apud Philosophos præcipua, finis videlicet origo atque materia, quibus cuiusque doctrinæ perfectionem iudicare consueuerunt. Medicinæ autem origo siue Hebræos & Arabes

sequaris, siue Græcos, Ægyptiosq; Theologos ab ipsa diuinitate manauit. Nam Hebræi & Arabes primum humani generis parentem Adam eam diuino lumine sapientiam adeptum asserunt. Reliqui verò Apollinem ab hominum deorumque parente Ioue illam suscepisse virtutem ad humani salutem generis tradidere, qui deinde idem Æsculapio reuelarit, à quo Podalirius & Machaon præstantes medici geniti fuerint. Multis deinde seculis Hippocrates Caus quæ à priscis obscuris inuoluta parabolis tradita fuerant, eduxit in lucem, atque hi omnes quos hactenus memorauimus in deorum concilium ab vniuersa religione Gentilium relati fuisse dicuntur. Quid memorem Pythagoram, Empedoclem, Democritum, Dioclem, Caristum, Erasistratum, Proxagoram, Chrysippum, Erophylum, Serapionem, Apollonium, Glaciam, Heraclidem, Chemisonem, Plistonium, Galenum, egregios præstantissimosque Græcorum philosophorum, Platonem, atque Aristotelem? Quos omnes & Philosophos acutissimos extitisse, & plurimos in arte medendi libros edidisse comperimus. Quid Ægyptios omnium vetustissimos gentium, quorum sacerdotes vniuersos præstantes fuisse medicos, Homerum, Euripides ac Plato testantur? Quid persarum Magos, id est sacerdotes, Zoroastrem, Hostanem, Abstrifcon, Gobriam, Paxatam, Sinicariondam, Damigeron, Hismosen, Ioannem, Apollonium, Dardanum, apud quos innumera penè in hac arte volumina, quæ syderum momentis, verbis, herbis, lapillis, atque vaporibus salutem tuentur nostram, reperta feruntur. Nonne & Mithridates ille rex Ponti cui duæ ac vigesima parebant linguæ, diuturnam huius disciplinæ studiis operam impendit? Sapor quoque rex Medorum & Auicenna diuinus, ac plerique Arabes huic sapientiæ ardenti opera incubuere. Serapion eiusque filius Ioannes, Ioannes insuper Mesue, Abumeron, auenzoar, Rasis, Auerrois, Albugasis, Isaac, Haly, ac plerique alij sapientes hebræorum atque arabum præstantissimi.

Mitto Latinos, quorum Cornelius Celsus, Apuleius, Q. Serenus, Columella, Plinius, Lactantius, primi de cura fanitatis libros tum prosa oratione tum etiam carminibus composuerunt. Qui verò eos sequuti sint, & innumeri penè reperiuntur & vobis adeò noti, vt prolixiori narratione nequaquam indigeant. Num potest alicuius facultatis origo hoc medicinæ ortu, non modo præstantior, sed par aut

similis inueniri? cum à Deo, heroibus, regibus, ducibus, Magis, Philosophis, & illis quidem vetustissimis atque omnium sapientissimis, proficiscatur. Subiecta verò huic arti materia, circa quam versatur, cuiusue principia proprietatesque perquirat homo est, quem tanti fecit Mercurius Trismegistus, ut eum diceret post primum Deum penè maximum esse Deorum. Stoici quoque & Peripatetici omnia quæ sub orbe Lunæ mouentur eius gratia fieri atque moueri. Hebræi autem & Arabes atque Christiani Theologi ipsum quoque mundum fuisse hominis gratia constitutum.

Ex quo quis non videat hominem de quo nostra illa facultas agit esse penè omnium à Deo fluentium præstantissimum? Atque ideo hominis curandi doctrinam perfectissimam iudicandam. Nec dixerit quispiam medicorum artem circa ipsum hominis corpus duntaxat versari. Siquidem Phœbus, ut in Epistolis Hypocratis legitur, animi atque corporis curationem coire in vnum arbitrabatur. Vnde apud Ægyptios atque Persas iidem sacerdotes erant & medici. Scribit in Carmide Plato, Magos illos animæ corporisque medicos Zamolsidis Zoroastrisque sectatores arbitrari omnia corporis, tum bona tum mala, ab anima fluere in ipsum corpus, quemadmodum oculorum qualitas fluit à cerebro, cerebri qualitas à toto corpore. Atque ut impossibile est, oculos curari nisi curetur cerebrum, & cerebrum curari nisi corpus totum, ita corpus totum nisi animæ bene valeat, non posse bene valere. Valetudinem verò animæ curari Apollineis incantationibus quibusdam, id est, philosophicis rationibus. Socrates præterea narravit vulgatum esse apud Thraces, eos medicos tali quadam curatione nonnullos homines seruare immortales consueuisse, tantum est animæ in corpus imperium. tanta potestas. Magica hæc opinio videtur cum illa Hebræorum Christianorumque sententia consentire, Adæ primi parentis animo prius quidem sano sana fuisse omnia, deinde verò infirmo infirma omnia euasisse. Cornelius quoque Celsus integram atque perfectam medicinæ artem intelligi voluit, cum quis hominis valetudinem tueri ex motuum animi & corporis cognitione valeret, in quibus duobus naturalis ac moralis contemplatio & vsus insuper continetur.

Nam & Auicenna corporis qualitatem in animum posse in vtramque partem quam plurimum censuit, ipsius quoque

animi affectiones, motus, imagines, ad corporis seu bonam, siue malam valetudinem maximam vim habere. Finem præterea medicorum quis non viderit? Eorum enim cura & diligentia ipsum esse, viuere & insuper bene viuere conseruatur. Quid his melius, quid optabilius addi potest? Quid magis naturæ propinquum aut consentaneum quam quod ipsa genuit tueri atque seruare? Nemo vestrum ignorat, viri clarissimi, humanam prosperitatem non in rerum possessione, sed iucundo quodam vsu consistere. At verò sine sanitate nihil vsu nobis esse iucundum nemo sanæ mentis ignorat. Hinc ita in sanitatis hymno cecinit Orpheus: Absque te cuncta sunt hominibus inutilia. Medicina igitur quando vel tuetur vel restituit sanitatē, cuncta simul bona & seruare videtur & reddere. Quamobrem sacræ Hebræorum literæ honorandum medicum merito iussisse videntur, & Homerus recte inquit: Vir medicus pretio multos æquauerit vnus. Quapropter vos omnes amici vehementer hortor, ut neque tempori, neque pecuniis, neque labori, vllō modo parcatis quo artem hanc saluberrimam humanæque vitæ conseruatricem totis viribus complectamini, ut & vitam prosperitatemque propriam, vestrorumque & reliquorum deinde omnium tueri, cæterasque liberales artes, quæ sine sanitate disci & exerceri non possunt, adiuuare possitis, ac denique vniuersis Gentibus vel maximis etiam regibus, qui omnes vestris se dedunt manibus, feliciter imperetis.

*In singulis expertum consulte.*

MARSILIUS FICINVS

Laurentio Bonincontro Astronomo  
Poëtæ, S. D.

QVærenti mihi nuper amicum quemdam è multis quem maximè consulerem, nunquid vera de raptu in tertium cælum Pauli disputauerim, occurrit imprimis Laurentius Bonincontrus Poëta astronomicus, astronomusque Poëticus. quem quidem iamdiu tanquam Astronomum suus Atlas in cælum altis sustulit humeris, cui rursus tanquam vati pater ipse Phœbus ore rotundo cælestia cecinit. Ergo tunc demum veram me diuinorum imaginem expressisse putabo, quando Laurentius meus, qui illorum vultum & duce Atlante, & monstrante Apolline vidit, penitus approbauerit.

*Præstat malam valetudinem bene ferre  
quam male bonam.*

*De Platonica philosophi natura, institu-  
tione, actione.*

MARSILIUS FICINVS  
Amicis suis, S. D.

**Q**uid toties amici quæritis quomodo valeam? Interrogate potius nunquid denique conualuerim. Cæteri siquidem ad hoc nati videntur, ut bene valerent. Ego autem contra ob hoc ipsum natus videor, ut male continuè valeam. Nam mihi imbecillitate quadam naturæ datum est ab initio, ut nunquam diem integrum firmam corporis valetudinem sim expertus. Sed largissimo quodam Dei munere inuidæ naturæ damna rependo, ut quam male nonnulli bonam valetudinem terunt, fermè tam bene ipse malam. Quantum ergo quidam possessionis prosperæ gratia naturæ debent, tantum ego gratia vñs ipsius debeo. Quando Deus ipse nostra firmitas est, infirmi vndique esse non possumus. Tunc enim animi firmitas corporis infirmitate perficitur. Mihi quidem adhærere Deo bonum est. Quoniam, ( ut Augustinus inquit, ) si in ipso non permanebo, nec in me potero. State igitur ô amici, state in Deo qui non mouetur, & stabitis. Quiescite in eo qui non turbatur, & quieti viuetis.

*Omnia dedit semel qui se ipse dedit.*

MARSILIUS FICINVS  
Florentinus Bernardo Bembo Veneto viro clarissimo, S. D.

**V**ix Iacobo Lanfredino dederam ad te Epistolam in qua cupiebam fieri certior, nunquid mea illa ( imò tua, ) omnia recepisses, quando reddita mihi est Epistola tua, grauitate, lepore, affectuque referta. Quid verò de mira gratitudine dicam? Alij cum gratis acceperint aliena, vix tandem gratias agunt. Bembo autem noster quod sua iure receperit, agit gratias, & quidem cumulatissimas. Ego suauissime mi Bernarde nihil iamdiu tibi dare possum noui, omnia olim semel tibi dedi quando tibi dedi Marsilium. Et si leuis eiusmodi possessio est, non enim tantus sum, ut merita tua impleam, non tamen leue est, quod cæteros omnes non minus quam me moribus tuis rapueris literatos. Tu enim horum omnium es desiderium. Tu populi nostri delitiæ. xxv. Aprilis. m. cccc. lxxvii.

MARSILIUS FICINVS  
Ioanni Francisco Hyppolito GAZOLI comiti viro clarissimo, S. D.

**S**cripsi ad Bernardum Bembo Venetum iamdiu Epistolam quandam de Philosophiæ laudibus longiusculam. Nuper quoque nonnihil eadem de re ad marcum Aurelium clarissimum oratorem. Reliquū esse videtur, ut de Platonica Philosophi natura, institutione, actione aliquid scribam. Ut pateat manifestius qua via potissimum pretiosissimus ille Philosophiæ thesaurus reperiatur à nobis, & repertus, quæ ratione legitime possideatur & expēdatur. Cum ab omnibus Philosophia, ( ut nomen ipsum à Pythagora inductum perhibet, ) sapientiæ amor definiatur, sapientia verò diuinorum contemplatio sit, certè Philosophiæ finis est cognitio diuinorum. Quod in septimo de Republica libro noster Plato testatur, vbi veram, inquit, philosophiam esse ascensum ab his quæ fluunt & oriuntur & occidunt, ad ea quæ verè sunt, & semper eadem perseverant. Tot ergo philosophia partes & facultates ministras habet, quot gradibus ab infimis ad superna conscenditur. Hi gradus partim à natura, partim à diligentia hominum exiguntur. Nam, ( ut in sexto de Republica tradit Plato, ) quicumque philosophus futurus est ab ipsa natura sic institutus esse debet, ut primo quidem ad omnia disciplinarum genera facilis ac promptus existat. Deinde, ut natura sit verax ab omni mendacio penitus alienus. Tertio loco ut contemptis omnibus quæ corruptioni obnoxia sunt, illis quæ semper eadem permanent mentem adhibeat. Magnanimus quoque & fortis sit necesse est, qui nec mortem metuat, nec inanem cupiat gloriam. præterea temperatum hunc quodammodo nasci oportet, easque animi partes quæ affectibus efferri solent domitas à natura suscipere. Quisquis enim veritatis avidus ad diuinorū contēplationem mentē conuertit, voluptates corporis parvipendit. Oportet præterea liberali animo philosophū esse. Etenim rerū vilium æstimatio homini veritatē rerum contemplaturo aduersa est, nimiumque contraria. Huius insuper voluntas iustitiam diliget, quippe cum veritatis, temperantiæ, libertatis sit admodum studiosus. Maximè verò omnium ingenij acumine atq; memoria & magni-



rudine animi illi opus esse videtur. At qui hæ quidem tres naturæ dotes, scilicet acumen ingenij, memoria, magnanimitas, cum disciplina atque educatio decens adhibita est, perfectum virtutem virum efficiunt. Verum si neglectæ sint, maximorum scelerum causæ esse à Platone dicuntur. Ergo naturæ huic adhibenda est summa hominum diligentia, ut qui ita natura affectus est ab ipsa pueritia literas discat, scientiarum omnium elementa. Cytharæ quin etiam usu inconcinnus istius componendus est animus. Gymnastice ludis corpus exercitandum, ut bono ipsius habitu conueniens Philosophiæ studiis præbeat ministerium. Interim optimarum legum instituta auribus inferenda. Honestis exhortationibus adolescentis animus ita formandus, ut moderatus pacatusque reddatur. Quam quidem moralem educationem Ethicæ nominant. Cum verò mens per ea quæ diximus ab appetitus perturbatione liberata, iam à corpore solui cœperit, adijcienda mox illi est mathematicorum cognitio, quæ de numeris, planis, figuris & solidis numerosisque horum motibus agit. Quoniam vero numeri & figuræ & motuum rationes ad cogitationem potius quam ad sensus exteriores pertinent, horum studio animus non modo ab appetitu corporis, sed ab eius quoque sensibus separatur & ad interiorē cogitationem se confert. Quod quidem mortem commentari est (quod in Phædone Plato scribit esse philosophantis officium,) per quod & similes Deo reddimur ut ex Phædro Theætetoque discitur. Est autem in his percipiendis is apud Platonicos ordo, ut arithmetica sequatur Geometria, Geometriam Stereometria, hanc Astronomia, Astronomiam denique Musica. Priores enim numeri sunt quam figuræ, figuræ planæ priores quam solidæ; solida verò corpora prius sunt quam moueantur. Ordo verò & vocum rationes motum sequuntur. Arithmetica igitur, quæ de numeris agit, præcedat, sequatur quæ de planis figuris tractat Geometria, succedat huic quæ de solidis considerat, Stereometria, quantum teneat locum Astronomia, quæ solidorum corporum, id est, sphaerarum motus suscipit. Postrema sit Musica, quæ ordinem vocum ex motione nascentium indagar. His perceptis Plato dialecticam, id est, demonstrandæ veritatis scientiam tradit.

Dialecticam verò non tantum logicam illam esse vult quæ primas & minutissimas ratiocinationum regulas docet, sed & profundum expeditæ mentis artificium, ad

ipsam veram meramque rei cuiusque substantiam physicis primo, deinde metaphysicis rationibus comprehendendam, ut & ratio de quolibet reddi possit, & denique supra sensuum corporumque naturam mentis lumen percipiatur, atque incorporeales rerum species, quas ideas vocamus, intelligantur, ex quibus ipsum vnum specierum omnium fons, mentium & animorum origo ac lumen, principium & finis omnium (quod ipsum bonum Plato vocat) inspicitur. Huius inspectio sapientia est, cuius amor Philosophia rectissime definitur. Postquam verò philosophantis animus primum ipsum contemplatus est bonum, unde iudicans quæ in rebus humanis bona sint, quæ mala, turpia vel honesta, noxia vel vtilia, ad eius exemplar humana disponit, à malo abducit, in bonum dirigit, & hac prudentia gubernandi rem propriam, familiarem & publicam administrat, legesque & rationes docet administrandi. Unde leges initium habuerunt. Quamobrem in Timæo philosophiam Plato Dei donum esse asserit, quo nihil vnquam præstantius sit nobis à Deo tributum. Nihil enim ipsum bonum, qui Deus est, homini melius largiri poterat quam integram quæ ad fieri potest diuinitatis ipsius similitudinem. Deum verò quis dubitet esse à corpore liberam veritatem omnibus providentem? philosophus autem morali institutione primaque ipsa eruditione, (quam diximus,) animum ab appetitu & sensu corporis liberat, dialectica veritatem assequitur, ciuili doctrina hominibus prouidet. Quo fit ut philosophia sit & donum Dei & similitudo & felicissima imitatio. Qua si quis prædixit sit, ex Dei similitudine, idem erit in terris, qui & in cœlis est Deus. Quippe inter Deum & homines medius est philosophus, ad Deum homo, ad homines Deus. Dei veritate familiaris, sui ipsius libertate possessor, ciuili prudentia dux hominum reliquorum. Quo quidem gubernatore & quondam fuisse aurea secula perhibentur, & reditura quandoque vaticinatus est Plato, quando in eundem animum potestas sapientiaque concurrent. Apud Platonem, philosophantium animi per sapientiam & iustitiam, recuperatis alis, statim cum à corpore discesserunt cœlestem in patriam reuolant, iisdemque in cœlis quibus & in terris funguntur officiis. Cum Deo veritate gaudent, secum libertate congratulantur, pietate hominibus prouident, ac velut interpretes Dei atque prophete quod & hic egerant, & ibi peragunt.

Animos hominum in Deum conuertunt, arcana Dei mysteria mentibus humanis interpretantur. Quapropter merito Theologi veteres, philosophantium mentes statim solutas à corpore, perinde ac triginta illa Hesiodi millia dæmonum, tanquam semideos, heroas beatosque dæmones coluerunt. Philosophia itaque, ( vt paucis comprehendamus ) ascensus est animi ab inferioribus ad superna, à tenebrisque ad lucem, principium eius diuinæ mentis instinctus, media verò ad facultates disciplinæ qua & narrauimus, finis summi boni possessio, fructus denique recta hominum gubernatio. Hæc ego Francisco Berlingherio nostro tamquā amico philosophico communia feci, tu quoque Iuliano Burgo nostro eadem ratione communia facies. Vale.

*De vita Platonis.*

MARSILIVS FICINVS  
Francisco Bandino suo, S. D.


CONatus sū diebus superioribus ideam Philosophi Platonis coloribus pingere. Verum si Platonem ipsum in medium adduxissem, certe non quandam illius ideæ picturam, sed ideam ipsam veri philosophi digitis ostendissem. Ergo Platonem nostrum intueamur, & philosophum, & philosophiam simul atque ideam ipsam pariter videamus.

*Genealogia & Genesis Platonis.*

PLato Atheniensis Aristonis & perictiones siue potonæ, filius à Neptuno

genus utrinque ducit. Nam Solon à Ne-reo & Neptuno descendit. Solonis verò frater Dropides Critiam maiorem genuit, à quo Calescrus ortus duos habuit filios, Critiam scilicet minorem, qui vnus ex triginta Athenarum gubernatoribus fuit, at Glauconem Carmidis & perictiones patrem, perictione verò, Aristone nupta Platonem peperit & Adimantum & Glauconem. Fæminam quoque Potonam quæ Eurymedonti nupta peperit Speusippum. Rursus Ariston Platonis à Codro filio Melanthes descendit, qui iterum in Neptunum, ( sicut & Solon ) originem referunt. Ferunt Athenis celebre esse, Aristonem perictionem cum esset speciosissima congregi conatum esse, verum fuisse illius conatus irritos, vidisseque in somnis Apollinem, atque ab eo iussu munda à coniugali copula quoad pareret seruauisse. Quod & Laërtius & Polycrates scribunt. Nascitur Athenis vel in Egina, à Troiæ captiuitate anno septingentesimo quinquagesimo sexto, ab vrbe condita trecentesimo. xxxiii. ante Christi aduentum quadringentesimo. xxiii. Platonis genesim qualem adolescens audieram in libro de Amore significauimus. Sed nunc adducam, qualē Iulius Firmicus Astronomus describit, cuius opinionem hac in re existimo veriore. Est autem eiusmodi. In ascendente aquario, Mars, Mercurius, Venus. In secunda Sol in piscibus. In quinta Luna in Geminis. In Septima Iupiter in Leone. In nona Saturnus in Libra.

Hanc genesim Iulius Firmicus asserit significare virum qui mirabili eloquentia polleat, coelestique ingenio ad omnia secreta diuinitatis accedat.



*Educatio, indoles, eruditio, sobrietas  
Platonis.*

Fertur cum in cunis esset in labiis infantis apes mel fuisse, eloquentiæ fu-

turæ præsagium. aiunt Socratem vidisse per somnium oloris pullum sibi in gremio plumescere, qui continuò exortis pennis expansis alis in altum euolans suauissimos cantus ediderit, postmodum cum à patre sibi

Plato commendatus esset, hunc esse cignū quem viderat dixisse. Poëtico stilo in adulescentia floruit. Elegias composuit, & tragœdias duas, quas & ipse igni dedit cum primum animum ad philosophiam applicuisset. Primis literis à Dionysio præceptore imbutus est. Deinde Socratem audiuit, vigesimum ætatis annum agens, post Socratis mortem Cratylo Heracliti discipulo & Hermogeni. Parmenidis philosophiam tuenti, sese accommodauit. Cum esset annorum duo de triginta Megaram se ad Euclidem cum aliis Socraticis contulit. Hinc Cyrenem profectus Theodorum Mathematicum audiuit. atque inde in Italiam ad pythagoreos philolaum & Architam Tarentinum Eurytumque concessit. Ab his in Ægyptum ad prophetas & sacerdotes se recepit. Decreuerat ad Indos Magosque progredi, verum propter Asiæ bella à proposito destitit. Regressus demum Athenas in Academia vitam duxit, quem ipsalubrem Attice locum dicitur elegisse, quod etiam Diuus Basilus & Hieronymus comprobant, vt nimis bonus corporis habitus ceu vitis nimia luxuries amputaretur.

Erat enim & speciosissimo & robustissimo corporis habitu. Vnde & à latissimis humeris, ampla fronte & egregio totius corporis habitu, orationis quouque vbertate, Plato est nuncupatus, cum ante nominatus fuisset Aristocles, nihil in eo deforme, nisi forte vox aliquantum gracilis, & nescio quid sub vertice gibbosum, eum aliquantum deformabat, ob academiæ habitationem passus est quartanam febrem menses decem atque octo, sed sobrietate & diligentia sua vires post febrem validiores quam ante recuperauit.

*Militia & navigatio Platonis triua,  
Prima navigatio.*

**M**ilitauit ter, primo in Tanagram, secundo in Corinthum, tertio in Delum, vbi etiam victoria potitus est. In Siciliam ter nauigauit, primo vt insulam & æthnea miracula crateresque videret. Agebat tunc quadragesimum ætatis annum, quo etiam tempore Dionysius Hermocratis filius vt secum loqueretur impulit. Vbi cum ille de tyrannide differeret dicens, Non id præstare, quod sibi soli esset vtile, nisi virtute etiam excelleret, offensum tyrannum atque iratum dixisse aiunt, Verba tua otiosorum senum sunt. At ille, Et tua, inquit, tyrannidem sapiunt. Ad hæc indignatum tyrannum primo quidem illum

necare voluisse, deinde verò à Dione & Aristomene obsecratum id minime effecisse. Verum Polidi Lacedæmonio, qui per id tempus legatus ad se venerat, eum tradidisse, vt venundaretur. Eum ille in Æginam adductum vendidit. Quo tempore & Chamander, tanquam mortis reum accusauit. Sane iuxta promulgatam apud eos legem capitale erat, si quis Atheniensium eam insulam adiisset. Cæterum cum à quodam fuisset allegatum, disciplinæ gratia eo Philosophum ascendisse, legemque illam de hominibus non de Philosophis, ( qui super homines sunt ) loqui, absolutum eum dimisere. Neque occidendum, sed vendendum decreuerunt. Adeo forte Anniceris Cirenaicus, qui eum xx. minis redemit, remisitque Athenas ad amicos. Polidem verò à Cabria superatum & post modum in Elice fuisse submersum, fama est, dæmonio sibi nunciante, talia illum Philosophi gratia perpeti. Non tamen quieuit Dionysius, verum cum cognouisset & quæ illi contigerant, scripsit Platoni, orans ne in se maledicta intorqueret. Ad quem ille rescripsit, non tantum sibi à philosophia superesse ocij, vt Dionysii meminisset. Obrectatoribus quibusdam Platonem à Dionysio derelictum obiectantibus respondit, imò verò à Platone Dionysius est relictus.

*Secunda Navigatio.*

**S**ecundo, profectus est ad Dionysium iuniorem ab eo & Dione philosophandi gratia accersitus. Hac quoque spe ductus, se suis consiliis effecturum vt illic ex tyrannide aut Resp. fieret aut regnum, visurumque quod iamdiu vehementer optabat gubernationem scilicet quandam maximè philosophicam, in qua vel gubernent Philosophi vel gubernatores philosophentur. Putabat enim ciuitates non aliter posse miseriam euitare. Id omne non vi aut dolo, sed philosophicis rationibus persuaso Dionysio, fieri cupiebat. Sed quarto ferè mense post Platonis accessum Dionysius falsis impulsus calumniis, Dionem, quasi tyrannidi insidiantem expulit, Platonem verò libenter amplectebatur. At Plato in patriam rediit. Tertio accessit Dionem Dionysio reconciliaturus, & ab utroque iterum obsecratus. Rogatus etiam ab Archita. Tunc & Dionysius victatam illi triremem obuiam misit, & Archidamum pythagoricum oratorem nobilesque permultos, & ipse quadrigis albis egredientem excepit. postulauit Plato promissum

sam Dionis restitutionem, atque insuper terram ac homines qui iuxta constitutam ab eo Rēpublicā viverent, idque ille quāquam pollicitus, implere detrectauit.

Cum verò Plato palam Dionysium redargueret, quod fefellisset fidem, tum sibi de Dione restituendo, tum Theodoti suo de Heraclide seruando, insensum deinde habuit Dionysium; vnde in summo viuebat periculo ne à militibus interficeretur. Sed Architas Tarentinus Salmus cum misit ad Dionysium Oratorem vnā cum naui, rogans vt Platonem dimitteret. Ille eum dimisit ac præbuit commeatum. Plato in patriam rediit. Dionysius paulo pòst à Dione ciuibusque pulsus tyrannide, criminis in Philosophiam commissi poenas dedit. Plato miro quodam honore exceptus est in patria, ibique ad rempublicā accersitus accedere noluit, quia plebs malis se moribus assuefecerat.

*Quibus Plato leges dederit.*

**F**ertur Arcades & Thebanos condita ciuitate honestæ magnitudinis, rogasse illum vt eam Rēpublicā institueret, verum cum ille eos intellexisset æqualitatem sectari nolle, profectum non esse. Syracusanis verò expulso tyranno leges dedit, & Cretensibus Magnesia nuper condita ciuitate scripsit leges XII. in libris digestas. Misit ex familiaribus suis Aristonum ad Arcades legibus instituendos. Ad Ilios Phormionem. Ad Pyrreos Mededimum.

*Continentia, grauitas, comitas  
Platonis.*

**V**ixit autem cœlebs & sobrius admodum & (vt Aurelius Augustinus prohibet) castus. Vnde & in senio sacra Naturæ fecisse dicitur, vt se apud vulgus crimine sterilitatis absolueret. Iuuenis adeò verecundus, adeò compositus fuit, vt nunquam ridere, nisi modicè deprehensus sit. Iratum verò vidit nemo. Vnde apud Platonem educatus puer cum ad parentes reuersus, vociferantem videret patrem, nunquam, inquit, hoc apud Platonem vidi. Semel tantum clam subiratus est puero grauitè delinquenti, sed Xenocrati, inquit, Cædeti hūc puerum, ego enim quia iratus sum nequeo. Edebat quolibet die aut semel tantum, aut si bis, parcissime. Dormiebat solus. Contrariam vitam multum vituperabat.

Ad amandos adolescentes quemadmo-

dum & Socrates suus videbatur paulo prior. Verum vterque tam ratione continens quam sensu procliuus. Quam diuinè isti amauerint, & quo pacto, quæ de amore locuti sunt, exponunt, & nos satis in libro de amore tractauimus. Optabar memoriam sui vel in libris vel in amicis relinquere. Et si melancholicus erat profundissimique ingenij, vt scribit Aristoteles, iocis tamen plurimis utebatur, atque Xenocrate & Dionem seuiores sæpissimè admo-nebat, vt Gratiis sacra facerent, quo iucundiores gratioresque redderentur. Platonis autem grauitati comitas erat admixta.

*Discipuli Platonis præcipui.*

**D**iscipuli eius fuere, Speusippus Atheniensis, Xenocrates Chalcedonius, Aristoteles Stagiritis, Philippus Opuntius, Ecticus Perintius, Dion Syracusanus, Anicles, Heraclitus, Erasclus & Doriscus Sceptij, Timolaus Cizicenus, Hebeon, Lampacenus, Pithori, & Heraclides, Enij, Hippotales & Calippus athenienses, Demetrius, Amphipolites, Heraclides Ponticus & complures alij, & cum his mulieres duæ, Laschenia Mátinea & Axitheia Phyasía, quæ virili utebantur veste, Theophrastum item illius fuisse auditorem ferunt, & Hiperidem oratorem, Cameleon & Lycurgum, Demosthenem quoque ipsius fuisse studiosum, & Menestratum. Vestibulo academiæ inscriptum erat: Nemo huc geometriæ expertus ingrediatur. Quod quidem non solum de linearum, sed etiam de affectuum debita mensura volebat intelligi.

*Libri Platonis.*

**L**ibrum de sanctitate scripsit, Euthyphronem, apologiam Socratis, Critonem, de eo quod cum Socrate in carcere tractauit, Criton, Phædonem de animi immortalitate, Cratylum de recta nominum ratione, Theætætum de scientia, Sophisten de eo quod est, Ciuilem de regno, Parmenidem de vno rerum omnium principio, & ideis, Philebum de summo bono, Conuiuium de amore, Phædrum de pulchro, Alcibiadem primum de natura hominis, Alcibiadem secundum de voto, Hypparchum de lucri cupiditate, Amatores de Philosophia, Theagem de sapientia, Charmidem de temperantia, Lachem de fortitudine, Lyfidem de amicitia, Eutidemum contentiosum, Prothagoram de moralibus, Gorgiam de rhetorica, Menonem de virtute, Hyppiam maiorem de pul-

chro, Hyppiam minorem de mendacio, Menexenum de Attica antiquitate, de Republica. libros x. Timæum de mundi natura, Critiam de Attica antiquitate, Minoem de Lege, de legibus libros xii. Epinomim siue philosophum Epistolas xiii. Hos omnes Platonis libros ipsi è Græca lingua transtulimus in Latinam. Tres verò sunt Platoniconum species dialogorum. Aut enim sophistas confutat, aut adolescentes adhortatur, aut docet adultos. Quæ in Epistolis vel in libris de legibus & Epinomide Plato ipse suo dixit ore certissima vult haberi, quæ verò in cæteris libris Socratis, Timæi, Parmenidis, Zenonis ore disputat, verisimilia.

*Eloquentia, sapientia, authoritas  
Platonis.*

**S**Tylus Platonis, (vt ait Aristoteles,) medicus inrer solutam orationem & carmen fuit, suauitas & copia tanta, vt Cicero Platonem & intelligendi & dicendi grauissimum authorem & magistrum fuisse dixerit, adiecit, si Iupiter humana lingua loqui voluisset, non alia quam Platonis lingua fuisse locuturum. Doctrina verò tanta in eo, vt cum ante illum omnes inter Græcos illustres externas Gentes sapientiæ gratia peregrinati fuissent, post Platonis tempora cæteræ nationes athenas confluxerint. Et Aristoteles tam miro ingenio præditus, ac nouæ hæresis audissimus, cum Platonem iam penè adultus adisset, viginti eum continuos annos audiuerit.

Adde quod priusquam adiret Platonem iam literis prouectus erat. Deinde platonem solum habuit præceptorem. Mitto quod à Cicerone scribitur, malo cum platone errare quam cum cæteris recte sentire. Præterea quod vnà cum panetio illum appellat Deum Philosophorum. Mitto illud Quintiliani. Quis dubitet platonem esse præcipuum vel acumine differendi vel eloquendi facundia diuina quadam & Homerica, multum enim illius oratio suprâ profam orationem, & quam pedestrem Græci vocant, surgit, vt mihi non humano ingenio sed Delphico quodam oraculo videatur instinctus. Diuina sapientia & probitate mirabilem auctoritatem, etiam in patria, quod rarissime fieri solet, sibi comparauisse videtur. Reuersus ex Sicilia Plato cum ad magnificentissimam illam Olympiorum celebritatem quasi quemdam orbis terrarum conuentum peruenisset, tam lætis cunctorum oc-

cursis exceptus est, vt è cælo Dens ad mortales demissus videretur. Ludos deserui, athletarum spectacula relinqui, pugiles solos omitti cernentes, & quod admirabilius est qui tam longis terrarum marisque tractibus pascendorum oculorum auriumque & animorum gratia Olympia venerant, omnis voluptatis obliti Platonem adibant, platonem intuebantur. In platone perinde atque amœnissimo diuersorio conquiescebant. Cum tragœdiam, quis referret, nec quisquam præter platonem adesset, obiectantibus quibusdam dedecori esse illi quod nemo præter vnum adesset, respondit ille, & hic vnus plus est quam totus Atheniensis populus.

*Charitas, magnanimitas, sanctimonia Platonis.*

**Q**Vam magno & constanti animo, præsertim in amicorum causa fuerit, indicant eius Epistolæ & contemptus tyranni, Dionisque defensio. Tyrannum sæpè quod iniuste gubernaret, quod vè amicos falleret etiam præsentibus testibus audacter redarguebat, tantum aberat vt illi assentaretur. Mitto minutiora illa, quale est, quod iusserat Dionysius in conuiuio, vt singuli purpuram induti salutarent. Saltauit protinus Aristippus, plato verò renuit, dicens, non conuenire philosopho muliebria. præterea Chabriæ fortissimo duci Crobylus accusato improbus diem dixerat, & capitis iudicium intentauerat, quocirca cum à reliquis destitutus ciuibus metu periculi in arcem ascenderet, solus plato auxilium præstanturus semper illi affuit. Cum verò calumniator Crobylus, vt eum à patrocinio deterreret, minitans dixisset, aliis defensionem præstaturus aduentas, ignorans, quod te quoque Socratis venenum expectat, ipse respondit. Olim Crobyle cum patriæ dignitati militabam intollerandis periculis haud segnis eram, nunc pro officio & amici salutem licet ferrum ac venena mineris & ignem, nullum recusio discrimen: Cum Socrates carcere iniustissime inclusus esset, plato pecunias congregauit, vt redimeret innocentem, & dum iudicium agebatur ascendens in suggestum sic cœpit orare. Cum minor natus sim Athenienses his omnibus qui tribunal ascenderunt. Verum tyranni indices veriti ne auctoritate & eloquentia sua ciues moueret, interpellauerunt repente, reclamaueruntque descende, plato domum abiit. Nam quantum illi in malæ mentis morbo, tantum hic tunc morbo corporis



laborabat. Socratis verò persecutores pœnas paulo post dederunt. Cum ex condiscipulis quidam instigaretur inuidia, Xenocratem ad eò Platonem gratum acceptumque esse, ut in eum conflaret inimicitias, multa in Platonem Xenocratis maledicta renuncianit. Plato medio sermone criminationem reipuens obaudit. Instat obtrectator vultus seueritate crimen affirmans, denique Deos omnes ac Deas obtestanti, Plato ut ab eius sese pertinacia solueret, Esto, inquit, sed ea Xenocrates fide ac gravitate pollet, ut nisi sic expedire iudicasset, dicturus ea nunquam fuisset. Gravitatem magnanimitatemque Platonis imitatum fuisse Xenocratem dilectum eius discipulum, testis est vita Xenocratis apud Diogenem, quæ quidem est fortitudinis & sanctitatis exemplar. Imitatum quoque fuisse Dionem Plutarchus est testis. Præterea Philiscus Lycurgi oratoris vitam describens, magnus vir, inquit, fuit Lucurgus multaque sunt ab eo gesta præclare, quæ facere nemo potuisset qui non fuisset Platonis auditor. Demosthenes cum Antipatrum fugeret Archiæ blandis verbis se ei vitam servaturum pollicens, Absit, inquit, ut vivere turpiter malim quam honestè mori, postquam Xenocratem & Platonem de immortalitate animi differentes audiui. Idem scribens ad Heracleodorum quendam condiscipulum suum, atque eum reprehendens, quod postquam Platonem audiuerat, negligeret bonas artes, & vitam parum honestè duceret: Nonne, inquit, erubescis ea negligere quæ à Platone accepisti? Dionysius ad Speusippum scribens ait, Plato quidem gratis sua limina terentes docebat, tu verò tributa exigis, & à volentibus ac nolentibus accipis. Laërtius quoque carpit eundem quod non sicut Xenocrates Platonis castitatem & fortitudinem mansuetudinemque fuerit imitatus. Illud verò de fortitudine Xenocratis tacere non possum, quod cum Platoni Dionysius diceret, Caput tibi quispiam tollet. Xenocrates qui aderat inquit, Nemo istud priusquam meum hoc abscindet.

*Sententia & Proverbia Platonis.*

De Aristotele & Xenocrate hæc Plato dicebat.

**H** Vi! qualem equum, qualem asinum iungendos assumpsit. Aristoteles quidem freno indiget, Xenocrates verò caribus. Erat inter discipulos eius lautus nimium & curandæ curis studiosissimus

adolescens, quem Plato rogavit; Quousque tibi carcerem ædificare perges? Quoties hominem irretitum videret, ille, aiebat, proprio in corpore mortuus est, vivit in alieno. Addebat, qui seipse alterius gratia deseruerit, omnium esse miserrimum, quippe qui neque se possideat ulterius, neque alterum. Platonis quidam familiaris vir doctus eum orabat, ut sibi aures paulisper accommodaret, libellum à se editum lecturo. Rogatus subinde à Platone, quæ libri esset inscriptio, respondit, Contradicens non esse, cui Plato, Cur igitur ipse hoc factitas? Cur contradicentibus contradicis? Cur me consulis, si tibi prohibes contradici? Leo civis potens in coetu carpebatur quod magnas & immodestas in senatu vociferationes habuerat. Plato, Hoc ipsum, inquit, est verè Leonem esse. Diogeni Cynico dicenti, quod humana quidem ista videret, ideas verò nequaquam. Quid mirum, inquit, oculos enim quibus ista videntur habes, & vteris, mente verò non vteris, qua sola illa cernuntur. Mirantibus discipulis quod Xenocrates in omni vita seuerus, nescio quid risu excipiendum dixisset, Quid, inquit, miramini inter spinas aliquando rosas & lilia nasci. Ad viventes crebro dicere solebat, Ocio labores antepone, nisi forte rubiginem splendori præstare putatis. Iuventutem ad beatam vitam hac ratione sepiissime incendebat. Contrariam virtutis ac voluptatis naturam animadvertite, huius enim momentaneam dulcedinem, subita poenitentia sequitur dolorque perpetuus, illius breves labores æterna voluptas. Cum vidisset quendam alea ludentem arguit, & cum ille, Quam parva reprehendis, diceret, Plato respondit, at non est parum consuetudo. Ebriis & iratis consulere solitus erat, sese ut in speculo studiose intuerentur, ab eiusmodi statim feditate discessuros. Ebrietatem & somnum valde detestabatur. Aiebat plurimum referre ad pueritiam educandam, ut honestis solum gaudere pueri assuescerent, alioquin voluptatem dicebat escam esse maiorum. Addebat, sanitatem animi veram esse philosophiam. Cæteras verò facultates non tam philosophiam quam ornamenta videri. Nihil sanæ menti suavius esse quam vera dicere & audire, veritate enim nihil vel melius vel durabilius. Interrogantibus quibusdam, quænam possessionum genera filiis essent potissimum comparanda? ea dixit quæ non grandinem, non hominum vim, non ipsum denique Iovem extimescerent. Demonico

de filij eruditione consultant, qualis inquit, in arbusculis plantandis dirigendis que talis & in filiis gignendis & instituentis cura esse debet. Hic labor, illic voluptas, cauendum autem ne in hoc sopiti, in illo plusquam vigiles videamur. Philedono cuiuspiam platonem carpenti, quod non minus in discendo quam in docendo studiosus ac sedulus esset, & quoad discipulus esse vellet interroganti, quoad, inquit, meliorem ac peritiorem esse me non pœnitabit. Interrogatus quidnam inter peritum imperitumque interesset, quod inter medicum ægrotumque respondit. Principibus nullum præstantius prædiorum genus esse dicebat, quam eorum familiaritates hominum qui cauponari nescirent. Principi non aliter necessariam esse sapientiam, quam corpori animam. Beatissimas fore Respublicas, si aut Philosophi dominantur, aut saltem qui gubernant diuina quadam sorte philosophentur. Nihil enim pestilentius esse potestate, & audacia, quam ignorantia comitetur. Tales quoque subditos esse solere, quales principes videantur. Magistratui non proprium bonum, sed publicum cogitandum, non partem solum ciuitatis quandam, sed totam esse curandam.

*Quantum Plato neglexit humana, quantum diuina dilexit.*

**R**epetebat quotidie sola æterna esse vera, temporalia verò verisimilia. Dormire in corpore animum, & quæ sensus appetit aut timet, nihil aliud esse quam somnia. Itaque hæc omnia penitus contemnenda, & vt mala videntur quibus plenus est mundus, ad æterna confugiendum, aliter enim deuitari non posse. Ipse quoque quæ præcipiebat impleuit. Nam dum & hæreditario quodam iure & ciuium fauore princeps in rempublicam esset futurus, omnem prorsus ciuilem respuit dignitatem. Cum patrimonio ditissimus esset, fratribus largitus est omnia, præter suburbanum prædiolum, quam academiam nominabant. Hoc solo contentus vixit, & si præceptor amicusque principum exstitit, diuitias tamen ab his nullas accepit. Solebat rex Dionysius dicere: Aristippus semper pecunias petit, Plato semper libros. Adde quod neque uxorem duxit, neque vixit in vrbe, ab omnibus liber, soli feruens veritati.

Vnde diuus Hieronymus inquit, Plato Ægyptum, & Architam Tarentinum eamque oram Italiæ quæ quondam magna

Græcia vocabatur, laboriosissime peragauit. Vt qui Athenis magister erat & potens, cuiusque doctrinam academiarum gymnasia personabant, fieret peregrinus atque discipulus, malens aliena verecunde discere, quam sua impudenter ingerere. Denique cum literas quasi toto orbe fugientes persequitur, captus à Pyrratis & venundatus, etiam tyranno crudelissimo paruit, captiuus, victus & seruus, tamen quia philosophus maior e mente se fuit. Hæc Hieronymus.

*Pietas & gratitudo Platonis.*

**G**RATUS Deo fuit, à quo principium cogitandi, dicendi, agendi omnibus in rebus & faciendum dicebat esse, & ipse semper efficiebat. præterea Deo gratias agebat quotidie, quod homo natus esset non brutum, quod Græcus non Barbarus, quod temporibus Socratis. Quam gratus præceptoribus fuerit omnibusque amicis testimonio sunt eius dialogi, in quibus mirifice eos omnes honorat, atque Socrati libros suos attribuit. Non solum enim illum in omnibus penè dialogis disputantem inducit, sed etiam omnia à se composita, scribit non sua, sed Socratis esse.

*Qua Plato affirmauit, & quicquam confirmauerunt.*

**I**N his quæ sensibus subiacent, partes Heracliti tuebatur. porro in his quæ ad intelligentiam pertinent pythagoræ maxime acquiescebat. In rebus autem ciuilibus Socratem suum amplectebatur. Quæ ubique asseuerabat hæc sunt. Deum omnibus prouidere. Animas hominum immortales esse. Bonorum præmia, malorum supplicia fore. Augustinus in libro contra academicos inquit: Christi auctoritatem omnibus anteponendam, si autem rationibus agendum sit, apud platonicos reperire se dicit, quod sacris Christianorum literis non repugnet. Idem Dionysius Areopagita significauit. Eusebius postea & Cyrillus latius declarauerunt. Hinc Augustinus in libro de vera religione, platonici, inquit, paucis mutatis Christiani fierent. Atque in confessionibus narrat se procemium Ioannis Euangelistæ ferme totum apud platonicos reperisse. propterea in secundo de ciuitate Dei inquit: La-beo Theologus apud Gentiles platonem, inter semideos connumerandum putauit, sicut Herculem atque Romulum. Semideos autem heroibus anteponebat.

Sed utrosque inter numina collocat. Verumtamen istum quem appellat semideum non heroibus tantum, verumetiam diis ipsis præferendum esse non dubito. Vnde inquit, se Platonicos ante alios elegisse, quia de rebus diuinis atque humanis rectius admodum quam cæteri Philosophi senserint. Quod & Marcus Varro antea iudicauerat, & Apuleius Platonem, non tantum heroibus superiorem fecit, sed diis æqualem, quia videlicet, diuinarum rerum abdita penetrauerit. Plato tanta fuit modestia præditus, vt cum mirabilem sibi auctoritatem ante alios comparauisset, tamen interrogatus à quodam, quatenus præceptis suis parendum foret, responderit, quoad in terris appareat sacratior aliquis, qui fontem omnibus veritatis aperiat, quem denique sequantur omnes. Addidit, nihil suo sed diuino tantum lumine reperisse. Quid autem in Philosophia senserit, satis in libro de Amore & Theologia nostra tractauimus.

*Reditus Platonis in patriam cælestem,  
& laudes.*

Natali suo decessit, & annum vnum atque octuaginta impleuit, sine vlla deductione. Ideo Magi qui tunc Athenis erant, Platoni immolauerunt, amplioris fuisse sortis quam humanæ rati, quia consumauisset numerum perfectissimum, quem nouem nouies multiplicata conficiunt. Atque, quod mirum est, adhuc in ea ætate, & eo ipso die scribebat. De quo Cicero inquit: Est etiam quietæ & puræ atque eleganter actæ ætatis placida ac lenis senectus, qualem accepimus Platonis, qui vno & octuagesimo ætatis anno scribens mortuus est. Seneca etiam affirmat, id Platoni sobrietatis & diligentiae beneficio cōtigisse. Alij inter scribendum, alij discumbentem in nuptiis remotis dapibus, inter discerendum ad superos redisse. Aristoteles in templo aram Platoni statuamque sacrauit, hoc Epigrammate, Aram Aristoteles hanc Platoni dicauit viro, quem nefas est à maioribus laudari. Addidit Aristoteles: Qui solus vita, doctrina, moribus, ore admonuit cunctos, & monumenta dedit.

*Vt virtute queant felicem ducere vitam,*

*Nulla ferent talem secula futura virum.*

Adiunxerunt & sapientes alij in Platonis laudes carmina plurima, sed præcipua Epigrammata tria. Primi hæc est sententia: Temperantia, iustitiaque excelluit omnibus, tantum verò sapientia superauit, vt omnem prorsus inuidiam superauerit. Secun-

di hic est sensus: Plato in decorum numerum est translatus. Longinquæ hunc nationes honorant. Quia diuinam vitam ipse nouit aliisque monstrauit. Tertijs sententia huiusmodi est, Phœbus Æsculapium genuit & Platonem, vt ille corporibus, hic animis mederetur. Præterea Mithridates Persarum rex, Platonis statmam in Academia locauit ita inscriptam: Mithridates Rodobati filius Perfes, Musis Imaginem Platonis dicauit, Sillaniani opus. Ex his omnibus id Plato est consecutus, vt Græci Aristotelem quidem demonium, Platonem verò diuinum cognominauerint. Quia videlicet ille & vita humanus & scientia naturalis maximè fuerit, hic autem scientia simul, & vita sese potissimum ad diuina contulerit.

*Apologia de moribus Platonis.*

Finem iam verbis imponam, si pauca quædam rursus addidero. Sunt plebei quidam versificatores, qui immerito Poëtarum sibi nomen usurpant, hi tam morum dissimilitudine quam malignitate inuidiæ prouocati in optimum quemque impudentissime ludunt. Quibus summa quædam licentia in bonos potius quam in malos, præsertim nostra hæc ætate, conceditur. Sed nolim nostrorum temporum meminisse, quæ tantum ad virtutem consequendam sunt inepta, quantum apta videntur ad insequendam. Tales igitur olim Poëticuli diuum Platonem à Græcis Apollinis filium & Socratem ab Apolline Græcorum sapientissimum iudicatum, mordere non dubitarunt. Quorum impietatem Laërtius Diogenes summo opere detestatur. Atque vt ipse declarat, ridicula etiam Comicorum conuitia Aristippus auxit Cirenensis, homo pessimus & optimi cuiusque suorum temporum aduersarius. Qui sicut alios plerosque modestissimos doctissimosque ficta quadam historia vituperauit, sic etiam Socratem præceptorem & condiscipulos suos Xenephontem atque Platonem. Finxit horum nomine carmina quædam in scorta puerosque lasciuia. Videlicet vt falsò magnorum Philosophorum exemplo liberiores ipse peccandi licentiam nancisceretur. Verum Aristoteles, cui veritas magis quam Plato fuit amica, tam falsas in virum sanctum calumnias sustinere non potuit, nam in elegiis ad Eudemum illa de Platone quæ in superioribus diximus cecinit, id illi maximè tribuens, vt prophani non solum vituperare Platonem vllò pacto non debeant, verumetiam sub prætextu laudis sanctum illius nomen ore prophano nomi-

nare non audeant. Neque elegia contentus fuit, sed etiam, ut tradit Olympiodorus, præclaram orationem de Platonis laude composuit. Obmurescant igitur apud superos inferni canes atque apud inferos latrati Cerberum comitentur. Nos autem Platonis vitam & sapientiam iudicio sapientum approbarissimam veneremur, atque vnà cum Apuleio Medaurense libere proclamemus; Nos Platonica familia nihil nouimus, nisi festum, lætum, coeleste supernum.

*Quantum Astronomi metiuntur, tantum Astrologi mentiuntur.*

MARSILIVS FICINVS,  
Florentinus, Bernardo Bembo Iuriconsulto & equiti clarissimo, S. D.

**S**alue mi Bernarde milles, parum dixi, Salue toties quoties spiras, Bernarde dulcissime. Plurima tibi scribo quotidie, transcribo pauca. Videor enim mihi cum Archetippum scripsi amori quodammodo satisfacisse, officio autem etiam si transcriberem, minime satisfacere, ut autem te nunc de præsentibus studiis nostris faciam certiozem, compono librum de Prouidentia Dei atque humani arbitrij libertate, in quo illa Astrologorum iudicia, quæ prouidentiae libertatique detrahunt, pro ingenij facultate redarguo. Nempe quàm diligenter coelestia verè metiuntur Astronomi, tam multum circa humana inanes Astrologi mentiuntur. Vale. Verum Thomam illum egregium Bernardi quondam Venerorum oratoris Achaten, quem libenter meus amplectitur animus, linguaque resonat, cur mea tam diu manus pigerrima prætermittis? Hunc ergo Bernarde quoties videris, toties Marfilij nomine saluere iubeto. XIII. Iunij. M. CCCC. LXXVII.

*Tunc maxime commendas aliquem, cum ostendis illius esse cui commendas.*

MARSILIVS FICINVS  
Marco Aurelio oratori clarissimo, S. D.

**S**I tua tibi commendare liceret, Nicolaum familiarem meum literis moribusque præditum, tibi plurimum commendarem. Quem quidem esse tuum testimonio nobis est tuum nomen, quod illius ore frequentissime sonat.

*Quando diuino afflante spirita amor accenditur, semper amante altero redamat alter, sepe altero cogitante idem cogitat alter.*

MARSILIVS FICINVS  
Bernardo Bembo iuriconsulto & equiti clarissimo, S. D.

**A**Ccepi Bernarde hodie à Marco Aurelio nostro Epistolam quandam forma quidem ipsa Mercurialem omnino patrique per similem, sed Saturno, ut arbitror, Orientem natam. Nempe granioribus incedens passibus cum ab æquo te Veneto sextodecimo Maij die discesserit, tandem decimonono Iunij littoribus nostris applicuit. Ego hanc summo complexus gaudio gratulabundus inquam: Venisti tandem, tuaque infortunatum vici iter pietas. Hæc & si quasi sub Saturno nata motu quodammodo tardior exiit, tamen tanquam concepta Mercurio fuisse videtur opere velocissima. Quod enim à nobis hodie postulat, ipsa iam diu dum nasceretur impleuit. Sane eiusdem Maij diebus quibus aureus ad me Aurelius scripsit, ego occulto quodam ac penè diuino siue Epistolæ siue Musæ suæ instinctu percitus, opusculum quoddam Aurelio dedit; caui, quod nisi ipsum quoque incessu Saturnium fuerit iam ad vos arbitror peruenisse. Mirabile Bernarde parumper geniorum nostrorum virtutem animaduerte. Dum Marcus ille gratis se mihi dabat, ego iure vicissim totum illi me dabam, & amplectentem me mirifice complectebam. Atque ita coelesti quodam confluente spiritu, in vnum penè inscij pariter conspirauimus. Arbitror equidem aut Mercurium ipsum in Tauro aut Phœbum in Geminis constitutum, tam similiter geminas Aurelij Marfilijque lyras temperauisse, ut sonante altera vicissim altera resonet. Atque ab utraque dulce illud Bembi reboet nomen, nomen Gratiis Musicum, Musique gratissimum. Vale foeliciter. At video Bernardum meum, noui enim hominis ingenium, absque deliciis suis neque posse neque velle vnquam bene valere. Christophorus Landinus Mineruæ Musarumque decus, & Ioannes Cavalcantes conphilosophus noster bene valent. Igitur bene vale. XIX. Iunij. M. CCCC. LXXVII.

*Quando diuino afflante spiritu, amor accenditur, semper amante altero, reamatur alter, sæpè altero cogitante, idem cogit alter.*

## MARSILIVS FICINVS

Florentinus Marco Aurelio,  
Oratori clarissimo,  
S. D.

**R**Eddita heri nobis est elegans admodum Epistola tua, Marce doctissime, Epistola melle mihi dulcior ac pretiosior auro. Verùm quid ago? Non licet mihi nunc in laudè hac vterius progredi, ne vanior fortè videar, si eam Epistolam, quæ laudat me plus satis, ipse satis laudare tentauero. Ergo aliunde rursus, si placet, exordiamur. Quando cœlesti quodam afflante spiritu, mentibus nostris amor accenditur, semper amante altero alter redamat, sæpè altero cogitante, alter idem similiter cogitat. Nam & cœlestis author cùm tanquam communis cunctorum causa complectatur vtrumque, mutuum amantium creat affectum, & affectus amantis, qui per hominem è cœlo dependens, tum in plana humanitatis faciè, tum in cœli concava resilit vicissim procreat Echo. Salue igitur amice cœlestis, salue semper in authore nostræ beneuolentiæ Deo, neque terrarum spacia Marce, neque vlla temporis interualla nostrum hunc cœlestem, perpetuumque amorem, vel orientem interrumpere, vel ortum demorari potuisse videntur, quominus amante altero, mox diuina quadam sorte amauerit alter, cogitante quoque atque scribente altero, alter eodem penè momento idem & cogitarit, & scripserit. Animaduertisse te arbitror, Aureli, si modo meum illud ad te nuper missum Opusculum accepisti, eo ipso tempore quo ad me scribebas, me quoque vicissim ad te scripsisse. Præterea idem penitus vtrumque, & significasse, tunc & postulauisse. Mihi quidem nihil in rebus humanis foelicius est, quàm illi affectu quodam euasisse me parem, quo nullum esse audio virtute superiorem. Nihil pretiosius quàm talem tantumque possessorem meum foeliciter possidere. Habeo igitur tota quod mente petebam. Sed hoc vnum quodammodo doleo, nequaquam id totum esse; quod ipse petebas. Mi Aureli, si non potes quod velis habere, id saltem velis habere quod possis. Accipe Marsilium tuum Marce totum quantumcunque sit. Ne respicias vterius oro, simulacrum illud, quod ab initio finxeras; membrum enim

quoddam simulachri illius est Ficinus. Respice potius, amice, quod possides quàm quod fingis. Sic vtique non alicuius partem, sed totum aliquid possidere te prorsus agnoscēs. Præstat autem Pigmæo aliquo toto frui, quàm vasti membro Gygantis.

*Nihil infirmius quàm humanus amor, nihil firmitus quàm diuinus.*

## MARSILIVS FICINVS

Bernardo Bembo Iuriconsulto, & Equiti clarissimo, S. D.

**S**cribis ad nos Epistolam Oratoriam, Poëticam, Amatoriam, sed nescio quid excusas frustra, quod omnino nullus accusat. caue ne vbi perfectus est amor vel minimum quid offensusculæ putes vnuquam posse contingere. Hoc vno solum charitatem forte potes offendere, si eam quandoque posse putas offendi. Humanus quidem res est solliciti plena timoris amor, Diuina verò charitas, siue Paulum audiamus, omnia credit, omnia sperat, omnia sustinet, neque excidit vnuquam: siue Ioannem Euāgelistam, Timor in charitate non habitat, sed perfecta charitas timorem omnem procul expellit. Hinc Aurelius Augustinus noster exclamat: Solus nullum charum amittit, cui omnes in illo chari sunt qui non amittitur. Sed nescio quomodo homeliā, vt aiunt, quandam modò hic inceptaueram. Atque charitatis officia ei viro tradebam, quem Florentinus populus admiratur, quasi quoddam & charitatis simulachrum & humanitatis exemplar.

*Frustra nimium in rebus his quæ sibi met nequaquam sufficiunt, nostram sufficientiam affectamus.*

## MARSILIVS FICINVS

hominum generi, S. D.

**S**ufficientiam vbique eo quæris proposito, vt postquam hanc vnam repereris, nihil vltra perquiras. Requiras autem quàm plurima semper ob hoc ipsum, quia nusquam hanc vnam assequeris. Vis ergo dicam quam ob causam nusquam sufficientiam assequaris? Forsitan quia hanc extra te quæris. Si ergo mortales opes immortalī animo sufficere nequeunt, da operam vt illis saltem animus ipse sufficiat. Aduerte quid dicam, non dico vt ipse sibi met satisfaciāt animus, quo enim pacto



qui ab alio & efficitur & perficitur, sibi ipse satisfacere potest? Frustra nimium, heu miseri! in rebus his quæ sibi met. nequaquam sufficiunt, nostram sufficientiam affectamus. Profectò solum quod sibi satis est, omnino omnibus satisfacit. Nihil autem sibi potest satis esse, præter immensum bonum quod ex seipso est, & ad seipsum. Hic ergo solum, hic, inquã, quod satis nobis facturum sit quæramus. Neque pigeat, nemo frustra bonum sequitur unquam, qui bene sequitur. Nam & bonum ipsum, quia immensum est, ubique viger atque exuberat undiq; & affectus noster bene sequendi, est aliquid proculdubio bonum. Solus autem bene vult, sequiturque bonum, qui summæ bonitatis ipsius gratia, per quam singula bona sunt atque seruantur, passim bona singula sequitur.

*Transitus repentinus à minimo lumine ad maximum, atque à maxime ad minimum, aciem impedit.*

## MARSILIVS FICINVS

Richardo Angelerio, Anglariensi  
insigni Theologo, S. D.

**C**iuiles viri sæpè Philosophos increpant, quod ad humanarum rerum gubernationem inepti, ut plurimum, videantur. Philosophi verò contra ciuiles viros, quod ad diuinorum contemplationem ineptissimi sint, sæpius improbant. Quid igitur ad hæc ipsi dicemus? Non nostrum inter hos, tantas componere lites. Sed Plato noster huc aduocandus est arbiter, quem ad humana, simulatque diuina, Deus ipse composuit. Hic igitur arbitratur, tam Ciuiles quam Philosophos ad utrumque officium exequendum fuisse ab initio institutos. Si modo ab altero extremorum ad alterum haud subito transeant, sed debitis gradibus gradientur. Præstat Græca ipsa Platonis verba ex libro de Repub. 7. hic ad verbum traducere. Post hæc naturam nostram, quoad eruditionem & ruditatem tali quadam imagine contempleris. Finge animo quandam sub terra speluncam, cuius ingressus versus lumen quoddam incipiens per totam speluncam peruius undique pateat. In ea homines nutritos à pueritia, ceruicem & crura ita deuinctos, ut & immobiles permanere cogantur, & ad anteriora solum prospicere, capita verò vinculis adstricta circumducere nequeant. Post tergum autem supernè procul ignis lumen suspensum sit. Interque ignem, & vinctos homines via superior pateat, secus quam

paries sit constructus exiguus. Sicut plerumque præstigatoribus miracula fingentibus scenæ seu cortinæ aliqua, super quibus sua miranda demonstrant, spectantium oculis opponuntur. Cogita rursus homines intra parietem ferentes vasa & opificia varia, supra parietem eminentia. Statuasque hominum, & aliorum animalium lapideas, & ligneas imagines, modisque variis fabricatas. Atque ut consentaneum est, qui hæc circumferunt partim sileant, partim loquantur. Similes isti nobis sunt; nam primum quidem putas istos aliud quicquam, vel sui ipsorum, vel proximorum hominum videre præter umbras quæ ex igne in aduersâ speluncæ partem cadunt. Quid autem eorum quam circumferuntur, nonne umbras duntaxat? Si ergo inuicem loqui liceret, nonne ista quæ coram viderent loqui opinantur. Quod si echo ex aduersa parte carceris resonaret, quoties prætereuntium aliquis loqueretur, putasne ipsos nisi transcuntium umbras aliud putare quod loquitur? Omnino igitur tales nihil verum esse nisi fabricatarum rerum umbras arbitrarentur. Contraverò nunc animaduerte qualis foret eorum à vinculis solutio, ignorantiaque curatio. Nempè si quis eorum solueretur, cogereturque repente surgere, collum vertere, ambulare, lumen ipsum aspicere, doleret protinus, nec propter splendorem intueri posset illa, quorum umbras ante cernebat. Tunc si quis illi dixerit, prius eam spectasse nugas, ad præsens autem rebus veris esse propinquiorem, veriusque inspicere. Ac prætereuntium quemque monstrans, quid sit quæsiuerit, nonne illum vacillaturum putas, arbitraturumque veriora esse quæ ante cernebat, quàm quæ nunc ostenduntur? Et si cogeret eum lumen aspicere, nonne dolore oculorum affectum iri putas? oculosque ad ea quæ faciliè prius viderat retoriturum, certiora ipsa existimantem, quàm quæ subito offeruntur. Si verò aliquis eundem per aspera atque ardua sursum traheret violenter, neque permetteret quicquam aspicere antequam solis lumen traxerit, nonne ipsum ægrè laturum, dum raptetur existimas? Et cum ad lumen euectus fuerit oculis splendore suffusus hesitaturum, nihilque ex his conspiciaturum quæ vera nunc ab hominibus existimantur. Consuetudine igitur primum opus est, si supera inspecturus sit, umbrasque primum facilius intuebitur. Post hæc in aquis hominum cæterorumque imagines, ipsa verò deinde, postea quæ in cælo sunt, & ipsum cælum nocte facilius contemplantur, dum astrorum & lunæ lumen spectabit, quàm si solem ipsum die solisque fulgore intueatur.

Atque ita demum, solem ipsum suspiciet, neque iam in aquis, & aliena in regione simulachra ipsius spectabit, sed ipsum secundum seipsum in sede propria speculabitur, & qualis sit agnoscere poterit. Animaduerte tandem ipsum esse qui tempora & annos temperat, qui omnia regit quæ sub cælo sunt, qui omnium quæ ante ab ipsis visa sunt modo quodam est author. Quid si habitationem pristinam memoria repetat, & illorum hominum sapientiam, atque vincula? An non censes eum beatum se loci mutatione existimaturum, illorum autem misertorum? Præterea si qui honores ibi inuicem exhibebantur & laudes, dabanturque præmia illi qui transeuntia quælibet acute cerneret, recordareturque maxime quæ ex illis priora, quæ posteriora, quæ pariter progredi soleant, atque ex his futura optime præfagiret, hæcne desideraturum ipsum putas? beatosque illos qui apud eos honorantur & dominantur existimaturum? Vel, quod ait Homerus, sibi electurum euenire in alieno, scilicet rure conserui hominis mancipium effici & quodlibet aliud perpeti potius quam opinionibus illis illudi & in ea miseria degere. Si rursus iste descendat, eandemque sedem quam antea nanciscatur, nonne cum repente à Sole discesserit tenebris offenderetur? Ac si umbras illas discernere oporteat, deque ipsis disceptare cum illis qui perpetuis vinculis pressi sunt, proferendaque sententia sit eo ipso tempore quo oculi ipsius hallucinantur antequam acies expurgetur, quod quidem non breui fiet, an non risum concitabit? Eique ab omnibus dedecori dabitur, quod postquam sursum ascendit, corruptis reuersus est oculis, diceturque nunquam ad supera contendendum esse, & cum qui solueret tenet & sursum ducere, si deprehendatur, protinus occidendum. Tota hæc imago, o amice, referenda est ad illa quæ supra dicta sunt. Carcer quidem iste ad ea quæ cernitur oculis mundi machinam, lumen verò ignis in specu ad Solis potentiam, postremo, si ascensum ad supera eorumque conspectum, ad eum qui ad intelligibilem regionem tendit, ascensum retuleris, ut ego quidem spero, non aberrabis. Postquam sententiam meam audire desideras. Deus autem nouit an vera sit. Quæ igitur mihi apparent huc tendunt. Nempe arbitror in ordine ipso intelligibili, boni ipsius ideam supremam existere, vixque videri. Si autem visa fuerit, asserendum, eam omnibus omnium rectorum atque bonorum causam esse. Cum ipsa in loco visibili lumen creauerit, & luminis authorem. In

ipso verò intelligibili regnet ipsa, veritatemque & mentem protulerit. Quam nosse necesse sit omnem quicumque sana mente aliquid vel priuatim vel publice est acturus. Age & hoc considera, neque mireris, quod hi qui huc descendunt nolint humana tractare, sed ipsorum mentis acies semper ad supera dirigatur, probabile quippe idem, siquidem superiorem imaginem sequitur. Quid autem hoc? Mirandum putas, si quis à diuinis spectaculis ad humana hæc mala prolapsus, ineptior sit ad agendum rideaturque, præsertim si antequam præsentibus tenebris assuescat, dum adhuc titubabat, cogatur in iudiciis vel alibi de iusti umbris aut statuis illis quorum umbræ hæ sunt, certare, deque iudiciis eorum qui iustitiam ipsam nunquam viderunt differere. Verum si mentem quis habuerit, recordabitur duobus modis & duabus ex causis oculos turbari solere. Tum quando ex lumine ad umbram descendimus, tum quando ex tenebris prodimus in lucem, eodemque modo affici animum arbitrabitur, quoties turbatum viderit, & ad aliquid cernendum hebetiorem, ideoque haud temere in risum prorumpet, sed diligenter inquiret, vtrum à lucidiori vita descendens nouis tenebris obruatur? Vel ab insipientia plurima ad fulgidum spectaculum surgens, sub corusco nimium splendore deficiat. Et alterius quidem affectum probabit, vitamque eius beatam fore censebit, alterius miserebitur. At si forte ridere coeperit, haud tam inepte hunc ridebit quam cum qui à lumine superno deciderit. Hæc Plato diuinus, his neque minui quicquam debet, neque addi potest. Ergo Vale.

*Quod animus immortalis sit. Atque cur cum sit diuinus sapere tamen vitam agit bestia similem.*

## MARSILIUS FICINVS

Ioanni Nefio literis & moribus ornatissimo, S. D.

**N**isi diuinus nobis vigor inesset, ac cœlestis mentibus nostris origo, mortalium rerum defectum nullo pacto possemus agnoscere, nihilque prorsus supra rerum corporalium ordinem, aut excogitaremus vnquam aut appetere, nullus vnquam vel minima in re corpori repugnare contenderet. Quandoque terrenis opibus impleremur. Aut omnes aut certam plurimi in hac mundi media regione, tanquam naturali origine patriæque, quiescerent. Nunc verò cum res nostræ

longe se aliter habeant, reor equidem, neque vana fides, genus nobis esse diuinum. Ceterum si diuini sumus, cur nam sæpè vitam agimus bestiae similem? Quia naturalis regionis huius conditio sic instituit, vt longe prius sensu tanquam bruta, quam ratione tanquam homines vteremur. Præterea multo plura atque manifestiora circa sensum quam circa mentem, incitamenta se nobis obiciunt. Postremo, vnus in nobis est homo, bestiae verò sunt multæ. Operæpretium est nostram illam imaginem intueri, quam Plato sic in nono libro de Republica pingit. Imaginem animæ talem aliquam figuremus, quales quondam memoratur fuisse naturæ chimæ ipsius, Scyllæ & Cerberi, & aliæ multæ, in quibus feruntur variæ in eodem formæ congenitæ. Finge itaque figuram vnâ bestiae variæ admodum & capita circum multa habentis, capita, inquam, partim bestiarum domesticarum, partim agrestium, quæ & permutare & producere ex se hæc omnia possit. Vnam præterea iis adiunge supernæ leonis formam, huic vnâ insuper hominis, & amplissimum quidem primum sit, angustius verò secundum atque tertium. Coniunge igitur hæc tria, vt ad vnum conficiendum inuicem cohærescant. Circumpone extrinsecus ipsis hominis vnus imaginem, vt illi qui nequeat interiora inspicere, sed exterius, dumtaxat cernat operimentum, vnum animal homo scilicet videatur. Dicamus itaque illi qui asserit prodesse homini huic iniuste agere, iuste verò viuere nequaquam prodesse, quod nihil aliud asserit, nisi prodesse illi, vt bestiam illam multiplicem pascat & leonem, & fortio rem illam leonemque efficiat, hominem verò perire fame permittat atque eneruet, vsque adeo vt propter imbecillitatem trahatur quocunque cetera illa rapiunt. Neque alterum cum altero mansuefaciat inuicemve conciliet, imò sinat singula se inuicem moribus lacerare, ac pugnantia se mutuo deuorare. Ergo si quis dicat officia iusta prodesse, hæc agenda dicendaque monebit, ex quibus homo ille huiusmodi animalis interior, summam potentiam consequatur, feræque illius pluribus capitis redimitæ tanquam colonus, curam habeat, domestica quidem capita fouens, irrigans ac nutriens, agrestia protinus amputans, dum leonis naturam ad hoc adiutricem accipit, communiterque curat omnia, & inuicem mutua beneuolentia sibi conciliat. Omni itaque ratione qui iusta laudat, vera loquitur, qui verò iniusta, mentitur. Nam & quoad voluptatem & quoad decus, & quoad emo-

lamentam iusti laudator, vera pronuntians, vituperator autem neque quicquam asserit, neque nouit quod improbat. Hactenus Plato. In eiusmodi animæ nostræ figura illa distributio continetur, quæ apud Platonem legitur in Timæo. Vbi animam in tres quasdam vires diuidit quasi partes, in ratiocinandi videlicet & irascendi & concupiscendi naturam. Vim rationalem capiti tanquam arci supremæ reginam accommodauit, præsertim quia in speculando caput maximè omnium laborare videtur, sensusque ibi omnes vigent quam plurimum. Præterea vim iracundiæ in præcordiis collocauit, quoniam in ira, & audacia & timore hæ partes maximè concitantur. Postremo concupiscendi naturam iecori dedit quia naturalis illi vigor inest & concoquendi alimenti & libidinis augendæ. Proinde rationem in Phædro nominat aurigam, quoniam naturali quodam ordine dux est partium reliquarum. Adiungit huic geminos equos, album quidem alterum, alterum verò nigrum. Quantum verò ad propositum spectat equi sunt cordis vires & iecoris, quia rationi debeant tanquam aurigæ parere. Sed magnanimitas quæ accommodatur cordi equus dicitur albus, est enim rationi propinquior. Iecoris autem concupiscentia quoniam à rationis excellentia remotior est, equus est niger. Ratio rursus in nobis Hercules nominatur, Hic occidit Anteum, id est, immania quædam simulachra phantasiæ. Quando videlicet à terra attollit in altum, hoc est, quando à sensibus & corporali imaginatione se mouerit. Hic quoque leonem demat, id est, iracundiam cohibet. Hic hydram obtruncat multis vndique capitibus pullulantem, id est, concupiscendi vim amputat. Quæ non ad pauca quædam, ad illa quidem maiora tanquam iracundiâ, sed ad quælibet imò innumerabilia insatiabili voragine fertur. Verum dum noster Hercules iecoris hydram amputat ferro, capita repente repullulant, quia fomes ipse relinquitur. Dum verò absument igne, quia fomitem prorsus extirpat, nihil inde renascitur. Iubet apud Platonem Socrates in Phædone, ne voluptatis corporalis gratia ab alia quadam corporis abstineas voluptate, alioquin pro vna multæ subito renascuntur. Imò rationis gratia præcipit, vt à voluptatibus abstinere conemur, sic enim solū posse ait, vitia funditus extirpari. Finē Epistolæ iam imponam, si prius vnū hoc admonuero, vt videlicet meminerimus, si bellæ in nobis sūt multæ, nimirū esse animas apud Platonem ab homine in belluas transmutare.

Sane fomites quosdam & affectus bestiarum ab initio in nobis habemus. Quos ubi dum temere nutruerimus vel contopitur quodammodo ratio, vel sub iracundiæ concupiscentiæque specie vigilat. Quocirca sub ipsa hominis pelle homo ipse videtur in bestias pertransisse. Hinc Socrates inquit Phœdro : Considero equidem me ipsum Phœdre, utrum ego sim bestia quædam Typhone multiplicior ardentiorque & furiosior. Siue placatus quoddam & simplicius animal, diuinæ cuiusdam & mitis sortis, id est, tranquillæ intelligentiæ, particeps. Calendis Iulij. M. CCCC. LXXVII.

*Solus omnia possidet qui à nullo, præter Deum, penitus possidetur.*

MARSILIVS FICINVS

Hieronymo Pasqualino charissimo  
compatri suo, S. D.

**S**I cupis possidere quamplurima, da operam ut nihil penitus te possideat. Nisi enim te ipsum habueris, per quem sis alia possessurus, nihil prorsus habebis. Hinc fit ut omnes homines egeant semper, omnes continuè doleant, quia videlicet, se ipsum quisque secum omnia iamdiu temere nimium & amisit & perdidit, quando clam ipse captus fuit, dum palam capere niteretur. Solus & alterius simul & sui ipsius esse potest, qui soli se illi dedit, qui ideo solus est omnium, quia solus est omnia. In quo dum cuncta quis reperit, reperit etiam se ipsum tanto se ipso perfectiorem quanto perfectior est ille quàm ipse. Sicut qui seruo seruit, seruus est & turpissimus & miserrimus, ita qui omnium seruit domino quodammodo fit dominus omnium. Solus libere seruire videtur, qui libertati obsequitur infinitæ. Ibi seruitus libera est ubi immensa libertas, id est, Deus, quicquid seruire violentumque cogitari potest procul expellit.

*Cum primum fatum impugnare nitimur, expugnamus.*

MARSILIVS FICINVS

Francisco Mareſcalco Ferrariensi, S. D.

**Q**Varis, optime mi conphilosophe, quatuor. Primum quidem quomodo valeam? Valeo equidem Mareſcalce sicutivolo, postquam cœpi ut valeo ita velle valere. Secundum verò, qua ratione philosophor? Hac potissimum ratione philosophor, ut quandoquidem res ipsæ a liter vo-

luntatem non sequuntur meam, ego saltem voluntate res sequar, sic enim voluntati sequenti res obsequuntur. Tertium, quantum te amem? si quis modus adsit amori, ut si qua certa liberæ voluntati mensura, metire Franciscæ amorem erga me tuum, ita forsitan & meum erga te metieris. Quartum, quid componam? Compono librum de Prouidentia Dei & humani arbitrii libertate. In quo agitur contra astro- rum necessitatem fatumque Astrologorum. At verò dixerit forte quispiam, fatui esse contra inexpugnabile fatum velle pugnare. Ego verò respondeo, tam facile posse hoc impugnari, ut quando quispiam impugnare voluerit, tunc primum eo ipso quod vult expugnet. Nempe cœlestium sphaerarum motus nunquam altius mentem attollere potest quàm ad sphaeras Nunc verò qui disputat contra illas eas iam transcendisse videtur. Atque ad ipsum Deum liberumque voluntatis arbitrium accessisse. Quasi non à cœlesti fato coactus fuerit, sed à supercœlesti tum Dei Prouidentia, tum mentis libertate perductus. Præterea cum actio quælibet aduersaria, & ut ita dixerim, peremptoria à contrario quodam in contrarium procedere soleat, nemo audeat confiteri voluntatem ipsam disputationemque fictæ violentiæ syderum repugnantem à syderum violentia proficisci, imò ab ipsa met prouidentia libertateque manare intelligamus, cuius gratia dixerimus contra fatum. xxvi. i. Iunij. M. CCCC. LXXVII. Florentiæ.

*Multos habet seruos, qui multis seruit.*

MARSILIVS FICINVS

Bernardo Bembo Veneto,  
S. D.

**P**Hoebus Capella, & Franciscus Eliensis, Pamphilusque Medicus, Platonis nostri libros, quos iamdiu omnes à Græca lingua tranſtulimus in Latinam, à nobis poscunt. Tu sicubi fortè hos egregios viros offenderis, nostro nomine saluere iubeto, traductionesque hoc mense mitti non posse dicito. Vides, Bernarde, quanta libertate agam tecum. Videor enim modo nescio quo pacto imperauisse. Sed tu, mi Bembe, in causa es, tam talem te singulis præstas, ut qui libertate fiduciaque maxima non utatur tecum, proculdubio seruilissimus diffidentissimusque omnium videatur. Tu quidem dum cæteris libentissimè seruis, interim maximè dominaris. Cæteri verò cum maximè tibi dominari videntur, nunc seruiunt libentissimè. Nulla facilius

præstantior, securior dominatio quàm amarioria. Nulla arctior iucundior, felicior feruitus quàm voluntaria. Kalendis Augusti. M. cccc. lxxvii.

*Amicitia inter homines, nisi afflante Deo,  
conflari non potest.*

## MARSILIVS FICINVS

Florentinus, Hermolao Barbaro  
Veneto, S. D.

**S**cripsi superioribus diebus Epistolam quandam de Amicitia vera breuiter disputantem. Quam non ad vnum quendam meorum potissimum, sed ad cunctos pariter amicos sine certo titulo dirigebam. Reddita mihi est paulopost elegans Epistola tua latinissime Barbare. Quæ quidem vera amoris esca, id est, amore ipso, me capit, & captum prouocat ad amandum, vt quod multorum erat futurum vnus ipse iam habeas. Siquidem disputationem nostram de Amicitia vera, meos omnes iam iam salutaturam ipse tibi præcipue subito vendicasti, vt quod cunctis inscribendum fuerat, soli inscribatur Hermolao. Ergo quemadmodum nuper dum scribo omnes, ad vnum scribere in primis adducor, ita posthac in omnibus meis amandis, vnum hunc in primis amabo.

## MARSILIVS FICINVS

Conphilosophis, præcipue  
Hermolao Barbaro,  
S. D.

**A**micitiā omnes communi quadam notione, vñionem aliquam esse definiunt. Cū verò non aliter vñio esse queat nisi ad vnum, meritò querendum videtur quidnam vnum illud sit ad quod duo aliqui conspirantes, amici fiunt atque dicuntur. Nunquid necessariò amici sunt illi, qui opinantur idem? Nequaquam. Possumus enim idem in plerisque rebus, tam humanis quàm naturalibus opinari, & tamen inuicem nos odisse. An fortè benevolentia, non in opinione, sed in voluntate consistit? Puta vt illi duntaxat qui volunt idem, dicantur amici? Neque id quidem, imò ob hoc ipsum nascuntur inimicitiae, quod volumus idem. Sæpè qui eundem vel thesaurum, vel dignitatis gradum, vel artis honorem expetunt, sibi inuicem inuident, & irascuntur, & dimicant. Dixerit fortè quispiā discordiam eiusmodi inter homines ob hoc exoriri, quod finita quædam cupiunt bona, quæ dum alter possidet, vel nullo modo, vel non æquè al-

ter possidet. Si qui verò repertiātur quidē bonum, quod & infinitū sit, appetant, cum illud nusquā impediri possit, quin passim exuberet in immensū, eos nullis inter se inimiciis agitari. Amicitiamque inter illos esse qui bonum idem, infinitum volunt. At verò neque istud quidem sufficere ad benevolentiam mihi videtur, omnes enim naturali quodam instinctu eiusmodi bonum optant, vnde foelices esse volumus cuncti, non tamen nos inuicem cuncti diligimus. Vbinam igitur benevolentiam ipsam reperiemus, quæ nihil est aliud quàm velle bonum, nisi circa bonū ipsum, quod est omne bonum, id est Deum, eam reperiāmus? Certè non alibi. Cæterum, humana voluntas erga Deum, duobus præcipue modis, quantum ad propositum spectat, affici potest. Aut enim accipere cupit inde, aut dare. Primus quidem instinctus communis naturalisque est omnibus, siquidem omnes à Deo quàm plurima exoptamus & petimus, sed non ob hoc ipsum Deum hominesve diligimus. Instinctus alter non æquè cuiuslibet esse videtur, nempe pauci admodum reperiuntur, qui Deo seipsum secumque omnia dedant, imò vt rectius loquar, Deo reddant. Nihil enim quod non ab eo acceperimus vel sumus vel possidemus. Quisquis seipsum Deo reddit, id est, omnem cogitationis affectum, actionis nixum effectumque conuertit in eum, hic solius Dei ipsius gratia Deum amat, ac cætera diligit propter Deum. Sane vanus formæ corporalis amator ob hoc ipsum diligit corporis speciosi picturam, quia formam ipsam & substantiam corporis amat. Ita verus piusque amator res creatas non ob aliam diligit rationem, nisi quia creatoris Dei, quæ amat, vel imagines sunt vel vmbrae, & quanto similiores apparent, tanto magis admiratur & laudat, simillimæ verò diuinæ mentis sunt mentes Deo præ cæteris deditæ. Quamobrem eiusmodi mentes inæstimabili quadam amoris fragrantia & dulcedine & ad Deum & se inuicem prorsus afficiuntur, dum se tum illi sponte reddunt tanquam patri, tum sibi mutuo libentissime dedunt tanquam fratribus. Cæteræ quæ inter homines amicitiæ nuncupantur, nihil sunt aliud quam rapinæ. Vera charitas, sicut Paulus inquit Apostolus, non quæ sua sunt, sed quæ alterius, quærit. Et si honestis quotidie amicitiæ vocabulis magnifice gloriamur, tamen quisque nostrum vt plurimum talis est, vt non alium quenquam respiciat, sed seipsum. Non enim hic reuera se tradit illi, sed accipere potius studet ab illo vel volupratem vel tri-



litatem quandam, siue ad externa corpus- que siue ad animum id attineat. Denique, ut summam dicam, solus ille vir verus legitimusque amator est appellandus, qui intelligit in omnibus bonis quæ passim sibi offerantur & placent, nihil reuera aliud sibi placere, quam diuinum ipsum bonum, ex quo & per quod cuncta sunt bona, ideoque in iis omnibus ipsum amat, in ipso diligit omnia, ita ut neque ipsemet sibi sit dilectus, nisi in eo per quem hoc habet ut sit diligendus. Cunctos quidem pro viribus curat homines tanquam eodem secum patre creatos, quosdam verò ante alios eligit, tanquam patris illius similiores, quibus cum & cœlestem in terris & supercœlestem in cœlis vitam agat. Inter hos solos vera est amicitia, id est, ab vno & in vno Deo vnico vera. Quippe vera stabilisque inter plures vnio, nisi per vnitatem ipsam æternam effici nequit. Vera autem vnitatis & æterna est ipsemet Deus, qui solus est vera simplicitas & immensa potestas. Ergo hi soli libere cum Propheta clamare posse videntur: Ecce quam bonum & quam iucundum habitare fratres in vnum.

*Fortuna neque benefacere potest malis, neque  
malefacere bonis.*

MARSILIVS FICINVS  
Antonio Hyuano Serezanensi,  
S. D.

SI quem videris incurabili morbo corporis laborantem, variisque diuersorum membrorum doloribus cruciatum, inuidebis ne illi delicatas dapes, ministrorum turbam, strata mollia, purpuram, cubiculum auratum? Certe nisi tu quoque tantum ægrotes animo, quantum ille corpore, inuidere poteris. Quicumque verò voluptatibus pecuniæ aut gloriæ vel imperandi studio seruiunt, insanabili quodam animi morbo & multiplici dolore premuntur. Quisquis ergo his inuidet, nihil videt. Quamobrem cæci maximè omnium illi mihi videntur, qui fortunam ideo cæcam ducunt, quia vel benefaciat malis, quibus reuera nihil est bonum, vel malefaciat bonis, quibus denique nihil est malum. Qualis enim in se quisque est, talia cuique sunt quæ accipit. Soli inter homines rationis oculis capti sunt, qui non vident, quam mirabili ratione singulæ mundi partes disponantur & moueantur, soli fortunæ cuidam, ut ita dixerim, & iniustitiæ summæ subiecti videntur, qui vbi exactissimus ordo rerum infinitam indicat authoris potentiam & sapientiam & iusti-

tiam, ipsi vel irrationalem putant imperare fortunam, vel de diuina gubernatione quasi minus iusta queruntur.

*Matrimonij laus.*

MARSILIVS FICINVS  
Antonio Pelocto Poëtæ & Amico  
egregio, S. D.

QVOD ad matrimonium iamdiu animum applicueris, mi Pelocte, non summopere probare non possum. Sic homo tanquam diuinus humanam speciem seruat quadam successione perpetuam. Tanquam gratus reddit naturæ quod mutuo acceperat ac sæpe foenore. Tanquam felix verusque sculptor imaginem sui viuentis sculpsit in filiis. Charam præterea vitæ societatem & fidam rerum custodiam, hac vel solum vel maximè ratione consequitur. Habet insuper domesticam Rempublicam in qua gubernacula prudentiæ omniumque virtutum vires exercent. Parat etiam maximum præsidium, senectuti quam vel in vxoris dilectæ gremio vel in filiorum nepotumque vnio vel in affinium officio ducat securiorem. Denique vxor atque familia vel laborum nobis est dulce solamen, vel saltem summa quædam ad moralem Philosophiam exercitatio. Quamobrem Socrates multo magis moralem ab vxoribus disciplinam, quam naturalem ab Anaxagora vel Archelao, se didicisse confitebatur. Quis nesciat creato quondam homini nihil prius antiquiusque à Deo præceptum & institutum quam matrimonium? Idque & inter sacra mysteria numerari & apud omnes Gentes summopere celebrari? Hoc semper & honorauere potentes, & sapientes non contempserunt, utpote qui videbant ad res quidem agendas conducere. Literas autem, si temperate viuas & parce tempus expendas, non impedire. Plato noster quod in iuuentute quodammodo neglexit matrimonium, tandem in senectute poenitenti ductus sacra Deæ Naturæ fecit, ut ob eam rem se apud vulgus à crimine tum omisso matrimonij tum sterilitatis absolueret. Statuitque in legibus suis, qui vxorem non duxerit eum procul ab omnibus publicis muneribus & honoribus segregandum. Publicis autem oneribus grauius quam ceteros ciues esse præmendandum. Mercurius Trismegistus eiusmodi homines, inquit, & humana lege infelicissimos, & lege diuina tanquam steriles siccasque arbores indicari. Ab hac tamen lege duo tantum genera hominum videntur

absolui, aut qui ob quandam naturæ imbecillitatem ad hoc ineptissimi sint, aut vnice seiplos Mineruæ tanquam vxori data fide denouerint, illos quidem excusat ipsa natura, hos autem casta forsitan accusaret Minerua, si Venerem sequerentur. Pelotum vero nostrum, si forte matrimonium neglexisset, improbasset, certe natura quæ hunc robustum peperit & formosum. Ac si Minerua, cui iamdiu seruit, forsan culpæ tentauerit, quod Musis misceat Venerem, Apollo statim Mercuriusque defendent. Nempe dicent, Pelotum plura melioraque carmina post hymenea, sacra Musis quam antea dicauisse. Denique sublimes iubebunt ad sydera tollere vultus. Vbi & Phoebus Musarum dux & Mercurius harum comes, mediam ducunt Venerem, amoris & Musicæ matrem, æquisque penè cum illa, vt ita loquar, passibus gradiuntur, neque vnquam ab eo longè discedunt. Verum mittamus in præsentia sydera, redeamus ad homines. Video te posthac, Antoni, apud familiares tuos sæpè hunc in modum pro re vxoria declamantem. Homo vel solus vel maximè omnium est animal, vt dicunt Philosophi, sociabile, cui ad hoc ipsum soli sermonis condendarumque legum est à natura tributa facultas. Vt quicumque solus vixerit, intelligat se aut fortè maius aliquid homine esse, aut proculdubio minus, si quidem phœnice rarior est, qui inter homines vires humanas transcendant. Hic ergo præ cæteris humanitatis fungetur officio, qui continuam, domesticam, indissolubilem inierit societatem. Cuius commercio publicâ ipsam generis humani societatem & seruare nitatur & gubernare perdiscat. Nempe quemadmodum ex domibus ciuitas, ita ex rei familiaris disciplina Reipublicæ peritia constituitur. Nesciet regere ciuitatem qui domum gubernare non didicit. Non amabit patriam, qui vel bona illius vel mala parum ad se pertinere censebit. Non curabit fortè seipsum grauioribus imbueremoribus, qui cum solus viuât, non sit familiæ bonorum morum præbiturus exemplum. Ocio & licentia quadam negligentior quotidie deteriorque euadet, quisquis in re familiari non fuerit occupatus. Nesciet verè quenquam stabiliterque amare, qui verum indissolubilemque amorem coniugis & filiorum non experitur. Non discet pati foris & superare ferendo, nisi qui domesticum habuerit patientiæ præceptorem. Non discet hominum misereri, qui vel coniugem vel filium nunquam senserit lamentantem. Siquidem mens non ignara mali, miseris succurrere

discit. Quod verò omnium deterrimum est, is qui neq; scit suis prospiciendum, neque pro suorum salute Deus sæpè vocandus, humanas magna ex parte negliget leges, & homines ipsos, cultumque diuinum. Denique difficillimum erit, non exuere hominem, nisi legitimum matrimonij pallium induerimus. Quamobrem si vultis amici homines esse, si filij legitimi Dei, legitime genus hominum augete, & tanquam Deo similes instar Dei filios vobis similes procreate, nutrite, regite, gubernate. Memento præterea in re familiari diligentissime gubernanda, vos ipsos colere, Reipublicæ terrenæ & peritiam discere & assequi dignitates, Reipublicæ munera promereri.

*Philosophia sapientiam gignit, sapientia parit felicitatem.*

MARSILIVS FICINVS,

Sebastiano Saluino Amitino, S. D.

**V**Bi nos diues potensque Iuno non audit, haud prius nobis culpandæ sunt Parcæ quàm numen illud experiamur, quod quia viget vbique, affatim adest omnibus qui eidem adesse volunt. Audit hominem nondum vocantem, exaudit quemlibet ritè precantem. Totam igitur auxilium Saluine nostrum nobis est à Minerua petendum, quo possimus quandoque nos tollere humo, superasque euadere ad auras. Nempe solum id numen ad æthereum mundi caput hominem potest atollere, quod ipso summi Iouis est capite natum. Quoniam verò non exaudit quenquam, nisi ritè precantem, conemur, amice, pro viribus rectè hinc auxilium petere. Quisnam sapientiam rectè adorât, nisi qui sapienter? Sapienter autem hanc solus adorât, qui poscit à sapientia sapientiam. Non possumus nisi per illam quicquam vel ab ipsa vel ab alio petere sapienter, non possumus quicquam ab illa sapienter petere, nisi illam. Hoc nos docuit Socrates vir omnium, Apollinis iudicio, sapientissimus, quippe qui, vt Plato in Phædro recenset, in quotidianis precibus suis solam à Deo sapientiam exoptabat. Sciebat enim vir ille sapientissimus, insipientibus quidem vel quæ bona vulgo videntur, esse mala, sapienti autem etiam quæ mala dicuntur bona tandem euadere. Fœlix cui bene succedunt omnia, soli autè succedunt bene, qui omnibus vitur, solus bene singulis vitur, qui & sui ipsius & aliorum vires à sapientia didicit. Fœlices igitur soli sapientiæ sacerdotes, qui vel in ipsa humana, ( vt ita di-

eam, miseria sunt beati. Ceteri verò vsque adeò sunt infelices, ut in ipsa etiam humana felicitate sint miseri. Hinc quanta legitimæ Philosophiæ dignitas & diuinitas sic apparet, in hac enim maximè consistit perfectum sapientiæ sacerdotium. Verumtamen adeò indignè impieque vulgo tractatur, ut ij qui soli verè sapiunt & à quibus ceteri id ipsum habent ut aliquid sapiant, maximè omnium desipere iudicentur. Præterea malè putentur sentire de Deo apud illos, qui à Philosophis Deum colere didicerunt, quando Philosophorum rationibus intellexerunt, Deum esse quem colant. O falsissimum vulgi iudicium. Tunc Democritum Philosophum putauerunt insipientem, cum maximè sapiens factus cœpit mortalium insipientiam deridere, & ab Hippocrate Medicorum sapientissimo iudicatus est omnium prudentissimus. Tunc Socratem diuinum quasi male de diis sentientem condemnauerunt, quando ab ipso eorum Deo, utpote qui rectius quam ceteri de Deo sentiret, sapientissimus est appellatus. Sed rideat insanum vulgus ut libet, rideat Philosophos ut insanos & impios, interim Philosophi & flebilem vulgi risum vna cum Heraclito lugeant, & ridiculum fletum cum Democrito rideant.

*Non est sanus cui salubria displicent.*

MARSILIVS FICINVS  
Iacobo Bracciolino Poggij Oratoris filio, paternæ artis hæredi, S. D.

**L**egenti mihi nuper Philosophicam quandam Plutarchi Platonici Epistolam ad Traianum imperatorem, venit in mentem subitò Bracciolinus, quippe cui sciam optima quæque valde placere. Atque in hoc ille mihi maximè placet, quod nihil laudat non bonum, nullum bonum non maximè laudat. Nullum certius apud Medicos fani gustus indicium, quam si illa quæ salubria sunt eadem & suauia videantur. Atque contra, quæ lædunt plurimum eadem & offendant. Sed accipe iam Philosophicam Imperatoriamque Epistolam, quæ quidem Proœmium est libri Plutarchi de Politica & Imperatoria institutione ad Traianum Imperatorem. Quem librum Policrates penè ad verbum traduxit. Plutarchus Traiano S. D. Modestiam tuam noveram non appetere principatû, quem tamen semper morum elegantia mereri studuisti. Quo quidem tanto dignior iudicaris quanto à crimine ambitionis videris ef-

ferremotior. Tux itaque virtuti congratulor, & fortunæ meæ, si tamen rectè gesseris, quem probe meruisti. Alioquin te periculis, & me detrahentium linguis subiectum iri non dubito. Cum & ignauiam Imperatorum Roma non ferat, & sermo publicus delicta discipulorum refundere soleat in præceptores Sic Seneca Neronis sui culpa detrahentium linguis carpitur. Adolecentum suorum temeritas in Quintilianum refunditur. Et Socrates in Pupillum suum dementior fuisse culpatur. Tu verò quiduis rectissime geres, si non recesseris à teipso, si primum te composueris, si omnia disposueris ad virtutem, recte tibi procedent vniuersa. Politicæ constitutionis morumque vires tibi descripsi, cui si obtemperas, Plutarchum vitendi habes authorem. Alioquin præsentem Epistolam testem inuoco, quod in perniciem imperij non pergis, authore Plutarcho. Vale.

*Marsilij Ficini Florentini disputatio contra iudicium Astrologorum.*

MARSILIVS FICINVS  
Francisco Hyppolitò Gazolti Comiti viro clarissimo, S. D.

**L**ibrum scripsi contra vana Astrologorum iudicia, mitto ad te Proœmium, reliquum mittam cum primum scriba noster exscripserit. Qui singula necessario fieri à stellis affirmant, tribus potissimum perniciosis erroribus & inuoluuntur ipsi, & vulgus inuoluunt. Nam summo & omnipotenti Deo quantum in eis est propriam rerum auferunt prouidentiam, absolutumque mundi totius imperium. Angelis verò, qui ita apud illos cœlestia mouent, ut omnia inde hominum scelera, omnia mala bonis, omnia bona malis proueniant, iustitiam adimunt. Hominibus denique qui non minus quam bestiarum, ut illis videtur, huc & huc impelluntur, auferunt libertatem, omnique priuant tranquillitatem. Si enim bona promittunt, quod & raro vix & obscure admodum facere consueverunt, ut plurimum, maximis illa difficultatibus implicant, unde fit ut nobis minimè profint, quod si aliquando, & id quidem rarissimè, absque summo labore ventura pronunciant, inde vani, superbi, negligentesque reddimur. Atque si casu quodam, (ut promiserunt,) euenerit, minus grata prouenit diu expectata voluptas. Si verò minantur mala, quod multo sæpius accidit, mala vel sero futura diu anticipamus, vel nunquam futura miseri fingimus patimurque fingent-

do. Denique si fata vitari non possunt, frustra prævidentur & prædicuntur, si possunt aliqua ratione vitari, falso ab Astrologis necessitas fati defenditur, fortasse dicent, (vt arbitrer) hoc quoque in fatis esse, vt aliquid è multis præsciatur interdum & caueatur. Sic igitur inter Parcas controuersia erit, vt alia vulnerare hominem statuatur, alia protegat. Sed demus hoc in præsentia illis, si placet, ne cui forsan pertinacissimi videamur, nunquam tamen alicui concedemus, illud quoque in Parcarum decretis consistere, vt multi non credant illis, multi insuper contradicant. Quomodo enim Marsilium nunc impellit, vt pro ingenij viribus fato repugnet. Qui certè non fati, ipsius vi, sed potius contrarij alicuius vel saltem superioris virtute, nunc inuehitur contra fatum. Necessitas enim ipsa omnino sibi ipsi repugnare non potest, vt esse neget necessitatem, atque suo instinctu aculeisque se perimat. Quidnam vulgatissimum illud sibi vult. Fatis agimur, credite fatis. Atqui si diligentius rem ipsam consideremus, non tam fatis ipsis quam fatuis fatorum assertoribus agimur. Non cedetis mihi credite fatis, si fatuis non credetis, qui obscuris non vera, vt de Sybilla dicitur, sed falsa inuoluunt. Ac de singulis hominibus non propria prædicant, sed communia cunctis. Homines loquacissimi in medium tot adducunt, vt non mirum sit si inter multa mendacia aliquando casu in verum aliquod incidunt. Sapere volunt aliis, cum ipsi sibi minimè sapiant. Operæpretium est considerare quam inopes ipsi sint, quam sordidi, quam in negotiis suis infortunati, in rebus agendis imprudentes atque inepti. Si fortè mercaturam exercent, multo minus quam cæteri mercatores euentum prævident mercaturæ, si Medicinam, minus quam cæteri Medici medium ac finem morbi præsapient, ac pessime omnium corpora curant, & cum diuinationem profiteantur ipsi inde casu viuere passim videntur & cadere.

Surgite igitur Philosophi precor, surgite omnes libertatis tranquillitatisque pretiosissime cupidi, eia agite, iam accingite vos clypeo Palladis atque hasta, bellum in præsentia nobis imminet contra nefarios gigantulos illos qui & futurorum præscientia Deo prorsus immèso se equare conantur, & fati cœlestis defensione supercœlesti Deo, qui est summa libertas liberum imperium auferre. Sed qui tam superbe ad superos ascendere moliantur, miserabiliter præcipitabuntur ad inferos. Porrigite manum nobis ex alto Deus omnipotens, vires tuis militi-

bus subministra, tuum illud descendere imperium. Nunc aggredimur, succurrite nomina quæ circulos rotatis æthereos, succurrite iustitiam vestram excusaturis aduersus impios hostes, qui extremæ cuiusdam iniustitiæ vos accusant. Faue tu quoque nobis, ô genus hominum, sine inuidia, nempe tuam istam omnium pretiosissimam libertatem tranquillitatemque tuemur. Vt postquam de diuinatibus non diuinis sed valde profanis, qui tam diu suis nos prestigiis mancipant, triumphauerimus, libere tandem clamare possimus. Impietas ergo pedibus subiecta vicissim obteritur, nos exæquat victoria cœlo.

*Proœmium Marfilij Ficini in opusculum eius de vita Platonis ad Franciscum Bandinum.*

**N**atus est mihi nuper in ipso omnipotentis Christi natali Plato quidam, Bandine magnanime, qui quamuis auo illi suo patrique nostro Platoni longè sit impar, videtur tamen nescio quomodo, vt cunque potest, indole similis. Ad hunc ego conuersus, ô Plato, inquam, patrias ne uitasque sedes repetes Athenarum. At ille repente, ô fatum exclamauit iniquum, nulla mihi, proh dolor! nulla vsquam restat patria domus. O ferrea sæcula quibus Mars ille sæuissimus Atticas diruit Palladis arces. Non igitur in miseram Græciam, sed in Pannoniam, Marsili, me conferam. Ibi enim floret magnus rex ille Matthias, qui mira quadam potentia similiter & sapientia fretus certis relabentibus annis, ædem potenti sapientique Palladi, hoc est, Græcorum gymnasia, reparabit. Ibidem præterea penes regem ipsum Pannoniæ sanctissimum foeliciter viuit Bandinus ille meus, qui diui Platonis quondam Florentiæ suis sumptibus & apparatu regio celebrauit in vrbe, atque etiam extra urbem, dum conuiuium idem apud clarissimos Medices nostros instauraretur, primus interfuit. Ibo igitur iam celer & alacer in Pannoniam ad amicos. Denique huic ipse inquam decus, id est, nostrum, melioribus vires fatis.

*Mentes non separant animos motibus aliores.*

**MARSILIVS FICINVS**  
Florentinus, Reuerendo in Christo patri Domino Nicolao Batoreo Episcopo Vacienti Pannonio, S. D.

**C**Um accepimus Bandinique literas, quibus vehementer suadetis vt in Panno-

Pannoniam proficiscar, gratissimus Mathiz, serenissimo Pannoniz Regi futurus, perfeceram iam quinque Platonice sapientiz clauces, quarum vna ceteris breuior, ad vos venit. Venire autem me difficile est. Viuere deinde sub isto coelo, forsitan difficilius. Verum, vt rectius loquar, si venturus sim ad vos, discedam à vobis prius oportet quam redeam, fieri nequit vt ab his discedam, quibus cum mihi conciliante Musa, vnus iamdiu factus est animus. Ama precor, vt facis, Marsilium tuum, te ob egregias virtutes tuas ardentem amantem. Ama similiter Fran-

ciscum Bandinum nostrum, virum ingenio magnificentiaque præstantem, commenda vtrumque, si decet, Mathiz felicissimo Regi, huic nonnihil ex officina nostra breui tempore proditurum nos vtunque poterit commendabit. Valete fœlices animi, atque viuite mecum, inuitis montibus, qui nos separare videntur: viuite mecum fœlices animi, vel altissimis montibus admodum altiores. Hoc ego sum vobis, vnus sibi quisque quod ipse est. Hoc mihi vos estis, quod duo sunt oculi, octauo Calendas Iunias. M. CCCC. LXXIX. Florentiz.



MARSILIVS FICINVS

FLORENTINVS,

BERNARDO BEMBO VENETO,

*Equiti clarissimo, S. D.*

P R O O E M I V M.

LIBRI V.



*L*iber Epistolarum nostrarum quintus, ab Epistola de Lege diuina exordiens, eadem à nobis lege Bembi illius nomē tan-

quam caput suum videtur exigere, quem nobiscum, vt alibi demonstrauimus, lex diuina cœlestisque coniunxit. Tibi ergo præ ceteris meritò fœliciter dicatus sit. *Lege fœliciter.*



# MARSILII FICINI FLORENTINI EPISTOLARVM

(::)

LIBER V.

(::)

LEGES DIVINÆ, FIDES,  
*scientia confirmantur.*

MARSILIUS FICINUS FLORENTINUS

Reuerendissimis familiaribus suis, S. D.



**L**EGES humanæ non aliter aut admittunt ab initio, aut postquam admiffæ sunt propagantur, quam vel consuetis communibusque humanarum & naturalium rationum suasionibus, vel autoritate quadam imperatoria impetive armorum, vel facilitate & commoditate viuendi, atque illecebris voluptatum. præterea syderum dispositio, non aliis vnquam instrumentis, quàm eiusmodi leges inter homines potest inducere. Quamobrem si quam legem intellexerimus apud homines sanæ mentis, & ortam aliquando & latissime propagatam, dum probabiles illi multorum agumentationes aduersarētur, dum arma potentum contra illam vbique fauissent, dum palam omnibus humanæ voluptatis vsus spesque a ea prorsus auferretur, legem eiusmodi neque humanam esse, neque à cœlesti fatopendere, sed diuinam omnino, & à supercœlesti quadam potentia proficisci necessariò concludemus. Quod autem necessaria probatione concluditur, id proculdubio certa scientia comprehenditur. Quisquis igitur eiusmodi legi, tali quadam ratione crediderit, habebit & scientiam matrem fidei, & fidem scientia confirmatam. Qui talia non considerat, seipsum considerare non po-

test. Qui verò considerat quidem quodammodo, sed non credit, nihil credit. Quid elegant alij nescio, ego certè malo diuinè credere, quàm humanè scire. Si quidem diuina fides longè certior est quam hominum sapientia, credulitas illa semper vera scientia confirmatur. Scientia hæc nonnunquam incredulitate vacillat. Igitur vt veri quiduis alicubi possimus credere, iam ipsi veritati credamus, quæ quidem cùm ignorantie falsive nihil admittat, certè ignorat, fallitve neminem. Præterea, vt aliquid vsquam boni sperare possimus, in ipso speremus bono, quod cùm nihil agat mali, nihilque patiantur iniusti, neque sperantes frustratur vnquam, neque derelinquit amantes. Quos ipsum & vt sperarent illuminauit, & vt amarent pariter inflammauit. Motus enim ad ipsum bonum, neque aliunde quàm ab ipso bono pendere potest, neque alia ratione illuc refluere quàm inde profuxerit.

*Nihil potest esse proprium, vbi communis est animus.*

MARSILIUS FICINUS  
Naldo Poëtz.

**R**edij nuper in Cellanum, Nalde meum, imò nostrum, nihil enim potest esse proprium vbi communis est ani-

mus. Composui secunda rusticationis die argumentum in librum nostrum de Religione brevissimum. Cumque id ad amicos inferberem, primus mihi venit in mentem Naldus, primus omnium à nobis amatus. Cui & reliqui hoc ipsum quod à me stabiliter diliguntur, totum debent. Quippè cum in eo primum amando, cæteros amare didicrim. Mitto igitur argumentum. Scripsi Nalde quid egerim. Scribe & tu quid agas, & quomodo valeas. Sed cur, inquam, scripsi, & cur scribe rogavi? Epistolis tantum contenti sint, qui diligunt mediocriter, at verò neque Naldus scio, quod loquor, neque Marsilius mutuis Epistolis contentus erit.

*Brevisiter loquendum, sed non brevisiter, vel cogitandum, vel amandum.*

MARSILIVS FICINVS  
Antonio Hyuano, S. D.

Vides, Antoni, quam arguti ingenij te existimem? Quoties libros petis integros, argumenta mitto. Librum primo de Summo bono petisti, argumentum misi. Theologiam deinde nostram platoniam postulasti, dedi & argumentum, quod paulò ante recepi. Sed ut ter argutum te, id est, argutissimum faciam, accipe tertium argumentum in nostrum illud de Religione librum, quem legisti. Conuiuium de Amore desiderabas, hic solùm Hyuanus non argumentum tantum nostro nomine, sed integrum opus accepit. Vtpote cui non portiuncula quædam impartiat, Marfilianæ beneuolentiæ, sed tota in ipsum pènitè transfundatur. Noui differere brevisiter, brevisiter amare non noui, quam angustus est sermo noster, tam amplius affectus. Sæpè flamma quæ minus spargitur, feruet ardentius.

*Sacerdotes & Philosophi piè loquantur  
& sentiant.*

MARSILIVS FICINVS  
Ioanni Caualcanti amico  
vnico, S. D.

EXiges à nobis, mi Ioannes (ut arbitror) rusticationis huius nostræ primitias, quoniã prima quæque iure optimo debeantur primo. Scripsi nescio quam exhortatiunculam ad pietatem hodie ad familiares meos, imò in primis ad meipsum. Nihil vnquam cæteris studeo suadere, quod non mihi ipse antea persuaserim. Sacerdotis officium est, nihil loqui, nisi

quod ad pietatem conducere videatur. Philosophi quoque professio, non aliter agere quàm loquatur, nò aliter loqui quam sentiat, aliter tamen mète sentire quam sensu. Denique, ne exhortationem eiusmodi scribere frustra tentauerim, lege hanc mi Ioannes, obsecro, diligenter. Nam neque ad amicos scripsisse velim, neque ad meipsum possum nisi tu legeris.

*Nullum in malis refugium est, nisi ad  
summum bonum.*

MARSILIVS FICINVS  
Familiaribus suis, S. D.

TRagœdiæ miseram mortalium sortem verissimè descent, fors quoque mortalium tragœdiam verissimam peragit. Tragœdia est imaginaria quædam hominum vita, vita hominum tragœdia videtur esse verissima. Mitto nunc declamationes illas Oratorum, Poëtarum, Philosophorum, quibus singula humani generis mala & incommoda recensentur, hoc solo in præsentia quanta sit generis nostri miseria paucis exprimam, quod ut plurimum illi omnium maximè miseri sunt, qui vulgò videntur omnium beatissimi. Tria vitæ genera apud Philosophos numerantur. Prima contemplationi: secunda actioni: tertia voluptati tribuitur. Quicquid in qualibet harum vita habentur foelicitate summi, ij ut plurimum re vera sunt in miseria summi. Sanè qui in veritatis contemplatione vulgò videntur excellere, ij sæpè maximè omnium insolubili dubitationum ambiguitate tenentur: nam dum singula curiosius discere studuerunt, atque cuncta in singulis audentius profiteri, meritò dubitare de cunctis in singulis didicere, & cum neminem credant superiorem se habere, vel parem, iam neque habent cui credant quicquam, nèque quem consulant. O insipidâ sapientiam! ô scientiâ inscitia omni cõfusiorem! Hanc Salomon omnium diuino iudicio, sapientissimus afferre laborem, inquit, atque dolorem. Hanc apud Deum insipientiam existimari, paulus apostolus asserit. Huius cogitationes apud Deum vanas haberi, propheta Esaias exclamat. Hoc illis non immeritò videtur accidere, qui res veras in alio potius quàm in veritatis ipsius lumine videre confidunt, perinde ac si quis mentis lumine captus, colores rerum non in solis ipsius splendore, sed in oculi radio se credat inspicere. proinde qui in actione primum obtinere gradum existimantur, primum re vera tenent in passione,

& cū maximè dominari dicuntur, tunc maximè seruiunt. Postremò, qui voluptatibus propensius obsequuntur, ij sæpius incidunt in dolores, & cū potissimum ingurgitare videntur, vehementissime fiunt & esuriunt. O miseram mortalium sortem, sortem miseria ipsa miseriorem! Quoniam igitur miselli confugiemus, vt miseriam nostram quandoque procul effugiamus? Ad Philosophiam ne illam sophistarū curiosissimam? An ad imperium? An ad voluptatē? Heu nimium ad hæc iam toties frustra refugimus! Siquidem superior illa Philosophia molestissimis nos questionibus implicat. Imperium autem extrema quadam & periculosissima cōprimit seruitute. Voluptas denique brevis & falsa, veris & longis doloribus inficit. Forsitā operæpretium erit, si volumus, quod sequimur assequi, vt ad illa dumtaxat, quæ nusquam fugiunt, fugiamus, nusquam verò id solum potest fugere quod mouetur nusquam, cū impleat vniuersum. Verū quid opus est vt moueamur ad illud, quod nō mouetur vsquam, quod vbiq; singulis adest? ne moueamur igitur, neque circa plurima distrahāmur, sed in vnitāte quantum possumus maneamus, æternam siquidem vnitatem, vnamque æternitatem non motu vel multitudine, sed statu & vnione consequimur. Cæterum, quidnam est istud? amici cia dicite, quid est istud? Nunquid est ipsum bonum, quod vniuersum implet? Nihil enim reperiri potest, quod non sit ipsius boni præsentia bonum. Hoc ipsum est, nonne videtis? Hoc ipsum est quod appetiunt omnia, quoniam ab ipso sunt omnia. Atque idcirco singula per ipsum perficiuntur, quatenus huic adhærere nituntur. Bono autem, vt mihi quidem videtur, non alia ratione, quam amore possumus inhærere. Quandoquidem hæc ipsa boni conditio est, vt appetatur, & appetibilis ipsius vt sit bonum. Atque id quod nobis optimum est, cū primū amamus, hæremus. Quippe cū amor sit bonum aliquod summo bono quā proximum, quoniam est flamma boni. Vbiq; verò flamma boni feruet ardentius, ibidem & boni lumen clarius emicat. Quid Epistola, si Deus est ipsum bonum, ipsa lux boni, ipse boni lucentis amor, amemus, o amici! amemus obsecro, ante alia bonum lucidum lucemque benignam. Sic enim non modo nostrum amabimus Deum, verum etiam amando fruimur, siquidem Deus est ipse amor, ipse amor est Deus. Ergo in primis ferueamus illo, sine cuius calore nihil caler. Vt benigna illius luce resulgeamus ad votum, sine

cuius splendore nihil lacer. Agite, amici, maneamus in eo, quod recedit nusquam, & permanebimus. Seruiamus soli omnium Domino, qui nulli seruit, ne seruiamus vili, sed omnibus dominemur. Fruamur illo si possumus, possumus autem si volumus; nam volendo fruimur, volumusque fruendo: fruamur, inquam, illo, quod solum exuberat per immensum, atque ita solum prorsus implebimur, ita solum verè pleneque gaudebimus. Vbi enim bonum viget absque defectu, ibi voluptas absque dolore sentitur, ibi gaudium vndique plenum.

*Non creauit ad parua quadam Deus homines, sed ad magna.*

MARSILIUS FICINVS  
Ioanni Caualcanti amico  
vnico, S. D.

**D**ialectici solent dicere, eam esse contradictionis conditionem, vt si quis in alteram eius partem iam inclinatur, non possit eodem momento in partem alteram inclinari. Ingenium verò meum vsq; adeò distractum est hoc autumno, vt neque loqui velim, neque filere: rursus, neque agere possim, neque non agere. Forsitā quia duplex quodammodo sum, qui videor esse simplex. Sed sim & duplex, vt in Phædro vult Plato, imò etiam triplex, vt idem disputat in Timæo, modo quod in me ad honestum negotium trahit, superet semper quod ad ignauissimū ocium retrahit & torporem. Ecce superat iam quod ad agendum inuitat atque loquendum, itaque & loquor utcumque possum & ago. Verū surgit in nobis nescio quomodo statim altior quæstio. Quoniam iocari velim parumper (vt soleo sæpè) ac saltem ad Caualcantem meum faceti aliquid scribere. Atque cū hoc potissimum proposito sumpsi calamum, scribo rigidiora, & qui Lyrica vel Comica tento, interim Elegia vel Tragica perago. Vis dicam, amice, Saturnum me vnicum his temporibus elegisse, in quo cunctas rigiditatis suæ vires experiatur? Sed non vis istud (vt video) mi Ioannes, nec ego volo. Quid ergo dicemus, o amice? Deum velle sacerdotes suos esse omnium seuerissimos, neque leuia inter sacra tractari, sed graua. Hac forsitā ratione Pythagoras discipulis suis præcepit in Symbolis, ne iuxta sacrificium vngues inciderent. Non creauit ad parua quadam Deus homines, sed ad magna, qui non implentur paruis, ac magna nouerunt, imò verò solum ad infinita crea-

uit eos, qui soli in terris infinitam reperere naturam, quibus finitum nihil, quamvis maximum, penitus satisfacit.

*Nullus incontinens potest sapiens esse.*

MARSILIVS FICINVS,  
Philosophis & Sophistis, S. D.

**I**Nter omnes animæ vires, quæ in cognoscendo versantur, supremæ sunt intellectus & ratio, infimæ verò gustus & tactus, hæc quidem ad naturam descendunt maximè corporalem, illæ verò ad incorpoream ascendunt substantiam atque diuinam. Quisquis igitur his omnibus simul seruire contenderit, nimirum frustra contendet. Neque enim supremorum radiis illustrabitur, quisquis infirmorum tenebris se prorsus immerferit. Neque infirmorum ridiculis auscultabit illecebris, qui vera supremorum bona gaudiaque gustauerit. Non attinget animus rationes rerum verissimas, quæ sunt à corporibus separatæ, nisi ipse se ipsum, tum morum purgatione, tum speculationis intentione à corpore separauerit. Nullius existimabit quæ temporari subiiciuntur in terris, qui cælum ipsum iam possidet, ipsamque (vt ita dicam) meretur æternitatem. Mitto quod quemadmodum oculi rubra quadam ophthalmia laborantes, vel amara lingua, nihil nisi rubrum sèriunt, vel amarum, sic animus qui ob diuturnum amorem obsequiumque circa corporea iam quasi corporalis euasit, quæ diuina sunt vel nulla esse putabit omnino, vel saltem corporea iudicabit. Mitto quam libero & quam diuturno opus sit ocio ad occultissimas rerum rationes inuestigandas. Nihil autem magis seruire, nihil magis negotiosum atque sollicitum cogitari potest, quàm anxia eius vita qui sensibus tanquam dominis seruit, & pluribus & infanis. Ac dum tyrannis insipientibus mancipantur, sapientiæ insuper proficitur obsequium. Quosunque igitur corpori stultè seruire deprehenderit, sapientes esse negabitis. Quos autem esse noueritis sapientes, hos non serui sui corporis seruos, sed dominos iudicabitis. Anxij certè viuunt, qui solis seruiunt corporis voluptatibus. Sed multo magis anxij, qui voluptates infimas cum supremis frustra copulare conantur. Nam cum nimium vtrinque laborent, neutra ex parte, vel mentis, vel corporis voluptatibus perfruuntur. Nullos Deus reprobatur magis, quàm eos qui fœdatis vitiorum vasculis nectar & ambrosiam haurire confidunt. Nullos probatur

amaque magis (vt disputat Aristoteles) quàm qui mentem Deo simillimam in primis colunt, & à corporis labe longe dissimili segregant, diuinumque lumen non nebulis obstruere vitiorum, sed pura student mentis serenitate percipere. Hæc ratio & Socratem (vt opinamur) induxit, vt moralem in primis disciplinam hominibus exhiberet, & Pythagoram, vt à sacris Gymnasiis suis profanos longè propelleret. Quia sicut vas foetidum, quemcunque liquorem infuderis, vel suauissimum, reddit sua contagione foetentem, sic mala mens accepta scientia malitiam parit, non sapientiam. Prætereà, sicut aer ad lumen solis, sic mens se habet ad veritatis & sapientiæ lumen. Ergo neque aer, neque intellectus vnquam dum nubilus est, suos radios comprehendit, & vterque comprehendit subito, cum primum purus & serenus euasit. Huc tendit Platonis illud in Epistola ad Syracusanos. Quod diuinum est, inquit, disci non potest, quemadmodum cætera quæ dicuntur, sed ex diuturna circa diuinum ipsum consuetudine, vitæque similitudine, subito quasi ab igne scintillante lumen effulget in animo, seque ipsum iam alit. Quid igitur tot lucubrationibus incumbitis, o Philosophi! quid tam longis disputationum ambagibus opus est Sophistæ? Vnica, nonne videtis? Vnica ad lumen ipsum via nobis est ipsa serenitas. Heu! frustra sæpè confiditis impuro purum (quod Socrates damnatur) attingere. Eia discite à Platónico Galeno, impossibile esse animam sanguine & adipe suffocatam cœleste aliquid cogitare. Discite rursus à Pythagora & Platone, sapientiam mētis nihil aliud esse, quàm summi ipsius boni lumen per animos verè bonos, tanquam specula quædam purissima ubiq; diffusum. Ergo cum primum boni penitus euaseritis, summi ipsius boni splendore, hoc est sapientia, refulgebitis. Sol cœlestis qui oculos animalium generat rerumque colores, idem apertis purisque oculis colores ostendit. Sol supercœlestis, id est veritas ipsa, res veras procreat atque mentes. Sol idem res veras puras ad ipsumque conuersis mentibus patefacit. Purgate rationis oculos ab omnibus corporis huius noxij fœdibus, auertite mentis aciem ab infimæ vmbre materiæ, conuertite intelligentiæ interioris aspectum ad lucem ipsam formæ supernæ. Vnde primum materia satis iam præparata corporeis formis repete formatur, inde mens parata sufficienter statim incorporeis formis afficitur. Et quam clavis illustratur radiis veritatis, tam vero gaudio abundè perfunditur.

*Philosophi sæpe dum discunt curiosius  
disputare, interim consultare  
dediscunt.*

MARSILIVS FICINVS

Ioanni Caualcanti amico  
vnico, S. D.

**Q**uidnam ais, ô vir, in rebus tatum nostris delicatissime? Obrui ne te his diebus à nobis quereris copia literarum? Ah! quid agis mi, Ioannes, ferto precor leuiora hæc æquo si potes animo, quando nos multo ferimus grauiora. Cur te turbo numero literarum? Quia videlicet ipse nimia cogitationum turba confundor. Ita solent qui ocio nimio redduntur negotiosis. Præstat autem opprimente ocio negotiosum esse, quam prementibus negotiis ociosum. Consule conphilosopho illi nostro quid potissimum in sua causa sit acturus. Ignosce, amice, Philosophis, nam sæpe Philosophi dum discunt curiosius disputare, interim consultare dediscunt.

*Solitudo Philosophi, non remissio mentis, sed intentio esse solet & debet.*

MARSILIVS FICINVS

Florentinus Bernardo Bembo  
Veneto, S. D.

**S**ecessi Nonis Septembribus in môtém Celanum nostrum procul ab vrbe, remittendi, imò potius intendendi animi gratia. Nam solitudo Philosophantibus non tam remissio mentis quam intentio esse & solet & debet. Hic, Bernarde, qua die accepi expectatissimas literas tuas, paulo ante scripseram, nescio quid, ad familiares meos, forte tragicum magis quam Philosophicum. Sed quaecunque id sit, frustra esset ad meos scriptum, nisi Bembo meo imprimis transcriberetur. Quicquid verò Bembo dicitur, Phœbo quoque Capelle, & M. Aurelio dictum existimamus. Cum in urbem rediuero, vbi illud reliqui volumen in quo nostra illa decem sunt argumenta eiusmodi transcribantur. Siue me tibi nunc commendauero, mi Bernarde, intellige Heroëm illum nostrum Ioannem Caualcantem sub Marsilij nomine commendatum. Siue dixero Vale, intelliget tibi sub Marsilij verbis ab Heroë prosperam valemdinem exoptaram. Cura vt valeas. At video Bembum meum neque posse neque velle absque delitiis suis bene valere Bernarde, Landinus & Bracciolinus tui tibi bene valent, igitur bene Vale.

*Prophanis sapientia non conceditur.*

MARSILIVS FICINVS

Laurentio Bonincontro Astronomo  
& Poëtæ, S. D.

**S**oles sæpenumero dicere, Laurenti, non posse homines impios ynquam Astrologos veros euadere. Quod quidem mihi quoque videtur esse verissimum. Nam si cœlum Dei ipsius est templum, consentaneum est, prophanos homines procul à cœlo cœlestibusque arcanis expelli. Præterea non solum Astronomiam, verumetiam sapientiam omnem à Barbaris descendisse, Plato noster ceterique Græcorum sapientes proculdubio consentunt. Compertum vero habemus solos apud Barbaros Sacerdotes, Physicas, Mathematicas, Metaphysicas scientias tractauisse. Vtpote qui sciebant sapientiam præcipuum Dei donum, non nisi mentibus maximè sacris diuinisque vel debere vel posse concedi.

Hac potissimum ( vt arbitror ) ratione Christus vitæ magister ait, sacra mysteria dari quidem vulgo velata, electis autem discipulis penitus reuelari. Verum quid hac in re nunc denuo ultra progredior? Lege, si placet, quæ in eandem sententiam superioribus diebus ad Philosophos scripsimus & sophistas. Adhibe his, amice, lectorem, si quem repereris doctrinam cum probitate præ cæteris coniunxisse. Dic amabo, Laurenti, quem ad hæc legenda nunc potissimum cogitas adhibere? Angelum ne Manectum? Hunc ipsum & tu cogitas video, & ipse modo hunc ante alios cogitaueram.

*Omne tulit punctum qui miscuit  
vtile dulci.*

MARSILIVS FICINVS

Sebastiano Foresio, charissimo  
compatri, S. D.

**N**emo est ex omnibus familiaribus meis quicum altius dulciusque loquar, dulcissime mi Foresi, quam tecum. Cæteris enim lingua tantum vel calamo loquor, tibi verò sæpe plectroque lyraque, alioquin plectra sinete mihi silent, muta sine tē mihi lyra. Age amabo, mi Foresi, quoties ad lyram canis, canetu quoque mecum. At video te dum alteram istam intentius fabricas citharam, interea cantum sonumque alterius prætermittere. Inter cœlicolas Sebastiane Phœbus pulsar quidem, non fabricat citharam, Mercurius



autem fabricat, sed non pulsat. Nemo igitur confidat in terris utramque facultatem & fabricandæ & pulsandæ citharæ pariter exercere. Si quis nobis obiiciat, illos nimium delirare, quibus nimium agitur res de lyra. Respondebis. Scio vicissim, nos ob hoc ipsum (ut ita loquar) lyrare ne delyremus. Qui tractant grauias semper, ipso nimirum grauitatis pondere deprimuntur. Qui continue leuibus occupantur, merito leui qualibet aura huc atque illuc impelluntur. Miscenda nobis est, (quemadmodum natura nos docet,) grauitas leuitati. Ut grauitas quidem quadam, (ut ita dixerim,) modesta leuitate releuetur & erigatur, leuitas autem grauitatis stabilitate firmetur. Verum quid ago? Musicam ne accuso nostram quasi rem leuem? cuius dignitatem siue potius diuinitatem aliàs, (ut te non laet,) longa Epistola demonstraui. Sed ne nimis forsitan indulgere Musicæ videamur, summatim ita concludimus. Graui quidem concentu nihil grauius, leui autem nihil leuius, temperato nihil posse temperatius cogitari. Ergo salua sit semper nobis rite vocantibus cithara mediocris. Tu quoque saluus esto, si modo sæpe Ioannem Caualcantem & Petrum Nerum nostros oculos salutaueris.

Ipse Lucas Marsilij scriba, qui hanc Epistolam transcripsi, metibi commendo. Atque oro, si modo tanto munere dignus tibi videor, ut tantum me ames quantum ab ipso Marsilio amari te video. Patronus, Foresi, meus te tantum amat, quantum ipse amas amari. Vale.

*Nullum commodius in malis remedium  
quam patientia.*

MARSILIVS FICINVS

Sebastiano Saluino Amitino  
suo, S. D.

**V**ulgare, Sebastiane, Prouerbiū habet, nihil esse difficilius patientia. Nos autem contra sentimus, neque esse admodum difficile, quod non sit valde laboriosum, neque laboriosum esse, quod non sit operosum, neque operosum videri, ubi nulla opus est opera. Quo autem pacto ibi opus est opera, ubi non agendum est potius quam agendum? Patientia verò non ut agas præcipit, sed patiaris. Quanto difficilius agere est, quam pati, tanto difficilius bene agere est, quam bene pati. Cæteræ quidem virtutes omnes in bene agendo versantur, patientia verò sola in bene patiendi consistit. Quid

est autem aliud pati bene, quam passionem à malis illam non augere? Quid autem hoc esse dicemus, nisi velle pati, quod etiam si nolueris, sis passurus? Quod nisi patiare libens, omnino patieris inuitus, & nisi te duci permiseris, traheris violentius & raptabere. O miram patientiæ potestatem! virtutes quidem aliæ contra fatum quodammodo pugnant. Patientia verò vel sola vel maximè omnium expugnat fatum, quæ enim fatum immutabilia necessariaque fore decreuit, patientia cum diuinæ prouidentiae voluntate consentiens, ita quodammodo mutat ut ex necessariis faciat voluntaria, sicut qui male agit, bona sibi met conuertit in malum, ita qui bene patitur mala sibi vertit in bonum, nempe in perferendis malis ipse bonus euadit. Tanquam igne aurum, sic iste aduersitate probatur & claret, tanquam veteranus miles frequenti periculorum exercitatione fit & callidus & intrepidus, tanquam qui iam gustauit amara, dulcia deinde sentit acutius, vitatur iis sapientius, fruiturque suauius. Non recte aestimat quanti sit bonum homo, qui non expertus est malum. Nesciet vnquam frui bonis qui malis nunquam didicit vti. Nullius prosperitas debiliior est quam cui videntur omnia prospere contigisse.

Prudentis est & in sereno aëre pluuiam, & in pluuiâ expectare serenum, imò nihil in caliginosa hac vita putare serenum, nisi sub mente serena. Continua nos extrinsecus procella ferit, intrinsecus tantum nobis est petenda tranquillitas. Vnde calor, inde serenitas, inde calor, vnde lumen. Lumen autem non ab umbra materiæ, sed à mentis luce procedit. Errant, amice, in loquendo qui dicunt, ex multis malis, multas in vita hominum contingere passiones. Rectius admodum diceretur, vitam ipsam esse passionem quandam, miseros sine vlla intermissione prementem. Non remedia quæ ad tempus agant, sed quæ continuè profint, morbis sunt continuè adhibenda. Consultare, pugnare, repugnare, non semper valemus, bene autem pati possumus semper & patimur & pati patiendi docemur. Possumus nimirum id semper, cuius potentia in ipsa voluntate consistit. Cum primum bene pati volumus, bene patimur, siquidem pati bene nihil aliud est quam velle pati. Si male agimus, proculdubio & mala patiemur & male. Si bene patimur, bene agimus. Si importune pugnabimus, amice, defatigabimur, & ipsa saltem defatigatione, vel à nobis ipsi penitus expugnabimur. Si ces-

serimus opportunè proculdubio expugnabimus. Cedit durorum corporum ictibus liquidissimus aër, redit subito aër in semetipsum qualis & ante fuit. Dura verò corpora colliduntur prorsus atque franguntur. Lentissima & mollissima quæque infracta per durant, ligantque durissima, quia cedere non nouerunt, cædi, frangi, ligarique coguntur. Ergo Saluine mi, fortunam vince ferendo, & ut alia vincas, (sicut cœpisti,) vince teipsum. Memento quoque in regione hac mundi maligna nihil intactum à malis abire, sed sub iudice iusto, imo sub iustitia iudice, nullum bonum premio iusto, nullum malum debito supplicio posse carere. Patientiam verò bonum usque adeò perfectum esse, ut absque ipsa cætera hominum bona perfici nequeant. Quæ enim ab aliis virtutibus inchoantur, ab ipsa perficiuntur. Vale, dilectissime frater, atque ut alij te ferant, ferto alios. Ego certe quoties, quæ me offendunt in homine video, toties esse me hominem memini, ideoque nonnihil quod alios offendar habere. Hac ratione multos fero quotidie, ut multi me ferant. Fert etiam patienter rigiditatem prolixitatemque nostræ huius Epistolæ. Ne velego incassum de patientia disputauerim, vel tu frustra nunc videaris audisse, quæ iam pridem pro tua prudentia & discere & seruare cœpisti.

*Solum Minervæ templum contra fortuna  
procellas homines  
protegit.*

MARSILIVS FICINVS

Ioanni Caualcanti amico  
ynico, S. D.

**A**micus ille noster binis iam literis apud me de sua fortuna sine sorte conqueritur. Ego vna hac Epistola consulo, ut ad templum Mineruæ confugiat, quo solo contra fortunæ procellas fulminaque protegimur. Nescio per quem commodius quam per te Epistola Mugellanos montes ascendat. Si vis lege, mitte si potes Vale. Sed quidnam cogitasti modo, dum legeres, si vis lege? Num forte permittere ut illa tua potius quam tu legat? Fac tandem ut cunque placet. Ego verò nolim cuiquam nostra placere, nisi ei viro qui ante omnes mihi placet, ante placuerint.

*Amicitia vetus extrinsecis non eget officiis.*

MARSILIVS FICINVS

Ioanni Caualcanti Amico  
ynico. S. D.

**R**esponde quæso Ioannes, si modo ista rogo, cur tot iam literis meis non respondes? Nescis verborum saporis morum afferre suauissimum nostris populis condimentum? Quidnam in acrioribus mihi dulce? Ioannes. Quid rursus in dulcioribus acre? Ioannes. An forte putas cum primum nostras Epistolas legeris, respondisse, præsertim cum verbis meis affectu semper operaque respondeas. Ac sæpè antequam loquar quicquam, ipse cuncta peregeris. Est ita profecto. Sed scio te vltius processisse, nam cogitasti primum respondere, ac etiam quid potissimum responderes. Vide inde, quod & ante peruideras, Marsilium cogitationibus tuis propinquorem esse lingua manuque tua. Ideoque inter animum tuum atque meum ministerium linguæ manusque interuenire non posse. Recte admodum diuinas, & ego recte diuino. Nam & tu cogitando scripsisti Ioannes, atque ego meditando legi dum scriberes. Verum ut alij etiam tua hæc legere possint, quæ tu mihi responderis, nunc ipse transcribam. Ioannes Marsilio S. D. Vetus consuetudo nostra, Ficine, iam fecit ut nihil mihi amplius afferre possis nonni. Non iam diu ingenium, Marsili, tuum, sensum habeo omnem, verbaque teneo. Erraui modo. Non enim tam consuetudinis diuturnitas quam initium ipsum istud effecit. Nempe ab ipso diuini huius amoris initio non partem mihi gradatim animi tui partemque subinde aliam, impertisti mi Marsili, sed totum semel in me vnicum penitus transfudisti. Tantumque muneris huius in alios qui abs te amantur, effunditur, quantum in eos ipse refundo. Quid igitur dare nobis conaris vltius? Nihil habes omnino quod non habeat qui te habet. Ergo frequens scribendi, rescribendique officium, quod inter alios est perfectioris benevolentia signum, hoc ipsum inter nos, si ad nos propriè referretur, benevolentia imperfectioris foret indicium. Multo magis tu in amicitiam nostram loquendo forte delinquis, quam ipse silendo. Videris enim nescio quid inter nos numeri adhuc & absentia suspicari. Ego verò simplicem vnitatem continuamque presentiam qualis est, ita confirmo, ut tu maximè confirmari desideras. Quid ergo? Nunquā ne mutua inter nos litera perferentur? Absit ut ex affluentissima intima fontis aqua

bandantia nihil effluat vsquam, nihil extra redundet. Absit vt quod ardet intus, nunquam extra resulgeat. Sed hac ratione vltro citroque saepenumero & scripsimus & scribemus, vt quæ nostræ mentes, imò nostra mens vicissim cogitat, & secum ipsa loquitur cogitando, cæteri etiam nonnunquam vsu intelligant literarum. Sed me cupis benevalere, quod certe ante omnia cupis bene. Vale.

*Qui Musis abutuntur, non mel, sed fel ab earum fonte reportant.*

### MARSILIVS FICINVS

Angelo Manetto Ciui præclaro, S. D.

**S**Vnt amice, nonnulli & Latini scriptores & Græci, qui homines literarum admodum studiosos apibus comparent, propterea quod instar apum ex multis sparsim authoribus, ceu floribus, colligant, quod deinde capacibus memoriæ alucariis conditum & quadam meditatione cōcoctum mellissuum pariat doctrinæ eloquentiæque liquorem. Siquis autem comparisonem eiusmodi ab optimis authoribus confirmatam, fore negauerit, hic dignus mihi videbitur, qui fel potius quam mel ab ipso Musarum fonte reportet. Ego igitur non demam huic similitudini quicquam, sed potius addam. Audisti, (vt arbitror,) amice, nonnunquam, vbi apes quam plurimos lambunt absinthij flores, mel ibi sæpissime fundere, quod summis quidem labiis delibatum quodammodo dulciusculum videatur, sed ipsis subinde faucibus haustum haudquaquam dulce proueniat, sed pene instar fellis amarum. Comperit habemus idem ferme nonnullis literarum illiconibus lurconibusque libronum, qui neque modum habent vllum, neque delectum, sæpe contingere, nempe quanto avidius dulcissimos Musarum larices haurire videntur, tanto nescio quid amarius interim corde concipiunt. Hanc forsitan Latini bilem, Græci melancholiam cognominant, morbum, quemadmodum Aristoteles probat, curiosorum peculiarem literarum. Hac Salomon ratione, studium literarum occupationem quandam onerosissimam appellat, addiditque tristitiam ipsi scientiæ comitem. Quid igitur ad Aristotelicum illud dicemus? Scientiæ arbor, inquit, radices quidem habet amaras, fructus verò dulcissimos. Profectò dabimus hoc Aristoteli, sed addemus, fructus eiusmodi fortassis esse poma persica, quorum dulce,

dini amarus quidam subest nucleus. Quid ergo? Musas ne detestabimur? Absit vt celestis nectaris, & ambrosiæ fontem stygios amarosque effundere riuulos, opinemur. Quantum igitur vsu ipsum laudamus Musarum, tantum vituperamus abusum. Quisnam maximè Musis abutitur? Nisi qui aut harum vestigia temere importuneque sectatur, aut vulgarem his Venerem imprudenter admiscet, aut eas à duce ipsarum Apolline segregat. Non capiunt scientiam insci homunculi, sapientiam ipsam insipide capeffentes. Non rite camenæ canunt, sed silent potius aut stridunt, vbi petulans Veneris filius interpellat. Non apte Pieridum saltat chorus, imò claudicat & vacillat, vbi dux chori procul abest Apollo. Proinde qui solis lumen percipere sine solis ope confidit, merito in tenebras corrui, non surgit in lucem, qui verum hoc & verum illud seorsum à summa veritate disquirat, proculdubio non in verum incidit, sed in falsum. Qui supernum nectar in stygia palude quæritat, nimirum sub umbratili scientiæ melle verum fel opinionis merito bibat.

*Nunquam aduersa reuera patimur, nisi cum patimur & peruersè.*

### MARSILIVS FICINVS

Ioanni Caualcanti amico vnico, S. D.

**N**Arrat nobis iterum dilectus amicus ille noster longo ordine, quot indles patiamur aduersa. Ego verò, utpote qui iamdiu in me ipso sum expertus, nunquam magis aduersa reuera me passum, quam cum paterer & peruersè, scribo ad illum, imò & ad me ipsum Epistolam quandam de facilitate foelicitateque patientiæ. In qua forte legenda opus sit legentis audientisque patientia, lege hanc patienter, optime mi Ioannes, ac si dignam existimas quæ mittatur, ipse mitte.

*Amicitia perfecta verbis literisque non indiget.*

### MARSILIVS FICINVS

Francisco Cardinali Senensi, S. D.

**Q**Vories venerande pater sumo calamum, quod equidem tento quotidie, quo ad patronum meum aliquid scribam, cuius opera, siue negotio potius, ocium sum adeptus, quo multa quotidie scribam, toties patronus ipse meus, his me gratis ad-

modum clamoribus interpellat; Coram quem quæris adsum, pone igitur, Ficine, calamum. Quid nam vllis opus est literis, ubi veras assidue datur audire ac reddere voces? Illos qui ipsi inter se videntur absentes, aliquando præsentem efficiant. Hos verò contra, qui sibi inuicem adsunt vbique, forsitan abesse monstrarent. Noli igitur hunc abste-fciungere calamo, cui semper te corde coniungis. Quid hic faciam? Nescio mi patrone. Dum ipse quædam erga me contraria facis, ego interim duo vicissim contraria patior. Tu quidem calcari-bus vt curram frequentius vrges, atque vnà fræno cohibes, vt quiescam. Ego verò siue non moueor, ignauus videor & ingratus, siue moueor insolens & ineptus. Verùm dum te meum sic animum distrahente, ego sic mutuo distrahor, hæc interim nescio quomodo, è manibus erumpit Epistola, eo videlicet consilio, non vt tibi quidem loquatur, qui cum ego sine Epistola pro arbitrio loquor, sed populo potius, vt sentiat omnis, quantum in omnibus patronus clientulusque consentiant. Commendauisset tibi modo Caualcantem nostrum Epistola velut absentem, nisi cum primum ipsa te salutauit, te coram Ioannem tuum vidisset astantem.

*Merito inuitus omni caret bono, qui sponte caret Deo, qui est omne bonum.*

## MARSILIVS FICINVS

Leoni Michaëli Peripaterico  
Veneto, S. D.

**S**I quis nostrum tanto ardore ipsum amaret bonum, quod est omne bonum, quanto quotidie omnes bona hæc amamus, & illa quæ absque ipso bono non sunt bona, certe tantum saltem boni semper gaudique sentiret, quantum mali nunc omnes assidue dolorisque sentimus. Imò verò illius gaudium tanto ferme, & verò hoc dolore nostro vehementius, & falsa voluptate suauius effert, quanto substantia boni ipsius & potentior est quam malum, & verior quam bonitatis imago, atque etiam pura mens perspicacior quam impura. Nunc verò quid mirum? si omnia nos mala sequuntur, dum ipsi relicto primo bono, id est, Deo, male singula sequimur tanquam bona, quæ omnia sine primo sunt mala. Merito toties inuiti in omne malum incidimus, quoties sponte ab eo cadimus quod est omne bonum. Quid nam huc & illuc tamdiu dementes & infelices erramus? Profecto dum solum singula sequimur, in-

terim vnum ipsum fugimus, quod est cuncta. Qui autem ipsum dumtaxat sequitur vnum, in eo mox cuncta consequitur. Potest nimirum mens omnia consequi, quæ solum pendet ex illo qui est super omnia. Hinc certè homo animalium solus accepit, vt quicquid vult assequi valeat, modo in eo ipso quod vult, velit insuper agere quicquid valet. Probo igitur te magnanime Leo, quod non turberis vltèrius circa plurima, sed quemadmodum restatur Carolus Valgulius, testis apud nos locupletissimus, optimam iamdiu partem illam elegeris, quæ quoniam non solum à toto suo effluit fonte, verumetiam refluit in eundem, idcirco totam gustantibus implet sitim, arque ab ea mente quæ gustauit, semel nunquam auferetur.

*Cum Deus sit ipse amor, quicumque absque Deo aliquid studet amare, hic absque amore tentat amare.*

## MARSILIVS FICINVS

Locterio Neronio, S. D.

**S**Cripti, optime mi Locteri, præterita sætate Epistolam quandam ad amicos meos de amicitia vera, quæ forsitan frustra ad veros amicos mihi scripta fuisset nisi legeretur ab illis, qui in eo ipso sunt nobis amici, sine cuius calore nullus amare quicquam potest, sine cuius splendore nil potest amari, sine cuius amore quicquid amare videmur, quoniam extra amorem ipsum affectamus amare, odisse potius cogimur quam diligere. Sine cuius amicitia, tanta magis quælibet inimica sunt nobis, quanto magis videntur amica. O mirabilem bonitatis ipsius & pulchritudinis amorisque copulam. Vbi enim bonorum lucet bonitas, ibi splendet pulchritudo pulchritudinis, ibidem flagrat & amor amorum. Siquidem ipsam boni lucem pulchritudo sequitur tanquam splendor, pulchritudinis autem radios amatorius sequitur ardor, tanquam reflexio radiorum.

*Solus feliciter dominatur qui volentibus dominatur.*

## MARSILIVS FICINVS

Francisco Cardinali Senensi, S. P. D.

**D**ic amabo quibus potissimum in præsentia verbis te inuocem, benignissime mi patrone. Magna quidem isthæc in qua constitutus es dignitas postulare videtur, vt (reuerende in Christo pater) exor-

diat, sed longè maior clementia tua & maxima quædam humanitas allicit, ut sic ferme familiaris inuocem. Saluè amice dulcissime. Ac ne proprium patroni nomen clientis ori dulcissimum fuerit prætermisum, saluè iterum mi Franciscæ suauitate suauior. Quando eiusmodi tunc ambiguitate laboro, quid faciam? Profecto ubi dignitatis gradus superat humanitatis affectum, dignis quibusdam superbisque titulis profari solemus, ubi verò singularis potentiam dignitatis excedit, humanis familiaribusque nominibus exordiri debemus. Ipsi præsertim qui apud te non hospites sumus & aduenæ, sed tua potius benignitate domesticæ. Solent, amice dulcissime, tunc maxime dolere clientes, quando patroni nihil daturi videntur, ego contra hoc ipso summo opere gaudeo, quod patronus meus nihil mihi sit daturus ulterius, quippe cum nihil sibi reliquerit sui, sed iamdiu seipsum nobis secumque sua omnia dederit. Viue foeliciter, amabilissime mi patrone. Non possunt amicitui non foeliciter viuere, te viuentem foeliciter, qui totus viuus amicis. Cui familiares omnes ob hoc ipsum arctissime seruiunt. Nulla seruitus vel arctior vel iucundior quam voluntaria, nulla dominatio tutior & facilior quam amatoria.

*Egregios grex improbat, Deus probat, apud quem gratitudo est & libertas.*

MARSILIUS FICINVS  
Ioanni Caualcanti Amico  
vnico, S. D.

**A**ccipe Ioannes duarum exemplaria Epistolarum, quas in amici nostri causa hac aurora excogitauit, & hodie ad sacerdotes illos dedi, quos nosti. Nescio qua fortuna, atque id quidem non est mihi curæ. Utinam saltem scirem qua Musa. Non sum mercenarius. Scio mercenarij fructum esse, bene recipere, liberalis verò artis finem, bene fecisse. Quicquid sit, saltem nostrum hunc in memoriam redigam, forsitan præstare dices obliuionem quærere, quam memoriam, & latere bene, quam male patere. Sed illius obliuiscantur cæteri, si quos delectat obliuio. Ille autem nequit obliuisci suorum. Compertum habemus, nullam vnquam magnum virum suis fuisse cognitum. Quid mirum? Sane egregij gregi non congruunt. Contrariis contraria non amantur. Lior venerationis occupat locum. Caligant nimio splendore debiles oculi. Non capiunt grandia, qui paruis implentur. Sed hoc vnum mecum forte dole-

bis, mi Ioannes, quod forsitan non tam quia maximus sit ille noster, quam quia minimus censeatur, patriæ est ignotus. Ne doleamus, amice, dum modo & ille nobis & nos placeamus illi, qui minima æquè discernit ut maxima, maxima æquè capit ut minima. Non erit minimus quisuis ab eo probabitur, cui præ magnitudine sua, maxima quæcunque infinitè minus sunt quam minima. Nusquam obscurus erit, quisquis in eo lucebit, qui lucet in omnibus, in quo lucent omnia. Nihil autem facilius est quam placere illi, cui quidem placere nihil est aliud quam velle placere. Ergo vides, quod mirabile est, minima quæque bona multo chariora esse quam infinitum bonum, hæc siquidem non nisi magno cum labore ac pretio comparantur. Illud autem si emitur, emitur voluntate. Sed cur istud amice? Forte quia exuberat immensum, & quia illius pretium est in illo. Cætera quidem nos emimus, illud verò reuera vitro nos emit, emit, inquam, nos & voluntatis bonitate sua, & bonitatis voluntate nostra. Igitur cum id bonitate agatur vtrunque, atque ipsa bonitas ipse sit Deus, pretium est vtrobique. Nec vnquam liberi sumus omnino, nisi postquam infinitæ libertati nos libere vendiderimus. Cum primum eius sumus qui sui ipsius est solus, tunc solum sumus & nostri. Filii nusquam magis quam in paternis laribus liberi imperiosique sunt. Parentes nulli libentius quam filius obsequuntur. Sed ne longius digredi cuipiam videar, vnde cœperam, finem in eo faciam, ad quem digredi, nihil aliud est quam regredi.

*Quod Philosophia non docet, imò vetat cum principibus viuere & conuersari.*

MARSILIUS FICINVS  
Ioanni Caualcanti amico  
vnico, S. D.

**I**n eo libro quem hoc anno ad Bernardū Bembum Venetorum oratorem de laudibus Philosophiæ composui, rationibus multis afferre conatus sum, Philosophiam cuncta docere. Vnum hoc excipere debui quod non docet nos vitam cum principibus agere. Nam si id vetat omnino, ut certe vetat, nullo modo docet. Vetat autem penitus ut mihi videtur, quandoquidem contraria iubet, nempe inueniendo veritatis amore tranquillitatem animi & libertatem vitæ desiderat. Apud principes autem non veritas habitat, sed mendacia, simulationes, dissimulationes, obrectationes, adulationes. Non tranquillitas animi, sed cura,



sollicitudo, inuidia, & omnis denique perturbatio. Non libertas omni charior auro, imò tam misera seruitus, ut neque subditis parcat unquam nec principibus, eiusque finis sit vel seruitus vel ruina. Neque obiciat mihi quispiam Cirenaicum Aristippum, non Philosophum, sed Phidolosum & Philomatium, tam belle aliquando cum Dionysio Syracusanorum tyranno versatum, nam hic Philosophiam, si unquam antea sub Socrate indutus fuerat, tunc primum exiit cum induit Dionysium. Quem tamen induisse quandoque poenituit. Expertus est enim Dionysij quidem capiti gladium, Aristippi verò ceruici & gladium eundem & Dionysium imminere. Multo hac in re vel prudentiores vel certè foeliciores, Democritus, Heraclitus, Socrates, Antisthenes, Diogenes, Crates, Xenocrates, Apollonius Theaneus, Plotinus, alique per multi, qui liberam & ditissimam paupertatem seruilibus pauperrimisque regum diuitiis, atque dulcissimam sobrietatem amarissimis tyrannorum deliciis longè præposuerunt. Operæpretium est magnos illos considerare Philosophos, quorum memoriam veneramur, qui multo foelicius quam homines alij cum principibus regibusque vixissent, si modo id homines posset Philosophiam docere. Mitto, quod suum Ciceronem Philosophum non ignobilem adolescens Octavianus beneficiorum ingratus, non magnâ causâ inductus, hosti nefario tradidit occidendum. Nero absque causâ præceptorem suum Senecam Philosophum sanctum morte damnauit. Rex Macedonum Alexander Philosophum Calisthenem magistrum eius ob hoc dumtaxat obiecisse dicitur leonibus laniandum, quod ab eo disputando superaretur. At quis non valde miretur deos illos Philosophorum Platonem nostrum & Aristotelem viros omnium grauissimos, qui cætera omnia nouerant, quæ sunt, quæ fuerant, quæ mox ventura trahantur, tam infœliciter, ne dixerim imprudenter, tyrannis vfos fuisse, ut minimam ob causam in summum capitis discrimen adducti sapius fuerint? Vtpote qui cum induebant principem, Philosophum non exuebant. Quem forte exuere apud Persarum regem Cyrum Socraticus coactus est Xenophon. O nimium miserabilem apud potentes sortem Philosophorum! Diuinus Plato bis venundatus est, prohi dolor! Ter subiit mortis periculum sub Dionysio maiore atque minore, tum libri cuiusdam Theologici, quasi ex mente Platonis à Dionysio scripti, & à Platone quodammodo retractati, tum vel maximè quod cos-

dem tanquam magister instrueret, quotidie ad iustiorē gubernationem adhortaretur. Alexander Macedo magnum illum sapientia virum Aristotelem magistrum pædagogumque suum ignominiosè nimium expulit, deinde etiam crudeliter effinsecutus, siue Calisthenis Aristotelici causa, siue quod Aristoteles arcana naturæ prius Alexandro tradita post in vulgus ediderit. Leuissima causa cœlestem Pythagoram sese doctorem optimatibus immiscentem in Crotoniensi Republica imò tyrannide perdidit. Xenonem Eleatem Metaphysicum singularem leuis causa perdidit sub Hierone, sub Nicocreonte similiter Anaxarchum. Ac ne me à Philosophis in præsentia transferam ad Poëtās, mittam iniustum Ouidij exilium, mittam quod Musici certaminis causa Nero suum Lucarum diu quidem odio habuit & denique interfecit. Mittam quod Domitianus, nescio qua ambituuncula impulsus, in suo illo muscarum ludo, familiarem eius Statium interemit. Sed, ut orationem meam cum Philosophis iam concludam, nemo vsque adeò sit humanæ facultatis ignarus, ut confidat se posse rite libereque philosophari ac simul secure tutoque vitam apud principes agere.

*Solus in amando laudandoque, nunquam fallitur cui amandi laud indique lex  
Deus est.*

MARSILIUS FICINVS  
Georgio Cyprio legitimo Medico, S. D.

**Q**uam seruit turpissimè? Qui seruo seruit. Quis miserrime? Cui merces seruitutis est poena. Igitur turpissimus & miserrimus est qui seruit corpori. Rursus qualis qui seruit vulgi rumoribus? Varius, inquietus, infortunatus. At qualis qui sese his mancipat qui vulgo videntur egregij? Parum prudens. Quippe diligendi sunt homines, non adorandi. Sed diuturno ac saltem trilucri examine iudicandi & diligentissime deligendi antequam diligas, alioquin & amor iudicium fallit, & euentus frustratur amorem. Laudandi autem paucissimi, & hi quidem iam prorsus adulti, atque iamdiu prouecti, & ij rursus moderatissime. Alioquin laudando vituperamur ac sæpe poenitet laudauisse. Solus nunquam fallitur cui & amandi & laudandi lex Deus est. Ut solum Deum suipsius gratia veneretur, homines amet in Deo, in hominibus laudet Deum. Quorsum hæc? Nempe cum  
viro

viro præceptis moralibus instituto depræcipuis morum institutionibus differuerim. Vale.

*Fides gignit spem, spes charitatem, charitatis ardor offert intelligentia claritatem.*

MARSILIVS FICINVS

D. Bernardo Bembo Patritio Veneto  
iuriconsulto & equiti clarissimo, S. D.

**P**Aulus Apostolus diuinæ sapientiæ vas electissimum, cum in cælum tertium raperetur, vnde terrenorum mentibus cœlestis amor accenditur, solem inde illum inuisibilem subito vidit, cuius splendorem nemo prius suspicere potest quam per eius flammam diuino quodam accendatur amore. Solus autem eiusmodi flammis prorsus accenditur, qui & radiis eius omnia illustrantibus veram semper adhibet fidem, & in eiusdem calore benignissimè cuncta fouente spem omnem firmissimè collocat. Cum verò quantum luminis ex eo mihi sole nuper illuxerit haud satis intelligerem, Bernarde clarissime, iudicem ad hoc Ioannem adhibui Caualcantem, verum quoniam & hic similiter vnà mecum caligare videtur, idcirco eadem ambo sententia Bernardum Bembum nostrum linceis præditum oculis hac re iudicem constituimus.

*Amore humano nihil infirmius, diuino nihil firmissimum.*

MARSILIVS FICINVS

Hieronymo Amatio, S. D.

**Q**Uam diuersa est amoris ratio atque aliorum pene omnium, amantissime mi Amati. Cætera siquidem quanto maiora sunt, tanto etiam firmiora censentur, amor autem & gratia contra, quo apparet ingentior, eo videtur infirmior. Crebrioribus enim sæpe leuioribusque causis ingens amor quam mediocris offenditur. Aut effectus ipsius ardor igneam incitat bilem, quæ paruo quodam afflatu nonnunquam magno irarum fluctuat æstu, aut cogitatio fixa bilem procreat atram, omnia tuta timentem. Aut certe auaritia eius qui totum alteri dedisse se putat, ideoque totum vicissim exigit ab amato, nunquam habet omnino, tota quod mente petebat. Sed aduersa hæc merito patitur peruersæ mentis affectus, vel mollis penitus vel mercenarius, qui cum terreno solum vento pascatur quando adolescere videtur maximè, tunc tumescit potius

quam adolescat, ideo quo apparet grandior, eo reuera est imbecillior. Humanus ergo, res est solliciti plena timoris amor. Diuina verò charitas virtutum flammis accensa radiisque cœlestibus, cuncta sublimia repetit culmina cœli. Vbi nulla sollicitat vnquam terrenorum formido malorum. Talis est mutuus amor noster amati. Ergo quam certus es amoris erga me tui, tam certus esto prorsus amoris erga te mei. Absit à nobis, vt pectus humanum humano pectori non respondeat sæpe vocanti, quandoquidem & fides fidibus similiter temperatis respondere videtur, & cithara consonas citharæ sonante altera reboat, & certus aliquando parens vocitantibus resonat Echo.

*Nemo vere seruit nisi qui seruit volens, nemo dominatur verè nisi qui volentibus dominatur.*

MARSILIVS FICINVS

Raphaëli Riario Cardinali sancti Georgij suppliciter se commendat.

**P**OSTquam à vobis heri discessimus, non potui me continere quin tuam consuetudinem Ambrosia, (vt dicam,) & neotatè dulciorem domesticis tuis vehementius inuiderem. Ergo ne inuidia peream, redeo celer ad illos hodie, quibus datum est epulis, (si dicere fas est,) accumbere diuum. Ac ne vltèrius istinc cogar abire, rursusque liuore torqueri, eo nunc ad vos duce reuertor, qui nunquam abs te longe discedit, à quo nunquam ipse discedo, qui mihi imperat, tibi parer. Quisnam iste est? inquires. Quis hic sit paulo post, (si volueris,) audies. Hesterni quidem itineris dux mihi fuit pulcherrima Venus in Tauro, comitante Luna, plagam cœli mediam obtinens. Quod Petrus Leo physicus & Mathematicus optimus tibi, (vt arbitror,) confirmabit. Hodierni verò nobis itineris dux erit Veneris natus ille cœlestis gratissimus amor. Igitur amatorio quodam, (si vis,) affectu amatorem tuum Marsilium excipe. Quandoquidem mira quadam benignitate naturæ amas, (vt audio,) etiam non amantes. Vide venerande pater quanta libertate siue potius licentia tecum agam. Amatorem modo appellavi me tuum, fortè seruum potius dicere debuissim. Hei mihi erravi. Verum tu ipse in causa es, mi domine nam talem vbique te singulis præstas, vt qui libertate fiduciaq; maxima non vtitur tecum proculdubio seruilissimus diffidentissimusque omnium videatur.

Fortè etiam nō erravi. Satis enim me servum sum confessus, vbi me professus sum amatorem. Nemo verè servit, nisi qui servit volens. Nemo dominatur verè, nisi qui volentibus dominatur. O quam mirabile est Veneris & amoris imperium! Siquidem, (vt tradunt Poëtæ,) neque Mars Venerem ferocissimus, nèque omnipotens domat Iupiter ipse Cupidinem. Sed omnia prorsus apud poëtās numina amoris ipsius vel flammis vruntur, vel saltem radiis micant & splendore resurgent.

*Veritas de institutione Principis*

*Ad Raphaelem Riarium Cardinalem.*

**N**Vlla te precor, Felix Antistes, admiratio teneat, quod hominis nullius nomen tanquam authoris huic epistolæ legas inscriptum. Quid mirum? non enim humanus affectus, imò veritas ipsa tecum in præsentia loquitur. Veritas nunc ad te non solum inermis, verum etiam nuda, (vt vides,) incedit, non argumentationum argutis aculeisque munita, non elegantium verborum ornamentis induta, sic enim se esse potentissimam omnium atque pulcherrimam scit: quemadmodum quicquid luci accedit extrinsecus, non lucem illuminat, sed obfuscatur, sic veritatem ipsam alienis additamentis debilitari (vt ita loquar,) & deformari. Hæc te in præsentia verbis plurimis obsecraret, vt eam mente benigna parumper audires pro tua causa declamantem, nisi tesciret, hanc ipsam semper audire libenter, præter quam quicquid auditur, male infelicitèq; auditur. Veritas. Cardinali Riario dilectissimo filio Salutem plurimam dicit, & verissimā pollicetur. Falso me Philosophi Sceptici alique permulti calumniantur, quod tanquam rerum omnium obscurissima nusquam pateam. Longè se res aliter habet, quid enim lucidius mea luce, per quam Sol ipse mundusque lucet? quid rursus latius potest clariùsque patere quam veritas? Per quam solam patent quotcunque vsquam patent. Extra quam quæcunque patere dicuntur, nihil aliud sunt quam tenebræ, quibus omnia latent. Non igitur avara sum vllò pacto, non inuida, passim cunctis vltro libentissimeque occurro. Verum multi nubila mente me prensant, quæ sola capior mente serena. Plurimi putant me alta Principum palatia colere, ego contra, sæpius cogor tuguria petere, atque humiles habitare casas. Sane non obstant hic tecta mihi plena spiraculorum, non obstant parietes rimarum vndique pleni, aperta hic ostia mihi, me excipit vacua

domus. Contra verò solidis ditissimam ædium tectis parietibusque repellor, ac si quando mihi hæ patent fores, occurrit repente innumerabilium turba mendaciorum. Ego autem inter hostes non censeo permanendum, igitur subito inde fugam arripens, domum ipsam auri quidem falsique plenam, veritatis autem inopem vacuumque relinquo. Sed venio ad te felix Antistes hodie, tecum libenter, si modo volueris, semper habitatura. Properavi equidem in ipso tuæ dignitatis initio, antequam hostes mei, id est pestifera adulatorum obtrectatorumque mendacia tuos lares obsideant.

Principio tam excelsum dignitatis gradum, neque meritis tuis attribuas, quæ in tam paucis ætatis tenerioris annis, tam multa (vt verum fatear,) non potuerunt. Neque rursus fortunæ sortique ascribas, sacra enim mysteria ordineque diuini, non à temeritate fortunæ, sed ab æterna sapientia Dei proficiscuntur. Diuina igitur providentia statuit, perfectum quendam gregis Christiani pastorem sæculis nostris ab ipso, (vt aiunt nido,) assidue proprio fouere sinu, & sacra solum alimonia educare. Atque antequam puerilibus ludis irretiat, rebusque vel prauis applicet animum, virilibus imbuere moribus, ac maximis optimisque officiis erudire. Deus igitur (sicut audisti) Deus ipse te nuper nouum hominem genuit, tu quoque vicissim terra dimissa coelestem genitorem tuum coelestibus amplectere moribus omnia complectentem. Tamdiu (mihi crede) stabis, quamdiu illi qui non mouetur hærebis. Noli altitudinis magnitudinisque humanæ viribus vllò pacto confidere, altissima quæque ventis atque fulguribus sæpius quatiuntur, molesque ingentes casu concidunt grauiore, difficiliusque resurgunt. Surge age in eum qui cadere nequit, nec ipse decides vnquam. Tunc enim homines ipsi se deserunt infelicitè, quando ipsum, sine quo esse nullo modo possunt, stultissime & ingratiſſimè deserunt. Heu quisquis tutorum eiusmodi relinquere tentat, haudquaquam relinquit omnino, simul enim in eundem recidit, sed vltorem. quicunque patrem benigne lucentem, impie negligit, interim eundem tanquam iudicem experitur vrentem. Proinde scis legitimos Cardinales nihil aliud esse quam quosdam Christianæ ecclesiæ cardines Apostolorumque vicarios, atque idcirco debere non proprio vel sui ipsius vel alterius commodo, sed communi Ecclesiæ bono consulere.

Præterea nihil agere vel cogitare, vel loqui quod non sit sanctitate Apostolica dignum. Qui verò contra faciunt, neque Cardinales imò sacrilegos esse, neque Apostolorum vicarios, sed inimicos. Dicam ne? & hoc insuper vnum multorum venia dicam ne? Dicam certe etiam absque venia, nam cui licebit vnquam dicere verum, si non licuerit veritati? Scito etiam nihil fermè à viris Apostolicis alienius esse debere quam fastum, pompam atque luxuriam. Quantum Gaudes seruis extrinsecis dominari, tantum da operam vt & diuinis legibus seruias, & seruis intrinsecis, id est, sensibus domineris. Memento seruos tuos homines esse, tibi que æquales origine, neque metu aliquo sed amore humanum genus natura liberum vel debere vel posse ligari. Quantum potentes penè omnes delectantur rebus singulis ordine quodam domi dispositis & ornatis, tantum ipse mente composita decorisque verbis & moribus delectabere. Musica tua erit affectuum animi & actionum omnium temperatio, ne cui consonant extrinsecus omnia, solus dissonet animus. Ludus quoque, scriptorum electissimorum lectio frequēs. Ne fortè in summis opibus solus esse inops animus videatur. Venatores aucupesque tui sint viri quidam penes te probatissimi atque doctissimi, qui prudentia, humanitate mirifica omnium tibi gratiam & beneuolentiam comparent. Sola humanitas esca est, qua homines capiuntur, sola hominum gratiæ prosperæ res humanæ geruntur. Nihil periculosius est in principe, quam si quamplurimi eum contemnant, vel oderint vel nimis inuideant. Contemptus quidem scientia, grauitate, integritate vitatur. Odium verò, innocentia & humanitate lenitur. Inuidia denique, munificentia, liberalitate, magnificentiaque sedatur.

Cū omnes homines & specie sint æquales & arbitrio liberi, iniquissimo nimirū animo seruitutem ferunt, nisi fortè qui dominantur, quantum inferiores excedunt sublimitate, tantum eisdem æquantur humilitate, ac longe magis sapientia quam fortuna excellere videantur. Natura membris capite inferioribus solam dedit tangendi potentiam, solum verò caput omnium sensuum viribus exornauit. Qua quidem in re homines admonuisse videtur, illos qui cæteris tanquam caput præesse conantur, tantum sapientia reliquos superare debere, quantum caput ipsum sensu membra omnia superat. Nullus omnino vir magnus confidere debet, mores

suos posse latere. Maxima enim quæque maximè patent, & quibus inuident omnes & minimè ignoscunt & maximè detrahunt. Videat princeps, quandoquidem ipse difficillimè alios latere potest, nequid ipsum domi forisue lateat, imprimis ipse sit Argus, deinde lyncem quendam penes se nutriet, ac, (si fieri potest,) Oedippo quoque non careat. Periculosum admodum est in magnis contemnere parua, parua sæpe scintilla contempta maximum incendium excitat. Neque decens, neque tutum est, vel hunc omnino se dedere somno, cui pro multis sit vigilandum, cui rursus plures inuigilent, vel multorum hominum caput bestię mancipari, id est, ventri libidinique seruire. Optimum tutissimumque est, irasci nunquam, quid enim aliud est ira feruere, quam ebrium insanumque euadere? Vbi vero ira frenum excusserit, interea donec iracundia referuescat, fræno cohibenda est lingua. Ac velut infans fieri solet, manus pedesque ligandi, nequid in ipso furore aut dicatur prorsus, aut agatur. Nullum in Pythagora iracundiæ signum discipuli vnquam deprehendere potuerunt. Non aliud irati Socratis argumentum familiares eius habebant, nisi silentium. Plato Philosophorum pater aliquando delinquenti puero subiratus, inquit Xenocrati, puerum hunc ipse cedito, ego enim dum iratus sum nequeo. Sit tibi animus humilis pariter & excelsus. grauitas comitate permixta, vita sobria, lingua veridica, sed parcissima, Largissima manus, promissio non temeraria, firma fides, obseruatio plena, diuturnum consilium, prudentum sententia diligenter examinatum. Ne multi quotidie te facile fallant, neque multis ipse neque facile credas. Non persuasio blanda vel leuis quælibet coniectura, sed ratio duntaxat certa te moueat. Neque aggrediare principium nisi finem ipsum, tam optimum quam certum ante prospexeris. Malos & infames deuita ministros, ne malus ipse Dominus habearis. Sed cur illud modo quod maximi momenti est, tam celeriter & quasi conniuentibus oculis pertransiuimus? Amorem Poëtæ cæcum ideo pingunt, quoniam amator vbi vel de se ipso, vel de amata re iudicat, sapissimè fallitur. Cum vero neminem vehementius, quam seipsos homines ament, certè à nullo magis quam à seipsis decipiuntur. Noli igitur tibi quicquam credere, noli rursus uiuico te totum cōmittere consultori, sed plures habeto, atque illos quidē admodum seniores, quos experientia rerum diuturnæ

docuerit, quorum mores tibi tanquam optimos constantissima commendet, ac res ipsa manifestissime probet. Quoties vnà cum senioribus tuis de te grauiore deliberas, caue tuam intelligant voluntatem, ne fortè cupiditatem tuam potius quam vtilitatem & dignitatem cōsulendo sequantur.

Omnino autem quotidie tuis edicto, tantum tibi veritatis donum, (vndecunque offeratur,) fore iucundum, quantum solent tyrannis auaris preciosissima quaecunque munera grata contingere. Aperi precor monentibus aures, ne cor ipsum fortunæ telis aperire cogaris. Obstrue omnino aures laudatoribus, quasi maleficis cantibus Syrenarum. Memento te hominem esse, ideoque nonnulla in te, quæ redargui possint, semper habere. Quamobrem quicumque domesticorum sine vlla exceptione te laudant, eos vel cæcos esse, vel tales qui velint esse te cæcum. Si leges eos tanquam veneficos seuerissime puniunt, qui vel oculis oculos fascinant, vel carminibus quibusdam captant aures, corpusque inficiunt, quidnam in illos agendum esse censemus qui assentando blandiendoque mentis oculos obcæcant, auresque præripiunt: Ergo si videre, si audire, si viuere vis, adulatōres omnes voluptatumque ministros velut hostes longius amoue. De his autem qui interdum nonnullos apud te erimantur, quid dicemus? Hi forsā aliquando parumper audiendi videntur, nunquam tamen exaudiendi. Si quando abs te audiuntur, te cautum reddant, potius quam vltorem. Hoc solo vltionis genere contentus esto, si vlisci posse monstraues. Detractores verò, maledicos, inuidos, non aliter quam canes rabie percitos, à liminibus suis procul expellito.

Domus denique tua sit Dei templum, prudentiæ oculus, libra iustitiæ, fortitudinis sedes, regula temperantiæ, honestatis exemplar, charitatis splendor, fons gratiarum, Musarum chorus, oratorum Poëtarumque gymnasium, Philosophorum Theologorumque sacrarium, prudentum senatus, ingeniorum fomentum, præmium literatorum, pauperum mensa, bonorum spes, refugium innocentum, prædium miserorum. Si hæc cæteraque eiusmodi pro viribus obseruaueris, tandem vocem illam felicissimam audies: Super hanc petram fundabo ecclesiam meam.

Commendo tibi Marsilium Ficinum Florentinum, cuius ore tibi superiora narraui.

*Tunc solum viro dignitatem nactō congratulari debemus, cum dignitate dignus appareat.*

MARSILIUS FICINVS  
Cardinali Riario suppliciter se commendat.

Nisi veritas ipsa tibi diebus superiori-  
bus præcepisset, vt aures obstrueres laudatoribus, miris nunc laudibus literas tuas prosequerer. Quæ quidem, prohi Deus omnipotens, quantum? Sed ecce me cantilenam modo laudatoriam, (vt ita dixerim) inceprantem, quamuis non redarguat veritas, tamen, (vt audio,) Riarius modestissimus interpellat. Non vis coram laudari, venerande pater, Esto sane, verum permitte saltem vt hoc ipsum quod ita laudari inhibeas, pro arbitrio laudem. An fortè vetas & istud? Ne acrior gloriæ stimulus qui te à fronte non pupugit, à tergo te feriat. Obtemperabo equidem domino. Sed tantulum mihi dabis interea, vt si tibi minus, saltem tum ipsi gratuler dignitati, quod cum virum tandem ornare statuerit, à quo ipsa ornari iam pene similiter videatur, tum fortunæ gaudē meæ, quod cum sim veritatis amator, eum nuper patronum nactus fuerim, cuius patrona est ipsa veritas, ipsius quoque veritatis felicitati congratulabor, quæ cum intermis & nuda prodierit, non hostes reperit, sed amicos. Hæc tamen, venerande pater, his me diebus sæpe iam corripit, non quia inermem miserim, sed incultam. Quis eam neget incultam nostris exisse liminibus? Quam haudquaquam comitata est ipsa religio, quæ cultum omnem continet veritatis. Ergo ne vltius de me aut mecum, aut apud te veritas conquatur, religionem insuper eius pedissequam ad te mitto, sed inermem similiter atque nudam. Non tamen opinor aut veritatem, aut comitem illius religionem incultam vilo pacto fore penes Cardinalem nostrum sedulum vtriusque cultorem.

*Veritas virum reddit dignitate dignum.*

MARSILIUS FICINVS  
Francisco Soderino Iurisciuiis peritissimo, S. D.

Veritas ipsa, Soderine dulcissime, nostris precibus exorata, superioribus diebus Cardinalem nostrum Riariū salutauit. Non tamen videtur hæc precibus meis ad votum satisfecisse, nisi Soderinum



quoque amicum verissimum salutaverit. Errat autem si quis putat veritatem hanc ad te posterius accessisse, nempe quæ Riarium adit post dignitatem, eadem ad te ante dignitatem eo consilio proficiscitur, ut, vel reddat vel saltem declaret iam ipsa dignitate te dignum.

*Omne tulit punctum qui miscuit utile dulci.*

MARSILIVS FICINVS  
Bernardo Bembo Veneto, S. D.

**D**Vm mei literas Æneæ considero, clarissime Bembe, videor mihi matrem illius Venerem suscipere Iqui coniunctam. Siquidem noster Æneas modo iura cum Ioue grauius dicit, modo cum Venere amatoria concinit. Vbiq; verò luculentus apparet, vbiq; benignus occurrit. Si fortè quæsiueris, quodnam leuibus animis cum grauib; sit commercium? natura ipsa rerum protinus respondebit. Sub coelo quidem elementa leuia grauib; commiscere, floresq; & folia pomis. In cœlo autem tardis velocia, fixa mobilibus temperari. Summa quoque tū Mercurio cum Saturno, tū Veneri cum Ioue qualitatū inesse concordiam. Igitur omne tulit punctum, qui miscuit vtile dulci. Vale feliciter mi dulcis vtilisque Ænea.

*Malo meis literis mente responderi  
quam manu.*

MARSILIVS FICINVS  
Ioanni petro Apollinari Peripatetico  
singulari, S. D.

**V**trum causa eadem contrarios circa subiectum idem effectus queat efficere, ingens est apud Philosophos controuersia. Hanc nuper litem noster nobis diremit Amatus, atque id effici posse, nō verbis, ut dialectici solent, sed re ipsa monstrauit. Siquidem in contrarios nos eodē tempore affectus induxit. Laudat hic mirificē Ioannempetrum Philosophum singularem, & amat ardentem. Ego autem dum ita laudantem audio, ad scribendum aliquid prorsus impellor, dum video ardentem amantem. Amatū Philosophum in amante, nobis agnosco præsentem, ideoque reuocor à scribendo, existimans præsentem amicum Epistolis non egere. Quid igitur faciam? Scribam ne? Scribam certè, ut ego quoque in diuersos te affectus quodammodo distraham, ut videlicet non respondeas simul atque respondeas. Ego vir egregie quam tepide scribo,

crede mihi tam ardentem amo. Ergo mihi inepte scribenti responde, calamo nihil, sed apte amanti, responde precor amore. Ac si nos amas, cura valetudinem tuam diligentissimè. Non enim potest his Philosophia temporibus, nisi ipse valeas, bene valere.

*Maiorem charitatem nemo habet quam ut animam suam ponat quis pro amicis suis.*

MARSILIVS FICINVS  
Laurentio Medici viro Magnanimo, S. D.

**S**alue magnanime Medices noster optime medice. Verè cœlestis medici solus officio fungeris, ille siquidem æternum filium è cœlo dimisit in terras, morborum medicum humanorum. Tu quoque charissimum ad nos filium heri ultro misisti, qui ægris admodum animis mederetur. Ille pro humani generis salute filio non pepercit, ipse etiam pro consolatione nostra non pepercisti filio. Non enim te vulgata hæc epidemiæ suspicio tenuit, quominus mærentes amicos ingenui filij præsentia consolares, ut diuinum præceptum illud prorsus impleres: Maiorem charitatem nemo habet, quam ut animam suam ponat quis pro amicis suis. Laurenti dum vndique salutis nostræ adeò prospicis, nostra omnia trahis ad te ipsum, ut in te potius quam in nobis iam viuamus. Quo fit ut si vices tibi rependere non possemus, poneremus vtiq; & nos nostras pro te animas, si haberemus, ipse has Medices habes. Has igitur vbicunq; placuerit ipse pone. Vale feliciter vnice patrone hætenus, nunc vnice pater.

*Felix est qui habet omnia quæ vult, habet autem omnia quæ vult, qui omnia vult quæ habet.*

MARSILIVS FICINVS  
Francisco Saxetto felicitatem dicit.

**S**olum Saxette felicem sapientes existimant, cui ad votum cuncta succedunt. Soli ad votum cuncta succedunt, qui omnia quæ vult habet qui omnia vult quæ habet. Ille singula vult quæ habet, id est, quæcunq; velle natura vel sorte contingunt, qui primum quidem intelligit, nolum se bonum nolle deberet. Deinde iudicat, illum qui ab initio cuncta facit bona, quotidie singula bene vbique disponere. Postremò ut nemo sibi dissentiat vsquam, ipse cum omnium auctore consentit. Solum ergo felicem existimamus

qui cum summa pietate se ipsum Deo gubernatore commiserit, quicquid acciderit, vel tanquam à Deo factum probat, vel saltem laudat tanquam à Deo in bonorum ordinem redigendum. Quæris forsitan, quæ ratione potissimum id ostendam? Vna hæc duntaxat ad præsens, gaudet enim Epistola breuitate. Si vel Solis lumen infinitum esset, vel ignis calor immensus, neque tenebris vsquam pateret locus, neque frigus vllum alicubi sentiretur. Scimus vnum illum vnus mundi rectorem, qui tantam molem tempore tam bene regit & mouet, neque vnquam defatigatur, bonum esse prorsus immensum, si immensum est proculdubio & infinito, (vt ita dixerim,) se spatio propagat, & infinito virtutis gradu omnia superat. Vbi nam igitur malum habitat, si non potest esse cum bono, ac bonum ipsum occupat vniuersum? Non ergo veram alicubi malum, sed imaginariam habet sedem, haudquaquam in ipsa natura, sed in ea potius mente, quæ vsque adeò de diuina bonitate mentitur, vt sub immenso bono posse res aliter putat disponi quam benè. Contra verò nihil contingit illi non bonum, qui nihil existimat esse non bonum. Vt autem ita res existimare possumus, ideoque feliciter viuere, sola nobis potest præstare religio. Præstabit autem id tibi quandoque plus duplo quam cæteris, mi Francisce, si tantum ipse religione alios superabis, quantum hæ tuæ ædes amplissimæ alias superant. Duplo tibi Saxette, religiosior domus est quam cæteris, aliæ certè sacellum vix vnum habent, tua verò gemina & illa quidem speciosissima continet. Viue religiosior duplo quam cæteri, mi Francisce, Vale duplo felicior.

*Prosperis peruersius vitimur quam aduersis.*

MARSILIUS FICINVS

Raphaëli Riario & Francisco Saluiato

Archiepiscopo Pisano, S. D.

**A**Ristoteles scribit in libro de moribus, difficilius esse dolores perpeti, quam à voluptatibus abstinere. Quod quidem forsitan ratione videtur esse probabile, quia dolor in destruenda natura potentior est, quam voluptas in conseruanda vel reparanda. Præterea vir sanæ mentis, (si optio detur,) eligit à voluptatibus abstinere potius, quam pati vel ferre dolores. Verûtamen nescio qua stulta siue potius misera mortalium forte contingat, quod plerique prosperis peruersius quam aduersis vtantur, & qui doloris non cesse-

rant minis, cedant tamen illecebris voluptatum. Mitto nunc Achillem, Hannibalem, M. Anthonium, aliosque permultos, qui borea quidem furente constitierant, blandiente tamen aura conciderunt, cumque emerferint felle profundo, statim paulo submersi sunt melle. Ac siliceret mihi muscas heroibus, more Homero, comparare, adderem muscas acido quidem vino nunquam, dulci verò sæpissime suffocari. At verò quis non valde miretur, si modo considerauerit, quam sapienter Hebræorum sapientissimus Salomon in labore durauerit, quam insipienter libidini succubuerit? Præterea Gentilium fortissimus Hercules quam fortiter summa quæque discrimina superauerit? quam molli ter collum voluptatis iugo subiecerit? Si fortè quæsiueris quam ob causam res prosperæ magis molliunt franguntque animos quam aduersæ, Philosophia sic breuiter respondebit: prosperitas vberiore afflatu animos inflat, rerum copia immoderatos facit & negligentes, licentia reddit deteriores, id est, ad scelera cuncta procliuiores. Profectò appetitus quisque natura bonum eligit atque sequitur, malum verò fugit & fugat. Voluptas quidem boni, dolor contra mali imaginem præ se ferre videtur, igitur vbi voluptas nobis occurrit, non modo non repugnamus, sed vltro velut amicam sequimur, eique cedimus & obsequimur. Atque hoc, (vt est apud Platonem,) velut hamo capti, hostibus, id est, malis deinde, quæ sub voluptate latent, clam necamur. Vbi verò facies tetra se doloris ostendit, tota protinus naturæ vis tanquam contra hostem in nobis armatur, vnde strenue sæpe pugnamus, faciliusque apertum hunc inimicum vincimus, quam proditorem. Quamobrem vt prosperè prosperis rebus vtamur, meminerimus, mali naturam tanquam insidiatricem, quo miseros fallat & perdat, sub prætextu quotidie boni, id est, voluptate, se nobis offerre. Alioquin malum ipsum, præsertim animi vitium, sicubi nondum nobis occurreret, cum vel ipsa turpitudine turpius sit, subito fugeretur, sed voluptas, quæ boni ipsius imago est operum, hospitio facillime à quolibet quasi bonum excipitur, at paulo post hospitem suum merito clam ferro incautum superat. Fugiamus itaque voluptatem, vt dolorem procul effugiamus. Nocet emptæ dolore voluptas.

*Nunquam deest amantibus scribendi materia.*

### MARSILIVS FICINVS

Florentinus Bernardo Bembo Veneto Iurisconsulto & equiti clarissimo, S. D.

**I**amdium perquiro legitimam apud te diuturni huius silentij nostri purgationem, atque idcirco ulterius interim sileo, quia quam maximè afferam silentij causam non inuenio. Scribo tamen in præsentia ob hoc ipsum, optime Bembe, quoniam quod potissimum scribam haud satis inuenio, hoc ipsum videlicet scribens, me nihil habere quod scribam. Quidnam facimus, Bernarde dulcissime? Vides quid mali nobis expectatio faciat? Nempe dum ego tuas propediem expecto literas, tuque meas, neuter nostrum expectatissimas dat, neuter accipit literas. Ergo certemus post hac Epistolis inuicem praeuenire, praesertim cum nobis non sit expectandum, quid musa scripturis dictare voluerit, illis enim Musæ est expectandus afflatus, quibus non afflat amor, quibus autem afflante amore cor assidue flagrat, iis eodem illustrante semper inuentio lucet.

*Præstat dare superflua quam debita denegare.*

### MARSILIVS FICINVS

Pierleone Spoletino conphilosopho suo, S. D.

**E**pistola tua, conphilosophæ noster, mysteria Platonica petit à nobis, simul & Platonica tractat. Tam belle petit, ut nesciam negare petenti, tam bene tractat, ut mittere nequeam. Siquidem nihil habeo prorsus, quod ad eum mittam, qui cuncta iam possidet. Ergo quid faciam? Parcus ne ero tam gratiose poscenti? An potius superuacuis largitor omnia possidenti? At qui malo aliquando dare superflua, quam debita forte negare.

*Gratia naturalis plus persuadet, quam acquisita eloquentia, humanitas plures vincit quam violentia.*

### MARSILIVS FICINVS

Florentinus Marco Aurèlio oratori clarissimo, S. D.

**Q**uemadmodum occidente quidem Sole, mœrere, oriente verò lætari cuncta videntur, sic Bernardo Bembo quondam hinc abeunte populus hic omnis ma-

nifeste condoluit, iam iam redeunte congratulatur. Iuvat hic Senatum Venetum parumper affari. Si quando diuine senatus vel sistere fluuios volueris vel saxa mouere, non Orpheos aduocabis, non Amphiones, imò Bernardum. Non enim minus hic tacendo ob mirabilem quandam gratiam persuadet quam illi canendo. Si longinquas aut rebelles oportuerit subigere nationes, non Cæsares Pompeiosue mites, imò Bernardum. Plures enim faciliusque hic humanitate capit atque amore, quam armis Imperatores. Quorsum ista tecum optime Marce? Ut ipse intelligas familiaribusque significes, quantum apud omnes vestra isthæc probeatur electio, atque Bernardum ipsum, nostrorum praesertim literatorum nomine roges, ut & celer & alacer carpat iter. Meque ipsum veniens feliciter iam mihi restituat, quem discedens facillime rapuit.

*Excusatio de libro Astronomiæ serius reddito.*

### MARSILIVS FICINVS

Anthonio Beniuenio medico legitimo, S. D.

**L**ibrum stellarum, quem iamdiu commodo mihi dedisti, tandem tibi restituo, quod serior ad te redit non in me qui properantior esse soleo, sed in stellas ipsas reice culpam. Omnes enim Anthoni cursum prius suum peragere decreuerunt, quam domum reuerterentur.

*Excusatio diuturni silentij.*

### MARSILIVS FICINVS

Florentinus Raphaëli Riario sancti Georgij Cardinali suppliciter se commendat, S. D.

**A**n putauisses vnquam venerande patet, tam diuturnum inter nos silentium cadere potuisse? At defines id vnum (ut arbitror) forte mirari, si modo communem rerum huius temporis omnium sortem diligenter consideraueris? Prodigiosus nonne vides? Prodigiosus agitur annus. Quotidie tot noua, tam inaudita contingunt, ut sit quotidie verbum eiusmodi repetendum, Non putaram. Verum ut dimissis publicis ad propria veniam. Cupieram equidem iamdiu aliquem nancisci fequique principem, qui mihi placeret omnino, cui æquè & ipse placerem. Nactus sum tandem, æccersitus sum millies, non sum sequutus. Hoc nunquam posse fieri pu-

tauissem, ah quoties ipsam, vt ita dicam, impossibilitatem sum execratus. Tu quidē primo impossibilia iubebas, mi Raphaël, cum me tua sequi vestigia obsecrabas. Non enim priuatæ solum causæ quas adducebam, sed etiam publicæ quædam & potentissimæ quas declarare non poteram, retinebant. Ego autem paucis post discessum tuum diebus & tædio mei affectus & tui desiderio inflammatus, impossibilia similiter exoptabam, me videlicet, non venisse solum sed etiam præuenisse. Atque iterum iisdem miser causis retinebar. Verum quod vel discindere vel dissuere tentauerat sæuitia Martis atque Saturni, interim Veneris Iouisque benignitas refarcire vndique studens, reduxit Florentiam subito archiepiscopum nostrum Amalphiesem, mihi quidem familiarissimum, tibi vero præceteris deditissimum. Qui cum pro arbitrio possem toties de Raphaële meo verba facere, quoties ad id me ardens affectus vrgeret, quem rursus ante haberem tui reciprocum laudatorem, hic præcipuus ægritudinis meæ medicus extitit, hic meum mihi restituit Raphaëlem. Siquidem ubique sunt duo in tuo nomine congregati, ibidem ipse ades. Meministi quam sæpe, quam multum Amalphienensis iudicium apud te probitatemque landauerim. Si quando Amalphiensem ipsa præsentia noueris, affirmabis me verè quidem illum sed parcissime laudauisse. Frater eius Petrus Nicholinus vir egregius, illius causam commendabit. Marsilius tuus si bene quid vnquam apud te meritis esset, ipsum tibi pro cunctis suis meritis commendaret, cum verò nulla sint merita, quod quidem summopere dolet, saltem ob solam tūm benignitatem tuam, tūm virtutem Amalphienensis, ipsius tibi rem iterum iterumque commendat.

*Patientia sine religione haberi non potest.*

MARSILIVS FICINVS

Anthonio Cocchio insigni Iuriconsulto, S. D.

**T**Ria præcipue, vt mihi videtur, patientia præcipit. Primum, vt mala libenter pati velis, quæ ipsa natura iubet vt pati nolis. Secundum, vt ipse tibi voluntaria facias, quæ fatum necessaria fore decreuit. Tertium, vt mala quælibet veritas in bona, quod Dei est solius officium. In primo quidem repugnare naturæ, in secundo verò expugnare fatum, in tertio denique iubet æquare se Deo. Longe faci-

lius olim fuit Herculi Euristhei parere mandatis atque indomita illa monstra domare, quam nobis patientiæ ipsius præceptis obtemperare. Atque id quidem quanta moliamur difficultate, illud potissimum nobis ostendit, quod cæteris in rebus quicquid frequentissime tractamus, optime tandem facillimeque explere solemus. At verò in officiis patientiæ quantum proficiat vulgus, haud facile video. Tota nimirum hominum vita in hac mundi regione maligna, cœlestibusque contraria mentibus, nihil aliud esse videtur quam morbus quidam dolorque perpetuus. Verūtamen cum assidue patiamur mala, ferme continuè male patimur. Atque ad reliqua mala, quæ innumerabilia sunt, impatientia ipsa nobis accedit summa malorum, quæ adeò mala est, vt nihil nobis absque illa sit malum, nihil cum illa sit bonum. Sola enim impatientia facit, vt aduersa quæ ad externa corpusque tantum pertinere possent, in animum quoque petranseant. Facit insuper, vt bonis à natura vel fortuna paratis minime perfruamur, patientia verò & mala bene ferendo transfert in bonum, & bonis vtendo bene felicissime fruitur. Profectò quam male, id est, difficile & infelicitur ferimus mala, cum à bono summo seiungimur, tam bene, id est, facillè feliciterque perferimus, quando bono summo coniungimur. Vbi enim est omne bonum, ibi solum reperitur omnium medicina malorum. Coniungimur autem, quando cum ipsa Dei gubernatoris omnium voluntate libentissime consentimus. Consentimus denique si amamus, imò si in singulis bonis amandis, agnoscamus, nihil reuera aliud nos amare quam summum ipsum diuinumque bonum, vnde & singula hoc ipsum habent vt bona amandaque sint, & nos id ipsum, vt & debeamus amari & amare possimus. Agnoscamus igitur, ô amice, precor, agnoscamus tandem, quandoquidem nihil vsquam, nisi ob ipsam Dei placet imaginem, nihil in his quæ placent aliud nobis placere quam Deum ipsum, ex quo singula hæc id ipsum habent vt placeant, sic vtique in omnibus amandis, Deum à nobis ipsum animaduertemus amari, sic cum ipsius voluntate libenter consentiemus, sic Deo coniuncti, fortunam, naturam, fatum feliciter superabimus. Profectò intelligimus, quemadmodum singula quæ vel calida sunt vel lucida ad summum calorem lucemque refecti coguntur, ita quæcunque partem boni aliquam habent, id est, cuncta in vno mundi ordine bene sapienterque disposita ad

nam summamque bonitatem & sapientiam manifeste reduci, cui cum nihil desit boni, vita prorsus adest æterna, intelligentiam rerum omnium summa, summa quoque benignitas, integra beneficentia, perfecta felicitas. Cumque omnia inde quanto fieri potest melius disponantur, quicquid acciderit in melius semper accipiemus. In hoc vno patientiæ vis tota consistit, ut bene patiamur tanquam bonum; quicquid sub infinitæ bonitatis gubernatione contingit.

*Sola malorum medicina est patientia.*

MARSILIVS FICINVS  
Florentinus Bernardo Bembo Iurif-  
consulto & Equiti clarissimo Vene-  
torum oratori, S. D.

Quoties his temporibus sumo calamum, quod facio sæpe, toties in mentem venit ut nonnihil de patientia scribam. Nihil ferunt aliud hæc ferrea sæcula nobis nisi malum. Nihil afferunt Musæ nobis aliud nisi patientiam, malorum virtutem perferendorum. Nunc metamorphosea illa est opus alchimia, quæ ferrum vertat in aurum. Ut sæcula pessima, quæ ob passionem ipsam ferrea veniunt nobis, saltem patientiæ munere aurea peragantur.

Accipe igitur vir patientissime exemplaria trium Epistolarum de patientia breviter disputantium.

*Nihil magis vel necessarium vel voluntarium est quam amor.*

MARSILIVS FICINVS  
Florentinus Anthonio Vinciguera  
viro doctissimo Venetorum  
scribæ, S. D.

Lege feliciter unà cum Bembo nostrum dereligionis librum. Atque vive semper Marsilij tui memor, imò verò, ut rectius loquar, Bernardi Bembi. In eum me iamdiu Deus ille, ut ita dixerim Magicus, transformavit, qui inter numina solus habet in liberas voluntates imperium? Cœlestis amor, Anthoni amantissime, solus sæpe voluntatem efficit necessariam; dum sic amo, ut non amare non possim. Ac vicissim voluntariam interdum reddit ipsam necessitatem, quando sic amo ut neque non amare velim, neque velim etiam posse nolle. Ergo siue Marsilium Bembum, siue Bernardum Ficinum cognominare libuerit, recte admodum utrumque cogno-

minabis. Eadem tu quoque nobiscum, nonne aduertis, ratione vinciris. Funiculus Anthoni triplex difficile soluitur, sed omnibus in rebus observandus nobis est Bembus noster. In hac una forsitan aliquando parte vitandus. Dicam ne? Dicam certe, ubi enim exuberat amor ibi abundat & venia. Auerroicus videtur esse Bernardus quodammodo potius quam Platonius, siquidem hic unus illam Auerrois hæresim tacendo persuadet multo magis quam omnes Auerroici disputando. Quippe dum mirabili quadam gratia & amore constante unam in pluribus conficit voluntatem, unum quoque, ut est apud Auerroem, significare videtur in pluribus intellectum. Verum nequid oinemur impij ubi de ipsa pietate differimus. Davidicus sit Bembus noster non Auerroicus, o quam bonorum, o quam iucundum habitare fratres in unum.

*Excusatio ubi serius respondemus.*

MARSILIVS FICINVS  
Loetario Neronio, S. D.

Noli optime mi Loetari mirari si tardius Epistolas nostras quibus tuis respondemus acceperis, nam & literæ tuæ sero ad nos deveniunt ex ipso, ut ita dixerim, cœlo demissæ, & nostræ vicissim serius à terra cœlestia petunt. Verum tamen inveni nuper, nescio quomodo, quæ potissimum ratione me possim tollere humo, ipsaque parumper scandere culmina cœli. Prædam igitur utcumque potero radios ab ipso Sole terras usque porrectos. Quibus aliquando quasi funibus quibusdam pro viribus æthereas plagas ascendam. Atque ibi Loetarium complectar meum, penè iam cœlestia complectentem. Quamobrem mitto ad te opusculi illius exemplar quod iamdiu de lumine conscripseram ad Phœbum Venetum oratorem, lege feliciter, sed ne interim Epistola sileat, quid nunc animus loquitur, Loetari, nisi tu mihi esses alter ego admonerem te ne ita posthac amplius amicos mihi meos surriperes, Ioannem certe Causalcantem meum heri nescio quibus filtris tibi ad eò deinxisti, ut nisi tu quoque meus esses ille iam desinat esse meus. Vale feliciter. Verum quid hic resistis inepte mi calame? quid cessas ingratus? Age nunc progredere paulo ulterius iam grate calame, exprime nunc gratissimum nobis illorum nomen quorum imagines animo iamdiu meo ipse amor impressit, Tho-



am Valorium & Georgium Anthonium Vespucium insignes doctrina & probitate viros saluere iubeto. Sed lege iam Locteri, si placet.

*Non ex humanis diuina, sed ex diuinis humana sunt indicanda.*

MARSILIVS FICINVS  
Hieronymo Rossio Pistorien-  
si, S. D.

**L**Ege feliciter nostrum de pia fide volumen, pie amice noster atque fide fidelior. Si quid in eo laude dignum repperis, Deum lauda absque cuius munere nihil est reuera laudandum. Si quid minus tibi forte placuerit, caue ne ob id ipsa tibi minus religio placeat. Noli rerum altitudinem diuinarum ex humani ingenij humilitate metiri. Non enim ab humanis diuina, sed à diuinis humana dependent. Viue felix nostri memor, amantissime frater.

*Non cortex nutrit, sed medulla.*

MARSILIVS FICINVS  
Florentinus reuerendo in Christo patri & D. suo Ioanni Nicholino archiepiscopo Amalphitano, S. D.

**N**on eodem oculo Philosophorum, Theologorumque scripta legenda sunt nobis, quo Poëtarum vel Oratorum. Alibi quidem & si non nihil oblectat extrinsecus, nihil tamen fermè reperitur quod nutriet. Hic autem non cortex nutrit aliquos, sed medulla. Aliud est olfacere flores, aliud carpere poma & sugere succos. Igitur diligenter enucleandi sunt sapientiæ fructus ut nutrient. Quanta sit vis in vino non qui tantum vidit, recte iudicat, sed qui bibit. Quantum sit caloris in pipere, non qui solum tractat manibus, sed qui lingua gustat insuper, prorsus agnoscit. Quam ingens sit splendor Solis in æthere non citra, sed ultra nubes, imò potius discissus nubibus, intuemur. Lux in tenebris lucet, & tenebræ eam non comprehenderunt. Quamobrem familiares tuos sæpe monebis, ut meminerint apud priscos Mineruam peplo velari. Atque ut mira Mineruæ ipsius opera haudquaquam conniuentibus percurrant oculis, sicut cætera solent, (ut ita dicam,) lynceis vigilantibus immorentur. Verum de his hæcenus. Audio te Ioannes suanissima archiepiscopi Florentini consuetudi-

ne familiariter vi. Beasti me, nuper mi Nicholine, beasti certe me nimium. Variatus es, (arbitror,) quam vehementer optarem iamdiu penes aliquem Iouialem vitam agere, quo nescio quid amari, atque, ut ita dixerim, Saturni quod mihi vel inseruit genesis, vel adiunxit philosophia, aliquando dulcissimo Iouis alicuius commercio leniretur. Tu ergo ut voti quandoque me compotem redderes, Rainaldo Ursino Iouis ipsius alumno, te totum Nicholine dedisti. Nempe sciebas ubi Amalphitanus sit alter ego, ibidem me prorsus adesse. Vis me saluum fore, hunc saluta frequenter, eique Marsilium toties commendato quoties salutaueris. Vale feliciter. Sed dic amabo, putastine nunc è memoria nobis nostrum Quarqualium excidisse? quisquis Quarqualij mei me putat oblitum, me quoque putet oblitum esse mei. Scribo igitur ad illum nescio quid philosophicum ex eadem certe officina, sed utinam bona depromptum.

*Prospera in fato fortuna, vera in virtute felicitas.*

Item Sinibaldo filio Pini Foriliuij Domini.

MARSILIVS FICINVS  
Laurentio Medici Ianiori, S. D.

**I**ngens amor erga te meus, egregie Laurenti, iubet iamdiu me tibi dare ingentia dona. Contemplator cœli, nihil inter omnia quæ cernit oculis, existimat ingens nisi cœlum. Ergo si cœlum ipsum tibi hodie dederò, Laurenti, en quid erit pretij? Sed nolim modo pretium commemorasse, nam gratis natus amor omnia dat accipitue gratis, neque pro cœlo quicquam sub ipso cœlo pari lancere pendipotest. Tradunt Astrologi eum nasci omnium fortunatissimum cui fatum ita Signa cœlestia temperauerit, ut Luna primum haud male aspiciat Martem atque Saturnum, deinde aspiciat bene Solem & Iouem, Mercuriumque & Venerem. Quantum Astrologi faciunt fortunatum, cui fatum bene cœlestia disposuerit, tantum illum Theologi beatum faciunt qui ipsemet sibi similiter eadem temperauerit. At verò magnum id esse nimium inquires. Magnū certe, aggredere tamen bona spe, ingenue Laurenti, maior admodum est ille cœlo qui te fecit, maior cœlo eris & ipse cum primum aggredi constitueris. Non enim sunt hæc alicubi nobis extra querenda, ne petotum in nobis est cœlum, quibus igneus vigor inest & cœlestis origo. Principio

Luna quidnam in nobis significat aliud præter nostram illam continuam animi & corporis motionem? Mars deinde celeritatem, tarditatem verò Saturnus. Proinde Sol Deum, Iupiter legem, Mercurius rationem, Venus humanitatem. Eya accingere iam generose adolescens, atque hunc in modum vnà tecum tempera tibi cœlum. Luna tua, id est, continuus animi corporisque motus deuinet nimiam Martis celeritatem, tarditatemue Saturni, id est, singula maturè & opportunè pertractet, neque citius quam par est properet, neque serius differat. Præterea Luna hæc in te tua respiciat continue Solem, id est, Deum ipsum, à quo almos semper radios accipit, vt vbique colas præ cæteris illum à quo habes, & tu id ipsum vt sis colendus. Intueatur quoque Iouem, hoc est diuinas humanasque leges, quas nunquam transgrediatur. Siquidem abire à legibus quibus omnia constant, nihil est aliud quam perire. In Mercurium item, id est, in consilium, & rationem scientiamque aciem dirigat, neque absque prudentum consilio quicquam aggrediatur, neque dicat agatue quippiam, cuius non possit rationem probabilem reddere. Rursus hominem scientiæ literarumque expertem quodammodo cæcum arbitretur & mutum. Demum in Venerem ipsam, id est, humanitatem, figat intuitum. Qua videlicet admonetur, vt meminerit non posse à nobis in terris magnum aliquid possideri, nisi homines ipsos possideamus, quorum gratia terrena omnia sunt creata. Homines autem non alia prorsus esca quam humanitate capi. Eam caue ne quando contempnas, forte existimans humanitatem humi natam. Est enim humanitas ipsa præstanti corpore nympha, cœlesti origine nata, Ætheræo ante aliàs dilecta. Deo. Siquidem eius anima spiritusque sunt amor & charitas. Oculi eiusdem grauitas & magnanimitas. Manus præterea liberalitas atque magnificentia. Pedes quoque comitas & modestia. Totum denique temperantia & honestas, decus & splendor. O egregiam formam! ô pulchrum spectaculum! Laurenti mi, nympha tam nobilis in tuo tota arbitrio posita est, si hanc ipse tibi connubio iunxeris, propriamque dicaueris, omnes tibi dulces afferet annos, & pulchra faciet te prole parentem. Denique, vt summatim dicam, si hac ratione prudenter tibi ipse in te cœlestia tùm signatum munera temperaueris, omnes fatorum minas procul effugies, auspiciisque diuinis vitam absque dubio beatam ages.

*Cœlum pollicetur bona, virtus præstat.*

MARSILIUS FICINVS  
Georgio Anthonio Vespuccio suo,  
Item Naldo, S. D.

AD Laurentium iuniorem scribo Epistolam de fatali prosperitate, quam à stellis quæ extra nos sunt plerumque sortimur, ac etiam de libera felicitate, quam pro arbitrio à stellis quæ in nobis sunt adipiscimur. Tu eam (si opus erit) interpretabere. Monebis quoque vt eam ediscat & seruet alta mente repositam. Quam magna isti nos pollicemur, tam magna sibi ipse præstabit, si modo eadem ipse mentelegerit, qua nos scripsimus.

*De salute Philosophorum ante Christi aduentum.*

MARSILIUS FICINVS  
Anthonio Hyuano Serezanensi,  
S. D.

Mosaica præcepta in duo genera apud Theologos distinguuntur. Alia ad naturale moraleque ius pertinent. Alia ad ceremonias & iudicia. Prima illa à Deo Mosi data sunt atque populo. Secunda Moses ipse constituit diuinitus inspiratus. Rursus prima omni hominum generi semper seruanda mandantur. Secunda Iudæos solos astringunt, videlicet vsque ad Messiae ipsius aduentum. Prima quæ diximus, adeò communia sunt, vt cuique etiam minus liberaliter instituto vel solo naturali iudicio cognita esse potuerint. Quid enim in eis aliud continetur, præter Dei vnus cultum vitamque moralem? Pythagoras & Socrates & Plato, atque similes alij Dei vnus cultores, optimisque moribus instituti, eiusmodi siue Mosaica siue naturali disciplina, inferos deuicabant, superna verò sine superni Christi gratia mereri non poterant, quamobrem in mediâ quandam regionem perferebantur, vbi in ipso lyngo de Messiae aduentu, siue per Prophetas, qui ibidem similiter seruabantur, siue per Angelos, certissimi reddebantur. Hinc Gentiles similiter atque Iudæi sub ipsa Christi spe primum, deinde præsentia Christi superos repetebant. Legisti quæ de pace nuper in ipso bello scripsimus ad Pontificem. Lege iterum quæ de bello quondam in ipsa pace paucis ante bellum diebus Romam scripsimus ad Pacem quendam Florentini Archiepiscopi Scribam. Transcribo tibi Epistolæ illius exemplar.

*Exhortatio ad respondendum.*

MARSILIVS FICINVS

Phœbo Capellæ Veneto oratori clarissimo, S. D.

**P**hœbe nisi responsa quandoque mihi dederis iam sæpe vocanti, forte negabimus esse te Phœbum, cuius præcipuum munus fuisse ferunt, dare responsa. Forsitan, inquires, non tantus es Marfilij cui Phœbus ipse respondeat, sed age mi Phœbe, responde modo, nam subitò tantus ero. O si tantum dicere possem, Phœbus ipse semel mihi respondit, ô quantus essem.

*Felix est qui verè gaudet, solus gaudet verè qui sola veritate gaudet.*

MARSILIVS FICINVS

Florentinus Bernardo Capponio Nicolai filio, S. D.

**C**omposui declamatiunculam quandam ad genus humanum de vitæ institutione breuiter disputantem. Tunc demum me bene rem tantam tractauisse putabo, cum tibi rectissime instituto, recte hominum genus instituisse videbor. Transcripsi tibi illius exemplar, lege feliciter, sed parum dixero nisi hoc vnum insuper addam, & viue feliciter. Quidnam aliud est felicitas nisi verum gaudium? Cuius gratia omnia omnes agunt. Ergo vt viuas feliciter, verè gaude, vt autem verè gaudeas, sola veritate gaude.

*Pictura pulchri corporis & pulchrae mentis.*

MARSILIVS FICINVS

Florentinus Familiaribus suis. Rursus Laurentio Medici, item Bernardo Bembo, S. D.

**M**ulta Philosophi disputant, oratores declamant, poëtæ canunt, quibus homines exhortentur ad verum virtutis amorem. Hæc laudo equidem & admiror. Alioquin, ( nisi bona laudarem ) essem ipse non bonus. Sed puto virtutem ipsam, ( si quando producat in medium ) multo facilius meliusque quam verba hominum ad se capeffendam cunctos adhortaturam. Frustra puellam adolescentis auribus laudas verbisque describis, quo stimulos illi amoris incutias, vbi ipsam pulchræ puellæ formam adolescentis oculis queas offerre. Monstra, ( si potes, sermo-

rum digito, nihil amplius hic tibi opus est verbis. Dici enim potest quanto facilis vehementiusque pulchritudo ipsa quam verba prouocet ad amandum. Ergo si mirabilem virtutis ipsius speciem in conspectum hominum proferamus, haud opus erit suasionibus nostris vltius, ipsemet citius quam cogitari possit persuadebit. Finge hominem vegetissimis perspicacissimisque sensibus præditum, robusto corpore, prospera valitudine, forma decora, congrua membrorum amplitudine, proceritate decenti. Finge hunc prompte sese mouentem & dextere, ornate loquentem, dulce canentem, gratiose ridentem, neminem amabis vsquam, neminem admiraberis, si virum eiusmodi, cum primum videris, non ames, non admireris. Age igitur, vt facilius diuinam animi speciem ex congrua pulchri corporis similitudine cogites, redde singula singulis. Corpus enim animæ ipsius est vmbra, forma verò corporis, vtcunque potest, refert animæ formam, quamobrem viuacitas illa & perspicacia sensus in corpore, quodammodo sapientiam animi referat atque prudentiam, robur corporis animi fortitudinē, corporis sanitas quæ in humorum temperatione consistit, animi significet temperantiam, pulchritudo quam membrorum ordo constituit colorque decorus, iustitiæ ordinem & splendorem nobis ostendat, amplitudo quidem liberalitatem atque magnificentiam, magnanimitatem verò proceritas, dextèritas illa vrbaneitatem & comitatem, ornatus sermo oratoriam. Cantus dulcis Poëticam facultatem. Denique risus ille gratissimus perfectum gaudium representet, quo nos virtus ipsa perfudit, atque securam vitæ felicitatem. Collige iam singula quæ narrauimus virtutis membra munaque in vnum, venerandum subitò admirandumque spectaculum manifeste videbis. O quam amabilis, ô quam mirabilis est hæc animi forma, cuius vmbra quædam est forma corporis, tam vulgo amabilis, tam mirabilis. Quantum verò virtus ipsa vbi oculis cerneretur gratissima specie ad seipsam singulos statim alliceret, tantum proculdubio vitium, si manifeste cernatur, deformitate sua deterrebit proptinus & fugabit. Agite igitur, ô amici, diuinam ipsam virtutis ideam formamque semper ante oculos habeamus. Hæc nos gratia splendoris statim alliciet, suauitate ordinis atque harmoniæ iugiter oblectabit, bonorum copia prorsus implebit.

# MARSILII FICINI FLORENTINI EPISTOLARVM

(:.)

LIBER VI.

(:.)

ORATIO CHRISTIANI GREGIS  
*ad Pastorem Sixtum, suadens ut ouibus suis  
dicat, Pax vobis.*

Christianus Grex, Sixto beatissimo Pastori suo  
suppliciter se commendat.



AVD facile nunc inuenio ( Pastor optime ) unde potissimum in primis exordiar. Hinc enim miris sanctitatis tuæ bonis prouocor ad laudandum, inde flebi-

libus miseriæ meæ malis reuocor ad querelas. Quid igitur in præsentia faciam? Narrabo ne laudes tuas? An nostras potius ærumnas dinumerabo? cæterum, (vt videtur) nihil te laudando proficimus. Non enim crescit vulgaribus laudibus præstantia singularis. Præstat igitur vulnera nostra Medico nostro detegere, hac ratione potissimum curaturo, quàm laudes eius notissimas atque innumerabiles frustra dinumerare. Et si misera quadam necessitate compulsi importunius hunc obsecrabimus, suæ tamen misericordiæ potius quàm obsecrationibus nostris confisi, speramus eum omnem ab ouili suo pestem penitus expulsum.

Sit otus essem lingua, Beatissime Pater, explicare non possem, quanta nunc calamitate premar, quanto dolore conficiar. Dici non posset quàm ingenti olim gaudio sim persuasus, quando te mihi Pastorem Deus ipse præfecit. Audieram equidem te esse Phœnicem Philosophiæ, sublimē ip-

sam Mineræ arcem ante alios possidentem. Quod quidem adeo manifestum est omnibus, vt negari non possit. Verum sperabam cum summa potestas summæ sapientiæ iungeretur, sæculum illud aureum rediturum, quod fore tunc Plato vaticinatus est, quando in idem potentia sapientiaque concurrerent. Demum quàm vera de sapientia tua iam pridem audieram, ferme tam falsa de mea sperari foelicitate. Vereor ne quis nimis contumeliosus vel minus patiens aliquando, sic audeat exclamare. Heu quantum hac in spe, mea me miserum fefellit opinio, conuersum est mihi gaudium in moerorem. Non aurea, ( quæ sperabam ) sæcula sed ferrea sub Pontifice sapientissimo, quis credidisset? Ferrea sæcula redierunt, nihil vsquam video nisi arma in meam perniciem fabricata; nihil audio nisi armorum sonitum, equorum strepitum, tonitrus bombardarum, nihil vsquam sentio, nisi fletus, rapinas, incendia, cædes. Adde quod & angor fame, & Epidimia indices magis magisque consumor. Et tanquam desint, quæ me intus sine fine fatigent, imminet assidue capiti meo lupo omnium voracissimus, leo rugiens, vastus elephas, Draco pestilens, Teucer, (immanis hostis Ecclesiæ) iam iam nisi in præsto affueris, misellum hunc gregem tuum teque in pri-

mis deuoraturus. Ex te vno tanquam capite tota Christiana res pendet, in te vnum summa redundat vel gloria vel infamia, te maximum omnium manet vel præmium vel supplicium. Ergo nequid eiusmodi vel casus ferat, vel impatientia conqueratur, consule tibi in primis, sanctissime pater, nobisque prospice, serua te primum nobis, oramus, conserua nos tibi vicissim, beatissime pater, ignosce quæsumus filiis tuis, pater indulgentissime, atque fons indulgentiæ, si partim vrgentibus malis impulsus, partim charitate, tum nostra vti, tum tua freti, monere sanctitatem tuam tanquam sus Minervam aggrediamur. Charitas omnia credit, sperat, sustinet. Charitas nunquam excidit, summa quoque benignitas non potest quicquam accipere non benigne.

Memento esse te Christi mansuetissimi clementissimique Vicarium, obliuiscere, (sicut solebas) iniuriarum, quarum memoria, nihil est aliud homini quam suipsius obliuio. Odium si quod habes in tuos, ponito, vt solitam recipias, si modo amiseris, ingentem mansuetudinem absque te ipso non potes amittere. Charitatem igitur pristinam, (scimus quod loquimur) quam retinebis, ne pium illum genium tuum amittere compellaris. Non patieris quenquam tuis armis vltius in gregem sæuire tuum, ne ipse alterius culpa pro Pastore lupus vel euadas vel saltem existimeris. Quisquis arma in tuos exercet, te proculdubio ante alios vulnerat. Non enim est vllus sine grege Pastor, & qui parrem gregis aliquam vel abnegat vel amittit, Pastor iam desinit esse communis. Si nullius greges fueris omnium. Si fueris alicuius, nullius eris. Diuinum tibi Christus in primis concessit imperium, non armorum præcipuè, sed animorum. Claues præterea dedit, non galeam aut ensen. Claues quibus Iani Plutonisque hostia clandas, regni verò cœlestis fores aperias. Ter edixit tibi, Nunquid amas me? Nunquid amas me? Deinde subiunxit, si me amas pasce oves meas. Si quæ errauerint, septuagies septies illis ignosce. Relinque ad horam nonagintanovem obediens, vt centesimam redimas minus obedientem, quam cum redemeris, vna hac magis gaudeto quam cunctis. Non dixit, insequere illam imprecationibus vllis, sed precibus eam benigne prosequere. Non dedit virgam aliquam qua deuias oves percuteres, sed & blanda potius verba, quibus benigne ad stabula reuocares, & claues quibus tutissime custodires. Mercenarius quidem alienas oves errantes nonnunquam rigide percutit, Pastor autem semper

ignoscit suis & prospicit. Non mercenarium te Dominus constituit, sed Pastorem.

At video quid accusabis, dices, aliud esse errare à pastore de via, aliud pastorem cornu laceffere. Atque ita de ariete inter nos aliquo forte quereris. Circumspeximus vndique bone pastor, nullum inter nos talem inuenimus arietem. Non ea vis animo, nescio quid arieti succenses, pene totum tuum quodammodo vel perdis vel amittis ouile. Latet, (nescio quomodo) oculos tuos, grex tuus, ô pastor, syluis rupibusque dispersus. O vtinam hunc parumper aspiceres, non enim posses cladem morum tantam oculis siccis aspicere, proh dolor! grex tuus omnibus vndique morbis malisque vexatur. Passim incusatur pastor, passim vituperatur, vndique interim me miserum angustia premunt.

Hinc infamiam tuam doleo, hinc lugeo miseriam meam. Si tibi famæ ipsius aures ad horam saltem suggereretur, quibus & infamiam tuam & fletum meum audires, profectò non minus sortem ipse tuam defleres, quam ego meam. O pastorem meum hac in re, vt ita loquar, infortunatum! ô gregem penitus infœlicem! proh nefas! In te quidem nonne audis? in te, summe Pontifex, satyri passim mordaces armanur. In me verò tragœdi tristiores incumbunt. Nulla legeretur alicubi acerbior satyra, licet falsa. Nulla verior tragœdia nunquam vel luctuosior, si tragœdiæ materiam demis, demis simul & satyræ. Dele de infamiæ libro nomen tuum, iamdiu scriptum à Deo in libro vitæ. Surge custos noster aliquando, surge iam custos legitime, dic vna cum Domino tuo, dic amabo, Pax vobis. Dixit, & facta sunt. Pax erit & gloria tibi que tuis. Aureum nobis vna tecum agetur seculum. Ferrum ab ouili tuo sub Constantini militia in lupos barbaros conuerteretur. Tantùm absque dubio, tunc laudabitur Pastor, quando trucidabuntur lupi, vel domabuntur, quantum nunc vbique vituperatur dum agni præcipitantur. Cadent à latere tuo vel inermi armati mille, & decem milla à dextris tuis, omnipotens pro te Deus ipse pugnabit.

Sed ecce, Accusas iterum arietem, accusa rursus, si accusandus tibi forte videtur, sed accusatio tua sit Christiana potius quam hostilis, non ad perniciem aliquam sit, sed potius ad salutem. Non venit Dominus tuus, vt perderet aliquem, sed seruaret. Medicum te esse voluit, non carnificem. Sed nolim coram sanctissima maiestate tua atrox illud verbum carnificis protulisse, cuius quidem vitium de pietate tua ne carni-



fer quidem vllus audeat suspicari. Dedit Deus omnipotens arma tibi, vt Paulus Apostolus inquit, non carnalia, sed spiritua- lia potius & diuina. Insiit te quidem subie- ctis ouibus prouidere simul & parcere, lu- pos verò superbos, id est, barbaros hostes fidei Constantini manibus debellare, non belli quidem, sed pacis gratia. Vt domitis feris seruatisque pecudibus, sub vno Pasto- re, tandem vnum sit & ouile. Sed parce tuis primum Alme Pastor, parce tuis, ne dum inter nos de lana herbaque certatur, inter- ea lupi vitam ipsam ouium & Pastoris faci- lius ferociusque inuadant.

Non dabitur tibi dedecori, si tuorum ali- cui, etiam septies, erranti pepercis, cum tibi mandatum à Domino fuerit, vt etiam septuagies septies illis ignoscere debeas. Officium tuum est, vt te non latet, cognos- cere singula, vt ignoscas, purgare & grotos, vt restituas sanitatem. Victoria tua non tam in bello, quam in pace consistit. Quin- imo si Christianos homines vincis in bello, ipse interim, quod à te procul absit, à dæ- monibus & publica infamia vingeris. Si be- nigne emendas atque indulges, vincis om- nes, atque integrum tibi seruas in tuos om- nes imperium. Fortitudo tua ferendo cla- ret, non inferendo, omnis tua sublimitas est humilitas. Tunc maximè mansuefacis omnes, cum ipse es omnium mansuetissi- mus. Facile quocunque placuerit mouebis omnes, si nusquam ipse moueberis. Visne subita simul & foeliciissima potiri victoria? Noli tuos bello vincere, sed potius ipsum vince bellum. Prouidentia plusquam coele- sti, motibus coelestibus impera. Doma be- nignitate tua malignum ac sauum Mar- tem, rigidumque Saturnum. Non est victo- ria magna minima superare. Quidnam ma- gnum est in terris? Cum tota ipsa terra sit minimum. Ergo coelestis Antistes, terra di- missa, vince cœlum, satis enim terrena vin- ces, si coelestia viceris. Vbi est regnum tuum ibi victoria tua, regnum verò tuum, non tam mundi huius inferioris est, vt inquit Iesus, quam superioris atque diuini. Vide vtrum malis, sanctissime Pater, vtrumq; in tua electione consistit, in terris quidem mi- les ne haberi an pontifex, in cœlo autem

respuine à Christo prorsus inermi, ipse ar- mis onustus tanquam dissimilis, an potius, armis positus, excipi ab eodem tanquam si- milis.

Inquies forsitan. Non licere gregi mone- re Pastorem. Esto sane, fateamur enim pa- trem nostrum prouidentia summum ad- monitionibus nullis egere. At liceat saltē oportune precari, imò verò etiam importu- ne, vbi compellit necessitas, obsecrare. Li- ceat rursus timere illi quem & timemus v- nicum, & amamus vnice, atque instar nu- minis veneramur. Suscipe, obsecramus, cœlum parumper, sicut solebas olim antē- quam animo prœlia hæc terrena conspice- res, videbis Petrum illum Pontificem pri- mum, vulnera hæc mea, quæ forte non vi- des, ipse, clare videntem. Videbis miseri- cordem Petrum meo grauitè dolore do- lentem. Forsitan necesse illum, nisi caueris, irasci tibi, dum nostri ad eò miseretur. Sed absit à nobis, absit procul, vt vel Petrus iras- catur Sixto, vel Sixtus ouili suo huic indi- gne. Nefas est vel Pastori bono mali aliquid ominari, vel ab ipso tandem sperare ali- quid, nisi bonum. Non enim est sui ipsius o- blitus Pontifex noster omnium prudentis- simus, non amisit sapientiam singularem, quando sapere cunctis incœpit, non exiit naturalem illam benignitatem, quando benignissimi Petri pallium induit.

Quid ego dicemus? Placuit forsitan solerti gubernatori, suis interdum acrius minita- ri, ne perpetua illa & inaudita clementia sua segnities putaretur. Atque vt incom- parabilis sua illa suauitas post austeritatem quandam suauius gustaretur. Forte etiam permisit hætenus gregem suum prœliis in- suetum idcirco ad certum tempus inter se dimicare, vt hac exercitatione ad prœlium contra lupos barbaros committendum fiat instructior. O Sixte noster tantum iam siste prœlium, satis iam satis exercitati sumus, quando prorsus defatigati iam sumus. Sixte benigne miserere tuorum. Dic age quan- doque beatissime pater, dic iam bonæ vo- luntate tua ouibus tuis. Pax vobis, vt oues tuæ vicissim tecum vna proclament Gloria in excelsis Deo, & in terra pax hominibus bonæ voluntatis.

## ADHORTATIO AD RVSTICANDVM.

MARSILIVS FICINVS FLORENTINVS

Bernardo Bembo, & Antonio Vinciguerræ,  
Viris Clarissimis, S. D.

**S**alue semper, Bernarde, mi Castor, salve rursus Antoni, mi Pollux. Aut fugate gemini servatores, si fieri potest, pestem istam, cui quilibet imprecatur. Aut fugite saltem, heu fugite quamprimum lethales terras, fugite litus amarum. Recipite vos in ipsa suburbia precor, si modo licet, vrbe relicta, vbi istos oculos meos, oculis quoque sapè reuisam, alta semper mihi mente repositos.

Hoc ego sum vobis, vnus sibi quisque quod ipse est. Hoc mihi vos estis quod duo sunt oculi. Valete felices. Sed curnam Christophorum Landinum nostrum modo prætermisimus Musæ Phœnicem? Quia cum in ipsa salutatione Ficinum dixi, putavi me dixisse Landinum.

*Qui ardenter amat, nihil capit præter amantem.*

MARSILIVS FICINVS

Florentinus Raphaëli Riario, sancti  
Georgij Cardinali suppliciter  
se commendat.

**H**Ac noctis eius hora, qua summus Creator, sine quo nihil nascitur, Deus homo natus est hominibus, vt homines Deo diuini renascerentur, nascitur quoque mihi hæc ad Raphaëlem Epistola. Verum queritanti mihi, qua potissimum alimonia nascentem Epistolam, fouerem atque nutrirem, nescio quis spiritus inter eos qui nocte eadem diuinum Verbum Pastoribus cecinerunt: quid quæris, inquit Marsili, quod scribas? Penetra nunc singula animi penetralia, vacuum quidem cæterarum omnino rerum mentem reperies, solo autem Raphaële Riario plenam: ergo Raphaëli non poteris præter ipsummet Raphaëlem aliquid scribere. Adcõte hic aliorum omnium tunc reddidit vacuum, quando sua te fecit præsentia plenum, tantus est enim tibi, tanquam charus, vt nequeas aliud capere, dum capis ipsum. Vis ergo quicquid habes, quicquid cogitas, quicquid loqueris, commodissime exprimere Raphaëli? Age eadem arte pingendi qua cum iamdiu animo pinxisti tuo, tunc pingetabella.

Hæc quidem spiritus ille, mi Raphaël. Ego autem manibus id pingere nequeo. Animo ipse finge. Sed vbinam? vbi est Amalphitanus noster? Hunc iamdiu hac atque illac, vt iubeam, saluere perquiro, sed frustra extra te quærebam, quem nisi in te inuenire non poteram.

*Neque tuum est incusare principes, neque fas incusare fortunam.*

MARSILIVS FICINVS

Reuer. in Christo Patri, & Domino suo,  
D. Ioanni Nicholino, Archiepisc.  
Amalphitano, suppliciter  
se commendat.

**P**roperaui modo ad pugillares certo quodam consilio, venerande Pater, vt plurima certè ad eum scriberem, quem amo venerorque quamplurimum. Verum vbi cepi calamum, ita protinus omnis au-fugit inuentio, vt non calamum, sed calamitatem inuentionis videar accepisse. Adhuc equidem ita mecum ambigo quidnam scribam? Cum neque mali quicquam velim scribere, neque possim boni nihil, enim inter mala hæc innumerabilia boni se nobis offert. Ego quid faciam? Fortunam ne incusabo, nimium his sæculis inimicam? An potius culpas hominum criminabor? Neutrum tandem, neque enim illud decet, neq; istud licet. Satis autem multa dixero, si quærunq; aliàs vnà diximus, recolueris. Scribo ad benignissimū nostrum illum patronū S. Georgij Cardinalem, ipse literas reddito. Rogarem te vt me Papiensi & Senensi probatissimis Dominis commendarer, nisi te scirem quoties te commendas, toties vnā tecum Marsilium commendare.

*Inter mala minus ladtur, quem tuetur Deus.*

MARSILIVS FICINVS

Reuerendo in Christo Patri & Domino  
suo Raphaëli Riario Sancti Georgij  
Cardinali suppliciter se com-  
mendat.

**N**equē scribis clientulo tuo, nequē rescribis quicquam, vnice mi patrone. Atque id quidem ille tam æquo patitur

animo, quam æqua patitur. Ille siquidem tibi hinc abeunti suos negavit pedes, tu quoque vicissim tuas iure negas scribenti manus, quamuis alter forsitan id neget volēs, alter certè illud negarit inuitus. Verum infelix eiusmodi negationis vicissitudo felici quadā affirmationis vicissitudine iuste rependitur. Nempè quemadmodum ille tibi suum iamdiu animum dedit, sic ipse mutuo illi animum pro suo tuum magno cum fœnore reddidisti. Profectò in cōmuni hac generis humani miseria, quam narrare animus horret, in qua nostrum nemo non miser, ille duntaxat minus est miser, de quo clementissimus Deus mandauit Angelo suo, vt custodiat eum in omnibus viis eius. Videtur & mihi hac in re Deus ipse prospicere voluisse, dedit enim Raphaëlem viæ ducem, vitæque custodem. O miram Raphaëlis mei benignitatem! Tu mihi Raphaël & vigilanti & dormienti propitium te semper offers mente læta, vultu hilari, verbisque benignis. Atque inter multa quæ præmunt vādiq̃ue mala, ita tu mihi passim vnicum solamen ades, quasi pulcher Apollo, discreta inter nubila lucens. Scribis autem Marsilio tuo nihil, cui loqueris omnia. Quippe nihil habes deinde quod scribas, cui iam fueris cuncta loquutus. Ego autem Patrono meo Epistolas dedico, non tam vt illi scribam, qui cum assidue loquor, quam vt de illo scribam interdum, quem & cogito semper & loquor. Si quando humilia respicit qui habitat in excelsis, Marsilium tuum quandoque Pontifici summo commenda quæso me totum venerande Pater, potes autem integrum commendare, si in ipsa commendatione Amalphitanum Archiepiscopum prætermiseris. Quos Deus coniunxit, homo non separet. Eius frater Angelus Nicholinus, Iuriscōsultus insignis cinisque præclarus, tam optat tuus esse quàm suus.

*Tunc solum nos probare debemus, quando à probatissimis approbamur.*

MARSILIVS FICINVS

Dominico Boliano Veneto

Iuriscōsulto, S. D.

SI amicitia cum clarissimo Patrio Francisco Michaële, iam pridem mihi contracta seruatoribus vllis egeret, obsecrarem te per ipsum numen amoris, vt omni studio in eius beneuolentiam me seruares. Equidem explicare non possem quantifaciam à viris amore dignis amari. Nam nisi ipse mihi placeam, non potest aliud quicquam mihi placere, tunc verò solum

maximè placeo, cū à probatissimis viris probari me sentio.

*Nemo infortunatior illo, qui neque ipse videt, neque videntem videt.*

MARSILIVS FICINVS

Antonio Cocchio insigni Iuriscōsulto.

Item Francisco Berlingherio, & Petro Arenensi, & magistro Georgio Cyprio, & Laurentio Medici Iuniori.

SCRIPSI iam pridem Epistolā quandam Svaticinio similem ad Pontificem, sed vtinam Pontificiam. Nec tam diuina apud alios fuerit, quàm apud nos diuinans, certè intestinam, externamq; perniciem iam jam Christiani gregis ceruicibus imminentem, procul expellet. Testor, amice, Deum, me hac in re meum pro viribus officium impleuisse, reliquum reliqui viderint, quibus oculi quidem dati sunt, vt in primis videant, aures autem vt saltem audiant. Alioquin & si fortè aliquando exclamare cogentur, heu non videram! nunquam tamen licebit dicere, non audieram. Idibus Ianuariis.

M. CCCC. LXXVIII.

*Cognosce alia, vt te cognoscas. Cognosce teipsum, vt cognoscas Deum.*

MARSILIVS FICINVS

Reuerendo in Christo Patri & D. suo, D. Ioanni Ferdinandi, serenissimi Regis filio, Cardinali Aragonio, suppliciter se commendat.

SCRIPSI tres superiorib; diebus declamationes, venerande Pater, Platonicas, potius quam Tullianas, quibus familiares meos à vitiis deterrerem, ad virtutem pro viribus cohortarer. Prima quidem miseram quandam vmbra improba vitæ describit: secunda verò vitæ probæ felicem refert imaginem: tertia denique diuinum exprimit probitatis ipsius exemplar. Tria hæc quasi specula quædam mittere ad te idcirco decreui, quia sciebam formosissimos quosque speculis admodum delectari. Speculare parumper in hisce te ipsum, venerande Pater. In primo qualis nūquam fueris, in secundo qualis iam pridem euaseris, in tertio qualis iam sis, statim agnosces. Gaudebisque bonis tuis non mediocriter. Sed vt feliciter tuis gaudeas bonis, in omnibus gratias age Deo bonorum omnium largitori. Curnā præcepit Deus cognosce teipsū, nisi vt in te cognoscendo, quicquid habes boni, habere ab eo prorsus agnoscas?

Si tibi nunc Marfilium commendauero, intellige Archiepiscopum Amalphitanum pariter commendatum, quos Deus coniunxit, homo non separet.

*Spiritus ubi vult spiras.*

Sixto Pontifici Marfilius Ficinus Florentinus atque vna omnes Conphilosophi sui coelestem victoriam dicunt.

**O**bscramus te per illum qui audit semper omnes etiam non loquentes, & exaudit sapissime non vocantes, ut filiorum tuorum vocem audias parumper mente benigna, Pater omnium benignissime. Nam Deus omnipotens, cui parent omnia, cui quidem parere libenter, nihil est aliud quam regnare, Deus ipse & clamare nos in praesentia, & audire te iubet. Praeterea si nos patienter audiueris, non modo non poenitebit, verum etiam, (ut speramus) iuuabit audisse.

Anno superiore, beatissime Pater, in ipso omnipotentis Christi natali, reliquiae quaedam Apostoli Petri in vrbe Volaterrana, miracula duodecim mense vno ingentia ostenderunt, omni populo manifesta. His ergo nouis commoti signis conuenimus vna Conphilosophi quatuor, & Prophetiae & Astrologiae pariter studiosi. Primum quidem Prophetarum examinatione mysteriorum consensimus, ex illis reliquiarum Petri miraculis portendi, Sixtum successorem Petri effecturum quandoque miracula cunctis populis Gentibusque notissima. Deinde nos ad Astrologica conferentes, considerauius diligenter praeteritam illam rursusque futuram coniunctionem Saturni ac Martis in Virgine. Iterum proximum Solis accessum ad Arietem, quartarum quoque anni totius initia. Eclipses praeterea Lunae quidem in Aquario. Solis autem in Leone futuras. Aliasque rursus anni sequentis Eclipses. Martis denique dissonam cum Ioue permixtionem, ceteraque quam plurima. Inde conclusimus, proximum biennium fore adeo miserabile, (ut vulgo putetur), supremum illud mundi exitium imminere, communem scilicet & extremam generis humani calamitatem, bello, peste, fame, prementem. Principum cuiusque generis interitum plurimorum. Nouam deinde sub falso Propheta haesim surrecturam. Horret hic animus narrare quod sequitur, mox Tyberinis undis, (quod absit,) Petri nauticam nataturam. Barbaros demum Italiam vastaturos. Quo-

niam vero Mars illi dux, Saturnum pestis, famis, prodicionis, heresis authorem, in omnibus illis quas narrauius coeli dispositionibus, superabat, conuenimus ex ipso bello reliqua mala omnia euentura. Hic ergo admirabundi inuicem dicebamus. Vbinam igitur salubria illa Sixti miracula? Quae ex illis Petri miraculis nobis portendebantur, si, ut & nos iudicamus & ceteri deinde Astrologi totius orbis existimant, tam dira sub eius Pontificatu clades priuatos passim & principes Ecclesiamque vexabit.

In hanc tandem, (quam narrauius,) sententiam disceptatio nos longa certa ratione perduxit. Quoniam videlicet Medicorum gubernatorumque virtutem morbi tempestatesque demonstrant, Idcirco prouidentia diuina permittit curante & gubernante Sixto, stellas aliquando plurimum & elementa inuicem conspirare, cum in communem generis humani perniciem, tum vel maxime in nauem Christianam, sauis admodum fluctibus agitandam. Ut Sixtus, quasi Neptunus, in media tempestate surgens ipso potentiae, sapientiae, benignitatisque tridente, ira tum temperet Aetolum furentes scilicet ventos, mare placet tumidum, virtute plusquam coelesti motibus coelestibus imperet, mirifica benignitate sua domet saeuum Martem rigidumque Saturnum. Atque id quidem Sixtum breui facturum non solum oracula Prophetarum, verum etiam coelestia quaedam signa manifeste demonstrant.

Hic igitur omnes Christianorum populi proclamabunt: Quisnam est iste? Quis iste est cui tam facile obtemperant elementa, cui sydera parent? Hic est profecto legitimus ille clementissimi Christi Vicarius, qui clauibus acceptis à Christo statutis ab eo temporibus Iani Plutonisque ostia claudit, Almae pacis templum filiis patefacit. Nam cum intelligat, non esse victoriam magnam minima superare, nihilque esse in terris magnum cum tota ipsa terra sit minimum, statuit iam terra dimissa coelestia superare, ac non tam bellos suos vincere quam ipsum vincere bellum.

Sixtus sublimis Theologiae phoenix, excelsas Palladis arces ante alios possidens, diuinum ibi oraculum in singulis consulit, neque humano in rebus diuinis administrandis, sed diuino potius consilio nititur. Praeterea suspicit inde Deum omnipotentem omnia & bonitate facere & beneficia sibi cuncta subiicere. Igitur ipse similiter statutis ab eo temporibus benefica iam victoria gaudet, qui bene vincit omnes dum

beneficio sibi omnium corda deuincit. Profectò intelligit cum cui imperium in beluas demandatur, anxium ministerium quoddam nancisci potius quam imperium. Corpora verò hominum quæ sola in nobis violentia capiuntur, nihil fermè aliud esse quam beluas. Animos certè natura liberos non posse aliter, quam liberali quadam beneficentia vinci. Magnanimus Sixtus iam non sollicito in beluas ministerio, sed solo in homines ipsos, id est, in animos imperio gaudet. Sixtus noster insignis pietate, pater piorum parentum more, filios suos post minas obiurgationesque paternas blandius osculatur, propitio fouet sinu, almīs vlnis amplectitur. Et quantum paulo ante falso maleficientia quadam insequi filios videbatur, tantum mox beneficentia re vera profequitur. Audite nunc omnes, audite vocem Pastoris nostri propitiam. Aspicite attentius hilarem Pastoris vultum qui cuncta serenat in benedictione, nonne videtis? Os aperit suum, ita suis ouibus cum Domino suo iam jam clamaturus;

Pax vobis, ô filij, vere nouo. Nolite timere non lupo sum, sed custos, non mercenarius sum, sed Pastor. Pastor ab eo missus in mundum per quem factus est mundus, qui in mundo erat, & missus est in mundum, non ut oues suas perderet sed seruaret, atque ut animam suam poneret pro ouibus suis. Mundi seruator, ad vos me misit, ut ei sine quo nihil seruatur, vos seruarem. Voluit quidem ad vos venire, ab eo non abirem, siquidem abire ab eo per quem sumus, nihil est aliud quam perire. In eius nomine, qui vsque ad consummationem sæculi semper est nobiscum, iterum pacem meam do vobis ô filij, vere nouo, inuito mundo, missam Sixto ab eo promouet sistitque mundum. Deus lux clara est in qua tenebræ non sunt ullæ. Deus charitas lucens est, in qua odium non est vllum. Qui in luce clara, & charitate lucida manet, in Deo manet & Deus in eo. Ergo filij diligite inuicem, quemadmodum vos ego dilexi. Filij mei in eo inuicem diligamus, sine quo nullus habet vnquam ut sit diligendus. Nulla pars mundi absque concordia consistere potest, cum ipsa concordia solum constet mundus. Nullus in mundo sine concordia consistere potest, cum ipsa concordia solum constet mundus. Nullus in mundo sine concordia potest illi placere, qui ipsa concordia fecit seruaturque mundum. Nos ergo ut verè beati simus verè inuicem diligamus. At vos abite à meis crudelia fata, à meis qui Deo parent superanti fatum. Abite procul fata crudelia, vires alibi posthac

vestras in fatios expertura. Migrate hinc ab ouili meo repente arma ferocia, in lupos iam vos conuertite barbaros. Accelerate, inquam, dum viget æstas, antequam lupi ferocius me simul ac meas oues innadant. Contra Teucros diuinæ legis hostes omnipotens nobis Deus ipse pugnabit. Nobis militabit æther, & coniurati venient ad classica venti. Cadent à latere nostro mille, & decem millia à dextris nostris. Vnum breui sub vno Pastore erit ouile. Ferreum sæculum mox in aureum conuertetur. Si quidem Marte domito qui Christianis minabatur prælia, rapinas, incendia, cædes, domitus quoque Saturnus erit, qui inde pestem, famem, proditones, hæreses falsas machinabatur.

Dixit Sixtus & facta sunt, ad benignissimam illam Pastoris vocem, Pax vobis, oues cunctæ clamabunt. Gloria in excelsis Deo, & in terra pax hominibus bonæ voluntatis. Hæc est dies quam fecit Dominus, lætemur & exulemus in ea. Cantate Sixto canticum nouum hodie, nostrorum Pontifex animorum. Sixtus in pace sistit Ecclesiam. Sixto cantate vates, claudentur belli portæ. Sixto legitimo Messias Vicario, cantate Prophetæ, in diebus eius erit copia pacis. Venite omnes & videre opera Domini, quæ posuit prodigia super terram. Aufere bella vsque ad fines terræ arcum conteret & confringet arma, & sicut comburet igni. Vacate & videte, quoniam ego sum Deus, exaltabor in Gentibus & exaltabor in terra. Dominus virtutum nobiscum susceptor noster Deus Iacob.

Clementissime Deus qui ab excelsis humilia respicis, atque humilibus largiris excelsa, Deus omnipotens mundi seruator, qui eadem virtute recreas seruasque assidue quæ creasti, serua propitium nobis, oramus Pastorem nostrum, tui gregis egregium seruatorem. xxv. Decembris. m. cccc. lxxviii.

*Felicitè vincit qui animos beneficio sibi deuincit.*

MARSILIUS FICINVS

Florentinus atque vnà Comphilosophi sui, Sixto sanctissimo in Christo Patri suppliciter commendant.

**F**Vit apud nos, beatissime Pater, hætenus Nicholinus Antistes plenus gratiæ & veritatis, homo nuper isthuc missus à Deo, cui nomen est Ioannes. Hic Romam venit in testimonium, ut testimonium nobis inde perhiberet de numine Sixti, quam gratiose mente Sixtus noster filiam suam



Florentiam complectatur. Quandoquidem virum Florentinis gratissimum primo aduentu clementissime sic complexus. O legitimum Petri Apostoli successorem! ô verum hominum piscatorem! (proinde si dicere fas est,) in hoc vno retium iactu videtur quodammodo Petrum ipsum superauisse. Non enim centum quinquaginta tres pisces hic cœpit, imò fermè quocunque Arnus alit, æquorque Pisanum. Sixtus certe legitimus Christi vicarius meminit, Dominum suum Christum cum esset discipulos electurus, primos præcipuos plures è piscatorum numero elegisse, eos se quandoque pisces hominum effecturum, his deinde tres escas potissimum & retia tria dedisse, quibus in profundo hoc humani generis pelago foeliciter piscarentur. Esca profectò prima fuit, singularis in Deum pietas atque religio. Secunda sobrietas vitæ morumque integritas. Tertia erga homines tam operum exemplum bonum quam vera doctrina verborum. Retia quoque addidit tria. Rete primum fuit charitas ardens quæ cunctos in Deo non aliter quam seipsos semper amarent. Secundum intelligentia summa, per quam omnibus tanquam filiis si quando errauisse putentur tam libenter ignoscerent, quam facile ipsi optent sua sibi errata à patre nostro qui est in cœlis, quasi filiis, condonari. Tertium rete, beneficentia tam abundans, vt non modo beneficientibus, sed etiam malefacientibus beneficeret. Et quos vel minus bonos vel etiam inimicos existimauerit, eos bono quodam, ac beneuolentia superaret, cœlestemque patrem imitaretur, qui almū solem opportunasque pluias æquè omnibus, etiam si minus videantur amici, abunde largitur. Hac igitur triplici esca allicere omnes, his quoque retibus tribus irretire & Christus ipse suis quondam mandauit discipulis, & Vicarius Christi Sixtus similiter ipse decreuit, vt ei Dominus ille suus eiusmodi quandoque lætus gratulabundusque occurrat. Veni iam Sixte. Veni, inquam, fili benedictæ Patris tui, intra in gaudium Domini tui. Kalendis Decembrib. M. cccc. lxxviii. Florentiæ.

*Surgunt è cœno quotidie qui rapiant nobis cœnam.*

MARSILIVS FICINVS  
Reuerendo in Christo Patri & Domino  
suo, Ioanni Nicholino Archiepiscopo  
Amalphytano, S. D.

Ad te scribo multa paucis ad Pontificem, tu verò contra de me pauca

multis supplex Pontifici dicito. Non potes de bonis meis multa narrare. Multis tamen verbis in meo malo forsitan debes, certe potes, orare. O quam multa hic de me ipso proloqui vrget animus! Verum non capit Epistola. Tu ergo mente cape. Ineptus ero si tua tibi commendare tentauero, haud æquum esse videtur in aduersitate Florentinum mihi apud istos nomen obesse, si modo obesse potest quod in prosperitate aliàs mihi nunquam profuit. Fortunatiores alij, ne dicam foeliciores, gaudent nostris. Nos numerus sumus fruges consumere nati, fruges dixi, modo non desunt fruges. Vale. Sed antequam valeas, iuuat hic Riarium Cardinalem nostrum parumper affari. Tu verò mi Domine, memento iam serui tui, si qua videtur memoria dignus. Venisti enim in regnum tuum, heu quam inuitus nunc petere cogor temporum malignitate compulsus, quæ nunquam aliàs censui Philosophantibus esse petenda. Dicam ne? Quod forte Philosophum minus, at verò decet egenum. Disperream hercle nisi dixero. Surgunt è cœno quotidie qui rapiant nobis cœnam.

*Nihil est occultius quam humana voluntas.*

MARSILIVS FICINVS  
Ioanni Nicholino Archiepiscopo  
Amalphytano, S. D.

Mitto Vaticanum quoddam ad Pontificem. Spiritus ubi vult spirat. Neque hominis alicuius voluntate, neque humana perturbatione sum motus, sed nescio quo spiritu, scio qua charitate compulsus. Si eodem quo scribitur animo legeretur, neminem prorsus offenderet. Siquidem neminem offendere debet diuina veritas charitati coniuncta. Tradunt plerique Philosophorum rerum veritatem esse omnium obscurissimam. Ego autem puto longè obscuriorem esse hominum voluntatem. Veritas quidem rerum propriis vestigiis nonnunquam inuestigatur certisque discerni potest indicij, quoniam determinata pendet ex causa, semperque permanet eadem. Voluntas autem humana cum ob libertatem non habeat causam terminatam, ac momento quolibet permuetur, neque vestigiis neque indicij certis inuestigatur. Præsertim cum ob simulationem dissimulationemque indicia sæpe sibi met contraria præferat. Ergo antequam edas consule tum te ipsum tum eos maximè qui Pontifici chari sunt maximè,

ita demum Pontifici ceterisque legatur, si tam bona omnium gratia censeatur legi posse quam bona nobis est voluntate compositum. Sin minus, penes te ipse seruato. Equidem ubi nihil mihi prodesse potest, nihil obesse volo. Deus humilem mihi fortunam dedit; Fortuna olim tenuem, nunc tenuissimam facultatem. Deo pareo, fortunæ cedo, consensio facultati, exigua sum sorte contentus modo tuta. Fortunatus cui fortuna obtigit mediocris. Fœlix qui sua est fortuna contentus. Ego certe idcirco paucis contentus sum & si multis sum sæpè contentus, qui & hi multi sunt paucis, multi pretij continendi. Beati pauperes spiritu. Beati pacifici. Prodigiosus hæcenus agitur, prodigiosior imminet annus. Quotidie dices, quotidie audies, Non putaram.

## MARSILIVS FICINVS

Reuerendo in Christo Patri & Domino suo, Ioanni Cardinali Aragonio Ferdinandi Regis Serenissimi filio suppliciter se commendat.

**A**lfonsus Rex foelicissimus auus tuus, venerande pater, nuper Ferdinando patri tuo foelicissimo Regi, oraculum effudit ex alto Angelica lingua, Marsilius Ficinus, (nescio quo spiritu raptus) interfuit, audiuit, seruauit, atque oraculum ipsum Angelica tunc ab Alfonso lingua pronunciatum, ipse in linguam humanam tibi hodie transtulit. Eo videlicet consilio, ut primum, (si placet,) ipse legas, deinde ad patrem tuum serenissimum mittas, ut quæ superioribus diebus Alfonso solis mentis oculis auribusque percepit, iam nostra opera ipsis quoque corporis auribus oculisque accipiat. Nemo autem miretur, oraculum eiusmodi quamuis in excelsum Regij Cardinalis Serenissimique regis ipsius conspectum sit proditurum, tamen absque humanis ornamentis vllis incedere. Quod enim diuini Solis, id est, supernæ veritatis, splendore vestiuntur, conari vestibibus humanis induere, nihil esse aliud arbitror, quam purum Solis ipsius lumen crassiore quadam caligine nubium circumfundere.

Commendatum tibi patrique tuo Archiepiscopum Amalphitanum nostrum, longè omnium commendatione dignissimum, nisi cum scirem merito tantæ apud vos autoritatis esse, ut ipse & Marsilium suum & alios sæpè per multos sit vobis commendaturus. Pridie Kalendas Martias. M. cccc. lxxviii. Florentiæ.

*Oraculum Alphonsi Regis, ad Regem Ferdinandum, inter illos primum Angelica lingua pronunciatum, deinde verò in linguam humanam, à Marsilio Ficino translaturum.*

**A**lfonsus Rex foelicissimus foelicissimo Regij Ferdinando filio suo, pacis olim seruatori, iamjam authori congratulans, in ipsa pace, veram salutem, victoriam certam, integram gloriam, gaudium plenum vaticinatur.

*Descensus animorum.*

**Q**uidnam aded stupes? ô fili! quid horres? Tam facile, tam propitius huc aduolo, quoties mihi placet, quàm facile, quàm propitij stellarum Solisque radij iugiter ad vos vsque descendunt. Neque radij syderum dum ad vos demittuntur sua sydera deserunt, neque supernæ mentes, dum vobis aspirant, superna relinquunt. Animaduerte, quæso, fili dulcissime, quantum cœlicolæ pace, tanquam cœlesti alimonia gaudeant. Nempe cum primum de pace, (quæ iam pridem inuida quadam sorte turbata est,) omnino reconcilianda cogitare cœpisti, repente vel sola hac cogitatione tua quasi esca superis suauissima prorsus illectus huc aduentauit. Ergo stupore omni atque horrore procul expulso, intentis auribus alta, & serua quod cœlitus audis, velut oraculum, alta mente repositum.

*Quam grata pax superis.*

**P**incipio, dilectissime fili, neque de mea sorte hæcenus audisti quicquam, neque tuam plane vnquam intellexisti. At hodie tanquam pacis non modo seruator, ut olim, verum etiam maximus author iam factus es cœlicolarum iudicio dignus, cui ipsa pandatur domus omnipotentis Olympi, atque tam ibi prouidentia ipsius ordo pulcherrimus, quàm inde consonans factorum series referetur.

*Animus diuinus.*

**A**ge iam mentem, Ferdinande, tuam in seipsam, relictis sensibus, circulari quadam sui ipsius animaduersione reflecte. Videbis protinus mentem tuam quando in seipsam, dimisso corpore flectitur, esse incorpoream quandam sphaeram, cuius circumferentia quidem, id est, intelligentia

& voluntas per incorporea voluitur. Centrum verò, id est, vita atque substantia, corporis alicuius cardini non innititur.

*Deus, Angeli, Animi.*

**A**Ge iterum tuo isto lucidiore mentis circulo, quasi speculo quodam, speculari speculari atque attinge in mundo ubique atque undique extra mundum, sphaericum intellectum, sphaeramque intelligibilem, cuius centrum quidem sic ubique, dum infinite penetrat vniuersum, sed circumferentia nusquam dum infinite supereminet vniuersum. Eia speculari diuinam formam, formarum omnium fontem, formam vniformem omniformem. Formam mentibus omnibus passim, praecipue puris tanquam speculis obuiam. Hic tibi coruscat Deus ille Deorum, praeter quem nullus verus est Deus. Hic exuberat aeterna bonorum bonitas, malorum penitus expers. Hic lucet immensa lux luminum Solque mentium reliquarum. In quem ferme non aliter & Angeli quam stellae, & animi quam Luna in Solem undique reuoluuntur.

*Immortalitas animorum.*

**A**Terni huius Solis radij quidam sempiterni sunt hominum mentes, caliginosa nube corporis circumfusae, sed in suum se Solem cogitatione & affectu pro arbitrio reflectentes. Ita profecto resiliunt, sicut ab initio suo inde profilierunt. Ergo cum possint aliquando medio quouis sublato in Solem suum tam rite contemplando quam recte amando refluere, proculdubio inde absque medio effluerunt, videlicet ab ipsa aeternitate proximae sine dubio sempiternae. Quae tunc immortalitatem suam clarius patefaciunt, quando mortalist tanquam minima praecipue aeternorum gratia parui pendunt. Praeterea immortalia prout sunt immortalia capiunt, immortalitatemque ipsam, id est, Deum sub ipsa immortalitatis ratione certa quadam argumentatione percipiunt.

*Providentia Dei.*

**H**is autem Deum cuncta videntem videntibus prouidet ante omnia Deus. Sane si Deus est, (vt certe est,) omnium causa, super omnia nimirum est & omnia. Si est simplicissimus, quod summa potestas ostendit, certe non aliud in eo est videre quam esse, igitur quia omnia est, ideo facillime in se cuncta discernit, si optimus est, quod nemo dubitat, merito videre in eo ni-

hil est aliud quam prouidere. Quapropter cuncta videndo perfecte prouidet vniuersis, praecipue verò mentibus, quae ipsum & in singulis vident, & super omnia colunt.

*Fatum & arbitrium.*

**C**Aeterum vt ad sortem nostram denique reuertamur, Deus ille Deorum praeter quem nullus verus est Deus, solus mihi mentem largitus est, mentem sese in Deum pro arbitrio conuertentem. Corpus autem lucide mentis vmbra, (iubente Deo,) Capricornus adiunxit, spiritum verò qui mentis corporisque nodus est, Capricorni Dominus Saturnus infudit. Genius thronorum comes me quantum Deo parui, rexit & duxit. Vixi equidem apud mortales olim inter laborem semper & gloriam. Laborem quidem, (vt plerumque fieri solet,) intulit ardentior imperandi cupiditas. Gloriam verò singularis magnificentia & incomparabilis magnanimitas attulit. Demum mirifica tum pietate in Deum, tum clementia in homines, tanquam duabus alis, genio duce, in caelestem patriam reuolaui. Vbi meo omniumque patri foeliciter restitutus, vitam beatam thronis quodammodo similem ago, qui Saturni sphaeram in primis exornant.

*Paradisus caelestis.*

**H**ic nobis inter innumerabiles spiritus qui ambrosia vescuntur & nectare, datum est epulis accumbere diuini. Hic & si suum cuique certum sydus familiarius esse videtur, singulis tamen pro arbitrio non aliter quam radiis quibusdam peruium atque perspicuum est vniuersum. Putatis, o caeci, vos in terris caelum ipsum & stellas videre sub crasso aëre, non aliter quam si pisces idem arbitrentur sub gurgite vasto? O quantum vestra haec ridicula nimium vos fallit opinio? Sane pisces in imo non caelum ipsum, sed aquam, non pura caelestium lumina, sed exiguas eorum imagines quasdam vident in aqua semper lutulenta iam fuscas. Idem contingit vobis o miseri sub aëre crasso, & tamen caelestia valde miramini iam vobis facta terrestria. Quantum & diurnum lumen noctis tenebras, & circumferentia centum superat, tantum aetherea nobis sunt lucidiora & maiora quam vobis. Quid de stellarum innumerabilium copia dicam vobis ignota? Quid de mirabili motuum diuersitate & ordine vobis incognito? Quid de inestimabili harmoniae illius suauitate, quam reddit

varius sphaerarum motus globorumque  
omnium consona temperatio?

*Paradisus supercaelestis.*

**V**erum quid vobis caelestia iam diutius usque adeò laudò? Quæ ferè non aliter supercaelestium umbræ sunt quàm terrena caelestium. O veram super æthera lucem, lucem usque adeò veram ut verè exprimi nequeat. O veritatem super cælum mire lucentem, tam mirabiliter perlucens, ut eam nemo queat satis nunquam pro dignitate mirari, cum admirationem ipsam mirificè superet. Hic, ô fili, hic, inquam, solum verissime, clarissime, optime, lætissime vivitur, ubi vita omnis nihil aliud est, quàm veritas, claritas, bonitas, lætitiæque plenissima. Hic in ipso immenso lumine luminum lumina idearum cuncta conspiciamus, & in luminibus singula vera clarissime contuemur. Perinde ac si quis in Sole quidem radios omnes inde manantes, in radiis autem colores singulos qui inde creantur inspiceret. Plura admodum in præsentia, fili, atque infinite maiora quam cælum & pulchriora volentem me hic vobis ostendere, prohibet iam vestra isthæc humanorum imbecillitas oculorum. Quapropter ne nimio splendore caligare cogaris, haud ulterius nunc regni divini infinitique Solis plusquam mirabile lumen ostendam, satis esto quàm beatus sit tuus Alphonsus, quàm beatus & ipse, si modo volueris, sis futurus, significasse. Quamobrem congratulare iam paternæ felicitàti, fili dulcissime, congratulare admodum felicitàti paternæ, gaude tua, sortem hic tuam hætenus inauditam iam lætus audito.

*Sors & libertas.*

**M**entem idem tibi pater, qui & mihi cæterisque creavit, solus enim ille procreat mentem qui solus mentem & recreat, qui sola mente capitur, qui solus pacit impletque mentem, corpus autem tibi istud quondam texuit Aries caput Astorum, spiritum verò ferventem Mars Dominus Arietis accendit. Custos tibi vitæ præcipuè genius est à Deo tributus, genius eorum numero, qui virtutum chorum Angelicarum propriè comitantur. Viuis & tui, mi fili, continuè laborem inter & gloriam. Laborem quidem atque discrimen rigidior Saturnus ipse tibi minatur. Gloriam verò prudens ille Mercurius Solis pedisequus pollicetur. Illinc tibi nonnunquam durities quædam potest obesse, hinc contra mirabilis prudentia prodest.

*Saturni Martisque natura.*

**D**vo potissimum inter Planetas hominibus assidue pericula machinantur, Mars videlicet & Saturnus. Vterque tamen, sicut vos docet experientia, plerumque parcat suis, Saturniis inquam Saturnus, Mars similiter Martiis, ut plurimum nescit obesse. Ego certe olim Saturni comes quoties peperci meis, hoc est Saturniis, toties favit mihi Saturnus. Contra verò nihil unquam favit. Ergo Ferdinande mi, Martis comes ardentis, (si foeliciter regnare cupis,) parce tuis. Qui verò sint inter omnes præcipuè tui, ostendit tibi ignea illa qualitas Arietis, qui cum & Leo Sagittariusque consentiunt. Omnes igitur arietis, leonis, sagittarij filios ipse tanquam fratres habeto. Præterea, ignosce, indulge, obsequere, (si placet) & meis. Qui nam mei sint maxime quæris? Qui videlicet vel capricorno, vel aquario sedibus Saturni reguntur.

*Admonitio moralis.*

**O**mnino autem finibus tuis contentus esto. Plura tibi admodum, crede mihi, maioraque dona sors dabit ultro quàm lacescita. Quot enim violentia persequeris, totidem certe te fugient, atque quod absit, si quando poterunt, forte fugabunt. Quot autem beneficentia prosequeris, totidem & sequentur libenter & obsequentur. Toties benevinctes, quoties beneficio vinces. Tamdiu securissime dominaberis, quamdiu volentibus dominare. Facile, (quocunque placuerit) mouebis omnes, si nusquam ipse moueberis. Summa, ut scis, prudentia aut nunquam aut certe coacta inquit cum fallacissima fortuna certamen. Vbi Mars sævit maxime, ibi fortuna & plurimum dominatur, & facillime fallit.

*Divinatio.*

**H**ætenus charitate paterna charum filium quamvis providentissimum monuisse sufficiat. Nunc brevibus iuvat foelici nato meo parumper vaticinari. Efficies, video, cito quod monui. Sic enim te pro tua prudentia facturum prævideram longe antea quàm prædicerem. Præclara te manet solum in ipsa pace victoria, tutis plena triumphis, in victoria vero tranquillitas, in tranquillitate pietas cultusque Minervæ. Audi obsecro nunc attentius audi, inquam, tota mente Ferdinande quod sequitur. Si tribus potissimum coronam tuam gemmis, hoc est, divina fide, spe, charitate,

prorsus ornaueris, certè quandoque ab ipso tertio cœlo, ubi globum Veneris gratiosum Angelici principatus exornant, tres tibi Gratiæ foeliciter aspirantes, procul à liminibus tuis furias tres fugabunt, tria fata placabunt, cumque curius duos Saturni peregeris, tunc præcipuè filij, Ferdinande, tui foelicitum Solis ad Iouem aspectum, tum Lunæ cum Ioue coniunctione, imò verò maximo Dei omnipotentis dono, coram te excelsæ potestatis splendore fulgebunt. At verò postquam paternos annos impleueris, atque insuper Martis circuitus plures merito nobis, id est, superis tantum notos adiunxeris, demum iisdem ipse alis quibus & hic tuus pater Alphonsus, scilicet, & pietate in Deum, & in homines clementia, (genio duce) cœlestem patriam repetes. Vbi fermè perinde atque virtutes Angelicæ, quæ præcipuè Martis sphaeram illustrant, beata æternitate frueris, fruendoque gaudebis.

*Quam mirabile gaudium in patria.*

**O** Mirum prorsus, ô incomparabile gaudium, ubi in ipso bonorum bono penitus infinito, cunctis bonis infinite gaudemus! O quam integro ibi gaudio fruimur, ubi quisque nostrum, quantumcunque est, totus est gaudium, gaudiumque totum! Canerem equidem libentissime nunc tibi, mi fili, Angelica voce thronorum, quam mirifica semper in patria dulcedine repleamur, nisi vereretur ne forte posthac tantæ dulcedinis huius comparatione, tota tibi in terris vita non solum amarissima, verum etiam amaritudo ipsa penitus videretur. Quare misericordia quadam me continebo, ne filium meum ultra mœstissimam mortaliū sortem, vehementius quam cæteri doceant dolere compellam. Vt autem aliquando foeliciter æternitate fruaris, noli rebus caducis frui vnquam, sed potius uti. Atque ut quandoque vere gaudeas, sola semper veritate gaudeo.

*Ascensus Animorum.*

**V**ale iam latus & viue foelix, suauissime fili, ecce nunc vocibus nonne audis? Vocibus, inquam, Archangelorum, sphaeram Mercurij præcipuè decorantium ad æthera reuocor. Sed antequam valeas, amplectere amabo spiritum hunc tuo spiritu meum, quando ego iamdiu amplector & tuum. Viue mecum & semper & libenter, ô fili, quandoquidem ego etiam ultra consummationem sæculi viuo tecum. Sed as-

pice iam, mi Ferdinande, imò verò iam suspice quam mirabiliter nunc seraphicis fretus alis & sublimes thronorum sedes momento temporis repeto, & lares interim tuos quodammodo instar radij non relinquo. Vale rursus ex alto.

*Tam ineptus est qui amico iam perfectò gratias agit, quam gratus qui non habet gratias.*

MARSILIVS FICINVS,  
Florentinus Rainaldo Gauardio  
Senatus Veneti scribæ  
egregio, S. D.

**M**isiisti ad nos superioribus diebus Marsilij tui salutandi gratia filium tuum Dominicum & indole & moribus literisque decorum. Talem præterea huic Epistolam ad me dedisti, ut non alios mente quam corpore videaris filios genuisse. Deinde dum excogito literas quibus tibi respondeam, atque gratias agam, ecce ipse ad nos accedit Bernardi Bembi Aneæ nostri fidus Achates. Quo quidem beneficio tanto me tibi vsque adeò deuinxisti, ut vnum è duobus animis animum iam prorsus effeceris. Quod ergo nullas tibi iam ulterius aut huius aut cuiuslibet alterius beneficij gratia, gratias agam ipse, egregie Rainalde, in causa es, ipse enim non duos ulterius nos esse voluisti, sed vnum. Ego tam ineptum insanumque esse arbitror cum qui sibi met gratias agit, quam ingratum qui non habet alteri gratias.

*Quod libenter accipis, redde libenter.*

MARSILIUS FICINVS  
Laurentio Lippo Rhetori &  
Poëtæ, S. D.

**S**alue perspicacissime Lippe. Sitam facile tamque libenter Alcinum a nobis traductum mihi reddideris, quam facile quamue libenter, ipse iamdiu tibi legendum dedi, rem mihi gratissimam feceris.

*Magis commendat virtus quam amicitia, facilius persuadet probitas quam eloquentia.*

MARSILIVS FICINVS  
Florentinus Francisco Bandino, S. D.

**G**eorgius Antonius Vespuccius qua in re indigeat opera tua ipse te facit suis literis certior. Res autem ista mihi non aliter



aliter quàm ipsi cordi est Bandine. Non enim potest non coniuncta causa esse, ubi coniunctus est animus. Sed est Vespucius noster, nosti ingenium hominis, in exigendo quàm par est verecundior. At verò insignis probitas & doctrina yri vel eo tacente apud æquos iudices omnia debet & vehementer exigere & facillime impetrare. Hunc ergo quamvis, ut icis, amicissimum, non tam ob amicitiam quàm ob virtutem suam tibi commenda. Nam ob virtutem ipsam est nobis amicus.

*Votum, Oraculum, Miraculum.*

MARSILIVS FICINVS  
Florentinus Bernardo Bembo Do-  
ctori & equiti Venetorum  
Oratori clarissi-  
mo, S. D.

**A**Mice cœlestis atque diuine semper salve. Cæteros quidem amicos partim mihi fors quædam obtulit, partim propria dedit electio, Bernardum verò Bembum mecum ab initio coniunxit cœlum, diuina deinde prouidentia mirabiliter confirmavit. Cœlum, inquam, propterea quòd eodem anno atque die sub eodem sydere nati sumus. Diuinam præterea prouidentiam nos inuicem deuinxisse ex eo potissimum assero, quod eo anno quo primum orator Florentiam accessisti, quarto ferè ante accessum mense mihi grauiter ægrotanti, statim post votum quoddam pro salute Deo diuæque Mariæ suppliciter institutum, visus es certe tum primum nobis notus in somnis, ante prorsus incognitus, citam prosperamq; valetudinem polliceri. Expergefactus pene sanus breui prorsus conualui. Quinto post mense quo die votopenitus satisfeci, eademque hora nostrum sponte primum adisti gymnasium magna comitante caterua, atque ea forma qua in somnis olim præuideram diuinitus salutasti, multaue inter nos dicta tunc factaque sunt, eodem prorsus pacto quo somnians videram. Eodem anno tanquam religiosi votis vitæ redditus librum de Christiana religione composui. Nunc ergo lege foeliciter amice cœlestis atque diuine. Quem certe nobiscum cœlum ipsum ligauit ab initio, deinde cœlo excelsior religio religauit. Marsilius mus

hæc manu propria Idibus

Iulius. M. cccc.

(.:) LXXIX. (.:)

*Verus amicus, quid amicus optaturus sit præ-  
sagit, atque præuenit  
petiturum.*

MARSILIVS FICINVS  
Florentinus Georgio Cyprio Physi-  
co insigni, S. D.

**S**I amor Deus est, quod & Poëtæ canunt & Theologi confitentur, ergo diuinus, si diuinus est & plusquam diuinus, cum sit Deus, ergo diuinat. Igitur verus amicus, quid amicus optaturus sit præsagit atque præuenit petiturum. Talis certe erga nos est Georgius noster Cyprius, illic ortus ubi Venus ipsa culta est, geminorum mater amorum. Equidem nisi verer ne forte plusquam familiarem amicitiam nostram verbis offenderem, ingentes pollicitationibus tuis gratias agerem. Verùm qui familiaritatem ipsam minus familiariter tractat, non est amplius familiaris habendus. Tunc maximè erga amicum gratiosissimum gratus sumus, quando tam grate accipimus quàm gratiose vel largitur ipse vel pollicetur.

*Qui pro rebus verba dat, folia dat  
pro fructibus.*

MARSILIVS FICINVS  
Ioanni Cocchio literis & moribus  
ornatissimo, S. D.

**T**V mihi das fructus ego folia mitto, vtinam saltem tam bella hæc sint, quàm illi boni. Leges vnà cum Francisco Castilionensi Conphilosopho nostro nostras de pace Epistolas ad Pontificem & ad Regem, meque illi commendabis. Vale foeliciter.

*Qui beati sint, qui beatis proximi, qui re-  
motiores, qui remotissimi.*

MARSILIVS FICINVS  
Lothario Neronio Conphilosopho  
suo, S. D.

**B**Eati cœlestes qui nihil vnquam sentiunt aliud nisi bonum, proxime autem ad illos accedunt, qui cum in regione pessima collocati, necessariò mala vndique sentiant, interim tamen quoniam nusquam à summo dissentiant bono, malis alicubi non consentiunt. Tertium illi obtinent locum, qui post lapsum ita quandoque in summum resurgunt bonum, vt agnoscant id esse malum, videlicet cessis-

se malis, agnoscant tunc solum se malis cedere, quando volunt ipsi vt apud se cedant bona maiora minoribus, agnoscant vbi inuenitur bonorum omnium bonum, ibi solum malorum Medicinam omnium reperiri. Infimi tandem existimandi sunt atque miserrimi, qui vsque adeò summi boni radiis vbique fulgentibus suos oculos clauferunt, vt nusquam in ea ipsa luce, extra quam nihil videtur boni, ipsi videant quantum hoc malum sit, sine illo semper esse, sine quo quicquid sentitur est malum. Hi nimirum quanta sit extra diuinam foelicitatem miseria, tandem non in diuino splendore suscipiunt, ne illic suspiciendo beati sint, imò in suis tenebris per quosdam illius radios quasi hallucinantes suspicantur & sentiunt, vt hic suspicando sentiendoque sint miseri. Mundus (vt Christus ait vitæ magister) in maligno positus est, ob hoc ipsum præcipue, quia positi sumus, imò sumus in mundo maligni. Male sanis & inquietis nihil occurrit sanum nihilque quietum. Quid ferrea sæcula toties iniuste culpamus?

Cum primum homo, ferrum auro anteponens, factus est ferreus, merito sæculum quod ante natura fuerat aureum, ferreum ipsi prorsus euasit. Quid mirum? si omnia nos vndique mala sequuntur, dum ipsi relicto primo bono, id est, Deo, mala singula sequimur tanquam bona, quæ omnia sine primo sunt mala. Non iniuria toties inuiti in omne malum incidimus, quoties sponte ab eo cadimus quod est omne bonum. Ergo non licet nobis de sæculis vnquam, imò contra licet sæculis ipsis de nobis vehementissime conqueri. Emamus ergo nobis, emamus omni studio aurum illud ignitum, quod aquila cœlestis ostendit, id est, puram veritatis lucem, ipso bonitatis amore feruentem. Sed non facile splendore ardorem, imò potius ardore splendorem prorsus ememus. Siquidem ipsum aurum non quando radiis ignis eminus percutitur, ardet, sed quando ignis calore cominus occupatur, effulget. Neque quoniam igne fulget proprie, sed quoniam igne feruet, penitus fit ignitum. Sic solum, sic & ipsi si boni, id est, Dei solius in primis amore flagrabimus, subito eiusdem splendore lucebimus, erimusque diuini. Deus lux est, Deus charitas est. Cui charus ante omnia Deus est, huic fulget ante omnia Deus. Cui Sol ille fulget per quem omnia fulgent, huic facile passim cuncta refulgent. Huic præterea mirifice dulcescunt omnia, qui nihil vsquam gustat, nisi in ipsa dulcedine, sine cuius sapore dulce nihil effici senti-

riue potest. Quorsum hæc? vt videlicet Theologicis Epistolistuis quandoque vtunque possum Locteri respondeam. Ad hæc enim suspicienda nuper ipse me tuis splendidissimis literis excitasti. Accipe ergo libenter, tua enim ista sunt, qualiacunque sunt. Tibi reddo. Calendis Augusti. M. cccc. lxxxix. In agro Caregio.

*Non est harmonice compositus, qui harmonia non delectatur.*

MARFILIVS FICINVS

Sebastiano Foresio clarissimo compatri, S. D.

**A**Vrelius Augustinus noster scribit in libris de Musica, eum non esse harmonicè compositum, qui harmonia non delectatur. Neque id quidem iniuria. Nempe cum ob similitudinem quandam voluptas effici soleat, necesse est eum qui concentibus non oblectatur, esse quodammodo concentus expertem. Hunc, (si dicere fas est) dicam, non esse à Deo compositum, qui in numero, pondere, mensura, cuncta componit. Dicam præterea, non esse amicum Deo, qui vsque adeò consonantia gaudet, vt mundum ob hoc ipsum creauisse potissimum videatur, quo singula quidem mundi membra & sibi inuicem & vniuerso concinerent, vniuersum verò ipsum authoris sui intelligentiæ bonitati pro viribus consonaret. Addē, quod ipsa sphæras disposuit earumque motus inuicem temperauit, vt (quemadmodum Pythagoricis Platonisque placet) inæstimabilem harmoniam melodiamque conficiant. Plurima in hanc sententiam aliàs disseruimus. Hoc vnum præterea iuuabit commemorasse, quod equidem diligentius obseruari, multos ingeniosos quotidie reperiri, qui his aut illis cæterorum sensuum voluptatibus studiisque natura vix moueantur, nullum vero ingenio præditum vnquam reperimus, qui Musicis modulis non raperetur. Nullum quoque eorum qui non rapiuntur nouimus acumine iudicioque pollere. Huius autem rei causa est præcipue duplex, altera Physica, altera Mathematica. Physica quidem, quoniam media cerebri pars, quam propius respicit auris, iudicio tanquam instrumentum vel incitamentum quoddam quodammodo seruire videtur. Hæc autem quando perfecta consonantia caret, minime omnium consonantia capitur. Quando verò harmonicè admodum composita est, harmonia mirifice tanquam re simili & congrua delinitur. Mathemati-

cāyēd, quoniam Mercurius, (idem quod Poetz ab Astrologis acceperunt) ingenij largitor est, & citharæ faber. Quem ergo nascentem haud benigne satis Mercurius inuenit, videmus ut plurimum tanquam alinum quendam & ad lyram & ad literas pariter apparere. Contra verò ad hæc ambo sese illos habere, qui ab ipso Mercurio lyræ literarumque magistro benigne respiciuntur. Vale foeliciter, mi Foresi, quem & si cæca fortuna minus, tamen perspicacissimus ille Mercurius benigne respexit. Equidem, mi Foresi, postquam tibi modo scripsi Vale, surrexi, properavi, sumpsi lyram. Incepi longum ab Orphei carmine cantum. Tu quoque vicissim, postquam legeris hic iterum vale, (si sapias surge), protinus surge, libens sume lyram, laborum dulce lenimen. VIII. Septembris. M. cccc. lxxix. In agro Cæregio.

*Maledicus non aliter te ledere potest, quàm si faciat vicissim te maledicum.*

MARSILIVS FICINVS  
Ioanni Cocchio, S. D.

**I**Nimicus tuus non ob aliam causam tibi detrahit, nisi ut palam vituperandus appareas, atque animo perturberis. Si moueris & ipse, vicissimque in maledicta prorumpis, habet ille aduersum te tota quod mente petebat. Nam te malum iam reddidit & maledicum & infamem. Prudenter Plato noster de maledicis inimicisque suis non modo non obloquebatur quicquam, sed neque cogitabat quidem, docens nos imitari naturam, quæ contrarium suum à se procul expellit. Sic enim & nos faciemus, si hostes ex ore ac mente pellamus. Adde quòd si & cæteri eadem ratione erga hostes nostros se gererent, prorsus ex omni memoria hominum delerentur. Verum multo diuinius nos Christus, (vitæ magister) instituit, præcipiens, ut benedicta quidem maledictis, benefacta verò maledictis libentissime redderemus. Sic enim facillime & ipsi permanemus indomiti, hostesque domamus. Naturam quoque ipsam sic imitatur, quæ contraria curat, temperatque contrariis, malaque superat bonis. Deum præterea sequimur, qui omnibus vel inimicis suis, id est, impiis iniustisque benefacit gratis, Solem suum pluuiasque inbens super malos æquè ac bonos oriri. Ego quoties ab hac erravi via, toties poenitentia sum affectus. Quando verò omnino securus sum, tunc foeliciter mihi omnia successerunt. Arbitror te præcepta

eadem sequuntur, & tanquam iam sequenti congratulor.

*Cum veritas ipsa sit immobilis & æterna felicitas, soli vere, immobiliter, beatè viuunt qui in veritatis studio vitam agunt.*

MARSILIVS FICINVS  
Sebastiano Saluino amitino suo, S. D.

**A**Ccepi Epistolam tuam de rerum mutabilitate immutabiliter disputantem, immutabiliter, inquam, id est, verè, siquidem immutabilitatem ipsam nihil esse aliud arbitror quàm veritatem. Profecto veritas ipsa vsque adeò immobilis est, ut etiam motionis veritas sit immobilis. Quidnam aliud est veritas motionis, nisi ipsa eius ratio quæ vera eiusdem definitione comprehenditur? Hæc autem ita se habet, ut aliter vnquam se habere non possit. Proinde veritas semper est præsens, neque de præterito transit in præsens, neque de præsenti transit in futurum. Veritas adeò præsens est ut etiam futuri præteritique veritas præsens existat. Quippe eadem veritate verum est in præsentia, hoc aut illud vel esse, vel fuisse, vel fore; quæ & ab æterno verum erit hoc aut illud aliquando fore, & in æternum verum erit, hoc aut illud quandoque fuisse. Veritas adeò sempiterna est, ut etiam si inceperit dicatur quandoque, certe ante ab æterno verum fuerit, & non nisi per veritatem eandem fuerit verum, veritatem ipsam quandoque fore. Ac etiam si vnquam desinere veritas cogitur, deinde in æternum verum futurum sit, atque non nisi per ipsammet veritatem futurum sit, verum, veritatem aliquando extitisse. Veritas si in motione immobilis est, si in præterito & futuro est præsens, si in principio est sine principio, si in fine similiter absque fine, certe nihil est aliud quàm immobilitas ipsa atque æternitas. Mens igitur natura veritatis capax, immobilitatis æternitatisque est particeps. Voluntas quoque natura veritatis auida, immobiliter æternæque voti sui compos effici potest. Vita electione veritatis studio, cultuique dedita, sola immobiliter æternæque foelicissima viuit. Nempe quicumque à veritate veræ beatitudinis fonte impie ingræteque discedunt, interim à beata æternitate miseri decidunt. Qui autem pro viribus accedunt ad veritatem, veræ foelicitatis originem, simul in beatam æternitatem beati resurgunt. Igitur, quem

admodum incepisti, in studio cultuque veritatis viue foeliciter. Soli enim verè beateque viuunt, qui in ipsa veritate veræ beatitudinis fonte viuunt. Soli autem aliquando possunt in ipsa veritate viuere, qui semper quoad fieri potest, veritati viuunt.

*Vbi bonorum viget bonum, ibi solum reperitur omnium medicina malorum.*

MARSILIVS FICINVS,  
& Ioannes Caualcantes, Leonardo Collensi, legitimo Iuris ciuilib Profef-  
fori, S. D.

**A** Nimus noster, vt est apud Platonicos, mediam quandam inter æterna & temperanea obtinet regionem. Atque tanquam vtrorumque particeps, ad vtraque pro arbitrio voluitur. Quando temporalibus sese mergit, primo quidem breuem quandam falsamque dulcedinem sentire videtur, mox longa veraque amaritudine prorsus obruitur. At, cum sese erigit ad æterna, contra omnino se habet. Nempe post breuem quandam falsamque amaritudinem, dulcedine vera & diuturna perfunditur. Quippè cum non temporaneum, sed æternum sit verum æternæ intelligentiæ nutrimentum. Cætera quidem hominum studia, vt plurimum, à diuinis se iungunt, mortalibusve coniungunt, religio autem contra à mortalibus soluit, diuinisque religat, vbi stygiis amarisque saporibus procul expulsis, nectarea nos suauitate perfundit. Si quando aliàs religioni indulgendum fuit hac tempestate est potissimum indulgendum, hoc enim, vt vides, malorum omnium seculum est. Solum verò apud Deum, vbi bonorum omnium viget bonum, reperiri potest omnium medicina malorum. **III.** Calendas Decembres. **M. cccc. lxxix.** Florentiæ.

*Decrescente corporis pulchritudine, crescit animi pulchritudo.*

MARSILIVS FICINVS  
Angelo Politiano, Conphilosopho suo, S. D.

**S**I nunc, Politiane, dixero me literarum tuarum acumen & eloquentiam non mediocriter admirari, aliquis fortè me nimis admirabundum existimabit, quippè cum nouitas tantum cæteris admirationem parere soleat, ego verò

etiam quæ mihi in Politiano iamdudum notissima sunt, videar admirari. Sed reuera non antiqua nunc in te, sed noua demiror. Adcò enim feliciter Politianus meus breuissimo quodam tempore adoleuit, et mutata forma alius mihi iam nouisque appareat. Ergo qui mihi puer non parum, qui multum placuit adolescens, idem plurimum perplacet adultus. Merito crescente in dies forma, creuit & gratia. Atque id quidem ea etiam ratione placet factum, quia sæpè vaticinatus sum futurum. Perge igitur, fac obsecro, vt corpisti, te diuinum, vt simul me facias diuinantem. Quod autem Marsiliana tantis vbique effers laudibus nihil miror, quis enim in propriis laudibus cauendis, non vehemens sit? non accendatur? Quis adcò gustu caret, vt non sibi sua maximè placeant? Retulit nobis Francus quid cum doctis omnibus, præsertim cum Hermolao Barbaro, erga nos egeris, quid petas vt agam? Agam equidem libenter, vtinam belle. Belle certè ago, atque bene, quicquid cum Bernardo Bembo meo ago. Landinus & Caualcantes innumeris te vicissim salutibus obriunt.

*Seditiosas vrbes procul fugito.*

MARSILIVS FICINVS  
Hieronymo Rosso, dilectissimo suo, S. D.

**N** Aldus Poëta noster, postulauit à me tuo nomine, Pauli raptum. Mitto Opusculi huius Archetypum. Tu verò, quoniam Archetypum est, cum primum transcripseris tutò remitte, Naldus hic, simulque Angelus Politianus, alter Poëta noster, multa de me Hermolao Barbaro, multa insuper mihi de Hermolao cecinerunt. Ergo vt tibi accommodum erit latinissimum hunc nostrum Barbarum conuenito, dicito statuisse me, nihil ad eum tanquam præcipuè bonum aliquando scribere non bonum, nihilque in his tantis patriæ malis in mentem nobis venire non malum. Equidem vt plurimum miseræ huius vrbis tædio rusticor. Nec aliam ob causam mœnia hæc interdum reuiso, nisi vt Bernardum Bembum meum visam, qui adcò nobis placet, vt eius causa tantum hoc tempore possim dicere, non nihil Florentiæ esse quod placeat. Idem de Bembo cæteri omnes sentiunt literati. Phæbo Capellæ, & Leoni Michaëliviris clarissimis nos commenda. Kalendis Martiis. **M. cccc. lxxix.** In Agro Regnano.

*Orphica comparatio solis ad Deum, atque  
declaratio idearum.*

MARSILIUS FICINVS

& Ioannes Caualcantes Loſterio  
Neronio Conphilosopho  
ſuo, S. D.

**S**phæra Solis tota, vt Orphici tradunt, animam habet longè quam cætera sphæra præſtantiorem. Quæ per vniuerſum quidem ſphæra corpus vitam motumque exercet, perque omnia inde diffundit. Per globum verò ipſum Planetæ Solis intellectum in primis exercet & viſum. Intellectum quidem per lucem quandam intelligibilem in ipſo Solis centro quin capiti ominantem. Viſum verò per inuiſibilem lucem in vniuerſo Solis ambitu tanquam oculo perlucemtem. Illic vti que ex intelligibili luce fit viſibilis, & intellectu quoque fit viſus, Nihil enim ibi aliud intellectus eſt, quam lux intelligibilis eadem, nihil aliud viſus quam lux ipſa viſibilis. Non aliud eſt, ipſius eſſe quam lucere, non aliud eſt ipſius lucere quam videre, non aliud illuminare, quam facere ſua omnia factaque ſeruare, quam facile eſſendo natura ſua lucet intrinſecus, tam facile lucendo illuminat extra, tam etiam facile illuminando ſua omnia facit & ſeruat. Sed miſſa faciamus in præſentia cætera Solis officia, intimam dumtaxat viſibilemque ipſius Lucem, id eſt, viſum ipſum conſideremus. Illic viſus tam ſummus eſt, quam viſibile ſummum. Viſus per quem cæteri vident, viſibile per quod cuncta videntur. Quonam potiſſimum viſus ille ſe dirigit, vt videat aliquid, niſi in ſemetipſum, in quem & cætera vtcunque poſſunt, intuetur vt videant. Sed quidnam videt præcipuè quando ſe videt? Profectò viſibilem lucem videt, viſibilium omnium colorumque fontem atque originem. Si illic ſummus viſus eſt atque viſibile ſummum, certe ſumma eſt perfectaque viſio. Et quæ differendo trium numero computamus, vnum reuera idemque exiſtunt. Si enim viſus eiufmodi atque viſibile vnum ſunt, vt diximus, conſequens eſt, vt vt viſio quæ tanquam actio quædam media inter vtraque cogitatur, cum vtriſque ſit idem.

Proinde ſi lux illa perfecte ſe videt, certe quantum in ſe poſſit & quodcunque facere ex ſe poſſit, penitus inſpicit. Vt autem cætera quæ innumerabilia ſunt, omitramus, colores certe omnes & facit & ſeruat. Pro vt enim ipſa ſeſe variis modis paſſum per va-

ria ſubiecta diffundit, varios edit vbique colores. Omnes ergo colores in ſe videt, dum ſe videt. Verum ſi lux illa ſimpliciſſima eſt, atque, vt ita loquar, vnicolor, quonam pacto tam multiplex erit atque omnicolor? Nimirum ob hoc ipſum, quia ſimpliciſſima eſt, eſt in genere ſuo & prima & omnium comuniſſima. Si ita eſt, meritò omnes ſui generis gradus in ſeipſa complectitur. Sola enim forma illa in quouis genere, omnino omniformis eſt, quæ in eadem omniformis. Atque multitudo formarum quæ in ſubiectis aliunde formatiſ compositionem diuerſitatemque adducit, eadem in cauſa formatrice eminentem ſignificat vbertatem, virtutemque vnitiffimam (& vt ita dixerim) fortiſſimam.

Cæterum, ne longius peruagemur, quot ſunt in rebus compoſitis colorum ſpecies, totidem ideas colorum lux illa conſpicit in ſeipſa. Prout enim videt ſe primo dumtaxat gradu micabilem, eſt nigri coloris idea, vt autem gradu II. idea fit fuiſci. III. flau. IIII. cœrulei viridiſque. V. cœleſtis & glauci. VI. rubei plenioris. VII. rubei clarioris. VIII. crocei. IX. albi. X. limpidi ſiue nitidi. XI. ſplendidi, ſplendoris denique. XII. Gradus eiufmodi qui in ſubiectis multis aliunde formatiſ multi ſunt, in cauſa vna omnium formatrice vnus ſunt gradus & ſummus. Non aliter quam innumerabiles numeri in ipſa eorum origine vnitates ſunt vnum, & innumerabiles lineæ in centro vno indiuiduo vnum ſunt atque indiuiduæ. Verumtamen lux illa, dum ſummum ſui ipſius inſpicit gradum, conſpicit ſimiliter quot ſequentibus gradibus paſſim queat ſummus gradus ipſe diffundi, quotue inde colorum ſpecies procreare. Eſt colorum cauſa triplex, efficiens, & exemplar & finis. Efficiens, quantum ex ſe ſuaque virtute producit: exemplar quantum ad ſuam illos ſimilitudinem exprimit: finis quantum & ipſa illos ad ſe eleuat atque reducit, & ipſi naturali quodam inſtinctu inde inſito ad ipſius ſimilitudinem, quantum ſpecies capit ſua, peruenire nituntur. Colores in ſubiectis diuiſi quidem ſunt qualitatè, ſitu & tempore: in cauſa verò tribus hiſ modis prorfus vñiti, in ſubiectis præterea confuſi ſunt atque inuicem contrarietate commiſti. In cauſa verò & virtute effectrice tam perſpicacia ſenſus ſingula inuicem diſcipientis, quam voluntate plurima eligentis abſque vlla confuſione diſtincti. In ſubiectis poſtremò imperfecti ſunt, quoniam vndique ſunt infecti. In cauſa verò perfecti prorfus exiſtunt, quantum puriſſimi ſunt atque pleniſſimi. Ergo ſicut in ſubiectis ma-



gis inter se diuisi sunt, sic in ipsa causa magis sunt. Quia priuationem illic aliquam essentiae naturaeque suae non patiuntur. Quares forsitan quoniam pacto in causa distinguantur? Respondeo exempli causa, mysterium illud, adhuc Orphicum sequens, tribus modis colores in ipsa luce considerare. Primo quidem secundum affectum eius & voluntatem. Per absolutam essentiam minime diuiduntur, una enim lux pura ibi sunt cuncti colores.

Per visionem voluntatemque inuicem distinguuntur. Quoniam & videt & vult multis lucem vnā modis permixta subiecta diffundi. Nunquid lux illa propterea composita multiplex euadit, quod multa in se videt posse ex se fieri vultque fieri? Nequaquam. Quippe quum neque per formas multas videat multa, sed per vnā, per vnā scilicet, lucem variorum originem exemplarque colorum. Neque pluribus ad plura cernenda eligendaque visionibus electionibusue utatur. Sed & vnā plura visionē discernat, & vnica similiter eliget voluntate, ergo ratione dumtaxat, id est, perspicacia plurima discernente & voluntate multa deliberante discerni videntur. Non ratione, inquam, oculorum nostrorum, qui hinc in alio illa suspiciunt, sed ratione oculi sui qui ibi in se illa conspiciatque deliberat. Quamobrem respectus illi quibus idae colorum inuicem discernuntur, non à coloribus his oculisue creantur, imò ab ipsa luce tam perspicacissima quam summe perspicua, ab ipsa, inquam, luce sese ad diuersas colorum species referente. Sunt enim respectus ita multi ut sic perspecti atque electi. Eiusmodi verò multitudo in ipso perspiciente & eligente propriè naturae suae simplicitati non obstat. Sed satis iam satis, mi Locteri, in coelestem Solem fiximus nostrum pro viribus, aquilae instar, intuitum. Ergo ne infelicitate caligare cogamur, nostram iam ad nostra aciem reflectamus, ad nostra inquam id est ad ideam nostram Solemque illum supercoelestem, qui arduos amatores contemplatoresque sui perditte caligare non finit. Sed quantum illorum coruscant oculis, tantum eorundem aciem & confirmat & roborat. Quapropter Orphicum mysterium illud si volumus fateri verum, saltem parumper fingamus quasi verum, ut Solem coelestem ita suspiciendo, prospiciamus in eo supercoelestem illum, tanquam in speculo, qui in Sole posuit tabernaculum suum. xix. Decembris. M. cccc. lxx. x. Florentiae.

*Præstat exulem esse quam inspicere patriam percuntem.*

## MARSILIUS FICINVS

Florentinus Bernardo Bembo Veneto Oratori, S. D.

**R**ogas urbanissime Bembe, quam obrem tamdiu Neapolitanus ille noster rusticus esse velit? Quia videlicet Urbanus hac tempestate esse non potest. Si vel posset ingentem, Bernarde, dolorem, quo ipsum urbis istius Neapolitanæ conditio quōdā nō felix; nunc penē mi erapremi, palam securus premere vel saltem sciret cautus reticere, nunquam eius urbis quæ Bembum suum diligit aspectum procul effugeret. Verum in tantis patriæ malis grauius non dolere non potest. Nondatur succurrere, ne dicam, non licet, dissimulare non libet, libet abesse. At inquires forsitan scilicet iis Philosophis labor est, cura quietos sollicitat, equidem (si deus optio) mallet vnā cum Democrito procul ab vrbe, è summo quodam montis vertice Abderitanos ridere dementes, quam cum Heraclito è turris specula lugere Ephesios pereuntes. At verò is ipse est qui Iesum in hoc vno saltem natura quadam potius imitetur, Iesum miseram Hierosolymæ urbis fortem in monte desinentem. Qui rursus Pythagoram, Platonem, Aristotelem modo sequatur deformem aliquando Athenarum faciem procul effugientes. Denique ut Socrates non sit Aristoteles, ut ita dixerim) esse studet. Scis (ut arbitror, quam ob causam Aristoteles post Socratis necem relictis Athenis in Calcidem se contulerit. Kalendis Iunij. M. cccc. lxxx.

*Felix est qui vere gaudet; verè gaudet, qui sola veritate gaudet.*

## MARSILIUS FICINVS

Ioanni Francisco Hippolyto, Iuris vtriusque Doctori, Gazolti Comiti viro clarissimo, S. D.

**F**Ranciscus Berlingherius familiaris noster, literis & moribus ornatissimus, reddidit nobis Epistolam tuam, qua scribis te primum Epistolarum nostrarum librum habere, reliquos cupere. Reliqui quinque sunt; mitto secundum, qui totus in Platoniorum mysteriorum contemplatione versatur. Quamobrem verò sequen-

res perinde ac primus, quem habes, brevibus variisque admodum constant Epistolis. Illos autem mittam ad te postquam secundum hunc abs te recepero, quem obsecro remittas diligentissime. Vnicum enim erat penes nos hoc libri huius exemplar. At tu Epistola tua ingentis amoris erga me plena, ita me tibi subito deuinxisti (ut putarim) vel unicum exemplar fidei tuæ & diligentiae commitendum. Amoris autem mei erga te mutui argumentum quoque esse volui, secundam libri huius Epistolam, quam cum iamdiu statuissem communi quodam titulo (ut sæpe soleo) ad amicos inscribere, nuper inscripsi tibi, utpote in quem vnum parem cunctorum beniuolentiæ beniuolentiam iam contulerim. Lege foeliciter, ac viue foelix, sed ut foelix viuas verè gaude, ut autem verè gaudeas, sola veritate gaude.

*Publica nequeunt recte feliciterque absque diuino auxilio gubernari.*

### MARSILIVS FICINVS

Francisco Berlinghe-  
rio, S. D.

**Q**uantum plerique solent amicis magistratus dignitatesque adeptis congratulari, tantum ego hac in re & Deo vouere soleo, & diuinam amicis gratiam exoptare. Didici equidem à Platone eas artes quæ circa priuata versantur bona, posse sufficienter interdum humana prudentia gubernari; in ea verò facultate quæ publicum curat bonum, gubernatorem esse, faterique oportere Deum ipsum, ad quem pertinet quidem omnium, sed communium publicorumque præcipuè prouidentia, humanam verò prouidentiam in eiusmodi facultate non gubernatricem esse, imò diuinæ gubernationis pedissequam & ministram. Huc tendit mysterium illud Platicum in Protagora, Prometheus, id est, humanam prouidentiam artes omnes præter civilem industriam inuenisse. Hanc enim ab Ioue, inquit per Mercurium, id est, à diuina prouidentia per Angelicas inspirationes quotidie nobis subministrari. Huc tendit & comparatio illa Platonica. Quemadmodum nequeunt à bestia bestię recte foeliciterque absque homine duci, ita neque homines ab homine sine Deo. Quidnam aliud sibi vult propheticum illud? Cor regis in manu Dei, & quocunque vult vertit illud. Quid & hoc Euangelicum Apostolicumque? Non haberes hanc potestatem

nisi tibi data esset desuper. Rursus, Non est vlla potestas nisi à Deo. Quæ verò sunt, à Deo ordinata sunt. Quæobrem Dionysius Areopagita Archægelos humanis ducibus, duces magistrosque præfecit. Hic David psalmis non aliter quam habenis quibusdam regni sui gubernacula temperabat. Sciebat enim, Nisi Dominus custodierit ciuitatem, frustra vigilaturum, qui custodit eam.

Hinc Salomon sapientiam diuinam inducit ita clamantem; Per me reges regnant, & legum conditores iusta decernunt. Per me principes imperant, & potentes decernunt iustitiam. Hinc Romanorum quoque religio, nihil publicum vel pace vel bello absque votis auspiciisque tentari iubebat. Vnde Scipio haud prius publica aggrediebatur negotia quam diuinis votis incubuisset. Scite Oratores atque Poëtæ, eos qui publicis præsunt muneribus, tanquam nauium gubernatores esse aiunt; & quasi semper inter scopulos fluctus procellasque versentur, perpetuo numinum præsidio indigere. Quapropter quemadmodum erga ceteros amicos soleo magistratus adeptos, si erga te amicissimum nunc afficior, nempe in primis Deo pro tua foelicitate voueo, deinde non tam tibi gratulor quam opto, opto, inquam, diuinam opem, ut pie, prudenter, iustè, clementer, & denique foeliciter istum aliosque omnes magistratus agas & peragas. Quod quidem spero te, noui enim ingenium tuum (gratia diuina) consequuturum. Vale.

*Non est communis pater, qui communem filiorum non habet curam.*

### MARSILIVS FICINVS

Bernardo Bembo Iuriconsulto &  
equiti Venetorum oratori  
clarissimo, S. D.

**N**ihil ad te iamdiu scripsi, mi Bembe, quia malignitas temporum nihil prorsus vel audienti vel cogitanti mihi suggererat nisi malum. Ego autem quamuis male scribere non dediscam, mala tamen scribere nondum didici. At nuper hoc vnum audiui, quod probem, modo sit verum. Pastorem videlicet summum celesti consilio fretum, voluisse à grege suo Venetos segregare. Contra verò quid aut audiri aut cogitari prophanus potuisset, quam eam Rempublicam quæ omnium quæ in terris sunt, quæque fuerunt, diuiniior iam censetur, ab ipso Dei vicario, vel oppugnari vel deferi? Proinde tunc

demum cuncta probabo , cum & ceteri omnes de Venetis idem senserint , & Pontifex ipse de ceteris quoque, idest, de Christianis cunctis idem penè senserint quod de Venetis. Cogitarit videlicet atque ostenderit omnem Christianorum omnium esse se patrem diuino oraculo iudicatum. Neque reuera patrem esse qui non habeat filios, neque filios habere reuera, qui filios suos non habet filios. Ego verò non solum pro mea in omnes charitate id opto, verum etiam Pontificem ipsum spero, pro sua pietate, esse facturum.

*Sola illa gratia non senescit , quæ à rebus non senescentibus oritur.*

## MARSILIVS FICINVS

Dominico Gallecto, S. D.

**C**Ogitabam modo diligentius ipse mecum , qua nunc te ratione potissimum obsecrarem obtestarerque , vt necessarium nostrum Conphilosophum Sebastianum Saluinum , si quo pacto potes , in sua causa adiuues. Primum quidem sese mihi obtulit amicitia , cumque ita scribere iam statuissem , rogo te per nostram amicitiam , mi Gallecte , & quæ sequuntur , virtus ipsa me subito sic interpellans , noli Marfilij , inquit , amicitiam , quæ me , scilicet , virtutem sequitur , sed per virtutem ipsam quæ amicitiam ducit & sustinet , obsecrare. Igitur Gallecte mutato consilio statui , & hac in re & in cæteris omnibus non tam per amorem nostrum quam per virtutem ipsam amoris nostri conciliatricem te rogare. Plurimum profectò virtuti gratia debet , quippe cum propter ipsam immortalis euadat. Audisti , vt arbitror , proverbium illud , Nihil citius senescit quam gratia , quæ videlicet à rebus aliquando senescentibus oritur. Quæ verò à virtute semper viridi nascitur , arescit nunquam.

Quidnam aliud sibi vult Poëticum illud , Solis æterna est Phoebo Bacchoque inuentus. Nempe nihil aliud gratia ipsa est quam splendor atque lætitia. Splendor quidem ipse apud Poëtas appellationem Phœbi , lætitia verò Bacchi nomen accepit. Virtus autem & menti splendorem & voluntati lætitiā affert , vinentem semperque vinentem. Vale foeliciter mi Gallecte , atque sicut semper sola virtute fulges , ita semper sola virtute gaude. Præterea quoscunque offenderis , qui sola virtute gaudeant , hos Marfilij nomine saluere iubeto , tanquam

mihi iam notos atque necessarios , alios mittito , nolo enim saluos eos , qui ipsi se saluos nolint , nolunt verò se saluos , quicumque virtutem nolunt , qua salui esse non possunt. Humanæ autem virtutis principium finisque est , meminisse non esse humanam virtutem , absque diuinæ virtutis gratia & amore. Iterum bene vale.

*Commendatio amici.*

## MARSILIVS FICINVS

Florentinus , Reuerendo in Christo Patri , & Domino suo Raphaëli Riario , sancti Georgij Cardinali , suppliciter se commendat.

**I**Am percrebuit Florentiæ constans opinio , Marfilium Ficinum à Raphaële Riario vehementer amari. Atque hæc opinio iamdiu à nostra illa familiaritate nata quidem est , confirmata verò ab Epistolis meis , quæ passim reuerentiæ erga te meæ testes circumferuntur. Quapropter multi me quotidie rogant , vt causas tibi suas commendem. Ego autem ne tibi essem molestior , vnius duntaxat causam suscepi , toto hoc tempore commendandam , Francisci videlicet , Petrucci Presbyteri. Nosti ( scio ) Cæsaris filium , quem cum ob necessitudinem , quæ mihi est cum suis , tum propter virtutes suas tibi non commendare non potui. Tu verò , quamuis in discessu tuo prædixeris , nisi tecum isthuc accederem , nihil vnquam te mihi , aut per litteras ; aut per nuncios responsurum , non tamen minatus es , quominus aliquando affectu & opera responderes.

Ergo , ne sis periurus , si modo id iure iurando firmasti , neque literis , neque nunciis responde quicquam , verum ne videaris à tuo illo ingenio discessisse , pio quandoque affectu saltem & opera respondebis. Sic viri solent magnanimi , qui tantum ipsi rebus , quantum ceteri verbis abundant. Quorum affectum in effectu , potius quàm in verbis agnoscimus. Equidem , si iussis olim tuis , tam parere potuissem , quàm optabam , ita profectò tuo huic nihil tanquam præsentī scriberes sicuti nunc nihil absenti. Sic fato ( vt ita dixerim ) quodam institutum fuisse videtur , vt & ego nullo pacto literas abs te nullas acciperem , & tu verba quidem Marfilio tuo dares nulla , officia dares. Utinam quoque omnes officia dent , non verba.

*Auxilium meum à Domino, qui cælum  
fecit & terram.*

MARSILIVS FICINVS

Domino Bernardo Bembo Veneto  
Iurifconsulto, & equiti cla-  
rissimo, S. D.

**P**ost diurnam rusticationem meam, redij tandem grauib. compulsus negotiis in urbem febricitantem. Hic Mars sæuus Iuliis Kalendis flammam in me geminas iaculatus in vitæ discrimen repente deduxit. Adeunt insignes Physici. Stephanus Mediolanensis, Georgius Cyprius, Antonius Beniuenius, alique nonnulli, omnes in me Apollinis artes, si quo pacto sustinere possem, diligentius experturi. Ego autem cum certo scirem, debilissimam corpusculi mei naturam, neque febres ferre duas posse, Iulio præsertim mense, neque necessaria Medicorum auxilia sustinere, leuauit oculos meos ad montes, vnde veniet auxilium mihi. Auxilium meum à Domino qui cælum fecit & terram. Ergo diuina affante clementia celestis in me aura spirans, ambas simul flammam dum in augmentum procederent, præter omnem Physicam rationem momento prorsus extitit. Stupent Medici, mirantur amici, exclamant ipsi domestici. Cantate Domino canticum nouum, quia mirabilia fecit. Meministi, optime mi Bernarde, quemadmodum iamdiu Deus omnipotens me tibi dedit, quando amicitiam nostram mirifica illa (quam nosti) ratione conflauit. Ecce iterum Deus idem Marsilium Bembo reddit dum vitæ restituit. Totum igitur Deo debemus quod viuimus, quod foeliciter viuimus, quod amamus, quod foeliciter amamus. Viue foeliciter, ama foeliciter. XXIII. Iulij. M. cccc. lxxx. Florentiæ.

*Quatuor diuini furoris species sunt, amor omnium præstantissimus.*

MARSILIVS FICINVS

& Ioannes Caualcantes  
Naldo Naldio Poë-  
tæ, S. D.

**R**editæ nobis sunt elegantissimæ litteræ tuæ, ea ipsa hora, qua Luna Marti ad rectam lineam iungebatur. Quis nam putauisset, quantum ex ipso coelo coniectare licebat, eas lunari quadam instabilitate vagari, atque Martij furoris odique plenas esse debere? Contra verò

omnino se habent. Nempe non infimo Lunæ motu pererrant, sed sublimis Vranæ Calliopæque concentibus mirifice temperantur. Non Martis ardent, sed Veneris igne. Non odio feruent sed charitate. Qua in re plane perspicimus verum esse Poëticum illud atque Astronomicum, Martem scilicet à Venere vinciri atque domari. Verum quoque id Theologicum, diuinum videlicet furorem tanquam celestibus motibus superiorem haudquaquam parere syderibus; sed imperare. Cum verò diuini furoris species, vt Platoni nostro placet, quatuor sint, Amor, Vaticinium, Mysterium, Poësis. Atque amor Veneri, vaticinium Apollini, mysterium Dionysio, Poësis Musis attribuatur. Amor ipse diuinus, quo tu correptus ad nos scribis, omnium præstantissimus duabus de causis iudicatur, altera quidem, quod furores cæteri absque amoris instinctu ad eam ipsam rem circa quam furore animus concitatur, neque comparantur vñquam, neque seruatur. Altera verò, quod amor cum amantem transferat in amatum, quoties ad superiora dirigitur, mentem cum Deo propius quam furores alij copulat. Quod si amatorium hunc furorem tuum pro dignitate laudare aggrediamur, Poëtico nobis furore opus erit. Quoniam verò Musæ nobis in præsentia non aspirant, quod non possumus laudare Poësi, amore certè mutuo probamus, semperque probabimus.

*Qui colit numen, numinis oraculis interest.*

MARSILIVS FICINVS

Reuerendo in Christo Patri & Domino suo Francisco Soderino Episcopo Volaterrano, S. D.

**A**Vdisti olim venerande Pater, veritatem ipsam coram Raphaële Riario Cardinali de institutione Principis; Interprete videlicet Marsilio, perorantem, audi, si placet, hodie veritatis ipsius amorem, id est, Philosophiam eadem fermè de re coram Ioanne Aragonio Cardinali breuiter eodem Interprete declamantem. Par enim est Soderinum Antislitem, quemadmodum duo hæc numina, ab incunte ætate obseruantissime coluit, sic eorum quoque oraculis mysterisque omnibus tanquam legitimum sacerdotem familiariter interesse.

P H I L O S O P H I C A  
principis institutio.

**P**hilosophia mater Ioanni Cardinali Aragonio, dilectissimo filio suo, salutem veram in vera sui ipsius cognitione pollicetur & præstat. Mortales penè omnes, dilectissime fili, adèd mihi cæci videntur, vt vel noctuis interdum quodammodo similes videantur. Mittam in præsentia alia quamplurima humanæ cæcitatæ indicia. Atque cum ad virum in dignitate maxima constitutum orationem habeam, solum quanta cæcitate in rebus eiusmodi mortales inuoluantur aperiā. Principio dignitatem falsa definitione nihil esse aliud iudicant, quàm honore digna nancisci. Ego autem veram dignitatem haud aliter definio, quàm honore digna mereri. Deinde illi tunc solum dominos tranquillòsque fore se sperant, quando plurimis tam rebus, quàm hominibus regendis fuerint occupati. At ego, id quod palam exitus ipse probat, tunc illos & omnium seruos, & omni perturbatione oppressos existimo, quando humeros suos temerè ponderi omnium sustinendo subierint. Verùm quoque illam dominationem esse censeo, quæ nulli seruiat seruo, quæ si quando seruit, tunc soli seruiat illi, qui solus nullius est seruus. Veram rursus tranquillitatem esse arbitror, quæ ita instituta est, vt perturbationes vel nullæ contingant, vel si fortè contigerint, tantum ipsi seruiant, quantum cæteris dominantur. Præterea, mortales vsque adèd insaniunt, vt quando vel sorte vel vitio quodam magna quædam naçi fuerint, repente inde magnos euasisse se opinentur. Perinde ac si quis mente captus, quando aut vestem induit longiorem, aut ædes amplas ingreditur, ob hoc longiorem se factum, gloriatur vel ampliorem. Ego verò contra, magnos certè viros eos solos affirmo, qui res magnas magna similiter virtute gerunt, neque superantur à magnis, sed aut superant aut æquant. Denique illi ad summa rerum fastigia euecti cæteros tanquam inferiores multoque minores, imò velut minimos nihili pendere solent. Cui si quis adèd deliret, vt postquam turrim altissimam ascenderit, tam seipsum altum procerumque existimet euasisse, quàm alta sit turris, atque opinetur quæcumque sub turri despicit verè tam exigua esse, quàm pusilla ab alto prospicienti videntur.

Ego autem illos esse re vera altissimos iudico, quos ob ipsam animi altitudinem, quasi in Olympi vertice constitutos, perturbationum nebulæ non attingunt. Cæteros omnes soleo tanquam infimos aspernari. Eos postremò & acutissime cernere, & rectissime iudicare omnia iudico, qui tanta esse singula, non quanta eminus prospicienti foris apparent, sed quanta intus re vera sunt, iudicant. Eos quoque tanquam magno animo iudicioque viros soleo magnificere, qui haud tanti faciunt singula quanti aliunde apparere forte contingit, imò quæti ipsa sese sua virtute singula faciunt. Ego, Ioannes mi suauissime, tales inuito vulgò mihi filios pario quales audis, ita etiam alumnos meos enutrio. Hac equidem ratione eos à vulgi cæcitate lachrymabilique miseria segrego. Hac maximè via meos à Lethea caligine Stygiaque procella longè semotos eueho feliciter ad æthereum Phœbi lumen, ad Elysiam tranquillitatem, ad immortale Ambrosiæ pabulum suauitatemque nectaream, neque pro tam felici munere aliam mihi à meis gratiam, quàm duos tantum nummos referri postulauim vnquam, vel postulabo: alter quidem est, vt tam libenter à me accipere dona velint, quàm ego dono libenter. Alter autem vt non tam mihi Philosophiæ, quàm sum veritatis amor, quàm ipsi sophiæ, id est, veritati summæ diuinæque, quam amo, gratias habeant. Illa enim me, illa, inquam, veritas me, seu sol ipse lynam, sempiterno replet lumine. Vos autem filij alumnique mei toties illa quæ passim vobis ostendo acutissime cernitis, quoties ea vobis à me quasi luna per ipsos dumtaxat solis, id est, veritatis radios, licet obliquos ostendi rectè discernitis. Profectò filij, sic affecti quandoque per diem in ipso diuino Sole inspicietis, quæ nunc quasi per noctem velut in Luna videtis.

Quorsum hæc? vt memineris, suauissime mi Ioannes, me iamdiu te tanquam filium libenter amplecti, memineris, me ab initio educauisse te sicut soleo meos. Neque plures vnquam abs te nummos pro ipsa educatione quam duos illos, quos paulò ante dixeram exacturum. Vale.

Atque viue, sin beatis vlnis matris huius  
tuæ Philosophiæ feliciter. x x

Augusti. m. cccc. lxxx.

Florentiæ.



*Pius dominabitur astris.**Diligentia circa matrimonium & nuptias  
summa.*

MARSILIVS FICINVS

Laurentio Medici, viro magnanimo, S. D.

**H**odie Laurenti, atque cras caueto tibi. Mars enim sub Capricorno tuo ascendente percurrentes, quadrato aspectu hodie quidem Saturnum, cras verò Solem videtur aspicere. Præterea Saturnus ipse ascendentis tui Dominus nondum solis radios prorsus euasit. Ob hanc ultimam rationem mihi quoque est cauendum; veniebam superioribus diebus ad te, eadem prædicturus, sed obiter succurret, præstare ut in hanc horam usque differrem, ne diuturniore te metu & molestia premerem. Solemus enim sæpè prædictionibus nostris mala vel procul futura anticipare, diu vel interdū fingere non futura. Cū verò miseri censeantur omnes, quibus aliquando sit timendum, illi certè minus miseri, qui breuiore metu sollicitantur. Spero equidem, neque vana fides, eundem syderum hominumq; regem, qui te hæcenus & à syderum minis, & ab immanibus hominum manibus mirificè sæpè seruauit, in posterum quoque pro sua clementia similiter seruaturum. xxvi. Septembris. M. cccc. lxxx.

*Vnum sunt qui ab vno amantur in vno.*

MARSILIVS FICINVS

Locterio Neronio, Comphilosopho suo, S. D.

**Q**ua hora reddita mihi est sapiens illa Epistola tua, Locteri charissime, cogitabam Enigma quoddam Platonicum Ioanni Nesio, eruditissimo familiari nostro id cupienti ea breuitate, quam Epistola postulare videtur, euoluere. Rogavi equidem pium istum Locteri spiritum tuum, in tuis hisce literis resonantem, ne noua nunc à nobis exigeret, sed his quæ iam excogitaueram contentus esset. Annuit libenter spiritus iste mihi. Ego igitur pleniore quadam fide quod amicorum vni promiseram duobus seruabo. Vos autem, dilectissimi mei fratres, Locteri & Ioannes, facile (ut arbitror) patiemini animum à Marsilio vestrum non duos existimari, sed vnum qui certè vos tanquam vnum vno, dumtaxat amore plenissimo, in ipso diligit vno, sine quo nihil vsquam, aut fit, aut permanet vnum.

MARSILIVS FICINVS

Florentinus Berlingherio Nicolai filio, Comphilosopho suo, S. D.

**S**i fortè domum custodiendam, vel seruandum depositum, vel pascendas oues, aut agrum colendum, sis alicui traditurus, eligesne ditissimum quemlibet, vel potentissimum? An potius illum præ cæteris eliges, qui ea ipsa (quam tuæ res postulat) præditus sit facultate? Hunc igitur ipsum duntaxat, si sapiens, custodiendam domum, depositumque seruandum soli prudenti, forti, iusto, fidoque committes. Pastori similiter trades probatissimo pascendas oues. Agrum quoque optimo cuidam agricultori colendum, si sapias, commendabis. Præterea, si quem tibi filium cupies adoptare, nunquid fortunam eius externam, potius quàm ingenium & virtutem considerabis? Empturus seruum, num serui vestem, pluris quàm corporis firmitatem, animique fidem & diligentiam æstimabis? Empturus equum, phalerasne pictas, pulchrumve frænum, an multo magis equi meritbra, dexteritatemque diligenter inspicies? Fundaturus domum, nunquid in arenis, quamuis aureis, an potius in faxis iacies faudamenta? Filia tibi, ut audio, nubilis est, filia his omnibus, quæ suprà narraui, longè tibi charior atque pretiosior, animaduerte quæso, quid facias diligenter. Ibi enim grauissimè erramus, vbi palam semperque reprehendi errata prius quàm corrigi possunt. Ibi periculosissime cadimus, vbi ruenti semel deesse videtur omnis resurgendi facultas. Ibi dolemus amarissimè, vbi & nostra culpa dolemus, & semper opinamur nobis fore dolendum. Quid est autem, filiam nuptui tradere, nisi eam marito custodiendam, seruandamque, & pascendam, colendamque committere? Hæc autem omnia fortuna mariti pollicebitur quidem, sed virtus ipsa præstabit. Nemo magis cæcus, quàm qui cæcam fortunam quasi ducem sequitur. Nemo sapius fallitur, quàm qui fallacissimæ credit fortunæ promissis. Proinde, eligere generum nonne fermè idem est, atque filium tibi aliquem adoptare? Aut hominem emere tibi, qui tibi obsequio, imò & ornamento (quoties oportuerit) esse possit? aut tanquam ædificium quoddam affini-

tatem ipsam tuis commodis stabilire. Superiora exempla satis ostendere possunt, qualem vir prudens generum sit quæsiturus, qualem quoque ducturus uxorem. Epistolam iam una cum Themistocle Plautoque concludam. Siue generum electurus es, ita sapiens Themistocles consulit. Malo virum qui pecunia egeat, quam pecuniam, quæ viro. Siue accepturus daturusque nuntium aut uxorem ducturus (scitis sic admonet Plautus.) Satis dotata venit, si morata venit, Vale.

*Magnos magna decet.*

### MARSILIVS FICINVS

Reuerendo in Christo Patri Domino Francisco Soderino Episcopo Volaterrano se commendat.

**S**cribo frequentes, ut sit quotidie, ad multos Epistolas, sed audi venerande Pater quid iamdiu hac in re mihi contingat, atque id quidem proculdubio nimium. Nunquam meus me stimulat genius, ut quæ scribo ad multos, aliquando ad Soderinum exscribam meum, virum certe perpaucorum. At quoties ad principes & Antistites magnos molior aliquid, ad Cardinales, ad Pontificem, ad Reges, toties munus idem ad Soderinum mittere subito genius ipse iubet atque impellit, utpote qui nescio quid magnum Soderino meo iamdiu augeretur & opter. Forte etiam hac ratione monet, ne putem me magnis vnquam verè satisfacturum, nisi huic vni qui re vera muneribus dignus est, magnis pro viribus satisfecero. Lege igitur nostram hanc quam mitto ad Matthiam Pannoniæ Regem Epistolam, utinam regiam Cura valeditudinem diligenter, rebusque referua secundis. xxx. Nouembris. m. cccc. lxxx.

*Nihil magis adhortatur nos ad virtutis amorem quam species ipsa virtutis.*

### MARSILIVS FICINVS

Bernardo Bembo Veneto, S. D.

**C**um vellem superioribus diebus familiares meos ad ardentem veræ virtutis amorem verbis, utcunque possem, quam breuissimis cohortari, conatus sum pulchræ mentis imaginem ex congrua quadam formosi corporis similitudine Platonice quibusdam, ut soleo sæpe, coloribus pingere. Verum dum pulchri animi

corporisque simul imaginem exprimere conor, inter pingendum ob imperitiam, & inertiam pingendi meam, non tam imago ipsa, quam optabam, exprimitur quam umbra resultat. Umbra verò omnem cogi semper rem ipsam, cuius est umbra, sequi adeo certum est, ut si quis id ignorauerit, is solus non homo esse reuera sed umbra hominis videatur. Igitur umbra eiusmodi, ut idem iam sapius reperam, cum primum apud nos oritur, relicta Florentia, Venetias usque Bernardi Bembi hinc abeuntis vestigia sequi compellitur. Si quando Bembus eam retro versus à tergo sequentem aduerterit, repente in ipsa seipsum, quantum ex umbra datur, cognoscet. Præterea ob similitudinem quandam, subito Hermolai Barbari recordabitur, Hieronymi Pencij nostri, ut arbitror, interea non oblitus. iii. Nouembris. m. cccc. lxxx. Florentiæ.

*Commendatio non vulgaris, Cuius institutio non vulgaris.*

### MARSILIVS FICINVS

Reuerendo in Christo patri Domino Gentili Episcopo Aretino se commendat.

**Q**uicunque Venerande pater intelligunt quam antiqua simul & quam viridis semper sit amicitia nostra, putant Marsilium Gentili suo varias plusquam mille amicorum necessariorumque causas iamdiu commendauisse, nullam tamen hactenus commendauit. Utpote qui, nescio quo siue instinctu siue spiritu, prælagiret, causam Ioannis Mariæ auunculi sui necessariorum omnium dilectissimi se quandoque commendaturum, ipsique auunculo quicquid esse momenti in decem commendationum millibus potuisset, iam designaret. Si igitur huic vni gratificaberis, in hoc vno decies certe millies te mihi gratificatum existimato. Neque tamen id peto nunc ab Episcopo meo atque eo quidem iustissimo, ut ob amicitiam nostram quæ iustitia ipsa cœpit & permanet, aliquid vnquam quid minus iustum cuiquam videri possit, efficiat. Absit, venerande pater, absit procul à nobis quo placeamus homini, Deo interim displiceamus, sine cuius splendore vel gratia neque alia nobis, neque nos aliis, neque ipsi nobis, neque denique Deo possumus vilo pacto placere. Sed de his hactenus. Dici non posset quantum probem Laurentium Medicem Petrum primogenitum suum Gentilis magistri quondam sui disciplinæ dedicauisse.

Spero

Spero enim puerum istum educatione eiusmodi, senem breui vel in ipsa pueritia euasurum. Quo nihil antiquius, nihil magis necessarium Plato noster esse illis existimat, qui reipublicæ gubernacula sunt feliciter accepturi. (Neque id quidem iniuria) Nempe si quælibet ars vel minima statim ab ipsa pueritia nobis discenda est & pro viribus exercenda, nimirum publica gubernatio, omnium artium domina atque difficillima, à teneris vnguiculis, quantum per ætatem licet, discenda est, atque ut ita breuissima pro viribus longissimæ arti & disciplinæ sufficiat, facultas eiusmodi vnà cum ipso spiritu, cum ipsa vita, ut ita dixerim, est inchoanda.

Conandumque in primis, ut qui caput aliorum quasi membrorum futuri sunt, tantum saltem sapientia prudentiaque cæteros superent, quantum caput ipsum subiecta sibi membra, sensuum copia & perspicacia superat, ut rationem ipsam modo prætermiserim solo in capite dominantem. Meminerint quoque semper, nos neque pedibus, neque manibus vnquam, sed solo capite cogitare. Ideoque qui student esse caput, eos necessario, ut & sibi & aliis omnibus cogitare atque consulere possint, nunquam prudentum cogitationum vacuos sed plenos semper esse debere. Alioquin quisquis cogitationum pondus tanquam difficile nimium (dum ipse caput ipsum est) ponere cogitet, ponere simul & caput necessario compellatur. Verum quid ego hæc? de gubernandi facultate prudentiaque tam multa ad eum virum, qui non modo prudentius hæc intelligit quam Marcellus, sed & facit, ergo Vale.

#### Commendatio non vulgaris.

*Nemo ardentius amandus quam qui  
Musas ardentem amat.*

MARSILIUS FICINVS  
Angelo Politiano Poëtæ Homeri-  
co, S. D.

**A** Lamannus Donatus noster iam pridem ore illo Politiane suo, nostri hominem, ore rotundo, altius hunc in modum nostris auribus insonat. Commenda precor per humanitatem, Marcelli tuæ, commendo obsecro per sacrum istum amorem in me tuum, qua obsecratione nulla sacratior, commenda quam primum Alamannum tuum Politiano. Cum verò tam ardentis tamque pertinacis peti-

tionis potius ab eo causas diligenter exquiro, ille similiter rursus ingeminat. Commenda quam primum. Causam autem tam exoptatæ commendationis adhuc explicat nullam. Ego igitur causam eius, qui nullam petitionis suæ causam affert, sine causa similiter tibi commendando. Sed caue Politiane putes præsentem commendationem ob hoc ipsum quod carere causa videatur, esse leuissimam. Ego enim contra ob id potissimum, tibi grauissimam videri volo, nempe summum apud Philosophos in quolibet rerum genere illud habetur, quod in eo ipso genere causam nullam habet, quasi non ab alio villo sed à se ipso dependeat.

Quamobrem commendatio præsens, cuius nulla præter ipsammet tibi adducitur causa, summa apud te commendationum omnium censeatur. Et si Alamannus ipse (sicuti plerumque solent, qui quoduis concitatus efferunt) & clamitat solum, eundemque clamorem sapius iam auribus nostris ingeminat, clamoris autem sui rationes vllas, lingua sub rapidissimo cordis affectu hæsitante, plane explicare non potest, ego tamen indiciis certis adductus, opinor eum infano quodam amore musæ alicuius formosioris accensum ardere iam totum. Atque vehementer optare, saltem gratiam Politiani musarum sacerdotis amicitiamque inire, quo quidem conciliatore amatore amata quandoque Musa facilius potiatur. Omnes ut secum studiis pro talibus annos exigat, & pulchra faciat se prole parentem. Vale, sed antequam Epistolam obsignem, teste Angelo te, prædico huic Alamanno, si quando tanto huic officio meo, minus officiosus gratusque videbitur, quod absit, ei me sic prorsus exprobraturum.

Ah nimis ingratus, dicam, nonne satis à me tibi factum quondam existimabas, si te Musarum saltem sacerdoti conciliauissem? At ego quando re Politiano meo conciliaui, non tam Musarum Sacerdoti quam ipsis Musis (quod multo maius est) videor commendasse.

*Pictura male mentis & bone, item  
ignorantis & doctæ.*

MARSILIUS FICINVS  
Laurentio Medici iuniori viro Magnanimo, S. D.

**A** Vdium Laurenti iamdiu homines malis imburos moribus tibi admodum  
YYy

displicere, audiri & nuper te ob hanc precipue causam placere bonis, quia displicet tibi mali. In illo equidem te valde probo, in hoc autem tibi magnopere gratulor. Nulla enim ad bonum via breuior, nulla commodior, quam odisse malum. Nullum certius sani gustus indicium, quam sapor illos, qui sanitati noxij sunt, aspernari. Nulla vel securior vita vel gloria firmior à bonis prudentibusque amari. Quos enim probi prudentesque viri amant, prauit etiam tandem honorare coguntur. Ut autem mali homines non tantum tibi odio, sed etiam horrore sint, cupio, si modo placet parumper attendere, ac teterrimam miserrimamque flagitiosorum vitam tibi, ut aiunt, digito demonstrare. Talis, Laurenti, est animus moribus peruersis infectus, qualis filua passim sentibus aspera, truculentibus feris horrida, venenosis infesta serpentibus, rursus, quale est mare tumidum, contrariis inter se ventis saeuissimum procellis fluctibusque iactatum, praeterea quale corpus humanum tam extra omnino deforme, quam intus ingentibus diuersorum membrorum doloribus cruciatum. Contra verò, mens moribus optimis ornata, talis est ferme qualis excultus ager & fertilis, quale tranquillum pacatumque mare, quale corpus humanum tam pulcherrimum quam firmissimum. Vidi-  
mus amice primum, quandam malae mentis umbram, deinde contrariam bonae mentis umbram, deinde contrariam bonae mentis effigiem, illam cum primum perspicue cernimus, non vehementer horre-  
re non possumus, hanc verò non mirabiliter amare venerarique nequimus. Quid est autem aliud virum bonum euadere, quam & hanc obnixè sectari simul & ab illa penitus abhorrere? Cæterum dic amabo, optime Laurenti, vis ne quemadmodum malum bonum uè animum paulo ante considerauimus, ita deinceps mentem aliquam ignorantem, rursusque doctam aliam, una mecum clarius intueri? Imò verò desideras vehementer (ut arbitror) atque ego itidem tibi breuiter ostendere cupio. Talis certe est mens ignara veri, qualis Luna quando inter ipsam Solemque interposita terra, Eclipsim patitur, id est, Solis splendore priuatur. Iterum, qualis est nocturnus nubilus frigidus aër, postremo quale corpus humanum cæcis oculis, surdis auribus, linguaque muta.

Contra verò mentem & scientia rerum præditam, & verborum copia pollentem, haud aliter se habere putamus quam vel

Lunam Solis lumine plenam, vel diurnum aërem & serenum abunde lucentem moderate calentem, vel denique corpus acutis sensibus expeditaque lingua quisquis autem imperitam mentem, cum primum turpissimam eius effigiem siue umbram videt, non subito fugiet?

Quicumque verò peritiam, ubi apparuerit, non sectatur ardentem, nihil usquam video quod sectetur. Perge igitur, mi Laurenti, perge quæso, fuge (ut coepisti) iam pridem, heu fuge procul tetram illam & miserabilem improbae ignorantisque mentis imaginem. Eia sectare totis viribus, sicuti facis, magis semper magisque indies, boni sapientisque animi speciem lucidam atque beatam. Ut quantum & ab initio natura, te & deinde fortuna locupletauit, tantum ipse saltem tua te industria locupletes. Ne forte cum cætera omnia tibi ad votum tam natura quam fortuna suppeditarit, aliquando tibi ipse tantum defuisse alicui videaris. Atque cum circa te tua omnia, agri, ædes, suppellectilia, vestes, membra denique corporis, singula splendeant, ferme tanquam stellæ, tu quoque animo & morum literarumque radiis refulgere, non aliter inter hæc omnia videaris, quam inter stellas Sol ipse lucere.

*Commendatio literatorum non vulgaris.*

MARSILIVS FICINVS  
Iacobo Lanfredino ciui legi-  
mo, S. D.

**S**I vulgari ad Iacobum meum lingua scripsero, proculdubio bis errauero. Siquidem & ad virum & ad amicum non vulgarem, vulgaria misero. Ergo Latina, utcumque potero, scribam, modo ne sim Barbarus, dum Latinus malo esse quam Florentinus. Sed quidnam potissimum scribam? Si res meas in præsentia commendauero, forte in amicitia diffidentior sim, minus certe in re familiari confidentior esse videbor.

Sed malo nimis rei familiaria confidere, quàm vlllo pacto amico diffidere. Quamobrem non præcabitur nunc Epistola, sed gratulabitur, haud tamen Lanfredino meo cuius humeris, quamuis robustis, pondus ingens nuper senatus imposuit, imò potius literatis.

Quibus enim humeris Atlas cælum sustinet stellis ardentibus aptum, iisdem certe Iacobus noster viros cœlestium

contemplationi deditos sustinebit. Profecto, cum ipse primum à Musis nutritus fuerit, & deinde filium suum Antonium Musis almis alendum à tenera ætate deuouerit, atque illæ patri feliciter hunc auerint, nimirum utpote Musis gratus omnes earum alumnos, tanquam fratres, ubique libenter agnosceret, eosque omni studio operaque seruabit.

*Non verbis amori, sed fide respondendum.*

MARSILIVS FICINVS  
Antonio Lanfredino, S. D.

**A**Ccepi ab Iacobopatre tuo simul atque abs te literas elegantiz amorisque plenissimas. Quoniam verò læsum sæpe clamantem audio, Ego & pater vnum sumus, idcirco vna tantum patri filioque simul Epistola respondebo. Amor omnis, amici optimi (quemadmodum proverbiū fertur) fidem postulat. Igitur amorī summo erga me, summa quadam fide pro viribus respondere decreui. Quod si vllis perfectæ fides testibus indiget, certè fidei erga vos meæ hoc potissimum mea Epistola testimonium feret secum, volumen ipsum, scilicet à vobis de vera fide compositum.

*Frustra scribit, qui ita scribit ut à nullo intelligatur.*

MARSILIVS FICINVS  
Florentinus Bernardo Oricellario, S. D.

**C**Um meo in libro, quæ de curanda literatorum valetudine nuper composui, multa nouaque de atræ bilis humore, ea qua potui subtilitate disputauissem, non nulli familiarium obiecerunt, me frustra duabus de causis tam multa de hoc humore differuisse. Tum quia fortè nullus comprehensurus ea penitus videretur. Tum quia nusquam felix illa melancholici ingenii temperatio, quam ibi effingerem potius quam narrarem, reperiri posset, haud aliter quam beatus ille Zenonicus, vel platonica illa Respublica vel Tullianus orator. Itaque mi Bernarde grauitè non dolere non poteram, meam hanc diligentiam sue potius curiositatem fore vanissimam. Sed heri Petrus Guicciardinus noster Iacobi ciuis clarissimi filius, & obiectiones illas confutauit facilè, & me ea (quam inde conceperam) molestia liberauit.

Siquidem librum nostrum vno, ut dici-

tur, spiritu perlegerit, tam subito singula comprehendit, tam memoriter retinet, ut & illa omnino intelligi posse ostenderit, & felicissimum ingenium illud à nobis optatum extare iam in eo potissimum, hominem qui ita intelligit meminitque planè monstraui. Et si mihi is vnus sufficit testis locupletissimus. me videlicet, haud vana composuisse, tamen quia iudex duos saltem in causa testes solet exigere, lege precor & tu librum nostrum, optime mi Bernarde, quod quidem si feceris, speio alterum mox meæ causæ testem non defuturum. Vale.

*Quam immundus sit hic mundus, quam falsus, quam fallax.*

MARSILIVS FICINVS  
Loetio Neronio conphilosopho suo, S. D.

**I**Am pridem verus & verax ipse genius noster Marsilium iubet ad Loetium Neronium & virum humanissimum, & amicum verissimum omnium, scribere non nihil quod sit inter humana maximè verum. Verum quærenti mihi eiusmodi aliquid quod tanquam verissimum probari possit, neque facilè satis inuenienti, genius idem ostendit, nihil inter hæc inferiora, cum reuera sint falsa, posse vnquam verius influeniri, quam id vnum, videlicet, hæc omnia, ita ut sunt, proculdubio falsa putare. Quo enim pacto in mundo potest mundanum, ut ita loquar, aliquid esse verum? Cum mundus ipse sit falsus, siquidem est immundus. Fortè cum creauisset Deus eiusmodi globum, quasi rotundum pomum aliquod, quale id quod pomum malum vulgo nominare solemus, videret, quæ esse nimis immundum, utpote qui ex immundissimo chao, ut poëtarum aliquis diceret, esset eductus, statim ab ipsa superficie mundi quasi mali pomi, mundare purgareque cœpit, putamina verò in centrum medium ad nos miseros suo pondere deciderunt.

Si qua igitur in vniverso sunt munda, cœlestibus tantum donata sunt. Nobis autem, sicut par est, non munda, sed, ut ita loquar, quisquiliz quædam & putamina contigerunt. Hinc Christianum illud: Væ terræ ac mari quoniam ad suos cecidit diabolus, ira furens. Rursus, Væ mundo à scandalis, necesse enim est ut scandala veniant.

Hinc illud Platicum, contraria bono mala esse necessarium est, cum verò apud



superos esse mala non possent, regionem hanc inferiorem necessariò circumeunt. Nullumque nobis aliud datur remedium quam hinc illuc quam celerrime purissima quadam vitæ diuinæ similitudine fugere. Nam ( vt est apud Hesiodum ) plena malitellus, plena & sunt æquora ponti. Sed neque coelestia etiam corpora esse purissima Platonici opinantur, si ad illa quæ super cælum sunt comparentur. Nam multo magis quæ sunt super cælum puritate coelestia superant, quam coelestia illa hæc quæ subcoelestibus collocantur. Quamobrem & si non licet idem omnino cum Manichæis sentire de mundo, liceat saltem cum iisdem aduersus eum ita clamare. O immundissimum mundum, qui eos inquinat fœdatque potissimum, qui ipsum au dius, & arctius amplecti conantur. O mundum falsissimum, ingratis simum, qui tanquam totus ( vt ait Iesus, positus in maligno, illis mentitur sapiens, illos fallit magis & maximè lædit qui fidem, spem, amorem obsequium in eo præ cæteris collocant, & quasi anguilla quædam, imò lubricus anguis, infortunatas nimium constringentium palmas celerius quam exprimi possit perlabitur, simul & in faciem eorundem inuolans mordet protinus atque fugit, & absens absentem morfu paulopost perimit venenoso. Verum ne forte declamatores quidam audaciores siue inepti potius videantur, missa hæc oratoria in præsentia faciamus, & quibus potissimum rationibus primum, deinde quorum præcipue autoritate freti, hæc de immunda mundi huius inferioris machina sentiamus, in medium ea breuitate ( quam exigit Epistola ) producamus.

*Anima in corpore dormit, somniat, delirat, agrotat.*

**E**xperimur in nobis non solum quotidie, verum ferme quolibet hora, quoties pauculus quidam vapor aliquanto crassior, & humidior ab inferioribus corporis partibus exhalans caput ipsum petit, cerebrique meatus opplet, statim nos somno grauari, mox etiã in somniis imaginibusque deludi. Experimur quoque nonnunquam ( si vapor aliquis bilis atræ, quam melancholiam græci vocant, arcem corporis obsederit expugnaueritque ) statim reginam inde nostram, ipsam videlicet rationem ( vt ita dicam ) præcipitari, ac manifesta homines insania corripiri. Si sumus quidam exigui tantam in nobis vim habet, si tam levis motus nos tantum

mutat, quanto magis censendum est celestem immortalemque animum, quando ab initio ab ea puritate qua creatur, momento delabitur, id est, quando obscuro terreni moribundique corporis carcere clauditur, tunc ( vt est apud Platonicos ) è suo illo statu mutari? Quippe qui tunc non vno & consueto tantum humoris aliquius fumo, sed omnibus pariter nouisque humorum omnium vaporibus, atque ipsa insuper humorum membrorumque insuetam mole grauatur.

Præterea informi illa materia quæ à formosissima mentis forma diuersissima est, tanquam flumine submergitur. Quamobrem totum id tempus quod sublimis animus in infimo agit corpore, mentem nostram velut ægram perpetua quadam inquietudine hac & illac sursum deorsumue iactari, nec non dormire semperque delirare. Pythagorici & Platonici arbitrantur, singulas mortalium motiones, actiones, passiones, nihil esse aliud quam vertigines ægrotantium, dormientium somnia, insanorūq; deliramenta, vt non iniuria Eurypides hanc vitam, vmbre somnium appellauerit, proinde cum fallantur omnes, tamen minus falli solent, qui interea quandoque, vt interdum fit in somno, suspiciantur, secumque ipsi dicunt, forsitan non sunt vera, quæ nunc nobis apparent, forsitan in præsentia somniamus. Quicumque inter somniantes sic est affectus, talis certe est ad alios, qualis apud inferos ab Homero dicitur esse Tiresias, solus, inquit, iste sapit, cæteri vero omnes velut vmbre volitant, imò vmbre volitant.

Hinc diuinis David in excessu mentis exclamat; Omnis homo mendax. Hinc sapientissimus Salomon parumper ante alios expectatus & resipiscens vociferatur; Vanitas vanitatum, dicit Ecclesiastes, vanitas vanitatum & omnia vanitas. Hinc Hieremias ita sapientes insipidos admonet: Vidit Deus cogitationes hominum vel sapientum esse vanas. Hinc Christus vitæ magister, Non est, inquit, ex hoc mundo regnum meum. Christus ipse cum esset omnium rex æternus, vt pote & per quem & ad quæ facta cuncta fuissent, ideoque esset hæres ab æterno rerum omnium constitutus, tamen quæcunque sub rapidissima cœli vertigine absque vlla stabilitate fluunt, atque aduersa quadam mixtione contrariorum confunduntur & prorsus inficiuntur, talia, inquã, Christus sua esse negauit, quasi talia reuera non sint, sed falso nobis esse appareat, ægrotis videlicet &

dormientibus atque delirantibus, cum hæc temporanea haudquaquam res ipsæ sint, imò rerum umbræ duntaxat, rerum scilicet æternarum. Quicumque verò simulachra pro rebus ipsis admittunt, hi sine controuersia tanquam ebrij vel phrenetici vel dormientes, umbris & insomniis illuduantur. Hi nimirum, errant obscuro sola sub nocte per umbras, Perque domos Ditis vacuas & inania regna. Plutonium, inquit Orpheus, insomniorum populo apud inferos dominari. Inferos autem Pythagorici omnem sub Luna regionem præcipuè nuncupant. Noluit Christus noster, ut arbitrator, se somniorum deliramentorumque regem similiter appellari. Iure igitur optimo mundi huius inania regna respuens, ita nostris auribus insonare videtur. O demones nimium mortalium mentes, o pectora cæca, quo ruitis? Quid tam trepide hinc expauescitis phantasticæ mentes? Quid anxie inde sectamini? heu miseræ nonne videtis? Insanus ubique vos agitat furor. Hinc falsæ malorum umbræ vos terrent, inde vanæ rapiunt umbræ bonorum, passimque inter ludicra semper & terribilia iactamini. Neque minus bonorum vana cupiditas quam falsorum formido malorum sollicitat incensos furis animos & fatigat. Vnica verò tot tantisque morbis medicina est, diuino medico credere vel exergisci prorsus, & vigilare semper, vel saltem eos qui dormiunt, dormientes existimare. Quamobrem surgite iam è somno miseri tam profundo, surgite, inquam, ex infelici somno feliciter, respirate filij tandem, vigilate, filij, mecum, respiscite iam & sapite mecum. Ut eadem qua & ipse quandoque ipsi quoque pro viribus felicissima luce & veritate fruamini. Aut saltem interea donec exergiscamini, inter dormiendum nonnunquam ita vobiscum dicite. Forsitan non sunt vera quæ nobis occurrunt, forsitan somniamus. Sic enim vos insomnia vestra vel quæ bona videntur, minus fallent, incendent, defatigabunt, vel apparent mala, minus certe terrebunt.

*Res vera sunt in mundo inuisibiles, in mundo  
verò visibiles sunt umbræ rerum.*

**O** Peræpretium fore arbitrariam Platonis ipsius verbis ex septimo de Republica libro translatis, mysteria quæ supra narrauimus, confirmare. Finge, inquit, quandam sub terra speluncam, in ea homines nutritos à pueritia ita ceruicem & manus à tergo pedesque columnis qui-

busdam alligatos, ut neque moueri vquam, neque alia nisi quæ è conspectu in opposita speluncæ parte apparent, aspicere possint. Post tergum verò superne lampas accensa sit, atque inter lampadem & illos qui ligati sunt, alij multi deambulent, loquanturque inuicem, ferentes manibus varia arborum animaliumque simulachra. Qui igitur ita vincti sunt, nunquam reuera vel se ipsos vel alia eorum quæ narrauimus vlla videbunt, sed solas vel sui umbras, vel aliorum quæ propter ignem à tergo accensum tantum ante suos oculos in aduersam partem speluncæ resultant. Quamobrem nihil aliud aut se esse quàm sui umbras, aut alia aliud esse umbras illorum, existimabunt, aut lumen ipsum esse aliud quam exiguum illud quod ibi reflexum apparet, opinabuntur. Siquis autem horum qui vincti sunt forte solvatur, subitoque lampadem & alia sub illa quæ sequuntur à tergo retrouersus intueri cogatur, caligabit protinus & dolebit, ac propter splendorem intueri non poterit illa quorum umbras paulo ante cernebat. Multoque magis id illi malum contingeret, si à spelunca sursum ad coeleste diurnumque lumen repente trahatur. Quare non subito sed paulatim conuenientibus gradibus ab umbris rerum ad res ipsas, item à luminis imagine ad lumen ipsum est perducendus, ita ut quæ in spelunca sunt apud illos prius illic in aqua videat quam ibidem in se ipsis inspiciat. Rursus quæ extra speluncam apud nos sunt primo noctu hic ad Lunam in aqua similiter, deinde in se ipsis terrena hæc similiterque in cælo cœlestia noctu itidem solum intueatur. Postera verò die tam Solem ipsum quam quæ sub Sole videntur prius in aqua, post in se ipsis illa demum Solem in cælo suspiciat. Hac potissimum ratione singula sincere facileque discernet, atque existimabit se cæcum, deceptum, miserumque fuisse, quando sub specu vinctus exiguis rerum umbris fuerat occupatus. Proinde quæ comparatio est speluncæ illius ad hunc mundum quem visibilem nominamus, eadem ferme mundi huius, ad illum quem inuisibilem diuinumque vocamus.

Siquidem hic animæ miseræ moribundi corporis clausæ tenebris & carcere cæco, neque alia vlla reuera, neque verum Solem, imò sui aliorumque umbras & exilem quandam veri Solis imaginem intuentur. Veræ enim mentes, veræ res quælibet, verus Sol, in mundo solum sunt inuisibiles, quæ si absque congruis educationis disciplinarumque gradibus, repente intueri conemur, caligamus

Protinus & dolemus. Conuenientibus uero tum morum, tum doctrinarum tum temporis perducti gradibus, sincerè discernimus iudicamusque cæcos illos & miseros, qui falsis mundi huius umbris imaginibusque falluntur, occupantur atque premuntur. Verumtamen quando animus ab immenso inuisibilis mundi lumine in corpus obscurum regendum mouendumque descendit, nouis suæque naturæ contrariis obrutus tenebris, cæcutire hallucinarique & diu titubare compellitur. Adde quod propter repentinam maximamque in deterius mutationem diu cogitur ægrotare, atque ferme sic affici, ut ij qui propter amentiam vel somnum vel ebrietatem falsis imaginibus illuduntur atque vexantur. Aut certe non aliter se habere, quam si quis à Solis lumine in cauernam illam quam descripsimus, repente præcipitetur. Ad eò enim nouis tenebris offundetur, ut aut nullo modo aut uix tandem sub exiguo illo cauernæ lumine, umbras illas tantum quantum narrauimus discernere possit. Præterea ob solutam illam & in peius mutationem in morbos tam sensus quam corporis varios incidet. Hactenus Plato. Gaudeant ergo mortales, temerè nimium gaudeant absque inuidia, quando in scænis uel inopes ipsi personis diuitum induuntur, uel etiam cum serui sint, tamen regum ibidem referunt maiestatem. Doleant, quoque frustra sed non absque misericordia quadam doleant nimium, quando in tragœdia nonnunquam, alioquin ipsi forte non miseri, tamen miserorum eiulantiumque gestus agere atque ægrotantium laruas gestare iubentur. Nos autem si uanos illos miserosque prorsus existimaremus, qui decipiantur ad eò ut tanquam in ueris bonis malis uè, sic in scænis modo gestiant & exultent, modo etià lamententur, multo certe uaniores ac inferiores mortales omnes esse censebimus, qui somno profundissimo consopiti umbratilia bonorum malorum uè simulachra pro ueris bonis aut malis accipiunt, præcipue quoniam & si falsis atque uolantibus, tamen id quod admodum miserabile est, falsis mobilibusque malis & uerè dolent & diutissimè cruciantur, & merito quoniam usque ad eò stulti se falli permittunt, ut anxiam hanc cœlestis immortalisque animæ habitationem in terrena regione mortis ueram esse uitam existiment, quam tamen manifeste uident à fletibus uagitibusque statim auspicantem perperuo deinceps, quærimonia & extrema miseria confici. Contra uerò, quando animus immortalis

mortali solutus corpore reuiuiscit, tunc mortem subire putant, quod falso nimis putant, tunc enim solum crebra morte iam mortua, uera uita & sempiterna resurgit. Quapropter non absque ratione apud Gymnosophistas Indorum Philosophos, atque etiam apud Getas Thraciæ populos, lugebantur puerperia, natique descebantur, funera uerò festa erant, & ueluti sacra lusu cantuque celebrabantur. Quod quidem ab Hesegia & Plotino Philosophis confirmari uidetur, opinantibus optimum esse mentibus moribundum corpus non ingredi, proximum uerè postquam ingressæ fuerint, statim egredi. Sed de iis aliàs. Interea accedit alius quidam rursusque alius error, nempe uel peregrinationem hanc tam sollicitam laboriosamque, stulte nimium suam esse patriam opinantur, uel saltem & si peregrinari se didicerunt, sperant tamen interdum aliquam in ipso itinere se quietem consecuturos, cum tamen ab ipsa rapacissima cœli vertigine, iam satis superque admoneri & possint & debèant, se ne momentum quidem unum sub rapidissimo cœli cursu posse quiescere, quando quidem momentum quietis ullum ipsa mundi machina naturaliter unquam habeat. Ergo errare multum à uero mortales miseris iam & agnoscant & desinant. Sic enim iam proculdubio desinent laborare. Ergo incipiant quandoque, imò uerò quam primum sapienter uiuere, nam ita demum uerè uiuere incipient atque feliciter. Vale. III. Decembris. M. CCCC. LXXX.

*Marsilius Ficinus Florentinus fugit Florentiam congratulari Danti, pia Christophori Landini opera, iam rediuiuo & in patriam restituto & coronato.*

**F**lorentia iam diu niesta, sed tandem læta Danti suo Aligherio, post duo ferme sæcula iam rediuiuo & in patriam restituto ac denique coronato congratulatur. Vaticinatus es quondam mi Dantes in exilio constitutus fore tempus quo pietas superans impietatem, feliciter te patriæ redderet, atque in excelsa Baptistæ Ioannis & desertis Apollineis coronaret. Non frustra augurium nam docuere parentes, si quidem nuper tuus pater Apollo, & longum fletum meum & diuturnum tuum exilium miseratus, mandauit Mercurio ut pie Christophori Landini diuini uatis menti prorsus illaberetur, Landinosque uultus indutus, alma primum uirga dormientem te suscitaret, deinde alarum remigio te su-

blatum menibus Florentinis inferret, denique phœbea tibi lauro tempora redimeret. Hodietandem diuinitus impletum est mandatum Phœbi, Mercurij Landinique pium opus, vaticinium Dantis, Florentiz votum. Venisti tandem iter monstrante Minerua, viæ duce Mercurio, clarissima poetarum omnium comitante caterua.

Denique ingredientem Gratiz feliciter exceperunt, amplexus & oscula tibi Pierides, tibi Nymphæ dedere. Venisti tandem modoque expectata parenti. Vicit iter durum pietas, datur ora tueri, Nate, tua, & notas audire & reddere voces. Sic equidẽ ducebam animo rebarque futurum, tempora dinumerans, nec me mea cura fefellit. O quam pulchriorem quamue beatior nunc te dulcis nate recipio quam amiserim? Conuersus est tibi mortalis prior ille vultus in immortalem atque diuinum. Conuersa Florentiz tuæ nox in diem, conuersus Florentinis tuis mœror omnis in gaudium. Gaudete omnes & exultate felicissimi ciues, quibus iam mirabiliter

pro vno Sole Sol geminus oritur, neque flammis tamen sed radiis geminatis. Hodie felicitati vestræ cœlum ipsum, (nonne videtis,) apertissime gratulatur. Suspiciat o ciues parump̃er, suspiciat cœlum. Ecce nunc ecce dum noster hic coronatur dantes, panditur interea domus omnipotentis olympi. Empirei cœli flammæ nullis amplius visæ hodie nobis manifeste coruscant, coronato Danti gratulabundæ. Proinde quemnam putat esse tamen hunc, tam nouum tam dulcem sonum, aures nunc nostras implentem? Profecto sonus sphaerarum Musarumque nouem nullis aliis auditus sæculis, hodie palam coronationi Dantis applaudite dulces dominationum cantus a Phœbi globo, audite rursum miros archangelorum Hymnos, ab ipso Mercurij globo canentium. Gloria in excelsis Apollini summo. gloria Musis semper, gloria Gratiis, pax, lætitia, felicitas Florentinis, gemino iam Sole gaudentibus.

F I N I S.

# MARSILII FICINI FLORENTINI.

EPISTOLARVM

LIBER VII.

MARSILIUS FICINUS FRANCISCO

*Berlingherio Nicolai filio, literis & moribus ornatissimo, S. D.*

P R O O E M I V M.



Iber Epistolarum nostrarum septimus, caput habet Epistolam de curanda literatorum valitudine disputantem, ab eaque tanquam & optima & omnium maxima iter auspicatur, quo præcipue ipsa ducit, eodem ipse

libentissime proficiscitur, hæc verò ad illum in præsentia ducit in primis, cui academia prosperam valitudinem in primis exoptat. Salue igitur optime mi Francisce, salue toties quoties non hic solum, sed omnes Epistolarum mearum libri saluere iubet amicos, sed ita salue, vt saluere ipsum

non à Marfilio tamen, sed etiam ab academia tota amantissima tui accepisse te putas. Omnia inter nos, ( Pythagoricorum more ) communia. Quod ipse volo cuncti volunt, quod cupiunt iunguli, & ipse percipio. Neque id quidem mirum videri debet, nam omnes in eo vnum sumus qui ipse vere solus est vnus. Omnes in eo sta-

mus, qui sua virtute permanet solus, omnes in eo amamus inuicem, qui solus est propter seipsum amandus. Sic cuius solius causa singuli sunt amabiles, & cuius gratia tamen sunt amandi, soli qui se inuicem in vno hoc amant, exclamare vnà cum Prophetà posse videntur, O quam bonum, & quam iucundum habitare fratres in vnum.

## MARSILIVS FICINVS LECTORI, S. D.

**P**romittebam modo, lector, huic libro septimo caput Epistolam de valetudine literatorum disputaturam, hæc verò deinceps ad eò nobis excreuit, vt non iam

caput tam exigui corporis, sed ipsa seorsum totum aliquod corpus fore velit. Itaque secessit iam consilio meliore, si in librum de vita feliciter adoleuit.



## SAPIENTIA A SOLO DEO.

### MARSILIVS FICINVS FLORENTINVS

Ioanni Caualcanti amico vnico, S. D.



Ar amice saltem pari referto. Vix quidem à me scripta, vix tu quoque legito. Scripta tamen qualiacunque sint, lege tamen, vtcunque legas. Sumpsi equidem

his diebus sæpe calamus eo preposito vt ad hominem multa cõgitantem pauca scriberem. Verum subito succurrebat, me scripturum frustra ad hominem non lecturum. Tandem frustra loqui malui, quam nihil loqui. Audi igitur. Multa sunt apud Poëtas figmentorum-genera. Sed quid ego nugis nunc hisce meis pium hominem interpello? in ipsis Augustini Soliloquiis commentãdis cum Deo solo loquentem. Missa igitur Poëtica facio, atque id tantum in præsentia monco, vt memineris quando sermonem formamus, non tam linguam quæ aliunde mouetur loqui solere, quam mentem ipsam quæ & mouet linguam & distinguit voces, & ad exemplar sui verba pro arbitrio format. Quod autem est ad mentem lingua, id fermè religiosa mens est ad Deum. Itaque non tam mens nunc tua Deo quam Deus per mentem tibi tuam loquitur. Quapropter quãdo Deo te loqui putas, mi Ioannes, re vera tunc audis Deum. Memento igitur, te diuinam maiestatem frèquenter audire, vti quæ ipsa sapientissime instituta, declarã nobis atque ( vt capisti ) confirma te tan-

quam discipulum diuinam ipsam sapientiam audiuisse. Volui hic ( vt vides ) hac hora dièi tertia Epistolæ finem imponere, nediutius diuinum istud Soliloquium tuum inturbarem, sed cum primum calamus posuissem, rediit in mentem non decere stomacho omnino ieiuno, ieiunam prorsus Epistolam spũere. Sed vt eructet cor meum verbum bonum, bonum quidem, vt arbitror, si superiorem illam de summo bono sententiam breuiter confirmauero. Omnes apud Iudæos Christianosque sacræ literæ clamant, sapientiam, nisi docete Deo, disci non posse. Ideoque ab eo solo esse fide quærendam, spe petendam, charitate pulsandam. Quod quidem cum Plato noster animaduerneret, suis studiis non confusus in quotidianis ad Deum precibus solam à Deo solo sapientiam sæpe poscebat. Hac in re pulcherrimè fabulatus Orpheus, sapientiam solo Iouis summi capite natam canit. Musas quoque ab Ioue habere principium. Iouis omnia plena. Tu verò si ab omnibus hanc adipisci posses, forte & si non absolutè, tamen comode à familiari illo tuo consequeris. At quonam pacto ab illo sapientiam consequeris, cui corpore nunquam sano mens semper est insana, & nuper cum animi primum deinde stomachi, postremo membrorum omnium debilitate non mediocrius laboraret, animo non mutato mutauit cœlum, & quoniam ab aère elemento-



rum rerumque omnium infirmissimo firmitatem querit, merito hactenus frustra querit. Tu verò interim vnà cum Aurelio tuo clama, o Deus omnipotens, quando nostra firmitas ipse est, tunc solum ipsa firmitas est, quando verò tua est, tunc est infirmitas. Ego quoque tandem idem efficiam.

*Vbi sapientia maior, ibi sermo breuior.*

MARSILIVS FICINVS  
D. Bernardo Bembo Veneto, S. D.

**S**olent qui filuere diu, cum demum diuturna silentia rumpunt, erumpere largius, & quasi qui diutius parturierunt aliquem tandem cogitationis fœtum parere grandiore. Marsilius verò tuus contra, non enim longo silentij tempore concipit longiora. Vtpote qui quanto diutius tacens secum ipse cogitat, tanto discernit acutius præstare nobis tacere quam loqui. Atque esse quam paucissima quæ exprime-re vel digne sciamus, vel debeamus honestè, vel tutò possimus. Ergo tuis tantum in præsentia breuissime respondebo. Primum quidẽ de prosperitate tua imò nostra gaudeo, felicitatem opto, deinde verò quod vasculum Theriacæ miseris, magnas ago gratias, certe ingentes acturus, quando vas pro vasculo miseris. Quanquam ingens in hoc etiam salutari vasculo minus me ab ipso Phœbo simul atque à te accepisse confiteor. Postremo, quod petis Alcinoum, scito hunc apud Caualcantem nostrum hoc tempore rusticari. Cum primum ad nos redibit, vobis (vt par est) redibit.

*Et si literis quandoque, nunquam tamen animo ab amicis abesse licet.*

MARSILIVS FICINVS  
& Georgius Antonius Vespuccius,  
Ioanni Baptistæ Boninse-  
gnio, S. D.

**P**lato diuinus amicitiae vel potius necessitudinis nostræ conciliator, iamdiu iubet ne abesse vnquam à Boninsegnio nostro velimus, qui cum ille semper esse nos voluit. Vt ergo Platoni simul atque necessitudini satis pro viribus faceremus, sæpe iam nos accinximus ad scribendum. Verum quoties calamum sumpsimus, toties conciliator ille noster inhibuit, id aperte monens, ne Boninsegnium assidue cum illo loquentem literis nostris interpellemus.

Quid igitur faciemus, dum Plato noster & mandat simul & prohibet? certe vt & quicquid imperat impleamus, ipso semper animo tuum animum alloquemur, & simul quicquid interim prohibet, deuitemus, ore calamoque filebimus. Sed liceat nunc saltem interpellare parumper, Platonem videlicet semel id concedente, dum ab Athenis ad te in ipsa eius academia rusticante accedimus, teque Platoniorum omnium nomine salutamus. Præterea Roberto patri tuo insigni istic Præsidi nos commendamus.

*Qui umbram amat, transfertur in umbram.*

MARSILIVS FICINVS  
Florentinus Antonio Hyuano Se-  
rezanensi, S. D.

**R**eddit mihi est Epistola tua Hyuane charissime, qua multa paucis de optimo viuendi genere colligis. Optimum verò viuendi genus id præcipue iudicare te arbitror, quod longe sit à mortua vita semotum, qua & mortale viuit, & quodammodo moritur immortale, quamdiu videlicet coelestis animus tereno corpori non solum natura semel coniungitur ab initio, sed affectu etiam quotidie mancipatur. Quo efficitur vt solus vere viuatur, qui à falsa hac vita affectu saltem, remotissime viuit. Quam verò falsa hæc vita sit, quam fallax, Platonica hæc tecum Epistola disputabit, quam ad Loëterium Neronium superioribus mensibus scriptam, tunc quoque ad te libenter exscripsi. Vale.

*Excusatio quando non salutaris amicus.*

MARSILIVS FICINVS  
Ioanni Caualcanti amico vni-  
co, S. D.

**R**usticari, Ioannes, hoc autumnus, scio equidem quo affectu, sed nescio satis qua ratione, volebam. Verebar autem ne nunc primum, quod ego vellem, ipse nolles. Ergo rus abiens, quasi iam rusticus, non dixi, Amice vale. Ne tu contra, omine quodam minus bono, forte, ne valeas, responderes. Scis enim quam interdum (vt vulgo dicitur) auguriosus sim. Haud facile sperauisse me posse vnquam valere bene, heroe semel prohibente valere, Bene vale. Ac me firmioris valetudinis gratia dies insuper aliquot rusticari, permitte.

*Agricultura literarumque studia inuicem  
feliciter coniunguntur.*

MARSILIVS FICINVS

Laurentio Medici viro magnanimo, S. D.

**C**um hodie oriente Sole, summa vetusti montis fastigia peterem, montis, inquam, Vecchij, quem Marfilio suo colendum Cosmus ipse mandauit; atque in hac huius sylua passim oberrans Caregiana palatia contemplerer, repente venit in mentem, festum Cosmi Damiani, que diē iā illuxisse, quod singulis annis ab ipso Cosmo eiusque filiis & nepotibus celebratur. Hic equidem non potui non dolere dum inde nullos usquam perspicerem ciues ad Cosmica (ut fieri solet) solennia confluentes. Cum subito Iouius ille Cosmus cui Iupiter iam conciliata Iunone ciuile imperium sine fine dedit, ab excelsa quercu propitius nobis aspirans, eiusmodi moerentes oraculis consolatur. Sacra, inquit, hodie, Marfilij, mea Laurentius quidem urbana pius instaurat, tu verò rustica mox, si mihi parueris, eadem hoc in luco nobis instaurabis. Neque te pudeat seniores istos Saturniosque agricolas meos sub montis huius vertice in ipsa academiola Phoebo sacrata conuiuas excipere. Quandoquidem hodie (sicuti vos astronomia docet) suspice iam, nonne vides? hodie Saturnus in caelo Phoebusque iunguntur. Hæc est Marfilij voluntas nostra, sicut in caelo fit hodie, ita fieri & in terra, ut Apollinea nunc trobique Saturniis coniungantur. O felicissimum genus humanum, si rustica Saturnij fistula Panis yrbanae phœbi citharæ consonaret, semperque vtriusque apud nos Dei munera iungerentur. Miscentur hæc in caelo (ut vides) apud superos hodie. Tu quoque apud homines sepe miscebis interris Vale. Vera hæc ferme (ut narro) sunt magnanime Laurenti. Ita ego primum recordatus mecum ipse moerebam. Ita deinde visus est & solari & monere me Cosmus. Ita demum Apollineum, id est, philosophicum Saturniis hominibus, id est, senioribus agricolis tuis paraui conuiuium, neque id quidem absque delphica lyra. Atque solennia Cosmica qualicumque pro tempore, pro loco, pro facultate potuimus, in phœbea Saturnij montis academiola libenter feliciterque celebrauimus. Quorsum hæc? Ut oraculis Cosmianis admoniti meminerimus (si feliciter vinere volumus) cæteris quoad fieri potest dimissis vel inter-

missis, Phœbum nobis simul & Saturnium Pana colendum. Rustica videlicet omnia quotidie dicanda Musis, Musasque vicissim ab urbanis negotiis ad Cereris agros Bacchique colles sæpissime transferendas. Vale feliciter.

*Inuitatio ad rusticandum.*

MARSILIVS FICINVS

Ioanni Caualcanti Amico amico, S. D.

**A**Vra qualibet leuiorem te esse putarem, si forte putares ipse me leui quadam commotum aura, tum Vere superiore tum autumno præsentis, ab vrbe in colles secessisse charegianos. Sed absit ut eum vlllo pacto leuem putem qui vel saxis est grauior. Nempe cum non absque ratione iudicauiissem, multo satius fore te huc ad me montem ascendere, quam me his temporibus ad te è monte descendere, sæpe Apollinem obsecraui, ut lyrae nostræ illa nunc Orphei Amphionisque dictaret carmina, quibus illi quondam quercus & saxa mouebant, quo ipse te arboreum, meo iudicio, saxumque traherem? Respondit Phoebus. Erras, Marfilij, nimium, non enim arboreus, aut lapideus (ut opinaris) est Ioannes, alioquin iam pridem tua illum (mihi crede) cithara rapuisses, non lapideus, inquam imò ferreus est Ioannes. Hoc ergo maioris est artis opus. Quare posthac non loco, sed forma mutare saxa conabere. Ingens istud Vecchij montis saxum (si potes) metamorphosea Zoroastris arte transferas in magnetem, ita demum ferreum illum huc hominem attrahes. Hæc modo nobis, oriente Sole, in ipsa Vecchij montis silua deambulantibus Apollo consuluit, Hæc igitur in præsentia molior. Vide precor amice quam ardua tui gratia moliar. Vide quam frustra te cogente laborem. O quanto melius, quantoque facilius te sponte Ioannes mutari tua, quam meo saxa labore mutari. Cum primum ipse ferreus esse desieris, tunc ego frustra laborare iam desinam.

*Amicitia inter pares libera est.*

MARSILIVS FICINVS

Alberto Lisco Veronensi, S. D.

**M**eministi cum superioribus diebus prope diui Ioannis ædem, verba de te atque Iacobo quodam apud Ricciardum Theologum facerem, me vos his verbis & ad me & inuicem comparauisse. Ergo Ricci-

charde mi, inquam, Albertum inter & Iacobum quasi aer inter ignem terramque medius sum constitutus. Et si tunc Alberte ioco quodam verba illa Socratico more proferre visus sum, non minus tamen virtutis quam ignis continent, nec minus ponderis quam tellus habent. Cætera quidem quæ sub hoc ænigmate comprehenduntur tuo ipse iudicio satis interpretabere. Vnum duntaxat egomet interpretari in præsentia volo. Quod videlicet quantum ignis præstat terræ, tantum dignitate terreo igneum anteposui. Rursus, quanto aer cum igne magis conuenit quam cum terra, tantum à me virum igneum quam terreum hominem ardentius amari, significari. Tu ergo nunc tanquam dialecticus, plane concludes, si honor amorque fidem pariunt, vtri vestrum fidem potius seruare voluerim. Adde & alterum insuper argumentum. Quonam pacto verisimile est me Philosophiæ Platoniciæ sectatorem, cogitauisse vnquam tibi violare fidem, cuius ego interim fidei, quod nec ipse negabis, mea omnia committebam, atque in posterum, quod plane perspiciebas, committere statuebam. Cum verò hæc ita se habeant, quidnam in causa fuit, vt in sacello Nouolano iam alter & alter sacrorum sub me minister potius quam Albertus meus esse potuerit. Principio putabam terrenum quendam dæmonem amicitiam nobis cœlestem tunc inuidentem, ministerium illud inter nos constitutum interturbasse. Quapropter ad literatorum numina confugiens, Mineruam scilicet & Apollinem obsecrabam, vt pithonicum dæmonem tum illa telo, tum iaculis ille, confoderet. Deinde verò communis ipse meus tuusque genius errantem me ita corripuit: Non dæmon, inquit, Marsili vllus te ab Alberto conatus est teiungere, Imò vos ipsi vnum cœli opus indico quædam inscijs quodammodo fecabaris. Scito Saturnum Aquarii dominum vtriusque Aquario ascendente natis, vnum pene spiritum infudisse amicitiamque vobis inde cœlestem sine fine dedisse. Siquidem quæ Saturnus planetarum omnium altissimus stabilissimusque construit, nullus, vt est apud Astronomos, aut audet destruere vnquam aut potest. Sed ipsi vestrum iam errorem agnoscite atque recognoscite. Si enim amicitia & qualitas quædam est. quidnam illi magis aduersari potest quam inæqualitas? Ergo cum cœlum vos amicos esse voluit, etiam æquales inter vos semper fore constituit. Vos autem tanquam cœlestis mysterij huius ignari, ministerium

commerciumque inter vos quoddam statuebatis, in quo alter vestrum sub altero tanquam inæquales fore in posterum videbamini. Sed absit imparitas ab amicitia cœlesti, cœlo iubente, Absit dominatio procul & seruitus. Pares verò inter se sint, amici semper sint & liberi pariter libereque se mutuo diligant. Hæc genius. Tu verò Alberte mi dilectissime, vale felicitè, mementoque ministerium quod non libuit superis, merito nobis non licuisse. Atque mysterium vicissim quod placet illis, nobis quoque placere omnino debere. xx. Octobris. m. cccc. lxxxi. Ex agro Caregio.

*De tribus Gratiis & Genio.*

MARSILIUS FICINVS  
Laurentio Medici Juniori V. Magnanimo, S. D.

Quoties his temporibus sumo calanum, Magnanime Laurenti, quod equidem quotidie facio ad te scripturus, toties subito foecundus admodum euasisse mihi videor plurimaque parturio. At verò cum primum duo hæc tantum scripsi verba, Marsilius Laurentio, idem ipse qui modo tanquam foecundissimus multa parturiebam, mox quasi prorsus iam factus sterilis pario nihil. Hinc sæpe iam stupeo nimium, superosque incuso. Video enim quod & natura & arte paulo ante nobis ad te scripturis abunde suppeditabatur, idem paulo post iam scribentibus non posse aliunde quam à superis inhiberi. Quapropter frequenter, vt dixi, illos incuso, tum quasi inuidos, quod videlicet forte cœlestem in terris amicitiam voluptatemque inuideant, tum velut avaros, quod vbi & natura & ars tam prodiga est, ibidem quodammodo videatur, si dictu fas est, parca diuinitas tandem Philosophorum dux Minerua hodie, ne diutius tibi essemus steriles, neque in numina tam grauer peccaremus, noli, inquit, impie iaculare cœlestes, qui interim te vicissim iniquæ temeritatis, & accusant & damnant. Nescis impie, nescis; Nihil sine summa ratione à superis vel iuberi vnquam vel prohiberi. Quia igitur ratione te his verbis ad Medicem scribere, videlicet Marsilius Laurentio, sæpe iam vetent, me papeis docente, perdisce.

*Tres Gratiæ & tres Planeta.*

Principio quas apud nos Poëtz tres Gratiæ tanquam tres puellas pingunt

quodammodo sese inuicem complectentes, tres potissimum apud superos planetæ sunt, Mercurius Iouius, id est, beneficio quodam Iouis affectus, Phæbusque & Venus mutui propitiique sibi inuicem in coelesti circuitu comites. Tria quoque illa Gratiarum nomina scilicet. Viriditas, Lux, Lætitia, stellis eisdem aptissime congruunt. Hæ stellæ sic affectæ inter coelestia humano ingenio præcipue fauent. Idcirco non quorumuis animalium, sed hominum tantum Gratiæ nominantur, neque reuera Veneris sunt pedissequæ sed Mineræ. Si quando verò Gratiarum primam esse Iouem audiueris, ne tam Iouem intelligas quam Mercurium Iouium, id est aliquo vel aspectu vel munere alio Iouis adiutum. Mercurius enim Iouis vitali quadam promptaque mobilitate sua, vt res ipsas assidue inuestigetis, hortatur. Sol autem inuentionem vobis omnem sua luce quærentibus patefacit. Venus denique venustate gratissima quicquid inuentum est, semper exornat.

*Genius scilicet demon ingenij dux à tribus  
Gratiis provenit.*

**T**Res igitur hi planetæ communi quodam inter se consensu, statim in ipsa genesi variis hominibus genios, id est, duces ingenij dæmones distribuunt, varios pro vt ex alia atque alia cœli plaga quotidie nascentes aspiciunt. quos quidem tanquam duces magis minusve sequi, vt plurimum, est in vestro arbitrio positum. Si quos autem ab eadem omnino ætheris regione similiterque respiciunt, eundem iis aut certe persimilem Genium largiuntur. Vbi verò genius præest idem aut similis, ingenium quoque idem aut simile sequitur. Huc sæpe eadem sponte vestra voluntas accedit. Postremo ubicunque vna similisue mens est, vnaque voluntas, & si animalia videntur duo, homo tamen intus est vna. Quamobrem, Marsili, in superos imò in te ipsum peccare iam desine. Agnosce quandoque tuam medicisque genesim, cognosces statim Iouium, Mercurium, Phœbumque & Venerem nascentibus vobis ab eadem prorsus cœli parte, scilicet Nona, quam fidei, religionis, ingenii, sapientiæ domum & Phœbi gaudiū Astronomi nominant, vtrumque vestrum similiter aspexisse. Quo efficitur, vt non modo similis, sed etiam vnus idemque ambobus inde genius sit tributus, Apollineus scilicet dæmon, nono siquidem ætheris domicilio gaudens Apollo, Apol-

lineus ad homines genios inde demittit. Ex horum numero dæmonum vnum vobis annuente Venere Mercurioque Phæbus ipse præfecit. Hinc vna mens in vobis secuta est. Huc etiam vna voluntas vtriusque se contulit. Si vbi singula hæc vnum sunt, homo quoque semper est vnus, ne forte quos cœlum rationemque te ipsa coniunxit tu verbis vltius separe, memento quoties ad Medicem tuum scribis oportere ita præscribere, Marsilius Marsilio, S. Atque ita demum superis aspirantibus inuentionis tibi vena largissime profluet. Hactenus Minerua. Ita prorsus amice alter ego, sæpe mihi his temporibus obligit, vt dicebam, ita deinde dux illa Philosophorum minerua consuluit, ita & ipse, vt illa mouit, ne nobis exarescat inuentio posthac semper efficiam. Bene Vale. Sed quid modo quasi alter alteri abiens abeuntis? Vale dicebam, imò valeant, & male valeant omnes qui inter nos dissidium quærunt. Nobis verò non vale, sed mane, dicendum. Igitur bene mane. Verum ne præsens Epistola dum de Gratiis & genio disputat, forte minus grata nostro genio sit, saluere iam & millies iterum saluere. Vespuccium iubeamus, virum omnium genio nostro gratissimum. xviii. Octobris. m. cccc. lxxxvi. In agro Caregio.

#### A P O L O G V S.

*Diuinum genus diuina sola allimonia coalescit.*

**MARSILIVS FICINVS**  
de Apologo quid sit, vnde genitus  
quo tendat.

**V**enerem quondam in Pythiis Apollinis hortis, flores ac fructus legentem varios, Mercurius amore faucius sequebatur. Hic illam denique & indice & duce Phœbo sub lauro quadam feliciter assequutus, summa cum vtriusque voluptate cognouit. Horum congressu scitus admodum formosusque natus est puer. In quo statim & perspicacem Mercurii sensum & gratam Veneris venustatem Phœbique splendorem facile quiuus agnouerit. Hunc igitur à mercurii patris cognomine quem superi Logum cognominant, suus Apollo patronus Apologum nominauit. Iussitque ipsum passim discurrentem tantum humano generi salubri quadam delectatione prodesse, quantum frater eius Cupido noxiæ voluptatis hamo noceret. Igitur locorum ignarus Apologus dum extra Pythios hortos in proximis siluis oberiat, forte incidit in pastores, qui diuina pueri forma & indole mirifice delectati,

delectati, cum penes se diu detinuerunt, atque cibis agrestibus, id est, glandibus & castaneis, cæterisque id genus urbanum Apologum aluerunt. Quapropter tandem mutata forma ex urbano subrusticus euasisset, nisi eius patronus Apollo propitia nuper porrecta manu è syluis ad hortos Pythios, quos hodie Pinthios Florentini nominant, feliciter reduxisset. Docet Apologus, diuinum genus diuina solum alimonia coalescere.

*Philosophus tria potissimum deuitare debet, Veneremur, auaritiã, ambitionem.*

*Apologus.*

**M**Inerua quam prisci Sophiam nominant, cum animaduertisset solo se Iouis capite genitam, opus hoc diuinum rata solo videlicet capite gignere, patrem supplex orauit ac denique exorauit, ut ipsa quoque tanquam parentis æmula, semel saltem capite pareret. Peperit ergo filiam tum auo suo Ioui tum matri Mineruæ per similem, ea sanè statim natura auitam quandam tum animo æquitatem, tum vultu totoque corpore dignitatem præ se ferebat. Præterea matris tam virilitatem quam pudicitiam & mente & gestibus referebat. Hanc auus à Sophia matre Philosophiam voluit nominari, edixitque Philosophiæ, ut quemadmodum ex Sophia, quæ summi rerum omnium capitis filia exortum habet, ita semper plantis mundi posthabitis summa rerum capita peteret, neque vllum inferiori Venere vquam veneficoque filio eius Cupidine haberet commercium. Alioquin pro æterna Philosophia statim temporaneam Philocaliam tam re ipsa, quam nomine euasuram. Adiecit ut multo magis omnem Plutonis infimi eiusque cultorum consuetudinem deuitaret. Alioquin ambrosia nectareque amissis, stygiæ paludis aquas & herbas, quibus solis infeliciter deinde vescatur, reportaturam. Monuit denique ne ambitionem Iunonem aliquando sequeretur crassiori aëre peruolantem, ne fortè cum caligine serenitatem, procellis tranquillitatem, nubibus sydera, commutaret.

*Impuri nunquam Musas vel Gratias assequimur, sed Picas & Furias,*  
*Apologus.*

**O**Rpheus Delphicos aliquando lucos ingressus, Oraculum consulurus obuium statim quasi iam expiatus Apollinem habuit. Cum verò ad Apollinis dexte-

ram numen Musas tresque Gratias comitantes cominus conspexisset: ad sinistram autem, quamuis eminus sequentes Picas & Furias, admirabundus altius exclamauit. O quam diuersi! o quam diuersi! Ducem hunc sequuntur exercitus! Sed noli, o Vates! mirari, Phœbus ait. Nempe quotidie mihi multi sacrificant, quo Musarum à me Gratiarumque munera impetrent. Ergo quicumque puris sacra manibus operantur, Musas à nobis Gratiasque gratis accipiunt. Quicumque verò pollutis attrectare sacra manibus audent, Picas & Furias inuiti reportant.

*Potentia sine sapientia non regnat,*  
*Apologus.*

**P**Rometheus cum ascendisset in cœlum, ibique multa ab ipso Ioue rerum omnium auctore mysteria didicisset, hac vna de re curiosius supplex interrogauit, quam videlicet ob causam Solem, Mercuriumque præ cæteris Planetis tam propinquos assidue in cœlesti circuitu comites inuicem esse ab ipso rerum initio statuisse. Respondit Iupiter, ut quicumque Solem syderum dominum viderint absque sapiente Mercurio, in cœlo nusquam incedere planè intelligant; & in terris potentiam nunquam absque sapientia, vel concedi debere, vel concessam diu posse regnare.

*In translationem libri de Amore missam ab Alamanno Donato, ad Laurentium Medicum, Apologus.*

**C**UM Alamannus inter Lauros nuper, ut solet, sæpè deambularet, in cupidinem Lauros circumuolantem sapius inuolans, denique comprehendit. Tenerum deinde puerum adolescens pius leuibus suauiter tractans manibus componebat, fertisque & floribus Deum iam planè agnitum exornabat, atque ita inter ornandum percunctabatur. Quænam noua huc aura formosæ Cupido tuas direxit alas? Est Paphos Idaliumque tibi sunt alta cythera. Tum ille suspirans, Heu matrem! inquit, iamdiu meam anxias passim quærito, matrem mihi meam neque Paphos Idaliumve reddit, nec alta cythera. Solus tamen Apollo quandoque longos miseratus errores, his me verbis admonuit. Mater, o Cupido! tua solebat quondam cantilenis choreisque solum leuibus oblectari, sed facta deinde ambitiosior cœpit aliquando & Achilli Homerum & Æneæ Virgilium



inuidere, ipsaque sibi Vatem persimilem exoptare, qui artes laudesque suas grandiori iam cythara personaret. Talem denique Vatem multa post sæcula Laurentium nomine inter Lauros canentem nata Venus apud Tuscos in ipso gratiarum agro Charegio, ibi iam suarum laudum cætu suauissimo delinitur, cæterorumque oblita omnium iucundissime conquiescit, ibi solum post hac Musas inter pudicas requiescit Venus Cupido tua, illuc igitur & ipse te conferes vna cum matre semper habitaturus. Ita quandoque mihi Phœbus Alamanne consulit. Hoc ergo Charegium relicta Cypro, has denique Lauros hederæ myrtoque neglectis, sollicitus iamdiu quaero. Quod si illuc ad matrem ipse me duxeris, ego tibi præ cæteris afflabo propitius, ego tibi perpetuo quodam nexu meam matrem conciliabo. Tunc Alamanus, peropportune, inquit, manus inter volasti diuine Cupido meas. Nempè trita meis pedibus, quæ ducit Charegium, via est. O me felicem cuius inter manus hodie puer felicissimus peruolauit! Ergo huc age diuine puer, leues iam tende alas. Per Fauentina pomœria Apollineis auspiciis petamus ambo Charegium, ego quidem gressu, sed ipse volatu.

*Quod male se habet Lucilia, id est anima,  
quando à Phæbo, id est, à Deo  
discedit, Apologus.*

**P**hœbus vitæ lumen, Medicinæque vitalis auctio, filia suæ Luciliæ quondam è multis præceptis id dedit potissimum. Videlicet, ne vnquam a latere paterno discederet, alioquin fore, vt in varios grauissimosque morbos incideret. Principio Lucilia instantis hyemis asperitate quasi coacta paternis mandatis obtemperabat. Sed verni deinde temporis iam arridentis prosperitate freta, cœpit puella longius à paternis laribus digredi, passimque per pulchros blande Veneris hortos & picta prata liberius peruagari, atque ibi tum molli herbarum amœnitate, tum pulchritudine florum suauisque odore plecta, non solum ferta coronasque sibi, verum etiam vestes iam integras ex hederæ, liliis, rosisque & violis aliisque contexit. Mox dulces fructus, & mitia poma vndique carpens non degustat solum, sed faucibus etiam plenis ingurgitabat, iamque insolenter ornatuque nouo lasciuens, parentisque oblita, vt euaserat, puella vanior gloriabunda proximas vrbes adibat. Sed interea obiter & latentes angues in

herba saltantis, puellæ mordebant pedes, & floribus fertisque suis apes insertæ cericem & genas, manusque pungebant, & alius immodico noxioque cibo tumescens molestè nimis distendebatur. Quamobrem ingrata Lucilia, quæ antea voluptatis illecebris delinita medicum patrem neglexerat, summo quodam cruciatu compellitur redire domum, patrem agnoscere, paternumque auxilium his fermè vocibus implorare. Heu! succurre iam Luciliæ Phœbe pater, propere, obsecro, clementissime pater, ser opem filiolæ iamiam, sine tuo auxilio pereuntis. Sed Phœbus, quidnam, inquit, inanis Flora patrem metuum vocas? Desine iam improba, desine, nunquam ego te Flora vanissima peperci, ab hinc ad Venerem tuam, ô Flora prophana procul abi quam primum. At verò cum Lucilia supplex diutius institisset, multisque Phœbum obsecrasset precibus, vt puellam cui solus ipse vitam dederat, solus à morte redimeret, promitteret præterea se nunquam in posterum paterna vel iussa vel consilia neglecturam, ita demum pater indulgens & increpuit pariter & admonuit. Haud te curandam prius recipiam, quam istos cupidineos fucos ornatusque Veneros deposueris, disce iam temeraria, disce dum à paternis laribus procul erras, quam diuturno grauique dolore quam breuis leuiusque voluptas ematur, disce parum mellis, quoties veri Medici mandata contemnis, quam multum fellis apportet.

*Diuina lex fieri à cælo non potest, sed forte significari.*

MARSILIVS FICINVS  
Florentinus Federico Urbini Duci  
semper inuicto, Felicitatem, D.

**S**Tella quæ hodie Magos summos Orientis Astronomos foeliciter duxit ad Christum, eadem me quoque in eam duxit contemplationem, qua legitimos Astronomos Christianis facile breuiterque conciliarem. Hodie Magi quidem apertis thesauris suis Christo Deo myrrham, sacerdoti thus, regi aurum supplices obtulerunt. Marsilius autem Federico Duci semper inuicto & apprime sapienti atque clementi munusculum quoddam ex ipsis Philosophiæ thesauris offert, Theologicum simul & Astronomicum atque Physicum, aliàs quando Deus dederit, ampliora daturus.

*Communis religio non fit à stellis.*

**G**enus ipsum religionis, quo nihil in rebus humanis magis commune, firmiterque est, nullus Astrologorum à motu dispositioneque fieri unquam existimauit. Sciunt enim quæcunque motu fiunt, necessario mutabilia fore, & quæ certa quadam syderum dispositione creantur, positione tandem contraria dissipari, genus autem ipsum religionis, quo Deus ab humano genere mundi gubernator agnoscitur atque colitur, solum inter omnia hominum studia operaque ubique & semper firmissimum permanere.

*Christiana religio non fit à stellis.*

**V**erum si quis Astrologus dixerit, Christianam legem exortam fuisse post aliquam Saturni cum Ioue cōiunctionem, in quibus cōiunctionibus condendarum vim legum Astronomi quidam maximam collocant, ita in præsentia breuiter, quantum exigit Epistola, respondebimus. Alibi enim à nobis de his latius & subtilius disputatur. Principio Saturnus & Iupiter vigesimo quoque anno iunguntur, atque in quauis cōiunctione vim cōiunctionis ipsius extendere in quam plurimos annos existimantur, quo efficitur, ut quando-cunque nobis à Deo diuina lex detur, Astrologis æquè liceat cœlestem aliquam potentiam fingere legis huiusmodi, vel auctricem, vel alteram significatricem. Mitto quod raro religionum mutantur species, cum tamen Planetæ illi sæpè concurrant. Præterea, cum annis nongentis atque sexaginta, ad easdem cōiunctiones perpetuo reuertantur, atque in eo ipso intervallo quater in signo quolibet coniungantur, mirum est diuinam legem, id est, Mosaicam, Christianamque tot mundi sæculis, aut nō prius extitisse aliquando, aut saltem postea tanto iam tempore non fuisse deletam. Præsertim, cum plurimæ inter se contrariæ cōiunctiones iamdiu præcesserint. Proinde Astrologi, qui Christi temporibus proximi extiterunt, multò melius de Christianæ legis fato (si fato iubeffet) quam posteriores iudicare potuissent. Illi tamen aded à veritate procul aberrauerunt, ut temerè nimium, illam cum primùm annos trecentos sexagintaquinque impleuisset, proculdubio ruituram affirmarent. Quæ etiam in re Oraculum ipsum Apollinis mentitum esse conuincitur. Imò verò mentita est iniquitas sibi; non tamen mentita est diuina Veritas, quæ Prophetas plurimos,

& Sybillas expertes Astronomiæ ab ipso rerum initio, ut Christianam legem præuiderent diuinitus, & prædicerent, inspirauit. Deinde post Christum Christianæ veritatis innumeros testes adhibuit Martyres, videlicet inter quos quamplurimi cum in omnibus liberalibus disciplinis, tum in Astronomia, præcipuè docti, pro Christi gloria mala omnia, & denique mortem libentissimè pertulerunt Sed iam ad Astrologos redeamus. Profectò, multò difficilior de rebus quæ ad consilium, mentem, Deum, spectant iudicare posse videntur, quam de iis quæ ad corporis affectus, actiones, passionem, operaque corporea pertinent, at verò de rebus huiusmodi difficile admodum, falsoque sapissimè iudicant, quod quidem non ipsa solum experientia patet, verum etiam iis rationibus, quas hic breuiter perstringam (alibi enim de his diffusius disputamus) confirmari videtur. Plotinus & ex Platonis sententia, & Auicennæ subtilissimè disputat sub diuina potestate prouidentiaque & cuncta singula contineri, eo videlicet ordine, ut causæ incorporeæ, scilicet Deus & angeli, corporumque cœlestium animæ, rerum naturalium artifices sint. Causæ verò corporeæ sint superiorum artificum instrumenta. Deinde ostendunt quæcunque terrena in terris accidunt ex comuni quodam concursu superiorum inferiorumque simul causarum omnium provenire. Cum autem cuncta hæc nullus unquam comprehendere valeat, nimirum neminem certam vlla de re huiusmodi ferre posse sententiam. Astrologi verò tum diuinis, tum inferioribus causis dispositionibusque obmissis, cœlestia utcunque possunt, sola suspiciunt, neque illa quidem omnia, sed paucissima, paucissimorumque illorum vim experientia quadam, remota, rara, fallaci, potius quam rationibus vllis attingunt. Præterea, certum natiuitatis nostre momentū difficile admodū deprehendere possunt, cōceptionis autē etiā difficilior, denique infusionis animæ, difficillime, imò verò nullo modo vaticinantur. Neque parentū aorumque nascentis pueri complexionem intelligunt, neque nutritionis, educationis, habitationis, consuetudinis, disciplinæ, consilij, rationem vllam vel habere student, vel etiam si diligentissime studuerint, prorsus assequi possunt. Omnia tamen hæc diligenter considerari Ptolomæus ideo iussit, quia nouerat vim causarum superiorum non aliter à nobis suscipi, quā perlequentes causas, ac etiam per materiā perque habitū, disponamur. Vnde, inquit, stellarum effectus ex diuersa dispositione ma-

teriaz mobilis permūtari apud nos sapius atque impediri. Sanè videbat eodem momento nasci quotidie res inter se, tum genere, tum specie, tum numero, tam forma, quam fortuna, eximque diuersas, vt nullo modo ex ipso solo, vel natiuitatis terrenæ cœlestis coniunctionis momento sufficienter quicquam iudicare possimus. præsertim cum vltra proprias singulorum sortes communes quoque fortunæ & considerandæ sint, & inter se diligentius comparandæ. Nam duo hæc sibi inuicem tum impedimento sunt, tum etiam adiumento. Cuncta verò quæ diximus nemo complectitur. Quamobrem Ptolomæus Astrologorum iudicia, & circa communia confusaque potius quam distincta, & circa possibile, potius quam necessarium versari proculdubio confitetur. Vt igitur illuc regrediamur aliquando, vnde digressi sumus. Si Astrologi tam obscure, vt ita dixerim, visibilia vident, quam obscure inuisibilia ipsa videbunt.

*Religio forte potest à cœlo significari.*

**S**ed ne videamur nimium pertinaces, sedemus cosidere nōnihil, modo per signa quædam sapius quàm per causas, & illa quidem ambigua cognituque difficilima videant, atque tunc demum cernere nonnihil possint, cum quod potissimum ex diuersis mundanæ citharæ fidibus, vel consonum vel dissonum sequatur, intelligunt, imò, vt verius loquar, vaticinantur. Plotinus Platonius docet, effectus infra lunam penè omnes, à cœlo significari, non tamen omnes à cœlesti corpore dependere: sola enim corporea posse vel à corpore cœlesti, vel potius per cœleste corpus, quasi per instrumentum, ab ipsis cœli motoribus fieri. Si qua verò apud nos omnino corporeum genus excedunt, atque ad mentem diuinitatemque accendunt, solum à mente diuina mentibusque eam sequentibus proficisci. Quarum quidem mentium consilia voluntatesque sæpè posse cœlestibus figuris & motibus, tanquam suis quibusdam oculis ac nutibus, indicari. Sed indicia illa planè perspicere, viri apprime sapientis opus esse atque diuini. Hæc Plotinus. Quamobrem Mosaica Christianaq; religio, tanquā spiritalis penitus & diuina, neque à cœlestibus, neque per cœlestia corpora ylopatio effici potuit. Præsertim, cum cœlestes illi motus opera in terris sua, terrenis duntaxat adminiculis efficere soleant. Diuina verò ex nō modo terrenis vbiq; auxiliis caret, verum etiā multis sæculis omni impe-

dimetorum genere passim perturbata atq; fuit. Fortè vero quodā modo significari per sydera potuisse videtur, eodem videlicet ipso Deo, & sic & ad illud tēpus designandum mouente sphaeras atq; tēperante, qui & sic & tali quodam tempore legem suam fore præuidit atq; decreuit, quod quidem in Metaphysicis cōprobat Auicenna, affirmans morales diuinasq; leges certis sæculis per Prophetarū animas sola Dei prouidentia missas atq; afflatas, institui, toto interim ad idem vniuersi ordine sub diuino motore, eiusque ministris ita redactis, vt & in terris ipsum animæ Prophetica corpus alicubi disponatur, & in cœlis atq; terris significetur aduentus. Fortè verò id voluit Dauid his verbis; Cœli enarrāt gloriā Dei, & opera manū eius annunciat firmamentum. Forfitan & hic quodammodo tendit, quod inquit Albumasar, Egyptios Indolque in prima Virginis facie, virginē quandam pulchram considerauisse sedentem, nutrientemq; puerum, cuius nomen apud quasdam Gentes esse Iesum, Albumasar opinatur. Imago vero illa quæ in eo signo cogitatur, imo fingitur potius quàm videatur, si propria esset Iesu ipsius causa, certè & ante & post Christi tempora, sæpè aliās, vel Iesum ipsum, vel quendam eius simillimum produxisset. Ergo si illic est imago eiusmodi, signum quoddam est legis Christianæ, non causa.

*Multa per cœlum significantur, quæ non fiunt à cœlo.*

**Q**uod autem à cœlo multa significantur quidem, nec tamen ab ipse fiant, rursus ex eo constat, quod mala ordinisque experientia à rebus illis optimis, ordinatissimisque prouenire non possunt. Sæpè tamen per cœlestia videlicet, tanquam per signa, non tanquam per causas prædicuntur, non aliter quàm in auguris auspiciisque multa per aues portendi putantur, quæ tamen per aues minimè fiunt. Ideo Plato in Timæo, stellas non dixit facere, sed prænuntiare futura. Non tamen omnibus, sed illis tantum qui ratione hæc assequi possunt. Præterea, Astrologi in cuiuslibet genesi consideranda, plurima indicare solent quæ ad patriam, ad parentes, auos, fratres, coniuges, seruos, amicos, inimicos pertinent; quorum fors nullo modo ab alterius genesi prouenit, sed potius indicatur. Quod etiam in interrogationibus iis planè perspicitur, quæ de rebus præteritis fiunt ab illis, atque tractantur. Profectò, quemadmodum quotidie per

oculos, gestusque & verba alicuius prævidemus, ipsum aliquod efficiendum, qui tamen non iis indiciis, sed voluntate perficit quod elegerat, itaque per motus sphaerarum coelestium portenduntur sæpe, neque ab illis cæli corporibus, neque per illa fiunt, sed à diuinis mentibus, quæ globos illos regunt mouentque, per coelestia quidem quasi per suos vultus significantur, verum per ipsa sua consilia vel ordinatissime disponuntur, vel rediguntur in ordinem, vel saltem ab humanis causis prouentura & diuinitus prævidentur à superis, & nobis per signa quædam coelestia demonstrantur. Quam in re Ptolemaeus quoque & Albumazar & Zaeles, & Manilius, ceterique præcipui authores Astronomiæ nobiscum sentire videntur. Quando videlicet affirmant, coelestia corpora esse diuinis animabus, mentibusque prædita, ac tanquam animalia quædam diuina ipsi Deo omnium rectori parere. Neque id quidem iniuria, nempe cum Ptolemaeus ipse humanam sapientiam fateatur alieno operi, id est, stellis usque adeò dominari, ut & minantibus repugnare & pollicentibus fauere tua sæpe industria possit, cui mirum si diuina concesserit sapientia operi proprio penitus dominari. Hinc illud Auicennæ; Cælum est animal obediens Deo. Quoniam verò hi omnes intelligunt, singula hic à diuina prouidentia fieri atque gubernari, idcirco quando de coelestium corporum virtute loquuntur, rarissime quidem aiunt coelestia hoc aut illud facere, frequentissime verò asserunt, tale aliquid aut tale significare. Et quemadmodum per sydera portendi falsas humanasque leges putant, ita etiam sæpe veras atque diuinas.

*Signa & testimonia de Christi diuinitate.*

**F**orte verò hanc ob causam, Magi in Astronomia omnium sapientissimi, quo tempore natus est Iesus, ab Oriente Hierusalem profecti sunt, asserentes certo se admonitos sydere, eo tempore eaque regione natum esse puerum qui rex Israël futurus esset, atque adoratione dignus. Quod verò infantem in opem tanti viri tam longo itinere adoraturi veniunt, plane demonstrat Magos existimauisse in puero diuinitatem esse à superiori principio, quam à coelo prouenientem, præsertim cum Stella quadam ducerentur miraculosa potius quam naturali. Calcidius Platonius varias adducit historias de stellis, quæ cum raro videantur, ingentes portendunt calamitates. Deinde subdit. Est quoque alia san-

ctior & venerabilior historia quæ perhibet, ortu stellæ cuiusdam non morbos mortisque denuntiata, sed descensum Dei venerabilem ad humanæ seruationis rerumque mortalium gratiam, quam à Chaldeis obseruatam fuisse testatur, qui Deum nuper natum muneribus venerati sunt. Hæc Calcidius. Neque id quidem Magos animaduertisse mirum videri debet, nam in eadem orientali plaga, & (ut quidam aiunt) in vrbe eadem qua & Magi diu ante illos Prophetæ Balaam floruit, prædixitque tum surrecturum Messiam quasi virgam ex Israël cum noua Iacob stella exoriretur, his videlicet verbis: Orietur stella ex Iacob, & consurget virga ex Israël. Quod autem Magi Christum adoraturi Hierusalem accesserunt, testimonio nobis est crudelis illa cædes infantum sub Herode, qua de re certiorum factum fuisse Augustum Macrobius asserit, ita scribens. Cum audisset Augustus, inter pueros, quos in Syria rex Iudæorum intra bimatum iussit interfici, filium quoque eius occisum, ait, præstat Herodis porcum esse quàm filium. Suetonius quoque scribit, veterem fuisse constantemque opinionem Oriente toto esse in fatis, ut circa Neronis tempora ex Iudæa profecti rerum summa potirentur. Idemque oraculum ante obsidionem Hierusalem scribit Iosephus in sacris literis fuisse repertum. Quod quidem aliis nullis conuenientius quàm Apostolis accommodari posse videtur. Siquidem in his oraculis designantur Iudæi quales fuerunt Apostoli ex Iudæa egressi Gentibus omnibus leges vbique daturi. Quum etiam Sybilla Cumæa tempore, eadem descripsisse videtur. Quibus magnus ab integro sæculorum nasceretur ordo, ac floreret virgo, nouaque progenies ex alto demitteretur. Quam obrem sententia erat & vetus & constans & Oriente toto, & in Astrologorum præfagiis, & in sacris literis, videlicet in Prophetis atque Sybillis de Christi diuinitate temporeque, maximè consona.

*Christiana Religio à Deo solo dependet.*

**S**ed de diuinis Sybillarum Prophetarumque oraculis in libro de Religione latius disputamus. In hac autem Epistola sic de diuina lege quantum ad propositam pertinet quæstionem, breuiter concludemus. Si quis fato quodam genesis vel conjunctionis alicuius genesis suffragantis, Christum fecisse miracula nobis obiecerit, interrogabimus, quonam pacto innumera-biles inter Christianos viri sancti diuersis

temporibus locisque orti, ac diu post Christum multa fecerint miracula & quotidie faciant. Præterea Eclypsis illa Solis, moriente Christo, præter ordinem naturæ facta, apertissime declarauit, Christum ab aliori quàm cœlesti ordine natum. Eclypsin quidem fuisse illud nobis argumento est, quod non licuisset Christi discipulis passim prodigium huiusmodi prædicantibus in re tam manifesta mentiri. Quid? quod Eusebius in ipsis Gentilium historiis idem asserit se legisse, idem & ante Eusebium Lucianus Antiochenus atque Tertullianus. Flegro quoque Olympiadum scriptor defectum solis prodigiosum eodem quo & nos tempore comprobat contigisse.

Quod autem prodigiosus fuerit, Dionysius Areopagita, Apollophanesque Philosophi, iuxta Heliopolim vnâ deambulantes, & oculis ipsis apertè viderunt, & disputationes subtiliter probauere. Quod quidem in Epistola Dionysij ad sapientem Polycarpum legimus. Idem hinc quoque coniicimus, quod nulli dubium, Iudæos Pascha ex lege semper Luna duntaxat plena celebrauissè, eodemque ipso tempore Christum affixisse Cruci. Vnde certissima ratione comprehenditur tum defectisse Solem, tum præter omnem naturæ ordinem defecisse. Vt videlicet cœlum morienti Christo ita nouis tenebris testimonium perhiberet, quemadmodum & nascenti testimonium noua luce perhibuit.

*Conclusio de Christiana legis diuinitate.*

**V**erum, ut ad propositū redeamus, cui mirum si mundi Conditor ita partes mundi singulas temperauit, ut & in mirabili dispositione syderum, & in summa totius orbis pace sub humana forma homines saluauerit. Quandoquidem & diu antea per Prophetas suos cœlestia tum regredi iusserit, contra naturam. Quæ quidem prodigia Dionysius narrat Babylonios, & Persas tanquam diuina opera in Annalibus suis annotauisse. Similia quædam apud Platonem legimus in libro de Regno.

Quam quidem historiam Poëtæ (ut omnia solent) in Phaëtonis fabulas & alia quædā similia transfulerunt. Deniq; diuina lex sanctaque religio, neq; ab inferioribus, neque à superioribus mundi corporibus proficiscitur, cum incorporei boni Deique gratia, corporea cuncta, tum vita contemnat, tum affectu & cogitatione transcendat. Neque vlla ratione pendet ex fato, quæ fatum ipsum semper & negat &

damnat, neque ab humana, vel natura, vel prudentia nascitur, quæ & eam negligit, & immenso quodam super ipsam spatio in Deum eleuatur immensum. Sed procul dubio à solo principio prouenit infinito quæ finem solum appetit infinitum. Sed iuuat nostram sigillo Platonico Epistolâ obsignare. Plato noster in Prothagora & Politico duo religionum principia ponit, quorum altero quidem statim in ipso rerum initio religio nata sit, altero verò post multa sæcula confirmata. Profectò non tam fuisse docet instinctu, quàm animis ex Deo manantibus insito, ob quam cognationem cum primùm inclusi corporibus sunt diuinitus ex terra, vel creatis, vel suscitatis, subitò Deum tanquam Patrem agnouerint atque coluerint. Confirmata verò lege diuina quàm aliquando Deus solus ob solam clementiam suam per nuncium ab ipso electum ad homines miserit. Vale, sexto Ianuarij M. ccc c. lxxx. Florentiæ.

*Philosophia & Religio germana sunt.*

MARSILIUS FICINVS

Florentinus Antonio Ziliolo

Sophronio Veneto,  
to, S. D.

**S**I quis opificium ingens aspectuque mirum semper ante oculos habeat, quod & ratione valde mirabili & arte admodum manifesta constructum sit atque moueatur, ac præterea spectantium vñ ad votum sit prorsus accommodatum, neque tamen ille animaduertat, aliquando opificium eiusmodi summa quâdam potentia, ratione, bonitate, factum fuisse atque moueri, nonne rationis oculis captum esse putabimus? Aut si forte quamuis animaduertat interdum, nunquam tamen timeat, veneretur, colat, tanti, tam pulchri, tam commodi operis Architectum, an non necesse est illum cum apud spectatores alios, tum apud Architectum ipsum, hac de causa extremo quodam odio dignum existimari? Sola verò ex omnibus hominum artibus facultatibusque pia semper Philosophia omni studio prouidet, ne vel in cæcitatem tam miseram corruamus, vel tam graue odium subeamus. Nullum enim aliud veri philosophantis officium est, quam singulas tum partium tum vniuersi rationes & causas excogitare semper atque docere. Deinde in ipsis rerum rationibus & causis assignandis ad summam denique omnium rationem causamque ascendere, præter ea cæteros ad superina pro viribus secum ducere. Ac dam



quanto sapientia regatur mundus ostendit, simul etiam quanta humani generis commoditate ducatur certis providentia rationibus demonstrare. Ut igitur agnoscamus Deum amemusque & totus undique mundus clamat, & Interpres mundi Deique Philosophus verus demonstrat diligenter atque exhortatur. Ad eum ut nisi omni penitus sensu orbatum simus, apertissime iam cognoscere debeamus, nihil in tanto universi ordine omnino esse fortuitum, nisi forte illi dumtaxat fortuiti sint, qui opificium tam artificiosum opinentur esse fortuitum. Proinde Philosophus dum ad contemplationem Dei nos erigit sapiens, dum ad amorem divinæ bonitatis inflammat, pius religiosusque est appellandus. Quamobrem tota Priscorum Philosophia nihil est aliud quam docta religio. Missa in præsentia faciam cætera, nam innumera sunt Plato divinis Mercurii Trismegisti mysteriis imbutus, in Republica & alibi sæpe disputat, nisi quis Dei ipsius & lucem quodammodo viderit & agnouerit bonitatem, neque aliud quicquam veri posse videre, neque aliquid bene unquam agere vel publice vel priuatim Divinum verò Solem, solo eiusdem lumine perspicere. Lumen denique illud menti solum serenæ infundi solere. Quam ob causam & ipse Plato suam semper, Socratico more, purgabat mentem, & cæteros ubique purgare docebat. Proinde non in dicendo solum verum & in cogitando exordiri à Deo præcipiebat in singulis, atque ipse semper exordiebatur à Deo Purgationis quoque eiusmodi gratia Pythagoras imitatus Orpheum, ultra singularem vitæ sobrietatem, quotidie oriente sole sacros superis hymnos consouante cythara concinebat. Idemque Empedocli cæterisque suis facere persuasit, quo cælestes globos semper Deo canentes imitarentur. Præterea cum inuenisset latus recti trianguli longius tantum posse quantum duo reliqua simul iuncta, Hecatombum Deo suppliciter immolauit. Vtpote qui intelligebat nihil usquam veri sine summæ veritatis lumine posse videri. Si pro rei tam pusillæ notitia tam grandem victimam immolauit, nonne putas illum pro sui ipsius cognitione seipsum dedicauisse Deo? Kurfus pro universi contemplatione, universum quoque ipsi totius conditori supplicem facrauisse: Quid de Mercurio Trismegisto dicam? Cuius disputationes omnes & à vobis incipiunt & in sacrificia desinunt. Quid de Zoroastre? Cuius Philosophia (ut testatur Plato) nihil est aliud quam sapiens pietas cultusque diuinus. Denique (ut summa-

tum dicam) Saturnia illa & aurea disciplina Priscorum non tam Philosophia quam Philothea nuncupanda videtur, eorumque sermo omnis oraculum est potius quam oratio. Quorsum hæc de sapientiæ pietatisque copula? Ut videlicet meminerimus primo quantum aureis illis sacræ Philosophiæ sæculis debeamus. Deinde (ut ipse intelligas) qua ratione Marsilius sectator antiquitatis, non solum in vno illo regionis libro, quem petis, verum etiam in omnibus eius scriptis vna cum Philosophicis semper religiosa, pro ingenii facultate, coniungat. Postremo ipsam agnoscas, te iam simulque Antonium Chronicum, tanquam Conphilosophos suos in ea Philosophia libenter amplecti, quæ sapienriam simul pietatemque complectitur. Vale.

MARSILIVS FICINVS

Phœbo Capellæ, S. P. D.

**L**Vmen iam diu quoddam peperit, lumen illud in suum continue Phœbum se recepit. Stellam & nuper quandam genui, stella hæc similiter statim nata suum feliciter reperit Phœbum.

MARSILIVS FICINVS

Phœbo Capellæ Viro clarissimo, S. P. D.

**C**um sæpius orauisset me Guilielmus amicus noster, ut eum Phœbo meo plurimum commendarem, exscripsi tandem illi Epistolam, quam superioribus diebus de Stella Magorum ad Federicum Urbini ducem scripseram, eamque his verbis Guilielmo dedi. Si vis amice Phœbo commendatus esse, age iam Mercuriali hac stella duce saluta Phœbum. Hæc te, ut spero feliciter illi conciliabit. Ito igitur, ito alacer, neque pigeat. Non enim hæc ex his stellis est quæ videri aliquando possint in æde Apollinis peregrinæ. Siquidem Mercurius ante omnes est Phœbo domesticus. Vale Florent. vi. Februarij. m. cccc. lxxxi.

*Quod pia sit Platonica disciplina.*

MARSILIVS FICINVS

Ioanni Nicholino, Archiepiscopo Amalphienfi, S. D.

**E**Vmenius Pythagoricus, quem Origenes Pythagoricis omnibus anteponebat, cum Moysi atque Platonis legisset libros, Platonem iudicauit esse alterum Moysen, Attica lingua loquentem. Præ-

reâ scribit Aurelius Augustinus duplici ad veritatem via nos duci, autoritate videlicet atque ratione. Autoritatem quidem Christi se omnibus anteponere, rationes verò quæ huic potissimum consonent, se solum apud Platonicos inuenire, apud quos Proœmium etiam Euangelij Ioannis penè totum colligi posse. Affirmat denique, Platonicos mutatis paucis Christianos absque controuersia fore, seque illos ex omnium Philosophorum numero, idcirco potissimum elegisse, quoniam quanto rectius de rebus diuinis quam cæteri philosophi sentiunt, tanto magis aliis anteponendi non iniuria videantur. Ego igitur diui Augustini primum autoritate adductus, deinde multorum apud Christianos sanctorum hominum testimonio confirmatus, operæpretium fore censui quandoquidem mihi philosophandum esset, ut in Academia præcipue philosopharer. Verum ut doctrina platonica quæ ad diuinam legem, idest, Mosaicam Christianamque tanquam Luna quædam se habet ad Solem latius resplunderet, libros platonis omnes à Græca lingua transtuli in Latinam. præterea ne cui noui luminis huius aspectu oculi caligarent, volumen composui quasi commentarium, in libros decem & octo distinctum, in quibus platonica mysteria ita pro viribus exponuntur, ut mentem eius potius quam verba sequamur, sublatisque poetice velaminibus platonice aperiamus sententiam diuinæ legi vndique consonam. Reor equidem, neque vana fides, hoc pro uidentia diuina decretum, ut acutissima quæque ingenia quæ soli diuinæ legis auctoritati haud facile cedunt, saltem platonice rationibus religioni admodum suffragantibus denique cedant. Quorsum hæc, venerande Pater? ut familiaribus hæc tuis legas, quo mirari iam desinant, Marfilium, cum sit sacerdos philosophiæ, tam frequenter incumbere. Vale.

*Marfilij Ficini in librum Platonis de Regno, ad  
Federicum Vrbini Ducem,  
Apologus.*

**I**upiter Optimus Maximus, cum optaret tale in terris quandoque regnum prospicere, quale in cælo semper apud se conspicit, iamdiu per ipsam diuini regis ideam, regium quendam diuinumque animum dimisit in terras, conuocatisque cælicolis imperauit ut omnes futuro huic regi suffragarentur, quem superi quidem & à fide regia fide regum, & ab orbis imperio Orbinarem Ducem iam nominaret, homi-

nes verò mutatis literis Federicum Vrbinatem Cucem essent appellaturi. Assensere omnia Ioui, præter Iunonem, numina, sola enim Iuno crassioris aëris ambitiosa regina, cæleste terris regnum hæctenus iniudet. Verum Pallas Mercuriusque fauentibus aliis (& teste veritate) coronam sceptrumque regium iampridem viro eidem cui & Iupiter libentissime contulerunt. Cum verò Academia passim Palladem Mercuriumque colat atque sectetur, ipsa quoque regnum orbisque totius Monarchiam diuinus Plato describit, Federico Vrbinati Duci tum ex Iouis sententia, tum ex testimonio veritatis optime merito, felicissime tribuit.

## MARSILIVS FICINVS

Apologus ad Federicum Vrbini Ducem,  
in librum Cosmographiæ Francisci  
Berlingherij Nicolai filij  
ad eundem.

**Q**uem Iupiter omnipotēs orbis totius Dominus ad terreni orbis imperium procreauit, quem Pallas Mercuriusque Iouis filij iamdiu tanto fecere imperio dignum, huic & Academia horum cultrix nimirum, Platonice terreni regni formam non iniuria dicat. Huic & Academicus Berlingherius noster vniuersam orbis terreni figuram, eo largitur tempore, quo Republicæ, Ducesq; & Reges iterum atque iterum tum Palladis hastam, tum Herculis clauam concedunt felicibus auspiciis potentem belli Italici dominam. Ac dum plerique potentes Federico Duci semper iniuncto Italiam bello parere volunt, interim & Academia & Academicus eidem tam pace quam bello totum subiicit orbem.

*Sacra sacrilegi non attingant.*

## MARSILIVS FICINVS

Carolo Astoro, S. P. D.

**P**ius Plato noster his diebus ab impio quodam Germano transcribebatur, qui nuper sacrilegis manibus sacrum ante aras sanguinem fudit, ille repente, ille, ut ita dixerim, sacrilegus miles sacerdote cæso fugam arripuit, ipsa quoque fuga alterum videtur sacrilegium patrauisse, dum videlicet vrbani Platonem inter rusticos relinqueret vagabundum. Tertiam insuper sacrilegium patraturus, si sacrum cruentis manibus Platonem reuersus aliquando ausit atrectare. Da igitur operam quæ, voür optime, ne Plato, aut diutius in syluis oberret,

aut forte, quod foret crudelius, aliquando contaminatis prophani illius manibus pol-  
luer.

*In solo Deo salus.*

MARSILIVS FICINVS

Francisco Bandino, S. P. D.

**S**ALVE amantissime mi Bandine, salve,  
inquam, millies imò semper in sempiterno auctore salutis Deo. Addidissim & in Platonem, si modo querenda post Deum esset salus in homine. Valemus bene quod in primis audire cupis. Quod & de re audimus nuper speramusque, nos indies similiter audituros. Dedicavi Matthiæ inniſto Pannoniæ Regi geminos noſtrarum libros Epistolarum, qui nunc Franciſci Iunij opera exſcribuntur. Cæteri verò libri noſtri quos optatis, ſunt iam in manibus impreſſorum, expreſſi cum fuerint, legati ad vos accedent, noſtram vobis mentem foeliciter expreſſuri. Hæc interim Episto-  
la tres tibi potiſſimum nobis in Muſis amicos mandat iterum atque iterum ſalutandos, Epistolam Colocenſem, Epistolam Vacienſem, Petrumq; Garasdam. Valete felices. ix. Maij. M. CCCC. LXXXII.

*Tantum ipſi nos probare poſſumus, quantum à probatis ipſi probamur.*

MARSILIVS FICINVS

Florentinus Petro Molino Veneto, S. P. D.

**A**NTONIUS noſter pictor & ſculptor inſignis, cum heſterno veſperi meoſque familiares in foro tuo nomine ſalutaret, ita tuos noſtris vultibus pinxit vultus, ita tuos affectibus noſtris inſculpiſit affectus, ut non tam tuæ nobis ab illo narrari ſalutes quam à te ipſo coram agi perſpicue viderentur. Itaque aſſurreximus omnes ſubito neque Florentinum Antonium ulte-  
rius, ſed ipſum Molinum iam præſentem agnouimus, & nudo capite, ut par eſt, honorauimus. Salve & tu ſemper doctiſſime Petre, noſque, ut cœpiſti, ſalutari hæc præſentia tua ſaluos frequentiffime redde. Tamdiu nos honorandos reuera putabimus quamdiu ipſe vos honorauerit. Tamen & noſtra nobis placebit ciuitas, quantum tibi eam placere noverimus. Utinam tibi noſtra magis in dies placeant, ut noſ ipſi nobis in dies vehementius placeamus, bene Vale.

*Honeſta ſilentij diuturni purgatio.*

MARSILIVS FICINVS

Ioanni Canalcanti Amico vnico, S. P. D.

**C**VM hac aurora abſoluendo ſacro Theologiæ operi, quod iamdiu melior, totus incumberem, ac nemo quamuis familiariffimus interpellare me tunc aude-  
ret, abs te tamen vnico audentius his obiur-  
gationibus interpellatus ſum. Soles Marſili aliaſ in primis ruſticationis tuæ diebus Ioannem tuum literis ſalutare, nunc verò ſolitum iamdiu ſalutibus abſtines. An non vi-  
des ſacrilege quam ſacræ amicitia tuæ iſto ſilentio detrahas. Ad hæc Plato hunc in modum reſpondere pro communi cauſa videbatur. Vide quam magna vis Ioannes tuis inſit verbis. Nempe apud alios aliud quidem dicere eſt, aliud autem facere, ipſe verò dicendo facis. Quibus enim verbis Marſilium appellas ſacrilegum, iſdem ſacrilegum hunc ipſe facis, ſi modo qui ſacrum publicumque opus, priuatæ quamuis ſingularis amicitia gratia intermiſerit, ſacrilegus ſit futurus. Eiuſmodi, ut dicebam, hæc aurora nobis incidit controuerſia. Verum viciffi tandem, ut ſoles, atque Platoniciſ parumper myſteriis intermiſſis ſolitas à nobis ſalutes iam reportas. Reportare viſ iterum, Platonemque iterum ſuperare? Reſponde amice, precor. Reſponde, non ut ſoles, inquam, ſed potiùs ut non ſoles. Quod ſi reſpondere non viſ mihi, ſaltem reſponde Platoni. Sed ecce dum inter loquendum te, viſiſ, intueor, geminum mox ibi vultum video, mirabile viſu, ubi modo vnicum intuebar. Ac ſi ritè amicos agnoſco vultus, grata Laurentij Medicis ora in mo, ut ita dixerim, ſpeculo, ſpeculari videor, & ab eo penè atque à te ſimiliter increpari. Ergo geminatis iam tibi vultibus, gementur & mihi viciffim illæ ſalutes, & quæ paulò ante duobus quaſi vni dicebam, nunc vni dicta ſint quaſi duobus.

*Reſponſum de geneſi, quod iudicatum ſit fallaciſſimum.*

MARSILIVS FICINVS

Zenobio Romano, S. P. D.

**Q**UAMquam non ſunt illa hic apud me nunc inſtrumenta, quibus eccleſia examiſſim examini penſarique ſolent, tamen ut agam in præſentia nonni-  
hil pingui Minerua, illa mihi cœli figura

non admodum placet, in qua Mars medium tenet coelum, Saturnus sextam occupat domum, Iupiter comburitur, Lunam Sol aspicit ex quadrato. Sed neque mala ominari iuvat, neque his multum decet credere. Nam cum in rebus proximis quotidianisque sæpè fallax iudicium sit, nimirum in remotissimis est fallacissimum, præsertim cum ex multis aliis præter sydera causis res nostræ dependeant, genitura, nutritione, loco, educatione, consilio, sorte, quod quidem ex eo patet perspicuè, quod eodem momento feruntur, atque nascuntur, inter se tamen genere, specie, numero, qualitate, fortuna, exitu, longissime discrepant. Vale.

*Diuina dum mittuntur, non amittuntur.*

MARSILIVS FICINVS

Locterio Neronio, Conphilosopho suo, S. D.

**I**oannes Cocchi Academicus noster, hesternò vespere me conuenit, atque Terentiano, ut solet, more, Saluere, inquit, te Marfilij noster, Locterij nostri nomine iubeo, tu vero nunquid Locterio referri iubes? nam ad eum, ut vides, aduolo, ego autem cum te vicissim saluere vehementer optarem, easdem, inquam, salutes Locterio referes. Tum Ioannes, At si reddideris, inquit, easdem salutes amico, videberis quas ille miserat fortè respuit. Ad hæc ego, si dextra, inquam, meæ sinistra reddat, quod accepit à dextra, id non amifero equidem, sed quadam potius commutatione seruaui. Locterius certe, Marfilijque hominis eiusdem dextra sunt atque sinistra. His fortè Dialecticus quidem interfuit obiecitque, & si homo idem possidet quicquid alterutra possidet manus, non tamen ulterius est in altera, quod iam reddidi alteræ. Tum ego ita respondi. Si mutua inter nos minæ permutatio fiat, nimirum quod obicis, Dialecticè, sequitur. Sin autem radius id quidem fuerit, minimè sequitur. Solet enim à lucido corpore in speculum proflire radius atque resilire. Radius hic quidem corpus vnde emicat dum emittitur non dimittit, vicissimque dum reflexione resilit non amittitur, proinde radius quicquid percussione quadam vulnerare videtur, fouet à quocunque frangi, mutua repercussione apparet potius geminaturque. Nescis Dialecticè, nescis Marfilium à Locterio missis in diuino lumine radiis saluari, vicissimque ab hoc illum radiis permissis resaluari. Præterea nihil hic offendi, sed fo-

ueri; nihil frangi, sed geminari. Ergo Dialecticè, inquam, cum tuis istis tenebris vale miser. Sed tunc demum futurus felix, cum lumen quod te gratis semper inspicit, grate respexeris. Tu vero Ioannes me inter atque Locterium indiuiduos diuinæ salutis radios fer absque vllò diuisionis metu, referque feliciter.

*Petitio, commendatioque artificiosa.*

MARSILIVS FICINVS

Francisco Bandino,  
S. P. D.

**M**isi nuper nonnulla ad Marthiam inuictum, Pannoniæ Regem, ex nostra hac Officina iamdiu deprompta, ea in primis, Bandine, spe eaque fiducia, ut quæ ego nescio quo pacto Saturnia feceram, suo ille splendore Iouia faciat. Quod equidem ita demum me facile spero consequuturum, si quæ nos ad eum Marfilianam misimus, ipse quandoque Mercuriali, ut solet, ore apud Regem regia reddas. Exscripsit autem hæc Amitinus frater meus ferè alter ego, Sebastianus legitimus Theologiæ Professor, hic dum illam legeret exscriberetque Epistolam, in qua iamdiu respondebam vobis, non posse me facile quod optabam accessu istuc meo, nunc satis vestro desiderio facere. Non potuit se continere, quin quasi quidam semipoëta meis auribus protinus intona-ret. Non patiar, ô Marfilij, non patiar vquam, quantum potero, te vquam non posse quod optes. Quid ergo? Inueni, Ficini, viam, grata repertis, quæ tanto te reddat amico. At ego, quamam istuc efficies, inquam, Saluine via? Si ego, inquit, illuc Ficinus alter accessero, tu in me saltem quo cupiebas accesseris. Sed felicibus in Patmoniam constitui auspiciis proficisci. Id est autem tutis Bandini nostri pedibus, qui & ipse feliciter est profectus. Hunc equidem, mi Francisce, & apud te laudarem, & tibi plurimum commendarem, si vel deceret alicubi laudare me ipsum, vel oporteret commendare me mihi. Vale feliciter. Viue felix. Ama, ut soles, scribe quæ satis saluant amici.

Saluta amicos. Commendo te Regiis, commenda nos Regi. Ex Agro

Caregio xx. Septem-

bri. M. cccc.

(.)

LXXXII

(.)

*Quam te precipue disciplina Platonica Peripateticam superat.*

MARSILIVS FICINVS  
Ioanni Pico Mirandulano Complatonico suo, S. D.

**M**agna quidem voluptate me affecerunt elegantes literæ tuæ, quod te plane iam eloquentem nostro iudicio præstat, maiori verò quod Peripateticum quoque euasisse significant, maxima denique quod Platicum proculdubio pollicentur, quam optimè singulare felixque ingenium tuum excoluisse videris. Quippè cum post humana eloquentiæ studia, rerum naturalium rationes apud Peripateticos indagaueris, atque te iam ad diuina Platonis nostri mysteria conferas. Nam Peripatetici quidem quanta ubique ratione naturalia disposita sint diligentissime disputant, Platonici verò præter hæc, quantum insuper illi qui hæc numero, pondere, mensura disposuit debeamus, ostendunt. Quamobrem illi nos facile doctos efficiunt, hi præterea sapientes atque beatos. Tu igitur, optime mi Ioannes, perge foeliciter (ut cœpisti) ego autem tam honesto proposito tuo si modo (ut ais) nostra opera indigueris me polliceor non defuturum. Vale.

*Salutatio pia & librorum petitio.*

MARSILIVS FICINVS  
Florentinus Ioanni Francisco Hypolitio Gazolti Comiti, S. P. D.

**L**ætantius Tedaldus nos tuo Laurentiique Bonincontri nomine iterum iterumque saluere iubet. Sed quamam salute potissimum? ea scilicet quam seruante nihil in nobis potest esse non saluum, Deo igitur seruatore saluete semper, atque in eiusdem amore nos amate, præterea saluate & vos nostrarum Epistolarum quandoque libelli. Satis iam satis hospites fuistis Hippolyti, ergo domum iam salui redite. xxii. Decembris. M. cccc. lxxxii.

*Honestas simul ac vehemens librorum commendatorum exactio.*

MARSILIVS FICINVS  
Dulci suo claro Iuriconsulto, S. P. D.

**S**alue mi suauissime Dulces, amaritudinemque meam, tua (si potes) atque

vinam possis, dulcedine tempera. Ego (ut scis) nullos vnquam genui liberos, nisi liberos; quam verò chari parentibus filij sint nullus ignorat. Mentis autem filij quanto propinquiore præstantioresque sunt quam corporis, tanto chariores habentur. Quorsum hæc? nempe Dux ille vester inuictus & Epistola & voce vehementer me rogauit, ut meos Vespasiano libros crederem Urbium ad se mittendos. Credidit equidem tam libenter, quam ille vehementer percupiebat. Vespasianus igitur tabellariis eos tradidit perferendos mercede conductis. At illi illos cum accepissent, non accepta mercede, captiuos mihi iamdiu retinent. Ego interim ardentissimo eorum desiderio vror, eisque quotidie mille pericula timeo. Obsecro per Musas te, mi Dulces, tuos per gratias obsecro dominos, ne patiantur me, dum & Ducis voluntati obsequi studeo & eos insuper honorare cogito, iacturam pati tam grauem. Vale.

*Negotiosum virum non esse temere interpellandum.*

MARSILIVS FICINVS  
Bernardo Oricellario Florentini senatus Oratori, S. P. D.

**P**rudentium sententia est, virum grauius negotiis occupatum abique graui causa non esse interpellandum. Mihi verò nunc satis grauis ad te interpellandum causa erit Platonica grauitas, satis certe quod & ipse (ut arbitror) facile confiteberis, nostra hæc siue Academia siue bibliotheca Latinum Platonem, Græco semine iamdiu conceptum, parturit quotidie. Verum absque obstetricis manu haud facile potest parere. Ergo mi Bernarde obstetricias Impressorum adhibe manus, quæ maturum iam foetum exprimant, expressumque forment. Vale.

*Non sunt amici, nisi alter ex altero pendeat.*

MARSILIVS FICINVS  
Francisco Bandino, S. P. D.

**L**iteræ, mi Bandine, tuæ prosperam quidem valetudinem tuam mihi significant, meam verò confirmant. Ego vicissim idcirco respondeo, ut dum significo tibi meam, tuam quoque confirmem. Nec immerito amicorum alter pendet ex altero, siquidem est alter in altero. De Vacienti verò Episcopo nostro quid dicam? Verum satis equidem dixi, modo cum de nobis di-



zi, proinde si amorem erga hunc explicare mecum voluero, cæteris quidem longissimus ero, mihi verò breuissimus. Ergo ne vel alios prolixitatis tædeat vel me pœniteat, breuitatis affectu dumtaxat contentus ero, quandoquidē sermone nō possum.

*Solitudo literatis necessaria.*

MARSILIVS FICINVS

Petro Nero viro candidissimo,

mo, S. P. D.

**A** Besse me iam ab vrbe diutius, vt opinor, vnā cum aliis nostris & ipse conquereris, sed desine conqueri, nunquam enim minus absum ab Academia quam cum ab vrbe absum. Urbana quidem à vobis sæpè me distrahunt, rustica verò restituant, vester hic totus sum atque expeditus. Siue enim deambulo, vobis, mihi, passim ipse floreo, siue dormio vos mihi semper somnia nostra reducant. Vale atque saluta omnino, sed quem? sed quos? Nul- lum equidem, vno cunctos cognominauerim, Academicos. Iterum bene Vale. Kalendis Aprilis. M. cccc. lxxxiii.

*Non verè se inuicem amant, qui non assidue de se inuicem cogitant.*

MARSILIVS FICINVS

Philippo Valorio, S. P. D.

**V**ides Philippe cum Valori scripturus essem fere Tarducio me scripsisse. Quid mirum? Nempe & vterque sibi inuicem vnus & mihi vnus vterque. Quo etiam fit, vt siue lyram pulsem, siue carmina canam, compulset alter & cōcinat alter. Sed heus Valori nonne corrumpicari sacros hos dies constitueramus, non agri sed animi colendi gratia. Iamque inuicem dedissemus verba, nisi quod conuiuunt semper, non corrumpicari non possent, sed hoc interest, quod ego te duce Maianum agrum petiturus eram, nunc verò contrā Caregianum ipse me duce petisti. Cum verò rerum omnium vicissitudo sit, mox ego Maianum te duce petam, verum nequid te lateat, vbi legis ego quasi sub grandiori quodam ego ne Berlingherium subintellige. Cupio hic vos complurimis salutationibus onustus reddere, quas deinceps in nostros passim Academicos transfundatis, in compatrem Boninsegnium, in compatrem Guicciardinum, in confratres denique cunctos. Vale.

*Laus Platonici Philosophi.*

MARSILIVS FICINVS

Petro Leoni insigni complatonico suo, S. P. D.

**S**i Sophista à Sopho quadā diminutio- ne deducitur, iustius est sophistam sequi sophum quam contra. Noli ergo mi sophæ vltius sophistam petere, hic enim mox, vt par est, te sequetur. Vale.

*Dolores omnes ex amore animi erga corpus nascuntur.*

MARSILIVS FICINVS,

Amerigo Corsino dilectissimo suo, S. D.

**A** Pollinem Medicinæ fontem ferunt aduos præcipuè filios gēnuisse, Æsculapium atque Platonem, Æsculapium quidem qui corporibus, Platonē verò qui animis medetur. Solent Medici Æsculapij sectatores doloribus corporis fomenta quædam vnguentaque adhibere quæ anodina, id est, dolorem sedantia nominant. Solēt & Academia Medicinæ Platonicæ studiosa eiusmodi Pharmacum tanquam anodinum fomentum, moerentibus animis ad- mouere, hac equidem imprimis vtor. Hanc & charissimis communem facio, quod si charissimis, & Amerigo igitur quam charissimo. Vbi dolor, ibi amor. Exue amorem, exueris & dolorem. Exue, inquam, non ip- sius amorem boni, absit enim vt vel malum vel impossibile iubeam. At verò & malum est non amare ipsum bonum, & impossibile est non amare id ipsum quod amas neces- sitate naturæ. Ergo non boni ipsius quod primum summumque & omne bonum est, sed singulorum quæ inter homines iudi- cantur bona amorem iubeo exuere. Quip- pe cum adhæc amando conuerti nihil sit aliud quam ab ipso diuertere. Quatenus au- tem diuerterentes ab ipso per quod solum hæc habent vt bona sint, adhæc conuertimur quæ absque illo sunt mala, eatenus in mala præcipitamus. Rursus ibi dolor vbi amor, horum videlicet bonorum amor quæ & differri possunt & auferri. Si possessio eius quod cupimus differatur, dolor vrit at- que sollicitat. Si possidemus quod interea auferri posse cognoscimus, dolor di- strahit si auferatur quod amorem quæsiue- ramus atq; possederamus, dolor opprimit. Quamobrem ne dolere cogamur solum ip- sum propter se amemus bonum, quod so- lum per se est bonum, quod quidem cum

ob naturam potentiamque infinitam neque usquam absit, differti nequit, neque unquam desit, auferri non potest. Nusquam deserit nisi deserentes, nunquam dimittit nisi dimittentes. Non admodum operosa est boni infiniti petitio, sola enim quaerit inueniturque voluntate. Non sollicita suspiciosaue possessio, eadem enim voluntate qua quaesitum acquisitumque fuerat retinetur. In hoc vno amando possidendoque omnia tanquam bona complectimur, hoc vno deserto quo solo reliqua bona fiunt, cuncta passim mala nobis euadunt. Exuamus ergo exuamus affectum, qui miseros ad inferiora detorquet, induamus affectum ad sublimia erigentem, hic enim nos liberabit à malis, hic nos ex doloribus eruet, implebit omni bono, afficiet omni gaudio, gaudio, inquam, quod à nobis nunquam auferetur. Hæc à nobis Amerige charissime, summatim animi languoribus adhibentur, eadem à Platone latius ac elegantius, & à sacris literis potentius atque diuinius. Vale.

*Expositio allegorica sæculi aurei atque aliorum.*

MARSILIVS FICINVS  
Iacobo Antiquario Secretario Ducali, S. D.

Cæteri te Iacobe tantum cognominant Antiquarium, Academia verò & Antiquarium pariter & Nouarium, tanquam antiquitatis inuocatorem atque cultorem. Quid autem esse aliud opinamur renouare antiqua, quam aurea illa sæcula renouare, regnante quondam Saturno, felicia? Quid rursus Saturnum apud homines? Quidue Iouem? Sane Platonici cum animam in tres præcipuè distinguât vires, intelligendi, videlicet, & irascendi atque concupiscendi, primam partiuntur in duas, scilicet in mentem vel contemplationi vel actioni præcipuè deditam. Mentem quidem contemplatricem nomine Saturni significant, mentem verò actionibus occupatam nominant Iouem, deinde animum vel iracundia durioresse Martem, vel voluptate molliorem esse Venerem, arbitrantur, præterea sub primo dñce vitam tam publicè quam priuatim agi, auream, id est, pretiosam & lucentem æternamque existimant, sub secundo argenteam, quippe tum sicut argentum pretio sequitur aurum, ita & actio contemplationem quasi pedisse quam dominam obseruareque debeat. Proinde sub tercio ob durissimam armorum crudelitatem ferream duci vitam putant.

Sub quarto denique plumbeam, libido enim atque voluptas instar plumbi & mollior est, & quasi pondere quodam ad inferiora declinior. Quantum verò vanissimos illos, quos vulgo Alchimistas appellant, roties & fallit opinio & fortuna frustratur, quoties inferiora metalla conflare in aurum moliantur, tantum his qui concupiscentiam, iracundiam, actionem contemplationi pro viribus subigunt, res ipsa quotidie succedit ad votum, adeo ut pro cæteris metallis aurum, id est, pro vilissimis pretiosissima & pro caducis æterna reportent. Perge igitur Iacobe felix, ut coepisti, aureæ antiquitatis contemplationisq; Platonice cultores, faue, vti facis, antiquis, faue aureis atque ita pro Antiquario nobis aureus eris. Vale feliciter. Academię charior auro.

*Omnium rerum vicissitudo est.*

MARSILIVS FICINVS  
Matthæo Forliuensi Pontificis Commissario, S. D.

Tradunt Poëtæ Iouem Saturno patri quondam imperium abstulisse, ego verò arbitror Martem his temporibus quasi Saturni vindicem sibi Iouis regnum usurpauisse, etenim, ut aiunt Astronomi, religiosi viri ab Ioue significantur atque reguntur. Nam quotidie religiosorum bona ad Martios homines transferuntur. Sed utinam vicissim imperium cœleste succedat, ut quemadmodum Marti iam pridem cecidit Iupiter, ita & Mars quandoque Ioui cedere compellatur. Sane tunc demum cum solus regnabit Iupiter, speramus pios homines, ut dixerim, regnaturos. Idque forte ante biennium, nisi nos Astronomica fallit ratio, coniunctio Planetarum magna vel perficiet vel, ut rectius loquar, significabit interea vos Commissarij saltem quibus pij gregis cura committitur, commendatum habeto te gregem vobis à Deo non mediocriter commendatum. Id optamus quidem ab aliis, sed abs te insigni pietate viro iam speramus. Vale. Die. xv. Iunij. m. cccc. lxxxiij.

*Qui humanum amorem in diuinum transfert, ex homine transfertur in Deum.*

MARSILIVS FICINVS  
Domino Matthæo Forliuensi clarissimo Pontificis Commissario, S. P. D.

Platonis nostri sententia est, ea potissimum ingenia quæ ad amorem propensiora sunt, alas quibus reuolatur in

cœlum posse recuperare, quod si liceret in Epistola rationes more disputantium accuratius assignare, equidem Platonica huius sententiæ quattuor in præsentia rationes afferrem. At verò si vel peierare licet amanti, differere quoque liceat de amore loquenti. Ergo prima huius rei causa est humana, secunda naturalis, tertia coelestis, quarta diuina. Humana, inquam, propterea quod amor ipse verum amicitiae est fundamentum. Amicitiae verò tanta vis est ut hac sola, vel sine legibus ullis, humanum genus tranquille possit beateque viuere, hac verò sublata neque leges neque cætera hominum studia beatum efficere possint. Mitto quam acutos ad inuentionem, quam vehementes ad eloquendum, quam tractabiles, iucundos, vrbanos, fidos, ad rationem, consuetudinem, amor efficiat. Naturalis autem ratio est eiusmodi. Profectò similitudo quædam ubique est causa amoris. Quod quidem in stellis & elementis plantisque & animalibus plane perspicitur. Quisquis igitur ad amandos homines propensissimus est, is nimirum ipsi humani generis ideæ, ad quam diuinus artifex homines procreauit, simillimus omnium iudicatur. Contra verò quicunque ab amore alienissimi sunt, hi & ideæ diuinæ dissimillimi & ab humana specie remotissimi. Tertium ad idem coelestemque causam ab Astronomis sic accipimus. Solent ad amorem procliuiores esse quorum in genesi ita Venus Mercuriusque disponuntur, ut ob mutuum aspectum vel congressum aut receptionem, aut terminum, ingenij gubernacula concordii voluntate suscipiant. Tunc sanè & Mercurius ingenij eloquique magister ad Venerem transfert vtrumque, & Venus ipsa gratia decorisque & fidei mater ingenium eloquiumque lepore condit, elegantia ornat, fide veridica format. Quamobrem nulli vel acutiores vel elegantiores reuera sunt quam amatores. Neminem verò latere volumus, aliud quidem libidinem esse quæ tactum expedit, aliud verò amorem qui aspectu audituque & contemplatione contentus est, à Platonis iudicari. Quarta denique ratio est diuina, quam Plato diuinus in Phædro atque Symposio probat quamplurimum. Cum in diuina mente rerum omnium formæ sint exemplares, earumque apud nos vmbra quædam appareant, in his nobis creatoris ipsius pulchritudinem nihil refert expressius quam pulchritudo creata, neque tam facile putat Plato nos ex humana sapientia vel alia quauis virtute nostra diuinam sapientiam cæterasque Dei virtutes inuestigare posse, quam facile ex huma-

na pulchritudine diuinam pulchritudinem inuenire inuentamque amare. Quippe cum reliquarum quæ sunt in Deo virtutum similitudo solis conueniat mentibus atque his dumtaxat percipiatur, pulchritudinis verò diuinæ simulachrum per omnia sese fundat, neque mentem solum, sed oculis etiam qui sensuum omnium perspicacissimi sunt, plane perspicitur. Hinc amorem ex humano diuinum existimat provenire. Proinde amorem nihil aliud quam pulchritudinis desiderium esse, definit, pulchritudinem verò non aliud esse quam gratiam, gratiam, inquam, ex tribus Gratiis, id est, ex tribus præcipue rebus insitam, & à tribus similiter numinibus venientem. Siquidem Apollo per Musicæ consonantiæ gratiam allicitat audientes, Venus autem per gratiam coloris atque figuræ rapiat inuidentes, Mercurius denique per miram intelligentiæ & eloquentiæ gratia contemplatores in primis ad se conuertat, atque amore diuinæ contemplationis pulchritudinisque accendat. Quoniam verò non tam intelligentia nos in rem ipsam quam intelligimus, quam amor in eam quam amamus transferre solet. Idcirco Plato noster existimat hoc ipso diuinæ pulchritudinis desiderio potius quam vel scientiæ studio vel alia quauis virtute mentem receptis alis in patriam reuolare. Quorsunt hæc? Nempe ut dum hæc legis, non modo mentem hac de re nostram intelligas, sed etiam ut in hac perfecti amatoris descriptione tanquam in speculo quodam tuam imaginem speculeris. Dum enim & legitimum amatorem & pium amicum effingo, Matthæum meum pro viribus expressisse volo. Vale.

*Obsecratio ut Platonis libri in Latinum à nobis translati ex eius manibus qui occulerat redimantur.*

## MAR SILIUS FICINVS

Hieronymo Cantiano Vrbinatis Ducis  
Oratori, S. D.

**D**Iuum Platonem in Ægina venditum, Anniceris Cyrenæus à seruitute redemit, & in Sicilia in summo vitæ discrimine constitutum, Architas Tarentius ab exitio liberauit. Platonis autem liberi cum relicta Græcia à Barbaris occupata sese in Italiam contulissent, in carcerem forte coniecti sunt, integrumque biennium, pro nefas! in vinculis detinentur. Sed ecce iam iam insignis pierate vir Cantianus Hieronymus à compedibus eos soluet laticque restituet. Quantum ergo quondam

Cyreneo & Tarentino pro Platone Græcia debuit, tantum Cantiane pro Platonis liberis debebit Italia.

*Charitas potius quam scientia transfert  
in Deum.*

MARSILIUS FICINUS

Philippo Carduccio literis & moribus ornatissimo, S. D.

**D**Eclamatunculam nostram quæ ad pietatem charitatemque amicos diebus superioribus cohortabar, Philippo Carduccio meo censui dedicandam, viro pietatis charitatisque plenissimo. Cum verò Philippum nomine piumque appello, geminum intelligi Philippum volo Carducium atque Valorium, legite igitur ambo feliciter.

**S**I Deus propriè nuda quadam res omnes intelligentia faceret, forte omnia & intelligerent & ab intelligentia recta minime aberrarent. Per quam enim proprietatem effectus à causa produnt, per eandem quasi imaginem à causa sibi impressam suam continuè stabiliterque causam representant. Cum verò creata omnia cognitionem habeant, & quæ habent, sæpe aberrant in cognoscendo, affectum tamen naturalem habent omnia atque ipso affectu non errent, consequens est à creatore omnia non tam per intelligentiam quam per voluntatem fuisse creata. Quod quidem inde confirmatur, quia sicut à causa processerunt ita & conuertuntur. Cum igitur per affectum ad bonum conuertantur omnia, non per cognitionem, sequitur à bono per affectum omnia processisse, atque sicut per affectum ipsius processerunt, sic per eundem ybique conuerti. Quod enim in rebus appetitionem dicimus, nihil significat aliud quam passionem, id est, raptum ab ipso primo cunctis illatum. Sed qui hæc quidem ferri vident, illum verò non vident trahere, ita decipiuntur, sicut qui ferrum putarent seipso sponte magnetem petere, quando magnetem alicubi non viderent. Hinc ergo constat voluntatem divinam esse per-

tam per quam mentes dum creantur egrediuntur, rursusque per quam eadem dum recreantur regrediuntur. Ergo ad canorum Davidis Poëtæ sacri Psalterium verus ille Phœbus omnipotens ab alto, ita nostris mentibus intonat. Attollite portas principes vestras & eleuamini portæ æternales & introibit rex gloriæ. O principes, o mentes corporum principes, principes animalium quas ego minui paulominus ab Angelis, quas ego honore & gloria coronaui, quas super opera manuum mearum iure constitui, attollite portas, sursum eleuate voluntates, o portæ æternales, o voluntates æternæ ab æterno creatæ, æternorumque capaces, nolite aperire vos ad inferiora excipienda, quorum vos ingressus inficiat, aperite vos ad superiora recipienda, quæ suo vos ingressu reficient. Tunc sane ego per vos intra bo rex gloriæ, rex, inquam, & lucis & gaudij. Signabo super intellectus vestros lumen vultus mei, dabo autem vobis lætitiā meam. Ego sum porta per quam quisquis non intrat fur est & latro. Voluntas mea porta est per quam egressi estis omnes, voluntas vestra porta est per quam in me regrediemini omnes. Ego ignis sum consumens atque consummans. Consumens quidem materiam, consummans verò formam, consumens quidem materialem deformitatem, consummans verò spiritalem formositatem. Attende quid ubique faciat ignis, ignis illuminat atque calefacit, quod verò ab igne illuminatur non ideo euadit ignis, quia lumen ignis accipiat, sed quia calorem. Similiter ego velut ignis intellectus illumino, voluntates accendo. Vos autem non ideo diuini potestis euadere quia meam lucem sola intelligendi ratione quærat, sed quia calorem meum flagrantia volendi petatis. Agnoscite igitur quanti sit amor, ego enim amore vos meo creauī, vos quoque amore vestro, amore, inquam mei, vos ipsos in me recreabitis. Ego amore feci vos mentes, vos autem amore Dei vos quandoque deos reficietis. Tunc ego dicam. Vos quoque dii estis & filij Excelsi omnes.



MARSILII FICINI  
FLORENTINI  
EPISTOLARVM,

AD PHILIPPVM VALOREM,  
*Virum Magnificum,*

PROOEMIUM.

MARSILIUS FICINUS FLORENTINUS  
Philippo Valori, generosissimo Valoris  
virtutis heredi.



*V*m sapè, dilectissime  
Valor, octauo Episto-  
larum libro caput im-  
ponere tentauissem, ne-  
que vlllo pacto valerem,  
supplex tandem diui-  
nam potentiam obsecrani, vt tantum sal-  
tem mihi valoris suppeditaret, quantum  
capiti huic adhibendo suppeteret, felicissi-  
mum certe votum. Nempe dum pro capi-  
te admonendo Valorem opto, Valor ipse  
interim mihi factus est caput. Salue itaque  
dulcissimum libri, imò liberi mei caput,  
quo liber meus ducitur, & quo viuus, imò

verò quo multi iam mei liberi viuunt. Op-  
portunè admodum quorum vita iamdiu  
aspirat domus Medica, aspirat simul &  
Valoria domus. Quippe cum & ha fa-  
milie prorsus idem vbique velint, &  
opem Medicam mox valetudinis prospe-  
ra Valor ipse sequatur. Aspiret semper  
vriusque familie felicitati Deus omni-  
potens, & concordiam hanc seruet anti-  
quam. Lege feliciter, & viue felix vna  
cum Nicolao fratre admodum eleganti,  
atque lectioni huic Antonium Lanfredi-  
num egregium Academicum non vt Le-  
ctorem tantum, sed vt iudicem adhibeto.





# MARSILII FICINI FLORENTINI EPISTOLARVM,

(.:)

LIBER VIII.

(.:)

*Gratiarum actio pro libris Platonis, per Hieronymum,  
ab occupatore redemptis.*

Marsilius Ficinus Hieronymo, Vrbinatis  
Ducis Oratori, S. D.



Ogitabam modo, Hieronymus, tibi per Epistolam agere gratias, quod Diuinus Platonem à diuturno quodam carcere, durisque compedibus liberaueris.

At, ipse Platonis genius, his me fermè verbis cernit. An adeò Marsili, & eloquentiam magnificis tuam & libertatem paruifacis meam, vt dignas liberatione mea gratias Hieronymo te confidas acturum? Ego Hieronymum salutabo meum, ipsemet & gratias agam, ipse & referam, hunc enim & inter Academicos annumerabo meos, & tertium iam liberatorem meum post Anniceridem Architamque cognominabo. Sic ad me Hieronymus modo Platonis genius, tu verò ipsum mox Platonis spiritum, audi in hoc volumine quasi suo quodam corpore resonantem.

*Amor absentiam non patitur.*

MARSILIVS FICINVS  
Petro Compagnio dilectissimo  
suo, S. D.

**T**Vnc primum te hinc abesse suspicari cœpi, cum Epistolam tuam legerem,

qua interrogabas, quando ad vos sim profecturus. Ego verò iamdiu istuc aduentassem si te hinc abesse sensissem. Modo proficiscor ad alios quia minus amo, ad Academicum non proficiscor quia nimis amo, atque ita complector vt abire non sinam. Vale.

*Praemium in Apologos.*

MARSILIVS FICINVS

Georgio Cyprio compatri charissimo ac optimo Medico, S. D.

**C**Vm apud te literati nonnulli in ipsa coena de Scalæ nostri scriptoris elegantissimi Apologis verba facerent, atque à me in primis, quia nuper legeram, iudicium de his exigent Ego omnis, inquam Scalæ nostri Apologus & elegans mihi videtur & masculus. At illi arriserunt pariter atque deriserunt. Arriserunt quidem eleganti quasi eleganter expresso, sed masculum quasi dictum improprie derisere. Ego igitur (iudice te) affirmo me non solum proprie sed etiam verissime Apologos Scalæ masculos appellasse. Quis enim iure neget eos esse masculos, qui me adhuc antea sterilem vno affatu adeò fecundum

reddiderint, vt eodem ferme partu multos filios Apologos parerem? Quod quidem hinc etiam confirmatur, quod postquam illi è nostris laribus discesserunt, nulli deinde apud nos nascuntur Apologi. Eos autem qui tunc nobis nati sunt quasi ob priorem sterilitatem meam imbecilliores tibi & tanquam compatri nutriendos & tanquam Medico fouendos confirmandosque commendando. Vale & charissime compater & optime Medice atque lege feliciter.

*Amatoria silentij purgatio quando amicorum literis non respondemus.*

MARSILIVS FICINVS  
Philippo Valori, S. P. D.

**A**ccepimus iam pridem Epistolam tuam mi Valor, non mihi solum, sed etiam Petro Nero Philippoque Carduccio ac denique Academicis cunctis communem, vt nihil mirum sit nullum adhuc nostrum Epistolæ respondisse, dum aliis alios quotidie responsuros arbitrarentur. Accedit adhæc, quod Dialecticus quidam ex Academia, cum audiret reprehendi nos quod Valoris nostri Epistolam valoris plenam quodammodo paruifacere tam longo silentio videremur, in hunc ferme modum argumentari cœpit. Facile ostendi potest, amici non tam nos quam Philippum ipsum diuturni huius silentij causam extitisse, quapropter ipsum potius quam nostrum quemquam esse reprerehendendum. Sane si Philippus Valor est amicus noster, certe est Valor noster, rursus si ipse est Valor noster, vtique ipse est noster Valor, At si ille est noster Valor, consequens est, vt illo absente ipsi nihil penitus valeamus. Ergo Valor redeat, subito vox nostra redibit. Ingenium nobis ille dat, ille rapit. Cum verò hæc illa Dialecticus conclusisset, alij omnes latissimo statim applausu consensere, vnus dumtaxat in argumentando paulo curiosior, non amorem quidem, erga te communem simul & singularem improbare, sed ipsam argumentationis formam reprobare aggrediebatur. Sed cæteri omnes ad eum conuersi imposito silentio concluderunt, conclusiones amatorias quomodocunque & vndecunque ducantur non dissoluendas esse, sed totis viribus confirmandas. Ergo bene vale, Valor, noster & ad nos vela.

*Quomodo singuli Angelos custodes habent.*

MARSILIVS FICINVS  
Philippo Callimacho,  
S. P. D.

**P**latonicorum sententia est, complatonice mi Callimache, quot in cœlo dii, id est, stellæ sunt, totidem circa terras esse dæmonum legiones, totidemque in qualibet legione dæmones contineri, quot in cœlo sunt stellæ, duodecimque esse dæmonum principes, quem admodum & duodecim sunt in Zodiaco signa. Præterea alios quidem Saturnios esse, Iouis, alios, Martiosque atque Solares. Similiterque pro aliarum stellarum tam nomine quam virtute varios dæmones censent atque cognominant. Addunt tot insuper esse humanarum ordines animarum, quot & stellæ & dæmonum legiones connumerantur, aliasque aliorum tum dæmonum tum syderum tam naturam quam munus appellationemque sortiri. Hos verò dæmones appellant genios, ingenuos duces ingenij, singulos singulis animabus à lege fatali, id est ab ipsa, quando animæ labuntur in corpus sphaerarum omnium dispositione, influxuque nobis accommodatos, quibus mentes nostræ, quatenus deterioribus quibusdam dæmonibus sensibusque non parent, quotidie facili quadam occultaque persuasione ita ferme ducuntur, vt naues gubernatore reguntur. Verum de his iam satis. Nam hic eam reclamationem Epistola, cuius humanitas humilitasque sublimiores contemplationes vix admittit.

Admittis hæc verbis (vt equidem audio) mi Callimache, tanquam Platonis nostri sectator: sed, vt video, non omnia hæc re ipsa confirmas. Quod enim vnicum quisque bonum habeat dæmonem, cum ipse multos apertissime bonos habeas, haud satis affirmas. Nunc Poësis Apollineum præfert dæmonem, nunc oratoria Mercurialem, aliàs Philosophia Saturnium; aliàs grauitas Iouium, semper & magnanimitas Martium, & humanitas vrbanaque Venerum, vt Callimachum nostrum Polidæmonem cognominare iure possimus. Salue igitur salue iterum Callimache Polidæmon, imò verò salue toties quoties bonis dæmonibus obtemperans, malis interim dæmonibus dominaris, & quoties præclare pugnans, quod Callimachus nomen sonat, superas quoque præclare Quid mirum ex omni te certamine victoriam reportare. Nempe si vnico dæmone quondam scilicet & Mercuriali Vlysses, & Martio Achilles,

& Venereo Aeneas, multis periculis sospites euaserunt, tu certe fida multorum custodia passim tutissimus ibis.

### MARSILIUS FICINVS

Sebastiano Baduero & Bernardo Bembo clarissimis Venetorum ad Summum Pontificem Oratoribus, plurimum commendat.

**V**T certioribus auspiciis ad summum Pontificem accedatis, publicam totius Italiae penes illum, quam optat, concordiam firmaturi, ferte vobiscum concordiam cum lege diuina excellentissimorum apud Gentile Philosophorum vestrumque Marsilium Pontifici summo Seruum deuotissimum suppliciter commendate.

*Concordia Moysi & Platonis.*

### MARSILIUS FICINVS

Braccio Martello literis & moribus ornatissimo, S. D.

**N**Vmenius Pythagoricus quem Origenes non solum Pythagoricis, verum etiam Philosophis pene omnibus anteponit, cum & Mosaios & Platonicos legisset libros, ait se in Platone Mosem agnouisse, nihilque aliud esse Platonem quam alterum Mosem Attica lingua loquentem. Quamobrem qui te, optime Bracci ad Academiam vocant, non tam ad Platonice disciplinam quam ad legem Mosaicam exhortatur Nam cum primum ingressus Academiam fueris, occurret tibi Parmenides qui vni cum demonstrabit Deum esse rerum omnium ideas, id est, exemplaria rationesque eminentissime continentem vel producentem. Occurret Melissus & Zeno, qui solum Deum reuera esse demonstrant, caetera verò videri. Veniet obuius & Timaeus ostendens mundum à Deo suae bonitatis gratia fuisse creatum, Deumque à principio coelum terramque creauisse, deinde aëreum spiritum super aquas circumfudisse, atque haec omnia tam diu permansura quam diu diuinæ placuerit voluntati. Deum fecisse hominem adeò sibi similem, vt vnicum Dei in terris cultorem terrenorumque Dominum collocauerit. Offerent ibidem se tibi Politicus, Prothagoras & Menexenus & Critias differentes ex terra homines ab initio rerum Dei virtute creatos atque sub spiritum diuinorum perpetua custodia positos, legem à solo quodam Dei nuncio accepisse, ac demum post mundi cursum ex terra, Deo iubente, resurrecturos.

Ibi Philebus, Thaeetetus, Phaedon, Phaedrus, Socrates in sola Dei ipsius similitudine atque fruitione nostram beatitudinem esse docent. Audies & senem quendam Atheniensem, verbo Dei mundum esse dispositum asserentem, Deumque rerum omnium esse mensuram, maximè verò si Deus fiat homo, superbos tanquam à Deo rebelles effulmantem, humiles verò probantem tanquam Deo charissimos, denique omnibus praedicentem siue descenderint in infernum, siue in coelum ascenderint, eos vbique diuinum iudicem reperturos Audies Hermiam, Heraclumque & Coriscum ibi doceri Deum rerum omnium ducem causamque patrem esse simul & filium, atque in singulari ipsius amore summum constitui bonum. Doceri insuper Dionysium, circa omnium regem esse cuncta ipsius gratia omnia, eumque causam esse bonorum omnium, deinde beatos hoc ordine distingui spiritus, vt alij potentiam Dei vel vt efficientem causam, alij sapientiam seu exemplar, alij bonitatem tanquam finem omnium referant. Doceri tandem Syracusanos, diuina mysteria rationibus comprehendere non posse, sed puritate mentis Deo persimiles denique fieri, vt tanquam ab igne scintillante subito lumen animo fulgeat seque ipsum iam alat. Proinde aspicias Herum Pamphilium diuino iussu à mortuis resurgentem, quo viuentibus animorum secreta renunciaret. Ille te per Elisiam praepraeducet quæ nostri nomine paradysi significant. Ostendet & inferos digito & purgatorium antrum atque Lymbum Eadem tibi Socrates multis vbique rationibus confirmabit, docebitque æternitatis curam habendam nobis esse multo magis quam temporis. Contemnenda esse caduca, vt consequamur æterna, præstare iniurias vel grauissimas perpeti quam inferre. Nihil curandum contendendumque aliud quam vt purissimum iudici omnia inspicienti animum offerre possimus, itaque confessionem poenitentiamque voluntariam peccatorum ante omnia probabit esse salutem hominum necessariam, sed ad eam iubebit maximè properandum, ne antiquatus animi morbus insanabilis prorsus euadat. Monabit denique nos per huius vitæ mare ipsa exactissime rationis naui tam diu vehi, quoad diuino denique verbo tutius feliciasque proueamur. Illic & Laches ad crebram delictorum confessionem poenitentiamque hortabitur. Verum curnam generosum Charmidem præterieram? Hic enim tibi Bracci à pristina quadam animorum nostrorum intemperantia, omnia tum corpo-

ris tum fortunæ incommoda proficisci aperi-  
 erit. Rursusque adiiciet, si prima ipsa pu-  
 ritas animorum restituatur, immortalita-  
 tem quoque restituendam. Denique Cri-  
 tias in ipsis Academiae penetralibus tan-  
 quam Mosaicum oraculum proclamabit.  
 Deum cum creauisset mundi hominem  
 postremo, quod & Prothagoras dixerat, ef-  
 fecisse in terra sibi simillimum atque alma  
 quadam impleuisse gratia, quae permanente  
 cunctis tum animi tum corporis fortunæ-  
 que bonis perpetuo fruere-  
 tur, in viridariis  
 quoque suis sub Vere perpetuo eum collo-  
 cauisset, exigua quadam salubrium pomor-  
 um degustatione vitam foelicem proroga-  
 turum. Circumsepsisse insuper hortos, ne-  
 quid alienum ingrederetur. Verum cum  
 homo à diuinis paulatim ad caduca diuer-  
 teret, patrisque legibus minus indies minus-  
 que obtemperaret, diuinam illam euani-  
 se gratiam, ideoque in turpem animi habi-  
 tum corporisque morbos & vitæ solitudi-  
 nem, laboresque incidisse, atque demum  
 exhortis illis ad regiones admodum dissi-  
 miles fuisse translatus. Quod quidem insi-  
 diante malo quodam dæmone sub insolenti-  
 oris voluptatis esca infeliciter accidisse,  
 Timæus & Phædrus & Diotima in Acade-  
 mia testabuntur. Sed, ut redeamus ad Cri-  
 tiam, hic tibi concludet, Deum cum huma-  
 num hoc opificium suum iam penitus im-  
 probaret, utpote quod ex diuino paulatim  
 profanum euaserat, quo & purgaret mali-  
 gnitatem & restitueret puritatem, terras in-  
 genti aquarum diluui-  
 o abluisset. Neque ve-  
 rò prætermittenda est aurea sententia illa  
 Platonis Academiae ducis, eatenus ac-  
 quiescendum esse, dicentis, præceptis suis,  
 donec sacratior aliquis quam homo in ter-  
 ris appareat, qui fontem omnibus veritatis  
 aperiat, quem denique sequantur omnes.  
 Hactenus & Plato & hi qui Platonis lingua  
 loquuntur. Præterea Plotinus & Philo, di-  
 uinum intellectum Dei filium celi iubent,  
 ab ipso Deo patre manantem vel tanquam  
 à loquente verbum, vel tanquam à luce lu-  
 men. Quod quidem Iamblicus, Aegyptio-  
 rum testimonio comprobatur, Deum sui ip-  
 sius patrem filium apertissime nominans.  
 Numeratque Angelos Archangelosque &  
 principatus, quos & Proculus nouenario  
 distribuit numero, affertque Chaldaeorum  
 oracula in quibus paterna in Deo potentia  
 & intellectus à patre manans, Igneusque  
 amor exprimitur. Sed quid de Amelio di-  
 cam? Hic proœmium illud Euangelij Ioan-  
 nis quod in sacris quotidie legitur, paucis  
 totum colligit atque admiratur. Hæc illi.  
 Tu verò Martelle, postquam Academiam

ingressus mysteria hæc ab his heroibus in-  
 tus acceperis, ac insuper alia plura atque  
 maiora quæ non capit Epistola, forsitan  
 Petri voce Bonum clamabis Bonum est hic  
 esse, faciamus tria tabernaculorum millia.

*Confirmatio Christianorum per Socratica.*

MARSILIVS FICINVS,

Paulo Ferobanti insigni Theo-  
 logo, S. P. D.

**N**isi vereretur, optime Paule, fore non  
 nullos qui vel prauitate ingenij vel  
 paruitate iudicij, alio quam modo loquamur  
 sensu caperent, singula demonstrarem, So-  
 cratem & si non figura qua Iob atque  
 Ioannes Baptista, tamen adumbratione  
 forte quadam Christum salutis authorem,  
 quasi (ut ita loquar) præsignauisse, idque  
 hac ratione præcipue facerem, ut detracto-  
 rem illum confunderem. Lucianum, qui  
 cum omnibus detraxisset, bonis Christianis  
 denique non pepercit, audens fidei nostræ  
 martyres deridere, quod & tanquam ni-  
 mium simplices, omnia quæ apud homines  
 bona habentur libenter amitterent, & tan-  
 quam infortunati se ipsos vltro cruciatibus  
 cædibusque exponerent. Obiiciendus au-  
 tem Luciano simplices deridenti, Socrates  
 ante alios sapientissimus & magnorum te-  
 stimonio Philosophorum & Apollinis ora-  
 culo iudicatus. Hic ergo non rudi quadam  
 simplicitate, imò singulari mentis excel-  
 lentia atque (ut Plato Xenophonque te-  
 stantur) diuinitate insuper vaticinioque in-  
 genito, æterna bona caducis in omni eius  
 vita præposuit, incommodaque corporis,  
 in ediam præsertim & nuditatem atque for-  
 tunæ mala omnia vltro sustinuit, solo ani-  
 mi malo detrimentoque sempiterno per-  
 territus, vni dumtaxat pietatis charitatis-  
 que intentus officio. Quippè qui propria  
 negligens commoda, nulloque detentus  
 periculo, tanquam animorum Medicus  
 mentibus hominum, vbique, circa fines pa-  
 trios, purgandis incumberet, dum super-  
 biam ante omnia detestatur, mansuetudi-  
 nem verò & charitatem religionemque  
 præ cæteris approbat, solum veri amoris  
 charitatisque studium proficitur, ambitio-  
 sam scientiarum excludit professionem.  
 Diuinis vbique nititur testimoniis, firma-  
 que illis hæret fide, piis iustisque moribus  
 est contentus, atque id quod mirum est,  
 nullum tam laboriosi officij in præmium  
 humanum sperans, sed certo ob id periculo  
 & morti se subiiciens. Nempe ad hoc vnum  
 se à Deo missum assueverat, mallegue di-

cebat Deo quam hominibus obsequi. Sed audiamus Socratem ipsum parumper apud iniquos iudices ita clamantem: Me verò esse talem ut à Deo civitati tributus fuisse videar, hinc potestis animadvertere. Non humanum certe id esse videtur, quod ego mea quidem omnia omnino neglexerim, atque in hac rei familiaris negligentia inopiaque tot annos iam perseuerem, vestro semper intentus bono, dum singulos convenio tanquam pater aut frater natus maior, suadens curam virtutis habere. Quod si quampro officio meo mercedem reciperem, humanam quandam id rationem haberet. Hæc ille. Itaque dum corripit peccatores, & calce percussus salutat percussorem, & alteram percussus genam abicit alteram. Denique tantum ex veritate odium reportavit ut ab iis ipsis impietatis fuerit accusatus, quibus ipse palam pietatis officium prædicaverat. Quid verò dicam, quod cum se facile defendere posset in iudicio non defendit; neque excusavit seipsum, sed iudices accusavit, & cum è carcere posset abire noluit, iniustamque necem sustinuit libentissime, summæ constantiæ patientiæque posteris exempla daturus. Mitto in præsentia, triginta nummorum precium de Socrate factum & ipsius Socratis vaticinia, vindictam quoque diinitus post eius necem subito consecuturum Lotionem, vesperi paulo ante obitum institutam à Socrate exhortationemque eius ad pietatem hora cœnæ. Quid quod in eadem hora de calice atque benedictione & in obitu ipso de gallo fit mentio? Mitto præterea multa Socratistam facta quam dicta; non ab ipso quidem, sed à discipulis eius quatuor præcipue scripti, quibus Christiana fides adversus Lucianum maximè confirmatur. Multa enim sunt & ea quidem maxima, quæ de numine huic infuso deque abstractione mentis à corpore & quasi quadam transfiguratione traduntur. Hæc verò neque facile Epistola caperet neque benigne forsitan nonnulli reciperent, putantes fortasse Socratem nunc quasi æmulum comparari, quem defensorem paro.

*In quo Principis consistat laus.*

MARSILIVS FICINVS  
Galeotto Faentia Principi,  
S. P. D.

**A**Lamannus meus modo me rogat proficisci Faentiam, quo & sponte sum profecturus. Imò etiam iam pridem (iubente Platone, quippe qui ex alto mihi iam-

diu vaticinantur, quod sibi quondam tertio in Siciliam itinere minimè contingit, in præsentia me primo hoc itinere statim consequuturum, inuenturum scilicet virum sui ipsius, prius quam populi principem, neque tam dominum, quam patriæ patrem. Qui non Martis solum colat, sed & Palladis arces, qui & inter milites Martem referat, & inter Musas agat Apollinem. O felicem urbem! ô verè Faentiam! cui tam mirificè propitius favit Deus, quam effecit felicissimi Principis favore felicem.

*Excusatio obsequij non collati.*

MARSILIVS FICINVS  
Ioanni Pico Mirandulano complatonico suo, S. D.

**Q**ua de causa ipse cupis Platonicos à nobis libros accipere, eadem & nos in præsentia cogimur retinere. Si quando dabitur obsequendi facultas sponte obsequar quam libentissime. Doleo equidem, mihi crede, ob singularem mutuumque amorem nostrum, & te sæpe optare quæ præstare non possum, & me non posse semper præstare, quod optes. Vale.

*Qui commendat omnes, est commendandus ab omnibus.*

MARSILIVS FICINVS  
Bandino, S. D.

**S**I quis honorandus est ab omnibus, is proculdubio est qui & ipse omnes honorat. Verrino igitur vati debent omnes honorem. Hic enim tam gratus est, tam gratus, ut omnes & quibus debet admodum grate, & quibus non debet gratis honoraret. Fauet bonis, extollit ingenia, ornat doctos, illustrat principes, colit sanctos, Deum in omnibus veneratur. Quid plura? ipsum vos audite. Qui enim laudat omnes ipse se laudabit in omnibus. Nisi verò tibi commendatus sit is cui probi commendari sunt omnes, nescio quem unquam habeas commendatum. Vale.

*Charitatis laus.*

MARSILIVS FICINVS  
Hermolao Barbaro Veneto, S. P. D.

**C**haritas non quærit quæ sua sunt, sed quæ alterius, charitas omnia credit, omnia sperat, omnia sustinet, charitas non cogitat malum, charitas nunquam excidit, denique in charitate nullus est timor,



Sed perfecta charitas timorem omnem procul expellit. Hæc verbis quidem simplicibus, sed ingenti quodam mysterio clamant diuinæ religionis Antistites. Hæc tu, humanissime Barbare, sic erga me forte quadam quasi erga te ipsum seruas omnia, ut hanc ipsam charitatem quam pietatis Christianæ patres in primis exoptant, in te magnopere seruere non dubitem. Profecto amatissime mi Hermolaë, Deum ipsum testor, qui charitas est, ad eam ipsam charitatis ideam & in te expressisti, & mihi ante oculos posuisti, ut ego quem hactenus quoad poteram ac liber amabam, nunc iam supra vires necessarioque amare compellar, hactenus igitur non amare & absentiam ferre potui, iam vero in posterum nequeo non amare, atque absentiam æquo (ut solebam) animo ferre non possum. Spero autem Deum qui nobis mirabiliter coniunxit animos, quandoque similiter oculos coniuncturum. Neque verò putare quemquam volumus Hermolaum atque Marfilium ob id forsan minus vel esse vel fore coniunctos, quod alter quidem Aristoteli fauere potius videatur, alter verò Platoni. Nam in eodem veritatis virtutisque cultu sumus vnum, in quo Plato & Aristoteles non esse vnum non potuerant. Perge itaque latinissime & Attice Barbare, atque, ut cœpisti, Atticum Aristotelem à diuturna barbarie strenue vendica. Ego verò Platonem nostrum à lethea quadam obliuione vel somno pro viribus excito. Ita diuinitus institutum est, ut mea utaque opera Latini Platonem loquentem saltem, & Aristotelem nunc primum audiant Latinè loquentem.

*Non exigendum ab amico plusquam habeat.*

MARSILIVS FICINVS,  
Ioanni Aurelio Ariminensi, S. P. D.

**A**N satis à me putabis tibi factum. Aureli iustissime, si toties ero tuus, quoties meus ero? satis equidem arbitror. Noui enim æquitatem & modestiam tuam, nihil plus mei à me exacturam quam habeam ipse mei. Hactenus non Marfiliani iuris sum, imò verò Platonici, iamdiu interpretatione huius totus additus, heri tandem, adiuuante Deo Platonicum opus exegi. Nunc primum mihi redditus, amicis quoque sum pariter restitutus. Misisti ad nos Vere superiori carmina multa partim à te, partim ab amicis composita, in quibus artem humanam laudo, Apollineum furorem miror, pietatem erga defunctos summo opere probe, ingentes pro ingenti munere gratias ago.

*Commendatio librorum Platoniceorum.*

MARSILIVS FICINVS  
Francisco Bandino, S. P. D.

**A**Ccedit ad vos tandem Plato noster pia Philippi Valoris opera, neque profecto absque singulati valore valuisset vnquam tanta terrarum spatia peragrarè. Ergo age complatonice mi Bandine, quantum ego te amo, quantum & tu me amas, tantum sicut & soles honora Platonem. Ac si Platonici nunc iterum peregrino opus est hospitio, hospes esto. Rursus si parum isthic noto opus est præcone, esto præco, si denique inter aduersarios trepidanti necessarium fuerit patrociniū, esto patronus.

*Excusatio quando breuius respondetur amicis.*

MARSILIVS FICINVS  
Antonio Calderino, S. P. D.

**N**Emo vellatior aspicit amicorum literas vel responderet alacrior quam Marfilius, cui nihil sine amicis est gratum. Quod autem duabus iam Epistolis tuis vix tandem reddiderim vnam, Platonice ille magnus Plotinus in causa est. Qui cum Platonem suum nuper rescuerit (me duce sine potius traduce) in Italiam accessisse, me dies noctesque sedulus vrget, ne permittam Platonem diutius absque fido Achate suo apud Italos peruagari. Ego igitur ad eam ingenti huic operi vehementer incumbo, ut vix mei ipsius aliquando reminiscar. Cum primum Plotinus me mihi reddiderit, reddet amicis.

*Excusatio quando breuius respondetur amicis.*

MARSILIVS FICINVS  
Callimacho, S. P. D.

**A**Ccepi tuas Callimache literas subtiliter & eleganter de dæmonibus disputantes atque has quidem valde dæmonicas. Sed vide quam dæmonicus amice sis, imò verò diuinus. Dum enim certas non posse à dæmone hominem occupari, interim te dæmone & quidem diuino occupatissimum esse demonstras. Quam quidem de re libentissime tecum pluribus agerem, nisi quouis momento Plotinus noster ad se reuocaret interpretandum. Quamobrem dum Plotinus detinet, Plato interea ad te profectus nostra opera tecum Latinè loquatur, hic etiam pro muneribus magnas tibi gratias agit, dum ipse gratiam habeo immortalem. Vale. Die xviii. Aprilis. M. cccc. lxxxv.

*Quæ qua Via ducit Deus, pergendam sit.*

MARSILIVS FICINVS  
Francisco Bandino, S. P. D.

**P**latonem, Bandine, quem petitis, arbitror iam ad vos ante has literas peruenisse, hūc ergo feliciter interea legite, dum ego do operam ut quando quod legatis lecto Platone, Plotinum: Plotinus noster Platoniorum vnā cum Platone suo facile Princeps, quinquaginta & quatuor diuinis composuit libros. Trigesimo eius libro hac hora (Deo aspirante) extremam imposui manum. Ita profectò iubet Deus omnipotens, hac nos diuina prouidentia ducit, hac ergo sequamur.

*Dubitatio, Vtrum opera Philosophica regantur fato, an prouidentia.*

Ioannes Panonius, Marsilio Ficino  
Platonico, S. P. D.

**L**Egi Budæ in Epistola ad Bandinum, item in Proœmio tuo super Platonē, & in Proœmio Theologiæ tuæ, quantum astruas prouidentia, quod aliquis esse fari, suspicabitur: Primò non video equidem ad quid seruiat prouidentia renouatio antiquorum Theologia, præterea memini cum olim in Italiam profectus, Latinis literis & Græcis erudiret Florentiæ, me à duobus vestrorum Astrologis audiuisse, te ex quadam syderum positione antiquas renouaturum Philosophorum sententias. Quamquidem positionem syderum, & si audierim non satis recolo, sed te arbitror meminisse, imò & per te inuenisse. Adduxerūt item illi Astrologi ad suum iudicium confirmandum, quod fatali quodam tempore antiquum cytharæ sonum, & cantum, & carmina Orphica obliuioni prius tradita luci restituisset, mox & Mercurium Trismegistum antiquissimum traduxisti, & Pythagorica multa Item carmina Zoroastris explanauisti, & antequam Florentia huc redirem, transferendo Platoni manum inieceras, iisdem (ut equidem suspicor) astronomicis auspiciis. Quod autem hæc non prouidentia quam fato quodam fiant abs te, illud etiam argumento est, quod ante hæc omnia, antiquum quemdam Philosophum siue Poëtam, utpote adhuc adolescens, leuiter propagasti, quem deinde meliori frenus consilio suppressisti, & (ut audio) pro viribus extraxisti, neque fuerat illud diuinæ prouidentia manus, quod ipse ætate prudentior factus, meritò iudicasti

damnandum. Equidem, te amice, moneo, caueas ne fortè curiositas quædam sit isthæc renouatio antiquorum, potius quàm religio.

*Quod diuina prouidentia statuit antiqua renouari.*

MARSILIVS FICINVS  
Ioanni Pannonio, S. P. D.

**S**I nostra quæ legisse te dicis intellexisses, non dubitares nūc qua potissimum ratione nostra hæc veterū renouatio diuinæ prouidentia seruiat. Principio neque debemus ab illis ad summum Christiana requirere, qui Christi aduentū antecesserunt, neque confidere acuta & quodammodo philosophica hominum ingenia vnquam alia quadam esca præterquam philosophica ad perfectam religionem allici posse paulatim ac perducī. Acuta enim ingenia soli serationi committunt, cumque à religioso quodam philosopho accipiunt, religionem subito communem libenter admittunt. Qua quidem imbuti ad meliorem religionis speciem sub genere comprehensam facilius traducuntur. Itaque non absque diuina prouidentia volente omnes pro singulorum ingenio ad semirabiliter reuocare factum est, ut pia quædam philosophia quondam, & apud Persas sub Zoroastre, & apud Ægyptios sub Mercurio nasceretur, utrobique sibi met consona. Nutrīretur deinde apud Thraces sub Orpheo atque Aglaophemo. Adolesceret quoque mox Pythagoras apud Græcos & Italos. Tandem verò à diuo Platone cōsummaretur Athenis. Vetus autem Theologorum mos erat, diuina mysteria tum Mathematicis numeris, & figuris, tum Poëticis figmentis obtegere. Plotinus tandem his Theologiam velaminibus enudauit, primusque & solus, ut Porphyrius proculusque testantur, arcana veterum diuinitus penetravit. Sed ob incredibilem tum verborum breuitatem, tum sententiarum copiam sensusque profunditatem, non translatione tantum linguæ, sed Commentariis indiget. Nos ergo in Theologis superioribus traducendis & explanandis hæctenus laborauimus. Nunc verò quotidie in Plotini libris similiter laboramus, huic operi nos, sicut & illi suo, diuinitus destinati, ut hæc Theologia in lucem prodeunte, & poëtarū definiant gesta mysteriaque pietatis impie fabulis suis annumerare, & peripatetici, id est philosophi omnes admonentur non esse de religione, tanquam de anilibus sentiendum.

Totus enim terrarum orbis à peripateticis occupatus, in duas plurimum diuisus est sectas, alexandrinam & auerroicam. Illi quidem intellectum nostrum esse mortalem existimant, hi vero vnicum esse contendunt. Vtrique religionem omnem funditus æquè tollunt. Siquis autem putet tam diuulgatam impietatem, tamque acerbis munitam ingeniis, sola quadam simplici prædicatione fidei apud homines posse deleri, iis à vero longius aberrare palam re ipsa protinus conuincetur. Maiori admodum hic opus est potestate. Id autem est vel diuinis miraculis vbique patentibus, vel saltem philosophica quadam religione philosophis eam libentius audituris quandoque persuasura. placet autem diuinæ prouidentiae his seculis ipsum religionis sue genus autoritate rationeque philosophica cōfirmare, quoad statuto quodam tempore veris infimam religionis speciem, vt olim quandoque fecit, à manifestis per omnes Gentes confirmet miraculis. Quod verò tu nostri huius operis causam in fatum referre volens de nostra genesi attigisti, non inficior equidem in hac ipsa figura Saturnum in aquario ascendentem, & Solem Mercuriumque in noua cœli plaga aspectumque reliquorum planetarum ad ipsam nonam, significare hominem rerum antiquarum inuolutorem, sed efficere nego. Tu quoque si Epistolam nostram de Magorum stella, & similem in Theologia nostra disputationem, item Plotini libros hac ipsa de re tractantes, quos & traduximus, diligentissime legeris, planè intelliges, officia publici boni ad animos pertinentia, dependere quidem præcipuè, velut à communibus primisque causis, à supernis mentibus Dei summi ministris, proficisci etiam quodammodo tanquam à causis propriis atque vltimis, ab humanis consiliis, vbi se supernis accommodant. Significari autem à figuris moribusque coelestibus, velut diuinarum mentium instrumentis. Disces præterea fatum, id est, cœlestium seriem causarum prouidentiae diuinæ seruire. Animos verò nostros tunc maximè liberos iudicari, quando maximè cum diuina voluntate consentiunt. Quoniam verò te poetarum apprime studiosum esse cognosco, rem totam vna cum Marone concludam. Aeneas, id est heroicus animus descendens ad inferos, & iterum ascensurus, id est, secreta diuinorum mysteria penetraturus, & obscura editurus in lucem, diuina ad hoc ipsum prouidentia ducitur, tanquam & diuinitus, vt ait, genitus quem

& equis amabat Iupiter, & diuina ad idem Oracula pronocabant. Incedit rursus ad idem, libero quodam arbitrio, vbi cum ascendens euehit ad æthera virtus, & vbi consultat, quid potissimum sit agendū, & sponte Oracula consulit, & semper libentissime cum sententia diuina consentit. Confert ad idem fatum prouidentiae seruicus ab Oraculo designatum.

*Carp manu namque ipse volens, facilisque sequetur.*

*Si te fata vocant, aliter non viribus ullis, Vincere, neque diuo poteris conuellere ferro.*

Profectò fatum velut prouidentiae præco ad id te vocat, id tibi significat quod statuit & imperat prouidentia, tu verò eatenus opus arduum vales ad finem vsque perducere; quatenus duo hæc aspirant. Eatenus quoque agis liberè, quatenus libenter prouidentiae pares. Et tunc vera es in regno fati dominus, quando videris in regno prouidentiae seruus. Vale.

*Pro prima Platonis impressione parum fortunata.*

MARSILIVS FICINVS  
Francisco Bandino, S. P. D.

**Q**UOD Platonis nostri libri tandem ab Impressoribus sint expressi, pia Philippi Valoris opera & magnifica manu factum est. Quod autem minus eleganter expressi, id partim negligentia Impressorum, vel potius Oppressorum, partim (si dictu fas est) malignitate fortunæ, nobis accidisse putato. Doles autem (qua tua pietas est) senem hunc nostrum ad vos squalidum accessisse. Desine, precor, mi Bandine, dolere. Sic enim & natura cōparatum est, & sorte datum, vt qui è carcere diuturno soluantur, profundisque tenebris eruuntur, squalentes prodeant, macieque cōfecti. Est aliquid post multa tenebrarum secula vidisse lucem, est plurimum ab inferis surrexisse. Iam sub diuo est diuus Platonis, iam spirat Phœbus pater ex alto suis filium radiis illustrabit. Vale.

*Purgatio de silentio.*

MARSILIVS FICINVS  
Americo Corsino, S. P. D.

**D**IXI equidem fratri tuo Philippo probo doctoquo viro his mihi temporibus non licere, vel ad amicos absentes ab vrbe quicquam scribere vel salutare præsentibus; Plotinum namque Platonis me sibi totum penitus vendicare, hinc tu Plotinum statim vehementi oratione, & acerrimo carmine lioris accusas, qui & ipse

ipse nullius sit, & me qui ferme omnium esse soleo, nullius fore contendat. At ego nunc Amerige vicissim Plotinum fore omnium melior, ac dum vni huic omnium mox futuro diligenter indulgeo, videor interim omnibus indulgere. Vale.

*Propheta & interpretes Prophetarum.*

MARSILIVS FICINVS  
Dominico Beniuenio Complatonico  
suo, S. P. D.

Quærebas superioribus diebus (& subtiliter admodum vt soles) omnia, qua virtute potissimum post tam diuturnam Platonis lectionem adhuc viuam, cum prima Platonis nostri lectio tibi rapuerit animum, totumque in platonem ipsum repente transfulerit? Nisi Plato noster, mi Dominice, viueret, & imò nisi melius admodum quam nos viueret, profecto dum transferimur in Platonem, interim laberemur in mortem. Sed cum inter homines quondam æternæ semper vitæ vixerit, merito nunc æterna vita viuens non in mortem legentes vertit, sed felicius conuertit in vitam. Missa in præsentia facio tanti muneris argumenta. Quod imminet nunc agamus. Dic age quis nunc nostris vulneribus medeatur, quæ medici nobis Hebræi quotidie inferunt, nisi Plato noster Medicus animorum? Interfuisi & tu disputationibus quæ in ædibus Ioannis Pici Mirandulensis ante alios admirandi, sæpe tractatæ sunt atque tractantur, vbi Helias & Abraham Hebræi Medici atque peripatetici aduersus Gulielmum Siculum differunt. Oracula prophetarum ad Iesum minime pertinere, sed alio quodam sensu dicta contendunt, conuertentes aliorum omnia è manibusque nostris pro viribus extorquentes, neque facile conuinci posse videntur, nisi diuinus Platonem prodeat in iudicium inuictus religionis sanctæ patronus: hunc igitur audiamus, consideremusque diligenter quid hac de re, & in Timæo dixerit, & nunc nobis adducat in medium. Alij (inquit) vates sūt, alij vatum interpretes. Nam qui præfagiunt, sæpe nesciunt quid præfagiant, & qui velociter interpretantur, errant magis in præuidendo, huius autem causa est, quod solertia interpretum venatoria, velox & versatile requirit ingenium præfaga facultas. Siquid debeat præsentire, ingenium exigit pacatum atque quierum, hæc autem tanquam inter se repugnantia in eodem facile non concurrunt.

Ex hac ergo Platonis nostri sententia colligere possumus, certam præscientiam futurorum in Deo tamen esse, mentemque diuinam per prophetam quasi per linguam futura prædicere, & quæ mens intelligit linguam interea ignorare. Nec immerito prophetæ, id est, prædictores & fatidici, id est prædictores factorum appellati sunt, neque tamen præscij vel præscientes, quasi non horum officium sit intelligere, sed præscita solum diuinæ mentis pronunciare. Quod si præfagi dicuntur, id est, præsentientes, id ipsum præfagium non ad mentem & rationem, sed ad sensum imaginationemque pertinere videtur. Sit ergo in lingua prophetæ futuri prædictio futurorum, sit in eius sensu futuri quædam imaginatio. Ratio verò certa & finis futuri ipsius in mente diuina, neque tamen temerè prorsus propheta loquatur, sed dum proprium quiddam se imaginari putat, illudque se sperat dicere, interim prænunciet aliud licet simile, tamen inde diuersum.

Quod quidem & adeò qui ad sonitum propheticam inflat tubam distinctè prænoscitur, & postquam denique factum est ab interprete deprehenditur ita esse factum, vt & propheta quasi præter spem protulerat, & Deus ipse præsciuerat. Non latuit Euangelistam talia esse prædicentium vaticinia (vbi ait) Caiphæ pontificem prophetasse, dicentem: præstat vt moriatur vnus pro populo quam tota Gēs pereat. Admittit quidem Euangelista hæc verba, veluti vaticinia quædam de morte Christi pro populo, scit autem alio quodam sensu à Caipha fuisse pronunciata. Non latuit Apostolum paulum prophetas nequaquam intellexisse quid dicerent, vbi ait, Testamentum vetus totum sub nube ac velamine extitisse, & sub figura quædam illis omnia contigisse. Vult igitur ferme omnia non solum verba sed gesta significasse futura, neque tamen confiteretur, antiquos quicquid loquerentur, quicquid gererent cognouisse hæc nostra portendere. Non latuit prophetam Dauidem, prophetas velut infantes atque lactentes non satis intelligere quæ prædicuntur. Mitto quæ alij de asino Balzam præsignante futura ferunt. Et quæ Gentiles de auguriis auspiciisque latissime scribunt. Sciunt autem auēs quamuis significant futura quædam ac prænunciant, quid tamen portendant penitus ignorare. Sileant ergo sileant iam Iudæi verborum cavillatores. Esto (si placet) pronunciauerit Haïas & Ieremias & Daniel alijque, nonnulla sub eo sen-

su quo Hebraei passim interpretantur, sed interim pronunciantes latuerit quid Deus ipse senserit, quidue simile Prophetarum verbis, diuersum tamen fore prædestinauerit. Hac sane sententia & expositione Platonis, optime mi Dominice, Iudæorum interpretum commenta solito suo tenore procedunt, Iudaica versutia frangitur, veritas Christiana seruatur. Vale. Sed postquam dixi vale, recordatus sum, Doctores Christianos cum Prophetia sapientiam copulare. Idemque Iamblicum Platonium & Proculum affirmare atque dicere, eum qui sine sapientia prædicit aliquid aut præagitur non Propheticum. Hac ergo distinctione tutius accipere possumus, quæ ex Platone & sacris literis sunt adducta.

### MARSILIVS FICINVS

Reueren. in Christo patri & Domino,  
D. Marco Veneto Diui  
Marci Cardinali se  
commendat.

**P**lato noster Romam profectus iam diu vagatur, hospitium passim querens ingenio suo moribusque aptissimum. Diuinus hic hospes purum sacrumque optat hospitem, sapiens doctum, eloquens elegantem. Tandem post longos errores in Augustis Marci Veneri Cardinalis ædibus, velut in portu libentissime conquiscebat, existimans se illic alteram academiam consequutum, & sperans quod in primis optabat, singulari iam sui hospitis sapientiæ summam quandoque potetiam non defuturam. Plato igitur hac electione huius auspicii tuos ingressus est lares, hoc ille potissimum tecum animo viuit. Quo autem ego erga te animo sim, quo amore obseruantiaque affectus Plato ipse interea tibi vaticinabitur, donec Antonius Calderinus familiaris noster mentem erga te meam aperiat, testis doctrina probitateque locupletissimus tuarum apud nos virtutum præco, nostræ apud te singularis obseruantie nuntius. Vale.

*Inimici hominis domestici eius.*

### MARSILIVS FICINVS

Petro Leoni Platónico Peripatetico  
singulari, S. P. D.

**S**alutem mihi complatonice, iam pridem saluo Platone, salue, & nuper mi complatonice Plotino iam saluo. Accipe nonnullos quos hic expectabas Plotini libros, heri omnibus transferendis fi-

nem imposui. Reliquum est & recognoscere verba, & obscurum sæpe sensum argumentis quibusdam reddere clariorem. Tu quidem optabas his tandem peractis multos Hippocratis libros me latinos efficere, ego autem Plotino mox absoluto, medicum cogor non iam interpretari, sed agere. At sacerdotem, inquires non decere. Quid sacerdotem? Sacerdotem præstat referre medicum quam mendicum. Vixi hætenus atque etiam viuo, quod maxime Philosophum decet, tenui facultate contentus, sed non eadem contenti viuunt domi nepotes, orphani, neptesque iam nubiles, inimici hominis domestici eius. Vixi equidem philosophantis more semper, hodie nec vnquam crastinum cogitavi. Sed hodie domestica turba me compellit inuitum (quod Deus verat) cogitare de crastino. Tentavi fortunam meam hoc anno Laurentio nostro sæpius aperire, sperans mihi apud illum significatione tantum opus fore non precibus, subrusticus verò pudor me sæpe cohibuit, sed Epistola vel amicus minus forsitan erubescet. Vale. Florentiæ die xvii. Ianuarij. m. cccc. lxxxv.

### MARSILIVS FICINVS

Venerando in Christo patri D. Marco Veneto Cardinali diui Marci, S. P. D.

**M**ercurium ferunt (quod te non latet) venerande pater, non verba tantum solitum nunciare, sed mittentis etiam mentem interpretari. Ascribunt Mercurio rursus opportunum reminiscentiæ munus, neque id quidem iniuria, sicut enim Lunæ motu corporis, ita Mercurio motum animi tribuunt. Dum igitur in animo mouet sensum, nunciare videtur, dum rationem mouet, interpretari, vbi verò memoriæ excitat, reminiscentiæ suscitare. Quorsum hæc? Nempe Calderinus noster inter nos integro Mercurij videtur officio fungi, non solum enim quasi nuntiis tuas mihi literas reddit verbaque refert, verum etiam mentem erga me tuam interpretatur. Amorem denique non docet, inquam, sed reuocat potius in memoriæ. Sciebam enim iam diu me abs te vehementer amari, non id quidem alio, sed animi duntaxat mei conscientia nunciante. Cætera venerande pater humana externis discimus coniecturis, quod videlicet doctus sit aliquis, quod formosus, quod potens atque diues. Quod verò nos amet non externa docent, nam externa sapissime fallunt, sed animus amore erga illum affectus certissime docet.



Qua enim vel ingenii similitudine ego iamdiu te amo, eadem vicissim (nam mutua similitudo est) ab te amari non dubito. Mercurius ergo noster quo apud nos tuo nomine nuper officio functus est, eodem apud te vicissim nomine nostro fungetur. Neque sic quidem quanti iudicium tuum faciam, & quam mirifice singulares virtutes tuas colam, exprimere poterit. quod autem vel ipse Mercurius (ut ita dicam) explicare non possit, Apollo saltem proferat vaticinio, ac tandem Iupiter officio feliciter impleat.

MARSILIVS FICINVS  
Antonio Calderino, S. D.

**S**alue Calderine noster, salua quoque sit Epistola nostra. Cum sub Solis defectu à nobis abieris, cuiam mirum sit Epistolam quoque nostram tunc defectum fuisse perpeffam? Nempe clausulae in eius calce duae nescio quomodo defuerunt, forsitan quoniam duae quaedam Solis quartae lumine defecerunt. Resumpsit Phoebus suum subito lumen, resumpsit nostra mox Epistola finem,

MARSILIVS FICINVS  
Braccio Martello literis & moribus  
ornatissimo, S. P. D.

**C**um superioribus diebus apud Philip-pum & Nicolaum Valores in agro Maiano versarer, & in quodam ibi secessu naturam daemonum indagarem, affuit repente Plotinus, diuinumque oraculum de daemonibus nobis effudit, verbis & breuissimis & obscurissimis inuolutum. Visum itaque nobis operæpretium accire Porphyrium tū Plotini discipulum, tū perferutandis daemonibus deditissimum, qui facile daemonicum sui præceptoris inuolucrum nobis euolueret. Aduentauit ergo Porphyrius & per Plotinum suum & per suos daemones aduocatus, aperuit vobis quæ præceptor senserat. Confirmauit quæ Origenes de daemonibus disputaue-rat. Porphyrius quidem Græcis nobiscum locutus est verbis, quorum ego summam verbistibi Latinis interpretabor, hanc tu summam si cum Epistola, quam de Mosis Platonisque concordia tibi dicaui de con-templatione Platoniorum non Plato so-lum verum etiam Platonici cum nostra re-ligione consentiant. Vale.

*Platonici Deo & anima mundi nihil præter  
contemplationem sacrificant, animabus  
autem stellas mouentibus flores sacrifi-  
cant atque terra arborum-  
que fructus.*

**P**rimus quidem Deus cum sit incor-poreus, immobilis, impartibilis, in v-lo, neque etiam in se ipso cohibitus, nullo eget extrinseco, neque etiam mundi ani-ma eget extrinsecis, possidet enim & con-tinet ipsum quod est trina dimensione porrectum, facultatemque naturaliter se mouentem, & suapte naturæ decreuit be-ne ornatæque moueri, mouereque mundi corpus secundum optimas rationes. Ex-cepit autem in se ipsa corpus atque com-plexa est, quamuis incorporea sit atque ab omni libera passione. Diis autem reliquis ac mundo & errantibus & non errantibus, qui ex anima & corpore constant oculis manifesti, sacrificandum est sacrificiis duntaxat inanimatis.

*Numina sub Luna qua non videntur, damo-  
nes, antiqui gentium populi nominabant,  
putabantque unumquemque da-  
monem prodesse nobis aliquan-  
do & obesse.*

**R**eliqua est inuisibilium multitudo, quos Plato absque distinctione dæ-mones appellauit. Horum verè alii quidam ab hominibus cognominati, apud singulos nacti sunt honores diis æquales, reliquumque cultum. Alij verò plurimum ferme nominati non sunt, sed à qui-busdam per vicos, aut vrbes nomen & cul-tum occulte quodammodo sortiuntur, re-liqua verò turba sic quidem communiter appellatur nomine daemonum. Rata vero apud omnes fides est eiusmodi, eos certe læsuros genus humanum si irascantur. prop-terea quod negligantur, neque cultum le-gitimum nanciscantur, rursusque benefa-cturos hominibus, qui eos votis supplica-tionibusque & sacrificiis & aliis quæ con-sequuntur sibi conciliauerint. Cum igitur opinio hæc de demonibus confusa sit, mul-tumque habeat in eos calumniæ, neces-sarium est eorum naturam ratione distin-guere: forte namque necessarium aiunt, vnde circa illos error hominibus incidit declarare, distinguendum igitur hunc in modum.

*Omnes daemones sunt anima quadam prodeuntes ex tota anima, id est ex ipsa animarum idea, habent & spiritum, id est, tenue corpus: sed daemones qui maxime suo corpori dominantur, boni sunt atque benefici, qui autem corpori minime dominantur mali sunt atque malefici.*

**Q**Uaecunque igitur animæ ex tota anima pullulantes magnas sub Luna locorum partes gubernant, innitentes quidem siue adhærentes spiritui, sed ipsum secundum rationem superantes, has utique bonos dæmones iudicandum, & ad eorū quæ sunt utilitatem omnia procurare, siue quibusdam præsent animalibus siue certis fructibus, siue aliis horum gratia ordinatis, velut imbribus & tempestatis ventis aërique sereno temperationique temporum & reliquis ad hæc omnia conferētibz, apud nos rursum, artibus & Musicæ disciplinæ & medicinæ ac gymnasticæ atque similibz, fieri verò non prima vthi qui utilitati rerum commoditatique consulunt, rursum inferant detrimenta. Inter hos annumerandi sunt dæmones, quos Plato transferre nunciareque dicit humana quidem diis, diuina verò hominibus. Dum vota quidē nostra ad Deos velut iudices perferunt, illorum verò iussa monitionesque vnā cum vaticinio ad nos deducunt. Quaecunque verò animæ coniuncto spiritui minime dominantur, sed plurimum cedunt, hæc sane per hunc ducuntur nimium & feruntur, quando iræ concupiscentiæque spiritus inualescunt. Hæc quidem animæ quoque sunt dæmones, sed rite malefici nominantur, sunt autem tūm hi omnes, tūm quos diximus ab his diuersi inuisibiles, nec prorsus humanis sensibus manifesti, non enim solido corpore vestiuntur, præterea nec vnā omnes formam habent, sed figuris plurimis insignitas & formæ quæ illorum spiritum obsignant aliās quidem apparent, aliās verò nequaquam. Aliquando verò & formas mutant, illi scilicet qui deteriores sunt, spiritus autem earum quæ quidem ratione corporeum quiddam est, passioni obnoxium est atque dissolubile, sed quæ ab animabus ita deuinctum est, species eius diu perseverare potest, neque tamen est æternum. Consentaneum enim est aliquid ab eo semper affluere atque nurriri. In harmonia quidem corpus bonorum consistit, quemadmodum & corpora nobis manifestorum, sed maleficorum demonum corpora inconcinna sunt ac affectione passiva locum incolunt terræ vicinum. Nullum ergo malum est quod non

audeant perpetrare, habent enim omnino violentum & male sanum morem, desertum videlicet custodia dæmonum meliorum, indeque vehementes repentinasque insidias plurimum machinantur & prouunt, ac dum agunt incursiones, partim latere conantur, partim inferunt violentiam. Quamobrem acutæ velocisque sunt passionēs ab eis illatæ. Curationes autem emendationesque à dæmonibus melioribus tardiores esse videntur. Omne enim bonum gubernatione facile æqualeque est & progreditur ordine neque, quod opportunum est transgreditur. Si ergo sic de dæmonibus senseris nunquam in opinionem de illis incidēs absurdissimam, per quam opineris vel à bonis mala, vel à malis contingere bona. Neque sic tantum absurdus est sermo, sed etiam multi concipientes inde pessimas de diis opiniones in multos homines diuulgarunt. Vnum enim hoc est inter maxima damna quæ à maleficis dæmonibus inferuntur, quod videlicet cum ipsi infeliciū passionum terrenis incidentium authores sint, sicut pestis, penuriæ, terræ motus, æstus, incendij atque similia, nobis interea persuadent illos horum effectores esse, qui contrariorum potius, id est, fertilitatis, prosperitatisque eiusmodi sunt authores. Sic itaque seipsos ex ipsa calamitatum causa conantur absoluerē. Atque hoc primum quidem iniustitiam suam latere nos molitur. Subinde veros nos flectunt ad supplicationes & sacra beneficis conuenientia, de diis quasi illi nobis irati sint. Hæc autem similia que faciunt studentes à recta deorum scientia nos abducere atque seipsos adducere. Omnibus enim rebus sic iniquè discorditerque factis admodum delectantur. Et tanquam aliorum deorum facies subeunt sicque in prudentia nostra confisi sibi turbas in societatem assumunt. Et propter eiusmodi concupiscentias hominum, incendunt animos amoribus cupiditatibusque diuitiarum, dominationum, atque voluptatum. Rursum nouis opinionibus nos inuoluunt, ex quibus seditiones bellaque nascuntur & cætera generis eiusdem. Quod autem animum grauissimum est persuadent similia à superis effici, ad eò ut etiam Deum maximum criminationibus eiusmodi subigant. Quem tradunt omnia sursum deorsumque turbare. Accidit autem hoc non rudibus tantum hominibus sed multis Philosophiæ etiam studiosis. Cum verò erroris vitio procedit atque confirmatur: etenim Philosophantes qui à communi colluione au-

quam secesserunt, in eosdem cum plebe errores inciderunt, rursusque turbæ opinionibus suis similes, à laudatis scriptoribus audientes in hac de iis sententia sunt magis etiam confirmatæ. Poëticum namque artificium suspiciones insuper eiusmodi hominum acrius excitauit, propterea quod elocutione utitur ad stuporem & attractum quasi magicum vehementer accommodata, facileque potenti mulcere animos & allicere, ideoque fidem de rebus prorsus impossibilibus nobis afferre. Sed profecto firmiter credendum est, neque bonum unquam lædere, neque prodesse malum. Non enim calor est, ut inquit Plato, frigefacere, sed oppositi, ita neque iusti nocere. Iustissimum autem omnium naturaliter est ipsa diuinitas, alioquin nihil diurnum foret. Nonne igitur secernenda est hæc potentia fors beneficorum dæmonum? Quæ enim prompta est naturaliter ad nocendum, contraria est beneficæ, contraria verò circa idem nunquam naturaliter accidunt. Cum igitur eiusmodi dæmones in multis mortalem lædant naturam, etiam quandoque in magnis certi boni dæmones interim officia sua nunquam deserunt, sed imminetia passim à malis pericula pro facultate significant, tum insomnis ostendentes, tum per animos diuinitus inspiratos perque alia multa. At si quis posset significata discernere, omnes improborum machinas deprehenderet atque deuitaret, hi namque significant omnibus, sed non quibus significata cognoscit neque quilibet scripta legere valet, sed qui literas antè didicerit. Per contrarios verò dæmones vniuersum efficitur veneficium. Hos namque maximè horumque ducem honorare solent qui mala veneficiis inferunt, hi sane dæmones omniformibus figuris imaginibusque abundant prodigiorumque machina strenue fallunt, horum opera infelices, philtora amatoriaque maleficia machinantur. Omnis enim intemperantia spesque diuitiarum atque gloriæ per hos inualefcit, præcipue verò deceptio. Mendacium enim proprium est eiusmodi dæmonum. Dij enim videri volunt ac potestas ipsa eis præficiens Deus maximus vult haberi, hi sane sunt duntaxat qui libamine nidoreque carniū oblectantur, his enim spiritale corpus eorum pinguescere solet. Viuit namque hoc vaporibus fumigationibusque atque varias admodum, ut par est, per varia nidoreque sanguinis & carniū vires assumit.

*Qui sacrificant animalia clam dæmones ad se malos alliciunt, dæmonibus verò bonis, id est, Angelis, res duntaxat inanimatas puritate mentis consecrare debemus.*

**V**l igitur prudens atque temperatus cauebit eiusmodi sacrificiis uti, quibus eiusmodi dæmones attrahat ad seipsum. Studebit autem animum perfectè purgare. Animum namque purum ob ipsam dissimilitudinem nunquam aggrediuntur. Proinde si ciuitatibus forte necessarium sit hos etiam dæmones sibi conciliare, nihil ad nos vsus eiusmodi pertinet. Nam in ciuitate diuitiæ externaque & corporea commoda tanquam bona inter ciues habentur, atque horum contraria mala. Neque ferme quicquam pensi habent de animi perfectione atque puritate. Nos autem commodis quæ dæmones afferant quantum fieri poterit non egebimus, sed tum ex animo, tum ex rebus externis omni studio contendemus, Deo quidem ipsi sibi que propinquis, similes fieri, quod sane tranquillitate animi veritatisque rerum comprehensione distincta, ac vita ad hæc prorsus intentata, completur. Improbis autem hominibus atque dæmonibus omnique prorsus eo quod mortali que gaudeat, dissimiles effici. Quamobrè secundum ea quæ tradidit Theophrastus ipsis quoque sacrificabimus quibus & Theologi consenserunt, cognoscens videlicet quatenus animam à perturbationibus purgare negligimus, eatenus potestati improbi copulari. Vnde merito compellemur hanc insuper demulcere, ut enim Theologi tradunt, qui à rebus pendent externis neque dum perturbationibus dominantur, hac ipsa conditione coguntur, putantis eiusmodi impetum à se propellere, alioquin cessare nunquam à laboribus poterunt.

*Puritas & abstinentia à malis demonibus nos tuentur, quibus contemplatores sacrificare nihil debent.*

**Q**Vapropter Theologo si quando permittunt dæmonibus improbis vitam durum gratia malorum, quæ illaturi sint, animalia mactare vetant, simul talia sacrificia degustare, præterea iubent antequam ita sacrifices, purgare animum ieiunio ac præcipue animalium abstinentia. Existant enim sanctam animi puritatem esse quasi symbolum & characterem diuinum, quo custodiaris adeò ut nihil patiaris ab illis quibus ipse propinquas dum eos sacri-

ficando concilias. Quando enim contra  
 sis affectus atque illi quibus sacrificia ope-  
 raris, sisque purior ideoque diuinior, te &  
 corpore & animo indemnem perseverare,  
 pura scilicet sanctimonia velut arce muni-  
 tum. Quamobrem fascinatrix etiam  
 veneficisque necessaria visa est eiusmodi  
 cautio per quam sint à discrimine tutiores,  
 neque tamen penitus tuti esse possunt, las-  
 ciuix namque gratia consueverunt dæmo-  
 nes improbos compellare. Quapropter  
 non veneficorum incantatorumque pro-  
 pria est puritas atque sanctimonia, sed di-  
 uinorum certe viuorum contemplantium-  
 que diuina. Iam verò castitas abstinentia-  
 que suas passim obseruatores contra ma-  
 los dæmones diuina familiaritatem tue-  
 tur. Itaque si fascinatores hac uti prorsus  
 constituissent certe fascinare nunquam  
 prorsus auderent, utpote qui per hanc re-  
 vocati essent ab eorum concupiscentia  
 quorum gratia impietate se polluant. Ita-  
 que perturbationum pleni, atque vix vel  
 paululum cibus abstinentis impuris, ideo-  
 que ipsi prorsus impuri supplicia luunt trās-  
 gressionis contra vniuersum iniquæ, par-  
 tim quidem sub dæmonibus quos ipsi pro-  
 uocant, partim etiam sub diuino iudicio,  
 cuncta mortalium opera consiliaque prorsus  
 inspiciente.

*Sapiens abstinere tum cibo tum sacrificio ani-  
 malium, per hæc enim mali ad nos dæmo-  
 nes aduocantur.*

**D**iuinus vir animum, tum sapientia  
 diuinarum tum abstinentiam, cibo  
 rum perturbationes hominibus incitan-  
 tium, tum ipsa ad Deum similitudine mu-  
 niet & quasi Dei templum incontamina-  
 tum animum esse putabit. In hoc videlicet  
 vniuerso Dei patris templo. Denique cum  
 omne sensibile corpus defluxus quosdam  
 materialium dæmonum nobis afferat, cer-  
 te vñ cum impuritate nutrimenti ex car-  
 nibus & sanguinibus hausti, adest nobis  
 potestas dæmonica huic amica facileque  
 plectta propter similitudinem proprieta-  
 temque valde familiarem. Quamobrem  
 recte Theologi omnes in primis abstin-  
 tiæ studuerunt. Memento igitur dæmones  
 quidem malos animalium victimis dele-  
 ctari. Deum ante eiusmodi victimis non  
 egere, qui sane adorantium mores inspi-  
 cit, maximum existimans sacrificium re-  
 ctam de diuinitate sententiam. Nam apud  
 Deum optima est oblatio, pura mens &  
 perturbationum vacuus animus, hinc Pla-  
 to, bono quidem viro conuenire ait sacri-

ficia operari diuinisque interesse, malum  
 verò frustra inter sacra versari.

*Purgatio de silentio ad amicum.*

MARSILIUS FICINUS  
 Francisco Bandino, S. P. D.

**D**ices mi Bandine, video, imò iam-  
 diu dicis, Marsilium ad amicos raro  
 parumque scribere, contra quam frequens  
 & longus postulat amor, sæpe multumque  
 requirens. Ego verò multa semper mihi  
 videor ad amicos scribere, dum assidue  
 multa conscribo amicis cæterisque legen-  
 da. Plotinus iamdiu quod promiseram La-  
 tina disputat lingua, quatuor & quinqu-  
 ginta libris, sed horum insuper commen-  
 taria poscit à nobis. Octo iam peregrinus  
 Deoque confisi alacriter ad cætera pergi-  
 mus. Commenda nos Matthiæ inuicti  
 Pannoniæ regi. Sed dicito non posse com-  
 mendatum habere Marsilium, nisi Iaco-  
 bum Azarolum in primis delicias nostras  
 habeat commendatum.

*Honestæ exactio ab amico.*

MARSILIUS FICINUS  
 Ioanni Pico Mirandulanovi doctis-  
 simo, S. P. D.

**S**alue. Dum alij aliorum gratia te vr-  
 gerent, ego de mittendo ad nos Ma-  
 humete vrgeri te nolui. Vereor autē ne  
 si diutius extra patriam consenescat, im-  
 potens tandem sit ad reditum. Tu igitur ve  
 oportune redeat pro tua humanitate cura  
 bis. At si aliquot insuper dies huc sis apud  
 te hospitem retenturus, mitte saltem sub-  
 ito Auicennam, qui permissione diuina sta-  
 tim disputat post Mahumetem, hæc enim  
 disputatio mihi nunc in primis est necessa-  
 ria, hanc in Alcorani calce vel paulo post  
 inuenies.

*Purgatio de breuitate scribendi ad amicum.*

MARSILIUS FICINUS  
 Francisco Bandino, S. P. D.

**D**edi iam pridem ad te literas Iacobo  
 Azarolo amico vero & eleganti vi-  
 ro, quætu pariter atque me Matthiæ in-  
 uicti Pannoniæ Regi sæpe meo nomine  
 commendare memento. Scripseram me  
 in octauum Plotini librum iam commen-  
 taria peregrisse. Nunc in duodecimum cō-  
 mentaria meditor, atque hac assidua cura  
 contingit, ut raras admodum & perbreues

amici literas à nobis accipiant. Et profecto quando tu tales, ceteri forte nullas. Miranda equidem inuenio in Plotino mysteria, atque ( id quod mirabilius est ) frequentissima, quæ utinam saltem verbis explicem sicut augurari animo mihi videor. Sed vale iam Bandine mi suauissime, Plotinus interim me accersit.

*Commendatio amici.*

MARSILIVS FICINVS  
Francisco Bandino, S. P. D.

**R**ogauit te aliàs, iterumque precor, ut causam iam vetustam Vincentij sacerdotis necessarii nostri magno regi commendes. Tota istinc pendet vita misselli. Erit profecto clementiæ regiæ, opem ferre sacerdoti egeno iusta petenti. Vale.

*Quid sit felicitas.*

MARSILIVS FICINVS  
Antonio Seraphico conphilosopho, S. P. D.

**T**Am grata mihi fuit Seraphice Epistola tua quam grata tua mihi libertas. significat enim te tandem à negotio in ocium libertatemque vindicasse te ipsum, si felicitas cuius gratia omnia omnes agimus finis est, si finis est quies, si quies est ocium, nihil felicitati magis quam negotium aduersatur. An ergo ut sim beatus nihil agam ( absit: ) si enim vita actus est naturæ intimus & perennis, neque potest beate viuere qui non uiuit, nimirum nec essemus nihil agendo beati, quid ergo? Nempe deuitabimus actionem qua vel sit in motu, si modo beatitudo sit quies, qua vel sit multiplex, quandoquidem summus finis est vnus, vel quod referatur ad aliud, siquidem finis vltimus non refertur ad finem. Actiones igitur fugiemus externas, quæ versantur in motu, quæ distractæ sūt, quæ præmio seruiunt alieno. Actui interim mentis intimo contenti erimus, actio hæc non aliunde pendet, sed habitat ipsa secum, non expectat præmium, sua enim sibi voluptas est præmium. Denique quicunque sic agit solus animum non agit ut aliquando sit beatus, sed iam beatus agit.

*Laus ingenij.*

MARSILIVS FICINVS  
Illustri Ioanni Pico Mirandulano conphilosopho suo, S. P. D.

**O**Res miras, ô rem incredibilem, apud eos qui reminiscentiæ non memi-

nerint. Legimus quæ misisti noningenta problemata, singula ( quod est mirabilius ) singularia. Liceat ergo mihi vnicum præter hæc palam proponere defendendum, cognitionem scilicet quæ scientia dicitur esse reminiscentiæ. Hoc equidem non his tamen noningentis asseram argumentis, sed toto prorsus tuo ingenio comprobabo. Tot enim & tanta, tam recte, tam facile, præstare in ætate tam tenera reminiscentiæ est potius quam discentiæ. In memoria igitur æterna erit amicus.

*Nil intempestiue tentandum.*

MARSILIVS FICINVS  
Bernardo Bembo Veneto equiti clarissimo, S. P. D.

**D**Esiderabas ( ut audio ) testimonium aliquod apud Platonem incredibilis beneuolentiæ nostræ. Amoris nostri, mi Bembe, testis est sextus Theologiæ liber, liber totus Epistolarum, quotidianus Marsilij sermo. Plato verò idcirco non accessit ad testimonium ne forsan importunus accederet, sciens testem non asserre fidem, nisi venerit opportunus. Sed testimonium hac de re Plato suum Plotino mandauit, Platonico testi vsque adeo fido, ut in Plotino tamen ipse Plato sit fidus, hic igitur explebit facilius quod Plato forsan difficilius præstitisset, hic quatuor & quinquaginta in omni Philosophia libros diuine composuit Omnes iamdiu Latinos effecimus. In decem atque octo commentaria composuimus, reliquos studiose prosequimur, sperantes operis tanti finem ( fauente Deo ) felicem. Vale feliciter Marsilij tui semper memoris perpetuo memor.

*Sapiens abstinebit tum sacrificio animalium, per hac enim mali ad nos demones aduocantur.*

**D**iuinus vir animum, tum sapientia diuinarum, tum abstinentiam ciborum perturbationes hominibus incitantium, tum ipsa ad Deum similitudine muniet & quasi Dei templum incontaminatum animum esse putabit. In hoc videlicet vniuerso Dei patris templo. Denique cum omne sensibile corpus defluxus quosdam materialium demonum nobis afferat, certe vnà cum impuritate nutrimenti ex carnibus & sanguinibus hausti, adest nob. potestas demonica huic amica facileq; pellenda propter similitudinē proprietatemque



valde familiarem. quamobrem recte Theologi omnes in primis abstinence studuerunt. Memento daemones quidem malos animalium victimis delectari. Deum autē eiusmodi victimis non egere, qui sane adorantium mores inspicit, maximum existimans sacrificium rectam de diuinitate sententiam.

Nam apud Deum optima est oblatio, pura mens & perturbationum vacuus animus, hinc Plato, bono quidem viro convenire ait sacrificia operari diuinisque interesse, malum verò frustra inter sacra versari.

*Purgatio de silentio ad amicum.*

MARSILIVS FICINVS  
Francisco Bandino, S. P. D.

**D**ices mi Bandine, video, imò iamdiu dicis, Marfilium ad amicos raro parumque scribere, contra quam frequens & longus postulat amor, sæpe multumque requirens. Ego verò multa semper mihi videor ad amicos scribere, dum assidue multa conscribo amicis cæterisque legenda. Plotinus iamdiu quod promiseram Latina disputat lingua, quatuor & quinquaginta libris, sed horum insuper commentaria poscit à nobis. Octo iam peregrimus Deoque confisi alacriter ad cætera pergimus. Commenda nos Matthiæ inuictō Pannoniæ regi. Sed dicito non posse commendatum habere Marfilium, nisi Iacobum Azarolum in primis delicias nostras habeat commendatum.

*Honestæ exactio ab amico.*

MARSILIVS FICINVS  
Ioanni Pico Mirandulano viro doctissimo, S. P. D.

**S**alue. Dum alij aliorum gratia te vrgerent, ego de mittendo ad nos Mahumete vrgere te nolui. Vereor autē ne si diutius extra patriam consenescat, impotens tandem sit ad reditum. Tu igitur ut oportune redeat pro tua humanitate curabis. At si aliquot insuper dies huc sis apud te hospitem retenturus, mitte saltem subito Auicennam, qui permissione diuina statim disputat post Mahumetem, hæc enim disputatio mihi nunc in primis est necessaria, hanc in Alcorani calce vel paulo post inuenies.

*Purgatio de breuitate scribendi ad amicum.*

MARSILIVS FICINVS  
Francisco Bandino, S. P. D.

**D**edi iam pridem ad te literas Iacobo Azarolo amico vero & eleganti viro, quem pariter atque me Matthiæ inuictō Pannoniæ Regi sæpe meo nomine commendare memento. Scripseram me in octauum Plotini librum iam commentaria peregisse. Nunc in duodecimum commentaria meditor, atque hac assidua cura contingit, ut raras admodum & per breues amici literas à nobis accipiant. Et profecto quando tu tales, cæteri forte nullas. Miranda equidem inuenio in Plotino mysteria, atque (id quod mirabilius est) frequentissima, quæ utinam saltem verbis explicem sicut augurari animo mihi videor. Sed vale iam Bandine mi suauissime, Plotinus interim me accersit.

*Commendatio amici.*

MARSILIVS FICINVS  
Francisco Bandino, S. P. D.

**R**ogauit te aliàs, iterumque precor, ut causam iam vetustam Vincentij sacerdotis necessarii nostri magno regi commendes. Tota istinc pendet vita misselli. Erit profecto clementiæ regiæ, opem ferre sacerdoti egeno iusta petenti. Vale.

*Quid sit felicitas.*

MARSILIVS FICINVS  
Antonio Seraphico conphilosopho, S. P. D.

**T**am grata mihi fuit Seraphice Epistola tua quam grata tua mihi libertas. significat enim te tandem à negotio in ocium libertatemque vindicasse te ipsum, si felicitas cuius gratia omnia omnes agimus finis est, si finis est quies, si quies est ocium, nihil felicitati magis quam negotium aduersatur. An ergo ut sim beatus nihil agam (absit:) si enim vita actus est naturæ intimus & perennis, neque potest beate viuere qui non viuit, nimirum nec effemus nihil agendo beati, quid ergo? Nempe deuitabimus actionem qua vel sit in motu, si modo beatitudo sit quies, qua vel sit multiplex, quandoquidem summus finis est vnus, vel quod referatur ad aliud, siquidem finis vltimus non refertur ad finem. Actiones igitur fugiemus externas, quæ versantur in motu, quæ distractæ sūt,

Commendatio amici nomine  
Philosophi.

**S**alue dilectissime mi Bandine. Scribo  
iam tertio ad te pro causa necessarij  
nostri Vincentij sacerdotis. Hanc precor  
si modo id valeas, opportunè inuicto Re-  
gi Matthiæ commendes, atque id in-  
super nomine meo, siquidem potes, Philo-  
sophicum nomen apud reges alicuius esse  
momenti, solet enim ea esse Philosophicæ  
fortis humilitas, vt apud minimos quidem  
possit aliquid, apud maximos verò mini-  
mum. Atque hac ipsi sorte contenti su-  
mus, modo philosophi simus, id est, vt pe-  
nes nos ipsos saltem plurimum valeamus.  
Neque diffiteor tamen me apud matthiam  
interdum aliquid potuisse neque diffido  
iterum valiturum, siquidem non potentia  
solum, verum etiam sapientia claret. Vale.

Oratio Marsilij Ficini de charitate, habita  
in collegio canonicorum Florentino-  
rum ad populum, propositum in  
tria capita orationem  
diuidens.

**A**t tollite portas principes vestras, &  
eueamini portæ æternales, & introi-  
bit rex gloriæ. Attollite aures, eleuate  
mentes, introibit in vos viuum & efficax  
Dei verbum, vnà cum verbo Dei charitas  
ante omnia salutaris, simul cum charitate  
statim rex gloriæ Deus. Deus enim chari-  
tas est, & qui manet in charitate in Deo  
manet & Deus in eo.

*Quod Deus charitas est.*

### CAPVT I.

**D**eum quidem summum esse charita-  
tem, patres venerandi & dilectissimi  
fratres, non tantum sonat Apostolica tu-  
ba, verum etiam tota rerum natura pro-  
clamat. Omnis enim natura rerum ideo  
creata est atque seruetur, quoniam ab ini-  
tio voluit atque vult Deus ipse creator. Vo-  
luntas autem in Deo proculdubio nihil al-  
liud est quam charitas atque Deus. Volun-  
tas, inquam, penes Deum non appetitio  
prorsus vlla, sed gaudium, gaudium pro-  
pria bonitate perpetuo gaudens. Cum e-  
nim duo quædam potissimum in volunta-  
te considerare possimus, appetitum atque  
læticiam, neque possit in primo bono vllus  
esse stimulus appetendi, nimirum volun-  
tas illic & charitas nihil à gaudio discrepat.  
Nam quemadmodum lux & calor, quæ  
duo quædam sunt in igne, vnum denique

sunt in Sole, sic appetitus atque læticia duo  
quidem in nobis sunt extra patriam circa  
finitum bonum, sed penes bonum infini-  
tum voluntas omnis est ipsa voluptas. Iam  
verò in elementis cælo subiectis aliud qui-  
dem est elementorum motus ad locum,  
aliud autem eorundem quies in loco, sed  
in cælo prorsus idem est motus, quiesue  
cælestium in reuolutione perpetua quies-  
centium. Similiter super cælum idem tan-  
dem est ardor ipse charitas & gaudium.

*Qui manet in charitate, in Deo manet.*

### CAPVT II.

**D**iuina quidem charitas dum proprio  
gaudet bono, commune omnibus  
amat curatque bonum. Charitas humana  
vicissim quatenus communi omnium bo-  
no gaudet, eatenus proprium inde repor-  
tat bonum. Quamobrem qui manet in  
charitate, in Deo manet, permanetque  
semper in gaudio, tum quia Deus ipse cha-  
ritas est, tum etiam quia dum charitatis  
flammis animus ardens affectus, Deum  
quidem excelsum in seipso, homines au-  
tem amat in Deo, interim ipso Deo, qui  
charitas est, afficitur mirabiliter Deusque  
efficitur. Nempe quemadmodum materia  
quælibet non idcirco fieri solet ignis quod  
ab igne lumen accipiat, sed calorem, sic &  
animus quandoque diuinus euadit, non  
tàm quia Deus intelligentiæ nostræ quasi  
subrutillet, quam quoniam nostra voluntas  
amoris diuini flagrantia ferueat. Inter hæc  
autem exclamat nobis hunc in modum  
vester Apostolus. Cessabit tandem pro-  
phetia vobis in patria vbi præteritum de-  
finit atque futurum. Cessabit quoque  
scientia vobis vbi & argumentatio definit,  
& modus mutabitur intuendi, charitas  
verò sola cessabit nunquam. Siquidem a-  
mandi conditio sub ratione gaudendi  
semper eadem permanebit.

*Et Deus in eo.*

### CAPVT III.

**H**acigitur ratione charitas sola per-  
manet, & qui manet in charitate in,  
Deo manet, sed quonam pacto manet  
Deus in eo? In animo, inquam, finito ip-  
se Deus immensus, manet quidem animus  
noster in Deo comprehensus, manet au-  
tem Deus in anime comprehendens. Ma-  
net certe Deus omnipotens etiam vbi  
non est charitas, sed tanquam iudex acrior

atque iudex exactorque pœnarum. Ma-  
net rursum clementissimus Deus ubi viget  
charitas tanquam eucharistia salutaris &  
gratiarum omnium abunde largitor.

*Epilogus & exhortatio.*

**O** Charitatem omnipotentem, quæ  
Deus est, quæ facit, quæ seruat, quæ  
perficit omnia! O sapientissimam charita-  
tem quæ diuinitus accendens animum ex  
animo mirabiliter transformat in Deum.  
O charitatem proculdubio benignissimam!  
quæ gratiam creatoris immensam cum fi-  
nita creatura communicat Eucharistiæ  
sanctæ communione. Qua Christus ipse  
propitijs mundi seruator dum & in cœlo  
est, nihilominus vsque ad consummationē  
sæculi totus est vbique nobiscum, cadu-  
cam alimenti nostri substantiam in corpus  
suum in nutrimentum cœleste conuer-  
tens, panis quidem dimensionem seruās,  
interca propriam non admittens, panis  
præterea dimensionem diuidens non di-  
uisus! Quo quidem nouo prorsus & gran-  
diore cibo ne forte perdat nos velut pro-  
phanos, sed vt tanquam suos foueat salu-  
briter atque alat. Claudamus dilectissimi  
fratres claudamus precor terrenas sensuū  
nostrorum portas, per quas insidiosus  
quotidie dæmon ingreditur, pandamus  
autem atque eleuemus æternas voluntatis  
& intelligentiæ portas ad magnum Re-  
gem gloriæ Christum, ad Iesum Chri-  
stum nostrarum Pontificem animarum,  
Pontificem æternum ad ostium nostrum  
affiduè stantem atque pulsantem nobis-  
cum, si aperuerimus, hodie cœnaturum.

Ad cuius ingressum statim gaudebit  
cor nostrum gaudiumque nostrum nemo  
tollet à nobis. Hic enim ob incredibilem  
charitatem suam nos in loco pascuæ col-  
locabit, hic de torrente voluptatis suæ po-  
tabit nos, hic nos in hac cœna pascale re-  
creabit manna cœlesti & pane nutriet an-  
gelorum. Nos igitur ob charitatem solam  
videbimus & gustabimus hodie quam sua-  
uis sit dominus, sentiemus protinus quam  
magna sit multitudo dulcedinis eius,  
quam solis cum diligentibus confertabit.  
Inebriabimur enim ab vbertate domus  
eius, satiabimur ad votum cum apparuerit  
gloria sua.

*Fortuna virtuti plurimum aduersatur.*

MARSILIVS FICINVS  
Rainaldo Gauardo Vene-  
to, S. P. D.

**F**ortunam plerique cæcam existimant,  
quod nunquam videat quibus patrocini-

netur aut etiam aduersetur, sed absque de-  
lectu semper clientis cuiuslibet suscipiat  
patrocinium, poterit & aliquis forsan for-  
tunam fingere non cæcam quidem, sed  
inuidam potius ac prorsus ambitionisam.  
Quippe cum nolit viris ingenio pruden-  
tiæque excellentibus aspirare, quorum  
præclara facinora non sorti sed virtuti po-  
tius ascribuntur. Afflare verò soleat pluri-  
mum, ubi quicquid emerferit magnum  
fortunæ solum possit attribui. Contra ve-  
rò pro viribus bonos insequi conarique  
vsque ad eodē virtutem deprimere, vt nihil  
ab ipsa præclarum vel geri vel comparari  
posse vulgo putetur. Vnde omnes deni-  
que fortunam faciamus Deam cœloque  
locemus. Non habes igitur, mi Rainalde,  
quod doleas in eorum numero te haberi,  
quos fortuna soleat infectari.

*Responsio ad omnia.*

MARSILIVS FICINVS  
Bernardo Michelottio, S. P. D.

**N**on putaram imprecationes vllas vel  
coniectas in hostem, vnquam mihi  
posse placere, vsque ad eodē sum augurosus,  
at Musa isthæc Michelotti tua tam strenua  
est, tam belle ludit, vt imprecationibus  
multis vndique in nos congestis interim  
me mirificè delectauerit. Quid? si ean-  
dem vicissim hæc deprecantem audiuerō  
feliciaque precantem. Cane igitur obse-  
cro palinodiam. Vale.

*Purgatio postquam diu non scripseris.*

MARSILIVS FICINVS  
Reuerendissimo in Christo patri &  
D. Marco Veneto Cardinali  
diui Marci, S. P. D.

**P**ythagoras & Plato pretiosum diuino-  
rum mysteriorum thesaurum tanti fe-  
cere, vt non fragilibus chartis, sed æternis  
mentibus, & his quidem æternitate dignis  
existimauerint commendandum. Itaque  
non scribebant summa diuinitatis arca-  
na, sed voce docebant. Ego quoque com-  
mendatum esse me tibi tanti facio, vt non  
tām per leues literas quam per graues ami-  
corum animos atque sermones quotidie  
me tibi commendem. Siue igitur istinc ami-  
ci scribentes ad me scribant, Marsili,  
salue, siue hinc Romam proficiscentes di-  
cant, Ficine vale, protinus addo, si vis me  
saluere siue valere, Saluta meo nomine  
Cardinalem vnicū patronum meum,

meque illi deditissimum suppliciter commendato. Sic dum tacere iam diutius tecum videor, taceo nunquam, si qui verò mandata verbis minus explent, ego interim impleo mente. Quam & plerique alij & in primis Calderinus iste quasi quidam Mercurius noster interpretari atque exprimere facillime potest.

*De eodem.*

MARSILIVS FICINVS

Antonio Calderino suo, S. P. D.

**A**ggressus iamdiu sum commentaria in Plotinum à nobis traductum, vigesimum nunc librum explico, quatuor & triginta sunt reliqui, per has occupationes mihi peregrinari non licet, alioquin iamdiu Cardinalem patronum nostrum ore salutauissem, quem assidue mente saluto. Nemo enim est quem salute iudicem digniorem. Tufrequentem cum adito precor, ac ( si fieri potest ) me frequentius commendato. Vale.

*Largiendum est etiam ingratum.*

MARSILIVS FICINVS

Miniati, S. P. D.

**Q**uod me Miniates amas, iuste facis pariter & amice; iuste quoniam amas amantem, amice; quia me honoras amando. Quod præterea Platoniam disciplinam publica passim laude prosequeris, diuinæ pietatis officio satisfacis. Id enim ad communem ingeniorum præsertim Philosophantium salutem diuina instituit providentia. Id equidem iamdiu melior, id sedulus elaboro tanquam aquarianorum more congrego quotidie quæ dispergam, & effundam gratis pariter & ingratum, ac me siquo modo possint libenter obscuraturis. Sed certo scio in lucem prodeunte Platone, legitimum Platonis amicum obscurum esse non posse. Quod denique mala pro bonis nuper à quodam Vgone reportasse conquereris, communis isthæc tibi mecum atque cum multis querela est. Tu ergo communi iactura, si licet, propriam consolabere. Præsertim quia cernit Deus omnia vindex.

*Purgatio quando non saluas coram sed literis.*

MARSILIVS FICINVS

Reuerendissimo in Christo patri. D.

Marco Veneto Cardinali diui

Marci, S. P. D.

**S**olentaliquando genitores adeo effusaciter imaginem suam filio prorsus

imprimere, ut qui natum videat viderit & parentem. Id equidem dari mihi nunc diuinitus opto, ut Epistolam mente in præsentia procreem adeo mei similem, ut ad te venisse videar dum accedit Epistola, alioquin impius proculdubio sum futurus nisi ad patronum meum iamiam nobis propinquiorem me subito conferam. Si quid vnquam ardentem optaui id ardentissime nunc exopto, consequi posse putans. Solus enim liber ex omnibus operibus artium liberi tanquam filij nomine nuncupatur, quia solus prodit simillimus auctori, certe similior quam pictura, hæc enim solam refert umbratilem personæ nostræ figuram, siquidem homines ipsos, id est, animos, Plotinus mundanam hanc tragoediam ingredi putat corporibus personatos. Liber autem totum exprimit hominem, quando totum explicat animum. Verum quid ago? Dum Epistolam mihi persimilem exigo paulatim, reddo dissimilem. Non enim erit humili Marsilio similis, si altius caput extulerit. Iam igitur suppliciter me tibi commendo. Vale  
Ex Florentia die xxvi. Iunii. m. cccc. lxxxvii.

*Multa quæ stellæ significant, demones persuadent, nos agimus.*

MARSILIVS FICINVS

Nicolao Batoreo Episcopo Vaciensi, S. P. D.

**S**cribis Matthiam inuictum Pannoniæ regem præsentiam nostram desiderare, quod & tu valde desideres aliique nonnulli Platonice mentis explicandæ gratia. Rogas si minus ipse venire valeam, ut aliquem saltem mittam ad vos meorum qui vestro hac in re satis desiderio faciat. Ego verò curabo pro viribus, ut ad vos Sebastianus noster amittinus accedat, aut si per occupationes suas ipse non possit, iter ad vos meorum alius agat, me verò patrias mutare sedes mihi fuerit, siue mutatio: nem prohibeat Saturnus in Aquario nobis ascendens, quod forte iudicabit Astrologus, seu veter aliquis eiusmodi genius, quod Magus forsitan opinabitur, siue corpusculum ineptum laboribus impediatur, seu mens contemplationi semper intenta quiescere iubeat. Ambiguas equidem hac de re causas assignaui. Nam Platonici putant humanos euentus à stellis quidem interdum significari, incitari verò frequenter à dæmonibus stellarum quasi pedissequis, peragi denique ab hominibus, pro conditione rerum nobis propinquiorum. Vale.

*Consolatio in obitu filij.*

MARSILIVS FICINVS  
Vgolino Verino poëta, S. P. D.

**P**iscorum sapientum sententia à Plotino in libro de prouidentia maximè confirmata, homines, id est, animos in hanc vitam ab ipso Deo velut in comœdiam tragœdiamuè descendere, vbi fabulosa sint omnia quæ vulgo vel aduersa putantur, fictæ diuitiæ paupertasque, ficti reges & serui, ficti similiter ortus & obitus. huc forte tendit platonicum illud, humanum genus in terris est Dei ludus. Ludi quidem huius & fabulæ author est ipse Deus qui & pater est animorum, hos igitur velut histriones in ludum hunc ille demittit ex alto, personas autem his adhibet ipsa mundi natura, coniugio ad hoc ipsam maris & foeminæ ministrante. Felicior certe discedit ex ludo, qui authori Deo recedit acceptior aut qui obsequentiùs gessit sibi traditos actus, felicissimus omnium cui præ cæteris honestiores dati sunt actus & breuiôres. Solet enim fabula longior tragica frequentius inserere comiciis. Nû igitur ingenuum adolescentem illû Verine deslebis? conquerens filium tuum teneriorem è vita migrasse? filium ne tuum? quem non tu procreasti, sed Deus, quem tu, breui lusurum à Deo missum persona quadam subornasti, tamen ac subornatum ad ludum hunc pro viribus instruxisti, qui non est vita, sed ex quodam vitæ ludo rediit in ipsam vitæ substantiam, qui cum doctam honestamque & piam ludi huius prouinciam strenuè gesserit, alacer remeaur ad patrem antequam comœdiam in tragœdiam commutaret, pro breui ludo præmium reportaturus æternum.

*Studium diuitiarum atque dignitatum, maximè omnium nocet studio literarum.*

MARSILIVS FICINVS  
Petro Soderino Academico, S. P. D.

**A**stronomi veteres duo domicilia Iouis apud superos inuenerunt, pisces atque Sagittarium, duo quoque Mercurij, Virginem atque Geminos. Cum verò Virgini quidem pisces oppositi sint, Geminis autè Sagittarius opponatur, merito nos admoneri coelitus arbitramur, ingenio & studio literarum quæ Mercurio tribuuntur, nihil magis opponi quam immensum diuitiarum & imperij studium

præ cæteris Ioui tributum. præterea cum Leo Solis domus longissime ab Aquario distet domo Saturni. Rursumque Aries exaltatio Solis remotissimus sit à Libra exaltatione Saturni, Sol autè reges, Saturnus verò Philosophos contemplatoresque significet. Quisnam hæc intelligens sperauerit vñquam vel philosophos? Certe non aliter quam diuinitus id effici potest, & tanquam diuinum munus plato noster vehementer optabat. Hanc equidem sciententiam tuam esse, in Petre, Novi enim excellentiam ingenij tui mentisque præstantiam. Hæc igitur vnà tecum confabulari decreui, vt te in hac tua sententia rationibus cœlestibus confirmarem. Vale.

*Commendandus ante omnes qui sapientiam toto orbe perquirat.*

MARSILIVS FICINVS  
Ioanni Pico Mirandulano Conphilosopho suo, S. D.

**S**alue. Robertus Saluiatus amicus fidelis & strenuus, hesternò vespere mihi legit Epistolam tuam, qua certis argumentis aduersariorum istic tuorum maledicta refellis. Conuenimus igitur vt hæc magnanimo Laurentio recenserem, quo si quid ille prius ex vrbe Roma aduersariis distantibus accepisset falsum, conuinceretur. Recensui ergo libens atque ille libenter audiuit. Vnde conuicimus nullum latere in eius animo erga te odium, sed amorem. In primis illud asseuerandum fuit, istos non tua sed sua causa in carcerem fuisse coniectos, nam contra istinc huc vsque fuerat diuulgatum. Eos igitur propria culpa fuisse comprehensos, & tu satis Epistola tua declaras, & petrus Leo mihi fuit testis, qui acceperat illos temere nimium & superbe in Pontificem oblocutos. Inter hæc autem magnanimus hic Leo noster hinc abit alacer peragraturs orbem raptus veritatis amore. Quam & si nobis vester quantum licet homini iam consecutus, prosequitur tamen impensior, diuinum præterea pro humano fructum, si Deus aspiret, reportaturus. Nostrum est igitur, religiosi precibus atque votis diuinum amico tanto præsidium, inter diuersa incerti itineris discrimina, comparare, Valeat ille felix, tu quoque vale feliciter.



*Gratiarum actio, congratulatio, commendatio.*

Serenissimo Pannoniæ regi Marthiæ semper inuicto. Marfilus Ficinus Florentinus suppliciter commendat.

**A** Ccepimus eodem nuntio, te nuper Dei gratia fortiter potitum victoria, & amicum nostrum gratia nostri clementer è carcere liberasse. Gratulor itaque tibi quamplurimum, congratulor & amico, mihi denique gaudeo, quod tamen apud regem tantum me posse cognoscam. Ago equidem Deo gratias pro felici victoria tua, tibi quoque post Deum pro libertate amici non mediocriter, sed plurimum pro autoritate apud te mea. Optoque etiam tibi quidem victorias posthac longemiores, amico ante meo beneficia subinde maiora. Ut cui liberalitatem beneficiorum maximam contulisti, non dedigneris: præterea, si res postulauerit, leuiora conferre.

*Cognitio de diuinitate animæ ante omnia necessaria.*

**Q**uidnam prodest homini si vniuersum mundum lucretur, animæ verò suæ detrimentum patiatur? frustra laboras Philosophæ dum conaris omnia comprehendere nisi apprehenderis animam, per quam sis reliqua comprehensurus, quidnam tibi Theologæ prodest, æternitatem asserere Deo, nisi eadem tibi quoque asseras, ut per æternitatem tuam frui possis æternitate diuina? Ergo Philosophi simul atque Theologi venite precor omnes, audite Prophetam admirantem, quanta fecit Deus animæ nostræ. Quidnam exclamas, ô Prophetæ, cum ais, venite? quid rursus admiraris, quando dicis, quanta? quid tandem portendis ubi subdis, Deus? exclamo equidem, admiror, porteado, Deum ipsum animæ nostræ dedisse diuina. Sin minus, ô fratres, Prophetæ creditis, quærite, petite, pulsate, quantum licet parentem nobis Deum. Ergo tu bone Iesu qui pendes isthic pro anima, nunquid voluisti pro anima corporea pati, pro anima mortali mori? Aspice, ô fratres, auscultate precor, nonne videtis os ille suum aperire atque respondere, Absit, ut pro re vilissima rem pretiosissimam commutauerim, imò verò pro anima hominis diuina, Deus factus est homo, pro anima immortalis sum mortuus. Erubescant igitur, conturbentur, confundantur valde velociter inimici nostri, quo-

niam Deus noster magna & mirabilia fecit nobis. Inimici nostri, non qui pecuniam nobis furripiunt, pecunia enim non nostra est, sed est fortunæ. Inimici nostri, non qui corpus occidunt, corpus enim non tam nostrum est quam fortunæ, naturæ fati. Inimici nostri qui perimunt animum, hic enim solus est noster, hic ipse nos ipsi est. Interimunt verò animum qui corporum prædicant atque mortalem. Erubescant igitur Aristippici, conturbentur Epicurei, confundantur Lucretiani, erubescant, si sunt Philosophi, nulla ratione niti, conturbentur, si sunt egregij, plebeia consuetudine falli. Confundantur denique Platonici argumentis quæ deinde sequuntur.

*Philosophia Platonica tanquam sacra legenda est in sacris.*

### ORATIO MARSILII in principio lectionis.

**A** Spira nobis precor alme Deus, narabo nomen tuum fratribus meis, in medio Ecclesiæ laudabote, in conspectu Angelorum psallam tibi. Solebant quondam dilectissimi fratres, qui exoptatas à Deo fruges vberius impetrabant, frugum primitias reddere Deo. Pythagorici, verò, quos nostri sequuti sunt Platonici optatam imprimis & acceptam diuinitus sapientiam Deo reddentes, sacra Philosophiæ mysteria meditabantur in templis, atque docebant. Nos igitur antiquorum sapientum vestigia pro viribus obseruantes, religiosam Platonis nostri Philosophiam in hac media prosequemur Ecclesia. In his sedibus Angelorum diuinam contemplantur veritatem. Verum, ô dilectissimi fratres, candidis omnino mentibus has sedes ingrediamur, quas Deus omnipotens pro illis qui in tenebras iamdiu corruerant, nuper candidioribus implet Angelis sedesque restituit, patrocinio insignis pietate ciuis quem cognoscitis omnes atque veneramini. Ut autem certiores spem habeatis nostras animas posse quandoque sublimius in sedes Angelicas euolare, venite, audite, videte, quanta fecit Deus animæ nostræ. Iam verò si Angelicum templum hoc intrauimus admirandum spectaturi Deum, Deoque perspecto suauiter fruituri, mandat autem mox intrantibus (Cognosce te ipsum) merito debemus animam nostram in primis agnoscere, per quam velut speculum venerandum parentis nostri faciem feliciter speculari possimus.

*Congratulatio.*

## MARSILIVS FICINVS

Florentinus Francisco Bandino, S. P. D.

**P**Andolphus Pisarenfis vir præclarus innumeris me tuo nomine salutationibus obruit. Tunc verò maximè veram mihi salutem dixit, quando dixit, esse te saluum & egregie saluum, atque ab inuictò Pannoniæ rege magnis legationibus honoratum. Gaudeo mirum inmodum prosperitate, Bandine, tua, hæc enim, & in amicos patriamque redundat. Vale felicior indies, iterumque felicior.

*Iupiter & Venus Martem domans.*

## MARSILIVS FICINVS

Ioanni Pico Mirandulano Conphilosopho suo, S. D.

**R**obertus Saluiatus noster nunciat mihi dum publicæ lectioni ardentèr incumberem, te sospitem peruenisse Bononiam. Gratulor equidem te factum nobis viciniorem, gaudeo te ex iniquorum manibus incolumem euasisse. Octobre superiore dum Mercurius à Marte combureretur, fremuerunt aduersum te Martiæ Gentes, & populi meditari sunt inania, quos extemplo derisit qui habitant in excelsis. Nam & nos interim hora Iouis & Veneris magnanimi Laurentij patrociniò freti, ne Mercurius etiam in terris vreretur obstitimus. Obstet Deus precor in posterum aduersariis nostris atque maledicis. Vale felix & me ama te amantem.

*Exhortatio ad amicos, ut percepturi Deum corporum omne deponant.*

**P**rophani sunt habendi, ut Plato in libro de scientia inquit, qui nihil esse putant nihil quod pugno comprehendipotest. Omnisolens Epicure, complectere manu puluerem, subterfugit protinus ipse tibi, coge aquam, subterlabitur, coërce aërem, subterfluit, cohibe ignem, subteruolat. O Epicure demens, non potes ignem, non aërem, non aquam, non puluerem cōstringere pugno, potes ne igitur illum cōplecti pugno, qui pugno vniversum ipse complectitur? Corpus vis esse Deum, esto corpus excellentissimum. Igitur ignis esto. Accede igitur ad hunc ignem, lumen habet pariter ac ardorem. Comprime (si potes) manu lumen, non lumen iam, sed tenebras reportabis, comprehende pugnis ar-

dorem, protinus dissolueris. Deus ignis consumens est, non pugnis, id est, imaginatione, non affectu mortalium, hunc potes apprehendere, etiam si moratus fueris, nullo tamen imaginationis pugno diuinæ veritatis percipies lumen. Relaberis enim protinus in tenebras falsitatis. Opus est igitur Dialectica cunctas imaginationis nebulas dissolvente. Rursum etiam si Dialecticus fueris, non potes tamen mortalium oppressus affectibus vitali calore Deisalubriter ipse perfrui, dissoluit enim quicquid materiæ reperit. Quod autem occurrit à materia liberum assistit, sibi que conciliat. Depone igitur terrenos affectus, diuino protinus ardore salubriter perfrueris.

*Quod ab amore Dei exordiri debemus, ut Deum intelligamus.*

**D**eus charitas est, qui manet in charitate, in Deo manet, & Deus in eo. Verum si charitas est amoris appetitus, stimulus, indigentia, Deus autem nullius indigus, omne bonum, quo pacto ipse Deus est charitas, est in charitate seruor, est lumen, est & gaudium. Est itaque Deus charitas, sed charitatis huius seruor quidem accensus est in anima, lumen verò viget in Deo, gaudium in vtroque sicut solis radius idem propè concavum speculum in se quidem lumen est, sed ardor illic in ligno, & ex ardore fit lumen ibidem. Qui igitur manet in charitatis ardore, statim in ipsa Dei luce manet, statim diuinum gaudium manet in eo. Cœleste profectò corpus perspicuis subinde corporibus, tanquam valde similibus, lumen prius communicat quàm calorem, terrenis autem admodum dissimilibus calorem impertit antequàm lucem, hæc igitur ardore purgata factaque simillima cœlo, lumen protinus inde reportat. Animus igitur terreno corpore circumseptus ab amore Dei exordiat, oportet, ut amore purgatus, lumen fortiat, inde diuinum & in lumine gaudium.

*Insinuatio quedam in amicitiam.*

## MARSILIVS FICINVS

Domino Francisco Scali, Neapolitani Regis Secretario, S. D.

**D**Vm coenarem apud Philippum Valorem meum, accepi literas à Nicolao Valore meo, quibus significat, quàm ardentèr me ames, quantis me laudibus prosequaris: addit præterea cum

te virum esse, quem vltro vehementer amare debuerim, etiam non amantem. Ego igitur qui Valoris mei testimonium esse validissimum certè scio, non solum redamo te iamdiu me amantem, sed opto me amorete insuper præuenisse, & colomirum inmodum, & gratias ingentes ago, quod me beneuolentia tua, tuisque laudibus dignum existimaueris. Ita enim & cunctorum excellentium virorum amore amore laudibusque dignum arbitror me effectum. Quid igitur tibi pro munere tanto rependam? Et si non quantum debeo, saltem quantum valeo, valebo autem fortasse non parum, quatenus multum in Valoria domo valebo, hæc enim nobilitate, autoritate, iustitia, plurimum ab ipso Florentiæ urbis exordio floret. Vale Florentiæ, die 14. Decembris. M. cccc. lxxxvii.

*Exhortatio ad iustam causam defendendam.*

MARSILIUS FICINVS  
Domino Ioanni Victori Senensi  
præclaro Iuriconsulto, S. D.

**S**ebastianus Saluinus Theologiæ doctor & doctus Amitinus noster eget patrocínio tuo in causa sua, & hac quidem admodum iusta. Iustitia verò quantum in cælo patria sua robusta est, tantum extra patriam in terris euadit infirma, ut continuo indigeat sustentaculo. Solus autem iustus qualem esse te ferunt, & facillè credo, potest ac vult, matrem suam sustinere iustitiam. Spero igitur, quod vehementer exopto, te causam necessarij nostri iustissimam facile suscepturum, quam cito feliciterque expedias. Vale.

*Commendatio amici apud Regem.*

MARSILIUS FICINVS  
Matthiæ Pannoniæ Regi semper  
inuieto, S. D.

**O**Pro, serenissime Rex, literas prope modum maiestate tua dignas ad te dare, sed vrget admodum me scribere cursum, num sacerdos ipse Vincentius, necessarius meus, commendationem nunc efflagrans, tum nuncius discessurus ad horam. Accipies ergo literas non quales solet officium & libertas, sed quales necessitas properantior procreare.

Proinde si forte videor in postulando procacior, solita erga me clementia tuam mihi tribuit libertatem. Ergo libe-

rius obsecro, ut quem olim sponte mei gratia è carcere liberaſti, nunc à me rogatus, hoc insuper afficias beneficio, ut perditam istic pecuniam suam (si fieri potest) quandoque recipiat. Ego verò quod toties iam tantum apud te possim tibi quidem gratias ago, mihi verò gaudeo. Deum denique obsecro, ut feliciter tibi semper aspiret.

*Cur viris magnis discrimina magna immineant.*

MARSILIUS FICINVS

Ioanni Pico Mirandulano  
Conphilosopho  
suo, S. D.

**S**uperioribus diebus Laurentium Medicem in crudo nimium obitu filia; verbis (ut fieri solet) consolabat amicis. Magnanimum virum consolationibus nullis egentem, consolationemque interea et si superuacuam, necessariis tamen rationibus & exemplis testamenti veteris confirmabam. Inter loquendum incidimus mox in Mosem, cuius vitam gesta que ab initio, Laurentio iubente, narrauimus. Quibus ille auditis, vides Ficine, inquit, quot, quam diuersa, quam magna futuræ Mosis magnitudini, non solum ab infantia per omnem vitam, sed in ipso etiam ortu & ante ortum obstitere pericula: profecto compertum habemus magnis sæpe inceptis hominibusque futuris quandoque magnis ingentia passim imminere discrimina, siue magnanimi grandia, dura, ardua moliantur, seu aduersa fortuna tentata sæpius atque superata, viros fortissimos prudentissimosque efficiat. Siue communis liuor plurimorumque ambitio egregiis se semper opponas. Seu diuina prouidentia ita commodis & incommodis vitam hominum nostræ salutis gratia temperauerit. Seu lateat præterea causa quædam inferior Deo, superior homine, res hominum ita commiscens, quam indagare ociosorum est & forte nonnunquam curiosorum. Verum vndeunque veniat, id ita profecto venit. Ac ne præterita nunc, quæ innumerabilia sunt, exempla reuoluam, videris subiunxit, eramus enim multi, quam certa sint in Mirandulano argumenta magnitudinis singularis, non futuræ solum indicia, sed ferme præsentis experimenta, præterea quàm grauib; hic adoleſcens discrimini-b; agitur. Denique & ille mirificè te probauit, & cæteri comprobarunt. Paulo post ad me conuersus ait: Vos autem ociosi, num aliquam ad hæc latentiore cau-

sam inuenistis? Adhæc ego, si figura vel harmonia cælestium portendens securam vitæ facilitatem, tam diuersa est ab illo quæ excellentiam virtutis promittit & gloriam, vt rarissimè admodum concurrere possint, aut forte non possint. Accedit adhæc, quod sint in aëre dæmones quasi stellæ secundæ in cælo hoc nobis proximo. Inter quos stellarum instar sunt dæmones superiores, sunt & inferiores utrique pastores hominum. Superiores quidem egregiorum, inferiores autem gregariorum. Inferiores sanè dæmones quasi homines quidam humanis mouentur affectibus, præcipuè verò superiores inuidia que tanguntur, ideoque dolent viros dæmonibus sublimioribus commendatos excellentiores palam existimari quam suos, & idcirco nolunt eos regnare, proficisci, viuere, fuscitant igitur contra illos ex gregibus suis vbique complurimos, bestias insuper opponunt atque etiam elementa. Hæc ibi dicta sunt. Sed nonne & magnum aliquid fore decreuit Platoniorum docurmenterū copulam ab initio supernus ille Saturnus in natali vtriusque figura Dominus, Dominus & in figura Platonis, horum itaque copulam Saturni dæmones præcipuè regunt. Sed hanc interea dissoluere passim Martiales dæmones machinantur. Siquidem Mars ipse in tres, quas dixi, figuras venit vt hostis. Tantum denique copula hæc destinata potentibus primordiis, potentes quoque quos sustinet hæcenus aduersarios superabit, quanto Saturnus est Marte superior, Saturnus qui olim menascente, suum capite tangebatur Aquarium, atque anno post trigesimo in lucem te prodeunte repetebat eundem, huc tendit, vt arbitror, Laurentius inter Saturnios præstantissimus & metuetur & Picum ad Florentem reuocat urbem. Et si omne solum forti patria est, hoc tamen præcipuè Picum suum Saturniæ iubent capeffere sortes & iussere iamdiu, cum primum sub coniunctione magna huc habitaturus accessit. Esto felix, Florentinus esto. xxx. Maij. M. cccc. lxxxviii. Florentiæ.

*Quo vadit amicus & tu vadis.*

PLATONICVS  
Complatonico S. D.

**N**E quando Marfilium in amicitia primum isthuc venisse dicas ad te postremum, ecce venit. Contemplare, si placeat, vultum istius qui te modo salutat & gestus. Sed interea quid sub persona lateat, attentius inspicere. Inuenies ne hos,

inquies, contempler pro Marfilio vultus? At supplex ille Pice, si nescis, impetrauit nuper, vt renouaretur velut aquilæ iuuentus sua. Impetrauit sane. Gestus autem quales?

Quanam ratione factus modo iunior effectus est & grauior? O quam grauibz amice vix tandem obsecrationibus impetratur pro senectute iuuentus, vt non mirum sit hominem tam grauius obsecrantem, inde iuniorem simul grauioremque euadere. Euaserit quidem, sed cur Philippi Valoris ille potissimum induit vultus? Mitto nunc Pice quam formam potissimum elegerit amor. Ille Deus eiusmodi operis Architectus dæmon certe vultus transformationis amatoris faber, miro quodam naturæ affectusque valore vsus in transformando, nimirum Valoris formam expressit in opere. Agnouisti iam satis qui cum loquaris amice. Vale, & Valorem ama.

*Erunt nouissimi primi.*

MARSILIVS FICINVS  
Probo Pontificis Commissario, S. D.

**Q**Voniam in Euangelio de conuulso legitur, Erunt nouissimi primi, ditumbe, probauissime Probe, nouissimus hodie hac in mensa, in mea mente primus. Vt autem ego in tua mente sim primus postulare non audeo, satis mihi factum existimabo cum gradum apud te obtinebo secundum, secundam enim inde mihi fortunam auspiciabor. Præterea qui secundus Probo fuerit, quandoque probandus erit. Probauimus sane literati plerique Pontificem, quod viro apprime doctos nos commiserit iudicandos. Literati enim quando in hominem indoctum incidunt, cadunt, doctum verò nati, resurgunt. Nati denique doctum pariter atque probum surgunt, vltius non casuri, Vale.

*Iocosa ex eo quod salutaturus, non salutauit.*

Ionnes Picus Mirandulanus, Marfilio  
Ficino Philosopho Platonico, S. D.

**S**Alue pater Platoniciæ familiæ. Iam extra omnem controuersiam, & noxium, atque infaustum esse Saturni tydus, & tibi Ficine, & si tuo fortasse bono, meo certe malo Saturnium esse natum. Vt enim ille est plurimum retrogradarius, sic & tu

quoque simili præditus ingenio, iam bis retro retulisti pedem, & quod est maius, occumbente sole, ne te Phœbi Iubar dicas esse reueritum. Sed dic amabo, quid fuit in causa iteratæ retrocessionis? An tuus Saturnus? An potius saturi nos? Sed quicquid illud fuit, quod te mihi, id est, me mihi abstulit, fac quæso in posterum, ut non seiungat nos, qui nos olim coniunxit, nec te vnquam credas ad me satutum accessurum, qui te solatium meæ vitæ, meæ mentis delicias, institutorem morum, disciplinæ magistrum, & esuriæ semper & sitio. Vale & veni, ut tuus Saturnus, id est, tuus saturus rē me quoque satutum reddat. Vale iterum, imò iam adueniens salue.

*Planeta reuerentur solis aspectum.*

MARSILIVS FICINVS

Ioanni Pico Mirandulano,  
no, S. D.

**Q**uod mense superiore tardior admodum quàm soleam, ad te accesserim, in causa sit Saturnus, mense etiam superiore retrogradus, postquam ipse ex Capricorno Solem in Tauro per triangulum cœpit aspicere. Quod autem heri bis ad te & manē, & vesperē proficiscens, bis retuli pedem, si qua apud superos culpa est, in ulpa sit Iupiter, heri namq; incepit Iupiter retrogradarius esse, utpote qui intrinū similiter veniebat Solis aspectum. Ille enim ex Piscibus hunc iam spectabat in Cancro sedentem. Cum vero superiorum planetarum mos & natura sit, cum primum in ipsum Solis conspectum prodeunt, inde regredi aut progredi, utrisque iam & Saturno & Ioue testibus, tu mihi Phœbus eris. Quanta igitur fides est in Ioue, quanta firmitas in Saturno, tam firma fide tu mihi Phœbus eris. Vale. quarto Idij. M. cccc. lxxxviii.

*Labor improbus omnia vincit.*

MARSILIVS FICINVS

Ioanni Pico Mirandulano,  
Conphilosopho suo,  
S. P. D.

**S**alve solus musarum salus, sed ad hoc Sipsam ut saluus sis, nihil in rebus humanis magis expedire videtur, quam ut Saluianus noster velit esse te saluū. Quantum igitur opto semper fore te saluum, tantum opto Saluiarum tibi salutem, ut nunc

ita semper optare. Equidem præter hunc noui nemin, qui quodcunque velit, protinus assequatur, siue enim ipsa virtute voti homines consequuntur optata, solus hic toto animo, totoque spiritu assidue quicquid elegit, efficit, siue sedula potius opera diligentiaque perficiuntur incœpta, solus hic quicquid sequitur ardentem ad finem usque prosequitur, ut quod dicitur solus qui ad finem usque perseverauerit, hic saluus erit, portendere videatur, solus hic saluus erit. Forte verò & granum illud sinapis quo transferuntur montes, hic noster habet. Nam & heri cameleopardalum transtulit per foramen acus, per inuia traducens animal, viæ prorsus ineptum. Quid ergo nobis opus est centum illis, quas nunc vna legimus rationibus Nicolai ad Astrologos consultandos? Vna hæc satis nobis sit pro centum. Nempe cum hic noster contra Saturnum retrogradum sibi negantem expeditionis officium durissima quæque celeriter ardenti quodam studio peragat, satis hinc exploratum habemus, studio nostro potius quam instinctu coelesti nostra negotia peragi. Mira profecto potestate pollere animus cognoscetur, si modo toto sua potestate utatur ad opus. Vale sexto Iulij. M. cccc. lxxxviii. Florentiæ.

*De tribus gratiis & concordia.*

MARSILIVS FICINVS

Roberto Saluiano & Hieronymo  
Beniuenio, S. D.

**S**olent multi scribes Pico inscribere Concordiæ Comiti, hætenus quidem recte admodum appellatus est Concordiæ Comes, utpote qui & cōcordiam ipse quærebat, & libenter concordēs homines sequebatur. Posthac autem non Comes quidem, sed Dux Cōcordiæ extra controuersiam est appellandus. Iam enim hunc ipsa velut ducem concordia sequitur. Nempe sicut nebulae discutiantur Solis accessu, sic aduentu Pici procul omnes discordiæ fugiunt. Subitoque hunc passim sequitur concordia ducem, aded ut solus hic valeat quod olim tentare nonnulli, & hic agit assidue, tum Iudeos Christianis, tum Peripateticos conciliare Platonicis, Græcosque Latinis. Et merito, quoniam tres illæ Gratiae, quæ quondam Venerem suam comitabantur, statim nascente Pico, Picum relicta Venere, Iouis & Phœbi Mercuriique imperio comitantur, prima quidem ab initio formauit animum, secunda statum animo confirmavit & corpus, tertia forti-



ne denique iubet parere consilio, & quacolat animum, tres animo gratias imprimis adhibuit, sapientiam, eloquentiam, probitatem, sic enim Phœbus, Mercuriusque & Iupiter decreuerunt. Quamobrem si & quemadmodum Furie discordiam pariunt, ita Gratia concordiam procreant, merito Picum quem Gratia comitantur, sequitur & ubique concordia ducem.

*Quomodo tacentes etiam colloquantur amici.*

## MARSILIVS FICINVS

Pierleono Complatonico  
suo, S. D.

**N**escio quo consilio, vel fato potius vel forte casu factum fuerit, ut heri Florentia discedens, non dixeris saltem per nuntium ( sicut soles ) Ficine Vale. Hoc certo scio id te & si non alia necessitate, saltem amicitiae iure, si modo poteras facere decuisse. Neque frustra id forte fuisset factum. Cupiebam equidem, quod etiam significavi, longius confabulari tecum. Sed dum confabulationem meam coactus ad triduum differo, inopinatus tuus iste discessus fabulam frustratur meam. Ita mihi abijt longa hæc inuentum fabula, dum magnanimus hinc abijt Leo mihi non fabula. Erravi modo. Non enim inuentos euauisse potest, nondum pronuntiata fabula. Quid ergo?

Si meus tuusque genius volatiles voces indicauit indignas, quibus æternus committeretur huius fabulae sensus, itaque si voces quodammodo viuas dedignatus est, qua nam ratione dignabitur literas non viuentes? Quæ igitur non commendavi vocibus, nec literis commendabo. Hanc ergo confabulationem, intimam Genii mei qui nec vsquam, nec vnquam abest disceditue à tuo, nunc iam exorditur tuo loquens profecuturus in æuum. His ita confabulantibus intus nulli se vltius inferent liuidi nigrique dæmones extrinsecus occurrentes. Cadent à latere tuo mille & decem millia à dextris tuis. Vale feliciter, Philosophare feliciter, ad Florentem Urbem adeò tibi amicam aliquando felicissime rediturus vndecimo

Augustij. M. cccc.

LXXXVIII. Florentiæ.

(.:)

(.:)

*In ignem omnia resoluenda secundum Orpheum.*

## MARSILIVS FICINVS

Callimacho sapienti Poëtae, S. D.

**O**rpheum aliosque nonnullos cecinisse ferunt: Cum omnia ex materiis quatuor inter se contrariis composita sint, & ignis amplissimus omnium, atque potentissimus, motuque perpetuo paulatim reliqua conterat, cætera tandem in ignem penitus resoluenda. Quid ergo? Si diuinus temperator omnium intellectus resolutionem eiusmodi tantam mundo concessit, ut quemadmodum quamdiu sibi constat in formam pulcherrimam est compactus, ita cum demum soluitur, in materiam formosissimam redigatur. Hunc ergo nos tantum interitum vniuersi, si credimus, æqua mente ferimus. Feremus magnanime mi Callimache æquo similiter animo nouum tuæ domus incendium. Lucem præterea quærebatur ex libris, in lucem tibi conuersi sunt libri sapientes in cælum rapti, contra quam è cælo Prometheus cum igne rapuit sapientiam. Quid igitur hinc tibi auspicamur amice? Magis obitu tandem quam vita lucebis. xv. Augusti. M. cccc. lxxxviii. Florentiæ.

*Videndum quo stylo ad quem scribas.*

## MARSILIVS FICINVS

Hermolao Barbaro Veneto, S. D.

**A**gitur apud te, ut audio, causa Martia Cini, qui isthic negotia curat cuius cuiusdam amicissimi mei Nisi hic me rogauisset, eius tibi iura non commendarem, nam superuacuum esse puto viro prudenti iustoque, iustitiam commendare. Hæc, Hermolae, me causa compulit, ut tibi nonnihil post longa silentia scriberem. Scriberem certe sapius si scriberem, elegantius. Audio enim castigatissimis auribus tuis, nisi exquisitissima non placere. Beatus es amice qui primum sis gradum eloquentiæ consecutus. Neque tamen ego miser, nam decimo sum contentus. Vale & me amantissimum te amantem. Ioannes Picus noster, qui Florentiæ nunc Philosophatur egregie se tibi commendat. xii. Septembris. M. cccc. lxxxviii. Florentiæ.

*De Fama volata. Et quod sua cuique charissima sunt.*

MARSILIVS FICINVS  
Paulo Florentino Theologo, S. D.

**G**Ratissime mihi contigerunt literæ tuæ, quibus equidem intellexi, & te bene valere & me volare, quod enim, vt scribis, totam iam Europam in amatoriam mihi subegerim seruitutem, facere quidem accessu non valui, ergo feci volatu. Sed tu laudum, imò & præconiorum spiritu ad volatum hunc alas adhibuisti. Tu ergo mi De-dalus esto, I modo, ne ego tibi sim charus, quamuis valde charus, & merito imprimis tibi sum charus, quandoquidem tua tibi debent esse charissima. Sunt & mihi tua quoque tam chara, vt adolescens iste nobilis tibi ante alios commendatus, sit mihi quoque gratissimus. Præsertim quia doctrina iam, vt ais, iudicioque sit senex. Profecto sic vices rerum sæpe natura rependit, quandoquidem sunt & plerique senes etiam ingenio pueri. Denique quam meus sum, tam sum mi Paule tuus, tam etiam adolescenti sum suus. Vale.

*Nihil magis impedit literas quam ciuilis ambitio. Probat per Astrologiam.*

MARSILIVS FICINVS  
Florentinus Hermolao Barbaro Venereti Senatus Oratori clarissimo, S. D.

**A**Ccepi à multis hoc anno, & nuper à Petro Alamanno, qui isthic legatione functus, heri me tuo nomine salutauit, in te legatione tua, non minus consueueris incumbere literis, & quod mirabilius est, acrius etiam philosophari, quam soleas. Solent homines mi Barbare, quando publica gerunt, imò etiam cum primum attingunt, intermittere studia literarum. Tum quia negotiosa vita, literarum imprimis ocium aufert vacuæ mentis opus. Tum quo propius ad Iouem accedimus gubernationis & imperij dominum, eo longius discedimus à Mercurio principe literarum. Nam & Luna cæterique cœlestes nusquam ab ædibus Mercurij separatiores sunt, quam vbi Iouis sedes ingrediuntur. Quippe cum ipse mundi faber, & Virgini Pisces & Geminis Sagittarium opposuerit. Præterea nonne Solem quidem principes & honores significare putant, Saturnum verò Phi-

losophos? Horum autem in cœlis & regnum regno & domus domiciliis opponuntur. Quis igitur vel princeps philosophabitur vnquam? vel Philosophus dominabitur? Sed cum tu quæ neque polliceri videtur cœlum, neque præstare mortales solent, efficias, animum dicemus tuum, quem admodum Plotini animum Magus dixit Olympius, humana cœlestique natura potentior esse. Tanta igitur potestate gaude. Eadem congratulantur amici. Vale. xi. Octob. M. cccc. lxxxviii.

*Pauci negotia publica coniungunt cum studio literarum.*

MARSILIVS FICINVS  
Francisco Gaddo Florentini Senatus Oratori, S. D.

**S**cribo ad Hermolaum Barbarum, probans eum quod in ciuilibus turbulentisque negotiis solitum capret ocium ad studia literarum, quodue mirabilius est, etiam philosophatur ardentius. Et quanto magis Iupiter, huic curis publicis caput vrget, tanto magis vrgeat ipse Minervam Iouis capite natam. Pauci quos æquus amauit Iupiter, non Planeta, sed conditor Planetarum, pauci coniungunt in vnum duò hæc inter se longè diuersa. Soli diis geniti potuere vel simul vtraque prosequi, quod efficit Hermolaus, vel dum sequuntur alterum, quod est philosophandi studium, momento perficere, quod cæteri vix tempore longo facere potuerunt. Alterum hoc efficit Picus noster, cui quidem igneus inest vigor & cœlestis origo. Aqua lignum mille vix annis transmutat in aquam, Ignis illud quasi momento conuertit in ignem Saturnum Theologi voracissimum appellant. Picus Saturno natus, ceu Saturnus ille liberos, sic ipse grandes quotidie libros integros deuorat, quos quidem non in cinerem redigat, vt noster ignis, sed vt cœlestis in lucem. Tu igitur dilectissime Francisco noster, Hermolaum Barbarum imitatus, interim in legatione philosophari non desines. Salutabis, quando per negotia tibi licebit, illum Marsilij Picique nomine. Significabisque quantum nostri sumus vtrique, tantum esse suos vtrosque, quando verò vtrumque nomino Politianum intelligi volo, indissolubile vinculum vtriusque. Vale xi. Octobris. M. cccc. lxxxvi.

*Tibi salum viuatur, ubi, viuatur intellectu.*

MARSILIVS FICINVS

Reuerendissimo in Christo Patri, &

D. Marco Veneto Cardinali

D. Marci suppliciter se

commendat.

**V**idesne, quàm sit callidus Calderinus noster? Excogitauit hic iamdiu facillimum tutissimumque viaticum, quo saluus semper & Florentiam petat, & repetat Romam. Salutationibus enim sese semper fulcit armatque tuis, quibus & ipse saluus eat per tela, per ignes, & saluum red-

dat amicum, saluum tibi quoque remittet: salutationes verò tuæ sunt, siue abs te eant, siue ad te redeant, hunc equidem quem modo callidum appellabam appello prudentem. Cæteri namq; fortis eiusdem homines plurimum dormitant ad fores insipientium: sed noster interim isthic ad fores vigilat sapientis, vt hauriat salutem à Domino, quam & impertit amicis, imò etiam vt inueniat vitam, sperat enim ibi duntaxat victurum, vbi potissimum viuatur intellectu, siquidem & legit, & meminit, intellectum da mihi, & viam. Viue igitur felix ante alios, venerande patrone, noster tuosque clientes habecas commendatos.



MARSILIVS FICINVS

FLORENTINVS,

MARTINO VRANIO CONSTANTIENSI,

*Amico unico, S. D.*

P R O O E M I V M.



**L**iber nostrarum Epistolarum nonus, quo sentire circumq; moueri possit, caput iamdiu posci virtutis animalis arcem, & sensus atq; motus originem. Dum igitur de capite huic eligendo delibero, Angelus ipse nostri custos seipsum adhibet libro caput, iubens videlicet, sibi numerum hunc nouenarium consecrari. Siquidem Angeli noui Ordines non solum apud Christianos, sed apud Hebræos esse atque Platonicos acceperunt. Sub tanto igitur capite atque duce querimus; Nunquid quoties liber aut homo, quem custodit Angelus, huc atque illuc pererrat, toties similiter oberret & Angelus? Nequaquã, Angelus enim quem bonum demonum geniumque nominant, aut semper esse vbique, quod Plo-

rinus, Porphyrius, Iamblichus opinantur, aut tam facile, velociterque vbicunque vult ad-est, quam radius ipse solis, huc momento perueniens hinc illuc, & passim eodem momento reflexus; imò & multo celerius atque facilius, quam radius quidem est ætas corporis luminosi, Angelus autem sui iuris existit: aut sicut sua cuiusq; stella non descendens influxu passim diffuso gubernat. Quam igitur ob causam ab Angelo librum auspicati sumus, satis iam dixisse videmur. Sed cur nam Martino Vranio potissimum dedicamus? Quoniam meus liber iam genialis effectus, ipso iure factus est huius, qui cum mihi idem communis est genius. Accipe igitur libenter, ac lege feliciter, Vranie mi cælestis amice, Martianas pariter atque Marsilianas Epistolas. Vale feliciter alter ego, III. Idij. M. ccccxc. Florentia.



# MARSILII FICINI FLORENTINI EPISTOLARVM

(.)

LIBER IX.

(.)

## DESCRIPTIO VILLÆ SALVBRIS.



Vm superioribus diebus, Ego & Picus noster Mirandulanus, vir virtute mirandus, Fesulanos, imò Subfesulanos colles peragrabamus, prospiciēbamus o-

biter subiectum oculis totum Florentinæ vrbis agrum, habitationem certè felicem, si modo duo tantum incommoda cautè deuitentur, & medijs fluminis Arni nebulæ, & acres montis oppositi venti. Fingebamus igitur in colle domum ad montis Fesulani radices, vt inde caliginem, hinc Boream vitaremus. Nolentes tamen in concauo sitam, vt auram vberius sub æstu susciperet. Desiderabamus insuper eam inter culta pariter & nemora collocatam, & vndique fontibus abundantem, quæ ad Meridiem vergeret atque Orientem. Quod in ædificiis, vbi de re familiari disputat, omnino præcipit Aristoteles. Inter eundem verò, (dum talia fingimus) repente videmus & talia.

Hic Picus exclamans, Num, inquit, mi Ficine, quod modò vehementer imaginabamur, optabamusque, mox & videre videmur? Quod quotidie somniantibus accidit. An fortè qualem mente machinabamur formam, talem imaginationis potentia fecimus? An potius

vir sapiens quondam ædificauit talem, qualem recta & Physica ædificandi ratio præcipit? Tum ego, Hanc Pice, inquam, sapiens ille Leonardus Aretinus dicitur construxisse, & propè hanc ipsam illic, vbi vides Ioannes Boccatijs habitasse, hanc deinde conciuis noster Pandolphinus, familia & nomine, Petrus Philippus, eadem certè prudentia qua & illi, elegit feliciter habitandum. O felicem virum! inquit Picus, cui contigit è publicis negotiis secedenti, ædem sacram inhabitare, ædem dixi, nam & propè sacrum hunc est posita lucum, & hanc circumstantes ædes viginti diuorum. Sacer itaque præ cæteris locus est in primis aptus Oraculis. Vnde & Pandolphinus videtur ritè cognominandus. Siquidem hoc cognomine (si Græcum interpretemur) Delphicus rotus significat. Hæc, mi Valor, inter nos dicta tunc probataque sunt, eadem ipse necessario tuo præclarissimo citi referes, vt sedes adeò salubres, si diuinitus dedicatas, libentius post hac colat, atque fre-

quentius. Vale, quarto

Calendas Nouembris. M. cccc.

(.)

LXXXVIII.

(.)

*Querimonia & consolatio, in amico-  
rum obitu.*

*Positio aspectusque Planetarum ingenis  
conferentium.*

MARSILIVS FICINVS

Amerigo Corsino, Conphilo-  
sopho suo, S. P. D.

**C**onquerebar heri, Corsine noster, vna cum Ioanne Canacio & Bindaccio Recasolano, fratribus in Platone nostris, de crudeli nimium obitu Alaman- ni Bonati Academiae Martis: hunc equi- dem hanc ob causam Martem Academiae nomino, quoniam magnanimus Iuuenis & facundus vnumquemque nostrum con- tra luidos detractores acerrime defende- bat. Hunc igitur Martem nostrum heri Mars in Leone discurrens, coniuncta se- cum Luna crudeli nimium castu, allisit ad petram è mulo deiectum, statimque è me- dio sustulit, Martem hic incuso præ cæ- teris (si quem nobis fas est ex superis incu- sare) quoniam Leonem tunc occupabat ipse cum Luna olim ascendentem Ala- manno nascenti, & modo percussio, octa- uam domum in cælo tenentem. Sed ea- dem hora qua cecidit miser, heu! & oc- cidit, surgens ab ortu Saturnus in Capri- corno, grauemque philosophantis sortem miseratus: amat enim Saturnus ipse Phi- losophos, animam eius per Capricornum excepit, deorum portam & Angelicis ibi Thronis annumeravit. Et si id iatis mœ- rorem nostrum consolari debet, deslebam tamen, vt dixi, crudum generosi Iuuenis obitum.

Ad hæc illi, Marsili noster, inquirunt, heu! non vnam hanc tantummodo iactu- ram Academia fecit, sed Locterium do- ctum etiam & religiosum virum, obitu nu- per amisit, vnde consolatione nobis opus sit gemina (si pergimus ista lugere.) In- ter hæc nuntiatum nobis est, Amerige, summum tibi hodie magistratum Reipu- blicæ demandatum, quamobrem conso- lationem, qua egebamus, geminam pro- tinus consequuti sumus, tum quia hoc munere honestatur amicus, tum etiam, quia tanto viro honestatur & munus: hoc hoc igitur Magistratu & Academia con- gratulantur, & patria gaudet. Tu quoque gaude Corsine noster, non tantum præ- senti munere, sed felicibus etiam auspi- ciis. Nunc enim sol aspectu trino fœli- cissimoque Iouem iamjam recta progrē- dientem aspicit, in posterum feliciora pro- mittens. Tunc deniq; præstaturus, quando Deus ipse voluerit, syderum temperator, III. Calendas Nouemb. M. cccc. lxxxviii.

MARSILIVS FICINVS

Florent. Hermolao Barbaro,  
S. P. D.

**F**requenter solent amici mutuo scri- bere animos amicorum inter sem- tibis non seiungi. Quibus sane dicendis mentiuntur sapius, aut certe falluntur. Longè enim disfuncti sunt animi, quando alter alterius ingenium prorsus ignorat. Tu ergo, vir verus, vt in hoc, sicut in cæ- teris suis veridicus, si quando idem ad nos tibi, quod cæteris scribere fortè contige- rit, misisti nuper ad hos quandam ingenij tui formulam, profecto formosam. Si modo Mercurius largitor ingenij aërium domicilium suum geminos habitans, am- plum præstat ingenium. Ac forsitan ve- nustius & elegantius quam in Virgine, & aspiciens illinc sextili surgentem in Ariete Iouem, integritatem & humani- tatem adhibet pulchritudini. Ac dum inde spectat quoque Saturnum, trino in Libra regnantem, obtinentemque (vt arbitror) Occidentis angulum, sicut & Iupiter Orientis granitatem, & antiquæ sapientiæ studium, & id quidem firmum atque perpetuum decernit ingenio. Venit itaque ad nos animus Hermolæ tuus, sed hætenus sine corpore suo nudus no- biscum habitat, quo ad reliquam acci- piamus abs te cæli figuram, qua corpo- ris forma distinctius & plenius exprima- tur. Ad eò humanus es, mi Barbare, vt non perpeffus fueris amici tui animum, animo suo carere diutius. Num igitur animo nunc tuo tam inhumanus eris, vt patiaris hunc corpus suum diutius affe- ctare? Sed absit vt id permittas. Nam si quod vehementer optamus effeceris, & totus eris, Hermolæ, tecum, & totus pa- riter nobiscum eris.

Accedit ad hæc, quod genitura tan- dem perispecta, scribemus ad te nonni- hil ad tuam valetudinem non inutile. Sperantes dum vitæ consulimus tuæ, sæ- culi nostri vitæ prospicere. Vale fœlici- ter, atque vt fœlicius valeas, totus ubi- que tecum esto. Duodecimo Nouem- bris. M. cccc. lxxxviii.

(.:) (.:) (.:)



*De efficacia loquendi, & ratione iocandi.**Satis ad vnum scribit amicum, qui cunctis simul scribit amicis.*

MARSILIUS FICINVS

Florentinus, Pierleone Philosopho singulari, imò &amp; Poëtæ, S. D.

POëtam verè nunc saltem te esse ne nega. Siquidem modo factus es loquendo factor, hoc sane tua testatur Epistola, his statim in Proœmio verbis. Ita sum, inquis, difficilis in scribendo, & quæ sequuntur. Quidnâ conaris his verbis, nisi difficultatē scribendi dicere? Hanc interea facis ipse dicendo, difficultatem, difficultatē, inquam, non scribendi tantū, sed insuper & legendi. Tam grandibus simul & atrishæ dictiones sunt plenæ lituris. Adeo ergo & veridicus es & efficax, ut quæ dicis interim & efficias. Verū quid nunc tum Philosopho grauissimo iocor? At verè non tam philosophus ego cum philosopho iocor, quàm amicus amico, sed quomodocunque iocer, quid tum? Nonne & Mercurius ipse nunc iocatur in cœlo, ludique in nobis?

Solet is apud Saturnum, aut Iouem seridè loqui, apud Venerem verò iocari, hac igitur hora cum Venere coniunctus & Luna, & nunc ascendens seria respuit, gaudetque ridiculis. Missa tamen ridicula hæc parumper, si possumus, faciamus. Quod nostra passim Platonicaque diuulgas, tam gratulor equidem, quam luce delector. Soli namque viro nostra canente, tamquam illustrante Phœbo, obscuri esse non possumus. Proculum à nobis expectas. Expecta Proculum simul, atque Iamblichum, diuinum illum Iamblichum, plurimis & grauissimis Porphyrij, quæstionibus mirificè respondentem, & interea Ægyptiorum Assyriorumque diuina mysteria reuelantem. Promissorum igitur tarditatem muneris copia propediem, DEVS adiuerit, compensabimus. Interea vale feliciter. Sed postquam dixi vale, attigit hanc Epistolam legitque Picus noster Mirandulus, vir certe mirandus. Atque ita perbelle legit, tam acriter iudicauerit, ut hanc non tam meam dicerem esse quam suam. Quid ergo? si tactu simul, atque inimitis eam sic affecit, ut suam è vestigio fecerit, sed tamen interim non desinit esse mea. Quamobrem ubi dixi, vale, dicendum erat, valetudinem tibi properam optat Ficinus Picusque tertio Ianuarij. M. cccc. xc. statim exorto Sole.

MARSILIUS FICINVS

Florentinus Francisco Bandino, S. D.

Nihil iamdiu ad te scribo charissime mi Bandine, quoniam interea & tibi & omnibus multa conscribo. Vtinam tam multum bona sint quam multa. Plotini libros omnes iamdiu me fecisse Latinos intellexisti, atque in eos commentaria scribere mox incoepisse, hæc ad dimidium iam perduximus, & forsitan absoluissem, nisi inter commentandum coactus fuisset traducere insuper in Latinū Pselium Platicum de dæmonibus, & Synesium de somniis, atque ex parte Porphyrium de abstinentia, ac etiam diuinam Iamblicum de Ægyptiorum Assyriorumque Theologia, & denique Priscianum Lydum Theophrasti mentem, de mente diligenter interpretantem. Inter hæc Philippus Valor, valoris & gratiæ plenus, regique vestro omnium deditissimus, Plotini textus commentariaque regi transcribit, voluminare regio. Quinterniones iam tres atque triginta grandes sunt absoluti. Vale sexto Ianuarij. M. cccc. lxxxix. Florentiæ.

*Amicus in amico. Item excusatio de itinere non suscepto.*

MARSILIUS FICINVS

Florentinus Platicus Srenissimo Pannoniæ regi Matthiæ semper inuicto, suppliciter se commendat.

SI mira potest amicitiae virtus efficere, quod Pythagorici pollicentur, ut sit amici animus in amico, certe nunc meus animus est in Philippo Valore, qui nuper in Pannoniam in primis maiestatem tuam salutaturus accedit. Ut cum istum audiueris suppliciter salutantem, Marsilium ipsum audiuisse te putes. Desiderabam equidem iamdiu maiestatem tuam visere, isthic desideratus à multis, verebar autē ne vires minus itineri longo suppetere. Deceui tandem in Valore venire, ita demum præsertim quia viaticum mecum attuli, libros salutari mentis alimonia plenos, qui & pro nutrimento in via & pro vehiculo simul mihi forent. Leges ergo feliciter Priscianum Lydum Philosophum, qui & Theophrasti & Aristotelis mentem de sensu & imaginatione & intellectu diligenter in-

terpretatur. Quem equidem non traduxi tantum à Græco, sed breuibus etiam notis exposui. In hoc verò legendo plane cognosces, quod & Themistius asserit, eandem esse Platonis & Aristotelis & Theophrasti de mente sententiam, vt vna quidem omnibus hominibus sit communis, & ea dumtaxat mens diuina, humanas vbique mentes illustrans, quem Peripatetici intellectum vocant agentem. Totidem verò sint propriæ mentes hominibus, quot sunt & animæ, atque hæ similiter immortales. Quos illi intellectus nominare possibiles consueuerunt, id est, à diuina mente formabiles. Per hæc intelliges Alexandrum & Auerroem confutatos, & animæ nostræ diuinitatem prorsus agnosces. Præterea non dedignaberis librum Michaëlis Pselli de dæmonibus legere, breuiter à me traductum, qui Platonicos Christianis in dæmonum opinione conciliat. Videbis post hæc operosum Plotini opus, ex parte nunc in Pannoniam, vt tibi totum ex parte monstratur, allatum. Reliquum est, vt felicissime maiestati tuæ Valorem meum validissime, meque ipsum in Valore commendem. Sexto Februarij. M. cccc. xc.

*Proœmium in Theophrastum de anima.*

MARSILIVS FICINVS  
Philippo Valori, S. D.

**Q**ui præcipit. Cognosce, te te ipsum, nos admonere videtur, vt animam cognoscamus, quæ quoniam est media rerum, nimirum est & omnia, hac itaque cognita facile sumus omnia cognituri. Ego igitur, vt animam imprimis assequer, per quam consequutus omnia forem, ad Philosophos, non plebeios illos quidem, sed egregios iamdiu studiose me contuli. Cum verò hinc quidem Platonicos, inde vero peripateticos anxius percunctarer, eorumque responsa dissidere inuicem viderentur, diffidebam ab initio me voti compem vnquam fore. Verum non multo post Themistius spem mihi præbuit optimam, affirmans, tantos inter se Philosophos non sententia quidem dissentire, sed verbis. Tandemque de anima Platonis, Aristotelis, Theophrasti, sub diuersis verbis esse sententiam. Incidi denique diuina quadam sorte in librum Theophrasti de anima à Prisciano quodam Lydo breuiter quidem, sed tamen diligenter expositum, ea potissimum ratione, qua Plutarchus, Iamblicus Platonici Peripateticique insignes, Aristotelicam de anima sententiam explicaue-

rant. Cum igitur in his legendis Platonicos peripateticosque esse concordēs animaduertērem, habui fermè tota quod mente petebam. Atque, vt cæteri quamprimum habeant, librum hunc à Græca lingua transtulimus in Latinam. Adiunximus præterea Expositiones quasdam breues à nobis interlegendum, atque transferendum excogitatas. Neque tamen hac in re duxi in præsentia mihi nimis elaborandum, vel latius euagandum, Ioannes enim vicus noster Mirandulanus, vir certè mirandus, iam hoc agit ad summum, vbi Philosophorum omnium de quauis materia mentes diligentissime discutit, ac Platonem Aristotelemque de anima mirabiliter monstrat esse concordēs. Librum verò tibi potissimum, mi Valor, censui dedicandum. Tu enim vnà mecum iamdiu concordiam Philosophorum hac de re vehementer affectas.

Medices verò nostri, quibus tanquam patronis dare omnia, imò reddere consueuimus, consentiēt proculdubio munusculum hoc vnum è multis meo dedicari Valori, & Medicæ domus præ cæteris amicissimo, & promptissimo semper Platoniorum operum adiutori. Quamuis autem Græcum exemplar vnicum inuenierimus, & id quidem mendosum, atque fragmentatum, attamen lege securus, & ita cæteris præbelegendum. Nam emendare hoc atque referare diligentissime studui. Et Angelus Politianus noster, acerrimo vir iudicio, plurimaque doctrina, nostram hanc diligentiam approbavit. Vale. xxv. Martij. M. cccc. lxxxviii.

*Proœmium in Iamblicum.*

MARSILIVS FICINVS  
Florentinus, Reuerendo in Christo Patri Domino Ioanni Medici, sanctæ Romanæ Ecclesiæ Cardinali suppliciter se commendat.

**C**um Epistolam ad te scribere statuissem in Cardinea dignitate nuper tibi collatâ congratulaturam, cogitaremque cui potissimum eam darem tibi reddendam, qui congratulationem nostram efficeret admodum gratiorem, in Academicam me subito contuli, sperans in eius saltem penetralibus, salutatorem nobis aliquem tibi acceptissimum non futurum. Illic ergo diuina quadam sorte, primus occurrit Iamblicus inter Academicos cognomento Diuinus, & magnus ibi Sacerdos. Cui equidem saluæ, inquam Iamblice, Sacerdos

Sacerdos magne. Est homo Florentiæ missus à Deo, cui nomen est Ioannes, Heroica Medicum stirpe natus, hic venit in testimonium, ut de summa Patris sui magnanimi Laurentii, apud omnes, auctoritate testimonium perhiberet. Huic ergo & tu, precor, de singulari meo erga eum amore testimonium perhibeto. Tu nouo huic Antistiti Christianæ religionis Cardinem iamjam gesturo congratulationem nostram, alioquin ieiunam, diuinis verbis mysterisque tuis efficies plenior. Annuit ille precibus, atque hac ad te sententia Ioannes Sacerdos magne, venit magnus ille Sacerdos. Tu igitur salutatorem tantum lætus excipe, atque post salutationem primam, post lectam Epistolam, quid Diuinus ille loquatur, si placet, attentius audi. Promisit enim ut sua tuaque persona pariter digna diceret, se tibi breuibus quid Ægyptij & Assyrij Sacerdotes de religione rebusque diuinis senserint, expressurum.

*Argumentum in Librum.*

**P**orphyrus qui inter Platonicos propter excellentiam Philosophus appellatur, longam in Ægyptum misit Epistolam ad Anebonem Sacerdotem, variarum, & grauium quæstionum plenam, ad omnes Philosophiæ partes spectantium, præsertim ad Deum atque Angelos, dæmonesque & animas, ad prouidentiam, ad fatum, vaticinia, magicen, miracula, sacrificia, vota, Porphyrij quæstionibus, respondit Iamblichus eius auditor. Introducit verò Porphyrio respondentem Abamonem Ægyptium Sacerdotem, pro Anebone discipulo suo, ad quem Porphyrius misit Epistolam.

Huius ergo quæstionis totius, atque responsionis, profecto diuinæ, tanquam in Plotino adhuc nimium occupatus, singula fermè non verba sed sensa traduxi, ut non mirum putari debeat, si tibi diuulsa videatur oratio, præsertim inter ipsa disputandi principia, vel leuior iactura verborum, nam deinceps verborum etiam contextus magis perpetuus apparebit. Coactus verò sum interdum meum aliquod verbum, vel continuationis, vel intelligentiæ gratia interserere. Velocioris autem ædificationis etiam in causa fuit Pierleonus, vir omnium cupidissimus secretorum, verum quod in primis admiror, hic semper affectare videtur quæ iam possidet. Nam diuinitate quadam ingenij, Philosophorum arcana & Græcorum & Barbarorum nondum lecta consequitur.

*Proæmium in Proæmium & Porphyrium.*

MARSILIUS FICINUS

Florentinus Reuerendo in Christo Patri  
Domino Ioanni Medici Sanctæ Romanæ Ecclesiæ Cardinali  
suppliciter se commendat.

**D**eus omnipotens Ioanni Bicio Medici, insigni pietate viro, & quantum ciuitas capit, cui omnium sententia sancto, quasi cuidam Abraham, quantum fas est conferre, quondam promississe videtur: Proles, o Ioannes, tua fulgebit in sæculum, sicut stellæ coeli. Seminibus tuis benedicent populi. In semine tuo tandem benedicentur omnes Gentes. Hæc illi Deus. Semina verò Ioannis, quibus benedicunt populi, Cosmis quidem primo, deinde Petrus Cosmi filius, tertio magnanimus Laurentius Petro natus. Semen autem Ioannis eiusdem in quo benedicentur omnes Gentes, est Ioannes Laurentio genitus, cui adhuc adolescentulo, diuina prouidentia mirabiliter Cardineam contulit dignitatem, futuri pontificis auspiciis, in quo quidem vice Christi benedicantur omnes Gentes. Huic ergo familiæ à Deo iamdiu electæ tanquam optimæ, optimus quisque literatorum sua omnia, ut ita dixerim, consecrare, & ea quidem quam electissima debet Marsilio quidem antiquo Medicæ domus alumno, non licuit per ætatem quicquam Ioanni Bicio dedicare, licuit autem Cosmo primum nonnulla, deinde Petro, tertio, Laurentio destinare. Licet adhuc quarto iam, aspirante Deo, Ioanni Farro Medicæ domus Flori, flores ex platonico-  
rum philosophorum pratis collectos offerre. Quos felicibus equidem auspiciis offero, ut libri, imò liberi mei, quando tandem in te benedicentur Genes, ipsi quoque participes benedictionis euadant. Accepi-  
sti quidem venerande patrone nuper, quos ex pratis Iamblici flores legeram, quos verò modo ex agris porphyrij proculique carpsi, feliciter accipe, quibus apium more libatis, vel in hortis Academiæ singas.

*Proæmium in Sinesium atque Psellum.*

MARSILIUS FICINUS

Florentinus, Petro Medici viro  
magnanimo, S. D.

**Q**uanquam multa quotidie legitis meliora nostris, nulla tamen fermè magis arbitror nobis placere quàm nostra  
DDdd

Si modo sua cuique maximè placere solent. Sua verò cuiusque sunt potissimum quæ omnium antiquissima possidentur. Antiquissima certè possidentur à vobis Marsiliana, spero igitur hæc vobis semper charissima fore, vt etiam si somnia mittam, hæc quoque quasi pro veris apud vos, primum atque per vos, vera etiam apud alios habeantur. Cum igitur Sinesij Platonici librum de somniis, quem nuper interpretati sumus è Græco, auctoritatem & fidem in primis apud Lectorem primum, & per hunc apud alios habere desiderarem, potissimum ad temisi. Quarto iam gradu post magnum Cosmum nostra lecturum. Atque hæc statim approbatione tua ob egregiam doctrinam, auctoritatemque tuam omnibus probaturum. Adiunxi libro de somniis librum Michaelis Pselli Platonici de dæmonibus, non immerito, quoniam à dæmonibus somnia mitti veteres arbitrantur. Vale. xv. Aprilis. M. cccc. lxxxix.

*Commendatio styli.*

MARSILIVS FICINVS

Andree Cambino Compatri  
optimo, S. D.

**M**Ultis iamdiu de causis dilectissime compater tibi debeo multum, sed hac ipsa plurimum, quod animum hodie nostrum tædio, nescio quo, grauatum, onere molestiore leuasti. Dedisti enim tres nobis orationes Francisci Puccij necessarii tui legendas, quarum lectio me adeò delectauit, vt vix orationibus totidem ac tantis, voluptatem hanc exprimere valeam. Solent enim ea potissimum oblectare, quæ satis desiderio faciunt. Ego verò in orationibus præ cæteris hæc ipsa desidero, argutos quidem sensus, interim non obscuros, copiam quoque minime supernuacua, breuitatem etiam, non manca illam quidem, sed integram, & interea moderatam. Proprietatem denique elegantiamque verborum. Ac si fieri possit, miram pictoris industriam, quæ rem ipsam oculis afferat. Cum igitur hæc omnia in orationibus necessarii tui reuera perspexerim, nimirum me mirificè delectarunt. Quapropter & tibi compater, atque illi ingentes gratias ago. Vale. Quinto Iunij. M. cccc. lxxxix.

*Responsio petenti Platoniam instructionem & librorum numerum.*

MARSILIVS FICINVS

Florentinus Martino Vranio Prænyngero, S. D.

**D**Vas ad felicitatem vias diuinus Iamblicus Ægyptiorum mente describit, alteram Philosophicam, alteram sacerdotiam, illam quidem apertiore ad felicitatem inueniendam, hanc verò brevior ad consequendam, illam in primis elegerunt Peripatetici, similesque Philosophi; Hanc maxime populus religiosus incedit. Plato nostros vtramque viam mirabiliter coniunxit in vnum, & vbique religiosus est pariter, atque Philosophus, disputator subtilis, pius sacerdos, facundus orator. Quamobrem si Diui Platonis vestigia, sicut cœpisti, diutius prosequaris, felicitatem, & inuenies, indice Deo, & Deo duce, consequeris eandem. Præsertim quia Plato noster vnà cum rationibus Pythagoricis, atque Socraticis, legem sectatur Moisaicam, auguraturque Christianam. Ducunt verò te, quandoquidem id interrogas, ad Platoniam intelligentiam argumenta in libros eius nostra, & libri quos etiam habes nostri, de immortalitate animorum potissimum inscripti, Platonica tamen vniuersa complexi. Item Alcinous ad te hodie missus.

Præterea multoque magis diuinus Iamblicus, nuper traductus à nobis, aliàs ad te mittendus. Maximè verò in penetralia totius sapientiæ, introducent Plotini libri quatuor & quinquaginta, quos & traduximus & iam magna ex parte commentariis interpretati sumus. Hos Vere nouo forsitan, accipere poteris. Quæris autem quos præter hos vel transtulerim libros, vel composuerim, transtuli equidem Mercurium de mente diuina, & opificio mundano, Sinesium de somniis, Psellum de dæmonibus, nonnulla Porphyrij de anima & intellectu. Et Proculi quædam in Alcibiadem, Prisciani Platonici commentaria in libros Theophrasti de anima. Composui de voluptate, & de curanda literatorum valetudine, quos nunc accipies, octo Epistolarum nostrarum volumina, commentarium in Philebum, nondum absolutum, de amore, de religione Christiana. Tentavi & alia quædam potius quam composui, & librum contra pestem lingua Tusca. Interrogas qui rursus apud Latinos inueniantur Platonici libri Dionysij, Arcopagitz omnia sunt

Platonica, Augustini multa, Boëtij consolatio, Apulei de dæmonibus, Calcidij commentarium in Timæum, Macrobij expositio in somnium Scipionis, Auicebron, de fonte vitæ, Alpharabius de causis, & Henrici Gandauensis, Auicennæ Scotique, multa Platonem redolent. Legantur etiam utcumque traducta elementa Theologiæ Proculi, atque ipsa eius Theologia, & liber de Prouidentia simul atque Fato. Similiter & nos utcumque traduximus Hermiam in Phædrum, & Iamblicum de Pythagorica secta. Extat insuper defensio Platonis à Belsarione Cardinali Miceno facta. Quædam speculationes Nicolai Caisij Cardinalis.

Sed hæcenus quæsitis fermè satis mihi videor respondisse, amoris autem in Marsilium Martine tuo, quem singularem esse certo scio, non Epistolis vel innumeris respondere unquam me posse confido. At ne omnino sim ingratus, singulari prorsus amoris tuo, singulari similiter, mihi crede, amore respondeo, ardentemque in me tuum animum simili mentis ardore complector. Hæc primum à nobis amatoris tui, Prennyngere, præmia geres. Sed utinam Vranio, id est, coelesti donum aliquod, vel prope coeleste, dare, vel saltem auspicari coeleste possem. Opto equidem mi Vrani, atque etiam spero, te antequam coelestem patriam repetas, foelicitatis fore participem, & in cælo beatum. Florentiæ, duodecimo mensis Iunij. M. cccc. LXXXIX.

MARSILIVS FICINVS

Florentinus, Pierleone  
Conphilosopho  
suo, S. D.

**Q**uantum ipse Proculum desiderabas visere, tantum ego ad te mittere cupiebam. Quibus enim voluntas est eadem, nimirum inest & æqua similisque voluntas. Cur ego non prius? Nondum venerat hora eius, venit hora nunc, quamvis tardior, hinc abeundi. Utinam ne serus ad vos perueniat, bonus certè veniet, quodcumque venerit. Philosophare foeliciter, amice, omnium optatissime, ac si quid à nobis optas, postula, sed eo sydere, ut celerius posthac accipias. Mirandulanus noster egregiè philosophatur, & te amat egregiè. Vale. II. Augusti. M. cccc. LXXXIX.

(:.)

(:.)

(:.)

*Commendatio leuiss.*

MARSILIVS FICINVS

Florentinus Ioanni  
Nesio, S. D.

**S**alue, rogauit Bernardus presbyter, ut cum tibi commendarem in vacatione cuiusdam Ecclesiæ, propemodum futura. Eum igitur tibi commendo, commendationis autem rationes nihil opus est afferre, Notior enim hic tibi est quam mihi. Tuæ igitur humanitatis erit amico, siquidem bene meretur, opitulari. Bene vale. VI. I. Augusti. M. cccc. LXXXIX.

*Studium de vita longa.*

MARSILIVS FICINVS

Florentinus, Ioanni Pico. Mi-  
randulæ Conphilosopho  
suo, S. D.

**Q**uo die hinc abiisti, libellum de Vita coelitus comparanda peregi, pridie verò opportunè incideram in quendam Arnaldi librum de retardanda senectute, diu à nobis optatum, sed scribarum vitio, lectu difficilem, difficillimum intellectu. Interea lectionem vrget instantius libelli Dominus, lectio igitur difficilis simul & properantior de senectute retardanda, retardat aduentum ad me tuum. Sed hoc, ut arbitror, æquo animo patiemur, modo diligentia hæc senectutem tibi quandoque retardet. Mihi verò non tam de retardanda senectute cogitandum est, sed potius retinenda. Interea dum separati videmur & separata tractare, facimus idem, Prometheum emulamur, fingimus hominem, tu animam, ego corpus, tu diuinitus illam ducis, ego coelitus hoc accipio, quam belle post mundum septiformi speculo abs te mirabiliter demonstratum, communitatim opera hominem speculatorem mundi componimus. Vale. VIII. Augusti. M. cccc. LXXXIX.

*De stylo Poëtico in Aphorismis Hippocratis.*

MARSILIVS FICINVS

Florentinus, Antonio Fa-  
uentino nobili Phy-  
sico, S. D.

**L**iteras ad nos forsàn die vel hora Saturni, vel hoc ipso ascendente, aut saltem Luna fixum domicilium subeunte, de-

DD d d ij



disti. Nam Ferraria Florentiam vix quatuor mensibus peruenerunt, verumtamen Saturnus iste Iouem peperit, Epistolam humanitatis & elegantiae plenam. Si sermo dinorum & stylus oraculorum carmen est, atque Hippocrates quondam Deus est habitus, & Aphorismi eius oracula, recte admodum eos in carmina traduxisti. At verò ne forsan quod benefeceris alicubi male locatum, videatur factum male, mecænatem suum Poëmati quæris. Nulla iam mihi Antoni inter mecænates electio, vix enim vnus est quem nominas. Hic ergo carminibus tuis patronus esto. Pergratum mihi erit tuos legere versus. Gratissimum iam est abs te amari. Quid enim amabilius, quam amari ab eo, qui iudicio amet & ipse veneratio-ne sit dignus? Nostra in plotinum commentaria, Theophrastus, Iamblicus, proculus, & alii quidam, interpellarunt, affectantes & ipsi per nos à Græcia quandoque in Italiam proficisci. Sed redii nuper ad plotinum, commentaria in eum profecturus assidue. Vale felix, optatissimus ad nos aliquando rediturus. xy. Augusti. M. cccc. lxxxix.

*Astronomicum auspiciū pro libro de Vita longa.*

MARSILIVS FICINVS  
Florentinus Ioanni Pico Miran-  
dulano, Conphilosopho  
suo, S. D.

Quemadmodum Plato noster prouocans quidem à Lysia, inuitatus autem à Timeo, Zenone, Parmenide, quæ ipsi scripserant conscripsit & ipse. Sic ab Arnaldo Philosopho, ego adductus sum ad libellum de Differendo senio componendum. Quoniam verò rem supra terrenas vires moliri me noueram, à cælestibus Opusculum tantum auspicatus sum, à Mercurio quidem rectum iter sub Virgine sua feliciter prosequente, à Luna rursum, Taurum subeunte, atque ibidem cœunte cum Ioue, & illinc Phœbum suspiciente per trigonum & Venerem similiter, atque mercurium, vt compositio nostra vitalibus nata planetis, regnante mercurio, Philosophantibus conferret ad vitam, tibi præsertim dilectissime Pice philosophantium omnium vita dignissimo. Cui sane vt maxime diligentia nostra prodesset, phœbum cum Tauro ludentem qualem ipse nascens feliciter nactus es, equidem obseruavi hodie, postremò peregi ad Saturni trigonum veniente Diana, ita pi-

cum sublimis Saturni filium præ cæteris curatura. præsertim quoniam Saturnus interea victor insidet Capricorno, caputque Draconis ingens dextra tenet, & gloria-bundus, trinis oculorum radiis Apollinem intuetur, hoc statim aspectu suis promissa cœlestium stabili prorsus foedere firmaturus, si modo, quod sperandum est, Iupiter ille summus, Capite quo mineruam genuit, mineruæ cultoribus annuat. xxiii. Augusti. M. cccc. lxxx. x.

*Responsio desideranti natalem suum  
& reliqua.*

MARSILIVS FICINVS  
Martino Vranio prænyngero Con-  
stantienſi, S. D.

Mitto ad te Iamblicum, quem primum petebas, & proculum insuper, atque Sinesium, tanto enim nostra iam inire postulas, vt plura semper tibi sint mit-tenda quam petas. Octo Epistolarum nostrarum libros etiam desideratos abs te librariis concedemus propediem exscribendos. primum missuri primò, deinceps verò secundum. Statui equidem hac aurora nonum ferme iam absolutum tuo potissimum nomini dedicare. Hoc enim à nobis & plura charitas exigit, virtusque tua. Natalem præterea nostrum poscis, & si plotinus noster amicis frequenter id flagitantibus concessit nunquam, ego tamen ingenti quodam amore erga me tuo, ita sum affectus, vt nihil tibi aliquando sim negaturus, nisi quod forsan facultati nostræ fuerit denegatum. Nonus ergo supra decimum Octobris dies mihi natalis fuit, anno videlicet à salute nostra millesimo quadringentesimo trigésimo tertio, hora verò dici, quamuis à patre Ficino medico descripta non fuerit, eius tamen Matrisque verbis coniecimus fuisse vnam supra vigesimam, ascendisse tunc Aquarium ferme medium, vnà cum piscibus, arbitror. Saturnum in Aquario tunc angulum tenuisse, martem in eodem, Carcerem deodecimū tenuisse, in Scorpione Solem, atque Mercurium in domo nona, Lunam in Capricorno, in Leone Iouem in septima. Ibidem in Virgine Venerem, in Ariete Fortunam. Natalem habes, qualiscunque fuerit. Natum habes quantuscunque contigit. Et si fortuna nonquam ampla & perpetua, quædam corporis imbecillitas, nostris semper libris, vel scribendis obstitit, vel edendis, nunquam tamen ab officio nobis forsan decreto destitimus.

Iam v̄ro in hoc octauo ætatis nostræ septenario, nouæ etiam editionis, imò & conscriptionis tibi mihi causam præbui-  
sti. Nam cum hoc anno librum à nobis de  
curanda literatorum valitudine peteres,  
compositum septimo ætatis septenario no-  
stro, quo libros Platonis edidimus, ge-  
nius profecto tuus, nostrum genium ex-  
citauit, vt librum de Vita ingeniosis pro-  
ducenda componerem. Vt non solum be-  
ne, quamdiu viuant, valerent, sed etiam  
vt diu bene valentes viuerent. Itaque hunc  
de vita studiosis proroganda librum iam  
absoluimus, fauente Deo, atque huic addi-  
dimus deinceps opusculum de vita cœlitus  
comparanda compositum, vt remediis me-  
dicinisque, non vt cunque compositis, sed  
astrorum obseruatione confectis, prospe-  
ram ingeniosis valitudinem vitamque lon-  
gauam promitteremus, si modo Deus  
ipse, sicut conscribenti nuper aspirauit,  
ita legentibus in posterum, & vtentibus  
aspirauerit. Bene vale, diu vale. Vale  
foeliciter. Vigesimo nono Augusti. M.  
cccc. lxxxix.

*ARTIFICIOSA COMMENDA-  
tio docti viri.*

MARSILIVS FICINVS  
Florentinus Serenissimo Pannoniæ  
regi Matthiæ semper inuicto  
suppliciter se com-  
mendat.

**H**Astenus non putaram eundem ho-  
minem posse duobus simul in locis,  
præsertim inter se longe seiunctis existe-  
re, nunc autem id posse fieri non solum  
puto. equidem, sed scio etiam, audio, vi-  
deo, scio quidem Nicolaum nostrum Theo-  
logum singularem, nuper ex Italia se in  
Pannoniam contulisse, audio tamen eun-  
dem Florentiæ, vt solebat, in gymnasiis pu-  
blicis, in foro, in templis loquentem, le-  
gentemque frequenter, & assidue dispu-  
tantem. Videmus eundem quotidie in  
ipsis coronis Philosophantium coronat-  
um.

Vinit igitur apud vos iam Nicolaus vester,  
spirat apud nos interea Nicolaus & noster,  
clamat adhuc in scholis, atque in ipsis pa-  
rietibus inde resonat echo: hac igitur ra-  
tione opinionem quidem iste fefellit no-  
stram, satis autem desiderio fecit. Iam  
enim tanti viri præsentiam desideraba-  
mus, vt nunquam foret velut absens à  
nobis desiderandus. Fallet & vos forsitan a-  
liter, nisi monuero. Histriones quidem in

scenis personas suas, sub alienis abscon-  
dere solent, Nicolaus autem sub sua vi-  
cissim occulit alienam. Cum igitur dispu-  
tationes eius auscultabitis, scitote Nico-  
laum quidem vos aspicere, neque tamen  
audire. Beatum namque illum Thomam  
Aquinatem differentem, potius audietis  
in ipso iam Nicolai pectore viuentem, in  
eiusdem ore clamantem. Aut enim in hoc  
ille nascente renatus est, quod Platonius  
aliquis opinabitur, aut saltem sublimis è  
cœlo Thomas loquēti propitius afflat. Vos  
itaque in Nicolao velut in viua quadam  
statua Thomam illum colite Aquinatem.  
Die vi. Septembris. M. cccc. lxxxix.  
In agro Caregio.

*Iocosa gratiarum actio.*

MARSILIVS FICINVS  
Florentinus Roberto Sal-  
uiato, S. D.

**A**thlantem Astronomiæ Principem  
Poëtæ canunt, non solum perpetua  
quadam astrorum obseruatione, sed mira  
etiam proceritate corporis, cœlestia con-  
secutum. Tu quoque ratione quadam for-  
te simili sydere nuper affecutus mihi vide-  
ris. Quo enim momento Iupiter ex alto  
oscula libauit natæ, quo quidem in coitu  
poscenti negare nihil solet, literas ad me  
ipse dedisti. Quamobrem nec ego negare  
tibi mi Roberte quicquam volo, quamuis  
neque possim reddere quod dedisti, iam ve-  
rò si tanto plus cuique debeo, quanto plus  
acceperim, nihil certè cuiquam maius  
quam tibi debeo, perquam magnificentissi-  
me mi Roberte. Rides ne perquam magni-  
ficentissimum istud verbum? Non impor-  
tune forsitan grandissimum hoc nunc nobis  
venit in buccam, immensum est enim quod  
dedisti, quodue debeo. Siquidem toto se-  
mel me donasti mundo, quando mundum  
illum ad nos misisti diuinitus ab Ioanne de-  
scriptum. Legebam equidem mox tempe-  
stiuè tuas literas simul atque donum oculis  
contemplabar in nostro illo, quod iam diu  
nobis obtigit, quod & colimus, diui Chri-  
stophori sacello. Orbem igitur præterea il-  
lum oculis lustrabam, quem Athlantis in-  
star humeris ille sustinet, si forte nobis oc-  
curreret in orbe toto quicquam moueri  
tuo par vel simile persoluendum. Interea di-  
uus ille mihi; Quidnam, inquit Ficine,  
demens, sub cœlo quæritas, æquale  
cœlo?

Nonne totum accepisti nuper ab amico  
mundum? Et interea plusquam Prophetam  
D D d d iij

ille tuus refecit amicus. Propheta quondam cœlum vidit novum, terramque novam. Tu modo amici tui opera hæc non aspexisti solum, sed manibus etiam tenuisti. Creavit Deus ab initio cœlum & terram in abyſſo tenebrarum, quem ante genuerat in abyſſo lucis, recreavit quondam in sapientia Moſis, recreavit & nuper in ſpiritu Pici, in verbo Mirandulæ, hanc unâ cum literis Robertus tibi dono dedit. Tantum ipſe donum æquare nunquam potes, vix ego tam grandis æquabo, tam longus. Longe vale Marſili, longe valeat & amicus. Hæc diuus ille mihi vixus eſt mi Roberte loqui. Hæc igitur & tu longiſſima valetudine bene feliciterque vale, ſi modo ſalutaveris frequenter meo nomine. Picum complatonicum noſtrum.

Sed heus tu! dic amabo, nunquid Democritum his ſaltem diebus appellare debuerim potius quam Platonicum? Mundi faber ſabbato quievit ab omnibus operibus ſuis. Picus autem absoluta iam mundi fabrica, magnum neſcio quid molitur. Num igitur novos conſtituit unâ cum Democrito mundos? Sed redit inter ſcribendum oportune nimium mihi nunc in mentem, quid noſter ille potiſſimum moliat. Non ſoliugum nunc per inania ſectatur Democritum, innumerabiles Atomos numerantem, ſed illum certe, quem quotidie audimus ita clamantem. Pater meus viſque modo operatur, & ego operor. Operatur Dei filius, id eſt, procreat quotidie novos animos quaſi mundos, per hos ergo mundos, vno iam absoluto, Picus noſter animæ contemplator Chriſtum ſequitur, non Democritum.

PRO O E M I V M I N  
*Librum de Vita longa.*

MARSILIVS FICINVS

Philippo Valori, Cui optimo, atque nobiliſſimo, S. D.

Quamquam Plato noſter genio ſuo vivit, & victurus eſt (ut arbitror) dum mundus ipſe vivet, meus me tamen genius huc ſemper impellit, ut poſt divinum cultum omnia Platonis vitæ proſpiciam. Ad hoc ipſum iamdiu nobis aſpirat præ cæteris Mædica domus, ad idem conſpiras & tu, mi Valor, Medicum amiciſſimus, & Platonice gloriæ, atque diſciplinæ admodum ſtudioſus: quam ergo vitam platoni ſemper exopto, can-

dem opto Medicibus, ſimilemque Valori.

Quamobrem, horror & obſecrote, mi Valor, ut quanta ſemper opera gloriæ platonice faues, tanta aliquando diligentia præcepta hæc noſtra de Vita producenda legas, atque ſerues, quibus diu vivens reſurgenti nuper diſciplinæ platonis diutius unâ cum magnanimo Laurentio Medici, patrocinari poſſis. Vale.

IRONIA IN LIBRVM  
*ſuum, contra Grammaticum detractorem.*

MARSILIVS FICINVS

Florentinus Tideo Procuratori Regio, S. P. D.

Edi nudiſ tertius Antonio Librario, nomine tuo petenti Platonicum Iamblicum exſcribendum. Si tibi forte legenti ordo quidam in libro perpetuus non occurrerit, ſcito me hunc librum non ad verbum expreſſiſſe, ſed ad ſenſum. Non tam, quoniam in Plotini Commentariis totus fueram occupatus, quam quia unicum eſt apud nos exemplar, mendarum plenum, & quod eſt deterius, fragmentorum. Tum vero ſi ſtylus ibi noſter non ſatis tuo iudicio fecerit, iſtum Tidee, quando non placet, mitto, ſaltem accipito ſenſum. Aliquando enim ſub ære latet argentum, quemadmodum ſæpe contra tegitur æs argento. Sed ne Grammaticus forte quidam ſcverus Philoſophorum cenſor arrogantia me accuſet, quod hic argentum quodammodo mihi videar vendicare; aurum iſti concedo quam libentiſſime, ſi quo pacto poſſim rigidiorem in me iudicem munere tanto placare. Atque ut largius etiam ipſi gratificer, fontem iſtum equidem appellabo, mec iſternam. Vale felix. Me tibi commendo, tu quoque Regi magno me commenda.

IOCOSA ADVERSVS  
*ſilentium diuturnum.*

MARSILIVS FICINVS

Florentinus, Pierleone Conphilopho ſuo, S. D.

Cæteri quidem diuturni ſilentij crimen, Apologia quadam & hac ſæpe longa purgare ſolent, tu verò novus Ora-

tor, si modo Orator est qui tacet, accusationem silentii, silentio diluis. Notus certe Medicus contra videlicet quam ceteri consueverint, similibus similia curans. Iamdiu te omnes amici damnamus, quod nec sponte, nec etiam lacessitus, tuorum alicui quicquam scribas. At Proculus nuper ab te Florentiam ad nos profectus, mandatis quidem tuis, sed sine tuis literis, silentium criminationibus in te nostris imposuit, iubens nos æquo animo ferre desiderium literarum tuarum tam diuturnum.

Nempe, cum ipse vir tantus tibi que tam amicus Epistolium discedens à te impetrare nequiverit, nec mirum nobis, inquit, videri debere, nec temerè factum abs te, ut Epistolam quam non obtinuit ille, nec nos iamdudum impetraverimus. Ita semper mira quædam non tantum loqueris, sed facis, amice, silentium defendis silentio, similibus similia cura, persuades quoque tacendo, sed noli rursus precor, librum, siue liberum illum tuum, qui iam pridem ad Laurentium Medicum est profectus, eodem quo tu silentio nobiscum agere. Laurentio quidem vix, mihi vix aut omnino nihil loquitur, forsitan à patre prohibitus. Concede tandem, obsecro, ut tuus ille saltem cum Marsilio tuo paterna venia indulgentiaque loquatur. xii. Octobris. M. cccc. lxxxix. Florentiæ.

*IN LIBRVM  
de Vita.*

MARSILIUS FICINVS  
Florentinus, Paulo Florentino, infir-

gni Theologo, in sermonum Mariæ grege egregio, S. D.

Mitto ad te libros de Vita nostros, mi Paule, vita dignissime, non tam ut legas hæc adminicula vitæ, quam ut serues. Nam cum omnibus amicis meis vitam magnopere cupiam, tibi hanc affecto summo perere. Orphico enim clamore tuo, sacra passim declamatio spirat, & viuunt parietes ipsi templorum. Decimoquinto Decembris. M. cccc. lxxxix. Florentiæ.

*IN LIBRVM DE VITA,  
post libros de Somniis &  
Dæmonibus.*

MARSILIUS FICINVS  
Florentinus Petro Medici, S. D.

Ego iam pridem, meusque Valor, missimus ad te Synesij Platonici somnia, Pselli Complatonici dæmones, sed in ipsis portarum tuarum liminibus, nescio quo fato & somnia statim euanuerunt, & omnes subitò disparuere dæmones, ut hæc nostra saltem, quam nunc mittimus, apud te vita compareat. Levis forsitan somniorum, dæmonumque iactura, vitæ verò non levis. Itò nunc igitur vita charior, melioribus utere fatis. Adito iam alacris Petrum Medicum decus nostrum, penes eum victura feliciter. Decimoquinto Decembris. M. cccc.

(.) LXXXIX. (.)

(.) LIBRI NONI FINIS. (.)



# MARSILII FICINI FLORENTINI

EPISTOLARVM,

AD NICOLAVM VALOREM,  
*litteris & moribus ornatissimum,*

## PROOEMIUM. MARSILIUS FICINUS

FLORENTINUS,

Nicolao Valori, amico  
gemino, S. P. D.



*V*m duodecim Episto-  
larum libros iam absol-  
uissem, eosque recogno-  
scerem, deprehendi deci-  
mum, vndecimumque  
librum certa adhuc in-

scriptione carere: itaque cogitanti mihi  
cuinam potissimum hoc opus geminum de-  
dicarem, tu mihi in primis occurristi, mi  
Valor amicus, & ipse geminus. Gratis  
enim hactenus Philippus optimus frater  
tuus, atque tu meorum operum gemini  
seruatores, ceu Castor atque Pollux,  
nunc autem defuncto nuper Philippo, ip-  
se mihi supersuisti geminus, qui profecto

dum te mihi offers, quod quidem pro hu-  
manitate in me tua quotidie facis, re-  
fers quoque Philippum incomparabiliter  
à nobis amatum. Et quantum nos angit  
grauissima Philippi nostri iactura, tan-  
tùm nos itidem sufficiens per te compen-  
satio consolatur. Consolatur & spes fir-  
missima sperantem Marsilium libros v-  
bique suos non minus Nicolao deinceps,  
quam olim Philippo commendatos fore.  
Lege feliciter, ac diu feliciterque viuere, &  
obseruator Platonice sapientie diligens,  
& studiorum meorum diurne ser-  
uator.



MARSILII FICINI  
FLORENTINI,  
EPISTOLARVM

(·:·)

LIBER X.

(·:·)

PRO LIBRO DE VITA,  
*ad Amicum misso.*

MARSILIVS FICINVS  
FLORENTINVS,  
IACOBO MARTINIO  
Iurisconsulto, S. D.



Ruſtrà librum de Vita profuturum amicis compoſuiſſem, niſi prodeſſet in primis Iacobo meo mihi omnium amiciffimo. Tu igitur ne fruſtrà conſcripſerim, accipe libenter vitam, quam mitto noſtram, lege diligenter teneto memoriter, ſerua ſedulo. Viue diu ad votum, atque ſœliciter. xvi. Decembris. M. cccc. lxxxviii.

*Pro eodem.*

MARSILIVS FICINVS  
Laurentio Medici iuniori, Ciui  
præſtanti, S. D.

Librum de Vita noſtrum amicis quidem omnibus, & literatis, & bonis prodeſſe cupimus. Illis verò potiſſimum, quorum ita multis profutura eſt, & qui rationem viuendi optimam elegerunt, hi maximè omnium digni ſunt vita. Lege igitur diligenter, dilectiſſime mi Laurenti, ac diu ſœliciterque viue. Decimoſexto Decembris. M. cccc. lxxxviii. Florentiæ.

(·:·)

*Iocoſa.*

(·:·)

MARSILIVS FICINVS  
Bernardo Michelectio, & ſi fortè  
riuali ſuo, tamen perquàm  
dilectiſſimo perquàm  
plurimam S. D.

Edicaui præterita æſtate Petro Medici noſtro librum Sineſij Platonici de ſomniis, & libellum Pſelli Complatonici de dæmonibus. Petrus igitur accepto libro, ſtatim Proœmium legit, lecto poſuit, liber ipſe neſcio à quo paulopoſt ſublatus eſt, poſthæc diu quæſitus, hætenus non comparuit, vt proſecto videantur cum primum penetralia Domus, ſiue ſacræ cuiuſdam ædis attigerunt & diſparuiſſe dæmones, & ſomnia proſus euaniſſe. Perſcrutare precor accuratiſſime mi Bernarde, num iſthuc ſomnia hæc, hi dæmones aduolauerint. Si ita compereris, expiate vos moneo, & ad nos expellite. Denique ſuſpicio, ne Cardinalis vel Gregorius, librum hunc legendum acceperint. Si forte habent, lectum ad nos mittant. Sækem non habere ſignificā, vt alibi diligentius perquiramus. Commenda me venerabili viro Pandolpho Lunæ, Solem verò curnam prætermiſerim? Commenda igitur impri-

mis Cardinali nostro Soli, deinde Pandolpho Luna, & quidem plenè, sed vt hinc exorſi Catalogum cœleſtium proſequamur. Commendabis & Ioanni Baptiſtæ, propter leges quaſi Ioui, Gregorio quinetiam Mercurio noſtro, Sed dic amabo, vbinam Venerem collocabimus? Matthæus igitur Venus eſto. At quoniam inermis eſt ſine Cupidine Venus, ages ipſe Cupidinem. Alioquin hodie Bernarde mi vix amabere. Saturnum verò, ac Martem lætitia & humanitas à feſtino contubernio veſtro procul expellit Vale. xxi. Decembris. M. cccc. lxxxviii.

*Proximum in libros primo quidem miſſos ad Laurentij filios & Valorem, deinde ad Laurentium Medicum.*

MARSILIVS FICINVS  
Magnanimo Laurentio Medici, patriæ ſeruatori, S. D.

**S**Ineſius atque Pſellus & Iamblicus, ac Porphyrius Proculusque Platonici, iam pridem ampliffimas tuas ædes ingreſſi, ingenuos filios tuos ſalutauerunt, hætenus quidem recte admodum feciſſe videntur. Quod autem inſalutatum te reliquerint, nec egiſſe prudenter, nec euafiſſe felices. Imprudentiam ergo ſuam tandem recognoſcentes, vt quandoque feliciores ſint, limina nunc tua reuiſunt cognituri patrem, & rurſum vnà cum patre filios agnituri, ſic protinus victuri felicius. Quippe cum nuper compertum habeant, nec libros quidem de Vita noſtros, abſque tuis auſpiciis viuere voluiſſe; comitantur præterea hos quique Philoſophos Prifcianus Lydus, ſimul & Theophrastus. Hi enim cum Valorem meum ſaluere iam diu dixerint, & ardèter optauerint, hodie te alacres adeunt, ita demum magnopere votum conſecuturi, vt imprimis ipſi penes te ſalui ſaluum faciant & Valorem, per te præcipuè poſt Deum ſaluere deſiderantem. Salue ante alios optime Patrone noſter, ac tantos Philoſophos apud te colloquentes foeliciter audi.

*Cætus ciuium quorundam elegantium, & optantium tranquillitatem, nomine Mammolæ.*

MARSILIVS FICINVS,  
Bernardo Oricellario dilectiſſimo in libertate vitæ & ſecura quadam negligentia fratri, S. D.

**C**Vm rerum omnium viciffitudo quædam futura ſit, meum certe eſt neſ-

cio quo fato, viciffitudinem in plerisque reddere. Cæteri ſane ſeruitute ſolent, & quidem longa, breuem ſibi tandem aſcendere dominatum, & ſumma quadam diligentia præfecturam. Ego viciffim libertate potius, & negligentia, neſcio quam heri præfecturam nactus fuerim vel cenſuram. Et in hac quoque dignitate viciffitudo patet. Nempe cenſores alij corrigunt imprudentiam. At ego deinceps ſum (neſcio quomodo) prudentiam correcturus. Iam verò & hic viciffitudo reſurgit. Nam prudentia Mammolæ imprudentia eſt apud vulgus. Atque contra prudentia vulgi manifeſta quædam eſt apud Mammolam imprudentia. Summa denique rerum viciffitudo in qua contubernij huius verſatur officiũ, hæc eſt proſecto, vt cum cæteri ſecuritatem omni cura ſtudioſe perquirunt, nos per ſummam quandam incuriam, non quæramus quidem, ſed iam habeamus. Nam quærere cerre curioſi eſt, habere verò ſecuri, nec tam quod optaueris poſſidere, quam quicquid forte poſſideas, id optare. Et idipſum velle quod habes. iiii. Ianuarij. M. cccc. xcix.

*De charitate nonnihil, cum commendatione rerum ſuarum.*

MARSILIVS FICINVS  
Alexandro Philicharo, S. D.

**S**I charitas omnis incipit à ſeiſpa, quem admodum vulgo fertur, heri equidem apud vos charitatis officiũ non ſum ſecutus, quando magiſtratui veſtro commendauim quidem alios, me ipſum verò interim prætermiſi. At ſi verior Pauli Apoſtoli ſententia eſt dicentis, Charitas non quærit quæ ſua ſunt, ſed quæ alterius, ingentem habui charitatem, & idcirco charitate ſum dignus. Tantum igitur amicorum in rebus meis indigeo diligentia, quantum ego in re quidem mea ſum negligens, in aliena diligens. Tu verò nobis es amicus, tibi igitur me commendo, vt Caregium in me Caregiolum habeas commendatum. xxii. Ianuarij. M. cccc. xc.

*Laus nobilis & optimi ciuis.*

MARSILIVS FICINVS  
Iacobo Antiquario, S. D.

**S**I librarij quondam noſtros Platoni libros tanta diligentia impreſſiſſent, quanta Philippus Valor magnificentia exprimi procurauerat, optime nobiſcum

actum existimarem. Libros autem de vita nostros exprimi forte nuper felice curavit vir nobilissimus pariter atque optimus, & antiquitatis innouanda, quemadmodum & tu dilectissime mi Antiquari, studiosissimus. In quo sane Platonice illud reipsa compertum habemus, ex stirpe videlicet generosa prolem ingenuam proficisci, ac si educatio diligens accesserit, optimam. Quem ergo noster hic librum de vita hodie mihi dono dedit, do equidem fratri eius ad te ferendum Nicolao eleganti grauique iuueni oratoris Florentini nepoti, ut sicut literatorum nostra hæc diligentia profutura sit ad vitam, tibi maxime profit, vita certe dignissimo. Sed quoniam de oratore nostro facta mentio est, Franciscus Valor qui isthuc legatus accedit, & patruus est Philippi, atque Nicolai, & mihi atate quidem frater, sed reuerentia pater. Vir profecto prudentia, integritate, autoritate summa, quem quoties aspicimus & audimus, quod & quotidie facimus, quasi magnum illum Cosmum Medicum, quem vultu verbisque refert, spectare & audire videmur. Quorsum hæc Antiquari quam optime? Vt dum per legatum tibi mitto librum, interea quis ille sit, & quantus tibi significauerim. Significo quinetiam Ioannem Picum Mirandulam, & Angelum Politianum, nostros non mediocriter te amare.

*Commendatio causæ Iurisperiti.*

MARSILIVS FICINVS  
Leonardo Iurisperito, S. D.

**C**Ausam nostram pluribus verbis amicissimo commendare superfluum arbitramur. Superuacuum quoque iusto Patrono, iustam sui clientis causam commendare. Quid ergo? Significatione potius quam commendatione apud te nunc utemur. Hebræi Iouem Sedech, id est, iustitiam, nominant. Quoniam & in genitura regnans iustum significat hominem, strenue pro iustitia repugnaturum, & in causis agendis si coelitus potenter aspexerit, iustam portendit fore sententiam. Cum igitur non solum apprimè doctus sis atque facundus, sed etiam Iouialis, & cras pro nostra causa pugnaturus, Sole feliciter Iouem aspiciente, speramus, si modo ingenij tui nervos intenderis, te iniquas aduersariorum nostrorum cauillationes expugnatum. Vale.

*De amore & amicitia & commendatio amici.*

MARSILIVS FICINVS  
Hieronymo Donato Veneri Senatui  
Oratori clarissimo, S. D.

**A**Ntonius pelotrus Apollineus Academiae nostrae lepos, vir alioquin fallere nesciens, fallit me quotidie falli volentem: Semper equidem heri putaram tantum me debere pelotro, ut amplius in posterum debere me posse negarem. Semper verò deinceps ampliore quodam in me officio actius me sibi deuincit. Vnde statim me conuincat sententia superiore deceptum. Hodie tandem amplissimo omnium beneficio me affecit, quando me teque simul ex amantibus effecit amicos. Nempe uterque nostrum, dilectissime mi Hieronyme, iamdiu alterum ardentè amat. Hactenus tamen neuter erat, ut videtur, amicus, se videlicet nesciens redamari. Sed poëta noster Antonius nunc poëta, id est, effectoris & transformatoris officio functus, amicitiani inter nos confecit, & in amicos transformauit amantes, dum utrumque certum reddidit non redamari solum ab amato, sed & prius diutiusque amari. Virorum profecto philosophantium amicitia, non minoris apud mortales videtur esse momenti, quam inter cœlicolas, cœtus felicium planetarum. Significauit præterea mihi pelotrus quantum & ipse videre me desideres. Ego certe te, mi Hieronyme, iamdiu videre percipio. Et si egregium animum vultumque tuum non solum in elegantissimis tuis literis, verum etiam in ore, in vultu Ioannis Pici Mirandulae, & Angeli rursus Politiani tuorum quasi præconum, & audire frequenter mihi videor & videre Tu me verò quantumcunque sum in ipso Valore meo isthuc procedente, videbis in Francisco Valore inquam Florentini Senatui Oratore. Hunc equidem amo præ cæteris & admiror, hic enim magnum illum Cosmum, quem adolescens senem adeò venerabar animo, facie, sermone refert. Hunc igitur cum primum aspexeris, Marsilium protinus introspecies libenter in suo Cosmo viuentem. Sed non quantus sum ut modo dicebam, in meo Valore me cernes. Imò verò velut per vitrum intuens, maiorem in eo me videbis effectum, Quantulus denique vel in meipso sum, vel quantus in isto, tantus sum optime mi Hieronyme tuus, plura insuper amor ingens scribere me prorsus impellat; nisi Nicolaus Valor Legati nepos Iuuenis quidem elegans & admodum in iuuentute senex, isthuc accederet, multa præterea tecum meo nomine loquuturus. Vale.

*De Amicitia & Immortalitate animæ.*

## MARSILIVS FICINVS

Bernardo Bembo Vene-  
to, S. D.

**C**um singularis inter nos amor, mi Bernarde, non à mortali causa, sed immortalis potius & cœlesti fuerit procreatus, merito præter Epistolarum monumenta, memoriæ eius non cuilibet libro, sed libris potissimum de immortalitate commendare constitui, rem videlicet immortalem immortalitati commendans. Testis est igitur amoris tanti iamdiu liber Theologiæ de immortalitate sextus. Testis & nuper diuinus Plotini de immortalitate liber, in cuius argumento scripsimus hodie quæ sequuntur. Desideras, maganime Laurenti, breuem tandem longæ disputationis summam, disputationis, inquam, de immortalitate, & in Theologia & in præsentia in longum iam productæ. Desiderabat & idem noster ille Bernardus cum Veneti senatus hic Orator nos hac de re latissime disputantes audiret, Bernardus, inquam, Bembus vir apprime doctus, doctorumque Patronus, atque meus in sydere genioque frater. Tibi igitur atque illi pariter hæc erit summa, quatuor distincta capitibus. Primo quidem, quod anima rebus caducis dominari potest incitamentisque corporeis repugnare. Secundo, quod multa à corporibus separata frequenter excogitat, siue res ipsas attingat per se separatas, siue separet ipsa. Tertio, quod naturaliter æterna desiderat, ac sæpe æternorum fiducia negligit temporalia. Quarto, quod æternum colit Deum, vitæ sempiternæ gratia. Tota denique religio naturalis homini, firmissimum immortalitatis est fundamentum.

*Dæmones solares Medici. Item Commendatio libri de vita.*

## MARSILIVS FICINVS

Florentinus Pierleone Medico, S. D.

**S**alve dilectissime mi Pierleone, salve iterum magne Leo. Sed ne forte putes cognomento Leonis te nunc inferiorem homine indicatum, cœlestem dico Leonem non terrenum. Nisi forte terrenum hominem, qui in terram è cœlo descendit, legimus enim in carminibus Zoroastris, duodecim Zodiaci signis, duodecim præesse rectores. Vbi eum qui Leoni præsidet, nominat Leondachum, additque ritè vo-

catum in terris apparituum immensa figura orbem totum occupaturum, huic ergo Chaldæi subiectos dæmonas nominauerunt Leones, qui etiam oculis nostris quandoque se afferant, figuris, pro arbitrio, variis humanisque, nonnunquam artes Apollinis professuri, herbis pariter verbisque medentes. Si nunc te vnum ex his Leonem cognominauero, nec indignabitur veritas, nec tu igitur dedignabere. Sed de his satis. Patronus noster magnanimus Medices vnà cum vita sua ad te fert & meam. Vbi igitur suam tibi credit, meam quoque commendat, hic tu precor vtriusque Medicum age, herbis quidem curato suam, verbis vero meam curato pariter & ornato. Quid velim intelliges planius, si quando Bernardum nostrum egregia quidem indole inuenem, præstanti verò virtute virum audiueris nostra legentem.

*Filij Solis dicuntur quibus nascentibus Sol  
aspirat, Sol in Leone in nona  
cæli plaga.*

## MARSILIVS FICINVS

Laurentio Medici Iuniori, S. D.

**O**rationem Iuliani Platonici ad Solem habitam, in qua certis argumentis Solem ipse suum agnoscit Patrem, Laurenti merito postulasti, nam & ipse, nisi forte genesim ignoras tuam, genus à Phœbo ducis. Ille enim te nascentem è regio statim folio gaudioque suo libenter aspexit. Illum tu parentem splendore virtutis, & carminibus imitaris.

*Commendatio literati literato.*

## MARSILIVS FICINVS

venerabili Ioachimo Patri  
Prædicatorum Generali, S. D.

**C**um literatum inuenem viro literatissimo, virtutis indole præditum virtute præstanti, amicum meum, amicissimo meo commendaturus sum, in præsentia brevis ero. Facile enim me persuasurum spero: Dominicus Florentinus Ioanne natus, prædicatoriam diuini Dominici sub te Patre professionem agens, tum postulat patrociniū, atque ego sui gratia posco. Vale.

*In librum de vita, de accepto dono.*

MARSILIVS FICINVS  
Martino Vranio Constantien-  
si, S. D.

**L**iber de vita noster est expressus. Accepi his diebus ab impressoribus vnum ad te missurus. Et hunc quidem non tibi venalem, vt ceteros, sed gratis accipies, imò abs te iam emptum, & pretio quidem magno, quando enim tuam amore nobis animam tradidisti, vitam tibi nostram extra controuersiam vendicasti. Accepi nuper tuo nomine thecam cultellariam manubriis gemmeis & aureis ornata, munus non philosophicum tantum, sed & regium, regio nimirum animo tuo dignum, mihi præterea quam gratissimum, præsertim quoniam hoc dono eundem mihi tibiue præesse genium planè perspexi. Nam cum compertum haberem Calcidonium quidem subesse Aquario præsertim medio, lapidem verò Saturno Aquarij Domino, mihi autem eo gradu Saturnus ascenderit, vtrumque lapidem ardentè optabam. Votum ergo meum genio meo notum, tibi subito notum, declarat, eodem nos genio gubernari. Quid vero quod Autumno superiore affectare talia capi, tu interim, vt coniicio, eodem tempore de mittendo ad nos dono deliberare. Si quis igitur sibi met ipse gratias vnquam sit acturus, certè nunc marsilius Martino gratias ingentes agit. Potest sane idem sibi gratias agere, si modo sit geminus. Vterque nostrum geminus est, dulcissime mi Martine. Eadem ratione geminorū in cœlo sydus est vnum futurum, vt spero, commune animis nostris hospitium. Vale feliciter. Libri Epistolarum tibi exscribuntur indies. Plotino extremam manum propediem imponemus, & nunc habebis subito, cum primum impressus fuerit. Me certè semper habes. x. Aprilis. m. cccc. xc. In agro Caregio.

*Approbatio libri ex comprobatione  
Doctorum*

MARSILIVS FICINVS  
matthæo Aretino physico necessario  
suo, S. D.

**L**ibrum de Vita physicum vere & æstate superiore composui inter flores in agro Caregio, Vtinam Florentem. Tunc demum probaturus cum à physicis comprobatum fuisse rescirem. accepi vero diebus superioribus literas tuas tanto plenas

spiritu, vt subito earum afflatu vita mea quæ iam pridem edita, quasi, vt ita dixerim, exspirauerat, mihi protinus respirauerit, tuaque apud me approbatione fuerit approbata.

Vide igitur mi matthæe quantum mihi placeas, in quo & ipse mihi placeo. Perge precor, atque vt nos iam amas semper ama, physicisque commenda. Petis præterea siquid nuper ediderim. Septem Platoniorum libros magno Laurentio Medici nuper dedi suo arbitrio exscribendos, cum rescripserint habere poteris, neque multo post, Plotini libros & commentaria in eos nostra. Vale feliciter. xxix. Aprilis. m. cccc. xc. In agro Caregio.

*Commendatio Academiae Peripatetico.*

MARSILIVS FICINVS  
Antonio Faentino Peripatetico pa-  
riter & Platonico, S. D.

**P**erge precor, antoni miles strenue, antiquam academiam resurgentem, vt iam pridem facis, totis viribus adiuvaa. Peripateticus miles, imo dux platonicos feliciter adiuvabis. Deus ipse pro religiosa philosophia, pro pietate pugnabit. Si ergo Deus pro nobis, quis contra nos? Tentavi pro amico aditum, quem monueras, patebit, vt arbitror, quandoque honestus in publico gymnasio locus. Sedulo equidem id efficiam, causam non deferam. Rem totam aliàs latius patefaciam. Vale xxx. Aprilis. m. cccc. lxxxix. In agro Caregio.

*De adorando Deo in confessionibus Augustini.*

## CAPVT II.

magnanimo Laurentio Medici,  
S. D.

**V**tus vbique solus, cui Deus adest. Prope est Dominus (inquit David) omnibus inuocantibus eum, inuocantibus eum in veritate. In veritate primus Deum solus inuocat vir sapiens simul atque sanctus. Talem fuisse diuum Augustinum non dubitamus. Quamobrè vnà cum augustino, mi Laurenti, præceptore pariter & patrono Deum suppliciter adoremus. Ita proculdubio precantibus ipse Deus aderit. Nam clementer adest etiam precaturis, efficitque vt eum in veritate precemur. Qua vero ratione in veritate adorantes Deum impetraturi simus, docet ipse Propheta, qui postquam inquit, prope est Dominus omnibus inuocantibus eum



in veritate, subiungit, voluntatem timen-  
tium se faciet & deprecationem eorum ex-  
audiet. Præterea, custodit Dominus om-  
nes diligentes se. Denique, laudationem  
Domini loquetur os meum. Quibus in  
verbis admonet, vt semper timeamus, a-  
memus, laudemus Deum, si modo peten-  
tes cupimus exaudiri. Iam vero quid potis-  
simum sit in oratione petendum, eisdem  
verbis similiter aperit. Cum enim tria hæc,  
timor, amor, laus, efficiant vt impetremus,  
merito tria eadem, dum adoramus, nobis  
postulanda videntur. Concedat videlicet  
nobis Deus vt eum timeamus rectè, ame-  
mus ardentè, rite laudemus. Summatim  
verò adorare docet & impetrare David,  
vbi ait, delectare in Domino, & dabit tibi  
petitiones cordis tui, sed iam orantem Au-  
relium audiamus. Sic enim cui regium nu-  
per templum condidisti, eidem ipse diui-  
num templum ædificabere. xii. Maij. m.  
cccc. xc. In Agro Caregio.

*Oratio quotidiana.*

MARSILIVS FICINVS

Hermolao Barbaro Amphioni Her-  
culi Apollini suo, S. D.

Salve humanissime & elegantissime Bar-  
bare, salve semper præcipua post Deum  
mea salus. Commendaſti nuper dum hinc  
abires orationibus apud Deum nostris  
vitam tuam. Commenda vicissim verbis  
apud ipsum Dei vicarium tuis vitam meã.  
Ego sanè mi Hermolae quod semel pro-  
misi tibi ter præsto quotidie. Terenim  
Psalmum illum, Exaltabo te Deus meus  
rex, quotidie iam diu cano Deo. Et post-  
quam admonuisti hunc concino semper  
tui memor. Doctores Hebræorum omnes  
extra controuersiam conuenerunt, qui-  
cumque mane, meridie, vespere, Deum  
hoc Psalmo laudauerit æternæ felicitatis  
hæredem fore. Tu verò quid erga vitam  
nostram vicissim pro humanitate tua sis a-  
cturus intelliges, quando libros de vita no-  
stros legeris, Apologiam præsertim libris  
additam, vbi cum Amphionem, Hercu-  
lem, Apollinem conuocatos audies, vbi-  
que Hermolaum intelliges aduocatum.  
xv. Maij. m. cccc. xc. Florentiæ.

*Pro libro de vita.*

MARSILIVS FICINVS

Antonio Calderino amico suo officio-  
sissimo, S. D.

Libros de Vita, dabis Hermolao Bar-  
baro nomine Valoris atque Marsilij,

cum his Epistolam, cæteris verò hæc tuo  
nomine monumenta dabis. Quicumque  
non perturbata mente, sed iudicio sano  
nostra legerit, plane perspiciet, quam syn-  
cero consilio, quam pia mente, quanta  
religionis veneratione conscripserim. præ-  
terea cognoscent literati omnes, quan-  
tum debeant fauere libris nostris literato-  
rum vitæ diligentissimè consulentibus.  
Vale etiam Reuerendissimo diui Marci  
Cardinali nostro Patrono frequentissime  
nos commenda; atque Patrocini nobis  
ab eo præstiti gratia, gratias ingentes age.  
xxvii. Maij. m. cccc. xc. Florentiæ.

MARSILIVS FICINVS

reuerendissimo in Christo Patri D.

Francisco Soderino, Episcopo Vo-  
laterrano se commendat.

Accepi superioribus diebus huma-  
nissimas abs te literas, quibus quan-  
tum in causis non solum meis, sed etiam  
amicorum meorum sis officiosus, plane  
cognoui, imò agnoui potius antea mihi  
cognitum. Quod igitur amicis nostris tam  
libenter patrocineris, gratias tibi magnas  
ago, sed multo maiores quod Patronum  
tuum reuerendissimum Cardinalem Ale-  
riensem præstititeris & mihi patronum. ac-  
cepi enim per literas antonii Calderini  
nostri antiquum hunc tuum Dominum, ac  
nuper meum, aduersus calumniatorem  
quendam strenuè nobis patrocinatum.  
Id equidem non meis vllis in eum meritis,  
sed cum tuis apud eum commendationi-  
bus, tum etiam pietati & clementiæ suæ  
acceptum refero. Tu verò posthac erit of-  
ficii vel amoris saltem, optime Soderine  
qua Patronum tantum ratione mihi con-  
ciliaſti, eadem perpetuò conseruare, &  
quas ego gratias vix agere possum, accu-  
mulatius agere, habere, referre, denique  
mihi significare, si qua in re gratificari in-  
signi huic pietate patri & Domino pos-  
sim.

*Gratiarum actio pro patrocinio exhibito  
nobis à Principe.*

MARSILIVS FICINVS

reuerendo in Christo Patri Domino

Marco Cardinali D. Marci,  
S. D.

Desideras magnum plotinum videre,  
venerande pater, quod mihi nuper  
antonius Calderinus noster officiose ad-  
modum significauit. Vises quidem Plo-  
tinum breui, vt spero, argumentis in

eum nostris mox absolutis. Sed ut interea quantum virum, aut heroa potius, sis visurus intelligas, audi precor quæ Porphyrius eius auditor in vita Magistri describenda recenset. Et profecto, inquit Plotinus, ipsa quoque natura ab initio maius aliquid præter cæteros possidebat, Ægyptius enim quidam sacerdos Romam perueniens perque amicum quendam Plotino subito notus, cum exoptaret suam Romæ sapientiam ostentare, suasit Plotino ut secum accederet familiarem sibi dæmonem (eo aduocante) protinus inspecturus. Cui facile Plotinus est obsequutus. Acta verò est in Isio dæmonis inuocatio. Solum namque hunc locum Romæ putum, ait Ægyptium inuenisse. Sed cum in aspectum proprium ipse dæmon accerseretur, præ dæmone Deus accessit, qui sanè non esset in genere dæmonum. Sic ergo repente Ægyptius exclamauit, Beatus es ô Plotine qui habeas pro dæmone Deum, neque ex inferiori genere sis ducem sortitus familiarem. Hæc Porphyrius. Sed quam opportunè nunc in historiam hanc incidimus? Nam quemadmodum Ægyptio Sacerdoti quondam dæmonem inuocanti pro dæmone Deus apparuisse fertur, ita mihi in Apologia nuper Herculem & Apollinem aduocanti, Pater eorū Iupiter ipse comparauisse videtur, quando Venetus Ecclesiæ cardo cœlitus à Diuo Marco missus, Patronus mihi tutissimus affuit. Hunc ex ipso Iouis ordine in terras demissum, testimonio nobis est fortuna, quidem eius ampla, amplior verò virtus. Nam & Astronomi Iouem fortunam primam nominauerunt. Et Iudæi eundem Sedech, id est iustitiam, communi lingua cognominant. Salue simul & vale feliciter salutaris nobis in terra Iupiter significate quidem ab Ioue celesti, à superiore verò create. Ego autem Mercurius fore cogar, si dignas officio tuo gratis sim acturus.

xxvi. Iunij m. cccc. xc. Florentiæ.

*Gratiarum actio pro Patrocinio exhibitio  
nobis à Principe.*

MARSILIVS FICINVS  
Rainaldo Vrsino Archiepiscopo Florentino, S. D.

Salue diu, salue semper Pastor bone. Salus ouium, Pastor bonus animam suam ponit pro ouibus suis, ut ea & pascat, & tueatur à lupis. Ita ut nuper agnum tuum Ficinum pie admodum ex voracibus luporum faucibus eruisti, & Saturno iam

nos graniter inuadenti, tu quasi Iupiter es oppositus. Varicinatus equidem videor, Antistites Iouiales, id est, magnanimos, & veridicos periclitanti mihi patrocinatorum, ubi de Planetis stellisque disputans, toties Iouem cæteris anteposui. Te verò Iouialem appellavi iamdiu etiam antequam tuam genesim contemplerer, & ubi contemplatus sum idem prorsus asseueraui, ex cancro videlicet regno Iouis ascendente, atque ex ipso Ioue in vndecima suo gaudio feliciter constituto, & inde Cancrum suum figura exagona contuente. Sed omnia tandem bona à summo Ioue cœlesti creatore Iouis proficisci putamus. Quoniam verò Vicarius eius summus Pontifex vestra opera nobis aspirare cepit, opto eum non solum aspirare nobis, verum etiam ipsum spirare diu. Itaque si eius genesim intelligerem & corporis habitudinem, & à quo morbo medici huic maxime timeant, confectionem, vel medicinam aliquam diligenter excogitarem diuturnæ vitæ atque prosperæ valetudini profuturam. Hanc saltem gratiam vobis referre cupio, referre verò parem ne Gratiarum quidem ritum dux Venus ipsa poterit

*Commendatio diligentie. Officia Mercurij.*

MARSILIVS FICINVS  
Antonio Calderino quondam, sed iam Caliderino.

Salue calidissime simul, & callidissime mi Caliderine. Quanto enim cordis calore nos amas, tanta res nostras calliditate gubernas. Misisti nuper quidem literas caloris & elegantie plenas, iamdiu vero officium præstitisti. En quid erit pretii? Hoc saltem inter Ioues, Apollines, Hercules, Amphiones. Tu mihi deinceps Mercurius esto. Quanquam & hic nobis extitisti iamdiu. Quod sanè literæ ad nostrum Cardinalem nostræ declarauerunt. Nuncias, interpretaris, persuades, concilias, expedis. Ergo Mercuri facunde noster, quas nunc ego balbus nequeo, heroicus Patronis nostris ipse gratias age. Persuade præterea, ne causam deserant, si perseuerauerint usque ad finem saluus ero.

*Declaratio amoris vnici.*

MARSILIVS FICINVS  
Martino Vranio Constantiensi, S. D.

Alter Marsili salue, dulcissime mi Martine, amice Vranie, reuera co-

litus mihi date, in quo apprime mihi ipse placeo, cui in primis salutem exopto. Accepi literas abs tēxxiij. Maii die missas. Acceperam etiam quas xxi. Martii die dederas. Nec tamen munuscula quæ misisse scribis, sed munera rege digna. Epistolam verò missam ab te cum tribus rhenensibus aureis die xxvi. Aprilis nondum habui. Dedi lampridem ad te literas ei qui dona tuo nomine mihi reddiderat. Do Georgio hodie quinterniones epistolarum septem, reliquos qui multi sunt, missurus alias, ac forte breui, si tabellarium nactus fuero. Plotino iam finis imminet. Aurum & argentum ab te Martine nolo, te tantum volo, tu mihi sufficis vnus.

*Purgatio traditionis in respondendo.*

Hermolaus Barbarus Venerus Marsilio Ficino Platonico, S. D.

**F**erussim ne dum Barbarus, qui nec muneri, nec literis tuis responderim, nisi eo ingenio effete cognoscerem, ut tūdemum amicos tuos diligeres, cum securius tecum agunt, nec solliciti sunt, ne aduersum te minus officiosi fuisse videantur. Ego verò lucubrationem tuam non don modo, sed beneficii quoque loco posui. Nihil mihi poterat infami coelo gratius accidere quam liber sanitatis, & studiorum præcepta continens. Quod autem rogas, ut quemadmodum tu me Deo, ita ego te Vicario eius commendem, scito id me nō solum fecisse, verum etiam ex animo diligenter, ac sæpius fecisse. Atque ut hoc verissimum esse intelligas, respondit per Laurentium stetit, quo minus huc te arcesferet. multa de te mitissimus Pontifex honorificentissime locutus, in sententia sua permanet videndi te apud se. Quod quidem si futurum aliquando est, opto, ut in legationis meæ tempus cadat, id & tibi gratum fore scio, mihi certe commodum, sed hæc satis, tibi & mihi vale, quibus meo nomine salutem isthic dici velim, quorum beneuolentiam inter prima mea bona collocem, qui me suis excellentibus officiis obæratum fecere, tu melius quam ipse nosti. Romæ Kalendis sextilibus. m. cccc. lxxxx.

*Petitio auxilij in publicis oneribus.*

MARSILIVS FICINVS  
Bernardo Diuitio Laurentij Medicis  
Amanuensi, S. D.

**T**anta mihi est erga magnanimum Laurentium reuerentia, ut vel Epi-

stola, quæ minus erubescere solet iam erubescat. Hæc igitur nunc Laurentium adiutura, interim rubore cohibita ad te saltem dilectissime mi Bernarde confugit. Sed venit nimium ad te quoque lenta, utpote quæ non festiua quidem, qualem forte desiderat, sed querula venit, & queri præterea nesciens, videlicet à Philosopho venien- querelis minime omnium assueto. Quid ergo? Narrabit saltem. Publica literatis stipendia ubique dari solent, ne dixerim, & in patria debent, amplissima certe Florentiæ dantur & peregrinis & ciuibus, ego verò literosus senex stipendium literarium ut excipiam nihil postulo, non enim tantum mihi arrogo, sed satis mihi factum fuerit, si non dederò. Recepti me nuper in secessum montis Vecchij, ne frequentes amicorum salutationes, præsens hoc meum cui totus nunc incumbo Dionysiacum opus interpellarent. At verò quod longè molestius est, non interpellant quidem me amici mei, quos iam desidero, sed interturbant quotidie exactores improbi & vexant, ut verius dixerim, extortores, post decimas illas mox studij Pisani nomine, Florentium hominem certe studiosissimum à diuino circa Dionysium studio separantes. Fortuna studiis inimica bonis, ne diuinum opus id producam, & multis me id genus iniuriis agitat, & crebris interea corporis languoribus afficit, sed præstat excrecentem hic querimoniam interciperi, sperare tandem, espirante Deo, prosperam valetudinem, leuamenque curarum statim, Laurentio succurrente. Vale feliciter optime mi Bernarde, & quam potes ipse fer opem.

*Purgatio circa salutationem non frequentatam.*

MARSILIVS FICINVS  
Pandulfo Pisaurenfi prætori Florentino, S. D.

**S**alutaturus equidem te, mi dilectissime, me frequenter eram, salutationes quidem priores interceptit magnus ille Plotinus, sequentes iterum Dionysius Areopagita maximus nunc interceptit. Interceptores tantos æquo animo tolerabimus, nam & si salutationes impediunt, salutes tamen mutuas animorum semper inter se loquentium è medio tollere, neque possunt, neque volunt ubicunque: versor inter literas, certè à literatissimo Pandulfo meo nusquam absun. Vale.

*Alludendo nomini declaratur diuitias esse  
bona animi.*

MARSILIVS FICINVS

Bernardo suo vulgari quidem lingua  
Doutio, Latina verò Diuitio,  
S. D.

**C**VM te mi Bernarde vulgus quidem  
Doutium vocitet, Latinitas verò Di-  
uitium, hinc forsan auspicabitur aliquis te  
non vulgaribus artibus fore diuitem, sed  
Latinis. Artes verò Latinæ sunt, quod te  
non latet, Latinæ literæ, liberalesque hu-  
manitatis artes, ac ipsa in primis humani-  
tas. Ego verò te harum diuitiarum genere  
non tam aliquando fore diuitem auguror,  
quam iam esse testificor. Verum ne forte  
quos Deus ipse coniunxit, ego diutius se-  
parem. Quod modo tibi, mi Bernarde,  
dicebam, Petro quoque fratri maiori tuo  
dictum puta. Harum ambo diuitiarum af-  
fluentia iamdiu magnanimo Laurentio  
accepti estis, longè omnium hac ratione  
ditissimo. Gloria & diuitiæ in domo eius,  
& iustitia eius manet in sæculum sæculi,  
xxv. Octobris. M. cccc. lxxxx. In Agro  
Caregio.

*De fato & fortuna & suo cuiusque demone.*

MARSILIVS FICINVS

Gregorio Scuto Alexandrino ingni  
medico, S. P. D.

**Q**VOD Plato in Timæo & Phædro &  
Symposio probat, amorem pertur-  
bationum omnium principium esse. Quod  
probat iterum in Phedone, dolorem sem-  
per voluptati succedere, ac sæpè vicissim,  
id equidem in dies magis magisque com-  
probo. Ac nuper in discessu, dilectissime  
mi Gregori, tuo proculdubio sum exper-  
tus. Inueneram tandem, ut fertur, homi-  
nem iuxta cor meum. Itaque quantum  
præsentiam huius amabam, tantum ab-  
sentia sum dolere compulsus. Atque &  
fermè vicissim quantum discessus hinc tuus  
dolore me affecit, tantum heri me tuæ li-  
teræ delectarunt. Te namque mihi reddi-  
dere præsentem, post hac nunquam, ut ar-  
bitror, discessurum. Eris igitur, singularis  
amice, in me saltem Florentiæ. Vbi, ut  
inquis ipse, aliter esse fata te nolunt, for-  
tuna quin etiam fatis consentiente.

Quæ quidem cum fato, id est, cum se-  
rie cœlestium causarum apud Platonicos,  
idcirco consentit, quoniam fortunæ no-  
stræ dux est ipse vniuscuiusque dæmon ad  
cœlestem harmoniam, ut Platonice lo-

quar, nascenti cuique destinatus. Qui &  
diuulsas apud nos inter se causas sagaci-  
sime pariter & potentissime colligens ad  
vnum conducit euentum, præter consi-  
lium sæpè nostrum, ideoque cognomento  
fortuitum. In eiusmodi fortunam, in hunc  
dæmonem Platonici eos potissimum effe-  
ctus referunt, quorum nullæ apud nos ma-  
nifestæ sunt causæ, imò & quibus euiden-  
tes causæ reluctantur. Si dæmon Gregori  
tuus ipse Cupido foret, Florentiæ profecto  
vitam ageres, vbi maxime cupiebas esse,  
vbi & ego alter tu te viuere summopere cu-  
piebam. Decreuit autem, ut auguror, se  
senis vitam ducere, vbi ob ascendentem  
Taurum regnat Venus. Neque tamen Cu-  
pido Venere natus te ducit, ut video, sed  
Mercurius, nam contra solitam barbariem  
medicorum Mercurialem retines elo-  
quentiam, Mercurialis scilicet dæmonis  
beneficio, alioquin à medico protinus fu-  
gituram. Eiusdem & nos officio, id est,  
meditationibus assiduis frequentibusque  
Epistolis semper erimus, fato dæmoni nus-  
quam repugnante, præsentis. xxvii. Oc-  
tobris. M. cccc. lxxxx. In agro Caregio.

*In successu operum, Deo gratias age, ami-  
cis congratulare.*

MARSILIVS FICINVS

Pierleone legitimo Philosopho,  
S. D.

**C**VM tandem Saturni die, quem sa-  
bath, id est, quietem Hebræi nomi-  
nant, laboribus in Plotinum meis finem  
imposuissem, nihil mihi prius venit in  
mentem quam primus ille in quo mentes  
solo tanquam ultimo conquiescunt. Hæc  
igitur, quam leges, brevis oratio longi o-  
peris finis mihi fuit. Gratias tibi agimus  
summæ Deus, illuminator mentium, au-  
thorque bonorum, quod nobis præter me-  
ritum ad absoluendum opus tantum tua gra-  
tia vires suppeditasti. Da precor clemen-  
tissime Deus veram lectori pio prosperita-  
tem, infunde præterea lumen, quo verà  
passim discernat à falsis, ne usquam vel me-  
ditando vel agendo à tua voluntate dissen-  
tiat. Reliquum erat, Pierleone mi pietate  
vir insignis, post orationem diuinam ami-  
cis congratulari. Primus autem post il-  
lud diuinitus petitus lumen, succurrit  
Leo magnus Apollinis sui lumine ple-  
nus, suos etiam in opus nostrum abunde  
radios effusus. Inprimis ergo tecum diu  
iam optatæ quietis, gratiosissime mi Pier-  
leone, congratulor. Deinde labores no-  
stros pro cōmuni, ut scis, utilitate susceptos,

Patrociniò tuo frequenter iam exhibito commendo quam plurimum. Denique quem tu apud Plotinum locum in sexta Enneade secundo eius libro habebas, audi, ita enim illic in argumento Laurentium nostrum alloquitur. Prosequitur quidem Plotinus deinceps entium genera Platonico more, interpretationem verò in his magnanime Laurenti breuissimam à Marfilio nunc accipies, audisti enim nonnunquam, & forte quandoque leges, familiarem tuum Pierleonem Mysteria eiusmodi diuino quodam, vt cætera solet, instinctu ractantem. xxi. Augusti. m.cccc.

LXXXI.

*Finis operis. Principium operis tibi esto de commentario in Philebum.*

## MARSILIVS FICINVS

reuerendo in Christo Patri & D. Francisco Soderino episcopo Volaterrano, S. D.

**S**cripsi hactenus tutissime mi Patrone, quid potissimum in causa clientuli pro tua humanitate, & beneficentia sis acturus. Requiris posthac, vt loles, rationem studiorum meorum studiosissime Soderine. Reddo igitur, vt Patrono debeo, rationem. Superioribus diebus legitimum illum Philosophum, & amicum nostrum Pierleonem fecimus certiorum, nos iam diuturnis laboribus in Plotinum nostris finem imposuisse, & hunc quidem sabbato quietis die. Quo quidem auspicio sperabamus in posterum à laboribus conuiescere, at mihi contigit, ac omnipotenti cœli fabro, ille enim hoc die ab omnibus operibus suis quieuisse fertur, ego autem instar cœli, quod quiescit nunquam, quod quietem suam sortitum est in motu, quod in ipso reuolutionis fine principium reuolutionis imminens instituit, opere tanto mox absoluto nouum iam opus aggredior, ac forsan omnino non nouum, quemadmodum & cœlum circuitum forte nouum agit nullum, sed semper repetit consuetum. Rediit enim mox in mentem absolucunda mihi superesse commentaria in Platonis Philebum de summo bono, quondam ad & dimidium vsque producta.

*Pro acceptis gratias age antequam noua petas.*

## MARSILIVS FICINVS

reuerendo in Christo Patri. D. Gentili Episcopo Aretino, S. D.

**S**alue semper, antistes sempiterna salute dignissime, Commendaturus tibi mox

necessarij causam, malui prius meo nomine gratias agere, quam alieno gratiam poscere. Inprimis igitur ingentes tibi gratias ago, quod in causa Montis Martiani potissimum tua, & sponte mihi cesseris & tempestiuè monueris. Admiror equidem non mediocriter, modestiam, humanitatem, clementiam tuam, quod nihil mihi debens adeò erga me amice te gesseris, vt reddideris ex amico mancipium tibi posthac omnia debiturum. Necessarij verò mei causam per tabellarium nunc exponam.

*De Adoratione.*

## MARSILIVS FICINVS

Bindacio Recasolano viro nobili & literato secum singulari charitate coniuncto, S. D.

**P**romisi iamdiu, dilectissime mi Bindaci, nonnihil de adorationis diuinæ virtute scribere. præstare verò promissa absque benefica illius, qui adorandus est, virtute non possum. Quamobrem, vt sacram, de adoratione diuina, disputatione feliciter auspicemur, aspira nobis precor alme Deus. Sic igitur decenter exorsi, sacro huic ædificio fundamentum iacimus diuinum illud porphyrii dictum. Inquisitio quidem diuinorum, purgat animum, imitatio verò facit Deum. Hæc ille. Hos igitur arbitramur tunc certe Deum quærere, quando Deum quoquomodo notum inprimis amantes, per omnia eius opera testimoniaque tanquam vestigia quædam diligenter inuestigamus. Vt verius veneremur inuentum, atque eiusmodi est perscrutatio illa, qua ab omnibus primum perturbationibus, deinde à nebulis animum purgare censetur. Imitatio verò, quæ animum facere Deum, id est, quoad fieri potest, diuinum, existimatur, est eiusmodi, vt separatus ipse provideas, placiturus Deo, qui providet omnibus separatus. potentiâ quidem diuinam vel sapientiam æmulari non possumus, semper infirmi, semperque ambigui, & vtrum vera consecuti simus, frequenter incerti. prouidentiam verò diuinam potius imitari licet. Si quid enim de Deo nobis est notum, quod & rationibus, & testimoniis est profecto, hoc est potissimum, Deum scilicet esse potestatem, & sapientiam quandam, ita regentem omnia, vt rerum gubernatarum conditionibus, & passionibus non sit admixta, sed penitus segregata. Vbi sane excelsam & segregatam esse, nihil impediatur, quo minus adsit singulis, atque provideat, sed po-



tius ad hoc ipsum conferre putetur. Vbi  
 rursum diligentissima omnium dispensa-  
 tio excellum nostræ habitum non pertur-  
 bet. Ut igitur pro viribus imiteris eum qui  
 in excelsis habitat, & humilia respicit in  
 cælo & in terra, studebis in primis ut ipse  
 à terrenis perturbationibus, ac vitiis segre-  
 gatus, quanta poteris charitate hominibus  
 tanquam fratribus ubique prosis atq; pro-  
 uideas. Hac ipsa providentia separata imi-  
 taturus Deum & ipsi potissimum placitu-  
 rus, qui & ipse omnibus providet, ab om-  
 nibus segregatus. Hæc est igitur imitatio  
 Dei, quæ animum quasi Deum putatur ef-  
 ficere. Hanc olim pro viribus tentavit So-  
 crates, ac post illum Apollonius Theaneus  
 Hanc vitæ magister Christus implevit.  
 Hanc omnes secuti sunt, qui tandem eius-  
 modi vitæ officiis miraculosa quædam o-  
 pera, quasi iam diuini perpetrauisse ferun-  
 tur. Horum duntaxat orationes, tanquam  
 diuinorum summus Deus exaudit, nam &  
 voluntas eorum, vnà cum diuina volunta-  
 te concurrat, & Deus animis sic affectis  
 frequenter, ut instrumentis vel subiectis  
 utitur ad miracula penetranda. Denique  
 cum ex institutione diuina materiæ quæ-  
 libet sub certis causis paratissime, subito  
 causis quasi coniuncte influxum quandam  
 suscipiant causarum, merito mentes per  
 imitationem Dei iam factæ diuinæ, & a-  
 more, votisque propius accedentes ad  
 Deum, affectum quandam mox diuinum  
 & ipsæ capiunt, & in corpus suum, resque  
 suas & proximos homines, præsertim si-  
 militer affectos, transferre putantur. Hæc  
 Auicenna & Algazel confirmare viden-  
 tur, ubi aiunt, eiusmodi animas suis sæpe  
 votis non solum corpora propria, sed etiã  
 elementa mundi, miraculose mouere. præ-  
 terea Damis & Philostratus, confirmante  
 Apollonio, narrant, sapientes quosdam  
 sanctosque viros apud Indos, qui appellan-  
 tur Oxidrachi, suas vrbes ab hostibus, non  
 manibus, sed oratione defendere. Deum  
 enim ab eis suppliciter obsecratum, hostes  
 tonitruis fulminibusque fugare. Quod au-  
 tem Deus sanctarum animarum oratio-  
 nes exaudit, Thomas Aquinas noster in-  
 de probat, quod cum omnem mouens quo-  
 dammodo ad suam moueat similitudinem,  
 atque ideo motus vouentium ad bonum  
 directus ab ipso bono dependeat ( quod  
 sanè nec frustra mouet ) nimirum ad op-  
 tatum finem quandoque perducit eos,  
 quos ipsum ad optandum mouet, & qua  
 facultate his impressa semel mouit, eadem  
 adiuvat ut prosequantur, eadem quoque  
 peragat, ut denique consequantur. Nam &

in naturæ motibus similem inclinationis  
 consecutionisque regulam facultatemque  
 constituit. Præterea quæ motori suo pro-  
 pinquiora sunt, efficacius inde mouentur.  
 Mouet autem primus motor omnia, cui  
 naturæ rationales propinquiores sunt ad-  
 modum quam corporeæ: cum igitur na-  
 turæ corporales inde & moueantur per  
 appetitum naturalem ad fines quæque  
 suos & consequantur, multo magis sub-  
 stantiæ rationales, quæ in votis ad bonum  
 à primo bono mouentur, bonum aliquã-  
 do consequuntur optatum, quatenus vi-  
 delicet inde mouentur. Agitantur autem  
 inde, quatenus & bene & ad verum bo-  
 num, desiderio precibusque procedunt.  
 Eatenus igitur exaudiuntur preces, & e-  
 uentus contingit optatus. Confirmantur  
 hæc per quandam Iâblihi diuini senten-  
 tiam, sicut Sol quidem solaribus, & Luna  
 lunaribus & concuum Lunæ leuibus pro-  
 prietatem, qua ad Solem, Lunam, con-  
 cauum mouerentur, impressit, sic instin-  
 ctum animis quo ad Deum orando con-  
 uerterentur ipse Deus infudit, & hunc qui-  
 dem minime vanum. Quandoquidem nec  
 ipsa natura dat aliquid mouetque frustra  
 videlicet recta diuinitus. Denique si ad a-  
 micum pertinet honestis amici desideriis  
 obsequi, mens certè diuina cui mentes ip-  
 sa similitudo partim naturalis partim ac-  
 quisita facit amicas, legitimis mentium  
 desideriis satisfacit, ad cuius bonitatem  
 prorsus immensam pertinet, bona latissi-  
 mē vsquequaque largiri, mentibus præser-  
 tim ad diuinum propriè bonum diuinitus  
 instigatis. Reliqua de Adoratione in ar-  
 gumento in Timæum iam tractauimus.  
 xx. Septembris m. cccc. lxxxx. Florentiæ.

*Proæmium in libros in adolescentia compositos,  
 sed collectos tandem atque, ad Lau-  
 rentium missos.*

MARSILIUS FICINVS  
 Laurentio Medici viro magnani-  
 mo, S. D.

Venerunt ad te iamdiu libri omnes,  
 Patrone charissime. Liberi inquam  
 mei quos in iuuentute vel ætate paulo ma-  
 turore peperit. Veniunt & ad te quotidie  
 quos in ipsa etiam senectute parturio. Qui  
 verò mihi quondam adolescenti nati sunt,  
 facti semel vagabundi, eadem adhuc for-  
 tuna, ne dixerim temeritate, pererrant, sed  
 hos etiam erroneos nuper reuocaui domū,  
 iussique protinus ad te confugere, ut & pa-  
 tronum eundem mei simul omnes agnos-

cerent, ita demum victuri felicius. Et ego similiter apud illum, quem in omni eius ætate semper amaui totum, totus quoque forem adolescens & vir senex. Accipe libenter tuos optime Laurenti. Lege feliciter, viue felix, certa patriæ nostræ felicitas, Marsilium Ficinum totum tuum dilige totum. xxvii. Octobris. m. cccc. lxxxx. In agro Caregio.

*Proæmium Marsilij Ficini in librum, qui inscribitur homo, ad magnanimum Laurentium Medicum.*

**H**ominem Peripatetici ex anima corporeque componunt. Hominis animam Christiani tradunt, mox genito corpore procreari. Ecce homo noster ad te venit humanissime Laurenti ex anima & corpore constitutus. Primo quidem corpus aspicias, vbi tanquam medici de curando corpore disputamus, deinde introspecies animam, vbi quasi theologi animū à cura corporis ad Deum conuertimus contemplandum. Ibi sanè quinque libellis velut gradibus ad diuinam cōtemplationem ascendimus scala Platonica. Sextus subinde liber ad Deum iam factum hominem, id est ad Christum, vnā cum Magis, indicestella, ducit. In septimo tandem Apostolus Paulus ad tertium coelum raptus, secum rapit & mentem, penes Deum die septimo quieturam xxx. Octobris. m. cccc. lxxxx. Florentiæ.

*Per quas cœli plagas anima descendunt atque ascendunt.*

MARSILIVS FICINVS  
Laurentio Medici, S. D.

**N**Vdius tertius quibus causis animæ laberentur in corpora, diligenter tanquam Platonici, vt cætera soles, inuestigasti. Qua verò potissimum cœli plaga descenderent, vt arbitror, angustia temporis omisisti, si igitur & hoc desideras accipe paucis. Per Cancrum Lunæ domicilium, animas Theologi veteres ad inferiora transire dixerunt. Cum enim generationis affectu veniant in regionem generationi subiectam, merito per plagam Lunæ generationi fauentis viam agere putauere. Quamobrem prisca Cancrum quidem mortalium portam appellauerunt, Capricornum verò huic oppositum Deorum portam nominauere, per hunc enim purgatos tandem animos reuolare in cœlestem patriam arbitrantur, quoniā que-

madmodum stimulo generandi descendunt, sic ascendunt vicissim studio cōtemplandi, diuinæ verò cōtemplationis auctorem, aut saltem significatorem esse Saturnum, dominum Capricorni Astrologi omnes cum Platonici consenserunt. Hæc igitur tibi porta Deorum, insignis pietate vir cōtemplatorque sublimis Laurenti, patet, tibi, inquam, auspiciis natō felicibus aperta diuinitus, Capricornum circuli tropici caput. Astronomi idcirco putant, quoniam & signum hoc tangit ipse circulus, & Sol cœli Dominus Capricornum mox attingens, petit ascensum. Sed per opportunè in huius circuli mentionem inter differendum nunc incidisse videmur. Speciosissimam enim intersecat viam in Capricorno, quam Astronomi cœlestem viam nominauere, Græcè quidem Galaxiam, Latine verò lacteam nuncupatam. Hanc exiguæ quidem sed quamplurimæ frequentesque stellæ quasi domicilia parua conficiunt animis, vt tradunt, dedicata beatis. Felicis autem huius viæ humiliumque domorum, sed cœlestium caput asserunt Capricornum. Similem nunc aureæ Laurenti viam sub seculo iam prope Saturnio construis. Viam certe pietatis ædibus charitatisque domiciliis consecratam. Quæ quidem te feliciter exoriente, Capricorno natum, denique ducat ad Capricornum cœlestis viæ caput portamque Deorum.

*Amatoris cura secura.*

MARSILIVS FICINVS  
Paulantonio Soderino eleganti viro, S. D.

**C**VM nocte superiore Laurentium medicem audiuissemus Apollinis instar in tranquillo Mammolæ, quasi Musarum choro diuina mysteria de amore canentem, ego & alter quidam ex eodem cœtu familiaris ad multam noctem differuimus, vtrum amores Mammola & amatores admittat, nec ne? Ille quidem hac ratione negabat. Quoniam cœtus eiusmodi securitatem inprimis exoptans curas omnes procul expellit, amor autem cura quædā est omnium profecto grauissima, & amator assidue intollerabili miser hoc modo vexatur. Ego verò non facile huic rationi concedens hunc in modum mox obieci. Quemadmodum lumen ingens minoræ lumina prorsus extinguit, sic amor cura omnium ardentissima, ceteras omnes longè propulsat. Cum igitur mortales alii curis innumeris opprimantur, quas quidem

omnes amator, amore iubente, posuerit, nemo securior viuit amante. Nullus igitur in iucundum Mammolæ contubernium venit acceptior. Tum ille, imò verò curatum, inquit, plenus ille venit, quisquis amatoriam cura curarum omnium æcerrima feruet. Sed ego, non respuit, inquam, Mammola hanc ob causam amatorem. Quoniam si in amatam personam iam pridem translatus est amator & quo se transtulit simul traduxit & curas, amator Mammolam iam securus ingreditur. Denique si forte conuiceris, hunc, quamdiu amat, securum esse non posse. Estò sanè, cures aliquid & quidem quam maxime, si vis, amator. At non humana iam curat, ut arbitror, sed diuina. Diuina verò curare non prohibet Mammola, sed humana. Quantum enim mortalium studium perturbatum est, tantum vicissim diuinorum cultus est ubique tranquillus: quod autem animus amore saucius non humanum aliquid tandem appetat, imò diuinum, hinc nostri conicere Platonici solent, quia nullo prorsus corporis formosi sensu vel visu, sedatur amoris incendium. Quasi aliud quiddam præter corpoream formam, circa formam eiusmodi superno fulgens quodammodo nobis occultum, clam affectet. Et idcirco quid potissimum cupiat, quidue patiat, ignoret. Hæc nos & similia ultro citroque confabulati sumus. Placuit tandem utrisque, mihi præsertim te, Paulantoni dulcissime, tanquam & æquum virum & amatoris iuris consultum, hac in causa iudicem adhibere. Ego igitur, ut de me loquar, spero te non tam iudicem in hac controuersia mihi fore quam Patronum, scio enim quantum diuino elegantis amoris genio soleas indulgere, & quam vehementer Marsilium ames tuum, iamdiu te ardentem amantem.

*Fata viam inuenient, aderitque  
vocatus Apollo.*

MARSILIVS FICINVS  
Petro Philippo Pandolfino Florentini  
senatus Oratori clarissimo,  
S. D.

DEScripsi tibi singulos deinceps anni futuri dies, quos his natalis magni lucubrationibus obseruaui. Felices equidem tibi dies ominor, infelices abominor, illos item precor, hos verò deprecor, Iuans ille Pater, ac pontificum significator, Iupiter decimo septimo, Septembris præteriti die in tuis Geminis pedem retulit, &

ad Taurum usque regressus decimo tandè huius Ianuarij die gressum dirigit, arque deinceps tramite recto gradiens, tuos iterum Geminos feliciter in fine Februarij repetet, & ad xx. Octobris diem feliciter ita progredietur ad Cancrum. Hoc itaque tempore quo Iupiter rectus incedit, præcipue verò per Geminos, fata viam inuenient, aderitque vocatus Apollo. Tunc igitur aureum illum arboris arduæ ramum, Carpe manu, namque volens, facilisque sequetur, cum te fata vocant. Antea non viribus ullis Vincere, neque duro licuit conuellere ferro. Sed vides ne Maronem vnà cum fato actionis quoque nostræ arbitrium coniunxisse? ubi ait, Carpe manu. Religionem quoque dominari fato, quando dicit, Aderit vocatus Apollo. Idè Ptolemæus ipse confirmat, dicens, sapiens adiuuabit opus astrorum, quemadmodum agricola terræ naturam. Vale in cælo quidem fortunatus, in rectore verò cæli beatus. xxvi. Decembris. m.cccc. xc. Florentiæ.

*Laurentius Platonis libros formis  
exprimere iussit.*

MARSILIVS FICINVS  
Braccio Martella, S. D.

ASTRONOMI Iouem tradunt vitalem vim fortui inspiraturum, per Mercurium potissimum ad humanam vitam spiritum conformare. poëtæ quoque canunt, Iouem animas ab inferis reducturum, mandare Mercurio, ut Caduceo tangat, & animas suscitandas. Quamobrem si Laurentius Medices in suscitando Platone nobis est pro Ioue, nutu qui concutit orbem, satis fuerit hunc semel oculis annuisse, quibus sæpe rem nostram publicamque serenat. Tibi strenue mi Bracci brachium caduceum erit, quo tanquam Mercurius alter attingas, ubi noster ille Iupiter annuit, ut Plato tandem non semi viuus surrexerit, sed iam viuus Plato mi Bracci noster, tantum Eurydicen pulchram, quantum Orpheus adamauit, Eurydicen, inquam, iudicii scilicet amplitudinem. Sed Orpheus quidem Eurydicen tenisurus descendit ad inferos, Plato verò visurus eandem propediem, ut speramus, ascendet ad superos, felicius proculdubio victurus Florentiæ quam Athenis. Quam enim illic optauit quondam visere Eurydicen, nunc primum Florentiæ viset, habebitque tota quod mente petebat. Amplum certè iudicium ibi tantum esse nostri, ubi contemplatio cum publica gubernatione conspirat, ubi

videlicet gubernator ipse philosophatur. Augusti quidem animi est, alterum sine altero sequi, infortunati verò, alterutrum absque altero consequi, felicissimi denique pariter utrumque complecti. Vixit igitur sub ampla Lauri Medicis umbra nobiscum vnà cum Platone felix. Dic xx. Ianuarij. M. cccc. xc.

*Concordia Iouis & Solis, Concordia collegarum.*

### MARSILIVS FICINVS

Angelo Nicolino, & Philippo Valori,  
præclaris in Florentina Republica ciuibus.

**A**stronomorum princeps Ptolomæus ait, in Harmonia coelestium Iouem cum Sole maxime omnium consonare. Consonantia verò hæc ad homines felicissime personat, quoties coelestes illi conspectu trigono se inuicem contuentur. In hunc heri tandem conspectum conspirauerunt. Conspirantes verò confestim vos egregio magistratu decorauere, simulque declarauerunt, & alterum quidem vestrum Iouialem esse, alterum vero Solarem. Et ambos in hoc magistratu, quem admodum in cælo Sol & Iupiter concordantes sunt, ita proculdubio fore concordantes. Ego igitur vobis congratulor, non tam quia tanto munere exornati estis, quam quoniam felicissimo sydere & auspiciis fortunatissimis in dignitate feliciter constituti, eodem fermè tempore quo stella felix quondam Magos perduxit ad Christum xx. Ianuarij. M. cccc. xc. In agro Caregio.

*Gratiarum actio pro immenso beneficio.*

### MARSILIVS FICINVS

Laurentio Medici viro magnanimo, S. D.

**D**vo nuper iam quasi diuinus in amico meo fecisti miracula, & in vitam restituisti, & hunc nobis reddidisti mutuum. Nam cum primum te inspirante reuixit, tam grandem mox pro immenso beneficio gratiarum actionem mente concepit, ut parere hanc ore non possit. Laus igitur, quod inquit Dauid, esto silentium xx. Ianuarij. M. cccc. xc. Florentiz.

*Allegoria quomodo Mercurius coelestium minimus, significat sapientiam virtutum maximam.*

### MARSILIVS FICINVS

Bindacio Recasolano viro nobili & literato, S. D.

**Q**uæris generose Bindaci subtiliter admodum, ut cætera soles, cur Deus per Mercurium coelestium minimum, sapientiam, virtutum maximam, significari voluerit. Vt igitur quæstioni breui, breuibus quoque respondeam, admonuit hac in re nos Deus, ut meminerimus minimam esse in hominibus sapientiam. Quippe cum nobis à stellarum minima promittatur. Docuit præterea sapientiam nec in magnitudine corporis constitutam esse, nec ab ipsa mole materiæ proficisci. Nonnunquam homines corpore, audacia, fortuna minimi, sunt sapientia maximi. Denique Sol quidem Deum ipsum præfert, Mercurius sapientem, Mercurius igitur nunquam à Sole discedens, significat animum duntaxat sapientem fore, qui nunquam discedit à Deo. Sol quinetiam principes significare putatur. cum igitur Sol nullam stellarum propinquiorem habeat in cælo quàm Mercurium, admonet interea principes debere nullos habere familiaritate coniunctiores quam sapientes, quod autem Mercurius idem, sapientiam, eloquentiamque promittit, literarum studiosos, lubet eloquentiæ studium cum studio sapientiæ copulare. Omne tulit punctum, qui miscuit vile dulci. xiv. Februarij. M. cccc. xc.

*Pallas, Iuno, Venus, vita contemplativa, actiua, voluptuosa.*

### MARSILIVS FICINVS

Laurentio Medici viro magnanimo, S. D.

**T**res esse vitas, nemo ratione viuens dubitat, contemplatiuam, actiuam, voluptuosam. Quoniam videlicet tres ad felicitatem vias homines elegerunt, sapientiam, potentiam, voluptatem. Nos autem sapientiæ nomine quodlibet liberalium artium studium, religiosumque otium intelligimus. Sub appellatione potentiæ auctoritatem in gubernatione ciuili pariter atque militari, diuitiarumque affluentiam, & splendorem gloriæ, negotiosamque virtutem comprehendere putamus. Sub voluptatis denique cognomento quinque sensuum oblectamenta & laborum curarumque declinationem, contineri non dubi-

tamus. Primum igitur poetæ Mineruam, secundam verò lunonem, tertiam denique Venerem nominauerunt. Tres olim apud Paridem de pomo aureo, id est, de palma & victoria certauerunt. Consultante videlicet Paride secum, quam è tribus potissimam ad felicitatem viam eligeret, elegit denique voluptatem, cum verò sapientiam spreuerit, & potentiam, merito imprudenter felicitatem sperans, incidit in miseriam, duæ tantum occurriffe traduntur Herculi, Venus scilicet, atque Iuno. Hercules neglecta Venere, animosam sub Iunone virtutem est securus, neque tamen inter mortales propterea felix, perpetuo certaminum labore vexatus, sed hunc tandem exæquat victoria cælo, huic denique superata tellus sydera donat. Duæ quoque Philebo cuidam obuiæ, voluptas, atque sapientia, de victoria contenderunt, atque eo iudice, Venus Palladem superauisse visa est; sed paulo post Socrate rectius decernente, Minerva victoriam reportauit. Spreta verò Venus simul atque Iuno Socratem tandem sub falsis iudicibus agitarum, morte damnarunt. Laurentius denique noster Apollinis oraculo doctus, nullum posthabuit superiorem, Tres enim vidit, tres quoque pro meritis adorauit. Quamobrem & à Pallade sapientiam, & à Iunone potentiam, & à Venere gratias poësimque, & Musicam reportauit. xv. Februarii m. cccc. xc.

*Congratulatio in noua dignitate, cum auspiciis astronomicis.*

MARSILIVS FICINVS  
reuerendo in Christo Patri, D. Her-  
molao Barbaro Patriarchæ A-  
quileiæ. S. D.

**I**ouem Poetæ sæpe Mercurium, nonnunquam Aquilam mittere consueuisse ferunt. Te vero nascente misit utrumque, ipse enim ad orientalem plagam in arce Zodiaci sedens, Aquilam quidem sydeream iussit per cæli verticem sub capricorno volare, mercurium verò figura quadam exagona subire Dioscuros. Chyronem præterea suum nonam cæli plagam colere sacris & sapientiæ consecratam. Iupiter igitur, & communis & tuæ religionis author, vel saltem significator, cum primum suos reuisit Diocletus, vnde Mercurium quondam demisit ab alto, te sacrum antistitem declarauit, Aquilæque præfecit, Aquiletiæ, scilicet ædem tuæ nuper curæ prouidentięque commendans. Sed

missis in præsentia stellis Astrorumque portentis, opto equidem hanc tibi dignitatem, mi Barbare, felicem fore, idque Deum precor cœlestium conditorem, congratulor etiam dignitati. Quæ profecto tantum abs te honestabitur, quantum plerique solent à dignitatibus honestari. Gaudeo denique mihi seculoque nostro, quod doctrinam cum integritate vitæ iam dudum coniunctam vidimus, & iam forte potentiam cum sapientia, quod Plato noster in primis optabat, videbimus conspirantem. Tantum verò bonum, & si à cælo significatum, tamen ab ipso rectore cæli factum existimamus. Vale felix, & Marsilium tuum habeas commendatum. XII. Martii. m. cccc. xci. Florentiæ.

*Heroicorum virorum laboriosa quidem vita est, sed gloriosa.*

MARSILIVS FICINVS  
Pierleone Platonico, S. D.

**H**erculem apud poetas heroem quendam præcipue solarem esse, hinc forsan coniectare licet, quod & nomen Herculis, gloriæ splendorem significat, ad Solem maxime pertinentem, & Hercules ipse monstra duodecim superauit, sicut & sol animalia xii. Zodiaci, quasi superans cursu perpetuo peragit. Heroem ergo solarem duri celebrant labores, huic tandem superata tellus sydera donat. Phœbeum quoque Leonem nostrum Apollineus Dæmon palam celebraturus, non singulari certamine, id est, duello tentare constituit, sed in hostium turbam ubique producere, ut hinc excelsa tandem virtus victoriam referat ampliorem. His igitur auspiciis magnanime Pierleone in publicis passim gymnasiis feliciter certauisti. Sic denique vicit Leo de tribu Iuda. Nam itaque primum scribendum nobis mutuo fuit, quando prorsus congratulandum. Hactenus autem frequentes occupationes tuæ non tibi solum, sed mihi quoque diuturni silentii causam præbuerunt. Quod autem rogas, quid in præsentia moliar: Dionysii Areopagitæ scripta relego, hæc aggressus æstate superiore. Cum primum commentariis Plotino, finem imposuisssem, Dionysius mihi solus supererat declarandus, Platoniorum proculdubio summus. Hunc igitur eodem ordine quo Platonem atque Plotinum & transferre, & summam interpretari conamur, platonica videlicet ratione. Librum eius de mystica Theologia iam absolnimus. Nomina nunc diuina prosequamur.



*Præmium in Apologos de voluptate.*

Marfilius Ficinus Martino Vranio amico  
suo cœlitus dato, S. D.

**N**onus Epistolarum nostrarum liber à Martino sumpsit exordium, decimus autem finem iam accipit in Martino. Genius enim Martinianus, Marfilianusq; penitus idem, numerum sibi vendicat novenarium, amoris autem nostri perfectio singularis denarium postulat, perfectionem videlicet numerorum. Cum vero amor nihil desideret aliud quam voluptatem, merito decimus hic liber consecratus amoris, finem in voluptate facit; Voluptate, inquam, Vrania, id est, cœlesti, quandoquidem hæc Vranio dedicatur. Leges igitur alter ego, hic iā in calce decimi nonnullos de voluptate apologos, dedicatos tibi quidem hodie, iamdiu autem à nobis excogitados, dum Philebum Platicum tractantem commentaremur, commentarium Laurentio Medici destinatum, tibi verò cum primum occasio se obtulerit exscribendum, nunc enim librarij nostri in exscribendis ad te Epistolis occupantur.

*A P O L O G V S.*

*Malus demon per verisimile ad falsum, per voluptatem trahit ad malum.*

Deus verò per hæc ad verum & bonum.

**D**eus veritas est & bonitas, ideoque omnia ex veritate & bonitate composuit. Res enim quælibet quantum in integra sui puritate id quod à Deo factum est permanet, vera denominatur. Quatenus verò alijs conducit ad aliquid bona alijs nuncupatur. Item quatenus intra se aliud sui conducit ad aliud bona sibi. Impressit autem Deus veritatem rerum verisimili quasi nota, bonitatem verò voluptate perfudit quasi esca, ut occulta cuiusque veritas per imaginem verisimilem indagaretur, ac demum per omnium veritatem Dei veritas. Rursus, ut per voluptariam escam singula ad bonum per se latens, allicerentur, perque bona omnia ad Dei bonum. Cum verò dæmon invidus Deum, partim verisimili nota, partim boni simili esca, ad se trahere cuncta contueretur, machinatus est tanquam divinitatis æmulus, quæ potissimum ratione ipse similiter ad se omnia traheret. Itaque notam verisimilem & boni similem escam ad divinæ illius expressit similitudinem adhibuitque tum illam falso, tum hanc malo, quo fit, ut per

illam mentes ad falsum, per hanc affectus trahat ad malum, ac denique ad se ipsum. Ipse enim cum à divina veritate bonitateque quasi rebellis & alienissimus sit, falsitas quædam est atque malitia. Hinc Plato malorum escam in Timæo nuncupat voluptatem.

*Apologus de bonis atque malis.*

**E**Rant quondam duo quædam sola, bonum, scilicet atque malum. Quamdiu verò bonum generabat, nihil malum ad generandum haud irritabatur præ superbia, putans se solum posse bono resistere. Incæpit tandem bonum generare bona, tunc malum extimescens sibi à bono atque bonis, concupiuit contra hæc generare mala. Cum vero ob sterilitatem non posset desiendo, sortem suam inuocavit fortunam, qua fauente, cæpit generare mala, atque contrario modo quam bonum bona. Videns enim bona referre bonum ad ipsumque conferre, habere virtutem, serva id in quo sunt salure sua concordare inter se, habere à tergo voluptatem, contra hæc obiecit opposita, scilicet degenerationem, impedimentum, numerosam turbam, impatientiam eius, scilicet quod sustinet bonum item ineptitudinem, ad varia simul bona. Denique voluptatem posuit in fronte mali, reprehendens unā cum Momo bonum ipsum, quod escam boni occulisset. A tergo bonis eam subdens, quam forte rectius proposuisset. At verò bonum ipsum ne regnum suum à malo dissolueretur, constituit primo quidem mala pati, contraria duo, scilicet malum alterum, atque bonum, cum bonum bono contrarium esse nequeat, deinde ut malum non modo alterum destruat malum, sed etiam seipsum. Siue enim per defectum fiat, siue per excessum, destruit tandem fundamentum quo sustinetur, à quo seorsum stare nequit. Hinc fit ut malum virtute infinitum esse non valeat, bonum vero valeat. Denique constituit ut mala & si voluptatis escam præferunt, brevi tamen in dolorem decidant diuturnum. Hoc significavit Pythagoras dicens, ab animali caudam habente nigrā abstinere, id est, à vitiis.

*Apologus. De voluptate que vicit ambitiosos, victa est à Pallade.*

**V**oluptates quondam cum audirent se à ambitiosis concionatoribus passim vituperari, in unum pro sua defensione conspirantes, Patronam causæ impudentiam

dentiam elegerunt, his verbis. Vide impudentia, quam ingrati hi omnes erga nos sint? Quippe cum in nobis tota illorum sita sit felicitas, attamen audeant palam nos improbare. Tunc impudentia. Ignauiam vestram, inquit, admiror, nempe cum illos illorumque ædes possideatis, non audetis saltem è fenestris portisque vestros interdum vultus populo demonstrare, quo intelligant omnes in deliciis vos apud illos haberi, atque idcirco ab eis vituperari, ne quis vos inde surripiat. Posthæc voluptates impudentiæ fretæ consilio atque insuper ope, vultus per fenestras aperuere suos. Hinc factum est, ut ambitiosi illarum vituperatores omnem apud populum fidem autoritatemque amitterent, & qui voluptatem vituperauerant, ab ipsa vicissim ubique vituperarentur. Postquam verò vanos falsosque vicere hostes, reliquum erat, ut aduersus veros hostes legitimosque Philosophos se defenderent. Quoniam verò voluptati minervam anteponunt, iudicium, aduocata nuper temeritate, in Iouem est translatum. Cum igitur peruentum esset ad Ionem, temeritas in voluptatum causa declamatrix, ius ait esse minervam in iudicium accersiri, quam supra quam fas est sectatores eius voluptati omnium dominæ anteponant. Pallas acersita comparuit. Repente obiicit ita temeritas. Nec tua, ô Iupiter, Pallas ex ore philosophorum voluptatem nihili pendens, se tuam esse filiam gloriatur. At ego respondeo, voluptatem ipsam sub Veneris nomine ex te natam, voluptatis verò filiam sub sapientiæ nomine esse Minervam, quam voluptatis cuiusdam gratia Philosophi cuncti sectantur. Quid plura? Ex te nata Venus est, quod si ex tuo prodiisse capite se iactet Pallas, afferemus, & ipsam abs te cum voluptate progenitam. Adhæc Pallas. At ego te ô voluptas affirmo ex me ortam, tum penes Iouem sapientiæ beneficio seipso gaudentem, tum apud homines ex me quoque variorum inuentrice oblectamentorum, imò verò ex mea apud philosophantes imagine. Hi enim imagine quadam mei splendoris delectantur, atque rapiuntur. Tunc temeritas, Dialecticas, ait, mittamus argutias. Voluptas utpote simplex & innocens, eiusmodi se non munit aculeis. Circumspice Iupiter quam amplum sit voluptatis imperium, en Venus, en Cupido huius stipulatores, huius & pedissequæ Gratiæ, huius & hortorum Deus ipse minister. Huius in popina Ceres, atque Bacchus in pemu. Huius Ambrosia nectarque cœlestes cuncti vescuntur. Quid memorem Martem Deorum ferocissimum? quid te ipsum Iupi-

ter? quid cæteros Veneris passim illecebris irretitos? Et quod cæteri violentia tandem vix assequuntur, vixque retinent, vnà hæc vno quodam nutu feliciter implet, nullum trahens, omnes volentes ducens, retinensque libentes. Neque solum quæ in terris viuunt sed quæ in cœlo & quæ in cœlum ducunt, ipsa ducit. Neque viuentia solum, sed etiam non viuentia rapit ad sua quæque voluptas. Cæterum ne Pallas vel Diana, vel Vesta suam iactent sterilitatem, imperiumque voluptatis effugiant, Voluptas, ô Iupiter, ipsa, & Palladem iubet arcubus & venatione Dianam & Vestam laribus delectari. Adhæc indignata Pallas, O Iupiter, mox videbis quam fortis sit voluptas hæc quæ tam insolenter omnium gloriatur imperio. Accerse huc pauorem non Deorum tantum, sed omnium abiectissimum. Exclamauit Iupiter, Heus paor! Confestim ad ipsam pauoris aduocati nomen, voluptates omnes trepidæ vnà cum temeritate fugam arripuerunt. Tunc omnes risere cœlicolæ fugamque tam vilem ridiculo damnare iudicio. Denique Pallas Deorum sententiam sic obsignauit. Quidnam pauore vilius? Hic enim ex eo quod non est creatur, quando ex absentis mali fit imagine. Hic rursus ex eo quod non est necatur, quando ex absentis boni imagine perditur, pauore verò tam vili vilior est voluptas. Hæc enim non ab ipso solum, sed ab eius umbra fugatur, quando non solum pauens, sed cogitans pauorem subito fugit, imò, ut verius loquar, interit, atque ut maiori cum ignominia pereat, non in simile quicquam amicumue transformatur, sed in hostem, & id quidem subito, dum in vita conuertitur in dolorem.

*De voluptate, quod non sit cum ipsa congregiendum, neque in terris speranda.*

*Apologus.*

Cum cognosceret & Iupiter animas ad cœlum non redire, quia voluptate in terris detinentur, misit Martem atque Vulcanum ceu fortissimos, & armatos ad Voluptatem interimendam, sed ij. in primo congressu, utpote iuuenes voluptatis illecebris deliniti, arma deposuere. Misit iterum Palladem armatam & sapientem, putans illos ob temeritatem succubuisse. Ad hanc ergo Voluptas ait, Nonne te pudet ô Pallas, deam vestitam, armatam certare mecum, humana, inermi, nuda. Illa respondit, Sic placet tecum certare, quo te superem. Adhæc illa, cum neque gloriæ, neque vtilitatis in certando rationem ha-

beas, neutrum enim victa me consequeris, constat re ipsa dumtaxat victoriæ voluptate deuictam, certare nulla gloriæ vel utilitatibus habita ratione. Tum Pallas verbis conuicta, prorumpit in verbera, telumque sæpius in eam direxit. At illa cuius natura cedens est, atque subintrans & fugacissima, ictus protinus declinabat. Ergo Pallas latum clypeum in caput eius protendit, at illa clypeum penetrauit, adeo enim ad penetrandum est potens ut corpus animamque penetret. Posthæc aduocauit Pallas dolorem, quo hoste contrario perderet voluptatem. At quoniam contraria se mutuo non accipiunt, dolor non in Voluptatis faciem irruerat, sed iuxta tendebat in latus. Tum Pallas vnà cum sociò Vulcano, acceptis follibus extenuare & resolvere voluptatem moliebantur. Neque potuit extenuare eam, cum tenuissima sit, neque resolvere in vterius aliquid, cum sit vltimum. Cum enim quæritur quare quis facit hoc? non respondetur, propter illud. Rursusque quæritur, quare illud? ac respondetur, quia placet. Si quæritur iterum, quare placet, non aliter respondebitur, quam quia placeat. Palladem ergo pallidam præ dolore, quia Voluptatem non persuasit, ad Iouem redisse ferunt. Tunc ea, utpote à fluxu proprio, properatior aggressa, Iouem ait, O fili! nunc agnosce tibi opus esse senis Saturni consilio, cui hætenus abstulisti regnum, & in palatii penetralibus occlusisti. Actiua videlicet vita homines à contemplatiua plurimum distrahente. Referatis ergo ianuis conuocatur Saturnus ad consultandum. Tū ille; Duo sunt ait principia motus. Voluptas quidem prosequendi; dolor autem fugiendi, indolentia verò neutrum facit. Non ergo voluptas interimenda, alioquin animæ cælum non petent, voluptate etiam hic extincta. Sed Voluptas huc trahenda, dolor apud homines relinquendus, ut inde huc cuncti confugiant. Placuit senis consilium, mittuntur dæmones Martis Vulcanique satellites ad Voluptatem corripendam. Timebatur enim ne dii illius pulchritudini indulgerent, & cederent. Constabat autem dæmones nullam rationem pulchritudinis habituros. At dæmones nunquam voluptatem tenere manibus poterunt, mollitie lubrica anguillas mirabiliter superantem. Eius enim mollitiem confirmat assiduus mollium dulciumque usus & habitatio. Voluptas denique & deos & dæmones superauit, ut nemo audeat cum illa congregi. Fugienda enim est porius quam innadenda. Verum ne diutius in diuina nomina delinquamus, fateamur Mi-

neruam in terra, & deos in terra alios, id est, humanam sapientiam, & potentiam, plurimum voluptate deuinci, sed eam à sapientia diuina superari. Nam Saturnus iterum vnà cum Minerva deliberauerunt, ut tentandum esset voluptatem rapere non per violentiam illi oppositam, imò per gratiam eius amicam. miserunt ergo mercurium, Apollinem, Musas, Gratias, ad Voluptatem sursum alliciendam, Vercurius ad eam primus orationem habens, dissuasit Voluptati in terris moras trahere inter hostes suos, timorem, dolorem, iram, odium, inuidiam, laborem, & pauperiem, atque morbum. Phoebus quoque eam cythara delinuit, Musæ cantilenis, & modulis, Gratiæ saltibus atque choris. His enim pellecta Voluptas inferuit se canentibus Musis, manibusque porrectis implicuit se Gratiis blande ludentibus. Itaque numinibus his canendo atque ludendo cælum repetentibus comitata Voluptas cælo inuecta est. Terra à Voluptate deserta est. Hinc ergo illuc abeundum, ita tamen, ut abeundo te retro ne veritas, ne Orphei more, perdas præmium. Sed quoniam tempore voluptas aufugit in cælum? Quo & Astrea, originalis scilicet iustitia Adam peccante. Sed ne mortales orbati voluptate inter tot aduersa se afficerent & perderent, Iupiter miseriæ nostræ misertus, dum abstulit Voluptatem, spem nobis multiplicauit. Sed fallit spes voluptatis hic consequendæ, id est, ex rebus mortalibus reportandæ. Nam ad Mineruam trāsata est, Mercurio, Phoebō, Musis, Gratiis perducentibus. Quamobrem Voluptatem plenam penes diuinam sapientiam tantum assequi possumus, delectationem etiam quandam ex liberalibus disciplinis. Posthæc Pluto rex terræ, videns sublatam sibi escam detinendarum apud inferos animarum, cogitauit saltem escam fingere aspectu similem Voluptati. Acceptis ergo vestibis fucisque à Voluptate relictis, quibus in terris solebat uti, in cælum abiit pura) subornare & substituere alium pro Voluptate decreuit, neque tamen subornauit dæmones, ministri etiam necessarij sunt, neque animas, adiudicatæ enim sunt, sed aliquam furiarum, non iram, non inuidiam, odium, timorem, dolorem, non enim his, velut nimium diuersis, congruebant vestes, & calcei Voluptatis, sed subornauit iacturam, quam nouerat semper terrenæ Voluptati familiarissimam. Hinc admonendi sumus, ut Voluptatem procul effugiamus, alioquin sub Voluptatis prætextu in latentem iacturam protinus corruemus.

# MARSILII FICINI FLORENTINI EPISTOLARVM

(..)

LIBER XL

(..)

## EPISTOLA DE DONO *Argentei Calicis.*

Georgius Heriuart Auguftiensis, Marsilio  
Ficino Platonico, S. D.



**Q**UOTIES animo repeto, repeto autem quotidie, & vt verius loquar, singulis horis, faustum illum & iucundum diem, qui mihi dulcis consuetudinis & amicitiae tuae initium attulit, libet illum ea celebritate dignum existimare, qua solet natalis dies celebrari, ac ( vt mos erat antiquis ) lapillo illum candido notare. Is enim fuit qui mihi eminens illud ingenium tuum, egregias virtutes, ac mellis suam illam, quae in te cumulare viget, dicendi copiam notam reddidit. Quae omnia tanti facio, vt tibi qui his sis ornatus, me totum dederim & dedicauerim. Nec quicquam maius habeam quam si datur occasio, vt tibi omnibus in rebus valeam gratificari, & vt opera mea, cura, ingenio, quantuluncumque est, vbicunque sim, velis vti. Quod vt facias vehementer etiam atque etiam rogo. Mitto nunc ad te argenteum, vel, vt sic loquar, potellum frinolum sane, & puerile munusculum. Quippe sunt virtutes tuae tales, quae mereantur amplioribus muneribus condonari. Sed vt ita, vt es, humanissimus, id non munus, sed amicitiae nostrae nuper initae & tuae in me humanitatis aliqua ex parte pignus & testimonium appellabis. Sicque existimabis me id ad te eo animo mittere. Vale & me ama. Datum Venetiis. Idus Aprilis. M. cccc. xci.

*Responsio pro dono argentei calicis.*

MARSILIUS FICINUS  
Florentinus Georgio Heriuarti  
Germano, S. D.

**E**ST mihi à teneris annis, mi Georgi, naturalis quaedam cum Germanis benivolentia, causis occultis conciliata, itaque Florentinorum socij Miniateses, Germanum genus, praeter ceteros hospites nostri sunt, & familia Picorum atque Caualcantum à Germania ducens originem nobis est amicissima. Quamobrem si germani comiter omnes mihi sunt Germani, quid dicam de viris amicisque inter vos egregiis? de Martino Vranio amico coelesti? de te insuper optime, mi Georgi? profecto quicumque mihi plusquam germanus est, is extra controuersiam est alter ego, vt non mirum sit, si vestra vobis charissima sunt, mea quoque vobis in primis tanquam vestra placere. Vtinam quantus apud vos sum amici, tantus & apud me virtute forem. Benivolentia certe talis erga te sum, qualis est ipse calix nuper ab te mihi dono datus, extra quidem argenteus, sed aureus intus. Arbitror & ingenium tuum, sub argenti specie, aurum illud habere, quod Socrates & in Phaedro suppliciter à Deo petit, & in Republica in Heroicis agnoscit ingeniis. Denique quantum nobis grata fuerit Epistola tua, ac munus acceptum, testis erit vndecimus Epistolarum nostrarum liber, ab

Epistola tua in primis adscripta, & hac responsione mea sumens exordium. Vale felix. Ac si Marsilium amas ama Martinum cognomine Pnyngerum, si me cupis amore quodam coelesti complecti, Vranium amorem meum tota mente complectere. xxix. Aprilis. M. cccc. xc.

*Quomodo aliquis sub aliena persona cogitanti sibi met occurrat.*

**MARSILIVS FICINVS**  
Pierleoneo complatonico  
suo, S. D.

**A**ccepiliteras Pierleone tuas amoris & gratiarum plenas, atque ut vno verbo laudem, re vera Platonicas. In quibus sane scribis, cum primum Platicum aliquid occurrit tibi, succurrere mox tibi Marsilium, sed caue ne te forsan exterior fallat imago. Reor equidem ipsum tibi Pierleonem sub Marsilii persona latere. Siqua enim humana species tibi res Platonicas contemplanti se offert, probabile est speciem maxime Platicam præ cæteris se offerre. Quid autem in rebus humanis Platicum magis, quam Leo magnus Solis Platici domicilium. Forte igitur, quemadmodum & Narcissus, te ipsum intuens, opinaris alium intueri. Præcipue verò Marsilium cuius imaginem ardens te induit amor. Sed quoniam incidimus in imaginem, scis profecto rationem inter imaginationem intellectumque mediam esse, atque in eam hinc quidem ab imaginatione confluere imagines naturalium, inde autem ab intellectu influere species diuinorum. Quamobrem sæpe contingit ut diuina quædam species apud humanam rationem imaginem quandam subeat naturalem, itaque quod intus diuinum est sæpe rationis oculis appareat naturale. Quid? si ratione simili Pierleonus sub figura Marsilii sibi sæpe sit obuius? Sed de his quidem hætenus. De Dionysio Areopagita recte admodum sentire mihi videris: mihi certe nec vlla scientiæ forma est gratiosior quam Platonica: neque forma hæc usquam magis quam in Dionysio veneranda. Amo equidem Platonem in Iamblico, admiror in Plotino, in Dionysio veneror, sæpe verò suspicor antiquiores Plotino Platicos. Ammonium atque Eunumium aut his forte priores, legisse Dionysii libros antequam nescio qua calamitate Ecclesiæ delitescerent. Atque illinc in Plotinum & Iamblicum Dionysii scintillas verè Platicas fuisse transfusas, vnde tantus sit ignis accensus. De Dionysio satis gratus admodum mihi erit Galenus de do-

gmate Hippocratis atque Platonis. Sæpe de te apud Laurentium Medicem verba fiunt. Amat profecto te mirifice, sicut solet, ut par est, admodum veneratur. xii. Maij. M. cccc. xxi. In agro Caregio.

*Ad magnos pertinet beneficia conferre etiam non merentibus.*

**MARSILIVS FICINVS**  
Florentinus Reuerendo in Christo Patri  
& Domino Raphaëli Riario Sancti  
Gregorij Cardinali suppliciter  
se commendat.

**E**t si nulla forte merita sunt, quibus impetrare apud te quicquam debeam, audebo tamen non nihil gratiarum poscere, non meritis quidem confusus ullis, sed & mea in te obseruantia, & tua in omnes clementia frerus. Iustum quidem, sed humanum est beneficium præstare merentibus, clementissimum verò est atque diuinum largiri etiam non merentibus. Magnum certe sacrumque Antistitem, magna in primis diuinaque decent.

*Charitas & pietas potissimum est sapientis officium.*

**MARSILIVS FICINVS**  
Martino Vranio Germano dilectissimo suo, S. D.

**V**tinam mihi tantum sapientiæ foret, ut & promissis pro me tuis, & expectationibus aliorum satis quandoque facere possem, officio quidem meo fermè iam pro viribus satisfeci. Adolescentes enim quos nuper ad nos gratia disciplinæ misistis perlibenter excepi. Pio statim apud nos hospiti commendaui. Dabo indies operam ut beneualeant, ut educantur, erudianturque quam optime. Meam saltem eiusmodi diligentiam, optime mi Martine, parentibus adolescentum vestrisque principibus quibus sapientiam promissisti, promittito. Hætenus & ipse fideiussor eris, ut spero, veridicus, ut ego satis forte fecero, si pro expectatione sapientiæ imprimis præstitero charitatis & pietatis officium, pietas enim summa quædam apud Deum sapientia est. Primo Iunij. M. cccc. xxi.

*Purgatio de literis non redditis.*

**MARSILIVS FICINVS**  
Reuerendo in Christo Patri & Domino  
Raphaëli Riario S. Georgij Cardinali  
suppliciter se commendat.

**C**hristophorus Marsupinus familiaris noster, Florentiam nuper Roma reuersus, statim post prima salutationis verba,



narravit, quantum me tua clementia diligat. Quo quidem nihil gratius audire poteram. Sed hoc interim molestum mihi fuit, quod mox negligentiae criminari me coepit, quasi nullas post discessum hinc tuum ad te literas dederim. Sed ego statim huic Archetypum Epistolarum mearum aperiens, quatuor saltem legi literas ad te hoc tempore missas. Certe nimis infortunatas itinere, inquam, Romano. Nondum enim ad te peruenisse videntur. Quae tamen alibi feliciore fortuna fretae, non solum per omnem Italiam, sed etiam in Hispaniam iamdiu, Galliam, Germaniam, Pannoniam, peruolarunt, obseruantiam & reuerentiam erga te meam ubique iam praeter quam Romae testificantes. Quamobrem non quia nullas, sed quia paucas Epistolas ad te miserim iure culpandus eram, Sed utinam quae natae semel infortunatae videntur, fortunatiores saltem hodie renascantur, ut ad felicem Patronum melioribus usae fatis quandoque perueniant, clientulumque commendent. IIII. Iunij. M. cccc. xci.

*Pro Adolescentibus & Suenia missis ad Academiam Florentinam.*

MARSILIVS FICINVS  
Ludouico Nauclero & Ioanni Phorcensii, Germanis Iurisconsultis, S. D.

**S**cribitis ad nos vestroque nomine Germaniae Principes, Florentiam adolescentes erudiendos tanquam Academiam mittere. Sed ea interim elegantia scribitis, ut non ad Academiam filios, imò ex Academia mittere videamini, atque apud exterarum nationes perquirere vobis iam domesticam disciplinam. Quae rerum vicissitudo est? Quantum insolentes plerique more Sophistarum aliena temere profitentur, tamen vos modestissimi viri vel propria, ritu Socratico, diffidemi, hoc praeter ceteris admirandi, quod quam curiose multi lapillos terrae visceribus reconditos perscrutantur, tam accurate, vos coelestem sapientiae splendorem ubique Gentium prosequamini. Quamobrem incredibili quodam amore erga vos affecti, adolescentum vestrorum curam pia mente suscepimus. Et imprimis insigni pietate hospiti commendauimus. Dabimusque indies operam, ut ager natura fertilis frugem quandoque proferat felicissimam. Vos igitur bono animo estote, & principibus vestris nostro nomine respondete, Magnanimum Laurentium Medicum, cuius & ipsi clientes sumus, adolescentum prouidentiam libentissime suscepisse. v. Iunij. M. cccc. xci. In Agro Caregio.

*De quatuor speciebus diuini furoris. Item laudes Medicis Laurentij vera.*

MARSILIVS FICINVS

Florentinus Petro Diuitio,  
literis & moribus ornatissimo, S. D.

**C**um iamdiu Platonem nostrum in conuiuio audiuiſſes de Amore latissime disputantem, desiderareſque praeterea Compendariam quandam de Amore sententiam, libellum dedi legendum, hac de re nobis in adolescentia Poetica facultate praestantem nostra compositum ad peregrinum alium adoleſcentem Memini equidem quam mirifice delectabar is audire a morem ipsum re vera non esse libidine, sed furorem quendam excellentibus ingeniis diuinitus instigatum. Praeterea, diuinum furorem, tanquam genus quoddam, quatuor in se species continere. Amorem, poësimque & Vaticinium, atque Myſterium. Et Amorem quidem à Venere, à Musis verò Poësim, sed ab Apolline Vaticinium, à Dionysio Myſterium proficiſci. Quae denique ratione alia hominum ingenia ab alioplurimum alioque numine variis furoribus agitentur. Reliquum erat, ingeniosissime Petre, perquirere; nunquid ingenium idem à pluribus, ut ita dixerim, diis simul affari possit, variis inde furoribus concitatum? Iam verò de Amore quidem atque poëſi quaestio non admodum difficilis esse videtur. Nam Homerum, Pindarum, Callimachum, Sapphon, Maronem, poëtico simul amatorioque instinctu percitos fuisse non dubitamus. Vaticinio insuper Epimenidem, atque Sybillam. Sed praeter haec etiam myſteriis inspirari, soli, ut aiunt, diis geniri patuere, qualem Gentes Orphicum, qualem nostrum Dauidem fuisse tradunt; Cognouimus & nos ingenium nostro saeculo felicissimum, quatuor has aequè furorum dotes à quatuor numinibus consequutum, poeticum sanè, amatoriumque spiritum sub Musis Venereque coelesti iamdiu in ipso adolescentiae flore concepit. Quod quidem ubique suauissimi cantus, & miranda prorsus eius carmina personant. Sed vaticinium hauserit ab Apolline iam adultus, quo certè mirabili quadam mentis sagacitate coelitus insira, frequenter futura discrimina, priuatim publiceque, praesagiens; medicam periculis manu adhibet, & rhebea statim virtute medetur. Myſticum verò furorem à Dionysio propè iam maturus feliciter est adeptus. Dionysiam ebrietatem Theologi veteres excessum mentis de-

finierūt, à rebus quidem mortalibus segregata, secreta verò diuinitatis mysteria penetrantis. Bacchus amat colles. In collibus Ambre Agnaneque vallens Laurens ille Phœbeus Dionysio nectare passim ebrius debacchatur. Tum verò afflatus ex alto celestia super hominem carmina fundit ore rotundo, profunda, quorum sensa nullis unquam penetrare fas est, nisi ingeniis simili quodam furore correptis. Rapi vero secum noster ille Patronus, nonnullos interdum attentius atque felicius audientes, in eos videlicet præ cæteris vbertate furoris exuberans. Qua verò ratione percitus ipse numine alios fermè similiter concitare valeat, docet Plato noster in libro qui inscribitur Ion. Vbi ingenti cuidam Herculeo lapidi ferreum annulum subdit exiguum, mox facile rapiendum, primo statim annulo subnectit secundum, tertium verò secundo, quartumque deinceps. Catenamque, conficit annulorum à magnete subinde pendentium, per quos attrahendi virtus à priore deinceps in consequentem repente transfunditur. Eadem ratione putat à Phœbo Musam rapi, ab hac Poëtam, à Poëta corripit similiter audientes. Mysterium hoc his forte carminibus Virgilius imitatur. Quæ Phœbo Pater omnipotens, mihi Phœbus Apollo prædixit, Vobis Suriarum ego maxima. Sed Surias in præsentia nominasse nolim, vbi non de Suriarum, sed de Gratiarum furore tractamus. Quo quidem Patronus noster abundans, Petre felix, & te pariter atque me, cæterosque suos observatores afficit protinus, affectos corripit, correptos occupat, occupatos mox incomparabili quadam voluptate perfundit. Quamobrem tanto beneficio hinc affecti in ardentissimo eius amore perseueremus, in quo singulariter amando, diuinum quotidie reportamus instinctum. viii. Iulij. M. cccc. xci.

*Vera Laus Marci Cardinalis sancti viri.*

MARSILIVS FICINVS  
Antonio Calderino dilectissimo  
suo, S. D.

Petrus Fannius noster vir doctus & probus, multis heri testimoniis comprobauit singularem beneuolentiam erga me tuam, pluribus iamdiu tuis in me officiis confirmatam, cum verò multis de causis plurimum tibi Calderine debeam, hac debeo certe quamplurimum, quod sanctum illum virum Marcum diui Marci Cardinalis, & iamdiu reddidisti nobis amicum, &

quandoque Patronum in nostris periculis præstitisti, cuius quidem obitu non possemus grauitè non dolere, nisi speraremus hunc è cœlo, vbi beatam agit vitam, certiore quodam in dies patrocínio nobis aspiraturum. Hic certe, quod te non latet, Dauidicum illud, Anima mea in manibus meis semper, & viuens & moriens impleuisse videtur. Atque illud Euangelicum attigisse, Potestatem habeo deponendi animam meam. Ita enim prædixit, horam ita latens, & quasi pro arbitrio discessit è corpore, vt non mori quidem, sed sponte peregrinari, imò redire in optatam patriam videretur, immortalis vitæ mortalibus exempla daturus, nouumque lumen cœlestibus luminibus accessurus. Felix igitur mi Antoni ob hanc maxime causam amicitia nostra, quod sub Patrono confirmata est omnium felicissimo. Vale feliciter, ac me, vt soles, amare, singulariter te amantem. xxix. Iulij. M. cccc. lxxxxi.

*Rationes negotiorum suorum amico reddende.*

MARSILIVS FICINVS  
Martino Vranio Prænyngero  
amico vnico, S. D.

Cum neminem te, perquam dilectissime me mi Martine, chariorem habeam, iure nulli potius quam tibi quotidianas rerum nostrarum rationes reddere debeo. Valco equidem bene, quantum habito, ætas, æstas, assidua literarum studia ferunt. Prosequor vt iam pridem scripsi, diuina Dionysij nomina. Recognosco Plotinum interea dum exprimitur à librariis, quatuor posthac aut ad summum quinque mensibus, vt arbitror, erit expressus. Exscribitur tibi nostrum commentarium in Philebum, mitto nunc eius partem quinterniones octo, alios verò reliquos breui accipies. Venetiis quotidie Platonis Theologiæ quælibet, iterum & vt aiunt diligentius inprimuntur. Adolescentes commendati nobis, prospere valent, multumque in dies literis moribusque proficiunt. Singularis quidem noster amor exactissimam singulorum rationem exigit, sed negotia prohibent, his ergo contentus, felicissime Vale. xx. Iulij. M. cccc. lxxxxi.

*De simplicitate & integritate morum.*

MARSILIVS FICINVS  
Pierleone complatonico suo, S. D.

Salute dignissime Pierleone vir omnium integerrime, imò & omnium

simplicissime. Verum Platonoster in Symposio quidem nullos nostris sæculis nasci integros existimat, sed diuifos. In Timæo autem atque Phædro duplices affirmat omnes. Te igitur quando integrum simplicemque appello, non huius quidem sæculi filium iudico, sed alterius, in quo, ut Plato inquit, homines quondam integri pariter atque simplices nascebantur. Quædiu videlicet regnabat quædã in humanitate diuinitas, diuinitas enim & integritas eadẽ est, atque ipsa simplicitas. Naturalia verò multiplicem habet integritatem. Monstra denique ab integritate simul, & simplicitate degenerant. Sed Mysteria vix admittit Epistola, sortes videlicet facile. Vide igitur Picroclone mi alter ego, quam similem in plebisque sortem nacti sumus, disciplinæ Medicem, in coelestibus eundem, ut coniecto, Saturnum ducem quoque Platonem, Patronum rursus eundem Laurentium Medicem, Platonicarum disciplinarum instauratorem, amicos prorsus eosdem, inimicos autem ipsi nullos, amamus enim omnes, solum forte non amaturi, si quis denique deprehensus fuerit solum amare seipsum. Mores præterea nostros quis non similes dixerit? Simulare namque vel dissimulare, pariter vterque nescit. Simulatores dissimulatoresque similiter vtrūque fallunt. Sed fallant (ut cūque lubet) iterū atque iterū, modo ipsi iam falsi, quandoque nos quoque falsos mutatis moribus non efficiant. Vale feliciter in tua integritate simplicitateque, in vita etiam ingrata sorte victurus. xx. Augusti. M. cccc. lxxxxi.

*Proæmium in Platonis Institutiones*

MARSILIVS FICINVS

Philippo Valori dilectissimo  
suo, S. D.

**A**Nno salutis humanæ M. cccc. lvi. quo ego quidem anno ætatis agebam tres atque viginti, tu vero natus es; primitias studiorum meorum auspicatus sum à libris quatuor Institutionum ad Platonice disciplinam. Ad quas quidẽ componendas adhortatus est Christophorus Landinus, amicissimus mihi, vir doctissimus. Cū autem ipse, & Cosmus Medices peregrissent eas, probauerunt quidem: sed ut penes me seruarem consuluerunt, quoad Græcis literis erudirer, Platonice tandem ex suis fontibus haurirem. Eas enim partim formata quadam inuentione, partim Platonice quorundam Latinorum lectione aditus effeceram. Platonem deinde, Platoniceque Græcos aggressus, Institutiones illas paulatim libris sequenti-

bus emendari. Neque tamen librum ipsum placuit abolere, quem tanquam liberum primogenitum meum, eo anno genueram quo natus es, mihi certè, & obertantia filius, & perpetuo quodam fauore patronus. Hunc igitur tu, mi Valor, dilectissime fili, fratrem tuum, fraterno precor amore complectere, in Valorum laribus in eunte iam ætate mihi domesticis, optato prorsus Valore victurum. Vale, xxiii. Nouembris. M. cccc. xci.

*Gratiarum actio.*

MARSILIVS FICINVS

Martino Vranio Prænyngero,  
amico vnico, S. D.

**I**Oannes Streler ille vester, ac propè iam noster, legit mihi hodie partem Epistolæ ad te tuæ, amoris erga nos ardentissimi plenam: qua præterea significabas te natalem nostrum, & Doctorum cœtu, & magnifico sumptu celebrauiffe. Ego igitur tantæ huic erga nos pietati tuæ facere non aliter satis possum, nisi tantum amauiero quantum me. Incomparabilis autem amoris erga te mei, suauissime mi Martine, testes erunt non solum Epistolæ nostræ, verum etiam libri quidam in posterum nobis edendi. Viue igitur, mi Martine, felix, non minus mihi semper quam mea vitæ charus Mitto ad te reliquam Commentarii nostri in Philebum, quinterniones quatuor. Plotini librorum impressio proximo huic Martio erit (ut arbitror) absoluta, magnifico Medicis Laurentii sumptu, formaque Regia, constituit mox quoque Platonis nostri libros eadem exprimi dignitate. Ego verò curabo pro viribus, ut emendatior sit expressio secunda quàm prima. Præterea libros singulos in capita multa, capitulataque distinguam, & inscriptionibus quam certissimis, tanquam formulis declarabo. Dionysii libri iamdiu vobis incepti propter occupationem eiusmodi aliquanto tardius absoluentur. Vale, xxiii. Nouemb. M. cccc. lxxxix. Florentiæ.

*In librum de Vita dono datum.*

MARSILIVS FICINVS

Mazingo insigni Physico, amico  
inseparabili, S. D.

**S**ALUE salutis nostræ (Deo auctore) curator, amice prorsus inseparabilis. In primis forte mirabile, cur inseparabilem amicum potius quàm aliter nominauerim. Quia videlicet, quos cælum coniunxit, terra minimè separabit. Quo enim pacto infima mundi terra nostros animos per lo-

corum distantiam diffungere poterit, quos altissimus Planetarum suis in aedibus amore coniunxit. Amore, inquam, tam durabili, quam stabilis est ipse Saturnus. Beneuolentiae verò tam firmæ pignus esto vita isthæc penes te mea. Nec immerito vitam istam tibi probandam colendamque committo, cui iampridem meam hanc meorumque, vitam commisi curandam.

*Philosophica ingenia ad Christum perueniunt  
per Platonem, in Augustino Au-  
relia contigit.*

MARSILIVS FICINVS

Florentinus Ioanni Pico Miran-  
dulae, Conphilosopho  
suo, S. D.

**S**cribis amice quam optime (quod mihi omnium est gratissimum) te multis quotidie suadere, ac iam persuasisse nonnullis, ut Epicurea impietate relicta, vel Auerroica quadam opinione posthabita, piam de anima Deoque sequantur Platonis nostri sententiam. Per quam sane quasi mediam quandam viam, Christianam pietatem denique consequantur. Salue igitur vere piscator hominum. Qui enim vulgaribus ingeniis persuadent, pisces vel potius piseiculos captare videntur, sed qui egregiis, piscatores hominum iudicantur. Hos forte magnos pisces nuncupat Euangelium, quibus comprehendendis nec rete quidem scinditur. Nostrum verò Mirandula rete nunc est Platonica ratio, quæ quidem si modo ritè trahitur sub Christiana veritate non scinditur, sed permanet integra dum impletur. Nullos legisti Philosophos quondam nisi Platonicos Christianam suscepisse religionem. Merito igitur Platonici (ut ita dicam) retibus altissima quæque Christo piscaris ingenia. Vtinam tres saltem eiusmodi religioni piscatores adessent, ut grandes nulli pisces pelago superessent. Sed heu miseri vel infortunati potius, messis quidem multa, operarij verò pauci. Quo igitur pauciores mi Mirandula sumus, eo frequentius nobis vehementiusque laborandum. Vale.

*Commendatio.*

MARSILIVS FICINVS,  
Francisco Soderino Episcopo  
Volaterrano, S. D.

**M**artinus Vranus à Germania Romanam venit, mandata sui principis pro viribus effecturus, & perfecturus (ut spe-

ro) si tu consilium tuum operamque praestiteris. praestari verò tam vehementer percipio, ut nihil ardentius nunc affectem, hunc tibi (si noveris) virtus eius mirifica commendabit. Ignoram ergo commendet ingens beneuolentia nostra. Hic enim mihi tam charus est, ut non aliter exprimere possim nisi dixerim, alter ego. Cum igitur amicorum meorum nullum frustra tibi hæcenus commendauerim, quæ tua quidem incredibilis humanitas & clementia est, spero nunc, imò certo scio, martinum, imò verò Marsilium tibi fore feliciter commendatum. Primo Aprilis. M. cccc. xcii.

*Commendatio.*

MARSILIVS FICINVS

Philippo Valori suo, S. P. D.

**M**eministi mi Valor quam ardentem nos amet martinus noster Vranus, adeò ut & filium suum meo nomine Marsilium nuncupauerit, nostrumque natalem instituerit celebrandum. Hunc ergo non dubito abs te vehementer amari. Hic te salutabit, consilium aperiet suum, auxilium postulabit. Si memineris quam sæpe de Martino dicere soleam, alter ego, non dubito quin habeas hunc in omnibus mirifice commendatum. Scripsi fermè eadem ad venerandum Soderinum nostrum. Huic ergo tu Marsilium ita (ut scis) geminum, geminatis quoque precibus commendato.

*Actio gratiarum. Item de ostentis in  
obitu principis.*

MARSILIVS FICINVS

Reuerendo in Christo Patri Domino  
Ioanni Medici Cardinali  
suppliciter se com-  
mendat.

**C**um quartum Medici gradum maximum arbitrentur, tu verò quartus à Cosmo in generosa medicum familia mihi sis patronus, es. proculdubio maximus. Quod quidem hinc planè perspicio, quod non aliena mihi das, sed tua. Tuo iam diu canonicatu me ornasti. Æde nunc Martiana, tibi done concessa, subito me donasti. Quamobrem obitum magnanimi Laurentij nostri, neque fortunam meam deslere mihi licet, qui deinceps tanto patrono me videam maximè commendatum, neque sortem eius commiserari, quem multis euiden-  
tibusque argumentis translatum ad superiores esse cognoscimus.

Lēgisti ( ut arbitror ) apud Heliōdum, triginta beneficorum dæmonum millia per ætē sublimem humana curare. Quos quidem prisci rectores hominum exploratoresque cognominant. Præterea, excellentissimos quosque apud homines principes, post obitum ad rectores eiusmodi commigrare, quasi collegas eorum posthac in humana gubernatione futuros. Animis ergo felicibus illuc aduolantibus illos congratulari, Platonici putant. Congratulationes verò signa dare portenta hominibus admiranda, tonitrus, fulmina, flammæ, machinarum ruinas, oracula, somnia. Quæ quidem prodigia, partim maiestatem transmigrantis animæ, partim detrimentum orbi populi, partim intercessionem antiquæ potestatis in hæredes significare videntur. Idque in Romuli Cæsarisque decessu extra controuersiam afferunt, contigisse. Quod & nunc in morte Laurentij magni propemodum diui, Florentiæ fuit vniuerso fermè populo manifestum. Viue igitur felix, maxime mi patrone, diuina voluntate contentus, gaudens felicitate paterna, confusus ope diuina. Die xv. Aprilis. M. cccc. xcii. In agro Caregio.

*Actio gratiarum.*

MARSILIVS FICINVS

Reuerendo in Christo Patri Domino

Francisco Soderino, Episcopo Volaterrano,

S. P. D.

**G**Rammatici quidem ultra superlatiuum nihil habent, Oratores autem atque Poëtæ huic aliquid addunt. Huc forsā tendit Virgilianum illud.

*O ter quaterque beati.*

Ter quidem beati sunt beatissimi. Quater verò, quàm beatissimi.

Hactenus me tibi charissimum esse planè perspexi, nec vnquam posse chariorem fore reputabam. Nunc verò quam charissimum esse proculdubio video. Charissimos enim tuos expolias, quo me induas. Gratias igitur quas olim soleo pro multis in me beneficiis tibi maximas agere, iam quam maximas ago, ac me tibi quam deditissimum esse confiteor. Illi quin etiam familiari tuo debeo non mediocriter, quem tuo rogatu mox animo haud ægro nobis, audio, concessisse. Die xxv. Aprilis. M. cccc. xcii. In agro Caregio.

*Causa prodigiorum in obitu Principis contingentium.*

MARSILIVS FICINVS

Philippo Valori Oratori apud

Pontificem, Florentino, S. D.

**C**Ogitanti mihi prodigiorum causas in excellentium virorū, præsertim principum, obitu contingentium, primò quidem venit in mentem, hæc neque fortuna contingere, habent enim ordinem, neque natura procedere, diuersa enim inter se fiunt, ut ad naturalem influxum vna quadam procedentem via, referri non possint, & habent in se mysteria natura prorsus superiora. Deinde succurrit, si portenta eiusmodi, neque à fortuna, neque à natura proficiscuntur, à diuinitate quadam proculdubio proficisci, id est ab intelligentia quadam sublimi, naturæ vires exuperante. Sed ne minima quæque ad mentem primam absque medio quodam ordine redigamus. Videntur hæc (ut Platonice loquar) ad tria potissimum numina referenda. Est enim personæ genius, dæmon familiaris homini, quem Angelum custodem nostri Theologi nominant, est & loci genius, domus, ciuitatis, regni custos, quem cognominant principatum, est insuper ordo sublimis chorusque numinum, vel dæmonum, vel angelorum, in quorum numerum sortemque per officij similitudinem, excellens animus quasi ad stellam suam migraturus, est in eodem illic officio quasi collega futurus. Quemadmodum ergo tres prodigiorum auctores sunt, ita & tria videntur genera portentorum. Sublimis quidem ille chorus crinitas accendit, tonitrus ciet, fulgura iaculantur, & flammæ stellasque cadentes. Præfectum prouinciæ numen, quatit diruitque machinas, oracula fundit, auguria & auspicia mouet, æstus designat. Custos verò familiaris somnia omniaque excitat, canumque latratus quasi malum dæmonium illinc arcentes. Finem præterea desideraturus mihi videris, huius hæc gratia fiant. Prima quidem illa significant excellentissimos non extinguere, non negligi, sed post obitum regnare cum superis. Secunda, calamitatem populi, tanto viro destituti prænunciant, & cauere imminetia subinde monent. Tertia, & virum admonent moribundum, & suis indicant celestem fauorem, illo quidem moriente non mori, sed familiæ suæ post illū aspiraturum. Addunt Platonici quidam, inter sublimes hos dæmones sempiternos, atque homines



vita breues, esse dæmones quosdā medios valdè longæuos, horum ergo potentioribus potentiores homines commendatos. Cumque illorum aliquis post multa secula moritur, magnū simul Principem ipsi commendatum ægrotare protinus vitæque decedere. Turbari vero aërem nouaque & miranda contingere, quando & magnorum dæmonum aërea corpora dissoluuntur, & amici dæmones fatum magni, tum dæmonis, tum Principis ægrè ferunt. Vale. xxv. Aprilis. M. cccc. xcii.

*De vita solitaria, & quanti facienda sit.*

MARSILIVS FICINVS  
Ioanni Pico Mirandulæ, S. D.

**L**atere ne vnquam speras, mi Mirandula? Parua quidem & obscura latere facile possunt, magna verò & præclara non possunt. Tu quidem, vt bene viuas, studes semper latere bene, sed interim quo populo euadis admirabilior, eo notior. Hinc quicquid tentaueris, rumores varij protinus excitantur. Quid ergo? Circumspiciesne semper vniuersam plebē, & quid confabulaturi sint, longè prospiciens, feruus eris? An tua potius professione contentus, vulgi iudicium nihil pendes? Noui equidem ingenium tuum. Videor igitur mihi videre quid agas. Haud omnino nihili pendes hæc, sed paripendes, plurimi verò prudentum iudicia facies. Sed de his quidem satis. Ego verò, dilectissime mi Ioannes, eo grauius tuo discessu dolui, quod me propter duorum simul amicorum obitum in summo mœrore constitutum repente deseruisti, sperantem mihi te solum consolatorem Medicumque fore. Sed spero te prope diem rediturum, qua quidem spe fretus amicos etiam consolabor. Vale reditque felix. Die xxviii. Aprilis in agro Carregio.

*Laudes amici, scilicet Bindacij Recasolani.*

MARSILIVS FICINVS  
Philippo Valori Oratori Florentino, S. D.

**D**uturnus Laurentij Medicis morbus vnā cum iniquitate temporum (vt arbitror) in causa fuit, vt & ego non leuiter ægrotauerim. Sed ex longa infirmitate iam satis belle conualui, videlicet aspirante Deo. Nemo verò longi languoris tēdia magis mihi leuauit, quam Bindacius Recasolanus familiaris noster, vir certe natura generosissimus, virtute probatissimus, opera

officiosissimus, hic sæpe me sponte sua, sæpe etiam tuo nomine salutauit. Significauit præterea se tibi debere quam plurimum. Hunc igitur in primis ama, mi Valor, & apprime te amantem, & omnium amore dignissimum. Martinus Vranus, alter ego, ad nos reuersus narravit hodie quam amice, quamque magnifice eum exceperis. Fecisti tu quidem (sicut soles) nec quicquam hoc tempore mihi gratius efficere potuisses. Die. xxvi. Iunij. M. cccc. xcii.

*Laudes legitimi Principis.*

MARSILIVS FICINVS  
Eberardo Duci Vuittembergensi &  
Montis Peligardiseniori, S. P. D.

**M**ulta iam pridem de singulari virtutum tuarum excellentia ex multis audiuius. Plurima nuper accepimus à Martino Vranio nostro, teste quidem & fideiussore apud nos locupletissimo, laudumque tuarum præcone apud omnes fide dignissimo. Quamobrem ingens admirabilium virtutum tuarum, quasi stellarum splendor ad nos vsque resurgens, incredibilem in nobis iam accendit ardorem, ad te vehementer amandum & colendum in primis atque venerandum. Desiderabam equidem iam diu quod & Plato noster optare se prædicabat, cognoscere principem, in quo quemadmodum in Pallade vnā cum potentia, pariter sapientia conspiraret, nec non, vt in Cæsare magnanimas cum clementia, sicut in Scipione grauitas cum comitate concurreret. In quo præterea floreret & iustitia Minois, & religio Numæ, sub quo pax illa rediret Octauiani. Qui denique pacis studia rebus bellicis anteponeret, templa fundaret, publica literarum gymnasia faceret. Quem subditi non tam metuunt quam ament & obseruent atque mirentur. Eiusmodi quidem est legitimi principis idea, & oprata quondam à Platone, & à nobis in primis desiderata, atque (vt constans iam fama perhibet) in te præcipuè ingens, vt non mirum sit me iam, meosque Academicos omnes, tot virtutum tuarum radiis inflammatos, te quasi cœleste numen colere antè alios principes atque venerari. Sed incredibili quodam amore præterea cogimur te obsecrare, vt ipse quoque nos ames, singulariter te amantes, semperque post hac etiam, vt iam facis, memineris, quemadmodum omne lumen pendet ex alto, ita virtutum tuarum splendorem ex ipso Deo patre luminum dependere, vt summus ille bonorum omnium author probitatem tuam pariter atque felicitatem con-

firmet etiam in posterum, & augeat confirmatam dispositionem, & quotidianos coelestium cursus aspectusque consideras, prosequaris.

\* Hic de-  
est finis  
Epistole  
ad Ducem  
Furiem  
tergens.  
Principiū  
Epistole  
ad Banda-  
cium.

\* Probo equidem (dilectissime mi Bandaci.) Veruntamen si quando Astrologiam illam aggrediaris, qua frustra nimium certa futurorum iudicia promittuntur, id minimè comprobabo. Quem enim omnium familiarissimum habeo, eundem & felicissimum fore desidero. Compertum vero habemus omnes qui prædicendis futuris curiosius inhiant, omnium infortunatissimos esse vel fieri. Cuius quidem aduersitatis causas, vel manifestas, vel occultas esse putamus. Manifestæ profecto causæ sunt, quod infinito ac prorsus incerto futurorum studio, sua semper omnia negligere compelluntur. Plerumque verò imminentis fati, vel promissis confisi, vel minis deterriti, sua quidem sententia necessarii, ipsi interea nihil agunt, toti videlicet ex fato pēdentes. Occultas autem huius rei causas esse arbitror, quod prouidentia diuina, cui natura, fatum, fortuna, seruiunt, non dat omnibus omnia, sed sua cuique iuste dispensat. Quibus ergo & his quidem volentibus futura concessit, meritò præsentia negat. Cū enim præsentia, si cum futuris compares, paucissima minimaque sint, si rebus eiusmodi careas, dummodo futura, quæ plurima maximaque sunt quoquomodo possideas, cōqueri apud prouidentiam de tua sorte non debes. Fortè verò fortuna, quæ videtur in hoc saltem opposito faro, quod illud quidem ordinem rerum asserit necessarium, hæc verò ordinem eiusmodi renuit, nimirum futurorum auguratoribus tanquam fatidicis assertoribusque fati infesa redditur & aduersa. Forte etiam qui ventura audacter anticipant, quæ coelestis ille pater in sua posuit potestate, sibi ipsis quod Dei ipsius est, insolenter usurpant. His ergo Iupiter indignatus eos tanquam Gygantes illos superbia nimium elatos effulminat. Missa equidem nunc quæ mihi succurrunt Astrologica facio. Rerum videlicet reconditarum longeque à præsentibus distantium perscrutatores, inde protinus in Saturnum abditissima quæque remotissimaque tenentem. Et quoniam præsentia fortunæ bona concessit Ioui, rebus tandem venturis secretissimisque contentum. Quamobrem (ut summam cuncta concludam) dilectissime mi Bandaci, quoniam ad sola præsentia longe deficiamus, ne dum ad futura quoque sufficiamus, quod diuinè præcepit Paulus, memori semper mente tenendum: Nolite sapere plusquam oportet sapere, sed sapere ad sobrietatem. Vale.

*Opiniones non temerè diuulganda. Item Orphei carmina.*

## MARSILIUS FICINVS

Florentinus Martino Vranio amico  
unico, S. D.

**A**Rgonautica & hymnos Orphei & Homeri atque Proculi, Theologiamque Hesiodi, quæ adolescens, nescio quomodo, ad verbum mihi soli transuli, quem ad modum tu nuper hospes apud me vidisti, edere nunquam placuit, ne forte lectores ad Priscum deorum dæmonumque cultum iam diu merito reprobatum, reuocare viderer, quantum enim Pythagoricis quondam curæ fuit ne diuina in vulgus ederent, tanta mihi semper cura fuit, non diuulgare prophana, aded ut neque commentariolis in Lucretium meis, quæ puer adhuc, nescio quomodo, commentabar, deinde pepercerim, hæc enim sicut & Plato tragœdias elegiasque suas, Vulcano dedi. Maturior enim ætas exquisitiusque examen, ut inquit Plato, sæpe damnat quæ leuitas iuuenilis vel temere credidit, vel saltem, ut par erat, reprobare nesciuit. Periculosius verò est, ut Plato inquit, noxias opiniones imbibere, quam venenum pessimum diuulgare. Sicut enim bonum, quo latius, eo diuinius, ita latissimum malum, pestilentissimum. Promissi verò tibi iutiora quædam Orphei carmina mittere, Ecce mitto.

### Orphei Versus de Deo.

**E**Vsebius Cæsariensis Libro. XIII. de Evangelica præparatione sic ait, Sed Orpheus etiam in carminibus quæ inscripsit de verbo sacro, diuina virtute omnia gubernari, cunctaque à Deo producta, hoc modo asserit, ut legitur in libro quem Aristobolus ad Ptolomæum scripsit.

**V**os qui virtutem colitis, vos ad mea tantum  
Dicta aures adhibete, animæque intendite vestros.  
Contra qui sanctas leges contemnitis, hinc vos  
Effugite, & procul hinc miseri, procul ite prophani.  
Tu verò qui diuinas specularis, & altæ  
Mente capis muscæ voces, complectere, & illas  
Aspiciens sacris oculis, sub pectore serua.  
Hocque iter ingressus, solum illum suspice mundi  
Ingentem auctorem solum, interituque carentem.

*Quem nos praesenti quis sit sermone docemus.  
Vnus perfectus Deus est qui cuncta creauit.  
Cuncta fouens, atque ipse ferens super omnia  
se se.*

*Qui capitur mente tantum, qui mente videtur.  
Qui nullumque malum mortalibus inuehit  
unquam.*

*Quem prater non est alius, tu cuncta videto  
Hic ipsum in terris melius quo cernere possis.  
Hic etenim video ipsius vestigia, fortem  
Hicque manum video, verum ipse cernere qui sit  
Nequaquam valeo, nam nubibus insidet  
altis.*

*Nemo illum, nisi Chaldeo de sanguine quidam  
Progenitus vidit, quem caelorum aurea sedes  
Sublimisque tenet, cuius se dextera tendit  
Oceani ad fines, quem de radicibus imis  
Concussique tremunt montes, nec pondere  
quamuis*

*Immenso sint, ferre queunt, qui culmina caeli  
Alta colens, terris nunquam tamen ille sit ab-  
sens.*

*Ipse est principium, mediumque & exitus  
idem.*

*Item idem in tercio inducit Porphyrij  
verba ista.*

*Admiranda est Graecorum sapientia, qui  
Iouem mundi mentem arbitrantur, quae in  
se ipsa mundum continens produxit, sic à  
Theologia Orphei profecti de ipso tradi-  
derunt.*

#### Orphei carmina.

*Sedereaque domus rex & Iupiter ipse  
Principium atque ortus, verum, vis una  
Deusque*

*Vnus & omnipotens regali in corpore cuius  
Singula ponuntur, tellus, unda, ignis, & aer,  
Nox simul atque dies, sapientia primumque origo  
Ac iucundus amor, magno hoc in corpore regis  
Sunt Iouis excelsi, cervicem namque videbis  
Caeli suspiciens reuerentia magnaue recta.*

*Hoc caput auricomum, flauis de vertice crines  
Stellarum rutilant radij, de hinc aurea pandit  
Cornua bina caput, capitisque simillima tauri  
Vnum est ortus, ipse est occasus & aliud  
Ast oculi fulgens, ingenti lumine Phæbus  
Lunaque purpureo Phæbi redimita colore.  
Praescia venturi mens constat regius aether,  
Quam strepitus nullus, nec vis, nec fama  
latere*

*Arcanumque potest, penetratque per omnia vi-  
ctrix.*

*Præterea inuictum corpus, sine fine modoque  
Panditur: Ast humeri magni quoque pectora  
lata,*

*Est aer, alas quoque vento possidet ille,*

*His ad cuncta volans, Euro est velocior ipso,  
Tum sacer antiqua matre ex tellure tumescit  
Venter, & ex altis consurgit montibus ingens,  
Quem medio pontus subcingit rite sonorus.  
Vltima præterea terrarum limina & ampli  
Fundamenta globi, furibundaque tartara  
plantas*

*Esse pedum magni constat rectoris olympi.  
Hic dum sub terris celasset cuncta, ac inde  
Ex imis repetens, in lucem protulit almam.*

#### Porphyrij expositio.

#### Simulachrum Iouis.

**V**niuersus igitur mundus Iupiter est, animal ex animalibus, Deus ex diis constitutus. Iupiter autem est quantum intellectus est, à quo vniuersa producuntur, & qui cuncta creat intelligendo. Hoc igitur modo Theologis de Ioue sentientibus, impossibile est talem eius imaginem fingere, qualem carmina descripserunt. Iouem igitur esse credendum est, virantem prouidentem, atque viuificam, quam pilâ & rotundis figuris significant. Hominis simulachrum ei constituunt, quoniam mens est quæ cuncta feminali ratione producit. Sedere autem fingitur, ut stabilis virtus atque incommutabilis exprimatur. Nuda apertaue habet superiora, quoniam conspicuus intelligentiis superioribus est: inferiora verò teguntur, quia occultatur inferioribus creaturis. Sceptum læua tenet, quia in his corporis partibus, ceu spiritualissimum vitæ domicilium inuenitur. Creator enim intellectus rerum spiritusque viuificus mundi est. Dextera verò aut aquilam portendit, aut victoriam, alterum quia ceterorum deorum dominus, quemadmodum aliarum auium aquila est. Alterum, quia omnia sibi subiecta sunt. Decimonono Iunij. M. cccc. xcii.

*Exhortatur amicos, ut Plotino foras pro-  
deunti faueant.*

MARSILIUS FICINVS  
Philippo Carducio dilectissimo  
suo, S. D.

**S**alue, mi Carduci, Academiz studio-  
sissime cultor. Vide quam verum sit  
Prouerbum illud, omnium rerum vicissitu-  
do est. Diuinus Plato noster quondam ma-  
gnum Plotinū peperit. Plotinus Platonem  
iam parturit, propediem pariturus. Plato  
lucem Plotino dedit, Platoni reddet lu-  
cem,

cem, cum ipse primum prodibit in lucem. Editus ille quidem iam est à nobis, sed adhuc (nescio quomodo) liminibus hæret. Surge age Carduci, nostrorum omnium ardentissime, Plotinum hærentem promove, nostrosque omnes & ceteros cohortare ad hunc manibus alacriter comprehendendum, ut ipse in lucem euestigio prodians, contuentibus omnibus, vicissim reddat lucem. XII. Iunij. M. cccc. xcii.

*In librum de Vita missum ad amicum.*

MARSILIVS FICINVS  
Ioanni Canacio, & Bindacio Recasolano dilectissimis suis, S. P. D.

**S**I qui familiarium meorum mentem meam tenent, vos certe familiarissimi omnium totam prorsus habetis. Vos itaque minime latet, quo consilio usus, quæ spe & fiducia fretus, libros de Vita conscripserim, ut ingeniosis quidem prodessem omnibus, sed inter eos multo magis amicis, maxime verò civibus imprimis saluti patriæ necessariis. Non dubitabam equidem me semel quam plurimis imò omnibus profuturum, si quos potissimum conseruarem, salutis publicæ seruatores. Meum quidem hætenus fuit, libros illos hac sententia, diligentiaque componere. Vestrum verò deinceps operam assidue dare, ne forte me fallat opinio, frustra que nimium laborauerim. Quoties ergo Paulantonium Soderinum nostrum salutabitis, virum & frequentissima salutatione, & perpetua salute dignissimum, toties commemorare huic præ ceteris memineritis, ut libros de vita relegat & obseruet. Huic enim maxime vitam longam salutemque perpetuam exoptamus. Quippe & cum ingeniosissimus amicissimusque sit, magnisque Medicibus patronis nostris non parua quidem naturæ, certe quam maxima beniuolentiæ necessitate coniunctus, imoque salutis publicæ admodum necessarius. Si tantum robore vir ille valeret, quantum consilio præualet, ita neque Medicorum remediis indigeret ad benevalendum, sicut nec ullorum iam consiliis eget ad bene viuendum. Iam verò si tantum valetudini suæ quandoque confu-  
leret, quantum rebus agendis & amicorum commodis rei; publicæ prosperitati quotidie prospicit, nequaquam vos vrgerem ut de curanda sui corporis valetudine mone-  
retis. Denique bene valete. Et Paulantonium nostrum (ut soletis) salutate frequenter, de colenda diligentius valetudine quotidie monituri, ut ipse quoque tamdiu saltem

filio suo Thomæ præclaro adolescenti viuatur, quamdiu sibi Thomas suus pater vixit, clarissimus eques. Die xxii. Iulij. M. cccc. xcii.

*Catalogus familiarium atque auditorum.*

MARSILIVS FICINVS  
Florentinus Martino Vranio amico vnico, S. D.

**N**ihil à me iustius postulare poteras, quam quod per Ioannem Streler Congermanum tuum iam sæpe requiris, amicorum videlicet nostrorum Catalogum non ex quouis commercio vel contubernio confluentium, sed in ipsa dumtaxat liberalium disciplinarum communione conuenientium. Cum enim absque amicorum meorum præsentia esse nusquam, aut debeam, aut velim, ipseque sim non in Italia solum in meipso, sed in te etiam in Germania, merito amicos hic meos, istuc etià mihi adesse desidero. Omnes quidem ingenio moribusque probatos esse scito. Nullos enim habere unquam amicos statui, nisi quos iudicauerim literas una cum honestate morum, quasi cum Ioue Mercurium coniunxisse. Plato enim noster in Epistolis integritatem vitæ veram, inquit, esse philosophiam, literas autem quasi externum Philosophiæ nuncupat ornamentum. Idem in Epistolis ait, Philosophicam communionem omnia non solum beniuolentia, sed etiam necessitudine præstantiorem stabilioremque existere. Sed ut mox veniam ad Catalogum, cunctos summatim amicos ita laudatos accipito. At si proprias cuiusque laudes singulatim narrare voluero, opus incœprauero longe prolixum. Si quos prætermisero non æquè laudatos, prorsus inuidiosum. Omnino verò absurdum fuerit, si dum amicos ordine disponere tento, interim comparationibus omnia perturbauero, odium pro beneuolentia postremo reportas. Primum summumque inter amicos locum patroni nostri Medices iure optimo sibi vendicant, Magnus Cosmus, Gemini Cosmi, filij viri præstantes Petrus atque Ioannes, Gemini quoque Petri nati, magnus Laurentius & inclytus Iulianus, tres Laurentij liberi, magnanimus Petrus, Ioannes Cardinalis plurimum venerandus, Iulianus egregia indole præditus. Ac ne in longum singulorum laudes prosequar, una Medices omnes communi laude complectar, genus Heroicum. Præter patronos duo sunt nobis amicorum genera. Alij enim non auditores quidem omnes, nec omnino discipuli, sed consuetudine familiares (ut ita loquar) confabulatores, atque vtrò citroque con-

filiorum disciplinarumque liberalium communicatores. Alij autem præter hæc, quæ dixi, nos quandoque legentes & quasi docentes audierunt, & si ipsi quidem quasi discipuli, non tamen reuera discipuli, non enim tantum mihi arrego, vt docuerim aliquos aut doceam, sed ( Socratico potius more ) sciscitor omnes atque hortor fecundaque familiarium meorum ingenia ad partum assidue prouoco. In primo genere sunt Naldus, Naldius à terrena statim ætate mihi familiaris, post hunc in adulescentia nostra Peregrinus Allius, Christophorus Landinus, Baptista Leo, Albertus, Petrus Pazius, Benedictus Accoltus, Aretinus, Bartholomeus Valor, Antonius Canisianus, paulo post, Ioannes Caualcantes, Dominicus Galectus, Antonius Calderinus, Hieronymus Rossius, Amerigus & Thomas ambo Bencij, Cherubinus Quarqualius Geminianensis, Antonius Seraphicus, Michaël Mercatus ambo Miniatienses, Franciscus Bandinus, Laurentius Lippius Collensis, Bernardus Nuthius, Commandus, Baccius Vgolinus, Petrus Fannius Presbyter. Horum plurimi exceptis Landino & Baptista, Leone & Benedicto Accolto, primas lectiones nostras nonnumquam audierunt. In ætate verò mea iam maturæ familiares, non auditores. Antonius Allius Ricciardus Anglariensis, Bartholomæus Platina, Oliuerius Arduinus, Sebastianus Saluinus Amitinus noster, Laurentius Bonincontrus, Benedictus Bi-liottus, Georgius Antonius Vespucius, Ioannes Baptista Boninsegni, Demetrius Bizantius, Ioannes Victorius Soderinus, Angelus Politianus, Pierleonus Spolerinus, Ioannes Picus Mirandula. In secundo genere, id est, in ordine auditorum sunt, Carolus Marsupinus, Petri quinque Nerus, Guiciardinus, Soderinus, Compagnius, Patentus, Philippi duo, Valor scilicet & Carducius, Ioannes quatuor, Canacius, Nesius, Guiciardinus, Rosatus, Bernardi quatuor, Victorius Medices, Canisianus, Micheleëtius. Francisci quatuor, Berlingierius Rimicinus, Gaddus, Petra sancta, Amerigus Curfinus, Antonius Lanfradinus, Bindacius Recosolanus, Alamannus Donatus, Nicolaus Michelotius, Matthæus Rabatta, Alexander Albitius, Fortuna Hebraus, Sebastianus Presbyter, Angelus Carduccius, Andreas Cursus, Alexander Borius, Blasius Bibienius, Franciscus Diacetus, Nicolaus Valor.

*Proæmium in compendium Proculi.*

MARSILIVS FICINVS  
Florentinus Martino Vranio amico  
conico, S. D.

**P**ost discessum ex Italia tuum aduecti sunt è Græcia mox ad magnanimum Petrum Medicem, libri multi ex quamplurimis electi, nuper electore Lascari Græco admodum elegante, pro regia illa bibliotheca iam pridem à magno Laurentio sceleriter instituta. Ego autem inter multa ( vt soleo ) semper in primis legi Platonica, primaque inter hæc commentaria Procli in sex Platonis de Republica libros principumque septimi. Quos igitur ex amoenissimis horum pratis stulos passim discurrendo collegi, religionem sanctam præ cæteris redolentes, ad te mitto insignem religione virum. III. Augusti M. cccc. xcii.

*Excerpta ex Proculo in Rempublicam Platonis  
à Marsilio Ficino, tres cuiusque  
Dei proprietates.*

**P**lato in Legibus per tres proprietates definit ipsam Dei rationem, scilicet, per bonitatem, potentiam, cognitionem, per tres quoque similes in Republica, scilicet per bonitatem, immutabilitatem, veritatem. Immutabilitas quidem est potentie propria, veritas autem cognitionis perfectio. Dicitur autem unusquisque Deus reuera bonus. Tum quia cum bono suo nullum malum est admixtum, tum quia bonitas in eo non est habitus aliquis essentie additus, sed ipsa eius essentia. Non enim prius quidem est Deus, deinde bonus existit. Eadem enim essentia sua formaliter & Deus æquè est & bonus. Sic igitur unusquisque Deus ita suapte natura dicitur se ipse bonus, sicut Deus primus se ipso bonum. Proculus idem in elementis Theologie probat, unumquemque Deum ita esse formaliter bonitatem quandam essentialem, sicut primus est ipsum bonum super essentialiam. Item ad ipsam Deitatem tria hæc formaliter pertinere, bonitatem puram, potentiam non impeditam, cognitionem nullius incertam.

*De nullius mali causa, nunquam mutat  
formas, nullum fallit.*

**P**lato in Republica, tria dogmata Theologica ponit. Primum, si quisque Deus suapte natura verè bonus est, bonorum quidem semper est causa, mali verò



alicuius nunquam. Secundum, si verè potens est, penitus immutabilis. Tertium, si ad Deum, & potentia immutabilis, & veritas bonitasque pertinet, neminem vnquam fictionibus vllis mendaciisque fallit. Circa primum dubitatur, vnde sint mala. Si Deus nihil agit ad malum. Circa secundum, si Deus nullus vllò modo mutatur, quomodo dii sponte apparent? alias quidem figurati, alias non figurati? nisi enim hæc admiserimus, omnem sacrorum disciplinam, & opera sacerdotum funditus sustulerimus, & ipsa quoque visa, in quibus dii sponte in figuris alias aliis se offerunt. Circa tertium, quomodo responsa nonnunquam falsa reddantur? Iam verò multa in Oraculis mendacia deprehenduntur.

Respondetur ad primum. Malum nec ex Deo, nec ex alia causa, proprium inter existentia habere processum. Neque verò possibile est, vel malorum ideam ponere, vel materiam dicere causam esse malorum. Omnes enim ideæ tanquam species quædam intellectuales sunt atque diuinæ. Extantque exemplaria, tum essentialium, tum perfectionum ad essentialium pertinentium. Materia verò ex Deo producta est, tanquam necessaria mundo, neque malefica est. Quippe cum ad generationem vniuersi conducatur. Neque etiam est bonum, cum omnium vltima sit, sed in necessariis ordinem habet. Quicquid enim est, alicuius gratia tale est. Nullam ergo, vel specialem, vel materiale malorum causam, ponere fas est, nec omnino vnā eorum causam. Sed quemadmodum ipse inquit, dicendum est, particularia & dispersa malum inferre. Particularia quidem. Quoniam nullum vniuersorum, vt intellectus, anima, corpus, causa est malorum. Dispersa verò, quoniam non res vna quædam causa est malorum: sed (vt ipse inquit) aliæ malorum occasiones sunt quarendæ. In corpore quidem malum, id est morbus accidit, propter diuersa quædam absque mutua proportionē inter se confluentia, dum vnum quodque superare contendit. Malum quoque in anima propter differentes vitæ species, & contrarias inter se pugnantibus. Quibus pugnantibus ex aliis malum accidit aliis, vnoquoque quod suum est agente. Oportuit autem corpus fore tale, scilicet ex contrariis atque repugnantibus (vt foret) nonnihil etiam in mundo caducum. Atque ita perfectus mundus, ex omnibus videlicet constituitur. Animas quoque commixtionem hic habere, ne regiones

istæ mundi rationalium animalium expertes forent. Neve rationales vitæ in corporibus absque medio plantarentur, sed agerent, paterenturque irrationalium quoque conditiones, & talia quædam appetant, sentiant, imaginentur. His enim opus est mortalibus, si modo vel breue tempus in his sunt regionibus mansura. Dum igitur quod suum est, res quælibet agunt, mala subscindunt, neque propter aliud, nisi propter bonum. Quibus sane contingentibus vniuersum vitur oportune, euaduntq; hæc in bonum per ipsam videntium potestatem. Quapropter nullum est purum alicubi malum, sed est boni quodammodo particeps. Atque ita malum diuinitus quoque pendere quodammodo dici potest, tanquam quodammodo bonum. Sed interim ab aliis permultis particularibus agentibus, velut aduentitium huic incidere, accidere, inquam, multis ipsis atque diuersis. Ad dubium de apparitionibus, deinceps ita respondebimus. Cum superi permanent immutabiles nec admittunt, diuina quædam visa inde profiliunt, quæ generationem suam in loco nobis circumfuso suscipiunt. Cum enim spectatores quidem vrantur corporibus, dii verò sint incorporei, spectacula diuinitus emanantia, videlicet coram dignis aspectu, habent quidem aliquid à superis producentibus, nonnihil verò spectatoribus quoquomodo cognatū. Quapropter apparent, neque tamen omnibus. Et quibus apparent aspiciuntur duntaxat persulgida quædam animarum inuolucra. Et idcirco clausis oculis frequenter aspiciuntur. Quantum igitur extensa sunt, & in alio quodam huiusmodi, id est, aëre apparent, cognatè spectantibus euadunt. Quantum verò diuino sunt referata lumine, & efficaciam habent, deorumque vires imagine repræsentant, per ipsa perspicua symbola, id est signa, continuè velut suspensa dependēt à innimis producentibus ea. Quapropter & ineffabilia illorum sacramenta mysteriaque, per talia figurantur, dum formas varias inuentibus offerunt. Testantur hoc eloquia sacra, sacerdotem sic alloquentia. Diuina quidem omnia incorporea sunt, corpora verò propter his sunt adhibita. Quippe cum incorporea incorporaliter percipere nequeatis, propter corpoream naturam istam in qua estis vniuersi. Hæc ibi. Hæc igitur & apparent, & disparent pro voluntate deorum, ipsi verò sunt occulti, quales natura sunt interea permanentes, neque quicquam per hæc ostenta suscipientes, nec amittentes.

Quemadmodum intellectuales illæ species, id est, ideæ neque corporeæ sunt, vel compositæ, vel formatæ, dum per ipsa talia quædam efficiuntur, per ipsas videlicet minime tales. Omnis itaque Deus permanet, non formatus, quamvis sponte quasi formatum sese offerat. Non enim in ipso talis, quædam forma est, sed ab ipso, dum spectator non valet sine forma, quod est sine forma videre, sed pro modo suo sub forma prospicit non formata. Ad tertium dubium ita respondemus. Mendacium non est in superis, qui respondent, sed in his qui responsa suscipiunt, propter infirmitatem suam oraculum perversè suscipientibus. Atque hæc ipsa fallacia non contingit præter numinum voluntatem, volentium dignos dumtaxat votum consequi. Sunt & nonnulli, quibus veritatem ipsam puram penes deos manentem, scire non convenit, sed pati quod convenit per fallaciam penes se contingentem. Neque igitur veritatem dii ignorant, nec ipsa confundunt, sed confusione propter ineptitudinem nostram apud nos accidente, ad nostram utuntur utilitatem, iam verò ipsa oraculorum testatur historia, propter locum, vel tempus, vel modum, vel aliud interrogantis erratum, falsum in responsis accidere.

Quando Plato in Republica dicit, non solum omne diuinum, sed etiam dæmonicum semper esse veridicum, neque mentiri, intelligendum est de dæmone vero dictum atque naturali, non de dæmonio per habitudinem quandam sic appellato, quod mutationes plurimas sustinet, seducitque illos quibus factum est amicum. Quod verò secundum essentiam est dæmonum, cum & rationale sit, est omnino veridicum. Irrationale verò & ipsum quidem veritatis est impos, falliturque & fallit tanquam falsum, existimaturque genus fallax, quod tradit historia, sæpe decipere, dum vel subit oracula, vel inuocationes auscultat, vel vltro aliquibus occurrit. Idque totum est non natura dæmonium, sed habitudine. Tota religio & opera sacerdotum & historia, communisque hominum fama consentit, deos sensibilibus apparere, multasque offerre formas variasque figuras. Et aliàs quidem lumen proferre non figuratum, aliàs figuratum, & nunc quidem humana figura, nunc alia. Dum videlicet ubique permanet immota diuinitas. Ipsa namque Deorum simplicitas apparet multiplex intuentibus. Non quidem per illius mutationem vel fallaciam, sed propter naturæ conditionem, quæ pro modis partici-

pantium, definit Deorum proprietates. Cum enim Deus ipse participatus, in sese vnus atque simplex, aliter ipsum participat intellectus, aliter intellectualis anima, phantasia item aliter atque sensus. Intellectus enim indiuiduè, intellectualis anima reuolubiliter, phantasia formabiliter, sensus verò passiuè. Idque quod participatur per substantiam est vniiforme. Per participationem verò fit multiforme, est immutabile, apparet mutabile propter infirmitatem nostram. Cumque nullo modo sit graue, dum tamen implet, grauari videtur. Quemadmodum de pallade Poetæ tradunt.

Quale enim est quod capit, tale necesse est quod accipitur apparere. Quando igitur Deorum aliqui quasi hospites vel aliter nobis occurrunt, non est putandum apparentem mutationem illis inesse, sed indifferentibus susceptaculis imaginationem variam resultare. Atque hic vnus est modus, quo Poësis deos in se immutabiles, tamen nobis quasi mutabiles introducunt. Est & modus secundus, quando scilicet diuinum ipsum multas in se vires habens specierumque omnium plenum varia contemplantibus intelligibilia spectacula profert. Tunc enim tradunt, diuinum ipsum has vires in se continens demonstratam virium varietatem in formas varias commutare, aliàs aliam proferens, semper quidem secundum omnes agens, apparens tamen transitoriis animarum intelligentiis semper aliud atque aliud prepter formarum quas in se continet multitudinem. Atque hoc pacto. Protheus ille formam propriam fertur spectantibus permutare, alius deinceps aliusque apparens. Protheum igitur qui diuinus quidam intellectus est, virium omnium specierumque plenus, sub Neptuni serie computatus particulares animæ, quæ sub eadem serie nominantur Phocæ affiduè contemplantur, & nunc quidem alias, tunc verò alias species intuentur, suarumque cogitationum progressionem Protheo applicantes, formarum permutationem in Protheo suspicantur. Itaque videtur omnia fieri spectantibus ipsum quocunque terram incolunt, vel aquam vel ærem, aut ignem. Quot enim species in se continet, imò quot species ipse semper est æternè, totidem alternè videtur effici propter perceptionem intuentium iugiter alternantem.

Tertius apparitionis variæ modus est, quando varia vnus Dei visa non proueniunt propter subiectorum perceptiones neque propter varietatem virium diuina-

rum, sed quando Deus idem secundum ordines diuersos progreditur, & vsque ad vltima quasi descendit numero se multiplicans in ordinesque inferiores declinans, tunc rursus fabulæ tradunt, diuinum illud permutari in hanc ipsam speciem desuper in quam processum fecit. Hac itaque ratione Mineruam quidem minori, Mercurium verò lario aui garulæ, Apollinem rursus asturi se similem reddidisse ferunt. Ostendentes videlicet præstantiora horum Deorum ordines, in quos processerunt ab vniuersis. Quamobrem quando diuinas apparitiones describunt eas sine forma figuraque conseruare student. Vtpote quando Pallas Achilli quidem soli se declarauit, exercitui verò præsentī nequaquam. Vbi verò apparitiones Angelicas afferunt, deos alienis formis indutos proferunt, sed his quidem vniuersalibus.

Quemadmodum in humanam quandam speciem viro mulierique communem, nec hominis alicuius propriam, deuenisse canunt. Sed quando dæmonicas narrant processiones, tunc in singula quædam particulariaque mutationes descensumque in bruta non verentur asserere. Vltima enim ordinum sequentium deos per figuras huiusmodi declarantur. Iam verò consideratu dignum est, quam aperte cum ordine rerum talia congruant. Diuino namque conuenit ipsum simplex, Angelico autem vniuersale, dæmonico tandem particulare. Et illi quidem intellectuale, isti autem rationale, huic denique genus quoddam irrationale. In ipso enim dæmonum ordine vita quoque talis est implicita.

*Tres habitus statusque animarum separatæ.  
Contemplatiuus, Actiuius,  
Voluptuosus.*

**A**nimarum habitus differentes sunt etiam à corpore separatæ. Similiter vniuersi loca quæ inhabitant differentia sunt. Necessè est igitur animas sic ab instrumentis mortalibus segregatas, vt nec ad deteriora habeant habitudinem, neque mortalium perturbationum nugarumque sint plenæ, secum quoque ferre inuolucra olim lucida, adhuc pura sicut antea fuerant, neque materialibus vaporibus perturbata, neque ob naturam concreta terrenam. Animas autem nondum per Philosophiam perfectè purgatas, sed ad affectum erga crassum corpus inclinatæ, vitamque cum ipso communem adhuc affectantes, necessarium est talia quoque vehicula sua sibi suspensa videre, potentibus demonstra-

re. Vmbrosa videlicet materialiaque retroque pondere recedentia, plurimumque secum mortalis concretæque naturæ ferentia, quod perspicuè in Phædone narratur. Harum præterea animarum ad hanc vitam se adhuc inclinantium differentiarum multæ sunt. Quæ enim vitam magis practicam duxerunt, neque adhuc à vita eiusmodi destitute merito competens diligunt practicis actionibus instrumentum, segregatæque ab hoc indignatæ commercium percipiunt, vitamque hanc nostram separatæ vitæ præponunt, vtpote quæ secundum vitam illam agere nequeant, ad vitam videlicet practicam aptiores. Quæ verò ob vitam flagitiosam caducum corpus affectant, vitamque cum ipso nihil differre putant à vita in ipso ducta, conueniens est in locum vniuersi tenebrosi vltimumque deferri. Homerus, quemadmodum & Plato, animam distinguit ab idolo suo, & intellectum ab his quæ sunt animæ propria, & animam quidem idolo, inquit, vti, intellectum verò vtrisque diuinorem esse. Atque idolum & animam esse quodammodo notæ, etiam in hoc corpore. In quo & seorsum à quo curam prouidentiamque huius habere, idque naturaliter concupiscere, intellectum verò phantasticis formabilibusque motibus nostris non comprehendendi. Proinde quemadmodum animarum in cælum ascendentium instrumenta harmonicam vocem emittunt, motumque concinnum præferunt, sic sub terras descendentiū, iamque minus rationalium, sonus similis est lamenti, ferens videlicet affectuosæ phantasticæque vitæ dumtaxat imaginem. Inferorum præterea loca & iudiciarios sub terra status ad flumina, quæ Homerus Platoque describunt, non esse purandum imaginationes vanas fabulosæque tantum terriculamenta, sed quemadmodum animis cælestia repetentibus, multa variæque loca illic sunt pro meritis distributa, ita putandum est punitione quoque purgationeque indigentibus animabus, loca sub terris esse disposita, varios defluxus habentia ab elementis circumfusis terræ. Quos sane defluxus flumina vocauerunt. Esse denique differentes dæmonum ordines huic præfectos operi, partim quidem vltiores, partim castigatores, partim purgatores, partim verò iudiciales. Perterriti vero illic animas contentaneum est imaginatione dæmonum præsectorum, statuque pro meritis quidem habitibusque vario confusoque, & à superis Solis radiis segregato.

*Tres animæ vitæ, diuina, humana, ferina.*

**T**Riplicem animæ vitam ita summam disponere possumus. primam quidem optimam atque perfectissimam, quæ diis coniungitur, agitque ibi vitam superis cognatissimam, ac propter summam quandam similitudinem, vitam illis iam unitam, nec sui quidem iuris, sed Deorum, dum suum quidem subit intellectum, suscitatur autem interim ineffabile munus, characteremque uniformis illius substantiæ superiorum, copulanque simile simili, suum videlicet illi luminis, ipsi scilicet, vni super omnem essentiam vitamque extrahit, ipsum essentia suæ vitæque propriæ uniformem quam maximè.

Secundum vitæ gradum ponimus, in quo animus à vitæ diuina deuenit in seipsum, statuitque mentem atque scientiam principem actionis, ubi euoluit multitudinem rationum, omniformes specierum differentias contrahit, atque in idem & quod intelligit, & quod intelligitur, in se colligit, repræsentatque, & quasi per imaginem exprimit intellectualem essentiam, in vno quodam videlicet naturam intelligibilem comprehendens. Vitam denique tertiam arbitramur, quæ cum potentiis deterioribus commercium iam init, agitque cum illis, imaginationibus sensibusque ratione carentibus utitur, deterioribusque prorsus impletur.

*Distinctio rerum in genera quatuor, item de imaginibus atque umbris.*

**P**lato in septimo de Republica, rerum ordinem lineæ comparat, per continuationem rerum connexionem, quæ quidem ex mutua similitudine proficiscitur. Similitudo verò est unitas quædam in rebus proueniens ex ipsa simpliciter unitate vniuersi principio. Quæ sanè totum volens simillimum sibi facere, neque tamen simpliciter vnum saltem maximè fecit. Ad quam unionem confert etiam ipsa principij bonitas. Cum enim ipsius boni natura sit, quasi diffundere se per omnia per processum, vicissimque per appetitum ad se vnum omnia reuocare, meritò vniuersum summopere reddit unitum. Diuiditur autem mundana apud Platonem linea in partes præcipuè duas: scilicet in genus insensibile atque sensibile. Primum illud longe amplius est secundo, hoc videlicet in se continens. Illud iterum in res intelligibiles diuiditur, atque cogitabiles, id

est, in formas diuinas, atque Mathematicas.

Hoc autem in res quasi substantiales, atque imaginales. Substantiales quidem corpora sunt, imaginales autem imagines corporum atque umbræ. Imagines quidem, repræsentationesque corporum speculares, subiecto quodam indigent tres habente conditiones, densitatem, & lenitatem, atque nitorem. Opus quidem est densitate, ne influens apparitio, si in subiectum inciderit, nimis rarum subito transfluat, atque ita imago ex multis defluxibus non fiat vna. Lenitate verò, ne asperitas ipsa propter partes suas, partim quidem prominentes, partim verò profundas, inæqualitatis causa sit imagini componendæ. Nitore quoque splendido, ut imago alioquin exilem habens formam conspicua fiat. Sic enim & minutissimæ quæque in domus ipsius aëre compositiones sæpè patent oculis in radiis per fenestellas rimasque penetrantibus. Alioquin ob tenuem naturam nobis occultæ.

Dicendum ergo, secundum sententiam Platoniam in Sophista, apparentes imagines, esse substantias quasdam, quorundam simulachrorum machinatione quædam dæmonica fabricatas. Iam verò & umbræ, quas cum imaginibus commemorat quasi cognatas, eiusmodi naturam habent: sunt enim & ipsæ corporum figurarumque imagines, plurimamque sympathiam, id est compassionem, consensionemque cum illis ipsis habent, à quibus decidunt. Quemadmodum declarant quotcunque Magorum artes pronuntiant, promittuntque ad idola, umbrasque conficere.

Quid verò dicam imaginum umbrarumque vires per quas fiunt in animalibus ratione carentibus sæpe multa, quæ omnem superant rationem? Nam hyenam ferunt calcantem canis in alto sedentis umbram, illum ex alto præcipitare statim atque deuorare. Atque Aristoteles, inquit, mulierem in purgatione menstrui sanguinis constitutam scdare sanguine quodam obiectum, speculum & imaginem. Imagines denique substantias quasdam esse Plato confirmat, ubi ait: Sicut cogitabilia ad intelligibilia sese habent, sic imaginalia ad visibilia corpora. Cogitabilia verò, id est, Mathematica, res in se quædam speciesque sunt, similiter imagines, cum sint naturales quidam ex rebus naturalibus effluxus, naturam quoque suam habent.

*Quomodo bonum est super essentiam. Et quomodo cognoscatur.*

**P**Lato in sexto de Republica ita divina comparat. Solem quidem ipsi bono, lumen verò Solis veritati à bono mananti, colores ex lumine dependentes, formalibus idealibusque rerum rationibus, à bono sub veritate pendentibus. Oculos autem & genitos & illustratos à Sole, comparat intellectibus ad bonum similiter se habentibus. Subdit præterea. Quemadmodum Sol super inferiorum visibilium generationem extat; ita bonum super ens & essentiam. Item, sicut Sol lumenque suum colores superat atque visus, ita bonum veritasque boni lumen, est super ideas, entia, mentes. Denique sicut Sol visibilibus nostris & oculis, non solum actionis perfectionisque causa est, sed etiam generationis, naturæ, virtutis, ita bonum est omnium tam intelligibilibus quam intellectibus author. His itaque omnibus est superius. Cum igitur ipsum bonum sit intelligibilibus, intellectu, veritate superius, non eadem ratione qua intelligibilia cognosci potest, sed diuino quodam intuitu percepto neque intelligentiam excedente, quam Plato illustrationem animæ nominat. Tunc videlicet ita diuinitus illustrante postquam à bono per negationem segregauerit, omnia quæ sunt post bonum, vicissimque rite admodum comparauerit. Hac scilicet ratione reflectens erigensque se in ipsum, quasi facta iam resupina, quæ hætenus fuerat, quasi prona. Sol inter mundana videtur ingentus. Quoniam nihil amittit suum, nihil alienum rursus admittit. Cætera verò omnia radios ab illo novos semper accipiunt, dum ille proprio centro reuoluitur, atque ita cœlestia circum & inferiora collustrat. Sol igitur qua ratione talis est, mundanis omnibus dominatur, quantum verò corpus & mobile alicui subest, supremæ videlicet, quæ sphaera dicitur circuitum identitatis habere. Hinc enim & Sol ipse fertur, sphaera rursus illa ad circuitum refertur sapientissimum, id est, mentem. Inter hæc memento sicut in rebus diuiduis est indiuiduum velut unitas atque punctum, sic in rebus corruptibilibus incorruptibile aliquid esse.

*Bonum triplex, scilicet in nobis, in idea, super ideam.*

**P**Lato tres venerandi boni considerat gradus. Vnum quidem in omnibus, scilicet statum quandam vitæ ex intelligentia & voluptate rite permixtum, alium autem

inter ideas, alium denique super ideas. Inter ideas enim, aliæ quidem rerum essentias constituunt, atque definiunt, aliæ verò perfectiones suas essentis adhibent. Illarum præterea prima est ens & essentia. Quod quidem genus est ad omnes alias ideas essentielles, id est, quæ ad constituendas essentias pertinent, velut ad ipsum animal, ipsum hominem, ipsum equum. Idearum verò ad perfectiones omnium pertinentium, prima est ipsum non simpliciter bonum sed ideale, quod similiter genus est idearum omnium ad perfectiones rerum quomodolibet attinentium, quales sunt ipsum pulchrum, ipsum iustum & sapiens atque similia. Sicut ergo essentia rerum perfectiones suas origine quadam antecedunt, esse enim naturaliter præcedit bene esse, ita ens & essentia in ipsa idearum serie ipsum antecedit ibidem ideale bonum. Sed ipsum tandem simpliciter bonum est ente superius, simulque imparticipabile bonum. Nam bonum inter ideas imparticipabile quidem est, sed est interim cum essentia, siue sub ente. In nobis tandem & sub essentia est, & participabile quidem est, sed interim cum essentia siue sub ente. In nobis tandem & sub essentia est & participabile bonum. Iam verò communis omnium consensus definiens bonum, cuius gratia omnia & quod appetunt omnia, vaticinari videtur illud nec vllius gratia esse, nec aliud prorsus appetere. Illud itaque necesse est esse eos aliquod, nec aliquod bonum in ente. Omnis enim essentia bonum appetit, id est, esse secundum naturam, ac bene perfecteque sese habere. Bonum quoque in essentia illius, ipsius substantiæ gratia est quesitum, ut videlicet secundum naturam perfecte se habeat. Nec est bonum simpliciter, sed alicuius dumtaxat & in aliquo bonum. Denique, ut summarim dicam, illud ideale bonum in ipso ente essentiaque tanquam pars alicuius, & in aliquo totius gratia collocatum. Itaque super illud est ipsum simpliciter bonum.

*De demonibus.*

MARSILIVS FICINVS

Philippo Carducio dilectissimo  
suo, S. D.

**C**Um Procli Platonici commentarium in Platicum Alcibiadem, è Græca lingua in Latinam non tam ad verbum, quam ad sensum interpretarer, recordarerque Platicam de demonibus sententiam summarim desiderare, hanc ibi repperam, mittere ad te constitui. Lege feliciter.



*Philosophia cum fortuna & diuitiis non  
coniungitur.*

## MARSILIVS FICINVS

Philippo Valori Oratori apud Pontifi-  
cem, Florentino, S. D.

**I**Nimici hominis domestici eius, dome-  
stici quidem mei, qui mihi sunt multi,  
multumque molesti, quoniam neque Phi-  
losophici, neque Philosophico victu suppel-  
lectilique contenti, frequenter obiiiciunt,  
ceteros Medicæ domus clientes atque  
clientulos, paucis annis inde quam pluri-  
mum accepisse, me verò amplissime huius  
familie familiarissimum, ac (vt ita dixerim)  
clientissimum, multis annis reportasse non  
mulum. Sed audi parumper, mi Valor, no-  
stram hanc ad meos Apologiam. Cæteri  
quidem amici Medicum, nondum quan-  
tum voluerant, acceperunt, ego verò quan-  
tum voluissem, si modo petissem, & habeo  
certe quantum volo. Illi plerumque preca-  
rio, ego gratis. Medices item aliis aliena  
dederunt, mihi sua. Nos igitur ita causam  
apud domesticos nostram perbelle proba-  
mus. At illi, quod mihi molestissimum est,  
non comprobant. Oportuerat enim iam-  
diu vel meos vnâ mecum quandoque fore  
Philosophos, vel me non fuisse Philoso-  
phum. Sed faum videtur ab exordio re-  
rum, neque Philosophos vllos vnquam fore  
diuites, neque rursus diuites facile fore  
Philosophos. Nullum enim fuisse fertur Mi-  
neræ cum Iunonē commercium. Nec eis-  
dem Iupiter & Phœbus, Venusque fauent,  
quibus Mercurius simul atque Saturnus.  
Neque cum sapientia rerum contemplatri-  
ce, facile rerum domina fortuna consen-  
tit. Porro vñum est necessarium. Vbi in-  
tenderis ingenium valet. Ingenium igitur  
& fortuna diuisum in nobis habent impe-  
rium, hoc quidem in animi cultum pluri-  
mum dominatur, hæc verò quam pluri-  
mum in rebus externis. Hinc & bona fortu-  
næ dicuntur. Sed in corpore vtrumque for-  
sitane æquè potest. Verum non licet Episto-  
læ nunc ultra philosophari, negotium enim  
iam aliud vrget.

*Vbi plus fortuna, ibi sapientia minus, at-  
que vicissim.*

## MARSILIVS FICINVS

Bindacio Recasolano cini optimo & di-  
lectissimo suo, S. P. D.

**A**Ristotelicum illud, vbi plus intelli-  
gentiæ, ibi fortunæ minus, atque vi-

cissim, vbi plus fortunæ, illic minus intelli-  
gentiæ, plerique forsitan sic accipiunt, vt sa-  
pientissimi quique philosophique minime  
fortunati sint, quod & carmina Pythagori-  
ca comprobant & res ipsa confirmat, nec  
non Astronomica ratio, præcipuè per Mer-  
curium atque Saturnum Philosophiam si-  
gnificari putant, hoc verò cum Ioue, Sole,  
Venere, affluentiam rerum significantibus  
nullum officij habere commercium. Deni-  
que legitimi veritatis contemplatores, &  
negligunt fortunæ bonâ, & ipsi fortuna-  
tissimis negliguntur, neq; principibus pla-  
cent, neque vulgo probantur. Vt non mi-  
rum sit, eos minimum habere fortunæ. Vi-  
cissim verò fortunatissimi quique plerum-  
que negligunt sapientiam, plurimumque  
temere & improvide viuunt, fortunæ vide-  
licet afflatu confisi. Ego autem & superio-  
rem interpretationē minime respuo, vtilius  
tamen atque diuinius Aristotelicum illud  
interpretarer. Cum enim compertum ha-  
beamus, homines quo prudentiores sunt,  
eo minus casu viuere, paucioraque in fa-  
milia rebusque suis agi fortuito, coniectare  
proculdubio possumus, Deo sapientissimo  
rerum omnium authori, nihil vsquam casu  
contingere, sed omnia prouidenter esse dis-  
posita. Atque vicissim, cum videamus cœ-  
lestia & naturalia omnia extra fortunam  
ordine certo disposita, concludere licet,  
summatim his omnibus sapientiam domi-  
nari.

*Proœmium in comparisonem Solis ad Deum.*

## MARSILIVS FICINVS

Eberardo inclyto Duci Vuirtember-  
genſi & montis Peligardi  
Seniori, S. P. D.

**M**artinus noster Vranus, id est, cœ-  
lestis, reuera cœlestium contempla-  
tor, longo mecum sermone tractauit, qua-  
lis Sol est inter sydera, talem, extra contro-  
uersiam, te esse inter omnes Germaniæ  
principes. Quibus equidem laudibus, quasi  
quibusdam virtutis tuæ radiis inflammas,  
Epistolum illud iam pridem ad te dedi, in-  
gentis quidem in te nostri pignus amoris.  
Sed non pignus ( vt par fuerat ) ingens.  
Quamobrem vt aliquanto vberius, & sum-  
mæ dignitati tuæ & meo satis desiderio fa-  
ciam, ad ipsum Germaniæ Solem, nunc  
Platicum & Dionysiacum Solem mitto,  
mirum te amorem nostrum splendore pas-  
sim declaraturam. Quemadmodum verò  
Mercurius Phœbi munera ad hominum  
ingenia transfertita Phœbum hoc munus  
nostrum ad vos feret Ioannes Streler, no-

bis quasi Mercurius alter. Leges ergo felicitet Phœbee princeps, quæ de comparatione Solis ad Deum partim Plato Dionysiusque Arcopagita tractarunt, partim ego interpretor, atque commentor. Vix felix in hac umbra vitæ; post hac Sol tandem perpetuò fruitorus. Vale.

*Laudes seculi nostri tanquam aurei ab ingentis Auerrois.*

MARSILIUS FICINUS

Paulo Middelburgensi insigni Physico & Astronomo,  
S. P. D.

**Q**UÆ Poëtæ quondam de sæculis quatuor cecinerunt, plumbeo, ferreo, argenteo, aureo, Plato noster in libris de Republica ad quatuor hominum ingenia transtulit, disputans aliis hominum ingeniis, plumbum quoddam, aliis ferrum, aliis argentum, aliis aurum naturaliter insitum. Si quod igitur sæculum appellandum nobis est aureum, illud est proculdubio tale, quod aurea passim ingenia profert. Id autem esse nostrum hoc sæculum minime dubitabit, qui præclara sæculi huius inuenta considerare voluerit.

Hoc enim sæculum tanquam aureum,

liberales disciplinas fermè iam extinctas reduxit in lucem, Grammaticam, Poësim, Oratoriam, Picturam, Sculpturam, Architecturam, Musicam, antiquum ad Orphicam Lyram carminum cantum. Idque Florentiæ. Quodue apud Præseos fuerat venerandum, sed iam propè deletum, sapientiam coniunxit cum eloquentia, cum arte militari prudentiam. Idque potissimum in Federico Urbinate Duce, tanquam in Pallade declaravit, filiumque eius & fratrem virtutis illius effecit hæredes. In te quoque mi Paule perfecisse videtur Astronomiam, Florentiæ quinetiam Platoniam disciplinam in lucem è tenebris reuocavit. In Germania temporibus nostris imprimendorum librorum inuenta sunt instrumenta. Tabulæ præterea, quibus hora (vt ita dixerim) vna, per omne sæculum tota cœli facies aperitur, vt prætermittam machinam Florentinam, quotidianos cœlestium motus agentem. Iam verò Germanicas tabulas Micheloëtius noster diligenter expressas ad vos affert, inclyto Duci vestro dicendas. Cœleste quidem munus, cœlesti principe dignum, dignum præterea (vt arbitror) quod & abs te cœlestium contemplatore probetur, dignum denique commendatione apud vos nostra. Valete. Die XIII. Septembris. M. cccc. xcii.

# MARSILII FICINI FLORENTINI EPISTOLARVM

*Ad Hieronymum Rossium, dilectissimum suum,*

P R O O E M I V M.

Marfilius Ficin. Hierony. Rossio dilectissimo suo, S. D.



**Q**UOD duodecimo Epist. mearum libro finem imposuissim, cogitaremque; cuiam in primis hunc inscriberem, rationi consentaneum fore censeui, vt diuturni operis finem tibi singulariter dedicarem, ad quem summam uniuersum opus

iam diu destinaueram; vt ad finem. Præterea, vt totum Epistolarum mearum studium in te dent, que conquiescat, vt in fine decreui: quotcunque etiam posthac Epistolas sum scripturus; ad librum hanc duodecimum, vel longissimum pertinere, summamque suo Rossio, vel Rossio potius titulo contineri. Lege feliciter, & felicissime viue, certè feliciter à nobis amate.

# MARSILII FICINI FLORENTINI EPISTOLARVM

(.:)

LIBER XII.

(.:)

*Nullus mala penitus & curas extirpare potest.*

MARSILIUS FICINUS FLORENTINUS

Ioanuiſtorio Soderino, & Francisco Diaceto

Conphilosophis ſuis, S. P. D.



Queritis quid ſibi velit Euangelicum illud; Neceſſe eſt vt veniant ſcandala. Idem profe- cto quod & Platon- icum illud, mala peni- tus extirpari non poſ-

sunt, ſed circa mortalem hanc regionem neceſſario reuoluuntur. Mitto equidem nunc, quot mala nobis inferat fatum, na- tura, fortuna, elementa, homines, ani- malia. Multo certe grauiora ſunt, quæ ipſi nobis imprudenter inferimus. Iam verò mi- rum videri non debet, homines vel nego- tioſæ vitæ deditos, vel libidinibus manci- patos, malis innumerabilibus opprimi. Quippe cum ipſi ſe fato paſſim & fortunæ ſubiiciant, & quaſi ſponte perturbationi- bus frequenter occurrant. Illud certe ni- mis eſt mirandum. Viros quinetiam qui voluptuoſa & actiua inſuper vita neglecta, ſe totos contemplatiuæ dederunt, per- turbationibus agitari. Cauſas enim ſolici- tudinum deuitariſſe videntur ſæpè tamen grauioribus curis quam vel voluptuoſi, vel actiui ſolicitantur. Contemplatores enim ſpretis humanis, aut ad religionem, ſan- ctimoniamque, aut ad Philoſophiam ſe- ſe conferunt. Vtrobique verò incidunt in Scyllam, cupientes vitare Carybdim. San- cti enim deliramenta nugaſq; mortalium fugientes, in dæmones incidunt tentato- res. Non enim in his eſt certamen aduer-

ſus carnem & ſanguinem, Paulus inquit Apoſtolus, ſed aduerſus maleficos quos- dam ſpiritus aëris caliginofi tyrannos. Quo fit vt ſanctos dum Deus exercitat dæmonia vexent. Quid verò de Philoſophis dicam? Nonne vel negotia Iouis, vel oblectamen- ta Veneris reſpientes, in Saturni tædia ſæpè moeroreſque corruūt & atram bilem? Cui quidem ingenti malo, Democritus, Plato, Ariſtoteles ingenioſiſſimos quoſq; obnoxios arbitrantur, vt pœnas illas quo- dammodo quas furti cœleſtis Prometheus in monte Cauſaco contemplator expen- dit, pendere videantur. Tanto verò con- templatores vtrique grauioribus ſæpè ſub- eunt curas, quam vel negotioſi, vel volu- ptuoſi, quanto validiores incidunt vexa- tores.

Quamobrem, ſi cuiſmodi viri, qui ma- ximè omnium mala declinaturi putantur, in mala ſæpius grauiora labuntur, nemo proſecto conſidere poteſt, mala mortali- bus vnquam poſſe virari. Sed hoc forſitan intereſt, quod ſuperiorum quidem illorum mala paulatim in peſſima conuertuntur. Hi verò ſi prouidenter profeſſionem ſuam conſtanterque proſequantur, tandem au- thore videlicet & promittente Deo. Qui ſeminant in lachrymis, in exultatione me- rent. Euntes ibant & fiebant, mittentes ſemina ſua, venientes autem venient cum exultatione, portantes manipulos ſuos.

Hæc verò commemorare vobis, dilectissimi Conphilosophi mei, operæpretium fore censui, ut neque confidatis vos dulces Philosophiæ saporibus absque amore quodam degustaturos, neque rursus desperetis, vel amaritudinem ipsam, autnore Deo, quandoque, quod & in pomis sapè natura facit in dulcedinem posse conuerti. Valete felices, & in contemplatione vestra (quemadmodum coepistis) prudenter constanterque perseuerate. Die vigesimo septimo Septembris. M. cccc. xcii.

*Solem non esse adorandum, tanquam rerum omnium authorem.*

MARSILIUS FICINVS

Eberardo inclyto Comiti, Vuirtembergenfi & montis Peligardi Seniori, S. D.

Socrates in castris sapè sub diuo Solem suspiciens orientem stetit attonitus in eisdem vestigiis, immotis membris, inconniuentibus oculis, statum more, quotusque Solem saluaret iterum resurgentem. His ergo Platonici similibusque signis adducti Socratem fortè dicent, Phœbeo quodam dæmone statim ab ipsa pueritia ductum, Phœbum ipsum venerari summopere consueuisse. Eademque ratione sapientissimum Græcorum omnium, Apollinis Oraculo, iudicatum. Ego verò quid de Socratis dæmone, seu genio, siue Angelo, affirmandum maximè videatur, in præsentia prætermittam. Id certè ausim affirmare, Socratem in eo mentis excessu non solem quidem hunc admiratum fuisse, sed alterum. Cui enim admirationem sola nouitas asferre soleat, quid tantum stupeat hinc admirabundus Socrates, quem & quotidie videt, cuius & motus omnes viresque iamdiu, Mathematica simul, & Physica ratione comprehenderat. Quem (teste Platone) non Deum primum, sed Dei Filium appellauit, non Filium, inquam, Dei primum, sed secundum, iamque visibilem. primum namque Dei Filium non solem hunc oculis manifestum, sed alterum, hoc lōgè superiorem, intellectum scilicet primum, solo contemplabilem intellectu. Socrates igitur sole cœlesti nonnunquam admonitus, solemque supercœlestem auguratus, & illius maiestatem contemplabatur attentior, & patris illius incomprehensibilem bonitatem admirabatur attonitus. Hunc Iacobus Apost.

patrem luminum appellauit, luminum, inquam, plusquam cœlestiū, atque cœlestium, apud quem non sit transmutatio, neque vicissitudinis obumbratio. Nam & supercœlestia illa facta putat naturaliter mutabilia, & cœlestia quotidie per noctium vices obumbrari non dubitat. Quamobrem omne datum optimum, scilicet menti naturaliter insitum, & omne donum perfectum, videlicet post naturales dotes adhibitum, non à Sole hoc stellisque mundanis, sed altius ab ipso patre luminum descendere, censet. Nam intelligentiæ viribus, quasi gradibus quibusdam, non quidem cœlitus, sed desuper acceptis freti, super cœlos ascendimus, ibique multa cœlis præstantiora, cognoscimus, amamus, & colimus, ipsumque cœli fabrum ante omnia veneramur. Neque tamen possemus intelligentia incorporeum aliquid cœloque melius intelligere, vel amare, si cœlitus tantum intelligentiam haberemus. Iam verò ne quis Solem, Lunam, Stellas, nimum, & adoraret, & tanquam intellectuallium munerum authores, & patres veneraretur, prudenter admonuit Solem hunc non esse vniuersi principium. Missas in præsentia faciam rationes, quibus in Theologia nostra principium vniuersi, nec corpus esse, nec animam, nec intellectum, sed aliquid admodum excelsius, affirmamus. A quo quidem Sol cœlestis longissime distat, ut vmbra quædam illius esse iudicetur, potiusquam imago.

Rationes autem quas Iacobus hic attingit breuiter, in præsentia perstringam. Cum status tanquam principium, & rector, finisque metionis, sit omni motu perfectior, certè Deus ipse principium & finis & rector omnium, mobilis esse non potest. Sol autem est assidue mobilis. Præterea principij virtus tanquam immensa, fortiter attingit omnia, nec vsquam cohiberi potest. Solis autem virtus per radios agens præpeditis passim radiis impeditur, defectum patitur obiecta Luna, sæpe nubibus coercetur, terrena densitate repellitur, distantia loci debilitatur. Sol ipse, qui etiam minimam quædam est particula mundi, angusta quædam sede tenetur. Trahitur à sphaera rursumque retrahitur. Contraque sphaeræ propriæ impenim à sphaera semper superiore reuoluitur. Contrariis signis impeditur & stellis, & aspectu malorum nonnunquam debilitatur.

Denique, principium vniuersi omnia vbique & semper, & in omnibus operatur. Sol autem nec mundi globos ipse facit, nec quæcunque frigida vel humida

sunt vel densa similiaque ipse virtute propria potest efficere. Neque similes in cælo virtutes vllam à Sole ducunt originem. Ceterum, quamuis Sol ab autore mundi longissime distet, cœlestia tamen omnia ad Solem vnicum qua rectorem in cælo mensuramque diuinitus redacta videntur. Vt hinc prorsus admoneremur, vt omnia quæ in cælo sunt & sub cælo & super cælum, ad vnum cunctorum principium similiter referri, considerantes tandem hoc ipsum ea saltem obseruantia veneraremur, quæ cœlestia Solem.

*Copula Philosophia cum legibus, quod felix & nobilis sit Philosophus.*

MARSILIUS FICINVS

Martino Vranio Prænygero,  
amico vnico, S. D.

**P**hilosophanti quidem mihi semper, nunquam verò Legibus incumbenti, Professores Legum duo sunt amicissimi, In Italia quidem Ioanuiſtorius Soderinus, In Germania verò tu in primis optime mi Martine, & vtrique cum insigni facultate Legum mirum sapientiæ studium coniunxistis. Dixerit ergo quispiam: Quænam Legibus cum Philosophia cognatio? Quæ videlicet Ioui Legum authori, cum Saturno Philosophiæ Duce, id est filio cum patre necessitudo. Mitto nunc Astronomos afferentes, Iouem quando Saturno coniungitur, nouas differre Leges. Præsertim quoties in ipsis cœli cardinibus, triplicitatumque capitibus, coniunguntur. Nonne Poëtæ præsci, veteresque Theologi, Saturnum in additis contemplatorem fingunt, legesque & iura post diurnam contemplationem excogitantem? Quæ deinde Ioui filio actionum duci tradat obseruanda ciuibus mandaturo. Homerus quoque Minoem, inquit, Regem conditorem Legum in Iouis antrum, annis nouem secedere solitum, ibique à Ioue leges accipere. Nemo verò antiquorum mysteriorum peritus proprium Ioui semper publico dedicauerit antrum. Hoc igitur nihil aliud esse videtur, quam Saturni ipsius semper additum domicilium vel sacellum, in quo quidem & Iupiter constitutus cum Saturno collega regem Minoem Legibus instruit, mox populū formaturis. Sed misso iam officio legum, sapientiæ studium prosequamur. Multos equidem ad hoc totis viribus capessendum sum per meas Epistolas exhortatus. Vos autem iam in hoc ipso prouectos non adhortabor equidem nunc, sed

potius confirmabo. Aut certe nos ipsos consideramus, aut suspicimus Deum, aut cæteros homines circumspicimus. Si forte nos ipsos, sola sapientia facit, vt & nos ipsos denique cognoscamus, & soli nobis cum habitare possimus propriis semper contenti diuitiis. Si verò Deum, sola quinetiam sapientia Deo similes efficit & amicos contemplantes videlicet assidue, quæ Deus ipse fecerit contemplando, ipsumque tanquam bonorum omnium autorem cognitum venerantes. Si autem homines, sapientia quoque sola sapientem populis, regibusque tandem constituit regem & quasi numen denique generandum. Cum igitur sapientiæ studium felicem prorsus efficiat animum, nunquid præterea nobilem vel efficit vel declarat? Si Platoni licet credere, nobilissimum est profecto Philosophorum genus. Nam & aureum esse inquit, & ab ipso Ioue mundi totius opifice reuera profectum, si Stoicis fidem adhibes, nobilitatem Philosophorum ex posteritate cognoscere. Solus enim fore asserunt immortales. Prophetæ denique Danieli non credere nefas. Fulgebunt, inquit ille, docti, sicut splendor firmamenti. Et qui multos erudierint ad iustitiam tanquam stellæ in perpetuas æternitates. Firmamentum verò non octauum dumtaxat cœlum, sed totam sphaerarum molem significare videtur, stellarum planeiarumque omnium firmamentum. Hoc autem etiam seorsum à stellis atque Planetis quodammodo suapte natura fulget, sed rariore quadam & sparsa, & candida luce, propterea minus oculis manifesta. Eiusmodi quadam luce fulgebunt, & hic & in patria docti reuera sanctique viri, etiam si nullos vnquam ipsi docuerint. Quid verò non solum sibi ipsis diuina contemplati fuerint, sed alios insuper palam erudierint, legesque dederint ad iustitiam obseruandam, manifestiore præ cæteris fulgore lucebunt, stellarum instar clarissime coruscantes. Neque id quidem ad tempus certum, sed per omne tempus, nempe per totum mundi tempus solum, sed per ipsum diuiniore æternitatis vsum, nunquam videlicet interruptum, sed perpetuum penitus atque continuum. Iustum enim esse videtur, vt qui publici diuinique boni fuerint authores semper sint hominibus profuturi, lumenque sibi diuinitus datum non absconderint, sed ad commune bonum prorsus ediderint, æterno quodam splendore diuinitus, bonoque donentur. Vale.



*Cur semper eadem & antiqua tractem.**Similitudo Mercurij cum Saturno.*

MARSILIUS FICINVS

Philippo Valori Oratori apud Pontificem, Florentino, S. D.

**H** Ester no vespream Franco nostro dixeram vale, tuque mihi ad Valorem nostrum eris Epistola. Mox autem (nescio quomodo) sum compulsus vespertinis literis addere matutinas. Quod quidem & amantes facitare plerumque solent, singulis Epistolis non contenti. Francia igitur (vt ita dixerim) Epistola nostram tibi valitudinem nuntiabit. Studiorum verò nostrorum rationem quam per negotia non poterat Francus tunc accipere, Epistolum præsens tibi reddet. Requiris, video, quid nunc agam. Quod equidem iamdiu, mi Valor agebam. Eodē semper, nescio quo fato, reuolutore. Significator nobis, ne dixerim ductor (vt scis) ab initio Saturnus sub Aquario ascendens extitit. Saturnia igitur & antiqua perpetuo retractamus. Cum primum olim rediit ad Aquarium, prisca Platonis opera sub magno Cosmo semel interpretati sumus.

Iam Saturnus iterum reuersus est ad idem, ad idem nos quoque reuertimur, Platonem iterum post Laurentianum Plotinum interpretamur. Sed grande opus (vt par erat) grandioribus commentariis declaramus. Commentariolum in Timæum in agro Maiano apud te compositum, latius nunc nobis excreuit, mox Parmenidem similiter aggressurū. Magnus ille patronus noster Petrus Medices spem nobis firmā dedit se resurgenti Platoni rursus aspiraturum. Arque iam ita prorsus inspirat, vt Plato noster hactenus errabundus, sit iam super hanc Petram, suam academiam fundaturus. Huic igitur isthuc ad Pontificem accedenti per ocium hac de re nostro nomine gratias quam plurimas agito. Penes hunc quasi tuum Iouem, tuos agnosces Dioscurus, Bibienos, Castorem, atque Pollucem, his ergo post illum nos etiam commendabis. Finem verò faciam, non inquam, Epistolio sed iam Epistolæ, si tibi prius significauero, Martianam illam causam, imò iam tarditate Saturniam, post Medicam auctoritatem, tua insuper opera iam esse confectam. VII. Nouembris M. cccc. xci.

MARSILIUS FICINVS

Philippo Carduccio dilectissimo suo, S. D.

**C**vm Epistolæ à me compositæ, iam Comnestibi transcriptæ, propemodum per tabellarium ad te perferendæ forent, decreui Mercuriale opus ad Mercurialem amicum non absque auspicijs Mercurialibus aduehi. Vt siquid in negotijs eiusmodi cœlestia valent & ocius ad te peruenire, & celerius legeretur, præterea vt diutissime relectum consideraretur, Mercurio Saturnum insuper addidi, siue comitem, siue ducem. Legi hodie rursus in x. de Republica Mercurium Saturnumque colore id est luce cœlestium omnium inter se simillimos esse, vt non mirum sit intelligentiæ quoque luce ita consimiles esse, vt alter quidem ad sapientiam exhortetur, alter verò Deo videlicet altius aspirante, perducatur. Dei quidem imaginem esse Solem volunt. Deus ipse est author sapientiæ primus, sapientiæ significatores, Mercurius & Saturnus, imaginis diuinæ comites, minime omnium à Sole discedunt, dum videlicet & Mercurius sub Solis splendore ferme semper incedit, & Saturnus ab Ecliptica Solis via minime omnium præuicari videtur. Hos Astronomi natura quadam similes esse putant Mercuriumque ædibus & finibus & aspectu Saturni gaudere. Hic (vt opinor) efficitur, vt ferme omnes, qui à Mercurio suum iter professionemque exordiantur, solum desinant in Saturnum. Vtinam tu mihi Carduci à Mercurio ad Iouem etiam quandoque peruenias. Vale. Die xiii. Nouembris. M. cccc. xcii.

*Apologia in librum suum de Sole, & lumine.*

MARSILIUS FICINVS

Florentinus Philippo Valori Oratori apud Pontificem, Florentino, S. D.

**L**ibrum de Sole clarissimo Petro Medici destinatum domi iam diutius retinebā atq; contra præceptū Euangelicum, sub modio lucernam, siue Solem ferme iam impius abscondebam. Sed petrus ille Nerus, quem in Epistolis nostris frequenter candidissimum appellauimus, piū existimauit fore, vt lumen hoc quam plurimis, vt Deus præcipit, effulgeret. Itaque

HH h h

candidissimo viro ad quem potissimum cura de lumine pertinet & candore libentissime parui. Atque ultra mysterium magnanimo Petro Medici commendatum permisi librum opera Petri Neri palam impressoribus exprimendum. Ecce igitur mi Valor luce mihi charior palam Sol hic quantuluscumque meus iam exoritur. Sed forte mox suborituris nebulis offendendus, vel etiam futurus noctuis quibusdam vespertilionibusque molestus. Nebulae quidem aut venti protinus dissipabunt, aut Sol ipse cum ascenderit altius, extenuabit atque dissoluet. Vespertilionibus autem sub lumine caligantibus caecutientibusque consulito, si modo consilij sint capaces, ne lucem quidem incusent cæteris salutarem. Sed ipsi splendorem hunc effugiant, suo more potius, atque ( vt par est ) indigni lumine assidue delitescant. Bona quidem spe Valorem meum ad hoc certamen prouoco, Valorem inquam non solum contra bubones, sed aduersus etiam inania monstra. Herculis instar validissime pugnaturum. Soles enim Boëtianum illud pro Hercule dictum in ore frequenter habere cuperata telus sydera donat. Herculem; veteres introducunt, virum Solis alumnum, pro vera gloria, pro veritatis splendore, quæ Solis ipsius munera propria & officia sunt, labores duodecim signa zodiaci subeuntem, Ito nunc alacer mi Valor in prælium, propugnatores enim illic ( scio quid loquar ) tres saltem inuictos habebis. Politianum Herculem inquam, Phœbeumque Picum, Amphionemque Landinum. Hi profecto qua strenuè pro mea vita iam triennium certauerunt, tam feliciter deinceps pro hoc meo, quantuscumque est, splendorem pugnabunt. Die II. Ianuarij. M. cccc. xciii.

*Sape in caelestibus gemini sunt, item  
Soles duo.*

MARSILIUS FICINVS  
Martino Vranio Germano, amico  
vnico, S. D.

**I** Vuat vnà tecum mi Vranie vir coelestis coelestia saepe tractare. Non solum in firmamento gemini sunt illi dioscuroi, sed inter planetas sunt quoque germani, Mercurius enim quasi minor frater est Saturni, consimili enim ( vt Plato inquit ) luce fulgent. & ingenijs utrique præsunt, Germania Iouis est alma Venus, Phœbi quoque Phœbæ. Mars autem quasi superbior communionis expers, Solem ipsum non tam

comitatur quam æmulatur. Præter enim feruorem suum Solis æmulum quasi rivalis, lumen ( nescio quod ) infundit Lunæ paucis admodum obseruatum. Post hæc autem æternus aër quasi Iupiter alter frater & maritus est sequentis aëris quasi lunonis. Sed vt reuertamur ad Solem. Quid mirum? siquidem in cælo sunt gemini Soles, geminos quoque penes me quasi Soles esse natos, principio quidem maiorem, deinde minorem. Minorem igitur ipse orator ad Pontificem proficiscens præterita æstate apud nos vidisti Florentiæ, qui & te hinc in Germaniam abeuntem, è vestigio sequutus est, clarissimum principem tuum Eberardum salutaturus. Alterum verò Solem qui inter Platonicas commentationes gaudior iam coaluit, iure sibi vendicat petrus Medices, & qui & Platonica iure sibi omnia vendicat, lumen similiter, ô mi Vranie mihi geminum inter lares eluxit, minus atque maius. Minus quidem iamdiu Phœbo Capellæ fulsit, maius vero nunc petro Medici clarissimo lucet. Vtrumque igitur vir coelestis feliciter contemplare. Contemplaberis verò feliciter, si luminis huius similitudine platonicum hoc quod sequitur de diuinitate mysterium memoriæ commendaue- ris. Quæ minimum lumen habent non aliter cernere consueuimus quam passim quærendo propius accedentes. Solem verò visuri, non tam quærere Solem cogimur vltro nobis obuium atque omnium patentissimum, quam purgare oculos, aperire, conuertere, proque modo nostro hos ad illum accommodare. Similiter cætarum quidem rerum veritates exiguas quasi scintillas argumentationibus perscrutari compellimur. Immensum verò Deilumen sic assequi non valeamus, sed & amatoria voluntatis conuersione & serenitate mentis paramur ad illum, nobis videlicet præparatis vltro feliciter conuiscantem. Hinc platonicum illud. Diuina quidem verbis rationibusque doceri non possunt quemadmodum cætera quæ discuntur, sed assidua circa diuinum ipsum consuetudine vitæque communionem subito tandem nobis velut ab igne scintillante lumen effulget in animo, seque ipsum iam alit.

*In librum de Sole, dono missum.*

MARSILIUS FICINVS  
Laurentio Conphilosopho suo Laurentianæ ædis Anstisti.

**C** Vm ego superioribus diebus librum de Sole & lumine, paruum quidē, sed

magna cum voluptate componere, tu interim & si præsentis meæ lucubrationis inficius, peropportune admodum Astronomicis rationibus ingenisti nostrum omne sapientiæ studium, ad Solem potissimum pertinere. Quoniam fors illa quam Ægyptij sapientiæ partem nominant in genesi peruenisset ad cor Leonis. Sol vero Dominus eius nonam tenuisset cœli plagam, sapientiæ destinatam. Oportune rursus absoluto statim libro de Sole & lumine heri ad nos computationem astronomicam attulisti. Eadem igitur opportunitate ego vicissim librum ipsum ad te hodie mitto. Utinam nostrum hoc lumen non Lunam videatur proferre, sed Solem. Die xiv. Februarij. m. cccc. xciii.

*Amor ipse Deus amantem redamari iubet.*

MARSILIUS FICINVS  
Florentinus Iuliano insigni Theologiae professori Ordinis minorum non minori, S. P. D.

Nihil est, dilectissime mi Iuliane, quod silentium apud nos tuum purges. Nam & si nobis quidem raro, frequenter tamen de nobis es locutus, ac si quid verbis forte defuerit, id totum ingenti erga nos amore compensas. Amoris equidem ardentis erga me tui, hinc argumentum habeo proculdubio maximum, quod ego te absentem diu ardentiori quodam in dies amore complector. Proverbium verò illud, si vis amari ama, in libro de Amore, atque Epistolis alicubi rationibus multis exposui.

Sed omnium maxima, quæ inter scribendum modo mihi succurrit esse videtur, nisi repentina me fallit opinio. Sed ut fallat aliquanto leuius, ita parumper confabulemur. Apollinem & Cupidinem sagittarios antiqui fingeant, hunc quidem flammam, illum verò lumina iaculantem. Quemadmodum igitur Apollo lumen simul in geminos iaculatur, ut quo ego te lumine viso, eodem & ipse me reuifas, ita Cupido flammam, ut qua iam ardet vnus, eadem mox ardeat alter. Omnino verò Amorem esse Deum, & Plato probat, & omnis testificatur antiquitas, & Theologi nostri sanctum quidem Spiritum amorem primum, seraphicis, id est, amatoris angelis anteponunt, & seraphicos angelos veris amoribus ubique præficiunt. Amatorium ergo numen mutue caritatis & Iunonis amicum, ubi aliquem accendit amore, statim ardentes ex hoc amore ve-

lut speculo radios in amatum occulta quadam & mirifica virtute reflectit, ut absens vel inficius ille mirabiliter accensus, vicissim amat amantem: iustum namque numen non patitur amantem superno videlicet instinctu concitum non redamari. Sed etiam de amore satis. Conquereris præterea per Epistolam Plotinilibros ad vos minime peruenisse, meam propemodum tarditatem accusaturus, libri quidem ipsi præterito Maio sunt ab impressoribus absoluti.

Sed in quibus mandatum est à Medicibus, ut eos saltem per Italiam diuulgarent, tardiores hætenus extiterunt, ac me etiam urgente, sunt tardi. Nouam Platonis interpretationem nondum edidi ultra dimidium iam productam. Ad hanc tu me maxime omnium adhortatus es, forte interim cohortantibus angelis, in quorum æde id in cœna mihi persuasisti.

Quo tempore post declamationes nostras ibidem frequentibus concionibus tu orabas. Libellum de Sole & lumine à me nuper editum ad te mitto legendum, ut ubi noster iamdiu feruet calor, ibi lumen quoque refulgeat. Die xx. Februarij. m. cccc. xciii.

*In librum de Sole.*

MARSILIUS FICINVS  
Mazino Phifico insigni Conphilosopho suo, S. D.

O Mnes (quod te non latet) Astro-nomi, Lunam quidem tertia ab ascendente cœli plaga gaudere putant, itineris illinc brevis religionisque parue ducem. Solem verò nona, longioris itineris, ac religionis magnæ rectorem, ut autem tutius loquamur, saltem significatorem. Cum tu igitur longum religiosumque ad Loretanam ædem iter sis propediem aggressurus, merito solem quendam nunc tibi tradito mihi nuper exortum. Futurum (ut opto) sereni æris, faciliisque itineris auspiciam.

*In librum de Sole.*

MARSILIUS FICINVS  
Georgio Cyprio insigni medico, S. D.

Cum Phœbum omnes Medicinæ authorem medicorumque patrem esse consentiant, merito phœbeum de Sole & lumine librum à nobis nuper editum ad te mitto legendum, antiquum familiaris  
HHhh ij

nostræ medicum. Phœbus igitur perpetui amoris erga te mei veridicus tibi testis erit. Sol tibi signa dabit ( vt inquit Maro noster ) Solem quis dicere falsum, audeat? Die xiv. Iunij. m. cccc. xciv.

*In librum de Sole missum.*

MARSILIVS FICINVS  
Baccio Vgolino, S. D.

**C**Um fratres sint Phœbus atque Bacchus, alter merito salutat alterum. At uter utrum prior adit? non Appollinem quidem Liber, metuens forte ne verba reportet. Sed Phœbus ipse Bacchum, sperans referre merum. xv. Iunii. m. cccc. xciii.

*Felicia ad philosophiam aspicias, à Mercurio, Saturno & Sole.*

MARSILIVS FICINVS  
Nicolao Valori dilectissimo suo,  
S. D.

**N**illus familiarium nostrorū felicioribus, quam tu auspiciis Philosophari cœpit. Non commemorabo equidem latius in præsentia, quantum ad Philosophiæ studia conferre putetur coniunctio illa Mercurii cum Saturno sub Aquario tunc imminens, quando & ego librum de Sole & lumine componebam, & tu Philosophiæ iam dabas exordia, atque quidem ab ipso Sole sane tanquam Orpheus alter ab Apolline potius quam à Musis.

Hunc ergo Solem quod quidem auspicia tanta decebat, aquilinis statim oculis suspexisti. Ad hoc verò deinceps, qui inter cœlestia dominatur, ad altiorem Solem cœlestium auctorem mira quadam celeritate profectus, Platoniam Theologiam feliciter admodum es aggressus. In qua quidem tam perspicue in dies profundissima quæque mysteria inspicis, quam dilucide fas est eum cernere, qui non sub Luna, sed sub ipso Sole singula contuentur. Perge quæso, mi valor, ea deinceps alacritate, qua cœpisti, & me passim socio & Apolline duce, summum veritatis gloriæque splendorem breui consequuturus.

*Signa legitimi Platonici, atque de ideis.*

MARSILIVS FICINVS  
Francisco Diaceto complatonico suo, S. D.

**E**rrant omnino, qui Peripateticam disciplinam Platoniam contrariam arbitrantur. Via siquidem termino contraria esse non potest. Peripateticam verò doctrinam ad sapientiam Platoniam esse viam, comperiet, quisquis recte consideraverit, naturalia nos ad diuina perducere, hinc igitur effectum est, vt nullus vnquam ad secretiora Platonis mysteria sit admissus, nisi Peripateticis disciplinis prius initiatus. Absoluti verò Platonici tria sunt symbola, quibus sacerdos eiusmodi à cæteris Philosophis sapientibusque discernitur, primum quidem est mens sublimis, ab inferioribus seipsam semper ad superiora conuertens, secundum verò religio, tertium eloquentia, & hæc quidem quasi poetica. Primum rursus ad Saturnum, secundum ad Iouem, tertium pertinet ad Apollinem. Solus itaque Platonius est legitimus qui illa quam diximus incedit via, his præditus symbolis, his ( vt ita dixerim ) numinibus commendatus. Quæ obrem conphilosophe mi Francisco, tibi tanquam legitimo Platónico gratulor & academiæ gaudeo. Vt autem ad tuam illam de ideis quæstionem pro Epistolæ modo respondeam, ita breuiter accipe. Non putas, proprias singulorum ideas in mente prima inter se absolute quidem, sed quadam relatione distingui.

Næque id quidem à Plotino iam tuo arbitror alienum. Quod sane in commentariis in eum breuiter explico. Negat & in Parmenide Proculus, ideas proprias singulorum, videlicet absolute distinctas. Id proculdubio Platoni maxime consonat in Timæo dicenti, ideale exemplar æternum esse. quodue ad ipsum exprimeretur, atque per ipsum, sempiternum fore significanti. Vnde colligitur naturalium species illinc penitus exprimi, tanquam videlicet sempiternas, singula verò non æquæ, sed sequentibus deinceps causis ad extremum inter se discerni. Quæ tamen distinctio intellectum primum non lateat vniuersi ordinis conditorem. Hinc in Timæo seniores dii, dæmonesque Architecto mandante, atque disponente, singulorum sub Luna fabricam prosequuntur.

Ne igitur vel in eo quod summopere est vnitum, extrema sit multitudo, vel cum quamplurima lateant, qui intelligentia facit & perficit omnia, singularium omni-

no mutabilium illic ideæ non sint re ipsa inter se naturaliter disiunctæ, sed eiusdem intelligentiæ se ipsam aliter atque aliter conferentis ratione distinctæ. Bene igitur excogitasti mi Francisce. Bene Vale. Die XI. Iulij. M. cccc. xciii.

*Purgatio silentij diuturni.*

MARSILIVS FICINVS  
Philippo Valori oratori Florentino ad  
summum pontificem, S. D.

**Q**Uæres forsitan diuturni huius silentij causam, hæc autem nihil aliud est, ut respondeam breuiter, quam incerta scribendi causa. Nam quid potissimum scribam? An forte quomodo valeo? Qui male ne, an bene valeam, semper ambigo. Nunquid significabo quid faciam? & de hoc hercle ambigo. Equidem quid velim scio, quid tentem; quid autem efficiam adhuc ignoro. Ambigo quinetiam præsentem ne te nobis putem, an absentem, quem quotidiana Nicolai fratris tui mecum philosophantis consuetudo vsque adeo præsentem reddit, ut esse opus Epistolis non aduertem. Solent grati homines post diuturnum silentium Epistolas saltem mittere longiores. Ego autem adeo ne ingratus fuerim, ut breuissimo forsitan Epistolio, longissimum silentium compensare confidam? Nequaquam, sed amor ingens potius, & fiduciam præstat & satis officio facit. Vale die xv. Iulij. M. cccc. xciv.

*In Librum de Sole.*

MARSILIVS FICINVS  
Antonio Calderino, S. D.

**S**OL inter cœlestia Dominus, in hoc vel maxime cæteras rerum naturalium causas antecellit, quod calore quidem omnia facit, lumine verò demonstrat. Mihi vero & si nihil opus est, ut calore Solis utar ad Calderinum calefaciendum, quem in rebus meis expediendis atque tuendis ubique feruentissimum sum expertus, lumine tamen Solis utendum censui quo ardentem amorem nostrum iamdiu testimoniis plurimis confirmatum, nunc insuper teste Apolline palam omnibus declarem. Die xv. Iulij. M. cccc. xciii.

*Lumen est admirabile, quoniam est imago sapientia. Item quam mirabilis sit copula sapientia cum potentia.*

MARSILIVS FICINVS  
Ramberto Malatestæ, illustri Sogliani principi, S. D.

**C**ommunis omnium certa que sententia est, & quasi vox ipsa naturæ, nihil aspectu pulchrius, nihil amabilius, nihil admirabilius esse quam lumen. Et si hoc omnes extra controuersiam consentunt, ubi tamen tantæ rei tanquam manifestæ, causam quæras, non omnes iam inuenient rationem, sed solus ille probabiliter respondebit, qui lumen hoc oculis manifestum animaduenerit, nihil aliud præter clarissimum intelligentiæ lumen. Quod quidem Plato noster in Phædro vaticinatus est, si quando interioribus oculis cerni possit, amores sui multo ardentiores excitaturum, quam lumen hoc patens in corporibus speciosis quotidie soleat amatoribus incitare. Quippe cum lumen hoc aspectu perspicuum, non tam à lumine tantam apud nos gratiam admirationemque natum fuerit, quam ex illo secretiore cuius est imago, ex illo, inquam, diuinæ sapientiæ lumine. Diuina igitur sapientia ubique dedit lumini tanquam suo cuidam vicario principatum. Corporis quidem nostri soli duces sunt oculi, inter membra enim sunt luminis, quasi cuiusdam sapientiæ, compotes. Inter omnes quoque animæ vires regnat mens sola, videlicet munere sapientiæ lucens. Elementorum præterea similiumque corporum, ignis est Dominus solus inter hæc quasi sapiens quidam lumine præditus. In cœlo similiter Sol ipse solus fons luminis omnibus dominatur. Idemque apud Astronomos potentiam significat atque sapientiam, nona cœli plaça gaudens velut æde Mineræ. Cuius etiam vicinitate Mercurius sapientis nomē obtinuisse videtur. Quid plura? Ipsum denique totius mundi regnum caloris vllius aut frigoris violentia, aut motuum quorundam impetus, aut vlla corporum vel fluctuantium turba vel vastorum moles sibi vendicat, sed sapientia prima, sicut omnia cernens, sic & omnia potens, sicut pronidens ubique singulis, ita rursus & domina singulorum. Hæc itaque merito & nobis mandauisse videtur, ut ita sapientiam cum potentia pro viribus coniungamus, sicut ipsa & in se & in vniuerso manifestè coniunxit.



Quamobrem diuinitus affectum arbitror, ut Solis lumen idem, quod quidem efficit omnia tanquam potens, similiter omnia demonstraret, velut sapiens, imò & cuncta iuaret atque delectaret tanquam bonum. Quo semper admonemur, cum potentia non solum sapientiam, sed bonitatem etiam copulare. Eiusmodi verò copulam venerandam prorsus atque beatam ut poetæ canunt, extitisse quondam regnante Saturno, & Plato noster videre præ cæteris exoptabat. Ac nos sectatores eius ante omnia cupimus, virum præ cæteris amaturi, qui singularis sapientiae studium morumque probitatem cum generosa stirpe simul & principatu coniunxerit. Hic iam adulationis vanitatisque suspicio à philosophis admodum aliena, prohibet latius explicare quod sentio, fas verò sit id saltem breuiter eloqui. In Ramberto Malatesta Sogliani principe, iam habeo tota quod mente petebam, tota hunc mente diligo, atque ut lex amicitiae iubet, mea huic omnia communia facio.

*Quomodo Venus per cupiditatem commiscet amantes. Iupiter amabilis per Mercurium conflat amicos.*

MARSILIVS FICINVS  
Ramberto Mala testæ Illustri Sogliani Principi, S. D.

**A**Ntiqui Gentium Theologi amicitiam tanti fecerunt, ut inter cætera numina, imò & sæpe præ cæteris Iouem coluerint amicabilem, conciliandis ubiq; beniuolentiis amicitiasque præfectum. Apud hos ergo quemadmodum alma Venus per Cupidinem accendebat amores & (ut ita dixerim) coniungebat amantes; ita Iupiter amabilis per Mercurium grauiores procreabat beniuolentias, amicitiasque conflat. Si nobis hodie liceat Iouem Mercuriumque nominare, profecto amicitiam hanc nostram non humana quadam causa dixerimus, sed Iouis amabilis munere copulatam, siquidem ipsa Minerva beniuolentiae nostrae conciliatrix, fertur à summo Iouis capite nata.

Sed nunquid per Mercurium id nobis effecisse dicemus? Per Mercurium certe, non solum per oculiorem illum atq; coelestem, sed etiam per notiozem nobis aliquem & humanum. Quandoquidem Petrus Martellus vtriusque nostrum amicissimus, qui & nos coniunxit in vnum, non solum Mercuriale fert ingenium, sed ipsam etiam effigiem indolemque Mercu-

rij præ se ferre videtur. Quam equidem, ut de meo quodam quasi vaticinio nonnihil dixerim, nondum inspecta eius genesi, auguratus sum, & inspecta, sum augurio confirmatus. Is igitur quemadmodum in amicitia inter nos vincienda; hætenus sub Ioue Mercurium egit, ita deinceps in mutuis consiliis inter nos significandis interpretandisque, vltro citroque Mercurius erit. IV. Augusti. M. cccc. xciii.

*Sol imago vicariusque Dei.*

MARSILIVS FICINVS  
Reuerendo in Christo patri. D. Francisco Soderino Episcopo Volaterrano, S. D.

**L**Ibrum de Sole nuper magnanimo Petro Medici dedicatum, ad te quoque necessarium eius, mitto legendum. Sed ut tibi etiam alteri patrono meo liber ipse totus videatur inscriptus, hanc totius summam tibi dedico. Tria Theologi Deo præcipua tribuunt, potentiam, sapientiam, bonitatem. Sol igitur imago Dei efficit apud nos omnia tanquam potens, distinguit præterea quotidie, demonstratque oculis singula velut sapiens, iuuat denique nos atque delectat tanquam bonus. Dei solius proprium esse tradunt, miracula facere. Sol itaque Dei vicarius tria potissimum miranda videtur efficere, sub coelo quidem quamplurima per hyemem quasi mortua, in vere suscitatur & æstate. In coelo autem coelestia omnia illuminat, moderatur & regit. Quæ verò super coelum non oculis tantum, sed mentibus etiam nostris inuisibilia sunt, Sol, ut ita dixerim, visibilia reddit, dum admirandis coelestium spectaculis nos admonet supercoelestia contemplari. Contemplare feliciter sacer antistes Solem hunc nostrum atque lumen, vero præ cæteris Sole alma luce dignissime. VII. Septembris. M. cccc. xciii.

*Proœmium in Epistolas.*

MARSILIVS FICINVS  
Florentinus cunctis semel Epistolis suis, Sal.

**Q**uoties Epistolæ meæ amicis meis, me iubente, salutem dicitis, toties amicissimo vestro Hieronymo Rossio immortales salutes dicitis. Vos enim ego mortales genueram, ac nescio qua fortuna propediem moribundas, Hieronymus autem insignis pietate vir regenerauit vos

Nuper (ut spero) iam immortales. Latet enim iam diu locis cupidæ, nec quisquæ adhuc è tenebris eruebat, fato forsan vel genio nondum volente. Roscius autem noster, imò iam & vester, Roscius, qua pietate semper erga parentem vestrum Marsilium se gessit, eadem nunc & vos charitate quadam hæreditaria feliciter est prosequutus, diligentia simul & opera curans, ut vestræ facies iam iam oppressæ, prorsus exprimerentur. Hunc ergo doctum piumque restitutorem vestrum, hætenus quidem tristes, nunc hilares salutate, atque pro ingenti immortalitatis munere immortales gratias agite. xv. Decembris. m. cccc. xciii. Florent.

*Pro libro de Sole, item de stella Magorum, in solennitate Epiphania.*

MARSILIVS FICINVS  
Angelo Nicholino ciui & iurisconsulto præclaro, S. D.

Hodie magi (stellarum observatores, stella miranda duce) Christum stellarum authorem muneribus præcipue tribus salutauerunt, auro, myrrha, thure. Hodie Christus sancto spiritu coelitus corruscante, fertur ab Ioanne Iordanis aqua per fusus. Hodie Christus aquarum procreator & vini, nuptiali conuiuio mirabiliter aquam commutauit in vinum. Hunc ergo diem tribus ingentibus miraculis celeberrimum, insignis pietate vir Angele, trino tu quoque solenniter quotannis honore concelebras, conuiuio, Musica, lectione. Huic equidem lectioni apud te sacræ, librum de Sole & lumine consecro, hac à me nuper ratione compositum, ut Solis luminisque visibilis comparatione ad inuisibile diuinitatis lumen pro viribus contemplandum lectorum mentes erigerentur. Vtinam sicut stella mirabilis ad videndum Christum, Deum & hominem, perduxit hodie Magos, ita nos ad Deum excogitandum hodie Sol perducatur, Ianuarij vi. m. cccc. xciv.

*Pro Bacchi dono. Item Evangelicum illud, ex aqua vinum factum.*

MARSILIVS FICINVS  
Mazingo insigni Physico, S. D.

Matutinis infra octauam Epiphaniæ lectionibus frequenter admonitus, hodie mecum Evangelicum illud animo reputabam. Vinum ex aqua factum, an præter mysticam allegoriam, atque mo-

ralem, physicum quoque sensum habeat, siquidem non longo quodam tempore, aquam ferme, sicut momento Christus permutet in vinum. Physicus verò sensus, ad medicum præcipue pertinens, inuestigat, curnam hoc primum miraculorum suorum Christus esse voluerit? Forstian ut ostenderet, primum summumque vitæ nostræ subsidium fore vinum, sed curnam vinum bonum, id est, validum, quare Creticum & Orientale merum seruatum est usque adhuc? Cur noluit ille vitæ Magister in prima mensa vinum hoc afferre, sed adeò distulit? Voluit forstian admonere, vinum virtute vigens feruenti iuuentuti minimè concedendum, sed recreandæ potius frigidiori senectuti seruandum. Cur denique non partem, sed totam prorsus aquam permutauit in vinum? ut videlicet bonum vinum in senectute præsertim bibatur & merum. Itaque cum hæc circa meridiem meditarer, exoptare coepi atque iam exquirere vinum eiusmodi, quo & senectutem meam & matris senium confouerem. Nam præterito autumnno, illa quidem octuaginta, ego autem sexaginta iam annos impleuimus. Tu verò tanquam vates eadem hora vinum ad me misisti diuinum, Apollineum certè medicum, qualis meus est Mazigus, & vaticinium decet & Bacchi munus, siquidem Phoebus idem & primus medicus, & vaticinij author appellatur, Bacchi frater sacrisque coniunctus. Quod denique multifacio, vnà cum electissimo Liberi patris munere Epistolam dedisti Galenicam, vitæ salubriter consulentem, ut cum auxilio consilium amice coniungeres. Ego igitur quantum cum medicina pronosticum, & cum Phœbo Bacchus, tantum profecto sum atque semper ero tecum amore coniunctus. Ianuarij xii. m. cccc. xciii.

*Pro libro de Vita rerum imprimendo. Item auspiciu de amicitia immortale.*

MARSILIVS FICINVS  
Florentinus Menchen sacerdoti Coloniaensi, præclaro iuris Canonici professori, magni Coloniae Antistitis Secretario, S. D.

Quintodecimo Calendas Februarij propè Solis ortum in somniis salutare videbar incognitum mihi antea virum honesta specie præditum, vestibus comitibusque ornatum. Qui post disputationem physicam mihi pedem ostenderet

quasi curandum, eodem ipse die Florentiam accessisti, profecturus Romam magni antistitis Hermanni legatus, qui cum propter contusionem pedis ad nos venire non posses, desiderium visendi significasti, egoque ad te, ut non oportebat solum, sed etiam decebat, accessi, itaque cum primum te iam obuium sum intuitus, agnouistatim qualem in somnis Heroicum virum videram, post salutationem primam in mentionem operis nostri de vita mox incidimus, multaue ad medicinam præcipue pertinentia inuicem differuimus. Inter loquendum, ut quicquid dormiens præfagiueram impleteretur, pedem ostendisti contusum. Itaque non somnium quidem vidisse videor, sed oraculum diuinitus accepisse (ut arbitror) auspiciam amicitiam nostram fore diuinam. Quoniam verò diuina sunt etiam immortalia, immortalem ego quidem (ut modo narraui) diuinitatem amicitiae nostrae præsenſi. Tu verò interim futuram eius immortalitatem excogitasti, decreuisti enim libros de vita nostros curare iterum exprimendos, quo & nostra hæc vita latius inde propagaretur, & posterius hoc tuo erga nos officio quantum nos amaueris, pariter à nobis amatus, intelligant, atque ita diuina hæc amicitia nostra apud posteros immortalis euadat. Viue felix mi Ioannes & nostrae propagator vitæ, & vita dignissime. Vale feliciter xvii. Ianuarij. m. cccc. xciv.

*Commendatio brevis in causa iusta.*

MARSILIVS FICINVS

Reuerendo in Christo patri Domino  
Francisco Soderino Episcopo  
Volaterrano, S. D.

**M**onasterium Septimi tibi commendaturus in causa Mutinensi paucis agam. Scio equidem quantum monachos illos, viros admodum pios, ames. Quos ego quoque non amo solum sed colo. Arbitror eos tanquam iustos iusta etiam postulare, tu iuris acerrimus es patronus. Quicquid denique officij in hos contuleris in me horum observatorem pariter collatum esse putauero. Monachus istius huius causæ procurator, & re & nomine iustus diligenter tibi referet omnia. Me quoque tibi commendo quam plurimum. Vale felix. xxv. Ianuarij. m. cccc. xciv.

*Plato multa Christianis consentanea dixit.  
Platonici multi Christiana sunt imitati.*

MARSILIVS FICINVS

Florentinus Reuer, in Christo patri.

D. Iacobo Rôdono Episcopo Ariminensi, S. D.

**F**rater Sanctus in ordinem diui Domini-  
ci Theologiæ professor insignis, tuo nomine me salutans, testimoniis profecto multis asseuerauit, me abs te ardentem amari quod quidem & si iam diu mihi plane perspectum erat, desiderabam tamen de prospera valitudine tua nuntium qualem nunc accepi, diutius exoptatum. Philosophia humanorum omnium bonorum mater, amicitiam iam diu nostram peperit, omni, ut Plato inquit, necessitudini præponendam, nec tempore perituram. Sed hæc profecto certiora sunt, quàm ut reſibus verbisque indigeant. Retulit præterea nobis, fratrem, nescio quem, in declamatione publica insolenter asseuerauisse, Trinitatis apud Christianos diuinæ mysterium apud Platonem ipsum extare, Christianosque familiaria illic primos accepisse. Vos autem à me super hac re tanquam mihi platonica sint nota, iudicium expectare. Ego igitur extra cōtrouersiam assero, Trinitatis Christianæ secretum in ipsis Platonis libris nunquam esse. Sed nonnulla verbis quidem quamuis non sensu quoquomodo similia. Similiora verò in sectatoribus eius, qui florere post Christum, in Numenio, Ammonio, Plotino, Amelio, Iamblico, Proclo, Qui cum & omnes Ioannis Evangelium legissent. Et quidam insuper Dionysij Areopagitæ libros, nonnulla trinitati similia libenter vsurpauerunt, ordineſque angelorum & nomina susceperunt, tanquam Platoni suæ Mosis sectatori plurimum consentanea. Quamobrem Aurelius Augustinus quondam Platonicus, & iam de Christiana professione deliberans, cum in hos Platoniorum libros incidisset, cognouissetque Christiana per imitationem ab his probata, Deo gratias egit, redditusque iam est ad Christiana recipienda propensior. Quantum verò Platonica Christianis similia sint, ex Epistola quam hac de re ad Braccium Martellum iam diu scripsi, breuiter intelligere poteris. Hanc enim nunc exscriptam ad te mitto. Vale felix, & me (ut soles) ama, te vehementer amantem. Die i. l. Februarii. m. cccc. xciv.

*Semper aliquid agendum, & , quoad fieri potest, in eodem perseverandum.*

*Sapientes filij sunt Minervæ, hæc Philosophiam parit, Philosophia Philosophos.*

MARSILIVS FICINVS

Florentinus Callimacho doctissimo

viro, & amico optimo,

S. D.

**C**VM vniuersum hoc, cuius quodammodo partes sumus, semper moueatur, certe nos ab actione motique vacare, neque possumus vnquam neque debemus, præsertim quoniam primus perpetuusque motus (vt placet Platonice) est ipsi animæ naturalis, & vita nihil est aliud quam animæ motus & actus, vt quam vivere, tam profecto moueri & agere necessarium sit, & pariter exoptandum. Sed nunquid ego interim sum ineptus? Oportunius forte fuerat, post diuturnum silentium, rationes negotiorum nostrorum & valitudinis nuntium, statim per Epistolam tibi reddere, quam ad eò repente Philosophari. Certe fuerat oportunius mi Callimache. Verum quod tam importune Philosopher, in causa est & diuturnior iam noster vsus & Genius. Tu quoque nobis cum soles per Epistolas sæpe, sed tempestiue & apte semper Philosophari. Pergamus ergo parumper (vt iam cœpimus) vtinam non inepti. Tres præcipui sunt per locum in vniuerso motus. Alia quidem circa idem eodemque modo perpetuo reuoluuntur, alia verò continuè locum situmque permutant, alia partim quidem motu illū circularem partim etiam rectum hunc imitantur. Homines quoque alij motus alios prosequuntur. Sed vt ego nunc de motu iam meo, nō alieno, loquar, mihi certe datum est, vt semper reuoluatur eodem. Quidnam hodie Marsilius agit? Quod & heri. Quid cras acturus? Iterum quod & hodie. Semper, vt vides, intra parietes academix voluor, circa idem iterum reuoluor. Quid autem hoc iamdiu circuitu fecerim, rursusque resecerim, atque retexam, intelliges ex catalogo librorum meorum, quem vnà cum libro de Sole legendum ad te mitto, vt clarissimo Phœbi muneris testimonio amicitia nostra præsentibus posterisque refulgeat. Mitto autem triplicem de Sole & lumine codicem, vt non tibi solum ego gratificer, sed tu quoque duobus tuis amicis gratificari possis. Quæ igitur componantur à nobis, ex his ipse percipies. Ego verò te iam restuas composuisse ex Octauiano tuo & Fedaldis accepi, quod quidem mihi contigit quam gratissimum. Vale feliciter. Die, 11. Aprilis. M. cccc. xciv.

MARSILIVS FICINVS

Germano Ganaïensi dilectissimo

fratri, S. D.

**M**INERUAM poëtæ celebrant perpetuo virginem, nulla tamen apud superos aut homines filios procreat grandiores, perpetua interim virginitate seruata. Siquidem ipsa solo summi Iouis capite nata, solo similiter capite generat, generat, inquam, pro extinctis gigantibus sapientes quasi heroas gigantibus grandiores. Philosophia quoque perpetua virgo sœpius, id est, Mineræ filia pro sapientibus Philosophos vertice parit. Salue igitur iterum dilectissime mi Germane, quem mihi re vera germanum communis peperit Philosophia mater, cum noller filios vnquā inter se disunctos & te (vt scribas) isthuc missa luce traxit in amorē meī, & me vicissim transmissio hucusq; ex ipsa luce calore rapuit in amorem tui. Quoniam verò amicorum, præcipue fratrum, omnia debent esse communia, decreui meæ omnia tibi ad vorum communia fore. Itaque mittam ad te primo quidē Dionysii & Platoniorum multorum libros tibi iam exscriptos, quos iamdiu petisti. Deinde commentaria in Parmenidem, Quæ tui gratia quotidie exscribuntur. Quibus forte succedent commentaria in Timæum, atque Sophistam. Quæ quidem, Sophistam properant iam ad calcem, transcribuntur interea & Epistolæ recognoscunturque vt cætera. Plotinum enim habere te senseram, nuper autem non scribis habere. Si mitti vis significa. Vale.

*Pro libro de Sole.*

MARSILIVS FICINVS

D. Bernardo Bembo Veneto,

S. D.

**S**Olet vulgaris amor sæpe propter absentiam longam diuturnumque silentium refrigerare, prorsusue deleri. Amorem verò nostrum vtpote singularem, propter hæc neque deferuere vnquam, neque obliterari posse, Phœbus ipse & calore sit pignus, & lumine testis. Die XIX.

*Pro libro de Sole.*

Marsilius Ficinus, D. Antonio Cronico Veneto.

**I**ouem quendam amicabilem antiqui colebant amicorum conciliatorem, amicitiae seruatorem. Sed quasnam potissimum mundi plagas Iupiter hic inhabitat? In Sole forsan posuit habitaculum suum. Siquidem amicitia ab amore dicitur atque ducitur. Amor autem calor quidam est. Amatorius verò ex notitia proficiscitur, à pulchritudine procreatur. Sed Apollo præ cæteris calor est & notitiæ, & pulchritudinis author. Iupiter amicus in hoc Apollineo munere amicitiae nostræ pignus esto. Die xiv. Augusti, m. cccc. xciv.

*Quid sentiat de Astrologia.*

MARSILIVS FICINVS  
Angelo Politiano, S. D.

**C**ontra multos Astrologos, qui more gigantum eripere coelum Ioui tam frustra quam impiè moliuntur, merito & Picus alumnus Palladis, & tu miles Hercules sæpe feliciterque certatis. Nempe Palladem Orpheus gigantum expultricem canit, & ab Hercule poëta multi gigantem Antæum à terra simul & è vita sublatum ferunt. Ego autem quid? Profecto tanquam in omni vita vobis vnanimis, in hoc quoque studio conspiro vobiscum, & si forte non decerto strenue, tamen ita plane decerno. Cæteri quidem platonici, cælestes imagines quas describunt Astronomi, pro opportunitate commemorant, neque reprobant eas, neque rursus comprobare student. Plotinus autem talia extra controuersiam ridet. Ego quoque in commentariis meis in eum, tanquam interpres æquè derideo, partim quidem eius auctoritate confusus, partim etiam quoniam nullam habeo certam eiusmodi rationem. Multas præterea ibidem Astrologorum regulas in controuersiam simili ratione deduco. Sed in libro de vita, vbi profiteor Medicinam, ac remedia vitæ, utcumque & qualicumque possum, vndique diligenter exquiro, neque despicio prorsus imagines illas, neque omnes respuo regulas, & si enim arbitror certam iis rationem nullam inesse, tamen ut studiosissimus humanæ Medicinæ curator, remedia non solum sapientibus certa, sed etiam multis probabilia sector, ut subsidia passim accumulem quomodolibet profutura. Nequid deni-

que prætermiserim intentatum, quod ad vitam utcumque conducturum cuiquam videri possit, nonnulla tamen intersero firmiora, multa quoque passim congero, quæ & si forte minus spero, tamen opto prodesse. Quod autem in principio libriter itij dicere videor, imagines ab antiquioribus platonici in cælo dispositas esse, non id equidem volo. Non enim consilium ibi meum est, platonicos affirmare cælestium imaginum assertores, de quibus aut nihil, aut parum quid loquuntur. Sed platoniorum quorundam fuisse sententiam, mundi animam cælestia sibi corpora peperisse, stellasque cum cælo, atque vitra stellas singulas, si modo ibi vllæ sint imagines, eiusmodi quoque imagines genuisse. Narro autem illic dispositiones signorum imaginumque non quales apud platonicos, sed quales apud Astrologos obseruaueris, iam verò quantum imaginibus vel cælestibus credam, vel arte factis cõfidam, progressio libri declarat. præterea in libro de Sole, non tam Astronomica doceo quam per hæc morales allegoriasque ad diuina perquiro. Denique tam in libris de vita quam de Sole & lumine cum philosophicis poetica miscens, liberius sum interdum & forte licentius euagatus, cum Plotino parcius seuerius ago, ut mihi tandem non ingratum sit futurum, Astrologica portenta fuisse à pico nostro Mirandula singulariter confutata. Quæ enim ego nusquam affirmo, imò & cum Plotino derideo, explodi à Mirandula gaudeo, superstitiosam præterea vanitatem ab illo tanquam à phœbo pithonico virus extinguere tecum politiane congratulor. Tu enim semper hac in causa, ut vbiq; soles, Herculem præstitisti. Soles profecto iamdiu hæc Astrologorum prodigia, ut alia monstra, passim acriter insequi, ut non in terris Solém, sed etiam in cælo monstra fortissimus Hercules expugnaueris. Vtinam denique sicut Herculi, sic & tibi, superata tellus sydera donet, interim in terris viue diu. Vale feliciter. Die xx. Augusti, m. cccc. xciv.

*Pro libro de Sole.*

MARSILIVS FICINVS  
Bernardo Oricellario Martiori filio, S. D.

**C**um & optans amicis lucem, & cupiens eos lumine declarare, operam equidem iamdiu dederim, ut libri de Sole & lumine mei apud omnes amicos meos forent, nimirum, & tu dulcissime mi Ber-



hæc nuper hoc munere donandas accedis, modo videlicet à nobis amatus, quia nuper es cognitus, neque tamen nunc solum, sed & semper amandus, quod autem te vehementer amem, non solum ingenium tuum elegans probitasque facit, sed etiam quoniam charus admodum sis Hieronymo Rossio & omnium mihi charissimo, & præ cæteris luce dignissimo. Sed ut aliquid tecum de lumine commentemur. Si quando inter legendum, illic hæsitaueris, vbi Solem vel lumen dicimus primo creatum, animaduerte quæso, ne forsan intelligas primo creationis momento vel gradu Solem vel Solis lumen fuisse factum, cum Moses ipse dicat. In principio creauit Deus cælum & terram. Terra autem &c. sed lumen angelicum primo quodam ordinis gradu creatum, lumen verò Solis futurum primo die, Solis denique ipsius globum atque figuram quarto, omnino verò & lumen Solis & globum, primo dignitatis inter cælestia gradu. Vale iam & absque hæsitazione lege feliciter.

*Commendatio clientis apud Magistratum.*

MARSILIVS FICINVS  
Nicolao Benino, literis moribusque prædito, S. D.

**E**Rat profecto officii mei ab ipso tui magistratus initio pro beniuolentia nostra non mediocri, tecum non mediocriter gratulari, non solum quod hac dignitate ornatus fueris, sed etiam & multo magis quod Magistratum fores pro dignitate gesturus. Congratulandum quoque fuerat amicis clientibusque meis, quod si vel infantes forent, patrociniū abs te consequuturi essent, vel si rei, saltem indulgentiam quandam, atque clementiam. Noui enim ingenium tuum. Certo scio te (quod Deus ipse agendo præcipit) iustitiam rite cum clementia coniuncturum. Præterea si quid hac in re circa Iouem confabulari licet, hunc Hebræi sedech, id est, iustitiam nominant, & Astro nomi Ioui suo iura legesque concedunt. Eundem poëtæ Iouem canunt indulgentiæ plenum, ut prætermittam poëticum illud ad licentiam potius declinans quam indulgentiam. Iupiter esse pium statuit quodcumque iunaret, satis esto apud Astrologos, Iouem cum legibus afferre vel significare clementiam, in hoc sane Deus cælitus homines admonuisse videtur, ut in magistratu pariter vtrumque miscerent, sed hæc tu pro ingenio tuo, ut arbitrer, fa-

tis nosti. Vale feliciter Florentiæ. xxxi.  
Augusti M. cccc. xciv.

*Gratiarum actio pro indulgentia in clientem impetrata.*

MARSILIVS FICINVS  
Nicolao Benino literis moribusque prædito, S. D.

**C**Um bonum atque malum sibi inuicem opponantur, atque idcirco conditiones subeant inter se oppositas, probabile nimirum esse videtur, si bonum tam foecundum est, ut malum, contra sterile sit futurum. Quantum verò malum crimē est, tantum clementia bonum sit, ergo necesse est, ut indulgentia clemens longe foecundior sit quam crimen atque delictum. Quamobrem si clientis mei delicti Epistolam ad te nostram peperit, multo magis liberalis & clemens indulgentia tua parere rursus debet Epistolam, ac multo meliorem atque maiorem, prima quidem, ut ita dixerim, fuit Iouia, Iouis videlicet comparatione freta, secunda igitur non aliter superatura primam, vel saltem est æquatura, quæ si fuerit Apollinea. Solus enim Sol potest superare Iouem. Quapropter Apollineis auspiciis hæc satis officio in me tuo facere possit, mitto eam ad te Phœbi comitem, Solisque potuisse quam. Lege libenter librum de Sole nostrum tibi dono datum, ac viuere feliciter. Die III. Septembris. M. cccc. xciv.

*De Ioue amabili & Apolline pro libro de Sole.*

Oratio Marsilij Ficini Florentini ad Ioannem Matheronem magni Gallorum regis inclytum oratorem.

**A**Ntiqui Theologi primum, deinde poëtæ, inter cætera numina Iouem amicabilem coluerunt, casti amoris ac firmiter amicitiæ patrem. Qui propterea & ab amore pariter atque amicitia, nomen hoc amicabile reportauit. Cum igitur & Plato noster numinis huius nonnunquam faciat mentionem, sæpe equidem intercommentandum quæsiui, quonam alio hunc Deum nomine clarius appellarem. Diu denique meditati venit in mentem, ut hunc præcipuè Deum clarissimum, id est, Apollinem nominarem, lucis, caloris, harmoniæ, notitiæ fontem. Iam verò nec vnquam amamus incognita, nec quicquam sine luce cognoscimus, nec absque calore quodam ad amandum aliquando

prouocamur. Præterea & harmonica quædam congruitas est ad amorem & amicitiam necessaria. Rursus, ad amorem sæpe consideratur pulchritudo corporis. Ad amicitiam semper optatur animi pulchritudo: utraque verò nihil aliud quam splendor quidam esse videtur. Splendoris autem author est Apollo. Omnes itaque rationes cogunt, amoris & amicitiam fontem Apollinem præcipuè nominare. Nos autem si confabulationis gratia Deorum numerum forte Gentilium more recipimus, Phœbū esse dicemus Deum quendam numenue Soli præfectum inter cœlestia regem: sin ratione potius seria nitimur, Phœbum esse Deum summum asseuerabimus. Cuius Sol cœlestis est imago. Itaque Phœbus ille honesti amoris & amicitiam firmæ author est, Sol verò significatur. Cum igitur ego Phœbeo quodam sapientiam virtutumque tuarum splendore singulariter inflammatus, te ardentem amem, affectemque amicitiam ex amore conflare, nimirum & Apollineis auspiciis ad te venio. Salue.

*Multifaciendum est laudari à laudato viro.*

MARSILIVS FICINVS  
Germano Ganiensi viro Virtute præstanti, S. D.

**Q**Uæ de excellenti virtute dignitateque tua iam pridem è multis audiueram, nuper Cosmus Sæfectus, & Laurentius Spinellus testimoniis apud me multis confirmauerunt, viri nobiles, atque testes hac in re profecto locupletissimi. Narrauerunt præterea quanti me facias & quam ardentem ames. Ego verò plurimi facio probari amari que abs te, laude præ cæteris & amore dignissimo: quam igitur tibi gratum sit nostra visere, tam nobis opabile tibi prorsus gratificari. Videbis, ut spero, mox nonnullos hinc ad te Platonicos venientes. Vidisses & Arcopagitam simul platonicorum culmen, si nunc eo habitu, qui & ipsum & te decebat accedere potuisset, exscriptoris & librarij negligentia impediuit accessum. Paucos, ut spero, post dies veniet cum Epistolis. Exscriptum iam tibi est commentarium in Parmenidem. Quotidie rescribitur in Timæum. Vale felix, atque (ut corpisti) charissime mi Germane, Marfilium germanum sub platone tuum ama precor ardentem amantem. Decimo sexto. Octobris. M. cccc. xciv.

*Pro libro de religione, purgatio de tarda salutatione.*

MARSILIVS FICINVS  
Ioanni Stephano Equiti & Oratori Mediolanensi clarissimo, S. D.

**E**T si virtus dignitasque tua & amor ingens erga te meus iamdiu postulabat, ut te vltro frequenterque salutarem, tuorum tamen negotiorum turba interpellare te nisi in re quadam necessaria prohibebat. Nunc igitur cum & minus tibi forte negotij fore putem, & nostra te exigit, ut iam pridem par fuerat, te saluto. Salue semper in ipso sempiternæ salutis autore Deo, vir omnium salute dignissime. Noli equidem ad virum virtutis dignitatisque plenum accedere vacuus, ad inclitum illustrissimi Ducis Oratorē sine duce venire. Ducit itaque me in præsentia Christus veritatis & gratiam plenus ferentem mecum librum de Christiana religione tractantem. Neque te offendat precor humilis ac pauper libri habitus, siquidem Christiana religio & in primis humilitatem præcipit & libenter paupertatem tolerat. Omnino verò liber Christiana pietate compositus, te decet insignem pietate virum. Præterea duo potissimum amor ut sit perfectus, desiderare videtur, ardorem, inquam, atque firmitatem. Profecto quam te ardentem amem testimonio esse potest Sol ille apud te noster, ut luminis, ita & caloris origo, quam vero firmus noster erga te amor sit futurus, argumentum penes te atque pignus erit præsens de religione liber. Nihil enim religiosa pietate firmitus, charitas enim nunquam excidit. Vale felix, meque ama precor iamdiu ardentem amantem. Die iv. Nouembris. M. cccc. xciv.

Oratio Marfilij Ficini Florentini ad Carolum magnum Gallorum Regem.

**E**Xcellsa maiestas tua, rex Carole semper inuicte, solet nonnunquam, ut plerique fuerunt, dicere, ad hanc expeditionem mitti diuinitus. Quod quidem nos & vniuersus hic populus Florentinus tunc proculdubio credit, firmiter sperat, vehementer congratulatur. Veri namque simile est & Christianissimum Gallorum Regem à Christo mitti, & Carolum præ cæteris insignem pietate regem, Christiana pietate duci, præsertim cum iter opusque tantum ea mente sis aggressus, ut sanctam Ierusalem sæuissimis Barbaris occupatam, summo humani generis redemptori, denique

ri, denique redimas. Regnum profecto sanctum speramus te facile redempturum. Recepto prius ob iter hæreditario regno, siquidem hoc itinere passim pro viribus vestigia Christi sequaris. Christus rex pacificus pacem volentibus sæpe promittit, idem tu quoque rex Christianissimus singulari pietate præditus promittis, ut audimus, atque ut speramus, profecto præstabis, idque reuera facies, quod pio quondam Eneæ, Æneadumque generi mandatum est à patre. Parcere subiectis, & debellare superbos. Quamobrem cum volentibus pacem, omnibus pacis author sis futurus, tuis præsertim, idest nobis, pacificum te præstabis. Florentinam civitatem tuam mirifica pietate vises, Florentiam à flore, id est, à lilio dictam, liliorum ubi que plenam. In propria venies, & tui te tota mente recipient. Tu autem ducem tuum imitatus Christum, clamabis ad populum: Venite ad me omnes qui laboratis & onerati estis, & ego reficiam vos. Præsens itaque populus & futurus in ævum gratiosum regem Carolum à charitate gratiisque nominatum, his semper vocibus celebrabit: Benedictus qui venit in nomine Domini. Carolus charus nobis, excelsus, rex pacificus. Hæc est dies quam fecit Dominus, exulemus & lætemur in ea. Hæc, inquam, de tuo splendore populus Florentinus præsens futurusque prædicabit. Totus autem mundus, omniumque communis historia, quæ mox dicam (ut arbitror) recenserebit, Carolus Gallorum rex inuictus Cæsarianum illud, dictum magnum, factum maximum. Veni, Vidi, Vici, adeo superavit, ut dicere iam iure possit, nondum veni, necdum vidi, iam vici. Superavit & celebratissimum illum apud omnes Herculem. Hercules enim manibus, igne, ferro, clava, laboribus dicitur pugnavisse. Carolus autem magnus, non tot quidem machinis, sed ferme Iouis instar, solo, ut ita dixerim, nutu concutit orbem, ut iam non Galliæ duntaxat, sed etiam orbis Dominus videatur quandoque vocandus. Quoniam excelsus Carolus videtur missus esse divinitus ad domandos Turcas, & ad sanctam Ierusalem sic à manifestis hostibus vindicandam, sicut ipse Deus omnipotens humanum genus ab occultis hostibus liberauit.

*Cur providentia permittat aduersa. Item de vaticiniis remediisque malorum.*

MARSILIVS FICINVS  
Florentinus Ioanni, Cavalcanti amico  
vnico, S. D.

SÆpe quæritur à Platoniciis, curnam providentia diuina permittat semper homines malis innumerabilibus agitari, iustos pariter & iniustos? Summatim ad hæc respondere solent. Primo quidem à mortalibus ignorari, mala ne ista sint an bona. Humanas enim res vmbreis, cogitationesque somniis esse consimiles. Huc tendit Propheticum illud, Omnia vanitas. Omnis homo mendax. Respondent iterum etiam si constiterit, quæ mala videntur, quodammodo etiam esse mala. Denique malum ab ipso summo bono permitti duntaxat gratia boni. Res enim difficiles & aduersæ vitium quidem curabile purgant, incurabile verò puniunt. Illic igitur purgationis, hic iustitiæ lucet bonum. Boni quinetiam homines in aduersis discernunt à malis & exercentur atque probantur. Probatio verò & profectus & constantia bonum. Operæpretium est præterea diligenter considerare Platonicum illud in Phædro, de venefica mali dæmonis astutia dictum. Dæmon aliquis statim ab initio vitiiis quam plurimis immiscuit voluptatem. Hæc quidem ibi Socrates, inquit, admonens, malorum dæmonum præcipuum esse studium, animas seorsum à cœlesti patria in hoc exilio diutius detinere superni patris oblitæ, longasque machinari moras illecebris oblectamentisque terrenis, quibus profecto quasi poculis veneficæ Circes, soporiferisque Syrenum cantibus delinitæ, nunquam aut cetero tardius in cœlestem patriam reuertantur. Contra verò dæmonicas insidias benefica providentia Dei statuit, dulcibus quidem his lætiferisque saporibus, sapores amaros interim commisceri, ne ab eiusmodi voluptate, quam Timeus malorum escam nominat, capiamur, ut pisces ab hamo. Hanc utique Platonici, præcipue Plotinus atque Synesius magna, ex parte causam esse putant, ut diuina providentia tot tantisque perturbationibus animos in terris vexari voluerit. Huc tendit Platonicum illud in libro de scientia, consonum euangelio, iamdiu, dilectissime mi Ioannes, ad te scriptum, ac breuiter declaratum. Impossibile, inquit, est Theodore mala funditus extirpari, necessarium enim est semper aliquid bono subcontrarium es-

se, apud superos quidem esse mala non possunt. Per mortalem verò naturam locumque hunc inferiorem necessario reuoluuntur. Quamobrem conandum est, vt hinc illuc quam celerrime fugiamus. Fugere verò illuc, est pro viribus se similem Deo reddere, similes verò nos Deo faciunt, iustitia, & sanctitas cum prudentia. Hæc Plato declarat, nos ob eam maximè causam, fugam hinc ad Deum aliquando meditari, vt mala quæ necessariò nos hic affligunt, effugiamus, ex hoc videlicet mortali malo, sempiternum illud teportaturi bonum. Iam vero nec vllus nisi vexatus morbis, cognoscit aditque medicum, neque rautæ, nisi fluctibus agitati, gubernatoris prudentiam admirantur, mortales profecto tam habetes sunt, vt bonum non aliunde prorsus cognoscant quam ex comparatione malorum, tam ingrati, vt Deum bonorum omnium largitorem non facile colant, nisi malis oppressi. Quamobrem morbis perturbationibusque frequentibus cruciati, ad Deum ipsum tanquam ad medicum opitulatoremque confugere compelluntur. Coguntur quoque cognoscere, non terrenam quidem provinciam vbi anguntur affliguè, nunquam verò quiescunt, suam fore patriam, sed coelestem. Nulla verò potior assignari causa potest, ob quam mala Deus & aduersa permittat, quam ratio Enangelica docens, cæcos mutilatosque nasci nonnunquam admirabilem Dei potentiam bonitatemque hominibus declarandam. Mala videlicet hominibus incurabiliter curaturam. Quemadmodum & morbi fluctusue non quilibet, sed grauissimi, medicum gubernatoremue summum testificari solent. Sape igitur homines & priuatim & publicè, tam extremis vndique coërcentur angustiis, vt nusquam pateat exitus, nulla iam spereter humana salus, sed tamen diuina bonitas & potestas filiis suis pia mente supplicetur obsecrantibus propitiam porrigens ex alto manum declarat, Deum solum esse in extremis calamitatibus seruatorem. Idque nunc quidem demonstrat apertius, quando discrimina tanta diu prius quæ veniant, per prophetam quandam ventura prædixerit. Medici quidem humani officium est, & si minus sanitatem, saltem semper præstare pronosticon. Diuini vero pariter vtrumque completi. Et si horum exempla ex sacris literis licet afferre quamplurima, quæ omnibus sunt in promptu. Meum tamen consilium est in præsentia, quid & sæper fuit in lucem minus nota proferre, mysteriaque Christiana quoad possem Plato-

nici confirmare. Audi igitur, mi Ioannes, tam diuinorum cultor, quam studiose Platoniorum, quibus verbis apud Platonem Socrates diuinum consilium circa malorū humanorum remedia Prophetasque confirmet, sic enim loquitur in Symposio. Sacerdos Diotima fatidica mulier diuinorūque perita, pestem prædixit Atheniensibus imminentem. Itaque sacris decennio ante pestem peractis, morbi dilationem dedit. Item sic in Phædro, si referamus Sibyllam, & alios quicumque vsi sunt vaticinio quam multa prædicentes in futurum profuerint, prolixum nimis extendemus sermonem, ac rem manifestam omnibus proferemus. Et paulo post inquit, Antiqui testificantur vaticinium diuino quodam furore profectum, coniectura prudentiaque humana supra modum præstantius esse. Atqui aduersum morbos laboresque grauissimos ob antiqua delicta quandoque diuina indignatione mortalibus imminentes, diuinus Gentibus quibusdam aliunde furor adueniens, & futura prædicens, quibus opus erat, remedia mirabiliter adinuenit, confugiens ad vota cultusque diuinis. Vnde expiationes, propitiationesque consequutus incolumè reddidit possidentem, & in præsens tempus & in futurum absolutionem præsentium malorum recte furenti occupatoque adeptus. Hæc ibi præterea in libro legum primo, Plato sic inquit. Epimenides Cretensis, vir diuinus decem annos ante Persicum bellum, Dei Oraculo monitus, peruenit Athenas, & sacrificia quædam Dei oraculo edita fecit, Atheniensibusque Persicam formidantibus classem, prædixit decennio Persas non venturos, & postquam venerint infecta re discessuros. Eiusmodi sane virum Plato omnium sapientissimum esse censer, quamuis sæpe vulgo stultissimus habeatur. Itaque in Phædro scribit mirabile quiddam hunc in modum. Diuinis meditationibus, qui recte vtitur, perfectisque mysteriis semper imbuitur, perfectus reuera solus euadit, ab humanis autem studiis segregatus, diuinorūque inhærens, carpitur à multitudine, quasi extra se positus, sed ipse Deo plenus, multitudinem latet. posthæc Plato cum prophetam & sacerdotem diuinis occupatum, sapientiæ humanæ longo admodum intervallo præposuisset, describit mentem quandam diuino prorsus amore flagrantem, ecstasimque amatoriam patientem, atque furorem alienationemque huiusmodi, non solum humanæ prudentiæ, sed diuinis etiam muneribus omnibus antepone. Vbi plane comprobat Apostolicum il-

lud. Maior horum charitas. Mitti ante prophetas à Deo, & qua ratione mittantur, Auicenna etiam in libro diuinorum multis rationibus Platoni consentit. Sed longioribus iam digressionibus prætermittis, ad institutum breuiter redeamus. Animaduersione pfecto non mediocri dignum est, quod in superioribus, inquit Plato, propter antiqua delicta indignatum Deum calamitates hominibus quodammodo destinasse. Hinc asseueratur oraculum illud, propter peccata venient aduersa. Illud quoque Mosaycum, ex primorum delicto parentum, aduersa nobis omnia contigisse. Vbi præterea subdit Plato, Deū tanquam misericordia quadam affectum, frequenter afflare Prophetas, futura nobis flagella prænuntiuros, vt hinc admoniti ad vota expiationesque sacras confugiamus, quibus rite peractis, incolumes frequenter euadimus, ibi pfecto, omnia videtur ecclesie nostræ mysteria comprobare. Proinde ne forte rei tantæ longius exempla petantur: Nonne propter multa delicta, postremum huic vrbi hoc autumno exitium imminerebat, nulla prorsus hominum virtute vitandum? Nonne diuina clementia Florentinis indulgentissima, integro ante hunc autumnum quadriennio nobis istud prænuntiavit, per virum sanctimonia sapientiaque præstantē Hieronymum ex Ordine prædicatorum, diuinitus ad hoc electum? Nonne præfatis monitisque diuinis per hunc impletis, certissimum iamjam supra nostrum caput imminens exitium, nulla prorsus virtute nostra, sed præter spem opinionemque nostram mirabiliter euitauimus? A Domino factum est istud, & est mirabile in oculis nostris. Reliquum est, optime mi Ioannes, vt deinceps salutaribustanti viri consiliis obsequentes, non solum ego atque tu, sed omnes etiam Florentini, Deo nobis clementissimo, grati simus, & publica voce clamemus. Confirma opus hoc Deus quod operatus es in nobis Die XII. Decembris. M. CCCC. XCV.

*Gratulatio pro literis diu expectatis.*

MARSILIVS FICINVS  
Germano Ganaïensi dilectissimo  
suo, S. D.

**E**Adem tempestatis huius iniquitas & tuas ad me & meas ad te sæpe literas interceptit. Heri tandem vicit iter durum pietas, expectatamque diu tuam mihi concessit Epistolam. Surge mea nunc Epistola

præfens, I nunc ad decus nostrum, melioribus vtere fatis, sed quidnam primo scribam? Certe quod in primis contigit mihi gratissimum, me videlicet & commendatum esse per Epistolam tuam fratri tuo Ioāni, Achari regio Parisijs prædenti. Id quidem operæpretium nobis fuit & erit. Nam Italia ferme tota, certe Tuscia omnis, præsertim Florentia, externis pariter & internis quotidie tumultibus agitur. Conueni equidem hic apud excelsum Regem vestrum superioribus diebus Ioannem nostrum, virum frequenti salutatione dignissimum, eiusque conspectu non solum ob splendorem suum, gratulatus sum, sed etiam ex hoc valde congratulatus, quod in egregio fratre tuo Charissimum meum videre videbar, me interim in præsentibus angustiis consolantem. Proinde & si professio nostra est vacuæ mentis opus, pergo tamen inter hos strepitus in Platonicis commemorationibus assidue quoad possum, eas propediem (si Deus aspirauerit) perfecturus.

*Pia Platonis sententia, de amicis, & inimicis Dei.*

MARSILIVS FICINVS  
Ioanni Caualcanti amico Vnico, S. D.

**C**Ontuli heri tecum & cum genero tuo Gerardo Iansfilatiopio viro, quid in Philebo Plato de amicis Dei sentiat, vel inimicis. Placuit ergo tibi vt ipsa verba Platonis ad te scriberem, & quæ ibidem sit expositio nostra. Accipe igitur atque lege feliciter. Verba Platonis hæc sunt. Vir iustus & pius & probus nonne Deo amicus est? Iniustus autem & improbus inimicus? Est pfecto. Plurima quidem spe vnusquisque ducitur. Interiores enim sermones quidam sunt in vno quoque nostrum, quos & opiniones & spes nominare solemus, sunt quinetiam Phantasmata picta. Nam cuique licet fingere se cumulum auri maximum possidere, oblectamentisque variis abundantem, omni suauitate perfundi. An non dicendum, opiniones imaginationesque eiusmodi bonis viris, quia Deo amici sunt, veras frequenter euadere? malis autem sæpe numero falsas? Dicendum certe. Præuis vtique viris oblectationes quædam adsunt, sæpe confictæ, ac denique falsæ, falsis igitur voluptatibus prauis sæpe numero gestiunt. Homines autem boni gaudiis semper veris aluntur. Hactenus Plato. Sequitur expositio nostra. Bo-



mus vir à Platone censeatur, qui in se quidem temperatus, ad Deum autem pius est, ad homines verò iustus. Animus eiusmodi propter similitudinem Deo præ cæteris est amicus, malus autem propter dissimilitudinem inimicus. Itaque cum Deus & moueat intrinsecus, & ubique prouideat, nimirum opiniones & imaginationes spesque bonorum virorum, veræ frequenter euadunt, malorum verò falsæ, utrique gaudia quædam excogitant, optant, sperant, hæc bonis viris tanquam diuinis atque veridicis, vera sæpe contingunt, malis verò falsæ, mali enim tanquam sibi met mendaces, sicut frequenter opinione falluntur, ita falsæ sæpius oblectamenta confingunt, denique si prauis tanquam à diuina veritate discordibus, succedere spes non debent, sæpe tamen in externis successum habere videntur, sequitur saltem, ut intrinsecus non succedant, semper ergo sollicitantur intus atque languent, eorumque voluptates similes sunt falsis voluptatibus egrotantium, somniantium, infanorum. Die xx. Decembris. M. cccc. xciv.

*Pro libro de Sole.*

MARSILIVS FICINVS  
Ioanni Ganaiensi dignissimo parisij  
præsidenti, S. D.

Cum propter hospitem domesticorum turbam, publicos tumultus, tranquille isthic Philosophari non possem,

Philosophicum tamen officium mihi perpetuum intermittere nollem, in rusticam solitudinem ex vrbe secessi. Sed antequam discederem, exoptatum mihi diu splendorem tuum sæpe quæsiui. Quem denique nondum salutavi præsentem, hunc absentem munere quodam Phœbeo saluto. Si quidem ipse Phœbus, quæ forte non tangit globo, radiis interim attingit ubique, splendor quin & tuus suis hucusque radiis me contingit. Per ipsum luminis Phœbei calorem te obsecro splendidissime mi Ioannes, ut Marsilium ames ardentem amantem Vale.

*Pro libro de Sole.*

MARSILIVS FICINVS  
Paulo Veronensi, insigni doctrina  
viro, S. D.

Videre te quidem Florentiæ licuit, idque admodum mihi gratum contigit. Gratissimum quoque fuisse, præsentem Parisij visere, virum aspectu dignissimum. Quanquam si vos inuicem ea, ut arbitror, charitate deuincti estis ut sit alter in altero, cum primum aspexi Paulum, in Paulo introspexi Ioannem, ita profecto Phœbus dum splendore foris aspicit, calore interim (ut ita loquar) introspicit, denique per ipsum Phœbeum manus, quod ad te quoque mitto, te vehementer obsecro, ut Apollineo Ioanni me sæpe commendes. Vale.

*Finis duodecimi & ultimi libri Epistolarum Familiarium Marsilij  
Ficini Florentini. Deo gratias. Amen.*

*In hoc opusculo de Sole & Lumine quadam  
sunt quæ in aliis Marsilij operibus quoque re-  
periuntur, sed cum author ipse hoc compen-*

*dium gratificari & censulera nimirum volens  
iis, qui magna volumina non potuerunt habere,  
scripserit, mutare nihil volumus.*



# MARSILII FICINI

## IN LIBRVM DE SOLE,

ad magnanimum Petrum Medicem,

P R O O E M I V M.



Ouam platonis interpreta-  
tionem auspiciis iam-  
diu tuis inceptam Ma-  
gnanime petre quotidie  
prosequor, atque (vt te  
non latet) crebrioribus  
articulorum distinctio-

nibus, longioribusque quantum res ipsa  
postulat, argumentis explano. Itaque cum  
nuper ad mysterium illud Platonicum per-  
uenissem, vbi Solem ad ipsum Deum ar-  
tificiofissimè comparat, placuit rem tan-  
tam aliquanto latius explicare, præsertim  
quia Dionysius noster Arcopagita Plato-  
nicorum primus, cuius interpretationem  
in manibus habeo, similem Solis ad Deum  
comparationem libenter amplectitur.

Dum igitur ad Solem hunc quasi lucef-  
nam pluribus iam noctibus lucubrarem,  
cogitauirem hanc electissimam ex opere  
magno seligere, & proprio commendare  
compendio. Idque de Sole mysterium  
quasi Phœbeum munus, ad te potissimum  
& Phœbi Musarum ducis alumnum, &  
Musarum patronum mittere, cui etiam  
vniuersa hæc noua Platonis interpretatio  
dedicatur, vt hac interim luce quasi Luna  
quadam, quale futurum sit Platonicum  
opus totum tanquam Sol ad Lunam, au-  
gureris, ac si quando Platonem meum,  
imò iamdiu vestrum amauisti, posthac lu-  
mine hoc accensus ardentius ames, & to-  
ta mente complectaris amatum.



# MARSILII FICINI

## VERBA AD LECTOREM,

librum hunc allegoricum & anagogicum  
esse potius quam dogmaticum.

C A P V T P R I M V M.



Pythagoricum præcep-  
tum est, magnanime  
Petre, profectò diui-  
num, de rebus mysteriis-  
que diuinis absque lu-  
mine non loquendum.  
In quibus (vt arbitror)  
verbis non id solum sapiens ille significat,

nihil in rebus diuinis audendum, nisi quæ-  
tenus ipsa Dei lux illinc afflatis mentibus  
patefecerit, sed etiam admonere videtur,  
ne sine huius manifestæ lucis compara-  
tione ad occultam diuinorum lucem vel  
percipiendam, vel declarandam proficif-  
camur. Ab hac igitur nos ad illam non  
tàm rationibus in præsentia, quam com-

parationibus quibusdam deductis ex lumine, pro viribus accedemus. At verò tu interim, accuratissime lector, vtinam & nobis indulgentissime, Apollinei modo & quasi poëtici sub Sole permiffi memor, feriora posthac à nobis, & (vt Græci aiūt) dogmatica ne exigito. Allegoricam equidem duntaxat & anagonigam ingeniorum exercitationem, fideiussore Phœbo, cuius hæc sunt munera, sum pollicitus. Non disputant vnquam cum Apolline Musæ, sed canunt. Ipse quinetiam Mercurius primus disputationum artifex, & si cum Saturno vel Ioue tractat grauiā, tamen cum Apolline ludit. Ille quidem non apte solum iocantur, sed diuinè. Nos autem vtinam saltem non inepte ludamus. Sed iam nostra hæc luminis qualiacunque futura sint æturi præludia, ipso bono, id est summo Deo feliciter inspirante, prodeamus in lucem.

*Quomodo Solis lumen sit ipsi bono scilicet Deo, simile.*

## C A P V T II.

**R**es nulla magis quam lumen refert naturam boni. Primo quidem lumen in genere sensibili purissimum eminentissimumque apparet. Secundo, facillime omnium, & amplissime, momentoque dilatatur. Tertio, innoxium occurrit omnibus atque penetrat, & lenissimum atque blandissimum. Quarto, calorem secum fert alium, omnia fouentem, & generantem, atque mouentem. Quinto, dum adest inestque cunctis, à nullo inficitur, nulli miscetur. Similiter ipsum bonum totum rerum ordinem supereminet, amplissime dilatatur, mulcet, & allicit omnia. Nihil cogit, amorem quasi calorem habet vbique comitem, quo singula passim infcantur, bonumque libenter asciscunt. Vbique rerum penetralibus præsentissimum, commercium cū rebus nullū habet. Denique sicut ipsum bonum inæstimabile est, atque ineffabile, ita ferme lumen. Hoc enim nullus adhuc definit Philosophorum, vt nihil lumine clarius sit alicubi, nihil rursus videatur obscurius, sicut bonum & notissimum est omnium, & pariter ignotissimum. Quamobrem Iamblichus Platonius huc postremo confugit, vt lumen, actum quandam & imaginem perspicuam diuinæ intelligentiæ nominaret. Quemadmodum emicans è visu radius est ipse visus imago. Forte verò lumen est ipse visus cœlestis animæ, vel visionis ip-

sius actus ad exteriora porrectus, emittens quidem agens, cœlum interea non relinquens, sed semper ibi continuus, exterioribus non permixtus, videndo agens simulatque tangendo. Nos saltem lumen solemus dicere vestigium quoddam vitæ mundanæ, quasi proportionem quadam se ipsam oculis offerentis. Vel quasi spiritum vitalem inter mundi animam, atque corpus. Sed de hoc in Theologia nostra satis diximus. Quamobrem vbi multas supra cœlum mentes angelicas quasi luces, earumque ordinem & inuicem & ad vnum Deum patrem luminum asseuerare studes, quidnam tibi longis inuestigationum amabagibus opus erit? Cœlum suspice precor cœlestis patriæ ciuis, cœlum ad hoc ipsum perspicue declarandum ordinatissimum à Deo factum, atque patentissimum. Cœlestia igitur tibi sursum conspicienti, statim per ipsos stellarum radios tanquam oculorum suorum aspectus atque nutus enarrant gloriā Dei, & opera manuum eius nuntiat firmamentum. Sol verò maximè Deum ipsum tibi significare potest. Sol tibi signa dabit, Solem quis dicere falsum, audeat? Ita demum inuisibilia Dei, id est, Angelica numina, per stellas potissimum intellecta conspiciuntur, per Solem vero sempiterna quoque Dei virtus atque diuinitas.

*Sol cœlestium illuminator & Dominus atque moderator.*

## C A P V T III.

**S**ol tanquam manifestus cœli Dominus omnia prorsus cœlestia regit, & moderatur. Magnitudinem eius ingentem quæ centies sexagies terram continere putatur in præsentia prætermittam. Principio lumen stellis omnibus inserit. Siue natiuum illæ per se lumen exiguum habeant (vt nonnulli suspicantur) siue nullum (vt plurimi putant.) Deinde illud imprimis ex signis XII. viuum, vt inquit Haly & Abraham, dicitur, & apparet effectū, quod Sol eo tempore vegetat. Imò vero duo vtrinque signa Sol tanta virtute complet, vt vtrumque spatium apud Arabes ductoria Solis, id est regium solium appelletur. In quo planetæ dum sunt, incendium tamen interea deuittantes, virtute mirifica pollent. Præsertim si in hoc ipso interuallo positi Planetæ quidem superiores exoriantur ante Solem, inferiores vero post Solem. Rursus signum illud in quo regnat Sol, id est Arics, caput inde sit

signorum caputque in quolibet viuento significat. Illud quoque signum quod Solis, est domicilium, id est Leo, & cor est signorum, & in quolibet viuento cor obtinet, iam vero cum Sol peruenit ad Leonem, epidimiam quasi Pythonicum venenum in regionibus multis extinguit. Præterea semper ab ingressu Solis in Arietem annua totius orbis fortuna dependet. Et hinc quidem proprie natura Veris. Ab ingressu autem Solis in Cancrum, æstatis qualitas iudicatur. Ab introitu in Libram, autumnus natura. Ab accessu in Capricornum, hyemis qualitas inuenitur. Comperita videlicet ibi præsentis figura cœlestium. Merito cum tempus à motu dependeat, Sol per quatuor signa mobilia, tempora quatuor anni distinguit. Item à reditu Solis in natiuitatis vniuscuiusque gradum atque minutum sua cuique varia per annum fortuna reuoluitur. Accedit ad hæc quod motus Solis tanquam primi & principis planetarum, vt Aristoteles inquit, simplicissimus est, nec à medio discedens Zodiaco, sicut cæteri, neque regrediens.

*Conditiones Planetarum ad Solem.*

#### C A P V T IV.

**I**tem certa quædam in cœlis ab ipso Sole vbiue spatia definita videntur, quæ cum primum peregerunt Planetæ, motum habitumque permutant. Nam Saturnus Iupiterque & Mars per tertiam à Sole cœli partem in conspectum Solis trinum peruenientes, mutato statim motu, vel ante vel retro mouentur. Si orientales à Sole fuerint, regrediuntur, si occidentales, progrediuntur. Venus Mercuriusque breuiora quædam, certa tamen à Sole & ad Solem spatia peruagantur. Venus quidem ultra, xxxiv. Mercurius autem xxviii. gradus discedere prohibetur. Luna in quouis aspectu Solis figuram mutat atque naturam. Et quasi Sol alter ætates quatuor agens, quatuor anni tempora repræsentat. Et quoties Soli coniungitur, ab ipso gradu coniunctionis cœlique figura declarat mensis futuri naturam. Proinde Planetæ omnes cum primum cor Solis attingunt, cæteris eo tempore, quamuis exiguo, dominantur. Aliter verò propinquantes Soli solito interim officio vacant. Congrediens quidem cum Sole Saturnus rigiditatem pristinam, Mars quoque solitam ferocitatem ponere iudicatur. Planetæ superiores quatenus ad eos Sol accedit,

ascendunt, quatenus verò discedit, contra, descendunt. Coniuncti quidem Soli sunt Epicyclo summi. Oppositi vero sunt infimi. In quadratura sunt altitudine medij. Luna vtrouque in perferente sublimis existit, in quadratura descendit. Venus atque Mercurius, si progredientes coniunguntur Soli, excelsi sunt, si regredientes, infimi. Neque fas est Planetis Epicycli sui prius explere circuitum, quam Solem quasi suum Dominum coniunctione reuiderint, in his quæ diximus videntur profecto planetæ superiores, quando in conspectu Solis trino gressum mutant, regium reuerentur Solis aspectum. Et coniuncti cum Sole ideo esse summi atque directi, quoniam sunt interim cum rege concordēs. Contra verò quando discordēs sunt id est, oppositi, retrogradi sunt & infimi. Venus atque Mercurius quando Solem attingunt, si recti tunc incedunt, id est, obediētes Domino, sublimes euadunt. Sin obliqui, quasi rebelles, interea sunt obiecti. Luna verò si etiam opposita Soli est sublimis, nullam nobis admirationem debet afferre. Quid enim Lunæ lumen est, nisi idem ipsum Solis lumen hinc & inde lunari speculo repercussum? atque in plenilunio in Solem est conspectu refluxum. Descendere autem Luna videtur in quadratura, quoniam tunc Dominum intuetur. Rursus sicut Sol non refert pedem, ita neque retrocedit, Luna epicycli velocitate præueniente regressum. Luna denique virtute solari, vbi in via Solis septentrionem petit ingenti Draconis capite constituto signis ibidem augmentum præstat. Vbi verò meridiem, decrementum cauda proiecta, Planetæ omnes orientales à Sole facti, vel occidentales conditionem vtrouque mutant, atque cognomen. Omnes quidem verentur Solis viam, quam eclipticam nominant. Inferiores planetæ magis deinceps atque magis. Fœminæ denique scilicet Luna Venusque maximè. Ideo plurimum digrediuntur in latus. Omnes denique vel in hoc tramite collocati, vel hinc digressi rursus ad septentrionem interim aut meridiem procedentes, conditionem vbiue mutare putantur. Luna generationis Domina, nullum habet manifestum nisi à Sole lumen. Atque ex perfecto Solis aspectu omnium cœlestium vires accipit, vt inquit Proculus, quasi in Sole sint omnes, viresque similes ad nostra demittit.

*Virtus Solis in generationibus atque temporibus, in genesi & in omnibus.*

## CAPVT V.

**D**Enique in cuiusque hominis natiuitate ipse Lunæ locus declarat Dominum genituræ, conceptionisque momentum. Et Lunæ cum Sole coniunctio vel oppositio ante hominis ortum facta, veritatem natiuitatis aperit, & fortunam. Atque in præsentī figura ea cœli portio in quam incidit pars fortunæ natiuitatis dæmonidicitur ab antiquis portenditque, vel ducit (vt placet Aegyptiis) totius vitæ tenorem. Partem verò fortunæ designat spatium inter Solem primo, atque Lunam obseruatum, deinde ab ascendente gradu proiectum. Proinde Astronomi per motum Solis iam compertum Planetarum motus inueniunt, atque metiuntur. Et Sol motu suo noctes diesque distinguit, & horas, & menses, & annos. Lumine pariter & calore generat, vegetatque, & mouet, & regenerat omnia, & exhilarat, atque fouet, & quæ occulta fuerant, primo aduentu efficit manifesta, accessuque vicissim atque recessu quatuor efficit anni partes, & regiones nimium à Sole remotæ, semotæ pariter sunt à vita. Ver quidem est temporum optimum, quoniam ab Ariete regno Solis incipit. Autumnus vero pessimus, quoniam à Libra casu Solis exordia sumit. Natiuitas postremo diurna communiter existimatur melior quam nocturna, & illa quidem ex Sole plurimum, hæc verò iudicatur ex Luna tanquam speculo Solis. Cœlestem in natiuitate figuram in partes duodecim patiuntur.

Vbi cum nonam quidem Soli, tertiam verò Lunæ destinant, illam profecto Deū nominant, hanc Deam, & optima quæque significare putant sapientiam, fidem, religionem, gloriam sempiternam. Hæc enim omnia Sol & omnem simpliciter veritatem & vaticinium regnumque significat. Accedit ad hæc, quod quatenus Sol ad medium ascendit cœlum, vitalem, & animalem spiritum in nobis mirificè fouet. Quatenus vero descendit, spiritus vterque debilitatur. Quamobrem Dauid omnipotentis tuba Dei, diluculo ad citharam & carmina surgens, atque interea clamans, Vanum est vobis ante lucem surgere, Solem declarat ad nos venientem, bona secum nobis euncta referre, spiritusque nostros excitatos illuminatosque mirabiliter ad sublimia reuocare. Mitto quod Sol, vt ferunt, quasi vates accessu suo vari-

cinia quædam sobriè dormientibus afferre putatur. Luna quoque Solis, quam Aristoteles minorem appellat Solem, spiritum humoremque naturalem ascendendo similiter recreat, deserit descendendo. Et quo magis lumine Solis abundat, eo magis est omnibus salutaris. Mitto nunc quemadmodum obseruanda sit ad Solis aspectum Luna lumine non deficiens in hoc signo deinceps, atque illo significante membrum hoc & illud, Atque ita per Lunam à Sole traſiſcienda virtus cœlestiū omnium ad membra fouenda per Medicinas eo tempore rite compositas. Satis enim de his in libro de vita iam diximus.

*Antiquorum laudes in Solem, & quomodo cœlestium vires in Sole & à Sole sunt omnes*

## CAPVT VI.

**O**Vas ob res Orpheus Apollinem viuificum cœli oculum appellauit. Atque summatim hæc quæ dicam ex hymnis Orphicis congregantur. Sol oculus æternus omnia videns. Supereminens cœlestelumen, cœlestia temperans, & mundana. Harmonicum mundi cursum ducens, siue trahens. Mundi Dominus, Iupiter immortalis mundi oculus circumcurrens, habens sigillum, omnia mundana figurans. Luna stellis grauida, stellarum Luna regina. Hæc Orpheus. Apud Aegyptios Mineruæ templis aureum hoc legebatur inscriptum. Ego sum quæ sunt, quæ erunt, & quæ fuerunt. Velum meum reuelauit nemo. Quem ego fructum peperī, Sol est natus. Vbi apparet, Solem Mineruæ, id est, diuinæ intelligentiæ partum, florem fructum, esse. Theologi veteres, eodem Proculo teste, dicebant reginam omnium iusticiam è medio Solis throno per cuncta procedere, omnia dirigentem. quasi Sol ipse sit omnium moderator. Iamblichus Aegyptiorum sententiā ita narrat. Quicquid habemus boni, habemus à Sole, videlicet, vel ab ipso solo, vel si & ab aliis, id quidem vel à Sole absolutum, vel à Sole per alia. Item Sol elementalium omnium virtutum Dominus. Luna virtute Solis generationis domina. Ideo Abumasar per Solem, inquit, & Lunam vitam cunctis infundi. Moses cœlestium Dominum in die Solem putat, in nocte Lunam, quasi nocturnum Solem. Solem quasi Dominum omnes in mundo medium, quamuis ratione diuersa, collocauerunt. Chaldæi quidem medium Planetarum, Aegyptij vero inter duos mundi quinariorum, nēpe super



hunc Planetas quinque, sub hoc Lunam & quatuor elementa. Propinquiorem vero terræ quam firmamento positum à providentia putant, ut eius feruente spiritu & igne, Lunæ aëris, aquæ humor, & crassa terrenorum materia foueretur. Alia quoque ratione medium ipsa planetarum prosperitas declarauit. Quæ quidem dispositionem eorum ad Solem eiusmodi postulat, in qua Saturnus, Iupiter, Mars, oriantur ante Solem. Venus autem & Mercurius atque Luna post Solem, quasi regem agentes itinere medium. Incedentes aliter, debiliores euadunt. Inter illos autem præstantiores habentur, quos ipse Sol Dominus præcedere iussit. Sed redeamus ad præscos. physici veteres, Solem cor cæli nominauerunt. Heraclitus luminis cælestis fontem. plerique platonici in Sole mundi animam collocarunt, quæ sphaeram Solis totam implens, per globum illum quasi igneum tanquam per cor effundit radios, quasi spiritus, inde per omnia, quibus vitam, sensum, motum vniuerso distribuit. His forte de causis Astrologi plerique putant, sicut Deus solus intellectuali nobis animam tribuit, ita solum sub influxu Solis eam mittere, id est quarto duntaxat mense post conceptum. Sed hoc illi viderint. Mercurius certe motum mentis nostræ significans, motu minime omnium discedit à Sole. Saturnus denique significans statum segregatæ mentis Eclipticam minime deserit. præterea Iupiter atque Mars, quoniam ille per Sagittarium suum, hic per Arietem cum Leone congruunt Apollineo, tantum adepti sunt munus, ut Iupiter quidem religiosam iustitiam legesque ciuiles atque prosperitatem significaret, Mars ante magnanimitatem & fortitudinem atque victoriam. Luna, Venus, atque Mercurius Solis comites appellatur, Luna quidem ob frequentem cum Sole coitum vel aspectum. Venus autem atque Mercurius ultra vicinitatem propter æqualem cum Sole progressum. Hinc igitur vniuersæ generationis imperium acceperunt. Siquidem humidior Luna in coitu conspectuque Solis, vitalem calorem nata, rebus subinde generandis humorem suggerit calentem atque vitalem. Mercurius autem duo hæc partesque omnes in rebus gignendis numerosa quadam proportionem commiscet. Venus aurem eiusmodi mixtionibus decentes adhibet formas, & gratiam, atque latitiam. Sol profecto quemadmodum lumen totum in se collectum per varias distribuit stellas inter se

specie differentes, sic & omniformes virtutes cum omniformi lumine digerit. Ex quo perspicue coniectare licet, tot saltem Soli virtutes inesse, quot stellæ in cælis existunt.

*Dispositiones signorum & planetarum circa Solem atque Lunam.*

## C A P V T VII.

**P**roinde Solem esse regem, Lunamque quæ Solis & soror est, & coniunx, esse reginam cælestium, ipsa signorum in Zodiaco dispositio manifeste declarat. Locum enim Solis & Cancer Lunæ sedes se contingunt. Item Aries Solis, & Taurus Lunæ regnum. Cæteri vero planetæ sedes quisque suas circa regem reginamque vndique quasi medios circumponunt. Mercurius hinc quidem prope Leonem habet Virginem, inde vero prope Cancrum habet Geminos, Venus autem hinc Libram, inde Taurum Mars quoque hinc Scorpium, illinc Arietem. Iupiter hinc Sagittarium, inde Pisces. Saturnus hinc Capricornum, illinc Aquarium. Sed olim cum ita Planetarum sedes ad Solem Lunamque disponerem, familiaris meus Bindanius Recasolannus profundo vir iudicio, sic obiecit. Vide ne Marsili, sedes easdem quamuis ordine conuerso, eisdem tamen gradibus ad Saturni domos esse vtrinque dispositas? Video, inquam, hoc ipsi Soli præcipue conuenire, interim vero altissimo etiâ Saturno contingere. Quid verò, si hoc Saturnus dignus est honore, quoniam minime omnium à regia Solis via præuariari videtur. Sed redeamus ad institutum. Quinque igitur hi Planetæ duas quisque sedes habent. Vnam quidem Solem quasi à tergo sequentem, alteram in conspectu Lunæ illæ nominantur occidentales à Sole, hæc orientales à Luna. Veruntamen totum Zodiacum Sol & Luna sibi vendicant. Nam provincia Solis, Leonem, Virginem, Libram, Scorpium, Sagittarium, Capricornum, occupat. Provincia Lunæ, Aquarium, Pisces, Arietem, Taurum, Geminos, Cancrum. Forte verò Cancrum hominum portam appellauere, quoniam Sol ibi descensurus propemodum iam videtur. Capricornum verò deorum portam, quoniam ibi Sol statim videtur ascendere. Sed hæc aliter quoque alibi declarauimus. Profecto duo hæc signa & Aries simul atque Libra dignitatem sibi vendicauerunt, ut cæli cardines vocarentur, quoniam ibi mutationes quatuor temporum Sol decernit, & quoniam per Arietem Sol incedens atque Libram, medium

in ascensu vel descensu tenet cursum, diemque cum nocte librat, ideo circulus ab Ariete productus in Libram, Mineræ, id est, sapientię iustitięque circulus apud Ægyptios nuncupatur. Cœlestium quidem ordo tam mirabilis declarat mundum non fortuna, sed prouidentia constitutum. Atque obseruantia quædam omnium ad vnum Solem cunctorum moderatorem ostendit, & angelicas mentes omniaque cœlestia vni supra cœlum summo prorsus obtemperare, & nostros animos multo magis eidem obedire debere.

*Planeta concordēs cum Sole & Luna sunt felices, discordēs contra. Item quomodo saluent Solem atque Lunam.*

### C A P V T VIII.

**S**olem Lunamque Ptolemæus vitæ aucthores existimat, & hanc quidem quod ad augmentum vegetationemque pertinet exhibere. Illum verò quod spectat ad sensum. Iouem præterea Veneremque idcirco vitę salutare existere, quoniam proportionē quadam harmonica cum Sole consonant atque Luna. Iupiter quidem cum Sole plurimum, aliquantum quoque cum Luna, Venus verò vicissim. Saturnus autem atque Mars idcirco sunt aduersi, quoniam à Sole Lunaque dissonant, Saturnus à Sole magis, Mars autem magis à Luna dissidet. Iupiter verò præ cæteris almus, quoniam si Solis Lunęque lumina perfectè consentunt, ex utrisque Iupiter coalescit. Neque verò prætermittendum est, quod Planetæ quando Solis aut Lunę faciem quasi quadam salutatione reuisunt, vim subito nouam adipiscantur, quam Arabes almugeam nominauere, quando scilicet, vel sequentes Solem, ab ipso tanto spatio distant, quanto sua domus à domo Solis remota est, vel præcedentes Lunam, eodem interuallo Lunę propinquant, quod domicilium suum est domicilio Lunę propinquum. Sic ergo Saturnus salutabit Solem quoties occidentalis, id est, post Solem exortus in signo sexto à Solis signo fuerit. Iupiter verò reuisset Solem, cum in quinto, Mars in quarto, Venus in tertio, Mercurius in secundo, similiter salutabunt Lunam, quando orientales à Luna, id est, ante illam orti eisdem illam interuallis aspicient. Hinc iterum apparent consonantia quidem Iouis Venerisque cum Sole atque cum Luna, dissonantia verò Saturni Martisque ab utrisque. Nempe Iupiter a-

pud Leonem Solis sedem, sedem suam Sagittarium in trigono collocavit aspectu perfecto. Venus Libram iterum ad Leonem in exagono aspectu quoque propitio. Mars Scorpionem in quarto videlicet spatio dissonante. Saturnus & in sexto non consono, & in septimo prorsus opposito. Opponit enim & Leoni Aquarium, & Cancro pariter Capricornum. Similiter Venus ad Cancrum disponit Taurum in exagono, id est, sextili. Iupiter Pisces in trigono, id est, in trino. Mars Arietem in quadrato. Saturnus, vt diximus, in sexto pariter atque septimo. Ideo Iupiter atque Venus fortunati dicuntur, vt pote cum Rege cœlestium reginaque concordēs. Saturnus autem atque Mars infortunati, quoniam sunt inde discordēs, sed Saturnus magis infelix, quoniam maximè dissidere videtur à Sole, imò etiam magis quam Mars à Luna. Hinc admonemur, animos illos qui cum diuina voluntate consenserint, felices fore, discordēs verò miseros.

*Sol statua Dei. Comparatio Solis ad Deum.*

### C A P V T IX.

**H**æc diuinus Plato noster diligentissimè contemplatus, Solem ipsius boni conspicuum filium nominauit. Arbitratus quoque est Solem esse perspicuam Dei statuam in hoc templo mundano, ab ipso Deo positam, intuentibus vbique præteris admirandam. Hunc veteres, vt Plotinus ait, & Plato, venerabantur vt Deum. In Sole prisca Gentium Theologi omnia Gentilium numina collocarunt. Quod quidem Iamblichus & Iulianus Macrobiusque testantur. Denique quisquis non videt Solem in mundo, imaginem esse vicariumque Dei, is profecto neque noctem considerauit vnquam, neque Solem suspexit exorientem, neque cogitauit quantum excedat sensum. Quam subito viua redeat quæ procul ipso mortuo putabatur. Neque munera Solis animaduertit, quibus solus ipse facit, quod stellæ cunctæ conficere nequeunt. Solem igitur vel phœbum, Musarum, id est, intelligentiæ ducem, vnà cum Platoniciis atque Dionysio imaginem Dei conspicuam esse concludit. Esse quoque Phœbem, id est, Lunam imaginem Phœbi fermè, quemadmodum ille Dei. Et vt inquit Hipparchus, hanc esse Solis speculum, videlicet, incidens sibi à Sole lumen, ad nostra deflectens, in præsentia disputare non expedit.

Neque tamen prætermittere decet comparisonem illam platoniam, alibi latius à me descriptam. Quemadmodum Sol & oculos generat & colores, oculisque vim præbet qua videant, coloribus qua videantur, & utrosque in vnum lumine conciliante coniungit, ita Deus ad intellectus omnes resque intelligibiles se habere putatur. Spes enim rerum intelligibiles & intellectus omnes ipse procreat, atque virtutem inuicem agendi præbet utrisque propriam semel atque naturalem. Circumfundit insuper assidue commune lumen, per quod virtutes & intelligibilia, & intellectuum ad actum mutuum excitat, copulatque agendo. Quod sanè in lumen rebus quidem intelligendis veritatem, in mentibus autem scientiam Plato nuncupat. Putat insuper ipsum bonum, scilicet Deum ita saltem hæc omnia superare, sicut Sol lumen & oculos & colores. Sed ubi Plato Solem, inquit, omne visibile superare, proculdubio supra corporeum Solem, incorporeum auguratus est Solem, diuinum scilicet intellectum. Quoniam verò ab imagine ad exemplar partim adimendo quod deterius est, partim addendo quod melius, ascendere licet, deme si placet Soli, cui materia subtrahit Auerrois, tu certam similiter quantitatem, sed interea cum luce relinque virtutem, ut supersit lumen ipsum mirifica virtute refertum, nec quantitate certa, nec figura aliqua definitum, ideoque immensum imaginatione spatium sua circum præsentia tangens. Ita nunc excedens intelligentiam, sicut in seipso nunc exuperat aciem oculorum. Hac ferme ratione Deum qui in Sole posuit tabernaculum suum, ac Solè pro viribus inuenisse videberis. Denique sicut nihil alienius est à luce diuina, quam materia prorsus informis, ita nihil à luce Solis diuersus est, quam terra. Ideo corpora in quibus terrea conditio præualet, tanquam ineptissima luci, lumen nullum intus accipiunt. Non quia sit impotens lumen ad penetrandum. Hoc enim dum non illuminat intus lanam, aut folium, interim penetrat momento Christallum, alioquin difficilior admodum penetratu. Ita diuinum lumen etiam in tenebris animæ lucet, sed tenebræ non comprehendunt, non & hoc habet simile Deo: Quod Deus angelicis beatisque mentibus scientiam diuinorum prius inserit, mox amorem. Animus vero nostris hic utrumque credentibus amorem accendit purgantem atque conuertentem, antequam diuinorum intelligentiam largiatur. Ita Sol perspicuas ubique pu-

resque naturas, quasi iam cœlestes momento prorsus illuminat, opacas verò materias ineptas luci calefacit prius, & accendit, atque subtiliat, mox illuminat. Atque tam calorem quam lucem iam leues & petuias, nonnumquam eleuat ad sublimia. Hinc Appollo radiorum aculeis Pythoneam molem transfigit, purgat, dissoluit, attollit. Neque verò prætermittere fas est, quod quemadmodum speramus Christum tandem in suo regno venturum, & splendore sui corporis exundante humana è terra corpora prorsus suscitaturum, ita post hyemem letalem quotannis expectamus Solem in Ariete regnantem, semina rerum in terris quasi iam mortua animalia semiuiua ad vitam & pulchritudinem statim reuocaturum. Hinc Mercurius tanquam Solis Achates caduceo quodam excitare dicitur dormientes. Et Plato resurrectionem quandam quasi similem, in libro de Regno describit.

*Sol primo creatus, & in medio cælo.*

## CAPVT X.

**Q**ueritur inter hæc, quid potissimum primo Deus creauit? Respondet Moses, lucem. Merito enim ab ipsa diuina luce plusquam intelligibili statim emanat lux omnium simillima Deo. Lux quidem intelligibilis in mundo supra nos incorporeo, id est purissimus intellectus, Lux autem sensibilis in mundo corporeo, id est, lux ipsa solaris. Sed hæc forte primo quidem sui gradu tanquam die primo, id ipsum simpliciter habet, ut luceat intus, illuminetque foris. Secundo vero, ut virtute calefactoria tum ipsa polleat, tum cætera vegetet. Tertio rursus, ut efficacia sua iussuque Dei seipsam propaget in molem. Quarto denique, naturæ ordinisque gradu quasi die quarto, ut molem suam irasortiat in orbem, quemadmodum diuinæ intelligentiæ lux vnde manauit, reflectitur in seipsam. Ideo Moses primo quidem die ipsam simpliciter lucem, quarto vero lucem rursus solari hac, id est, orbiculari figura præditam asserit procreatam. Plato quoque bis Solis constitutionem repetit in Timæo. Primo quidem in numero planetarum quasi consortem. Secundo diuinitus mirabili præcæteris luce regiaque auctoritate donatum. Solem plerique Astronomorum in exordio mundi ad Orizontem primo habitabilem tradunt, in Ariete regno suo, medium cœlum, velut arcem atque caput, tanquam

regem cœlestium tenuisse. Moses quoque ubi ait, factum esse diem vnum, non mane quidem & vespere, sed vicissim vespereatque mane, designat post meridiem quo Sol est accensus, diem iam natum, deinceps in vespeream declinare, sequenti mane complendum. Autoritatem profecto Solis regiam confirmavit, ubi primum in mundo diem dominicū assignauit, id est, solarem. Si enim Deus mundum sex quidem diebus absoluit, & septimo conqueuit, nimirum ab ipso Solis die, id est, potestate solari, mundi videtur auspiciatus exordia. Saturnum verò à Sole remotissimum, generationibus actionibusque iudicauit aduersum ubi Saturni die præcepit ab actione vacandum. Nonne & author ille vitæ Christus quem expirantem Sol è medio cœlo quasi vates, obtenebrato vultu defleuerat, rursus die & hora Solis resurrexit ex mortuis, ita lucem nobis intelligibilem, sicut Sol visibilem redditurus.

*Duo Solis lumina. Apollinis munus. Gradus luminum. Sol diuina omnia refert.*

## C A P V T XI.

**S**I Solem excogitemus in prima illa naturæ suæ proprietate, quam primo creationis suæ momento sortitus est, tanquam numeratus in consortio planetarum cognoscemus naturalem primamque lucem eius non fuisse tantam primo, quanta mox euasit. Non enim tantum stellas ceteras magnitudine superat quantum lumine. Nam magnitudinem quidem Iouis minus quam duplo, lucem verò forte centuplo superat. Horum quantitates certè comparatione terræ censentur. Quoties verò Sol terram contineat, diximus ab initio. Iupiter profecto quinquies atque nonagies terram adæquare putatur. Aliud igitur & aliunde prorsus eluxit lumen hoc immensum, naturali Solis luci desuper additum. Omnia sane cœlestia proprium lumen nascentia secum attulerunt, sed vel exiguum vel nobis occultum, siue raritate quadam & candore, siue alia de causa lateat. Simile quoddam lumen pauloque pro magnitudine sua maius ab initio Sol secum attulisse videtur. Verum præter proprium illud natiumque lumen, ut ita loquar, obscurum, statim aliud hoc oculis potentissimum lumen diuinitus est adhibitum, tanquam expressior quædam intelligentiæ diuinæ & largissimæ bonitatis imago.

Deus, ut Theologi nostri tradunt, ge-

minum mentibus dedit lumen, Primum quidem naturaliter his accensum. Secundum verò, iam quasi pro meritis necnon gratis insuper additum, largitate mirabili beatas efficiens. Cum igitur stellæ mentium sint imagines, consentaneum est, has duo similiter lumine suscepisse. Quemadmodum verò Deus lumen hoc ingens in Sole lumini Solis primo mirabiliter addidit, ita Sol statim vicarius in hoc officio Dei hoc additum sibi lumen natiuis stellarum luminibus addidit. Imò verò sicut solemus lumen quod apparet in Luna, non ipsius Lunæ, sed Solis lucem dicere, per Lunam ad nos vsque demissam, ita secretissima Platoniorum ratione dicemus, splendorem tantum in Sole patentem, non ex ipso quidem, sed ex Deo per ipsum ad cuncta procedere, tanquam non globi illius, sed Dei ipsius lumen, ita iam oculis manifestum. Deus profecto dum solarem globum exiguum cœli particulam tanto splendore compleuit, ut ex vno fulgor exuberaret in omnia, absque dubio declarauit, & corpusculum Solis tam incomparabile munus non ex se, sed desuper accepisse, & ex vno Deo Solis Sole cuncta prorsus bona per omnia propagari. Quemadmodum verò lumen hoc in Sole sensibile, sensibilia omnia sensusque collustrat, & vegetat, & format, & ad superiora conuertit, ita intelligibile quoddam in ipsa Solis anima lumen, intimos animorum oculos illuminat, accendit, & reuocat. Hinc Solem apud Theologos veteres Apollinem arbitror nominatum, & harmoniæ omnis authorem, ducemque Musarum, quoniam animos non tam manifestis quam occultis influxibus radiorum à confusa quadam turba resoluat, & harmonice moderetur, atque ad intelligentiam postremo perducatur. Neque vero putandum est, lumen hoc amplissimum efficacissimum efficacissimumque, & inter mundana datum præ cæteris optimum donumque perfectum, originem primam ab exiguo Solis corpore ducere, sed ab ipso bono tanquam patre luminum, in quo quicquid est luminis, certè plus quam intelligibile est, omnem prorsus excelsens intelligentiam. Sed inde in diuinum siue angelicum intellectum mox descendens, intelligibile iam euadit. Deinceps in animæ mundanæ mentem veniens, intellectuale mox, & insuper imaginabile iam efficitur, subinde in cœlum transiens, sensuale fit simul atque sensibile. Denique ad inferiora demissum iam quasi diuiditur, & alicubi quidem sensuale fit, id est, in oculis

oculis animantium. Alicubi verò sensibile, id est obiectis. In paucis autem seruat vtrumque, & his quidem nocte videntibus. Sed reuertamur ad prima. Tria Platonici principia ponunt. Ipsum bonum, diuinum intellectum, mundi animam. Lumen vnicum præceteris palam hæc omnia refert. Ipsum quidem bonum præfert, quoniam dum cuncta mirabiliter antecellit, interim per omnia se diffundit, & ad sublimia renocat, excellentia interim sua mirabiliter & puritate seruata. Intellectum verò diuinum, quoniam declarat omnia, & distinguit, & ornat. Animam quoque mundanam, quoniam almo calore generat omnia, fouet, & vegetat, atque mouet. Rursus, quemadmodum ex tribus super cælum mundi principiis in cælum descendit, atque sub cælum, refertque vbique parentes: Ita in cælo quidem per solem repræsentat ipsum bonum, intellectum verò diuinum, id est plenitudinem idearum, per firmamentum stellarum plenum. Animam denique mundi quasi mobilem, per lunam luce mutabilem. Similiter & sub cælo primum quidem per ignem, secundum verò per aërem, tertium postremò per aquam. Denique, quemadmodum stellæ quidem superiores immutabiliter illuminantur à sole, luna verò mutabiliter inde lumen accipit, sic & Angeli à Deo immobiliter, animæ verò mobiliter illustrantur.

*Similitudo Solis ad Trinitatem diuinam, & nouem Ordines Angelorum. Item, de nouem Numinibus in Sole, & nouem Musis circa Solem.*

## C A P V T XII.

**N**ihil in mundo diuinæ Trinitati reperitur sole similis. In vna enim solis substantia tria quædam inter se distincta sunt, pariter & vnita. Primum quidem naturalis ipsa foecunditas sensibus nostris prorsus occulta. Secundum manifesta lux eiusdem ex ipsa foecunditate manans, ipsi semper æqualis. Tertium ab utroque calefactoria virtus, penitus par vtriusque. Foecunditas igitur Patrem refert, lux verò intelligentiæ similis, Filium intelligentiæ modo conceptum, calor amatorum Spiritum repræsentat. Circa diuinam Trinitatem Theologi nostri tres Angelorum Hierarchias excogitanti, quamlibet tres ordines continentem. Primam Patri, secundam Filio, tertiam Spiritui consecratam. Similem quoque circa solarem trinitatem, nos ter-

narium inuenimus atque nouenarium. Si quidem ex ipsa solis natura foecunda, tres naturales foecunditates per cuncta procedunt. Prima quidem inde sit in natura cælesti: secunda verò in simplici elementorum natura; tertia denique in natura mixtorum. Rursus ex vitali calore solis passim ultra naturas propagatur & vita, eaque trina. Prima quidem vegetalis in plantis; secunda verò sensualis immobilis in Zoophytis; tertia sensualis atque progrediens, in perfectioribus scilicet animalibus. Ex luce denique solis tres fulgoris species deriuantur, siue per cælum, siue sub cælum. Aut enim omnino candidum lumen est, aut omnino rubens, aut mixtum. Cum verò lumen & simillimum, & quasi principium cognitionis existat, præcipuè sensualis, meritò tribus luminis speciebus tria quoque genera sensuum respondere videntur. Rubori quidem sensus omnino corporei, tactus videlicet, atque gustus. Candori verò sensus plurimam incorporei, imaginatio scilicet atque visus. Sed luminis mixto sensus quoque inter incorporeos, corporeos medij, auditus scilicet & olfactus. Hactenus solis lumen non solum imago est eiusmodi rerum, sed & causa. Puræ verò intelligentiæ solum est imago: sicut enim intelligentia pura momento peragit, & profunda penetrat, atque declarat, ipsa interim nulli permixta, sublimis existens, ita lumen momento per omnia se dilatat, & singula patefacit, indiuiduū simul est ubique totum, nulli permixtum. Si quidem abeunte sole ne momentum quidem lumen in aëre permanet, suum namque Phœbum passim comitatur euntem. Sed quoniam nescio quomodo hic sub Apolline quasi Poëta sumus, & si non boni, liceat parumper confabulari. Primo quidem de diis (vt Platonicè loquar) superioribus, deinde de Musis nouem, veteres in sole numina collocarunt. Nam aut substantiam eius contemplantur, aut vires, in substantia, essentiam, vitam, intelligentiam, essentiam cælum, vitam Rheam, intelligentiam verò Saturnum, eorum more cognominamus. Si vires Solis post substantiam contemplantur, foecunditatem quidem eius Iouem nominabimus & Iunonem, lucem vero Apollinem & Minervam, calorem denique Venerem atque Bacchum. Jam vero Phœbum & Bacchum, qui præceteris in Sole plurimum dominantur, antiqui semper iuuenes exprimebant, quoniam si quis nouerit lucem caloremque Solis, ea sinceritate prorsus, & proprietate, qua illic existit suscipere ad usumque suum, & modum accommodare, iuuen-



tutem inde perpetuā reportaret, vel saltem centum atque viginti solis annos impleret. Verum post nouem hæc numina intima Soli, ad nouem circa Solem Musas progrediamur. Quid igitur nouem circa Phœbum Musæ, nisi nouem Apollineorum genera numinum per sphaeras mundi nouem distributorum? Octo namque coelos tantum veteres cognouerunt. Sub igne verò cœlesti, quasi nonum cœlum aërem purum adhibuerunt, qualitate videlicet motuque cœlestem. In qualibet verò sphaera diuinos spiritus oculis occultos disposuerunt gradatim stellis singulis dedicatos, quos Proculus etiam Angelos, & Iamblicus insuper Archangelos Principatusque cognominant. Sed qui inter eos ubique præcipuè sunt solares, antiquiores appellauere Musas scientiis quidem omnibus præsidentes, maxime verò Poësi, Musicæ, Medicinæ, expiationibus & oraculis atque vaticiniis. Iam reuertamur ad Solem. Minima quæque, si modo rarissima sint, inepti nimium admiramur, consueta verò vel maxima cæci pariter & ingrati iamdiu admirari desiuimus. Nemo miratur ignem, instar cœli Solisque feruentem, sine mixtura purissimum, perpetuo mobilem, longe lucentem, ex minimo statim maximum, dum omnia in se conuertit. Nemo Solem quantum fas est, miratur, incomparabiliter omnia superantem, genitorem omnium atque moderatorem, Solem exhilarantem tristitia, nondum viua viuificantem, iam mortua suscitantem. Verum si semel quotannis panderetur domus omnipotentis Olympi, splendorque subito tantus suspiceretur, Solem supra modum omnes solum admirarentur, Solem omnes vel tanquam summum Deum suppliciter adorarent, vel saltem diuinitus missum minimè dubitantes, Deo quamuis occulto tanti muneris auctori, ingentes quotidie gratias agerent. Iamblicus igitur Iulianusque Platonici iubent noctem fingere, absque vilo Lunæ stellarumque lumine, quo Solis quoque donum est manifestum. Vt certius cognoscamus quid absque Sole futuri simus, quantum huic Soli supernoque debeamus.

*Solem non esse adorandum tanquam rerum omnium authorem.*


### C A P V T XIII.

**S**ocrates in castris sæpe sub dio Solem suspiciens orientem, stetit attonitus in eisdem vestigiis, immotis membris, incontinentibus oculis statuz more, quousque

Solem salutaret iterum resurgentem. Hic ergo Platonici similibusque signis adducti, Socratem fortè dicent Phœbeo quodam dæmone statim ab ipsa pueritia ductum, Phœbum ipsum veneratissimum opere confuuisse, eademque ratione sapientissimum Græcorum omnium Apollinis oraculo indicatum. Ego verò quid de Socratis dæmone seu genio, siue Angelo affirmandum maximè videatur, in præsentia prætermittam. Id certè ausim affirmare, Socratem in eo mentis excessu non Solem quidem hunc admiratum fuisse, sed alterum. Cum enim admirationem sola nouitas afferre soleat, quid tantum stupeat hunc admirandus Socrates, quem & quotidie videt, cuius & motus omnes viresque iamdiu Mathematica simul & Physicæ ratione comprehenderat. Quem, teste Platone, non Deum primum, sed Dei filium appellauit. Non filium, inquam, Dei primum, sed secundum iamque visibilem. Primum namque Dei filium non Solem hunc oculis manifestum, sed alterum hoc longè superiorem, intellectum scilicet primum, solo contemplabilem intellectu. Socrates igitur Sole cœlesti nonnunquam admonitus, Solemque inde supercœlestem auguratus, & illius maiestatem contemplabatur attentior, & patris illius incomprehensibilem bonitatem admirabatur attonitus. Hunc Iacobus Apostolus patrem luminum appellauit, luminum, inquam, plusquam cœlestium, apud quem non sit transmutatio, atque vicissitudinis obumbratio. Nam & supercœlestia illa facta putat naturaliter mutabilia, & cœlestia multa quoquo modo obumbrari non dubitat, subcœlestia verò quotidie. Quamobrem omne datum optimum scilicet menti naturaliter insitum, & omne donum perfectum, videlicet post naturales dotes adhibitum, non à Sole hoc stellisque mundanis, sed altius ab ipso patre luminum descendere, censet. Nam intelligentiæ viribus quasi gradibus quibusdam non quidem cœlitus, sed desuper acceptis freti, super cœlos ascendimus, ubique multa cœlis præstantiora cognoscimus, & amamus & colimus, ipsumque cœli fabrum ante omnia veneramur. Neque tamen possemus intelligentia incorporeum aliquid cœloque melius intelligere, vel amare, si cœlitus tantum intelligentiam haberemus. Iam verò ne quis Solem, Lunam, stellas, nimium admiratus & adoraret, & tanquam intellectualium munerum authores, & patres veneraretur, prudenter admonuit, Solem hunc non esse vniuersi principium.

Missas in præsentia faciam rationes, quibus in Theologia nostra principium vniuersi nec corpus esse, nec animam, nec intellectum, sed aliquid admodum excelsus affirmamus, à quo quidem Sol cœlestis longissimè distat, ut umbra quædam illius esse iudicetur potius quàm imago. Rationes autem quas Iacobus hic attingit, breuiter in præsentia perstringam. Cum status tanquam principium & rector finisque motionis, sit omni motu perfectior, certè Deus ipse principium & rector omnium, mobilis esse non potest. Sol autem est assidue mobilis. Præterea principij virtus tanquam immensa fortiter attingit omnia, nec vquam cohiberi potest, Solis autem virtus per radios agens præpeditis passim radiis impeditur, defectum patitur obiecta Luna, sæpe nubibus coercetur, terrena densitate repellitur, distantia loci debilitatur. Sol ipse quinetiam minima quædam est particula mundi, angusta quadam sede tenetur, tra-

hitur à sphaera, rursusque retrahitur. Contraque sphaeræ propriæ impetum à sphaera semper superiore reuoluitur, contrariisque signis impeditur & stellis, & aspectu (ut ita loquar) malorum nonnunquam debilitatur. Denique principium vniuersi omnia ubique & semper, & in omnibus operatur. Sol autem nec mundi globos ipse facit, nec quæcunque frigida vel humida sunt vel densa, similiaque ipse virtute propria potest efficere. Neque similes si quæ sunt in cœlo virtutes, vllam à Sole ducunt originem. Ceterum quamuis Sol ab authore mundi longissimè distet, cœlestia tamen omnia ad Solem vnicum, quoniam rectorem in cœlo mensuramque diuinitus redacta videntur. Ut hinc prorsus admoneremur, omnia quæ in cœlo sunt, & sub cœlo, & super cœlum, ad vnum cunctorum principium referri similiter. Idque considerantes tandem hoc ipsum ea saltem obseruantia veneramur, qua cœlestia Solem.




# MARSILII FICINI FLORENTINI,

IN LIB. DE LVMINE,

*Ad Magnanimum Petrum Medicem,*

P R O O E M I V M.



*V*M opusculum de Sole tibi clarissime Petre destinauissem, memini paulo post iamdiu me de Lumine libellum composuisse. Itaq; decere prorsus existimaui, ut lumen il-

lud Solem hunc suum mox sequantur, quasi ducent. In terris quidem primus illucescentis aurora fulgor, Solem præcedit è vestigio surrecturum. Sed in cœlo vicissim Sol ipse pater splendorem antecedit ex ipso manantem. Ordinem equidem terrenam iamdiu secutus lumen priusquam Solem, sum, nescio quomodo, cōtemplatus. Nunc verò vicissim cœlestem ordinem imitatus, Solem lumini, patrem nato, ut par fuerat, anteposui. Neque verò in hoc libro vel in præcedente

consilium fuit minutiones Mathematicorum de Sole vel Lumine quæstiones curiosè prosequi, sæpe non tam utiles quàm certe difficiles. Sed horum potius exemplis comparationibusque quibusdam quasi gradibus mores animi contemplandi regulas diuina mysteria pro viribus assequi. Siquidem nullum adhuc planè perspicienda certius vel indicium, vel argumentum est quam lumen; nobis enim cœlestis ille pater Phœbea lustrauit lampade terras, non quidem ut sub tanto lumine, ut ita dixerim, muscas aucupemur, sed nos ipsos & patriam nostram patremque cœlestem suspiciamus, per eiusmodi videlicet lumen diuina videntes, quasi per quoddam speculum in enigmate, aliis autem per lumen excelsus facie ad faciem quandoque visuri.



# MARSILII FICINI FLORENTINI.

*Quid sit lumen in corpore mundi, in anima, in Angelo, in  
Deo, discursio per omnes sensus.*

## CAPVT PRIMVM.



**Q**D t maximè omnium tenebras, quarum culpa displicent mihi, quæcunque displicent, vel quod cum illis sint, vel quod ab illis labentia relabantur, deprimantque ad illas. Amo ante omnia lumen, cuius gratia & cætera diligo, vel quod cum illo sint, vel quod ab illo fluentia resfluant, reducatque ad illud. Ergo nuntiate mihi, obsecro, quid sit lumen? Respondet auditus. Aëreus sum, fatis esto, si sonos tibi aëreos nuntiem. Respondet & odoratus. Equidem non sum adeò lucidus, vaporeus sum à me disce vapores. Quid aliena quæris, à me gustus ait? Nato equidem in liquore, indico tibi liquores. Noli à me, dicit tactus, extorquere quod nequeo, corpulentus sum, corpulenta nuntio, altius quære lumen.

*Descriptio luminis visibilis.*

## CAPVT II.

**H**Inc admonitus ab infimo quo cecideram, ad altissima mei corporis nunc ascendam, ut inde lumen læuius altiusque cunctisque accipiam. Eia agite oculi mei lucentes, per lumen illud obsecro, quo præ cæteris, imò quo solo delectamini tantum, indicate Regina vestra quid sit lumen. Respondet subito visus, splendidus ego spiritus sum, & splendor sum spiritalis. Quocirca cum à me iure propria officia postules, largior libentissime quantum habeo. Lumen est spiritalis quædam & subira, & latissima à corporibus natura eorum sine detrimento proprio emanatio, nitoris scilicet cuius-

dam à diaphanis, id est, transpiciuis. Coloris autem ab horum oppositis, quantitatis, figuræ, motusque ab omnibus. Congrega in vnum omne colorum genus, quid erit hoc vniuersum? Nisi lux quædam omnicolor, siue lumen factum in solidiore obscurioreque materia terræ iam opacum. Segrega terram illi permixtam. Quid erit reliquum, nisi qualitas quædam, imò claritas actusque perspicui, sicut color est actus opaci. Color quidem lux est opaca. Lux autem color clarus, imò perspicui corporis colorumque flos quidam & vigor quasi vnicolor actu, virtuteque omnicolor. Fortè verò & abeunte lumine non sunt colores. Siquidem sint lumen ipsum iam varium, alibi videlicet, aliter affectum atque reflexum. Fortè etiam invirtute luminis semper sunt ipsi colores, alibi aliter explicandi.

*Nihil clarius quàm lumen ac Deus, nihil obscurius.*

## CAPVT III.

**A**Dumbratio hæc est, ô mei oculi, potius quàm pictura. Nihil vnquam audiui obscurius definiri. O rem valde miram! Quonam pacto fieri potest, ut nihil sit obscurius lumine? Quo nihil est clarius, quando per illud clarent, declaranturque omnia. Ascendam igitur hinc ad sublimem mentis speculam, ut saltem hoc videam inde, præter quod aliud quicquam alicubi videre non possum. O mens quæ rectè cuncta metiris, dicito mihi, nunquid forte lumen est ipse Deus, quo etiam nihil clarius est, nihil obscurius! Nihil clarius quàm Deum esse, esseque ad summum potentem sapientemque & bonum. Hoc enim auribus nostris quæcunque ab eo sunt facta

proclamat. Ut nemo sit surdior illo, qui tantum rerum omnium sonitum strepitumque non audit. Nihil contra obscurius, quam quid sit Deus, ut nihil sit tenebrosius illo, qui sibi opinatur hoc esse clarissimum.

*Lux intelligibilis est intelligibilium causa, visibilis visibillum.*

C A P V T III.

**R**espondet mens, Deum esse patrem luminum, apud quem non est transmutatio, per quam extinguatur vel minuat. Neque vicissitudinis obubratio, per quam vel vicissim subeat noctem, vel patiatur eclyptim. Respondet rursus, Deum esse lucem, in qua tenebrae non sint ullae. Id est, formam in qua nihil est informe. Formositatem quoque in qua nihil est deforme. Deus certe sicut mens, quae radius eius est, monstrat, lux est inuisibilis, infinita, veritas ipsa veritatis cuiusque, rerumque omnium causa. Cuius splendor imò potius umbra, est lux ista visibilis atque finita, causa visibillum. Quoniam verò lucis veritatisque natura est, ut ceteris alia verè declararet, Deo cuncta per se verè clareque conspicua sunt. Perinde ac si visibilis lux, cum sit oculorum visibillumque fons, seipsam intueatur tãquam omnicolore, atque in se colores omnes sensibiliaque omnia videat.

*Lumen visibile, rationale, intelligibile, diuinum.*

C A P V T V.

**V**erum ad tam sublimem speculationem haud tam repente prosiliendum, sed gradatim ascendendum mens admonet, ne caligare cogamur, ac splendore nimio obcaecari. Noli ratio considerare sensibus, visus tibi non satis nuntiat, ceteri nullo modo. Visus quia sensualis lux est, tantum sensibilem accipit datque splendorem. Atque è conuerso, quia sensibilem accipit datque splendorem, hunc sensualem quandam lucem esse cognoscis, ultra verò inde non licet progredi. Sed hinc à me discito, primum quidem me, se intelligentiam, esse lumen quoddam intellectuale, quandoquidem obiectum meum est intelligibile lumen, quod in qualibet re querenda quero, & reperta reperio. Siquidem lumen cuiusque rei & ipsius veritas idem. Veritas est lumen intimum, lumen veritas se ad extrema fundens. Discito deinde te, scilicet ratione & lucem quandam rationalem rationemque hinc irem. Siquidem rationem lucis tanquam originem tuam, ratiocinan-

do tanta aniditate perquiris. Sed vis rationem lucis commodius assequi: In luce cuiuslibet rationis eam quærito. Ibi est ratio lucis, ubi & omnium, in veritate summa, quæ & ipsa summa certitudo & claritas est, reperies veritatem lucis & claritatem. Siquidem idem est huius lucis quam quæris claritas atque veritas. Quid lux in Dea? Imensa suæ bonitatis veritatisque exuberantia. Quid in Angelis? Intelligentiæ certitudo à Deo manans, profusumque gaudium voluntatis. Quid in cœlestibus? Copia vitæ ab Angelis, virtutis explicatio à cœlo, risus cœli. Quid in igne? Vitalis quidam vigor à cœlestibus insitus, & efficax propagatio. Deinde in iis qui sensu carent, effusa cœli gratia. In sentientibus exhilaratio ipsius spiritus, sensusque vigor. In omnibus summam intimæ fecunditatis effusio. Vbiq; diuinæ veritatis bonitatisque imago.

*Quibus rationibus à luce visibili ad inuisibilem ascendamus.*

C A P V T VI.

**V**erum ne fortè fingere pro arbitrio videamur, ubi substantiam quandam lucis incorporeæ penitus, & diuinæ, toties affirmamus, consideratione dignum est, lucem hanc oculis manifestam, esse non posse primam, tum quia proportionem aliquam habet cum corporeis oculis omnibus, vel quibusdam, tum quia mobilis est, atque est in alio, & ex aliquo pendet. Ad aliquam ergo superiorem lucem ascendendum est, eiusmodi conditionibus absolutam, per se iam & in se existentem penitus incorpoream. Quandoquidem & hæc manifesta nobis propemodum incorporea est; imaginumque similiter incorporearum causa, nec ullis astricta dimensionibus, vel diuisionibus vel mixturis. Vnde constat ex mole vel forma, vel virtute corporea originem primam habere non posse, hanc igitur habere à luce corporibus altiore, ac supra modum ampliore, ut ita dixerim, atque clariore. Siquidem materia vel cœlestis ita lucem illic offundit diuinitus descendentem, sicut sub cœlo caliginosa moles susceptum cœlitus lumen obtenebrabat. Quamobrem operæ pretium est, & hoc sub luna lumen à caligine, & cœleste illud à materia segregare & illinc ad lumen supercœleste conscendere, illinc rursus à rationali luce ad intellectualem, ab hac ad intelligibilem, ab hac pro viribus ad diuinam, ut reuelata facie ducti videlicet à Domini spiritu à clari-

zate gradatim in claritatem in eandem imaginem transformemur.

*Ad numinum gaudium cœlestes ipsorum oculi rident, splendore motuque gestiunt.*

### C A P V T V H.

**V**idemus postquam à cœlestium radiis qui à supercœlestibus per cœlestia tanquam per vitra quædam ad nos descendunt cunctis dari perfectionem suam, vitam, sensum, certitudinem, gratiam, atque lætitiā, necessarium est lucem in spiritibus super cælum esse formæ ipsorum perfectionem, fecunditatem vitæ, perspicaciam sensus, clarissimam verissimæ intelligentiæ certitudinem, gratiæ copiam, gaudij vbertatem. Horum omnium imago est splendor cæli, imò ad horum claritatem, tanquam umbra, quia minus potest corpus cœli exacte claritatem spiritus imitari, quam terra cæli fulgorem. Ad ipsum mirabile cœlestium gaudium cælum quasi corpus eorum, imò quasi oculus eorum (oculum enim Orpheus Solem appellat) ridet splendore, motuque exultat, sicuti terra tanquam ab illis remotissima luget tenebris, situque torpet & ocio, neque enim putandum est cælum moueri vel vi aliqua, vel defectu, cuius motus natura perpetuus est, locumque naturalem non relinquit, substantia quoque absolutissima, à qua nihil discedit sui, sed quodam excessu lætitiæ, ob quam gestiens quiescere nesciat. Ad gaudientium numinum cantum, ut Pythagorici arbitrantur, sphæræ choreas ducunt. Vnde ordinatissimis variisque motibus mirabilem conficiunt harmoniam, ad astrorum risum, qui præcipuè radiis indicatur, rident omnia quæ sub cælo sunt, quæ super terram, ad tenebras tanquam ad tristitiam omnia mœrent. Solemus enim ridentibus congratulari, flentibus contristari.

*Risus cæli ex numinum gaudie proficiscens, id est, lumen omnia fouet atque delectat.*

### C A P V T V I I I.

**Q**uod lumen sit risus cæli ex spirituum cœlestium gaudio proficiscens, indicant homines, qui quoties lætantur spiritu, ridentque vultu, splendent certe intus, dilatanturque spiritu, vultu quoque splendere videntur, oculis maximè, qui maximè sunt cœlestes, quique in risu motum cæli instar efficiunt circularem. In lu-

gentibus autem contrā obtenebrantur, restringuntur, torpent omnia. Radij verè cæstellis ridentibus tanquam diuinatum mentium oculis, benignissime lætissimeque directi in semina rerum, non aliter omnia fouent generantque quam struthij aspectus in ouum. Illorum enim virtute calor naturalis cunctis inseritur, vnde vira oritur, alitur, augetur. Hinc fit ut omnia voluptatem appetant, quia non modo voluptate terrena, sed etiam cælesti lætitiā generantur. Quis autem neget numina læto quodam affectu omnia mouere atque generare? Cum & ab animalium natura & ab arte omnia voluptate procreari atque perfici videamus.

*Lumen est incorporeum, est forma, imò actus  
natura cælestis. Esse potest sine corpore.  
Subditio, est ubique etiam  
sub terris vnà cum  
diaphano.*

### C A P V T I X.

**S**ed iuuat interdum vnà cum nostro Plotino, circa eadem latius peruagari. Lumen quo momento penetrat molle diaphanum transfuerberat, vel durissimum. Item, quo breue spatium, eodem quoque longissimum. Incorporeum est igitur, cui neque duritia resistit, neque spatium. Veruntamen quoniam est cœlestis, ideo obstaculum natura terreum atque sordidum, & si minus durum sit, non capit candidam luminis puritatem. Hinc Plotinus prohibet corporeas lumini tribuere passionēs, id est accedere, recedere, diffuere, effluere, contrahi, dilatari. Sed potius dicendum putat, vbi coram lucido perspicuum quid exponitur, statim lumen illic existere, illic agere. Sin minus, non existere illic, non agere. Neque tamen simpliciter esse desinere, quamdiu corpus est lucidum. Sicut neque radius visualis, quamdiu visus. Lux quidem est forma primi corporis prima. Itaque tam perfecta, ut non per modum ociosæ qualitatis cuiusdam ab actu distinctæ, sed potius per modum vegetioris actus existat, tam videlicet efficacis, ut momento per omnia sese porrigat, à fonte proprio non disiunctus.

Præterea, in quocunque sub cælo corpore præualer igneus quidam vigor igni cœlesti similis, emicat & inde lumen aut fulgor quidam quæ familiaris color. Proinde cœli luminisque natura, ut foueat omnia, non cogitur de integro per cuncta discurrere, si verum sit paradoxon, hanc



esse semel cunctis infusam. Hinc Herus ille, qui apud Platonem surrexit ex mortuis, isterea lumen inspexerat, coelesti videlicet quodam visu, sed oculis caducis occultum; quod quidem per omnia prorsus extentum, regeret vniuersum. Luminis huius vehiculum, id est perspicuum, Iamblicus ex Theologia Phænicum asserit, cunctis vel opacis infusum, siquidem his omnibus inest & color aliquis quædam portio luminis. Lumen autem seorsum à perspicuo in opacis esse non potest, quamvis forsitan in se penes luminosum esse possit. Si secretum Timei sensum rectè vaticinamur, ignem ipsum spiritumq; coelestem proximum animæ mundanæ vehiculum, simul cum hac ubiq; vigere, cognoscimus. Hæc enim anima motu quidem vitali calorem edit ubique atque motum, intelligentia lumen, simulque luminis vehiculum ubique diaphanum. Neque tamen propriè lucere terram licet dicere. Siquidem neque perspicuum huic miscetur, neque lumen communicatur quamuis infusum. Si quis Astrologorum regula fretus consideret, quantam vim habeant innumerabiles ubique radii machinæ coelestis immensæ ad penetrandam terram mundi punctum, hinc saltem cognoscet, per hanc quoque passim diffundi coeleste lumen atque diaphanum illic lumini necessarium. Quamuis oculis quamplurimis hæc in terra patere non possint, Patent verò fortè quibusdam illic degentibus animalibus. Aiunt enim Platonici, Sicut se habet frigus ad calorem, nigredoque ad albedinem, sic habere tenebras se ad lumen, ut tenebræ non sit priuatio pura luminis, sed lux minima vel opacissima. Nigredo minus opacum lumen. Perspicuum, quasi quædam paulo clarioris luminis inchoatio. Color quædam luminis terminatio. Quod quidem vnà cum colore quodam quodammodo sit ubique. Tam enim potente, tum animæ, tum celestium lumine fieri, ut puris tenebris locus nusquam pateat. Siquidem & calorem ad amplitudinem luce debiliorem esse ubique sub terram, effectus multi testantur. Pythagorici forsitan hinc adducti, nescio quam in centro mundi turrim Iouis ædificauerunt. Vestales certe (ut alibi diximus) ignem illic accenderunt. Aut si quoque sunt propterea terram stellam quandam cognominare. Vnà cum his Theologi veteres atque Plato, quod & effectus ipsi confirmant, flumina quædam ignea per terræ meatus deriuauere, igneosque illic dæmones inuenerunt.

*Aliud lumen est, aliud calor, atque lumen antecedit calorem.*

C A P V T X.

**Q**UOD aliud fulgor sit, aliud calor, perspicuum est. Nam fulgent sine nitent quæ non calent, ac etiam frigida multa. Calida sunt etiam multa quæ fusca. Calor ignis penetrat sæpe qua non transit splendor, propagatur & splendor longius citiusque multo quam calor. Quod sit calor à lumine, inueniet quisquis cogitabit, etiam in spiritibus intelligentiæ claritatem origine quadam antecedere voluntatis affectum, & in mundi machina Solis radios sequentis caloris originem esse. In superioribus quidem regnat vnio, in sequentibus verò diuersitas. Itaq; in hoc apud nos igne, quamuis calor in eodem corpore sit, in quo & lumen, non tamen est in lumine, sicut neque elementalium quies est in motu. In celestibus autem est & in lumine calor quasi lumen & in cœli motu est ipsa cœli quies, ut Physicè loquar. Denique super cœlum in ipsa intelligentia est voluntas quasi eadem, & in voluntate gaudium velut idem.

*Lumen non sit illuminati qualitas, sed est actus illuminantis. Neque lumina confunduntur.*

*Lumen est vinculum vniuersi.*

C A P V T XI.

**C**UM verò lumen causa sit caloris, neque tamen generis sit eiusdem, merito tanquam in superiori quodam genere constitutum, adeo hunc apud nos etiam antecellit, ut ipsum quidem à luminoso corpore tantum pendeat, sed à subiecto patiente nequaquam. Hic autem vtrinque dependeat. Lumen igitur solius illuminantis proprius & naturalis actus existit. Neque corporis illuminati sit qualitas, neque tam inest quam adest illuminato. Ideo neque diaphani naturam permutat, neque hoc per locum mutatio mutatur, neque certum per hoc habet spatium. Occurrit enim vltimè semper seipsum propagaturum, eodemque momento reflexiones multiplices agit, à speculis in specula, ab aqua in speculum, & hinc rursum in parietem, similiterque deinceps. Neque per reflexiones vsquam deferit illud unde reflectitur. Et in quolibet aëris puncto multiplices format rerum imagines spirituales. Per quas possit oculus rem totam in puncto quolibet conueri. Per hæc omnia confirmatur lumen non esse corporeum aliquid vel corporis qualitatem. Sed

ut redeamus parumper ad comparationem luminis cum calore, neque paulatim illuminat, neque hic vel parumper restat, illuminante desuper abeunte. Quod sæpe iam diximus. Calor autem utpote qui aëris calefacti sit qualitas, paulatim accedit, atque recedit, & abeunte lumine residet in subiecto. Potest itaque lumen idem de substantia in substantiam pertransire, siquidem non sit subiecti alicuius accidens, aut qualitas, aut passio quædam, sed separabilis actus agentis. Merito inter substantiam quasi in se subsistentem & qualitatem, quæ ab agente simul & patiente dependet, existit luminosus actus solum agenti suspensus. Quando lumen calefacit aërem, calefactio à lumine dependet & aëre, atque inter lumen caloremque genitum, tenet medium. Cum igitur calor hic subducto lumine maneat, lumen aëre sublato penes Solem existere potest, quia proprium. Proprium enim inseparabile est. Sic inter lucem lucido corpori penitus intimam atque calorem iam aëri factum intimum, medium est lumen, partim quidem lucenti intimum, partim etiam extra procedens, ut radialis actus spectaculi directus in speculum, atque radius visualis ex oculo micans. Hinc patet lumen proprium esse naturæ coelestis, neque corporibus ullis communicari nisi quod coelestibus, id est, diaphanis & igneis, ut iam diximus, & in his quidem coelestem conservare proprietatem. Cuius munere neque diaphano miscetur illuminato, neque lumina luminibus confunduntur. Eiusmodi namque confusio non ad coelestes actus atque virtutes, id est, ad radios, sed ad elementales pertinet qualitates. Quarum nulla est ad præsentiam luminis necessaria. Satis enim illi est, si terrenam opacitatem non offenderit, coelestibus percipiendis ineptam, quasi lumen ubique sui iuris sit, nec viquam coelestem amittat sublimitatem. Lumina verò luminibus non confundi, hinc apparet, quod si ad tres lucernas deambulaueris, tres umbras ex opposito reddes, videlicet propter tria lumina inuicem non confusa. Item si tribus his ingentem tabulam opposueris, in cuius medio unicum sit foramen, tria statim lumina è tribus lucernis in oppositum resultabunt, quia videlicet non sunt confusa. Denique si lucernam vnam sustuleris, suum illam lumen quod comitari videtur, splendore communi interim diminuto.

Mitto nunc Dionysiacum illud, tres in vno splendore radios, diuinam nobis Trinitatem representare. Mirabiles in radiis esse vires, sed occultas Astronomi compro-

bant, atque Magi. Sed res nimium admiranda est, quæ multis nota, ubi ex ære concavo radij ad centrum è conspectu quamplurimi per æquales quisque angulos reperculsi, remotum etiam corpus, vel durissimum prorsus adurunt. Vnde constat insuper radios naturaliter esse calidos. Si quidem sola congregatione feruentissimi mox euadunt. Tanta proculdubio est potentia luminis, ut coelestia alioquin à terrenis quod absque proportionem distantia, facile & subito plurimumque conciliet. Neque solum virtutes stellarum omnes ad sequentia transferat, sed solem ipsum stellarumque ad inferiora traiciat. Quemadmodum spiritus noster, animæ vires, ipsamque animam ad humores traducit & membra, atque sicut in nobis spiritus est animæ, corporisque nodus, ita lumen est vinculum vniuersi. Sol enim & stella quælibet lumen suum non per tenuissimam quasi lineam iaculantur, sed toto suo ambitu circumfundunt. Sed hoc statim vndique colligit se in conum, ne fortè extra suum fontem profluens euanescat. Sic enim propter unionem validius aget, & totum facilius erit ubique. Ac dum tota basis coarctatur in conum, stella tota omnisque virtus eius per angulum aderit, agetque potenter ubique, poteritque in angulo tota eius magnitudo videri. Sic etiam cum in stellis centrum & circumferentia sit lumen earum, quatenus à toto profluit ambitu, circumferentiam imitatur, quatenus autem colligitur in angustum, imitatur & centrum. Imitatur & ipsam (ut Platonicè loquar) mundi animam. Ipsam quidem eius intelligentiam claritate sua, vitam verò calore, motum denique motu. Sed de his omnibus satis in Commentariis in Plotinum atque Timæum.

*Lumen imitatur Deum, gradus luminum, colorum scientiarum. Numerus septenarius atque nouenarius.*

## C A P V T XII.

**Q**uodammodo etiam lumen imitatur Deum. Nullus enim oculus quantumlibet acer, lumen ipsum in se purum, solumque cernit, utpote quod incorporeum est omnino proportionemque oculorum superat, ut diuinum. Vident verò lumen oculi dumtaxat in corpore illuminato, vel luminoso, & hoc quidem paulo denfio, videlicet oculis lumen contemperante. Forte verò illuminatum potius quam lumen cernunt. Debilissimi quidem oculi,

neque hoc etiam fastinent. Validiores hoc inueniuntur, sed non circa Solem, Vegetissimi circa Solem quidem, sed in Sole nequaquam. Similiter ad Deum intellectus varios se habere cognoscet. Cognosce precor Solem vno quodam nutu posse simul omnia facere, vel remotissima quæque, lumine videlicet & calore. Deumque similiter facillime cuncta, intelligentia simul & voluntate. Cogita rursus, Deum tria rerum genera procreare. Angelos penitus incorporeos, item formas omnino corporeas, medias verò animas, incorporeas quidem substantia, sed affectu motuque quasi corporeas. Similiter Solem aspice, calore semper corporea generare, item lumine spirituales corporum imagines per aërem resultantes Medios verò colores. Septem præcipui sunt effectus, tum Solis circa corpora, tum diuini luminis circa mentes & animas. Nam penetrat, illustrat, accendit, excitat, amplificat, eleuat, format. Memento denique neque Solem neque aliud quicquam absque lumine Solis videri posse, siquidem omne lumen à Sole dependet. Similiter ad diuinam lucem, veritatem primam, verorum omnium plenitudinem, intellectus omnes se prorsus habere. Sed de his Theologia latissime. Quibus adde, quid sit lumen nullus absolute definit, sed quid non sit, semper argumentamur. Non color, non diaphanum, non imago cœlestium, quæ quidem simpliciter sit imago. Non enim imaginis est ultra imagines imaginariamque cognitionem, etiam substantias agere. Negationibus igitur comparationibusque quibusdam duntaxat lumen cognoscimus, sicut Deum. Inuat verò parumper comparationes eiusmodi prosequi. At tu interim da verbis veniam lucis amice. Diuina lux per nouem Angelorum ordines distribuitur. Quem numerum in mentibus Platonicis etiam receperunt. Ad similes verò gradus animæ quoque beatæ recipiunt. Similiter Solis lumen per nouem gradus præcipue distribuitur.

Primus quidem gradus luminis est in Sole, secundus luminis in firmamento candidi ob raritatem quoque nobis occulti, tertius conspicuæ lucis in stellis, sed hæc tibi trina sunt candida, rubea, mixta, sunt igitur huc vsque gradus quinque. Ad rubeam refertur ignis. Sextus in diaphanis sub Luna simplicibus: septimus in diaphanis sub Luna compositis ceu vitris atque cristallis lumen minime conseruantibus: octauus in diaphanis compositis conseruantibus, quales sunt oculi multi, & nothilucæ, carbunculi que. Quibus inest pinguis quædam

cum perspicuitate tenacitas, luminis conseruatrici: nonus definit in colores imaginisque colorum. Præterea si colores sunt quasi lumina quædam totidem ipsi quoque gradus. Extremi quidem sunt albus atque niger, horum medius æquè distans viridis. De quo satis in libro de vita secundo. Inter album atque viridem croceus est albo similior, rubeusque clarus prope viridem, Zaphirinus verò medius. Tres similibus quoque gradibus inter viridem sunt & nigrum ex antecedentibus trina proportionem commixti. Cum verò scientiæ luminibus luminosisque coloribus comparari possint, meritis sunt & nouem, quasi Musæ sub Apolline nouem. Scientia quidem vel de rebus agit penitus separatis, vel omnino corporeis aut mediis, illa quidem diuina, ista naturalis, hæc Mathematica Harum quælibet secatur in tria. Diuina enim vel contemplatur Deum, vel substantias omnino diuinas, vt Angelos, vel intellectuales animas, natura quidem diuinas, sed quodammodo etiam vergentes ad corpora, sed interim separabiles. Huc vsque diuina scientia contemplatur. Naturalis autem tria quoque considerat, vel elementalia corpora, vel cœlestia, vel animas his coniunctas. Mathematica quoque triplex. Aut enim solam quantitatem tractat siue numeralem siue continuam, vt Arithmetica Geometricaque. Aut quantitatem eiusmodi cum ratione motus, vt Astrologus. Aut etiam cum ratione sensus, siue visus, siue auditus, vt perspectina vel Musicus. Nouem igitur communia scientiarum lumina sunt. Sed longius iam digressi videmur.

*Lumen est quasi spiritale quoddam. Et spiritus sunt lumina quædam. Similitudo luminis ad animam atque Angelos.*

### C A P V T XIII.

**Q**UOD lumen spiritale quoddam sit, potius quam corporale, ex eo constat, vt alibi diximus, quia passim sine tempore propagatur, sine offensione implet perspicua corpora, sine sui inquinamento se sordidis circumfundit. Præterea corporibus his facilius se largitur, quæ longius à corpulenta mole discedunt. Vnde purissima corpora cœli & ignis, qui cœlestis est, vt Platonicis putant, in se lucent, aër & aqua ab illis. Interea terræ neque ex se manifeste nitent, neque ex illis. In superficie terræ lumen mixtionibus diuersis elementorum quatuor maximè terrenis infusum, diuersorum colorum induit formas, quæ corpusculi-

la, quorum quasi quædam animulæ sunt scintillæ luminis illis infusæ. Quas si ab illis mixtionibus segregaueris, atque seruaeris, videbis forte quales sint rationales animæ à corporibus separatæ. Sunt enim lumina quædam olim in corporibus confusiora, sed iam in naturam propriam restituta, ideoque clarissima. Sic enim corpus ab anima diuersissimam illi quasi Eclipsim obducit, sicut Luna coniuncta Soli, imò verò sicut mixtio terrena à cœlo lumen reddit opacum, facitque colorem ex lumine, sic corpus circa animam reddit ex intelligentia sensum. Quomodum radius calorem quidem permiscet aëri, lucem verò retinet non permixtam. Sic anima corpori vitam communicat, intelligentiam verò nequaquam, instar lucis sine compressione sui se colligit in angustum, sine distractione rursus explicatur in amplum. Nec aucto corpore crescit ipsa, neque diminuto decrescit. Lumen ab amplo dependens se colligit per foramen, transuersisque radiis profilit in oppositum, figuram pristinam, mox amplitudinem quoque paulatim subinde recipiens ad eandem denique rediturum. Similiter anima ab ampla diuinitate in angustum corpus affectumque apud nos redacta, potest hinc etiam incolumis emigrare, pristinam quandoque formam & amplitudinem receptura. Qualis etiam descensus ascensusque sit Angelorum, radij quoque declarant profilientes huc resilientesque momento, & profiliendo Solem minime deferentes.

*Lumen in Deo, in Angelo, in ratione, in spiritu, in corpore.*

### C A P V T XIII.

**V**Erùm, ut redeamus vnde digressi sumus, cœlum, quamuis in se, non tamen ex se, sed ex superiorum claritate & gaudio refulget, & gestit, ceu oculus ex spiritus claritate animique lætitia. Spiritus autem lætatur maximè claritate sua solisque. Animus claritate spiritus atque mentis. Videtur autem lumen hoc esse mens refulgens per corpus perspicuum quasi vitrum, & inde iam facta visibilis. Mens autem lux in se ob nimiam vbertatem tenuitatemque penitus inuisibilis. Siquidem lumen, & si est vbiq; die, nusquam tamen apparet, nisi vbi densum est aliquid atque resistens. Subtrahe densitatem, & si non videtur, est tamen ibidem. Adde iterum densitatem, statim rursus apparet. Hinc planè constat, lumen ipsum in se esse in-

tellectuale quiddam. Quod quidem mox sensibile fiat, subdito videlicet denso, lateat verò subducto. Quomodo verò visibilem ex inuisibili lucem euasisse fingamus, quasi ex scintilla iam mota lucidum quendam circulum, in sexto Theologia tractamus. Proinde, lux in mente est veritas gaudens, gaudiumque verum, lumen à mente in corporibus est quædam veritatis rerum sensibilibus declaratio, pulchritudinis flos, oblectatio sensus. Sed repetere rectius. Nempe lux tanquam propria corporis circularis perpetuo reuertētis ad idem, imò & intelligentiæ seipsam reflectentis in orbem, nimirum vbiq; tangens, repetere videtur originem, dum sursum reflectitur in seipsam, nosque similiter contemplatione simul & amore sui reducit in patriam. Sed interim me quoque compellit, ut inter loquendum, nescio quomodo, circuli more iam sæpius reuertatur ad idem. Tu autem indulge, precor, prolixo huic amico lucis, ipse lucis amice. Bona igitur iam venia repetam. Lumen in diuina mente intelligentiam supereminet. Inde angelicæ menti lumen idem infusum, secundum intelligentiam redditur, sed super terminos rationis. Diuinum hoc angelicumque lumen in mentibus hominum secundum rationem iam euadit, sed superat phantasiam. In spiritum secundum phantasiam, super sensum, in corpore verò maximè oculis quasi cœlestibus animæ stellis, sensui iam familiæ fit, sed non materiæ. Nam ipsum etiam pulchritudinis florem in corporibus apparentem Plotinus in quodam splendore non corporeo collocavit. Ipsa certè pulchritudo prima nihil aliud est, quàm splendor gloriæ penes patrem luminum, & figura substantiæ eius. Vnde triplex emicat pulchritudo. Prima quidem per Angelicos intellectus; secunda verò per intellectuales animas; tertia, per corpora vbiq; formosa quasi lumen vnum per tria quædam vitra coloribus inter se varia, ideoque varium ex primo splendorem subinde reddentia. Ipsa igitur gratia pulchritudinis, quæ etiam in corporibus intuentes & cogitantes tam mirabiliter in se conuertit, nihil aliud est quàm splendor per gradus desuper emicans. Maximè verò per radios oculorum, & rapiens intuentes, & amatores occulto quodam calore mirabiliter in se transformans. Sed de his in libro de Amore satis. Ad institutum ordinem reuertamur. In omnibus mentibus lumen est vita exuberans, veritas clara certa, lætitia plena, inde in corporibus est diuinæ explicatio & effusio vitæ, decla-

ratio veritatis rerum & authoris, gratia formæ, voluptatis incitamentum. Empedocles & Zeno volunt, quemadmodum se habet ad carbonem flamma, sic quodammodo se habere lumen ad flammam, atque flammam esse quasi lumen densum, lumen verò flammam rarissimam, vitamque cunctorum. Plotinus & Proculus arbitrantur esse visum quendam, aspectumque numinum per radios cœlestium oculorum proculemissum. Atque esse spiritum quendam diuinum, qui & omnia videat, & quantum in se est, ab omnibus videatur. Addunt, eiusmodi spiritum extingui nusquam, sed sydera sequi, sicut visualis radius animalium nocte videntium, nunc quidem emicat foras, nunc verò non emicat, nec interea prorsus extinguitur, vitam oculi sui continuè comitans. Si enim tota cœli natura sempiterna est, in hac autem nihil familiarius, pulchrius, efficacius, diuinius est quam lumen, nimirum & lumen est sempiternum. Forte etiam coniectare licet, ignem quoque sub Luna, lumenque suum sempiternum esse. Est enim portio quædam cœlestis ignis, cœlesti quodam impetu crassioribus inclusa corporibus Hunc Ægyptij cœlestem spiritum cognouerunt elementis infusum. Hunc Pythagorici Vestalem ignem inuenerunt, vel in centro mundi feruentem. Hunc Stoici intellectualem ignem per omnia discurrentem cogitauerunt. Hunc & Plato, qualem in Timæo probauimus, & Plotino. Hunc Theologi veteres, teste Marone, diuinum ætherem viuentibus haustum, dixerunt, ire per omnes terras, tractusque maris cœlumque profundum. Igneus est ollis vigor & cœlestis origo. Fortè igitur ignis cum videtur extingui in occultum resoluitur ignem, lumenque huius in lumen illius occultum.

*Anima & si nominantur lumina, tamen in vnum quasi commune lumen resolui non possunt.*

## CAPVT XV.

**Q**uod modo fingebam, & si fortè non est verum, licentius tamen fingi potest. De anima verò fingi reuera non potest. Quæ enim communem inter se materiam habent, inuicem confundi possunt. Item quæ aliorum partes sunt, in illa restitui. Rursus quæ superioris substantiæ actus quidam pedissequi sunt, in illam quasi resolui, & quæ accidentia, facilius euanesce-  
re. Rationales autem animæ, substantiæ sunt incorporeæ, rectrices corporum, eis-

que repugnantes, per se agunt, à se conuertuntur, in se subsistunt, superiori etiam quandoque rebelles, inter se nimium discrepantes. A substantiis accidentia ratione distinguunt, à corporeis incorporea separant. Itaque neque confundi possunt, vel restitui, vel resolui. De his in Theologia & secundo Epistolarum libro latissime. Ac si animæ fingantur vt lumina, non quidem vt radii sunt, sed vt lucēs, & hæc quidem substantiales, sensibili luce longè præstantiores, similes quidem stellis potius quàm luminibus dependentibus, natiuo quodam lumine præditæ ferme sicut stellæ, aliud præterea lumen, sicut stellæ à Sole, diuinitus accepturæ. Sicut lucem visibilem non percipit nisi lux aliqua visualis, nec intelligibilem, nisi lux quædam intellectualis, ita neque substantialem distinctam sempiternam, nisi lux substantialis distincta sempiterna, præsertim si illa sit sub ipsa sempiternitatis ratione percipienda. Per hanc itaque rationem, quasi per speculam tibi prospicienti, propria statim nostræ mentis immortalitas rutilabit.

*Lumen est quasi visibile numen, & Deum referens, & nos gradatim ad mores & diuina perducens.*

## CAPVT XVI.

**D**enique, lumen est quasi numen quoddam in mundano hoc templo, Dei similitudinem referens. Aded, vt Plato noster in libro de Republica hoc ipsius boni filium nominauerint. Est enim instar Dei aspectu ante omnia venerandum. Est & amplificatio quædam subita & latissima absque detrimento sui ob exuberantem bonitatem largitatemque suam cunctis sese libentissime & felicissime largiens. Causa conseruatioque & exercitatio omnium quæ nascuntur. Proinde ad vitam, veritatem, lætitiā, vnde descendit, cætera subleuat. Absque huius præsentia mori cuncta videntur, huius autem præsentia reuiuiscere. Interim verò dum ipsum non solum fit à Sole, sed etiam conseruatur, neque inde discedit, nos admonet, non solum à Deo fieri, sed seruari, atque ab illo minimè discedendum. Siquidem illud vbi longius distare iam videtur à Sole, vbi vehementius reflectitur erga Solem. Et si fortè videbor alicui curiosior, dicam tamen quod mihi nunc de iustitia venit in mentem, amore lucis & iustitiæ raptus. Quis enim modus adfit amoris? Nempe videtur mihi lumen sæpe nos ad iustitiam cohortari, ab iniustitia detertere;



vbi quàm potens ipsa iustitia sit, quàm impotēs iniustitia manifeste declarat. Radius enim qui tanquam iustus incidit rectus, æquales vtrumque reddens angulos, potenter agit, & penetrat. Et vbi ex aëre transit in aquam, non frangitur per obliquum. Atque vbi tangit solidum, quasi fortis reflectitur in seipsum. Contra verò radius, qui tanquam iniustus decedit ex obliquo, angulos vtrinque faciens inæquales, tanquam debilis vix efficit quicquam, subito frangitur in obliquum, nec in se redit vnquam, sed residit in aduersum. Quantum verò lumini tanquam diuino, constantia, æqualitas, puritas vbique sit grata, declarat ipsum in corporibus specularibus. In quibus & ex quibus ob hæc tria mirum in modum multiplicatur. Dixerit fortè Poëta quispiam, sicut Phœbus Daphnem, ita lumen amare virginitatem. Siquidem flos ipse candoris vnà cum virginitatis flore viget, simulque disperditur. Præsertim in orbibus oculorum, ex quibus etiam testificatur ingenium. Hinc certè Democritus puellam quam modo virginem iudicauerat, sagaciter deprehendit inæpollutam. Sed iam redeamus ad institutum. Lumen non solum nos in moribus instruit, sed etiam quod optimum est, diuinum humano generi commemoratur cultum, vt neque impij negare audeant esse Deum, cuius simulachro sensibus nihil clarius. Neque flagitiosi vel latere oculum, vel effugere manum eius se posse confidant, cuius simulachrum est ipsa claritas. Ac velocius quàm dici possit momento per omnia dilatatur, nec est qui se abscondat à calore eius. Vnus in omnibus & circa omnia lumen. Lumen in omnibus à Deo factis est quidam diuinæ claritatis splendor, atque (vt ita loquar) est Deus quasi seipsum finiens, & ad operum suorum capacitatem sese accommodans. Deus autem ipse est lumen immensum in seipso consistens, ac per se in omnibus & extra omnia per immensum. Fons ille vitæ, in cuius lumine (vt ait David) videmus lumen. Oculus quoque quo omnes vident oculi, & vt inquit Orpheus, oculus qui cuncta in singulis inspicit, ac reuera omnia conspicit in seipso, dum esse se perspicit omnia. Constituit autem, vt in vno lumine cuncta conspicerentur, non corporea solum, sed etiam incorporea. Lumen vides in materia mundi plenum omnibus rerum omnium formis, atque volubile. Subtrahe materiam, relinque cætera, habes animam incorporeum lumen à corporibus separabilem, omniforme, mutabile. Deme rursus huic mutationem, et iam intellectum Angelicum consecu-

tus, & paratum lumen, & omniforme iamque etiam mutabile. Detrahe huic eam diuersitatem, per quam forma quælibet diuersa est à lumine, aliæque diuersæ sunt ab aliis, & infusæ in super aliunde. Lumen hoc infinite lucet, quia natura lucet sua, estque simpliciter absolutum. Ita demum Deus mentis oculis per hoc lumen superiore quodam lumine coruscabit, vita sensuque plenissimum, quando quidem imago eius, id est, Solis lumen, vitam omnibus sensumque largitur, & quanto lux illa excellentior est quam nostra, tanto maius menti gaudium quam hæc oculis afferet.


*De statu beatorum sub diuino lumine, atque miserorum.*

## C A P V T X V I I.

**S**OL in superna Hierusalem, vt Prophesta inquit, est ipse Deus, qui cultoribus in terra suis in cœlestem patriam reuersuris, proculdubio promittit, vniuersæ veritatis lumen ac plenum in lumine gaudium. Lumen hoc præcipuè sapientibus, alios ad iustitiam instruendis pollicetur. Fulgebunt (inquit Daniel) docti sicut splendor firmamenti, & qui multos erudierint ad iustitiam, tanquam stellæ in perpetuas æternitates. Non inquit, sicut Sol fulgebunt, Sol enim illic est ipse Deus. Splendor verò firmamenti est candor ille cœlorum, ob raritatem suam oculis nostris semper occultus. Cum enim totus ignis luceat, multo magis tota substantia cœli, vel vbi non sunt stellæ, lucet, sed velut ignis procul in materia tenuissima lucens, vix vlli conspicuus. Eiusmodi splendore fulgebunt sapientes illi, qui apud nos sola fuerint contemplatione contenti. Qui vero contemplati diuina, deinceps ad actionem se contulerint, erudituri cæteros ad iustitiam atque sapientiam, vberiore quadam atque manifesta, sicut stellæ, luce fulgebunt. Cum enim sapientes nihil aliud amauerint & coluerint quam lucem, hanc enim solam in qualibet veritate quærenda quæritant, merito lucis præmia referunt, & qui cæteros illuminant in perpetuum, non iniuria ipsi quoque in perpetuas (vt inquit) æternitates diuinitus illustrantur. Quemadmodum verò piorum præmium est mira quædam lucis participatio, ita supplicium impiorum est ipsa privatio lucis. Imò verò ipsemet Sol diminus, qui sanos vegetosque piorum oculos mirifice fouet, impiorum contra oculos languentes offendit, & conscientiam incendio vexat. Non aliter quam Solis lumen in aperto quidem

quidem delectat, in angustum vero coactum profus adurit; sed libenter reuertimur ab beatos. Gratum quidem apud nos aeris lumen omnibus, quia vitali animalique spiritu cognatissimum, rerumque innumerabilium varietate delectat. Gratius lumen in spiritibus corporis est sanguineis. Gratiissimum lumen intimum menti beatis, usque adeo mentem implens, ut inde statim exundet in corpus, in corpus, inquam, tum coeleste (ut Platonice loquar, unuscu-

iisque animae proprium, tum etiam humanum, tandem iam quasi coeleste factum. Illic igitur unusquisque tantus est oculus, totus undique peruius, atque lucens. Quamobrem singuli tam mentis quam ocularis corporis radios in se inuicem iacentes, facillime quodam nutu se mutuo profus intelligunt. Singuli mutuo radiorum iactu in singulis coruscabunt. Deus autem, tanquam sol in stellis, quam abunde, tam foeliciter fulgebit in cunctis.



# MARSILII FICINI

FLORENTINI

adhuc Adolescentis,

*Liber de Voluptate, ad Antonium Canisianum, Ciuem Florentinum.*

PROOEMIUM.

*Tria differendi genera.*



**M**emini cum adessem una tecum in Campolitano vestro, & cum regionis illius praecipua amoenitate tum variorum pomorum quibusea villa imprimis abundat suauitate duceremur, nos in Voluptatis disputationem incidisse, quam ipse à me requisisti, & cum primum daretur ocium literis traderem. Hoc ergo ad te de Voluptate opusculum ut primum Figinum redij, summa ipsa cum voluptate conscripsi. Tria vero sunt ut hinc potissimum exordiamur apud Philosophos differendi genera; Vnum quo certam aliquam quaestionis partem disputando defendimus, atque approbamus, ut Peripatetici, ac Stoici effecere. Alterum quo quaestione proposita diuersas ad id, quod quaritur, sententias, rationesque referimus, ut propositis pluribus, inuicemque collatis, quid ex iis probabilius, verissimiusque appareat eligamus, quo Academici, ac Socratici penè omnes utebantur. Tertium vero genus Scepticorum maxime proprium est, qui cum omnia indifferencia esse putent, nec certum,

aut probabile habebant quicquam quod sequantur, ea enim, quae natura ordine seiuncta distinctaeque sunt confundunt atque permiscunt ab excellentioribus, quibusque Philosophis reiciuntur. Ego igitur ex iis omnibus Academicorum, Socraticorumque, in differendo rationem hoc tempore proponendam mihi decreui. Etenim Plato, quem tanquam Philosophorum Deum sequimur, atque veneramur, vetat eos, qui adhuc in tenera aetate constituti sunt, suam aliqua de re sententiam afferre, ne, ut in iunioribus saepe accidit, quod primis annis maxime probauerimus, id maturiori deinde aetate, & graniori iudicio reuocandum, & in contrariam sententiam conuertendum sit. Satiùs igitur esse censui ceterorum Philosophorum de Voluptate sententias breui sermone concurrere, quam meam exprimere, ne contra id, quod à Platone nostro docemur, aliquid imprudenter asseuerarem, & ut tua, quam noui in Philosophiae studiis ardentissimam satisfacerem voluntati. Sed haec haecenus, ad Philosophorum iam opiniones deueniamus.

# MARSILII FICINI FLORENTINI,

## DE PARTIBVS ANIMÆ,

### CAPVT PRIMVM.

*Item de lætitia, gaudio, & voluptate secundum  
Platonem.*



Lato igitur (vt ab eorum principe initium faciam) cum animum in duas partes distribuisset, mentem scilicet, ac sensum, menti lætitiā, & gaudium attribuit, sensibus voluptatem. Verum prima duo inter se differre putat, quod omne gaudium laude sit dignum, lætitia verò partim laudanda, partim vituperanda sit. Esse enim lætitiā in boni alicuius possessione quandam mentis elationem, quæ tamen modestiam excedere pariter, atque seruare queat, gaudium vero illam ipsam, quæ ex contemplatione, aut alio quopiam virtutum vfu suscipitur, iucunditatem. Itaque & ipse idem in Phædro, cum de prima illa ac vera vita, qua in cœlorum sedibus animus fruitur, loqueretur, ait, Veritatis contemplatione nutritur; & gaudet, vnde sæpenumero gaudium mentis alimoniam vocitat, nam ipsam agro similem vult esse veritatem, frugibus verò veritatis ipsius contemplationem. Alimoniz deinde, quæ ex iis duobus capitur gaudium, quo mens veritatis contemplatione perfruitur.

Quapropter, & idem in eodem Phædro, cum de iis tenebris, in quas animus è summa, ac vera luce depressus, ac demersus est, disputaret, Vbi inquit, multus inest conatus veritatis campus, quonam sit intueri, nam conueniens animæ cibus ex illo extitit, & alarum natura, qua anima eleuatur, hac alitur.

Alas Plato vocat, quibus animus ad supera, vnde ob terrenarum rerum cogitationem descenderat reuolat, id autem cum duabus virtutibus, Contemplatiua videlicet, atque Morali consequi possit, easdem Plato, vt ego interpretor, virtutes animæ ipsius alas intelligit, quas veritatis diuinarumque rerum contemplatione recuperet; quemadmodum horum appetitione terrenorum amiserat. Cum verò per vtriusque Philosophiæ Naturalis, pariter & Moralis, exercitationem recuperatis alis ad superos reuolauerit, tum redeunti animo duo putat præmia reddi, & vnum quidem esse diuinitatis contemplationem; alterum perfectum quoddam, atque absolutum gaudium, quo in ea ipsa Dei cognitione animus persuaetur. Illud quidem ambrosiam; hoc nectar Plato in Phædro appellat his verbis, Quæ verè est speculata anima, atque iis nutrita; subiens rursus intra cœlum domum reuertitur. Cum autem redierit auriga ad præsepe sistens, equos obicit ambrosiam, & super ipsam nectar, porandum.

Aurigam more Pythagoræ, rationem vocat, equos verò cæteras animi partes atque naturas, quod illa ducat, reliqua verò ducantur omnino, atque regantur: atque idem arbitror à nonnullis præstantioribus Vatibus, cum aut ambrosiam, aut nectar, aut aurigam circa animum nominant plerumque significari. Hæc igitur ex diuina Platonis nostri de ipsius gaudij natura sententia, quod idem videtur

intelleſſe Mercurius Trimegiſtus, cū de ſummo Deo hæc diceret. Condonas nos ratione, ſenſu, intelligentia. Ratione, vt te ſuſpicionibus indagemus, ſenſu, vt te cognouerimus, cognitione, vt te cognoscentes gaudemus, quòd te oſtenderis nobis totum. Sed de gaudio hæc hæcenus.

*Quid ſit voluptas, & quòd non ſit per ſe bonum, multis rationibus ſecundum Platonem.*

## C A P V T I I.

**V**oluptatem verò eſſe Plato vult ſuam quandam motionem in ſenſibus, quæ ex indigentia repletioneproficiſcatur. Eſſe enim indigentiam eiufque repletionem inuicem quodammodo pugnantia, & ex illa cupiditatem, ac dolorem, ex hac voluptatem ſenſibus noſtris accidere. Neque hanc ipſam de qua nunc loquimur voluptatem in bonis connummandam putat, quod cum plurimis veriſſimisq; rationibus demonſtrauerit, hæc tamen ex omnibus prima eſt, atque potiſſima. Quod quemadmodum caloris præſentia ea, ad quæ calor aduenerit callida efficiuntur, ita & eo, quod bonum eſt abſiſtente bona ſiunt omnia, quibus ipſa bonitas adſit.

Neminem autem voluptatis poſſeſſione meliorem fieri, cum & beſtiis inſit voluptas maior etiam, quam hominibus, quæ tamen ne dum his meliores, ſed nec omnino bonæ quidem ſunt. Mulieres præterea & pueri, ſulti denique, atque ignaui omnes voluptatem ſectentur, totisq; complectantur viribus, multo etiam magis quam viri boni atque præſtantes ingenio. At quæ absurdum foret, ſi quod bonum ſit magis improbis, atque ignauis, quam probis & præſtantibus hominibus comperat. perat.

Neque poſſunt, vt ille putat, contraria; inuicem commiſceri, voluptatem verò etiam, vbi mala ſunt proculdubio reperi, cum improbis atque iniuſtis non deſit. Nullo igitur pacto bonum eſſe. Etenim cum eo, quod malum eſſe congregi, bonum verò cum malo, quia repugnantia ſunt, coire nullo modo poſſe. Adde illud, quod in Gorgia à Socrate dicitur, bonum ac malum nunquam ſimul in eodem homine reperi. Eundem tamen eodemque tempore ſæpenumero affici dolore pariter atque voluptate. Omnem quippe

indigentiam doloroſam eſſe, omnemque eius repletionem ſenſibus voluptariam. Sitire autem indigentiam vocat naturæ, potare verò repletionem. Illud ergo moleſtum, hoc contrà iucundum: bibere porro ac ſitire ſimul contingit, ex quo effici vult, vt dolorem ſimul, atque voluptatem habere quis poſſit. Imò cupiditatem, ſollicitudinem, ſuſpicionem, inuidiam, & miſericordiam, quæ omnia dolorem in ſe contineant, voluptatis comites eſſe. Vnde timens cupidinem, inquit dolori ſimul, & voluptati permixtam à ſenſibus proficiſci, quo ſit, vt voluptas cum dolore copulata conſuſaque ſit. Cumque bonum malo non ſit commiſtum, negat ille dolorem, malum, voluptatemque bonum eſſe poſſe.

Præterea cum omne bonum ſtabile, ac permanens eſſe debeat, quis dixerit voluptatem, quæ nullam ſtabilitatem habet, bonam eſſe? Atqui negari non poteſt. Siquis eius definitionem conſideret, inſtabilem, atque incertam eſſe voluptatem, motio namque in definiendo (vt ſupra retulimus) appellata eſt. Nihil autem contrarium ſtabilitati magis eſt, quam motus, neque quiſquam eſt, qui modo voluptatem corporis vllam guſtauerit, qui neſciat quam fragilis ſit, quam brevis, quanta celeritate labatur, ac deſuat, quamque cito in contrarium conuertatur. Inſuper quod bonum eſt, bono contrarium eſſe nunquam poterit. Voluptatem verò cum plurima, ac maxima bona impediat, bono contrariam eſſe quis dubitet?

Impediunt enim prudentiam voluptates, menti infundunt tenebras, deprauant iudicium, ſuiſque blanditiis, ac lenociniis, quaſi meretriculæ quædam mentes ad ſe alliciunt hominum, atque illaqueant, omnemque naturam hominis in vitiorum atque ſclerum luto coenoque proſternunt. Diuinè enim Plato in Epiſtola ad Dionyſium, voluptas inquit hominibus detrimentum affert, inſcitiam, inquietudinem, ſtultitiam, & petulantiam pariens. Præterea nullum bonum eſt, quod non aut laude, aut veneratione dignum ſit. Voluptatem verò nemo ſanæ mentis laudat, neque quiſquam eo, quod maximis fruatur voluptatibus honore indicatur eſſe dignus, & gloria. Sed potius, qui talis eſt, vt ea alto, atque inuictò animo aſpernetur & negligat.

Accedit ad hæc, quod nullum bonum meritò noſtrum dici poſſe videtur, niſi quod aut in ipſa cuiusque natura inſit, aut à nobis ipſis profeſtum fuerit. Neque nos

aliud quicquàm sumus præter mentem & rationem. Corpus autem carcer, & sepulchrum est nobis. Sensus verò velut satellites quidam, atque insidiatores, qui id potissimum curare, atque contendere videntur, ut nos in huius carceris tenebris alius mergant, atque astringant, ut nec ad locum suum patriamque coelestem animi reuolent nec auras respiciant clausi tenebris, & carcere cæco, quo efficitur, ut ea dumtaxat nostra, atque in nobis existere videantur, quæ ab animo, & ratione profecta sint, cætera verò à fortuna, vel ab inimico nobis carcere oriuntur, neque tam nostra sunt, quàm corporis, & fortunæ Recteque inquit Varro, nemo suam dicat, quod extra ipsum est.

Voluptas igitur cum in corpore, ac sensibus ingenta, & insita sit, qui eam in bonis nostris connumerauerit, absque dubio videbitur insanire. His adde, si placet, quod ait apud Platonem Socrates in Gorgia, omnia animi bona ab arte, rectitudine, ordineque, & electione proficisci, atque in hoc omnis etiam moralium Philosophorum disciplina consentit, omnem virtutis, bonorumque animi vim in electione consistere, voluptatem verò quis dixerit ab electione proficisci? nonne quæ in electionem cadunt, in iis prius oportet consilium, deliberationemque locum habuisse? nihil enim eligitur, nisi quod ante consultum, iudicatumque fuerit, voluptatem verò ut habeat in se nemo deliberat, ea namque nobis ingenta est, quapropter Socrates duas in vno quoque nostras ideas esse putat, quas sequamur, quocunque ducunt, vnam opinionem optimi affectatricem, alteram voluptatum cupiditatem, & illam quidem acquisitam, hanc autem innatam vocitat. Nec igitur artem, neque rationem, neque ordinem prorsus vllum voluptas sequitur, sed potius naturæ, ac sensuum repentino, & temerario quodam impetu, quàm aut certo aliquo iudicio, aut consilio excitatur in nobis, blanditur sensibus, corpus suauitate quadam perniciose delinit, atque titillat, effoeminat animum, atque è suo statu mentem, rationemque dimouet.

Insuper ea est bonorum natura omnium, ut futura dum sint, spem hominis erigant, cum verò adsint, tranquillum efficiant animum possidentis, ac quietum, & eo, quod adest, contentum reddant, suæque expleant possessione, ut nullo ulterius egeat, nihil requirat, nil appetat, quasi id vnum possideat, quod sua sit natura iufficiens, atque perfectum, quod

si quid ultra desideret, qui boni alicuius possessione fruitur, sollicitudine tamen, ac molestia penitus vacare videtur, futura autem voluptates intollerabili quodam cupiditatis ardore sensus afficiunt, cura accendunt, animum onerant sollicitudine, & (ut breui complectar) in furorem quandam rabiemque compellunt; cum verò qui eas, quarum cupiditate exarserat, voluptates præsentis amplectitur, continuo metum vna secum, suspicionemque ducunt, obcæcantque nos, dum fruimur, & ad ferarum redigunt immanitatem, nec dum haustæ, imò (ut verius loquar) nec adhuc primis labris degustatæ incredibili quadam animi poenitentia, verecundia, tædio, stomacho, languore prorsus afficiunt, ut verissimum sit illud Socratis in Phædone, dolorem, ac voluptatem ex eodem capite ambo esse connexa, naturamque in vnum eorum apices coniunxisse.

Eaque de causa fieri, ut cuicumque eorum alterum adsit, eandem postea sequatur & alterum, inde rursus cupidinis ignes exoriuntur, & quo avidius voluptates haustæ sunt, eo plura, atque vberiora libidinum germina, seminaque repullulant. Hinc (ut opinor) Poëtæ apud inferos Tityon inducunt.

*Cui tota nouem per iugera corpus  
Porrigitur, rostroque immanis vultur ad-  
unco*

*Immortale iecur tondens, sæcundaque pænis  
Viscera rimatur epulis, habitatque sub alio  
Pectore, nec fibris requies datur illa renatis.*

Quapropter diuine Architas Tarentinus, ac Plato eiusmodi animum perforato vasi similem esse voluerunt, ob insatiabilem, atque infinitam voraginem appetendi, quod quæ nullis voluptatibus expletur. Epicarmus Pythagoricus, ac Socrates non modo perfractò vasi, verumetiam Euripo libidinosum animum comparauerunt, quod quemadmodum in Euripo aqua fluit ac refuit, & rursus deorsumque iactatur.

Ita & in huiusmodi animo, nunc cupiditas, seu voluptas insit, nunc cesset, ac fluat, & iterum renascatur, ac resuat modo lætetur, ac speret, & quasi sursum erigatur libidinosus animus, modo doleat, diffidat, metuatur, sollicitetur, deorsumque cadat, tum id velit, tum nolit, imò eodem quoque in tempore, aliud quidem ratio velit, aliud sensus affectent, atque ita sit, ut eiusmodi animus non modo, tum ad hoc se, tum ad illud intendat; verumetiam vno in tempore in contrarios affectus, diuersasque sententias distrahatur.



Itaque Socrates male dicebat, ut lyra sibi dissona foret, chorusque, quem duceret, & multos alios homines sibi contradicere, quam ut ipse vnus sibi ipsi contrarius ac dissonus esset, vnde rationabiliter Pythagoras harmoniam quandam virtutem nuncupat. Sequuntur deinde reliquæ tres contra Voluptatem Platonis argumentationes: Etenim contrariam ille boni, ac mali naturam esse censet, ut illud difficile consequamur. In hoc autem veluti per lubricam viam quandam facile dilabamur, igitur fore, ut mala quæ sunt, ita excrescant, ut omnem bonorum naturam deleri penitus, atque extirpari necesse sit, nisi huic tam perniciosæ pesti aptissimum quoddam natura remedium adhibuisset, ita enim institutum esse, ut singula bona ob maximam naturæ cognitionem sese inuicem appetant, in vnumque tendant, nec vlllo pacto ab inuicem discernantur, sed quadam quasi confusione coeant, & cui vnum aliquod ex iis adsit, nullum sibi bonorum deesse queat, virtutesque tanta connexionem consequantur, ut qui vnam adeptus sit, omnium iam virtutum possessione fruatur. Quapropter laboriosis difficultatibusque bonorum consequendorum, eorumdem quoque coniunctionem, copulationemque Deus opposuisse videtur. At vero mala inter se dissident, atque dissentiant, nec vlllo modo inuicem coire, confundive possunt. Recteque Aristoteles, malum, inquit, seipsum corrumpit, quod si integrum vndequeque sit intolerabile est. Nec vnquam in eodem prodigalitas, atque auaritia, aut audacia, timiditasque conueniunt, eodemque modo nec alia vlla vitiorum extrema, cum penitus opposita sint, inuicem connectuntur. Quapropter optimum id aduersum delinquendi procliuatatem à natura remedium adhibuit esse videtur, ut qui ad lapsum est pronior, in omnem tamen præcipitij partem labi nequeat, qui vero summa difficultate ascendit, totum atque integrum deinde cacumen necessario consequatur. Cum igitur malorum, bonorumque huiusmodi conditio sit, necessaria ratione concluditur, ea quæ sese minimè consequuntur bona esse non posse, voluptates autem nedum inuicem congregiantur, sed sibi quodammodo repugnare, sæpiusque impedimentum afferre videntur. Nam dum aliquis corporis sensus maxima suauitate mouetur, reliqui eorum, quæ sibi tum offeruntur, vix incuditatem percipiunt, illud quoque accidit, ut alter altero plures, maioresque admodum voluptates persentiat, nec omnes animantes pariter

delectentur, virtutes autem, & omnino quæcunque bona sunt, ob eam, quam pauloante retulimus rationem, sic inuicem copulantur, ut cuncta simul eidem adsint, nec plura ex his vni, quam alteri adesse queant. Cum ergo bonorum atque voluptatum dissimilem inter se naturam esse perspicuum sit, nemo profecto corporis voluptatem, nisi qui nimium eius amicus existat, bonam dixerit. Altera deinde Platonis argumentatio eam esse probat bonorum proprietatem, ut ad communem humani generis utilitatem salutemque tendat, voluptatem verò propriam dicit libidinem, amoremque gignere, & qui huic obnoxius est propriæ dumtaxat cupiditati semper intendere, nec vllam sibi alterius curam esse, modo propriæ voragini vigilantius obsequatur. Omniaque, quæ agit ad eam, quæ sensibus percipitur suauitatem incuditatemque referre. Postrema Platoniorum ratio illa est, quæ bonum, ac finem idem omnino esse dicunt, finem verò id, ad quod quasi quiddam extremum appetitio referatur. Quapropter cum naturalis homini appetitio voluptatem alterius cuiusdam gratia solummodo concupiscat, nec sanè finem, nec omnino bonum, hanc esse quis sanæ mentis existimet? Etenim ob eam causam suauem eiusmodi perceptionem viuientibus à natura datam existimant, ut quæ ad viuendum necessaria sint, acquirant, & parent; quod enim viuit duobus potissimum indiget, ut quæ nocere possunt, reiciat, atque repellat, quæ verò prodesse, capiat, atque asciscat. Cum verò illa à se propellere, hæc autem consequi laboriosum, atque difficile sit, ne ob hanc ipsam difficultatem viuientia ad ea, quibus indigent comparanda tardiora forent, in omni huiusmodi actione quandam naturam voluptatem implicuit, quo fit, ut hac dulcedine, velut esca delinita, ac penitus capta, nec pericula vlla, laboremque fugiant, nec parandi victus difficultatemque percipiant, sintque ad paranda vitæ necessaria promptiora, quod autem horum gratia voluptas nobis à natura data sit, hoc velut signo demonstrant, quod omnes animantes, cum quid è corpore, quod superfluum sit expellunt, siue quod necessarium capiunt, hac, quam sæpe iam commemorauimus suauitate mouentur, quæque magis id agunt, maiorem quoque delectationem percipiunt. Cum verò naturæ indigentiam prorsus expleuerint, nullam vltius voluptatem persentiunt, sed ea, quamdiu indigentiam replent, moueri videmus, quasi ad vitæ necessaria consequenda explendamque indigentiam sen-

suum voluptatem natura retulerit, vitæ igitur tum seruandæ, tum etiam generis propagandi gratia voluptas tradita est, nec propter se expetenda, neque finis, proptereaque ne bonum quidem, ut sæpius demonstrauimus appellari debet.

Architas quoque Pythagoricus, hac aduersus corporis voluptatem argumentatione utebatur, quod causæ semper, eaque causas consequuntur, cognata esse dicebant. Ideoque nemini dubium esse putat, quin illud ex quo mala plurima consequuntur, bonum esse non possit, voluptatis autem gratia pestiferas omnes animi perturbationes, adulteria, stupra, homicidia, furta, dissensiones, scelera denique omnia nasci perspicuum esse. Ex quibus efficitur (ut ille putat) non modo non bonum, sed maximum quoddam malum, ac detestandum videri. eademque ratione Antisthenes Socraticus extremum, summumque malorum corporis voluptatem esse probat, quia quod omnium malorum causa, & origo sit, cæterorum quoque pessimum merito iudicari possit, cumque delicta omnia ab ignorantia proficiscantur, nihilque esse possit, quod æquè, ac voluptas iudicium, consolidumque corrumpat, necesse est, ut ille concludit, ab hac & ignorantiam, & mala omnia proficisci. Vnde insania dicere solebat potius, quam voluptate corripiar. Præterea, Mercurius Trismegistus, Ægyptiorum omnium sapientissimus, duabus potissimum rationibus hanc nefariam labem ex animis hominum extirpare conatur. Id enim cuique bonum esse censet, quod aut rem ipsam, cui quidem adsit, in propria natura contineat, aut ad meliorem frugem perducatur. Primi generis esse virtutes eas, quæ in actione positæ sunt videmus, earum namque proprium est animum ab omni perturbationum tumultu liberum, tranquillumque reddere. Perturbationum verò detractio, & quasi quædam mentis serenitas sua cuiusque animi ac naturalis proprietas existit. Secundi generis eas virtutes, quæ in contemplatione versantur esse constat. Quippe cum animum rerum diuinarum studio, intelligentiaque supra humanam quodammodo naturam erigant atque extollant, ut ad Dei vitam, quæ duntaxat in contemplatione consistit, quam proximè videatur accedere, voluptatis vero conditionem utrique contrariam esse patet. Ardentissimis enim innumerisque affectibus animum quasi quibusdam furiis agitatur, ut longe absit ab illa, quam magnopere natura requirit, tranquillitate. Cumque humanum genus inter

Deum, ac bestias medium teneat, ob eamque causam utrorumque participes esse meritò videatur, in alterum quoque migrare, & quasi conuerti posse Trismegistus existimat. Etenim qui mente præcipuè vitur, cum profecto beatissimam Deorum immortalium vitam agere, qui verò corpore, ac sensibus, bestiarum. Quapropter cum voluptatis usus in corpore sensibusque existat, qui maximè huic deditus est, non modo non ascendit ad ea, quæ meliora, diuinioraque sunt, sed ne propriæ quidem naturæ statum, dignitatemque retinet, ac velut ex animo ad corpus, ex mente ad sensus, ex homine ad bestias labitur. Diminè apud Platonē Socrates in Phædone, Voluptas inquit quasi clauum tenens animum corpori affigit, atque coniungit, efficitque, ut insectus corporea specie ea putet esse vera, quæ suadeat corpus. Nam cum eiusdem rebus commoneatur, atque eadem sentiat cum corpore, cogitur, ut puto, eorundem morum, atque eiusdem alimonie fieri. Ex iis altera quædam argumentatio à Trismegisto contexitur. In omnibus quippe rerum generibus vnum aliquod maximum, atque summum esse vult, cuius participatione reliqua in eodem genere reponantur, ut omnia, quæ calida sunt, ignis natura, cui summa caliditas adsit calida fieri, eodemque modo & bona quæcunque sunt, quod summum, primumque bonum sequantur, atque imitentur bona dici debere. Summum verò bonū esse Deum, qui dubitat, is nihil omnino intelligit. Quæcunque igitur bona dicuntur, quia Deum quodammodo imitentur, eiusmodi appellatione digna esse putat, unde virtutes omnes, quod Deo cognatissime sunt, non immeritò perfectæ atque optimæ indicantur. Primi namque (ut supra diximus) virtutum generis opus est tranquillitatem afferre. Alterius autem, ad veritatis cognitionem perducere. Tranquillitas verò, veritatisque scientia (ut Platon quoque disputat) diuinitatis maximè propria sunt. Quapropter nemini dubium esse potest, quia utraque virtutum genera homines immortalī Deo cognatos efficiant, at verò voluptati quæ potest esse cum diuinitate cognatio? Deus quippe ab omni corporis concreione solutus, ac liber existit, voluptas autem corpus mouet, sensibusque blanditur, efficitque ut in corporis luto sensibusque demersi, non modo ab immortalium deorum præstantia, sed ab hominum quoque natura degenerare videamur, omnemque humanam rationem exuti porcorum spurcissimas sordes induere. Quapropter non

immerito inquit Plato, voluptas à deorum natura sequestra est; sed quid verius aptiusque aduersus hanc pestem dici potest? quam quod ab Hippocrate diuino profecto viro dictum ferunt. Is enim cum de Veneris voluptate loqueretur, partem esse dixit illam morbi teterrimi, quem nostri comitiales vocant.

*Obiectiones Peripateticorum contra Platoniam voluptatis definitionem.*

## CAPVT III.

**H**Æc igitur est diuina Platonis de voluptate sententia, in qua Mercurius Trismegistus, & Pythagorici omnes, ac Socratici quique excellentiores absque vlla dubitatione consentiunt. At verò Peripatetici acuti sane viri, sed hac in re contentionis forte studiosiores, quam veritatis, tam optimam, tamque diuinam Platonis sententiam suis quibusdam argutiis peruertere, atque deprauare contendunt. Tria verò sunt, in quibus nituntur Platonicos carpere. Primum quod Plato voluptatem motum in definiendo vocauerit, motum namque omnem velocem aiunt esse, vel tardum, voluptatem verò nullam velocem, aut tardam dici posse, sed aut breuem dici, aut diurnam oportere, neque motum vllum simul totum posse consistere, sed alteram semper alteri motionis parti succedere partem, ita vt vna deficiente, nascatur & altera, neque possint duæ quædam motionis partes se inuicem expectare: voluptatem contra simul fieri totam, omnesque eius partes inuicem, vt ita dixerim, commanere. Nam cum animus boni alicuius possessione frui se nouerit, hunc statim putant voluptatem percipere. Itaque fieri, vt voluptas animi cognitionem perceptionemque sequatur, & vt percepto eo, quod bonum videtur, extrinsecus obiecto puncto temporis tota conficitur, sic voluptatem, quæ apprehensionem eiusmodi sequitur, puncto quoque temporis perfici. Quæ verò sic fiunt, tota simul ac pariter fieri, atque indiuidua quædam simplici que natura consistere. Ex quibus concludi volunt voluptatem sensibus simplici quodam puncto prorsus innasce, ac statim primo sui exordio totam perfectamque existere, nec partem alteram, vt absolutior sit, desiderare, quo fit vt motus esse non possit.

Deinde Platonem reprobant, quod repletionem indigentia vocauerit voluptatem, idque ob hoc falsum esse putant, quo-

niam in animo voluptas insit, repletio autem existat in corpore, nec omnem voluptatem consentiunt talem esse, vt cum indigentia repletionem conueniat. Siquidem quæ oculis, auribus, ac naribus, ex fomis, sonis, odoribusque percipiuntur voluptates, nullam priorem expleant indigentiam. Esse præterea in contemplatione quandam ineffabilem voluptatem, quæ nihil ingens impleat, eam quippe mentis propriam esse, mentem verò nec aliquo sustentaculo indigere, nec aliqua ratione repleti posse, impleri enim contraque exauriri corporibus conuenire, quæ & plena esse possunt, & vacua. Animo autem, cum simplex atque incorporeus sit, illa nullo pacto posse contingere. Tertio verò loco id arguunt, quod voluptates nullas Plato bonas esse dixerit, plerasque malas. At illi plurimas arbitrantur optimas, & laude dignissimas, talesque esse illas, quæ ex honestis actionibus suscipiuntur, videri namque actiones huiusmodi iucundissimas, eamque voluptatem, quæ in illis insit, optimam purissimamque existere.

*Responsiones ad obiecta.*

## CAPVT IIII.

**H**Æ sunt Peripateticorum argumentationes, quibus ego respondere me posse diffiderem, nisi idem ipse, contra quem pugnant, suo, vt dicitur, se Marte defenderet. Prima igitur argumentatio, quæ voluptatem nequaquam motum esse posse concludunt, etsi fortè vera sit, nihil tamen in Platonicos valet. Nam & ipse Plato docuit duo esse motuum genera, alterum quidem corporum, alterum animorum; motumque corporum eorum, in quibus est, naturam sequi; corpus siquidem indiuiduo, ac simplici statu collectum esse non potest. Sed alteram eius extra alteram partem iacere necesse est, alioquin diuisione careat oportet, quod verò indiuisum remanet, id iam naturam corporis exiit: quapropter cum omne corpus extensum atque diuiduum sit, necesse est si quando agat patiaturque quippiam, aut ex loco in locum alterum transferatur, propinquiores, anterioresque partes prius cæteris, vel pari, vel agere, vel conuerti. Itaque omnis corporum motus temporis spatium exigit & successione quadam ab eo, quod prius est in posteriora distenditur. Animus autem indiuiduus est, ac simplex, nullam penitus discretionem, distantiamque partium habens. Igitur animi motio indiuidua est, & simplex atque vno tempo-

ris puncto simul tota conficitur. Vnde Thales Milesius nihil animo inquit esse velocius. Cum ergo voluptas apud Platonem, non corporis, verum animi motio diffinita fuerit, nihil sane prohibet eam motionem esse, ac etiam simul totam consistere, præsertim cum in Platonicis libris motio non modo fluxum, successionemque (vt Peripatetici volunt,) verum omnem quoque operationem actumque significet. Deinde quod aiunt Platonem voluptatem indigentia repletionem, indigentiam verò dolorem appellauisse, fortasse minus verum videri potest.

Nam & ipse in Gorgia vult voluptatem in repletionem consistere, voluptatem vero in voluptate, aut aliud quippiam eorum, quæ natura sunt in seipso consistere, præter eos qui Platoni dissimillimi sunt, nemo diceret. Præterea in eodem libro inquit, repletionem esse voluptariam, indigentiam verò plurimum dolorosam. At quis addè inepte loquitur, vt voluptatem voluptariam, dolorem dolorosum vocitet? Quis item dixerit pulchram pulchritudinem? iustitiam iustam? eodem quoque modo nec Plato voluptariam voluptatem, nec dolorem dolorosum appellauisset. Non igitur dolorem indigentiam, nec repletionem voluptatem esse voluit. Insuper voluptatem inquit à repletionem fieri, dolorem ab egestate. Ipse verò idem nihil existimat à seipso fieri posse. Quonam igitur pacto voluptas, si sit repletio, ab ipsa fiet repletione? aut dolor, si sit egestas, ab egestate nascetur? Quinetiam idem ipse in Timæo voluptatem in sensu ponit, eamque motum affectumque nominat, affectum verò sensusque motum repletionem esse vir tantus nunquam diceret. Quod si quis in Gorgia legerit voluptatem esse corporis repletionem, is attentius eum locum consideret, ac demum reperiet Platonem non id ipsum sentire, sed eam esse Calliclis voluptuosissimi hominis sententiam, aduersus quem Socrates acerrime disputat. Verum dant hæc nobis Peripatetici, nonnulli, negant tamen omnem voluptatem ab ipsa repletionem indigentia fieri, quippe cum illa, quam nobis affert contemplatio, quæque mente consistit, ex nulla fiat indigentia repletionem, ego verò & si luce clarius ostendere id possim, illam quoque mentis, quæ ex contemplatione capitur iucunditatem ab ipsa repletionem originem sumere, demum tamen hoc illis, ne videamur nimis forsan contentiosi, sit ita sane, vt volunt, quid nunc?

Nonne Plato (vt superius quoque dixi-

mus) voluptatem in sensibus, gaudium in mente locauit? Si ergo Peripatetici eam in mente ponant, quid ad nos? Non enim hoc sentit Plato. Quod ergo in contemplando percipitur, non voluptatem, sed gaudium nuncupamus. Quod si minus à repletionem nascatur, nihil contra Platonem, qui non gaudium, quod in mente est, sed voluptatem, quæ in sensibus infidet, inquit à repletionem creari. Sed instat acrius Aristoteles in eo, qui de moribus liber est decimus, probans illam quoque, quæ fit in sensibus voluptatem, non semper ab ipsius repletionem indigentia proficisci, id enim in tactu, ac gustu verum esse vult. At verò in his, quas ex odoribus, formis, sonisque capimus voluptatibus, nullo pacto contingere. Neque enim illum qui latatur sonus, aut formis, his ipsis, in quibus oblectatur rebus vlla ratione repleri, neque his antea egiisse, nec verò, & si verisimilia forsan videantur, non tamen talia sunt, vt Platoni aliqua ex parte detrahere possint. Nam verba illa Platonis, quibus inquit voluptatem ab indigentia repletionem gigni, duobus (vt videtur) modis possumus interpretari. Hæc enim duo, egestas, atque appetitio, ita inuicem sunt connexa, vt alterum nequeat ab altero separari. Ea namque quibus egemus appetimus, neque appetimus quicquam, quo non ante concupiscentiam egerimus, neque quisquam est egens, quin appetat, neque appetit vnam, qui non eget. Quo fit, vt vtraque sic inuicem videantur esse coniuncta, vt alterum semper alterum comitetur. Quapropter apud excellentiores quosque Philosophos hæc est consuetudo, vt sæpenumero egestatis nomine appetitum significant, eodemque modo & appetitionis nomine egestatem velint intelligi. Vnde recte Cicero, non caret inquit is, qui non desirat. Socrates quoque, opibus delitiisque nostris, quibus ceteri ardentissime student, egere se negabat, quod eas nequaquam appeteret. Epicurus autem, non qui parum haberet, sed qui plus euperet egere dicebat. Itaque si quis velit egestatem pellere, non pecuniæ adiiciendum, sed cupidini potius detrahendum. Eodemque modo, cum Plato inquit, repletionem indigentia, appetitionis repletionem intelligi voluit. Repletur autem concupiscentia cum id, quod cupiebat assequitur. Repletio autem appetitionis nihil aliud est, nisi consecutio quædam eius, quod in concupiscentiam venerat. Ex his ergo, quæ diximus, sic Platonem interpretamur. Repletio indigentia causa voluptatis existit, hoc est cum

appetito, quæ eget, quamque indigentiam appellamus, id quod exoptauit, adepta est, cuiusque præsentia fruitur, & quasi repletur, sensibus statim ille motus innascitur, quam suauitatem, delectationem, voluptatemque dicimus. Vnde Epigramma Deliacum, iucundissimum esse inquit, re amara potiri. Hæc autem interpretatio cunctis in sensibus, ac etiam in mente (si quis velit) locum habet. Quippe cum omnes sensus rem ipsam cuius cupiditas antecessit adepti, ineffabili quadam voluptate deliniantur. Atque primus est hic respondendi modus, quo Platonici Peripateticorum laqueos possint effugere, etsi cui forsan videatur hæc interpretatio durior, age tentemus aliam, ne nostri videantur illorum iaculis succubuisse. Explere igitur indigentiam quid aliud est nisi id, quo indigeas assequi: egemus autem quibus, nisi his, quæ vel salutem dum adsit nostram meri, si amissa sit, reddere possint, vel alio quopiam modo nobis sint vtilitatem aliquam allatura? Nos verò homines sumus. Est autem homo, ut Peripatetici, ac Stoici arbitrantur, id quod ex anima rationali constat, & corpore. Pythagorici ac Platonici paulisper à cæteris discrepantes, hominem esse putant diuinam quandam mentem terrenis vinculis alligatam, quo fit ut apud cæteros Philosophos animus naturam ac nomen cuiusdam partis hominis habeat, apud Platonicos animus noster homo totus existat. Quapropter Socrates à Critone interrogatus, quemadmodum se sepeliri iuberet; Vt liber, inquit, si modo comprehenderitis me, nec ego vos effugero. Atque idem apud Platonem cum Alcibiade disputans, pluribus rationibus hominem probat nihil aliud præter animum esse. Corpus autem non esse hominem, sed hominis Externa verò non hominis, sed fortunæ. Nec tamen animum nostrum semper & ubique existentem hominem vocitat, verum quamdiu in coelestibus sedibus vitæ agit, tum Deus, tum etiã dæmon à Platoniciis nuncupatur. Cū verò habitaculis terrenis includitur, ab ipsa humi natura, in qua mergitur, humanitatis nomen accipit. Itaque Origenes Platonice nobilissimus, hominem in dæmonem ac Deū conuertere posse, & in bestias quoque migrare nonnunquam asseuerat. Seneca item Platonis plurimū studiosus animū nostrum appellauit Deū, in humano corpore hospitātū Sed ij omnes, & ipse etiã Plato, Heraclitū, Empedoclem, Pythagoram imitati sunt. Nam Pythagoras animum nostrum ex homine in Deum transferri his versibus asserit.

*Corpore deposito, cum liber ad æthera perges,  
Euades hominem factus Deus ætheris ams.*

Cum igitur (ut ad propositum reuertamur) homo sit ex Aristorelicorū sententia, quod ex anima rationali constet, & corpore: ut verò Plato vult, diuinus quidam animus, qui terreni corporis ministerio vititur, sequitur ut duarum profectò rerum animi scilicet & corporis cura nobis suscipienda sit. Animi quidem, ut ille iubet, sui tantum gratia, corporis autem cura omnis ad animum, quasi seruus ad dominum referri debeat. Eorum ergo quibus egemus duo sunt genera. Indigemus enim his quæ sint animo, & his, quæ sint corpori profutura. Profunt verò corpori, quæ vitam, quæ valitudinem, quæ vires, quæ formam, quæ naturam propriam aut reficiunt, aut seruant. Animo autem ea conueniunt omnia, quæ ad mores optimos, quæque ad rerum cognitionem aliquid conferant. His adde illa præ cæteris, & animo prodesse, & corpori, quæ alterutri similia, & cognata videantur. Similia namque, ut dicitur, similibus conseruantur, & singula salutem propriam expetunt. Hæc ergo sunt, quibus homines indigent. Quapropter, quando hæc adsunt, vel ea saltem, quæ horum speciem, quandam & similitudinem habeant, voluptate afficimur. Siquidem quæ bona nobis esse videntur, si præsentia sint, voluptatem afferunt. Quo fit, ut voluptatem præcedat opinio, ut enim placet Stoicis, nulli quicquam potest esse iucundum, nisi quod quisque sibi cognatum ac bonum existimauerit.

Cum verò voluptas corporis sensibus percipiatur, horum verò species quinque sint, erunt similiter quinque genera voluptatum, vna quidem tangendo, altera gustando percipitur, odores aliam præstant, aures, atque oculi reliquas suggerunt. Atque ij sensus ita se inuicem habent, ut ordinem quandam & loci pariter, & naturam contineant. Oculi enim purissimi sunt, & ut Timæus Platonice disputat, ac probat, ignis lucisque naturæ cognati. Aures secundum ordinem puritatis obtinent, atque aëri comparantur. Nares tertium deinde tenuitatis gradum possident, & crassiori quadam natura concretæ, medium inter aërem, & aquamque continent. Deinceps verò gustandi organum crassius est, & aquæ naturæ simillimum. Postremo tenuitatis gradu hæ, quibus tangimus, partes distribuuntur, hæ namque ad corporis naturam accedunt propinquius, ac terræ crassitudini deputantur. Cernis hos quinque sensus gradatim dispositos sic inuicem sese habere.



re, vt qui eminentiori parte corporis collocantur, potiore quoque ordinem puritatis obtineant, & alijs alijs, diuersisque rebus cognati existât. Quod quia in his, quos in Platonis Timæum edidimus, Commentariis latius disputauimus, sufficiat hoc loco breuiter attigisse. Cum ergo tangendi sensui solida quædam & crassiora corpora admouentur, eadem prædita humoris calorisque natura, quæ ipse quoque sensus affectus est, horum tunc præsentia corporum, quia sibi cognata sunt, quia eandem naturam habent, quia propriam eius concretionem, qualitatemque tuentur, exultat quodammodo ac gessit, totusque suauitate perfunditur. Gustus verò liquidioribus, vt patet, corporibus recreatur, delectatur enim saporibus his, qui humoris decocti, maturique naturam habent. Quippe cum & ipse, vt Platonici putant, eadem proportionem concretus sit, quo fit, vt simili, & quasi suo quodam familiari accedente, cum eo suauissime conquiescat. Odorandi præterea vis odoribus iis reficitur maximè, qui inter aquæ aërisque naturam commixti sunt, quod in pomis, floribusque percipitur, siquidem, & ipsa eandem naturam ab origine sortita sit. Aures insuper eiusmodi delectantur sonis, qui ex purissimo aëre confecti sunt, atque ex eadem, qua & ipsæ harmoniæ consistât, itaque videmus ob naturæ diuersitatem hos remissioribus, illos vehementioribus, alios grauioribus, alios item liquidioribus concentibus delectari. Oculis autem, quod luci familiarissimi sint, ea videntur esse gratissima, quorum natura quam simillima luce temperata est; eiusmodi verò ea sunt omnia, quæ ex colorum, qui omnes à luce proficiscuntur, pulcherrima temperatione resultant. Nec solum rebus his, quas sensibus haurimus ad vitam augendam reparandamque naturam indigemus, verum etiam ad mentis peritiam consequendam, quo efficitur, vt sensus duabus de causis, optimis quibusdam rebus, quæ extrinsecus offeruntur indigeat, tum quia sibi cognata ac similia sint, singula verò similibus conseruari perficique necesse est; tum quod ad rerum atque artium cognitionem, quæ res maximè à nobis expetitur, instruere possint. Quoties igitur ea, de quibus diximus, sensibus offeruntur, admittunturque intro penitus ad fruendum, sensuum indigentia illa, quæ antea cupidinem peperit expletur. Eaque, quam quærimus, voluptas ex hac indigentia repletionem contingit.

Hæc est igitur secunda Platonice definitionis interpretatio, quam neminem ar-

bitror, modo sanæ mentis sit, vituperaturum; quapropter de his hætenus, pergamus ad reliqua. Tres sunt Aristotelicorum aduersus Platonem propositæ quæstiones: Prima, quod falsò Voluptatem vocauerit motionem. Alia, quod nec repletio, nec à repletionem Voluptas omnis esse possit. His omnibus non meo quidem ingenio, nec enim tantum mihi arrego, sed his, quæ ab ipso Platone latissimè disputata sunt, satis iam responsum arbitror. Postrema verò Aristotelis obiectio fuerat, quod plurimæ voluptates, contra Platonem, quid id negasset bonæ honestæque forent, cuiusmodi sunt, quæ ex actione atque usu virtutum, & contemplatione proueniant. Ego verò dixerim superius à principe ac præceptore nostro propositum esse, quod huic obiectioni respondendum sit. Quæ enim in mente consistunt, virtutesque sequuntur, Plato non ster, vt supra retulimus, non voluptatis, sed gaudij nomine nuncupauit, quapropter quod virtuti mistum sit, bonum esse, Aristoteli dabimus, nec tamen voluptatem dabimus bonam esse, sed gaudium, virtutis enim pro arbitrio suis quisque vocabulis, & nomine quidem discrepat Aristoteles à Platone, re congruit. Pythagorice verò, Stoici, ac Cynici cum nostris re pariter, ac nomine congruunt.

*Opiniones varia quid sit voluptas, Prima opinio Aristotelis.*

## C A P V T V.

**A**Ristoteles autem, vt ad eius sententiā deueniamus, Voluptatis nomine virtutis latius, eoque vult non modo illam, quæ sensibus inhæreat iucunditatem, sed illam, quoque, quæ in mente consistat significari, quid verò ipsa voluptas sit, magis annuere, quam exprimere videtur. Verumtamen quæ de hac in septimo, ac decimo de moribus disputat, hoc quod dicam modo interpretari possumus. Tres sunt, vt Aristotelis verbis utar, animi potestates, quarum vna nobis cum plantis cōmunis est, quam vegetandi vim nominant, cuius officia tria sunt, alere proprium corpus, atque augere, ac demum aliud extra se gignere simile, alteram deinde naturam animæ sentiendi vim vocitat, quæ nobis cum ceteris quoque animalibus communis existit. Sensuum verò, alios intimos, alios externos esse, externi autem, qui etiam ad propositum magis pertinent, quinque sunt, vulgari propemodum diuisione notissimi, tertia verò animi vis, solis ex omni animantium mortalium genere hominibus conuenit, eumque intellectum mentemque nancupat. His addit

monendi potestatem, sed eam, quod ad propositum nil valeat, dimittamus, de prima verò animæ natura, quæ plantis convenit Philosophi veteres diversa sentiunt, siquidem Plato arborum herbarumque animas tacitam quādam appetitionem, quem naturæ nixum vocat, habere putat. Empedocles non modo naturalem inclinationem, verum sensum etiam plantis inesse voluit. Anaxagoras autem, ac Democritus voluptate doloreque eas affici, nec sentiendi modo, sed & cogitandi, & intelligendi vim habere censent. At verò Aristoteles, nec ratione, nec omnino sensu præditas, nec voluptatis alicuius participes arbitrat, quo fit, ut nutriendi augendique illa potestas nihil ad Aristotelis de voluptate sententiam conferat. Reliquæ igitur animæ vires, quibus voluptatem attribuit, duæ sunt, ex quibus unam, ut eius verbis utar, intellectum, alteram sensum nominat, hisque suas actiones, quas cognitiones vocat, assignat. Intellectus igitur siue, ut Latine loquar, mentis, atque rationis operationem, intelligentiam, cogitationem, contemplationemque dici vult. Visus verò visionem, auditus auditionem, odoratus, odorationem, gustus, gustationem, tactus denique tactionem, ut visus quidem ipsa sit animæ vis, ac natura, qua videre quis potest, visio verò actio ipsa, hoc est videre, eodemque modo in sensibus cæteris, visionem, aut, ut vnum pro singulis prosequamur, duo potissimum habere principia, à quibus veluti quibusdam causis oriatur, visum scilicet ipsum, in quo sit, & insuper rem externam, quæ cernitur, à qua visus excitatur, ut videat, & visum quidem animi vim, ac potestatem nominat Aristoteles. Quod autem visu cernitur obiectum, visionem verò perfectam esse dicendam, cum & animi vis optime affecta sit, & illud quoque, quod cernendum est, obiectum suapte natura sit optimum, & naturæ insuper animæ consentaneum, quod si alterutrum defecerit, visionem imperfectam fore, utrisque verò concurrentibus, perfectam, quæ verò perfecta sit visio, eandem quoque iucundam esse, quæ perfectior, iucundior, quæ perfectissima, iucundissimam, Visionem igitur, ut idem repetam, quia perfecta sit, iucundam esse, perfectionem igitur visionis iucunditatem quandam videri. Quapropter & vice versa iucunditatem visionis perfectionem esse. Cum verò iucunditas, ac voluptas, ut ad propositum spectat, idem valeant, effici vult, visionis perfectionem esse voluptatem, quodque de visu dictum est, idem etiam de sensibus cæteris, deque ipsa mente intelligi

volumus, in cunctis enim est operatio propria, in auditu quidē, auditio, in odoratu, odoratio, de cæterisque similiter. Voluptas igitur communi definitione apud Arist. nihil aliud est, nisi perfectio quædam operationis animi, idem autē cognitionis. Cumque omnibus sensibus voluptas inhaereat, voluptas visus erit visionis perfectio, auditus auditionis, gustus gustationis, ac de reliquis eodem modo, ut cuiusque voluptas sit propriæ operationis perfectio. Est autem apud Arist. perfectio duplex, altera quidem prima, annexa altera, prima verò illa est, quæ pars eius naturæ, cuius perfectio vocatur, existit, velut anima hominis, hæc enim hominis perfectio est & pars quædam humanæ substantiæ, annexam verò perfectionem illam dicimus, quæ cum nulla substantiæ pars existat, substantiam tamen ipsam consequitur, ac veluti comes rei ipsius, quam perficit, naturæ annectitur, atque adiungitur, cuiusmodi est in iuventutis flore pulchritudo, nec enim pulchritudo iuventus ipsa est, neque pars aliqua iuventutis, sed ipsam sequitur iuventutem, atque ornat, perfectamque reddit: voluptas igitur cum sit operationis illius, quæ in sensibus, aut mente consistit, perfectio, quæ tandem perfectio hæc erit? prima ne? at hoc Arist. utique negabit, Voluptas enim, quæ visu efficitur, nec ipsa visio est, nec pars aliqua visionis. Erit igitur voluptas in visu visioni quædam annexa, atque adiuncta perfectio. Nam & si in ipsa visione implicita sit, neque tamen visionis pars est vlla, neque visio tota. Alioquin absque voluptate visio, quam sæpe iam commemoro, fieri nullo modo posset, verum ab ipsa oritur visione, & quasi comes consequitur, miscetur illi, hæret, ornat, perfectamque efficit, nam & diligentius, & perfectius quisque id agit, quod delectat, quod profecto notius est, quam ut probatione aliqua indigere videatur. Quamobrem non absque ratione voluptas operationis illius, cui competit, ut contemplationis, visionis, auditionis, cæterarumque omnium adiuncta quædam perfectio definitur, quod si honestæ actionis fuerit, ipsa quoque voluptas honesta ab Arist. nuncupatur, sin turpis, & ipsa turpis, mediæ verò, voluptas quidem est media, qua quidem in re à plerisque veterum Philosophorum discrepat Aristotel. Alij namque voluptatem esse putauerunt rei cuiusdam, quæ nobis conveniat, naturam impositam sensibus, veluti suavem mellis linguæ saporem imbibitum. Alij verò voluptatem rei convenientis perceptionem definire, veluti cum gustui dulcedo liquoris apponitur, nec dulcedinem ipsam,

nequeliquorem, neque gustum voluptatem appellauerunt, sed ipsam potius gustationem, hoc est dulcedinis perceptionem, quorum sententiam Auicenna probare videtur. Nonnulli verò nec ipsam etiam suauis liquoris perceptionem voluptatem esse voluerunt, sed illud potius animi iudicium, quod primam sensuum apprehensionem, quam plerique phantasiam vocant, sequatur. Primo namque sensum, quod sapor dulcis sit, nosse, postmodum quòd bonus asciscendusque sit iudicare, id plerique iudicium voluptatis nomine significari putant. Nec defuerunt, qui neque suauem sensibus impositam qualitatem, nec eiusdem qualitatis perceptionem, neque iudicium voluptatem vocauerint, verum commotionem quandam corporis, ac sensus, quæ quidem perceptionem ipsam iudiciumque consequitur, veluti liquefactionem, effusionem, elationem, exultationem, petulantiam, atque his similia. At verò alij quidem ipsam membrorum suauem, & gratam, quæ ante iudicium sit, concitationem, titillationemque, voluptatem esse iudicauerunt.

*Opiniones Peripateticorum de voluptate.*

#### C A P V T VI.

**A**ristoteles autem horum nihil Voluptatē nuncupare videtur. Cæterum apprehensionis ipsius quandam perfectionem, ut prior quidem dulcedinis perceptio sit, ex hac aliud quiddā nascatur, eius quasi comes, & annexa perfectio, eademque Voluptas existat. Quid verò sit huiusmodi perfectio, quam Voluptatem nominat, nunquam satis (ut videtur) explicuit. Peripatetici autem, qui fluxerunt ab Aristotele, dum id, quod ab eorum principe obscure dictum fuerat, explicare, & in lucem edere vellent, in diuersas sunt sententias distributi. Nam alij quidem in sensibus, alij verò in eo, qui sensus sequitur appetitu Voluptatē collocauere. Et qui in sensibus, diuersis quoque modis Arist. interpretantur. Et enim nonnulli duas in sensibus esse putant perceptiones, quarum ab iis, quæ extrinsecus offeruntur in animū quodāmodo proficisci, ac fluere videtur: altera verò ab animo magis profecta, ad ea, quæ extra sunt porrigi. Primò namque animus, v. g. dulcedinem percipit, quæ prima perceptio ex ipsius rei, quæ obiecta est suauitate oriri videtur. Deinde considerat se dulcedinem consequutū fuisse, illā percipere, habere, eaque perfrui, atque hanc illi secundam animi perceptionem, seu cogitationem, siue meditationem, seu animaduersionem, Voluptatem appelladam esse ab Arist. censuerūt, ut Voluptas sit illa ipsa consideratio,

qua bonorū præsentia se frui quis cogitat.

Nonnulli non sensum, cum sese dulcedinem consequutum animaduertit offerri, & quasi erigi, & quandam velut hilaritatem concipere, ac per se ferre, eamque voluptatem ab Aristotele dictam arbitrantur. Itaque voluptatem esse eleuationem, siue hilaritatem animi adepti iam illud, quod cupierat bonum. At verò qui Voluptatem in ea parte animi, qua appetimus posuerunt, duas appetitus proprietates esse putant. Vna quidem moueri nos, ad eaque inclinari, quæ procul à nobis sunt bona, nec dum illa fuerimus consequuti Altera verò in eo, quod adepti iam consequutique sumus consistere; primam, cupiditatem; alteram, quietem nūcupant, & illam quidem molestia, sollicitudine, cura, anxietate, plenam esse volunt, hanc verò ineffabili quādam suauitate perfusam, eamque Voluptatem à Peripateticorum Principe nuncupari, ut nihil aliud Voluptas esse dicatur, nisi terminus quidam, siue quies, appetitus in bono, quod iam fuerit consequutus. Vnde Lucretius, Requies, inquit, hominum diuumque Voluptas. Cæterum, quid ipsa quies sit, non eodem omnes modo exposuerunt. Alij namque cessationem ipsam, ac velut finem aliquem appetendi quietem definiunt. Appetitum etenim cum id, quod cupierat bonum adeptus fuerit, ab appetendo desistere. Itaque sollicitudine & anxietate vacare, quæ vacatio quies ipsa sit, eademque Voluptas ab Aristotele nuncupata. Ideoque Voluptas est, ut isti definiunt, acquisitio, quod cupitum fuerat bono, ab omni appetendi sollicitudine & anxietate vacatio. Nonnulli verò Peripatetici aliquid huic vacationi aliud addiderunt. Carere quippe omni molestia nondū plenam, ac perfectā Voluptatis naturā possidere. Fieri vero integrā atque absolutam, si in eo ipso statim sic omnis appetitio conquiescat, ut nō modo nō vltius appetat quippiā, sed huic quo fruitur bono totis nervis, ac viribus hæreat, assentiat sibi esse satis, atque in id penitus diffundatur. Est ergo, ut censent isti, Voluptas assēctio, atque diffusio appetitus id id, quod possideat bonum, quo fit ut mediis in voluptatibus liquefcere corpus totū, ac diffuere videatur, cum omnis animi, corporisq; vis, ac motus in id, quod extrinsecus obicitur, inclinetur, ac penitus rapiatur. Eiuscemodi vero diffusio non modo in corporis membris partibusque, verum etiam, in appetitu natura; anima esse debet, neque enim in re aliquā corpus nisi appetit in pulsū animiq; potestate diffunditur.

Quapropter

Quapropter & ipsum quoque appetitum animumque diffundi necesse est, atque avidissime affigi, & hærere illi, quod propriæ videatur naturæ congruere. Omnis igitur huiusmodi animi, appetitusque nixus, copulandi, hærendi, affigendi ei, quod iam possidetur bono voluptatem continet, nec aliud quicquam, ut illis placeat, voluptas esse videtur, nisi assentiri, hærere, affigi præsentī bono, in idque diffundere, penitusque diffundi, modo hæc intelligas in animo, in eaque animi parte, quæ appetendi vis nominata est fieri. Nam huiusmodi motus in calore quoque, sanguine, spiritibus, totoque corpore reperitur, qui nec tamen voluptas est, nec pars aliqua voluptatis, verum ab ea quam in animo est diffusionē, assensioneque, quam voluptatem dicunt, illa quoque corporis liquefactio, effusioque veluti vestigia quædam intimo voluptatis proficiuntur. Nam qualia hæc in corpore sunt, talis & in animo voluptas existit.

*Quæ Platoniorum cum Aristotelicis concordia, & quia Plato de sensibus, & aff. etibus.*

C A P V T VII.

**H**ÆC est igitur Peripateticorum de voluptatis definitione sententia, quam ipse arbitror, ne minima quidem in parte à Platonis nostri sententia discrepare, nisi quod Aristoteles latius loquitur eodem nomine voluptatis, & eam, quæ in mente est, iucunditatem, & eam quæ in sensibus nominans. Plato vero voluptatem vocat eam, quæ sensibus accedit, quod vero in mente est, id gaudium nuncupat. Quin etiam interdum & ipse Plato voluptatis & gaudij nomina confundit, utroque vocabulo utens ad utrumque significandum, Nomine igitur vel nullo modo, vel vix, ac minimo discrepant, an verò re congruant testes esse possunt nonnulli Platonis libri, nec non Platonici plerique haudquaquam Philosophi contemnendi. Nam Apuleius, Calcidius, Contiſus, Ptolemæus Platonici nobiles eo, quem breuiter referam, modo Platonis sententiam obscurissimis in Timæo verbis positam, interpretantur, sensum profecto aiunt à Platone primam animi perceptionem, quæ ab ipsa corporis passione nascatur, intelligi. Etenim rerum omnium, quæ noscendæ sunt, species quasdam ad nos fluere, sensuum foraminibus hauriri in eo, qui in cerebri ventriculis est, spiritu imprimi, atque consignari, eiusmodi rerum species in spiritu, quod quidem corpus est tenuissimum, atque per lucidum figuratas pulsare animum, atque

efficere, ut illa ipsa obiecta externa quorū hæc sunt imagines, intueatur, atque percipiat, hanc animi perceptionem ab ipsa corporis passione impulsuque nasci videmus, spiritus siquidem ab externis motus corporibus, ipse animum consimili pulsat, formatque imagine. Cum igitur eiusmodi perceptio à spiritus impulsione nascatur, consequens est eam à corporis passione, id est, pulsa motioneque proficisci, quod imitatus Aurelius Augustinus Platonius bonus in eo libro, qui de animi quantitate inscribitur. Sensus est, inquit, passio corporis per seipsam non latens animam, id est, per ipsam corporis speciem sensibus haustam eiusdem quoque passionem corporis, prima quadam, & propria imagine percipi. Ex quibus fit, ut gemina corporis passione sentiamus. Nam cerebri spiritusque impulsu externorum corporum passionem apprehendimus. Passionem vero illam, quam corpus proprium extrinsecus accipit, Platonici bifariam diuidunt, quarum una leniat corpus, ac mulceat, nec tam membra, visceraque pulset, quam palpet, atque titillet, altera vero asperius, ac durius agitet. Cum verò animus primæ illi corporis motioni, cuius mulcere proprium est, consentiat, voluptatem fieri, cum ab altera, quam a peram dicimus, abhorreat, atque desciscat, dolorem asserit. Assentitur autem animus corporis motioni, cum ei libenter adhæret, affigiturque, copulatur, perfunditur, atque in ea suauissime quiescit. Quapropter Aurelius Augustinus voluptatem definit appetitionis ipsius cum eo, quod amauerit vnionē. Nonne & hoc idem Peripatetici voluptatem superius definire, requiescere ē animum, perfundi, ac penitus copulari: Quid ergo restat, cur non dicant Platonici, Peripateticique vnum, atque idem de voluptate, & dicere pariter & sentire? Quo alio discrepant? nisi quod illi consentire animum, isti quiescere, ac sistere dicunt, imò & ob hoc nihilo discrepant, nec enim quiescit animus vnquam, nisi consentiat, nec consentit quidem, nisi pariter & quiescat.

*Quomodo Peripatetici diuidant voluptatem, & de viribus animæ.*

C A P V T VIII.

**Q**uid ergo Platonici, ac Peripatetici de voluptatis definitione tradiderint, & quemadmodum in idem utrorumque disputationes conueniant, satis iam arbitror declaratum. Quod vero de voluptatis diuisione peripatetici fescerint exequamur. Omnem Peripatetici naturam hominis ex anima constare putant, & corpore, ani-

nam vero in duas partes, vt ad propōitā  
 quēstionem pertinet, mentem videlicet,  
 sensumque distribui, rursusque mentem  
 vim pariter geminam, naturamque habē-  
 te. Earum profectō vnā in veritatis  
 indagatione, alteram in consultatio-  
 ne, & actione versari, atque illum ( vt  
 eorum verbis vtar ) contemplatiuum in-  
 tellectum, hunc actiuum nominant, illius  
 proprium esse rerum earum, quæ naturæ  
 ordine continentur, causas, proprietates,  
 progressusque perquirere, solaque ve-  
 ritatis contemplatione contentum esse,  
 huius autem opus dici volunt, quæ augen-  
 da, fugiendaue sint, consultando discer-  
 nere. Sensuum vero alios quidem intimos,  
 externos alios vocant. Intimos, vt vult  
 Auerrois Peripateticorum interpretum  
 acutissimus, quatuor in species diuidunt,  
 quorum primus omnes, quæ per externos  
 quinque sensus hauriuntur imagines col-  
 ligat, atque percipiat, ob idque commu-  
 nem sensum appellant. Altera deinde vis  
 imaginandi ab iis nuncupata est, cuius of-  
 ficiū sit, cum ipsa nihil persentiat ima-  
 gines, quæ à prioribus sensibus acceptæ  
 sunt, retinere, easque tertiæ sentiendi na-  
 turæ, quam illi Phantasiā, existimandi-  
 que, ac cogitandi vim dicunt, afferre, cu-  
 ius opus esse arbitrantur, vt iis acceptis  
 imaginibus, quid, aut quale sit id, cuius il-  
 læ imagines sint, iudicet, atque percipiat,  
 eaque ipsa, quæ discreuerit, siue coniun-  
 xerit, seu conceperit iudicando, postremæ  
 cerebri ipsius, sensusque particulæ, quam  
 memoriā dicunt, seruanda commendet.  
 Sensus verò illos externos qui ad id, quod  
 querimus magis valent, quinque in spe-  
 cies, quæ cunctis notæ sunt, diuidunt, eos-  
 que sic inuicem sese habere putent, vt qui  
 eminentiorem corporis locum possident,  
 puriores simplicioresque sint, reliqui  
 crassiores. Ideoque visum auditu, hunc o-  
 doratu, odorandi verò vim gustu, hunc de-  
 nique tactu puriorem videri. Nam ad vi-  
 sum lux, atque colores, ad aures soni, ad  
 nares odores, sapores ad gustum, solidi-  
 tas vero, ac mollicies, calorque, & frigus  
 ad tangendi vim pertinent. Quapropter  
 quo lux, colorque sono, sonus odoribus,  
 hi verò sapore, sapores autem iis, quæ ta-  
 ctui subiiciuntur puriores existunt, eo vi-  
 sus auditui, hic narium sensui, sensus hic  
 gustui, gustus denique tactui, puritate, di-  
 gnitateque præstant. His autē quinque viri-  
 bus sentiendi, quinque pariter in corpore,  
 vt illi vocant, organa atque subiecta, & qua-  
 si fundamenta quædā attribuuntur. Nec aliud  
 quicquā hæc esse videtur, nisi corporis

quædā affectiones, quas alij dispositiones,  
 alij qualitates, nonnulli cōplexiones no-  
 minant, quæ elementorum varia commix-  
 tione diuersis in partibus corporis diuersæ  
 nascuntur, ac sunt diuersarū quoque sensuum  
 fundamenta. Alia nāque corporis affectio  
 est, qua vidēdi potestas sustinetur, ac viger.  
 Alia vero qua audiendi, idēque est de reli-  
 quis omnib. iudicandū. præter has quinque  
 seu affectiones, siue subiecta, quinque pari-  
 ter instrumenta, solidioraque corporis mē-  
 bra, quibus tum sensus, tum etiam affec-  
 tiones ipse inhæreant, velut receptacula  
 quædam adinuenta, constitutaque sunt, o-  
 culi namque vasculorū instar affectionem  
 vimque videndi recipiunt, cæteraque, vt per-  
 spiciū est, corporis mēbra certo quodam  
 ordine cæteris qualitatib. ac sensibus assi-  
 gnantur. His præterea mēbris, instrumen-  
 tisque proprii quidā motus, qui cuiusque affec-  
 tum intimum demonstrare videntur, in-  
 nati sunt. Itaque in ipsis animi perturbatio-  
 nibus, modo rubescere, modo pallescere, &  
 alias quidē cōtrahi, ac rigere, alias vero dis-  
 fluere, & quasi liquefcere cernimus. Ad  
 hæc omnia, quæ longo iā ordine dinume-  
 rauimus voluptatē, ita pertinere Aristote-  
 les arbitrat, vt in ea mente, quā contem-  
 platiuā appellat, perfectā quædā atque ab-  
 soluta voluptas insit. In cæteris deinde ho-  
 minis partibus gradatim degenerat. Nam  
 septē, vt putat, de causis, prima illa volup-  
 tas, altera, quæ in actiua mēte ponitur, vo-  
 luptate perfectior esse videtur. Omnis eni-  
 m, quæ ex veritatis indagatione cōtem-  
 plationeque suscipitur voluptas, honesta  
 est, ac laude dignissima. Cum vero mēs al-  
 tera de reb. agendis fugiendisque delibe-  
 rat, gaudetque eiusmodi rerum electio-  
 ne, non omnis tamen voluptas illa laudari so-  
 let. Quæ ex his consiliis actionibusque quæ  
 legibus optimis aduersantur, prouenit, me-  
 rito vituperatur, veluti si mens consilio cō-  
 tra patriæ, parentumque salutem, contra  
 que ius suscepto gaudeat, cum honestis ac-  
 tionibus delectatur, voluptas honesta est,  
 cum vero mediis, illa quoque est mediā,  
 quo fit, vt prima in mente, vnum danta-  
 xat gaudij genus, idque laude dignum exi-  
 stat, in altera vero tria, vt diximus, genera,  
 honestum, turpe ac medium reperiantur.  
 Illa quoque ratio, qua ille in decimo de  
 moribus vitur, non parum ad id, quo de  
 agimus valet, diutius enim contemplari  
 nos inquit, quam aliud quiduis agere pos-  
 se, cumque veritatis inquisitio firmior, sta-  
 biliorque, quam quodlibet agendi officiū  
 sit, necesse est eam quoque quæ ex illa proue-  
 nit voluptatem stabiliorem, ac perfectio-



rem existere. Adde quod sapientis vita contemplatioque pauciorum quam civilis indiget, quapropter illius voluptas, cum ipsa queque paucis minimisque contenta sit, proculdubio magis ex seipsa sufficiet, ac perfectior iudicabitur. Est præterea pars ea mentis, cui naturæ contemplationem tribuimus, altera ut nemo, utique negaret, perfectior, proptereaque præstantiorem cæteris omnibus voluptatem affert. Cumque actiuz mentis motus agitatioque ad aliud quoddam, aut eligendum, aut reiiciendum feratur, primæ verò mentis contemplatio seipsa cõtenta sit, nec aliud omnino quicquam præter seipsa desideret, necessaria ratione conficitur, voluptatem, quæ contemplationi propria est, sui duntaxat gratia desiderari. Alteram verò aliud præter se quiddam velut finem expetere, atque idcirco primam illam admodum præstantiorem iudicandam esse. Accedit adhæc, quod prima cuiusque pars atque perfectior, totius quasi vicem appellationemque gerit, ex quo sequitur, ut cum hominum quisque pluribus ex partibus constitutus sit, ea tamen, quæ contemplationi deputata est, quia cæteris dignitatē præstet, integram penè naturam hominis cõtplectatur, eaque maximè homo, ut Aristoteles inquit, existat, quamobrem, & illius actio nobis præcipuè congruit, atque inefabilem continet voluptatem, quæ enim natura cognatiora sunt, maiorem utique voluptatem afferre solent. Postrema verò Aristotelis argumentatio probat, propriam immortalium Deorum operationem in sola contemplatione consistere, ideoque neque quicquam in nobis præter primam (ut diximus) mentem contemplationemque, atque eam, quæ ex illa oritur, voluptatem, quod Deo cognatum sit, inesse videtur. quod si voluptas huiusmodi, quia sola Diis immortalibus conuenit, maximè diuina est, reliquis omnibus voluptatibus præstantior merito iudicabitur. His igitur argumentationibus, ut contemplandi voluptatem illi, quæ agendo percipitur, anteponeret, Aristoteles utebatur, verum ad eas iam, quæ quasi titillant sensus, & ad eos suauitate quadam affluunt, atque illabuntur, deueniamus. Has in duas ab Aristotele species diuisas comperimus, è quibus aliz quidem naturales, aliz contra naturam esse videntur, atque naturales eas vocat, quæ cum naturam reficiant, ab omnibus, aut pluribus appetuntur, easque pari quoque numero bifariam diuidit, quarum aliz cunctis animantibus æquè cõtunes sunt, aliz verè singulis pro diuersitate na-

turæ quodammodo propriæ, atque cognatæ, namque quod cibū cuncta, potumque, ac Veneris vsum expetunt, communis naturalisq; libidinis, ac voluptatis est propriū: quod autē singula pro naturæ diuersitate singulis, certisque rebus variè delectantur, aliisque alia gratiora contingunt, id naturali quidem, attamen propriæ voluptati competit, nam cum id voluptariū cuique, quod eius naturæ congruit, videatur, diuersæque sint diuersorū animantium affectiones, atque naturæ, necesse est differentiibus animalibus ea quoque, quæ congruāt discrepare, atque idcirco certam, & quasi propriam singulis animantibus cupiditatem (ut inquit Heraclitus) voluptatemque competere. Delectat enim quemque, quod naturæ suæ sit aptū, trahitque sua quemque voluptas. Atque hæc sunt, quas naturales appellat, contra naturam verò eas esse vult, à quibus vniuersum penè hominum genus abhorret, easque in tria diuidit genera. Alias enim flagitiosa quadā corruptaq; natura, alias consuetudine pessima, nonnullas morbis, aduersisq; casibus euenire, peruersitate verò naturæ contigisse scribit Aristoteles, ut mulier quædam prægnantiū viscera rescindere, puerosque vorare ardentissime niteretur: vel quod de efferatis quibusdam Gentibus circa Pontū ferunt. Alios enim crudis, alios humanis carnibus delectari, nonnullos tradere natos inuicē, ut in conuiujs comedantur. Trogloditas verò, serpentinis carnibus vesci. Diuturna quoque consuetudine plerisque contingit, ut pilorum euulsione, aut vnguuium esu delectentur. Sæpe etiā, aut animi, aut corporis morbis id euenit, ut ille, qui matrē immolauit, comeditque, & qui patris, ac filiz carnibus, ut vesceretur vtrumque decoxit, quique conserui iecur ardentem concupuit, eoque interfectio summa cū voluptate vorauit. Nos quoque vidimus certo corporis morbo affectos, alios quidē lapillos, alios gypsum, nonnullos terram, quosdam carbones, alios calcem, ut prægnantibus sæpe accidit, dentibus auidissimè terre. Tria hæc contra naturam genera voluptatum, non humani, sed ferini immanisq; esse putat ingenij, vnde eiusmodi voluptates, in eo, qui de moribus inscribitur septimus, immanes appellat. Ex his, quæ hactenus numerauimus, tria esse videntur apud Aristotelem genera voluptatum, prima quidem in contemplatione, altera verò in consultatione, atque actione versatur, & utraq; sane in mente, sed diuerso quodam (ut diximus) modo consistunt, tertia deinde in sensibus posuimus, eaque in duas

distribuimus species, naturalem scilicet, & contra naturam, naturalium vero alteram communem, alteram propriam nuncupamus, immanium præterea vnam corrupta, flagitiosaque natura, alteram vitiosa consuetudine, tertiam morbis contingere, primam igitur, quæ ex contemplatione nascitur voluptatem, quod Deo simillima sit, quodque non, ut homines, sed ut Diij sumus, nobis contingat, diuinam vocitat, eam vero, quæ actiue mentis est propria, honestam ane, non tamen diuinam nominat, est enim honestas non ipsa quidem diuinitas, sed perfectum quoddam diuinitatis simulachrum, atque imago, vnde secunda mens, atque voluptas à prima degenerat, quod primæ diuinitas, alteri vero diuinitatis simulachrum tribuatur. Quæ autem corpus deliniunt voluptates, nec diuinitatis amplius, nihilque magis honestatis participes essequeunt, quippe cum honestas solius mentis decor, pulchritudo, atque ornatus existat, atque is ornatus partiumque omnium conuenientia in mentis habitu honestas, in affectibus moderatio, in actionibus modestia, in operibus ordo, in corpore forma à plerisque Platonice appellatur, habet tamen & ipsæ, quæ sensus mouent voluptates exiguam quandam honestatis imaginem. Quæ enim ex iis mentis rationis que legibus obsequuntur, ob eamque causam moderatæ fiunt, ob hanc ipsam moderationem honesti, atque decori naturam imitari videntur, cumque honesti appellatione haud omnino dignæ sint, boni vocabulo ab Aristotelicis appellatur, quæ effrenatiores, minusque rationis participes sunt, eas nec diuinas, nec honestas, nec denique bonas, sed vituperatione potius dignas, ac malas esse censet, cumque non adeo modum excefferint, ut ab hominum moribus ingenioque abhorreere penitus videantur, vitiosas quidem, humanas tamen voluptates nominat, easque in duas distribuit partes, alias enim appetitionem duntaxat corrumpere, ut qui his afficitur, appetat profecto præter rationem, & agat, neque id tamen consulo efficiat, nec agendum extra perturbationem constitutus existimet, sed quodam deinde ardore libidinis excrecente contra id, quod recta aut mens elegerat, inclinetur, atque trahatur, eiusmodi verò incontinentis animi voluptates esse putat, alias vero non modo appetitionem, verum etiam mentis iudicium deprauare, ut & contra quam deceat concupiscat, & id ipsum agendum bonumque mens iudicet, consuloque eligat

pro viribus voluptati corporis indulgere, easque, quæ sic mentem occæcant intemperantis hominis voluptates esse probat. Omnes tamen, quas hæcenus in sensibus posuimus humanæ videntur. At vero cum ab hominum consuetudine ingenioque alienæ voluptates homini cuiquam, vel pessimè nato, atque educato, vel morbis extra seposito dominantur, quoniam bestiarum potius, quam humani ingenij propriæ sint, seruales, atque immanes appellat. Sed hæc omnes, quas sensus nobis porrigunt voluptates, in quinque veluti gradus, pro numero quoque sensuum ab Aristotelicis digeruntur, atque eas eundem, quem & ipsi sensus ordinem tenere censent, ut videndi voluptas, illa, quam aures præstant, purior, ac dignior sit, alique similiter aliis eodem ordine puritate dignitateque præstent.

*Voluptates auditus, atque visus, excellentiores sunt cæteris sensuum voluptatibus. Item de omnibus sensibus, & instrumentis eorum.*

#### C A P V T IX.

**E**st autem ratio quædam optima à rætonicorum principibus adinuenta, qua oculorum, atque aurium voluptates, cæteris, quas corpus offert, omnibus præferunt, soni quippe, & hæc quæ oculis cernuntur figuræ, optima quadam atque apertissima partium coniunctione conficiuntur. Id autem absque proportionem fieri nequit, nec absque ordine est vlla proportio. Ordo autem maximè rationis est proprius, quo fit ut in plerisque sonis, figurisque, quibus ille compositionis ordo insit, vestigium quoddam rationis inesse videatur, quæ quidem rationis imago in cantuum, vocumque numeris, harmonia, in partium verò membrorumque conuenientia, pulchritudo à Platonice nuncupatur, quo efficitur, ut hæc non modo auribus, atque oculis blandiantur, sed mentem quoque, rationemque his ipsis, quæ in se continent rationis vestigiis moueant, cumque maximam cum mente naturæ cognitionem habeant, occupant eam penitus, rapiuntque, ac ineffabili quadam complent animum voluptate, atque iis duabus imaginibus voluptatibusque duæ quoque furoris diuini species, ut in libello de diuino furore latius disputauimus, oriuntur. At vero odores, sapor, calidum, ac frigus, cæteraque eiusmodi, quæ ad olfactum, gustum, tactumque pertinent, nec harmoniâ, nec proportionem, neque ordinem, multoque minus similitudinem aliquam rationis habere, aut præ se ferre videntur. Itaque sensuum duntaxat corporisque naturam permulcent, mentem vero haud

uiliomodo, aut vix congruunt. Proptereaque, quæ ex his proficiuntur voluptates, necrationis, nec dignitatis quicquam possident, nec aliquod menti ( vt ita dixerim ) pabulum afferunt. Accedit ad ea de quibus paulo ante Peripaterici disputabant, quod sentiendi vis, quo crassior est, eo pluribus animantibus competit. Vnde non omnibus viuendi, aut audiendi potestas à natura tributa est. Pluribus, odorandi, gustandi forte omnibus: tangendi denique quod omnibus animalibus insit, nemo vtiq̃ue dubitaret. Eodem quoque modo horum sese voluptates habebunt, vt aliæ quidem aliis communiores, viliorefque iudicentur: verum ex omnibus eas, quæ in gustu, tactuque positæ sunt, communissimas, atque vilissimas esse constat, quapropter eas Aristoteles ferinas, seruiles, absurdas esse dicit. Plato incontinentissimas atque furiosissimas. Hippocrates autem ( vt superius diximus ) ex illis alteram comitali morbo similem iudicauit. Nec vero illud parum valet, quod omnes penè, qui circa mores Philosophentur, eos, qui in his duabus voluptatibus modum excefferint, incontinentes, aut intemperantes dici volunt. At circa reliquas voluptates, quod magis admodum liberales sint, neque incontinentiam neque intemperantiam posuerunt. Hactenus tria, quibus voluptas tribuitur, mentem videlicet contemplatiuam, atque actiuam, sensusque retulimus. At vero post sentiendi vires, affectiones ipsæ, membraque corporis, quæ sensibus subiacent disponuntur, quæ cum nec delectationem, nec molestiam per seipsa percipiant: ipsis tamen motibus concitationibusque corporeis, quibus aut iucunditas, aut dolor infertur sensibus, subiiciuntur. Vnde fit, vt ipsa quoque membra voluptatis intimæ vestigia quædam tenere videantur. Atque hanc ipsam viscerum, partiumque corporis agitationem, quæ intra gaudendum dolendumque fit, plerique Philosophorum veterum voluptatem, ac dolorem appellauerunt. Alij vero ipsam naturæ manifestam sensibus refectionem, voluptatem eius autem, quod naturæ proprium est, resolutionem, imminutionemque dolorem esse censuerunt. Cæterum præter has intimas motiones externi quidam genus, qui occultarum affectionum signa præbeant, subsequuntur, nec defuerunt, qui ea ipsa signa voluptatis, dolorisque nomine nuncuparent. Sed huius opusculi breuitas exigere videtur, vt Aristotelicæ disputationi finem impona-

mus, idque iam fiet, si hoc prius admonuerimus, vt quoties in hac ipsa disputatione voluptas à nobis in mente posita est, intelligatur in ea mentis parte, quæ appetit, & vult quippiam poni, mentis enim pars vna cogitat, consideratque, altera meminit, tertia vult, & si aliter diuidi queat, hæc tamen ad præsens sufficient. Nec est aliud quicquam mentis voluptas, nisi illa ipsa perfecta, grataque assensio, qua voluntas in eo, quo mens considerat, vt pote familiari, ac sibi proprio penitus conquiescit.

*Opiniones Stoicorum, aliorumque, de voluptate, omnibusque affectibus.*

## C A P V T X.

**H**Æc igitur ad Aristotelis sententiam satis esse debent. Ad Stoicos deueniamus, Stoici igitur quorum princeps Zeno extitit, gaudium non secus, ac Plato definiunt, voluptatis verò, ac lætitiæ nomen confundunt inuicem sæpius, atque idem vtroque nomine disputando designant. Cum enim ita mouemur, vt in bono simus aliquo, dupliciter id contingere putant. Nam cum ratione mouetur animus, placidè, atque constanter id gaudiū dici volunt, cum verò effuse inaniterque exultat, lætitiā gestientem voluptatemque nuncupant, quam ita definiunt irrationalem animi elationem existimantis magno quodam bono se frui: quanquam Cicero secundo de Finibus, iis nominibus ita nos Latinè vti vult, vt gaudium, lætitiæque solain mente consistant, voluptas verò cum sensibus præcipuè tribuatur, ad mentem quoque transferri possit. Esse lætitiā mentis elationem existimantis se magno bono frui, gaudium vero rationalem mentis elationem, voluptatem esse illam, quæ sensibus percipitur, suauitatem eamque ad mentem quoque transferri posse, atque eam semper in mente esse vituperandam. Hæc ille cum de Philosophia disputat, cumque harum rerum differentiam exprimit. Reliquis verò in locis voluptatis nomen, & pro gaudio, & pro lætitiā sæpius ponit. Aristoteles autem à Cicerone, ac Stoicis plurimum dissentire videtur, cum nec gaudium neque voluptatem aliquam lætitiā dici velit. Nam cum in eo, qui de moribus secundus inscribitur, affectus dinumeraret, lætitiā interposuit. Adiecit deinde eos esse affectus, quos voluptas, aut molestia sequitur, quo fit, vt voluptas apud Aristotelem affectus esse non possit, alioquin falsum esse,

quod paulo ante dixerat necesse est. Nam cum voluptas seipsam sequi nequeat, qui eam affectum vocauerit, is voluptatem omnes affectus sequi, quod posuerat Aristoteles, negare videbitur. Præterea, cum in eodem secundo affectus animi motus appellauerit, in decimo verò voluminis eiusdem voluptatem nullo pacto morum vocandam esse demonstret, quis non intelligat Aristotelem eam esse affectum penitus negauisse? Cum ergo voluptas huius sententia, neque motus, neque affectus sit, lætitiā verò affectum esse voluerit, necessaria ratione concluditur, voluptatem atque lætitiā inter se admodum discrepare. Nec verò lætitiā apud Peripateticos talis est, ut animo dum bono præsentitur, absit, esse namque illam animi motum, nemo inter Peripateticos dubitat. Etenim affectus, cum appetitus passiones quædam ab iis definiuntur, passio verò eorundem opinione fluxus, motusque existat, motiones erunt. Itaque & lætitiā affectus existens, necessariò motus esse videbitur. Animus autem id iam quod cupierat consecutus, non amplius mouetur quidem, sed cessat concitatio omnis appetendi, atque in eo, quod adeptus est bono suauissime requiescit, quocirca ab appetitu dum fruitor affectus, omnes qui circa id ipsum, quod adeptus est, versantur, amouere oportet. Ergo & ab illo cum bono aliquo fruitor, lætitiā amouebimus.

Quid sit ergo lætitiā, quærat forte quispian, si nec voluptas, nec gaudium est, nec in appetitu dum fruitor præsentis bono consistit, & si id non satis ab Aristotelicis explicatum fuerit, in hunc tamen modum arbitror me haud quaquam absurde Aristotelem interpretaturum. Cum nobis quippiam, quod bonum appareat, obiectum est, id primum iudicat animus capiendum, tūm appetitus ad id ipsum, quod iudicatum fuerit inclinatur, quam cupiditatem, seu libidinem dicimus. Deinde inquirat animus ipse secum, possit ne facile quod cupiat adipisci, quam curam, sollicitudinemque vocamus, quod si minus consequi se posse comperiat, tūm hæc ipsa opinio diffidentia dicitur, quam sequitur desperatio, id est, cum non amplius expectat se eo, quod cupiat, facile fruitorum. Oritur hinc tristitia, id est, desperantis, diffidentisque animi depressio, atque obiectio, quanquam hæc in vultu non minus quam in animo ab iis, quibus latine loquendi cura est, ponitur. Sin autem crediderit quis se id, quod cupit, facile consecuturum, hæc ipsa fides confidentia nun-

cupatur. Spes deinde confidentiam sequitur, id est, futuri boni firma, ac facilis expectatio. Nascitur hinc lætitiā, erectioque dam atque elatio animi sperantis se absque ulla dubitatione, quod petierit, possesurum. Etenim certa confidentia, spesque firmissima, & ipsius, quod speramus vehemens consideratio id ipsum, quod petimus ita animo repræsentant, ut non multum absit, quin id omnino præsens esse videatur. Quo efficitur, ut quiddam voluptati simillimum, ex hac ipsa spe, & cogitatione nascatur, eamque lætitiā Aristotelem vocauisse arbitror imaginem quandam futuræ voluptatis, ac speciem, quam Lucretius Epicureus guttam Veneris appellauit, quod sit exigua quædam, ac leuis amata rei perceptio, voluptas verò perfecta absolutaque rei desiderata (ut Platonice loquar) fruitio. Quapropter, & idem ipse Lucretius in quarto de natura rerum libro cum de hac prima gutta Veneris loqueretur, ait:

*Namque voluptatem præsegit muta Cupido,  
Hinc Venus est nobis, hinc autem est nomen amoris*

*Hinc illa te primum Veneris dulcedinis in cor  
Stillauit gutta, & successit feruida cura.*

Id est, cum ipsa Cupido, quam amorem Venereum nominamus, muta, id est, adhuc latens, atque intimo motu, secum ipsa (ut ita dicam) considerans ob ipsam spem, ac confidentiam præsentit, ac velut prægustat futuram voluptatem, in ea statim prima illa gutta Veneris oritur, quæ lætitiā nominamus. Sit igitur apud Peripateticos lætitiā suavis quædam futuræ voluptatis ex ipsa spe nata præsentio, & qualis est in appetitu voluptas, dum fruitor, talis in eodem quoque dum sperat, lætitiā. Atque hæc est de huiusmodi nominibus, lætitiā, gaudio, voluptate inter Platonem, Aristotelem, Zenonem, & Marcum Tullium controuersia.

Sed vtantur suis, ut placet, nominibus, nos ad Stoicos redeamus. Est autem perturbatio (ut Stoicis placet) auersa à recta ratione contra naturam animi commotio, eamque ab opinione nasci putant. Nam simul ut obiecta cuiuspiam species est, id aut malum pestiferumque, aut bonum animus opinatur. Ex hac autem opinione quatuor animi perturbationes proficiuntur. Nam quæ nobis obiciuntur, seu mala illa quidem, seu bona sint, aut futura, aut præsentia esse videntur. Quod si mala quædam futura animus cogitauerit, ab his statim declinare conatur. Quæ declinatio si cum ratione fiat, cautio appellatur, eaque

nec perturbatio est, nec à sapientis animo aliena. Quæ autem sine ratione, & cum examinatione humili atque fracta, nominatur metus. Est autem metus à ratione auersa declinatio, siue futuri mali sollicita expectatio. Cum verò iam illud, quod malum videtur, impendit, præsentiaque animum afficit, ea perturbatio, quam siue ægritudinem, seu dolorem nominant, oritur, ægritudo verò est animi aduersante ratione contractio, præsentis autem mali sapientis affectio nulla est. At cum species cuiuspiam, quod futurum bonum appareat, offertur ad id adipiscendum, impellit ( vt Stoicè loquar ) ipsa opinio. Id cum constanter, prudenterque fit, eiusmodi appetitionem appellamus voluntatem, eam illi putant in solo esse sapiente, nec vlllo modo perturbationem dici debere, quam sic definiunt, voluntas est, quæ quid cum ratione desiderat, quæ verò ratione aduersa incitata est, vehementius ea libido est, vel cupiditas effræ nata, quæ in omnibus stultis inuenitur. At cum ita mouemur, vt bono fruamur aliquo, duobus id modis contingit, nam aut grauiter aut tranquille mouetur animus, idque gaudium vocitant. Cum autem leuiter effuseque gestit, tùm illud lætitiæ gestientem, voluptatemque nominant, quam cum definierint irrationalem, & gestientem animi elationem existimantis se magno bono frui, cum illis peritateticis, quorum opinionem superius, cum de Aristotele loqueremur, secundo loco retulimus consenserunt, vtrique enim in hoc congruunt, vt voluptas sit ipsa animi elatio existimantis se maximum quiddam bonum consecutum. Diuidunt autem Stoici voluptatem in partes plures, nam quinque in sensibus, quatuor in mente, dum sensibus assentitur esse censuerunt, quæ sensus mouent nec distincta nomina, neque propria apud Stoicos habent præter eam, quæ auditu percipitur, hanc siquidem delectationem illi vocant, atque ita definiunt. Delectatio est voluptas suauitate auditus animum deliniens, reliquæ verò, cæteris sensibus blandiuntur, verum præter eas, quibus corpus afficitur, quatuor adinuentæ sunt, quæ in mente quoque, postquam ab appetitione deprauata est, comperiuntur. Hæ verò sunt oblectatio, effusio, iactatio, maliuolentia. Est autem oblectatio animi inclinatio ad voluptatem emolliens. Neque hanc quicquam aliud esse arbitror, nisi ipsam mentis molliem, atque assensionem, qua illi, quam sensus porrigunt suauitati libentissime iungitur, consentit, paret, atque obse-

quitur, effusionem verò definiunt virtutis animi remissionem, ac dissolutionem. Nec enim solum mens ipsa mollietate quadam, vt sensuum voluptatibus pareat, inclinatur, & trahitur, quod per oblectationem fieri diximus, verum etiam quod maius est, omnis mentis nostræ vis, omnisque intentio præsentis boni dulcedine deliquescit, ac diffluit, seseque ad id fruendum effert, penitusque diffundit. Hanc igitur Stoici nominant ( vt arbitror ) effusionem. Sequitur deinde iactatio, voluptas gestiens, & se efferens insolentius. Hic quoque mentis est morbus, cum eius quod bonum apparet, possessione exultat, & inaniter gloriatur. Maliuolentia verò est voluptas ex malo alterius sine emolumento suo. Nam cum ob utilitatem propriam alterius malo quis afficitur voluptate, videtur potius beniuentia in se, quam vlla in alios maliuolentia, hoc perpeti. Quapropter merito particula, in, definiendo illa adiuncta est sine emolumento suo.

*Cyrenaici de voluptate, quod sit finis.*

## C A P V T X I.

**H**Æc igitur de Stoicorum sententia dicta sufficiant. Cyrenaicos iam philosophos audiamus, qui ab Aristippo Socratis discipulo fluxerunt. Cyrenaici duas posuerunt perturbationes, dolorem, & voluptatem: hanc lenem motum, illam verò motum asperum appellantes: nihil differre à voluptate voluptatem, neque plus altera mulcere alteram, atque hanc quidem omnes animantes adsciscere, illum autem aspernari: voluptatem verò corporis intelligunt, quam & finem esse dicunt, non eam, quæ in statu sit, & in doloris priuatione consistit, & veluti à perturbatione quietem agit, quam suscepit Epicurus, finemque constituit, testimonio putant esse nobis finem haberi voluptatem, quod à pueris hanc nobis natura conciliauerit, etiam absque iudicio rationis, cum animi iudicium, nec consuetudine aliqua deprauatum est, nec opinione informatum, quo fit vt solo naturæ instinctu voluptatem summum bonum existimare videamur. Cumque illa fruimur, nihil aliud præter eam inquirimus, quasi expetendorum omnium, vltimum, extremum, summum, ac finis existat, neque est quicquam, quod æquè ac dolorem naturaliter fugiamus. Itaque voluptatem maximè omnium expetimus: voluptatem præterea bonam esse etiam si à turpissimis rebus proueniat, & si



enim foeda sit, voluptatem tamen per se ipsam esse eligendam, bonumque existimandam porro illa doloris abiectio, quam tuctur Epicurus, eis non videtur voluptas esse, neque priuatio voluptatis dolor, vtraque enim esse in metu constituta, neque tamen corporis solum esse voluptates, verum animi etiam, quæ scilicet ex præteritarum rerum recordatione, vel spe futurorum bonorum, vel disciplinarum studiis percipiuntur. Longe tamen esse præstantiores corporis, quam animi voluptates. Deterioresque corporis dolores, quam animi, virtutes verò & omnino quicquid aliud præter voluptatem sit eius gratia bonum, & expetendum esse. Et quæcunque mala videntur, doloris causa mala, fugiendaque videri. Solam profectò voluptatem propter se bonam, atque expetendam: dolorem verò propter se malum, ac reiiciendum: voluptatem quoque & dolorem ex assensione, & compassione animi ad corpus contingere. Corpus namque variis diuersisque motibus agitari, his verò si lenes, blandique sint, assentiri animum atque id esse voluptatem. Sin autem asperiori quadam corpus passione pulsetur, contrahi animum, & compati, atque dolere. Quamobrem in hac doloris voluptatisque definitione, cum plerisque Platoniorum, Peripateticorumque consentiunt. Dissentiunt tamen cæteris nonnullis in rebus, vt ex iis, quæ retulimus esse potest perspicuum, & eo insuper, quod nec suauicquidquam, nam nec insuauicopinabantur, cæterum cuius vis rei, vel nouitate, vel varietate, vel satietate lætari alios, alios angere.

*Opinio Eudoxi, quod voluptas sit summum bonum.*

## CAPVT XII.

**E**Adem fermè est Eudoxi Architzæ auditoris sententia, ijs enim quas ponam rationibus voluptatem summum bonum probat. quod expetendum est inquit id bonum videtur. Quod vero magis expetitur melius. Quod denique maximè id maximum, ac summum esse bonum, nemo vtiq; dubitaret. Voluptatem vero præ cæteris expeti, è duobus patere arbitratur. Nam nihil est ex omnibus, quod vehementius, ardentiusque quam voluptatem viuientia concupiscant. Nec bonum est aliquod præter eam, quod ab omnibus expetatur. Voluptatem quippe non solum homines, verum cætera quoque animalia

omnia, infâtes præterea statim, ut nati sūt. Iuuenes deinde, ac senes affectant. Nihil autem è cæteris bonis, quod ab iis omnibus appetatur reperiri potest. Item quod est secundum naturam maximè, summum id esse bonum nemo vel indoctus negaret, voluptatem verò potissimum naturæ congruere, ex his patebit, quod hac gignantur animantes, ipsique adeò generationi necessaria sit, vt plerique veterum Philosophorum plantas quoque inuicem vtriusque sexus commissione coire, ac per voluptatem gignere, surculosque emittere disputauerint, quodque eam viuientia vix in lucem edita cuestigio concupiscant, ante quam aut aliud quicquam appetant, aut consilio aliquod id, quod quærunt, eligere valeant, voluptatis præterea illecebris ab ipso nutricis lacte, per omnem vitam nutrimur, educamur, atque augemur, huius delitiis erudimur, huius in gremio vitam agimus, hæc cunctis sensibus innata est, ac velut esca omnia vitæ necessaria perficiuntur officia, neque enim, aut quæ pestifera sunt expellimus, aut quæ vtilia sine voluptate consequimur, quapropter maximè naturæ congruere, ac generi nostro familiarissima (vt Aristoteles inquit) esse videtur. Præterea bonum, quo latius est, eo diuinius est existimandum, cumque voluptas omnibus animantibus competat, cunctisque bonis immista sit, quis eam dubitet latissimè patere, & vbique diffundi, nec vlla sane virtus est, quæ cæteris omnibus virtutibus insit, aut cunctis animalibus natura conueniat, voluptas autem omnibus virtutibus immista est, nec vlla omnino virtutum absque voluptate inueniri potest. Ipsa vero voluptas absque virtute in pluribus reperitur, nec esse potest vlla boni sine voluptate possessio, ex quibus concluditur eam cunctis bonis infusam, proptereaque amplissimam, optimamque existere. Insuper nihil præter voluptatem, quod non ob aliud quiddam expectamus. Imo quod maius videtur ob eam ipsam reliqua omnia concupiscimus, nec enim aliam ob causam vllam, quod bonum est affectamus, nisi vt eo tandem. si fieri vllò modo potest, acquisito fruamur; fruitionis ergo (vt ita loquar) gratia bona omnia perquiruntur, voluptas autem, cum nihil aliud sit, nisi suauissima quædam acquisiti iam boni fruitio, quis neget, eius gratia bona reliqua desiderari. nec vllus est, qui boni quippiam appetat, nisi, vt id ipsum pro viribus consequatur, nec consequi vult, nisi vt possideat, atque in eo suauissimè requiescat, suauis autem

illa quies, siue quietis illa suauitas, qua bonum iam nacti perfruihur, voluptas ab omnibus penè Philosophantibus nominata est, eiusque gratia vt probauimus, & bona omnia desiderantur, nec vlli voluptas vniquam potest contingere, nisi prius, quod cupierit, bonum consecutus sit, quo sit, vt voluptas bonorum adeptionem sequatur: cumque id, quod aliud necessario sequitur, eius quoque finis existat, necesse est voluptatem cum profecto finem, cuius gratia bona omnia petamus, existere. Duo sunt igitur in Aristippi, Eudoxique disputatione præcipua, quod videlicet voluptas corporis potior sit, quam animi, quodque in ipsa corporis suauis commotione omnis beatitudo consistat.

*Rationes Aristotelis contra Aristippum, & Eudoxum de voluptate probant voluptatem mentis potius esse corporis voluptate.*

### C A P V T XIII.

**A**T Aristoteles aduersus vtramque sententiam rationes verissimas probatissimasque contexuit. In primisque pluribus rationibus potius esse animi, quam corporis voluptatem demonstrat. Ex omnibus enim corporis voluptatibus vehementissimæ sunt, quæ tangendo, ac gustando percipiuntur, harum vero ea natura est, vt absque indigentia, aut nullo modo, aut certe vix corpus mouere possint, vnde Socrates cibi cõdimentum famem esse dicebat, portionis, sitim, omnis autem indigentia, cū naturæ inimica sit, dolorem affert. Cumque eiusmodi voluptates sine indigentia fieri nequeant, necesse est doloris semper participes esse, proptereaque nec integras, neque puras haberi, præsertim cum poenitentiam, satietatem, morbosque pariant, animi vero voluptas nullam penitus egestatem mistam habet, ob eamque causam nec doloris est particeps; nec vlla satietate, aut molestia mentem afficit. Quid? quod sensuum delectationes, quo magis, atque aui. dius hauriuntur, eo citius in contrarium recidunt, mentis vero gaudium, quo magis quæritur, eo maius perfectiusque habetur. Præterea voluptatis causæ, ac velut principia duo sunt, ipsa videlicet animæ vis, quæ motum eiusmodi recipit, idque insuper, quod extrinsecus nobis obicitur, illud quidem voluptatis subiectum, hoc obiectum nominant; suauitatis corporis subiectum est sensus, obiectum verò, corporis qualitas, atque natura, quam sensibus haustæ species offerunt, eius autem, quo animus fruatur, gaudij subiectum qui-

dem mens, obiectum, res incorporea, simplex, absoluta, æterna, veritasque existit, quo igitur huius, quam superioris illius voluptatis principia diuiniore sunt, eo hæc est, quam illa, perfectior. Et ( vt disputat Auicenna ) sensus rerum, seu superficies, siue proprietates quasdam extrinsecus attingunt, nec rebus ipsis, sed earum potius imaginibus copulantur, mens autem intimam atque absolutam naturam eius, quod obiectum est, inspicit, atque ita cum eo, quod considerat copulatur, vt vel è duobus vnum ( vt vult Auerrois ) fiat, vel, vt Aurelius Augustinus inquit, indissolubili conuexione cohæreant, qua comprehensione, coniunctioneque maior admodum mentis, quam sensibus, qui id assequi nequeunt, voluptas contingit. His adde, quod mentis natura vna semper, eademque existit, & idcirco idem sibi semper simile, ac proprium est, ex quo sequitur, huic idem semper esse iucundum, eandemque voluptatem adesse. Corporis autem natura, aut nunquam eodem in statu permanet ( vt Eracritus & Plato volunt ) aut breui in multas affectiones transfertur ( vt Aristoteles putat ) aliasque alia eius qualitas est, quapropter neque idem omni tempore corpori congruit, quodque nunc secum natura consentire videtur, statim, aut certe paulo post dissentit, & dissidet, nec illi ob idem semper est voluptarium, quibus profecto intelligitur, mentis voluptatem certam, & stabilem, corporis verò breuem, fluxam, ac fragilem esse. Sensus item præsentium duntaxat suauitate rerum mouentur, nec ex aliis rebus vllis, nisi corporeis, voluptatem suscipiunt, mens autem præteritorum memoria, futurorum verò spe, præsentium contemplatione similiter delectatur, nec solum eorum, quæ carent corpore, verum etiam ipsorum corporum cognitione gaudere potest. Cumque animus, pars hominis omnium præstantissima sit, nemini dubium esse potest, quin id, quod menti consentaneum est, homini cognatius familiusque, quam quod sensibus conuenit, iudicari debeat, quod autem cuique cognatissimum est, idem proculdubio iucundissimum ex quo intelligitur, animi gaudium corporis dulcedine, maius ac præstantius esse. Accedit ad hæc, quod animus indiuiduus est, ac simplex, cognitio quoque veritatis pariter indiuidua, voluptas ergo mentis, cum ex iis duobus velut quibusdam causis profluat, simplex esse videbitur, nec seipsa minor maiorue fieri posse, quippe cum nec eius principia varietatem eiusmodi patiantur, sensus autem pe-

membra disseminati, distributique sunt, proptereaque multiplici varietate concreti, obiecta quoque sensuum nihil aliud esse videntur præter formas quasdam, qualitatesque corporum, quæ ex quædam partium ipsarum conueniëntia proficiuntur, vt figuræ, colores, soni, odores, cæteraque eiusmodi, cumque ea ipsa corporum proportio, qua sensus mouentur, proportioni quoque sensuum consona, ac similis est, asciscunt eam sensus utpote sibi propriam, familiaremque, ac bonam, voluptateque afficiuntur, cum verò eiusmodi corporum harmonia magis minusque ad sensuum harmoniæ similitudinem accedere possit, consequens est, vt sensus eiusdem quoque corporis proportionem maiorem alias, aliasque minorem suscipiat voluptatem. id autem in cantibus, ac sonis intueri licet, eodem namque temporis ( vt ita dixerim ) momento, eadem ipsa, quæ ex eodem quoque cantu percipitur delectatio vocibus, modo suauius, nō odo absurdus editis vehementior, remissiorque efficitur, cum igitur voluptas animi simplex, immutabilisq; permaneat, corporis autem delectatio mixta sit, ac maior, minorque fiat, nemo sana mentis illam hac præstantiorem esse, perfectioremque negabit. Postrema verò ad id ipsum Aristotelis argumentatio sic patet, quæ propter seipsa expetunt inquit iis, quæ alterius gratia, potiora videntur, gaudium verò mentis, propter seipsum amari, ex eo potissime declaratur, quod mens, eiusque motio cæteris omnibus, quæ nobis insunt, dignitate magnopere præstant, vnde sequitur, nihil nobis inesse, ad quod illa, velut ad finem aliquem referamus, eademque ratione, neque eam, quæ illis inhæret, voluptatem propter aliud quippiam appetemus. Voluptatem verò corporis trium præcipuè rerum causa concupiscimus, horum sane vnum est, mens, naturæ indigentia reliquum, postremum dolor intimus, atque perpetuus. Etenim cum deteriora ad illa, quæ potiora sunt, natura retulerit, vt esset inexplicabilis quidam ordo rerum, ac partium inter sese perfecta connexio, necesse est, corporis quoque sensus, eorumque motus ad mentem velut ad dominam, reginamque referri. Deinde ( vt supra etiam diximus ) ob eam causam tam vehementem sensibus natura voluptatem ingenuit, vt huius illecebris ad ea, quæ vitæ necessaria sunt comparanda propensiores efficeremur, id autem ex eo maximè patet, quod quâdiu id, quo natura indiget, in corpus admittimus, huiusmodi suauitate mouemur: postquâ verò

omnis naturæ egestas expleta est, non modo nullam amplius voluptatem gustamus, sed quæ maius est, aut poenitentia, aut satietate afficimur. Id verò ea de causa natura institutum arbitror, vt quemadmodum voluptate allicimur ad indigentiam, sic poenitentia ac satietate absterreamur, nec ultra quam opus sit, admittentes naturam lædamus. Doloris quoque occulti leniendi causa ( vt septimo de moribus disputat Aristoteles ) iucundum corporis motum, veluti Medicinam quandam appetimus. Neque enim manifesti modo, verum etiâ occulti quidam, mediique dolores contingunt, violenti quippe motus, qui extrinsecus inferuntur, manifestum dolorem efficiunt. Naturales autem, quæ intus sunt agitationes, tacitum, atque medium. Inesse quidem nobis perpetuos arbitratur naturæ spiritus, sensuum mentisque motus. Nam & continet anima corpus, alique, & gignit à membris præterea corporis ipsius ad membra humorem spiritumque alterno, ac perpetuo motu transfundit, vritur deinde ad sentiendum corporis instrumentis, sensibus quoque ad contemplandum. Rationabile vero esse videtur, hos tantos, tam varios, tamque perpetuos motus naturam defatigare, atque occulto quodam ( vt ita dixerim ) dolore afficere, quem idcirco minus aduertimus, quod hunc à primo ortu dolorem ad extremum vsque diem perpetimur. Igitur diuturna consuetudo sensibus eum quodammodo familiarem efficit, ac mentis intentionem dissoluit. Cæterum ab ipsa rerum artifice, ac magistra natura institutum est, vt quod diuturna illa consuetudo deleuit, ne ob eam negligentiam animal deperiret, necessario quodam, cæcoque instinctu excitetur, quo quasi coguntur omnia, vt voluptatem corporis intimo huic dolori oppositam veluti Medicinam concupiant. Quapropter, & illi quoque, quibus nulla penitus manifesta egestas accidit, ob hanc tamen insitam cæcamque indigentiam voluptatem affectant, quo fit vt verissimum sit illud Platonis, de quo superius disputauimus. omnem scilicet voluptatem ab egestatis expletionem proficisci. Nam quibus nulla aperta egestas apparet, his intima, & occulta, quamdiu viuunt deesse nunquam potest. Ea que ipsa de qua differimus insita indigentia iuuenibus potissimum Melancholicisque contingit, illis profecto quoniam ob augendi, perficiendique corporis necessitatem plurimis vehementibusque motibus concitantur, quibus accidit, vt maiori egeant Medicina, maximeque om-

nium hac de causa voluptates sequantur. Quibus verò atra bilis, quam Græci, *μελαγχολία* dicunt dominatur, corpus (ut inquit ille) iugiter consumitur, atque ob eius humoris vehementem siccitatem arroditur. Proptereaque, & ij magnopere voluptatibus obsequuntur, quapropter iuvenes, ac melancholici maximè omnium incontinentes, atque intemperantes esse solent. Medius verò dolor fames, atque fitis, & quæuis alia corporis concupiscentia dici potest, neque enim latens hic penitus dolor est, neque aperto, aut vehementi ori motu corpus excruciat, unde medius non immerito nominatur, cuius quoque pellendi gratia, ut nemo non videt, voluptates expetimus.

*Rationes Aristotelicæ contra eosdem, quod voluptas corporis non sit summum bonum.*

C A P V T XIV.

**L**ongo iam ordine declarauimus Aristotelis sententiam iudicantis voluptatem animi, corporis suauitate præstare. Restat nunc alia aduersus Eudoxum, Cirenaicosque Aristotelis disputatio, qua corporis voluptatem summum nullo pacto esse bonum demonstrat. Summum profecto bonum Philosophorum omnium autoritate eiusmodi esse debet, ut nec præter ipsum melius quippiam sit, nec ipsum villo modo ad aliud referatur, voluptas autem corporis, mentis gaudio (ut paulo ante monstrauius) admodum deterius est, eiusque gratia, cæterorumque (de quibus diximus) desideratur. Insuper quod per se summum bonum est, semper atque omnibus bonum expetendumque videri debet, omnibusque eius ex partibus approbandum, neque tamèn omnis corporis delectatio, neque semper, neque à cunctis expetitur. Nam quod vni voluptatem, molestiam alteri sæpe numero præstare solet, quæque pueris grata, viris molesta videntur, quodque sobrij dum sumus concupimus, postmodum saturi effecti eius etiam aspectu nauseamus. Ad id quoque facit, quod ea summi boni natura est, ut quicquid agimus, id eius gratia, quasi necessitate compulsi penitus eligamus. Hinc autem plurima laboriosissima negotia sunt, periculorumque officia quædam plenissima, quæ etsi certo sciamus nullam nobis voluptatem corporis allatura, honoris tamen, aut honestatis, aut mentis gaudii gratia, suscipere non dubitamus, quin & ad mortem fortissimi, ac sapientissimi plurimi viri certam sese pro honesto, pro patria, pro parentibus contule-

runt, quos si quis dixerit ea suauitate corporis irretitos, aut libidine inflammatos effecisse, aut horum iudicio vulgi, ac bestiarum opinionem, impetumque prætulerit, is profecto stultissimus est omnium iudicandus. Potest præterea quicuis frui corporis voluptatibus vel abiectus quisque non minus quam optimus. At felicitatem nemo diceret abiecto competere. Nec rationabile est vilissimos, ac semiuuios homunculos æquè, ac magnos sapientesque viros beatos asserere. Item cuiusque naturæ summum illi proprium esse debet, voluptas vero corporis, cum vix quoque uiuentibus bestiolis communis sit, nullum pacto summum hominis bonum iudicari debet. An verò summum bonum tu dixeris id, quod ne bonum quidem esse videatur, quam verò turpis, quam pessima, quam pestifera sit inanis hæc sensuum elatio à Platone nostro superius satis arbitror persuasum. Quo autem Eudoxus, atque Aristippus potissimum nitebantur, quod videlicet voluptas corporis ab omnibus expetatur, id Aristotelicis parum ad id, quod probare contendunt, valere videtur esse, namque putat varias diuersorum corporum affectiones, propterea quæ his natura cognata sint, atque ob eam ipsam cognitionem, voluptatem pariant, inter se plurimum discrepare ex quo intelligitur varias admodum differentesque diuersis animantibus voluptates contingere, quod si omnes corporis voluptates percurreris, nullam tandem, quæ ab omnibus summo-pere cupiatur inuenies, mentem verò, aut in omnibus vnâ, aut prorsus simillimam esse constat. Ideoque quod mentis proprium est, id omnium mente vrentium proprium cognatumque videtur. Mentis autem proprium est veritatis indagatio, atque cognitio. Id igitur cunctis hominibus consentaneum, ob idque desiderandum esse parer. Quapropter omnes ut Aristoteles inquit, homines scientiam naturæ desiderant, quod autem appetitur, si absit, molestiam, si verò præsens fuerit, voluptatem gignere solet, cunctis ergo hominibus vnum natura cognatum, vnum omnibus expetendum, vnum denique iucundissimum, atqui id totum in veri contemplatione consistit, quod mentis (ut Plato inquit) est pabulum, atque ineffabili quadam complet animum voluptate voluptates igitur corporis, aliæ quidem ab aliis appetuntur, mentis vero gaudium, vnum, atque idem à cunctis amatur.

*Cur homines ad voluptatem corporis  
sint proclives.*

## CAPUT XV.

**A**T quærat forte quispiam, cur homines propemodum innumeri sint ad voluptates corporis proniores, huius profectò causam Aristoteles arbitratur, quod sensum illa suauitas eius, quo mens alitur gaudij umbra quædam, atque imago sit. Igitur à primis annis cum sensibus duntaxat utimur, qui nec veritatis naturam, nec eius gaudium assequi possunt, eius voluptatis, ad quam naturæ prima intentio fertur, loco illam, quæ sensibus blanditur, hac decepti similitudine sequimur, auideque complectimur. Cum verò ætatem adoleuerit, ac velut expergefatis animi oculis, veritatem suspicari, eiusque gaudium de gustare cæperimus, tùm quoque plurimi ante actæ vitæ cursum ad senectutem vsque prosequuntur, diu namque sensibus credere, eorumque motibus obsequi consuevere, eaque ipsa consuetudo radices altius iam, profundiusque egit, ut impossibile, aut certe difficillimum sit, eas iam solidas, atque altissimas extirpare, quibus perspicuum est, duo esse præcipua, ignorantiam videlicet, ac flagitiosam consuetudinem, quæ nos extra beatitudinis callem in miseræ filuis versari cogant, quod Cicero in tertio Tusculanarum disputationum elegantissime describit his verbis. Natura, inquit, paruulos nobis dedit igniculos, quos celeriter malis moribus, opinionibusque deprauatis sic restringimus, ut nusquam naturæ lumen appareat. Sunt enim ingeniis nostris semina innata virtutum, quæ si adollescere liceret, ipsa nos ad beatam vitam natura perduceret. Nunc autem simul atque in lucem editi, & suscepti sumus, in omni continuo prauitate summaque opinionum peruersitate versamur, ut cum ipsius nutricis lacte errorem suxisse videamur. Cum verò parentibus redditi, id est, magistris traditi sumus, tùm ita variis imbuimur erroribus, ut vanitati, & opinioni confirmatæ natura ipsa cedat, hæc Cicero. Ut autem ad propositum redeamus, voluptas pro hominum diuersitate varia, & incerta est, mentis vero vnicum ab omnibus gaudium natura expetitur. Cumq; duo hæc contemplatio scilicet veritatis, eiusque voluptas in mente consistant, atque ex his summi boni natura constare videatur, virum sit horum ad beatitudinem potius, præstantiusque, Philosophi veteres dubitauerunt. Trimegistus enim, & Theodorus Dionysij dialectici discipulus, Democritus, Piro, Euri-

lochus, Philatimon, Philiasius, Nausiphanes, Theius, Epicurus, Origenes, Avicenna, Algazel in beatitudinis natura gaudium, quod contemplationis comes est, præcipuum iudicare videntur. Thales autem, Bias, Anaxagoras, Socrates, Euclides Megarensis, Aristoteles, Herillus Calcedonius, auerrois contemplationem ipsam præposuere, atque hæc quidem disceptatio, & controuersia vsque in nostram viguit ætatem, & inter Christianos quoque Theologos agitur. Sed de hoc alias. Nunc vero admonuisse sufficiet, quemadmodum Aristoteles in duobus potissimum (ut supra declarauimus) ab Eudoxo & Aristippo dissentiat.

*Quid de voluptate Sceptici senserint, quid Dionysius, quid Theodorus.*

## CAPUT XVI.

**P**iro quoque Eliensis, atq; omnes, qui ab eo fluxerunt philosophi sceptici nominati, hoc vno cum Aristippo Cyrenæcorum principe consenserunt, quod nihil ex omnibus rebus natura iucundum, aut asperum esse queat, voluptatemque ac dolorem, aut ab hominum opinione, aut usu fieri, aut certa nostrorum corporum affectione, nam quod modo iucundum appareat, cras contra molestum futurum, quodque alteri asperum, alteri aliter affecto suauissimum, quod vero eiusmodi varietatem recipit, negat suapte natura quale videatur existere, verum pro diuersitate hominum, quæ sensibus admouentur, varia quoque videri putant. Dionysius autem Heracleotes, non modo id vnum, sed cuncta Cyrenæcorum instituta defendit, finemque bonorum dicit esse voluptatem, cum enim in dolorem oculorum incurrisset, noluit dolorem indifferentem dicere, cum illo fuisset acriter cruciatus, cumque Zenonem Stoicum audiuiisset, post se ad Cyrenæicos cõtulit. Theodorus vero Dionysij dialectici discipulus, & ab hoc, & à Cyrenæicis plurimum discrepat, nam voluptatis, nomine solû utitur ad eã, qua tanguntur sensus suauitatem significandam, nec modo non summum bonum, sed ne bonum quidem eiusmodi voluptatem esse putat, summum quippe bonum mentis gaudium, eiusdemque ægritudinem summum malum, alterum quidem prudentia constare, alterum imprudentia: atqui bona, quibus beatitudinem comparamus, esse prudentiam, ac iustitiam, mala verò contrarios habitus, voluptatem autem, & dolorem, ut Stoici quoque putant, indifferentia.



*Quid Epicurei de rerum primordiis, de Voluptate & affectibus, atque moribus.*

C A P V T XVII.

**A**T verò Epicurei Voluptatis nomen, veluti genus quoddam constituunt, cuius species duæ sunt: alteram porrò Voluptatem in motu, alteram in statu consistere arbitrantur: quæ verò in motu posita est, bifariam diuidunt: vnā quippe in mente esse, in sensibus alteram, illud gaudium vt plurimum nominant, hanc verò lætitiā: gaudium defininnt suauem mentis commotionem, eo quod petierat, perfruentis, lætitiā verò iucundum motum, quo sensus hiant, ac diffiunt. Quemadmodum verò hæc ipsa, quæ ponitur in motu, iucunditas oriatur, sic docent. Rerum, aiunt, quæ sunt omnium primordia corpuscula quædam minima, ac penitus indiuidua, quas ob eam causam, quod insecabiles sint *ἀσπρόνους* nuncupant, easque magnitudine inter se, ac figura differre, vt hæc quidem semina maiora sint, alia minutiora, hæc rotunda, leuiaque, illa curua, & hamata, & aspera, hæc omnia imensum per inane perpenis motibus volitare, contingere sese, ac fortuitis concursibus cohærentia, quæcunque in rerum natura sunt constituere, horum concreatione tria præcipua rerum genera fieri putant. Quædam his atomis, quæ rotundæ, minutæ, leuesque sint, effici, alia maioribus asperioribusque. Nonnulla verò inter hæc duo medium obtinere, nec leuia esse, nec penitus aspera, corpus quoque nostrum, & animam iisdem seminibus concreta esse volunt, hoc interesse tamen, quod corpus amplioribus crassioribusque, hæc autem è minatis, leuibus, rotundisque confietur. Inesse præterea inane cunctis mistum corporibus, atque naturis, quos meatus, porosque nominant, quibus efficitur, vt corpora sese mutuo capere, ac veluti combibere possint. Cum igitur prima illa seminum genera nobis obiecta sunt, quia (vt diximus) minima existunt, sine vlla offensione corpus, atque animam vndique penetrant, quia verò rotunda, & leuia, atque idcirco animæ naturæ cognata, mulcent continuo illam, ac sensibus blandiuntur, cuius generis mitia poma, mellisque, atque lactis liquores, cantus, odoresque suauissimos, cæteraque eiusmodi esse putant, Quapropter ea, quibus anima contexta est semina, cum lenibus hisce blandisque corpusculis attinguntur, assentiuntur illa quidem dulci huic commotioni, seseque in ea, quæ sensibus, ac meatibus hausta sunt

corpuscula, maxima quædam auiditate diffundunt, iucunde adhærent, firmiter copulantur, suauissime complectuntur, eamque ipsam assensionem, effusionem, coniunctionem, complexionemque, voluptatem in motu positam arbitrantur: contra verò accidit, cum tertium illud corporum genus, quod asperis ponderosisque seminibus constructum est, sensibus admouetur, quod enim grandia sunt, quibus constant elementa, difficile corporis atque animæ foraminibus intruduntur, & vi quadam animæ corpuscula pulsan, pertrumpuntque, ac distrahunt, quod verò aspera sunt, & hamata, mordent quodammodo animam acriter, corpusque compungunt, talia quidem esse censent absynthium, fel, colores, sonos, odoresque molestos: cætera denique omnia, quæ asperitate aliqua, & amaritudine sensus contingunt, horum quippe seminibus animæ primordia concita distrahuntur, horrent, diffugiunt, ac sese celeriter contrahunt, eiusmodi dispersionem, contractionemque dolorem secundum motum definiunt. Hæc Lucretius Epicureus nobilis in secundo de rerum natura, his versibus exprimit.

*Vt facile agnoscas de leuibus atque rotundis*

*Esse ea, quæ sensus iucunda tangere possunt.*

*At contra quæ hamata, atque aspera, cumque videntur,*

*Hæc magis hamatis inter se nexa teneri,*

*Propterea que solere vias rescindere nostris*

*Sensibus introituque suo pertrumpere corpus.*

Item eodem in libro hæc.

*Præterea quoniam dolor est ubi materiali*

*Corpora vi quadam per viscera viua, per artus*

*Sollicita suis trepidant in sedibus intus.*

*Inque locum quando remigrant fit blanda voluptas.*

At verò illa, quæ mediis quibusdam elementis coagmentata sunt, in plura genera partiuntur. Nam alia quidem ad lenia blandaque corpora propinquè accedunt, alia ad illa potius, quæ sensibus aspera quædam verò ab vtrisque æqua fermè differentia distant. Prima quidem tacito quodam motu animam ad voluptatem alliciunt, altera ad tristitiā, doloremque sensim, ac latenter incitare videntur. Illa verò, quæ dicuntur indifferentia, motum ambiguum dubiumque efficiunt. Quapropter horum impulsu pigrescit animus, ac torpet, nec ad agendum nisi nouo aliquo accedente motu excitatur. Neque verò silentio præterendum puto, quod inter ea, quæ penitus leuia, rotundaque sunt, & ea insuper, quæ adunca omnino, & aspera, medium quoddam genus corporum interponitur. Idque

his constat atomis, quæ nec rotundæ penitus, nec inflexæ, aduncæque sunt, sed angulis quibusdam exiguis, ac mollibus eminent, cuius generis vina quædam, ac poma, quæ agrestis, & acris, atque (vt aiunt) acuto sapore modice temperata sunt, esse volunt. Hæc autem nec leniunt animum, neque dissipant, nihiloque magis languescere cogunt, verum leuiter, ac modice pungunt, & quasi titillant, voluptatemque efficiunt. Id totum ex his Lucretij versibus intelligitur.

*Sunt etiam quæ iam nec leuia fore putantur  
Esse, neque omnino flexis mucronibus vnca,  
Sed magis angululis paulum prostantibus, &  
qua*

*Titillare magis sensus, quam ladere possint.*

*Fecula iam quo de genere est, vinique sapor.*

Quo fit, vt tres sint earum, quæ motum sequuntur in sensibus species voluptatum, vna quidem affectio quædam ad mollietatem, quam illectionem nuncupant, altera lenis, ac dulcis commotio, postrema verò exigua quædam compunctio, & (vt aiunt) velut pruritus, atque titillatio. Vtitur & alia quadam diuisione voluptatum Epicurus, alias enim naturales, & necessarias dicit, veluti quæ dolorem, ac vehementem naturæ concupiscentiam sedant cibis, atque potionibus, cæterisque omnino, ad quæ vehemens naturæ motus impellit, alias naturales quidem, non tamen necessarias, cuiusmodi sunt, quæ delectationem variant solum, nec dolores tollunt, nec voluptatem exaugent, naturæ siquidem expleta indigentia, eoque, qui hanc sequitur dolore detracto, putat Epicurus summam corporis terminari voluptatem, vt postea variari voluptas, distinguere possit, augeri, amplificare non possit, hoc ergo secundo in genere ex voluptates ab Epicureis positæ sunt, quæ condimentis variis, exquisitisque epularum delitiis percipiuntur. Tertium deinde genus addit voluptatum earum, quæ nec naturales sunt, nec necessariae, veluti quæ ex rerum externarum spectaculis nihil ad victum, aut peritiam pertinentibus, & omnino omnes, quæ ex immenso diuitiarum, atque opum cumulo capiuntur. Harum omnium voluptatum, ea ratio est, vt earum, quæ necessariae sunt libido, nec opera multa, nec impensa expleatur, nec naturalium voluptatum cupiditates multa desiderant, propterea quod ipsa natura diuitias, quibus contenta sit, & parables, & terminatas habet, inanium atque cupiditatum, quæ nec naturales, nec etiam necessariae voluptates affectant, nec modus ullus (vt ille putat) nec finis reperiri potest, vnde

si ad naturam vixeris, inquit Epicurus, nunquam eris pauper, si ad opinionem, nunquam diues, sapientem quippe locupletat ipsa natura, cuius diuitiæ parables sunt. neque verò tenuissimo, & contemptissimo victu minores, quam ex rebus exquisitissimis ad epulandum voluptates percipiuntur. Paucis enim ac minimis natura contenta est. Nec eam solam Epicurus sequitur voluptatem, quæ suauitate aliqua naturam mouet, de qua satis iam diximus, sed maximam illam voluptatem existimat, quæ percipitur omni dolore detracto, quam in statu positam dicit: cumque eam esse voluptatem Cyrenaici negauissent, contra, Epicurus voluptatem hanc dici debere, sic docet, quoniam cum priuamur dolore, ipsa liberatione, & vacuitate omnis molestiæ gaudeamus, omne autem id, quod gaudemus, voluptas est, vt omne, quod offendimur, dolor, doloris omnis priuatione recta nominata est voluptas, vt enim cum cibo & potu famis, sitisque depulsa est, ipsa detractio molestiæ, consecutionem affert voluptatis, sic in omni re, doloris amotio successionem efficit voluptatis. Itaque non placuit Epicuro medium esse quiddam inter dolorem & voluptatem. Illud enim ipsum quod quibusdam medium videtur, cum omni dolore caremus, non modo voluptatem esse, verum etiam summam voluptatem, quisquis enim sentit, quemadmodum sit affectus, cum necesse est, aut in dolore esse, aut in voluptate. Hanc præterea voluptatem in statu positam bifariam diuidunt; alteram quidem in animo ponunt, in corpore alteram, hanc indolentiam, illam verò tranquillitatem vocant. Est autem (vt placet his) in corpore indolentia doloris omnis detractio. Tranquillitas autem placida quædam, & constans animi ab omni perturbatione vacatio, nonnunquam verò vtramque voluptatem vno vocabulo complectuntur, absolutam, atque integram tranquillitatem appellantes, quo fit, vt duplex tranquillitas sit, vna solius animi totius hominis, altera ea, quæ perfecta omnino, atque absoluta.

*Modus in voluptatibus, & quod felicius non sit  
in voluptate concitata, sed in tranquillitate  
apud Epicurum, atque Democritum.*

## C A P V T XVIII.

**O**Mnem insuper voluptatem suapte natura bonam esse, atque experendam, fugiendam tamen interdum alterius gratia, quæ enim ex immoderatis, & turpibus actionibus suscipiuntur, vitare ob eam

causam oportere, quod breuissimæ sint, ac fragiles, secumque ferant poenitentiam, curam, sollicitudinem, atque dolorem. Dolores itidem per se fugiendos omnes esse, alterius tamen gratia, eos suscipiendos, qui cū leues, ac breuissimi sint, maximas quasdam sint nobis voluptates, & commoda præstaturi, & si voluptates omnes bonæ sint, non tamen in omnibus suam esse beatam vitam, neque enim eam, quæ motu fit, ad beatam vitam seipsa contentam esse, nec ad beate viuendum sui gratia penitus necessariam, cæterum absolutam illam tranquillitatem, quæ placidam animi quietem corporisque continet, summum omnino bonum putant. His enim duobus omnem prorsus naturam hominis, corporis videlicet, atque animi pariter esse perfectam, atque hunc esse statum, ad quem omnia referantur negotia, siquidem labores subire omnes, ut in ocio, deinde & quiete esse possint, easque, quas in motione posuimus voluptates sequi, ut dolores pellant, naturæque indigentia satisfaciant, pelleret verò dolorem, & indigentia satisfacere, ut omni dolore, qui ab egestate naturæ fit, soluti ac liberi simus. Atque hæc ea indolentia est, quam in statu intelligi volunt, quamque in felicitate censent partem alteram obtinere, alteram verò partem tranquillitatem animi regere, cuius gratia virtutes omnes quæsitæ sint. Quippe cum nihil aliud virtutes desiderant, nisi ut omni liberet animum perturbatione, id vero est ipsa tranquillitas, quapropter tranquillitatis ipsius gratia virtutes omnes quæsitæ esse volunt, & multo magis reliquas omnes hominum actiones. Præterea cum cætera hominis bona, aut animi dumtaxat propria sint, aut corporis, sola ex omnibus absoluta illa, ac perfecta tranquillitas vniuersam hominis naturam continet. Ideoque bonorum omnium præstantissimum merito iudicari debet. Adhæc quoque non parum id valet, quod omnium Philosophorum autoritate confirmatum est. Id scilicet summum videri cui nihil vterius addi possit. Tu verò quid tranquillitati adicies? an verò id facies nisi quid illi desit? At si quid boni defecerit, necesse est eum, cui desit, illud appetere, qui verò cupit, tranquillus esse nullo modo potest, ubi igitur tranquillitas est, sibi appetitio nulla; ubi verò nihil appetitur, nulla est indigentia, ubi nulla egestas, ibi denique status perfectus, copia rerum expetendarum, bonorumque omnium absoluta complexio, ubi ergo tranquillitas est, ibi bona sunt omnia, ubi omnia sunt, & tranquillitas, quo intelligitur, ei nihil deesse, nihil omnino addi pos-

se, bonorumque in se naturam omnium, rationemque comprehendere. Ideoque perfectum esse bonum, atque extremum, ad quod naturæ omnis appetitio referatur. Cumque bona plurima sint, aut vnum aliquod ex his beatitudo est, aut omnia inuicem congregata, aut quiddam potius, quod ex omnium cæterorum bonorum cumulatione possessione conficitur. Aliquod verò bonorum secretum à cæteris, quoniam plurima sibi alia superaddi queant, summum nullo modo bonum videri potest, nec etiam simul collecta omnia. Beatitudo namque humanæ vitæ finis quidam vltimus, atque extremus existit, vltimus autem finis vnus, atque simplex esse debet, quapropter summum bonum erit, quod ex aliorum omnium acumulatione profectum sit. Id verò præter tranquillitatem esse nihil potest. Est enim bonorum natura duplex, nam & expleant animum, & omni molestia liberant, eiusmodi verò expletio, atque liberatio, proculdubio est ipsa tranquillitas. Quæ quoniam cæterorum bonorum possessionem sequitur, consequens est, ut eorum omnium finis, atque extremum, ob eamque causam summum merito videatur, nec enim quiescit animus vnquam, nisi bona omnia consecutus fuerit, quies autem, & tranquillitas, vnum, atque idem est, bonorum igitur aliorum possessioni succedit, eius itaque gratia bona quæsitæ videntur omnia, quasi hic sit finis vltimus, atque optimus ab omnibus expetendus. Quapropter Epicurus beatam vitam censet in animi tranquillitate consistere, in ea vero tranquillitate, quæ animi simul & corporis indolentiam continet beatissimam. Sed nevidear ea, quæ de Epicuro relata sunt, ex me ipso asseuerare, primum voluptas, quæ motionis comes est, summum bonum non sit, ipse suis verbis testatur in Epistola ad Menecem inquit: Cum itaque dicamus voluptatem finem esse, nec luxuriosorum voluptates, easque, quæ in gustu sunt positæ, ut quidam ignorantes, & à nostra sententia dissentientes arbitrantur, sed non dolore, animoque tranquillum esse, & perturbatione vacare dicimus. Non enim conuiuia, & commensationes, non puerorum, mulierumque congressus, non piscium usus cæterorumque, quæ affert pretiosior mensa, suauem gignit vitam, verum ratio sobria, causasque perscrutans, quæque vel eligenda, vel fugienda sint, opinionisque expellens, per quas animos ut plurimum tumultus occupat. Item in Epistola eadem. Doloris, inquit, perturbationisque vacatio constantes sunt voluptates, gaudium vero, ac lætitia

actio secundum motum dicitur summa vero voluptas est doloris priuatio, & maiores quidem sunt animi, quam corporis voluptates; caro enim præsenti diutaxat suauitate perfunditur, animus præteritarum, præsentium, futurarumque rerum cogitatione congaudet. Item in eadem Epistola, Non potest iucunde viui, nisi prudenter, honestè, ac iustè, viuatur, neque prudenter, honestè, iustè, nisi iucunde. Ex his ostendit Epicurus, nec in voluptatibus secundum motum, neque in his, quæ exturpibus affectionibus capiuntur, summum bonum consistere, verum duo hæc indolentiam scilicet corporis, & animi tranquillitatem vitam efficere beatissimam. Idem quoque testatur Lucretius Epicureus in secundo libro de rerum natura, vbi dum inanes hominum cupiditates, luxuriosasque delitias vituperat, hæc inquit.

*O miseras hominum mentes! o pectora caca!  
Qualibus in tenebris vita, quantisque periculis  
Degitur hoc aui, quodcumque est nonne videtis.  
Nil aliud sibi naturam latrare nisi utque  
Corpore seiunctus dolor absit, mente fruatur  
Iucundo sensu, cura semota, motuque.*

Hic ergo vituperans luxuriam hominum, eos cæcos vocat, & miseros quod omnibus sese molestiis onerent, neque videant, quid natura tanquam supremum finem bonumque desideret. Quid verò id sit ipse explicat dicens, hoc naturam appetere, ut dolor absit à corpore, quod illam, de qua diximus indolentiam significat, quodque cura metusque semota sint, quibus profectò verbis animi tranquillitatem vult intelligi, atque horum duorum numerum beneficio fruatur, ac sensu iucundo, & mente, quasi dicat,

in his summam consistere corporis, atque animi iucunditatem. Quod ergo duobus his, indolentia scilicet, & animi tranquillitate vita consistat beatissima, hæc Epicuri, atque Lucretij testimonia satis esse debent, quod verò & ille, in quo mentis tranquillitas sit, quamuis membra corporis crucientur, beatus existat, testis est Epicurus in Epistola ad Metodorum dicens, eum, qui semel sit sapiens, in contrarium habitum transire non posse, neque perturbationibus cedendo errare, & siue crucietur, siue excarnificetur, sapientem nihilominus felicem fore. In Epistola quoque illa, quam moriens ad Hermacum scribit, hæc inquit, Cum ageremus vitæ beatum, & eundem summum diem, scribebamus hæc, tantum autem morbi aderam vesicæ, & viscerum, ut nihil ad eorum ægritudinem posset accedere, compensabatur tamen cum his omnibus animi lætitia, quam capiebam memoria rationum, inuentorumque nostrorum. In his verbis beatum se diem dicit agere, & tamen maximis doloribus cruciari, atque eadem fuisse dicitur Leucippi, Democriti, ac Theodori sententia, ut in tranquillitate mentis beatitudo sit, quod si huic indolentia corporis adiungatur, in hactum, affectione animi, corporisque absoluta, atque perfecta beatitudo consistat.

Hæc nos ad te à diuersis Philosophis de Voluptate disputata conscripsimus, quam verò ex his sequaris sententiam, volo tibi potius ab illorum, qui hic disputant, auctoritate, rationibusque, quam meo iudicio suaderi. Mihi verò satis fuerit Philosophorum penè omnium opinioniones exercendæ memoriæ gratia retulisse.

F I N I S.

*Marfilij Ficini Florentini de Voluptate Liber absolutus est, Figini 111. Calendas  
Ianuarias, M. cccc. LVII. Anno ætatis sue. xxiiii.*

## SENTENTIÆ

## PVLCHERRIMÆ

CVM MVLTARVM

rerum Definitionibus:

E X

## MARSILII FICINI

FLORENTINI

PHILOSOPHI PLATONICI, MEDICI,

&amp; Theologi clarissimi, Operibus collectæ,

secundum Alphabetum distributæ.

Per ADAMVM HENRICVM PETRI.

OVID. LIB. III. ELEGIAR. DE TRIST.

*Nempe dat & quocunque libet fortuna, rapitque,**Irus & est subito, qui modo Cræsus erat.**Singula quid referam, nil non mortale tenemus,**Pectoris exceptis ingeniique bonis.*

Michael Petreius, Hammell urge isis Lectori, S.

**Q**uisquis ades, doctique vides monumenta laboris,*Et pia, sed prisca temporis, acta legis.**Ingenium Authoris merito digneris honore,**Et doctum grata suscipe mente librum.**Insignis iuuenis, clarus, nullique secundus**Arte tibi tantum prodidit Author opus.**Quod cum virtutis, laudes, alma pietatis**Tum solida flores utilitatis habes.**Quæ fuerant etenim summo querenda labore**Quæ clemens virtus : te liber iste docet.**Quicquid diuinis scriptum fuit vndique libris**Quod sacra iura docent, quod medicina potest:**Quicquid Marsilius scripsit sapientia amator,**Qui Phæbum coluit Pegasidesque Deas.**Cuncta sub hoc libro cœmis nunc ære sonante,**Atque studes, tenera si legis arte, Vale.*





*SENTENTIAE PVLCHERRIMAE,  
ex Marsilij Ficini Florentini Operibus collectae,  
& secundum Alphabetum distributae.*

Litera A.

*Adolescens & Puer.*



Adolescens curet vt seni similis, credat se posse senescere, seniores honoret. Lib. 3. Epist.

Puerorum curam parentes vel pædagogi habere debent, In Comment. Platon.

Adolescentes limites præceptorum & pædagogorum non prius transgrediuntur, quàm iniqua vulgi consuetudine deprauentur. Superiorem quippe viuendi normam domi inbibitam sequerentur, nisi ab ea improborum hominum, eorum præsertim qui illis blandiuntur, vsu consuetudineque deflecterentur. In Comment. Platon.

*Adulator & Adulatio.*

Nemo pestilentior homicida quam adulator, qui quantum in se est, interficit animum. Lib. 1. Epistol.

Memento Adulationem seruile vitium esse, imò etiam multo vilius quàm seruile; Nemo enim apud adulari potest, quin à catellis longissimè superetur. Lib. 3. Epist.

Adulatio est conuersatio ad voluptatem absque ratione boni habitus, ad oblectationem consuetudinis tendens, mediocritatemque transgrediens.

*Aequitas.*

Aequitas iustorum conducentiumque remissio, moderatio in commerciis, ordo rationalis animæ quo ad honesta & iustitia.

*Aër.*

Aër elementum, cuius omnes loci mutationes secundum naturam sunt.

*Affinis.*

Affinium est, vt meminerint se lege, quasi natura quadam ita esse coniunctos, vt rem operamque suam communicare sibi inuicem debeant. Lib. 3. Epistol.

*Agricola.*

Agricolæ officium est, de agriculturæ opportunitate consulere, aerem, & agricolas seniores. Præterea tanta cum fide, liberalitateque hospitibus suis agri fructus offerre, quanto illi cum fœnore illos reddit ager. Lib. 3. Epist.

*Ambitio.*

Ambitio habitus animæ omnes, honoris gratia sumptus admittens, præter rationis normam.

*Amicus.*

Cum viri boni & amici agitur res, res agitur nostra. Lib. 1. Epist.

Non est suavis absque amico suauissimo melodia. Lib. 3. Epist.

Amicus in amico non imaginem suam tantum inspicit, sed seipsum. Lib. 3. Epist.

Nihil in rebus humanis vel rarius acquiritur, vel pretiosius possidetur, vel infelicius, periculosiusque amittitur quàm amicus. Lib. 3. Epistolarum.

Amicorum officium est, communi inter se consilio quærere verum, communi auxilio sequi bonum. Lib. 3. Epist.

Nullos habere amicos nunquam statui, nisi quos iudicaui vna cum honestate morum, quasi cum Ioue Mercurum coniunxisse. Lib. 11. Epistol.

*Amicitia.*

Veram Platonici Philosophi Amicitiam, stabilem vitæ duorum vñionem definiunt. Lib. 1. Epistol.

Non est inter Religiosos amicitia vera, nisi quam vera Religio conciliauit. Lib. 3. Epist.

Amicitia quæ breui utilitate, vel voluptate contrahitur, breui tempore dissipatur. Lib. 3. Epistol.

Amicitia consensus in rebus honestis & iustis, eiusdem vitæ electio, consensus in deliberando atque agendo, concordia in communionem vitæ cum beneuolentia, communio in dandis accipiendisque beneficiis.

*Amor & Amator.*

In hac vita humanus Amor in Deum humanæ præstat cognitioni, quia Deum nemo verè cognoscit. Lib. 14. Cap. 10. Theolog. Platon.

Amor animam naturalis corpori iunxit, amor eam naturalis in corpore detinet.

Amor idem quotidie ipsam ad cultum corporis prouocat. Lib. 16. Cap. 7. Theolog. Platon.

Ita natura comparatum est, vt neque Amor honestus sit, nisi Religiosus, neque Religio vera, nisi amore suscepta. Lib. 1. Epist.

Si vis amari, ama. Lib. 1. Epist.

Vnus est vitæ custos Amor, sed vt ameris ama. Lib. 1. Epist.

Verus piusque Amator res creatas non ob aliam causam diligit, nisi quia creatoris Dei quæ amat, vel imagines sunt, vel vmbra, & quanto similiores apparent, tanto magis admira-

tur & laudat, simillimæ verò diuinæ mentis sunt mentes Deo, præ cæteris deditæ. Quamobrem eiusmodi mentes inextimabili flagrantia quadam amoris, dulcedine, & ad Deum & se prorsus inuicem efficiuntur, dum se tum illi sponte reddunt tanquam patri, tum sibi mutuo libentissime dedunt tanquam fratribus. Cæteræ quæ inter homines amicitiæ nuncupantur, nihil aliud sunt quàm rapinæ. Lib. 4. Epist.

Solus ille vir verus legitimusque amator appellandus, qui intelligit in omnibus bonis quæ passim sibi offeruntur, & placet, nihil reuera aliud sibi placere, quàm diuinum ipsum bonum, ex quo & per quod cuncta sunt bona, ideoque in iis omnibus ipsum amat, in ipso diligit omnia, ita ut neque ipsemet sibi ut dilectus, nisi in eo per quem hoc habet ut sit diligendus. Lib. 4. Epist.

Amorem cæcum Poetæ ideo pingunt, quoniam amator, ubi vel de seipso vel de amata re iudicat sæpiissime fallitur. Cum verò neminem vehementius quàm seipsos homines ament, certè à nullo magis quàm à seipsis decipiuntur. Lib. 5. Epist.

Amor perturbationum omnium principium est. Lib. 10. Epist.

Quemadmodum lumen ingens minora lumina prorsus extinguit, sic amor cura omnium ardentissima cæteras omnes longe propulsat. Lib. 10. Epist.

Amor circulus est bonus à bono in bonum perpetuo reuolutus. In Comm. Plat.

Simplex amor ubi amatus non amat amantem. In Com. Plat.

#### Angelus.

Angelicus duplex est circuitus, tum quia illuc redit unde manauit, dum suum diligit & intelligit authorem, tum quia considerat semetipsum. Lib. 4. cap. 1. Theol. Plat.

Bono Angelo nihil post Deum melius, malo nihil peius. Lib. 1. Epist.

#### Animus.

Animus terrestris corpore circumseptus, ab amore Dei exordiat, oportet, ut amore purgatus, lumen fortiatur inde diuinum, & in lumine gaudium. 8. Epist.

Animus autem indiuiduus est, ac simplex, nullam penitus discretionem distantiamque partium habens. Lib. de Voluptate.

Tres sunt, ut Aristotelis verbis utar, Animi potestates, quare vnà nobis cum plantis communis est, quam vegetandi vim nominant: Cuius officia tria sunt, alere proprium corpus, atque augere, ac denique aliud extra se gignere simile, alteram deinde naturam Animæ sentiendi vim vocitat, quæ nobis cum cæteris quoque animalibus communis existit. Sensuum verò alios intimos, alios externos esse. Externi autem, qui etiam ad proprium magis pertinent, quinque sunt vulgari promodum diuisione nouissimi, tertius verò animi vis, solis ex omni animantium mortalium genere hominibus conuenit, eamque intellectum mentemque nuncupat. His addit mouendi potestatem. Lib. de Voluptate.

Cum animus pars hominis omnium præstantissima sit, nemini dubium esse iam potest, quin id quod menti consentaneum est homini cognatiussimilissimæque, quàm quod sensibus conuenit indicari debeat, quod autem cuique cognatissimum est proculdubio incundissimum, ex quo intelligi-

tur animi gaudium corporis dulcedine maius ac præstantius esse. Accedit adhuc quod animus indiuiduus est, ac simplex, cognitio quoque veritatis pariter indiuidua. Lib. de Voluptate.

Humanus animus affectat qualia sint diuina intelligere, aspiciens in ea quæ sibi cognata sunt. In Com. Plat.

Animus in senectute perturbationibus sedatis quas secum affert iuuenius, segregatus à corpore diuina propius & apertius inspicit. In Com. Platon.

#### Animus.

Animus cum, ut Platoni nostro placet, duabus tantum alis, id est, intellectu, & voluntate possit ad cœlestem patrem & patriam reuolare, ac Philosophus intellectu maxime nitatur, sacerdos verò voluntate, & voluntatem intellectus illuminet, voluntas intellectum accendat, consentaneum est qui primi diuina per intelligentiam vel ex se inuenerunt, vel diuinitus attigerunt, primos diuina per voluntatem rectissime coluisse, rectumque eorum cultum, rationemque colendi ad cæteros propagasse. Lib. De Christ. relig. in Proemio.

Animus Deo plenus tantum in Deum erigitur, quantum & diuino lumine illustratus agnoscit Deum & diuino calore accensus fitit eundem. Lib. De Christ. rel. cap. 2.

Quid miraculosius, quid diuinius in terris, quam animus omnino corporis sui dominus? Lib. De Christ. relig. cap. 10.

Virtus animi est æqualitas quædam, ut Magi tradunt, per quam animus & sibi met & ipsi verò bonoque consonat. Lib. 8. Theolog. Platon. cap. 2.

Animus propria labe, id est, iniquitate non perit. Iniquus enim animus non minus est animus & vitalis quam sit æquus. Lib. 9. Theolog. Platon. cap. 5.

Viuet semper religiosus animus ut dignum suscipiat præmium. Viuet semper & impius, ut luat supplicia impietatis, qui infinite peccat, quoties pro finitis commodis Dei obliuiscitur infiniti, & malignum habitum contrahit indelebilem, per quem mille annorum millia sit peccaturus si viuerit, postquam statuit semel tam diu peccare, quàm diu viuet. Lib. 14. Theolog. Plat. cap. 10.

Animus est verus motor corporis. Lib. 15. Theolog. Plat. 12.

Pius animus ad Deum se conuertens, tribus quibusdam gratiis, diuinitus incedit munitus, fide vera, spe firma, charitate feruenti. Com. D. Pauli. cap. 10.

Animus tanquam diuinus diuinis Theologiæ mysteriis expiatur. Lib. 1. Epist.

Videbar animus ipsam iustitiam, videbar sapientiam, videbar harmoniam, & quandam diuinæ naturæ mirabilem pulchritudinem, atque has omnes tum ideas, tum diuinas essentias, tum primas naturas, quæ in æterna Dei mente sic nominat, quarum perfecta cognitione, hominum mentes, quamdiu illic degunt feliciter murantur. Lib. 1. Epist.

Solo enim diuino veritatis pabulo, reuera diuinus animus oblectatur, alitur, augetur. Lib. 1. Epist.

Diuinus animus nulla ex re alia pendere debet quàm ex Deo. Lib. 1. Epist.

O quàm malus est homo, cui canis & equus

melior est quàm animus, ô quàm deformis cui calceus, quantum in se est, pulchrior est, quàm animus. Lib. 3. Epist.

Nihil huic reuera bonum est, vel pulchrum, apud quem cuncta præter ipsum, id est, præter animum bona videntur & pulchra. Libro tertio Epistolarum.

Nihil pauperius & inanius illo, cuius horrea quidem plena sunt, animus verò vacuus. Lib. 3. Epist.

Honestis exhortationibus adolescentis animus ita formandus, vt moderatus pacatusque reddatur. Lib. 4. Epist.

Non attinget animus rationes rerum verissimas quæ sunt à corporibus separatæ, nisi ipse se ipsum rum morum purgatione, tum speculationis intentione à corpore separauerit. Libro quinto Epistolarum.

Animi natura liberi non possunt aliter, quàm liberali quadam beneficentia vinci. Lib. 6. Epistolarum.

Animus noster (vt est apud Platonicos) mediam quendam inter æterna & temporanea obtinet regionem. Atque tanquam vtrorumque particeps, ad vtraque pro arbitrio voluitur. Quando temporalibus sese mergit, primo quidem breuem quandam falsamque dulcedinem sentire videtur; mox longa veraque amaritudine prorsus obruitur. At cum sese erigit ad æterna contra omnino se habet. Nempe post breuiem quandam falsamque amaritudinem, dulcedine vera & diuturna perfunditur. Quippe cum non temporaneum, sed æternum sit æternæ intelligentiæ verum nutrimentum. Lib. 6. Epist.

Longè disuncti sunt animi, quando alterum, alterius ingenium ignorat. Lib. 9. Epist.

#### *Anima.*

Est anima hominis quodammodo omnia, præsertim cum sit in corpore ex omnium viribus composito, cœlique temperatissimo. Lib. De Christ. relig. cap. 16.

Vita corporis anima est, animæ vita Deus. Lib. De Christ. relig. cap. 20.

Cur indicamus animam corpore meliorem, nisi quia summæ bonitati propinquior. Lib. 2. Theol. Plat. cap. 3.

Ab anima superiorum virtute fit motus operis ordinati. Lib. 4. Theol. Plat. cap. 1.

Anima est triplex circuitus, quia respicit Deum, quia seipsam considerat, quia causis rerum ad effectus descendit, rursusque ab effectibus ascendit ad causas. Lib. 4. Theolog. Plat. cap. 2.

Anima est à Deo super materiam, vt eam non attingat elementorum procella, & iniquitas certantium qualitarum. Lib. 4. Theolog. Platon. cap. 4.

Anima est essentia, est & vita. Lib. 5. Theolog. Plat. cap. 14.

Rationalis anima vera naturalis vita est. Lib. 5. Theol. Plat. cap. 6.

Individua virtus animæ humanæ qualitas est. Lib. 8. cap. 1. Theol. Plat.

Animæ officium est, penetrare facillimè corpora, implere, mouere. Lib. 6. Theolog. Platon. cap. 6.

Præstantissimæ animæ partes sunt intellectus atque voluntas, quando circa corporalia occupamur, intellectus aut nihil cernit omnino aut non sincere discernit, sensibus, & phantasiz de-

ceptus, voluntas affligitur dum multis inde rextur curis. Lib. 9. cap. 2. Theol. Plat.

Anima qua viuunt corpora, omnibus corporibus potior est, quia vitam dat corporibus. Lib. 12. Theol. Plat. cap. 5.

Tres rerum ordines ad humanam animam pertinere videntur. Prouidentia, Fatum, Natura. Lib. 13. Theol. Plat. cap. 2.

Anima est actus corporis physici, organici potentia vitam habentis. Lib. 15. Theolog. Platon. cap. 7.

Anima est principium viuendi, sentiendi, intelligendi. Lib. 15. Theol. Plat. cap. 7.

Anima est id quo viuimus, & quo sentimus ac intelligimus primo. Lib. 15. Theolog. Platon. cap. 7.

Quot corpora hominum sunt, totidem & vitales complexionem, totidem viuificæ, totidem animarum mentes. Libro 15. cap. 12. Theolog. Platon.

Confert descensus animæ in corpus ad animæ ipsius beatitudinem. Lib. 16. cap. 4. Theolog. Platon.

Anima hominis mentibus omnibus obtusior, comparatione indiget ad plenissimum rerum maximarum iudicium. Lib. 16. Theolog. Platon. cap. 4.

Animæ cedunt diuinæ voluntati. Lib. 16. Theolog. Plat. cap. 4.

Animas impiorum in ipso iudicii tempore, etiam nullo fugante, procul à diuini iudicis cultu pro viribus fugituras. Comment. diui Pauli. cap. 15.

In spiritu viget anima, in animo fulget intelligentia. Lib. De vita cœlesti, compar. cap. 26.

Magnum es quiddam ô anima, te parua non implent, optimum quoque, si displicent tibi mala, pulcherrimum, si horres turpia, sempiternum, si temporalia paruipendis. Lib. 1. Epist.

Intèr omnes animæ vires, quæ in cognoscendo versantur supremæ sunt, intellectus & ratio, infimæ verò gustus & tactus, hæc quidem ad naturam descendunt corporalem, illæ verò ad incorpoream ascendunt substantiam atque diuinam. Lib. 5. Epist.

Tanta est animæ excellentia, vt re prorsus nulla indigeat ad essentiam. In Com. Plat.

Vita sensualis est conflata ex proprietate individua atque diuidua. In Com. Plot.

Anima non inest proprie corpori, sed adest. Ibidem.

Anima adest corpori separabiliter, sicut lumen aëri. ibid.

Quælibet vis animæ est in qualibet parte corporis tota, sicut anima. ibid.

Anima quod seipsum mouet, vitalis motus animantibus causa.

#### *Animositas.*

Animositas impetus violentus irrationalis animæ absque ratione & ordine mentis.

#### *Ars.*

Artium opera eatenus permanent incorrupta, quatenus vi naturæ seruantur. Lib. 2. Theol. Plat. cap. 7.

Quid est ars humana? Natura quædam materiam tractans extrinsecus. Lib. 3. Theolog. Platon. cap. 1.

Ars est recta efficiendorum operum regula. Lib. 1. Epist.

*Astutia.*

Astutia, affectio qua finem proprium coniecimus.

*Attentio.*

Attentio, intentio animi ad discendum.

*Avaritia.*

Avaritia libidinum explendarum gratia pecunias affectamus. Commentar. diui Pauli. cap. 10.

*Audacia.*

Audacia sine sapientia, est fera indomita, ac penitus effrenata. Lib. de Christiana Religione. cap. 3.

Audacia, securitas qua quis malum neque futurum expectat, neque præsens horrescit.

*Aurora.*

Aurora dici principium, primum à sole lumen.

*Auxilium.*

Auxilium expulsio mali vel adukti, vel etiam imminensis.

## B

*Beatitudo.*

Beatitudo bonum, ex bonis omnibus accumulatum, potestas ad bene viuendum seipsa sufficiens, perfectio secundum virtutem sufficiens, vitæ commodius.

*Beatus.*

Beatus ille futurus est, qui humiliter diuinæ legi se subiicit, miser verò qui eam superbè contemnit. Libro 18. Theolog. Platon. capite 10.

Illi dumtaxat, quibus bona plurima adsunt, beati dicuntur. Hi tamen non prius beati sunt, quàm bona ipsis præsentia adsint, neque profuturi vnquam, nisi illis vtantur. Libro 1. Epistolarum.

Beatè viuere nihil est aliud, quàm veritate gaudere. Lib. 3. Epist.

*Beneficentia, & Beneficium.*

Quos beneficentia prosequeris, totidem & sequentur libenter & obsequuntur. Toties bene vinctes, quoties beneficio vinces. Libro sexto Epistol.

Iustum quidem, sed humanum est beneficium præstare merentibus, clementissimum verò est atque diuinum largiri etiam non merentibus. Lib. 11. Epist.

*Beneuolentia.*

Nihil ad egregias res agendas commodatius est quàm prudentum doctorumque virorum beneuolentia, nullum certius est argumentum, vel iustitiæ, prudentiæq; quam si huiusmodi adsint, vel iniustitiæ, & imprudentiæ, quàm si desint. Lib. 1. Epist.

Beneuolentia electio hominis ad hominem grata atque accepta.

*Bonitas.*

Bonitas tanto intervallo, saltem mentem superat, quanto longius boni, quàm speciei tendit largitio: quo enim res quæque potentior est, longius operatur. Lib. 1. Theolog. Platon. cap. 6.

Bonitas ipsa munus suum impertit omnibus, id est, unicuique aliquam bonitatem. Lib. 2. Theolog. Platon. cap. 1.

Viuere vult præ cæteris ipsa bonitas, cuius vitam vult voluntas omnis, præter quam nihil aliud vult voluntas. Lib. 2. Theolog. Platon. cap. 12.

Sola diuina bonitas, est absolutum diuinæ mentis obiectum. Theolog. Platon. Libro 2. cap. 12.

Diuina bonitas non indiget creaturis. Lib. 2. Theolog. Platon. cap. 12.

Bonitas est affectio qua eligimus optima.

*Bonum.*

Bonum ipsum nunquam respicere possumus. Lib. 1. Theolog. Platon. cap. 6.

Bonum latius est, quàm vita, quia pluribus conuenit, magis quoque necessarium est munda quàm vita. Libro 2. Theolog. Platon. capite 6.

Non desiderat vnquam nisi bonum, non reperitur vnquam nisi verum. Lib. 2. Theolog. Platon. cap. 6.

Bonum quod sui ipsius gratia expetendum.

Bonum quod in omnibus quæ sunt, salutis est causa: causa omnis, quod ad ipsum tendit id, à quo veniunt quæcunque sunt eligenda.

Mortalia vsu comparanda esse. Naturalia ratione querenda, diuina ratione à Deo petenda. Lib. 1. Epist.

Mortales quotidie à Deo petunt, sed vt bene illis vtantur, nunquam postulant. Lib. 1. Epistolarum.

In ore bonum gestamus, in pectore malè. Lib. 1. Epist.

A bono non proficiscitur, non nisi bonum. Lib. 1. Epist.

Pudeat quandoque mortales, pudeat, inquam, dum non alia ratione, nisi quia bona mortalia diligunt, in iis diligendis æternum ipsum bonum negligere, vnde hæc id prorsus habeat vt sint bona. Bona quidem in seipsis omnia sunt, quoniam sunt ab ipso bono, bona rursus & nobis, quatenus referuntur ad ipsum. Libro 3. Epistolarum.

Non est bonum hæc habere quæ dicuntur bona, nisi bonis dignus fueris. Bonis enim non fruimur nisi bonus. Lib. 4. Epist.

Bonum ipsum, quia immensum est vbique viget atque exuberat vndique, & affectus noster benefequendi est aliquid proculdubio bonum. Solus autem qui bene vult sequitur bonum, qui summæ bonitatis ipsius gratia, per quam singula bona sunt, atque seruantur, passim bona singula sequitur. Lib. 4. Epist.

Est bonorum natura duplex: nam & explent animum, & omni molestia liberant, cuiusmodi verò expletio atque liberatio proculdubio est ipsa tranquillitas. Quæ quoniam cæterorum possessionem bonorum sequitur, consequens est, vt eorum omnium finis, atque extremum, ob eamque causam summum merito videatur, nec enim quiescit animus vnquam, nisi bona consequutus fuerit, quies autem & tranquillitas vnum atque idem est, bonorum igitur aliorum possessioni succedit, eius itaque gratia bona quæ sita videntur omnia, quasi hic finis vltimus atque optimus ab omnibus expetendus. Lib. de Voluptate.

Bonum est principium, finis, & comprehensio omnium. In Comment. Dionys. Areopag.

Bonum est quod omnia entia appetunt. In Comment. Platon.

Plato in Republica. Si boni ipsius cognitio no-

bis desit, arte omnes alias & scientias inutiles, conatus irritos, noxias actiones fore. In Comment. Platon.

## C.

*Calumnia.*

Calumnia dissensio amicorum verbis facta.

*Cardinalis.*

Legitimi Cardinales nihil aliud sunt, quam quidam Christianæ Ecclesiæ Cardines, Apostolorumque vicarii, atque idcirco debent non proprio, vel suiprius vel alterius commodo, sed communi Ecclesiæ bono consulere. Præterea nihil agere, vel cogitare, vel loqui quod non sit sanctitate Apostolica dignum. Qui verò contra faciunt, neque Cardinales, imò sacrilegos esse, neque Apostolorum vicarios sed inimicos. Lib. 5. Epist.

*Castigatio.*

Castigatio curatio animæ ob commissa scelera.

*Cautio.*

Cautio declinatio mali diligentia custodiendi.

*Celebritas.*

Celebritas tempus secundum leges sacrum.

*Charitas.*

Timor non est in charitate, sed perfecta charitastimorem foras mittit. Libro De Christ. relig. cap. 6.

Nihil Deo gratias, quàm charitas. Libro 1. Epistolarum.

Diuina charitas, siue Paulum audiamus, omnia credit, omnia sperat, omnia sustinet neque exitit vnquam, siue Ioannem Euangelistam, timor in charitate non habitat, sed perfecta charitas timorem omnem expellit. Aurelius Augustinus noster exclamat. Solus nullum charum amittit, cui omnes in illo chari sunt, qui non amittuntur. Lib. 4. Epist.

Vera charitas, sicut Paulus inquit Apostolus, non quæ sua sunt, sed quæ alterius sunt quærit. Lib. 4. Epist.

Diuina charitas, dum proprio gaudet bono commune omnibus amat curatque bonum. Charitas humana vicissim, quatenus communi omnium bono gaudet, eatenus proprium inde reportat bonum. Quamobrem qui manet in charitate, in Deo manet permanetque semper in gaudio, tum quia Deus ipse charitas est, tum etiam quia dum charitatis flammis animus ardentè affectus, Deum quidem excelsum in seipso, homines autem amat in Deo, interim ipso Deo, qui charitas est, afficitur mirabiliter Deusque efficitur. Lib. 8. Epist.

Charitas sola permanet, & qui manet in charitate in Deo manet, sed quoniam pacto manet Deus in eo? In animo, inquam, finito ipse Deus immensus manet quidem animus noster in Deo comprehensus, manet autem Deus in animo comprehendens. Manet certè Deus omnipotens etiam ubi non est charitas, sed tanquam iudex acrior atque iudex exactor pœnarum. Manet rursus clementissimus Deus ubi viget charitas tanquam Eucharistia salutaris & gratiarum omnium abunde largitor. Libro octauo Epistolarum.

O charitatem omnipotentem, quæ Deus est, quæ facit, quæ seruat, quæ perficit omnia. O sapientissimam charitatem quæ diuinitus accendens animum ex animo mirabiliter transfor-

mat in Deum. O charitatem proculdubio benignissimam, quæ gratiam creatoris immensam cum finita creatura communicat Eucharistiæ sanctitate communione. Quæ Christus ipse propitius mundi seruator dum & in cœlo est nihilominus ad consummationem sæculi totus est vbique nobiscum. Libro octauo Epist.

Qui manet in charitatis ardore, statim in ipsa Dei luce manet, statim diuinum gaudium manet in eo. Lib. 8. Epist.

Charitas integra animi declaratio, ciuilis scientia honestorumque atque vtilium: scientia iustitiam inducens in Rempub.

*Ciuis & ciuilitas.*

Ciuis officium est considerare ciuitatem esse tanquam animal vnum, ex ciuibus tanquam ex partibus constitutum. Ac partem toti non parti totum seruire debere. Libro primo Epistolarum.

Ciuilitas monere videtur, vt ciues singuli, esse se quædam ciuitatis membra meminerint. Lib. 1. Epist.

Quam apud Platonem nostrum ideam optimi ciuis quotidie legimus, in hoc ferme iam agnouimus. Cui tam curæ publicæ sunt quam cæteris propriæ, in quo singularis magnanimitas & incredibilis mansuetudo inter se de puritate contendunt. In quo & prudentia liberalissima, & liberalitas prudentissima, in quo tanta cum gravitate benignitas, vt tot diligant, quot vident, tot ament coluntque, quot & norunt. Libro tertio Epistolarum.

Ciuis siue magistratus sit, siue priuatus officium est, tam diligens publici curæ, quam ingens amor proprii Lib. 3. Epist.

Oportet ciues, non sibi, sed ciuitati viuere. In Com. Plot.

*Ciuilis homo.*

Ciuilis homo petitus eorum quæ ad administrationem Reipub. pertinent.

*Ciuitas.*

Ciuitas habitatio multorum hominum communibus vtentium legibus: cœtus hominum iisdem legibus subiectorum.

Ciuitatis virtus recta Reipublicæ constitutio.

Ciuitas non diuitiis sed virtute seruatur, magnaue geruatur. In Com. Plat.

*Cælum.*

Cælum quanto minus crassum est, quam cætera, tanto luce, motu, effectû est admirabilius. Lib. 1. Theol. Plat.

Cælum corpus est optimum, diuinitati quam proximum. In Com. Plot.

Cælum corpus omnia complectens corpora, præter ipsum supremum aërem.

*Color.*

Color lux est opaca. Lib. de Lumine.

*Communio.*

Communio legum iusta institutio, quæ quod præditum est probum dicitur: habitus concordiam præstans.

*Concordia.*

Concordia consensus, imperantium & subditorum in imperandi obediendique ratione.

*Conferens.*

Conferens quod in bonum fert.



*Coniectura.*

Coniectura rei latentis iudicium.

*Con sanguinei.*

Con sanguineorum est, se inuicem tanquam eundem corporis membra diligere. Libro 3. Epistol.

*Conscientia.*

Conscientia cogitatio tristis, absque ratiocinatione.

*Consensio.*

Consensio, communicatio rerum omnium, cogitationum, suspicionumque concordia.

*Consilium.*

Noli igitur tibi quicquam credere, noli rursus unico te totum committere consultori, sed plures habeto, atque illos quidem admodum seniores quos experientia rerum diuturna docuerit, quorum mores tibi tanquam optimos constantissima commendet fama, acres ipsa manifestissime prebet. Quoties vnà cum tuis senioribus de re grauiore deliberas, cū ue tuam intelligent voluntatem, ne forè cupiditatem tuam potius quàm vtilitatem, & dignitatem consulendo sequantur. Libro quinto Epistolatum.

*Consilium.*

Consilium admonitio alterius de agendarum rerum ratione.

*Constantia.*

Constantia potestas, perferendæ molestiæ sequentis exiis, quæ recta ratio iussit, potestas quæ nunquam delicitur è rationis proposito.

*Consultaria.*

Consultatio consideratio futurorum, quonam pacto conferant.

*Continens.*

Continens est cuius ratio iudicat verè, affectus obtemperat ægrè. Libro 28. Theolog. Platon. cap. 10.

*Contrarietas.*

Contrarietas distantia maxima illorum quæ sub eodem genere per quasdam differentias continentur.

*Contumelia.*

Contumelia iniuria quæ per contemptum infertur.

*Conuiuium.*

Conuiuium laborum requies, remissio curarum, ingenij pabulum, amoris & magnificentiæ argumentum, cetera beneuolentiæ, amicitia condimentum, fomentum gratiæ, vitæ solatium. Lib. 3. Epist.

*Cor.*

Cor principium est venarum scilicet angustissimarum, quæ in iecore dilatantur. In Comment. Platon.

*Corpus.*

Corpus apud Platonem ex materia quadam constat & quantitate, atque ad materiam extendi & affici pertinet solum, & ipsa extensio affectioque passionis quadam sunt. Lib. 1. Theolog. Plat. cap. 2.

Infinitam multitudinem corpus Pythagorici arbitrantur, quoniam absque fine diuiditur. Lib. 1. Theol. Plat. cap. 2.

Præstantissima corpora sunt (vt ad Platonicos) cœlicolarum dæmonumque & hominum. Lib. 1. Theol. Plat. cap. 2.

Inferiora corpora per superiora mouentur, superiora per naturam incorporealem, Lib. 2. Theol. cap. 2.

Præest mobilibus mundi corporibus, substantia incorporealis & stabilis. Lib. 2. Theolog. Plat. cap. 7.

Sicut anima circa Deum, quasi centrum conuoluitur, ita corpus tractum ab illa semper circum animam quasi centrum reuoluitur. Lib. 4. Theol. Plat. cap. 2.

Corpus & virtutum & vitiorum vnà cum anima est particeps. Libro 18. Theolog. Platon. capite 9.

Resurget corpus immortale. Lib. 18. Theolog. Plat. cap. 9.

Corpora idcirco resurgunt, vt præmia etiam & supplicia corporibus ita merentibus sempiterna in perpetuum persoluantur. Lib. 18. Theol. Plat. cap. 9.

Corpus Medicinæ remediis curatur. Libro 1. Epist.

Patuntur corpora & quæ corporibus sunt coniuncta, mens autem à corpore libera. In Comm. Platon.

Corpus apud Orpheum carcer dicitur atque sepulchrum, vt pote quæ in corpore tanquam morrua iudicetur. In Com. Plat.

Corpora animarum, mentiumque vmbra & vestigia sunt. In Com. Plat.

*Crudelitas et Clementia.*

Nullum certius est autementiæ indicium, aut miseriæ portentum quam crudelitas. Lib. primo. Epist.

Crudelitatem plurimum exercemus, crudelitas vicissim & nos exercet. Clementiam fugimus, fugit & nos clementia. Lib. 4. Epist.

*Cupiditas.*

Cuiusque cupiditas, eo habitu quod volebat expletur. In Com. lat.

*Litera D.**Dæmones.*

Socrates in Phædro Platónico inquit, malorum dæmonum præcipuum esse studium, animas seorsim à cœlesti patria in hoc exilio detinere superni patris oblitus longasque machinari moras, illecebris oblectamentisque terrenis, quibus profecto quasi poculis veneficæ circes' soporiferisq; Syrenum cantibus delinitæ, nunquam aut certe tardius in cœlestem patriam reuertantur. Contra verò dæmonicas insidias Prouidentia Dei statuit, dulcibusque quidem his lætiferis saporibus, saporibus amaros interim cōmisceri, neab eiusmodi voluptate, quam Timæus escam nominat malorum, capiamur, vt pisces ab hamo: Hanc vtique Platónici, præcipue Plotinus atque Synesius magna ex parte causam esse volunt, vt diuina prouidentia, tot tantisque perturbationibus animos in terris vexari voluerit. Lib. 12. Epist.

Infaniam à dæmonibus humores mirabiliter irritantibus fieri. In Com. Plat.

*Decretum.*

Decretum ciuile ad certum tempus respiciens.

*Definitio.*

Definitio oratio ex genere differentiaque composita.

*Degeneratio.*

Degeneratio prauitas in natura: declinatio ab eo quod secundum naturam: morbus eius quod secundum naturam.

*Delectatio.*

Delectatio est voluptas suauitate auditus animi deliniens, reliquæ verò, cæteris sensibus blandiuntur: verum præter eas quibus corpus afficitur, quatuor adiumentæ sunt, quæ in mente quoque postquam ab appetitione deprauata est, comperiuntur. Hæ verò sunt Oblectatio, Effusio, Luctatio Maleuolentia. Est autem oblectatio animi inclinatio ad voluptatem emolliens. Lib. de Voluptate.

*Demonstratio.*

Demonstratio ratiocinatio vera: oratio ostendens aliquid per præcognita.

*Deus.*

Deus, qui infinita sapientia, bonitas, claritas est, ignorans vel ingratus, vel crudelis esse non potest. Lib. De Christ. relig. cap. 2.

Deus in seipso summum est bonum, veritas rerum, lumen fauorque mentium. Lib. De Christ. relig. cap. 4.

Deus in homine, hominem reddit diuitem merito. Lib. De Christ. relig. cap. 16.

Dij plures esse non possunt, quia nequeunt plura esse principia. Libro 2. Theolog. Platon. cap. 2.

Deus summum est rerum principium.

Deus vnus mundi ordinator vnus est.

Omnis simplex infinitas Deus ipse est.

Nemo dubitare debet Deum semper esse, quando Deus est ipsum semper, imò sempiternitas ipsa est ipse Deus. Lib. 2. Theolog. Platon. cap. 5.

Deus omnia penetrat.

Difficile reperitur vbi sit Deus, quia nusquam est, quod nullius vel subiecti, vel loci limite cohibet.

Difficilius reperitur vbi non sit, quia in omnibus est, illud in quo sunt, per quod fiunt, per quod seruantur quælibet vbique.

Deus ideo est in omnibus, quia omnia in eo sunt, quæ nisi essent in eo, essent nusquam & omnino non essent.

Deus est omne bonum, Deus est omne verum. Adde quod amplitudo & plenitudo ipsa est. Lib. 2. Theol. Plat. cap. 5.

Deus per essentiam suam quasi quoddam exemplar circumspicit omnia. Lib. 2. Theol. Platon. cap. 10.

Idem in Deo est natura eius, atque intelligentia. Lib. 2. Theol. Plat. cap. 11.

Deus est ætæternus, atque perpetuus, ex se, in se, circa se penitus. Lib. 2. Theolog. Platon. cap. 1.

Nihil extra Deum est, quod Deus excedere nequeat.

Cælum Deus mouet tanquam finis. Libro 3. Theol. Plat. cap. 1.

Dei proprium est vnitas, mentis ordo, animæ motus.

A Deo solo prima ipsa fit vnitas in mundo, partium & totius. Libro quarto Theolog. Plat. cap. 1.

Deus circulus vnus est, quoniam à se est, circuli instar, & in seipsum, pro vt non habet extra se principium sui vel finem, sed in se incipiens definit in seipsum. Lib. 4. Theol. Plat. cap. 1.

Deus verum bonum est, Angelus imago quidem est bonitatis, sed intellectus verus. Lib. 5. Theol. Plat. cap. 14.

Deus frequenter, vel bonos immunes, vel ma-

los impunes relinquit, vt his iudiciis vobis offerat vitam alteram superesse, in qua iustitia quæ falli non potest pro meritis impleatur. Lib. 14. Theol. Plat. cap. 10.

Deus est animi vita, sicut anima corporis. Com. D. Pauli. cap. 10.

Deus vnitas stabilis est, & status vnicus. Quisquis igitur Deum assequi vult multitudinem pro viribus motumque deuinet. Libro primo Epistolarum.

Quos immortalis Deus coniunxit, homo non separet. Lib. 1. Epist.

Deus omnipotens mirabilia solas fecit. Lib. 1. Epist.

Amantur à Deo quicunque Deum pia mente colunt. Lib. 1. Epist.

Deus amore immenso gratis largitur omnibus omnia, solisque dat pauperibus. Nam omnes quamuis ditissimi videantur, omnino inopes sunt apud Deum. Merito hac sola virtute Deum emimus, quoniam hæc sola eum verissime imitatur. Nemo sapiens aut fortis aut temperans se iactat æmulati Dei. Lib. 1. Epist.

Cultus Dei virtutum virtus est, Consecutio autem præmium est virtutum. Libro primo Epistolarum.

Nihil penitus latere potest Deum, per quem solum patent, quæcunque vsquam patent. Lib. 1. Epist.

Deus prudentibus ad gubernandum vitur. Lib. 3. Epist.

Soli Deo confide. Lib. 3. Epist.

Deus est charitas, & qui manet in Deo in charitate manet, & Deus in eo. Lib. 3. Epist.

Nulli vnquam, vt est apud Homerum & Platonem, Deus omnia dedit. Lib. 3. Epist.

Quando Deus ipse nostra firmitas est, infirmi vndique esse non possumus. Tunc enim animi firmitas corporis infirmitate perficitur. Mihi quidem adherere Deo bonum est. Quoniam, vt inquit Augustinus, si in ipso non permanebo nec in me potero. Lib. 4. Epist.

Nullos Deus reprobat magis quam eos, qui sordidis vitiorum vasculis Nectar & Ambrosiam haurire confidunt. Nullos probat amatque magis (vt disputat Aristoteles) quam qui mentem Deo simillimam imprimis colunt, & à corporis labe longe dissimili segregant, diuinumque lumen non nebulis obruere vitiorum, sed pura student mentis serenitate percipere. Libro quinto Epist.

Deus charitas est lucens, in qua odium non est vllum. Qui in luce clara, & charitate lucida manet, in Deo manet & Deus in eo. Libro 6. Epistolarum.

Deus lux est, Deus charitas est, Cui charus ante omnia Deus. Cui sol ille fulget, huic facile cuncta passim resurgunt. Libro sexto Epistolarum.

Solum apud Deum, vbi bonorum omnium malorum viget bonum, reperiri potest Medicina omnium malorum. Lib. 6. Epist.

Turus vbique Solus: cui Deus adest, Lib. 10. Epist.

Deum & summam esse charitatem, non tantum sonat Apostolica tuba, verum etiam, tota rerum natura proclamatur. Omnis enim natura rerum ideo creata est atque seruat, quoniam ab initio voluit atque vult Deus ipse creator. Voluntas autem procule dubio in Deo nihil aliud est quam

quam charitas atque Deus. Voluntas inquam penes Deum, non appetitio prorsus vana, sed gaudium, gaudium propria bonitate gaudens. Lib. 8. Epist.

Deus ignis consumens est, non pugnans, id est, imaginatione, non affectu mortalium hunc potes apprehendere, etiamsi moratus fueris, nullo tamen imaginationis pugno diuinæ veritatis percipies lumen. Lib. 8. Epistol.

Deus nullius indigus, omne bonum, quo pacto ipse Deus est charitas, est in charitate feruor, est lumen & gaudium. Lib. 8. Epistol.

Deus veritas est & bonitas, ideoque omnia ex veritate & bonitate composuit. Res enim qualibet quantum permanet in integra sui puritate id quod à Deo facta est, vera denominatur. Quatenus verò aliis conducit ad aliquid, bona aliis nuncupatur. Item quatenus intra se aliud sui conducit ad aliud, bona sibi. Lib. 10. Epistol.

Dicitur vnusquisque Deus reuera bonus, tum quia bono suo nullum malum est admixtum, quia bonitas in eo non est habitus aliquis essentialis additus, sed ipsa eius essentia. Non enim prius quidem Deus est. Deinde bonus existit. Eadem enim essentia sua formaliter & Deus æque est & bonus. Sic igitur vnusquisque Deus ita suapte natura dicitur se ipso bonus, sicut Deus primus se ipso bonum. Proculus idem in Elementis Theologiæ probat, vnumquemque Deum ita esse formaliter bonitatem quandam essentialem, sicut primus est ipsum bonum super essentialiam. Item ad ipsam Deitatem tria hæc formaliter pertinere; Bonitatem puram, potentiam non impeditam, Cognitionem nullius incertam. Lib. 11. Epist.

Tota religio & opera sacerdotum & historia consentit, communisque hominum fama Deos sensibiliter apparere multasque offerre formas, variasque figuras. Lib. 11. Epistol.

Nihil clarius quam Deum esse, esseque ad summum potentiam, sapientiamque & bonum.

Nihil obscurius quam quid sit Deus, vt nihil sit tenebrosius illo, qui sibi opinatur hoc esse clarissimum. Lib. de Lumine.

Deus certe sicut mens quæ radius eius est, monstrat, lux est inuisibilis, infinita, veritas ipsa, veritatis cuiusque, verumque omnium causa. Cuius splendor imo potius umbra, est lux ista visibilis atque finita, causa visibilium. Lib. de Lumine.

Deus tanquam Sol in stellis quam abundè, tam foeliciter fulgebit in cunctis. Lib. de lumine,

Summum bonum esse Deum qui dubitat, is nihil omnino intelligit. Lib. de Voluptate.

Deus non solum simplicissimum est, sed & ipsa simplicitas. In Com. Dionys. Areo.

Deus motus ad essentiam, acceptio essentiarum, processus in esse.

Est Deus vnitas non in re quauis vnita sedem habens, sed vnionis vnitatisque vbique causa. Essentia quoque, & intellectus dici potest, tanquam essentiarum omnis intellectusque causa, non tanquam essentialis quædam intellectualisue forma. Dionysius Areop.

Deus nempe consilium, & consilij fons appellatur, quia veritas omnium est & bonitas. In Com. Platon.

Deus super æternitatem est, Angelus in æternitate ibidem.

Deus totius amoris & pulchritudinis fons est.

Non negligit Deus minima gubernare, qui facere minima non neglexit. In Com. Platon.

*Dictio.*

Dictio vox hominis quæ scribi potest, & signum quoddam commune absque cantus harmonia significans.

*Dies.*

Dies solis iter ab ortu ad occasum, lumen nocti contrarium.

*Dignitas.*

Dignitatem mortales falsa definitione nihil aliud esse iudicant, quam digna honore nancisci. Ego autem veram dignitatem haud aliter definio, quam honore digna mereri. Lib. 6. Epist.

*Discipulus.*

Discipuli est præceptorem honorare tanquam intelligentiæ partem. Cauere tamen ne magistri vitia latenter imbibat. Lib. 3. Epistolarum.

*Disciplina.*

Disciplina facultas animam curans.

*Discere.*

Bene discere, & discere præcor hodie, qui cras discit nunquam discit. Lib. 1. Epistol.

Nunquam nimis fit, quod nunquam satis fit. Nondum satis didicit, qui adhuc quicquam dubitat, dubitamus autem quamdiu viuimus. Tam diu igitur discendum nobis est, quamdiu viuendum. Lib. 1. Epistol.

Stimulus autem discendi vel reminiscendi, non in nostra voluntate, sed in opinione consistit. In Com. Platon.

*Diuites seu diuitia.*

Diuites illi iniusti penitus habendi sunt, qui ob superbiam obliuiscuntur Dei, diuitiarum omnium largitoris, Pauperum quoque te nostros faciunt, & pecuniarum possessores se appellant, cum à pecuniis ipsi possideantur, contra verò iusti sunt & felices qui in summis diuitiis constituti se Dei ministros, pauperum tutores, pecuniarum distributores existimant. Lib. 1. Epist.

Tam maximè rerum omnium copia genus hominum impedit, quam inopia. Lib. 3. Epist.

Quemadmodum pauperes illos laudamus valde, qui in ipsa rump paupertate sunt diuites, tum infima sorte sublimes, sic eos diuites nimium admiramur qui in summa rerum affluentia viuunt sobrii, & in excelsa fortuna sunt humiles, atque prudentes. Plerique cum possidere omnia videntur, existimant sibi cuncta licere, & obliuiscuntur humanæ se aliquid esse super homines arbitrantur, cum sæpe minus sint quam homines. Lib. 3. Epistol.

*Diuinitas.*

Duo sunt apud nos diuinitatis argumenta: vnum Prophetia, alterum prodigiosorum operum demonstratio. In comment. Plo.

*Diuinatio.*

Diuinatio scientia rerum absque demonstratione præsaga.

*Doctrina.*

Doctrina magna ex parte ad prophanos translata est, vnde vt plurimum iniquitatis euasit & lasciuie instrumentum, ac malitia potius dicenda est quam scientia. Lib. de Christi religione in proemio.

*Docilitas.*

Docilitas ingenium animæ ad velociter percipiendum.

*Dominus.*

Domini officium est legi rationique seruire quo possit seruis legitimè & rationabiliter dominari. Considerare tam seruum, quam Dominum hominem esse. Humanitatem semper cum dignitate miscere. Lib. 3. Epistol.

Quantum gaudes seruis extrinsecis dominari, tantum da operam vt & diuinis legibus seruias, & seruis intrinsecis, id est, sensibus dominaris. Memento seruos tuos homines esse, tibi que, æquales origine, neque metu aliquando, sed amore, humanum genus naturaliter liberum vel debere vel posse ligari. Lib. 5. Epistol.

*Dominatio.*

Nulla facilior, præstantior, securior dominatio, quam amatoria. Lib. 4. & 5. Epistol.

Tamdiu securissimè dominaberis, quamdiu volentibus dominabere. Lib. 6. Epistol.

Illam dominationem esse cenſeo, quæ nulli seruiat seruo, quæ si quando seruit, tunc soli seruiat illi, qui solus nullius est seruus. Veram rursus tranquillitatem esse arbitror quæ ita instituta est, vt perturbationes vel nullæ contingant, vel si forte contigerint, tantum ipsi seruiant, quantum cæteris dominantur. Libro 6. Epistol.

Dominatio principatus iustus, nulli subditus.

*Domus.*

Domus tua sit Dei templum, prudentiæ oculi, libra iustitiæ, fortitudinis sedes, regula temperantiæ, honestatis exemplar, charitatis splendor, fons gratiarum, Musarum chorus, Oratorum, Poetarumque gymnasium, Philosophorum Theologorumque sacrarium, prudentum senatus, ingeniorum fomentum, præmium literatorum, pauperum mensa, bonorum spes, refugium innocentum, præsidium miserorum. Libro 5. Epistol.

*Donum.*

Donum mutua gratiarum relatio.

*Dulcedo.*

Dulcedo est sapor ex moderata humoris ærei concoctione proueniens. Lib. 16. capite 1. Theolog. Platon.

Dulcedo fit ex calidi & humidi permixtione. In Com. Platon. E.

*Educatio.*

Delicata luxuriosaque educatio ingenia vel diuina deprauat. In Commentariis Platon.

*Electio.*

Electio approbatio recta.

*Elementum.*

Elementum vocis vox simplex causaque quod cæteræ voces, voces sint.

Elementum ex quo componuntur & in quod composita dissoluuntur.

*Eques.*

Equitis officium est fortitudo quidem in bello, in pace verò magnificentia. Lib. 3. Epistol.

*Error.*

Minus errans, minus malè facit. Lib. 1. Epistol.

Quoniam singulis penè momentis fallimur & erramus, nulla ad consequendam tranquillitatem, vel ad deuirandos errores via commodior, quam pauca & egregia cogitare, pauciora & electa loqui, agere paucissima, & illa quidem tam possibilia quam honesta. Multum errant atque laborant, qui multa loquendo vel agendo aggreduuntur, plurimum autem qui plura loquuntur, & agant quam cogitauerint. Lib. 3. Epistol.

*Eruditio.*

Eruditio disciplinæ traditio.

*Euangelium.*

Euangelij prædicationem tria impedire possent videntur, pericula, labores, ignominia. In Commentariis D. Pauli.

Diuina virtus in Euangelio per tres potissimum gradus ad salutem felicitatemque perducet, & fidem quasi geminam atque iustitiam. Eodem Commentarios.

*F.**Facundia.*

Facundia perspicacia & facultas obtinendi quod propositum est.

*Fatum.*

Fatum est series animarum. Lib. 13. 2. Theolog. Platon.

Non aliter fatum dependet à prouidentia, quam à lumine calor. In Com. Platon.

*Felicitas.*

Non datur perspecta felicitas, nisi animis perfecte purgatis, hoc non Mosaica, sed Christiana lex efficit. Lib. De Christ. relig. cap. 34.

Felicitas in prospera operari finis consecutione consistit, id autem in singulis facultatibus sapientia præbet. Lib. 1. Epistol.

Nulla videtur ad humanam quandam felicitatem via commodior, quam quod vt plurimum sua cuique placeant. Lib. 3. Epistol.

Duas ad felicitatem vias diuinus Iamblichus ex Ægyptiorum mente describit, alteram Philosophicam, alteram sacerdotiam, illam quidem aptiorem ad felicitatem inueniendam, hanc vero breuiorem ad consequendam, illam in primis elegerunt Peripatetici, similesque Philosophi. Hanc maxime populus religiosus incedit. Lib. 9. Epistol.

Felicitas in sapientia iustitiæque consistit, in felicitas in contrariis. In Com. Platon.

*Felix.*

Solum felicem existimamus qui cum summa pietate seipsum Deo gubernatori commiserit, quicquid acciderit, tanquam à Deo factum probat, vel saltem laudat tanquam à Deo in bonorum ordinem redigendum. Lib. 6. Epistol.

Felix qui sua est fortuna contentus. Lib. 6. Epistol.

*Ferocitas.*

Ferocitas excessus audaciæ aut non metuens quæ metuenda sunt.

*Fides.*

Fides (vt Aristot. vult) est scientiæ fundamentum, sola fide, vt Platonici probant, ad Deum accedimus. Lib. De Christ. relig. cap. 37.

Fides amorem patrem suum fouet, atque hoc fomento ex amore generat amicitiam, iam nam alia fides eadem & auget quotidie seruatque penitus indelebilem. Lib. 1. Epistol.

Diuina fides longe certior est quam hominum sapientia, credulitas illa semper vera scientia confirmatur. Lib. 5. Epistol.

Fides recta præsumptio quod sic se res habeat vt sibi videtur, morum stabilitas.

*Fili.*

Filiorum est, genitorem sequi quasi radicem atque caput, & tanquam Deum alterum venerari. Lib. 3. Epistol.

*Finis.*

Finis noster est per intellectum Deum videre, per voluntatem viso Deo frui, quia summum

genum nostrum est, summæ potentie nostræ obiectum summum siue actus perfectissimus circa ipsum. Libro 14. Theologiæ Platonis capite 2.

In sola Dei siue cognitione siue possessione, ultimus finis consistit humanus, quæ naturalem sola terminat appetitum. Lib. 14. Theologiæ Platon. cap. 2.

Est finis, cuius gratia omnia operantur bonam. In Com. Platon.

#### *Fornicatio.*

Fornicatio est concubitus omnis lege prohibitus. Com. D. Paul. cap. 10.

#### *Fortitudo.*

Fortitudo est status immobilis. Lib. 14. Theolog. Platon. cap. 6.

Fortitudo ad opera honesta promptior, abicit à nobis timoris impedimentum, Libro 1. Epistol.

Fortitudo habitus animæ intrepidus, militaris audacia, peritia eorum quæ ad bellum spectant. Constantia animi aduersus illa, quæ terrere solent, audacia prudentiæ pedissequa. Intrepiditas in mortis expectatione. Affectione seruans in periculis rationale propositum. Robur contra periculum obfistens. Vigor tolerans omnia virtutis gratia. Perseueratio animi in iis quæ rectæ rationi audenda vel metuenda videntur, observatio eorum quæ ratio dicat in rebus patiendis. Rei militaris peritia, habitus in lege immobiliter.

Fortitudo scientia circa bona & mala audendi atque metuendi. In Com. Platon.

#### *Fortuna.*

O Fortunati quibus est fortuna parata iam sua. Ex. Lib. 3. Epist.

Nihil fortuna relinquit intactum, vel illæsum, vel Deus inultum. Lib. 3. Epist.

Fortuna cum magnum affectat hominem facere, ingentem prius facit bestiam; venenoso fastigio turgidam. Vnde & ingenio & vultu tyrannus nascitur prius quam tyrannide potiatur, sic præter dignitatem in dignitatibus constituti, faciunt ut dignitates ulterius ipsæ probis hominibus non sint dignæ. Faciunt etiam ut interdum neque diuina prouidentia mundum, neque humana prouidentia genus humanum agi, sed casu credatur. Lib. 3. Epist.

Malis quidem bona, Fortuna fit mala, bonis autem mala, fortuna bona. Lib. 3. Epist.

Vir certe diuinus non vult fortunam sibi ducem, ceca enim est sepeque casu cadit. Non gaudet fortunæ promissis, infida enim est vel suis quos propter dignitatem ad summum dignitatis culmen euexit. Lib. 3. Epist.

Nemo miserior illo qui veram felicitatem collocat in fortuna. Nemo felicior quam qui fortunæ prosperitatem reuera felicem esse non iudicat.

Qui puerilem Fortunæ ludum cum Socrate calcas, sapiens & diuinus ab Apolline iudicatur. Lib. 3. Epist.

Cæci omnium maximè illi mihi videntur, qui fortunam ideo cæcam ducunt, quia vel beneficiat malis, quibus reuera nihil est bonum, vel malefaciat bonis, quibus denique nihil est malum. Qualis enim in se quisque est, talia cuique sunt quæ accipit. Lib. 4. Epist.

Sacra mysteria ordineque diuini, non à temeritate fortunæ sed ab æterna sapientia Dei proficiuntur. Lib. 6. Epist.

Vbi Mars sedit, maximè ibi Fortuna & plurimum, & facillime fallit. 6. Epist.

Nemo magis cæcus quam qui cæcam fortunam quasi ducem sequitur. Nemo sæpius fallitur, quam qui fallacissimæ credit fortunæ promissis. Lib. 6. Epist.

Fortunam plerique cæcam existimant, quod nunquam videat quibus patrocinetur, aut etiam aduerfetur, sed absque delectu semper clientis cuiuslibet suscipit patrociniū, poterit & aliquis forsitan fortunam fingere non cæcam quidem, sed inuidam potius ac prorsus ambitionis. Quippe cum nolit viris ingenio prudentiaque excellentibus aspirare, quorum præclara facinora non fortis sed virtuti potius ascribuntur. Afflare verò soleat plurimum, vbi quicquid emerferit magnum fortunæ solum possit attribui. Contra verò pro viribus bonos insequi conarique vsque adeo virtutem deprimere, ut nihil ab ipsa præclarum vel geri vel comparari posse putetur. Vnde omnes denique fortunam faciamus deam cæloque locemus. Lib. 8. Epist.

Neque cum sapientia rerum contemplatrice, facile rerum domina fortuna consentiri. 1. Epist.

Ingenium & Fortuna diuisum in nobis habent imperium, hoc quidem in animi cultum plurimum dominatur, hæc verò quam plurimum in rebus externis. Hinc & Bona fortunæ dicuntur. Lib. 11. Epist.

Aristotelicum illud vbi plus intelligentiæ, ibi fortunæ minus, vbi plus fortunæ, illic minus intelligentiæ, plerique forsitan sic accipient, ut sapientissimi quique philosophique minimè fortunati sint, quod & carmina Pythagorica comprobant, & res ipsa confirmat, nec non Astronomica ratio, præcipuè per Mercurium atque Saturnum Philosophiam significari putant, hoc verò cum Ioue Sole, Venere, affluentiam rerum significantibus, nullum officij habere commercium. Denique legitimi veritatis contemplatores, & negligunt fortunæ bona, & ipsi à fortunatissimis negliguntur, neque principibus placent, neque vulgo probantur, ut non mirum sit eos minimum habere fortunæ, vicissim verò fortunatissimi quique plerumque negligunt sapientiam, plurimumque temerè & improuidè viuunt, fortunæ videlicet flatu confisi. Lib. 11. Epist.

Fortunæ motus ab occulto in occultum casu quodam felicitis actionis causa.

#### *Fortunatus, & Infortunatus.*

Fortunatus sciat bona fortunæ, soli bono esse bona, ac sereno æri succedere pluuias.

Infortunatus cogitet mala fortunæ, soli malo esse mala, ac post dies pluuios, serenos expectat esse. Lib. 3. Epist.

Fortunatus cui fortuna obtrigit mediocris. Lib. 6. Epist.

#### *Frugalitas.*

Frugalitas rationalis vitæ simplicitas morumque bonorum studium.

#### *Furor.*

Furor corruptio & estimationis veræ.

#### *G.*

#### *Gaudium.*

Gaudium lætitia in operibus temperantiæ.

#### *Genus, humanum.*

Cum humanum genus inter Deum & bestias mediū teneat, ob eamque causam vtrorūq; particeps esse merito videatur, in alterum migrare &



Quasi conuerti posse Trismegistus existimat. Etenim qui mente præcipue utitur, cum profectio beatissimam Deorum immortalium vitam agere, qui verò à corpore & sensibus, bestiarum. Lib. de Volup.

#### *Generositas.*

Generositas virtus ingenui moris, facilitas animi ad dicenda atque agenda pariter.

#### *Gratia.*

Plurimum virtuti gratia debet, quippe cum propter ipsam immortalis euadat. Audisti pro- uerbium illud, nihil citius gratia, quæ videlicet à rebus aliquando senescentibus oritur. Quæ verò à virtute semper viridi nascitur, arescit nunquam. Quidnam aliud sibi vult poeticum illud, Solis æterna est Phæbo Bacchoque iuuentus. Nempe nihil aliud gratia ipsa est, quam splendor atque lætitia. Splendor quidem ipse apud Poëtas appellationem Phœbi, lætitia verò Bacchi nomen accipit, virtus autem & menti splendorem, & voluntati lætitiā affert, viuētem semperque virentem. Lib. 6. Epist.

Gratia, voluntaria beneficentia, redditio boni, obsequi in tempore opportuno.

#### *Gustus.*

Gustus nihil aliud est quam tactus aliquis linguæ. Lib. Theolog. Platon.

#### *H*

#### *Habitus.*

Habitus affectio animæ secundum quam quales dicimur.

#### *Homicida.*

Non minus homicida censendus est qui hominem præcipit nasciturum quam qui natum tollit è medio. Audacior quidem qui præsentem abrupit vitam, crudelior autem, qui lucem inuidet nascituro, & nondum natos suos filios enecat. In Com. Platon.

#### *Homo.*

Nullum bruta præ se ferunt religionis indicium, ut propria nobis sit in Deum cœli regem erectio, sicut corporis in cœlum erectio propria cultusque diuinus, ita ferè, hominibus naturalis, quemadmodum equis hinnitus canibus uel latratus. Lib. De Christ. relig. cap. 1.

Homo perfectissimum animal, ea proprietate maximè tum perfectione pollet, tum ab inferioribus discrepat qua perfectissimis, id est, diuinis coniungitur. Libro de Christ. religione capite 7.

Per Deum tanquam ducem, & tanquam lucem agit quodcumque agit quisque & querit alibi. Lib. 2. Theolog. Platon. cap. 5.

Aquila visu hominem superat, multæ aues auditu, canes olfactu nullum vero animalium gustu & tactu. Libro 10. Theologiæ Platonis. capite 2.

Homo omnia diuinæ naturæ opera imitatur, & naturæ inferioris opera perficit, corrigit & emendat. Lib. 13. Theolog. Plat. cap. 3.

Nec utitur tantum elementis homo, sed orna, quod nullum brutorum facit. Libro 13. Theo. Plat. cap. 3.

Non imperat bestiis homo crudeliter tantum, & gubernat etiam illas, fouet & docet. Lib. 13. Theolog. Platon. cap. 3.

Homo qui vniuersaliter cunctis & viuētibz & non viuētibz prouidet, est quidam Deus. Lib. 13. Theolog. Platon. cap. 3.

Nec superiorem vult homo neque parem, ne-

que patitur superesse aliud ab imperio eius exclusum. Lib. 14. Theolog. Platon. cap. 4.

Duo sunt excellentissimi hominum actus, illi scilicet qui in excellentissima parte animæ sunt, & circa obiectum versantur excellentissimum: tales sunt, in mente nostra Dei cognitio atque amor. Lib. 14. Theolog. Plat. cap. 10.

Homo est temperans, continens, & è conuerso. Lib. 18. Theolog. Platon. cap. 10.

Omnino qui amorem gaudiumque suum non tam in Deo iam inuento quam in inuentione propria collocat, nunquam ineffabile lumen gaudiumque penes Deum vigens percipere potest, neque gustat vnquam, neque videt, quam suauis sit Dominus, neque thesauros illos apprehendit, quos abscondit Deus diligentibus se: quapropter, inanis, vacuus, obscurus, insipiens iudicatur. Comment. D. Paul. cap. 8.

Qui in omni ætate lautissima quadam curiositate viuunt, minus, sæpe tuti viuunt.

Qui verò adolēcentes se minus assuefecerint, adulti saltem assuefaciunt, cautiorem tamen & paulatim id tentantes. Libro De studios. fanit. capite 5.

Quicumque inter res medicorum arte laudatas potissimum eas eligit, quæ corpori simul & ingenio profunt, maximum vitæ sibi vendicat adiumentum. Lib. de vita producend. cap. 15.

Nihil inuita agas Minerua. Lib. de vit. coel. compar. cap. 23.

Omnes homines bene agere, hoc est bene viuere volunt, bene viuunt autem, si bona plurima illi ad sint. Lib. 1. Epist.

Solus homo infelix animal quæ Deus coniunxerat, separauit, imperium suum quod natura fuerat amplum cohibuit in angustum. Lib. 1. Epist.

Sicuti vas, ita homo sono cognoscitur. Lib. 1. Epist.

Cuius vita non probatur, eius oratio reprobat. Lib. 1. Epist.

Quod apud mortales nunc intermittitur, inter superos prorsus instauratur. Lib. 4. Epist. Nihil à magno paruum contemnendum. Lib. 3. Epist.

Qui sequitur omnia nihil assequitur. Libro 3 Epistol.

Qui à rebus externis pendet, semper sollicitum miserrimeque, viuere & sapissimè falli. Solus autem tranquille certeque viuit qui non extra se in rebus mortalibus, sed inter seipsum æternis vitam agit, solus nunquam pauper qui meridiem suam non in opere ponit, sed in opera, solus nunquam infortunatus, qui non post & extra principium expectat finem, sed finem suum in principio collocat. Lib. 3. Epist.

Delige omnes, elige & ama vnicum. Libro 3. Epist.

Bonus cunctis subito beneficus videbitur. Lib. 3. Epist.

Qui loquitur bene, agit autem male, hic frustra vel hominibus bona loquitur non credentibus, vel à superis bona petit non concedentibus. Lib. 4. Epist.

Leo & lupo & vulpes est hominibus homo, sicut optimum animalium est, si vsquam reperitur, homo optimus, ita pessimum animal est homo pessimus, prudentissimus est qui cautiſſimus, omnium autem, & qui diligenter ea uetab homine, sed hic opus Lynce atque

Oedypso, hic opus est Argo Solus hominum ingenium consiliumque tenebit qui semper neminerit aut nullo pacto, aut certe raro admodum difficillimeque posse teneri. Libro 3. Epistolarum.

Mala omnia vel bona vertuntur in malum, bona autem cuncta vel quæ videntur pessima in bonum conuertuntur. Lib. 3. Epist.

Vix fidem huic adhibemus, qui cuius vel homini vel iudicio properè præstat fidem. Quæmadmodum ocus cadit, qui mouetur ocus, sic fallitur qui credit facile. Lib. 3. Epistolarum.

Homo consideret, cum nunquam in terrenis viuere possit se cæli quidem ciuem esse, incolam verò terræ, vt annitatur, nihil cogitare vel loqui vel agere, quod minus dicere videatur cælestis patriæ ciuem. Lib. 3. Epist.

Qualis in se quisque est, talia cuique sunt quæ accipit. Lib. 4. Epist.

Homines peripatetici ex anima corporeque componunt, hominis animam Christiani tradunt mox genito corpore procreari. Libro 10. Epistolarum.

Solis inter homines rationis oculis capti sunt, qui non vident, quam mirabili ratione singulæ mundi partes disponantur & moueantur, soli fortunæ cuidam, vt ita dixerim & iniustitiæ summæ subiecti videntur, qui vbi exactissimus ordo rerum infinitam indicat authoris potentiam, & sapientiam, & iustitiam, ipsi vel irrationalem putant impetare fortunam, vel de diuina gubernatione quasi minus iusta quæruntur. Lib. 4. Epistolarum.

Homo vel solus vel maximè omnium est animal, vt dicunt philosophi, sociabile, cui adhuc ipsum soli sermonis condendarumque legum, est à natura tributa facultas. Lib. 4. Epist.

Non creauit ad parua quædam Deus homines, sed ad magna, qui non implentur paruis, ac magna non nouerunt, imò verò solum vel infinita creauit eos, qui soli in terris infinitam reperere naturam, quibus finitum nihil, quamuis maximum, penitus satisfacit. Lib. 5. Epist.

Noli altitudinis magnitudinisque humanæ viribus vlllo pacto confidere, altissima quæque ventis atque fulgoribus sapius quatiunt, moleste ingentes casu concidunt grauiore difficilisque resurgunt. Lib. 5. Epist.

Sic tibi animus humilis pariter atque excelsus, grauitas comitate permixta, vita sobria, lingua veridica, sed parcissima, largissima manus, promissio non temeraria, firma fides, observatio plena, diuturnum consilium, prudentum sententia diligenter examinarum. Ne multi quotidie te facile fallant, neque multis ipse, neque facile credas. Non persuasio blanda, vel leuis quælibet, coniectura sed ratio duntaxat certa te moueat.

Neque aggrediare principium nisi finem ipsum tam optimum quam certum ante prospereris. Malos & infames deuita ministros ne malus ipse Dominus habearis. Lib. 4. Epist.

Omne tulit punctum qui miscuit vtile dulci. Lib. 5. Epist.

Male sanis & inquietis nihil occurrit sanum nihilque quietum. Lib. 6. Epist.

Ego autem illos esse reuera altissimo iudicio, quos ob ipsam animi altitudinem, quasi in Olympi vertice constitutos, perturbationum nebulæ non attingunt. Cæteros omnes solco as-

perari. Eos postremo & acutissime cernere & rectissime iudicare omnia iudico, qui tanta esse singula, non quanta eminus prospicienti foris apparent, sed quanta intus reuera sunt, iudicant. Eos quoque tanquam magno animo iudicioque viros soleo magnificere, qui haud tanti faciunt singula, quanti aliunde apparere fortè contingit, imò quanti ipsa sese sua virtute singula faciunt. Lib. 6. Epist.

Profecto compertum habemus magnis sæpe inceptis hominibusque futuris quandoque magnis ingentia passim imminere discrimina, siue magnanimi, grandia, dura, ardua moliantur, siue aduersa fortuna tentata sapius atque superata, viros fortissimos prudentissimosque efficiat, siue communis liuor, plurimorumque ambitio. Lib. 6. Epistolarum.

Compertum habemus, homines quo prudentiores sunt, eo minus casu viuere, paucioraque in familia rebusque suis agi fortuito. Libro 11. Epist.

Propheticum, omnia vanitas, omnis homo mendax. Lib. 12. Epist.

Boni homines in aduersis discernuntur vt à malis, & exercentur, & probantur, probatio verò, & profectus & constantia bonum. Libro 10. Epistolarum.

Mortales profecto tam hebetes sunt, vt bonum non aliunde prorsus cognoscant, quam ex comparatione malorum, tam ingrati, vt Deum bonorum omnium largitorem non facile colant, nisi malis oppressi. Quamobrem morbis perturbationibusque frequentibus cruciati, ad Deum ipsum tanquam ad medicum opitulatoremque confugere compelluntur, cogunturque cognoscere non terrenam quidem prouinciam (vbi anguntur assidue, nunquam vero quiescunt) suam fore patriam, sed cælestem. Libro 12. Epistolarum.

Sæpe homines & priuatim & publicè tam extremis vndique coercentur angustiis vt nusquam pateat exitus, nulla iam speretur humana salus, sed tamen diuina bonitas & potestas filiis suis pia mente suppliciter obsecrantibus propitiâ porrigens, ex alto manum declarat, Deum solum esse in extremis calamitatibus seruatorem. Lib. 12. Epistolarum.

Si fecit Deus hominem ad imaginem suam, certè est in homine statua Dei, quamuis additamenti abscondita. In Com. Dionys. Areo.

Hominem perditum etiam si belle loquatur audiendum non esse, neque licere de moribus loqui nisi homini morato. In Com. Pla.

Homines à tenera ætate quemadmodum arbores à tenerioribus curandi sunt, & ad frugem optimam dirigendi. ibidem.

Homo denique totus est mundus, per intellectum quidem refert proportionem aliqua firmamentum, per vtriusque expressionem Mercurium, per sensum imaginationemque Solem, per irascibilem Martem, per concupiscentiam Venerem, per vegetalem Lunam, per cælum vehiculum, per corpus tractabile regionem Elementalem. In Com. Platon.

Homo bonus qui huiusmodi est, & homini bona reddat. Homines boni gaudiis semper bonis aluntur. Lib. 12. Epist.

Homo animal sine pennis bipes, laris vnguis quod solum ex animantibus scientiæ rerum per rationes sit particeps. (Plat.)

Homo ludus iocusque Deorum est. In Com.  
Hominis virtus est affectio siue habitus animæ,  
quo potentia naturalis eius quam optime suum  
opus exercet. In Commentariis Plat.

Est homo, anima rationalis, mentis particeps,  
corpore vtens. In Commentariis Platon.

#### *Honor.*

Honor bonorum largitio propter virtutis offi-  
cium, æstimatio ac dignitas virtute acquisita, fi-  
gura venerationis, conseruatio dignitatis.

#### *Humanitas.*

Cætera bona liuorem irritare solent, sola hu-  
manitas mitigare. Lib. 3. Epist.

Sola humanitas esca est, qua homines capiun-  
tur, sola hominum gratia prospere res humanæ  
geruntur. Lib. 5. Epist.

Est humanitas ipsa præstanti corpore Nympha,  
coelesti origine nata, Æthereo ante alias dilecta  
Deco. Siquidem eius anima spiritusque sunt a-  
mor & Charitas. Oculi eiusdem grauitas magna-  
nimitas. Manus præterea liberalitas & magni-  
ficentia. Pedes quoque comitas & modestia. To-  
rum denique temperantia atque honestas, decus  
& splendor. O egregiam formam, ô pulchrum  
spectaculum. Lib. 5. Epist.

#### *Humilitas.*

Humilitas facilitas animæ, omnis expers ira-  
cundiæ.

#### *Imitatio.*

Accommodatio ad virtutem via est imitatio  
quam lectio, sanè quemadmodum harmonia dū  
præfens aures nostras illabitur vehementius af-  
ficit, quam dum præterita cogitatur, ac præ-  
lium cum spectatur, acrius mouet, quam cum  
narratur, sic egregia viuientium heroum opera  
ardentius ad virtutem inflammant, exactiusque  
formant, quam veterum Philosophorum de mo-  
ribus disputantium verba.

#### *I.*

#### *Idea.*

Omnes ideæ tanquam species quædam sunt  
intellectuales atque diuinæ.

#### *Ignis.*

Finis ignis est cœli ultimi concavum. Lib. 2.  
cap. 6. Theolog. Platon.

#### *Ignorantia & confidentia.*

Ignorantia & confidentia sui, nacta quidem  
potentiam terribilis est, si vero sit impotens ri-  
dícula fit. In Com. Platon.

#### *Immortalitas.*

Immortalitas essentia viuens & sempiterna  
perseueratio.

#### *Impudentia.*

Impudentia habitus animæ infamiam lucri cau-  
sa subiens.

#### *Incontinens.*

Incontinens, in quo etsi non malè iudicat ra-  
tio, præualet tamen corporea perturbatio. Lib.  
18. Theolog. Platon. cap. 10.

#### *Incontinentia.*

Incontinentia affectio trahens ad ea quæ in-  
cunda videntur, præter rectæ rationis iudicium.

#### *Indocilitas.*

Indocilitas tarditas ad discendum.

#### *Indolentia.*

Indolentia habitus quo in dolores nunquam  
incidimus.

#### *Indigentia.*

Indigentia bonorum diminutio.

#### *Industria.*

Industria ingenium animæ quo quisque mu-

nitus est, in singulis quod decet facilè conicit  
mentis acumen.

#### *Ingenium.*

Ingenium dicendi velocitas, genitura bona na-  
tura, virtus insita in natura.

#### *Ingratitudo, & ingratus.*

Iuste tibi ingrati sunt homines, quibus ipse  
non iuste donaueris. Quinetiam tu nunquam  
erga alium ingratus fuisti, vel hominem vel cer-  
te Deum ingratitude punitur Lib. 3. Epist.

#### *Iniquitas.*

Iniquitas habitus qui leges despicit.

#### *Iniustum.*

Iniustum est, quod contra legem est. In Com-  
mentariis. D. Pauli. cap. 10.

#### *Innocentia.*

Innocentia sola optimam in posterum spem  
animo præbet, vnicum vitæ solamen. In Com.  
Platon.

#### *Intelligentia.*

Intelligentia cogitationis intentio.

#### *Intrepiditas.*

Intrepiditas habitus per quem timoribus nul-  
lis mouemur.

#### *Intellectio.*

Intellectio scientiæ principium.

#### *Intemperans.*

Intemperans in quo vel ratio consopita est,  
vel deprauata, affectu nimium dominante, vbi  
ad imperium phantasie omnia fiunt, neque asse-  
ctui ratio aduersatur. Lib. 18. capite 10. Theo-  
log. Platon.

Nullus intemperans prudens esse potest. In  
Commentariis Platon.

#### *Inuidia.*

Inuidia tristitia ex amicorum bonis siue præ-  
sentibus siue præteritis.

#### *Inuoluntarium.*

Inuoluntarium quod præter sententiam fa-  
ctum.

#### *Ira.*

Optimum tutissimumque est irasci nunquam,  
quid enim aliud est ira feruere, quam ebrium in-  
sanumque euadere? Vbi verò ira frenum excul-  
serit, interea donec iracundia referuescat, freno  
cohibenda est lingua. Lib. 5. Epist.

Ira prouocatio irascibilis animæ partis ad vl-  
ciscendum.

#### *Iudicium.*

Iudicium rata pronuntiatio de eo quod in dis-  
ceptionem venit.

#### *Iurisconsultus.*

Iurisconsultus, qui lege vtitur non legitime, &  
malus iurisconsultus est, & homo malus, Legi-  
timus ergo iurisconsultus homo est, cuiusque  
legitimus. Lib. 1. Epist.

Magna apud homines iurisconsulti dignitas  
est, hic publicus ciuium patronus, hic commu-  
ne ciuitatis oraculum, hic diuinæ voluntatis &  
mentis interpres. Quid in terris pulchrius est æ-  
quo, æquitatis legumque interprete, in quo  
contra quid turpius, desideras arbitror legitimi  
iurisconsulti effigiem & indolem inueneri, ô  
quam pulchrum spectaculum, quam mirabile,  
huius anima Dei est cultus, spiritus patriæ, legis  
cura, cerebrum, iudicium perspicax, oculi, lin-  
guæque doctrina, pectus memoria tenax, corre-  
cta voluntas, manus rectæ voluntatis effectus,  
pedes perseuerantia, totum æquitas atque gra-  
uitas. Lib. 1. Epist.

Iustitiam officium, ut omnium grauissimum sit atque sciat, quod qui facram adulterat legem, seu sacrilegum scilicet censura plebendum esse quam qui nummos. Lib. 3. Epist.

### *Iniustitia, Iniustitia & iustus.*

Originalis iustitia humana non ex interioribus principiis eius habuit ab initio, sed gratia diuinæ dono, quod ab origine totius naturæ humanæ primo parente traditur fuisse collatum. Libro de Christ. religio. cap. 13.

Iustitia Dei per legem Euangelicam reuelatur. Comment. D. Paul. cap. 5.

Iniustitia auersio quædam est à Deo. In Commentariis D. Paul. cap. 5.

Perfecta iustitia, scilicet perpetua salute digna per solam legem gratiamque Euangelicam comparatur. Commentar. D. Paul. cap. 4.

Iusti officium est, suum cuique tribuere, maioribus honorem atque reuerentiam, æqualibus domesticam quandam consuetudinem, inferioribus opem atque consilium. Quantum iustæ actionis sit fructus hinc perspicue declaratur, quod neque domus, neque ciuitas, neque exercitus, neque commercium prorsus vllum vel bonorum hominum vel malorum absque iusta distributione quæ sit promeritis consistere potest. Qui quidem si vique adeo mundi machinæ necessaria est dici non potest. Nempe si desit hominibus siue congregantur in vnum, à se inuicem cito perduntur, siue disiecta vixerint, à feris passim lacerabuntur, o perpetuum humani generis vinculum, o saluberrima nostrorum medicina morborum, o publica ciuitatis anima, Iustitia quid lux in Deo? Immensa suæ bonitatis veritatisque exuberantia.

Quid angelis? Intelligentiæ certitudo à Deo manans, profusumque gaudium voluntatis. Quid in cœlestibus? Copia vitæ ab Angelis, virtutis explicatio à cœlo, risus cœli. Quid in igne? Viralis quidam vigor à cœlestibus insitus, & efficax propagatio. Deinde in iis quæ sensuarent effusa cœlitus gratia. In sentientibus exhilaratio ipsius spiritus, sensusque vigor. In omnibus summam intimæ fecunditatis effusio, vbique, diuinæ veritatis, bonitatisque imago, id est, de lumine, lumen quo momento penetrat molle diaphanum, transuerberat vel durissimum. Item quo breue spatium, eodem quoque longissimum. In corporeum est igitur, cui neque duritia resistit nec spatium. Lib. de Lum.

Lux est forma primi corporis prima. Libro de Lumine.

Cœli luminisque natura, ut foueat omnia, non cogitur de integro per cuncta discurre, si verum sit paradoxon, semel esse cunctis infusam. Lib. de Lumine.

Autem Platonici, sicut se habet frigus ad calorem, nigredoque ad albedinem, sic habere tenebras se ad lumen, ut tenebræ non sit priuatio pura luminis, sed lux minima vel opacissima. Nigredinis opacum lumen, perspicuum quasi quædam paulo clarioris luminis inclinatio. Color quædam luminis terminatio. Lib. de Lum.

Lumen solius illuminantis proprius & naturalis actus existit. Lib. de Lum.

Quando lumen calefacit aërem, calefactio & à lumine dependet, & aëre, atque inter lumen

caloremque tenet medium. Libro de Lumine.

Lumina luminibus non confundi, hinc apparet, quod si ad tres lucernas decambulaueris, tres umbras ex opposito reddes, videlicet propter tria lumina inter se non confusa. Libro de Lumine.

Lux in mente est veritas gaudens, gaudiumque, verum lumen à mente in corporibus est quædam veritatis rerum sensibilem declaratio, pulchritudinis flos, oblectatio sensus. Lib. de Lum.

Lumen in diuinâ mente lumen supereminat. Lib. de Lumine.

In omnibus mentibus Lumen est vita exuberans, veritas clara certaque, lætitiâ plena, inde in corporibus est diuina explicatio, & effusio vitæ, declaratio veritatis rerum & authoris, gratia formæ, voluptatis incitamentum. Libro de Lumine.

Lumen est quasi numen quoddam in mundo hoc templo, Dei similitudinem referens. Adde ut Plato noster in libro de Republica hoc ipse boni filium nominauerit. Est enim instar Dei & aspectu ante omnia venerandum. Est & amplificatio quædam subita & latissima absque detrimento sui ob exuberantem bonitatem largitatemque suam cunctis sese libentissimè largiens; causa conseruatioque & excitatio omnium quæ nascuntur. Proinde ad vitam, lætitiâ, veritatem, vnde descendit cætera subleuat. Absque huius præsentia mori cuncta videntur, huius autem præsentia reuiuiscere. Lib. de Lumine.

Vnum in omnibus & circa omnia lumen. Lumen in omnibus à Deo factis est quidem diuinæ claritatis splendor, atque (ut ita loquar) est Deus quasi seipsum finiens, & ad operum suorum capacitatem sese accommodans.

Deus autem ipse est lumen immensum in se ipsam consistens, ac per se in omnibus, & extra omnia per immensum.

Fons ille vitæ in cuius homine (ut ait David) videmus lumen. Lib. de Lumine.

Occulta quidem lumina sunt intellectus Angelici animalesque. Manifesta vero sunt cœlestia lumina. In Commentaria Dionysij Areopagitæ.

### *M.*

#### *Magnanimus.*

Magnanimi est præ magnitudine sua parui facere quæ parua sunt & breuissima temporalia omnia, quorum quod est præteritum, non amplius, quod est futurum, nondum est, quod præsens indiuisibile est, & incipit simul ac desinit. Lib. Epist.

#### *Magnanimitas.*

Magnanimitas moderatus contingentium risus, urbana cum hominibus conuersatio, magnificencia animi cum ratione.

#### *Magistratus.*

Magistratus officium est, meminisse se non dominum esse legis, sed ministrum, tutoremque publicum ciuitatis, præterea se à Deo dum ipse homines iudicat, iudicari. Libro 3. Epistolarum.

Magistratui non proprium bonum, sed publicum cogitandum, non partem solum ciuitatis quandam, sed totam esse curandam Lib. 4. Epist.

Plato sæpe numero magistratus optimos legibus anteponebat, quod leges absque illis omnino videantur inutiles: eas enim seruabit nullus. Magistratus optimi ipsi sint leges. Sed ait magistratus non posse optimos fieri, nisi ciues sint optimi viri, neque viros fore tales nisi adolecentes quoque puerique sint tales. In Com. Platon.

*Magister.*

Magistri officium est doctrina & bonitate sua discipulum doctum atque bonum, quasi mentis suæ filium procreare. Lib. 3. Epist.

*Maleuolentia.*

Maleuolentia est voluptas ex malo alterius sine emolumento suo. Lib. de Volupte.

*Malum sine mala.*

Impossibile est mala penitus extirpare, necessarium est enim bono aliquid semper esse contrarium. Lib. 1. Epist.

Fugari non possunt aduersa, sed fugi. Libro 1. Epist.

Non est malum in hæc incidere, quæ vulgo dicuntur mala, nisi malis dignus fueris. Mala enim non patitur nisi malus. Lib. 4. Epistol.

Mala continuè cogitamus, non agitant vndique mala. Mala quotidie sequimur, merito nos mala sequuntur. Lib. 4. Epistol.

Malum ab ipso summo bono permittitur gratia boni. Res enim difficiles & aduersa vitium quidem curabile purgant, incurabile verò puniunt. Illic igitur purgationis, hic iustitiæ lucet bonum. Lib. 12. Epistol.

*Manfuetudo.*

Manfuetudo animæ aduersus iræ impetum immobilis: moderata temperies animæ.

*Maritus & Vxor.*

Mariti officium est, vxorem quasi corpus suum sensumque diligere, ac diligentissime ducere.

Vxoris prudentem maritum suum veluti suum animum rationemque honorare atque libentissimè sequi. Lib. 3. Epistol.

*Matrimonium.*

Quis nesciat creato quondam homini nihil prius antiquiusque à deo præceptum institutumque, quam matrimonium. Idque apud omnes gentes summopere celebrari? Hoc semper & honorauere potentes, & sapientes non contempserunt, utpote qui videbant ad res quidem agendas conducere; litera autem si temperate viuas & parce tempus expendas non impedire. Lib. 4. Epistol.

Quicumque solus vixerit, intelligat se aut fortè maius aliquid homine esse, aut proculdubio minus, siquidem phænice rarior est, qui inter homines vires humanas transcendat. Hic ergo præ cæteris humanitaris fungetur officio, qui continuam, domesticam, indissolubilem inierit societatem. Cuius commercio publicam ipsam generis humani societatem & seruare nitatur & gubernare perdiscat. Nempe quemadmodum ex domibus ciuitas, ita ex rei familiaris disciplina Reipublicæ peritia constituitur. Nesciet regere ciuitatem qui domum gubernare non didicit. Non amabit patriam qui vel bona illius vel mala parum ad se pertinere censebit. Non curabit fortè seipsum grauioribus imbueret moribus, qui cum solus viuat, non sit familiaris bonorum morum præbiturus exemplum. Ocio & licentia quadam negligentior quotidie deteriorque euadet, quisquis in re familiari non fuerit occupatus.

Nesciet vere quenquam stabiliterque amare, qui verum indissolubilemque amorem coniugis & filiorum non experitur. Non discet pati foris & superare ferendo, nisi qui domesticum habuerit patientiæ præceptorem.

Non discet hominum misereri, qui vel coniugem vel filium nunquam senserit lamentantem. Siquidem mens non ignara mali, miseris succurrere discit. Quod verò omnium decretum est, is cui neque sit suis prospiciendum, neque pro suorum salute Deus sæpe vocandus, humanas ex parte negliget leges, & homines ipsos cultumque diuinum. Denique difficillimum erit, non exuere hominem, nisi legitimum matrimonij pallium induerimus. Quamobrem si vultis amici homines esse, si filij legitimi Dei, legitime genus hominum augere, & tanquam Deo similes instar Dei, filios vobis similes procreate, nutrite, regite, gubernate, Memento præterea in re familiari diligentissime gubernanda, vos ipsos colere, Reipublicæ terrenæ & peritiam discere & assequi dignitate, Reipublicæ munera promereri. Lib. 4. Epistol.

*Medicus.*

Medici officium est cogitare quando ægrotantes adit agide vita, ut nihil sine ratione tentare audeat, nihil sine consilio. Lib. 3. Epist.

Medici humani officium est, & si minus sanitatem, saltem semper præstare prognosticon, diuini verò pariter vtrumque complecti. Libro 12. Epistol.

*Memoria.*

Memoria dispositio animæ in hærentem illi veritatem custodiens.

*Mel.*

Mel est apum succus gradu secundo calidus, virtute abstergens, sapore dulcissimus, tactu pinguis. Lib. 16. cap. 1. Theolog. Plat.

*Mendacium & mendax.*

In loquendo caueto mendacium, non minus quam scopulum nauigator. Cito mendacem detegit perditque mendacium. Libro 3. Epistolarum.

Mendacium ciuitatis calamitas est, videlicet quando priuati inter se mentiuntur, maxime verò si magistratibus mentiantur. Perinde ac si ægroti medico vel nauæ mentiantur gubernatori. Licet autem gubernatoribus interdum uti mendacio salutis publicæ gratia, & priuato quandoque erga priuatum, solum gratia mali, cuiusdam grauissimi deuittandi. Licet & confabulari de antiquis moderatè, quarum veritas ignoratur, & quasi per imagines quasdam resillas quarum certam formam vix habemus, effingere. In Commentariis Platon.

Mendacem quasi mancum & mutilatum à re publica excludendum.

Mendax verò nominatur, & qui dedita opera mentitur aliis, & qui per ignorantiam mentitur ipse sibi ibidem.

*Mens.*

Eget mens veritate, veritas mente non indiget. Lib. 1. Theolog. Platon. cap. 6.

Mens humana quotidie à particularibus formis ad vniuersales absolutasque se confert. Lib. 1. Theolog. Platon. cap. 3.



Omnia bonum appetunt, mentem vero non omnia, non enim assequi mentem & sapientiam omnia possunt, ideoque multa sunt quæ eam non appetunt, ne frustra appetant. Lib. 1. Theol. Platon. cap. 6.

Mens omnis aliquo modo æterna est. Lib. 1. Theolog. Platon. cap. 6.

Mentem sibi quam aliis præ cæteris significat naturam, consilium, affectum Dei, prodegit ergo ex Deo tanquam verbum, imo tanquam verbi significatio à loquente Deo. Libro 2. Th. Platon. cap. 6.

Mens cogitatione affectuque immensa est, pro ut inmensa machinatur & vult, perque immensum suam operatione discurret. Lib. 2. Theolog. Platon. cap. 6.

Scopus finisque mentis est ipsum verum bonumque (id est) Deus. Huc essentiali quodam instinctu ignis instar currit prius quam vitali, & vitali prius quam intellectuali. Nihil est autem quod obsistat, quin essentia mentis usque ad Deum penetraret, corpus enim spiritui non resistit, multoque minus spiritus. Lib. 2. Theolog. Platon. cap. 6.

Omnes mentes Dei sunt instrumenta. Lib. 2. Theolog. Platon. cap. 9.

Mens quælibet volendo potius facit opera, quam viuendo. Lib. 2. Theolog. Plat. cap. 11.

A mente virtute Dei fit ordo partium unitarum. Libro 4. Theolog. Plat. cap. 1.

Mens hominis infinitarum & distinctarum inuentrix rerum, usu sermonis innumerabilis suffulta est: quasi quodam digno eius interprete: manibus quoque munita tanquam aptissimis instrumentis adiuuenta mentis innumerabilia fabricanda, quæ quidem instrumenta, natura eadem dedisset & bestiis, si illis inesset artifex idem interior, talibus instrumentis vsurus. Lib. 13. cap. 3. Theolog. Platon. cap. 3.

Mens veritatis locus est. Lib. 15. Theologiae Platon. capite 14.

Mens verò illa videtur esse verissima, quæ nihil vnquam falsi admittit, nihil prorsus ambigui. Libro 2. Epist.

Dementes nimium sunt illæ mentes & miseræ, quæ omnem, in hoc operam suam semper impendunt, ut corpus atque externa quam optime ornatisimeque se habeant, ut autem bonæ ornataque ipsæ sint penitus negligunt. Libro 3. Epist.

Sicut aer ad lumen solis, sic se mens habet ad veritatis & sapientiae lumen. Libro 5. Epist.

Quod ad mentem est lingua, id ferme religiofa mens est ad Deum. Itaque non tam mens nunc tua Deo, quam Deus per mentem tibi tuam loquitur. Lib. 7. Epist.

Est mens vultus ad veritatem conuersus, huius duo oculi sunt, dexter & sinister, ille veritatem eorum, quæ in diuina mente sunt inspicit, hic eorum quæ ab illa. Ille intuitus sapientia, hic scientia. In Com. plat.

Dux sunt mentium diuinarum dotes: vna quidem claritas intellectus omnia cernens: altera: verò optimus vitæ habitus. In Plorin. Com.

#### *Mensura.*

Mensura medium excessus atque defectus.

#### *Mercator & artifex.*

Mercatoris officium est, veridica fide atque diligencia externis alimentis alere ciuitatem atque seipsum. Item. Mercatores & artifices & alij

ita pecunias querant, ut nemini noceant. Nam quicquid à malo surgit, in malum denique recidit, ita seruent ut neque frustra videantur, neque solum gratia quæ fuisse, sic expendant, ut diu possint expendere, atque honestè & vtiliter expendisse probentur. Lib. 3. Epist.

#### *Meridies.*

Meridies tempus in quo umbræ corporum quam breuissimæ sunt.

#### *Merus.*

Est autem merus, à ratione auersa declinatio, siue futuri mali solliciti expectatio. Libro de Voluptate.

Merus concussio animæ in expectatione mali.

#### *Modestia.*

Modestia voluntaria ad id quod optimum iudicatur concessio, in gestu corporis compositio.

#### *Moderatum.*

Moderatum medium inter excessum atque defectum secundum artem sufficiens.

#### *Monitio.*

Monitio sermo ex sententia castigans, sermo ab erroribus absterrens.

#### *Mors.*

Mors diuisione & resolutione contingit. Lib. 1. Theolog. Platon. cap. 3.

Vitæ formæque vitali contraria mors quodammodo dicitur, seu aliqua mortifera qualitas formæ, sicut frigiditati caliditas, humiditati contraria est siccitas. Lib. 5. Theolog. Platon.

Mors est animæ à corpore liberatio. Libro 16. Theolog. Platon. cap. 8.

#### *Mores.*

Mores viæ sunt vel ad inferos vel ad superos. Lib. 18. Theolog. Platon. cap. 10.

#### *Mulier.*

Mulier studeat quodammodo ut sit virilis, maxime verò pudica. Quantum enim virum magnanimitatem decet, tantum pudicitia mulierem. Lib. 3. Epist.

#### *Mundus.*

Minus est mundus ad Deum, quam corpus ad animam, magisque eger Deo mundus, quam corpus anima. Lib. 2. Theolog. Platon. cap. 6.

Nec per mundum Deus, sed per Deum mundus quatenus potest extenditur. Theolog. Platon. cap. 6.

Didici à magistro vitæ, mundum totum in maligno possum esse, bono tamen viro in bonum cuncta reuerti. Lib. 3. Epist.

Mundus certe quamuis à ratione quadam pulcherrima optimaque, pulcherrime optimeque disponatur atque ducatur, tibi tamen immundus atque malus tibi, id est, hominum generi qui immundus viuus in mundo, malusque in bono. Prima tibi mundanorum malorum origo est, mundanorum bonorum nimius appetitus. Libro 3. Epist.

Mundus Deus statum fabricatus est suam. In Com. Dionys. Areopag.

Est contra religionem mundum vituperare tantumquam malum. In Com. Plorin.

#### *Musici & Musica.*

Diuina Musica est rectus cogitationum, verborum actionumque concentus. Libro 1. Epistolarum.

Musici officium est, in sono gratiam, cantus

in cantu sermonis elegantiam imitari, meminisse etiam motus animi multo magis oportere consonantes esse quam voces. Inconcinus enim alienusque à Musis est Musicus, cui dum consonat vox, lyraque, mens dissonat, iubet Dauid Mercuriusque quandoquidem Deo mouente canimus, canamus & Deum. Lib. 3. Epist.

### Musa.

Non decet Musam fieri mendicam, & innocentiam miserabilem. Lib. 1. Epist.

Nihil afferunt Musæ nobis aliud nisi patientiam, malorum virtutem perferendorum. Lib. 5. Epist.

Non decet Musas fieri aut lasciuiz ministras, aut iniquitatis arma. Lib. 1. Epist.

Quantum igitur vsum ipsum laudamus Musarum, tantum vituperamus abusum. Quisnam maxime musis abutitur? Nisi qui aut harum vestigia temere importuneque sectatur, aut vulgarem Venerem imprudenter admiscet, aut eas à duce ipsarum Apolline segregat. Non capiant scientiam in seij homunculi, sapientiam ipsam insipienter capeffentes. Non rite camenæ canunt, sed silent aut strident, vbi petulans Veneris filius interpellat, non apre Pieridum saltat chorus, imò claudicat & vacillat, vbi dux chori procul abest Apollo. lib. 5. Epist.

### N.

### Natura.

Sicuti se habet ars ad naturam, sic & natura ad Deum. Lib. 2. Theolog. Plat. cap. 7.

Sicut natura operibus suis infert morum, sic natura præstat Deus esse. Lib. 2. Theol. Platonis cap. 7.

Tamdiu existit natura, quamdiu Deus seruat eam existendo. Ibidem.

Quid est naturas natura quedam materiam tractans extrinsecus. Lib. 3. Theolog. Plat. cap. 1.

Natura cuiusque vna quædam forma virtutisque ad vnum quoddam opus certo modo determinata, toto suo impetu faciens quicquid facit, & necessario faciens. Lib. 2. Theolog. Platon. capite 11.

Natura est series corporum. Lib. 13. Theolog. Platon. cap. 2.

Difficile est naturam prorsus exuere. Lib. 14. Theolog. Platon. cap. 10.

Natura in nobis corpus & spiritum cum anima coniunxit. Corpus quidem remediis medicina curatur, Spiritus autem qui æreus sanguinis vapore & quasi quidam animæ corporisque nodus, æreis quique odoribus, sonisque & cantibus temperatur & alitur. Animus vnum quiddam est, est anima & corpore, spirituque compositum. Lib. 1. Epist.

Natura nobis instrumenta quibus discamus multa largitur, oculos, nares, aures, gustumque & tactum, vnicum vero quo doceamus instrumentum dedit, scilicet loquendi se facultatem. Lib. 3. Epist.

Profecto sic natura sæpe vices rerum rependit, quandoquidem sunt & plerique senes etiam ingenio pueri. Lib. 8. Epist.

Natura (vt dicit Plato in Polit.) vel Deis ars est, vel artificiosum Dei organum. In Commentariis Patont.

Natura instrumentum prouidentiz est. In Commentariis Plotin.

### Nomen.

Inter omnia Dei nomina præcipuum est ipsum bonum. Com. Dionys. Arcopag.

Nomen dictio simplex significatiua eius quod secundum essentiam prædicatur, & omne quod secundum seipsum minime dicitur.

### Nox.

Nox umbræ dici contraria, solis priuatio.

### O.

### Obletamenta.

Obletamenta terrena non implent animum sed titillant. Lib. 14. cap. 7. Theolog. Platon.

Solent ea nos oblectare, quæ satis desideria faciunt. Lib. 9. Epist.

### Occasio.

Occasio flos ipse temporis rebus agendis conferens: tempus bonum quandam ferens opem.

### Officium.

Officium verè præstantissimum est, proculdubio quod & maxime necessarium, & in primis ab omnibus exoptatum, efficere videlicet vt hominibus sit mens in corpore. sana in Apol.

Officium est actio vniuscuiusque propria, decorum honestatemque seruans, prout res, persona, locus, tempusque postulat. Lib. 3. Epist.

### Opera.

Opera vehementius quam verba mouent, maxime mouet alios, quia ipse mouetur maxime, omnino autem offendit aures, qui aliter canitore, aliter pulsat lyram. Lib. 1. Epistol.

### Operatio.

Perfectior est operatio stabilis, quæ vno momento perfectissime suum opus absoluit, quum quæ indiget tempore. Lib. 1. Theolog. Platonis capite 5.

Operatio Dei est perpetua quædam in seipsum conuersio, per quam seipso fruatur & gaudeat. Lib. 9. Theol. Platon. cap. 6.

### Opifex.

Vanus est opifex qui ab alio magis, quàm ab ipso opere expectat honorem, non pendet operis virtus ex iudice, sed opus iudici commendat artificem. Lib. 1. Epist.

### Opinio.

Opinio perceptio cum fide per ratiocinationem, rationis discursus, cogitatio in verum & falsum. Recta opinio vera per coniecturam probabilem æstimatio est. In Commentariis Platonis.

### Opportunitas.

Opportunitas tempus in quo vnumquodque aptum est, vel pati aut agere.

Opportunitas imminetia temporis in quo vel agere vel pati quicquam oporteat.

### Opulentia.

Opulentia possessio rerum sic moderata vt ad felicitatem conferat, abundantia rerum ad beatitudinem conferentium.

### Oratio sine precatio.

Quid potissimum sit in oratione petendum, eiusdem verbis propheta similiter aperit, cum enim tria hæc, Timor, Amor, Laus, efficiant vt impetremus, merito tria eadem, dum adoramus, nobis postulanda videntur. Concedit nobis videlicet Deus, vt eum timeamus rectè, amemus ardentè, ritè laudemus, summum vero adorare docet & impetrare Dauid, vbi

ait, Delectare in Domino, & dabit tibi petitiones cordis tui. Libro 10. Epist.

Oratio vox quæ scribi potest, pronuntiatiua cuiusque rei compositio ex verbo ac nomine sine harmonia cantus.

#### Orator.

Oratoris officium est, qui aliis suafurus est, sibi iam ipsi suafuisse. Lib. 3. Epist.

#### Os.

Os medulla calore consolidata.

#### Offensatio.

Offensatio affectio, quæ sibi vendicat ea bona quæ minimè adsunt.

#### Ordo.

Ordo concentus operationum adinuicem communionis proportio, vicissitudinis in omnibus causa, contemplatio ad percipiendum idonea.

#### P.

#### Palma.

Palma, virtus, præmium, sui ipsius gratia exoptandum.

#### Pater familias.

Patris familias officium est filios colere, quasi propriæ vitæ propaggines, atque optimo suo exemplo regere tanquam membra. Lib. 3. Epist.

#### Patientia.

Patientia non ut agas præcipit sed patiaris. Quanto difficilius agere est quam pati, tanto difficilius bene agere est, quam bene pati. Cæteræ quidem virtutes omnes in bene agendo versantur. Patientia verò sola in bene patiando consistit. Lib. 5. Epist.

O miram patientiæ potestatem, virtutes quidem aliæ contra fatum quoddammodo pugnant, patientia verò vel sola vel maximè omnium expugnat fatum; quæ enim fatum immutabilia necessariaque fore decernit, Patientia animi diuinæ prouidentiae voluntatē consentiens, ita quoddammodo mutat, ut ex necessariis faciat voluntaria, sicut qui malè agit, bona sibi met conuertit in malum, ita qui benè patitur, mala sibi vertit in bonum, nempe in perferendis malis ipse bonus euadit. Lib. 5. Epist.

Patientia bonum vsque adeò bonum est, ut absque ipsa cætera hominum bona perfici nequeant. Lib. 5. Epist.

Tria præcipuè ut mihi videtur, patientia, præcipit, primum, ut mala libenter pati velis, quæ ipsa natura iubet ut pati nolis. Secundum, ut ipse tibi voluntaria facias, quæ fatum necessaria fore decreuit. Tertium, ut mala quælibet veritas in bona, quod Dei solius est officium, in primo quidem repugnare naturæ, in secundo verò expugnare fatum, in tertio iubet denique æquare se Deo Lib. 5. Epistol.

#### Pavor.

Pavor trepiditas in expectatione mali.

#### Pax.

Diuinæ pacis officium est vniuersi ordinem conseruare. In Com. Dionysii Areop.

Pax quæ qua ab inimicitiis belli cessamus.

#### Peccatum.

Omne peccatum contra legem est diuinam & naturalem atque civilem. In Commentariis D. Pauli cap. 10.

Peccatum actio præter rectam rationem.

#### Peccator.

Nemo grauius miserabiliusque peccat,

quam qui cum Angelo rebelli per ingratitude nem, & superbiam à Deo deficit, creatore bonorumque omnium largitore. In Commentariis D. Paul. cap. 9.

Nihil magis necessarium esse vtiliusque peccatoribus quam confiteri peccata, affici penitentia, pœnas à iudice petere, æquo animo ferre ut purgetur animus, antequam insanibilis morbus eius euadat. In Commentariis Plat.

#### Perseuerantia.

Quantum bonum perseuerantia sit hoc indicat, quod non cæteræ virtutes bona pollicentur, perseuerantia præstat, quæ quidem quanto difficiliore est, tanto cæteris laudabilior. Libro 1. Epistol.

Principium vel voluntatis vel sortis, perseuerantia vero virtutis. Lib. 1. Epist.

Sanè non in carceribus currentium præmium sed in calce locatur. Cursum aggredi cuiuslibet est, vel ignauissimi, peruenire verò paucorum.

Perseuerantia affectio quæ perficit quæcumque elegerat, id est, tolerantia voluntaria aduersus labores inconcussus habitus.

#### Perturbatio.

Perturbatio (ut Stoicis placet) est auersa à recta ratione contra naturam animi commotio, camque ab opinione nasci putant. Libro de Voluptate.

#### Pietas.

Pietas iustitia erga Deum, affectu colens Deum, voluntaria veneratio Dei, recta honoris diuini scientia. Est pietas Dei patris agnitio. In Commentariis Plat.

Pietas sanctitatem excitat. In Com. Plat.

#### Φιλανθρωπία.

Φιλανθρωπία, id est, humanitas, affectio amicitiae hominum conciliatrix, habitus hominibus beneficus, gratiarum redditio, gratitudo benefica.

#### Philosophia & Philosophus.

Totum hoc Philosophiæ studium (ut inquit Plato) est meditatio mortis. Lib. 16. Theolog. Platon. cap. 8.

Philosophus diuina quærat diligentius, ut fruatur, perscrutetur, & naturali. vtatur. Lib. 1. Epist.

Tria sunt apud Philosophos præcipua, finis videlicet, origo, atque materia, quibus cuiusque doctrinæ perfectionem iudicare consueuerunt. Lib. 4. Epist.

Philosophiæ tres species à Platone adinuentas atque distributas, huic naturæ Trinitati ex omnibus suis partibus respondere. Ut ea philosophandi facultas quàm de rerum causis, progressionibusque dixerit, Deo rerum principio congruat. Altera vero qua differendi origo modusque tractatur, Deo veritatis illustratori conueniat. Postrema philosophiæ pars, cuius præceptis & institutis vitam agimus, nosque ipsos & familiam ac Rempublicam ad felicitatem consequendam dirigimus, Deo quoque beatitudinis largitori comparatur. Lib. 4. Epist.

Philosophia cum sit cæleste munus, terrena vitia procul fugat, fortunam fortissimè domat, mitigat misericordè fatum, mortalibus bonis certissimè vtitur. Immortalia munera largitur ad votum. Lib. 4. Epist.

Cum ab omnibus philosophia (ut nomen ipsum à Pythagora inductum perhibet) sapientiæ amor definatur, sapientiæ verò diuinorum

contemplatio sit, certè Philosophiæ finis est cognitio diuinorum. Libro 4. Epistol.

Quicumque Philosophus futurus est, ab ipsa natura sic institutus esse debet, ut primo quidem ad omnia disciplinarum genera facilis ac promtus existat: Deinde, ut natura sit verax, ab omni mendacio penitus alienus, tertio loco, ut contemptis omnibus quæ corruptioni obnoxia sunt, illis quæ semper eadem permanent, mentem adhibeat. Magnanimus quoque & fortis sit necesse est, qui nec mortem metuat, nec inanem cupiat gloriam. Præterea temperatum hunc quodammodo nasci oportet, easque animi partes, quæ affectibus effertur solent, domitas à natura suscipere. Quisquis enim veritatis avidus ad diuinorum contemplationem mentem conuertit, voluptates corporis parvipendit. Oportet præterea liberali animo Philosophum esse. Etenim rerum vilium æstimatio homini veritatem rerum contemplaturæ aduersa est nimiumque contraria. Maxime verò omnium ingenij acumine atque memoria, & magnitudine animi illi opus esse videtur. Lib. 4. Epist.

Philosophia ascensus est animi, ab inferioribus ad superna, à tenebrisque ad lucem, principium eius diuinæ mentis instinctus, media vero ad facultates disciplinæ quæ ex narrauimus finis summi boni possessio, fructus denique rectæ hominum gubernatio. Lib. 4. Epist.

Philosophia non docet nos vitam cum principibus agere, nam si id vetat omnino (ut certe vetat) nullo modo docet. Vetat autem penitus ut mihi videretur, quandoquidem contraria iubet, nempe inueniendo veritatis amore tranquillitatem animi, & libertatem vitæ desiderat, apud principes autem non veritas habitat, sed mendacia, simulationes, dissimulationes, obreæationes, adulationes, non tranquillitas animi, sed cura, sollicitudo, inuidia, & omnis denique perturbatio, non libertas omni charior auro, imò tam misera seruitus ut neque subditis parcat unquam, nec principibus, eiusque finis si tvel seruitus vel ruina. Lib. 5. Epist.

Nemo usque adeo sit humanæ facultatis ignarus, ut confidat se posse ritè libereque Philosophari ac simul securè tutoque vitam apud principes agere. Lib. 5. Epist.

Sola ex omnibus facultatibus & artibus hominum pia semper Philosophia omni studio prouidet, ne velin cæcitatem tam miseram corrumpamus vel tam graue odium subeamus, nullum enim aliud veri Philosophantis officium est, quam singulas tum partium, tum vniuersi rationes & causas excogitare semper atque docere. Libro 7. Epistol.

Virorum Philosophantium amicitia non minoris apud mortales videtur esse momenti, quam inter cœlicolas cæteris feliciū planetarum. Lib. 10. Epist.

Deus ipse pro religiosa Philosophia, pro pietate pugnabit Lib. 10. Epist.

Est autem Philosophi officium diuina nosse, gubernare humana: in illo contemplatiua Philosophia, in hoc actiua comprehenditur. Philosophus itaque primo diuinam, id est, absolutam ipsius boni naturam per sapientiam contemplatur. Deinde ad id velut ad finem humanas operationes dirigens, humana gubernat. Eiusdem autem seire est rectè hominem vnum, familiam, ac rempub. gubernare. Quamobrem qui mora-

lis est, idem Dominus, ciuilis, rex idoneus esset. Ex quibus concluditur in ipso Philosophantis officio hæc omnia contineri, sapientiam, prudentiam, iustitiam moralem, domesticam, ciuilem, ac regiam disciplinam. Per sapientiam diuina cognoscit, per prudentiam iustitiamque humana gubernat, dum rem suam, rem in familiarem, rempublic. administrat. In Commentariis Platonis.

Philosophus est verus imitator Dei. In Commentariis Platonis.

Philosophia appetitus sapientie, contemplatio veritatis, ut veritas est, cura animæ secundum rectam rationem.

*Poeta.*

Poëtæ officium est, ut naturam moreque pingere valeat, utrumque vidisse. Lib. 3. Epist.

*P. sic/sio.*

Mediocris rerum possessio, & temperatus fortitunæ afflatus, ut securior est, & stabilior; sic ad Mineruam & Musas accommodatior. Libro 3. Epistol.

Possessio rerum tam excedens quam deficiens, non solum motibus, & concordia, sed ingenio etiam & artibus obest. In Commentariis Platonis.

*Potentia.*

Summæ potentie sunt naturæ, mens, mentis, quæ caput atque voluntas. Lib. 14. Theologia Platon. caput 7.

Potentia quæ est per se ipsum efficax.

*Potestas.*

Potestas excellentia in agendis seu dicendis habitus quo potentes efficiuntur.

*Præceptum.*

Mosaica præcepta in duo genera apud Theologos distinguuntur, alia ad naturale moraleque ius pertinent, alia ad ceremonias & iudicia, prima illa à Deo Mosi data sunt, secunda Moses ipse instituit diuinitus inspiratus. Rursus prima omni hominum generi semper seruanda mandantur, secunda solos Iudæos astringunt, videlicet usque ad Messiam ipsius aduentum. Prima quæ diximus adeo communia sunt, ut cuique etiam non minus liberaliter instituto, vel solo naturali iudicio cognita esse potuerint. Quid enim in eis aliud continetur, præter Dei vnius cultum, vitamque Moralem. Lib. Epist.

*Princeps.*

Tres sunt præcipui (ut Magi tradunt) principes super mundum, Oromasis, Mithras, Arimanis, id est, Deus, mens, anima, Lib. 4. Theolog. Platon. capite 1.

Arbitramur à iustis principibus, iuste subditos gubernari. Lib. 3. Epist.

Principis virtus est, circumspecta prouidentia, iustitia clemens, sublimitas humilis, humilisque sublimis. Lib. 3. Epist.

Principibus nullum præstantius prædiorum genus esse dicebat Plato, quam eorum qui familiaritates cauponari nescirent. Lib. 4. Epist.

Nihil periculosius est in principe, quam si quam plurimi cum contemnunt, vel oderint vel nimis inuideant, contemptus quidem sciant, grauitate, integritate vitatur. Odium verò innocentia, & humanitate lenitur. Inuidia denique munificencia, liberalitate, magnificentiaque sedatur. Lib. 5. Epist.

Nunquam fore bonos in Republic. principes, nisi sint viri probatissimi, statim videlicet à se-

nera aetate diligenter exculti. In Commentariis Plat.

### *Principatus.*

Principatus prouidentia vniuersi.

### *Prinatus.*

Prinatus officium est tam libenter magistratum parere mandatis, vt non legis necessitate compellitur, sed propria voluntate videatur adductus. Lib. 3. Epist.

### *Præcrastinatio.*

Sera nimis vita est crastina, vñe hodie. Lib. 1. Epist.

Prorogatio vitæ etsi interdum morum emendatio est, sæpe tamen præteritæ prosperitatis abrogatio vel derogatio. Libro primo Epistolarum.

### *Propinquitas.*

Propinquitas communio in eodem genere.

### *Prouidentia.*

Prouidentia est series mentium. Lib. 13. Theol. Plat. cap. 2.

Prouidentia in rebus necessariis sua nunquam deferit. In Com. Plor.

Diuina prouidentia nunquam alios contrà omnem fortunæ fauorem, repente ad imum è summo vñstigio delicit. Alios contra malignum fortunæ impetum euehit mirabiliter in excelsum, si quos aut vel superbos stare diu, vel humanos ad tempus cadere sinit, permittit etiam vt & illi tam deiecta miseraque mente sint, quàm alia sorte, & isti tam excelsa mente quàm humili & abiecta fortuna. Libro tertio Epistolarum.

Prouidentia præparatio ad futura.

### *Prosperitas.*

Humana prosperitas, falsa quidem felicitas, ac veræ felicitatis impedimentum. Epistolarum Libro tertio.

Terrena prosperitas toties humano generi aperiuntur mentita iam fuisse conuincitur, quor in vniuerso temporis cursu ab initio mundi, ad nos vsque momenta fluxerunt. Libro tertio Epistolarum.

Vberior vanæ prosperitatis afflatus, vanos mortalium animos inflat, tumidosque reddit atque ægros. Lib. 3. Epist.

Facillimè multis de causis quas intelligere quilibet facile potest, prosperitas nostra turbatur, atque perinde vt iactus in alium lapis quando altissimè ascendisse videtur, tunc subitò sine villo temporis intervallo descendit, ita fortuna quæ ad summa euexit fastigia rerum, statim sine mora vel iubet eum velut è monte sponte descendere, vel ipsa præcipitat, sanè & grandioribus casus grauior, & altioribus ruina profundior imminet, sæpissime post blandas auras Zephyrosque suaves, repente stridens aquilone procella velum aduersa ferit, fluctusque ad sydera tollit. Libro 3. Epist.

Diuina prouidentia statuit terrenam prosperitatem idcirco volantem, & fugacissimam esse, ne tenere diutius non procul à diuina beatitudine posset, cum ne momentum quidem à nobis vñum ipsa teneri possit. Atque etiam ne morbis frequentibus cogemur cœlestis Medici frequentius recordari. Meminisse præterea nos in regione, tam inquieta non esse tanquam in parria constitutos, sed quasi quodam exilio relegatos. Lib. 3. Epist.

Prosperitas vberiore afflatu animos inflata rerum copia immoderatos facit & negligentes, licentia reddit deteriores, ad scelera cuncta propellitiores. Lib. 5. Epist.

### *Prudentia.*

Prudentia notitia rerum priuatim & publicè rerum administrandarum. Libro primo Epistolarum.

Summa prudentia aut nunquam aut certè cōacta, inicit cum fallacissima fortuna certamen. Lib. 6. Epist.

Prudentia vis quæ per seipsam ad beatitudinem humanam ducit: scientia bonorum & malorum, dispositionem felicem præstans, potestas quæ quid etiam agendum sit & quid non iudicamus.

Prudentia scientia bonorum malorumque propriè ad hominem pertinentium. In Comment. Plat.

Tanta prudentiæ perfectio est, vt & optanda docet exoptare atque comparare, & comparatis ea potissimum vti ratione qua profint. In Com. Plat.

### *Pudor.*

Pudor audaciæ remissio, eiusque optimum apparet spontanea & libens acceptio, formido vituperationis veræ.

### *Pulchritudo.*

Humana pulchritudo, videtur priusquam ametur, Diuina verò amatur vt videatur. Lib. 2. Epistolarum.

Ipsa pulchritudo prima nihil aliud est, quam splendor gloriæ penes patrem luminum, & figura substantiæ eius. Vnde triplex emicat pulchritudo, prima quidem per Angelicos intellectus, secunda verò per intellectuales animas. Tertia per corpora vbiq; formosa, quasi lumen vñum per tria quædam vitra coloribus inter se varia, ideoque variam ex primo splendorem reddentia. Lib. De Lum.

Pulchritudo nihil aliud est quam summi boni splendor, fulgens præcipue in his rebus, quod oculis, auribus, mente percipiuntur, perque illas ad ipsum bonum, visum, auditum, mentemque conuertens. In Com. Plat.

### *Purgatio.*

Purgatio deteriorum à melioribus segregatio.

### *R.*

Margaritæ autem religionis pretiosissimæ sæpe tractantur ab ignorantibus, atque ab his tanquam suisbus conculcantur. Lib. De Christ. rel. in Proem.

Si inanis religio esset, per eam rursus homo omnium esset imperfectissimus, quoniam per eam dementissimus atque miserrimus. Lib. De Chr. rel. cap. 1.

Communi quoque hominum varicinio religio vera est, omnes namque semper vbiq; colunt Deum, vitæ futuræ gratia. Lib. De Christ. relig. cap. 1.

Religio est inimica corporibus. Lib. 14. Theol. Plat. cap. 10.

Religio fatum damnat, asserit libertatem. Lib. 14. Theol. cap. 10.

Nusquam & nunquam religionis facta est intermissio, licet aliàs, & alibi aliter Deus honoratus sit cap. 10. eodem Lib.

Nihil habent homines religione diuinius. Ibidem.



Cætera hominum studia, vt plurimum à diuinis seiungunt, mortalibus coniungunt, religio autem contra à mortalibus soluit, diuinisque religat, vbi Stygiis amarisque saporibus procul expulsi, nectarea nos suauitate perfundit, si quando aliàs religioni indulgendum fuit, hac tempestate potissimum est indulgendum, hoc enim malorum omnium sæculum est. Libro 6. Epist.

Tota religio naturalis homini, firmissimum immortalitatis fundamentum. Libro decimo Epist.

Oportebat religionem (quæ quidem ad felicitatem vnica est via) non rudioribus tantum hominibus, verum etiam peritioribus commune fore. Quæ quidem duce omnes ad beatitudinem cuius gratia nati sumus, & ad quam consequendam communi studio laboramus, facilius, rarius peruenire possimus. In Comment. Platon. in Proem.

Religio est, eius quod Deo redditum est assidue, iustisque operibus cum Deo ipso indissolubilis religatio, vt merito sapiens ille dixerit, funiculum triplicem difficile solui, funiculum, inquam, ex pietate, sanctitate, religioneque connexum. In Comment. Plat.

Religio religat sanctitatem. In Comment. Platon.

Tota religio naturalis homini firmissimum immortalitatis fundamentum est. In Comment. Plot.

#### Res.

Res humanæ umbris, cogitationesque somniis sunt confimiles. Lib. 12. Epist.

#### Respublica.

Beatissimas fore Respublicas, dicebat Plato, si aut Philosophi dominantur, aut saltem qui gubernent diuina, quadam sorte philosophentur. Nihil enim pestilentius esse potest, & audacia quàm ignorantia comitetur. Tales quoque subditos esse solere quales magistratus. Lib. 4. Epist.

Resp. cœtus multorum hominum ad felicitatem per se sufficiens, legitima multitudinis conspiratio.

#### Rex.

Regi maximo curæ est re vera honorari, quam aut his aut illis gestibus honorari. Lib. De Christ. relig. cap. 4.

Rex imperans secundum leges nulli subiectus, irreprehensibilis, cuius ordinis institutor.

#### Robur.

Robur ins vnumquodque in natura sua seruans, eo quod detrimenta deuitat.

#### S.

#### Sacerdos.

Ad nullum magis quam ad pium sacerdotem pertinere singularis charitatis officia, quæ quidem in maximo omnium beneficio quam maxime lucent. In Apologia.

Nihil in terris honesto sacerdote pulchrius est, turpi verò nihil turpius. Ille religionis hominumque salus, iste pestis. Lib. 1. Epist.

Sacerdos est temporalis quidam Deus, Deus verò sacerdos æternus. Lib. 1. Epist.

Sacerdotis virtus & officium est, sapientia quædam pietate feruens, & pietas sapientia lucens. Lib. 3. Epist.

#### Sacrificium.

Sacrificium hostiæ donum Deo exhibitum.

#### Sacrilegius.

Sacrilegi habendi sunt, qui iuniorem imò & quorumlibet animos verbis morbosue inficiunt. Lib. 1. Epist.

#### Sagacitas.

Sagacitas innata ratiocinandi virtus.

#### Salus.

Salus munitio ab omni damno secuta.

#### Sanctitas, Sanctus, & Sanctum.

Vtrobique incidunt in Scyllam, cupientes vitare Charybdim: sancti enim deliramenta nugæque mortalium fugientes, in dæmones incidunt tentatores. Non enim his est certamen aduersus carnem & sanguinem, sed aduersus (vt Paulus inquit) maleficos quosdam spiritus aëris caliginosi tyrannos. Lib. 12. Epist.

Sanctus est eius quod Dei est, Deo agnito retributio. In Com. Plat.

Sanctitas pietatem confirmat & sancit, sanctitas quoque religionem mouet. In Com. Plat.

#### Sanctimonia.

Sanctimonia vitæ doctrinam efficit venerandam, iuniores seniorum mores facile ebibunt. Lib. 1. Epist.

Sanctimonia cautio declinans à peccatis quam aduersus Deum committuntur, diligens observatio diuini cultus secundum naturam.

#### Sanitas.

Sanitas animæ habitus affectibus non succumbens.

Scientia arbor et si radices aliquantulum amara habere videtur, fructus tamen profert quæ suauissimos. Lib. 1. Epist. & 5. Epist.

Scientia vel de rebus agit penitus separatis, vel omnino corporeis vel mediis, illa quidem diuina, ista naturalis, hæc Mathematica. Harum quælibet secatur in tria. Diuina enim vel contemplatur Deum, vel substantias omnino diuinas, vt Angelos vel intellectuales animas, nostras quidem diuinas, sed quodammodo etiam vergentes ad corpora, sed interim separabiles. Huculque diuina scientia contemplatur. Naturalis autem tria quoque considerat: vel elementalia corpora, vel cœlestia, vel animas his coniunctas. Mathematica quoque triplex, aut enim solam quantitatem tractat, siue memorialem, siue continuam, vt Arithmetica, Geometriaque. Aut etiam cum ratione motus, vt Astrologus, aut etiam cum ratione sensus, siue visus, siue auditus, vt perspectiua, vel Musicus: nouem igitur communia scientiarum lumina sunt. Lib. De Lum.

Scientia comprehensio animæ immutabilis, ratione vis comprehensiuæ alicuius, vel quorundam ratione immutabilis, ratio vera in cognitione immutabilis.

#### Sapientia.

Sapientia sine audacia prodest quidem, quamuis non magnificet, sed obest nunquam. Lib. 1. cap. 1. De Christ. relig.

Sapientia in singulis humanis operibus nos vti compotes pro viribus efficit, neque aberrat vquam, neque fallitur, alioquin sapientia reuera non esset. Lib. 1. Epist.

Sapientia est rerum diuinarum cognitio, res autem diuinas, Plato in Libro de Republica non aliter menti nostræ innotescere, posse, quam Deo nos illustrante, demonstrat, quemadmodum corporum formas oculis, non aliter, quam sole oculos, illuminante videri. Libro 1. Epistolarum.

Conducunt ad sapientiam defendendam, non tam Martis milites, quam Palladis sacerdotes. Lib. 1. Epist.

Principi non aliter necessaria est sapientia, quam corpori anima. Libro quarto Epistolarum.

Quisnam sapientiam recte adorat, nisi quod sapienter? Sapienter autem hanc solus adorat, quod poscit à sapientia sapientiam. Non possumus nisi per illam quicquam vel ab ipsa vel ab alio petere sapienter, non possumus quicquam ab illa sapienter petere nisi illam. Libro quarto Epistolarum.

Felix cui succedunt omnia bene, soli autem succedunt qui bene omnibus vitur, solus bene omnibus vitur, quod & sui ipsius & aliorum vires à sapientia didicit, felices igitur soli sapientiae sacerdotes, quod vel in ipsa humana (ut ita dicam) miseria sunt beati. Lib. 4. Epist.

Deus per Mercurium celestium minimam sapientiam, virtutum maximam significari voluit, ut meminerimus, minimam esse in hominibus sapientiam, quippe cum nobis à stellarum minima promittatur. Docuit præterea sapientiam nec in magnitudine corporis constitutam esse, nec ab ipsa mole materiae proficisci. Nonnunquam homines corpore, audacia, fortuna, minimi, sunt sapientia maximi. Deinde Sol quidem Deum ipsum præfert, Mercurius sapientem, Mercurius igitur nunquam à Sole discedens, significat animum dumtaxat sapientem fore, quod nunquam discedit à Deo, Sol quinetiam principes significare putatur. Cum igitur Sol nullam stellarum propinquiorem habeat quam Mercurium, admonet interea, principes debere nullos habere familiaritate coniunctiores quam sapientes: quod autem Mercurius idem, sapientiam, eloquentiamque mittit, literarum studiosos iubet eloquentiae studium cum studio sapientiae copulare. Lib. 10. Epist.

Mentis diuinæ idearumque cognitio sapientia dicitur. In Com. Plat.

Sapientia scientia est quæ nihil penitus præsupponit: scientia eorum quæ semper sunt, scientia quod rerum omnium causam contemplantur.

Sapientia certa rei comprehensio est, quare prius ratione disiuncta sit res oportet, ut certo percipiatur. In Com. Plat.

Sapientia est absoluti diuinique boni scientia. In Com. Plat.

#### *Sempiternum.*

Sempiternum, quod per omne tempus & prius extitit, & nunc est, nulli corruptioni obnoxium.

#### *Senectus.*

Senectus decrementum vitæ tempore factum.

#### *Senex.*

Senex videat ne puerilis sit, recorderetur iuuenem se fuisse. Lib. 3. Epist.

#### *Sensus.*

Sensus ita se inuicem habent, ut ordinem quemdam loci pariter, & naturæ contineant. Oculi enim purissimi sunt & ut Timæus Platonius disputat, ac probat, ignis lucisque naturæ cognati. Aures secundum ordinem puritatis obtinent, atque aëri comparantur. Nares deinde tertium tenuitatis gradum obtinent & possident, & crassiori quadam natura concreta, medium inter aërem, aquamque continent. Deinceps verò gustandi organum crassius est, & aquæ naturæ, si-

milissimum. Postremo tenuitatis gradu hæ, quibus tanquam tangimus partes distribuuntur, hæ namque ad corporis naturam accedunt propinquius, ac terræ crassitudini deputantur. Lib. de Voluptate.

Sensus animæ progressus, mentis motus.

#### *Sermo.*

Loquendi vsus atque scribendi homini proprius, diuinam quandam indicat mentem nobis inesse qua careant bestiae. Lib. 13. Theolog. Plat. cap. 3.

Ad excellentius aliquod opus est nobis sermo tributus, videlicet tanquam mentis Interpretes, infinitorum inuentorum præco, atque nuncius infinitus. Lib. 13. Theol. Plat. cap. 3.

Sermo foetens putridæ mentis est signum. Lib. 1. Epist.

Vt possis bona loqui, audi bona, ut etiam audias de te bona. Fieri enim non potest, ut qui male loquitur non male audiat. Libro primo Epistolarum.

#### *Seruus & seruitus.*

Serui officium est, existimare vitam suam esse domini, atque rationem domini suam esse. Lib. 3. Epist.

Nulla arctior, iucundior, felicior seruitus quam voluntaria. Lib. 4. & 5. Epist.

Quicumque verò voluptatibus pecuniæque aut gloriæ vel imperandi studio seruiunt insanabili quodam animi morbo, & multiplici dolore præmuntur. Lib. 5. Epist.

Moderata seruitus est qua Deo seruitur. In Com. Plat.

#### *Spiritus.*

Spiritus qui aëreus sanguinis vaporem & quasi quidam animæ corporisque nodus, aëreis quoque odoribus sonisque & cantibus temperatur & alitur. Lib. 1. Epist.

Spiritus principalibus membris infident: vitalis viget in corde, naturalis in iecore, animalis in cerebro. In Com.

#### *Societas.*

Societas amicitia ex diuturna æqualium consuetudine conflata.

#### *Sol.*

Sol qui genuit ignem, ignis formator extitit. Lib. 5. Theol. Plat. cap. 8.

Sol inter celestia Dominus, in hoc vel maxime cæteras rerum naturalium causas antecellit, quod calore omnia quidem facit, lumine verò demonstrat. Libro duodecimo Epistolarum.

In cælo Sol ipse solus fons luminis, omnibus dominatur, idemque apud Astronomos potentiam significat atque sapientiam, nona cæli plaga gaudens, velut æde Mineruæ. Cui etiam vicinitate Mercurius sapientis nomen obtinuisse videtur. Lib. 12. Epist.

Solius Sol superare potest Iouem. Libro 12. Epistol.

Sol omnium maxime Deum tibi significare potest. Lib. De Sole.

Sol tanquam manifestus cæli Dominus omnia prius cælestia regit & moderatur. Libro de Sole.

Merito cum tempus à motu dependeat Sol per quatuor signa mobilia, tempora quatuor anni distinguit. Lib. de Sole.

Sol oculus æternus omnia videns, supereminens cæleste lumen, cælestia temperans & mun-

dana. Harmonicum mundi cursum ducens sine trahens. Mundi Dominus, Iupiter immortalis, mundi oculus circumcurrens, habens sigillum, omnia mundana figurans, luna stellis granida, stellarum lunaregina. Hæc Orpheus, apud Ægyptios Minervæ templis aureum hoc legebatur inscriptum. Ego sum quæ sunt, quæ erunt, & quam fuerunt. Velum meum revelavit nemo. Quem ego peperit fructum, Sol est natus. Vbi apparet Solem Minervæ, id est, intelligentiæ partem, florem, fructum esse. Theologi veteres. Proculo teste, dicebant reginam omnium Iustitiæ à medio Solis Throno percuncta procedere, omnia digerentem. Quasi Sol ipse sit moderator omnium, Iamblichus Ægyptiorum sententiæ, ita narrat, Quicquid habemus boni habemus à Sole videlicet vel ab ipso solo, vel si & ab alijs, id quidem vel à Sole absolutum vel à Sole per alia. Item Sol elementarium omnino virtutum Dominus, Luna virtute Solis generationis domina, Ideo Albumasar per Solem, inquit & Lunam vitam cunctis infundit. Moses cælestium Dominum in die Solem esse, in nocte lunam, quasi nocturnum Solem. Lib. de Sol.

Solem esse regem, lunamque, quæ Solis & soror est & coniunx, esse reginam cælestium ipsa signorum in Zodiaco dispositio manifestè declarat. Lib. de Sol.

Dominus noster Plato, Solem ipsius boni conspicuum filium nominavit. Arbitratus quoque est Solem esse perspicuam Dei statum in hoc templo mundano, ab ipso Deo positum, intuentibus ubique præ cæteris admirandam. Hunc veteres, ut Plotinus ait, & Plato venerabantur ut Deum. In Sole præsci Gentium Theologi omnia Gentilium numina collocarunt. Quod quidem Iamblichus, Iulianus, Macrobiusque testantur. Denique quisquis non videt Solem in mundo, imaginem esse vicariumque Dei, is profecto, neque noctem consideravit unquam, neque Solem suspexit exorientem, neque cogitavit quantum excedet sensum. Quam subito viæ redeant, quæ procul ipso mortua putabantur. Neque munera Solis animaduertit, quibus solus ipse facit, quod stellæ cunctæ conficere nequeunt. Solem igitur vel Phœbum, Musarum, id est, intelligentiæ ducem, unā cum Platonis atque Dionysio imaginem Dei conspicuam concludit. Lib. de Sole.

Sol conspicuus in mundo nobis est imago. Sol tam visus generis quam videnda suscitavit ad agendum, cumque oculis videnda coniungit. In Com. Dionys. Arcop.

Sol unius est mundani omnis luminis principium. In Com. Plat.

Sol oculos generat vimque videndi illis præstat. ibid.

Sol cælestis ignis qui solum ab ortu ad occasum ab eisdem aspicitur potest, animal sempiternum astrum animatum diurnum & maximum.

#### *Sophista.*

Sophista inueniuntur nobilium atque diuitem mercenarius venator. Sophista ambitiosus & fallax Philosophi æmulator est. In Comment. Plat.

Sophista similis est illi qui piscatur hamo.

Sophista est mercator quidam qui disputationes, disciplinasque morum, eo consilio accumulavit passim, ut mercede quadam commutet, atque vendat. ibid.

Sophista est avarus quidam artifex, qui quæ-

stus gratia priuata illegitimè tractat, & docet, atremque contradietoriam proficitur. In Com. Plat.

Sophista est versutus falsarum opinionum disseminator. In Com. Plat.

#### *Sors.*

Vbi plurimum sapientiæ, minima opus est sorte, vbi minimum sapientiæ, sors plurima dominatur. Et si interdum fortuna sapientiæ iungitur, non tamen simul utraque regnat. Aut enim nullo pacto sors rationi coniungitur, aut seruit. Quamobrem sors, probis inuida viris totis obstitit viribus, ne proba visquam ratio regnet, utpote quæ illa regnante sit gloriæ & imperium amissura. Sæpe sors dotat multum, quem parum natura virtutis dotauit. Neque dicitur facile quem natura virtutis dotauit. Lib. 3. Epist.

Plura tibi admodum maioraque dona sors dabit vitro quam lacestia. Quot enim violentiæ persequeris, totidem certè te fugient, atque quod absit, si quando poterunt, fortè fugabunt. Lib. 6. Epist.

#### *Spes.*

Spes expectatio boni.

#### *Stultitia & miseria hominum.*

Stultitia ridicula, miseria flebilis esse videtur. Stultitia quid aliud est quam iudicii deprauatio? Miseria quid, nisi appetitus afflictio, ex deprauatione iudicii proficiens. Libro primo Epistolarum.

Illud in primis stultissimum non iudicare non possum, quod multi bestiam quidem suam imò feram noxiam & indomitam, hoc est, corpus pascant diligentissimè, seipsos autem, id est, animum ipsum, quantum in eis est fama perire permittunt. Lib. 1. Epist.

Stultitiæ fructus est miseria. Libro primo Epistolarum.

#### *Sufficiencia.*

Sufficiencia perfecta bonorum possessio, habitus quo unusquisque suis ipsius Dominus sit.

#### *Superstitio.*

Sæpe iners ignorantium ignauiorumque cura superstitio potius quam religio est appellanda. Lib. De Christi. relig. in Proem.

#### *Suppositio.*

Suppositio principium indemonstrabile, sermonis summula.

#### *T.*

#### *Tempus.*

Nulla iactura grauior est quam temporis. Lib. 1. Epist.

Tempus Solis motus, progressionis mensura. Tempus bonum.

Temperantia moderatio animæ circa naturales concupiscentias atque voluptates, compositio ordoque animæ ad naturales voluptates atque dolores, consonantia animæ ad imperandum & obediendum voluntaria, eorum quæ secundum naturam sunt actio rationalis animæ conuersatio quoad honesta & turpia, habitus quo decencia eligimus & seruamus.

Temperantia circa bona malaque similiter acciscendi atque metuendi. In Com. Plat.

#### *Temperans.*

Temperans qui mediocres concupiscentias habet.

Temperato viro pulchrum videtur omnia nosse, quod si fieri possit, secunda quædam, id est, tota nauigatio videtur, suam ignorantiam reco-

gnoscere, ac & rem ipsam ignoret, & ignorantium, nec dum quod ignorat tentat, aberrat, neque indocilis sit, neque superior, quod Plato in Alcibiade docet. In Com. Plat.

#### *Terra.*

Si quis quærat quam ob causam terra sit rotunda, respondet, quia videlicet rotunditatis idea participat, ad cuius similitudinem sapientia mundi idcirco terram disponit, quoniam iudicavit voluitque boni ipsius gratia fieri melius ita sese habere. Lib. 2. Theol. Plat. cap. 11.

#### *Tollerantia.*

Tollerantia perpassio molestiæ honesti gratia, perpassio laborum honesti gratia.

#### *Tyrannus.*

Tyrannus imperans ciuitati secundum sententiam propriam.

#### *V.*

#### *Vaticinium.*

Vaticinium scientia quæ dignoscitur quid adfit quidque futurum sit mortali viuenti.

#### *Ventus.*

Ventus agitatio aëris circa terram.

#### *Verecundia.*

Verecundia formido in expectatione infamiz.

#### *Veritas.*

Veritas nihil de sua causa deprecatur, quia nec de conditione miratur, scit se peregrinam in terris agere. Lib. De Christ. relig.

Veritas non modo aliud est quam mens, sed & superius aliquid. Libro primo. Theolog. Platon. cap. 2.

Latius se fundit veritatis quam mentis imperium. Lib. 1. Theol. Plat. cap. 6.

Diuina veritas omne rerum antecedit initium, omnium rerum fini succedit, nam & ante cuiusque principium, verum erat initium illud fore & post omnem cuiusque finem, verum erat finem illum fuisse, quicquid autem aliquando verum est, veritate verum est. Libro 2. Theolog. Platon. cap. 5.

Veritatis acquirendæ studio alimoniam corporis prætermittimus sæpenumero, neque tempori neque sumptibus parcimus, neque laboribus, enervamus corpus, quo enervato animus fit nervosior. Libro octauo Theolog. Platon. capite secundo.

Veritas non est corporea, alioquin rebus incorporeis non inesset. Libro 8. Theolog. Platon. capite 2.

Veritas mentis cibus est, quo fit vt se vicissim libenter adiscant. Libro 15. Theolog. Platon. cap. 14.

Quia veritas impugnatores telis inuadit, pugnat vtcunque potest, qui autem veris aggreditur rationibus reuera semper expugnat. Libro 3. Epist.

Absoluta veritas lux Dei est in seipsa. Rerum veritas est Dei splendor in ipsis. Ergo si vis veritate gaudere, ama, quære, considera Deum propter seipsum & cætera propter Deum. Libro 3. Epist.

Scito eas res dumtaxat veras existere, quam ad veritatis iudicem intelligentiam pertinent. Lib. 3. Epist.

Immensum est veritatis lumen, immensa potestas. Lib. 3. Epist.

Veritas rerum propriis vestigiis inuestigatur nonnunquam, certisque discerni potest indicis,

quoniam determinata pendet ex causa, semperque permanet eadem. Voluntas autem humana cum ob libertatem non habeat causam terminatam, ac momento quolibet permutetur, neque vestigiis, neque indicis certis inuestigatur. Lib. 6. Epist.

Veritas est lumen optimum, lumen veritas se ad extima fundens. Lib. de Lum.

Tranquillitas veritatisque scientia, diuinitatis maximè propria sunt. Libro De Voluptate.

Veritas ex redargutione falsitatis elucet. In Com. Plat.

#### *Veracitas.*

Veracitas habitus in affirmando atque negando rectus, scientia veri.

#### *Victoria.*

Victoria vis in certamine superans.

#### *Vicissitudo.*

Omnium rerum vicissitudo est. Libro primo Epist.

#### *Vinum.*

Tantum imago vini alit sitim, quantum vinum alit sitibundum. Lib. 3. Epist.

*Vir Sapiens, Felix, Prudens, Bonus, Iustus, Pius, Probus, & Præuus.*

Sapienti viro lex Deus est, insipienti libido. Lib. 18. Theol. Plat. cap. 10.

Hi sapientes habentur, qui pro viribus intentionem animi auertunt à sensibus, ad intellectum verò conuertunt, vbi diuinam legem auscultant, officia iusta dictantem. Comment. dñi Pauli cap. 15.

Virum sapientem felicemque eum puto, qui cum ex solo pendeat Deo, in mediis calamitatibus viuat lætus. Quem nec metus examinat, nec dolor excruciat, neque voluptas corrumpit, neque libido inflammat. Qui inter densissimas spinas molles speciososque flores legit, qui ex stercore margaritas eruit atque effodit, qui in profundis videt tenebris, qui compedibus grauatus & vinculis circumstrictus, veluti liber solutusque percurrit, quem denique spiritus cœlestis afflauerit. Lib. 3. Epist.

Nullus verbosus & loquax sapiens esse potest, docuit enim semper, didicit nunquam. Quisquis autem sapientiæ literis caret, non modo pauper, verum etiam cæcus & mutus iudicandus. Lib. 3. Epist.

Vir caueat ne villo modo muliebris sit. Lib. 3. Epist.

Prudentum sententia est, virum grauibz negotiis occupatum, absque graui causa non esse interpellandum.

Solum felicem sapientes existimant, cui ad votum cuncta succedunt, soli ad votum cuncta succedunt, qui omnia quæ vult habet. Ille singula vult quæ habet, id est, quæcunque velle natura, vel sortè contingunt, qui primum quidem intelligit, nullum se bonum, nolle deberet. Lib. 5. Epist.

Vir prudens corpus quidem suum mundi membrum, mundi ipsius reuolutioni concedit, quocunque contigerit agendum. Animum autem Dei filium à corporis commercio segregat, & diuinæ committit providentiæ, pro arbitrio gubernandum. Lib. 1. Epist.

Prudentis est & in sereno aëre pluuiam, & in pluuiâ expectare serenum, imò nihil in caliginosa



hac vita putare serenum, nisi sub mente serena.  
Lib. 5. Epist.

Vir iustus, & pius, & probus, nonne Deo amicus est? Inustus autem & improbus inimicus? Est profecto. Lib. 12. Epist.

Bonus vir à Platone censetur, qui in se quidem temperatus, ad Deum autem pius est, ad homines verò iustus. Animus eiusmodi, propter similitudinem Deo præ cæteris est amicus, malus autem propter dissimilitudinem inimicus. Itaque cum Deus moueat & intrinsecus, & ubique provideat, nimirum opiniones & imaginationes speciesque bonorum virorum, verè frequenter euadunt, malorum verò falsæ, vtrique gaudia quædam excogitant, optant, sperant, hæc bonis viris tanquam diuinis atque veridicis, vera sæpè contingunt, malis verò falsæ, mali enim tanquam fibimet mendaces, sicut frequenter opinione falluntur, ita falsæ sapius oblectamenta contingunt, denique si prauis tanquam à diuina veritate discordibus, succedere spes non debent, sæpè tamen in externis successum habere videntur, sequitur saltem, ut intrinsecus non succedant, semper ergo sollicitantur intus atque languent, eorumque voluptates similes sunt falsis voluptatibus ægrorantium, somniantium, insanorum. Libro 12. Epistolarum.

Prauis viris oblectationes quædam adsunt, sæpè confictæ, atque denique falsæ, falsis igitur voluptatibus prauis sæpè numero gestiunt. Lib. 12. Epist.

Vir sanæ mentis ad id imprimis pecunias esse viles iudicabit, ut quicquid vel Deo nouerit, vel homini promiserit aliterque debuerit impleat, neque ob paupertatem adducatur, aut mentiri cuiquam, aut vlla in re defraudare, pecuniæ namque referendæ sunt ad iusticiam, iustitia verò ad vitæ alterius præmium. In Commentariis Platon.

#### *Vires.*

Æquales vires æqualia faciunt. Lib. 1. Theol. Plat. cap. 3.

#### *Virtus.*

Naturalis virtus manet, quia naturalis eius vigor viget perennis, neque remittitur. Virtus acquisita mutatur, qui ex potentia in actum, ex actione transit in habitum, atque è conuerso. Lib. 1. Theol. Plat. cap. 3.

Diuina virtus pura atque summa est. Libro 2. Theol. Plat. cap. 4.

Infinita virtus nunquam minuitur. Libro 17. Theol. Plat. cap. 2.

Virtutibus præmia, vitiis supplicia digna debentur, hæc cum in hac vita non tribuantur, tribuantur in altera. Libro 2. Theolog. Platon. capite 10.

Cum virtute oritur præmium. Ibidem.

Virtus est exorians præmium. Ibidem.

Virtus adolescens inuidiam concitat, adulta sedat, liuorem domat. Lib. 1. Epist.

Virtus est habitus animi electione ad beatitudinem conferens. Lib. 1. Epist.

Humana virtutis principium finisque est, meminisse non esse humanam virtutem absque diuinæ virtutis gratia & amore. Libro sexto Epistolarum.

Obesset autem laboriosa virtutis via bonis, atque è contra prodesset voluptuosa vitæ malis, nisi animus foret immortalis. In Commentariis Plat.

Virtus militaris experientia in bello.

#### *Visus.*

Visus quia sensualis lux est, tamen sensibilem accipit datque splendorem, hunc sensualem quandam lucem esse cognoscis, ultra verò inde non licet progredi. Libro De Lumine.

Visus habitus quo corporea discernuntur.

#### *Vita.*

Vita in virtute quadam indiuisibili consistit. Lib. 1. Theol. Plat. cap. 3.

Integrior vita est quæ tota simul est vnita secum, à seipsa non distans, quàm quæ per diuersa temporum momenta porrecta secundum actus affectusque intrinsecus, quodammodo à seipsa distrahitur. Libro primo Theolog. Platon. capite 5.

Vera vita per se corporis est formatrix & reatrix, ideoque est corpore longè præstantior. Lib. 5. Theol. Plat. cap. 15.

In Vita præsentis virtus nascitur & vitium. Lib. 18. Theolog. Platon. cap. 10.

Nihil autem magis seruile, nihil magis negotiosum atque sollicitum cogitari potest quàm anxia eius vita qui sensibus tanquam dominis seruit, & pluribus & insanis. Ac dum tyrannis insipientibus mancipatur sapientiæ insuper proficitur obsequium. Quoscumque igitur corpori seruire stultè depræhenderis, sapientes esse negabis. Quos autem noueritis esse sapientes, hos non serui sui corporis seruos, sed dominos iudicabis. Anxiè certè viuunt qui solis seruiunt corporis voluptatibus, sed multò magis anxij qui voluptates infimas cum supremis frustra copulare conantur, nam cum nimium vtrique laborent neutra ex parte, vel mentis, vel corporis voluptatibus perfruuntur. Libro quinto Epist.

Tota hominum vita in hac mundi regione maligna, cælestibusque contraria mentibus, nihil aliud esse videtur quàm morbus quidam dolorque perpetuus. Libro quinto Epistolarum.

Tres esse vitas, nemo ratione viuens dubitat, contemplatiuam, actiuam voluptuosam, quoniam videlicet tres ad felicitatem vias elegerunt homines, Sapientiam potentiam, voluptatem. Nos autem sapientiæ nomine, quodlibet liberalium artium studium religiosumque officium intelligimus. Sub appellatione potentiz, auctoritatem in gubernatione ciuili pariter atque militari, diuitiarumque affluentiam & splendorem gloriæ, negotiosamque virtutem comprehendimus. Sub voluptatis denique cognomento, quinque sensuum oblectamenta, & laborum curarumque declinationem, contineri non dubitamus. Primam igitur Poëtæ Mineruam, Secundam verò Iunonem, Tertiā Venerem nominarunt. Lib. 10. Epist.

Beatam vitam esse putamus, non vitam talem aut talem, quasi additamenti alicuius egenam, sed vitam ipsam summo viuendi gradu vigentem. Vitam inquam, id est, actum essentiz primæ directum naturaliter in ipsum bonum atque ita perfectum. In Com. Plot.

#### *Vitium.*

Cum vitio oritur supplicium. Libro decimo octauo. Theolog. Platon. capite primo. Vitium est supplicium nascens. ibid.

Vitij facilitatem, mox vitæ miserabilis difficultatem.



cas sequitur, dolorque perpetuus. Hinc illud Pythagoræ symbolum, Animal cauda nigra nectas, hoc est, fugito vitium cui mentis nigredo succedit, & voluntatis afflictio. Libro tertio Epistolarum.

#### *Vlcio.*

Vlcisci cogitas? Caue moneo diligenter, nam si vlcisci tentaueris, secundam ac tertiam patieris iniuriam, ac studio perdendi alterius, ipse te perdes: apes minima iniuria lacescit pugnunt, vitamque pungendo relinquunt. Libro tertio Epistol.

#### *Unitas.*

Est vnitas secundum potentiam numerus omnis. Libro secundo. Theolog. Platon. capite decimo.

#### *Voluntas & Voluntarism.*

Quibus voluntas est eadem, nimirum inest & aqua similisque voluntas. Lib. 9. Epist.

Voluntas appetitus secundum rationem rectam affectus rationalis cum ratione secundum naturam tendens.

Voluntarium quod seipsum ducit, quod per seipsum eligendum, per cogitationem perficit.

#### *Voluptas.*

Voluptates corporis tamdiu percipiuntur quamdiu egestas & appetitio permanet. Lib. 14. Theol. Plat. cap. 7.

Voluptas spirituum esca quædam est. Lib. De Vita producenda. cap. 16.

Quod bonum est bono contrarium esse nunquam potest. Voluptas autem cum plurima, ac maxima bona impedit, bono contrariam esse quis dubitet? Impediunt enim prudentiam, voluptates menti infundunt tenebras, deprauant iudicium, suisque blanditiis, ac lenociniis quasi meretriculæ quædam mentes ad se alliciunt hominum, atque ita illaqueant omnem naturam hominis in vitiorum atque scelerum luto, cænoque prosternunt. Diuine Plato in Epistola ad Dionysium, inquit, voluptas hominibus detrimentum affert, incitiam, inquietudinem, stulticiam & petulantiam parit. Præterea nullum bonum est, quod non aut laude, aut veneratione dignum sit. Voluptates verò nemo sanæ mentis laudat, neque quisquam, quod maximis fruatur voluptatibus honore iudicatur dignum esse, & gloria. Sed potius qui talis ut eas alto atque inuictio animo aspèrnetur & negligat. Lib. De Volup.

Rectè (inquit Varro) Nemo suum dicat quod extra ipsum est. Voluptas igitur cum in corpore ac sensibus ingenera, & insita sit qui eam in bonis nostris connumerauerit, absque dubio videbitur insinire. Lib. De Volup.

Neque igitur artem, neque rationem, neque prorsus ordinem vllum sequitur voluptas, sed potius naturæ, ac sensuum repentino, & temerario quodam impetu, quàm aut certo aliquo iudicio aut consilio excitatur in nobis, blanditur sensibus, corpus suauitate quadam delinit perniciosæ, atque titillat animum effœminatum, atque è suo statu mentem rationemque dimouet. Insuper ea est bonorum natura omnium, ut futura dum sint, spem hominis erigant, cum verò adsint, tranquillum efficiant animum possidentis, ac quietum, & eo quod adest, contentum reddant, suæque expleant possessione, ut nullo vltius egeat, nihil requirar, nihil appetat, quasi id vnum possideat, quod sua sit natura sufficiens atque

perfectum, quod si quid vltra desideret boni alius cuius possessione fruitur, sollicitudine tamen ac molestia penitus vacare videtur, futura autem voluptates intolerabili quodam cupiditatis ardore sensus afficiunt, curas accendunt, animum onerant sollicitudine, & (ut breui complectar) in furorem quendam rabiemque compellunt, cum verò quiescas, quarum cupiditate exarserat, voluptates præsentis amplectitur, continuo metum vnà secum suspicionemque ducunt obsecantque nos dum fruimur, & ad ferarum redigunt immanitatem, nedum haustæ, imò (ut verius loquar) nec adhuc primis labris degustatæ incredibili quadam animi poenitentia, verecundia, & odio, languore prorsus afficiunt, ut verissimum sit illud Socratis in Phædone, dolorem ac voluptatem ex eodem capite ambo esse connexa, naturamque in vnum eorum apices coniunxisse. Lib. De Volup.

Cum bonorum atque voluptatum dissimilem inter se naturam esse perspicuum sit, nemo profecto corporis voluptatem, nisi qui nimium eius amicus existat, bonum dixerit. Libro De Voluptate.

Nemini dubium esse puto, quin illud ex quo mala plurima consequuntur, bonum esse non possit. Voluptatis autem gratia pestiferæ omnes animi perturbationes, adulteria, stupra, homicidia, furta, dissensiones, scelera denique omnia, nasci perspicuum est. Libro De Voluptate.

Cum voluptatis vsus in corporis sensibus existat qui maximè huic deditus est, non modo non ascendit ad ea quæ meliora, diuiniora que sunt, sed ne proprium quidem statum, dignitatemque retinet, ac velut ex animo ad corpus, ex mente ad sensus, ex homine ad bestias labitur. Diuine apud Platonem Socrates in Phædone, Voluptas inquit, quasi clauum tenens animum affligit, atque efficit, ut infectus corporea specie, ea putet esse vera, quæ suadeat corpus. Libro De Volup.

Voluptas à Deorum natura sequestrata est, sed quid verius aptiusque aduersus hanc pestem dici potest, quàm quod ab Hippocrate diuino profecto Viro dictum fuerat. Is enim cum de Veneris voluptate loqueretur, partem esse dixit illam morbi terribissimi, quàm nostri comitalem vocant. Lib. De Volup.

Voluptas communi definitione apud Aristotelem, nihil aliud est, nisi perfectio quædam operationis, idem autem cognitionis, Cumque omnibus sensibus voluptas inhzreat, voluptas visus erit visionis perfectio, auditus auditionis, gustus gustationis, ac de reliquis eodem modo, ut cuiusque voluptas sit propriæ operationis perfectio. Lib. de Volup.

Omnis qui ex veritatis indagatione contemplationeque suscipitur voluptas, honesta est ac laude dignissima. Cum vero mens altera de rebus agendis fugiendisque deliberat gaudetque eiusmodi rerum electione, non omnis tamen voluptas talis laudari solet. Libro de Voluptate.

Sapiens vita contemplatioque pauciorum quàm ciuilis indiget, quapropter illius voluptas, cum ipsa quoque paucis minimisque contenta sit, proculdubio magis seipsa sufficiet, ac perfectior indicabitur. Libro de Voluptate.

Delectat quemque quod naturæ suæ est aptum, trahit sua quemque voluptas. Lib. De Volup.

Cum ab hominum consuetudine ingenioque alienæ voluptates homini cupiam, vel pessimæ nato, atque educato, vel morbis extra se posito dominatur, quoniam bestiarum potius, quàm humani ingenij propriæ sint, serviles atque immanes appellat Aristoteles.

Sicut opinio, spes, formido, sic voluptas partim quidem vera, partim verò falsa esse potest. In Com. Platon.

Voluptas disciplinarum plura censeretur, quia non necessario dolorem habet admixtum. In Com. Platon.

Neque est aliud quicquam mentis Voluptas, nisi illa ipsa perfecta grataque assensio, qua voluntas in eo, quod mens considerat, utpote familiari ac sibi proprio penitus conquiescit. Lib. De Volup.

Voluptates corporis trium præcipue rerum causa concupiscimus, harum sanè vnum est mens, naturæ indigentia reliquam, postremum dolor intimus atque perpetuus. Lib. De Volup.

Voluptas corporis cum omnibus quoque uiuentibus bestiolis communis sit, nullo pacto summum hominis bonum iudicari debet. Lib. De Volup.

Voluptas pro hominum diuersitate varia, & incerta est, mentis verò vnicum ab omnibus gaudium natura expetitur. Lib. De Volup.

Adhæsiō voluntatis est voluptas. In Comment. Plat.

Vita voluptuosa seruilis, seruit enim indigentia corporali, est & aurea mixta, etenim voluptates cum doloribus habet, ut quando quis propter famem docet, sed interim propter spem mensæ statim futuræ lætatur. In Commentariis Plat.

#### Votum.

Votum precatio hominum ad Deum qua vel bona, vel quæ bona videntur efflagitant.

Votum est ardens affectus iusti animi, Deo deditus, & quod bonum videtur exoptans. In Com. Plat.

#### Vox.

Vox prolatio ex ore secundum cogitationem.

FINIS.